



6.32.0.16

LES ESTATS

EMPIRES; ROYAVMES, *ET* PRINCIPAVTEZ DV MONDE,

REPRESENTÉZ PAR L'ORDRE, NAÏFVE
ET VERITABLE DESCRIPTION DES PAYS, MOEVRS
des Peuples, Forces, Richesses, Gouvernemens, Religion, Princes, Magistrats & Sou-
verains qui ont gouverné chaque Estat, & en quelle forme depuis leur establissement
iusques aux changemens modernes d'aucuns d'eux, à l'occasion des guerres dernie-
res & vicissitudes des temps.

ILLUSTREE

PAR LA NOBLE ET CELEBRE ORIGINE DE TOVS
*les Ordres Militaires & de Cheualerie de toute la Chrestienté, tant anciens que
Modernes, leurs statuts, armes, deuisés & sous quels Empereurs, Roys &
Souverains ils ont commencé & continué dans le Christianisme iusqu'à present.*

AVEC L'INSTITVTION DE TOVTES LES RELIGIONS
compagnies regulieres, Monasteres, Conuents, Ordres, Seminaires & societés, tant de
l'un que de l'autre sexe, avec quels vœux, et. quels temps, souz quels Papes, Monar-
ques, Republicques, & Souuerainetez, elles ont commencé dans l'Eglise Catholique,
iusques aujourdhuy.

Par le sieur D. T. V. T. Gentil-homme ordinaire de la Chambre du Roy.

ET DEPVIS EXACTEMENT REVEVE, CORRIGEE ET
augmentee en ceste nouuelle edition, d'un grand nombre de tres-curieuses recherches
de tous lesdits Estats, Genealogies & Maisons Imperiales, Royales, & Souueraines y
adioustees de nouveau, sans iusques à maintenant auoir esté mises en lumiere.



A PARIS,

Chez la veufue OLIVIER DE VARENNE, rue
S. Iacques, à la Victoire.

M. DC. XXV.

AVEC PRIVILEGE DV ROY.



Goussier del.



A MONSEIGNEVR;
MONSEIGNEVR, MESSIRE HENRY
DE MESMES, CHEVALIER, SEIGNEVR D'IRVAL,
CONSEILLER DV ROY EN SES CONSEILS D'ESTAT ET
Priué, President en la Cour de Parlement de Paris, & Souuerain
Iuge & President en Chef de la Chambre de Iustice.



ONSEIGNEVR;

Pendant que vostre Grandeur equitable presse & combat l'iniustice pour l'honneur des fleurs de Lys, le seruice du Roy, le repos & le soulagement de son peuple, ceux qui se glorifient de se qualifier vos humbles seruiteurs, chargent continuellement de vœux & de suffrages les Autels du grand Dieu de Iustice, à ce qu'il rende prix & salaire eternal à tant de belles vertus & actions que vous faictes paroistre dans les charges glorieuses que tres-dignement & iudicieusement vous exercez avec louange en ceste compagnie Royale de ceste tant celebre Cour du Parlement de Paris, où de la bouche de tant d'Illustres Catons partent les oracles de verité: C'est pourquoy, MONSEIGNEVR, ne desirant autre chose que continuer mon affection à vostre seruice, & contribuer à vos gloires ce qui est de mon petit travail: i'ay creu estre de mon deuoir de vous presenter cét œuure, où i'ay remis en son lustre la Description generale de la Majesté, grandeur & magnificence qui se void aujourd'huy en tous les ESTATS, EMPIRES, ROYAVMES ET PRINCIPAVTEZ DV MONDE, que ie vous dedie humblement en vne autre forme qu'elle ne s'est veüe cy deuant: où i'ay fait voir la gloire de tout ce florissant Empire de France: releuee au dessus de l'orgueil & de l'ambition de tout ce qui se peut représenter de grand sur la terre, tant pour la Majesté tres-puissante de ses Roys, les grands Princes, l'honneur & le bras genereux de ceste grande Monarchie: comme aussi l'ordre de toutes ces Illustres testes, Nosseigneurs du Conseil, les Nestors de nostre grand Alcide, fidelles Conseillers, si fort affectionnez pour la deffence des droicts de ceste Couronne, gloire & prosperité du regne de sa Maïesté. Mais encores quand ie me suis arresté en la description de la France, à descrire la grandeur de cét admirable Parlemét, & celles de tant d'insignes & venerables personnes dont il est composé, estant tout l'ornement royal, & le lustre le plus riche & noble de ceste ville de Paris, Capitale de France, & sejour ordinaire de nos

EPISTRE.

Roy. Cette tant prudente & sage Cour que les Princes & Republiques estrange-
res ont maintefois consultez pour estre arbitres & diffinitors de leurs differents,
c'est celle qui en ses thrônes fleur-d'elisez & en ses tribunaux venerables & sacrez,
entretient en sa grandeur l'autorité Royale, ne respirans que pour le bien du
seruice du Roy, Paix, & Repos de tous les bons sujets; Cour, d'où partent les
Echos de verité, inspirez diuinement du Ciel, qui sçait religieusement mainte-
nir l'innocence & corriger l'iniustice, rendre le droit aux gens de bien & punir
les meschans. Or c'est MONSEIGNEUR, entre ces Nobles & equitables Prin-
ces de ce grand Senat, où chacun admire vostre grande prudence, la candeur de
vos sages Conseils, & la sincerité de vos equitables iugemens, dignes ornemens
de tant de belles vertus, que vous avez faict paroistre, non seulement aux char-
ges & premieres dignitez que vous avez exercees aux Offices de Magistrature
auec tant de Police & de loüanges publiques, & en ce supreme degré de fidelle
Pilote de la direction & conduite de cette grande nef Parisienne, pendant lequel
vostre grande equité recogneuë & manifestee par tout, vous a donné la séance
premiere en ceste tant celebre assemblée Generale des Estats du Royaume seant-
te à Paris, en laquelle vous avez acquis telle reputation, que peu d'annees apres
vos merites vous ont esleué à l'Auguste qualité de tres-Iuste & equitable Iuge &
President en cette Cour, où vostre grande sagesse a fait de tels progres en l'admi-
nistration d'une si bonne Iustice tant estimee du public, que le Roy Monar-
que grandement iudicieux au choix de ses bons Iuges & Officiers fidelles de son
Estat, ayant recogneu tant d'effects & de preuues signalees de vostre integrité
& loüables fidelitez, vous a honoré de ceste haute qualité & dignité de Iuge
souuerain & President en chef de la Chambre de Iustice, que sa Majesté a voulu
establir pour tirer raison des torts, iniustices & mauuaise administration de ses fi-
nances, sur les Officiers d'icelles, se confiant de cela sur la pureté de vostre con-
science & tres-equitable Iustice: sur ces considerations MONSEIGNEUR, ie
voy que ce liure, que tres-humblement ie vous presente, sera accompagné de
deux asseurs, appointez sur le respect de vostre Grandeur, sçauoir l'esperoir & la
crainte, l'un m'encourageant par la promesse de vostre bon naturel, l'autre m'in-
timidant pour ma bassesse à la presence d'un si grand homme de Iustice & d'E-
stat, exposee au public qui voudra iuger de ce dessein, & ietter les yeux sur la
qualité du present qui vous est fait, & sur la personne qui l'offre: Mais nonob-
stant ces respects, ie viuray heureux, si par cecy ie continuë faire cognoistre à tous
que j'ay des obligations infinies aux graces & faueurs particulieres, que j'ay re-
ceues de vostre bonté & bien-veillance, lesquelles me retiennent, pour demeu-
rer eternellement,

MONSEIGNEUR,

Vostre Tres-humble, Tres-obeïssant &
Tres-obligé seruiteur,

M. M. S. H.



A V A N T - P R O P O S.



EVX qui par leurs diuisions ont iugé legerement auoir deduit au vray les sciences, n'ont pas recogneu qu'ils oubloient la plus necessaire, qui se nomme la science du Monde, admirable liure du grand & Religieux saint Anthoine. C'est elle qui pousse plus que toutes autres choses les hommes aux honneurs & aux charges, qui fait florir les Maisons & les Republiques, qui rend les actions & les paroles de ceux qui la possèdent, agreables aux grands & aux petits, qui fait arriuer presque toutes choses à souhait & à propos, & qui force, par maniere de dire, la destinee. Cette science s'acquiert par la conuersation & hantise de plusieurs par diuers discours & rapports, ou de viue voix, ou par escrit, par le maniement des affaires, communication avec les estrangers, voyages en diuers lieux, veüe de diuerses humeurs de peuples, & pour le dire en un mot par la iudicieuse consideration des façons de viure des uns & des autres.

Maintenant pour venir au point, Une bonne partie de ceste science est comprise dans les Discours de ce liure, où l'on pourra voir toutes sortes de personnes & de nations viuement & naïfvement pourtraictes, & representees avec leurs façons de faire & coustumes le plus curieusement qu'il est possible: de sorte que si la perfection manque en quelques lieux, ce mal est seulement procedé du deffaut des vrais rapports & non de la diligence. Aussi l'Autheur de ce liure ne l'a iamais entrepris qu'avec un ferme dessein de se rendre agreable, comme font ordinairement les Geographes, en la Description de la terre, racontans les singularités qu'on y rencontre, mais encore s'est voulu rendre utile en s'essayant d'y marquer, non à la legere, mais en termes assez estendus, ce qui peut rendre la vie d'un homme ou plus aisee, ou plus ciuile.

Mais pource que ceste representation de Pays estoit inutile, si on eust ignoré leur qualité, il n'a voulu la retrancher non plus que le reste, & l'a adioustee avec tout ce que la terre y produit & les animaux qui naturellement y ont leur seiour & leur nourriture.

Encore pensoit-il estre peu d'auoir employé son esprit & son temple à la soigneuse recherche des choses depourueës ou de sentiment ou de raison, s'il ne vous eust faict voir l'homme qui s'estoit habitué en chaque contree, & pour qui tout ce qui s'y trouue sembloit estre faict, premierelement en sa posture ancienne & avec ses vieilles façons, ou pour la pluspart abolies: puis en sa parue moderne, ou avec plus de polissure, ou avec plus de rudesse selon les changemens du monde, afin de laisser iuger le meilleur de ces deux Estats, & de faire qu'on se peust seruir d'une piece de l'un, & d'une parcelle de l'autre.

Et d'autant que c'estoit auoir peu trauaillé pour le solide contentement des Lecteurs si on eust laissè la chose ainsi nuë, & que c'eust esté bien peu de sçauoir les actions des Peuples si l'on eust eu moyen de iuger par les commoditez que les lieux leur donnent ce qu'ils deuroient oster ou adiouster à leur façon de viure: & de cognoistre les causes pour lesquelles ils se sont laissez glisser à quelque deffaut, ou bien ont embrassé quelque chose de loüable, & si par mesme voye l'on ne venoit à sçauoir les moyës que ces peuples ont de viure en l'estat auquel ils sont nez, il a mis en suite des mœurs, les richesses, qui monstrent par leur abondance comme les hommes qui les ont se sont abandonnez aux delices, ou bien addonnez aux sciences & par leurs deffauts de quelle sorte ceux qui en manquent sont demeurez rudes & barbares, ou bien se sont addonnez aux arts & mestiers.

Oltre ce cognoissant assez qu'encore qu'un pays soit pourueu de commoditez qui suffisent ou qui regorgent, ses habitans sont subiects à en estre deslogez s'ils ne sont capables de rembarrer ceux qui voudroient entreprendre de leur rauer le bien qu'ils possèdent, pour ceste cause s'ic in-

Auant-Propos.

continent apres les richesses, celuy des forces, afin qu'on remarque le moyen que les nations ont de resister ou à l'enuie de leurs voisins, ou à la furie d'une multitude d'estrangers, venus de loing de quelque miserable pays, pour se saisir de celuy des autres.

Mais tout ce que dessus estant sans Police comme un bastiment en l'air sans aucun appuy qui le maintienne, il a rangé soudain apres le reste le Gouvernement & la conduite de la Seigneurie, dont il entreprend le discours, afin qu'ayant recogneu les humeurs de ceux qui sont sujets, on puisse iuger s'ils sont maniez selon leur naturel.

Cela fait il n'a voulu laisser la principale piece des Republiques qui est la Religion de laquelle il a discours, pour monstrier que c'est la crainte de la Divinité qui maintient les peuples en leur devoir, qui les rend obeysans à leurs Princes, & qui les destourne beaucoup plus de tous les mauvais desseins qui leur entrent dans l'esprit, que les armes & les soldats qui les environnent & menacent.

Il ne s'est pas encore voulu contenter de cecy, tant il estoit desireux de satisfaire à chacun, veu qu'il a aussi attaché comme par appentis, les noms de ceux qui ont gouverné les pays qu'il décrit.

Or à ce grand travail auquel ce grand homme a consommé quantité de veilles, apres plusieurs grâds voyages qu'il a entrepris pour la curiosité de recognoistre les singularitez des lieux & des Pays où il s'est trouvé pour accomplir un si grand dessein, ne pouuant pas voyager par tout, il croyoit se confier quelquefois à la sincerité des Auteurs qui ont escrit la mesme Histoire des pays, mais comme ils ont escrit sur memoires mal assurez, ils ont quelquefois assez raremēt gardé la fidelité que nostre Auteur croioit trouver en eux, qui est cause que la suite des temps faisant cognoistre toutes choses apres la douzième année qu'il a mis ce liure entre les mains des Libraires pour le mettre en lumiere, & qu'il fut imprimé pour la première fois, il a esté impossible pour ses occupations particulieres, de reuoir sa coppie, & y changer les choses que les escriuains de l'Histoire auoient infidellement descrites par la grande cognoissance qu'il a eüe des affaires du monde du depuis.

C'est pourquoy comme on a desiré de mettre ce mesme liure encore sous la presse pour la quatrième fois, n'ayans ouy nouvelles de son Auteur depuis la première impression, les Marchâds ayant aduis des impressions que l'on projettoit faire à Rouen, Geneue, voire à Paris, comme de vray il a esté contrefait à Geneue, considerans qu'il n'y auoit plus de suite de temps audit liure, & que les guerres qui ont esté par le monde, & spécialement en la Chrestienté ont fait charger de face à une infinité d'Estat, ils ont en l'absence de l'Auteur, fait reuoir ladite coppie par un Auteur historien de ce temps, qui avec fidelité l'a corrigee en ses deffautes, l'a reduite en forme moderne, & y a adiousté & augmenté la valeur de plus de cent feuilles de tres rares memoires, Recherches, Observations, Genealogies des Princes, Gouverneurs, Magistrats, Maisons Illustres des plus grands Seigneurs, particulièrement de France & d'Espagne, qui seruent d'ornement & d'enrichissement à cet œuvre digne du public, ainsi que l'on recognoistrà par la lecture d'iceluy, & les choses augmentees aux Estats d'Angleterre, Escosse, France, Espagne, Venise, Italie, Florence, Sauoye, Suysses, Lorraine, Empire, & sur la description des Estats du grand Seigneur, de la magnificence de son Serrail, & des pays qu'il possède en Europe, Asie, & Afrique selon les memoires du voyage tant de Monsieur de Breues qui a esté Ambassadeur de sa Majesté tres-Chrestienne à la porte du grand Seigneur, que d'autres nauigations & voyages qui se sont faits au Leuant par personnes dignes de foy.

Que le Lecteur le voye donc non avec precipitation, mais avec soin & diligence, & si quelque chose luy desagree, qu'il ne blasme pas tout un corps pour une tare, qu'il y cherche les matieres qui le peuent satisfaire, & quoy qu'il y trouue, s'il ne veut espargner les Auteurs pour leur defence, qu'il le face du moins à raison de leur dessein, A dieu.




DE L'ORDRE
DE TOVS LES ESTATS, EMPIRES, ROYAUMES
& Principautez du monde, descriptes en la premiere partie de
ceste description.

I.	D iscours de l'Estat du Roy de la grande Bretagne, comprenant l'Angleterre, l'Ecosse & l'Irlande.	fuillet 1.24. 41
II.	De l'Estat du Roy de France, de sa grandeur & magnificence.	f. 49
III.	Des Estats du Roy d'Espagne & de tous les Royaumes qui y sont comprins.	f. 139
IV.	Estat du Royaume de Naples, possedé à present par le Roy d'Espagne.	fol. 218.
V.	Estat du Royaume de Sicile.	f. 230
VI.	Estat de l'Isle de Sardaigne.	f. 238
VII.	Estat de Milan.	f. 240
VIII.	Estat des Isles d'Afrique du costé de l'Ocean Athlantique appartenantes au Roy d'Espagne.	f. 244
IX.	Des Isles de Canarie.	f. 244
X.	Des Isles du Cap Verd.	} f. 245
XI.	De l'Isle du Prince.	
XII.	De l'Isle de sainte Helene.	
XIII.	Des Isles Acores.	f. 249
XIV.	De l'Isle Mosambique.	f. 252
XV.	Estat de l'Isle & Royaume d'Ormus.	f. 253
XVI.	De l'Isle de Diu.	f. 255
XVII.	Places que les Portugais tiennent en la coste de Malabar.	f. 256
XVIII.	De la forteresse de Malaca.	f. 257
XIX.	Du pays de Cambaya.	f. 258
XX.	Des Isles Philippines.	f. 259
XXI.	De l'Isle de Goa.	f. 260
XXII.	De l'Estat du Nouveau monde.	f. 281
XXIII.	Discours de l'Italie, des Estats, Principautez & Republiques d'icelle.	fol. 331
XXIV.	Del'Estat de l'Eglise.	fol. 331
XXV.	Des Estats du grand Duc de Toscane.	fol. 414
XXVI.	Origine de la maison de Florence, & des grands Ducs de Toscane.	fol. 421
XXVII.	De l'Estat du Duc d'Urbain.	fol. 430
XXVIII.	De l'Estat du Duc de Mantoue.	fol. 433
XXIX.	Del'Estat du Duc de Modene, & Duché de Ferrare.	fol. 436
XXX.	Estat de la Republique de Luques.	fol. 441
XXXI.	De la Republique de Gennes.	fol. 445
XXXII.	Estat de la Republique de Ragouze.	fol. 454
XXXIII.	Estat de la Republique de Venise.	fol. 461
XXXIV.	Du magnifique Temple de saint Marc de Venise.	f. 465
XXXV.	De la grande place de saint Marc de Venise.	f. 468
XXXVI.	Del'Arsenal de Venise.	f. 474
XXXVII.	Des villes qui sont dans le continent d'Italie. De la ville de Bresse.	f. 479
XXXVIII.	De la ville de Verone.	f. ibid.
XXXIX.	Des villes de Bergame, Vincence & Creme.	f. ibid.
XL.	Du Friul & de ses villes.	f. 480
XLI.	De Vancienne ville & territoire d'Aquilee.	f. 481
XLII.	Du pays de l'Istrie.	f. 482
XLIII.	De la Marche de Treuise & de ses villes, de la ville de Trente.	f. 482
XLIV.	De la ville de Treuise.	f. 483
XLV.	Estat de toutes les Isles de la mer Mediterrance, Adriatique & Ionique appartenantes à la Seigneurie de Venise.	f. 485

L'Ordre des Estats.

XLV.	De l'Isle de Candie ou Crete.	f. ibid.
XLVI.	Del'Isle de Corcyre, ou Isle de Corfou.	f. 487
XLVII.	Del'Isle de Cephalonie, l'Isle de Zante.	f. 488
XLVIII.	Du Golphe de Venise & de l'erreur qu'on fait sur la cognoissance de ce Golphe.	f. ibid.
XLIX.	Des ceremonies observees en l'eslection des Ducs de Venise.	f. ibid.
L.	Des Ducs & Princes de la Republique de Venise, & ce qui s'est passé de plus remarquable pendant le gouvernement de chacun d'iceux.	f. 489.
LI.	Des Estats du Duc de Sauoye.	f. 498
LII.	Catalogue de la vie & suite des Comtes & Ducs de Sauoye, depuis l'an 1000. iusques en l'an 1624. extrait de la cronique de Sauoye.	f. 510
LIII.	Estat de la Republique de Geneue.	f. 520
LIV.	Estat de la Republique des Suysses ou des cantons des ligues des Suisses.	f. 523
LV.	De l'Assemblée faite à S. Gal entre les 4. Cantons, qui a vigueur de loy & de ligue.	f. 535
LVI.	Des ligues de Glaris, de Zug avec les Cätöns de Berne avec les trois cantons.	f. 538
LVII.	Ligue hereditaire faicte entre l'Empereur Maximilian & Charles Archiduc d'Autriche & les Suysses.	f. 539
LVIII.	De l'union des trois ligues des Grisons avec les Cantons.	f. 541
LIX.	De la paix de Berne l'an 1537.	f. 542
LX.	Memoire concernant les troubles & remuemens des Grisons.	f. 545
LXI.	Des differens entre l'Euesque de Coire & les Grisons, d'où est arriué le trouble pour la Religion.	f. 546
LXII.	Jalousie d'Espagne sur la France pour l'alliance des Suysses, extrait de l'histoire de la Paix, de Pierre Mathieu historiographe.	f. 560
LXIII.	Del'Estat du Duc de Lorraine.	f. 562
LXIV.	Des Ducs & Princes sortis de la maison de Lorraine.	f. 566
LXV.	Origine de la Maison de Guyse.	f. 567
LXVI.	Princes & Princesses de la maison de Guyse.	f. ibid.
LXVII.	Del'Estat des 17. Prouinces des Pays Bas que tient le Roy d'Espagne sous le Gouvernement d'Isabelle Claire Eugenie Infante Archiduchesse de Flandres tante.	f. 571
LXVIII.	Des Seigneurs & Comtes de Flandres.	f. 582
LXIX.	Estats Generaux des Prouinces vnies des Pays Bas.	f. 587
LXX.	Des Comtes de Hollande & Zelande & Seigneurs de Frise.	f. 596
LXXI.	Del'Estat de l'Empire d'Allemagne.	f. 623
LXXII.	Description des Empereurs d'Occident commençant à Iule Cæsar, & finissant à Ferdinand II. à present regnant.	f. 651
LXXIII.	Diuisiön des cercles d'Allemagne.	f. 676
LXXIV.	Du Royaume d'Hongrie.	f. 682
LXXV.	Del'Estat du Roy de Pologne.	f. 695
LXXVI.	Del'Estat du Roy de Dannemarch.	f. 718
LXXVII.	Del'Estat du Roy de Suede.	f. 732



ORDRE DE TOVS LES ESTATS, EMPIRES, ROYAV-
mes & Principantez du Monde descrits en la seconde partie de ceste description.

I.	D ES Estats du Turc en Europe.	f. 1
II.	De Thrace où Romanie ou est bastie Constantinople.	f. 4
III.	De la ville de Constantinople, de sa prise & grandeur.	f. 5. & 6
IV.	Description generale du Serrail du grand Seigneur.	f. 14
V.	De la personne du grand Seigneur.	f. 18
VI.	Mœurs anciennes & Modernes des Thraces & nouveaux Turcs.	f. 31
VII.	De la moderne de Grece & de son antiquité.	f. 32
VIII.	De l'ancienne & celebre ville d'Athenes.	f. 40
IX.	Du Gouvernement ancien & moderne des Lacedemoniens.	f. 57
X.	Des Isles del' Archipelago qui appartiennent au Turc & de ce qu'il possède en Es- clauonie.	f. 64
XI.	Del'Isle de Cypre ou de Chypre.	f. 71
XII.	Del'Isle de Rhodes.	f. 76
XIII.	Des Isles du Propontide appellées des Modernes de Marmora.	f. 77
XIV.	De la Bosnie, la Bulgarie, Seruie, Rascie, & ce que le Turc possède en Hôgrie.	f. 79
XV.	Des Terres & Estats que le Turc possède en Asie.	f. 80
XVI.	Du Royaume de Hierusalem.	f. 85
XVII.	Genealogie des Roys de Hierusalem & de Cypre, & principalement des Roys de la maison de Lusignan.	f. 87
XVIII.	Catalogue des Patriarches Latins de Hierusalem.	f. 91
XIX.	De l'Arabie & des mœurs des Arabes.	f. 94
XX.	De la Natolie.	f. 100
XXI.	De la Palestine.	f. 101
XXII.	Des Estats du Turc en Afrique.	f. 105
XXIII.	Des Royaumes d'Alger, de Tunes, & Tremisen en Barbarie & Mauritanie.	f. 105
XXIV.	Description moderne de la Barbarie, Tunis & Alger, selon les Memoires des voya- ges du Leuât de Monsieur de Breues Ambassadeur de sa Majesté Tres-Chre- tienne au Levant.	f. 109
XXV.	Description de l'Egypte & de la Troglodite sa voisine.	f. 113
XXVI.	Estat de l'Egypte depuis le vray Empire Romain.	f. 129
XXVII.	Discours des Turcs en General.	f. 134
XXVIII.	Des Empereurs de Constantinople tant Chrestiens que Turcs, depuis que l'Em- pire d'Occidēt fut separé de celuy d'Orient & dōné à Charlemagne	f. 144
XXIX.	Del'Estat de l'Empire du grand Sophy de Perse.	f. 151
XXX.	Reuelation des plus notables Prouinces & qui ont plus longuement duré souz la Seigneurie de Perse.	f. 154
XXXI.	Discours des Roys de Perse selon les Autheurs Grecs & Latins qui en ont escrit.	f. 166
XXXII.	Cronique des Roys de Perse, selon la sainte Bible.	f. 168
XXXIII.	Autre Cronique abregee selon les autres Autheurs Grecs & Latins.	f. 169
XXXIV.	Des Roys de Perse Mahometans.	f. 185
XXXV.	De la Lignee des Sophians de Perse.	f. 190
XXXVI.	Monarques de Perse.	f. 193
XXXVII.	Annales des Roys de Perse selon les mesmes Autheurs Persans.	f. 195
XXXVIII.	Origine de Scachismael sophy & de ceux qui sont descendus de luy & ont com- mandé à la Perse iusques à present.	f. 271
XXXIX.	Discours de l'Estat du grand Duc, ou Empereur de Moscouie.	f. 277
XL.	Discours de l'Empire du Grand Cham de Tartari.	f. 290
XLI.	Discours de l'Estat du Roy de la Chine.	f. 362
XLII.	Genealogie des Roys de la Chine.	f. 329
XLIII.	Discours du Roy du Iappon.	f. 331
XLIV.	Discours de l'Estat du Roy de Brame, ou de Pegu.	f. 337

L'Ordre des Estats.


XLVI.	Discours du Grand Mogor.	f. 344
XLVII.	Discours du Roy de Calicut.	f. 343
XLVIII.	Discours du Roy de Narlingue.	f. 334
XLIX.	Discours de l'Empire du Prete-jam.	f. 361
L.	Discours du Royaume de Monomotapa.	f. 374
LI.	Discours du Royaume de Congo.	f. 376
LII.	Estat de l'Empire & Empereur de Marroc.	f. 389
LIII.	De l'Estat des Cheualiers de Malte, & de l'Isle de Malte.	f. 1
LIV.	Estat des Grands Maistres de Malte qui ont commandé iusques à present.	f. 18
LV.	Origine des Ordres militaires tant reguliers que seculiers.	f. 35
LVI.	Origine de toutes les Religions qui iusques à present ont esté au monde.	f. 60





T A B L E

DES ORDRES MILITAIRES TANT REGVLIERs que Seculiers.

1.	 NSTITVTION des Cheualiers de l'Ordre de la sainte Ampoule de l'Eglise de S. Remy de Reims en France.	36
2.	L'ordre des Cheualiers de S. Maurice & de saint Lazare entre les Sauoyards.	36
3.	L'ordre des Cheualiers du chien & du coc en France.	37
4.	L'ordre des Cheualiers de la Genette en France.	37
5.	L'ordre des Cheualiers du lys au Royaume de Navarre.	38
6.	L'ordre des Cheualiers de saint Jean de Hierusalem dictz aujourdhuy de Malte.	38
7.	L'ordre des Cheualiers nommez Templiers.	39
8.	L'ordre des Cheualiers Teutoniques de l'Hospital de sainte Marie en Hierusalem, ou autrement les portes Croix, ou Marianes.	39
9.	L'ordre des Cheualiers de saint d'Accon, & de saint Thomas.	40
10.	L'ordre des Cheualiers de saint Sauueur en Arragon.	40
11.	L'ordre des Cheualiers de Môt-joye en Syrie qu'on appelle en Castille de Monthac & en Catalogne de Mantgoia.	41
12.	L'ordre des Cheualiers de Porte-glaue ou gensdarmes de Christ en Liouonie.	41
13.	L'ordre des Cheualiers de S. Iacques en Espagne.	41
14.	L'ordre des Gensdarmes de Iesus Christ institué par S. Dominique contre les Albigeois heretiques.	42
15.	L'ordre des Cheualiers d'Alcantara au Royaume de Leon en Espagne.	43
16.	L'ordre des Cheualiers de la glorieuse Vierge Marie en Italie.	43
17.	L'ordre des Cheualiers de Montese au Royaume de Valence.	43
18.	L'ordre des Cheualiers de I. Christ en Portugal.	43
19.	L'ordre des Cheualiers de la Baudé & de la Scama, entre les Espagnols & de la Galsa entre les Venitiés.	44
20.	L'ordre des Cheualiers Amisiens, vulgairement appelez des aduis en Portugal.	44
21.	L'ordre des Cheualiers de la Table.	44
22.	L'ordre des Cheualiers de la jartiere en Hierusalem.	45
23.	L'ordre des Cheualiers du bain en Angleterre.	45
24.	L'ordre des Cheualiers de l'Estoile en France.	46
25.	L'ordre des Cheualiers de l'Annonciade de Sannoie.	45
26.	L'ordre des Cheualiers de la Toison d'Or chez les Bourguignons & ceux de la maison d'Autriche.	47
27.	Ordre des Cheualiers du Porc-espic en la maison d'Orléans.	47
28.	Ordre des Cheualiers du Cordon de la Vierge Marie en la maison de Bourbon.	48
29.	L'ordre de saint André du Cordon & de la rue, au Royaume d'Escoffe.	48
30.	L'ordre des Cheualiers de sainte Marie, & de l'Elephant.	49
31.	L'Ordre des Cheualiers de Cypre.	
32.	L'ordre des Cheualiers de la volonté & de la raison en Castille.	49
33.	L'ordre du Dragon entre les Allemans & les Hongrois, de Tulin en Boheme & des Disciples en Autriche.	49
34.	L'ordre Militaire au Royaume de Suede.	50
35.	L'ordre des Cheualiers du Glaue & du Baudrier en Suede.	50.
36.	L'orde des Cheualiers de l'Espic en Bretagne.	50.
37.	L'ordre des Cheualiers du Croissant entre les Argeuins & Siciliens.	51
38.	L'ordre des Cheualiers de la Navire ou de la coquille.	51
39.	Ordre de S. Michel en France.	51
40.	L'ordre des Cheualiers de saint George de Corinthie.	52
41.	L'ordre de la Croix de Bourgongne au Royaume de Tunis.	52
42.	L'ordre des Cheualiers de saint Estienne en Toscane.	52
43.	L'ordre des Cheualiers du saint Esprit en France.	53
44.	L'ordre des Cheualiers du sacré sang de nostre Seigneur Iesus - Christ, en la ville de Mantoué.	53.
45.	L'ordre des Cheualiers de nostre Dame du Mont - Carmel, & de saint Lazare en France.	53.
46.	L'ordre de la Cordeliere ou du Cordon institué par Anne de Bretagne Roynie de France.	54.
47.	Des Cheualiers instituez par les Papes.	54
48.	Les Cheualiers de Iesus Christ.	}
49.	Les Cheualiers du saint Esprit.	
50.	Les Cheualiers de saint Pierre.	
51.	Les Cheualiers de saint Paul.	
52.	Les Cheualiers de saint George.	
53.	Les Cheualiers de Lorette.	
54.	Des Cheualiers de S. Anthoine.	
55.	Les Cheualiers de Iubina.	
56.	Les Cheualiers du Lys.	
57.	Cheualiers du saint Esprit en Saxe.	
58.	Del'ordre des Cheualiers de la Milice Chrestienne instituee par le Duc de Nevers.	54

Fin de la Table des Ordres Militaires.

TABLE DE L'ORIGINE DE TOUTES LES RELIGIONS
qui ont esté au monde iusques à present.

1. De la Religion d'Henoc en la loy de nature.	61	Fefole.	83
2. De la Religion d'Abraham.	61	42. Ordre de la congregation de S. Gregoire.	83
3. De la Religion des Nazareens en la loy de Moyse.	62	43. Ordre de la congregation de S. Iustine.	83
4. De l'ordre d'Helie le Prophete qui est l'ordre des Carmes.	61	44. Des freres de S. Ambroise.	84
5. De la Religion d'Helisee.	61	45. Des Moines Hermites de S. Hierosme.	84
6. De la Religion de Judith.	61	46. De l'ordre des Sabbotiers institué par S. Barnardin.	85
7. De l'ordre des Rechabites.	61	47. De l'ordre des Minimes.	85
8. De la Religion & ordre des Scabbes.	61	48. De la congregation des Amedoes ou amis de Dieu.	85
9. Religion d'Holda Prophetesse.	61	49. Ordre des Apostolins ou Barnabites.	86
10. La religion des Pharisiens entre les Iuifs.	62	50. De l'ordre des Capucins.	86
11. Ordre des Saduceens.		51. Des ordres de l'observance de saint Augustin.	87
12. Ordre des Essiens.	62	52. Premier ordre d'icelle observance, congregation de Lucette.	87
13. Religions de nostre Sauveur I. C. au monde.	93	53. Seconde congregation de la mesme: celle de la Charbonniere.	87
1. Institution du Sacerdoce de la loy nouvelle.	63	54. Troisième congregation Perusine.	87
2. Des Clercs de l'Eglise instituez par S. Pierre.	63	55. 5. de l'ordre des Baptistes.	87
3. Des Chanoines reguliers de Latran & de la Frisonnaye.	64	56. 4. l'Ordre de Sainte Marie de Mont-orton.	87
4. Des Chanoines de S. Marc de Mantoue.	64	57. 6. l'ordre de la congregation des Hermites, appelée Pouilloise.	88
5. De la religion de solitaire de S. Paul 1. Hermite.	65	58. 7. De l'ordre de S. Augustin de Dalmatie.	88
6. De la religion de S. Anthoine Hermite.	65	59. 8. De l'ordre de Zumpame.	88
7. Religion de S. Hilariion & autres congregations d'Hermites & Religieux de la Thebaide d'Egypte.	66	60. 9. De l'ordre de saint Paul premier Hermite.	88
8. Des Cenobites.	66	61. Congregation de saint Paul premier Hermite en Hongrie.	88
9. Des Anacorettes, leur auteur, est Paul de Thebes.	66	62. L'ordre de sainte Brigide.	89
10. Du Monastere de Laute basti par Cariton.	67	63. De l'ordre de Premonitre.	89
11. Ordre de S. Basile.	67	64. Religion de Font-aueillant.	90
12. Ordre de l'Abbé Pacome.	68	65. Congregation des Hermites appellez de Madame de Gonslagues.	90
13. Abbaye de S. Symphorian, & ses Religieux.	68	66. L'ordre des dix vertus ou plaisirs de la Vierge, dit de l'Annonciade, institué par la Roynie Jeanne, Epouse du Roy Louys 12.	91
14. Monastere de S. Martin de Tours.	68	67. Ordre des bons hommes de la reigle de saint Augustin en Angleterre.	93
15. Religion de saint Hierosme.	69	68. Congregation de la vie commune.	93
16. Religion de saint Augustin.	69	69. Congregation des pieds nus en Espagne.	93
17. Ordre de saint Benoist.	70	70. Congregation du Saint Esprit à Venise.	94
18. Ordre de la congregation de Camalduly.	71	71. Ordre de nostre Dame de la Mercy de la Redemption des captifs d'entre les mains des Turcs.	94
19. De l'ordre de Grand-mont.	72	72. Ordre de la tres sainte Trinite aussi pour la Redemption des mesmes captifs.	94
20. De l'ordre des Hospitaliers de saint Anthoine.	72	73. L'ordre du saint Esprit en Saxe & Reine.	94
21. De l'ordre du Val d'Ombre.	72	74. Congregation des Prestres qui recueillent les orphelins.	95
22. De l'ordre de S. Bruno & des Chartreux.	72	75. Congregation des Prestres Reguliers de saint Paul.	96
23. De l'ordre de Cisteraux & de Clemen.	73	76. Ordre des Prestres reguliers Theaux.	96
24. De l'ordre des humiliez.	74	77. Ordre des Iesuites.	97
25. De l'ordre des Carmes.	74	78. Congregation des Peres de l'Oratoire.	98
26. De l'ordre sacré & reformé de Cisteraux, appelé l'ordre des Fucillants.	75	79. Du conuant des Vrelans.	98
27. Des Religieuses de sainte Therese.	77	80. Ordre du bien-heureux Jean de Dieu ou des freres de l'Hospital de la charité.	100
28. Ordre de sainte Croix.	77	Nombre des Hospitaux de la Charité.	101
29. De l'ordre de saint Dominique.	78	81. Ordre des Religieux de la vision au pays du Pretejan.	101
30. De l'ordre du Val des Escoliers.	78		
31. De l'ordre de saint François d'Assise.	78		
32. Ordre des Religieux de la penitence de Iesus fondé par saint Louys.	79		
33. De l'ordre des seruiteurs de la Vierge.	79		
34. De l'ordre des Celestins.	80		
35. De l'ordre de la religion du mont d'Olivet.	80		
36. De l'ordre de Iesuistes de saint Hierosme.	81		
37. Des Chanoines reguliers de saint Sauveur.	81		
38. Ordre de saint Pierre de Pise.	81		
39. L'ordre de la congregation de saint Hierosme de			

Fin de la Table de toutes les Religions.



DISCOVRS DES ESTATS DV ROY DE LA GRANDE BRETAGNE.

DE L'ANGLETERRE.

SOMMAIRE.

DE S noms anciens, d'Albion & de Bretagne; jadis donnez à l'Angleterre, de leur source & etymologie, & des peuples Saxons qui l'ont possedee.

2. De la forme de cette Isle de la grande Bretagne, semblable à la Sicile, sa situation; son estendue, & ses limites.

3. Sa fertilité, son temperament, & les qualitez de son air, sujette à la contagion de 4. en quatre ans.

4. Ennemie des bestes veneneuses, les loups n'y peuuent viure.

5. Des fleuves & riuieres d'Angleterre. & singulierement de la Tamise, dont les eaux ne desbordent iamais pour quelque sorte de pluye qu'il face: des cheuaux nommez Guildins, la pluspart hongres, fort bien dressés, & du nombre infiny des oyseaux & volatiles qui y sont.

6. Domages que les oyseaux font aux bleds en Angleterre, & le remede qu'y apportent les laboureurs: de la bonté du poisson d'Angleterre, du Turbot, & du Brochet excellents.

7. Des perles abonlantes en cette Isle, du temps de Cesar, & le la broderie du corselet de perles qu'il consacra à Venus, des minieres d'or, d'argente, plomb estaing, cuiure, & fer.

8. De la pierre nommée Gagete, qui nourrit le feu en l'eau, a vertu de faire uriner pulverisee en eau.

9. De la monnoye de fer & d'airain des vieux Anglois, & de leur superstition aux viandes.

10. Des femmes communes iadis en Angleterre, & de leurs ordres aux armées.

11. Civilite & subtilite d'esprit, & autres bonnes qualitez des Anglois modernes, & de leurs exercices.

12. Humeur des Anglois altiere & impetueuse, encline au larcin, à la carnacite, & à l'yurongnerie.

13. Richesses grandes des particuliers procedans du trafic des laines, de l'estaing de Cornuaille, & du haran d'Yorch.

14. De Londres, ville Metropolitaine d'Angleterre, habitee de trois cens cinquante mille ames.

15. Trafic d'Angleterre estime à douze millions d'or par an.

16. Finances & reuenus du Roy d'Angleterre.

17. Reuenue ordinaire de la Couronne d'Angleterre.

18. Subsidies extraordinaires de deux sortes en Angleterre.

19. Despence de la bouche de la Cour du Roy d'Angleterre à combien se monte par an.

20. Tribut impose sur les personnes qui veulent viure catholiquement en Angleterre.

21. Forte assiette de l'Isle d'Angleterre, & le grand nombre de ses vaisseaux de mer.

21. Anglois fort experts à la marine, leur trafic es Prouinces loing-taines, tant du Levant que d'Occident.

23. Nombre des gens de guerre qu'on peut lever en Angleterre.

24. Armee d'Angleterre en quel ordre passa au siege de Bologne du regne de Henry 8.

25. Noblesse Angloise, & des Cheualiers de diuerses especes en Angleterre, & les ceremonies de leur creation.

26. Ordre des Cheualiers de la Jarriere par qui institué.

27. Des offices Royaux d'Angleterre, & des Milords.

28. Des Estats d'Angleterre, & tenue des Parlemens du Royaume, de leur grande puissance, des officiers & ceremonies en l'assemblée d'iceux.

29. Trois sortes de iugemens en Angleterre.

30. Des Sieges Royaux, & supplices ordinaires, & de la punition des traistres.

31. De la Cour de Westmoutier, & la Chaire estoilée quand establee.

32. De la Cour de l'Eglise appelée la Cour

de Chrestienté, & sa iurisdiction en quatre sortes de causes.

33. Criminels condamnez à estre pendus, sont estranglez par la main de leurs propres parens.

34. Religion Chrestienne quand & par qui establee & introduite en Angleterre.

35. Diuorce du Roy Henry huitiesme d'avec Catherine d'Arragon, & lequel espouse Anne de Boulen qu'on croyoit estre sa fille.

36. Se declare estre Chef de l'Eglise Anglicane, au lieu du Pape, & fait emprisonner Thomas Maurus.

37. Monasteres & Religion Romaine quand abolis en Angleterre.

38. Couronnement de la Royne Elizabeth, celebré avec ceremonies catholiques.

39. Constitutions Ecclesiastiques dressées par le Roy Iacques sixiesme, monstrant l'Estat moderne de l'Eglise Anglicane.

40. Catalogue des Roys d'Angleterre.

41. Alliances des Roys d'Angleterre avec les Roys & Princes estrangers.

42. Archeueschez & Eueschez qui estoient anciennement en Angleterre.



LE soing & le trauail des plus celebres Cosmographes & Geographes Anciens & Modernes a tousiours esté au dessein de faire voir au vray la Mappemonde des Estats & Republiques du monde, d'euiter le desordre facile à se glisser en la notice des Pais, pour la diuersité grande des Royaumes & Prouinces regies & commandees de puissances souveraines, grandement inégales & differentes, mais se sont tousiours estudiez d'y establir vn ordre asseuré & de facile conduite à la connoissance des choses qui nous sont plus voisines & Estats voisins : à celles qui nous sont presque du tout incogneues dans l'esloignement des Prouinces & loingtaines Republiques de la terre, & que de la description particuliere de la grandeur & puissance, que Dieu Autheur de la nature, a distribué aux grandeurs souveraines estables de luy sur les diuerses nations de la terre, chacun iuge du pouuoir que claque Prince & chaque Republique a de se maintenir en la iouissance de ce qu'il luy appartient, & que l'on voye la distinction diuerse de la situation des pais, leur voisinage, leur forces, richesses & pouuoirs, selon qu'ils se maintiennent aujourd'huy en accord ou discord, paix ou guerre les vns avec les autres. C'est pourquoy, pour y tenir vn ordre plus aisé, selon la pratique de la vraye Geographie : & voulans descrire tout l'Estat de chaque Prince ou Republique en quelque pais ou partie de la terre, où se peut estendre le pouuoir & la domination d'icelle, faut prendre le commencement à l'Angleterre, comme Estat premier, qui donne entree large aux Empires, Royaumes, Estats, & Souuerainetez de l'Europe. Cét Estat qui comprend aujourd'huy les Estats de trois Royaumes, Angleterre, Escosse, & Irlande, porte le nom General de l'Isle de la grande Bretagne, dont le principal & plus noble, voire le plus puissant est celui d'Angleterre, duquel l'antiquité des aages & des siecles, ont tousiours fait estat & estime pour la renommee de ses Princes & de ses habtans.

I. Le pourrois paroistre vain, ou bien me rendre ennuyeux, si ie voulbis rapporter icy le long debat des noms anciens de cette Isle, puis qu'il semble qu'on doit plustost attendre de mon dessein la consideration des choses que des paroles. Toutesfoi l'importune curiosité de ceux qui les pourroient demander à cette entree, me conuiera seulement à dire, que

selon les fabuleux recits des Grecs elle porta premierement le nom de certain Albion, fils imaginé de Neptune; ou bien, selon les Latins, elle fut ainsi nommée pour les rochers blanchissans qu'on y apperceuoit autour du riuage, elle reçut après le nom de Bretagne de ce mot *Brit* signifiant coloré en Anglois, pour ce que les habitans de cette Isle auoient accoustumé de peindre leurs corps, & depuis elle changea ce nom en celui d'Enghelland, c'est à dire terre des Anglois, à cause des Anglois Saxons qui la possederent.

Cecy doit suffire à ceux qui veulent contenter vn peu leur esprit, ou complaire à la paresse qui les tient d'en faire ailleurs la recherche. Or afin de venir au point, l'Isle de la grande Bretagne est presque semblable à la Sicile, ayant trois poincts, ou caps qui s'estendent en diuerses sortes. Le premier qui regarde le Couchant est celui de Bellerie, ou d'Antouest, nommé des Anglois *The Cap of Cornwall*, c'est à dire Cap de Cornouaille. Le second est celui de Cantie, qui a son regard du costé du Leuant, auioird'huy nommé *Norrfoland*, de qui toute la contree de cette Isle, qui s'estend vers l'Orient, a pris le nom de Cant, ou de Kent, selon le vulgaire. Le troisieme est celui d'Orcas, de Taruedce, ou de Taruise du costé du Nord, nommé par les vns *Dunghumbhead*, ou *Dunsbihead*, & par quelques autres *Houburne*. Cette Isle est assise vers la partie Occidentale de l'Europe à quinze degrez de l'Equateur, & est opposée du Couchant à l'Isle d'Irlande, du Leuant aux riuages de la basse Allemagne, du costé du Nord aux Isles Orkades, ou Orknes, & du Midy à la France.

Quant à son estenduë les Anglois qui l'ont plus curieusement considerée la mesurent en cette sorte. Ils comptent du Cap de Taruise iusques à celui de Bellerie, pource que le chemin va serpentant à cause des riuages courbez, à le prendre du Couchant, huit cents douze milles. De ce lieu iusques à Kent trois cents vingts milles. De là par des destours & recoings on compte iusques à Taruis 704. milles. Tellement que le tour de toute l'Isle contient environ mille huit cents trente-cinq milles. Mais pource que c'est peu de cognoistre l'estenduë de quelque pays si l'on ne sçait sa bonté, ie desire auant de m'engager en d'autres discours, considerer ce que cette Isle fournit à ses habitans, & par meisme moyen ce dont elle manque.

QUALITE' DV PAYS.

L'AIR de cette Isle est grossier, les broüillards, les pluyes, & les vents s'y assemblent. L'aysement, & l'espaissieur de cet air est cause que le froid & le chaud n'y sont iamais excessifs. Les nuicts y sont claires, & les maladies rares, tellement qu'on y vse moins de medecines qu'en tous les autres endroicts de l'Europe. Toutesfois il y vient de temps en tēps, & selon quelques-vns, de quatre en quatre ans vne peste qui emmeine beaucoup de monde. Le terroir y rapporte tellement en beaucoup de lieux, que celui qui dist le Panegyric à Constantin, l'a loué d'une fertilité merueilleuse. Il produit toute sorte d'arbres de tout temps, fors que le Sapin, & comme dit Cesar, le Faux: mais auioird'huy l'on y trouue de ces derniers arbres en grand nombre. Il manque toutesfois d'Oliuiers, d'Orengers & autres arbres, qui naissent ordinairement en des regions plus chaudes. Les ceps de vigne y sont plustost pour parade que pour aucun profit que leurs maistres en retirent, veu qu'encore qu'ils produisent quelques raisins, il aduient fort rarement qu'ils meurissent comme il seroit necessaire. On y sème du froment, du seigle, de l'orge, de l'auoine, & de toute sorte de legume. Les bleds y naissent tost & meurissent tard, à cause de l'humeur abondante de l'air, & de la terre. Il y a plusieurs collines sans arbres, & sans eau, qui produisent de l'herbe fort espaisse, & menuë, suffisante pour la nourriture des troupeaux de moutons qu'on y meine paistre, qui ou pour la douceur de l'air, ou pour la bonté de la terre, ont la laine plus longue, & plus delicate qu'aucune qu'on voye.

Or on tient que les bergers d'Angleterre empeschent que leurs troupeaux aillent boire aux fontaines: tellement qu'ils ne sont abreueuez que de rosee, pour ce qu'ils ont cogneu par vne longue experience que les autres eaues leur estoient nuisibles, & mesme les faisoient mourir. Et veritablement on peut bien nommer cette laine la Toison d'or, veu que c'est le fondement de la richesse des habitans, qui tirent grande quantité d'or & d'argent des marchands qui les vont trouuer pour en faire emploie. Et c'est de cette laine qu'on fait des draps si fins, & si beaux, que les Allemans, les Polonois, ceux de Dannemark, de Suede, & de plusieurs autres pays en font grāde estime & les acheptēt plus volōtiers qu'aucuns autres. Il se trouue en Angleterre grand nombre de toute sorte d'animaux, au moins de ceux que nous auons ordinairement en ces contrees, excepté que les asnes, & mulets y manquent.

Elle ne souffre aucune beste venimeuse, & nuyfible, & mesme elle a cette particularité 4.

qu'il ne s'y trouue plus de loups, pource que les habitans ont esté si industrieux, ou si pe-
nibles, qu'ils en ont nettoyé tout le pays, où ces bestes auoient autresfois, ainsi qu'on dict,
esté veuës.

Cela faict que le bestail va de tous costez en liberté, sans qu'aucun le garde, pource qu'on
est affranchy de ceste crainte, & l'on y voit de jour & de nuict grande quantité de cheuaux,
de bœufs, & mesmes de brebis par les prairies, & autres possessions, qui sont communes à
tous les voisins, lors qu'on a paracheué la récolte. Le pays, comme i'ay desia dict, ne pro-
duit pas du vin, mais en recompense ils se seruent de biere faicte d'orge, & de houblon,
qui est agreable, & mesme vtile à ceux qui en vsent. Il y a de belles riuieres qui abbreu-
uent tout le pays, & l'on rapporte vne chose merueilleuse, mais veritable, que la Tamise,
l'Ombre, & quelques autres riuieres ne croissent iamais pour pluye qu'il face.

5 Les cheuaux de ce pays que nous nommons Guildins, qui sont pour la plus grande part
hongres, afin qu'ils durent plus long temps, estans au descouuert à la pasture, ne trottent
pas, mais vont vn certain amble avec lequel ils auancent merueilleusement : pour le moins
on voit fort peu souuent le contraire. Il s'y trouue aussi plus de conils qu'en pays du mode.
Les Anglois ont vn nombre infiny d'oyseaux tant priuez que sauages. Les chapons de
Kent sont fort grands, comme ceux de Poluerare au terroir de Padouie, ou ceux du Mans,
ou de S. Geniez. Les oysons y sont fort delicats auant qu'ils ayent mué : mais estans de-
uenus grands ils ne sont pas d'vn goust beaucoup agreable. Il y a quantité de perdrix,
faizans, cailles, merles, griues, & alloüettes, & mesme l'alloüette s'y engraisse estrangement
durant l'hyuer, qui n'est pas aspre, & lors il s'en prend vn si grand nombre, que toutes les
tables en sont presque couuertes. Il y a des cygnes par tous les lacs, & toutes les riuieres,
& l'on y oyt crier tous les iours de grand matin, les corbeaux & les corneilles.

9 Et beaucoup de personnes tiennent pour chose asseurée, qu'il ne se trouue en pays du
monde tant de corneilles qu'en Angleterre. Et ces oyseaux se nourrissent des vers qui nais-
sent en ceste Isle en grande abondance, à cause de l'humidité de la terre. Mais ils portent
beaucoup de dommage, pour ce que non seulement ils mangent les bleds, lors qu'ils sont
meurs, mais encore ils tirent la semence de la terre avec le bec, lors que les bleds commen-
cent à paroistre : de sorte qu'il faut que les laboureurs mettent en ce temps-là des garçons
par les champs avec des arcs pour les chasser, à cause que les seuls cris ne les mettent pas en
fuite. Et pour ce que ces oyseaux sont si dommageables, & si fascheux, il fut arresté au
conseil des Seigneurs, qu'on chercheroit tous les moyens de les faire perdre, donnant quel-
que recompence à ceux qui les tueroient.

Les Anglois ont de fort bons poissons, & entre autres le turbot, & le brochet. Et quant
au brochet qui n'estoit pas autrefois gardé, il est maintenant fort estimé, pour ce qu'estant
hors des estangs, & mis dans des reservoirs, il s'engraisse au possible en mangeant le menu
poisson, & les anguilles. Puis lors qu'on le met en vente on l'ouure avec vn couteau, & si
par fortune le peïscheur ne le peut vendre, il ne meurt pas toutesfois pour cette ouuerture,
mais en le coulant, & le mettant dans le reservoir parmy les ranches, la playe est bien tost
fermée, pour la gluante matiere de ce poisson. Les huïstres y sont plus delicates qu'en tout
autre lieu du monde, & en plus grande abondance.

7 Outre ce que dessus cette Isle produit de l'or, de l'argent, du plomb, de l'estain, & du
cuyure. Il y naist encor quelque peu de fer, & l'on y trouue quelques perles : & Suetone
mesme a remarqué en la vie de Cesar, que l'esperance de trouuer des perles en l'Isle de la
grande Bretagne, luy en fit entreprendre le voyage, & qu'elles y estoient de telle sorte qu'il
pouuoit discerner la difference de leurs poids avec la main. Mais à present il ne s'y en treuve
plus que quelques-vnes petites, & iaunastres en la coste d'Escoce, & des Orcades, qui ne
paroissent guere mieux que des yeux de merlan. Aussi Pline dict, que les perles que produire
l'Angleterre sont menues, & de mauuais lustre : neantmoins que Cesar voulut qu'on sceust
que la broderie du corselet qu'il offrit à la statue de Venus en estoit faicte.

8 Ce pays a aussi des fontaines de sel, & des fontaines chaudes, & vne pierre nommée Ga-
gate, qui semble rude & vile, & toutesfois est de grande vertu, veu qu'elle nourrit le feu en
l'eau, tellement qu'il ne peut estre esteint qu'avec de l'huyle. Et si quelqu'un a beu de l'eau
avec quelques pieces de cette pierre mises en poudre, incontinent il faut qu'il face de l'eau,
& ne peut tenir son vrine : & mesme ceste poudre est bonne à faire ietter du sable. Nous
auons dit iusqu'icy les commoditez de l'Angleterre, il reste maintenant de dire en peu de pa-
roles ses incommoditez, & ce dont elle manque, & qu'elle emprunte des autres, ou pour ses
necessitez, ou pour ses delices. Il faut donc compter specialement entre les choses qu'elle
reçoit, les especeries, les sucres, & toutes sortes de fruiçts, qui luy viennent de France, &
d'Espagne, les vins, les huyles, & le houblon necessaire à faire la biere, les draps d'or, & de
soye,

De la grande Bretagne.

5

soye, la plus grande partie des toiles, & de toutes sortes de marchandises, outre les pastels, la cochenille, & semblables choses nécessaires à la teinture: Et ce pays a vne grande incommodité, qui est que de quatre en quatre ans il y a vne si étrange peste qu'elle emporte vn grand nombre de personnes. Or apres auoir discoursu de la qualite du pays, voyons celles des personnes qui l'habitent.

MOEVRS DES ANCIENS ANGLOIS.

Les habitans de la Grande Bretagne vsoient anciennement de certaines pieces d'airain, ou d'anneaux, selon quelques vns, ou selon les autres de lames de fer iusqu'à certain poids pour leur monnoye. Ils n'estimoient pas qu'il fust loisible de manger d'un lievre, d'une poule, ou d'une oye, & toutefois ils en nourrissoient pour leur plaisir. Ceux de Kent estoient les plus civilisez d'entr'eux & n'estoient guiere differens des Gaulois en façons de faire. Il y en auoit fort peu qui semassent du bled, & pour ce ils viuoient de lait, & de chair. Ils estoient couverts de quelques peaux, & se teignoient avec du pastel, pour estre plus espouventables au combat, & mesme les femmes en quelques solemnitez & ceremonies alloient toutes nuës, & teintes de ceste herbe. Ils portoient les cheveux longs, & tout le corps raz, horsmis la teste, & le dessus des leures, où ils entretenoient tousiours des moustaches.

Ils estoient quelques fois dix, ou douze, qui auoient leurs femmes communes, suivant en cela la forme de la republique de Platon, renouvellee en nostre aage parmy les Anabaptistes.

Mais ceux qui auoient principalement les femmes communes entr'eux, c'estoient les freres avec les freres, & les enfans avec les peres, & lors que ces femmes enfantoient, on tenoit pour vrais peres de tels enfans ceux qui auoient eu la premiere fleur de ces femmes. Ils vsoient de chariots en leurs barailles, & auoient accoustumé de les faire rouler avec grande vîtesse, en lançant leurs dards, tellement qu'ils rompoient bien souuent les rangs des ennemis par la terreur de leurs chevaux, & par le bruit des roues: & lors qu'ils estoient meslez parmy les troupes des gens de cheval, ils mettoient soudain pied à terre, & combattoient en ceste sorte. Cependant les chariots se retiroient vn peu hors de la meslee; mais rangez en telle façon, que si leurs maistres estoient pressez par leurs ennemis, ils pouuoient promptement gagner leurs chariots, & faire retraite. Aupres Strabon les trouue barbares, pour ce qu'ayans grande quantité de lait, ils n'en sçauoient, pour la plus grande part, faire du fromage. Ils nommoient villes les forests entourees de fosses, où ils se pouuoient garantir des courses, & soudaines inuasions de leurs ennemis. Tacite escrit que les Anglois auoient accoustumé d'auoir des femmes pour leurs chefs d'armee; & selon Dion de Nicee, ils ne labouroient iamais leurs terres, & ne viuoient que de leur chasse, & des fruiets des arbres, ne mangeant aucun poisson, bien qu'ils en eussent de fort bons, & en abondance. Ils supportoient aisément la faim, le froid, & toute sorte d'incommoditez & de peines. Car estans plongez dans les marets iusques à la teste, ils n'enduroient la faim durant plusieurs iours, & estoient nourris dans les forests, d'escorces & racines d'arbres. Ils imprimoient sur le corps des enfans diuerses figures, qui venoient à croistre avec eux. Ils estoient extremement adonnez à la magie, voire en telle sorte, qu'on les estimoit plus sçauants en ce meschant art, ou du moins autant, que les peuples qui auoient acquis la reputation d'en cognoistre les plus secrets, & profonds mysteres. Tandis qu'ils voyageoient sur la mer, ils ne mangeoient chose du monde: ce qu'ils pouuoient faire aisément, pource que leurs voyages estoient courts, & qu'ils n'auoient aucune sorte de trafic avec les nations estrangeres. Ils vsoient d'un breuage composé d'orge, comme ils font encor en nostre siecle. Il y auroit beaucoup d'autres choses à dire sur ce sujet. Mais c'est assez de considerer les principales des siecles passez, pour venir aux façons de faire des Anglois de nostre aage.

MOEVRS DE CE TEMPS.

MAINTENANT les Anglois sont polis, & civilisez, & la barbarie, où rudesse n'y est pas si grande que beaucoup de gens s'imaginent, Pour le moins c'est chose asseurée que les gentils hommes Anglois sont pleins de gentillesse, & de courtoisie, & que ceux des autres nations n'emportent guere d'auantage sur eux en ces parties; combien que la vanité des vnes ou des autres les pippe, & les flate en telle sorte, qu'elles se persuadent, qu'on ne peut rien trouuer de poly, ny bien aduenant en toute chose que chez elles. L'aduouie bien que les hommes de basse qualité y sont plus barbares qu'ailleurs, mais quant à ceux-cy leur condition les excuse, & pour les rendre d'autre humeur, il leur falloit vne autre naissance.

Au reste les esprits des Anglois sont esueillez, prompts, & subtils, capables de tous arts, & toutes sciences, & leurs corps ont aussi cette particularité, qu'ils sont merueilleusement souples, & propres à tous essays de disposition, & d'adresse, & à toute sorte d'exercices. Les personnes de qualité ont la façon belle, & agreable, & la douceur meslée avec la gravité, mille fois plus seante que la légèreté de plusieurs, à qui quelques-vns donnent le nom de gentillesse, ou de naïveté sans contrainte. Et pour dire vray, ie ne voy pas que leurs actions soient forcées, veu qu'ils semblent avoir receu cette grace de la nature, & non pas l'avoir acquise par artifice. Ils se plaisent à festiner les estrangers, & n'espargnent aucune chose pour leur faire bonne chere, avec autant de franchise que de magnificence. Et c'est vne chose remarquable qu'il est permis à tout estranger d'aller manger chez le Maire de Londres, qui est obligé de tenir maison ouverte. Ils sont parfaicts archers, & courageux à la guerre. Mais on iuge que la plus grande partie de cette nation se porte plustost dans les dangers par vn furieux mouvement de sa nature, que par vne resolution pleine de cognoissance du hazard, & qui parte de la vraye vaillance. Quoy que s'en soit, ils semblent ignorer la crainte, & la fuite, & n'avoir autre dessein que de vaincre, & lors qu'il y a vn bon nombre de cette nation dans vne armee, elle n'est pas mal assortie, & n'est besoin que de la sçavoir sagement conduire. Toutesfois ils ne supportent pas aisément les incommoditez de la guerre, & sont pleins d'impatience, & desirieux de venir aussi tost aux mains avec l'ennemi, & de le vaincre, ou de se perdre. Ceux qui s'addonnent aux lettres, y réussissent si heureusement, qu'on a veu tousiours en Angleterre, quelque illustre personnage, qui s'est rendu remarquable par vne parfaite acquisition de plusieurs sciences. Quant à leurs habits, il y a long temps qu'ils ont trouué la façon de ceux des François si propre, & si gentille, qu'aussi tost qu'il y en a quelque nouvelle, les Anglois la transportent en leur pays, & la suivent, sans l'avoir toutesfois entiere, & du tout semblable, ou pour l'insuffisance de leurs tailleurs, ou peut estre pource qu'ils fuyent d'estre estimez sans inuention, & d'emprunter cette gentillesse, & propriété, ou pour mieux dire, bizarrerie des autres.

Et veritablement on peut tirer en partie quelque preuve de ce que j'ay dit, de l'humeur des Anglois, qui est altiere, & rogue au possible, voire en telle sorte qu'ils ne doiuent rien à l'Espagnol de ce costé-là, & tiennent qu'ils surpassent le reste du monde en toutes choses. 12 Aussi apres avoir excepté quelques-vns, qui sont bien nez, & nourris, vous trouuerez que le naturel de tous les autres est extremement fier, & leurs façons de viure insupportables à ceux qui ont quelque sentiment & courage.

Au surplus cette nation est tellement nee au larcin, qu'ainsi que vous estes plus attentifs à la conseruation de ce que vous auez au lieu où il y a des Anglois, ils vous font cognoistre en vous tirant tousiours insensiblement quelque plume, que vous ne sçauriez vous garantir de leurs ruses, & qu'ils sont plus habiles à vous enleuer quelque chose, que vous n'estes à les empescher de le faire. Et ce desir d'avoir de l'argent à quelque prix que ce soit, les fait bien passer si auant, que les soldats venus de bas lieu, pour avoir vn seul teston de leur compagnon, qu'ils ne peuuent abuser, d'autant qu'il sçait aussi les tours de Villon, luy couperont bien souuent la gorge s'ils peuuent, cōme on peut voir aux armées, où cette nation se trouue. Et pour le regard de leur pays, il se trouue vn grand nombre de voleurs, qui se rueroient à tous propos sur les estrangers, ou passans mal accompagnez, pour leur oster la bourse, & la vie, n'estoit l'ordre qu'on a mis de faire assembler les villages, si tost qu'on se plaint d'un vol, ainsi que la *Hermidad* s'assemble en Espagne.

Les villes ne sont pas exemptes de cette maniere de gens, de sorte qu'on y doit soigneusement prendre garde à tous, veu qu'incontinent qu'une chose est tant soit peu esgarée, elle se trouue aussi tost perdue, & si l'on y marche de nuit mal accompagné, on est en danger de ne voir iamais plus le iour, ou de ne voir plus ce qu'on porte. Mais ces gens n'ayans pas sur la terre assez de moyen d'effectuer leurs mauuais desseins, se mettent sur la mer, & escument de tous costez ce qu'ils peuuent: tellement qu'on n'oyt que des plaintes des vaisseaux Anglois, qui rauissent tout ce qui n'est pas capable de leur faire resistance. Ils ont encor ce defect qu'ils aiment le vin à outrance, & en boient au delà de ce qui leur peut suffire. Et lors qu'ils ont fait quelque excez à boire, ils se seruent du Tabac, qui leur fait vider vne partie de ce qui leur charge la teste, & les allege en peu de temps; si bien qu'ils peuuent reprendre le verre comme auparauant & se remettre à la desbauche. Et non seulement les hommes pratiquent ceste dissolution; mais c'est encor chose certaine qu'ils sont bien aises que les femmes, qui doiuent estre plus modestes, vivent de mesme: veu qu'on oblige les maris, lors qu'on conuie leurs femmes à aller boire du vin au cabaret: & c'est leur faire hōneur, que de les rendre de modestes dissoluës, & de sages, desnuées non seulement de prudence, mais de raison, & hors d'elles-mesmes. C'est ce qu'on peut, ce me semble, remarquer plus particulie-

culierement touchant leurs façons de faire & leurs humeurs qui sont meslées de bien, & de mal, comme celles de toutes les autres nations du monde.

Mais pource que ce n'est pas assez qu'un Royaume soit accompagné de toutes les qualitez que nous auons cy deuant escrites, & qu'on en ait cognoissance, veu qu'il faut aussi qu'on sçache de quelle sorte il s'en sert, & qu'il sçait faire son profit, il sera fort à propos de discourir maintenant de sa richesse. Car encores qu'elle soit vn instrument de desbauche, & vn acheminement à la noblesse, toutefois elle est tenuë pour vn nerf si assuré des Republiques, qu'on peut dire aujourd'huy qu'une prouince manque de mouuement, & de vigueur, lors qu'elle est desnuée de ceste partie. P'entreray donc sur le discours du profit des particuliers, & par mesme moyen ie feray voir ce que le Roy d'Angleterre peut tirer de son Estat

RICHESSES D'ANGLETERRE.

Aujourd'huy que l'Angleterre, l'Ecosse, & l'Irlande sont sujtees à vn seul Prince, combien que l'Ecosse ait esté adiouste à l'aduenement du present Roy, toutefois quant à la richesse, i'estime avec ceux qui sont bien informez du fait, que le reuenu d'Ecosse est vn neant & si peu considerable, que beaucoup de Principautez, qui ne portent pas le nom de Royaume, portent plus de commoditez à ceux qui les possèdent. Puis donc qu'il ne faut 13 faire guiere d'estat d'autre chose que de l'Angleterre, la richesse des particuliers procede premierement de la vente des laines du pays, dont on fait des draps si fins & si beaux, que les Allemans, les Polonois, ceux de Danemark, de Suede, & de plusieurs autres pays en font grande estime, & les achèptent plus volontiers qu'aucuns autres. Et l'on tient pour chose assurée, que les estrangers tirent des laines, ou des draps d'Angleterre pour pres d'un million & demy d'or toutes les années. Dauantage ils vendent vne grande quantité d'estain, qui vient au pays de Cornouaille, extrêmement fin, & presque esgal en beauté à l'argent. Et de cét estain ou du plomb, les Anglois peuuent tirer enuiron 4. ou 5. 1000. escus, toutes les années. Outre ce ils tirent vn grand profit du haranc, qui se prend aupres d'Yorc, qu'ils enuoyent en beaucoup de contrees de l'Europe.

Ils tirent aussi beaucoup d'argent de leur biere, dont ceux des pays bas font grand estat, 14 comme aussi de leurs cuirs, & de leur charbon. La ville de Londres Metropolitaine du Royaume, & demeure des Roys, qui comprend avec ses faubourgs, & l'Osmeistrie enuiron trois cens cinquante mille ames, est heureusement assise au riuage de la Tamise, où il y a grand abord de nauires de trois iusques à quatre cents tonneaux, estants audez du flux, & reflux de la mer encores qu'il y ait plus de soixante milles de la mer iusques à la ville. On estime qu'aux deux compagnies d'auanturiers, qui sont ceux qui peuuent spécialement enuoyer de la marchandise de Flandres en Angleterre, & de là en Flandres, de Stapoliers, qui ont la permission de tirer des laines, il y en a plusieurs riches de cinquante, ou soixante mille liures d'estrelins, tous, ou la plus grande partie en argent comptant, qui selon le cours ordinaire valent plus de deux cent mille escus d'or, outre vne infinité d'autres de diuerses compagnies, comme marchands d'estaing, d'épiceries, & autres choses, appelez grossiers, & ce qui semblera incroyable, c'est qu'il y a des marchands de poisson salé extraordinairement riches de ces sommes, ou mesme de plus grandes. Et quant à tout le Royaume d'Angleterre, Guicciardin a creu que le trafic de l'Angleterre, auant les bouleuersemens de la Flandre, se montoit à douze millions d'or toutes les années. Voila ce qui se peut dire de la richesse du peuple. Nous parlerons maintenant des finances, & reuenus du Roy, qui sont necessaires pour maintenir vn Estat, veu que l'on a veu combien l'incommodité des Princes malaisez, & grands despensiers ou donneurs, ou bien qui auoient peu de reuenu, leur a porté de dommage.

Pour venir donc au point, ie dis qu'auant que les Roys fussent maistres absolus de l'Angleterre, leurs reuenus estoient limitez, & ce qui plaisoit aux Parlements estoit seulement exercice. Mais les Parlements, qui sont les Estats, ont relasché de leur premiere puissance, de sorte qu'ils s'assemblent aujourd'huy plus pour authoriser, & colorer la volonté des Roys, que pour les regler, & toute l'autorité est maintenant entre les mains du Conseil priué du Roy, qui decide toutes les matieres d'importance.

Or auant que Henry 8. se separast de l'Eglise Romaine, c'est chose assurée que l'ordinaire 15 du reuenu de la Couronne d'Angleterre montoit enuiron à cinq cens mille escus toutes les années, qui estoient tirez de la tutelle des pupils, iusques à l'an 22. de leur aage: car tous ceux, entre les biens desquels il se trouue quelque membre, pour petit qu'il soit, qui soit affecté en quelque sorte à la Couronne d'Angleterre, demeurent durant leur bas aage sous la tutelle du Roy, qui se contentant de leur donner vn foible & petit entretien, tire

tout le reste de leur reuenu, iusques à tant que les pupils ayent atteint la 22. année, & lors qu'ils y sont arriuez, ils payent au Roy certaine somme pour r'entrer en leurs heritages. Dauantage, il faut mettre en ligne de compte les mariages, non seulement des pupils, mais aussi de tous ceux qui recognoissent la Couronne pour quelque bien qu'ils ont, encores qu'ils soient majeurs, qui est encor vne coustume speciale de ce Royaume, & de celui d'Escoffe, veu qu'il n'y a aucun de ceux qui ont ceste sorte de biens, qui estant en estat de se marier le puisse faire, s'il n'a premierement accordé, & composé avec le Roy maistre des mariages, de tout ce qui le peut toucher pour regard de la dot: mais encores les Roys ont accoustumé, touchant cecy, d'vser de beaucoup de graces. On tiroit au commencement de ceste sorte de reuenu, plus de dix, ou douze mille liures estrelins, mais maintenant à cause des biens Ecclesiastiques vnus au laiz, les reuenus des particuliers estants d'autant plus accreuz, nonobstant toutes graces, on en tire plus de trente mille liures. Outre, il y a vne sorte de reuenu que l'on appelle la liurée des reuenus, c'est à sçauoir d'une année, que payent nommément ceux qui recognoissent tenir quelques biens de la Couronne, lors qu'ils paruiennent à quelque succession de biens francs, & il y en a encores vn autre qu'ils nomment Reluffe, qui consiste en la recognoissance des fiefs, qui sont en si grand nombre, & tant de sortes, que ceux-là seulement que l'on appelle Militaires, surpassent le nombre de soixante mille, avec plus grand & moindre profit du Roy, selon l'importance, & qualité des fiefs, & ces reuenus sont comptez pour extraordinaires, eu esgard aux ordinaires, qui sont le domaine de la Couronne, appelé la vieille rente, avec le reuenu de soixante mille liures, auquel est vny à present celui du Duc de l'Enclastre, qui rend trente mille liures. Mais quand on aura oisté diuerses assignations qu'on donne sur ceste nature de deniers, ceste rente sera de beaucoup diminuée. Sur tout il y a le reuenu de la gabelle, appelée la Coustume, qui est seulement de ce qui entre au Royaume, & de ce qui en sort, & tous payent ceste gabelle indifferemment, tant les estrangers, que les habitans du pays: mais les estrangers sont chargez en quelques choses quatre fois autant que les Anglois, & en quelques autres sans aucune proportion.

Ce reuenu rendroit beaucoup au Roy, eu esgard au grand abord des choses qui entrent en Angleterre, & en sortent, s'il estoit manié par des gabelleurs particuliers, tels que ceux des autres Princes: mais d'autant que le Prince le leue, la plus grande partie s'en va en presens, & en brigandages, veu que de deux cents mille & dauantage de liures qu'on dit qu'il rend ordinairement toutes les années, il n'en reste presque à la Couronne la quatriesme partie, & tout le reste est consumé en despenses, ou demeure entre les mains des officiers qui en ont la charge. Voila les reuenus plus importants de la Couronne, qui estoient anciennement, & qui sont encores, outre lesquels il y a le profit qui se tire des mines de fer, de plomb, & d'estaing, & principalement de celle d'estaing, n'y ayant presque aucune partie de l'Isle qui n'y soit sujete, à cause que la terre est toute pleine de mines: mais sur tout le pays de Cornuaille, où l'on en tire ordinairement, en abonde au possible, & du plus fin qui se trouue.

- 16 Il y auoit aussi, & y a encores le reuenu des Eueschez, & des Abbayes qui vaquent, & quand les Abbayes, qui sont en nombre infiny, n'estoient comme elles sont à ceste heure, cela estoit de grande importance, & la nomination des Abbayes, de mesme que les Eueschez, appartient aux Roys, qui s'accommodent des fructs, plus, ou moins longuement, selon l'importance des pieces qui vaquent en differend d'y pouruoir. Le Roy a la confiscation des biens des rebelles, outre les amendes pecuniaires qu'il tire de plusieurs Sieges, mais principalement celui qui se nomme la Straquerrabe. On ne fait payer aux nobles Ecclesiastiques insolents, & aux officiers publics pour des larcins, & autres excez qu'ils commettent, outre ceux qui sont conuaincus de felonnie. Et tous ces reuenus tant ordinaires, qu'extraordinaires montoient, comme on disoit, au temps de la separation de l'Eglise Romaine, à la somme de cent cinquante mille liures estrelins, qui sont six cents mille escus. Ceux-cy avec l'vsurpation des biens Ecclesiastiques, tant des Cheualiers de Rhodes, qu'autres, faite par le Roy Henry VIII. furent redoublez, encores qu'à dessein il y procedast avec beaucoup de nonchalance, taschant de faire que toute chose s'accommodast au milieu de ce desordre. Depuis ce temps-là les Roys d'Angleterre tirent les decimes de tous les biens d'Eglise, suiuant l'ordonnance de Henry, & les Annates aussi leur sont acquises, & pource la Cour de l'augmentation fut ordonnée, comme aussi celle des premices, & des decimes, & tous ces reuenus se montent à plus de huit cents mille escus. De sorte que tout ce reuenu ordinaire est d'environ vn million trois cents mille, & tant d'escus. Il y a de plus, les subsides extraordinaires qui sont de deux sortes, veu que quelque fois on les tire en commun du Royaume, & pour cet effect on assemble les Parlements, qui sont les Estats, où l'on resout ce qui est
- nécessaire,

nécessaire, & la façon de laquelle on doit proceder : & par fois aussi le Roy demande aux particuliers vn subside, qu'ils nomment Bienueüillance, & lors vn chacun s'efforce de ne paroistre pas de peu d'amitié enuers son Prince.

A ces voyes de tirer de l'argent, on en adioute vn autre de nostre temps, qui est la cinquiésme, ou vne semblable partie, que la Couronne tire des Corsaires & de ceux qui ont permission d'aller escumer sur les mers de ceux qui n'ont aucune alliance avec les Anglois, chose que les Roys de Tunes faisoient anciennement, & qui est encore pratiquée par le Viceroy d'Algier, qui donne retraicte aux Corsaires, à condition qu'ils luy feront part de leur butin, & de leurs esclaves. Or il n'y a personne qui doute que lors qu'il n'y a point de guerre au Royaume, d'autant qu'il n'a ordinairement besoin pour sa seureté d'aucune des despences qui sont plus importantes, comme de l'entretien de la caualerie, & infanterie, ny de prouision d'armee, pource qu'il est assuré de luy-mesme : il n'y a dis-je, personne qui doute qu'il ne soit suffisant non seulement de pourueoir à la conseruation de la grandeur, & dignité du Roy, mais de satisfaire abondamment à toutes ses volonte, pource qu'en ostant la despence de la garde du Roy de trois cens Archers, & de cinquante Gentils-hommes seruants, les vns & les autres avec vingt cinq liures d'estat l'annee, & des cinquante pensionnaires à cinquante liures (c'est à sçauoir estrelins) par an, & estant la reparation des ports, & de ce peu de vaisseaux qui sont en estre, les canons, le renouvellement d'armes, & de toutes sortes de munitions, de mesme que la reparation des maisons du Roy, dont il y a grand nombre par le Royaume, outre l'entretien des Iuges, & autres gens gagés, & officiers publics, toutes despences veritablement ordinaires, & nécessaires à la conseruation d'un Royaume, en ostant, dis-je, tout cecy, qui n'est pas de grande importance, le reste s'en va avec beaucoup de superfluité, & de desordre, aux necessitez de la chambre, de la table, de l'escurie, des armes, de la chappelle, de la garderobe, & autres offices, ie dis avec beaucoup de superfluité, pource qu'il n'y a nation qui despence plus, que l'Angloise, tant à viure, qu'aux autres choses ordinaires, & le Roy entretient fort grand nombre de gens, avec vne infinité de distinctions de degrez, & d'offices. Tellement que du temps de la feuë Royne Elizabeth, la seule despense de la Cour, pour rapporter sans plus ceste particularité, à cause que les autres de plus grande importance sont comprises en celle du manger, & au boire : la seule despense de la Cour, dis-je, pour le regard de la bouche, se montoit à soixante mille liures estrelins l'annee, qui sont environ deux cens cinquante mille escus. Et toutesfois ce n'est pas la quatriésme partie de la despense qui se faisoit au temps des Roys Henry, & Edouard, predecesseurs de la Royne, qui auoit retranché beaucoup de superfluitez, & mesme osté beaucoup de tables.

Les reuenus de la Couronne viennent doncques de ces chefs, & se despensent par ces voyes : si bien qu'il ne reste aux necessitez extraordinaires, ou de guerre, ou de debtes, ou d'autres occurrences publiques, que les moyens extraordinaires, qui seroient plus profitables au Prince, s'il vouloit introduire vne partie des charges pratiquées aux autres Prouinces, & rendüs ordinaires. Mais la liberte du Royaume est merueilleuse pour ce regard, & il n'y en a aucun qui soit auourd'huy moins chargé. Il y a seulement vn poinct à adiouter, qui est que le Roy d'Angleterre fait payer certain tribut, tant en Irlande, qu'en Angleterre, à ceux qui veulent viure Catholiquement, & à la Romaine, sans toutesfois qu'il leur soit permis d'en faire aucun exercice. Et pour le regard de ce tribut, le Roy en tire vne partie, & donne l'autre à quelques-vns de sa Cour, qui estans assignez pour toute leur vie sur quelques Catholiques, font pache avec eux de quelque somme qui leur est donnée pour vne seule fois.

Ce Royaume n'a donc point d'autre reuenue extraordinaire, que les subsides, qui sont resolus par l'interuention des Parlements, qui sont les Estats, au temps des necessitez publiques : en quoy les estrangers trempent aussi bien que les Anglois, mais ceux-cy sont payez avec vne grande commodité, veu qu'on donne tousiours deux termes au payement, & cela se paye selon l'estime de ce qu'un chacun possède, estant obligé de donner plus ou moins de gros pour liure, suiuant le besoin, & selon que le Prince est plus, ou moins pressé, ou qu'il presse ses subjects. Mais les estimations sont raisonnables, non seulement eu esgard à ce que chacun possède, mais encore à ce qui se pratique aux autres lieux. Toutesfois ce n'est pas si peu de chose qu'on en tire ordinairement vn million d'or. Nous auons assez parlé des richesses tant des particuliers que de la Couronne. Et combien qu'elles soient les nerfs de la guerre, toutesfois on a besoin d'estre fortifié d'autre chose, pour faire vne bonne & viue resistance. A raison dequoy nous viendrons maintenant à parler des forces que peut auoir ce Royaume.

21 **L'**ANGLETERRE est mieux assise qu'aucun autre Royaume, pour la forteresse, veu qu'elle a par excellence les deux proprieté qu'Aristote recherche en l'assiette d'une ville: l'une est, que les ennemis n'y peuvent entrer que fort difficilement: l'autre est, qu'elle a ses yssues fort aysees pour toute sorte d'entreprises. Car la mer d'Irlande qu'elle a du costé du Ponant, est si basse, & pleine d'escueils & de dangers, qu'on n'y peut aller dessus avec de grands vaisseaux: & la mer Britannique qu'elle a du costé du Midy, a son flux & reflux, avec creüe, & decroissement de douze à quinze pas de hauteur ordinaire, avec une si grande vehemence, que c'est chose espouventable. Tellement que pour aborder aux ports, on a besoin du flux, & d'un vent fauorable: mais beaucoup plus du flux que du vent, & la coste de l'Isle est de tous costez aspre, fors qu'en peu de lieux, qui sont bien fortifiez, comme Vauric, Douure, Dorcestre, Zotnes Dertmons, Pliment, Plemut, Milfort, Briste. Ce qui fait qu'on peut estimer que toute l'Isle n'est presque autre chose qu'une grande forteresse.

Ceste Isle n'a iamais esté prise, ny par guerre, ny par forces estrangeres, & tous ceux qui ont attenté de la surprendre par armées nauales, y ont tres-mal faict leurs affaires, & s'en sont tousiours retournez assez mal contents: vn seul exemple de cecy passé en nos iours fera cognoistre combien l'Angleterre est de difficile accès,

En l'année 1588. l'Espagne mit sus une tres-grande & horrible armée nauale pour conquerir l'Angleterre, on l'appelloit l'Inuincible, d'un appareil admirable, & tel qu'il se peut recognoistre par la description qui en fut imprimée à Lisbonne, & depuis traduite en François, Allemand & Italien. Cette armée estoit composée de cent trente vaisseaux, de cent vingt-neuf hommes de marque, embarquez à leurs despens, avec 456. seruiteurs bien equippez, de 226. Seigneurs, Gentils-hommes, Capitaines, Enseignes, Lieutenans & autres principaux membres des Compagnies, avec 163. seruiteurs, de 30. Regiments ayans 172. Enseignes, & vingt mille combattans, entre lesquels il y auoit plusieurs appointez pour estre de cheual, suiuant les apprests que l'on en auoit fait és vaisseaux du Prince de Parme, lequel faisoit cōduire plusieurs harnachemens pour accommoder les cheuaux que l'on pretendoit trouuer en Angleterre.

Chaque vaisseau & chaque Regiment auoit son visiteur, son fourier, son Thresorier, son Commissaire des Prouisions, son Chirurgien.

Les Officiers de Iustice estoient, d'un Auditeur General, avec un Lieutenant, d'un Alguazil de Roy, avec son Lieutenant, de quatre autres Alguazils, quatre Secretaires, six Huissiers, un Geolier.

Le Maistre de Camp Alphonse de Cepede estoit assisté de vingt Gentils-hommes pour pouruoir sur mer & sur terre aux difficultez qui se presentent, avec deux Ingenieurs.

Le grand Maistre de l'artillerie auoit ses Lieutenans, de 59. Maistres Canonniers, avec un General des Chariots preparez pour la terre, & un general de tous les instruments de fer pour l'equipage, entretenement & conduite de l'armée, un Commissaire des mulets, avec vingt-deux conducteurs.

En l'hospital des malades il y auoit un General administrateur, son Lieutenant, 5. Medecins, 5. Chirurgiens, 5. coadiuteurs, 4. bandeurs de playes, un Reuisiteur, un grand Maistre, soixante-deux seruiteurs.

Il y auoit des Religieux à proportion de ce grand nombre, 8. Obseruantins de Castille, 20. Obseruantins de Portugal, 29. Cordeliers de Castille, 10. Cordeliers de Portugal, 9. Augustins de Castille, 4. Augustins de Portugal, six Cordeliers de Portugal de l'Ordre nommé Del Pagna, 12. Carmes de Castille, 9. Carmes de Portugal, 8. Cordeliers du troisieme Ordre de S. François en Portugal, 12. Iacobins. 15. Iesuites de Castille, 8. Iesuites de Portugal, de sorte qu'outre le nombre des combattans il y en auoit pres de dix mille qui ne s'approchoient ny pour donner, ny pour receuoir.

Une armée pour grande qu'elle soit & bien conduite, si elle n'a des prouisions & munitions à l'aduenant, est tousiours suiue de blasme, de honte & de regret. Le Roy d'Espagne n'ayant entrepris ce grand dessein sans l'auoir bien digeré, y employe des prouisions si grandes, que les Chefs ne deuoient craindre que par ce manquement l'armée se deust estonner ny effrayer.

Il y auoit quinze mil quintaux de biscuit, quatorze mil 170. pipes de vin. 6500. quintaux de lard, 3433. quintaux de fromages, 8000. quintaux de poisson sec de toutes sortes, du Riz pour fournir trois quintaux à chaque vaisseau pour six mois, six mille trois cens & vingt fanegues de febues & pois, vnze mil 398. arrotoas ou mesure d'huile, vingt & trois mil huit cens & septante arrotoas de vinaigre, onze mil huit cens 51. pipes d'eau douce.

Outre

Outre les viures, les vstensilles estoient en grande quantité & de toutes sortes, plats, gobelets, entonnoirs & vaisseaux de bois, chandeliers, lanternes, lampes, falots, & chandelles de cire & suif, plaques de plomb & seaux de vaches pour boucher les trous des navires, sacs de cuir, de trillis & canevas, cercles pour pipes & tonneaux, huit mille seillots de cuiure, cinq mille paires de souliers communs, onze mil paires de souliers cordez, cordes, cloux, chevaux, charrettes, rouages, moulins, chables, aiz & tout ce qui appartient à l'atelage, ou par eau, ou par terre, de 12. grosses pieces d'artillerie & 12. de campagne; avec les sacs de peau de veau pour la pouldre & leurs boulets.

Les armées de reserve estoient de 7000. harquebuses, & ils fournirent 1000. mousquets, dix mil lances 1000. pertuisanes & halebardes 6000. picques, plus des pics, pales & instrumens necessaires pour 700. pionniers.

En ce nombre, estat & equipage l'armée partit du port de Lisborne, sous la conduite du Duc de Medina Sidonia, assisté de 22. Seigneurs d'autorité, de conseil & d'experience, avec 14. pages & 10. ieunes Gentils-hommes ou Cheualiers, de seruiteurs vn grand nombre.

A peine fut-elle demarée, que tirant vers le port de Grongnes en Gallice, la tourmente s'éleva si furieusement, qu'elle fut contrainte de prendre terre & d'attendre la bonasse; ayant perdu à ce heurt trois galeres de Portugal, & plusieurs tellement escartees & brisees, qu'elles demurerent inutiles pour ce voyage.

L'orage appaisé, & l'inconstance du temps assurée, environ le 21. Juillet 1588. Le General de l'armée fit donner voile si heureusement, qu'en moins de cinq iours il desconvrit la pointe de Cornuaille, & au mesme temps fut descouvert le port de Pleumont, par l'Admiral d'Angleterre & le Drach Vice-admiral, lesquels luy firent tourner visage, en l'escarmouchant de si pres, qu'il y eut du desordre à se retirer & vn gallion perdu, où l'on trouva vne parties des finances de l'armée, & les memoires de l'ordre que le Duc de Medina avoit à suivre, ayant conquesté l'Angleterre.

Elle gagna la coste de Calais, où elle devoit joindre le Duc de Parme, mais l'armée Angloise qui la vouloit empescher, la suivit & la pressa de si pres, qu'elle fut contrainte de quitter ce rendez-vous en confusion, leur Galleasse generale s'embarassant parmy les autres vaisseaux fut emportée d'une courante sur le sable & pres le port de Calais, & demoura avec l'artillerie au pouvoir du Gouverneur de Calais. Les autres vaisseaux furent rudement canonnez & escartez par les efforts de l'artillerie Angloise: de sorte qu'en ces escarmouches l'armée en fut diminuée de douze & de plus de cinq mil hommes.

Comme elle print le haut du costé du Nord vers Norduegue, tirant vers Escosse & Irlande, ceste mer du Septentrion ayant desia la saison advancée pour ses tempestes & tourmentes, se joüa miserablement du reste de l'armée: elle en mit à fond 17. grands vaisseaux en la coste d'Irlande, en fit eschoüer, fracasser, & ensabler plusieurs autres: de sorte que de 130. vaisseaux à peine y en eut-il 30. qui s'en peurent retourner en Espagne: & voila comme l'Angleterre ne se peut pas s'appaiserement.

Il faut adjouster à la forte alliette, les forces maritimes, & terrestres. Car quant à celles de mer, outre les galions d'armée, qui souloient estre au nombre de cent, non pas guieres hauts, mais gros & longs, dont il y en a encor 70. ou quelque peu davantage. Le Royaume a tant de ports, & tellement frequentez des marchands de toutes parts, que les Anglois disent que les vaisseaux qui y pratiquent ordinairement, passent le nombre de deux mille. Mais quoy que c'en soit, c'est chose assurée qu'on y peut mettre ensemble quatre cens vaisseaux, voire même davantage, si la necessité le requeroit. Et de fait, Edouard 3. passa à l'entreprise de Calais, & depuis Henry 8. au siege de Bologne, avec mille vaisseaux de toute sorte. Si bien que ce sera vne grande & difficile entreprise d'attaquer ceste Isle, dont les ports sont, ien'en diray pas d'entrée, mais d'accez fort difficile, outre les fortifications qu'on y a faites. Il faut adjouster à ces difficultez la valeur & l'experience de ce peuple sur la mer & en ce qui en depend, veu qu'il n'y a gens plus hardis, ny plus prompts sur l'eau, ny plus duits à y combattre que les Anglois. Ce sont ceux qui courent la mer Oceane, tant en Hyuer qu'en Esté, avec les vaisseaux extrêmement legers, & du tout bien fournis de bons canons, dont ils ont grande abondance. Ils trafiquent iusques en Moscouie, & en Cathay, en Alexandrie d'Egypte & à Constantinople, en Liuonie, en Barbarie, & en Guinée. Ils se sont essayez de passer aux Indes, tantost du costé d'Occident, costoyant le nouveau monde: tantost de celui du Levant, costoyant la Moscouie, & le Cathay. Mais il semble que le plus souvent la nature se soit entierement opposée à leurs desseins, & leur ait bouché le passage. Davantage, ils ont attaqué l'année 1586. l'Isle Espagnole, & le nouveau Monde, & mesmes avant l'alliance faite entre les Roys d'Espagne, & d'Angleterre, ils molestoient

continuellement les Isles Azores, le Cap verd, & le Brasil. Deux de leurs Capitaines ont avec autant de courage, que de bon-heur, presque fait le tour de tout le monde. En fin ils seroient dignes de toute louange, s'ils n'auoient appliqué tout ce courage, & toute ceste industrie à de mauuais vsages, veu qu'ils ne s'addonnent presque à autre chose qu'à escumer, & voler tous les vaisseaux dont ils se peuuent rendre maistres, & porter vn dommage inestimable à plusieurs marchands Chrestiens qui les rencontrent. Et pource que quelques vns sont deuenus riches en ces voyages, & brigandages de mer, il y en a beaucoup qui flattez de l'esperance d'un gain semblable, ou plus grand, vendent leurs fonds, & heritages, & arment de l'argent de ceste vente des vaisseaux, avec lesquels ils vont en course, & remplissent la mer Oceane de meurtres, & de voleries.

- 23 Outre ce que dessus, il y a grande quantité de gens de guerre ordinairement dans le pais, qui sont bons hommes sur la terre, & ne sont pas de peu d'importance, soit que l'on ait esgard au nombre, soit que l'on en considere la qualité : car quant au nombre, le Royaume est diuisé en cinquante & vne Comtez, en l'une desquelles, qui est celle de Lorcassier, on fait estat qu'on peut enrouler dix mille hommes de pied. Mais quoy que s'en soit, c'est chose certaine que le Royaume peut mettre en campagne cent mille hommes de pied, & vingt mille de cheual. Chacune de ces Comtez est gouvernee par vn Vicomte, qui a la charge de faire amas & eslite de soldats, lors que la necessité le requiert, & lors ils vsent de ceste maniere. Ils font comparoir deuant eux tous ceux qui sont dans leurs gouvernements, depuis l'aage de seize, iusques à soixante ans : & entre autres, ils choisissent les plus disposés, & ceux qui paroissent plus robustes. Pour l'Infanterie ils eslisent les plus grands, & plus membrus : & ceste infanterie est diuisée en quatre sortes : car il y en a quelques vns qui vsent de l'arc, & des flesches, armes particulièrement propres des Anglois, veu qu'ils ont acquis en s'en seruant, beaucoup de grandes, & signalees victoires. Les autres vsent d'une arme d'ast presque semblable à la halebard, mais ayant le fer vn peu plus gros, & plus pesant avec des crochets, & avec ceste arme ils frappent, & tirent en bas les hommes de cheual, & ceste sorte d'armes a esté aussi assez pratiquée anciennement par les Anglois. L'experience, & la coutume de ce siecle en a adjousté deux autres : l'une est celle des arquebuses, avec lesquelles on n'a pas ouy dire qu'ils se soient signalez en quelque rencontre : l'autre est la picque, qui est extrêmement conuenable à leur disposition, d'autant qu'ils sont grands, & forts, & de belle disposition.

Quant aux hommes de cheual, ils choisissent des hommes de moyenne taille, qui soient adroits, & disposés. Ils n'ont pas des cheuaux de longue haleine, ny bons pour le choq, & le rencontre, au prix de ceux du Pays bas, & des Allemans. Car outre que la bonté du pays gras ne le porte pas (pource que les bons cheuaux demandent vn pays qui ne soit pas beaucoup gras, ny aussi d'ailleurs entierement sec) ils ne s'en soucient guieres, & ne s'amusent pas à les rendre bons. Mais les hommes de cheual sont de deux sortes : veu que quelques vns sont armez de toutes pieces, & ceux-cy sont Gentils-hommes pour la plus grande partie : les autres sont armez à la legere, & de ceux-cy il y en a deux sortes : car vne partie est armée à la façon des Albanois, l'autre ressemble plus aux cheuaux legers d'Italie, avec certains pourpoints de caneuz garnis de maille, ou avec quelque plastron, & vn morion comme de picquier, & ceux-cy vsent de lances longues, & deliees. Mais encor qu'ils puissent mettre enuiron deux mille hommes d'armes en campagne, & vn grand nombre de cheuaux legers, toutefois on n'a pas veu que la caualerie Angloise se soit iamais rendue remarquable en aucun combat, ainsi que l'Infanterie. Et le Roy Edoüard quatriesme, qui fit tant de grandes entreprises, voulant monstrier en quelle sorte de gens il auoit plus d'assurance, quittoit son cheual, & se mettoit à pied parmy l'Infanterie.

- 24 Mais pour monstrier ce que peut vn Roy d'Angleterre, principalement comme cestuy-cy, qui possède maintenant toute l'Irlande, & l'Ecosse, j'ay pensé qu'il seroit à propos de mettre icy l'effort du Roy Henry huictiesme, lors qu'il fit l'entreprise de Boloigne. Ce Roy passa donc la mer avec vne armée diuisée en trois parties. Il y auoit en l'auant-garde douze mille hommes de pied, & cinq cens de cheual armez à la legere, & encores mille hommes de cheual seulement armez de maille & de tassettes, que le Roy auoit tous vestus de bleu bordé de rouge. L'arriere-garde (veu qu'ils passerent en cet ordre) estoit conduite par le Duc de Nortfolk, & estoit composée de semblable nombre de gens de pied, & de cheual, vestus de bleu comme les premiers. Entre ceux-cy il y auoit mille Irlandois, couuerts d'une chemise de lin longue & estroite, & d'un manteau par dessus : & quant au reste nuds, avec la teste nue & les cheueux longs : & ceux-cy estoient armez de trois dards, & d'une longue espee : Et auoient vn gand de fer en la main gauche, qui estoit long iusques au coude. Quand ils viennent au combat, ils se retrouuent fort haut, & sont fort accoustumés, & exercez à

exercez à la course. Le corps de la bataille, où estoit la personne du Roy, estoit de vingt mille hommes de pied, & deux mille chevaux Anglois, tous vestus de rouge, bordé de jaune. Ils menaient apres eux cent gros canons : outre les petites pieces. Ils auoient encores mené sur des chariots cent moulins, dont chacun tournoit avec vn cheual, & venoit à moudre le bled, & encores sur les chariots ils auoient des fours, où le pain se cuisoit. Le nombre des chariots estoit si grand, qu'ils en entouroient, & fermoient toute l'armée en façon de tranches : & pour tirer ces chariots, & l'artillerie, & conduire le bagage, il passa de l'Isle en terre ferme environ vingt-cinq mille chevaux, & outre les viures de toutes sortes, on y mena quinze mille bœufs, outre vn nombre infiny d'autres bestes. Ce seroit vn trop long discours de vouloir specifier par le menu la grande quantité des eschelles, ponts, balles, pouldres, munitions, bois & autres choses appartenantes aux factions militaires, dont il estoient fournis, n'ayans laissé en arriere vne seule chose de toutes celles qu'ils estimoient nécessaires. Toutefois quant aux vaisseaux, ceux qui estoient entretenus ordinairement, sont beaucoup diminuez, veu qu'il n'y en a pas guieres plus de quarante, d'autant qu'ou par negligence, ou pour la trop grande depence, il y en a eu partie de vendus, & partie qui ont esté rendus mal propres à la nauigation. Mais il faut considerer que ce peu qui reste, avec l'autre peu de particuliers subiects, dont le Roy se sert en toutes occasions, comme des siens propres en les payant, de mesme qu'il fait des estrangers quand la necessité le presse : tous ces vaisseaux, dis-je, suppléent non seulement à la deffence, mais seroient mesmes en vn besoing capables d'attaquer, & d'offencer, veu qu'il court vn bruit qu'on en trouue d'espars en diuers endroits de ceste Isle, que grands, que petits, propres à seruir, & aller contre l'ennemy, en si grand nombre, que s'ils estoient mis ensemble, ainsi qu'on pourroit faire aisément en vn besoing, à vn simple commandement du Roy, ils monteroient à vn grand nombre, les Anglois disent de quatre cens. Mais posons le cas qu'il n'y en eust vn nombre mediocre, il y en auroit sans doute tant qu'en armant vne partie de soldats, d'artillerie, & de toutes les munitions, & armes requies, comme on pourroit faire sans peine (veu que ce Royaume ne porte enuie, pour le regard de toutes ses prouisions nécessaires, à nul autre) s'ils n'attaquoient personne, pour le moins ils ne craindroient pas, se mettant sur la deffence, aucune force qui les voulust assaillir.

Pour les hommes de faction on tient que quand il faudroit faire vn effort, on en armeroit bien vingt-cinq mille, de corselets & armes blanches : ie dis quant à ceux que le Roy seul peut armer, veu que si on y adjoystoit ceux des Seigneurs & Barons particuliers, dont il n'y en a aucun pour petit qu'il soit, qui à proportion de sa suite, & de ses moyens, ne soit assez pourueu pour armer vn bien grand nombre, iusques à la mesme qu'on dit qu'il y en a qui en peuuent armer des milliers, comme les Comtes d'Amby, de Sarisbury, de Vvestmerlande, & sur tout celuy de Pembrok, encores que ceux-cy ne fussent pas tous soldats experimentez, toutefois estans en compagnie de soldats pratics, & exercez (d'autant qu'il en sort plusieurs de ceste nation, ainsi que des autres, qui s'en vont deçà delà aux guerres) ils feroient en toutes choses de grands effects pour l'inclination naturelle qu'ils ont à la guerre : & ceux-là mesmes qui seroient desarmez, feroient pour la mesme raison grande preuue de leurs personnes. Pour tout le Royaume d'Angleterre lors qu'il n'estoit pas vny à l'Escoffe, la mer le rendoit assez fort de tous costez contre toutes les autres nations, hormis contre les Escossois, qui sont dans vne mesme Isle. Mais les Anglois auoient assésuré la frontiere avec vne garnison de quinze cens soldats distribuez en quatre places, c'est à sçauoir vne partie à Barwik frontiere du costé de Leuant, assise à la bouche du fleue Medo, place forte, & de grand trafic pour la pesche des saumons, vsurpee anciennement sur les Escossois, & tousiours retenuë par les Anglois : vne autre partie en la ville de Carled, frontiere du costé du Ponent, & le reste en deux autres places de moindre importance, assises entre ces deux, l'vne appelée Orche, & l'autre Vvark, entre la ville de Duram, qui est vn peu plus esloignée, & toutefois renommée entre les Anglois, d'autant qu'encores qu'on n'y tienne les soldats payez ordinairement, toutefois estant fort peuplée, elle a tousiours esté tenuë pour vn des principaux arrests des courses des Escossois. Voila tout ce qui se peut dire des forces d'Angleterre.

Il est à propos que nous parlions maintenant de la conduite & gouvernement de ce Royaume : veu que ce ne seroit pas assez qu'il fust riche, fort & peuplé, s'il n'estoit aussi bien gouverné, puis qu'on sçait assez que plusieurs Republiques qui ne manquoient pas de tout ce que nous auons remarqué en ce Royaume, se sont neantmoins perduës par faute de conduite qui leur estoit nécessaire.

B

35 **L**A Couronne d'Angleterre est successivement hereditaire à ceux qui sont plus proches de sang, & lors que les males manquent, les femmes succedent, & sur cecy les Anglois alleguent ce qui est dit aux Nombres, à sçavoir que quand l'homme mourra sans enfans males, la succession appartiendra aux femmes, dont les bastards sont toutefois exceptez. Mais ceste coustume n'est aucunement receüe en France, pour raison de la loy Salique faite jadis par Pharamond premier Roy des François, l'an 422. qui ne permet pas que les femmes succedent.

Or le Royaume est diuisé en quatre sortes de personnes, c'est à sçavoir nobles, bourgeois, hommes liges, ou legaux, & artisans. On compte entre les nobles en premier lieu le Roy, puis les Princes, Ducs, Marquis, Côtes, Vicôtes & Barons, qui sont nômez par excellence, Seigneurs, hommes nobles, & ceux-là sont suivis des Cheualiers, des Escuyers, & autres nobles qu'ils nomment *Gentlemen*. Les Ducs, Marquis, Comtes, Vicomtes, & Barons, reçoivent ces qualitez du Prince, ou prennent celles du pere qui a porté quelqu'un de ces titres : car le fils aîné d'un Duc du vivant du pere sera nommé Comte, & le fils d'un Comte Vicomte, ou Baron, les autres enfans des gentils-hommes sont appelez Escuyers : mais on appelle communement Seigneurs les enfans des Ducs, & des Marquis, de mesme que les fils aînez des Comtes.

Il n'y a au reste personne qui puisse estre Baron, s'il ne peut tirer de son reuenu annuel mille marcs d'or. Il n'y a personne qui naisse Cheualier, non pas mesme le Prince de Galles. Au reste les Cheualiers sont faits ou auant le combat pour leur donner plus de courage de bien faire, ou bien apres le combat lors qu'ils ont rendu quelque preuue signalée de leur valeur, ou bien pour quelque bonne esperance qu'on a d'eux en temps de paix. Mais ils ne sont pas tous faits d'une mesme sorte : car les uns sont faits de la main du Roy, les autres par son mandement & autorité, les autres de la main, & par l'eslection du General d'armee, qui les trouue dignes de cet honneur. Et lors que quelqu'un est fait Cheualier, il est à genoux, & reçoit un coup sur les espaules, ou sur le dos, de l'espee nuë, puis on luy dit, *Soyez Cheualier au nom de Dieu*. A quoy l'on luy adjoustoit autrefois de *sainct Georges* : & auant qu'il se leue on luy dit, *Auancez*.

• Les Cheualiers du Bain sont faits tels aux sacres des Roys, avec de longues & curieuses ceremonies.

Les Cheualiers Porte-enseignes sont faits en l'armee, & peuuent apres cela mettre leurs armes en leurs drapeaux, de mesmes qu'ils estoient Barons, mais cet ordre est presque perdu en Angleterre. Or de quelque rang de Cheualiers qu'un homme soit, sa femme est aussi tost appelee Dame, aussi bien que celle d'un Baron : mais quant au mary, il n'a pas le nom de Baron, ains on adjoust à son nom ce mot de Sir, qui signifie Seigneur, de sorte qu'il sera appelle, Seigneur Pierre, Iean, &c. Quant aux Cheualiers de la lartiere, leur ordre a esté institué par Edoüard III. & c'est celuy qui est plus honorable en Angleterre. l'en parleray traitant des ordres diuers de cheualerie sur la fin de ce liure : Et d'autant encores que cet ordre n'est pas tant vne espee de police, qu'un ornement du Royaume, i'en quitteray le discours pour venir aux autres personnes.

36 Les Escuyers nommez en Anglois *Esquire*, ou vulgairement *Squire*, sont ceux qui portent la marque de leur noblesse en leurs armes, & l'on tient que ce nom est venu de l'escu qu'ils portoient deuant les Cheualiers, ou Seigneurs : & leur fut donné pour les distinguer des simples soldats.

Les nobles, ou *Gentlemen*, qui est un mot approchant de celuy de gentil-homme, sont confusément tous ceux qui sont tels de race, ou qui le deuiennent en quelque façon. Et certainement on deuiet noble en Angleterre bien aisément, veu que tous ceux qui estudient aux loix, & qui font profession des Arts liberaux, & ne vivent pas de leur travail, ont le nom de Monsieur, qui doit estre donné seulement aux gentils-hommes, & Escuyers en Angleterre, & sont estimez nobles.

Après les gentils-hommes on met les bourgeois, qui non seulement ont quelque magistrat en leur ville, mais aussi en peuuent porter la charge. Or il faut que telles personnes seruient à la Republique aux lieux où elles habitent. Ces hommes là ne sont guieres estimez aux Comtez, sinon qu'ils sont appelez aux Estats : & les plus anciennes villes en deputent ordinairement quatre, les autres deux.

• La troisieme sorte de gens est de ceux que les loix d'Angleterre appellent, *Hommes liges* ou *legaux*, qui peuuent tirer annuellement de leurs fonds la somme de quarante sols estrelins, c'est à dire six liures d'Angleterre, selon le cours de la monnoye duiourd'huy. Ces gens-cy se declarent ouuertement non nobles, & portent beaucoup d'honneur à ceux

qui le sont : mais ils sont pardessus les gens de mestier , & artisans , qui sont mis au dernier rang. 27

Les offices Royaux d'Angleterre sont à vie , & ne peuvent estre ostez , sinon pour crime de lezeMajesté : & s'ils ne sont entierement conformes de nom à ceux des autres Royaumes , & que la charge soit differente , toutefois ils ont en leur administration l'autorité que les autres ont aux autres Royaumes. Les principaux estats sont ceux-cy : le grand Chancelier , le grand Thresorier , ou Intendant general des Finances , le President , le Maistre du petit seel , le grand Chambellan , le Connestable , le grand Marechal , l'Admiral , & le grand Seneschal : mais la charge de Connestable , & de Marechal sont seulement en estre en temps de guerre , ou bien en quelques temps de couronnement ou semblable ceremonie.

Quant aux autres , il faut sçavoir que la couronne d'Angleterre s'est rendue en telle sorte maistresse de tous les Estats du Royaume , ou par force , ou par la voye de la iustice , c'est à sçavoir par le moyen des fautes des Princes , ou par faute d'heritiers , que tous appartiennent aujourd'huy au Roy : & combien que quelques lieux soient sous quelque Prince , veu qu'il y en a encores quelques vns , bien qu'en petit nombre , toutefois on recourt en dernier ressort au Conseil du Roy , & les Seigneurs n'ont aucune puissance sur leurs subiects apres qu'ils leur ont payé ce qu'ils leur doivent annuellement , qui est vne somme d'argent à tant pour teste , veu que les peages , daces , gabelles , & tailles appartiennent au Roy.

Toutes les principales villes du Royaume sont gouvernees par les officiers du Roy , & au lieu qu'autrefois elles ont eu des Seigneurs absolus , aujourd'huy il n'en reste autre memoire que le titre des lieux que le Roy garde encores , en honorant quiconque il luy plaît , adjoustant à ces titres quelque petit reuenu , sans toutefois que ceux qui ont ces titres ayent aucune sorte de iurisdiction aux lieux ou pays dont ils portent le titre , & s'il y auoit à faire quelque chose (qui sera tousiours bien peu) ce sera comme pour les fonds , decimes , & choses semblables , sans qu'il se puisse mesler du gouvernement entier.

Les titres que le Roy donne sont de Duc , de Marquis , de Comte , de Vicomte , de Baron : & quant au titre de Milord , il s'esteint avec ceux qui l'ont , sinon qu'ils eussent esté du Parlement , veu qu'alors le titre passe au fils aîné , & ainsi de main en main , le fils estant du Parlement. Et lors que quelques autres ont vn titre pour le respect du pere , ils ne peuvent estre du Parlement tandis que le pere est viuant , encores que le titre soit de Comté , ou de Baron.

Lors qu'un Duc vient à mourir , le fils aîné ne se nomme pas toutefois Duc tout aussi tost , ainsi que porte la coustume des autres estats , & Royaumes : mais il est necessaire que le Roy le face tel , ce qu'il fait avec certaine solemnité , veu que celui qui doit succeder au pere , se presente au Roy , qui luy ceint l'espee , & luy met la couronne sur la teste , avec plusieurs autres ceremonies : & il fait le mesme pour le regard des fils de Ducs , & de Comtes : toutefois ceux-cy n'ont autre nom que de Milords durant la vie de leurs peres : & les fils des Vicomtes , & des Barons sont nommez simplement chacun de leur nom.

Lors que les titres sont en vne maison , & que le Roy les a donnez vne fois , ils ne se peuvent iamais perdre , si ce n'est en cas de quelque grande faute , veu qu'en ce cas , celui qui a le titre le perd aussi bien que tous les descendans ; & lors que ceste priuation arriue , ils nomment cela estre priué de sang , qui veut dire en effect qu'ils sont priuez de la noblesse , & depuis cela le Roy en jottit tousiours , sinon en cas que le priué fust remis : ce qui arriue quelquefois , comme il s'est veu en Pole , au Duc de Nortfolk , & en Courtenay , veu que le sang , comme ils disent , & les biens ont esté restituez à tous trois : mais cela ne se peut faire qu'en l'assemblée des Estats , non plus qu'ils n'en peuvent estre priuez que de mesme sorte. 38

En Angleterre la Souueraineté est tellement entre les mains des Estats , qu'ils seruent au Roy d'un couteau affilé pour tailler tout ce qu'il veut , & de Ministres pour ranger son peuple à contribuer incontinent tout ce qu'il souhaite.

Le Roy est bien aise de conuoquer tous les ans ceste assemblée , & seroit bien marry d'interrompre ceste coustume , les plus sages , & les plus gens de bien , & tous ceux qui desirent le soulagement du peuple voudroient bien de tout leur cœur , que lesdits Estats qu'ils appellent , Parlement , fussent assemblez aussi rarement qu'en France , le peuple en seroit moins foulé , ceste assemblée ne tournant qu'à la plus grande charge du peuple , parce que ce Parlement est tousiours composé pour la plupart des affidez , & plus passionnez seruiteurs du Roy , qui panchent & se tournent tousiours incontinent au moindre geste & branslement de l'Estat à tous les mouuemens du Roy , en somme à tout ce qu'il veut & desire : Et pour leurs bons seruites reçoivent tousiours quelques commoditez & gratifications , lesquelles , outre les fraiz de l'assemblée & ce qu'ils accordent en icelle , tombent en fin sur le dos d'icelle.

Au reste les loix d'Angleterre ont deux choses, c'est à sçavoir le iugement, & la pratique. Il faut aussi considerer en cela les personnes, les lieux, les choses, & les manieres, ou moyens. Ces personnes sont les Notaires publics, les Aduocats, & les Iuriconsultes. Les Notaires dreslent les actions, les decrets de la Cour, les rapports & les sentences, & les mettent par escrit.

Les Aduocats, comme bien versez en la science du droict, preparent le procez aux Iuriconsultes.

Les Iuriconsultes sçauans par routine, & experience, de l'ordre & façon de poursuivre les procez, dreslent les formules sur les affaires de leurs clients, ou parties, ils veillent à leurs demandes, afin que le retardement, & la nonchalance ne leur preiudicient, & mettent le procez en estat d'estre iugé.

Les lieux qui seruent aux iugements sont les Cours, où l'on fait les loix, & les sentences, c'est à sçavoir les Parlements, ou Estat, la Cour du Chancelier, les Sieges Royaux, les Greffes, la chambre des Comptes, la Cour des pupils, la Chambre estoillee, la Cour des Requestes, & la Duché de Lenclastre.

Cesdits estats qui ont la force de la puissance absolue est aux estats, qui abrogent les anciennes loix, en introduisent de nouvelles, changent les droicts & possessions des hommes priuez, legitimement les bastards, & changent les poids, & les mesures, prescriuent le droict de succeder au Royaume, ordonnent des tailles, donnent grace des crimes, redressent les familles abbatuës par les fautes des predecesseurs, & ont puissance de mort & de vie sur ceux que le Roy remet entre leurs mains.

Les officiers des Estats sont les Orateurs, Greffiers, & les Arbitres. L'office de l'Orateur est de proposer, & ageancer avec vn beau langage les requestes ou remonstrances qui sont presentees aux Estats.

Les Greffiers gardent ce qui a esté arresté aux Estats, tant ce qui est imprimé, que ce qui n'est pas publié, & qui n'est qu'au profit des particuliers.

Les Arbitres sont ceux qui ont esté tenus par les Seigneurs, & citoyens, pour habilles hommes, & capables de cognoistre de ce qui est proposé dans les remonstrances, & d'en determiner.

Or la façon d'assembler les Estats est telle, que le Prince enuoye des lettres par tout, aux Ducs, Marquis, Barons, & autres Seigneurs, ou laiz, ou Ecclesiastiques, qui ont droict de donner leurs voix, & tous se doiuent trouuer aux Estats quarante iours apres. Et le Roy enuoye aussi des lettres aux Vicomtes des prouinces, pour eslire deux Cheualiers en l'assemblée des Estats prouinciaux, afin de dire leur aduis pour le reste.

Le Roy est en vne sale haute où il est assis au milieu de la sale en vn siege digne de luy & vn peu esleué: le Chancelier est assis vn peu plus bas, plus pres du Roy que nul autre: les Archeuesques & Euesques sont à sa main droite, & les Ducs, & Barons à la gauche. Les Iuges sont au milieu entre ces deux rangs, & aussi les Secretaires du Roy, assis selon la coustume, sur des sacs de laine. Cependant les Cheualiers & habitans du Parlement (car c'est le nom qu'ils ont, & sont au nombre de trois, ou quatre cens) sont appelez en vn autre lieu separément, & apres qu'ils ont déclaré par quelle prouince, ou ville ils sont deputez, on leur commande aussi tost d'eslire vn homme capable, & discret, qui soit Orateur des Estats, & de le presenter au Roy, deuant lequel il harangue, & le Chancelier luy respond. L'Orateur demande que l'assemblée d'embas jouisse des priuileges anciens, & que le Roy ne se fasche pas s'ils disent leurs aduis librement, & plusieurs autres choses: & le Chancelier respond selon qu'il iuge estre necessaire. Et quelquefois deux iours se passent en ces actions, & harangues, Outre le Chancelier il y en a vn qui lit les remonstrances, qui sont receuës, ou rejettes selon la pluralité des voix: & si la pluralité des voix l'emporte touchant vne nouvelle loy, le Lecteur escrit au dessous de la remonstrance en François, *Soit baillé aux communs*: & lors qu'il leur semble, ils font porter aux peuples ces remonstrances par quelques vns de ceux qui sont assis sur les sacs de laine, qui estans entrez dans la maison, apres auoir demandé permission, parlent ainsi à l'Orateur des estats, *Excellent Seigneur Orateur*, il a semblé bon pour la Republique au Senat, & aux Peres auteurs, que cecy ait vigueur de loy, & ils vous prient instamment d'aduiser ce qui sera expedient de faire. Puis estans partis, & les huis estans clos, l'Orateur rapporte ce qu'ils ont dit, & si l'on n'est cependant empesché à d'autres affaires, l'Orateur demande curieusement leur aduis sur ceste remonstrance.

Au reste il n'est permis à ceux qui sont assemblez, de s'entredire des iniures, ou de se railler l'vn de l'autre. Les Estats ne se tiennent plus depuis que midy est sonné. Si le peuple a pour agreable ce qui a pleu aux Senateurs, il se cōfirme avec vne telle souscriptiō, **LES COMMUNS ONT ASSENTEZ**: c'est à dire que le peuple ya consenti: & au contraire, si le Senat

a pour

a pour agreable ce dont le peuple est auteur, on escrit, *LES SEIGNEURS ONT ASSENTEZ*. Et quand le Senat & le peuple ne sont pas de mesme aduis, on eslit quelques vns des deux maisons pour debattre ce dont il est question, & proposer par ensemble leur aduis, & bien souuent apres cela l'un s'accorde à l'opinion de l'autre. De sorte que rien ne peut auoir force, ny vigueur, sans estre approué des deux maisons, & mesme cela n'est pas suffisant, si le Prince ne le confirme le dernier iour, lors le titre de chaque ordonnance porte, *Il a esté ordonné, &c.* Et l'on obserue que le Prince l'approue de sa propre bouche en François: Le Roy le veut: & lors toutes les ordonnances d'Angleterre sont acheuees, & imprimées aussi tost, horsmis quelques priuileges qui concernent les particuliers. Et lors que le Roy ne veut pas quelque chose, ou la veut abolir, il dit seulement: Le Roy s'aduiera.

Au reste le Roy d'Angleterre absout de tout crime de sa propre autorité, combien qu'autrefois quelques Comtes & les Princes de Galles se soient attribuez ce droit. On ne parle point au Roy qu'en se jettant deuant luy à genoux, & personne mesme ne s'ose promener dans l'antichambre, encor que le Roy n'y soit pas, non plus qu'en France. Et il y a encor vne chose, qu'encore que le Roy soit absent, on n'y ose demeurer sans estre descouvert, principalement s'il est Anglois: car vn estrangier est le plus souuent excusé, comme ne sachant pas la coustume.

Il ya trois sortes de iugemens en Angleterre, c'est à sçauoir des Estats du dueil, & des 39 assemblees iuridiques. La façon de donner la sentence aux Estats en tous faits, est toute semblable à celle que i'ay desia dit.

Pour le dueil, il n'est pas maintenant en vsage, toutefois il n'est pas du tout deffendu, de sorte que les Anglois tiennent qu'on ne le refuseroit pas à vn homme qui le demanderoit iustement. On en voit la forme aux Commentaires de Briton. Ces deux premieres sortes de iugement sont absoluës, & sans appel, de mesme que ce que les Iuges arrestent en leurs assemblees. Les Sieges Royaux sont ainsi nommez, pource que les Roys d'Angleterre ont accoustumé de s'y asseoir, & que toutes les causes qui concernent la Couronne, & se plaident à l'instance du Roy, y sont expediees. Le principal iusticier d'Angleterre iuge en ceste Cour avec ses autres Assesseurs. La Cour des actions ciuiles est celle où se plaident les procez des particuliers, nez de quelque partie du droit d'Angleterre. Il y a en ceste Cour vn Iuge principal, avec trois Assesseurs.

Les ordonnances des Magistrats, ou des Iuges sont excecutes le plus souuent par les Vicomtes. Il y a aussi la chambre des Comptes, où se rapporte tout ce qui concerne les finances du Roy. Quant aux supplices, ils n'en ont guiere d'autres en Angleterre contre les homicides, assassins, rauisseurs & semblables crimes, qui ne sont pas de leze Majesté, que de les pendre: & c'est quelque chose du tour inusitée de donner la question à vn homme, luy trancher la teste, le mettre en quatre quartiers, & le mettre sur la rouë. Le Iuge n'a pas puissance d'amoindrir ou augmenter la peine: c'est chose qui doit estre rapportee au Prince & à ceux de son Conseil priué par le commandement desquels on laisse les corps des voleurs pendus, iusqu'à ce qu'ils pourrissent, combien que ce soit ordinairement la coustume d'enterrer ceux qui sont excecutez. Si la femme a tué son mary, on la brusle toute viue: si le seruiteur a tué son maistre, il est mené sur vne claye au lieu du supplice, ils appellent cela *petit tracas*. Si on s'est essayé d'empoisonner, on n'en meurt pas, pource que le Prince n'a pas perdu son subiet.

Quand quelque meurtre a esté commis, tous ceux qui y ont assisté sont pris pour homicides, & condamnez à la mort. On punit les traistres en ceste sorte: premierement ils sont pendus, & estés viuants on leur arrache les boyaux, puis on leur tranche la teste avec vne hache, & ayant mis leurs membres en quatre quartiers on les met en diuers lieux sur des pieux. Les Ducs, Marquis, ou Barons qui sont du Parlement, ont ce priuilege, qu'estans accusez de crime de leze Majesté, ils sont iugez par leurs semblables.

En Angleterre il y a certains Iuges, qu'on appelle de Circuits & Iuges d'Assises, lesquels sont choisis tous les ans par le Roy, & faut que ce soient certaines personnes la probité, desquelles luy soit cogneue: lesquels apres luy auoir presté serment necessaire, il les enuoye, les vns en vne prouince & les autres en vne autre. Leur pouuoir est d'entendre & escouter les plaintes du peuple contre les Iuges des lieux & officiers de iustice, comme aussi il s'estend sur les Gouverneurs des villes & places des prouinces.

Or leur autorité est si ample qu'ils peuuent condamner à la mort, ou à telle autre peine qu'ils iugent raisonnable, & font excecuter leurs iugemens & sentences sans appel, & sur qui que ce soit qui aye delinqué, des Iuges ou Gouverneurs.

Ils sont appelez Iuges de Circuit ou d'Assises, parce qu'ils font le tour des prouinces qui sont assignees à chacū d'eux, & c'est à eux que s'adressent les lettres patentes du Roy pour

estre executees par tout le Royaume contre qui que ce soit.

Il y a vne autre Cour en Angleterre, qui n'a pas la semblable en lieu que ie sçache. Lors qu'on rend le droict à Vvestmonstier, le iour auparauant que les Assises finissent, le Chancelier, les Barons, & tous ceux qui sont du Conseil Priué du Roy, & pareillement les Iuges, c'est à sçauoir les deux principaux Iusticiers depuis six heures iusqu'à vnze ont accoustumé de s'asseoir en certain lieu, qui est nommé la chambre estoilée, ou à cause du grand nombre de fenestres qui y est, ou à cause que le plancher est semé de plusieurs estoilles dorées. Ceste Cour a esté introduite pour iuger des choses faites par violence, & pour arrester l'insolence des plus puissans, qui sont obligez d'y venir respondre en personne, & s'ils ne se iustifient bien ils sont enuoyez en prison pres d'un ruisseau qui se nomme *Fine*, d'où il sort en peu de temps par le moyen de les amis, avec promesse de viure deormais plus paisiblement: & lors il est condamné à l'amende enuers le Roy, & à tous despens, dommages & interests enuers sa partie. Elle fut establie au temps que le Cardinal Vvolscus Euesque d'Yorc fut Chancelier d'Angleterre. Ceux qui president en ceste Cour sont le Chancelier, l'Intendant general des finances, tous les Conseillers, & tous les Barons. La pluralité des voix l'emporte. Les peines ordinaires sont la prison, & l'amende pecuniaire.

Il y a encores la Cour des pupils, qui iuge tout ce qui concerne les orphelins, & en la Cour de la Duché de Lenclastre, les actions personnelles, & reelles, qui concernent en quelque sorte que ce soit, les fonds de la Duché, sont debatues. La Chambre des Requestes voit les requestes, & plaintes presentees au Roy, hors desquelles elle ne peut donner aucun iugement: & s'appelle la Cour des pauvres, pource qu'il faut que ces Iuges rendent droict sans salaires. Elle est aussi appelée Cour de conscience.

Il y a encores la Cour d'Eglise, nommée aussi Cour de Chrestienté, & les Archeuesques, & Euesques qui y president, ont vne iurisdiction particuliere, principalement en quatre sortes de causes, veu qu'ils cognoissent des testaments, & lais testamentaires, des decimes, des mortuaires, & des nopces, & de l'adultere, ou fornication: bref de tout ce qui concerne la conseruation de l'ordre, & ornement de l'Eglise & qui appartient à l'entretien de la Religion. Voila l'ordre de la iustice d'Angleterre, & la façon de laquelle elle est gouvernee.

32 Mais auant que ie mette fin à ce discours, ie vous veux dire en vn mot de ceux qui sont condamnés à la mort.

Quand l'on fait iustice de quelqu'un en Angleterre, & qu'on le mene pendre, tous les parens ont accoustumé de se trouuer presents à la mort: & apres qu'on l'a mené par la ville sur vn chariot, on le conduit en fin au gibet: où l'on le pend, en luy mettant au col vne chaine de fer, large de trois doigts. Et pource que ceste chaine ne le peut si promptement estrangler à cause de sa largeur, les paréts courent soudain, & le tirent tât par les pieds qu'il meurt, & estiment faire en cela vn bon office, & digne de ce qu'ils luy font. Cela est permis par la iustice, à cause qu'on en a trouué tel, qui est demeuré pendu depuis le matin iusques au soir sans estre mort, en danger de perdre tout ensemble le corps, & l'ame. Nous auons assez discouru maintenant du gouuernement politique, voyons maintenant comme on se porte aux choses qui concernent la Religion, & le seruice de Dieu, qui sont les principaux piliers des Republiques bien ordonnées.

RELIGION D'ANGLETERRE.

33 Les Anglois, selon quelques vns, receurent la Religion Chrestienne de Ioseph d'Arimatee, & puis du Pape Eleuthere, par la predication de Eugace, & Damian, qui baptiserent le Roy Luce, & vne bonne partie de ses gens enuiron l'an de nostre salut 180. Mais l'Isle ayant apres esté occupée par les Anglois Saxons, le grand grand Gregoire Pape y manda Augustin, & Melite, & plusieurs autres de l'ordre saint Benoit, qui y renouellerent la foy, & y conuertirent Eitelbert Roy de Kent, enuiron l'an 506.

Depuis ce temps là iusques à l'an 1534. l'Angleterre n'eut iamais autre foy que la Catholique Romaine, & mesme Ina Roy d'Angleterre fort puissant, rendit son Royaume tributaire d'un denier pour feu au saint Siege, qui estoit appelé en ce temps là le denier de saint Pierre & se colligeoit par an, de chaque famille & maison par le Collecteur du tribut de saint Pierre: Les Anglois se voulurent par apres liberer de ce tribut & de ceste recognoissance du saint Siege de Rome, mais y ayans esté maintenus malgré leur rebellion par le secours & l'assistance des François & Saxons, au lieu d'un denier qu'ils payoient annuellement pour le tribut de saint Pierre, furent condamnés à payer le triple.

Or Henry VII. Roy d'Angleterre maria son fils aîné Artus à Catherine fille de Ferdinand d'Aragon, & d'Isabelle de Castille, qui regnoient lors en Espagne. Mais le mariage ne fut pas consommé, à cause de la mort d'Artus, apres le deceds duquel pour le bien de la paix entre l'Espagne, & l'Angleterre, Henry puîné d'Artus avec dispense de Iules II. espousa

pousa la mesme Catherine, & en eut en vingt annees qu'il vescu avec elle, trois enfans males, qui moururent ieunes, & deux filles. Mais il aduint que Henry commença de perdre l'affection qu'il portoit à Catherine : dequoy le Cardinal Vvolse hōme arrogant & ambitieux, & qui n'aimoit pas la Roynes, s'estant aduisé, commença à luy mettre quelques scrupules en la teste sur son mariage, à cause du premier qui auoit esté contracté avec Artus, & ce qui pouloit encores ce Cardinal à persuader ce diuorce au Roy, c'estoit la haine qu'il portoit à Charles V. nepueu de Catherine, pour l'opinion qu'il auoit que Charles auoit empêché qu'il ne fust créé Pape.

D'ailleurs, le Roy aimoit si esperduement Anne de Bolen, que l'on croyoit toutefois communement estre sa fille. Plusieurs Theologiens des Vniuersitez de la Chrestienté escri- 34 uirent sur ce subject, les vns contre Henry VIII. les autres à son aduantage, eslans gaignez par argent. Entre autres choses ceux qui luy contrarioient disoient, que ceste separation estoit fondee sur la loy diuine, pource que Onan auoit espousé Tamar, qui auoit esté femme de son frere aîné : & la loy Mosaique veut qu'un frere prenne la femme de l'autre decedé sans enfans, afin que la race & famille soit conseruee sans passer en l'estrangere, si bien que ce mariage estoit estably sur la loy positive. Mais en fin Henry 8 leua le masque, & despescha à Rome à Clement 7. Estienne Gardiner, & François Brien pour traiter du diuorce. Le Pape remit le iugement de cecy à certains Cardinaux, & Theologiens, qui responderent que le mariage estoit bon, & valable, & ne pouoit estre dissout. Toutefois Gardiner obtint du Pape pour iuges deux Cardinaux, à sçauoir celuy de Campege, & celuy d'Yorc, & que la cause se debattroit en Angleterre. Mais apres qu'on eut longuement disputé, & plaidé pour l'un, & pour l'autre, la Roynes appella au Pape, disant que les iuges estoient obligez au Roy, l'un pour l'Euesché de Vinton, & l'Archeuesché d'Yorc : l'autre pour l'Eglise de Sarisbury. A ceste cause le Pape deffendit aux deux Cardinaux de proceder outre : & ordonna que Paul Capizucco de la Rete, luy en feroit le rapport. Le Roy voyant la grande difficulté de l'affaire, & le peu d'espoir d'un bon succez, tourna son desdain contre l'Archeuesque d'Yorc, qu'il auoit mis en ceste peine, & le despoüilla de l'Estat de Cheualier, & de l'Euesché, & luy osta mesme un Palais qu'il auoit basti à Londres, & le confina premierement en un village, puis en son Eglise d'Yorc, & depuis ayant ordonné qu'on le menast prisonnier à Londres, il mourut miserablement en chemin. Mais pour tout cela, il ne laissoit pas d'aymer autant que iamais Anne de Bolen, & d'enuoyer Cranmer à Rome pour deffendre sa cause.

Cependant Guillaume Varan Archeuesque de Cantorbery, qui auoit tousiours deffendu comme il deuoit, le mariage de la Roynes, vint à mourir, & le Roy à la sollicitation de Thomas Bolen pere putatif d'Anne, & mesme de ladite Anne, mit Cranmer en la place du deffunct, à la charge de prononcer, mesme contre l'autorité du Pape, le mariage nul, & illegitime. Aussi tost il vint iusques là que de faire accuser les Ecclesiastiques d'auoir recogneu l'autorité des Legats estrangers & declara que tous leurs biens luy estoient confisque, tellement qu'il induisit le Clergé, abandonné des Barons, & des Archeuesques, à le supplier de se contenter pour peine de ceste faute, de quatre cens mille escus, en leur quit- tant le reste, & ce fut de là que prit origine le titre qu'il prit de chef & primat de l'Eglise d'Angleterre. En fin il espousa secretement Anne de Bolen, donnant à entendre au Prestre nommé Roland, qu'il auoit permission du Pape de ce faire. Aussi tost apres Catherine fut confinee en certain lieu escarté, avec trois Damoiselles, & incontinent la Cour fut pleine de flateurs, qui pour plaire à Anne commencerent à se mocquer des Prestres, du Pape, & des Sacrements.

Les heretiques d'autre part voyans ceste occasion s'effayerent en toutes sortes de prou- 35 uer leur nouvelle opinion, & pour ce, ils firent induire le Roy à se faire iurer l'obeyssance qu'on promettoit au Pape, pour obtenir cela plus facilement, ils se contenterent qu'il adjoustast au serment ceste clause, *Entant que la parole de Dieu le permettroit*. Et avec cet artifice ils firent tresbucher Iean Fischer Euesque de Rocestre, plein de doctrine, & pieté. Et le serment estant presté, Cranmer comme ne recognoissant plus le Pape, prononça la sentence du diuorce entre le Roy & la Roynes, sur la fin de l'an 532. Ce que le Pape Clement ayant entendu prononça, mais trop tard, la sentence diffinitive en faueur de la Roynes, declarant les secondes nopces illegitimes. Lors Henry huitiesme (à qui Elisabeth nasquit cependant) 36 de despit qu'il eut, osta à Catherine, & à Marie sa fille tous ornemens, & titres, & voulut que les Barons iurassent de tenir les secondes nopces pour legitimes, & la fille qui en estoit née pour heritiere du Royaume, & d'en tenir Marie pour forclosé comme illegitime. En mesme temps il fit mettre en prison Iean Fischer, & Thomas Morus, & plusieurs Religieux de l'Ordre saint François qui ne pouoient souffrir ce scandale, & fit ordon-

ner en vñe Assemblée des Estats du Royaume, que personne, sous peine d'estre déclaré criminel de lèze Majesté, n'eust à recognoistre l'autorité du Pape en Angleterre, ou Irlande, & qu'on le tint luy-mesme pour chef de l'Eglise Anglicane en terre, & que pour ceste cause on luy payast les annates, & les decimes des benefices, mesme que ce fust luy qui decidast de tous débats, & reformast les abus, & qu'on appellast plus le Pape qu'Eueſque de Rome simplement.

- 37 En fin l'an 1538. il obtint la confiscation de tous les Monasteres de l'un & de l'autre sexe, & en distribua les reuenus à plusieurs gentils-hommes du Royaume, afin de les rendre interezes en ce fait. Tellement que les Monasteres finirent en Angleterre enuiron l'an 1540. & l'on tient que le nombre des Eglises ruinees estoit de dix mille. Finalement ce Roy mourut l'an 1546. & ayant pour fils Edouard VI. le laissa successeur du Royaume, & Edouard prit avec le titre de Roy celui de Chef de l'Eglise Anglicane, & ce fut sous cestuy-cy que la Religion Catholique demeura toute esteinte en Angleterre, par le moyen d'Edouard Seimer heretique Zuinglien, qui estoit oncle du Roy, qui introduisit aux chaires les Ministres Lutheriens, & autres, iusques à forcer les ieunes gens à les ouyr : & deslors il fut ordonné que l'on celebreroit l'office diuin en langue vulgaire, comme on fait encor.

- Cependant Marie fille de Henry huictiesme & de Catherine, maintint toute seule la Messe, & le saint Sacrement en sa chapelle : Edouard mourut dans peu d'annees apres son couronnement, & Marie ayant vaincu le Duc de Nortumbrie, & leane fille du Duc de Suffolk fut receüe Roïne. Et incontinent elle fit annuler le titre de chef de l'Eglise Anglicane, remit les causes spirituelles au iugement de l'Eglise : & Cranmer fut le premier condamné par ceste voye, & fit sortir aussi tost d'Angleterre enuiron trente mille heretiques de diuerses nations, & sectes, & annulla toutes les loix faites par Edouard contre l'Eglise Catholique, & pour aduancer mieux la vraye Religion, se maria avec Philippes Prince d'Espagne. Mais ainsi qu'elle travailloit pour remettre ce que les autres auoient destruit, elle deceda dans la sixiesme annee de son regne. Elizabeth fille d'Anne de Bolen luy succeda, mais craignant
38 que le Pape, & les Catholiques ne debatissent la succession, elle fut couronnee avec les ceremonies Catholiques : mais elle chercha de maintenir son autorité par le moyen de l'heresie, & ayant premierement imposé silence aux Predicateurs Catholiques, elle ouurit les ports, & les portes de l'Isle aux heretiques. Elle fit apres assembler les Estats, où elle voulut estre renommee Souueraine tant au spirituel qu'au temporel en tous ses Estats, & voulut que chacun la recogneust pour telle, excepté les Barons, afin qu'ils ne se missent en armes, & ne s'unissent avec le Clergé, & la peine à qui refuseroit de iurer estoit, la premiere fois de la confiscation de tous les biens, & de prison perpetuelle, & la seconde de la vie. Par ce moyen elles'appropriast les annates & les decimes, abolit la Messe en son pays, & tout exercice de la Religion Catholique, ordonnant pour peine à ceux qui oyroient la Messe, ou administreroient le saint Sacrement, qu'ils payeroient la premiere fois deux cens escus, ou tiendroient prison six mois, & pour la seconde quatre cents escus, ou seroient vne annee entiere en prison, & la troisieme que tous leurs biens seroient confisquezz, & eux detenus en prison à perpetuité. Et l'on vid soudain le lendemain de la feste saint Iean Baptiste, l'an 1559. cesser les Messes, & le diuin office par tout le Royaume.

Et pource qu'elle eut aduis de quelques Colleges & Seminaires establis par le Pape Gregoire treziesme pour les Catholiques Anglois qui auoient quitté l'Angleterre, pour cause de persecution, se refugioient pour y estre sustentez, instruits, enseignez, & rendus capables de maintenir & deffendre la Religion Catholique contre toute sorte d'heresie, se figurant que dans lesdits Seminaires on y viuoit contre les loix d'Angleterre, & que l'on y tramoit la ruine de son Estat, & que l'on y nourrissoit des hommes factieux & rebelles, propres à susciter le trouble en son Royaume : Fit faire vn Edict fort seuer, par lequel il citoit expressement enjoint à tous ses subiets refugiez d'Angleterre pour frequenter lesdits Colleges & Seminaires, de retourner en leur pays natal & à tous peres de familles ses sujets, deffences tres-rigoureuses de ne plus permettre à leurs enfans la sortie du Royaume pour aller esdits Seminaires estrangers, & dans dix iours au plus apres la publication du present Edict, seront tenus lesdits peres de famille de deliurer entre les mains de l'ordinaire des lieux, les noms & qualitez de ceux qui auroient quitté leurs pays pour se rendre en compagnies estrangeres desdits Colleges, sans aucune licence & permission de sa Majesté, à ce qu'il leur soit signifié, que si dans quatre mois apres la publication dudit Edict, ils ne quittent lesdits Colleges & Seminaires estrangers & ne retournent au Royaume, il est deffendu sous de tres-griefues peines à tous leurs parens de leur faire tenir aucunes sommes de deniers ny moyens d'assistances pour leur viure & entretien dans lesdits Colleges, & hors leur pays natal, & à tous marchands sous les mesmes peines, de receuoir aucunes lettres

lettres de change pour leur faire toucher aucune somme de deniers.

Ces Seminaires commencerent aussi-tost que la furie du Calvinisme s'alluma contre les Catholiques d'Angleterre, & que pour l'atroce persecution qu'on leur faisoit ressentir sous le regne de la Roynie Elizabeth, les vns furent bannis, & les autres pour euitier la mort se refugierent en diuers endroiçs de France, d'Italie, & de Flandres, pour y viure en assurance, deplorans la misere de leur pays. En ce temps seolt au S. Siege de S. Pierre, Gregoite 13. du nom qui ayant appris la persecution allumee en Angleterre contre les Catholiques, & comme plusieurs auoient les mains sanguinaires des Calvinistes, en quittans leur patrie, & se refugians à Rome, en Flandres, & particulièrement en la ville de Reims en Champagne, desirant leur subuenir en leur affliction & vrgente necessité, établit quelque nombre de Colleges ou Seminaires en certains Royaumes & pays, lesquels il réta de reuenus & rentes nécessaires pour le viure & entretien nécessaire de certain nōbre de pauures estrangers réfugiés de leurs pays pour cause de persecution & de Religion: Entre lesquels Seminaires il en fit fonder vn en la ville de Rome, pour la natiō Angloise, & vn autre en la ville de Reims, fort frequēté desdits Anglois, plus trois autres, l'vn à Lorette pour la nation Sclauone eschappée de la tyrannie des Turcs, & vn autre encore à Rome pour la nation Allemande: & derechef vn troisieme pour la nation Grecque, en tous lesquels il y établit nombre de sçauans hommes pour instruire lesdits Anglois & autres estrangers en la vraye doctrine de la foy Catholique, Apostolique & Romaine en toute pieté & probité de mœurs, d'où sont finalement sortis de grands soldats de Iesus Christ, qui ont depuis espanché leur sang, & souffert le martyre en Angleterre & ailleurs en combattant les erreurs Calvinistes.

Or entre les diuerses sectes d'heretiques qui regnent en Angleterre, & qui sont tous ennemis du Pape & des Catholiques, il y en a deux principalement.

La premiere est la secte des Calvinopapistes, ainsi appelez, pourautant qu'ils ont quelque ressemblance & conformité avec les Catholiques en choses diuines & ceremonies de Religion: car ils ont leurs Archeuesques, Euesques, Doyens, Archidiacres, & tous les ordres & degrez Ecclesiastiques, iouissans des biens & reuenus, qui leur ont esté assignez par la pieté de leurs ancestres; ils celebrent aussi tout l'office diuin, & chantent es Eglises selon les heures du iour ordinaires & accoustumées: c'est pourquoy pour ce sujet, quelques-vns les appellēt Calvinistes mols & delicats, attendu la Religion: mais si on considere leurs mœurs & leurs humeurs, ils sont plus cruels que les Turcs enuers les Catholiques.

La seconde secte d'heretiques qui regne en Angleterre, est celle des Calvinistes, appelez Puritains, lesquels ne veulent rien auoir de commun avec les Catholiques, & pource ils rejettent & renoncent à toute sorte de noms, & offices Ecclesiastiques vsizez en la Religion Catholique, comme il se void par la belle Reformation de la Religion qu'ils ont mise en auant, dans laquelle ils publient calomnieusement auoir remarqué en la Synagogue des Calvinopapistes, cent chefs au moins de superstition Papistique, comme ils disent.

Il y a encore des Anabaptistes tollerez en Angleterre, comme en Allemagne, qui en somme s'accordēt tous avec les deux sectes precedentes, en la hayne qu'ils portent au Pape, & en la persecution des Catholiques: car ils sont tous puissans; & quoy qu'ils soient tous les iours en diuorce les vns contre les autres pour les differens de la Religion, & qu'ils inuectiuent & escriuent iournellement contre leurs articles discordans de Religion, ils ne laissent neantmoins de conspirer à toute heure la ruine & extinction de la vraye & Catholique Religion, & s'accordent ensemble quoy qu'ennemis, comme Herodes & Pilate pour destruire l'Eglise de Iesus-Christ, & persecuter cruellement ses membres.

Ce seroit chose superflue de traicter icy dauantage du procedé que l'on a tenu iusques icy contre les Catholiques en Angleterre, puisque toute l'Europe en est abreuee, & les histoires Ecclesiastiques modernes remplies de telles cruautez & impietez.

Il me suffira de dire que Iacques VI. luy ayant succédé, il a esté dressé vn liure de Constitutions Ecclesiastiques, qui monstre assez la Religion qu'on y tient. Je vous en diray donc les poinçts principaux en peu de paroles.

Premierement il est dit que le Roy d'Angleterre sera recogneu en tous ses Estats pour chef de l'Eglise Anglicane, & que celui qui en dbutera, soit tenu pour excommunié, de 39. meisme que celui qui dira que la forme de la Liturgie établie en l'Eglise Anglicane, & comprise au liure des prieres publiques, & de l'administration des Sacremens, est vn seruice corrompu, superstitieux, & illicite: & pareillement quiconque dira que quelqu'un des 39. articles arrestez au Synode tenu à Londre l'an 1562. est superstitieux, ou erronné en quelque sorte, comme aussi celui qui blasmera les ceremonies d'Angleterre, & la discipline des Archeuesques, Euesques, Doyens, & Archidiacres, & la façon de les ordonner: & semblablement ceux-là sont excommuniiez par ordonnance, qui asseureront qu'il est permis à

quelque ministre que ce soit, ou à vn'lay, ou à quelques vns des deux ordres assemblez, d'ordonner des choses Ecclesiastiques sans l'autorité du Roy.

Il est aussi dit que l'on obseruera les Dimanches, & les autres iours de feste, suiuant l'institution de l'Eglise Anglicane, c'est à sçauoir en oyant lire, & prescher la parole de Dieu; en faisant des prieres publiques, & priees, & en confessant ses pechez à Dieu.

Que la Liturgie publique sera leue, ou chantee aux iours, & vigiles marquees au liure des prieres publiques.

Que la Litanie sera recitee par les Recteurs, Vicaires, Ministres, ou Curez en toutes les Eglises Cathedrales, & Collegiales, & en toutes les Chappelles, & mesmes que tous les Mercredis, & Vendredis, encores qu'il ne soit pas Feste; le Ministre sera prest aux heures ordonnees pour prier Dieu dans l'Eglise, ou la Chappelle, & ayant appelle le peuple avec la cloche, recitera la Litanie contenuë audit liure, & que tous les peres de famille, principalement qui demeurent seulement loing de l'Eglise demie lieuë, seront obligez d'y assister, ou d'y enuoyer au moins quelqu'un de leur maison, capable d'assister le Ministre durant les prieres: que la forme & les ceremonies de la Liturgie, & de la Cene seront obseruees par toutes les Academies, & qu'en icelles les escoliers, & prefects vseront de surplis en leurs Eglises, & Chappelles, aux Dimanches, & iours de Festes: que tous se mettront à genoux lors qu'on dira la confession, & les Litanies, & autres prieres: & qu'ils se tiendront debout lors qu'on dira le symbole.

Que tous les Oeconomies des Parroisses, après auoir pris conseil du Ministre pour ce regard, tiendront prest la quantité du pain de seigle & de bon vin, qui semblera necessaire pour le nombre des comunians, au iour de la Cene qui sera ordonné: aux despens toutesfois des Parroissiens, & que ce vin sera porté sur la table en vn vaisseau, qui sera pour le moins d'estaing.

Que l'on fera pour le moins la Cene trois fois l'annee: que ceux qui administreront la Cene aux Eglises Cathedrales, seront parez de leurs Chappes aux festes solennelles.

Que ceux qui sont publiquement recogneus atteints de quelque peché qui leur est ordinaire, seront rejettez de la Cene.

Que tous fassent la Cene en leurs Parroisses.

Que les peres ne pourront estre parrains de leurs enfans, ny pareillement les enfans incapables de la Cene.

Qu'on fera le signe de la Croix sur les enfans en les baptisant, sans aduoüer toutesfois que ce signe soit de l'essence du baptême, & que l'enfant est fait Chrestien sans le signe de la Croix, aussi-tost qu'on a dit, *Je te baptise au nom du Pere & du Fils & du S. Esprit.*

Que quand on deura ordonner des Ministres, il faudra enjoindre vn ieusne, & qu'un Euesque ne sera pas en mesme iour, & tout à la fois vn homme Diacre, & Prestre: & outre ce, qu'aucun ne pourra estre fait Diacre, ny Prestre, s'il n'a quelque lieu arresté pour exercer le Diaconat, ou la Prestrie en quelque Eglise Cathedrale, ou Collegiale, ou s'il ne monstre qu'il est designé Chappellain en quelque College de Cambrige, ou d'Oxford, ou bien qu'il est Maistre aux Arts depuis cinq ans.

Que si vn Euesque reçoit quelqu'un qui n'ait aucun de ces tiltres, il sera obligé de luy fournir tout ce qui luy sera besoin, iusques à ce qu'il l'ait pourueu en quelque Eglise.

Que s'il refuse de ce faire, il sera suspendu pour vn an, par l'Archeuesque assisté d'un Euesque, du pouuoir d'ordonner des Diacres, & des Prestres.

Qu'on ne receura personne sans l'interroger, & examiner: qu'on ne donnera les Ordres à aucun, si premierement il n'accorde ces trois articles, que le Roy est Souuerain en Angleterre, tant pour le regard du spirituel, que du temporel: que le liure de la publique Liturgie ne contient rien de contraire à la parole de Dieu, & qu'il suiura ceste forme aux prieres publiques, & en l'administration des Sacrements: & en troisieme lieu qu'il approuue le liure des articles de la Religion arrestez au Synode tenu à Londres l'annee 1562.

Que ceux qui auront receus les Ordres ne seront admis aux benefices sans de bons tesmoignages de leur suffisance & bonne vie.

Que ceux qui deuront estre admis aux benefices, iureront que leur faict est sans simonie, qu'on dispensera rarement de tenir plusieurs benefices.

Que les Doyens des Eglises Cathedrales seront obligez à y faire deuë residence.

Que les Doyens, & Prebendaires qui resident aux Eglises Cathedrales, sont obligez de prescher, & que les Prebendaires Beneficiez sont tenus de demeurer en leurs benefices.

Que les Beneficiez legitimement absents de leurs benefices sont obligez d'y auoir vn Curé qui presche.

Que les Ministres ne seront admis pour Curez, si ce n'est par l'approbation de l'Euesque, ou de l'ordinaire.

Que les Gloses, & les Paraphrases sont deffendues en la lecture publique des Écritures aux Ministres qui ne sont pas admis à la predication.

Que la forme de la priere sera imitée des Predicateurs au commencement de leurs Sermons.

Que la lecture des prieres publiques, & l'administration des Sacrements deux fois l'année, est enjointe aux Ministres purement Predicateurs, & que les Ministres purement non Predicateurs administrent les Sacrements avec efficace.

Que la confirmation sera celebree en la visite que les Euesques feront de leurs Dioceses, de trois en trois ans.

Que les Cathecumenes seront offerts à l'Euesque estant en visite, pour estre confirmez.

Que les Ministres n'espouseront aucun sans qu'il y ait eu des bans, ou que les espoux ayent esté legitimentement dispensez.

Que les Curez, Vicaires, & Recteurs aduertiront les iours de Dimanche le peuple, s'il y a quelques festes ou vigiles en la sepmaine suivante.

Que tout Ministre qui aura la permission de prescher, s'essayera de reduire les Catholiques refusans qui seront dans la Parroisse, à la Religion d'Angleterre.

Que les Ministres ne refuseront à personne le baptisme, & la sepulture, sinon que le defunct soit mort excommunié pour quelque grand crime.

Que le Ministre ne pourra différer le baptisme en l'extreme necessité.

Que les Ministres seront obligez de garder vn registre de ceux qui seront baptisez, qui se marieront, & qui seront enterrez.

Qu'on ne pourra prescher, ny faire la Cene aux maisons particulieres, & que les Ministres ne pourront aussi celebrer de leur mouuement particulier les ieusnes publics, & les propheties appelees exorcismes, & ne pourront aussi faire des assemblees particulieres.

Que celui qui sera vne fois Diacre, ou Prestre ne pourra pas apres se rendre lay, & quitter ses Ordres.

Qu'on enseignera ny publiquement, ny en particulier sans congé de l'ordinaire.

Que les Curez habiles seront preferez aux autres par l'ordinaire.

Qu'il y aura dans les Eglises des liures de prieres publiques aux despens des Parroissiens, comme aussi des Bibles en grand volume, & des liures d'homelies approuuez en Angleterre.

Qu'il y aura aussi des fonds de baptisme, & des tables pour la Cene dans les Eglises, comme aussi des chaires propres pour la predication, & des troncs pour les aumosnes.

Qu'on visitera les Eglises de 3. en 3. ans, & qu'on signifiera les choses dont elles ont besoin aux Commissaires establis par le Roy sur ce fait.

Qu'on fera des inuentaires des fonds, & biens des Eglises, & qu'ils seront gardez aux archives des Euesques.

Que les Oeconomies, & Inquisiteurs des Eglises, où les assistans ne permettront pas qu'on iouë des Comedies, qu'on banquette, qu'on tienne la Cour seculiere, ny qu'on face la monstre des soldats, ou telle autre chose prophane, aux Eglises, Chappelles, ou Cimetieres, ny qu'on sonne aussi superstitieusement les cloches aux festes qui sont supprimees par le liure de la Liturgie publique, ny en leurs villes.

Que le mariage contracté dans les degrez prohibez sera nul.

Que ceux qui n'auront atteint l'aage de 20. & vn an, ne pourront contracter mariage sans le consentement de leurs parens.

Que les veufues ne seront pas obligees d'auoir le consentement de leurs parens, lors qu'elles se voudront remarier.

Qu'il ne faut pas ouyr la simple confession des parties pour deffaire vn mariage.

Que les sentences du diuorce, & de la separation ne se donneront qu'aux sieges de Iustice: & que de ceux qui seront ainsi separez, l vn ne se pourra marier ailleurs, tandis que l'autre sera en vie.

Qu'on descourra aux Cours ceux qui ayans atteint l'aage de 14. ans ne communieront pas la feste de Pasques; de mesme aussi que ceux qui troubleront les prieres, & se porteront insolamment aux Eglises.

Qu'il faut denoncer aux Ministres les pechez notoires, mais qu'il est deffendu de descourir ceux qui auront esté confessez en particulier.

Que les Oeconomies seront obligez de deferer ceux qui sont refusans de suivre leur Religion.

Que les sentences qui concerneront les Ministres pour le regard de les priuer de leurs be-

nefices, ou offices, seront seulement prononcées par l'Archeuesque. Voyla à peu pres les poincts principaux de ces constitutiōs Ecclesiastiques formées à plaisir, contraires en beaucoup de lieux à celles des Calvinistes qui rejettent toutes les ceremonies qui sont observées en Angleterre. Au reste les Catholiques n'y osent faire exercice de leur Religion, & afin de viure paisiblement, sont taxez selon leurs moyens à tant pour année. Mais pource que le Roy d'Angleterre assigne beaucoup de gens de sa Cour sur ceste exactiō, ceux à qui l'assignation est donnée, conviennent avec les Catholiques à certain prix pour vne fois, & ne leur demandent apres aucune chose.

Il est deffendu pareillement aux Calvinistes de faire exercice de leur Religion. Mais ceux-cy ne payent rien pour viure paisiblement en Angleterre, pource qu'ils s'accordent avec les autres en ce qui touche le Pape; tellement que les seuls Catholiques y sont foulez. C'est tout ce qu'on peut dire pour ce regard. Et puis que nous avons traité assez au long de toutes les parties, & conditions de ce Royaume, il faut mettre fin à ce discours, pour venir à celui de l'Ecosse, apres avoir représenté les noms des Roys d'Angleterre: & les Archeueschez & Eueschez anciens de ce Royaume.

ROYS D'ANGLETERRE.

40 **L'**HISTOIRE d'Angleterre est toute pleine de confusion iusques à Egbert, qui regna l'an 801. Et pource, ie ne feray point de difficulté de passer sous silence tous les autres qui l'ont precedé, & de commencer par cestui-cy.

L'an 801. Egbert I. commence, de regner, il regne 37. ans, meurt l'an 828.

Il y a pour successeurs ceux qui s'ensuiuent

Edelphe regne 20. ans, & meurt l'an 858.

Ethelbald regne 5. mois.

Ethelbert regne 5. ans, meurt l'an 863.

Ethelrede regne 9. ans, meurt l'an 872.

Alured regne 28. ans, meurt l'an 900.

Edouard l'ancien regne 24. ans, meurt l'an 924.

Adelstan regne 16. ans, meurt l'an 940. ayant subiugué toute l'Isle.

Edmond regne 6. ans, meurt l'an 946.

Eldrede regne 9. ans, meurt l'an 953.

Eduin regne 4. ans, meurt l'an 959.

Edegar regne 16. ans, meurt l'an 975.

S. Edouard Martyr regne 3. ans, est tué par les embusches de sa marastre Alfrede, & depuis mis au nombre des Saints: sa mort fut l'an 978.

Ethelrede regne 38. ans, meurt l'an 1016.

Edmond costé de fer, regne 1. an meurt l'an 1017.

Canut Roy de Noruege, & de Dace, & depuis Roy d'Anglererre, ayant chassé Edmond, & Edouard enfans d'Edmond costé de fer, regne en Angleterre 20. ans, meurt l'an 1037.

Harald regne 4. ans, meurt l'an 1041.

Canut 2. regne 2. ans, meurt l'an 1043.

Edouard S. Roy, regne 23. ans, meurt l'an 1066.

Harald II. regne 1. an, meurt l'an 1067.

Guillaume Duc de Normandie chasse Ha-

rald, & se rend maistre de l'Angleterre, regne 21. an, meurt l'an 1088.

Guillaume le Roux regne 13. ans, meurt l'an 1101.

Henry I. regne 35. ans, meurt l'an 1136.

Estienne Comte de Bologne, nepveu de Henry, se saisit du Royaume, regne 19. ans, meurt l'an 1155.

Henry 2. regne 35. ans, meurt l'an 1190.

Richard 1. regne 10. ans, meurt l'an 1200.

Iean regne 17. ans, meurt l'an 1217.

Henry 3. regne 56. ans, meurt l'an 1272.

Edouard 1. regne 35. ans meurt l'an 1308.

Edouard 2. regne 19. ans, meurt l'an 1317.

Edouard 3. regne 51. an, meurt l'an 1378.

Richard 2. regne 22. ans, meurt l'an 1400.

Henry 4. regne 14. ans, meurt l'an 1414.

Henry 5. regne 9. ans, meurt l'an 1423.

Henry 6. regne 38. ans, meurt l'an 1461.

Edouard 4. regne 23. ans, meurt l'an 1484.

Edouard 5. regne 1. mois, meurt 22é de 11. ans.

Richard 3. regne 2. ans, meurt l'an 1486.

Henry 7. regne 24. ans, meurt l'an 1509.

Henry 8. regne 38. ans, meurt l'an 1547.

Edouard 6. regne 6. ans, meurt l'an 1553.

Marie avec Philippe d'Autriche regne 5. ans 3. mois, meurt l'an 1558.

Elizabeth regne 55. ans, meurt l'an 1603.

Iacques Roy d'Ecosse luy a succédé au Royaume d'Angleterre, & regne à present.



E toute ancienneté ce Royaume d'Angleterre est lié d'Alliance avec les Rois & les plus grands Princes de la Chrestienté, comme avec les Roys de France, d'Espagne, d'Allemagne, Dannemarch, Suede, Hongrie & autres Souuerainetés. 41.

Et pour ne rapporter que celles que la Couronne d'Angleterre a contractées par mariages avec celles de France & d'Espagne.

Avec la France, premierement sera remarqué qu'en l'an 404. Charles surnommé le Simple Roy de France, fut marié deux fois, & eut pour seconde femme Ogine, fille d'Edouard, & sœur d'Adelstam & d'Edmond Roys d'Angleterre : lequel mariage fut fait enuiron ledit an neuf cents quatre, & d'iceluy est issu Louys troisieme du nom, dit d'Outre-mer, Roy de France.

Hugues surnommé le Grand, Duc de France & Comte de Paris, pere de Hugues Capet Roy de France, eut pour seconde femme Ethulde (qu'aucuns appellent Elizabeth) fille & sœur des susdits Roys Edouard, & Adelstam: Ce mariage fut contracté l'an 926. mais d'iceluy ne sortirent aucuns enfans.

Eustache Comte de Bologne, fils d'Estienne, Roy vsufructier d'Angleterre, espousa enuiron l'an 1137. Constance de France, fille du Roy de France Louys le Gros; de leur mariage ne vint aucune lignee: Constance espousa en secondes nopces Raimond 3. du nom Comte de Tholose.

Henry Couronné Roy d'Angleterre, fils du Roy Henry second espousa en l'an 1163. Marguerite troisieme fille de Louys le ieune, septiesme du nom, Roy de France, & de la Roine Constance de Castille sa seconde femme; ils eurent vn seul fils, qui ne vesquit que trois iours.

Richard, surnommé Cœur de Lyon, Roy d'Angleterre 1. du nom, accorda en mariage enuiron l'an 1189. Alix de France, 4. fille de Louys le ieune, Roy de France: mais il n'eust effect, & pource Richard espousa depuis Berengaire de Nauarre, & Alix, Guillaume Comte de Ponthieu.

Iean second du nom, Duc de Bretagne, Prince du sang royal de France, espousa Beatrix d'Angleterre, fille de Henry troisieme Roy d'Angleterre. De ce mariage solennisé à S. Denys en France l'an 1259. en presence de S. Louys Roy de France, & du meisme Roy Henry 1. 1. sortirent deux fils & trois filles.

Emond Comte de Lancastre, fils de Henry troisieme Roy d'Angleterre, espousa Blanche d'Artois, Princesse du sang de France, fille de Robert de France, premier Comte d'Artois & de Mahaud de Brabant sa femme. Blanche d'Artois auoit en premieres nopces espousé Henry Roy de Nauarre.

Edouard premier du nom, Roy d'Angleterre, estant veuf de Leonor de Castille sa premiere femme, espousa l'an 1299. Marguerite de France, fille de Philippe le Hardy, Roy de France, & de Marie de Brabant sa seconde femme, de ce mariage sortirent deux fils & vne fille.

Edouard second du nom, Roy d'Angleterre, espousa en l'an 1309. à Bologne sur la mer, Isabelle de France, fille puisnee de Philippe le Bel, Roy de France, & de la Roine Ieanne de Nauarre sa femme: mariage honoré de la presente de quatre Rois, assauoir du meisme Philippe le Bel, de Louys Roy de Nauarre son fils, du Roy des Romains, & du Roy de Sicile. Du Roy Edouard 2. & d'Isabeau sa femme fut fils Edouard 3. Roy d'Angleterre.

Iean surnommé le Vaillant, Duc de Bretagne 5. du nom espousa en l'an 1341. Marie d'Angleterre, fille d'Edouard 3. du nom Roy d'Angleterre, de leur mariage ne vindrent enfans.

Edouard Duc d'Yorch, fils aîné d'Edmond, Comte de Cambrige, qui estoit fils du Roy d'Angleterre Edouard 3. estant encore fort ieune fut accordé en mariage avec Beatrix de Portugal, fille vniue de Ferdinand Roy de Portugal, yssu du sang de France: Mais ce mariage accordé enuiron l'an 1381. n'eust effect. Beatrix ayant espousé depuis Iean 1. du nom, Roy de Castille.

Iean 1. du nom Roy de Portugal, surnommé de bonne memoire, yssu du sang royal de France, espousa Philippe de Lancastre, fille de Iean, Duc de Lancastre, qui estoit l'un des fils puisnez d'Edouard 3. du nom, Roy d'Angleterre. Ce mariage fut celebre l'an mil trois cents octante sept.

Richard 2. du nom Roy d'Angleterre, fut conioint par mariage, dont le traicté se fit l'an 1395. avec Elizabeth de France, 5. fille de Charles 6. Roy de France: en secondes nopces elle espousa Charles Duc d'Orleans, lequel de Marie de Cleues sa 2. femme eut Louys 8. Roy de France.

surnommé le Juste, Roy tres-Chrestien de France & de Nauarre, & ce en la ville de Com-
piegne en Picardie.

ARCHEVESCHEZ D'ANGLETERRE.

EN Angleterre il y auoir anciennement deux Archeuesques, qui auoient sous eux plu-
sieurs Suffragans Euesques: comme il se void au liure nouuellement mis en lumiere
par Aubert Chanoine d'Anuers, intitulé, *Notitia Episcoporum Orbis Christiani*, en la forme
qui suit. 42

ARCHIEPISCOPATVS CANTVARIENIS.


CANTERBERIA.

Londinensis *London.*
Vintoniensis, *Vinton.*
Conuentrensis, & Lichfeldensis iuncti. *Co-*
uentre.
Sarisburenensis *Sarisburi.*
Bathoniensis, & Vvellenensis, iuncti.
Lincolniensis *Lincolne.*
Petroburgensis.
Exoniensis.
Closcestrensis *Clocestre.*
Herefordensis. *Herefors.*
Norvvicensis, siue Nordouicensis. *Norvvich.*

Eliensis.
Rossensis *Rothesire.*
Cicestrensis *Chichestre.*
Oxonienensis. *Oxford.*
Vvigoriensis. *Vvorchester.*
Bristoliensis. *Bristow.*
Meneuensis, ad fanum S. Davidis in Vvallia,
siue Cambria.
Bangorensis, siue Banchorensis, in Vvallia.
Landaffensis, siue Landauenensis. *ibid. Landaff.*
Asaphensis, siue Eluuenensis, *ibid.*

ARCHIEPISCOPATVS EBORACENSIS YORK.

Bunelmensis.
Cestrensis. *Chestre.*
Carleoleensis, seu Carlioensis.



QUALITE' DV PAYS.

L'Escoffe est aspre, & montueuse, & n'est pas de beaucoup si fertile, que l'Angleterre, mais elle abonde plus en poisson.

La mer qui la borde porte grande quantité d'huytres, de harans, de corail, & de coquilles, & parmy les vallees il y a plusieurs lacs, marests, riuieres, & fontaines où l'on trouue grande quantité de poisson. Et la plus grande partie de ces lacs vient de la montagne Gramptie, où sont aussi les sources de trois riuieres qui portent batteaux, c'est à sçauoir la riuiere de *Choyd*, iadis *Aleuth*, qui se descharge dans la mer d'Irlande: celle de *Zam*, qui surpasse en grandeur toutes les autres riuieres d'Escoffe, & qui vient partie du pays d'Argille, d'un lac de mesme nom, partie du pays de *Strather*, & se desgorge dans la mer Germanique, & celle de *Forthea*, qui s'allant rendre en la mer d'Allemagne fait ce grand golphe, qui est appelé vulgairement la mer d'Escoffe.

Il y a aussi, outre le Zude qui separe l'Escoffe de l'Angleterre, les riuieres de *Spays*, *Nesse*, & *Louch*.

Il y a aussi des montagnes qui ont quelques petites plaines, où il y a de fort bons pastis, & mesme il y en a quelques-vns qui portent le marbre, & l'albastre.

Les forests y sont pleines de bestes fauves, & noires, principalement celle de Caledoine, où il y a aussi des bœufs blancs, qui sont farouches, qui ne peuuent estre domptez en aucune sorte, & leur crin est comme celui des Lyons.

Il y a vn certain lieu nommé l'Aire des charbons, qui abonde en bitum terrestre, & brulle quelquesfois avec grand dommage des habitans.

Dauantage l'Escoffe a des mines d'or, d'argent, de vis argent, de plomb, & de cuiure, & particulièrement il s'est trouué vne mine d'or en Craufort, d'où l'on tire l'or sans peine.

En Gollouay il y a vn lac appelé Mirtuu, dont vne partie se gele en hyuer, l'autre ne se peut geler pour froid qu'il face.

Il y a en Carite de grands bœufs dont la chair est extremement tendre, & de fort bon goust: & leur graisse a ceste particularité qu'elle coule tousiours comme de l'huyle. En *Lennos* il y a vn grand lac nommé *Loumond*, qui a plus de 24. mille pas de longueur, & 8. de largeur, où il y a 30. Isles, dont la plus grande partie est pleine de bourgs bien habitez. Il y a en ce lac 3. choses dignes de memoire, c'est à sçauoir, qu'il porte de fort bons poissons, qui sont sans aisles: que sans aucune haleine de vent il s'y leue quelquesfois de si grâdes vagues qu'elles estonnent mesme les mariniers plus hardis: & finalement vne Isle où il y a de bons pastis, mais qui flottent tousiours où le vent la pousse. En *Bathquhame* on ne void aucun rat, & si l'on y en porte de dehors il meurt aussi-tost. On tire au pays de Fife certaine pierre noire en grande quantité, fort propre à faire du feu.

Il y a à deux mille pas d'Edimbourg vne fontaine, où l'on void nager des gouttes d'huyle, qui est de telle nature, que si vous n'y prenez rien, il ne s'y en assemble pas dauantage, & quoy que vous y en preniez beaucoup, il y demeure tousiours autant d'huyle. Ceste liqueur est bonne contre les rudesses de la peau. Quant au bled, c'est tout ce que les Escoffois peuuent faire que d'en auoir pour leur nourriture.

MOEVRS ANCIENNES DES ESCOSSOIS.

On tient que les Escoffois furent iadis nommez Pictes, qui veut dire, peints, à cause qu'ils auoient autresfois accoustumé de peindre leurs corps, & faire des marques sur les bras, & sur les mains avec du feu, ainsi que font encores quelques-vns d'entre les sauages d'Escoffe. Mais ce nom ne fut pas commun à tous, veu que les deux nations, c'est à sçauoir celle des Pictes, & des Escoffois, donnerent leurs noms aux habitans de la partie plus Septentrionale de la grande Bretagne qu'ils attaquèrent, selon le lieu où chacune de ces deux nations s'arresta. Ces Pictes rendoient aussi leurs cheveux bleuz par artifice. Ils se repaissoient de chair humaine, selon le tesmoignage de saint Hierosme, & bien qu'ils trouuassent de bons troupeaux pour s'en repaistre, ils se prenoient toutesfois aux mammelles des femmes, & semblables parties, qu'ils arrachotent, & coupoient, trouuans telle viande la plus delicieuse de toutes. Mais Boëce en parle d'autre sorte, disant qu'ils estoient fort sobres au manger, & au boire, & dormoient fort peu, que tout grain leur seruoit à faire du pain, & qu'ils mangeoient ordinairement de la chassé qu'ils prenoient, ou de la chair de bœuf, mais qu'ils en vsoient d'autre sorte que les autres nations, pource qu'ils se

nourrissoient de veaux, ou les chastroient pour s'en servir au labourage, & mangeoient les vaches quand elles estoient pleines, pource que elles estoient alors plus grasses, & le poisson leur seruoit quelquefois de nourriture : qu'ils demeurèrent quelque temps sans faire autre repas iusqu'au soir qu'un bien leger desieuner, & que le soir ils faisoient bonne chere, ayans pour breuuages vne eau compoëe de thin, de mète, & d'anis, & autres bonnes herbes, & de bonne odeur, ou bien de biere : mais à la guerre l'eau pure leur seruoit de boisson, & ils portoient autant de farine qu'ils voyoient suffire pour passer la iournee. Ils mangeoient la chair à demy cuite, comme la trouuant de meilleur goust, & retenant mieux sa substance, & ils se nourrissoient aussi de poisson seiché au Soleil, s'ils ne trouuoient autre chose pour se repaistre. Ils auoient tousiours en temps de paix la teste nuë, & le poil coupé, hormis qu'ils laissoient sur le front vn petit troupet de poil. Ils alloient volontiers pieds nuds pour s'endurcir à toute sorte d'incommoditez. Leurs bas de chausse ne passoient pas le genouil, & le haut estoit de lin, ou de chanvre : leurs manteaux estoient en esté d'un drap delié, & en hyuer de laine double, & grossiere, & leur giste estoit à terre, ou sur vn banc avec vne paillasse. Les enfans n'estoient nourris d'autre lait que de celui de leurs meres. Si quelqu'une mettoit son enfant à nourrice, elle estoit soupçonnée d'adultere. S'ils estoient vaincus en bataille, ils se sauoient aux montagnes à grande course, & n'estoient à leur aise qu'ils n'eussent eu leur reuanche. Si les Gentils-hommes estoient en danger en quelque bataille, leurs subiects & seruiteurs se hazardoient pour leur sauuer la vie, ou la perdre avec eux. On plantoit sur le tombeau des Nobles autant d'obelisques qu'on auoit tué d'ennemis au combat sous leur charge. Celuy qui voyageant pour le fait de la guerre, ou estant au champ, estoit trouué sans fusil, ou n'ayant l'espee au costé, ou en la main, estoit fouetté par ignominie : & en ce temps ils estoient armez legerement de quelques corselets de fer, mais beaucoup plus de cuir bouilly, & pour les autres armes ils auoient l'arc, la lance, & l'espee. Si quelqu'un s'enalloit du champ sans congé, le premier qui le rencontroit le pouoit tuer, & ses biens estoient incontinent confisquez. Les femmes mesmes estoient enrrollées pour aller à la guerre, pourueu qu'elles ne fussent enceintes, ou trop aagees. Ainsi qu'ils sortoient pour aller combattre, ils tuoient la premiere beste rencontrée, & teignant la pointe de leur espee de son sang, en goustoient, avec esperance que ceste ceremonie leur seruoit d'heureux presage de la victoire. On noyoit ceux qui estoient trop addonnez à boire & manger. Ils vsoient de lettres hieroglyphiques, comme les Egyptiens. Voila ce qui se peut dire des mœurs anciennes.

MOEVRS DES ESCOSSOIS DE CE TEMPS.

10. **M**AINTENANT les Escossois sont de leur naturel enuieux, & superbes, & mesprisent tous les autres hommes. Ils font parade de leur noblesse, & sont si ardents apres ceste vanité que les hommes pauvres, & de bas lieu sont si effrontez que de se vanter qu'ils sont sortis du sang des grands du Royaume, & de la race royale.

Mais auant que de passer outre, il faut remarquer que les Escossois sont diuisez en ciuils, & sauages, les vns estans plus gracieux que les autres, & les derniers presque brutaux, encores que Chrestiens, & fort vaillans à la guerre, comme n'ayans aucune apprehension de la mort. Les ciuils sont ceux qui demeurent du costé du Midy, qui est nommé la haute Escosse, plus fertile que la partie Septentrionale, & les habitans sont nommez, *Gens de la terre haute* : & ceux-cy vsent presque ordinairement de la langue Angloise. Les Sauages sont ceux qui habitent du costé du Nord, & ceux-cy sont nommez, *Gens de la terre basse*. Ceux-cy retiennent les mœurs, la langue & les armes des Irlandois, dont ils ont pris leur origine. Ils ont pour leurs armes l'arc, & les fleches, & vne espee fort large, & vn poignard fort pointu.

Au reste les Escossois ont beaucoup d'esprit, & d'industrie, mais fort portez à la vengeance, & cruels lors qu'ils ont moyen de la prendre. Dauantage ils sont hardis, & courageux à la guerre, & souffrent toute sorte d'incommoditez beaucoup mieux que les Anglois : & ils ont encores cela, qu'ils sont pleins de subtilité, & ruse, & enclins à des factions, & seditions, & sur tout capables de toute sorte de sciences. On les a tenu depuis long temps pour extremement fidelles : de quoy les Roys de France, qui s'en seruent pour la garde de leurs corps, rendent assez suuant tesmoignage. Ainsi qu'il se peut voir par le discours qui suit, faisant mention de leur alliance avec la France, des secours que les Roys d'Escosse ont enuoyé aux Roys de France, & des priuileges dont jouissent les Escossois en France.

Ceste

Ceste alliance entre la France & l'Escoffe signifiee par la double bordeure de fleur de lys, qui est à l'entour du lyon en l'escu des armes du Roy d'Escoffe, fut contractée entre Charlemaigne & Achayus, l'an 791. & continuée par quarante & vn Roys de France, & 46. Roys d'Escoffe par 120. ans.

En vertu de ceste alliance plusieurs notables secours ont esté donnez par les Escossois à la France: car Achayus secourut Charlemaigne de 4000. Escossois, conduits par son frere Guillemer, qui luy seruirent en ses guerres d'Italie, d'Allemagne & d'Espagne, & de quelques sçauans Escossois pour les iniures fondees par luy.

Malcome troisieme enuoya à Hugues frere de Philippe premier Roy de France, deux mille Escossois pour le voyage de Hierusalem, qu'il fit avec Godefroy de Bouillon.

Alexandre deuziesme enuoya trois mille Escossois à S. Louys Roy de France, conduits par Patrik de Dombart comte de la Marche, pour son voyage de Leuant.

Alexandre troisieme enuoya deux mille Escossois, conduits par les comtes de Catiff & Athole, au mesme saint Louys, pour son voyage d'Affrique.

Dauid le Bruce enuoya trois mille Escossois au Roy Iean, conduits par Guillaume comte de Donglas, qui furent tuez à la bataille de Poitiers.

Robert de Stuard, gouuerneur d'Escoffe, oncle de Iacques premier, enuoya sept mille Escossois à Charles, Dauphin de France, commandez par son fils le comte de Bouchan, & Archebald de Donglas comte d'Ouicton & beau-frere du comte de Bouchan, qui gaignerent la bataille de Baugé.

Son fils Mudarque aussi gouuerneur d'Escoffe enuoya dix mille Escossois au mesme Charles estant Roy septiesme de ce nom, conduits par son frere le susdit comte de Bouchan & Archebald de Donglas dit le borgne, comte de Donglas, pere du comte d'Ouicton, & beau-bere du comte de Bouchan, qui moururent la pluspart à la bataille de Verneuil l'an 1424.

Iean de Stuard Connestable d'Escoffe l'an 1425. amena quatre mille Escossois au mesme Roy Charles, outre plusieurs bandes commandees par Dauid de Pitulor.

Depuis lequel temps les Escossois, comme tesmoignent les Histoires des deux nations, ont rendu de bons seruices à cet Estat, sous les charges de Robert Bernard, vn autre Robert & Iean Stuards sieurs d'Aubigny, Alexandre Duc d'Albanie, & Iean son fils comte de Bologne, durant les regnes de Louys vnzieme, Charles huietieme, Louys douzieme, François premier & Henry second.

Et non contents d'auoir assisté les François selon leur pouuoir en la France, taschans de diuertir la tempeste de la France, ils ont attiré l'orage sur eux-mesmes en leur pays d'Escoffe.

Car de ceste façon Dauid le Bruce fut blessé, pris prisonnier, avec la perte de plus de dix mille Escossois à la bataille de Dursan.

Iacques quatrieme Roy d'Escoffe, faisant la guerre de mesme façon à son beau-frere Henry huietieme, fut tué à la bataille de Flanduns, avec presque toute sa Noblesse & 14. mille Escossois.

Son fils Iacques cinquieme faisant la guerre à son oncle Henry huietieme, pour son beau-pere François premier, receut si grand desplaisir du mauuais succez de son armee commandee par son fauory Oliuier de saint Cler, que sans autre maladie, estant en la fleur de son aage, il mourut huit iours apres.

Sa fille l'heritiere d'Escoffe, Marie Stuard, estant promise par les trois Estats d'Escoffe en mariage à Edoüard sixiesme Roy d'Angleterre, du viuant de son pere Henry huietieme aussi Roy d'Angleterre, a esté neantmoins enuoyee & mariee en France, dequoy ledit Edoüard irrité enuoya à son oncle le Duc de Somerssette avec vne armee en Escoffe, qui gagna la bataille de Pinqué, en laquelle moururent quinze mille Escossois.

A ces secours, seruices & pertes receuës pour la France, faut adjoüster pour comble de ceste alliance, les affinitez & mariages mutuels des Princes des deux Royaumes.

Car Louys vnzieme estant Dauphin de France, espousa Marguerite fille de Iacques premier, Roy d'Escoffe: auquel temps, comme tesmoignent nos Histoires, le sang des deux Nations fut fort meslé, car il y eut lors, comme ils disent, cent quarante, que Dames, que Damoiselles Escossoises mariees en France: duquel nombre furent les deux sœurs de la Roïne Dauphine, dont l'vne espousa le Duc de Bretagne, & l'autre le comte de Flandres.

Alexandre Duc d'Albanie frere du Roy Iacques troisieme d'Escoffe, espousa la comtesse de Boulogne, & courant en lice contre Louys Duc d'Orleans, fut d'un éclat de la lance blessé, dont il mourut bien tost apres: De ce mariage nasquit Iean de Stuard, Duc

d'Albanie, comte de Boulogne & gouverneur d'Escoffe, durant la minorité de Jacques 5. Roy d'Escoffe.

Ce Jacques 5. espousa en premieres nopces Magdelaine fille aisnee de François premier, & en secondes nopces Marie de Lorraine Douairiere de Longueville & sœur du Duc de Guise.

Sa fille Marie de Stuard Royne d'Escoffe espousa François Dauphin de France, & depuis Roy de France, deuxiesme de ce nom.

Les Roys de France esmeus de ces secours, seruices, pertes & affinitez des Roys & autres de la nation d'Escoffe, ont tasché de leur costé de monstrier combien ils les auoient agreables, en honorant plusieurs de ceste nation des plus honorables charges de leur Royaume.

Car Charles 7. Roy de France crea le comte de Buchan Connestable de France.

L'annee suiuiante le comte de Donglas fut fait Duc de Touraine & Mareschal de France, lequel Duché a demeuré à luy, à son fils, & à son petit fils, durant leur vie, & les regnes de Charles 8. & la pluspart de celuy de Louys 11.

Iean Stuard fut comte de Dreux & seigneur de Comcrefault en Berry.

Robert Stuard, sieur d'Aubigny fut Mareschal de France.

Dauid de Pitulo fut capitaine des Gardes de Louys 11. Roy de France, qui apres sa mort l'honora d'une statue qu'il luy fit dresser en la sale de son Palais.

Bernard de Stuard, sieur d'Aubigny fut créé Mareschal de France du temps de Louys 11. Roy de France, & Viceroy de Naples sous Charles 8. son frere fut estably Gouverneur de Milan sous Louys 12. Roy de France, & luy mesme Lieutenant General es armées desdits Roys de France en Italie, comme aussi en celle qui fut enuoyee en Angleterre au secours de Henry 7. Roy d'Angleterre, contre Richard 3.

Son fils Robert Stuart fut fait Capitaine des Gardes & Mareschal de France du temps de François premier Roy de France.

Iean Stuart, son heritier, fut fait Capitaine de la Compagnie des Gensdarmes Escossois, comme aussi des Gardes du Corps du temps du mesme Roy François 1.

Iean de Hamilton, Comte d'Aran Gouverneur d'Escoffe, durant la minorité de Marie Stuard Royne d'Escoffe, fut créé Duc de Chastelleraud, & son fils aisné capitaine de la compagnie des gens-d'armes Escossois entretenus en France.

Plusieurs autres, tant Ecclesiastiques que lays Escossois ont tenu & exercé de grandes dignitez & charges en France, que j'obmets pour cause de briefueté.

Et ne se contentans pas les Roys de France de remunerer les seruices des grands d'Escoffe, mais auans esgard à la valeur & fidelité de la nation Escossoise, & pour dauantage confirmer l'alliance, ils ont erigé quelques compagnies de ceste nation, leur donnant de grands priuileges.

Sainct Louys Roy de France en son voyage du Leuant, ordonna que 24. Escossois eussent la garde de son corps nuict & iour.

Lequel honneur a demeuré à eux l'espace de 140. annees, durant le regne de 8. Roys de France pour le moins.

Charles 5. accreut le nombre de 76. Archers, laissant aux 24. premiers les prerogatiues par dessus les autres qui leur sont demeurees iusques au iourd'huy, à sçauoir.

Que deux de leur nombre assisteront à la Messe du Roy, au Sermon, Vespree & repas ordinaires du Roy de France, vn à chascun costé de sa chaire.

Et que les iours des grandes Festes, les ceremonies des touchemens des Roys, & creation des Cheualiers de l'Ordre du Roy, receptiō des Ambassadeurs extraordinaires, entrees de villes, il y auroit six de leur nombre, plus proches de la personne du Roy, trois de chaque costé de la Majesté.

Que les corps des Roys seroient portez par eux seuls par tout où les ceremonies le requerroient.

Que son effigie seroit accompagnée par eux.

La compagnie Escossoise a demeuré la seule garde du Roy plus de 70. ans: car ce fut Charles 7. qui erigea la premiere compagnie Françoisise des gardes du corps, & comme Louys 11. la seconde, & François premier la troisieme, & comme les prerogatiues de 24. (auquelle premier gen-d'arme de France estant adjousté par Charles 7. fait le nombre de 25. comme l'on les appelloit & les appelle-on encore) les tesmoins plus anciens que le reste de la compagnie Escossoise, aussi les priuileges de toute ladite compagnie & les plus signalees & honorables factions demeurans à elle seule, la tesmoignent plus ancienne que les autres trois, à sçauoir.

La garde des clefs du logis du Roy au soir.

La garde du chœur de l'Eglise.

La garde des batteaux, quant le Roy passe des riuieres.

L'honneur de porter la crespine de loye blanche à leurs armes, qui est la couleur colonnelle en France.

Les clefs de toutes les villes où le Roy fait son entree, donnees à leur Capitaine en quartier, ou hors de quartier.

Le priuilege qu'il a estant hors de quartier aux ceremonies, comme aux Sacres, Mariages & Funerailles des Roys, Baptêmes & Mariages de leurs enfans, de se mettre en charge, la robbe du Sacre qui luy appartient, & que ceste compagnie par la mort & changement de Capitaine ne change iamais derang comme font les autres trois.

Charles 7. Roy de France Esleeteur de toutes les compagnies d'Ordonnance en France, erigea aussi la compagnie des gens-d'armes Escossois des reliques des Escossois deffaits à Verneuill au Perche, la composa de cent gens-d'armes & de deux cens Archers, & leur attribua la premiere place parmy la gen-d'armie Francoise, & donna la charge d'icelle à Robert de Stuard, sieur d'Aubigny, auquel succeda en la mesme charge son fils Bernard, & à luy son fils Robert, & à Robert son cousin & heritier.

Iean de Stuard, apres que Iacques de Hamilton Comte d'Aran eut la mesme compagnie, laquelle est aujourd'huy commandee en qualite de Lieutenant par Louys de Stuard Duc de Lenox, & petit fils dudit Iean, estant Capitaine d'icelle.

Charles Duc de Zorke fils du Roy de la grande Bretaigne.

Plusieurs autres compagnies de caualerie Escossoise ont esté erigees par diuers Roys, mais non successiuelement continuees comme ces deux icy.

Finallement les derniers Roys ont voulu monstrier leur beneficence à toute la nation Escossoise. Car Henry second donna par le contract de mariage de son fils, à tous les Escossois de l'un & l'autre sexe les droicts de naturalizatiō & aubeine en France à iamais; les lettres en ont esté verifiees à la Cour de Parlemēt de Paris au mois de Iuillet l'an 1550. avec ceste seule restriction, que cela s'entendoit pendant que les Escossois demeureroient en bonne amitié avec les Roys de France, & que les François retirez en Escosse iouissent de mesmes priuileges; lesquels aussi furent confirmez par Henry quatriesme surnommé le Grand, de memoire immortelle, l'an 1599.

Charles neuuesme confirma aux marchands Escossois l'an 1567. les priuileges donnez par ses predecesseurs, d'exemption de toutes sortes d'impositions mises sur les marchandises des autres, les lettres en ont esté non seulement verifiees à la Cour de Parlement de Paris, mais aussi confirmees par les Arrests d'icelle es années 1581. & 1594.

Mais le temps qui consomme toutes choses a fort infirmé les deux derniers priuileges, plusieurs les contestans, mais plus les priuileges de la garde Escossoise; car depuis que le Comte de Montgommery, qui a esté le dernier Capitaine de l'extraction Escossoise de ceste compagnie, a esté deposez de sa charge par la mort de Henry 2. on a pourueu des François à ceste charge, qui ont ouuert la porte aux autres qu'aux Escossois, d'auoir des places en ceste compagnie (encore que par plusieurs années apres leur admission, ils n'ayent exercé les charges) lesquels ont si bien multiplié qu'à ceste heure ils tiennent les deux tiers des places de ladite compagnie, & parmy icelles plusieurs places d'honneur, comme de premier Gen-d'arme de France, des Exempts extraordinaires, du Mareschal du logis, le priuilege des clefs, la garde du chœur de l'Eglise, le rang de la compagnie aux ceremonies, sont rongnez & peruertis contre la coustume de ceste compagnie. En fin tout moyen est osté dorefnauant aux Escossois d'y entrer, ou à ceux qui y sont d'estre aduancez.

Finalemēt pour monstrier naïfvement l'antiquité de ceste alliance de France avec Escosse. Je veulx faire voir les articles accordez entre l'empereur Charlemagne Roy de France, & Achayus Roy d'Escosse l'an 791. Renouuellez par Louys le ieune aussi Roy de France, & Guillaume d'Escosse l'an 1166.

1. Premierement que perpetuelle amitié & confederation est concludē & accordee entre la France & Escosse pour estre gardee à tousiours.

2. Que les François estans persecutez de guerre par les Anglois, le Roy d'Escosse leur fournira des soldats aux despens du Roy de France.

3. L'iniure des Anglois ou force de leurs armes contre lesdits François ou Escossois seront communes & repoussees par la force des deux Couronnes de France & d'Escosse.

4. Les Escossois estans prouoquez par les Anglois, seront aydez & secourus par les François à leurs fraiz & despens.

5. Si quelqu'un des subiects des deux confederez donne aide & secours priuement ou publiquement tant d'armes, conseil, que de viures aux Anglois, entre aucuns de ces deux confeder-

derez, fust-il fugitif, il sera tenu comme coupable de crime de leze Majesté enuers tous les deux partis.

6. Il ne sera point licite à nul des deux de recevoir les subiets bannis par l'autre, ny les ennemis, ny aussi amener des estrangers sans leur mutuel consentement; & si le Roy d'Angleterre commence la guerre à l'un des deux, l'autre le secourera assaillant l'Anglois de l'autre costé.

7. Que si l'un des deux Roys ou Royaumes accorde la paix ou la trefue avec l'Anglois sans comprendre l'autre, au cas que la guerre s'ouvre entre celui qui est hors & l'Anglois, ladite paix ou trefue sera nulle.

Ceste confederation & alliance fut renouvellee premierement & mise en 11. articles par le Roy Charles 5. & Robert second Roy d'Angleterre l'an 1371. & depuis confirmee par lesdits Charles & Robert 3. l'an 1391. & entre Charles 7. & Robert Duc d'Albanie Gouverneur d'Escoffe l'an 1406.

Autre confederation nouvelle entre ledit Roy Charles 7. & Jacques 1. Roy d'Escoffe l'an 1449. & depuis entre Louys 12. & ledit Jacques l'an 1512.

Autre confederation encore renouvellee & amplifiée par le Roy François 1. & par le Duc d'Albanie Gouverneur d'Escoffe l'an 1517. & du depuis fut ratifiée par ledit François & le Comte d'Aren Gouverneur aussi d'Escoffe l'an 1523.

RICHESSES D'ESCOFFE.

LE pays d'Escoffe est pour la plus grande partie si maigre & sterile, qu'il ne peut presque fournir à ses habitans ce qui suffit pour leur nourriture. Quelque petit trafic de laine qu'ils font, quelque vente de charbon pour les mareschaux, de caritez, de reuesches, de binn, & celle du harenc, qui est la plus profitable, les affranchit d'incommodité, & fait qu'ils se servent de ce que les nations estrangeres leur apportent, s'il leur est necessaire. Ce n'est pas toutesfois qu'il n'y ait de riches marchands qui traficquent de tous costez, principalement du costé du Nord, & qu'il n'y aborde grande quantité de vaisseaux, pour le bon nombre de ports assurez qui s'y trouvent. Mais la plus grande partie de la marchandise, principalement celle qui est plus pour les delices, que pour la necessité, est transportee en Angleterre. Ceste pauvreté du pays est cause que le Roy en retire un bien petit revenu, qui ne peut estre presque egalé à celui des moindres Princes d'Italie.

FORCES D'ESCOFFE.

A Viourd'huy que l'Escoffe, & l'Angleterre sont sous un seul Roy, je ne voy point que ce Royaume soit surmonté en forme d'assiette par aucun autre, veu que la mer le borde de tous costez, tout le dedans mesme du pays est si plein de precipices, de montagnes, & de forests, qu'on l'estime pour ceste cause du tout invincible. Car si les habitans sont contraints de fuir, ils se retirent aux montagnes où ils vivent de poisson sec, & de chair de bestes sauvages. Que si quelqu'un les alloit attaquer en ces lieux, ils leur sont si favorables, qu'une petite poignée de gens seroit capable de defaire une grande armée. Au reste il y a deux seules fortresses aux frontieres de l'Angleterre, dont l'une est *Ambay*, grand port de la coste d'Angleterre, & au Golfe d'Edimbourg, qui est opposé à Varwich: l'autre est du costé du Couchant nommée *Dombrior*, assise sur une haute montagne, separée des autres, & ce fort semble opposé en quelque maniere à Larling.

Quant aux autres lieux, il y a Edimbourg, nommé des Escossois Irlandois *Dun Eadem*, c'est à dire ville de *Eaden*, & vulgairement *Edemborou*. E l'on croit que c'est le lieu que Ptolomee appelle Chasteau assié, veu qu'Edemborou signifie mesme chose que chasteau assié. Ceste ville capitale d'Escoffe, & son siege est assise en lieu haut, ayant d'estendue d'Orient en Occident mille pas, & de l'argeur beaucoup moins. Ceste ville est riche, assez forte, & entourée de bonnes murailles. Du costé du Couchant il y a un rocher, & sur ce rocher une forte place, sous laquelle on void une profonde vallee de tous costez, si ce n'est de celui qui regarde la ville: & pour ceste cause on tient ce fort imprenable, sinon qu'il ait affaire à ceux qui seront maistres de la ville. Ce fort s'appelle le Chasteau des filles, pource que les filles des Pictes y estoient anciennement gardees, & nourries, iusques à ce qu'elles fussent en aage de se marier. Il y a aussi Alherdon, qui est une bonne forteresse du costé de la mer Germanique. Il y a encor en Marnie une bonne, & forte ville nommée Fordun, dont l'assiette peut donner assez de peine à ceux qui l'attaqueront. Quant aux hommes, nous avons desia parlé de leur courage, & leur nombre est assez grand: si bien qu'ils sont capables de resister à une grande puissance

puissance estrangere, & mesme à ceste heure qu'un mesme Roy possede l'Ecosse, & l'Angleterre, les Ecossois seront tousiours assisteés des Anglois, & sans doute ils feront tousiours grande deffence estans ensemble.

GOVERNEMENT D'ECOSSE.

L'Ecosse est composee de trois ordres, c'est à sçauoir de la Noblesse, du Clergé, & du tiers Estat.

Le Roy, pour parler selon leur façon, est Seigneur direct de toutes les terres, & a autorité Royale & Iurisdiction tant sur ses laiz, que sur les Ecclesiastiques.

Le fils aîné du Roy d'Ecosse est appelé aussi tost apres sa naissance, Duc de Rotayse & Seneschal d'Ecosse.

Les autres enfans du Roy sont nommez simplement Princes.

Les plus honorez d'entre les nobles, c'estoient autrefois les *Thanes*, qui estoient les officiers du Roy, dont les plus hauts esleuez se nommoient *Abthenes*, & ceux qui estoient moindres *Vnder Thanes*. Mais ces noms se sont peu à peu perdus, depuis le temps que Malcolm 3. de ce nom Roy d'Ecosse donna les tiltres de Comte & de Baron receus des Normands, aux Gentilshommes qui estoient accompagnez de plus de merite. Et depuis ce temps-là il s'est glissé en Ecosse aussi bien qu'en Angleterre des Ducs, des Marquis, des Comtes, Vicomtes, & Barons.

Le premier qui introduisit le tiltre de Duc, fut Robert 3. enuiron l'an 1400. de mesme que le Roy d'Angleterre qui regne à present y a introduit les titres honoraires de Marquis, & de Vicôte. Ceux-cy sont tenus de la noblesse plus releuee, & ont place, & voix aux Estats, & sont appelez *Lords*, de mesme que les Euesques.

Entre les autres nobles on met au premier rang les Cheualiers dorez, qui prestent serment avec vne grande solemnité. Au second rang sont ceux qu'on nomme *Lords*, & Barons simplement, entre lesquels on ne mettoit personne qui n'eust ses terres qui releuent immédiatement du Roy, & qui n'aye iustice haute, moyenne, & basse. On met en troisieme lieu ceux qui sont sortis des familles plus illustres, mais sans tiltre, & ceux-cy sont particulièrement nommez Gentils-hommes, ou *Gentilman*. Tous les autres comme citoyens, marchands, artisans, & autres, sont mis au rang du peuple: toutesfois le peuple appelle presque *Gentilman*, tous ceux qui sont riches, ou qui tiennent maison ouuerte.

Au surplus tous les enfans puisnez des Comtes, Seigneurs, & Cheualiers, ne succedent en aucune partie à leur pere, veu que toute la succession vient à l'aîné par le droit d'Ecosse à fin de conseruer les familles. Quant au peuple, afin qu'on n'ordonne rien d'insupportable contre luy aux Estats, il luy est permis d'y enuoyer trois ou quatre citoyens de chaque ville, afin qu'ils dient leur aduis librement des choses propres avec les autres deux ordres. Pour le regard de la puissance il n'y a personne qui en ait tant que le Viceroy ou Gouverneur d'Ecosse, qui gouuerne tout le Royaume, en l'absence du Roy, ou à son deceds, ou bien si le Roy se trouue en bas aage.

Les Estats du Royaume ont vne autorité fort absolüe, & ceste assemblée est composee de trois sortes de personnes, c'est à sçauoir de Seigneurs spirituels, comme Euesques, Abbez, & Priens, de Seigneurs temporels, comme Ducs, Marquis, Comtes, Vicomtes, & Barons, & en troisieme lieu des deputez des bourgs & des villes. Et il n'y a guere de tēps qu'on adioustoit à ce nombre deux deputez pour chaque Comté. Le Roy prescrit le temps auquel ils seront assemblez, & le fait publier, les causes de l'assemblée estant declarees par le Chancelier, les Seigneurs spirituels eslisent separement huit des Seigneurs temporels, & les Seigneurs temporels autant de spirituels. Et tous ceux-cy estans ensemble nomment huit des deputez des Comtez, autant de ceux des bourgs, qui font le nombre de 31. & avec le Chancelier, Thresorier, Garde du petit seel, Secretaire du Roy, & autres, admettent, ou rejettent ce qui doit estre rapporté aux Estats, en l'ayant premierement communiqué au Roy. Les choses qui sont admises sont soigneusement espluchees par tous les Estats, & ce qui est approuué par la pluralité des voix, est présenté au Roy qui declare aussi tost que la chose luy plaist ou deplaist, & si quelque chose ne luy agree, elle est effacee.

Ce qui tient le premier rang apres les Estats c'est le college de Iustice, qu'on nomme *Thesaur* 16. *cession* que le Roy Jacques V. institua l'an 1332. y mettant vn President, & quatorze Conseillers, sept Ecclesiastiques, sept laiz (ausquels on a depuis adiousté le Chancelier qui tient le premier lieu, & cinq autres Conseillers) trois Greffiers principaux, & autant d'Aduocats qu'il semblera bon à messieurs du Parlement. La Cour se tient tous les iours, excepté le Dimanche, & le Lundy depuis le premier de Nouembre iusques au quinziesme de Mars, & de

puis le iour de la Trinité, iusques au premier d'Aoust, le reste du temps s'escoule en vacatiō. Ils iugent selon les ordonnances des Estats du Royaume, & lors qu'ils manquent, on a recours au droit ciuil.

Il y a aussi des Cours subalternes en chaque Comté, où le Vicomte, ou son Lieutenant rend la iustice à ceux du pays, & quelquefois on appelle de ses sentences au College de iustice. La plus part de ces Vicomtes sont tels par succession, & leurs tiltres sont hereditaires, car les Roys d'Escoffe pour obliger plus estroittement la noblesse, instituerent iadis des Vicomtes perpetuels & hereditaires. Il y a aussi des Cours ciuiles aux fiefs Royaux, où il y a des Baillifs, de mesme qu'il y a des magistrats aux bourgs, & villes libres. Il y a d'autres Cours qu'ils appellent *The commissariar*, dont la souueraine est à Edimbourg, où l'on plaide deuant quatre iuges, touchant les testaments, le droict des benefices ecclesiastiques, les decimes, les diuorces, & semblables choses dont la cognoissance appartient de droict à l'Eglise.

Quant aux choses criminelles, le principal Iuge Royal a son siege à Edimbourg (cét office a esté iadis en la maison des Comtes d'Argaterie) & ces Iuges commettent deux ou trois Iuriscultes, pour cognoistre des choses capitales, ou qui concernent le retranchement de quelque nombre, ou la confiscation de tous les biens de quelqu'un. Il est permis en ceste Cour au criminel, mesme accusé de crime de lezeMajesté, de prendre vn Aduocat pour defendre sa cause. Bien souuent aussi il y a des Iuges que le Roy commet pour cognoistre de quelque cause criminelle particuliere. Les Vicomtes pareillement en leurs Iurisdiccions & les Magistrats dans les bourgs, cognoissent d'un homicide (pourueu que le meurtrier soit pris dans vingt-quatre heures) & faire mourir le meurtrier: mais apres ce temps, la cognoissance en appartient au Iuge Royal, ou à ceux qui sont commis en ceste partie. Quelques nobles ont le mesme priuilege contre les voleurs qui sont pris dans leurs Iurisdiccions. C'est tout ce qui se peut dire touchant le Gouvernement politique. Maintenant il faut venir à l'Ecclesiastique.

RELIGION D'ESCOSSE.

L'Escoffe receut la foy Chrestienne du temps de Victor I. Pape, en l'année 103. & l'idolatrie cessa entierement sous le Roy Crakinte, qui mourut l'an 313. Celestin I. y enuoya Palladius, pour en chasser l'heresie Pelagienne qui commença à s'y prouigner sous Eugene 2. qui mourut l'an 460. Depuis ce Royaume s'estoit tousiours maintenu en la pureté de la Religion Catholique iusques à nostre temps, qu'elle y est presque entierement esteinte, si l'on doit croire à l'apparence.

Le subiect de la perte de la Religion, fut le voisinage del'Angleterre: veu que Henry 8. & depuis la Roynie Elizabeth, s'essayèrent de retirer par tous les moyens le Roy, & le peuple d'Escoffe de l'union de l'Eglise. Et veritablement la Religion Catholique s'en seroit bien long temps auparauant esloignee, si Iacques V. roy d'Escoffe & Marie sa femme ne l'eussent retenuë. Et pour cet effect il fit brusler Hamilton, bien que son parent, pource qu'il estoit conuaincu d'heresie, & traicta de mesme plusieurs autres nobles, & qualifiez, & l'an 1533. aux Estats du Royaume il exhorta tous ses subiets à l'entretien de la foy Catholique, & à l'obeissance de l'Eglise Romaine.

18. Le Roy Iacques mourut l'an 1541. & laissa la conduite du Royaume à Marie sa femme, qui luy auoit fait 5. iours auparauant vne fille, qui eut nom Marie.

- Apres la mort du Roy, le Comte d'Aran fut fait Gouverneur d'Escoffe, & déclaré tuteur de la Roynie. Le Comte d'Aran est gagné par l'Anglois pour faire le mariage de l'Infante Marie avec son fils Edoiard, & pource qu'il craignoit que le Cardinal de saint André s'opposast à ce mariage, il le mit en prison, & le seruice diuin selon l'usage de l'Eglise Catholique cessa presque entierement par tout le Royaume, ou le Gouverneur faisoit prescher l'heresie, & lors il commença à y auoir deux factions, l'une pour le Roy d'Angleterre, l'autre pour la Roynie veufue, qui passa cependant en France avec sa fille, qui fut apres mariee à François Dauphin de France, & ayant visité le Roy Henry 2. & ses parents (car elle estoit fille de Claude Duc de Guise) elle s'en retourna bien tost avec le titre & l'autorité de Regente en Escoffe. Et pource qu'elle preferoit les François aux autres, aux charges du Royaume, & se fioit plus en eux, elle donna pretexte d'esmouoir des troubles aux seditieux, qui manderent querir incontinent des Ministres en Allemagne, qui rendirent mesprisable toute la Religion Catholique.

Cependant Iacques bastard du Roy deffunct, Prieur de saint André, se desplaisant de viure en homme d'Eglise, pria la Roynie de luy donner la Comté de Moray: & ne la pouuant auoir, esleua vn grand trouble qui aduança beaucoup l'heresie.

En

En fin la Royne veufue vint à mourir, & depuis la Royne Marie mere du Roy d'Angleterre, qui estoit bonne Catholique, & qui desiroit d'exterminer l'heresie de son pais, fut detenue longuement prisonniere, apres executee en Angleterre, comme il s'ensuit.

Vn Mercredy 18. Feburier 1587. L'arrest de mort fut prononcé à ceste grande Princesse issue du sang d'Angleterre & de la droite descende de Henry 8. par les Comtes de Schrafbourg & de Kédit, accompagnez des principaux de la Noblesse du pais, & dès le Mardy 17. Feburier audit an, auoit esté arrestée avec elle l'execution au lendemain à huit heures du matin, & fut menée par eux en la grand'salle du chasteau de Fodringhay, sur vn eschaffaut tapissé de noir, suivie de cinq Dames de son train; il n'y auoit cœur alors qui ne fust esmeu de compassion, voyant de quelle constance elle reprenoit la vanité de leurs larmes, de quel courage elle embrassoit la fin de ceste longue captiuité, sa resolution genereuse & plus que masle à la mort, sa fermeté en sa Religion, sa pitié en la recommandation de son fils & de ses seruiteurs.

Elle ne voulut iamais permettre que le bourreau la despoüillast, disant, qu'elle n'auoit accoustumé le seruice d'un tel gentil-homme: Elle mesme despoüilla sa robbe, se mit à genoux sur vn carreau de velours noir, presenta sa teste au bourreau, qui (contre le priuilege des Princes) luy fit tenir les mains par son valet, pour luy donner le coup de mort avec plus d'assurance, monstra la teste separee du corps aux quatre coings de l'eschaffaut, au peuple qui cria, *Vive la Royne*, & comme en ceste monstre la coiffure cheut à terre, on vit que l'enuy & la fascherie l'auoient renduë toute blanche & chenuë en l'age de 45. ans, ceste Royne qui viuant auoit emporté le prix des plus belles femmes du monde.

Ceste Princesse Marie Stuart fille & heritiere d'Escoffe n'est pas si tost venuë au monde, que deux grands Roys jettent l'œil sur son alliance, Henry 8. Roy d'Angleterre la demande pour son fils Edouard 6. Henry second Roy de France, la demande aussi pour François Prince Dauphin: Cela causa de grandes factions en Escoffe.

Elle fut couronnée à 18. mois, conduite en France à 6. ans. Elle eut trois maris, espousa à 15. ans le Dauphin de France, qui n'en auoit que 14. & demeura avec luy vn peu moins de trois ans.

Après sa mort elle se retira en son Royaume, où elle espousa Henry d'Arley, gentil-homme aagé de 22. ans, aymé de tous & hay de peu; comme elle estoit la plus belle Princesse de l'Europe, aussi il estoit beau en toute perfection, & iamais on ne vit mariage au commencement mieux accordé en aage, en humeur & en affections, le premier & dernier fruit duquel fut Jacques 6. aujourd'huy Roy de la grande Bretagne: mais ce bôuillon d'amour fut aussi-tôt refroidy qu'embrasé, le desdain & la jalousie estouffant sa vigueur par les artifices & perfidies du bastard d'Escoffe, qui suscita le Roy à faire tuer aux yeux mesme de la Royne enceinte, vn gentil-homme estrange qu'elle fauorisoit sur tous: Ainsi comme elle estoit à la table prenant son disner, vn gentil-homme la prend en sa chaire par le milieu du corps, & luy saisit les bras, craignant que l'effort qu'elle eust fait voyant deuant elle massacrer ce sien fauory, ne fust cause de quelque accident à craindre à sa grosselle.

Malheureux vrayement en ces faueurs! & non pour autre raison malheureux, que pour auoir eu trop d'heur & d'auancement en pais estrange. Cét acte rompit toute l'harmonie du mariage, qui se changea en vne hayne irreconciliable. Sa belle voix & sa perfection au fait de la musique l'auoient approché de ceste Royne, qui ne pouuoit viure sans le voir.

Le Roy estant à Edimbourg, vne trainee de pouldre sur la minuit emporta sa chambre, & ceux qui estoient apostez pour le tuer, l'estranglerent. La Royne espousa le Comte de Bothuel, soupçonné de ce meurtre, sur quoy le peuple s'esleua, l'accusa d'adultere & de parricide, la fait prisonniere, son mary se retire en Dannemarc, où il mourut prisonnier: Elle eschappe, prend les armes contre la mutinerie de ses subiects; mais en fin elle est contrainte de se retirer en Angleterre, ne trouuant refuge plus assuré qu'en la maison d'où elle estoit sortie, & dont elle pouuoit estre heritiere: l'Angleterre & l'amitié de la Royne sa sœur l'inuitoient à se retirer aupres d'elle; mais au lieu de la recevoir & traiter cōme Royne sa voisine, comme dotiairiere de France, comme la premiere Princesse de son Royaume, & exercer enuers elle les droicts de consanguinité & d'hospitalité, de l'assister de ses forces pour la restablir en ses terres contre la mutinerie & reuolte des Escossois, au lieu d'estre ce qu'elle luy auoit juré qu'elle seroit, elle la fait arrester & constituer prisonniere, & apres vne longue captiuité, on la fait monter sur l'eschaffaut pour estre executee à mort.

Cependant toute l'Escoffe apres la mort de la Royne Marie est donnée en proye aux heretiques, qui tascherent d'esteindre de tous costez la vraye lumiere: & pour comble de ce malheur, le ieune Roy est instruit par des personnes heretiques, qui luy donnent à l'abord de mauuaises impressions, & luy font conceuoir vne telle horreur de la Religion Catholi-

que, que depuis il ne l'a iamais embrassée. Et de fait il y a estably en Escoffe l'observation des ordonnances Ecclesiastiques, dont nous auons parlé en l'autre discours, aussi bien qu'en Angleterre, & s'est essayé par tous moyens d'en bannir la foy de ses peres. Mais à parler vniuersellement de ce Royaume, la partie Meridionale, à cause du commerce de France, des Pais bas, & de l'Allemagne, est plus infectée que la Septentrionale, & les villes sont plus corrompues, que les villages & la Cour, & les lieux qui en sont proches, que ceux qui en sont esloignez.

Mais ce qui est plus considerable, c'est que la noblesse s'est maintenue presque toute nette d'heresie.

Il y a deux Archeuesques en Escoffe, c'est à sçauoir celuy de saint André, Primat de toute l'Escoffe, & celuy de Glasco. Il y a sous l'Archeuesché de saint André 8. Eueschez, c'est à sçauoir de Dunkelden, d'Aberdon, Moray, Dumblan, Brechin, Rossen, Cathane, & des Oracles. Et l'Archeuesque de Glasco en a trois, c'est à sçauoir de la Case blanche, de l'Kilmour, ou d'Argade & de Sodore, ou des Isles de Sure, Mule, Yle, & autres. Les Ecclesiastiques y estoient autrefois contenus par l'autorité des Decrets, & des Conciles : mais maintenant ils sont gouuernez par les loix que les Roys ont ordonnées, ou confirmées de leur propre bouche. Et tout le Clergé y vit à la façon d'Angleterre, suivant de nouvelles ordonnances, & fuyant les anciennes dont l'Escoffe a vscé durant vn si grand nombre d'années.

ROYS D'ESCOFFE.

23. **F**ERGUS fut le premier qui porta le nom de Roy d'Escoffe 310. ans auant la venue de Iesus-Christ : il regna 25. ans.
A cestuy-cy succederent ceux qui s'ensuiuent.

Ferritare regne 15. ans. Mainie 29. ans. Darnadille regne 28. ans. Reuthere regne 26. ans. Reuthere regne 14. ans. There regne 12. ans. Ioline regne 34. ans. Fimam regne 30. ans. Durst regne 9. ans. Euede 1. regne 19. ans. Gilles regne 2. ans par usurpation. Euede 2. regne 17. ans. Edere regne 48. ans. & de son temps la grande Bretagne fut faite tributaire des Romains.

Eugene 3. regne 7. ans. Metellan regnoit du temps que nostre Sauueur vint au monde. Son regne fut de 39. ans, il mourut l'an de grace 34.

Caratace regne 20. ans, meurt l'an de grace 54.

Corbrede regne 18. ans, meurt l'an 71.

Dardan regne presque 4. ans, meurt l'an 74.

Cotbrede Galde regne 35. ans, meurt l'an 109.

Luchtach regne 3. ans meurt l'an 112.

Mogalle regne 36. ans, meurt l'an 148.

Conare regne 14. ans, meurt l'an 162.

A cestuy-cy succeda Ethodie premier du nom.

Et à Ethodie Satraelde premier. A Satraelde Donaelde premier, qui regne 21. an, & meurt l'an de grace 216.

A cestuy-cy succeda Ethodie second. Et à Ethodie Athirce. De ces deux l'un fut tué, l'autre se tua luy-mesme.

Nathaloe succeda, & fut tué l'an 253. comme cruel tyran.

Findoce regne dix ans, meurt l'an deux cens soixante-trois.

Donald second regne vn an, est tué.

Donald troisieme est aussi tué, & a pour successeur Crathinte.

A Cratinthe succeda Fincormach.

Et à ce dernier Romache.

A Romache Angusan.

A cestuy-cy succeda Fetelmache.

Eugene premier regne trois ans, meurt l'an 379. Et lors Maxime enuoyé par les Empereurs, & depuis se faisant tyran, s'investit de toute l'Isle de la grande Bretagne, & l'Escoffe demeura sans Roy quarante & quatre ans, & iusques en l'an de grace 423.

Ferguz second nepueu d'Eugene est fait Roy, regne sept ans, meurt l'an 430.

Eugene second regne trente & vn an, meurt l'an 461.

Dongard luy succede.

Et à Dongard Constantin.

Et à ce dernier Congal, qui mourut l'an 501.

Congal eut pour successeur Conran, qui regne 35. ans.

Eugene troisieme luy succede.

Conua vient à regner, & meurt l'an 578. Rimatille luy succede, & à cestuy-cy Aidan, qui regne 27. ans, meurt l'an 606. Ce dernier eut pour successeur Kenneth Keir.

Eugene quatrieme regne 13. ans, meurt l'an 632.

Ferquhard est mis en prison.

Ioheuard 4. regne 14. ans, meurt l'an 646.

Ferquhard luy succede.


Malduin meurt l'an 684. Eugene. V.

V. Eugene VI. Ambirkelet. Eugene
 VII. Prince Religieux, meurt l'an 716.
 Mordac.
 Ethfin.
 Eugene VIII.
 Ferguz III.
 Soluathie.
 Archeue meurt l'an 820.
 Congal. Dongal. Alpin.
 Remeth.
 Donald V. meurt l'an 860.
 Constantin II.
 Ethe.
 Gregoire regne 22. ans, meurt l'an 893. Do-
 nald VI. Constantin 3. qui l'an 40. de son
 regne se fit Moyne.
 Malcolme. I.
 Duffe.
 Culen.
 Kemet meurt l'an 1000.
 Constantin IV. regne 3. ans.
 Grine.
 Malcolme II. regne 31. an. meurt l'an 1040.
 Ducan.
 Macabee.
 Melcome Camnoir regne 30. ans, meurt l'an
 1097. Donald 7.
 Ethgar fut le premier qui se fit sacrer en Es-
 cosse avec onction.
 Daud Malcolme 5.
 Guillaume le Lyon regne 49. ans, meurt
 l'an 1204.
 Alexandre 3. qui n'ayant aucun hoir de son
 corps, laissa en grand trouble l'Escoce,
 qui fut gouvernee par six hommes, atten-
 dant que les debats de la succession entre
 Jean Baliot fils de la fille aînée du Roy
 Daud, & Robert Bruys pere d'Alexan-
 dre 3.
 Jean paruiet à la Couronne par le moyen

du Roy d'Angleterre, à qui il fit homma-
 ge contre la volonté des Escossois. A la
 fin l'Anglois le mena comme prisonnier
 en Angleterre.
 Et le pais fut gouverné par des Regents, à la
 deuotion de l'Anglois.
 Robert est appelé Roy par les Escossois,
 deffait Edotiard 3. & se rend paisible mai-
 stre d'Escoce.
 Daud fils de Robert luy succeda, mais il fut
 chassé par Edotiard fils de Jean Baliot, &
 s'enfuyt en Frâce. Toutefois cet Edotiard
 n'est point mis au nombre des Roys legi-
 times. Aussi bien l'Escoce estoit gouver-
 nee par Robert Stuart, au nom du Roy
 Daud 2. qui fit vaillamment iusques à ce
 que son Roy reuint en France.
 Apres la mort de Daud les Estats d'Escoce
 esleurent Robert Stuart, nepueu du der-
 nier Roy Daud, & fils de sa sœur, & de
 Robert Gouverneur d'Escoce durant
 l'absence du Roy Daud.
 Jean fils naturel de Robert, qui prit aussi le
 nom de Robert.
 Jacques 1.
 Jacques 2.
 Jacques 3. vint à la Couronne en l'age de 7.
 ans, l'an 1463.
 Jacques 4.
 Jacques 5. qui en premieres nopces espousa
 Magdeleine de France, fille du Roy Fran-
 çois premier du nom, & depuis la fille du
 Duc de Guise, & de cestuy-cy sortit Ma-
 rie, qui fut marice à François second
 Roy de France, & apres la mort du Roy
 François second au fils du Comte de Le-
 noz, dit Henry d'Arley, de qui elle eut
 le Roy d'Angleterre, & d'Escoce, qui re-
 gne à present.



S O M M A I R E.



- I**RLANDE quels noms elle a porté anciennement : sa description & situation, selon Ptolomée le Geographe : autres seoy Maïor Escossois, & Munster.
2. Diuision de ceste Isle en cinq principales contrées, & combien de Comtez y a en chaque contrée ou Prouince.
 3. Son air doux & temperé, & à quelles maladies sont subiects les Irlandois.
 4. Singularitez de ceste Isle en la production des animaux terrestres, poissons, oyseaux.
 5. Martinets, oyseaux d'admirable propriété, qui morts ne pourrissent point.
 6. Irlandois anciennement viuoient de chair humaine, comme les Antropophages, & mangeoient les corps morts de leurs parens.
 7. Agilité & grand courage des Irlandois, de quels noms ils baptisent ordinairement leurs enfans & de leur education.
 8. Larcin n'est estimé chose infame entre les Irlandois, ains chose louable.
 9. Mariage des Irlandois se fait par paroles de futur, & non par paroles de present.
 10. Priere ordinaire des Irlandois à la nouvelle lune.
 11. Nourriture des Irlandois.
 12. Villes celebres en trafic Galuez & Waterfort.
 13. Gendarmerie Irlandoise diuisee en 3. rangs, vsans de cornemuses au lieu de trompettes.
 14. Forteresses basties en Irlande par la Royne Elizabeth & le Roy Iacques.
 15. Irlande quand reduite sous la puissance des Anglois.
 16. Irlandois sauuages comment gouvernez par leurs Seigneurs & Iuges.
 17. Sieges & officiers d'Irlande.
 18. Religion Chrestienne quand receuë en Irlande.
 19. Reuolte du Comte de Tiroüen Catholique, expulsé d'Irlande.
 20. Edict du 30. Ianuier 1614. du Vice-roy & Conseil d'Irlande, portant bannissement des Archeuesques, Euesques, Iesuites, & Seminaires Catholiques hors le Royaume.
 21. Des Archeuesques & Euesques qui sont en Irlande.



IRLANDE, que les anciens ont nommee Hibernie, les autres Iuernie, les autres Iuuerne, & Ierne, & Iris, & Ogygie, & par les Irlandois, mesmes Frin, est assise entre le cercle Arctique, & le Tropique de l'Escreuissse, approchant toutefois dauantage du pole Arctique, comprend en latitude quatre degrez & demy du Meridien, & est enfermee selon le compte des modernes, entre le 20. & le 21. paralelle, & sa contree Meridionale a son plus grand iour de 16. heures, & enuiron trois quarts : & vers l'extremite du costé du Nord, de pres de 18. heures. Or pour le regard du globe terrestre, ceste Isle nommee par Ptolomee Petite Bretagne, est mise entre la grande Bretagne, & l'Espagne, & a du Leuant l'Angleterre, separee par vne mer orageuse d'environ vn iour de nauigation: du Couchant la grande mer Oceane, du Nort l'Island, qui n'en est esloignee que d'une iournee de mer, & du Midy l'Espagne distante de trois iournees de Mer.

Iean Major Escossois Docteur de Paris au liure 1. de *Gestis Scotorum*, dit que Hybernica estoit anciennement appelee Escosse, & que le pais, que nous appellons aujourdhuy Escosse, n'estoit pas distingue d'auec l'Angleterre, & pour entendre comment l'Escosse a esté appelee Escosse, faut remarquer avec le mesme Major, & Munster li. 2. de sa *Colmog.* cha. 11.

que les peuples d'Hybernie estoient anciennement appelez *Scoti*, en memoire de la mere de leur Capitaine Iberus, qui portoit le nom de *Scota*, lesquels ne pouuans se contenir dans les limites d'Hybernie, voulurent conquerir la Bretagne, appelee autrement *Albania*, les autres disent *Albion*, qui est auourd'huy l'Angleterre, pais qui comprenoit en vne meisme Isle & sous ce meisme nom *Albania*, ou *Albion*, l'Angleterre & l'Ecosse, sans aucune difference & n'estoient qu'un Royaume appelle Bretagne: Ces Hybernois firent de grands exploits sur ce Royaume de Bretagne, & n'eust esté le secours que les Anglois receurent des Saxons, ils l'eussent reduit à leur puissance; mais secourus de ces peuples Allemands, ils repousserent les Hybernois, & les contraignirent de se retirer es dernieres parties du Royaume, où ils se maintindrent & resisterent longuement à leurs ennemis: & du depuis leur demeura ceste partie de Bretagne, & l'establisant en Royaume separé d'Angleterre, l'appellerent Ecosse. Et de fait le meisme Annaliste remarque qu'encore auourd'huy en Ecosse le langage est meslé de l'ancien Anglois & Hybernois, ce qui arriua pour s'y estre habituez lesdits Hybernois nommez Escossois, avec les Anglois dudit pais qu'ils commencerent d'appeller Escossois.

Ceste Isle s'estend en forme ouale ou lenticulaire, du Sud au Nord, & est plus petite de la moitié que la grande Bretagne. Quelques-uns font la longueur du Midy au Septentrion de 70. lieues d'Allemagne & la largeur d'Occident en Orient de 27. lieues d'Allemagne: & les autres la mesurent d'autre sorte. Mais *Camdene* qui est digne de foy, nous apprend qu'elle est longue de 400. mille pas, & large de 200.

Or l'Irlande est diuisee en cinq principales contrees, c'est à sçauoir en la Momonie, du costé du Midy, en la Lagenie du Leuant, la Connactie du Couchant, l'Ultonie du Nort, & la Medie presque au milieu. En Momonie il y a les Comtez de Kerri, Desmond, Cork Vwaterford, Limerick, Tipperary. En Lagenie celles de Kilkennie, Caterlough, Queenés County, Kings County, Kildares Vveishford, Dublin. En Connactie celles de Zvomund Gallovay Maio, Slego, *Lettn*, & *Roscoman*. En Ultonie celles de Louth, Caouon, Fermamagh, Monagan, Armagh, Doun, Antrim, Colram Zir Oen, Zir-Connellee ou Donegal. En Medie celles d'East, Meast Vvest Meath, & Lonfort.

QUALITE' D V P A Y S.

C'EST E Isle jouyt d'un air doux, & temperé, combien qu'il ne soit pas trop bon pour meurir ce qu'on met en terre. La chaleur extreme de l'Esté n'y fait pas rechercher l'ombre, ny la rigueur de l'hyuer le feu. Ce pais ne produit rien de venimeux, & ne le peut souffrir, s'il est porté d'ailleurs. Mais l'humidité de l'air, & de la terre y est trop grande, qui fait que les habitants, & les estrangers sont molestez de catharres, & de flux de ventre: à quoy ils resistent par le moyen de l'eau de vie. Le pais est montueux, marescageux, & plein de forests, exposez aux vents, & à beaucoup d'estangs, mesme au sommet des plus hautes montagnes. Il y a beaucoup de bons ports, & quelques belles plaines, qui tiennent toutefois bien peu de lieu au regard des forests, qui sont agreables avec leur verdure. Mais toute l'Irlande vniuersellement est fertile, horsmis en Ultonie, qui est bonne en quelques lieux, & maigre en quelques autres: & Connactie qui est moins cultiuee que les autres contrees, & toute pleine de forests, de marescages, & de montagnes. Par tout ailleurs les montagnes sont couuertes de bestial, & pour ceste cause sont abondantes en beure, lait, & fromage. Elle a toutefois ce mal qu'elle produit du bled court, & menu & les vignes y sont plus pour ornement, que pour fruct qu'elles portent. Car lors que le Soleil entre au signe de la Vierge, il y a des vents froids qui soufflent en ceste contree, & la chaleur d'après midy en Automne n'a pas assez de force pour pouuoir faire meurir les raisins. Ceste Isle a de bons cheuaux, propres à porter des charges, qui vont le hobin. Elle ne produit aucune beste mal faisante, que le loup, & le renard: tous les autres animaux priuez y sont plus petis qu'ailleurs, excepté les chiens de chasse.

Au reste il y a dans les forests force bestes, & les cerfs y sont si gras, qu'ils ne trauaillent guiere les chiens avec leur course. Il y a aussi beaucoup de sangliers, & de lieures, mais le pais manque de cheureux, de daims, & d'herissons: de mesme qu'il y a fort peu de loupes: mais en recompense il s'y trouue vne grande quantité de rats. Dauantage ceste Isle a force faulcons, espreuiers, aigles, & gruës, & assez grand nombre de cygnes du costé du Nord: mais en toute l'Isle il y a fort peu de cigongnes, qui y sont noires, de mesme qu'il n'y a point de perdrix, de faisans, de pies, & de rossignols. Il y a aussi grande quantité de poissons, tant de mer, que d'eau douce, que l'on prend dans les riuieres, & dans les lacs du pais, qui sont remplis de poisson, & il y a certains poissons en ceste Isle, que l'on ne sçauoit trouuer ailleurs. Ceste Isle a pareillement des mouches à miel (contre l'opinion de quelques-uns) en si grande quantité, qu'on n'en trouue pas seulement aux ruches, mais encores aux

troncs des arbres, & dans les caavernes. Elle produit aussi certaine masse de terre noire, meslée de soulfre, dont les habitans vîent principalement pour allumer le feu, d'autant que le pays produit fort peu de bois taillis. La mer d'Irlande porte aussi de petites perles qui tirent sur le noir, & nagent en gros en rond, attendant leur chef, comme les abeilles. Girard escript que de certain bois nageant sur la mer, il coule certaine gomme, qui s'endurcit, apres qu'il naît au dedans des animaux qui ont premierement vie, puis prennent des aîles, & vn bec, & volent finalement en l'air, ou nagent sur l'eau: & le mesme Autheur dit 5. qu'il a veu plusieurs de ces oyseaux demy formez qui eussent volé comme les autres, s'ils eussent eu leur perfection.

Il y a encores d'autres oyseaux nommez Martinets, moindres qu'un merle, courans comme les cailles, & ayans le ventre blanc, & le dos noir, qui ont ceste propriété, que si estans morts on les garde en vn lieu sec, ils ne pourrissent point, & estâs mis entre les habits, ils les preseruent de la teigne, & mesme si on les pend en vn lieu sec lors qu'ils sont morts, ils renouellent leurs plumes toutes les annees. Sur tout le lac Eaugh abonde en faulmons, qui sont aussi bons qu'en tout autre lieu de la terre.

6.

MOEVRS DES ANCIENS IRLANDOIS.

Strabon dit que les anciens Irlandois estoient plus sauvages que les habitans de la grande Bretagne, qui se repaissoient de chair humaine, & estoient grands mangeurs. Ils tenoient que c'estoit chose honneste de manger les corps de leurs peres & meres apres leur mort, & de coucher non seulement avec les autres femmes, mais encores avec leurs sœurs & leurs meres. Mele dit qu'ils estoient du tout rustiques, ignorans de toute vertu, & despourueus entierement de pieté. Solin adioust encor, que lors qu'ils estoient victorieux, ils auoient accoustumé de se frotter le visage du sang de ceux qui estoient morts au combat, apres en auoir toutesfois humé. Et selon le mesme, le droict, & l'iniustice leur estoient choses indifferentes. Lors qu'une femme auoit fait vn enfant masle, elle mettoit les premieres viandes sur l'espee de son mary, & pouffoit doucement dans la bouche de l'enfant avec la pointe le commencement de sa nourriture, & selon le desir ordinaire de toute la nation, luy souhaitoit qu'il ne mourust qu'en la bataille, & au milieu des armes. Ceux qui se vouloient parer parmy eux, mettoient aux gardes de leurs espees des dents de quelques grands poissons qu'on trouue particulièrement le long de ceste coste, pource que ces dents ont la blancheur de l'ivoire, & la principale gloire des Irlandois consistoit aux armes. C'est tout ce qu'on peut recueillir des anciens escriuains touchant leurs mœurs qui estoient pour la plus-part incogneues à cause de la rudesse, & barbarie de ce peuple, pres duquel on ne pouuoit auoir libre accez, & aussi pour ce que ce pays a si peu de choses qu'on puisse desirer, qu'il falloit vne grande curiosité pour desirer d'en auoir la veüe, & vne grande prudence & dexterité pour pouuoir viure parmy ces sauvages, & prendre cognoissance de leurs façons de faire. Je dis cecy pour le regard des anciennes mœurs: mais si tu desires voir celles du temps moyen, tu les trouuerras au long dans Girald, de qui plusieurs autres ont puisé ce que l'on en peut dire.

MOEVRS DES IRLANDOIS DE CE TEMPS.

7. Les Irlandois sont generally forts, agiles, & de grand courage, s'exposent librement à tous hazards, suportent aisément toute sorte de travail, & endurent aussi le froid, & la faim, & toute sorte d'incommoditez. Ils sont fort enclins à l'amour, courtois à l'endroit des Estrangers, constans en leur amitié, & irreconciliables en leur haine, de legere creance, desireux de gloire, & qui ne peuuent souffrir qu'on les outrage, ny de fait ny de parole, & finalement extremes en toutes leurs passions, de sorte que ceux qui sont mauuais ne sçauroient estre pires, ny les bñs meilleurs. Lors qu'on baptise leurs enfans, ils leur dñent des nōs prophanes, adioustât tousiours au nō quelque chose prise de l'euenemēt, ou de la couleur comme rouge, blanc, noir, ou de quelque maladie, ou de quelque autre chose semblable, & mesme des nōs iniurieux, cōme de galeux, ou de superbe, & autres pareils, & cōbien qu'ils souffrent malaisément les outrages, toutesfois les principaux qui ont la lettre O, deuant leurs nōs, ne desdaignent ces tiltres qui semblēt les offencer. Il n'est pas permis de donner le nō du pere, ou de quelqu'un de la famille, s'il est lors en vie, pource qu'ils estiment que telle chose auanceroit leur mort. Mais lors que le pere est decedé, le fils prend son nom afin qu'il ne se perde, & si quelqu'un de leurs ancestres a eu le mesme nom, on attend quelque chose de grand de celuy qui le porte. Ceste opinion est augmentee par les Poètes qui ont mis par escript les faits de ces anciens, y adioustant beaucoup de fables, & acquerant beaucoup de moyens par ceste voye. Car les nouvelles marices, & celles qui accouchent, s'estiment infames

mes si elles ne donnent leurs meilleurs habits à ces donateurs de lottange. Les femmes se remettent avec leurs maris six iours apres leur enfantement. Aussi-tost qu'une Damoiselle a fait vn enfant, beaucoup de femmes la viennent trouver pour gagner ce point de nourrir cet enfant, qu'elles preferēt aux leurs mesmes. Et cōbien qu'ils soient en tout ce pays fort addonnez à l'amour, & qu'ils tiennent à honte de donner la mamelle à leurs propres enfans, toutesfois le mary, & la femme s'abstiennent volontiers de coucher ensemble pour l'amour de l'enfant, dont elle a entrepris la nourriture. Si le contraire arriue, elles mettent vne autre nourrice en leur place à leurs despens. Si l'enfant se porte mal, la nourrice le frotte de vieille vrine, & contre les defastres qui luy pourroient arriuer, ils luy pendent au col non seulement le commandement de l'Euangile sainct Iean, mais encores vn clout tortu pris du pied d'un cheual. Et pour ce mesme effect les nourrices, & les enfans portent des ceintures faites de cheueux de femmes. Les femmes donnent aussi à leurs amants des bracelets faits de leurs cheueux. Tous ceux qui ont succé le lait de mesme nourrice, s'entr'ayment extrêmement les vns les autres, & mesme bien souuent ils aiment plus leurs freres de lait, que ceux qui sont sortis de mesme ventre. Lors que leurs peres & meres tacent leurs enfans, ils ont recours à leurs peres nourriciers, qui les animent bien souuent contre leurs propres peres. Et si quelqu'un de ces enfans deuient malade, si tost que la nourrice en apprend la nouvelle, elle y court à grand haste, encores qu'elle s'en trouue fort esloignée. Ils aiment l'oysette, & tiennēt pour grande richesse de demeurer sans rien faire. Ils affectionnent la musique, & se plaisent extrêmement à iouer du cistre. Si quelques-uns se rendent Religieux, ils vivent avec vne grande austerité, veillant, priant, & marrant leur chair par beaucoup de ieusnes, de sorte qu'il ne se faut pas estonner de ce que l'on escrit de leurs Moynes anciens. Les femmes mesmes, & les filles Catholiques ieusnent tous les Mercredis & Samedis de l'annee. Mais celles qui sont addonnees à mal faire, sont plus meschantes qu'on ne scauroit croire. Ils teignent leurs habits noirs des escorces des arbres, que les Anglois nomment *aldres*. Ils font aussi de la branche de l'escorce, & des feuilles du Peuplier, les chemises iaunes qui ne sont presque plus en vsage, & lors qu'ils les teignent, ils ne les font pas cuire longuement, mais les plongent dans l'vrine froide des hommes, durant quelques iours, afin que la couleur soit plus iaune.

Le larrecin ne rend pas les personnes infames, quoy qu'il soit exercé parmy eux avec vne 8. grande cruauté. Au reste, ils disent qu'en cela ils suiuent la façon de faire de leurs ancestres, & que ce leur seroit vne grande honte de viure du trauail de leurs mains. Lors qu'ils marchent pour voller, ils remarquent le premier qu'ils rencontrent en main, & si leur voyage réussit selon leur desir, ils taschent de faire que le mesme homme vienne tous les iours à leur rencontre, & au contraire. Ils disent que c'est vne marque d'un lasche courage, de dormir la nuit, & de n'aller bien loing voler quelque chose, en s'exposant à toutes sortes de dangers: mesmes ils ne pardonnent pas aux Temples, & lieux sacrez, ains les pillent entierement, tuent les hommes qui s'y trouuent, & mesmes y mettent le feu.

Ils ne se marient guere que dans les villes, & ce non par paroles de present, mais de futur, 9. & pource ils se séparent legerement, & le mary va trouver vne autre femme, & la femme vn autre homme, de sorte qu'on ne peut scauoir la verité du mariage, iusques à ce qu'ils meurent. De là viennent les debats touchant les possessions, les rauages, les meurtres, & les haines mortelles. Les femmes chassées consultent des sorciers qu'on estime capables de rendre sterile la nouvelle femme, ou de luy donner des maladies dangereuses. Les femmes de mesme que les hommes font grand estat de leurs cheueux s'ils sont blonds, & longs, & les rendent annellez, & les laissent pendre en ceste sorte.

Les Irlandois sauages (car ils sont diuisez de mesme que les Escossois) se mettent à ge- 10. noux en voyant la Lune nouvelle, & disent en parlant à la Lune, *Laisse nous aussi sains que tu nous as trouuez*. Ils prient Dieu pour les loups, & estiment que par ce moyen ils n'en seront pas offencez. Ils tiennent pour sorciere la femme qui demande du feu le premier iour de May, & n'en donnent qu'aux malades, & mesme avec des maudissions, & croient que l'Esté suiuant elle desrobbera tout le fromage. Ils tiennent aussi qu'un arbre mis deuant les portes le premier de May, fait que leurs troupeaux ont du lait en abondance. Il n'est pas permis de louer vn cheual, ou quelque autre animal, sans dire aussi tost, *Dieu le gard*, ou sans luy cracher contre. Que si dans trois iours il arriue quelque mal au cheual, ils cherchent celui qui l'a loué, afin qu'il luy die la Patenostre à l'oreille. Les femmes y scauent des enchantemens pour tous les maux, & mettent tousiours deuant leurs enchantemens la Patenostre, & l'*Ane Maria*, & l'adioustent aussi à la fin de tous. Si quelqu'un est malade, on ne luy parle ny de testament, ny du salut de son ame, mais seulement de s'efforcer de guerir: si quelqu'un demande l'Eucharistie, ils le tiennēt pour perdu. Et lors que quelqu'un meurt, on fait des

plaintes, & des lamentations si hautes, qu'on diroit que tout le monde se va perdre.

11. Quant à leur nourriture, ils vivent volontiers d'herbes, de racines, & de potirons, & de beurre meslé avec de la farine d'avoine: de même aussi que de lait, de bouillon de beufle, & de chair, bien souvent sans pain: veu qu'ils gardent le plus souvent leurs bleds pour leurs chevaux, dont ils ont un soing extreme. Lors que la faim les presse, ils deuorent la chair toute crüe, & pour la digerer, ils vsent de grands trafics d'eau de vie. Ils tirent aussi du sang des vaches, & lors qu'il est caillé, ils le mettent sur le beurre, & le mangent. Ils vont tousiours teste nue, sinon quand ils la couurent de fer pour aller à guerre, & portēt de longs cheveux crepés, & ne peuuent endurer la moindre raillerie qu'on leur die. Ce sont là les façons de faire des Irlandois sauvages. Il y en a encore beaucoup d'autres: mais ie craindrois en les rapportant, ou d'ennuyer le Lecteur, ou d'estre contraire à mon dessein même.

RICHESSES D'IRLANDE.

12. **C**E qui peut rendre les Irlandois riches, c'est l'abord des marchands qui viennent de tous costez, & le trafic des habitans de l'Isle, qui n'a guere autre chose que de la laine pour vendre, & distribuer aux pays estrangers. Entre les autres villes il y a Galuey, où les marchands estrangers frequentent, qui est pleine de riches habitans, qui font grand trafic de tous costez, & Vwaterford ne luy cede aucunement en nombre de gens de trafic qui font aussi bien leurs affaires en ce lieu qu'en aucun pays de l'Europe. La plus grāde partie de l'Irlande est assez capable d'entretenir ses habitans, & de leur fournir ce qui leur est nécessaire, mais non que les richesses y soient si grandes que en un grand nombre de lieux de l'Europe, qui en ont même au delà de ce qui peut suffire aux delices. Leurs plus agreables richesses, & presque seules, sont les vaches, qui ne rendent point de lait en Irlande, cōme on tient, sinon qu'elles ayēt leur veau viuant à leur costé, ou le cuir du mort rēply de paille, afin qu'il rapporte sa semblance; veu qu'elles cognoissent cōme l'odeur de leur ventre en ce cuyr. Et si la vache est sans lait, ils font venir un tiers qui luy fait aymer un autre veau, afin qu'elle prenne du lait. Quant aux commoditez que le Roy d'Angleterre en tire, elles sont petites, ou nulles, à cause des grandes garnisons qu'il y entretient, & seroient encores moindres s'il ne tiroit tribut de ceux qui veulent viure, & estre recogneus Catholiques, sans toutesfois qu'il leur soit permis de faire aucun exercice.

FORCES D'IRLANDE.

13. **L**E V R milice est composée de gens de pied, & de cheual. Les hommes de cheual ont les chevaux tellement faits à leur volonté, qu'ils sautent aisément dessus, encores qu'ils soient armez, & cela vient autant de la souplesse & dextérité du cheual, qui s'accommode à eux, que de la disposition des Irlandois, dont nous auōs parlé n'aguere. Ils ont des dards pesans qu'ils lancent aux ennemis en les prenant par le milieu. Quant aux gens de pied, il y en a quelques-uns qu'on nomme Galoglaſſes, qui portent des haches plus tranchantes que des rasoirs, au bout de leurs longs bois, & ceux-cy sont toute la force des armes Irlandoises. Les autres qui tiennent le second rang, sont ceux qui s'appellent Karni, & qui vsent des dards, & de coutelas, & n'estiment pas auoir tué une personne s'ils ne luy ont tranché la teste. Ils mettent au troisieme lieu les Coureurs, qu'il nomment Daltins qui vont desarmez, & sont prests à seruir les gens de cheual. Et l'infanterie, & la caualerie crient esgalement *Pharo Pharo*, lors qu'il faut venir aux mains, & même quand ils sortent de la ville ont accoustumé de crier à chacun à la porte particulièrement, & celuy à qui l'on ne crie rien est tenu pour mal heureux, & ce silence est estimé de mauuais presage. Et tous les hommes de guerre vsent de cornemuses au lieu de trompettes.

Les Irlandois sont en fort grand nombre, & courageux: si bien qu'on les pourroit tenir inuincibles, s'ils n'estoient contraires les uns aux autres. Mais ils ont esté presque tousiours diuisez, & pour ceste cause ils ont donné entree aux Roys d'Angleterre.

14. Celuy qui regne à present y maintient dix forteresses garnies de gens de pied, & de cheual iusques au nombre environ de 12000. Ce qui fut commencé par la Royné Elisabeth, depuis les dernieres entreprises du Pape Gregoire. Il y a la ville Archiepiscopale, que l'on nēmen *Almach*, qui est forte, & là presen la coste qui regarde le Leuant, on void la ville de Tridat, qui est la plus grande forteresse apres celle que nous venons de nommer. Il y a apres Dublin, siege des Roys, assez bonne forteresse, & port où s'embarquent ceux qui veulent aller en Anglerre, qui arriuent à Colter, presque vis à vis Dublin: & du costé de la Tramontane il y a une seule forteresse qui a nom *Vvocuergues*: mais au costé qui regarde l'Angleterre

gleterre, il y a sept forteresses avec leurs ports, c'est à sçavoir apres Dublin, Anglan, & Pofcie, le Limbrach, Vvaterford, Ros, Lorch, & Chrusal qui est du costé du Midy.

Or le passage de ce canal est fort dangereux, à cause des rivières qui y tombent de plusieurs endroits contraires: tellement qu'elles engendrent vn bouillon d'eaux confuses, & courant de diuers costez, qu'ils rendent malaisé à ceux qui voyagent, Pour conclusion: le Roy d'Angleterre n'a pas grand subiect de craindre que les Princes estrangers se rendent maistres de l'Irlande, tant à cause de la commodité de l'affiette, que des forts qu'il y a, & des gens qu'il y entretient, & mesme de plusieurs habitans du Pays qui luy sont affectionnez. De sorte qu'il ne pourroit courre fortune que par vn changement de volonte, & par vne reuolte generale de l'Isle, qui est extremement difficile, à cause des garnisons qui la brident.

GOVERNEMENT D'IRLANDE.

L'IRLANDE a eu autrefois beaucoup de petits Roys, mais elle est maintenant sous la 15. puissance des Anglois, entre les mains desquels elle tomba l'an 1175. lors que Roderic Roy de Connacie se nomma Roy de toute l'Irlande, & que voulant se rendre Roy de l'Isle entiere, il combatit contre les autres Roys, qui se donnerent à Henry II. Roy d'Angleterre de leur franche volonte, & sans aucune effusion de sang, & depuis tous les Roys d'Angleterre ont esté nommez Seigneurs d'Irlande, iusques à Henry huitiesme qui fut nommé Roy par les Estats d'Irlande, pource que ce nom de Seigneur estoit odieux à quelques seditieux. Au reste le Roy d'Angleterre y enuoye vn Viceroy pour la gouverner & ces Viceroyes furent nommez au commencement Conseruateurs d'Irlâde, puis Iusticiers, Lieutenâs, & deputez, par les patentes qui leur donnoient ceste iurisdiction, & puissance, qui est veritablement Royale: Car ils peuuent faire la guerre, & la paix, ordonner & disposer de tous les Magistrats, excepté de quelques vns, remettre tous crimes, horsmis ceux de leze-Majesté, faire des Cheualiers, & choses semblables. Ces lettres patentes sont leuës lors que quelqu'un est publiquement receu pour tel, & lors prestant le serment ordinaire deuant le Chancelier, on luy met en la main vne espee, puis on le met en vn siege, en presence du Chancelier du Royaume, & des principaux d'iceluy qui sont du conseil, avec le Roy d'armes, & le Sergeant d'armes, & autres officiers honoraires. Il y a au Conseil pour Assesseurs le Chancelier, & le Thresorier du Royaume, les Comtes, les Euesques, & les Iuges, qui sont du priué Conseil. Et l'Irlande a les mesmes ordres que l'Angleterre.

Or l'Irlande est diuisee, comme nous auons ja touché, selon les mœurs de ses habitans, en 16. deux parties. Car ceux qui ne veulent obeyr aux loix, & viuent plus barbarement, sont nommez vulgairement *Wild Irish*, ou Irlandois sauages: mais ceux qui obeyssent aux loix sont appelez Anglois Irlandois, & leur contree a le nom de *The English Pale*. Ceux-cy parlent bon Anglois naturellement, & toutesfois ils entendent l'Irlandois, à cause du commerce journalier. Les Sauages ont des Seigneurs, ou plustost Tyrans, qui ne viuent sous la puissance des Anglois que par contrainte. Ces Seigneurs ont vn O, deuant leurs noms, ou bien le mot de Mac, comme *O Neal*, *Mac-Donell*, & ceux-cy ont vn droit particulier, par le moyen duquel ils viuent avec vne autorité insupportable, & disposent des biens de leurs subiects à leur volonte, par le moyen des soldats Gallogastes, ou karnes, & des gens de cheual qu'ils nourrissent. Ces Seigneurs ont leurs Iuges qu'ils nōment, *Brehans*, ainsi que les Gots auoient leurs Bellagines. Ces *Brehans* sont du tout ignorans, & toutes-fois ils rendent iustice aux voisins à certains iours sur quelque montagne fort haute. Ceux qui sont accusez, & peuuent nier, eschappent facilement: & s'ils sont surpris en manifeste larcin, on les condamne à la restitution, & quelques-fois à l'amende.

Quant au droit de succession, ces grands ne l'obseruent pas: mais celuy qui estant de bonne maison, se trouue plus fort, & plus hardy, se rend Seigneur par le moyen de la faction, & l'edition des gens de la contree, & chasse tous les enfans, & parens proches du deffunct, & par vne barbare ceremonie est mis en vn siege de pierre, au descouuert sur quelque haute montagne. Et quelquesfois en ce temps mesme par vne loy nommee *Thanistry*, on designe vn successeur, qui est nommé *Tanist*; peut estre du mot *Thane* de Dannemarc, qui signifie noble. Quant aux autres Irlandois, ils suivent plus la raison, & se gouvernent à l'Angloise.

Les Estats d'Irlande ont plus de puissance que tout le reste, & ceux-cy sont assemblez à 17. la volonte du Viceroy, combien que du temps d'Edouard 1. il estoit ordonné qu'on tiendroit les Estats en Irlande toutes les annees. Il y a aussi 4. assemblees iuridiques, comme en Angleterre, & 5. Cours, c'est à sçavoir la Chambre estoilee, la Chancellerie, le Banc Royal, le banc des communs Decrets, & le Fisc Royal, ou la Chambre du thresor. Il y a aussi les Iu-

sticiers des assises, *sinon auparavant, pour ouyr, & determiner*, & des Juges en chaque Comté, pour conseruer la paix. Le Roy a aussi son Sergent à la loy, son Procureur, ou *Attourneé* general & son Solliciteur.

Il y a aussi aux Prouinces plus esloignées des Gouverneurs pour rendre iustice, comme Connac le *principal Commissionnaire*, & President en Momoie, qui ont leurs Allessieurs choisis d'entre les nobles, & les Iuriconsultes.

L'Irlande a mesmes loix municipales que l'Angleterre & les loix des Parlements, ou Estats d'Angleterre y estoient en viage, iusques à Henry 7. Car l'an 19. de son regne elles estoient confirmées en Irlande par l'autorité des Estats. Mais depuis ils ont eu leurs statuts particuliers des Parlements.

Outre ces Magistrats ciuils, l'Irlande en a aussi vn militaire, sçauoir le Marechal, qui est là pour brider l'insolence des soldats, & des rebelles. Ceste charge a esté long temps par succession entre les mains des Barons de Morley d'Angleterre, qui la receurent du Roy Iean. Le Marechal a son Lieutenant, qu'on nomme *Princel Marecall*, & quelquesfois il en a plus d'un selon l'occurrence, & le temps, & tous exercent ceste charge, & font valoir l'autorité qui leur a esté donnée sous le grand sceel d'Irlande. Voila en gros tous les Sieges & Officiers d'Irlande, où l'on void presque mesme gouvernement qu'en Angleterre, en toute chose.

Mais auant que de finir ce discours, ie ne veux laisser passer vne particularité du gouvernement d'Irlande, qui est, qu'on n'y souffre aucun banquier, qui espuise l'argent du pays avec ses vsures, & charges insupportables. Les autres Prouinces seroient bien plus à leur aise, si ces sangsues leur estoient oltees, veu que ces gens sont comme la rate qui ne grossit, & ne s'enfle que par la diminution, & le dommage des autres. La France saignera long temps de la playe que ceste sorte de gens luy a faicte: & quand elle seroit deliurée de telles personnes, elle en seroit beaucoup plus heureuse.

RELIGION D'IRLANDE.

18. Ceste Isle receut la foy de Iesus-Christ l'an de nostre salut 335. du temps que Fincomarc regnoit en Escosse, & cela aduint par le moyen d'une femme d'entre les Piétes qui ayât pris cognoissance avec la Roynie l'an 322. luy preicha la foy Chrestienne, & la conuertit. La Roynie gagna le Roy, luy remonstrant ce qu'on luy auoit preiché, & le Roy disposa le peuple à receuoir le baptisme enuiron l'an 335. Or les Irlandois ont vescu depuis en ceste mesme Religion iusques au temps de Henry 7. Roy d'Angleterre, qui commença d'y semer l'heresie, qui y fut depuis aduancée par la Roynie Elizabeth, qui mesme en mit dehors le Comte du Tiroen Catholique, qui outre les autres subiects de sa reuolte, dont il n'est pas temps de discourir, auoit la cause de la Religion, qu'il ne pouuoit voir esteinte: mais ses affaires reüssirent si mal, qu'estant contraint d'abandonner l'Isle, il n'eut autre recours qu'au
19. Pape, & se retira à Rome. Tellement que les Catholiques n'y osent faire auioird'huy l'exercice de leur Religion, & s'ils sont trouuez faisans dire la Messe en leurs logis, outre le tribut qu'ils payent au Roy toutes les annees pour viure Catholiquement, & ne se trouuer pas aux assemblees de ceux de la nouvelle Religion; ils sont encore condamnez à vne grosse amende, qui emporte presque tous leurs moyens, & les Prestres sont confinez en prison perpetuelle. De sorte que l'Irlande n'a publiquement autre Religion que telle que nous auons descrite discourant de l'Angleterre, & autres plusieurs Edicts qui ont esté publicz en ceste Isle contre les Catholiques & Ecclesiastiques conformement à ceux que la Roynie Elizabeth & du Roy Iacques 6. de la grande Bretagne ont faict publier en Angleterre: le Viceroy & Conseil d'Irlande ont faict nouuellement publier vn Edict le 30. Ianuier 1624. portant bannissement des Archeuesques, Euesques, Iesuites, & tous autres Ecclesiastiques & Seminaires hors ledit Royaume d'Irlande en ceste sorte.

20. Il est bien assez cognu par experience iournaliere, quels intolerables meschefs & inconueniens sont tombez sur ce Royaume, à cause de l'extraordinaire frequentation & aduenement icy de personnes communément appelez Titulaires, Archeuesques, Euesques, Grâds Vicaires, Abbez, Prieurs, Doyens, Iesuites, Freres, Prestres de Seminaires & autres de ceste secte, qui taschans d'establir & maintenir vn pouuoir & autorité estrangere en ce domaine de sa Majesté, lesdits Euesques sous pretexte d'icelle ont vsurpé & exercé la iurisdiction Ecclesiastique en ce Royaume, en toutes causes spirituelles & Ecclesiastiques, au grand prejudice de la Couronne Imperiale de sa Majesté, comme aussi lesdits inferieurs Prestres seculiers ont exercé toutes fonctions spirituelles & sacerdotales, comme Baptême, mariage, & autres

autres iemblables; & sous pretexte & couleur d'icelles ont pris & exigé maints salaires de ceux qui sont abusez & trompez par eux, au grand & intolérable grief & surcharge de ceste pauvre nation, & taschant & s'efforçant à pervertir les cœurs des subiects, & de les tirer de la vraye Religion icy establee, à vn aucuglement & superstition, & aliener leurs affections de leur Seigneur souverain sa Majesté, pour les assubietir à ladite autorité estrangere, & troubler la paix & tranquillité commune de ce Royaume.

Pour reformer tels abus, & chasser telles seditieuses personnes, plusieurs Edicts ont esté faits & publiez en ce Royaume: vne partie par l'autorité & commandement receu de sa Majesté d'Angleterre, & autres par l'autorité du Vice-Roy & Conseil de ce Royaume pour le temps, commandants par iceux Edicts, & estroitement enjoignants ausdites personnes promptement ou dans peu de temps apres, (& ja long temps y a expiré) sortir hors de ce Royaume, & de ne iamais cy-apres y retourner, sinon qu'ils le voudroient conformer à la Religion icy establee, & bien & ordinairement frequenter l'Eglise, sur peine d'encourir le grandissime courroux & indignation de sa Majesté, & sur peine des punitions que par iuste raison pourroient estre infligees sur les contempteurs & mespriseurs volontaires des commandemens de sa Majesté Royale. Ce nonobstant sa Majesté est aduertie que lesdits Titulaires, Euesques, &c. & autres personnes ja mentionnees, se sont depuis peu accreus icy en plus grand nombre qu'en aucun autre temps cy deuant; Et que tels Iesuites, Prestres de Seminaires & autres Prestres, Freres, Grands-Vicaires, Abbez, Prieurs & Euesques ainsi ordonnez par autorité estrangere, qui cy deuant se cachotent secrettement en plusieurs endroits de ce Royaume, depuis peu, avec plus grande audace & presumption se monstrent & declarent en l'usage & exercice de leurs fonctions es publiques assemblees, à raison desquelles les subiects generalement ont esté plus seduits, & confirmez en leur desobeissance & obstination contre les loix & commandemens Royaux de sa Majesté, (en mespris d'icelle, & des precedents Edicts) & sont en termes d'engendrer encore plus grands meschecs, s'il leur estoit permis de demeurer & continuer icy plus long temps; De laquelle augmentation & insolence desdits Euesques, Papistes, Prestres & autres ja mentionnez, sa Majesté ayant pris cognoissance particuliere, a signifié & déclaré son grand desplaisir là dessus, & en consequence d'icelle, il nous a commandé de mettre à execution toutes les loix, (qui ont force & vigueur en ce Royaume) qui infligent aucune punition sur ceux qui exercēt aucune chose pour exalter & maintenir le pouuoir ou Iurisdiction spirituelle ou Ecclesiastique d'aucun Prince ou Prelate stranger dans ce Royaume, & nous commanda de reiterer l'Edict pour bannir & chasser tous Euesques Papistes, Prestres, Grands-Vicaires & autres, comme dit est, hors d'icelle, comme estants les principaux supposts & fauteurs de ladite autorité vsurpee.

Scachez donc que nous (obeissans aux commandemens de sa Majesté Royale, & pour donner vn aduertissement à tous en cet endroit) denonçons, & au nom de sa Majesté estroitement donnons charge & commandement, que tous ceux, & sçavoir, tous Titulaires, Doyes, Iesuites, Freres, Prestres de Seminaires & autres Prestres quelconques, Reguliers ou Secliers, estants faits ou ordonnez par aucune autorité deriuee, ou pretendue estre deriuee du siege de Rome, ou par aucune autre autorité estrangere quelconque, sortent Incontinent hors de ce Royaume d'Irlande, & au plus tard dans l'espace de quarante iours apres la datte du present Edict; Et que aucuns de ces Titulaires, Euesques, Grands-Vicaires, &c. ordonnez par autorité estrangere, comme dit est, ne viennent, ny retourneront en ce Royaume apres ces quarante iours passez, sur peine d'encourir la plus haute indignation & desplaisir de sa Majesté, & sur telles autres peines & punitions, qui peuuent estre iustement infligees sur eux par les loix & statuts de ce Royaume. Et sur telles peines aussi nous, au nom de sa Majesté, deffendons expressement à toutes personnes quelconques en ce Royaume, de recevoir, secourir, ou conuerser avec eux, ou recevoir les ordres, ou instruction d'aucun tel Titulaire, Archeuesque Papiste, Euesque, Grand-Vicaire, Abbé, Prieur, Doyen, Frere, Prestre des Seminaires & autres Prestres, qui apres ces 40. iours demeureront & continueront en ce Royaume, ou retourneront en iceluy contre le contenu de cet Edict.

Et dauantage, au nom de sa Majesté nous declaron, publions, & commandons, qu'en cas que tels Titulaires, Archeuesques Papistes, Euesques, Grands-Vicaires, Abbez, Prieurs, Doyens, Iesuites, Freres, Prestres de Seminaires ou autres Prestres demeureront, & obstinément continueront en ce Royaume, apres ces 40. iours passez, ou volontairement reuiendront ou retourneront en ce Royaume, ou en aucune partie d'iceluy: ou si quelques-uns les recoiuent, secourent, ou conuersent avec eux, ou recoiuent les ordres, ou instruction de quelqu'un de tels Titulaires, Archeuesques Papistes, Euesques, &c. que alors tous & chacun les Gouverneurs des Prouinces, Preuosts, Mareschaux, Majors, & Escheuins des villes,

Conneftables, & autres les Officiers de fa Majesté, & fidels fubiets en ce Royaume, feront leur diligence & efforts pour empescher tous & chacun tels Titulaires, Archeuefques, Papiftes & autres, comme dit est, & tous & chacun leurs receleurs, fauteurs, fecoureurs & adherents, & eux & chacun d'eux mettront en quelque ferme & eftroite prifon, iufques à ce que ordre foit donné pour leur punition, ainfi que à nous le Vice-Roy & Conseil iemble-ra bon.

Et encoré nous requérons qu'eux & chacun d'eux feront feuerement commandez de mettre en pleine & entiere execution cet Edict de fa Majesté, à peine eux & chacun d'eux d'en répondre du contraire deuant fa Majesté, qui les appellera à vn eftroit compte, touchant l'accompliffement de leur deuoir en cet endroit.

Pourueu toutesfois, que si quelqu'un desdits Titulaires, Archeuefques, Euefques, &c. deuant lesdits 40. iours efcheus, ou dans dix iours après leur retour & arriuee en ce Royaume, fe foubmettront deuant nous le Vice-Roy à present, ou deuant le Vice-Roy ou autre principal Gouverneur qui fera alors en ce Royaume, ou deuant le Gouverneur d'aucune Province, ou aucun du Conseil Priué de fa Majesté en ce Royaume, & fur ce se conformeront & frequenteront deuëment & proprement l'Eglife selon la teneur des loix de fa Majesté, que alors il sera & pourra estre licite & permis à tous & chacuns tels Titulaires, Archeuefques, Euefques Papiftes, &c. qui ainfi se foubmettront & conformeront, de demeurer & continuer en ce Royaume, & reuenir & retourner en iceluy, & jouir du benefice des loix de fa Majesté, & de fa Royale protection, en auffi libre & ample maniere qu'aucun autre loyal fubieét; tandis que eux ou chacun d'eux continueront en leur conformité. Donné au Chasteau de fa Majesté à Dublin, le 21. Ianuier 1624. Ainsi signé,

Adam Loftus Chancelier, Henry Valentia, Francisco Aungier, François Blundell, George Shurley, I. Blenet Hayfet, Dudley Norton, François Amesley, Guillaume Parsons, Roger Jones, Jean King, Adam Loftus.

VIVE LE ROY.

Imprimé à Dublin, anno D. 1623. Qui selon nostre computation fut le 30. Ianuier 1624.

21. En Irlande il y a quatre Archeuefques, c'est à fçauoir celui de *Dublin*, d'*Armaah*, de *Cafil*, & de *Toane* : & ces quatre ont vingt-quatre Suffragans. Leur autorité estoit anciennement grande, mais aujourd'huy le Roy d'Angleterre l'a entierement tiree à luy, & a toute puiffance tant aux choses spirituelles, que temporelles. Et pource qu'on a retranché toute liberté aux Catholiques, & qu'ils y vivent avec mille peines, principalement ceux qui font de l'Eglife, ils se sont retirez de tous les costez de l'Europe, pour tesmoignage du mauvais traictement qu'ils y reçoient, & de la perte de la vraye Religion en ceste Ile.

DISCOVRS

S O M M A I R E.

- E**



Le nom de la Gaule a sa source incertaine, les vns le tirent du nom Grec à γάλα qui signifie lait, pource que les peuples Gaulois ont la face & le visage fort blanc; les autres veulent tenir ce nom de Galate fille d'Hercules, qui s'y habitua; quoy qu'il en soit la source du nō Gaulois est fort ancienne, & pour dire vray incogneue; nous lisons donc bien dans quelques vieux Auteurs, & Merula l'observe, que iadis on vouloit signifier le pays & le peuple Gaulois par le nom de Celtes, pour la Noblesse du peuple Senonois, & du pays d'alentour Paris natal d'une nation & d'un sang le plus illustre de Gaule, qui surmonta l'Italie, & se rendit tributaire l'orgueilleuse puissance de Rome. Ceste nation & le pays portoient le nō de Celtes dont Cesar faict mention fort souuent; & pour ce que ceste genereuse milice des Celtes redoit la Gaule & les Gaulois redoutables aux Prouinces estrangeres, & qu'ils estoient la gloire de toute la nation Gauloise, à ce subiect le nom de Celtes fut attribue à toute la Gaule, à ses peuples, & fut appelée le pays des Celtes; & de faict Ephore Geographe chez Strabon, diuisant le monde en quatre parties dict, que celle qui regarde le Midy est habitee des Negres Ethiopiens, celle qui s'estend vers la partie du Nord & du Septentrion, par les Scythes; & la troisieme qui regarde l'Occident, est, dit-il, habitee par les peuples Celtiques; ceste appellation fut derechef abolie par la premiere de Gaule & Gaulois, qui retourna en vsage sous le temps de Cesar: mais aussi ceste ancienne fut changee par l'introduction es Gaules des peuples Allemands nommez Franks, sortis des pays d'Allemagne Septentrionaux, comme note Ptolomee, qui s'estant meslez avec les Gaulois, & rendus Maistres de plusieurs grands pays de Gaule, changerent les noms de Gaule & Gaulois en ceux de France & François, & a force de se multiplier en peuples sourcilleux en nombre, ennemis d'esclavage, & ayans secoué le joug tyrannique des Romains se maintindrent franks & libres, & du depuis iusques à present ont esté nommez Franks, & la Gaule, France. L'on comprend sous le nom de Gaule tout ce qui s'appelloit autresfois ainsi, veu que par ce moyen elle contiendra non seulement le Royaume de la France, mais encor vne bonne partie d'Allemagne, & d'Italie. Car les anciens diuisoient la Gaule en Cisalpine, & Transalpine, nommant Cisalpine, ou Gaule par deça les Alpes (selon leur demeure) ce qu'on nomme auourd'huy Lombardie: & donnant de Transalpine, ou de Gaule par de là les Alpes, au pays qui est enfermé entre la riuere du Rhin, la mer Oceane, les Monts Pyrenees, la mer Mediterranee, & les Alpes. Mais Cesar diuise la Gaule en Belgique, Celtique, & Aquitanique: & Ptolomee nous propose la Gaule diuisee en quatre parties, c'est à sçauoir, en l'Aquitannique, en la Lyonnoise (qui est mesme chose que la Celtique de Cesar) en la Belgique, & la Narbonnoise, & de ces mesmes parties la Belgique est maintenant pour la plus grande part de l'Allemagne, qu'on appelle inferieure ou basse Germanie.

2. Mais à prendre la France en l'estat auquel elle se trouue à present, du costé du Nord, duquel elle regarde la basse d'Allemagne, on luy donne pour limite vne ligne tiree depuis Calais iusques à Strasbourg, qui laisse à main gauche le pais d'Artois, de Haynaut, & de Luxembourg & à la main droite la Picardie, & la Lorraine, & du costé qu'elle regarde l'Angleterre, la mer Oceane, nommee des anciens Britannique. Du couchant la mesme mer Oceane la borne faisant vn grand golphe en Aquitaine. Du Midy, du costé qu'elle se joint à l'Espagne, elle est bornee des Monts Pyrenees, où elle est moins restraite, & plus large, elle a pour ses limites la mer Mediterranee. Finalement du Leuant elle a les Alpes qui la separent de l'Italie, de mesme que le mont Iura la diuise des Suisses, & le Rhin des Allemands. Et tout le Royaume, si on prend de droit fil d'Orient en Occident, depuis l'Isle d'Heissant, opposee au dernier riuage de la Bretagne, iusqu'au bord du Rhin, a de longueur quelque peu plus de 300. lieues de France: ou bien si l'on veut mesurer sa longueur, selon les autres, en tirant de l'Ouest, Nort-Ouest, à l'Est Suest, de l'Isle d'Aldenay de Normandie iusques à Nice, on y trouuera 330. lieues, qui est presque autant de chemin qu'il y en a de Paris à Rome. Sa largeur, à prendre depuis les parties plus Meridionales, qui sont vers la mer Mediterranee, iusques à la ville de Calais, est enuiron de 220. lieues & le tour de toute la France est de plus de 1020. lieues. Ce Royaume est enclos entre le 13. & le 19. parallele, c'est à dire qu'il tient en largeur depuis le milieu du 5. climat, entre le 41. & en 51. degré de largeur, & le 20. & 38. de longueur, où le plus long iour est de 15. heures, iusques au milieu du 8. où il est de 16. heures & demie. Et quant à la longueur, il comprend tous les Meridiens qui sont compris entre le 15. Meridien, & le 19.

3. Au reste pour diuiser la France en toutes ses parties, il me semble qu'il est à propos de la prendre selon les Parlements, à la iurisdiction desquels elle est soumise. Elle a donc 8. principaux

paux Parlements qui sont Paris, Thoulouse, Rouën, Bordeaux, Rennes, Dijon, Grenoble, & Aix, & en a encores deux moins principaux, c'est à sçauoir celui de la basse Nauarre, qui tient à Saint Palais, & celui de Mets. Le Parlement de Paris contient les Dioceses qui s'en suivent.

L'Archeuesché de Reims.
L'Archeuesché de Sens.
L'Archeuesché de Lyon.
L'Euesché de Laon.
Celle de Chalon en Champagne.
Celle de Soissons.
Celle de Bologne.
Celle d'Amiens.
Celle de Noyon.
Celle de Senlis. ^{f)}
Celle de Beauvais.
Celle de Paris.
Celle de Chartres.
Celle d'Orleans.
Celle de Nevers.

L'Archeuesché de Bourges.
L'Archeuesché de Tours.
Celle d'Auxerre.
Celle de Meaux.
Celle de Poitiers.
Celle de Maillezay.
Celle de Lussan.
Celle d'Angoulesme.
Celle d'Angers.
Celle du Mans.
Celle de Clermont.
Celle de saint Flour.
Celle de Langres.
Celle de Malcon.

Et les principales Prouinces où sont les susnommez Archeueschez, & Eueschez, sont l'Isle de France, la Beausse haute & basse, la Soloigne, Berri, Auvergne, Lionnois, Forests, Beaujolois, Poictou, Anjou, Angoumois, le Maine, Brie, Picardie, Champagne, Touraine, Nivernois, Bourbonnois, Malsconnois; de toutes lesquelles Prouinces nous ferons apres un discours particulier.

Le Parlement de Thoulouse a sous luy,

L'Archeuesché de Narbonne.
L'Archeuesché d'Auch.
L'Archeuesché de Thoulouse.

Ses Eueschez sont,

Nismes.
Véz.
Lodoue.
Saint Pons de Tomieres.
Ale.
Montpellier.
Besiers.
Agde.
Carcassonne.
Mende.
Castres.
Alby.
Le Puy.
Rodez.

Vabres.
Cahors.
Pamies.
Mirepoix.
Saint Papol.
Montauban.
La Vaur.
Rieux.
Lombez.
Cominges.
Couserans.
Tarbe.
Laiçtoure.
Vimiers.

Ses principales Prouinces sont ce que l'on nomme, haut & bas Languedoc, qui est de fort grande estenduë, le haut & bas Viarez, le Veley, le Geuaudon, l'Albigois, le Rouergue, le Lauragois, le Quercy, le pays de Foix, & vne partie de la Gascogne.

Le Parlement de Rouën a sous luy,

L'Archeuesché de Rouën.

Ses Eueschez sont,

Auranche.
Eureux.
Bayeux.

Seez.
Constance.
Lisieux.

C'est le Parlement de Normandie.

Discours de l'Estat.

Le Parlement de Bourdeaux a sous luy

L'Archeuesché de Bourdeaux.

Ses Eueschez sont,

Bayonne.

Aqs.

Basaz.

Aire.

Xaintes.

Perigueux.

Sarlat.

Agen.

Limoges.

Condom.

Tulle.

Ses principales Prouinces sont vne partie de la Gascogne, haute & basse Biscaye,
Xaintonge, Perigor, & Limosin.

Le Parlement de Rennes a sous luy les Eueschez qui s'ensuiuent.

Saint Brieu.

Saint Malo.

S. Paul de Leon.

Nantes.

Vannes.

Triguier.

Cornoüaille,

Dol.

Rennes.

C'est le Parlement de Bretagne.

Le Parlement de Dijon a sous luy,

L'Euesché d'Autun.

L'Euesché de Chalon sur Saone.

C'est le Parlement de la Bourgongne.

Le Parlement de Grenoble a sous luy,

L'Archeuesché d'Ambrun.

L'Archeuesché de Vienne.

Ses Eueschez sont,

Valence.

Die. Ces deux sont gouuérnees par vn mesme Euesque, sans que l'un v'surpe les droits
de l'autre.

Grenoble.

S. Paul trois Chasteaux.

Gap.

C'est là le Parlement de Dauphiné.

Ce Parlement d'Aix a sous luy,

L'Archeuesché d'Aix.

L'Archeuesché d'Arles.

Ses Eueschez sont,

Digne.

Grasse.

Glandeue.

Senas.

S. Paul de Vences.

Apt.

Riez.

Freiuz.

Cisteron.

Marseille.

Tolon.

C'est là le Parlement de Prouence.

Le Parlement de Bearn a sous luy,

L'Euesché de l'Escar, &c

Celle d'Oleron.

Le Parlement de S. Paul a sous luy,

La Biscaye

La Biscaye Nauarroise, ou la basse Nauarre.
Le Parlement de Mets a soubs luy les Euesques de

Mets.

Toul.

Verdun.

O pour parler à ceste heure particulierement des Prouinces de France, ie commenceray 5. par la Picardie, qui a auourd'huy pour sa borne du costé d'Occident, avec vne partie de la Normandie, la mer Angloise, du Nort l'Artois & le pays de Haynaut, contrees de l'ancienne Gaule Belgique, & du Leuant Luxembourg, & la Lorraine, & du Midy la Champagne, & l'Isle de France.

Ses principales villes sont Amiens, Soissons, Abbeuille, Corbie, Peronne, Dorlen, S. Quentin, Noyon, Laon, Boulogne, la Fere, Beauuais.

Ceste Prouince est diuisee en vraye, haute & basse Picardie, dont la haute est presque auourd'huy toute dâns les pays bas.

La vraye, qui commence à Creue-cœur, comprend les Vidamies d'Amiens, de Corbie, & de Piquiny, la Comté de Vermandois, & la Duché de Tirasche, & de Rethelois.

La Comté de Vermandois comprenoit Soissons, Laon, & la Fere, trois des meilleures villes de Picardie, & S. Quentin, qui est vne forte place.

Rethel est la principale ville de Rethelois, qui est assis entre le pays de Haynaut, de Lorraine, & de Barrois.

La principale ville de la Duché de Tirasche c'est Guise, où il y a vn assez bon Chasteau.

La basse Picardie comprend Santerre, où est Montdidier, Peronne, Roye, & Nesles assez fortes places.

La Comté de Ponthieu, dont la principale ville est Abbeuille, les autres places sont le Crottoy, Ruë, Treport, Cressy: & on tiët aussi que ceste Comté comprend celles de S. Paul, & de Monstreul.

La basse Picardie embrasse aussi la Comté de Boulongne, la Comté de Guynes, qui est diuisee de la Comté d'Oye par vn grand canal qui passe au milieu de la ville de Guynes, & ceste Comté comprend soubs soy deux Baronnies, sçauoir celle d'Ardres, & celle de Courtembrone.

A 3. lieues d'Ardres, en tirant vers la mer, on trouue la ville de Calais, qui est de la Comté d'Oye, qui s'estend iusqu'à Dunkerke ville des pays-bas.

Les principales riuieres de Picardie sont celles de Somme, sur laquelle on trouue Amiens, & Abbeuille: la riuere d'Oyse, pres de laquelle est la Fere, Marne, Aync, l'Eschau, & Scarpe.

De ces villes de Picardie, Soissons a esté iadis demeure des Roys, mais depuis le tiltre de Royaume de Soissons a esté transformé en celuy de Comté.

Les dernieres terres que les Anglois ont tenuës en France, sont la Comté d'Oye, où est Calais, qui fut prise sur le Roy Philippes de Valois, apres la bataille de Cressy en Ponthieu, l'an 1347. & repris du tēps du Roy Héry II. par François de Lorraine Duc de Guise, l'an 1550.

Voila ce qui nous reste auourd'huy de la Gaule Belgique.

Maintenant il est à propos de parler de la France prise plus particulierement, qui est 6. de la Gaule Celtique, & qui est voisine de la Picardie du costé d'Occident. Ceste contree que l'on nomme plus particulierement France, a esté iadis habitee par les Beauuoisins, & Parisiens. • maintenant Paris en est la principale ville, & ce pays contient maintenant la Preuosté, & Vicomté de Paris, la Duché de Valois, & le Hurepois, & Gastinois.

La Preuosté, & Vicomté de Paris est diuisee en 4. parties, à sçauoir en celle qui est appelée Parisis, qui comprend d'vn costé tout ce qui est iusqu'à Pontoise, & de là iusqu'à Clay vers la Brie: Ce nom de Parisis est presque esteint, & n'est demeuré qu'à quelques villages, comme à Louure, Cormeille, Escouan, & autres qu'on nomme en Parisis, & aux taxes du Parlement, où l'on fait mention de sols, & deniers Parisis.

La ville de Paris a esté seulement autrefois de la grandeur de l'Isle que la Seine environne: Mais elle fut depuis beaucoup augmentee, & debat auourd'huy d'estenduë avec les plus grandes de l'Europe. Elle est diuisee en trois parties, dont la plus grande qui regarde vers le Leuant, & le Septentrion, & est plus basse que les autres, est nommée la Ville: la plus petite qui est en lieu plus esleué, & regarde le Midy, & l'Occident s'appelle l'Vniuersité: & la partie du milieu qui est enuironnée de tous costez de la riuere, a le nō de Cité. La ville a 7. portes, c'est à sçauoir celles de S. Anthoine, du Tēple, de S. Martin, S. Denys, Mōtmartre, S. Honoré, & la Porte neufue, qui est prez du Louure. Elle a 6. faux-bourgs, c'est à sçauoir de S. Anthoine, de S. Martin, du Tēple, de S. Denis, de Mōtmartre, & de S. Honoré. Et ce qui rēd ceste partie remarquable, par dessus les autres, c'est qu'elle contient le Louure, demeure ordinaire de nos rois. La Cité a pour son ornement le Palais, ou Siege de la Iustice, & d'ailleurs le Pont-neuf, ouurage veritablement Royal, cōmencé par le Roy Henry III. mais acheué, & accompli

par Henry le Grand, qui a surmonté le dessein de son predecesseur, & a rendu ce Pont agreable, & commode en toute sorte. Ce quartier comprend aussi le Pont Nostre-Dame, fait de pierre de mesme que le Pont neuf, où l'on ne voit que boutiques pleines de toute sorte de marchandises, & si bien garnies qu'on ne peut rien voir de mieux assorty. On passoit de là au Pont au Change, ou on y trouuoit tant de richesses chez les Orfeures, & tant d'esclat de pierreries, qu'il estoit impossible que les plus curieux de telles choses n'y contentassent leur veüe. Tout aupres cy-deuant s'y voyoit aussi l'edifice du Pont aux Marchands, autrefois dit le Pont aux Meusniers, que l'on aduoüera auoir esté vn des embellissements de Paris, & que la rue qui estoit sur ce Pont, surpassoit en beauté toutes les autres.

Mais le 25. Octobre 1621. le feu s'estant pris entre minuit & vne heure dans vne souspen-
re pleine de fagots dudit Pont aux Marchands, en vn logis d'un Escrivain, nommé Goulard, en moins de deux heures embrasa generalement tout ce beau Pont qui consistoit en plus de cinquante corps de logis, avec perte incroyable d'une infinité de marchandises & meubles de valeur qui ne peurent estre sauuez. Les pauvres marchands n'ayans le loisir que de fuir & sauuer leurs familles tous nuds, la plupart abandonnans aux flammes ce qu'ils ne peurent emporter.

Cet incendie ne s'arresta pas là, la flamme gaigna encore quelques logis du Pont aux Changeurs, ausquels bien prit à quelques-uns de desloger de bonne heure, laissant leurs meubles & beaucoup de richesses enterrees avec les ruines dudit Pont dās la riuere; car en moins de deux heures, de mesme que celui des Marchands, tout ce beau Pont aux Changeurs, qui auoit esté si soigneusement raccoustré, fut vniuersellement perdu, car detachant les logis les vns d'avec les autres, renuersa le tout en la riuere. La perte du bien des Marchands & de leurs meubles fut estimee à plus de quatre cents mille liures.

Quant à l'Vniuersité, elle a les portes de S. Victor, S. Marceau, S. Jacques, S. Michel, & S. Germain, & celles de Bussy, & de Nesle, & les fauxbourgs de S. Germain, S. Michel, S. Jacques, S. Marceau, & S. Victor.

Quant aux Eglises ou Chappelles, dont le nombre est fort grand, celle de Nostre-Dame surpasse les autres: elle est soustenuë de douze colonnes, a de longueur 174. pas, de largeur 60. & de hauteur 100. Elle a à l'entour quarante-cinq Chappelles garnies de barreaux, ou grilles de fer. Il y a en tout sept portes, dont les trois qui sont au front, ont au dessus vingt-huit statues de nos Roys. A costé l'on void les Tours Nostre-Dame de la hauteur de trente-quatre coudées. Ces Tours seruent de Clochers, où l'on void la grosse cloche, qui est si pesante, qu'il faut douze hommes pour la sonner, & le son est ouy de trente-quatre lieues à l'entour. Pour les autres lieux deuots il ne s'offre rien de plus admirable que la Sainte-Chapelle, qui est ioincte au Palais, & qui a esté bastie par S. Louys, n'ayant aucune colonne au milieu, pour soustenir sa grande & haute voute, mais seulement aux costez. On garde en ceste Chappelle vne partie de la Couronne d'espines, la Robbe de pourpre, le Roseau, & l'Esponge de la passion, la verge de Moysé, le fer de la lance, du suaire de Nostre Seigneur, & grande quantité d'autres saintes Reliques. Il y a plusieurs Monasteres, dont celui du Temple osté aux Templiers en l'an 1506. donné aux Cheualiers de Rhodes, est de fort grande estendue: l'Abbaye sainte Geneuiefue est aussi fort spacieuse, de mesme que celle de saint Germain des prez, qui est hors de la ville aux fauxbourgs de S. Germain, qui porte à son maistre 30. mille liures de rente.

Quant aux Colleges, il y en a en tout 50. dont celui de Nauarre, fondé par la Roynie Ieanne de Nauarre, femme de Philippe le Bel, est le plus signalé.

Le College de Sorbonne fut institué par Robert de Sorbonne Theologien, du temps du Roy S. Louys.

Quant aux boutiques mechaniques, & ouuriers, certains lieux particuliers leur sont presque assignez à Paris, c'est à sçauoir aux parcheminiers prez du pont S. Michel, aux Foulons pres S. Iean en Greue, & ainsi des autres.

Il y a grand nombre de places, & d'extremement beaux logis, dōt les plus remarquables sont l'Hostel de Soissons de Longueville, l'Hostel de Cheureuse, l'Hostel du Bouchage, l'Hostel Montmorency, l'Hostel de Guise, l'Hostel d'Ost, l'Hostel de Langres, qui est maintenant l'Hostel de Mayenne, l'Hostel de Neuers, l'Hostel Zamer, dit à present de l'Esdiquieres, logis de M. le Cōestable, l'Hostel d'Angoulesme, l'Hostel de Vitry, l'Hostel de Nemours, l'Hostel d'Esperson, & vn grand nombre d'autres encores fort beaux qui sont dans la ville: & au dehors vous auez aux fauxbourgs S. Honoré l'Hostel de Mercœur, & aux fauxbourgs Saint Germain, le superbe Hostel de Gondy, l'Hostel de Luxembourg, l'Hostel abbatial de S. Germain des prez, l'Hostel de Bouillon. Il y en a beaucoup d'autres, mais ce ne seroit iamais fait d'en vouloir faire le denombrement: il suffit de dire que les maisons d'un quart,
voire

voire mesme d'un tiers de Paris, semblent des Palais. Je diray encores cecy, que si l'on iette les yeux sur l'Arcenal, on en trouuera la demeure du tout belle, & spacieuse, & le bastiment fort agreable, & outre ce qu'il n'y manque aucune chose de toutes celles qui doiuent estre en vne maison où les foudres, & munitions du Prince se gardent. Mais si l'on desire voir vn bastiment admirable, & vrayement Royal, il faut considerer la place Real, où l'on verra outre les belles galleries qui rauissent tous les regardans, autant qu'elles les contentent, vn grand nombre de logis tellement accomplis, & assortis de tout ce qui peut seruir aux necessitez, ou aux delices, que les plus curieux n'y scauroient desirer aucune chose. La maison de Ville n'est pas aussi vn des moindres ornemens de cét abregé du mode. Pour le grand, & le petit Chastelet, & la Bastille, ce sont des bastimens que leur antiquité rend plus recommandables que leur beauté. Celuy qui voudra scauoir plus de particularitez de Paris, lise le liure qui en a esté fait expressément, par le bon Pere du Breuil Religieux de l'Abbaye de S. Germain des Prez, où l'on trouuera tout ce qui s'en peut dire. Vous trouuez assez pres de la ville le bourg de Conflans, proche du pont de Charenton, où la superbe & magnifique maison de feu monsieur de Ville-roy Secretaire d'Estat, appartient aujourd'huy à monsieur de Verdun premier President de la Cour, demeure des plus agreables qui soit en France, il s'y oit vn Echo qui rend treize fois la voix, & si vous dites apres vn mot de quatre syllabes il le redit tout entier par quatre ou cinq fois.

La seconde partie est celle que l'on nomme vulgairement la Gaule, qui est peu cogneuë, & dont le nom est resté seulement à quelques villages. En ce país est contenuë la Comté de Danpmartin, qui est vn bourg assis sur vne petite colline.

Dauantage pour l'embellissement & commodité publique de ceste grande ville, les delices de nos Roys, depuis vn an sa Majesté a recommandé le soing d'y faire venir les eaux des sources voisines, de maniere que maintenant par la ville, Cité & Vniuersité de Paris il n'y a place ny carrefour où ne se voyent de tres-belles fontaines, principalement deuant l'Eglise de saint Benoit, & carrefour de saint Seuerin rue saint Jacques: au mont de sainte Geneuiefue & croix des Carmes, au paruis de l'Eglise de Nostre-dame de Paris, deuant la grande porte du Palais, en la place de Greue, au deuant du grand Chastelet & en autres endroits de la ville, sans les maisons particulieres, Monasteres, Colleges & autres lieux qui jouissent encore de la commodité de ceste eau.

L'Isle de France (qui est en troisieme lieu) comprend tout ce qui est depuis saint Denys iusques à Poissy, & Montmorency, & generalement tout ce qui est entre les tours, & serpentemens de la Seine, en tirant vers la Picardie, & la Normandie.

Quelques-vns luy donnent d'autres bornes: mais mon dessein n'est pas d'en debattre.

Saint Denys est superbe des sepulchres de nos Roys, & de plusieurs saintes & precieuses reliques, & d'un grand nombre de riches ornemens.

A Poissy vous y voyez vn bon Couuent de Religieuses des meilleures maisons de France. A saint Germain en Laye, qui est entre Poissy, & Paris, vous y voyez la maison Royale, qui a esté renduë digne demeure des Roys, sous le regne de Henry IV.

S'ensuit Vexin le François ou Vulxin, qui s'estend iusques à Clermont en Beauuoisis: mais la memoire en est presque entierement perduë, & ne se conserue qu'en quelques vieux registres. Voila quant à la Preuosté & Vicomté de Paris, & à ses quatre parties.

L'autre partie de la France prise plus specialement c'est le país de Valois, qui s'estend iusques en Picardie, dont la premiere ville outre Crespy, c'est Senlis, Euesché, les autres sont Angy, le Pont saint Maixne, Pongoing, Brenouille, &c..

Le país de Hurepois commence à la Seine sous le petit pont de Paris, & va du long de la riuere iusques à Corbeil, Melun & Moret, où il est separé du Gastinois par la Verine, qui se descharge dans le Loing. Et en ce país on void Fontainebeilleau la plus belle, plus agreable & plus superbe demeure que nos Roys puissent iamais auoir, & qui a esté mise en cet estat par le Roy Henry le Grand.

On met en quatrieme lieu le Gastinois, qui comprend les Duchez d'Estampes, & de Nemours, la Comté de Rochefort, de Moret, & autres, & les villes de Milly, de Montargis, & l'ancienne Abbaye de Ferrieres en Gastinois, fondée du temps des Apostres 11. ans apres l'Ascension de Iesus-Christ par les Disciples de saint Pierre, & du depuis accruë par le Roy Clouis premier Chrestien, qui en est appellé premier Fondateur.

S'ensuit maintenant la Beausse, que quelques-vns diuisent en trois parties: la haute s'estend depuis le bourg d'Ablis, iusques au país Chartrain, & au delà, contenant les Comtez de Dreux, & de Monfort: la basse Beausse comprend le país d'Orleans, de Soloigne, & Lorriz: & quant à la moyenne, ils y logent la Comté de Blois, sous laquelle ils mettent celle de Dunois, puis la Duché de Vendosme, & celle de Touraine.

La ville d'Orleans est celebre , & renommee pour les faits d'armes de Ieanne la Pucelle.

La Soloigne comprend les villes de Gergeau, la Ferté, Clery, & saint Laurens.

La Touraine est entre Blois, & Saumur.

Amboise est de la Touraine, où il y a vn Chasteau qui peut estre mis entre les meilleurs de France.

Il y a aussi l'Isle Bouchard , assis sur la riuere de Vienne , dont ceste ville est entourée.

Chastillon sur l'Indre, Lochefort place, Asay le Brusle sur l'Indre, & Asay le Ferron sur la riuere du Chair & Montrichard, à quoy quelques-vns adjoustent Loudun , mais les autres le mettent en Poictou.

L'Anjou commence au bord du Chouzay , & finit entre Montcontour , & Herraug , où est le commencement du Poictou , qu'il regarde au Midy: du Leuant il a pour ses bornes la Touraine , & le Vendosmois , du Nort le Mayne & Laual , du Couchant il touche la Bretagne.

Il y a en ceste Prouince beaucoup de riuieres, comme Loire, le Mayne, Vienne la Diue, le Loir, le Sarre, & plusieurs autres. La principale ville est Angers: les autres sont Saumur, Montreneau, Bauge, Beaufort, Brissac, Montreul, Bellay, Mauleurier, Chantorceau, Duretelle, la Fleche, Chasteau-Gontier, &c. L'Anjou vint à la Couronne de France sous Louys XI. par la mort de Charles dernier Duc, nepueu de René.

Le Mayne qui joint à l'Anjou , & à la Touraine, vient apres , & ceste prouince a trois principales riuieres, c'est à sçauoir, le Mayne, le Loire, & le Sarre : la capitale ville c'est le Mans. Ceste prouince comprise sous l'Aquitaine , a autrefois obey à ses Ducs , iusqu'à ce qui fut accordé entre Louys XI. Roy de France, & Henry III. Roy d'Angleterre, que l'Anglois se contenteroit de la Guyenne, qui seroit bornée du costé du Nort de la riuere de Garante, & du Midy des monts Pyrenées, & quitteroit toutes ses pretensions de la Normandie, & des païs du Mayne & d'Anjou , & en consideration de ce on luy donneroit quinze cents mille escus.

Quant au païs du Perche, il est diuisé en deux parties, dont l'une est nommée le Perche Gouet, dont la principale ville est Nogent le Rotrou: l'autre est proprement la Comté, & la principale ville c'est Mortaigne, où est le siege du Bailly. Il a pour les bornes Verneuil du costé de la Normandie, & Meniere du costé du Mayne.

La Champagne est bornée des païs de Brie, Bourgongne, Charolois & Lorraine. Elle est diuisée en haute & basse: la basse comprend Troye, Joigny, Bassigny, Vallage. Joigny est vne Comté qui separe la Champagne de la Bourgongne, & est proche de Sens. Sa principale ville est Joigny. Bassigny a pour ses riuieres, Marne & Muse, & vne petite partie de la Moselle. Sa principale ville est Chaumont qu'on nomme en Bassigny, où il y a vn fort chasteau sur vn rocher. On nomme la tour le Donjon, & la haute fueille. On donne au païs de Bassigny, outre Langres, Montigny, Goeffy, Nogent le Roy, Montecclar, Andelot, Bismay, Chosseul. Visnorry, Clefmont, où il y a presque par tout des chasteaux. Vallage confine avec le Partois, & le Barrois. Ses principales villes sont Vassy, saint Didier, Jauville, Montirandé, Donterant, le Chasteau aux forges, Esclaron & Arsy sur la riuere d'Aube.

La haute Champagne comprend le Partois, qui prend son nom d'un petit bourg qui est sur Marne, nommé Perte. Sa ville principale est Vitry, puis il y a Argilliers, Laforcourt, Louuencourt & autres villes.

On adjoste à ces deux parties ce qui leur est joignant, c'est à sçauoir les Duchez de Reims & de Langres, & les Comtez de Chaalons, Ligny, & la Motte.

La Comté de Champagne a esté vnüe à la Couronne de France en ceste sorte. Thibaud II. Comte de Champagne, eut vn fils nommé Thibaud III. de ce nom, qui deceda sans enfans, & eut pour successeur Henry le Large, fils d'Estienne Roy d'Angleterre, qui estoit frere de Thibaud II. Henry eut vn fils de mesme nom, qui estant mort sans enfans, son frere Thibaut qui se nommoit Comte Palatin de Champagne, s'en empara, & estant deuenu Roy de Nauarre par la mort de son ayeul maternel, il eut pour successeur tant au Royaume de Nauarre qu'en la Comté de Champagne, Henry, de qui la fille Ieanne mariée à Philippes le Bel, vint la Champagne, & les autres prouinces à la Couronne.

On met ordinairement avec la Champagne, la Brie, qui joint le Hurepois, Ce païs commence pres du pont Charenton, où la riuere de Marne se mesle à celle de Seine: & la riuere de Marne separe presque la Brie de la Champagne, de mesme que la Seine du Gastinois. Et presque tout ce qui est entre ces deux riuieres iusqu'à la Duché de Bourgongne, est coutumierement

stunierement appelé Brie. Il y a encores en ce païs la ville de Brie-Comte-Robert, ainsi nommée du Comte Robert, jadis seigneur de Brie, qui faisoit là sa demeure. Les autres villes cogneues en Brie sont Chateau-Thierry, Meaux, Nogent, & mesmes quelques-uns donnent à ce païs la ville de Sens.

La dernière partie des païs de la Gaule qu'on nommoit Celtique, & Belgique, & qui se trouuent sous le Parlement de Paris, c'est le païs de Lyonnois, qui a pour ses limites du Nort la Bresse, du Leuant la Sauoye, du Midy le Dauphiné & le Viarez, & du Couchant le Forests & l'Auvergne. La ville capitale de ce païs c'est Lyon, assis sur les riuieres de Saone & du Rhone, dont celle de Saone passe par le milieu de la ville. La cognoissance que l'on a de la grandeur & beauté de ceste ville, & sa reputation, m'empescheront d'en dire dauantage.

Il faut maintenant que ie vienne aux prouinces d'Aquitaine qui recognoissent la iurisdiction du Parlement de Paris: comme le païs de Berry, le Bourbonnois, le Poictou, l'Angoumois, le païs d'Aunis & l'Auvergne.

Le Berry a pour ses bornes du Nort la Soloigne, de laquelle il est diuisé par la Chair: du Leuant le Hurepois, Niurnois, & Bourbonnois, & en cet endroit il est borné par le ruisseau de la Faye: du Midy il a le Lymosin, où est la riuere de Croure, & du Couchant le Poictou & la Touraine, dont elle est separée par vne petite riuere nommée Clery.

La principale ville de ce païs c'est Bourges. Ceste ville auoit sept portes, mais depuis l'on en condamna trois à cause des guerres. Ces portes se nomment l'une Bourbonne, l'autre de saint Iriat, l'autre de saint Sulpice, l'autre d'Arogne. Il y a dix-sept Eglises collegiales, & dix-sept parroisses, les quatre ordres des Mendians, deux Abbayes d'hommes, l'une hors de la ville nommée saint Sulpice, l'autre dans la ville nommée de saint Ambroise, toutes deux fort riches. Il y en a trois de femmes: la première de l'Annonciade, l'autre de S. Laurens, l'autre des Sœurs mendiante de sainte Claire. On y traueille sur tout en drapperie. Elle a les foires de S. Laurens, S. Lazare, S. Martin, & S. Oursin, où il y a vn grand abord de marchands.

Les autres villes du Duché de Berry sont Yssoudun, Dun le Roy, Vierzon, Mehun, Concessant. On met aussi en ce païs les Comtez de Sancerre, & de saint Aignan, & la Baronnie de Mont-faucon. Il y a aussi en ce païs quarante Chastellenies. Plus y a la ville & chateau de Chastelleraud, l'un des beaux sejours de France appartenant à Monsieur le Prince de Condé, auquel il a donné le nom de Marquisat, & du depuis le Roy en sa faueur l'a erigé en Duché & Pairie, plusieurs Baronnies en dependent.

Sancerre a sous soy Sancergues, Beaufeu, Chappelle, d'Anguillon, Boucard, lalongne, Tarenai, Verdigni, Menesme, Charentonai & autres places. La Baronnie de Monfaucon comprend les seigneuries de Baugi, & Gron, & aussi le Fane, Liuron, Coni, Villabon, Seuri, Marcilli, Marnai, Farges, Auor, Saligni, Picigny, Cru, Lassai, Boisboson, Nuisemét, Villiers, Compoys. Les Chastellenies sont Aix, Beuli, Quantilli, Femorigni, Francheuille la chappelle, Nançai, Drie, Leureux, Beaulieu, Breci, Bengi, S. Fleurant, Neufui sur Baranjon, Mort-honnier, Marmaignes, maubranche, saint Vrsin, Tailli, brilliers, Vatan, saint Satur, Luri, Estrechies maupas, Villeneuve, saint Crapaix, Ascilli, Iussi, le Chaudries, la Corne, les Chaizes, Vaurilles, les Cloyes, Bouge. Ce ne seroit iamais fait si ie voulois faire le denombrement des autres lieux du païs de Berry. Sien que i'en finiray le discours, apres auoir fait voir de quelle sorte ceste Duché fut réunie à la Couronne de France, du temps que Hugues Capet Godefroy fut Gouverneur de Berry pour le Roy. De ce Godefroy descendit Harpin, qui achepta du Roy Henry premier la Comté de Berry. Cestuy-cy, s'en allant à la guerre sainte, vendit la mesme Comté pour estre vnue à la couronne à Philippes premier. Quelques années apres Iean de Valois obtint de son pere Iean de Valois pour droit d'appannage ceste Comté erigee en Duché. Iean estant mort sans hoirs masles, la Duché réuint à la couronne. On la bailla apres à Iean fils de Charles VI. qui estant mort sans enfans, laissa pour successeur son frere Charles, qui estant devenu Roy de France, & estant presque chassé de tous les autres endroits de la France par les Anglois, fut appelé par mocquerie Roy de Bourgongne. Ainsi par le moyen de Charles VII. elle vint à la couronne; maintenant monsieur le Prince de Condé en jouyt avec le païs de Bourbonnois, depuis le traité de Loudun fait l'an 1617.

Le païs de Bourbonnois a pour ses bornes d'Occident le Berry & le Limosin, du Nort le Niurnois, du Leuant il a presque pour borne la Bourgongne, & du Midy le païs de Lyonnois.

Ce païs a esté autrefois sous des Ducs, dont le dernier fut Archambaud, qui n'eut qu'une fille nommée Agnès pour heritiere, qui fut mariée à Iean Duc de Bourgongne: & en ayant eu vne fille nommée Beatrix, la maria à Robert fils de Louys IX. Roy de France, & luy donna

na la Duché de Bourbonnois, à condition qu'il porteroit le nom de Bourbon. Ce qui fut fait. Robert fils de saint Louys engendra Louys surnommé le Grand, qui fut fait premier Duc de Bourbon par Philippes de Valois, environ l'an 1329. Cestui-cy a eu pour successeur en droitte ligne Pierre premier (qui eut vn frere nomme Jacques, de qui vindrent les Comtes de la Marche, & de Vendosme) puis Louys II. Bon, Jean premier, Charles & Jean II. A cestui-cy mourant sans enfans succeda Pierre II. de qui la fille, & heritiere Susanne estant mariee à Charles de Bourbon Comte de Montpensier (fils de Gilbert de Bourbon) rendit son Mary Duc de Bourbon. C'est ce Charles qui estant Connestable de France, & s'estant rangé du party de l'Empereur Charles cinq, contre le Roy François premier, fut tué deuant Rome l'an 1527. Apres la mort de Susanne le Roy s'empara de la Duché de Bourbonnois, & lors les Ducs de Vendosme en prindrent par droit de parentage le seul titre & les armes.

Le pais de Bourbonnois est diuisé en haut & bas: le bas comprend les villes, & deux comtez: la principale ville c'est Moulins, qui est assise sur la riuere d'Allier, abondante en poissons, & principalement en Saumons. Il y a vn beau chasteau à Moulins, & vn jardin aussi agreable que l'on en puisse presque voir ailleurs, où il y a force arbres portans des citrons & des oranges. Les autres villes sont Bourbon l'Archambaud, & Bourbon Ancy, Montmerant, Montluçon, saint Porcin (que quelques-vns mettent entre les villes d'Auuergne) Cusset, Chancelle, Charroux, Verneuil, Varennes, Genat limitrophe d'Auuergne, le mont aux moines, Souuigni, la Palisse, saint Gerah, saint Pierre le monstier, Aynai le Chasteau, S. Amand, & autres. On y comprenoit aussi les deux comtez de Forests & de Beaujolois. Le Beaujolois embrasse tout ce qui est entre la riuere de Loire & la Saone, & est assis vers le leuant entre le Forests & la Bourgongne: la principale ville s'appelle Beaujeu.

Le pais de Forests a pour sa principale ville Montbrison: les autres sont saint Estienne, saint Guermier, saint Germain, Laual, saint Bonet, le Chasteau saint Rambert, & quelques autres moins fameuses.

Le haut Bourbonnois comprend le seul pais de Combraille, où est la ville de Montaigne, & ce pais est plus montueux que le bas Bourbonnois.

Le Poictou est vne grande prouince comprenant 1200. parroisses sous les trois Eueschez de Poictiers, Maillezay & Lusson. Ce pais a pour ses bornes du midy l'Angoumois & la Xaintonge, du Couchant la mer Oceane, du Nort l'Anjou & la Bretagne, & le reste est borné du Berry, de la Touraine, du Lymosin. Ce pais a receu autrefois le titre du Royaume des Gots, qui en furent chassés par Clouis de mesme que de toute l'Aquitaine. L'Empereur Louys le Debonnaire donna à son fils repin le Royaume d'Aquitaine. Et Charles le Chauue ayant chassé d'Aquitaine Charles, & Pepin fils de Pepin, & les ayant mis dans des monasteres, se saisit de ceste principauté, & la donna à Arnoul son parent, mais ce fut à condition que tous ces pais ne porteroient desormais que le titre de Duché. Arnoul eut pour ses successeurs Guillaume le Bon, Ebon 1. & 2. Guillaume 2. & 3. Guy Guillaume 4. & 5. & la fille de ce 5. nommée Eleonor, estant seule heritiere fut mariee à Louys 7. Roy de France, qui se doutant de quelque trahison, & la soupçonnant d'adultere, la repudia, & soudain elle espousa Henry Duc de Normandie, qui succeda à Estienne Roy d'Angleterre. Henry eut pour successeur, tant au Royaume d'Angleterre, qu'aux prouinces qu'il tenoit en France, ses fils Richard & Jean. Mais estant arriué qu'Artus fils de Godefroy (qui auoit esté fils aîné du Roy Jean) disoit qu'il deuoit estre preferé à Jean: ce Prince estant persuadé & sollicité par le Roy Philippes Auguste, d'oster le Poictou à Jean, entreprit de s'en rendre maistre par force: mais il fut defait par Jean, & pris & emmené à Roüen, & mis à mort. Pour ceste cause Jean estant accusé de parricide deuant le Roy Philippes par Constance mere d'Artus, fut condamné, & ses biens furent soudain adjugez au Roy Philippes, comme seigneur direct, & entre autres choses le Poictou luy fut acquis. Mais Louys 8. son successeur le donna à Alphonse son fils, qui estant mort sans enfans, causa qu'il vint au pouuoir du Roy Philippes, & demoura entre les mains de nos Roys, iusques à ce que sous Philippes de Valois Edouard 3. Roy des Anglois le recoura, & le retint plus pleinement avec tout l'Aquitaine, par le traité qui fut fait entre luy, & le Roy Jean. Et le Roy Edouard donna à son fils la principauté d'Aquitaine: mais le fils ayant imposé des charges insupportables en ses pais, en perdit vne grande partie qui se rendit à Charles 6. Roy de France, & depuis Charles 7. chassa les Anglois de toute la Guyenne l'an 1453. & la laissa à son fils. Cestui-cy la donna à son frere Charles, apres la mort duquel le Roy Louys la laissa à Charles 8. & depuis ce temps, la Guyenne, dont le Poictou est vne partie fort remarquable, est demeurée entre les mains des Roys de France.

La principale ville de toute ceste prouince c'est Poictiers, d'où le reste du pais a tiré son nom:

nom: les autres villes sont Niort, Fontenay le Comte, où passe la petite riuiere de Vendee, Lusignan, Montmorillon, la basse Marche, Dorat, saint Maixan, Siuray. Il y a aussi en Poitou la principauté de Talmon, & celle de la Roche Suryon. Il y a la Duché de Chastelleraut assis sur la riuiere de Vienne, la Vicomté de Touars, Brosse, Bridieres, la Rochecauiart, & les Baronnies de Mainlers, Partenay, Meile, Chizay, Chauuigny, Lussac, Bressuyre, Charrou, Chasteneraye, saint Mesmin, saint Gilles, Chasteaumur, les Sables d'Aulonne, saint Hermine, Montaigu, Mirebeau, la Motte, S. Beraï, Vouuât, saint Hilaire, Mortemer, Luzai, saint Sawn, l'Isle Jourdain, S. Benoit du Saut, Bourgneuf, Meroil, Meruant, Brige, Vouuert, Ville-fagnaux & autres.

L'Angoumois a pour ses bornes du costé du Nort le Poitou, du Leuant la Xaintonge, du midy le Bourdelois, & le Perigort, & du couchant le Limosin. Sa longueur d'Orient en Occident est de 24. milles, sa largeur du midy au Nort de 16. La principale ville de ce pais c'est Angoulesme: les autres moindres villes sont Martou, Chateau-neuf, Blaisac, Chabannes, Confolant, Ruffec, Aigres, Couruille, la Rochefoucaut, qui est vne comté, Mareuil, Lanfac, Villebois, qui sont de la maison de Marueil, Momberon, & Bouteuille, qui sont de la maison de Montmorency.

Charles Roy de France surnommé le Sage, donna la comté d'Angoulesme auie aux Anglois, à son fils Louys, qui estant deuenu Roy de France, la laissa à son fils Iean, à qui Charles succeda. Charles eut pour successeur François premier, qui de Comte d'Angoulesme estant paruenue à la couronne de France, erigea ce pais en Duché, & le donna à sa mere, apres la mort de laquelle son fils Charles porta le titre de Duc d'Angoulesme, & Charles estant mort sans enfans, la Duché fut vnue à la couronne.

Le pais d'Aunis comprend le territoire de la Rochelle, & est de fort petite estenduë.

Le pais d'Auuergne a pour ses limites du costé d'Orient le Forest & le Lyonnais, du midy les derniers dioceses du Languedoc, d'Occident le Quercy, le Perigort, & le Limosin, & du Nort le Berry & le Bourbonnois. Ceste prouince est diuisee en haute & basse. Le haut pais d'Auuergne a pour sa principale ville saint Flour, les autres villes sont Orillac, Charlat, Murat, Billon.

La basse Auuergne comprend la Limagne, peut-estre nommee de ceste sorte de la riuiere de Lamone, & Lymone, qui se varendre dans celle d'Alier. Sa longueur depuis le vieil pont de Briuat, iusques à Ganat, (les autres l'estendent plus outre) est d'environ 20. lieues. Sa largeur depuis la montaigne qu'on appelle communément Poi de Dome, iusqu'à la ville de Thiers, est d'environ 8. lieues. Sa principale ville c'est Clermont, belle & agreable pour son assiette, & ses fontaines. Les autres sont Rion, Montferrant, Yssioire, Brioude, Aigueperse, & plusieurs autres: Montpensier est en ceste contree.

Voila donc tous les pais qui sont du ressort du Parlement de Paris: venons maintenant à ceux qui recognoissent le Parlement de Thoulouse.

Le Quercy a pour ses bornes le pais de Perigort, celui de Rhodes, l'Auuergne & le Limosin: on y compte deux dioceses, c'est à sçauoir Chaors, & Montauban, sur le Tarn. Les moindres villes sont Burelle, Nazareth, Souillac, Gourdon, Martel & les autres.

Le pais de Rouergue touche le Quercy du Leuant, le reste est borné du Languedoc & de l'Auuergne. Sa principale ville c'est Rhodes: les autres sont Ville-franche, de Rouergue, Estauges, Espeyron.

Le Languedoc a pour ses bornes du couchant la Gasconne, de laquelle il est diuisé par la riuiere de Garonne, du Su le Quercy, du Nord l'Auuergne, & le Forests, de l'Est la Prouence & le Dauphiné: tellement que tout le Rhosne est tenu du Languedoc, & sous le Parlement de Thoulouse. Il a la mer Mediterranee du costé du midy, & en partie aussi les monts Pirenees.

Ceste prouince est de fort grande estenduë comprenant 22. Dioceses, dont le seul Viuares qui a de longueur du long du Rhosne plus de vingt lieues, est pris pour vne. Ses Dioceses sont Thoulouse, Narbonne, Alby, Carcassonne, Beziers, Agde, Montpellier, Nismes, Vsez, saint Pous, de Tomieres, Alet, Castres, Pamiers, Mirepoix, saint Papoul, Lodesue, Eaule, Lauaur, Montauban, Viuares, Velay, Geaudan.

Sa ville principale c'est Thoulouse, assise sur la riuiere de Garonne, en lieu plain & fort bon pais. Les autres sont Narbonne, Alby, Carcassonne, Beziers, Pesebaz, Montpellier, Nismes, Vsez, Bagnolet, Alaiz, Sommiers, le Pont saint Esprit, le Bourg, Viuiers, la Voûte, Tournon, Aubenas, Annonai, Mende, Maruege, le Puy, & grand nombre d'autres, dont le denombrement seroit ennuyeux.

A Nismes on void les Arcnes où l'ancien Amphiteatre, qui est aussi merueilleux qu'ou-

urage qu'on voye: mais le Pont du Gard sur la riuere du Gardon, où il y a trois ponts l'un dessus l'autre, est beaucoup plus admirable: les pierres des Arenes, & du pont sont de grandeur extraordinaire. On a attribué au Languedoc depuis quelques années la Comté de Foix, combien qu'auparavant elle fust de la Guyenne. Ce pais a le Languedoc du leuant, du couchant le Comingeois, du Nort le territoire de la Riuere, du midy les monts Pyrenees. Ce pais de Foix a la seule Euesché de Pamiers, qui est vne ville assise en l'endroit où les deux riuieres de Lers, & Lagier s'assemblent. Ses autres villes sont Seuerdun & Maseres, demeure ancienne des Comtes de Foix.

Pource que la Gascongne a quelques-vnes de ses parties du ressort du Parlement de Thoulouse, il est à propos maintenant d'en discourir, afin de n'aller pas en desordre.

La Gascongne de nostre temps comprend tout ce qui est entre la Garonne, les monts Pyrenees, la mer Oceane & la Guyenne, de Louys XI. Quelques parties de la Gascongne sont bornees de la riuere de Garonne, comme Armagnac & Bigorre, les autres tiennent tant deçà que delà la riuere, comme l'Agenois, la Duché d'Albret, & le pais de Cominges. La Comté d'Armagnac contient deux Dioceses, c'est à sçauoir celle d'Auch, & celle de Lectoure, qui sont deux principales villes, outre lesquelles il y a l'Isle Iourdain, & quelques autres peu considerables.

La Comté de Bigorre est entre les pais de Bearn, & de Cominges, pres des monts Pyrenees, dont vne grande partie est sous ce Comté, depuis les montaignes d'Aure, iusqu'à celles du Saut & d'Alpe, qui sont de Bearn. Sa principale ville c'est Tarbe, où est le chasteau de Bigorre. Sur les frontieres de la Bigorre il y a les Comtez de Gaure & d'Estrac.

L'Agenois a pour ses bornes du leuant le Quercy, du Nord le Perigort (& de ce costé l'Agencois va iusques à Biron du Perigort) du couchant la Gascongne & la Garonne, qu'il a aussi du costé du midy. Ce pais comprend 2. Eueschez, c'est à sçauoir celui d'Agent & celui de Condom. Ses moindres villes sont Villeneuve d'Agenois, Claire, Marmande, Foy la grande, & quelques autres assises sur la riuere de Garonne, & aussi Valence sur la Baïse, Leirac, la Romiou, Montreal.

Le pais de Cominges est diuisé en haut & bas, le haut est aux montaignes, & ses villes sont saint Bertrand & Conserans, saint Beat, saint Fergeau, Monregeau, Saliers & autres. Au bas est l'Euesché moderne de Lombez, & les villes de Samathan, l'Isle en Dodon, Murut, Riumes, avec vne infinité de grosses bourgades & riches villages. Voila tout ce qui est du ressort du Parlement de Thoulouse.

Le Parlement de Roüen comprend toute la Normandie, qui apres auoir esté ostee aux Anglois par le Roy Charles 7. estant depuis tombee entre les mains de Charles, luy fut ostee par Louys. 11. son frere, au lieu de quoy on luy donna la Guyenne, & depuis ce temps la Normandie est tousiours demeuree entre les mains de nos Roys, & n'a esté donnée à aucun des enfans de France.

Ceste prouince a maintenant pour ses bornes du leuant le fleuve d'Epte, vers le lieu appelé saint Clair sur Epte, du couchant elle s'estend iusqu'à la riuere de Cenon, qui separe la Normandie d'avec la Bretagne, entant que ceste riuere sortant de Fougères, & arrouant la place de Pontorson, est receüe des flots de la mer au pied du mont saint Michel, dit Tombelaine, au cap de Ceneds: & du Nort au midy elle a en sa longueur le pais qui est depuis la mer iusques à la riuere de Sarthe, qui separe les Normands d'avec les Manceaux du costé d'Alençon & du Perche. Et par ce moyen la Normandie a les Picards de Beauuoisis au leuant, les Manceaux au midy, l'Océan au Septentrion, & la Bretagne au ponant, ayant son eleuation de quarante six à quarante sept degrez, & par ce moyen estant la plus froide region qui soit guieres sous la iurisdiction du Roy de France, excepté la Comté d'Oye en Picardie.

La principale ville de ceste prouince c'est Roüen, siege du Parlement: ses autres villes sont Avranches qui est fort proche de la mer: Evreux qui a en son endroit les villes de Vernon, Aigle, Paisey, Tuillieres, Ingles, Canches, Rugles, Bruin, Hermenuille. Il y a apres la ville de Bayeux qui est assez bonne: puis celle de Sez, du ressort de laquelle sont plusieurs villes, & entre les autres pais presque tout celui d'Alençon, & vne partie du Perche: puis Constances, & apres Lisieux. Il y a les Duchez d'Alençon, d'Aumale & de Longueuille. Les Comtez sont Eu, Harcourt, Evreux, Tancarville, Moleurier, Mortain, Montgommery, Thorigny, Gisors.

Il y a aussi le Royaume d'Yuetot de petite estendue, qui fut erigé du temps de Clothaire premier, qui eut Gaultier seigneur d'Yuetot le iour du Vendredy Saint, pour penitence de quoy le Pape ordonna que ceste terre seroit donnée en propriété aux hoirs & successeurs dudit sieur d'Yuetot, dixhuit villages en dependent, & recognoissent ce seigneur comme
siens

siens vassaux & subiects de sa iurisdiction. Ce Royaume est au pais de Constantin.

Au surplus la Normandie est diuisee en haute & basse : la haute contient outre les Duchez & Comtez susnommees, le pais qui se nomme Vexin le Normand, dont la principale ville est Gisors, où ressortent Estre, Paigny, Escouli, la grande Forest de Lybois, saint Clair sur Astre, les deux Andelis, & Chateau-Gaillard. La basse est diuisee au pais de Caux, Bessin & Constantin. La principale ville du pais de de Caux, c'est Dieppe : les autres de moindre reputation sont Harfleur, Honfleur, le Havre de grace, Caudebec & Fescamp, Le pais de Bellin a outre la ville de Bayeux, dont nous auons parlé, celle de Caën, Falaise, Hiesmes, Vire, Mortain. Le pais de Constantin comprend, outre la ville de Constances, & le Royaume d'Yvetot, les villes de Valoigne, Cherbourg forte place sur la mer, saint Lo, Quarenten, Montebourg, saint Sauueur, S. Hermont, & S. Gilles.

Le Parlement de Bordeaux a sous soy le pais de Perigord, Limosin, Xaintonge, le Bordelois, les Landes, Albert, Basadois, la haute Gascongne, & partie de Biscaye, & Medoc, par delà la riuere de Garonne. Le Limosin a pour ses bornes du costé du Nort le Berry, de l'Est le Bourbonnois, du Su, l'Auuergne, de l'Ouest le Perigord & de l'Ouest Nortouest le Poictou. Il y a vn grand orme entre la maison neufue, & Argenton, qui sert de limite au Berry, au Bourbonnois, à l'Auuergne & au Limosin.

Il y a haut & bas Limosin. Le haut a pour sa principale ville Limoges : les autres villes sont la Sousterraine, le Boisson, Barat, Dorat, Gonfoulat. Le bas Limosin est proprement appellé la Marche, & est limitrophe de l'Auuergne, & du Perigord. Sa principale ville c'est Tulle, assise en vn terroir aspre & montueux. Il y a aussi les villes d'Vfarche, Briue la gaillarde, Teignac, Donzenac, Allasac, Bellac, Maillac, Visset, Belmont.

Perigord a quarante degrez d'esleuation du pole, & a au Leuant le pais de Limosin, au Ponant l'Angoumois, & partie de la Xaintonge, au Nort l'Angoumois, dans lequel il s'aduanee & est engagé, & au Midy la Gascongne, selon la riuere de Dordonne, qui fait separation de l'Agenois, & des pais d'entre deux mers, d'avec le pais de Perigord. La principale ville de ce pais c'est Perigueux, les autres sont Sarlas, Bergerac, Riberaç, Noneron, Lunel, Biron, Brathomme, la Roche & Miramont.

Le Parlement de Bourdeaux a encores soubz luy en Guyenne le Bordelois, le Basadois, les Landes & la Xaintonge. La principale ville du Bordelois, c'est Bourdeaux, belle & ancienne ville, où prit naissance le fameux Poëte Ausone, l'un des ornemens de la France. Les autres villes sont Blaye, Bourg sur mer, Libourne, Condat. Il y a aussi dans la Seneschauſſee de Bourdeaux ce qu'on nomme le pais d'entre deux mers, c'est à sçauoir Medoc, Buch, & Frôsac.

Le pais de Medoc comprend tout ce qui est entre Bourdeaux, la Mer Oceane, & la Garonne qui s'y desgorge. Ce pais est presque tout de sable, & les flots de la mer le couurent peu à peu. Il y a en ce pais le bourg de Puliac, celui de Dionissay. Le pais de Bouch, dont le Seigneur s'appelloit Capital, ioint au Medoc, est subiect aux Comtes de Candale. Le Fronfadois a pour sa ville Fronfacs, de qu'il a pris ce nom.

Le Basadois a pour sa principale ville Basas, à vne iournee de Bourdeaux. Les autres sont saint Bazeille & la Reule, assises sur Garonne. Monsegur posé sur la riuere de Drot, saint Ferme Castel Moru, Geronde & Sauueterre, & iusques à la Dordone il y a plusieurs villages.

S'ensuit le pais de Lapord, ou Lourde, qui a deux Dioceses, c'est à sçauoir Bayonne & Aqs. Bayonne est la ville capitale du pais, dont la iurisdiction s'estend iusqu'au fleuve d'Iron, qui est au delà de saint Iean de Luz.

Le pais de Xaintonge a du Nort le Poictou, du Leuant l'Angoumois, & le Perigord, du Midy la riuere de Garonne, & Ponant la mer Oceane. Sa principale ville c'est Xaintes : les autres sont saint Iean d'Angely, Lorgaire, Archaut, Pont Loubleze, Taillebourg, Iarnac, Barbesieux, Iosac, & Broüages, renommee pour le sel que l'on y prend.

Le Parlement de Rennes comprend la haute, & basse Bretagne, & pour ses bornes du Leuant la Normandie, le Mayne & l'Anjou, du Midy le Poictou, & des deux autres costez la mer Oceane. Sa longueur est de six iournees de chemin, & sa largeur de trois. On y parle deux langues, dont l'une, qui est celle de la haute Bretagne, est la Françoisë ; l'autre est le Breton-bretonnant, ou bas Breton, qui n'a rien de commun avec toutes les autres langues : & c'est le langage qu'on parle en la basse Bretagne.

La haute Bretagne est plus orientale, & est separee de la basse par vne ligne tiree du bourg de Chateau Andron, & continuee entre Quintin, & Corlay vers l'extremite du goultre de Vannes iusques à la riuere de Vilaine, en telle sorte que saint Iean demeure dans la basse Bretagne.

La ville Metropolitaine de ce pais c'est Nantes.

La ville du Parlement Rennes : ses autres villes sont Dol, saint Brieu, saint Malo, Dinan,

Rieux, Chasteau-briant, Lamballe, Vitray, Jugon, saint Aubin du Cormier, Plerel, Ioclin, Malestroit, Pontigny, saint Julien, Ancenis. La basse Bretagne a pour sa principale ville Vannes, & les autres sont saint Paul de Leon, Landtriguiet, Blauet, Brest, Morlaye, Guincamp, Quimperlay, Conquerneaux, Quimpercorantin, saint Regnaud de Bois. Pour conclurre, la Bretagne de Comté qu'elle estoit fut erigee en Duché du temps de Henry second Roy d'Angleterre & fut vnée à la France apres la mort d'Anne de Bretagne, qui estant mariee premierement à Richard Prince de Galles, fils d'Edouard quatriesme Roy d'Angleterre, puis à Maximilian premier Empereur espousa en fin Charles huitiesme Roy de France, & apres luy Louys douziesme, & par ce moyen ceste Duché vint à la Couronne.

Le Parlement de Dijon comprend maintenant ce qu'on nomme Duché de Bourgogne, qu'on dit auoir pris ce nom d'un lieu nommé Bourg-ogne au pais de Langres. Ses limites sont au Septentrion. Les pais de Champagne, & d'Auxerrois, dont vne partie est de ceste prouince: au Ponant le Niuernois, & Bourbonnois, au Midy le Beaujolois, & Lyonnois, & au Leuant la riuere du Rhosne, qui la separe de la Sauoye, & de la Bresse, & de la Franche-Comté.

La principale ville de ceste Duché c'est Dijon, assise presque sur la frontiere de France sur la riuere d'Ouche. Or quoy que la ville de Dijon ayt esté bruslee en l'an 1227. si est-elle plus belle, & magnifique que iamais.

Il y a apres Autun, autrefois grande & renommee ville qui a de belles marques d'antiquité, & qui debattoit la primauté à toutes les autres de France. C'estoit la Capitale des Heduois, qui estoit vne des deux factions qui remuoient toute la France. Puis on compte Beaune, puis Chaalon sur Saone, & apres Semur en Laussois, Tounus, Nuyz, Aualon, Saulieu, Flaigny, Auxonne, Noyers, Rauieres, Leigne, Monbard, Chastillon, S. Seine, Se-loigne, Creuant, Viteau, Verdun, Arnay, Seurre, Tonnerre, & Senescey. On met en la Bourgongne trois autres villes Episcopales qui sont du ressort de Paris, c'est à sçauoir Neuers ville capitale de la Duché de Niuernois, Auxerre, Mâcon.

On a adjousté encor au Parlement de Dijon la Bresse, dont Bourg est la ville principale: & encor l'Euesché de Bellay, le Bugey, Veromey, & les nouuelles terres qui joignent la Sauoye.

La Duché de Bourgongne est demeuree entre les mains des Roys de France depuis la mort de Charles dernier Duc de Bourgongne qui mourut deuant Nancy: veu qu'aussi-tost apres sa mort Louys second Roy de France s'en empara.

Quant à la Comté de Mâcon le Roy saint Louys l'achepta de Iean Comte du pais & d'Elie sa femme.

Le Parlement de Grenoble comprend tout le Dauphiné, qui a pour ses bornes du costé du Midy la Prouence, & la ville d'Ambrun est la metropolitaine de ceste contree qu'on nomme le haut Dauphiné: du Nord il a le pais du Lyonnois & la Bresse, & de ce costé est le pais de Dauphiné, duquel la ville Archiepiscopale de Vienne est metropolitaine: il a du costé d'Occident le Rhosne qui le separe du Lyonnois & du Viuarets, & du Leuant, la Sauoye, Sa principale ville c'est Grenoble, siege du Parlement, assise presque au milieu de la prouince, les villes du long du Rhosne ou bien pres, sont Ternay, Vienne, Rossillon, saint Valier, Theim, la Roche, Valence, Montlimar dans le pais, & en plaine, Quirieu, Cremieu, Bourgoin, la Tour du Pin, la Coste saint André, S. Marcelin, Voyron, S. Antoine de Viennois, Moretel, Beaurepaire, Moras, Romans sur l'Isere, Lorient, Chabcul, Crest, Die. Aux montaignes Ambrun ville Archiepiscopale, Gap, Talart, Briançon, Gorges, Serre, Monbrun, la Mure, Essilles. Il y a aux montaignes le pais de Thieffues, les Baronnie le Gapençois & le Briançonnois. Les principaux pais de la plaine sont le Grasiuoden qui est pres de Grenoble, le Viennois, qui a de longueur enuiron dix lieues, la Valoire où sont les villes de Moras, Beaurepaire, & la Coste saint André, l'un des meilleurs endroiets du Dauphiné, & le Valentinois, qui est aussi de grande estenduë. Le Roy Philippes de Valois acquit de Humbert Dauphin du Viennois ceste prouince l'an 1340. à condition que le fils aîné de France porteroit le nom de Dauphin.

Le Parlement d'Aix comprend la Prouence, qui a pour ses bornes du Septentrion le Dauphiné, & la riuere de Durance, du Leuant les Alpes, & la riuere de Vare, au bord de laquelle à main gauche on void Nice, du Midy la mer Mediterranee, d'Occident en partie la principauté d'Orange, en partie la Comté d'Avignon. La principale ville de Prouence c'est Aix, Siege du Parlemēt. Les autres sont Marseille, Arles, pres de laquelle est la Camarque, qui est vne langue de terre pleine & enfermee entre 2. bras, & canaux de la riuere du Rhosne, contenant 7. grandes lieues Prouençales qui en valent plus de 12. Françoises, &

en ceste Camarque il vient grande quantité de bleds, & outre ce il y a de grands pastis tant pour les bestes à corne, que pour les cheuaux, dont les habitans y nourrissent vn grand nombre. Il y a outre cela la plaine de saint Chauar, de Miramas, Senas, Malmort iusqu'à Ourgon, & Ardague vers la Durancé, qui peut estre parangonnée à la Beausse, & en toute ceste estendue de pais on void vn grand nombre d'orengers, citronniers, grenadiers, oliviers, & figuiers, & le plus beau vignoble qui se puisse voir, & l'on void aussi en ceste contree des palmiers qui portent d'aussi bons fruiçts que ceux d'Afrique. Les autres villes sont Riez, Frejus, Grasse, Senez, Glandesue, Vance, Digne, Cisteron, Brignoles, Ourgon, Saint Fropéz, Hieres, Frejus, Antibes, Tolon, Salon, de Craux, saint Maximin, Tarascon, Draguignan, Forqualquier, Vallonsolle, Pertuis, Berre, le Puy, ou le Peucho.

Entre Aix & Marseille est la sainte Baume, où la Magdeleine s'estoit retiree. Quant à la façon de laquelle ceste Comté a esté vnice à la Couronne, vous deuez sçauoir que Ieanne Roïne de Naples, & Comtesse de Prouence, laissa pour son successeur en ses autres principautez, & en ceste Comté, Louys d'Anjou fils de Iean Roy de France, apres l'auoir adopté pour se venger de ses ennemis. Louys eut pour successeur son fils Louys 2. & cestuy-cy Louys 3. adopté aussi par Ieanne 2. Roïne de Naples, pour estre Roy de Sicile, & Duc de Calabre. Louys 3. mourant sans enfans, laissa du consentement de Ieanne 2. ses Estats à René d'Anjou son frere, qui ne voulant pas resigner ses droicts du Royaume de Naples, & de la Comté de Prouence à René de Lorraine son petit fils sorty de sa fille Yolant, les transporta à Charles son frere Comte du Mayne, qui ayant perdu son fils Charles, institua son heritier vniuersel Louys 2. Les autres disent que cela se fit par testament de René, non sans vne griefue plainte, & fascherie de René de Lorraine.

Le Parlement de Bearn comprend deux Dioceses, c'est à sçauoir celle de l'Escar, & d'Oleron.

Le Parlement de Mets comprend Toul, & Verdun, qui sont sous la protection des Roys de France, qui y tiennent garnison par tout.

La ville de Mets fut mise sous l'obeissance des Roys de France par Henry 2. Ceste ville est arrousee des eaux de la Moselle, de la Seille. Elle fut autrefois la capitale du Royaume d'Austrasie, & maintenant toute la contree d'alentour s'appelle de son nom le pais Messin.

Il y a encor quelques Isles qui appartiennent à la France, qui sont en la mer Oceane du 6. costé d'Occident, comme l'Isle de nostre Dame de Bouyn.

L'Isle-Dieu, où il y a deux ou trois assez bons villages.

L'Isle de Marmotier, où est l'Abbaye qui est communément appelée Blanche.

L'Isle de Raiz vis à vis de la Rochelle, abondante en vin, où est la ville de S. Martin. Elle porte aujourd'huy le titre de Duché.

L'Isle d'Oleron, où se fait grande quantité de sel.

Les Caps, ou Promontoires de France sont celuy de S. Matthieu, ou du Four, qui s'estend par delà toute la France vers l'Occident.

Il y a apres celuy de Blankenest vis à vis du cap de Kanet qui est en Angleterre.

Le Cap de Talmond.

Le Cap de Buch.

En la mer Mediterranee on void le Cap de Gercel, nommé par quelques-vns Cabo, de S. Signo, & par d'autres Cabo-baxo.

Le Cap de Sete, qui est en Languedoc.

Le Cap de la Haque.

Les forests de France sont en grand nombre. Au pais du Mayne on trouue les forests de Verlay, Longoulmay, Perfi, Sille, Charnay, Audain, Mayne, Concise: en la basse Bretaigne, les forests de Bostblanc, de Torient, de Guirche en Poictou, les forests de Mouliere, Dine, Brosse, Ligne en Berry, la forest de Robert, & autres: en Anjou, celles de Loufaye, & Marson: en Boulonois, le bois de Surene, Celles, Hardelot, Dalles, Bour-sin. En Vermandois, Recoigne, Bouhan. En Picardie, le bois de Baine, de la Fere, de Beaulieu, de Coulli.

Mais sur tout il faut faire estat de la forest d'Orleans qui est de plus grande estendue, qu'aucune de France, & la forest de Fontainebelean, passe-temps de nos Roys, de mesme qu'est bien souuent celle de Montargis. Il y en a beaucoup d'autres, mais le denombrement en seroit trop ennuyeux.

Les principales riuieres de France sont la Seine, qui a sa source en la montaigne de Voge en Bourgogne, & delà elle vient à Paris, puis à Rouen, & delà se va descharger dans la mer.

La Seine reçoit dans ses eaux la rivière de Marne, qui sort du mont de Faucilles vn peu au dessus de Langres, & passant par Janville, Saint Didier, Chaalon, Dormant, & Meaux, & receuant quelques fleuves moins renommez, comme le Saut, Boise, Ourq, & Tresme, se mesle parmy les eaux de Seine au pont Charanton pres Paris. Ou se sort d'vn lieu au dessus de Guyse vers le Leuant assez pres du village d'Orgny. Elle passe par la Picardie, & arrou-sant Guese, la Fere, Compiègne, saint Maixant, & quelques autres villes, elle se descharge dans la rivière de Seine pres de Poissi, vn peu au dessous de Pontoise. La rivière d'Aisne est à Cæsar vn fleuve de la Gaule Belgique aux extremittez du Diocese de Reims. Sa source est en Barrois au dessus de Clermont pres du village de Souilly.

La rivière de Loire a sa source en Auvergne en vn lieu nommé la Font de Loire. Ceste rivière ayant couru beaucoup de pais, & passant par Roane, Marciny, Desise, Nevers, Seuil-ly, Gien, Gergeau, Orleans, Blois, Amboise, Tours, & Saumur, le pont de Cé, se va rendre dans la mer pres de Nantes. Elle reçoit beaucoup de rivières nauigables, comme d'Allier, le Chair, Vienne & le Mayne; l'Allier a sa source au dessus de Clermont, & porte plus de poisson que Loire, combien qu'il ne soit pas si grand. Il passe par Molinet, & se decharge dans Loire en vn lieu qu'on nomme le Bec d'Allier.

Le Rhosne sort du mont de la Fourche au haut Valais, & passe par le Lac de Geneue, & puis à Lyon, où la Saone entre dedans: De là ceste rivière descend de Vienne, Tournon, Valence, Avignon, & autres lieux, iusques à ce qu'elle se va jeter par deux branches dans la mer Méditerranée aupres d'Arles en Provence. Ceste rivière reçoit la Saone à Lyon, l'Isère entre la Roche, & Valence, & outre ce la Droume, & la Durance.

La Saone prend source assez pres des sources de la Meuse, & de la Moselle. Elle passe par la Bourgogne, & se va rendre dans le Rhosne au dessous de Lyon, pres l'Abbaye d'Esnay.

L'Isère passe par Grehoble, & Romans en Dauphiné venant de Sauoye, & se va rendre dans le Rhosne pres de Valence en Dauphiné.

La Droume descend des Alpes, & se mesle avec les eaux du Rhosne au dessous de Valence.

La Durance vient aussi des Alpes, & est la plus fascheuse rivière de France n'ayant point de gué asseuré.

La Garonne diuise selon Cæsar les Gaulois des Aquitains. Elle vient des monts Pyrenées pres d'vn lieu nommé Cadalup, & venant des montaignes de Foix passe à Thoulouse, & Moissac, & de là à Bourdeaux, pres duquel elle se mesle dans la mer d'Aquitaine. Ce fleuve reçoit les rivières de Tary, de Gers, d'Oold, ou du Loth, & la Dordogne, grande rivière nauigable, & qui cede bien peu à la Garonne.

Ce seroit vn long discours de coucher sur ce papier toutes les rivières nauigables de France; C'est pourquoy ie m'en deposite, me contentant d'auoir mis icy les principales.

QUALITE' DV PAYS DE FRANCE.

7. **D**E mesme que la France a diuerses provinces, aussi ses provinces ont diuerses qualitez, que ie m'essayeray de comprendre en aussi peu de paroles qu'il me sera possible. Premièrement le terroir d'autour de Paris est extrêmement plaisant & fertile, & ne manque ny de bleds, ny de vins, ny de laitages, foin, fruits, & herbages, ny d'eaux qu'on y void de tous costez, & c'est ce qui rend Paris accommodé, mesme iusqu'à la merueille. On y void entre autres le ruisseau de Gentilly, qui est aussi nommé la rivière des Gobelins, plus propre que toutes les autres rivières de France à teindre l'écarlate. Vous auez aussi à Montmartre pres de Paris, & autres lieux voisins grãde quantité de plastre, duquel on se sert à Paris pour toutes sortes de bastimens, & c'est ce qui facilite le moyen de bastir en ceste grande ville. Le terroir d'autour de Chartre abonde en toute sorte de bleds, en vins, & en fruits: est arrousé d'vne petite rivière nommée Dœuure, qui passe dans la ville.

La Beauce est vne des plus fertiles contrées de l'Europe en froments, de sorte que ny la Sicile, ny l'Angleterre n'égale aucunement la fertilité de ce pais, qui est vn des principaux greniers & nourriciers de Paris. Il n'y a en toute ceste contrée vn seul fleuve qui y puisse auoir son cours en bas, estant tout vny, sans que vous y voyez vn lieu guiere plus haut que l'autre: & toute la Beauce estant sans eaux, il faut que les habitans du pais tirent leur eau des lacs, ou marcs, & des puits, qui seichent en esté.

La Soloigne est vn pais sablonneux, & où il y croist force seigle. Le terroir d'autour de Blois abonde en bleds, vins, fruits, & autres commoditez qui seruent à la vie humaine, & a force bois taillis, & de haute fustaye, force rivières, ruisseaux, estangs, & fontaines d'eau viue, en quoy il surpasse la Beauce. Il se trouue entre Orcheze & Blois de la terre sigillée.

Le païs d'alentour d'Orleans est aussi fertile qu'aucun des autres, en tout ce qu'ils ont plus de singulier & plus rare. Il y a du plaisir, soit qu'on s'amuse à pescher, soit à voller, ou à la chasse, veu que le poisson, les oyseaux, & le gibier y foisonnent: mais sur tout le terroir d'Orleans est renommé pour les excellens vins, tant blancs, que clarets qui y croissent, & qu'on vient querir non seulement de Paris: mais bien souuent mesme d'Angleterre.

Le païs de Gastinois est peu fertile, sablonneux en beaucoup d'endroits & de peu d'apport, neantmoins assez agreable pour ses forests, & ses riuieres.

Le terroir de Sens est si plantureux, qu'il n'y a chose qui puisse seruir à la vie humaine, dont il n'abonde. Il y a grande quantité de bleds, & vins, qui sont delicats au possible. La chair y est à vil prix. Les laitages, laines, & autres commoditez à souhait. Il y a du poisson en abondance, & l'huyle de noix autant ou plus qu'en aucun autre païs de France, veu que tout le païs est couuert de noyers, principalement la Champagne qui est entre les riuieres d'Yonne, & de Seine depuis Montereau où fault Yonne, iusques à Sens: & deçà la riuere d'Yonne vers le Gastinois on void de beaux costaux tous couverts de vignes.

Le païs d'alentour d'Auxerre n'est pas moins reuerant pour son vignoble; où il vient du vin en telle abondance, qu'il en fournit à Paris la plus grande partie de l'année.

La Champagne est vn païs plat, fertile, & propre au labourage, toutefois en quelques endroits la terre y est fort legere, & rapporte peu à ses maistres. Quant à la Brie, quoy qu'elle soit pleine de bois, c'est vn assez bon païs, ayant le Ciel serain, l'air doux, & tempere, & de bonnes & grandes riuieres: bref il n'y manque aucune chose de celles qui sont necessaires à la vie humaine: veu qu'il y a du vin, du bled, du bestail, des fructs, des bois, du gibier, de la chasse, & du poisson en abondance.

Ce païs d'autour de Prouins est renommé pour la conserue des roses qui s'y fait, qui est enuoyee par toute la France. Il va querir du vin chez ses voisins, mais il abonde en bleds, en pasturages, & en eau.

La Picardie qui est arrousee des riuieres de Some, Oyse, Ainau, Lescan, Scarpe, & autres, y est vn des principaux greniers de Paris, & est telle qu'il n'y a rien qui luy manque que le vin: ce qui vient plustost de ce que les habitans ne se soucient de remplir ce païs de vignes, & le cultiuer, que du deffaut de la terre, qui pourroit bien rapporter des raisins, de mesmes que les raisins y pourroient bien meurir aussi bien qu'en beaucoup d'autres endroits qui ne sont pas plus propres pour ceste plante.

Le Niuernois a trois fleues nauigables, c'est à sçauoir Loire, Allier, & Yonne, & d'autres qui ne sont nauigables, comme la Nyeure, recommandee pour les belles prairies qu'elle arrouse: & l'on y compte aussi Lixentes, Laubois, Aron, Aleine, Acolin, Bresbre, Arrou, & Quicure. Le plat païs est plein de bois, & de pasturages, ce qui fait que le peuple ne se soucie de la nourriture du bestail, & n'a soing du labourage, ny du vignoble, si ce n'est en quelques endroits entre Néuers, & la Charité, & en quelques autres Chastellenies. Ce qui est de rare en ce païs, c'est qu'il abonde en mines d'argent, & de fer. On tiroit autrefois de l'argent pres saint Leonard, mais les mines de fer y sont maintenant plus pratiquées, & ce païs a ceste commodité propre pour les chercheurs de mines, que le bois y est à commandement, & l'on s'y sert du charbon de pierre qu'on trouue pres de Dezize. On y trouue aussi à deux lieues de Neuers de la pierre à bastir, la plus belle de France, qu'on porte à Orleans, Blois, Amboise, & autres lieux, dont les bastiments sont faits de ceste pierre, à cause qu'on la peut commodément transporter par la riuere de Loire.

Le païs de Berry est fertile pour la plus grande partie, & abonde en tout ce qui est requis pour la vie humaine, ayant bois, vignes, terres labourables, chairs, fructs, & laines, & vne infinité de riuieres, comme le Cher, l'Indre, Creuse, Azin, Chæstre, Colin, la Tripende, Moulon, & Auron, dont la plus grande part, s'vnissant, & se rendant dans Loire fait qu'on en peut porter les denrees du Berry ailleurs.

La Touraine est vne des plus fertiles contrees de France, & est la seule qu'on nomme les delices, & le jardin de France, d'autant que l'air y est si bon, que les fructs y viennent comme à souhait, & des meilleurs de l'Europe, tellement qu'on en porte iusques à Paris, où ils sont prisez sur tous autres. Les bleds, & les vins y viennent en abondance, & le bois n'y manque aucunement, tant pour la chasse, que pour se chauffer, & bastir. On y trouue aussi de belle pierre blanche fort aisee à tailler, de laquelle les maisons des païsans sont mesme basties.

Le païs du Mayne arrousé de la riuere du Mayne, du Sarthe, du Loir, & de plusieurs autres petits fleues, & ruisseaux qui l'égraisent, est fort propre pour les pasturages, & nourriture du bestial, plus que pour le labourage. De sorte que les Mâceaux peuuent plus fournir de bestial, que de grains, ou de vins, non que le païs en soit depourueu: veu qu'il y a des endroits qui en

portent tellement, que l'Anjou & la Touraine ne le surpassent, ny en bonté de vins, ny en abondance de grains, mais cela n'est commun qu'à certaines contrées.

Le pays d'Anjou est inégal en beaucoup d'endroits, & a des terres, & costaux qui sont couverts de vignoble pour la plus grande part, & quant au plat pays il est embelly de forêts, & de bois de haute fustaye & de vallons où l'on void grande quantité de bonnes prairies, & de landes où l'on nourrit force bestial. Somme que toutes les choses nécessaires à la vie, & mesme qui peuuent servir aux delices s'y trouvent, & sur tout on estime les vins blancs qui viennent de ce pays, comme estans des meilleurs de ce Royaume.

Il est aussi arrosé de force rivières, qu'on met iusqu'au nombre de quarante, sans y comprendre les fontaines, viuiers, estangs en grand nombre, les marais, ruisseaux, & reservoirs à poisson, & pour le dire en vn mot c'est vne des plus agreables demeures de France. C'est de là que vient la plus grande partie del'Ardoise qu'on void en France. Aussi les maisons en sont basties en partie dans Angers, & ailleurs, & presque toutes en sont couuertes, d'autant que l'Ardoise y est à meilleur marché que la tuille. On void mesmes tout aupres d'Angers les clostures des iardins, & des vergers, faites de grandes pierres d'Ardoise quelquesfois plus hautes qu'un homme, qui sont fichees dans la terre. Il y a aussi en Anjou grande quantité de lin, & de chanvre.

Quant à la Normandie, il y a premierement autour de Rouen plusieurs belles & fertiles campagnes, comme celle de Rhommois, qui est des meilleures de France. Mais ce pays s'addonne plustost au trafic qu'au labourage, de mesme que fait presque tout le reste de la Normandie, à cause de la commodité de la Mer.

Le terroir de Caën a ceste particularité, qu'encor que la Normandie ne porte guiere de vins, toutesfois il en croist d'assez passables à Caën: mais à Argences, qui est à trois lieux près, les vins y sont tres-bons, & les habitans de la ville de Caën s'y fournissent ordinairement. Et pour n'amuser trop le Lecteur, si vous prenez toute la Normandie en gros, vous trouuerez qu'elle ne manque de chose qui puisse servir à l'homme. Car pour le bled il y en a assez bonne prouision: il y a des chairs, & des laitages en abondance, & grande quantité de fruits. Et si l'on me dit que ceste Prouince manque de vin, & qu'il luy en faut aller chercher ailleurs, ie responds qu'elle a du cidre, & du peré, dont le goust est quelquesfois merueilleusement agreable: tellement que cela repare le deffaut du vin: Il y a seulement de mesme qu'en Picardie quelques terres proches de la Mer, qui sont toutes couuertes de sable, & ne rapportent que bien peu à leurs possesseurs.

Pour le regard de la Bretagne c'est vne bonne Prouince, qui a des terres labourables à souhait, des prez en abondance, des landes pour le pasturage, & des forêts pour s'en servir à beaucoup d'vsages. Elle a la Mer pour trafic, de laquelle les Barons retirent aussi le sel cuit par la force, & chaleur du Soleil, lequel ils departent aux Prouinces voisines. Le fer, le plomb, & en quelque endroit les mines d'argent n'y manquent point. Il y croist aussi du vin, mais non en telle quantité, ny si friand, que les habitans du pays n'en recherchent d'autre, & n'aillet iusques en Anjou, voire mesme iusqu'à Bourdeaux pour recouurer des vins de Gascogne.

Si nous venons en Poictou nous trouuerons que le pays est bon, gras, & riche, n'ayant fault d'aucune chose de celles qu'on estime nécessaires, veu qu'il y a force bleds, vins, chairs, bois, poissons, laines, lins, fruits, & les forêts n'y manquent non plus, où les Veneurs peuuent trouuer assez de subiect de s'exercer.

La Xaintonge abonde en bleds, & en vins, & est vn des meilleurs pays de la France, tellement qu'elle fournit mesme de ses dérees à l'Espagne, à l'Angleterre, & à d'autres Prouinces.

Et le pays d'Angoulesme n'est pas moins fertile en bleds, & en vins, dont la bonté est assez connue. Il y a aussi des vallons si propres aux iardinages, qu'on ne void rien de plus plain, ny de plus gentil en Italie, & ces mesmes vallons produisent des chanvres en grande abondance. Il y a aussi force bois qu'on prend en la forest de Braconne, qui est la plus grande de ceste contrée, contenant 1450. iournaux de terre.

Le pays de Perigord est montueux, pierreux, & aspre, & pour la pluspart chargé de bocages, dont il y en a quelques-vns de bois de chesne, qu'ils nomment l'arrie en leur langue: mais pour l'ordinaire on n'y void que chastaigners qui sont de grand profit au peuple, tant pour sa nourriture, que pour engraisser les pourceaux. Mais encor vne des plus grandes commoditez de ce bois, c'est qu'il reuiert en peu de temps estant coupé, & porte le fruit plus beau & meilleur.

Et si cela n'estoit, il seroit impossible d'entretenir tant de forges à fer, & à acier qui sont en ceste Prouince. Tellement qu'il semble que ce pays soit sterile, & ne porte aucun grain pour la nourriture des hommes. Mais il porte assez de bled, & mesme de froment pour nourrir ses habitans, & souuent pour en faire part à ses voisins.

Quant

Quant aux vins ils sont bons, ou mauuais selon les endroits: car ceux qui se cueillent vers Montron pres du Limosin, sont vn peu verds, & n'ont pas grande force, bien qu'il y ayt des endroits le long du Bandiat où le vin est meilleur: mais tirant pres la ville de l'erigueux, & outre vers l'Agenois, les vins y sont delicats, bons & nourrissans, non fumeux, & sains à l'estomach, & l'air y est bon, & si subtil, qu'on n'y voit guiere ny la peste ny autres maladies contagieuses. Il y a aussi des eaux sulphurees, & alumineuses, qui sont fort medecinales. Pres d'un bourg appelle Marzac, il y a aussi vne fontaine qui a son flux, & reflux de mesme que le bras de mer qui passe deuant Bourdeaux, quoy qu'elle en soit esloignee de deux grandes iournees. Et pres de la Linde, qui est vne petite ville assise sur la riuere de Dordonne il y a aussi vne fontaine sortant d'une tour carree, haute de dix pieds, ou environ, & ayant demy-toise de largeur, dont la source jette sans celle tant d'eau que deux moulins à bled en meulent en toute saison.

Le pais de Perigort abonde aussi en simples, qui sont fort bons pour diuerfes maladies. Et à quatre lieues ou enuiron loing du Perigueux, en vn lieu nomme la Roche, il y a vn creux large, & spacieux dans vn rocher, duquel on tire grande quantité de terre rougeastre qui a meisme couleur, & vertu, que celle que nos Apoticares appellent *Bala Armena*: De sorte qu'on en vient querir de plusieurs endroits.

Le Limosin ne porte guiere de froment, estant vn pais assez froid, & maigre: mais il y vient force seigles, orges, & panicles. Il produit aussi des chataignes, & des raues en abondance. Il y a aussi quantité de vin aux enuiron de Limoge, mais verd, & peu agreable: toutefois on y en boit d'assez bon, qui vient du bas Limosin. Le pain, la chair, les fructs, le gibier, la venaison, & choses semblables y sont à bon prix, tellement qu'il fait du tout bon viure à Limoges. Le bas Limosin a force vignes, & son meilleur terroir est pres de Briue la gaillarde, où il y a force vignes, prairies & terres labourables.

L'Auuergne qui est diuisee en haute, & basse, est de diuerse qualite selon ceste diuision. Car la haute Auuergne abonde principalement en pasturages, & a force seigles: mais elle est sans vin, au lieu que la basse où est la Limagne abonde en bleds, vins, bois, prez, fontaines, fleues, lacs, où il y a force poisson, & pareillement en Saffran, & mines d'Argent. Bref la Limagne est vn des meilleurs pais de France, & qui rapporte plus à ses maistres. Et mesme pres de la source d'Alier on trouue vne belle mine d'Or, & d'Azur. Pres de Clermont il passe vne petite riuere nommee Tiretaine, sur le cours de laquelle on void vn merueilleux pont de pierre, fait de l'eau d'une fontaine qui s'endurcit & se transforme en pierre. Ceste fontaine est enuiron trois cents pas de la riuere, & le pont que son eau fait, coulant dans la riuere, a plus de trente six brasses de longueur, six d'espaisseur, & huit de large. Et c'est vne chose bien remarquable que ceste eau par le moyen de la transformation laisse les prez par où elle passe tous pleins de pierres. Il y a aussi pres de Clermont au milieu de la plaine vne petite colline, ou plustost motte de terre, d'où le bitume coule tout ainsi que feroit l'eau d'une fontaine, & ce bitume est noir au possible, gluant, & tenant, & duquel ceux du pais se seruent pour marquer leurs brebis, & pour autres choses. Il y a aussi force bains d'eau chaude en Auuergne, comme ceux de Vichy, & ceux de Chaudes-aigues.

Quant au Bourbonnois, & Forests on n'y cueille du froment qu'en bien peu d'endroits, estant presque tout pais de sable. Il s'y trouue en beaucoup de lieux d'assez bons vins, & du seigle en grande quantité. Les deux pais sont pleins de bois, & raboteux en plusieurs endroits, mais le Forests est beaucoup plus aspre que le Bourbonnois.

Le pais Meisin est gras & fertile, & abonde en bleds, vins, chairs, poissons, foins, sel, bois & mineraux, de sorte qu'il n'a guiere à faire du secours de ses voisins.

Quant à la Bourgongne, le terroir d'aupres de Dijon ne produit que ce qui peut suffire à ses habitans, encor assez chichement: celui de Beaune est assez fertile, & sur tout il porte quantité de bons vins renommez par toute la France. L'air y est fort temperé, & il y a de l'eau à foison, qui arrouse tout le pais: celui d'Autun est maigre en beaucoup d'endroits: ceux de Chaalons, Mascon & Tournus sont assez bons, & il y a des vins delicats, & en abondance, & principalement à Tournus.

Le Lyonnois est maigre en quelques endroits, & sa terre est fort legere, mais il fait extremement bon voir ceste partie qu'on nomme franc Lyonnois du long de la Saone, où il y a force bonnes terres, & quantité de vignes, & mesme de prairies, & vn grand nombre d'arbres fructiers, qui rendent ceste contree du tout agreable.

Le Dauphiné produit en ses montaignes beaucoup de bled, principalement de seigle. Il y a force bons pasturages, où l'on nourrit vn nombre incroyable de bestial, & par consequent il y a beaucoup de laiitage.

Quant aux vins, tout ce pais des montaignes n'en porte que bien peu. Pour le regard du

plat pays, il est presque tout bon & fertile du long de la riuere du Rhosne, & porte de très-bons vins, dont les plus renommez sont ceux de Vienne, Tein, Valence, & Montelimar. Bien avant dans le pays, & près de Grenoble il y a le Grafinodan qui abonde en bleds, & porte d'excellents vins, principalement près de Grenoble, où l'on fait grand estat de ceux qu'on nomme de S. Martin. A trois ou quatre lieues de là vous auez de fort bonnes terres, & des prairies près de Moyrans. Vous trouuez apres la Valoire qui ne cede à pays de France, en abondance de froment, & beauté de grain, ny semblablement en quantité de foin, veu que de tous costez on void en vne grande plaine les plus belles prairies du monde, meslees parmy quelques terres, & les vnes & les autres sont arrosees de l'eau d'une petite riuere nommee Veule, qui engraille merueilleusement les terres, & de la riuere d'Oron, au moins depuis la ville de Beaurepaire, en tirant vers le Rhosne. La manne vient aussi au pays de Briançonnais.

La Prouence porte tout ce qu'on trouue ordinairement aux plus fertiles contrees de France, & les surpasse en beaucoup de choses: car il y a des pays si abondans en bleds, que l'Isle de France n'est pas mieux pourueüe, & nommément la Camarque d'Arles, & la plaine de S. Chamar, de Miramas, Senas, & Malemort, depuis Orgon iusques à Aix & Marseille, & depuis Marseille iusques à Yeres, Frejus, & Antibes, iusqu'à la riuere du Var. Toute ceste estendue de pays porte force oranges, citrons, oliues, grenades, & figues, & grande quantité de vins des meilleurs de France. Les landes & terres vagues sont couuertes de rosmarins, myrthes, genevriers, sauges, & palmiers. Le saffran, & le riz y abondent en plusieurs lieux, & les huyles d'oliue y sont extremement bonnes. La Normandie vous est aussi representee au haut pays de Prouence, & selon les ports de mer, comme à l'Escaille, Seiné, Colmars, Castellane, & autres lieux où le vin ne croist aucunement; mais tout le pays est couuert de vignes de haute branche à la Normande, à sçauoir de poiriers, pommiers, chataigniers, & autres arbres qui croissent en pays froid. Car ceste partie de Prouence est froide à cause des montagnes qui sont couuertes de neige tout le long de l'annee, & toutesfois les habitans ne laissent d'y estre riches, à cause du bestial qui y abonde, & des fromages qui s'y font, qui sont seulement de lait de brebis, & de chevres. Ceste Prouence a toutesfois ce mal qu'il y a fort peu de bois, & qu'il y est cher au possible. Mais aux montagnes de l'Esterel entre Frejus, & Antibes, il y a de grands arbres qui portent le liege. La Prouence est aussi fournie de belles salines qui sont à Berre, Yeres, l'Estang, & Valench.

Le Languedoc est comme ie croy vne des Prouinces de France plus considerable. Car si vous regardez le terroir qui est autour de Thoulouse, vous verrez que c'est vn des meilleurs de France, foisonnant en bleds & en vins, & vn pays tellement gras, qu'il est presque impossible d'en sortir, lors que la pluye a esté grande. On peut presque faire 7. ou 8. lieues en ce pays là sans trouuer vn caillou.

La Comté de Lauraguez a tout ce qui peut estre necessaire aux hommes, & ne manque pas de choses que la nature donne plus pour les delices, que pour la necessité.

L'Albigeois est vn pays assorty de mesme de toutes choses, & si vous tirez du costé de Carcassonne vous y rencontrez aussi vn des gras terroirs de l'Europe. Pres de Beziers vous trouuez des terres assez bonnes, force bois d'oliuiers, & des vignes qui portent de bons vins. Depuis Pesenas iusqu'à Montbasin on trouue des landes, & des rochers, & faut aduouier que ces 3. ou quatre lieues de pays ne valent guieres, non plus que les quatre qu'on fait en allant de Nismes à Vsez. Mais entre Nismes & Montpellier le terroir est fort bon, & porte toute sorte de fruiets, quantité de bled, des vins excellents, & force oliues, & depuis Nismes iusqu'au Sainct Esprit (exceptant bien peu de lieu) le pays produit tout ce qui est necessaire.

Le plat pays de Viarez qui est du long de la riuere du Rhosne, produit tout ce qui peut seruir ordinairement à la vie. Il y a des bleds à suffisance, des vins excellens, principalement à Cornaz, & à Tournon, toute sorte de legumes, force chanvres, & des fruiets de toute sorte, voire mesme des oliues, dont il y a quantité près du bourg S. Andreol. Les montagnes de Viarez ne portent que du seigle: mais en la plus grande partie on y cueille de bons vins: & les habitans y sont si penibles & industrieux, qu'ils font comme par force porter aux rochers des vignes. Mais ces montagnes ont cela de particulier qu'à cause que les pasturages y sont bons, on y fait grande nourriture de bestail.

Le Velay, & le Geuaudan sont deux pays presque de mesme nature, qui portent des seigles & des legumes en abondance. & n'ont gueres autre chose, si ce n'est force lait, dont ils font des fromages que les habitans du pays vont vendre ailleurs, de mesme que leurs seigles pour auoir du vin. Bref le Languedoc est vne des meilleures Prouinces de France, veu que

non

non seulement elle a tout ce qui luy fait besoin, mais encores dequoy fournir à beaucoup d'autres contrees.

Le pays de Rouergue est aspre & montueux, & n'est gueres fertile: mais le Quercy porte des bleds en abondance, & des vins qui ne cedent aucunement aux meilleurs d'Aquitaine, si ce n'est à ceux du Bourdelois. Le bestail s'y void à foison, les bois ne manquent nullement, le charbon naturel y vient: les riuieres sont pleines de poisson. Sur tout la riuere du Tarn porte force bons poissons, comme des esturgeons, que ceux du pays appellent creacs, des lamproyes, aloses, qu'ils nomment colacs, brochets, barbeaux & vandaïles.

Les montagnes de Foix sont pleines de bons pasturages, & d'une infinité de mineraux, dont les eaux qui sentent le soufre, donnent cognoissance. Et veritablement il n'y a pas où la mine de fer soit meilleure qu'en Foix. Il y a aussi force resine, tourmeptine, poix, encens, lieges, laictages, marbres, iaspes, & autres pierres, comme ardoises, lauasses, tuffes, & grez, & un nombre infiny de sauuagine, des lacs merueilleux, des precipices effroyables, des vallons fertils vers Pamiers, & des herbages qu'on y void sur le plus haut des montagnes, avec de belles & claires fontaines. On y trouue aussi aux montagnes de Lauedan, les meilleurs chevaux de France, & tels qu'ils surpassent les Espagnols en force & d'exterité: mais il n'y en a pas si grand nombre qu'en Espagne, à cause que la montagne n'est guiere grande. On y void aussi force Sangliers, Daims, Cerfs, Cheureux, Chamois, appelez Isars par les habitans du pays, & autres bestes sauuages: & des plantes aussi sottes qu'en scauroient souhaiter les plus curieux chercheurs de simples.

Quant au pais de Cominges il est de mesme qualité que celuy de Foix en beaucoup d'endroits, & en d'autres il les surpasse: veu qu'il y a force bleds, vins, fruiets, foin, huiles de noix, mil, & autres choses necessaires à la vie humaine.

Pour le regard du pays d'Armagnac, tout ce qui est vers Lericoure, Auch, & Vie est tres-fertile: mais depuis qu'il approche des landes de Bourdeaux, il ne porte que des chastaigniers: & autres arbres, & le tout n'est rien que pasturages, & une pure solitude, non pas toutes-fois qu'il n'y ait des lieux à l'escart, & loin du chemin public qui rapportent beaucoup à leurs maistres.

La Bigorre est de diuerse qualité: car le vallon qui est depuis Bagneres iusques en Armagnac, selon la riuere d'Aulbe, est des plus fertils de Guyenne, & celuy qui est le long de l'Adour ne luy cede en rien, estant d'un costé reuestu de boscages, & de l'autre de bon vignoble, & au bas on void les prairies & terres labourables propres au froment: mais ce qui est au plus haut est un peu sec & maigre: si bien qu'il n'y croist guieres autre chose que du mil.

Le pays d'autour de Bourdeaux porte des vins excellens: de sorte que le vin de Graue est cogneu par toute l'Europe Occidentale, & Septentrionale, & outre les vins de Graue il y a ceux de Larmont, la Bastide, & lieux voisins, & encor les blancs qui viennent à Melion, qui ne doiuent rien aux Grecs. On fait aussi grand estat du pain de Potensac, place voisine de Bourdeaux. Il y a aussi quantité de chair, & de poisson; & pour le dire en un mot, Bourdeaux seroit une des meilleures demeures de France, si l'air marin, & les vapeurs des eaux ne rendoient ceste ville si subiecte à diuerses maladies, & mesme bien souuent à la peste. Le pays de Buch abonde en pins qui portent la resine, de laquelle les pauvres gens se seruent en ce pays, en Armagnac Bearn, & Bigorre au lieu de chandelles: tellement que leurs maisons en sont toutes noires, pour la fumee que rend la resine. Les Landes sont pleines de sablon & bruyeres, & le pays est si sec qu'on n'y trouue une seule goutte d'eau. Pres de ceste contree est Chalosse, qui est recommandee pour les bons vins blancs qui y croissent. Au terroir de Daix il y a une fontaine d'eau salee, d'où l'on tire du sel en quantité, mais c'est (quoy que tres-beau) est corrosif, pour estre de son naturel quelque peu alumineux. Il est aussi fort fertile, & a des bains, & des mines, tant de fer que d'autres metaux, & porte aussi du bitume. Le pays d'autour de Bayonne est un peu maigre, toutes-fois il porte assez de commoditez à ses maistres. Il y a sur tout force arbres fructiers pour faire du cidre, dont ils ont abondance.

Le pays de Bearn, à la contree de Iurançon, où viennent des vins qui sont esgaux en bonté aux meilleurs de France. Il y a outre cecy des bains singulierement bons, qu'on nomme d'Aigues-caudes, ou Caudes-aigues, & de Cauderets, des meilleurs simples qu'on voye, & quantité de mines. Ce pays abonde en mil pour la plus-part: & toutefois les bleds n'y manquent aucunement en plusieurs endroits, non plus que les vins. Sur tout il y a de bons pasturages, & par ce moyen force bestail, beurre, laict, & fromage. Il y a aussi force chanvres & laines, & ceste Prouince a ceste particularité qu'elle est mieux fournie de chevres que pays de France, pour ce qu'on a le moyen de les nourrir, sans preiudice des fruiets, ny des arbres tendres, pour les rochers & bruyeres dont ce pays abonde.

MOEVRS DES ANCIENS HABITANS DE FRANCE.

CLEMENT Alexandrin escrit de mesme que Strabon, que les Gaulois auoient accoustumé de nourrir de longs cheveux : & Agathie dit, que c'estoit la coustume des Roys de France de ne se faire iamais tondre, & de diuiser leurs cheveux en deux sur le haut du front. Et Diodore dit qu'ils se lauoient la teste fort souuent avec de la chaux, pour rendre leurs cheveux blonds. Strabon dit aussi que les nobles rasoient le poil des jouës, & laissoient croistre celui du menton, & qu'ils taschoient par tous moyens de ne deuenir pas gras, & de n'auoir pas de gros ventres, & que si quelque ieune homme estoit plus gros qu'une ceinture de certaine mesure, il estoit repris. Symmaque les louë de la peine qu'ils prenoient à apprendre les bonnes lettres & Caton en ses Origines, dit que les Gaulois estoient affectionnez à deux choses, c'est à sçauoir à la guerre, & à parler gentiment. Aussi les Gaulois ont emporté bien souuent le prix d'eloquence sur toutes autres nations. Toutesfois Diodore les reprend de parler bref, & vn peu obscur. Il dit aussi qu'ils estoient bien aises de prescher tout le iour leurs loüanges, & de mespriser les autres : qu'ils estoient pleins de menaces, mesdisans, & auoient bonne opinion d'eux-mesmes. Ainsi Vercingetorix se vante dans les Commentaires de Cesar, qu'il fera vne assemblee de toute la France, à l'accord de laquelle toute la terre ne seroit pas capable de resister.

Quant à la religion des anciens Gaulois, & leurs coustumes, touchant les choses sacrees, Cesar dit qu'ils estoient fort adonnez à la religion, & au seruice des Dieux, qu'ils adoroient principalement Mercure, lequel ils tenoient pour inuenteur de tous arts, & guide de tous les voyageurs : & estimoient encore que ce Dieu auoit grande puissance sur la marchandise, & presidoit au gain, & le conduisoit en toutes choses.

Ils adoroient apres Mercure, Apollon, Mars, Iupiter, & Minerve, ayant presque mesme opinion de ces Dieux que les autres nations, estimans qu'Apollon chassoit les maladies, que Minerve donnoit cognoissance du commencement de tous ouurages & artifices, que Iupiter gouernoit le Ciel, & Mars presidoit à la guerre, & auoit toute puissance sur les armes.

Plin dit que Xenodore fit vne statuë de Mercure plus grande qu'aucune de son temps en vne ville d'Auuergne.

Strabon escrit que Diane d'Ephese auoit vn temple à Marseille. Mais vn marbre trouué monstre que les Gaulois adoroient encor vne autre Diane surnommee d'Ardenne.

Lactance, Lucian, & Minuce rapportent que les Gaulois adoroient les Dieux Hese, Teutare, & Zarane : mais plusieurs hommes doctes tiennent que ce sont les mesmes que Mars, Mercure, & Iupiter.

Aufone nommé Belene pour Dieu des Gaulois, Lucian dit aussi qu'ils adoroient Hercule surnommé Ognien.

Les Gaulois adoroient leurs Dieux en se tournant vers la main droite, ainsi que dit Athenée. Ils sacrifioient des hommes aux Dieux, & nommément à Mars, comme Cesar tesmoigne en ces paroles : Lors qu'ils ont delibéré de combattre, ils luy destinent ce qu'ils prendront à la guerre. Ils immolent les bestes qu'ils ont prises, & rapportent tout le reste en vn lieu.

On peut voir en plusieurs villes les monceaux dressez de telles choses, & il n'arriue gueres souuent que quelqu'un au mespris de la religion cache les choses prises, ou prenne ce qui a esté mis en tels lieux : & mesme il y a vn grief supplice ordonné contre ceux qui contreuendront à ceste coustume.

Ceux qui sont atteints de quelque griefue maladie, & qui se trouuent en danger aux combats, ou en quelques autres lieux, immolent des hommes, ou bien ont vœu de les immoler, & se seruent des Druydes pour tels sacrifices, & estiment que les Dieux ne peuuent estre apaisez, si ce n'est en donnant la vie d'un homme pour celle d'un autre.

Ils tiennent que les sacrifices de ceux qui sont surpris en quelque larcin ou autre crime, sont plus agreables aux Dieux, mais quand les coupables leur manquent, ils se seruent des innocens.

Strabon dit aussi qu'ils auoient accoustumé de frapper avec l'espee le dos de l'homme qui estoit dedié pour estre immolé, & qu'ils presageoient les choses qui leur deuoient arriuer par son tressaillement.

Tertullien escrit qu'ils passoient les nuicts près des tombeaux des vaillans hommes pour receuoir des Oracles.

Or les Gaulois ne faisoient aucun sacrifice sans auoir appellé quelque Druyde.

Les Bardes estoient les Poëtes des Gaulois, qui compoioient les loüanges des hommes illustres, & blasmoient les lasches.

Ammian Marcellin faict mention des Eubages qui faisoient profession parmy les Gaulois de rechercher les plus hauts secrets de la nature.

Laerce, & Suide font mention des Senmothees, qui ne differoient en rien des Druydes, non plus que les Saronides de Diodore Sicilien, & Pline nomme bien souuent les Druydes Magiciens. Car les Druydes en Gaule estoient mesme chose que les Magiciens en Perse, Chaldeens en Assyrie, & les Gymnosophistes aux Indes.

Ces Druydes auoient beaucoup de ieunes gens à instruire, & estoient extremement honorez parmy les Gaulois: Car on se rapportoit à eux de tous debats, tant publics, que particuliers, & si quelque crime auoit esté commis, ils en iugeoient, & ordonnoient la peine que bon leur sembloit contre les coupables. Si quelque personne publique, ou priuee ne s'arrestoït à leur ordonnance, ils luy interdissoient de se trouuer aux sacrifices, qui estoit parmy eux vne grande peine. Et ceux qui estoient interdits en ceste sorte, estoient tenus pour impies, & fuyz de tout le monde, & mesme lors qu'ils demandoient iustice, on ne la leur rendoit pas.

Entre tous les Druydes il y en auoit vn qui estoit sur tous les autres, & auoit souueraine autorité sur eux. Apres sa mort on mettoit en sa place le plus meritant d'entr'eux, & s'il y en auoit plusieurs en mesme rang, & qui fussent esgaux en merite, les Druydes s'assembloïent pour l'eslection, & la pluralité de voix l'emportoit. Quelquesfois ils s'opiniastroient tellement à la recherche de ceste dignité que des paroles ils venoient aux mains.

Ces Druydes s'assembloient toutes les annees sur la frontiere du pays Chartrain, où abordoient tous ceux qui auoient quelques procez, ou debat, & obeïssoient à leur sentence. Et il semble que Cesar nous marque que ce lieu n'estoit autre que la ville de Dreux qui est à ceste heure, qui retient encor en quelque sorte le nom de Druydes. Ils n'estoient pas costumiers d'aller à la guerre, & ne contribuoient à aucune chose de celles qui estoient imposees sur le pays. Tellement que ces priuileges conuioyent plusieurs personnes de s'aller rendre leurs disciples, & plusieurs peres d'y enuoyer leurs enfans pour receuoir instruction d'eux, & se rendre capables de paruenir à ce rang. Ceux qui se rangeoient sous leur discipline, apprenoient vn grand nombre de vers, & n'estimoïent pas qu'il fust loisible de les escrire. Vne seule de leurs opinions fut publiee (dit Mele) c'est à sçauoir que les ames estoient immortelles, & selon Diodore, qu'elles passioient d'un corps en autre, comme tenoit Pythagore. Strabon dit aussi qu'ils dispuoient des mœurs, & s'addonnoient à ceste partie de la Philosophie, outre la naturelle.

Il y auoit aussi parmy les Druydes des femmes qui faisoient mesme profession. Il y en a qui tiennent que ces mots, *A gyl an neuf*, viennent de ce que les Druydes auoient accoustumé d'enuoyer par leurs disciples du guy à tous au commencement de l'annee, comme la leur desirant heureuse. C'estoient là les mœurs des anciens Gaulois, touchant les choses sacrees. Et pour parler plus specieusement de ces Druydes. C'estoient certains Philosophes Gaulois, desquels Pythagore a esté disciple, dit Clement Alex. i. de ses Tapissieries: ainsi l'ôt escrit & remarqué Iamblique & Clement Alexandrin qui rapportent l'autorité d'un Alexandre qui l'a ainsi escrit en son liure des Symboles Pythagoriques.

Et pour assurer avec plus de verité d'où sont venus ces Druydes, la plus commune opinion est qu'ils sont nez entre les Gaulois qui les appellēt ainsi Druydes en Grec, comme qui diroit Chesniers, pource qu'ils celebrient leurs principaux mysteres parmy les bois, & à l'imitation de l'antiquité entre les Chesnes.

Qui voudra lire l'histoire des vieux Gaulois trouuera de vray que leur premiere langue estoit la Grecque laquelle ils parloient parfaitement, & leur estant comme naturelle; beaucoup d'auteurs disent que faisans leurs saillies au pays de Grece, ils ont appris la langue Gauloise aux Grecs, & le pays de Grece, pour vn temps fut appellé *Gallogracia*: voyez l'auteur du liure de l'antique præ-excellence des Gaules & Gaulois.

Pline sur la fin du 16. liure dit que l'allusion du mot Grec de Druyde à celui de Chesne est fort grande. Mais il y a plus d'apparence de deriuier le mot de Druyde du mot Hebreu *Drußin* ou *Drußm* qui signifie Speculateur, ou recherchant les hauts secrets, comme les Mages de Perse, chose fort approchante de la profession des Druydes Gaulois.

Ils auoient telle puissance & autorité en Gaule qu'ils exerçoient du commencement tous actes de souueraineté sur le peuple. C'estoient eux qui retenoient les Gaulois si vaillās, disent Cesar & Lucain, parce qu'ils mesprisoient la courte duree du corps, & qu'au sortir d'iceluy ils croyoient que les ames alloient viure d'une vie eternelle.

Ils adoroient (dit Cesar) Apollon, Mars, Iupiter, & Minerue, & auoient mesme croyance que les Romains : mais assurer cela, c'est pure resuerie, & cela aussi ne se trouue chez Cesar, ce qui ne manque de preuue vraye semblable, veu qu'ailleurs le mesme Cesar rapporte que les Germains ne cognoissoient point de tels Dieux, & n'honoroiēt que ceux qu'ils voyoiēt. cōme le Soleil, la Lune & les estoilles : or est-il que Cesar mesme dit que la pluspart des Belges Gaulois estoient yslus des Germains, & Tacite assure que les Gaulois auoient iadis tenu la Germanie, & à voir ce qu'il escrit de la Religion desdits Germains, il se trouue qu'elle estoit si conforme à celle des Gaulois qu'on la reputoit empruntée par droit de voisinage.

Et quoy qu'il en soit, cest chose certaine que les Druydes n'adornoient pas plus d'un Dieu, qui faict que Lucain dit en la guerre de Pharsale, que les Druydes seuls sçauoient quel estoit le vray Dieu, ou seuls l'ignoroient.

Et de faict Brennus ayant pris Rome, ne fit non plus d'estat du Mars Capitolin, que de l'Apollon de Delphe. Tyrius Maximus en sa dissertation 38. parlant des Celtes dit, qu'ils adornoient Iupiter, desguilans par ce nom le vray Dieu & l'effigie d'iceluy *Ἰουλιανὸν θεὸν καλεῖται* sçauoir vn haut Chefne qu'ils appelloient *ὕψλη δρῦς* pour demonstrier qu'ils n'auoient point d'Idoles figurees : & de vray Cesar n'a iamais escrit qu'on ait trouué des Temples des Idoles entre les Celtes Gaulois.

Trop bien qu'iceux Celtes Druydes adornoient le Chefne, auquel, dit-il Cesar, ils appendoient leurs despoüilles de guerre en forme de trophées.

10. Quant aux prophanes, ils auoient accoustumé d'aller armez aux assemblees. Plutarque escrit que les femmes deliberoient de la paix, & de la guerre, & que leur resolution estoit suiue.

Strabon escrit que si quelqu'un interrompoit celuy qui haranguoit en quelque assemblee, il y auoit vn Officier qui le venoit menacer avec l'espee en la main, & luy commandoit le silence : & s'il ne se taisoit pour ceste fois, il faisoit le mesme pour la seconde, & ainsi iusques à la troisieme, & s'il trouuoit celuy à qui il auoit affaire, opiniastre, il luy coupoit telle partie de son saye, que le reste luy estoit inutile.

Leur coustume estoit aussi de demander les nouuelles aux passans, & le peuple s'enqueroit des marchands de quels pays ils venoient, & les contraignoit de dire les choses qu'ils y auoient veües, & les Gaulois s'arrestants bien souuent sur ces rapports, qui estoient quelquesfois faux, tenoient là dessus leurs assemblees, & resoudoient plusieurs choses qui leur portoient apres beaucoup de dommage, d'autant que ces deliberations auoient pour leur fondement vn faux bruiet & vne legere creance. Ils auoient accoustumé de punir plus grieuement celuy qui auoit mis à mort vn estrangier, que celuy qui auoit priué de vie quelqu'un du pays, veu que celui-cy estoit seulement banny, mais l'autre estoit soudain condamné à la mort. Quand quelque chose remarquable estoit arriuee, on l'alloit incontinent publier, touchant par les villages, & cela passoit ainsi de main en main avec grande promptitude.

Quant aux choses qui concernent la guerre, le reste des Gaulois apprit les habitans de Marseille à clorre de murailles les lieux de leur habitation. Elian diēt que c'estoient les hommes les plus prompts de la terre à s'exposer à toute sorte de dangers. Vopisce diēt que c'estoient des hommes pleins d'inquietude, & qui ne pouuoient iamais demeurer en repos. Tite-Liue les tient pour des personnes qui ne se pouuoient commander lors qu'ils estoient en cholere. La liberte leur estoit en si grande recommandation, que Flore rapporte que quelques Gaulois ayants esté pris en la guerre, tascherent de rompre leurs chaines à belles dents, & en fin presenterent la gorge l'un à l'autre, afin de se faire estrangler. Cesar tient qu'ils estoient prompts à entreprendre la guerre, mais peu capables de souffrir ces inconueniens, & incommoditez, & Tite-Liue dit que les Gaulois sont au commencement du combat plus qu'hommes, & à la fin moins que femmes. Mais Leon est bien d'autre opinion, lors qu'il dit, que les Gaulois ne perdent iamais courage, & qu'ils tiennent la moindre retraicte pour vne honteuse fuite. Et de faict Saluste dit que de son temps les Gaulois estoient si redoutables, qu'ils auoient fait trembler toute l'Italie, & qu'au lieu qu'on combattoit avec les autres nations pour la gloire, il falloit prendre les armes en main contre ceste-cy, pour deffendre sa vie. Et Iustin dit que les Roys d'Asie, & tous les autres estimoient en telle sorte le courage des Gaulois, qu'ils croyoiēt que sans eux ils ne pouuoient cōseruer ce qui leur estoit acquis, ny recouurer ce qu'ils auoient perdu. Aristote dit que les Gaulois ne craignoient point le tremblement de terre.

Nous lisons dans Strabon, qu'ainsi qu'Alexandre eut demandé vne fois à quelques Gaulois ce qu'ils redoutoient le plus, il luy responderent, qu'ils craignoient seulement que le Ciel tombast sur eux. Et Elian nous apprend qu'ils tenoient tellement toute fuite pour ignominieuse, que souuent ils ne se retiroient pas d'une maison qui tomboit par terre, ny de celle qui se

souuent enuoloppez dans ces flammes. Mais pour venir à leur façon de proceder en temps de guerre, Cesar dit, qu'auant le commencement de la guerre ils faisoient publier vne assemblée, où tous ceux qui auoient atteint l'aage de quatorze ans se deuoient trouuer armez, & celui qui venoit le dernier estoit avec d'estranges tourmens mis à mort deuant tout le monde. Les hommes de tous aages alloient à la guerre, & personne ne s'exemptoit d'y aller pour estre chargé de trop d'annees. Ils auoient le soin de pouruoir si bien à leurs viures qu'ils ne leurs manquaissent iamais, & de faire qu'au contraire les ennemis en eussent incontinent faute, brullants pour cet effect mesme les bourgs & les villes.

Les armes des Gaulois estoient l'espee assez pesante, selon Polybe, & longue, selon Tite-Liue, mais sans poincte, n'estant propre, comme dit Strabon, que pour donner des estramassons, & non pas des estocades, & ces espees leur pendoient au costé gauche, selon Diodore, à vne chaîne. Ils portoient aussi des escuz longs, & de leur hauteur, pareillement deux dards. Ils vsoient aussi de lances, dont le fer estoit long d'une coudee. Ils auoient aussi la teste armée d'un morion, sur lequel il y auoit des cornes grauees, ou des representations d'oyseaux, ou de bestes à quatre pieds. Et ce fut pour ce subiect que la neuuesme Legion de Cesar composée de Gaulois, fut nommée Aloüette, pource qu'aux habillemens de testes des soldats de ceste Legion il y auoit des Aloüettes grauees, ou bien des crestes. Ou bien elle eut ce nom, selon quelques-vns, pource que les soldats vsoient de morions faicts comme la creste ou hupe que l'Aloüette a sur la teste.

Les Gaulois se seruoient aussi de l'arc, & de la fronde. Ils paroient les gardes de leurs espees de corail, de mesme que leurs escuz, & quelque-vns mettoient de l'or sur leurs cuirasses.

Beaucoup de Gaulois combattoient nuds au dessus du nombril, ainsi que Tite-Liue escrit au discours de la bataille de Cannes. Ils faisoient beaucoup plus d'estat de la Cheualerie que des gens de pied, & mesme Cesar se ressentit de la valeur de la Caualerie Françoisse, qu'il employa contre Petreius, & Ascanius, & apres en Afrique contre les restes de la guerre ciuile. Ils vsoient au combat de gros escadrons, & mesme iusqu'au nombre de six mille hommes, comme on peut voir en Vegece.

Lors qu'ils alloient entrer au combat ils crioient espouuentablement, sautoient & frapportoient leurs escuz, & faisoient vn si grand bruit avec leurs armes, qu'il sembloit que tous les lieux d'alentour qui en retentissoient, s'escrissent avec eux. Ils se seruoient aussi de trompettes. Et quant à leur valeur au milieu des combats, l'Auteur de la guerre d'Afrique, dit que c'estoient des hommes francs qui auoient accoustumé de combattre non pas avec embusches, & ruses, mais à guerre ouuerte.

Quant à l'ordonnance de leur armée, pource qu'elle estoit composée de gens de diuerses villes, les soldats estoient diuisez en villes, & villages, & les troupes de chaque ville estoient ordonnées separement, afin d'euitier tout desordre, & de rendre les homes de chaque troupe plus ardans à se deffendre l'un l'autre. Ainsi qu'ils auoient obtenu victoire de leurs ennemis ils immoloient les prisonniers aux Dieux, comme on lit dans Athenée, & selon Strabon ils laissoient pendre les testes de leurs ennemis du col de leurs cheuaux, & les attachoient aux portes de leurs villes, afin qu'elles seruissent de spectacle.

Il y auoit au reste deux sortes d'hommes qui estoient en reputation parmy les Gaulois, c'est à sçauoir les Druydes, & les Cheualiers, dont les vns assistoient au seruice des Dieux, & annonçoient, & presageoient leurs volonte: les autres alloient à la guerre quand l'occasion s'en presentoit, & menaient avec eux selon leurs moyens le plus de gens qu'il leur estoit possible. Ceux qui estoient de l'ordre du peuple estoient tenus comme serfs, tellement que ces Cheualiers auoient mesme puissance sur eux que les maistres sur leurs esclaves. Ils ne permettoient pas que les enfans vinsent deuant eux, sinon lors qu'ils estoient en aage de porter les armes. Les maris mettoient en commun avec leurs femmes autant de leur bien eualué, qu'elles leur auoient porté de mariage, & tenoient par ensemble compte de tout, & les fructs en estoient gardez. Que si l'un d'eux venoit à mourir, la part de tous les deux venoit à l'autre avec les fructs des anneés precedentes, & les maris auoient puissance de vie, & de mort sur les femmes, de mesme que leurs enfans.

Ils auoient aussi ceste coustume que lors que quelqu'un estoit chargé de debtes, ou de trop de details, ou accablé par la puissance des plus grands, il se rendoit serf de quelque Gentil-homme, qui deslors auoit mesme pouuoir sur luy que sur vn esclave. Leurs maisons, suiuant le tesmoignage de Cesar, estoient pour la plus grande partie dans les forests, ou bien pres des riuieres, pour esuiter l'ardeur de l'Esté. Ils n'en fermoient iamais les portes si l'on veut croire Stobee, & vsoient de poisses comme on fait en Allemagne, ainsi qu'on peut voir au Misopogon de l'Empereur Iulien.

Quant à leurs habits ils portoient des sayes de laine, qui estoient faicts comme à fuseaux, II.

ou lofanges de diuerfes couleurs. Ils portoient auffi des chaufses qu'ils appelloient Brayes, & des bagues, mais feulement au doigt du milieu, comme dit Plin. Ils vïoient de vaillette de terre epaillee, & fufsemee de diuerfes fleurs qui y estoient representees. Ils mangeoient non pas assis sur des sieges, mais estendus par terre sur des peaux de loups ou de chiens, & selon Strabon, sur des lits, & estoient seruis par des ieunes enfans. On faisoit le feu pres d'eux, où l'on voyoit les pots, & les broches couuertes de chair, principalement de celles de pourceau, tant fraische que salee. Mais le plus souuent ils n'auoient que du lait pour toute viande. Les plus riches beuuoient du vin qu'ils faisoient venir d'Italie, ou des enuiron de Marseille, pource qu'ailleurs on ne voyoit aucune vigne, & quelquesfois ils mettoient vn peu d'eau dedans leur vin. Ils conuioient auffi les estrangers à souper, & leur demandoient qui ils estoient, & quel subiect les auoit tirez hors de leurs maisons.

Athenee raconte qu'anciennement ils auoient accoustumé de mettre les membres des moutons, ou autres bestes sur la teste, dont le plus vaillant prenoit la cuisse. Que si quelqu'un estimoit que ce tiltre luy fust deu mieux qu'à celuy qui s'estoit attribué le premier ceste qualite, ils combattoient sur ce sujet iusques à la mort. Il dit encor qu'il y en auoit qui prenoient de l'or & de l'argent au theatre, ou certain nombre de tonneaux de vin, & apres auoir iuré qu'ils endureroient ce pourquoy ils auoient receu ces presents, & apres les auoir aussi distribuez à leurs amis, ils s'estendoient à la renuerse sur leurs escus, en presence de celuy qui leur deuoit couper la gorge. Ammian Marcellin dit qu'ils estoient fort coustumiers de nager, & d'aller à la chasse, où ils portoient des fleches empoisonnees.

Pour le regard des funerailles, elles estoient magnifiques parmy les Gaulois; veu que Cesar, dit, qu'on jettoit dans le feu tout ce que le deffunct auoit plus aymé durant sa vie. Et Mele dit, qu'il y auoit des personnes qui se iettoient dans le feu où le trespassee brusloit, comme croyans d'aller viure avec luy. Il iettoient aussi, selon Diodore, des lettres dans le bucher, comme si les trespassez les deuoient lire. Et Valere le Grand rapporte, que les Gaulois prestoient de l'argent durant leur vie, à condition qu'on leur rendroit quelque iour aux Enfers.

MOEVRS DES FRANCOIS DE CE TEMPS.

12. **P**UIS que nous auons entrepris de discourir des moeurs de toute la France, il sera fort à propos de parler de sa ville capitale qui est Paris, demeure ordinaire de nos Roys, & abregé de tout le Royaume, de mesme que l'homme est celuy du monde. Les Parisiens sont donc d'un assez doux naturel, & ne se monstrent pas si reueches que les habitans de plusieurs autres villes de France. Ils sont toutesfois fort aysez à esmouuoir, & vn homme accort est capable d'en faire mutiner vn milier. Ils sont extremement desireux d'argent, de sorte qu'il n'y a chose du monde qu'un Parisien n'entreprenne pour en auoir. Cely soit dit aussi bien que l'autre chef, pour le regard des personnes de basse condition.

On a veu les Parisiens autresfois assez niais, tellement qu'on leur donnoit le nom de Badants par toute la France: mais ils sont auourd'huy tellement desniaisez, qu'ils sont capables de piper mesme les autres. Ce n'est pas qu'il n'y aye beaucoup de personnes accoustumees à ne rien voir, & ne rien faire, qui sont encore dignes de ce tiltre. Mais ils n'ont pas si tost mis le pied dans le monde, qu'ils sont beaucoup plus malaisez à leurrer que beaucoup d'autres. Il est vray que i'estime que la deffiance de toutes choses qu'on leur recommande à tous propos, à cause d'une infinité d'affronteurs qu'on void à Paris, est la plus grande finesse qu'ils ayent.

Les femmes de toute sorte desirent d'y paroistre, & estre beaucoup mieux vestuës que leur condition ne porte à quelque prix que ce puisse estre. Et leurs maris qui s'essayent pour la plus grande partie de leur complaire (d'autant que les femmes y gouernent presque tout) employent le verd & le sec pour satisfaire à leur desir. Mais les femmes sont loüables, en ce que les plus belles mesmes, & les plus delicates, & riches, ne desdaignent pas de visiter les hospitaux, manier les malades tous vlceres & fievreux, & les nourrir & medecamenter.

Ce peuple est fort desireux d'apprendre ce qui se passe de nouveau de tous costez, ainsi que Cesar dit de nos ancestres. Il ayme fort toute sorte de passer temps, & se plaist à viure en delices, y estant conuié par l'object ordinaire de ceux qui frequentent la Cour, qui n'ont pour la pluspart aucun meilleur exercice, que de jouer, rire, & faire bonne chere.

Au reste les Parisiens qui faisoient iadis vne merueille de toutes les choses qui arriuoient de nouveau, ne s'estonnent gueres plus d'aucune, tant ils sont accoustumez à en voir d'estranges. Ce peuple soupçonne ordinairement les estrangers qui y abordent, & pour ce chacun est sur les gardes, à ce que ses hostes ne luy emportent ce qu'ils luy

luy doiuent. Il est vray qu'il a beaucoup d'exemples de ceux qui ont esté deceuz, en vsant de trop de courtoisie, sans cognoistre les personnes à qui ils auoient affaire. Mais s'ils vous ont cogneu homme d'honneur, & que vous ayez esté longuement en leurs logis, vous en receuez plus de plaisir que de personne du monde. Ils ont ceste particularité, qu'ils ne bougent point de leur logis la nuict, quelque bruiet qu'ils oyent parmy la rue, & quoy que quelqu'un crie qu'on le vole, ou qu'on l'assassine. De sorte qu'une personne qui se trouue parmy des tireurs de manteaux ne doit esperer apres Dieu, qu'en ses mains, ou bien en ses pieds. Et ce qui les retient au logis en ceste sorte, c'est qu'ils ont souuent de fausses alarmes que quelques yrongnes leur donnent, ou bien des cris de quelques vagabonds qui se plaisent à mettre le monde en action, afin de s'en rire apres, ou de quelques meschans qui font ce bruiet à dessein, afin d'essayer de faire sortir, & d'assassiner ceux qu'ils hayssent. Pour conclusion, le peuple de Paris est d'une assez douce humeur, & fort maniable, & ie croy qu'il passe en ciuilité tout l'autre peuple qui se void au reste de la France.

Tout ce qui est autour de Paris est peu différent. Mais il faut que ie die encore cela, que les pay sans sont aussi fiers qu'en lieu du monde, à cause du voisinage du Parlement, & qu'on ne leur scauroit dire vn mot qui leur desplaise, qu'ils ne repartent aussi-tost iusques à vous conuier de leur mettre les mains dessus, ce que faisant vous les faictes assembler pour s'essayer de vous mettre en peine.

Ils ont encor ceste coustume en tous les enuiron de Paris, qu'ils espuisent les passans tant qu'ils peuuent, & tireroient d'eux iusqu'au dernier denier s'il leur estoit possible. De sorte que de quelque costé qu'on aborde près de Paris on trouue par tout vne cherté incroyable.

Les Chartrains sont amiables, courtois, communicatifs, & doux à chacun, & viuent ordinairement ensemble en bonne paix, aiment les estrangers qui ont quelque bonne partie en eux, sont addonnez à la pieté, & fort affectionnez à la foy de leurs ancestres, sont charitables, aumosniers, & addonnez au trafic.

Les Beauuilliers sont presque de mesme naturel que les Chartrains, & sont d'assez bonne paste, addonnez au labourage & au trafic des bleds. En beaucoup de lieux ils sont assez ruzez, à cause des passans qui viennent de tous costez en grand nombre. Les habitans de Chasteaudun sont de bon esprit, aigus & subtils, & entendent à demy mot ce qu'on leur dit, & ont aussi fort peu de langage. Toutesfois ils parlent si bref qu'ils viennent quelquesfois iusques à ne s'entre-escouter pas, ou ne souffrir que ceux qui parlent à eux acheuent leur discours, qui est vn vice naturel du pays.

Les citoyens de Blois tiennent de la bonté du terroir, & de la douceur de l'air du pays, & sont courtois, doux, affables, accorts, subtils & spirituels au possible, mesnagers, & en action perpetuelle, sont addonnez au seruice de Dieu, aiment les estrangers, & viuent de bon accord entr'eux. En fin tout ce pays a des habitans qui ne doiuent rien en gentillesse à tout le reste de la France.

Les Vendosmois ont l'esprit doux, gentil, & addonné à tout ce qu'on void de plus poly, & mesme né pour se rendre excellent en quelque chose, comme a fait Pierre de Ronlard, Gentil homme de ce pays, cogneu par toute l'Europe par ses oeures, qui l'ont rendu non seulement l'honneur de sa patrie, mais encor l'ornement de toute la France.

Ceux d'Orleans & des enuiron sont assez polis & ciuilez, & ont vn langage fort agreable, mais ils sont d'un naturel aigre & piquant, qui leur a faict donner ce nom de Guespins tant rebatu. Ils sont pleins de courage, & s'entre-soustiennent fort les vns les autres, & sont addonnez au trafic qu'ils exercent en beaucoup d'endroits.

Ceux d'autour de Sens ont bien tesmoigné iadis combien ils estoient remplis de courage, puis que ce furent les premiers qui se resolurent de passer avec Brenne en Italie. Le peuple y est assez bon, & moins rusé qu'en beaucoup d'autres lieux, & en ce pays on void presque chacun assez affectionné à la religion. Et l'Auxerrois est de mesme, ayant des gens d'assez bonne trempe, mais courageux, mutins, & d'ailleurs affectionnez au trafic de leurs denrees.

Quant aux Champenois, & Briois, bien que leurs voisins les blasment d'estre trop arrestez à leur opiniõ, & qu'on les appelle testus, toutesfois ceste imperfectiõ est couuerte par vn nombre infiny de vertus, qui les rendent loüables, pource que la raison leur fait dompter ceste chaleur naturelle, d'où procede ce vice qu'on leur impose. Ils sont accostables, prompts à faire plaisir, craignans Dieu, & ne sont subiects à se coiffer aisément de nouuelles opinions.

Les Picards sont d'aussi bon naturel que gens de France, francs au possible, courtois, affectionnez à faire plaisir, vaillans, & courageux tout ce qui se peut, mais ils sont extremement

prompts, à raison dequoy on leur a donné le nom de teste chaude, aiment à faire bonne chere, meismes iusques à l'excez, & n'estiment & n'ayment presque que ceux qui leur font teste à bien boire, de telle sorte que si quelqu'un veut emporter quelque chose d'eux, il faut qu'il face carrous à toute teste. Ils sont biens vnies, & de bon accord ensemble, de sorte que si vous touchiez vn habitant de quelque ville, vous auriez aussi-tost sur vous tous les autres. Bref c'est vne nation qui n'est point double, & de qui l'on se peut asseurer en toute sorte.

Les Tourangeaux sont pleins de gentillesse, & de douceur, affectionnez au trafic, mais sur toute chose fideles à leurs Roys, comme la retraicte du Roy Charles septiesme à Tours, & celle du feu Roy le tesmoignent. Le pays est si bon qu'il les conuie à se plaire au jeu, & à toute sorte de passe-temps, si bien qu'on leur a donné le nom de Rieurs de Tours.

Les Manceaux sont addonnez au trauail, industrieux, de subtil esprit, mal-aisez à decevoir, bons mesnagers, & quelque peu plus rusez que leurs voisins: au reste propres à tout ce qu'ils entreprennent, & ce pays nourrit d'aussi braues & courageux Gentils-hommes qu'il y en ayt en ce Royaume.

Les Angeuins, & Poicteuins sont d'un gentil esprit, mais les Poicteuins l'ont principalement fort subtil. Ils gaussent de bonne grace, & rencontrent fort à propos. Le paysan y est ruzé, & s'il le faut ainsi dire, meschant, & la noblesse y est galante & courageuse, de meisme qu'au pays d'Anjou.

Les Normands sont fins & rusez, ne sont subiects aux loix, ny aux coustumes d'aucuns estrangers, & vivent selon leur ancienne police, qu'ils defendent opiniastrément. Ils sont sçauants au possible en matiere de procez, & sçauent tous les destours, & toutes les ruses & surprises que la chiquanerie peut inuenter: tellement que les estrangers ne s'osent associer avec ce peuple: au reste les hommes y sont de fort bon esprit, (comme quelques personnages de ce siecle nous font voir, & la commune pratique & cognoissance de quelques-vns nous tesmoignent.) Ils embrassent aussi fort la Pieté, & sont remplis de courage, dequoy les conquestes de Guillaume Duc de Normandie, qui se fit Roy d'Angleterre, & celles des enfans de Valonges, & de Haute-ville Guischart, qui se rendirent Seigneurs de la Pouille, Calabre, Naples, & Silice, nous peuuent seruir de garands fort asseurez.

Quant aux Bretons ils sont plus ou moins polis & ciuilez selon les contrees qu'ils habitent: veu que ceux qui sont plus voisins de la mer ne sont pas naturellement si courtois que les autres: mais en general tous les Bretons sont assez sociables, & de douce conuersation: au reste fins & subtils, quoy qu'ils paroissent grossiers. Ils aiment leur profit, & sont addonnez au vin plus qu'il ne seroit necessaire, & pour cet effect ils frequentent les cabarets, où la plus grande partie de leurs affaires se traicte, & pour conclusion, ils sont pleins de pieté, & bons Catholiques. Ils ont ceste particularité qu'ils veulent mal de mort aux Normands, de meisme que les Normands couuent contr'eux vne haine extreme.

Pour le regard des Angoumoisins, ceux qui se tiennent dans Angoulesme sont gens de bon esprit. Ils se veulent maintenir en reputation, se vantent volontiers, se plaisent peu au trafic, vivent la plus-part de leurs reuenus, & sont les Gentils-hommes, aiment les lettres, sont magnifiques & courtois, prennent plaisir (comme la plus-part des François) à choses nouvelles.

Quant à ceux du Plat-pays, ils sont grossiers & rudes, addonnez au trauail, & opiniastrés, au reste propres aux armes.

Les Perigourdins sont disposés & gaillards, & sobres, se contentent de peu, & font de grands exercices, & quoy qu'on les taxe d'estre rudes, & grossiers, toutesfois ceux qui les pratiquent les recognoissent pour accorts, & propres à toute honneste action & exercice, soit des lettres, ou des armes.

Sur tout les maisons des Gentils-hommes de Perigord sont de vrayes escholes de vertus & de courtoisie, & les Bourgeois des villes imitent les façons de la noblesse qui y est en fort grand nombre.

Et quant aux femmes elles y sont chastes, bonnes mesnageres, & n'ont autre soin que de leur famille, & ne sont aucunement coureuses, quoy que leurs marys n'vsent d'aucune rigueur en leur endroit.

Les Limosins sont volontiers sobres, & ne boient guere du vin qu'aux villes. Ils sont bons mesnagers. Les parens demeurent tousiours bien vnies, tellement que vous verrez aux villages des maisons, où vn vieillard verra ses enfans iusqu'à la troisieme generation, & meisme quelquefois il y a des familles où l'on void plus de cent personnes de meisme sang, qui vivent en commun, ainsi qu'en vn College. Ils sont pour la plus grãde part laborieux, & subtils, mais ils ont ce mal qu'ils fondēt vn procez sur vn rien, & qui pis est on les blasme du mestier de tesmoins à gages. On estime principalement de ce naturel les habitans de Tulle.

Mais

Mais quant à ceux d'Vzerche ils ne se soucient gueres de la marchandise, & s'addonnent plus volontiers aux armes.

Quant aux Gentils-hommes ils sont presque ordinairement en querelle les vns avec les autres, mais au reste ils sont magnifiques, & genereux, & pour le regard des citoyens des villes ils les imitent en ceste derniere partie.

Les Auvergnats sont extremement accorts, & rusez, fort laborieux, ardants & aspres au gain, s'addonnent grandement au trafic, sont doubles pour la pluspart, querelleux & pleins de violence, & gens avec qui il fait mauuais auoir affaire. La Noblesse y est fort courtoise, & courageuse, mais le peuple ayme les procez, & conteste malicieusement pour peu de chose.

Les habitans de Bourbonnois qui aboutissent à l'Auvergne sont presque de mesme naturel, car quant à ceux qui en sont plus esloignez ils sont doux, & gracieux ordinairement, & ont l'esprit subtil, & accort, sont bons mesnagers, & addonnez à leur profit, mais au reste courtois aux estrangers.

Ceux du pays Bessin se sentent vn peu de la rudesse des Allemans, mais aussi ils participent à leur franchise. Ils sont vaillants, forts, & laborieux, religieux & simples, mais roides à se maintenir tant qu'ils peuuent en liberté: au reste ils aiment fort peu les lettres.

Quant aux Bourguignons, ceux de Dijon sont le plus souuent fort arrestez en l'opinion qu'ils ont prise. Ils s'entr'ayment & frequentent, sont ialoux de leur honneur, conuoient les grandeurs, & estats, au reste sont fort accostables. Les femmes y vont parees & braues, & toutesfois elle y sont chastes, & loyales à leurs marys.

Le menu peuple est addonné au trauail, & sur tout à cultiuer les vignes. Ils sont deuots, & fermes Chrestiens, ennemis de reuolte, & de nouvelles opinions, vaillans & hardis, & tels pour conclusion, qu'on ne les peut manier que de bonne sorte.

Quant à ceux de Beaune, les principaux citoyens sont gens de iustice, & le reste s'adonne à cultiuer les vignes, ou à faire des draps, tant de laine, que de lin, & de chanvre, dont tout ce pays abonde.

Ceux de Saumur sont paisibles, debonnaires, & charitables, s'entr'ayment, & vivent en bon accord, & se plaisent fort en l'accointe, & cognoissance des estrangers.

Ceux de Chalon sont spirituels, & s'addonnent à bien parler, & tiennent des susnommez presque en tout le reste. On peut dire le mesme de tous les autres habitans du pays de Bourgogne, qui sont la pluspart pleins de franchise, & de bon naturel: mais en quelques endroits on abuse du vin aussi bien qu'en Allemagne.

Le peuple de Lionnois est doux, & gracieux, à la façon niaise: mais l'effect n'en est pas si grossier que l'apparence. Car le paysan y est rusé, & pour ceux qui sont vn peu plus releuez de condition, ils font habilement leurs affaires. Ce sont gens de grand trafic, qui font argent de toute chose. Et quant à ceux qui demeurent dans Lion, il y a plus grand nombre d'estrangers entr'eux, qu'en lieu de France, & tous tiennent presque de l'humeur Italienne, & les hommes & les femmes aiment esgalement paroistre magnifiques.

Le peuple de Forest est subtil, accort, & de bon esprit, sçait sagement pouruoir à ses affaires, ayme le gain, & pour cet effect trafique par tout le monde. Mais il est charitable à l'endroit de ceux de son pays, lors qu'ils sont reduits à quelque necessité en pays estrange. Il est besoin de prendre soigneusement garde à soy, lors que l'on doit demeurer avec vn Forestien quelque affaire.

Les Dauphinois à en parler generalement, sont fort affectionnez à leur Prouince, mais fort ialoux, & soigneux de leur liberté, constants à la poursuite de leurs affaires, soigneux à conseruer le leur. Les habitans des villes y sont courtois, affables, de bon & gentil esprit, capables des sciences, & sur tout des Mathematiques, curieux chercheurs des secrets naturels, libres en parole, & sociables, mais vn peu dissimulez, & hauts à la main, ayans bonne opinion d'eux-mesmes, & se vantans volontiers. Que si nous voulons voir ce peuple plus particulièrement, il le faudra diuiser en celuy des montagnes du Plat-pays. Celuy des montagnes est rude, & grossier, peu né aux lettres, & propre aux armes, & sur tout addonné au trafic, & au trauail.

Ces montagnars ont vne coustume, qu'ainsi que l'hyuer approche, ils enuoyent au loing ceux qui sont capables de trauailler, tellement qu'il ne demeure au logis que les vieilles gens, & les enfans qui ne peuuent marcher, ou gagner leur vie. On appelle Bics, ou Bisoiards, tous ceux cy qui vont dehors, & qui reuiennent à Pasques, & quelquesfois ces Bics, qui sont penibles, & pour la pluspart accorts, deuiennēt riches marchands avec leur espargne. Quant à la noblesse des montagnes, elle se sentoit autresfois de la rudesse de sa demeure: mais maintenant qu'elle pratique Grenoble, elle ne doit guere en gentillesse

à celle du Plat-pays, qui est aussi accomplie en toute chose, qu'aucune qu'on puisse voir en tout le reste de la France. Celle des montagnes est aussi fort espargnante, & tasche d'auoir du bien en plusieurs sortes, principalement par le moyen du bestial qu'elle nourrit, au lieu que celle du Plat-pays, qui est gentille, & genereuse, despence son reuenu honnestement, & se frequente plus qu'aucune qui soit en France, & pour conclure, toute la Noblesse se soustient au possible, de sorte qu'encores qu'au fort de la guerre vn Gentil-homme soit logé dans vne foible maison au milieu d'un bois, il arriuera peu souuent qu'on luy aille faire de l'ennuy, pourueu qu'il ayt bien sceu viure auparauant avec ses voisins: elle est aussi toute vaillante & courageuse. Pour le regard du peuple du Plat-pays, il est plus civilisé que celui des montagnes: mais il aime fort peu le trauail, principalement aux lieux fertiles, & se plaist extremement à la faineantise. Il est courtois, & respecte fort les Gentils-hommes, qui y ont autant de pouuoir qu'en pays de France. On peut tirer des montagnes de bons soldats, mais il ne s'en tirera pas de moindres du Plat-pays, où les personnes semblent presque aussi peu nees aux lettres, qu'aux montagnes. Les hommes n'y sont pas si aspres au gain, qu'ailleurs, & se contentent, pourueu qu'ils puissent couler leurs iours sans incommodité: non pas qu'il n'y en ayt quelques-vns qui brulent d'auarice, aussi bien qu'aux autres contrees: mais ce que ie dis, c'est ce que l'on y pratique d'ordinaire. A Grenoble, & aux autres bonnes villes, comme à Vienne, Valence, Romans, les femmes se plaisent fort d'estre parees: & depuis quelque temps ceste vanité s'est glissée par toute la Prouince. Je diray ce mot à la louange des Damoiselles de Dauphiné, que l'on en void fort peu en France qui les esgalent en esprit & gentillesse, & que parmy leur franchise & familiarité qui est fort grande, elles ont l'honneur en recommandation sur toutes les femmes du monde: tellement que c'est presque vne merueille d'ouïr parler d'une femme qui face l'amour au desauantage, & au preiudice de sa reputation.

Les Prouençaux ont vne merueilleuse disposition, & sont extremement sobres, lors qu'ils vivent à leurs despens, & assez vaillans, mais inconstans, auares, doubles, & de foy mal-assurée. Ils sont tous grands parleurs, se plaisent à faire des comptes d'eux-mêmes, & s'estiment au possible. Ils sont arrogans, & fiers tout ce qui se peut en leur pays, & ne portent nul respect à leurs Seigneurs, ou à ceux qui sont esleuez en dignité sur eux: veu même qu'il y a en beaucoup qui ont mal-heureusement meurtry ceux qui leur commandoient. Les femmes y sont fort pompeuses à l'Italienne. Le paysan y est plus spirituel qu'en aucun pays de France, & y dit si bien sa raison, que l'on diroit que quelque habille homme nourry parmy les affaires, l'a instruit en ceste sorte. Ceux qui sont aux lieux maritimes s'addonnent fort au trafic, & manient dextrement leurs affaires. Ils sont grands faiseurs de chansons, avec lesquelles ils passent bien souuent leur fougue, quand il leur arriue quelque trouble: au reste ils sont fort affectionnez à leur religion, & bons Catholiques.

Que si nous nous amusons à considerer le Languedoc, nous verrons premierement les Thoulousains nez aux lettres, & de bon esprit, mais subiets à s'esmouuoir au moindre bruit, peu courtois à l'endroict des estrangers, au reste deuots & bons Catholiques, fort civilisez: mais qui vivent assez mal chez eux. Ceux des enuiron de Carcassonne, Beziers, Montpelier & Nismes sont du tout soudains, grands parleurs & grands vanteurs d'eux-mêmes, peu secrets, & peu consideres, mais assez pleins de franchise & de naïfueté, & pareillement de courage. En tout le pays, qui est depuis Thoulouse iusques au saint Esprit, & au saint Esprit même les femmes y sont insupportablement braues, & se plaisent même à vser de diuers fards, combien que ce ne soit pas tant avec dessein de mal faire, que d'estre estimees belles, veu que le pays porte avec soy ceste vanité. Et les hommes mêmes aiment d'y aller parez, & bien vestus, au delà de ce que leur condition, & leur reuenu leur peut permettre. Les femmes y trauailloient ordinairement toute la semaine en diuers ouurages de soye, & se nourrirent fort mal, afin de pouuoir auoir de leur gain quelque chose de gentil pour les Dimanches, & Festes, & principalement depuis Beziers iusques au Pont S. Esprit. Car cela ne se pratique gueres à Carcassonne, ny à Narbonne.

Que si nous venons au Viuares nous y trouuerons au Plat-pays, qui est fort estroit, vn peuple qui n'est nullement affectionné aux delices, ny à l'oisiueté, qui aime le trauail, & qui fait valoir le mieux qu'il peut le peu de terre qu'il possède. Le paysan y est principalement adonné à cultiuer les vignes, qui luy sont ordinairement de grand rapport. Il fait bonne chere, va mal vestu, au contraire de tout le reste du Languedoc. Les femmes mêmes, & les enfans y trauaillent, & aux terres & aux vignes. On void au reste en ce pays de fort bons esprits, & en assez grand nombre, & ces esprits s'exercent volontiers à quelque chose de gentil, & font paroistre en leurs discours, & en leurs actions qu'ils ne doiuent porter enuie à ces deux autres Prouinces de France. La Noblesse y est si ciuile, & reçoit si courtoisement

courtoisement les estrangers, principalement ceux qui se rendent recommandables par quelque belle partie, qu'on diroit que la vertu mesme a choisi ce pais pour sa demeure.

Tout le mal qu'on y trouue, c'est qu'ordinairement le pais des montaignes est plein de querelles & de meurtres, & qu'il s'y fait bien souuent des assemblees, comme si l'on vouloit donner quelque bataille, & ces assemblees qui sont quelquefois dissipees par ceux qui ont quelque pouuoir dans les pais, sont aussi par fois & trop souuent rompuës avec effusion de sang. Et quant aux singuliers combats ils y estoient auant l'Edict du Roy si frequents qu'on n'oyoit parler d'autre chose. Pour dire encore quelque chose des montaignes, la noblesse y est fort courtoise, & se plaist à faire bonne chere à ceux qui y suruiennent, mais elle n'est pas du tout si polie que celle du plat pais, excepté quelques-vns qui ont veu la Cour, & y ont appris la gentillesse. Mais quant au paisant il y est rude en ses actions, mais nullement grossier d'esprit, veu qu'il fait dextrement ses affaires, & parle avec iugement des choses de sa cognoissance. Il est extrêmement laborieux, tellement qu'il grattera trois iours vn rocher, afin d'y pouuoir planter vn cep de vigne. Et ce trauail est cause de sa richesse.

Ceux du Velay, & du Geuaudan doiuent estre mis en mesme rang que les habitans des montaignes de Viarez. Car la noblesse, & le peuple y vit tout de mesme, excepté qu'en Velay les querelles y sont plus ordinaires & le peuple de moins bon naturel qu'en Viarez. Et mesme il s'y trouue des Bandoliers par troupes, ainsi qu'aux montaignes de Foix, & plusieurs lieux, où tout le droit consiste en la force. Au reste ils sont fort addonnez au trafic de leurs denrees, & autres choses.

Les habitans du pais de Foix sont addonnez au trauail, supportent toute sorte d'incommoditez, soit de marcher par de mauuais pais à quoy ils sont accoustumez, soit de demeurer long-temps sans manger. Ils sont aussi remplis de courage. Mais il y a vn mal en ce pais, qui est que plusieurs ne pouuans viure au plus mauuais pais, s'adonnent à demander la gracieuseté aux paisans avec vn poictinal en Bandolier. Toutefois ils ont ce bon naturel, pour la pluspart, que si vous les contentez volontairement ils ne vous font nul mal, & mesme quelquefois les premiers que vous rencontrez, & que vous rendez contents vous mettent, ou font mettre hors de tous dangers, & de tous mauuais passages. Quelquefois aussi ces Bandoliers vous laissent en blanc, ainsi que vous passez d'Espagne en France, ou de France en Espagne.

Le pais de Cominge abonde en hommes vaillans, mais peu addonnez aux lettres, quoy qu'ils ayent l'esprit aussi gentil, & prompt à toute chose que nation de la terre. Il supportent aisément toute sorte d'incommoditez, sont sobres, & discrets en parole, hayssent la superfluité des habits & les delices, & tout ce qui peut rendre l'homme effeminé. Quant aux femmes elles y sont chastes, grandes mesnageres, & obeyssantes à leur maris, & n'ayment pas à demeurer oisives.

En Armaignac le peuple est grossier, simple, bon mesnager, & qui fait profit de tout, addonné au trafic, & sur tout du bestail. Il ne manque pas de courage.

Pour le regard de la Bigorre, le peuple y est haut à la main, né aux armes, soudain en ses entreprises, & toutesfois dissimulé au possible, peu courtois, farouche & mal plaisant, si ce n'est aux vallees. Au reste il n'endure pas aisément vne iniure, & commet des meurtres pour legere occasion: Il est toutefois bon, & loyal, & naturellement simple. La noblesse y est gaillarde, sociable, courtoise, bonne & renommee pour sa vaillance.

Les Gascons sont de gentil esprit, prompts, & soudains au possible, tous bottillans, & pleins de courage, propres à tout ce qu'ils entreprennent. Mais au reste ils sont altiers, & veulent tousiours auoir le dessus, si bien qu'ils se rendent le plus souuent odieux, & insupportables. Toutefois quant ils se voyent parmy les autres nations, où ils sont plus foibles, ils cachent leur naturel, & se rendent souples. Mais cela n'empesche pas qu'on ne voye à trauers ceste apparence leur fierté qui ne peut estre dissimulee. Ils se plaisent à prescher leurs loüanges, & les oüyr. A leur dire personne n'est pauvre parmy eux, & quand ils sont hors du lieu de leur cognoissance, le plus miserable & necessiteux fait le Prince. Ils sont pour la plus grande partie auares & ardants à en auoir de quelque costé qu'il vienne, sont assez aduisez, & scauent bien faire leurs parties. Au reste ils sont enuieux du bien d'autrui plus que nation de la terre, & si pleins de mespris, lors qu'ils n'ont pas affaire de personne, qu'ils desobligent beaucoup de gens de leur cognoissance par leur mine. Mais quand ils ont besoin de quelqu'un on n'a iamais veu gens qui s'humilient dauantage. Quant à la noblesse elle est aussi braue, galante, courtoise & courageuse qu'on en puisse voir ailleurs. Elle se visite tellement, qu'on pourroit nommer avec raison les maisons des Gentil-hommes, hostelleries, & lors qu'ils reçoient quelqu'un chez eux, ils luy font la meilleure chere qu'ils peuuent. Mais leur naturel soudain & colere, cause qu'il y naist à toute heure des querelles.

Pour le regard du Bearn, le peuple y est fort gaillard, accostable, & courtois, mais fin & subtil, bien-disant en sa langue, vaillant & amy de la liberté. Il est au reste haut à la main, s'estime infiniment, & méprise les autres au possible: & c'est ce qu'on trouue odieux entre ses façons de faire, qui d'ailleurs sont assez louables. Les Bearnois sont assez propres aux lettres, & se plaisent à apprendre quelque chose, & à escouter les estrangers. La noblesse y est braue & courageuse, & n'ayme guere la parade des habits, estimant que le plus grand ornement des hommes consiste en la vertu, dont elle est fort bien assortie.

Nous auons discoursu particulièrement des peuples de France l'un apres l'autre, il est à propos de considerer en general ce qu'on en peut dire.

13. Le peuple de France est bon, & franc, non toutefois que les guerres ne luy ayent rauy quelque partie de ceste premiere rondeur, qui le rendoit louable par tout le reste de la terre. Mais au moins il a encor ceste particularité, qu'il se laissera moins glisser à vn mauuais dessein, que les nations voisines, veu que la plus grande partie a en horreur la perfidie & meschanceté. Il est assez aduisé, mais toutesfois bien soudain le plus souuēt, sans percer si auant que l'Italien, ou Espagnol auant que d'entreprendre quelque chose. C'est vn peuple né à la guerre, & qui estime plus ceux qui font profession des armes, & leur porte plus de respect, qu'à ceux qui suivent les lettres, veu que le seul besoin qu'il a des gens de lettres fait qu'il les honore. Il redoute fort la noblesse, qui a beaucoup de pouuoir en tous les lieux où elle demeure, pourueu qu'elle se monstre tousiours digne de ce tiltre. Il ayme ses Roys plus qu'aucun autre peuple de la terre, & l'on peut dire qu'il est plustost plein d'une affection franche en leur endroit, que d'une crainte seruile de leur puissance. Il est propre à toute chose, & peut reüssir en tout ce qu'il entreprend, tant il a l'esprit subtil, & prompt. Vous y voyez peu de gens subiects à s'égarer de leur entendement, mais beaucoup de legers, & peu graues: ce qui leur vient de la franche humeur qu'ils ont, & de leur rondeur naturelle, plustost que de defaut de iugement, & de conduite.

Ce peuple s'adonne à toute sorte de mestiers & d'arts liberaux, & mechaniques: est hazardeux, & plein de courage, va par tout le monde, ou pour le trafic, ou pour la guerre, ayme assez les nouueautez, est curieux, & quelquefois peu secret, dépancier, & desireux de paroistre. Quelquefois il a trop de langage, mais bien souuent on void plustost partir le coup de sa main, que la parole de sa bouche. Chacun y affectionne l'honneur, & mesme on estoit venu iusques là auant l'Edict des Duels, que le moindre homme offensé de parole par quelque autre de mesme estoffe, ne manquoit de l'appeller au combat, pour tirer aussi tost raison de l'offense avec les armes, à l'imitation des Gentils-hommes, & des gens de guerre. Depuis la Paix on s'adonne fort en France à suyure les lettres, pource qu'on void combien les hommes de robbe-longue sont honorez, & se font riches durant ce calme. Tellement que beaucoup de gens mesme de basse condition, mettent leurs enfans aux estudes, pour essayer d'en faire des puiots de leur maison, & des arcs-boutans du Palais. Mais il y en a maintenant si grand nombre que les vns font mourir de faim les autres, & le plus heureux l'emporte sur son compagnon, plustost que le plus sçauant, veu qu'il n'est pas besoing au iourd'huy dans les Cours où la iustice se tient, d'estre plein de bonnes lettres, mais seulement d'estre bien instruit aux formalitez de iustice, entendre la routine du Palais, auoir cognoissance des ordonnances, & pour le dire en vn mot, auoir bien la pratique dans l'esprit, sans se foucher de la speculatiue. De sorte que c'est presque folie aux peres de faire longuement estudier leurs enfans, qui feront plus de profit demeurans vn an chez vn Procureur avec quelque bribe de Latin, qu'ils auront dedans l'esprit, que s'ils en demeuroient dix à voir les bons liurés. Toutesfois les Cours de Parlement, & autres Sieges ne laissent d'auoir des hommes pleins de toute sorte de doctrine, comme on void par leurs plaidoyers & leurs autres œuures.

14. Quant à la noblesse i'estime que la terre n'en porte point de plus vaillante, ny de plus gentille, & la courtoisie est tellement nee avec les Gentils-hommes que c'est vn prodige d'en voir vn mal-gratieux, & peu honneste. Et de fait les estrangers viennent apprendre en France toute sorte de gentillesse, & n'estiment pas estre bien ciuilisez s'ils n'y ont fait vn voyage. La noblesse se plaist extrêmement à la chasse, & s'adonne à tirer des armes, à monter à cheual, & à toute sorte de gentils exercices, comme aussi à l'entretien des Dames, qui sont aussi parfaites qu'on en sçauroit trouuer en pais du monde. Et ceste liberté qu'elles ont en France de voir, & d'estre veuës, au lieu de les pousser au mespris de leur honneur, les porte plustost à la conseruation, & au mespris du desir qui arriue ordinairement à celles qui sont resserrees, en qui la contrainte, & la seruitude font naistre vne plus ardante passion de contreuenir à ceste deffence. Elle est bien si courageuse, que ie tiens pour assuré qu'une armee toute composee de Gentils-hommes François seroit inuincible, & capable de donner de

ner de la terreur à tout le monde, & de se rendre victorieuse en toutes ses entreprises. Elle conferue fort son autorité sur le temple; de sorte qu'un gentil-homme seul dans un bourg ou dans un village, dont il ne sera pas Seigneur, fera feschir ordinairement tout le reste.

Les visites sont frequentes entre les Gentils-hommes, dont l'un n'est pas plustost attaqué par un homme d'autre condition, que tous s'assemblent pour faire repentir celui qui se veut prendre à un de leur qualité, & si deux gentils-hommes ont querelle ensemble, tous les autres du voisinage s'essayent de faire que leur debat ne passe pas plus auant, s'ils en sont aduertis d'assez bonne heure.

Ils se plaisent volontiers aux lettres, non pour en tirer du gaing, comme ceux d'autre condition, mais pour occuper leur gentil esprit, & pource qu'ils tiennent que le sçauoir n'est pas un des moindres ornements d'une personne bien-nee. Toutesfois ils sçayent bien souvent d'en faire parade, & ne veulent pas desployer ce qu'ils sçauent qu'entre les amis. Mais sur tout ils recherchent de bien dire, & font tout ce qui leur est possible pour acquerir ceste partie, dont ils pensent jetter de la gloire; aussi bien qu'ils la tiennent pour un vray moyen d'auoir quelque part aux bonnes graces des Dames.

Ceux qui demeurent ordinairement à la Cour sont tenus pour plus polis que les autres qui ne bougent de leur pais. Mais ie puis dire qu'il y en a de si bien nez, que sans auoir pratiqué la Cour, ils ne doiuent rien en gentillesse à ceux qui la hantent. Et cela vient de ce qu'il y a force bonne compagnie en chaque pais, ou ceux qui font leur profit des choses qu'ils voyent se peuuent dresser, veu que parmy ces compagnies il y en a tousiours quelques-uns qui ont veu la Cour, & qui sçauent de quelle façon il faut viure, & ce sont pour la plus part du temps ceux aux actions desquels les autres s'arrestent. Auioird'huy la meilleure partie de la noblesse, au moins celle qui est plus galante, ou mieux accommodée dans une Prouince, vient trouuer le Roy pour y demeurer une partie de l'année, & mesme il y en a beaucoup qui ne bougent iamais de sa suite : tellement que la Cour est presque tousiours fort grosse.

Les ordinaires occupations des Courtisans, outre les exercices de monter à cheual, de danser, & de tirer des armes, auxquels les plus ieunes s'amusent, sont, la course de la bague, ou le plaissant exercice de rompre contre le Faquin, ou de combattre au Carneual à la Barriere. Le ieu n'est pas aussi un de leurs moindres diuertissemens: & ce qui emporte une bonne partie de leur temps, c'est l'amour, & la veue des Dames. Mais ils employent la meilleure partie à la suite du Roy en quelque lieu qu'il aille, soit à la chasse, ou ailleurs, de sorte qu'il sera tousiours extrêmement bien accompagné encore qu'il parte à l'improiuste.

Le Roy de France est tousiours plus familier, & se laisse voir plus franchement que Prince qui soit au monde. Car le François est de tel naturel qu'il n'est pas à son aise quand il n'a la permission de voir son Prince, & si quelqu'un en reçoit le moindre bon visage il estime plus cela que tous les biens qu'un autre luy pourroit faire.

Que si la France a eu par le passé des Roys gracieux, & affables, elle se peut vanter auioird'huy d'en auoir un qui sans aucun rabais de son rang preste plus l'oreille à tout le monde que Monarque qu'on ait iamais veu, & mesnage tellement ses actions, qu'en assurant les plus timides, & plus esperdus avec sa douceur, il imprime la crainte & le respect en l'ame des plus hardis avec un esclat de Majesté qui reluit ordinairement sur sa face.

Il n'y a personne qui l'égale en tout le reste, & c'est chose asseurée qu'il efface la gloire de tous les Roys qui furent iamais au monde, qui doit donner de l'admiration à ceux qui viennent: & que ce sera le plus parfait modèle que les Roys des siècles à venir pourront auoir pour se rendre accomplis en toutes choses, sans qu'ils puissent toutesfois iamais paruenir à la perfection de ce Prince inimitable.

RICHESSES DE LA FRANCE.

CE ne seroit iamais fait de vouloir esplucher par le menu les richesses de la France, pour ce qu'il n'y a presque petit coing de pais où l'on ne trouue du bien à foison. C'est pour-¹⁵⁶ quoy i'en quitteray les moindres particularitez, pour parler seulement des pais où ceste richesse est plus considerable, & d'où l'argent peut arriuer à la France. Je commenceray donc par Paris, & vous diray que ceste ville attire à soy la meilleure partie de l'argent de France, & que si l'on veut faire compte des Seigneurs qui s'y tiennent ordinairement, des Officiers du Parlement qui sont pleins de biens, des Aduocats, & Procureurs qui ont pour la plus part leurs maisons pleines de la substance d'un million de personnes, de ceux de la Chambre

nes de fer, d'acier, & force gens qui le mettent en œuvre, & qui en tirent argent de tous coitez.

Le Limosin a grande quantité de toiles, qu'il portent hors du Royaume, & sur tout la ville de Limoges, quoy qu'esloignée de la mer & de toute rivièrè, est vne des plus marchandes de France. Car elle a des ouuriers si spirituels qu'ils font des besongnes plus delicates que gens qui soient en France, & ces besongnes sont portées aux pais estrangers aussi bien que les ouvrages d'émail qu'on y fait, qui sont beaux, & recherchez au possible. Ceux de Tulle tirent vn grand profit des huyles de noix qu'ils ont en abondance.

Quant à l'Auvergne elle enuoye dehors ses fromages en grande quantité, ses draps velus, camelots, & tapisseries, dont elle tire de grandes sommes de deniers, de mesme que de son saffran, & ses mulets qui vont en Italie, & en Espagne.

La Bourgogne enuoye ses bleds en Espagne, & en Italie, & en tire vn fort grand argent.

Lyon est vne des plus marchandes villes de France, tellement que toute l'Italie, & partie de l'Espagne qui est du destroit de Gibraltar en tirant à la mer Mediterranée y vient répondre. Et mesme il faut par Edict du Roy que les soyes, & semblables marchandises y passent, & soient veuës à la Doane: toutes fois le commerce, & le gain n'y est pas si grand qu'autres fois, pource que les vaisseaux choisissent plustost le chemin de la mer Océane. Il y a aussi des Banquiers qui ont de la correspondance non seulement en l'Europe, mais encor en l'Asie, & en Afrique.

Le Forests enuoye ses ouvrages de fer & d'acier presque par tout le monde, principalement la ville de Saint Estienne, où il y a des ouuriers en grand nombre, qui travaillent aussi delicatement qu'aucuns autres qui soient en France. Et il y a beaucoup de marchands de ce pais fort riches, & bien logez hors de France.

Le Dauphiné tire force deniers du bled qu'il enuoye en Espagne & en Italie. Ceux des montagnes se rendent aussi riches par le moyen des mulets, des chevaux, & d'autres bestes qu'ils vont vendre en Piedmont, & en Italie. Ils ont aussi leurs chamois qui leur portent de l'argent.

Le Languedoc a ses pastels qu'il enuoye au loing, & ces pastels viennent principalement en la Comté de Lauraguez, & en la plaine de Montpellier. Ce seul trafic est capable de rendre riche ceste Prouince, tant ceste plante est recherchée de tous les endroits de l'Europe, & d'ailleurs pour la teinture, tant il y en a grande abondance en ce pais. L'Albigeois fait de grâds deniers de son saffran: vne bonne partie du Languedoc s'enrichit par le moyen de ses huyles d'oliue.

Ceux qui sont autour de Florençac, & de Pomerols, & ceux de Lauraguez aussi tirent de grandes sommes de bleds qu'ils enuoyent en Espagne. Ceux de Montpellier s'enrichissent par le moyen des drogues, compositions & eaux qu'ils font, & enuoyent hors de France, comme estans plus excellentes qu'aucunes autres. Ceux d'autour de Montignac font vn grand argent de leurs laines.

Ceux de Frontignac, & de Cantaperdris se font riches par le moyen de leurs vins Muscats, & des raisins confits qu'ils enuoyent par toute l'Europe. Le Viarez tire assez d'argent de ses aïx & foliues de sapin, qu'on va vendre hors du Royaume: Le Velay de force ouvrages de laine, comme bonnets, bas, chausses, & choses semblables, & encor des Camayeux qui se font au Puy. Pécasis aussi ses sels qu'il enuoye en Suisse, & ailleurs hors du Royaume, & en tire vn profit inestimable.

Quant à la Prouence, elle enuoye hors du Royaume ses bleds qui viennent en abondance en la Camarque, & aux plaines de Saint Chamar, de Miramas, Senas & Malemort iusques à Ourgon, & Ardage, & encor ailleurs. Elle a aussi ses citrons, oranges, raisins confits, figues seiches, grenades, huyles, & lieges, dont elle tire beaucoup d'argent des estrangers. Et ceste Prouence est pleine d'argent à cause de l'ordinaire trafic de ceux qui l'habitent, & de ses ports de mer, où beaucoup de marchands estrangers abordent.

Le Foix fait vn grand trafic de son fer, & tire aussi de grands deniers de son bestail, & de mesme que tout le reste des pais qui sont pres des monts Pyrenees. Il ne fait pas moins de profit de la raisine, tourmentine, poix, encens & liege. L'Armagnac n'en tire pas moins de son miel, & de sa cire.

Quant à ceux du Parlement de Bordeaux, ceux d'Albret font hors du Royaume grand trafic de leur liege, poix & raisine. Toute la Gascogne principalement le Bordelois, tire grand argent de ses vins, qui sont vendus aux Pais-bas, & en Angleterre. Bayonne n'en tire pas moins de la quantité de cidres. Et pour conclusion, la Gascogne est riche, à cause du grand abord des marchands Espagnols, Anglois, & Flamans qui y abordent.

Nous auons espluché le plus particulièrement qu'il nous a esté possible les richesses que la France reçoit des Prouinces estrangeres, & auons discouru par le menu des moyens qu'elle a de tirer argent de ce qui est recherché des nations voisines ou esloignées.

Or encor qu'on ayt accoustumé de venir des choses generales aux particulieres, i'ay suivuy toutesfois icy vn ordre contraire, afin qu'apres qu'on aura veu les choses dont ce Royaume surabonde, & qu'il peut fournir aux autres, on voye apres plus aisément qu'il y a moyen de se passer de tous ses voisins, & que ses voisins sont contrains de le rechercher, & d'y mendiér leurs necessitez, qu'apres auoir remarqué ce dont il se passe, ie puis plus facilement imprimer la creance de l'heur du pais au discours general, auquel ie m'appreste, & auquel ie desire monstrier non seulement en gros la richesse du Royaume, mais encor les deniers qui viennent à la Couronne.

Tout le terroir de France, de quelque sorte qu'il soit, est vtile à quelque chose, & aux lieux où le vin ne vient pas il y a du bled, & où le bled ne croist pas il y a des chataignes & des pasturages. Somme il n'y a rien qui ne serue au lieu que si nous considerons l'Italie, l'Apennin tiét presque vn quart de l'Italie, & tout ce qu'il occupe est pour la pluspart aspre, & de nul rapport, & en Espagne il y a vn grand pais plein de landes inutiles. Les montagnes d'Auvergne ont beaucoup de bonnes terres, & beaucoup de lieux riches, pleins de fructs, abondans en bestail, & d'où l'on tire force chairs, beurres, & fromages, de mesme que des montagnes de Viarez, Velay, Geuaudan, des Seuenes, de Dauphiné, Forests, & Prouence. Le reste s'estend presque tout en spacieuses campagnes pleines de bleds, ou bien à de petites colines bien fertiles, & chargees, & des vallees couuertes d'herbe propre à la nourriture du bestail.

On diroit que l'abondance va par tout à l'enuy avec la diuersité, & le profit avec la beauté des contrees. Et ce Royaume a aussi ceste particularité, que toutes ses Prouinces peuuent aisément s'entre communiquer toutes leurs denrees, & tous leurs fructs par le moyen d'un grand nombre de riuieres nauigables qu'on y trouue, veu qu'on compte seulement au pais d'Anjou quarante riuieres grandes ou petites.

C'est pourquoy la feuë Royne mere Catherine de Medicis disoit qu'il y auoit plus de riuieres nauigables en France, qu'en tout le reste de l'Europe. En quoy elle ne s'esloignoit gueres de la verité.

La fertilité du terroir, & la commodité que les riuieres donnent à la conduite des denrees, est cause de la multitude & beauté des villes & places de France, dont la pluspart sont assises sur leurs riuages. Et quoy que la France ne manque pas de bons ports, & en grand nombre, toutesfois ses plus grandes villes ne sont sur le bord de la mer, ce qui monstre que leur grandeur ne vient pas de dehors, mais cōme domestique. Car les villes maritimes sont plus grandes que celles qui sont auant dans le pais, lors qu'elles reçoient plus de profit & de soustien de la mer que de la terre, ainsi que nous voyons en la ville de Genes, Venise, & Ragouse. Mais aux lieux dont la grandeur ne depend essentiellement que de la terre, les villes qui sont dans le pais sont plus grandes que les maritimes, comme nous pouuons apperceuoir en la ville de Milan, aux autres places de Lombardie, comme aussi en Allemagne, & Hongrie.

Et pource que tous les pais de France sont riches, & la commodité des riuieres est generale, delà vient, qu'excepté Paris (dont la grandeur procede de la demeure des Roys, du Parlement, & del'Vniuersité, accompagnée du voisinage des riuieres) toutes les villes & places de France sont pour la pluspart de moyenne grandeur, ou petites, mais belles, commodes, & fort peuplées.

Bodin escrit, qu'en vn denombrement qui fut fait au temps du Roy Henry II. auquel toutesfois la Bourgogne ne fut pas comprise, on comprà 27. mille lieux peuplez qui auoient clocher. Or de mesme que les villes de France sont fauorisees de plusieurs riuieres, aussi les chasteaux & maisons des Gentils-hommes particuliers ont force estangs & lacs qui en sont proches. Et quoy qu'il n'y ait pas en France des lacs esgaux en grandeur à ceux d'Italie ou de Suisse, toutesfois ceux que l'on y void sont pleins de fort bon poisson, & suppleent le defaut de leur grandeur par la multitude.

On peut dire de mesme des bois, qui n'estans pas de grande estendue, y sont en grand nombre. Et c'estoit delà que les Roys tiroient beaucoup de profit jadis, à cause du grand nombre des forests de leur domaine, & les Gentils-hommes en tirent auourd'huy force argent, vendant la coupe de leurs bois, non seulement pour brusler, mais encores pour bastir. Il y a au reste plusieurs choses qui attirent l'argent estranger en France, mais particulièrement le bled qu'on en tire pour l'Espagne, & le Portugal, & quelquesfois pour l'Italie, le sel que les nations voisines y prennent, principalement à Berte en Prouence, à Peccays en Languedoc,

Languedoc, & à Broilage, où il semble que la vertu que le Soleil a de transformer l'eau de la mer en sel, s'arreste sans passer plus outre vers le Nort. Il se trouue biē d'autre tel ailleurs, comme du sel de fontaine en Lorraine, & de fontaine & de mine en diuers lieux de Polongne, d'Angleterre & d'Allemagne, mais tout ce sel ne vaut gueres, nō plus que ce luy de mine que l'on trouue en Suede. Il y a encores la chanvre, & la toile dont l'importance est incroyable, & celui seul en peut iuger qui sçait la grande quantité que l'on tire pour les flotes de Seuille, & de Lisbonne, & pour tant de voiles & de cordages qu'on fait du chanvre de France. Il y a pareillement les vins qu'on y vient querir d'Angleterre & des Pais-bas, & d'où l'on tire tant d'argent toutes les annees, que le calcul en seroit long si on le vouloit entreprendre, tant ces strangers prennent de vin de tous costez en ce Royaume.

Il faut adjoüster à ce que dessus le pastel, & le saffran, & autres choses de moindre importance, qui estant toutes mises ensemble, font vne assez grande somme pour enrichir vn Royaume. Et l'importance du fait est, que les nations voisines ne se peuuent passer de toutes ces choses. Et quoy qu'il y ayt quelques fois eu de fort estroites deffences de n'enuoyer riē hors du Royaume, toutes fois on n'a laissé enfin de le faire avec permission, pource que le profit qui en vient, est pour le moins de 15. & de 20. pour cent. Et mesme du temps que la France auoit guerre avec le Roy d'Espagne, le trafic ne cessoit pas avec les Espagnols, pour la necessité qu'ils auoient de viures, & le gain qu'ils apportoit. Tellement qu'il ne se faut pas estonner si durant les guerres passees, non seulement en Italie, mais dans le Royaume, les soldats receuoient tout leur payement en reales, escus & doublons d'Espagne.

Quant au reuenue des Roys de France, outre le domaine qui estoit presque tout engagé 16. par le passé, & qui se rachete maintenant peu à peu, & sera dans peu d'annees hors des mains de ceux qui le tiennent, ce qu'on tire de toutes les prouinces monte à de fort grandes sommes. Au temps que l'argent estoit plus rare qu'il n'est à present nos Roys en receuoient moins, comme il estoit raisonnable.

Louys 12. ne tiroit du Royaume qu'environ vn million & demy d'or annuellement. François premier en tira iusques à trois millions. Henry second vint iusques à six, Charles 9. iusques à sept. Henry trois passa mesme dix millions.

Louys 12. laissa le Royaume plein d'or & d'argent, & fut à ceste occasion appelé pere du peuple.

Le Roy François premier, quoy qu'il eust de fort grosses guerres, & de grande depence sur les bras, laissa toutes fois huit cens mille escus de son espagne. Mais Henry second laissa beaucoup de millions d'or de debtes à ses enfans : à raisons de quoy Charles 9. & Henry 3. ses fils furent contraincts de charger non seulement le peuple, mais le Clergé, de grosses impositions. Ce qui fait voir que l'on ne doit pas estimer les Roys riches quand ils ont beaucoup de reuenus, mais quant ils le sçauent bien manier, puis que le Roy François premier fit avec moins de reuenue, de plus grandes guerres, & laissa de l'argent comptant à ses enfans, & au contraire Henry second n'eut pas de si grandes guerres, & n'entretint pas ses armées si long temps, & toutes fois il laissa des debtes à ses fils, & de la misere au Royaume.

Quant à nostre temps, l'on ne sçauoit faire le denombrement de tout ce que le Roy tire de ses Tailles, de ses Doüanes, de ses parties Casuelles, du Clergé & choses semblables, pour 17. ce que les Tailles ne sont pas tousiours de mesme somme, ains sont imposees selon les occurrences, & combien que les ordinaires fussent assurees, & marchassent tousiours d'un mesme pas, toutes fois les extraordinaires seroient tousiours incertaines. Puis le nombre des partis est si grand, & en plusieurs choses si secret, que la recherche en seroit non seulement ennuyeuse, mais imparfaite. Toutes fois pour satisfaire aux curieux, j'ay voulu faire voir à quoy se monte la taille ordinaire d'une annee, afin qu'on iuge du reste de ce que nos Roys recoiuent de leur Royaume toutes les annees.

EXTRAIT FAIT SVR LE BREVET DES TAILLES DE L'ANNEE 1609. des sommes de deniers qui se sont leuees durant icelle, pour l'ordinaire de la Taille, & Creüe y iointes, & pour les payemens des Officiers : le tout particulièrement en chacune des generalitez cy-apres nommees.

PREMIEREMENT.

LA GENERALITE' DE PARIS.

Pour la taille,

Pour le payement des gages des Officiers,

769000. liures

147000. lva.

H

LA GENERALITE' DE SOISSONS.

Pour le principal de la taille,
Pour les gages d'Officiers,

362465. liu. 18. fol 10. den.
3624. liu. 18. fol 10. den.

CHAALONS.

Pour le principal de la taille.
Pour les gages des Officiers.

473000. liu.
72000. liu.

AMIENS.

Pour toute la taille,
Pour les gages des Officiers,

[:] 263000. liu.
36000. liu.

ROVEN.

Pour toute la taille.
Pour les gages d'Officiers,

vn million, 72000. liu.
4000. liu.

CAEN.

Pour la taille,
Pour les gages des Officiers,

(:) 638280. liu.
9720. liu.

ORLEANS.

Pour la taille,
Pour les gages des Officiers,

(:) 537500. liu.
70500. liu.

TOURS.

Pour la taille,
Pour les gages des Officiers,

(:) 929000. liu.
102000. liu.

BOVRGES.

Pour la taille,
Pour les gages des Officiers.

[:] 360740. liu.
4960. liu.

MOVLINS.

Pour la taille,
Pour les gages des Officiers

423993. liu. 10. f.
66406. liu. 10. f.

POICTIERS.

Pour la taille,
Pour les gages des Officiers,

[:] 670000. liu.
75000. liu.

RION.

Pour la taille,
Pour les gages des Officiers,

(:) 656000. liu.
9000. liu.

LYON.

Pour la taille,
Pour les gages des Officiers,

[:] 865000. liu. 10. f.
45000. liu.

BORDEAUX.

Pour la taille,
Pour les gages des Officiers,

623036. liu. 7. f.
40663. liu. 13. f.

LANGVEDOC THOUVLOUSE ET MONTPELLIER.

Pour tout ce qui s'y leue,

751517. 4. f. 3. den.

DAUPHINE.

Pour l'octroy ordinaire compris le Taillard,
Et outre pour subuenir aux affaires dudit pais,
Pour le taillon.

[:] 10160. liu.
30000. liu.
(:) 27513. liu.

Somme,

77673. liu.

PROVENCE.

Ce qui se leue se monte à la somme de

86463. liu.

BOVRGONGNE ET BRESSE.

Le droit que le Roy a monte,
Pour les gages des Officiers,

168250. liu.
9445. liu.

BRETAGNE.

Il y a d'imposé.

(:) 380460. liu.

LIMOGES.

Pour la taille & creuës y ioinctes, la somme de
Pour les gages des Officiers,

[] 670000. liu.
75000. liu.

LES

LES FORCES DE FRANCE.

LE Royaume de France, comme celuy qui est au milieu de la Chrestienté est plus com-
modé qu'aucun autre, pour vnir & diuiser les forces des plus grands Princes de l'Eu-
rope, pource qu'il a deuant soy l'Italie, derriere soy l'Angleterre, l'Espagne à main droicte,
l'Allemagne à la gauche, les Suisses d'un costé, & les Flamans de l'autre; & outre cela il est
entre deux mers, c'est à sçauoir la Mediterranee & l'Oceane. A raison dequoy il peut aisé-
ment favoriser & troubler par mer & par terre, toutes les entreprises & tous les desseins des
Princes & Potentats de l'Europe, au moins de ceux qui luy sont voisins: & quant à luy il est
asseuré de tous costez, & par nature, & par art, pource qu'il est deffendu par les Alpes, &
les Pyrenees de l'Espagne & de l'Italie, par la mer del'Angleterre, & des Royaumes plus
esloignez: par des fleuves de l'Allemagne & de la Flandre, & en tous les pais plus im-
portans des frontieres il y a des places fortes, & grande quantité d'armes, de canons, &
autres choses propres à la guerre, & par tout de bons Chefs, & bons hommes de guerre
pour conduire toute chose comme il sera necessaire. Et quant à la propre deffence, on ne
trouue pas depuis que la France est Royaume, qu'elle ayt esté vaincue par aucune autre na-
tion, si ce n'est par les Anglois, qui par vne longue & continuelle guerre en occuperent vne
grande partie. Mais outre ce que leur victoire vint de la diuision des François qui assistoient
les Roys d'Angleterre, elle ne fut pas de longue duree, veu que non seulement ils furent dé-
pouillez de la partie du Royaume dont ils s'estoient rendus maistres de viue-force, mais
encor de la Normandie, & de la Guyenne, ancien patrimoine des Roys d'Angleterre, qui
vint à nos Roys par forfaiture. Et ce qui rend la France plus forte aujourd'huy que iamais,
c'est que jadis tous les Princes voisins pouuoient entreprendre sur ce Royaume à cause qu'il
y auoit tousiours vn Duc de Bretagne, vn Duc de Guyenne, vn de Normandie, de Bour-
gogne ou de Bourbon, qui leur donnoit passage, & les receuoit, comme quand les Anglois
auoient quelque dessein le Duc de Bretagne leur donnoit entrée, où ils venoient aborder
en Normandie. Mais maintenant que la Bretagne, la Guyenne, la Normandie & la Bour-
gogne sont au Roy de France, il a peu à craindre, sinon qu'on vueille apprehender quelque
orage du costé de la Franche-Comté de Bourgogne. Ce qui rend encor la France forte,
c'est que les Estats des grandes maisons de France ne se diuisent pas tant par le menu qu'on
fait en Allemagne, & en beaucoup de lieux d'Italie, ains la meilleure partie paruiuent aux ais-
nez, qui sont les vrais heritiers, & les autres freres demeurent avec vn petit partage, telle-
ment que pour paruenir à quelque rang, & à des moyens qui les puissent releuer selon la
maison & la qualité en laquelle ils sont nez, ils se mettent à suiure les armes, & s'essayent de
s'y rendre excellents, & les simples Gentils-hommes voyans aussi la porte de l'honneur ou-
uerte pour eux, taschent de faire le mieux qu'il leur est possible aux occasions, afin d'estre
reconneus & recompensez de quelque charge. Et delà vient que la France a tousiours eu de
si grands hommes de guerre.

La France a deux sortes de gens de guerre, c'est à sçauoir de mer & de terre. Quant aux
gens de guerre de mer, on n'en peut dire grande chose, pour ce que le deffaut d'un grand
nombre de vaisseaux, & d'hommes de rame, & de commandement, n'a iamais laissé mettre
ensemble vne si grande puissance, qu'elle fust capable de quelque entreprise offensive signa-
lee, & pour ceste cause, le Roy François fut d'auis de se seruir des Turcs sur la mer. Il est vray
qu'il n'a iamais esté besoing de secours estranger, pour deffendre le Royaume, pource qu'en
la mer Oceane on a peu auoir ensemble iusques à deux cents vaisseaux à voile, & en la mer
de Prouence on a jadis armé iusques à quarante galeres qui sont reduites maintenant
à plus petit nombre, & ces galeres ont mesmement seruy quelquesfois en la mer
Oceane, mais plus pour passer des gens en Escosse, que pour donner de la jalousie à
quelque Prince, ou pour autre effect. Mais le nerf principal de la milice Françoisé consiste
aux gens de terre, & plus en la caualerie qu'en l'Infanterie, pour ce que la commodité qu'on
a des Allemands, & des Suisses, & le peu de plaisir qu'on prend à voir les armes en la main
du menu peuple du Royaume, a mis en plus grande reputation la caualerie, qui estoit autre-
fois toute de Gentils-hommes, & par consequent fort vaillante, mais il y a maintenant vn
meflange de toute sorte de personnes, dont les vnes sont payées, & les autres sont obligées
d'aller à la guerre à leurs dépens. La gendarmerie qui est d'obligation, est communément
appelée l'arriere-ban, qui n'est autre chose que la Noblesse obligée à seruir le Roy en per-
sonne avec tant de cheuaux, selon la qualité des fiefs, comme le Roy la pratiqua en la dernie-
re guerre de Sauoye. Et pource qu'il y a beaucoup de Gentils-hommes, ceste caualerie est en
grand nombre. Les compagnies de gens-d'armes sont les vnes de cent, les autres de 50. Cel-
les de cent sont conduites & commandées ordinairement par quelques Princes, ou par le
Connestable, ou par les Mareschaux de France. Aujourd'huy que la paix est, il y a fort peu
de compagnies de gens de cheual entretenues.

19. La compagnie des cheuaux legers du Roy , avec sa compagnie de gens-d'armes.
 La compagnie de gens-d'armes de la Roïne.
 La compagnie de Monseigneur le Duc d'Anjou.
 Celle de Monseigneur le Prince de Condé.
 Celle de Monseigneur le Duc de Vendosme.
 Celle de Monseigneur le Cheualier de Vendosme.
 Celle de Monseigneur le Marquis de Verneuil.
 Celle de Monseigneur le Connestable.
 Celle de Monseigneur le grand Escuyer.

Voila toutes les compagnies de gens cheual qu'on entretient à present en France.

Mais si quelque guerre arriuoit , on verroit aussi-tost fondre vn si grand nombre de caualerie sur les ennemis , qu'elle seroit capable de les estonner , & de les rompre. Car toute la Noblesse s'exerce maintenant plus que iamais à monter à cheual , & à tous exercices qui rendent vn homme de cheual plus plein de disposition à combattre. Et quant à ceux du tiers Estat , il y en a plusieurs qui ont esté aux guerres passées , qui se plaisent encor à entretenir de bons cheuaux , & vn grand nombre de ieunes hommes riches & courageux , nez à la guerre , qui monteroient à cheual avec allegresse s'ils oyoient sonner la trompette.

20. Quant à l'Infanterie , encor que les Gascons & ceux qui approchent de l'Espagne soient estimez les meilleurs fantassins de tous , comme plus propres à supporter la peine , & les incommoditez de la guerre , & tenans beaucoup de l'Espagnol , & qu'on puisse tirer de ceux-cy iusqu'au nombre de huit à neuf mille : & combien aussi que ceux du Viarez , & des montagnes de Dauphiné ne doiuent rien aux Gascons en toutes choses , au iugement de ceux qui les cognoissent , & qu'ils puissent ensemble faire vn plus grand nombre que les Gascons , toutesfois on auroit beaucoup de milliers de gens de pied en tous les autres endroits du Royaume , qui seroient bons hommes , comme ceux qui ont eu longuement la guerre , mesme outre ceux-là , presque tous ceux qui naissent en France ont tant de courage , qu'il est bien aisé de trouuer grand nombre de soldats aguerris , au moins resolu à toute entreprise.

Les Roys de France ne se seruoient gueres anciennement d'Infanterie , de peur de quelque reuolte : & combien que Charles huitiesme cognoissant la necessité des gens de pied , ordonna l'entretien de 5000. hommes de pied François , & le Roy François voulut apres qu'il y en eust iusques à cinquante mille , toutesfois cela s'éuanoüy bien-tost , & fut rompu par la deliberation des Estats du Royaume , afin que le peuple desarmé peut estre bridé par les Magistrats , & ne laissast les arts auxquels il s'exerce , & le labourage de la terre , au grand preiudice d'vn chacun , & afin aussi qu'il ne deuint en temps de paix subiect à exercer des voleries , & ne mist de la confusion au Royaume. Mais toutes ces deliberations des Estats n'auroient point de lieu , quand le Roy se resoudroit au contraire.

Louys lecond fut le premier qui pour pouuoir faire passer tout ce qu'il vouloit tint le peuple desarmé , & leua des Suisses , au lieu des François : chose qui a esté fauie de ses successeurs. Mais celuy s'abuse grandement qui pense que son peuple doit estre lasche & foible , s'il leue des gens de guerre estrangers. Car la hardiesse s'acquiert avec l'experience des armes , & les dangers de la guerre , & ceste experience sera commune dans le Royaume aux soldats , & au peuple , si ceux-là deuiennent bons guerriers , pour la profession de soldat qu'ils font , ceux-cy le seront pour la necessité de se deffendre. Et de mesme que la hantise des bons fait les hommes bons , de mesme aussi la frequentation des soldats aguerrit le peuple. Outre ce beaucoup de factions ne peuuent estre commises aux estrangers , pource que la pratique des lieux leur manque , & aussi pource qu'il y a beaucoup d'entreprises qui sont de trop grande importance pour les fier à des personnes qui ne sont pas du Royaume. Tellement qu'il est necessaire que les peuples , aux pais desquels la guerre se fait , deuiennent guerriers en partie par necessité , pour le besoing qu'en a le Prince , en partie par la veüe & pratique des choses qui cōcernent la guerre , qui leur passent à toutes heures par les mains , cōme il est arriué à la France aux dernieres guerres , où elle s'est veüe dans vn rié plaine de soldats.

Aujourd'huy il y a fort peu d'hommes de pied entretenus ordinairement en France , & qui seroient toutesfois vne des plus grandes forces d'vne armee. Et voicy le denombrement.

Les quatre compagnies des Gardes du corps , qui ont pour leurs Capitaines Messieurs de Vitry , le Comte de Tresmes , & Pralin.

Le Regiment des Gardes qui doit estre composé de 20. compagnies , & a pour son Maistre de Camp Monsieur de Crequy.

Le Regiment de Piedmont qui doit estre aussi de 20 compagnies.

Le Regiment de Picardie qui doit estre de 20. compagnies , & a pour Maistre de Camp

Camp Monsieur de Ramburre.

Le Regiment de Nauarre qui doit estre de 20. Compagnies.

Le Regiment de Champagne, qui doit estre de 20. Compagnies.

Outre ce il y a le Regiment des Suisses, & les cent Suisses des gardes du corps.

Du premier Monsieur de Bassompierre est Colonel: & le Duc de Bouillon Comte de la Mark Colonel desdits cens Suisses.

Mais si le Roy auoit besoing de gens il y a encor plus de quatre mille soldats fort aguerris, qui sont entretenus aux Prouinces estrangeres, qui ne manqueroient de venir trouuer au moindre bruit de guerre.

Et quant au nombre des gens experimentez qu'il pourroit leuer, & qui ne sont pas entretenus, on n'en scauroit faire le compte, pource que la France ne fait presque que reprendre son haleine, & a encor vne infinité d'hommes qui n'ont pas les bras plus engourdis, ny le cœur plus lasche qu'aux guerres dernieres, où ils se sont trouuez, veu que le François a cela de particulier qu'il s'entretient tousiours au desir de l'honneur, & ne pense pas, comme il est vray, qu'il y en ayt aucun plus esleué que celui qu'on acquiert avec les armes.

Aureste il y a telle abondance de viures en France, qu'elle peut nourrir quelque armee que cesoit, & les viures peuuent estre conduits d'un lieu à l'autre fort facilement, à cause de la commodité des riuieres. C'est pourquoy lors que l'Empereur Charles le Quint entra en France par la Prouence, & puis par la Champagne, elle nourrissoit outre les garnisons plus de cent cinquante mille soldats, & de nostre temps sous Charles IX. on y trouua 20000. cheuaux, & 30000. hommes de pied tous estrangers, & quinze mille cheuaux, & cent mille hommes de pied François, sans routesois que la cherté fust par le Royaume. Et les Roys entretenoient anciennement 3500. lances & 4500. Archers, & mesme il y auoit quelquesfois quatre mille lances, & six mille Archers payez perpetuellement. Vne lance tiroit vn Archer & demy apres elle, & par consequent vne compagnie de lances vne autre compagnie d'Archers, qui estoient seulement distingues par le moyen du drapeau, qu'on nommoit guidon, veu que tous auoient mesme Capitaine. Tellement que cent lances venoient à faire deux cents cinquante Archers, outre les lances. Tous ces gens de guerre emportoient treize cents mille escus de despence toutes les annees. Car chaque lance tiroit deux cens cinquante escus, chaque Archer quatre vingts, l'Enseigne trois cens, le Lieutenant 480. le Capitaine 820.

Ces gens de guerre furent reduits à leur perfection par Charles huitiesme, qui en determina le nombre, & leur establit leur paye, & les disciplina avec les exercices, les distribuant par les places frontieres sous des Capitaines, Lieutenans, Enseignes & Guidons, & les diuisa en hommes d'armes, & en Archers, leur adjoustant encor des Fourriers, des Thresoriers, des payeurs & des Commissaires, & en donnant la charge au Connestable, aux Mareschaux de France, & aux premiers Seigneurs du Royaume: avec tous ces gens de guerre dont nous auons parlé, les precedents Roys de France non seulement ont peu acquerir vn si grand Estat, & le deffendre de la force de tous les Princes voisins, mais encor se faire sentir en Asie & en Afrique, combattre l'Allemagne & l'Espagne, aller en Italie, & faire trembler tout le monde, pource que les François sont de leur naturel prompts & hardis, & courageux à entreprendre, & du tout inuincibles au commencement. Et cet heureux succez à l'entrée est de si grande consequence, que bien souuent on emporte tout apres cela, & toute perte qui se fait au commencement tire tousiours vne grande & mauuaise queue pour celui qui perd.

A raison dequoy les François sont estimez si forts, si terribles, que c'est chose dangereuse de les assaillir. C'est aussi chose fort difficile d'arrester le cours de ceste premiere fureur, dont la bonne issue leur donne encor plus de courage.

Quant à l'artillerie il y a en France vne chose digne de consideration, qui est qu'on a gardé de reduire toutes les pieces à vne forme commune: ny trop grandes afin qu'elles n'empeeschassent, ny trop petites, afin qu'elles ne fissent trop peu d'effect, mais moyennes, & toutes d'une mesure, afin de seruir en toutes d'une mesme forme de balle, & d'une mesme quantité de poudre, & de mesmes instrumens à les remuer, & conduire, & en user.

Ce qui se trouue extremement vtile tant aux places, qu'aux armees, pource que quand toutes les balles sont bonnes pour toutes pieces, on oste la confusion qui naist à les apprester & fournir, & quand vne piece est gastee on ne laisse pas de se seruir de balle ny du reste, pource que les pieces sont de poids esgal, ou peu different, & là où vne de ces pieces peut aller on y peut conduire les autres.

Le canon de France a de longueur enuiron dix pieds, & son fust enuiron quatorze,

& estant monté sur son fust environ 19. pieds, & sa largeur est qui consideree en l'essieu, est de sept pieds. Il y a encor vn autre chote à considerer au fait de l'artillerie, qui a esté inuenté par l'industrie des François, qui est qu'au lieu où l'on met le feu à la piece, ils mettent vne piece de fer, pource qu'il ne craint par le feu comme la bronze, qui se consume en peu de temps, & lors que le trou est large le coup n'a que bien peu de force, de sorte que la piece demeure inutile, & n'est pas tenuë pour bonne si elle ne sert pour cent, & du moins pour 80. coups en vn iour.

Toutes ces choses adjoustes à la situation naturelle de la France rendent ce Royaume puissant, principalement sous vn si grand Prince, si plein de valeur, de prudence & de preuoyance, & asforty tant d'vn grand nombre d'argent, que de toutes choses necessaires. Car quant à l'offence, ce Royaume a laissé les marques de son pouuoir en beaucoup de Provinces voisines & esloignées.

Et pour parler des choses plus anciennes, les François ont rauagé jadis l'Italie, renuersé presque la grandeur des Romains, & fait beaucoup d'autres exploits en d'autres contrees. Et si nous venons à vn temps moins reculé de nous, Charlemagne fut si puissant avec la force de ce Royaume qu'il subiugua la Saxe & la Baviere, combatit en Espagne contre les Sarasins, destruisit le Royaume des Lombards, conquist la meilleure & plus grande partie de l'Italie, & laissa à sa posterité presque la moitié de l'Europe.

On ne peut rien voir aussi de plus signalé que l'entreprise de Hierusalem, & de la terre Sainte, resoluë en France au Concile de Clermont, & executée par les François à leurs despens particuliers, avec vne si ardante vnion de volonte, & tant de constance, & de vertu, qu'elle a surmonté la gloire de toutes les autres entreprises que l'on a iamais celebré dans les histoires.

La Grece, & l'Asie esprouuerent aussi les armes des François en la conquête de l'Empire de Constantinople.

La Barbarie, & l'Egypte ont esprouuë les armes des François au temps du Roy S. Louys, qui nonobstant qu'il fust pris, eust cet aduantage, que le Roy de Tunes accorda de payer quarante mille ducats de tribut toutes les annees.

Et au mesme temps Charles d'Anjou conquist la Scilice, & le Royaume de Naples, & sa posterité passa en Hongrie, & regna en ceste Prouince plusieurs annees, & depuis au temps de nos peres Charles huitiesme avec vn estrange & merueilleux succez, & cours de victoire, occupa en Italie en peu de temps vn grand pais, qui fut vn commencement pour conuier de nouveau ses successeurs à la conquête de l'Italie, veu que la mesme volonte passa encor au Roy Louys 12. & aux Roys François, & Henry, qui gaignerent de belles victoires, & eussent tout emporté si la fortune eust respondu à leur courage.

Quant à la deffence, outre le grand nombre de gens qui sont en France, qui montoit environ à vingt millions au temps Roy Charles 9. suivant le denombrement qui en fut fait, & les viures & l'artillerie dont elle est fournie à suffisance, & la situation fauorable, il y a tant de places fortes, & de tous costez, qu'il n'y a peut-estre pais où il s'en trouue si grand nombre.

Il y a beaucoup de choses qui ont esté cause de toutes ces forteresses. L'vne est, que lors que le Royaume estoit diuisé en plusieurs principautez, & seigneuries, chacun fortifioit sa frontiere. L'autre que les guerres des Anglois qui furent quelque tēps maistres d'vne bonne partie de la France firent augmenter le nombre des forteresses. L'affiette des places, & la nature des lieux ayde à ceste fortification, & aussi la diligence & inclination du peuple, veu qu'il n'y a peut-estre nation qui ayt plus d'industrie à fortifier que la François, ny qui se soucie moins pour cet effect de la peine & de la despense. Mais afin de considerer les choses plus particulièrement, courons la France afin de voir vne bonne partie de ses meilleures places.

Je ne veux pas parler de Paris qui est du nombre, veu qu'encor qu'il n'eust aucunes murailles, comme aussi veritablement elles sont foibles en beaucoup d'endroits, il y a tant d'habitans que ceste ville ne peut estre prise qu'à faute de viures.

Corbeil se feroit fort au possible, si on ostoit le commandement de deux costaux qui sont des deux costez: mais celuy qui est en tirant au Gastinois vers la Magdeleine ne luy est si nuisible pour estre assez loing, que celuy qui est du costé de Seine venant à Ville-neufue S. George.

La ville de Chartres est aussi assez forte pour arrester le cours d'vne armee, comme on a peu voir durant ces guerres. Et Chasteaudun qui est assis sur vn roc & costau fort esleué, où l'on peut auoir accez bien mal-aisément, est vne ville assez importante & considerable. Aussi fut-ce la forteresse & le chasteau des Dunoys, pour y auoir retraite en temps de guerre,

veu

que les ennemis n'y pouuoient auoir accez que par vn lieu, qui est vers la porte de la Beaulle. Orleans est encor plus considerable que les villes precedentes, comme estant plus fort & de plus grande importance, à cause du passage de la riuere de Loyre. Et le tesmoignage de la forteresse se peut tirer du siege d'Artile Roy des Huns, qui fut arresté tout court deuant Orleans avec son armée victorieuse, & du siege que les Anglois mirent deuant l'an mil quatre cents vingt-huict, au mois d'Octobre qui dura iusques au mois de May, & fut levé par Jeanne la Pucelle.

Gergeau à six lieues d'Orleans, bien qu'il soit petit, a esté toutesfois assez bien fortifié, & est important à cause du pont & du passage de Loire.

Montargis est aussi vne bonne place, mais non si bien fortifiée qu'Orleans, ny de telle consequence.

Chateaulandon est vne ville qui a fait assez de mal durant les guerres passees, & est capable de resister vn peu de temps avec vne moyenne garnison.

La ville de Sens est assise sur la riuere d'Yonne, qui passe au pied du costé de Gastinois, a de fort bons fossez, & de bonnes murailles, & est capable de deffence.

Auxerre est sur le bord de la riuere d'Yonne, & est assez forte place, qui commence en vn vallon, & se hausse iusqu'au sommet du costau, sur lequel elle est bastie, & où est l'ancien Chasteau fortifié de grosses & anciennes murailles, qui seruoit iadis de forteresse, & deffence à tout le pays en temps de guerre.

La ville de Troye en Champagne est aussi forte, & a de bonnes & fortes murailles, avec de bons habitans prets à bien faire aux occasions, aussi bien que ceux d'Auxerre.

Chaumont en Basligny est aussi de toute ancienneté clos de bonnes & fortes murailles, accompagnées de force tours, & de bons fossez, & son donjon se nomme Haute-feuille.

Mais Vitry le Parthois qui a esté rebasty & fortifié du temps du Roy François, comme estant sur la frontiere de Champagne, mais non au lieu ancien, ains en vn village appelé Montcourt, sur vn costau qui est à demie lieue du lieu où estoit auparauant Vitry.

Le Seigneur Hieronyme Marin Boulonnois fut employé pour en faire le dessein, & suivant son plant ceste ville fut mise en l'estat où elle est à ceste heure.

Il y a encor sur la frontiere de Champagne la place de S. Dizier, qui a esté fortifiée à la Reale, depuis qu'elle fut ruinee en l'an 1544.

Montereau qui est bien auant dans le pays a vn chasteau fort, & d'assez grande estendue.

Meaux est assise sur vn mont, ayant la marine au pied du costé de l'Occident, & ceste ville est separee en deux corps, dont l'un se nomme la ville, & l'autre le marché ou fort de la ville, & ces deux lieux sont diuisez par vn ruisseau ou torrent courant sur le roc, & le fossé est fort profond & à fond de cuue, & au dedans de la ville on void le chasteau posé sur vn haut, & qui commande au marché. Il y a de bonnes murailles, mais ceste ville n'est pas fortifiée à la Reale.

Châlons en Champagne n'est pas aussi vne place ny petite, ny de peu d'importance, non plus que Reims sa ville capitale.

Mais si nous venons à la Picardie, nous trouuerons pres de la frontiere des places fortes au possible, comme Laon, la Ferté, Sainct Quentin, Peronne, la Chappelle, Ardres, Ham, Dorlens, Corbie, Amiens, & Abbeuille, & d'autres moins fortifiées, comme Boulogne, Monstruël, Ardres & autres. Soissons est aussi vne place passablement forte & capable de deffence. Beauuais qui est plus auant dans le pays, & plus en tirant vers Paris est bien fortifiée, & soustiendrait vn assez long siege. Mais si nous regardons Calais sur le bord de la mer, selon qu'il est bien fortifié maintenant par feu Monsieur de Vic son gouuerneur avec son Richban, nous trouuerons que ceste ville emporte le prix de la fortification entre toutes celles de Picardie, & quand elle sera acheuée selon le dessein dudit sieur de Vic, i'estime qu'il y aura fort peu à redire, & qu'il y aura aussi fort peu de moyen de l'offencer.

Langres est vne place dont l'assiette est forte ce qui se peut, & les murailles bonnes. Montefclair fut extremement bien fortifiée avec de bons bouleuarts & ramparts par les Roys François I. & Henry II. pource que c'est la premiere place forte qui soit au pouuoir du Roy de France, venant deçà du costé de Lorraine.

Neuers est vne ville bien auant dans le pays, close de bonnes murailles, & entourée d'assez bons fossez, avec vn pont sur Loyre. Ceste place est de bonne deffence, & bien importante pour le passage.

La ville de Bourges est aussi accompagnée de fort bons fossez & bonnes murailles, & est vne des bonnes places de France.

Sancerre assise au haut d'une montagne, a eu de quoy faire teste aux plus opiniastrés: mais la rebellion des Huguenots qui s'y vouloit fortifier pour se preualoir du passage de Loyre,

fut cause que Monsieur le Prince de Condé y estant entré fit demolir ses murailles l'an 1621. Et la ville de la Charité aussi sur Loyre est capable d'arrester d'assez grandes forces.

Yffoudun en Berry est aussi vne place forte, & bien remparee, ayant vn chasteau vn peu plus haut esleué, qui est bien fortifié, & flanqué, & a de fort bons fossez.

Argenton qui est sur les extremités de Berry est bonne ville, ayant vn fort chasteau où il y a dix-bours si grosses, & trois petites.

La Chastre est aussi clos de bonnes murailles, accompagnées de fortes tours, & entourées de profonds fossez.

La ville de Tours est bien fortifiée, & a de bons fossez, & bonnes murailles avec la riuere de Loire qui la borde, & qui la rend place d'importance.

Le chasteau d'Amboise qui est à 7. lieues sur la mesme riuere est aussi tenu pour vne des bonnes places de France.

Sauumur sur la mesme riuere a esté bien fortifié, a de bonnes murailles; mais le chasteau principalement dōneroit beaucoup de peine. Les fortifications ont esté abbatuës par commandement du Roy Louys 13. & les fossez du chasteau comblez pour empescher le dessein des rebelles Huguenots sur ceste place importante, à cause du passage de Loyre, ce fut l'an 1622.

Le chasteau de Loches est aussi fort au possible, estant assis sur vn haut rocher, n'y ayant qu'une seule entree, deffendue d'un gros boulevard, de fortes murailles, & de doubles fossez, qui sont fort profonds & fort larges, & il y a fort peu de moyen de battre ceste place si ce n'est en brisant le rocher, qui a en la circonference en longueur & largeur, de mille à douze cens pas, & de le sapper il est impossible, veu que les contremines y sont desia faites.

Angers est vne bonne & forte ville, dont les fossez sont presque tous à fonde de cuue, & les murailles fortes & bonnes. Mais sur tout le chasteau est vne des meilleures places de France, ayant ses fossez dans le roc, & estant tout fortifié aussi bien qu'il est possible. Et ceste ville est fort importante comme estant sur la riuere de Sarthe, & pres de la riuere de Loire, & Pont de Sé qui est vne lieue loin d'Angers, & sur la riuere de Loire est vne assez bonne place.

La Normandie a plusieurs bonnes places dans le pays, comme Rouen qui est capable de soustenir vn long siege, & qui a iadis arresté de grandes armées.

Bayeux est vne ville assez considerable.

Falaise est tellement assise, qu'encor qu'elle soit posée en vn vallon, & environnée de montagnes de tous costez, tout estoit toutes les auenuës, & les faux-bourgs sont plus bas qu'elle; & sur tout elle a vn bon chasteau, qui est sur vn roc, qui commande à la ville & a de fort profonds fossez, & de bonnes murailles.

Caën qu'on tient pour la seconde ville de Normandie, & iusques où le flot de la mer arriue, de mesme qu'il fait à Rouen, d'où il passe encor plus outre, n'est pas vne des moins importantes places de Normandie, estant grande, & moyennement forte, & capable d'assez longue deffence, mais sur tout elle a vn chasteau basti sur vn roc, & fortifié de son donjon, au milieu duquel il y a vne tour carree d'admirable hauteur & grosseur, qui est flanquée aux quatre coings d'autres quatre grosses tours, & a de bōs fossez à fond de cuue, & ce chasteau a vne si grande court, qu'on y peut mettre cinq ou six mille hommes en bataille.

Auranges est aussi forte, estant assise sur vn rocher assez roide, où la mer vient lors qu'elle est en son plein flux, & ceste ville fortifiée de bonnes murailles, & entourée de profonds fossez.

Vous auez pres du long de la coste Honfleur, bonne & forte place, de mesme que Dieppe, où il y a quantité de canons.

S. Valery en Normandie, autre que celui de Picardie, Cherbourg, dernière place que le Roy Charles VII. osta aux Anglois, quand il les chassa du Royaume, le mont S. Michel, environné de tous costez del'Océan, & le fort de l'Isle de Zere fait contre les courses des escumeurs de mer. Mais sur toutes les places de la coste de Normandie, il faut estimer le Havre de grace, forteresse imprenable, dressée par le Roy François I. pour faire telle à l'Anglois, veu que son assiette est bonne au possible, fors que d'un costé où il y a quelque colline qui semble luy commander, & toutesfois ne luy scauroit gueres nuire.

En Bretagne vous trouuez Rennes capitale du pays, bonne & forte ville. Nantes ne luy doit rien en ceste partie. Dol, Vannes, Quimpercorentin, & S. Malo. Mais Blauet, & Brest emportent le prix sur toutes les autres places, qui sont du long de la coste, principalement en fort grand nombre, & bien fortes.

En Poictou vous auez la ville de Poictiers, qui a soustenu presque de nostre temps en vn furieux siege de quatre vingts mille hommes, Maillezay, la Ganache, S. Michel en l'Her,

qui a

qui a resisté durant les troubles à de longs & furieux assauts, Niort, Fontenay, Chastelleraud & Lusignan, toutes assez importantes.

En Xaintonge il y a Xaintes, où l'on a fait vne des bonnes citadelles de France, S. Iean d'Angely. maintenant reduit en village aussi bien que Pons pour leur rebellion de l'an 1621. par commandement du Roy Louys XIII. en apres vous auez Blaye, place forte, & en Angoumois vous auez Angoulesme, qui est assez bien fortifiée, mais la citadelle, ou son chasteau fera tousiours plus de resistance que la ville. Mais au pays d'Aunis vous auez la Rochelle port de mer, & vne des clefs de France, capable de donner beaucoup de peine a de fort grâdes armées; nous en parlerons cy-apres: allant plus auant vous rencôtrez Perigueux, ville bien fortifiée, & qui n'est commandee que d'un costé, d'où elle a encor moyen de se deffendre aisément.

Pour le Limosin sa principale ville a donné iadis beaucoup d'affaires à de grands Princes, & Vzerche est en telle assiette qu'on l'estime du tout imprenable. Toutesfois il a esté ruiné l'an 1619. pour le subiect de Monsieur d'Espéron, qui s'en vouloit preualoir.

En Auvergne vous auez la ville de Clermont, qui est assez forte, & les chasteaux d'Usson & de Nonnette, qui se peuuent dire comme imprenables. Mais sur tout il faut faire estat de S. Flour assis sur vn roc fort esleué, & taillé tout droict, qui rend la place presque hors de moyen d'estre prise.

Vous voyez apres Moulins en Bourbonnois, place assez considerable sur la riuere d'Allier, qui n'a iamais cedé à l'effort des ennemis durant nos guerres dernieres. Montagu en Combraille est aussi capable d'assez de defence.

Quant à la Bourgongne elle a pour ses principales places fortes, Dijon, Chalon, Seurre, Auxonne & Beaune, avec vn chasteau fort au possible, outre vn grand nombre de petits lieux assez forts.

Le Chasteau de Talan pres de Dijon est aussi vne bonne place.

Autun est aussi ville d'importance, & que nos dernieres guerres ont mise en meilleur estat que iamais, & la ville, & le chasteau de Semur peuuent faire grande resistance.

Pres de Lorraine & del'Allemagne vous auez la ville de Mets, qui arresta si longuement l'Empereur Charles V. avec vn grand nombre de canons, & vne armee qui deuoit donner de l'effroy à tout le monde. Vous auez aussi la citadelle, qui est vn des plus forts lieux de France.

Si vous allez plus auant en tirant vers le Midy, vous trouuez la ville de Lyon qui est extremement forte du costé de la citadelle abbatuë, où est aussi le bouleuart S. Iean, lieu extremement fort. Pierre Ancise qui est vn chasteau sur le roc de l'autre costé de la riuere de Saone, deffend l'aduenue d'un autre costé: Lyon a le Rhosne qui luy sert de deffence, & pour le dire en vn mot, quoy qu'il ne soit pas aussi fort du costé de Fourvieres, & de S. Iust, toutesfois ceste ville soustiendrait vn fort long siege, & peut arrester vne grande armee, & empescher les deileins, à cause de son assiette.

En Dauphiné du long du Rhosne vous auez Vienne, qui est vne bonne place, où il y a les forts de Pipper & de la Bastie, qui commandent de tous costez.

Vous auez plus bas Valence vne des meilleures villes de guerre de France, & qui a vne forte citadelle. Encore plus bas à demie lieuë du Rhosne vous auez la ville & le chasteau de Montlimar, capable de grande deffence. Le Roy a fait demolir ses nouvelles fortifications, retournant du Languedoc l'an 1622.

Dans le pays on trouue Romans sur la riuere de l'Isere, qui est moyennement fort, vous auez les chasteaux de Moras & de Quirieu, dont le dernier est beaucoup plus fort que l'autre. Apres cela vous auez Grenoble, ville fortifiée à la moderne par Monsieur de les Diguieres, Gouverneur de Dauphiné, qui en a fait vne des bonnes places de France. Vous auez apres cela le fort de Baraut, pres la Sauoye, pour seruir de bride de ce costé là aux ennemis. Vous y auez d'autres places fortes au possible, comme Die, Gap, le chasteau de Serre, Nyôs, Ambrun, Briançon, & le chasteau d'Essilles sur les frôtieres. De sorte que l'ennemy n'auroit pas peu à faire, quand il entreprendroit entrer en Dauphiné, veu toutes ces barrieres.

Pour la Prouence vous auez dans le pays pour fortes places, Aix, Arles, Cisteron, Ourgon, Brignoles & Pertus. Mais les Maritimes comme Marseille, Tolon, Castel, d'If, Nostre-Dame de la Garde, la Tour de Bouc, & Antibes, & quelques autres encor sont des meilleures qui se voyent.

Quant au Languedoc, Thoulouse se peut vanter d'estre forte, mais Narbonne qui est pres de la frontiere l'est beaucoup plus, & Lucate encore dauantage.

L'assiette de la cité de Carcassonne est forte: mais la ville basse est beaucoup mieux fortifiée.

Befiers, & Pezenas sont assez forts. Mais on a fait Montpellier & à Nîmes tout ce qu'on a peu pour les rendre villes de deffence.

Le Pont Saint Esprit est fort, & accompagné d'une bonne citadelle.

Au Velay le Puy est une fort bonne place, & ville qui n'a jamais esté prise.

Vous avez après le chasteau de Polinac, qui est estimé pour imprenable, à cause de son assiette, Montauban en Quercy est renommée pour sa forteresse, l'assiette est forte au possible. l'en parleray cy-après.

En Gascogne la ville de Bourdeaux craindra tousiours fort peu qu'on l'attaque.

Castelnau de Barbarans est une place extrêmement forte, & du tout inaccessible.

La ville d'Auche est bastie sur un roc de difficile accez, sinon du costé qu'on va à Vicfeufac, & a souffert autresfois de grandes attaques.

Lectoure est une place qui peut estre mise entre les plus fortes de ce Royaume.

Cominge est aussi une bonne place, & l'assiette de S. Fregeou est forte au possible.

La ville de Dax est tres-forte & bien assise, Bayonne est aussi ville forte sur la frontiere, du tout importante, & capable de longue deffence.

Voilà à peu pres ce qui se peut dire touchant les places. Que si nous venons à considerer les hommes qui sont en France, & qui luy seruent de soustien, nous trouverons qu'il n'y a Royaume en tout le monde qui se puisse vanter d'avoir un plus grand nombre de vaillans hommes: & s'il y en a quelqu'un aussi peuplé, où peut estre davantage, comme la Chine pourroit estre, ie respondray que ce peuple lasche & effeminé nous surpasse en nombre, parce qu'on dit qu'il y a autant d'habitans sur l'eau que sur la terre, mais nous le passons en valeur. Et si nous considerons seulement l'Europe, nous trouverons qu'il n'y a point de contrées où l'on voye plus de personnes.

Pour le regard des voisins, la France pourroit craindre les Anglois si la Guyenne ou la Normandie estoit à eux, & si les François estoient bandez contre eux-mesmes, veu qu'autrement ils sont invincibles; & meisme il faut croire que Cesar n'eust aduancé que bien peu en France, si les Gaulois ne se fussent entre-hays, & ne l'eussent mis bien avant dans le pays, causans par leur diuision la ruine de tout cet estat.

La France craindroit les Espagnols, si toutes & quantesfois qu'ils veulent assaillir la France du costé de l'Espagne, ils ne le faisoient que mal aisément, veu que le passage est si malaisé, que pour peu que les François résistent, & se mettent en deffence en un si mauuais pays, l'Espagnol perdra iustement le courage de passer plus outre: & outre ce les fortes places de la frontiere du costé du Languedoc & de Guyenne l'arrestent tout court avec sa honte.

Quant aux Flamands la France ne les craint aucunement: en premier lieu, pource qu'ils ne scauroient faire un grand effort contre ce Royaume: en second lieu, pource que les Estats sont bien liez & vnis avec ceste Couronne, & se roidiront tousiours pour elle contre leurs voisins. En troisieme lieu, pource que les Flamands ne recueillent pas assez de quoy viure, à cause de la froideur & nature du pays, & principalement qu'ils n'ont pas du bled & du vin à suffisance: choses qu'ils sont contraincts de tirer de Bourgogne, de Picardie & autres Provinces de France, & outre ce les habitans des Pays-bas vivent de leurs mains, dont ils font plusieurs ouurages, qu'ils vendent principalement aux foires de France, & pour ceste occasion lors qu'ils romproient la paix avec les François, non seulement ils manqueroient de viures, mais aussi du moyen de debiter leurs ouurages. On pourra dire le mesme des Allemands, & outre ce que la frontiere d'Allemagne, de mesme que celle des Pays-bas, a des places fortes, du tout capables d'arrester celui qui feroit quelque entreprise sur la France.

Quant à la Lorraine elle est si foible qu'elle ne scauroit donner de la crainte à ce Royaume, & d'ailleurs il y a de bons forts qui la brident, de mesme qu'il y en a pour empêcher les entrees qu'on pourroit faire par la Franche-Comté, qui est un petit pays où il faudroit faire passer une armée de bien loing: de sorte que la longueur feroit qu'on se tiendroit sur ses gardes, & que toute la frontiere seroit en armes. On pourroit redouter les Suisses à cause de leur voisinage, & des soudaines courses qu'ils peuvent faire à quoy l'on ne scauroit pourvoir à temps. Mais en premier lieu on les a pour allies, & d'ailleurs les places frontieres de ce costé là sont bien munies de tout ce qui pourroit estre nécessaire: si bien que cela les empêcheroit d'aduancer beaucoup leurs affaires: outre que le naturel des Suisses est de combattre plustost en raze campagne, que d'aller donner de la teste contre une place, & qui plus est les Suisses s'esloigneroient peu volontiers de leurs confins pour se mettre en pays plain, & laisser derriere de fortes places: veu qu'ils auroient peur (comme il aduiendroit sans doute) que les viures leur manquassent, & semblablement de ne s'en pouoir pas retourner si

librement

librement depuis qu'ils se seroient mis vne fois en la plaine , à cause de la Cavalerie François.

Pour les Estats du Duc de Sauoye , on n'en a gueres d'apprehension , pource qu'ils sont bridez de tous costez avecques l'Italie , par vn grand nombre de places fortes , & d'ailleurs pour la plus-part les Alpes donnent vne grande difficulté au passage , & de plus on trouue au pied force lieux de deffence où il faudroit s'arrester , ayant à dos vn pays si sterile : tellement que les Italiens seroient contraincts ou d'auoir vne grãde peine , ou de laisser ces places derriere ; ce qui seroit grande folie : ou bien de s'essayer de les prendre (chose qui les tiendrait long temps en haleine) & d'ailleurs l'Italie ne peut estre maintenant gueres redoutee , à cause de la diuision de ses Princes.

G O V E R N E M E N T.

L'ESTAT de la France, qui a esté autrefois Democratique, est maintenant reduit en 23. Monarchie, principauté d'un seul, le Roy n'y est pas esleu, comme en beaucoup d'autres endroits, ains le Royaume vient par succession , & les masles sont seulement admis à regner, non pas les femmes , suiuant vne loy fort ancienne , & fondamentale.

Le Roy a toute puissance de resoudre & ordonner la guerre contre les ennemis , de faire la paix avec eux, & des alliances avec les autres Princes, & Republiques : comme aussi d'imposer des tailles, créer des Magistrats, faire des loix, & des ordonnances, donner les priuileges, & des graces, & faire beaucoup d'autres choses à sa volonté : tellement que tout ce qui luy plaist est receu pour loy inuiolable : mais pour monstrier que ses volonteés sont iustes , & pleines de raison , il ne permet pas que ses Edicts passent qu'apres que ses Cours de Parlement les ont verifiez.

Le fils aîné du Roy , & plus proche heritier de la Couronne doit porter le nom de Dauphin , de mesme que l'asseyré successeur de l'Empire se nomme Roy des Romains.

Les Roynes de France ont beaucoup d'autorité, tellement qu'elles ont ressort & grãds 24. iours si elles veulent en leurs terres , tant de leurs domaines , que douaires , pour cognoistre des premieres appellations , & l'appel de leurs grãds iours vient en la Cour des Pairs de France , combien que les terres & parties soient d'autre ressort , suiuant vne declaration du Roy Louys le Gros de l'an mil trois cents dix-sept.

La mere du Roy regnant , si elle n'est Roynes de France , est precedee par la Roynes regnante.

Les dons faits par les Roys aux Roynes leurs femmes durant leur mariage , valent , combien qu'entre toutes autres personnes ils soient nuls.

Les officiers domestiques des Roynes & meres des Roys ont pareils priuileges que ceux des Roys. Mais elles n'ont communauté aux acquests faits par les Roys leurs maris durant leur regne , ouy bien en ceux qui sont faits auant leur aduenement à la Couronne apres le mariage.

La Roynes veufue est appellee communement Roynes Blanche, ceste coustume est demoree depuis la mere de Saint Louys , nommee Blanche , qui vescu long temps , & la Roynes Blanche, veufue du Roy Philippe de Valois , qui vescu iusques au regne de Charles V l.

La façon de couronner , & declarer les Roys de France tels auant que les François eussent receu 25. foy de iesus Christ, c'estoit d'esleuer le Roy couronné sus vn grand bouclier ou pavois , & le porter sur les espaules, en luy laissant faire ainsi trois tours autour du cãp , & les assistãs crioient qu'il estoit leur Roy, & mesme on tient que ceste coustume a duré depuis le Christianisme en toute la race des Merouingiens. Car la sainte Ampoule , que ie crois avec beaucoup d'autres auoir esté enuoyee du ciel , fut seulement pour seruir au baptesme du Roy Clouis, & depuis au sacre des Roys de la seconde & tierce lignee. On a sacré la pluspart de nos Rois à Reims en ceste sorte. La Messe commencee, le Prestre se tournoit auant l'Epiestre deuant le Roy, & luy exposoit la foy Catholique, luy demandant s'il la croit , & vouloit deffendre. Le Roy ayant respondu qu'ouy, on luy apportoit le serment qu'il lisoit, & soubsignoit, ledit serment estoit tel : Je N. par la grace de Dieu prochain d'estre ordonné Roy de France, promets au iour de mon sacre deuant Dieu & ses Saints , que ie conserueray le priuilege Canonique, loy , & iustice deuë à vn chacun de vous Prelats , & vous deffendray tant que ie pourray (Dieu aydant) comme Roy doit par droit deffendre en son Royaume chacun Euesque , & Eglise commise , & octroyeray au peuple à nous commis deffence des loix en leur droit, consistant en nostre autorité.

Ce serment estant leu , le Roy mettoit entre les mains de l'Archeuesque de Reims en

en presence de beaucoup de Prelats, qui s'y trouuoient. Ce fait ledit Archeuesque prenant la crosse Sainct Remy, recitoit comme le Pape Victor auoit donné par ceste crosse, tant à luy qu'à son Eglise le pouuoir de ce Sacre. Lors il estoit déclaré Roy par ledit Archeuesque, & autres Prelats & gens d'Eglise. Puis les Grands du Royaume, & apres eux les Cheualiers, & le peuple l'approuuoient tous d'une voix, crians par trois fois, Nous l'approuuons, nous le voulons, soit fait. Et soudain on chantoit, *Te Deum*, & lors l'Archeuesque sacroit le Roy. Puis estant retourné en son siege, & assis on apportoit le priuilege donné par le Pape Victor, qui estoit deuant les Prelats. Voilà en peu de mots la ceremonie qu'on obseruoit, & qu'on doit encore suiure. l'en ay retranché beaucoup de formalitez, pource que i'ay creu qu'elles seroient ennuyeuses.

Quant aux Regences elles sont ordonnees ou pour la minorité, ou pour l'absence, ou pour l'indisposition des Roys, & ceux qui ont esté Regent, ont disposé de toutes choses comme s'ils en eussent esté vrayz maistres.

Les fils de la maison de France partageoient anciennement par esgales portions, sans qu'il y eust droit d'ainésie, & les bastards aduoüez heritoient avec les legitimes : & chacun tenoit sa part en tiltre de Royaume. La troisieme lignee a du tout rejeté les bastards, non seulement de Couronne : mais aussi de l'aduen, & surnom de France, qui est permis aux bastards des Roys, & depuis Huë Capet les puisnez des Roys n'ont eu que des partages priuez, & mesmes il fut apres ordonné en l'an 1283. que les puisnez ne pourroient quereller ou demander certaine legitime part, ou quote leur estre deuë en la succession du Roy leur pere, ains seulement prouision pour leur viure, & entretien, à la volonté de leur pere, & s'il ne l'auoit déclaré durant sa vie, à la volonté du Roy leur frere regnant, sans qu'il leur fust permis de se plaindre d'une trop petite portion.

Mesdames les filles de France, s'il y a enfans masles, n'heritent qu'es meubles & acquests, selon la loy Salique, & sont aussi perpetuellement excluses de la Couronne par coustume, & loy particuliere de la maison de France fondee sur la magnanimité des François, qui ne peuvent souffrir d'estre commandez par des femmes seules, & sur ce qu'elles eussent aussi peu par mariage transporter la Couronne a des estrangers. On a veu que mesdames de France mariees à moindres que Roy, estoient appellees Roynes avec leur nom propre. Cest honneur leur estoit donné durant leurs vies, pour monstrier qu'elles estoient filles de France. Le surnom de France appartient aux filles des Roys de France, soit qu'elles soient nees auant, ou durant leur regne. Il est vray que celles qui sont nees auparauant ne le prennent qu'apres l'aduenement à la Couronne : & si elles sont filles du fils aîné du Roy, elles sont appellees Mesdames dès leur naissance, pour l'assurance que le pere a de regner, s'il ne meurt. Les autres ne doiuent estre appellees que Mesdamoiselles, & apres l'aduenement Mesdames avec le surnom de France.

DES

DES DVCHES ET COMTEZ,

PAIRIES SIMPLES ET PARTICVLIÈRES
reünies à la Couronne de France.

BOVRGOGNE, DVCHE ET PAIRIE.



BOVRGOGNE, Royaume venu à Clouis par sa femme Clotilde, fille de 26. Gundebaut Roy de Bourgogne : fut depuis diuisé en Duché & Comté : Le Duché demeura à nos Roys, le Comté aux Empereurs. Henry I. Roy de France, bailla à son frere Robert de France, le Duché de Bourgogne l'an 1030. & la posterité de ce Robert a iouy dudit Duché, iusques en l'an 1362. que Philippes II. Duc dudit Duché deceda sans enfans, & par ainsi ledit Duché vint au Roy Iean par proximité de lignage, (non par droit de retour à la Couronne, commel'a escrit du Tillet.) Le Roy Iean donna le Duché en appannage à son fils Philippes le Hardy, à la charge de reuerfion de plain à la Couronne, faute d'hoirs masles, & fut tue à la bataille de Nancy, l'an 1476. & par sa mort le Duché fut reüny à la Couronne, sous le Roy Louys XI. apres quelques disputes.

NORMANDIE, DVCHE ET PAIRIE.

NORMANDIE fut erigée, commel'on dit en Duché & Pairie l'an 912. par Charles le Simple, mais sans preuue. Le pays a esté possédé par des Ducs particuliers, iusques au regne de Philippes Auguste, que la Normandie fut reünie à la Couronne, par la felonnie de Iean sans terre Roy d'Angleterre. Les Anglois l'ont depuis querellé & possédé 30. ans, & depuis remise en l'obeïssance du Roy Charles VII. Et en fin Louys XI. l'ayant donnée à Charles son frere, la retira & la reünit à la Couronne.

GVYENNE, DVCHE ET PAIRIE.

LA Guyenne fut premierement erigee en Duché par le Roy Charles le Chauue l'an 861. & depuis restablie par le Roy S. Louys l'an 1219. l'Anglois l'ayant tenuë long temps. Il y eust arreit particulier pour ce Duché, du temps de Charles V. & expresse reünion à la Couronne : Louys XI. le bailla en appannage à son frere Charles, à condition que le Poictou n'y seroit compris, & mourant ledit Charles sans enfans ce Duché fut inseparablement reüny au Domaine du Roy, sans en pouuoir estre diuisé.

BRETAGNE, DVCHE ET PAIRIE.

BRETAGNE, Duché, erigé en Pairie par le Roy Philippes le Bel, l'an 1297. & reüny à la Couronne par le Roy François I. par ses lettres de l'an 1532. au mois d'Aoust, donnees à Nantes.

ORLEANS, DVCHE ET PAIRIE.

ORLEANS fut erigé en Duché & Pairie, pour en appannager le premier fils de France apres l'ainé & le Dauphin : A ce tiltre le Roy Iean le donna à Philippe de France son frere, qui deceda l'an 1391. Depuis, Charles 6. le donna au Duc de Touraine Louys son frere, à la charge de ne tomber en quenouille. C'est celuy qui fut tue par le commandement du Duc de Bourgogne : apres luy, son fils ainé, pere du Roy Louys XI. fut Duc d'Orleans.

ALENCON DVCHE' ET PAIRIE.

Alençon ancien Comté possédé par Seigneurs particuliers, iusques à ce qu'Helie sœur & heritiere de Robert d'Alençon, yflüé d'eux, qui donna ce Comté au Roy Philippes Auguste, du depuis le Roy S. Louys le donna pour appanage à Pierre son quatriesme fils, & mourant sans enfans le Roy Philippes III. le donna à son second fils Charles, lequel estant Roy, en appanagea Charles son frere puîné, les descendans duquel en ont iouy, & a esté erigé en Duché & Pairie par Charles VI. le 1. Januier 1414. & y demeura iusques à Charles, dernier Duc, qui mourut l'an 1525. sans masles, & ainsi ledit Duché fut reüny à la Couronne. Depuis le Roy Charles I X. le donna à François son frere, par la mort duquel sans enfans ledit Duché fut derechef reüny au Domaine.

ANIOV, DVCHE' ET PAIRIE.

Anjou Comté, fut erigé en Duché & Pairie par le Roy Philippe le Bel pour son frere Charles de France, Comte de Valois en Septembre 1297. Depuis encore par le Roy Jean pour Louys son second fils en Octobre 1390. La posterité de ce Louys, ayant duré quelques anneés, l'Anjou par la mort de René, qui estoit Roy de Sicile, fut reüny à la Couronne par le droit de reuerlion des appannages. Charles IX. l'an 1566. le donna pour appanage à Henry son frere, & depuis ledit Henry deüenu Roy, le laissa à François son frere, par la mort duquel il fut reüny à la Couronne.

AVVERGNE, DVCHE' ET PAIRIE.

Auvergne Comté a esté possédé par des Comtes particuliers, l'un desquels eust vne fille, qui espousa Robert Comte de Boulogne, & ainsi ledit Comté fut en la maison de Bologne, iusques au regne de S. Louys, qui le donna avec le Poictou à Alphonse son frere, lequel mort sans enfans les Comtes de Boulogne possederent ledit Côté iusques au Roy Jean, qui l'vnt à la Couronne, ayant espousé Jeanne Comtesse de Bologne & d'Auvergne: Mais peu apres l'an 1360. le Roy l'erigea en Duché & Pairie, avec le pays de Berry, pour Monsieur Jean de France son fils.

NEMOURS DVCHE' ET PAIRIE.

La ville de Nemours fut erigee en duché & Pairie par le Roy Charles sixiesme pour Charles deuxiesme Roy de Nauarre le neufiesme Iuin mil quatre cents quatre, pour recompense d'Eureux & autres terres qu'il auoit en Normandie, & reüeny à la Couronne par le deceds dudit Roy, mort sans enfans masles. du depuis il esté baillé à Philippe de Sauoye avec autres pour cent mille liures, & à ce tiltre en iouit Monsieur le Duc de Nemours, qui est à present.

ANGOVLESME DVCHE' ET PAIRIE.

Angoulesme Comté a souuent changé de mains, des Comtes particuliers en ont iouy, puis vint au Roy Philippes le Bel, & à ses enfans Roys de France. L'un desquels, sçauoir Louys Hutin eut Jeanne Comtesse d'Angoulesme, qui espousa Philippes d'Eureux; puis Charles d'Espagne en fut Comte, & en apres le Roy Jean le bailla aux Anglois. Charles V. disposa depuis dudit Comté, & de luy vint à Jean de Berry son frere, qui le rendit à Charles VI. lequel le donna en appennage à son frere Louys Duc d'Orleans, & de luy il vint au Roy François I. que l'on appelloit le Comte d'Angoulesme, & en fut le dernier Côté, & luy-mesme l'erigea en Duché l'an 1515. l'vnissant & incorporant avec tous ses membres à la Couronne, & n'en est depuis sorty que par engagement, ayant esté baillé à Madame Diane legitimée de Frâce, fille naturelle de Henry II. à la charge de reuerlion à la Couronne apres sa mort. Toutesfois le Roy Louys XIII. à present regnant a continué cet engagement apres la mort de ladite Dame, avec la mesme clause à Monsieur Charles de Valois, Comte d'Auvergne, que la Cour n'a encore verifié.

CHASTELLERAUT, DVCHE' ET PAIRIE.

Chastelleraut fut erigé en Duché & Pairie par le Roy François I. en faueur de M. François de Bourbon, en Feurier 1514. Mademoiselle de Montpensier en jouit à present par engagement.

COMTEZ

COMTEZ ET PAIRIES REVNIÉS A LA COUVERNE.
POICTOU, COMTE ET PAIRIE.

LE Comté de Poictou fut confisqué sur le Roy d'Angleterre par le Roy Philippe Auguste, l'ayant usurpé par felonnie; & depuis fut erigé en Pairie pour M. Philippe de France, dict le Long, par Louys Hutin son frere en Aoust 1315.

LA MARCHE, COMTE ET PAIRIE.

LE Comté de la Marche fut erigé en Pairie par ledit Roy pour M. Charles de France, dict le Bel, en Mars 1316.

EVREUX, COMTE ET PAIRIE.

IL y a vne declaration du Roy Charles le Bel, de la creation du Comte d'Eureux en Pairie par le Roy Philippe le Long 1326.

Ces trois Comtez Pairies furent réunis à la Couronne, par l'aduenement à icelle des Roys Philippe le Long, & Charles le Bel au mois de Juillet 1436.

ARTOIS, COMTE ET PAIRIE.

LE Comté d'Artois fut erigé en Pairie pour Robert second fils de S. Louys par le Roy Philippe le Bel en Septembre 1297. Il n'est plus de ceste Couronne.

MASCON, COMTE ET PAIRIE.

LE Roy Jean estant prisonnier en Angleterre, Charles Dauphin, Regent en France donna à son frere Jean Comte de Poitiers, le Comté de Mascon, & l'erigea en Pairie pour luy & ses hoirs masles descendans de luy en droicte ligne: les lettres sont de Septembre 1359. Du depuis, le Roy retourné en France, cassa ceste donation, & donna à son fils Jean les Duchez de Berry & d'Auvergne, & fut faicte vne declaration en Novembre 1360. de réunion perpetuelle du Comté de Mascon à la Couronne. Toutesfois par le traicte d'Arras, Mascon fut donné au Duc de Bourgogne, & demembré de la Couronne, mais par la mort du dit Duc de Bourgogne Charles, ledit Comté fust réuni par lettres du mois de Mars 1476.

FOIX, COMTE ET PAIRIE.

FOix Comté, fut erigé en Pairie par le Roy Charles VII. pour Gaston de Foix, en Aoust 1458.

BEAUMONT LE ROGER, COMTE ET PAIRIE.

Beaumont le Roger fut erigé en Pairie par le Roy Philippe de Valois pour Robert d'Artois, en Ianuier 1328.

DVCHEZ SIMPLÉS REVNIS A LA COUVERNE.
BERRY DVCHÉ.

Berry fut erigé en Duché par le Roy Jean 1350. en faueur de son 3. fils Jean: la posterité de ce Jean finit en filles l'an 1417. & ainsi ce Duché fut réuni à la Couronne.

TOURNAINE DVCHÉ.

Touraine fut erigee en Duché par le Roy Jean l'an 1350. en faueur de Philippe son 4. fils du depuis surnommé le Hardy, Duc de Bourgogne.

SOISSONS, DVCHÉ.

Soissions fut erigé en Duché par le Roy Louys XII. en l'annee 1501.

CHARTRES DVCHÉ.

Chartres fut erigé en Duché par le Roy François premier l'an 1528. en consideration de Madame Renée de France, Duchesse de Ferrare, Monsieur de Nemours en iouit par engagement.

ESTAMPES DVCHE'.

E Stampes fut erigé en Duché par le Roy François I. l'an 1536. Monsieur de Vendosme en jouit par engagement.

VALLOIS DVCHE'.

L E Comte de Vallois fut erigé en Duché par Charles VI. l'an 1402.

BEAUMONT LE VICOMTE, DVCHE'.

B Beaumont le Vicomté fut fait Duché par François, l'an 1543.

MONTARGIS DVCHE'.

M Ontargis fut erigé en Duché l'an 1560. par le Roy Charles IX.

BOVRBON, DVCHE'.

B Ourbon a esté long temps simple Baronnie, iusques au temps de Charles le Bel, qui l'erigea en Duché l'an 1327. pour Louys de Clermont, fils de Robert de Clermont, & de Beatrix de Bourgogne, Dame de Bourbon.

DVCHEZ SIMPLES ET PARTICVLIERS.

LONGVEVILLE.

L Ongueville fut erigé en Duché par le Roy Louys XII. l'an 1505. pour François d'Orleans Comte de Dunois.

TOUVEVILLE.

T Outeuille en Normandie fut fait Duché par François I. en faueur de François, Comte de S. Paul, espousant Adriane, Dame de Touthuile l'an 1534.

CHEVREUSE.

C Heuse fut erigé en Duché par le Roy Henry second l'an 1555. en faueur de Charles, Cardinal de Lorraine: Monsieur le Prince de Joinville en jouit à present, en porte le nom, & les armes.

ALBRET.

A lbret fut erigé en Duché par le Roy Henry II. l'an 1557.

ROVANNES.

R Oüannés fut fait Duché par le Roy Charles IX. en faueur de Messire Claude Gouffier, grand Escuyer de France, en Nouembre l'an 1566.

BEAUPREAU.

B Eaupreau fut créé Duché par le Roy Charles IX.

BOISSY.

L E Marquisat de Boissy fut erigé en Duché par Charles IX. l'an 1566.

CHASTEAV - THIERRY, CHASTILLON SVR

MARNE, ET ESPERNAY.

C Es trois seigneuries furent erigees en Duché par Charles IX. pour François d'Alençon l'an 1566.

EVREUX.

E Vreux fut créé en Duché par Charles IX. l'an 1569.

BRIENNE.

B rienne en Champagne, fut erigé en Duché par le Roy Henry III. l'an 1587. en faueur du Comte de Maulevrier.

CROVY.

C R O V Y.

CRouy fut erigé en Duché par Henry I V. en faueur du Duc d'Arscot.

B A R L E D V C.

BAr fut erigé en Duché par Philippes de Valois l'an 1319. Monsieur le Duc de Lorraine Ben est Seigneur, mais il en recognoist le Roy en partie.

LES DOVZE ANCIENS PAIRS DE FRANCE.

Ilya douze anciens Pairs en France, diuisez en six Ecclesiastiques & six Laïques. Entre les six Ecclesiastiques sont trois Ducs & trois Comtes.

Les Ducs sont l'Archeuesque de Reims Duc & premier Pair Ecclesiastique.

L'Euesque de Laon, Duc & Pair.

L'Euesque de Langres, Duc & Pair.

Les trois Comtes Pairs Ecclesiastiques sont.

L'Euesque & Comte de Noyon Pair.

L'Euesque & Comte de Beauuais Pair.

L'Euesque & Comte de Chaalons Pair.

Les six Pairs anciens de France, Laïques sont trois Ducs & trois Comtes.

Le Duc de Bourgongne premier Pair.

Le Duc de Normandie.

Le Duc de Guyenne.

Le Comte de Thoulouze ou Comte de S. Gilles.

Le Comte de Flandres.

Le Comte de Champagne.

C'est vne pure fable de vouloir tirer l'origine des Pairs dès le temps de Charlemagne; d'y vouloir aussi assigner vn temps certain, c'est vouloir assurer d'une chose tres-incertaine, & qui n'est que de coniecture.

L'on faiët toutesfois vne remarque, qui semble donner risée à cet établissement. Que deuant le Roy Charles le Simple, tout estoit à peu pres Domaine Royal, & les Prouinces autrement departies qu'elles ne l'ont esté depuis: le Roy faisant la part à ses sujets à volonté. Mais sous Charles le Simple il y eut vne grande decadence & d'autorité & de puissance: car on vid le royaume diuisé & partagé en sept grandes & principales Prouinces dictes Comtez, Marquisats, & Duchez au Domaine Royal, & en plusieurs moindres & petites Comtez, dont les vnes dependoient des sept plus grandes, comme fiefs subalternes, ainsi que les Comtez de Touraine, Anjou, Blois & autres dependoient du Comte de France.

Quant aux grandes, la premiere & principale des sept, fut celle qu'on disoit de France, & de Paris, qui du commencement comprenoit sous soy le pays d'entre la Seine & la Loire, iusques aux frontieres de Normandie. Mais Hugue le Grand l'estendit bien auant dedans la Picardie.

Les autres estoient le Duché de Bourgongne, la Normandie, la Flandre, l'Aquitaine & le Languedoc qui se nommoit lors Gothie, & celle que le Comte Hebert avoit sous le tiltre de Comté de Vermandois, s'estendant iusques en Champagne, Brie & Picardie.

Or comme ces sept Prouinces estoient les plus grandes & principales de toute la France: aussi ceux qui les obtindrent, ne furent pas seulement les plus puissants entre les Seigneurs de la France, mais aussi s'attribuerēt le tiltre de Prince, Primats & Superieurs de France, ensemble aussi Princes de leurs Prouinces & des subiects: ausquels ils commandoient. Les Grands si puissants vsurperent vne telle domination qu'ils entrerent en jalousie du roy, & abandonnerent Charles le Simple, pource qu'il vouloit esleuer en dignitez & charges par dessus eux vn de ses Conseillers nommé Sagano, qui estoit de bas lieu, & le possedoit du tout. Ceste puissance donc contre les regles fut telle qu'elle rendit les roys contemptibles pour leur foiblesse, iusques à Hugue Capet & sous les enfans de Capet, iusques à Louys le Gros, & ses successeurs presque esgaux, ne leur portant pas le respect qu'ils firent depuis. Si ces Grands eussent pris le nom de Pairs, cōme les nostres d'aujourd'huy, il est sans doute qu'ils eussent esté ainsi nommez pour estre Pairs & esgaux en autorité aux roys, parce qu'ils l'estoient en effect. Ce pendant si l'on considere les qualitez, conditions, droicts & priuileges dont ces Grands iouissoient: on ne trouuera pas que la dignité de Pair, en ayt porté d'autres avec soy, depuis Hugues Capet, & ce qui fait croire que les Pairs qui ont suiuy, ont esté formez sur ceux-cy, est qu'il n'y en a aucun de ceux qu'on appelle Laïcs, qui ne fust successeur de ceux qui estoient Grands & Princes cy-dessus. De sorte que si Hugue Capet se fut aduisé de donner son Duché de France à quelqu'un de ses enfans, sans le réunir au domaine Royal, cōme

gnes, Champagne devers la Meuze; autre limite ancienne. Thoulouse & Languedoc uevers le Rhoin & la mer de Leuant; & Flandres devers la riuere de l'Escaut, autre limite ancienne du Royaume & la mer.

Vignier voulant rendre raison pourquoy le Duc de Bourgongne est le premier Pair, dit par conjecture, que ce fut sur ceste occasion.

Henry premier, apres la mort de son pere (bien qu'il fust aîné) sa mere auoit affection à Robert son puîné, assisté qu'il fut de quelques grands. Mais Henry aydé par le Duc de Normandie, vint au dessus de ses ennemis, contraignit son frere de se contenter du Duché de Bourgongne, en titre de fief de France, auquel possible il adjousta la primauté & priorité par dessus les autres.

Le Duché de Bourgongne reüny à la Couronne par reuersion, par la mort du Duc Charles l'an 1426. faute de males.

La Normandie retourna aussi par reuersion à la Couronne & confiscation adjugée par la Court, pour les rebellions des Anglois.

La Guyenne de mesme.

Thoulouse, en vertu du traité de paix fait avec Raymond dernier Comte de Thoulouse.

Flandres ne recognoist plus le Roy de France au moyen des renonciations de François premier.

Champagne fut vnüe à la Couronne par recompense faite des droits pretendus par les descendans du Roy Louys Hutin.

PAIRS ECCLESIASTIQUES.

Il est à noter que de tous les Prelats de France, il n'en a esté mis aucun au nombre des Pairs du Royaume, que de ceux, dont les Eueschez & villes cathedrales estoient anciennement comprises sous les villes & pais, qui furent reseruez à Charles le Simple & à son fils pour le siege & domaine royal, & où ils demeuroient ordinairement.

Laon & Noyon, nottez par les Historiens, pour estre les lieux du sejour ordinaire des Roys de France: ainsi Louys d'Outremer conquist Langres & la prit en sa particuliere sauuegarde: & l'an 980. le Roy Lothaire, & le Roy Robert l'an 1030. y mirent de leur autorité des Euesques, sans attendre qu'ils fussent esleuz, ce qu'ils ne faisoient ailleurs.

Pour Beauuais on void que le Comte Eudon du temps dudit Roy Robert environ l'an 1015. donna le Comté de Beauuais à l'Euesque Roger.

L'on remarque qu'il n'y a pas plus de quatre cents ans que l'on appelle Beauuais Pairie. Pour Chaalons, il est certain que dès l'an 963. il n'est subiect à aucun des grands du Royaume. Et les Archeuesques de Reims, de ce temps là estoient en tres-grande autorité par dessus les autres grands du Royaume, ayant desia le Comte de Reims le droit de battre monnoye, oëstroyé par Louys d'Outremer, l'an 937. & futerigé en Duché & Pairie par le Roy Robert l'an 1079.

DE L'ESLECTION DES DVCHES ET PAIRIES qui subsistent aujour d'huy en France.

VENDOSME, DVCHÉ ET PAIRIE.

I.

LE Comté de Vendosme est venu en la seconde branche de la maison de Bourbon par le mariage de Jean de Bourbon, fils de Jacques Comte de Ponthieu, avec Catherine heritiere dudit Comté, fut erigé en titre de Duché & dignité de Pairie par François premier en Feburier l'an 1514. verifié en Parlement le cinquiesme Mars ensuiuant, & en la Chambre des Comptes le treiziesme May 1516. & est au premier volume des Ordonnanc. de France. p. 16.

ANNOTATION.

Les considerations pour ladite Pairie, sont les seruices, la proximité du sang, & que ledit Comté est de grand reuenu, avec les Baronnies & Seigneuries y annexees: à sçauoir, Montdoubleau, Montoire, Lauerdin & Saint Calais, tenuë à vne seule foy & hommage de la Couronne, avec exemption de iurisdiction, fors en cas royaux & ressort au Parlement de Paris, à la charge qu'au deffaut des males la Pairie demeurera esteinte, demeurant

seulement la qualité de Duc, pour les femelles & ayans cause, de sorte qu'il semble que Cæsar, fils naturel du feu Roy Henry quatriesme, & de Madame la Duchesse de Beaufort donataire de ladite Duché, ne peut valablement retenir le titre de ladite Pairie, si la donation ne le porte, & faut qu'elle soit verifiée en la Chambre des Comptes, & encore il faut pour garder l'antiquité de la Pairie qu'il subsiste en la personne du Roy donateur, qui l'a transféré de son vivant au donataire; car il est bien plus aisé de continuer vne chose que de la faire reuiure de nouveau: Ceste question est traittee par Chopin, lib. 3. de doman. fol. 495. nouuelle edition, *en vetustis Francia Patritas mutatione personarum nouus esse dicatur*, & resoult que non en ces mots, *patritiarum verius prediorum solariumque haberi quam personæ attributum*. Mais ceste distinction ne doit sortir hors de ces termes, *dummodo primari patritas concessio finita non sit, vel in possessoris interitu, alioquin si prius extraneus patritalem eiusmodi ducatum coemerit, illi nonum patritas diplom. scribi impetrandum, nisi antiquum nominetur & referatur ad omnes successores*: Or est-il que Cæsar-Monsieur, à present Duc de Vendosme est personne estrange, & ainsi la resolution de la question seroit contre luy. Ce quin'est pas pourtant.

GVISE DVCHE' ET PAIRIE.

II.

LA Duché de Guise n'estoit lors que Comté, quand en faueur de Claude de Lorraine, il fut erigé en Duché & Pairie par le Roy François premier en l'auier 1517. Verifié en Parlement le douziesme Aoust ensuiuant, en la Chambre des Comptes le cinquiesme Septembre audit an, & est au 2. vol. des ordonn. de France, p. 109.

ANNOTATION.

LEs considerations de ceste creation, sont les grands seruices, la retinon des anciens Duchez & Pairies à la Couronne, & la proximité du lignage (ce n'estoit qu'alliance: car il auoit espousé Dame Anthoinette de Bourbon, de la maison de Vendosme) on remarque que c'est la premiere Pairie créée pour Prince non du sang: pour en jouir par luy & ses descendants masles, & venans à deffaulir, la dignité de Pairie demeurera esteinte, restant celle de Duché en son entier, avec ressort immediat au ressort du Parlement, exemption de iurisdiction fors en cas royaux: la verification est *ad onus, quod dicta Paria extincta ressortus dictarum terrarum* (car il y a des terres annexées à ladite Duché & Pairie) *revertetur in statum qui ante creationem ducatus & Paria extabat*: & en la Chambre des Comptes, *saluis tamen Procuratori generali suis actionibus ubi in posterum aliquid Baroniarum & dominiorum*, qui estoient vnies audit Duché par lesdites lettres: *de dominio aut subiectum redditui & vnioni seu incorporationi corone Francia reperiatur*.

MONTPENSIER DVCHE' ET PAIRIE.

III.

LE Comté de Montpensier fut erigé en Duché & Pairie pour Louyse de Bourbon de la branche de Montpensier, & Louis de Bourbon Prince de la Roche-guyon fils aîné de ladite Dame, au mois de Februrier 1583. par le Roy François premier verifié en Parlement le 6. Mars audit an, & à la chambre des Comptes le 19. ensuiuant, & est au 3. vol. des ordonn. de François premier fol. 144.

ANNOTATION.

CEcy en consideration des grands seruices faits par les predecesseurs de l'un & l'autre, la proximité du sang avec l'union du Comte Dauphin d'Auuergne & autres terres à vne seule foy & hommage, lige de la Couronne, exemption de iurisdiction, fors des cas egaux, à la charge qu'au deffaut de masles ladite Pairie demeurera esteinte, demeurant ledit titre de Duché seulement.

ELBOEV DVCHE' ET PAIRIE.

IV.

LE Marquisat d'Elbœuf fut erigé en Duché & Pairie pour Charles de Lorraine, Comte de Harcourt par le Roy Henry troisieme en Nouembre l'an 1581. verifié au Parlement le 29. Mars 1582.

ANNOTATION.

ET ce en consideration de ses grands seruices & de ses predecesseurs, & que ledit Marquisat, y compris les terres & Baronnies vnies, est de grande estenduë & reuenu, pour en iouyr par luy, ses hoirs masles & femelles ou autres heritiers, & les tenir à vne seule foy & hommage de la Couronne, & ce faisant distrait du Duché de Normandie, avec ses appartenances & dependances vnies, exemption de iurisdiction en ce qui concerne la Pairie seulement & non pour le regard des subiects d'icelle qui demeureront à leurs ressorts & iurisdiction ordinaires, avec la clause derogatoire aux Ordonnances pour les réunions à la Couronne à deffaut des masles; & verifié au Parlement simplement & purement, & ce faisant presté le serment de Pair, & en consequence de ce receu en l'estat de Conseiller de la Cour. Nota que d'autant que lesdites lettres sont adressantes à la Cour de Parlement de Normandie, qu'elles y ont deu estre verifiees, & que ce sera sans distraction de l'hommage dudit Duché de Normandie, comme ladite Cour, qui n'estoit lors qu'échiquier, l'ordonna, quand le Comté de Longueville fut erigé en Duché l'an 1505. par le Roy Louys 12. pour François d'Orleans Comte de Dunois.

Mais il est plus à propos pour le seruice du Roy que les Duchez vnies à la Couronne, & qui neantmoins peuuent estre baillez en appanage aux puisnez de France, soient destituez de si grands vassaux comme de Ducs; d'autant que lesdits appanages ne se pourroient preualoir de leur assistance & force contre le Roy souuerain, s'il arriuoit quelque guerre, & si on dit que le seigneur suzerain ou souuerain, est tousiours excepté: neantmoins lesdits vassaux n'ont pas tousiours ces considerations. C'est pourquoy pour euitier cét inconuenient, il faut autant que l'on peut faire que les grands fiefs releuent immediatement de la Couronne, à quoy peu de personnes iusques à present ont prins garde, & soit notté.

NEVERS DVCHE ET PAIRIE.

V.

LE Comté de Nevers fut erigé en Duché & Pairie pour Marie d'Albret & François de Cleues, au mois de Ianuier 1528. verifié en Parlement le 17. Feburier ensuiuant, & en la chambre des Comptes le 28. Feburier audit an.

ANNOTATION.

DV Tillet remarque au chap. des Pairs que ledit Comté de Nevers auoit esté erigé en Pairie dès 1459. *Registres Barbines fol. 204.* par le Roy Charles 7. en faueur de Jean de Bourgongne: cōfirmé par le Roy Louys 11. le penultiesme Iuillet 1464. & par le Roy Louys 12. autre creation faite par Eugilbert de Cleues en Mars 1505. enregistree au Parlement. *Registr. des Ordon. de Louys 12. p. 179. Choppin. de Domanio lib. 3. p. 493. derniere edition 1605.* Or par le narré des lettres en erection de Duché il est porté en consideration des grands seruices faits à la Couronne par leurs progeniteurs, à sçauoir Jean de Bourgongne, Duc de Brabant, Comte de Nemours, ayeul de ladite Marie d'Albret contre l'inuasion des Bourguignons, & par Eugilbert de Cleues Comte d'Eu, à la conqueste du Royaume de Naples, & de Jean d'Albret, Comte de Dreux & de Rethel, pere de ladite Marie, & de ceux faits à la conqueste de Piedmont par ledit François de Cleues: & aussi que ledit Comté a esté tenu par ledit feu Jean de Bourgongne & ses successeurs apres luy en Pairie, & comme Pairs ont seruy au Sacre & Couronnement de nous & de nos predecesseurs, que sa Majesté crea en tiltre & dignité de Duché (ces mots seuls sont adjouitez, Pairie, presupposent l'ancienne; & toutesfois par ce qui suit, semble que ladite Pairie soit renouuelee) pour jouyr dudit tiltre à vne seule foy & hommage de nostre Couronne par ladite d'Albret, ses hoirs tant masles que femelles, successeurs & ayans cause, & qu'ils possèdent iceluy Duché en quelque degre qu'ils soient successeurs, & ayans cause propriétaire dudit païs, ores & pour l'aduenir, en tiltre, droict & prerogatiue de Pairie; ces derniers mots semblent operer comme creation de nouvelle Pairie; & sous le ressort du Parlement de Paris, ainsi que les autres Pairies: sauf pour les cas royaux & privileges, & outre le vouloir & consentement de nostre dite cousine d'Albret, sans toutesfois qu'il soit fait aucun preiudice à son droit de propriété ou possession, ou autrement octroyé à son fils unique la dignité, nom & tiltre de Duc dudit païs: Si dōnons en mandemēt, Que de ceste presente creation & erectiō de Duché & Pairie,

(par ces mots non enunciatifs, mais dispositifs, sans doute l'on doit iuger Neuers nouuel. le Pairie, & dire que l'ancienne a esté esteinte & amortie) ils facent, souffrēt & laissent jouir nosdites cousine & cousin d'Albret & Cleues respectiuelement : lesdites lettres verifiees, tant au Parlement qu'à la chambre des Comptes, purement & simplement : & est encore à remarquer que la presceance fut debattuë, comme le rapporte Chopp. *ibid.* pag. 495. Louys de Gonlague Duc de Neuers de par sa femme, par le Duc de Montmorency, à cause que ledit Duc de Montmorency disoit y auoir mutation de personnes à ladite Pairie : & sur ce ledit sieur Duc de Neuers obtint lettres de declaration du Roy du 27. Feburier 1566. Toutesfois les parties ouïes, la cause fut appointee au Conseil, en Iuin 1567. Le Duc d'Aumale querelant la mesme presceance, fut adiugee au Duc de Neuers en ce terme, que les Ducs de Neuers precederoient les Ducs d'Aumale, pour monstrier que l'on ne iugea pas la dignité des maisons, estans tous deux Princes estrangers, mais par le rang de leur Pairie. L'Arrest de la Cour est du cinquiesme Septembre 1579. & encore le mesme autheur remarque vne dispute aduenue pour la presceance entre les Ducs de Guise & de Neuers en l'an 1553. qui fut iugee au profit du Duc de Guise par l'ordre d'erection des Pairies : ainsi l'on n'eut esgard qu'à la derniere erection de celle de Neuers cy rapportee ; qui est la raison pourquoy elle est cy mise en rang contre l'ordre de du Tillet.

AUMALE DVCHE' ET PAIRIE.

VI.

LE Comté d'Aumale fut erigé en Duché & Pairie, sous le nom de François de Lorraine. Le fils aîné de Claude Duc de Guise, par le Roy Henry second à son aduenement à la Couronne, au mois de Iuillet 1547. verifiee en Parlement le cinquiesme Ianuier l'an 1548. & à la chambre des Comptes le douziesme desdits mois & an.

ANNOTATION.

Ledit Comté d'Aumale fut erigé en Duché en faueur des recommandables seruices dudit François, & qu'au Sacre du Roy Henry second, il auoit seruy de Pair, pour en jouir par luy du tiltre, & par Claude de Lorraine son frere ensuiuant le contract de mariage de luy & François de Buze fille de la Comtesse de Valentinois, Diane de Poictiers, à la charge que ladite Pairie demeurera esteinte à faute de males, demeurant ledit Duché en sa qualité avec exemption du ressort fors en cas royaux : verifié en Parlement pour la directe iurisdiction au Parlement, pour les cas concernans seulement la Pairie.

MERCŒVR DVCHE' ET PAIRIE.

VII.

LA Principauté de Mercœur fut erigee en Duché & Pairie pour Nicolas de Lorraine, Comte de Vaudemont, par le Roy Charles neufiesme au mois de Decembre 1569. verifié en Parlement ; avec lettres de sur-annation du Roy Henry troisieme du 20. Aoust l'an 1576. Le n'ay trouué la verification de la chambre des Comptes.

ANNOTATION.

CE fut fait en faueur de ce que ledit Nicolas se seroit interposé & aydé à la paix d'entre le Roy Henry second & le Roy d'Espagne, & aussi pour la grande prudence, soing & vigilance, avec laquelle il a administré les biens & estats de Messire François Duc de Lorraine, pendant sa Minorité : loint la grandeur de la maison dont il est extraict, & que ladite Principauté est composee de plusieurs bonnes villes, bourgs, bourgades & chasteaux, & de plusieurs vassaux, comme Comtez & Baronnies, pour jouir de ladite Duché & Pairie, tant males que femelles à tousiours, & tenir de la Couronne de France, & pource eclypsee du pais & Duché d'Auuergne, pour le regard de la foy & des droicts de Pairie, avec ressort au Parlement de Paris, pour ce seulement, avec derogatoire à l'ordinaire pour la reunion des Duchez, Marquisats & Comtez à la Couronne, & mesme à l'institution, ou que l'on pourroit pretendre le nombre des Pairs estre prefix.

MONT-

MONTMORENCY DVCHE' ET PAIRIE.

VIII.

LA Baronnie de Montmorency fut erigee en Duché & Pairie pour Anne de Montmorency, Connestable de France, par Henry second au mois de juillet 1551. verifié au Parlement le 4. Aoust, & en la chambre des Comptes le 5. ensuiuant audit an.

Du Tillet pag. 38. met ladite erection en juillet 1546. & se trouue au vol. 2. des Ordonn. du Roy François 1. p. 186.

ANNOTATION.

ET ce en faueur des grands & recommandables seruices, & que c'est la premiere Baronnie de France, & de la Noblesse de ses predecesseurs, specialement de Matthieu de Montmorency Connestable de France sous Philippes Auguste, à la charge que deffail-lans les masles, la Pairie demeurera esteinte, restant seulement le tiltre & la dignité de Duché sans distraction de ressort.

PONTHIEVRE DVCHE' ET PAIRIE.

IX.

LA Comté de Ponthieure fut erigee en Duché & Pairie pour Sebastian de Luxembourg, Comte de Ponthieure, Vicomte de Martigues, par Charles 9. en Septembre 1569. verifié en Parlement le 15. dudit mois, & en la chambre des Comptes le septiesme Octobre ensuiuant.

ANNOTATION.

EN consideration des grands seruices, dignité & grandeur de la maison de Luxembourg, dont aucuns ont esté Empereurs & aliez és maisons de France, Bourgongne, Sauoye, & Bretagne, & de la proximité du sang & lignage : pour en jouir par ses hoirs & successeurs tant masles que femelles, tant pour le regard du Duché, que de la Pairie : lequel Duché est des-vny seulemēt pour la Pairie du Duché de Bretagne, & sans que luy & ses successeurs soient forclos d'assister aux Estats de Bretagne, comme les Comtes de Ponthieure ont accoustumé d'y assister, avec l'exemption de iurisdiction, fors les cas royaux & ressort au Parlement de Bretagne, excepté pour les cas & droicts de la Pairie, & à la charge qu'au defaut des masles & des femelles ja procreées ou qui pourroient estre procreées dudit de Luxembourg, ou que lesdits enfans n'ayent aucuns masles, tellement que la ligne masculine vienne à faillir, la dignité de Duc & Pair demeurera esteinte, & ladite terre & seigneurie retournera en son premier estat de Comté de Ponthieure. La Cour en verifiant ladite Pairie a approuué le ressort audit Parlement de Bretagne, excepté és cas concernans la Pairie & sans tirer à consequence. A la charge qu'il viendra faire le serment à la Cour.

MAYENNE DVCHE' ET PAIRIE.

X.

LE Marquisat de Mayenne fut erigé en Duché & Pairie pour Charles de Lorraine fils second de François Duc de Guise par le Roy Charles 9. au mois de Septembre 1573. verifié au Parlement le 24. desdits mois & an.

ANNOTATION.

EN faueur des grands & signalez seruices que Claude & François de Lorraine Ducs de Guise, pere & ayeul, & de ceux de Henry Duc de Guise son frere aîné, & particulièrement de ce qu'il deffendit Poictiers & les siens durant les troubles, és sieges & batailles dernieres, pour en jouir par luy & ses successeurs, & ayans causé tant masles que femelles, avec les Baronnies & terres reünies, & les tenir à vne seule foy & hommage de la Couronne, avec exemption de iurisdiction, fors en cas royaux & ressort au Parlement de Paris : & neantmoins que ledit Duché & Pairie pourra estre separé & subdiuisé, comme si lesdites terres n'estoient vnies. Si donnons en mādement &c. à ce qu'ils ayēt à faire jouir luy, lesdits hoirs, & ayans causé dudit Duché & pairie : nonobstant que les filles n'ayent accoustumé d'y succeder.

PINEY DVCHE' ET PAIRIE.

XI.

LA Duché de Piney fut erigée en Pairie par le Roy Henry troisieme au mois d'Octobre 1581. pour François de Luxembourg verifié au Parlement le trentiesme Decembre audit an.

ANNOTATION.

LE Duché a esté erigé en Decembre 1576. par le Roy Henry troisieme, pour ledit François de Luxembourg, & à iceluy reüny plusieurs terres y mentionnees pour en jouyr par iceluy sieur de Luxembourg & ses hoirs, tant masles que femelles, & ayans cause, à vne seule foy & hommage, à cause de la Baronnie & grosse tour du Loure, (auparavant il releuoit du Comté de Chaumont en Bassigny) avec ressort au Parlement de Paris immediatement & sans aux cas Presidiaux, que les subiets dudit Duché seroient tenus de se pourueoir au Presidial dudit Chaumont, les cas royaux y sont exceptez. Il y a derogatoire à l'Edict de Moulins, pour l'vnion des Duchez, Marquisats & Comtez, à faute de masles, & ladite erection de Duché verifié en Parlement, apres plusieurs, & sans tirer en consequence le 18. Septembre 1577. & en la chambre des Comptes le neufiesme Aoust 1528. & depuis ledit Duché fut erigé en Pairie par le Roy Henry troisieme pour en jouyr par ledit sieur de Luxembourg, ses hoirs & successeurs masles & femelles & ayans cause: lescdites erections de Duché & Pairie faites en faueur de la grandeur Imperiale & Royale maison de Luxembourg, dont sont sortis quatre Empereurs, Marquis du Saint Empire, Connestables, & Mareschaux de France, & du costé maternel, Bonne de Luxembourg, mariee au Roy Iean, les Roys de France 5. 6. & 7. & suiuan, lse maisons d'Anjou, de Berry & de Bourgogne, & des grandes alliances d'icelle maison avec la France, l'Angleterre, l'Autriche, Hongrie, Dannemark, Sauoye, Lorraine, Cleues, Neuers, Flandres, Bar, Brabant, Anguien, & avec tous les Princes & Potentats d'Allemagne, & en consideration des graces & signalez seruices de luy & de ses predecesseurs faits à ceste Couronne par Valerian & Charles de Luxembourg, Connestable, & Anthoine de Luxembourg Mareschal de France.

AIGVILLON DVCHE' ET PAIRIE.

XXI.

LA Baronnie d'Aiguillon fut erigee en Duché & Pairie pour Henry de Lorraine, fils aîné de Charles Duc de Mayenne, par le Roy Henry quatrieme au mois d'Aoust 1599. verifié au Parlement le deuxiesme Mars 1600.

ANNOTATION.

EN faueur des seruices dudit sieur Duc de Mayenne son pere & de ses predecesseurs faits à ceste Couronne, & de la proximité dont il nous touche, tant de sa personne que de nostre tres-chere cousine Henriette de Sauoye son espouse mere dudit Henry, & aussi en consideration du mariage contracté entre luy & nostre tres-chere & tres-aymee cousine Henrye de Gonsague, fille du feu sieur Duc de Neuers & de la Duchesse de Neuers son espouse: ladite Baronnie erigee en tiltre de Duché & Pairie, y annexees & vnies, les Baronnies de Montpesac, Saint Liuradie, Madaillan & Bleuirat, pour en jouyr par ledit Henry, ses successeurs, & ayans cause perpetuellement & à tousiours, à vne seule foy & hommage de nous & de nostre Couronne, à cause de nostre chasteau du Loure, avec attribution du ressort immediatement des appellations du Bailly ou Seneschal ducal estably audit lieu d'Aiguillon & des terres y annexees au Parlement de Bourdeaux, entre les subiets de ladite Pairie, & pour le regard des causes, où il aura interest à la Cour de Parlement de Paris, ancien ressort des Pairs de France, soit en premiere instance ou pour appel, ainsi que bon luy semblera, & exception des cas royaux, avec la derogatoire aux Edicts & Ordonnances, touchant l'vnion des Duchez, Marquisats & Comtez à la Couronne, au deffaut des masles: lescdites lettres sont verifiees au Parlement purement & simplement, apres le serment de fidelité fait au Roy.

ROHAN

ROHAN DVCHE' ET PAIRIE.

XII.

LE Vicomté de Rohan erigé en Duché & Pairie pour Henry de Rohan, sieur de Leon, par le Roy Henry quatriesme au mois d'Auril 1603. verifié en Parlement à Paris le 7. Aoust audit an, & en celuy de Bretagne le 16. Octobre audit an, & en la chambre des Comp-tes le 28. May 1604.

ANNOTATION.

Ceste declaration est fondée sur l'ancienne noblesse & vertu de ses predecesseurs, mesme de nostre oncle, René, Vicomte de Rohan son pere, & des siens, que ceux de ceste maison ont tenu les premiers rangs en l'establissement de ce Royaume, prés des Roys de France & de Nauarre, & des anciens Roys & Ducs de Bretagne, & pour la grande & belle lignee des personnes illustres qui en sont descenduës en ligne masculine, depuis 1200. ans. Que ledit Vicomté contient plusieurs villes closes, & plus de 40. paroisses & plusieurs fiefs & arriere fiefs qui en releuent, pour iouir de ladite Duché & Pairie par ledit sieur de Rohan, & ses successeurs masles, à la charge que venant à deffaillir, ladite qualité de Duc & Pair demeurera esteinte, & releuera iceluy Duché & Pairie de la Couronne à vne seule foy & hommage, avec ressort immediat au Parlement de Bretagne: verifié à la Cour de Parlement de Paris, aux charges de tiltre & prerogatiue d'honneur seulement de Duc & Pair, iusques à ce qu'il ait satisfait à indemnité pour la diminution du domaine & droicts de iurisdiction, & que les causes de la Pairie seront traittes & iugees en la Cour de Paris priuatiement à la Cour de Parlement de Bretagne, & sans tirer à consequence: ausquelles charges & conditions ledit sieur de Rohan a fait sermēt à la Cour de Duc & Pair le septiesme Aoust 1603. & au Parlement de Bretagne lesdites lettres ont esté enregistrees, à la charge que les subiects dudit Duché & Pairie, ne pourront estre distraicts hors dudit Parlement, & qu'il en apportera les lettres de declaration de sa Majesté dans six mois, & sans preiudice des droicts des opposans & des cas reservez aux iuges royaux.

IOYEUSE DVCHE' ET PAIRIE.

XIII.

LE Vicomté de Ioyeuse fut erigé en Duché & Pairie, pour Anne Vicomte de Ioyeuse par le Roy Henry troisieme en Aoust 1582. verifié en Parlement le 7. Septembre audit an.

ANNOTATION.

EN faueur de l'alliance nouvellement contractee, par laquelle il estoit deuenu beau-frere de la Royne, ayant espouse sa sœur, pour en iouir par luy & apres son deceds par ses enfans & ses hoirs successeurs, & ayans cause, & pour marcher, seruir & operer immediatement apres les Princes & auant tous autres Ducs & Pairs, non Princes, verifié au Parlement, apres plusieurs iussions sur les remonstrances de la Cour, pour en iouir par luy & ses descendans en loyal mariage.

RETHELOIS DVCHE' ET PAIRIE.

XIV.

LE Comté de Retheinois fut erigé en Duché & Pairie pour Louys de Gonsagues & Henriette de Cleues son espouse, Duc & Duchesse de Neuers, Comte & Comtesse de Retheinois, en Decembre 1581. par le Roy Henry troisieme, verifié en Parlement le 13. desdits mois & an.

ANNOTATION.

Ladite erection faite à cause de la grande estendue dudit Comté, qui a six villes closes, y comprise la Baronnie de Rozay, vnie & incorporee, pour en iouir par eux, leurs hoirs, & successeurs, masles & femelles, & ayans cause à perpetuité au tiltre & dignité de Duché: Nota que le mot de Pairie n'est point reperé. Verifié au Parlement pour en iouir, luy & ses successeurs.

HALVYN DVCHE' ET PAIRIE.

XV.

LE Marquisat de Magnelay, composé de 16. ou 17. villages, fut en l'an 1586. créé & erigé en Duché & Pairie de France, sous le tiltre d'Aluyn par le Roy Henry troisieme en faveur du Seigneur & Dame de Magnelay, en consideration des seruices rendus par ceux de la maison de Pienne, & pour la memoire de celle d'Aluyn en Flandres.

ANNOTATION.

Ledit Seigneur de Magnelay a eu vn fils, lequel il a suruescu, & luy decedé, sa femme a porté le tiltre de Douairiere & Duchesse d'Aluyn, attendu qu'elle ladite creation auoit esté faite, tant pour ledit deffunct son mary que pour elle, ladite Dame Douairiere, viuant encore le Roy Henry 4. le Roy Louys 13. à présent regnant, sous la tutelle de la Roynne sa mere, en consideration des seruices de Monsieur le Duc d'Espéron, de ceux de la maison de Candale & de Pienne, a continué ledit Duché & Pairie es personnes du Comte de Cādale, fils aîné dudit Seigneur Duc d'Espéron, qui a espousé la fille vniue de la Marquise de Magnelay petite fille dudit sieur Duc d'Aluyn, & en tant que besoing estoit l'a de nouveau créé & erigé par lettres parentes en l'an 1611. verifié en Parlemēt le 28. May audit an, & ledit sieur de Candale apres sermēt par luy presté, a esté receu audit Parlement par Arrest d'iceluy du 23. Auiil 1614. lequel sieur de Candale, pretend l'ordre & le rang dudit Duché d'Aluyn en son erection premiere, en consequence desdites lettres, portans continuation, comme si ladite Duché n'eust point vaqué. Du depuis la Dame Marquise de Magnelay a fait dissouldre ledit mariage de sa fille d'avec ledit sieur Comte de Candale, pour quelques raisons iustes & legitimes: de sorte que ladite Comté d'Aluyn reduite en Duché & Pairie, elle a espousé en secondes nopces le Comte de Nantheuil fils du Comte de Schombergh, qui à raison dudit mariage prend le nom, la qualité & le tiltre de Duc & Pair d'Aluyn.

MONTBASON DVCHE' ET PAIRIE.

XVI.

LE Comté de Montbason erigé en Duché & Pairie, pour Louys de Rohan, Comte dudit lieu, par le Roy Henry troisieme au mois de May 1588. verifié en Parlement à Tours le 27. Auiil 1589. & en la chambre des Comptes le 7. May audit an.

ANNOTATION.

EN consideration de la haute & ancienne maison de ceux de Rohan, descendants (comme ils disent) du premier Roy de Bretagne, qui a continué depuis 1200. ans tousiours de masse en masse, & des alliances qu'ils ont eues aux plus grandes maisons de la Chrestienté, & des grands & signalez seruices faits par les predecesseurs, spécialement par Pierre de Rohan, Seigneur de Gié, Mareschal de France, à la iournee de Fornioie, pour jouir desdits Duché & Pairie, esquels sont vnies & incorporez les Baronnie de Sainte Maure, Monastere & la Haye, pour luy & ses successeurs masses seulement de luy descendants, & les tenir en foy & hommage de la Couronne, aux exemptions de iurisdiction & appel desdites terres vnies pardeuant le Bailly ducal dudit Montbason, & par appel à la Cour, à la charge que deffaillans les masses, la qualité de Duc & Pair sera esteinte & retournera ladite terre en l'estat qu'elle estoit. La Cour verifiant lesdites lettres, pour le regard de la qualité, rang, dignité & autorité de Duc & Pair, l'a receu au serment, & pour la distraction du ressort, reglement & indemnité requise par Monsieur le Procureur General & autres ordonnances, qu'ils seront ouïs en leurs oppositions pour y estre reglez, ainsi que de raison, & à la chambre des Comptes, aux conditions portees par l'Arrest de la Cour, & sans preiudice des droicts du Roy, pour lesquels sera informé dans six mois en la maniere accoustumee.

VENTADOVR DVCHE' ET PAIRIE.

XVII.

LE Duché de Ventadour fut erigé en Pairie par Henry troisieme au mois de Iuin 1589.

Annotation.

ANNOTATION.

A Vparavant c'estoit vn Comté qui fut erigé en Duché au mois de Feburier par Henry troisieme pour Gillebert de Leui, ses hoirs & successeurs masculins: laquelle erection fut verifiée au Parlement le 13. May audit an.

Le Procureur general stipulant, & du consentement d'iceluy de Leui, la reuersion dudit Duché à la Couronne, à deffault de masculins, & en la chambre des Comptes le troisieme Iuin audit an, aux charges & conditions portees par l'Arrest de la Cour, la verification de la Pairie au Parlement, fut faite par consequent des lettres du Roy quatrieme pour jouir de la mesme grace accordee audit feu Gilbert, pere pour Messire Anne de Leui son fils, le tout à la charge de reuersion & des clauses portees par l'Arrest de la Cour du 13. May, 1578. interuenu sur les lettres d'erection dudit Duché & sans aucune chose innouer en la iurisdiction & ressort accoustumé, & depuis par lettres de la declaration dudit Roy Henry 4. du 9. Iuin 1609. verifiées en Parlement le 3. Iuillet audit an & en la chambre des Comptes le iour de ensuiuant, ladite clause & charge de reuersion a esté leuee & ostée.

THOVARS DVCHE ET PAIRIE.

XVIII.

L A Duché de Thotars erigee en Pairie pour Claude de la Trimouille Duc dudit lieu en Aoust 1595. verifié en Parlement le 7. Decembre 1599. & ce par Henry 4.

ANNOTATION.

L Edit Duché de Thotars erigé au mois de Iuillet 1563. par le Roy Charles 9. en consideration des seruices de ceux de la maison de la Trimouille, & specialement de feu Louys, Seigneur de la Trimouille, Lieutenant du Roy Charles 8. en la bataille de Sainct Aubin, & en la iournee de Marignan, & en la bataille de l'auie, il combatit près du Roy François premier, où il fut tué, & que Charles de la Trimouille, Prince de Talmond son fils, fut aussi tué à ladite iournee de Marignan, & pour ses grands & signalez seruices, & de l'antiquité & haute noblesse de ladite maison de la Trimouille, & pour les seruices faits par ledit Claude de la Trimouille en ces guerres dernieres aux sieges & batailles, & specialement en celle d'Yury, & pour ses merites & alliances qu'il a avec sa Majesté, elle auroit vny à ladite qualité de Duc celle de Pair de France, pour en jouir par luy & ses successeurs, masculins tant seulement, & d'abondant distraict de la iurisdiction du Seneschal de Poictou, la iustice dudit Duché & Pairie, fors les cas royaux, & pour tenir iceluy Duché & Pairie du Roy, à cause de sa Couronne, & à deffault de masculins, la qualité de Pair demeurera esteinte, & la terre en l'estat qu'elle estoit auparavant: avec la derogatoire aux ordonnances pour la reunion desdits Duchez, Marquisats & Comtez à la Couronne. Verifié en Parlement pour jouir du tiltre & prerogative de Pair & sans preiudice à la reunion au Domaine de la Couronne pretendue par le Procureur General du Roy du Vicomté de Thouars.

ESPERNON DVCHE ET PAIRIE.

XIX.

L A Baronnie d'Espéron erigee en Duché & pairie pour Jean-Louys de Nogaret, de la Valette, par le Roy Henry troisieme en Novembre 1581. verifié en Parlement le 27. Novembre audit an.

ANNOTATION.

L Adite erection est fondee sur l'antiquité & noblesse de la maison de Nogaret & du hardy exploit fait pour l'honneur & exaltation de ce Royaume, sous le regne de Philippe le Bel, par le sieur de Nogaret grand Seneschal de Beaucaire, dont est issu par suite de longues annees, ledit sieur Duc d'Espéron, & en faueur des seruices de feu Messire Jean de Nogaret sieur de la Valette, Cheualier de l'Ordre, & que la Baronnie d'Espéron auroit esté tenuë cy deuant par les Comtes de Vendosme & depuis par les Ducs de Bretagne, pour en jouir par luy, ses enfans masculins & femelles à tousiours, & perpetuellement, avec ressort au Parlement & exemption de iurisdiction, fors en cas royaux, & parce que nous entendons (portent lesdites lettres) honorer ledit sieur d'Espéron du mariage de l'une des sceurs de nostre tres-chere & tres-aimée espouse & compagne, la Royne,

comme le Duc de Joyeuse nostre beau-frere, voulons qu'il ait seance, voix & opinion apres les Princes immediatement, & avant tous autres Ducs & Pairs, fors ledit Duc de Joyeuse, avec la derogatiue en l'union des Duchez, Marquisats & Comtez à la Couronne, verifié en Parlement purement & simplement, apres auoir oüy Messieurs les Presidents de Thou & Preuost en leur creance, & ce faisant a esté receu Pair de France, & en consequence Conseiller de la Cour, & a fait le serment pource requis, & profession de foy qu'il a iuré. Nota que ledit sieur Duc n'a espousé la sœur de la Royne, ains l'heritiere de Candale, & partant semble qu'il y auroit quelque difficulté sur la preséance fondée sur ledit futur mariage, qui ne s'est ensuiuy.

RAIZ DVCHE' ET PAIRIE.

XX.

LE Comté de Raiz erigé en Duché & Pairie pour Albert de Gondy & Claude & Catherine de Clermont la femme, Comte & Comtesse dudit Raiz par le Roy Henry troisieme au mois de Nouembre 1591. verifié au Parlement le 20. Mars 1592.

ANNOTATION.

EN consideration que ledit Comté est de grande estendue & grand reuenu, que ses predecesseurs ont tenu le premier rang de Magistrats en la Republique de Florence, comme souverainement, & comme tels ont possédé de beaux Palais & somptueux edifices faits dedans & dehors Florence, ainsi qu'il fut verifié, lors qu'il fut fait Commandeur du Saint Esprit. (Nota, noblesse de Florence) & pour ce les seruices qu'il a rendus en six batailles cy desnommez & de plusieurs sieges en Piemont, font sçauoir en quelle qualité il y estoit. C'est la question, car on en parle diuersement: pour jouir par eux & le suruiuant d'eux, & apres par leurs hoirs & malles, tant que la ligne masculine durera, distrait de la foy & hommage, & ressort de Bretagne; Pour le regard de la Pairie, cause & droicts concernans icelle, & sans que ladite qualité luy puisse nuire & à ses successeurs malles, pour assister aux Estats de Bretagne, en qualité de Comte, Baron & Doyen de Raiz, verifié au Parlement, apres plusieurs iussions, en faisant le serment accoustumé & prealablement celui de Marechal de France. Ce fait & apres a fait celui de Duc.

FRONSAC DVCHE' ET PAIRIE.

XXI.

LE Marquisat de Fronzac fut erigé en Duché & Pairie pour François d'Orleans, Comte de Saint Paul, Gouverneur & Lieutenant General en Picardie, par le Roy Henry 4. en lanuier 1608. verifié en Parlement le 18. Februrier ensuiuant & en la Cour de Bourdeaux, au ressort de laquelle est ledit Duché de Fronzac, le 26. iour de Mars 1610.

ANNOTATION.

EN faueur des grands & signalez seruices que ceste Couronne a resenty successiuelement de ceux de la maison de Longueville, depuis le Comte de Dunois, duquel ils sont descendus, qui viuent encore en la memoire de ceux qui en ont receu le fruit, à la charge de le tenir à foy & hommage de la Couronne, l'ayant des-vny & demembré de ladite Duché de Guyenne au Comté de Perigord, duquel il releuoit, pour le regard de la foy & hommage & des droicts & dependances de Pairie seulement, veut qu'il ait opinion & voix deliberatiue en la Cour de Parlement de Paris, à la charge qu'au deffaut d'hoirs malles ladite dignité de Duché & Pairie sera esteinte & supprimee & retournera la iurisdiction en son premier estat.

DAMVILLE DVCHE' ET PAIRIE.

XXII.

LA Baronnie de Damville erigee en Duché & Pairie pour Charles de Montmorency, Admiral de France, fils & frere de Messieurs Anne & Henry, Connestable de France, par le Roy Louys 13. en Septembre 1610. verifié en Parlement le 30. Decembre audit an.

ANNOTATION.

EN faueur de ses seruices, & instruit par l'exemple des Roys ses predecesseurs & autres Princes qui ont eul la charge des plus grands estats du monde, combien il est vtile & important de remunerer & recognoistre dignement par tous hauts honneurs, charges, tiltres & dignitez, les hommes vertueux, & qui par dignes exploits en grands & importants affaires, donnerent preuue de leur suffisance & capacité, pour non seulement les faire persister

en leurs fidelitez accoustumees & les accroistre & redoubler, mais aussi pour prouoquer tous autres de les suivre & imiter, & ayant mise en consideration l'antiquité grande & la noblesse de la maison de Montmorency; le nombre des personages illustres, & excellens & magnanimes, qui en sont issus, les dignes & recommandables seruices qu'ils ont successiuellement fait à la deffence de la Couronne & conseruation en son entier, del'autorité de leurs Roys, sans iamais s'en estre departis ny desuoyez, & telle qu'entre-autres Matthieu de Montmorency en l'an 1222. auoit sous Philippes Auguste esté honoré de l'estat de Connestable de France, comme depuis Anne & Henry de Montmorency ses pere & frere, & autres considerations contenues en ladite erection; aussi que ladite Baronnie fut en l'an 1552. accreuë & augmentee par l'vnion y concedee des seigneuries de Couurilles grandes & petites minieres, de laquelle par ainsi sont à present tenus plusieurs beaux fiefs assis en 35. bonnes diuerses parroisses, toutes dependantes dudit chef de Damuille, tenu & mouuant de sa Majesté, à cause de sa Chastelenie de Bretheuil au Duché d'Eureux, en laquelle Baronnie, il y a tout droit de iustice, haute, moyenne & basse, pour en jouir & vser par ledit Charles de Montmorency, de son viuant & apres son deceds pour les enfans masles procreez de luy en loyal mariage, & au cas qu'il decede sans enfans masles, par Henry de Montmorency son nepueu, & à son deffaut & apres luy ses hoirs masles, aussi issus de luy en loyal mariage, perpetuellement & à tousiours, en qualité de Duché & Pairie de France.

VSEZ DVCHE ET PAIRIE.

XXIII.

LE Duché d'Vsez erigé en Pairie pour Iacques de Crusol Duc d'Vsez par le Roy Charles neufiesme au mois de Ianuier 1572. en Parlement le troisieme Mars audit an, & en la chambre des Comptes le deuxiesme Ianuier 1577.

ANNOTATION.

AVparauant ladite Duché n'estoit que Vicomté, & fut erigé en Duché pour Anthoinette de Crusol en l'an 1595. à la charge de retour à la Couronne à deffaut des masles, avec exemption de iurisdiction, fors es cas royaux, & ressort au Parlement de Paris des cas concernans la Pairie, & pour le surplus, au Parlement de Thoulouse, fors au cas Presidial, la verification de la Cour porte qu'il a esté receu au serment, fait profession de foy & l'a iuré.

BEAUFORT DVCHE ET PAIRIE.

XXIIII.

LE Comté de Beaufort fut erigé en Duché & Pairie par le Roy Henry quatriesme pour Cesar son fils naturel & la Marquise de Monceaux sa mere par lettres de Iuillet 1597. verifiees en Parlement le 10. Iuillet audit an, & en la chambre des Comptes le premier Aoust audit an.

ANNOTATION.

ENcore que ce Comté ne soit erigé en Duché & Pairie qu'en l'an 1597. Neantmoins le Roy par ses lettres patentes de creation, veut que ladite Dame, Cesar son fils, leurs successeurs & descendans, tant masles que femelles, tiennent rang & seance, immediatement apres les Ducs & Pairs de Montmorency, comme si elle auoit esté erigee immediatement apres.

Les considerations de ladite creation sont, que ledit Comté est vn des plus anciens & nobles Comtez de ce Royaume, qui auoit esté possédé successiuellement par les Princes des maisons de Foix, d'Albret & de Neuers, & acquis par ladite Dame de Monceaux, de Madame de Guise, heritiere en partie de ladite maison de Neuers, y vnies & incorporees la Baronnie de Lancourt & autres terres & seigneuries y nommees, pour en jouir par ladite Dame & ledit Cesar fils naturel du Roy, leurs successeurs, tant masles que femelles à tousiours, à vne seule foy & hommage de sa Majesté, à cause de la Couronne, avec ressort immediat au Parlement de Paris, des appellations, comme auparauant, en qualité de Bailly ducal, & aussi qu'en premiere instance elle & ses successeurs pourroient, si bon leur semble, traiter, conduire & faire iuger au Parlement les causes, concernans la Pairie; suiuant l'ancien priuilege des Pairs, avec exemption de iurisdiction des Iuges ordinaires, fors en cas royaux: & pour la presceance, elle est fondee sur l'amitié que porte sa Majesté à ladite Dame Marquise, & à l'honneur que Cesar son fils a d'estre issu de luy, lequel, & ses successeurs doiuent succeder audit Duché: la verification de la Cour est pure & simple, cōme celle de la chambre des Comptes.

K iij

BIRON DVCHE' ET PAIRIE.

XXV.

LA Baronnie de Biron erigee en Duché & Pairie pour Charles de Gontault sieur de Biron, Marechal General de Camp des armées, & Marechal de France, Gouverneur & Lieutenant General au pais & Duché de Bourgogne & Bresse, par le Roy Henry quatriesme au mois de Iuin 1598. verifié en Parlement le dernier iour desdits mois & an.

ANNOTATION.

EN faueur de la vertu & generosité qui reluit en la personne dudit sieur de Biron, qui de soy-mesme est grande, & a de soy-mesme assez de lustre pour auoir besoing d'estre d'ailleurs recommandee à la Posterité, fondees & eleuees, avec les merites de tant de longs & signalez seruices faits au Royaume par deffunct le Marechal de Biron son pere, & que le fils a continuez & augmentez, avec tant de fidelité & affection; que l'on peut à bon droit referer à ses trauaux vne bonne partie de la gloire acquise à ceux qui sous son authorité se sont vertueusement opposez à la cheute & ruine de l'Estat durant les dernieres eleuations, ne voulans neantmoins delaissier de faire cognoistre par vn tesmoignage particulier de tous ceux qui viendront apres sa Majesté, l'estime qu'elle fait des personnes si capables & si dignes, & sur tout eterniser autant qu'il luy sera possible la memoire de tant de perils & hazards courus pour le salut de la Couronne, en tous les combats, rencontres, escarmouches, assemblees & batailles qui se sont presentees depuis 20. ans qu'il commença à porter les armes, où il s'est acquis tout ce qui se peut de gloire & d'honneur, se trouuant blessé de 32. blessures qui sont autāt de marques honorables de sa vaillance, & ayant passé par toutes les charges & grades qui l'ont peu rendre digne du commandement des principales armées: desquelles luy ayant aux derniers troubles donné la conduite, il s'en est acquitté au tres-grand contentement de sa Majesté, au bien vniuersel de luy & de ses subiects, mesme au recent exploit du siege d'Amiens, vsurpé par les armes d'Espagne, auquel il a rendu tant de preuues de prudence & de vaillance, & s'est si souuent veu couuert du feu, du fer & du sang de ses ennemis, que sa Majesté ne peut que luy donner & attribuer vn tres-grand honneur & merite de la perfection & heureuse issue de ce siege, entre tous ceux qui l'ont genereusement & fidellement seruy: Et ne pouuant rien adjouster à la reputation d'iceluy, & considerant que le seul moyen qui luy reste de le remercier & d'honorer sa personne, ensemble la principale, & quelques-vnes de ses terres & possessions du tiltre dont ses predecesseurs Roys ont quelquesfois gratifié ceux qui auoient bien merité d'eux & du Royaume, afin d'exciter par mesme moyen vn chacun par cet exemple de suiure le chemin de sa vertu & de ses seruices: Depuis ayant esté condamné à mort par Arrest de la Cour de Parlement du dernier de Iuliet 1602. ladite Duché auroit esté confisquée & remise en sa premiere nature, ayant sa Majesté fait don de ladite confiscation au sieur de Saint Blancard son frere.

SULLY DVCHE' ET PAIRIE.

XXVI.

LA Baronnie de Sully erigee en Duché & Pairie pour Maximilia de Berhune Marquis de Rhosny par Henry quatriesme en Feburier 1606. verifié en Parlement le neuuesme Mars audit an, & en la chambre des Comptes le 15. desdits mois & an.

ANNOTATION.

EN faueur des grands & signalez seruices vtiles à cet Estat & de ses merites erigee, y annexees les Baronnies & Seigneuries de Molinfront, Sully, Saint Gondon & la Chapelle d'Anguillon pour jouir desdites Duché & Pairie par luy & ses successeurs masles, tant que la ligne masculine durera, & pour le tenir à la foy & hommage de la Couronne, à la charge que deffaillant la ligne masculine la qualité de Duc & Pair demeurera esteinte, & retournera en l'estat qu'elle estoit auparauant, avec derogatiue aux ordonnances, reünissant les Pairies, Marquisats & Comtez à la Couronne à faute de masles, la verification du Parlement est à la charge de donner de son consentement recompense, tant des terres feodales que distraction de ressort & dependances d'icelles, & a fait le serment accoustumé & iuré fidelité au Roy.

CHASTEAU

CHASTEAV-ROUX DVCHE' ET PAIRIE.

XXVII.

LE Marquisat de Chasteau-Roux en Berry erigee en Duché & Pairie pour Henry de Bourbon, Prince de Condé, premier Prince du Sang, & premier Pair de France, par le Roy Louys XIII. en May 1616. verifiée en Parlement le 3. Aoult ensuiuant.

ANNOTATION.

EN faueur de ce que les maisons, terres & Seigneuries de ceux qui approchent de consanguinité à la Majesté, cōme faiēt le dit Seigneur Prince, soient releues & remarquées par dessus les autres de villes & qualitez, & dignitez conuenables & correspōdantes à l'honneur qu'ils ont de luy appartenir, aussi que le dit Marquisat qui cy-deuant estoit possédé par deux diuers Seigneurs, a este reuny par le dit Seigneur, lequel par ce moyen se trouue le plus ancien & noble de tout le pays & Duché de Berry, mouuant de sa Majesté à vne seule foy & hommage d'un grand domaine & reuenu, ville belle & grande aux droicts de Iustice & ressort vulgairement appellé Chasteau-roux, & dont ladite Seigneurie prend son nom, & à cause de laquelle il est recogneu fondateur de plusieurs Colleges, Abbayes & communautéz, & de luy sont mouuans en plein fief plusieurs villes, Baronnies, Chastellenies & Chasteaux, places fortes, Iustices, terres & Seigneuries, d'aucunes desquelles releuent plusieurs fiefs, Iustices, arrieriefiefs & retroiefiefs lors au pays & Duché de Berry, Touraine, Blaisois, Poictou & Bourbonnois, outre & sans la ville de Chasteaux-roux: appartient aussi audit Seigneur Prince la Barōnie, Iustice & ressort de la riuere d'Indre, tenuë & mouuāt de sa Majesté, à cause du Comté de Blois, & sous le ressort du Bailliage dudit Comté, luy appartient pareillement le Domaine & Seigneurie de la Baronnie & ville de Chastre, mouuant en fief du Marquisat de Chasteau-roux, & estant neantmoins du ressort & Iurisdiction du Bailliage de Berry à Issoudun; comme au semblable les Baronnies de Commiers, S. Chartier, & le Bourg de Deolz: toutes lesquelles choses sont vnies à ladite Seigneurie, en ce qu'elles appartiennent audit Seigneur Prince, & les Iustices & suzeraineté, ressort & Iurisdiction dudit Chasteau-roux, la rendent des plus belles de ce Royaume.

D'EV COMTE' ET PAIRIE.

XXVIII.

LA Comté d'Eu en Normandie erigee en Pairie en Aoust 1458. par le Roy Charles VII.

ANNOTATION.

LE Roy Charles VII. l'erigea en Pairie, en faueur de Charles d'Artois, Prince du Sang, elle est à present possedee par Madame Catherine de Cleues, Duchesse, Douairiere de Cuise, & est seule Comté en France, non reunie à la Couronne. Il y a vne declaration du Roy Louys XI. que le Comte d'Eu iouisse pour son Comté des droicts de Pairie, nonobstant le traité faiēt avec M. Charles de France, Duc de Normandie, frere dudit Roy, le 15. Ianuier.

DVNOIS, DVCHE' ET PAIRIE.

XXIX.

LE Comté de Dunois fut erigé en Duché & Pairie par le Roy François premier, en faueur des seruices rendus aux roys ses predecesseurs par François d'Orleans, Comte de Dunois.

S O U S L E R E G N E D U R O Y L O U Y S X I I I.

heureusement regnant, quantité de Breuets de Duc & Pairs de France, ont esté donnez à plusieurs Seigneurs par sa Maïesté, dont les noms s'ensuiuent.



S D I G V I E R E S erigee en Duché & Pairie, en faueur de Messire François de Bone, Marechal de France, Lieutenant General pour le Roy en Dauphiné. Il a esté receu au Parlement de Paris.

Charles de Cossé, Marechal de France. La Comté de Brissac erigee en Duché & Pairie.

Maille erigé en Duché & Pairie pour Charles d'Albert, Sieur de Luy-nes, en l'année 1619. receu au Parlement de Paris.

Honoré Albert Marechal de France, créé Duc de Chaufne, & Pair de France, receu au Parlement de Paris.

Roger de Bellegarde, Grand Escuyer de France, Duc de Bellegarde, & Pair de France.

Iean Louys de la Valette pourueu d'un Breuet de Duc & Pair de France.

François de Silly, Comte de la Rocheguyon, pourueu d'un Breuet de Duc & Pair de France.

François, Comte de la Rochefoucault pourueu d'un Breuet de Duc & Pair de France.

A V parauant que de finir ce traicté de la Noblesse & du Gouuernement, il est à remarquer ce qui suit, qui est mesme passé par Arrest du Priue Conseil du Roy du 10. Mars 1578.

Premierement la terre qui est erigee en Chastellenie doit auoir d'ancienneté haute Iustice, moyenne & basse sur les subiects d'icelle, droit de Foire, Marché, Preuosté, peage, & preeminences, sur tout és Eglises estans dedans ladite terre.

2. Il faut que la Baronnie soit composee de trois Chastellenies pour le moins qui seront vnies & incorporees ensemble, pour estre tenuës à vn seul hommage du Roy.

3. Que le Comte aura deux Baronnies & trois Chastellenies pour le moins, ou vne Baronnie & six Chastellenies vnies & tenuës comme dessus.

4. Le Marquisat sera composé de trois Baronnies & six Chastellenies vnies & tenuës du Roy.

Et finalement par Edict du Roy Henry III. par lequel est ordonné que d'oresnauant, aucun de quelque qualité, dignité & autorité qu'il soit, ne sera pourueu & créé Duc & Pair de France, si la terre & ses annexes qui seront ainsi erigeez ne vallent de reuenu annuel, la somme de huit mille escus, & à la charge expresse, & non autrement qu'incontinent que celui en la faueur & personne duquel sera faite ladite creation de Duché & Pairie, & qu'il l'aura acceptee, & entré en iouissance, sera decedé, soit qu'il ayt enfans masles ou femelles, descendans de luy en loyal mariage, ou qu'il n'ait point d'enfans en quelque sorte & maniere que ce soit, ladite terre, Duché & Pairie sera jointe, vnies & incorporee à son Domaine: cét Edict & declaration dudit Roy pour les creations des Duchez, Marquisats, & Comtez est au 5. vol. des Ordon. dudit Roy, fol. 37.

Venons maintenant aux autres Officiers de la Couronne, tous Princes ou bien grands Seigneurs.

27. Le Grand-Maistre, dont la charge est presque semblable à celle des anciens Maires du Palais, a surintendance sur tous les Officiers de la maison du Roy, & c'est à luy à faire toutes les années l'estat de ceste maison, & d'appointer, ou desappointer iusqu'aux moindres Officiers, & leur commander: tellement qu'aucun de ceux qui sont aux gages du Roy en la suite ordinaire, ne se doit dispenser de l'obeïssance du Grand-Maistre, & volontiers cest estat est entre les mains des Princes, comme on le void aujourdhuy entre celles d'un Prince du Sang. Et ceste charge de Grand-Maistre n'empesche pas qu'on n'en puisse auoir vne autre en mesme temps: veu qu'on a veu deux Grands-Maistres, dont l'un, c'est à sçauoir Anne de Montmorancy estoit Connestable en mesme temps, & l'autre, c'est à sçauoir François de Lorraine Duc de Guise, estoit Lieutenant general sous le Roy Henry II.

Le nom de Grand Chambellan fait assez paroistre sa charge, d'autant qu'il est comme chef de ce qui concerne la Chambre du Roy. C'est luy qui peut faire donner ou refuser l'accez à ceux qui veulent entrer pour parler au Roy, & qui a commandement sur tous les Gentils-hommes de la Chambre, qui sont en tel nombre qu'il plaist au Roy, & ont charge d'habiller, & deshabiller. Parmy ces Gentils-hommes il y en a vn qui se nomme Premier, qui est par

est par dessus les autres & commande aux Pages de la Chambre. Auiourd'huy il y a deux premiers Gentils-hommes qui sont en charge, chacun selon qu'il plaist au Roy l'ordonner. Le Grand Chambellan a pareillement puissance sur tous les autres (de quelque sorte qu'ils soient) qui seruent le Roy dans la Chambre, comme valets de Chambre, Maistres & Valets de Garderobbe, & tous autres. Au reste c'est au Grand Chambellan à chauffer, & tirer les bottines au Roy le iour de son Sacre.

Quant au grand Escuyer, il a charge des Escuyeries du Roy, & a commandement sur les Gentils-hommes commis sur l'Escuyerie, & sur les Escuyers, Pages, Cheuaucheurs, & Piqueurs qui y sont, de sorte que tous les cheuaux tant de seruice, que des haras mesme, sont sous sa puissance. Il doit porter l'espee Royale semee de fleurs de Lys en toutes les ceremonies solempnelles, comme aux entrees, sacres, & enterrements des Roys. Auiourd'huy ceste charge est presque partagée en deux, & le premier Escuyer semble auoir mesme autorité que le Grand, qui doit auoir aussi commandement sur les Postes, & donner commission à celui appelé le Controolleur des Postes. Il est vray qu'aujourd'huy le Controolleur general des Postes dispose de toute chose.

Il n'y a chose qui soit plus seante au Prince que la Chasse, pource qu'elle rend le corps plus disposé à supporter toute peine, & fait fuyr l'oisiueté, & la paresse, qui est la peste des ames. Il y a donc pour cest effect vn grand Veneur, & vn grand Fauconnier. Ceux-cy scauent en quel temps le Roy veut aller à la chasse, & s'il veut voler, ou courre le Cerf, & selon sa volonté ils se disposent à luy donner du plaisir. Ils ont commandement sur les Gentils-hommes de la Venerie, & sur tous ceux qui ont charge des chiens, & des oyseaux du Roy.

Les Maistres d'Hostel sont comme les bons ménagers de la maison du Roy, de la despence de laquelle il faut qu'ils ayent cognoissance, & en oyent les comptes. Ils portent vn baston garny d'argent aux deux bouts, & deuant les Gentils-hommes qui seruent le Roy, lors qu'on veut seruir les viandes.

On dit qu'au temps passé ils auoient charge de mettre taux aux viures, & de faire plusieurs autres choses, qui leur ont esté ostées, & sont à present de la charge du Preuost de l'Hostel, veu que beaucoup de choses sont changees en l'exercice des charges, selon qu'il a pleu aux Roys d'en disposer, & donner autorité aux personnes qui y estoient commises.

Il y a encor pour la table du Roy le Grand Panetier, les Gentils-hommes seruants, & les Escuyers tranchants, de qui les noms monstrent assez leur charge. Or le grand Panetier eut autrefois autorité sur la police des bleds, & du pain, pour voir si le poids en estoit iuste, & la mesure loyale, & mesme il y mettoit le prix. Auiourd'huy le Panetier est celui qui fait essay des plats qu'on vient à seruir deuant le Roy. L'Eschançon fait aussi le mesme essay du vin, quel'on verse à boire au Roy, pour euitier l'inconuenient qui en pourroit arriuer, si l'un ou l'autre estoit empoisonné.

Et pource que la maison des Roys est composée d'hommes de diuerses humeurs, & que 28. pour le grand nombre des Princes, & grands Seigneurs qui sont ordinairement à la suite ordinaire de la Cour, il y a grand nombre de gens, ou pour leurs affaires, ou sans aduen, qui font souuent des fautes, comme larrecins, meurtres ou batterie, qui meritent chastiment: on a ordonné pour y pouruoir le Preuost d'Hostel, dont le tiltre emporte la qualité de iuger des choses tant ciuiles, que criminelles, qui sont entre les personnes qui suivent la Cour. Le Preuost de l'Hostel passe, & interine les graces données par le Roy à ceux de la Cour, & sa iurisdiction ne s'estend pas seulement sur la maison, & suite du Roy, ains encor six lieues à la ronde, & mesme il a sous luy deux Lieutenants, l'un de robe courte, des Sergents, qui se renomment du Preuost de l'Hostel, & cinquante Archers vestus d'hocquetons, ou casques de liuree, & de mesme que les Archers de la garde du corps du Roy qui le suivent, & le seruent, & vont poursuivre les criminels. Outre la charge susdite de la punition des forfaits, c'est à luy à mettre prix au pain, au vin, à la chair, au foin, & à l'auoine, ce qui fut iadis de la commission des Maistres d'Hostel du Roy. C'est encor à luy à cognoistre des causes de tous les Officiers de la maison du Roy, en ce qui est purement personnel, ce qui fut aussi de la iurisdiction ancienne des Maistres d'Hostel, qui auoient cognoissance des larcins & autres crimes commis à la suite de la Cour, & le Roy des Ribauts estoit estably, pour se saisir des coupables: là où maintenant le Preuost d'Hostel a toutes les deux charges.

Les cent Gentils-hommes sont la compagnie du Roy, & commis pour la plus seure, & honorable garde, & retiennent encor le nom de cent, bien que depuis le regne de François I. du nom, ils ayent esté mis en nombre de deux cents, chaque compagnie ayant vn Capitaine, & vn Lieutenant, qui marchent sous la Couronne du Roy.

La garde du Roy est partie en trois, veu qu'il y a des François, des Escossois, & des Suisses. Il y en a tant des Escossois, que des François qui portent le hocqueton, qu'on nomme Ar-

chers de la Garde, & d'autres qui ne le portent pas, qui s'appellent Exempts, & portent le baston, & sont comme Caps d'escouades, deuant les Archers, & les conduisans en l'absence des Chefs ordinaires. Outre ce il y a le Regiment des Gardes sous son Maistre de Camp.

Or entre vne si grande multitude qui suit le Roy, il faut qu'il y ayt des personnes establies pour loger toute ceste suite, & pour cest effect on a ordonné les Marechaux des logis, & les Fourriers, dont la charge est de marquer les lieux, & maisons, tant pour le Roy, que pour les Princes, Seigneurs, Officiers, & domestiques de sa Majesté.

Il y a encores à la suite du Roy certains Officiers d'Estat, des principaux du Royaume, par les mains desquels il faut que les affaires d'importance passent, de sorte que l'on ne peut faire legitimelement sans eux despesche quelconque. Ceux-cy ont tous pour leur Chef le Chancelier, qui est aussi le Chef de la Iustice de France. C'est luy qui corrige les octroys mesmes que le Roy fait, & qui peut passer le ganiuet par les Patentés, signées mesme du Roy, & de quelqu'un de ses Secretaires, tant l'autorité de cest Office est grande. C'est luy qui despesche les graces, immunités, estats, dons, offices, & autres semblables choses que les sujets requierent ordinairement, & toutes les depeschés qui sont sans son sceau, sont de nulle valeur. Que s'il arriue quelque mescontentement aux Roys contre ces Chanceliers, pource que le nom en est saint, & inuiolable, & que sans mort on ne leur peut oster le nom, & degré: on leur donne des substitués, qui portent le nom de Garde des Sceaux, d'autant que le nom de Chancelier ne leur doit estre communiqué du viuant de celuy qui a esté pourueu de cest Office.

Il ne fut jamais que les Princes n'eussent des Secretaires, & pour ceste cause il y a iusqu'au nombre de six-vingts Secretaires de la Maison & Couronne de France, entre lesquels il y en a quatre premiers, qui sont appelez Secretaires d'Estat, & des commandemens, qui font toutes depeschés, & ont le departement de leurs charges selon les Prouinces, tant dedans, que dehors le Royaume. Il y a aussi le Secrétaire du Cabinet, qui fait les depeschés des volontés particulieres du Roy, qu'il ne veut pas estre diuulguées.

On a dressé encor pour l'Estat deux Conseils de la Maison du Roy, dont l'un porte le nom de Priué, & l'autre de Grand, qui furent autresfois mesme chose, tandis que le Parlement estoit ambulatoire: mais les choses estants changées selon la necessité du temps, il a fallu diuiser aussi les offices.

Or le Priué Conseil est composé de diuers grands personnages, où preside celuy que bon semble au Roy, quand il n'assiste point, & de droit on y void assister les Princes du Sang, le Chancelier & beaucoup d'autres personnages des mieux sensez, ou plus honorables du Royaume. Et c'est en ce Conseil qu'on vuidé les affaires, tant de paix que de guerre, & autres choses qui appartiennent à l'Estat, & mesme quelquesfois on y euoque des causes de consequence, qui sont pendantes au grand Conseil, ou bien en la Cour de Parlement, & quant au grand Conseil, il est composé de toute ancienneté du Chancelier, & de 8. Maistres des Requestes de l'Hostel du Roy, & outre ce il y a dix-sept Conseillers & deux Secretaires, vn Aduocat du Roy, & vn Procureur General. En ce Conseil on iuge definitiuement, les Officiers n'y travaillent qu'un semestre, à cause que c'est comme vn Parlement ambulatoire. Ces Iuges vident les appels ciuils qui viennent deuant eux de la Cour du Preuost de l'Hostel, & iugent aussi des differents qui sont entre les Cours souueraines, & des benefices qui sont en la collation des Roys.

Les Maistres des Requestes sont les Assesseurs du Chancelier, avec lequel ils cognoissent de tous les Offices du Royaume, & de la capacité, ou incapacité de ceux qui les poursuiuent, ont puissance de donner remissions, & lettres patentés qu'on nomme de la petite Chancellerie, & ceux qui en ont affaire, ont voix es Cours de Parlement, & peuuent presider aux Bailliages, & Seneschaussées, tellement que les Lieutenans des Baillifs, & des Seneschaux leur quittent la place.

Voilà quant aux Officiers de la Maison du Roy le plus sommairement qu'il est possible: voyons maintenant ceux qui sont hors de sa maison, qui ont charge des affaires de la guerre, veu que ç'a esté de ce costé là que les Roys ont toujours pris leur accroissement, & puis nous viendrons à parler des autres.

Le Connestable a commandement sur toute la gend'armerie de France, tant de pied que de cheual, veu qu'il est General des armées qui se leuent en France, & des garnisons, en quel lieu qu'elles soient assises. Pour l'exercice de ceste Iurisdiction les Roys ont octroyé aux Connestables seance de Iustice au Palais, & vn Lieutenant à la table de Marbre, qui cognoist de tous excez, & crimes commis par ceux qui font profession des armes. Et comme il iuge des fautes de la gend'armerie, il fait le semblable de ceux qui offensent les soldats, cognoist
des

des butins, & rançons, & prisonniers, des reuoltes des soldats contre les Capitaines, & de ceux qui sans son congé quittent l'armee. C'est au Connestable à iuger des plaintes des hommes d'armes, & autres gens de guerre qui auront esté cassez, & mis hors de leurs compagnies par les Commisaires des guerres, Capitaines, Lieutenans, ou autres, commis à voir la monstre des gens de guerre. Il cognoist aussi de ceux qui sont surpris en espiant, des debtes, obligations, & contractz qui se font pour raison de la guerre, de ceux qui rendent les places fortes sans congé, ou sans endurer vne force extreme: des Gentils-hommes subiects au ban, & arriereban, qui refusent d'aller faire le seruice qu'ils doiuent au Roy, duquel ils tiennent fief de Noblesse, & affranchissement. Somme les payeurs des Compagnies, Tresoriers, & leurs Commis, les Preuosts des Mareschausses, leurs Lieutenants, & Archers, dependent de la iustice du Connestable.

Après luy il faut considerer les Mareschaux de France, qui ne peuuent comme autresfois estre demis de leurs charges, qui leur demeurent autant qu'ils vivent. Au commencement il n'y en auoit qu'un, puis on en fit deux, puis trois, & apres quatre, & de nostre temps il y en a eu iusques à six ou sept, & maintenant ils sont au nombre de cinq. L'ordonnance dit qu'il appartient aux Seigneurs Connestable, Mareschaux de France, ou leurs Lieutenants à la table de Marbre, de cognoistre de tous excez, & crimes commis par les gens de guerre, tant de pied que de cheval, au champ, en leur garnison, en y allant, ou bien en reuenant, ou tenant les champs, & des efforts aussi qu'on leur peut faire. Ils cognoissent aussi des prisonniers de guerre, des butins, & des debats qui en peuuent arriuer, de ceux qui prenans les gages du Roy, desobeissent à leurs Chefs, & partent du camp sans congé.

L'Admiral qui est tel toute sa vie, est Chef, & Lieutenant general sur mer: & par tous les lieux qui sont sur la marine, & a charge de tout ce qui s'entrepréd sur mer, comme aussi il a cognoissance de toutes les fautes qui s'y commettent. Il n'y a personne qui puisse sans sa permission mettre aucun nauiue en mer, fust-ce à ses propres cousts, & despens, ny entrer aux ports de France. Il a cognoissance de tous les differents qui aduiennent, tant pour raison des contractz faictz & passez pour le faict de la guerre, marchandise, & pescherie, que pour autres causes ciuiles & criminelles procedantes de ce qui se passe sur la mer, & il y met tels Lieutenants que bon luy semble pour en decider. C'est à luy à prendre la dixiesme de toutes les prises, & de tous les gains & profits qui se font sur mer, par quelques personnes que ce soient, & c'est à luy qu'il appartient de donner permission à ceux que bon luy semble, de harengaison, & morte saison pour pescher, veu que sans son octroy nul ne peut aller aux terres neuues, pour la pescherie des harans, & des morues. C'est à l'Admiral à faire dresser l'ordre des guetz sur les costes de la mer, lors que la necessité le requiert, & mesme il y en a qui tiennent qu'il peut faire trefues pour quelques iours avec les ennemis, qui est vn grand priuilege.

Les Lieutenants generaux des armées sont mis pour y tenir la place du Roy, la personne duquel il n'est pas bon de hazarder, comme plusieurs accidents nous ont fait cognoistre, & ceux-cy sont mis en leur lieu, pour commander aux armées, & auoir pareille autorité que le Roy auroit, s'il y estoit en personne.

Les Gouverneurs des Prouinces, qui doiuent estre en asse bon nombre en France, à cause de son estenduë, auoient autresfois le pouuoir de donner des graces, octroyer droicts de Foires & marchez, annoblir les roturiers, & legitimer les bastards, & auoient droict d'euoquer pardeuant eux les causes pendantes pardeuant les Iuges ordinaires. Mais Louys XII. reuoqua ces priuileges par vn Edict, & aneantit ceste puissance. Ils ont bien encor grande autorité, mais la Iustice ordinaire ne depend aucunement d'eux, ains seulement celle qui gist en choses appartenantes à la guerre, & bien que le Gouverneur represente le Roy, si est-ce que s'il est question d'un citoyen ou autre, ne faisant profession des armes, ce n'est à luy à le punir, ains à l'ordinaire, & l'appel ne va deuant luy, ains pardeuant la Iustice establee es Cours. Le mesme se peut dire des Lieutenants generaux pour le Roy aux Prouinces. Je ne m'estendray pas sur les charges des Colonels de la Caualerie & Infanterie, & du grand Maître de l'Artillerie, veu que le nom fait assez voir la puissance qui leur est donnee.

Ainsi que l'Ordre de l'Estoille auoit esté institué par le Roy lean, de mesme celui de S. Michel fut institué par le Roy Louys XI. à Amboise. Et le feu Roy Henry III. fut autheur de celui du S. Esprit, qui dure encor, & dont les Cheualiers iouissent d'aussi beaux, & mesme plus grands priuileges, que ceux des autres Ordres.

Il reste maintenant à voir l'establissement de la Cour de Parlement de Paris, & de toutes les Compagnies souueraines, pour le faict tant de la Iustice que des Finances.

L'un des plus anciens establissements de France, que l'histoire nous tesmoigne, est celui 30. des Parlements, qui dès nos premiers Roys, portoit le nom, non de Parlement, mais d'Estats ou d'Assemblée de notables, qui se conuoquoit de trois ans en trois ans, voire quelquesfois

plus souvent, selon l'exigence des affaires du Royaume, & ce par commandement du Roy en tel lieu & ville que bon luy sembloit, & duroient environ sept semaines ou deux mois. Et pource que tout ainsi qu'en Angleterre la tenuë frequente de ces Parlements incommodoit le peuple qui en souffroit beaucoup de fraiz & despence, furent choisies, apres tres-humbles remonstrances faictes au Roy, quelques villes des plus grandes Prouinces de France, où s'eslisoient personnes Clercs & coustumiers, experimentez aux iugemens des differents des parties, qui iugeroient des causes d'appel, comme font aujourd'huy les Cours souveraines establies en France, où se traictent & terminent les audiences priuees de chaque particulier, les plaintes publiques & generales estans reservees aux Estats generaux conuoquez sous l'autorité du Roy.

Ainsi donc es premiers temps & regnes de nos Roys, tenir le Parlement en France, ainsi qu'aujourd'huy encore en Angleterre, c'estoit assembler les Estats du Royaume, & conferer par le Roy avec ses sujets de ses plus grands, & importants affaires, prendre leur aduis & Conseil: ouyr leurs plaintes & remonstrances, & y pourvoir. De là est venu le mot de Parlement, qui a tousiours esté depuis rerenu, & prins pour le supreme & souverain Iusticier de France.

Les premieres assemblees portans le nom de Parlement se tenoient quelquesfois en plaine campagne, particulièrement en la premiere lignee de nos Roys, & iusques bien auant dās la seconde. Ainsi l'Histoire de France faict foy que le Roy Pepin voulant acheuer la guerre d'Aquitaine s'en alla à Bourges, où selon la coustume des François, il tint les Estats au milieu d'un champ. S. Gregoire de Tours faict mention en plusieurs endroits de ceste mesme coustume, disant, que lors que les Assemblees se tenoient en plain champ, les Grands Princes, Prelats & Abbez, y faisoient porter des Tentés & Pauillons pour se loger.

Tous affaires de Iustice & d'Estat se traictoiēt indifferemment en icelles Assemblees: mais sur tout les matieres Beneficiales & Ecclesiastiques, la Police & la Reformation des abus du Royaume. Il y auoit ceste seule difference, que quand les parties ne se pouuoient accorder en certains points, & que les affaires meritoient conseil & deliberation, lesdits Estats auoient esleu certains Iuges Politiques, auxquels ils les renuoyoit pour en decider en sentence definitive, & sans appel.

Or on appelloit ces Assemblees de Champ Parlemens ambulatoires, qui subsisterent en France iusques au regne du Roy Philippe le Bel, qui pourautant que ces Parlements estoient incertains comme les lieux où ils se deuoient tenir, & que les sujets souffroient de grandes incommoditez pour auoir iustice en ces Parlements ambulatoires, il ordonna par deliberation des Estats que la Cour de Parlement de France seiroit à Paris, & que les Iuges ainsi ordonnez y resideroient comme souverains & perpetuels definiteurs de toutes les appellations du Royaume. Ainsi ce grand Legislatteur Solon ordonna en la ville d'Athenes, un lieu appelle l'Areopage, où il mit des Sages Deputez, pour administrer la Iustice, auxquels ceux de la Religion alloient pour auoir iugement de leur querelle. Le semblable fit Lycurgue à Lacedemone, où il institua le Senat, pour rendre iustice à tous les sujets de l'Empire. Hippodame Legislatteur ordonna à Milese un principal siege iudiciaire de plusieurs venerables vieillards, auxquels on auoit recours en toutes sortes d'affaires. Cesar dict que les Druydes qui estoient les Philosophes, & les sages de nostre Gaule, conuenoient chacun an en certain tēps & lieu determiné, au pays Chartrain, qui estoit le milieu de la France, & là de routes parts se rendoient ceux qui auoient querelles & procez, attendans leurs iugemens, auxquels ils obeissoient. Romulus premier Roy de Rome, crea cent Senateurs esleus entre les plus gens de bien, qu'il appella Senat, & au commencement furent appelez Peres par honneur, & aussi pour les admonester de traicter les causes des particuliers par affection paternelle, & leur donna lieu en la Cour de Rome pour y resider.

Ces Parlements auparauant leur establissement à Paris estoient ambulatoires, suiuant la Cour, & se tenoient indifferemment en tous lieux, & vne fois l'an du commencement: & depuis sous Louys le Debonnaire, du tout enclin & addonné à la Iustice, deux fois l'an d'ordinaire, non toutesfois à iours certains & prefix, cōme depuis sous Philippes le Bel, lequel ordonna le Parlement sedentaire à Paris, pour y estre tenu 2. fois l'an es iours de la Natiuité, & Purification N. Dame en Feurier & Septēbre. Ce qui a changé toutesfois du depuis, sans assurance de iour certain, le Parlemēt tenāt tantost à Pasques, à la Toussainets, & autres iours tels qu'il estoit ordōné par le Roy, comme il se void encores par les anciens Registres de la Cour, nōmez *Olim*, par lesquels l'on appelle les Arrests qui se prononcēt solennellement en Robbes rouges, les surueilles & autres iours deuāt les grādes festes. Et du depuis Louys Hutin son fils, pour le rēdre plus celebre, luy assigna lieu au Palais, ancien sejour & demeure des Roys, ainsi que fit iadis l'Empereur Adriā, lequel establit pres sa personne cēt Iuges en forme de Parlemēt, à chacun desquels il fit dresser & construire logis à part, pour y rēdre sa Iustice.

Ainsi

Ainsi donc le Parlement auparavant ambulatorio fut estably à Paris par Philippes le Bel, & la Justice s'y est depuis renduë souverainement sous le nom & autorité du Roy, par gens de toutes qualitez comme Prelats, Princes, Barons, & gens du Conseil, versez & experimentez au faict de Judicature, & n'a le Parlement esté tiré de celieu, sinon lors que l'Anglois tenoit Paris & quelques villes du Royaume, & fut transferé à Poitiers depuis l'an 1418. iusques à 1436. que l'Anglois chassé de Paris, le Parlement y fut restably; ou bien pour quelque autre grande occasion qui auroit meu les Roys de ce faire, comme quand Charles VII. conuoqua le Parlement à Mōtargis, & à Vendôme, pour le procez de lean Duc d'Alençon.

Du commencement de l'establissement du Parlement à Paris il n'y auoit qu'une Chambre, & quelques fois la Chambre des Prelats, parce que le Parlement estoit composé la plus grand part de Prelats & Ecclesiastiques, ou bien que les Ecclesiastiques y presidoient, & tenoient les premiers sieges, comme ils faisoient en la Chambre des Comptes, Cour des Aydes & autres Cours souveraines du Royaume.

En apres fut establie la Chambre des Enquestes, qui a esté autres fois grande Chambre, tant à cause des grandes affaires qui s'y traitoient que pour l'autorité qu'elle auoit par dessus celle des autres Enquestes, par tout le Royaume de France: Et depuis le Parlement estably à Paris fut appelée la grande Chambre du plaidoyé, à la difference de celle des Enquestes où se iugeoient les procez par escrit.

Le Royaume aggrandy par succession de temps, & les affaires croissans au Parlement, il a aussi esté necessaire d'accroistre le nombre des Iuges, ce qui s'est faict par l'establissement d'autres Chambres des Enquestes.

Outre ceste Chambre fut aussi establie vne autre appelée des Requestes du Palais.

Et de ces Chambres du Parlement, & des Enquestes, & Requestes du Palais, fut prins nombre certain de Conseillers pour iuger les procez en la Chambre de la Tournelle, qui lors n'estoit ordinaire, ayant depuis esté erigee & establie par le Roy François I. en l'an 1515. & estoit composée de deux Presidents, 8. Conseillers de la grand' Chambre, & est appelée Chambre de la Tournelle, à cause que les Iuges y seruoient à leur tour, & alternatiuement par semestre, cōme dit Bodin, afin que l'accoustumance de faire mourir & condamner les hommes, n'alterast la douceur naturelle des Iuges, & les rendit aucunement cruels & inhumains, en exerçant continuellement leurs charges. Mais i'estime mieux qu'elle soit ainsi appelée, à raison de la Tour ou Tournelle, dans laquelle alors se iugeoient les procez criminels qui est celle qui sert aujourd'huy de Beunette à Messieurs de la grande Chambre.

En Iuillet 1519. fut erigee par le mesme Roy François I. la Chambre des Vacations, suiuant les Institutions & ordonnances auparavant faictes par le Roy Louys XII.

La Chambre des Enquestes fut diuisee en deux: la premiere la grande Chambre des Enquestes, & l'autre la petite: & pour l'affluence des affaires & procez au Parlement le Roy François I. l'an 1521. estant à S. Germain en Laye decerna par autres lettres la creation de 20. nouveaux Conseillers au Parlement, dont fut faicte & composée la 3. Chambre des Enquestes: vne autre 4. Chambre des Enquestes fut erigee au Parlement, par Edit du mois de May 1545. composée de 18. Conseillers, & 2. Presidents, puis des anciens Conseillers de la Cour.

En ce temps-là mesme sçauoir au mois de Iuin 1544. fut erigee & establie vne Chambre du Conseil, l'establissement de laquelle fut fondé sur l'abbreuiation des procez & distribution de prompte Justice, avec creation de deux Presidents nommez 5. & 6. Presidents de la Cour de Parlement, & 12. Conseillers, 4. Clercs, & 8. Laiz, pour cognoistre, iuger & decider toutes les appellations verbales, appointees au Cōseil par la grande Chambre du plaidoyé.

Le Parlement continua en ceste façon iusques en l'an 1554. que le Roy Henry second fit & ordonna le Parlement Semestre par Edict faict à Compiègne, au mois de May auditan: pour le seruice duquel il fit vn Reglement, par lequel il ordonna que la Cour de Parlement fust vn seul corps, qui seroit composé de cent cinquante six testes, sçauoir huiet Presidents de la Cour, huiet des Enquestes, 36. Conseillers Clercs, non compris les Presidents des Enquestes Clercs & 104. Conseillers Laiz, outre les 12. Pairs de France, & 20. Maistres des Requestes ordinaires: Et deuoient les Presidents & Conseillers seruir, c'est assauoir 78. en la premiere demie année commençant le premier Iuillet, & autre semblable nombre de 78. en l'autre demie année ensuiuant, commençant le 1. Ianuier: En chacune desquelles demie année y auroit 3. Chambres fournies: La grande Chambre du Plaidoyé, de 4. Presidents, & 30. Conseillers, 10. Clercs, & 20. Laiz, & chacune des 2. Chambres des Enquestes de 2. Presidents & 20. Conseillers, 4. Clercs & 16. Laiz, desquelles 3. Chambres seroient pris pour faire la Chambre de la Tournelle, 2. Presidents & 8. Conseillers Laiz de la grande Chambre, & de chacune des 2. Châmbres des Enquestes, 3. Laiz pour faire le nombre de 16. dont seroit composée la Châmbre de la Tournelle. Cét establissement du Semestre au Parlement dura iusque en l'année

temps, mesmes enuers les estrangers, telle recommandation & renommee ne prouenant d'ailleurs que de la grande preud'homme & integrité des Iuges & saint zele & inclination de nos Roys à la iustice.

Et dès ce temps-là mesme les personnes appellees au Parlement estoient choisies & celleues de nos Roys par merites, suffisances & capacitez, & non autrement.

Ceste Cour ordonne souverainement & iuge *Sacra vice*, comme representant la personne du Roy, lequel a bien voulu sousmettre sa hauteur & Majesté à la iustice & rectitude de son Parlement, & à l'observation de ses ordonnances. Et ce qui l'a rendu si recommandable par tout & enuers tous, tant regnicoles qu'estrangers, a esté la vertu, doctrine, & grande experience des personages choisis & establis par elections pour y rendre iustice.

Après la Cour de Parlement suit la Chambre des Comptes à Paris, erigee & establie pour en toute souveraineté cognoistre, iuger & decider du faict des Comptes & des finances : en ceste Chambre de tout temps, il y a eu Iuges & officiers creez à ceste fin appelez Maistres des Comptes, comme estans ordonnez pour veoir, ouyr, & examiner les Comptes des Thresoriers, Receueurs & autres Officiers comptables du Royaume.

Ceste Chambre ayant esté establie à Paris, y furent mis & establis par succession de temps Presidents & Souverains, en presence desquels tous affaires concernans le faict des Comptes estoient resolués & terminez.

Le plus souvent le premier des Presidents de la Chambre estoit Archeuesque, Euesque ou Prelat, & le second Laic.

Le grand Boutelier ou Eschanson de France, suiuant l'ordonnance de Charles V I. du 6. Ianuier 1400. à cause de son Office estoit anciennement l'un de deux Presidents en la Chambre des Comptes à Paris : Et en l'estat de Philippes le Long Regent, du mois de Iuin 1316. Messire Henry, Sieur de Suilly, estoit souverain de la Chambre des Comptes, & le dernier Aueil ensuiuant, il fut fait grand Eschanson de France l'an 1317. & par consequent President des Comptes, ceste Iurisdiction estant annexée audit Office : & estoit le grand Eschanson de France, l'un des 4. grands Officiers qui souscriuoient les Chartres & parentes des Roys, & assistoient aux iugements des Pairs, avec voix & opinion deliberative.

Ils sont Iuges souverains, & à eux appartient cognoistre souverainement du faict des Comptes & finances du Roy. De ce il y a Edict & declaration faicte à Compiègne le premier Aoust 1553. par lequel le Roy veut & entend que ses gens des Comptes soient & demeurent seuls & priuatiement Iuges en Cour souveraine & dernier ressort de tout le faict des Comptes & des finances, sans que les Generaux des Aydes, ny autre Cour puisse prendre tiltre ou qualité de Cour des finances.

L'autorité de ceste Chambre a tousiours esté grande : en icelle se tenoit ordinairement le Conseil du Roy : Et là se faisoient toutes instructions & ordonnances, tant sur le faict des Aydes, que sur toutes autres choses concernans le faict & Estat du Royaume, pour les Officiers de la Chambre des Comptes. Ils sont un grand nombre de Maistres des Comptes, Auditeurs des Comptes, Correcteurs des Comptes, Greffiers, Huissiers, & Messagers des Comptes.

Il y a en ceste Chambre iusques au nombre de 9. Presidents.

Celuy des Maistres des Comptes est de 62.

Les Correcteurs des Comptes sont après les Maistres les premiers deuant les Auditeurs, faisans à present le nombre de 21. Ils ont & prennent la qualité de Conseillers, selon les lettres du 13. Decembre 1532. obtenues du Roy. Le mot de Correcteur monstre quelle est leur charge, sçauoir de faire les corrections des Comptes, iceux reuoir & diligemment examiner, tant des calculs des parties payées & alloüees, qu'ez obmissions ou deniers mal & induement pris sur le Roy, & s'ils y trouuent des Corrections, en faire extraict & rapport à la Chambre suiuant l'ordonnance de Charles VII. faicte à Melun, en Decembre 1454.

Quant aux Auditeurs ils sont d'institution fort ancienne & presque establis de mesme temps que les Maistres des Comptes : ils sont iusques au nombre de 62. departis par Semestres.

Il y a eu tousiours deux Greffiers en la Chambre des Comptes, & les affaires de la Chambre croissans leurs ont esté donnez deux Clercs depuis appelez Notaires, Greffiers, suiuant l'ordonnance de Vernon de l'an 1388.

Il y a aussi en la mesme Chambre un Procureur du Roy par ordonnance de Charles 7. 1454.

Pour l'Aduocat du Roy il est créé l'an 1405.

Il y a un Huissier de Chambre d'ancienne institution, & créé seul avec le corps d'icelle pour faire & executer tous les affaires concernans le service de ladite Chambre. Il a droit de Chambelage sur tous les Seigneurs qui entrent en la Chambre, pour y faire les foy & hommages des terres & Seigneuries releuans nuement du Roy. Outre ce il y a encore un Officier de Garde des Comptes, & un autre pour la garde des liures & Registres.

Dauantage il y auoit encore de tout temps dixhuiët Messagers creez pour executer les mandemens de la Chambre des Comptes & Thresoriers de France. Ils sont decorez du tiltre d'Huissiers, pource qu'avec ce ils ont encore pouuoir d'executer tous mandemens des Conseillers du Parlement, Grand Conseil, & Iustice Royale. Ils sont à present au nombre de vingt-quatre.

Finallement il y a vn Relieur de liures, faisant seruice actuel en ladite Chambre, & est employé particulièrement à cest effect, & receu avec serment, & dit-on qu'il ne doit scauoir ny lire, ny escrire.

Dans le Palais de Paris est aussi la Chambre du Thresor ainsi appellé, pource qu'anciennement le Thresor du Roy y a esté gardé dans vne tour, près ladite Chambre dudit Thresor en la Cour du Palais, qui se void encore auourd'huy treillizée, & au plancher de laquelle sont attachees les balances où les finances du Royaume qui y estoient apportees & mises es mains du Changeur du Thresor, se pesoient: Autresfois du temps de Clouis & de Chilperic, il n'y auoit qu'un seul Thresorier pour la garde du Thresor du Roy, estably seulement pour vn an selon la volonté des Roys; puis en furent creez quatre: & de plus par Edict de Blois furent creez dix-sept Thresoriers Generaux es dix-sept Generalitez de France, & en chaque Bureau de Generalité dix autres Thresoriers.

Il y a en ladite Chambre des Conseillers du Thresor, qui ont toute Iurisdiction contentieuse par dessus les Thresoriers de France.

La Cour des Aydes a son institution au regne du Roy Louys Hutin en l'an 1338. & dès lors, & quelque temps auparauant furent ordonnez & establis Officiers par tous les Diocèses & bones villes du Royaume qui estoient choisis & esleus pour receuoir les deniers qui se leuoient, qui furent appelez Esleus, & les autres Maistres & Generaux Conseillers, pour connoistre & iuger en toute souueraineté des procéz prouenant des Aydes, subside & autres impôts. Et furent ces Conseillers Generaux ainsi appelez, à cause qu'ils auoient la charge generale de tous les Aydes par tout le Royaume, le nombre desquels s'est accru, comme & à mesure des abus & maluersations qui se sont trouuees à la leuee & recepte desdites Aydes par les Esleus & Collecteurs d'icelles.

Du commencement ceste Cour des Aydes estoit composee de huit personnes, scauoir vn President Clerc, quatre Generaux, & trois Conseillers sur les Aydes. Maintenant elle est composee de quatre Presidents, de vingt-six Conseillers Generaux, d'un Procureur du Roy, de deux Aduocats Generaux du Roy, vn Greffier & Huissier.

Il y a aussi vne autre Cour souueraine en France, qui est celle des Monnoyes, qui iugé souuerainement d'icelles, elle est composee de huit Maistres Generaux, d'un Aduocat & Procureur du Roy, avec Huissiers & Esclayeurs, & par creation de François I. l'an 1522. le 11. Mars ceste Cour fut augmentee d'un President & de deux Conseillers, & du depuis Henry second crea encore vn President avec trois Generaux de Robbe longue, & de plus vn autre Office de President erigeant la Chambre en Cour, & deux Generaux avec autres apres establis iusques au nombre de quatre Presidents & 20. Generaux.

Voila les Cours souueraines qui sont distribuées par le Royaume de France, pour le faict de la Iustice, finances du Roy, & Police generale des François.

Le Premier Bailliage qui est sous le Parlement de Paris, c'est la ville de Laon, puis celuy de Rheims, puis Amiens, Abbeuille, Boloigne, Senlis, Sens, Auxerre, Troyes, Vitry en l'Arthois, Chasteau-Thierry, Chaumont en Bassigny, Meaux, & Prouins, dont les deux derniers, de mesme que Chasteau-Thierry sont compris au pais de Brie. Il y a apres Melun, Poictiers, Angers, le Mans, Tours, Blois, Bourges, Orleans, Chartres, Angoulême, la Rochelle, Montfort l'Amaury, Lyon, Moulins, S. Pierre le Monstier, Rion, & Orillac en Auvergne, puis la ville & Preuosté de Paris, apres le discours de laquelle il faudra voir les autres, mais selon les Prouinces, & non selon l'ordre que j'ay mis icy.

Dans Paris vous auez le siege Presidial du Chastelet, où il y auoit vingt-quatre Conseillers, par l'Edict de l'an 1560. du Roy Henry II. A ce Presidial ressortissent le siege de la Preuosté, & Vicomté, la conseruation des Priuileges Royaux de l'Vniuersité de Paris, les anciens ressorts de ladite Preuosté, Brie Comte-Robert, & la Ferté A'eps. Il y a dauantage au Chastelet le Preuost, ses Lieutenans civil, criminel & particulier, le Conseruateur des priuileges, les gens du Roy, Procureur, & Aduocat, les Greffiers tant civil que criminel, & les Commissaires de la ville. Pour le seruice de ce Chastelet il y a des Sergens tant à cheual, qu'à verge, qui executent les adiournemens, & donnent les assignations ordonnees par les Iuges, comme enuoyez par le Roy, & portans tiltres d'Officiers, & la marque du Roy en Eteufon des armoiries de France. Le Chastelet a charge de ce qui concerne la police de toute antiquité: si bien que si les Boulengers, ou autres qui vendent marchandise de bouche, font

faute en leur estat, les Commissaires y ont l'œil dessus, & c'est au Preuost de Paris à punir telles fautes.

Quant à la Cour de Parlement de Paris, dont les Princes du Sang naissent Conseillers, il falloit selon le nombre ancien qu'il y eust cent hommes, à sçauoir les douze Pairs de France, les terres desquels sont du ressort de ladite Cour, puis huit Maistres des Requestes de l'Hostel du Roy, puis quatre-vingts Conseillers, y compris les quatre Presidents, à sçauoir quarante Clercs, & quarante laiz, entre lesquels sont l'Euesque de Paris, & l'Abbé de S. Denys, puis les deux Aduocats du Roy, & le Procureur general. Mais ce nombre est maintenant augmenté de beaucoup, la grande quantité des affaires, estant cause de la pluralité des Iuges. Les moindres offices de la Cour sont les quatre Notaires & Secretaires, le Greffier ciuil, & le Greffier criminel, le Greffier des representations, & les Huissiers. Tout ce corps est diuisé en six Chambres, dont la premiere est la grande Chambre, que l'on nomme autrement la Chambre doree, la Tournelle, qui est celle où se plaident les matieres criminelles: la grande Chambre des Enquestes: la petite Chambre des Enquestes: la Chambre nouuelle, & la Chambre du Domaine. Vous voyez encor dans l'enclos du Palais les Requestes de l'Hostel du Roy, la Chancellerie, les Requestes du Palais, le Bailliage du Palais, la Chambre des Maistres des Eaux, & Forests, à laquelle ressortent trois cents Officiers de trois cents sieges des Eaux & Forests de ce Royaume: la Connestablie, & Mareschaussée de la France à la table de Marbre, la Chambre des Comptes, celle du Thresor, la Chambre des Monnoyes, la Cour des Aides, des Esleus, le siege de l'Admirauté à la table de Marbre, & la grande Paneterie de France.

Les soubz-Bailliages du Chastelet de Paris sont Poissy, S. Germain en Laye, Tornan en Brie, Corbeil, Monlehery, & Gonnelle en France.

Soubz le Parlement de Paris sont les sieges de Iustice principaux qui s'ensuiuent.

Premierement en la ville de Laon, siege Presidial, où par l'Edict du Roy Henry II. il y deuoit auoir dix Conseillers, & vn Greffier d'appeaux. Et doiuent ressortir audit siege Presidial au cas de l'Edict, la ville de Laon, les sieges de S. Quentin, Ribemont, Noyon, Couffy, Chauny, Soissons, Guise, Peronne, Mondidier & Roye.

Plus en la ville de Rheims autre siege Presidial, où il y doit auoir huit Conseillers, & vn Greffier d'appeaux par ledit Edict, que nous suiurons tousiours. Et à ce siege Presidial doiuent ressortir le siege dudit Rheims, la conseruation des priuileges de l'Vniuersité dudit lieu, le siege de Chaalô, Espernay, Fismes, la Côte de Vertus, & le Bailliage de Saudron.

En la ville d'Amiens il y a vn siege Presidial, où sont sept Conseillers, & vn Greffier d'appeaux pour le Bailliage dudit Amiens.

En la ville d'Abbeuille autre siege Presidial, où il y a sept Conseillers, & vn Greffier pour la Seneschauſſee de Ponthieu.

En la ville de Boulogne siege Presidial, sept Conseillers, & vn Greffier pour la Seneschauſſee de Boulonnois.

En la ville de Senlis siege Presidial, huit Conseillers, & vn Greffier, auquel siege ressortent ledit siege de Senlis, les sieges & ressorts de Compiègne, Clermont en Beauuoisis, Creil, Preuosté d'Angy, Chaulmont en Vexin, Pontoise, Beaumont sur Oyse, Crespi, la Ferté-Milon, & Pierrefons.

En la ville de Sens, siege presidial, dix Conseillers, & vn Greffier, où ressort le siege de Ville-neufue le Roy.

En la ville d'Auxerre siege Presidial, sept Conseillers & vn Greffier, pour le Bailliage dudit Auxerre.

En la ville de Troyes siege Presidial, huit Conseillers, & vn Greffier, auquel siege ressortent le siege dudit Troyes, la conseruation des Foires de Brie & Champagne, pour autant qu'elle s'estend dans ledit Bailliage, les sieges de Bar sur Seine, Mussi l'Eueſque, la Ferté sur Aube, Nogent, & Pont sur Seine, Eury le Chastel, & S. Florentin.

En la ville de Vitry en Parthois siege Presidial, sept Conseillers, & vn Greffier, auquel siege Presidial ressortent le siege dudit Vitry, les sieges de sainte Menchou, S. Disier, Rouuray, & Passauant.

En la ville de Chateau-Thierry siege Presidial, sept Conseillers, & vn Greffier, auquel siege ressortent ledit Chateau-Thierry, & les sieges de Chastillon sur Marne, Treffons, Quichil-Chastel, & Midy S. Front.

En la ville de Chaumont en Bassigny siege Presidial, sept Conseillers, & vn Greffier, auquel siege ressortent ledit Chaumont, le Bailliage de Bar sur Aube.

En la ville de Meaux siege Presidial, sept Conseillers, & vn Greffier, auquel siege ressortent ledit Meaux, les sieges de Crecy, Couloumiers en Brie, & la Ferté Gaucher.

En la ville de Prouins siege presidial, sept Conseillers, & vn Greffier. Ledit Prouins, & les sieges de Sezanne, Montereau fault Yonne, Bray sur Seine, Jouil le Chastel, & la conseruation des foires de Brie & de Champagne, pour autant qu'elle s'estend audit Prouins, y ressortent.

A Melun siege presidial, sept Conseillers, & vn Greffier. Ledit Melun, & les sieges de Moret, Nemours, Chasteau-landon, la Chappelle la Reyne, & Milly en Gastoinois y ressortent.

A Poictiers siege presidial, pour la Seneschaucee audit Poictiers, douze Conseillers, & vn Greffier. Et à ce siege presidial ressortent le siege dudit Poictiers, la conseruation des priuileges del' Vniuersité dudit lieu, & les sieges de Lusignan, Chasteleraut, Montmorillon, la basse-Marche, & le Dorat, Fontenay le Comte, Niort, Giuray, & saint Maixent.

A Angers pour la Seneschaucee d'Anjou siege presidial, dix Conseillers, & vn Greffier. Là ressortent le siege dudit Angers, & les sieges de Saumur, Bauge, & Beaufort en la vallee.

A Tours siege presidial, huit Conseillers, & vn Greffier. Là ressortent les sieges de Tours, de Chinon, Lodun, Langeais, Amboise, Loches, & Chastillon sur Yndre.

Au Mans siege presidial, pour la Seneschaucee du Mayne, huit Conseillers, & vn Greffier. Là ressortent les sieges dudit Mans, du Chasteau du Loir, Laval, Beaumont, sainte Susanne, Chasteau-Gontier, la Flesche, & Main la Juhaix, Sablé, & la Ferté Bernard.

A Lyon siege presidial, huit Conseillers, & vn Greffier. Là ressortent les sieges dudit Lyon, la conseruation des foires dudit lieu, les Bailliages de Mascon, Forests, & Beaujolois. A Lyon il y a aussi la Cour de Parlement de Dombes qui s'y tient. Et maintenant le Forests ressort à Montbrison.

A Moulins siege presidial pour la Seneschaucee de Bourbonnois, sept Conseillers & vn Greffier. Là ressortent le siege dudit Moulins, avec les ressorts selon l'erection qui a esté faite en Duché, & les sieges de la haute-Marche.

A saint Pierre le Monstier le siege presidial, sept Conseillers, & vn Greffier. Là assistent le siege du Bailliage dudit saint Pierre le Monstier, compris Donziois, Saucrins, Cussier, & le bourg saint Estienne de Neuers.

A Rion siege presidial pour la Seneschaucee du bas Auvergne huit Conseillers, & vn Greffier. Là ressortent les sieges dudit Rion, Montferrand, Combraille, & Montaigu, Aigue-perse, Clermont, & Montpensier.

A Orillac siege presidial pour la Seneschaucee du haut-pais d'Auvergne, huit Conseillers, & vn Greffier. Là ressortent les sieges dudit Orillac, de saint Flour, Carlat, & Murat.

A Blois siege presidial pour le Bailliage, sept Conseillers & vn Greffier. Là ressortent les sieges dudit Blois, de Romorentin, Millansay, Chasteaudun, & le pais de Dunois.

A Bourges siege presidial, pour le Bailliage de Berry, huit Conseillers, & vn Greffier. Là ressortent le siege dudit Bourges, la conseruation des priuileges de l'Vniuersité dudit lieu, les sieges d'Yssoudun, Dun le Roy, Mun sur Yeure, & Concressant.

A Orleans siege presidial, pour le Bailliage dudit Orleans, douze Conseillers, & vn Greffier. Là ressortent le siege dudit Orleans, tant au Bailliage, qu'en Preuosté, la conseruation des priuileges de l'Vniuersité dudit lieu, les sieges de Bois commun, Chasteau-Renard, Yeuille, Yeure le Chastel, de Neufueille aux Loges, Gien, Montargis, Lorriz, Meun sur Loire, & Bogency.

A Chartres siege presidial du Bailliage, dix Conseillers, & vn Greffier. Là ressortent le siege dudit Chartres, les sieges de Chasteau-neuf, Thimerays, le grand Perche, & Perche-gouët, Estampes, Dourdan, Nogent le Roy, Bonneual, & la iustice temporelle de l'Eglise cathedrale de Chartres, & l'Abbaye dudit Bonneual.

A Angoulesme siege presidial de la Seneschaucee d'Angoumois, sept Conseillers, & vn Greffier. Là ressortent le siege dudit Angoulesme, les sieges de Coignac & Chasteau-neuf.

A la Rochelle siege presidial, sept Conseillers, & vn Greffier. Là ressortent le siege de la dite Rochelle avec le pais d'Aunis, & les enclaves, & ressorts du gouvernement de la dite ville.

A Montfort l'Amaury siege presidial, sept Conseillers, & vn Greffier. Là ressortent le siege dudit Montfort, les sieges de Houdan, Mantes, & Meulan.

Il y a encor quelques Presidiaux ajoustez depuis le Roy Henry II. de mesme que le nombre des Conseillers est augmenté par le moyen de beaucoup d'Edicts de la creation de nouveaux offices.

La Normandie comprend sept Bailliages, qui sont sous le Parlement de Rouën, c'est à sçauoir Rouën, Caux, Caën, Constantin, Eureux, Gisors, & Alençon. Le Roy Louys XII. erigea le Parlement de Normandie à Rouën, & y establit quatre Presidens, vingt-huit

Conseillers, treize Clercs, & quinze laiz, deux Greffiers, & vn Audiencier, avec les gens du Roy, deux Aduocats & vn Procureur general: mais depuis on a bien augmenté le nombre des officiers de ceste Cour, de mesme que les autres du Royaume.

Outre la Cour de Parlement il y a à Rouen celle des Aydes, qui comprend la iurisdiction des Esleus, instituee par le Roy Charles 7. & composee de deux Presidents, vnze Conseillers, vn Greffier, de deux Aduocats, & vn Procureur du Roy, trois Huissiers, & vn Receueur & payeur: & ceux-cy iugent oïlinitiuemēt sur les faits d'aydes, gabelles, tailles, creuës, dons, octroy, emprunts, citappes, & choses semblables. De ces luges dependent plusieurs Esleus, Grenetiers, & Controoileurs, ayant leur iurisdiction à part, & outre les eslections de la Duché de Normandie y sont comprises les eslections de la Duché du Perche, de la Preuosté de Caumont, & accroissement de Magny, y comprenant aussi Pontoise. Il y a pareillement à Rouen la Cour du Bailliage, & le siege Presidial, & Vicomté, & Iurisdiction ordinaire, que ceux du pais nomment la Cohuë.

Pour venir au denombrement plus particulier des Presidiaux, & Bailliages, on met en 31.
premier lieu.

Le Bailliage de Caudebec, & apres

Le siege Presidial d'Eureux.

Le Bailliage de Gisors.

Le Bailliage d'Alençon.

Cecy est compris sous la Generalité de Rouen, où il y a bien vingt Vicomtez, & douze ou quinze bons sieges Royaux.

Le siege Presidial de Caën.

Le Bailliage de Constance.

Cecy est compris sous la Generalité de Caën, quia sept Vicomtez, & quelques sieges Royaux.

Le Parlement de Thoulouse a sous luy les Presidiaux, Bailliages & sieges qui suiuent.

La Seneschaucee & Presidial de Thoulouse.

La Seneschaucee de Carcassonne.

La Seneschaucee de Ville-franche en Rouergue.

La Seneschaucee de Cahors en Quercy.

La Seneschaucee de Tarbe en Bigore.

Ces sieges sont compris sous la Generalité de Thoulouse, où il y a cinq bons sieges dependans du Seneschal de Quercy, & autres.

Le Presidial de Montpellier, la Cour des Aydes, & la chambre des Comptes.

Le Presidial de Beziers.

La Seneschaucee & siege Presidial de Beaucaire, & Nismes.

Cecy est sous la Generalité de Montpellier, où il y a quatre bons sieges.

Le Parlement de Bourdeaux comprend les sieges suiuan.

Le Presidial de Bourdeaux.

Le Presidial de Perigueux.

Le Presidial d' Agen.

Le Presidial de Bazas.

Le Presidial de Lauues.

Le Presidial de Xainctes.

Quinze Iudicatures.

Le Parlement de Bourgogne a sous luy les sieges qui suiuent.

Le Bailliage de Dijon.

Le Bailliage de Nuys.

Le Bailliage de Beaune.

Le Bailliage d'Auxonne.

Le Bailliage de Sainct Iean de Leon.

Le Bailliage de Chaalon sur Saone.

Le Bailliage de Mascon.

Le Bailliage d'Autun.

Le Bailliage de Semur.

Le Bailliage de Montceniz.

Le Bailliage de Charrolles.

Le Bailliage d'Auxois.

Le Bailliage d'Aualon.

Le Bailliage d'Arnay le Duc.

[:]

(:)

[:]

[:]

L iij

Le Bailliage de la Montagne.

Le Bailliage de Bar sur Seine.

Le Bailliage de Gets.

Le Bailliage de Bellay.

Le Presidial de Bourg en Bresse.

Le Parlement de Bretagne contient sous luy les sieges qui suivent

Le Presidial de Rennes.

Le Presidial & chambre des Comptes de Nantes.

Le Presidial de Vannes.

Le Presidial de Quimpercorentin.

La Seneschaucee de Plorueil.

Six Iudicatures Royales.

Le Parlement de Dauphiné seant à Grenoble a sous luy les sieges qui s'ensuiuent.

Le Bailliage de Grisiuadan à Grenoble.

Le bailliage de Vienne

Le bailliage de Valence.

La Seneschaucee de Montlimar.

Le bailliage d'Ambrun.

Le Bailliage de Gap.

Le bailliage de Nyons.

Le bailliage de Die.

Le bailliage de Crest.

Le Bailliage de Chabeul.

Le bailliage de saint Marcelin.

Le bailliage de Briançon.

Au Parlement de Prouence on compte

La Seneschaucee d'Aix, & pour le moins vingt sieges Royaux; & remarquez que toutes les villes de France ont leur chambre des Comptes, excepté Thoulouse & Rennes.

RELIGION DE FRANCE.

4. **S**AINT Epiphane nous apprend que saint Luc a presché la foy Chrestienne en France. Et saint Clement en sa premiere Epistre contre les Iuifs, escrit qu'il enuoyera en Gaule par le mandement de saint Pierre à lacques frere de nostre Seigneur. On tient que Crescence, Martial, Denys Areopagite, Eleuthere, Aphrodisce, Rustique & autres prouignerent grandement la foy qu'on y auoit plantee, tellement que Tertullien dit, que de son tēps beaucoup de natiōs des Gaules faisoient professiō de la foy Chrestienne. Finalement tout le Royaume fut conuertty à la foy enuiron l'an 465. sous le Roy Clouis, dont l'histoire est assez cogneuē. Au reste la France contient 216. Dioceses, & entre icelles 15. Archeueschez, & 202. Eueschez dont nous auons dits les noms par cy deuant.

L'Archeuesché de Paris comprend 600. parroisses ou clochers, compris les hameaux.

Le Diocese de Meaux comprend 410. parroisses, ou clochers, compris les hameaux.

Celuy de Chartre 1700. parroisses, ou clochers.

celuy de Soissons 380. parroisses. ou clochers.

celuy de Beauuais 592. parroisses, ou clochers.

celuy de Noyon 404. parroisses, ou clochers.

celuy de Bologne 460. parroisses, ou clochers.

celuy d'Amiens 498. parroisses, ou clochers.

celuy de Rheims 1014. parroisses.

celuy de Chaalons 360. parroisses, ou clochers.

celuy de Troye 509. parroisses, ou clochers.

celuy de Sens 930. parroisses, ou clochers.

celuy d'Orleans 700. parroisses ou clochers.

celuy d'Angers 668. parroisses, ou clochers.

celuy de Tours 1035. parroisses, ou clochers.

celuy de Poitiers 709. parroisses, ou clochers.

celuy du Mans 451. parroisses, ou clochers.

celuy de Lussan 213. parroisses, ou clochers.

celuy de Bourges 1260. parroisses, ou clochers.

celuy de Nevers 211. parroisses, ou clochers.
 celuy de Limoges 411. parroisses, ou clochers.
 celuy d'Angoulême 411. parroisses, ou clochers.
 celuy de Clermont 306. parroisses, ou clochers.
 celuy de Lyon 411. parroisses, ou clochers.
 celuy de Mâcon 307. parroisses, ou clochers.
 celuy de Chaalon 420. parroisses, ou clochers.
 celuy d'Autun 1300. parroisses, ou clochers.
 celuy d'Auxerre 460. parroisses, ou clochers.
 celuy d'Ereux 960. parroisses, ou clochers.
 celuy de Senlis 211. parroisses, ou clochers.
 celuy de Rouen 1338. parroisses, ou clochers.
 celuy de Caën 509. parroisses, ou clochers.
 celuy d'Alençon 390. parroisses ou clochers.
 celuy d'Eureux 355. parroisses.
 celuy de Nantes 385. parroisses, ou clochers.
 celuy de Rennes 450. parroisses, ou clochers.
 celuy de Vannes 405. parroisses, ou clochers.
 celuy de Bayeux 211. parroisses, ou clochers.
 celuy de Séez 213. parroisses, ou clochers.
 celuy de Constance 319. parroisses, ou clochers.
 celuy d'Auranches 362. parroisses, ou clochers.
 celuy de Trignee 307. parroisses, ou clochers.
 celuy de saint Malo 314. parroisses, ou clochers.
 celuy de Quimpercorentin 202. parroisses, ou clochers.
 celuy de Xaintes 291. parroisses ou clochers.
 celuy de Périgueux 302. parroisses, ou clochers.
 celuy de Langres 960. parroisses, ou clochers.
 celuy de Bourdeaux 918. parroisses, ou clochers.
 celuy de Montauban 414. parroisses, ou clochers.
 celuy de Tarbes 291. parroisses, ou clochers.
 celuy d'Aix 259. parroisses.
 celuy de Bazas 504. parroisses, ou clochers.
 celuy d'Auch 768. parroisses & clochers.
 celuy de Bayonne 349. parroisses, ou clochers.
 celuy de Cahors 422. parroisses, ou clochers.
 celuy de Thoulouse 1152. parroisses, ou clochers.
 celuy de Castres 412. parroisses, ou clochers.
 celuy de Carcassonne 319. parroisses, ou clochers.
 celuy de Narbonne 972. parroisses, ou clochers.
 celuy d'Agde 629. parroisses, ou clochers.
 celuy de Beziers 306. parroisses, ou clochers.
 celuy de Montpellier 491. parroisses, ou clochers.
 celuy d'Agde 77. parroisses, ou clochers.
 celuy de Mirepoix 89. parroisses, ou clochers.
 celuy de Nîmes 509. parroisses, ou clochers.
 celuy de saint Paul 62. parroisses, ou clochers.
 celuy de la Vaur 114. parroisses, ou clochers.
 celuy de Mandé 209. parroisses, ou clochers.
 celuy de Viuiers 155. parroisses.
 celuy d'Alby 309. parroisses.
 celuy de Rhodéz 219. parroisses, ou clochers.
 celuy de Vabres 500. parroisses, ou clochers.
 celuy de S. Pons 482. parroisses ou clochers.
 celuy de S. Flour 202. parroisses, ou clochers.
 celuy de Lodeue 103. parroisses.
 celuy de Rieux 500. parroisses, ou clochers.
 celuy d'Alets 168. parroisses, ou clochers.
 celuy de Ligier 125. parroisses, ou clochers.
 celuy de Puy 428. parroisses, ou clochers.

celuy de Vienne 800. parroisses, ou clochers.

celuy de Valence 325. parroisses, ou clochers.

celuy de Gap 204. parroisses.

celuy d'Ambrun 211. parroisses.

celuy de Die qui est maintenant joint à Valence 147. parroisses, ou clochers.

celuy de Briançon 170. parroisses, ou clochers.

celuy de Digne 185. parroisses, ou clochers.

celuy d'Aix 800. parroisses, ou clochers.

celuy de Cisteron 200. parroisses, ou clochers.

celuy d'Arles 311. parroisses, ou clochers.

celuy de Marseille 280. parroisses, ou clochers.

Outre les parroisses, il y a en France vn fort grand nombre d'Abbayes, & de Prieurez, dont les vns ont esté ruinez durant les guerres, les autres subsistent encore.

La France est diuisee en deux sortes de Religion. Les vns suivent l'Eglise Catholique Romaine, les autres s'arrestent à l'opinion de Caluin. Au commencement on a employé le fer, pour exterminer ceux qui s'attachoient à ceste nouvelle secte, mais pour vne telle qu'on coupoit, il en sortoit sept, ainsi que d'une hydre.

Et mesme on s'opiniastra iusques là, tant d'un costé que d'autre, qu'on donna des batailles, où toutesfois ceux de la nouvelle opinion se trouuerent tousiours les plus foibles. Et neantmoins ils ne perdirent iamais courage, & tascherent de tenir tousiours bon, nonobstant tous les Edicts qui les chassoient du Royaume, ou qui les rendoient incapables de tenir aucuns offices. Finalement nostre Roy a considéré que tous estoient ses subiects, & a voulu traiter comme pere tous ceux qui viuoient sous son obeissance. Et ayant recogneu par les choses passees, que tant plus on traualloit les nouveaux sectaires, tant plus ils se roidissoient, & endurcissoient en leur opinion, il a renouvelé l'Edict de Pacification, fait par ses predecesseurs, par lequel l'exercice de la Religion pretendue est permis en France, aux lieux où il a esté jadis pratiqué, & la Messe a esté remise aux lieux d'où ses ennemis plus forts l'auoient chassée. Et les plus aduisez estiment que c'est le parfait, & vray moyen de ramener les esgarez à la bergerie.

Il seroit maintenant à propos de discourir des priuileges & libertez de l'Eglise Gallicane, mais il y en a des liures entiers, auxquels ie renuoye ceux qui en desireront sçauoir quelque chose.

LES ROYS DE FRANCE.

PHARAMOND.

Clodion le Cheuelu regna 20. ans, mourut l'an de nostre salut 447.

Meroüce regna douze ans, & mourut l'an 459.

Childeric I. regna vingt six ans, & mourut l'an 484.

Clouis premier Roy Chrestien, regna trente ans, & mourut l'an 514.

Childebert fut Roy de Paris, & ses autres freres regnerent ailleurs.

Car Clotaire fut Roy d'Orleans, Clodomir de Soissons, & Theodoric eut le Royaume de Mets & d'Australie. Ce Childebert regna quarante cinq ans, & mourut sans enfans l'an 559.

Clotaire Roy d'Orleans succeda à Childebert au Royaume de Paris, regna cinquante ans.

Aridet, ou Cherebert, Roy de Paris.

Chilperic fils du susdit Clotaire premier, regna vingt-trois ans, & mourut l'an 587.

Clotaire second regna quarante quatre ans, & mourut l'an 631.

Dagobert premier regna quatorze ans, & mourut l'an 645.

Clouis, appelé par quelques-vns Louys, regna 16. ans, & mourut l'an 661.

Clotaire troisi. regna quatre ans.

Childeric douze ans.

Theodoric regna quatorze ans, & mourut l'an 693.

Clouis troisi. regna quatre ans.

Childebert second regna dix-huit ans, & mourut l'an 715.

Dagobert second regna quatre ans.

Clotaire IV. regna deux ans.

Chilperic second regna cinq ans.

Theodoric second regna quinze ans, & mourut l'annee 741.

Childeric troisi. qui fut déposé par Pepin, & mis dans vn Monastere.

Seconde lignee depuis Pepin iusques à Huë Capet.

Pepin regna 18. ans, & mourut l'an 768.

Charles le Grand, autrement Charlemagne, mourut l'an 814. apres auoir regné quarante six ans.

Louys premier du nom, surnommé le Debonnaire, regna vingt-six ans, & mourut l'an de grace 840.

Charles second regna trente huit ans, & mourut l'an 879.

Louys second dit le Begue, regna deux ans, & mourut l'an 881.

Louys & Carloman bastards, Roys ensemble, dont Louys mourut à la chafse de la main d'un de ses gens, & Carloman aussi courant apres vne fille, mourut brisé par son propre cheual l'an 885.

Charles troif. regna cinq ans, & mourut l'an 891.

Eude regna neut ans, & mourut l'an 899.

Charles le Simple regna vingt-sept ans, & mourut l'an 926.

Raoul regna feui deux ans, & mourut à Auxerre l'an 936.

Louys d'Outremer regna 27. ans, & mourut l'an 956.

Lothaire regna trente & vn an, & mourut l'an 986.

Louys cinq. regna vne seule annee, & en luy finit la seconde ligne.

Les Roys depuis Huë's Capet, iusques à Philippes de Valois.

Huë Capet regna neuf ans, & mourut l'an 996.

Robert regna trente-trois ans, & mourut l'an 1031.

Henry premier regna trente ans, & mourut l'an 1260.

Philippes premier regna quarante ans, & mourut l'an 1109.

Louys le Gros 6. du nom regna 28. ans, & mourut l'an 1137.

Louys 7. regna quarante trois ans, & mourut l'an 1179.

Philippes Auguste Dieu-donné regna 43. ans, & mourut l'an 1223.

Louys 8. regna quatre ans, & mourut l'an 1227.

Sainct Louys 9. de ce nom, regna 43. ans, & mourut l'an 1270.

Philippes troif. regna quinze ans, & mourut l'an 1285.

Philippes 4. dit le Bel, regna 28. ans. & mourut l'an 1313.

Louys 10. ne regna que dixhuiet mois, & mourut l'an 1315.

Philippes le Long regna cinq ans, & mourut l'an 1320.

Charles le Bel 4. du nom, regna sept ans, & mourut l'an 1328.

Les Roys depuis Philippes de Valois iusques à Louys 13. à present regnant.

Philippes de Valois regna 22. ans & mourut l'an 1350.

Iean regna 14. ans, & mourut l'an 1363.

Charles 5. regna 16. ans, & mourut l'an 1380.

Charles 6. regna 42. ans, & mourut l'an 1422.

Charles 7. regna 38. ans, & mourut l'an 1460.

Louys 11. regna 23. ans, & mourut l'an 1485.

Charles 8. regna 14. ans, & mourut l'an 1497.

Louys 12. regna 17. ans, & mourut l'an 1514.

François premier regna 32. ans, & mourut l'an 1547.

Henry second regna 13. ans, & mourut l'an 1559.

François second mourut l'an 1560. ayant regné 16. mois.

Charles 9. regna 14. ans, & mourut l'an 1574.

Henry III. regna 14. ans, & mourut sans enfans l'an 1589. & la race de la branche Royale de Valois defaillit en luy.

Henry le Grand quatriesme de ce nom, Roy de Nauarre, fut fait Roy de France par le decez de Henry troiesme, comme le plus proche de la Couronne, estant sorty en droite ligne de Louys de France, Comte de Clermont en Beauuoisis, fils de sainct Louys. Il a dompté tout ce qui s'opposoit à ses iustes pretentions, & s'est apres dompté luy. mesme en pardonnant à ceux qui s'estoient bandez contre luy. La France n'en eut amais vn semblable,

[.]

[.]


& ceux qui viendront apres nous, desireront à bon droit le retour du regne d'un si puissant, & si bon Monarque, qui a fait viure son peuple en repos, ses voisins en alleurance, & les ennemis en continuelle crainte. Il a regné 21. ans: & mourut l'an 1610. Laisant pour successeur, son fils

LOUIS XIII. que Dieu nous a donné comme vn Soleil leuant sur nos tenebres: & comme vne belle & vifue Image de cet incomparable Monarque HENRY LE GRAND: Et faut croire que son Regne qui a commencé par l'innocence de son aage, sera vn Regne de pieté, de iustice & de paix, que Dieu continuera de combler de ses benedictions comme il a commencé.


DISCOURS

DV PAYS SOVVERAIN DE BEARN.

SOMMAIRE.

1. ituation du pays de Bearn, qualitez & fertilité d'aucuns endroits d'iceluy pays, des villes principales d'iceluy & autres lieux remarquables.
2. Ses fleuves & riuieres tous inutiles à la navigation.
3. Des forces de Bearn, de ses fortresses & magasins, & particulièrement de Nauarreins, & de l'autorité des Colonels Persans, cy-deuant Chefs de la Milice du pays.
4. Du gouuernement Polistique de Bearn, des Princes & Seigneurs qui ont jouy de sa Souveraineté, du souverain Conseil ou Parlement du pays estably à Pau.
5. De la religion ancienne & moderne des Bearnois, des Eueschez de l'Escar & d'Oleron; depuis quand la religion Catholique en a esté bannie sous le regne de la Royne Jeanne de Navarre, & l'introduction de l'heresie de Caluin en icelle: & le reestablissement de ladite Religion Catholique audit pays par le Roy Louys le Juste, & de la verification des Edicts de sa Maiesté en faueur des Euesques & Ecclesiastiques de Bearn.

SITUATION DV PAYS.

- I. e pais de Bearn est vne petite Souveraineté, qu'on rencontre à la descente des monts Pyrenees, qui separent la France d'auec l'Espagne, sortans d'Arragon: il a sa longueur du Midy au Septentrion, & pour ses bornes au Midy la Comté de Bigorre; au Nord la Biscaye Royale, de laquelle le Bearn est separé par la riuere de la Cane; sa largeur est du Leuant au Ponent, il a pour ses bornes du costé du Leuant le pais de Landes & Chalosse, selon l'Adar, & du Couchant la Biscaye Nauarroise. Il n'y a que deux petits fleuves qui arrousent le Bearn, tous deux inutiles à la navigation.
- II. Le pais du Bearn est diuisé en deux, il a d'un costé les Monts, où est la ville d'Oleron, de l'autre les Vallons, où est la ville de l'Escar. La ville principale du Bearn est Pau, siege du Parlement de la Principauté, ses autres villes sont Orthes ancien sejour des Comtes de Foix & Seigneurs de Bearn, Morlas, lieu où l'on battoit la monnoye du pais, Nay ville fort marchande qui fut toute bruslee du feu du Ciel enuiron l'an 1545. Pontac, Coderch & Nauarreins assis au pied des montagnes, & est l'Arsenal du pais; il y a encore la basse Nauarre, où est la ville de Sainct Palais.

GOVERNEMENT.

- III. **I**l y a en Bearn vne compagnie souveraine, Conseil ou Parlement pour le fait de la Iustice, lequel est composé de deux Presidens & de vingt Conseillers, vn Aduocat & Procureur generaux du Roy.

4. Les Estats du pais s'assemblent tous les ans par la permission du Seigneur, afin de pourueoir aux affaires & au departement de la donation qu'ils luy font annuellement. Ils sont tres-exacts

tres-exacts obferuateurs de leur loix, foy & couftume, & ne fouffrent pas volontiers que le Seigneur mefme s'en difpenfe.

Or pour apprendre cōme le Bearn a eſté diſtrait du corps du Royaume de France, duquel il a touſiours eſté & eſt encore veritablement vn mēbre, faut ſçauoir que depuis 360. & tant d'années, ce païs a eſté gouverné par des Seigneurs qui ont uſurpé le tiltre de Souuerains, & qui s'eſtablirēt en ceſte uſurpation durant que S. Louys eſtoit occupé aux voyages de la Terre ſaincte, car ce fut en ce tēps-là que les habitans choiſirent Raymond de Moncade pour eſtre leur Seigneur.

Ce Raymond de Moncade, eut vn fils appellé Gaſton de Bearn, lequel n'ayant eu que 2. filles de l'heritiere de Bigorre ſa femme, donna l'aiſnée en mariage au Comte d'Armaignac, & l'autre à Roger Bernard, Comte de Foix, avec la Seigneurie de Bearn, & la Comté de Bigorre: de ſorte que ceſte Seigneurie eſtant tombee entre les mains du Comte de Foix a touſiours du depuis eſté conſeruee en l'eſtat qu'elle eſtoit iuſques en ces dernieres années qu'il y a eu du changement, ainſi que ie diray cy-apres, & ce par l'autorité & puiſſance de ceſte grande maiſon, quoy qu'originaiement ce ſoit vne uſurpation faite ſur la Couronne de France. Car il n'y a rien de plus veritable, que le Bearn, cōme il eſtoit jadis du Royaume d'Aquitaine, que Charles le Chauue annexa à la Couronne, eſt compris par conſequent dans le gouvernement de Guyenne, depuis qu'elle eſt reduite en Prouince, teſinoings en ſont les cōfrontations qui ſont encore aujourd'huy expriimees dans les prouiſions des Gouverneurs d'icelle: voicy cōme ce païs appartient au Roy.

Catherine de Nauarre, Comteſſe de Foix & de Bigorre, & Princeſſe de Bearn, eſpouſa Iean fils d'Alain Duc d'Albret, de laquelle il eut Henry d'Albret Roy de Nauarre, Comte de Bearn, de Foix, de Bigorre & d'Armaignac, Charles qui mourut près de Naples & quelques filles, entr'autres Marguerite de Valois ſœur du Roy François premier, puis Ieanne d'Albret Royne de Nauarre, eſpouſe d'Anthoine de Bourbon, d'oū eſt iſſu Henry de Bourbon Roy de France & de Nauarre; & de luy Louys XIII. Roy de France & de Nauarre, glorieuſement regnant aujourd'huy.

RELIGION DV BEARN.

LE païs de Bearn auoit touſiours ſuiuy la Religion Catholique, Apoſtolique & Romaine, & auoit deux Eueſchez, ſçauoir Oleron & l'Eſcar, qui eſtoient cōme deux mammelles pour la nourriture ſpirituelle de ces habitans, parmy leſquels toute ſorte de vertu & pieté florifſoit, iuſques au temps de la Royne Marguerite de Valois, ſœur de François premier Roy de France, qui fit venir en ceſte Prouince quelques diſciples de Luther, qui eſtoient deſia reſpandus parmy la France; toutesſois ce ne fut que pour elle, & ce venim ne ſ'eſpandit pas plus outre. Mais la Royne Ieanne de Nauarre ſa fille paſſa bien plus auant, & ſoubs ſon regne les deux principaux Hereſiarques de ce ſiecle, Luther & Caluin, mais particulièrement l'hereſie de Caluin ſe gliffa dans le Bearn, car les Caluiniftes trouuans libre accez au païs de ceſte Princeſſe, l'infecterent tellement, qu'en moins de rien, & en l'année 1569. tous les Preſtres & Religieux en furent chafſez, maſſacrez, ou noyez & le patrimoine de Dieu pillé & diuertie à d'autres vſages.

Sainct Fulgence a remarqué en l'Epiftre troiſieſme qu'il eſcrit, que la pretention ordinaire de tous ceux qui ſe retirent de la creance commune de l'Egliſe ſoient-ils heretiques, athees, ſchiſmatiques, ou libertins, n'eſt voilé d'autre pretexte que de celui de la liberté, qui eſt vn mot grandement favorable & plauiſible à tout le monde, & parlant de cete liberté, il l'appelle, *Noxiam & ſeruilem libertatem*, vne liberté ſeruile & dommageable, cōme les Grecs parlant d'un mariage traueſſé de mauuiſe intelligence, le nomment *γάμος ἀγάμος*, vn mariage nō mariage: vne mort douce, ils l'appellent *θάνατος ἀθάνατος*, *τά πορ ἀτά πορ*, vne mort ſans mort, des funerailles non funerailles, des honneurs ſans honneurs: *Funera Cæcopiae ne funera*, dit le Poëte, vn vin foible, lequel les Grecs appellent *οἶνος ἀνοῖος*, vn vin ſans vin: ainſi Sainct Fulgence, parlant de ceſte liberté pernicieuſe, l'appelle, *Libertatem ſeruilem non liberam, ſed noxiam*.

Il y a deux ſectes de nos iours, qui ont ceſte liberté grandement en teſte: ſçauoir les huguenots & les atheiſtes: pour les huguenots, ils ont fait des liures & des chafſons contre la tyrannie pretendue du peuple, contre la ſeruitude imaginaire de la Cour de Rome en faueur de la liberté.

Quant aux Atheiſtes ils ne parlent de rien ſi ſouuent que de ceſte heureuſe liberté qui nous rend maîtres de nous-mêmes, ſeigneurs de nos eſprits, & genereux contre tous les euenemens de fortune, qui peuuent choquer ou eſbranler noſtre courage: ie rapporteray deux ou trois exemples de l'hereſie du Bearn, par leſquelles on pourra voir la maniere des eſprits qui ſe laiſſent emporter à leurs paſſions fougueuſes & déreiglees.

avec la France, la qualité de Catholique, si nos Roys n'estoient sans dispute, les aînez de l'Eglise; Prouince, par laquelle ce grand Roy y faisant ses retraictes auant qu'estre receu à la Couronne, auoit conquis le reste de son heritage; Peuples auxquels Dieu a donné tout ensemble le terroir & l'esprit bon: Bref qui s'estoient emancipez de la fidelité & obeissance deuë à leur Souuerain par l'introduction & abus d'une religion contraire à celle de nos Roys.

Dieu auoit reserué ceste gloire à sa Majesté regnante, selon les predictions du feu Roy son pere: car dès lors qu'elle a prins l'entiere administration de ses affaires, elle a faict paroistre que sa seule vertu guidée d'un bon Conseil, ne pouuoit faire prendre sur ce subiect vn plus assuré chemin, & donner vn establissement plus solide, que celui que la pieté affermit par la iustice, afin que d'une mesme action l'on vist éclater tout ensemble les traits de sagesse & de bonté.

Il y a donc cinqans & plus que le Roy seant en son Conseil, donna de son plain & pur mouuement, conformément à la demande des Estats Generaux, qui auoient esté assembles à Paris l'an mil six cens quinze, vn Arrest de main-leuee pour le restablissement des Ecclesiastiques en Bearn, la restitution de leurs biens, & consequemment des Eglises, & ordonna que le diuin seruice fut remis par tout, qui fut l'un des premiers effects de son zele enuers Dieu, & le salut de son peuple, quasi à l'entree de son pur, plain & absolu Gouvernement.

Mais il n'y a sorte de tumulte, de deffaitte & desobeissance, que ce commandement n'ait rencontré.

Les Commissaires que le Roy y enuoya, furent intimidez, mesprizez & baffouëz; le Royaume fut parcouru pour y faire adherer les partisans, les peuples desbauchez pour s'en esmouuoir, troupes creees, Capitaines choisis, factions formees, entreprises faites pour s'y opposer & embraser la Guyenne, le Poictou & le Languedoc.

A qui en donner le tort, il estoit mal-aisé par le deguïsement des deportemens d'un chacun: les Ministres Heretiques, ne paroïssent que dans la Cabale, le Parlement de Pau que par ses refus, les mutins que par les alarmes, & le Gouverneur que par ses intersts couuerts, & dedans le tout, comme dans vne masse corrompue estoit le leuain de certains, qui ne se nomment pas, & qui par des delaiz & laschetes honteuses, faillirent de perdre dans le faict particulier d'une frontiere, toute la France, & enseuelir l'autorité du Roy, pires que tous les autres, parce qu'ils estoient plus obligez à bien-faire.

Le Roy ne voulant toutesfois commettre le repos de son Estat, ny à la violence des vns, ny aux ruses des autres, n'obmit rien pour compenser le grief que ceux de la Religion P. R. dudit pais presupposeroient receuoir en l'exécution dudit Arrest, ains rechercha soigneusement les voyes d'accommodement, qui satisfissent d'une part au des-engagement de son autorité & de l'autre, neantmoins à sa conscience pressée par la plainte du Clergé & misere des Catholiques, reduits à tel estat, qu'à mesme temps qu'il y tolleroit la liberté de conscience, pour l'erreur, elle se trouuoit effacée & estouffée par la foy en ses subiects du Bearn.

Mais tout cela en vain, parce que les particuliers promoteurs de ce desordre vouloient auoir leur conte auant que la chose fust faicte, & tirer de l'auantage de l'auoir appaisé: tellement que le Roy victorieux de ses ennemis par ses armes, & de ses propres armes par sa clemence n'empareille, ayant approché de la Guyenne pour autres affaires plus generales, se resolut en fin de profiter encore de ce loing-tain voyage, l'accroissement de ces mouuemens par les aydes ordinaires, & les plus douces qu'elle pourroit choisir.

Sa Majesté enuoya donc à Pau vne derniere recharge sur l'Edict de la main-leuee, avec assurance qu'elle eust des principaux officiers de ce pais là, qu'elle y trouueroit toute sorte d'obeissance: mais il réussit autrement par l'opinion qu'eurent ceux qui pratiquoient la Rebellion, que le Roy seroit facilement amusé à ne passer outre, & réduit aux necessitez s'en retourner sans rien faire, pourueu qu'on mesnageast les longueurs & difficultez qu'ils y firent rencontrer si à propos, que sa Majesté fut contrainte de faire vn assez long séjour es enuïrons de Bourdeaux, avec mille incommoditez de sa Cour & de l'armée.

La premiere nouuelle qu'elle en eut le huietième d'Octobre mil six cens vingt, par le sieur de la Chesnaye, ne fut qu'une remise à la deputation des deux Parlements, qui le lendemain arriuerent portans charge de faire croire au Roy qu'ils n'auoient point esté libres en leurs deliberations, ains esté violentez par des gens de guerre qui sont

venus de toutes parts que le Baron de Benac auroit introduits dans ledit lieu de Pau, qu'aussi les intentions de sa Majesté n'auroient assez clairement paru par les termes de la lussion, & que toutesfois ils n'auroient desisté de faire vn Arrest mental de ladite main-levée, mais que pour l'employer par escrit & le signer, il leur auoit esté du tout impossible sans peril tres-euident de leurs vies, qui sans doute furent pour lors bien plus cheres que l'obeissance.

Et parce que l'on pouuoit leur opposer le pouuoir de Monsieur de la Force, qui deuoit pour le deuoir de sa charge, & de la parole donnée au Roy tout fraichement dans Bordeaux, faciliter toutes choses, & y reprimer les émotions populaires de tels factieux incogneus, gagez à faire bruit: veu mesme qu'on scauoit que ledit sieur de la Force y estoit tout puissant, ayant les armes en main pour le seruice du Roy.

Les Deputez preuenans telle opposition, protesterent à sa Majesté, que ledit Gouverneur sollicité par leur compagnie de se joindre à eux au Parlement, pour y dire son aduis, & autoriser de son exemple l'obeissance; non seulement refusa d'y comparoitre, mais de plus, s'excusant sur sa foiblesse, declara qu'il n'auoit peu empescher que les estrangers de la Prouince n'accourussent à la foule sur le bruit de la verification, ainsi qu'autrefois ils en auoient vsé.

Or il est certain que tout ce qui estoit à la suite de la Cour, souhaittoit grandement, pour plusieurs considerations le prompt retour à Paris, ne semblant nullement necessaire qu'on passast outre iusques-en Bearn, s'engageant en vne mauuaise saison, si le Conseil de Pau se soumettoit à la volonté du Roy, verifiant son Edict, & ceste opinion portee dans les esprits des Bearnois, faisoit tellement roidir leur opiniastrété, pour rendre les commandemens de sa Majesté illusoires, qu'on commença vniuersellement à recognoistre qu'il n'y auoit plus d'esperance que le Roy peust receuoir aucun contentement des esprits resolués à eluder les volonteés par des faicheuses & honteuses tergiversations.

Sur ce le Roy se resolut dès lors toutes choses quittees, d'aller luy-mesme en Bearn, & dir aux Deputez, que puis qu'il n'auoit peu par eux se faire obeir par ses subiects, il estoit raisonnable qu'il le fust par soy-mesme, & de ce iour, qui fut le neuuiesme Octobre, remarquable par la feste de Saint Denys, Apostre de la France, il n'y eut plus moyen de l'en diuertir, quelque instance que luy en fissent ceux de la Pretendue Religion, tant il auoit à cœur, apres les auoir mis en leur tort, vne action si sainte, si celebre, tant attenduë de son courage, & si necessaire pour l'affermissement de la paix de son Royaume, & l'éclat de sa reputation parmy les estrangers.

Sur quoy ayant commandé aux Deputez de se retirer & d'aller dire au Parlement de Pau, que sa presence assurerait les affaires, nonobstant les aduis qu'il eust des difficultez du chemin, de la faim & du peril, il part l'vnziesme du mesme mois, & encore que le treiziesme, se rendant à Grenade, l'Aduocat general du Conseil de Pau luy apportast l'Arrest verifié, le conjurant de ne passer outre, & que le sieur de la Force luy venant au deuant, raschaist de le fléchir par toutes sortes de tres-humbles remonstrances vn peu trop tard rendues, il fut neantmoins impossible de le pouuoir vaincre, pour le retour: vous aurez (dit-il) interest que i'y aille pour appuyer vostre foiblesse.

Le quatorziesme, sa Majesté arriua à Arzac, qui n'est qu'à cinq lieues de Pau, respondit aux Deputez de la ville de Pau, le requerans de dire sa volonté pour son entree dans ledit lieu de Pau, qu'il y entreroit comme Souuerain de Bearn; s'il y auoit vne Eglise pour y aller descendre: mais que s'il n'y en auoit point, qu'il ne vouloit ny l'entree ny le poëlle, qu'il seroit mal-seant à sa pieté de receuoir des honneurs en vn lieu, où il n'auoit iamais esté, auant qu'auoir rendu graces à Dieu, de qui il tient cét heritage.

Et parce que les Catholiques auoient vne petite Chappelle à demy couuerte tout au bout des faux-bourgs de la ville, où l'on les auoit releguez, les chassans de la paroisse qui est à la porte du Chasteau: Sa Majesté iugea indigne de sa pieté d'approuuer cét affront fait à Dieu, par le transport de sa personne sacree, en vn lieu si esloigné de sa maison, où il ayma mieux faire dire la Messe & donner commencement à ses affaires par le seruice de Dieu dans le mesme lieu qu'on auoit profané.

Arriuée donc le quinzième à Pau, elle trouue que ce n'estoit rien que de faire valoir ladite main-levée, car non seulement elle n'y fut pas recueillie avec l'applaudissement que les subiects sont coustumiers de faire paroistre à la venue de leur Prince, mais (chose estrange) on auoit mesme soustrait les viures pour l'obliger d'en dessemparer promptement, & publioit-on hautement, qu'aussi tost qu'elle en seroit partie

partie, l'on renuiereroit l'ordre qu'elle auroit estably pour ceste execution : il n'en falloit pas dauantage pour faire comprendre à la Cour la verité des insolences passées contre la personne & autorité du Roy en son absence.

Ainsi la voila contrainte pour en preuenir l'inconuenient, d'apporrer du changement à Nauarreins, place la plus importante du pais, & d'establiir bonne garnison en toutes les villes principales, dedans lesquelles sa Majesté donna commandement à des Gouverneurs fideles à son seruice, courageux & irreprochables, qui fur vn coup pratiqué doucement & puissamment, qui fit en vn moment tomber des mains les armes des Rebelles, & donna fin aux entreprises factieuses des esprits portez à la reuolte.

Orthes estoit la ville, où les Huguenots estoient en plus grande quantité, factieux & meschans au possible, l'Vniuersité de tout le pais; & où les habitans auoient jadis paru insolens à l'extremité: car dans icelle il y a vne Eglise où estoit le sepulchre de ce braue & renommé Prince Gaston de Foix, Eglise qui auoit eschappé les fenx & les desolations premieres & plus sanglants mouuemens, qui a esté sous le regne du Roy Louys treiziesme l'an 1614. abbattuë & demolie de fond en comble, & l'Euesque du lieu, qui selon les Constitutions Canoniques, vouloit faire tirer de son Eglise vn corps qu'on y auoit profanement inhumé, fut menacé de cent coups de poignard par les heretiques de la ville, & pareille impudence ont-ils faict voir depuis le procez des Euesques & Bearnois, en la personne du Commissaire du Roy, Monsieur Renar, logé à Orthes, lequel ils iniurièrent atrocement, & susciterent mesmes les Escoliers de l'Academie d'icelle, pour enfoncer sa maison & y jetterent de la bouë & des pierres contre les fenestres de son logis, pource qu'il estoit arriué en ce pais pour faire executer les commandemens du Roy.

Nauarreins fut remis entre les mains de sa Majesté, sans forces ny resistance par le sieur de Sales tresancien Gouverneur d'icelle, y mis par le feu Roy, & y fut substitué le sieur de Poyane braue Capitaine Gascon: On trouua en la Citadelle d'icelle pres de cent pieces d'artillerie de toutes façons, quantité de munitions de guerre & de viures. Le Roy y laissa le Regiment de Champagne iusques à ce que le sieur de Poyane y eust estably sa Garnison.

Et pource que les principales forces du Bearn estoient entre les mains de certains Colonels nommez Persans, qui auoient toute autorité sur la Milice du pais, & qui pouuoient en vn moment mettre sus pied de sept à huit mille hommes, le Roy sans coup donner supprima ce pouuoir vsurpé desdits Persans, & cassa leurs offices, ce que sa Majesté fit au soulagement de ses subiects.

Elle reuint cet ancien fief à la Couronne de France, augmenta le nombre des officiers Catholiques, pour la distribution de la Iustice opprimée, à temps & sans soupçon, & partagea les Iurats, Chefs de la Police, remit les Ecclesiastiques en la possession de leurs Eglises & de leurs reuenus temporels, restablit la Religion Catholique par tout le Bearn, ordonna que les Euesques du pais auroient seance & voix deliberative au Parlement & Conseil, & en l'assemblée des Estats de la Prouince.

Ces effets temporels n'estoient que pour affermir le spirituel en l'execution de ladite main-leuee, car le lendemain les reglemens en furent registrez au Parlement, & executez auant que sa Majesté voulüst partir: l'Eglise de parroisse fut renduë aux Catholiques de Pau au mesme iour qu'elle auoit esté occupee par les huguenots, cinquante ans auparauant, & deux mille escus furent donnez par sa Majesté ausdits Pretendus Reformez pour se bastir vn Temple.

Il est à remarquer que le Comte de Montgomery deffit le sieur de Terrides deuant la ville de Nauarreins, le mesme iour du mesme mois que sa Majesté fit son entree audit Nauarreins, & y fit dire la Messe, qui en auoit esté bannie depuis les susdites cinquante annees, & le mesme iour que les Euesques furent chassés par l'Edict de la feuë Royne Ieanne, les cinquante ans reuolus le Roy a restably la Messe dans Pau à la confusion de l'Enfer, desesperé de voir le Iubilé accompli par la restauration d'une vraye & legitime liberté, qui reuenoit en Israël à mesme cercle d'annees.

Ce fut au reste chose memorable à la posterité de voir le Roy accompagné des Princes & Officiers de la Couronne, de toute sa Cour & des principaux Chefs de l'armee, sortant de l'Eglise de Pau, fraichement reconciliée. Apres y auoir ouy le *Veni Creator*, pour s'en aller en Procession solennelle tout le long de la ville, où l'on n'auoit veu de si long-temps telle ceremonie iusqu'au bout de la ville, où estoit le Saint Sacrement exposé sur l'Autel de la Chappelle, qui fut porté sous le daiz que sa Majesté auoit cy-dessus refusé à son entree dans Pau, par les Princes & Ducs, qui lors se rencontre-

rent, & accompagné des Cardinaux, Prelats, Abbez, & autres Ecclesiastiques qui se trouverent lors en nombre, pour assister aux deuotions de sa Majesté, en vne occasion si plausible & tant inespérée.

On n'entendit tout le temps de la Procession par les carrefours & fenestres de la ville de Pau, rien qu'applaudissemens de ioye, vn **VIVE LE ROY**, retentissant de tous costez dedans l'air.

Le Roy non content d'auoir mis ordre aux affaires d'Estat & restably celles de la Religion, voulut aussi pourueoir à l'instruction de la ieunesse, qui est le fondement de l'un & de l'autre. A ces fins estant aduertty que la Royne Ieanne son ayeule auoit jadis fondé à Orthes l'Vniuersité, tenue par ceux de la Pretendue Religion, la pluspart estrangers, pour estre le Seminaire des Ministres, & vne perpetuelle pepiniere de l'heresie, qu'elle auoit rât à cœur, considerant aussi que c'estoit vne chose du tout indigne de sa Majesté Tres-Chrestienne, de maintenir ceste fondation selon ce premier dessein, au preiudice de sa conscience, qui luy deffend de contribuer directement de ses deniers à l'education de la ieunesse en la Religion qu'il abhorre : Iugea qu'il estoit necessaire de pourueoir à tel inconuenient par des moyens efficaces & deus.

A ces fins, & à la requisition de Messieurs les Euesques du pais, assiste du corps des Catholiques : il ordonna que deormais, il y eust en l'une des meilleures villes du pais & des plus propres à cet effect vn College de Peres Iesuites, pour y faire profession de toutes les bonnes lettres, & contrecarrer l'erreur : voulut aussi fournir aux reuenus necessaires, & s'en rendre le Fondateur. Reparant par ce moyen les fautes que ses Majeurs auoient faites, & donnant moyen aux Catholiques de nourrir leurs enfans en la crainte de Dieu. Et par interim commanda que les patentes du feu Roy Henry le Grand son pere, par lesquelles il auoit dressé en Bearn vne mission desdits Peres avec toute liberté d'y faire leurs fonctions par tout, fors l'instruction de la ieunesse, & d'y trauailler à la conqueste des ames, en nombre tel qu'il plairoit aux Prelats y employer, sortissent leur plain & entier effect, & fussent verifiees par le Parlement, qui quelques annees auparauant les auoit modifiez au nombre de quatre, & aux forclusions des Confessions, quoy que par eux permises à tous autres Prestres, Seculiers & Religieux, & mesmes aux Capucins qui le font par dispense de leur Ordre, ainsi passa-il au Conseil de Pau. Et voila ce qui s'est passé au changement nouveau, fait en la Souueraineté du Bearn, en l'annee 1620. par Roy le Louys XIII. de France & de Nauarre.



DISCOVRS DE LA MONARCHIE D'ESPAGNE.

SOMMAIRE.

- | | |
|----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| <p>1. DENOMBREMENT general de tous les Estats qui sont sous la domination du Roy d'Espagne.</p> <p>2. Description ancienne & moderne d'Espagne, & ses trois Gouvernemens.</p> <p>3. Topographie de la Catalogne, & de tous ses Royaumes.</p> <p>4. Des mines d'or & d'argent, & des eaux chaudes & froides medicinales, qui se trouvent en Espagne.</p> <p>5. Du naturel & mœurs tant anciennes que modernes des Espagnols.</p> <p>6. Richesses d'Espagne enquoy consistent, du traffic qui se fait aux ports, avec la taxe du revenu annuel du Roy de tous ses Estats.</p> | <p>7. Des forces du Roy d'Espagne, tant par mer que par terre.</p> <p>8. Valeur de l'Infanterie Espagnole, le nombre de sa Cavalerie entretenue en tous ses Estats, & ses forteresses.</p> <p>9. Autorité du Roy d'Espagne en ses Royaumes, & nombre de ses Conseils avec l'Etat des grands Seigneurs & maisons Nobles d'Espagne.</p> <p>10. De l'ordre des Navigations Espagnoles.</p> <p>11. Religion & choses qui la concernent en Espagne: des Archeueschez & Eueschez, & de leur revenu.</p> <p>12. Genealogie des Roys d'Espagne, & de la succession des Roys Gots en tout ce Royaume.</p> |
|----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|



AFIN de n'embrouiller pas le Lecteur, & ne luy faire chercher tous les Estats qui sont sous le Roy d'Espagne en divers endroits, de ce livre, j'ay pensé qu'il seroit plus à propos de mettre icy tout à la fois toutes les terres qu'il possède, & apres en avoir fait le denombrement en general, considerer distinctement les particularitez plus remarquables.

Le Roy d'Espagne possède aujourdhuy en l'Europe tous les Royaumes d'Espagne, & le Royaume de Naples, l'Estat de Milan, les Isles de Majorque, & Minorque, d'Isle, de Sicile, & de Sardaigne.

En Afrique il possède le meilleur port qui soit sur la mer Mediterranée, c'est à sçavoir Marzalcabil, qui signifie Grand port, & encore les places d'Oran, & de Melille, & le lignon d'Afrique.

Il y a outre ce hors du destroit les Isles Canaries, au nombre de douze, dont il y en a sept principales. Et à cause de la couronne de Portugal il tient en la mesme Afrique les importantes places de Serpe, & de Tanger, qui sont les clefs du Destroit, voire mesme de nostre mer, & de l'Ocean Atlantique, & dehors du Destroit Nazagan.

Il a encor eu avec le Royaume de Portugal les Isles Azores, dont les principales sont la Tercere, S. Michel, sainte Marie, l'Isle du Pic, & S. George. Il tient aussi le S. Port, & non guere loing de là, l'Isle de Madere, grande belle, & riche. Davantage il a les sept Isles du Cap verd, & sous la ligne equinoctiale, l'Isle de S. Thomas. Il possède encor toute la coste d'Afrique, qui s'estend depuis le Cap d'Aguere, jusques à celui de Guardafu.

M iij

En Asie à cause de Portugal il tient presque les meilleures places de sa coste Occidentale, c'est à sçavoir Ormus, Diu, Goa, Malaca. Le Royaume d'Ormuz comprend sous luy vne bonne partie de l'Arabie heureuse, & l'Isle de Baaren qui est fort grande. Il possède encor la pres Daman, Bazin, & Zanaa, outre Ciaul, & les forteresses qui sont aux Royaumes de Cananor, & de Cochin, & encor à Colan. Il tient aussi presque toute la coste qui s'estend depuis Daman iusques à la ville de Melipur, veu qu'elle est toute aux Espagnols, ou leurs amis, hors mis Calicut. L'Isle de Manar, & le port de Colomban, en l'Isle de Zeilan appartient encor aux Espagnols, de meisme que 40. Isles des Philippines, dont la principale se nomme Luzon, longue de plus de 200. lieues, mais estroite. On compte encor entre ces Isles celle de Vendenao, Tandaia, qui est nommée par excellence la Philippine, à cause que ce fut la premiere qu'on descouvrit & Celebe, où Magellan mourut.

L'autre partie des Estats du Roy Catholique consiste au nouveau monde. Le tout est diuisé en Isles & en terre ferme. Les Isles de la mer du Nort sont en si grand nombre qu'on ne le sçait iusques à present, veu que les seules Lucaies surpassent le nombre de quatre cens. Celle de Borichen est fort grande, comme aussi la Iraique, la Cube, & l'Espagnole.

Quant à la terre ferme l'Espagnol possède actuellement tout ce qui va costoyant la Floride, la nouvelle Espagne, & le Iucatan, & encor toute la grande Presque-Isle Meridionale iusques au Cap de Califorme, voire meisme iusques à Quiure; veu que les Castillans ont fait iusques là leur descouuerte.

Il possède encor ceste partie du Peru, qui est entre la riuere de la plata, ou de l'argent, & Maragnon, & commence depuis Panama, & cecy s'appelle Bresil. Il tient encor le Peru, & le Royaume de Mexique.

Voyons maintenant en particulier les choses plus considerables qui sont en ceste Monarchie, & parlons premierement de l'Espagne où est la demeure ordinaire des Princes.

II. L'Espagne qui est la premiere partie de terre ferme qu'on trouue pres de l'Afrique, au delà du destroit de Gibraltar, est bornée du costé du Leuant des monts Pyrenees, qui s'estendent depuis Fontarabie, qui est en la Prouince de Guipuscao iusques au Cap de Creuz, qui est au commencement de Catalogne entre Roses, & Colibre. Elle a pour borne du costé du Midy la mer Mediterranee, qu'on nomme communement la mer du Leuant, qui commence entre l'Espagne & l'Afrique, & se joint apres à l'Ocean, depuis le destroit de Gibraltar iusques au Cap de S. Vincent. Elle a du Couchant la mer Oceane, depuis ce Cap de S. Vincent iusques à celui qu'on appelle de Fin de terre, & du costé du Nort la meisme mer l'enferme, depuis le Cap de Fin de terre iusques à Fontarabie.

Les monts Pyrenees ne sont estendus de droit fil autour de l'Espagne, ains vont faisant vne figure tortuë, de sorte que le chemin d'une extremité de ces monts à l'autre seroit de plusieurs iournees; au lieu que du costé de la France, il n'est pas si grand, ny si fascheux, & difficile de la moitié.

Ces montagnes vont par la Nauarre & Roncevaux, le long du val de Salazar, & val de Ronoal iusqu'à Hisaia, qui est la derniere borne du Royaume de Nauarre, puis elles passent en Aragon par les monts du Iaca, iusques au destroit de Catalogne, & iusques à la pointe du Cap de Creuz, où elles prennent fin en la mer Mediterranee, y ayant depuis Fontarabie iusques à ce Cap, environ quatre-vingts lieues.

La plus grande estendue d'Espagne est: du Cap de Creuz iusque au Cap de S. Vincent, & cet espace est de 175. lieues, tellement que toute l'Espagne peut contenir en son circuit environ six cents, & vingt lieues Espagnoles, dont la chacune comprend quatre milles ou environ d'Italie, de sorte que ces lieues reuiendroient à deux mille quatre cents quatre-vingts milles d'Italie, pourueu qu'on fist ce chemin par terre, d'autant que par mer l'en faudroit beaucoup qu'il y eust vn si grand espace.

Les Romains ont autrefois diuisé l'Espagne en citerieure, ou celle qui estoit par deça, c'est à dire qui estoit plus proche des terres de l'Empire Romain, c'estoit celle qui est entre le fleuve Ebre, & les monts Pyrenees. Mais l'Vlterieure ou celle d'audelà estoit celle qui se trouuoit esloignée des terres de l'Empire, c'est à dire qui s'estend depuis la riuere d'Ebre iusques au destroit de Gibraltar. Elle fut apres diuisée en trois Prouinces, c'est à sçavoir en Betique, Tarraconoise, & Lusitane, par les Romains meisme qui y establirent quatorze iurisdiccions, dont la Tarraconoise en comprend sept, comme la plus grande des trois, la Lusitane trois, la Betique quatre. Et ceste diuision dura iusques au temps d'Attille. Mais depuis le Royaume de Grenade, l'Andaluzie & la Betique ont succédé à l'Estremadure: Aragon, Castille, Nauarre & les autres petits Royaumes à la Tarraconoise: & le Portugal, & Royaume d'Algarbe à la Lusitane.

Or on diuise auourd'huy l'Espagne en trois Gouvernemens, ou Royaumes, c'est à sçavoir d'Aragon,

d'Aragon, Castille, & Portugal: Aragon cōprend Catalogne, Valence, Maiorque, Sardaigne, Sicile, & Naples: Castille comprend Biscaye, Leon, les Asturies, Galice, l'Estremadure, l'Andaluzie, Grenade, Murcie, & les deux Castilles, avec les Canaries, le Royaume de Nauarre, l'Estat de Milan, le nouveau monde, les Philippines, & autres pays.

Le Portugal comprend le Royaume d'Algarbe, le Portugal mesme, avec ce que les Espagnols ont en la Guinee, en Ethiopie, & ce qu'ils tiennent au Bresil, & aux Indes, & plusieurs Isles.

Or en commençant la description, la premiere chose qui s'offre à moy c'est la *Catalogne*, qui s'estend depuis Salles iusques à la riuere d'Ebre, & confine avec la France. S'ensuit Perpignan qui est en la Comté de Roussillon qui fut engagee par le Roy d'Aragon, pour beaucoup de milliers d'escus aux François, & puis renduë au Roy d'Espagne par Charles VIII. par le moyen de la promesse, qu'il tira que l'Espagnol ne l'empescheroit pas en son entreprise de Naples. Ceste Comté s'estend entre deux bras des monts Pyrenees, dont l'un va à Salles, l'autre à Colibre, que les anciens nommoient Illiberis. Sur le riuage de la mer, ou pres de là on void diuerses places, avec leurs ports, plustost necessaires qu'aiseurez, pour ce qu'ils sont sujects à diuers vents, & ne sont gueres capables. Il y a Elne, Colibre, Rosas, Empira, Palamos, Balanos: Mais Barcelone est la ville capitale de Catalogne.

On void dans le pays Cirons, Vich, Cardone, Vrgle, Mont-ferrat, mont d'incroyable deuotion pour vne image miraculeuse de la sacree Vierge mere de Dieu. Mais retournant à la marine on void au delà de la riuere Lobregato, Tarragone, ville d'où la plus grande partie de l'Espagne prenoit son nom, & combien qu'elle soit sans ports, toutesfois elle est en assiettes fort commode. On trouue apres l'emboucheure de la riuere d'Ebro, renommee pour auoir esté la borne des Romains, & des Carthaginois. Il naist pres de la mer de Biscaye, aupres d'un lieu qui se nomme Fuentibre, & courant quelque peu vers les monts Pyrenees, tourne apres vers le Leuant, & puis vers le Midy, & il n'y a presque riuere, qui face plus de tours, ny qui serpente dauantage. Ceste riuere se grossit par le moyen des riuieres qui naissent au pied desdits monts, & s'y rendent, veu que de l'autre costé elle ne reçoit que le Bilbille, si l'on a seulement esgard à ce qui est digne de consideration. Et ceste riuere fait en son emboucheure l'Isle d'Alfaques retraicte des Corsaires. Mais ensuiuant son cours on void Tortose belle ville, & en bon pays. Au reste les riuieres d'Espagne ont presque toutes par maniere de dire les bords fort hauts, & les lits bas, d'où vient qu'on y nage malaisément, on se sert toutesfois vn peu des eaux de l'Ebre en Aragon, & de quelques petites riuieres aux Royaumes de Valence, & de Grenade.

L'Aragon a pour ses bornes du Leuant la riuere de Cinga, du Ponent les monts de Montcate, & de Moline, du Nort la riuere d'Ebro, & du Midy la montagne de Brabance. On void en ce Royaume, ou pour mieux dire en ceste prouince d'Espagne les villes de Iaca, Huesca, Venasca, & la place de Moson, renommee pour les Cours qui s'y tiennent. La principale ville du pays c'est Sarragosse, la plus belle ville d'Espagne, si on a esgard à la beauté des rues, & à la magnificence des Palais. On y void aussi Calatajut, qui doit tenir le premier rang apres Sarragosse.

Quant au Royaume de Valence il tire son nom de sa principale ville, & est borné du costé d'Orient de la Mediterranee, du Nort de l'Aragon, de l'Occident de la vieille, & nouvelle Castille, & du Midy du Royaume de Murcie. Il a deux bonnes villes, c'est à sçauoir Horiuela & Valence, on compte en ce Royaume enuiron vingt & deux mille familles de Mores.

Quant à ses fleues, les principaux sont Guadalauiar, qui veut dire eau pure & claire, qui passe pres de Valence & Xucar, que les anciens ont nommé Sucron, d'où prend son nom le Sein, ou Golphe de Sucron, qui s'estend depuis la petite Isle d'Alfaques, iusques au Cap Martin. Le port de ce Royaume c'est Alicant, nommé par les anciens Illice, d'où prend son nom le Golphe, compris entre le Cap Martin, & le Cap de Palos.

Murcie a pour ses bornes les costés d'Alicante, & le Cap de Gates, & a peu de lieux peuplez, & ceux qu'on y void sont de peu d'importance. Murcie est la principale ville. En ce Royaume est le port de Cartagene, qui est le meilleur qui soit en Espagne sur la mer Mediterranee, pource qu'il y a vis à vis vne petite Isle, qui l'asseure des vents, & le deffend de l'impetuosite de la mer, qui y rompt sa furie. Aussi André Dorie disoit, qu'il tenoit trois ports fort asseurez en la Mediterranee, c'est à sçauoir celui de Cartagene, & Iuliet, & Aoust. La ville est peu de chose & mal bastie.

Le Royaume de Grenade s'estend depuis Vere iusques à Malaga, & l'on void icy de quelle importance est l'Agriculture, veu qu'au temps que les Mores y dominoient, ceste contrée estoit extremement habitee, & pleine de toute sorte de biens. Les collines estoient re-

uestues de vignes, & d'arbres fruitiers, les vallées & les plaines abondoient de grains, & de jardins, & les villes de gens, & de viures; au lieu que maintenant il n'y a guere de gens, & le pays rapporte fort peu, à cause qu'on y exerce moins qu'auparavant l'Agriculture.

La ville de Grenade ressemble à vne grenade ouuerte, veu qu'elle contient deux collines, qu'on peut presque nommer deux montagnes, qui sont diuisées par vne vallée, par laquelle passe le Bae. Et ceste ville est diuisée en quatre parties différentes d'assiette, qui se nomment Grenade, Sierra de sol, ou montagne du Soleil Albayzin, & Antequeruela.

Les marchands, & les Gentils-hommes habitent principalement à Grenade, qui est la principale, & il y a vne Eglise d'admirable Architecture.

Il y a le lieu qu'on nomme Alcaçar, qui represente vne petite ville ayant dix portes. Il a l'Alhambra, Palais des Roys Mores, qui pour raison de son artifice, & pour la multitude de ses fontaines, peut estre mis entre les miracles du monde. Mais sur tout son assiette est merueilleuse, pource qu'elle a audessous du costé du Leuant la ville; du Midy les Montagnes neigeuses, & du Nort vne grande plaine. Quant aux autres parties il n'est pas à propos d'en parler, pource qu'il n'y a rien de remarquable. Toute la ville a de circuit enuiron sept milles, & est entouree de murailles avec vn grand nombre de tours. Quelques-vns y en mettent iusques à mille.

En ce Royaume on void encor la ville de Guadix à neuf lieux loing de Grenade. Les autres lieux considerables sont Ronde, Maluelle, Velez, Vere, Mochacar, Guascar, Baze, Codbo, & Loche sur la riuere de Genil. On voit à sept lieux de Grenade le Chasteau d'Alharne. Les lieux maritimes plus importants de ce Royaume sont Almerie, & Malaga, pres duquel lieu il y a vn grand nombre de villages. Ferdinand Roy d'Aragon & de Castille, acheua de conquerir ce Royaume avec la ville l'an 490.

L'Andalusie s'estend presque depuis le commencement du destroit de Gibraltar, iusques au fleuve de Guadiane. Elle est presque à la porte de la mer Mediterranee par le moyen du destroit de Gibraltar, de quinous dirons icy deux mots, quoy qu'il appartienne plustost au Royaume de Grenade, qu'à ceste Prouince.

Ce destroit a donc sept milles de largeur avec le flux & reflux ordinaire de la mer Oceane, qui entrant par ceste porte s'acquiert le nom de mer Mediterranee, & s'estend là iusques aux dernieres bornes de la mer Majour par l'espace de 3700. milles, & enuiron plus de dix milles. Les Grecs l'appelloient destroit d'Hercule, à cause de deux colonnes de bronze qui estoient au Temple d'Hercule, ou comme les autres veulent, à cause de 2. montagnes, dont l'une nommee Calpe est en Espagne, & l'autre nommee Abile en Afrique, & qui ont esté mises en reputation par les Poëtes, qui ont escrit que c'estoient des colonnes plantées par Hercule pour borne de ses voyages.

Les Latins nomment aussi ce destroit Caditain, à cause du voisinage de l'Isle de Caliz nommee des Latins Gades. Les Mores luy ont donné le nom de Gibraltar, à cause d'un Chasteau qu'ils bastirent au dessous de la montagne de Calpe, qui a peu de tour, mais est si haut qu'il represente de loin vne Isle separee du reste de la terre.

Orayant passé le destroit on trouue l'Isle de Caliz, loin de terre ferme enuiron 700. pieds, à laquelle estoit conjoincte vne autre petite Isle, qui n'auoit pas plus de 200. pas de circuit, & toutes les deux estoient appellees des Latins Gades. En la plus grande qui reste au iourd'hy, il y a vne ville qui estoit du temps des Romains des plus nobles & plus riches d'Espagne.

Tellement que Strabon escrit qu'elle ne cedit à aucune ville de l'Empire, ny en grandeur ny en magnificence, ny en nombre d'habitans de marque, veu qu'on y compta quelques-fois cinq cents Cheualiers Romains, qu'on ne trouua nulle part ailleurs qu'à Padoue. Maintenant il s'en faut de beaucoup qu'elle soit si grande, & l'on la peut plustost mettre entre les celebres abords des marchands, qu'entre les villes magnifiques. Les Mores la ruinerent, & les Corsaires ne la laisserent pas remettre. Mais il n'y a chose qui luy porte plus de dommage que le voisinage de Seuille qui attire tout le trafic de la mer du Ponent. Entre Caliz & la terre ferme, il y a vn fort bon port nommé Porto-Real, & plus auant vers le Septentrion il y en a vn autre nommé de Sainte Marie, de là en doublant vn petit Cap on trouue le port S. Lucar où les nauires s'arrestent, ou pour attendre le vent s'ils veulent aller en haute mer, ou bien pour attendre le reflux de la mer Oceane, s'ils veulent aller à Seuille qui est sur le bord du fleuve Guadalquivir à main gauche. Ceste ville a enuiron six milles de circuit, & beaucoup d'Eglises & de Monasteres magnifiques, & de belles rues & grandes places. Au temps que le grand Ferdinand prit Seuille on comptoit autour 20. mille villages ou hameaux, mais au iourd'huy le nombre n'en est pas de beaucoup si grand. Toutesfois on compte encore 100. places fermées de murailles.

La riuere de Guadalquivir, qui veut dire en Arabe grande riuere, fait port à ceste ville, & veritablement elle merite bien ce nom de grande, & pour sa grandeur, & pour la bonte de ses eaux fort propres à la teinture des draps, & a rendre belles les personnes. La maree monte encor deux lieues au dessus de la ville. De l'autre costé de la riuere on void Triane, qui est vn fort plaisant membre de Seuille. Or combien que le Soleil s'y face sentir excessiue-ment, en telle sorte que les bleds d'alentour y sont meurs en Aueil, de mesme qu'en Egypte, toutesfois il y a tant de rafraischissemens, que le Roy Ferdinand disoit, qu'il falloit demeurer en temps d'Este à Seuille, & en Hyuer à Burgos, qui est vne ville fort froide, mais où il y a de merueilleuses defences contre le froid. Outre Seuille il y a encor en Andaluzie plusieurs autres villes & places importantes: mais la principale c'est Cordoue, iusques à laquelle on peut voyager sur le Guadalquivir, ou sur de grands ou sur de petits batteaux: c'est vne ville de grand circuit, mais où il y a peu de maisons à cause du grand nombre de iardins. Il y a tout aupres force chasteaux & places dont Lorene en est vne. Iacn est aussi ville remarquable, & qui a merité que les Roys d'Espagne s'en disent Seigneurs entre les autres tiltres. Elle a en son Diocese Vbede, Boesse, Anduier, places assez considerables. Il y a encor Almaden & Marchene, dont la premiere est le lieu del'ordre del'Alcantare en la Diocese de Cordoue, & Marchene est vn lieu sur les confins de Grenade & d'Andaluzie.

L'Extremadure s'estend depuis Ville Reale iusques à Bajados, & depuis Sierra Morena iusques au Tage. On y void sur la riuere de Guadiane qui la trauerse, les villes de Badajos & de Meride. Et l'on void icy vne chose remarquable, qui est que ceste riuere coule l'espace de 15. lieues sous terre sans se monstrier, iusqu'à tant qu'elle paroist de nouveau pres de Merelin, lieu renommé pour la naissance de Ferdinand Comtez qui conquesta Mexique. En ce pays est l'Image de N. Dame de Guadalupe, où l'on void vn grand abord de toute sorte de personnes.

Les deux Castilles sont presque semblables en assiette, sinõ que la nouuelle a plus de plaine que la vieille, & elles sont diuisees l'une de l'autre par quelques montagnes qui commencent aux confins de la Nauarre, & trauersent presque toute l'Espagne iusques à la mer. La ville capitale de la nouuelle c'est Toledé, & de la vieille Burgos.

Toledé est grande ville assise en vn lieu esleué, & l'on y monte ou descend tousiours. Elle peut auoir de tour enuiron quatre milles: mais elle ne semble pas si grande qu'elle est, à cause de l'inegalité de son assiette. Elle est enuironnee de tous costez de montagnes, sinõ d'une part, à ses rues estroictes, & ses maisons espaisies, & plus belles dedans que dehors. Elle a vingt-trois quartiers, & dix-sept places. Elle est enuironnee de trois costez du Tage, qui court au bas, & dont l'eau est tiree en haut dedans la ville par vn moyen que trouua Iacques Cremonois. Pres de Toledé on descouure vne plaine qui est fort plaisante aux lieux où l'on conduit l'eau du Tage.

On trouue du costé du Nort de Toledé la ville de Madrid (demeuré des Rois d'Espagne.) On void au deçà la Guadiane, Cité Royale, & sur la riuere Calatraue, d'où tirent leur nom certains Cheualiers d'Espagne: & au deçà du Tage on void Couque, & Ocagne, renommées par ses gands: & sur la riuere on void encor Alcantare, d'où prend son nom vn autre ordre de Cheualiers: & au dessus de Madrid on void Alcalá de Henarez.

Mais passant à la vieille Castille on y void Burgos sa ville capitale, comme j'ay dit cy-dessus. Ceste ville est ancienne & bien bastie, mais elle a ses rues estroictes, & est entouree de montagnes, qui causent que les iours y sont plus courts que la latitude du lieu ne porte: pource qu'ils luy retardent le matin les rayons du Soleil, & les luy desrobent le soir auant l'heure qu'il s'en deuroit retirer, & pour ceste cause l'air y est extremement froid. On void là entre autres choses l'Eglise Metropolitaine faite avec vn grand artifice, parce qu'en mesme temps on y chantel'Office en cinq chappelles, sans aucun empeschement ou destourbier. Il y a vn Crucifix fort ancien qu'on tient auoir esté fait par Nicodeme. Il y a vn Couuent de Religieuses qu'on nomme Vulgues qui sont au nombre de cent cinquante, toutes de maisons Nobles.

Ceste ville debat de la preface & primauté avec celle de Toledé, & aux Cours ou assemblees d'Espagne, ce debat ne pouuant estre terminé, le Roy Ferdinand s'aduisa de les contenter tous deux: de sorte qu'il fit parler la ville de Burgos, disant qu'il parleroit pour celle de Toledé.

On void apres sur la riuere Tormes, & puis Salamanque, où il y a vne fort renommee Vniuersité, & l'on void au delà du costé du Nort Medina del Campo, ville riche & de grand traffic, & apres cela Zomere, & Valladolid, l'une des plus agreables villes qu'on puisse voir, qui est assise sur la riuere de Pisuerque, bien bastie, avec de belles & grandes rues, & des Palais magnifiques. Il y a plusieurs arts, & entre-autres vn grand nombre de bons Orfeures.

Ceste ville s'est accruë & s'embellit par la demeure que les Roys s'y ont faite.

Au Leuant de Salamanque on void Auile, Segouie, Signende, & plusieurs autres villes & places, dont le denombrement seroit ennuyeux. Mais ie ne laisseray pas en arriere Sorie, appelée par les anciens Numance: veu qu'il n'y a eu ville au monde qui ay fait plus de mal & d'ennuy aux armées des Romains plus long temps, & avec vn plus petit nombre de personnes. Entre la riuere de Pisuergne & la riuere d'Ezla on void Medina del rio, place marchande & assez pres de là Palence. Mais en sortant hors des confins de Castille, on void au dessous des montagnes des Asturies la ville de Leon capitale d'un Royaume: qui fut ainsi nommée du temps de la conqueste de l'Espagne faite par les Mores. Ce fut là que les Roys d'Espagne firent leur premiere demeure apres ce rauage & ceste inondation des Mores: & delà ils les contraignirent avec des guerres continuelles de 800. ans de s'en retourner finalement en Afrique, & veritablement les Roys & les Gentils-hommes d'Espagne s'employèrent avec vne extreme ardeur & resolution à ceste entreprise.

Galice est comprise entre la riuere Auie, & la mer Oceane. Ce pays est principalement renommé pour le corps de S. Iacques, Protecteur d'Espagne qui est à Compostelle.

Alfonse IX. ayant surmonté miraculeusement Miramolin, institua l'ordre des Cheualiers de S. Iacques, qui est le plus honorable ordre d'Espagne. Ceste Prouince a vn tres-bon port à la Courougne, où Charles cinquième ordonna que le trafic des espiceries s'y feroit, ce qui ne réussit pas apres. Vous voyez aussi en ce pays Bayonne, Pontenedre & Ribadeo lieux maritimes.

Asturie s'estend depuis la riuere Ribadeo iusques à S. André. Sa principale ville est Ouiedo, où se sauuerent (au temps des Arabes) les Gots qui resterent avec beaucoup de reliques de Saints. C'est de là que tirent leur origine les *Hidalgos* d'Espagne. Il y a aussi en ce pays la ville de Sautigliane. Ceste Prouince s'aduance fort vers le Nort avec le Promontoire Scythique, auourd'huy Cap de Fico.

La Biscaye est bornée de la Nauarre, de Guipuscoa, de la mer, & des Asturies. Ses principales places sont S. André avec vn port capable de force vaisseaux. Il y a encores Laredo, qui est vne bonne place, avec vn port capable, de mesme que Portugalette. La capitale ville de Biscaye c'est Bilbao, en vne assiette fort commode. Dans le pays on ne void que des maisons esparses çà & là, à cause que l'aspreté des lieux ne souffre pas que plus de gens y demeurent.

Guipuscoa a pour ses bornes la riuere de Vidofona ou Vidofor, Aluida, Huria, & Beryuia, & separe la France de l'Espagne, les monts Pyrenees, la Nauarre, la Biscaye, & la mer Oceane. Ses places sont Deuia, Oria, S. Sebastien ville Metropolitaine, Fontarabie, & le Passage, & Tolofette.

La Nauarre est assise entre la riuere d'Ebro & les monts Pyrenees. Sa ville Metropolitaine c'est Pampelune, les autres sont Stelle, qui en est esloignée de vingt milles, & Turelle, & aussi Lugrogne & Calaoire. Ce Royaume a deux passages vers le Bearn. Ce qui reste au Roy de France peut estre estimé presque la sixiesme partie du Royaume, qui a esté iniustement vsuré sur les Roys de Nauarre, & appartient de droit au Roy de France, à present regnant, comme à celuy qui descend de Catherine de Nauarre Comtesse de Foix, & de Bigorre, & Princesse de Bearn.

Le mal proceda de ce que ceste Princesse ayant espousé Iean fils d'Alain, Duc d'Albret qui prit le party de Louys XII. Roy de France, & l'assista contre les Venitiens, Espagnols & Allemands, & mesme contre le Pape irrité, apres auoir excommunié le Roy de Nauarre, mit son Royaume en interdict, & l'abandonna à Ferdinand, qui s'estant rendu maistre de Pampelune, & presque de toute la Nauarre, a transporté aux siens ceste iniuste vsurpation, qui ne peut plus estre de longue duree. Ceux qui sont descendus de Iean ont tenu le nom avec vne partie du Royaume: & i'ay trouué à propos de mettre icy leur descende.

Iean

Jean fils d'Alain Duc d'Albret. Sa femme Catherine de
Nauarre

Henry d'Albret Roy de Nauarre, Comte de Bearn, de Foix, de Bigorre, & d'Armagnac sa femme.	Charles qui meurt. Quelques filles pres de Naples sans enfans.
--------------------------------------------------------------------------------------------	----------------------------------------------------------------

Marguerite de Valois sœur de François I. Roy de France.

Ieanne d'Albret Royne de Nauarre espouse Antoine de Bourbon.

Henry de Bourbon Roy de France & de Nauarre — Louys XIII. Roy de France & de Nauarre.

QUALITE' DV PAYS.

L'Espagne en beaucoup de lieux n'est point cultiuee, à cause du fond qui est pierreux, ou pour les solitudes mal plaisantes: toutesfois si on la compare avec l'Afrique, elle est beaucoup plus fertile, pource qu'elle n'a pas de si grandes chaleurs. L'Espagne en plusieurs lieux rapporte assez de tout ce qui est nécessaire à l'homme, comme froment, vin, fruiçts, huyle, bestial, lin, fer & metaux, miel, & cire, & a des eaux qui nourrissent le poisson, & autres choses semblables. Elle n'est pas tant molestee des vents que la France, & l'air n'est infecté de brouillards, & de marests pestilents. L'or, l'argent, & le bon fer ne se trouue point en autre lieu en telle abondance, qu'en Espagne. On ne fouit pas tant seulement l'or aux mines, mais encore quand les fleuves enflent par les pluyes, ils produisent du sable d'or, & principalement le fleuve du Tage.

On a trouué autresfois en Espagne des fragments de pur or de la quantité de demie liure. Il y a en diuers lieux de ce Royaume des fontaines chaudes & froides, qui ont vne vertu admirable, pour guarir diuerses maladies. Il n'y a point faute de bestial en Espagne, & non seulement il y a force bestes priuees, mais aussi grand nombre de sauages. Sur tout elle est estimée pour les cheuaux qu'elle produit, qui sont de si grãde vitesse, que l'on a dit qu'ils estoient engendrez du vent. Elle n'a pas beaucoup de bestes nuisantes, si ce ne sont les conils qui fouissent la terre, gastent les racines des plantes, & font beaucoup d'autres dommages. Les fleuves qui coulent en Espagne coulent tout doucement, à raison dequoy ils ne gastent pas leurs terres par leur impetuosité. Ils ont aussi abondance de poisson, d'autant que la mer leur en enuoye beaucoup. L'air y est generally bon, & est froid vers le Nort, & les Pyrenées, & temperé vers la mer Oceane, & la nostre. Elle porte des fruiçts de toute sorte, & en si grande abondance, qu'elle en pourroit presque toutes les contrees Septentrionales, principalement d'oliues, oranges, citrons, figues, & choses semblables. La chair y est de fort bon goust, principalement celle du mouton, & du pourceau. On ne scauroit dire combien il y a de bon poisson aux lieux maritimes, principalement d'Andalusie, de Portugal, de Galice & de Biscaye.

Strabon escrit que vers le destroit de Gibraltar les Tons s'engraissent estrangement du gland qui tombe dans la mer des chesnes qui en sont proches. Et le Reuerend Pere Louys de Grenade a escrit, que l'annee 1575. la force de la mer jetta en la coste de Penique, lieu de Portugal, vn poisson long de 40. brassées, & large de 15. pieds, & si gros, que deux hommes assez grands, l'un estant d'un costé, & l'autre de l'autre, ne se voyoient presque pas, les bouts de la queue auoient d'interualle cinq brassées.

Et l'annee 1578. la mer enuoya en la plage de Valence vn veau marin, long de cent pieds. Et quelquesfois en la coste de Biscaye on void des Baleines de telle grandeur, que l'on en tire 200. bottes d'huyle. Mais pour retourner encores à ce que la terre porte, elle abonde de poix, de l'escarlante, de jonc, lin, chanvre, vif-argent, saumon, de pierre, de tourmentine, & d'alun.

Pline fait estat de l'airain des monts Marins, qui se nomment aujourdhuy *Sicna Morena*. Il y a aussi assez grande quantité de bonnes, & fines laines. Mais pour venir aux particularitez, la Catalogne est generally sterile, & plus abondante en fruiçts qu'en grains, & a plus d'arbres sauages que de bonnes plantes. Pres de Vich le pays est aspre & à demy desert. Pres de Tortose il y a vn assez bon terroir.

N

En Aragon pres des monts Pyrenees, on marche des iournees entieres sans trouuer aucuns habitans, toutesfois il y a quelques valees qui portent assez de fruit, & de grain, & l'eau fait de grands effects en tous les lieux par où elle passe. Pres de Caladiud il y a vn bon air, le pays est de bon rapport, où il y a force beaux iardins, & lieux peuplez.

Valence a l'air plus temperé, & plus agreable de toute l'Espagne: son terroir est plein de iardins, & lieux extremement plaisans, où il vient grande abondance de riz, de sucres, de grains, de fruits, & ce pays repond grandement aux qualitez de celuy qui est autour de Naples.

Quant aux riuieres qui arrosent ce Royaume de Valence, les principaux sont Gualdauar, qui veut dire eau pure & claire, qui passe pres de Valence, & Xucar, qui fut iadis nommé Sucron. Ce pays a des mines d'argent à Burjol: d'or à Loder: de fer à Finistrat, & à Iabee: d'albastre à Piacent: d'alun, de chaux, & de plastre en plusieurs lieux.

La ville de Murcia fut deliuree d'entre les mains des Mores l'an 1241. par le Roy Dom Alfonso VI. nommé à l'Empire, & fut souuinise à son pouuoir, elle receut la foy Catholique en l'an 1116. de maniere que par l'espace de 525. ans elle demeura en la puissance des Morisques, & du depuis a tousiours esté fidelle à ses Roys.

Ceste Cité est peuplee de dix mille habitans, & a de circuit vne lieue & demie d'Espagne. Elle est scituee en vne plaine, & en toute la ville il n'y a point de rue qui aille par descente, & qui panche en bas, elle est à 9. lieues de la mer, & 4. du Royaume de Valence. La Cité de l'Orcin est de ses appartenances, & luy commande comme à Cartagene, qui sont 2. bonnes villes & bons ports de mer, bien que l'Orca soit vn peu esloigné au dedans.

Il y a en ceste ville de Murcia vn Gouverneur, qui est souuerain, vn Lieutenant General & Ciuil, 12. Conseillers, 14. Greffiers, 12. Prouinces, & plus de 30. Aduocats, pource qui est du Seculier.

Il y a vne belle Police en ceste ville pour le faict de la marchandise, de maniere que si quelqu'un a failly ou vendu au preiudice de la taxe d'icelle, ou s'il est accusé de larcin, on le fait aller par les rues monté sur vn asne, & le fustige-on de verges par derriere, à chaque carrefour on luy donne autant de coups qu'il est condamné; la Iustice le suit à cheual deuant laquelle marche vn trôpette qui dit à haute voix; *C'est la punition que sa Maiesté ou sa Iustice en son nom comade estre faicte de cét hōme conuaincu de larcin, ou d'un autre mesfaict, pour lequel il est condāné à tant de coups de fouet, selon la grauité du crime:* Alors on sonne derechef la trompette, & le Bourreau execute la sentence, & donne autant de coups de fouet au criminel qu'il est porté par icelle, que s'il en donne dauantage on se rue sur luy.

A Lorca il y a vn Lieutenāt Ciuil, à Cartagene vn autre, & les delinquans en peuuent appeller à Murcia, & pour le second appel à Grenade sans autre, pource qu'il y a Chancellerie Royale.

Lors qu'on sonne le tocsin à l'entour du port à Murcia, le Gouverneur est obligé d'y aller avec ses gens, & s'acheminer à Cartagene pour deffendre la coste des Mores.

Tout le pays entre Murcia & Cartagene est presque desert & depeuplé, parce que ce ne sont que montagnes, & quelquesfois l'incommodité est qu'il ne s'y trouue pas vne goutte d'eau en Esté pour defalterer les voyageurs par ce pays, s'ils n'en portent avec eux. Le pays qui est du costé de l'Orca est fort peuplé: sous le gouvernement de Murcia sont aussi compris Carauaca, Moratalla, Calasparra, Colomera, & autres lieux. Par la ville passe la riuere Xucar, qui sort du Royaume de Valence, elle est fort marchande, à cause des foyes fines qui s'y font, elle est delicieuse pour les delices de ses beaux iardins, arrosez de diuerses sources cristallines d'eau, ils sont remplis d'oranges, limons, & citrons, qui croissent comme vne grosse citrouille, il y croist aussi quantité de cannes douces, dont on tire du sucre: outre plusieurs oliuiers, amandiers, vignes, grenadiers & autres fruitifiers & profitables.

Quant à Grenade, c'est vn des plus fertils terroirs d'Espagne, principalement là où le Genil & le Dare passent, pource que ces deux riuieres arrosent partie d'elles-mesmes, & partie aussi avec l'aide & industrie des habitans le pays d'autour de Grenade, & par ce moyen seruent grandement à y faire venir des plantes, des fruits, des herbes, des grains en abondance, mais sur tout y causent la grande quantité de bestial, de sucres, des meilleures foyes qu'on voye. Les Mores qui en furent chassez l'an 1492. disoient que le Paradis estoit iustement en la partie du ciel qui respond à Grenade. Du costé du Nort il y a vne grande plaine si fertile, qu'il n'est pas possible de le croire sans l'auoir veu. Pres du fleuve Genil il y a vne plaine fort agreable, & de grand profit, & aux montagnes qui en sont proches, on y paist vn grand nombre de troupeaux.

Là est la Chancellerie Royale, & l'Archeuesché du Royaume, elle a vn Chasteau admirable pour ses Tours.

Y a

Y a aussi à Grenade de fort belles cisternes, entr'autres vne de marbre soustenuë de 12. Lyons de marbre.

Ceste Cité a plus de 40. mil feux, & plus de deux mille fontaines d'eau fort fraische.

Pres d'Alhame il y a des bains, qui donnent vn grand plaisir à ceux qui sont sains, & font vn grand bien aux malades: pres de ces bains d'eau chaude, il y passe vn ruisseau extremement froid, qui pour ceste occasion se nomme Riofrio, ou riuere froide. Malague a tout son terroir, partie en plaine, partie en vallee, tout plein de fruiçts.

Il n'y a partie en Espagne qui porte plus de fruiçts, & de grains, que l'Andaluzie, ny où il y ayt plus de troupeaux, principalement de cheuaux, & ce pays est tel qu'on le peut nommer à bon droit, le grenier, le fructier, la caue, & l'Ecurie d'Espagne, & mesme la voliere, veu qu'elle a tant d'oyseaux, & principalement de ceux que nous appellons griues, qui sont tres-excellentes, que c'est chose incroyable presque à celuy qui n'y a pas esté. Autour de Seuille on void vne grande quantité de fruiçts, d'huyles, de vins, & de grains. Il y a entr'autres choses vn bois d'oliuiers qui dure 30. lieues. Pres de Cordouë le terroir est de grand rapport, & l'on y void vn grand nombre de beaux iardins, & force eaux, qui le rendent entierement agreable. Pres d'Almaden il y a vne bonne mine de vif argent, qui est vn metal liquide, mais qui surmonte en pesanteur ceux qui sont fermes, il s'attache à l'or toutes & quantes fois qu'il peut, & le separe de tous les autres metaux, & lors qu'il n'y a point d'or, il court à l'argent, & le purge des meslanges de la terre, de l'airain & du plomb avec lesquels il s'engendre. Il ne se soucie nullement des autres metaux, ains les gaste, les ronge, les perce, & s'enfuit, & il se resoult immediatement en fumee, & de fumee il retourne en son estre. En ces mines d'Almaden il y a de l'argent vif de deux sortes, l'excellent est celuy qui sort des pierres rompuës, est nommé vierge: celuy qui est de moindre prix se trouue sous terre: mais l'un & l'autre est venimeux de sa nature. Et c'est ce qui fait que ceux qui le tirent, deuiennent en peu de iours passés, & decolorez, en telle sorte qu'ils semblent plustost personnes mortes que viuant, & tremblent presque ordinairement, & viuent peu. Et ce vif argent a ceste particularité qu'il entre insensiblement iusques dans les os: tellement que lors qu'on rompt quelques fois en Almaden les os des iambes des morts, qui ont demeuré en terre quelque temps, il en sort vne bonne quantité de vif argent: ie parle de ceux qui ont trauaillé aux mines. Les Doreurs, afin de se garantir du mal qui prouient du maniement du vif argent, ont accoustumé de tenir dans la bouche vn peu d'or, tandis qu'ils trauaillent, & lors qu'ils en tirent ceste piece d'or, elle est toute couuerte de vif argent. Les rochers d'où on le tire, sont rouges, à cause du vermillon qui est comme vn excrement de ces mines, & qui luy tient ordinairement compagnie. C'est ce qui a fait que Plin a mis pres d'Almaden des veines de vermillon qui estoient alors fort estimees.

Aux enuiron de Marchene il naist des plus beaux & meilleurs Genets de toute l'Espagne.

L'Estremadure est le pays plus exposé au Soleil de toute l'Espagne, si bien que comme on passe en Italie le bestial de l'Abruzze aux campagnes de la Pouille, quand l'hvuer arriue, ainsi on le passe en l'Espagne des parties Septentrionales à l'Estremadure, où il fait vne chaleur excessiue en Esté, qui est cause qu'il n'y a pas de grandes villes. En toute l'espace du cours souterrain de la riuere de Guadiane, il y a de fort bons pasturages, à raison dequoy on dit entre les autres merueilles d'Espagne, qu'il y a vne riuere sur laquelle les troupeaux paisent. La terre de Guadacanal a eu grande reputation de nostre temps pour vne fort bonne veine d'argent qui s'y est trouuee.

La nouuelle Castille a plus de plaine que la vieille, & est plus au Midy, & plus chaude: ceste cy abonde plus en grains, & celle là en bestial: ceste cy est arrousee du Tage, & de plusieurs autres riuieres qui s'y rendent, celle là du Duero, qui grossit en telle sorte pour la grande quantité des eaux qu'il reçoit, qu'il deuient le plus grand fleuve d'Espagne. Il est vray qu'à cause de son cours rapide, & de son lit estroit, enuironné pour la plus-part de precipices & de rochers extremement droicts, il n'est pas si commode pour la nauigation, & n'aide pas tant à la production des fruiçts, que l'Ebro, le Guadalquivir & le Tage. Pres de Madrid on iouyt d'un bon air, & de la commodité des bois propres pour la chasse. Pres de Valladolid on void vn terroir fertile en grains, chairs, vins, & fruiçts de toute sorte.

La Galice est vn pays aspre, & qui n'a gueres d'eaux. Il y a de bons vins pres d'Orens: il s'y trouue assez de chasse, & de poisson aussi. Asturie est de mesme qualité que la Galice, mais elle est encores plus aspre, & moins habitee.

Il ne vient que fort peu de vin en Biscaye, & en quelques lieux, principalement à S. Adrien on plante au lieu de vignes des pommiers, du fruct desquels les habitans font du cidre qui est de difficile digestion: mais d'un goust agreable à celuy qui y est accoustumé. Elle a force bois, dont l'on fait des vaisseaux. En la mer de Biscaye on trouue grande quantité de

poisson. Pres de Bilbao on fait du pain excellent, & il s'y trouue de la chair de fort bon goust. Tolosette a vne petite riuere qui abonde en saulmons, & en truittes. Ce pays confine avec celui d'Alaue, qui abonde en orge, & est assez agreable.

MOEVRS DES ANCIENS ESPAGNOLS.

FAMIQUE nomme ceste nation pleine d'arrogance & de vanterie: Vopisque dit qu'elle est pleine de ruse, dispose de corps, sans repos, desiruse de choses nouuelles, & Iustin dit qu'elle a des esprits plus approchans de la beste, que de l'homme. Les Espagnols vsoient anciennement, selon Diodore, de robes courtes & noires. Isidore nomme ces habits Striges. Ptolomee & Diodore les font propres, & disent qu'ils se plaisoient fort à estre nets: mais vu d'eux les blasme de ce qu'ils estoient si sales qu'ils lauoient tout leur corps, & frotoient leurs dents avec de l'vrine. Strabon dit, que les femmes auoient accoustumé de s'exercer à l'Agriculture, & autres œuures rustiques: & que les femmes accouchees seruoient leurs maris, qui se mettoient dans le liect ainsi qu'elles auoient fait l'enfant. Diodore nous apprend qu'ils mangeoient grande quantité de chair, faisoient leur breuuage de miel, & beuuoient du vin acheté, & non pris chez eux. Flore dit qu'ils vsoient d'un breuuage faict de froment. Athennee met les Espagnols entre les peuples qui auoient accoustumé de s'enyrurer. Iustin les rend pleins d'une grande espargne & abstinence, & fort sobres: tellement qu'encore qu'ils fussent extrememēt riches, comme on peut voir chez Athennee, ils beuuoient de l'eau, & mangeoient seuls. Et Troge dit aussi qu'aux iours de feste il n'y auoit entr'eux nul appareil de festin. Plinie escrit que de son temps ils vsoient de gland au second seruice: & Strabon dit qu'ils faisoient du pain de la farine de gland. Plinie dit qu'ils mangeoient estās couchez par terre. Ils apprirent des Romains apres la seconde guerre Punique, à se lauer d'eau chaude. Iustin, & Valere le Grand, disent qu'ils auoient les corps disposez à souffrir la faim, & le travail, & les courages tous resolus à la mort. Seruius dit qu'ils estoient entierement addonnez aux larcins & volleries. Ils aymoient plus la guerre que l'oyfueté, selon Troge. En la guerre ils estimoient plus que les autres, non seulement les hommes de cheual, mais ceux de pied, qui pouuoient porter plus de peine. Ainsi qu'ils auoient vaincu en combattant à cheual, selon Diodore, ils mettoient pied à terre avec deux espees, & aydoient aux gens de pied. Leurs espees, selon Tite-Liue, & Polybe, estoient courtes, & propres à venir de pres aux mains: & leur coustume estoit de donner des estocades, & frapper de la poincte, non pas du trenchant. Athennee dit qu'ils vsoient de dards, & Diodore, qu'ils portoient des salades d'airain, & auoient aux iambes des bottes faites de poil. Strabon dit qu'ils auoient accoustumé d'aller legerement armez, & de porter des escus, des bardes, & des fondes. Polybe dict qu'ils entroient au combat couverts de certain linge bordé de Pourpre, & portoient des hocquetons extremement blancs. Les meres racontoient aux ieunes gens qui alloient à la guerre, les beaux faiets de leurs peres & predecesseurs, comme Saluste remarque en ses Histoires.

Ils dressoient autant de petites colonnes autour des sepulchres des morts, que chacun auoit tué d'ennemis, ainsi que tesmoigne Aristote. Cesar dit qu'ils passaient volontiers les riuieres à la nage. Iustin dit que plusieurs d'entr'eux faisoient plus d'estat de leurs cheuaux de seruice, & de leurs armes, que de leur propre sang. Diodore escrit qu'ils estoient cruels aux ennemis, & doux & courtois aux estrangers. Seruius dit apres Saluste, qu'il y en auoit plusieurs qui ne vouloient pas suruiure à leurs Roys. Ils aymoient tellemēt leur liberté, qu'en la guerre Cantabrique les meres tuerent leurs enfans, afin qu'ils ne vinssent pas au pouuoir des ennemis, ainsi que Strabon nous apprend, & vn enfant par le commandement de son pere, tua tous ses parens prisonniers, ayant rencontré vne espee pour cēt effect, & mēme vne femme coupa la teste à ceux qui estoient liez, & captifs avec elle: & encores on y lit, que quelques-vns estans estendus sur la croix, se mirent à chanter. Et leur courage est loué dans Iustin en la personne d'un esclau, qui au temps de la guerre Punique, ayant pris vengeance de son maistre, rioit à bon escient au milieu des tourments, tellement qu'il surmonta par son allegresse la cruauté de ceux qui le tourmentoient. Ce qui marque la fidelité des Espagnols, c'est ce qu'on lit dans Suetone, que Cesar auoit pour ses gardes des Espagnols qui le suiuiēt avec des espees. Strabon nous apprend encores, qu'on mettoit deuant les Espagnols du poison qui faisoit mourir sans douleur, afin que si quelque chose leur arriuoit contre leur gré, ils l'eussent tout prest pour se priuier de vie. Silius dit qu'ils auoient accoustumé de faire manger les morts aux Vautours. Toutesfois Elian escrit cela particulièrement des Barcenes, & seulement de ceux qui estoient morts en la guerre, disant que ceux qui mouroient de maladie estoient bruslez.

MOEVRS DES ESPAGNOLS DE CE TEMPS.

Les Espagnols sont chauds & secs de nature, & ont la couleur brune, qui fait que les 5. femmes vivent fort en Espagne de blanc, & de rouge. Ils ont les membres durs, & peu lâches. Ils surpassent presque tout le reste des hommes en superstition; & servent comme de guides aux autres peuples en ce qui est des ceremonies, des flatteries, & des tiltres superbes & magnifiques. Ils sont singulierement nez & duits à se taire & à dissimuler, & cacher leur courage. Ils gardent leur gravité avec une severité affectée, qui les fait hayr à toutes les nations. Les femmes n'y boient du vin que bien rarement, & se laissent voir peu souvent, & les Damoiselles ne sortent jamais de leur logis qu'avec une grande compagnie de valets qui les deuantent, & des chambrières qui les suivent. Dans leurs maisons les Espagnols sont sobres, & se contentent de peu: mais en celles d'autrui, ils sont gourmands & delicats, & desirieux de faire bonne chere. Ils recueillent les estrangers avec peu de courtoisie. Quand ils sont hors d'Espagne, l'un d'eux fait estat de l'autre, l'honore, & le loue jusques là mesme qu'ils rendront le plus roturier Gentil-homme comme leur Roy s'ils peuvent. Ils aiment la Justice, & la rendent exactement à toute sorte de personnes. L'industrie des Magistrats fait qu'il n'y a que bien peu de larrecins, où mesme qu'il n'y en a point: & dans le pays il se commet peu de meurtres. Il n'y a personne qui demeure impuny quand il a failly contre les loix, ou offensé quelque autre de quelle qualité qu'on le trouue. Lors que deux ou trois Espagnols sont ensemble, de quelque estoffe, & condition qu'ils soient, principalement lors qu'ils sont à la guerre, ils discourent de la Republique, & de choses serieuses, cherchent le chemin d'affoiblir les forces des ennemis, pourpensent des stratagemes, & les proposent à leurs Chefs, lors qu'ils les trouvent considerables.

Quand ils sont campez, il n'y a gens au monde qui endurent plus longuement, & avec plus de patience la faim, la soif, les veilles, & toute sorte de travail. Ils ont plus d'art que de furie, lors qu'ils viennent à combattre. Leur disposition & leurs armes legeres font qu'ils suivent aisément l'ennemy, & prennent aussi facilement la fuite, lors qu'il en est besoin. Quoy qu'ils ayent l'esprit bien subtil, toutesfois ils ne sont pas heureux à apprendre, & lors qu'ils ont tant soit peu de cognoissance des lettres, ils s'estiment sçavants au possible. Ils aiment les ruses, & tromperies des Sophistes sur toutes choses. Aux Vniuersitez ils se plaisent plus à parler Espagnol que Latin. On ne void guere de leurs œures qui passent leurs montagnes, à cause du defect qu'ils ont de ne sçauoir pas bien parler Latin: toutesfois la curiosité des François a donné depuis quelque temps à l'essor leurs œures: tellement que l'on en trouue maintenant un grand nombre par toute la France, & principalement à Lyon & à Paris. Ils sont plus melancholiques qu'autres, & c'est ce qui les rend du tout lents aux entreprises. Ils aiment le repos, & se fondent extremement sur les apparences, à raison de quoy ils employent tout leur argent à paroistre en habits ou autres choses. Ils vantent au possible tout ce qui les touche. Ils cognoissent aussi-tost leur aduantage, & le recherchent autant qu'ils peuvent. Ils courent leur foiblesse avec une grande industrie. Ils se battent beaucoup mieux à pied qu'à cheual, combien qu'ils ayent des cheuaux bons par excellence, & s'aydent mieux de l'arquebuse que d'aucune autre sorte d'armes. Ils font paroistre qu'ils portent une grande reuerence à l'Eglise, & aux choses sacrées: & quelques-uns estiment que ceste profession de pieté & de Religion qu'ils font tous, leur a rendu le Ciel fauorable, & a fait que Dieu leur a donné un nouveau monde en la conqueste & Seigneurie duquel il n'y a nation qui y ayt part que la Francoise. Ils sont sujets à deuenir amoureux, & mesme sur leur vieil aage: & lors qu'ils aiment, c'est avec tant d'ardeur, & de passion, que l'on tiendroit pour incroyable les actions que l'amour leur fait produire, si l'on ne les auoit veus: & leurs coustumes est de n'espargner aucune chose, ny pour leurs amis, ny pour leurs maistresses. Mais pour venir aux particularitez, près de Vich en Catalogne les habitans sont rudes, & nullement civilisez, sauvages, & pleins d'ignorance: mais en Aragon les habitans de Sarragosse principalement font profession de civilité, & de gentillesse, & s'addonnent aux choses qui sont bien seantes à un Canulier. Les habitans de Valence ne sont pas beaucoup estimez des autres peuples, pource qu'estans presque engouffrez dans les delices, dont la ville & le pays abonde, ils sont peu propres, & s'addonnent peu aux armes, tellement que les autres Espagnols les nomment Penites, à cause de leur delicateffe. Il n'y a ville en l'Europe, où les femmes qui font l'amour soient plus estimees, & la volupté deuanee en ce lieu l'honnesteté en toute maniere. Au pays d'Andaluzie les habitans sont polis, & civilisez, ont l'esprit bon & gentil, & pour la plus grande partie ils sont pleins de discretion, & de prudence. Les Biscayans sont excellens aux choses maritimes & réussissent volontiers bons soldats, & bons mariniers.

RICHESSES D'ESPAGNE.

6. **L'**ESPAGNE a peu de rivières, & il n'y pleut guère souvent, de sorte que l'abondance n'y est pas générale, & le commerce s'y exerceroit moins qu'en autre lieu, n'estoit l'abord de ce qui vient des Indes. Car puis que le trafic est fondé sur la commodité de la conduite des marchandises, & que la commodité depend des pays pleins, & aisez, & des rivières navigables: l'Espagne estant pleine de montagne, & ayant peu de rivières, deuroit avoir par conséquent peu de trafic, & de commerce. Il est vray qu'elle ne manque pas de bons ports de mer, où il se fait un incroyable trafic. Ses richesses sont les vins, les huiles, la cire, le miel, le sucre, le safran, & les fruits de toute sorte, qui y viennent en si grande abondance, qu'elle en fournit presque tous les pays Septentrionaux, principalement d'olives, oranges, citrons, figues, & choses semblables. La pêche des tons y est de si grande importance, que le Duc de Medine Sidonie en tire quatre-vingts mille ducats toutes les années: & celui d'Arcos vingt-mille.

A Murcie on fait grande quantité de fort bons vases de craye, & aussi de tres-fines soyes, dont on tire beaucoup d'argent.

En la ville de Cartagene il se fait grand trafic de laines, qui sont conduites de là à Gennes, à Milan, à Florence, & ailleurs, & même en France, où l'on use fort maintenant de laine d'Espagne, pour faire des feutres, & non autre chose. Les vers à soye estans morts au Royaume de Murcie il y a quelques années, à raison de certain temps qui leur fut contraire, les habitans en ont repeuplé le pays plus que jamais par le moyen de ceux de Grenade.

Au Royaume de Grenade, outre la grande quantité des soyes, on trouve aussi force laines dont on tire un grand profit. Malaque abonde en toute sorte de viures, tellement que les armées s'y pouruoient volontiers.

Le port de Seuille rapporte un grand profit à l'Espagne, pource que c'est de là qu'elle envoie les vins, les huiles, & les fruits de toutes sortes en l'Amerique, & par tout le Septentrion, & particulièrement tant de vin, que l'on dit ordinairement que quand il n'entre pas chaque jour quatre mille pieces de vin dans Seuille, il faut nécessairement que celui qui a affermé la Dace, face banqueroute.

On descharge d'autre-part en ce lieu, l'or & l'argent de la nouvelle Espagne, & du Peru, les perles de Gubane, & de Terrarecqui, les Emeraudes de Sainte Marthe, la cochenille de Mexique, les sucres, & les cuirs de l'Isle Espagnole, & plusieurs autres richesses du nouveau Monde, & de là on les distribue à tout le reste de l'Europe: tellement que ceste seule ville, pour l'entrée & sortie de tant de thresors, dont elle est comme le magazin, vaut autant au Roy d'Espagne qu'un bon Royaume.

Les Espagnols tirent aussi de grandes sommes de vif argent qu'ils trouvent auprès d'Almaden, au Diocèse de Cordoue. D'ailleurs ils recoivent un grand nombre d'argent de leurs genets, dont ceux de Marchene sont les plus beaux, & les meilleurs du Royaume. Ces genets sont si parfaitement beaux, & si bien formez, qu'il semble que la nature se plaise à les rendre agreables, & les polisse le plus curieusement qu'il luy est possible. Ils vont si vistes, qu'il semble quand on les pousse à toute bride que quelque vent les emporte: & leur vivacité est si grande qu'on ne scauroit presque croire la hardiesse qu'ils ont aux combats, ny le courage qu'ils montrent aux blessures qu'ils recoivent: veu qu'on en a veu beaucoup qui ayant les boyaux qui leur trainoient ont porté leurs maistres en lieu d'assurance. C'est aussi le sujet qui fait qu'on les met à plus haut prix que tous les autres chevaux. Et si la nature leur avoit donné la force esgale au courage, ils auroient toutes les perfections & qualitez, qu'on peut desirer en un cheual. Je dy cecy, pource qu'ils sont plustost courageux, que forts, & plus propres à de petites, & courtes escarmouches, qu'à de longues batailles. Et véritablement ces chevaux sont conformes au naturel des Espagnols, qui se plaisent grandement aux apparances, & sur tout à estre propres, & magnifiques, veu qu'on ne scauroit de peindre un cheual plus gentil, ou plus propre pour paroistre, & faire monstre de soy-même.

La plus grande richesse de Galice vient du vin d'Orens, & de la pêche des habitans.

La Biscaye envoie les laines aux pays Septentrionaux, & les espees qui se font à Bilbao, de même que Guipuscoa fait argent de celles qui se font à Tholofette.

Le Portugal envoie dehors les soyes qui se font au pays d'autour de Bragance, qui sont presque des meilleures. Il envoie aussi dehors les sels, & les tons qui s'y pêchent, & qui luy portent un grand argent, & la plus-part de ces tons viennent du Royaume d'Algarbe.

Lisbonne est l'abord de toute la marchandise, & le lieu où se fait toute le trafic des Indes Orientales

Orientales, de l'Ethiopie, du Bresil, de Madere, & des autres Isles, & de tout le Septentrion. C'est là que les flottes & que les armées de mer se fournissent, & c'est en fin le lieu où tout le Royaume se vient pourvoir de ce qui luy est nécessaire. Mais afin de voir mieux le trafic qui se fait aux ports d'Espagne, & principalement à Lisbonne, faisons en denombrement particulier, specifians distinctement toutes choses.

De Candie on porte des maluoisies, qui sont enuoyees apres aux Indes Orientales, où par le moyen de la longue nauigation elles viennent bonnes par excellence, & se vendent quatre vingts & dix, & voire cent escus la pipe.

De Barbarie par la voye de Ceute & de Fauier, il vient beaucoup de cuirs, de pierres precieuses, tapisseries, & autres choses, mais non en si grande abondance que de coustume.

Il y vient de l'Angleterre plusieurs vaisseaux chargez de marchandise, & specialement de draps.

Il y vient des Pays-bas des toiles, & force menuës merceries, pour enuoyer aux Indes. Il y arriue de France du froment, de Biscaye des armes, & bien souuent des Indes Occidentales quelques nauires qui y portent de tres-bons cuirs fort grands, & en grande quantité: de mesme qu'on y void venir de l'Isle Espagnole, de la casse & du sucre, & quelque peu d'or & d'argent, avec autres choses, qui se trouuent en ceste contree.

Du Bresil il vient plusieurs sucres, & la qualité s'en accroist toutes les annees. Il en vient aussi force ambre gris, & force cottons, qui augmentent tous les iours, & la terre est si bonne pour cet effect, qu'on en tireroit autant qu'on en pourroit desirer.

De Madere il vient six cens mesures de sucre tous les ans, & ces sucres estans meilleurs que tous les autres, qui viennent en ce pais-là, on vend quatre ducats & dauantage la mesure, qui se nomme arobe. On porte encor de ceste Isle du sang de Dragon, & quelque autre chose, mais de peu d'importance, de mesme que de saint Thomas il vient tous les ans plus de deux milles arobes de sucre, & deux cens esclaves Negres. Il y a peu d'annees qu'on y a introduit les cottons dont il vint la premiere annee à Lisbonne soixante mille liures, & ils augmentent tous les iours.

Des Paranes, vient force ris, noix, singes sans queue, & perroquets bleus.

De l'Isle du Prince il vient des sucres, du ris, & des esclaves noirs.

De l'Isle du Cap-verd vne moyenne quantité de sucres, cottons, cuirs, peaux de cheures, ris, cire, huile, & sur tout plusieurs esclaves noirs.

Des Isles Azores grande quantité de pastels, qui sont distribuez par l'Angleterre, & la Sicile, beaucoup de fromens, & orges, qui vont pour la pluspart en l'Isle de Madere, & aux places d'Afrique, & payent dix pour cent au Roy. Dauantage l'on y fait l'alun de roche, qu'on tient estre des meilleurs.

De la mine de la Guinee il vient seulement de l'or, & l'on n'en porte pas toutes les annees la valeur de deux cens mille escus: outre celuy que les particuliers en tirent, & portent secretement.

Des Indes Orientales, il vient tous les ans la quantité de deux cens mille quintaux de poiure, qui souloit entierement appartenir avec toute l'autre espicerie au Roy qui payoit le tout à Malaque, à raison de trois ducats pour quintal, dont chacun vaut cent liures, & aux autres Isles à l'entour cinq ducats, & à Lisbonne en la maison des Indes on les vend quarante ducats le quintal. De gingembre, canelle, mastic, girofle, & noix muscade, il en vient pour la valeur de deux cents mille escus à chaque changement de nauires: de bons eudelles pour cent mille ducats, & plus, pource qu'on s'en sert en Espagne, depuis quelque temps en ça, pour teindre les draps, en lieu de pastel. On vent vn ducat l'Arche, qui vaut seize onces.

Pour le borax, camfre, sandal, aloës, ebenes, & autres drogues, il en vient tous les ans pour quarante mille ducats. Plusieurs particuliers conduisent des balles de coton de beaucoup de sortes, pour la valeur de soixante mille ducats: surquoy l'on gagne iusques à quatre vints pour cent. Pour le regard de l'ambre, & du musc, il a accoustumé d'en venir pour vingt mille ducats.

Quant aux perles & pierres precieuses, comme rubis, & diamans, il en vient vne bonne quantité, mais on ne peut scauoir iustement combien, à cause que les particuliers en portent beaucoup secretement, afin de ne payer de la dace au Roy, qui est de cinq pour cent.

De la Chine, Malaque, Maluie, Bengale, Pegri, Lambaye, & autres lieux de ces parties-là, il en vient des foyes blanches, de tres-belles porcelaines, & plusieurs autres choses belles & delicates, qu'on nomme en Lisbonne Brincos, en grande quantité.

Il vient encores de la Chine de menuës perles, avec de beaux & menus ouurages extre-

mément delicats, qui se vendent à Lisbonne iusques à cent croisez, ou escus de Portugal la piece; & les Portugais les portent sur les habillemens, comme les Magistrats portent des chapperons sur leurs robes en Italie.

On porte de la Chine quelques litteres, tables, & chaires, & bancs d'un certain bois noircy, & luyfant comme l'ebene, ouure & garny d'or de bonne grace, avec plusieurs autres gentillesse de sorte qu'on peut cognoistre que les peuples de la Chine ont l'esprit subtil, & propre à inventer quelque chose de delicat.

De l'Perse on apporte de beaux tapis d'or & de soye, & de fines laines. Les nauires qui viennent des Indes apportent quelques petites coquilles blanches, qu'ils trouuent sur certains riuages de la mer, & les vendent à Lisbonne.

Toutes ces marchandises viennent à Lisbonne de toutes les parties du monde, & sont portees par toute l'Europe avec un profit signalé des Portugais, & celuy du Roy d'Espagne eust esté beaucoup plus grand, pource qu'il auoit les espiceries à son commandement, s'il n'eust esté trompé par ses propres Officiers. Mais on peut veritablement dire que le Roy d'Espagne s'est pluost appauury depuis quelques annees, encor que les marchandises soient de grand profit. Et pour ceste cause il est permis à quelques particuliers de les auoir, en se reseruant quelques daces, dont il a trouué sept cent mille ducats, outre la despenfe pour le regard des marchandises. Il y a maintenant trois Vice-Rois aux Indes, l'un à Malaque, l'autre à Binus ou Ormus, & le troisieme à Mozambique, afin de prendre garde que les espiceries ne passent par la mer Rouge en Alexandrie, comme elles auoient accoustumé de faire, à cause de la mechanceté des officiers qui se laissent corrompre.

Les marchandises qui vont ordinairement de Lisbonne aux Indes sont vins de Candie & d'Espagne, & des draps de soye, & de laine, & beaucoup de menuës merceries. On enuoye en la Chine, & à la Mine, pais des Negres, quelques gros anneaux de leton, qui viennent de Flandres, où chacun s'achete un real, & puis est vendu à raison du tiers d'un ducat aux Negres.

Pour le regard du Bresil on y enuoye des vins, des draps de laine, plusieurs habillemens faits de toutes sortes, pource qu'il n'y a nul artisan en ce pais là, & ces choses ne seruent pas pour ceux qui sont natifs du pais, (veu qu'ils ont accoustumé d'aller nus, demeurer dans des bois, & se nourrir de chair humaine,) mais pour les Portugais mesmes, & autres marchands qui habitent en ceste contree.

On enuoye en Angleterre du vin, de l'huile, du sucre, des espiceries de toutes sortes, & de mesme aux Pais-bas, outre vne grande quantité de sel fait aux mines de Portugal, & ceux qui en ont cognoissance assurent qu'il part tous les ans pour les prouinces estrangeres du moins trois cens Ourques chargees de sel, dont chacune est ordinairement de quatre cens tonneaux.

Les nauires d'Italie chargent à Lisbonne des espiceries, & plusieurs sucres, & en la ville de Lagos, & en Algarbe plusieurs tonnes, dont on enuoye aussi quantité par route l'Espagne.

Quant au reuenue du Roy d'Espagne, c'est chose certaine qu'il tire plus de quatre millions d'or des Estats d'Italie, & de Sicile: plus de deux millions du Portugal, enuiron trois millions d'or de terres neufues, à vne annee portant l'autre, Majorque & Minorque cinquante mille escus, de l'Espagne un million: & enuiron quatre cents mille escus. Mais ce n'est rien de ces tributs, au regard de ce qu'il en tire extraordinairement, & mesme l'on peut dire coustumierement pour la plus grande partie, comme de la Croisade qui luy vaut le reuenue d'un Royaume, les subides de l'Eglise, avec lesquels il peut entretenir continuellement cét bonnes galeres, & les caducitez des Estats, qui emportent plus qu'on ne pense en Italie & en Espagne, outre les dons gratuits des peuples ordinaires, & extraordinaires. Car le Royaume de Naples donne toutes les troisiemes annees enuiron un million, & deux cents mille escus, & de mesme la Sicile, & la Sardaigne, la Duché de Milan, Castille, & ses autres Estats du nouveau monde font en leur temps de grands presens: & outre cela les contributiōs sont grandes & signalees. Car mesme la Castille accorda naguieres au Roy d'Espagne vne contribution de quatre millions payables dans quatre annees.

Il laisse le grand nombre des Commanderies des Ordres de Mantegge, de Calatraue, d'Alcantare, & de Sainct Iacques, avec lesquelles, quand il n'auroit autre chose, il peut comme Grand-Maistre recompenser & enrichir ses seruiteurs, & officiers, & quiconque il luy plaist, comme font les Roys de Pologne, & d'Angleterre. Mais il consomme tout cecy en l'entretien de sa Cour, aux pensions des Vice-Rois, & gages des Presidents & Conseillers, estats des Lieutenants, Gouverneurs, Capitaines, & Ambassadeurs, pensions de Cardinaux, presens, soldats de galeres, & de l'Infanterie, & Caualerie qui garde les forts & frontieres:

comme

comme aussi en entretien des Euesque, & Prestres qu'il tient aux Indes, & aux nauires qu'il y enuoye, & qu'il en fait venir, tellement que tout son reuenu ne luy suffit pas quelquesfois. Ce qui se void assez en ce qu'on fait le Roy d'Espagne debiteur sur la place de Genes d'un grand nombre de millions d'or, dont les Geneuois tiennent compte, pour n'en estre peut-estre iamais payez, & il est encore dans les liures de plusieurs marchands sur tous les bons ports de mer de l'Europe. Tout son recours n'est qu'à la flotte des Indes, qui n'est pas plus tost arriuee qu'elle est enleuee par les creanciers, & si quelque tempeste la fait perir, ou que quelque ennemy l'emporte, comme les Holandois en ont enleuee quelquesfois de bonnes pieces, toute chose est au desespoir. Et ce qui a beaucoup espuise les coffres du Roy d'Espagne, c'a esté la guerre des Pais-bas, où il a consommé vne incroyable quantité d'argent avec fort peu d'auancement: & s'il se remet vn peu, & replit les coffres ce, sera par le moyen de la cessation d'armes qui a esté accordee. Toutesfois les autres despences qu'il luy conuient faire en tant d'endroits feront qu'il n'aura iamais guere de reste, & qu'il viendra tousiours plus tost aux emprunts.

LES FORCES DV ROY D'ESPAGNE

Quelques-uns tiennent que ceste Monarchie ne peut estre de longue duree, à cause que les terres sont tellement separees, & esparées, & qu'il faut des despences incroyables pour enuoyer par tout, & des vaisseaux & des hommes, & mesme que ceux qui sont natifs des pais esloignez peuuent en fin entrer en consideration du petit nombre des Espagnols, prendre courage, & se liguier contre eux, & les chasser, ou bien quelque Gouverneur Espagnol se voyant esloigné du Roy peut gagner les cœurs du pais, aspirer à la domination, & se reuolter contre son Prince, sans auoir guere de crainte d'estre puny de son audace, & de sa rebellion.

Les autres repartent qu'un Espagnol n'oseroit entreprendre ceste reuolte, pource qu'il doit estre entierement assure, que s'il s'estoit retiré de l'obeissance de son Prince, ceux du pais qui ne huent rien plus que les Espagnols, se seroient bien-tost deffaits de luy, quand il manqueroit de l'assistance d'Espagne.

Si bien que ceste rebellion ne peut arriner pour encore, & iusques à ce que les Espagnols s'y soient multipliez dauantage.

Quant à la rebellion du peuple natif du pais on ne la peut guere craindre, à cause que l'Espagnol le tient en bride sans cesse, & prend garde de pres aux actions de ces barbares, afin d'euer toute surprise. Et quant à l'esloignement, & la separation des terres, ceste opposition n'est guere considerable: pource qu'entre plusieurs autres raisons, les grandes Seigneuries sont plus propres à se maintenir contre les caules exterieures de leur ruine, & les medieres contre les interieures.

Or on void en vne Monarchie ainsi diuisee, la grandeur & la mediocrité vnies ensemble. On void la grandeur en tout le corps composé de membres des-vnis, & la mediocrité en la plus grande partie de ses membres, pource que quelques-uns d'iceux (comme l'Espagne, le Peru, & Mexique) sont fort grands d'eux-mesmes.

De là vient que ceste Monarchie a tous les biens que peut apporter la grandeur, & la mediocrité, c'est à sçauoir vne grande puissance contre les ennemis de dehors, & vne grande assurance des corruptions domestiques.

Il faut adiouster à cecy que tous les membres de ceste Monarchie se peuuent vnir avec des forces de mer. Car de mesme qu'Auguste avec vne armee qu'il tenoit à Rauenne, & vne autre qu'il auoit à Messine assureoit tout l'Empire Romain: ainsi le Roy d'Espagne entretenant deux armees, l'une en la mer Mediterranee, l'autre en l'Oceane, tiendrait tous les membres de sa Monarchie, & tous les Estats qu'il possede en l'Europe, & au nouveau monde bien vnies ensemble, pource qu'un bon nombre de gallions, & de vaisseaux de guerre qu'il auroit sur ses mers, assureroient non seulement les costes & lieux maritimes d'Espagne & de l'Amerique, & flottes qui vont & viennent, mais encor brideroient l'Angleterre, & empescheroient les nauires des Estats, & autres de courir à leur fantasie. Mais quant à l'armee de la mer Mediterranee, elle vnira tousiours tous ses Estats, en telle sorte que toutes leurs forces y seront, comme nous voyons que les Portugais maintiennent avec leurs forces maritimes les Estats qu'ils possedent en Perse, en Cambaye, en Decan, & au reste des Indes, & les ont maintenus glorieusement desia plus de quatre-vingts & dix annees.

Quelques hommes de grand iugement & de grande experience ont oppose aux deliberations qui ont esté faites sur ce subiect, la concurrence du Turc, disant que le Roy d'Espagne se retirant de la despence excessiue qu'il fait aux fortifications, veut avec cet argent

qu'il espargnera entretenir vn corps d'armee de cent cinquante, ou plus de galeres, comme il pourroit faire bien aisément, il fera que le Turc qui se contente à present d'un corps de 130. galeres ou enuiron, en voudra tenir deux cens sur la mer, afin d'auoir tousiours en cela l'auantage sur le Roy d'Espagne: si bien que ce Roy entrera en des pense sans qu'elle luy soit profitable.

Mais c'est vne trop grande subtilité, & aux choses qui consistent en pratique il n'y a rien qui réussisse moins que la trop grande subtilité des esprits. Car il ne suffit pas que le Turc vueille estre plus fort sur la mer que le Roy d'Espagne: mais il faut voir encor s'il pourra l'estre, & faire vn si grand effort, veu qu'il n'a pas plus de gens propres aux factions maritimes, ny plus de commoditez d'auoir des vaisseaux que le Roy d'Espagne.

Car toute la coste d'Afrique, en ostant Alger, & Tripoly, n'a pas de quoy faire, ou maintenir deux galeres.

Ie dy le mesme de la mer Majour, ou Pont Euxin, où il n'y a lieu d'importance que Caffé, & Trebisonde: & l'on en peut dire le mesme presque de toute la coste de l'Asie, pource que ce n'est pas assez d'auoir beaucoup de costes de mer, veu qu'il est necessaire d'auoir aussi des gens qui se plaisent à aller sur mer, & qui puissent supporter l'incommodité & la peine qui s'y offre, qui prennent plaisir à la nauigation, & à trafiquer sur la mer, qui ayent abondance de bois, & de chanvre, qui ne s'estonnent pas des menaces des vents, & de l'horreur des tempestes, qui ayent le courage de mettre leur vie au hazard au milieu des dangers, & de deffier la mort aux plus mauvais & fascheux passages. Or est-il que la moitié de l'Empire du Turc n'a pas des gens de mer, qui puissent aller du pair avec les seuls Cathalans, Biscains, Portugais, & Geneuois que ie nomme particulierement pour le seruice que le Roy d'Espagne en reçoit en ses armées de mer, ou qui soient capables de leur faire teste.

Finalement ce Roy a deux aduantages sur le Turc, dont l'un est, qu'encor que le Turc ayt sous son Empire plus de gens que luy, toutesfois, à cause qu'ils sont Chrestiens pour la plus grand part, il ne s'y peut guere bien fier, quand il a affaire contre des personnes de mesme Religion qu'eux: l'autre que les costes de la mer du Roy d'Espagne sont plus vnies que celles du Turc, à raison de quoy il peut avec plus de facilité ramasser tous ses gens, & les mettre ensemble.

Dauantage on a veu presque tousiours les armées du Ponent victorieuses de celles du Leuant, & les Septentrionales de celles du Midy, les Romaines des Carthaginoises, les Grecques des Asiatiques.

Ainsi Auguste mit en route les armées de mer d'Egypte avec celles d'Italie, & de nostre temps les Chrestiens ont defait celles des Turcs, qui confessent mesme que nos galeres sont meilleures que les leurs, & en craignent la rencontre. Et de fait toutes & quantes fois que l'Empereur Charles V. a voulu armer, il y a mis ensemble de telles forces, que le Turc n'a iamais eu le courage de se remuer, & luy aller faire teste.

Il mena à l'entreprise d'Alger cinq cens vaisseaux, & plus de six cens à celle de Tunes, & André Dorie mena en Grece tant de forces qu'il prit sans peine Patras, & Corone. Et cela suffisoit pour ce regard.

Ie ne veux rien dire des forces maritimes que ce Roy a tousiours eu sur l'Ocean Germanique, ou la mer d'Allemagne à cause des Pais-bas qu'il vouloit r'auoir, & remettre sous sa domination.

Que s'il auoit les pais d'Hollande & de Zelande, il se pourroit vanter que tous les autres Princes luy cederoient en forces sur mer.

Ie laisse à part le grand abord de toute sorte de vaisseaux à Seuille, où toutes les flottes du Peru, & de la nouuelle Espagne se viennent rendre, & où l'on tient en perpetuel exercice vn grand nombre de soldats, & de mariniers.

Ie me deporteray aussi de parler de la valeur des Biscains sur la mer, où ils deuiennent esgalement excellens mariniers, & bons soldats, si bien qu'ils vont aussi courageusement contre l'ennemy armé, que contre les furieuses ondes de la mer. Mais pour monstrier encor mieux ce que le Roy d'Espagne peut sur la mer, voyons ie vous prie l'appareil de guerre qu'il dressa en l'année 1588.

Le Roy d'Espagne fit apprestier, pour faire la guerre à la Roynie d'Angleterre, & aux Pais-bas, trois cens cinquante voiles avec neuf mille hommes de marine, en ceste forte.

Il y auoit quatre galeaces de Naples, vingt cinq gros vaisseaux de Seuille, vingt-cinq de Biscaye, Guipuscoa, trente Ourques d'Allemagne, cinquante petits vaisseaux de Catalogne, Valence, & autres villes, cinquante de la coste d'Espagne, c'est à sçauoir chaloupes, & barques, cent Zabarres de Portugal, des quatre villages de la coste de la mer d'Austriche, Biscaye,

Biscaye , & Guipuscoa , vingt galeres d'Espagne , quatorze de Naples , & douze de Sicile.

Il y pouuoit auoir pres de soixante mille hommes tant Espagnols , qu'Italiens, & Allemans, c'est à sçauoir vingt-cinq mille Espagnols : en comptant cinq mille qu'il auoit tiré des Regimens d'Italie, & six mille de Canarie, & des Indes, & des garnisons de Portugal: & le reste fut leué en Espagne: Douze mille Italiens avec dix Maistres de Camp , vingt cinq mille Allemans, douze cents cheuaux legers Espagnols, autres deux cents de la coste, & deux cents de la frontiere , qui sont en tout mille six cents hommes de cheual.

L'Andaluzie contribua douze mille quintaux de biscuit. Malaca & sa comté vingt & sept mille cinq cents quintaux. Cartagene, & Murcie cinq mille quintaux. Sicile cinquante mille quintaux: Burgos, & Campos cinquante six mille quintaux: Naples, & les Isles quinze mille quintaux. Somme il y pouuoit auoir en tout enuiron cent soixante sept mil, & cinq cents quintaux.

Seuille & l'Estremadure contribuerent 4000. quintaux de chair salee. Galice six mille quintaux, Asturie, & autres endroits mille quintaux qui font en tout onze mille.

Seuille, & l'Estremadure contribuerent cinq mille quintaux de lard, Ronde 2000. Galice 2000. Biscaye deux mille, qui font en tout onze mille.

Algarbe fournit huict mille barils de poisson de Dodine. Almandraue du Duc onze mille barils : & Caliz quatre mille barils , qui font en tout vingt & trois mille barils.

Majorque y fournit deux mille quintaux de fromage , Senegaille & l'Estremadure mille : Portugal vingt cinq mille quintaux, qui font en tout vingt huict mille quintaux.

Gennes & Valence fournirent quatorze mille quintaux de riz.

L'Andaluzie, & Naples fournirent vingt & trois mille poids d'huile, & de vinaigre , & chaque poids vaut vingt-cinq liures, & chaque liure seize onces.

Cartagene contribua quinze mille hanegues, ou boisseaux de pois, & de febues, & Naples, & Sicile onze mille.

Malague, Maxouelle, & Ceresse, & leurs iurisdicions contribuerent treize mille pions de vin: Naples six mille, Seuille & sa iurisdiction sept mille qui font en tout vingt & six mille.

Il y a d'autres prouisions de bleds, fer, toiles, & autres choses necessaires , qui furent fournies par l'Andaluzie, Naples, & Biscaye.

Dauantage on leua pour le seruice de l'artillerie quatre mille, & deux cents hommes, dont il y auoit quatre cents Gastadours.

Maintenant que nous auons parlé des forces maritimes , venons à celles de la terre qui consistent en infanterie, & caualerie.

Quant à celles là les meilleurs hommes de pied de tous les Estats appartenans à ce Roy hors de l'Espagne sont les Vualons. Le dy de ceux qui sont hors d'Espagne, pource que l'infanterie Espagnole est assez cogneuë pour la meilleure que ce Prince puisse auoir : car les Espagnols par le moyen de leur infanterie affranchirent leur pais de la domination des Mores, & ne se virent pas plustost à bout de ceste entreprise qu'ils assaillirent l'Afrique, & y prindrent des places d'importance, & par apres les Portugais trauaillerent la Mauritanie, & dompterent la coste de la Guinee, d'Ethiopie, & de Cafrarie, conquererent les Indes, Malaca & les Isles Moluques, les Castillans passant l'Ocean Atlantique se rendirent maistres du nouveau Monde, où il y a tant de Royaumes, & de Prouinces, & tant de peuples differents de langage, d'habits, & de façons de faire.

Leur valeur consiste en la conduite, & accortise , pource qu'il n'y a nation qui cognoisse mieux son aduantage, & desaduantage à la guerre: elle consiste aussi en la diligence, pour ce qu'ils ne s'égarent ny oublient guere & se seruent de toute chose: on la peut aussi loger en l'vniou, veu qu'on n'a iamais veu que les Espagnols soient venus aux mains entr'eux hors de leurs pais: & finalement ils ont vne grande patience , & endurent fort aisément la faim, la soif, le chaud, le froid, le mal aysé, la peine , & toute sorte d'incommoditez, si bien qu'ils sont capables de lasser presque toutes les autres nations.

Ils ont obtenu de grandes victoires avec ces parties, & s'ils ont esté vaincus, ils ont aussi bien souuent esté victorieux , toutesfois la fortune les a mal traittez en l'entreprise d'Alger, & en celle d'Angleterre, & l'armee de cinquante mille hommes, que Charles cinquieme fit entrer en Prouëce y fit si mal ses affaires qu'il n'en resta que quatre ou cinq mille qui furent contraints de se retirer miserablement.

Quant à l'infanterie Italienne des terres du Roy d'Espagne elle est capable de rendre vn bon seruice à son Prince.

Pour le regard de la caualerie, l'Espagnol a les meilleures races de cheuaux qui soient en

l'Europe. C'est à sçavoir les Genets d'Espagne, les Courriers de Rhene, les Chevaux de Bourgogne & ceux de Flandres.

Il semble que la nature a voulu armer ces gens avec les mines de fer de Biscaye, de Guipuscoa, & de Moline, avec les tempestes de Bilbao, de Tholosette, & de Calatamd, & par le moyen des boutiques de Milan, de Naples, & de Bosleduc, & qu'elle ayt aussi voulu les pourvoir de viures par le moyen des greniers de la Pouille, de Sicile, de Sardaigne, d'Artois, de Castille, & d'Andalusie, & aussi par les vins de Calabre, de Saint Martin, d'Aymont, & de beaucoup d'autres lieux.

D'ailleurs le Roy d'Espagne pour n'épuiser par trop l'Espagne de son peuple, qui est employé en tant de lieux, & tant de diuerses entreprises, la rendant par ce moyen moins habitée, pour leuer vn assez bon nombre d'Infanterie, & de Caualerie tant Italienne qu'Allemande. Mais l'argent qu'il espend en tant de lieux l'empesche de pouuoir faire beaucoup de ces leuees, & entreprises à l'esgal de son ambition, qui seroit de posséder toute chose.

Le Roy d'Espagne entretient ordinairement en ses Estats vn grand nombre de Caualerie, veu qu'il y a en Espagne trois mille chevaux, en l'Estat de Milan, quatre cens hommes d'armes, & mille chevaux legers, au Royaume de Naples 1100. hommes d'armee, qui est le plus grand nerf de mille qui soit en Italie, & en Sicile on luy doit fournir mille cinq cents chevaux. Et l'on ne doit pas faire peu d'estat de ce que les Feudataires sont obligez de seruir, & mesme personnellement, à leurs despens aux occasions de deffence, eu esgard au grand nombre de Feudataires; & hommes qui portent tiltre en Espagne, où l'on compte vingt & trois Ducats, trente deux Marquis, quarante neuf Comtes, deux Vicomtes, sept Archeuesques (veu que ceux-cy y entrent encor pour leur part comme grands Seigneurs) & trente trois Euesques.

Et au Royaume de Naples il y a quatorze Princes, vingt cinq Ducs, cinquante sept Marquis, cinquante quatre Comtes, & quatre cents quatre vingts huit Barons. Cela suffira sans que ie m'amuse à rechercher ceux des autres contrees.

Quant aux forteresses il n'y en a guere dans l'Espagne, ains seulement sur les frontieres, & sur la coste de la mer.

Du costé du Languedoc l'Espagnol a Salces, qui a esté fait pour l'opposer à Lauquatte qui appartient à la France. Ce lieu de Salces est de grande importance, tant pour raison de l'assiette (pource qu'il est en vn passage estroit où l'air est pestilent en Esté à cause de quelques estangs, & marests qui en sont proches) qu'à cause des fortifications qu'on y a faites. Perpignan qui est de ce costé en la Comté de Roussillon est bien bonne ville, & a vn chasteau des meilleurs d'Espagne. Barcelone est aussi assez bien fortifiée.

Le Roy Phillippes II. cognoissant l'importance du port de Cartagene, l'a fait fortifier raisonnablement, afin que les Turcs s'y logeassent. Il y a force lieux forts au Royaume de Grenade à cause du sejour qu'y ont fait les Mores.

La Citadelle de Pampelune est vne des fortes places de l'Europe, & Fontarabie est capable d'vne bien grande deffence.

La ville de Lisbonne en Portugal est vne des meilleures qu'on voye en tous ces païs. Il y a en la ville trois sales d'armes qui suffiroient pour armer 15000. hommes de pied, de corselets, & vn assez bon nombre de gens de cheual de cuirasse. Il y a quelques autres magazins avec vingt piéces d'artillerie, entre lesquels il y en a vne fort longue, qui porte cent liures de charge, & est faite avec vn grand artifice. Elle fut ostée aux Mores par les Portugais en la ville de Diu aux Indes.

Au deuant du Monastere de Bellam, il y a vne tour enuironnée d'eau avec trente piéces d'artillerie, non pas pour s'en seruir en temps de guerre, pource qu'ayant vne colline qui luy commande, elle seroit abbattue en peu de temps à coups de canon: mais pour s'en seruir en temps de paix contre quelque nauire, on a basti à la bouche du port vne forteresse, qui estant petite peut difficilement estre bonne.

Il y a aussi en Portugal pres du Tage la forteresse de S. Iulien, oeuvre moderne, fait avec le dessein de garder le passage de la riuere.

La puissance des Portugais s'est peu à peu diminuée, à cause de leurs diuerses nauigations, & entreprises: de sorte que le Roy Iean III. perdit Cap d'Aguero, & abandonna Safin, Ayamor, & Arzille, & le Roy Sebastien voulant aller en personne à la conqueste de l'Empire de Maroc ne peut mettre ensemble que douze mille Portugais, & encor avec beaucoup de peine. Le mesme aduient à l'Espagne, qui s'affoiblit de iour en iour en telle sorte, & se depeuple tellement à cause des nauigations, que les villes & lieux demeurent seulement pleins de femmes: pource que plusieurs milliers de soldats qui sont en la fleur de leur âge en sortent tous les ans, & il n'y en retourne que bien peu, qui sont mesme estropiez, & vieux, de forte

sorte que le Royaume demeure priué non seulement de ses hommes, mais aussi des enfans qui en pourroient naistre.

Les Espagnols ont suiuy en cela vne raison d'estat toute contraire à celle d'où proced la grandeur, & la puissance des Romains. Car ceux cy (s'auisans qu'il n'y a chose plus necessaire aux entreprises de grande importāce, que la multitude des hommes) mettoient toute peine à multiplier leur nombre par mariage, & colonies & receuoient en leur ville leurs ennemis mesmes : si bien que ces peuples se voyoient en vn iour aux mains avec les Romains, & citoyens de mesme ville, mesme ils communiquoient le droit de Bourgeoise non seulement aux villes, mais encor aux Prouinces entieres.

Finalement ils embrasserent presque tout leur Empire avec ces façons de faire, & le nombre des Romains deuint si grand, qu'ils s'opposoient non seulement avec la valeur, mais encor avec la multitude à tout le reste du monde, à raison dequoy Rome ne peut estre ruinee qu'avec ses propres forces. Mais les Portugais & les Castillans en leurs entreprises, où ils auoient besoing d'un grand nombre de gens, à cause de la grandeur des païs qu'ils tiennent, & des grandes separations de leurs conquestes, ne se seruent que de leur nation, qui n'est toutesfois des plus nombreuses del'Europe, & se va diminuant de iour en iour, & toutesfois les Castillans ont les Milanois, Neapolitains, Siciliens, & Sardes, qui pour le long temps qu'il y a qu'ils sont sous l'Empire des Espagnols, & pour l'obeissance, & fidelité qu'ils ont fait paroistre tousiours, peuuent estre estimez pour subiects naturels, & non de conqueste, de sorte qu'ils s'en deuroient fier ausdites entreprises.

Les Portugais ne se pouuoient pas seruir de gens de conqueste, pource qu'ils n'ont point eu de tels subiects, mais ils se pouuoient bien ayder d'hommes soudoyez de pais non suspect, pour les frontieres, ou quelque pretension, ou autre semblable subiect.

Ce defect d'hommes a esté cause que les Portugais, & les Espagnols ont laissé beaucoup d'entreprises d'importance, & qu'ils procedent lentement en celles qu'ils ont entre les mains : & de là vient encor que ceux-là deffendent avec grande peine les Isles, & costes de mer du nouveau Monde, & ceux-cy, celles du Brasil, & du Cap verd, & les autres, & que les vns & les autres ne peuuent presque resister, ie ne diray pas aux Corsaires Anglois : mais aux Negres, qui se reuolent tous les iours en l'Isle Espagnole, en l'Isle de saint Thomas, & en autres lieux : & mesme les Portugais ont perdu depuis assez peu de temps l'Isle de Ternaté, pour le peu de gens qu'ils y auoient.

Quant aux Rinces ou Republique de quelque consideration, pour les forces qui confident avec le Roy d'Espagne, il n'y a que le Roy de France, le Turc, & les Venitiens.

Le Roy de France est maintenant en bonne paix avec celui d'Espagne, & il n'y scauroit auoir que la pretention de quelques terres que le Roy de France pourroit demander, qui fust capable de rompre le repos de ces deux Royaumes. Mais posé le cas qu'on fust de mauuais accord : i'estime que si les François qui sont maintenant en grand nombre, & fort agueris, & qui ne demandent guere la paix, donnent du costé du Languedoc, ou de la Gascogne, ils donneroient vn grand eschec à l'abord à l'Espagne qui se trouue mal peuplée. Et il ne faut pas dire qu'on attaqueroit aussi la France du costé de la Picardie, & de la Sauoye, veu que pour le regard de la Picardie, outre les places fortes qui pourroient arrester vne armee, l'Archiduc est bridé par les Estats, avec lesquels il n'a que suspension d'armes, & ses forces ne sont pas si grandes qu'une assez legere armee ne luy peust faire teste : veu que ses meilleurs hommes seront obligez de courir ailleurs où la necessité presseroit dauantage. Pour le regard de la Sauoye ou vne armee leuee sur l'Etat de Milan, & au Royaume de Naples se pourroit acheminer, au cas que le Duc de Sauoye luy donnast passage, cene peut estre si grande chose que le seul Gouverneur du Dauphiné ne leur puisse donner assez d'affaires, & les arrester tout court, comme Monsieur de les Diguieres a fait assez paroistre durant les guerres passées, au milieu de leur plus grosse furie.

Quant aux Venitiens depuis que l'Etat de Milan est au pouuoir des Espagnols, les choses passent assez doucement entr'eux, & ceste Republique est plus sur la deffence, & sur la fortification de ses places, que sur les desseins de faire des conquestes : pource que ceste Republique estant toute dressée pour la paix, il ne seroit pas à propos pour elle, qu'elle alterast les affaires en son voisinage. Dauantage on a veu que les Espagnols se sont employez en faueur des Venitiens en leurs plus grands dangers aux guerres de Bajazet, Soliman, & Selim II. leur ont faites en la Cefalonie, à la Preuese, à Lepanto, & toutesfois ils auoient, & ont aux flancs Alger, Tunes, & l'Afrique, beaucoup plus voisines que Cypre, où les Isles de la mer Ionique, del'Espagne, de la Sicile, de la Sardaigne, des Baleares, & du Royaume de Naples.

Les autres Republiques ou Princes d'Italie sont ou ses amis, & obligez, ou trop foibles pour entreprendre quelque chose contre l'Espagne. Quant aux Suisses qui sont proches de la Franche-Comté, ils n'y peuvent venir en grand nombre, d'ailleurs ils y trouueroient de bonnes places contre lesquelles ils n'ont pas accoustumé de s'opiniâtrer.

Pour le regard du Turc, & des autres qui peuvent porter doinnage aux Espagnols, nous en auons parlé & parlerons encore en leurs lieux.

GOVERNEMENT D'ESPAGNE.

Les Roys d'Espagne comme puissans, & nés parmy vn peuple qui leur est extrêmement affectonné, sont honorez au possible de leurs subiects, qui leur portent d'autant plus de reuerence, qu'ils jouissent moins souuent de leur veüe.

Les Roys ont donc toute puissance en Espagne, & disposent à leur volonté de toutes choses, non toutesfois sans auoir des Conseils, par lesquels ils se conduisent.

Le Royaume d'Espagne tombe en quenouille, tellement que les filles des Roys d'Espagne peuuent succeder à la Couronne: & c'est de ceste sorte que la maison d'Autriche est deuenüe maistresse de l'Espagne, comme nous ferons voir en son lieu.

Le Roy a la nomination de toutes les Archeueschez, & Eueschez, des Prieurez, & Commandes, des Ordres de Cheualerie, c'est à sçauoir de saint Jacques Alcantare, & Calatrave. Il est maistre absolu de la paix, & de la guerre: il cree tous les Presidens, Conseillers, Vice-Roys, Lieutenants, Gouverneurs, & Capitaines. Mais le Roy ne peut conferer les benefices qu'à ceux qui sont natifs d'Espagne, ou biẽ qui ont eu de luy leurs lettres de naturalité. Et la plus grãde partie des Espagnes s'est maintenuẽ en ses priuileges, qu'elle ne souffre pas aisément d'estre accablée de charges excessiues. C'est pourquoy l'Empereur Maximilian disoit qu'il estoit Roy des Roys, & le Roy d'Espagne Roy des hommes, à cause qu'il ne pouuoit auoir des Allemands que ce qu'ils vouloient, & que les Espagnols refusoient de donner à leur Roy plus qu'ils ne luy deuoient par leurs loix, statuts, ordonnances, & coustumes.

Il y a en Espagne plusieurs Conseils avec lesquels le Roy gouuerne ses Estats: c'est à sçauoir le Conseil des Conseils d'Espagne.

Le Conseil d'Estat & royal.

Le Conseil de Castille.

Conseil d'Aragon.

Conseil d'Italie.

Conseil des Indes.

Conseil du Thresor.

Conseil des Ordres.

Conseil de l'Inquisition.

Conseil de Guerre.

Conseil de Camera.

Conseil des Descharges.

Conseil de Portugal.

Conseil de Bosquera.

Le Roy confere à quelques-vns de ses Conseils les choses qui concernent le bon gouuernement, la conseruation, & augmentation de ses Estats, & ayant oüy l'opinion d'vn chacun, commande qu'on mette en execution celle qu'il iuge la meilleure.

Les villes sont gouuernées par vn gentil-homme qui en est natif, à qui le Roy donne le nom, & l'autorité de gouuerner, en y mettant aussi des Conseillers creés par leurs concitoyens: & lors que le Gouverneur a accompli le temps de son gouuernement, on forme ordinairement vn procez sur ses actiõs, lequel estât veu par le Conseil du Roy, il luy en fait rapport, afin qu'il punisse le Gouverneur s'il recognoist en luy quelque méchanceté, & iniustice, ou qu'il ne l'employe pas de là en auant s'il le recognoist peu accort, & trop plein de nonchalance; & qu'au contraire s'il void qu'il n'a manqué ny de iustice, ny de diligence, & qu'il a bien fait son deuoir, il l'esleue à des charges plus grandes, & plus importantes. Le Roy d'Espagne a plusieurs Cõseils ausquels il remet toutes les affaires dõt on luy a parlé, ou qu'õ luy a laissées par escrit, & l'on a accoustumé de faire tousiours l'vñ & l'autre, pource que si l'hõme veut dire brefuement s'õ fait, il le peut, mais il dõne encor vn memoire que le Roy lit quand il se retire en sa chãbre, & suiuant la qualité de l'affaire il le remet à vn de ses Cõseils, dont

the following table, which is based on the results of the examination of the skulls of the various races, and which shows the relative frequency of the different types of skulls.

The following table, which is based on the results of the examination of the skulls of the various races, and which shows the relative frequency of the different types of skulls.

The following table, which is based on the results of the examination of the skulls of the various races, and which shows the relative frequency of the different types of skulls.

The following table, which is based on the results of the examination of the skulls of the various races, and which shows the relative frequency of the different types of skulls.

The following table, which is based on the results of the examination of the skulls of the various races, and which shows the relative frequency of the different types of skulls.

The following table, which is based on the results of the examination of the skulls of the various races, and which shows the relative frequency of the different types of skulls.

The following table, which is based on the results of the examination of the skulls of the various races, and which shows the relative frequency of the different types of skulls.

The following table, which is based on the results of the examination of the skulls of the various races, and which shows the relative frequency of the different types of skulls.

The following table, which is based on the results of the examination of the skulls of the various races, and which shows the relative frequency of the different types of skulls.

the 1990s, the number of people in the world who are undernourished has increased from 600 million to 800 million (FAO 1996).

There are a number of reasons why the world's population is becoming more undernourished. First, the world's population is growing rapidly. The world population is projected to increase from 5.5 billion in 1990 to 7.5 billion in 2020 (UNEP 1992). Second, the world's population is becoming more urbanized. The world's population is projected to increase from 55% urban in 1990 to 65% urban in 2020 (UNEP 1992).

Third, the world's population is becoming more dependent on food imports. The world's population is projected to increase from 10% dependent on food imports in 1990 to 20% dependent on food imports in 2020 (UNEP 1992). Fourth, the world's population is becoming more dependent on food aid. The world's population is projected to increase from 10% dependent on food aid in 1990 to 20% dependent on food aid in 2020 (UNEP 1992).

These four factors are all contributing to the world's population becoming more undernourished. The world's population is projected to increase from 5.5 billion in 1990 to 7.5 billion in 2020 (UNEP 1992). The world's population is projected to increase from 55% urban in 1990 to 65% urban in 2020 (UNEP 1992).

The world's population is projected to increase from 10% dependent on food imports in 1990 to 20% dependent on food imports in 2020 (UNEP 1992). The world's population is projected to increase from 10% dependent on food aid in 1990 to 20% dependent on food aid in 2020 (UNEP 1992).

These four factors are all contributing to the world's population becoming more undernourished. The world's population is projected to increase from 5.5 billion in 1990 to 7.5 billion in 2020 (UNEP 1992).

The world's population is projected to increase from 55% urban in 1990 to 65% urban in 2020 (UNEP 1992). The world's population is projected to increase from 10% dependent on food imports in 1990 to 20% dependent on food imports in 2020 (UNEP 1992).

The world's population is projected to increase from 10% dependent on food aid in 1990 to 20% dependent on food aid in 2020 (UNEP 1992). The world's population is projected to increase from 5.5 billion in 1990 to 7.5 billion in 2020 (UNEP 1992).

The world's population is projected to increase from 55% urban in 1990 to 65% urban in 2020 (UNEP 1992). The world's population is projected to increase from 10% dependent on food imports in 1990 to 20% dependent on food imports in 2020 (UNEP 1992).

The world's population is projected to increase from 10% dependent on food aid in 1990 to 20% dependent on food aid in 2020 (UNEP 1992). The world's population is projected to increase from 5.5 billion in 1990 to 7.5 billion in 2020 (UNEP 1992).

The world's population is projected to increase from 55% urban in 1990 to 65% urban in 2020 (UNEP 1992). The world's population is projected to increase from 10% dependent on food imports in 1990 to 20% dependent on food imports in 2020 (UNEP 1992).

The world's population is projected to increase from 10% dependent on food aid in 1990 to 20% dependent on food aid in 2020 (UNEP 1992). The world's population is projected to increase from 5.5 billion in 1990 to 7.5 billion in 2020 (UNEP 1992).

Deux Commis de Secretaires, à chacun cent trente trois ducats neuf reales trente deux maravedis.

Deux Huissiers du Conseil, à chacun cent six ducats dix reales & demy.

A celuy du Registre est donné de pension par an deux cens soixante sept ducats, quatre reales quatre maravedis.

A celuy du sceau deux cens soixante sept ducats quatre reales.

Au Payeur deux cens mille maravedis qui sont cinq cens trente quatre ducats 8. reales.

Au Receueur des Amendes, & fraiz de Iustice le mesme gage susdit.

Au Secretaire qui depesche les sedules, & prouisions, le mesme gage.

Les Vices-Rois, & les Audiencias qu'ils ont aux Indes.

Vice-Roy en la nouvelle Espagne.

Les Vice-Rois du Peru en sont seigneurs de tiltre, & ont de rente 12. mille ducats.

Chancellerie de la nouvelle Espagne en Mexico.

Chancellerie en Guatimala.

Chancellerie en la cité ditte de los Reyes.

Chancellerie à saint François de Quinto.

Chancellerie au nouveau Royaume de Grenade.

Chancellerie aux Isles Philippines.

Chancellerie en la cité de saint Dominique, en l'Isle Espagnole.

Conseil d'Hazjenda.

LE President a six mille ducats par an.

Celuy qui tient les Comptes, cent mille maravedis, qui valent deux cens soixante sept ducats quatre reales.

Quatre Conseillers, à chacun autant.

Au Thresorier, le mesme.

Au Secretaire le mesme.

Au Fiscal le mesme.

A quatre Huissiers, à chacun le mesme.

Conseils des Ordres.

LE President a six cens mille maravedis qui valent mille six cens quatre ducats & deux reales.

Quatre Conseillers, à chacun trois cens mille maravedis, qui sont huit cens deux ducats & vn real.

En ce Conseil se depeschent les lettres de saint Jacques de Calatraue, & d'Alcantara, où se iugent aussi les Plaidoyers des Cheualiers desdits Ordres.

Vn Fiscal, trois cens mille maravedis, qui valent huit cens deux ducats & vn real. Son Commis le mesme gage.

L'Aduocat Fiscal, le mesme.

Celuy de l'Ordre de Callatraue, le mesme.

Celuy de l'Ordre d'Alcantara, le mesme.

Le Solliciteur Fiscal, trente mille maravedis, qui valent huitante ducats trois sols & demy.

Le Rapporteur, cent mille maravedis, qui valent deux cens soixante sept ducats quatre reales, son Commis autant.

Vn autre Fiscal de saint Jacques, soixante mille maravedis, qui valent cent soixante ducats vn real, & demy.

Le Secretaire du Conseil d'Alcantara le mesme.

Celuy du sceau du Conseil de l'Ordre de saint Jacques quarante mille maravedis, qui valent cent six ducats, deux reales, & dix-sept maravedis.

Celuy du sceau de Callatraue, trente mille maravedis, qui valent huitante ducats trois sols & demy.

Celuy des Registres des Ordres susdits, l'un pour tous cinquante mille maravedis, qui valent cent trente trois ducats, trente huit sols.

Celuy qui rapporte les prouisions & Cedulaes qui se despeschent en ce Conseil, par confirmation du Roy a par an cent mille marauedis, qui valent deux cens soixante sept ducats quatre reales.

Le Roy est grand Maistre de tous les Ordres, & principalement de l'Ordre de saint Jacques, & quand il se fait quelque expedition pour cet Ordre, le Roy apres ses tiltres ordinaires, met en ses lettres, *Perpetuel Administrateur de saint Jacques.*

Conseil d'Inquisition.

L'Archeuesque de Toledede est tousiours Inquisiteur general, & reçoit de rente pour assister en propre personne à ce Conseil six mille marauedis, qui font mille six cens quatre ducats quatre reales, & huit marauedis.

Six Inquisiteurs, chacun desquels a de gage trois cens mille marauedis.

A vn Fiscal le mesme.

A vn Secretaire cent mille marauedis, qui font deux cens soixante sept ducats quatre reales, lequel Secretaire doit estre de la couronne de Castille.

Vn autre Secretaire de la couronne d'Aragon, ayant de rente cent mille marauedis, qui valent deux cens soixante sept ducats quatre reales.

A vn autre Rapporteur le mesme.

Vn Alguazil principal trois cens mille marauedis, qui valent huit cens deux ducats deux reales quatre marauedis.

Vn Procureur des Amendes trois cens mille marauedis, qui valent huit cens deux ducats, deux reales quatre marauedis.

En tous les Royaumes d'Espagne il y a vingt mille familiers de l'Inquisition, qui sont ceux qui accusent & vont prendre les delinquans, chacun desquels a de rente trente mille marauedis, qui valent huitante ducats, deux reales, & douze marauedis.

Au Fiscal de l'Inquisition secrette trois cens mille marauedis, qui valent huit cens deux ducats treize sols.

A deux Huissiers du Conseil, trente mille marauedis à chacun.

Au Soliciteur le mesme.

Conseil de l'Inquisition de Toledede.

EN ce Conseil y a six Inquisiteurs.

Deux Secretaires.

Vn Fiscal.

Deux Huissiers, & plus de cent Accusateurs.

Villes où se tient l'Inquisition en Espagne.

INquisiteurs de Grenade.

Inquisiteurs de Seville.

Inquisiteurs de Murcia.

Inquisiteurs de Cuenca.

Inquisiteurs de Logrono.

Inquisiteurs de Llerena.

Inquisiteurs de Galice.

Inquisiteurs de Valladolid.

Chancelleries d'Espagne.

CHancellerie à Valladolid, & souverains de Cour.

Chancellerie à Grenade, & souverains de Cour.

Regent, & Audience à Seville, & souverains de Cour.

Audience en Galice, & souverains de Cour.

Chancellerie de Nauarre, & souverains de Cour.

Maistres des Comptes en la grande Chambre des Comptes.

Qatre Maistres des Comptes chacun desquels a trois cents mille marauedis.

Vn fiscal, trois cens mille marauedis.

Vn Rapporteur, avec son commis trois cens mille marauedis.

Quatre Portiers chacun desquels a quinze mille marauedis.

Trente Compteurs ordinaires, chacun desquels a huit cens ducats de rente.

Autres deux Fiscaux, qui ont trois cens mille marauedis.

Vn grand Escriptuain.

Vn autre Escriptuain de la Cruzada.

Le Compteur de la Cruzada, chacun desquels a trois cens mille marauedis.

Vn Receueur, qui a cinq mille marauedis, qui sont deux cens soixante & sept ducats quatre reales.

Douze Compteurs nommez, qui ont chacun deux cens cinquante mille marauedis, qui sont cent trente trois ducats, & sept reales.

Conseil de guerre.

VN President, & quatre Auditeurs, chacun desquels a de rente par an deux cens mille marauedis, qui sont cinq cens, & vingt quatre ducats, huit reales, & douze marauedis.

Vn Secretaire le mesme.

Deux Officiers dudit Conseil, à chacun deux, cinquante mille marauedis, qui sont cent trente trois ducats trente huit sols.

Aux deux Portiers, à chacun trente mille marauedis, qui sont huitante ducats, trois sols six deniers.

A vn Rapporteur quarante mille marauedis, qui sont cent & six ducats cinquante deux sols, six deniers.

On traite en ce Conseil de tout ce qui appartient à la guerre, ou pour se deffendre, ou pour attaquer tant par mer que par terre, & aussi des fortifications & prouisions necessaires aux frontieres de tous les Estats d'Espagne.

Conseil de Camora.

EN ce Conseil il y a trois Auditeurs, & chacun desquels a de rente cinq mille marauedis qui sont deux cens soixante & sept ducats, quatre reales, & neuf marauedis.

Le grand Official du secret du Conseil, cinq mille marauedis.

Deux Portiers, chacun desquels a trente mille marauedis.

Vn Rapporteur, quarante mille marauedis qui sont cent & six ducats, cinquante deux sols & demy.

En ce Conseil se font des recompenses des offices, & si pardonne t'on à ceux qui sont condannez à mort, les bannis sont rappelez, & les forçaires mis en liberté, & là mesme sont expedies les Prouisions des dons que le Roy fait.

Conseil des descharges.

VN President.

Trois Auditeurs.

Vn Secretaire.

On ne paye aucun salaire en ce Conseil, & sert seulement à payer les debtes du Roy, & par ce moyen chaque iour celles que l'Empereur Charles auoit faictes sont diminuees.

Conseil des Bois.

VN President.

Deux Auditeurs.

Vn Secretaire.

Deux Portiers.

En ce Conseil est traité de ceux qui apportent du domnage aux Bois de sa Majesté, Et s'y pouruoient les gardes, & autres Officiers qui conuiennent en ces bois.

Conseil de Portugal.

Deux Presidents.

Quatre Conseillers.

Vn Secretaire

Vn Fiscal.

Ce Conseil est beaucoup prisé, & de grand profit. Je ne le couche pas icy par escrit, parce qu'il se treuve plusieurs liures de ce Royaume, qui sont imprimez.

Vice-Rois, & autres Gouverneurs que le Roy d'Espagne pouruoit.

Vice-Roy de Naples.

Vice-Roy de Sicile.

Vice-Roy de Nauarre.

Vice-Roy de Valence.

Gouverneur de Milan.

Gouverneur d'Aragon.

Gouverneur de Cerdenna.

Gouverneur des Majorque, & Minorque.

Gouverneur de Portugal.

Les Ambassades que le Roy enuoye d'une part & d'autre.

VN Ambassadeur à Rome.

En France.

En Allemagne.

A Genes.

A Venise.

En Sauoye.

A Marruecos.

En Angleterre.

Les Souuerainetez que le Roy pourroit.

EN Oran, & Maçalquiuir.

A Milan.

A Fuen Arabia.

Au Pegnon.

Taxe des gages des Officiers de la maison du Roy.

LE grand maistre d'Hostel a de rente par an trois mille ducats.

Autres quatre Maistres d'Hostel, à chacun mil cinq cens ducats.

Trente vn Gentils-hommes seruans, chacun desquels a tous les iours à despendre 8. reales.

Vingt-quatre Gentils-hommes de la maison du Roy, chacun desquels a par iour six reales de paye.

Dix Gentils-hommes de la Chambre, à chacun douze reales par iour, qui valent vn escu.

Dix Aydes de Chambre, à chacun six reales par iour.

Trois Garde-robres, qui ont la charge des habits, & autres tels meubles, à chacun six reales par iour.

Quatre garde ioyaux, au premier vnze reales par iour, & aux autres, quatre.

Cinq Panetiers, quatre reales à chacun.

Quatre Sommeillers, au premier quatre reales, & à chacun des autres, deux.

A quatre hommes de Cuisine qui ont charge des viandes salees, quatre reales, à chacun des deux premiers, & aux autres deux à chacun deux reales.

Aux trois Officiers du garde-mangé, au premier deux reales, & deux à chacun des autres.

A deux garçons de Cuisine vne reale par iour.

Au Cuisinier, & à sa premiere ayde quatre reales, & à l'autre deux.

Au Coustellier deux reales par iour.

Au Cuisinier du premier Maistre d'Hostel trois reales.

Au portier de Cuisine, & à son ayde, deux reales.

Au premier plumassier pour luy & pour ses aydes, & à quatre siens garçons, quatre cens ducats de paye par an.

Au premier tapissier du Roy, quatre reales par iour.

A cinq aydes de la tapisserie, deux reales par iour.

Au premier Serrurier trois reales par iour.

A trois siens seruiteurs, deux reales à chacun par iour.

A deux Medecins de la Chambre de sa Majesté, trois cens ducats par an à chacun.

Au Medecin de la maison, trois cens ducats par an.

Au Chirurgien, quatre reales par iour.

A deux Barbiers du corps, quatre reales par iour.

A l'ayde du Barbier, trois reales par iour.

A deux Apoticaire, trois reales par iour à chacun.

A l'ayde de l'Apoticaire, deux reales.

Au Tailleur, cinquante ducats par an.

Au Chaussietier le mesme.

Au Cordonnier, cinquante ducats par an.

A l'Orfeure quarante ducats par an.

Au Brodeur, cinquante ducats par an.

Au Pelletier cinquante ducats.

Au Plumassier trente ducats.

A la Cousturiere quarante ducats.

Ala:

100

100

A celuy qui marque les notes ; autant.

Au Fourrier quarante mille maravedis qui valent cent six ducats cinquante deux sols six deniers.

Au Fourrier de la Chappelle, la mesme paye.

Au Sacristain de l'Oratoire, trente mille maravedis.

Au Sacristain de la Chapelle, la mesme paye.

A celuy qui accorde les Orgues & autres Instruments, cinquante mille maravedis, qui valent cent trente trois escus, trente huit sols.

Au Commis de l'Aumosnier, quinze mille maravedis, qui font quarante ducats vn sol, neuf deniers.

A deux Souffleurs d'Orgues, quinze mille maravedis à chacun.

A six Violons, quatre reales à chacun.

A deux joueurs de Cornet à bouquin le mesme.

Chappellains qui ne seruent pas.

A Quarante Chappellains qui sont hors de la Cour, quarante mille maravedis à chacun qui valent huitante ducats trois sols six deniers.

Ecurie du Roy.

A V grand Escuyer deux mille ducats par an.

A autre cinq Escuyers cent mille maravedis par an à chacun.

A quatre Picqueurs vne mesme paye par an, sçavoir deux cens soixante sept ducats quatre reales cinq deniers.

A quatre Massiers, cent mille maravedis par an à chacun.

Aux Roys d'armes, cinquante mille maravedis à chacun.

Au Fourrier de l'escurie, la mesme folde.

A son ayde trente mille maravedis.

Autres deux aydes du Fourrier la mesme folde.

Au Messager de l'escurie, vingt mil maravedis.

A cinq autres Messagers, le mesme par an.

Au Fourbisseur de l'escurie, soixante mil maravedis.

A son ayde, le mesme.

Au grand Palefrenier cinquante mil maravedis.

A quatre autres aydes, quinze mil maravedis.

A quatre qui liurent la nourriture, à chacun d'iceux quinze mil maravedis.

A celuy qui tient le grand compte de l'escurie, cinquante mil maravedis.

A celuy qui garde les harnois, vingt mil maravedis.

A deux maistres Celliers, à chacun d'iceux vingt mil maravedis.

Au Cellier vingt mille maravedis.

A celuy qui a la charge des celles & brides, vingt mil maravedis.

A son ayde vingt mil maravedis.

Au maistre qui fait les coches, vingt mil maravedis.

Au maistre qui les garnit, tout autant.

Au Doreur quinze mille.

Au Plumacier, la mesme folde.

Au maistre de boutique, quinze mil maravedis.

A l'Argentier vingt mil maravedis.

Au Porteur d'eau vingt-quatre mil maravedis.

A quatre Mareschaux, le mesme à chacun.

A l'Arquebuzier, quinze mil maravedis.

A l'Armurier trente mille.

A son ayde la mesme paye.

Au maistre des carosses, vingt mil maravedis.

A vn Commis extraordinaire qui tient compte des carosses, la mesme paye.

A celuy qui a la charge de porter l'Arquebuz du Roy & à son ayde, quarante cinq mil maravedis.

A huitante garçons de l'escurie, deux reales & demy de quarte à chacun.

Le Roy a vingt-quatre carosses, & chaque Cocher quatre reales à despendre par iour.

Six Litieres, & en chacune deux mulets & deux seruiteurs, qui ont de paye trois reales par iour.

Six Chariots pour le service de l'escurie, à chacun desquels sont commis deux garçons, qui ont trois reales à despendre par iour.

Mulerie.

LE maistre Muletier a par an quatre cens ducats.
Son commis cent ducats.

Il y a cinquante mulets avec chacun vn garçon, qui a trois reales à despendre par iour.

Le maistre bastier a quinze mille marauedis par an.

Sa Majesté a treize valets de pied, lesquels outre leurs habits & leurs souliers, ont trois reales à despendre par iour.

Ceux qui marchent en campagne à la suite de sa Majesté, ont le mesme salaire.

A dix-huict ioueurs d'instruments, quatre reales par iour à chacun.

A douze Trompetes la mesme paye.

A deux Predicateurs soixante mil marauedis par an.

Le Confesseur du Roy a de gages par an, trois cens mille marauedis, qui sont huit cens deux ducats vn real & demy.

Vu autre Predicateur particulier, soixante mil marauedis.

Chasse à l'Oiseau.

AV grand Veneur pour luy & pour ses chasseurs, deux cens soixante mil marauedis par an.

A son Lieutenant pour luy & pour deux autres chasseurs, cent deux mil marauedis.

A sa seconde ayde & à trois autres chasseurs, cent dix mil marauedis.

A vn autre ayde & à trois autres chasseurs, huitante mil marauedis.

A vn autre ayde & à trois autres chasseurs, soixante six mil marauedis.

Chasseurs dans l'eau.

ADix Chasseurs dans l'eau, quinze mille marauedis à chacun.

A celui qui fait la charpenterie necessaire à la chasse, deux mil marauedis.

Chasse de volaille.

AV premier chasseur de volaille, cent mil marauedis.

Au Commis de la chasse de l'Oyseau, pour luy & pour deux leuriers de sa charge soixante mille marauedis.

A la garde des adresses, pour la chasse avec son ayde, & son Cheual, cinquante mille marauedis par an.

Chasseurs de l'Oyseau à Cheual,

AQuatre garçons qui ont en garde vn limier trente mille marauedis à chacun.

Garçons qui ont en charge les Leuriers.

AQuatre garçons, qui ont la charge des Leuriers, trente mille marauedis à chacun.

A ceux qui nourrissent les Leuriers & Limiers, vingt mille marauedis à chacun.

A deux Chienetiers vingt-quatre mille marauedis.

A Seuille il y a vn Regent & quatre Auditeurs qui cognoissent des choses de iustice de ceste ville, & de sa iurisdiction.

La Nauarre est gouuernee de mesme sorte.

En Galice il y a vn siege & vn Gouverneur comme President.

En Aragon il y a vn siege de Regents & de Conseillers.

A Valence on trouue mesme chose, comme aussi en Catalogne.

Et pource qu'aux conquestes des pays que les Mores possedoient jadis en Espagne, il estoit besoin de contenir en leur deuoir les peuples qui auoient esté fraichement baptisez, & pour chasser soigneusement que la Religion n'en fust infectee en quelque sorte, on dressa le conseil de l'Inquisition (où l'on tient toutesfois qu'il y a plusieurs abus, & des cruautez sans nombre.) Le chef de ce conseil c'est l'Inquisiteur General, qui demeure ordinairement à la Cour.

Il y a aussi quatre Conseillers Ecclesiastiques de bonne vie, & qui doiuent estre scauants. On cognoist en ce Conseil des causes des heretiques, & l'on pouruoit le Royaume d'Inquisiteurs, qui se tiennent ordinairement à Seuille, Cordouë, Leon, Grenade, Murcie, Calarie, Toledo, Valladolid, Crunque en Arragon, Valence & Catalogne.

Il y a tousiours en la Cour du Roy quatre Iuges qui cognoissent des choses ciuiles & criminelles, qui se passent cinq lieues à l'entour, & de tout le Royaume aussi par commission.

Ils ont fort grande autorité, & specialement aux choses criminelles, auxquelles ils procedent avec beaucoup de rigueur, & il n'est pas permis d'appeller de leur sentence.

Il y a trente & vn Alguazils ou Sergens de la Cour, & plusieurs Greffiers criminels qui tiennent leur siege à part, & aussi la prison.

Le Roy d'Espagne a pris la coustume de recompenser ses vieux soldats qui ont bien fait durant les guerres, ou qui sont demeurés estropiés, & mesme ceste recompense passe à leurs enfans s'ils meurent à son service. Ce qui est proprement donner courage & subject de bien faire à ceux qui le seruent, comme au contraire c'est faire aller les hommes à la guerre laschement, que de ne leur proposer nulle sorte de recognoissance.

Il y a aussi en Espagne beaucoup de dignités & de charges qui sont hereditaires, comme celles qui s'ensuiuent.

Il y a encore beaucoup de Seigneurs de marque & de titre, comme ils appellent en Espagne, comme sont ceux qui s'ensuiuent.

De ceux de Velasco, leurs armoiries, titre, maison & reuenus.

DVc de Feria, Marquis de Verlanga, Comte d'Haro, Connestable de Castille. Il a son Hostel dans la cite de Burgos, son Estat à Castille la vieille, aux Monts, à Biscaye, & au terroir de Sorie. Il a de rente septante mil ducats.

Comte de Nieua, de la maison de Velasco. Il a son Hostel à Nieua, son Estat en la Prouince de la Rioja, & possede de rente dix mil ducats.

Comte de Siruel de la maison de Velasco. Il a de rente quatorze mil ducats.

La maison de Velasco est l'une des plus nobles d'Espagne, d'où sont sortis les Connestables de Castille, & plusieurs autres Seigneurs & valeureux Capitaines, son extraction est du meilleur des Monts de Biscaye, où il y fait son sejour. Il est estimé sur toute la Noblesse. Ses armoiries sont vn escu, avec sept eschets azurés en champ blanc, & pour les bords six Lyons de gueules en mesme champ, & six chasteaux d'or en champ de gueule.

De ceux de Mendoza, leur titre, maison & rentes.

Duc de l'Infantadgo, Marquis de Cenete & Santilliana, Comte de Saldagna, & Seigneur du lieu Royal de Mançanares. Il a son Hostel à Guadalajara, son Estat à Castille la vieille, aux Monts, au Royaume de Toledé & en la Prouince d'Alua, sa rente est de cent mil ducats.

Duc de Francuilla, Prince de Molite de la lignee de Mendocas. Il tient son Estat aux Royaumes de Toledé & de Naples, & a de rente quarante mil ducats.

Marquis de Mondexar, Comte de Tendilla. Il tient son Hostel à Mondexar, & son Estat en la Prouince d'Alcaria, & a de rente quarante mil ducats.

Marquis de Montescaros, il a sa maison à Guadalajara, son Estat en la Prouince d'Alcaria, & a de rente dix mil ducats.

Marquis de Cagnete. Il tient son Hostel à Cuença, son Estat en la dependance de ladite cité de Cuença, & a de rente dix mil ducats.

Comte de Combrade de la maison de Mendoza. Il tient son Hostel à Guadalajara, son Estat en Alcaria, & a de rente dix mil ducats.

Comte de Castre de ceste mesme maison, il a de rente huit mil ducats.

Comte de Montagudo. Il tient son Hostel à Almançan, son Estat au pays d'Aragon, & a de rente seize mil ducats.

Comte d'Orgaz grand Seigneur, & selon quelques vns chef de ceste lignee. Il tient son Hostel à Sainte Olalla, son Estat au Royaume de Toledé, & a de rente dix mille ducats.

Ceste lignee est fort noble, & la principale d'Espagne : son extraction est tirée d'un grand personnage, Seigneur de Biscaye, nommé Don Curia. Le chef de ceste lignee c'est le Duc de l'Infantadgo, ses armoiries sont vn escu, avec vne bande trauersiere de gueules & des barres de gueule en champ vert, & aux deux costez sont escrites ces paroles, *Ave gratia plena.*

Des Enriques, & du titre que se donnent ses Seigneurs.

Duc de Medina de Rio seco, Comte de Modica, Vicomte d'Esterlin. Il tient sa maison à Valladolid, son Estat en la Prouince de Campos, & en Catalogne, & en la Sicille, & a de rente cent mil ducats.

Duc d'Alcala de los Gauzules Marquis de Tarifa, Comte d'Ornos. Il tient son Hostel à Seuille, son Estat en l'Andalousie, & a de rente huit mille ducats.

Marquis de Villeneuve Del Rio, yssu de ceste lignee. Il tient son Hostel à Seuille, son Estat en Estremadura : & a de rente vingt deux mille ducats.

Marquis d'Alcanizes. Il est pareillement de ceste lignee, & a de rente douze mille ducats.

Comte d'Aluade Lista. Il tient son Hostel à Camor, son Estat en Castille la vieille, & en Estremadura, & a de rente trente mille ducats.

Comte de Fuentes, il est de la maison des Enriques, tient son Hostel à Salamanque, son Estat à Castille la vieille, & a de rente dix mille ducats.

C'est vne fameuse lignee en Castille, les descendants de laquelle sont yssus de sa Maistrise de S. Jacques, frere du Roy Don Pedro le cruel, & d'une Infante de France. Ce Don Enriques mit à mort son frere Don Pedro le cruel, & depuis se fit Roy. Ses armoiries sont vn escuillon my party, en haut deux chasteaux en champ de gueule, & en bas vn Lyon rāpant en mesme champ. De ceste lignee est yssu l'Amiral de Castille, le Duc de Medina de Rioseco.

De ceux de la Cerda, maison Royale, & du titre que se donnent les Seigneurs de ceste lignee, ensemble de leurs armes, rentes, & de leur maison.

Duc de Medina Celi, Marquis de Cogolludo, Comte du Port de Sainte Marie, Il est le chef des Cerdas: Leur Hostel est à Medina Celi, leur Estat au Royaume de Toledé & en l'Andalousie, & la plus part du temps ils font leur demeure à Seuille: il a de rente chaque année quarante mille ducats.

Le Comte de Gelues est de la lignee de Cerdas, & a de rente soixante mille ducats.

La lignee de la Cerda prend son extraction de deux maisons Royales de Castille, & de France, comme on peut voir en la Genealogie du Roy d'Espagne, & en l'histoire de S. Louys Roy de France. Les Ducs de Medina Celi, sont yssus de ceste noble lignee. Les armoiries sont vn escu esquartellé: aux deux costés du chef, & du bas, tant à main droicte qu'à gauche, sont les armoiries de Castille, & aux autres deux x, celles de France. Celles de Castille sont vn Lyon & vn chasteau. Le Lyon est de gueule en champ blanc, & le chasteau purpurin en champ de gueule: les armoiries de France sont trois fleurs de Lys d'or, en champ d'azur.

Des Manriques, leur titre, leur maison & leurs rentes.

Duc de Najera, Comte de Valence, & de Triuigno, chef de la lignee des Manriques, il tient son Hostel à Najera, son Estat en la Prouince de la Roja, & a de rente quarante mille ducats.

Marquis d'Aquilar, Comte de Castagneda, de Manriques de Llara. Il tient son Hostel à Carrion des Comtes, son Estat au Royaume de Leon, & en la prouince de Campos, & a de rente quarante mille ducats.

Comte de Paredes de ceste mesme lignee. Il tient sa maison à Paredes, son Estat en la Prouince de Campos, & a de rente douze mil ducats.

L'on tient que le valeureux & ancien Comte Fernand Gonzalez de Castille est sorty de ceste lignee, & c'est de luy que sont yssus les Ducs de Najera en Castille. Ses armoiries sont vn escuillon avec deux chaudieres noires, à chaque costé desquelles se voyent quatre testes de serpent en champ de gueule.

De ceux de Cordouë, leur tiltre, maison & reuenu.

Duc de Sesa Comte de Cabra, & de Baena: C'est le chef des Cordouës, & l'Aquilar ses Seigneurs ont leurs Hostels à Cordouë, & à Grenade leur Estat au Royaume de Naples, & à Cordouë. Leur rente est de septante mille ducats.

Ceste noble lignee est yssüe des Seigneurs de l'Andalousie, nommée Fernand Nunez, & Aluar Perez. D'iceux sont sortis plusieurs grands Caualliers & entr'autres vn grand Capitaine nommé Gonsale Fernandes de Cordouë, son successeur en valeur, & en Estat, ses armoiries sont sept barres d'Aragon, & la moitié d'un escuillon en bas, où se voit la teste d'un Roy More, attaché en vn pillier avec vne chaisne, & treize barres à l'entour pour trophée.

De ceux de Toledé, leur tiltre, maison & rente.

Duc d'Alua & Guesca, Marquis de Coria, Comte de Sauueterre, Vicomte de Salizes, & Seigneur de Valde Corneia de la maison de Toledé. Il tient son Hostel dans Alua, & son Estat en Castille la vieille, en Portugal, & au Royame de Grenade: ses rentes sont de huitante mille ducats.

Marquis de Ville-franche. Il tient son hostel à Ville-franche, son Estat au Royaume de Leon, & de Naples, & a de rente vingt-cinq mil ducats.

Comte d'Altamira de la maison de Moscoso & de Toledé. Son Estat est en Galice, & a de rente huit mil ducats.

Comte d'Oropesa de la maison de Toledé. Il tient son hostel à Talauera, son Estat est au Royaume de Toledé, & a de rente vingt-cinq mille ducats.

Ceux de ceste lignee selō quelques vns sont descendus d'un Cauallier nommé Don Estienne

Illan frere d'un Empereur de Grece ; qui passa en Castille pour donner secours au Roy de ce Royaume, contre les Mores, & s'arresta en icelle. De ceste lignee est yssu le Duc d'Alua. Leurs armoiries sont vn escusson, avec quinze escaques d'azur, & de blanc, ensemble neuf bannieres pour trophée à l'entour par eux gaignees sur les Mores.

De ceux de Cuniga, leurs armes, titre, maison & rente.

Duc de Vejar, Marquis de Gibraleon, Comte de Renalcazar, c'est le chef des Cunigas, & de la lignee de Soto major. Il tient son Hostel à Seuille, & à Vejar, son Estat au Royaume de Seuille, & a de rente à chaque annee septante huit mille ducats.

Marquis d'Ayamont de la lignee de Cunigas & Soto major. Il tient son Hostel à Seuille, & a de rente vingt cinq mille ducats.

Marquis de Villa Manrique de la maison de Cunigas. Il a de rente, quinze mille ducats.

Comte de Miranda de la lignee de Cunigas. Il est chef des Auellanedas, tient son Hostel à Pegnaranda, son Estat à Castille la vieille, & a de rente trente cinq mille ducats.

Ceste lignee est yssuë d'une Infante de Navarre, & en Castille le Duc de Vejar y est grand Commandeur. Ses armoiries sont vn escusson, avec vne barre noire traversiere en champ blanc, & au bord les chaisnes des armoiries de Navarre.

Des Borias, leurs armoiries, titre, maison & rente.

Duc de Gandie, Marquis de Lombay chef de la lignee des Borias. Il tient son Hostel, & Estat au Royaume de Valence, & a de rente vingt mille ducats.

Marquis de Nauarres, Seigneur de Montesa, de la lignee des Borias, il a de rente quinze mille ducats.

Ceste lignee est yssuë de Valence: d'icelle sont yssus de grands Seigneurs, & entre autres le Duc de Gandia, Seigneur de Montesa: ses anciennes armoiries, sont vne vache paissant l'herbe verte en champ de gueule, & au bord des gerbes de bled en champ de gueule.

Des Guzmanes, leurs armes, titres, maison & rente.

Duc de Medina Sidonia, Marquis de S. Luc de Varrameda, Comte de Niebla chef des Guzmanes. Il tient son Hostel à Seuille au port de S. Luc de Varrameda, son Estat au Royaume de Seuille, & a de rente cent trente cinq mille ducats.

Marquis d'Ardales, Comte de Tobar, de la lignee de Guzman, il tient son Hostel à Malaga, son Estat en Andaloufie, & a de rente quinze mil ducats.

Marquis d'Algaña des Guzmanes. Il tient son Hostel à Seuille, son Estat en Andaloufie, & a de rente quinze mil ducats.

Ceste lignee est fort noble & ancienne à Castille, parce qu'elle est yssuë d'un fameux Roy Goth, nommé Gundamire. Plusieurs genereux Cavaliers sont sortis d'icelle, & spécialement le Marquis de Medina Sidonia, le Marquis d'Ardales, & le Comte d'Orgaz. Ses armes sont vn escu composé de deux chaudrons de gueule, avec quatre testes de serpent à chaque anse, ses bordures sont de huit hermines.

De la maison de Cordouë, ses armes, titre, hostel & rente.

Marquis de Bereta de la lignee des Cardonas, tient son Hostel à Flerena, & son Estat en Estremadura. Il a de rente quinze mil ducats.

Duc de Marqueda, Marquis d'Elche, chef des Cardonas. Il tient son hostel à Toleda, son Estat en ce mesme Royaume. Il a de rente cinquante mil ducats.

Ceste lignee est en grand estime à Catalogne, & dit-on qu'elle est yssuë de la noble famille d'Anjou en France. D'icelle sont sortis plusieurs Ducs & autres Seigneurs de remarque. Ses anciennes armoiries estoient trois fleurs de Lys avec vne charniere. Depuis du tēps de l'Empereur Charlemagne elles furent changees en trois chardons verts en champ de gueule.

Des Figueroas, leurs armes, titre, maison & rente.

Duc de Feria, Marquis de Cafra, chef de la lignee des Figueroas. Il tient sa maison à Cafra, son Estat à Estremadura, & a de rente quarante mil ducats.

Marquis de Pliego, Seigneur de la maison d'Aguilar, de la lignee des Figueroas. Il tient son hostel à Cordouë, son Estat au Royaume de Cordouë, & a de rente soixante mil ducats.

Ceste lignee fait la demeure en Galice, & est la principale de ce Royaume, elle est yssuë des Ducs de Feria, grands Seigneurs en Espagne. Ses armoiries sont cinq feuilles de figuier en champ blanc.

De ceux de la Cueva, leurs armes, titre, maison & rente.

Duc d'Alburquerque, Marquis de Buelma & Cuellar, Côte de Ledesma, chef des Cuevas. Il tient son hostel à Cuellar, son Estat en Estremadura & en Castille, ses rentes sont de quarante six mil ducats.

Marquis de Ladrada de la lignee des Cuevas. Il tient son Hostel à Ladrada, son Estat au Royaume de Toledo, & a de rente huit mil ducats.

Ceste lignee est fort noble & yssue d'Aragon, bien que quelques vns vueillent dire qu'elle soit d'Aguilar de Campos. D'icelle sont sortis les Ducs d'Alburquerque. Ses armes sont vn escu my party, au haut sont les armoiries d'Aragon, & au bas vne grotte d'où sort vn serpeu ou dragon.

Des Pachecos, leurs armes, titre, maison & rente.

Duc d'Escalone, Marquis de Moya, Comte de S. Estienne, chef des Pachecos. Il tient son Hostel à Toledo, & son Estat au Royaume de Murcia, & Mancha, ses rentes sont cent mil ducats.

Ceux de ceste lignee sont yssus de Portugal, ensemble les Ducs d'Escalone, & Marquis de Viena de Castille. Ils portent pour armoiries vn escuillon avec deux chaudieres de gueule, & au bout des deux ances deux testes de serpent en champ blanc : les bordures sont de huit petits escus, avec les escuillons de Portugal.

Des Girons, leurs armes, titre, maison & rente.

Duc d'Ossun, Marquis de Pegnafil, Comte d'Vregna, chef des Girons. Il tient son Hostel à Pegnafil, son Estat au Royaume de Seuille & de Castille, & a de rēte cent mil ducats.

Ceux de ce lignage sont yssus d'un fameux Cavalier, lequel combattant en vne bataille contre les Mores, sauua la vie à son Roy, mettant la sienne au hazard. En memoire d'un si genereux exploit, & afin qu'il fust recogneu d'un chacun, le Roy luy couppa les basques de son harnois.

Ses armoiries sont vn escuillon à trois quarés, à main droicte en haut vn Lyon de gueule en champ d'argent, à la gauche vn chasteau d'or en champ de gueule, & au quartier d'embas trois coignes, & pour bordures trois eschiquiers de gueule.

Des Ponces de Leon, leurs armes, titre, maison & rente.

Duc d'Arcos Marquis de Tara, Comte de Marchena, chef des Ponces de Leon. Il tient son Hostel à Seuille, son Estat en l'Andalousie, & a de rente quarante mil ducats.

Comte de Baylen des Ponces de Leon. Il tient son Hostel à Baylen, son Estat au Royaume de Leon, & a de rente six mil ducats.

La maison des Ponces de Leon est fort ancienne & noble en Espagne, d'où est yssu vn Cavalier fort fameux nommé Don Ponce de Minerua.

Les Ducs d'Arcor tirent aussi leur extraction de ceste lignee. Leurs armes sont vn escu my party. A main droicte vn Lyon de gueule en champ d'argent, à gauche cinq barres pareilles à celles d'Aragon, & pour les bordures huit escuillons d'or en champ d'azur.

De la Royale maison d'Aragon, leur armes, titre, maison & rente.

Duc de Villa Hermosa, Comte de Ribagorça, chef des Aragonois. Il tient son Hostel à Saragoce, son Estat en Aragon, & a de rente vingt mille ducats.

Ceste lignee est tres-illustre & noble en Espagne, comme yssue des Roys d'Aragon, d'où sont sortis en ce Royaume plusieurs grands Cavaliers. Ses armes sont vn escuillon à neuf barres droictes, cinq colorées, & les autres de gueule.

Des Siluas, leurs armoiries, titres, maison & rente.

Duc de Pastrana, Prince d'Eboli, chef de la lignee de Siluas. Il tient son Hostel à Madrid, son Estat en Alcarria, & a de rente soixante mille ducats.

Le Marquis de Montemajor est pareillement yssu de ceste maison, & a de rente soixante mil ducats.

Le Comte de Cifuentes qui tient son Hostel à Toledo, son Estat à Alcatia, & a de rente vingt mille ducats.

Ce lignage est yssu de Portugal, d'où quelques grands & fameux Cavaliers passerent depuis en Castille, du temps du Roy Don Jean premier d'où sont sortis les Ducs de Pastrana & les Comtes de Cifuentes. Ils portent pour armoiries vn Lyon rampant couronné en chap d'argent.

Des Osorios, leurs armes, titre, maison & rente.

Marquis d'Astorga, Comte de Traslamar, & de Sainte Marthe. Il est Seigneur de la maison de Villalobos, & chef des Osorios. Son Hostel est en Astorga, son Estat au Royaume de Leon, & a de rente cinquante mille ducats.

Comte d'Osorio, chef de ceste lignee, & de Manriques. Il tient son Hostel à Valladolid, son Estat à Castille la vieille, & a de rente quatorze mil ducats.

Du Royaume de Leon est yssu l'ancien & noble lignage des Osorios, ensemble le Marquis d'Astorga grand Seigneur de Castille, & plusieurs autres Seigneurs : les armoiries sont deux loups en champ de gueule, & huit croix Bourguignonnes pour bordures.

Des Rojas, leurs armoiries, titres, maison & rentes.

M Arquis de Pora, chef de la lignee des Rojas. Il tient sa maison à Pora, son Estat en la Prouince du Eureba, & a de rente vingt mille ducats.

Marquis de Denia, Comte de Lerma, chef de los Rojas. Il tient sa maison en Denia, son Estat en Castille la vieille, & a de rente quarante cinq mil ducats.

Marquis d'Alcantres de la lignee de los Rojas. Il a de rente quinze mil ducats.

Ceux de la maison de Rojas sont fort nobles & fameux en Castille. Leur sejour ordinaire est à Burena, pres de Biruiesca, & c'est d'où est yssu le Marquis de Poxa: leurs armoiries sont cinq estoiles d'azur en camp de gueule.

De ceux de Castro. Leurs armoiries, titres, maison & rente.

M Arquis de Sarria, Comte de Lernos, de Castro, de Villeneuve & Seigneur d'Vlloa; chef de la lignee de los Castros. Il tient son Hostel à Montfort de Lemos & en Sarria, son Estat au Royaume de Galice, & a de rente soixante mille ducats.

De ce lignage est yssu le Marquis de Sarria & le Comte de Lemos. Il est si noble & si ancien, qu'on le tient estre descendu d'un signalé Capitaine nommé Craftinius, qui fut le premier lequel en la iournee de Pharsale alla donner contre Pompee. Layn Caluus en est pareillement descendu, qui estoit l'un des Iuges qu'il y auoit anciennement à Castille deuant qu'elle fut gouuernee par les Roys. Ses armoiries sont vn escusson, avec cinq ronds d'azur en champ d'argent, leur residence ordinaire est en la Galice.

Des Riberas, leurs armes, titre, maison & rente.

D Vc d'Alcala de los Ganzules, Marquis de Tarifa, Comte de Hornos, de la lignee des Riberas, & des Henriques. Il tient son Hostel à Seuille, son Estat en l'Andalousie, & a de rente huitante mil ducats.

Ce lignage est yssu du Royaume de Galice. En Castille les Ducs d'Alcala, & leurs deuançiers, se rendirent fort signalés au seruice de leur Roy, contre les Mores, où ils s'acquirent beaucoup d'honneur par leurs memorables victoires. Ils portent pour armoiries vn escusson à trois barres vertes en champ de gueule.

De Pimenteles, leurs armoiries, titre, maison & rente.

C Omte de Beneuent, chef de la lignee des Pimenteles. Il tient sa maison à Valladolid, son Estat en la Prouince de Campos, & a de rente douze mille ducats.

Ceste lignee de los Pimenteles selon l'opinion de plusieurs est yssue des Royaumes de Portugal, de Galice & de Castille. Elle est en grande estime en Espagne, & les Comtes de Beneuent en sont descendus. Leur armes sont vn escusson escartelle: Aux deux chefs d'en haut, tant à main d'roite qu'à gauche se voyent les armoiries d'Aragon, & aux autres deux d'en bas à chacune d'icelle cinq bannieres d'argent en champ verd.

De ceux de Haro, leurs armoiries, titre, maison & rente.

M Arquis de Carpio, Comte d'Adamus, de la lignee de los Haros. Il a de rente vingt quatre mil ducats.

Ce lignage est yssu de Don Curia Seigneur de Biscaye, duquel sont descendus les Marquis de Carpio. Il porte pour armoiries vn escusson, avec deux loups, chacun desquels tient à demy deuoré vn agneau de gueule en champ d'argent, & pour bordures huit croix bourguignonnes en champ de gueule.

De ceux d'Auila, leurs armoiries, titre, maison & rente.

M Arquis de las Nauas, chef de la lignee des Auilas. Il tient son Hostel dans Auila, son Estat en ce territoire, & a de rente quinze mil ducats.

Ceux d'Auila font leur demeure en la mesme ville d'Auila. Ils sont yssus du noble Comte Don Blaise, lequel du temps du Roy Don Alonse huitiesme de Castille, se rendit fort fameux & signalé en la guerre contre les Mores, où il estoit general d'armee. De ce lignage est yssu le Marquis de Nauas. Il porte pour armoiries vn escusson avec treize ronds d'azur en champ de gueule.

De ceux de Cortes leurs armoiries, titre, maison & rente.

M Arquis del Valle est fils de cet Hernand Cortes, qui conquesta la nouuelle Espagne. Il tient son Hostel à Mexico, son Estat en la nouuelle Espagne susdite, & a de rente cent cinquante mil ducats.

Ce lignage est sorty d'Aragon, & d'iceluy sont descendus plusieurs fameux Caualliers en Espagne, & entre autres le Marquis de Valle. Il porte pour armoiries vn escusson escartelé, aux deux costés du chef à main d'roite se voit vn aigle dans son nid, & à l'autre costé est depeinte la ville de Mexico avec huit testes enchainees, aux deux d'embas vn Lyon rampant de gueule, en champ d'argent, & trois couronnes d'or en azur.

Des Peraltas, leurs armes, titre, maison & rente.

MArquis de Falses chef des Peraltas. Il tient son hostel à Marcilla de Nauarre, parce qu'elle luy appartient, son Estat au Royaume de Nauarre, & a de rente six mil ducats.

Ce lignage est fort noble & ancien en Espagne, comme estant descendu du Royaume de Nauarre & des Roys de ceste Couronne, d'où sont yssus encores en ligne droicte les Marquis de Falses. Ils portent pour armoiries vn escusson, avec vn griffon coloré en champ de gueule, & pour bordures quatre petits escus, ensemble les armes de Nauarre.

De ceux d'Aguilar, leurs armes, titre, maison & rente.

Bien que le Duc de Sesa soit de Cordouë, Aguilar ne laisse pas d'estre le chef de ceste lignee, Comte de Cabra, & de Baena. Ses hostels sont à Cordouë, son Estat au Royaume de Cordouë & de Naples. Il a de rente septante mil ducats.

Marquis d'Aguilar, Comte de Castagneda, des Enriques de Lara. Il tient sa maison à Carrion des Comtes, son Estat au Royaume de Leon, & en la Prouince de Campos, & a de rente quarante mil ducats.

Cet ancien lignage est en Castille. Il est yssu des Marquis de Pliego, ses deuanciers seruirent les Roys de Castille contre les Nauarrois, & aux guerres qu'ils eurent contre les Mores, sur lesquels ils gagnerent vne memorable victoire, avec les titres de Seigneurs d'Aguilar de la Frontera. Ses armoiries sont vn aigle noir, tenant vn escusson, avec trois barres colorées en champ de gueule.

Des Fajardos, leurs armes, titre, maison & rente.

MArquis de Veles & de Mula, chef des Fajardos. Il tient son Hostel en la cité de Murcia, & a de rente cinquante mil ducats.

De ce lignage sont de tout tēps yssus les Gouverneurs de Murcia, & de leur Royaume.

L'origine de ceste lignee est sortie de Galice, à saint Marthe d'Hortiguera. Ce fut de ceste maison que sortit vn valeureux ieune homme, lequel pour s'acquérir de l'honneur s'en alla au Royaume de Murcia, & là gagna plusieurs victoires sur les Mores, pour le seruice du Roy de Castille. Pour ce faict d'armes, outre les recompenses qui luy furent faictes, le titre de Viceroy du Royaume de Murcia luy fut encores donné, d'où sont sortis les Marquis de los Veles, cōme on peut voir en la grāde Eglise de ladite ville, où ils ont leur Chappelle, avec leurs armes, qui sont trois plumes, & au dessus d'icelles trois horties en champ d'argent.

Des Viamontes, leurs armes, titres, maisons & rentes.

DE ce lignage sont yssus les Connestables de Nauarre, leur Hostel est à Pampelonne, leur Estat à Nauarre: & leur rente est de vingt mil ducats.

Ceste noble lignee est à Nauarre, & c'est l'opinion de plusieurs qu'elle est yssuë d'un Charles Roy de France. Ses armoiries sont vn escu escartelé & faict en eschiquier d'azur & d'argent.

Des Puertos Carreros, leurs armoiries, titre, maison & rente.

MArquis d'Alcala de Ioanes de Horta. Il est yssu de la lignee de los Puertos Carreros, tient sa maison à Seuille, son Estat au Royaume de Seuille, & a de rente seize mil ducats.

Marquis de Villeneuve de Barca rotti, chef de ceste lignee. Il tient son Hostel à Asa, son Estat au Royaume de Cordouë, & a de rente dix-huit mil ducats.

Ceste lignee qui est fort noble est yssuë du Royaume de Portugal, car certains Caualliers ainsi nommés, passerent en Castille, & seruirent avec tant de valeur le Roy Don Alonse le Grand, qu'ils receurent de luy plusieurs recompenses. De ceux-cy sont yssus les Comtes de Medellin en Castille. Leurs armoiries sont vn escu d'argent, avec deux estendarts à l'entour.

De ceux de Bacan, leurs armoiries, titre, maison & rente.

MArquis de Sainte Croix, de la lignee de los Baçanes. Il tient son Hostel à Viso, son Estat à Sainte Croix, & a de rente vingt cinq mil ducats.

C'est l'un des plus nobles lignages qui soient au Royaume de Nauarre, & sa maison des secondes qui font election du Roy. Il est yssu du Marquis de Sainte Croix. Ses armoiries sont sept eschiquiers de sable en champ d'argent, avec plusieurs bannieres à l'entour, & pour bordures huit croix Bourguignonnes en champ de gueule.

Des Herreras, leurs armoiries, titre, maison & rente.

MArquis d'Augnon de la maison des Herreras. Il tient son Hostel à Madrid, son Estat en la Prouince d'Alcarria, & a de rente trente mille ducats.

Ce lignage fait sa residence ordinaire en Castille, où il est tenu pour fort noble & ancien.

Ses armoiries sont vn escu avec deux chaudieres en champ de gueule, & pour bordures huit petites chaudieres d'argent en champ d'azur.

Des Cardenas, armes, tiltre, maison, & rente.

COmte de la Puebla chef des Cardenas. Il tient son Hostel à Llerena, son Estat au Royaume de Cordoue, & a de rente seize mille ducats.

Ce lignage est fort noble en Castille; sa demeure ordinaire est à saint Milan en la Rioja, d'où sont issus les Ducs de Maqueda, & les Marquis d'Elche. Ses armoiries sont deux loups d'azur en champ de gueule, & pour bordures huit Croix de S. André.

Des Acunas, leurs armes, tiltre, maison & rente.

COmte de Buendia, seigneur de Duegnas de la maison d'Acuna. Il tient son Hostel à Duegnas, son Estat en la Prouince de Campos, & a de rente vingt mille ducats.

Ce lignage est fort noble en Espagne, & issu de Portugal des Comtes de Buendia en Castille. Ses armoiries sont vn escuillon avec neuf coignes d'azur en champ d'argent, & pour bordures huit petits escus, avec les cinq escussions de Portugal en champ de gueule.

Des Capatas, leurs armes, tiltre, maison & rente.

COmte de Barajas du lignage des Capatas. Il tient son Hostel à Madrid, son Estat au Royaume de Toledé, & a de rente douze mil ducats.

Ce lignage (si nous croyons l'Histoire) est descendu d'Aragon, du Roy Abarca, d'où sont sortis plusieurs valeureux Caualliers en Castille, & entr'autres à Madrid, dom François Capata Comte de Barajas President au priué Conseil du Roy. Ses armes sont vn escu avec cinq bottes de fable & de gueule en champ coloré, & pour bordures huit escussions de gueule avec vne barre de fable trauersiere.

Des Heridias, leurs armes, tiltre, maison, & rente.

COmte de Fuentes, de la lignee des Heredias. Il tient son Estat en Aragon, & a de rente huit mille ducats.

Ce Comte fut enuoyé en Flandres du viuant du Duc de Parme, & par le decez de ce Duc (qui aduint en la ville d'Arras au pais d'Artois,) Il gouerna les Estats en l'an 1595. par vn petit espace de temps. Durant son gouuernement il s'acquist beaucoup de credit & d'honneur, pour s'estre fait maistre de Chastelet, de Dorlā, de Cambray, & pour plusieurs autres siens exploits memorables. Depuis par la venue d'Albret Cardinal de Toledé & Archiduc d'Autriche, ce Comte s'en alla gouuerner l'Estat de Milan, où il fut en l'an 1610. en laquelle annee il mourut. Il a plusieurs autres rentes outre celles de sa Comté.

Ce lignage est issu des Goths, lesquels anciennement faisoient leur demeure aux monts Pyrenees. Ceste nation estoit fort valeureuse, comme j'ay dit cy deuant en son histoire. De ceste maison est issu le Comte de Belchise en Aragon. Ses armoiries sont cinq chasteaux d'argent en champ coloré.

Des Sarmientos, leurs armes, tiltre, maison & rentes.

COmte de Salinas, & de Bibadeo, de la lignee des Sarmientos. Il tient son Hostel à Burgos, son Estat en Biscaye, & a de rente vingt mille ducats.

Ce lignage est fort noble, & de grande reputation en Espagne, d'où est issu le Comte de Salinas en Castille. Sa demeure est à Carrion de los Condes. Ses armoiries sont vn escu avec treize ronds de gueule en champ coloré.

De ceux de Gueuara, leurs armes, tiltres, maison & rentes.

LE Comte d'Ognate est chef de ceste lignee. Il tient son hostel à Ognate, son Estat à Guipuzcoa, & a de rente six mil ducats.

Ce lignage est issu d'Aragon & de Biscaye. C'estoit l'une des treize maisons qui faisoient election d'un Roy en la Nauarre. Ses armoiries sont vn escuillon avec trois barres de gueule, six hermines d'argent en chacune, avec quarrez d'argent.

Des Ayalas, leurs armes, tiltre, maison & rente.

COmte de la Gomera, chef des Ayalas. Il a de rente quatorze mille ducats.

Ce noble lignage est issu des anciens Roys d'Aragon: plusieurs grands personnages en sont sortis, & entr'autres deux valeureux soldats, lesquels ayans gaigné vn certain pais au seruice de leur Roy, ils le demanderent à sa majesté, lequel le leur octroya liberalement. Ces deux Caualliers estoient parauant nommez Blasque & Blasquez. Le Comte de Fuenfajida est issu de ceste maison. Ses armoiries sont vn escu avec deux loups de fable, en champ d'argent, & pour bordures huit croix de saint André, de gueule, en champ coloré.

P iij

Des Quignones, armes, titre, maison, & rente.

LE Comte de Luna est le chef des Quignones. Il tient son hostel à Leon, son Estat au Royaume de Leon, & a de rente vingt mille ducats.

C'est vn ancien lignage en Asturie, qui se nomme de los Vigiles, lequel est fort noble. De cestuy cy procedēt les Quignones au Royaume de Leon, & d'iceluy le Comte de Luna. Ses armes sont vn escu avec vn faisceau de fleurs bleues & blanches en champ de gueule.

Des Azevedos, leurs armes, titre, maison & rente.

LE Comte de Monterrey est le chef des Azevedos. Il tient son hostel à Salamanque & son Estat à Galice. Il possede de rente quarante six mille ducats.

Ceste lignee tient sa demeure au Royaume de Galice, & d'icelle sont sortis des genereux Cauahiers, tant à Castille, qu'au Portugal. Ses armes sont vn escu avec vn arbre verd tout rond par le haut, nommé Azebo, en champ de gueule, & au pied vn tronc au milieu duquel est attaché vn leurier blanc.

Des Lunas, leurs armes, titres, maison, & rente.

LE Comte de Morata de la lignee des Lunas, tient son hostel à Saragoce, & son estat au Royaume d'Aragon. Il a de rente sept mille ducats.

Ceste lignee de Luna fait sa demeure au Royaume d'Aragon, & est fort noble. D'icelle sont issus plusieurs signalez personages, & specialement don Alvaro de Luna, lequel du temps du Roy don Iean second, fut grand Maistre de saint Iacques, & Connestable de Castille, mais la fortune luy fut autant contraire, comme elle luy auoit esté au commencement fauorable. Ses armes sont vn escu d'argent, & rouge avec vne demie Lune en champ de gueule en bas.

Des Mexias, leurs armes, titre, maison, & rente.

LE Marquis de la Guardia, Comte de sainte Euphemie, chef des Mexias. Il tient son hostel à Salamanque, & son Estat à Iuen. Il a de rente quarante mille ducats.

Ceste lignee procede de Galice. Ses armes sont vn escu avec trois barres azurees en champ rouge.

Des Vloas, leurs armoiries, titres, maison & rente.

LE Marquis de la Mota est de la lignee des Vloas en Galice, proche de la riuere nommee Vloa. D'icelle sont sortis plusieurs preux Cauahiers. Il a de rente seize mille ducats. Ses armes sont vn escu avec sept quarrez, & en chacun d'iceux deux bandes colorées en champ rouge.

Des Arellanos, leurs armes, titre, maison & rente,

LE Comte d'Aguilar, chef des Arellanos, tient son Estat en la Prouince de la Rioja, & a de rente quinze mille ducats.

Ce lignage tient sa demeure à Nauarre. Il est fort prisé pour sa noblesse. Ses armes sont vn escu party au large, la moitié azuré, & l'autre rouge, & pour la bordure neuf fleurs de Lys d'or en champ azuré.

Des Benauides, Armes, titre, maison & rente.

LE Marquis de Fromiste, de la lignee des Benauides. Il tient son hostel à Fromiste, son Estat en Campos, & a de rente dix mil ducats.

Ce lignage procede de Galice. Il porte pour armes vn escu, avec vn Lyon rampant & trois bandes blanches, trauesees au milieu, en champ rouge, & le Lyon coloré.

Des Auellanadas, leurs armes, titre, maison & rente.

LE Comte de Riadauia de la maison des Auellanadas. Il tient son hostel à Valladolid, & son Estat à Galice. Il a de rente six mille ducats.

Ceste noble lignee tient sa demeure à Castille la vieille, & à la riuere de Biscaye, dont sont dites les iurisdiccions. Il porte pour armes vn escu de gueule, avec vn loup de sable, & pour bordures huit croix de S. André, rouges en champ coloré.

Des Carrillos, leurs armes, titre, maison & rente.

LE Comte de Pliego, de la maison des Carrillos, & Mendoza. Il tient son hostel à Guadalajara, & son Estat au territoire de Cienega. Il a de rente huit mil ducats.

On dit que l'extraction de ceste lignee est venuë de Burgos, & est beaucoup prisee en Espagne, parce que d'icelle sont sortis plusieurs Cauahiers & Prelats de grande, estime, & specialement vn Archeuesque de Toledo. Ses armes sont vn escu, avec vn chasteau de gueule en champ coloré.

De

Des Saavedras, leurs armes, tiltre, maison, & rente.

LE Comte de Castellar de la lignee des Saavedras. Il tient son hostel à Seuille, & a de rente douze mil ducats.

Ceste lignee est à Galice, de laquelle sont issus plusieurs valeureux caualiers. Ils demeuroient jadis dans des caues, qu'ils nommoient de Viuanco, d'où ils sortoient pour occire les dragons & autres bestes furieuses. Ils ont pour armes vn escu, avec trois bandeaux esquarterez en gueule, & en champ d'argent.

AVTRES LIGNEES DESQUELLES NOVS N'AVONS PEV
sçauoir leurs tiltres & rentes, neantmoins nous ne lairrons pas de descrire
icy leurs armes, selon l'ordre que nous venons de suiure, parce
qu'elles sont des principales d'Espagne.

Armoiries de la lignee de Castille.



Ev x de ceste lignee decendent du Royale maison de Castille. Leurs armes sont vn escu party en quarré, en bas vn chasteau de sable en champ de gueule, & aux costez d'en haut, deux Lyons d'or en champ de gueule.

Armes de ceux de Grenade.

Quelques caualiers sont issus de ceste lignee en Espagne, & entre autres les Abencerrajes fort renommez, lesquels sont decendus du sang Royal des Roys de Grenade, leurs armes sont vn escu, avec vne grenade en champ blanc.

Armes des Aualos.

Ceste lignee fut fort prisee en Espagne pour vn temps, & specialement à Nauarre, d'où prit son extraction ceste maison. D'icelle sont sortis plusieurs signalez personnages: mais iceux ayans encouru la disgrace du Roy, par l'enuie de quelques-vns, ils s'en allerent en Italie, où ils s'acquirent vn si grand renom par leurs exploits d'armes, qu'ils prirent pour tiltre le Marquisat de Pescara. Leurs armes sont vn escu, & au milieu vn chasteau de gueule en champazuré, & pour bordure des quarez rouges & blancs.

Armes des Manuels.

Plusieurs genereux caualiers en Espagne, sont decendus de ceste lignee, laquelle prend son extraction d'un fils du Roy don Fernand nommé don Manuel. Ses armes sont quatre quarez, deux au chef, & deux en bas, à chacun desquels est vn bras avec des ailles, & vne espée en la main en champ de gueule, & les bras verds, & aux autres deux, deux Lyons de gueule en champ d'argent. Cestuy-cy porte des ailles pour deuise, parce qu'un Seraphin apparut à sa mere estant enceinte de luy.

Armes de ceux de Touar.

Les Ducs de Fera sont issus de ceste lignee, lesquels tiennent leurs hostels au territoire de Treuigno. Ils portent pour armes vn escu avec vne barre de gueule trauersiere & aux costez d'icelles deux testes de serpents de gueule en champ d'azur. Le Roy don Alonse leur donna ceste barre, qu'il gagna aux Algeziras, parce qu'un Caualier de ceste lignee, se rendit fort renommé en la conqueste d'icelles.

Armes de ceux de Sandomal.

Ceste noble lignee tient son hostel à Treuigno, & prend son extraction du Comte de Lemos grand seigneur de Castille. Ses armes sont vn escu avec vne barre de sable à trauers en champ de gueule.

Armes des Meneses.

Plusieurs grands seigneurs sont issus de ceste lignee, & sont encores pour le iourd'huy leur demeure au Portugal. L'histoire raconte que ceste lignee est decendue d'une Infante fille de don Ordogno, Roy de Leon, qui se maria avec Tello de Mancses. Ses armes sont vn escu en champ de gueule.

Armes des Chacones.

Ceste lignee des Chacones est issue des nobles, & anciens d'Espagne, & procede de Galice. Ses armes sont vn escu party en quatre quartiers, sçauoir au chef, au bas, à main dextre, & à gauche, deux loups de sable en champ d'argent, & aux autres deux, à chacun

deux fleurs de Lys d'or en champ d'azur.

Armes de ceux de Biuro.

Ceste lignee fait sa demeure à Galice en vn lieu nommé sainte Marthe d'Ortiguera. Ses armes sont trois faïccaux d'horties vertes Ondoyantes en champ d'argent.

Armes des Padillas.

ON dit que ceux de ceste lignee font leur demeure à Treuigno, & qu'ils sont issus d'un ancien nommé Godo. Ils ont pour armes trois grilles d'argent, avec trois demies Lunes à l'entour en champ d'azur.

Armes des Leyuas.

Ceste lignee est l'une des plus nobles, & principales de Castille, & plusieurs genereux Cavaliers sont sortis d'icelle, lesquels tant es guerres naualles, comme es batailles rangees ont eu de grandes charges au seruice de leurs Roys. Ses armes sont vn escu avec vn chasteau ondoyé de flots colorez en champ d'azur, & le champ de l'Escu est de gueule.

Armes de los Nignos.

Ceste lignee est fort prisee en Castille, & dit-on qu'elle est decenduë d'un Infant, fils du Roy don Alonse, qui se nommoit Pair de l'Empereur. Plusieurs Cavaliers sont sortis d'icelle à Toledo, & en son Royaume. Ses armes sont vn escu, avec sept fleurs de Lys d'or, en champ d'azur.

Armes de ceux de Solis.

Ceste lignee fait sa demeure aux Asturies d'Ouiedo, & procede d'un enfant de ce Royaume. Ses armes sont vn soleil de gueule en champ d'argent.

Armes de ceux de Vera.

Ceux de ceste lignee demeurent à Galice, & sont fort prisez, bien que plusieurs Cavaliers d'entr'eux soient passez en Castille, & principalement en Estremadure. Leurs armes sont vn escu avec des fleurs azurees en champ d'argent.

Armes des Vanegas.

Plusieurs valeureux Cavaliers sont sortis de ceste lignee. Leur demeure est au Portugal & Galice, bien que la plus part d'iceux, viue pour le iourd'huy à Castille, leurs armes sont vn escu avec trois barres d'argent en champ d'azur.

Armes des Fonssecas.

Ces Fonssecas sont sortis de Portugal: ceste lignee est fort noble, quelques-uns d'icelle passerent en Castille. Leurs armes sont vn escu avec cinq estoilles rouges en champ de gueule.

Armes des Valdes.

Ce lignage est estimé pour estre fort noble. Son sejour est aux Monts & aux Asturias d'Ouiedo. Ses armes sont vn escusson avec trois barres d'azur en champ d'argent & pour bordures vne cordeliere.

Armes des Maldonados.

Ce lignage fait son sejour ordinaire au Royaume de Galice. Ses armes sont vn escusson avec cinq fleurs de Lys d'or en champ coloré.

Armes des Quiquadas.

Ceste maison est fort noble en Castille, & d'icelle sont sortis plusieurs preux & bons Cavaliers. Elle a pour armoiries quatre machoires d'azur en champ d'argent. Ceux de ceste famille ont pris ce nom & ces armoiries d'un valeureux chef, lequel comme robuste qu'il estoit ayant deffié au combat vn certain More grand guerrier, ainsi qu'il combattoit avec luy corps à corps d'un seul coup qu'il luy donna en ayant ja receu plusieurs du More, il luy mit les machoires par terre, avec vne bonne partie de la barbe.

Armes des Vargas.

Ce lignage est de grande reputation, & les principaux d'iceluy font leur demeure en Estremadura, & en l'Andalousie. Ils portent pour armoiries vn escusson avec trois barres ondoyantes d'azur en champ d'argent.

Armes des Sandos.

Ce lignage est issu de Galice, ses armes sont vne aigle noire enlaccée par les pieds, en champ de gueule, & pour bordures vne cordeliere.

Armes des Vegas.

Ceux de ceste maison sont fort nobles, & il y a difference à dire qu'ils procedent d'Aragon.

gon ou de Castille. Ils portent pour armoiries vn chasteau de gueule en champ vert.

Armes de ceux de Soto Major.

CEux de Sotomajor sont issus de Galice, & d'eux ont pris leur extraction plusieurs grands Seigneurs, lesquels se sont rendus fort recommandables, pour les seruices par eux rendus à leur Prince, contre les Mores. Ils portent pour armoiries vn escu avec trois cheurons escartelez de gueule, & vne barre de sable my-partie, avec trois quarrez en champ d'argent.

Armes des Carauajales.

Ce fameux lignage est issu du Royaume d'Aragon. D'iceluy sont sortis plusieurs grands chefs deffenseurs de leur partie, & tousiours fideles à leur Prince. Ils ont pour armoiries vn escu d'argent, avec vne barre trauersiere de sable.

Armes de ceux de la Vega.

LE sejour ordinaire de ceste noble famille est aux monts & au terroir de Santillana. Plusieurs preux Caualliers en sont issus. Les armes de ceste maison sont vn escu de gueule, & pour bordure ces mots, *Aue Maria gratia plena*. Ils ont ces armoiries en memoire d'un exploit heroïque que fit vn ieune gentil-homme de ceste famille, nommé Garcissassus, lors que Don Fernand & Madame Elizabeth tenoient assiegee Grenade. Auquel temps il mit à mort vn More, qui pour derision de la Vierge auoit attaché vn chappellet à la queue de son cheual. Depuis le Roy luy donna pour armes *Aue Maria*, & parce qu'il fut occis en la Vega ou plaine de Grenade, il prit le surnom de la Vega, & se fit nommer Garcissassus de la Vega.

Armes de ceux des Vermudor.

Ceux de ceste famille font leur demeure à Galice. Du temps de Cid Ruidias Campeador, ils se rendirent fort recommandables par leurs exploits genereux & guerriers, comme il appert par vn ancien liure qui traite des exploits de ce Cid. Ils portent pour armoiries vn escu avec sept eschagues de couleur en champ de gueule, qui font quinze quarrez, à la maniere d'un ieu d'échets.

Armes des Auendagnos.

Ce lignage est issu de Galice. Du temps que les Roys de Castille faisoient guerre contre les Mores des grands chefs issus de ceste maison se rendirent signalez par leurs faits d'armes, & pour le sang par eux répandu. A cause dequoy ils portent pour Armoiries vne chemise ensanglantee & trauessee de trois flèches en champ verd.

Armoiries des Porras.

Ceux de ceste famille font leur sejour ordinaire parmy les Monts, & sont issus de fort noble extraction. Ils portent pour armoiries vn escusson avec cinq fleurs de Lys d'azur bordées de gueule en champ d'argent.

Armes des Inestrosas.

Ceux de ceste famille, d'où sont issus de grands chefs, font leur sejour en Castille, en vn lieu nommé Treuigno. Ils portent pour armoiries vn escusson avec deux loups d'azur en champ coloré & pour bordures huit estoiles de gueule en champ d'azur.

Armes des Chaues.

Ce lignage est issu de Portugal. Il est vray que quelques Canalliers sortis d'iceluy passerent en Castille, & se treuerent à la conquête de Baega. Ils portent pour armoiries vn escu avec cinq clefs d'or en champ coloré, & pour bordures cinq croix de S. André, parce que ces Seigneurs furent cause de la prise de ceste ville, le iour de S. André.

Armes des Quesadas.

DE ceste maison, qui est fort ancienne en Castille, est sorty vn valeureux & Catholique Prelat, Archeuesqué de Toledé, lequel de son temps esleua grandement sa fortune, ses armoiries sont vn escu avec quatre bannieres colorees, & à chacune d'icelles quatre hermines d'argent, & le champ de l'escu pareillement.

Armes des Crassos.

Ceste famille fait sa demeure à Nauarre. Ses armes sont deux loups de sable en champ d'argent.

Armes des Cuandos.

Ce noble lignage fait sa demeure à Galice. Il porte pour armoiries vn escusson avec vne Croix de Calatraue coloré en champ d'argent, & aux bouts quatre escailles de gueule.

L'Euesché de Coria vaut vingt quatre mille ducats.
 L'Euesché de Plaisence quarante mille ducats.
 L'Euesché d'Astorga dix-huict mille ducats.
 L'Euesché de Camora vingt mille ducats.
 L'Euesché de l'Vniuersité de Salamanque vingt quatre mille ducats.
 L'Euesché de la cité de Rodrigo dix mille ducats.
 L'Euesché de Mondegredo douze mille ducats.
 L'Euesché d'Orense huict mille ducats.
 L'Euesché de Lugo, huict mille ducats.
 L'Euesché de Tuy quatre mille ducats.

L'Euesché d'Almeria vaut quatre mille ducats.
L'Euesché de Guadix sept mille ducats.

L'Euesché d'Oribuel a 8000. ducats.
Celle de Segorue, dix mille ducats.
L'Euesché de Vluestre six mille ducats.
L'Euesché de Carthagene (qui jadis estoit suffragante à Valence, est sousmise à present à celle de Murcia,) seize mille ducats.

L'Euesché de Calahorra vaut 20000. ducats.
L'Euesché de Pampelune vingt deux mille ducats.

L'Euesché de Leon quatorze mille ducats.
L'Euesché d'Ouiedo vingt vn mille ducats.

L'Archeuesque de Toled.	200.m.d.	L'Euesque de Mondognedo,	22.m.d.
L'Archeuesque de Seuille.	80.m.d.	L'Euesque de Cadiz,	12.m.d.
L'Archeuesque de S. Iacques.	40.m.d.	L'Euesque de Malaga,	30.m.d.
L'Archeuesque de Grenade.	24.m.d.	L'Euesque d'Almeria,	4.m.d.
L'Archeuesque de Burgos.	35.m.d.	L'Euesque de Guadix,	7 m.d.
L'Archeuesque de Saragosse.	50.m.d.	L'Euesque de Canarie,	12.m.d.
L'Euesque de Ciguença.	50.m.d.	L'Euesque de Pampelune,	22.m.d.
L'Euesque de Plaisence.	40.m.d.		
L'Euesque de Palence.	32.m.d.	<i>Ceux du Royaume d' Aragon.</i>	
L'Euesque d'Osma.	22.m.d.	L'Euesché d' Aragon,	40.m.d.
L'Euesque de Salamanque.	24.m.d.	L'Euesque de Guescar,	11.m.d.
L'Euesque de Segouie.	24 m.d.	L'Euesque de Valuestre,	6.m.d.
L'Euesque d'Auila.	20.m.d.	L'Euesque de Iaca,	6.m.d.
L'Euesque de Iacn.	20.m.d.	L'Euesque de Taraçona,	9.m.d.
L'Euesche de Cordouë.	46.m.d.	L'Euesque de Teruel,	8.m.d.
L'Euesque de Calahorra.	20.m.d.	L'Euesque d'Albarrazin,	6.m.d.
L'Euesque de Cuença.	45.m.d.	<i>Abbayes de ce Royaume.</i>	
L'Euesque de Cartagene.	16.m.d.	L'Abbaye de Montaragon,	12.m.d.
L'Euesque de Camora.	20.m.d.	L'Abbaye de saint Victorian,	2.m.d.
L'Euesque d'Ouiedo.	21.m.d.	L'Abbaye de saint Iean de la Pegna,	2.m.d.
L'Euesque de Leon.	14.m.d.		
L'Euesque d'Astorga.	18.m.d.	<i>Prelats de l'Isle de Sardaigne.</i>	
L'Euesque de Coria.	24.m.d.	Archeuesque de Caller,	4.m.d.
L'Euesque de Badajoz.	16.m.d.	Archeuesque de Sacera,	4.m.d.
L'Euesque de la cité Rodrigo.	10.m.d.	Archeuesque d'Oristan,	3.m.d.
L'Euesque de Lugo.	8.m.d.	Archeuesque d'Ampurias,	2.m.d.
L'Euesque d'Orense.	8.m.d.		
L'Euesque de Tuy.	4.m.d.		

Archeuesque d'Alaguer,	3.m.d.
Euesque d'Ales,	1.m.d.
Euesque de Bosa,	1.m.d.

Prelats du Royaume de Valence.

A Archeuesque de Valence	3. m. d.
Euesque d'Orihuela,	8.m. d.
Euesque de Segorue.	10.m.d.
L'Euesque de Majorque, & Minorque est suffragant de l'Archeuesque de Valence & a de rente	10.m.d.

Prieurez.

L E Prieur du Conuent de saint Jacques de Veloz.	30.m. d.
Le Prieur du Conuent de S. Marc de Leon.	10.m.d.

Le Prieur du Conuent de S. Jacques de Se- uille.	14.m.d.
-----------------------------------------------------	---------

*Les Commanderies de S. Jacques, Calatraue,
Alcantara, avec les lieux, où elles sont,*

*Et les rentes que chacune pos-
sede en particulier.*

*Prouince de Castille.**Commanderies de saint Jacques.*

L A grande commanderie de Castille.	14. m. d.
La commanderie d'Ocagna	1.m.500.d.
La commanderie de Monte Alegre	5.m.d.
Celle de Mont-real.	10.m.d.
La commanderie de deux Varies.	1.m.800.d.
La commanderie Villarruia.	1. m. 100. d.
Celle de Vissoria.	2.m. d.
Celle de Viedma.	1.m. 500.d.
Celle de l'Orcajo.	4.m.d.
Celle de Pozo Runlo.	1 m.600.d.
Celle de Mirabel.	1.m.300. d.
Celle de Villa major,	2.m. d.
Celle del campo de eriptana,	1.m.500.d.
Celle de villa Escusa de Haro,	1.m. 500. d.
Celle de Socaellemos,	14. m. d.
Celle de Corral d'Almaquer,	4.m.d.
Celle de sainte Croix de la çarça,	1.m. d.
Celle des bastimens de la Prouince de Ca- stille,	2.m.500.d.
Celle du bastimēt du chāp de Mōtiel,	3.m.d.
Celle d'Aledo, & Totana,	4. m. d.
Celle de Carauaca,	12 m. d.
Celle de Cieça,	1.m.200.d.
La commanderie de Ricote,	6.m.d.
Celle de Socobos,	4.m.500.d.
Celle de Moratalla,	9.m.400.d.
Celle de Montizon, & Chiclana,	3.m.200.d.
Celle de Torres, & Cagnamares.	1.m.d.
Celle de Montiel, & l'Ossa,	1.m.800.d.
Celle de Carricosa,	1.m.200.d.
Celle de Villa Hermosa,	4.m.d.
Celle de la Mambra, & la Solana,	6.m.d.
Celle de Segura de la Sierca, de laquelle le Duc de Feria est commandeur,	2.m.d.

Celle de Veas, de laquelle le Marquis d'Al- maçan est commandeur,	5.m.d.
Celle d'Yest, de laquelle le Comte de Buen- dia est commandeur,	6.m.d.

Celle d'Abauches, & Viedmar, de laquelle le Comte de Fuen Salida est comman- deur,	5.m.d.
------------------------------------------------------------------------------------------	--------

Celle de Villeneuve de la Fuēte,	1.m. 500.d.
----------------------------------	-------------

La commanderie de Merida,	4.m.500.d.
---------------------------	------------

Celle d'Alhange,	5.m.200.d.
------------------	------------

Celle d'Alcuesta,	2.m.d.
-------------------	--------

Celle d'Ornachos,	5.m.500.d.
-------------------	------------

De ceste commanderie le General d'O-
ran est commandeur.

La commanderie de Palamos,	1.m.500.d.
----------------------------	------------

Celle d'Oluia,	1.m.d.
----------------	--------

Commanderies de la Prouince de Leon.

L A grande commanderie de Leon, le commandeur de laquelle est le Mar- quis de sainte Croix,	12.m.d.
----------------------------------------------------------------------------------------------------------	---------

La commanderie d'Aguza,	10.m.d.
-------------------------	---------

Celle de Guadalcanal,	4.m.200.d.
-----------------------	------------

Celle de la Puebla de Sancho Perez,	2.m.d.
-------------------------------------	--------

Celle de la Royné,	4.m.500.d.
--------------------	------------

Celle de la fuente le maistre,	2 m.200.d.
--------------------------------	------------

Celles des saints,	4.m.300.d.
--------------------	------------

Celle de Ville-franche,	1.m.d.
-------------------------	--------

Celle de bien Venida,	3.m.d.
-----------------------	--------

Celle d'Vfagre,	1.m. 500.d.
-----------------	-------------

Celle de Ribera, 3.m.d. appartient à la mai-
son de Ribera,

Celle d'Hinojosa,	1.m.200.d.
-------------------	------------

Celle des bastimens de la Prouince de Leon,
appartient aux Maças, & vaut

6.m.d.	
--------	--

Celle des maisons de Cordouë appartient

aux Venauides,	3.m.d.
----------------	--------

Celle de la Barra, qui appartient aux Vuer-
mudez,

1.m.500.d.	
------------	--

Celle du chasteau Torafe, au Comte de Be-
neuent,

500.d.	
--------	--

Celle de Peña Vsēte aux Médoças,	2m.500.d.
----------------------------------	-----------

Celle de Triane aux portscarreros,	1m.500d.
------------------------------------	----------

La grande commanderie de Montaluan ap-
partient aux Vigneç,

4.m.d.	
--------	--

Celle d'Orchenta aux Mendoças,	500.d.
--------------------------------	--------

Celle de Museros aux Cardenas,	400.d.
--------------------------------	--------

Celle de Zagra, & Cenete, à ceux de Toledé,	2.m.d.
---------------------------------------------	--------

La cōmāderie d'Auellino en Sicile,	1m.500d.
------------------------------------	----------

Celle de Fradel apartiēt aux Bacanes,	400d.
---------------------------------------	-------

Celle de saint Coloire à Naples appartient
aux Espinolas,

1.m.d.	
--------	--

La cōmāderie de Vafante en Frāce,	2 m. d.
-----------------------------------	---------

La cōmāderie d'Oriō en Bearn vaut,	500.d.
------------------------------------	--------

La commanderie d'Estepe,	6.m.d.
--------------------------	--------

Celle de Paracuellos appartient aux Ceuel-
lones,

2.m.d.	
--------	--

Celle de Moutijo,	1.m.500.d.
-------------------	------------

Celle de Mohernaudo aux Lassos,	2.m.d.
---------------------------------	--------

Celle

Celle d'Oroja aux Valdeses,	3.m.d.
Celle de Lolon appartient aux Acognas,	1.m.d.
Celle de Mora aux Pimentales,	1.m.500.d.
Celle d'Estreuiera aux Lunas,	800.d.
Celle d'Huelamo,	400.d.
Celle de Mures & Venaçuça aux Guevaras vaut,	500.d.
Celle de Castilleja de la Cuesta,	300.d.
Celle du Chasteau verd appartient aux Guz- manes, & vaut	300.d.
Celle d'Almendrales aux Cugnigas, vaut,	2.m.400.d.
Celle de Montemolin aux Toledos,	1.m.400.d.
Celle de Medina de las Torres aux Padillas,	2.m.500.d.
Celle du Monastere, le Commandeur de la- quelle est le Marquis de Cagnete, vaut,	1.m.500.d.
Celle de Calçadilla aux Mécadas,	1.m.500.d.
Celle d'Aquilarejo aux Cugnigas,	600.d.

*Les Gouvernemens, & dependances de
l'ordre de S. Jacques.*

L E Gouvernement de Quintanar vaut,	80.d.
Le gouvernement de Ville-neufue d'Alcau- dete,	100.d.
Celuy de la Mote vaut,	80.d.
Celuy des Velez que le Comte de Buendia tient, vaut	500.d.
Celuy de Bienvenida,	400.d.
Celuy de la Higuera,	800.d.
Celuy de la Porte de la Roine,	100.d.
Celuy de Contalgallo,	200.d.
Celuy de Fuente du maistre,	100.d.
Celuy de Montonches,	1.m.200.d.

Commanderies de l'ordre de Calatraue.

L A grande Commaderie de Calatraue, le comadeur de laquelle est le Duc d'Alu- de la maison de Toledé, vaut	10.m.500.d.
La commanderie dudit ordre,	9.m.d.
La commanderie de Cestellanos,	2.m.d.
Celle d'Almagro appartient aux Lunas, & Mendoça, & vaut	1.m.d.
Celle de Mudela,	4.m.500.d.
Celle de Castilferas aux Manriquez de La- ra,	4.m.500.d.
Celle d'Almuradiel aux Velasques,	1.m.500.d.
La commanderie de Carrion.	1.m.800.d.
Celle de Toroba aux Siluas,	1.m.300.d.
Celle de valde Pegnas aux Padillas.	3.m. 500.d.
Celle de Montauchelos aux Pimentales,	1.m.500.d.
Celle de Fuente el Moral, Cordouas, & Pon- ces de Leon,	1.m.d.
Celle del Moral Enriques de Riberas, Mar- quis de Villeneuve del Rio,	7.m.500.d.

Celle de Corral de Saraguel Padillas,	2.m. 600.d.
Celle du Port plain aux Moros,	1.m.600.d.
Celle d'Alcolea aux Ortizes,	1.m.400.d.
Celle de Vallesteros,	1.m.300.d.
La commanderie de Daniel,	2.m.700.d.
Celle de Pozuela Acognas,	1.m.100.d.
Celle d'Almodonar du champ, Cugnigas, & Cordouas,	2.m.700.d.
Celle d'Herrera aux Manriques de Lara, vaut	2.m.d.
Celle de Mançanares, de laquelle le Marquis de l'liego est gouverneur,	6.m.500.d.
La commanderie de Viueros,	3.m.400.d.
Celle de la Pegna de Martos,	
Celle de la maison de Cordoué,	2.m.500.d.
La commanderie de Velmez,	700.m.d.
La commanderie de Calatraue,	4.m.d.
Celle de Sorita aux Sandoñales,	500.m.d.
Celle de Vallega,	1.m.100.d.
Celle de la maison de Toledé vaut,	1.m. 200.d.
Celle de la maison de Talauere, aux Enri- ques,	800.d.
Celle de la maison de Plasence aux Osorios, le commandeur de laquelle est le Comte d'Adrada,	3.m.300.d.
Celle de la maison de Seuille, & Niebal vaut,	3.m.d.
Celle de Cagnaueral vaut,	2.m.d.
Celle de Lepera, les commandeurs de la- quelle sont les gouverneurs de Castille,	1.m.600.d.

*Prieurez, & Sacristies dudit ordre
de Calatraue.*

L E Prieuré de la Fuente,	1.m.d.
Le Prieuré d'Açuqueça vaut, celuy de saint Benoist de Seuille,	600.d.
Celuy de saint Benoist de Iaën vaut	2.m.d.
Celuy de saint Benoist de Porcuna,	1.m.d.
Celuy de S. Benoist de Toledé,	600.d.
Celuy de Corite,	200.d.
La Sacriste dudit ordre,	2.m.400.d.

Commanderie de l'ordre d'Alcantara.

L A grande commanderie d'Alcantara,	10. m.534.d.
La Clauerie dudit ordre,	6.m.246.
La commanderie de l'Azauchal,	2.m.200.d.
Celle de la Magdelaine,	3.m.300.d.
Celle de Hornos,	400.d.
Celle de Celamin,	2.m.150.d.
Celle de la Vatumbera, & de la iurisdiction de Badajoz,	300.d.
La commanderie des maisons de Calatraue,	2.m.500.d.
La commanderie de Portezuelo,	3.m.150.d.

Qij

Celle de la Puebla,	1.m. 200.d.	Celle de Yenfayan,	1.m. 500.d.
La Commanderie des maisons de Coria vaut,		Celle de Herrera,	800.d.
Celle de Nelis, & Nauarre,	1.m. 500.d.	Celle de Castelnouo,	4.m. 500.d.
Celle de Castille,	2 m. 400. d.	Celle de Cabeça el Buey,	3.m. 600. d.
Celle des Eglas,	3.m. 500.d.	La Commanderie de sancti Spiritus,	2.m.d.
Celle de la Molareja,	4. m. d.	Celle de Calamea,	4.m. 300.d.
Celle de Santiuagnez,	4. m. d.	Celle des maisons de Calatraue,	2.m.200.d.
Celle de Mayora,	4.m. 500. d.	Celle de Quintana,	1.m. d.
Celle de Parragal,	.m.100.d.	Celle de la Paradela,	2.m.d.
Celle de Veluis de Sierra,	1. m. d.	Celle de Galizucla,	2.m. 500. d.
La Commanderie de la Sarça,	500. d.	Celle de Parragosa,	3.m. 300. d.
		La Commanderie del Adelfa,	800.d.

Les Iurisdicctions dudit ordre d'Alcantara.

L Es deux Iurisdicctions d'Alcantara,	1.m. 500.d.	Celle de Hesa d'Alcorchan,	1. m. 400. d.
La Iurisdicction de Magazela,	800. d.	La Iurisdicction de Banquerencia,	400.d.

Prieurez & Sacristies.

L A Sacristie dudit ordre,	800.d.	Le Prieuré de Magezela,	400.d.
Le Prieuré del Campo,	500.d.	Le Prieure de Calauca,	400.d.

Sa Majesté tient à perpetuité les Ordres de la Cheualerie de saint Jacques, de Calatraue, & d'Alcantara. Il est bien vray que quelquesfois les maistrises sont donnees à des rentiers, lesquels donnent au Roy treize m.d. d'arrentement par chacune année: Outre qu'ils sont obligez de donner à tous les Cheualiers desdits Ordres, qui n'ont point de Commanderie, & sont profez 12.m. maravedis à chacun, pour le pain & eau. Sa Majesté a l'administration susdite par Bulle Apostolique.

LES CHEVALIERS DE PORTUGAL.

I L y a en Portugal trois Ordres de Cheualiers. Le premier est appelé de Christ, avec la croix rouge bordée de cordons d'or, & vn d'argent au milieu. Le second de saint Jacques avec l'épée rouge, comme celle de Castille, le troisieme de saint Bernard avec la croix verte, comme est celle de Calatraue. Le Roy dispose de cinq cens Commandeurs des Ordres.

Il y a deux Ducs: le premier de Bragance, riche de cent mille croisez, ou escus de Portugal de rente: le second est celui d'Auere, riche de cinquante mille escus de rente.

Il y a trois Marquis & dix Comtes. Les autres Gentils-hommes, ont plus de biens meubles qu'autres. Et à cause qu'ils auoient accoustumé de combattre en desordre avec les Mores, le Roy d'Espagne les fait exercer aux Ordonnances, ayant fait venir des hommes expres d'Espagne, de France, d'Allemagne, & d'Italie.

Quant à l'ordre qui est estably pour les nauigations, ie le diray en peu de paroles.

10. Il part ordinairement au mois de Mars quatre ou six grandes nauires, qui ne retournent plus de la mesme année: tellement que tous les vaisseaux demeurent dehors l'espace de dix-huict mois: mais tous les ans il part au mois de Mars vne compagnie, & en Septembre vne autre. Ces nauires se separent pour charger en diuers endroits d'Afrique, & pareillement aux Indes, & en Asie, & pource qu'au retour ils n'ont que les mariniers, & peu de marchâds, on leur enuoye au deuant six gallions bien armez iusques au Cap verd, pour asseurer la flotte des Corsaires Anglois, qui iroient attaquer les nauires, entendant qu'elles viennent des Indes, ainsi qu'ils ont fait autresfois, pillant mesme l'Isle de Madere.

Ceste nauigation des Indes s'est renduë tres-facile, & les marchandises s'asseurent à six ou sept pour cent. On a entendu d'un marinier de l'aage de soixante ans, qu'il auoit fait vingt-trois voyages aux Indes, ayant passé quarante six fois le Cap de bonne esperance: qu'ayant passé l'Équinoctial, où l'on ne découure pas le Nord, on peut nauiger avec la mesme Boussole, dont l'on vse en nos mers: veu qu'ayant passé vers le Ponant des Canaries, l'Estoile de la Boussole comme disent les mariniers, comme vers le Nordest & du Leuant, ayant passé le Meridien de l'Isle de saint Laurens elle tourne vers Nordouëst, & la cause en est incogneüe.

RELIGION,

Religion, & choses qui concernent l'Eglise d'Espagne.

TOUTE l'Espagne suit la Religion Catholique, Apostolique, & Romaine, & les nouvelles opinions y sont tellement hayes, qu'afin qu'elles ne s'y glissent, on y a estably des Inquisitions rigoureuses, qui sont instituees à bonne fin, combien qu'il y ait de l'abus, de mesme qu'en toutes autres choses bien ordonnees. La primauté d'Espagne estoit anciennement en l'Eglise de Seuille, puis elle fut en celle de Toledé, iusques au grand rauage qui arriva au Royaume: car Toledé estant tombé entre les mains des Barbares, l'Archeuesque de Braca jout de ceste dignité, comme les Archiues de l'Eglise de Braca enseignent. Mais apres que les Chrestiens eurent repris Toledé, l'Archeuesque de la ville redemanda ceste dignité, & celuy de Braca la luy debatit, voulant retirer vne chose qu'il auoit acquise: celle, ment que l'on tient que leur debat n'est pas encor terminé.

Si on desire sçauoir les Euesques qui ont esté en Espagne depuis le temps des Romains & des Goths, que l'on voye la Chronique de Vasee, où l'on pourra contenter sa curiosité. Apres que les Espagnols eurent recouuert leur pais des mains des Barbares, les Eueschez furent remises avec les villes qui leur estoient anciennement subiectes, & mesme on en a faiët de nouveau quelques-vns. Voicy les Archeueschez & Eueschez qui y sont,

L'Archeuesché de Tarragone, qui vaut huit mille ducats toutes les années.
Les Eueschez mises cy dessous sont sous ceste Archeuesché.

Barcelonne, qui vaut 5000. ducats de rente,

Girone, qui en vaut 4000.

Vicq, qui en vaut 25000.

Ilerde, qui en vaut 5000.

Vrgel, qui en vaut 7000.

Dertose, qui en vaut 8000,

L'Archeuesché de Sarragosse vaut vingt mille ducats de rente: elle a ces Eueschez.

Hiues, qui en vaut 3000.

Tirasce, qui en vaut 5000.

Pampelune, qui en vaut 6000.

Calathere, qui en vaut 12000.

Segouie, qui en vaut 3000.

Entre les principaux d'Espagne, & qui ont plus d'autorité apres le Roy, on peut mettre à bon droit l'Archeuesque de Toledé, comme Primat d'Espagne, & chancelier de Castille, ayant plus de vingt mille ducats de reuenue.

Il a sous luy les Eueschez de

Moruedre, qui vaut vingt mille ducats de rente,

Vuiede, qui en vaut six mille.

Burgos, qui en vaut deux mille.

Plaisance, qui en vaut quinze mille.

Luence, qui en vaut seize mille;

Curie, qui en vaut 8090.

Cordouë, qui en vaut deux mille.

Cet Archeuesque est Seigneur temporel de dix-sept lieux clos de murailles.

L'Archeuesché de saint Iacques de Compostelle, qui vaut 20000. ducats, a sous elle les Eueschez

d'Auile, qui vaut 8000. ducats.

Palence, qui en vaut 15000.

Salamanque, qui en vaut 1000.

Ebore, qui en vaut 20000.

Corie, qui en vaut 8000.

L'Archeuesché de Lisbonne, qui vaut seize mille ducats de rente, a sous sa jurisdiction ces Dioceses.

Leon, qui vaut 8000.

Vbede, qui vaut 6000.

Zamore, qui en vaut 12000.

Diuidat, qui en vaut 4000.

Lerie, qui en vaut 8500.

Badajos, qui en vaut 6000.

L'Archeuesché de Braca, qui vaut de reuenue 12000. ducats, a sous elle les Eueschez quis'ensuiuent.

Q iij

Coymbre, qui vaut 12000. ducats de rente.

Lamece qui en vaut 6000.

Vise, qui en vaut 8000.

Almore, qui en vaut 3000.

L'Archeuesché de Seuille, qui vaut 11000. ducats de rente, & ces Eueschez.

Iaën, qui vaut 15000.

Calix, qui en vaut 8500.

Cartagene, qui en vaut 5000.

Sylue, qui en vaut 6000.

Les Archeuesques de Valence, & de Grenade, n'ont aucune Euesché soubseux, & jouissent du droit de manteau. Celuy de Valence a 13000. ducats de rente, & celuy de Grenade 1000.

Il y a encores des Eueschez qui ressortent sans aucun moyen en Cour de Rome, telles que sont les suivantes.

Malaga, qui en vaut 1000.

Orense, qui en vaut 3000.

Guadix, qui en vaut 1000.

Pace, qui en vaut 4000.

Almerque, qui en vaut 15000.

Cunarie, qui en vaut 8000.

Mais si quelqu'un desire sçavoir plus exactement combien toutes les Archeueschez, Eueschez & Abbayes, & tous les Prieurez ont de reuenu, qu'il lise ce qu'en a escrit Damiã de Gôës Portugais.

Je remarqueray seulement icy qu'il y a à Burgos vn Conuent de Religieuses que l'on nomme les Vuelques, qui sont iusques au nombre de cent cinquante toutes nobles: leur Abbessse est Dame de vingt-quatre places, & de cinquante villages, & a la collation de plusieurs benefices, & de douze Commanderies.

GENEALOGIE DES ROYS D'ESPAGNE.

DV temps d'Attila l'Espagne fut diuisee en douze Royaumes, puis elle fut reduite à cinq, à sçavoir Castille, Aragon, Nauarre, Portugal, & Betique, ou Grenade. Les Mores ont tenu leur siege à Grenade iusques à nostre temps. Quant aux Roys de Castille il y a beaucoup de centaines d'annees qu'ils ont receu la foy Chrestienne: car quand les Gots furent rejettez de l'Italie, apres l'auoir fort endommagée soubz Alaric & Ataulphe, ils s'en firent en Espagne avec leur Roy, qui s'appelloit Sigeric.

La succession des Roys Gots en tout le Royaume d'Espagne.

Segeric, ou Sigeric.

Vallias, & selon les autres Valia.

Theodoric, & selon les autres Rodoric, qui fut fait Roy 491.

Thorismond, qui eut pour ses freres Theodoric, & Henry.

Alaric fils de Henry. Cestuy-cy fit premierement sa demeure à Thoulouse, mais il fut chassé en Espagne par Clouis Roy de France.

Tendis fils d'Alaric qui fut tué

Tendosil, & selon les autres Theodegosil. Cestuy-cy fut tué, pource qu'il s'efforçoit de jouyr des honnestes femmes.

Aglia qui mourut en guerre.

Atanagild, qui fut tué aupres de Toled.

Lenogild qui auoit Luide son frere pour compagnon. Cestuy fut Arrien, aussi bien que tous ses predecesseurs, assujettit Sicile au Royaume de Castille. Il persecuta aussi son fils Hermogid, & le tua l'an 572. pource qu'il estoit vray Chrestien.

Rechared fils de Lenogild fut bon Catholique, & fut conuertty par saint Leandre.

Luibe, & Viterie.

Gundamir.

Sesibut, dont la domination s'estendoit par toute l'Espagne.

Richared second de ce nom.

Suitille, qui auoit esté grand Capitaine de Sisebut.

Sisenand, deuant lequel quelques-uns mettent Racimir.

Suitille II.

Tulque.

Vinde, que les autres appellent Videsuind.

Recensuind, bon, & saint Roy.

Bambe, qui deffit vn grand nombre de Mores qui trauersoient l'Espagne.

Henring, qui eut Egic son gendre pour compagnon.

Vitize,

Vitize, qui creua les yeux à Theodebert fils de Reiscensind, à qui le Royaume escheoit ainsi qu'il estoit encores enfant: cestuy-cy estant aueuglé, se maria & engendra Roderic, qui estant fait Roy vengea sur Vitize, & ses enfans, l'iniure faicte à son pere.

Roderic, en qui la lignee des Roys Gots prit fin en ceste sorte. Il y eust vn Comte nommé Iulien, que le Roy Roderic auoit fait Preuost en Tugitane de Mauritanie. Les autres escriuent qu'il y fut enuoyé en Ambassade, ce qui est bien plus vray semblable, cependant que le Comte estoit absent, Roderic jouyt avec violence de sa fille: pere entendant ceste force faicte à sa fille, pensa promptement à s'en venger, ayant mesme la commodité du lieu qui luy en offroit le moyen: veu qu'il sollicita les Mores de venir en Espagne, où ils entrerent par le destroit de Gibraltar l'an 714. sous la conduite de Muce, enuoyé par le Roy Miramolin, & se rendirent presque maistres de toute l'Espagne en l'espace de deux ans: on dit que durant ce temps il mourut enuiron 70000. hommes, tant d'un costé que de l'autre. Les Chrestiens qui restoit de l'armee desconfite se retirerent aux Asturies, & en Galice, avec leur Prince Pelage, ou Pelaye, qui fut oncle paternel de Roderic, & qui prit sur les Africains la ville de Leon, où il regna l'espace de vingt ans. Et alors les Roys cessèrent de se nommer Gots, ou Ostrogots, & porterēt le titre de Roys d'Espagne ou de Castille. Les autres l'escriuent encore ainsi: Pelage oncle du Roy Roderic, qui pour euitier la colere de Vitizze s'en estoit fuy, parce qu'il auoit fait creuer les yeux à son frere Theodebert, se retira en lieu solitaire, où il vesquit en Religieux, iusques à ce qu'estant tout triste & desolé de voir les grâds & cruels massacres que faisoient les Mores par toute l'Espagne, il se joignit à quelques Chrestiens qui auoient ja pris la fuitte & s'en alla au pais des Astures, où apres auoir faict vne grande leuee de gens, il fit la guerre contre les Mores, gaigna par force la ville de Leon, & y regna vingt ans, pendant lesquels il eut loisir d'empieter, mais bien peu sur les terres des Mores lesquels s'estant cachés bien auant dans les montaignes, Pelaye combattit vaillamment contr'eux: Et parce qu'ils estoient en grand nombre, il fut forcé de s'enfermer dans des grottes avec ses gens. Et bien qu'on leur donna sus avec vne grande furie, ils prirent neantmoins courage, & Pelaye voyant qu'il ne pouuoit s'eschapper se mit en priere implorant la faueur de Dieu. Il fut exaucé de telle sorte que les fleches & cailloux, qui estoient tirez contre la grotte, retournoient droit aux Mores, & les tuoient en grand nombre. De plus s'apperceuant de l'émotion, & tumulte que les Mores faisoient par dehors, ils sortirent, & les talonnans de pres leur firent prendre la fuite, en mettant à mort vn grand nombre. D'où s'ensuiuit que les Chrestiens prirent halene, & voyant que Dieu combattoit pour eux, ils poursuiuirent leur bonne fortune, commencerent à gagner beaucoup de pais sur les Mores, & demanderent secours à l'Empereur Charlemagne, qui fit de grands rauages aux Mores, & empieta beaucoup sur leur terroir, bien qu'il ne peut gagner le tout: ce qui aduint en l'an 751. sous le Pontificat d'Estienne III. lequel se retira en France, pour la peur qu'il auoit d'Astulphe Roy des Romains.

Ce Pelaye laissa pour successeur son fils Fasila, lequel estant à la chasse, fut mis en pieces par vn Ours: & ainsi mourut par vn accident fortuit.

Alfonce neveu de Fasila, surnommé le Catholique, qui mit fin à la secte des Arriens, & eleua la Chrestienté à son plus haut grade. Il viuoit au temps de Chilperic & Pepin Roys de France.

Froila fut fils d'Alfonce: & luy succeda l'an 761. quelques vns l'ont nommé Friola. Il deffit les infideles, qui faisoient de grands degasts en la Galice, & mit à mort avec son armee plus de cinquante mil hommes. Il mourut de la main de son frere Aurelius, qui s'eleua par ce moyen au Royaume, & regna six ans.

Aurelius frere de Froila qu'il occit regna six ans.

Silo fut gendre d'Alfonce, fit paix avec les Mores, & pacifia les émotions de Galice.

Curegatus fils naturel d'Alfonce fut eleué au Royaume par l'ayde que les Mores luy donnerent: pour recompense de laquelle il leur enuoyoit chaque annee vn certain nombre de jeunes Vierges pour vne espeece de tribut, & pour satisfaire à l'accord qu'il auoit fait avec eux. Cestuy-cy se forligna fort durant sa vie des bonnes mœurs de ses deuanciers.

Germond Veremond cousin d'Alfonce estoit diacre, lors qu'il fut esleu Roy, & depuis il quitta le Royaume, & se mit dans vn Cloistre.

Alfonce second fils d'Alfonce premier, & frere aîné de Gimut Veremond fut vn Roy fort religieux, & si chaste qu'il ne voulut jamais toucher à sa femme. Les infidelles s'estant resolus de le destruire, & ruiner, il leur alla donner contre, en occit vn grand nombre, & gaigna plusieurs belles despoüilles, avec lesquelles il fonda les Citez qu'il nomma Asturie, & Duete.

Dom Ramire fils de Germond Veremond deffit les Normands lesquels avec vne grande

armee s'estoient mis sur mer pour s'en aller saccager la Galice. Il gaigna vne bataille contre les Mores, par l'ayde de l'Apostre Sainct Iacques qui s'apparut à luy.

Ordognio fils de Dom Ramire laissa cinq enfans, regna dix ans, gaigna Toledé, & mourut l'an 883.

Dom Alfonce III. fut esleu Roy en l'an 883. & honoré du sur-nom de grand: Aussi eut il plusieurs guerres contre les infidelles, & gaigna sur eux deux grandes Citez en Portugal, l'une desquelles se nommoit Corimbre, l'autre Vizée. Ce fut luy qui fit creuer les yeux à quatre freres qui auoient conspiré contre luy. Les vns tiennent qu'il fit bastir l'Eglise de Sainct Iacques en Compostelle, les autres disent que ce fut l'Empereur Charlemagne, & ceste opinion est la plus certaine, selon la verité de l'Histoire. Cet Alfonce regna quarante ans.

Dom Giliaz fils de Dom Alfonce III. eut de grandes guerres en son temps, fit son prisonnier le Roy Aiola More, & regna 3. ans.

Dom Ordognio fit bastir l'Eglise Cathédrale de León avec vne grande magnificence, & fonda des riches rentes en icelles: Mais il fut infortuné en la guerre, & les Mores luy tuerent plusieurs de ses gens en bataille, où moururent encores quelques Euesques. Il y auoit quatre Comtes en Castille qui n'auoient pas voulu marcher en ceste guerre, lesquels il enuoya querir sous promesse de ne leur faire aucun tort, mais il leur failla la foy, & les fit mettre à mort. Ce qui fut cause que les Castillans se souleuerent contre luy, & esleuerent entre eux des Iuges, pour gouuerner leurs Republiques, & leurs Estats. De ceux-cy descendirent depuis les Roys de Castille.

Froila second frere d'Ordognio, practiqua de grandes cruantez, fit mourir plusieurs valeureux Gentils-hommes, & deuint lepreux à la fin, laissant quatre enfans. Il ne regna qu'un an.

Alfonce IV. s'alla rendre dans vn Cloistre apres auoir remis le Royaume à son frere Dom Ramire: Mais depuis comme il se repentoit d'auoir fait ceste faute, & pretendoit de retourner au Royaume, son frere Ramire le prit, & luy fit creuer les yeux.

Dom Sancho premier de ce nom, fut frere de Dom Ramire. Ce Roy fut si engourdy qu'il ne pouuoit se tenir sur ses pieds. Il esprouua de grands remedes pour en faire aller ceste graisse qui le rendoit ainsi pesant, mais il ne treuua jamais personne, qui le peut guerir. Il y auoit pour lors vn Roy More à Cordouë nommé Abdemar, personnage doué d'une grande sagesse, & lequel auoit plusieurs bons Medecins à sa Cour: Dom Sanche le recognoissant fit paix avec luy, sous esperance qu'il luy donneroit quelque remede, & s'affiant là dessus, il prit vn certain breuuage qui luy causa de grandes douleurs, d'où s'ensuiuit sa mort. Du temps qu'il fut hors du Royaume Dom Ordognio fils de cet Alfonce qui eut les yeux creués comme nous auons dict, vsurpa la couronne Royale sur luy: mais à son retour Dom Sancho la regaigna par l'ayde des Mores qu'il eut d'Abdemar, & mourut en l'an 918. & l'onzième de son regne.

Dom Ramire III. fut fils de Dom Sancho. Durant le regne de ce Roy les Mores rompirent la paix qu'ils auoient faicte avec son pere, mirent le pied dans son Royaume, & y firent de grands degasts. Ce qui fut cause que ceux de Galice deuisans ce Roy pour sa jeunesse, proclamerent à S. Iacques, Bermut II. lequel estoit fils de Gordin & cousin d'Alfonce III. Du temps de ce Bermut, il y eut vne grande guerre entre luy, & le Roy Almanzor: tellement que Bermut prit la fuite au mont des Astures, & Almanzor campa deuant la ville de Leon, laquelle il prit d'assaut, y fit d'estranges degasts, depuis s'enfuit en Galice, où il abbatit l'Eglise de Sainct Iacques. Ce Roy Dom Bermut & Dom Garzia Comte de Castille, s'estant joints par ensemble ils firent de grands rauages aux Mores avec leur armee.

Alfonce V. fils de Bermut donna sa sœur en mariage à Audala Roy de Toledé, More de nation, afin qu'il en tirast du secours contre le Roy de Cordouë. Mais ceste jeune Princesse, comme Chrestienne qu'elle estoit, craignant d'offenser Dieu n'accepta ce Mariage qu'à contre-cœur, & ne voulut point auoir compagnie avec le More, bien qu'il l'en sollicita, & par prieres, & par menaces. Peu de temps apres le More mourut, elle se voyant libre s'enferma dans vn monastere. Cet Alfonce mourut d'un coup de fiesche deuant la cité de Vizée en Portugal.

Bermut III. fils d'Alfonce, mourut ieune, & sans enfans apres auoir regné quatre ans.

Sancha Sœur de Bermut luy succeda au Royaume avec Dom Fernand premier son mary, qui estoit Comte de Castille. Ce fut le premier qui ioignit ensemble les deux Royaumes de Castille & de Leon, & ce en l'année 1018. Jusques alors la Castille auoit eu des Comtes pour Gouverneurs. Depuis il se nomma Roy de Castille, & de Leon. Il se fit aussi

Roy de Nauarre, parce qu'il osta le Royaume à son frere Dom Garfia. Se voyant si puissant & si fort il fit en sorte qu'il recouura Coimbre, & vne bonne partie du Portugal. Il mourut sur les quarante ans de son regne. Quant au Royaume de Nauarre, il y en a qui sont d'autre opinion : Mais i'en parle selon ce que i'en ay leu. Du temps que les Mores faisoient chaque iour d'estranges degasts en Espagne, les Nauarrois esleurent pour leur Roy vn certain Enecus homme valeureux, qui tenoit auparauant la Comté de Bigorre joincte aux monts Pyrenees. Cestuy-cy gaigna de grandes victoires contre les Mores.

Dom Garfia fils d'Enecus fut depuis esleu Roy. Ceux-cy luy succederent l'vn apres l'autre.

Dom Sancho Abarca.

Garfia.

Dom Sancho Abarca ainsi nommé, pour auoir esté nourry en vn hameau, comme ie le monstre en ce liure.

Dom Garfia.

Don Sancho de Castille.

Dom Fernand fils de Sancho, lequel prit la ville de Valence par l'ayde de Dom Roderic de Viruar, dit Cid Ruidias Ganpeador, en l'an 1030. Dom Sancho, & Dom Alfonse son frere qui fut par luy chassé de la ville, & se voyant repoussé de la sorte s'alla refugier deuers le Roy More de Toledé, où il fut quelque temps. On le souloit nommer le Roy à la main percée, parce qu'ayant des grandes amitez avec les Mores, il aduint qu'vn iour estant à l'Alcassar de Toledé en la sale où ils tenoient leur Conseil, & iceux s'apperceuant qu'il reposoit sur vn banc, pour connoistres'il dormoit, ils se mirent à dire à haute voix, qu'on apportast du plomb fondu pour luy en percer la main. Bien que Dom Alfonse ouyt assés ces paroles, il n'en monstra neantmoins point de semblant, ains fit l'endormy, & souffrit qu'on luy perçast la main avec du plomb fondu s'éueillant tout à coup en sursaut. Par où les Mores se firent accroire qu'il dormoit. Le iour d'apres il fit des articles de paix avec le Roy de Toledé, & ce nonobstant il ne laissa pas de luy rompre le serment de fidelité, car il emporta ceste ville sur les Mores. Or pour reuenir à l'histoire de son frere Dom Sancho, ie dis qu'il mourut pres de la ville de Zamora, deuant laquelle il mit le siege, pretendan de la prendre pour sa seur Vrraca. Mais il aduint qu'vn traistre de ceux de la ville nommé Velgide d'Olfos s'en alla treuuer le Roy, & luy dict, que s'il auoit desir de prendre Zamora, qu'il le suiuit secrettement, & qu'il luy mōstereroit vne porte par où il pourroit entrer sain & sauue. D'abord le Roy adjoustant foy à ses paroles s'en alla iusques à la ville avec ce traistre, & apres auoir reconnu la porte, comme il luy prit volonté d'aller aux necessaires, il s'escarta tant soit peu : Dequoy s'apperceuant Velgide, il le trauersa d'vn jaucelot, le laissant mort sur la place, & prit la fuite en la ville. Telle fut la fin infortunée de ce Roy. Ce Dom Alfonse laissa vne fille nommée Vrraca qui se maria avec le Comte de Barcelonne nommé Raymond, ils eurent vn fils qui porta lenom d'Alfonse VII. lequel succeda depuis au Royaume de son pere grand. Cet Alfonse VII. eut les enfans suiuant.

Henry premier de ce nom Roy de Castille.

Sancho Roy de Castille.

Alfonse VIII. fils de Sancho.

Dom Fernand Roy de Leon.

Alfonse IX.

Dame Beatrix mariee avec Louys Roy de France.

Ce Dom Alfonse fut estimé le plus puissant de tous les Roys ses deuanciers, & pour cestecause nommé Empereur d'Espagne, parce qu'il gaigna Cordouë, Parmenie, & Bayonne, & plusieurs autres citez & Royaumes, selon que l'Histoire en faict foy, & mourut du temps que Federic I. fut Empereur.

Dom Sancho III. Roy de Castille qui se maria avec Dame Blanche, fille de Dom Garfia Roy de Nauarre, & eut d'elle Dom Alfonse VIII. qui prit à femme la fille du Roy d'Angleterre, & en eut plusieurs enfans masles, & filles.

Dame Blanche mere de S. Louys Roy de France.

Dame Beringuela femme du Roy Dom Alfonse de Leon.

Dame Vrraca femme du Roy de Portugal.

Dame Leonor femme du Roy d'Aragon.

Ce Dom Alfonse VIII. fit vn grand degast des Mores, & en tailla en pieces plus de deux cens mille : il mourut en l'an 1160.

Dom Alfonse IX. fils de Dom Fernand Roy de Leon succeda au Roy Dom Alfonse VIII. & eut Dom Fernand III. de ce nom.

Dom Henry fils de Dom Alfonse VIII. regna bien peu de temps, sçavoir enuiron deux ans, & mourut se jouant avec d'autres enfans.

Dom Fernand III. fils de Dom Alfonse VIII. fut fait Roy de Castille, & de Leon. Il gaigna de grandes victoires contre les Mores, s'assuiettit toute l'Espagne, & en chassa ces Barbares iusques à la Betique, à present nommee Grenade, & les fit les tributaires. Duregne de ce Roy qui fut en l'an 1252. Dom Iayme Roy d'Aragon conquesta les Isles Baleares qui sont Majorque & Minorque, & leur fit embrasser la Foy Catholique par l'ayde de ce Roy Dom Fernand.

Dom Alfonse X. fils de Dom Fernand III. se maria avec Dame Violente fille de Dom Jacques Roy d'Aragon, laquelle il cherit grandement : Mais à cause qu'il n'en pouuoit auoir d'enfans, pensant de rompre ce mariage, il fit venir la fille du Roy de Dannemarc, nommee Christine, laquelle estoit doüee d'une singuliere beauté. Sur ces entrefaites, comme il estoit à Seuille, on s'apperceut que la Roync estoit enceinte : Dequoy le Roy tout hon-teux, il se mit à considerer comme il se deuoit gouuerner en vn fait si estrange. Il aduint cependant que Dom Philippe, frere du Roy, & Abbé de Vaulolida, estant esleu Archeuesque de Seuille, se démit de ceste dignité, & se presenta au Roy pour se marier avec Christine : lequel en fut fort content, & leur donna de grands moyens à tous deux. Depuis ce Roy eut plusieurs enfans, sçavoir Dame Beringuela, Dom Fernand, Dom Sancho, Dom Iean, Dame Leonor, & Beatrix, laquelle se maria avec le Roy de Portugal, qui eut pour son dou-aire le Royaume d'Algarue. Et ce fut la cause pourquoy les Roys de Portugal possederent tousiours depuis ce Royaume. Ce Dom Alfonse fut vn Prince fort sage, & qui composa plusieurs liures, & entr'autres l'Histoire du Monde, & vn liure intitulé Du Mouuement du Ciel, & des Estoiles, ou autrement le Tableau d'Alphonse. Il fut créé Roy des Romains par quelques Electeurs, contre Richard Roy d'Angleterre, & les Euesques de Spire, & de Constance, ensemble l'Abbé de S. Gal, furent enuoyez à Burgos, pour luy presenter ladite Election. Mais d'abord qu'il ouyt la discorde aduenüe entre les Princes, il quitta son droict à Richard. Peu apres cet Alfonse laissant son Royaume à Dom Sancho son fils, il fut fait Empereur : & comme on le prioit de quitter son droict à Rodolphe d'Ausbourg, qui n'agueres auoit esté esleu Roy des Romains, il s'en démit tref-volontiers, reprit le chemin d'Espagne, & peu apres mourut de regret à Seuille sans Empire, & Royaume d'Espagne, parce que son fils ne luy voulut pas ceder la place du Royaume qu'il luy auoit ja donné. Ce Dom Alfonse X. eut les enfans suiuan.

Dom Sancho III.

Dom Ioan.

Dom Diego.

Dom Pedro.

Dame Barenguela.

Dame Beatrix.

A ce Dom Alfonse succeda Dom Sancho IV. Il fut fortuné aux guerres qu'il eut contre les Mores, prit d'assaut la ville de Tanfa & gaigna vne grande victoire contre Mahomet Roy de Fez en Afrique, estant avec son armee sur mer tout contre ledit Royaume. C'estoit vn Prince fort cruel, puis que mesmes il ne voulut pas receuoir son propre pere à son retour d'Alemagne, & qu'il commanda d'occire quatre mille valeureux Gentils hommes pres de Passerole : parce qu'en vne rebellion qui s'estoit esmeuë, ils auoient nommé Alfonse fils de son frere du nom de Roy.

Dom Fernand III. de ce nom Roy de Castille & de Leon, eut de la fille du Roy de Portugal nommée Constance, Alfonse XI. & Dame Leonor, qui se maria avec Dom Alfonse Roy d'Aragon. Ce Roy gaigna Gibraltar en l'an 1472.

Alfonse XI. Roy de Castille eut Dom Pierre, Dom Alfonse, Dom Sello, Dom Sancho, & Dom Henry second, duquel nasquit Iean premier, & Leonor Roync de Navarre.

Dom Pedro fut esleu Roy apres la mort de son pere. Ce fut vn homme de meschante vie, & qui fit mourir sans cause sa mere, plusieurs de ses parens, & autres excellens personnages. Et comme il pensoit d'en faire autant de son frere Dom Henry, iceluy se refugia deuers le Roy d'Aragon, luy demanda secours, & l'ayant receu, il resserra son frere dans Toledo, le fit son prisonnier, & le poignarda. Voila de quelle façon les plus grands du Royaume esleuerent Henry à la Couronne en l'an 1372.

Henry II. de ce nom fut fils d'Alfonse XI.

Iean premier de ce nom succeda à la Couronne à Henry. Il prit à femme Dame Leonor fille de Dom Pedro Roy d'Aragon, & eut deux grandes, & penibles guerres, l'une contre

ceux de Portugal, à cause que pour la mort de Dom Ferdinand son beau pere, il vouloit succeder du costé de sa mere, & iceux auoient voulu faire Roy vn certain Cauallier bastard, nommé Dom Iean, yssu de sang Royal : à cause dequoy on s'opposoit à luy. L'autre guerre fut contre les Anglois qui s'efforçoient de le chasser hors des Royaumes de Castille, & de Leon, parce que le fils du Roy d'Angleterre, qui s'estoit marié avec la fille de Dom Pedro Roy d'Aragon, demandoit les Royaumes de Castille, & de Leon, allegant pour raison qu'ils luy appartenoient & luy deuoient eschoir du costé de sa femme. Mais ceste guerre fut à la parfin appaisée par le moyend'un certain mariage. Il ne sera pas hors de propos de mettre icy toute la Genealogie de Iean I. iusques à ceux qui sont encores pour le iourd'huy.

Dom Iean Roy de Castille, & sa femme Leonor fille du Roy d'Aragon eurent deux fils, sçauoir,

Henry Roy de Castille, & de Leon, & Dom Fernand Roy d'Aragon.

Cet Henry eut encores deux fils, qui furent, Iean Roy de Castille, & Marie Royne d'Aragon.

De ce Iean furent procréés Dame Elizabeth, Henry Roy de Castille, lequel eut vne fille nommée Elizabeth.

Venons maintenant au second fils, qui fut Dom Fernand Roy d'Aragon.

Celuy-cy eut quatre fils : sçauoir,

Dom Alfonse Roy d'Aragon, & de Sicile,

Iean qui succeda depuis à son frere.

Marie Royne de Castille.

Iean Royne de Portugal.

De Iean qui succeda à son frere à la Couronne sortit Dom Fernand Roy de Castille, & de Dom Ferdinand Madame Ieanne, & Dom Iean, qui se maria avec Madame Marguerite fille de Maximilian, Madame Ieanne qui fut mariée avec Dom Philippes Archiduc d'Autriche, & Catherine Royne d'Angleterre.

De ceste Ieanne sont yssus

Dom Charles Empereur.

Dom Ferdinand Archiduc d'Autriche.

Dame Leonor femme de Dom Emanuel Roy de Portugal.

Marie Royne d'Hongrie.

Madame Elizabeth Royne de Dannemarch, & Catherine, femme de Iean Roy de Portugal.

L'Empereur Charles le Quint eut vn fils nommé Dom Philippes d'Autriche, Roy d'Espagne second de ce nom.

Que s'il est question de passer outre en ceste Genalogie, ie dis que Henry III. de ce nom, succeda à son pere en l'an 1290. & que son frere Dom Ferdinand fut esleué au Royaume d'Aragon, Dom Martin Roy d'Aragon étant mort sans heritiers, & sa mere ayant esté femme de Dom Pedro Roy d'Aragon. Cet Henry donna sa fille en mariage à Dom Alfonse fils de son frere : Icelle gouerna le Royaume d'Aragon, par l'espace de vingt-cinq ans, en l'absence de son mary, qui s'estoit ietté dans l'Italie, à cause des guerres de Sicile.

Dom Iean II. de ce nom fut proclamé Roy de Castille apres la mort de son pere. De sa femme Marie fille de Dom Ferdinand luy nasquit Henry III. Il trauailla grandement son oncle, à cause du Royaume d'Aragon : Mais tous ses efforts ne luy profiterent de rien. A la priere d'un Iacobin, il chassa tous les Iuifs de son Royaume, & fit reseruer leurs biens en Espagne. Ce qui fut cause que plusieurs d'entr'eux, de peur qu'ils auoient de faire perte de leurs moyens, se firent baptizer, bien que (comme perfides qu'ils estoient) cela ne les empescha pas de faire leurs synagogues, & assemblees secretes.

Henry III. succeda à son pere en l'an 1454. Il gaigna quelques citez sur les Mores : & depuis conquesta à force d'armes le Royaume de Nauarre, par le decez de Dom Charles fils du Roy d'Aragon : Cestuy-cy n'eut point d'enfans, comme impuissant qu'il estoit à la generation, bien qu'il affirmast, d'un certaine fille naturelle qu'elle estoit à luy. Les principaux Seigneurs du Royaume le deffendirent, & prirent Madame Elizabeth seur du Roy Henry III. laquelle ils marierent avec Dom Fernand V. de ce nom, fils de Dom Iean d'Aragon, qui estoit Prince du sang, & lequel succeda depuis au Royaume d'Espagne. Quant à la fille naturelle dont ie viens de parler, elle fut deboutée.

Dom Ferdinand V. Prince Catholique, succeda à la Couronne en l'an 1450. Il gaigna plusieurs grandes victoires, & acheua de chasser bien loing d'Espagne tous les Mores, les derniers desquels furent ceux du Royaume de Grenade, qui l'auoient tenu par l'espace de 700. ans. Les Royaumes de Naples & de Sicile luy escheurent, & n'eust qu'un seul fils, qui

fut marié avec Madame Marguerite d'Autriche. Mais sa mort preceda celle de son pere, sâs laisser aucun heritier qui luy succedat au Royaume. Ce qui fut cause qu'il prit pour fils adoptif, Dom Philippes Archiduc d'Autriche, qui fut donné en mariage à Jeanne sa fille, d'où sortirent l'Empereur Charles le Quint, & le Roy Dom Fernand.

De cet Empereur magnanime, est yllu Dom Philippe d'Autriche II. de ce nom, lequel prit possession du Royaume en l'annee 1555. & le tint iusques à l'an 1598. De son temps fut gaignee ceste fameuse bataille nauale, de Lepante qui raua la l'orgueil du grand Turc. Il joignit à sa couronne le Royaume de Portugal en l'an 1580. & fit plusieurs autres exploits dignes de memoire. Il eut quatre femmes. La premiere desquelles fut fille du Roy de Portugal, de laquelle nasquit le Prince Dom Charles. La seconde Marie d'Angleterre. La troisieme Elizabeth fille d'Henry II. de ce nom, Roy de France, de laquelle nasquit l'Infante d'Espagne Madame Elizabeth, Clara Eugenia, femme de l'Archiduc Albert, lequel à cet effect posa l'habit de Cardinal. La quatrieme fut Anne, fille de l'Empereur Maximilian II. & Mere de Philippes III. Il posseda ses Royaumes 43. ans, & les augmenta, mourut finalement l'an 70. de son aage le 13. iour de Septembre 1598.

A ce Prince a succedé Dom Philippes III. Il prit à femme Madame Marguerite fille de l'Archiduc d'Autriche en l'an 1598. & en eut vne fille au mois de Septembre 1601. appelée Anne Marie Mauricette. Et en l'annee 1605. nasquit le Prince d'Espagne, qui fut nommé Philippe Dominique Victor, vray heritier des Royaumes d'Espagne, & aujourd'huy regnant sous le nom de Philippes IIII. Il a espousé Madame Elizabeth de France, fille aînée de feu Henry le Grand Roy de France & de Nauarre.

Il a encore deux freres viuans, le Prince Dom Charles & le Cardinal Infant, & vne sœur l'Infante Marie.

RENTES ET REVENUS ANNUELS DES Estats d'Espagne reuenans au Roy.

IL faut remarquer que le troisieme des Gabelles, & autres rentes, qu'a le Roy d'Espagne en toutes ses cités, villes, & autres lieux, tous les partis y compris sont icy declarées, chacune en particulier. Pour plus facile intelligence de ce que ie dis, il faut sçauoir, que ce que l'Espagnol nomme Alcauala, signifie le dixiesme qui se paye au Roy de quelque marchandise que ce soit qui se vend, soit qu'elle consiste en maisons ou heritages. Or ce droit se doit payer au Roy deuant qu'on possède le titre de Seigneur, ou de Cheualier, & ainsi des autres. De maniere que plusieurs des villes susdites, ont accoustumé de s'accorder avec le Roy, & cet accord nommé Encabeçamiento, chacune d'icelles faisant ses departemens par le lieu de sa iurisdiction, afin de payer ce qui est de sa part. Et parce qu'en plusieurs endroits des Seigneuries le Roy vend ou donne liberalement lesdites Alcaualas, le troisieme demeure tousiours à sa Majesté. l'en traicteray doncques par le menu selon chascun paye, comme il s'en suit.

Les Salines qu'a le Roy au Royaume d'Espagne se rentent chaque annee en maravedis nonante trois millions, & chaque compte vaut vn million. Et en escus de douze reales chacun deux cens vingt sept mil neuf cens quarante vn escu dix sols & sept deniers.

Les dixmes de la mer des marchandises, qui passent par la Castille venant de Biscaye, & de la Prouince de Guipuzcoa, valent en maravedis par an septante millions. En escus cent septante vn mil cinq cens soixante, & huit escus dix-sept sols six deniers.

Les dixmes de la mer qui passent par le Royaume de Leon, valent chaque annee en maravedis vn million, & en escus deux mil quatre cens cinquante escus, & cinquante neuf sols.

Les dixmes de la mer de la principauté des Asturies, valent chaque annee en maravedis trois cens septante & huit millions: & en escus neuf cens vingt & six mil quatre cens & septante escus trente cinq sols & sept deniers.

La rente de la Preuosté de la ville de Bilbao, qui est des marchandises qui viennent par mer, valent quatre cens & nonante millions, & en escus douze cens mil neuf cens huitante escus, vingt-trois sols quatre deniers.

La cité de Burgos, & sa terre, payent de rentes, troisieme, & Alcaualas, chaque annee en maravedis, dix-sept millions, qui font en escus, quarante vn mil six cens trente trois escus, vingt sols.

La, c'est à dire lieu de iurisdiction, Merindad de Burgos, qu'on nomme le bureau, paye chaque annee en maravedis deux millions, soixante & six mil maravedis, qui font en escus cinq mil soixante & trois escus quarante cinq sols & demy.

Le

Le mont d'Oca paye chaque année trente quatre mil maravedis, qui sont en escus huitante trois escus, vingt sols.

La Merindad, qu'on nomme de la Rioja, paye en maravedis, trois millions, qui valent en escus sept mil trois cens cinquante deux escus cinquante & six sols.

La Merindad d'Ebro, paye deux millions de maravedis, qui valent en escus quatre mil neuf cens & vn escu cinquante cinq sols.

La Merindad del'autre costé d'Ebro, vaut vn million quatre cens & deux mille maravedis, qui valent en escus, trois mil quatre cens trente cinq escus cinquante sols.

La cité de Victoria, paye tous les ans deux cens soixante neuf mil maravedis, qui valent en escus, six cens cinquante neuf escus dix-sept sols & demy.

La Prouince de Guipuzcoa, paye vn million cent & huitante vn mil maravedis, qui sont en escus, deux mil huit cens nonante quatre escus quatre sols & six deniers.

Les mines de fer qui sont en ladite Prouince, payent cent cinquante mil maravedis, qui valent en escus, trois cens soixante sept escus trente huit sols.

Les sept Merindades de Castille la vieille, neuf cens quarante & deux mille maravedis, qui sont en escus deux mil trois cens huit escus, quarante neuf sols & demy.

La valle de Mena paye par an, deux cens vingt huit mil maravedis, qui sont en escus, cinq cens cinquante huit escus quarante neuf sols & demy.

La Prouince de la cité de Logroño paye sept millions, & sept cens quarante six mil maravedis, qui valent en escus, dix-sept cens cinquante six escus cinquante deux sols.

La ville de lanquas & sa terre paye cinq cens quarante vn mil maravedis, qui sont en escus mille trois cens vingt-cinq escus, cinquante sept sols & demy.

La cité de Sainct Dominique de la Calçada, quatre millions, huit cens & douze mil maravedis, qui valent en escus, neuf mil huit cens trois escus cinquante cinq s. 4. den.

La Merindad de la ville de Diego, paye vn million, & cinq cens quarante cinq mille maravedis, qui sont en escus mil trois cens trente cinq escus quarante sept sols.

La Merindad de Can de Mugno, paye quatre millions six cens & douze mil maravedis, qui valent en escus, dix mil neuf cens & trois escus cinquante six sols.

Le Merindad de Castro Xeris, paye huit millions quatre cens huitante cinq mil maravedis, qui sont en escus, dix-neuf mil neuf cens & nonante quatre escus quarante 4. sol.

Le Merindad de Ceriato, paye vn million neuf cens soixante & huit mille maravedis, qui sont en escus, quatre mil huit cens & vingt-quatre escus douze sols & demy.

La Merindad de Monçon, paye deux millions deux cens & septante six mil maravedis, qui sont en escus, cinq mille cinq cens & septante huit escus vingt-cinq sols & demy.

La cité de Palence, & la Prouince nommée de Campos, paye chaque année seize millions neuf cens quarante huit mil maravedis, qui valent en escus, quarante & vn mil cinq cens trente neuf escus trente sols.

La ville de Carrion paye chaque année, quatre millions neuf cens quarante & huit mil maravedis, qui sont en escus douze cens & vingt-sept escus vingt-six sols.

La Merindad de Carrion, paye deux millions neuf cens & dix mil maravedis, qui valent en escus, mil cent trente deux escus vingt & vn sols.

Les lieux de Pierre d'Aluarez de Vega, six cens cinquante huit mil maravedis, qui sont en escus huit mil quatre cens quarante & vn escu dix sols huit deniers.

La ville de Sahagun, paye deux millions cent vingt-cinq mil maravedis, qui valent quatre mil neuf cens deux escus cinquante trois sols & deux deniers.

La Merindad de Pernia, paye cent septante huit mille maravedis, qui sont quatre cens trente six escus quinze sols neuf deniers.

La Merindad de Campo, paye vn million sept cens trente & vn mille maravedis, qui valent en escus quatre mil deux cens nonante & vn escu trois sols.

La vallee de Miranda paye cinq cens cinquante sept mil maravedis, qui sont mil trois cens huitante vn escu cinquante & vn sols.

Les quatre villes qu'on appelle de la coste de la mer, payent trois millions six cens seize mil maravedis, qui valent en escus huit mil huit cens & soixante six escus trente cinq sols.

La Principauté d'Asturias, & la cité d'Oviedo, douze millions trois cens quarante huit mil maravedis, qui sont en escus trente mil deux cens & soixante quatre escus quarante 2. s.

La cité de Lugo paye quatre millions cent & trente sept mil maravedis, qui sont en escus dix mil cent & trente neuf escus quarante trois sols.

La cité de Mondogredo, paye vn million sept cens & trente deux mil maravedis, qui sont en escus, quatre mil deux cens quarante cinq escus six sols six deniers.

La cité d'Orense & son party, payent six millions cinq cens & huit mil maravedis, qui

R

font quinze mil neuf cens cinquante escus & cinquante neuf sols.

La cité de Compostelle à Saint Jacques, & les lieux de son Archevesché, payent dix-huict millions deux cens & douze mil maravedis, qui valent quarante quatre mil six cens & vingt-huict escus cinquante cinq sols.

La cité de Thuy & les lieux de son Evesché, cinq millions huit cens & vingt sept mil maravedis, qui valent quatorze mil deux cens huitante & vn escus cinquante sols.

La ville de Ponferrada, paye vn million neuf cens septante cinq mil maravedis, qui font quatre mille huit cens & quarante escus cinquante & vn sol six deniers.

La cité de Leon & les lieux de son Evesché & iurisdiction, payent six millions trois cens cinquante mil maravedis, qui valent quatorze mil sept cens & cinq escus cinquante 4. sols.

Les lieux de la cité d'Astorga & son Evesché, payent deux millions quatre cens cinquante mil maravedis, qui valent trois mil cinq cens & soixante six escus onze sols.

Les lieux nommez de la Cauadiaz de Leon, & Astorga, payent sept cens & nonante sept mil maravedis, qui font mille neuf cens cinquante trois escus deux sols.

Les Barrios environ de Salas, en la principauté d'Asturias, payent chaque année deux cens trente & vn mil maravedis, en escus, cinq cens soixante six escus dix sols & quatre den.

La cité de Zamora & sa iurisdiction, quinze millions cinq & vingt-cinq mille maravedis, qui valent trente six mil sept cens & soixante quatre escus quatre sols & huit deniers.

La cité de Toro & son party, paye onze millions cent & douze mil maravedis, qui font en escus, vingt six mil neuf cens soixante escus quarante huit sols.

La ville d'Vregna paye de troisièmes, soixante & deux mil maravedis, parce que la dixième est au Duc d'Osuno, & vaut cent & quarante deux escus neuf sols six deniers.

La vallee de Garegna, paye de troisièmes & dixièmes, deux millions trois cens trente cinq mil maravedis, qui valent cinq mil sept cens dix-huit escus huit sols quatre deniers.

La ville de Varacil de la Loma, paye deux cens cinquante mil maravedis, qui font six cens douze escus quarante cinq sols.

La cité de Salamanque, & les lieux de ses terres & iuridictions, payent vingt-quatre millions, trois cens mil maravedis, qui valent cinquante huit mille, huit cens, vingt-trois escus, trente deux sols.

La cité de Rodrig & son party, payent quatorze millions, trois cens, & quarante cinq mil maravedis, qui font vingt-sept mil huit cens, & six escus trois sols.

Le party de Trigueros paye quatre cens, & dix-sept mil maravedis, qui font mille, & vingt-deux escus, & trois sols.

La ville d'Olmillo, paye quarante sept mil maravedis, qui valent cent & quinze escus onze sols.

La ville de Tordeillas, & les lieux de son party, deux millions, six cens mil maravedis, qui valent en escus six mille trois cens septante deux escus trente trois sols, deux deniers.

La cité de Valladolid, son party, & iurisdiction, vingt-neuf millions sept cens, & trente mil maravedis, qui valent septante vn mille, huitante escus cinquante cinq sols.

La ville de Tordehumos, paye huit cens vingt-vn mil maravedis, qui font deux mille douze escus quinze sols, & deux deniers.

La ville de Medina del Campo, & les lieux de son party, payent chaque année trente vn million trois cens soixante & cinq mil maravedis, qui font en escus septante cinq mil huit cens & vingt-trois escus trente quatre sols.

La ville d'Olmedo, & les lieux de son party, deux millions, cent & quarante neuf mil maravedis, qui valent, cinq mil deux cens & soixante sept escus dix sols.

La ville de la Naua, & les sept Eglises, payent de troisièmes trois cens trente trois mil maravedis, parce que les dixièmes sont à Dom François de Fonseca, qui valent en escus, huit cens dix sept escus neuf sols.

La ville de Madrigal, paye six cens huitante deux mil maravedis, qui font mille six cens septante escus, deux sols, six deniers.

La ville d'Arenale, & sa iurisdiction cinq millions trois cens dix mil maravedis, qui valent treize mille quatorze escus quatre sols.

La cité d'Auila, son party & iurisdiction dix-neuf millions, trois cens & soixante huit mil maravedis, qui valent quarante sept mil quatre cens septante escus trente 4. s. 6. deniers.

La cité de Segouie, & sa terre douze millions quatre cens & huitante mil maravedis, qui valent trente mille cinq cens, & huitante trois escus vingt sols.

La ville d'Aranda de Duere, & sa terre, trois millions, trois cens, & cinquante mil maravedis, qui valent neuf mille huit cens soixante sept escus ving-sept sols huit deniers.

La ville de Roa paye chaque année vn million, cinq cens dix-huict mille maravedis, qui font mille sept cens & vingt escus cinquante quatre sols deux deniers.

La ville de Gomiel de Ysan paye de troisiemes cent & cinquante quatre mil maravedis, parce que le dixiesme appartient au Duc d'Ossune, qui font trois cens septante sept escus vingt sept sols.

La ville de Sepulveda & les lieux de son party trois millions cinquante quatre mille maravedis, qui font sept mille quatre cens & huictante deux escus cinquante six sols.

La cité de Sorie, & son party, dix millions deux cens & huictante deux mille maravedis, qui valent vingt cinq mille deux cens escus cinquante neuf sols six deniers.

Les lieux de la cité d'Ossuna, & son Euesché quatre millions de maravedis, qui valent neuf mille huict cens & trois escus cinquante six sols.

La ville d'Agreda, & Caracena, & son party deux millions huictante, & trois mille maravedis, qui font cinq mille cent & cinq escus vingt-quatre sols.

La ville de Molina, & sa terre cinq millions sept cens, & nonante vn mille maravedis, qui valent quatorze mille cent, & nonante trois escus vingt-huict sols.

La cité de Ciguença, & son party trois millions six cens soixante deux mille maravedis, qui font huict mille neuf cens septante cinq escus trente sols.

La cité de Cuença, son party & sa terre vingt-quatre millions six cens quarante cinq mil maravedis, qui valent soixante mille quatre cens & sept escus vingt cinq sols.

La cité de Huete, & son party dix-sept millions neuf cens & six mille maravedis, qui font quarante trois mille neuf cens & onze escus quarante & huict sols.

La ville de Villarejot de Fuentes paye deux millions cinq cens & dix-sept mille maravedis, qui valent six mille cent & soixante neuf escus sept sols.

La Prouince nommee le Marquisat de Villena paye trente & vn million cent & mille maravedis, qui font septante six mille cent & trente sept escus quinze fois sept deniers.

La ville de Belmonte paye de troisiemes quatre cens, & septante six mille maravedis, parce que les dixiesmes appartiennent au Marquis de Villena, & valent en escus mille cent & soixante six escus quatre sols.

La cité de Murcia, son party & iurisdiction, quatorze millions huict cens & vingt mille maravedis, qui valent trente six mille trois cens & vingt-trois escus trente deux sols.

La cité de Lorca, sa terre & son party paye cinq millions de maravedis, qui font douze mille deux cens cinquante quatre escus cinquante cinq sols.

La ville d'Alcaez, sa terre & son party paye seize millions neuf cens huictante quatre mille maravedis, qui font quarante vn mille six cens & vingt sept escus vingt-huict sols.

La ville de Segura de la Sierra, ses montagnes d'alentour & sa terre, onze millions nonante & vn mil maravedis, qui valent vingt sept mille cent & huictante trois escus cinquante sols six deniers.

Villeneuve de los infantes & sa Prouince, payent huict millions six cens soixante quatre mil maravedis, qui valent vingt & vn mil deux cens trente cinq escus dix-sept sols.

La ville d'Ocagna, & la prouince nommee Castille, vingt-trois millions trois cens dix mil maravedis, qui valent cinquante six mil quatre cens & trente deux escus onze sols.

La cité de Guadalajara & son party, onze millions soixante quatre mil maravedis, qui valent vingt-sept mil cent & dix-sept escus quarante fois.

Les villes du Prox & Pozo, payent cent soixante mil maravedis, qui valent sept cens & cinq escus quatre sols.

La ville d'Almonacid, & la Prouince de Zorita, vn million cent & huictante huict mil maravedis, qui valent deux mille neuf cens onze escus cinquante six sols.

Les villes de Veuga, Talamenque, & Tordelaguna & sa iurisdiction, payent dix-huict millions deux cens cinquante mil maravedis, qui valent quarante mil sept cens trente escus vingt-deux sols six deniers.

La ville de Yepes paye quatre millions & vingt-trois mil maravedis, qui font cent & trois escus quarante & vn sols.

La ville d'Alcala de Henarez, & les lieux de sa iurisdiction, payent avec la ville de Bri-bueda, seize millions deux cens cinquante mil maravedis, qui valent trente neuf mil huict cens vingt-huict escus vingt neuf sols six deniers.

La ville de Madrid & son party, payent vingt-trois millions six cens quarante cinq mil maravedis, qui valent en escus cinquante sept mil neuf cens quarante sept escus trente six sols deux deniers.

La Comté de Pugno en Rostro, paye vn million deux cens soixante mil marauedis, qui valent trois mil huitante huit escus quatorze sols quatre deniers.

Les villes de Cubas, & Grignon, payent de troisiemes, cent vingt-sept mil marauedis, parce que les dixiesmes appartiennent à Dom Alonse de Mendoça, qui valent deux cens huitante neuf escus trente six sols huit deniers.

La ville de Galapahar, paye de troisiemes, cent soixante mil marauedis, parce que les dixiesmes appartiennent au Duc de l'Infantasco, qui valent trois cens nonante deux escus neuf sols.

La ville d'Illescas & son party, deux millions deux cens nonante sept mil marauedis, qui valent, cinq mil six cens & vingt-neuf escus cinquante quatre sols.

La cité de Toledé & son party, payent septante trois millions, qui font cent septante six mil cent & soixante neuf escus trente sept sols.

Les rentes qu'on nomme le seruice de Montadgo, valent dix-neuf millions cinq cens & mil trois marauedis, qui font quarante six mil sept cens trois escus quarante sols.

Les lieux du Prieuré de S. Iean, sept millions cinquante cinq mil marauedis, qui font dix-sept mil deux cens nonante & vn escu quarante sols.

La ville d'Almagro & sa Prouince, sept millions cinquante cinq mil marauedis, qui font dix-sept mil deux cens nonante & vn escu quarante sols.

La Maistrise de Calatraua, paye trois millions quatre cens trente huit mil marauedis, qui font huit mil quatre cens vingt sept escus & huit sols.

La ville de Cuidad Real paye quatre millions cent cinquante mil marauedis, qui valent mil cent septante & vn escu cinquante quatre sols.

Les lieux qui sont compris en l'Archidiaconal de Talauera de la Roynie, quatorze millions trois cens vingt-six mille marauedis, qui valent mil cent douze escus quarante cinq sols.

La cité de Plaisance & les lieux de son Archidiaconal, payent dix-huit millions quatre cens soixante escus & dix-huit mil marauedis, qui font quarante cinq mil deux cens quatre vingt neuf escus douze sols.

La cité de Truxillo & son party, douze millions deux cens vingt-quatre mil marauedis, qui valent vingt-neuf mil neuf cens soixante escus quarante sept sols six deniers.

La ville de Caceres & son party, payent sept millions huit cens cinquante mil marauedis, qui valent dix-neuf mil deux cens quarante neuf escus douze sols.

La cité de Badajoz & son party, neuf millions septante & vn mil marauedis, qui valent vingt-quatre mil quatre cens trente huit escus quarante trois sols.

La ville d'Alcantara & son party, avec sa prouince, neuf millions quatre cens & trois mil marauedis, qui valent vingt-trois mil quarante quatre escus trente trois sols six deniers.

Le dixiesme des herbes de l'ordre de Calatraua, pour nourrir les cheuaux, trois millions quatre cens huitante & vn mil marauedis, qui valent huit mil deux cens huitante cinq escus quarante cinq sols.

Ces herbes se donnent aux cheuaux de prix au mois de Mars, & sont de la vesse & de l'orge verd, qu'on appelle en Espagne, *Alfalfa* & *Alcacer*.

La Prouince de la Serena, paye sept millions cinq cens septante mil marauedis, qui valent dix-huit mil cinq cens cinquante trois escus cinquante cinq sols.

La cité de Merida & son party, vingt & vn million deux cens trente quatre mil marauedis, qui font cinquante deux mil quarante quatre escus sept sols.

La ville de la Fuente le Maistre & son party, six millions neuf cens soixante & treize mil marauedis, qui valent dix-sept mil quatre vingts dix escus quarante & vn sol.

La ville de Guadal canal, & son party trois millions trois cens & cinq mille marauedis, qui valent huit mille cent escus trente trois sols.

La cité de Xecez de Badajoz sept millions cinq mille marauedis, qui font dix-sept mille quatre cens & soixante vn escu, cinquante huit sols.

La cité de Seuille son party & sa terre cent & huitante deux millions trois cens huitante sept mille marauedis, qui font quatre cens quarante vn mille six cens quarante sept escus six sols.

Toute la rente de la Seigneurie de Seuille, deux millions, qui font quatre mil neuf cens, & vn escu cinquante huit sols.

La ville de Palma, & Gelues payent de troisiemes pour année deux cens trente huit mille marauedis, parce que les dixiesmes appartiennent au Comté de Palme, & Gelues, qui valent cinq cens huitante trois escus vingt sols.

Les villes de Teba, & Ardales, payent de troisieme chaque annee cinq cens & huitante vn mille marauedis, parce que les dixiesmes appartiennent au Marquis d'Ardales, qui valent mille quatre cens & vingt-quatre escus vn sol trois deniers.

La ville de Llerena & son party payent de troisiemes, & dixiesmes chaque annee trois millions, & cent & vingt-cinq mille marauedis, qui font sept mille six cens & cinquante neuf escus dix neuf sols.

La cité de Cadiz paye huit millions quatre cens quarante & deux mille marauedis, qui valent vingt mille six cens & nonante vn escu dix sols.

La rente de la Vicomté de la cité de Cadiz, trois millions, trente huit mil marauedis, qui valent sept mille quatre cens, & quarante six escus cinq sols.

La cité de Gibaltar, paye vn million, cinq cens mille marauedis qui font trois mil six cens & septante six escus vingt huit sols trois deniers.

La cité de la frontiere & son party, vingt & vn million cent cinquante mil marauedis, qui valent cinquante & vn mil huit cens trente huit escus trois sols six deniers.

La ville de Carmona & son party, neuf millions quatre cens & cinquante mil marauedis, qui valent vingt-trois mil cent soixante & vn escu quatre sols six deniers.

Les villes de Lora & Setafilla, six cens huitante mil marauedis, qui font mil six cens & soixante six escus quatre sols.

La cité d'Ecija & les fauxbourgs quinze millions cinq cens mil marauedis, qui valent trente sept mil neuf cens nonante escus onze sols six deniers.

La Cité de Cordoue & son party, huit millions neuf cens nonante huit mil marauedis, qui valent vingt deux mil cinquante trois escus cinquante trois sols deux deniers.

L'enclos des lieux Royaux de Cordoue, payent chaque annee, dixsept millions soixante deux mil marauedis, qui font quarante & vn mil huit cens dix huit escus trente huit sols deniers.

La cité d'Anduxar & son party quatre millions huit cens mil marauedis, qui valent onze mil sept cens & soixante quatre escus trente sols six deniers.

La cité d'Erheda & son party, payent onze millions six cens quarante mil marauedis, qui font vingt-huit mil cinq cens trente & vn escu cinquante sols dix deniers.

La cité de Baeca & son party, dix-sept millions trois cens & seize mil marauedis, qui font trente neuf mil neuf cens nonante escus douze sols huit deniers.

La ville de Quesada paye chaque annee vn million quatre cens dix huit mil marauedis, qui font trois mil quatre cens septante cinq escus vingt-neuf sols sept deniers.

La Lieutenance de Caçorla, paye six millions huit cens huitante huit mil marauedis, qui valent seize mil huit cens huitante deux escus vingt & vn sol trois deniers.

La Comté de Saint Estienne, paye vn million trois cens quarante mil marauedis, qui font trois mil deux cens huitante quatre escus dix-neuf sols.

La ville de Martos & son party, payent onze millions quatre cens trente six mil marauedis, qui font vingt-huit mil vingt-neuf escus & quatre sols.

La cité de laen & son party, payent quinze millions neuf cens vingt-six mil marauedis, qui valent trente neuf mil trente quatre escus dix-neuf sols six deniers.

La cité de Grenade, la terre & son party, payent chaque annee, quarante deux millions neuf cens neuf mil marauedis, qui font cent & quatre mil nonante trois escus 8. s. 6. deniers.

Les loyes qui se font à Grenade, valent au Roy chaque annee, vingt-deux millions de marauedis, qui font 53921. escu cinquante quatre sols. Je ne sçay si à present le profit en est aussi grand; car bien que j'aye tasché de le sçauoir, ie n'ay peu, à cause de la diuersité des nourrissons, depuis que les Mores furent generalement dechassés en l'an 1610. comme j'ay dit en ce liure.

La rente nommée Guelayabizes de Grenade, vaut deux millions sept cens huitante mil marauedis, qui font quatre mil neuf cens & deux escus quarante quatre sols.

Les cités de Loxa, & Alhama, payent trois millions six cens cinquante mil marauedis, qui font huit mil neuf cens quarante six escus cinq sols.

La cité de Baça & son party, dix millions six cens vingt six mil marauedis, qui font vingt six mil quarante quatre escus trente huit sols.

La cité de Gadiz, & les monts des enuiron, six millions trois cens nonante cinq mil marauedis, qui valent quinze mil six cens septante quatre escus vn sol.

La cité d'Almerie, paye trois millions huitante mil marauedis, qui valent sept mil cinq cens quarante neuf escus vn sol six deniers.

Les villes d'Almugneçar, & Salobregna, payent deux millions six cens quarante trois mil marauedis, qui font six mil quatre cens septante & sept escus cinquante six sols 5. deniers.

R. iij

La cité de Malaga & son party, seize millions deux cens & soixante neuf mille maravedis, qui font trente neuf mil huit cens septante cinq escus quinze sols.

La cité de Velez Malaga, paye trois millions cinq cens vingt neuf mil maravedis, qui valent huit mil six cens quarante & neuf escus trente & vn sol.

La ville de Pulchegna, quatre cens & dix mille maravedis, qui font mil quatre escus cinquante quatre sols.

La cité de Ronda & sa terre, payent cinq millions trois cens trente quatre mil maravedis, qui font treize mil septante trois escus trente deux sols six deniers.

Les Isles de Canarie, quatre millions huit cens trente mil maravedis, qui font onze mil quatre escus cinquante cinq sols.

L'Isle de Tenerife, trois millions de maravedis, qui font sept mil trois cens cinquante deux escus cinquante sept sols.

L'Isle de la Palme, deux millions quatre cens mil maravedis, qui font cinq mil huit cens huitante deux escus vingt deux sols.

Le service ordinaire que les Royaumes de Castille payent, vaut chaque année cent & quatre millions trois cens & cinquante mille maravedis, qui valent deux cens & cent cinquante deux mille cinq cens & vingt & vn escu cinquante deux sols quatre deniers.

Le droit des ports du Royaume de Valence, Aragon, & Nauarre, valent quarante neuf millions trente cinq mil maravedis, qui font cent & vingt-neuf mille cent & cinq escus cinquante sols.

Les droits des ports du Royaume de Portugal trente & quatre millions cinquante mille maravedis, qui font huitante deux mille six cens trente sept escus quinze sols six deniers.

Les rentes des laines, & droits qu'on paye pour les tirer hors des Royaumes, valent cinquante trois millions cinq cens & huitante six mil maravedis, qui font cent & trente mille deux cens & soixante deux escus, seize sols six deniers.

La grande Dohanne de Seuille, vaut cent & cinquante quatre millions trois cens & dix neuf mille maravedis, qui font trois cens septante deux mille cinq cens & vingt-huit escus cinquante sept sols.

La Dohanne des Indes, vaut chaque année soixante & sept millions de maravedis, qui font cent soixante deux mille soixante & trois escus, quarante cinq sols.

La rente nommée la Seigneurie des maisons de la monnoye de ces Royaumes, vaut vingt deux millions de maravedis, qui valent cinquante & six mille trois cens & septante deux escus trente trois sols.

Le Roy donne à rente aux Banquiers les droits des Commanderies de S. Iacques, Calatraue, & d'Alcantara à nonante huit millions de maravedis, qui font deux cens trente huit mille quarante sept escus huit sols.

Il donne pareillement à rente les herbes qui se cueillent au terroir desdites Commanderies à trente sept millions cinq cens mille maravedis, qui font nonante mille huit cens & trente cinq escus cinquante six sols.

La mine de l'argent vif, nommée Almedan, vaut chaque année septante cinq millions de maravedis, qui font cent & huitante vn mil six cens septante deux escus trente cinq sols.

La Sainte Croisade, ostés les despens, vaut chaque année deux cens millions de maravedis, qui font quatre cens & nonante mille cent & nonante six escus quatre sols quatre deniers.

Le subsidie vaut chaque année à sa Majesté soixante cinq millions de maravedis, qui font cent cinquante neuf mille trois cens & treize escus, quarante trois sols.

Les Eglises, & Eueschés de ces Royaumes se rentent tous les ans cent & dix millions de maravedis, qui font deux cens soixante neuf mille six cens & sept escus cinquante sols, & sept deniers.

Le service de ces Royaumes vaut tous les ans à sa Majesté sept millions septante & six mille maravedis, qui font dix-sept mille trois cens, & trente trois escus vingt sols & deux deniers.

La rente de la monnoye foraine vaut seize mille trois cens huitante sept escus quinze sols & cinq deniers.

Tout ce qui vient tous les ans des Indes vaut trois cens millions de maravedis, qui font sept cens trente cinq mil deux cens nonante quatre escus sept sols.

Le Royaume de Nauarre, vaut tous les ans trente cinq millions, & huit cens mille maravedis, qui font huitante cinq mille sept cens huitante quatre escus dix-neuf sols.

Les Royaumes de Valence, d'Aragon, & de Catalogne valent septante cinq millions, qui font cent huitante trois mille huit cens vingt-trois escus trente deux sols.

Ce qui se retire des Isles de Sardaigne, Majorque, & Minorque, est employé à la garde & deffence desdites Isles.

Le Royaume de Sicile rend tous les ans en rentes, compris tout ce qu'il vaut, huit cens septante cinq millions, qui valent deux millions cent quarante quatre mil six cens & sept escus cinquante sols & sept deniers.

Les rentes du Royaume de Naples, ensemble la Pouille & la Calabre, valent quatre cens cinquante millions de maravedis, qui font vn million cent & deux mil neuf cens quarante & vn escu dix sols & sept deniers.

L'Etat de Milan vaut de rente tous les ans, trois cens millions de maravedis, qui font sept cens trente cinq mil deux cens nonante trois escus vingt deux sols.

Les Estats de Flandres & Bourgogne, valent sept cens millions de maravedis, mais il ne sont à présent au Roy d'Espagne, attendu qu'ils ont esté donnez pour le douaire de Madame l'Infante Elisabeth Clara Eugenia, lors qu'elle espousa Albert paravant Cardinal, en l'an mil cinq cens nonante huit.

Les rentes des cartes, valent tous les ans, vingt millions de maravedis, qui font quarante six mil trois cens vingt trois escus trente trois sols.

Les rentes des sarges drappees qui entrent de Florence en ces Royaumes, valent dix millions de maravedis, qui font vingt quatre mil cinq cens & neuf escus quarante sols.

Toutes les parties de maravedis reduites en Ducats d'Espagne, se montent à la somme de treize millions quarante huit mil ducats, qui font en escus la somme totale, douze millions cent nonante six mil six cens soixante & six escus quarante sols.

Il faut comprendre en ce compte la Cité de Saldagna, que nous ayons cy, deuant oubliée, laquelle paye vn million & treize mil maravedis, qui font en escus deux mil quatre tens huitante deux escus cinquante & vn sol.

BANNISSEMENT DES MORISQUES HORS d'Espagne en l'annee mil six cens dix.

Des le commencement de l'annee 1610. Philippe troisieme de ce nom, Roy des Espagnes, en fit bannir & chasser tous les nouveaux Chrestiens Morisques, qui se trouuerent estre au nombre de neuf cens mille personnes. Avant que de rapporter la teneur de son Edit, & comme il fut executé, voyons d'ou & quand sont venus les Maures en Espagne, pour mieux donner à entendre quelles gens estoient ces Morisques, & l'occasion pourquoy ce Roy les en a fait mettre du tout dehors.

Plusieurs Historiens ont escrit la vie de Mahomet, lesquels s'accordent tous, qu'estant issu de pauvres gens, son pere de Religion Payenne, & sa mere Iusue, il fit toutesfois accroire qu'il estoit vn Prophete. Par l'aduis d'un Sergius Moine & Arrien, il forma vne Religion nouvelle tirée du Iudaïsme & de l'Arrianisme, laquelle ayant clandestinement semée & publiee, il attira à sa suite vn grand nombre de peuple d'Arabie, & se rendit l'an 617. Duc & Prince de tous les Arabes & Sarazins.

Les Caliphs des Arabes, c'est à dire les successeurs de ce Mahomet, se firent si puissans establisant ceste nouvelle Religion par leurs armes, que quatre vingts dix ans apres sa mort, le Caliphe Vlit fut paisible possesseur & Empereur de tous les pais qui sont en la ceste partie Septentrionale d'Afrique, de la Palestine, Syrie, Arabie, & Perse; bref de toute ceste grande longueur de pais qui est depuis le mont Atlas en l'vne des extremités Occidentales d'Afrique, iusques au fleuve Indus en l'autre extremité Orientale d'Asie.

Durant l'Empire de cet Vlit, sçauoir l'an 713 les paillardises, vices & cruantez des derniers Roys Gots en Espagne, ouvriront la porte aux Arabes, Sarrazins & Maures, pour entrer en l'Europe par le destroit de Gibraltar, & conquieser l'Espagne, où ils y firent mourir en cinq ans sept cens mil Chrestiens, la peuplerent presque de Maures, exterminant du tout la Monarchie des Gots, qui autresfois auoit soulé aux pieds l'Empire Romain & ruiné Rome & l'Italie.

Tous les Historiens François rapportent aussi qu'en l'an 715. sous la conduite d'Abderamen Lieutenant general en Espagne du Caliphe Gizit successeur d'Vlit, quatre cents mille Arabes, Sarrazins & Maures, passerent les monts Pyrenees, & qu'estés entrez iusques à cinq lieues de Tours au milieu de la France ils furent tous mis au fil de l'épée par Charles Martel Maire du Palais du Roy Thierry. Et que cinq ans apres le Roy Amorrhee voulant secourir des Sarrazins (que ce Martel auoit assiégés encor dans Narbonne) fut tué & par luy defait en la bataille de Froinre aux pieds des monts Pyrenees: ce qui depuis arreista ces inlides.

les d'entrer plus auant en Europe : & donna le moyen & la commodité aux pauvres Chrestiens Espagnols (qui n'auoyent voulu subir au joug de ces Mahometans, & qui s'estoyent garentis de leurs armes dans les monts d'Asture, de Biscaye & es Pyrenees) d'establir asseurement les Royaumes de Sobrabre & d'Ouiedo.

Le naturel de la nation des Arabes, est (comme testifient plusieurs bons auteurs) d'estre ennemy du repos, ambitieux, entreprenant, & de ne se pouuoir tenir en vn ordre. Aussi peu apres en Asie ils firent deux Caliphes, l'vn en Perse, & l'autre en Damas : & en suite par leurs diuisions l'Empire des Turcs ayant pris naissance, ceste grandeur où la nation des Arabes s'estoit eleuee, fut du tout effacee de l'Asie.

En Afrique les Miralmumins Arabes s'y estans faits souuerains, refuserent de reconnoistre les Caliphes d'Asie. Eten quarante trois ans que l'Espagne fut successiement gouuernee par vingt Lieutenans des Caliphes ou des Miralmumins, vn Maure appelle Abderamen tua Ioseph dernier Lieutenant general en Espagne des Miralmumins d'Afrique, & se declara Roy de Cordouë, où il establit vne Monarchie laquelle a duré sous vingt Rois. 257. ans.

Cependant que l'Espagne estoit gouuernee par les Lieutenans des Caliphes, ou Miralmumins, les Rois Chrestiens de Sobrabre & d'Ouiedo n'estendirent gueres leurs limites hors de leurs montagnes. Et mesmes au commencement du regne des Rois de Cordouë, Abderamen (qui estoit si puissant qu'il auoit en ses guerres ordinaires trente mille chevaux & deux cents mille hommes de pied) contraignit les Chrestiens de se retirer en leurs premieres demeures : Mais par succession de temps, les diuisions, confusions & guerres civiles entre les Maures, firent que d'vn costé les Roys de Sobrabre se rendirent maistres des pais entre l'Ebre & les Pyrenees, se faisant nommer Roys de Nauarre & Comtes d'Aragon; & de l'autre les Roys d'Ouiedo s'emparerent de tout ce qui est entre le fleuve Duero & l'Ocean Cantabrique ou Septentrional, (c'est à dire) de la Biscaye, Leon, des Astures & de Galice, s'estendans mesmes outre le Duero en vne partie de Castille la vieille; ce qui leur fit laisser le tiltre de Roys d'Ouiedo, & prendre celuy de Roys de Leon. Pour vn temps ils retindrent sous leur souueraineté la Castille qu'ils faisoient regir par Iuges & Comtes, mais l'an 910. Dom Fernand Gonçales du consentement des Roys de Leon en prit le tiltre de Comte Souuerain. Voila quel fut l'Estat des Chrestiens en Espagne pendant que les Roys Maures tenoient leur siege à Cordouë, iusques en l'an 1014.

Depuis, les guerres civiles & diuisions s'augmentans entre ces infideles, les Roys Chrestiens qui veilloient tousiours pour les ruiner, leur enleuerent Toledé, l'an 1083. Sarragosse l'an 1118. & Cordouë l'an 1147. Ces pertes notables firent que plusieurs Roitelets Maures s'esleuerent en Espagne chacun se disant Roy de son gouuernement, les vns libres, & les autres tenans des Roys de Maroc & de Fez : iusques en l'an 1236. que le Maure Mahomet Aben. Alhamar se fit premier Roy de Grenade, & souuerain des Maures en Espagne.

Aussi pendant ces diuisions qui durerent plus de deux cents ans, D. Sancho le Grand Roy de Nauarre, erigea l'an 1034. les Comtez de Castille & d'Aragon en Royaumes. De celuy de Castille, il en pourueut son second fils D. Fernand : Et de l'Aragon, D. Ramir son bastard en fut le premier Roy.

L'an 1090. D. Alfonse sixiesme, Roy de Leon & de Castille, ayant donné le pais de Portugal (conquesté sur les Maures) en mariage à sa fille Therese avec Henry de Lorraine; leur fils Alfonse Henriques prit le tiltre de Roy de Portugal l'an 1112. Voila l'origine de tous les Royaumes Chrestiens qui s'esleuerent en Espagne sur les ruines des Maures.

Les Roys de Castille dōc deuenus les plus proches voisins des Roys de Grenade, leur firent aussi plus ordinairement la guerre, toutefois les Roys d'Aragō se redirent maistres de Valence l'an 1138. & ceux de Castille prirent l'an 1248. à composition Seuille; & l'an 1257. Murcie, les Algarbes & plusieurs places que tenoient les Roitelets Maures, qui ne vouloient obeir aux Roys de Grenade. Ces redditions se firent à condition de leur assigner autres terres & biens pour viure en liberté de leur Religion, sous leur domination.

Or ainsi que Musa premier Lieutenant General des Caliphes en Espagne (pour ne la rendre deserte apres leur conqueste) de peur de n'en retirer aucun tribut, y laissa demeurer les restes des Chrestiens (qu'il voulut estre nommez de son nom Musarabes) & viure en la liberté de leur Religion, avec beaucoup d'autres priuileges : De mesmes les Roys Chrestiens en Espagne, apres auoir conquesté quelques villes sur les Maures, les y laissoient viure à la Mahometane.

La guerre n'estoit pas continuellement entre les Chrestiens & les Maures : il se faisoit entre eux des Edits de Paix, à la rupture desquels les Chrestiens craignans la trahison des Maures qui demeuroient parmy eux, les faisoient sortir hors des villes, s'ils ne se faisoient baptiser.

ser. Ceux qui aymoient mieux le lieu de leur naissance que leur Religion, estoient baptisez: Et ce sont ceux-là & leurs enfans que depuis on a appelez Morisques ou nouveaux Chrestiens en Espagne, à la distinction des Musarabes, appelez Vieux Chrestiens, qui se retrouuoient encor dans les places que l'on reprenoit sur les Maures. Il se lit aussi dans les Histories d'Espagne, que les Maures en ces renouvellemens de guerres ont tué & pillé les vieux Chrestiens qui estoient parmy eux: & que les vieux Chrestiens en ont depuis fait le mesme des Maures & des nouveaux Chrestiens.

Or la Monarchie des Maures, en Grenade a duré sous 22. Roys 264. ans iusques en l'an 1492. que les Roys d'Aragon & Castille Dom Ferdinand & Isabelle contraignirent le Roy Mahomet le Petit de quitter le tiltre de Roy, & de leur remettre la ville de Grenade, & la grande forteresse d'Alhambra en leur puissance, à condition de luy donner honneste entretenement pour viure, & le laisser jouyr & ses successeurs de l'appanage dont il jouyssoit du vivant du dernier Roy de Grenade son pere: plus, que tous les Maures viuroient en liberté de leur Religion & ceremonies en l'Espagne: & que ceux qui se retiroient en Afrique ne laisseroient de jouyr du fruit de leurs immeubles, & les pourroient vendre si bon leur sembloit. Ainsi les diuerses Royautez d'Arabes & Maures en Espagne finirent, apres y auoir duré 781. ans.

Ces Roys Dom Ferdinand d'Aragon, & D. Isabelle de Castille sont les premiers auteurs de ceste grande Monarchie d'Espagne telle qu'elle est à present: car ayans vny leurs Royaumes d'Aragon, de Castille & de Leon l'an 1479. conqueslé celuy de Grenade l'an 1492. enuahy & vsurpé celuy de Nauarre l'an 1512. ils se rendirent souuerains de toute l'Espagne, excepté de Portugal (que Philippes II. a depuis reüny à la Castille, apres la mort de D. Henry de Portugal.) Hors de l'Espagne ils tenoient en Italie, Naples & la Sicile: Colomb leur decouurit les Indes Occidentales: & puis ils se rendirent souuerains de plusieurs Isles aux costes d'Afrique.

A ce Roy D. Ferdinand, le Pape Iules II. donna le tiltre de Catholique, que ses successeurs ont depuis tousiours aussi pris, & ce pour auoir estably l'Inquisition en Espagne contre les Iuifs & les Maures Mahometans, (qui a depuis esté aussi employée contre ceux qui sentoient mal en la foy.)

Au mesme temps de l'establissement de l'Inquisition, qui fut enuiron l'an 1493. il fit par autre Edit bannir de ses pais tous les Iuifs & Maures qui ne voudroyent se faire baptiser. De cet Edit plusieurs en ont escrit diuersement: les vns asseurans qu'il a esté fait d'un bon zele, & les autres, pour confisquer tant de richesses que les Iuifs & Maures auoient en Espagne. Et mesmes aucuns ont dit, que ceste ordonnance auoit esté belle en apparence, mais de perilleuse consequence; car les Iuifs qui ne voulurent y obeir, se retirerent au nombre de cent mille sur les terres du Turc, où ils apporterent l'inuention des canons & de la poudre: & ceux qui se firent baptiser, s'allierent depuis avec les nobles familles d'Espagne qu'ils contaminerent de sang & de creance. Et pour les Maures Mahometans, ils reprirent derechef les armes, deffirent & tuerent D. Alonse d'Aguillar enuoyé contre eux: mais en fin l'an 1502. le Roy D. Ferdinand leur permit de se retirer en Afrique: & vendre leurs biens. Ainsi les Iuifs & Maures Mahometans furent depaïssez du tout d'Espagne; Et de toute la race des Maures n'y demeura que les Morisques ou nouveaux Chrestiens, qui en ont esté chassiez en ceste année par le Roy Philippes II. Voicy la teneur de son Edit, par où se cognoistra mieux l'occasion qui l'a meu à ce faire, que ce que i'en pourrois mettre par extrait.

Le Roy. Parce que la raison oblige en conscience le bon & Chrestien gouuernement d'expeller & chasser de tous Royaumes & Republiques les choses qui y causent scandale, & portent dommage aux bons subiects, & danger à l'Estat, & sur tout qui offensent Dieu nostre Seigneur, & sont preiudiciables à son service: A ceste cause, l'experience ayant monstré que la residence des nouveaux Chrestiens les Morisques & leur demeure aux Royaumes de Grenade, Murcie, & Andalouse, a causé tous ces inconueniens: parce qu'outre la façon de proceder de ceux qui s'accorderent en la souleuation dudit Royaume de Grenade, laquelle commença par atroces, meurtres & tueries, de tous les Prestres & Chrestiens vieux qu'ils peurent attraper de ceux qui viuoient parmy eux, appellant le Turc à leur secours & ayde: & les ayant tirez dudit Royaume, & permis de demeurer en nos autres Royaumes, moyennant qu'ils se repentissent de leurs fautes, & vesquistent fidelement & Chrestienement, selon les preceptes & iustes ordonnances qu'on leur donna: non seulement ne les ont gardez & accomplis, suuant les obligations de nostre sainte Foy: ains ont monstré tousiours auoir icelle en grand mépris, & ne craindre d'offencer Dieu nostre Seigneur, comme a esté veu par la multitude de ceux qui ont esté chastiez & punis par le saint Office de l'Inquisition: outre ce qu'ils ont commis plusieurs larcins & meurtres contre les vieux Chrestiens. Et non

contens de ce, ont voulu conspirer contre ma royale Couronne & mes Royaumes, recherchant l'ayde & le secours du Turc, allans & venans personnes par eux enuoyees à cét effet, & faisant le mesme enuers autres Princes, desquels ils se promettoient ayde & secours, leur offrant leurs personnes & moyens. Et puis que durant tant d'annees qu'ils trament ces trahisons & conspirations, aucun d'eux n'est venu à les reueler, ains les ont tousiours couuertes, cachées & niées: c'est vn signe tres-euident que tous ont esté de mesme opinion & volonté, contre le seruice de Dieu, & le mien, & contre le bien de ces Royaumes; encores qu'ils ayent peu imiter plusieurs Cheualiers des leurs de genereuse extraction, qui ont fait seruice à Dieu, & à nos Seigneurs les Roys nos progeniteurs, & à moy, comme bons Chrestiens, & vassaux tres-loyaux. Considerant donc tout ce que dit est, & l'obligation que j'ay d'y mettre ordre & remede, & procurer la conseruation & augmentation de mes Royaumes & subiects, & desirant de pouruoir au tout, j'ay arresté avec l'aduis & conseil de plusieurs hommes doctes, & d'autres personnes fort Chrestiens, prudets & jaloux du seruice de Dieu & du mien, de chasser desdits Royaumes de Grenade, Murcie, & Andaloufie, & de la ville d'Hernache (encor que ce soit hors les limites desdits Royaumes) tous les nouveaux Chrestiens Morisques qui sont en iceux, tant hommes que femmes & enfans. Car comme quand quelque grand & detestable crime se commet en quelque College, ou Communauté, il est raisonnable que tel College ou Communauté soit destruit ou perdu, & que les petits pour les grands, & les vns & les autres soient punis: & que ceux qui peruertissent la bonne & sincere vie des Republicques & de leurs villes & citez, soient challez loing des autres habitans, afin que leur contagion ne se prenne & gaste les autres.

A ceste cause en vertu des presentes, j'ordonne & commande que tous les nouveaux Chrestiens Morisques, sans en excepter aucun de ceux qui viuent & sont residens ausdits Royaumes de Grenade, Murcie, Andaloufie, & ladite ville d'Hernache, tant hommes que femmes, de quelques aages qu'ils soient, tant naturels que non naturels, & qui en quelque maniere ou pour quelque cause que ce soit sont venus & demeurent ausdits lieux, excepté ceux qui sont esclaués, sortent dans trente iours premiers suiuan, qui se conteront du iour de la publication des presentes, de tous ces miens Royaumes & Seigneuries d'Espagne avec leurs enfans & filles, seruiteurs & seruantes, & autres leurs domestiques de leur nation, tant grands que petits, & qu'ils ne soient si hardis de retourner ny demeurer en iceux, ny en aucun endroit ny partie d'iceux de residence ny de passage, ny en aucune autre maniere quelconque.

Et leur prohibe & deffens de sortir par les Royaumes de Valence, ny Aragon, ny entrer en iceux, sur peine que s'ils le font & n'accomplissent en la sorte que dit est, & s'ils sont trouuez en mesdits Royaumes & Seigneuries en quelque sorte & maniere que ce soit passé ledit terme, ils encourront la peine de mort, & confiscation de tous leurs biens pour l'effect que j'ordonneray les appliquer. Lesquelles peines ils encourront pour le mesme fait, sans autre figure de procez, sentence, ny declaration.

Et prohibe & commande, qu'aucune personne de tous mes Royaumes & Seigneuries, y estans & y habitans, de quelque estat, qualité, preeminence, & condition qu'ils soient, qu'ils ne soient si hardis de receuoir, ny receller, recueillir, ny deffendre publiquement, ny secrettement, homme ou femme Morisque, passé ledit terme, & ce pour tousiours & à iamais, en leurs terres, maisons, ny autre lieu quelconque, sur peine de perdition de tous leurs biens, vassaux, forteresses, & autres hereditiez, & en outre de perdre toutes & chacunes les graces & bien-faits qu'ils ont de moy, applicables à ma chambre & fiscq.

Et encores qu'equitablement i'eusse peu confisquer & appliquer à mon domaine tous les biens, meubles & immeubles desdits Morisques, cōme biens de proditeurs, criminels de leze-Majesté diuine & humaine, toutesfois vsant de clemence enuers eux, il me plaist, que pendant & durant ledit temps de trente iours, ils puissent disposer de leurs biens, meubles, & choses mobiliaries, & les emporter, non en monnoye, or, argent, joyaux, ny lettres de change, mais en marchandises qui ne soient prohibees, acheptees des naturels de ces Royaumes, & non d'autres, ou en fructs desdits Royaumes.

Et afin qu'iceux Morisques puissent durant ledit temps de trente iours, disposer d'eux, & de leurs biens, meubles, & choses mobiliaries, & faire emploie d'iceux en marchandises, comme dit est, ou en fructs de ladite terre, & emporter celles qu'ils achepteront, parce que pour les immeubles faut qu'ils demeurent pour mon domaine, & pour les appliquer à l'œuvre du seruice de Dieu, & bien public, selon que mieux me semblera estre conuenable. Declare par ces presentes, que ie les prends & reçois sous ma protection & sauuegarde Royale, & les assure eux & leurs biens, à ce que pendant ledit temps ils puissent aller & venir, & estre assurez pour vendre, troquer, & aliener tous leurs susdits biens, meubles, & choses mobiliaries,

mobiliaires, & employer la monnoye, or, argent, & joyaux, comme dit est, en marchandises non deffendues & acheptees des naturels de ces Royaumes, & fruiets d'iceux, & emporter avec eux lesdites marchandises & fruiets, librement, & à leur volonté, sans que pendant ledit temps leur soit fait ny donné aucun mal ne dommage en leurs personnes, ny biens contre iustice, sur les peines en quoy encourent ceux qui rompent la sauue-garde Royale.

Et tout de mesme donne permission & faculté aux susdits Morisques qu'ils puissent emporter avec eux de mesdits Royaumes & Seigneuries leldites marchandises & fruiets, tant par mer, que par terre, payant les droicts accoustumez, avec ce que, comme dessus est dit, qu'ils ne retirent or, ny argent monnoyé, ou à monnoyer, ny autres choses deffendues par les loix de ces miens Royaumes, en espee, ny par change, sauf leldites marchandises & fruiets, qui ne soient choses deffendues.

Toutesfois leurs permets bien qu'ils puissent emporter l'argent qu'ils auront besoing pour leur passage & transport qu'ils auront à faire par terre, comme aussi pour leur embarquement par mer. Et commande à toutes les Iustices de cesdits miens Royaumes, & à mes Capitaines generaux de mes galeres, & armées de haut bord, qu'ils facent garder & accomplir tout le contenu cy-dessus: & que non seulement ils ne contreviennent à ce, mais encores qu'ils y donnent & apportent bonne & briefue execution, & toute faueur & ayde que besoing sera, sur peine de priuation de leurs offices, & confiscation de leurs biens. Et commande que ceste mienne commission & tout le contenu en icelle ils facent publier publiquement, afin qu'icelle vienne à la notice de tous, & que personne n'en puisse pretendre cause d'ignorance. Donné à Madril, le neufiesme iour du mois de Decembre 1609. Signé; Je Le Roy. Et plus bas, André de Prade.

A ceste cause, afin que ces presentes viennent à la notice de tous. Le Dom Jean de Mandosse Marquis de S. German, &c. Ordonne que ce mandement soit publié en la forme accoustumee en toutes les villes & lieux de la iurisdiction de ceste cité de Seuille. Et parce qu'elle estant, comme elle est tant prochaine, & que l'embarquement doit estre fait en icelle desdits Morisques, & pour certaines autres causes iustes, qui importent le service de sa Majesté, & autres considerations à ce me mouuans, en vertu des commandemens que l'ay de sa Majesté, pour faire ce que plus conuiendra au temps qui leur a esté prefix pour sortir: le ne concede ausdits Morisques des villes & lieux de ceste Prouince que vingt iours, pour sortir d'icelles; nonobstant que ledit Edit leur concede trente iours, lesquels commenceront à courir le iour de la publication dudit Edit. Et durant ce temps ne pourront sortir dedites villes & lieux où ils ont leur habitation & maisons, sur peine de la vie, sans que pour ce faire ils ayent licence & permission des Alcades, Superieurs & Iusticiers, que le Seigneur Marquis de Carpy Gouverneur de ceste cité de Seuille, nommera en chacune ville. Et où il ne leur en nommera, ils seront tenus de prendre ladite licence & permission des Iuges & Iustices des lieux, ensemble les conducteurs & guides qui les doiuent conduire & mener à l'embarquement. Et la peine à laquelle ie les condamne dès à present, s'ils font le contraire, se doit promptement & irremissiblement executer. Donné à Seuille, le douziesme iour de Ianuer mil six cens dix.

L'execution de cét Edit fut aussi prompte que la publication: Car tous les nauires & vaisseaux furent arrestez en tous les ports d'Espagne, de quelque país qu'ils fussent, afin de les passer où ils voudroient se retirer.

Plusieurs passerent d'Espagne en diuers ports de Barbarie. Mais tout le long de ceste annee à plusieurs & diuerses fois, tant par mer que par terre, il aborda & entra en France plus de cent cinquante mille personnes de ces Morisques.

Les premiers qui arriuerent aux ports de Prouence, aucuns passerent seurement en Afrique: mais ceux qui partirent du port de Brescon receurent tant de violences & voleries pres de Porte-farine en Barbarie, par ceux qui auoient pris la charge de les y conduire; que cét acte a esté estimé le plus infidele & méchant que l'on puisse imaginer.

La charité, & la bontieue humanité de Henry le Grand (belles & rares parties en vn Roy tres-Chrestien) ne pouuant en luy demeurer oisies à vne si belle occasion, furent cause de l'Ordonnance suiuite qu'il fit sur l'entree & le passage desdits Morisques en France.

Le Roy ayant esté aduertý de l'Ordonnance n'agueres faite par le Roy d'Espagne, portant commandement expres à tous Morisques, estans sur ses estats & país d'Espagne, d'en sortir dans vn brief temps, & iceux deshabiter sur de grandes peines, qu'il fait executer contre eux, & qu'à ceste occasion grand nombre de familles desdits Morisques s'estans mis ensemble, s'acheminèrent sur la frontiere de Biscaye, país de Labour, & de la ville de Bayonne. Et ayant sa Majesté toute bonne intention qu'il soit vsc en leur endroict d'humanité pour les recueillir en ses país & Estats: Et que pour ceux qui font & voudront faire profession de

la Religion Catholique, Apostolique, Romaine, ils y puissent demeurer en toute seureté. Et pour les autres qui ne le voudront faire, il leur soit donné libre passage, iusques en ses ports de la mer de Leuant, pour de là se faire transporter en Barbarie, ou ailleurs, que bon leur semblera.

Sadite Majesté a ordonné & ordonne, que lors que lesdits Morisques apparoiſtront sur ladite frontiere, il leur sera par le Commissaire, qui sera à cet effect enuoyé par sa Majesté, déclaré de la part d'icelle, que tous ceux des susdits Morisques, qui voudront viure en ladite Religion Catholique, Apostolique, Romaine, & faire profession d'icelle, qu'ils ayent à en faire promptement vn roolle, contenant les noms, surnoms, aage & sexe d'iceux, pour leur estre assigné temps & lieu pour faire ladite profession par deuant l'Euesque dudit Bayonne, ou ses grands Vicaires, en la forme qu'elle doit estre faite, dont chacun d'eux retirera vn acte & certification dudit Euesque ou desdits grands Vicaires. Lequel acte ils seront tenus par mesme moyen faire enregistrer au Greffe de la Iustice dudit Bayonne. Et ce fait, s'estans tous lesdits Catholiques remis ensemble, seront conduits par lesdits Commissaires, iusques à ce qu'ils ayent passé les riuieres de la Garonne & Dordonne: lesquelles passees ils pourront demeurer & habiter dans les villes ou plat-pais des terres de l'obeïſſance de sa Majesté, qu'ils voudront choisir. A la charge toutesfois, qu'après l'eslection faite du lieu de leur dite demeure, ils seront tenus de se représenter à l'Euesque du Diocese dans lequel ils seront, auquel ils feront apparoir de l'acte de leur dite profession de foy, faite par deuant ledit Euesque de Bayonne, laquelle ils y confirmeront, & en retireront aussi vn acte dudit Euesque, qu'ils feront enregistrer au Greffe du Bailliage d'où sera leur dite demeure, pour viure d'oresnauant en ladite Religion Catholique, Apostolique, Romaine: ce qui leur sera enjoint de faire à peine de la vie, & sera expressement porté par l'acte de leur dite profession de foy faite par deuant ledit Euesque de Bayonne, l'injonction qui leur aura esté faite de viure d'oresnauant en ladite Religion Catholique, Apostolique, Romaine, à peine de la vie, (comme il est porté par la presente Ordonnance) dont ils recognoistront auoir eu entiere cognoissance. Et contiendra aussi ledit acte, qu'ils se sont aussi soumis de le représenter à l'Euesque au Diocese duquel ils resoudront de faire leur residence.

Et pour les autres desdits Morisques qui ne feront ladite professiō de la Religion Catholique, Apostolique, Romaine, leur sera fait commandement de la part de sadite Majesté par ledit Commissaire, de se mettre tous ensemble en vn lieu qui leur sera pource assigné, pour iceux estre au mesme temps confinez és mains du Commissaire qui sera à ce deputé par sa Majesté, pour les conduire depuis ladite frontiere par les plus courts & aisez chemins que faire se pourra, iusques dans les ports de la mer du Leuant, où leur seront fournis des vaisseaux pour les transporter seurement en Barbarie, ou autres lieux des terres du grand Seigneur qu'ils aduiseront, en payant par eux raisonnablement les frais du voyage de leur dit transport par mer: A la charge que les Maistres & Patrons des vaisseaux qui feront leur dit transport, se chargeront au Greffe de la Iustice du lieu d'où ils partiront, de la quantité des personnes & biens qu'ils transporteront avec eux: leur deffendant tres-expressement de leur faire aucun mauuais traitement, ny exiger d'eux aucune chose outre le salaire de leursdits vaisseaux, à peine de la vie. Et rapporteront attestation de leur décente en terre, & qu'ils n'auront receu d'eux en leur dit passage aucun mauuais traitement, en vertu dequoy ils en demeureront déchargez.

Ordonne sa Majesté aux susdits Commissaires qui auront charge de leur conduite, de les faire en leurs susdits voyages, loger par departement dans les bourgs & villages qui seront sur le chemin de leur dit passage, & leur y faire administrer viures en payant raisonnablement.

Ordonne aussi sadite Majesté aux Gouverneurs & Lieutenans generaux de ses Prouinces, d'ordonner & enjoindre, si requis en sont par les susdits Commissaires ordonnez pour faire ladite conduite aux Preuosts des Mareschaux, & Visseneschaux d'icelles, de conduire avec leurs troupes, chacun en ce qui sera de sa charge & ressort, lesdits Morisques: à ce qu'il ne leur soit fait à leur dit passage aucune iniure, de plaisir ou empeschement, à la charge de payer par eux les salaires desdits Preuosts des Mareschaux, & leurs Archers, dont taxe leur sera faite par les Iuges des lieux, comme il a accoustumé d'estre fait en pareilles occasions. Fait à Paris le 22. iour de Feurier 1610. FORGET.

Pour l'Execution de ceste Ordonnance, le Roy donna la Commission au sieur de Clielle d'aller receuoir les Morisques Castillans qui vouloient entrer en France par saint Iean de Lus, lesquels estoient plus de quarante mil, & enuoya la commission au sieur d'Augier Preuost general du Languedoc de les conduire en leur passage iusques aux ports & havres plus prochains des mers de Leuant, pour y estre embarquez & portez en Barbarie, suiuant ce qu'auoient

qu'auoient requis lesdits Morisques.

D'Augier ayant receu ceste composition par le Duc de Ventadour Lieutenant du Roy en Languedoc, il l'executa avec toute fidelité, & fit conduire ces Morisques depuis Bayonne sur la mer Oceane, iusques à Agde en Languedoc, qui est sur la mer Mediterranee, où il en fit embarquer à diuerses fois plus de trente mil, lesquels allerent decendre à Tunis en Barbarie avec tant de seureté, que les Commissaires deldits Morisques, aux remerciemens qu'ils en firent depuis au Roy, & à la Royne Regente sa mere, se louoyent fort des sages deportemens dudit d'Augier en leur endroit.

L'aduis que la Royne Regente receut, que cinquante mil Morisques Aragonois s'acheminoient encor en France, & qu'il estoit arriué aussi vn grand nombre de Morisques Grenadins en Prouence, sur des vaisseaux Ragousins, Cathalans, & Geneuois: Leurs Majestez soigneuses de la conseruation desdits Morisques, & aussi pour pouruoir tant aux plaintes de leurs Commissaires, sur les violences que l'on auoit exercees enuers ceux qui s'estoient embarquez au port de Brescon: que pour faire hastier le passage desdits Morisques en Barbarie, à cause de la plainte que faisoient les habitans de Prouence, & du Languedoc, touchant l'incommodité du sejour desdits Morisques, & le danger de contagion par la misere où estoient reduits plusieurs d'iceux Morisques, dont les Hospitaux de Marseille estoient remplis: Leurs Majestez, dis-je, enuoyerent le sieur d'Aymar Maistre des Requestes, avec commission de deliurer entierement lesdits pais de tant de Morisques, & les faire conduire & passer en Barbarie, sans qu'il leur fust fait aucun tort ny iniure, & regarder à ce que le tout se fist au repos des habitans desdites prouinces.

Le sieur d'Aymar suiuant sa commission s'achemine à Agde, fait assembler les principaux des Morisques qui y estoient encor, leur fait entendre l'intention de leurs Majestez: sur leurs plaintes on commence le procez à Authoron le fils, ses patrons & mariniers arrestez prisonniers au fort de Brescon. Il pouruoid aux choses necessaires à l'embarquement des Morisques qui y estoient, & de ceux qui y deuroient arriuer: donne charge à l'Eyrat & Palmier marchands de Pelenas & d'Agde, de fournir & tenir prests des vaisseaux pour le passage desdits Morisques: taxe les viures: ordonne qu'on leur payeroit pour teste quatorze liures: que la femme & son enfant iusques à l'age de cinq ans ne seroient contez que pour vne teste, & que deux enfans de l'age de huict iusques à dix ans, n'en feroient aussi qu'une: leurs hardes & meubles immunes du payement. Aussi il fait continuer la commission du sieur d'Augier sur le tesmoignage que luy rendirent tous les Morisques memes, du bon traitement qu'ils auoient receu de luy. Voicy la lettre que la Royne en escriuit à d'Augier.

Monsieur d'Augier, ie recognois bien que vous avez tres-bien & fidelement seruy en la commission qui vous auoit esté donnee par le feu Roy mon Seigneur, pour donner ordre au passage & embarquement des Morisques & Grenadins, & en demeure bien contente, & aussi n'ay-je intention de trauerser ny empescher l'effect de vostre dite commission, sinon en ce que nous auons iugé à propos, deffendre desormais l'entree en ce Royaume desdits Morisques, afin d'en deliurer entierement ledit pais, qui n'en peut recevoir que toutes sortes d'incommoditez, & c'est sur ce dessein principalement que ledit sieur d'Aymar a esté depesché par delà, afin qu'en donnant ordre de faire faire iustice à ceux qui se plaignoient des vols, & larcins, & autres excez, commis en leurs personnes & bien, il prit aussi le soing de faire sortir promptement ceux qui se retrouueroient encores de reste dans ces prouinces de delà: Et de fait, i'auois fait expedier vne commission adressante au sieur d'Aymar & à vous, pour cet effect seulement, mais ayant presentement esté auertie que l'on n'a peu empescher que du costé de Bearn il n'en soit entré vn bon nombre, qui prennent leur chemin du costé de Tarbes, i'ay fait reformer ladite commission, y ayant fait adiouster la continuation du pouuoir que vous auiez de prendre garde à leur passage, donner ordre à ce qu'ils s'acheminent par les lieux qui se trouueront plus commodes pour leurs viures, logements, & pour leur embarquement, tenir la main à leur seureté, & à ce que les riches payent pour les pauvres: en sorte qu'il n'en demeure aucuns derriere, & qu'ils ne sejourneront qu'un iour seulement pour sepmaine, afin que tant plustost l'on en soit deliuré.

Vous trauaillerez donc suiuant ladite commission à faire passer ce qui se presentera, & prendrez aussi tousiours garde à ce qui escherra par delà, important le seruice du Roy Monsieur mon fils, & le bien & repos de ses subiects: & sur ce ie prie Dieu, Monsieur d'Augier, vous auoir en sa sainte garde. Escrit à Paris, le dix-neufiesme iour d'Aoust 1610. Marie, Et plus bas, Philippeaux.

Ainsi le sieur d'Aymar ayant fait subroger ledit sieur d'Augier pour faire la conduite & embarquement des Morisques qui viendroient par terre en Languedoc, il s'achemina en Prouence pour y faire embarquer les Morisques qui y estoient arriuez par mer.

La principale difficulté de ces embarquemens estoit que les mieux aisez vouloient s'embarquer tousiours les premiers, & laisser les plus pauvres derriere : Et la principale clause de la cōmission du Roy, estoit, Que les riches Morisques payeroiēt pour les pauvres, afin qu'aucun ne restast. Ce fut pourquoy il enjoignit audits Morisques à Marseille d'eslire des Commissaires d'entr'eux pour proceder à la cottisation de tous les deniers necessaires à leur embarquement, nourriture des pauvres, & autres dépens qu'il leur conuenoit faire, & vn Receueur pour les recevoir. Le sieur d'Augier en fit de mesme à Agde, mais vn mesme accident leur aduint : car Sappata Receueur de ceux de Marseille ayant fait la recepte des deniers, les vola, & s'enfuit, tellement qu'il aduint vne si grande pauvreté parmy ces misérables Morisques, que les riches ayans trouué moyen de passer en Barbarie, apres que les pauvres eurent esté quelque temps alimentez aux hospitaux : ceux de la ville de Marseille furent contraints à leurs dépens de faire transporter les restes en Barbarie.

Tous ces Morisques sont naturellement subtils, vñs de toutes sortes de fraudes, de supercheries & trahisons : ils ne gardent point la foy aux estrangers ; & sont peu charitables entr'eux-mesmes : ce que le sieur d'Augier recogneut assez à Agde où le plus grand embarquement s'est fait : & où au commencement du mois d'Aoust arriua Hachy-Ybrahim Mutafaracca député Ambassadeur du grand Turc en France pour apprendre l'estat de l'embarquement desdits Morisques, lequel ayant veu embarquer quatre mil d'iceux, & appris le bon traitement que tous en general auoient receu des Commissaires de sa Majesté tres-Chrestienne, il s'en alla en Barbarie donner ordre à les y faire recevoir.

Or sur l'entree des cinquante mille Morisques Aragonois en France par le Languedoc, il s'en fit vne grande plainte au parlement de Thoulouze, pour le degast & incommoditez qu'auoient souffert les bourgades où auoient passé auparauant les Morisques Castillans, ce qui fut le sujet de l'Arrest donné audit Parlement le sixiesme d'Aoust, portant inhibitions & deffences ausdits Morisques d'entrer & passer dans le Languedoc, à peine de la vie.

Mais d'Augier continuant sa commission, aduertiy que plusieurs estoient arriuez pres S. Subrac, & paroissoient au delà de la Garonne, nonobstant l'opposition des Capitouls de Thoulouze, il les fit passer sur le pont de saint Subrac & conduire à Agde, où plus de cent vaisseaux estoient au port, lesquels plusieurs marchands de diuers endroicts y auoient faict venir pour embarquer lesdits Morisques, lesquels représenterent lors audit sieur d'Augier, qu'ils ne pouuoient payer les nollis, ou flet, au prix de quatorze liures que ledit sieur d'Aymar auoit taxé, laquelle ledit sieur d'Augier modera à douze, & quelques iours apres sur de nouuelles remonstrances les reduit à dix, & encores declara que cinq testes passeroient franches sur chaque cent, ayant esgard à la miserable condition de tant de pauvres reduits parmy eux à mendicité, enjoignant aux marchands d'embarquer tous lesdits Morisques à ce prix (par eux tant desiré & merueilleusement accepté) & de tenir des vaisseaux à suffisance, à peine de tous dépens, dommages & interests.

Or estant comme il a esté dit cy-dessus, expressément porté par les patentes & lettres de sa majesté, que les riches Morisques payeroient pour les pauvres (afin qu'aucun n'en restast) à quoy dès l'entree du Royaume, & mesmes à Thoulouze deuant ledit sieur d'Augier, ils s'estoient soumis & obligez, & veu qu'artificieusement presque tous se disoient pauvres, ledit sieur d'Augier, pour donner commencement à leur embarquement, attendant que lesdits Morisques eussent donné ordre à leurs affaires, aduisa de faire partir six vaisseaux chargez des plus pauvres, & se rendit caution pour eux enuers lesdits marchands iusques à la somme de deux mil escus.

Là dessus les principaux desdits Morisques apprehendans vn trop long sejour, & les inconueniens qui s'en pouuoient ensuiure si les mieux aisez laissoient derriere les plus pauvres : Ils resolurent d'eslire quelques-vns d'entr'eux pour proceder à leurs cottisations, & departement : & à leur nomination la charge fut donnée à Tristan Oscan, Pedro Bibero, & Alonce Loppes, lesquels procederent à la cottisation de tous les deniers necessaires à leur embarquement, nourriture des pauvres, & autres frais & dépens qu'il leur conuenoit faire.

Lesdits Oscan, Bibero, & Loppes assiste des principaux d'entre lesdits Morisques, ayant commencé de proceder audits departemens, ledit Loppes fut par eux créé Receueur de toutes les sommes qu'ils leueroient : Mais voicy ce qui en aduint. Loppes ne payant, & ne contentant les marchands de leurs aduances, ils requièrent le sieur

d'Augier d'enjoindre audit Loppes de leur deliurer les sommes qui leur estoient deuës, ou ce qui se trouueroit entre les mains en deduction d'icelles, & faire choix & eslection de quelque personne resleant & capable audit Agde pour à l'aduenir receuoir les sommes de deniers prouenans de la recepte de Loppes : Ce que les Morisques trouuerent bon, pourueu que Loppes continuast de les receuoir premierement de leurs mains : Ainsi du consentement desdits Morisques & des marchands qui fournissoient leur passage, la charge en fut donnée à lean Antoine Iourdan bourgeois d'Agde.

Cela ne fut de grand fruit, car les Commissaires Morisques & leur Receueur ne fournissant les sommes par eux promises, soit par leur meschanceté, ou pource que les plus riches d'entr'eux cachotent leurs commoditez se faisant tous pauvres ; ce fut vne chose pitoyable de voir comme ils faisoient embarquer ces pauvres necessiteux, les exposant à la mercy des ondes & de la faim, sans leur fournir d'aucunes prouisions pour leur nourriture, non pas mesmes à suffisance de biscuit : à raison dequoy ces pauvres abandonnez meslans leurs soupirs & leurs larmes aux plaintes qu'en faisoient les Patrons, qui ne vouloient point courir le risque de soustenir & souffrir le reproche & l'opprobre de leur famine prochaine & de leur desespoir : Et le sieur d'Augier touché du vif sentiment de leur perte, (le Roy ayant déposé entre les mains le soing de leur conseruation) ordonna que pour chaque centaine de Morisques de paye, seroient pris & mis en barque quinze quintaux de biscuit, qui reuient seulement à quinze liures de pain chacun. Ce qui n'estoit pas trop pour vn si long & perilleux voyage fait en temps d'Hyuer, Thunis estant distant dudit Agde d'environ trois cents lieues, & en outre ordonna, qu'aux pauvres ne pouuans subuenir à l'achat dudit biscuit en seroitourny aux dépens des riches par Donnet & Sollerrat marchands commis audit fournissement, à raison de huit liures le quintal.

Par cet ordre donc qu'y mit d'Augier, & par sa diligence, il fit partir en vn mois soixante & dix vaisseaux chargez de ces Morisques, lesquels arriuerent si heureusement à bon port à Thunis & es costes voisines que nul ne perit. Voicy le certificat que luy en donnerent les Commissaires Morisques Aragonois.

Nosotros los Comissarios diputados por el Reyno, de Aragon abaxo firmados, certificamos al Rey, y a la Reyna, y a mon Segnor Duque de Ventador Par de Francia, & Loco teniente General por su Magestad en la Prouincia de Lengadoc, Como el Segnor Dauger Consejero y Mayordomo ordinario del Rey, & Preboste General de Lengadoc y Comissario diputado por sadicha Magestad por nuestra guia y embarcamiento : Nos a guiado y hecho acompañar por sus tinientes y Archeros desde la villa de Toloza asta esta villa de Agde, habiendo recibido todo buen tratamiento, fabor, y merced del y de sus tinientes. Nos an deffendido y conseruado como sus propios hijos y hecho dar, los mantenimientos con toda abundancia y otras cosas necessarias, y a administrado Iusticia en todas las ocasiones que se an ofrecido y le habemos requirido. Y a hecho embarcar veyente y cinco mil Moriscos Aragonenses pequenos y grandes sobre buenos baxeles guiados y lleuados pour muy buenos patrones y marineros, donde quedamos muy contentos y muy obligados à servir selo su Magestad, y rogar à nuestro Segnor por su salud y prosperidad : hecho en Agde à veynte y quatro dias del mes de Nouembre y ano mil seys cientos y dies. Alonso Delopé, Tristan Osce Maiour C R E. Pedro Viuera. Yo Noffre Almocaten, Baile de Mores, Comissario diputado por el Reyno de Aragon.

Ce certificat porte l'embarquement de vingt cinq mille Morisques Aragonois tant petits que grands.

Depuis ledit Augier en fit encor embarquer & passer en Barbarie de trente à quarante mille, tant Grenadins, Castillans, qu'Aragonois. Mais de dire icy si la fidelité leur fut entierement gardée, comme on deuoit, ny ce qui s'est passé en leur embarquement, cela ne se peut pas faire, pour les grandes plaintes que l'on a depuis faites contre Augier, & autres, qu'il auoit employez en ces embarquements. Aussi Loppes comme Procureur des Morisques, s'achemina peu apres à la Cour vers leurs Majestez, & sur vne requeste qu'il presenta au Conseil contre Augier & quelques habitans d'Agde, il obtint commission pour les y faire appeller.

A l'assignation Augier comparoit, & donne ses deffences par escrit, fait imprimer comme vn Factum de ce qui s'estoit passé en l'embarquement des Morisques, & par ses escritures proteste, Qu'il ne s'est meslé aucunement des impositions & exactions leuees sur lesdits Morisques, saisies de leurs hardes, fouillement de barques, ny de l'emprisonnement d'aucun d'iceux : Il produit aussi quelques Certificats, portans, qu'il auoit conduit, & fait conduire seurement par le pais de Languedoc, soixante mille Morisques, les ayant fait embarquer au port d'Agde avec beaucoup de soing & de preuoyance, &

transporter en Barbarie avec leurs biens en toute seureté.

Au contraire Loppes, Procureur des Morisques, continuant ses plaintes, dit, Que ledit Augier, Ioseph Palmier & Jean Antoine Iourdan, habitants de la ville d'Ag'e, sous pretexte de fouiller quelques vaisseaux, pour contraindre les riches Morisques au payement des frais des embarquements des pauvres, en auoient enleué grand nombre de reaux appartenans à diuers particuliers Morisques : & qu'en ceste procedure il s'estoit passé beaucoup de voleries, de larcins, & d'exaction contre droit & equité.

Sur les plaintes de Loppes, le Conseil enuoya à la Cour de Parlement de Paris, la connoissance de ce different, pour le soulagement des parties.

Augier voyant que cet affaire prenoit autre cours qu'il n'auoit pensé, se retira en Languedoc, où il a semblé depuis qu'il n'a cherché qu'à fuir la iustice de ce Parlement : Comme au cōtraire le Procureur des Morisques l'a recherché, & y a pouruiuy ses plaintes avec de la diligence, ayant obtenu adjournement personnel contre Augier, & quelques autres. Pource que l'Arrest qui interuiendra de ce procez, sera digne de remarque, il ne sera oublié. Dieu aydant, d'estre mis cy-apres au temps qu'il sera donné. Voila tout ce que j'ay peu sçauoir de plus remarquable aux diuers passages & embarquemens que les Morisques ont fait en France.

Il se trouuera peu d'exemples aux siècles passez pour entrer en parallèle à ceste-cy : aussi ce esté vne grande entreprise au Roy d'Espagne de bannir & chasser neuf cens mille personnes d'un pais, où leurs predecesseurs auoient habité plus de neuf cens ans continuellement.

Ce dechassement ne demeura aussi sans estre controllé par plusieurs escriuains : les vns l'approuans, pource que depuis quelques annes ces Morisques auoient recherché le moyen de remuer par le support & intelligences qu'ils auoient avec le Turc, & autres Roys Mahometans : mesmes avec quelques Princes Chrestiens. Et d'autres ont diuersement escrit l'intention des Espagnols sur ce bannissement de Morisques, pour le grand profit qu'ils ont laissé en Espagne de leurs immeubles : mais c'est assez parlé d'eux. Voyons comme l'occasion se presenta en ceste mesme année, que le Marquis de S. Germain s'empara de l'Arrache en Barbarie, pour le Roy d'Espagne.

Prise de l'Arrache en Barbarie par les Espagnols.

Si plusieurs Princes de la Chrestienté nonobstant leurs affinitez & parentez ont des partialitez les vns contre les autres : ceux des autres endroits du monde n'en ont pas moins.

Les Roys de Barbarie depuis cent ans, suiuant ce que plusieurs Historiens ont rapporté, en seruent assez de preuue, & tousiours les Roys de Castille, ou de Portugal, en leur donnant secours, se sont emparez de quelque place qui estoit à leur bien-seance : toutesfois le Roy Dom Sebastien de Portugal y allant en personne pour supporter Muley Hamet contre son frere Muley Maluco Abdelmee Roy de Fez & de Maroco, en pensant y profiter, perdit la bataille d'Alcacerquibir, où il fut tué, comme les Castillans afferment : mais le commun des Portugais eroit que non, & qu'apres ceste perte s'estant sauué de la bataille il estoit errant parmy le monde iusques en l'an mil six cens vn, qu'es tant descouuert il fut arresté prisonnier à Venise pour s'estre dit le Roy Dom Sebastien.

Depuis estant tombé entre les mains des Castillans, & mené à Naples, ils l'ont enuoyé en Castille, où il a esté pendu.

Or la faute principale que fit le Roy Dom Sebastien en Barbarie, ce fut qu'estant descendu à Arzille, il laissa derriere luy Arrache ville des ennemis, & s'en alla chercher Abdelmeelec en la campagne d'Alcacerquibir.

Arrache est vne ville forte au Royaume de Fez en la Prouince d'Azgar, bastie sur la mer Oceane à l'entree du fleuve Lucus, sur lequel est assise vne partie d'icelle, & l'autre sur l'Ocean : son port est tres-beau & difficile à prendre, pource qu'il est deffendu d'une forteresse, dans laquelle les Roys de Fez y tiennent d'ordinaire trois cents cheuaux legers, & trois cents harquebusiers en garnison : pource que les Portugais & Castillans tiennent presque toutes les villes maritimes des Prouinces de Habat & Erif, où ils ont de grosses garnisons.

Ceste Prouince icy est depuis la riuere de Nocor le long de la mer Mediteranee iusques au destroit de Gibraltar : l'autre sur l'Ocean depuis ledit destroit iusques au fleuve Lucus, en laquelle le Roy d'Espagne tient maintenant les fortes villes de Tanger, Arzille, & autres.

Sur

Sur la guerre qui s'est esmeuë depuis peu entre le Roy de Fez Muley Xequi & son frere Muley Sidâ, qui sont Mahometans, le cadet a contraint l'aîné de sortir hors le Royaume & venir implorer du secours audit Roy d'Espagne: Mais le feu Roy Dom Sebastien ayant seruy d'exemple à l'Espagnol de ne se fier aux Roys Barbares qu'avec assurance, il traita avec luy, en luy promettant secours, qu'il luy donneroit aussi cent mille ducats pour retourner à l'Arrach (place qui tenoit pour luy) où par argent & autrement il pratiqueroit & regagneroit le plus de gens de guerre qu'il pourroit: au li que pour seureté du secours qu'il luy donneroit, il feroit mettre la forteresse del' Arrache sous la puissance. Suiuant cet accord, le Fezzien retourne à l'Arrache avec l'argent promis dans vn des vaisseaux du Roy d'Espagne, où en peu de temps plusieurs de ses amis & seruiteurs le reuindrent trouuer. L'Espagnol cependant ayant fait dresser vne armee nauale de grand nombre de galeres & autres nauires, & sur icelles fait monter dix mille hommes, il en donna la conduite au Marquis de S. Germain, lequel arriua le 20. Nouembre sur le soir au port de l'Arrache, & sy tint à l'ancre tout le long de la nuict.


Le lendemain matin le Marquis ayant fait conuoquer tous les Chefs dans l'Admirale, & leur ayant communiqué son dessein de forcer l'Arrache en cas que le Roy Maure ne luy tint promesse, il eut assurance d'eux qu'ils s'y comporteroient en gens de guerre: Mais voycy ce qui en aduint: Le Fezzien ne se pouuant dédire de sa promesse, & voyant que l'Espagnol estoit si puissant qu'il le pouuoit forcer, plusieurs des siens & le peuple craignans ce qui leur aduint, qui estoit de tomber sous la puissance d'Espagne, vouloient luy tourner face, mais ayant le Gouverneur du chasteau à sa deuotion, il mit hors la garnison des Barbares qui estoit dans le chasteau, & luy-mesme en donna l'entree & les clefs au Marquis de saint Germain. Au bruit que les Espagnols estoient entrez dans le chasteau, tous les habitans coururent aux armes, & pensans leur resister, apres que plusieurs d'entr'eux eurent finy leurs iours valeureusement durant trois heures de combat, ils tomberent sous la puissance du Marquis qui fit aussi tost arborer sur les tours & clochers vne croix & les armes de Castille. Ainsi ceste forte ville que le Castillan & le Portugais auoient des si long temps desirée, & où les habitans receurent vne grande ruine, est en fin tombee sous la puissance de leur Roy.

Le Marquis de saint Germain donna le nom de Marie à la forteresse del' Arrache, pource qu'il y entra le iour de la Presentation Nostre Dame. Les nouuelles de cet exploit furent apportees en Espagne six iours apres, dont le Roy rendit graces à Dieu: & le peuple en fit des feux de joye. Ce sont les vicissitudes des temps. Iadis les Maures couroyent l'Espagne, & maintenant les Espagnols se promenant en Mauritanie.




ESTAT DV ROYAVME DE PORTVGAL.

SOMMAIRE.

1.  **LENCEINTE**, longueur & latitude du Royaume de Portugal.
Du nombre des villes portans le nom de Cité qui y sont, de ses fleuves & riuieres, & principalement de ses ports & havres.
Des noms & appellations qui ont esté autres fois donnez à ce Royaume.
2. Qualité du pays du Royaume de Portugal, de la fertilité d'iceluy, de ses vins, huiles & necessite de bleds, de ses mines d'or & d'argent, & de l'abondance de son sel.
3. Des richesses & reuenus annuels du Royaume de Portugal.
4. Despence annuelle dudit Royaume de Portugal.
5. De la iustice & gouuernement de la ville de Lisbonne & de tout le Portugal.
6. Des forces, Citadelles & fortteresses estrangeres, appartenantes aux Portugais.
7. De la ville de Lisbonne, & de ses habitans.
8. Catalogue des Roys qui ont regné en Portugal, iusques au Roy Philippes fils de l'Empereur Charles V.

SITUATION.

 E Royaume de Portugal a 285. lieues de circuit, sçauoir 135. lieues le long des costes de la mer, & 150. lieues d'enceinte du costé de la terre. En Portugal & Espagne, il y a 17. villes qui portent le nom de Cité, lequel nom n'est attribué sinon aux villes Capitales, Episcopales & priuilegiees; les autres sont simplement appellees villes, soit qu'elles ayent portes & murs, ou qu'elles n'en ayent point: de telles villes & bourgades, il y en a en Portugal 470. sans compter les villages & les hameaux: Il y a trois principales riuieres avec havres, a sçauoir Lisbonne, Porto & Setoral, & encore trois autres au pais d'Algaue, ou Algarbe, qui est aussi de la dépendance de Portugal, a sçauoir Tauilla, Lagos & Villa Noua, la riuere de Lisbonne.

Le Royaume de Portugal estoit autresfois nommé Lusitanie & Espagne vltérieure, ayant pour ses bornes du costé du Nort les riuieres de Mingo & d'Auie, iusques à la ville de Ribadanie, qui est sur le bord de l'Auie: de ce costé il regarde la Galice, & de là en tirant vers le Leuant vne ligne iusques à la Mirande assise sur le Duero, de là encores vers le Midy, il faudra pour prendre les bornes tirer presque tout droit iusques à l'emboucheure de la riuere d'Ante, & de ce costé là il confine avec la Castille, l'Estremadure & l'Andaluzie, & du Midy & de l'Occident, il a pour sa borne la mer Athlantique, ou du Ponent.

Ce Royaume a de tour 899. mille, ou selon quelques vns 850. & en a du costé de mer 470. il est long & estroit, & assis pour la plus grande partie sur la mer Oceane, il est long de 320. mille & large de 60. & est diuisé en deux Royaumes, dont l'un retient le nom du tout, l'autre s'appelle Agarbe, mot Arabe, qui signifie partie Occidentale: l'un est diuisé de l'autre par vne ligne qu'on doit tirer imaginaiement d'Alcotin à Odechere, qui sont deux chasteaux, dont l'un est assis sur la mer du Ponent, l'autre sur la riuere de Guadiane. L'Algarbe est vers le Midy & Portugal vers le Nord. Il passe par ce Royaume beaucoup de belles & grandes riuieres, comme la Guadiane, le Tage, le Mondegue, le Duero, le Mingo, qui ont presque toutes de l'or meslé parmy leur sable.

Guadiane passe par le Portugal l'espace de 7. lieues, le Tage 18. le Duero 28. & le diuise de la Castille. L'Algarbe contient les villes de Tauile, Lagos, Silues, dont Tauile & Lagos ont d'aillez bons ports, outre lesquels (passé le Cap de S. Vincent, dit des anciens Sacré Promontoir)

Promontoir) il y a encore celuy de Villeneufue & quelques autres qui sont petits.

Le Portugal a trois fort bons ports, c'est à sçavoir celuy de Setubal à 10. mil long de Lisbonne vers le midy: vn Golphe de long 30000. & large de trois. Celuy de la cité de Port que le Duero fait & celuy de Lisbonne qui est plus grand & qui est fait par le Tage, par lequel on entre 15. voire 20. mil avant dans terre avec de fort gros vaisseaux: & Lisbonne au iugement de tous est la ville la plus peuplée de la Chrestienté apres Paris: Elle contient cinq collines, entre lesquelles s'estend la plaine iusqu'au fleuve, elle peut faire 20000. maisons divisées en 25. parroisses. En la plus haute colline, on void vn chasteau du tout ancien qui n'est fort qu'à raison de son assiette. Il n'y a point de soldats en garnison, & ce lieu sert seulement de prison aux gens de qualité. On trouue à l'emboucheure du Tage, Cascais où les vaisseaux attendent la maree pour monter à Lisbonne, ou le vent pour faire voile. Les autres citez sont, Coimbre, où il y a vne bonne vniuersité fondée par le Roy lean III. (il y en a vne autre fondée par le Cardinal Henry qui fut depuis Roy) Lamego, Viseo, Miranda, Porto, Portalegre, Guarda, Laira, Eluas: Et quoy que Bragance n'aye pas vne Eglise Cathedrale, toutesfois elle jouit du priuilege de cité, & est sous vn Duc si puissant & si riche qu'il sèble que c'est chose monstrueuse de voir qu'en vn si petit Royaume il y ait outre le Roy vn si grand Prince, veu qu'on tient qu'un tiers du peuple du Royaume luy est sujet, & est dans ses terres. Outre ce Duc il y en a encores deux autres, vn Marquis, dix-huit Comtes, vn Viconte & vn Baron. Outre les citez on compte que le Portugal a ou des chasteaux ou d'autres places fermées de murailles, iusques au nombre de 470. & d'auantage, qui sont pour la plus grande part entre le Tage & le Migne. La partie du Royaume qui est entre le Tage & la riuere de Guadiane est peu peuplée: mais celle qui est entre le Duero & le Migne, contient vn peuple innombrable, mais pauvre, & plus semblable à celuy Galice, avec qui il confine qu'aux Portugais. Ce Royaume fut jadis de beaucoup plus peuplé qu'à present: Et cela vient du grand nombre des loingtaines entreprises du Brasil, de l'Ethiopie, des Indes, de Malaca, de Malucco, & de plusieurs autres Isles, où il s'est perdu & se perd encore tous les ans beaucoup de gens à l'aller ou au retour, & outre il y en a tant qui s'arrestent en ces lieux esloignez, que le Portugal en demeure desnue d'hommes: le nombre de peuple qui y estoit, a peu estre recogneu en ce que le Roy lean passa à l'entreprise d'Afrique avec quarante mil hommes, & ceste entreprise fut poursuivie avec de grandes forces par Alfonse V. qui fut surnommé Africain pour ceste occasion. Mais depuis que les Indes furent descouuertes le Roy Emanuel enuoya à l'entreprise d'Azamor vne armee de vingt mil hommes de pied, & trois mil cheuaux.

QUALITE.

L'Air de Portugal est tres-bon, & est rafraischy à bon escient par le flux des eaux qui est fort grand en toute ceste coste pleine de golphes de mer. Son assiette est pour la pluspart montueuse, & principalement en Algarbe: Les fruiets de la terre y naissent en plus grande perfection qu'en aucune autre partie de l'Europe: Il abonde en vin, miel & huile, mais il a faute de bled & de froment qu'on y porte du Royaume de France, & des pais Septentrionaux, il ne manque pas de mines d'or & d'argent, & d'alun, ny de marbre blanc: Il a du sel pour fournir le pays & ses voisins, mais la partie du Royaume, qui est entre le Tage & la riuere de Guadiane, est peu habitée, & le pays est presque tout montueux & stérile.

De la Iustice & Gouvernement de Lisbonne & Portugal.

Il y a premierement le Tribunal, appelé le Relats du Ciuil, dont le premier Iuge est appelé le Regidor, de la part du Roy, y ayant encore deux autres Iuges pour assesseurs: Puis le Tribunal criminel avec deux Iuges. Vn auditeur, ou iuge du Peage du Roy nommé Alfandega: Plus vn Iuge des proprietéz & benefices: huit Iuges des Orphelins, vn Iuge des hospitaux: vn surintendant appelé Correcteur des affaires des Indes, de Guynée, Cap verd, Ile de S. Thomas & Bresil. De tous ces iugemens, il y a appel au Relats du Ciuil. En outre le Tribunal des supplications dont les Iuges sont appelez Desembargadores: c'est à dire Deschargeurs, lesquels sont de grād credit & autorité plus que ne sont les Cōseillers & Presidés en nos quartiers. A ceste iustice viennent les appels du Tribunal Ciuil: leur superintendant est appelé Correcteur des supplications, il y a aussi deux Iuges nommez Desembargadores du Facenda, comme qui diroit Curateurs & Iuges des biens du Roy: Ceux-cy iugent des droicts & plaident entre le Roy & les particuliers, & d'iceux il n'y a point d'appel: en outre, il y a le Conseil du suprême Tribunal ou le haut Conseil de ceux qu'on appelle Desem-

ge, ils sont appelez seruiteurs de la maison du Roy, qui est vn grand honneur, ausquels est assignee quelque portion de ces Moradies, pour auoir de l'orge & de l'auoyne à nourrir leurs cheuaux, jaçoit que quelquesfois cela ne fuffise pour leur auoir des fouliers, & ne leur sert que d'un petit tesmoignage de faueur, dont ils se tiennent plus fiers que de tous les biens du monde, monte annuellement à la somme de huitante mille ducats.

Les despences & necessitez requises au seruice de la Chambre & maison du Roy, sont d'ordinaire de deux cens mille ducats par an, qui souloient estre baillez à ferme, comme ils sont encore auourd'huy, avec les despens & tables du Gouverneur ou Vice-Roy de Portugal.

Pour l'entretienement des forteresses du Royaume de Portugal, deux cens mille ducats.

La somme de tous les susdits despens, montent annuellement à mil six cens huitante mille ducats.

De la ville de Lisbonne.

LA ville de Lisbonne a trente deux Eglises parrochiales, & plus de douze mille maisons, qui cōprennent plus de vingt mille demeures, sans compter la Cour & les depēdances, & les Eglises & Monasteres: Le nombre des habitans y est de plus de cent vingt, entre lesquels il y a plus de dix mille Mores & Esclaues, & ainsi appert par les roolles & signatures des Pasteurs des parroisses qui sont obligez chacun en son quartier & parroisse, sans nulle exception, d'exhiber aussi les memoires de ceux qui suivent la Cour, & de ceux qui se trouuent es Monasteres, Conuent, Hospitaux & autres lieux de pieté, comme aussi des estrangers & passagers: car la ville est tellement remplie de Monasteres, Conuents & Hospitaux qu'ils montent à peu pres autant que les maisons de la ville. Le nombre des Chappelles & autres petits Oratoires de la Vierge & des Saints est infiny. La ville a plus de troiscens cinquante rues, sans compter les ruelles & venelles, qui s'y trouuent en tres-grand nombre.

Le douzieme Decembre 1581. mourut le Duc d'Albe à Lisbonne, dont il estoit Gouverneur, lequel fut nourry de lait de femme l'espace de quatorze iours auant sa mort: son corps ayant esté embausmé, fut emporté en son pays d'Albe pour y estre inhumé.

Au commencement de l'an 1582. partit de Lisbonne vne grande flotte sous la conduite du Marquis de Sainte Croix, accompagné d'une grande suite de Noblesse desiruse de seruir au Roy, pour aller es Isles de Flandres appelez Afores, autour desquelles se tenoit Dom Anthoine, avec bon nombre de nauires François, sous la conduite de Philippe Strosse Admiral, là où apres vn grand conflict & grand nombre de tués de part & d'autre, le malheur tomba sur les François, desquels plusieurs furent pris des principaux Gentils-hommes, ausquels le Marquis fit trancher la teste par vne insatiable cruauté, en l'Isle de S. Michel, Dom Anthoine se sauua dans vne fregatte tandis que Philippe Strosse estoit en vne petite barque fort blessé dont il mourut depuis. Ceste victoire haussa le col aux Portugais, & tourna au grand honneur du Marquis, auquel on prepara de grands triumphes. Le Roy ayant eu tel succez, commit le gouvernement de Lisbonne à Albert d'Autriche, Cardinal fils de sa sœur, & se retira avec l'Imperatrice sadite sœur, & toute sa Cour à Madrid

CATALOGVE DES ROYS DE PORTUGAL, IVSQVES AU Roy Philippe, fils de l'Empereur Charles V.

LE I. Roy de Portugal a esté Dom Alphonse Henriques, fils du Comte Dom Henry, qui selon le dire des Chroniques, estoit fils du Duc de Lorraine, lequel se vint rendre à la Cour du Roy de Castille, pour estre employé contre les Marrans mescredoyans, qui pour lors occupoient encore la pluspart des Espagnes, & tout le pays de Portugal, & y faisoient guerre contre les Castillans & autres peuples voisins: en laquelle guerre il se comporta si valeureusement que le Roy ne sceut mieux le recompenser qu'en luy donnant sa fille pour épouse, & pour douaire le pays de Portugal, qu'il auoit conuesté, avec tout ce qu'il pourroit encore acquerir, & fut appellé comte de Portugal, & naquit ledit Alphonse son fils l'an 1094. lequel conquist la pluspart du pays de Portugal sur les Morisques, apres la mort de son pere, il porta le tiltre de Prince l'espace de vingt sept ans, lequel titre nul ne peut porter sinon le fils aîné du Roy & l'heritier du Royaume, & ayant atteint l'age de quarante cinq ans, fut couronné Roy par priuilege & permission du Pape, & dès lors le pays de Portugal, fut erigé en Royaume. Le premier Roy de Portugal se maria aagé de cinquante deux ans, & eut vn fils & trois filles, & de plus eut vn fils & vne fille bastards: il

regna 46 ans, deceda en la ville de Coimbre, où il est enterré au Monastere de Sainte Croix que luy mesme auoit fondé comme aussi les Monasteres d'Alcoba, & S. Vincent hors Lisbonne, appelé du vulgaire San Vincente de fora.

Ce Roy conquist du commencement la ville de Lisbonne sur les Morisques ou Sarrafins, à l'ayde & par le moyen des Sarrafins, qui faisant le voyage de la Terre Sainte, enuiron le temps de la prise de Damiette, furent contrains pour la tempeste de descendre en Portugal, lors que le Roy estoit occupé au siege de ladite ville, & arriuerent fort à propos pour assister le Roy audit siege, auquel ils se comporterent en telle sorte qu'en peu de temps non seulement ladite ville, mais aussi plusieurs autres places, furent reduites en la puissance du Roy.

En consideration duquel bon seruice le Roy honora la nation Allemande de particuliers & perpetuels priuileges & immunitéz par dessus tous les naturels du pais: ordonnant par Edict irreuocable que tous les Allemands qui de là en auant voudroient demeurer ou trafiquer en son pays, seroient francs & libres de toutes tailles & impôts de tout ce qui leur seroit de besoin pour leurs personnes, maisons, & familles, de pouuoir porter tels accoustrements & joyaux, eux & leurs femmes & leurs domestiques que bon leur sembleroit: ce que toutesfois n'est permis aux Portugais mesmes, quoy que naturels du pays: car ils ont vne loy touchant leurs habits & l'estoffe qu'un chacun doit porter selon sa qualité.

Item de pouuoir aller de nuict & hors de temps à leur commodité avec cinq ou six seruiteurs, avec lumiere ou sans lumiere & avec telles armes & defences qu'il leur plairoit, ce qui n'est permis aux naturels en aucune maniere.

Item de ne pouuoir estre repris d'aucune iustice en leurs maisons, ny estre iugez ou recevoir sentence, sinon en cas de crime de leze Majesté, & ce seulement par le Iuge ordonné à cela, appelé le Iuge des Allemands.

Item que leurs maisons, tant celles qu'ils ont à loüage qu'en propriété, ne pourront estre prises pour le seruice du Roy ou de sa Cour, comme à cela les autres sont suiets.

Item qu'ils ne pourront estre contraincts à aucun seruice ou charge du pays ou du Roy, comme sont les naturels, ny mis à aucune contribution pour la deffence ou necessité de l'Estat.

En voyageant par pays, ils doiuent estre seruis & accommodez deuant tous autres pour leur argent, & autres semblables priuileges & franchises qu'il seroit trop long de reciter: & sont lesdits priuileges encore à present comme de tout temps, estroitement entretenus & obseruez, & irreuocablement confirmez par les Roys, & iournellement accreuz par les nouveaux seruices qu'ils recoiuent de ladite nation.

Dom Sancho fils du Roy susmentionné, fut le deuxiesme Roy de Portugal, & nasquit l'an 1154. & fut fait Roy à l'aage de 31. an, & eut quinze enfans, que fils, que filles, & regna 27. ans, il deceda en la ville de Coimbre l'an 1212. aagé de 65. ans, & fut inhumé au Monastere de S. Croix pres de ses peres.

Dom Alphonse III. de ce nom III. Roy de Portugal, fut estably Roy à l'aage de 15. ans, & a eu trois fils, qui en leurs temps ont esté tenus pour Saints, à sçauoir, Dominique, François & Anthoine: Il deceda l'an 1223. & gist au Monastere d'Alcabelle.

Dom Sancho Capello, fils dudit Alphonse, fut proclamé Roy, estant aagé de 16. ans & mourut à Toledé l'an 1247. & gist là en la grande Eglise.

Après le decez dudit Sancho son frere le Comte de Bologne, fut couronné pour Roy, & fut le V. Roy de Portugal, lequel regna 31. an, & mourut à Lisbonne l'an 1279. & gist au Monastere d'Alcabelle.

Dom Denys, fils du deffunct, fut couronné Roy de Portugal à Lisbonne, estant aagé de dix-huict ans, & fut le VI. Roy de Portugal, le regne duquel dura quarante six ans, & mourut en la ville de S. Arein, l'an 1315. le 20. Ianuier, aagé de soixante quatre ans, & gist au Monastere d'Oliuellas, enuiron à deux lieues de Lisbonne, lequel de son viuant il auoit fondé. Il auoit espousé Dona Isabella, fille de Dom Pedro Roy d'Aragon, qui a esté canonisé pour Saint. Son sepulchre est en la ville de Coimbre, là où se font plusieurs miracles à ce qu'on dit.

Après cestuy-cy regna son fils Dom Alphonse, surnommé le Braue, qui fut couronné Roy en la ville de S. Areyn, estant aagé de 35. ans, & fut VII. Roy de Portugal, & regna 31. an, il mourut à Lisbonne en May 1356. & gist au grand Chœur de la grand Eglise. Cestuy-cy conquesta Salado sur les Morisques par l'assistance du Roy de Castille.

Son fils Dom Pedro a esté VIII. Roy de Portugal, & regna en bonne paix & iustice:

il mourut l'an mil trois cens soixante six, & gist au Monastere d'Alcabasse. Il laissa vn fils nommé Dom Fernando, ayant eu deux fils de Dona Vnes ou Agnes de Castro, auant leur mariage, sçauoir Dom Iean & Dom Denys.

Après son trespas, sondit fils Fernando fut couronné neufiesme Roy de Portugal, & espousa Dona Lianor Gonçalues Telles, laquelle il rauit à son mary Lorenca Vaas da Chuna, lequel il bannit du pays: au reste il aymoit ses subiets, & n'espargnoit point les malfaisans, vagabonds & desbauchez: son regne dura dix-sept ans, & deceda en l'an mil trois cens huictante cinq, aagé de quarante trois ans, son sepulchre se void au Chœur de l'Eglise de S. François en la ville d'Areyn.

Après la mort de cestuy cy, Dom Iean vint de Castille avec Dona Beatrix sa femme pour receuoir la Couronne de Portugal, mais le fils bastard du Roy Dom Pedro, frere du defunct Roy Dom Fernando luy résista, & luy donna bataille, en laquelle il le vainquit: ce fut en la plaine de S. George, en laquelle pour memoire perpetuelle de ceste victoire, il fonda vn riche Monastere, appelé le Monastere de la bataille. Et fut le susdit bastard couronné dixiesme Roy de Portugal, étant aagé de trente huit ans, il deceda le quatorziesme d'Aoust mil quatre cens trente trois, & fut enseuely au susdit Monastere de la Bataille par luy construit: Ce mesme Roy gagna la ville & forteresse de Septa sur les Morisques en Barbarie.

Après luy regna son fils Dom Edoüart, onzième Roy de Portugal, qui vesquit quarante deux ans, dont il en regna cinq, & deceda au Palais de Ronuen de Thomar, l'an mil quatre cens trente huit, & gist au Monastere de Bataille.

Dom Alphonse fils du susdit Roy, nasquit à Sainct Areyn, l'an mil quatre cens trente deux, & d'autant que lors de la mort de son pere, il n'auoit que six ans, son oncle Dom Pedro eut la regence iusques à l'an mil quatre cens quarante huit, lors commença ledict Alphonse à regner, & fut le douzième Roy de Portugal. Il mourut à S. Areyn en la mesme chambre qu'il nasquit le vingt-huictiesme Aoust mil quatre cens huictante vn, & gist avec ses predecesseurs au Monastere de Bataille.

Après luy regna Dom Ioan surnommé le Grand deuxiesme de ce nom, treiziesme Roy de Portugal, lequel nasquit à Lisbonne le quatorziesme May mil quatre cens cinquante cinq. Cestuy cy fit sententier & decapiter en public Dom Fernand, Duc de Bergunce en la ville d'Euora, le vingt-deuxiesme Iuin mil quatre cens huictante trois, & de sa propre main tua d'un coup de poignard Dom Domingo Duc de Begia, frere de la Royne Leonor sa femme, & donna la Duché à Dom Emanuel son frere, il vesquit quarante ans, & mourut à Aluor étant aux Bains le 25. Octobre mil quatre cent nonante cinq, & gist au Monastere de Bataille avec ses predecesseurs.

Il ordonna son successeur par testament Dom Emanuel de Viseu qui a esté le quatorziesme Roy de Portugal, lequel fut proclamé Roy le vingt-septiesme Octobre mil quatre nonante cinq. Cestuy cy par tous ses Royaumes fit baptiser tous les Iuifs soit qu'ils le voulussent ou non, sur peine de perte de biens, l'an mil quatre cens nonante neuf, & fit chasser tous les Morisques qui habitoient à Lisbonne hors de la porte de Moreria. Du temps de ce Roy, la commune esmeut vne sedition contre les nouveaux Chrestiens ou Iuifs baptisez, desquels furent massacrez quelques centaines d'hommes, femmes & enfans, leurs maisons pillées & bruslees, leurs biens & marchandises enleuees. Le Roy fit rechercher les principaux auteurs de ceste sedition, en fit faire punition exemplaire, au moyen dequoy le trouble cessa. Ce fut ce Roy qui premierement fit decouurer les Indes Orientales par ses Capitaines & Pilotes. Item les costes du Royaume du Prete lam: il conquesta aussi les villes & forteresses de Saffin, & Azamor en Afrique: Il deceda à Lisbonne le iour de Sainte Lucie 1521. son sepulchre est au Monastere de Bethleem.

Il eut pour successeur Dom Ioan troisieme de ce nom son fils quinzième Roy de Portugal, qui nasquit en Iuin mil cinq cens vingt-vn, en la ville de Lisbonne, où il fut couronné l'an mil cinq cens vingt-vn: il estoit de naturel benin & debonnaire, grand amateur de la Religion & des gens d'Eglise, & aussi des bonnes lettres; Il institua vn nouveau College en l'vniuersité de Coimbre, il mourut le onzième Iuin mil cinq cens cinquante sept, & fut enseuely au Monastere de Bethleem, dit des Rostiers Allemands.

Après la mort fut couronné Dom Sebastien seiziesme Roy de Portugal fils du Prince de Portugal qui estoit fils dudit Dom Ioan, qui du viuant de son pere, eust à femme Ieanne fille de Charles le Quint, sœur du Roy Philippe: Ce Prince mourut laissant sa femme enceinte dudit Dom Sebastian, qui après le decez de son ayeul fut déclaré Roy, & nasquit le propre iour de S. Sebastien l'an mil cinq cens cinquante trois: il passa avec vne grande armee en Afrique, pour la conquerir l'an mil cinq cens septante huit, mais il y fut def-

fait par les Mores , avec la pluspart de ses gens.

Après ceste perte de Dom Sebastien , fut proclamé Roy de Portugal le Cardinal Dom Henry , grand oncle dudit Dom Sebastien , & fut 17. Roy de Portugal , lequel mourut l'an 1580. laissant pour heritier de la Couronne par testament le Roy d'Espagne Dom Philippe , comme droit successeur de ladite Couronne , en tant que son pere Charles V. avoit espousé la plus vieille fille du Roy Dom Emanuel , mere du susdit Dom Philippe , & sœur de l'ayeul de Dom Sebastien & du susmentionné Dom Henry , combien qu'il y eust encore vn frere du susdit Dom Henry nommé Louys , qui après son decez laissa vn fils nommé Dom Antonio , qui estoit Prieur d'Ocrato de l'ordre des Croisez de S. Jean , lequel fut proclamé Roy par les Portugais , mais par la grande force & violence du Roy d'Espagne , qui avoit achepté la pluspart de la Noblesse Portugaise , le susdit Dom Antonio fut supplanté & chassé , & le Roy d'Espagne venant en personne en Portugal y fut receu & proclamé Roy dans le Monastere de Thomar par les trois Estats du Royaume , à sçavoir les Ecclesiastiques , la Noblesse & les Procureurs des villes , par le moyen dequoy la Couronne de Portugal , est venue à ceux de Castille ou Espagne , après avoir eu ses propres Roys en nombre de 17. l'espace de 442.

DES ISLES DE MAIORQUE ET MINORQUE, ET AUTRES.

LE Roy d'Espagne possède encores dans la mer Mediterranee quelques Isles, que ie trouue à propos de descrire.

Les Isles Baleares, ou Gymnesies jadis, & maintenant Maiorque, & Minorque, font aujour d'huy vn Royaume, dont le Roy d'Espagne prend le titre.

Maiorque, & vulgairement Mallorque, est plus proche de l'Espagne que Minorque, & n'est esloignée d'Espagne, que de la nauigation de quatre ou cinq heures: & de Minorque de 14. mille. Quelques vns disent qu'elle a de tour 240. milles, les autres 300. & quelques vns 480. Strabon la fait longue de 600. stades, qui font 75. milles, & large de 25. milles: mais les modernes ont trouué beaucoup plus de largeur, c'est à sçavoir enuiron 100. milles. Et par ce moyen sa longueur sera beaucoup plus grande que Strabo n'a écrit.

Il y a vne ville du nom mesme de l'Isle, qui est la capitale de toutes ces Isles. Elle s'appelloit anciennement Palme, & aujour d'huy il y a vne bonne Vniuersité, où Raymond Lulle est en grande reputation, de sorte que l'on y entretient tousiours à grands gages vn homme sçauant, pour enseigner publiquement la doctrine de ce Lulle. Il y a aussi vne autre ville nommée Bolence, que les habitans appellent Pollence, qui regarde le Midy, de mesme que Maiorque est du costé du Septentrion.

QUALITE'.

Ceste Isle est aspre, & sterile pres de la mer, mais ailleurs les costaux, les plaines, & les vallées rapportent assez de vin, huile, de froment, & de fruiets. Sur tout il y vient de bonnes huiles, qu'on porte de là à Valence, en Flandres & en Italie. On y fait aussi de fort bons fromages, qui surmontent en bonté tous ceux qu'on vend à Rome, & en Espagne. D'auantage les habitans font vn grand trafic de gros draps de laine, & les portent autour de l'Isle de tous costez, voire iusques en Sicile. Il n'y a point de bestes nuisibles, sinon des conils, qui leur ont fait bien souuent beaucoup de dominages. On y trouue vn nombre incroyable de cerfs.

MOEURS.

Les habitans de ces Isles escumoient autresfois tout ce qu'ils rencontroient, & estoient cruels & sauvages, habitans dans les rochers, n'ayans autre soin que d'espier ceux qui voyagoient sur mer. Ils auoient de petits vaisseaux mal polis qui estoient legers: Vne fois ils apperceurent de loing l'armée des Romains, & pensans que ce fust quelque proye, ils oferent bien aller au deuant d'eux, & de premiere abordee coururent les vaisseaux des Romains de pierres & cailloux: mais les Romains les contraignirent en fin de fuir, puis les allerēt trouuer où ils s'estoient retirez pour acheuer de les perdre. Ils n'vsoient point anciennement de monnoye d'or ny d'argent. Ils firent jadis la guerre pour les Carthaginois, & pour leur recompense ils n'en rapporterent que les femmes & du vin. Ils vsoient de frondes, & s'en sçauoient extremement bien ayder, à quoy leurs meres les accoustumoient leur mettant du pain au bout d'un baston, contre lequel ils iettoient des pierres, ne leur estans permis de manger qu'après auoir abbatu ce pain.

Il3

Ils sont maintenant civilisez comme leurs voisins, & sont de complexion amoureuse aussi bien qu'anciennement.

Assez prez de Majorque vous avez les petites Isles de Dragonete, & Cabrere.

L'ISLE MINORQUE.

Minorque est plus Orientale que Majorque, & son tour est de 150. milles, & sa largeur de 60. Elle est esloignee de l'Espagne de 150. milles. Du temps de Ptolomee il y avoit deux villes, sçavoir *Iaua*, qui s'appelle maintenant Citadelle de *Mago*, qu'on nomme à ceste heure Minorque du nom de l'Isle: Elle a beaucoup de villages.

Au riuage de la mer elle est environnee de hautes montagnes garnies d'arbres espais. Au reste quoy que ceste Isle soit moindre que l'autre, toutesfois elle ne luy cede pas en bôté, ains au contraire on y fait vne grande nourriture de bœufs & d'autre bestail, & principalement de grands mulets, qui ont plus de voix que tous les autres. Ceste Isle a deux ports, c'est à sçavoir Maon, & Fernelle.

De nostre temps ces Isles ont vn Royaume à part, qui comprend encore les Pithieuses, dont l'vne nommée iadis par les Grecs *Ophieuses*, & par les Latins *Colubraria*. a maintenât le nom de Formentere, & a de tour septante milles, & est esloignee de terre ferme de huitante milles.

Ceste Isle est deserte pour la plus grande part, à cause des serpens qui y sont en grand nombre, & font mourir beaucoup d'hommes.

L'autre est Euisse, qui en est esloignee de 10. milles, & de la terre ferme 50. & son tour est de plus de cent milles.

Le terroir de ceste Isle chasse les serpens, & ne peut souffrir aucunes bestes nuisibles, si non les conils qui mangent bien souuent les bleds. Ceste Isle abonde en bleds & en toute sorte de fruits.

On leue tous les ans en ceste Isle grande quantité de sel. Car il y a vn certain temps auquel la mer regorge iusques sur les terres, & lors les habitans ferment le passage par où l'eau est entree, puis on laisse ainsi ceste eau sans la troubler, & lors il se fait de si grands monceaux de sel, que non seulement Majorque, & Minorque en sont pourueuës, mais encor on en porte de grands nauires chargez en Italie, où l'on en fournit plusieurs villes.

Mais afin de dire comment le Royaume de Majorque a este ioinct à la Couronne d'Espagne, vous devez sçavoir que les Mores d'Afrique tindrent ces Isles iusques environ l'an de N. Seigneur 1240. que Ferdinand Roy de Castille les chassa premierement de Majorque. Mais les Mores s'y estants reiettez il fallut que Jacques d'Aragon (fils du Roy Pierre, qui fut tué deuant Muret soustenant les Albigeois heretiques) y allast avec ses forces: & lors secouru dudit Ferdinand il fit si bien que les Mores en furent chassés, & soudain il porta le nom de Roy de Maiorque, & de Minorque, environ l'an 1240. Et voila le droict que les Roys d'Aragon ont en ces Isles, si bien que le Royaume d'Aragon ayant esté ioinct à celui de Castille par le mariage de Ferdinand & d'Isabelle, les Roys d'Espagne qui en sont descendus les possèdent à iuste prix.

Au tour des Pithieuses, c'est à sçavoir de la Fromentere & d'Euisse il y a encor trois petites Isles, à sçavoir Vedran, Conirello, Dragomago. Et au dessus d'Euisse entre Maiorque & la bouche du fleuve Ebro il y a vne petite Isle deserte qui se nomme Mancolibre, & en la bouche mesme de ce fleuve l'Isle d'Alfaques, que ce fleuve & la mer font ensemble.

Finalemēt assez pres du port de Cartagene il y a l'Isle vulgairement appelle Sombraire, qui est petite, & n'a rien qui merite qu'on en discoure.

SOMMAIRE.

1. **D**IVERSES appellations du Royaume de Naples dans les histoires, & la description de son estendue & de ses bornes.
2. Divisé en six Prouinces, premierement, aujour d'huy en douze, dont la premiere est la terre de Labeur.
3. Des Isles & Ports plus remarquables de ce Royaume.
4. Singularités qui se trouuent en ce pays de Naples, sont les beaux cheuaux de quatre races que le Roy d'Espagne y tient, les sources d'eaux medecinales & bains de diuerses vertus, un champ de soufre, environné de rochers bruslans, d'où se tire l'alun: montaigne d'Astrune, la Tarantule, dont on chasse le venin avec le chant & le son des instrumens.
5. Description du naturel & mœurs des Neapolitains, tant anciens que modernes, & leur façon de viure.
6. Richesses de ce Royaume, venantes du commerce avec les Venitiens & du trafic d'amandes, saffran, soyes, huiles, vins, cheuaux & coral avec les estrangers.
7. Forces du Royaume de Naples, en quoy consistent, quel nombre de gens de guerre, & de vaisseaux de mers entretenus ordinairement, ses principales forteresses, villes & chasteaux.
8. Police & gouvernement, consistans en sept Vice-roys, dont le General demeure à Naples.
9. Archeueschès qui sont au Royaume de Naples.
10. Denombrement des Roys qui y ont regné iusques à present.



1. E Royaume qui comprend presque la moitié de l'Italie, prend le nom de la principale ville qui s'y trouue, & les Historiés l'appellent tantost de ceste sorte, tantost le Royaume de Pouille, tantost le Royaume de Sicile mesme. Car quelques Roys qui ont possédé le Royaume de Naples, & celui de Sicile tout ensemble, se nommoient de leurs tiltres Roys des deux Siciles, c'est à sçauoir de celle qui est de par deçà, & de celle qui est de par delà le Far, ainsi que l'ont pratiqué Frederic deux. Charles d'Anjou, & Alfonse d'Aragon, de Naples & de Sicile.

Ce Royaume commence à la riuere de Trante, dont l'emboucheure tend vers le Septentrion, & depuis Terracine pres du fleue Vfense, qui se degarge dans la mer de Toscane, & s'estend iusques au destroiët de Sicile il est enfermé entre la mer Adriatique & celle de Toscane, comme vne presque Isle. Il a pour ses bornes du Couchant les deux riuieres d'Vfense, & de Trante, du Nord la mer Adriatique, du Midy la mer de Toscane, & de Sicile, & du Leuant la mer Ionique. On collige sa mesure en ceste sorte. Depuis Terracine iusqu'à Naples on compte quatre-vingts milles, depuis Naples iusques au Cap du Golfe de Policastro cent quarante sept milles. De là iusques à Rhege de Calabre cent quatre-vingts milles; de Rhege iusques au Cap de Spartiuento cent trente trois milles. De là iusques au Cap des Colonnes cent quatre-vingts quinze milles: du Cap des Colonnes iusques à Tarente deux cents milles. De Tarente iusques au Cap de Sainte Marie trente milles. De là iusques au Cap d'Otrante vingt-six milles. De ce Cap iusques à celui de S. Ange deux cens vingt-deux milles, & de là iusques au fleue de Trante deux cens milles. Et toutes ces sommes reduites en vne font mil trois cents dix-huict mille, & tel est le tour qu'on peut faire en voyageant par eau: à quoy si l'on adiouste cent cinquante milles qu'on compte de largeur iusques à la borne du couchant, selon le chemin qui se fait par terre, le produit sera de mil quatre cens soixante huict milles pour tout le tour du Royaume de Naples: il ioinët à l'estat de l'Eglise par l'espace de plus, cent cinquante milles.

2. Alfonse premier Roy d'Aragon, de Naples, & de Sicile, le diuisa en six Prouinces, c'est à sçauoir en terre de Labeur, Principauté, Basilicate, Calabre, Pouille & Abruzze: mais il fit apres trois parties de la Pouille, diuisant en terre d'Otrante, terre de Bary, & Capitanat ou

Capitanerie, Ferdinand Roy d'Espagne, & Louys XII. Roy de France le diuiserent en parties égales en telle sorte que la Pouille & la Calabre demeurèrent à l'Espagne & la terre de labeur avec la ville de Naples, & l'Abruzze à la France, aujourdhuy on le diuise communement en douze parties: c'est à sçauoir en Terre de labeur: Abruzze tant deçà que delà, Pouille pleine, Capitanerie, Principauté tant deçà que delà, Basilicate, Calabre haute & basse, terre de Barri & d'Otrente. Il contient deux mille & sept cens lieux peuplez, dont il y a vingt qui sont Archeueschez, cent & vingt sept Eueschez & mille quatre cens places où il y a enuiron deux millions d'ames.

On trouue donc en costoyant la mer la Terre de labeur, ou Campagne heureuse, dont Capoue où Annibal se ramolit avec son armee parmy les delices, estoit anciennement la capitale ville. Et mesme il y a vn ancien qui a escrit que les Romains estimoient trois villes capables de la grandeur del'Empire, c'est à sçauoir Carthage, Corinthe, & Capoue: les deux premieres comme estans esloignees de Rome furent ruinees par les Romains, qui delibererent mesme longuement s'ils feroient le mesme de Capoue, mais en fin ne voulans paroistre cruels en ruinant vne fort noble ville d'Italie, s'en assurerent en confisquant son terroir, & la priuant de toute forme de Republique. Ils laisserent sur pied les bastimens, afin qu'ils seruissent de retraicte à ceux qui laboureroient la terre: mais ils luy osterent le Magistrat & le Conseil public, afin que les habitans ne peussent rien remuer. Maintenant la capitale ville non seulement de ce terroir, mais de tout le Royaume c'est Naples, cité veritablement royale. Elle a enuiron sept milles de circuit: & s'est grandement acreuë de nostre siecle, & eust pris encor plus d'accroissement, si le Roy d'Espagne n'eust defendu de bastir d'auantage, à quoy il fut poussé par les Barons du Royaume, les subiects desquels abandonnoient leur demeure, pour aller iouyr des exemptions octroyees aux habitans de Naples: & il le fit aussi en partie pour le danger des reuoltes & mutineries du peuple, qui peuuent estre mal-aisément arrestees en vne grande & forte ville qui a trois chasteaux, dont le principal s'appelle Chasteauneuf, ou Castelnouo, qui fut fondé par Charles d'Anjou. Il n'y a ville où l'on voye vn si grand abord de Seigneurs, où l'on face aussi tant de profession de gentillesse, & où les caualiers paroissent mieux ce qu'ils sont, & s'addonnent plus à toute sorte de vertueux exercices. Les Gentils-hommes se retirent pour passer le temps à des exercices honorables en cinq places qu'ils appellent sieges. Ceste ville a vn port qui n'est ny guerres grand ny fort assésuré, mais on l'a aidé par le moyen d'vn mole. Il y a à Naples vn Arsenal où l'on fait continuellement force vaisseaux de guerre. On compte en ceste ville plus de deux cents milles personnes. Il y a vn beau golfe avec vne plage, & des Isles, & des Caps extremement agreables. C'est là qu'est Pouzzoly, où l'on recognoist tant de merueilles, qu'il semble que la nature se soit pleuë à se faire admirer en ce lieu, & y ait reduit tout ce qu'elle auoit de plus beau & de plus gentil. C'est là qu'est le lac d'Agnan, Baye, Tridoly, & le lac Auerne. On met en ceste Prouince trois villes Metropolitaines, c'est à sçauoir Naples, Caopouë & Surrente, & vingt-deux citez, entre lesquelles celles qui ont plus de renom sont Gayette, Sesse, Ceano, Calui, Venafre, Caserte, Nole & Auerse, & il y a cent soixante six chasteaux & places ceintes de murailles, cent septante villages.

La principauté a pour ses bornes du Couchant la terre de Labeur, & du Leuant le pays de Basilicate. Ce pays a 16. milles de largeur, & 33. de longueur, & ses principales villes sont Nocere, Sanserin, Suerrète, Masse, Vic, Riuel, Analfé, & Salerne. Nocere est à 9. milles de la mer, & à 4. de Serne, & tout autour il y a force villages. Riuelle est vne ville bastie depuis n'agueres, qui ne doit rien aux premieres villes du Royaume de Naples, pour le regard des bastimens magnifiques. Amalfi est vne belle ville, combien qu'autresfois elle ait esté plus renommée. C'est en ceste ville qu'on trouua, selon quelques vns, l'usage de la boussole: ce que Pasquier a refuté suffisamment en ses Recherches, monstrant par quelques passages de nos vieux Poëtes François que ceste inuention est plus ancienne. C'est de ceste ville que prend son nom la coste d'Amalfi qui regarde le Midy, & s'estend en long enuiron 20. milles, & a de hautes montagnes, principalement du costé qu'elle panche sur la mer. Il y a tant de peine à les monter que le seul regard rend les personnes malades. Salerne est vne ville fort ancienne esloignée de la mer de mille pas ayant de tres-beaux iardins dans ces murailles. Il y a vne Vniuersité, & ceste ville porte titre de Principauté. Mais il faut que ie vous aduise que la Principauté de deçà s'estend le long de la mer depuis Salerne iusques à Policastre, & depuis Saint Seuerin iusques à la Palude, & la riuere de Silaire la trauerse presque par le milieu: elle contient les Archeueschez de Salerne & d'Arfi, & quinze autres citez, & deux cens treize chasteaux ou places fermées, entre lesquelles est Euoli avec son bois, Fiano avec sa longue vallee de vingt milles, & large de quatre, enuironnée de colines bien habitees.

La principauté de par de là s'estend depuis Nusco iusqu'à Confe, & à Bedgne & contient ces deux villes, & huict autres, c'est à sçauoir Anelin, Arrian, Bisache, Montemaran, Montverd, S. Agathe, S. Ange, Vic, & cinquante trois cheuaux ou places fermées.

Basilicate contient la Lucanie, & partie de la Pouille. Elle a pour ses bornes du Couchâr la riuere de Silare, qui est la limite de la Campagne, du Midy la mer de Toscane, du Leuant la riuere de Iaë, basse Calabre, vne partie de la haute, & du Nort la terre de Bari. Elle contient les villes de Melfe, Venose, Potence, Cerence, Tricaire, Lauel, Montpelose, Marfico, Rapolla, & 93. chasteaux ou places fermées.

La basse Calabre a pour ses bornes du Septentrion la haute Calabre anciennement la grande Grece, avec la riuere de Crathide, & vne partie de l'Apennin, du Couchant la riuere de Lan avec la Basilicate, du Midy la mer Toscane, & le destroit de Sicile, & du Leuant vne partie de la mer Adriatique.

Sa ville Metropolitaine est Consenceville ancienne qui comprend 7. costaux, & a vn fort chasteau au dessus d'vn mont qui commande à la ville, & à tous les lieux des enuiron. La ville est entourree des riuieres de Crathide, & Consente, & est auourd'huy assez riche, combien qu'autres fois elle l'ait esté dauantage. Outre ladite ville il y a encor celles de Frede, & de Belmont, la ville de S. Euphemie qui a donné son nō à la mer qui est apres: Trope belle ville, riche, & fort peuplée, Rhege ville ancienne, assise au front ou bout de l'Italie, jadis forte & puissante, & maintenant presque deserte, principalement depuis l'an mil cinq cēs quatre vingt quatorze, que le Turc y mit le feu. Il y a aussi Chasteauuilaire qui est au sommet d'vne montaigne fort haute, Monsaut qui porte tiltre de Duché, Turran, Regian, & les villes de S. Marc, Marturan, ville ancienne assise en l'Apennin, Tauerne bonne ville, & bien peuplée, Nicaistre, qui est à trois milles loing de la mer, Mont-leon ville assise en vn costau de l'Apennin, & qui porte tiltre de Comté, & Terreneufue ville fort peuplée.

La haute Calabre (selon Ptolomee) a pour ses bornes du Leuant la mer Adriatique, du Midy la riuere d'Alice & la haute Calabre, du couchant la riuere de Crathide avec l'Apennin, & Basilicate, du Nord le Golphe de Tarante, & la Terre de Bary. Il y a de ce costé deux Caps signalez, dont l'vn est celuy de Colomnes, iadis la Chine, l'autre est celuy de Scylace, qui est dangereux au possible.

La capitale ville de ce pays c'est Cantazare: puis vous auez Hierace, qui porte nom de Marquisat, Belicastre, ou Beau-chasteau, ville esloignée de huict milles de la mer, Croton ville fort ancienne & renommée, qui porte maintenant le titre de Marquisat, n'estant toutesfois si riche ny si peuplée qu'autresfois: Cariathe, qui est vne Comté: Bassignan Principauté avec vn fort Chasteau, Tarie Corilan, Rosan forte ville à trois milles de la mer, Cassan, Hauteuille qui est principauté, Mater Archeuesché, ville riche & peuplée, Crauine Duché, Tarante ville fort ancienne, & la fin de la haute Calabre ou grande Grece qui a vn port renommé. Ce fut la patrie du Philosophe Archyte. Maintenant c'est vne Principauté.

La terre d'Otrante commence à Tarante qu'elle a pour sa borne du costé du Midy, de mesme que la mer iusques au Cap Sainte Marie.

Elle a pour ses confins du Leuant le mesme Cap avec la mer Ionique, du Nort depuis Otrante iusques à Brindes, & du Couchant la Terre de Bary avec vne grande partie de la haute Calabre. Sa forme est comme d'vne presque Isle, veu qu'elle est environnée de la mer Adriatique, & de l'Ionique. Sa largeur entre Brindes, & Tarante est de trente milles, selon Plin, & selon Rassin de quarante.

La nauigation d'alentour est de deux cens milles, si bien que le tour de tout le pays sera enuiron de 240. milles.

Ses villes sont Lecy, qui est à trente milles du Cap de Sainte Marie, & est ville riche & peuplée, & bien bastie: Otrante ville tres-ancienne, qui est auourd'huy assez peuplée, & a vn fort chasteau sur vn rocher qui regarde sur la mer, & vn port assez capable, combien que subiect aux vents du Nort.

Brindes est vne ancienne ville, mais presque abandonnée auourd'huy à cause des discordes ciuiles. Son port estoit si bon autrefois qu'il estoit mis entre les premiers, mais il est auourd'huy si comblé, que les galeres mesmes n'y peuuent presque passer.

Castro est vne ville maritime, cōsiderable pour les dommages qu'elle a receus des Turcs.

La Pouille est diuisee en deux par les anciens, c'est à sçauoir en la terre de Bary, nommée Peucetie des anciens, & la Pouille pleine, que les mesmes appelloient Daunie, & ces deux pays estoient diuisez par le fleuve de Lofante. On comprend en ceste seconde partie la Capitainerie, qui comprend le mont de S. Ange & les enuiron, & en tout treize villes, & quatre-vingts & dix chasteaux, ou places fermées. Les citez sont S. Ange, Mantredoi-

ne , Siponte , Salue , Lesine , Vieste , Ascolie , Bouine , Firenzole , Volurate , Tremole , & Troye.

Il semble que toutes les richesses de la Pouille soient assemblees au mont S. Ange , qui a presque de tour 120. milles. Diomedes la voulut reduire en Isle , pource que son Istme n'est large que de deux milles. Les Sarrazins cognoissans la commodité du lieu s'y fortifierent , & se maintindrent long-temps , pource que veritablement il n'y a lieu si propre pour dominer , & pour trauailler le Royaume de Naples , & la mer Hadriatique.

La terre de Bary contient trente six chasteaux ou places fermées , & quatorze citez , dont les plus renommées sont Bary & Trany , puis Monopoly , Polignan , Grauine & Bitonte.

La Pouille pleine a pour ses bornes la terre de Bary , & la riuere de Lofante : du Midy l'Apennin , del'occident l'Abruzze , & du Septentrion vne partie de la mer Hadriatique.

Le pays d'Abruzze , iadis des Samnites , a pour ses bornes du Leuant la Pouille pleine avec la riuere de Saline. du Couchant la riuere de Trante , du Septentrion la mer Hadriatique , & du Midy l'Apennin. Ce pays est borné d'un costé de Fortore , & de l'autre du Trante , & est diuisé en Abruzze au deçà , & Abruzze au delà la riuere de Pescare. L'un contient cent cinquante chasteaux ou places closes , & cinq citez , qui sont Beneuent , Lancian , Cité de Chery , Cité Burelle , Sulmone , l'autre contient deux cens quatre vingts & quatre chasteaux ou places fermées , & quatre citez , qui sont Aquila , Atry , Cité de l'ene , & Terame. Beneuent fut donné à l'Eglise par Henry III. pour eschange d'un certain tribut , osté à Banguergue sa patrie par Leon IX. & ceste ville ayant esté diuersement saisie & tenuë , fut finalement remise à l'Eglise par les Normands. Aquila fut bastie par l'Empereur Federic II. qui y mena les peuples d'Amiterne & Forcoigne , pour asseurer de ce costé le Royaume. On monstre à Lancian vne Hostie consacrée , transmuée en sang , tandis qu'un Iuif la frappa avec un couteau. On comprend dans l'Abruzze la Comté de Molisi , qui a cent & quatre lieux enclos de murailles , & quatre citez qui sont Boiane , Guardialferie , Isenrie , & Trinente.

Il y encor en la mer Hadriatique viz à viz de la Pouille pleine les Isles de Diomedes , dont 3. les plus grandes se nomment auioird'huy S. Marie Tremitane , & S. Dominique. Outre cel'on void la mer Ionique vis à vis de la ville de Gallipoly l'Isle d'Achate peu renommée , & au Golphe de Tarante quelques petites Isles de peu de renom , dont la plus grande se nomme de Saint André : vis à vis du Cap des colonnes il y a deux Isles de Dioscore & de Calypse.

Il y a en la mer de Toscane quelques Isles qui appartiennent à ce Royaume , c'est à sçauoir Palmarole , Pontie , & quelques autres petites qui n'ont rien de remarquable.

On void encor au Golphe de Pouzzoli & de Naples , enuiron 18. Isles , dont la plus renommée est Ischie , qui a de tour 18. milles & est tellement enuironnée de rochers forts hauts qu'on n'y peut entrer que par un endroit. Il y a vne place qu'on met entre les fortes , mais principalement à cause de son assiette.

Pres d'Ischie vous auez Profide , dont le circuit est de pres de six milles.

La dernière Isle est de celle de Capry , où Auguste alloit si souuent : les autres qu'on y void n'ont rien de considerable.

Il y a veritablement peu de ports en un tel circuit de pays , combien que quelques Golfs aux diuers tours de ses riuages puissent en certain temps seruir de ports. Ils sont toutes fois mal asseurez , comme particulierement celui de Naples , qui sert plustost de pompe , que de seurte aux vaisseaux qui s'y trouuent , encor qu'il soit defendu du Mole , & l'on a de coutume quand la mer est fort couroucée de mener des galeres à Baye , qui est un peu loing : & ces merueilleuses restes de Neron , appelé communément Mer morte , seruent encor auioird'huy de port.

Le Golphe de Gaiette est tenu pareillement pour port , combien qu'ils sont descouverts du costé du Leuant.

Au pays d'Otrante il y a celui de Brindes , & pour la terre de Beri , on dit que si celui de Trany y estoit accomodé il seroit capable de cent galeres , de mesme que celui de Tarante en Basilicate , en pourroit tenir beaucoup plus si l'on y prenoit quelque peine.

Ce port est auioird'huy fermé , afin de ne conuier , cōme on croit , par sa commodité , les Turcs principalement à attenter quelque chose : veu que iadis Cleonyme Lacedemonien , Alexandre , & Pyrrhe , tous deux Roys d'Epire passans de Grece en Italie , se seruirent tousiours de ce port à cause qu'il estoit capable & asseuré , & proche.

CE Royaume produit toutes choses necessaires à l'entretien de l'homme : & en a pour servir de medicamens, & d'autres pour les delices en si grande quantité, qu'il en peut fournir abondamment aux autres pays, & entre autres choses il y naist de fort beaux chevaux, dont le Roy tient quatre races, de mesme que font encor plusieurs Seigneurs, & l'on ne les peut tirer hors du Royaume qu'avec expresse permission du Roy d'Espagne ou du Viceroy, qui s'accordent bien rarement. Mais sur tout il y a grande abondance de bled, vin, huile, & soye, & de toutes sortes de fruits. La Comté de Rhegge, & plusieurs lieux de Calabre, portent des sucres. La terre de Labeur a du vin, & du froment en abondance, & est extremement agreable. On voit autour de Pouzzoli beaucoup de sources d'eaux medecinales, & des bains de diuerfes vertus. On y voit vn champ plein de souffre, enuironné de hauts rochers qui brulent continuellement, d'où l'on tire, & où l'on cuit l'alun. On voit la montagne d'Astrune, avec vne grotte, qui a trois mille de tour au dessus, & se va peu à peu restrecissant vers le fonds, en façon d'Amphitheatre, l'on voit couler par le milieu vne petite riuere. On y trouue les bains à suer, & le trou duquel tu ne te sçauois approcher sans te mettre en danger de mourir. L'air de la terre d'Otrante est fort bon, & toutesfois la ladrerie regne en ce pays, ce qui procede, comme on tient, de ce qu'on y mange trop de chair de pourceau, & aussi des figues seiches, qui sont les viandes ordinaires du menu peuple. Le terroir monstre vne superficie aspre, mais lors qu'on le rompt avec le soc on y decouure vne bonne terre, & combien qu'il y ait peu d'eau, toutesfois il a de beaux pasturages, & produit du froment, de l'orge, de l'auoyne, des oliues, des melons excellens, & des asnes, & des mulets qui sont fort estimés. Il naist en ce pays vn animal qu'on nomme le Turantelle, dont on chasse le venin avec le chant & son des instrumens, ce que Gelle escrit suiuant l'autorité de Theophraste, de quelques autres animaux. Les Chersidres naissent pareillement en ceste contree, qui recoit aussi plus de dommage des Sauterelles qu'aucune partie de l'Italie, veu qu'elles ne laissent rien par où elles passent, & consomment en vne nuit les moissons qui sont desia meures. Mais il semble que la nature y ait pourueu, par le moyen de certains oyseaux qu'on nomme Gauiers qui persecutent ces animaux. Ce pays est aussi rauagé par la gresle, qui luy porte beaucoup de dōmage presque toutes les annees. On y oit les tonnerres en Hyuer & en Esté, cōme en la terre de Labeur. Le pays aux enuirs de la ville d'Otrante a son air bien temperé, comme on peut voir aux Lauriers, Myrthes, Oliuiers & Cedres, qui y croissent. Les rochers qui le ceignent du costé de la mer, sont si fragiles, que les eaux en ont cōsumé presque quatre vingt pas en moins de cent annees. Mais Brindes a vn mauuais air, pource que de mesme qu'il n'y a chose qui rende l'air meilleur que la multitude des habitans (pource que ce sont eux qui desseichent les lieux marescageux, pour les cultiuer, & qui coupent les bois trop espais & purgent le mauuais air avec le feu, & trouuent le bon air avec les hauts bastimens) aussi au contraire il n'y a chose pire que la solitude des grandes villes, pource que non seulement elles demeurent priuees des choses susdites, mais les maisons mesmes & les ruines sont les retraictes de la corruption, comme nous tesmoignent Aquilee, Rome, Rauenne, & Alexandrie d'Egypte, & Bagades encor, comme on dit. Quant à la Pouille encor que son terroir soit sablonneux, & leger, & que l'herbe y vienne petite & claire, toutesfois elle est si bonne qu'elle entretient force bestail. L'Abruzze est la plus froide partie du Royaume en la Principauté. Sainct Seuerin est nommé pour le bon vin qu'il porte. Pres de la costed'Amalphi, & au deçà de ses rochers il y a de belles valees, avec force fōtaines & sources d'eaux, d'où coulent quelques ruisseaux avec vn agreable murmure. Ce pays a grande abondance de grenades, citrōs, orēges, oliues, poires, prunes, cerises, & semblables fruits. Il abōde encor en vin, & non seulement il cōtente le goust, mais aussi l'odorat & la veuë par le moyen de ses myrthes, lauriers, bouys, iossẽmins, lierres, rosmarins, roses, & autres plantes. Le terroir d'autour de Galerne porte force citrons, limōs, orāges, grenades, & toute sorte de fruit. Basilicate est presque toute mōrueuse, & pour ceste cause fort suiete aux voleries. Les roses viennent deux fois l'annee pres de Peste. La Calabre porte du froment & de l'orge, du vin de plusieurs sortes, des oliues, des figues, du sucre, du miel, du sel, de l'or, de l'argent, & a quantité de laine, de coton, & de safran. Elle abonde tellement en soye qu'il s'y en fait autant qu'en tout le reste d'Italie. Il y a aussi grande abondance de lin, & de chanvre, & la manne y tombe aussi du Ciel. Pres du riage de la mer & dans le pays on voit force beaux iardins pleins de citronniers, orangers, limoniers, & de plusieurs autres arbres. Quant aux Isles, celle d'Ischie a force bons vins, & abondance de fruits, comme aussi grande quantité de souffre, & d'alun, & des bains. Celle de Profideiette du feu, & a des bains chauds. Celle de Cabri manque de froment, mais elle abonde en chair, poisson & volaille.

IL y a vn ancien qui dit que ceux de la Terre de Labeur estoient superbes, pour l'abondance des fruits, la bonté de l'air & la beauté de la contree. C'est là qu'estoit le marests Acherusien, qu'on nomme aujourd'huy Caluccia, & l'Auerne, & des lieux souterreins, & l'autre de la Sibylle, ausquels lieux (comme dit Strabon) on entroit par des sacrifices, apres auoir appaisé les Dieux, selon la fole creance des anciens. Les Prestres des faux Dieux s'y trouuoient pour conduire ceux qui y entroient. Il y auoit là vne fontaine, qu'ils tenoient pour le Phlegeton, à cause de la puanteur de ses eaux.

Les Prestres y receuoient les suruenans, pour consulter l'Oracle, & viuoient de ce qu'ils pouuoient tirer du fottissement des metaux, ou de leurs predictions. C'est à cause de cela qu'Homere dit qu'ils ne voyoient iamais le Soleil. Ces hommes furent apres exterminéz par vn certain Roy, qui trouua leurs predictions fausses. Il y auoit à Naples toutes les cinquiesmes anneés vn combat de luitteurs, & de chantres, par le commandement de l'Oracle. C'estoit en ce Royaume, & non loing de Rhege, qu'estoit la ville de Locres, si bien policee par Zaleuque, & où l'on auoit accoustumé de se mettre vne corde au col, lors qu'on vouloit proposer quelque loy nouuelle, afin de mourir si elle n'estoit pas approuuee.

Les Sybarites estoient aussi en ce país, qu'on taxoit d'estre si mols, & si plains de delicatesse, que mesme ils auoient appris à leurs cheuaux à dancer au son des instrumens. Bref tout ce país auoit des habitans si addonnez aux delices, qu'Annibal se laissant glisser en leurs façons de faire, destrempa son fort naturel, & ne fit que perdre ce qu'il auoit acquis, & sa reputation tout ensemble depuis ceste mauuaise accoustumance.

MOEVRS DE CE TEMPS.

Les Neapolitains sont presque tous gentils, & de bon esprit, embrassent les delices plus que perlonne du monde, & se plaisent à l'entretien des Dames. La Noblesse se retire presque tout à Naples, autant pour jouyr du bon air de ceste ville, que pour y passer le temps, & voir la bonne compagnie qui s'y trouue ordinairement. Et de fait on ne scauroit voir vn plus grand nombre de gentils Cheualiers qu'on en void à Naples en Esté hors de la ville, où ils vont trouuer les Dames qui vont au pourmenoir en carrosse, & les abordent à cheual d'vn si bel air, & avec tant de grace, & vn si gentil discours, qu'il est impossible de voir ou d'ouyr rien de plus agreable, & semble que c'est particulièrement à ceste Noblesse qu'il appartient de faire l'amour, & d'estre pres des Dames, plus qu'à nulle autre. Et ceste gentillesse est accompagnee ordinairement d'assez de courage, veu que les Gentils-hommes du Royaume de Naples vont chercher la guerre où elle est, & s'efforcent de s'y signaler, comme on a veu par le passé aux guerres des Pais-bas, où il s'est tousiours trouué grande quantité de Noblesse de ce Royaume. Et le peuple n'est pas moins affectionné au mestier des armes, veu qu'on sçait assez qu'vne bonne partie del'Infanterie de l'Archiduc, & du Roy d'Espagne vient du Royaume de Naples. Car quant aux Espagnols naturels ils sont en fort petit nombre.

Le peuple de ce Royaume est aussi fort adonné au trafic, mais ce qui le destourne de suivre ceste inclination, & ce desir, c'est la charge des exactions, qui est plus importune en ce país, & plus grande qu'on ne scauroit croire.

J'ay dit que les Neapolitains estoient tous gentils, mais la regle n'en est pas si generale qu'il ne se trouue des lieux, où là courtoisie & la ciuilité sont fort ignorees. Car aupres de Monfauit il y a d'aussi rudes, & sauages gens qu'en país d'Italie, & presque tous ceux de Calabre ont l'esprit moins subtil & releué, que les autres, ainsi que les anciens mesme ont publié & ceux de la terre d'Otrante sont simples, & sans art, & mesme ceste simplessse approche plus de la stupidité que la franchise.

Les hommes, & les femmes ont l'esprit adonné entierement à l'amour, & recherchent autant ce plaisir que personnes de la terre. Aussi il n'y a peut-estre lieu où l'on trouue plus de bonnes rencontres, pour ce regard, qu'à Naples, où vostre recherche ne scauroit estre presque inutile, si elle est conduite, & accompagnee de quelque merite.

Au reste on a donné aux hommes, & aux femmes de quelques lieux des noms qui feront cognoistre leur humeur. Car on nomme ceux de Brasilicate temeraires, ceux de la basse Calabre stupides, & les femmes de Consence obstinees, celles de Beneuent rustiques & grossieres, celles de Capoué superbes, celles de Naples affairees, & celles de Brindes faigneantes.

Les Neapolitains aussi bien que tous les autres Italiens, ne font guere bonne chere en leurs maisons, mais se plaisent à les rendre belles & magnifiques, & à estre bien vestus, logeant toute leur dépence en la parade extérieure.

Les femmes y sont si superbement habillées, que la moindre semble à ce qu'elle porte, Princesse, & elles aymeroient mieux passer les iours entiers sans manger que de n'estre excessivement parées lors qu'il faut paroistre deuant le monde, & celles qui n'ont pas le moyen d'estre si braues, passent les iours & les nuicts de toute vne sepmaine à trauailler en soye ou autre chose, afin de se faire voir le Dimanche & d'entretenir ceste vaine pompe.

RICHESSES.

Les gens de ceste contree se pourroient nommer aussi heureux qu'aucuns de l'Europe, 6. s'ils n'estoient tant molestez, & chargez par les officiers, veu que non seulement ils ont l'infailible abondance de toutes choses, mais encor vne grande commodité de les debiter par l'estat de l'Eglise, & autres Prouinces, & ce qui les peut rendre à leur aise, c'est spécialement la nauigation, & le commerce ancien avec les Venitiens, à l'endroit desquels les peuples de la Pouille & de la Calabre, se monstrent affectionnez au possible, pour ceste particularité, veu que la plus grande partie de leurs nauigations se fait avec ceste nation, & sans elles ils endureroient beaucoup, ainsi qu'on a veu les années passées, lors que ce trafic fut deffendu à cause de la peste, outre que les Venitiens ont possédé diuerses villes en la Pouille, & ont esté tenus pour amis iusqu'au temps des Roys Normands, & tant à cause de ceste souuenance que du susdit interest, les Neapolitains ont vne particuliere inclination à aymer ceux qui sont sous ceste Seigneurie.

Il n'y a prouince en Italie qui enuoye dehors tant de choses qui viennent chez elle. Car elle vend aux estrangers force noix & force amandes, & les enuoye iusqu'en Barbarie, & en Alexandrie: elle depesche son saffran en plusieurs endroits, elle fournit des soyes à Gènes & à la Toscane: des huiles à Venise, & à d'autres lieux, des vins de Rome, & des cheuaux, agneaux, & moutons à plusieurs contrees.

La Pouille pouruoit de chair Venise, l'Esclauonie & la Toscane.

Le vin de saint Seuerin est extrêmement estimé, & de grand prix à Rome.

La basse Calabre enuoye du corail aux autres Prouinces, & de la manne qui est estimée plus que celle de tous les autres lieux. Castre est renommée à cause des huiles qu'on y va acheter de tous costez & les marchands Geneuois principalement y en vont faire grande emploie.

Le Roy d'Espagne tire de ce Royaume deux millions, & cinq cents mille ducats, y comprenant le don gratuit d'un million, & deux cents mille ducats, qui se fait toutes les années, & qui est réduit en rente ordinaire, de même que les trente-vn grains qu'on paye pour le logement des gens de guerre, & pour l'entretien de quelques Gentils-hommes qui accompagnent le Viceroy, & se nomment continuels, sept grains pour la garde des tours des costes, neuf grains pour la reparation des ruës, & cinq grains pour le Preuost de Campagne, duquel reuenu ostant vn million & trois cents mille ducats de pension, & autres choses qui sont payées à diuers, le demeurant ne suffit pas pour les garnisons, l'Infanterie, la Caualerie, les galeres, & autres dépenses.

FORCES.

Les Neapolitains ont esté de tout temps extrêmement subiects aux reuoltes, de sorte 7. qu'en quatre cens cinquante quatre ans, durant lesquels ce Royaume a esté diuersement possédé par les Normands, François, Alemands, Catalans, & Espagnols, on compte vingt sept rebellions signalees des Neapolitains, qui ont aydé aux pretentions, & desseins des vns, & des autres qui ne se seroient pas peut-estre si facilement laissez surmonter aux volontez des Papes qui les conuioient, ny à leur propre ambition, ny à l'aiguillon de la vengeance, si ceste instabilité de courages ne leur eust promis beaucoup plus ce que la commodité de toute autre occasion leur proposoit.

Or quant à ces frequentes rebellions, encor que les subiects en ayent esté diuers, toutes-fois on en peut assigner deux principales causes, c'est à sçauoir la grandeur & la puissance des Princes du Royaume, & l'eslection du Roy qui appartenoit à des Princes estrangers, subiects à changer de volonté, tant à cause de la courte vie des Papes, que pour la diuersité d'eux. Car vne partie du Royaume ayant tousiours esté diuisée entre les Princes naturels, grands à cause de leurs dependances, & de leurs reuenus, ils ont tousiours eu les courages de leurs vassaux prompts à toutes leurs volontez: de sorte qu'ils ont pris bien souuent la hardiesse

diessé de menacer, & de combattre leurs propres Roys, & pour leur particulier intérêt ont mis en desordre le Royaume, combien qu'ayant decouvert l'inclination du Pape, à déposer vn Roy, & pouuant avec ceste nouueauté effectuer quelque vne de leurs penſées, ſans autre eſgard que de leur paſſion particuliere, ils ont tant de fois, en s'offrant pour fauteurs du nouveau Roy, & des deſſeins du Pape, & en grandissant la des-obéiſſance, & les fautes des perſonnes qui luy eſtoient ſuſpectes, ſollicité le ſainct Siege au changement, & interpretant meſmes quelques fois fauſſement aux Roys les iuſtes actions des Papes, ils leurs ont donné ſujet de meriter d'eſtre excommuniez, & demis, afin de faire naiſtre apres l'alteration des choſes, qu'ils auoient auparauant projectées, & deſiroes pour contenter leurs paſſions. En quoy l'on peut cognoiſtre combien les Eſpagnols ont accortement cherché pour ſe conſeruer & confirmer cet eſtat, non ſeulement de demeurer vnis avec le ſainct Siege : mais encor de deſobliger les Papes, & affoiblir de tout leur pouuoir tous ceux qui pourroient pour quelque reſpect que ce ſoit eſtre crus puiffans dans le Royaume, principalement ayans acquis par confidence, & par obligation la plus grande part des Princes d'Italie, & s'eſtans aſſeurez par ce moyen de tout le dommage de dehors.

Et veritablement apres que nous aurons conſideré à ce propos celuy qui gouuerne, & celuy qui eſt dominé, l'vn imperieux, & altier, l'autre ſuperbe, & indompté, l'vn hay pour ſa ſoudaine grandeur, & par l'inclination de pluſieurs, & l'autre enclin aux reuoltes, & pour ceste cauſe propre à eſtre elineu, & fauoriſé des pretendans, l'vn s'eſtant tellement affoibly au Royaume que l'autre ne peut facilement regimber, ny ſecouer le joug, on doit iuſtement ou pour le temps, ou pour le prudent ſoing de celuy qui gouuerne, s'eſtonner d'un tel ſucces, touchant lequel ie veux croire, qu'autant qu'il a eſté aydé des occasions autant il a eſté bien conduit, & ſecondé par les Gouverneurs. Car ce Royaume eſtant paruenu au Roy d'Eſpagne, tous les empeſchemens qui pouuoient confondre le pais ont eſté leuez avec ceste reſolution de la maintenir, & le Prince s'eſt aſſeuré ſuffiſamment de la poſſeſſion de cet art, meſmes en tout motif de guerre, pource que les pretenſions des François s'eſtans mortifiees avec la paix de l'annee mil cinq cens cinquante neuf, & particulierement à cauſe des guerres ciuiles qu'ils ont eues, & le Roy d'Eſpagne ayant en Italie le Pape qu'il reſpecte, & eſtant allié du Duc de Sauoye (combien qu'il y ayt eu ces anneés paſſées quelque mauuiſe intelligence entr'eux) eſtant de meſme vny avec le grand Duc de Toſcane par le moyen de la nouuelle alliance, d'ailleurs ayant à ſa deuotion ceux de Gennes, & les Luquois eſtans ſans force, & les Venitiens peu deſireux de remuer contre luy, il ne luy reſte que d'eſtre aſſeuré des principaux du Royaume de Naples. Ce qu'il a effectué en partie, en donnant quelque entretien, & ſpecialement à la Cour aux Confidens, en laiſſant rarement l'adminiſtration du public aux grands, ou la laiſſant fort limitée, en chaſtiant aſprement les ennemis, & les perſonnes ſuſpectes, & en n'admonestant pas ayeſément ny ſoudainement les plaintes contre les Gouverneurs, pource que le ſujet deuiet bien-veillant par le premier, & s'entretient en eſperance de plus grande choſe, & avec le ſecond on ne luy laiſſe pas acquerir de l'eſtime pres du peuple, & avec les deux ſuiuans on preuiet les troubles par la ſeuérité du chaſtimēt: mais beaucoup plus pour ce que l'homme ne ſe peut fier de deuoir iuſtifier ſon fait par aucune voye, outre qu'avec le premier, le ſujet eſtant alleché par vne telle demonſtration, taſche par tous moyens de ſe rendre de iour en iour plus confident, & de meriter dauantage pres du Prince, & depence tout ce qu'il a pour eſleuer à la veuë du monde ce petit tiltre de Seigneur, & Cheualier, de Colonel, ou de ſemblable choſe qu'on luy donne: tellement qu'avec ſon eſtabliſſement il deuiet fidele, & s'affoiblit en telle ſorte avec la depence, qu'il n'a plus de hardieſſe apres, ny pour luy ny pour les autres; & tant à cauſe de l'eſperance, que de neceſſité, il ne ſe peut retirer de l'affection & du ſeruite. Avec le ſecond on oſte l'occasion de faire vne ſuite, & avec les autres deux, d'autant qu'on fait tomber eſgalement les ennemis decouverts, & ceux qui ſont ſoupçonnez, il aduiet que chacun procede ſi nettement, & ſe gouuerne ſi ſagement, que le Prince ſe peut aſſeurer des penſées, & des actions de ſes ſubiects & vaffaux qui ſont tous nobles, ou roturiers, & le noble ne pouuant mener à fin quelque entrepriſe ſans l'ayde du peuple, que les Eſpagnols portent ouuertement contre les nobles, ſpecialement aux choſes de Juſtice, il arriue qu'il endure apres patiemment pluſieurs choſes faſcheuſes, & le peuple ne peut eſmouoir que vainement quelque ſedition ſans la conduite des Gentils-hommes. En fin la diſcorde eſt tellement miſe parmy ces deux Ordres, que viuans deſ-vnis avec vne manifeſte mal-veillance, le Royaume demeure encor pour ce chef grandement affoibly, outre qu'entre les nobles meſmes on maintient encor quelque diſſention viue, d'autant qu'ils fauoriſent plus l'vn que l'autre, & des autres s'eſleuent par fois tellement qu'avec ceste deſ-vnion les forces du Royaume demeurent demembrees, & le Roy d'Eſpagne ne peut craindre, ce ſemble, vn remuēment

important de ses subjects, & ce d'autant plus qu'ils n'ont personne qui fauorise leurs desfeins, à cause de l'estat des affaires d'Italie, qui desire le repos, mais principalement pour la bonne amitié du saint Siege, à l'endroit duquel le Roy d'Espagne a acquis tant d'autorité, qu'il a aujourd'huy grande part à l'election du Pape, ayant obligé plusieurs Cardinaux, ou en leur promotion, ou pour les pensions qu'il leur donne, & il a aussi soing particulier, comme j'ay ja dit, de se rendre tousiours le Pape amy, pource qu'il sçait assez l'alteration que Clement VII. & Paul IV. luy ont causee.

La bonne intelligence du Roy d'Espagne avec le saint Siege, & les autres Princes d'Italie, & la mortification qu'il a faite en grande partie des troubles du Royaume, ont donc esté les contre-poisons, avec lesquels il s'est preserué iusqu'à maintenant du venin de la guerre.

Quant aux gens de guerre il a mille hommes de pied Espagnols qu'il tient ordinairement en ce Royaume sous plusieurs Capitaines, avec vn maistre de Camp, & vn Auditeur, & ce corps de gens de guerre est appellé le Regiment ou T E R Z O de Naples, aux chasteaux du Royaume, & aux tours faites pour la garde des costes, on tient mil six cents hommes de pied ordinaires, en y comprenant les officiers qu'on a accoustumé de tenir en ces chasteaux. Il y a mille hommes d'armes diuisez en dix-sept compagnies, c'est à sçauoir cinq d'Espagnols & vnze d'Italie, à soixante chevaux pour compagnie, excepté celle du Vice-Roy qui est de cent, & celle du Seigneur Marc-Antoine Colonne qui est de cent dix. Il y a encore 450. chevaux legers diuisez en cinq compagnies. Outre ce, en toutes les Prouinces du Royaume, il y a cinq hommes de pied enrrollez pour cent feux, & il y a 4011454. feux à cinq pour cent sont 240701. hommes de pied ordinaires.

Ceux-cy sont nommez par les Esleus de chaque païs: toutefois s'ils ne plaisent pas aux Capitaines, il en faut trouuer d'autres qui les contentent. Ils sont assez bien armez, & plus propres à souffrir qu'à faire la guerre, & ceste Infanterie est appelée du bataillon, & combien que ceux-cy ne soient payez sinon lors qu'ils seruent les Capitaines, toutesfois les autres officiers ont leurs estats & gages ordinaires. Dauantage il y a trente sept galeres en ce Royaume, c'est à sçauoir trente-trois de Naples, & quatre qu'on paye aux Geneuois.

Les galeres de Naples demeurent ordinairement au Mole sans soldats, & bien souuent sans moitié de la chorme, qui est louée par des Capitaines & Marchands nobles & autres, pour décharger les vaisseaux, & pour autres seruites domestiques, de sorte qu'une fois que huit galiotes prindrent pres de l'Isle de Capry deux galeres de Sicile, on employa vn iour entier à depelcher cinq galeres apres les Turcs, d'autant qu'on ne trouuoit ny vogueurs, ny soldats. Et certainement on tient que le Roy d'Espagne tireroit peu de seruice de la dépence qu'il fait en ces galeres, qui sont garnies de fort peu d'artillerie, & de gens de commandement qui ont peu d'experience, & de forçaires Turcs, ou condamnés, dont les vns seruent avec dédain & danger, & les autres sont peu experimentez, & peu propres à souffrir l'incommodité de la mer.

Semblablement les gens des chasteaux tant des trois de Naples que des autres qui sont par le Royaume, sont deux tiers moins que le Roy d'Espagne n'en paye, & l'effort de l'artillerie, qui est toutesfois de l'ordinaire, se trouue au Chasteau neuf, & en iceluy de saint Erme de Naples, en la forteresse de Gaiette, & au Chasteau de Capouë, veu qu'aux autres qui sont espars par le Royaume, ce n'est pas chose fort considerable. Toutes ces munitions sont en petite quantité, en quoy toutesfois chacun cognoist clairement l'épargne que font les officiers du Roy, de mesme qu'aux choses qui abondent au Royaume.

Ce Royaume est fort peuplé, & a treize Princes, vingt-quatre Ducs, vingt-cinq Marquis, quatre vingts & dix Comtes, & enuiron huit cens Barons, qui sont obligez de seruir le Roy d'Espagne en personne, pour la deffence du Royaume. Le Duc d'Albe au temps de la guerre que le Pape Paul IV. meut contre luy, y leua vingt mille hommes de pied, sept cens hommes d'armes & mille cinq cens chevaux legers.

Les principales forteresses sont Naples avec trois chasteaux, c'est à sçauoir le Chasteau neuf, celuy de l'Oeuf, & celuy de saint Erme, la Mencie, Crotone, Torante, Gallipoly, Otrante, Brindes, avec le fort saint André, Monopoly, Bary, Trany, Barlette, Manfredoine, mont saint Ange, & Gajette, & dans le païs Cantazare, Concenise, & Aquila.

G O V V E R N E M E N T.

8. **L**E Roy d'Espagne tient ordinairement en ce Royaume vn Vice-Roy qui demeure à Naples, aussi bien que les autres Officiers, tant pource que c'est l'ancien sejour des Roys, que

que pour la beauté de sa situation, & l'abord de la Noblesse du Royaume, & des marchands & gens du pais, & estrangers, & habitation de plusieurs artisans. On peut tirer de ceste ville comme d'un abrégé un particulier & distinct discours des choses de ce Royaume, pource qu'on enuoye de là des Gouverneurs par les douze Prouinces; & ces Gouverneurs sont en nombre de six nommez aussi Vice-Rois, mais sous-ordonnez à celui de Naples. Il y a pareillement en chaque place du Royaume, qui n'est pas terre de Baron, un Capitaine. Et d'autant qu'on ne peut appeler de ces Capitaines & Juges qu'au Vice-Roy de la Prouince, à la Vicairerie & aux Conseillers de Naples comme il semble aux meilleurs quartiers, & que les sieges de la principale ville ont flux & reflux perpetuel de procez, qui sont prolongez par les Aduocats, par les Notaires, appelez par eux Maîtres d'actes, & par les Procureurs, & qu'aussi les prisons de la Vicairerie sont ordinairement pleines d'un nombre incroyable de personnes, on peut cognoistre aisément que la Justice n'y manque pas de besongne.

Il y a sept Officiers principaux en ce Royaume, outre le Vice-Roy, c'est à sçauoir le Connestable, le grand Justicier ou Chancelier, le grand Admiral, le grand Thresorier, le grand Protonotaire, & le grand Seneschal. Il y a quatre Cours qu'on nomme sieges, c'est à sçauoir Capouë, Nide, Montane, & saint Gregoire, où tous les Princes, Ducs, Marquis, & tous les principaux du Royaume, & les autres ordres s'assemblent, pour deliberer des affaires publiques.

RELIGION, ET CE QUI CONCERNE L'EGLISE.

Tous les habitans du Royaume de Naples sont tenus pour affectionnez à la Religion Catholique & Romaine. Quant à l'Estat de l'Eglise de ce Royaume, il est composé de vingt Archeuesques, qui ont sous eux plusieurs Euesques qu'on met en cet ordre. 9.

L'Archeuesque de Naples a sous luy les Euesques de Nole, de Pouzzole, de Cere, & d'Ischie.

L'Euesque d'Auerse n'est subiect à aucun.

L'Archeuesque de Capouë a sous luy les Euesques de

Sergnie.

Thiano.

Calui.

Calerte.

(:)

Ciazzo.

Carinolo.

Selle.

Venafri.

Aquino.

L'Euesque du mont Cassin, & l'Abbé du Monastere de ce mesme lieu, ainsi ordonné par le Pape lean XXII. n'est subiect à personne.

L'Archeuesque de Salerne a sous luy les Euesques de

Campagne.

Capaccio.

Pulicastro.

Nusco.

Sarno.

[:]

Marfico.

Nocera de li Pagani.

Acierno.

L'Euesque de Ravel n'est subiect à aucun, non plus que l'Euesque de la Caue.

L'Archeuesque d'Amalfi a sous luy les Euesques de

Lette.

Scala.

Capri.

Minori.

L'Archeuesque de Surrente a sous luy les Euesques de Vico, de Massa, de Castel à Mare.

L'Archeuesque de Conze a sous luy les Euesques de

Muro.

Cagiano.

Montuerde.

Alcedonia.

Saint Angelo de Lombardi.

Bisache est vny avec celui de saint Ange.

L'Archeuesque de Girenze a sous luy les Euesques de Venosa, Aquilonia, Potenza, Grauiua, & Tricaria.

Mater, qui est maintenant Archeuesché, & qui estoit jadis sous le Diocese de Citenze est maintenant vny avec elle.

L'Archeuesque de Tarente a sous luy les Euesques de Mortula, & de Castellaneta.

L'Archeuesque de Brinde à qui celle d'Otri est iointe, a sous elle l'Euesché de Hostuni.

L'Archeuesque d'Otrante a sous luy les Euesques de Castro, Gallipoli,

Vrgento.

Leccie.

Capo di Leuco.

L'Euesque de Nardo n'est subiect à aucun.

L'Archeuesque de Bari, a sous luy les Euesques de Bitonto, Mafletta,

Giouenazzo.

Ruuo.

Salpe.

Pulignano.
Monenuino.
Lauello.
Conuersano.
Bitetti.
Andri.
Bisegli.

L'Archeuesque de Trani a sous luy les Euesques de Montepoloso, & de Rappollo, & de Alessano.

L'Euesque de Monopoli, n'est subiect à aucun, non plus que l'Euesque de Melphi, & celui de Troye.

L'Archeuesché de Manfredoine, nommée Siponto, à qui celle du Mont saint Ange est iointe, a sous elle l'Euesché de Vielle.

L'Archeuesque de Beneuent a sous luy les Euesques de

Luceria.

Ascoli.

Firenzola.

Telese.

Sant'Agata di Gotti.

Alife.

Monteuerbe.

Marfico vecchi.

Monte Marano.

Auelin est ioint avec Frequentin.

Vico della Baronia.

Ariano.

Bojano.

Bouino.

Turibulense.

Dragonaria.

Multurata.

L'Archeuesque de saint Seruin, saint Marce, Belcastro, Isola, Firena a sous luy les Euesques d'Vmbriato-rino, Strongoli, Milato, Cariati.

L'Euesché de l'Isle de Lipari est vnue avec celle de Parenze, & toutes deux sont subiectes à l'Archeuesque de Messine.

Les Archeuesques, & Euesques y ont d'assez bons reuenus, & ie diray ce mot en finissant ce discours, qu'entre les lieux de deuotion qui sont à Naples, il y en a vn qui se nomme *Monte della pietra*, qui dépence soixante mille escus l'année, ou pour la nourriture de ceux qui y sont, ou en aumosnes, & entretient d'une partie de cet argent deux mille enfans à nourrice par le Royaume.

ROYS DE NAPLES.

10. **O**N ne trouua iamais vn Royaume comme celui de Naples, qui sans finir iamais aye esté pris tant de fois, & qui deuenu ennemy de soy-mesme ayt fait mōstre en vne perpetuelle seruitude, de la liberté, & de la seigneurie, avec la grandeur de ses ennemis. Car il n'a fait que glisser d'une main en autre, & sa succession a esté pleine de tant d'inconstance, qu'on a veu bien souuent vne race plustost esteinte que bien receüe, & paisible dans le Royaume. I'abregeray le discours, & le denombrement de ses Roys, autant qu'il me sera possible, afin de n'estre ennuieux, & en diray en peu de mots toute la suite.

Roger Comte de Sicile, & par le testament de Guillaume Duc de Pouille, & de Calabre, & descendu de Tancred fils de Richard de Normandie, osta la ville de Naples à l'Empereur de Constantinople sur la fin du mois de Septembre de l'an 1130. & soudain fut déclaré Roy de Naples, & de Sicile à Beneuent, par le Pape Anaclet second qui en retint l'hommage.

Larino.

Canne.

Tremuli.

Lefina.

Triunto.

[:]

Guardia Alfana.

L'Archeuesque de *Ciuita di Chietti* a sous luy les Euesques de

Aquila.

Ciuita di Penna, & ceste Euesché est iointe avec celle d'Atri.

Sulmono.

L'Archeuesque de Lanciana a sous luy les Euesques de

Sora, & de

Theramo.

L'Archeuesque de Reggio a sous luy les Euesques de

Cassano.

Nicastro.

Catanzaro.

Crotone.

Tropea,

Oppido.

Castel'a Mare delle Bruca.

Geraci.

Squillace.

Nicotera.

Bouë.

L'Archeuesque de Cosence a sous luy l'Euesque de

Mortoran.

L'Archeuesque de Rossan n'a point d'Euesque sous luy.

L'Euesque de Bissignan n'est subiect à aucun.

Ce Royaume continua aux déçendans de Roger, iusques à ce que le Roy Guillaume surnommé le Bon, estant mort sans enfans legitimes, & les Barons du Royaume ayans esleu Roy Tâcred nepueu bastard de ce Guillaume, Clemēt 3. pretendait que le Royaume estoit deuolu à l'Eglise, meut la guerre en Pouille, & apres luy Celestin 3. couronnât & cōfirmant l'Empereur Henry 6. à la charge de recouurer ce Royaume, cōme fief de l'Eglise, l'en inuestit publiquement, ainsi la Seigneurie passa des Normands aux Alemans, qui le tindrent encores peu heureusement, pource que Federic II. Empereur fils dudit Henry, estant deuenu persecuteur de l'Eglise fut priué de l'Empire par Innocent IV. & particulierement du Royaume de Naples, qui fut baillé à Colimond fils du Roy d'Angleterre, qui toutesfois ne se mit pas en peine d'en chasser les enfans de Federic, qui s'estoient rendus maistres de la plus grande partie, & auoit esté iniustement occupé par Mainfroy bastard de Federic second.

Vrbain IV. le transporte à Charles d'Anjou Comte de Prouence, & frere de S. Louys, qui par armes obtint ce dont le tiltre luy auoit esté conféré, qui en fut inuesty par Clement IV. à la charge de quarante mille ducats payables toutes les années au S. Siege, avec vne haquenée blanche.

La succession de ce Royaume continua par droite ligne en la maison d'Anjou: car à Charles d'Anjou pere succeda le fils Charles second, qui le laissa à Robert son fils, & cestuy-cy mourant sans hoirs males, le laissa à sa niepce Ieanne I. fille de Charles Duc de Calabre auquel temps Vrbain VI. le remit à Charles de Duras, qui decendoit d'un frere dudit Roy Robert, & en priua tout à fait ceste Roynie, comme excommunice, pour la part qu'elle auoit en la creation de l'Antipape Clement VII. faite à Fondi.

Après Charles regnerent successiuent les enfans de Ladislas, qui fut aussi Roy de Hongrie, & Ieanne aussi, mais non sans peine.

Louys d'Anjou second fils du Roy de France, est adopté par Ieanne avec consentement de Clement Antipape: mais il est tué deuant Bary, par les gens de Charles de Duras.

Louys son fils est couronné, & inuesty du Royaume par le mesme Clement: mais il s'essaya en vain de s'en rendre maistre.

Le fils de cestuy-cy nommé pareillement Louys, estant appelé à la conquête de ce Royaume par Martin V. qui l'en inuestit, donna sujet à la Roynie Ieanne de le mander offrir à Alfonse Roy d'Aragon, qui se trouuoit alors en Sardaigne: mais pource qu'Alfonse estant venu à Naples, ne pouuant souffrir que tout le gouuernement du Royaume fust sous le nom de la Roynie, s'essaya de la mettre en prison: mais elle s'enfuit secrettement, & declara son heritier le susdit Louys, annulant la premiere adoption d'Alfonse, qui nonobstant qu'après la mort de Louys, la Roynie declara son successeur René frere de Louys, & qu'après la mort de la Roynie, Eugene 4. pretendist que le Royaume fust deuolu à l'Eglise: nonobstant tout cela dis-je, Alfonse prit Naples par force, en demeura maistre, & en eut aisément l'inuestiture d'Eugene, & de ceste sorte le Royaume passa des François aux Catalans. René laissa pour son successeur au Royaume de Naples Louys XI. Roy de France.

Charles 8. luy succeda, & se rendit entierement maistre du Royaume de Naples.

En fin Louys 12. Roy de France & Ferdinand Roy d'Espagne le diuiserent entr'eux après la fuite du Roy Federic: mais les François le perdirent par leur mauuaise conduite, si bien qu'il demeura aux Espagnols: & le malheur qui aduint au Roy François à Paue, & les troubles qui ont esté depuis en France, ont osté à nos Roys le moyen de le r'auoir, mais non le droit qui leur est acquis sur ce Royaume.

SOMMAIRE.



1. *SSIETTE* de la Sicile, sa forme triangulaire & ses Caps qui la bornent, anciennement ioints à l'Italie, mais depuis separee par tremblement de terre, ou par l'embrasement du Montgibel.
2. Diuision de ceste Isle en trois regions, contenant 173. villes.
3. Abondance en bitum, bleds, vins muscats, miel poix, saffran, laines, cannes de sucre, sel mineral, pierres precieuses, Porphyre, marbre, albatre & mines d'or, d'argent & de fer.
4. Montgibel iettant flammes sans cesse, couuert neantmoins de neiges en toute saison, lac & fontaines d'eau chaude.
5. Sicile habitée jadis des Cyclopes & Le-strigons, Geants, & autres diuers peuples: & quel est maintenant l'humeur & naturel de ce peuple Sicilien.
6. Quelles sont les richesses & forces de ceste Isle.
7. Du Parlement de Sicile, du don gratuit que l'on offre tous les 3. ans au Vice-roy. Des trois souverains sieges. Des Capitaines d'armes du Conseil du Roy.
8. Inquisiteurs establis pour la Religion. Trois Archeueschez qui ont sous eux plusieurs Eueschez.
9. Roys qui ont possédé ou pretendu ce Royaume: avec l'Arrest du Roy d'Espagne contre l'écrit du Cardinal Baronus, touchant ceste Monarchie.



ESTE Isle qui ne cede à aucune de celles qui sont dans la mer Mediteranee, est assise entre l'Italie, & l'Afrique: elle a pour ses bornes du costé du Nort la mer de Toscane, du Leuant la mer Hadriatique, & Ionique, du Midy la mer d'Afrique, & du Couchant celle de Sardaigne. Les extremités de ceste Isle forment vn triangle, dont les trois angles produisent autant de Caps, dont l'un est le Cap de Faro, jadis Pelore, qui est au Nort, & regarde l'Italie, ou Cap de Calabre, nommé communément *Cauda Vulpis*, l'autre est *Capo Passero*, jadis *Pachinum*, vers le Midy, & le Leuant qui regarde le Peloponnese: le dernier est *Capo Boco*, jadis *Lilybee*, du costé du Midy & du Couchant, qui regarde l'Afrique, dont il est esloigné de cent milles, combien que Strabon, & Ptolomee en mettent 180.

Ce *Capo Boco* est esloigné du Cap de Calaris de Sardaigne de 190. milles, ou selon les autres, de 200. mais aux lieux qui sont plus proches de l'Italie il n'en est loing que de mille & 5. cens pas, & aux lieux plus esloignez de 300. milles, qui est l'espace qu'il y a entre Drepane, Sicile, & Naples. C'est pourquoy tous les Autheurs sont presqued'accord que la Sicile a esté anciennement jointe à l'Italie, comme vne presqu'isle, & que depuis par vn tremblement de terre, ou bien à cause de l'embrasement du Montgibel, ou du continuél flux, & reflux de la mer Ionique, & de la Toscane, elle fut separee de la terre ferme. Il y a de grands indices de cecy, pource que la mer de ce destroit n'est profonde au plus que de 80. pas & Rhege ville assise au bord de l'Italie, signifie rompure, & aussi à cause que la terre y est fresse, & si pleine de cauernes, & d'ouuertures, qu'elle est presque toute exposee aux vents: & la mer qui est entre l'Italie, & la Sicile, est si fascheuse, que les anciens ont donné à ces lieux les noms de Scylle, & de Caribde. Scylle est vn rocher, Caribde vn gouffre de mer qui va en tournoyant, & tous deux sont dangereux pour les nauires.

Au reste cōbien que ceste Isle soit en forme triāgulaire, toutefois ses costez sōt obliques: car le costé qui regarde le Leuant, est concaue, & celuy qui tend au Nort est quelque peu courbé. Or le costé du Septentrion du *Capo Boco* iusques au Cap du Fare contiēt 281. milles, ou selon les autres 285. Le costé du Midy depuis *Capo Boco* iusques à *Capo Passero* 193. milles, ou selon les autres 240. Le costé d'Orient depuis *Capo Passero*, iusques à *Capo del Faro*, contiēt 150. milles, ou selon les autres 175. C'est pourquoy ceux-cy donnent au tour de ceste Is-

le 700. milles, & ceux-là 624. Mais Possidoine, au rapport de Strabon, n'en met que 550.

Ceste Isle est mise de mesme que la Sardaigne, au 4. climat, entre le 11. & 12. parallele, où le plus grand iour d'Esté est de 14. heures, & deux tiers, & en ces deux Isles on void l'estoille de Canope, qui est la plus claire estoille de toutes celles, qui sont au nauire d'Argos, & ceste estoille n'est presque veüe d'aucun endroit d'Italie.

Toute l'Isle est diuisee en trois regions, qui se nomment la valce de Demone, la valee de Neetri, & la valee de Mazare. La valee de Demone entouree des fleuves de Terie, & Merie, contient l'angle du Cap du Fare, & c'est en ce lieu que les Messeniens, & les Cataneens habitoient au temps de Ptolomee. Le Val de Neetri est enclos des fleuves de Terie, & de Gele, contenant tout l'angle du Cap Passero, c'estoit le lieu où demeuroient les Syracusains. Le Val de Mazare contient le reste de l'Isle, où est l'angle de Capo Boco, & c'est où demeuroient les Orbites, & les Sageltains.

Il y a aujourd'huy au Royaume de Sicile 173. villes, entre lesquelles on compte Palerme, Messine, Montroyal, Syracuse & Catane, qui sont les principales. Palerme est la demeure des Vice-roys, & est belle ville, & bien bastie, & a vne Vniuersité: Syracuse a esté plus grande & plus belle qu'elle n'est aujourd'huy, veu qu'elle est pour la plus grande part ruinee. Catane autresfois belle & grande ville, est encor renommee, à cause de son Vniuersité, & tout aupres il y a vne forest qui a de tour huit milles.

QUALITE' DV PAYS.

Ceste Isle est pleine de feu qu'elle jette en abondance, & toutesfois elle produit toute sorte de fructs en grande quantité: elle est exposée aux vents, & toute cauerneuse, & pleine de souffre, & de bitum, matieres propres à engendrer & nourrir le feu: d'où vient que bien souuent elle vomit tantost des flammes, tantost des vapeurs en plusieurs lieux: & delà vient aussi qu'il y a beaucoup de sources d'eaux chaudes.

Ceste Isle porte du bled en telle abondance, qu'en quelques terroirs les habitans cueillent cent mesures pour vne, & delà vient qu'on appelle ces lieux, Champs de cent charges.

La terre de Sicile porte aussi des vins excellents, qui ne cedent point aux meilleurs d'Italie, & sur tout celuy qu'ils nomment doux Muscatel. Elle abonde aussi en miel, pouds, safran, laine, & choses semblables, & produit aussi la Canne qu'ils nomment CANA MESTE, d'où l'on tire par decoction grande quantité de sucre, principalement en la ville de Schizze.

Elle porte toute sorte de fructs qui sont extrêmement agreables, & aussi des cardes, de mesme que force racines de palmiers sauages. On y trouue aussi le sel mineral en plusieurs montagnes, outre celuy qu'on fait de l'eau de la mer. Il y a aussi force loyes, principalement aupres de Messine, de mesme que force chasse, & quantité de poisson.

Ceste Isle porte aussi quelques pierres precieuses, veu qu'on y trouue l'Agathe au bord de la riuere d'Agathe, on tire le Beril pres de la ville de Graterie. Il y a aussi du Porphyre de deux sortes, c'est à sçauoir du rouge meslé de blanc, & du verd, & du Diapre rouge plus precieux que Porphyre. Il y a des carneres de marbre noir, & d'autres de diuerses couleurs. On y void de l'Albatre en la valce de Mazare, de mesme que des mines d'or, d'argent, & de fer, & mesme des diamans: & il s'engendre du coral, comme jadis, entre Drepane & l'Isle d'Elic.

On trouue encor ces merueilles de la Sicile, qu'encores que le Mongibel brusle sans cesse, toutesfois au sommet, où le feu est plus grand, il y a tousiours force neiges. Au terroir de Menci on void le renommé lac de Palicori, aujourd'huy Naptie qui jette de l'eau extrêmement chaude par trois bouches, & tandis qu'elle boult, elle est fort chaude, & fait du bruit.

Pres du Montgibel il y a vne fontaine d'eau froide aigre, qui boult toutesfois, où les draps passez auparauant en galle, deuiennent soudainement noirs. Pres de Drepane il y a vne fontaine, dont l'eau esmeut à la 1. fois que l'on en prend. Et au terroir qui est pres de Capo Boco, il y a des coqs, & des poules, qui surpassent en grandeur tous les animaux de mesme espee qui sont en Europe, & en Afrique.

MOEVRS ANCIENNES.

Ceste Isle a esté autrefois habitee des Cyclopes, & Lestrigons, c'est à dire des Geans, & gens barbares, & inhumains, comme les fables, & les histoires, & mesme les ossements trouuez en diuers temps, nous tesmoignent.

On y void aupres habiter les Sicanes, Espagnols de nation, & les Grecs transporterent des colonies, mesme les Troyens y aborderent apres la ruine de Troye, & les Candiots y furent avec leur Roy Minos.

Il y eut aussi des colonies enuoyees par les Romains en Sicile au tēps de la premiere guerre Punique, & d'Auguste. Elle fut apres tenuë par les Empereurs de Constantinople, puis occupée par les Gots, qui en furent toutefois chassés 17. ans apres par Belissaire. Les Sarrazins s'en firent maistres, & en furent apres chassés par les Normâds, & lors vne grande multitude de

Lombards vint en ceste Isle, & on y vid apres eux les Allemands : mais ils en furent chassés par Clement VII. & les François leur succederent, puis les Aragonois en ont esté maistres. De sorte que les mœurs, & les humeurs des habitans de ceste Isle, ont esté diuerfes selon les peuples qui l'ont occupee, & ce changement a apporté vn estrange melange de façodee faire. On dit entr'autres choses de ceux d'Agrigente, qu'ils bastissoient comme s'ils eussent deu viure tousiours, & banquetoient comme s'ils eussent deu mourir à toute heure.

Ils auoient aussi vn lieu sacré pour iurer, & prester serment, & escriuoient sur vne table de bois ce qu'ils iuroient, & le jettoient dans l'eau qui venoit de la fontaine qu'ils nommoient CRATERES. S'ils iuroient avec verité, la table nageoit sur l'eau, & si au contraire elle alloit au fonds. Les humeurs des Siciliens ont esté de tout temps recogneuës pour inconstantes, & subiectes à tous vents, & iamais on n'a veu parmy eux vne resolution parfaite. Ils estoient beaux diseurs, & Diodore, & Aristote assurent qu'ils ont inuenté l'art de bien dire, & les Eclogues: & Pline, & Plutarque disent qu'ils ont inuenté les horloges, & quelques machines de guerre. Ce fut la patrie du grand Mathématicien Archimede.

MOEURS DE CE TEMPS.

Les Siciliens sont pour la pluspart d'esprit subtil, & eloquens de leur nature, à raison dequoy Apulee les a nommez hommes à trois langues. Dauantage ils sont facetieux, pleins de sentences, & de bonnes rencontres; mais fort grands parleurs. Outre ce, ils sont pleins de soubçon, & enuieux, & fascheux mesme quelquefois en leur conuersation. Ils offensent les autres legerement, & sont portez aisément à prendre vengeance de quelque iniure qu'on leur aura faite. Ils sont aussi grands flatteurs. Ils ont cela de bon, qu'ils recueillent courtoisement les estrangers. Ils sont propres à inuenter, & réussissent aux sciences speculatiues, & pratiques. L'on remarque en eux qu'ils sont naturellement plus rusez que sages, plus subtils que sinceres, grands amateurs de nouveautez, & de noies. Ils espient curieusement les actions de ceux qui ont quelque charge parmy eux, & tiennent tousiours pour fait tout ce qu'ils feroient s'ils estoient en la mesme charge. Les mesmes sont obeïssans à la Iustice, fideles au Prince, prompts à le seruir, & officieux en la premiere chaleur des amitez. Leur nature est de deux extremités, pource qu'ils sont du tout timides, & du tout hardis. Ils sont timides en traittant leurs propres affaires, pource qu'ils regardent fort à leur interest particulier, & pour ne le troubler pas, se transforment en tout comme les Prothees, se soubmettent à celuy qu'ils pensent capable de donner fin à leurs desseins; & seruent tellement qu'ils semblent nais pour ceste seule chose. Ils ont d'autre part vne incroyable hardiesse, lors qu'il est question de l'interest public, & procedent alors avec des moyens tous differents des autres. Ils estiment meriter beaucoup enuers la couronne d'Espagne, à cause qu'ils se sont donnez volontairement, & croient qu'on leur doit l'entiere obseruation des articles avec lesquels ils furent acceptez. Ils sont extremement jaloux de leurs priuileges, & estiment que tous ressentimens leur sont permis pour les maintenir, s'assurant qu'ils ne peuuent pour quelque sedition populaire qui arriue, estre tenus pour rebelles.

C'est vne humeur ancienne des Seigneurs, & grands de Sicile, de se pourchasser quelque intelligence en la Cour du Roy d'Espagne, tantost pres de celuy qui est plus en credit, tantost pres des Secretaires, & celuy qui est cogneu du Roy poursuit l'armee du Roy mesme. Mais tous ont accoustumé de la cōtrafter avec les Regēs. Ils font cecy pour deux raisons, la premiere pour les affaires qui leur pourroient arriuer de iour en iour à la Cour, l'autre, pour satisfaire à la naturelle inclinatio qu'ils ont d'estre censeurs perpetuels des actions du Vice-roy, de ses confidents, & de ses officiers, & veritablemēt l'innocēce ne suffit pas pour empêcher ceste censure, veu qu'en escriuant ils se seruent de chaque bruit qui court: ce qu'ils font plus hardiment lors qu'ils sçauent que le Vice-roy est paruenue avec quelque difficulté à ceste charge, & qu'il a des enuieux, & de foibles aydes à la Cour, ou qu'il n'y a pas des Agents accorts, & propres à penetrer les méchancetez qui se feront contre son maistre.

RICHESSES.

Ceste Isle estoit tenuë anciennement pour grenier de l'Italie, & principalement de Rome, comme elle l'est encores bien souuent: de sorte que les Siciliens tirent vn grand argent de la vente de leurs bleds, de mesme que de leurs huiles & de leurs soyes, dont ils font grande quantité par tout, mais principalement à Messine, où l'on trouue la meilleure.

Le Roy d'Espagne tire de ceste Isle ordinaire trois cens mille escus toutes les annees, à sçauoir cent mille chacun annee l'une portant l'autre des traites des froments, cent mille
du poids

du poids & de la marchandise, & cent mille des ponts, bastiments, decimes, & donnees qu'on nomme en Sicile Secretiers. Il y a les reuenus extraordinaires, comme les confiscations de la grand' Cour, les dépouilles des sieges vacants, le retraict de la Croisade, & des dons extraordinaires, qui montent à de grandes sommes. La dépense qui est presque tousjours plus grande que la recepte, consiste en payement d'officiers, de la Caualerie, de l'Infanterie, & des galeres, des garnisons, des debtes & des recompenses.

F O R C E S.

LE Roy d'Espagne tient ordinairement de bonnes garnisons, principalement aux costes de la mer, que le Vice-roy pouruoit quand il est besoing de gens, & de Capitaines. Palerme est bonne & forte ville, & Messine de mesme. Il y a plusieurs forts chasteaux, qui donneront tousiours beaucoup de peine à celuy qui entreprendra la conqueste de ceste Isle.

G O V V E R N E M E N T.

LE Parlement de Sicile a vne grande autorité, tellement que le Gouverneur ne peut auoir le don gratuit que l'on offre tous les trois ans, & n'en peut obtenir vn extraordinaire, ny faire aucun renouvellement touchant le public, sans le consentement vniuersel du Royaume, qui est donné par le Parlement, composé de trois sortes de personnes, appellees par les Siciliens, les trois bras du Royaume, qui sont tous les Prelats, tant ceux qui ont de grands reuenus que les autres, & l'assemblée de ceux-cy s'appelle le bras Ecclesiastique: tous les Barons appelez le bras militaire, & toutes les terres du Roy dont chacune enuoye vn Procureur, & ils appellent cecy le bras Seigncurial.

Le Vice-roy appelle ces gens par des lettres, qui les aduertissent de se trouuer à vn tel iour où est le Vice-roy, & lors qu'ils sont assemblez, le Vice-roy assis en haut, & en vn siege Royal, propose briefuement les causes qui l'ont meu à les assembler, & ce qu'il desire d'eux. Là dessus le premier Prelat se leue, & luy dit qu'on a entendu sa proposition, qu'on se leuera, & luy fera tost reponce. Apres cela on choisit le lieu où les trois bras se doiuent assembler à part, & en chaque lieu on traite ordinairement sept chefs, & les bras se donnent aduis l'un à l'autre de ce qu'un chacun a conclud, afin qu'on sçache en quoy ils sont d'accord, & en quoy ils ne le sont pas.

Le 1. chef dont on traite presque ordinairement, & pour lequel ils sont appelez, c'est le don gratuit, pour voir si on le doit donner ou non: si bien que si l'on resout que pour le mauuais estat des affaires on ne peut rien donner, le Parlement est finy, & l'on ne fait autre chose.

Si l'on conclud qu'il faut faire vn don, on traite du second chef, qui est la qualité, puis du troisieme, qui est le moyeu de la tirer, le quatriesme est en combien d'annees on le payera: le cinquieme chef est des conditions avec lesquelles on le donne: le sixiesme est des graces qu'il faudra demander. Quant au septiesme on traite des deputez à qui l'on donnera la charge de faire executer tout ce qui est accordé au Parlement.

La ville de Messine pour la qualité de son assiette, la commodité du port, & les conditions des habitans, a tousiours esté le chef du Royaume, & a de grands priuileges. Les troubles des Vice-roys commencent presque tousiours par le deffaut de l'observation desdites franchises, à laquelle les Messinois se roidissent plus qu'à chose du monde.

Il y a trois souuerains Sieges qui embrassent en Sicile tout le maniemment de la Iustice, la grand' Cour, la Sacree conscience, & le Domaine.

Au premier il y a vn President, six Iuges, vn Aduocat du Roy, & le Conseruateur du Domaine. Le President & l'Aduocat du Roy sont presque ordinairement à vie, les Iuges se changent de deux ans en deux ans. Il y en a trois ciuils, & trois criminels, qu'on change à la fin de la premiere annee, & les ciuils deuiennent criminels, & les criminels ciuils.

Le 2. Siege appellé la Sacree conscience, qui signifient autant que le siege des appellations, est composé d'un regent à vie, & de 2. Iuges Biennaux, c'est à disposition du Vice-roy de donner les Iuges des troisiemes causes.

Le tiers siege appellé le Domaine ou patrimoine, qui est comme la Chambre à Rome, ou la Sommaire à Naples, a vn President, vn Conseruateur, vn Protecteur, vn Iuge & 4. Maistres des Comptes, & il faut que tous les Officiers de 3. sieges, excepté le Conseruateur & le Protecteur du Domaine, qui peuuent estre estrangers, soient natifs du Royaume, ou ayent espousé vne femme de Sicile, & y habitent ordinairement.

Les choses de la Iustice sont aussi traitees par des personnes à qui le Vice-roy donne grande autorité selon les occasions, & principalement aux choses criminelles, & ceux qui exercent telle iurisdiction sont appelez Capitaines d'armes.

Ces Capitaines sont de trois sortes. La premiere est de ceux qui sont deputez à la poursuite des bannis, qui ont accoustumé d'estre quatre avec bons appointemens, & quelques soldats à cheual qui sont payez. La seconde est de ceux que le Vice-roy depute pour vn temps pour esclaireir & chastier quelque crime. La troisieme est quand le Vice-roy mesme en enuoye vn du Domaine, & afin qu'il puisse executer luy donne puissance de Capitaine d'armes. La quatrieme, quand à cause des occurrences de la guerre il donne en gouuernement les trois vallees.

On enuoye en chacune de ces vallees vn Seigneur, quand il y a soupçon de guerre, avec vn nombre determiné d'infanterie & de caualerie, & pareillement avec grande autorité tant ciuile que criminelle. Ces Seigneurs s'appellent aussi Capitaines d'armes: mais s'ils sont grands, comme Ducs ou Princes, le Vice-roy les honore du tiltre de Lieutenans.

Il y a outre les susdits, deux autres sieges à Palerme, & Messine a son siege estably par le Roy avec les iuges, & souueraine autorité tant ciuile que criminelle, & Palerme a son Preteur pour les choses ciuiles, & vn Capitaine pour les criminelles. Les citoyens n'y peuuent estre tirez hors du siege, & si vne cause ressortant de Palerme se trouue en la grande Cour elle demeure au siege de Palerme, si la Cour part de Messine, & le mesme se fait avec ceux de Messine.

Il y a encor vn membre de Iustice qui consiste en l'audience tant publique que priuee que le Vice-roy dōne, en laquelle on expedie les causes sommairement & à plein, cōme ils disēt.

Il y a le Conseil du Roy où assistent tous les Officiers de la grande Cour & du Domaine, & quelquesfois le maistre de Portulane.

Ce Conseil s'assemble pour des choses de grande importance, quand la seule Cour ou le seul Domaine peuuent estre suspects, & quand le Vice-roy veut proceder avec plus d'assurance & de iustification en quelque particularité dangereuse, lors qu'on doit faire quelque bonne prouision pour les occasions de la guerre.

Le siege du Domaine doit tenir compte des reuenus du Roy, tant à l'entree qu'à la sortie du coffre.

En l'affaire de la traite du froment, qu'on traite au Domaine, on doit remarquer quatre choses, à sçauoir la quantité du froment, le prix qu'on luy donne, les requestes de dehors, & la quantité de l'ordinaire imposé de nouveau.

La quantité du froment vient à la cognoissance du Vice-roy, ou par reuelation, ou par le calcul de la recolte.

La reuelation est quand le Vice-roy enuoye des Commissaires, forçant vn chacun à reueler les froments: en quoy il se commet tousiours quelque tromperie.

Le calcul de la recolte se fait en ceste sorte. On fait compte qu'on sème en Sicile mille charges de froment, & lors on n'en peut tirer vn grain, pource qu'il fait besoing aux habitans tant pour viure, que pour semer. Ou bien la quantité de froment sera d'vn million de charges, dont l'on en pourra tirer deux cens mille, sinon que le Roy en vueille retirer quelque partie pour de bons respects. Et si la recolte est de la 3. sorte, le Royaume aura vn million, & 2. cens mille charges de froment, dont l'on pourroit tirer alors 4. cens mille charges.

De la quantité naist le prix, qui est mis par des personnes deputees par le Viceroy, qui sont entendus, & de bonne conscience, & c'est icy la seconde consideration.

La troisieme consideration est des requestes de dehors, dont il faut que Roy soit bien aduertu auant qu'il publie le nouveau impost.

La quatrieme consideration est la quantité de l'ordinaire, qui veut dire la charge qui suit tousiours les traites sans autres impositions, & il faut qu'elle soit sceue pour pouoir faire le dessein du nouveau impost.

L'ordinaire est d'environ huit tares, de sorte que si le froment se vend à ceux qui l'emmenent trois escus la charge, l'achepteur paye trois escus, & huit tares.

On calcule les tares en ceste sorte. Vne tare c'est 20. grains de Sicile, qui sont comme vingt tournois de Naples, ou quarante quatrins de Rome. Chacun de ces grains rend environ quatre-vingts escus pour la retraite, veu qu'on paye au maistre Portulā, ou de ce grain, ou de ces tournois, ou de ces quatrins, vn grain, ou bien vn tournois, ou deux quatrins pour chaque charge de froment qu'on tire.

Il y a pour l'affaire du froment vn Commissaire principal appellé le Maistre Portulan, qui a charge particuliere, & aussi d'autres Portulans sous sa iurisdiction, combien qu'il ne les cree pas, mais le Vice-roy.

C'est à cestuy-cy que s'adressent toutes les lettres du Vice-roy touchant la sortie des froments, & semblables matieres.

Il y a au Royaume huit Chargeurs, cinq principaux, & trois qui ont peu de maniemment.

Les particuliers meinent le fromēt à ces Chargeurs, afin que les nauires les puissent prēdre. Chaque Chargeur a son magazinier, qui est vn office que le Roy baille, & qui est fort bien payé de celuy qui le vend, pour le profit qu'apporte l'accroissement des grains, qui est du magazinier, & pource il donne bonne caution & assurance.

Ceste masse renduë aux Chargeurs se nomme le Comble, & il n'y a chose si capable de faire remuer ceste Isle, que si le Viceroy touche au Comble.

RELIGION, ET CE QUI CONCERNE L'EGLISE.

Les habitans de ceste Isle suiuent la Religion Catholique & Romaine. Il y a les Peres Inquisiteurs, qui sont establis pour regarder au fait de la Religion. On appelle leur Iurisdiction le S. office & ces peres ont cogneu en toutes les concurrences, que le Roy d'Espagne a tousiours eu pour plus agreable celuy qui a vsé en son proceder de plus grande modestie. Les Prelats ont fort grande authorité en ceste Isle, & monstrent bien la creance qu'ils ont parmy ce peuple, aux Parlemens où ils resistent au Viceroy ouuertement, & luy debattent les demandes, selon qu'ils considerent que l'Etat du peuple le requiert.

Il y a trois Archeueschez, c'est à sçauoir Palerme, Messine, & Mont-royal, qui ont des Eueschez sous elles. Car l'Archeuesque de Palerme a sous luy les Euesques d'Agrigente, Mazare & Malte. L'Archeuesque de Messine a sous luy les Euesques de Lippalede, Pace, Lipari, Patte, & S. Marc. L'Archeuesque de Mont-royal a sous luy les Euesques de Syracuse, & de Catane.

LES ROYS.

Les mesmes qui ont possédé ou disputé le Royaume de Naples, ont aussi tenu ou debat-tu le Royaume de Sicile.

Après la mort du Pape Clement VIII. les Cardinaux estants entrez dans le Conclau pour proceder à l'eslection d'un nouueau Pape, & ayans tenté le Scrutin par diuerses fois il arriua que le Cardinal Baronius eut 37. voix qui n'estoit toutesfois nombre suffisant pour faire les deux tiers: Ce qu'ayans decouuert les Protecteurs & entremetteurs des affaires d'Espagne à Rome, ils luy furent du tout contraires, & par brigues empescherent son eslection, parce qu'il auoit escrit dans l'onzième liure de ses annales, les pretentions des Papes sur le Royaume de Sicile.

C'estoit vn long discours, contenant cinq grandes feuilles qu'il auoit conté dans la vie du Pape Urbain II. en l'an 1097. où il dit en substance, que depuis le Pape Nicolas II. (qui tenoit le siegel l'an 1060.) Robert Guiscard, & tous les Princes Normands ses successeurs, Comtes, Ducs, & puis Roys de Sicile, & après eux Constance & son fils Federic, puis le Roy d'Angleterre, & tous ceux des maisons d'Anjou, & d'Aragon, Roys de Sicile, en auoient tous esté inuestis par les Papes, auxquels ils en auoient fait au S. Siege hommage lige, sous plusieurs conditions, & principalement par la manutention & liberté des Ecclesiastiques, & de leur iurisdiction, & entr'autres promis chacun d'eux ceste clause: *Et quod in Ecclesiis vacantibus nos, vel nostri in regno habedes, nulla habebimus regalia: nulloque fructus, redditus, proventus & obuentiones percipiemus, &c.* Ce qui auoit tousiours esté obserué iusques au temps de l'Empereur Charles V. où on auoit fait voir le iour à vne Bulle dudit Pape Urbain II. laquelle auoit esté iusques à lors incogneuë de nos deuanciers, dit le Cardinal Baronius, & sur laquelle ledit Empereur & depuis les Roys de Sicile ses successeurs ont alteré le droit spirituel & temporel que le S. Siege a sur la Sicile.

Durant la vie de ce Cardinal, les Espagnols auoient assez parlé de corriger ce qu'il auoit escrit de la Monarchie de Sicile: mais après sa mort, le Roy d'Espagne fit l'Edict suiuant.

Dom Philippes par la grace de Dieu Roy de Castille, de Leon, d'Aragon, des deux Siciles, &c. D'autant qu'on nous a fait à sçauoir, & auons esté informés par les consultations de nos Conseils & relations de personnes bien aduisees & ialouses de nostre seruice, de la conseruation de nostre reputation, paix & tranquillité de nos subiects, & specialement des naturels habitans de nostre tres-fidelle Royaume de Sicile: Que Cesar Baronius iadis Cardinal de la sainte Eglise Romaine en l'onzième tome de ses Annales Ecclesiastiques, qu'il a laissé escrits & publiez, en la vie de Urbain Pape II. du nom, en l'annee mil nonante sept, en vn discours long & prolix, avec paroles & raisons moins temperees & retenuës de ce que requeroit sa profession, procedant plus par forme d'accusation & inuectiue que de relation historique, a pretendu rendre non seulement suspects, mais encore faux, iniustes, vicieux & violens les origines & tiltres, par le moyen desquels les Serenissimes Roys de Sicile

nos predecesseurs ont acquis ensemblement avec le domaine les regales & preeminences que deslors iusques à present ils ont retenu & conserué paisiblement, & sont descendus sans interruption qui fut legitime iusques à nostre temps ; Et pourtant que nous ne de uons, ny pouuons permettre que par la lecture d'une relation si peu considerée, comme est celle que fait le Cardinal, s'inquietent, se troublent, & se rebellent insensiblement les esprits de nos subiects, & qu'on puisse en quelque temps que ce soit mettre aucune tache en la reputation & conscience de ces Roys, & en la nostre : Cela estant tres-certain, comme on peut colliger & entendre des exclamations & exaggerations dont il use, qu'il s'est laissé emporter à l'affection & passion particuliere, ou pour le moins qu'il l'a escrit avec peu de cognoissance, & vne ignorance inexcusable de la verité de l'histoire, attendu que c'est chose tant notoire & sceüe par tout le monde, que les susdicts nos predecesseurs acquirent & obtindrent cy-deuant, comme aussi ils ont depuis retenu & conserué tous ces droicts, comme propres attributs & preeminences de la dignité & Maiesté de ce Sceptre & Couronne Royale, & entant qu'il auroit esté de besoin, avec benediction, concession, & permission tacite & expresse des souverains Pontifes à ce meus & obligez par la raison d'une iuste recognoissance, & pour quelque remuneration des grands & notables merites que ces Catholiques Roys ont euen l'Eglise de Dieu, & sur le S. Sie-ge, pour auoir reduit à son giron & obeissance ce Royaume, depuis que par secrette permission de Dieu, il y auoit plusieurs annees qu'il estoit au pouuoir des Sarrazins, & en miserable seruitude des Mahometans à la honte & ignominie, & encore avec crainte & peril de autres Royaumes & Prouinces de la Chrestienté, particulièrement de l'Italie, & de la Cité mesme de Rome, lieu du throsne du Sainct Siege Apostolique, Mere & Chef de l'Eglise Catholique, & auoir encores espandu leur sang en vne tant glorieuse conquête, comme aussi employé & consumé leurs grandes richesses & Royal patrimoine en la reedification & deuotion des Eglises & Monasteres, qui ayans esté d'autresfois des Temples où du commencement auroit esté loué avec vn culte diuin le vray nom de nostre Seigneur, & la Foy & Religion de Iesus-Christ professée & confessée, les infidelles les au-ent souillez & prophanez avec sacrilege & abomination, les faisans des Mosques du perfide Mahomet, & estables à cheuaux.

Or ayans esté ces seruices tant agreables aux yeux des Saincts & Romains Pontifes encore accreus par d'autres non moins considerables que les successeurs de ces premiers Roys, & nos progeniteurs, & nous aussi auons fait, defendans cōtinuellement l'autorité & Majesté du Siege Apostolique, opposans nos personnes & celles de nos subiects, moyens & forces à tous les ennemis, & à ceux qui ont pretendu de diminuer & de faire : de maniere que par la grace de Dieu il a tousiours fleury & florit encore plus purement & catholiquement dans le Royaume de Sicile qu'en plusieurs autres de la Chrestienté, l'on entendra par là que n'ont esté iniustes & vicieux, ains au contraire fort iustes & glorieux les commencemens qui ont donné tiltre à la possession en laquelle ont esté par tant de siecles & aages les susdits Roys du droict de ces regales & preeminences, & avec quelle sùreté de nostre conscience Royale & reputation Chrestienne & respectueuse au sainct Siege Apostolique nous l'auons peu & pouuons continuer.

Par ainsi voulans pouruoir de remede conuenable pour empescher le dommage qui pourroit causer avec le temps & nostre tolerance ou dissimulation, la permission de la lecture de ce liure de la relation, & desirans ne manquer à l'obligation que nous auons de conseruer les droicts legitimes & iustes auxquels nous auons succédé, comoinctement avec les mesmes Royaumes & Estats qu'il a pleu à nostre Seigneur nous commettre, sans donner lieu ny permettre à ce que par semblables calomnies, mesmes au iugement des mal affectionnez & emuleurs de nostre felicité, soit notée la Majesté de nostre Couronne, avec vn si euident scandale, comme il pourroit estre causé en nostre Royaume de Sicile, & es autres qui nous appartiennent.

C'est pourquoy apres l'auoir communiqué & consulté avec nos Conseils nous auons aduisé d'ordonner & mander par cest Edict & pragmatique sanction : Qu'aucune personne de quelconque dignité, estat & condition qu'elle soit, & tant priuilegee soit elle qu'elle voudra, puisse exposer, tenir, vendre ny acheter en nos Royaumes & Estats le dict onzième tome sous le nom de son autheur, ny d'autres, imprimé ou escrit à la main, & en quelque langue que ce soit avec ledit discours sur ladite Monarchie, lequel commence dès le verset (*Hic auctor aggredietur*) & finit au verset (*Iam vero canentes receptui, quæ cæsi Urbani Papæ datum diploma Salerni sunt secuta, narremus*) ny sans le tesmōignage de la correction faite par la personne deputeée à cest effect, sous peine pour la premiere fois contre celuy qui y contreuendra de cinq cens escus ayans cours dans le Royaume, estat & seigneurie où tel

cas arriuera, applicables par tiers à nostre Royal fisc, Iuge & denonciateur : & pour la seconde fois encourra mesme peine pecuniaire, & outre ce le bannissement du Royaume pour cinq annees, qu'il n'enfraindra à peine de payer le double s'il est noble, & ne l'estant sera enuoyé au x galleres pour y estre mis à la rame, ce qui le doit aussi bien entendre contre ceux qui à present ont ledit liure, si dans quinze iours à conter de la publication de cest Edict ils ne le manifestent & mettent es mains des personnes qui pour cela auront esté deputées pour la correction susdite. Et afin que cecy soit obserué, accomply & executé de poinct en poinct & avec l'obseruance requise : Nous mandons que soient deliurez nos provisions & lettres par tous nos Conseils qui resident aupres de nous, afin qu'il soit gardé & executé en nos autres Royaumes, Estats & Seigneuries. Si mandons en outre à nos Vice-rois, Gouverneurs, Lieutenans & Capitaines generaux, Conseils, Senats, Chancelleries, Audiencies, Tribunaux, Iuges, Iustice, Ministres & Officiers d'icelles des les plus grands iusques aux plus petits qui sont à present ou seront à l'aduenir, & vn chacun d'eux, qu'en leur distroit & iurisdiction ils facent obseruer & executer inuiolablement tout le contenu en ce nostre Royal Edit. Donné à S. Lauren s le 3. Octobre 1610.

MOY LE ROY.

R. ven Lanz. R. ven Quintana Duegna. R. ven Caymus. R. ven Marc Ansoine du Pont. R. Le Roy nostre Seigneur a mandé à moy Laurens de Aguirre à Panorme le seiziesme Decembre neufiesme Indiction 1610. Presentees à l'Illustrissime Seigneur Lieutenant General, & il mande que le Spectable Conseiller du Roy Conseruateur du Royal Patrimoine les recognoisse & rapporte Vincent Lanfructus M. N. Là mesme ayant esté faicte la recognoissance & relation susdite, sa tres-illustre domination a mandé qu'elles soient faites executoires. I. de Vegha Conseruateur. Parquoy en execution de tout ce que sa Maiesté ordonne, & obseruation de nostre provision cy deuant inseree. Nous vous ordonnons, que vous deuiez executer & faire executer par celuy auquel il appartient d'executer & obseruer les susdites lettres Royaux & Edict selon leur forme & teneur, en se gardant bien de venir au contraire, si la grace de sa Maiesté leur est à cœur. Donné à Panorme le 17. Decembre 9. Indiction 1610.

Le Cardinal Iannetin Doria.

Monsieur le Lieutenant general a mandé à moy Vincent Lanfructus. M. N. Visa. Par Jean de Vegha Conseruateur. I. de Vegha C. Soit imprimé De Rao. P.

Voila la teneur de l'Edit que fit le Roy d'Espagne, suiuant lequel aux impressions des Annales de Baronius quel'on a depuis faites en Anuers, ce traité de la Monarchie de Sicile en a esté du tout retranché. Il y a eu autresfois beaucoup de moindres subiets que celuy-là pour lesquels on auoit entré en des excommunications & interdicts : mais la puissance du possesseur a fait contenir vn chacun en paix. Aussi ny le Nonce du Pape en Espagne, ny les Ecclesiastiques n'en ont osé ouurir la bouche pour se plaindre de ceste correction faite au liure d'un Cardinal de telle autorité.



L'ISLE DE SARDAIGNE.

SOMMAIRE.

1. **D**ESCRPTION de ceste Isle, sa longueur, sa largeur, & sous quel climat. *Peu habitee pour son air pestilenciel. Entre ses singularitez elle a ses Muscrions, dont les peaux seruent d'armes : & l'herbe Sardonique qui fait mourir en riant.*
2. *Mœurs tant anciennes que modernes des habitans de Sardaigne. Son Gouverneur, Religion & nombre d'Archeueschez pareil à celui de Sicile. Et comme apres plusieurs possesseurs de diuerses nations elle est venue à la Couronne d'Espagne.*

1. **L**A Sardaigne est vne grande Isle & presque semblable à la Sicile, & s'estend du Septentrion au Midy en longueur, elle est seulement esloignee de huit milles de l'Isle de Corse. Elle a du Levant la mer de Toscane, & de ce costé elle a la Sicile esloignee de 200. milles. Au Midy, elle a pour sa borne la mer d'Afrique, de laquelle elle est loing environ 160. milles, du Couchant elle a la mer de Sardaigne. Les modernes luy donnent 240. milles de longueur, & 90. de largeur, & de tour cinq cens. Elle est sous le 4. climat & comprend le 11. & 12. parallele, & là le plus grand iour est de quatorze heures, & pres de trois quarts d'heure.

QUALITE' DV PAYS.

Cette Isle est diuisee en deux regions ou parties, c'est à sçauoir au Cap de Calaris, où elle est vn peu montueuse, & au Cap de Lugudor qui regarde l'Afrique. Ceste Isle porte des fructs de toute sorte, & abonde en bleds de mesme que la Sicile. Elle porte aussi de l'argent. Mais l'air y est si mauuais qu'elle est bien peu habitee, à cause que la peste s'y engendre volontiers, ce qui arriue en Esté, & aux lieux plus fertils, c'est à sçauoir au Cap de Lugudor, où il y a beaucoup de marests.

Car quant au Cap de Calaris qui est montueux, comme nous auons dit, & subiect au vent du Nort, l'air y est meilleur.

Il y a force bestail en Sardaigne, & entre autres animaux elle a les Muscrions qui ne se trouuent en nul autre lieu de l'Europe, & ressemblent fort aux cerfs. Leurs peaux seruent au lieu d'armes. Elle n'a point d'animaux nuisibles, excepté le Regnard, & vn petit animal semblable à l'araignee. Il y croist aussi vne herbe appelée Ranuncule, iadis Sardonique, qui fait retirer les nerfs de ceux qui en mangent, & les fait mourir en telle sorte qu'ils semblent ruez iusqu'au dernier soupir.

On garde l'eau des pluies d'Hyuer pour l'Esté, à cause qu'elles y manquent alors. Il y a des estangs fort pleins de poisson, & pareillement des fontaines d'eau chaude qui sont fort bonnes. Il y a aussi des mines de soufre, d'alun, & de sel. Elle porte aussi des cheuaux qui sont petits, mais forts & courageux.

MOEVRS ANCIENNES.

Les Carthaginois qui se rendirent maistres de la Sardaigne, ne vouloient pas que ceux qui en estoient natifs y labourassent la terre.

Les Sarrazins l'ont tenue, & puis les Pisans, puis elle est venue entre les mains de ceux

d'Aragon, de sorte qu'on y a vescu tantost d'une façon, tantost d'autre, selon le naturel des vainqueurs.

M O E V R S D E C E T E M P S

LEs habitans de Sardaigne sont robustes de corps & de couleur brune, à cause de l'ardeur du Soleil. Ils ne sont gueres civilisez, sont fort addonnez au travail & à la chasse, vsent volontiers de viandes grossieres, mais ils traictent courtoisement les estrangers, & vivent paisiblement, combien qu'il y en a qui assurent qu'ils sont pleins de cruauté. Ils sont fort addonnez à voler & à escumer sur la mer.

R I C H E S S E S.

ILs sont assez d'argent de leur vin qui est porté à Rome, & de leurs cheuaux qu'ils vendent assez bien aux estrangers, tant ils sont courageux & de grande peine. Ils tirent aussi quelque argent de leurs Mulcrons qu'on meine en Italie.

F O R C E S.

LE Roy d'Espagne tient en ceste Isle quelques garnisons. Mais le petit nombre du peuple fera tousiours qu'elle sera moins forte.

Calaris est vne bonne ville & bien fortifiée, & a vn beau port & fort capable. Il y a aussi Oristagne, puis Sassaris, Alghes-Bosa, Chia, Oresie, Sore, & autres fortes places.

G O V V E R N E M E N T.

LE Roy d'Espagne tient en ceste Isle vn Viceroy qui demeure à Calaris, & dispose de toutes choses. La iustice y est presque exercee de mesme qu'en Sicile.

R E L I G I O N , E T C E Q V I C O N C E R N E L ' E G L I S E.

LEs Sardes sont Catholiques Romains, & il y a des Inquisiteurs en ceste Isle, de mesme qu'en celle de Sicile.

Il y a trois Archeuesques, c'est à sçauoir celuy de Calaris, qui a sous luy les Euesques de Suiolo, de Doli, & de Puella. Celuy de Sassaris, qui a sous luy les Euesques de Sore, Plonate, Ampurie, Giface, ou Girarde, Castre, Othac & Bosane. Celuy d'Albore a sous luy les Euesques de Visselle, de S. Iuste, & de Terre Albe. Ceux de Ciuita, & de Galtelle sont priuilegiez.


L E S P R I N C E S.

LEs Carthaginois possederent cette Isle, mais ils en furent chassez par les Romains. Les Sarrazins l'occupèrent apres sur le declin de l'Empire de Rome, puis elle fut prise par les Geneuois, & par les Pisans, & le Pape l'ayant arrachée de leurs mains la donna en fief au Roy d'Aragon, & par ce moyen elle est paruenue au pouuoir du Roy d'Espagne.



DE L'ESTAT DE MILAN.

SOMMAIRE.

1.  **IRCVIT** du Duché de Milan. Ses principales villes, entre autres Milan peuplée de 200000. habitans : iadis possédée par les Gaulois & Romains, Gots, Huns, Lombards & autres, & comme finalement est tombée es mains du Roy d'Espagne.
2. Ris croissant en abondance pres de Milan. Fertilité du terroir de Pauie appelé pour ce le iardin de Milan.
3. Milanois propres aux lettres, aux armes, & à la marchandise.
4. Combien de ducats le Roy d'Espagne tire toutes les années du Duché de Milan, outre les dons gratuits.
5. Quels hommes de guerre & le nombre de gendarmerie qu'il y entretient ordinairement.
6. Milanois gouvernez pour le present par le Duc de Fuentes, & par le Senat de Milan composé de douze Docteurs, quelques Prelats & Gentils hommes Milanois.
7. Genealogie des Ducs de Milan.



LA Duché de Milan a de tour 30000. La principale ville c'est Milan dont toute la Duché a pris le nom. Ceste ville est fort peuplée, puissante & forte, & en belle & bonne assiette, & est aujourdhuy l'une des premières de l'Europe. On y compte 200000. habitans. Ses faux-bourgs sont fort longs & larges, & la rendent beaucoup plus grande, & ces faux-bourgs sont environnez d'eau aussi bien que la ville, par de grands canaux, par lesquels les vaisseaux portent à Milan toutes choses en si grande abondance, qu'elles y sont à bon prix. Les bastimens y sont beaux & magnifiques, & y a un grand nombre de bonnes & riches familles. Il est sorti de ceste ville quatre Papes, Alexandre 2. Urbain 3. Celestin 5. & de nostre temps Gregoire 14. On admire en ceste ville le Chasteau, le Dome & l'Hospital pour leur magnificence. En cet estat on voit Cremone, où il y a de beaux edifices tant publics que particuliers, où il y a une belle Citadelle gardée par les naturels Espagnols, & la ville de Lody qui est riche. Mais ces villes cedent en grandeur à Pauie, bonne & ancienne ville, iadis demeure des Roys Lombards, où il y a Vniuersité. Il y a outre cela Nouarre assise sur une coline, qui a de nobles familles : & aussi comme Ville riche, qui donne son nom à un grand lac qui contient en longueur 18. milles & 4. en largeur. Quelques uns luy donnent 60. milles de tour. Il y a beaucoup d'autres villes en cet Estat, & un grand nombre de village & de peuple.

La ville de Milan a esté premierement long-temps sous la domination des Gaulois, iusqu'à ce que M. Marcellus Consul ayant deffait Virдумarus Roy des Insubres la soumit aux Romains. La puissance des Empereurs estant affoiblie, ceste ville fut rauagée par beaucoup de nations barbares, c'est à sçavoir par les Gots, les Huns & les Lombards. Ces derniers estans chassés d'Italie par Charles le Grand, ceste ville obéit aux Roys de France, puis aux Empereurs d'Allemagne. Enfin elle se rebella sous les deux Federics I. & II. Empereurs, & eut de nouveaux Seigneurs, c'est à sçavoir les Galeaces Vicomtes, qui furent nommez Ducs apres par l'Empereur Venceslas l'an 1395. Ceux-cy venans à manquer les Sforces entrèrent en leur place, qui finirent en la personne de François. Les Roys de France ont tenu ceste ville assez longuement, mais enfin elle est tombée entre les mains du Roy d'Espagne avec tout l'Estat, auquel neantmoins nos Roys pretendent auoir beaucoup de droit comme il y a apparence, & il appert par la genealogie des Ducs de Milan mise cy apres.

QVA.

QUALITE' DV PAYS.

IL y a en ce pays force lacs, & grand nombre de riuieres & de campagnes qui portent des bleds en abondance. Il vient aussi de fort bons vins, & toute sorte de fruits, & les riuieres & les lacs nourrissent grande quantité de poisson. Pres de Milan il croist tant de riz qu'il n'est pas possible qu'on en puisse trouuer dauantage en autant de pays. Pres de Cremone on void force bleds, on y trouue quantité de vins, & de toute sorte de fruits, du miel & du lin en abondance. Pres Lody tant de seigle, de mil, de vin, & de lin, & tant de fruits qu'il n'est possible de plus, & outre ce il y a force prairies, où l'on nourrit vn grand nombre de bestes.

Le terroir de Pauie est si fertile & si plein de tous fruits, de toute sorte d'herbages, qu'on le nomme le iardin de Milan, & y a force gibier & force volaille, avec grande quantité de poissons. On ne scauroit rien voir de plus agreable ny de plus de rapport que le terroir qui est pres de Come.

MOEVRS DES HABITANS.

CE pays engendre des personnes propres aux lettres, aux armes & à la marchandise. Il y a toutesfois des endroicts où ils sont grossiers & rudes. Ceux de Cremone ont la reputation d'estre fidelles.

Le peuple de Milan est merueilleusement industrieux. Celuy de Lode est propre à la marchandise, aux armes, & à acquerir des moyens: & ceux qui demeurent pres de Come aiment le labourage, & sont pleins d'industrie. On donne aux femmes de Pauie le nom d'auaricieuses, & desireuses de gain, on appelle les Milanoises ciuiles & courtoises, celles de Lode superstitieuses, & celles de Cremone somptueuses.

RICHESSES.

Milan est si plein de diuers artisans, qu'on dit ordinairement que si l'on veut accommoder l'Italie il faut ruiner Milan. Et les artisans sont si industrieux, & font si bien toutes choses que tout ce qui part de ceste ville est en grande estime. Car on scait assez le prix qu'on donne aux arquebuses de Milan, & à toutes les armes qui en viennent, aux gardes d'espee dont on fait si grand estat, aux fournimens, puis aux passements & à la broderie. De sorte qu'il faut aduouer que ceste ville tire vn grand argent de tout le reste de l'Europe. Adioustans à cela les bas de soye que l'on prise plus que les autres. Et mettrons outre cecy le riz dont il fait part à tant de Prouinces. Apres cela Lode fait tant de fromages qu'elle en enuoye en beaucoup d'endroits d'Italie, & pour le couper court, l'Estat de Milan fournit aux Grisons & aux Suisses beaucoup de ses fruits, & est accommodé avec exccez de ce qui luy est necessaire.

Le Roy d'Espagne tire de cét Estat huit cents milles ducats toutes les annees ordinairement, outre les dons gratuits, & autres choses extraordinaires.

Et pour monstrier que ce Roy scait bien tirer autant qu'il peut de cest Estat, ou que ses Officiers le tirent pour luy, le Prouerbe d'Italie dit, quel'Officier de Sicile ronge, celuy de Naples mange, & celuy de Milan deuore.

FORCES.

LE Roy d'Espagne entretient ordinairement en cest Estat trois mille hommes de pied, Espagnols, mille cheuaux legers, & six cents hommes d'armes, pour la garde de cét Estat. Le grand nombre du peuple seroit fauorable à ceste conseruation, s'il ayroit les Espagnols; mais on tient que leurs actions desagreent à ce peuple en telle sorte, qu'il n'y a personne qu'ils haissent dauantage. De sorte que s'il n'estoit bridé, il pourroit bien entreprendre quelque nouveauté contre ceux qui le dominant. Il y a de bonnes fortereilles en cest Estat, dont le Chasteau de Milan est la premiere.

Le Gouverneur tire force argent du Roy d'Espagne toutes les annees, pour augmenter la fortification de ceste place qui est capable d'vne grande resistance. Cremone a vne Tour forte tout ce qui se peut, qu'on met entre les merueilles de l'Europe. Pauie est aussi vne bonne place, & Nouarre aussi. Il y a aussi beaucoup d'autres fortes places en cest Estat, mais les Espagnols se fondent principalement sur le Chasteau de Milan, estimans à cause de ce fort, qu'ils sont inuincibles.

Le Roy d'Espagne ne peut craindre pour le regard de Milan, que les Venitiens, qui ont

X

demeuré desia paisibles long-temps, & ne demandent que le repos, ce semble: ou le Duc de Sauoye qui luy peut apporter de grands dommages ou en se ruant sur cest Estat à l'impourueu, estant assisté de quelque plus grand Prince, ou bien en donnant passage à ceux qui entreprédroient de l'attaquer. Mais l'alliâce qui est entre eux deux luy doit faire secoüer toute crainte. Ou bien il peut redouter les Suisses qui ont vsurpé bien souuent en toute seurté beaucoup de bons membres de cest Estat. Mais le fort de Fuentes, & le bon ordre que le Gouverneur de l'Estat y met, les destourneront tousiours aussi bien que les Grisons, de toute entreprise.

G O U V E R N E M E N T.

LE Roy d'Espagne y tient vn Gouverneur qui est le Duc de Fuentes, pour le présent, & le mesme est Capitaine General de l'Infanterie, & Caualerie qui y est entretenuë, & en porte le titre. La cognoissance des causes tant ciuiles que criminelles depend du Senat de Milan, où il y a 16. Docteurs, & quelques Prelats, & Gentils-hommes Milanois.

G E N E A L O G I E D E S D U C S D E M I L A N.



PAR QUEL DROIT LE ROY DE FRANCE PRETEND LA
DUCHE' DE MILAN LUY APPARTENIR.

X 4

Gauche
Marthieu }
Vicomte. } Etienne

**Actio Ga- Jean Marie second
leace, Duc, mort fans hoir.**

Jean Marie second Duc, mort sans hoir.

Philippe Marie, tiers Duc, n'eut point de fils légit.

Blanche, fille bastarde, mariée à Francisque Sforce, qui a usurpé par force la Duché de Milan.

Galceac Gouverneur de Milan. } Jean Galceac
Louys Sforce, qui fut } da son pere.
fait Duc par l'Empe- }
reur apres son nepueu, }
fils de son frere qu'il }
empoisonna, comme }
dicent aucuns. }
Blanche Marie. }
Maximilian. }
Francisque. }

• Bonne , mariée au
Roy de Pologne.
Francisque Sforce
dernier mené capif
en France.

**} Moururent fans
} hours.**

Galace.
Jean Ga-
lacefon
fil, pre-
mier Duc
crée par
Vuen-
cellas.

Valentine, qui fut mariée à Louys Duc d'Orleans, à ceste condition, que si ces deux freres d'elle mourroient sans enfans mâles, que les enfans legitimes, & successeurs de Valentine fussent heritiers de la Duché de Milan. Et dit-on que le Pape sous-signa ce traité. Certes ç'a esté un affaire odieux, pour lequel rant de milles Chrestiens sont morts.

Philippe, Comte de
Vertus, mort sans
hoirs.

Charles Duc d'Orléans, lequel apres la mort de son oncle, leua une armee contre Milan.

Louys 12. Duc d'Or- Claude fils de Louys,
leans, lequel feit auffi } mariee à François
guerre pour recouurer } Duc de Valois, & de-
la Duché de Milan. } puis Roy de France.
Et eftant fait Roy, il
print Milan par force,
& emmena Louys
Sforce prifonnier.

Charles Comted'An-François
goulefne , Louye la de Valois.
femme, fœur de Phil- Roy de
bert, Duc de Saunoye. France.

François
 Dauphin.
 Henry, Duc
 d'Orleans,
 depuis Roy
 Charles
 Duc d'An-
 goulême.

François
 Roy de
 France.

ESTAT DES ISLES D'AFRIQUE DV COSTE' DE L'OCEAN ATLANTIQUE APPARTENANTES AVROY D'ESPAGNE.

DES ISLES CANARIES.



Les anciens mettent ces Isles en l'Ocean Atlantique, & les nomment fortunées, mais ils ne s'accordent pas en leurs noms & les modernes sont fort differents des anciens touchant leur disposition & assiette.

Toutesfois il est ainsi qu'elles sont appellees Canaries, selon qu'a remarqué Linschot en ses nauigations pour la multitude grande de dogues & de chiens qu'on y trouua lors qu'elles furent decouvertes.

Ces Isles Canaries sont diuisees en sept, c'est à sçauoir Teneriffe, l'Isle de Fer, la grande Canarie, l'Isle de Palme, Gaumere, Lanzarote, Forteventure.

En l'Isle de Teneriffe, il se void vne montaigne nommée Pico de Terraira, laquelle au iugement de plusieurs est la plus haute qui se puisse voir, car elle se decouure de soixantelieuës loing, on n'y peut monter qu'ès mois de Juillet & d'Aoust pendant les iours caniculaires, & le regne des grandes chaleurs, estant tout le reste de l'annee couuerte de neiges, comme ainsi soit qu'en la mesme Isle ny aux autres ne se voyent aucunes neiges en toute sorte de temps, il faut trois iours à monter ceste montaigne, selon Linschot: & en sa cime qui est de 15. milles y a vne grande plaine, de laquelle en temps clair & serain, on peut voir toutes les autres Isles voisines, combien qu'il y en ait qui en soient esloignées de 50. lieuës: on y trouue des pierres de soufre qu'on enuoye en Espagne.

En l'Isle de Fer, se void vne chose admirable, c'est que cōme le terroir est sec & aride, il ne s'y trouue nulle veine d'eau, sinon autour du riuage de la mer, mais en l'escarte des demeures, & en si petite quantité que la commodité qui en reuiert à l'Isle est petite ou nulle; au de faut de cela par providence de Dieu, pouruoyant d'eaux aux habitans & aux animaux, il s'y trouue vn certain arbre, dont l'espece est incogneue qui n'a nul rapport avec les autres arbres, ayant les fueilles longues & estroictes, & toutesfois verdes, sans aucun changement; au tour duquel arbre il y a tousiours vne petite nuee qui le couure, laquelle ne change iamais de forme; d'icelle distile incessamment de l'humidité sur les fueilles de l'arbre, d'où procede vne eau tres-claire qui degoutte en telle abondance dans des cuues & vaisseaux qui sont sous ledit arbre, qu'elle suffit non seulement pour les habitans, mais aussi pour les bestes, duquel miracle nul ne sçauroit rendre cause ny raison.

La grande Canarie est la capitale de ces sept Isles, & commande aux autres: il y a en icelle le siege Episcopal desdictes Isles où reside l'Euesque & le siege de l'Inquisition.

L'Isle de Palme est fort petite, mais elle est d'autant plus agreable & plaisante que y croist vne belle quantité de Palmes & de Dactyles.

QUALITE' DE CES ISLES.

En ces Isles abondent l'orge, le miel, la cire, le succe, le fourmage de brebis, de cheures, de chameaux, & y trouue on grande quantité de peaux. Entre autres choses elles produisent vne herbe nommée Oricelle, dont on teint les draps en couleur rouge, & dont se transporte grande quantité par toute l'Europe.

L'Isle de Palme a de grandes commoditez, & sur tout abonde en vins, fromages, bestail & succe, à raison dequoy ceux qui vont d'Espagne au Brasil se pouruoyent icy des viures qui leur sont necessaires.

MOEVRS DES HABITANS DE CES ISLES.

Les habitans qu'on nomme Ganches, estoient autresfois grossiers & rudes, mais ils sont maintenant rendus plus accorts, & sont deuenus plus civils & plus polis depuis que les Espagnols y frequentent.

RICHESSES.

Les Isles de Canarie enuoyent leurs vins excellents par toute l'Europe, de mesme que leurs sucres qui y font venir les marchands Espagnols & Portugais pour s'en charger : & pour cest effect il y a vn lieu nommé par eux la Stapele.

GOVERNEMENT.

Il y a en la grande Canarie vn Siege de Iustice où l'on rend le droit aux autres Isles.

RELIGION.

Le peuple de ces Isles adoroit autrefois le Soleil, la Lune & les Estoilles, mais les Espagnols s'en estans rendus maistres l'an mil quatre cens quatre, y establirent la vraye foy avec leur domination, tellement qu'aujourd'huy elles sont toutes Chrestiennes.

A costé droit de ces Isles à cent lieux ou environ on découure vne Isle appelée San Porondon, où plusieurs personnes sans y penser se rencontrent qui exaltent merueilleusement la beauté d'icelle, & disent que les habitans d'icelle sont Chrestiens, plusieurs Espagnols sont souvent sortis de Canarie pour la trouuer & ne l'ont peu faire, les vns croient que c'est magie, les autres disent qu'elle est difficile à trouuer, parce qu'elle est continuellement couuerte de nuages.

DES ISLES DV CAP VERD.

On estime que ce sont les Hesperides des anciens, elles ont pris le nom de Cap verd, du Cap d'Afrique qui s'estend en la mer vis à vis desdites Isles.

Il y en a neuf qui ont esté découuertes l'an 1455. par Louys Cadamuste & ont le nom de S. Antoine, S. Vincent, Sainte Luce, S. Nicolas, S. Bonauista May, S. Iacques & Fuego, ou l'Isle du Feu. La principale est l'Isle de S. Iacques, dont la longueur est de 70. milles. Les Portugais y ont vne bonne ville qui se nomme *Ribera grande*, & qui peut faire environ 500. feux. Il y a vn port qui est assez asseuré & capable.

L'Isle de S. Iacques est presque toute montueuse & aspre, mais elle a de plaisantes & bonnes valles, qui sont peuplées au possible. Toutes ces Isles ont generalement forces cheures, & il s'y trouue beaucoup de salines: Les Espagnols y cueillent du mil qu'ils nomment Zabure. Il y a grand nombre de tortuës, dont la couerture est aussi grande qu'un bouclier.

L'ISLE DV PRINCE.

Ceste Isle a trois degrez de l'equinoctial, & est ainsi nommée à cause que le reuenu qu'on en tiroit estoit assigné au Prince de Portugal pour son entretien.

Elle est assez bien cultiuee, & y croist du sucre en grande abondance: tellement qu'elle en enuoye dehors grande quantité: Il y naist aussi vne sorte de palmiers d'où les habitans tirent certain suc, qui leur sert de breuuage & de saltere.

Arzille, Tingu ou Tangir, & Septe, ou Seuta.

Ces trois villes sont au Royaume de Fez au pays d'Elabat. Arzille est assez grande ville, distante du destroit de Gibraltar d'environ 70. milles. Tanger est grande & ancienne ville sur le riuage de la mer Oceane, & a 30. milles du destroit de Gibraltar.

Seuta est vne fort grande ville à la bouche du destroit, & a iadis esté capitale de toute la Mauritanie.

Ces trois villes sont subiectes au Roy d'Espagne, qui tient encor en ce Royaume en la prouince de Garet deux bonnes villes, qui sont Medele, & Chefase.

L'ISLE DE SAINTE HELEINE.

Ceste Isle porte ce nom à cause que les Espagnols la trouuerēt le 21. May iour de S. Heleine, Elle contient seize milles, & à demy degre de l'Equinoctial vers le Pole Antarctique, & à 550. lieux loing du Cap de bonne Esperance, de mesme qu'à trois cens cinquante lieux d'Angole.

QUALITE'.

Cette Isle est montueuse, & le bois des arbres qui y sont n'est presque propre qu'à mettre au feu, tant il est brulé: ce qui monstre qu'il y a des veines de feu en cette Isle.

La terre a vne qualité seiche, & en quelques lieux elle a la substance du soulfre. Avant l'arriuee des Portugais il n'y auoit point encores de bestes, les arbres n'y auoient porté nul fruit, de sorte que tout ce qu'elle pouuoit donner c'estoit de l'eau douce, qui coule des montaignes, & descend en la vallee en abondance, pres du lieu de la chappelle, & de là coule en la mer par les torrens.

Les Espagnols ou Portugais remplissent là leurs vaisseaux, & y lauent leur linge. Ils y ont aussi peu à peu porté des bestes de toutes sortes, & ont planté de bons arbres fruitiers aux vallees, tellement qu'il y en a auourd'huy vn nombre incroyable. Il ya vne multitude innombrable de daims, de cheureux, sangliers, perdrix, & pigeons: & chacun y peut chasser tant que bon luy semble. On en peut tuer aisément avec vn baston, ou vne pierre, tant il y en a grande quantité. Il y a des figues de Portugal, des grenades, des oranges, & des citrons en telle abondance que ceste Isle semble vn petit Paradis terrestre, & les arbres y portent presque tousiours, à cause de la pluye qui les arrose tous les iours six ou sept fois, & qui est suivie d'un beau Soleil, si bien que le meslange de l'air serain & pluuieux rend ceste Isle extremement fertile.

Il y a aussi grande quantité de poisson, tellement qu'en peu de temps on en peut prendre pour beaucoup de iours. Les Mariniers font seicher ce poisson qui est de meilleur goust que celuy qu'on mange en tous les autres endroits de la terre.

Les rochers qui sont au bord de la mer, sont couverts de sel, qui est propre & suffisant pour l'aprest des viandes.

Tellement qu'il semble que ceste Isle a esté mise en ce lieu pour seruir de rafraichissement des nauires d'Espagne.

On a accoustumé de laisser en ceste Isle les malades avec du ris, du biscuit, de l'huile & quelque peu d'espece. Quant au poisson & à la chair, ils en trouuent de reste. Car lors que les nauires s'en vont, les animaux qui s'estoient retirez vers les escueils, & aux montaignes, retournent à la valee, & sont facilement pris.

Les malades demeurent là iusques à l'annee suiuiante, qu'ils sont receus dans les nauires qui repassent. Et veritablement ils guarissent aussi tost pour la plus part, à cause de la temperature de l'air qui dure tousiours en mesme estat en ceste Isle.

Le Roy d'Espagne a fait vn Edict par lequel il est deffendu de bastir & habiter en ceste Isle, afin qu'avec le temps ceste communauté ne se perde, veu qu'il seroit à craindre que les habitans ne fissent leur particulier, & ne s'appropriassent entierement ce qui est maintenant commun à tant de personnes, & si profitable.

Il y a quelques annes qu'un Hermite s'y estoit retiré pour auoir soing de la chappelle, & pour y viure avec plus de deuotion. Mais pource qu'on sceut qu'il tuoit les cheureux, & faisoit son profit de leurs peaux, on le ramena en Portugal. Dauantage deux Caffres Negres de Mozambique & vn homme de laue avec deux esclaves se cachèrent dans les rochers & montaignes, estans par fortune eschapez des nauires. Ceux-cy s'estans multipliez iusques à vingt rauageoient l'Isle quand les nauires estoient partis, & nuisoient grandement aux fruits, & tandis que les nauires estoient pres de l'Isle ils se tenoient enfermez en leurs loges qu'ils auoient dans le rocher, & en certains lieux où les Portugais n'auoient iamais esté.

Lors que les Mariniers les eurent apperceus ils essayerent de les prendre: mais tout cet effort fut vain, à cause de leurs demeures qui estoient inaccessibles aux autres.

En fin par commandement expres du Roy ils furent pris & menez en Portugal: & depuis ce temps il n'y a personne qui y demeure horsmis les malades, qui font leurs petites loges sous des arbres en façon de paillons. La multitude des arbres est grande, & ces loges sont comme vne montre de quelque ville. Chacun de ces malades chasse pour auoir de la chair: chacun va pescher, cueillir des fruits, & lauer son linge. Outre ce ils font vne profession generale en chantant des hymnes. On void les noms de plusieurs graués dans l'escorce des figuiers, & ces noms croissent quelquesfois de la grandeur d'un pied.

L'ISLE DE SAINT THOMAS.

Cette Isle est ainsi nommée, pource que les Portugais la trouuerent le iour de saint Thomas. Elle est assise sous la ligne Equinoctiale, & est de forme ronde. Son diametre est de quarante milles.

Lors que ceste Isle fut decouverte elle estoit toute pleine de grands arbres dont les branches s'esleuoient en croissant. Elle est exempte de la peste. L'air y est chaud & sain, toutes-fois il y a peu de Chrestiens qui y vivent au delà de cinquante ans, & c'est vne merueille d'y voir vne barbe blanche. Mais ceux qui sont natifs du pais y vivent iusques à cent ans communément. Les iours y sont tousiours esgaux aux nuicts. Aux mois de Mars & de Septembre il tombe des pluyes espaisles qui viennent souuent, & humectent la terre, & les autres mois de l'annee la rosee la rafraichit.

Le terroir ne peut souffrir du froment, de la vigne, ou des arbres dont les fruiçts ont les noyaux durs. Il porte des melons, cōcombres, des citrouilles, des figues, du zinzembre, & du sucre principalement: de sorte qu'on auoit accoustumé de charger de sucre de ceste Isle quarante nauires toutes les annees, & donner en eschange du vin, du fromage, du froment, des cuirs, & autres choses necessaires. Mais ceste abondance a cessé depuis que certains vers se sont mis à foüyr les racines des canes: si bien qu'aujourd'huy on ne charge tous les ans que six nauires de ce sucre.

Ceste Isle porte aussi du millet, du ris & de l'orge, des laitues, des choux, des betes-raues, du persil, & toutes herbes potageres en abondance.

Il croist encore en ceste Isle vne herbe que les habitans nomment Ignamã. Ils la tiennent pour excellente, de grande vertu, & necessaire à leur vie. La peau de dehors est noire, & celle de dedans blanche: elle est longue comme vne grande raue, & a plusieurs rameaux en sa racine. Elle a le goust de la chasteigne, mais il est plus delicat & plus agreable. On la mange communément cuitte sous la cendre, ou sous les charbons, & quelquesfois aussi crüe.

Les Espagnols qui y habitent y ont transporté des oliuiers, des peschers, des amandiers, & autres arbres qui ont esté beaux à voir, mais n'ont iamais porté nul fruiçt.

Il y a en ceste Isle certaine sorte d'ecreuilles qui demeurent dans terre, & comme les taupes renuersent la terre, & rongent toute chose. On trouue aussi en ceste Isle vn grand nombre de perdrix, d'étourneaux, merles & perroquets.

La mer d'alentour est toute pleine de poisson, & c'est chose merueilleuse de voir vn nōbre infiny de baleines qui se trouue en ce riuage. Au milieu de l'Isle il y a vne montagne pleine d'arbres ordinairement si couverte de nuees qu'il sort des forests de l'eau suffisante pour arroser les cannes de sucre: & tant plus le Soleil est haut, tant plus l'air est plein de nuages autour de ceste montagne.

Les habitans sont partie blancs, & partie noirs: & quant aux noirs l'on dit qu'ils sont tellement tourmentez des puces, poux, & punaises, au lieu que les blancs n'ont ny poux, ny puces, ny punaises en leurs lits.

Les Portugais ont basti en ceste Isle vne ville qu'ils nomment Paucasan, où il y a enuiron 700. familles, outre l'Euesque, & les autres Ecclesiastiques. Il y a en ceste ville vn fort bon port.


L'ISLE DE MADERE.

Ceste Isle a en son milieu 32. degrez de latitude Boreale, & trois degrez & demy de longitude. Sa grandeur est de 140. degrez, ou selon les autres, de 160. Elle fut premierement decouverte, & habitee l'an 1420. & auparauant elle estoit deserte, & pleine de forests, qui furent toutes consummees par le feu qu'on y mit afin de la rendre propre au labourage. Elle est toutesfois montueuse comme la Sicile, & tres-fertile. Car lors qu'on commença d'y semer elle rendoit soixante pour vn, mais elle ne rapporte pas tant aujourd'huy. Elle produit force bleds, & d'excellens vins en assez grande quantité, & semblablement de fort bons fruiçts: de mesme on y trouue force miel & force cire, & sur tout grande quantité de sucre fort estimé qu'on porte en plusieurs contrees. Il y a icy force troupeaux de bestail, & les montagnes abondent en sangliers. Ceste Isle ne manque aussi de paons sauues, de ramiers, de cailles, & d'autres oiseaux. Il y a icy des fontaines d'eau extremement claires, & 8. riuieres. L'air y est chaud & temperé, il n'y fait gueres froid. Les cedres y deuiennent fort hauts, & l'on en fait des tables, des caisses & choses semblables. L'Archeuesque Primat des Indes demeure en ceste Isle en la ville de Funcial qui est capitale des autres.



LES ISLES ACORES.

SOMMAIRE.



RIGINE du mot *Acore*:


*Et pourquoy ces Isles ont
esté ainsi nommees.*

2. Description de la Terce-
re, & des autres Isles Acores. Leurs prin-
cipales Villes & bourgs.
3. Singularité des fruits qu'on appelle Bara-
ses, & d'une plante dont la racine sert
au lieu de plumes pour emplir les matelats
& couïetes : Du pastel : des oiseaux de
Canarie.
4. Des fontaines d'eaux chaudes où l'on peut
cuire des œufs. Fontaine qui convertit le
bois en pierre d'une beauté incroyable

nommé Teixo, auquel est défendu de coucher par Edit du Roy d'Espagne.

5. *Maladies particulieres du pays.*
6. *A quoy s'adonnent les habitans de ces Isles: & la façon de garder leur froment qui se corrompt dans l'annee.*
7. *Forteresses de l'Isle Tercere au bord des rochers gouvernees & gardees par les soldats Espagnols de nation.*
8. *Angre capitale Ville des Isles Acores, où reside le Gouverneur qui deffend par Edit aux estrangers de faire le tour de l'Isle, ny d'en considerer les aucuenës.*



 N cōpte sept Isles Acores, ou Flamandes, c'est à sçauoir la Tercere, saint Michel, sainte Marie, saint Georges, la Gracieuse, Pico, & Fayal. Les autres deux, c'est à sçauoir Corues & Flores ne sont pas comprises sous le nom Acores, combien qu'aujourd'huy on mette sous vn mesme gouuernement les neuf Isles: on les nomma Acores de la multitude des Autours qu'on y trouuoit au cōmancement, pource qu'Acor signifie vn Autour en Espagnol. Mais auourd'huy on n'y trouue point de ces oiseaux. Elles ont eu le nom d'Isles Flamandes, à cause des Flamans qui habiterent les premiers en l'Isle de Fayal, où ils ont encor des familles, dont les hōmes ressemblent aux Flamans de cheueux, & de façon, & mesme on appelle vn torrent du lieu où ils demeurent *Ribera dos Flamingos*, en Portugais: c'est à dire riuere des Flamans. La capitale de toutes ces Isles c'est la Tercere, nommee communément Isle de Iesus-Christ de Tercere. Elle contient enuiron quinze ou seize milles de tour avec rochers hauts & eminents, dont elle est ceinte, comme de murailles naturellement dressees, qui la rendent imprenable.

Ellen'a point de port pour deffendre les nauires. Toutesfois la mer se courbant en demie lune deuant la ville d'Angre fait vne espece de port, & la terre s'aduance quelque peu en mer en forme de croissant.

Et c'est aussi d'où vient le nom de la ville, à cause que les Portugais nomment Angre cette forme de la lune. D'un costé où elle s'estend comme vn coude, elle a deux montagnes nommees Bresijl, qui s'aduancent dans la mer en telle façon qu'elles semblent de loing separees de l'Isle.

Au reste elles sont si hautes qu'on void de là librement iusques à quinze milles lors que le temps est serain.

Il y a là deux colonnes de pierre, d'où celui qui est en garde fait sçavoir la venue des nauires. Car il remarque celles qui viennent d'Occident, & du Midy, c'est à sçavoir des deux Indes, du Bresil, de la Guinee, & du Cap verd, de la colonne d'Occident, par le moyen des drapeaux dressez, & s'il y en a plus de cinq on les fait cognoistre par le moyen du principal drapeau, & de la trompette qui sonne. De la colonne d'Orient on cognoist les nauires qui viennent de Portugal, & d'autres lieux d'Orient, ou du Nort par le moyen des drapeaux qu'on dresse, qui sont veus de toute la ville, à cause de la hauteur de ces colonnes, & ainsi rien ne se découure en mer que toute l'Isle n'en soit aduertie, car il y a garde sur l'une & l'autre montagne en sentinelles, qui aduertissent les Gouverneurs & Capitaines de se tenir sur leurs gardes.

Au

Au pied de ladite montagne il y a vn chasteau , vis-à-vis de cestuy-là encore vn autre qui deffendent le port, à ce que nul vaisseau entre sans permission.

La ville principale de ceste Isle c'est Angre, qui est aussi capitale des autres Isles Acores. A trois milles de là on void la ville de Praye, c'est à dire ville du riuage, qui est ceinte d'assez bonnes murailles, mais peu peuplées. La Tercere a encor les bourgs de saint Sebastien, sainte Barbe, Altares, Gualue, & Villeneuve, & autres. L'Isle de saint Michel a près de vingt milles de longueur, & beaucoup de bourgs, & de hameaux.

La principale ville de ceste Isle se nomme *Punta delga*. Il n'y a point de ports en ceste Isle, & la mer y est plus dangereuse qu'autour de la Tercere. Mais les nauires ont ce bien qu'il n'y a point de fort qui les empesche à l'arriuee de quelqu'orage de se mettre en pleine mer, pour euitier le dâger; ce qui n'est pas permis près de la Tercere. A raison dequoy les nauires estrangers vont volontiers à saint Michel. L'Isle de sainte Marie a de tour dix ou douze milles. Elle est habitee des Espagnols.

La Gracieuse contient enuiron cinq ou six milles. Il y a des Portugais qui y demeurent. L'Isle de saint George est longue de douze milles, & large seulement de deux ou trois.

L'Isle de Fayal contient dix-sept ou dix-huit milles, & est plus renommee apres la Tercere, & saint Michel.

L'Isle de Flores contient sept milles. A vn mille ou enuiron loing de là on void la petite Isle de Coruo, qui a deux ou trois milles de tour.

La Tercere a trente neuf degrez de hauteur, & est esloignee de Lisbonne vers le Leuant, & le Couchant 250. lieues d'Espagne.

QUALITE.

Toute l'Isle de la Tercere porte force froments, & grande quantité de vin. Toutesfois² les vins ne peuuent estre emportez loing à raison de leur foiblesse, qui est cause que les riches vident des vins de Madere, & de Canarie. L'Isle a du poisson, de la chair, & autres choses necessaires à suffisance. On y vse seulement de l'huile qui vient de Portugal, & elle manque aussi de sel, de pots, de plats, & de vaisselle de terre, & choses semblables. Elle porte des pesches de diuerses sortes, & en abondance: mais il y a peu de cerises, de prunes, de noix, & de chastaignes.

Les pommes, poires, oranges, limons, & semblables fruits s'y trouuent en assez bonne quantité, & de mesme elle porte des choux, des raues, & toute sorte d'herbes en leur saison.

Le principal fruit de ceste Isle croist sous terre ainsi que les raues.

Les arbres de ceste plante sont de la forme des vignes, mais ont les feuilles d'autre sorte. On nomme ces fruits *Barates*, qui sont du poids d'une liure, & à petit prix. C'est le plus delicat manger du peuple. On les estime beaucoup plus en Portugal, mais l'abondance en diminue l'estime. On y void vn autre fruit semé comme du froment, qui croist en forme ronde presque comme vn pois. On l'appelle *Tunssse*. Ce fruit a vn goust agreable: mais son escorce est plus dure que celle du pois. On en fait grand estat aux autres pais: mais sur le lieu on le jette aux pourceaux. On trouue en la mesme Isle communément vne plante de la hauteur d'un homme, qui ne porte aucun fruit, & ne rend autre profit sinon que la racine tendre & jaune est tiree comme de la soye par les habitans, qui en remplissent leurs mattelats & leurs cotettes au lieu de plume, & de laine.

L'Isle n'a gueres d'oiseaux de proye. Ceux qu'on nomme de Canarie, y volent de tous costez. A raison dequoy beaucoup de gens s'occupent à les prendre pour les vendre. Elle a beaucoup de caille, & des coqs & poules d'Afrique en quantité. En Esté on y prend beaucoup de poisson: mais en Hyuer la mer ne permet qu'on y pesche. Car en Ianuier, Feurier, Mars & Aueil, & mesme en Septembre, elle n'est presque iamais sans orage.

La terre y est montueuse, il y a des rochers de plusieurs costez, qui s'aduancent comme des pointes de diamant, en telle sorte qu'ils pourroient couper la plante des pieds de celuy qui y passeroit. Mais ces rochers sont pleins de feuilles de vignes, desquelles ils sont tous couverts en Esté, de sorte que c'est vne merueille de voir que ceste plante y a pris racine.

La vigne ne croist pas aux campagnes ou lieux plains, mais le pais plain abonde en froment, & en pastel, principalement pres de la ville de Praye. Mais c'est chose ordinaire, & merueilleuse, que le froment, & les autres fruits de ceste Isle ne durent plus d'une annee en leur bonté.

Ceste Isle est fort subiete aux tremblemens de terre, & a des soupiraux de flammes. Et mesme en ceste Isle & en celle de saint Michel, on trouue des lieux d'où il sort des vapeurs fumeuses continuellement, & mesme la terre y est toute bruslee.

4. On y trouue aussi des fontaines où l'on peut cuire vn œuf, comme s'il estoit sur le feu. A trois mille loing de la ville d'Angre il y a vne fontaine qui conuertit en pierre le bois, qu'on y jette avec le temps.

La Tercere porte vn si grand nombre de Cedres qu'on en vse pour faire des vaisseaux, & mesme pour mettre au feu. Il y a vne autre sorte de bois qu'ils nomment Sanguin, qui est de couleur de sang, & beau au possible. Il y a aussi du bois blanc & jaune, dont les couleurs sont fort viues.

L'Isle de Pico porte vn certain bois nommé *Teixo*, qui est de telle grandeur, qu'il est deffendu au peuple par Edit du Roy d'Espagne, d'y toucher, n'y ayant que les Officiers du Roy à qui ceste chose soit permise. Il est extrêmement dur, rouge au dedans, & ondé d'vne beauté incroyable, qui l'augmente mesme avec le temps.

5. L'air est bon par tout icy, & il y a fort peu de maladies particulieres au pais; entre lesquelles est celle que les Portugais nomment *Ar*, qui rend vn homme foible & perclus de tout son corps, ou de quelqu'un de ses membres. Il y a encor vne maladie que les Portugais appellent le Sang, qui fait sortir certaines apostumes de sang autour des yeux: ou bien en quelque autre partie du corps. Cesont les deux maux principaux, qui procedent des orages de l'humidité des lieux, & des grands vents, qui sont tels icy qu'ils battent les pierres des maisons à la longue, & mesme consomment le fer, veu qu'on a veu des barreaux de fer de la grosseur du bras en la maison de l'argenterie du Roy, qui en six ans deuindrent aussi menus qu'vne paille, & les murailles mesmes furent rongees, & reduites à rien dans ce temps n'esme.

C'est pourquoy ils ont accoustumé de mettre presque tous au frontispice des maisons, des pierres qu'ils tirent autour du riuage qui sont cachees sous les eaux. Celles-cy durent plus contre les vents. L'Isle Gracieuse porte force diuers fruits, dont elle en fournit beaucoup à la Tercere. L'Isle de saint George a grand nombre de forests & de montagnes, & quelque peu de pastel. Il y a aussi beaucoup de Cedres. L'Isle de Fayal porte en quantité toutes choses necessaires à la vie, & abonde en poissons, & en bestial qu'elle fournit mesme à la Tercere.

L'Isle Pico porte force fruits de toutes sortes, & a aussi grande quantité de bois de Cedres, & de Teixe qui est tant en prix. Elle a beaucoup de bestial, assez de vins, & de fruits tres-excellens, entre lesquels il y a des oranges dont le goust est merueilleusement agreable. L'Isle de Flores a force bestial, & de tres-bons lieux pour en faire nourriture.

M O E V R S.

6. Les habitans de la Tercere sont ou Portugais qui viuent à la façon de leur pais, ou natifs de l'Isle qui suivent les mœurs des Portugais, & des Espagnols qui les dominant. Ils ont ceste particularité qu'ils ne s'adonnent nullement à la chasse, à cause que le pais ne porte que quelques conils en bien petit nombre.

Les premiers habitans de l'Isle de Fayal ont esté Flamans, à raison dequoy ils retiennent encor de l'humeur & des façons de faire de la nation Flamande, qu'ils affectionnent particulièrement sur toute autre.

Les habitans de la Tercere sont laborieux, & adonnez à cultiuer la terre: tellement qu'ils font mesme tenir la vigne sur des rochers qui ne semblent nullement propres à cét vsage. Ils ont accoustumé pour garder leur grain qui se corrompt dans l'annee, de le cacher sous la terre l'espace de quatre ou cinq mois, & tous les habitans de la ville de Praye particulièrement ont vn grand rond en certaine place, où vn homme peut entrer, & au dessus il y a vn couuert avec la marque de son maistre. Chacun met en sa fosse son froment apres la moisson au mois de Iuillet, & le laisse ainsi couuert iusques à Noël. Lors tous les habitans le retirent entier & non corrompu, combien que quelquesvns n'en prennent qu'à mesure qu'ils en ont besoin, & laissent dans le puits tout le reste. Et apres qu'il a esté gardé dans ce puits durant le temps susdit, ils le conseruent le reste de l'annee dans des coffres, sans qu'il soit besoin de remuer.

Ils ont accoustumé de donner vn nom à chaque bœuf, qui est dressé à cognoistre lors que son maistre l'appelle. Il y a beaucoup d'artisans par tout qui s'adonnent à faire mille gentillesses du bois qui s'y trouue. Mais ils ne trauaillent pas si promptement que ceux de Noremberg en Alemagne. Les laboureurs de la Tercere s'employent principalement à faire venir du pastel. Ceux de sainte Marie s'adonnent sur tout à faire de la vaisselle de terre.

Richesses.

RICHESSES.

Les Anglois, Escossois, & François font grande emploie de pastel en l'Isle Tercere, & l'échangent volontiers à d'autre marchandise. Les habitans y font aussi quelque argent des oyseaux de Canarie qui s'y trouuent en grand nombre, & qu'on vient chercher curieusement des autres Prouinces.

On y fait aussi grand gain sur les bœufs de ce pais qui sont de requeste pour estre tres-grands & plus beaux que tous les autres de l'Europe. Les habitans tirent aussi de bônes sommes de leur menuiserie, & ouurages de bois, que les Espagnols venants des Indes Occidentales prennent en passant pour les vendre apres en l'Espagne.

La Tercere est en vne assiette commode pour receuoir toutes les riches flottes qui viennent des Indes, & qui s'y fournissent de ce qui se trouue leur duire, y laissent aussi des choses qu'ils portent, & rendent par ce moyen ceste Isle riche ainsi que les autres, qui y courent aussi-tost pour faire trafic de ce qu'ils ont de meilleur. Mais les Anglois ne font qu'écumer par là aupres, & voler tous les nauires qui tendent vers ceste Isle: tellement que plusieurs eurent ces Isles de crainte qu'ils ont de rencontrer ces Pyrates, au grand dommage des insulaires & des nauires. L'Isle de Fayal est ordinairement frequentee des marchands Anglois qui y font employte de pastel toutes les annees. Les habitans de Flores, & Corua sont pauvres à cause des Pyrates Anglois qui les incommodent, se tenans entre ces deux Isles, & les ravageans à toute heure.

FORCES.

L'Isle Tercere est forte d'elle-mesme à cause des rochers qui l'environnent de tous costez comme des murailles, & au bout de ces rochers il y a vne bonne forteresse. La ville d'Angra est ceinte d'assez bonnes murailles. Au pied de la montagne de Bresil, il y a vn fort qui depend diametralemēt à vn autre, pour la deffence du Golphe, afin qu'aucun nauire n'entre ny sorte sans la permission de ces chasteaux.

Le Roy d'Espagne entretient ordinairement en la Tercere quatorze compagnies. Il n'y auoit autresfois que des Portugais à la garde de ces Isles. Mais depuis les derniers troubles de Portugal on a mis des soldats Espagnols dans la Tercere avec vn Gouverneur de la mesme nation.

Ceste garnison se tient continuellement dans les chasteaux ou forteresses, & ne fait aucun déplaisir aux Portugais, veu qu'il est deffendu à tous les soldats de sortir hors des lieux où ils sont, & d'aller par la campagne.

C'est ce qui fait aussi qu'on peut marcher par toute l'Isle en grande assurance. Il y a vne compagnie d'Espagnols en garnison à *Punta Dolgada*. En l'Isle sainte Marie il n'y a nulle garnison, pource qu'estant de tous costez environnee d'écueils, & de rochers, elle peut aisément estre gardee par les habitans mesmes. L'Isle Gracieuse est aussi sans soldats, & pource qu'elle ne scauroit porter les frais de la garnison qu'il seroit besoing d'y tenir.

En la ville de Dorta en l'Isle de Fayal il y a vne forteresse qui n'est guere bonne. Or à cause que les habitans se plaignirent vne fois de la grandeur des frais de la garnison, & de la facherie qu'elle leur donnoit, & qu'ils promirent de la garder eux-mesmes, le Roy d'Espagne en tira les soldats qui s'y tenoient. Mais Comerland Anglois apres vne petite resistance, & vn debat qui furent entre les habitans, prit l'Isle, ruyna le chasteau, & jeta l'artillerie dans la mer, emmenant quelques Carauelles. Si bien que le Roy fut conuie d'y enuoyer des soldats & les y remettre en garnison, apres auoir chastie les principaux auteurs de tout le mal.

GOVERNEMENT.

La capitale ville de toutes les Isles c'est Angra, où le Gouverneur fait sa residence, & il y a vn Siege de Iustice, qui a autorité sur tout le reste. Il est deffendu à tous estrangers de faire le tour de l'Isle, & d'en considerer les aduenues, ny s'y promener à cheual, & par cy-deuant y estoit assignee vne bourse aux marchands estrangers pour vendre leurs marchandises sans en bouger.

Les Edicts des Portugais en portent expresse deffence, & mesme autresfois on assignoit aux marchands estrangers vne rue dans la ville d'Angra, pour y vendre leurs marchandises, sans qu'il leur fust permis d'en sortir, sinon lors qu'ils vouloient entierement trousser bagage. Mais aujourd'huy la liberte est plus grande, tellement qu'on se peut promener par toute la ville, & mesme aller aux champs: mais il n'est permis d'aller faire le tour de la coste.

RELIGION.

Les habitans de ces Isles sont Catholiques, & nullement infectez d'heresie ny du Mahometisme, il y a vne Eglise Cathedrale en la ville d'Angre où l'Archeuesque faict sa demeure.

MOSAMBIQUE.

Mosambique est distraicte de terre ferme d'environ de demy mille, c'est vne ville assise en l'Isle de Pruse, l'Isle contient de grandeur environ demy mille & est plaine, il y a vn port où les nauires abordent sans danger & ont vn fort qui les couure.

QUALITE.

Ceste Isle porte des Palmiers & des noix d'Inde, des Citrons & des Figues, quant aux autres fruiçts on n'y en trouue guiere, & on y porte du froment des Indes, du ris & autres choses necessaires à la vie: on a tout à fort bon marché, les bœufs, les brebis, les cheures, les pourceaux, les poulles & choses semblables, la volaille y a la chair noire, mais elle est d'extremement bon goust.

Ceste Isle n'a point d'eau douce, mais on y en porte de la terre ferme, d'un lieu que les Portugais nomment Cabafere, & pour ceste cause il y a de grandes cisternes & des pots où l'eau se garde.

L'air de Mosambique est chaud & mal sain, si bien qu'on void souuent tumber malades les voyageurs qui s'y arrestent.

MOEURS.

Il y a en ceste Isle 40. ou 50. Portugais qui sont mariez & habitans ordinaires de ceste Isle. Ceux cy vivent à la façon de leur pays. Outre ces quarante ou cinquante Portugais & Mestis, qui ont esté engendrez aux Indes par les Portugais, il y a quatre cents maisons de Negres qui y habitent, qui sont couuertes de chaume, & ceux cy vivent moitié à la façon des Portugais & moitié comme les autres Negres. Mais ceux qui demeurent depuis Mozambique iusques au Cap de Bonne-esperance, sont entierement barbares & sauvages, sans Dieu, & sans loy. Mais tous les marchands sont nuds generalement, & les hommes ont seulement vn petit linge qui couure leurs parties honteuses, & les fêmes depuis le milieu de la poitrine iusqu'à my-cuisse se couurent d'un certain drap de cotton qui est grossier. Mais ceux qui demeurent en terre ferme ne cachent aucune partie de leurs corps. A Mozambique ils font leurs delices de la chair de pourceau, & ne la defendent pas aux malades, comme ils font toutes les autres chairs: Il n'est permis à aucun de demeurer en ceste Isle sans qu'il se marie. Le tyran de Quiloë en estoit autresfois maistre, & les Mahometans y habitoient sous vn Gouverneur, que les Arabes nomment Zequen.

RICHESSES.

Il y a vne mine d'or pres de Sofale qui est à soixante lieuës de France loing de Mozambique en tirant vers le Cap de Bonne-esperance. Il y a beaucoup d'or en ceste mine, & vne autre espece d'or qu'ils nomment *Borongo* & *Omrabo*, c'est à dire poudre d'or, pource que cest or est delié & menu comme du sable, & toutesfois aussi bon qu'aucun qui soit en Leuant. Vn Lieutenant du Capitaine de Mozambique demeure au fort de Sofale, & enuoye des vaisseaux nommez *Pangajo*, à Mozambique, qui vont du long de la coste, & portent l'or au Capitaine. Ces vaisseaux sont faicts d'un bois leger, & les aiz en sont ioincts avec du fil, sans qu'il y ait vn seul clou qui les tiennent. Les mines qui sont pres d'Angole sont de l'autre coste d'Afrique esloignees de celles de Sofale environ cent cinquante lieuës, & les Negres font souuent ce chemin par terre, pour venir à Sofale, & porter cest or. Le profit que le Capitaine de Mozambique tire en trois annees, est d'environ trente mille ducats ou dauantage, & ceste somme fait nouf tonnes d'or. Et ce profit vient principalement des mines de Sofale, & d'Angole. On porte de Mozambique aux Indes, de l'or, de l'ambre gris, de l'ebene, & de l'yuoire, & pareillement on y meine grand nombre d'esclaves qui sont forts au possible, & propres à endurer plus de peine que tous les autres.

FORCE.

Les Portugais ont en ce lieu vne place qui a esté parfaicte dans dix ou douze ans. Elle est aussi bien fortifiée qu'aucune qui soit en toutes parties. Mais il y a fort peu d'artillerie & de

de munitions de guerre, & mesme il n'y a gueres de soldats. Toutesfois lors qu'il en est besoin, tous les Portugais qui ont maison en ceste Isle, sont obligez à la deffence de ce fort veu que l'Isle n'a point d'autre place qui la garde, au dedans il y a beaucoup de cisternes pour conseruer l'eau, & tousiours on y en garde pour vne annee.

G O V E R N E M E N T.

LA charge du Capitaine qui est enuoyé à Mozambique dure trois annees, au bout desquelles vn autre luy succede. C'est la coustume des Portugais de faire que les Officiers ne puissent exercer plus longuement les charges qui leur ont esté commises, & qu'ils fassent place aux autres. Ceux-cy sont esleus parmy ceux dont le Roy d'Espagne s'est seruy en la flotte des Indes, veu qu'ils sont recompensez du service qu'ils ont rendu, par le moyen de ces Officiers, pour raison desquels on leur donne de bons gages, outre le profit qu'ils peuvent faire par le moyen de ce à quoy ils sont employez, & du lieu où ils demeurent. Et ce profit ne scauroit estre petit, pource que les Officiers font toute chose à leur volonté. On voyage vne fois tous les ans de Mozambique aux Indes, c'est à scauoir au mois d'Aoust, & l'on en reuiet au mois d'Auril, & il n'y a personne qui puisse estre admis à ce commerce que ceux qui sont mariez à Mozambique.

R E L I G I O N.

Quelques-vns de ces Negres qui demeurent dans l'Isle de Prase où est Mozambique, sont Chrestiens, mais les autres tiennent la loy Mahometane, & s'arrestent à l'opinion receüe des Turcs, qui auoient esté en ce pais auant les Portugais. Mais ceux qu'on nomme Mestiz, sont tous fort affectionnez à la Religion Catholique.

Estat des Isles & des places que les Portugais & les Espagnols tiennent en Asie.

E S T A T D E L' I S L E E T R O Y A V M E D' O R M U S.

IE mets Ormus dans la Monarchie d'Espagne, pource qu'elle est tributaire des Espagnols qui y ont eu la meilleure place qui s'y trouue, mais depuis deux ans en çà le Persan par l'auis & industrie des Anglois & Hollandois, qui luy ont presté leurs vaisseaux & secours à cause de l'inimitié qu'ils portent aux Espagnols, se saisit d'une partie du Royaume, & singulierement de la forteresse que les Portugais ont laissé perdre, & n'en jouissent plus. Ormus ad'un costé le Royaume de Perse au Septentrion & de l'autre l'Arabie, ceste Isle a de largeur 20. mille, est à l'emboucheure du Golphe Persique & a 27. degrez de hauteur.

Q U A L I T É.

Ceste Isle est pleine de rochers, aspre & presqu'entierement sterile: vous n'y voyez point d'herbe verte, les rochers y sont tous couverts de sel & les maisons y sont basties de pierres sales: Elle ne porte aucuns fruits, mais elle reçoit toute sorte de viures de l'Arabie, de Perse & de la ville de Bassore, mais la situation & commodité du lieu fait que toutes choses y abondent, & que grande multitude de marchands y frequentent, car c'est vn lieu de marché & estape de Perse, d'Arabie, Turquie, de l'Inde, de tous les pais circonuoisins: Les Armeniens, Asiatiques & Venitiens y font grand trafic de perles, on les y apporte des Indes & d'Ormus, on les porte à Venise.

L'Huer y est de mesme qu'en Portugal. Mais en Esté au mesme temps que nous l'auons, il y fait si chaud que les hommes sont contrains de reposer dans certains canaux de bois pleins d'eau, dans laquelle ils ont tout le corps plongé. Tellement qu'ils n'en mettent hors que la teste, & tous les bastimens ont le toit plat & percé pour receuoir la fraischeur & le vent, ainsi qu'au Caire. L'eau qu'on y boit y est portée de terre ferme. Il y a certaine maladie qui regne à Ormus, qui est telle, qu'il vient des vers aux cuisses de ceux qui en sont atteints, & ces vers ne procedent selon l'opinion de plusieurs que de l'eau qu'ils boient. Ils sont semblables à des cordes de luth & de la longueur de 2. ou 3. aulnes, & l'on les tire peu à peu en les faisant tourner avec vne paille qu'ils font tourner volontiers, mais quand ils resistent, il ne s'en faut mettre en peine, mais seulement lier ce qu'on a tiré & froter l'enfleure au dessous du trou de beurre frais, & de ceste sorte la cuisse est deliuree de ces vers dans dix ou douze iours. Que si quelqu'un rompt vn de ces vers on ressent des douleurs fort violentes.

M O E V R S.

Les habitans du Royaume d'Ormus tiennent de l'humeur des Persans, & des Arabes, tellement que ie ne feray plus long discours de leurs mœurs, & de leurs humeurs, pource que ie m'attends d'en parler particulièrement lors que ie seray sur le Royaume de Perse, & que ie traiteray de l'Arabie.

R I C H È S S E S.

A cause de l'affiette & commodité de ceste Isle, elle abonde en toutes choses, & est frequentee de marchands de Perse, d'Arabie, de Turquie, & des Indes, & de toutes les contrees voisines. Mais le plus grand nombre est celuy des Armeniens, des Perses, de ceux d'Asie, & des Venitiens qui sont fort curieux d'auoir de la pierrerie qui vient à Ormus des Indes, & va

d'Ormus à Venise par terre.

On porte encor en ceste Isle des païs de Perles, de Coraçon, & de Dias, de belles tapisseries qu'on nomme *ÆLCATIFES*, & de Turquie des camelots de diuerses sortes: de mesme que d'Arabie plusieurs herbes & drogues medecinales, du sang de Dragon, de la manne, de la myrrhe, & de l'encens, de tres-bons chevaux de Baren, & plusieurs belles perles Orientales de Mescatte, qui est vn port entre les Caps de Rosalgate & Moncadon au riuage d'Arabie. On y porte outre cela des raisins secs, des dattes de plusieurs sortes, & de la marmelade, qu'on enuoye apres d'Ormus aux Indes, qui en sont toutes fournies par ce moyen. On fait aussi grand profit à Ormus sur les Larins, qui est certaine espeece de monnoye de Perse, longue, & finissant comme en deux branches, en façon de fil d'argent. La cause de ce grand abord de gens à Ormus est telle. Il y a deux troupes qui s'assemblent pour aller par terre toutes les annees. Elles se nomment *Casiles*, ou *Carauanes*, & partent d'Alep ville de Syrie, pour aller à Tripoli, qui en est à trois iournees. La *Carauane* garde l'ordre qui s'ensuit. Toutes les annees au mois d'Auril, & de Septembre on eslit vn Capitaine avec cent Ianissaires, qui meinent la *Carauane* iusques à la ville de Bassore, d'où l'on va par mer iusques à Ormus sans peine. Les marchands scauent le temps du depart de la *Carauane*, & lors il y a vne grande multitude de chevaux, de chameaux, & de dromadaires, & tant d'hommes prests à faire voyage, qu'on en compte quelquesfois iusques à cinq ou six mille qui marchent en ordre ainsi qu'une armee. Chaque chameau en porte deux avec leur bagage qui prend d'un costé & d'autre, & les Ianissaires prennent continuellement garde à ce que les Arabes ne portent aucun domage à ceste troupe, comme ils s'essayent de faire ordinairement. On passe vn desert qui dure quarante iournees, & au bout de tous les trois ou quatre iours on fouyt des puits pour abreuuer le bestial & pour appaiser la soif des hommes. Il y a aussi beaucoup de pouruoyeurs qui suiuent la troupe, & vendent des viures à ceux qui en veulent. Toutes les nuits ils dorment sous des pavillons avec de bonnes sentinelles de tous costez. Ils viennent en ceste sorte à Bassore ayant passé Babilone, qu'on nomme maintenant Bagadet. Ils reposent quelques iours à Bassore, & s'assemblent en la mesme ville au temps du retour, & s'en reuont à Alep en ceste sorte. Et c'est de là que vient le grand abord des marchands & des marchandises à Ormus.

Le Gouverneur d'Ormus tire plus de profit qu'en aucun autre de routes les Indes apres celui de Mozambique. Car il enuoye ses vaisseaux à Goa, Chaul, Bengala & Mescatta, & y vend ses marchandises, ayant fait vn Edict qui porte, que personne ne vende les marchandises qu'il a auant que celles du Gouverneur ayent esté acheptees. Et cela ne vient pas du Roy d'Espagne, mais de la liberte que prennent les Gouverneurs, qui estendent le pouuoir qu'ils ont comme bon leur semble. Au reste par vn priuilege que le Roy a donné aux Gouverneurs, il n'y a personne qui puisse enuoyer des chevaux aux Indes qu'eux, ou ceux auxquels ils en donnent la charge. C'est ce qui porte vn grand profit au Gouverneur, à cause que les chevaux sont extrêmement chers aux Indes, de sorte qu'un cheval qui sera tant soit peu bon se vendra quatre ou cinq cens pardaues, & le pardaue vaut environ vn richaler. Le temps propre pour aller de Goa à Ormus, est aux mois de Ianuier, Feurier, Mars, Septembre & Octobre.

FORCES.

LA principale force du Royaume consiste en la place que les Portugais y ont, qui est bien fortifiée, il y a des cisternes dans ce fort de mesme qu'en celui de Mozambique pour le grand deffaut d'eau de ce païs. Ce fort est assez garny de soldats & d'artillerie pour tenir les Mahometans bridez. Tous les autres lieux sont de fort peu d'importance.

GOVERNEMENT.

Les Portugais se gouvernent à la façon de leur païs, & le Capitaine ou Gouverneur du fort s'y porte de mesme que font ceux des autres places de ces quartiers qui obeissent au Roy d'Espagne. Le Roy d'Ormus demeure en ceste Isle, mais hors de la place des Portugais, ceux qui sont faits Roys tiennent par maxime d'estat, de faire aueugler au commencement de leur regne leurs freres & tous ceux de la race Royale, & cela fait ils leurs donnent tout le contentement qu'ils peuuent desirer, hors de ce qui peut satisfaire à la veüe: Car la loy porte que les aueugles ne peuuent gouverner le Royaume & par ce moyen ils s'affranchissent de la crainte d'une guerre ciuile.

RELIGION.

Le Roy d'Ormus & tous ses subiets sont Mahometans, & suiuent la Religion des Persans; mais ceux qui sont Portugais, ou sortis d'eux sont conuertis par les predications du Pere Gaspard Berzé de Zelande, Iesuite.

L'Isle

L'ISLE DE DIU.

Ceste Isle de Diu jadis appelée Alambater, est esloignée du fleuve Indes de 70. lieues de France, & est joignant la terre ferme.

QUALITE.

Il y a fort peu de fruits en ceste Isle, mais elle est pleine de choses nécessaires à la vie. Elle a des bœufs, des vaches, des brebis, de la volaille, du beurre, du lait, des aulx, des febues & choses semblables. Toutesfois le lait n'y est pas si net qu'aux Pais-bas; elle a aussi des fromages, mais qui sont trop salez. Les habitans ont aussi force poisson salé, & font fumer leur chair comme nous faisons nos langues de bœuf.

MOEURS.

La ville de Diu est habitée par les Portugais, auxquels ceux qui sont natifs de la Prouince, demeurent meslez, de mesme qu'en Ormus, & aux autres villes des Indes que les Portugais tiennent. Les vns gardent les façons de faire de Portugal, les autres s'arrestent à celles de leurs voisins, dont nous ferons mention: toutesfois la conuersation ordinaire y met tousjours dauantage en credit les façons de nostre Europe.

RICHESSES.

Ceste ville a vn port extrêmement commode, & où beaucoup de marchands estrangers abordent, si bien qu'elle ne peut manquer d'estre riche. Elle est entre deux riches pais, c'est à sçauoir Sinde, & Cambaye. De là vient qu'il y a tousiours icy grand nombre de Turcs, Persans, Armeniens, Arabes, & autres. On paye icy de grandes gabelles au Roy d'Espagne, pource que les Banianes, Gufarates, Rumes, & Perses, qui trafiquent en Cambaye, & s'acheminent vers la mer rouge, chargent, & déchargent icy le plus souuent leurs nauires, à cause de la commodité de l'Isle.

FORCE.

Les Portugais ont si bien fortifié la ville de Diu, qu'ils l'ont renduë comme imprenable: & de fait ils furent assiégés par le Souldan de Cambaye, & ses adherans l'an 1539. & depuis encores en l'an 1546. Mais ils se deffendirent si bien, & traiterent leurs ennemis en telle sorte, qu'ils leuerent le siege, avec beaucoup de perte & de honte, comme tesmoignent les Annales de Portugal.

GOVERNEMENT.

Ceste Isle a jadis obey aux Roys de Cambaye, veu qu'elle est assise en son Royaume: & ce Roy auoit permis aux Portugais d'y dresser vn fort. Mais avec le temps toute l'Isle est venue au pouuoir des Portugais, qui s'y gouvernent comme aux autres pais qu'ils tiennent en ces quartiers. Ils y ont dressé vne forteresse imprenable contre les efforts des ennemis.

LA VILLE DE DAMAN, ET AUTRES PLACES.

La coste des Indes est proprement l'Isle de Vaquas iusques au Golphe de Cambaye, les autres lieux ont leurs noms particuliers, comme Mozambique, Melinde, Ormus, Cambaye, Choromandel, Bengala, Pegu, Malaca, & autres. Ceste contree a beaucoup de ports, & d'Isles, qui sont sous la domination des Portugais, avec de fortes places qu'ils y ont basties. Daman est la premiere de toutes, & à quinze mille de là, à dix-neuf degrez & demy d'elevation, on void la ville de Basaijn. A dix mille de là, à dix-neuf degrez de hauteur de Pole, on trouue la ville de Chaul, avec vn bon fort. A dix mille, ou cinq lieues de là vous voyez Dabul, qui a dix-huict degrez de hauteur de Pole: & de Dabul iusques à l'Isle de Goa on compte quinze lieues, & Goa est au quinziesme degré. Les habitans de Goa nomment toute la contree qui est depuis Goa iusques à Daman, terre Septentrionale: & celle qui est depuis Goa iusques au Cap de Comorin, terre Australe: mais il se nomme principalement terre de Malabar.

Toute ceste contree porte en abondance du ris, des pois, & autres legumes, de l'huile, & des noix d'Inde, & a force beurre. On ne trouue point d'huile d'oliue en tout l'Orient, hors celuy que l'on y porte de Portugal: mais elle a tout ce qui est necessaire à la vie en abondance. Elle porte aussi grande quantité de gingembre, mais on n'en fait pas beaucoup d'estat. Ceste contree nommee Septentrionale, jouyt d'un air temperé, voire du meilleur de toutes les Indes.

RICHESSES.

Les villes de Daman, de Basajjn, & de Chaul, ont de tres-bons ports, & tres-commodes, où il y a grand abord de marchands: mais Chaul est la plus renommee, pour le grand commerce qu'elle a avec les habitans d'Ormus, de Cambaye, de Sinde, de Mascatte, de Bengale, d'aupres de la mer rouge. Il y a en ceste ville des marchands grandement riches, un grand nombre de nauires. En toute la contree on fait quelques besongnes de coton, mais en petit nombre. Il y a un lieu pres de Chaul où l'on fait force estoffes, & habits de soye: & ceste soye est portee de la Chine, & puis mise en œuvres par les habitans des enuirs de Chaul, qui en font un grand argent. On fait en la mesme ville des litières, & des chaires, d'un merueilleux artifice.

Les places que les Portugais tiennent en la coste de Malabar.

La coste de Malabar commence au Cap de Ramos, qui est à dix lieues de Goa du costé du midy, & finit au Cap de Comorin, & en tout cet espace il y peut auoir enuiron cinquante quatre lieues de France. Les Portugais ont icy en premier lieu la place d'Onor, à dix milles du Cap de Ramo & des, puis Onor iusques au chasteau de Barselon, ces lieux ont habitez des Portugais à l'occasion de la grande abondance de poivre & de ris: depuis Barselon iusques à Mangalor, est un chasteau de Portugais & pareille quantité de poivre & de ris.

QUALITE', ET RICHESSES.

Il y a icy grande quantité de poivre: tellement que l'on en emporte dehors iusques à sept ou huit mille liures toutes les annees: & ce poivre est estimé le meilleur de toutes les Indes. Il y a peu d'annees que l'on y fait trafic de poivre; mais maintenant il est fort en vogue. La Roynie de Baticole à qui ceste contree appartient, vend ce poivre, & le deliure au facteur de ceux qui l'emmenent, qui demeure à Onor. Mais il faut qu'elle touche l'argent six mois auparauant que l'on puisse auoir la marchandise. Il vient aussi force ris en ceste contree.

FORCE.

Le fort d'Onor que les Portugais ont icy, n'est guere frequenté, sinon au temps que les nauires veulent charger le poivre. Le reste du temps on n'y aborde guere. La forteresse est assez bonne, & bien garnie.

Ils ont aussi du long de ceste coste le fort de Barzelor à vingt-cinq milles d'Onor, où il y a force ris, & quantité de poivre, de mesme qu'à Mangalor, où les Portugais tiennent encores une bonne place, à neuf milles de Bazelor.

LE FORT DE CANANOR.

Ils ont encores un fort en Cananor à dix milles de Mangalor, & ceste place est fort estimee à cause que l'on trouue en ce lieu plus grande abondance de poivre qu'aux autres. Les Malabares ont pres de la forteresse un lieu basti à leur mode, où se tiēt tous les iours un marché, où toutes sortes de viures se trouuent en abondance, principalement grande quantité de volaille, d'œufs, de beurre, de miel, d'huiles, de figues des Indes, qui sont particulièrement nommees de Cananor, & surpassent en grosseur toutes les autres que l'on void aux Indes. On y vend aussi des masts de nauire, beaux, & grands au possible, qui ne cedent rien à ceux de Noruege, & en si grand nombre, qu'on en fournit les pais voisins. Ce pais est plein de beaux & longs arbres, & extremement agreable à la veüe. Il y a beaucoup de Mores blancs Mahometans parmy les Malabares, qui trafiquent du costé de la mer rouge. Mais ny ces Mores, ny les Indiens n'y peuuent trafiquer sans permission des Portugais, qui courent toutes les annees la mer avec une bonne armee, pour la deliurer des Escumeurs: & s'ils trouuent quelques vaisseaux degarnis, ne priuilege, ils les meinent, & les tiennent avec les marchandises de bonne prise. Au reste les Mores sont compagnons des Portugais, pour crainte du fort, mais ils conspirent contr'eux en secret, & donnent de l'argent aux autres Malabares ennemis des Portugais, pour leur nuire.

Le

LE FORT DE COCHIN.

Les Portugais ont aussi en la ville de Cochin vne place extremement bien fortifiée, où le Vice-roy, & l'Euesque de Cochin demeurent.

LE FORT DE COVLON.

Ils ont encores vn fort en Coulon, qui est à douze milles de Cochin; & l'on y charge vn vaisseau de poivre toutes les annees.

LE FORT DE COLVMO EN L'ISLE DE ZEYLON.

Ils ont aussi vne place forte en ceste Isle qui a esté assiegée par vn Roy de Zeylon, & luy a tellement resisté, qu'il s'en est retourné avec vne grande perte. Mais les Portugais n'ont aucune sorte de commerce avec ceux de l'Isle. Le Gouverneur n'a presque autre profit que celui qui luy vient de la canelle que les Portugais vont raver à main armée où ils en peuvent trouver, pource qu'elle est tenue la meilleure des Indes.

VNE VILLE AV ROYAVME DE BISNAGAR.

Les Portugais ont aussi vne ville en ce Royaume, au lieu mesme où estoit le sepulchre de saint Thomas, & y ont fait bastir vne belle Eglise de pierre, au lieu où il y avoit vne Chapelle de bois: & la porte de l'Eglise est faite du bois de ceste Chapelle, pour memoire de ce qui a esté. On dit qu'il se fait force miracles en celieu. Ceste porte est garnie de clouds de tous costez, & couverte de fer, afin que l'on n'emporte le bois par trop de deuotion.

LA VILLE ET FORTERESSE DE MALACA.

Malaca est assise sur la riuere de Gaze, & est belle ville, ayant de tour pres de vingt milles. Les originaires du lieu racontent que son commencement est venu de six, ou sept pecheurs qui y vindrent habiter, mais que ce nombre fut augmenté par l'arriuee de quelques autres pecheurs de Siam, de Pegu, & de Bangale, qui y bastirent vne ville, & formerent vn langage particulier, prenans toutes les plus belles façons de parler des autres nations. Ils nommerent leur ville Malaca, qui est deuenue si riche & si puissante en peu de temps à cause de son assiette, qu'elle peut debatre la preface aux plus puissantes villes, voire mesme à quelques Royaumes des enuirs.

QUALITE' DV PAYS.

L'air y est si facheux, que non seulement les estrangers, mais encores ceux qui y naissent, se trouvent souuent trauaillez de diuers maux, qui s'attachent principalement à la peau, & aux cheueux. Si quelcun vn eschape sa vie, c'est presque vn miracle: de sorte que cela fait que plusieurs s'abstiennent d'y aller, toutesfois le desir du gain en incite beaucoup d'autres à s'y acheminer aux dépens de leur santé. La terre n'y porte aucuns fruits, sinon qu'en quelques lieux vn peu de bled. En fin tout le Royaume de Malaque qui dure deux cens soixante dix milles de longueur, n'est presque rien qu'un desert, si vous en exceptez ce qui se trouue pres de la ville.

MOEURS.

Il y a icy enuiron cent familles des Portugais, qui vivent à la façon de leur pais. Les habitants natifs du lieu portent les cheueux longs, ont l'esprit maling, & se plaisent à faire des meurtres la nuit, afin qu'on ne sçache pas qui en est l'auteur. Les hommes, & les femmes y font également l'amour, & n'estiment qu'il y ait nation qu'ils se sçache conduire si gentiment. Ils sont heureux à faire des chansons, des rithmes, & louent extremement la puissance d'amour par leurs vers, qui sont assez subtils, bien conceus, & de bonne grace. Ils ont le plus elegant, & gentil langage de tout l'Orient: aussi beaucoup de gens en vsent aux Indes, comme on fait en Angleterre, en Allemagne, & aux Pais-bas de la langue Francoise.

RICHESSES.

Il y a icy vne Stapele, ou vn marché, & trafic de toutes les Indes, de la Chine, & des Isles que l'on nomme Moluques, & autres Isles voisines: & l'on y void force vaisseaux venans de la Chine, des Moluques, de Bada, des laues, de Sumatre, Sian, Pegu, Bengala, Choromandel, & autres lieux, qui s'en retournent chargez de marchandise. Ce lieu porte vn grand profit au Gouverneur, & plus que nul autre apres ceux de Mozambique, & d'Ormus.

Il part tous les ans vn vaisseau de Portugal pour venir à Malaca, qui deuanee d'un mois tous les autres, & ne va pas aux Indes que par contrainte. Il reçoit seulement la charge à Malaca, & la meilleure que toutes les autres qui abordent. Il y a six cens Portugais qui demeurent ordinairement dans le fort.

G O V E R N E M E N T.

IL y auoit jadis vn Roy Mahometan à Malaca, mais il fut depossédé par Alfonse d'Arbuquerque, pource qu'il faisoit le pis qu'il pouuoit à Lopez de Secheira Portugais: si bien que la ville, & le Royaume sont maintenant sous la domination du Roy d'Espagne. De sorte que ce Royaume est gouverné maintenant comme le reste qui obeit à ce Prince. On y bat de la monnoye d'or, & d'argent, dont les habitans n'auoient nul usage auparauant, veu qu'ils se seruoient de certaine monnoye d'estain, qui pesoit beaucoup, & valoit peu.

R E L I G I O N.

LE s Portugais qui y demeurent, tiennent tous la Religion Catholique, ceux qui sont natis du pais, qu'on nomme Malayes, sont pour la plus grande partie Chrestiens: mais il y a beaucoup de marchands qui s'y tiennent quelquesfois longuement, qui sont de diuerses Religions, & y vivent en liberté. Il y a dedans la ville de Malaca vn Euesque, de mesme qu'à Cochin, mais il est sous l'Archeuesque de Goa.

D V P A Y S D E C A M B A Y A.

CAmbaya est le plus fertile pais des Indes, qui fournit abondamment les autres pais de viures necessaires, pour laquelle occasion les Portugais, Perses, Arabes & Armeniens, y hantent & trafiquent ordinairement.

M O E V R S.

LE Roy de Cambaya est de la secte de Mahomet, mais les Gusurates & Banianes, qui sont les naturels habitans y vivent à l'Epicurienne & à la Pythagorienne. Ce sont les plus ingenieux esprits & les plus subtils marchands de toutes les Indes.

R I C H E S S E S.

CE pais produit froment, riz, poix, huile, beurre & autres choses commodes; on y fait beaucoup d'ourages de coton de diuerses sortes & de diuers noms, comme Carre-quins, Beffetas, Iorins, Chantares, Cottonias, dequoy on fait des voiles & des sacs; Ils font aussi des tapis qu'ils appellent Alcatifes, mais non de si grands qu'on les puisse esgaler à ceux qu'on apporte de Perse à Ormus: Ils en font encor d'autres de moindre valeur appelez Banquoya begarry, & semblables aux draps d'Escoffe, & seruent de couuerture aux coffres & lits, & par mesme artifice, ils font des contrepointes d'ourages à l'aiguille, enrichis de fil de soye, & des paillons de toute sorte.

B A N D A E T A M B O Y N A.

DE Malaca on va par mer à Bande, & Amboyne, où les Portugais ont des forts, & des Capitaines, pour faciliter le commerce. Bande est vne Isle à cinq degrez de hauteur du Pole par delà l'Equinoctial. Les Portugais y frequentent à cause qu'il y a de tres-bonnes noix que l'on nomme Maciz, quel'on met en conserue, & l'on en fait aussi de l'huile qui est fort estimee, & quel'on porte à Malaca, & de là en d'autres lieux. Presque tout le trafic se fait icy par eschange, de mesme qu'à Sunde, & à laue.

Il ne faut pas se fier legerement aux habitans de ceste Isle, veu qu'ils sont fort coustumiers de tromper les marchands, de sorte qu'il faut attendre que ceux de l'Isle portent leurs marchandises aux nauires, afin de negotier en toute asseurance.

A vingt milles de l'Isle de Bande en tirant vers l'Oüest Nortouest, on void l'Isle d'Amboyne, où les Portugais ont aussi vn petit fort. Ceste Isle n'a pas grande quantité d'épices, mais les nauires qui vont de Malaca aux Moluques, se rafraichissent, & font aigade en ceste Isle.

PHILIPPINES.

EN tirant vers l'Orient à 100. milles, ou environ de la contrée de Cambaye, ou de Champe, on void les Isles nommees Luslones, premierement descouvertes par les Espagnols l'an 1594. Elles sont nommees ou de Manille, ou Philippines, ou à cause de la principale ville, & du port plus signalé, qui se nomme Manille, ou à cause de ce nom de Philippes, qui est celuy que porte le Roy d'Espagne. La ville de Lussion, ou Manille, a 12. degrez de hauteur du pole Arctique : l'Isle a de tour environ mille milles. Autour de ceste Isle y en a plusieurs autres, dont les principales sont *Tandair*, & *Mindana*. L'Isle de Tandair, qui se nomme proprement Philippine, est plus belle, & plus agreable que les autres, & son circuit est de 160. lieues, celle de Mindanao a plusieurs bonnes villes, comme Caillou, Pauados, Subut, Dapito, & Suriaco.

QUALITE'.

TOut ce pays est extremement fertile en froment, & a beaucoup de cerfs, de cheuaux, de bœufs, de vaches, de cheures, & de pourceaux. Il y a aussi force ciuettes & toute sorte de fruits, comme aussi grande abondance de miel & de poisson.

Les Espagnols disent qu'elles portent de l'espicerie, mais on n'en void guere, ou point qui en vienne.

Il y a aussi grande quantité de ris, de sucres & de legumes, & de figues longues de demy coudee.

On y trouue aussi de l'or & du fer. L'air est bon, & temperé, & approchant du chaud, principalement sur la coste de la mer : car ce qui est dedans le pays est plus froid.

RICHESSES.

Les habitans tirent beaucoup d'argent de leur or, & de leur fer, qui est transporté aux lieux voisins, & pareillement en Espagne.

Leurs ciuettes ne leur rapportent pas aussi peu de profit : mais ce qui les rend plus riches c'est le grand commerce qu'ils ont avec les Chinois, qui y apportent force marchandises, comme de la soye, du coton, des porcelaines, du soufre, du vis-argent, du bronze, du cuyure, de la farine, des noix, des chataignes, des dattes, toute sorte de toilles, des escritoirs, & force petites gentilleses.

Il y a vingt nauires qui viennent toutes les annees de la Chine pour porter ces marchandises, qui sont de là conduites à Mexique, avec vn profit inestimable des habitans.

FORCES.

IL y a de bonnes places en ces Isles, où les Espagnols tiennent de grosses garnisons, & resolus de n'en démordre en aucune sorte. La perte qu'ils ont faite ces années passées, de ce qu'ils tenoient aux Moluques, les a fait opiniastrs à se deffendre icy le mieux qu'il leur sera possible. Et pour cest effect ils ont force munitions de guerre, & grand nombre d'artillerie, & sont pourueus des hommes qui leur sont necessaires pour ceste deffence.

GOVERNEMENT.

Le Roy d'Espagne tient vn Gouuernement en la ville de Manille, ou de Lussion, qui a la charge de toutes ces Isles. On l'y enuoye de la nouvelle Espagne.

Ces Isles estoient autrefois sous la Monarchie du Roy de la Chine, mais estants abandonnees des Chinois pour certaines occasions, & les habitans n'estans aduoiez, ny soustenus de personne, il fut aisé aux Espagnols de s'en rendre maistres.

RELIGION.

L'Euesque de toutes ces Isles demeure à Manille. Il y a beaucoup de personnes qui se font catechiser journellement, & qui recoiuent la Religion Chrestienne.

Y iij



L'ISLE DE GOA.

SOMMAIRE.

- D**ESCRPTION de l'Isle de Goa, son climat, & circuit.
2. Sterilité de l'Isle, qui n'abonde qu'en vin fait de palmiers.
 3. Commencement de l'hyver au mois d'Avril, & l'esté en Septembre, tout au contraire des autres pays.
 4. Maladies ordinaires de Goa.
 5. Quel est le naturel, & mœurs des habitants de Goa, & des Portugais de toutes les Indes.
 6. Quels tilres, & qualitez ils prennent, quelle distinction il y a entre les personnes.
 7. Ceremonies observees & celebrations de mariages, & nopces, & aux baptesmes.
 8. Façon de vivre, & d'habies des femmes de ce pays, & leur lubricité, & pratiques d'amour.
 9. Des Canarins, & Corumbins, des Indes, leur

occupation, maniere de vivre, & Religion.

1. Richesses de Goa consistantes au trafic de divers lieux d'Esclaves, de cheuaux d'Arabie, d'espiceries, gomme, tapis, au change de monnoyes d'argent.
11. Qu'elles sont les fortifications de ceste Isle, & comme elle est gouvernee par le Viceroy des Indes.
12. Du poiure que l'on tire des Indes, & la façon d'y proceder.
13. Diversité de Religion en Goa, où l'on vit en liberté de conscience.
14. Du Christianisme introduit premierement aux Indes par l'Apostre S. Thomas.
15. Du nouveau Christianisme des Indes, presché par les Religieux de S. François, puis par le bienheureux S. François Xavier Iesuite.



1. La ville de Goa est la capitale de toutes les contrees des Indes où les Espagnols, & Portugais pratiquent. L'Isle avec la ville ont quinze degrez de hauteur du costé du Nort. Elle est environnee d'un golphe, ou fleuve, de la grandeur de trois milles, & esloignee de la terre ferme seulement par le mesme qui se courbe en dedans du costé que la ville regarde le tour, & de là se joinct à la mer du costé du Midy, rapportant presque la figure d'une demie Lune. La bouche du fleuve iusqu'à la ville, est d'une iuste largeur, & il y a entre la terre ferme & l'Isle de Goa, quelques autres petites Isles habitees de gens du pays: mais de l'autre costé de la ville, le fleuve devient si bas en Esté en quelques lieux qu'on peut passer aisément à gué: & les hommes n'ont de l'eau que iusques aux genoux. Du costé du Nord il y a aussi la terre de Bardes, dont l'affiette est plus haute, à raison dequoy les vaisseaux des Portugais y demeurent plus seurement quand ils portent leur charge. Ceste terre est aussi sous la domination des Portugais, & y a plusieurs bourgs, & villages assez bien peuples. Il y a un ruisseau qui separe Bardes de la terre ferme d'un petit espace. Du costé du Midy de l'Isle de Goa où le fleuve entre dans la mer, on void Salsette, qui obeit pareillement aux Portugais, & est semblablement separee par un ruisseau de la terre ferme. La ville de Goa a de belles maisons à la façon de Portugal, mais basses à causes des chaleurs, & chaque maison a presque son verger, & son iardin plein de toute sorte de fruits des Indes. C'estoit autrefois une petite ville, ceinte d'une assez foible muraille, & de fossés sans eau, sinon lors que la pluye les remplissoit. Les murailles sont encor debout, mais les portes n'y sont plus, & l'on void autour des vieilles murailles la nouvelle ville deux fois aussi grande que le tour de l'ancienne, mais elle est ouverte de tous costés.

QUALITE'

L'Isle de Goa est extrêmement sterile, & ne porte rien de ce qui peut servir à la nourriture de l'homme. Elle a seulement quelques brebis, quelques cheures & pigeons & un peu de volaille, & le pays est montueux, aspre, & pour ceste occasion mal propre au labourage, & tout desert, & en friche. Les autres choses nécessaires à la vie viennent de Salsette, & Bardes, mais principalement de la terre ferme. Ils ont seulement du vin de palmyer qu'ils font en abondance.

Il y a peu d'eau à Goa qui soit bonne à boire, & l'on n'y trouve qu'une fontaine nommée Bagain, qui est à un quart de lieuë de la ville, où les esclaves en portent vendre.

Quant à l'eau qui doit servir aux bains, à se laver, & à faire cuire la viande, on la tire des puits qui sont faits dans les maisons.

La terre est pierreuse, seiche, & de couleur rouge. C'est ce qui a donné sujet à quelques Alchimistes Italiens d'y vouloir chercher de l'or, & de l'airain, ce que le Viceroy leur a deffendu, afin que la reputation de ceste richesse n'attirast les nations voisines à venir attaquer la ville.

L'hiver commence environ la fin du mois d'Auril, depuis Cambaye iusqu'au Cap de Comorin, par le moyen du vent d'Oüest, qui vient de la mer en ceste contree. Il commence par des tonnerres, & des foudres, auxquels on void succeder une continuelle pluye iusqu'en Septembre, & lors l'hyuer prend fin avec les mesmes tonnerres, & foudres. Ces pluies sont nommées aux Indes ceste saison hyuer, & en ce temps on ne peut voyager sur mer.

Quant à l'esté, on le prend pour le temps le plus clair de l'année, lors il fait un vent du Levant, & rend les nuits plus agreables: mais il n'y a point d'autres fruits en esté, que ceux qui paroissent sur les arbres le long de l'année. Chacun serre son bien de crainte de l'hyuer, ainsi que s'il falloit aller faire un voyage sur mer en quelques lieux esloignez. Au mesme temps on met les vaisseaux devant la ville en ostant tout ce qui est dedans, & les couvrant de joncs, afin que la trop grande pluye ne les pourrisse. Mais il y a quelques maisons que les continuelles pluies font tomber par terre.

Il y a certains monceaux de sable, qui bouchent le fleuve au commencement de l'hyuer ne laissant aucun passage aux vaisseaux, & la mer fait un si grand bruit, qu'elle essourde presque tout le monde.

La riviere qui environne l'Isle de Goa, devient douce par le moyen des eaux de couleur rouge qui tombent des montagnes, combien que son eau ordinaire soit salee & semblable à celle de la mer.

Au mois de Septembre ces monceaux s'en vont, la riviere est ouverte en telle sorte qu'elle donne passage non seulement aux petits vaisseaux, mais aux plus grands de Portugal qui sont de 800. lasts ou charges, & ces navires entrent dans la riviere librement sans qu'on la sonde & sans courir fortune.

Au reste l'hyuer est extrêmement fascheux en ceste contree, de ce qu'on ne peut s'exercer à aucune chose à raison des continuelles pluies, & que les hommes sont contraincts de demeurer enfermez dans leurs maisons, ou s'entretenir avec leurs voisins le mieux qu'il leur est possible. Toutesfois les femmes & les mestis qui sont fort contents quand ils ont eu la pluye, vont aux champs avec leurs valets & servantes, en prenant les viures qui leur sont nécessaires. Ces gens ont des cisternes & des reservoirs en leurs fonds, & ces reservoirs sont faits afin d'y nager, qui est une de leurs delices. En ce temps presque tous les fruits des Indes florissent.

L'Esté commence au mois de Septembre, & dure iusqu'à la fin du mois d'Auril avec un temps clair & serain, & peu de pluies, & c'est lors qu'on remet les vaisseaux en la mer, & que l'armée part de Goa pour deffendre la coste & les marchands.

Les vents d'Est qui viennent de terre ferme, & qu'ils nomment *Therentos* pour ceste cause soufflent alors sur la mer, & cōbien qu'ils soient plaisans, toutesfois ils engendrent plusieurs maladies, premierement à cause des grands changemens auxquels la coste des Indes est sujette. Au reste ils soufflent tousiours en Esté depuis minuit iusques à Midy, mais ils ne vont à plus de dix milles loing de la terre. Aussi tost apres disner les vents du Ponant se levent qui s'appellent *Vrasons*. Ces vents apportent quelquefois une grande temperance contre les insupportables chaleurs du pays. Et veritablement il faut admirer la qualité de l'air en ces quartiers, veu que depuis Diu iusqu'au cap de Comorin l'hyuer est nuisible, & depuis l'autre partie du cap de Comorin iusques à la coste de Choromandel, l'Esté est agreable, combien que tous les deux ayent pareille hauteur, & ne soient esloignez que de 70. milles, & en quelques lieux de 20. milles.

Ceux qui vont de Cochin vers la ville de S. Thomas, assise en la mesme coste de Choro-mandel, & vers les monts de Ballagatte, qu'il faut passer pour aller en l'autre contree, voyent d'un costé des champs extremement agreables & bien cultivez en Esté, & de l'autre un pays rauagé de pluyes, obscurcy de nuages & plein de l'horreur des tonnerres & des foudres. Et non seulement cecy se void en ceste contree des Indes, mais encore pres d'Ormus vers le cap de Rosalcate où les nauires ont un temps serein & propre, mais lors qu'on a passé le cap, & qu'on est de l'autre costé l'on n'a que des vents, des pluyes, & des orages, avec la mesme vicissitude de l'hyuer & de l'esté qu'on la void aux autres lieux d'Orient.

Beaucoup de maladies viennent de ce changement à ceux qui demeurent à Goa. Car ils ont un mal soudain nommé *Mordexin*, qui leur vient avec un si grand vomissement qu'ils sont prests à rendre l'ame. Ce mal est commun, & mortel. La dysenterie aussi y est contagieuse, ainsi que la peste parmy nous.

Les fieures continuës y emportent souuent les hommes dans trois ou quatre iours.

Les Portugais n'y trouuent point de meilleur remede que de se faire tirer du sang : les Payens le tirent de certaines herbes, du sandal, & de certaines onctions. Ces maladies emportent beaucoup de Portugais tous les ans, pour ce qu'ils ne mangent ce qui est de meilleure substance, & qu'ils s'addonnent trop à assouuir le desir des femmes lasciuës. On en peut voir le tesmoignage en l'Hospital Royal, qui est la retraite des seuls Portugais, dont il sort quatre ou cinq cens morts toutes les annees. La verole y est fort en regne, & n'apporte nulle infamie à celuy qui l'a. Ils tirent son remede de la racine de la Squine, & quoy qu'ils en soient bien mal on ne les fuit pas, mesme encor qu'ils l'ayent eue trois ou quatre fois : au contraire ils s'en glorifient, & tiennent ce mal bien doux au regard des autres.

Les Indiens ne scauent que c'est de la peste. Plusieurs sont trauaillez de la pierre & de la relaxation du boyau, principalement ceux qui sont mariez, pour ce qu'ils boient continuellement de l'eau, & font vne infinité d'excez & de desbauches. Il ont tousiours le ventre nud en leurs galleries basses qui sont à l'entree du logis, & recoiuent là le vent ayans pres d'eux leurs seruiteurs, dont l'un leur frotte le dedans des doigts des pieds, l'autre la teste, & le troisieme leur chassé les mouches. Ils continuent ceste façon de faire durant deux heures apres le repas, & reposent alors, puis ayant si soif on leur apporte toute sorte de confiture afin que l'eau ne leur fasche & leur semble de meilleur goust. De là vient que ces hommes ont presque tous gros ventre, & sont appelez *Barriges* pour ceste cause.

Les iours d'hyuer & d'esté ne different au plus que d'une heure.

Le Soleil se leue à six heures, & se couche à la mesme heure selon le cours du Soleil. A midy ceux du pays ont le Soleil sur la teste, & peu ou point d'ombre. On peut voir à Goa les deux Poles du monde. L'estoile Australe n'est gueres au dessus de l'horizon, non plus que celle du Nort.

MOEURS DES HABITANS DE GOA, ET DES Portugais de toutes les Indes.

LA terre de Bardes a des habitans rustiques & grossiers qui sont nommés Canarins, & marchent tous nus, excepté les parties honteuses. Ceux-cy s'amusent principalement à cultiuer les palmiers d'Inde, qui ayment les lieux sablonneux, & bas, & les riuages marges. Beaucoup de Portugais habitans aux Indes se sont mariez à des femmes du pays, & leurs enfans sont appelez Mestis, iaunes pour la plus grand part, & assez bien formez, de mesme que les femmes y sont passablement agreables.

Quant aux enfans dont le pere & la mere sont de Portugal, on les nomme Castises, c'est à dire de race, à cause que *Cast* signifie race, & ceux-cy ressemblent aux Portugais, excepté qu'ils sont de couleur entre iaune & bazanee.

Or les Portugais, ou Mestis viuent presque tous sans rien faire, combien qu'il y en a quelques uns qui font des chappeaux, des souliers, des sieges, & de la vaisselle : toutesfois ils en font faire la plus grande part aux esclauës. Au reste les maistres y tiennent tellement leur rang qu'il est impossible de voir rien de plus arrogant, veu qu'ils ont une desmarche si graue qu'on les tiendroit pour des Princes si l'on ne cognoissoit leur naturel & coustume, qui ne regne pas seulement parmy les nobles, mais encor parmy les gens de basse qualité, que les autres nations trouuent du tout insupportables, à cause de cet ardent arpentement des rues : & tous estiment esgalement que les autres leur doiuent beaucoup d'honneur, lequel ils taschent de se faire rendre.

Les Indiens originaires, & les estrangers tant infideles, que Chrestiens, trauaillent aux autres arts & mestiers. Tous les habitans sont distinguez en deux sortes de personnes, c'est

à sçauoir en celles qui sont mariees, & en celles qui ne le sont pas. Ceux qui ne sont pas mariez sont nommez communement soldats, qui eist entr'eux vn nom fort honneste: non pas qu'ils soient enrrolliez sous quelque Capitaine, ou qu'ils prestent serment à quelqu'un, veu que ceste façon d'enrroller les soldats n'est pas en vlage aux Indes. Ainsi que les Portugais enuoyez d'Espagne sont venus aux Indes, ils ne sont pas attachez à vn lieu deterrainé, où ils doiuent faire leur demeure, ains se peuuent aller tenir où bon leur semble. Toutesfoiis ils sont escripts en Portugal sur le liure de ceux qu'on enuoye, qui est porté tous les ans aux Indes, & contient les noms & surnoms de ceux qui partent pour ce voyage & la solde que le Roy leur a ordonnee. Ceux-cy sont tous distinguez par tiltres & prerogatiues de dignité. Les vns se nomment *Fidalgos da casa del Rei nosso Senhor*: c'est à dire gentils-hommes de la maison du Roy: les autres *Mossos Fidalgos*, qui sont les enfans des Gentils-hommes, ou ceux que le Roy a esleuez à ce rang. Les autres sont *Camilleros Fidalgo*, c'est à dire Cheualiers qui portent ce tiltre pour quelque fait d'armes, par lequel ils se sont signalez, ou pour les seruices qu'ils ont redus à leur Prince: ou bié pour dire mieux, ils l'obtiennent d'un General lors qu'il est sur le point d'aller faire la guerre, ou mesme avec de l'argent: de sorte qu'aujourdhuy des hommes qui sont venus de bas lieu en Portugal portent ceste qualité, quoy qu'ils ne soient nullement signalez, l'on ne la refuse pas au moindre qu'eux deuenu riche qui la recherche. Il y a encore ceux qu'on nome *Mossos da Camera, & do seruico*. Ceux-cy sont ou Gentils-hommes ou valets de la chambre du Roy, & ce nom est en telle estime parmy eux, qu'ils l'ayment mieux que des richesses.

Il y a aussi les Escuyers, ou *Escuderos Fidalgos*, qui tiennent rang parmy eux, tous les autres sont nommez *hombr'es honrados*, c'est à dire hommes honorables: & ceux qui sont de plus basse condition parmy eux portent le nom de soldats sans autre tiltre. Et l'on s'aduance en qualité à mesure qu'on fait plus de seruices au Roy, & selon les tiltres on a les recompenses.

Les Gentils-hommes y traittent volontiers les simples soldats, lors qu'ils sont retirez dans les villes, & retirent des tesmoignages de ceste liberalité.

Les Portugais, les Mestis, & les Chrestiens sont manifiques en leurs maisons, & les Portugais entr'autres ont communement 10. ou 20. esclaves selon leurs moyens. Ceux qui sont mariez ont leurs logis bien meublez, & pour le regard de leur personne, ils sont curieux de changer tous les iours de chemise, & d'habits, de mesme que leurs femmes: & les seruiteurs mesme en changent souuent à cause des grandes chaleurs.

Les officiers honorent esgalement tous les Portugais, tant nobles qu'autres. Quand ils vont par la rue ils ont vn de leurs seruiteurs qui porte vn parasol, l'autre son manteau à cause du Soleil, ou de crainte de la pluye, & le troisieme porte son epee, afin qu'elle n'empesche pas leur grauité affectée: Avant le disner vn seruiteur portera à son maistre vn oreiller de soye, pour mettre sous les genoux, lors qu'il faudra prier Dieu en l'Eglise. Ils vident de grandes & longues salutations avec des baisemens de mains qu'ils ne s'espargnent pas l'un à l'autre. Quand ils entrent dans l'Eglise leurs seruiteurs y sont desia, qui leur ont appresté des sieges, & tous les autres qui sont assis se leuent, & les saluent avec de profondes reuerences. Que si quelqu'un ne leur rend le mesme honneur qu'ils luy font, ils s'en picquent extremement, & en poursuient la vengeance par toutes voyes, faisant assemblée de leurs amis de tous costez pour donner la mort à celuy qui ne les a pas saluez par mesgarde, & pour penser à quelque autre chose. Mais lors qu'ils ne veulent pas tuer, mais seulement s'en venger en quelque maniere, ils le battent cruellement avec vn gros roseau qu'ils nomment *Bambu*, assemblant pour cest effect de grosses troupes: & cecy se pratique presque tous les iours aux Indes, sans que le Magistrat en face punition. Ils battent aussi leurs ennemis avec de longs sacs pleins de sable, & les brisent tous de coups. Ainsi quand quelqu'un mesme du peuple va visiter vn autre, le maistre du logis va au deuant à la porte du logis avec le chapeau en la main, & le mene en sa sale, où il luy presente vn siege tel que celuy où il se met, puis luy demande le suiet de sa venue. Et lors que celuy qui est venu s'en veut aller, le maistre du logis le conduit iusqu'à la porte avec baisemens de main, & beaucoup de reuerences & offres de seruice. Que s'il n'estoit traitté de ceste sorte il se sentiroit tellement offensé qu'il en pourchasseroit la vengeance iusqu'à la mort: & mesme ils recherchent tant l'honneur, que si on leur donne vn siege trop bas, ou qui ne soit pas aussi honorable que celuy qu'on a, on les irrite au possible.

Lors qu'il se fait quelques nopces chez quelqu'un de ceux qui sont estimés tant soit peu riches, tous leurs amis & tous ceux de leur cognoissance y viennent ou sur leurs cheuaux, ou sur des cheuaux d'emprunt, ou de loüage, & sont quelquesfois au nombre de 100. richement vestus. Ils vont à l'Eglise en ceste sorte avec leurs seruiteurs & parasols en bon ordre. Les amis precedent, & l'espoux vient apres entre deux d'iceux qu'ils nomment comperes, puis

l'espouse le suit entre deux commeres, qui sont portees en leurs lictieres ou pallanquins, & parees au possible.

Les seruiteurs suivent apres sans rang ny ordre. Et lors que la ceremonie du mariage est acheuee en l'Eglise, les nouvelles espouses sont conduites avec le mesme ordre, & les amis voisins, & parents se vont mettre en des fenestres tapillees qui sont sur les rues où les mariez passent, & les arrosent d'une eau composee de roses & de sucre. Les gens de remarque ont aussi des fluteurs & joueurs d'instruments, qui sont leurs seruiteurs, & resjouissent la compagnie avec leur harmonie. Les nouveaux mariez approchant de leur maison d'habitation, remercient ceux qui les ont accompagnez, qui sont à cheual avec beaucoup d'honneur, & entrent aussi tost avec les commeres avec une grande gravité, & se vont mettre aux fenestres.

Ceux qui ont accompagné les mariez donnent quelque carriere à leur cheual pour leur faire honneur, & les comperes sont les premiers à ce faire. Les autres leurs font honneur avec un concert de flutes qui sont fort en usage aux Indes. Apres les courtes tous passent devant la fenestre, & quittent la maison de l'espoux avec beaucoup d'honneur, excepté les comperes qui montent en haut, & font beaucoup de bons souhaits aux nouveaux mariez, tandis qu'il y a quelque chose de prest pour leur faire boire de l'eau, qui est un signe d'amitié entr'eux. Apres qu'ils ont gousté de ce qui leur est offert, ils vont, & ne demeurent que trois ou quatre fort proches parens, qui apres avoir fait bonne chere ne tiennent guere longue compagnie aux mariez, pour ne retarder pas leur contentement. Les espoux se couchent la plupart du temps auant que le Soleil se couche sans rien attendre & faire la bonne mine, cōme on fait icy. Lors qu'on baptise un enfant on le mene de la mesme sorte, & le parrain marche au dernier rang tout seul suivi de 2. seruiteurs à pied, dont l'un tient un plat d'argent, ou blanc, ou doré plein de rosquilles, au milieu duquel il y a une chandelle de cire dorée, & gentiment faite, & percée de quelques pieces d'or & d'argent, qui sont le present de celui qui baptise l'enfant. Le reste est couvert de roses. Un autre porte une saliere d'argent doré d'une main, & de l'autre un bassin de mesme metal, avec de belles seruiettes qui pendent des espauls. Cela est suivi de deux Pallanquins, en l'un desquels est la commere, en l'autre la sage-femme avec l'enfant, couvert d'un riche drap fait pour cest usage.

Les ceremonies du baptisme estans paracheuees on s'en retourne en mesme ordre au son des flutes, & avec les courtes des chevaux, la cōmere gardant le tout, cōme aux nopces. Voila ce qui se pratique pour le regard des mariez, mais les soldats qui ne le font pas se mettent en Esté sur la mer, & la defendent. Ils sont magnifiques en leur maison, & gardent une grande gravité, ayans un valet qui leur porte aussi le parasol, & ils donnent quelquefois à un homme qu'ils ne loueront que pour cest effect, vingt & cinq Basarucs l'annee.

Bien souvent dix ou douze soldats demeurent ensemble, & n'ont qu'un ou deux valets pour nettoyer leurs habits. Ils vivent de riz cuit dans l'eau, de poisson salé, & d'autres viandes de peu de valeur, sans pain, usant pour leur breuvage d'eau de fontaine. Ils usent presque de deux ou trois habillemens communs, dont ceux qui sortent s'accommodent, d'autant que ceux qui demeurent au logis n'ont besoin d'estre vestus, à cause des grandes chaleurs, qui font qu'ils se contentent d'estre couverts d'un linge.

Il se trouve des Gentils-hommes, & des Capitaines riches, qui donnent de l'argent à ces soldats avec toute liberalité, afin qu'ils achèptent des habits, & ce qui leur est necessaire. Par ce moyen ils s'acquierent l'amitié de ces soldats pour s'en servir apres plus librement en leurs voyages de mer, ou bien aux courses qu'ils font pour attraper les ennemis.

Il y en a beaucoup qui vivent en ceste sorte à leur aise. Mais le principal profit de plusieurs vient de l'amour des femmes des Portugais, des Mestis, & des Chrestiens des Indes.

Ces femmes sont si lubriques, qu'elles donnent tout l'argent qu'elles peuvent attraper à leurs adulteres qu'elles enrichissent par ceste voye.

Quelques uns de ces soldats par la faueur de leurs amis vont trafiquer deçà delà, & l'on nomme ceux-cy Chatins, pource qu'ils ont quitté le mestier des armes, & ne veulent plus servir de soldats sur la mer aux armées qui se dressent. Car il n'y a aucun, de ceux-cy qui soit contrainct d'aller à la guerre, combien qu'il soit escrit au liure de Portugal, & quoy qu'ils soient exempts d'aller à la guerre, toutesfois à cause qu'ils vivent sans se marier on les appelle soldats. Il y a aujourdhuy un grand nombre de ces Chatins par les Indes, pource qu'ayant peu ou point de guerre, plusieurs s'addonnent à la marchandise, afin de gagner quelque chose. Il y a beaucoup de raisons de cecy.

Car en premier lieu les Capitaines qui faisoient estat de gens de guerre, ne se soucient maintenant gueres de l'honneur, & donnent peu à ceux qu'ils soudoyent. Les Soldats aussi qui sont moins considerables demeurent tousiours miserables avec ceste solde, & cōbien qu'ils ayent beaucoup d'attestations & certificats, qui leur doivent faire attendre quel-

quelque recompense, toutesfois ils ne peuvent pas porter la grande despence qu'il faut faire de là iusques en Portugal, ny estans arriuez, faire des presens à ceux qui peuvent quelque chose en Espagne, qui ne font rien si l'on ne les gaigne par cette voye. Et mesme il y a ce mal, qu'encor qu'ils obtiennent quelque dignité, il faut bien souuent qu'ils attendent la mort de quelqu'un qui les deuance, & quelquesfois toute leur vie passent en ceste attente. On doit adiouter à cela les incommoditez, & dangers de nauigation, qui causent que plusieurs ne retournent pas en Portugal, ains se marient aux Indes, & s'addonnent à quelque negoce: Outre ce, la guerre n'est eschauffee contre les Barbares, & l'on ne descouure plus de terres, d'autât que le Viceroy est plus curieux de son profit, que de sa gloire. Car les charges des Indes n'estans que de trois annees, font que ceux qui les exercent ne cherchèt qu'à s'enrichir durant ce temps. C'est ce qui fait que la mer est moins seure qu'auparauant, & que les escumeurs y font la pluspart de ce qu'ils veulent, pource que le Viceroy ne tient pas d'ordinaire vne bonne armee sur la mer pour courir de tous costez. Et c'est aussi ce qui diminue la puissance, & les richesses du Roy d'Espagne. Car on ne peut bien voyager par terre, à cause de plusieurs Royaumes qui ne sont gueres amis des Portugais qui n'ont que quelques forts sur les costes.

On ne voit gueres souuent aux Indes les femmes des Portugais, des Mestis, ny des Chrestiens, sinon que ce soit pour quelque visite, ou pour aller à l'Eglise; & lors qu'elles sortent elles sont soigneusement gardees. Car elles sont en leurs Pallanquins tellement couuertes qu'il est impossible de les voir. Quand elles vont à l'Eglise, ou en visite, elles sont superbement vestuës avec force perles, & pierreries.

Leurs habits sont de damas, de velours, ou de Brocat. Car la soye est fort commune en ce pays. Presque toutes vont par la maison la teste nuë, ayans vne chemise deliée nommée Baju, qui les couure iusques au nombril, & depuis le nombril en bas, elles ont vn linge peint, mais en deux ou trois doubles; le reste est descouvert. C'est là l'habit que les femmes de tout aage, & de toute condition portent au logis, & tandis qu'elles y demeurent, elles font tout faire au dehors par leurs chambrières; elles ne mangent point de pain, non plus que les seruiteurs, non pas pour aucune cherté de bled qu'il y ait, veu qu'elles en pourroient auoir en abondance, mais par vne certaine coustume, & inclination qu'elles ont à manger du ris, qu'elles cuisent avec de l'eau, ayans pour viande du poisson salé, & des fruiçts salez pareillement, qu'ils nomment Mangas, ou bien avec quelque bouillon de chair, & de poisson, qu'elles versent d'en haut. Au reste elles mangent leur potage à belle main, se moquant de l'usage des cuilliers, comme s'il estoit du tout incivil. On y vse pour boire de certains vases deliez de terre noire, qui sont percez au col. Ils les nomment Gorgolettes, à cause que celuy qui boit en leuant le vase, & ne le touchant pas avec la bouche reçoit l'eau par les petits trous, & ceste eau gazouille en sortant, & fait vn doux bruit.

On y rient ceste façon de boire pour ciuile, afin qu'on ne salisse pas le vase avec la bouche qui est quelquesfois peu nette.

Ceux qui viennent fraîchement de Portugal, & qui veulent boire en ceste sorte, versent beaucoup d'eau sur leurs habits, pour ne sçauoir pas la façon d'vser de ce vase. On appelle telles gens Reynols, par sobriquet, & ce nom s'approprie à tous ceux qui sont ignorans des façons de faire des Indes, & qui n'estans pas accoustumez à la grauité affectee, vont avec toute liberté par les ruës, sans se soucier de ceste contraincte, à laquelle toutefois ils s'accoustument bien tost.

Les hommes du Leuant sont extremement jaloux, & ne meinent voir leurs femmes, ny leurs filles à aucun, tant soit-il leur amy excepté à leurs comperes. Si quelqu'un frappe à la porte qui veut parler au mary, aussi tost les femmes s'enfuyent, & se cachent, laissant leur mary seul pour aller à celuy qui vient. Mesmes les proches parens, & qui plus les enfans massés qui ont passé l'aage de quinze ans, sont bannis des lieux, où les femmes demeurent & ont leur logis à part.

Car comme on a oüy dire bien souuent que le nepueu a esté estimé de la femme de son oncle, le frere de la femme de son frere, & le frere mesme a quelquesfois eu à faire avec la sœur. Et veritablement l'impudicité des femmes de ces quartiers est fort grande, & il y en a peu de marices qui soient chastes.

Plusieurs ont vn soldat pour amy, qui les va voir secrettement par le moyen des chambrières qui seruent au badinage. Elles vsent mesmes de certaines herbes pour cet effect. Elles ont vne herbe nommée Datroë, de la semence de laquelle elles tirent vn suc qu'elles meslēt au breuage de leurs maris, qui en auans beu ne font que rire comme des hommes qui ont perdu l'entendement, & demeurent sans apprehension d'aucune chose, ou bien dorment si profondement qu'on les iugeroit sans vie.

Lors les femmes estans en assurance jouissent de leurs amours en presence de leurs maris, qui sont toutesfois sans cognoissance.

Quelquefois la force de ce breuvage dure 24. heures, & pour faire reuenir en leur bon sens ces pauures cornards on leur laue les pieds avec de l'eau froide, mais ils n'ont nulle souuenance des choses qui sont passees. Les femmes font aussi souuent mourir leurs maris par poison, qu'elles accommodent comme il leur semble, afin qu'il ne fasse son effect que dedans le temps qu'elles determinent, tellement qu'il y en a quelquefois qui vivent six ans apres en auoir pris. Les maris font aussi mourir leurs femmes adulteres, ou soubçonnees de leur faire tort, avec le tesmoignage de trois ou quatre personnes, qui assurent qu'elles ont faussé la foy du mariage. Car par les coustumes de Portugal l'homme qui faict mourir pour ceste occasion sa femme n'est point puny, & soudain il luy est permis d'en espouser vne autre. Il y en a plusieurs qui meurent en ceste sorte, & il n'y a rien de plus commun aux Indes que la mort des femmes adulteres, qui ne peut toutefois induire les autres à vne meilleure vie. Car elles tiennent pour delices, & pour chose qui leur apporte de la gloire, de mourir en faisant l'amour. Au reste elles sont curieuses de la proprieté en toutes choses, & veulent que leur maison, & tout leur fait soit net au possible, & elles se lauent souuent le corps pour se tenir nettes. Elles fuyent le trauail & se plaisent aux parfums. Elle se frottent la teste, & le front de Sandal, afin de faire sentir bon, & mangent aussi continuellement des fueilles de *Bethele*, avec de la chaux, & de l'herbe *Arequé*, qui a quelquefois telle force qu'elle les rend comme yures, & ceste herbe a le goust, & la secheresse du bois, ou des racines.

Les femmes ruminent ces trois choses tout le iour comme des bestes, & auallent le ius en crachant le reste, & de là vient qu'elles ont les dents, & les leures noires, & rouges, qui estonnent ceux qui n'ont pas accoustumé de les voir. Ces façons de faire sont venues des Indiens, & ces femmes se persuadent tellement que par ce moyen elles sont preseruees de la puanteur del'haleine, & du mal des dents, & de l'estomac, qu'on leur osteroit plustost la vie que ces herbes.

Lors que le mary est absent, la femme tout en mangeant de la *Bethele*, & estant derriere vne natte, regarde les passans sans estre veüe. Mais si quelqu'un quelle ayme passe, elle leue doucement la natte, comme pour tesmoignage de son affection. Ce sont les commencemens que les femmes donnent à leurs amours, qu'elles pratiquent apres par le moyen de leurs chambrières, & d'une infinité de stratagemes. Elles mangent aussi force espiceries pour se maintenir en chaleur, ou l'augmenter, & mangent aussi certains gasteaux nommez *Cachondes*, composez de diuerses sortes d'espices pour le mesme effect. Et non seulement les femmes apprestent cela pour elles, mais en font encor manger à leurs maris pour les rendre plus vaillans au lit, & se rendre aussi plus contentes.

Elles se baignent aussi fort souuent, & passent les riuieres à nage, tant elles y sont accoustumées. Elles sortent aussi la nuit pour aller rendre des vœux qu'elles ont faits, & lors elles vont librement à pied, pource que la magnificence des sieges, & des chaires est deffenduë en telles occasions.

Les femmes desirant bien souuent ces nuits long-temps auparauant, & lors leurs esclaves qui leur sont fort affidees, les accompagnent, & tandis que leur maistresse prie, elles entretiennent leurs amis, & se iettent en quelque boutique ou cabaret faisant vn signal, & se moquent là de leur maistresse qui est apres la deuotion, en iouissant de leurs amours.

Les femmes de ces quartiers mettent toute leur felicité à estre aymées d'un homme blâc, ou Portugais, & louent entr'elles la beauté de leurs amoureux avec vne grâde ardeur.

Les enfans qui naissent des femmes esclaves sont à leurs maistres qui se reliouissent quand ils ont augmenté leurs maisons d'un seruiteur. Cela se faict toutesfois lors que ces enfans ne sont pas engendrez d'un Portugais, ou d'un homme de libre condition. Car lors le pere peut rachapter son enfant huit iours apres sa naissance avec peu d'argent, & le rendre libre. Mais si l'on demeure huit ou dix iours sans le rachapter, il est serf, & demeure à son maistre qui le peut apres vendre à quelque prix qu'il voudra, ou le nourrir comme son esclave si bon luy semble.

On voit peu souuent que la mere, quoy qu'esclau, & miserable, face mourir l'enfant lors qu'elle en acouche. Car c'est vne gloire à ces femmes d'estre enceintes d'un homme blanc. C'est ce qui fait que la mere garde soigneusement son enfant, & ne le veut donner à son pere à quelque prix que ce soit: de sorte que s'il le veut auoir il faut que ce soit à la desrobée. Les enfans des Portugais, Mestis & autres Chrestiens sont nourris tous nuds, excepté qu'ils ont la chemise que nous auons nommée *Baju*, laquelle ils portent seulement iusqu'à ce qu'ils soient en aage de porter des chausses. Ils sont presque tous nourris par des femmes esclaves, & des Indiennes.

Les Payens qui demeurent à Goa tiennent la rencontre du corbeau de mauvais presage, encor qu'il y ait beaucoup de ces oyseaux aux Indes. Celuy qui en a veu quelqu'un sortant du logis, s'y remet aussitost, & s'enferme, avec resolution de ne sortir pour quelque chose que ce soit, tant il redoute quelque desastre. Il y a par tout beaucoup de Magiciens parmi eux qui charment les serpens, & les tirant hors d'un panier, les contraignent de danser au son de quelque instrument, & les baissent, les embrassent, & mesme parlent à eux, comme des personnes, afin de tirer de l'argent par ces artifices. Ils sçavent trop comme il faut preparer, & composer des poisons, & en donnent librement à ceux qu'ils haïssent.

Les logis de ces Payens sont volontiers bas & petits, couverts de chaume, sans fenestres, & avec des portes si basses qu'ils sont contraints de se baïsser lors qu'ils entrent, ou sortent: leurs meubles sont de nattes de jonc, sur laquelle ils se couchent, ou pour dormir, ou pour prendre leur repas.

Les tables, les nappes, & les serviettes sont faictes de feuilles de figuier, qui seruent aussi à l'usage des plats, & des pots, & pour l'huile, & pour le beurre. Ils apprennent leur viande en des pots de terre, & y cuient du ris, duquel ils remplissent des puits qu'ils font pour cet effect, & ils pilent aussi leur ris, à cause qu'estans pauvres, & miserables ils achèpent le ris avec l'escorce.

Quelques uns tiennent aussi du riz pres de leur demeure pour l'usage de la famille. Ils vsent lors qu'ils veulent boire, d'un petit vaisseau d'airain, avec lequel ils versent du vin dans la bouche, ne voulans qu'elle fraye contre le vase. Ils frottent presque toutes leurs maisons de fumier de vache à cause des puces qu'ils craignent. Au reste ils tiennent leurs corps le plus net qu'ils peuvent, tellement qu'après les necessitez de la nature ils se lauent entierement. Ils se lauent tousiours avec la main gauche, à cause qu'ils mangent de la main droite, & n'vsent iamais de cuilliers. Ils gardent estroitement leurs superstitions, & ceremonies, ne sortans iamais sans auoir fait leurs prieres: Quand ils font chemin ils adorent les images horribles de leurs Dieux qui sont en des rochers, des montagnes, & des cavernes, & mesme ils adorent des figures de Diabes. Lors qu'ils doiuent voyager par eau, ou par terre, ils ne font que sonner leurs trompettes l'espace de quatorze iours avant leur departement, & s'ils vont par mer ils mettent force bâderolles de tous costez au nauire, & force drapeaux, à l'honneur, comme ils disent, de leurs Pagodes, ou Idoles. Et lors qu'ils sont de retour ils font encor le mesme bruit l'espace d'une semaine, ou de deux. Ils obseruent ceste façon de faire aux autres solemnitez, des nopces, de la natiuité, des saisons de l'annee, de la moisson, & du temps des semences.

Il y a un grand nombre de Barbiers entr'eux, qui marchent de tous costez pour peu de chose, & n'ont point de boutiques, mais vont par leurs maisons où l'on les employe iusques aux plus vils seruices, & pour abreger ils sont traitez comme gens de peu, & dont l'on ne fait gueres d'estime.

Les Payens qui sont sçauants en medecine tiennent fort leur rang dans la ville de Goa, veu qu'après les Ambassadeurs, & quelques marchands il n'y a point d'autres infidelles qui se courent d'un paratol allants par la ville.

Les Portugais ne dedaignent lors qu'ils sont malades de se faire voir à ces Medecins Payens, & l'Archeuesque, & tous les hommes d'Eglise se fient plus volontiers à eux qu'aux Portugais mesmes. Et c'est ce qui fait que ces Medecins sont extremement honorés, & assemblent de grandes richesses.

Les laboureurs des enuiron de Goa sont presque tous Chrestiens, toutefois ils ne different gueres des Payens, dont ils gardent encore plusieurs ceremonies, à quoy les Inquisiteurs seignent de ne prendre garde, à cause de la longue coustume qu'ils ont prise. Il y a en la mesme ville au bout des places des Changeurs Indiens Chrestiens, qu'ils nomment *Xaraffos*. Ceux cy se cognoissent fort aux metaux, & disent si une piece est bonne ou faulse aussitost qu'ils l'ont regardée. Les Payens ont ceste coustume de s'arrester au mestier, ou à la profession de leurs peres, & ceux cy se marient, chacun à des femmes de leur art, ou profession, & sont tous distinguez par la vacation qu'ils ont, & ne se meslent par mariage avec des femmes qui soient de quelque autre.

Les peres ne donnent rien en mariage à leurs filles, excepté quelques colliers, & dorures, & toute l'autre despence consiste au banquet des nopces. Les enfans masles emportent tout l'heritage.

Il y a plusieurs Gufarates & Banianes du pays de Cambaye, qui habitent à Goa, Diu, Chaul, & Cochim, & autres lieux des Indes pour le trafic de froment, de coton, de ris, & choses semblables: mais principalement pour celui des pierreries, auxquelles ils s'entendent mieux que gens du monde. Ils sont sçauants en Arithmetique, & ne surpassent pas seulement en ceste partie les autres Indiens, mais les Portugais mesmes. Ils ne mangent nulle.

ment avec les autres nations, non pas quand ils deuroient mourir de faim. Lors qu'ils vont par mer à Cochin ils ne prennent qu'autant de viande qu'ils estiment estre necessaire pour ce voyage. Que s'ils demeurent plus longuement qu'ils ne se sont figurez ils aymerot mieux mourir que de manger avec vn Chrestien, ou quelqu'autre, ou en recevoir de la viande.

Beaucoup de Canares, & Decanins qui sont du pays de Decan, font leur demeure en la ville de Goa, & y ont des boutiques. Ils achèptent des Portugais de la soye, du damas, & du velours, du cotton, des porcelaines, & autres marchandises de la Chine, de Cambaye, & de Bengale à la grande mesure, à fin de les vendre apres à vne plus petite aulne. Ils ont pour cet effect des courtiers leurs concitoyens qui pouruoient à leur emploite. Ceux-cy portent des viures à Goa de la terre ferme. Ils ont des nauires des Indes, avec lesquelles ils trafiquent du costé de Cambaye, de Sunde, & de la mer rouge. Il y a beaucoup d'excellens Orfeures entr'eux, beaucoup de graueurs, & autres artisans, grand nombre de Barbiers, & Medecins, qui demeurent tous à Goa, & esgalent presque en nombre les Portugais, les Mestis, & les Chrestiens. Ils afferment les droicts du Roy autour de Salfette, de Bardes, & l'Isle de Goa, & pour ceste cause ils sont souuent contraincts d'assister à tous les iugemens, ausquels ils plaident leur propre cause, alleguants les loix & statuts de Portugal, avec estonnement des Portugais mesmes.

Les Canarins, & Corumbins des Indes, se messent du labourage, & de la pesche, & ont soing des palmiers des Indes, qui portent des *Cocos*. Il y en a quelques vns entr'eux qui se meslent seulement de lauer, & blanchir le linge. Ceux-là s'appellent *Meynars*. Les autres se nomment *Paramars*, c'est à dire messagers par terre. Ceux-cy qui sont les plus vils hommes des Indiens vivent de peu de chose. Ils s'abstiennent de manger de la chair de vache, de boeuf, de beufle, de pourceau, & vivent de mesme que les Canares, & les Decanins. Ils vont presque tous nus, n'ayants que les parties honteuses couuertes d'un petit drap.

Les femmes se couurent d'un linge qui leur va iusques aux cuisses, & en retroussent vne partie sur l'espaule, tellement qu'elles font paroistre la moitié de leur tetin.

Plusieurs de ces Canarins font profession de la Religion Chrestienne, à cause qu'ils demeurent presque tous aupres de Goa. Car il y a force Palmiers pres des riuages, de mesme que du ris, qui est la viande des Canarins & qui vient en vne terre basse. Ceux-cy portent de terre ferme de la volaille, du lait, des fruiçts, & des œufs à la ville. Leurs maisons sont couuertes de chaume, avec vne petite porte basse, où vn homme ne scauroit entrer tout droict.

Ils engendrent des enfans en fort grand nombre, qui demeurent entierement nus iusques à huit ans, & depuis ce temps ils cachent leurs parties honteuses. Les femmes qui accouchent se deliurent sans sage femme, & lauent aussi tost leurs enfans, puis les couchent sous des feuilles de figuier des Indes, & font soudain leur mesnage aussi bien que si elles n'estoient fraichement accouchees. Les enfans, comme j'ay desia dit, sont nourris tous nus, & lors qu'ils sont sales on n'vse d'autre mystere que de les lauer avec de l'eau, tellement qu'ils deuiennent fort dispos, & sont faits à tout, pource qu'on n'vse pas en leur endroit de mignardise. Les hommes de ceste sorte vivent bien souuent iusques à cent ans en pleine santé, sans perdre vne dent, se mocquans de nos delices, avec lesquelles nous faisons tort à nostre vie, & à la nature. Ils nourrissent seulement vn bouquet de cheveux au sommet de la teste, & se rasent la teste. Ils sont bontageurs, & vont sur la riuere dans les vaisseaux nommez *Amadies*, qui sont si petits qu'ils ne peuuent presque tenir vn homme seul. Cela cause qu'ils sont souuent renuersez, mais ils sont si habiles qu'ils redressent le vaisseau, jettent l'eau dehors, & poursuient leur voyage. Mais ils sont miserables d'ailleurs en ce qu'ils viuent petitement, & fort mal, & sont pour ceste occasion ordinairement maigres, & defaits, foibles, & de peu de courage, à raison de quoy les Portugais les mesprisent, & baffoient. Ils obseruent en leur mariage mesmes ceremonies que les Decanins. Lors que les maris sont morts on dresse le buscher, pour les brusler & les femmes coupent leurs cheveux, & deschi rent en signe de dueil leurs habits, qui ne valent toutefois grand' chose.

Il y a beaucoup de Mores, & de Iuifs, qui demeurent à Goa, Cochin & autres lieux, dont plusieurs sont venus d'autres pays, & plusieurs aussi Indiens de naissance, qui ont succé le Mahometisme, ou le Iudaïsme, avec le lait. Quant à leur famille ils suivent la coustume du pays où ils demeurent. Ils ont entre les Indiens des temples, des Synagogues & des Mesquites, où ils font exercice de leur religion comme bon leur semble. Aux villes des Portugais chacun vit en liberté de conscience. Toutefois il n'y a personne qui face des sacrifices à sa mode de peur de scandale, & il y a peine de mort à ceux qui feront le contraire. Les Iuifs ont volontiers de belles femmes. Il y en a plusieurs qui sont venus de Palestine, & qui parlent Espagnol des mieux.

Pour les Mores ils vivent selon la loy de Mahomet, que nous descrirons en l'Empire des Turcs, & trafiquent du costé de la mer rouge, où ils portent des espiceries. Et combien que

plusieurs d'eux demeurent avec les Portugais pisse-messe, toutefois ils les hayssent au possible, & empeschent l'avancement de la foy Chrestienne, laquelle ils rendent odieuse aux Indiens le plus qu'ils peuvent.

RICHESSES.

Les Portugais, & Mestis qui demeurent à Goa trafiquent tous les iours en Bengala, Pegu, Malaca, Cambaye, la Chine, & autres lieux.

Les citoyens de la ville de Goa, & les autres peuples des Indes, & des nations voisines s'assemblent tous les iours en vn lieu qui est comme la Bourge d'Anvers : mais ils vivent en quelque chose de façons de faire differentes.

Car à Goa les Gentils-hommes, & autres s'assemblent avec les marchands, & toutes choses sont exposees en vente comme en vn marché, ou en quelque foire. Ceste assemblée se fait seulement avant midy toute l'année, excepté les iours de feste. Elle commence à sept heures du matin, & dure iusques à neuf : à cause de l'excessive chaleur de l'après-dinée. Il y a des crieurs publics en la principale place de la ville qui se nomme *Leylon*, & ceux-cy vont par ceste place avec des chaines d'or, des bagues, des pierreries, & autres ornemens, accompagnez d'un grand nombre d'esclaves à vendre, & de l'un & de l'autre sexe, & lors si quelqu'un veut acheter vne de ces miserables personnes, on les produit, & les montre, comme on fait icy les bestes.

On trouve aussi à Goa des cheuaux d'Arabie, des episceries de toutes sortes, & autres medicaments secs, de la gomme qui sent bon, de beaux tapis, & plusieurs autres curiositez de Cambaye, de Sinde, de Bengala, de la Chine, & d'ailleurs, & c'est presque vne merueille de voir vne si grande multitude de personnes.

Quelques Portugais vivent, & assemblent du bien par le moyen de leurs esclaves, qui sont quelques fois iusques au nombre de vingt ou trente, & vivent de peu de chose. Ces serfs se louent par la ville à faire toute sorte de choses, & portent de l'eau pour la vendre. Les femmes esclaves accommodent diuersement les fruiets des Indes, & font diuers ouvrages qu'elles portent vendre au marché, à quoy l'on choisit des plus belles, & plus ieunes, afin que leurs marchands attirez par leur beauté achemptent plus volontiers leur mercerie, non tant pour sa beauté, que pour celle des femmes qui la portent, desquelles ils esperent iouyr, ce que les femmes leur accordent assez librement pour gagner quelque piece d'argent.

Les Portugais s'enrichissent donc aisément par ceste voye, & entretiennent leur famille. Les autres font vn grand profit sur l'argent en ceste sorte. Lorsque les nauires de Portugal viennent, ils achemptent force grands reals d'Espagne & donnent douze de profit sur chaque centaine.

Après cela ils les gardent iusques au mois d'Auril, lors que les marchands s'en vont à la Chine, veu que les reals sont grandement de requeste en tel temps, & y gagnent vingt ou trente pour cent. Au mesme temps ils achemptent des Larins de Perse, donnent huit ou dix de profit sur chaque cent, & lors que les nauires de Portugal viennent, ils les changent contre des reals, & gagnent vingt ou, ou 25. pour cent.

L'usage de ces Larins est necessaire aux Indes, pour achempter du poivre à Cochin, veu qu'on y fait grand estat de ceste monnoye. Il y a encore d'autre sorte de monnoye, comme les Pagodes, les Venimens, & les Santonois qui sont d'or. Plusieurs font aussi grand profit en toutes ces monnoyes, principalement si la fortune les fauorise. Plusieurs vivent aussi du reuenu que les Palmiers des Cocos leur apportent, à cause qu'on fait vn grand trafic de ce fruiet aux Indes. Tellement qu'il y en aura tel qui outre toute sa despence tirera tous les iours de gain d'un seul Palmier demy *Pardanne*, dont l'entier vaut trois testons de Portugal, & il y en a quelques vns qui ont 4. ou 500. de ces arbres en vne metairie, lesquels ils louent aux Canarins.

Beaucoup des Payens habitans de Goa sont riches marchands. Il y a vne rue où l'on ne voit que des boutiques de ces ges, pleines de soye & de velours, & autres estoifes, & de Porcelaines. Ils achemptent toutes ces choses premierement en gros par le moien de leurs courtiers, puis les vendent en detail auans vn merueilleux esprit pour cet affaire. En la mesme rue il y a d'autres marchands vis à vis qui vendent des toiles de toutes sortes, des chemises toutes faites, tant pour les Portugais, que pour leurs esclaves, & plusieurs autres petites besongnes. Il y a vne autre rue où demeurent ceux qui vendent toutes les besongnes des femmes, & mille belles sortes de linge ouré, de mesme que du chanvre pour faire des voiles, & des cordages. On voit en vn autre rue les Banjanes de Cambaye, qui vendent des perles, & de la pierrerie, du corail, & choses semblables. Il y a aussi la rue de ceux qui font des lizieres, chaires & bancs, qu'ils bigarent de diuerses couleurs avecques la Lacque, à laquelle ils scauent donner les couleurs qu'ils veulent.

Les Orfeures ont aussi leur demeure particuliere, comme aussi les charpentiers, menuisiers & autres artisans, & ouuriers, les autres vendent en gros le ris, & les autres marchandises des Indes.

Il y a grand nombre d'Apotiquaires qui vendent en detail des drogues & especes. Ceux-cy sont pour la plus grande part Bramins ou Prestres des Idoles, qui ont à chaque bout de rue des boutiques garnies de toute sortes de marchandise, ce qui est extremement commode au peuple.

La principale & plus commune sorte de monnoye c'est le *Pardauue xerafin*, qui est d'argent, & se fait à Goa. Il a l'image de saint Sebastien d'un costé, & de l'autre trois ou quatre fleche liees ensemble. Il vaut trois testons ou trois *Reyses* de Portugal, & a tantost plus grand, tantost moindre prix selon le cours du change. Ils vsent d'une autre façon de compter par certains *Tangas*, dont on se sert pour faire quelque compte. Cinq de ces Tangas font un pardauue ou xerafin de la moindre marque. Car il y a deux sortes de monnoye, c'est à sçavoir la bonne & la mauuaise: veu que 4. Tangas de bonne monnoye en font cinq de mauuaise; à raison de quoy aux ventes & aux achapts on desire sçavoir auant qu'aucune chose se face, si le paiement sera en bonne ou mauuaise monnoye. Mais on fait encore un autre compte par Vingtain, non pas qu'ils soient en espee, mais seulement en esprit de celui qui compte. Ceux-cy valent quatre Tangas de la bonne, & cinq de la mauuaise monnoye. La menuë monnoye porte le nom de *Basarucs*. On compte pour quinze basarucs de bonne monnoye, dix-huict de la mauuaise. Un vingtain & trois basarucs font deux reyses de la monnoye de Portugal, & sont faicts de mauuais estain: trois cens soixante quinze basarucs font un Pardauue ou xerafin.

Les Larins de Perse valent chacun cent cinq & cent huict basarucs, selon le cours du change. Il y a des escus d'or nommez pagodes, qui valent tousiours plus de huict tangas.

Les Payens qui les font y mettent une figure de leurs Idoles. Les escus de Venise ou de Turquie valent presque deux pardauue xerafins. Ils ont aussi des escus d'or de saint Thomas, avec l'image de ce Saint, qui sont estimés sept ou huict tangas. Quant à la monnoye de Portugal, on n'y reçoit que les grands reals qui en valent huict petits. Ainsi que les nauires de Portugal arriuent les reals sont estimez cent trente-six reyses, puis ils montent à plus grand prix lors que le temps d'en porter à la Chine s'approche.

Il y a certaine maniere de compter à Goa pour le regard des achapts & des vents. Il y a des pardauues xerafins d'argent qui sont en espee, mais il y en a d'or qui sont en imagination, & ne seruent qu'aux comptes. Car lors qu'on achapte des perles & de la pierrerie, de l'or & de l'argent, & des chevaux, on ne parle que de pardauues, qui valent alors chacun six tangas, mais pour le regard des autres marchandises, quand on ne specifie rien, on entend simplement les pardauues xerafins, dont chacun vaut cinq tangas. Ils nomment aussi des pardauues de larins, & lors le pardauue vaut cinq larins. Voila la monnoye de ceux qui demeurent à Goa, & la façon du change par le moyen de laquelle beaucoup de personnes font de grands profits. Au reste la grande fausseté de ces pardauues, qui sont quelques fois merueilleusement bien contrefaits, fait qu'on a grand besoin des chargeurs qui cognoissent bien la fausse monnoye.

Les Indiens de terre ferme font ceste monnoye fausse pour tromper les Portugais. A raison de quoy personne n'ose receuoir la moindre piece d'argent sans l'auoir fait voir à un changeur.

Ces changeurs apprestent aussi soigneusement de l'argent de diuerses sortes pour ceux qui en demandent, ayans des tables toutes disposées, où l'on void ordinairement des monceaux d'argent distinguez par tangues. La tangue vaut soixante & quinze basarucs, & au change du pardauue sur trois cens soixante & quinze basarucs, ils en adioustent quelquefois huict ou dix.

Les poids de Goa sont semblables à ceux des Portugais, & sont distinguez en quintaux, arrobes, & autres poids. Ils ont encor toutesfois un autre poids nommé *Mao*, qui signifie la main, & pese douze liures, & l'on en vsé pour vendre du beurre, du miel, du sucre, & semblables matieres.

On mesure le poiure avec le *Bhavo*, qui fait trois quintaux & demy de poids de Portugal, & chaque quintal faict cent liures. Ils ont une mesure qu'ils nomment *Medula*, qui vaut environ neuf onces. Vingt-quatre de ces mesures font la main, & vingt mains le *Candil*, & un candil tient presque quatorze muids. Ils mesurent avec cecy le riz, le froment, & autres choses seiches, & en chargent les nauires, faisant le compte de la charge par candils ou barhes. Ils vendent aussi le ris dans la paille bien liee avec des fardes. Le farde contient communement trois mains & demie.

Le meilleur ris se nomme girasal, & vaut plus que celui qu'on appelle Chambasal. Il y a encor d'autres sortes de ris de moindre valeur, quand il est dans l'écorce on l'appelle Batthe, & ressemble fort à l'orge.

Quant aux Vice-Rois ils ont accoustumé de visiter les places & forteresses qui sont sous le Roy d'Espagne, à cinquante, soixante, & quatre-vingt milles de Goa, tant du costé du Nort que du Midy. Ceste visite leur apporte vn grand profit, autant que toute autre chose. C'est chose assée que les Vice-Rois ont de grands reuenus, & qu'ils disposent de ceux du Roy d'Espagne comme bon leur semble, deuenans par ce moyen extrêmement riches, à cause que le Roy leur donne entiere puissance. Tellement qu'ils amoncelent vne grande quantité d'or & d'argent, & assemblent force richesses. Outre les reuenus & profits ordinaires ils reçoient des presens de tous costez, qui les enrichissent. Car tous ceux qui ont quelque alliance avec l'Espagne enuoyent, suiuant la coustume, des Ambassadeurs au Vice-Roy nouvellement arriué, avec des presents, qui ne manquent iamais d'estre grands & magnifiques; & tandis qu'il demeure à Goa, il est entretenu aux dépens du Roy, de mesme que les autres Officiers, de ce qu'on tire pour le Roy des terres de Salsette, & de Bardes.

F O R C E S.

L'Isle a seulement vne muraille du costé du Leuant vis-à-vis de la terre de Salsette, iusques à l'autre costé de la terre de Bardes. Ceste deffence n'est bonne que contre les soudaines attaques des peuples de la terre ferme, qui ne sont sous la domination des Portugais. Il n'y a point d'autre fortification en ceste Isle. Il y a bien en la terre de Bardes vn chasteau qui est sur vn haut à la bouche du fleuve; mais il est presque ruine, & a seulement trois canons de fer & vn homme qui le garde.

L'Isle de Goa du costé du riuage de la mer monstre en quelques lieux des rochers fort hauts: mais la terre de Bardes du costé qu'elle regarde la mer, a vn beau riuage de sable l'espace de cinq cents pas.

Voicy la garde de ceste Isle. Du costé du Leuant il y a trois ou quatre portes sur le bord de la riuere à l'extremité de l'Isle, vis-à-vis de la terre ferme de Salsette & Bardes. Chaque porte a son Capitaine, & son Secetaire, sans la permission desquels personne ne peut aller en terre ferme. A raison dequoy quand les Indiens Decanins, & les autres Ethiopiens idolâtres qui demeurent à Goa vont en terre ferme pour faire quelque trafic, ou emploie, ou bien pour chercher des viures, il faut qu'ils reçoient sur le bras nud vne marque qu'on leur imprime en ces passages.

Lors qu'ils retournent ils doiuent monstre la mesme marque, & l'on donne pour la liberté du passage deux basarucs pour le Capitaine, & Secetaire, qui mettent la nuit en sentinelle vn ieune homme, qui a charge de sonner vne cloche qui prend de la tour. Ce ieune homme attache bien souuent la corde de la cloche avec vne couroye à son pied, afin de faire entendre à tout le monde qu'il veille. Il y a cinq passages de ceste sorte. L'vn est du costé du midy, qui conduit à la terre ferme, & à Salsette. Ce pas s'appelloit Besterijn, & se nomme maintenant le passage de saint lacques, à cause de la parroille de saint lacques qui est en ce lieu là.

Le second passage nommé Sec, est au Leuant de l'Isle, & c'est le commun passage pour aller en terre ferme, à cause que la riuere est plus gueable en ce lieu cy qu'en nul autre.

Le troisieme qui se nomme le passage de Daugijn ou de la mere de Dieu, est du costé du Midy, & est presque tout aupres de la ville. La muraille va iusques là, commençant au pas de saint lacques: & tout le reste de l'Isle n'a autre deffence. De ce passage on trajecte iusques à l'autre Isle qui répond à la terre ferme, & ce quatriesme s'appelle de Norua.

Le cinquiesme & dernier passage est de la ville iusques à la moitié de la riuere, en vne plus basse plager tirant vers Barde. Cestuy-cy est plus fort de tous, & se nomme Pas de Pangijn. Et c'est en cet endroit qu'on arreste & visite tous les vaisseaux qui entrent dans la riuere, ou en sortent. Voila toutes les fortifications de ceste Isle, qui toutesfois ne craint gueres l'effort de ses voisins, estant soigneusement gardee, & pleine de peuple. Toutesfois ce qui pourroit nuire aux Portugais seroit la grande multitude des Idolâtres, & Mahometans qui sont en ceste Isle. Mais s'il y a de la crainte de ce costé là, les Portugais y mettent si bon ordre, & prennent garde si soigneusement à toute chose, qu'ils peuvent viure en assurance. Outre cela les armées de mer qui courent de tous costez empeschent assez qu'on ne le puisse surprendre, & les soldats qu'on y entretient qui sont en grand nombre, les rendent pleins d'assurance.

G O V V E R N E M E N T.

LE Vice-roy des Indes qui demeure à Goa y est enuoyé pour trois ans avec pleine puissance, & quelquesfois y demeure dauantage selon que le Roy l'ordonne. Mais c'est chose qui n'arriue gueres souuent, & est du tout extraordinaire. Ce Vice-Roy a dans ceste ville son conseil, son siege de Iustice, sa Chancellerie, & ses Iuges à la façon de Portugal, & pour ceste cause il decide tous les procez & debats au nom du Roy d'Espagne, auquel on peut toutesfois appeller des choses civiles qui sont de grande importance, & c'est aussi le seul point reserué.

Quant aux criminelles il n'y a personne qui puisse appeller du iugement qui se donne à Goa, s'il n'est noble, & le Vice-Roy est bridé en ce qu'il ne peut faire mourir vn gentilhomme, ainsest obligé del'enuoyer prisonnier, & sous bonne garde en Espagne, sinon que le Roy y pouruoye d'autre sorte.

Le Palais du Vice-Roy est gardé par des soldats qui sont ordonnez pour cét effect. Ceste dignité dure iusques à l'armee de l'autre Vice-Roy qu'on luy donne pour successeur qui estant à Bardes, ou en quelque autre port des Indes enuoye soudain les Procureurs pour prendre possession. Lors le Vice-Roy quitte le Palais à celuy qui vient, & le dégarnit de tous les meubles, n'y laissant que les murailles, qui sont bien-toit tapissées, aussi bien que le reste se trouue en peu de iours meublé richement.

Le Vice-Roy precedent s'en retourne dans le mesme nauire où son successeur est venu. Ce grand pouuoir n'est iamais donné que pour quelque recompense signalee.

Les Indiens disent communément qu'ils ne peuuent esperer vne meilleure fortune aux Indes, tandis que ceste façon d'enuoyer des Vice-Roy pour trois ans sera maintenue. Car la premiere année le Vice-Roy considere & recognoist les façons de faire du pais: la seconde il tasche d'assembler des moyens: & la troisieme il met toute chose en bon ordre, afin que son successeur ne le surprenne. Ce qui peut assez faire conjecturer que ceste domination sera de duree, puis qu'il n'y a personne qui se puisse promettre vn plus long-temps pour donner ordre à toute chose, & que par ce moyen on empesche la nonchalance de ceux qui different les affaires d'un iour à l'autre.

Le liure où l'on escrit le nom de ceux de Portugal aux Indes est enuoyé à vn qui en a charge particuliere aux Indes, & cét office est triennal de mesme que les autres des Indes. Lors que l'Esté arriue aux Indes, & que la necessité contrainct de mettre vne armee sur la mer, pour rendre plus asseuree la nauigation que ceux de Malabar ennemis iurez des Portugais empeschent, & troublent en toute sorte chaque année, enuiron le mois de Septembre on fait crier à son de tambour que ceux qui voudront seruir le Roy sur la mer, viennent pour receuoir la solde. Lors le Vice-Roy fait vn General qui a plusieurs Capitaines sous luy, dont chacun commande à vn vaisseau, & de ces vaisseaux les vns tiennent cent hommes, & les autres trente. Ces hommes selon les tiltres qu'ils ont reçoient la solde, dont le payement se fait tous les trois mois.

Le soldat a sept pardaues Xerafins. Le pardaue vaut trois testons de Portugal. Vn homme honorable prend neuf pardaues, & ainsi delà en auant.

Les Capitaines taschent d'attirer les bons soldats avec des presens outre la solde. Les vaisseaux sont fournis de viures à suffisance, & les Capitaines mangent avec les soldats, & prennent garde qu'ils soient bien; veu qu'autrement ils leur seroient peu obeïssants. Ceste armee garde & court la mer iusques au mois d'Auril, pour empeschier les courses des Malabares. Sur la fin du mois d'Auril, elle s'en retourne à Goa, & lors on tire les vaisseaux en terre. Les soldats estants de retour vont où bon leur semble, sans estre soldoyez delà en auant.

Lors le Vice-Roy proteste deuant le General de l'armee, que par son commandement, & au nom du Roy d'Espagne il a tenu sur la mer vne armee tant de temps, & a empesché les escumeurs de faire quelque ravage. S'il s'est fait quelque bel exploit digne de memoire, on en fait vn long discours, où l'on met entre autres poincts que le General a fait pour ce regard de grands fraiz pour le seruice du Roy.

Le General ayant ce tesmoignage & certificat, tesmoigne le mesme des Capitaines qui ont esté sous sa charge. Il faut aussi auoir des certificats des Secretaires, & de ceux qui ont charge de l'Arcenal des Indes, afin qu'on puisse monstrier que l'on n'a rien fait qui puisse retarder, ou diminuer la recompense.

Les Portugais s'en reuont avec des tesmoignages, ayans desia conceu dans leur esprit la charge qu'ils veulent briguer: Tous les officiers s'en reuont aussi au bout de trois ans, & c'est vne extreme faueur quand on leur accorde la continuation pour leur gendre, qui prend l'office pour le mariage de sa femme. Lors les lettres sont enregistrees en la grande Chancellerie

rie & enuoyees aux Indes afin que le Vice-Roy les confirme. On y suit les mesmes loix qu'en Portugal.

Quant au poivre qu'on tire des Indes, voicy comme on y procede. On ne charge nul navire que les cinq, que ceux qui afferment les vaisseaux du Roy d'Espagne, doivent tenir prests. Que s'il y a tant de marchandise que ces cinq vaisseaux ne la puissent tenir toute, lors les Fermiers du poivre, & les Officiers du Roy requierent que l'on y adjouste encores quelques vaisseaux au nombre ordinaire: ce que leurs Fermiers sont contrains de faire, en telle sorte qu'il y en ayt assez pour emporter toute la charge, que s'ils le refusent, alors le Vice-roy, & les officiers du Roy en peuvent charger à leur volonté, tant du poivre des Fermiers, que d'autres marchandises qui restent au profit du Roy, sans que les Fermiers des nauires y puissent pretendre aucune chose: mais cela se peut faire seulement lors que les cinq nauires ont entierement leur charge.

Les Fermiers du poivre ont en chaque nauires vn facteur, à qui le Roy donne place & entretien durant le voyage.

La ferme de poivre dure cinq annees, & s'il arriue quelque chose sur la mer, c'est au dommage de ceux qui la tiennent, & qui chargent les nauires, de mesme que tout le chargement se fait à leurs depens: & si l'argent vient à se perdre aussi, ceste perte est sur leurs coffres. Ils sont obligez de donner le poivre au Roy à raison de douze ducats pour quintal: si la quantité y manque, tout est au dommage des Fermiers, & non du Roy, qui reçoit en la maison des Indes le poivre sec & net, avec vn gain asseuré, & sans crainte de perte. Au reste ces Fermiers ont leurs droits, & leurs privileges si bien affermis, qu'on ne peut aller au contraire.

Il n'y a personne autre qui puisse vendre du poivre aux Indes sur peine de la vie, & ceste loy est rigoureusement obseruee. On ne peut diminuer la somme d'argent qui est preparee pour l'achat du poivre, ny en prendre tant soit peu pour quelque cause qu'on puisse alleguer, tant soit-elle necessaire.

Il n'y a personne qui puisse apporter de l'empeschement lors qu'on charge les nauires de poivre. On laisse mesme les affaires du Roy à part en ce temps, & le Vice-roy n'a soing d'autre chose avec les autres Capitaines des Indes, & donne assistance pour cet effect lors qu'on la demande.

Le Bhare du poivre se vend aux Indes presqu'ordinairement 28. Pagodes, & le Bhare vaut trois quintaux, & demy de Portugal: tellement qu'un quintal vaut 12. Xerafins Bardauues, & quatre Tangles, & le quintal pese 128. liures. Ils donnent certaine quantité d'argent au Roy d'Espagne, si les nauires arriuent à bon port: outre ce ils sont obligez de faire porter & nourrir les soldats gratuitement. En fin si quelque nauires vient à se perdre, le Roy n'y fait perte que de quelque argent qui luy est donné pour son droict, & de ce qu'il n'a pas le poivre qu'il deuoit auoir à certain prix.

Et delà vient que ceux qui ont charge des choses qui concernent la mer, ne se soucient de mettre dans les nauires guere de gens de deffence; au lieu que les Roys de Portugal en auoient vn soing particulier pource que tout le poivre leur appartenoit.

RELIGION.

ON a liberté de conscience dans Goa, où l'on void avec des Portugais des Mores, des Juifs, Armeniens, Gufarates, Banjanes, Bramins, & autres gens des Indes qui y viuent à leur mode, & selon leur Religion, sinon qu'on ne leur permet pas de brusler les hommes morts, ou en vie, ny de celebrer leurs nopces, & faire parade de leurs superstitions diaboliques: à quoy l'Euesque prend soigneusement garde de peur de scandale des nouueaux Chrestiens. Mais si quelqu'un apres auoir esté baptisé se remet au Paganisme, il sera mis à l'Inquisition pour estre puny selon la sentence des Inquisiteurs.

Il y a là plusieurs Arabes, Perses & Abyssins, qui suiuent en partie la Religion Chrestienne, & en partie celle des Mores, qui gardent la pernicieuse loy de Mahomet.

Les Mores mangent de tout sans distinction, excepté de la chair de pourceau, & sont enterrez à la façon des Juifs. Quelques-uns d'entre les Decanins, Gufarates, & Canarins s'abstiennent de la chair de vache, & de beufle. Plusieurs adorent le Soleil & la Lune, recognoissants touresfois vn seul Dieu, Createur de toutes choses. Au reste il y a force Eglises, & Monasteres à Goa: mais il n'y en a pas vne des vierges religieuses, pource qu'il n'y a moyen de persuader la chasteté aux femmes des Indes. Il y a icy vn Archeuesque qui a sous luy tous les Euesques des Indes Orientales, & il y a Inquisition de mesme qu'en Espagne.

L'ANCIEN CHRISTIANISME DES INDES.

Sainct Thomas Apostre, apres que ceste partie luy fut escheüe en la distribution du monde, se transporta premierement en l'Isle de Socotere, où ayant fait plusieurs Chrestiens, il passa à Cranganor, de là à Colen, & de là à Choromandel. Ayant donc semé par tous ces lieux la parole de Dieu, meu de la renommee de la grandeur de la Chine, y alla pour prescher Iesus-Christ. Apres y auoir trauaillé durant quelque temps il s'en retourna au Royaume de Choromandel pour receuoir les Neophytes, & les confirmer en la foy. Ce pais auoit lors pour sa ville capitale Malipur, que les Portugais nomment aujourd'huy sainct Thomas, & s'estant mis à bastir vne Eglise en ce lieu, tandis que les Prestres des Idoles, & le Roy Sagam luy faisoient toutes les contrarietez qu'ils pouuoient, il aduint vne chose, qui seruit grandement pour manifester à ces barbares la vertu de I. Christ, & la verité de l'Euangile.

La mer auoit poussé vne piece de bois d'extraordinaire grandeur, à la plage qui estoit lors esloignée de la ville environ dix lieues.

Le Roy eut desir de se seruir de ce bois, pour vn bastiment qu'il faisoit : mais il ne le peut iamais faire bouger d'vne place, ny par le moyen des Elephants, ny par celuy de plusieurs instruments, & de beaucoup d'hommes.

On dit que l'Apostre proposa là dessus au Roy vn party, que s'il luy donnoit ce bois pour bastir vn temple au vray Dieu, il le tireroit soudain à la ville sans ayde d'homme, & sans aucune machine: le Roy accepta le party presqu'en se mocquant, & pour s'en rire. Lors sainct Thomas ayant lié la ceinture qu'il portoit, à vne petite branche, qui paroissoit hors du tronc, apres auoir fait le signe de la Croix, le tira sans peine dans les murailles, avec estonnement de tout le peuple. Puis ayant dressé vne Croix de pierre, il predict que quand la mer viendrait là, on verroit venir des pais loing-tains des hommes blancs, pour reestabli la doctrine qu'il auoit preschee. Ceste Prophetie fut verifiée à l'arriuee des Portugais aux Indes, pource qu'un peu auparauant la mer s'estoit approchée de ceste marque.

La reputation de sainct Thomas croissoit continuellement avec ses miracles. Dequoy les Bramins estans faschez pource qu'ils voyoient deffailir leur credit, & leur gain, l'un d'eux pour le ruiner, tua vn sien fils, & accusa l'Apostre de ce meurtre.

L'Apostre estant venu deuant le Roy pour se purger de ce qui luy estoit imposé, dit qu'il n'estoit besoing d'autre iustification, que du tesmoignage mesme du mort, & requit qu'il luy fust permis de l'interroger: son aduersaire n'eut pas la hardiesse de refuser ce party, & lors ainsi que tous estoient estonnez de ceste proposition, & en attente de ce qui reüssiroit, l'enfant mort fut porté en la presence du Roy: Sainct Thomas se tournant alors vers le corps, luy dit qu'au nom de Christ qu'il preschoit pour Dieu & Sauueur du monde, il declara qui estoit l'auteur de sa mort: au nom de Christ ce corps parla, & tesmoigna que sainct Thomas estoit messager du vray Dieu, & que son pere l'auoit tué de rage, & pour l'enuie qu'il portoit au Sainct.

Le Roy qui auoit desia quelque inclination à la foy de Christ, l'embrassa soudain voyant ce miracle. Mais les Bramins, bien que conuaincus de leur perfidie, ne pouuans souffrir le progres de l'Apostre, avec la ruine de leurs idoles, se resolurent de le faire mourir.

Il y auoit hors de la ville vne coline, où sainct Thomas, à l'exemple de Christ, auoit accoustumé de se retirer pour y faire ses prieres, & penser à luy-mesme. Ce fut en ce lieu qu'il receut premierement des coups de pierre, & de dard, & mourut en fin d'un coup de lance. Son corps fut enleué par des Disciples, & enterré dans vne Eglise, où l'on mit encore vne piece de lance qui l'auoit percé, & vn baston ferré dont il vsoit en ses voyages pour se soustenir, & vn vase plein de la terre où son sang estoit tombé.

Quelques-uns estiment que le miracle du tronc de bois ne se fit à Malipur, mais à Cranganor, & que le successeur du Roy Sagam le fit mourir à Calamine, & que son corps fut transporté par les Chrestiens en Edesse ville de Mesopotamie. Toutesfois lean III. Roy de Portugal, suiuant la commune opinion, enjoint à Edoüard de Meneses son Lieutenant aux Indes, de faire ce qui luy seroit possible pour trouuer le corps de sainct Thomas au riuage de Coromandel, & de pourchasser que ses saintes reliques (bien que les autres tiennent qu'elles sont toutes en Mesopotamie) fussent mises en quelque lieu pour y estre gardees avec reuerence. Meneses en donna charge à Emanuel Fria, qui s'en alla à Malipur avec quelques Prestres, & vn Architecte.

Là parmy les rues de la ville, ils trouuerent les vestiges d'un temple magnifique, où il n'y auoit plus rien debout qu'une petite Chappelle avec plusieurs croix peintes dedans & dehors. Ceux du pais disoient que le corps de l'Apostre estoit en ce lieu, & de fait ils trouuerent

uerent vne pierre où estoit escrit en vieil langage, comme on apprit de gens qui s'y entendoient, que ceste Eglise fut bastie par saint Thomas, & que le Roy Sagam auoit donné la dixme des marchandises que l'on conduisoit dans les villes, pour l'entretenir.

On trouua sous ceste pierre, comme ceux du pais atleuroient, le corps du Roy: mais en creusant plus auant, on trouua vn lieu premierement ceint d'une muraille de terre, & puis de pierre, haute de neuf pieds couuerte de diuerses sortes.

On disoit que le corps de l'Apostre estoit là dessous. Surquoy deux Portugais, qui se confessèrent & communierent auparauant, s'estans mis à ouuir le lieu trouuerent certains os fort blancs, mellez avec de la chaux, & du sable, vn troçon de lance, vn baston à voyager, & vn vase de terre, si bien que l'on cogneut à ces marques que c'estoit là le vray corps de l'Apostre: & ce d'autant plus que le corps du Roy Sagam, & d'un autre Disciple de saint Thomas, estoient aupres, mais ces deux estoient si laids, & si espouuentables que la seule couleur distingnoit les os de l'Apostre de ceux des autres.

Le corps du saint fut mis apres en vne chasle, & ceux des deux Disciples en vne autre, & les clefs du lieu furent portees au Viceroy, & remise entre ses mains.

Deux anneés apres les mesmes os furent cachez par deux Portugais sous l'autel de la Chappelle, & finalement transportez à Goa par vn Religieux de l'Ordre de S. François, au temps que Dom Constantin de Brangace estoit Viceroy des Indes.

Il y a aujourd'huy des Chrestiens aux Indes, qui se nomment de saint Thomas: il est vray qu'ils ont diuerses erreurs, nees en partie de l'heresie d'Arrius, & en partie de Nestorius. Ce mal se glissa parmy eux, pource que ces miserables ayants grande faute de Prestres, & de Prelats qui les instruisissent, & administrassent les Sacremens, apres vne longue deliberation arresterent d'enuoyer quelques vns d'entr'eux pour en chercher & les mener aux Indes, en quelques lieux qu'ils les trouuassent. Ces deputez apres vn long & penible voyage, arriuerent en Assyrie, où ils prièrent le Patriarche de Babylone de leur fournir ce qu'ils demandoient. Ce Patriarche leur donna quelques Prestres Prelats qui allerent aux Indes, & au lieu de la pure, & vraye doctrine, semerent l'yuraye des seldits Heresiarques, & ces creurs y sont demeurees iusques à nostre temps.

Toutesfois ils retiennent beaucoup des traditions Apostoliques, ont en grande veneration le saint Sacrement de l'Autel, & le prennent sous les deux especes.

Ils gardent l'Aduent, & le Careme, chantent ordinairement les Psalmes, oyent la Messe, & celebrent les Festes de Iesus-Christ, & des Saints, mais sur tous l'Octau de Pasques. Ceux-cy habitent à Cranganor, & aux enuiron, & l'on estime qu'il y en peut auoir enuiron soixante & dix mille.

Il y en a encores vn grand nombre à Negaran, & à Malipur: & dauantage au pais d'Angamale quinze milles au dessus de Cochin tirant vers le Nort. C'est là que demeure l'Archeuesque, dependant du Patriarche de Babylone.

Ils recognoissent peu à peu la verité de la Religion Catholique par le moyen des Iesuites qui ont vn College à Vaypicota: veu qu'ils se confessent à eux, & leur portent leurs enfans à baptiser, & leurs Prestres apprennent à dire la Messe à la Romaine.

En l'an 1583. l'Archeuesque tint vn Synode, où deux Iesuites se trouuerent & firent beaucoup de Decrets conformes à la Religion Catholique.

L'an 1587. le Roy d'Espagne fonda vn College à Malipur avec l'ayde des Chrestiens de saint Thomas, & vn Seminaire pour l'institution de la ieunesse.

LE NOUVEAU CHRISTIANISME DES INDES.

Les premiers qui passerent aux Indes pour annoncer l'Euangile, furent les Religieux de saint François, dont le premier fut frere Henry, depuis Euesque de Sette, qui y alla avec l'armee qui y mena Pierre Aluare Capral l'an 1500. avec quelques Prestres, mais on ne trouue pas que luy, ny ses compagnons eussent moyen de faire valoir leur talent à cause des continuelles guerres. On vid aller apres Frere Antoine Petroine, & bien tost apres Frere Antoine Laurere, qui s'arresta en la Socotere, & y fit quelque fruct. Finalement Loppez Sequeyra Viceroy des Indes bastit à Goa vne Eglise sous le nom de saint François, & vn Couuent pour les Religieux de cet Ordre: ce qui fit qu'ils eurent la commodité de s'employer en ces quartiers au seruice de Dieu, & à la conuersion des Indiens. Si bien qu'il ne se fit delà en tant guerre d'entreprises de paix, ou guerre, où ils ne se trouuassent. Car Antoine Petroine fut le premier qui dist la Messe, & prescha à Daman en Cambaye, & Frere Antoine Casal fut au secours de Diu avec Dom Iean de Castro, & y fit son deuoir.

Le premier Euesque des Indes fut vn certain frere Fernandez de l'Ordre de saint François

qui y alla au temps de Nugnez d'Atune. Cestuy cy en administrant les Sacrements de la Confirmation, & des saints Ordres, en preschant aux Portugais, & en attirant les Gentils à la foy, exerça louablement l'office d'Euesque, & c'est chose vray-semblable qu'en ce temps la foy fut grandement aduancee. Mais il n'y auoit chose dont les Escriptuains de leur temps se souciaient moins, veu qu'outre qu'ils estoient rares, ils ne s'occupoient qu'à escrire les faits des armes, & les voyages des flottes. Fernandez eut pour successeur Iean d'Albuquerque de Castille, du mesme ordre de saint François, qui vint aux Indes avec Dom Garzie de Norogne, & amena avec luy vn frere Vincent, propre à enseigner la doctrine Chrestienne, & vn Iacques de Borda, Portugais, Predicateur assez fameux. Mais iusqu'à ce temps on voyoit plustost aux Portugais vn ardent desir d'auancer la Religion Chrestienne aux Indes, qu'aucun effect d'importance: pource que les Capitaines, & Gouverneurs estoient occupez à bastir des forts, & à faire des vaisseaux, & ramasser des soldats pour deffendre la mer, & attaquer le pais des ennemis, & les Religieux de saint François, quoy qu'ils eussent à Goa vn bon Conuent, estoient toutesfois tellement occupez de nuit & de iour à leurs exercices ordinaires du chœur, & d'enterrer les morts, qu'ils auoient peu de loisir, de catechiser, & d'instruire les Gentils pour les conuertir.

Au temps qu'Estienne Gama gouernoit les Indes, qui fut en l'an 1540. quelques gens de bien, dont les principaux furent Michel Vaz Vicair general des Indes, & Iacques de Borda, & Cosme Annie, instituerent vn Seminaire de ieunes gens de diuerses nations, afin de semer par leur moyen la foy Chrestienne en beaucoup d'endroits: & on leur assigna les reuenus des temples des Idoles ruinez par Michel Vaz, & l'on appella ce Seminaire le College de sainte foy, & puis de S. Paul, à cause d'une petite Eglise ainsi nommee.

Ils pensoient esleuer en ce College vn bon nombre de ieunes gens de toutes nations, & les instruire en la doctrine Chrestienne, afin qu'ils fussent apres propres à prescher, & reduire à la verité de l'Euangile leurs compatriotes. En ce temps on y fit vne belle acquisition à l'Eglise sans y penser.

On nomme Paraues les peuples qui habitent près du Cap de Comorin, qui sont simples, & de bon naturel, & s'entretiennent pour la plus grande part, par le moyen de la pesche des perles, d'où vient que le riuage où ils habitent, qui a de longueur depuis ledit Cap iusques à l'Isle de Manar, enuiron cinquante lieues, auquel espace on compte enuiron vingt-cinq villes ou villages, se nomme Pescherie.

Ceux-cy donc ayans esté ruinez par les Mahometans, & estans reduits tant pour ceste occasion, que pour d'autres, à vne extreme misere, apres vne longue consultation, poussez par vn certain Iean de la Croix, qui s'estoit conuertý quelques annees auparauant, & trafiquoit en ces lieux-là, se resolurent de mander à Cochín leurs chefs, pour demander secours, en promettant d'embrasser la foy Chrestienne s'ils estoient secourus.

Leurs deputez arriuez à Cochín pour asseurer mieux les Portugais se firent incontinent baptiser. Il sembla qu'on ne deuoit mespriser ny leur demande, ny leur offre. Si bien que les Portugais ayants mis en ordre vn bon nombre de vaisseaux armez non seulement chasserent les Mahometans de ce pais-là, mais encores rendirent meilleure la condition des Paraues, & plus grand nombre de la pesche. Il alla sur les mesmes nauires quelques Prestres, qui catechiserent en peu de iours tout ce peuple. Mais ce peu d'Ecclesiastiques ne pouuoit suffire à l'instruction des Catechumenes, ny à la confirmation des conuertis. Ce qui leur nuisoit encores, c'estoit le commerce, & la frequentation qu'ils auoient avec les infideles pleins de liberté, & de dissolution. Tellement qu'il estoit plus aisé que les vieux Chrestiens se corrompissent, que d'ayder aux nouueaux.

Le Roy Iean qui estoit aduertý de tout cecy, ne pardonnoit, ny à dépence, ny à peine, pour remedier à tout, & ce qui le poussoit grandement à ce faire, c'estoit qu'il scauoit qu'il ne pouuoit tirer les decimes du pais, ny les tailles, ny faire la guerre aux Gentils, sinon pour maintenir, & augmenter la gloire de Dieu, & la predication de l'Euangile, si les Gentils s'opposoient à son aduancement. Mais les forces du Roy n'estoient pas correspondantes à sa bonne intention, pource qu'il falloit pour l'effect de ce dessein, vn grand nombre d'hommes de bonne vie, pleins de prudence, de doctrine, de charité, de grandeur, de courage, & de force de corps, & le Portugal n'auoit alors gueres de tels hommes: car les Predicateurs estoient pour la pluspart estrangers, & les Portugais qui vouloient s'addonner aux lettres, se transportoient à Alcale, ou à Salamanque.

L'Vniuersité de Conymbre qu'ils auoient fondee, estoit encore nouuelle, & ne produisoit que des fructs amers, & la necessité des Indes estoit pressante.

La compagnie des Iesuites commença de florir alors, & le Roy qui en fut aduertý escriuit à Dom pierre Mascarogue son Ambassadeur à Rome près de Paul troisieme, d'obtenir du

Pere

Pere Ignace Fondateur de ceste Compagnie, quelques-vns de ses Peres. L'Ambassadeur les demanda, & n'en obtint que deux, c'est à sçauoir le Pere Simon Rodriguez Portugais, & François Xavier Nauarrois, auxquels se joignirent apres Paul de Camerin en Italie, & François Mansille en Portugal. De ceux-cy Rodriguez demeura en Portugal apres, & Xavier passa aux Indes. Ils partirent de Rome l'an 1540. Ainsi qu'ils furent en Portugal le Roy informé de la vertu du Pere Xavier, luy fit beaucoup d'honneur, & luy ayant avec affection recommandé l'aduancement de la Religion Chrestienne aux Indes, luy donna vn Bref du Pape, par lequel il estoit fait Nonce du Saint Siege, avec ample pouuoir aux Indes. Il arriua à Goa le seiziesme du mois de May de l'an 1542. où il fut receu avec grand honneur de l'Euesque, & commença soudain à mettre la main à la besongne, instituant d'abord le Catechisme. Il alloit tous les iours par les rues, & au son d'une clochette assembloit beaucoup de gens pour venir à l'Eglise. Là tant luy que ses compagnons enseignoient la doctrine Chrestienne. Il passa l'hyuer de ceste sorte, & Paul de Camerin prit le soing du College de S. Paul, où il y auoit vn bon nombre de ieunes gens. Mais le Pere qui auoit ouy parler de la fraiche conuersion des Paraues, s'en alla vers eux au Printemps, menant avec luy Mansille pour les confirmer, & pour ce faire il apprit leur langue avec grande peine. Il luy fallut combattre plus d'une fois avec les Bramins, qui ne pouuoient endurer qu'il leur ostast leur suite & leur reputation, & decourist leurs vanitez, & leurs tromperies. Il ne s'arrestoit en vn lieu qu'autant qu'il y estoit necessaire: mais il faisoit choix des Neophites qui auoient plus de vertu, & plus d'esprit, & les laissoit en sa place pour auoir soing des autres. Estant arriué au bout de quelque Prouince, il retournoit à l'autre, & demandoit compte des choses qu'il auoit enseignées, principalement à ceux qu'il auoit fait maistres des autres, qui se nomment là *Canaçopolles*. Il obtint pour eux certaine somme d'argent que les Indiens souloient donner pour les brodequins de la Roynie de Portugal, à laquelle il escriuit qu'elle ne pouuoit monter au ciel avec de meilleurs brodequins, qu'avec les prieres des Neophites. Il employa plus d'une année à l'instruire, & confirmer les Paraues, & à la renommee de leur conuersion les Macoes, peuples voisins, qui appartiennent au Royaume de Trauancor, & habitent le costé du Leuant du Cap de Comorin, enuoyerent des messagers au Pere, le priant qu'il les allast baptiser: ce qu'il fit, & dans vn mois il reduisit à la foy plus de dix mille personnes. Cependant qu'il estoit attentif à la conuersion des Macoes, ceux de Manar, qui est vne Isle entre Coromandel, & le dernier Cap de Zeilan, luy enuoyerent des messagers pour demander le papesme. Il y enuoya quelques-vns qui catechiserent ceux de Manar, cependant qu'il travailloit à ce qu'il auoit commencé. Ce que le Roy de la fanapatan, duquel ils estoient subiects, ayant entendu, remply d'extreme courroux il en tua vne partie, & tourmenta cruellement l'autre. Quelques-vns qui s'échapperent de ses mains, vindrent par terre à Goa (espace de deux cës lieux) pour demander le baptisme. Cependant que le Pere Xavier estoit occupé en de si bons exercices, on luy enuoya pour luy ayder Iean Beyra de Pontuedro, Nicolas Lancelot d'Vrbin, Antoine Criminel de Parme, & l'année 1548. il eut encore Gaspard Berzé, & Antoine Gome, avec huit autres compagnons, & en mesme temps il arriua à Goa douze Religieux de l'Ordre de saint Dominique, dont Iacques Bermulde estoit le chef, & on leur bastit vne belle Eglise, & vn Couuent fort commode en peu de temps.

Le Pere Xavier ayant laissé la charge de l'Eglise des Paraues au Pere Antoine Criminel, luy donna subiect de mourir glorieusement: Car les Bramins, & les Badagnes le tuerent.

Parmy ces accidents le Roy de Tanor se fit baptiser. Tanor est vne ville esloignée de Goa vers le Midy d'environ huitante lieux. Ce Roy estant informé de nostre foy par frere Vincent de l'Ordre de S. François, & par Iean Suare qui l'alloient souuent trouuer, se fit en fin baptiser, en prenant le nom de Iean.

La Roynie, & deux personnes de son Royatme firent le semblable puis apres, mais secrettement, & le Roy mesme apres le baptisme, portoit au col (de peur des seditions) les trois filets selon la coustume des Bramins, de la secte desquels il auoit esté. Il luy prit enuie apres, afin de nouir vne plus estroite amitié avec les Portugais, de venir à Goa, où il fut receu fort magnifiquement.

L'Archeuesque, le Viceroy, & plusieurs autres, luy parlerent de quitter ces marques des Bramins, & de faire profession ouuerte du Christianisme: mais il alleguoit le danger d'une reuolte du peuple, & de son frere, & les prioit de ne le vouloir faire precipiter, adjoustant qu'il auoit tellement à cœur la Religio, & la gloire de Christ, qu'il ne laisseroit passer aucune occasion de l'accroistre, mais qu'il falloit y proceder sagement. Il demeura l'espace de dix iours à Goa, durant lesquels il eut le Sacrement de la Confirmation de l'Archeuesque. Or les Portugais ayans non seulement augmenté, mais estably leur Empire aux Indes, avec la paix qui s'ensuit, le nom de Christ s'estendit aussi grandement.

On destruisit beaucoup de Temples d'Idoles, au lieu desquels on bastit de magnifiques Eglises. Pour attirer mieux les Gentils, on fait de grandes caresses à ceux qui sont baptisez, & on leur pourchasse des charges, & des offices, où il y a de l'honneur, & du profit, en les exemptant de toutes charges, & leur permettant le port des armes, & choses semblables.

On ne sçauoit s'imaginer combien les nouveaux Chrestiens furent aises de ce que le Roy d'Espagne fit deux d'entr'eux Commandeurs de l'Ordre de Christ ces années passées. On a fondé plusieurs maisons de Catechumenes, & huit Seminaires, pour l'instruction des ieunes gens. Mais la foy ne se multiplia iamais tant aux Indes, qu'au temps que Dom Constantin de Bragance en fut Viceroy, qu'il employa pour la conuersion des infideles, non seulement les reuenus du Roy, mais encores son bien propre.

Il assistoit luy-mesme aux Baptêmes, honoroit les baptisez, & les caressoit, leur donnoit des moyens, & pour conclusion se monstroient en toutes occasions pere des Neofites. Avec ces façons de faire, non seulement il aduança la Religion, mais affermit encore la domination des Portugais aux Indes. Durant son gouuernement l'an 1557. les Iesuites seuls baptiserent dix-huit cens personnes, & l'année d'après vn peu plus: mais l'an 1559. ils en baptiserent trois mille deux cens soixante, & l'an 1560. douze mille sept cens quarante deux. Tellement que ces Peres ou ceux de l'Ordre de saint Dominique, & de saint François conuertirent par maniere de dire, toute la ville de Goa, qui est enuiron de la grandeur de Gennes.

De là vint que l'on ne baptisa pas les années d'après tant de personnes. Toutesfois il n'y a presque année qu'on n'en baptise mille, voire dauantage: ou dans la ville, ou aux enuiron. L'an 1587. pource que les habitans de la coste de Malabar pressez de faim, & d'extreme necessité, vendoient leurs enfans & se mettoient à prix eux-mesmes; on pourchassa deux fort bonnes choses pour l'augmentation de la foy, dont l'une fut que ceux qui seroient exposez en vente, ne fussent achetez que des Chrestiens, l'autre que ceux qui auoient esté desia achetez par des Gentils, fussent mis en liberté en se rendant Chrestiens.

La conuersion des Gentils s'aduança de mesme en Basain, où les Iesuites ont permission du Roy de prendre les enfans orphelins, & de les catechiser, & le mesme Roy l'année 1581. assigna 250. escus de rente aux Catechumenes.

Le nombre ordinaire de ceux qui se conuertissent tous les ans à Basain, monte enuiron deux cens, & l'on en compte autant à Colan, & cent à Zane, & quelque peu moins à Daman, & à Chiaul. Bandore, terre voisine de Goa, est desia toute Chrestienne, de mesme que la petite Isle de Coran. En l'Isle de Salfette, l'an 1583. on tua trois Iesuites, pource qu'ils destruisoient les Idoles, & l'idolatrie: mais l'an 1587. vnze cens quarante personnes, & puis quatorze villages entiers se conuertirent. En la coste de la Pescherie il y a enuiron quarante mille Chrestiens, & l'on baptise tous les ans à Menar plus de six, ou sept cens personnes. En la coste de Trauancor longue de 75. milles, on ne peut guere entretenir la predication pour la pauureté du pais, & la cruauté des Princes Payens, & des Mahometans. Toutesfois on y compte enuiron dix mille Chrestiens. A Cochim l'on ne fait pas le fruit qu'on pourroit, à cause du Roy qui a fait vn Edict, par lequel ses subiects qui se font Chrestiens, perdent tous leurs biens. Mais nonobstant il ne se passe année que plus de cent personnes ne s'y conuertissent.

Les Iesuites ont là vn College où ils enseignent la Grammaire, les lettres humaines & l'Arithmetique, & ont vn grand nombre d'ecoliers de mesme qu'à Chiaul, où l'œuvre de la conuersion est entre les mains des Religieux de saint François, comme encore en Negapatan.

A Chiaul l'an 1581. vn gentil-homme Payen fit vœu de faire tout ce qu'il pourroit pour faire baptiser sa fille qui estoit au eugle, si on la faisoit voir; le vœu estant fait il obtint ce qu'il desiroit, mais le pere n'accomplissant ce qu'il auoit promis, la fille tomba malade à la mort: lors il renouela le vœu & la fille fut guerrie, & luy-mesme la porta après à l'Eglise afin qu'elle fust baptisée; finalement l'an 1587. & l'année d'après se baptiserent aux Indes Citeriennes ou par-deçà huit mille personnes, & l'an 1588. il y eut des Catechumenes iusques au nombre de neuf mille, & de baptisez cinq mille.

Consideration

CONSIDERATION GENERALE SUR LES ISLES
descries & les places que les Espagnols tiennent en Afrique, en Asie, & aux Indes. De
l'utilité, richesses, importances & forces de ces Estars. Des Isles Philippines : Des Princes
amis & tributaires du Roy d'Espagne, voisins de ces pays: & de ses puissans ennemis qui y
pretendent.

Aa ij

Turcs: Mais les continuelles allées, & venues des flottes les asseurent entierement, & l'an mil cinq cents quatre-vingts neuf ils prirent pres de Mombazze quatre galeres, & vn galion de Turcs, qui auoient eu la hardiesse d'aller iusques là.

Quant aux Estats d'Asie ils sont diuisez en ceux de Perse, de Cambaye, & des Indes. Les Portugais ont en Perse le Royaume d'Ormus, & en Cambaye l'Isle de Diu, & Daman, & Bazain. Aux Indes ils possèdent Chaul, l'Isle de Goa, avec celles qui en sont voisines: les forteresses de Cochin, & de Colan, l'Isle de Manar, & le port de Colomban en l'Isle de Zeilan, mais la principale est Goa, où le Viceroy demeure, & où sont les forces des Indes.

Ormus & Diu sont en grande estime pour la Seigneurie de la mer, & du trafic du Golphe de Perse, & du Golphe de Cambaye. Cochin, & Colan sont estimez pour l'abondance du poivre qu'on y charge, Manar pour la pesche des perles qui se fait en ceste mer, Colomban pour l'excellence, & quantité de la canelle qui sort de ceste Isle, Daman, & Bazain pour la bonté des pais voisins, à raison de quoy le troisieme Roy de Portugal assigna ce pais à des vieux soldats. Goa est de tres-grande importance pour la commodité de son assiette, conjointe avec la fertilité du terroir.

Le Roy d'Espagne a encores icy quelques Princes amis, & quelques vns tributaires de ses amis.

Le premier & le plus riche, c'est celuy de Cochin. Cestuy-cy estoit premier vassal du Roy de Calicut, & n'auoit grande puissance. Maintenant avec l'amitié, & le trafic des Portugais, il a acquis de si grandes richesses, & de telles forces que les Roys voisins luy en portent enuie.

Le Roy de Colan est encore des amis du Roy d'Espagne, qui tient en tous les deux forts d'importance. Il y a encore le Royaume de Malaca qui s'estend deux cens soixante & dix milles, mais est peu peuplé. Toutesfois la ville qui se nomme ainsi vnit tous les trafics, voire presque tous les voyages qui se font par ceste grande mer, depuis les embouchures de la mer rouge iusques au Cap de Liampo, & c'est icy qu'abordent les richesses de la terre ferme, & de beaucoup d'Isles qui ne cedent toutes ensemble en grandeur à l'Europe. Malaca a deux puissans ennemis, c'est à sçauoir les Roys d'Yor, & d'Achen, dont le premier est puissant par terre, & le second par mer: elle a esté assiegee de tous deux, & reduite à vn grand danger plus d'une fois: mais avec le secours qui luy vint des Indes elle fut tousiours sauuee avec grande perte des ennemis. En dernier lieu Paul de Lime deffit le Roy d'Yor, & emporta mesme vn fort qu'il auoit fait pres de Malaca, où l'on trouua entre autres choses neuf cents pieces d'artillerie de bronze. Toutesfois cet Estat est en grand danger pour la puissance du Roy d'Achen, qui ne pense qu'à le ruiner.

Quant aux Philippines elles appartiennent à la nouvelle Espagne, non qu'elles soient comprises dans ses confins, ou du nouveau monde, mais pource qu'elles furent decouvertes l'an mil cinq cents soixante quatre, par Michel Loppez de Legaspe, eunoyé pour les decouurer par Dom Louys de Velasque Viceroy de la nouvelle Espagne. On estime que dans ceste mer qui s'elargit entre la nouvelle Espagne, & Sumatre, il y a vnze mille Isles grandes ou petites. Et quoy que les Espagnols les comprennent toutes sous le nom de Philippines, toutesfois ce nom conuient proprement aux plus Septentrionales. De celles-cy ils en ont conquis iusqu'à maintenant plus de quarante avec vn million d'habitans. Ces Isles abondent vniuersellement d'or, & de viures & de canelle, dont on porte grande quantité en la nouvelle Espagne, & en l'Espagne mesme.

Le Roy d'Espagne y a fait mener des bœufs, & des vaches, des cheuaux, & des juments pour les y faire multiplier.

Le nombre des Espagnols qui a conquis, & qui deffend ces contrees, monte aujourd'huy à mille six cents, & de ceux-cy les soldats ne passent le nombre de neuf cents. Ces Estats sont de plus grande importance qu'on n'estime: pource qu'outre l'abondance des viures, & d'or qui s'y trouue, l'assiette en est toute propre pour subjuguer les Isles voisines, & pour introduire le trafic entre ceux de ceste Archipelage, & la nouvelle Espagne, & faciliter le commerce entre la Chine, & Mexique, qui sont toutes choses de grande importance. Mais ce qui importe le plus, c'est qu'on a commencé à brider de ce costé les Mahometans, qui s'alloient rendans peu à peu maistres des Isles, & de la coste de l'Asie, & l'entreprise est plus aisée aux Espagnols par la nouvelle Espagne, & par le Peru, qu'aux Arabes par leurs contrees, pource qu'outre que les premiers sont plus forts, il s'est trouué des nauires qui en deux mois sont venus du Peru aux Philippines (il y a moindre distance d'Acapulcho, & de Salisco) là où vn vaisseau n'y pourroit venir d'Arabie en demie annee: non seulement pource que le premier est plus proche que le dernier, mais encore pource que les vents generaux fauorisent beaucoup plus la nauigation des Espagnols que les Mores: d'autant que les vns vont par ligne droite,

& les autres par ligne courbe. Dauantage ceux-là font le voyage d'une traite; ceux-cy en plusieurs: veu qu'au Cap de Comorin ils trouuent que l'Esté se change en Hyuer, & le mesme leur arriue presque à Malacca, où il faut attendre. Outre ce les Espagnols voyagent tousjours avec le vent en poupe, & sur vne mer paisible, mais les Arabes entrent en vne mer, où pour le grand nombre des Isles, il trouuent mille dangereuses courantes, & vents diuers qui les surprennent, & outre ce force escumeurs qui les attaquent. Il faut adjouster à cela que les Portugais, & les Espagnols estants vnis aujourd'huy feront tousiours vn grand effort en ce pais-là: & c'est aussi le subject qui fait que les Chinois prennent garde à eux, & redoutent ce voyfinage, & les armes des Chrestiens.

Les forces des Espagnols en ces Estats consistent en deux choses: l'une est la forte assiette des lieux, l'autre le nombre, & la bonté des armes. Car quant aux assiettes, les Portugais cognoissans qu'ils ne pouuoient pour leur petit nombre embrasser les entreprises d'importance dans vn pais, ny resister à la puissance des Perles, des Gufarates, des Princes de Decan, de Narlinge, & des autres, furent attentifs à occuper les lieux qui leur semblerent plus propres pour se rendre maistres de la mer, & du trafic, pource que peu de gens y pourroient tenir contre de grandes armées: & d'autant qu'ils sont maistres des ports, & des mers, ils ont commodité de mettre ensemble tant de forces maritimes, qu'il n'y a personne qui puisse s'opposer à eux, & leurs vaisseaux sont tels, & si bien pourueus, qu'un des leurs n'a peur de trois ny de 4. d'autre sorte, & tout ce qu'ils peuuent craindre, c'est la furie des Hollandois s'ils trompent encore avec eux. Et pour dire quelque chose qui face cognoistre ce qu'ils peuuent aux Indes, François d'Almeide avec vingt & vn nauires, ou quelque peu dauantage, mit en route les Mamelus voisins de Diu. Alfonso d'Albuquerque assaillit Calicut avec vne armée de 30. grands vaisseaux, prit Goa avec 21. la recouura avec 24. prit Malacca avec 23. nauires, entra dans la mer rouge avec 20. & recouura Ormus, avec 22. Nugno d'Acugne alla à l'entreprise de Diu avec trois cens vaisseaux, où il y auoit trois mille Portugais, & cinq mille Indiens, outre les seruiteurs armez qu'ils ont accoustumé de mener en grand nombre. Dom Constantin de Bragance eut en l'entreprise d'Onor cent soixante voiles, & autant en celle de Ionesapatan.

Outre les Princes amis, & tributaires le Roy d'Espagne a pres de ces Estats de tres-puissans ennemis. Le Sophi de Perse pretend sur Ormus, qui estoit autresfois d'un de ses vassaux, le Roy de Cambaye sur Diu, qui luy appartenoit jadis, & sur d'autres terres encore que nous auons dit auoir esté siennes, Nizzamaluc, & l'Idalcan (les Portugais nomment ainsi deux tres-puissans Princes du Royaume de Decan) & le Roy de Calicut, & de Narlinge. Mais le Roy de Perse, & celui de Narlinge ne se sont pas jamais aduancez contre les Portugais, pource qu'ils ont tousiours eu à faire avec de plus grands ennemis. Les autres ont fait de fort grands efforts pour recouurer Diu, Chialu, & Goa, & autres lieux, mais ils n'ont peu mener à fin vne seule entreprise d'importance, pource que les assiettes des lieux sont extrêmement commodés pour receuoir du secours par mer, & combien que ces ennemis ayent fait leurs entreprises en Hyuer pour empescher le secours, leur ruse ne leur a de rien seruy, pource que les Portugais auoient tel courage, & leurs vaisseaux estoient de telle sorte qu'ils ne craignoient nul danger: si bien que les assiegez & leurs compatriotes allants à l'enuy, les vns à s'opiniastres, & vaincre avec la patience, les autres à supporter toute sorte de danger des vents, & de la mer, pour les secourir.

Ils ont rendu nul l'effort de leurs ennemis. Mais les Espagnols n'ont point de plus grand ennemy que le Turc, qui a souuent essayé par la mer rouge, avec la commodité que luy donne la ville d'Aden, de les chasser des Indes estant conuié à cela, tantost par le Roy de Cambaye & tantost par sa propre ambition. La plus grande armée qu'il ait faite a esté de 64. vaisseaux qu'il manda à Diu, mais elle fut honteusement mise en fuite, de mesme qu'une autre de 27. grands vaisseaux qu'il enuoya à l'entreprise d'Ormuz. Ils n'ont autre chose veritablement en Zeilan, qu'un fort qui est nommé Colombo, pource que le Roy qui a esté leur tributaire a esté despoüillé de ce Royaume par un More nommé Singua Pandar, & maintenant il se maintient avec l'ayde que les Portugais luy donnent.



L'ESTAT DV NOUVEAU MONDE.

SOMMAIRE.

1. **D**EVX difficultez notables qui ont empesché aux Anciens le decouuement du Nouveau Monde, & laquelle des deux estoit la plus grande : & les raisons qui ont fait croire aux anciens qu'il n'y auoit que trois parties du monde, l'Asie, l'Afrique, & l'Europe.
2. Esquille marine inuentee par vn Neapolitain pour l'vsage de la nauigation, l'an 1300.
3. Qualitez & description de la Zone Torride.
4. Conference du Nouveau Monde (pris en l'estat, qu'il fut decouvert) avec le nostre : & la difference de nostre Hemisphere à celui du Nouveau Monde : & les aduantages qu'il a sur le nostre.
5. D'où sont venus les habitans de ce Nouveau Monde : & la folle opinion qu'ils ont de leur origine.
6. Diuision de ces terres neuues en deux parties, Amerique, Magellanique, & leur description.
7. Denombrement & description des lieux & pays que le Roy d'Espagne possede au Nouveau Monde : & premierement des fortz Sainte Helene, & trois autres dans la Floride.
8. Du Golphe de Mexique.
9. Nouvelle Espagne.
10. Nouvelle Gallice.
11. Les Prouinces de Mechouacam & Mexique.
12. Gasteacan.
13. Lucatan.
14. Guatimala.
15. Terre ferme.
16. Nicaragua.
17. La Castille de l'or.
18. Le nouveau Royaume de Grenade.
19. Le Brasil.
20. Chile.
21. Le Peru, ses villes principales & prouinces.
22. La ville de sainte Croix du Mont.
23. Tucuma Royaume où l'Espagnol a cinq Colonies.
24. Paragays.
25. L'Espagnole.
26. Cuba ou Ferdinand.
27. Iamaïque.
28. Les Isles de Canibales ou Caribes.
29. Discours en general sur le Nouveau Monde : de ses forces, & du gouvernement tant civil qu'Ecclesiastique.
30. De la cognoissance que ce peuple a de Dieu.
31. De leur idolatrie enuers les Trespassez.
32. De l'idolatrie enuers les statues.
33. De leurs Guaques ou Temples.
34. Des Prestres, Religieux & Religieuses.
35. Des sacrifices tant d'hommes que d'animaux.
36. Des Sacrements rapportans aucunement aux nostres, introduits parmy ce peuple par la ruse du diable vray-signe des oeuvres mystérieuses de Dieu.
37. Des dispositions du Nouveau Monde à recevoir l'Euangile de Iesus-Christ.
38. De quelques prediCTIONS de la future predication de la foy Chrestienne en ces terres neuues.
39. Des prodiges qui la precederont.
40. Quelle chose facilita la conuersion des Indiens : Et des empeschemens de leur conuersion.
41. De la diuersité des Barbares, & de la façon de prescher l'Euangile.
42. Des difficultez qu'on eut en la conuersion des Americains.
43. Des remedes des susdits deffauts.



L'AUTRE partie des Estats du Roy d'Espagne consiste au nouveau Monde, où il a tout ce qu'il veut, pource qu'il n'y trouue personne qui luy contrarie. Ces Estats sont diuisez en Isles, & en terre ferme. Les Isles de la mer du Nort sont en si grand nombre qu'on ne le scauroit dire iusques à present (veu que les seules Lucayes passent le nombre de quatre cens) & quelques vnes sont si grandes & si riches, que de chacune on pourroit faire vn grand Royaume. Borichen est longue de trois cens milles, & large de soixante. Iamaïque est presque aussi grande.

La

La Cube a trois cens lieues de longueur, & vingt de largeur. L'Espagnole a de tour seize cens milles.

Quant à la terre ferme, le Roy d'Espagne est maistre actuellement de tout ce qui va costoyant la Floride, la nouvelle Espagne, le Iucatan, & encor ceste grande presque Isle meridionale iusques au Cap de Californie, voire mesme iusqu'à Quiuire, veu que les Espagnols ont descouuert iusques-là, & plus outre encore.

La coste de la nouvelle Espagne qui commençant depuis Sainte Helene, & passant par Panama va iusques à Quiuire, a de longueur environ cinq milles, & de circuit cent milles, auxquels adionstant les confins qui sont dans le pays vers le Nort, on y trouuera en tout neuf mille milles.

Après cela l'Peru commençant depuis Panama a de coste douze milles, & six cens milles, dont il y a trois mille milles de riuere entre le Maragnon, & le fleuue d'Argent, ou de la Plata, qui appartiennent sous le nom de Brasil à la couronne de Portugal. Mais auant que de passer plus outre, il faut que i'auance quelque propos touchant le descouurement de ce Nouveau Monde.

Deux raisons ont induit Aristote & quelques autres à se persuader qu'il n'y auoit autres gens au monde que les habitans d'Europe, d'Asie & d'Afrique.

La premiere estoit la grande largeur de la mer Atlantique, qui leur fit estimer que les hommes ne scauroient passer tant d'eaux avec aucune force ou industrie, & ce fut ce qui meut S. Augustin à nier les Antipodes.

L'autre raison qui deceut les anciens fut, qu'ils creurent que la Zone Torride estoit inhabitable pour son excessiue ardeur, de mesme que les Polaires pour leur froideur insupportables. Mais la premiere de ces deux raisons eut beaucoup plus de force que la seconde, pource qu'ils renoient pour chose impossible ce grand passage de mer. Et veritablement la chose estoit telle comme nous monstrerons cy-apres. Mais d'autre part il faut scauoir que les anciens eurent quelque cognoissance de la Zone Torride, veu que Hannon Carthaginois costoya, selon Plin, l'Afrique depuis Cilbraltari iusqu'à la mer rouge, & certain Eudoxe au contraire depuis la mer rouge iusqu'à Gilbraltar. Si bien qu'ils furent contraints de passer deux fois sous l'Equinoctial, & trauerser toute la Zone Torride. D'auantage les anciens eurent cognoissance del'Ethiopie, des Indes, & de la Chersonese d'or, qui sont toutes Provinces assises dans les bornes de la Zone Torride.

Plin fait mention de Taprobane qui est sous l'Equinoctial: & mesme l'experience de nostre Zone pouuoit monstrer aux anciens que la Torride estoit habitable. Car encor que le Soleil eschauffe & deseiche vniuersellement avec le voisinage de ses rais, & ce d'autant plus qu'ils sont plus droicts, de mesme que par le moyen de la distance & obliquité des rayons il donne lieu à la froideur, & à l'humidité, comme le iour & la nuit, l'Esté & l'Hyuer nous font paroistre: toutesfois ceste reigle generale est alteree en mille façons par les diuerses assiettes. Car la vertu des causes vniuerselles en la production des effects, est bornée, & presque restraincte par la qualité de la matiere, & c'est ce qui fait que les predictions des Astrologues se trouuent souuent du tout vaines.

Ainsi nous voyons que la vehemence des vents se renforce aux vales, & diminue aux plaines, l'ardeur du Soleil se ramasse & multiplie aux miroirs concaues, s'espand & se perd en ceux qui sont pleins. Et pour venir à nostre propos, le chaud, & le froid de l'air, & des pays, reçoit milles differences des diuersités des lieux hauts ou bas, qui sont en lieu plein ou esleué, tournez du costé du Nort, ou du Su, de l'Est, ou de l'Ouest, proches, ou esloignez de la mer, des lacs, des bois, & des fleuues, & qui sont subiects aux vents, ou non.

On scait assez que l'Angleterre est plus esloignée de l'Equinoctial que la France, & toutesfois au rapport d'un chacun, l'Angleterre est plus temperee, & en la mesme proportion la Zelande est moins froide que le mont Atlas. Il n'y a point de plus grand effect du voisinage du Soleil qu'en Esté, ny de son esloignement qu'en hyuer.

Mais que dirons-nous si en mesmes distances de l'Equinoctial, & du cours du Soleil nous trouuons que les saisons se changent en mesme temps? Gate est vne montagne qui partant du grand Caucase trauersé toute la longueur des Indes iusqu'au Cap de Comorin: Or en mesme temps au deçà de la montaigne l'hyuer commence à l'entree d'Auril, & l'Esté au de-là de montaigne: deçà l'on voit regner les pluyes & les vents froids & orageux, & de-là les iours sereins & agreables.

Deçà la mer deuient si fascheuse que les mariniers ne sont presque assurez aux ports: & de-là on voyage par le golphe de Bengale en assurance, & l'on tralique par tout: finalement le mont de Gate fait de plus grands effects que l'Equateur, puis qu'en si peu d'espace il chage les saisons de l'annee: que si nous trouuons difference d'hyuer & d'Esté en la mesme hau-

teur, cela monstre que les degrez du chaud, du froid, du sec, & de l'humide, ne dependent absolument du voisinage ou esloignement & de droicteur ou obliquité des rays du Soleil. Donc la fraicheur peut subsister avec le voisinage du Soleil, l'humidité avec ses rayons droits, & les pasturages ne seront du tout bannis de la Zone Torride, comme Aristote a creu avec quelques autres. Mais l'autre difficulté sembloit sans remede aux anciens, d'autant qu'en leurs nauigations ils n'auoient autres guides que le Soleil, la Lune, les Ourès, & les autres estoilles: Quand le Ciel estoit couuert de nuages qui leur ostent toute clarté du Soleil & des estoilles, alors ils se gouuernoient par la qualité des vents, & par les conjectures du chemin qu'ils auoient fait. En quoy ils estoient fort pratics à cause de leurs courtes nauigations, & l'assiduité des voyages. Les Taporbases, pource qu'ils ne voyoient le Nort portoient avec eux vn bon nombre d'oyseaux, & selon la necessité ils laschoient tantost l'vn & tantost l'autre, & pource que les oyseaux cherchent volontiers la terre, ils tornoient derriere les proies des nauires. Mais si le ciel estoit obscur, & la mer troublee de plusieurs vents, les anciens ne pouuoient comprendre où ils estoient, pource que le ciel & la mer estans en cecas en pareil estat, il n'y auoit point de raison pour laquelle ils deussent plustost aller d'vn costé que d'autre. Or Dieu voulant faciliter la predication de l'Euangile à ceux qui auoient demeuré si longuement idolatres, descouurit enuiron l'annee 1300. à vn certain Flaue de la Cosie d'Amalfi au Royaume de Naples, le secret qui est en l'Ayman, & la propriété de faire que le fer qui en est touché recoiue la vertu de tendre vers le Nort, & le monstrier. Il y a toutesfois quelque difference: pource qu'en quelques lieux l'aiguille de fer dont les mariniers vsent, frottee d'Ayman regarde le Nort tout droict: & hors de-là, se destourne quelque peu tantost vers l'Est, tantost vers l'Ouest, de sorte qu'il faut qu'ils remarquent soigneusement ceste variation, s'ils ne veulent faillir en leur voyage. L'estoile du Nort est esloignée de nostre Pole enuiron de trois degrez & demy.

Or par le moyen de l'Ayman, de qui le fer recoit la vertu de monstrier le Pole, les mariniers prennent l'assurance de trauerser de grandes mers, & de chercher de nouvelles Isles, & de nouueaux pays; pource que lors qu'ils sçauent où est le Nort, ils sçauent aussi qu'en tournant le visage vers ceste partie, ils ont l'Orient à la main droite, l'Occident à la gauche, & le Midy derriere eux. Et l'on peut veritablement cognoistre en cecy combien Dieu se plaist à faire des operations merueilleuses par des petits moyens, & fort bas, veu qu'une aiguille de fer frottee d'Ayman n'a rien de precieux, ou d'agreable: & toutesfois la plus grande entreprise & le plus admirable art quel'homme exerce, qui est la nauigation, depend d'elle.

Maintenant que nous auons monsté les difficultez du descouurement du nouveau Monde, & veu laquelle des deux estoit plus grande, il faut que ie die encore deux mots de la qualité de la Zone Torride. Il faut donc premierement presupposer que l'Equinoctial est vn cercle imaginé au Ciel, qui l'environne tout de l'Orient à l'Occident, & est esgalement esloigné des deux Poles. Il se nomme Equinoctial, pource que quand le Soleil y passe (ce qu'il fait deux fois l'annee, c'est à sçauoir aux mois de Mars & de Septembre) le iour est egal à la nuit, & tous deux sont de douze heures: ce qui s'appelle Equinoxe.

On appelle apres Tropiques deux cercles imaginez au Ciel, avec lesquels la course du Soleil est bornée, & l'on les nomme Tropiques, pource que lors que le Soleil est arriué iusques à l'vn d'eux, il retourne en arriere. Celuy qui est par de-là l'Equinoctial tirant vers le Sud, se nomme Tropique du Capricorne, & celuy qui est de nostre costé, Tropique de Cancer, ou de l'Escrueille. Celuy-là est à vingt-trois degrez & demy Meridionaux de l'Equateur: & cestuy-cy en est esloigné de 23. degrez & demy Septentrionaux.

On nomme Zone Torride l'interualle qui est entre les deux Tropiques, & cest interualle comprend 47. degrez, auxquels on fait respondre mille quatre cens & dix lieues Françoises sur la terre, à raison de trente lieues pour degré. Ce fondement estant mis, il faut premierement dire que la Zone Torride abonde d'eaux de toutes sortes, veu qu'il y pleut, & neige, principalement quand le Soleil la frappe droictement avec ses rayons: car il y pleut alors abondamment, & la pluye commence à midy.

D'auantage, il n'y a lieu sur la terre où l'on trouue de plus grandes riuieres, veu qu'en la Presqu'Isle Australe du nouveau Monde, laissant plusieurs autres grands fleues du Brasil, & du Peru, l'on y trouue celuy de la Magdelaine, qui a sept lieues de largeur en son emboucheure.

Il y a outre ce celuy d'Orillane, qui est large de septante, & celuy de l'Argent, ou de la Plata qui a de largeur quarante lieues.

D'auantage il y a les lacs de Tiquicaca (cestuy-cy a de tour quatre-vingts lieues) de Paria, & de Bombon, & il y a peu de montagnes sans lacs, d'où procedent la pluspart de ces ri-

uieres

uieres de ces contrées. En la Presqu'Isle du costé du Nort, il y a le lac de Guatimala qui est long de cent cinquante milles, & celui de Nicaragua de trois cens, celui de Mexique en contient cent, celui que l'on nomme la mer Caphalique en a cent cinquante de tour: & apres cela le Royaume de Mechouacan est tout plein de lacs, de fleuves, & de fontaines. Et pour sortir hors du nouveau Monde, où y a-il des lacs, & des fleuves plus grands qu'en Ethiopie sous la Zone Torride? Il y en a deux, l'un où le Nil prend sa source, l'autre par lequel il passe, qui ont deux cens milles de diametre chacun.

Il y en a vn autre esgal aux susdicts, entre le Royaume d'Angole, & de Monomotapa: Il y a le lac d'Aquelonde, & celui de Coluc, qui sont tres-grands, & outre ce on void en la mesme Ethiopie de grandes riuieres, comme la Coante, & le Niger, qui a pour ses branches les riuieres de Senaga, & de Gambee.

Il y a le Zaire qui est large de vingt milles en son emboucheure, & la plus grande partie des susdites riuieres, non contentes de leurs lits qui sont fort amples, inondent les campagnes toutes les annes.

Les Isles de Saint Thomas, & de Sumatre qui sont sous l'Equinoctial, sont du tout humides: celle de Saint Thomas a au milieu vne haute montagne perpetuellement couverte d'une espaisse nuë qui rend tant d'eau, que les champs en sont abondamment arrosez: celle de Sumatre est generally pleine de marests, & des riuieres, dont la plus grande part naist d'un fort grand lac, qui est sur vne haute montagne au milieu de l'Isle. Et la nature n'estant contente des eaux de l'air, & de la terre, pour humecter la Zone Torride, produit tant en Quito, qu'aux Moluques, pays qui sont sous l'Equinoctial, certaines grandes cannes, où elle conserue des eaux.

Il ne faut aussi taire que sous la Torride il y a beaucoup plus de mer que de terre, de mesme qu'en nostre Zone il y a plus de terre que de mer. Dauantage, c'est chose certaine qu'en la Torride les eaux croissent, & les pluyes multiplient, selon que le Soleil s'approche de la ligne, & au contraire lors qu'il se retire vers les Tropiques, elles manquent. C'est ce qui faict cognoistre combien l'egalité du iour, & de la nuict, peut pour l'accroissement de l'eau, veu que de mesme qu'en nostre Zone, les pluyes grossissent aux Equinoxes, aussi font-elles en la Zone Torride. Apres cecy la Torride est non seulement humide, mais encores tēperee quant au chaud, & quelques vnes de ses parties ont beaucoup plus de froid que de chaud, comme Pasto, Collon, Potosi, & les montagnes sont tousiours couuertes de neige, & de glace.

La cause generale de ceste temperature, est la longueur des nuicts près de la ligne, où elles sont perpetuellement esgales aux iours: mais tant plus tu t'en esloignes, tant plus tu trouues les iours d'Esté longs, & les nuicts courtes: & pour ceste cause les iours d'Esté sont plus longs en Angleterre, qu'en Italie.

La briueté des iours fait que le Soleil ne peut produire tant de degrez de chaleur sous l'Equinoctial, que loing d'iceluy: & en effect l'Esté est plus ardent en l'Estremadure d'Espagne, & en la Pouille en Italie, qu'en Quito, & en Colloa, pource que la continuation de l'operation en la cause efficiente, importe grandement à la perfection de l'effect.

Mais que dirons-nous des differences que l'on void en la mesme Zone Torride, où vne partie est plus chaude, & l'autre plus fraische? Ce n'est pas vne question du nouveau monde, mais commune a toutes les Prouinces, & nous auons desia donné sa solution, disans que la mesme chaleur du soleil reçoit milles differences de la diuersité des aliettes. Mais pour en dire quelque chose, il faut considerer que le nouveau monde est tout plein de hautes montagnes qui rafraichissent l'air, & avec leur hauteur (veu que les lieux haut participent plus du froid que les bas) & avec les neiges qui ne les abandonnent iamais, & avec des lacs extremement froids, & avec des riuieres qui en procedent, & avec leur eau qui pour estre de neiges, & de glaces fonduës est ensemble froide, & crüe, & avec la vehemence, & rapidité, avec laquelle ils coulent des montagnes & trauesent les plaines rafraichissent au possible l'air, & la terre.

Dauantage les susdites montagnes estans fort hautes, il est necessaire qu'elles facent vne grande ombre, tantost deça, tantost delà; & ceste ombre adioustee à la longueur des nuicts, importe beaucoup pour temperer la Zone Torride. Outre ce il faut considerer que les vents frais ne cessent iamais d'y souffler: car premierement en la mer le vent d'Est y regne tousiours, & apres cela au Peru, & au Brasil on a le vent du Su, qui se leue à midy, & est frais au possible, & de l'autre costé le vent d'Est.

Comparons maintenant vn monde avec l'autre, considerant le nouveau en l'estat auquel il estoit quand il fut premierement decouvert. Nous auons quelques aduantages pour le regard du Ciel, quelques autres pour celui de

la terre. Pour le regard du Ciel, l'un est, que nostre Hemisphere a plus d'estoille, & de lumieres, que celui qui luy est opposé: car le nostre a l'estoille du Nort proche du pole Arctique de trois degrez & un tiers, avec un grand nombre d'autres estoilles qui luy font compagnie: au lieu que le pole Antarctique n'a point d'estoille qui n'en soit du moins esloignée de trente degrez. L'autre aduantage d'aussi grande importance, est que le Soleil luit sept iours de l'année vers le Tropicque de l'Escrueille, plus que du costé que celui du Capricorne, comme les Equinoxes & Solstices nous monstrent. Et c'est de ces deux choses que procede la froidure qui se trouue plus grande en l'autre costé qu'au nostre, pource que l'autre jouyt moins de temps de la lumiere du Soleil, & a moins d'estoilles.

Quant à la terre, nous auons aussi deux aduantages: l'un est, que la nostre s'estend plus de l'Occident à l'Orient, & consequemment est plus propre à la vie humaine, que l'autre, qui se restreignant du Ponant au Leuant s'eslargist de mesurement d'un pole à l'autre: car la terre va du Ponant au Leuant avec plus d'esgalité, & est tousiours esgalement esloignée de la froidure du Nort, & de la chaleur du Su: & les iours & les nuicts vont tousiours de mesme sorte. Mais en allant vers le pole, il est force de treuuer des nuicts qui durent des mois entiers, & en fin vne demie année. Le second aduantage, est que nostre terre est plus fauorisee de la mer, qui la rend propre au trafic, & à la communication: car outre la mer Oceane, qui est commune & à nous & au nouveau monde, nous auons la mer Mediterranee, qui mouille l'Europe, l'Asie, & l'Afrique, & s'accommode à ces trois parties en beaucoup de sortes, avec les golphes.

Et que dirons-nous de la mer Caspie, & de la Baltique, dont l'une est grandement commode à l'Asie, & l'autre à l'Europe? Adioustons à cela que nostre terre est plus esgale, & plus plaine, & par consequent plus propre au trafic par terre & par eau.

Quant aux choses que la terre produit, le nouveau monde cedit à cestuy-cy, premierement en la perfection des animaux, veu qu'il n'y auoit ny chiens, ny moutons, ny brebis, ny cheures, ny pourceaux, ny chats, ny asnes, & ce qui est plus important, il manquoit de bœufs, de cheuaux, de chameaux, de mulets, & d'Elephants.

Quant aux arbres, il n'y auoit ny cedres, ny orangers, ny limoniers, ny grenadiers, ny figuiers, ny poiriers de coings, mais sur tout il manquoit d'oluiers, & de vignes. Il est vray que nous auons plus grand aduantage pour le regard des animaux, que des fruits, pource que pour le regard des derniers, nous les surmontions en la bonté, & en la diuersité, & aux premiers en bonté seulement. Entre les grains ils n'auoient ny froments, ny seigles, ny toutes les sortes de bleds, ny du ris, ny pour la gentillesse de leurs iardins, des melons.

Quant aux arts & industrie, il n'y auoit nulle comparaison, pource que les habitans du nouveau monde n'vsoient du fer, qui est vne matiere necessaire, & vtile à la vie humaine, & se seruoient aussi peu de feu, instrument vniuersel de l'industrie. Ils n'auoient nulle cognoissance de l'artillerie, de l'Imprimerie, des lettres, & de la doctrine: la nauigation ne passoit pas la force de leur veüe, & ie parle encores en cela des peuples plus industrieux, & ciuils, comme estoient ceux de Mexique, & du Peru.

Nostre Monde surmonte encores le nouveau en la multitude des personnes. Il y a là force grandes montagnes, force marais, & des bois longs au possible, qui rendent de grands pays inhabitables, & la partie habitee n'est si pleine de gens que nos terres, pource que celles-cy ont esté plustost peuplées, voire mesme estoient desia peuplées, quand les autres commencerent à se remplir de personnes. D'auantage, on a trouué icy les arts pour substantier la vie, comme l'Agriculture, & pour la conseruer, comme l'Architecture, & pour l'accommoder, comme la marchandise: tellement que la multiplication du genre humain estoit aydee icy de la nature, & de l'industrie, & là par maniere de dire, de la seule nature. Mesmes iusques à present la plus grande partie du Brasil suit vne façon de viure sauuage, & en la nouvelle Espagne un pays de tres grande estendue, est occupé des Chichimiques, peuples sans loy, sans chefs, & sans demeure asseuree, qui viuent de chasse, & des fruits que produit la terre.

Ceux de la Floride, & les Paragays viuent presque de mesme sorte, & quand les Espagnols arriuerent au Peru, combien qu'ils y trouuassent plusieurs lieux peuplez, il n'y en auoit toutesfois aucun qui eust forme de ville que Cusco. Mais auourd'huy le nouveau monde est moins peuplé que jadis en partie pour les guerres ciuiles des Espagnols: veu qu'otient qu'aux guerres qui ont esté entre les partisans de Pizarre, & d'Almagre, & entre les partisans de Pizarre, & les gens du Roy, il mourut un million & demy des habitans naturels: en partie pour le desordre des Espagnols en ces commencemens, non tant pource qu'ils travailloient les peuples excessiuement, qu'à cause qu'ils les transportoient d'un lieu à l'autre, loing de l'air de leur pays, & causoient par ce moyen leur mort. Ce qui leur a preiudicié aussi,

& leur

& leur nuit encorés c'est l'usage des viâdes qu'on y a trāsportees de l'Europe. Ils ne mägeoiēt tant de chair, ny si grosse, & nourrissante: ils n'auoient nuls vins, au lieu que le Peru en abonde maintenant: & pource que les Princes les occupoient tantost à bastir des Tambes, tantost à dresser des chemins, & choses semblables, ils n'auoient tant de temps de gourmander & de s'enyurer, qu'ils ont à ceste heure, veu qu'ils abusent tellement de la liberté qu'ils s'abandonnent à l'oyslieté, à la faineantise, à la paillardise, & à l'yurongnerie qui les consume miserablement.

Plusieurs maladies generales en ont encorés consumé beaucoup, comme la verole, & la cocoliste en la nouuelle Espagne, & la mesme verole fit mourir beaucoup d'enfans, & de ieunes gens au Peru, l'an 1567. & plus de femmes que de masles, & elle pardonna à ceux qui auoient passé trente ans.

On remarqua encorés particulièrement, que ce mal ne trauailla nul de ceux qui estoient nez en Europe: tellement que pour les susdites raisons la partie maritime de nouuelle Espagne est auourd'huy presque deserte.

Aux Isles du Golphe de Mexique il n'y est presque resté la semence des naturels, & moins encore en la coste de Parie, & en la plaine du Peru il y manque la trentiesme partie.

Mais pour dire aussi les aduantages du nouveau monde sur le nostre, il semble que Ioseph de la Coste veuille que l'Amerique surpasse nos pays en temperature, pource que le froid, ny le chaud n'y est ennuieux en beaucoup de lieux: mais cela est encore commun aux parties de nostre monde, qui sont au dessous, ou pres de l'Equinoctial, comme est l'Ethiopie, & comme sont aussi les Indes, & la Chersonese d'or. Apres cela il veut que le nouveau monde surpasse le nostre en abondance d'eaux, & de pasturage & veritablement quant aux eaux, c'est chose claire qu'il a plus de mer, & que la riuere de la Plata, & celle de Maragnon, sont les deux plus grandes de l'Vniuers. Il luy donne aussi de l'aduantage sur nous en grandeur de bois, & en diuersité d'arbres, & de racines, dont ces peuples vivent en beaucoup d'endroiets (comme de Iuches aux Isles de Barlouent, & au Brasil) ce qui a beaucoup d'apparence de verité, pour la conjunction de l'humidité avec la chaleur qui y regne perpetuellement.

Il met apres hors de dispute qu'il y a plus de mines d'or & d'argent, qu'en nos terres: combien que ce soit chose malaisée à decider, au moins à tant pour tant. Car ie ne sçay si le Peru surpasse en mines d'or l'Ethiopie, Monomotapa, & Nandingue, & Sumatre, & Lequii, ou si les mines de Potosi sont plus riches que celles de Cambebes en Angole. Il adiousté que la nouuelle Espagne est vn des meilleurs pays du monde, chose que l'on peut accorder sans preiudice.

Mais considerant le nouveau monde ou l'estat present, i'estime qu'il surpasse le nostre, non pas en multitude (veu qu'il n'est si bien cultiué) mais en diuersité d'animaux, & de fruiets, pource qu'on a adiousté aux siens particuliers presque tous les nostres: & il a cest aduantage, que nos semences viennent mieux en Amerique, que celles de l'Amerique ne profitent en nos terres.

Il est question maintenant de sçauoir d'où sont venus les habitans de ce nouveau monde. Premièrement doncques il faut sçauoir que ces peuples ont vne telle opinion de leur origine.

Les Guanches habitans des valees de Xauxe, tiennent pour leurs premiers parents vn homme, & vne femme sortis de Guatibilque, fontaine celebre parmy eux.

Les Guanches peuples d'Andabayle, valee subiette à Cusco, disent qu'ils sont sortis du lac Sogdocque.

Ceux de Cusco veulent tirer leur origine du grand lac de Tiquicaca. Les autres disent qu'apres le deluge le genre humain fut restaure par six personnes qui s'estoient sauuees en vne certaine cauerne.

Mais laissant toutes ces folies, c'est chose claire qu'il faut dire que tous les hommes sont sortis d'Adam, & d'Eue, & puis de ceux qui se sauuerent de l'Arche de Noé, & par consequent que les habitans du nouveau monde sont descendus de nous. C'est chose malaisée de trouuer de quel endroiēt on y a passé. En quoy rien ne nous pourroit plus esclaireir, que le voisinage des lieux: mais cela ne nous peut seruir pour le peu de cognoissance que nous auons de l'extremité de la terre.

Vopelius veut que du costé du Nort Groelande se tient avec l'Estotilant, & est terre ferme, auquel cas il est vray-semblable que les Lapons, & ceux de Noruege, continuants leur multiplication, ou habitation, se sont peu à peu poussez iusques-là. De quoy nous font foy les habitans, & les façons de faire communes aux Lapons, à ceux de Noruege, d'Esto-

tilant, & de Baccalaos : pource que tous habitent dans des cauernes, ou dans le creux des arbres : tous portent des peaux de veaux marins ou de bestes sauvages, tous vivent de poisson, ou de fructs que la terre produit d'elle-mesme, & ne sont gueres differents de couleur.

Vers le Su, s'il est vray comme plusieurs tiennent, que la terre opposee au destroit de Magellan, est terre ferme, il faudra dire que ce fut de ce costé que passa vne partie des premiers habitans de l'Amerique, pource que ce destroit n'est en quelques lieux large de plus d'une lieue, à raison dequoy le passage en aura esté bien aisé.

Nous n'avons pas cognoissance de l'extremité Orientale & Occidentale, seulement on void que la couleur des gens du nouveau monde, rapporte plus avec celle des nations d'Orient que de celles d'Occident, pource qu'ils ont vne couleur de bronze, & il y a des degrez de ceste couleur, comme du blanc entre nous : car elle est plus obscure en quelques lieux, comme au Peru, & au Brasil : & en quelques autres plus claire, comme en la Parie, & au nouveau Royaume. On y trouve toutesfois quelques peuples noirs, mais en petit nombre, comme en Careque pays assis entre sainte Marthe, & Cartagene. A raison dequoy l'on peut dire que ceux-cy y vindrent par quelque tempeste, ou de la Guinee, ou de l'Éthiopie. Il semble qu'il n'y a point passé de personnes des endroits plus civilisez d'Europe avant Christophe Colomb, pource qu'on ne treuve en tous ces pays aucune trace de lettres, ou d'autres choses de l'Europe : outre qu'il n'y a encores deux cens ans que la plus grande partie des Isles, qui sont entre nostre terre ferme, & le nouveau monde, estoient inhabitees, comme les Acores, Madere, les Isles du Cap verd, saint Thomas, & les autres de ceste mer.

Concluons donc que le nouveau monde a esté premierement habité des peuples, qui continuans l'habitation d'Europe & d'Asie, (quant à l'Afrique, il semble qu'elle n'y a peu avoir part en ceste sorte) & cherchans continuellement des demeures plus commodes, ou plus asseurees, sont peu à peu arriuez iusques-là, & qu'il a aussi esté peuplé par quelques autres qui y ont esté poussez par la tempeste.

DIVISION DV NOUVEAU MONDE.

A Pres que Colomb eut descouvert ces terres neufues à ceux d'Europe, on a tousiours continué d'aller plus avant en diuerses occasions : mais bien que plusieurs personnes pleines de hardiesse & de singuliere valeur, tant d'Italie, d'Espagne, & d'Angleterre, que de Portugal, & de France, se soient employees à ceste recherche, toutesfois on n'en a peu avoir entiere cognoissance, principalement des extremités vers le Septentrion, Occident & Midy.

Quant à moy ie suiuray les plus authorisez de ceux qui en ont parlé, sans m'amuser à ces discours pleins d'impertinence.

Doncques ceste partie de la terre qu'on appelle Nouveau Monde (ie parle de la terre ferme) est diuisee en deux parties, c'est à sçavoir en Amerique, & en Magellanique.

L'Amerique est encores diuisee en deux fort grandes Presqu'Isles, ioinctes par vn Isthme, ou vne langue de terre longue de sept lieues, entre le Nom de Dieu, & Panama : car quant aux onze lieues qu'on met communement de plus entre ces deux terres, elles procedent des tours qu'on fait en cherchant vn chemin plus aisé, & plus commode. Or nous nommerons vne de ces Presqu'Isles, Septentrionale, & l'autre Australe.

Quant à la Septentrionale, on luy donne seize mille milles de circonference, & quatre mille milles de longueur du Levant au Ponant. Ses bornes du costé du Nort ne sont encores cogneues.

Jacques Cartier la descouvrit l'an 1535. iusqu'au 50. degré : Gaspard Cortereal Portugais iusqu'au 66. Sebastien Gabot Italien iusques au 67. & il ne passa plus avant à cause du froid excessif. Finalement Martin Forficier fit les annees passees par commandement de la Royne Elizabeth d'Angleterre, plusieurs voyages pour aller par ceste voye au Catay, & aux Moluques : mais il semble que la nature soit opposee à ses desseins, pource qu'outre la grande froidure, & la vehemence de vents froids au possible, il y tombe vn certain verglaz si penetrant, qu'il semble du vif-argent, & consume tout ce qu'il touche : & la mer ne s'elargit pas vers le Levant, mais seulement tousiours vers le Pole. Si bien qu'encores que Forficier fit courir le bruit qu'il estoit arriué au destroit Arctique, toutesfois il ne vint jamais à bout du voyage projeté. Il descouvrit en ses navigations vn pays qu'ils appella Virginie, & quelques autres contrees desertes, & toutesfois frequentees en certain temps de l'annee par des estrangers qui y viennent pescher. Des autres costez ceste presqu'Isle est bornee en partie de la mer du Nort, & en partie de celle du Sud, ou Zur.

Or

Or la partie qui est tournée vers le Levant, contient trois pays de grande étendue, c'est à sçavoir Estotilant, la terre de Labrador, ou Laboureur, & Norembugue, qui sont presque opposées à la Noruegue, Angleterre, France, & Espagne. Estotilant est la plus Septentrionale partie qu'on cognoisse, & elle fut descouverte long-temps avant Colomb par certains pecheurs de Friesland, & depuis recongneue encore en l'an 1590. par Antoine Zeno Venitien, par commandement de Zichim Roy de la mesme Friesland.

Ce pays d'Estotilant finit à la riviere Neigeuse, qui a 60. degrez d'elevation de pole, & c'est la que commence la terre de Labrador, qui s'estend iusqu'à la riviere de S. Laurens, que quelques-vns nomment le destroiët de trois freres, les autres rivières de Canada. Laisant le Golphe de trois freres on entre en vn golphe qu'on nôme Carré, qui a de longueur pres de huit cens milles, & qui est presque bouché de diverses Isles (le Verazan, & autres y en ont compré iusqu'à 37) qu'il a du costé du Levant. Ce pays est nommé terre de Baccalaos, d'un poisson qui y abonde, & multiplie tellement, que c'est chose incroyable.

Le voisinage des susdites Isles entr'elles, fait que la mer semble diuisée en plusieurs bras, & Golphes: & pour ceste cause il y a beaucoup de ports bons, & asséurez. Quant à la pret-qu'Isle Australe, on tient qu'elle a seize milles de tour, & quatre milles de longueur. La largeur est diuerse, pource qu'entre le Nom de Dieu, & Panama, elle est de sept lieues, entre le Golphe d'Urba, & celui de S. Michel de septante cinq: entre le Cap de S. Augustin, & le Cap blanc de mille, & au destroiët de Magellan de cent trente quatre. Elle est presque toute trauersee de fort hautes montagnes (& par consequent d'une infinité de valles) d'où procedent force rivières. Mais celles qui se rendent dans la mer du Nort, sont plus grandes que les autres: ce qui aduient à cause des montagnes qui trauerseent le Peru en telle sorte, qu'elles ne s'esloignent iamais de la veüe de la mer du Sud: à raison de quoy les rivières qui en viennent ne sont prestost nees, qu'elles trouuent la mer où elles se perdent.

Mais il ne faut estimer que ie vueille descrire tout ce nouveau monde maintenant, veu que mon dessein n'est que de faire cognoistre la Monarchie d'Espagne: si bien que ie ne m'arreteray qu'aux lieux où les Espagnols tiennent quelque chose, ayant proieté de parler en leur lieu des autres Prouinces.

Le fort de Sainte Helene, & les trois de la Floride.

POUR commencer donc du costé du Nord, les Espagnols ont vn fort sur le Cap de sainte Helene, qui est sur l'extremite de la Norembugue.

Les François ont establi des colonies en ceste Prouince, c'est pourquoy il n'est pas à propos de la descrire en ce lieu.

Quant à la Floride, elle a pour ses bornes du Levant Bahaman, & les Isles Lucayes, vers l'Occident Mexique, vers le Midy, Cuba & Iucatan, vers le Nort Canada, Virginie, & la nouvelle France. Elle est longue de quatre cens milles, s'aduanee en mer avec vne poincte, & sa largeur est de 80. milles. Elle a sa coste aspre, & la mer est pleine d'escueils, principalement entre la susdite pointe, où sont les escueils des martyrs. Elle est sous mesme parallele que la Mauritanie, & son milieu a 35. degrez de hauteur.

Les Espagnols pour plusieurs malheurs qui leur sont arriuez, ont comme abandonné pour maintenant l'entreprise de ceste conqueste, combien qu'ils cognoissent vne partie de sa richesse. Du riuage de S. Helene, à la poincte de la Floride, on trouue Rio secco, ou Riviere seiche, le Cap de la Croix, celui de S. Augustin, & Cannaueral: mais en la Floride le Roy d'Espagne a 3. places où il tient garnison, à sçavoir S. Jacques, S. Augustin, & S. Philippes, & deçà iusques au Cap de la terre neufue, ou de la France Antarctique, les vaisseaux y sont petits, & à rames, pource que la mer y a peu de fonds. Plusieurs ont esté d'opinion, qu'en ce pays il y a quelque destroiët par lequel la mer du Nort, se ioinët avec celle du Su. Vn de ceux qui ont eu ceste opinion, a esté Melendes, qui le prouoit premierement, pource qu'en la mer du Nort il s'estoit troué des pieces des nauires Chinois, & en second lieu, pource qu'en vne plage qui s'aduanee dans la terre 300 lieues, il venoit en certain temps des balenes de l'autre mer, & quelques-vns ont tenu que le Chandi qui prit l'an 1587. au Cap de Californie vn naire qui venoit des Philippines, passa par là. Estienne Gomes cherchant ce passage, fit plusieurs milles sur le fleuue de S. Antoine qui est en la Floride, & quelques autres font aliez par celui de S. Laurens, mais sans fruit.

Q U A L I T É.

CESTE Prouince est abondante en plusieurs, & diuers fruits, & en beaucoup de sortes d'animaux. Il y a aussi grande quantité d'or, & d'argent, que les habitans amassent

entrecoupans les riuieres de petits fossez. La terre y porteroit toute sorte de grain s'il y estoit semé, de mesme qu'elle est capable de toute sorte de fruidts. On y a veu des monstres, des perles, turquoises, & esmeraudes qui y sont. Les vaches de ce pays ont du crin semblable à celuy des cheuaux, & vne bosse comme les cheuaux.

M O E V R S.

Les habitans sont de couleur semblable à l'airain, qui prouient de ce qu'ils s'oignent d'un certain onguent, & de la chaleur du Soleil, combien toutesfois qu'ils naissent assez blancs. Ils sont disposés, & legers, ce qui leur arriue à cause de l'exercice perpetuel qu'ils font, allant à la chasse, & des viandes qui sont pour la pluspart des bestes sauvages. Ils ont trois sortes de cerfs, de l'une desquels ils tirent du lait, de mesme que nous faisons de nos vaches. Ils arment la pointe de leurs fleches d'arestes de poissons, ou de pierres à feu. Ils vivent de coquilles de mer pour monnoye, toutesfois elles sont accommodees proprement à leur mode, & il n'est permis à aucun d'en user, qu'aux grands Seigneurs, non plus qu'entre nous de battre la monnoye. Ils portent des habillemens de marte, principalement les nobles: les autres vont à demy nuds. Ils sont fins & cauteleux, & naturellement aiment la vengeance, & la guerre. Ils ont grand soin des viures, & seiment le ris au mois de Mars, & de l'uin, lequel ils cueillent trois mois apres lors qu'il est meur, & le mettent en des granges communes pour le distribuer à chacun selon son estat, & sa necessité. Ils combattent ordinairement contre les Cocodrilles, & se tiennent à leur occasion en continuelle garde, comme s'ils estoient de toutes parts enuironnez d'ennemis.

Quand ils ont faute de viures, ils mangent des serpens, des araignes, & autres ordures, de mesme que les Auanates leurs voisins.

On trouue en ce pays beaucoup d'Hermaprodites, dont ils se seruent en lieu de valets, & de iuments.

R I C H E S S E S.

Les habitans apres auoir amassé de l'or, & de l'argent dans l'eau, ainsi que j'ay desia dit, les portent vendre au riuage de la mer, & c'est le principal trafic de ceste contree.

F O R C E S.

Les Espagnols y tiennent les trois places susdites de Sainct Iacques, sainct Augustin, & sainct Philippes, & mesme on dit que celle de sainct Augustin n'a esté fortifiée depuis que le Drak la ruina. Celles qui sont sur pied, sont assez fortes, & ont assez de gens, & d'artillerie.

R E L I G I O N.

Les habitans croyent l'immortalité des ames comme nous, mais au reste ils sont idolatres.

L E G O L P H E D E M E X I Q U E.

Ce Golphe qui se nomme aussi mer de Cortez, a comme deux portes, l'une par laquelle la mer entre avec vn cours fort rapide, & cestuy-cy est entre l'extremité de Iucatan, & de l'Isle de Cube: l'autre par laquelle elle sort avec la mesme vehemence; & cestuy-cy est entre la pointe de la Floride, & la Cube. Il baigne presque deux mille milles de coste entre la susdite Floride & Iucatan, & c'est icy la coste de la nouvelle Espagne. Cette mer est fort orageuse, & a peu de ports qui sont tous suiets, fors que celuy de la l'Hanane vers le Nort. Le principal est celuy de S. Jean de Lua, qui a esté extrêmement bien fortifié par les Espagnols, pource que c'est là qu'à couuert d'une Isle qui a vne lieuë de tour, les flottes de Mexique & d'Espagne s'arrestent.

N O V V E L L E E S P A G N E.

On fait passer sous ce nom tout le pays qui s'estend depuis la Floride iusqu'à la mer de Californie: du Midy il confine avec Guatimala, & Iucatan. Il fut subiugué par Fernand Cortez l'an 1518.

Ceste Espagne contient quelques regions signalees, qui sont la nouvelle Galice, Mechocacan, Mexique & Gualtecan.

Q U A L I T E' D E L A N O V V E L L E E S P A G N E E N G E N E R A L.

L'air principalement vers Mexique, qui est mesme dans la Zone Torride, y est temperé. Aux mois d'Aoust & de Septembre il y pleut tous les iours depuis midy. Le ter-
roir

roir y est tres fertile, & abonde presque de toutes sortes de fruiets, fors que du vin & d'huile: combien qu'il y ait assez du vin, & grande quantité d'oliues: mais l'un & l'autre y vient avec un grand profit des reuenus du Roy d'Espagne. Il y a aussi presque de toute sorte d'animaux, tant de ceux du pays que de ceux d'Europe.

Les Espagnols ont affectionné plustost ce pays que nul autre de l'Amerique. Il est vray qu'encor que ceux qui sont proprement du pays y vivent assez longuement: les Espagnols, l'appelle ainsi ceux qui naissent de peres Espagnols, passent peu souuent soixante ans, & s'ils les passent ce n'est de guerres: & ceux qui viennent d'Espagne estans desia aduancez en aage, y vivent plus long-temps que ceux qui y vont en leur enfance.

LA NOUVELLE GALICE.

Les habitans de ceste Prouince les nommoient aupatauant Xalisque, où Nugne de Guzman qui la conquist, fit bastir les places de Compostelle, du S. Esprit, & de S. Michel, de Guadalaiare. La partie qui est ceinte de la riuere de Piañle, & de celle de S. Sebastien, est nommee Culiacan. La ville Metropolitaine est Culiacan, où les Espagnols ont fondé la colonie de S. Michel. Or laissant à main droiète les pays peu cogneus, pource qu'on n'a point veu de leur or & de leur argent, de Sibole, de Grenade on vient à la mer rouge, ou de Californie, iusques où les Espagnols pratiquent, & le pays est habité. François Coronado vint à Sibole par le commandement d'Antoine de Mendozze l'an 1579. mais n'ayant trouué guerres de profit il s'en retourna avec ses soldats à Mexique.

QUALITE.

CE pays abonde en mines d'or, & est capable de porter toute sorte de fruiets. On trouue beaucoup de poisson en la mer qui en est proche, & force bestes sauuages dans les forests. Mais la plus part du pays est raboteux & aspre.

M O E V R S.

CEux qui habitent sur le riuage de la mer ne vivent que de poissons, les autres sont sauuages, & vont continuellement à la chasse. Ce sont gens pauures qui vont nuds, & dorment où la nuit les surprend dans les forests. On dit encore que bien souuēt ils ne s'abstiennent de la chair humaine. Ils ne recognoissoient autrefois personne, & viuoient en liberté, mais maintenant les Espagnols les dominant.

M E C H O A C A N.

Ceste Prouince est esloignee de Mexique moins de 50. lieues, & en a de tour quatrevingts. On y void la ville de Sinsone grande & peulee, où les Roys de Mechoacan faisoient leur demeure. Il y a aussi la ville de Pascuar où l'Euesque demeuroit premierement, & celle de Valladolid, où il fait à present sa residence. Il passe sur ce pays un fleuve rapide, qui va tousiours serpētant, & qui apres auoir receu autre douze fleuves entre en un lac nommé la mer Cephalique, qui a cent cinquante milles de tour. En sortant de là il se precipite en peu d'espace dans vne profonde vallee, & puis continuant son cours avec mille tours, entre avec vne grande abondance d'eaux, qui engendrent des Cocodriles en la mer du Sud. Mais retournant un peu en arriere on descouure pres de la mer, Sacatule & puis dans le pays Coline, & apres cela la Purification, & sur le riuage de la mer, les ports de saint Iacques, de la Natiuité, & de saint Antoine.

QUALITE.

CE pays est des meilleurs de la nouuelle Espagne, veu que le mahis & plusieurs autres fruiets y meurissent deux fois l'annee, & François de Torazas recueillit 600. quartez de grain pour quatre qu'il auoit semez. Il y a aussi grāde quātité de simples, entre lesquels celui qu'on nomme Mechoacan du nom du pays, est fort renommé. Le coton, la cochenille, les meuriers & la soye s'y trouuent en abondance. Il rend vne grande quantité d'or & d'argent, mais il est bas. Il y a aussi force miel, & quantité de cire, d'ambre noir, de sel, & de poisson, à raison de quoy il se nomme Mechoacan, qui signifie lieu de pesche.

M O E V R S.

Les habitans sont hauts, robustes & dispos. Ils montrent auoir un esprit gentil, ce qu'on peut assez cognoistre par les moyens des ouurages qu'ils font de plumes d'oyseaux, ou qui sont raillees dans des canes, ou bien de semblables choses qui en viennent. Mais cecy se peut encores mieux comprendre par leur langue, qui est abondante & pleine de mots, & si figuree & artificieuse, que ceux qui l'entendent la preferent à la Latine. Ils sont de bonne complexion & de longue vie, & l'on tient qu'ils sont des descendans des sept races venue sdes parties du Nort pour peupler l'Espagne.

MEXIQUE.

LA prouince de Mexique est la plus agreable & plus fertile de tout le nouveau monde, voire mesme selon le iugement de Iosephe, de la coste des meilleures de toute la terre. Elle est ainsi nommee de la ville capitale, qui est esloignee des Isles fortunees de cent degrez. Elle fut prise par Cortez l'an 1521. le 13. d'Aoust.

Ce Capitaine Espagnol mena en ceste entreprise 200. mille Indiens, 900. Espagnols, 80. cheuaux, 17. pieces d'artillerie, treize brigantins, & six milles canots qui sont comme des gondoles. Ceste ville est en vne grande plaine enuironnee de hautes montagnes, où la neigene defaut iamais, & peut auoir de tour enuiron 70. lieues, mais il y en a 33. occupees par deux lacs, dont l'vne est d'eau douce, l'autre est d'eau salee.

L'eau du lac doux entre au salé, & en deuient salee au fonds qu'elle y trouue salnitreux. La ville qui estoit sur le lac salé fut ruinee par Cortez, & puis rebastie, non dans l'eau, mais sur le sec. Elle contient enuiron six mille maisons d'Espagnols, & soixante mille d'Indiens qui habitent aux faux-bourgs.

On dit qu'à Mexique il y a quatre choses extremement belles : c'est à sçauoir les femmes, les habits, les cheuaux, & les ruës. Sur les riuages des lacs il y auoit pres de cinquante bonnes places, entre lesquelles Tescuto cede bien peu à Mexico. Mexico a l'Imprimerie, l'Argenterie, & vne Vniuersité des plus florissantes. Il y a outre cela dans ce Royaume la ville des Angesauec vn terroir merueilleusement fertile, distingué en valees, collines, & plaines, où l'on voit vne grande quantité de troupeaux de brebis, & de bestes à cornes, outre vne grande abondance de bleds, & de fruiçts. De l'autre costé on voit Tlascala qui signifie ville de pain, en vn petit costeau avec vn beau terroir plein, qui a de tour enuiron 60. milles. Il y auoit iadis trois cents mille ames, mais à present on n'y en trouuera peut-estre cinquante milles. Ses citoyens sont tous nobles, & ont obtenu ce priuilege pour les seruices faits à la couronne d'Espagne en l'entreprise de Mexique. Les autres places plus remarquables sont Tulle, Tulluca, & vers la mer outre la vraye Croix, Zempoalan, avec vn pays à l'entour abondant en eaux : puis Tausco grande ville, dont l'Euesque se dit aussi Euesque de Capaz : qui faisoit comme on dit, vingt-cinq mille maisons basties de chaux, & de terre grasse, & partie de bois couuert de paille, & de certaine pierre. Elle semble encore plus grande, pource que les maisons sont esloignees l'vn de l'autre, esparées de peur du feu.

Le fleuve d'Aluatade coule par ces lieux, & entre apres dans la mer par trois bouches. Dans le pays on void Vlatlan grande ville, avec vn pays plein de fruiçts, & fort habité, & il y a encores des mines d'alun, & de fin soulfre.

QUALITE'.

TOut le pays est extremement temperé, porte vne grande quantité de fruiçts, & routes les commoditez necessaires. Il y a force meuriers, des fucilles desquels on nourrit grande quantité de vers à soye.

Au lac doux de Mexique il naist vne fort bonne herbe qu'on coupe routes les Lunes, & quant au salé, l'on en tiroit autresfois grande quantité de sel, qui a manqué maintenant : mais on tire beaucoup de salnitre, & les Indiens cuisent la terre avec le supier, & en font vn certain sel qui ne vaut gueres. Elle nourrit maintenant force cheuaux, asnes, troupeaux de moutons, & de brebis, & il y a quelques mines. Il ya telle abondance de viures, que vingt huit liures de boeuf ne valent plus de demy real, vn pourceau deux reals, ou trois pour le plus.

MOEVS ANCIENNES.

Les habitans de ce pays estoient autresfois mangeurs d'hommes & idolatres, & auoient plusieurs femmes.

Le Roy de Mexique ne succedoit iadis par droit de sang, mais par le choix des Electeurs, qui estoient au nombre de six. Ils eslissoient de ieunes hommes gaillards, & bien disposez de leur personne, & propres à la guerre, & mesme les Mexicains firent mourir vn Roy pource qu'il estoit coüiard. Il y auoit vn souuerain Conseil composé de quatre degrez de nobles, & d'officiers, sans lequel on ne pouuoit executer chose d'importance. Ils n'auoient rien en plus grande recommandation que la nourriture des enfans, & n'estimoient autre chose que la religion, & la guerre. Il y eut entr'eux vn personnage nommé Tlacaellé, qui fut si vaillant qu'il conquist vne bonne partie de l'Estat de Mexique, & puis fut si magnanime que de refuser le Royaume, disant qu'il estoit meilleur pour la Republique que quelqu'autre fut Roy, & qu'il executast ce qui seroit necessaire, que de







de long. La riviere de Ciagre s'approche de la ville de Panama de cinq lieues : & c'est par elle que sont portees les marchandises d'Espagne, qui sont menees apres par terre à Panama. On voyage d'icy pour le Peru en Januier, Feurier, & Mars, & encor en Aoust, & en Septembre, mais non si commodément.

Les mariniers sortis du port de Panama vont recognoistre les Isles des Perles. Je ne veux passer sous silence, que nos plantes & semences, qui se rendent meilleures en plusieurs endroits de la nouvelle Espagne, & du Peru, diminuent de leur bonté, & de leur grandeur au Nom de Dieu, à Panama, tellement que les choux, & les laitues la troisieme fois qu'on les seme ont presque changé d'espece, & sont venus à neant.

RICHESSES.

Toutes les marchandises qu'on porte de Peru en Espagne, ou d'Espagne au Peru, abordent en ce pais : veu que les richesses qu'on porte du Peru en Espagne, doivent estre déchargées à Panama, & de là portees par terre au Nom de Dieu, où elles sont derechef mises sur les navires pour estre portees en Espagne, & au contraire celles qu'on porte d'Espagne doivent estre premierement déchargées au Nom de Dieu pour estre conduites par terre à Panama, & de là chargees sur les vaisseaux pour estre conduites au Peru.

LE NOUVEAU ROYAUME DE GRENADÉ.

À Midy de Cumane, & des pais voisins on void le nouveau Royaume de Grenade, dont les principales villes sont Sainte Foy, siege de l'Archevesque, & du siege de Justice, puis Tungie, Velez, la Trinité, Muscolime, la Palme, Toque, Mariquite, Bague, Victoire, Nostre Dame des remedes, Pampelone, Meride, & saint Christofle. On void avancer dans la mer vn Cap presque triangulaire avec la Base jointe à la Terre ferme. L'angle occidental se nomme Pointe d'Aranie, l'Oriental Pointe des Salines, & entre l'un & l'autre il y a celu qu'on nomme les 3. Pointes.

QUALITÉ ET RICHESSES.

Ce nouveau Royaume de Grenade est presque tout plein d'agreables valees qui portent beaucoup de fruits, & est extrêmement fort d'assiette, à cause des aspres montagnes qui l'environnent, & pource qu'il y a des passages fort estroits. On fait en quelques lieux du sel des palmiers, & d'urine. Pres de Tungie, il y a des mines d'or, d'émeraudes, & près de ce Cap où sont les trois pointes susdites on trouue force perles. On fait consommer beaucoup de gens à les pescher, pource que l'eau de la mer où les huîtres meres des perles sont attachées aux escueils, & aux rochers, est extrêmement froide : & il faut que les pescheurs demeurent sous l'eau & retiennent leur haleine quelques fois vn quart d'heure, & à ceste fin les maîtres leur font manger peu, & les tiennent loing des femmes, & les viandes qu'ils mangent sont fort seiches.

Les perles naissent en la chair des huîtres, & il aduient rarement qu'on en trouue deux semblables, à raison dequoy les Latins les ont nommées VNIONES.

Le prix en est fort rabaisé, à cause de la grande quantité que ceux du nouveau Monde en ont enuoyé en Europe. Car en la flotte de l'an 1587. il y en vint pour le Roy d'Espagne dix & sept marcs, & autre trois caisses, & pour les particuliers douze cents & soixante quatre marcs, & autres sept petits sacs de perles à l'once. On en tiroit autres fois beaucoup des Isles de Cubaque, mais on tient que les huîtres ayent esté consommées par la perpetuelle pesche, soit qu'épouuantes du bruit de l'artillerie, elles ayent changé de pais, ou qu'on aye abandonné l'entreprise pour vn tremblement de terre qui ruyna vne bonne partie de la ville, où il y auoit vn grand abord de personnes, il semble qu'il n'y en ayt pas si grande abondance qu'il y en souloit auoir. Quant aux émeraudes, pour la grande quantité qu'on en a tiré icy, & au Peru autour de Mante, & de Portuail, ils sont assez rabaisés de prix.

LE BRASIL.

Cette Prouince fut decouuerte par hazard, par Pierre Aluares Cabral, l'an mil cinq cens vn. Elle commence à la riviere de Maragnon, & s'estend iusques à celle de la Plate, ou de l'argent, avec des bornes incertaines du costé d'Occident. Selon le compte de quelques uns ce qui touche à la Couronne de Portugal, en ces lieux s'estend quinze cens milles du

Nort au Su : plus de cinq cens milles du Levant au Couchant, & presque trois mille milles de costé. Mais les Portugais n'en tiennent plus de mille, & quatre cens.

Les principaux lieux du Brasil sont ceux qui s'ensuiuent. On void au deçà du Cap de saint Augustin Pariba, qui se nomme aussi Cité des Neiges, & puis Parnabuco, bonne ville; l'Isle de saint Alexis inhabitee; mais quelque peu commode à ceux qui voyagent. S'ensuit le Cap de saint Augustin qui a 8. degrez & demy de hauteur de pole australe. Et ceste partie est plus proche de l'Afrique qu'aucune autre partie du nouveau Monde, veu qu'on tient qu'il n'y a pas de l'une à l'autre plus de mille milles.

Les flottes qui vont de Portugal aux Indes y abordent pour prendre le vent, & recognoistre leur route, & pource qu'ils ne peuvent quelquesfois passer ils retournent en arriere. On void apres saint Christofle, & l'emboucheure du fleuve de S. François, & puis S. Sauueur, ou la Baye de tous les Saints.

Ceste ville est assise sur vn port, ou pour mieux dire sur vn golphe qui a trois lieues de bouche, & trente de tour, où les baleines entrent, & se jouent à plaisir.

C'est là que demeure l'Euesque, & le Gouverneur de la prouince. On void à 80. milles loing Igneos, ou saint George, puis au 27. degré & demy Puerto-Seguro, ou port assésuré, renommé, pource qu'Aluare Cabral vint surgir là quand chassé des vents il découurit le Brasil. Certains escueils qui ont forme de muraille, & contre lesquels les ondes se rompent, le couurent.

On découure apres la riuere du saint Esprit, & Baya Hermosa, & le Cap froid, qui est presque tout en Isle, & a de tour deux cents quatre vingts milles en vingt deux degrez & demy. On arriue apres à Santos, & à Piratinga, qui est dans le país, & ces lieux sont assez bons. Entre saint Sebastien, & saint Vincent on void Buenabrigo, sur lequel passe le Tropique du Capricorne, & la ligne d'Alexandre sixiesme. Mais la derriere colonie des Portugais en cet endroit, c'est saint Vincent: & pource que ce lieu est en país fort esloigné, on condamne ordinairement à y aller demeurer ceux qui meriteroient pour quelque crime la galere, ou chose semblable. Ce lieu fut ruiné par les Corsaires Anglois l'an 1591. le iour saint Estienne, mais on l'a rendu depuis meilleur qu'auparuant.

On void au vingt-huictiesme degre le Cap de Patos, ainsi nommé d'un grand nombre de certains oyseaux noirs sans plumes, & avec le bec de corbeau, qu'on y trouua.

Q V A L I T E.

L'AIR y est fort bon à cause des agreables vents qui y courent : toutesfois à cause qu'il est quelque peu humide, il est plus fauorable aux vieillards qu'aux ieunes gens. Du long du riuage il se leue deux heures auant midy certains vents froids du costé du Su, qui font vn grand bien aux habitans. Sur la mer les vents du Su regnent la moitié de l'annee, & ceux du Nort l'autre moitié. A raison dequoy la nauigation est presque esgalement diuisee. On voyage commodément de Lisbonne au Brasil au mois de Septembre, d'Octobre, & iusques à Mars, & fort commodément en Ianuier, mais on retourne par plusieurs voyes en tout temps.

Le país est plein de fontaines, riuieres & forests, distingué de plaines, & de costaux, tousiours agreable, & plein de verdure, avec plusieurs plantes, & diuers animaux, dont nous n'auons cognoissance en Europe. Il y a entre les plantes la Copide, qui de son escorce couppée jette du baume. Ce que les bestes mesme cognoissent, veu que se sentans mordus des serpens, & des autres animaux, elles ont recours à ce remede. C'est ce qui fait que beaucoup de ces plantes sont presque desnüees d'ecorce.

Le Cedre est là vn arbre ordinaire (de mesme qu'en la nouvelle Espagne, & à Barbouent) & il y a plusieurs autres sortes de bois incorruptible. On y fait des barques d'une escorce d'arbre, capables de vingt-cinq personnes, voire mesme de dauantage.

Les concombres & melons d'Europe y deuiennent beaux & bons au possible. Entre les animaux on y voit la Talusie, que les Espagnols nomment Armadillo, qui est de la grandeur d'un cochon, couuert, & presque tout armé d'écailles, d'où il tire & où il retire la teste en assurance, ainsi que fait la Tortue.

Les Cerigons ont sous le ventre deux bources, où ils recueillent leurs petits, & les portent lors qu'ils sont en quelque danger, & que la necessité les presse de ce faire. On trouue aussi de ces animaux aux Isles Moluques.

Les Portugais nomment Parelle vn animal grand comme vn Renard, mais si lent & tardif en son marcher, que ceux qui ne l'ont veu ne le scauroient presque croire, & il a ceste particularité qu'il ne se haste nullement pour les caresses qu'on luy fait, ou pour les coups qu'on

qu'on luy donne. La Tamandoë est grande comme vn pourceau : mais ses ongles sont de grandeur extraordinaire. Elle se paist de fourmis, & avant trouué leur trou avec ses ongles, elle y pousse la langue dedans, & l'en retire chargée. Elle a la queue si longue & si couverte de poil, qu'elle cache dessous tout le corps.

Les Antes ont ie ne sçay dequoy semblable aux mules, mais elles leur cedent en grandeur, elles ont la levre d'embas semblante à vne trompe, & les oreilles rondes, & la queue courte. Elles reposent de iour, & paissent de nuit.

Haute ou Gay est vne petite beste semblable à vn chat, qu'on n'a veu manger ny boire iusqu'à ceste heure.

La diuersité des oyseaux, & des poissons de mer, & d'eau douce est incroyable. Au pais qui est près de saint Sebastien, le froment n'y naist, & n'y meurt pas tout ensemble. Mais quand vn espy dégraine l'autre florit, & lors que l'un jaunit l'autre est verd.

Je diray encor auant que de quitter le discours de la qualité du Brasil, qu'on tua ces années passées aux enuiron de la Baye de tous les Saints, vn monstre de grandeur demesurée, & d'un regard horrible, qui auoit vne face de singe, des pieds de lyon, & tout le reste d'homme, le col jaune, & les yeux estincelans, & pour le dire en vn mot, estoit si horrible, qu'un soldat qui le tua à coups d'arquebuse, en tomba mort aussi.

M O E V R S.

ENCOR que l'air soit delié, & le pais agreable, on ne sçauoit toutesfois dire assez combien les habitans sont brutaux & barbares. La plus grande part vit sans cognoissance des lettres, de religion, & de loy, & ne recognoist nul Prince. Quand il faut aller à la guerre, les 20. Brasiliens suiuent seulement celui qu'ils estiment plus remply de valeur.

Le peuple y va nud : les plus aisez ou les nobles, portent des habits faits de plumes d'oyseaux de plusieurs couleurs; qui les couurent depuis le nombril iusqu'au genouil.

Les hommes se rasent les poils du front iusqu'au milieu de la teste. Ils mangent toute sorte d'animaux, des singes, des lezards, des serpents, & des rats. Ils font leur pain d'une façon admirable. Ils ont vne herbe de la grandeur de la porcelaine, dont la racine est si venimeuse qu'estant mangée crüe, & sans estre preparée, elle fait mourir soudainement. Ils prennent la susdite racine, & la pilent promptement, & la pressent, afin qu'il n'y reste la moindre partie du suc mortel. Ils la seichent apres au Soleil, & la pilent de nouueau, & en font de la farine, & apres du pain qui est plus sain que de bon goust.

Ils composent de la mesme farine vn breuuage semblable à la biere, avec laquelle s'en-yurant ils deuiennent plus rusez, & plus malins que de coustume.

Ils s'amusent fort aux augures, & sorcelleries. Ils n'ayment nullement le trauail, ains l'oisiveté, les passe-temps, les festins, & la dance. Ils entreprennent les guerres, non pour estendre leurs limites, mais pour l'honneur, lors qu'ils estiment que leurs voisins les ont offencez.

Ils mangent ceux qu'ils ont pris en guerre, & en font des festins solempnels.

Ils ne punissent autre crime que l'homicide. En leur langue ils ne se seruent aucunement des lettres F. L. & R. Ils bastissent leurs maisons de bois, & les couurent de feuilles d'arbres. Plusieurs familles demeurent ensemble sous vn mesme couuert, & de crainte des animaux nuisibles, ils dorment en l'air dans certains rets.

Ils viuent sans soucy de l'aduenir, & presqu'en commun.

Ils nagent si bien, qu'ils demeurent quelquesfois les heures entieres sous l'eau, mesme avec les yeux ouuerts. Ils supportent aisement la peine, & le ieusne, & d'autres costez passent les nuits entieres à gourmander & boire sans mesure.

Quand les femmes ont enfaaté, les marys se mettent au liét, reçoient les presents & les visites, mangent des choses delicates pour se remettre, & finalement font tout ce qu'on void faire ailleurs aux accouchées. Prés d'Igleos il y a vn peuple qui combat avec les Aymures, qui semblent plustost bestes qu'hommes, veu qu'ils ouurent le ventre des femmes enceintes, & en tirent les creatures, qu'ils mettent en presence des meres sur leurs bras, & les aualent à demy cruës, chose coustumiere encores parmy ceux du Popian. Prés du fleuve saint Sebastien il y a des hommes hauts de douze pieds, qui mangent le plus souuent la chair crüe.

RICHESSES.

Les richesses qu'on tire aujourd'huy du Brasil consistent en cotons qui sont des plus fins, & en sucres excellents, & il n'y a chose en Europe qui y estant transportee porte plus de profit à ses maistres. Il y a eu des années que le sucre qu'on apporte du Brasil en Portugal a passé la quantité de cent-cinquante mille arobes.

Les Portugais s'adonnent grandement à ce trafic, & ont fait bastir en diuers lieux pour cuire & affiner le sucre: & ils entretiennent là vn grand nombre d'esclaves qu'on y a amenez de la Guinee, & de Congo.

CHILE.

Sortant au destroit de Magellan on costoye Chile, qui est ainsi nommee d'une vallee principale. Elle commence du Su en tirant vers le Nort à la hauteur de cinquante & deux degrez & demy, & s'estend iusques au vingt-septiesme degré. Mais du Levant au Ponent elle n'a plus de cent milles d'estenduë, veu que d'un costé elle a la mer, & de l'autre la grande Cordeliere.

On void au trentesixiesme degré la fameuse vallee d'Arauco, qui s'est deffenduë durant tant d'années avec tant de furie, & s'est maintenue en liberté.

Les Espagnols ont icy diuerses colonies, comme saint Jacques sur le fleuve de Parais, en la vallee de Mapoco, la Conception en la petite vallee de Penco avec vn port: les confins en la vallee d'Angole: Valdiuia près d'un port de mer, où il y a vn grand lac: l'Imperiale l'une des meilleures colonies de ce pais, qui auoit auant la guerre des Arauques trois cens mil hommes de seruite, de mesme que Valdauia en auoit cent mille. Elle fut nommee Imperiale, pource que quand les Espagnols entrerent en ceste Prouince, ils trouuerent sur les portes, & sur les toits des Aigles à deux testes faites de bois. Il y a encor Ville-riche sur le bord d'un petit lac, près de deux lieux qui jettent en certain temps du feu, & des cendres. Il y a Chilo, & Chilan, qui fut bastie l'an mil cinq cens quatre-vingts-vn, & Cochimbo où est le terroir de la Sereine.

L'année mil cinq cents soixante-deux, il y eut vn si estrange tremblement de terre en ce pais qu'il transporta les montagnes, boucha le passage aux fleuves, jetta par terre la Conception, fit sortir la mer hors de ses bornes: l'on dit qu'il occupa trois cents lieux de coste. Il se renouela apres l'année 1575. mit par terre Valdiuia. La Metropolitaine c'est saint Jacques.

QUALITE.

Ceste Prouince est estimee semblable au pais d'Europe, à cause qu'elle est hors de la Zone Torride, produit force grains, & de fort bons vins, & de toute sorte de fruiçts qu'on void en Espagne. Il y a ceste difference entre nous & ceux de Chile, que lors que nous auons l'Este ils ont l'Hyuer, & au contraire. Il y a grande quantité d'or, de bons pasturages, force troupeaux de bestes à corne, & de brebis, & assez bon nombre de cheuaux: mais avec tout cela elle est mal peuplee à cause de la guerre de ceux de la vallee d'Araucque. Les riuieres de ce pais coulent avec assez de roideur durant le iour, mais la nuict elles vont foiblement au possible, comme si le froid & la glace les auoient arrestees.

MOEURS.

Les habitans sont fort hauts, disposés & pleins de courage. Ils ont pour leurs armes l'arc & les fleches. Ils vont vestus de peaux de bestes sauvages, & de loups marins.

LE PERU.

Ceste Prouince s'estend depuis la ville de Plata iusques à Pasto, ou bien depuis les confins de Chile iusqu'aux bornes de Popayan entre la mer du Su, & les Andes. Mais pour entendre bien sa disposition, il faut sçauoir que tout le Peru est diuisé en trois parties, non moins differentes d'assiette, & de forme, que de qualité, & de nature, & celles-cy sont plaines, montagnes & andes: pource que le long de la mer la terre est plaine & basse, mais avec plusieurs valons. Ceste plaine a cinq cens lieux de longueur, & de dix à quinze de large. On void du costé du Levant deux chaines de montagnes, l'une à la veüe de l'autre, qui commençans (comme on dit) au destroit de Magellan, vont entre Panama, & le Nom de Dieu, iusqu'à Terre ferme. Celle qui est du costé d'Occident se nomme Sierra, qui en Espagnol signifie montagne, celle du Levant s'appelle Ande, ou Cordeliere, & leur largeur n'est de plus de vingt lieux. Tellement que le Peru en plaine ou montagne n'est large de plus

plus de quarante lieues. Il y a environ cinquante valées au Peru, dont les principales sont Xauca, longue de quatorze lieues, & large de cinq, Chica, Andaguayla, & Lucas.

QUALITE.

C'est chose admirable qu'en si peu de distance qui se trouue en la largeur du Peru, qui n'est que de 40. lieues, & veu qu'il n'y a nulle difference de hauteur, il ne pleut ny neige, ny tonne aux plaines: & cependant en la Sierra les saisons font leurs cours cōme en Europe, & il y pleut depuis le mois de Septembre iusqu'en Auri, & aux Andes il pleut presque tout l'hyuer: & l'on a remarqué que si les habitans se transportent des plaines aux montagnes, ils y sentent les mesmes douleurs d'estomach, & de reste, qu'on a accoustumé de sentir sur la mer lors qu'on ne l'a pas accoustumée. Ce que les vns attribuent à la trop grande subtilité de l'air, & aux trop grands vents, les autres à la diuersité, pource qu'aux plaines l'air est chaud, grossier & humide, aux montagnes froid, sec & subtil.

Là il est tousiours de mesme, pource qu'il n'y souffle iamais autre vent que celui du Midy, icy il est diuers, & de facons differentes.

Là il ne pleut ny neige, icy il fait l'un & l'autre. Si bien que ce n'est chose merueilleuse que la complexion de l'homme se sente de ceste diuersité d'air, & en souffre quelque alteration. Or les plaines n'estant iamais arrousees de pluye elles demeurent en friche, pleines de sable, & sans porter fruit, de sorte qu'on en trouue seulement aux valées par lesquelles passent les fleues qui descendent des montagnes, & se vont rendre en la mer. Et ces valées, qui sont environ au nombre de cinquante, sont fort soigneusement cultiuees, & bien habitees par tout, à cause desdits fleues qui les arrousent. Vne riuere est esloignée de l'autre ordinairement sept ou huit lieues, tantost plus tantost moins.

Le labourage des valées n'est esloigné des riuieres plus d'une lieue en ça, & une autre en là. Mais encor qu'il ne pleue pas aux plaines, toutesfois au mois de l'hyuer, qui commence au mois d'Octobre, & dure iusqu'en Auri, certains brouillards subtils & deliez occupent l'air, & il en sort vne certaine humeur qui ne baigne pas presque la poussiere, combien toutesfois que cela soit de grande importance pour meurir & mener à perfection ce qui a esté semé. Mesme près de Lima, ce seul brouillard sans autre eau fait verdier & florir quelques contrees qui sont par ce moyen pleines de bons pasturages. Il y a encor quelques parties des plaines, où sans aucune riuere qui paroisse, on voit naistre des grains, & des fructs de toute sorte en abondance, ou pour l'humidité que les riuieres y pouillent, ou par le moyen des riuieres qui se perdent dans le sable, par celle qui vient de la mer.

La Sierra abonde en pasturages & forests, où il paist vn nombre incroyable de vicunes, qui sont comme des cheureux, & des guanaches, & des paches. Aux Andes il y a grande quantité de singes & de guenons de plusieurs facons, comme aussi des perroquets. Il y a encor abondance d'une herbe nommée Coca, fort estimée au Peru, pource qu'on tient que celle qu'on depesche à Potosi vaut cinq cens mille escus toutes les années.

Le meilleur du Peru consiste aux valées, qui portent quantité de maiz, & de froment. La nourriture generale du Peru c'est le maiz qui toutesfois ne vient pas bien aux pais froids, comme estant vne partie du pais de l'asto & tout le Collao, mais au lieu du maiz ils ont d'autres racines bien nourrissantes.

MOEURS.

Tous ceux du Peru sont distinguez principalement en trois sortes de personnes, dont chacune contient encor plusieurs peuples sous soy, qui sont differents en noms. Ces gens-cy sont differents, & leurs langues separees.

Ils auoient accoustumé de faire la guerre les vns aux autres auant qu'ils vinssent en la puissance de Ginacau. Mais lors que par sa victoire la cause de tous les debats fut ostée, on veid que les principaux d'entr'eux, & le peuple s'adonna à la langue de Cusco pour plaisir, au lieu qu'auparauant on rendoit seulement le droict à chacun en ceste langue, & l'on ne la pratiquoit qu'en iustice. Tellement que celui qui sçait la langue de Cusco peut aisement aller par toute la prouince.

Les femmes ont vne robe de laine qui leur va iusqu'aux talons, & les hommes vne chemise qui leur descend iusqu'aux jambes, & vn manteau par dessus.

Or combien qu'on porte vne mesme sorte d'habillement par toute la prouince, toutesfois celui de la teste est different, veu que chacun a selon la coustume du pais des bandes que quelques vns portent simples, les autres de plusieurs couleurs: il n'y a presque vn seul qui ne differe de l'autre en ce qu'il met sur la teste.

Au reste les habitans de ce pais sont pleins de simplicité, & toutesfois parmy

Cc

ceste façon grossiere & rude, ceux qui sont près de l'Equateur sont dissimulez, cachent leur pensée, & murmurent entre leurs dents, sans descouvrir librement leur pensée.

Ils ne sont gueres esloignez de la façon de viure des Iuifs.

Ils sont subiects à l'amour des masses, & pour ceste cause font assez peu d'estat des femmes, veu que non seulement ils les font seruir d'esclaves, mais encores ils les battent rudement pour la moindre chose. Ceux cy mesmes qui demeurent près de l'Equateur sont seulement couuerts iusques au nombril d'une chemise fort delice, & laissent les autres endroits nuds, voire mesme les parties honteuses.

Ils parent leurs bras de bracelets de pierrerie, & se percent les jouës & les levres, y mettant des turquoises & des esmeraudes. Chez ceux cy les entrees des temples qui estoient du costé d'Orient, estoient seulement fermées d'un rideau de laine, & dans les temples il y a deux Idoles, qui ont la semblance de boucs, & l'on brulle deuant eux certain bois qui rend vne merueilleusement bonne odeur. Chez les Caraces on a veu sur les portes des statues d'hommes avec des estoiles de Diacre.

Les Pazoons conseruent de pourriture admirablement, & avec vn extreme soing, les corps des enfans, & des homes morts. On adoroit communement en leurs temples des serpens, & outre cela chacun en particulier auoit ses dieux, selon l'art, ou le mestier qu'il exerceoit.

Ils estoient du tout ignorants des lettres, & mesme de la peinture qui tenoit lieu des lettres chez ceux de Mexique: ils ont vsc de cordes de laine qu'ils nomment *Quippes*, ou faisant des nœuds de diuerse sorte, ils comptoient depuis vn iusques à dix, & de la plus haut montant par degrez en comptant, ils donnoient à ces nœuds les couleurs semblables aux choses qu'ils vouloient exprimer. Chaque prouince auoit ses Notaires qui faisoient entendre facilement au peuple les choses arriuees, mesme long-temps auparauant, par le moyen de ces couleurs.

Leurs armes sont l'espee, la pique, vn cloud de fer, la hache d'argent, avec le trenchant d'or, & plusieurs especes de dards.

Ils scauent bien s'aduançer, garder leur ordre, secourir leurs gens, & ne craignent nullement la mort, pourueu qu'ils puissent laisser aux leurs vne belle memoire, ou trouuer moyen d'auoir quelque recompense de leurs Capitaines.

Le pretexte de leurs guerres auant la venue des Espagnols, estoit qu'au deluge le monde s'estoit sauue dans leurs lacs, & qu'ils auoient tous ieus la vraye Religion, & la deuoient enseigner aux autres.

Leur principal Dieu estoit le Viracoca, c'est à dire Createur vniuersel, & apres luy le Soleil. L'Inga Pacacuri, qui trouua la plus grande partie de leurs superstitions, ayant assigné des rentes aux temples des Dieux, n'en assigna point à Viracoca, disant qu'il n'en auoit besoin puis qu'il estoit Createur de toutes choses. Entre les autres choses remarquables qu'ils introduisirent aux pays par eux conquis, l'une estoit qu'ils diuisoient tout le terroir en trois parties: l'une appartenoit à la Religion, & aux dieux; la seconde estoit de l'Inga, ou du Roy qui entretenoit de cela sa personne, sa Court, ses parents, ses Barons, ses garnisons & ceste partie estoit la plus grande: la troisieme partie estoit pour le peuple. Toutesfois personne n'auoit rien de propre que par grace speciale de l'Inga, & cela n'estoit pas hereditaire. Ces terres du peuple, & des communautez, estoient distribuees tous les ans, & on assignoit à chacun autant de terre qu'il en auoit besoin pour son entretien, & celui de sa famille, à raison de quoy ceste portion estoit tantost grande, tantost petite, & de cecy ils ne payoient aucune taille.

En lieu de taille ils estoient obligez de labourer les terres des dieux & de l'Inga, & de mettre les fruits en de grands magazins destinez à telles choses, d'où l'on tiroit aussi prouision pour le peuple en temps de sterilité. On faisoit le mesme des animaux, veu qu'on les diuisoit aussi bien que les paturages en ces trois parties. En quoy il me semble que ceux cy surpassoient de beaucoup Lycurge en la distribution des terres, & les Romains en la loy des champs, ou *Agraria*: Pource qu'il ne pleut iamais au Peru, les habitans se soucient fort peu des maisons, & les Espagnols mesmes ne couurent les lieux de leur demeure, que de quelquenatte. Neantmoins le Roy du Peru fit plusieurs grans bastimens, & entre autres les *Tambes*, qui estoient comme de tres-grands magazins, où l'on mettoit les viures, & les armes, & autres prouisions pour les armes. Ces bastimens estoient disposez sur les grands chemins en telle sorte, que l'un estoit tellentent esloigné de l'autre 3. ou 4. lieues. Et les Roys de ce pais auoient fait faire 2. chemins longs de 5. cens lieues dont l'un passoit par les plaines, l'autre par les montagnes: ceuures veritablement qui pour leur grandeur & profit, doiuent estre preferees à ce que l'Egypte, & Rome ont eu de plus admirable. Car aux montagnes il fut besoing de hausser en mille endroits, & de remplir les valees, & lieux profonds.

Il fut nécessaire de couper les roches, appuyer les choses ruineuses, esplaner les lieux malaisés, soutenir les précipices, & de vaincre aux plaines tant de difficulté que le table accoustumé de porter avec loy en vne entreprise de ceste sorte. Les Tambes estoient sur ces chemins, & en plusieurs endroits il y auoit de beaux jardins, & des arbres qui donnoient vn grand plaisir, & estoient de grande commodité aux passants.

RICHESSES.

ON tire du Peru de l'or & de l'argent en abondance, outre les autres marchandises : & de toutes les richesses qui viennent de l'Amerique par deça le Peru en fournit ordinairement deux tiers, & la nouuelle Espagne vn tiers, mais la nouuelle Espagne est beaucoup plus riche de marchandises, & donne avec ses Isles entre autres choses grande quantité de cochenille, de coton, de sucre, & de perles : mais entre les thresors du Peru, il y en a deux merueilleux : l'vn est la mine d'argent de Potosi, qui fut decouuerte l'an 1545. & d'où l'on a tiré, & tire si grande quantité d'argent, que le quint qui en appartient au Roy, est monté en quarante ans à cent & vnze millions de poids, & vn poids vaut treize reals, & vn quart d'Espagne : & toutesfois il y en a plus d'vn tiers dont on ne tire pas le quint. On purge ceste quantité d'argent en cinquante-deux engins, faits sur vne riuere qui en est proche, & en vingt-deux qui sont en la vallee de Tarapie, outre plusieurs autres que l'on fait tourner avec des cheuaux. On tire aussi de ce pais assez bonne quantité d'or. L'autre thresor consiste aux mines de Cnancavelque, où il se trouue force vis-argent. Elles furent decouvertes l'an 1567. & le Roy d'Espagne en tire de net environ quatre cens mille poids.

Mais l'estime qu'il sera à propos auant que de laisser le Peru, de discourir de ses villes principales, & ses prouinces.

AQVIPA, LIMA, TRUGILLO, ET AVTRES.

ON rencontre premierement Tarapata avec son port au 21. degré, puis Arica, & la bouche du fleue, & port de Quilca, & dans le pais la plaisante & delicieuse ville d'Arequipa, qui est assise au pied d'vne montagne qui jette du feu, jouyt d'vn air temperé, & subtil, & a vn terroir tousiours fraiz, & fleurissant. L'argent de Plata, & de Potosi arriue à son port, où on la charge pour Panama. Il y arriue diuerses sortes de viures, & de marchandises, qui vont à Cusco. On trouue apres le port de Hacari, assez frequente, la pointe de saint Nicolas, & Sangalle, & Collao de Lima.

Lime qu'on nomme aussi ville des Roys, pource qu'elle eut son commencement le iour des Roys en l'an 1539. est assise sur vne grãde riuere à deux lieux loing de la mer, où est le port nommé Callao, d'vne Isle qui est vis-à-vis cent lieux loing de la ville d'Arequipa. Elle est bastie avec beaucoup d'art, veu que toutes ses rues principales répondent à la place, & il n'y a presque vne seule maison qui soit sans eau, qui y vient de la riuere. L'air y est temperé. On y sent quelque fraicheur, ou bien quelque peu de froid plus grand que l'ordinaire, durant les quatre mois de l'Esté d'Europe. Elle est au douzième degré, & vn tiers. L'Archeuesque, & le Viceroy y font leur demeure, & il y a aussi vne Cour, ou Siege de iustice, & c'est icy l'abord de tous les trafics du Royaume. On compte dans la ville de Lima douze milles esclaves Negres, & vingt-quatre mille femmes Espagnoles, & par là il est aisé de iuger du reste.

Passant plus auant on decouure le port de Gaure, où il y a grande quantité de sel, & celuy de Casma abondant en bois, & en viures : puis Santa, & Quanaple, d'où l'on vient à Trugillo, qui est à deux bonnes lieux loing de la mer. Ceste ville est assise au septiesme degré, & deux tiers, en la vallee de Chimo, sur le bord d'vn beau fleue. On apperçoit apres la pointe del'Aiguille au sixiesme degré, Payta ville de grand trafic, au cinquiesme : Tumbes au troisieme, S. Heleine au deuxiesme, le Cap de saint Laurés au premier, & là aupres Port vieil, & S. Jacques, & puis le Cap de Passao sous l'Equinoctial, qui borne de ce costé le Peru. A main droite quinze lieux dans terre, on void la ville de S. Michel premiere colonie des Espagnols en ces contrees. Auant que sortir des plaines du Peru, l'estime qu'il sera à propos de dire vne ou deux choses estranges. Mala est vn lieu loing de Lima quinze lieux : l'on y void vn figuier, dont la partie tournée vers le Su, produit ses fructs quand il fait Esté aux montagnes, & l'autre qui est tournée vers la mer, les produit quand il fait Esté en la plaine. En la vallee de Chilca il ne pleut aucunement, & il n'y passe nul fleue, & toutesfois elle abonde en maiz avec telle inuention. Ils peschent au riuage de ceste mer des sardines, ou semblables poissons, dont ils prennent vn nombre infiny, puis ils font certaines petites fosses en terre, où ils sement leurs maiz, mettant chaque grain en vne teste de ces poissons, & l'on ne scauroit croire combien il multiplie.

Ec ij

COLLAO, ET AVTRES.

MAis la richesse, & puissance du Peru consiste aux provinces qui sont dans le pais, dont la premiere est Collao, assise où les deux chaines des montagnes, ou Cordelieres sus-nommees s'esloignent l'une de l'autre, & s'eslargissent. Sa limite Australe, c'est vn lieu nomme Caracol, & la Septentrionale Ayauire.

La capitale ville de ceste province c'est celle de la Paix: mais la plus peuplee d'originaires du pais c'est Cuiquito, grande ville, importante, & subiecte sans moyen au Roy. Elle a sous la iurisdiction Iuli, Chilane, Achos, Pomata, Cepita, Quaqui, Tiaguanaco, & autres places. A Tiaguanaco l'on void les restes de quelques grands baltimens. On estime qu'ils sont fort anciens, & faits par des hommes pleins de puissance: car on ne scauroit comprendre comme ils ont peu mouvoir des pierres longues de trente, larges de quinze pieds, & espesses de six, sans engins de fer. En ceste partie du Peru on void le lac Tiquicaca long de trente lieues, & large de quinze, en ayant huitante de tour, & de profondeur plus de huitante pas. Il reçoit dix, ou douze grosses riuieres, avec plusieurs autres eaux, qu'il renuoye toutes dehors, avec vn tres-gros fleuve, qui se va rendre dans vn autre lac nomme Auloga, ou Paria, qui est sans fonds, où il se perd, comme le lordain en la mer Morte, ou la Volgue en la mer Caspie.

QUALITE.

ENcore que l'air y soit si froid que le maiz n'y peut venir, toutesfois c'est peut-estre le meilleur pais, & le plus peuplé du Peru. Et par là on peut comprendre combien la bonté de l'air importe plus à la multiplication, & à l'entretien des hommes, que l'abondance des viures. Au lieu de maiz il y naist (outre d'autres choses) certaines racines que ceux du pais nomment l'apes, qui ont mesme goust que les truffes: ils les seichent au Soleil, & les gardent pour l'Hyuer. Il y a encores force bestial, & principalement beaucoup de camelogs qui sont certaines bestes semblables aux brebis, mais plus grandes, & avec la façon des chameaux, mais sans bosse. Ces bestes seruent à porter les charges, & portent iusques à cent cinquante liures de poids, & aussi à labourer la terre, & leurs laines sont fort bonnes à faire draps, & leur chair saine, & de tres-bon goust. Tiquicac produit vne sorte de jonc nomme Totore, qui est bon à plusieurs choses: il sert à faire des maisons, & des barques, & de grain aux pourceaux, & l'on void au mesme lac vne infinité de canards, & d'autres oyseaux.

CHIARQUES.

S'ensuit la province des Chiarques, riche pour les thresors que l'on a tirez, & que l'on tire des mines de Porc (qui sont au terroir de Plata) & de Potosi.

La capitale ville de ceste province, c'est la ville susdite. Assez près de Potosi il y a vne petite montagne nommée Cuyana Potosi, c'est à dire, petit Potosi, au pied de laquelle commence la ville de deux lieues de tour, avec le plus grand abord, & trafic qui soit au Peru. Les Espagnols qui y habitent, sont iusques au nombre de quatre mille, & ceux du pais sont nombre de huitante mille.

Je ne comprends en ce denombrement ceux que la conuoitise du gain, ou la curiosité de voir y meine des pais esloignez, ny les miserables qui font leur demeure ordinaire dans les entrailles de ceste montagne, qui sont en si grand nombre, qu'on en feroit vne bonne ville.

QUALITE, ET RICHESSES.

ON peut comprendre les richesses du pais, puis que le President de la Gasque assigna en son terroir cent mille escus de rente à Pierre de Hiniola, sans les moindres assignations, & il y en auoit de 50. & de 80. mille.

La montagne du Porc a des mines d'argent qu'on ne peut espuiser, & il y en a beaucoup d'autres, desquelles toutesfois on ne tire tout ce que l'on pourroit, pour ce que ceux du pais ne s'en soucient pas, & le pais est trop froid pour les Negres. Ce qui a diminué aussi le grand abord du Porc, c'est la grande richesse de Potosi, qui est vne petite montagne au vingt-deuxiesme degré de hauteur, semblable à vn pain de sucre, haute d'vne lieue, & en ayant demie de tour. Elle contient quatre veines d'argent, qui sont larges par tout pour le moins d'vn pied, & au plus de six. De celles-cy vne qui se nomme Centeno, a vingt-quatre branches, & celle qu'on appelle Riche, en a septante huit.

On y traueille iusques à la profondeur de deux cens, & plus, de brassées à la clarté des chandelles: & ceux qui y traouillent, passent plusieurs mois sans voir la lumiere du Soleil. Ils descendent, & montent par des eschelles faites de cuir crud, de huit cens degrez, voire d'auantage, avec la charge sur les espaules, & la lumiere en la main.

Le

Le travail de ces misérables ne sçauroit estre exprimé: plusieurs tombent en bas à cause que la teste leur tourne, & plusieurs autres par desespoir: vn qui vient à tomber, en tire avec luy toute vne troupe. Ces mines furent decouuertes au Roy d'Espagne l'an 1545. & depuis ce temps iusques à l'an 1585. les quints du Roy monterent à trois millions de poids, & le poids vaut treize reals, & vn quart.

L'argent qu'on en tire est apres purgé en 74. engins d'eau & en trente de cheual. En la valee de Tarapaye il y a vn lac d'eau fort chaude, qui est si rond, qu'il semble auoir esté fait avec le compas: & il a ceste particularité, qu'il ne croist nullement avec la perpetuelle source que l'on void bouillir au milieu, & ne diminue jamais pour vn gros canal qu'on en a tiré.

C V S C O.

S'Ensuit aux dix-septiesme degré du costé du midy la ville de Cusco en vn lieu ceint de montagne. Il y a vn Chasteau basti de si grandes pierres, qu'il semble que ce soit plustost vne oeuvre de Geants, que d'hommes ordinaires, principalement à cause que ces peuples n'auoient des bestes pour tirer, ny l'usage des ferremens. Ceste ville estoit le siege de l'Inga, ou Roy du Peru, & capitale de l'Empire, dans lequel il n'y en auoit nulle autre qui merita le nom de ville, ou pour sa grandeur, ou pour sa police. Elle auoit de grandes rues, mais estroites, & des maisons faites de pierres jointes entr'elles, avec vne merueilleuse industrie: mais les maisons ordinaires estoient basties de bois, & couuertes de paille.

On voyoit à Cusco le riche Temple du Soleil, & les Palais du Roy, où il y auoit vne infinité d'or, & d'argent. Il y auoit vne grande place, d'où l'on auoit tiré quatre chemins aux quatre ports de l'Empire.

Les Roys du Peru pour peupler, & annoblir ceste ville, ordonnerent que chacun Cacique y bastiroit vn Palais, & enuoyeroit demeurer ses enfans, & pour faire paroistre la grandeur de l'Empire, & les diuerses nations qui leur estoient subiectes, ils voulurent que chacun alast vestu à la façon de son pais, & en portast certaine marque à la teste: qui estoit vne belle, & magnifique inuention. Ceste ville fut rebastie à la nouvelle façon l'an 1534. par François Pizarre. Elle a enuiron cinquante mille habitans, & à l'entour en douze lieues deux cens milles.

Q V A L I T É.

La ville de Cusco a vn terroir plein d'agreables, & riches valees, comme sont celles d'Andaguayla, Xaquifane, & Bilcas, & de Sucay. Ceste derniere a l'air si bon, si subtil, & si temperé, & son assiette est si agreable, qu'on ne la sçauoit dignement exprimer: à raison de quoy elle est toute pleine de magnifiques maisons d'Espagnols, & de gros villages bien peuplez. Nos fruits y viennent aussi bien qu'en Espagne. A Cusco on mange des raisins fraiz toute l'annee. Il y a aussi force bœufs, & grande quantité de brebis & de cheuaux qui s'y entretiennent, & y multiplient aussi bien qu'en Europe.

C A S S A M A L A C A, E T A V T R E S.

Ceste place qui est au Leuât de Lima, est capitale d'une noble prouince, & renommée pour la route, & prise d'Atabalippa Roy du Peru, aduenue l'an 1533. de la rançon duquel les vainqueurs s'enrichirent plus que soldats qui furent iamais au monde, encores qu'ils n'en eurent qu'une partie: car cent soixante hommes de guerre touchèrent deux cens cinquante deux mille liures d'argent, & vn million, & trois cens vingt-six escus d'or.

La ville de Cassamalaque est à present peu de chose, mais son terroir est des longs du Peru.

La ville de Plata, & Lima, Cusco, sont les plus grandes, & plus riches, tant en iurisdiction, qu'en reuenu, de celles que les Espagnols ont basti au Peru: mais Potosi, bien qu'elle ne soit ville, ne cede toutesfois en nombre de peuple à Lima, ny pareillement en richesse.

Les autres colonies ne sont pas si grandes, toutesfois on ne doit passer sous silence Guamanga, Guanugo, la Frontera, Loxa, & saint Jacques de Guajachel. Guamanga est presque au milieu de Lima, & de Cusco, & entre la valee de Xanza, & Ande. Quayla (celle là est du territoire de Lima, & celle-cy de Cusco) est esloignée de soixante lieues de Cusco, & presque aux confins on void la ville de Blica à 15. lieues de Guamanga, qu'on estime auoir esté le milieu de l'Empire de Inga, pource que l'on compte autant de Quito à Balca, que de Balca à Chile. Guamanga eust son commencement l'annee 1539. & est fort bien bastie de pierre, & de terre, les maisons sont couuertes de tuille, & on y void plusieurs belles & hautes tours. S'ensuit Leon de Guanuco fondée au mesme temps en vn lieu sain, & dont le terroir est des meilleurs. Ceste ville a sous elle ses pais de Gonchua, Quayla, Tamara, & Bonbom. On entre apres en la Cacapoye, dont la ville capitale est la Frontera, ou Frontiere qui commande encor en la prouince de Guanaca.

Les Capoys sont des plus blancs, & des plus beaux du nouveau Monde. Il y a encore la ville de Loxe fondée par Alfonse de Nercadille l'an 1546. elle se nomme autrement Zarze, sur le bord de la rivièrre de Catamayo.

Il y a plusieurs petites rivières qui courent par son terroir, & le rendent également agréable, & plein de biens. On voit par tout des campagnes semées de maiz, & de nos grains, de vergers chargés d'oranges, de limons, d'autres fruits, & des jardins pleins d'herbes, de fleurs, & un nombre infiny de bestial espars par les montagnes voisines.

Q V I T O.

Mais il est temps que nous entrons en la province de Quito, large de cent milles & longue de deux cens, assise sous l'Equateur, & toutesfois plus froide que chaude. La ville de saint François fondée l'an 1534. & capitale de Quito, est assise en un lieu bas entre des montagnes. Elle est à sept lieux de l'Equateur tirant vers le Nord, à 60. lieux de Port vieil, à 80. de saint Jacques, de saint Michel autant, de Loxe 130. & de Lima, & de Potosi 300.

Q V A L I T É.

L'Esté y commence en Avril, & y dure jusques en Novembre. Les habitans qui sont de moyenne taille sont bons pour le labourage, & sçavent bien conduire le bestial, & il n'y a pais au Peru où les fruits, & les animaux d'Europe profitent mieux, & particulièrement pour le regard des fruits, les sucres, & les oranges.

Les cheures y sont de trois jusqu'à cinq cheureaux d'une portée. Outre les mines ordinaires on en a trouvé une d'argent vis de couleur jaune, qui sent le soufre ainsi qu'on le met au feu. On y trouve de fort grosses cannes pleines d'eau. Entre ces lieux qui jettent du feu sur la cime de ces montagnes, il y en a un merueilleux, veu qu'il jette tant de cendres, qu'il en couvre quelquesfois 200. milles de pais à l'entour, & pousse tant de feu, qu'on le voit de plus de 300. milles loing, & fait tant de bruit, que les tonnerres n'en font pas tant.

La ville de saint François du costé du Levant au pais nommé, de la Cannelle, mais ceste canelle est différente de la commune. L'arbre a les branches & feuilles semblables à celles du laurier, mais plus grandes, & le fruit ressemble au gland, & son escorce, & sa feuille sent de bonne odeur: mais la meilleure chose qui y soit, c'est l'endroit où est le fruit de couleur tannée tirant sur le noir, & plus gros, & plus concave que celui du gland, & chaud, & cordial, de sorte qu'on en use aux douleurs de costé, & de l'estomach & du ventre, & l'on en porte à Quito comme d'autre marchandise. On le rend en poudre avec quelque liqueur. L'année 1587. ce pais fut tout rompu d'un grand tremblement de terre.

SAINTE CROIX DU MONT.

23. **A**yant décrit le Peru, il reste que suivant la trace de quelques Capitaines Espagnols, nous entrons au cœur de ceste grande Presqu'Isle, & voyons ce qui a esté decouvert jusques à present: & ce qui me fait résoudre à en discourir, c'est la ville de sainte Croix du Mont, que les Espagnols y tiennent. Donc entre la rivièrre d'Orillan, & celle de la Plata, on voit au 17. degré Austral une montagne qui est une branche des Andes, qui va jusqu'au détroit de Magellan, & a toujours ses cimes chargées de neige, & de glace. Ayant passé les confins de Cerigans on descend en un pais qui a esté decouvert depuis 30. ans en ça, où il n'y a pas une pierre sur la terre, ou dans l'eau, de la grosseur d'une noix. Vers le Nord on voit une petite montagne où les Espagnols ont basti sainte Croix du Mont, à 17. degrés de l'Equinoctial, à 400. milles de la Plata. Il y a 160. maisons d'Espagnols; entre lesquels il y peut avoir 60. commandeurs.

Q V A L I T É.

Le pais plain est sujet aux inondations des rivières. Les fourmis afin que les eaux ne leur gâstent la récolte, font, principalement au Vapay, comme de petits ramparts de la hauteur d'un bras, peu plus, peu moins, & de tour environ douze ou quinze pieds, où ils conservent leurs grains, & en font plusieurs.

C'est là que se retirent les passants lors qu'ils sont surpris des eaux.

Le Vapay croist & décroist comme le Nil, & va lentement comme la Saonne. On y voit beaucoup d'animaux différents des nostres. Il y a un animal entièrement semblable au pourceau, sinon qu'il se paist d'herbe, & dort en l'eau comme un poisson.

Les Espagnols nomment Sonailles certaines vipères longues d'une brassée & grosses comme une pique. Ils ont certaines enleueures sur la queue de la grandeur d'une noix, qui sont creuses.

creuses, & conioin^{tes} l'une avec l'autre à la façon des jointures des doigts, & l'on tient qu'il en croist une toutes les années. Ces bestes sont si venimeuses, que si l'on en est mordu on meurt aussi tost: mais elles ne voyent à trois pas loing d'elles, & l'on oyt le bruit de leurs enleueures, ou pour mieux dire sonnettes, de vingt pas: il y en a aussi au Brasil.

La Tocca est un oiseau de la grandeur de la corneille, mais il a la poitrine blanche, le bec doré, & de longueur esgale à tout le reste du corps. Il y a des Austruches en grand nombre, & les soldats qui marchent par ce pays, trouuent souuent des monceaux de cinquante œufs, & d'auantage qui leur seruent de prouision, veu qu'un œuf suffit à cinquante soldats.

Le pays produit abondance de cotton, de riz, de maiz, & de diuers fruits: mais il ne porte ny froment, ny vin, lequel on y mene du Peru, & un tonneau de vin s'y vend cent escus ordinairement. Toutesfois ceux du pays font un certain breuuage de maiz, & de miel. Il n'y a pas faute de lacs remplis de poisson: mais S. Croix a une petite riuere miraculeuse, qui n'est large que de deux brassées, fort peu profonde, & ne court qu'environ un lieu, pour ce qu'elle se perd soudain dans le sable: & toutesfois elle pourroit la ville d'eau, & de trois sortes de bons poissons, avec telle commodité & abondance, qu'on les prend avec un seau, ou avec la main, & ceste pesche dure depuis la fin de Februrier iusques à la fin de May. On en void peu le reste de l'année.

M O E V R S.

IL y a en ce pays diuers peuples barbares, & entr'autres les Cerigans, & les Vicarans, qui s'entrefont continuellement la guerre, ou combattent contre les Espagnols, auxquels ils empeschent le passage autant qu'il leur est possible. Dom François de Toledé mit ensemble les forces du Peru pour les dompter, mais en vain: ils mangent la chair des hommes comme nous celle des moutons.

Les Toues leurs voisins, mettent leurs ennemis pris en guerre sur les espauls, & les vont branlant tandis qu'ils marchent.

Les Varays se disent tous esgaulx entr'eux, mais plus grands que leurs voisins, lesquels ils mesprisent en telle sorte qu'ils demanderent à un Predicateur si on les baptiseroit avec une même eau que les autres, si tant estoit qu'ils se fissent Chrestiens. Ils n'ont point de demeure arrestee. Ils exercent leurs fils aux armes presque aussi tost qu'ils sont nez, & leurs armes sont l'arc, & la masse. Ils leur donnent en proie les captifs, & recompensent celui qui en tue quelqu'un avec un coup signalé. Ils les poussent à estre furieux en leur donnant des noms de tygres, de lions, de semblables animaux.

Quelques-uns de ces peuples pour paroistre plus terribles se teignent le corps, & quand la Lune se renouuelle ou est pleine, on dit qu'ils se frappent avec certains poignards d'os pour s'accoustumer aux accidents de la guerre. Ils ne sçauent que c'est que larcin, & l'on n'y vend aucune chose. Ils accompagnent avec les pleurs les morts au tombeau, & reçoient leurs amis venans de loing plaignant les maux qu'ils ont soufferts, tellement qu'il ont des larmes à commandement.

Les originaires du pays d'aupres de S. Croix du Mont cultiuent les terres, & payent aux Espagnols deux liures de cotton filé pour teste toutes les années. Car le cotton sert icy de monnoye, de même que le cacao en la nouvelle Espagne, & la coque au Peru, voire même d'auantage.

Ces peuples vivent longuement & pleins de santé. Ils se plaisent à la chasse & à prendre des oiseaux. Ils mangent des formis rosties, des quenès de cocodrils, des sauterelles, & des viperes, apres en auoir osté la teste, & le foye. Ils vont tous nuds excepté que les femmes portent par honnesteté quelque feuille ou escorce, ou ceinture de cotton assez estroite, & ce apres les nopces: Mais les Espagnols ont introduit dans la ville l'habillement dont on use au Peru.

Quand il fait froid (encore que le pays soit chaud de sa nature, & qu'il n'y souffle nul vent froid) ou ils ne sortent pas du logis, ou bien ils portent quelque tizon en la main pour s'eschauffer l'estomac. Ils portent tous la teste rasee à main droite & à main gauche, & au milieu laissent un bouquet de cheveux. Quelques-uns s'en rasent la moitié, mais les uns du costé droit, les autres du gauche, & la pluspart à l'entour, laissant les cheveux au milieu. Ils disent qu'ils ont receu ceste coustume d'un certain Paicume, à raison dequoy ils nomment Paicume le premier Religieux qui y alla pour prescher l'Euangile.

Quand les femmes enfantent, les hommes se mettent au liét, & font ce que nous auons escrit de ceux du Brasil. Ils ne sçauent compter que iusqu'à quatre. Pour dire cinq ils disent toute la main, pour dire dix les deux mains: pour quelque temps, ils laissent en la maison

autant de bastons qu'ils veulent demeurer de iours dehors, & en portent tout autant, & chaque iour ils en ostent vn, & la femme ou celuy qui demeure au logis vn autre, & de celle sorte ils comptent les iours de l'absence.

Au de là de S. Croix vers le Leuant il y a les peuples Garays, c'est à dire guerriers, qui n'ont rien des autres Tapuys, c'est à dire esclaves. Toutesfois ils estiment les Espagnols, & disent qu'ils sont descendus d'eux. Ils n'oublient iamais vne iniure. Ils mangent la chair humaine de toutes les nations, fors que de la leur. Ils bastissent des maisons hautes, & spacieuses, où plusieurs familles vivent ensemble, chacune à part, bien que sans aucuns entredeux. Ils se percent la levre de dessous, & y pendent quelques choses qu'ils tiennent gentilles. Ils n'ont aucune forme de iustice. Les meurtres ne sont punis que par les parents du mort. Leurs Caciques ne seruent que pour chefs de guerre. Ils ne permettent pas aux Espagnols armez d'entrer en leurs places, dont l'une a pour le moins 500. feux, ou s'ils y entrent avec armes c'est en si petit nombre qu'ils ne peuvent pas entrer en doute, & ils en reprochent leur domination à leurs voisins. A 120. milles loing de là demeurent les Chiquites subiets des Espagnols.

C'est chose remarquable que la langue des Varays s'entend par le Brasil, par le Paragay, & par le pays des Garais, & de leurs voisins, qui est vn grand indice que les susdits peuples ont esté maîtres de tous ces pays. Si bien que de mesme qu'avec la langue Latine, Arabe, & Esclauonne on peut aller presque par tout nostre monde, ainsi avec la langue des Varays, de Cusco, & de Mexique on peut aller presque par tout le Nouveau Monde.

T V C V M A.

13. **E**Ntre Chile, le Brasil, Paraguay, & S. Croix, le Royaume de Tucuma s'estend par l'espace de 200. lieues. Les Espagnols qui coururent iusques là en l'entreprise du Peru y ont cinq colonies, c'est à sçauoir, Salte, Steco, S. Michel, Cordouë, & saint Iacques. Salte est esloignée de Taline dernière terre du Peru de cent trente-six milles, & le voyage en est ennuyeux pour le deffaut de l'eau. Elle est assise en vne vallee longue de 84. milles, & large pour le moins de 30. Il y a tout auprès vne autre vallee qu'on nomme de Calchiqui, qui s'estend du Septentrion au Midy par l'espace de 30. lieues, & est pleine de riuieres, & de gens courageux. Les Espagnols les ont combatus durant plusieurs années en vain.

Finalement vn certain Jean Perez reduisit par amitié à l'obeyssance du Roy d'Espagne le Prince de ceste vallee, qui se fit mesme Chrestien. Mais s'estant apres fasché du mauuais traitement de Perez il se reuolta avec toute la vallee, & demeura 17. ans en ceste sorte. En fin Jean Ramirez avec cent hommes de pied Espagnols, 500. cheuaux, & 300. archers du Peru mit à fin ceste entreprise. Steco est capitale de 50. places. A 150. milles de Steco on void S. Iacques, siege de l'Euesque & du Gouverneur de la Prouince. Cordouë est en mesme assiette que celle d'Espagne, sinon qu'elle a en Hyuer l'air plus froid, & l'Esté plus temperé. Elle est à 60. lieues de Chile, à 240. de S. Iacques, & autant de S. Foy du Paraguay.

Q V A L I T E.

14. **L**E pays est vniuersellement plain, & l'air plus chaud que froid. Il y pleut beaucoup, & les riuieres inondent facilement les campagnes. Les vents y sont si grands qu'ils déracinent les arbres, & forcent les habitans à se retirer en plusieurs lieux sous terre.

La vallee de Salte est pleine de force eaux, & d'une grande quantité de poisson. L'air y est temperé au possible: le terroir y est extrêmement bon, & l'on y trouue force bestail: si bien qu'elle n'a faute que de personnes. Le terroir de Steco abonde en coton, blé, fruits & bestail. Au Royaume de Tucuma le pays est si plain, & si commode, qu'on y va l'espace de deux mille milles en carrosses tout à l'aïse.

P A R A G V A Y S.

LEs Paraguays habitent aux confins de Tucuma, le long de la riuerie dont ils prennent le nom. Pour passer ceste riuerie qui est fort grande, & qui s'espan d bien loing hors de son liêt, il semble que la nature a produit là vne sorte d'arbres qui se nomment zaines & fort à propos. Ils sont plus gros que hauts, & ont la racine & la cime assez petite, mais le ventre large avec la motielle tendre, & l'escorce dure, à raison dequoy on les creuse facilement: & l'on en fait des barques d'une piece, capables de beaucoup de gens. Ce pays fut premièrement decouvert par la mer du Nort par Sebastien Gabor, & par diuers Capitaines Espagnols,

gnols, & puis par la voye du Peru par Diego Royas, & autres. La ville capitale c'est la vraye Foy, puis il y a les villes de l'Assumption, de S. Anne, Bonair, S. Esprit, & S. Sauueur.

L'ESPAGNOLE.

Ceste Isle est nommee par les originaires Hayti, & Quisquava, & par les Espagnols Espagnole & de S. Dominique, & à cause de la ville capitale qu'ils ont bastie. Son tour est de 350. lieues, ou 1400. milles, sa longueur de 500. milles & sa largeur est diuerse, mais où elle s'estend le plus elle n'a que 300. milles de large.

Le milieu de l'Isle est esloigné de l'Equateur vers le Nort pres de 19. degrez, & sa forme est longue d'Orient en Occident. Sa ville principale est celle de S. Dominique, de qui tout l'Isle prend son nom, c'est là qu'est la cour ou le siege de la Iustice où il y a vn President. C'est-là que se tient aussi l'Archeuesque. Il y a en ceste ville cinq monasteres fort celebres, les autres villes sont S. Iean de Neguane, port de Plata, port Royal, Cauana, Xaragua, & quelques autres encores qui ont esté basties par les Espagnols.

QUALITE.

L'Air y est merueilleusement bien temperé, n'estant la chaleur ny la froidure vehemete, combien que sur le sommet de quelques rochers fort haut le froid soit plus aspre. Tout l'annee les arbres sont reuestus de feuilles, car iamais les vnes ne tombent que les autres ne repoussent: tous les arbres, tous les grains, & toutes les herbes qu'on y porte d'Espagne y viennent, & se multiplient au possible, mais on trouue par experience que le froment croist mieux en lieux montueux.

Ce pays a plusieurs havres & riuieres: mais ce qui le rend plus delicieux & commode pour les habitans, c'est l'eau de 4. grands fleuves qui sortants des coupeaux des hautes montagnes, qui sont enuiron le milieu de l'Isle, courent de diuers costez, veu que Luna tend vers l'Orient, Attribunic vers l'Occident, Iacchie vers le Septentrion, & Naibus vers le Midy: tellement que l'Isle est proportionnement diuisee en quatre.

On void en ceste Isle vne cauerne sous vne haute montagne tirant vers l'Orient esloignée de la mer tout au plus de 500. pas, dont l'entree est semblable au portail d'un beau palais. On y oyt le bruit de quelque fleuve impetueux, qui coule rapidement sous des concautez souterreines l'espace de cinq mille traits d'arc: tellement que celuy qui s'en approche de plus prez en demeure demy sourd quelque temps.

Toutes ces eaux se viennent ioindre avec vn grand lac plein de bancs perilleux. D'auantage il y a vn autre grand lac que les Indiens appellent Haguëygabon, & les nostres la mer Calpienne.

Ce lac ayant receu vn grand nombre de fleuves de toutes parts se perd en vn golphe: de sorte que ces rochers spongieux recoiuent les eaux de la mer par quelques conduits & creux souterreains, d'autant qu'on y trouue quantité de poissons de mer, & que l'eau y est salee. Au milieu de ce lac est l'Isle de Guarinsara fort propre pour la pescherie. Les autres lacs de ceste Isle bien qu'ils soient tous petits, sont tous salez. On void aussi là le lac de Magnano si connu à cause de ses bonnes eaux: Il y a icy grande abondance de sel, car on le tire des montagnes comme le crystal. Outre tous ces lacs il y a aussi vn grand fleuve duquel les eaux sont salees, combien que plusieurs petits vaisseaux d'eau douce s'y viennent rendre. Ceste Isle porte aussi de l'or, & l'on dit que les Monts Cabiniens ont des mines pleines de tant d'or que c'est chose incroyable. Ceste Isle porte aussi grande abondance de sucre, de la casse, du gingembre, du mastic, du bois d'aloës, & de la canelle. Auant l'arriuee des Espagnols elle n'auoit que trois sortes d'animaux à quatre pieds: mais maintenant il y a force animaux prieux, si bien qu'on y porte de là en Espagne vn nombre incroyable de cuirs, & de peaux. Il y a aussi de l'azur.

MOEURS.

Les habitans son naturellement oisifs & paresseux, vont tous nuds, & vivent seulement de leur pesche. Auant qu'ils eussent receu nostre religion ils croyoient qu'il y auoit vn premier moteur de toutes choses, mais areste ils estoient pleins d'une infinité d'erreurs. Depuis qu'on y a porté des cannes de sucre on y a fait des meules propres, & basti des boutiques, si bien que les habitans en font aujourd'huy vn grand trafic, & par ce moyen s'enrichissent.

CUBA OV FERDINANDE.

26. **O**N void ceste Isle du Couchant de l'Espagnole, & celle de Iamaïque luy est costé du Midy. Elle s'estend 300. lieues d'Orient en Occident, & la plus grande largeur est de 65. lieues, & il y a beaucoup d'endroits où elle n'est large de plus de vingt. Il y a six villes dont la capitale est celle de S. Jacques, fort cogneue à cause de son fleuve & de son port. On tient que les autres villes ne sont gueres bien peuplées horsmis Hauan, qui est le plus grand abord de l'Isle. La ville de S. Jacques est vn liege Episcopal.

QUALITE'.

AVx enuiron de l'Isle on trouue plusieurs bancs dangereux, veu que vers le Septentrion il y a vn grand tournoyement d'eau: & le coste du Midy est aussi plein de plusieurs petits rochers. La region est montueuse, & pleine de forests, & de riuieres, & de plusieurs estrangs d'eau douce, & pareillement de salee: D'auantage il y a des mines d'or aux montagnes, & le grauiier des riuieres est presque tout d'or; vne certaine vallée à quinze mille pas de S. Jacques est si couuerte de grandes boules de pierre, qu'il semble qu'on les y ait mises pour plairir, bien qu'elles y soient naturellement. Prez du port du Prince il y a vne source qui iette continuellement la poix. Il y a grande multitude de serpens en ceste Isle.

M O E V R S.

Les habitans de ceste Isle prenoient plaisir à apprivoiser les serpens auant qu'elle fust decouuerte. Ils alloient aussi tous nuds comme en l'Espagnole. Le peuple se cōtentoit de ce que la nature produisoit, & tous viuoient en commun.

I A M A I Q V E.

27. **C**este Isle qu'on nomme auourd'huy de S. Jacques est assise entre le 17. & le 18. degré de largeur. Elle a du costé de l'Orient l'Espagnole, du Nord Cuba, du Midy les Isles de S. Bernard, & de Cartagene, & du Couchant les terres de Iucatan ou Fondure, la longueur est de cinquante cinq lieues, sa largeur d'environ 15. & son tour de cent cinquante. Elle cōtient deux villes, c'est à sçauoir Seuille, & Oristagne. Seuille est la principale où est l'Eglise de l'Abbaye, dont Pierre Martyr Anglere Milanois sur prelat, Didaque fils de Colomb subiuqua les habitans de l'Isle & la rendit tributaire à la couronne d'Espagne, l'an 1509.

QUALITE' ET RICHESSES.

Elle iouyt d'un bon air, & assez fertile, nourrit grande quantité de bestail, à cause de ses beaux herbages, & de force belles fontaines qui les arrosent. On dit aussi qu'il y a des mines d'or. On en tire aussi grande quantité de cotton, & de sucre. Il y a plusieurs bonnes riuieres & plusieurs lacs qui y abondent en poisson.

M O E V R S.

Le peuple est tout semblable en façon de viure aux habitans de l'Espagnole, & de Cuba, combien que quelques-vns disent, que ceux de Iamaïque estoient autresfois plus cruels.

LES ISLES DES CANIBALES OV CARIBES.

28. **O**N nomme Isles des Canibales toutes celles qui sont estenduës par vn double rang de l'Orient, & du Midy de l'Espagnole, vis à vis, ou à la veüe de terre ferme. La plus grande part est sans habitans, mais entre celles qui sont habitees, on tient pour premiere, l'Isle de S. Iean que les originaires nomment Boriquen, & ceste-cy est proche de l'Espagnole du costé d'Orient, & a trois cens milles de longueur, & soixante & dix de largeur. Elle abonde en bleds & fruiets, en animaux, & en poissons, comme aussi en or, & l'on y trouue du Gayac fort excellent. Sa ville principale c'est S. Iean où il y a vn fort bon port. Apres ceste Isle Cubaga est renommee par l'abondance des Perles qu'on y trouue. Les habitans de toutes ces Isles sont bruns, & ont peu de cheveux, & de barbe, sont cruels, & mangent la chair des hommes. Les fleches sont empoisonnees: Ils vsent de petits esquifs d'une piece qu'ils nomment Canoes pour aller sur la mer.

DISCOVRS EN GENERAL SVR LE

Nouveau Monde.

FORCES.



Es Estats que le Roy d'Espagne possede au Nouveau Monde sont si grands & si puissans, qu'ils ne doivent craindre les ennemis qui les pour-²⁹ roient attaquer.

Les Espagnols ont en toutes les Prouinces de bonnes places, & avec cela se sont saisis des bouches des riuieres, des ports de Mer, des passages d'importance, & pour le dire en vn mot, de tous les lieux propres à la domination des pays, ou abondances en viures ou riches de mines, ou capables de brider les peuples guerriers, ou des villes de consequence. Du costé du Su, ils n'ont aucun ennemy qui leur puisse donner de l'ennuy. De celuy du Nort ils reçoient quelques-fois du desplaisir des Anglois, qui courent de tous costés pour prendre les flottes, & saccager les ports de mer. Le plus grand dommage qu'ils ayent souffert fut en l'an 1586. quand François Drak Anglois saccagea S. Dominique en l'Isle Espagnole, & Cartagene en la terre ferme. Mais ceste hardiesse des Anglois donna subiect aux Espagnols de penser mieux à la seureté de toutes ces Prouinces, qui se blent fortifiées du costé du Nort par la nature: premierement avec vn grand nōbre d'Isles qui seruent de rāpart, & de deffence à la nouuelle Espagne, & la fortifient avec le grand nombre de bancs, diuerses courantes qu'ils causent, & entr'autres avec vne courante extremement rapide, qui entrant par le Golphe de Para, où l'on l'a nommé bouche de Dragon, puis passant entre Iucatan, & la Cube retourne apres en arriere entre la Cube & la pointe de la Floride, avec tant de vehemence qu'un nauire à pleines voiles ne scauroit aller de ceste sorte. Ceste courante ioincte avec la diuersité des vents, & les autres perils de la mer, mettra tousiours en branle ceux qui n'auront point de ports pour leur retraite. Dauantage le Roy d'Espagne se seruant de ceste faueur de la nature a fait bastir vn fort d'importance en vne Isle proche de la vraye Croix, ville assise sur le riuage de Mexique, & vn autre en la Cube à l'auenue vis à vis de la Floride. La premiere oste aux ennemis la commodité d'éuiter la courante, & la seconde le moyen de s'en seruir. Outre ce il a fait bastir vne forteresse extremement bonne à S. Dominique, ville qui semble estre faite pour la domination de ceste mer, à cause de la cōmodité de son assiette. Et pour conclusion, de mesme que l'assiette de l'Italie semble auoir esté faite par la nature pour dominer la mer Mediterranee: aussi celle d'Espagne semble formee pour commander à la mer Oceane, & l'experience monstre que les Espagnols sont d'une complexion qui les rend capables de souffrir toute sorte de climats, & de contrees.

GOVERNEMENT CIVIL DV NOUVEAU MONDE.

EN tout le Nouveau Monde il y a deux Vice-Roys, l'un de la nouuelle Espagne qui fait sa demeure en la ville de Mexique, & l'autre du Peru qui se tient en la ville de Lima. De ces deux celuy du Peru est de plus grande autorité, pource qu'outre la grandeur des Prouinces subiectes à son gouuernement, il peut depuis quelques années disposer des commanderies vacantes: ce que le Vice-roy de la Nouuelle Espagne ne peut faire. Mais cestuy-cy est plus à desirer pour le voisinage de l'Espagne, pour la beauté de la ville de Mexique, & la ciuilité de la Prouince.

La Iustice est toute maniee par les Cours Royales, dont la Nouuelle Espagne en a cinq, c'est à scauoir à Mexique, S. Dominique, Guatimala, Guadalaiara, & en Panama. Le Peru en a aussi cinq, c'est à scauoir à Lima en l'Imperiale de Chile, à Plata, Quito, & à S. Foy du Nouveau Royaume.

Les Espagnols, & les Indiens ont recours esgalement à ces Sieges, & desquels on ne peut appeller.

Les Espagnols (excepté le Marquis de la Vallee, & quelqu'autre) ont des terres ou peuples en fief, mais cela ne tient que durant la vie de ceux à qui on les donne (& l'on les donne communement aux conquerans) & de leurs fils aînez, ou de leurs femmes, s'ils n'ont point de fils. Ceux-cy tirent des peuples qui leurs ont esté donnez, environ deux escus

Ces nations encore que barbares, dressent les yeux au Ciel aux aduersités & dangers, & 30.
tiennent que c'est la demeure de celuy qui gouuerne toutes choses. Mais il n'appar-
tient qu'aux enfans de la lumiere de cognoistre que ce souverain Seigneur est seul Dieu. Or
cest instinct naturel, & ceste cognoissance de Dieu est plus ou moins claire aux Gentils, se-
lon qu'ils participent plus au moins de l'usage de la raison & de la vertu morale.

Entre les peuples du nouveau monde, les Chichimiques de la nouvelle Espagne, &
certains peuples du Brasil, sont tres-barbares. Car ceux-cy menans vne vie entierement
sauuage, & brutale, sans chefs, sans loix, sans aucune forme de ciuité, ny de police, ne mon-
strent en leurs actions autres discours de raison que celuy dont ils ont besoin pour leur en-
retien. Le sens obscurcit en eux l'entendement, & les passions aueuglent le iugement. Ils
n'esleuent leurs pensees au dessus de la terre, & ne pensent qu'aux choses qui leur sont pre-
sentes.

Ainsi les voisins du Brasil n'ont aucune cognoissance de Dieu, ny de Religion. Mais
pource que l'homme ne peut demeurer sans appuy, il est necessaire que celuy qui ne s'appuie
en Dieu s'assubiettisse, sinon aux faux Dieux, au moins aux Augures, en semblables vani-
tez, & de ceste sorte ces Brasiliens encor qu'ils n'adorent Dieu, ny les idoles, toutesfois
ils sont comme tyrannisez par les Augures, & les charlatans, & se gouernent par les signes
des choses futures.

Les peuples de sainte Croix du Mont, quoy que n'ayans point d'idoles, adorent toutes-
fois le Diable, non pour en obtenir quelque bien, mais pour en euitier quelque mal. Ils par-
lent, & traictent avec luy, & luy presentent diuerses choses, espandent de leur breuuage a son
honneur, & en boient avec grande ceremonie, & n'osent toucher aux fructs de la terre sans
luy en auoir offert les premices. Mais il n'y a chose en laquelle ils se soubmettent plus a luy
qu'en la chasse, & la pesche, qui sont les arts, & les exercices avec lesquels ils s'entretiennent.

Les Varays leurs voisins sortans hors d'eux-mesmes en certain temps de l'annee courent
furieusement aux boys, & aux solitudes, & avec certains sauts, & hurlemens brutaux appel-
lent vn certain Cendire, duquel on raconte diuerses folies, marchent avec ce nom en la bou-
che par des precipices & par des forests d'où y a peine de s'en retirer, marchent sur des char-
bons ardens, & sur des couleures sans en receuoir offence. Les mesmes ont cognoissance
de sept sortes de Demons, & les reuerent de crainte d'estre battus, ou mesmes tuez, & sont
encor fort adonnez aux augures. Ils portent leurs fleches aux deuins, & selon leur iuge-
ment, ou ils les tiennent pour bonnes & heureuses, & les conseruent, ou pour mauuaises, &
malheureuses, & les iettent en l'air.

Mais venons aux peuples quelque peu plus civils. Ceux de Cusco, & les habitans du Pe-
ru confessoient vn Createur del'Vniuers, & vn souverain Prince qu'ils nommoient Viracoca, & Pacacama, & Pacayaia, c'est à sçauoir Createur du Ciel & de la Terre, & l'adoroient
en leuant les yeux au Ciel. Mais ils n'auoient point de mot correspondant au nom de Dieu,
& mesme auourd'huy ils ne sçauent dire Dieu, si ce n'est en se seruant du mot Espagnol.

Les choses susdites font qu'il est aysé de leur persuader qu'il y a vn souverain Dieu, mais
non de leur donner à entendre qu'il n'y en ait aucun autre. Toutesfois ils surpassent en enten-
dement, & en certaine ombre de Religion les Grecs anciens, veu qu'encor qu'ils met-
tent vn souverain Dieu avec vn grand nombre d'autres, toutesfois ils n'attribuent pas des
adulteres, & d'autres vices detestables à leur Viracoca, comme les Grecs faisoient à leur Iu-
piter, ains au contraire ils ne luy attribuent que des choses hautes, & merueilleuses, à raison
dequoy ils le nomment aussi Vaspu, c'est à dire admirable.

Après le Viracoca ceux du Peru adoroient les Astres: & pource qu'entre eux il n'y en a
point de qui la vertu soit plus manifeste, que le Soleil: ils luy donnoient le second lieu, & le
troiesime au Dieu des pluyes & des autres choses qui s'engendrent en l'air, mais principa-
lement au Dieu du tonnerre, pour la terreur qu'il donne aux hommes. Ils croyoient qu'il y
auoit au Ciel toutes sortes d'animaux d'où dependoit la generation, & l'augmentation des
troupeaux, & des autres animaux de leur espee, & pource ils croyoient que chaque sorte de
bestes auoit vne estoille qui luy dominoit, laquelle ils adoroient pour ceste cause, afin que
si l'animal estoit priué elle le conseruast, & le fit prosperer, & s'il estoit venimeux, ou sauua-
ge, elle les en gardast, & deliurast.

Les Varays adorent avec de grands hurlemens, & avec vn mouuement estrange de tout le
corps la Lune nouvelle, & quand le Croissant commence à fin de tirer droit

del'arc, qui est
Bd

leur principal exercice, ils se découpent les bras en plusieurs lieux, & les iambes, & les cuisses afin de courir plus promptement; & apres ils se iettent dessus des cendres des animaux qui sont estimez vistes, & de mesme les femmes se découpent le visage, les cuisses, & les bras, puis les teignent d'un bleu qui ne se perd iamais.

Les Chianes peuples voisins de Croix du Mont, diuisent l'annee en douze mois, auxquels ils font presider autant d'Estoilles qu'ils adorent, leur faisant certains sacrifices, & à celles qui dominēt aux mois des recoltes plus qu'aux autres. Ils les prient, & les inuoquent en criant qu'elles leur soient propices, & fauorables. Les mesmes remarquent superstitieusement le chant des oyseaux, & l'on ne scauroit dire combien ils abhorrent le chant du hibou. Lors qu'on l'entend en quelque lieu les vieillards sortent avec les armes en la main, & le coniu- rent de s'en aller sans faire dommage. Cependant les ieunes gens, & les femmes demeurent au logis, afin que cest oyseau ne leur annonce quelque defaître.

Mais ceux du Peru (pour retourner d'où nous sommes partis) attribuoient encor la di- uinité à la terre, & à la mer, sous les noms de Pacacuma, & Macamoca & pareillement à l'Arc-en Ciel, & à tout ce qui a quelque grandeur, & merueille en soy, aux arbres, aux som- mets des montagnes, aux riuieres, aux rochers d'excessiue grandeur, aux ours, aux couleu- ures, & aux tygres, afin de n'en receuoir aucun dommage. En leurs voyages ils iettoient, & offroient leurs vieux souliers, & choses semblables aux montagnes, aux rochers, & aux che- mises mesmes, afin qu'ils leur donnassent force, & passage. Ils se tiroient les poils des sour- cils, & les offroient au Soleil, aux montagnes, aux vents & aux autres choses dont ils auoient crainte.

Les Guacauilques faisoient offrande à leurs Dieux des dents qu'ils se tiroient. En Cusco ils portoit grand honneur à un Renard qu'ils tenoient en leur Guaque ou Temple. A Menta, qui est en la cōtree du Port-vieil, ils adoroient une Esmeraude de grandeur, & beau- té extraordinaire, se recommandoient à elle en leurs maladies, & luy faisoient diuerses of- frandes. A Cassamalque ils tenoient pour Dieu certaines pierres grosses comme des œufs, & quelques autres plus grandes. Ils estoient superstitieux enuers les fontaines, & les eaux courantes, & s'y lanoient avec diuerses ceremonies pour en receuoir la santé.

En la prouince de Cinaloa qui est par de là la nouvelle Espagne, ils tiennent qu'il y a un Createur, & Gouverneur de l'Vniuers, mais ils n'estendent son gouvernement, & la pro- uidence à l'homme, afin de ne preiudicier à son franc-arbitre. Ils bruslent les morts sans cere- monies, ou les iettent en une fosse profonde de six cents pas.

Ceux de Mechoacan auoient cognoissance du commencement du monde, de la forma- tion de l'homme, du limon de la terre, & du deluge, ce dernier estoit commun à ceux du Pe- ru, & du Brasil, mais avec mille sotises. Ils croyoient que les Dieux d'en haut firent les choses celestes, & ceux d'embas les terrestres, & ils mettoient une mere de tous les Dieux, comme les Grecs faisoient Cybele. Tout art, & tout exercice auoit parmy eux son Dieu, & l'on esti- me que ces dieux ont esté des hommes de merite, qui apparurent à ceux du pays apres leur mort avec diuers artifices du diable.

DE L'IDOLATRIE ENVERS LES TRESPASSEZ.

31. **C**eux du Peru conseruoient soigneusement les corps de leurs Roys decedez, qui estoient à Cusco chacun en sa chappelle, & il y en auoit de plus de deux cens ans. Chacun de ceux-cy laissoit tous les thresors qu'il auoit assemblez pour l'entretien de la chapelle où il vouloit estre enterré, & de ceux qui estoient destinez à la seruir. Chacun d'eux faisoit faire durant sa vie sa statuë de pierre, à laquelle on portoit honneur comme à luy mesme, & du- rant sa vie, & apres sa mort.

On portoit en temps de guerre, & de secheresse ces statuës pour obtenir la victoire, & la pluye, & l'on leur faisoit diuers sacrifices. C'estoit chose generally pratiquée au Me- choacan, & au Peru, & pays circonuoisins de tuer en la mort des autres, leurs femmes, leurs filles, & leurs seruiteurs plus aymez, ou de les enterrer viuants, afin qu'ils ne manquassent de gens qui les seruissent. Ils les tuoient apres diuerses chansons & dances, & ces miserables s'estimoient heureux d'estre ainsi traittez.

Quelques-uns des familiers ou domestiques de l'Inga, & des Seigneurs du Royaume, pource qu'ils ne pouuoient tenir dans la tombe, faisoient quelques fosses aux lieux où le mort auoit accoustumé de passer le temps, ayans opinion que Roy passant par là les mene- roit en l'autre vie à son seruire. Aux obseques de l'Inga ils luy sacrifioient mesmes des en- fans, & teignoient la face du mort de leur sang, tirās une ligne d'une oreille à l'autre. Ils vsoient d'autres ceremonies quand quelqu'un du menu peuple mouroit. Ils mettoient forces viâdes sur la sepulture, & de l'argent, & de l'or, & autres choses de prix dans la bouche, au sein, & en la main

la main du mort, & leur donnoient des habillemens neufs, afin qu'ils fussent garnis pour l'autre vie, veu qu'ils croyoient que les ames des morts alloient errants çà & là, & estoient sujettes à la faim, à la soif, au froid, & au chaud: & pource ils celebrent leur bout de l'an, & y portoient diuerses viandes, & mesmes des estoifes pour s'habiller.

Iean de la Tour Capitaine de Confolue Bizarre, tira d'une sepulture la valeur de cinquante mille escus en estoifes qui auoient esté mises là pour cest effect. En Mechoacan; pource qu'ils croyoient qu'on viuoit en l'autre monde comme en cestuy cy, ils se pouruoient en mourant non seulement de viures, & de vestemens, mais encor de choses appartenantes à l'exercice qu'ils y vouloient faire.

DE L'IDOLATRIE ENVERS LES STATUES.

Ceux du Peru n'estoient pas moins fols autour des Idoles de pierre, & de bois, & pource qu'ils estoient poussez à reuerer les diables pour la peur du mal qu'ils leur faisoient ou pouuoient faire, ils les figuroient en formes terribles. Les diables parloient en plusieurs de ces statues, & respondoient à leurs Prestres.

Les Mexicains outre les statues adoroient encor des Idoles viuantes. Ils prenoient vn prisonnier, & quelquesfois dauantage, qui leur sembloit plus propre pour le sacrifice. Ils l'habilloient & l'accommodoient de mesme façon que l'Idole à laquelle ils vouloient sacrifier, & luy donnoient le mesme nom. Durant tout le temps de ceste representation, qui duroit par plusieurs iours, & quelquesfois des mois entiers, ils l'adornoient & luy portoient honneur comme à l'Idole mesme, & cependant il passoit son temps, & faisoit bonne chere. Quand il passoit par les rues le monde accouroit pour luy faire honneur, & luy offrir diuerses choses. On luy mettoit deuant les enfans, & les malades, afin qu'il les benist, & les remist en santé. Ils luy laissoient faire toute chose à son plaisir, excepté qu'il auoit de iour dix hommes de garde, ou dauantage autour de luy, & de nuict on l'entfermoit dans vne cage. Et quand le temps de la comedie estoit expiré, & qu'il estoit bien gras, ils le tuoient pour le sacrifice, & en faisoient entr'eux festin solemnel.

DE LEURS GUAQUES, OV TEMPLES.

Il y auoit au Peru quelques Guaques communes à tout le Royaume, & d'autres particulieres à chaque prouince. Il y en auoit trois plus fameuses, l'une à quatre lieues loing de Lima qui se nommoit Pacacama, dont les ruines monstrent encor auourd'huy sa grandeur. Le diable parloit en ce lieu, & respondoit aux Prestres, qui alloient consulter ordinairement l'oracle de nuict, ayans le dos tourné contre l'Idole, puis baïssoient la teste, & se ploient avec vn vilain geste, tant le diable ayme la saleté. Ils luy demandoient conseil, & il respondoit d'ordinaire avec vn sifflement aigu, & penetrant, ou avec vn cry horrible.

L'autre Guaque estoit en Gozco, où les Ingues auoient mis tous les Dieux, & toutes les Deesses des nations qui leur estoient subiectes, come pour gages de leur subiectiō & fidelité, & chaque Idole estoit entretenu par sa Prouince avec vne despēce inestimable. On y voyoit entre autres la statue du Soleil d'or massif, tournée avec tel artifice du costé du Leuāt, que lors que le Soleil la frappoit à son leuer, il en sortoit tant de splendeur, à cause de la reuerberation de ses rays, qu'elle redoubloit la clarté du iour. La troisieme Guaque estoit en l'Isle de Titacata dediee au Soleil, pource qu'ils disoient que leurs pays ayans esté bien longuement sans lumiere, le Soleil apparut tout à coup en ceste Isle, & luy rendit le iour & la clarté.

A raison de quoy l'Ingua y bastit vn Guaque magnifique. Mais les Mexicains surpassoient de beaucoup ceux du Peru en grandeur de Temples, & de ceremonies. Il y en auoit vn de l'Idole Vitzilpuitzli avec vn si grand cloistre à l'entour, que dix huit mille personnes s'y assembloient durant leur feste pour y dancer, & ce temple estoit ceint d'une muraille faicte de grandes pierres en forme de serpens. Il y auoit quatre portes tournées vers les quatre parties du monde, & il y auoit vn chemin paué long de six milles & de dauantage, qui respoit à chacune. On montoit au temple par vn escalier de trente degrez, large de trente brassées. Entre les degrez & le temple il y auoit vne petite place large de trente pieds avec vne file d'arbres, & des bastons entrauersés entre l'un & l'autre, chargez de testes de ceux qu'ils sacrifioient. Il y auoit dans la ville huit autres temples de la mesme forme, mais non si grands.

DES PRESTRES ET RELIGIEUX.

Les Prestres estoient à Mexique diuisez en moindres, plus grands, & tres-grands, & ceux-cy se nommoient papes.

De ii

Leur perpetuel exercice estoit d'encenser les idoles ; ce qu'ils faisoient au leuer ou coucher du Soleil, & à midy, & à minuiet. Ils sacrifioient en leurs Temples chacun selon son degré. Outre les Prestres il y auoit des Monasteres de femmes ; il y en auoit au Peru pour le moins vn en chaque Prouince, & là il demouroit deux sortes de femmes, veu que quelques-vnes estoient filles, les autres femmes d'age meur, qu'on nommoit Mamacones, & celles-cy commandoient aux autres, & les instruisoient.

Il y auoit en chasque monastere vn Gouverneur qui luy commandoit, avec puissance de faire choix des ieunes filles qui luy sembloient dignes de celieu pour leur beauté, & leur grace, & celles-cy estoient prises au dessous de l'age de dix-huiet ans. Celles filles ayants pris les ceremonies de leur superstition, & diuerfes choses pour l'usage de la vie, estoient enuoyees à la Cour, lors qu'elles auoient passé l'age de quatorze ans, & là il y en auoit vne partie qui demouroient au seruice des Guaques en perpetuelle virginité : vne autre estoit reseruee pour les sacrifices ordinaires qu'on faisoit de filles, & pour les extraordinaires qu'on faisoit aux occurrences de l'Inga, & vne autre partie estoit donnee en mariage aux parents, & Capitaines del'Inga, ou retenue pour luy mesme. Si quelqu'une de celle-cy se trouuoit peu honneste, on l'enterroit viue, ou bien on la faisoit mourir avec vn grand tourment.

Les Mexicains auoient encor vne certaine sorte de religieuses, dont la profession ne duroit plus qu'un an, & qui demouroient au cloistre du Temple, ou en certaines maisons, & on les nommoit filles de la penitence. Celles-cy ne passioient pas l'age de treize ans, viuoient enfermees avec chasteté, balioient le temple, apprestoient les viandes qu'on mettoit deuant l'Idole, & que les Ministres mangeoient. Elles se leuoient à minuiet pour faire leurs prieres, & par penitence elles se frapportoient au haut des oreilles avec certains petits cousteaux, & mettoient le sang qui en sortoit sur leurs iouës.

On tenoit pour indice de l'impudicité de ces filles si les rats rongeoient quelques choses aux Guaques, ou y passioient par dedans, & lors ils cherchoient soigneusement qui estoit celle qui s'estoit oubliee.

Vis à vis de ces filles il y auoit vn conuent de ieunes gens de dix-huiet à vingt ans, qu'on nommoit religieux. Ceux-cy portoient certaines couronnes semblables à celles de nos moynes avec le reste des cheveux sur les espaules. Ils viuoient en paureté, chasteté, & obeyssance. Ils seruoient à la Guaque, & les Prestres. Il y auoit encor de petits moynes destinez à des seruices plus manuels, & à de vils offices. Ils alloient quatre à quatre, ou six à six partout, avec tant de modestie qu'ils n'osoient leuer leurs yeux, principalement où il y auoit des femmes. Ils cherchoient l'aumosne par la ville, & si l'on ne la leur faisoit ils alloient aux champs prendre ce qu'ils y pouuoient rencontrer, sans que les maistres eussent la hardiesse de les empescher, ou de leur faire outrage, & ceste liberté estoit permise, pource qu'ils viuoient en paureté, sans viure d'autre chose que d'aumosne. A minuiet ils se tiroient du sang du bras, & menoient ceste vie durant vne annee.

Mais parlons maintenant des Prestres. Apres qu'ils auoient donné de l'encens à l'Idole sur la minuiet, ils s'assembloient tous en vne sale, & là assis par ordre se perçoient la iambe, & se frottoient les tempes avec le sang qui en sortoit, puis fichoient les instruments qu'ils auoient employez pour cest effect en certaines balles de paille, à la veüe de chacun, afin qu'on cogneust l'aspre penitence qu'ils faisoient pour le peuple. Ils ieusnoient quatre ou cinq iours auant les festes de leurs Idoles. Ils gardoient la chasteté avec tant de rigueurs, que plusieurs d'entr'eux se fendoient les genitoires pour ne la rompre, & faisoient beaucoup d'autres choses pour se rendre impuissants. Ils ne beuuoient rien qui les peust conuier à la luxure.

DES SACRIFICES.

35. **I**ls sacrifioient à leurs Dieux ce qu'ils auoient de bon & de beau, de l'or, de l'argent, du grain, de la cire, & des animaux.

Au Peru l'on faisoit ordinairement des sacrifices de cent moutons le mois, mais de diuerfes couleurs, & avec ceremonies differentes. Ils sacrifioient tous les iours au Soleil vn mouton rond, & le brusloient vestu d'une chemise rouge. Ils s'arrachent les sourcils, & les offoient au Soleil. Mais il n'y auoit chose plus horrible que les sacrifices d'hommes qui se faisoient au Peru, mais plus en Mexique. Au Peru ils sacrifioient des enfans depuis quatre iusqu'à dix ans, & ce principalement pour la prosperité de l'Inga, aux entreprises de guerre, & au iour de son couronnement : le nombre des enfans qu'on sacrifioit estoit de deux cens. Ils sacrifioient encor vn bon nombre de ces filles qu'on tiroit des monasteres pour le seruice del'Inga. Quand il estoit griefuement malade quelque personnage de qualité,

ou

ou vn devin, ou vn sorcier, il y en auoit vn grand nombre, luy disoit qu'il estoit hors d'espoir de guerison, ils sacrifioient son fils au Soleil, ou bien à Viracoca, en le suppliant qu'il s'en contentast au lieu du pere.

Mais les Mexicains ne sacrifioient que des hommes pris en guerre, & pour en auoir grand nombre, ils ne s'estoient souciez de subiuguer Tlascala, grande ville proche d'eux.

La façon avec laquelle ils traictoient ces malheureux, estoit telle. Premièrement ils les faisoient mettre à genoux par ordre deuant la porte du temple. Le Prestre alloit apres à l'entour de l'idole entre les mains, & le montrant à chacun d'eux luy disoit, voila ton Dieu. Ils estoient menez apres au lieu où l'on les deuoit sacrifier.

Là comparoisoient six de tres-grands Prestres destinez à ce ministere avec des façons si estranges qu'ils sembloient plustost diables qu'hommes. Deux de ceux cy saisissoient la malheureuse victime par les pieds, deux autres par les mains, & vn autre la prenoit par la gorge. Ils la renuersoient ainsi sur vne pierre de figure pyramidale, dont la pointe estoit fort aiguë.

Là le souuerain Prestre luy ouuroit avec vn cousteau la poitrine, & luy arrachoit le cœur qu'il monstroient premierement au Soleil, luy offrant cest cœur & ceste fumee, puis il le iettoit au visage de l'Idole. Ils donnoient puis apres du pied au corps, qui roulant par ces degrez s'en alloit en bas, où ceux qui l'auoient pris à la guerre se le partageoient, & en faisoient festin solennel.

Les nations voisines faisoient le mesme à l'imitation des Mexicains. En quelques festes ils vsoient d'une autre sorte de sacrifices. Ils prenoient vn esclaue, & quelquesfois d'auantage, & l'escorchoient: puis quelqu'un d'eux se couuroit de sa peau, & accommodé de ceste sorte alloit par la ville, où chacun luy deuoit donner quelque chose.

Ceste comedie ou tragedie à mieux dire duroit iusqu'à tant que la peau qu'il portoit se corrompoit sur son dos. Quelquesfois lioient l'esclaue à vne rouë de pierre, & luy donnoient vne espee, & vne targue. Celuy qui le vouloit sacrifier entroit apres dans le camp avec mesmes armes. Si l'esclaue se laissoit vaincre il estoit sacrifié à l'heure mesme, & s'il vainquoit il estoit afranchy, & tenu pour vn grand Capitaine.

Comme le Diable auoit contrefait quelques Sacremens de l'Eglise.

Iustin Martyr, & Clement Alexandrin nous montrent que le diable pour oster la creance, & la merueille aux mysteres de l'Incarnation, & aux œuvres surnaturelles de Iesus-Christ, feignit plusieurs années auparauant quelque chose semblable par le moyen des Poëtes, comme par exemple que Bacchus estoit né deux fois, l'une de Semele, l'autre de Iupiter, afin d'obscurcir la double generation de Christ eternelle & temporelle. Il fit feindre qu'Erichton estoit né de Pallas vierge, qu'Hercule estoit descendu aux enfers, & y auoit lié Cerbere, & semblables choses afin que les hommes ne creussent ou n'admirassent la virginité de nostre Dame, & la descente de Iesus-Christ aux enfers, & les autres diuines actions. 36.

Au nouveau Monde il ne s'est pas seruy des Poëtes pour cest effect, mais il auoit effrontément contrefait luy mesme les Sacremens de l'Eglise, principalement celuy de l'Eucharistie. Car à Cusco les Religieuses du Soleil faisoient certains gasteaux avec de la farine de maiz, & du sang de moutons blancs qu'on sacrifioit ce iour là, & en donnoient vn morceau à chacun des estrangers qui venoient en ce temps à la Cour, comme vn sacrement de confederation & d'union avec l'Inga, & ceux cy receuans ce present avec grand honneur protestoient qu'ils ne penseroient ny feroient aucune chose contre le Soleil, ny contre l'Inga: & que ceste viande demeureroit en leurs entrailles pour tesmoignage de la fidelité & de l'affection qu'ils auoient enuers le Soleil & l'Inga.

Ceste ceremonie se faisoit deux fois l'année, l'une au mois de Septembre, & l'autre en Decembre: & l'on enuoyoit de ces morceaux à toutes les Guaques de la Prouince, afin qu'ils fussent distribuez au peuple.

Mais ce que les Mexicains faisoient estoit bien plus considerable. Deux iours auant la festes de Vizilpuitzli les Religieux de ce temple faisoient de maiz rosty, & de semence de l'herbe qu'on nomme Blite paistrie avec du miel, vn idole de la grandeur de celuy de bois qui estoit au temple. Ils le mettoient apres sur vn banc, & le portoient avec le peuple derriere en procession à grands pas par la campagne, & de là s'en retournoient au Temple. Les filles venoient apres vestues de blanc, avec des guirlandes de fleurs & certaines pieces de pain, de la forme de grands os, & les donnoient aux ieunes gens qui les mettoient aux pieds de l'Idole. Ils nommoient ces pieces les os & la chair de Vizilpuitzli. D d

On voyoit apres paroistre les Prestres & Ministres du temple vestus de leurs ornemens, avec des guirlandes sur leurs testes, & apres leurs Dieux, & leurs Deesses: & ceux cy se met-tans au tour de ces pieces de paste chantoient iene sçay quoy en dansant, & par ce moyen elles demeuroient consacrees, & estoient deslors tenues pour os & chair d'Idole. Ils fai-soient apres les sacrifices des captifs, & despoüilloient apres l'Idole, & en faisoient de mes-me que des autres pastes consacrees, & les distribuoient au peuple, qui les prenoit avec grã-de reuerence, disant qu'il mangeoit la chair, & les os de son Dieu.

Le diable auoit aussi tost contrefait le sacrement de la confession, veu qu'au Peru il y auoit des Princes deputez à ouyr les confessions en forme de grands & petits penitenciers, & avec des cas en partie communs & en partie reservez aux superieurs. Ils tenoient que c'e-stoit vne grande offence de cacher quelque peché en la confession, & si les Confesseurs s'en prenoient garde (à l'effect de quoy ils vtoient d'enchantemens) ils barroient griefuement le penitent avec vne pierre sur les espaules iusqu'à tant qu'il s'en confessoit. Ils se confes-soient en leurs aduersités, pource qu'ils tenoient que leurs pechez en estoient cause, & tout le peuple se confessoit lors que l'Ingue estoit malade. Les pechez dont ils se confessoient estoient tous actuels, & principalement l'homicide, le larcin, l'adultere, l'irreuerence en-uers les temples, & aux iours de festes, les mauuais propos tenus de l'Inga, & leur des-obeyf-sance en son endroit.

L'Ingue confessoit ses pechez non aux Prestres, mais au Soleil, afin qu'il les dist à Viraco-ca, & qu'il les pardonnast, puis se mettant en vn ruisseau courant, il disoit ces paroles. L'ay dit mes pechez au Soleil: toy ruisseau porte les en la mer, où ils demeurent à iamais noyez.

Ils contrefaisoient encore le mystere de la sainte Trinité, veu qu'ils adoroient trois sta-tuës du Soleil, & nommoient l'une Soleil le Pere, l'autre Soleil le Fils, & l'autre Soleil le Frere. Et de mesme il auoient trois statuës du Chuchille, qui estoit Dieu du tonnerre, & luy donnoient les mesmes noms de Pere, de Fils, & de Frere.

Les peuples de S. Croix du Mont ont des cas qui empeschent le mariage qui se va faire, & deffont celuy qui est contracté, & qui ne separent celuy qui est fait, bien qu'illegitime.

Des dispositions du Nouveau Monde à recevoir l'Euangile.

37. **D**ieu disposa les peuples de la nouvelle Espagne, du Peru & des autres pays à vn si estrã-ge changement en plusieurs manieres. Premièrement de mesme que pour faciliter la predication de l'Euangile il pacifia le monde sous l'Empire d'Auguste, ainsi il ordonna que l'Euangile passast à cest autre monde, quand l'Empire de l'Inga au Peru, & des Mexicains en la nouvelle Espagne estoit parueniu au plus haut degré. Et pour monstrier combien la gran-de estenduë de quelque Empire sert à l'aduancement de l'Euangile, ie dy en premier lieu, que sous vn grand Monarque on void ordinairement fleurir la paix, & le repos. La paix ou-ure les ports des Royaumes, & les portes des villes aux commerces, & la communication des peuples, & par consequent à la dilation de la parole & du nom de Dieu. La paix fait florir la doctrine, la vertu, la ciuilité, la police, les bonnes mœurs, & les arts, choses propres à rendre l'homme plus doux, & l'Empire d'un seul est plus capable à maintenir ceste paix.
- Au contraire la multitude des Princes apporte avec elle la des-vnion, d'où procede la guer-re, l'espanchement du sang, & la riuere des villes, & des peuples, de mesme que la vertu, de la foy, & de la religion.

La grandeur de l'Empire apporte encor vn grand bien pour la predication de l'Euangi-le, pource qu'une langue est commune à beaucoup de gens, & est bien loing espandue, pour-ce que la langue des vainqueurs s'estend avec leur domination.

Or au nouveau monde la langue de Mexique estoit estenduë par l'espace de mille lieuës, & celle de Cusco n'auoit pas moins d'estenduë. Car les Roys de Mexique, de mesme que ceux du Peru n'auoient moins de soin d'estendre leur langue, que leur Empire: & combien qu'on vse en ces deux Prouinces de plusieurs langues particulieres, & fort diffetentes en-tr'elles, toutesfois celle de Mexique est belle & riche, & commune à toute la nouvelle Es-pagne, & celle de Cusco au Peru, comme entre nous la Latine, & entre les Turcs l'Esclauon-ne en Europe, & l'Arabique en Asie. Tellement qu'il suffit à ceux qui preschent la parole de Dieu, d'apprendre vne seule langue pour aller par vn pays long de trois mille lieuës au lieu qu'il leur auroit fallu 15. ou 20. langues, voire dauantage. Outre les susdites deux langues il y en a encor quelqu'autres qui s'entendent par plusieurs pays, comme la Gorgotoque, & la Chinoise; mais il n'y en a point de plus vniuerselle que Varayque. On parle ceste-cy par tout le Paraguay & par tout le Brasil. Les Lucatins l'entendent, & plusieurs autres peuples pres-que depuis le destroit de Magellan iusqu'à Sainte Marie.

Le troisieme bien qui naist de la mesme, c'est que la grandeur de l'Empire assemble en vn lieu les peuples espars en beaucoup d'endroits. Car il faut sçauoir qu'en la nouuelle Espagne, & au Peru les peuples auant qu'ils fussent subjugez par ceux de Mexique & de Cusco, viuoient comme bestes, sans chef, sans loy, sans communauté. Chacun s'accommodoit où bon luy sembloit, & passoit sa vie en ce lieu avec sa famille. Ainsi viuent encor aujourd'huy ceux de la Floride, partie des Chichimiques, ceux du Brasil & les Varays. Ils changent facilement de demeure, & se tiennent vn iour en vn lieu, & le lendemain en vn autre. C'est pourquoy s'ils ne sont premierement reduits à viure ensemble, & à arrester leur demeure, on ne les peut instruire en la loy de Dieu.

Or les Roys de Mexique, & de Cusco deliurerent de ceste peine les Predicateurs de la doctrine Chrestienne, veu que pour pouuoir plus aisément disposer des peuples conquis, ils voulurent qu'ils vescuissent ensemble, & que pour cét effect ils bastissent des bourgs & des villes.

Finalement la grandeur de l'Estat & de la domination oste la rudesse aux peuples, & les Cours polissent les esprits, & les esueillent, & meurissent les iugemens, & la diuersité de la conuersation rend l'homme plus accort & plein de prudence.

Les peuples du Peru viuoient au commencement par les montagnes nuds, rudes, & brutaux, mangeoient ce que la terre produisoit, & mesme la chair humaine. Soubs l'Empire de l'Inga ils apprirent avec la ciuilité diuers arts.

Ils labouroient & cultiuoient les terres, ils semoient & recueilloient leurs grains & leurs racines.

Ils auoient soing des mines d'or, d'argent, & d'airain, nourrissoient grande quantité de bestial, les tondoient, & de la laine faisoient des tapis, & des draps, delquels non seulement ils se couuroient, mais encore se paroient, & outre ce bastilloient des places & des maisons d'importance, & pareillement des temples.

Ils auoient quelque forme de iustice, & de raison, & quelque sorte de loix, & d'ordonnances. Mais sans cela tout estoit plein de brutalité, de cruauté, de confusion & de desordre. Or soubs vn grand Monarque les peuples se polissent, & s'exercent à l'humanité, les Superieurs pour sçauoir obeir, & mettre en execution ce qui leur est commandé. Donc la polissure introduite aux Estats des grands Princes de l'Amerique, seruit beaucoup à y introduire l'Euangile, pour ce qu'elle osta la rudesse aux peuples, & les disposa à la douceur qu'on recherche en la vie d'un Chrestien. Et certes l'experience nous montre clairement la verité de cecy, veu que la parole de Dieu fit plus de fruit en vn iour en la nouuelle Espagne, & au Peru, qu'elle n'a fait au Brasil en plusieurs années, ny en la Floride, ny en la Chichimique, & aux Indes, & autres païs, où elle n'a pas trouué les mesmes dispositions. Et de fait, encore qu'ils fussent capables de la doctrine Chrestienne, toutesfois il seroit mal-aisé de les maintenir longuement en bon estat, à cause de leur roulement perpetuel, & de leur demeure incertaine.

C'est chose claire que ceux du Brasil ne se conseruent longuement en la foy, s'ils ne sont près des Portugais: car estans loing d'eux ils retournent soudain au vomissement, ou par l'inclination de la nature, ou par la conuersation des autres. Et pour ceste cause les Religieux qui ont ceste charge, ne les iugent ordinairement propres au baptesme, si ce n'est en quelque forte maladie, ou en l'extreme vieillesse, pource qu'alors les passions qui les combattent sont plus coyées, à cause de la foiblesse de la nature, & leur offusquent moins la lumiere de la raison & de l'entendement, & on leur esloigne les conuersations dangereuses. On peut dire le mesme des Chichimiques & des nations semblables.

DE QUELQUES AVTRES DISPOSITIONS.

Les susdites choses faciliterent la Predication, & la conuersion de l'Amerique comme exterieurement: parlons maintenant des dispositions plus viues, & plus importantes.

La premiere fut le joug des Roys, & les charges insupportables du peuple, car l'Inga du Peru, & le Roy de Mexique chargeoient tellement leurs subiets, qu'ils ne sembloient pas hommes, mais bestes: & ces Princes ne vouloient pas estre honorez comme hommes, mais comme Dieux. On pourra entendre les charges par les choses qui s'ensuiuent.

Le nouveau Roy n'heritoit aucune chose des meubles, & du tresor de son predecesseur, mais il estoit contraint de faire nouvelle maison, & de se pouruoir d'or, d'argent, de draps, & de tout le reste, sans employer les moyens du deffunct, qui estoient tous destinez à l'entretenement de la Guaque, Chappelle & maison du Roy mort, qui estoit soudain mis au nombre des Dieux.

On luy dressoit des statues, on luy ordonnoit des sacrifices, & la maison estoit occupée de generation en generation aux ceremonies, & autres choses inventées à son honneur. Tellement que les subiects estoient continuellement empêchez à ramasser l'or, à creuser les mines, à faire des draps, & à assembler des thresors, sans que ceux qui estoient desia assemblez les allégeassent en aucune sorte.

Outre ce, les peuples du Peru sous les Inques bastissoient des Tambes maintenant, & tantost esplanoient des montagnes, tantost remplissoient les valees pour faire des chemins.

Les Tambes estoient comme de grands magazins faits de tous costez par le Royaume, où l'on mettoit les munitions de guerre, & les viures pour la Cour de l'Inga. Entre les chemins il y en avoit deux faits à la main, qui duroient plus de quinze cens milles, & l'un alloit par la montagne, l'autre par la plaine. On peut estimer le travail de ces deux chemins en considerant l'alpreté des rochers, & la profondeur du sable aux plaines, & cependant il fallut vaincre ces difficultez, & plusieurs autres, sans usage d'instrumens de fer, & sans bestes de charge, & sans chariots, avec le travail des bras seuls. Or il est beaucoup plus aisé de s'imaginer la peine de couper de si gros rochers, & les conduire d'un lieu à un autre, les loger, & les ajuster sans ayde du fer, que de l'exprimer avec des paroles.

C'estoit encores une chose plus insupportable à ceux du Peru, de donner leurs enfans pour estre sacrifiez pour la guerison, & pour le bon succez des entreprises de l'Inga, & d'estre contraincts de s'enterrer eux mesmes en la mort du Roy, & des Caciques.

Lors que Guaynacapa mourut, il y eut mille personnes de sa maison qui furent tuez, & ensevelis avec luy pour le servir en l'autre vie.

Le mesme Roy pour quelque déplaisir receu de certain peuple qui habite entre Quito, & Païto, en fit tuer vingt mille, puis les fit jetter dans un lac, qui fut nommé pour ceste cause Ajarquacoca, c'est à dire mer de sang.

La raison qui a meu ceux du Peru à enterrer leurs familles & leurs richesses avec eux, est, à ce qu'on dit, pource qu'il leur semble quelquesfois qu'ils voyent aller ceux qui sont morts depuis long-temps par leurs possessions qu'ils ont plus aymées, estans parez de ce qu'ils ont emporté avec eux, & accompagnez de leurs familles : à raison dequoy se persuadans qu'en l'autre vie on a besoing de service, d'or, & d'argent, de viures, ils les en pourvoyent le mieux qu'ils peuvent.

Le joug des Loix de la nouvelle Espagne n'estoit pas aussi leger. Motezuma, qui fut le dernier, ordonna qu'aucun du menu peuple ne le regardast au visage à peine de la vie. Quand il voyageoit, luy & ses Barons alloient sur un eschaffaut fait à plaisir, & les autres deçà delà. Il avoit divers Palais de plaisir, de deuil, & d'affaires selon les occurrences. Il avoit une grande maison avec divers appartemens pleins d'animaux terrestres, de poissons, & d'oiseaux de toutes sortes, & pour les poissons de la mer, des estangs d'eau salée, & pour les autres de petits lacs d'eau douce, avec un service inestimable : tellement que la plus grande partie de son Estat estoit occupé apres ses plaisirs. C'est pourquoy ces peuples ont esté si prompts à recevoir la loy de Jesus-Christ, pour l'esperance de quelque soulagement, & ceux qui estoient plus oppressez, bien plus que les autres.

Que dirons-nous maintenant du joug insupportable du diable? Nous en avons parlé cy-dessus au discours de la Religion de Mexique, & des sacrifices qu'on y faisoit d'hommes que l'on tiroit avec tant de cruauté qu'il semble que le diable ne cherchoit pas tant la mort de ces malheureux, que la douleur, & la peine de la mort: mais ie ne laisseray de dire à ce propos une chose remarquable.

Les Prestres des Idoles quand ils voyoient l'occasion propre, alloient trouver les Roys & les Princes, & leur disoient que les Dieux mouroient de faim, & qu'ils eussent souvenance d'eux: à lors les Princes s'envoyoient des Ambassadeurs l'un à l'autre, & s'entredonnoient avertis de la necessité en laquelle les Dieux se trouvoient, les conjoints pour ceste cause à faire levée de gens pour donner la bataille, & afin d'avoir dequoy donner à manger aux Idoles. Ainsi ils marchaient en abondance au lieu destiné, & venaient aux mains.

Tout leur but estoit de prendre des hommes, & de faire le plus de prisonniers qu'ils pouvoient, afin de les sacrifier.

En Mexique le Roy ne pouvoit estre couronné sans avoir premierement fait quelque entreprise, d'où il ramenast un grand nombre de victimes.

Les Mexicains estoient tellement oppressez des diables, par la cruauté, & multitude des sacrifices qu'ils desiroient, qu'ils ne les pouvoient plus supporter : & toutesfois ils n'eussent sceu de quel costé ils se devoient tourner, si la lumiere de la loy de Jesus-Christ pleine de douceur ne se fust offerte à eux : aussi la receurent-ils avec une grande promptitude, & allégresse.

Ceux

Ceux de Mechoacan ² ans entend la renommée de l'Evangile, enuoyerent incontinent des Ambassadeurs à ~~Fernand~~ Cortez, qui s'estoit rendu quelques iours auparauant maistr de Mexique, & le prierent qu'il leur enuoyast la loy, & des Maistres qui l'expliquassent, pour ce qu'ils estoient résolus de quitter la leur comme insupportable & méchante.

Ioseph de la Coste raconte que les Espagnols s'estans vne fois arretez à regarder la tragedie de ces cruels sacrifices, vn ieune homme à qui l'on auoit arrache le cœur, & qu'on auoit apres jetté en bas par les degrez du temple, dist aux Espagnols : Meilleurs, on m'a tué : ce qui engendra vne grande horreur & compassion en eux.

De quelques dispositions prouennës de la malice du diable.

LE diable mesme malgré luy, disposa en quelque sorte ces infideles à la foy, pource que la sagesse de Dieu est si haute & si profonde, qu'elle se sert mesme du mal pour vn bien, & tourne à sa gloire les moyens avec lesquels le diable tasche d'obscurcir son saint nom. Les plus grands mysteres de la foy Chrestienne sont ceux de la Trinite, des personnes diuines, de l'Incarnation, & de l'Eucharistie, qui surpassent infiniment toute lumiere de raison, tout discours humain, & mesme l'intelligence des Anges. Or le diable voulant par son orgueil contrecarrer en cecy la Majesté de Dieu, disposa le Nouveau Monde à la verité par ses tromperies.

Les poincts de la discipline Chrestienne plus difficiles au sens, & plus rudes, sont la confession des pechez, & les autres parties de la penitence. Ceux-cy furent encores rendus bien aisez par la mesme voye, veu principalement que le diable recherchoit de ces miserables de plus grandes austeritez, que Iesus-Christ n'en commande aux penitens : & ce n'est pas chose estrange, pource que le diable est le bourreau de l'homme, & Iesus-Christ en est le Medecin, ains mesme le Pere.

Les Roys mesmes de la nouuelle Espagne quand ils prenoient la couronne, & la possession du Royaume, sacrifioient aux Idoles le sang qu'ils se tiroient avec grande douleur des bras, & des oreilles. Car le diable ne vend rien qu'aux prix du sang. Il acoustuma encores ces gens à la pauureté, chasteté, obeissance & religion, ainsi que nous auons monstre cy-dessus : ce qui fit que les conseils de l'Evangile ne leur semblerent chose entierement nouuelle.

De quelques predictions de la future predication de la Foy.

DIEU voulant disposer le genre humain à la venue de Iesus-Christ, donna non seulement les Prophetes aux Iuifs, mais encores les Sybilles aux Gentils, & ces personnes prononcèrent si clairement la venue du Verbe Eternel au monde, sa vie & sa mort, que leurs œuvres ne sembloient pas predictions de choses futures, mais narrations de quelques euenemens passez. A raison dequoy il fut deffendu aux Chrestiens durant les perlecutions, de lire les vers des Sybilles.

Nostre Seigneur ne laissa aussi le Nouveau Monde sans pareille ayde. Il y eut en l'Isle Espagnole vn Roy nommé Guarionex, qui demanda à vn des Chemes (ils nomment ainsi les Idoles) qu'il luy dist ce qui deuoit arriuer à son peuple apres sa mort, & le Cheme répondit, que dans peu d'annees il viendrait en ceste Isle des hommes qui seroient vestus, & porteroient de longues barbes, qui destruiraient les Idoles, l'ancienne religion du pais & toutes ses ceremonies.

Au pais qui confine avec la riuiera de Plata, vn peu auant la venue des Espagnols, il y eut vn Oriquara beaucoup estimé pour sa bonne vie entre ces nations, qui poussa (comme on peut croire) par le saint Esprit, courut toutes ces contrees, annonçant la venue de certaines gens, qui enseigneroient vne nouuelle Religion, & exhortant chacun à la receuoir, & à laisser la pluralité des femmes : & afin que ceste sienne doctrine demeurast mieux imprimée en leurs esprits, il la mit en certains vers qui se chantent encor maintenant.

En Acuzamil Isle proche de Iucatan, on trouua vne croix haute de deux brassées, à laquelle ceux du pais souloient auoir recours comme à chose celeste & diuine, principalement au temps des grandes secheresses, afin d'obtenir la pluye pource qu'ils auoient semé.

En Mechoacan il y eut vn Prestre de grande autorité & reputation parmy ces peuples, qui leur predict que dans peu de temps la verité leur seroit reuelee, & qui menoit vne vie Chrestienne, comme on a entendu dire à plusieurs personnes qui l'auoient cogneu, & particulièrement à vn qui l'auoit seruy : car il celebrait la Natiuité, & la Resurrection de Iesus-Christ, & pour y apporter plus de deuotion, il se retiroit quelques iours auparauant du bour.

& des affaires. Avec ces œuures, & autres semblables, il s'estoit acquis vne telle reputation de saincteté & de doctrine, que les paroles estoient tenuës pour oracles. Tellement que plusieurs de ceux qui l'auoient pratiqué, dirent apres auoir ouï les Predications de l'Euangile, qu'il ne leur sembloit pas qu'ils ouïssent choses nouuelles. Et l'on ne fut plustost aduertey de la venue, & du progrez de Fernand Cortez en la nouuelle Espagne, que le Roy de Mechoacan l'alla trouuer avec la fleur de son Royaume, & se fit vailal de l'Empereur, voulut estre baptisé, & obtint de Cortez des personnes pour instruire son peuple en la foy Chrestienne.

Dauantage tous les peuples du Peru, & de la nouuelle Espagne, auoient vne ferme creance de l'immortalité des ames, des peines des méchans, & des recompences des bons. Quelques-uns mesmes, comme ceux de Chicora, renoient qu'apres la mort les ames se purgeoient en certains lieux froids, & passioient apres en des pais agreables, où elles menotent vne vie heureuse, & contente.

Ils auoient cognoissance, bien qu'obscure, & pleine de mille fables, ou songes, du deluge vniuersel, & de la resurrection des morts. A raison dequoy au Peru, lors que les Espagnols cherchans les thresors enterrez avec les Princes, & destruisans les sepulchres, dissipoiēt les os des morts, ceux du pais en receuoient vn extreme déplaisir, & les prioient de ne faire pas vn si grand outrage aux ames de leurs ancestres, pource qu'ils croyoient qu'en escartant ces os on empescheroit leur resurrection.

De diuers prodiges & subiects qui faciliterent l'entree de l'Euangile.

39. **L**es Espagnols entrerent au Peru, & en la nouuelle Espagne, avec de bonnes occasions d'estendre & leur Estat, & le Royaume de Dieu: car en la nouuelle Espagne le peuple de Vlascale, qui estoit lors vne ville puissante, & fort peuplée, estoit en guerre avec les Mexicains, & pour se renforcer, s'allia avec Fernand Cortez, qui avec l'ayde des Tlascalans, vint à bout de l'entreprise commencée, & subjuga le Royaume de Mexique, non moins à Iesus-Christ, qu'à l'Empereur, de qui il estoit Capitaine. Mais on auoit desia veu des prodiges inouïs, & des accidents merueilleux, qui ouuroient grandement le passage à l'Euangile, pour l'incroyable estonnement du Roy Motezuma.

En la ville de Cholola on adoroit vn Idole fameux qu'on nommoit Qyetzalcoail: cestuy-cy dit clairement qu'il venoit des estrangers à la conqueste & possession de ces Royaumes. A Tesculo les Dieux predirent que beaucoup de calamitez pendroient sur la teste de Motezuma, & de tout l'Empire de Mexique.

Les Magiciens annonçoient les mesmes choses avec tant de rage de Motezuma, qu'il les faisoit mettre en prison: & pource qu'ils se sauuoient aisément, & s'enfuyoient, il faisoit mourir leurs femmes, & leurs enfans, tant il estoit irrité, & en furie. Apres cela, tournant son esprit, & sa pensee à appaiser l'ire de ses Dieux, il commanda qu'on menast dans la ville vne belle, & grande pierre pour y faire dessus des sacrifices: mais combien que beaucoup de gens fussent assemblez pour cet effet & y fissent tout leur effort, ils ne la peurent mouuoir de son lieu, & mesme tandis qu'ils s'opiniastroient à telle chose, ils otïyrent vne voix qui sembloit sortir de la pierre, & qui leur dist en substance, qu'ils ne se trauaillassent en vain, & qu'il leur estoit impossible de la remuer. Cela entendu, Motezuma commanda que l'on sacrifiast où la pierre estoit arrestee.

On dit qu'alors il sortit encores de là vne voix qui tint ces propos: Ne vous ay-je pas dit que vous ne prissiez plus tant de peine? & afin que vous vous en assiez mieux, ie me laisseray tirer quelques pas, puis ie m'arrestes de nouveau sans que l'on me puisse mouuoir: & cela aduint, veu qu'elle tomba en fin dans vn canal d'eau, & fut apres retrouuee en son premier lieu.

Il apparut encores au Ciel vne fort grande flamme en forme de pyramide, que l'on voyoit environ la minuit, puis au leuer du Soleil, & sur le midy, & ce spectacle dura vne annee. On veid en plein iour courir d'Orient en Occident vne Comette semblable à vne fort longue queue d'un animal avec trois testes.

Le temple se brusla aussi sans qu'il y eust dedans ou dehors aucune lumiere, & sans qu'on otïst aucun tonnerre, ou qu'on vist aucun esclat en l'air: & combien que beaucoup de gens accourussent pour esteindre ce feu, il n'y eut pourtant nul remede. Il sembloit que le feu sortist des murailles mesmes, & qu'il se renforçast avec l'eau, iusqu'à tant qu'il consumma toute chose.

Le lac mesme commença soudain sans aucune occasion apparente à bouillir avec tant de vehemence, que les bastimens proches allerent par terre.

On

On ouyt des voix lamentables, comme d'une femme fort travaillée, & reduite à de grandes angoisses, & ceste voix disoit ces paroles: Helas! mes enfans, l'heure de vostre ruine est arriuee; Où vous pourray-je conduire, afin que vous ne perissiez entierement? On veid diuers monstres à deux testés, qui estans portez deuant le Roy s'éuanouyrent.

Les pescheurs du lac prirent vn oyseau de la grandeur, & couleur d'une grue, mais d'une façon non encores veüe, & le presenterent au Roy, qui en demeura tout estonné.

Cet animal auoit au haut de la teste vne certaine chose comme vn miroir: Motezuma tournant la veüe de ce costé là, veid en plein midy le Ciel, & les estoilles, & en demeura tout estonné, puis se remettant à regarder ce miroir, il veid venir des gens armez du Leuant, qui combattoient furieusement, & faisoient vn estrange carnage de ceux qu'ils rencontroient. Dequoy estant tout troublé, il fit assembler les deuins, qui demurerent aulli estonnez que luy, & ne luy sceurent rendre aucune raison de telle chose, & l'oyseau disparut apres.

En ce mesme temps Motezuma veid venir à luy vn païsan tenu de tous pour homme simple, & veritable, qui luy dist, qu'ainsi qu'il semoit aux champs vn Aigle de grandeur extraordinaire l'enleua à l'impourueu, sans luy faire mal, ny déplaisir, & le porta en vne caverne, où il ouyt dire: Tres-puissant Seigneur, ie t'ay porté celuy que tu m'auois commandé: lors sans voir personne il ouyt vne voix qui s'adressoit à luy avec ces paroles: Cognois-tu cet homme qui est là estendu sur la dure? & lors regardant en terre, il y veid vn homme assoupy d'un profond sommeil, avec des habillemens Royaux, des fleurs, & du parfum qu'on luy brusloit selon l'usage du païs.

Le païsan ayant repris courage, répondit alors: Puissant Seigneur, cestuy-cy me semble estre nostre grand Roy Motezuma. Tu dis vray (luy repliqua-t'il; regarde comme il est profondément endormy, & toutesfois il y a de grandes miseres, & d'estranges accidents qui pendent sur sa teste: il est temps qu'il recoiue la punition de tant d'offences qu'il a commises contre Dieu: Prends ce charbon de parfum qui luy brusle dans la main, & le luy mets au nez, & tu verras qu'il ne sent rien: & pource que le païsan n'auoit la hardiesse de s'en approcher, la voix se remit à luy dire; Ne crains rien, car ie suis beaucoup plus grand que luy, & te garderay de tout mal. Alors prenant courage, il se saisit du charbon, & le mit au nez de Motezuma, qui ne s'en remua pas. Or sus, dit la voix, puis que tu vois combien il est endormy profondément, val' éveiller, & raconte luy tout ce qui s'est passé. Et au mesme instant l'Aigle reprit le païsan, & l'elevant en l'air le rapporta où il l'auoit pris.

Outre ces choses, il faut sçauoir que les Mexicains auoient opinion qu'autresfois vn certain grand Prince qu'ils nommoient Topilchin, les auoit abandonnez, & qu'il deuoit retourner vers eux pour les consoler. Or la nouuelle de la venue de Cortez en la coste Orientale de la nouuelle Espagne, ayant couru iusqu'à eux, ils creurent tous que leur grand amy & seigneur Topilchin estoit reuenu suiuant sa promesse. Ils enuoyerent donques où estoit Cortez cinq Ambassadeurs hommes de qualité, avec beaucoup de riches presens. Ceux-cy estants arriuez où les Espagnols estoient, leur dirent qu'ils sçauoient que leur seigneur Topilchin estoit de retour avec eux, & que son seruiteur Motezuma enuoyoit le visiter, & luy baiser les mains. Cortez se seruant d'une si bonne occasion, feignit d'estre Topilchin, & comme tel accepta les presens, & le compliment. Il ne pouuoit desirer vne occasion plus à propos, pour introduire en ce païs l'Evangile, & le nom de Iesus-Christ. Mais il semble que Dieu ne voulut que la verité de l'Evangile fust introduite par vne feinte, & que les pechez de ces gens, principalement l'idolatrie, la cruauté des sacrifices, & l'orgueil de Motezuma s'opposassent à vne maniere si paisible du changement de ces Estats. Delà vint qu'il y eut tant de reuoltes, de batailles sanglantes, de ruynes de villes, & de pertes d'hommes d'un costé & d'autre.

Les Espagnols entrèrent semblablement au Peru avec vne occasion aussi fauorable. Guaynacapa Inga du Peru eut deux fils, Guacar, & Attahualpa (que les autres nomment Attabalipa) dont Guacar estoit successeur legitime de son pere, & comme tel entra en possession du Royaume: mais son frere luy fit la guerre, & le prit. Dequoy ses subjects estans extremement faschez, & n'ayans assez de force pour le deliurer, firent (comme ils auoient accoustumé aux necessitez) vn grand & solemnel sacrifice à Viracoca, le supplians, que puis qu'ils n'auoient pas la puissance de deliurer l'Inga, leur Seigneur, il voulut enuoyer des gens du Ciel qui le deliurassent.

Ainsi qu'ils estoient en grande esperance d'estre exaucez, ils ouyrent dire que certains estrangers arriuez par mer au Peru, auoient mis en route Attabalipa à Castamalaca, & l'auoient pris prisonnier: si bien qu'estimans que ces hommes (c'estoit François Pizarre, & ses compagnons) estoient arriuez là à cause du grand sacrifice qu'ils auoient fait à Viracoca, ils les nommerent Viracoques, nom qui est demeuré iusques à ce iour aux Espagnols, comme à

des hommes descendus du Ciel, & enuoyez de Dieu. Tellement que comme Dieu ouurit la porte de la nouvelle Espagne aux Espagnols par le discord du Roy de Mexique, & de la Republique de Tlascala, & par tant de prodiges aduenus durant le Royaume de Motezuma, ainsi il ouurit le Peru par la discordance qui estoit entre les fils de Guaynacapa, & par le succez de leur sacrifice, à cause duquel les Espagnols furent estimez enfans de Dieu, & hommes descendus du Ciel.

De l'Ordonnance du Pape Alexandre VI.

Alexandre VI. ayant entendu le découuement de tant de terres neuues, & ce que les Espagnols monstroient d'auoir le courage d'estendre la Religion autant que leur Estat, obligea premierement le Roy d'Espagne, & celuy de Portugal à auoir vn soing fort particulier de la conuersion de ces peuples, & apres pour les animer dauantage à vne œuvre si belle, & si genereuse de la meilleure sorte qu'il pourroit : & pour oster toute occasion de debat entre ces deux Roys, diuisa les entreprises de ces deux nations par la fameuse ligne du partage : & pour oster toute sorte de pretention aux autres Princes qui n'auoient eu part en la despence, ny en la peine, il deffendit generalement à tous d'entrer dans lescdites bornes.

Quelle chose facilita la conuersion des Indiens.

In'y eut iamais pais où l'Euangile fit de plus grands progres, qu'au Nouveau Monde, veu que les peuples entiers s'y conuertissoient, & vn seul pere de l'ordre de S. François en baptisa en plusieurs annees enuiron quatorze cens mille en la nouvelle Espagne, & en cinq ou six ans le nombre des baptizez monta iusques à dix millions, ou à huit, selon les autres. Or les soldats ayderent grandement à ce soudain cours de la foy, veu qu'encore qu'il n'y ayt gens moins propres pour l'introduction de la pieté, & de la foy que les hommes de guerre, & qu'entre le bruit des armes on n'entend la voix des loix ciuiles, & moins encore de l'Euangile, tout plein de douceur & de sainteté, toutesfois la licence des soldats seruit beaucoup aux Predicateurs pour la destruction des Idoles, & des temples de la nouvelle Espagne & du Peru. Nostre nature est de telle sorte, qu'elle ne peut demeurer sans religion, ny sans lieu où elle l'exerce, tellement que si elle n'a cognoissance de la vraye religion, elle s'abandonne aux superstitions, & si elle manque de lieux sacrez faits à la main, elle cherche Dieu aux montagnes, ou aux cauernes. Or les Indiens extremement adonnez à l'adoration de leurs dieux, & par nature & par coustume, estans demeurez sans idoles, & sans Guaques, pource que la furie des soldats, & le torrent de la guerre auoit rompu & abbattu toute chose, allerent facilement aux Eglises, & s'acommoderent à la religion à laquelle ils estoient conuiez par des Predicateurs Chrestiens, principalement à cause qu'elle estoit beaucoup plus douce que l'idolatrie passée: car de mesme qu'un ruisseau trouuant son passage ordinaire bouché, tourne facilement son cours vers le lieu qu'on luy a creusé de nouveau, ainsi l'homme ne pouuant faire son voyage accoustumé, en fait vn semblable, ou qui en approche, & les Indiens n'ayans plus leurs idoles, ny leurs lieux de deuotion de coustume, changerent bien aisément le chemin de leur perte à celui du salut, l'idolatrie à la pieté, & la seruitude du diable au seruice de Dieu.

Les Politiques disputerent si celui qui fait de nouvelles conquestes doit faire tels changemens tout d'un coup, comme firent les Espagnols au Peru & en Mexique; ou bien s'il les doit faire peu à peu comme les Empereurs Romains: mais on peut resoudre facilement ceste question, pource qu'où l'on entre en la conqueste avec vn grand auantage de la fortune, par le moyen de laquelle on vainc toute sorte de difficultez, & lors on peut oster tout empeschement à la fois, ou bien on n'a pas d'assez grandes forces, & lors pource que la puissance manque on se doit seruir de l'art, & gagner par le moyen des occasions & du temps, ce qu'on ne peut effectuer alors avec la force.

Le Turc pource qu'il execute ses entreprises avec vn grand aduantage, apres auoir obtenu vne victoire, & s'estre rendu maistre d'une ville ou d'un Royaume, luy donne aussi-tost la forme qu'il veut, & exterminie aussi-tost les Princes, & les maisons illustres, ou par prerogatiue de sang, ou par grandeur d'autorité, oste la liberté & les biens aux peuples, conuertit les villes en villages, les Palais en cabanes, les Eglises en mosquées ou estables, & les proprieté des fonds en timars: & pour abreger, se rend entierement maistre des biens & des personnes. Mais les Princes Chrestiens, pource qu'ils n'executent pas leurs entreprises avec de si grandes forces suiuent l'autre voye, qui requiert plus de temps & de dextérité. Or retournant d'où nous sommes partis, les Indiens n'ayans plus d'idoles ny de temples où ils recourussent en leurs necessitez selon leur coustume, prindrent aisément le chemin des Eglises Chrestiennes

Chrestiennes qu'ils auoient devant leurs yeux, & embrasserent sans beaucoup de difficulté la foy qui leur estoit preschee.

Les Guaques du Peru furent ruinees par la fureur des soldats & de la guerre, & les plus renommes de ces Guaques estoient celles de Pacacama à quatre lieues de la ville des Roys, où le diable rendoit réponse à ce qu'on luy demandoit. Il y en auoit vne autre à Cusco, où l'on voyoit comme en vn Pantheon, tous les Dieux des Prouinces & nations conquises par les Inques comme ostages de leur fidelité. Il y auoit en la mesme ville plus de 400. autres Guaques. Mais en la nouvelle Espagne la ruine des idoles, & de leur maison proceda non tant de la coustume de la guerre (le propre de laquelle est de consumer & destruire) que de la prudence & du zele de Fernand Cortez qui la cōquit, qui commanda à ses Capitaines & Lieutenans, de ne laisser debout idoles ny temple: tellement que les Indiens ne pouuans aller où ils auoient accoustumé, pour mal-faire, furent aisément introduits aux lieux où ils pouuoient bien-faire.

Des empeschemens de la conuersion des Indiens.

Maintenant que nous auons monstré les dispositions, avec lesquelles nostre Seigneur ⁴¹ aduança la foy, & le cours de la Predication en l'Amerique, il est à propos de parler vn peu de ce qui fut contraire à cet aduancement.

La chose qui empescha plus que tout autre l'edification spirituelle du nouveau Monde, fut la mauuaise opinion qu'on eut au commencement de la capacité de les habitans, veu qu'en partie pour leur pauureté ils estoient méprisez, & en partie pour la rudesse de leurs façons de faire mis au rang des bestes de charge, principalement par des soldats, accoustumiez à faire toute chose avec violence, & à se seruir de tous pretextes, bien que vains, foibles & impertinents, & mesme il y en auoit entr'eux qui ne desiroient pas que les Indiens se conuertissent, afin de n'estre obligez à les traiter plus doucement apres qu'ils auroient receu le Baptême.

Il sembloit que ceste façon de proceder à l'endroit de ces malheureux estoit iustificiee par les vices & les pechez detestables auxquels ils s'estoient plongez, & principalement par la sodomie, l'idolatrie, & la coustume de manger les hommes. Et la chose passa si auant que pour les susdits trois vices les Caribes ou Canibales furent donnez pour esclaves, & cet eut fut estendu par conseil de frere Thomas d'Ortiz, & de quelques autres à tout le reste du temps de l'Empereur Charles 5. en l'annee 1525. A raison dequoy l'insolence des soldats, qui est naturellement de mesuree, se voyant fauorisee de l'auarice des superieurs, conueillee en cela par des personnes religieuses, s'augmenta soudain, & courut comme vn furieux torrent accru par des pluyes & par les neiges fonduës.

L'auarice est de la nature déraisonnable & cruelle, les loix humaines & diuines ne la peuuent arrester, ny la crainte de la mort, ny de l'enfer mesme. Que fera-el e donc aux soldats à la discretion desquels on a remis des peuples foibles? Et que feront-ils aux lieux où estans esloignez de leur Prince, ils se voyent maistres de toute chose? Donques beaucoup de ces gens perirent aux mines de Cibao, en la pesche des perles de Cubaqua, & de Tiraquei, & à la recherche des esmeraudes de S. Marte, & des autres richesses de ce pais. Or plusieurs trouuerent ces choses indignes, & de grande charge à plusieurs personnes d'entendement & de conscience, tellement qu'il y en eut quelques-vns qui escriuirent sur ce subiet, & d'autres qui estans venus à la Cour de l'Empereur Charles V. en traiterent avec luy, & avec le Conseil des Indes.

Or l'Empereur qui estoit de bon entendement, & auoit l'ame assez bonne, ayant entendu ces incōueniens & desordres de ses Estats, & le mauuais traitement qu'on faisoit à ceux du pais, desirant y mettre remede, & décharger sa conscience, mit l'affaire en consultation, où se trouuerent des hommes excellens en pieté & en doctrine: par l'aduis desquels il ordonna finalement l'annee 1543. qu'aucun n'eust la hardiesse d'employer les Indiens aux mines, à pescher des perles, ny à porter les charges, sinon en cas de necessité, & qu'en ce cas ils fussent payez de leurs peines: que les tribus que les Indiens payeroient aux Espagnols fussent taxez, & que tous ceux du pais qui vaqueroient par la mort des Espagnols qui en estoient alors maistres, demeurassent immediatement subiets de la Couronne d'Espagne, & que les Euesques, les Conuents & les hospitaux ne peussent auoir des vaisseaux en Amerique. Avec ces ordonnances & quelques autres, la chose fut reduite à tels termes, que les Espagnols demeueroient tous sans vassaux: ce qui fut cause des guerres qui aduindrent apres, & d'vne rebellion manifeste, qui eut pour chef Pizare, & les rebelles tuerent Blas de Nugnez de Vela, Viceroy du Peru. Pour appaiser ces desordres, l'Empereur depecha au Peru le Licencié de la Galcha, homme fort accort & sage, qui surmonta la force avec la dextérité, & la fure avec la ruse, deffit en vn combat les rebelles, & appaisa toute chose par la prise & mort de Pizare.

Depuis ce temps l'affaire de la Religion, comme aussi celui du gouvernement des peuples, alla beaucoup mieux par le moyen de la paix.

De la diversité des Barbares, & de la façon de prescher l'Evangile.

42. **L**es Escriptuains donnent le nom de Barbares aux peuples dont les mœurs s'esloignent de la raison, & de la commune façon de viure. Et si ceste deffinition estoit vraye, le nom de Barbares (quant à la 2. partie) conuiendrait mieux aux Grecs & aux Latins, qu'aux autres nations. Car si l'on doit appeller façon de viure comme celle que meinent la pluspart des hommes, & si l'on doit appeller Barbares ceux qui s'en esloignent, puis que les Grecs, & les Latins ont vescu autrement que tout le reste, ils deuroient plustost estre nommez Barbares. Disons donc qu'on doit estimer barbares ceux dont les façons & coustumes s'esloignent extraordinairement de la droite raison, ce qui aduient par fierté de courage, par ignorance, ou par rudesse de mœurs.

La fierté est vne certaine brutalité qui a quatre degrez.

Le premier est de ceux qui n'ont cognoissance de diuinité ny de religion, & ceux cy sont de beaucoup de sortes, veu que quelques vns viuent sans Dieu, & sont toutesfois adonnez à des enchantemens & sorcelleries. Et c'est chose admirable que ceux qui ne cognoissent point Dieu au Ciel ny en terre, se soumettent d'autre part à des sorciers & à des enchanteurs. En quoy ils ressemblent à certains cheuaux qui estans terribles de leur nature, & pleins de mespris du fer & du feu, sont d'autre costé ombrageux & retifs, & craignent le bruit d'une charrette, & choses semblables, Tels sont les Chichimiques & ceux du Brasil.

La seconde sorte est de ceux qui ont quelque forme de religion, ou pour mieux dire de superstition, mais sans fondement ou probabilité, & plus semblables à des fables & des songes, qu'à des discours de raison. Tels estoient les peuples de l'Espagnole, & tels sont aujourd'huy les originaires des Isles de Salomon.

La troisieme est de ceux qui adorent diuers dieux & idoles, sans paruenir toutesfois à vn souuerain Prince & Createur.

La quatrieme est de ceux qui tiennent le Createur de l'Vniuers pour souuerain, mais non pour seul Dieu, comme ceux de Cusco. Ceux de la 1. & 2. sorte n'ont aucune forme de ceremonie, ou bien les ont sans solemnité. Ceux de la 3. & 4. les ont legitimes, stables & solennelles, comme les Mexicains & ceux de Cusco.

Le 2. degré de brutalité consiste aux viures, & cecy aduient en deux manieres. Quelques vns sont brutaux, pource qu'ils ne sement, ny se soucient de l'Agriculture, mais mangent comme bestes ce que la terre produit d'elle mesme. Et pource que nostre complexion suit la nourriture, il faut que la nourriture sauage soit suiue d'une complexion & nature sauage. Les autres sont brutaux, pource qu'ils se repaissent de chair humaine, ou indifferemment, ou bien seulement des ennemis pris en guerre, comme ceux de Popayan & de Mexique. Au pais de Popayan, ils mettoient deuant leurs maisons les testes de ceux qu'ils auoient deuorez, sur certaines grosses cannes, pour monstre de leur cruauté & brutalité execrable. En d'autres lieux ils remplissoient de cendre les peaux des ennemis mangez, & les pédoient aux foliues, ou les dispoisoient d'autre sorte. Ils leurs accommodoient le visage avec de la cire, & mettoient aux vns vne lance, & aux autres vne flèche en la main : spectacle veritablement horrible, & c'estoit là leur tapisserie. En quelques endroits de la mesme prouince se persuadants qu'ils feroient sortir les Espagnols du pais avec la faim, ils se resolurent de ne semer pas leurs grains, mais les viures ayans manqué pour ceste cause, non tant aux Espagnols qu'à eux mesmes, ils se mangerent les vns les autres : & pour vn tel manquement de viures, l'Antropofagie fut introduite il y a quelques années parmy ceux d'Arauco, où elle n'auoit iamais esté : mais on ne scauroit ouïr vne chose plus prodigieuse que celle de la vallee de Not sur les limites de Popayan. Les Caciques de ces lieux alloient dans le pais des ennemis à la chasse des femmes, & en emmenoit le plus qu'il leur estoit possible. Ils les tenoient là seulement pour en auoir des enfans qu'ils peussent manger, & de fait ils les mangeoient si tost qu'ils auoient attein l'age de 12. ou de 13. ans. En la vallee de Guaca, ils marioient leurs prisonniers de guerre avec leurs parentes, afin d'en auoir des enfans qu'ils peussent manger, & apres ils mangeoient les esclaves mesmes quand ils n'auoient plus la puissance d'engendrer.

Le 3. degré de la brutalité consiste en la nudité qui est de plusieurs manieres. Car quelques vns n'ayants nul sentiment d'honnesté (qui fut la premiere raison qui poussa Adam à se couvrir) ne couurent pas mesmes leurs parties honteuses, les autres couurent comment que ce soit, ces parties : mais pour le reste ils vont nuds ; les autres sont vestus seulement depuis le nombril iusques aux genoux. Quelques vns, encore qu'ils montrent leur nudité en tout ou en partie, pource qu'ils n'vient d'aucuns habits, se teignent toutesfois le corps de diuerses couleurs

couleurs pour se rendre beaux ou terribles, & portent des pierres de petit, ou de nul prix attachées aux levres, aux nez & aux oreilles, comme font ceux du Brail. Quelques-uns sont entièrement couverts, mais de peaux de bestes sauvages, ou de peaux marines, ce qui n'est toutesfois pas tant brutalité que la rudesse d'un peuple.

La quatriesme sorte consiste en l'habitation, qui est de plusieurs façons.

Les plus barbares n'ont autre demeure que les caavernes, ou les concavitez des arbres, & ce qui sans autre industrie les deffend du vent, du froid, ou de la pluye. Ils passent le jour où ils trouuent à manger, & dorment où la nuit les surprend. Ceux-là ont quelque sorte de police, qui n'ayans point de demeure assisee quant au lieu, l'ont toutesfois établie, quant à la forme. C'est ainsi que vivent les Tartares sur leurs chariots couverts de feutre, & les Arabes aux Adiuarets. Ceux-là arriuent à la perfection de la police, qui non seulement ont des demeures assisees quant à la forme, mais encor quant au lieu, & ceux-cy vivent en des villes, bourgs, villages, ou maisons écartees. Entre ces trois sortes d'habitation il y a ceste difference que les premiers cherchent leur nourriture où la necessité & l'occasion les conduit.

Les seconds menent avec eux des chameaux ou autre sorte d'animaux, dont leur vie depend, & changent non pas de demeure, mais de lieu, selon la commodité de la pasture qu'ils cherchent.

Les derniers estans arrestez quant à leur demeure en un lieu, y tirent tous leurs viures, & autres choses necessaires. Entre les Arabes quelques-uns demeurent en pleine campagne en des Adiuares, & ceux-cy retiennent le nom d'Arabes : les autres aux villes, & ceux-cy sont nommez Mores. Aussi quelques Tartares habitent en rase campagne, & les autres dans des villes, comme ceux du Zanqueray, & toutesfois les Arabes & les Tartares qui campent ainsi s'estiment plus nobles que les autres.

La cinquieme sorte de brutalité consiste au gouvernement. Car quelques-uns entièrement barbares vivent sans aucunes loix, & sans aucuns chefs, tant en temps de paix que de guerre, quelques autres n'ont ny loix ny chefs en temps de paix, mais seulement aux occurrences de guerre, les autres en ont en paix, & en guerre, & ceux-cy se gouvernent par République, comme Tlascala, & Chilolla, ou par Monarchie, qui vient par election comme elle se faisoit en la nouvelle Espagne, ou par succession comme au Peru. Ceux-là sont Barbares qui se gouvernent selon les deux premieres sortes. Et certainement il faut dire qu'au nouveau Monde les premiers habitans ont esté au commencement sans forme de gouvernement : mais que peu à peu quelques hommes plus capables ont persuadé à leurs compatriotes de demeurer ensemble, & de se bastir quelques logis premierement de branches d'arbres, puis de gros bois, & finalement de terre & de pierre. De ceste mutuelle communication nasquirent les loix & les arts qui sont les ornemens de la vie humaine. Quant au viure le premier art fut celui de nourrir du bestial qui a esté fort pratiqué & estimé au Peru, où l'on faisoit grand estat de la multiplication des troupeaux. Ils ne sacrifioient point de bestes femelles, ny ne les tuoient, ou prenoient à la chasse, & s'ils trouuoient quelque beste galeuse ou mal disposée, ils l'enterroient toute viue, afin qu'elle ne gastast le reste.

L'art de filer, de tistre la laine, & de faire les draps premierement pour s'habiller, puis pour se parer, fut comme un rejetton de l'art de la conduite des troupeaux. L'agriculture vint apres, & premierement celle qui a soing des grains, puis elle s'amusa aux fructs & aux arbres. L'architecture & le bastiment des maisons premierement de bois, puis de terre, puis de pierre & de marbre, dont ceux de Cusco & de Mexique eurent cognoissance, mais plus ceux-cy que ceux-là, vint en suite. Mais bien que les uns & les autres fissent des bastimens excellens & pour leur grandeur, & pour leur magnificence, toutesfois ils ne sçauoient pas faire des voûtes, combien qu'ils eussent assez d'esprit & d'art à faire des ponts merueilleux d'une matiere fort foible. Car ils en font de tres-grands sur des riuieres fort larges & profondes, d'une certaine sorte de jones, qu'ils nomment Totara, & aussi de paille, qui pour estre legers ne vont pas à fonds. Ils jettent sur ces ponts beaucoup de jones, & semblable matiere, & les attachant apres bien fermement de l'un & de l'autre costé du fleuve, les hommes & les bestes y passent assurement.

On void sur le canal du lac de Gucuyto, qui est sans fonds, un de ces ponts long de trois cens pieds.

Le compagnon de l'Agriculture c'est le trafic, par le moyen duquel nous communiquons nostre bien aux autres, & tirons à nous le leur.

Le plus grand trafic qu'on ayt decouvert au nouveau Monde a esté celui du sel, de la queue du Cacao, & de la canelle. Les autres arts, & industries vont germant apres de main en main.

Les derniers sont les lettres & les sciences, principalement Speculatives, comme fruits
Ee ij

de la paix, de la seureté, de l'oisiueté & de l'abondance.

C'est pourquoy les lettres humaines florissent aux villes paisibles & parmy des hommes qui sont à leur aise, & les speculatiues s'affinent dans les religions & les cloistres. Car celles-cy requierent de l'attention, & n'ont rien de joyeux & de populaire, comme l'eloquence, la Poësie & semblables choses.

Des choses susdites on comprend que la Barbarie porte avec elle l'incapacité des choses celestes, pour deux raisons, c'est à sçauoir à cause de la brutalité, & de la stupidité. Celle-là regne en la Chichimique, au Brasil, & parmy les Caribes, ceste-cy aux Isles de Barlouent & de Salomon, aux valces du Peru, & en autres lieux. C'est pourquoy l'on ne doit manier l'affaire de la Religion d'une mesme sorte par tout. Parmy les Cannibales deuoreurs, & parmy les autres qui mangent indifferemment la chair humaine, on doit proceder comme avec les ennemis du genre humain, ou comme avec des fols furieux, on les doit rendre premiere-ment capables & de raison, & d'humanité, puis les instruire en la vertu, & en la foy Chrestienne. Et il n'est pas mal à propos mesme d'vser en leur endroiect de la force, & des armes, afin qu'ils se recognoissent pour hommes, & qu'on leur annonce apres l'Euangile. Aristote mesme dit que tels hommes doiuent estre pris comme des bestes, & domptez par force.

Les voisins de telles gens sont ceux qui s'abstiennent de chair humaine, mais vont nuds sans aucune honte, veu qu'il n'y a chose qui distingue plus l'homme de la beste que la honte, pour laquelle Adam se couurit de feuilles de figuier, & receut de Dieu des habits de peaux. Il n'est pas toutesfois permis d'vser à l'endroiect de ceux-cy de la violence & du fer, mais bien de houssine, & de brine, & l'on ne leur doit enseigner la doctrine Chrestienne s'ils n'apprennent premiere-ment la honte & l'honnesteté. Quelques autres n'ont besoing de force ou de violence pour estre retirez de la barbarie, mais plustost de conduite & d'adresse, pour ce qu'ils ne sont farouches, & brutaux comme des loups, ou des tygres, mais fols & stupides comme des brebis & des bestes de charge, & ceux-cy ont plus besoing de menaces que de coups, & de crainte que de force, veu que les caresses & les flatteries seruent de bien peu en leur endroiect. Mais pource qu'en y les vns ny les autres ne perseuerent pas en la foy receüe une fois sous leur Prince naturel, & pource que les Princes & les subiects retournent facilement à l'idolatrie: pour ceste cause il est besoing qu'ils soient sous le gouvernement d'un Prince Chrestien qui en prenne le soing, & maintienne en leur deuoir, & en la foy les peuples & leurs Seigneurs: pource que de mesme que Dieu donnant la forme aux choses naturelles, leur fournit aussi tost les choses qui la doiuent suivre, aussi donnant à ses Vicaires & Ministres le precepte d'enseigner la verité à toute creature, il leur donne pareillement l'autorité de se seruir de moyens propres pour faciliter la conuersion & la conseruation de ceux qui sont conuertis. Et ie ne voy en cecy nul subiect de doute, ou de scrupule, pourueu qu'on vienne à forclorre de tel soing l'ambition & l'auarice. Mesme encor qu'au commencement de l'entreprise du nouveau Monde, on pouuoit douter & mettre en dispute, s'il estoit loisible ou non de prendre le gouvernement & la superiorité, il n'y peut plus auoir aujourd'huy de subiect de dispute, pour le danger des Mahometans & des Anglois. C'est chose certaine que les Mahometans se rendroient maistres des Philippines, & les Anglois de l'Amerique, si les Espagnols ne leur faisoient resistance.

La conuersion du nouveau Monde a commencé par les victoires, & les armes, & a esté pouruiue avec la Predication, & maintenant on la doit continuer en adjoustant à la Predication l'autorité des Magistrats & du gouvernement.

Les Apostres acquirent de l'autorité à l'Euangile par la grandeur des miracles, avec lesquels ils confondirent l'arrogance des Iuifs, & la fierté des Gentils, pource que les Iuifs estoient accoustumez à voir des prodiges & des choses au dessus du cours du Ciel, & des forces de la nature. Au contraire les Grecs estoient enflés de l'opinion de leur doctrine & sagesse. C'est pourquoy à cause qu'il n'estoit pas à propos que les messagers de I. Christ les combattissent par l'affeterie des paroles, ou de la grace des discours, afin que la conuersion du monde ne fust attribuée à des raisons humaines, & à des artifices d'icy bas, les Apostres les conuainquirent avec des miracles & des œuvres impossibles aux forces naturelles, par le moyen desquelles ils faisoient voir que Dieu presché par eux estoit par-dessus la nature, & par consequent beaucoup au dessus de leur sagesse, & toutesfois ils trouuoient de la difficulté à croire que Iesus-Christ crucifié & mort, fust celuy par la vertu duquel se faisoient tous ces miracles: pource que la croix seruoit de scandale aux Iuifs, & estoit tenue des Grecs pour folie: mais au nouveau Monde, pource qu'il n'y auoit point de Iuifs qui se souuinsent de Moyse & des miracles que Dieu auoit faits par son moyen, ny des Grecs qui n'estimaissent aucune chose de celles qui estoient au dessus de leur sçauoir, & qu'il estoit habité par des peuples, ou brutaux, ou stupides, il n'estoit pas besoin de miracles, mais d'aide humaine, avec laquelle

laquelle ces peuples fussent menez à l'usage de la raison ; pource qu'estans arrivez là ils embrasserent proprement la verité, qui leur estoit simplement proposée par les Predicateurs, ou par les Maistres de la doctrine Chrestienne, pource que la lumiere de l'Evangile est si belle & si amiable d'elle mesme, & le joug de Iesus-Christ si leger; qu'il n'a besoing de miracles pour se faire desirer aux hommes, & jamais il n'y eut país où l'Evangile fust plus promptement receu qu'au nouveau Monde. Il y eut plusieurs subjets d'une si soudaine conuersion: mais le principal fut le mauuais estat auquel se trouuoient ses habitans, & la bonté des loix diuines. Leur idolatrie n'estoit pas pleine de sensualité, comme la loy de Mahomet, qui les attirast & les flattast, & d'autre part ils ne cherchoient pas des miracles comme les Iuifs, ou la subtilité de la Philosophie, comme les Grecs; qui méprisoient tout le reste du monde: mais ils estoient simples, sans arrogance & sans presumption, & aymoient peu leurs idoles qui leur donnoient tant de peine, & leurs sacrifices qui leur coustoient la vie & le sang, & pour ceste cause ils se trouuoient tous prests à recevoir vne loy meilleure, & il ne se trouue point de meilleure loy que celle que Iesus-Christ nous a donnée. Dauantage tant plus ils estoient de bas entendement, tant plus ils admiroient le Ciel & les choses celestes, & tout ce qu'on leur proposoit de la grandeur, route Puissance, & Majesté de Dieu, & de la misericorde, douceur & Passion de Iesus-Christ, pource que tant plus ces choses surpassoient leur entendement & capacité, tant plus elles sembloient conuenables à la grandeur de Dieu, & à la bonté infinie de I.C.

Des difficultez qu'on eut en la conuersion des Armeniens.

IL ne se faut pas imaginer que la conuersion du nouveau Monde se soit passée sans beaucoup de grandes difficultez, & que ces roses n'ayent eu leurs espines.

La premiere difficulté fut l'ignorance de la langue, pource que n'y ayant chose qui requiere vne plus grande facilité d'exprimer la conception, & la grace du langage, que les mysteres de nostre sainte foy, la Predication fut commencée en l'Amerique par des personnes qui n'entendoient pas le langage de leurs auditeurs, & n'estoient entendus d'eux. C'est pourquoy ils estoient contrains de se servir de quelques truchemens, qui n'entendans bien ce qu'on leur disoit, donnoient à entendre vne chose pour vne autre, & au lieu d'une doctrine Catholique semoient des erreurs parmy les assistans, & c'estoit vn grand ennuy & empeschement aux vns & aux autres de dire leurs conceptions & ouïr celles des autres par vn tiers, & l'on perdoit beaucoup de temps en toutes choses. Ce desordre s'augmentoït par vn autre qui n'est pas moindre, qui estoit, qu'en ce peu qui se faisoit on n'vsoit pas d'une forme cōmune, & certaine, pource qu'il n'y auoit point de superieur qui eust le soing & l'autorité de donner forme à tant de choses, & par tant de país differens. L'autre difficulté naissoit du deffaut des ouuriers propres à vne entreprise importante, telle qu'estoit la conuersion de l'Amerique. Il y auoit beaucoup de moisson, & peu de gens qui y trauaillassent, & ceux qui s'y employoient n'entendoient, ny n'estoient entendus.

De ces deux difficultez procederent diuers deffauts en la conuersion des Indiens.

L'un fut l'ignorance, avec laquelle les Neofites ou nouveaux Chrestiens demeurèrent, & le peu d'intelligence des choses necessaires au salut, pource qu'estans baptisez sans instruction ils n'auoient gueres autre chose du Chrestien que le baptême, & le demandoient plustost pour contenter leurs Caciques, ou les Espagnols, & pour faire ce qu'ils voyoient faire aux autres, que par vne resolution entiere. Et ces premiers Religieux qui s'y employoient, prenoient si grand plaisir à multiplier le nombre des fideles qu'ils ne passoient plus auant, & estoient meus à cela en partie par la douceur, & consolation que la conuersation des ames porte avec elle, & en partie pour l'impossibilité qu'il y auoit d'entendre à l'instruction de tant de personnes. Tellement qu'ils estimoient que c'estoit mieux fait de les laisser sans catechisme que sans baptême. Ainsi nous lisons que de douze Religieux de l'Ordre de saint François, il n'y en eut aucun qui ne baptisast au moins cent mille Indiens en la nouuelle Espagne, & l'un d'eux en baptisa quatre cens mille. Comment pouuoient-ils donc instruire en la doctrine de Iesus-Christ vne si grande multitude d'hommes rudes, & sauages, principalement puis qu'ils begayoient en la langue de Mexique?

Le pire est qu'en vn si petit nombre d'instructeurs, il y en auoit, & y en a encore plusieurs qui s'employent, & sont employez encor à vn si grand ministere, combien qu'ils fussent & soient de mauuaise vie, peu entendus & pleins de nonchalance.

En la prouince du Paraguay il y auoit l'an mil cinq cens huiante-sept vn Prestre qui auoit charge d'un fort grand país. Cestuy-cy n'vsoit d'autre diligence enuers ceux qui se venoient baptiser que de leur demander s'ils vouloient auoir le nom de Pierre, ou de Iean. Mesme en la nouuelle Espagne, aujourd'huy qu'il y a eu des Euesques, & des Religieux.

Ec iij

en grand nombre, a vn Curé sous sa charge, cinquante, voire soixante & dix villages, & quarante mille de pais, ou dauantage.

Les peuples demeuroient donc autant adonnez à leurs anciennes superstitions, & aussi enclins à l'idolatrie qu'auparauant, pource qu'ayans cognoissance des choses diuines, ils n'éleuoient pas leur esprit plus que d'ordinaire, & demeuroient avec plusieurs femmes ou concubines.

L'autre deffaut qui se rencontra en la conuersion des Indiens, fut qu'à cause que ces premiers Peres baptisoient les Indiens non pas vn à vn, mais à centaines, & à milliers, il aduint que de plusieurs qui couroient au baptême, on demeura en doute s'ils estoient baptisez ou non. Dauantage chacun d'eux ayant plus d'une femme, quelques-uns demeuroient apres le baptême au premier estat, mais la plupart ne sçauoit ce qu'il falloit laisser ou retenir, & les Predicateurs mesmes en estoient en doute

DES REMEDES DES SVSDITS DEFFAVTS.

LE premier qui s'employa à amender la condition des nouveaux Chrestiens del' Amerique fut le Marquis de la Valee: veu qu'outre le bon ordre qu'il donna en la nouvelle Espagne aux choses ciuiles, il pourchassa encor l'an 1524. qu'on celebrast vn Synode prouincial, où il se trouua cinq Prestres, dixneuf Religieux, & six laiz entre lesquels fut ledit Marquis ou Cortez, & frere Martin de Valence Vicaire du Pape. On esclarcit là le poinct du mariage des Indiens, c'est à sçauoir avec quelle femme ils deuoient demeurer, & l'on resolut, que par ce qu'on ne sçauoit la forme de leur contract de mariage, ny le stile qu'ils suiuoient en ce cas, ils retiendroient pour lors celle qu'ils voudroient, en congediant les autres. Mais il n'y eut personne qui aydast plus à la faueur, & au zele des nouveaux Chrestiens de la nouvelle Espagne que Vasco de Quiroga, premier Euesque de Mechoacan, qui fit de fort bonnes ordonnances, & mit en v'sage des institutions vtils au progrez spirituel des Indiens, & mesme pour le temporel, & la memoire en est encor si viue aujourd'huy, qu'il n'y a chose que ces peuples prechent avec plus d'affection que les vertus de ce Prelat. Il osta la multitude des femmes, aneantit l'idolatrie, & les superstitions, pourchassa que ceux qui n'auoient encor receu le baptême fussent premierement catechisez, & instruits, accreut merueilleusement le seruice de Dieu, la saincteté des Eglises, & la reuerence enuers les choses sacrees. Il obtint cecy en pourchassant que les Eglises fussent bien basties, eussent de bons reuenus, & fussent pourueues de tout ce qui estoit requis pour la celebration du diuin office, & pour l'administration des Sacremens. Mais il se rendit principalement remarquable par la charité enuers les pauvres, & necessiteux: dequoy l'on void des marques signalees par tout le Royaume de Mechoacan: veu qu'on n'y void bourg ou village pour petit, & pauvre qu'il soit, où il n'y aye logis pour les pelerins, & hospital pour les malades. Et pour l'entretènement de ces lieux, qui n'ont point de reuenue certain, il y a des compagnies, dont la charge est de pourvoir, & seruir les malades, & de leur donner toutce qui leur est necessaire. Chacun de ceux-cy, qui sont diuisez par contrees, fait sa sepmaine.

Le temps de la contree estant venu, tous, tant hommes que femmes, sortent avec leurs familles, & portent tout ce qui est besoing aux malades pour ceste sepmaine. Chaque contree a vn homme, entre les mains duquel elle remet tout ce qu'elle a appresté pour les malades, comme du vin, de la viande, des seruiettes, des vases, & choses semblables, & cestuy-cy dispense tout selon la necessité des malades. Celuy qui a la charge de tout aduertit ses gens sept iours auparauant, de la sepmaine qu'ils doiuent faire. En ce temps les hommes de la contree font vne grande prouision de bois gros, & menu, & le vont chercher six mille loing, & dauantage, & cependant les femmes font prouision de grain, & choses semblables.

Le temps estant arriué, chacun porte à l'hospital ce qu'il a appareillé, qui du bois, qui du pain, qui de chair, & il y en auoit qui y conduisoient les malades. Car aussi tost qu'on entend que quelqu'un est tombé malade, on void accourir soudain ceux de la compagnie qui le portent à l'Eglise, afin qu'il se confesse & delà à l'hospital, où il est seruy de iour & de nuict avec vn grand soing, & vne charité digne de louanges. Ces coustumes introduites par cet Euesque durent encor aujourd'huy; tellement que ce n'est pas merueille s'il y arriue des choses par lesquelles Dieu monstre manifestement cōbien il prend plaisir aux œures pieuses & Chrestiennes. Ils n'ont pas moins soing du seruice de Dieu, & de l'ornement des Eglises, veu qu'ils estiment que quand tout iroit en ruine, on ne doit toutesfois iamais abandonner l'Eglise.

Ils employent force argent à acheter des images, & des paremens d'autel, & bien qu'ils soient pauvres, & meinent vne miserable & penible vie; toutesfois en ce qui regarde l'ornement

l'ornement des lieux sacrez, & la celebrite des festes, ils n'espargnent leurs biens, ny leur peine, & se priuent des choses necessaires, afin que le seruice de Dieu se face dignement, & avec majeste. Ils desgarnissent leurs maisons de meubles pour en garnir l'Eglise, s'ostent le pain de la bouche, par maniere de dire, pour entretenir le Cure, & quand l'argent leur manque, ils supplent à ce deffaut avec le trauail. Ce qui fut important aussi pour le remede de ces defauts aduenus en la premiere conuersion des Indiens, fut la multitude des Religieux, & la fondation des Conuents des Ordres de S. François, de S. Dominique, de S. Augustin, & de la Mercede, ausquels on a depuis adiousté les Iesuites, & quelques Carmes, les Eglises Cathedrales, les Collegiales, les Academies, les Seminaires, les Conciles des Dioceses & Prouinciaux, les Catechismes imprimez, les visites faictes par les Euesques.


DISCOVRS DE L'ITALIE, DES

ESTATS, PRINCIPALTEZ ET

REPUBLIQUES D'ICELLE.

DE L'ESTAT DE L'EGLISE

SOMMAIRE.

1. RANDEV & estendu de l'Estat du Pape : ses Pays & Principales villes. Et de la seigneurie directe qu'il a ou pretend sur plusieurs Royau- mes.

2. Description de la Ville de Rome, Siege ordinaire des Papes, & de ses Antiquitez. En premier lieu du pont S. Ange.

3. De l'Isle Tiberne. Des Pyramides Colomnes d'enorme hauteur, Thermes & Estuues Antonniennes & autres, Sepultures des Empereurs, Theatres, Arcs, Temples, Portiques.

4. Enceinte de l'ancienne Rome de cinquante milles à present de setze milles.

5. Des portes de Rome diuisees iadis en quatorze regions, auourd'huy en treize, & quels sont les noms d'icelles Regions, tant anciennes que modernes.

6. Ses royes, & les montagnes qu'elle comprend dans son enceinte.

7. Prise & pillée sept fois, & par quelles nations.

8. Description particuliere des Pays & Estats du Pape, & premierement du Latium ou campagne de Rome.

9. Du patrimoine de S. Pierre.

10. De l'Ombrie, & de la Sabine, & leurs principales villes.

11. De la Marque d'Ancone.

12. De la Romagne & sa capitale Ville Raenue, Siege des Exarchats, des Empereurs de Constantinople. De l'origine de l'Exarchat, & quand il print fin.

13. De l'Estat de Ferrare, sa longueur, largeur &

confins.

14. De la Comté de Venise, ses Villes & places murées, entre lesquelles Anignon.

15. Fertilité de l'Italie, & bonné du terroir de la Campagne, Vmbrie, Ferrare, & notamment des champs & prez de Terny fauchez quatre fois l'annee. Du territoire de Ricci, dont l'herbe coupee le iour recroist la nuit suivante presque en mesme hauteur.

16. Bains de toutes sortes à Tinoli, & autres pays. Mines d'Alun à Stolf, Salins d'Ostie, &c. Lins de Foyance, Pastel de Bologne, &c. Manne de S. Laurens en la Campagne, vins de Cesene, Fajance, &c.

17. Des autres choses dont cet estat de l'Eglise Romaine abonde.

18. Des defauts d'iceluy, & premierement de l'air mal-sain de la Campagne de Rome.

19. Romains anciens, enclins aux armes & aux lettres, & leur frugalité admirable. Vin defendu aux filles & aux femmes. Des ceremonies de leurs mariages, & des libelles de repudiation.

20. De leurs obseques & funerailles.

21. Des Couronnes, Triomphes & Ouations.

22. Des festes solennelles des anciens Romains, Agonales, ieux Floraux, &c.

23. Mœurs meslees des Romains de ce temps, à cause de la grande frequentation des Estrangers.

24. Richesses & reuenue du Pape en quoy consiste.

25. Estat & calcul exact des reuenus, & des despences des Papes.

26. Ce que le Pape donne aux Cardinaux : Et ce qu'il despenche en autre chose.

27. Ce que sa Sainteté donne à ses Nonces.

Ec. iij

28. Ce qu'elle donne par an à ses Gardes, Capitaines & gens d'armes.
29. Des forces de l'Estat de l'Eglise Romaine. En quoy elles consistent.
30. De la fortification de Rome faite en divers temps.
31. Des forces maritimes de l'Eglise.
32. Des causes du manquement de peuple en plusieurs endroits d'Italie.
33. Du Gouvernement ancien des Romains. Du Senat institué par Romulus, quel il estoit auant & après la Monarchie; Des Tribuns, Questeurs, Dictateurs, Pretours & autres Magistrats.
34. Du gouvernement & police des Papes, & premierement du College des Cardinaux, & de leur Consistoire.
35. Du grand Penitencier, & sa Jurisdiction.
36. De la Cour de Rome, & des deux Audiencias erigees pour les signatures & expeditions des supplians.
37. De la Chancellerie & ses Officiers.
38. De la Chambre Apostolique, à quel fin establie, & ses Officiers.
39. Du Pretour ou Senateur du Campidoglio: ses trois Lieutenans ou Substitués.
40. Du Vicaire du Pape sur les Prestres, & des douze Chappellains ou Auditeurs des causes du sacré Palais.
41. De la creation des Papes. Et de l'assemblée des Cardinaux, pour l'Eslection d'iceux.
42. De la Religion superstitieuse des anciens Romains. Des Augures, & quel estoit leur art, & façon de deuiner. De l'Institution des Luperces, Potitens, & Pinariens, Flamines Dials, Vestales, Saliens, Pontifes, Feciales & autres Prestres des faux Dieux.
43. Catalogue Chronologique, & succession des Papes jusqu'à present.
44. De l'institution des trois Ordres de Cardinaux, & leurs Titres.



Et Estat (sans y comprendre Beneuent, & Auignon) est aujourdhuy plus grand qu'il ne fut iamais, depuis que Ferrare, Comachie, & Romagnole y ont esté adioustées. Car il a plus de trois milles de longueur, & pres de cent milles de large. Il comprend le Ferrarois, le Bolognois, la Romagne, la Marque d'Ancogne, l'Ombrie, la Sabine, le Perusin, avec vne partie de la Toscane, le Patrimoine, Rome, & le Latium ou la Campagne de Rome. Et en cet espace on cõpte de plus cinquante Eueschez, & pres d'un millier, & demy de personnes. Il y a vne ville du premier rang d'Italie, qui est Rome; vne du second, qui est Bologne, & plusieurs du troisieme & du quatrieme, c'est à sçauoir Ferrare, Peruse, Ascoli, Ancone, Forli, Rauenne, Ferme, Viterbe.

Il y a en cest Estat vne des quatre Duchez instituees par les Lombards, qui est celle de Spolite.

Il y a la plus grande partie de l'Exarchat de Rauenne, puis l'une des Marques d'Italie, qui est celle d'Ancone.

Cest Estat s'estend d'une mer à l'autre, & a sur la mer Tyrrene, ou Toscane, le port de Ciuita vecchia, sur l'Adriatique celui d'Ancone, & de Comacchio, & les bouches du Po, & avec peu de frais on pourroit faire vn fort à Terracine & à Neptun.

Le pays qui tire de Rome au Royaume de Naples se nomme la Campagne de Rome, de mesme que tout celui qui est de l'autre costé vers Florence est appelé Patrimoine, la Marque d'Ancone, & la Romagne font, l'une vers le Royaume de Naples, l'autre vers l'Estat de Ferrare, avec lesquels Bologne confine pareillement, & l'Ombrie tient le milieu. Outre les villes que nous auons desia nommées, cet Estat comprend celles de Rimini, Cesene, Fayence, Imole, Macerate, Camerin, Spolite, Norcie, Rieti, Terny, Narni, Oruicto, Assisi, Foligno, Todi, avec enuiron 30. autres. Outre cela, il comprend la Comté de Venisse, ou d'Auignon, & la ville de Beneuent au Royaume de Naples.

Quant à la Seigneurie directe, les Papes sont souuerains des Royaumes de Naples, & de Sicile, de la Duché d'Urbain, de Parme, & de Messeran, & mesme les Roys d'Angleterre leur faisoient hommage pour l'Angleterre & l'Irlande, auant qu'ils se retirassent de l'obeyssance de l'Eglise.

Mais auant que ie passe plus outre, il me semble qu'il sera fort à propos de descrire pour le contentement des curieux la ville de Rome, capitale de cest Estat, & demeure presque ordinaire des Papes, & de faire mention de ses Antiquitez qu'on pourroit desirer icy, pource qu'il y en a plusieurs qui sont bien aises d'estre entierement informez de ceste maistresse ville du monde.

Pour satisfaire à ce desir, ie commenceray par le Pont S. Ange, que les anciens nomment Pont Elie. Ainsi que vous estes sur ce pont, regardez au bas, & vous verrez dans le Tybre quelques restes du Pont triomphal, par lequel tous les triomphes passoient jadis en s'acheminant au Capitole. En tournant à main droite, on void le Chateau, qui estoit proprement

premierement la sepulture de l'Empereur Hadrian, & au sommet il y auoit vn vase de bronze doré d'admirable grandeur, qu'on void aujourd'huy au milieu de la court descouuerte de S. Pierre.

Mais auant que de partir de S. Pierre on peut aller à Belueder, pour y voir plusieurs belles statues au iardin secret, & spécialement le Laocoon renommé; sur lequel celuy qui est en vn des iardins de Fontainebleau a esté fait. Et en la place de S. Pierre on void l'aiguille qui estoit autrefois derriere l'Eglise, & qui fut mise en ce lieu avec grands frais par Sixte V.

Après cecy il faut venir par derriere, iusqu'à la porte du S. Esprit, & comme on est dehors on void en haut à main droite vne certaine petite Eglise nommée S. Onofrie, & commençant de là iusqu'à S. Pierre Montorio on void tout le costau que les anciens nommoient *Ianiculum*, l'un des 7. montagnes de Rome, & le costau qui est deuant S. Pierre, nommé Vatican, est aussi vne des 7. montagnes.

En regardant de S. Onofrie iusqu'à S. Pierre Montorio en bas, on apperçoit le lieu où estoit le Cirque de Iules Cesar, fort long & large, comme on peut voir allant sur la montagne deuant la porte de S. Pierre Montorio.

Ainsi allant droit en la rue qui va vers Ripa, on vient iusqu'à S. Marie en Trasteuere, au de-là le Tybre, où l'on void maintenant l'Eglise qu'on nommoit auparavant *Taberna meritoria*, des anciens Romains, pource que quand les soldats venoient estropiez de la guerre, on les entretenoit là tout le reste de leur vie. Et deuant le grand Autel, on void le lieu où sortit vne fontaine d'huile à la naissance de nostre Seigneur, qui coula tout le long d'un iour en fort grande quantité.

En marchant tousiours vers Ripa, où l'on vend le vin on void force beaux iardins, maisons & Eglises, au lieu où estoit iadis l'Arsenal des Romains, de la grandeur duquel on peut iuger sur le bord de Ripa, pource qu'on en void les vestiges.

Puis allant vers Ripa, on trouue à main gauche vne Isle, que les anciens nommoient Tyberne, où est maintenant l'Eglise de S. Barthelemy & de S. Iean, où demeurent les *Frate benfratelli*.

Il y eut en ceste Isle deux Temples, l'un de Iupiter Lycaonien, l'autre d'Esculape, & si l'on considere bien ceste Isle, elle est faite comme vn nauire.

Il y a encore en ceste Isle deux ponts pour y entrer, l'un appellé des anciens Pont Fabricce, & l'autre Sexstie, qui n'ont aujourd'huy autre nom, que le Pont à quatre chefs, ou *Ponte quattro Capi*.

Après cecy en passant de l'autre costé de ladite Isle, on va tousiours vers le Trasteuere par vne rue qu'on trouue au pied du pont de l'Isle susdite, & en marchant tousiours droit on vient à vn pont neuf, qu'on nomme aujourd'huy de S. Marie, & que les anciens appelloient *Pons Senatorium*.

Au pied de ce pont on trouue vn Palais tout ruiné, qui estoit selon le bruit commun, le Palais de Pilate: mais les iudicieux disent, que ce fut vn Palais de Nicolas Renze, ou des Ourfins, comme on void encor aujourd'huy sur vne de ses portes en 2. vers. Vis à vis on void vn ancien Temple de la Lune, & de l'autre costé celuy qui estoit dédié au Soleil. Après qu'on les a passez, on apperçoit vn grand marbre blanc, rond, & au dedans semblable à vn visage qu'on nomme vulgairement la Bouche de la Verité, appuyé à l'Eglise de S. Marie en Cosmedin, appelée l'Ecole Grecque, où S. Augustin lisoit. Après l'on vient au pied du mont Auentin, pres duquel on void quelques ruines dans le fleuve où estoit anciennement le pont Sublicie, où Horace Cocles combatist contre toute la Toscane.

Et allant sous ladite montagne pres le Tybre, vers S. Paul, on trouue des vignes à main droite à costé du Tybre, dans lesquelles les Romains eurent cent quarante greniers, qui furent fort grands, comme monstrent les ruines de ceux qui sont en la vigne du Seigneur Iules Cesarin.

Cela passé, on va tousiours vers S. Paul, & l'on trouue vn fort beau pré, où les Romains faisoient leurs ieux Olympiques, & en ce pré vous voyez le mont Testacce tout fait de pots cassez, pource qu'on dit que les potiers demeuroient là aupres, & iettoient leurs pots & vailieux cassez.

On void en regardant vers la porte de S. Paul, vne fort ancienne Pyramide enfermée en vne muraille, qu'on dit estre la sepulture de Sextius.

Puis en prenant le chemin à main gauche de la porte de S. Paul, il conduit à saint Gregoire, où passant le mont Auentin, on voit de grandes ruines de bastiments, & en ce chemin on void vn ruisseau, où les femmes lauent ordinairement au dessous de S. Gregoire; & il faut bien regarder de là, veu qu'on est au plus grand Cirque, où l'on conroit avec les coches,

& où l'on faisoit les batailles navales pour plaisir.

On void aussi trois rangs de colonnes hautes, l'une sur l'autre, qu'on nommoit *Septizonium Seueri*, ou les sept enceintes de Seuer.

Vn peu au dessus on void les Thermes, ou Estuues Antoniennes merueilleuses à voir, & de l'autre costé l'on void pres S. Balbine le Cimetiere de Praxede, & de Basle, mais tout est ruiné.

Marchant apres iusqu'à l'Eglise de S. Sixte par le droict chemin, qui va à S. Sebastien on entre à main gauche dans vne ruelle qui meine à S. Estienne le Rond, ou *Rotundo*, qui estoit anciennement le Temple de Faune, & apres on void certaines murailles hautes, qu'on dit auoir esté des Aqueducs qui alloient au Capitole, & c'est en ce lieu qu'est le mont Celic, que l'on passe iusqu'à S. Jean de Latran, où l'on void le bastiment ancien embelly par le neuf, fait par Sixte V.

Puis on prend le chemin de sainte Croix en Ierusalem, & deuant la porte de l'Eglise, on trouue vn lieu où estoit le Temple de Venus, où les courtisanes de ce temps là souloient tous les ans celebrer leur feste le 20. d'Aoust.

Et quelques-uns disent que le theatre qui est en l'Eglise de S. Croix, estoit celui de Statilius Taurus, beau & grand, comme on peut iuger aisément.

Apres cecy, il faut retourner vers la vieille Rome, & prendre le chemin de la porte Maggiour, qui va à S. Marie Majour, & marchant tousiours droict, on trouue les trophées de Marius, chose belle au possible.

Et venant apres vers Rome, vous passez l'arc de Galien, maintenant nommé l'arc de sainte Vite, qui est encor entier, où estoient attachees les clefs de Tioli, au dessous, pres de l'hostellerie. Ainsi l'on aura veu vn des quartiers de la ville.

Pour considerer d'autre part la ville de Rome, il faut commencer, où l'on void derriere l'Eglise vne grande partie de la sepulture d'Auguste, qui occupoit avec son bois, iusques à l'Eglise de sainte Marie del Popolo, & l'aiguille qui estoit par terre en ceste rue a esté conduite à sainte Marie Majour pour l'y dresser.

La porte qu'on nomme maintenant del Popolo, ou du peuple, & qui fut nommée par les anciens Flaminie, ou Flumentane, est attachée à l'Eglise del Popolo. Ceste-cy a esté agrandie & embellie par le Pape Pie IV. qui a pareillement dressé la voye Flaminie, mais on la pourra mieux considerer quand on ira à la grande vigne de Iule III.

Maintenant il faut retourner en arriere vers la Trinité, sous laquelle a esté le grand Cirque d'Auguste. Et le lieu où l'on voit l'Eglise de la Trinité, allant iusqu'à *Monte Cauallo*, estoit à ce qu'on dit celui des beaux iardis de Saluste.

Allant apres vers le mont Quirinal, qu'on nomme aujourdhuy *Monte Cauallo*, au dessous de la vigne du Cardinal de Ferrare, on voit certaines grottes anciennes, aupres desquelles les Romains faisoient en vne place leurs jeux Floraux, & plusieurs femmes d'amour demouroient en ces grottes, & sur le lieu qu'on peut voir en la vigne dudit Cardinal de Ferrare, il y auoit vn Autel dédié à Apollon.

Il faut apres prendre vne ruelle qui va en haut à *Monte Cauallo*, & y estant paruenue, l'on voit deux cheuaux de marque enuoyez d'Egypte à Neron dont le Palais est aupres, & de l'autre costé on voit l'Eglise qu'on dit auoir autrefois esté le Temple du Soleil; mais ce n'est pas chose vraye, pource qu'on voit aujourdhuy qu'il y auoit vn chemin secret sur de fort belles colonnes, qui venoit de son Palais iusqu'au lieu nommé *Oratorium Neronis*, & l'on voit encore droite vne grande partie de l'Eglise.

Apres il faut prendre le chemin droit qui va aux Thermes, ou bains de Diocletian, & à main gauche proprement aux vignes du Cardinal de Ferrare commençoient les Estuues de Constantin Empereur, qui s'estendoient iusqu'à sainte Suzanne, & de l'autre costé de ces Estuues estoit le Senat des Matrones, & pauures veufues, & orphelins, & auant que les Romains y entraissent, ils visitoient l'Autel d'Apollon, qui estoit vis à vis de ce lieu.

Puis on vient aux Estuues de Diocletian, qui sont telles qu'il semble qu'on ne puisse rien bastir de semblable, & quelques-uns disent qu'il y a au dessous des grottes, dont l'une va au Capitole, l'autre à S. Sebastien, & le troisieme sous le Tibre au Vatican.

On voit apres la rue Pie, qui a esté rendue ainsi droicte, longue & large, par le Pape Pie IV. dont elle porte le nom.

Là on peut voir la merueilleuse & agreable vigne du Cardinal de Ferrare, comme aussi la vigne du Pape Sixte V. avec de beaux bastimens.

On voit encor aupres celle du Cardinal de Carpy, pleine de choses antiques, & modernes, qui sont toutes excellentes.

En ce mesme chemin on en voit vne infinité d'autres toutes belles, mais non pour estre

estre comparees aux trois susdites.

Au bout de ceste belle rue il y a vne porte qui luy est propre, & qui a esté faite par Pie IV, dont elle porte aussi le nom.

On se peut de là transporter iusqu'à sainte Agnes, par la voye Nomentane, où l'on y voit vn petit Temple ancien tres-beau, qu'on dit auoir esté dédié à Bacchus, & pareillement on y voit vne sepulture de porphyre aussi grande, & aussi belle qu'autre qu'on puisse voir. Mais en retournant aux estuues de Diocletian, qui ont esté dediees par le Pape Pie IV. à l'honneur de la Vierge Marie.

Il faut prendre le chemin qui va à sainte Marie Majour, & l'on trouuera sous ceste Eglise, en la vallee, vne Eglise qu'on nomme sainte Potentielle, où estoit anciennement l'Estuue Nouarienne.

Et au dessus sur la montagne, où est maintenant le Monastere de S. Laurens en Valisperne, estoient les Estuues Olympiques qui venoient d'un costé à l'autre.

Et où est l'Eglise de sainte Marie Majour, là mesme estoit anciennement le Temple d'Isis, que les Romains auoient en grande veneration.

Et où estoit la Chappelle de S. Luc pres l'Eglise de sainte Marie iusques en bas, on voyoit le bois sacré à Iunon grande Deesse des Romains.

Auiourd'huy il est incorporé avec la vigne du Pape Sixte.

Au dessus de la vigne de S. Antoine estoit le riche & merueilleux Temple de Diane, où les Romains faisoient leurs sacrifices avec beaucoup de despence. De l'autre costé où est maintenant l'Eglise de S. Martin, on voyoit anciennement le Temple de Mars, qu'on tenoit pour Dieu de la guerre.

Ayant passé ladite Eglise, on trouue vne rue qui mene droit à S. Pierre il Vincola, ou aux liens, mais laissant ceste rue, & prenant la premiere petite rue qu'on trouue, on void dedans vne maison merueilleuse quel'Empereur Tite fit pour son Pontife.

Ayant veu cecy, il faut passer en bas par la premiere rue, entre les vignes, qui conduit à S. Clement Conuent de Religieux, puis venant à l'admirable theatre de Vespasien, nommé le Colisee, on voit vne merueilleuse structure, & masse de pierre, pource que quatre vingts dix mille personnes pouuoient voir de là à leur aise tous les spectacles.

Ainsi qu'on aura passé par apres de l'autre costé, on verra l'arc de Constantin, qu'il fait encor fort bon voir. Et apres du jardin des Religieux de sainte Marie la Neuue, on void quelques restes du Temple du Dieu Serapis. Et allant plus outre on passe l'arc de Vespasien, qu'on luy dressa quand il retourna triomphant de Ierusalem.

Plus auant on void le Temple de la Paix presque ruiné, & vis à vis d'iceluy le mont Palatin, qu'on nomme maintenant le grand Palais, où est vne belle vigne des Farneses.

Pres de ce lieu estoit le Temple de Romulus, qui est conuert en l'Eglise de saint Cosme, & saint Damian, & tout apres le Temple de Marc Aurele, & de Faustine sa femme, fille d'Antonin Pie, le Palais duquel est derriere ledit Temple.

Vis à vis il y auoit vn fort beau Temple dédié à la Deesse Venus, qui est maintenant conuert en vne Eglise nommée de sainte Marie qui deliure des peines d'enfer, ou *Liberatrice dalle pene d'Inferno*.

Et les trois colonnes qu'on void au milieu de la place du Camp des Vaches estoient, à ce qu'on dit, vn pont qui passoit du long du Capitole au grand Palais, & l'on dit que le lac de Curce estoit en celieu.

Puis en l'Eglise qu'on void avec vne porte de bronze pres l'arc de Septimius, estoit, à ce qu'on dit, le Temple de Saturne, le thesor du peuple Romain, qui se nomme auiourd'huy S. Adrian.

L'arc que l'ay dit estoit de Lucius Septimius Seuerus, & est fort beau, & l'on voit en vn coing de la rue vne statue appuyee qu'on nomme Morforio.

De l'autre costé de l'arc où l'on voit trois colonnes, estoit le Temple de la Concorde: là on est au Capitole, au pied duquel estoit le Temple de Iupiter, qui ne fut iamais refait depuis que le Capitole fut bruslé.

Il y auoit encor apres de ce Temple celuy de Ceres, & sur ce lieu l'on voit auiourd'huy vn homme de bronze à chenal, qui est l'Empereur Marc Aurele. Et de ce lieu l'on voit presque la plus grande partie de Rome en fort belle prospectiue. Mais de là il faut faire en priere vn peu de chemin au pied du dos du Capitole, où l'on trouue certaines cisternes profondes faites par les Romains, peut estre pour y tenir le sel, ou le grain, & ces lieux estoient anciennement nommez *Horrea*, ou Greniers.

De là l'on passe pres de S. Marie de la Consolatio, & nō loing de là, on voit l'arc Boaire, ou des boeufs: & l'on y peut aussi voir le theatre de Marcellus, qui est maintenant la demeure

des Saucis, & dans ce theatre estoit le Temple de la Pieté.

Allez prez de là pour aller vers la pescherie, estoient les portiques d'Octavie sœur d'Auguste, mais on en voit à present peu de vestiges.

Plus en là à l'entree de S. Ange de la Pelcherie, on voit les portiques de Septimie Seueré.

Marchant apres iusques à Campo di Fior, ou camp de Fleure, on trouue le Palais des Ourfins, qui estoit anciennement le theatre de Pompee, & son portique estoit derriere.

Là aupres on voit le beau Palais de *Capidi ferro*, ou Teste de fer, & plus auant on trouue celuy des Farnesés fait avec admirable architecture, & plein de belles antiquitez.

Mais pour acheuer de voir Rome, il faut commencer là trois fois au Camp de Mars, ou pour mieux dire à la place Colonne, où l'on void la colonne d'Antonin Pie, de la hauteur de 177. pieds, avec vn escalier fait en limasson au dedans, où il y a 140. degrez, & 56. fenestres.

Avant ven cecy il faut aller à la place de Charre, & tourner à main gauche, ainsi qu'on est à l'espicerie, qui va en bas iusqu'aux Vierges Vestales; Temple autrefois fort estimé des Romains, & maintenant plein d'orphelins. Avant veu cecy, il faut retourner à la mesme rue par laquelle on est venu, & aller tousiours droit vers S. Marc iusqu'à ce qu'on est parvenu à vn lieu nommé *Marcello de Corui*, & là l'on verra la Colonne de Trajan, qui est de la hauteur de 123. pieds, & l'escalier qui est au dedans a 155. degrez, & le fenestres sont au nombre de 45.

Puis retournant en arriere on void l'Eglise de Minerue, qui portoit autrefois le mesme nom: mais fust apres ruinee avec vn autre bastiment. Mais j'auois oublié que si l'on desire voir des choses rares tant en sepulture qu'en peinture, il faut demander au mont Citorien la maison de Ierosime Garimbert, veu qu'on y verra beaucoup de choses toutes rares.

Non gueres loing de là del'autre costé l'on voit le Pantheon, aujourdhuy nommé la Rotonde, lieu tres ancien & tres beau, basti par Marc Agrippe.

Là aupres du costé de derriere où l'on vend maintenant des tables de bois, on voyoit autrefois les estuues d'Agrippa.

Et derriere S. Eustache on voyoit les estuues de Neron qui sont en partie au Palais de Madame: vous en verrez autour de belles restes. Il a maintenant vn Palais basti par l'Abbé Vento.

Ayant passé la place de Madame vous entrez en celle de Nauone, où tous les Mercredis on tient le marché; mais les Romains la firent pour leurs jeux, & spectacles.

4. Au pied de ceste place sous le grand Palais des Ourfins, on void la statuë de Pasquin, & ce sont là toutes les antiquitez qu'on peut voir à Rome, que ie vous ay descrites le mieux qu'il m'a esté possible. Toutesfois auant que la quitter j'en diray encor quelque chose.

Rome contenoit au temps de Romule, le Mont Capitolin, & le Palatin, avec les valles qui sont au milieu, & auoit trois portes, la premiere se nommoit Trigonie, pour le triangle qu'elle faisoit pres du pied du mont Palatin: la 2. Pandane, pource qu'elle demouroit continuellement ouuerte, & elle fut aussi nommée Libre, pour la commodité de l'entree: la 3. Carmentale, de Carmente mere d'Euancre qui y habita, & fut nommée *Scelerata*, ou meschante, & coupable, à cause de la mort des 300. Fabiens qui sortirent par là, & moururent tout pres de la riuere d'Aron en vn iour. Mais par la ruine de la ville d'Albe, & la paix des Sabins avec les Romains, ils commencerent à accroistre le tour de la ville, & l'aggrandirent tellement, y enfermant les sept montagnes qu'on y void à ceste heure, qu'au temps de l'Empereur Claude on y trouuoit 630. tours, & vingt-deux mille portiques. Et quant au tour de ses murailles quelques auteurs disent qu'il estoit de cinquante milles, les autres de 32. & les autres de 28. mais de nostre temps avec le Trasteuere, & le faux bourg S. Pierre. Rome n'a de tour que seize milles.

Quant aux portes on trouue difference chez les auteurs, tant pour le regard de leur nombre que leurs noms: veu que les vns en mettent trente, & les autres 24. mais à present il y en a seulement 18. ouuertes, qui enferment les sept Monts, & toute la ville se trouue diuisée en 14. regions.

5. La principale est celle du Peuple, ou del Popolo, nommée anciennement Flaminia, & Flumentana.

La Pinciane, nommée Collatine.

La Salaire, dicté autrefois Quirinale, & Agonale, & ce fut par elle qu'entrèrent les Gaulois Senonois, quand ils saccagerent Rome.

Celle

Celle de sainte Agnes, jadis Nomentane, Figulense, & Viminale.

Celle de S. Laurens, jadis Tiburtine, & Taurine.

La Majour, jadis Labicane, Prenestine & Neuie.

Celle de S. Iean, jadis Celimontane, & Septimie, & Asinaire.

La Latine, jadis Florentine.

Celle de S. Sebastien, jadis Appie, Fontinal, & Capene. Ce fut l'entree de celuy des trois Horaces, qui vainquit les Curiaces, & aussi de la plupart des triomphes.

Celle de S. Paul, jadis Ostiense, & Trigemine, & ce fut par celle-cy que les trois Horaces sortirent.

Celle de Ripe, jadis Portuense.

Celle S. Pancrace, jadis Aurelie.

La Septimiane, jadis Fontinale.

La Terionne, jadis Posterule.

La Pertuse. Celle de S. Esprit & celle de Belueder, & celle de Cenello, jadis Annee.

Quant aux chemins principaux, autrement Voyes, il y en auoit 29. combien que chaque porte eut la sienne. Mais les plus celebres furent premierement la Voye Appie, qu'Appius Claudius estant Censeur fit pauer depuis la porte de S. Sebastien iusqu'à Capoue. Trajan la restaura iusqu'à Brindes, & elle fut nommee Royne des Voyes, pource que c'estoit par elle que passoient presque tous les triomphes.

La voye Flamini que C. Flaminius estant Consul fit pauer depuis la porte du peuple iusqu'à Rimini, & l'on la nommoit aussi la voye large, pource qu'elle s'estendoit iusqu'au Capitole.

L'Emilie fut pauer par Lepide & Flaminius Consuls iusqu'à Pologne.

La Suburre commençoit au dessus de Collisee, & alloit iusqu'à l'Eglise de sainte Luce en Orfee.

La sacree commençoit pres de l'arc de Constant, & alloit iusqu'à l'arc de Tite, & par la place de Rome, autrement Forum, iusqu'au Capitole.

La Neuue passoit par le grand Palais, & au Septizone, & alloit iusqu'aux estuues Antoniennes.

La triomphale alloit du Vatican iusqu'au Capitole. Vespasian la repara, comme on void en vne inscription en marbre qui est au Capitole deuant le Palais des Conseruateurs.

La voye Vitellie alloit du mont Ianicule iusques à la mer.

La voye droicte fut au champ de Mars.

Quant aux monts sur lesquels Rome fut bastie, le plus celebre fut le Capitolin, où Tarpeien, & Saturnien, aujourd'huy nommé Campidoglio ou Capitole, sur lequel il y auoit 60. Temples, Chappelles, ou maisons sacrees aux dieux; & le plus celebre de ces Temples estoit celuy de Iupiter, auquel ceux qui triomphoient entroient apres le triomphe, pour y rendre graces de la victoire qu'ils auoient acquise.

Le mont Palatin, aujourd'huy nommé Palais Majour, ou grand Palais, est deshabité & plein de vignes, & a vn mille de tour. Romule y commença la ville, pource qu'il fut nourry en ce lieu: & Heliogabale la fit pauer de porphire.

L'Auentin, ou Querquetulan, qui a plus de deux milles de tour, est celuy où est l'Eglise de sainte Sabine.

Le Celien est celuy où est l'Eglise de saint Iean, & de saint Paul iusques à saint Iean de Latran.

L'Esquilin ou Cespian, où est l'Eglise de sainte Marie Majour, & saint Pierre aux liens.

Le Viminal où est l'Eglise de saint Laurens & sainte Potentiane.

Le Quirinal, ou Agonie, aujourd'huy Montecauallo.

La Ianicule est celuy où est saint Pierre Montorio en Trasteuere.

Le Pincie où est l'Eglise de la Trinite.

Il y a encor d'autres petits monts, comme le Vatican où est l'Eglise de saint Pierre, & le Palais du Pape, le Citoire, jadis Cicatoire, pource qu'on y citoit les Tribuns quand on s'assembloit pour faire des Magistrats. Celuy des Hortules ou petits iardins, où le Pincie commence à la porte Salare, & va iusques à celle du Peuple, & c'estoit de ce mont que ceux qui briguoient les Magistrats descendoient au champ de Mars pour les demander au Peuple.

Quant aux regions, Rome en eut autrefois 14. mais il n'y en a plus aujourd'huy que treize. Celle des monts qui a pour enseigne trois montagnes. Celle de Colonne qui a vne colonne. Celle de Trejo qui a trois espees. S. Eustache qui a vn Sauueur au milieu de deux cornes. Celle du Pont vn pont pour enseigne. Celle de Regola ou de la Regle vn cerf: celle de Ripa vne roue. Trasteuere vne teste de Lyon. Campidoglio vne teste

de Dragon, Parion vn Griffon, Pigna vn Vase, Campo Marzo ou la region du camp de Mars, a pour enseigne la Lune : & S. Ange vn Ange.

- Ceste ville a esté prise sept fois par diuerses nations. La premiere 360. ans après qu'elle fut bastie, elle fut prise par les Gaulois Senonois sous leur capitaine Brennus. La seconde 800. ans apres elle fut prise par les Visigots: 40. ans apres les Vandales y entrerent, & 18. ans apres les Erules; puis 14. ans apres les Ostrogots, 12. ans apres Totile s'en rendit maître; & en dernier lieu l'an 1527. le 6. May elle fut prise par l'armée de l'Empereur Charles V. conduite par le Duc de Bourbon. Mais encor qu'on l'ait tant de fois destruite, & qu'on ait mis en pieces les plus precieuses choses qui y fussent, & tous les superbes bastimens; toutefois si l'on regarde la magnificence des Palais, des Eglises, & des autres bastimens, la beauté des rues, & la grandeur de la Ville, elle se fait encor bien aisément recognoistre pour Rome.

Voyons maintenant le reste de l'Estat de l'Eglise, puis que nous en auons considéré la ville capitale.

8. Le Latium ou Campagne de Rome est diuisé en ancien & nouveau. L'ancien s'estend depuis la bouche du Tybre iusqu'au mont de Circel par l'espace de 50. milles. Le nouveau depuis le mont Circel iusqu'à la riuere de Garillam. Ce fut autrefois vn pays extremement habité & plein de grandes & illustres villes qui receurent leur grandeur du voisinage de Rome, & puis furent renommées par les courses & rauages des Barbares. Rome est dans le Latium. Les autres lieux sont Ostie, Ardee, Neptun, qui est sorty des ruines d'Anze, Terracine, & dans le pays Prenestine, Tiuali, Anagni, Fresolone, Veruly, Alatri, Bauco, Segna. Auourd'huy ce pays est diuisé en trois parties, c'est à sçauoir en Latium, Campagne de Rome, & Maremme, c'est à dire lieux maritimes. L'Estat de l'Eglise finit à Terracine, contre laquelle est Gayette clef du Royaume de Naples.

9. Le patrimoine de S. Pierre laissé à l'Eglise de Rome par la Comtesse Mathilde au temps du Pape Paschal en l'an mil cens, s'estend depuis la pesche, qui se va rendre dans la mer au deça du mont Argentaire, & depuis S. Quirice iusques à Ceperan. On void entre la Quirane, & le Tybre le lac Trasymen, & plus outre Peruse, ville fameuse: & entre la riuere de Fiore, & le Tybre Pitiglian, Acquapendente, Oruiete, renommée pour son assiette, son puy, & son dome: Belsene avec son lac, Montefiasco, Bagnaree, Castro, Nepe, Viterbe, fameuse pour la longue demeure que les Papes y ont fait tandis qu'ils estoient trauallez par les Senateurs de Rome. Orte, Gallese, Ciuita castellana, & vers la marine Cornette, Toscanelle, Ciuita Vecchia, Porto, Bracciam sur le lac Sabbatin, Roncillon, Sutri, Martinian, où estoit la ville de Veiens.

10. Ayant passé le Tybre on entre en l'Ombrie qui passe auourd'huy sous le nom de Duché de Spolette, & en grande partie ombragée de l'Appennin, à raison de quoy elle a eu le nom d'Ombrie. Ses villes sont Borgo, à S. Sepulchro, cité de Castello, Augubio, Todi, toutes sur le Tybre, Terni, Spoleti, Norcie, Foligno, Assisi, Nocere, Camerin, & Amelia.

La Sabine est vn pays enfermé deçà & delà de l'Apennin. Il est estroit, mais long depuis le Tybre iusqu'à Lamentane. Les autres le bornent entre la Negre, & l'Apennin, & entre le Tybre & le Teueron, qui separe les Sabins des Equicoles. Ses principales places sont Riete, Narni, Ottricoli, Magliane, Farfe, Palumbare.

La Marque d'Ancone s'estend entre l'Apennin & la mer, depuis le Tronee iusqu'à la Feuille ou Foglia, & comprend plusieurs bonnes places, entre lesquelles Fabrian est fort renommée, & avnze Archeueschez ou Eueschez.

Entre ces villes celle qui est de plus grand trafic c'est Ancone, la plus puissante c'est Ferme, la plus forte la Rocca, la plus belle Ascoli, la plus grasse Iesi, la plus ancienne Osme, la plus fauorite Macerate, pource que c'est là que demeure le Gouverneur de la Prouince, & la Rote, la plus sainte c'est Lorette.

La Romagne s'estend depuis la Foglia iusqu'à Panare, & depuis l'Apennin iusqu'au Po. Ses villes sont Rimini, Cesene, Fayence, Rauenne, Forli, Imola, & encor Sarsine, Ceruie, Bertinore. A six milles loing de Fayence est Brisiguella capitale de la vallée de Lamon, qui a de long dix milles, & six de large, avec seize mille habitans.

La plus noble de toutes ces villes c'est Rauenne où quelques Empereurs firent leur séjour, & puis les Exarques des Empereurs de Constantinople. Et pource que les Histoires parlent assez souuent de l'Exarcate, ie trouue à propos d'en dire icy l'origine, le progres, & la fin. L'Exarcate commença apres que Narles Capitaine de Iustinian, & puis de Iustin Empereurs eut chassé les Gots d'Italie, & le premier Exarque (qui veut dire vn souverain Magistrat) fut Longon, qui faisant sa demeure à Rauenne, comme auoient fait les Roys des Gots, osta la façon accoustumée du gouvernement par Prouince, & mit en routes

en toutes les places qui estoient d'importance vn Capitaine, & fit le mesme à Rome en ostant le Senat & les Consuls. L'Exarcat estoit donc de grande puissance, mais l'Empire estant apres abbatu par les Lombards il fut esteint. Quand Pepin en ayant chassé Astolfe, en inuestit l'Eglise, l'Exarcat contenoit Rauenne, Sarcine, Classe, Forli, Forlimpopoli, lesquelles villes faisoient vn Estat qu'on nommoit Penapoli: & hors de cet Estat il cōtenoit Bologne, Regge, Modene, Parme, Plaisance, avec les autres places assises entre l'Apénin, & le Po. Il prit fin l'an de grace 751. auquel Astolfe Roy des Lombards prit Rauenne, tellement qu'il dura 183. années, & c'est chose digne de considération, que les Empereurs Romains, principalement Honorius, puis les Roys des Gots, & apres cela les Exarques, estimerent Rauenne digne de leur demeure entre toutes les villes d'Italie.

L'insolence des Exarques à l'endroit du Pape fut cause que l'Archeuesque de Rauenne se reuoltra aussi contre le Pape au temps d'Emerald, & ceste rebellion dura iusqu'au temps du Pape Donne, ou comme les autres veulent, d'Agaton, lors que Theodore Archeuesque voyant que son Clergé le traitoit mal, soumit son Eglise au Pape. Ceste Prouince dont nous parlons fut premierement nommée Flamine, mais Charles le Grand pour anéantir le nom de l'Exarcat, & rendre les peuples affectionnez à la ville de Rome, la nōma Romagne.

L'Estat de Ferrare est grand & commode, veu qu'en y comprenant Modene qui en a esté démembrée, il a de longueur depuis la mer Adriatique iusqu'à la Tyrenne enuiron 160. milles: sa largeur depuis la coste est d'environ 50. milles. De Primare à Magnauaque il y a neuf milles: de Magnauaque à Yolane dix-huict milles, d'Yolane à Gorre dix-huict: de Gorre aux confins des Venitiens six milles. De l'autre coste en Lombardie il y a depuis S. Ambroise place du Boulonnois voisine de Castelfranc, cinq milles, de Modene à Regge 15. milles, de Regge à Bersel quinze milles. Il est plus large en quelque lieu, & aux autres plus estroict. Le Ferrarois confine avec le Rauennois & le Boulonnois: cet Estat confine pareillement avec les Venitiens par le lieu de Polifelle. Le Comté de la Mirande confine avec Bondene chasteau du Ferrarois. Le Duc de Mantouë confine avec la Stellare. Il y a outre Ferrare, & Regge villes puissantes, Comaquo aux marais de la mer Adriatique, & plusieurs autres chasteaux en la Romagne, la Grassignane en la Toscane, & finalement Carpi place importante assise au cœur de cet Estat. Ceste place fut donnée par l'Empereur Charles V. au Duc Alfonse pour la partie qui estoit deuolue à l'Empire par la rebellion du Seigneur Marc Pie, & ce Duc l'obtint du susdit Marc, luy donnant en eschange la Seigneurie de Saxole: & le Seigneur Leonel de Pij ne voulant ceder sa portion avec vn eschange ou prix raisonnable, fut chassé de ce qu'il possedoit avec la permission de l'Empereur par ce Duc, qui mit lors pour prix cent mille escus en la Banque de Venise, que Leonel ne voulut iamais recevoir.

La ville de Ferrare a de circuit six ou sept milles, & de fort belles rues, d'honorables Palais, & assez bon nombre d'Eglises, & de Monasteres, avec vn chasteau qui estoit la demeure des Ducs. Il y a apres pour la commodité des subiects des Estudes en tous arts & toutes sciences.

La Comté de Venise appartient au Pape, & l'on y compte quatre citez, c'est à sçauoir Auignon, Carpentras, Cauaillon, & Veson, qui sont baignées du Rosne, de la Durance & de la Sorgue. Il y a outre cecy quatre-vingts places fermées de muraille. Auignon fut acheté par Clement VI. de la Royne Jeannie fille de Robert de Naples, l'an 1351. mais la Comté de Venise fut confisquée (comme quelques vns veulent) par l'heresie du Comte Raymond de Tolose. La susdite ville d'Auignon, de l'origine de laquelle on ne sçait rien de certain, a presque toutes choses au nombre de sept, comme sept Paroisses, sept Hospitaux, sept Conuents de Religieux, & sept de Religieuses, sept Colleges, & sept portes. Ceste ville acquit vne grande reputation par la demeure que les Papes y firent l'espace de 60. & dix ans, depuis Clement V. iusqu'à Gregoire XI.

QUALITE

LA Campagne de Rome a vn fort bon terroir qui rapporte beaucoup, & est arrosée de force eaux, combien qu'il y ait quelques lieux aspres & pierreux, qui toutefois ne sont pas vuides & inutiles, mais propres aux pasturages & charges de bois.

L'Ombrie est vn pays fort habité, & de grand rapport, veu qu'il y en a qui escriuent vne partie de la Prouince estre si fertile, que pour ne dire autre chose du reste, les animaux y font deux petits d'vne ventrée. Le reste de l'Estat est pour la plus grande partie distingué de plaines & de collines de bon rapport. Tout le territoire de Ferrare se desploye en belles campagnes, de mesme qu'vne bonne partie de celui de Bologne, de Forli, de Rauenne, & de Romagne.

Cornele Tacite donne la louange de la fertilité d'Italie aux champs de

F
Veneti, & de

Terni. Plin eſcrit que les prez du territoire de Terni qu'on peut abbreuuer, eſtoient fauchez quatre fois l'annee, & ceux qui ne pouuoient eſtre abbreueez, trois fois. Mais la bonte de ce pays ne peut eſtre mieux cogneuë que par la groſſeur des raves & des choux.

Plin eſcrit du territoire de Rieti, que l'herbe coupee durant le iour croiſt en telle ſorte la nuit, que le matin ſuiuant on void les perches qui giſent par terre toutes couuertes, & la campagne qui s'eſtend depuis Spelle, iuſqu'à Spolere qui a 18. milles de long, & 4. de large, eſt pleine de grains & de fruits, & celle qui s'eſtend depuis Peruſe iuſqu'à Aſſiſe, & à Tondi, & les campagnes de Viterbe, & de Romene ſont moins bonnes. Apres cela la partie du Bolonois qui approche doucement de l'Apennin, & toute la Romagne ſont diſtinguees de collines, de plaines, & de quelques vallees. La Marque, & les autres parties de l'Eſtat ſont toutes ſi bien aſſiſes, que l'on droit que ce pays debat en quoy il excelle dauantage, ou à eſtre fertile, ou bien à eſtre agreable.

Mais les terroirs de Rimini, de Fano, d'Ascoli (principalement depuis la bouche de Tron- te, iuſqu'à celle de l'Aſone) de Ferme, de Peruſe, & de Cornet, ſont delicats au poſſible. Ils abondent vniuerſellement de grains, d'huiles, & de vins; & en enuoyent dehors grande quantite, principalement de vins & d'huiles. Il y a pluſieurs lacs, entre leſquels eſt celui de Peruſe, plus remply de poiſſon qu'aucun des autres lacs d'Italie: celui de Bolsene, de Braſſian, de Vic, de Piediluco, de Subiaco, de Foglian, & les petits lacs de Baſſanel, de Monteroſe, de Baccan, de ſaincte Praxede, & Caſtelgondolſe, & de Neme.

16. Les deux principaux fleuues d'Italie paſſent par cet Eſtat en leur plus grande largeur, c'eſt à ſçauoir le Po, & le Tybre: & outre ceux-cy il y en a pluſieurs autres, veu que le ſeul Tybre recoit 72. ou torrens, ou fleuues. Il y a des bains de toutes ſortes à Tiuali, à Lamentane, à Striglian, à Vicarel, à Anticole, à Viterbe, à la Porrette, & Scarpette.

Il y a vne riche mine d'alum à la Stolſe, des ſalins abondans à Oſtie, à Ceruie, & à Comac- quio, où il y a encores la plus grande peſche d'anguilles qui ſoit en Italie. Il croiſt du lin excellent, & en abondance à Fayence, & à Lugo, du chanvre à Cento, à Butrio, à la Pieue, & aux enuirs de Peruſe; comme auſſi du paſtel au territoire de Bologne, de Caſtel-bolonois, & de Forli. Il vient auſſi de la manne à S. Laurens de Campagne.

Ie ne veux m'eſtendre ſur les vins; ains il me ſuffit de dire que toute la Romagne, toute l'Ombrie, tout le Patrimoine, la Sabine, & la Campagne de Rome, en portent des meilleurs qu'on boiue, & ce ſeroit choſe affectee de vouloir faire icy mention des vins de Ceſene, de Fayance, de Rimini, d'Oruiette, de Todi, Montefiaſco, d'Abban, & de pluſieurs autres.

Et ie ne veux m'eſtendre auſſi ſur les raiſins d'Amelie, de S. Gemini, & de Narny.

17. Que diray-je des autres choſes dont tout cet Eſtat abonde? Il nourrit des boeufs grands, & forts, principalement la Romagne, & la Campagne, & la chair tant de veau, que de boeuf, y eſt de bonte excellente, de meſme que celle de pourceau, principalement celle de la montagne. La venaiſon y abonde au poſſible, principalement en la Campagne de Rome vers Sermonete, & Terracine, & Neptun, où l'on trouue pluſieurs ſangliers de grandeur de meſuree.

La Campagne de Rome a des races de cheuaux, qui ne cedent beaucoup à ceux du Royaume de Naples. Il n'y manque auſſi des foreſts, où l'on trouue force glands, & de fort bon bois pour baſtir, & pour toutes les autres neceſſitez.

On trouue en pluſieurs lieux quantite de pierres bonnes pour les baſtimens, entre leſquelles ceux de Triuertin que l'on tire, & taille avec grande facilite, emportent le prix: & non ſeulement elles reſiſtent au fer, mais en deuiennent meilleures, & plus fermes.

La Marque d'Ancone a des plaines, & des vallees riches d'huiles, de grains & de vins. La Comté de Veniſſe eſt auſſi fort agreable, & rapporte beaucoup à ſes maiſtres, principalement des vins, qui ne doiuent rien en force, & bonte à nuls autres que l'on boiue en France; aſſez grande quantite de grains, & de fruits en abondance, & d'auſſi bon gouſt, qu'on en puiſſe trouuer ailleurs: ce qu'on peut aiſement voir en Auignon, où les fruits abondent de tous coſtez, qui ſont beaux, & bons au poſſible.

18. Mais puis que nous auons ſuffiſamment monſtre les bonnes qualitez de l'Eſtat de l'Egliſe, il ne ſera mal à propos, comme i'eſtime, d'en remarquer les defauts, afin qu'on y puiſſe mettre remede.

Il faut donc ſçauoir que ſix conditions ſont requiſes à la perfection d'un Eſtat, c'eſt à ſçauoir la bonte de l'air, l'abondance des eaux, l'agriculture, la marchandie, la ſeurete, & ſur tout le grand nombre d'habitans, pource que c'eſt de cecy que depend la plus grande partie du reſte.

Or quant à l'air, il faut confeſſer que l'Eſtat de l'Egliſe en eſt aſſez incommodé; veu que

que toute la partie maritime, tout le pays de Cornet, toute la Campagne de Rome, a vn air fascheux, & mal sain : ce qui procede des forests, qui couurent la plus grande partie du pays le long de la marine, & des marefcages. A quoy l'on ne peut remedier, qu'en coupant les bois, reduisant en labourage, & en seichant les marais, & sur tout en faisant de grands bastiments pour loger les hommes : car le territoire de Rome, & de la Campagne, estant presque entierement priué d'habitation, les payfans y deuiennent malades, non seulement pour le mauuais air, mais encores à cause de la terre où ils dorment, & pareillement de l'ardeur du Soleil, & de la froidure de la Lune, contre lesquels inconueniens ils n'ont ny deffence, ny remede, & n'en peuuent auoir sinon par le moyen des bastiments qui les puissent deffendre des mauuais impressions de l'air, & des vents meridionaux.

Et combien que cefoit chose difficile, toutefois elle est plus aisee qu'on ne pense, si les Princes estoient aussi facilement induits à faire des entreprises pour le bien de la posterité, qu'à celles dont ils esperent cueillir le fruit eux-mesmes. Car pourquoy est-ce qu'Anze, Ardee, Citra launia, & Asture ne pourront estre saines à present, puis que leur air n'estoit autrefois mal-sain ?

Le marais Pontin, où il y eut iadis 24. places, fut seiché pour la plus grande partie, & reduit au labourage par Cethege, & puis par Theodoric Roy des Gots, lors que les champs furent couverts d'eaux, & inondez de nouveau. Sixte V. fit encor le mesme dessein peu de temps auant sa mort, y employant non la despense, mais l'autorité, & par son moyen les territoires de Sezze, & de Piperne en sont demeurez beaucoup plus larges : & l'air de Terracine en est resté beaucoup meilleur, & on a fait en plusieurs lieux beaucoup de bons reservoirs.

Il ne faut autre chose pour cet effect qu'une certaine continuation de peine & de despence, avec laquelle on tiennet ce canal de la riuere d'Aufente, & les canaux où l'eau ramassée coule vers la mer. Et pource que ceste continuation de despence n'est chose que les particuliers puissent supporter, & que les seuls grands riches en sont capables, de là vient que la chose ayant esté iusqu'à maintenant entre les mains des personnes priuees, à qui la vie, ou le moyen a manqué, elle n'a réussi parfaitement. L'issuë en seroit bonne, si on en chargeoit le peuple Romain, ou quelque autre communauté voisine qui fut riche, ou quelque Religion qui eust beaucoup de moyens, comme celle de S. Benoit.

Le Ferrarois a besoin d'un pareil remede : car de mesme qu'icy il faut donner vne facile issuë aux eaux del'Aufente, afin qu'elles ne noient le territoire de Terracine, & ceux qui en sont proches, aussi là il est necessaire d'abaisser le liët du Po qui passe au dessous de Ferrare, & le remettre en son premier estat, afin que ledit Po n'inonde le Ferrarois.

Et il ne faut que la despense destourne ce dessein, pource qu'outre qu'on ne peut faire sans despence aucune chose honorable, il n'y a point de raison qui porte qu'un marchand fasse de grands frais pour acquerir quelque chose, & qu'un Prince laisse de rendre meilleur son Estat, pour ne faire aucune despence, veu principalement que sans que le Prince débourse rien du sien, il peut mener à fin ceste entreprise avec sa seule autorité, aux despens des personnes priuees, ou bien de communautéz.

Je dis le mesme des camps spacieux du territoire de Rauenne, de Bagnacavallo, de Lugo, & de Bologne, qui sont inondez de la Paduse. Hercule premier Duc de Ferrare seicha la Samaritaine, Hippolite Piatois, la Rauode, & les Lamberts le Pogge.

Le Duc Alfonse II. de Ferrare, laissant l'utile pour le delectable, employa à la Mesole le temps, & le trauail que les communautéz estoient obligées de donner pour contenir le Po dans son lit, & pour asséurer les champs des inondations de ce fleuue. Il faisoit là trauailler à faire des leuees, & creuser des fosséz, à planter des bois, & à choses semblables, les hommes destinez pour faire la leuee du Po, sous pretexte que ce n'estoit pas chose necessaire. Cependant le Po rongeoit le riuage, & emportoit les leuees, & les villageois mourroient en grand nombre à la Mesole, à cause du mauuais air. C'est pourquoy le pays priué du trauail, & des villageois mesmes, n'a peu resister à la vehemence du Po, qui ayant fait en beaucoup de lieux des ouuvertures irreparables, a empiré plus qu'on ne scauroit estimer, le territoire de Ferrare, & celuy de Comacquo. Ce qu'on n'auroit pas esté, si Alfonse eust employé autour du Po la diligence dont il vfa à Mesole. Et peut estre qu'Alfonse n'esperant pas que la Duché de Ferrare deust demeurer en la maison d'Est, ne se soucia de la laisser mal accommodée, & empirée en tant d'endroits.

Je m'eitonne bien que preuoyant cecy, il n'entreprist plustost d'embellir ou Modene, ou Regge, que de faire tant de frais à la Mesole.

Mais quant aux eaux courantes desquelles l'agriculture, & la fertilité des terres depend en partie, combien que l'Estat Ecclesiastique n'ayt faute de riuieres & de lacs, nous en resoisson

pourroit meliorer de beaucoup le territoire de Rome en conduisant le Teueron à la ville, chose que Sixte V. auoit projeté. Et il est dit de Claude Empereur qu'il mena le ruisseau d'Anjen à Rome, avec vn nouveau canal de pierre, & le diuisa en plusieurs beaux lacs. Et de fait par ce moyen outre le bien que ceste eau feroit à la terre, outre les commoditez qu'il apporteroit aux habitans, outre la facilité qu'il adiousteroit à la conduite des viures, & autres choses, outre le profit qu'il porteroit aux iardins, & au trafic, il rendroit encor l'air meilleur, & plus sain, tant pour la fraischeur que l'eau courante engendre, que pour le changement de l'air que la même cause.

Car entre autres raisons du mauuais air qui rend le pays proche de Rome inhabitable, on dit que ce terroir estant fait comme à ondes, l'air enfermé entre l'une & l'autre par faute d'agitation, & d'issue, vient à se corrompre, de même qu'une eau mourante; & l'eau courante du Teueron empêcheroit ce dommage.

Après cecy la communauté des eaux, & des lieux, conuiroit les personnes à bastir des Palais, des moulins, des magasins, & des choses semblables, & à planter des vergers, & des bois sur les deux bords de la riuere. Et tout cecy seruiroit pour rendre l'air plus sain, ou moins nuisible, & pour mettre les laboureurs à leur aise, & remplir le terroir de fruits. Cecy seroit accompagné d'un autre profit important, veu qu'en tirant le Teueron par delà sainct Paul, l'inondation du Tybre qui a accoustumé d'estre si preiudiciable à la ville de Rome, ne luy feroit la moitié tant de dommage qu'elle luy fait ordinairement, pource qu'il manqueroit de l'eau ordinaire, & extraordinaire dudit Teueron, qui n'est pas si petite qu'elle ne hausse celle du Tybre de quelques brassées.

Et l'on ne doit craindre que tirant le Teueron sous S. Paul, l'eau du Tybre perde sa bonté, qui procede des eaux sulphurées qui y sôt portées par le Teueron des campagnes de Tiouli: veu que de même que la medecine ne peut quelquesfois remedier à l'indisposition d'un membre, sans endommager vn autre: de même aux choses ciuiles on ne peut prendre vn party si seur, ny si aduantageux, que s'il porte du bien à vne partie, il ne soit dommageable à l'autre: & il suffit que de deux maux on euite le plus grand.

Il faut adiuster à cela que les eaux de Tiouli conduites par le Teueron, ne sont necessaires à la bonté de l'eau du Tybre, pource que celles qu'il y meine, sont suffisantes: & la Noire, ou Nere, outre ses eaux, dont la couleur peut faire iuger combien elles sont sulphurées, y en meine beaucoup d'autres de plusieurs vertus, qu'on void soudre au dessous de Narny en plusieurs endroits.

Pour conclusion de ce discours, ie diray que le pays d'autour de Rome iusques à trente milles, est fort fertile, comme celuy qui la pouruoit abondamment de bled, & de chair, & le feroit encore de vin, si les habitans, principalement les estrangers, pour leur santé, ou plutôt par delicatelle, ne prenoient plus de plaisir aux vins qui viennent de Corseque, de la riuere de Genes, & de France.

Mais ce pays si fertile est presque entierement sans habitans, & pour ceste cause on y void aller tous les ans de diuers lieux, mesmement de Lombardie, iusqu'à 40. mille laboureurs, pour cultiuer, & faire la recolte, & lors que tout est acheué, on void retourner en leurs maisons avec quelque grain, ceux qui restent en vie, veu qu'il en meurt tousiours vne grande partie qui meurt à cause de la trop grande ardeur du Soleil, ou des vents marins qui sont d'autant plus pernicioeux à present, qu'ils portent en leur grande abondance les vapeurs des marecages par lesquels ils passent, à cause que l'empêchement des bois leur manque à ceste heure pour la pluspart, & toutes ces choses offensent, mais beaucoup moins la ville de Rome, que le reste. Si bien que ce pays qui contenoit vn nombre incroyable de personnes demeure maintenant vuide, desolé: & la plaine qu'on nomme Romaine, depuis la porte d'Hercule, ou Porte Ercole, iusqu'au delà de Terracine, ayant enuiron cent cinquante milles de longueur, n'a peut estre huit mille habitans.

MOEURS ANCIENNES.

Les Romains estoient nez, & affectionnez à la guerre, & faisoient au commencement peu d'estat des lettres: mais à la longue, lors qu'ils eurent vn peu estendu leur Empire, & qu'ils se furent mis à leur aise, les plus grands, & plus riches embrasserent les sciences, & s'adonnerent aux lettres au possible. Même ceux qui faisoient estat de conduire les armées, estoient forts sçauants, & ce n'estoit chose indigne d'un homme de guerre & de maison, d'auoir beaucoup de doctrine: au contraire, les ieunes homes des plus grades maisons de Rome, plaidoient pour leurs cliens deuant le Senat, & s'adonnaient à la cognoissance de leurs loix, & à l'eloquence, & pour le dire en vn mot, taschoient d'acquiescer toutes sortes de science, voyant qu'elles estoient enchainées l'une avec l'autre. Au commencement ils estoient fort sobres,

sobres, se contentoient de peu, & méprisoient les grandes richesses, tellement qu'on a trou-
ué des premiers de la ville, comme Valere Publicola, qu'il falloit enterrer aux despens du
public, d'autres qui mettoient eux-mesmes cuire des raues en leur petit mesnage, apres auoir
conduit des armées, vn autre qui tenoit le manche de sa charruë, ainsi qu'on luy vint annon-
cer qu'il estoit fait Dictateur, & vn autre qui apres auoir esté chef d'armée demanda permis-
sion de s'en retourner pour donner ordre au labourage de deux ou trois iournaux de terre, &
aux petites affaires de sa maison. Mais depuis qu'ils eurent eu la despoüille d'vn grand nom-
bre de Prouinces, & qu'ils eurent gousté les delices estrangeres, ils y prirent tel goust, que
le luxe, & la dissolution se glisserent parmy eux en telle sorte, qu'ils surpasserent en ceste par-
tie toutes les autres nations de la terre. D'ailleurs, l'auarice, & le desir d'en auoir à quelque
prix que ce fust, les posseda tellement, qu'ils ne faisoient point de difficulté de faire mille
exactions dans les Prouinces, de prester avec vsure excessiue, puis en fin de proscrire, & meur-
trir leurs concitoyens, afin de iouyr de leurs biens. Ceux qui auoient mesme reputa-
tion d'estre plus sages, estoient des plus auaricieux, comme on a peu voir en Senecque,
qui auoit 4. ou 500. mille escus seulement en Angleterre, dont il tiroit de grands interrests.
Au commencement ils ne pensoient qu'à la grandeur de leur Republique, mais ils se laisse-
rent apres emporter au delir de la leur particuliere, & depuis toutes choses allerent de mal
en pis, & l'ambition des citoyens Romains renuersa l'Estat de la Republique, & le reduisit
sous la domination d'vn seul. Ils se plaisoient extremement à voir espandre le sang humain
aux lieux destinez pour cét effect, où les escrimeurs, ou gladiateurs, & les Traces, ou Myr-
millons, & les Retiaires combattoient à toute outrance pour donner plaisir au peuple. Les
lyons mesmes, & autres bestes farouches n'estoient espargnees pour seruir de passe-temps
aux Romains, qui estoient tellement accoustumez, & affectionnez à ces spectacles, que ce-
luy qui les vouloit gagner n'auoit besoing que de faire vn grand appareil de gladiateurs, de
bestes, de comedians, de sauteurs, & semblables gens, & quiconque en auoit dauantage,
estoit plus aux bonnes graces de ce peuple. D'ailleurs les plus grands auoient accoustumé
de faire present au peuple de tant de mesures de bled, & de tant de vin pour teste, & de faire
largesse de pieces d'argent, qu'ils appelloient *MISILES*, comme qui diroit jettes. Les pe-
res venans de la ville, ou sans auoir bougé du logis, baisoient leurs filles, pour recognoistre
si elles auoient beu du vin, qui estoit chose deshonneste entre les Romaines. Ils ne laissoient
aller manger leurs enfans hors de leurs logis, ne leur permettoient de dire des paroles des-
honnestes, & les enuoyoient en Toscane, en Athenes, & à Rhodes, pour apprendre les arts,
& sciences. Ces enfans ne comparoissoient iamais en public, iusqu'à ce qu'ils auoient atteint
l'aage de dix ans, & lors ils s'alloient faire escrire au liure de leur Tribu. Ils comparoissoient
apres vne autrefois à l'aage de 17. ans, & lors ils laissoient la pretexte ou robbe d'enfance, &
prenoient la robbe virile, & lors qu'ils l'auoient prise chaque ieune homme alloit conti-
nuellement avec vn vieillard, luy faisant beaucoup d'honneur, & aux iours que le Senat s'as-
sembloit, ces ieunes gens accompagnoient à la Cour quelqu'vn des Senateurs, & de leurs pa-
rents, ou amis de leur pere, & l'attendoient iusqu'à ce qu'il sortoit, & luy faisoient encore
compagnie iusqu'en son logis.

Quant à leurs mariages, ils auoient accoustumé de parer la femme quand elle s'alloit marier en ceste sorte: ils luy donnoient premierement vne clef en la main, luy habilloient la teste avec vn dard qui auoit tué vn gladiateur, la ceignoient d'une ceinture faite de laine de brebis, que le mary luy deffaisoit apres sur le liét: elle portoit en la teste au dessous du voile, qu'ils nommoient *Flammeum*, vne guirlande de verueine meslée d'autres herbes, & la faisoient seoir sur vne peau de brebis: & quand elle alloit trouuer son mary, elle estoit accompagnée de trois enfans, qui deuoient auoir pere & mere: l'un d'eux portoit deuant elle vn flambeau allumé fait d'aubépin (veu que ces ceremonies se faisoient de nuict) & les autres alloient à ses deux costez. On luy mettoit encore deuant vne quenouille couuerte de lin, avec le fuscau plein de fil, & on luy faisoit toucher apres le feu, & l'eau. On n'allumoit aux nocces plus de cinq torches, que les Ediles auoient accoustumé d'allumer. Ils vsoient de trois façons à separer les mariages.

La premiere s'appelloit *Repudium*, d'où vient nostre mot de repudier, & l'on vsoit de ceste maniere quand l'homme quittoit sa femme sans qu'elle y prestast consentement, & le premier qui en vfa fut Carbiilius cent ans apres Rome bastie, pource que sa femme ne luy faisoit point d'enfans. C. Sulpice repudia la sienne, parce qu'elle auoit esté hors de la maison en poil, & sans auoir vn voile sur la teste. Q. Antistius delaisa la sienne, pour l'auoir veüe parler secrettement avec vne femme libertine. P. Semprone fit le mesme, pource que la sienne estoit allee aux spectacles publics sans son sceu, & Cesar repudia sa femme pour le soupçon qu'il eut de Clodius, qui fut trouué habillé en femme en la solennité de la pompe.

FF

auoit celebree à l'honneur de la bonne Deesse.

La 1. façon se nommoit Diuorce, & ceste sorte de separation se faisoit par le consentement de tous deux.

La 3. estoit appelée Separation, & se faisoit à la volonté du Prince.

20. Les anciens Romains ont traité en deux façons ceux qui estoient morts, & fait deux sortes d'obseques.

La 1. estoit de couvrir les morts de terre, & les ensevelir comme nous faisons : l'autre de brusler les corps ; mais ceste façon ne dura guere, & le premier des Senateurs qu'on brusla apres sa mort, fut Scylla, & Numa Pompilius fut l'inventeur des obseques, & institua vn Pontife qui en auoit la charge.

Le 1. honneur qu'on faisoit aux hommes illustres en leurs offices funebres, estoit de les louer avec vne harangue, comme Cesar estant aagé de douze ans, loua son ayeul, & Tibere estant aagé de neuf ans, loua son pere.

Le 2. estoit de faire escrimer des gladiateurs, & Marc, & Decius fils de Iunius Brutus, furent les premiers qui pratiquerent cecy à l'honneur de leur pere.

Le 3. estoit de faire vn magnifique festin.

Le 4. de distribuer de la chair à tout le peuple. Les premiers qui en distribuerent, furent ceux qui eurent soing des obseques de P. Licinius, citoyen Romain, fort estimé, & tres-riche. Ils espendoient encore quelquesfois des fleurs, & des parfums sur la sepulture : comme le peuple Romain fit aux funeraillies de Scipion. Ils mettoient encore aux temples, & lieux publics, certains ornemens, comme des escus, des couronnes, & choses semblables, & ceux qui ne pouuoient estre enterrez avec toute ceste pompe, pource que la despence en estoit fort grande, estoient enterrez sur le soir par certains hommes commis à cet office, nommez *Vespilons*, & l'on enuoyoit le mort à la sepulture vestu de blanc. Son plus proche parent luy fermoit les yeux, & peu apres on ouuroit la chambre pour laisser entrer toute la famille, & le voisinage, & trois ou quatre d'entr'eux l'appelloient trois fois par son nom à haute voix, & on le lauait apres avec de l'eau chaude.

L'heritier balioit toute la maisõ avec vncertain balay destiné pour cet vsage, & on mettoit sur la porte des rameaux de cyprez : que si le mort estoit d'autorité, les citoyens estoient inuitez aux obseques par vn homme qui auoit charge de telle chose.

21. Quand vne veufue mouroit n'ayant eu qu'un seul mary, on la portoit en terre avec la couronne de la pudicité sur la teste. On auoit accoustumé de donner des couronnes aux soldats, pour recompense de leur valeur. La triomphale estoit de laurier qu'on donnoit au Capitaine. L'obsidionale estoit d'herbe, qu'on donnoit à celuy qui deliuroit la ville du siege qu'on y auoit mis, & le premier qui la receut fut Licinius Dentatus. La ciuique estoit de chesne, ou d'yeuse, qu'on donnoit à celuy qui deliuroit vn citoyen de quelque danger. La murale estoit donnée par le Capitaine au soldat qui estoit monté premier sur la muraille d'une ville ennemie. On donnoit la castrense à celuy qui entroit premier dans le camp, & sur les retranchemens des ennemis. La nauale estoit pour celuy qui montoit premier sur le vaisseau des ennemis, & toutes ces trois couronnes estoient d'or. La murale estoit faite en façon de creneaux d'une ville : la Castrense en façon de pallissade, & la Nauale comme vn esperon de galere. L'Ouale estoit de myrrhe, & on la donnoit à celuy qui auoit vaincu l'ennemy sans rien perdre. Et la premiere fut faite d'épics, & donnée à Romulus. Les armilles estoient certains petits cercles de lames d'or & d'argent, que les soldats portoient au bras gauche près de l'épaule pour ornement. On accordoit le triomphe aux Dictateurs, Consuls, ou Preteurs qui auoient vaincu plus de 5000. ennemis, & qui soufmettoient à l'Empire Romain des villes & provinces. L'Ouation estoit vne façon de triompher, qu'on octroyoit au chef d'une armee qui auoit vaincu les ennemis sans rien perdre, & cestuy-cy entroit à pied dans la ville, avec le Senat derriere, sans estre suiuy de son armee, & le premier qui triompha de ceste sorte, fut Posthume Tuberte Consul, qui triompha des Sabins. Mais le premier qui triompha fut Romulus, & le dernier l'Empereur, & on compte 320. hommes qui sont euz triomphans dans Rome.

Le premier qui mena des ennemis subjugués à Rome, fut Cincinnat. Ceux qui triomphoient estoient sur vn chariot à deux roues, tiré par des cheuaux, ou autres bestes, suiuis de leur armee couronnée de laurier, ainsi qu'ils estoient arriuez au Capitole, & descendus, ils entroient au temple de Iupiter pour luy rendre graces de la victoire obtenue, & ayant sacrifié vntaureau blanc, ils alloient en leur maison.

22. Les anciens Romains celebrent en l'honneur de Ianus les Agonales le neufiesme de Ianuier.

Le troisieme d'Auril ils faisoient les jeux Floraux en memoire de Flore femme d'amour
fort

fortaymee de Pompee, qui laissa le peuple Romain heritier de tout son bien, & sa maison estoit au lieu qu'on nomme maintenant *Campo di fior*, ou Champ de fleur. Ces jeux se faisoient jadis au dessous de la vigne du Cardinal de Ferrare, au pied du mont Quirinal, maintenant appellé *Cavallo*.

Le sixiesme du mesme mois en memoire de la victoire obtenue sur les Latins, les Cheualiers alloient magnifiquement vestus, portans en la main droite des rameaux d'oliuier au Temple de Mars, qui estoit en la voye Appie, à quatre milles loing de Rome, à celuy de Castor, & de Pollux.

Le 29. de May on celebroit les Lustres, auxquels on monstroient les Trompettes, les Aigles, & autres enseignes, & instruments de guerre. Ils auoient encor accoustumé de faire les jeux Trajans, Sceniques, Capitols, Apollinaires, Seculiers, Romains, Plebeiens, Circenses, & autres.

Cene seroit iamais fait si i'entreprendois de discourir entierement de tout ce qu'on peut dire sur le sujet que nous traittons. Il suffit d'en auoir dit ce peu de paroles, & de renvoyer les plus curieux à ceux qui ont fait des liures expres de ceste matiere. Laissons donc toutes ces anciennes façons de faire, afin de venir aux modernes.

MOEURS DE CE TEMPS.

Les Romains de ce temps retiennent encor beaucoup de choses des anciens, comme la grauité, qui semble estre née avec eux, la magnificence, & vne certaine grandeur de courage particuliere à ceste nation, qui la sçait mesnager plus discrettement que les Espagnols, avec leurs façons de faire affectées. Au reste, Rome est presque toute pleine d'estrangers qui y viennent de toute l'Europe: desorte qu'on peut dire que les mœurs de toutes ces nations y sont pratiquées, & on n'en sçauoit particulariser guere de choses, tant les actions des vns & des autres sont différentes. Il faut dire seulement que c'est vne ville où l'on vit avec beaucoup d'artifice, & où l'on porte beaucoup d'honneur, mesme aux plus pauures qui sont capables de paruenir à quelque grandeur; pource qu'on a veu dans ce lieu tant de merueilles de la fortune, qu'il n'y en a point de si miserable qui ne puisse deuenir heureux, estant de la condition & capacité requise; tellement qu'on craint d'irriter iusqu'aux moindres, de peur qu'ayant quelque iour moyen de s'en reuancher, ils ne le fassent. Mais pour parler de ceux du pais, ils sont comme tous les autres Italiens, pleins de fard, n'oublient aisément les iniures receues, vivent mesquinement en leurs maisons, mais ils sont prodigues lors qu'il faut faire quelque dépence qui paroisse.

Les Gentils-hommes y sont courtois, gentils, & fort ciuilez, propres aux armes, & à la conduite de la guerre: mais le menu peuple de la Campagne de Rome est du tout grossier, rude, & sauage; mais il est plein de courage, & robuste, aussi bien qu'anciennement.

Ceux de la Marque d'Ancone sont d'un fier courage, & pour ceste cause propres à la guerre. Ils sont rudes en leur conuersation, s'adonnent à l'Agriculture, & ne se soucient guere de la marchandise, peut-estre pource que leur pais n'a point de riuere nauigeable, ny de belles plaines, ny d'autre port que celuy d'Ancone, qui n'est pas si bon qu'on le fait, veu qu'il est tout comblé, & n'est guere seur.

On donne en Italie à ceux de Ferrare le nom de rusez, on appelle ceux de Peruse prompts, & hardis, ceux de Spolette fins & cauteleux, ceux de Bologne farouches, ceux de Fayence courageux, ceux d'Ostie pressants, ceux de Rome cruels & vaillans.

Les Romains apportent à la guerre la perseuerance, les Ferrarois l'artillerie, ceux de Viterbe des esperons.

On dit aussi que ceux d'Ancone sont mesquins, ceux de Rimini grands mangeurs d'oyes, & ceux de Peruse mangeurs de poisson, & delicats, & d'ailleurs, qu'ils dissimulent leur courroux, lors qu'ils ont receu quelque offence: mais les Ferrarois s'opiniastrent à leur vengeance, de mesme que les Romains qui la prennent plus cruelle que nuls autres.

Quant à la reception des estrangers, les Ferrarois leur sont rudes, & ceux de Spolette grossiers, & en toutes choses gens couuerts. Pour le regard des femmes, on dit que celles de Peruse sont fort propres, celles de Beneuent rustiques, celles de Bologne vn peu glorieuses, celles de Cesene rauissantes & subiectes à prendre: les Romaines graues, les Ferraroises auides, celles de Rauenne courtoises.

Pour acheuer son discours, tous les Italiens en general sont si pleins de jalousie, qu'ils tiennent continuellement leurs femmes enfermées dans leurs logis come dans les prisons, sans en permettre la veüe à personne, non pas mesmes à leurs amis plus particuliers, si ce n'est par vne faueur extraordinaire, & avec tant de gens qui regardent de tous costez, & qui espient les

actions des vns & des autres, qu'encor que les femmes eussent quelque volonté de faire l'amour, il leur seroit impossible d'accomplir leur desir, si ce n'est avec vn incroyable artifice, & vne extreme peine. Ils sont aussi fort dissimulez, & lors que vous leur avez vne fois fait quelque offence, il ne faut penser que vous puissiez vous reconcilier avec eux ainsi qu'aux autres païs, veu qu'ils garderont cela sur le cœur toute leur vie, & penseront continuellement aux moyens de s'en venger, & mesme il y en a beaucoup qui font semblant d'avoir publié l'iniure afin d'en prendre vengeance plus commodément & à leur aise. Mais le meilleur est de ne vous fier jamais à ceux à qui vous avez donné quelque subiect de courroux, veu qu'il faut croire qu'ils vous feront en fin cognoistre leur ressentiment s'il leur est possible.

RICHESSES.

L'Estat de l'Eglise abonde tellement en grains, & en toute sorte de biens, qu'il est mal-aisé que la cherté y vienne par le deffaut de la terre, pource que toutes les provinces estans diuisees en plaines & montagnes, il faut que l'année soit bien malheureuse si tous les endroits viennent à manquer. Et mesme il y a tant de grain, de vin, d'huile, qu'il en fournit mesme aux autres païs, comme la Toscane, Gennes, Venise & l'Esclauonie en peut rendre bon tesmoignage.

Il est donc force que la cherté vienne des traittes, auxquelles il n'est mal-aisé de remedier, pource qu'elles dependent de la disposition du Prince. Mais il se peut faire que l'abondance soit en vn païs, & qu'on n'en puisse toutesfois jouir à cause du grand nombre des bannis qui commettent mille méchancetez, & font vne infinité de rauages & de meurtres: auquel inconuenient il semble que l'Estat de l'Eglise est particulièrement sujet. Et de vray beaucoup de lieux de cet Estat demeurent deserts, beaucoup de campagnes ne sont cultiuees, & plusieurs personnes sont en miserable estat pour les dommages inestimables receus de ces coureurs. A quoy l'on pourra remedier estant en bon accord, avec les voisins, en ostant la commodité des bois & des retraittes à telles gens, & en dressant & eslargissant les chemins. Car ce fut par ce moyen qu'Auguste s'essaya de remedier aux meurtres & voleries qui se commettoient par toute l'Italie. Que s'ils se mettent aux champs, & viennent à vouloir tenir la campagne, il sera premierement besoing d'empescher qu'ils ne se r'allient ensemble, & s'ils se r'allient il faut essayer de faire qu'ils ne se puissent fier l'un à l'autre, & pour conclusion suiure le chemin & l'expedient de Sixte V. & de Clement 8. qui en ont exterminé presqu'entièrement la race.

La Romagne fait du sel qu'on porte aux autres païs. La Marque a donné quelquesfois iusqu'à cent mille sestiers de froment aux Venitiens, & grande quantité d'huyles. Le Patrimoine & la Campagne de Rome ont souuent assisté de grains Gennes, & quelquesfois encore le Royaume de Naples.

Quant à la ville de Rome on y trouue quelques Princes & Barons de 50. & cent mille escus, voire dauantage de rente, mais le general est plustost pauvre que riche, comme il faut par necessité qu'il soit en vn lieu où il n'y a aucun art propre, avec lequel les hommes se puissent entretenir, pource que presque toutes les choses dont on y vse y sont portees des païs estrangers, & principalement, les draps de laine & de soye, de Venise, Luques, Florence, Gennes, & Naples. C'est encore vne chose remarquable que l'argent qui est porté à Rome de tous les endroits de la Chrestienté, en partie pour la dépence des estrangers qui y demeurent, & en partie aussi pour les expeditions qu'on y obtient, & particulièrement pour les bulles des benefices, & en partie encore pour l'investiture de certains fonds, ou pour le profit, ou par ambition.

Quant au profit, on ne peut nier que l'Estat de l'Eglise ne manque de ceste partie, d'où vient que le Prince n'a des reuenus de ses terres, qui soient proportionnez tant soit peu à la grandeur & estendue de son Estat.

Mais pour le rendre marchand, il est besoing de deux choses: l'une d'introduire les arts, & principalement celuy de la soye & de la laine qui sont de si grande importance, que c'est de là que depend en partie la grandeur de Venise, de Milan, de Naples & de Gennes, dont les peuples s'entretiennent & s'enrichissent par ce moyen pour la plus grande partie.

C'est chose aisée de planter des meuriers aux enuirs de Rome & des autres villes de l'Eglise, comme on fait au Veronois, au Vicentin, & au Milanois. Le terroir en est aussi capable qu'ailleurs, & aussi fertile. Que si les Humiliez au commencement de leur religion furent suffisans pour introduire l'art de la laine à Florence & en d'autres lieux, pourquoy est-ce que cela sera difficile à l'autorité d'un Pape, & à un peuple qui s'y voudra employer? ou pourquoy est-ce que ces arts qui florissent tant aux autres villes ne pourront estre transpor-

tez

tez à Rome, à Ancone, à Ascoli & à Rauenne? L'autre chose est la commodité du trafic, pour lequel il est nécessaire de nettoier & accommoder les ports de Ciuità Vecchia & d'Ancone, pour y attirer à celle-là le trafic du Ponant, & à ceste-cy celui du Leuant, & il faut pareillement y attirer les marchands, avec de beaux priuileges, & de bonnes exemptions, & les entretenir en les accommodant, & leur faisant bon traitement. Et l'on ne doit rien espargner en cecy, pource que la grandeur des Estats & la richesse des Princes depend pour la plus grand part du grand abord & nombre des marchands.

Pour le regard du reuenue du Pape, il consiste en la Douane de Rome, & autres daces sur le vin & sur les cheuaux, en la gabelle de la farine, en la salure de Rome, en la gabelle de l'huile, au denier de la chair de tout l'Estat Ecclesiastique, & en la Douane du bestial du Patrimoine, aux luminaires de la Tolfe, Controolleur general des Postes, crimes de Rome, taxes des cheuaux, en l'ayde triennale payee par l'Estat Ecclesiastique, mise par Paul III. pour vne fois, & puis deuenue perpetuelle en l'ayde triennale payee par les Religieux non mendiants d'Italie aux collections d'Espagne, de Portugal, & d'Italie, cens de saint Pierre payés par le Royaume de Naples, la Duché d'Vrbain, de Parme, de Plaisance, & autres, en la Daterie, & outre ce aux reuenus ordinaires de la province de Rome, de la Marque, du Patrimoine, de la Campagne, & Ombrie, de Ferrare, Camerin, Peruse, Boulongne, Beneuent, de plusieurs villages, & autres petits reuenus.

Je ne mets pas en ce compte le profit des Legations & des gouuernemens retenus, comme j'ay dit, par le Pape: pource qu'on luy peut faire tenir la place des pensions qu'il paye à diuers Cardinaux qui sont pauures.

Je ne compte pas aussi les Annates des benefices & pensions pour l'expédition des Bulles: pource qu'elles ne viennent pas à la chambre, ains sont affectées à diuers officiers. Or plusieurs de ces reuenus ont esté alienez par diuers Papes, & toutesfois aujourd'huy ils rendent enuiron vn million & demy.

Ces alienations ont esté faites sous deux noms, ou d'offices, ou de Monts. Les offices sont presque tous les ordinaires de la Cour, & plusieurs autres ordinaires adjoustez, qui ont ceste condition, qu'ils vacquent par mort, on bien lors que celui qui les tient est fait Cardinal, & la Chambre les reuend, & l'on fait compte que ce profit monte iusques à cinq cens mille escus.

Les Monts sont de deux natures, ou vacans par mort, & ceux-cy rendent douze pour cent l'année, ou bien qui passent aux heritiers, & qui rendent sept, & sept & demy, que la Chambre paye toutes les années.

Outre cecy il y a plusieurs charges sur les reuenus, comme le gouuernement de Rome, & des Prouinces, & ce qui se donne aux officiers du peuple Romain. Il y a apres la depence de la famille, de la garde des Suisses, & cheuaux legers, de la garde du Chasteau saint Ange, d'Ostie, de Ciuità Vecchia, de Teracine, d'Oruette, des chantres, & plusieurs autres dépenses de la chappelle des trompettes, pensions de diuers officiers, Nonces, Courriers, aumosnes, & dons. Mais nonobstant toutes ces choses, & les grandes dépenses que le Pape Sixte 5. fit en plusieurs bastimens, il espargna tellement, & fit si bien ses affaires, qu'en cinq années de son Pontificat, il mit au Chasteau saint Ange quatre millions d'or. Car les Papes ont moyen de tirer tousiours de l'argent, & particulièrement de deux choses avec vne grande promptitude, l'vne en creant des Cardinaux, sinon ouuertement pour de l'argent, au moins pour les offices qui viendront à vaquer: l'autre en esslargissant dauantage la main permettant les regrez, & donnant d'autres graces, comme on auoit autresfois accoustumé. Mais il faut pour faire telle chose que la conscience du Pape s'accommode à ses affaires. A ce propos Sixte IV. disoit que l'argent ne luy manqueroit iamais tandis qu'il auroit vne main & vne plume. Et veritablement Pie IV. eut seulement des Religions 40000. escus, & en auroit trouué plus d'un million s'il eust voulu, comme on luy conseilloit, admettre les resignations des benefices avec regrez, & les compositions des offices. Paul troisieme entra en ligue avec les Venitiens, & l'Empereur contre les Turcs, pour la sixiesme partie de la dépence, & enuoya pour secours à Charles V. 12000. hommes de pied, & 500. cheuaux payez, & mit sa maison en la grandeur où nous la voyons. Pie cinquiesme enuoya 4000. hommes de pied, & 100. cheuaux à Charles IX. Roy de France.

Mais pour faire voir encor mieux les reuenus & les dépenses des Papes, j'ay pensé que ie rapporterois au Lecteur tout ce que ie dois, si ie luy en mettois icy vn estat. Le voicy donc tel que ie l'ay peutirer.

Les Douanes de Rome ont accoustumé d'estre affermees au plus offrant pour neuf années, c'est à sçauoir pour le prix de 35. mille escus ou enuiron l'année, & en tirant des regales avec augmentation, les tromperies qui s'y font, les vins francs des Ambassadeurs, &

lieux pies, & autres priuileges, il restera à la disposition de la Chambre pour ce temps-là 17000. escus.

La salure de Rome s'affirme ordinairement au plus offrant pour sept ans, & en tirant toutes les regales & dépenses, il reste chaque année pour la Chambre, 8690. escus.

La gabelle de deux carlins pour la monture du grain de Rome fut établie par le Pape Iulien 3. & depuis ils furent appliquez iusques à la somme de 21333. escus, à raison de sept & demy pour cent, puis ils furent reduits à 7. par Pie 5. & assignez aux Maistres du bastiment, & tout le reuenu, dont le maniement est donné au peuple Romain, avec la surintendance d'un des Seigneurs de la Chambre, monte, 16000. escus.

On afferme la gabelle du quattrain de la chair de Rome, à raison de 7. pour cent, 20000. escus.

L'imposition de 4. Iules pour le tonneau accordée au peuple Romain, 3000. escus.

La gabelle du quattrain de la chair à liure de l'Estat de l'Eglise, excepté à Rome, Bologne, Camerin, & Beneuent, s'affirme ordinairement soixante mille escus l'année: mais à cause des dépenses & regales, il en reste à la Chambre toutes les années environ, 5000. escus.

La maistrise des Postes de Rome, & de tout l'Estat de l'Eglise s'affirme 5000. escus, & en venant à soustraire toutes les dépenses, & recompences, il reste pour la Chambre, 2000. escus.

Les luminaires de la Tolse estoient autresfois affermees pour 64500. escus l'année, dont on paye 36500. escus aux faiseurs d'Alion, & le reste à diuers, avec les regales des Seigneurs de la Chambre, si bien qu'il ne reste aucune chose pour la Chambre.

L'imposition des chandelles s'affirme chaque année, 3000. escus.

Les cens de saint Pierre montent par an 31000. escus, & l'on les exige le iour de saint Pierre toutes les années, 31000. escus.

Les Clergez composez par les dépouilles, payent toutes les années pour saint Pierre, 2160. escus.

Le quartier des Moines reguliers monte chaque année 30662. escus, dont ils payent 14960. escus au Mont Naual des Moines, lesquels ils esteignent, & la somme de 15702. au mont Pie, & des recouuremens vacales, dont il ne reste rien pour la Chambre.

Le subside Triennal de la Marque monte soixante mille escus d'or à vnze Iules pour escu: dont on laisse quatre cens escus pour les bastimens d'Ancone, cinq mille escus pour les murailles de Fane, & 1160. escus pour les murailles de Ciuita noua, & au môt Cosere, vendus au Seigneur Jean George Cesarin, & 25. escus pour les gages du Thresorier, & paye tous les ans quatre mille escus au depositaire: si bien qu'il reste à la fin de l'année, 4958. escus.

Le subside Triennal de Rome monte 40304. escus d'or, dont on exige 2223. escus d'or priuilegiez Venitiens, & autres 223. escus, semblables sont laissez au Thresorier de la Prouince pour la garde de l'Illustrissime Legat, qui en rend compte, & autres 5400. escus au College des Clercs de la Chambre pour les trois adjoustez, & 203. escus de mesme sorte au Thresorier qui exige ce subside Triennal pour ses gages, & le port de l'argent à Rome: si bien qu'il reste à la Chambre de net, 29758. escus.

Le subside Triennal de l'Ombrie, & de Peruse 39701. escus d'unze Iules pour escus, dont on exige pour des terres priuilegiees 741. escu, & l'on paye tous les ans au Thresorier de Peruse 9485. escus, pour le suppleer aux payemens de la Thresorerie: mais à l'aduenir on en aura, & mesme desia on en a la plus grande partie; & 290. escus pour les gages & ports d'argent; & l'on a accoustumé de laisser pour les gages 100. escus par an, si bien qu'il reste pour la Chambre, 1376. escus.

Le subside Triennal de la Campagne de Rome, & des lieux maritimes, monte par an 1565. escus: les terres taxees 2048. escus d'or, 2048. escus.

Qui furent mis l'an 1551. par le Pape à 1755. escus d'or, & l'an 1571. par le Pape Pie à 15553. escus d'or; & ostant 770. escus qu'on exige pour l'impossibilité & les exemptions, & 120. escus pour les exacteurs, & le port de l'argent, il reste 14643. escus d'or, dont il vient en monnoye à la Chambre environ, 13632. escus.

Les taxes des cheuaux de la Marque montent 77221. escus, & sont assignees au Thresorier de ceste prouince; si bien que le reuenu qui entre en ladite Thresorerie est de 77221. escus.

La taxe des cheuaux de Patrimoine monte à 978. escus, & fut donnée en assignation pour 967. au mesme fermier des Douanes, & Thresorerie du Patrimoine, & l'on exige de reste, 978. escus.

La taxe des cheuaux de Romagne monte 5017. escus de monnoye, dont vne partie est payee pour recompence des moulins de Rauenne, & partie au College du mont Pa, non vacable;

vacable; de sorte qu'il n'en vient par an à la Chambre que 800. escus, qu'on tire de la Thre-
sorerie de Romagne, 800. escus.

Tiuoly paye de cens par an 200. escus, qui estoient donnez au feu Cardinal de Ferrare au-
tresfois, & sont aujourd'huy au depositaire. 200. escus.

L'augmentation du subside Triennal de la Marque, au lieu de la chair de pourceau estein-
te, monte 10134. escus douze lules pour escu. On en distrait 202. escus pour les charges, &
20. pour l'Exacteur, & port de l'argent: de sorte qu'il reste pour la Chambre, 7842. escus.

Ceste augmentation de la Prouince de Romagne monte 6512. escus d'or. On en distrait
114. escus pour les terres qui payent moins au subside Triennal, & septante-trois escus pour
les charges del'Exacteur, & le port de l'argent. Reste pour la Chambre 6325. escus.

L'augmentation de la Prouince du Patrimoine est de 2423. escus. On en distrait 305. pour
les terres qui ne payent point de subside, & 100. escus pour l'Exacteur, & le port de l'ar-
gent, 2423. escus.

La Thresorerie de la Marque avec la taxe des cheuaux de ceste Prouince estoit ordinaire-
ment affermee, 62015. escus.

La Thresorerie de Romagne s'afferme 3597. escus de dix lules par escu, & pour le gouver-
nement de ceste Prouince, & les Regales des Seigneurs de la Chambre Apostolique, & au
depositaire du Pape 1270. escus. Reste pour la Chambre, 17897. escus.

Le Thresorier de la Romagne reçoit du subside Triennal 2720. escus, & 2000. escus pour
l'Estat du Legat, & 3360. escus, pour la garde, & 2220. escus pour le bol, qui sont 83000. es-
cus, dont on tire 1700. escus pour l'Estat du Vicelegat, & 1068. escus pour la garde. Il reste
pour la Chambre, 6032. escus.

La Douane, & Thresorerie du Patrimoine s'afferme 66377. escus, & pource qu'il y entre
plusieurs Regales & depences, il reste peu pour la Chambre.

La Thresorerie de Camerin s'afferme 24500. escus pour neuf annees, mais pour plusieurs
payemens qu'on fait, il reste peu pour la Chambre.

La Thresorerie de Peruse, del'Ombrie, & les taxes des cheuaux de ladite Prouince s'affer-
ment ordinairement 203000. escus, mais à cause des grandes regales & payemens, il reste
peu à la Chambre.

La Thresorerie d'Ascoly s'afferme pour cinq ans 6354. escus, & à cause de beaucoup de
payemens, & de regales, il reste peu à la Chambre.

La Thresorerie de Campagne rend 10000. escus, & pour diuers payemens, il reste peu à la
Chambre.

La Thresorerie de Norcie tenuë par Nicolas Spinelli, pour l'aduanee qu'il fit à la Cham-
bre, & pour tenir compte des reuenus de la communauté, ne rend aucun compte à la Châbre.

La Thresorerie de Cascie fut vendue au mois d'Auril 1572. à Ioseph Ieronimo de Foligni,
qui en donna à la Chambre 500. escus d'or, & ceste cy ne rend aucun compte à la Chambre.

La Thresorerie de Beneuent paye 454. escus à ceux de la Chambre, & 728. escus pour salai-
res & diuerses depences, & 768. escus au Gouverneur, & 50. escus pour celuy qui le tient:
partant il reste fort peu à la Chambre.

La Gabelle de Spolète a esté affermee à raison de 4260. escus toutes les annees, dont on en
paye 781. au Thresorier de Peruse, & 1260. au Gouverneur de Spolète, tellement qu'il reste
pour la Chambre 2219. escus.

La Douane d'Ancone s'afferme au College du Mont Pie des recouurez, 3500. escus l'an-
nee, assignez au College; & outre ce la traite de 100. charges de grain, qui n'estant point le-
uee, en paye à la Chambre 1000. escus par an, & 179. escus pour les Regales des Seigneurs de la
Chambre. 3500. escus.

La Douane d'Amaragi de Ciuita noua s'afferme 13000. escus l'annee, à la charge de payer
au Secrétaire Apostolique 117. escus; & aux Religieuses de Viterbe 173. escus. Reste pour
la Chambre 1010. escus.

La ferme de Biede est de 1030. escus l'annee, qu'on paye au depositaire. 1030. escus.

Le Casal de Magrotte rendoit tous les ans à la Chambre 9240. escus, & fut vendu par Paul
4. à l'Hospital du saint Esprit.

La Gabelle du quattrain pour la liure de chair de Bologne monte l'annee 6088. escus, assi-
gnee au mont de l'augmentation de Bologne 6038. escus.

Le Subside Triennal de Bologne pour 9900. escus, fut assigné au mont del'Augmentation.
On tient qu'il monte 50. milles escus toutes les annees. Tous les Officiers y sont assignez.

Le cens de Riete fut jadis engagé à Iean Baptiste de Serene pour 400. escus, & depuis le fils
de Pierre Paul Mignanel l'auoit. Il porte toutes les annees 816. escus.

Les passages derniers auoient accoustumé de s'affermer 250. escus par an: mais ils furent
68

apres engagez à François de la Fontaine, puis possédez par Ierosme Ceoli.

Les minutes de la Chancellerie rendent par an 10000. escus, & sont presque toutes assignées aux officiers & domestiques de sa Sainteté 10600. escus.

Les profits du Mont de la Religion portent à la Chambre 16338. escus.

Autresfois la dace du vin de Bolognes s'affermoit 600. escus d'or l'annee 600. escus.

La depositaire, ou consignation de Fane pour les crimes assignee au Thresorier de la Marque, il reste les traittes dont on doit tenir compte, & cela monte chaque annee 100. escus.

Les terres de Seiches payoient autresfois par an. 440. escus.

La Ferme de la facture del' Alum monte l'annee. 200. escus.

La Ferme des sels d'Esclauonie porte l'annee. 750. escus d'or.

Des profits du Mont Pie qui se doit esteindre, on tire par an. 2350. escus.

Du reste du Mont d'Auignon on tire par an. 616. escus.

REVENVS INCERTAINS DV S. SIEGE.

Les deux premieres annees du Pape Sixte rendirent 130000. escus.

On dit que la Colleeerie d'Espagne rend vne annee portant l'autre, 44000. escus.

Celle de Portugal vne annee portant l'autre, 220000. escus.

Celle d'Italie vne annee portant l'autre, 12000. escus.

Les traittes des grains du Patrimoine de la Marquede Romagne ontporté à raison d'annee pour annee, 30000. escus.

Les restes du Mont vacable ont rendu vne annee portant l'autre. 1000. escus.

Les profits des Monts vacables rendent toutes les annees enuiron, 7500. escus.

Les affranchissemens des biens Ecclesiastiques rendent par an, 3500. escus.

La depositaire ou consignation de Bologne rend toutes les annees enuiron 4000. escus, qui demeurent dans ladite ville, 4000. escus.

La Daterie rend chaque annee, 68250. escus.

Ce que le Pape donne aux Cardinaux, & ce qu'il dépense en autres choses.

26. On donne aux Illustriſſimes Cardinaux gagez par sa Sainteté tnotes les annees, & à qui plus à qui moins, 1310. escus.

On donne ordinairement aux Maistres d'Hostel de sa Sainteté pour sa dépence ordinaire l'annee, 600. escus.

Et encor au mesme pour ayde de Cour, 12000. escus.

Et pour le renouuellement du buffet, deux fois l'annee, deux cens escus.

Pour les habits des familles à Noël.

Pour les habits des Palefreniers deux fois l'annee, à la saint Jean, & à Noël. 1710. escus.

Pour quelque dépence de Secretairerie de sa Sainteté l'annee, 1350. escus.

A vn Eſcrinain de la Secretairerie toutes les annees, 332. escus.

Tous les Chantres de la Chappelle de sa Sainteté ont de gage tous les ans. 180. escus.

A l'Apothicaire pour la cire de la Chappelle qu'il fournit pour l'usage du Pape, 4656. escus.

Pour la cire de Chandeleur, 1200. escus.

Pour les draps verds, 1500.

Pour les dépenses du Jeudy de la sepmaine Sainte, ou Peneuse, 105. escus.

Pour les rameaux d'Oliue, 250. escus.

Pour la rose d'or qu'on donne, 270. escus.

Pour l'épee qu'on donne, 240. escus.

Pour l'espee, ceinture & chapeau en broderie de perles, 240. escus.

Pour le daiz de drap d'or pour le Sauueur, & la Vierge, avec la façon, 340. escus.

Pour les tentes de la feste Dieu, & ensemble pour tout son appareil, 3000. escus.

Gages des hommes de Chambre, & des Escuyers par mois, 250. escus.

Archiuistes par mois, 20. escus.

25. escus.

CE QUE SA SAINCTETE DONNE A SES NONCES.

27. Au Nonce qui est prés del'Empereur tous les mois, 230. escus.

Au Nonce qui est en France par mois, 145. escus.

Au Nonce qui est à Venise par mois, 90. escus.

Au Nonce de Sauoye par mois, 115. escus.

Au

Au Nonce près du Duc de Toscane,	57. escus.
Au Nonce d'Allemagne par mois,	115. escus.
Au Nonce de Pologne par mois,	230. escus.
Au Nonce des Princes d'Allemagne,	130. escus.
Au Nonce de Naples.	
Au Nonce d'Espagne.	

GARDES DV PAPE.

A V Capitaine General des Gardes de sa Sainteté, toutes les années la somme de,	2400. escus.
A son Lieutenant par an,	639. escus.
A la garde des gens-d'armes, & cheuaux legers,	1077. escus.
Aux Suisses par an,	10932. escus.
Aux Suisses encor pour leurs habits,	26000. escus.
Aux mesmes pour leurs bonnets & pannaches,	200. escus.
Pour les petites & grandes Enseignes,	1000. escus.
En cheuaux pour donner à Noël, & autres,	1000. escus.
Pour le payement des cheuaux des Suisses quand la Sainteté se va promener hors de Rome,	250. escuss.

FORCES.

Quant aux soldats, la commune opinion est qu'il s'en trouue de meilleurs sur l'Estat del'Eglise qu'en tout le reste de l'Italie, & l'on fait estat que la Marque & la Romagne fourniront quinze mille hommes propres à mener les mains, & le Patrimoine, & la Campagne, peut estre autant. Et veritablement il ne faut douter qu'un Pape seul, ou accompagné de quelques autres, ne puisse avec tant de moyens qu'il tire, & les forces que l'ay dites faire du bien, & du mal quand'il vouldra, spécialement en Italie, où il a tant de part, & nous n'auons faute d'exemples qui nous enseignent que les Papes maintenoient, avec moins de forces qu'ils n'ont à ceste heure, leur autorité contre les plus Puissans Princes, qu'ils deposoient les Empereurs, & les Roys, & changeoient les Estats à leur volonté, & mesme on sçait ce que peut faire au temps de nos Peres le Pape Alexandre, qui poussa le Roy de France à passer les monts, & mettre en desordre toute l'Italie.

Leon dixiesme & Clement septiesme establirent la grandeur de leur maison avec plusieurs guerres, qu'ils firent seuls, & accompagnez, & Clement apres auoir eu quelques malheurs deuint plus grand qu'il n'estoit auant qu'il les eust soufferts. Paul troisieme du nom maintint la dignité de l'Eglise, & le repos d'Italie entre deux puissants Princes: plus avec l'autorité qu'avec les armes, fit la guerre aux Turcs, & laissa sa posterité en la grandeur où elle se trouue.

Iules troisieme prenant les armes en Italie la mit presque toute en confusion, & Paul quatrieme dépensa beaucoup de millions d'or, & laissa vne exemple remarquable des inconueniens qui peuuent naistre des desseins mal reglez d'un Pape. C'est pourquoy de mesme que les anciens auoient accoustumé de sacrifier à quelques Dieux pour auoir du bien, & à quelques autres pour ne receuoir aucun dommage, ainsi l'on a creu que c'estoit sagement fait d'estre tousiours bien avec les Papes, soit qu'ils se trouuent bons, ou autres, pource qu'autant que les faueurs que les Papes bien affectionnez peuuent faire, sont vtils durant la paix & la guerre, aussi les maux qu'on peut craindre des Papes ennemis, sont fort dangereux; & iamais celuy qui veut mettre en desordre les autres, ne manque de gens qui le poussent.

Pour ceste cause tous les Princes de la Chrestienté, tant grands que petits, meus de pieté, ou poussez par d'autres considerations, se sont humiliez aux Papes, & tous vniuersellement, encores que grands, ont taché de se les rendre amis, ou pour le moins de ne les auoir pour contraires. Mais pour reuenir aux peuples qui sont sous la domination des Papes, apres auoir dit le nombre de ceux qu'on pourroit tirer de deux ou trois provinces pour les mener à la guerre, il faut considerer la qualité de ces gens.

La Marque est pleine d'hommes belliqueux, & pour ceste cause propre à empêcher que les ennemis ne mettent pied à terre, & à faire repentir ceux qui l'y auoient mis.

C'est en cet Estat que sont les Latins, & les Romains dompteurs du monde, & ceux de la Romagne, de la valeur desquels il ne faut dire autre chose, sinon que par leur moyen l'Italie fut deliurée des Barbares qui la tyrannisoient, & recouura sa premiere gloire.

Car Alberic Comte de Cuni, ayant ramassé douze mille combattants, qui on nomma

8 ij

la compagnie de saint George, poursuiuit de telle sorte les nations estrangeres qui rauageoient l'Italie, qu'il les en chassa toutes, & reduisit l'art militaire, auparauant mal entendu des Italiens, en tel estat, qu'on n'estimoit aucun Capitaine s'il n'auoit cōbattu sous luy.

Ceux de la Marque furent les premiers qui commencerent la guerre Sociale estimée par les Romains, l'une des plus dangereuses qu'ils ayent eues. Vous y voyez les Ombres, dont Hannibal apres auoir vaincu les Romains au lac Trasymene, esprouua la resistance, n'ayant peu se rendre maistre de Spolete : tellement qu'il cogneut combien estoit chose malaisée de subjuguer Rome, puis qu'apres vne si grande victoire il auoit en vain attaqué ceste ville.

L'excellence des Capitaines n'est pas moindre que la valeur des soldats de l'Estat Ecclesiastique. Car on y void florir plusieurs familles propres à pouruoir de Capitaines tous les Princes, & toutes les Republiques d'Europe.

Tellement qu'il ne se faut estonner, de ce qu'en la guerre de Ferrare, finie heureusement en bien peu de temps, on a veu mettre en armes près de vingt mille hommes de pied, & deux mille cheuaux tout de cet Estat, presque dans vn mois; chose que peu d'autres Princes & Seigneurs d'Europe pourroient faire.

Quant à l'assiette, cet Estat est entre la mer Hadriatique, & la Tyrrene, & est presque au milieu de l'Italie; à raison dequoy de mesme qu'il est des plus assurez des courses des Barbares, aussi c'est le plus propre à travailler, & tenir en paix l'Italie.

Il n'a point de port capable d'une grande armée de mer, & le riuage Romain est fort subiet à la tempeste, de mesme que celui de la Marque, & de la Romagne. Tellement qu'il ne peut estre assailly par mer, ny avec de grandes forces, ny sans peril.

Il faut adjoûter à cecy que la partie qui regarde la mer de Toscane a vn air mal sain : si bien que cela seul seroit suffisant pour combattre, & deffaire les ennemis.

D'ailleurs la Marque, & la Romagne ont pour rempart, & bastion deçà l'Esclauonie, & de là les deux Siciles. Ce qu'on peut assez cognoistre en ce que les Turcs n'ont iamais eu la hardiesse de s'en approcher, combien qu'ils l'ayent assez desiré.

Après cela il n'a par terre aucuns confins qui luy puissent donner de la crainte; veu qu'il surpasse en forces la Toscane, & ne cede au Royaume de Naples. Car encor que ce Royaume soit plus grand, plus riche, & plus peuplé que n'est l'Estat de l'Eglise; toutesfois il ne luy cede en beaucoup de choses.

Premierement à cause qu'il est long & estroit, il a beaucoup de difficulté à vnir ses forces; dauantage c'est vn pais de conqueste; à raison dequoy le Prince ne se peut seruir de ces peuples avec la mesme assurance qu'il feroit s'ils estoient ses subiects naturels, pource il est contraint d'y tenir de grosses garnisons, auxquelles le Roy d'Espagne dépend presque tout ce qu'il en tire. Mais le Pape est Seigneur naturel de cet estat, pour la conseruation duquel il ne faut pas (pour le regard des subiects) qu'il dépence vn sol: ie laisse l'autorité que la Religion aporte au Pape, & l'interest que les autres Princes ont en la conseruation de l'Estat de l'Eglise, dont le rabais feroit leur perte, & ie laisse aussi la promptitude avec laquelle les Princes estrangers prendroient la protection de l'Eglise, ou par le desir de gloire, ou par raison d'Estat.

C'est pourquoy nous voyons que Gregoire septiesme, & Alexandre troisieme, ont fait teste à des Princes qui auoient les forces de l'Empire, pour lors plus puissant qu'il n'est à ceste heure, jointes à celles des deux Siciles.

Que diray-je des fortresses d'Oruiette, de Citecastellane, de Castre, de Pallian, du chasteau de Spolete, de Peruse, d'Ancone, de Forli, de Bertinor, de la ville & citadelle de Ferrare, & mesme on peut dire que l'Ombrie, à cause de ses passages estroits, & de l'aspreté de son assiette, n'est rien qu'une forteresse.

Ceste importance, & grandeur de l'Estat Ecclesiastique est redoublée par la grande autorité du Pape, veu qu'il n'y a Prince qui ayt plus de moyen de recompenser & de punir, qui puisse plus donner avec moins de perte, qui puisse conferer des dignitez esgales à la grandeur des Princes, sans crainte d'ameindrir la grandeur de sa Principauté; il n'y a Prince qui soit plus respecté de ses voisins, ny plus reueré de ceux qui sont esloignez, & pour abreger on ne peut dire que les Roys, & les Empereurs puissent receuoir de l'honneur de leur obeissance, si ce n'est en la rendant à ce Prince.

C'est le subiect qui a conuié les Roys d'Angleterre à se rendre tributaires, & les Roys de Naples à se rendre vassaux de l'Eglise, & la Comtesse Matilde à laisser la mesme Eglise heritiere de son grand Domaine.

Ceste autorité est si grande, que par son moyen Leon troisieme desmembra l'Empire d'Occident de celui d'Orient, & en inuestit Charles le Grand, & ses successeurs. Avec la mesme Gregoire cinquieme mit l'Empire entre les mains des Allemans, & en institua

sept Eleveurs. Ce fut avec la mesme qu'Alexandre 6. diuisa par vne ligne toutes les nauigations de l'Ocean, & des terres neufues, entre les Castillans, & les Portugais.

Il faut adjouster à cecy que l'Estat de l'Eglise est aujourd'huy plus paisible, & la grandeur temporelle du Prince est plus releuee que iamais, pour deux raisons.

L'une fut la vente de la liberte que fit l'Empereur Rodolphe aux peuples de Toscane: ce qui fit que l'Empire manqua d'autorité, & les Empereurs manquerent de subiect de venir en Italie, & de traualier l'Eglise.

Ceste cy fut suivie de l'autre, qui fut l'extirpation de tant de petits Seigneurs qui déchiroient l'Estat de l'Eglise. A quoy Alexandre 6. & Iules II. traualierent grandement.

Et ce qui ayde encore à ceste grandeur, c'est que le Royaume de Naples & l'Estat de Milan sont sous vn Prince qui ne demeure pas en Italie.

Or l'on pourroit entierement assseurer cet Estat en le garnissant de forteresses, comme les Venitiens, ou de gendarmerie, comme les Turcs, ou de l'un, & de l'autre, comme font les Roys de France, & d'Espagne.

Quant aux forteresses (ie parle des Estats hereditaires, & comme naturels, & non de conquete, & acquis par force, & par violence) on peut disputer s'il est meilleur de fortifier les frontieres, ou le cœur de l'Estat, ou les frontieres, & le cœur tout ensemble. Surquoy ie dy, que des villes maistresses, quelques-vnes sont semblables au cœur, tant pour leur assiette, que pour leur office: pour l'assiette, pource qu'elles sont au milieu des Estats, comme Lisbonne, Prague, Londres, Florence, Paris, & Madril; pour raison de l'office, pource qu'à cause de leur richesse elles fournissent les forces aux autres membres. Quelques vnes sont semblables au cœur quant à l'office, & à la teste quant à l'assiette, pource qu'elles ne sont pas au milieu des Estats, ains en quelque extremite, comme Naples, Palerme, ou Messine, & comme Gennes, qui est assise au milieu de la riuere, quant à la longueur, mais en vne extremite, quant à la largeur.

Or les villes maistresses qui sont au milieu des Estats doiuent estre plustost seures que fortes, & la seureté consiste à estre esloignees du danger. Cecy s'obtient par la fortification des extremitez, & des passages. Car la fortification d'une ville maistresse assise au cœur de l'Estat, oste premierement la hardiesse à tout le reste du pais, puis l'autorité & la reputation au Prince, comme à celui qui se deffiant de pouuoir tenir & deffendre le reste, pense à se sauuer au cœur de l'Estat, veu que comme quand la chaleur naturelle se retire des pieds, des jambes, & des autres parties esloignees du cœur, il y a peu d'esperance de vie au malade; ainsi quand vn Prince fortifie la ville où il demeure, & le milieu de son Estat, il semble qu'il ait perdu le courage, & le moyen de deffendre l'extremite. Puis sauuant les extremitez on sauue encor le milieu, mais non au contraire. Tellement qu'il faut que le milieu s'employe pour son bien à fortifier les extremitez: ce qui ne se pourra faire si tu fortifies le milieu, pource qu'il sera necessaire de mettre en la fortification & munition de ce milieu ce qui seroit bon pour les extremitez, c'est à sçauoir des viures, de l'artillerie, des munitions, des armes, & des soldats. Et pource que les villes capitales sont ordinairement grandes, elles requierent vne si grande depence & prouision qu'il ne restera nul moyen de fortifier, & pouruoir la frontiere. Cecy a esté esprouué par le Duc de Mantouë en la fortification de Casal. Et par ce moyen il me semble que i'ay répondu à ce qu'on pourroit dire qu'on peut fortifier les extremitez & le milieu tout ensemble.

Somme toutes les extremitez ne doiuent faire autre chose que tenir l'ennemy arriere de l'Estat, & le milieu ne doit s'employer qu'à fournir les extremitez: ainsi que nous voyons en vn corps animé que l'office des mains est d'empescher les dangers, & celui du cœur de fournir la vigueur, & la force aux mains. Outre ce vne ville maistresse non seulement aura plus de moyen de secourir les extremitez n'estant pas fortifiée, mais encore en aura plus de soing, pour le besoing qu'elle aura de loger l'esperance de la sauueré en la deffence, & munition des frontieres. Si bien que ie resous qu'une telle ville est plus propre à tenir les ennemis loing d'elle, & à garnir la frontiere avec toutes les forces, n'estant pas fortifiée, qu'avec vne partie des dites forces estant bien mise en deffence, & tout cecy sont dit des Estats qui sont vn peu grands: car quant aux petits, dont les extremitez sont presque jointes au cœur, la fortification de ce milieu est entierement necessaire.

Mais les principales villes autrement assises, & qui ressemblent plus à la teste qu'au cœur, n'estants pas en seureté, pource qu'elles sont en quelque extremite, ont besoing d'estre fortifiées. C'est pourquoy de mesme que la nature alleure la teste de quelques animaux, non seulement avec le crane, mais encor avec les cornes: ainsi la raison d'Estat, & de guerre, non seulement ceint semblables villes de murailles, mais les renforce encor avec des citadelles.

Quelqu'un dira que mesme les villes assises au centre des Estats ressemblerent autant à la teste qu'au cœur, pource qu'elles communiquent aux places des environs, non seulement l'esprit, qui est le propre du cœur: mais encore le sens & la conduite, qui est le propre de la teste. C'est pourquoy en fortifiant les vnes, on ne peut desnier ceste fortification aux autres.

Il n'est pas mal-aisé de résoudre ceste difficulté. Car en premier lieu la teste sert aux animaux de chef, & de mains: de chef pource qu'elle contient le cerveau; de mains, pource que l'animal s'en sert pour en offencer. Et il y a quelques animaux, qui font cecy avec la bouche, & pour cet effect ils l'ont longue & grande, comme le chien, le loup, le lion, les poissons, & les oyseaux: quelques-uns les font avec les cornes, comme le taureau, le cerf, & le beuf; les autres offencent avec les dents extraordinairement grosses, & longues comme le sanglier, & l'elephant, qui a outre cela la trompe, pource que l'office du chef n'est pas de combattre, mais de prevoir avec les sens, dont il est doué, & c'est la main qui doit repousser les attaques, empêcher les coups, & esloigner les dangers. C'est pourquoy la teste des animaux n'est armée comme chef, mais comme main. Apres cela le conseil, & le gouvernement de l'Estat ne depend du lieu, mais du Prince & du Magistrat, qui demeure maintenant en vne place, & tantost en l'autre.

C'est ce qui a fait que les Papes ont tantost fait séjour à Viterbe, tantost à Oruicte, à Peruse, à Anagne, à Rieti, en Avignon, & à Ferrare.

Mais pour le regard de donner vigueur aux entreprises, c'est chose qui depend du cœur de l'Estat par la richesse des reuenus, l'abondance des munitions, & des viures, la multitude des personnes, & la commodité de l'assiette: chose qu'on ne peut transporter d'un lieu à l'autre.

Or Rome n'est pas véritablement au milieu de l'Estat de l'Eglise, veu qu'elle est fort esloignée de Bologne, & de Ferrare, & assez proche des frontieres de l'Abbruzze, & toutesfois elle n'est pas aux extremités, & tout aupres des ennemis.

C'est pourquoy il n'est pas à propos qu'elle soit parfaitement fortifiée, ny aussi qu'elle soit du tout foible: mais comme nous la voyons avec le chasteau, & le bourg fortifiés, & le reste plustost ceint de murailles que bien remparé.

Car si l'on la fortifioit entierement, ce seroit chose qui apporteroit des inconueniens, & des desordres que nous auons dits cy-deuant, & pour asseurer les affaires, consumer les ennemis, & donner du temps aux secours, & aux occasions, il suffit que le bourg & le chasteau soient forts.

30. Mais pour dire quelque chose de ce qu'on a fait en diuers temps touchant la fortification de Rome, Bellissaire refit les murailles ruinées, mais avec un circuit beaucoup moindre. Puis ces murailles estans encores par terre, Adrian premier les redressa, & Leon 4. pour empêcher que les Sarrazins ne vinssent à Rome en montant contremont la riuiere, bastit autour de la ville, tours, & entre les autres en fit deux fort nécessaires, c'est à sçauoir vne de chaque costé du Tybre. Il ceignit le Vatican de muraille, qu'il nomma de son nom Leonine. Nicolas 3. en uironna la Muraille Belueder. Paul 3. commença à fermer le bourg, avec dessein, que Rome étant fort solitaire du costé du Levant, & la muraille esloignée des lieux habitez, & pour ceste cause ne se pouuant bien fortifier de ce costé, ny deffendre avec peu de gens, le peuple eust là pour le moins un refuge pour quelque temps. Pie 4. mit en bon estat ceste fortification, & aggrandit le chasteau. Il reste donc que les frontieres de l'Estat soient fortifiées.

Or l'Eglise confine avec le Royaume de Naples par tout le trauers d'Italie d'une mer à l'autre, le Perus, & le Patrimoine continent avec le grand Duc, le Ferrarois, & le Bolonois avec le Duc de Mantoue. Apres cela les interets des Princes ne portent pas qu'il y aye ligue, & union entre eux contre l'Eglise, pource qu'il est plus expedient à tous qu'elle se maintienne en sa grandeur, que non pas son rabais, & declin adjouste de la puissance à quelque Prince qui est desia assez puissant de luy mesme. Car de mesme que le Pape est Pere vniuersel, aussi il semble que l'Estat de l'Eglise soit un Estat duquel tous doiuent attendre du secours, ainsi que les Venitiens en ont souuent eu contre le Turc, les Cheualiers de Malte en leurs necessitez, & l'Empereur Charles en la guerre de Saxe, veu que tous ceux-cy ont esté secourus d'argent & d'hommes par les Papes.

Je ne parle pas de l'Empereur Ferdinand, ou de Maximilian, ou de Rodolphe qui regne aujourd'huy, ou du Prince de Transylvanie, qui ont tous esté secourus contre les Turcs de grosses sommes d'argent, & de force cavalerie, & infanterie par le Pape Clement septiesme. Paul troisieme, Pie troisieme, Pie cinquiesme, & Clement huitiesme. C'est pourquoy il me semble que c'est chose plus importante au Pape de se maintenir en reputation de Pere commun,

commun, & de ne rompre avec aucun, que de fortifier ses places, pource que par ce moyé de mesme qu'il assure tous les Princes voisins de son Estat, aussi tous l'assureront, & iront à l'enuy à qui le secourra, & le servira mieux. Mais si l'on doit fortifier quelque place ce doit estre aux frontieres plus esloignées, qui sont celles du Ferrarois, & du Boulonnois. Quant à Ferrare, elle est si forte que l'Eglise ne peut recevoir du dommage de ce costé-là.

Le Boulonnois est véritablement foible, pource que Bologne n'est forte, ny bonne à fortifier, à cause des lieux qui luy commandent. Si bien que pour assurer l'Estat de ce costé-là, on ne peut mieux faire que de fortifier Castelfrâc, lieu qui pour estre en plaine, non subiect à des lieux plus hauts, est capable de toute fortification : & pour estre en pays abondant, & avoir Bologne pour voisine, & interessée en sa deffence, pour son bien propre, & de son territoire, peut estre aisément pourueu, & bien muni.

Pie cinquième comença la fortification de Castelfrâc, mais il ne la laissa presque qu'esbauchée, à cause du bruit de la guerre de Cypre. Avec ces deux clefs, qui sont Ferrare, & Castelfrâc, l'Estat de l'Eglise demeure entièrement assuré de tout l'orage qui luy peut venir de de-là les monts, & de Lombardie. Du costé du Royaume de Naples la longueur de la frontière demanderoit beaucoup de forteresses. C'est pourquoy l'on pourroit fortifier vers la Marque Transone, Offide, & Ascoli : mais Ascoli comme bonne ville forte d'assiette, & de gens, & située au delà du Tront, au pays des ennemis, seroit suffisante, & propre à les travailler en leur estat, propre, comme la vraie raison de guerre le requiert.

Vers la Sabine il suffira d'avoir Rieti, ville assez bonne & en bon pays, qu'il ne faut abandonner aux ennemis pour ceste cause. Du costé de la Campagne, encor que ce seroit chose importante de fortifier Terracine, Frusino, Firentin, Signe, & Anagni, toutesfois quelques-uns tiennent qu'il suffiroit de mettre en deffence Frusino, & Anagni, en abbattant toutes les petites forteresses qui sont plus proches de Rome, afin que les ennemis ne s'y peussent loger, & s'y rendre forts. Du costé de la Toscane l'Eglise a les villes de Castello, de Peruse, d'Orviete, de Castro, & de Viterbe, qui sont pour la plupart assez fortes.

Mais pour dire la verité, l'estat de l'Eglise ne pouvant estre assailli plus dangereusement que du costé de la Toscane, non à cause des forces de son Duc, mais du passage qu'elle peut donner aux ennemis, comme elle le donna à Charles huitiesme Roy de France, & à Charles Duc de Bourbon, il sera tousiours à propos, qu'un Pape tasche d'avoir le Duc de Toscane pour amy, en sorte qu'il luy serve de deffence contre les estrangers.

Il reste maintenant que nous parlions de la mer de Toscane, & véritablement il est à propos que le Pape aye cinq ou six galeres bien en ordre, tant pour assurer la mer & la navigation, que pour vne certaine grandeur & reputation, pource que ce seroit chose indigne de laisser entièrement ceste mer, sur laquelle l'Eglise a tant de places, & il semble que le Prince qui ne joint les forces maritimes à celles de la terre, ne peut estre estimé puissant. Mais les galeres pourroient estre mises entre les mains de quelque ordre de Chevaliers, à qui l'on donneroit l'Isle de Ponze pour demeure. Mais pour sçavoir de quelle sorte cecy doit estre institué, l'exemple du grand Duc Cornet a montré, & ce seroit chose trop ennuyeuse que d'en rapporter icy la maniere. Il faudroit que le chef de l'ordre demeurast à Ponze, de mesme que les galeres, premierement pource que la Chourme, & les autres gens que le mauvais air consume à Ciuita Vecchia y seroient plus sains, & plus gaillards, & aussi qu'avec leur ayde, Ponze qui a de tour dix huit milles, & qui a pour voisines Palmaiuele qui en a douze, & Lanuque six, & trois autres moindres Isles, toutes fertiles, & qui au temps de Strabon estoient pleines d'habitans, seroient assurées des Corsaires, & cultivées, & l'on tireroit encor quelque fruit de ceste mer, qui est abondante en poissons, & principalement en Sardine. Davantage les galeres seroient en lieu plus propre pour descouvrir la mer, & plus commode pour couper chemin aux Corsaires, qui tireroient vers la terre pour y faire quelque butin, ou qui en retourneroient. Mais il n'y a chose à laquelle il faille estre plus attentif qu'à conserver & multiplier les habitans de l'Estat, pource que c'est de cecy que la grandeur de toutes les principautez procede.

Surquoy ie trouue qu'il est à propos de discourir d'où vient qu'en plusieurs endroits d'Italie on void manquer le nombre d'habitans qui leur seroit convenable, afin qu'on y puisse remedier en l'Estat dont nous parlons. Le peuple manque donc en partie pour des causes naturelles, comme la peste, & en partie aussi pour des causes naturelles & humaines tout ensemble, comme la famine, pource qu'il adient bien rarement que la nature cause la cherté sans le concours de l'avarice des hommes, en partie pour les causes purement humaines, comme la guerre, les assassinats, les courses de voleurs, & gens de pareille estoffe. Les hommes manquent aussi, pource qu'ils reçoivent solde des Princes estrangers, & vont à la guerre à leur service. Et en ceste sorte il n'y a Estat qui resente plus

Qui resente plus
g. iij

ce mal que celui de l'Eglise, pource que c'est comme vn champ commun, sur lequel chacun fait ses desseins, & des forces duquel chacun se preuaut. Les hommes manquent encore, pource que les Princes chargent trop le pays d'impositions, & de tailles, à raison desquelles le peuple ne s'y marie, ou bien s'en va dehors, ou bien si quelques-vns y establiissent leur demeure, & s'y marient, ils n'ont pas le moyen de s'entretenir eux-mêmes, tant s'en faut qu'ils puissent seulement nourrir leurs enfans: à raison dequoy l'on void les chemins pleins de mendiants. Les hommes manquent encor dauantage aux lieux où le Prince non seulement oste toute la substance au peuple, mais encor serre l'argent qu'il en tire; pource que leur ayant osté l'argent avec les impositions, il leur rait encor la vie, en leur ostant toute commodité de gagner, & de payer ces impositions. Celuy fait encore pis, qui non seulement priue ses sujets du moyen de faire quelque gain, mais veut encor le gain pour luy-mesme, en exerçant le trafic. Les guerres, & les entreprises esloignées consomment allez de gens, pource qu'il en reuiert peu: ce que les Espagnols esprouuent en leurs entreprises de l'Amerique, & ont essayé aux guerres de Flandres, & les Portugais aux entreprises des Indes. Les Turcs ont esproué le mesme en la guerre de Perse, & pareillement en celle de Hongrie. Ce qui rend encor vn peuple miserable, & rend vn pays desert, c'est la gourmandise, & la pompe, pource que ces deux choses font que ceux qui seroient capables de nourrir dix personnes avec leur travail, n'en peuuent presque entretenir vn seul, & que se trouuillant apres des choses vaines & superflues, ils laissent les vtiles & necessaires. Le peuple vient de mesme à manquer si les biens premierement distribuez à plusieurs, viennent entre les mains de peu de personnes. Ce qui arriua sous les Romains à l'Italie, à raison dequoy Plin dict qu'elle demeura desnuee d'habitans, pour la grandeur des biens de peu de personnes.

GOVERNEMENT ANCIEN.

Pource que la conduite des Romains a esté si bonne, que presque toutes leurs entreprises leurs ont heureusement reüssi, j'ay creu que ie ferois plaisir au Lecteur si ie luy mettois icy le plus briuevement qu'il sera possible le gouuernement ancien de ceux qui se sont rendus redoutables à tout ce qui estoit de leur cognoissance, autant par leur sage & admirable conduite, que par leur courage. Je commenceray donc par le Senat duquel dependoit toute l'administration des affaires, & en parleray selon qu'il estoit auant la Mouarchie, & apres.

33. L'ordre des Senateurs fut institué par Romulus, qui considerant que sa ville estoit assez bien fortifiée d'une gaillarde ieunesse, & que ce ne seroit chose moins importante de la fortifier avec le conseil, esleut cent des premiers citoyens qui se trouuoient alors qu'il appella Peres par honneur, & Senateurs, à cause de leur aage; & ceux qui nasquirent apres de ces Peres furent appelez Patrices. Tullus Hostilius rendit cet ordre plus parfait apres qu'il eut destruit Albe, & conduit ses habitans à Rome. Car il receut alors entre les Senateurs les Tulles, les Seruilies, les Quintes, les Gregentes, & les Clodes: Mais lors que les Roys furent chassés, Brute Consul voyant le Senat vuide de personnes de bien, voulut que les premiers de l'ordre des Cheualiers fussent faits Senateurs, & les appella Peres Conscripts, c'est à dire joints avec les Peres. Ces Senateurs prirent vne grande autorité qu'ils gouuernoient toutes les affaires de la Republique, tellement que ny les Roys, ny les Consuls, ny les Dictateurs, ny aucun autre Magistrat, ne faisoit chose que le Senat n'eust premierement resoluë, & Tarquin le superbe ayant fait plusieurs choses à sa volonté sans l'autorité du Senat estoit appellé tyran, & perdit en fin cet estat. Je trouue que les Senateurs furent de trois Ordres, veu que les vns furent nommez Patrices, les autres Pedaires, & les autres Conscripts. Nous auons parlé des Patrices, & des Conscripts: mais quant aux Pedaires ils estoient ainsi nommez pour plusieurs raisons. Quelques-vns disent qu'ils ne pouuoient dire leur aduis au Senat, ains consentoient à l'opinion des autres, qui est en Latin, *Pedibus ire in sententiam aliorum*: les autres, que plusieurs des Senateurs estans en Magistrat alloient au Senat en litiere, ou coche, & que les autres qui n'auoient aucun Magistrat faisoient ce chemin à pied, & pour ceste cause estoient appelez Pedaires. Varron dit que c'estoient quelques Cheualiers qui ayans exercé les plus grands Magistrats, & estans pas encor compris dans le Senat par les Censeurs, ne pouuoient dire leur aduis, ou donner sentence au Senat, ains seulement s'y trouuer, & s'accorder à l'opinion des autres. Mais pour dire l'ordre d'opiner au Senat, ie trouue qu'on auoit accoustumé au commencement de laisser opiner au premier celui qui auoit esté ordonné chef du Senat par les Censeurs. Quelquesfois aussi ceux qui estoient esleus Consuls commençoient. Ciceron dit en son discours de la vieillesse, qu'on donnoit iadis ceste preference au plus vieil: toutesfois on dit que celui qui estoit prie

prie par le Consul deuoit dire premier son aduis, suiuant vne coustume qui fut introduicte, mais il ne pouuoit prier aucun qui ne fut Consulaire. Aule Gelle dit que Varron escrit de ceux qui pouuoient assembler le Senat, & nomme le Dictateur, le Consul, le Preteur, le Tribun du peuple, & le Prefect de la ville. Il adiouste hors de la iurisdiction ordonnee les Tribuns militaires, qui auoient esté Proconsuls, les dix hommes qui auoient alors la puissance Consulaire, & les deux hommes creez pour ordonner la Republique. Il dit qu'il ne se souuient si le Prefect de la Cité des Latins auoit ceste autorité, pource qu'il n'estoit pas Sénateur, & ne disoit son aduis au Senat. Varron dit que le Prefect de la Cité le peut assembler, & le Tribun du peuple pouuoit faire le mesme auant la loy d'Atinius, encore qu'il ne fut pas Sénateur. Mais on tient que pour le regard du lieu où l'on pouuoit assembler le Senat, il ne pouuoit estre autre que celuy qui estoit ordonné par les Augures, qui estoit par eux nommé Temple. Et le Senat s'estant assemblé en la Cour Hostire, en la Pompee, & apres en la Iulie, qui estoient lieux prophanes, les Augures ordonnerent que ce fussent des Temples, afin que selon la coustume de leurs predecesseurs les deliberations s'y passassent. Quant au temps de ceste assemblée, le mesme Auteur dit qu'elle n'estoit d'aucun fruct si elle se faisoit ou auant le leuer du Soleil, ou apres qu'il estoit couché, & dauantage, il falloit que le Censeur ordonnast le temps pour deliberer. Quant à l'age des Sénateurs, depuis ce qui aduint à Papyrius Pretextatus, il fut ordonné qu'aucun qui n'eust vingt-cinq ans ne pourroit demeurer dans le Senat, ainsi qu'on lit dans Plutarque en la vie de Pompee.

Varron dit aussi que celuy qui vouloit entrer au Senat, deuoit premierement immoler, & que les deliberations se faisoient en deux sortes, ou par dispute, ou si la chose estoit douteuse, par aduis d'un chacun, & l'on ordonnoit vne amende contre ceux qui ne se trouuoient au Senat quand il s'assembloit. Les Posthumes estoient neantmoins appelez hommes du Senat. Mais ceux qui estoient nez, & conceus apres que leurs peres auoient esté mis hors du Senat, n'estoient tenus pour enfans de Sénateurs: & au contraire s'ils estoient conceuz auant cet accident. Mais si les enfans conceuz d'un pere mis hors du Senat qui venoient à mourir, tomboient apres sa mort au pouuoir de leur grand pere Sénateur, ils estoient estimez du Senat.

Pour les Tribuns des Cheuaux legers, Romulus les institua le premier, quand il adiousta trois centaines ou centuries de Cheualiers, qu'il employoit en toutes les necessitez de la Republique, & les nomma Rhamnesiens, Tatiens, & Luceres.

La creation des Questeurs est tres-ancienne, veu qu'ils furent ordonnez presque auant tous les Magistrats: car il est certain que Tullus Hostilius en crea, & quant à ce qu'on tient que Romulus auoit deux Questeurs, ce n'est pas chose asseuree. On dit qu'ils furent nommez Questeurs pource qu'ils estoient commis pour exiger les deniers publics, & auoient le soing du thesor public, & qu'une partie de ces officiers alloit par les Prouinces pour retirer l'argent des daces, & une autre partie auoit la charge de lire dans le Senat les lettres enuoyees d'un costé & d'autre. On dit que les Questeurs examinoient quelquesfois les criminels, & Varron veut qu'ils ayent ce nom de Questeurs, pour la question qu'ils ordonnoient qu'on donnast aux malfaieteurs. C'estoit la coustume de creer les Questeurs autant de l'ordre du peuple, que des Patrices. Et pource que les Consuls ne pouuoient condamner vn citoyen Romain à la mort sans commission du peuple, on ordonna que les Questeurs seroient commis sur les choses capitales, & ceux-cy se nommoient Questeurs des homicides.

Si nous voulons à ceste heure regarder au commencement des deux hommes il sera befoing de commencer depuis le temps du Roy Tullus Hostilius qui les ordonna lors qu'Horace reuenant victorieux des Curiaces, eut tué sa sœur.

Ce Roy voyant que chacun le condamnoit à la mort, commit pour iuger du fait ces deux hommes qui le condamnerent: mais il appella de sa sentence au peuple, & fut absous. Voila le commencement des deux hommes capitaux, auxquels l'on en adiousta vn troisieme, & pource qu'ils estoient commis sur les choses capitales, ils auoient aussi charge des prisons des criminels, & Tite Liue dit que ce Magistrat fut employé à la condamnation de C. Manlius Capitolin, & ceux-cy mesmes punirent tous ceux qui se trouuerent de la conuersion de Catilina.

Quant au Prefect ou Gouverneur de la ville, sa Iurisdiction s'estendoit par toute l'Italie, il prenoit cognoissance de tous les crimes qui y estoient commis. Il donnoit audience aux esclaves qui auoient recours aux statues, & se plaignoient de leurs maistres en quelque chose. Il auoit aussi pouuoir de bannir, ainsi que ceux qui accusoient quelque femme d'auoir commis adultere avec son esclave. Les tuteurs, & curateurs comparoient aussi de.

uant luy pour toutes sortes de choses qui concernoient leur charge, & de mesme il prenoit cognoissance de l'ingratitude des affranchis envers leurs maistres. Il auoit aussi charge de toutes les choses qui se vendoient, & il deuoit prendre garde que toutes choses fussent laissées à prix raisonnable. Il auoit aussi des hommes de tous costez, pour luy rapporter ce qui s'y faisoit. Finalement la creation ayant duré long-temps la iurisdiction fut donnée au Preteur des Feries Latines, iusqu'à ce qu'on commença de le creer vne autrefois.

Les plus anciens auteurs assurent que la puissance des Consuls fut trouuée à l'exemple de celle des Roys, pource que les Roys ayans esté chassés, on trouua deux hommes qui auoient mesme puissance, mais limitée quant au temps, pource qu'elle ne duroit qu'une année. Ils auoient des Licteurs & toutes les autres marques que les Roys souloient auoir. Et pource qu'ils deuoient conseiller ce qui estoit vtile à la Repub. on les nomma Consuls. Les premiers Consuls apres les Roys chassés furent L. Iunius Brutus, & Tarquin Collatin. Brutus s'accorda avec son compagnon qu'il y en auroit vn seul d'eux à la fois, qui marcheroit avec les enseignes Royales, afin que le peuple estonné de les voir tous deux avec ces marques, ne se plaignist de ce qu'au lieu d'un Roy ils en voyoient deux. Il y auoit douze Licteurs, qui portoient des verges avec des haches, & deuançoient les Consuls. Valere Consul fut auteur d'une loy, par laquelle il estoit porté que l'on pourroit appeller de tous Magistrats, & lors l'autorité Consulaire commença à deuenir moindre que la Royale. Iadis les Consuls estoient choisis d'entre les Senateurs, mais en fin les Romains las des seditions des Tribuns, permirent qu'un des deux Consuls fut choisi d'entre le peuple. Le premier Consul de cet ordre fut Lucius Sequacius.

Le Dictateur estoit de si grande autorité que l'on ne pouuoit appeller de sa sentence, & il auoit souveraine iurisdiction sur le peuple Romain. On n'auoit accoustumé de creer vn Dictateur, sinon quand il naissoit quelque occasion qui menaçoit la ville de ruine. Au commencement on ne pouuoit eslire vn Dictateur qui ne fust Patrice, toutefois en la guerre que les Rom. eurent contre les Falisques, on choisit parmy le peuple C. Marcius Cutilius pour estre Dictateur.

Le premier Dictateur qui fut à Rome fut Titus Largius. Or ce Magistrat à cause de sa puissance, ne pouuoit estre retenu plus de six mois, mais sous le nom de tel Magistrat L. Scylla, & Iules Cesar se rendirent Seigneurs des Romains, & tascherent par ce moyen d'euitter l'odieux nom de Tyran.

Le Maistre des Cheualiers auoit iurisdiction sur tous les soldats. Le premier qui le fut se nommoit Spurius Cassius, qui fut créé par T. Largius premier Dictateur. Finalement l'office de Maistre des Cheualiers fut tel pres les Dictateurs, que celui du Prefect Pretorien pres de Cesar.

L'occasion de creer les Tribuns fut la diuision du peuple d'avec les Peres. Si bien que lors que le peuple se fut retiré au Mont sacré, on l'appaisa en luy promettant qu'ils y auroient des Magistrats du peuple, auquel on donna lors deux Tribuns, c'est à sçauoir A. Virginus, & T. Vetusius. Puis vne autre separation estant arriuee, on en adiouta trois autres, & depuis cinq, si bien que les Romains eurent dix Tribuns, dont l'autorité s'accreeust tellement que tout ce que le Senat ordonnoit, estoit assuré si les Tribuns l'approuuoient. Ils se tenoient à l'entree du lieu où le Senat s'assembloit, qui commettoit aux Tribuns la charge de voir ce qu'il auoit ordonné, & de l'approuuer, d'en oster, ou d'y adiouter selon qu'ils verroient estre vtile à la Repub. & pour marque de leur confirmation ils adioutoient à l'escrit la lettre T. La plus grande importance de l'institution des Tribuns, fut qu'ils interuenoient aux intercessions (c'est à dire qu'ils empeschoient qu'aucune violence fut faite par les autres Magistrats) & la moindre, en ce qu'ils presentoient au peuple les loix qu'on appelloit Plebiscites, & l'autorité du Senat n'interuenoit pas en cecy. Ils assignoient aussi les Prouinces à ceux qui les alloient gouverner en la place des Consuls, ainsi qu'on voit en Plutarque en la vie de Caton. On obserua pareillement que si tous les Tribuns estoient d'accord en quelque chose horsmis vn, celui-là seul pouuoit empescher tous les autres qui luy estoient contraires.

En la guerre des Eques les Consuls Albus Posthumus, & Sp. Furius creèrent Proconsul, ou leur Lieutenant T. Quintius, & depuis il y eut des Proconsuls, qui auoient toutes les marques de Consuls, excepté qu'ils ne menoient plus de six Licteurs quand ils vsoient de leur iurisdiction non ordinaire, mais commise par le Consul, combien que quelque temps apres ils commencerent d'auoir vne autorité particuliere: car les bornes de l'Empire estans esloignées, il fut ordonné que ceux qui sortoient du Consulat, commenceoient d'estre Proconsuls, & ainsi ils gouvernoient les Prouinces de l'Empire, les diuisans entr'eux au sort.

Le Proconsul ne pouvoit exercer sa iurisdiction hors la Prouince qui luy estoit escheuë, encor qu'elle fust volontaire, comme d'affranchir & d'adopter. S'il menoit sa femme avec luy en la Prouince, il la pouvoit chastier si elle commettoit quelque faute. Il ne pouvoit acheter autre chose que des viures dans la Prouince. Il ne deuit determiner les causes qui auoient besoin d'une bonne enqueste : mais aux cas qu'il n'estoit besoin d'une si grande diligence, comme lors qu'il s'agissoit de l'obeyssance des enfans enuers les peres, & choses semblables, il pouvoit iuger sommairement. Il pouvoit pareillement faire fouetter les affranchis qui estoient ingrats à leurs maistres.

Les Proconsuls auoient accoustumé à cause de multitude des affaires qu'ils auoient entre les mains d'enuoyer aux Prouinces des Legats, qui y exercoient iurisdiction, non comme de leur propre autorité, ains comme commis à cela par le Proconsul, qui ne les pouvoit ordonner en son lieu auant qu'ils fussent arriuez aux Prouinces. Que s'il arriuoit quelque chose importante aux Legats, & qui requist la diligence du Iuge, les Legats la deuoient remettre au Proconsul, pource qu'ils n'auoient autorité ny de battre, ny de faire mourir, toutesfois ils pouvoient donner Iuge à ceux qui plaidoient, & des tuteurs aux pupils.

Les Ediles du peuple ordonnoient qu'on fist les festes publiques, & il falloit qu'ils despençassent selon leur dignité, & leur patrimoine en ces festes. Pedian dit que Pompee ayant esté créé Edile, & ayant à ses despens fait bastir vn merueilleux, & riche theatre, voulut qu'il y eust vn chariot avec quelques Elephans, outre les magnifiques ieux qu'il y fit faire. Les Ediles auoient le soing de faire que tous les Romains gardassent en s'aschant au theatre l'ordre de leur dignité. Que si l'achepteur estoit deceu par le vendeur, en prenant du bestail malade pour sain, il auoit recours à l'Edile, qui auoit aussi le soing de faire que les fosses publiques, les aqueducs, & tous les bastimens fussent en bon estat, & bien propres.

Le Prefect du froment auoit la charge de pourchasser du bled de tous costés, & commandoit à celuy qui en auoit plus que sa maison ne requeroit, de le vendre, & il y imposoit vn iuste prix. Le peuple Romain fut secouru souuent par ce Magistrat, lors qu'il estoit en mauuais estat touchant le froment. Et l'affaire des froments vint à estre tellement autorisée, que toutes les personnes qui n'estoient capables d'accuser aux autres cas, estoient admises en cestuy-cy seul, comme les putains, & semblables personnes.

Les Tribuns militaires qu'on prenoit aussi bien du peuple que du Senat, furent quelquefois au nombre de vingt, & quelquefois plus, ou moins, mais au commencement on en crea seulement trois, c'est à sçauoir A. Sempronius, Amacinus, L. Attilius, & T. Cecilius, & l'on vint du Consulat aux Tribuns militaires avec puissance Consulaire, quand M. Genue, & P. Horace laisserent le Consulat, & ce Magistrat auoit mesme autorité que les Consuls, seulement le nom estoit changé, & le peuple s'en mesloit.

Les Censures, quoy qu'au commencement de petite autorité, vindrent à l'auoir si grande, que c'estoit d'elles que dependoient les mœurs, la discipline des Romains, la conduite des Cheualiers, la iurisdiction des particuliers, & les daces des lieux publics du peuple Romain. Ils estoient du Senat ceux qu'ils en iugeoient indignes, eslisoient le Prince du Senat, y adioustoient ceux que bon leur sembloit, estoient les cheuaux & les armes aux soldats qui estoient trop gras, & ceux qui se plaisoient d'estre parfumez, & parer, receuoient par eux vne marque d'infamie, & estoient mis hors de l'armee. Au commencement lors qu'un Censeur estoit mort, on tenoit que l'autre suffisoit pour tous deux : mais il fut ordonné depuis qu'un Censeur estant mort, l'autre quitteroit son office, & on en creeroit deux autres. La cause de cecy fut qu'au temps que les Gaulois prirent la ville, vn des Censeurs estant mort, on substitua l'autre en sa place : ce qu'on tint depuis pour mauuais augure. Les Censeurs auoient encore la charge de limiter les vsures.

Le Preteur de la ville eut l'autorité de faire de nouvelles loix, & de casser les anciennes, & en fin ce qu'il ordonnoit estoit nommé loy honorable. On octroya aux Preteurs les Marques Royales, & presque tous les ornemens Consulaires. Ce Preteur de la ville alloit à cheual habillé de blanc.

En fin y ayant à Rome vn grand abord de toutes nations, on crea le Preteur estrange, ou Peregrin, qui oyoit les causes des estrangers. Et finalement le nombre en fut si grand qu'il y eut quelquefois dix-huit Preteurs. Mais apres qu'on eut pris la Sardaigne, la Sicile, l'Espagne, & la Prouince Narbonnoise, on crea autant de Preteurs qu'il y auoit de Prouinces prises, afin qu'une partie cognust des affaires de la ville, & l'autre de ceux des Prouinces. Depuis Scylla adiousta le tourment public comme aux faussaires, aux parricides, aux empoisonneurs, & adiousta quatre Preteurs. Cesar ordonna deux

Preteurs, & deux Ediles qui eurent charge du froment, & du nom de Ceres furent nommez Cereaux. Auguste ordonna apres seize Preteurs, & Claude en adiouta deux, dont Tybere en osta vn, & Nerua en adiouta vn autre.

Tels qu'estoient les Tribuns des cheuaux legers pres des Roys, ou les Maistres des Cheualiers pres des Dictateurs, tels furent les Prefects Pretoriens pres des Empereurs. Car ceux-cy tenans le premier lieu apres eux, & estans commis pour corriger la discipline publique, leur autorité vint à estre si grande, qu'au lieu qu'au commencement on appelloit du Prefect du Pretoire, ceste appellation fut apres ostee par le Prince, qui pensa que ceux qui paruenoient à telle dignité par leurs merites deuoient iuger comme luy mesme. Ces Prefects auoient vn priuilege que les mineurs contre lesquels ils auoient donné sentence, n'auoient nul recours, au lieu qu'ils l'auoient estans comdamnez par les autres Magistrats.

Auguste estimant que la conseruation du public n'appartenoit à autre qu'à luy, ordonna sept troupes de soldats aux lieux de la ville qui en auoient plus besoin, afin qu'ils peussent promptement secourir les lieux où le feu se mettroit; & l'ordre fut tel, qu'une troupe ou compagnie gardoit deux regions de la ville, & les Tribuns estoient chefs de ces troupes, & le Prefect des gardes estoit chef de tous. Il cognoissoit des causes des embrasemens, des larrons, si par fortune le crime n'estoit si grand, qu'il fut besoin de remettre la personne entre les mains du Prefect de la ville. Outre ce, le Prefect veilloit vne bonne partie de la nuit, & alloit par la ville armé, aduertissant chacun de prendre garde au feu, & de tenir de l'eau dans sa maison.

Il reste que nous parlions du Procureur de Cesar, qui estoit iuge entre Cesar, & le peuple.

Ce Magistrat auoit ample autorité, de sorte que tout ce qu'il manioit pour l'Empereur estoit aussi valable que si l'Empereur mesme l'eust fait. Mais si ce Procureur alienoit quelque chose de l'Empereur comme sienne propre, on n'estimoit pour cela que l'Empereur l'eust aliené, veu qu'on l'estimoit seulement telle lors que l'Empereur y prestoit consentement. En fin s'il traittoit de vente, ou de donation il ne faisoit rien qui valust, pource qu'il auoit la charge, non d'aliener le bien de l'Empereur, mais de faire diligemment ses affaires. Et lors qu'un serf de Cesar estoit fait heritier en quelque testament, il ordonnoit qu'il succedast à cest heritage, qui venoit par droit à l'Empereur, pource que l'esclane acquiert tout au Maistre. Mais si Cesar estoit heritier, & que son Procureur se mist en l'heritage, il mettoit l'Empereur en possession. Ce Magistrat n'auoit pas la puissance de bannir.

Le nom de President est general, veu que les Proconsuls, les Legats des Cefars, & tous ceux qui gouernoient les Prouinces, pourueu qu'ils fussent Senateurs, estoient nommez Presidents.

GOVERNEMENT DE CE TEMPS.

34. **L'**Autorité du Pape comme chef, s'espand de luy en tant de membres, que ceux de sa Cour vieillissent ordinairement auant qu'ils entendent ce gouuernement, que ie m'essayeray toutesfois de vous faire entendre le plus briefuement qu'il me sera possible. On voit premierement le S. College des Cardinaux, dont le Pape est le chef, & de ceux-cy le nombre n'est point determiné de nostre temps, combien qu'on trouue qu'autrefois ils n'estoient que douze à l'exemple des Apostres. Ces Cardinaux auoient iadis de coustume d'aller trouuer le Pape deux fois la sepmaine: mais les affaires importantes estans augmentees de nostre temps, ils s'assemblent vne seule fois, & leur assemblée se nomme communément Consistoire. On y ordonne ceux qui sont esleus Euesques, & Archeuesques, ou commis sur les Eglises Patriarchales quand il vacque des sieges, dont l'eslection n'appartient à vn Chapitre, à vne ville, à vne Prouince, à vn Roy, ou à autres personnes: car en ce cas ils sont esleus par le Pape, & par le Senat, auquel appartient ceste reserue par priuilege de tous les Papes, & ceste reserue encores a accoustumé de s'estendre à certains Monasteres qui se trouuent taxez au liure de la Chambre, & qu'on donne en charge à des personnes capables, & pource on appelle tels Monasteres Consistoriaux, pource que l'on ne dispose d'eux que par la voye du Consistoire.

C'est en fin icy qu'on traite toutes les choses qui appartiennent à la foy, à la Religion, à la paix des Chrestiens, & à la conseruation du temporel de l'Eglise. C'est icy que les Prouinces, les réguliers, & les Roys ont leurs Protecteurs, dont la charge est de proposer l'eslection, & les autres causes de leurs Prouinces au Senat, & celuy qui propose a de coustume
aux

aux elections d'ouyr ceux qui contredisent, s'il y en a, & de rechercher plusieurs choses qui sont requises en la personne qu'on doit eslire pour l'Eglise vacante, & qui appartiennent à ladite Eglise.

Cela se fait aussi par voye de tesmoins (laquelle recherche on nomme vulgairement procez) & toutes ces choses sont mises par escrit au Senat, & cestuy-cy fait entendre la response dudit Senat à ceux qui attendent, signant & scellant avec le seing du S. Siege, la response, qui est presentee par ceux qui attendent au Vicechancelier, qui fait vn autre certificat en son nom, par lequel il fait foy à tous les officiers qui doiuent expedier, faisant vn recit du fait. Apres ce rapport, les supplians pourchassent d'auoir vn bref conforme au rapport, c'est à sçauoir qui soit premierement dicté pres des Abbregeurs, & estant dicté, soit escrit par les Escriuains, puis expedie par les autres, par la Chancellerie, ou la Chambre Apostolique, & quelquefois extraordinairement par la Secretairerie, & lors que tout est expedie, il y faut le seel de plomb.

Le grand Penitencier en ce qui appartient à son absolution, exerce la iurisdiction qui luy a esté commise par le Pape, par plusieurs Vicaires & Substituts, qu'on nomme Penitenciers, qui sont diuisez par toutes les plus grandes Eglises de Rome, comme S. Pierre, saint Iean de Latran, & sainte Marie Majour. Mais il n'accorde les dispenses de l'observation des loix humaines, que pour quelque cause, & luy mesme par generale commission du Pape, escoute les supplians, puis ayant veu leurs demandes, s'il y a chose pour laquelle le requerant merite d'estre ouy, & que ce qui est requis ayt accoustumé d'estre octroyé par le Pape, il rescrit par autorité de son office, & en vertu de sa commission generale, non par la bouche du Pape, & alleure en ses lettres vne vertu de ceste commission qu'il rescrit par la bouche du Pape, & il escrit tousiours en l'vne de ces façons, *Fiat in forma, fiat de speciali, fiat de expresse*, & par ces diuerses façons de parler il fait cognoistre à ceux qui taxent, l'importance de la requeste, & de mesme que le rescrit du Penitencier varie en la forme, aussi les taxes des payemens sont alterees par les officiers, & la multitude des loix humaines, & du Pape, & des Conciles, & des Monasteres est si grande auourd'huy, que les hommes liez en certaine sorte desirans l'ancienne liberté, recourent humblement au Penitencier, qui marque de sa main la demande du suppliant, puis on expedie les Bulles sous son nom, & son seel. Et pource que bien souuēt il ne rescrit precisément, estant esclairey de quelque attestation du suppliant, il dōne les Iuges à son rescrit, qui cognoissent du fait, & en cecy il en met d'autres en la place. Cét office a pour plus grande commodité de ceux qui viennent pour des expéditions, vingt-quatre hommes pour deffendre les supplians, & ceux-là sont nommez Procureurs de la Penitencerie. Il donne des dispences de se marier dans les degrez deffendus par les loix humaines, comme aussi il admet les legitimations des enfans. Il dispence des defauts des membres ceux qui veulent receuoir les Ordres, ou tenir des benefices, comme aussi d'en tenir plusieurs. Il absout des meurtres *in foro conscientia*, & pour le regard des clerics en toutes les deux Cours, avec retention de benefices, & dispense pour d'autres. Il fait le mesme de la Simonie, du faux serment, change les vœux, & dispence les reguliers de quelque chapitre de leurs reigles. Dauantage il donne des indulgences aux lieux, & aux personnes, & plusieurs commissions en forme de droit, comme seroit sur la nullité de quelque mariage, & choses semblables.

On demande au Pape tous les iours la signature des choses qui viennent de sa propre liberalité, comme sont les octrois des benefices, & autres choses, qui sont aussi cōmises generalement au grand Penitencier, & aussi les choses, qui concernent mesme la Iustice touchant les choses Ecclesiastiques en tous les endroits du monde, & pareillement de celle du temporel de l'Eglise Romaine, & de tous autres lieux: de sorte qu'elles viennent, ou pour raison de la personne qui est d'Eglise, ou par la permission des Princes, ou par le consentement des parties à la Cour de Rome.

Le Pape pour plus grande commodité des expéditions des supplians a ordonné à toutes ces choses deux audiences, en l'vne desquelles on demande les choses de grace, & en l'autre celles de Iustice.

Si bien qu'on les nomme diuersement, c'est à sçauoir signature de grace, & signature de Iustice. Le Pape commet sur ces deux audiences quelques hommes legistes, & à la signature de la grace tous les Cardinaux qui sçauent la loy, & c'est rarement qu'on a commis des Prelats qui ne fussent Iuriscōsultes (qu'on nomme Referendaires) à la grace, & à la Iustice.

Ceux-cy ont charge de voir ce que portent les requestes, & les choses qu'elles contiennent ont accoustumé d'estre octroyées, de mettre leur nom à la fin de la requeste signifiant

par là au Pape, ou bien au Cardinal qui doit signer, que la chose qu'on demande peut estre accordée. Mais si le suppliant requiert quelque chose qui puisse preiudicier à vn autre, ils ne l'oütroient sans appeller ce tiers, & si la chose estoit importante, ou fort douteuse, le Referendaire la confere en l'audience avec les autres, & le suppliant ne l'obtient que tous ne soient d'accord en la signature. C'est pourquoy le Pape a estably sur les deux signatures vn Cardinal, qui oütroie ordinairement les choses plus legeres, & encor les importantes, si on a accoustumé les oütroier.

Les Referendaires de la signature de la grace ont accoustumé de refuser les requestes qui contiennent des choses appartenâtes à la iustice, cōme si le Pape trouuoit mauuais qu'ils fissent cē qui est proprement de sa charge. La signature a vn iour de la sepmaine determiné auquel les Referendaires s'assemblent. A raison de quoy ceux qui plaident ont accoustumé le iour auparauāt d'aller deuant les Referendaires avec leurs Aduocats, & de debattre quelques fois: mais bien rarement leur fait deuant eux. Le iour ordonné, c'est la charge du Referendaire de rapporter briefuement les requestes des supplians, & la chose ayant esté debatüe entre ces iuges, celui qui est President iuge selon la pluralité de voix, & les Referendaires ne proposent iamais plus vne requeste qui a esté refusee, ou pour le moins ils le font bien rarement. Le Pape soucrit presque tousiours avec ces paroles *PLACET P.* quand on traite des choses de iustice: mais lors qu'il s'agit de celles de grace, il met *FIAT VT PETITVR P.* Et ce P. signifie le nom du Pape: comme Paul, mais s'il a autre nom, comme Iules, il escrit I. & ainsi des autres: & si le Pape soucrit quelque fois, non à la priere de quelqu'un, mais de son seul mouuement, il ne met pas *VT PETITVR*, mais adioute à la fin *MOIV PROPRIO.* Mais le Cardinal de la signature de la grace escrit tousiours avec mesme forme, c'est à sçauoir, *CONCESSVM IN PRÆSENTIA D. N. PAPAE*, puis il met son nom, & toutes fois il ne soucrit pas en la presence du Pape, mais il luy est permis de ce faire par sa commission generale. Quant aux formes d'escire en cas de iustice, le Cardinal qui est commis met lors qu'on escrit aux iuges de la Cour de Rome, *PLACET D. N. PAPAE*, & adioute son nom: & si le fait s'adresse aux iuges des Prouinces, il met, *CONCESSVM IN PRÆSENTIA D. N. PAPAE*, puis le Cardinal adioute son nom, & quelques fois il escrit, *Placet p. iur. Placet arbitrio iudicis. Concessum arbitrio, &c.* Et on doit sçauoir que les rescripts de iustice qu'on enuoye aux iuges des Prouinces, ne paruiennent autrement aux mains du Regent, mais sans autre estenduë de signature sont remis au Dataire, de mesme que ceux de grace, où il met le iour de la date, puis les escrit au registre de mot à mot, & apres on les rend aux supplians, ou à leurs sollicitateurs, en forme de lettres qui doiuent estre expediees, & pour leur expedition il y a trois voyes, quand la chose est à la iustice, à sçauoir par la Chancellerie, & par l'office des contredits sous plomb, ou par la Secretairerie en forme de Bref, *sub annulo piscatoris*: mais si la chose est de grace, on l'expedie par la mesme Chancellerie, ou par la Chambre, & quelques fois extraordinairement par la Secretairerie.

57. L'office de la Chancellerie a vn Cardinal estably, qu'on nomme Vicechancelier. Sa dignité, selon le commun iugement de ceux de la Cour du Pape, luy donne le premier rang de toute ladite Cour. Cestuy-cy pour raison de son office, preside aux expeditions des lettres en matiere des choses Ecclesiastiques qui vont par tout le monde, & pareillement à ceux qui expedient, qui sont en grand nombre, comme Abbregeurs, ou grands Abbreuiateurs de parc (qui ont charge de dicter les lettres de la requeste du suppliant, & ce qu'ils dictent est par eux appelle minute) escriuains, moindres Abbregeurs de parc, Sollicitateurs, plombeurs & E. registres. Tous ceux-cy entendent à l'expedition des lettres. Il y a d'autres officiers qu'il faut aller trouuer lors qu'il s'agit de quelques expeditions touchant le payement des rentes, & ce sont les Escriuains de la Chancellerie, & les Chambriers & autres.

38. L'audience de la Chambre Apostolique fut establie pour mieux expedier les affaires, & pour cet effet le Pape auoit esleu 6. Prelats domestiques qu'on nomme Cleres de la Chambre. Ceux-cy estoient Conseillers domestiques du Pape, qui traitoit avec eux à part de toutes les choses qui le concernoient, comme du gouuernement de la ville de Rome, & de tout l'Estat temporel, & des comptes du Thresor. C'estoit-là que le Pape elisoit les Magistrats, à raison de quoy ils prestent auourd'huy le serment de fidelité pour leur office aux Cameriers. C'estoit-là qu'on faisoit les contrats des choses publiques qui concernoient le Pape, & qu'on a accoustumé d'expedier les lettres des benefices presque cōme par la voye de la Chancellerie, quand les supplians choisissent ce chemin pour abreger, ou bien à cause de la matiere qui se traite, ou pource que telle chose n'est pas fait de Chancellerie, ains requiert l'expres commandement du Pape. On condamnoit en ce lieu les malfaiteurs à des peines Ecclesiastiques, ou temporelles, selon que le requeroit la qualité de la personne, ou du mes-

mes fait, & l'on y faisoit beaucoup d'autres choses. Mais les affaires de Rome se sont tellement multipliées, que le Pape secouant peu à peu ceste charge va peu souuent en ceste audience, excepté aux cas qui importent à ses finances, ou qui concernent quelque mauuaise expedition de Bulles. Le Pape expedie aussi separément quelquesfois les choses susdites de luy-mesme, sans l'audience de la Chambre, & en l'execution il appelle ses Secretaires domestiques.

Le Chambelan ou Camerlinge a accoustumé par l'aduis des sept Clercs, & quelquesfois de son inouement particulier, de rescrire de droict aux Iuges, comme de toutes les choses profanes qui appartiennent aux Magistrats en l'Estat temporel de l'Eglise, & dehors iceluy, du payement des decimes, des fruiçts, des benefices, des despoüilles, des Clercs morts, & d'autres choses qui concernent la Chambre Apostolique. Et il rescrit presque tousiours comme s'il en auoit charge de la bouche du Pape, & les formules de ses rescrits sont nommees lettres de la Chambre, dont l'expedition se fait en deux sortes, veu qu'elles sont seellees, & closes, ou bien ouuertes, & desployees sans le seel de Chambelan.

Le Thresorier a riére luy tout l'argent qui entre dans la Chambre, & sa charge est de le recevoir, de le garder, & de le despandre où il est besoin. Il y a quelque temps qu'on met cét argent entre les mains d'un notable marchand qui le reçoit par commission du Thresorier, & en fait les payemens, & cestuy-cy se nomme depositaire.

L'Auditeur de la Chambre qui a charge des choses spirituelles, est suiuy du gouuerneur qui punit les criminels, & est executeur du bras Seculier, decide des trefues, des seuretez, des plaintes des vassaux contre leurs Seigneurs, encor que capitales à quarante milles de Rome. Il a autorité sur tous les officiers de la ville, & a accoustumé de prendre garde à la tranquillité de la ville, & de la Cour de Rome. Si tu lis le chapitre de Sixte quatr. & la Bulle de Jules second tu verras au long l'autorité de ce gouuerneur.

Le President de la Chambre Apostolique reçoit les comptes de tous ceux qui ont manié les deniers de la Chambre en la ville de Rome, ou aux Prouinces, & en fait le denombrement & le discours en l'audience de la Chambre.

Et pource qu'on traite quelquesfois en l'audience de la Chambre des causes, qui sont entre le Fisc & les personnes priuees, il a esté ordonné que les particuliers auroient en ceste audience vn Aduocat aux despens du public, pour la defence des causes des particuliers, & des pauvres contre les Aduocats Fiscaux.

Il y a vn autre Aduocat qui deffend le Fisc, tant en l'audience que dehors pardeuant les autres Iuges de la Cour de Rome, où il est besoin de respondre de droict pour le Fisc, & cestuy-cy est en l'ordre Consistorial.

Le Procureur du Fisc ordonne, traite, & deffend les causes fiscales en l'audience, & pardeuant les autres Iuges de la Cour de Rome. Et les causes fiscales sont celles où l'on traite de la liberté publique, ou des deniers publics. Cét office est fort necessaire, & de grande autorité en la Cour de Rome, & il importe aux particuliers, & aux Princes qu'il soit exercé par vn homme sçauant & pratic en la Cour de Rome. Ce Procureur hors de l'audience préd cognoissance des secrets des causes, & les entend, & void à sa volonté, & dit son aduis, combien qu'il ne soit pas des Iuges. Il interuient encor aux Consistoires publics, & peut requérir qu'il soit fait par quelqu'un des Protonotaires vn instrument public pour perpetuelle memoire des choses faictes publiquement.

Le Commissaire de la Chambre Apostolique fait & execute les affaires de la Chambre où les Iuges n'ont que voir. Il est commis sur les exactions, les ambassades, les gabelles, les bleds, & autres choses qui appartiennent à la Chambre.

Le dernier de tous ceux de la Chambre Apostolique qui deffend les droicts, & les reuenus assignez aux Cardinaux, & toute autre chose qui concerne lesdits Cardinaux. Le nombre des Iuges de la Cour de Rome estant fort grand, & y ayant beaucoup de gens en prison, & chacun ayant à part les siens, il arriue bien souuent que pour l'occupation des Iuges, & quelquesfois à dessein, les choses prennent plus long trait que la qualité des causes, & le fascheux sejour des prisons requiert. C'est pourquoy les Cardinaux les visitent tous les mois, comme souverains Iuges. Toutesfois ceux qui ont place en l'audience de la Chambre ne s'assembtent pas pour ces visites: mais celuy qui est Lieutenant du Chambelan, est presque tousiours vn des sept Clercs, & avec eux tous les autres officiers de la Chambre, excepté le Thresorier & le President. Tous ceux-cy à vn iour ordonné se vont seoir pour quelque temps en vn lieu public dans les prisons de la ville, & les prisonniers sont appelez deuant eux par ordre, & ouys s'ils veulent. Et lors ils deliurent les prisonniers qu'ils oyent, ou moderent leur peine, & quelquesfois

quand ils sont du tout insolubles, ils les admettent à vne simple cession de biens, & les mettent hors de prison.

Pres des deux dernieres prisons, c'est à sçauoir de la Cour Sauelle, & de la tour de None, il y a des Iuges moindres qui prennent leur nom de ces deux lieux. L'appellation du Iuge de la tour de None va à la Cour du gouuerneur, & celuy de la Cour Sauelle à l'auditeur de la Chambre, qui decide les causes dont on appelle, encor que le gouuerneur s'entremette des appellations du Iuge Marechal ou de Cour Sauelle, mais cela appartient à l'auditeur. Les femmes d'amour de la ville payent tous les ans à ce Iuge certain tribut, & cela est si ancien, que le contraire n'apparoissant point, il l'exige mesme de celles qui ne le veulent payer.

39. Outre la Cour ordinaire, il y a à Rome vne autre sorte de citoyens Romains, auxquels le Pape a donné vn Preteur, qu'on nomme Sénateur. Cestuy-cy demeure au Campidoglio ou Capitole, & rend le droit aux citoyens Romains par autorité ordinaire.

Il y a trois Lieutenans ou Substituts, deux desquels qui president aux iugemens priuez sont nommez collateraux. Ceux-cy sont differens en dignité, veu que l'un est nommé premier, l'autre second, & le tiers est Iuge des crimes. Et si l'on appelle de quelqu'un d'iceux, il y a vn iuge à part au Capitole pour toutes les appellations: & si la sentence est conforme à la premiere, on ne peut en appeller. Il y a encor quelques sieges où tous les arts sont marquez en des petites tables sous vn portique, auquel on lit les mestiers, eslit les Consuls artisans, qui rendent droit touchant leur art à leurs compagnons, & ceux qui s'estiment greuez vont proposer leurs griefs aux Conseruateurs de la ville qui demeurent au Capitole. Ceste iurisdiction fut confirmee par les Papes Iules II. Leon X. & Paul III.

40. Il y a apres vne sorte de personnes qui sont les Prestres à qui le Pape a donné vn sien Vicaire. Cestuy-cy tant à Rome qu'en tout son Diocese, a mesme autorité que le Pape duquel il est Vicaire, & ordinaire, veu qu'il a des Prestres sous sa iurisdiction. Il impose aux penitens la marque de la penitence, confere les Sacremens de l'Eglise, & par la loy du Diocese fait assemblee, ou tient Congregation, & visite les Eglises, & les Monasteres reguliers, s'ils n'ont quelque priuilege qui les excepte. Il peut aussi enquerir, corriger, punir, oster & donner les benefices. En vertu d'un Indult du Pape la iurisdiction de son Vicaire s'estend à tous les Laïs, & estrangers, qui pour quelque confrairie, ou demeure, ou seruice aux Hospitaux, ou Monasteres, semblent suivre la religion, & encor sur tous les Iuifs de la ville, sur les vesues, & les pupils, & autres miserables personnes Chrestiennes, comme si elles estoient au giron de l'Eglise. Et par le mesme indult son autorité s'estend sur les causes où l'on ne traite pas de la propriété, mais des loüages, & pensions, & aussi sur ce qui cōcerne les metairies, les champs, les vignes, & les salaires. Mais aux autres choses où il s'agit de la propriété, il ne peut iuger plus haut que iusques à 60. ducats d'or de la Chambre, & son autorité s'estend aux susdites choses iusqu'à 40. milles loing de Rome. Il a sous luy quatre Notaires ou Greffiers publics, & deux substituts, l'un qui prend cognoissance des choses priuees & ciuiles, l'autre des publiques & criminelles.

Il y a douze Chappellains du Pape, ou Auditeurs des causes du sacré Palais, auxquels les Papes donnerent le pouuoir d'ouyr à part ceux qui plaidoient, & à leur rapport les Papes donnoient leurs sentences.

A Rome chacun est en peu de temps recogneu pour citoyen, & peut participer, voire mesme participe facilement aux premiers honneurs de ceste ville, où l'on peut mieux qu'en tout autre lieu esperer la recompense de son industrie, & la recognoissance de son esprit, & aspirer enfin avec la fortune, & la vertu aux plus grandes dignitez de l'Eglise.

Les Papes ont accoustumé de donner les Legations des Prouinces qui sont de leur domination, & le gouuernement des principales villes, à leurs parens tant Ecclesiastiques que Seculiers, ou à ceux qui sont leurs creatures. C'est la façon dont ils vsent en Italie, & en Auignon, ils ont vn Legat, ou Vicelegat, qui est comme Gouuerneur, & a la charge des choses Ecclesiastiques, & de celles qui concernent la iustice: & outre ce il y a vn general qui est Cavalier, & a la charge des soldats qu'on tient en garnison dans la Comté de Venisse, & de tout ce qui concerne les armes.

41. Le Pape a le pouuoir de conferer des benefices aux pays des autres Princes, combien qu'il soit quelque peu restraints à cause de l'oëtroiy fait par certains Papes à diuers chapitres, & Princes. Toutesfois ceux qui ne reçoient pas les benefices de luy, doiuent auoir sa confirmation, & faire expedier leurs Bulles en Cour de Rome, & outre ce payer les Annates.

Je croy qu'il est à propos en ce lieu de rendre cōpte, tant de l'institution & maniere de creer le Pape,

le Pape, que des considerations des Cardinaux. Toutesfois la creation des Papes a esté fort diuerse: veu que nostre Seigneur sans consentement d'aucun, & par sa souueraine autorité institua S. Pierre, puis l'autorité de creer le Papes fut donnée au Clergé de Rome, auquel se ioignit le peuple Romain qui interuenoit avec luy en la creation. Mais apres 351. années l'autorité des Empereurs s'y interposa encore, pource que les Papes esleus prindrent pour vn temps la coustume de receuoir d'eux la confirmation, premierement en payant certaine quantité d'argent, & puis sans payer aucune chose. Ils s'abstindrent encore pour vn temps de se laisser couronner sans la presence & consentement de leurs Ambassadeurs, & en fin du consentement des Papes mesmes, qui pensoient brider par ceste voye l'audace & l'insolence du peuple Romain, toute l'autorité de creer le Pape fut transportee aux Empereurs, qui la tindrent, & en vserent longuement. De sorte que quand les Papes la leur voulurent oster, ils ne le peurent faire sans vn grād desordre & schisme remarquable qui trouuailla longuement la Chrestienté: & cependant quelques Papes nommerent leurs successeurs, qui estoient apres confirmez par le Clergé. Mais en fin l'autorité des Papes estant plus forte, l'Empereur & le peuple estant entierement forclos, l'eslection demeura aux Cardinaux, & à quelques-vns des plus grands du Clergé, iusques à ce qu'Alexandre III. au Concile de Latran tenu en l'année mil deux cens cinquante neuf, où il y auoit deux cens huictante Euesques, ordonna que celuy là fust legitime Pape qui seroit esleu par les deux tiers des Cardinaux presens; & ceste coustume a duré iusqu'à cet heure, sinon qu'en l'année 1417. au Concile de Constance, Martin V. fut esleu pour oster le schisme de ce temps-là: mais Gregoire X. ordonna premier au Concile de Lyon le Conclau, qui de temps en temps a esté mieux reglé, & reduit à la forme qu'on void aujourd'huy.

Les Cardinaux s'assemblent pour eslire vn Pape en l'vne de cestrois sortes, ou par cōpromis, ou par adoration, ou par voye de scrutin & de billets, où ils donnent leurs voix à celuy qu'ils fauorisent. Il suffit donc qu'on entende que l'autorité de creer le Pape consiste aux Cardinaux, & qu'ils sont membres principaux du Pape, qui est comme chef, lequel ils assistent, estants ses conseillers & coadiuteurs. Beaucoup de priuileges leur ont esté donnez par plusieurs Papes. & particulierement par Paul II. & quelques autres leurs ont mesme octroyé la moitié des reuenus du S. Siege, mais au lieu de cela ils iouysseut à present de la moitié des Annates des benefices qui s'expedient par Consistoire.

Ils auoient accoustumé d'estre seulement au nombre de 53. mais le nombre s'est accru & diminué selon la volonté des Papes, & Pie III. en vit vne fois 66.

Ceux qui vont discourant sur le proche successeur au Pontificat, ont accoustumé de considerer d'vn costé le temps qui court, pource que le temps de la paix requiert vne chose, & celuy des troubles vne autre, & lors que toute chose est pleine de desbordement il faut penser à auoir quelqu'un qui l'arreste; & d'ailleurs il est besoin de prendre vn autre chemin, lors qu'apres vne grande seruitude on desire vn peu de liberté, & d'autre part il faut prendre garde aux volontez des Princes, chacun desquels desire auoir vn Pape pour amy: mais ils considerent surtout les affections particulieres des Cardinaux, pource qu'il semble qu'en l'eslection du Pape ils perdent la memoire de tous les autres. On void toutesfois que la vieillesse sert beaucoup, tant pour le regard de ceux qui aspirent au Pontificat, que pource que plusieurs font tousiours quelque acquest au changement des Papes. Apres on cherche la bonté, pource que les hommes sont communement si meschans, qu'ils suppriment du tout le desir naturel des choses bonnes.

Mais la principale bonté qu'on recherche aux Cardinaux, c'est celle qui profite aux autres, comme la iustice, l'affabilité, la courtoisie, & l'inclination à vouloir communiquer la grandeur aux autres: & pour ceste cause il semble qu'ils regardent de ne faire Pape celuy qui a beaucoup de grands parens & amis qui peuuent estre cause d'interrompre & diminuer la courtoisie, & les autres parties que l'ay marquees, & chaque Cardinal pourchasse de faire Pape, non seulement celuy qu'il ayme; mais aussi celuy qui est obligé de l'aymer. Mais encor qu'on prenne garde à toutes ces choses; toutesfois on peut asseurer qu'il est impossible de pouoir faire vne ferme, & valable coniecture de celuy qui doit estre Pape, pource que les affaires de Rome branlent à toute heure. Vn mescontentement, vne nouuelle promotion de Cardinaux, le moindre accident qui arriue, met toutes choses s'en dessus dessous, outre ce qu'on a remarqué que la plus part du temps les humeurs qu'on void dehors se changent dans le Conclau, mesmes bien souuent les Cardinaux esmeus tout d'vn coup, ou touchez de crainte, & comme hors d'eux-mesmes, se portent à ce qu'ils n'auoient iamais eu dans la pensée. Quand ils peuuent preuoir le danger de quelqu'un qui peut estre Pape, ils y remedient, facilement s'accordent ensemble, & partant les principaux sujets de la Papauté sont presque

toujours abatus. Mais pour ce qu'on ne peut user de mesme diligence en tous, lors qu'ils sont surpris, & qu'on parle de quelqu'un auquel ils n'ont jamais pensé, & qu'ils n'ont le temps de prendre résolution, ils courent comme personnes despourueues de conseil, comme si chacun doutoit estre le dernier. Toutesfois on void bien souvent que celui qu'on croyoit le moins devoir estre Pape vient à l'estre; c'est pourquoy c'est plustost deuiner que coniecturer de dire que quelqu'un doit estre Pape.

Au reste le Pape qui est auourd'huy ayme fort la paix, & le repos de la Chrestienté, & tasche de maintenir tous les Roys en bonne amitié, sans favoriser l'un plus particulièrement que l'autre. Il semble que la prise qu'il a eue avec les Venitiens a diminué beaucoup l'affection que ceste Republique portoit au S. Siege. Toutesfois les affaires sont auourd'huy si bien appaisées, qu'on tient que les choses se remettront bien tost, si desia elles ne le sont, au premier estat, & que l'aigreur qui a esté d'un costé, & d'autre, & l'animosité de deux partis, dont le grand Henry Roy de France a empesché les effects, cessera par la bonté du Pape & par la discretion de la seigneurie de Venise.

RELIGION DES PREMIERS ROMAINS.

42.

ENtre tous les Dieux estimez par les Romains, Pan, Lycee, nommé de plusieurs Faune, & Sylvain, tint le premier rang, & ce fut à luy qu'on dedia les Lupercales, & que les Luperces sacrifient. On dit que ce sacrifice vint d'Euandre Roy fugitif d'Arcadie, qui vint au lieu, où fut apres faicte la forteresse de Rome.

Les Pasteurs qui auoient ce Dieu pour leur chef, luy sacrifioient tous nuds, avec le visage couuert, & quelques ceintures en la main. Il y en a qui rapportent l'origine de ce sacrifice à l'accident qui arriua à Faune, lors qu'il poursuioit d'amour Iole femme d'Hercule. Mais les autres disent que Romule sacrifiant à Pan tout nud, pour la chaleur du Soleil, eust aduis que quelques voleurs emmenoient son troupeau, si bien que pour les attraper il les poursuivait tout nuds comme il estoit, & les prit: si bien qu'en memoire de cecy il voulut que les Prestres qui feroient ce sacrifice fussent nuds. La speciale deuotion qu'on auoit à ce Dieu, & à ces Prestres estoient pource que les femmes qui ne pouuoient accoucher ou deuenir enceintes, auoient recours aux Luperces, & ainsi qu'elles auoient esté vn peu battues de certains petits foyers teints de sang de bouc, elles accouchoient, ou conceuoient bien tost. On faisoit la feste de ce Dieu, le dix-huictiesme de Ianuier, ainsi qu'Ouide rapporte.

Il y eut apres les Potitiens & les Pinariens, familles ainsi nommees, qui furent ordonnez pour sacrifier à Hercule. Les Potitiens instruits par Euandre presiderent long-temps à ce sacrifice, iusques à ce que ceste charge estant donnée à des serfs publics, la famille des Potitiens vint à manquer; ce qui aduint par le moyen d'Appius Claudius leur ennemy, & les Romains creurent que pour punition il estoit deuenu aueugle.

Les freres Aruans, ou Aruales, donnerent conseil aux Romains, afin que les champs produisissent des bleds, Romule fut l'inuenteur de ceste Religion, & ceux-cy se nommerent Aruans, pource qu'*Arum* signifie champ. Ils furent au nombre de douze, & l'on leur donna avec la Prestrie vne couronne d'espics, avec quelques bandes blanches.

Presque en mesme temps la science, & religion des Augures vint à Rome de la Toscane, dont les habitans scauoient parfaitement l'art de deuiner en ceste sorte. Leur façon de faire estoit telle. Celui qui deuoit presager par le moyen de l'augure, montoit sur la forteresse, ou sur quelque autre lieu descouuert, & s'assioit là sur vne pierre tournée au Midy, & estant assis à main gauche, tenoit en main vne baguette courbe qu'on nommoit Lituë. Delà ayant regardé la ville, & les champs d'alentour en priant les Dieux, il separoit les regions de l'Orient à l'Occident, & logeoient les parties droites au Midy, & les gauches au Septentrion, & remarquant sans mot dire, le lieu iusques auquel sa veüe s'estoit portée, tenant en la main gauche sa baguette, mettoit la droite sur la teste de celui à qui il vouloit presager quelque chose, disant: O pere Iupiter, s'il est accordé que vn tel iouisse de telle chose, donnez en des signes manifestes, où j'ay fait mes bornes; & lors il disoit quels signes il vouloit que Iupiter enuoyast, & s'ils arriuoient l'Augure estoit bon. Or avec le temps ceste science fut en prix à Rome, de sorte que le nombre des Augures creust aussi bien que leur autorité, tellement qu'on crea les Colleges des Augures, qui n'estoient que trois au commencement.

Numa Pompilius Roy des Romains fut le premier qui ordonna le Flamen Dial, veu qu'au-

qu' auparauant les Roys exerçoient l'office de Pontife. Numa considerant donc qu'à l'aduenir les Roys pourroient plustost ressembler à Romulus qu'à luy, & estre plus affectionnez aux armes qu'à la Religion, ordonna quatre Prestres qu'il nomma Flamines, qui deuoient estre continuellement attentifs au seruice des Dieux, & ces Prestres furent dediez à plusieurs Dieux, c'est à sçauoir vn à Iupiter, qu'ils nommerent Dial, & deux à Mars, & vn à Quirinus, ou Romulus. Les autres Flamines dediez à d'autres Dieux qu'à Iupiter portoient le tiltre des Dieux, auxquels ils estoient votiez: & Numa voulut que celuy de Iupiter portast vne robe honorable, & eust vn siege d'yuoire, qu'on n'octroyoit en ce temps là qu'aux plus grands Magistrats. Cestuy-cy seul auoit vn petit chapeau blanc, & dauantage il alloit à cheual. Il ne luy estoit permis de iurer, ny de porter du feu de son sacrifice en aucun lieu qui ne fust sacré. Si quelqu'un entroit ceint dans son Temple, il falloit qu'il le déceignist, & qu'il jettast dehors ce lien par le toict. Il n'auoit aucun noeud dessus luy. Si le criminel qu'on menoit foitetter se mettoit à genoux deuant luy, c'estoit peché de le foitetter ce iour là. Vn homme qui estoit de libre condition, ne pouuoit couper les cheueux de ce Prestre. Il ne luy estoit permis de toucher vne cheure, ny du lierre, des feues, ou la chair crüe. Il falloit que les pieds de son liêt fussent salis de bouë liquide, & il n'estoit permis à aucun de reposer dans ce liêt.

Les rongneures des ongles du Dial, & les cheueux qu'on luy auoit coupez estoient cachez en terre sous vn caillou. Il ne luy estoit permis de prendre l'air sans chapeau, & les Pontifes luy ordonnerent le mesme quand il seroit en lieu couuert. Il ne pouuoit toucher de la farine paistrie avec le leuain, ny quitter sa chemise qu'en des lieux couverts, afin qu'il ne fust nud sous le Ciel, comme sous les yeux de Iupiter, & personne ne se pouuoit asseoir avec luy, lors qu'il disnoit, que le Roy sacrificule. Il n'entroit iamais aux lieux où il y auoit des corps morts.

Varron a dit que les anciens eurent autant de Flamines que de Dieux, comme le Dial, le Martial, le Quirinal, le Vulcanien, le Falagre, & comme nous auons nos Archeuesques, Euesques, & Cardinaux, ils auoient aussi leur Flamen, leur premier Flamen, & celuy qui estoit sur tous les autres.

Quant aux Vestales & à la garde de leur feu, cela est si rebatu que ie n'en diray autre chose, sinon que si ce feu s'esteignoit elles estoient battues avec des verges par le Souuerain Pontife. On ne mettoit en ce Temple que des Vierges qui deuoient estre nees de personnes de libre condition, & on les prenoit depuis six ans iusques à dix au plus.

Les dix premieres annes elles apprenoient la forme des sacrifices, estoient autant de temps occupees à sacrifier, & les dix dernieres annes elles instruisoient les ieunes filles qu'on prenoit de nouveau, lesdits trente ans passez elles se pouuoient marier. Mais celles qui se marierent furent malheureuses.

Le peuple Romain les honoroit extremement, & outre le feu dont i'ay parlé elles gardoient le Palladium, ou la statue de Minerue, & autres choses sacrees des Romains: & quand elles estoient trouuees en adultere on les faisoit mourir en ceste sorte. On les degradoit, & les portoit sur vne biere, liees & avec le visage couuert en fort grand silence par la ville, qui estoit ce iour là tout en duëil, iusqu'à la porte Salair, près de laquelle il y auoit vn lieu qu'on nommoit le champ Scelerat, auquel estoit vne sepulture qui auoit vn petit trou pour entrée, & deux petites fenestres. En l'vne on mettoit vne lampe allumee, & en l'autre de l'eau, du lait & du miel, & lors qu'on estoit arriué audit lieu, le grand Prestre disoit quelques prieres ayant tousiours les mains dressees au Ciel, puis on faisoit entrer la Vestale en ceste tombe par le petit trou, & cependant le peuple tournoit le visage, puis auant osté l'échelle, & couuert le lieu d'vne pierre, comme si c'eust esté vn sepulchre. le peuple jettoit dessus de la terre, & estoit tout ce iour en duëil.

Les Saliens furent dediez à Mars au nombre de douze par Numa, puis Hostilius en ajouta douze autres. Ils furent appelez Saliens pour les sauts qu'ils faisoient en sacrifiant. Ils portoient certaines jupes peintes, & sur la poitrine certaine piece enrichie d'or, & d'argent, & de pierres precieuses.

Au commencement il y eut quatre Pontifes pris entre les Senateurs, puis le peuple obtint qu'on en esliroit autant de son ordre. Ceux-cy auoient vn chef, qu'on nommoit le tres-grand Pontife, qui sçauoit avec quelles hosties, & en quel temps il falloit sacrifier, & auoit le soing de sçauoir d'où l'on tireroit de l'argent pour les dépenses du seruice des Dieux. On dit que le Pontife auoit vne table où il cognoissoit l'éclipse de la Lune, & du Soleil.

Le Prestre Fecial presidoit à la foy publique donnee aux peuples, & l'on iugeoit que la guerre qui n'auoit esté premierement denoncee par le Fecial, n'estoit pas iuste.

Quand on faisoit la paix le Fecial demandoit au chef de l'armee, s'il luy commandoit de

faire la paix avec l'ennemy, & le Chef luy ayant commandé, il disoit, ô tel, ie te demande de l'herbe; Aquoy le Chef répondoit, qu'il en print, & l'ayant prise, il demandoit s'il le faisoit messager du peuple, & du Senat Romain. Le Chef répondoit qu'il le faisoit, pourueu que cela se fît sans que luy & le peuple Romain fussent deceus. Lors on faisoit la paix avec prieres à Iupiter, que si le peuple Romain contreuenoit aux conditions de l'accord, il le frappast, de mesme qu'il frappoit alors vn pourceau, & ce d'autant plus qu'il estoit beaucoup plus puissant. Mais quand ils denonçoient la guerre, ils vsoient de ceste façon de faire.

Le Fecial portoit vn dard demy bruslé, & de l'herbe aux confins de ceux à qui il denonçoit la guerre, & en presence de trois hommes d'aage adjoustoit que les ennemis auoient failly en ce qu'ils auoient fait contre le peuple Romain, & que pour ceste cause luy & le peuple Romain leur annonçoient la guerre: & ayant dit ces paroles il jettoit ce dard sur la terre, afin qu'ils visSENT qu'on leur faisoit iustement la guerre.

Les deux hommes des Sacremens auoient la charge de lire les liures sacrez, & les vers de la Sibyle, & de les interpreter. Ils présidoient encore aux ceremonies qu'on faisoit à Apollon, & quand il naissoit quelque monstre, ou qu'il arriuoit quelque prodige, ils taschoient d'appaiser les Dieux avec leurs sacrifices.

Les sept hommes des Epulons estoient enclos en vne espee de Prestrie, de laquelle il y a peu de gens qui ayent escrit. Plin deuant reciter vne oraison, & craignant ceux qui estoient là pour l'écouter dist. Le Consulaire estoit au milieu, & apres vn des sept hommes des Epulons; & il est dit qu'on accepte les excuses des filles des Augures des dix hommes sacrez, des Flamines, & des sept hommes des Epulons: le parlerois des habillemens, des vases, des sacrifices, & des instrumens, mais ie m'en deporte, pource que la chose seroit ennuyeuse.

CHRONOLOGIE,

Et briefue description de la succession, vie & mort des Papes depuis saint Pierre, iusques à Paul V. à present seant. Ensemble leurs Ordonnances, Conciles, & Schismes.

43. **P**ource qu'en discourant du gouvernement de l'Estat de l'Eglise, i'ay aussi parlé de la Religion, & des choses qui concernent l'Eglise, ie m'en deporteray maintenant, pour reuenir au denombrement des Papes, iusqu'à Paul cinquiesme qui tient aujourd'huy le S. Siege, & la Souueraine dignité de l'Eglise, avec vn sommaire des ordonnances pendant leurs vies, & les temps des Conciles generaux, puis ie mettray les Cardinaux qui sont aujourd'huy, afin que les plus curieux se contentent.

Saint

CHR.

- Le siege fut vacquant sept iours.*

- Le siège fut vacant 19. iours.**

- Digitized by Google

NOM.

DES
PAP.*Le siege fut vacquant quinze iours.*

ANS.

DE
CHR.
125.

6. Sixte Romain prohiba que les ornemens de l'Eglise ne fussent maniez d'autres que des Ecclesiastiques : ordonna les Corporaux de lin tres-pur & net : qu'en la celebration de la sainte Eucharistie l'on chanteroit *Sanctus, Sanctus, &c.* Ce sacre mystere estant traité simplement auparavant, la deuotion reluisant plus que pompe & appareil. Peu de ceremonies. Car saint Pierre ayant consacré, disoit l'oraison Dominicale. Il fut martyrisé de son Pontificat l'an neuuesme, mois dixiesme, iour neuuesme.

Le siege fut vacquant deux iours.

9. Telesphore Hermite Grec, institua le Careme, selon plusieurs : mais ils se trompent : car il est de l'institution des Apostres, comme Polidore l'a remarqué de saint Hierosme, escriuant contre Montan à Marcelle : trop bien augmenta-il le nombre des iours, ordonna de ieusner cinquante pour quarante, mesmement les Prestres, qui doiuent estre plus saints que les autres. Il ordonna aussi que le iour de la Natiuité de Iesus-Christ, l'on celebreroit trois Messes, la premiere à minuit, signifiant l'heure de la Natiuité : la seconde au point du iour, lors qu'il fut cogneu des Pasteurs, la troisieme en plein iour, qui est celuy de nostre Redemption, & que desormais l'on chanteroit cet Hymne, *Gloria in excelsis Deo*. Il fut martyrisé & ensevely au Vatican, de son Pontificat, l'an dixiesme, mois huictiesme, iour vingt-cinquiesme.

Le siege fut vacquant sept iours.

10. Hygine Grec, natif d'Athenes ordonna (pour le moins) qu'un parrain ou marraine presenteront l'enfant au Baptisme, que les materiaux dediez au bastiment du Temple ne seroient transferez à vîages profanes. Que le Metropolitain ne condamneroit un Euesque de sa Prouince, sans le consentement & aduis des autres Euesques de la mesme Prouince : Il meurt l'an quatriesme.

Le siege fut vacquant trois iours.

11. Pie d'Aquillee ordonna quel'on celebrast la Pasque (Pentecoste ja ordonnee par les Apostres, Act. vingtiesme) le iour du Dimanche, plusieurs saintes ceremonies, pour l'ornement & decoration du baptisme & de la sainte Eucharistie : que les Romains ne prendroient le voile avant l'aage de vingt-cinq ans, que le Prestre jurant, seroit depose, & l'homme laïc excommunié. Il imposa aussi penitences aux Prestres negligens, & traitans irreueremment les saints Sacramens : consacra le premier le Temple de Rome, sçavoir les Thermes de Nouat dedié à sainte Pudentiane, les Temples des Chrestiens estoient auparavant cachettes & grottes obscures, sa mort aduint de son Pontificat l'an vnzieme, mois cinquiesme, iour vingt-septiesme.

Le siege fut vacquant treize iours.

12. Anicete Syrien de nation, renouela l'Ordonnance d'Anaclete, que les Clercs ne porteroient point de barbe : que les Prestres auroient vne couronne : qu'un Euesque ne pourroit estre consacré avec plus petit nombre que de trois, le Metropolitain de tous les Euesques de sa Prouince. Il fut martyrisé le 9. an 8. mois, 24. iours de son Pontificat.

Le siege fut vacquant dixsept iours.

13. Concordius Soter de Fundi, renouella & confirma l'Ordonnance d'Euariste touchant la benediction Sacerdotale, au mariage & consentement des peres & meres, pour les grands abus qui se commettoient de son temps. Gratian recite qu'il ordonna que l'on ne doit garder le serment, par lequel l'on promet de mal-faire. Il mourut l'an septiesme, mois 11. iours dix-huictiesme de son Pontificat.

Le siege fut vacquant vingt-vn iour.

14. Abundus Eleutherus, Grec de nation, enuoya en la grande Bretagne, à la requeste du Roy, Fugatius & Damianus, gens de pieté & religion : par lesquels le Roy & le peuple furent baptisez. Il deffendit qu'aucun par superstition ne s'abstint d'aucune sorte de viande, & que nul ne fust condamné de crime, absent & non conuaincu. Ayant augmenté la Religion Catholique par son bon exemple, a laissé

NOM.
DES
PAP.

a laissé paix & repos en l'Eglise espanduë quasi par toute la terre, il mourut l'an
quinzième, iour treizième de son Pontificat.

ANS
DE
CHR.

Le siege fut vacquant cinq iours.

15. Victor Affriquain, ordonna que si aucun estant prest de recevoir la sainte
Communion, & sollicité de pardonner à son ennemy, refusoit de se reconcilier,
qu'il fut priué de ce saint mystere: declara qu'en cas de necessité, il seroit loisi-
ble à qui que ce fust, homme ou femme, de baptiser ceux qui requerroient ce-
ste grace, en quelque eau que ce fust, pourueu qu'elle fust viue: combien que la
coustume de baptiser autrement ne fust qu'à Pasque & Pentecoste. Il confirma
aussi l'Ordonnance de Pie, touchant la celebration de la Pasque, le iour du Di-
manche, contre la coustume des Eglises d'Asie, lesquelles il excommunia: de-
quoy il fut repris par Irénée. Il fut martyrisé l'an douzième, mois vn, iour vingt-
huit de son Pontificat.

Le siege fut vacquant douze iours.

16. Abundius Zefirinus Romain, ordonna que chacun ayant atteint l'age de 198.
douze à treize ans receust à tout le moins au iour solennel & feste de Pasque la
sainte Eucharistie: que les calices estans de bois dès le commencement, seroient
faits de verre, lequel Decret fut aboly depuis, & ordonné qu'ils seroient d'or,
d'argent, ou d'estain: qu'un Euesque ne pourroit estre iugé de son Archeuesque
ou Metropolitain, ny de son Primat ou Patriarche, sans l'autorité Apostoli-
que, en quoy il n'oublia d'establi sa primauté. Il mourut l'an vingtième, iour
quinzième de son Pontificat.

Le siege fut vacquant six iours.

17. Domitius Calistus Romain, dressa vne Eglise & vn cimetiere à Rome, où re-
posent les reliques de plusieurs saints Martyrs, institua le ieusne des Quatre- 218.
temps, esquels il faut recevoir le Clerc es ordres sacrez. Quelques-vns luy attri-
buent l'Ordonnance du Celibat des Prestres: mais Polydore au liure cinquies-
me, chapitre quatrième dit, que l'on n'a peu oster du tout le mariage aux Pre-
stres Occidentaux (car les Orientaux & Grecs se marient) iusques au Pontifi-
cat de Gregoire 7. l'an 1074. il fut martyrisé l'an cinquiesme, mois vn, iours trei-
ze de son Pontificat.

Le siege fut vacquant six iours.

18. Urbain Romain, sous lequel l'Eglise Romaine commença de posséder des 223.
terres, prez, & autres heritages, qui doivent estre communs & distribuez pour
alimenter les gens d'Eglise, les pauvres, les Protonotaires qui escriuoient les
actes des Martyrs. Damase luy attribue l'Ordonnance des vaisseaux d'argent ou
d'estain, dont Boniface Euesque de Majence disoit que jadis les Prestres d'or
vsoient de calice de bois: maintenant les Prestres de bois vsent de calice d'ar-
gent. Pour sa sainte vie il attira à la foy beaucoup de monde, il fut martyrisé
l'an septiesme, mois sept, iours cinq de son Pontificat.

Le siege fut vacquant vint-trois iours.

19. Calpurnius Poncianus Romain ayant laissé deux Epistres decretales à tous 231.
les fideles, & enduré beaucoup de tourmens, mourut en exil, en l'Isle de Sar-
dine, l'an cinquiesme, mois cinq, iours deux de son Pontificat. Quelques-vns
disent que de son temps estoient à Rome quinze Prestres, dits Cardinaux, c'est à
dire principaux, pour enseuehr les morts, & baptiser les perits enfans, & autres
quinze qui eurent la principale charge du salut des ames: toutesfois Polydore
& Damase disent que ce fut Margel Pape l'an trois cents deux, auteur de ces
Cardinaux.

Le siege fut vacquant vn iour

20. Antheros Grec, ordonna que les gestes des Martyrs seroient escrits: permit 236.
à tout homme Ecclesiastique de changer son Eglise avec vn autre, moyennant
qu'il le face pour le salut des ames, & profit public, & non pas pour sa commo-
dité particuliere: declare qu'il ne sera loisible à aucun d'estre Pape qu'il ne soit
Euesque premierement. Il fut martyrisé l'an cinquiesme, mois vn, iours qua-
torze de son Pontificat.

Le siege fut vacquant six iours.

21. Fabian Romain, esleu miraculeusement, baptise Philippes pere & fils premier 239.
Empereur Chrestien, & accepta leurs thesors: dispose les ceremonies du S. Cres-
me: ordonne de rechef le Martyrologe, deffend de prendre femme entre le cin-

NOM.
DES
PAP.

quiesme degré de consanguinité, veut que chacun Chrestien communie 3. fois ANS
es festes de Pasques, Pentecoste, & Natiuité de Nostre Seigneur: fut martyri- DE
sé principalement en haine des thresors receus de l'Empereur, l'an 13. mois 11. CHR.
de son Pontificat.

Le siege fut vacquant six iours.

22. Corneille Romain fut tres-docte, & escriuit plusieurs Epistres, eut deux Antipapes, fit plusieurs ordonnances, comme l'on peut voir dans Gratian, & accusé de leze Majesté, pour auoir escrit à saint Cyprian, fut fustigé & mis à mort sous l'Empereur Dece, l'an deux, mois 2. iours 3. de son Pontificat. 255.

Le siege fut vacquant deux mois, cinq iours.

SCHISME I.

Nouatian Romain Prestre heretique, disant que les Apostats, c'est à dire ceux qui estoient décheus de la foy, ne deuoient estre receus en l'Eglise, 251.
quoy qu'ils fissent penitence: & premier schismatique, hypocrite & conuoiteux de paruenir au Pontificat, alluma le feu de diuision & discorde, se faisant Antipape, avec l'aide de Nouatus prestre de Carthage, tesmoin saint Cyprian, escriuant à Corneille qu'il le condamna heretique en deux Conciles tenus à Rome. Nicostratus autre Antipape en Affrique.

23. Luce Romain ordonna que chacun Euesque seroit accompagné de deux Prestres & trois Archidiacres, pour estre tesmoins de sa bonne conuersation: que les Euesques seroient aagez de trente ans: toutesfois Gratian attribué cet ordre à Zozime, il fut martyrisé l'an premier, mois trois, iours treize de son Pontificat. 253.

Le siege fut vacquant vn mois cinq iours.

24. Luce Estienne Romain, fut le premier qui mit en vsage les habits Sacerdotaux, les premiers Prestres se contentans d'estre vestus de pieté, religion & sainteté: s'estudians plus à dépouiller le vieil homme, & les vices, que de se parer de nouveaux & riches ornemens. Il fut martyrisé l'an premier, mois trois, iours treize de son Pontificat. 255.

Le siege fut vacquant vn mois douze iours.

25. Sixte II. Athenien, ayant enseigné l'Euangile par toute l'Espagne, il fut esleu Pape, il ordonna de bastir les Eglises & Autels vers l'Orient, & estoit en bonne volonté de confuter les Heretiques, des Sabelliens, Cerinthiens, & Nepotians, il fut martyrisé l'an premier, mois dix, iours 23. de son Pontificat. 257.

Le siege fut vacquant vnze mois quinze iours.

26. Denys Grec, fut le premier Moyne qui fut receu au siege Romain pour estre Pape, & estant esleu, il diuisa le premier, tant à Rome, qu'ailleurs, les Temples, Cimetieres, Parroisses, & Dioceses au Prestres, commandant que chacun se tint content de son finage, pour y nourrir le troupeau qui luy seroit commis, il souffrit mort l'an 10. mois 5. iours 5. de son Pontificat. 260.

Le siege fut vacquant cinq iours.

Felix Romain ordonna que l'on celebre tous les iours la memoire des Martyrs, & non ailleurs qu'és lieux sacrez: que tous les ans l'on obserue la Dedication des Eglises vne fois l'an, il souffrit martyre l'an 3. mois 5. de son Pontificat.

Le siege fut vacquant cinq iours.

28. Eutichien Toscan de Luna, ayant escrit quelques Epistres & Decrets, enseigné 342. Martyrs de ses propres mains, luy-mesme fut martyrisé l'an 8. mois 6. iours 24. de son Pontificat. 271.

Le siege fut vacquant huit iours.

29. Caius de Salone en Dalmace, de la famille de Diocletian, l'on luy attribué l'institution des quatre degrez en l'Eglise, à sçauoir Huissier, Lecteur, Exorciste, Acolite. Mais Genebrard obserue d'Eusebe au liure 6. chap. 43. qu'il en falloit plustost faire Aurheur Corneille son predecesseur: il souffrit martyre l'an 12. mois 4. iours 6. de son Pontificat. 275.

Le

NOM.
DES
PAP.*Le siege fut vacant d'un mois huit iours.*ANS
DE
CHR.

30. Marcellin Romain estant saisi de crainte des tourmens & supplices, honora les Idoles, mais depuis il recongneut sa faute en plein Synode assemblé à Sinuesse, & en fit penitence: & mesme depuis vint à redarguer l'Empereur Diocletian, & de son gré il souffrit martyre l'an 7. mois 9. iours 26. de son Pontificat.

Le siege fut vacant 20. iours.

31. Marcel Romain, limita les quartiers & tiltres departis par Euariste, & les reduit à 25. ordonna que le Concile general ne pourroit estre assemblé sans la permission du siege Apostolique. Martin V. ordonna le contraire, comme nous verrons apres, qu'un Clerc ne pourroit estre conuenu deuant un Iuge lay: il fut martyrisé l'an 5. mois 6. iours 21. de son Pontificat.

Le siege fut vacant 20. iours.

32. Eusebe Grec, Medecin, fit plusieurs Ordonnances. Aucuns luy attribuent celles de l'Invention de sainte Croix: il fut martyrisé l'an premier, mois 7. iours 25. de son Pontificat.

Le siege fut vacant sept iours.

33. Militiades Affriquain, deffendit le ieusne au Dimanche & au Ieudy: pourau- tant que les Payens celebrent les solennitez de leurs Dieux Saturniens. Il mourut l'an 3. mois 2. de son Pontificat.

Le siege fut vacant dix-sept iours.

34. Sylvestre Romain ordonna la tunique, & l'aube de lin blanc, deffend l'ordie- ment de soye ou drap teint en la consecration, changeant les noms Payens des iours, à sçauoir le nom du Soleil lors ainsi nommé, au Dimanche ou Domini- que: les autres cinq ensuiuant nommez par eux de la Lune, Mars, Mercure, Iu- piter, & Venus, les appellant feriez 1. 2. 3. 4. 5. 6. & au lieu du iour de Saturne, Sa- bath, ou Samedy, qui signifie repos. Toutesfois auant luy le Dimanche auoit esté consacré à Dieu par les Apostres en memoire de la Resurrection. Or il fit chose beaucoup plus grande quand il conuertit à la foy Catholique l'Empereur Constantin, qui apres fit cesser les persecutions tyranniques qui se faisoient con- tre les Chrestiens: donna à Sylvestre la ville de Rome, selon aucuns, & plusieurs Prouinces, edifia & dota plusieurs Temples Chrestiens: il mourut l'an 20. mois 2. iours 4. de son Pontificat.

Le siege fut vacant 15. iours.

SYNODE I. GENERAL.

Premier Concile General tenu à Nice, par le commandement de Constan- tin le Grand, par 318. Euesques de toutes les parties du monde pour rendre l'Estat de l'Eglise pacifique, troublé principalement par la detestable heresie d'Arrius, où il fut condamné, & conclud le fils de Dieu estre *Homousion*, c'est à dire consubstantiel au Pere, ce que porte le Symbole que nous chantons.

35. Marc Romain, ayant ordonné que le Symbole composé au Concile de Ni- ce: *Credo in unum Deum*, &c. fust chanté du Clergé & du peuple apres la Predica- tion de l'Euangile, & que l'Euesque d'Ostie vseroit du manteau Episcopal, *Pallium*, à cause que celui de Rome est par luy consacré: il mourut le 8. mois 20. iours de son Pontificat.

Le siege fut vacant 20. iours.

36. Iules Romain, estant retourné d'exil où il auoit esté enuoyé par Constan- tius Arrien fils de Constantin, ordonna plusieurs choses, entre autres qu'un Pre- stre ne pourroit estre conuenu sinon deuant un Iuge Ecclesiastique, que les Con- ciles ne seroient conuoquez sans sa permission, il mourut l'an 14. mois 5. iours 16. de son Pontificat.

Le siege fut vacant un mois 25. iours.

37. Liberius Romain estant banny pour auoir résisté aux Arriens, & par belles promesses de l'Empereur Constantius Arrien (selon l'opinion d'aucuns) il con- sentit de leur adherer à sa grande infamie: toutesfois en fin s'estant reuqué il mourut Catholique l'an quinziesme, mois quatre, iours dixseptiesme de son Pontificat.

SCHISME II.

Felix 11. Romain fut selon quelques-vns 38. Pape, mais d'autres ne le nom-
brent pas, d'autant qu'il presida en l'absence de Liberius Onuphius: le Mai-
re le tient pour le 1. Schismatique: il fut martyrisé par les Arriens le 10. an, mois 355.
3. iours & onze.

38. Damase Espagnol, il a escrit les vies des Papes par le conseil de saint Hieros-
me, fit dire en l'Eglise Latine à la fin des Pseaumes *Gloria Patri*, &c. composé par
Flamianus Antiochenus, aydé de S. Christophle, le Symbole de Constantino-
ple, & le Confiteor, & par son commandement S. Hierosme colligea les Epi-
stres & Euangiles, comme elles se lisent en la Messe, & les heures Canoniales,
l'ordonnance de chanter les Psaumes alternatiuement, est de luy & de S. Am-
broise. Il mourut l'an 18. mois 1. iours dix de son Pontificat.

Le siege fut vacquant dixsept iours.

SCHISME. III.

Vrsin Romain, il estoit competitor de Damasus apres la mort de Liberius 366.
& Felix, & lors commença le troisieme Schisme, lors l'ambition des hon-
neurs, commença aussi à saisir le cœur des Prelats de l'Eglise.

SYNODE II. GENERAL.

Concile vniuersel assemblé à Constantinople de 150. Euesques, sous Gra- 381.
tian & Theodose Empereurs, pour l'heresie de Macedonius Euesque de
Constantinople & d'Eudoxe, nians le S. Esprit estre Dieu, où ils furent condânez.

Syricius Romain deffend au Clergé le mariage, ordonne que nul bigame ne
pourroit estre receu à l'ordre de Prestre, qu'il seroit licite aux Moines de bon- 384.
ne conuersation d'estre Prestres (car ils ne l'estoient pas lors, & n'en y auoit au-
cun aux Monasteres) & receus Euesques: Les Bourguignons de peur de Huua
se font Chrestiens; il mourut l'an 15. mois 1. iours 15. de son Pontificat.

Le siege fut vacquant 20 mois, 15. iours.

39. Anastase Romain ordonna que quand on chanteroit l'Euangile chacun fust
debout, afin de l'ouïr avec plus grande reuerence; que ceux qui seroient defe- 398.
ctueux ou mutilez de membre ne fussent receus au Clergé: il mourut l'an 4.
iours, 21. de son Pontificat.

Le siege fut vacquant dix iours.

40. Innocent d'Albanie ou d'Escoffe, ordonna l'Extreme Onction, & declara 402.
que les Euesques qui vendroient Prebendes, Doyennetz, Prieurez, ou autres di-
gnitez Ecclesiastiques, ou quelque Sacrement, la sainte Huile, consecration
des Autels, fussent punis comme Simoniaques, que luy & tous ceux de son sie-
ge ne pourroient estre iugez d'aucun Roy, ne tout le Clergé, il mourut l'an 15.
mois 1. iours 21.

Le siege fut vacquant vingt-deux iours.

41. Zozimus Grec, homme fort docte & de sainte vie, deffendit que les serfs ne
fussent admis en l'ordre de Prestre: moins, dit Platine, les bastards & méchans: 416.
il mourut l'an 1. mois 4. iours 7.

Le siege fut vacquant neuf iours.

42. Boniface Romain, ce fut luy qui changea les veilles des SS. aux ieufnes: il fut 419.
chassé de Rome à cause d'Eulalius par l'Empereur Honorius fils de Theodo-
sius, lequel le rappella: il mourut l'an 4. mois 6. iours 28.

Le siege fut vacquant neuf iours.

SCHISME IV.

43. Eulalius Romain durant le Schisme contre Boniface, fut esleu par vne partie 419.
du Clergé, & mis hors de Rome avec Boniface, il mourut le troisieme mois &
sept iours de son election.

44. Celestin Romain ordonna que les Pseaumes fussent chantez de tous auant la Mes- 423.
se, ce qu'auparauant ne se faisoit, ains seulement l'Epist. & l'Euang. estoient recitez
de

NOM. de là les Introites ont esté cueillies, graduels, offertoirs, & communions. Or-
DES donne aussi que les Prestres sçauront les Canons Ecclesiastiques. Il mourut l'an
PAP. 8. mois 5. iours 3. ANS DE CHR.

Le siege fut vacquant vn mois, vnze iours.

SYNODE III. GENERAL.

Concile general sous Theod. II. de 200. Euesques celebré en Ephese con- 430.
tre l'heretique Pelagius & Nestorius Euesques de Constantinople qui
nioient la diuinité de Iesus-Christ.

45. Sixte 3. Romain, accusé d'auoir violé vne Nonnain, purgé par son serment 432.
en presence de 55. Euesques, ayant distribué tous les biens aux pauvres, mourut
l'an 7. mois 11. *Le siege fut vacquant vn mois, vnze iours.*

46. Leon le grand, ainsi surnommé à cause, de sa grande doctrine, ordonné, ou 440.
renouelle les Rogations, Processions, qu'on appelle Litanies. Ses Litanies
sont les petites. Gregoire le Grand institua les grandes, ayant fait plusieurs or-
donnances. Il deffendit de chanter *Alleluia & Gloria in excelsis Deo*, en temps de
Carême. Il mourut l'an 10. mois 11. iours, 2. Le siege fut vacquant 7. iours.
Auant ce Pape l'Eglise Romaine nombroit les ans depuis la Passion de Iesus.

SYNODE IV. GENERAL.

Concile general de Calcedoine sous l'Empereur Martian de 225. Euesques, 452.
contre l'heresie d'Eutiches Prestre de Constantinople, confondant les 2.
natures en Iesus-Christ.

47. Hilaire de Sardaigne, docte personnage, deffendit que nul ne puisse eslire vn 461.
successeur à aucune charge Ecclesiastique: Il mourut l'an 6. mois trois, iours 10.
Le siege fut vacquant dix iours.

48. Simplicie de Tiouly, ordonna qu'aucun Ecclesiastique ne reconnoisse vn laïc 467.
en la possession d'un benefice. Il meurt l'an 15. mois 6. iours 13.
Le siege fut vacquant six iours.

Felix 3. Romain, ordonne que les Eglises seront consacrees seulement par les 483.
49. Euesques. Il meurt l'an 8. mois 11. iours 17.
Le siege fut vacquant cinq iours.

50. Gelasius Africain composa les Prefaces que l'on chante auant le saint Canon, 491.
ordonna que les Ordres sacrez ne seroient administrez que quatre fois l'annee,
& le Samedi. Il composa hymnes, collectes, respons, graduels, liures, & fit au-
tres ordonnances, étant docte, & mourut l'an 4. mois 8. iours 19.
Le siege fut vacquant 5. iours.

51. Anastase II. Romain, est reputé heretique, infamé par quelques-vns, & fa- 496.
uorissant aux Nestoriens: toutesfois il excommunia l'Empereur Anastase com-
me Eutychien. Il mourut miserablement apres auoir vuide ses boyaux comme
Arrius l'an 2. mois 11. iours 24.
Le siege fut vacquant deux iours.

52. Celius Symmachus de Sardaigne fut Pape, nonobstant l'élection d'un nom- 498.
mé Laurent & d'un autre appelé P. Alton, ainsi par eux commença le 5. Schis-
me: Car Theodoric Roy des Gots, qui lors occupoit l'Italie, ayant entendu que
le Clergé de Rome seditieux vouloit deposer Symmachus, enuoya cet Alton
tenir le siege, & chasser les deux autres. Toutefois Symmachus s'estant purgé
des delits que l'on luy objectoit, fut remis, & mourut l'an quinziesme, mois 7.
iour 28.
Le siege fut vacquant deux iours.

SCHISME V.

Laurens Romain durant le schisme contre Symmachus, mourut l'an pre- 513.
mier.

Celius Hormisdas de Fresselone cité de Campanie, voyant plusieurs Moynes 514.
à Rome opiniastrés en l'heresie d'Eutyches, les fit bannir de la ville. Il fit de
grandes aumosnes, condamna l'heresie des Manicheens qui repulluloient, fit
brusler leurs liures, & mourut l'an 9. mois 9. iours 17.

54. *Le siege fut vacquant cinq iours.*
Iean de Toscane estant enuoyé en Ambassade par le Roy Theodoric Arrien vers l'Empereur Iustin en Constantinople, pour restituer les Arriens à leur liberté, & l'ayant obtenu, neantmoins estant suspect à Theodoric, il fut par luy emprisonné, où il mourut en grande disette l'an 2. mois 9. iours 6.

55. *Le siege fut vacquant vn mois 27. iours.*
Felix 4. Samien, separa le peuple du Clergé, bailla à cestuy des liures necessaires, fit le bastiment de saint Cosme à Rome, & quelques reparations aux autres. Il mourut l'an quatre, mois deux, iours dix-huit.

56. *Le siege fut vacquant trois iours.*
Boniface 2. Romain, fut approuvé de tous après la mort de Dioscore, il confirma l'Ordre de S. Benoist. Il mourut l'an 2. & 2. iours de son Pontificat.

Le siege fut vacquant 3. mois, 5. iours.

SCHISME VI.

- Dioscore Romain estant esleu par quelques-vns durant le schisme contre Boniface, mourut l'an 8. & 28. iours apres.

57. Iean II. surnommé Mercure, ayant receu la confession de foy de l'Empereur Iustinian, signee de sa main, avec vn beau present, mourut l'an 2. mois 4. iours 6. de son Pontificat.

Le siege fut vacquant six iours.

58. Rusticus Agapitus Romain, fit delaisser à Iustinian l'heresie Eutychienne, de laquelle il auoit esté seduit par Anthemius Euesque de Constantinople, puis mourut l'an, & dix-neufiesme iour de son Pontificat.

Le siege fut vacquant six mois, 25. iours.

59. Celius Siluerius de Frusolone en Campanie, ne voulant remettre Anthemius heretique en son Euesché de Constantinople par commandement de l'Impératrice, est condamné faulxement d'auoir voulu liurer Rome aux Gots, fut exilé en l'Isle de Pont, où il mourut de pauvreté, ayant institué la feste de la Purification pour appaiser vne grande peste: l'an premier, mois cinquieme, iour second de son Pontificat.

Le siege fut vacquant cinq iours.

SCHISME VII.

60. Vigilius Romain créé pendant le schisme contre Syluerius, homme ambicieux, & qui auoit esté cause de l'expulsion de Syluerius, obtint la dignité Papale par force, & par faueur de Theodora femme de l'Empereur Iustinian: laquelle puis apres le fit tirer de Rome, du consentement des Romains qui le haïssient à mort, mené à Constantinople, où il fut griefuement affligé, iniurié, outragé, conduit par la ville avec vne corde au col, finalement banny, pour n'auoir voulu remettre Anthemius heretique en son Euesché de Constantinople suiuant sa promesse mal-faite à Theodora, & dont il se repentoit. Il mourut l'an 17. mois 6. iours 29. de son Pontificat.

Le siege fut vacquant vn mois, cinq iours.

SYNODE V. GENERAL.

- Concile vniuersel celebré à Constantinople pour la seconde fois, de cent soixante-cinq Euesques, contre Anthemius Euesque de Constantinople, & Theodore homme eloquent, qui disoit la Vierge sainte auoir enfanté vn homme seulement, & non homme & Dieu, & fut conclud qu'elle estoit *Theotocos*, Mere de Dieu.

61. Pelagius Romain ayant ordonné que les Ecclesiastiques chanteroient toutes les heures Canoniales, que les heretiques, & schismatiques seroient punis par glaue, puissance, & iustice temporelle; que nul ne fust admis aux Ordres Ecclesiastiques par ambition, ny dons, meurt l'an 5. mois 10. iours 28. de son Pontificat.

Le siege fut vacquant 4. mois, 5. iours.

62. Iean 3. Romain, ayant acheué de faire reparer quelques Eglises, aggrandir les cimetieres des Martyrs, il mourut l'an 12. mois 11. iours 26. de son Pontificat.

Le

NOM.
DE
PAP.

Le siege fut vacquant dix mois, dix-neuf iours.

63. Benoit Romain ayma fort les pauvres, & voyant l'Italie ruynee par les guerres des Lombards, qui commencerent d'occuper l'Italie à l'instigation des Nar-
ses, irrité par l'Imperatrice Sophie, & affligé de famine, & peste; il mourut l'an 4. mois vn, iours 27. de son Pontificat.

Le siege fut vacquant quatre mois.

64. Pelage II. Romain esleu sans le consentement de l'Empereur, à cause que Rome estoit assiegée par les Lombards, ayant fait de sa maison paternelle vn hospital pour les pauvres, transporte le Patriarche d'Aquilee à Grandens, la faisant Metropolitaine de la prouince de Venise, mourut de peste l'an 10. mois 2. iours dix de son Pontificat.

Le siege fut vacquant six mois 25. iours.

65. Gregoire le Grand, Moyne, fut esleu par la voix du Clergé & de tout le peuple, & du consentement de l'Empereur Maurice, il augmenta la Messe de plusieurs ceremonies & prieres, del'Introite, ou Antienne, prise de quelques Psalmes: qu'on chantoit les neuf mois *Kyrie eleison*, qui signifie, Seigneur aye mercy de nous: Alleluya au commencement des heures Canoniales, *Deus in adiutorium*, & le *Gloria Patri* en la fin de chacun Pseaume de saint Ierosme, jaçoit qu'aucuns luy attribuent l'abstinence de chair en Carême, qui est beaucoup plus ancienne, trop bien y adjousta-il les quatre iours du Mercredy iusques aux Dimanches pour parfaire la quarantaine. Il institua les grandes Litanies, parties des stations de Rome, & infinies autres choses quel'on peut voir dans Platine, il meurt l'an 14. mois 6. iours 10. de son Pontificat.

Le siege fut vacquant cinq mois, dix-sept iours.

66. Sabinian Toscan, duquel on ne sçait l'origine, & à bon droit: car il estoit méchant & indigne de son estat: detracteur des vertus de son predecesseur, disant qu'il auoit dissipé le bien de l'Eglise, ayant esté liberal aux pauvres, & en volonté de faire brusler ses liures, ayant ordonné des lampes ardentes en l'Eglise, les cloches, & que les heures fussent sonnées, il mourut l'an premier, mois cinq, iours 24. de son Pontificat.

Le siege fut vacquant vn mois, vingt-six iours.

67. Boniface 3. Romain, ayant obtenu le Primat sur toutes les Eglises de l'Empereur Phocas, ordonna en vn Concile de 72. Euesques, 30. Prestres, & trois Diacres, que l'Euesque sera esleu par le Clergé & le peuple: & que tous ceux qui paruiendront à la dignité Episcopale par dons & faueurs, seront excommuniez. Voila vne sainte ordonnance bien negligee à la ruine de plusieurs, il meurt 8. mois 13. iours de son Pontificat.

Le siege fut vacquant dix mois, trois iours.

68. Boniface 4. de Valeria en Prouence, obtint de l'Empereur le Pantheon de tous les faux Dieux, & le dedie à l'honneur de la Vierge Marie, & de tous les Martyrs, lors la feste de Tous saints fut instituee le 12. May, ayant fait vn Monastere de sa maison, & donné congé aux Moynes de prescher, baptiser & confesser, il meurt l'an 6. mois 8. iours vnze de son Pontificat.

Le siege fut vacquant quatre mois, vingt-trois iours.

69. Theodat ou Deusdedit Romain, homme de sainte vie, fit celebrer le Concile d'Auxerre, auquel les Estrennes qui se donnent le premier iour de l'an furent deffendues: afin de n'estre veu suiure les Payens. Il meurt l'an troisieme, mois 10. iours 17. de son Pontificat.

Le siege fut vacquant vn mois, 26. iours.

70. Boniface 5. Neapolitain, homme fort humain, ordonna le premier entre les Papes, que les Temples seroient la franchise pour tous fugitifs, sinon les sacrileges & excommuniez; il mourut l'an troisieme, mois dix, iours 9. de son Pontificat.

Le siege fut vacquant treize iours.

71. Honoré fut liberal aux pauvres, repara l'Eglise de S. Pierre, d'or, d'argent, & de beaux tableaux; apres mourut l'an 11. mois 11. iours 7. de son Pontificat.

Le siege fut vacquant vn an, 7. mois, 18. iours.

72. Severin Romain fut liberal aux pauvres, s'estudia à reparer les Eglises, & accroistre le reuenu d'icelles. De mesme zele estoit lors nostre Dagobert, qui fit bastir l'Eglise de S. Denys, l'enrichissant merueilleusement; voire des reliques, & dépouilles des autres Eglises. Le Pape mourut l'an 1. mois 2. iours 4. de son Pontificat.

- Le siege fut vacquant vn mois, 22. iours.*
73. Iean IV. de Dalmatie rachepta plusieurs Dalmates, & Istriens, detenus captifs par les Sarrazins, puis mourut l'an premier, mois neuuesme, iour dix-huictiesme.

- Le siege fut vacquant vn mois, quatorze iours.*
74. Theodoric Hierosolymitain, fils de Theodore Euesque de Hierusalem, fut liberal aux pauvres. L'election estoit vallable, faite par le Clergé & le peuple, confirmee par l'Exarche, comme Lieutenant de l'Empereur. Il meurt l'an sixiesme, mois cinq, iours 18. de son Pontificat.

- Le siege fut vacquant quatre mois, vn iour.*
75. Martin Italien assemble vn Concile à Rome de cent cinquante Euesques, contre Pyrrhus, Sergius Cyrus absent, & Paul present, Patriarches de Constantinople, heretiques, Monothelites, nians deux volonteze en Iesus-Christ: par le commandement de l'Emper. Constant. III. heretique, il fut banny en vne cite de Pont, où apres plusieurs miseres finit ses iours l'an 6. mois premier, iours vingt-huict de son Pontificat.

- Le siege fut vacquant 8. mois, 28. iours.*
76. Eugene Romain ordonna que les maisons des Prestres & Euesques seroient edifiees près des Temples, avec prisons, pour punir les crimes des Ecclesiastiques: il mourut l'an 2. mois 9. iour 14. de son Pontificat.

- Le siege fut vacquant vn an, 17. iours.*
77. Vitalianus Italien ordonna le chant de l'Eglise Romaine, & l'accorda avec les orgues pardeuant non vsitees au seruice diuin, & s'estant du tout adonné à deffendre la Religion Chrestienne contre les heretiques, mourut l'an troisieme, mois cinquiesme, iour 19. de son Pontificat.

- Le siege fut vacquant deux mois, 14. iours.*
78. Deodate Moyne Romain, guarit vn ladre en le baillant, homme religieux, affable, liberal aux pauvres, & estrangers, mourut l'an 4. mois 2. iours 15. de son Pontificat.

- Le siege fut vacquant quatre mois six iours.*
79. Donnius Romain fit pauer de marbre le paruis de saint Pierre, & par son integrité assujettit l'Eglise de Rauenne à celle de Rome, qui se disoit chef d'elle-mesme; il mourut l'an 2. mois 5. iours 10. de son Pontificat.

- Le siege fut vacquant deux mois, vingt-huict iours.*
80. Agathon Sicilien Moyne, fut de si bon naturel, que iamais homme qui vint à luy ne s'en alloit triste, ny desolé, mais joyeux, & consolé; il mourut l'an 2. mois 7. de son Pontificat.

Le siege fut vacquant 7. mois.

SYNODE VI. GENERAL.

Concile vniuersel tenu à Constantinople, de deux cens huictante & neuf Euesques, contre les Monothelites, qui nioient deux volonteze, & natures en Iesus-Christ. Le Patriarche de Constantinople delaisse son heresie: Machaire d'Antiochene la voulut laisser, & fut dejeté de son Euesché: là il fut permis le mariage aux Prestres de Grece, & non à ceux de l'Eglise Occidentale.

81. Leon II. Sicilien, homme fort sçauant en la langue Grecque, & Latine, & bon musicien, qui reduit le chant en meilleure melodie, ayant les pauvres, exhortant tous de paroles, & d'exemple à pieté, iustice, humanité, & autres vertus, ayant ordonné que l'on bail leroit la paix à la Messe, mourut le dixiesme mois, dixneuf iours de son Pontificat.

- Le siege fut vacquant vn an, vn mois, vingt-vn iour.*
82. Benoist 2. Romain, fut de telle sainteté, qu'en sa faueur l'Empereur Constantin IV. approuua l'election des Papes estre suffisamment faite par le Clergé & peuple Romain, sans l'autorité, & confirmation de l'Empereur: ce qui ne fut apres obserué long-temps, il mourut le 10. mois, 27. iours de son Pontificat.

- Le siege fut vacquant deux mois neuf iours.*
83. Iean V. Syrien, homme sçauant & vertueux, fut consacré comme son predecesseur, par les Euesques d'Ostie, Portense, & Velitense, & ordonna qu'ainsi s'obser-

Le siege fut vacquant 2. mois 18. iours.

SCHISME VII.

84. Pierre Archiprestre Romain, esleu par le Clergé, eut le Siege quelques iours.

Theodore Prestre Romain estant esleu par l'exercite Romain, eut le Siege pour quelques iours contre Pierre, & furent tous deux causes, & auteurs du schisme septiesme, & tous deux estans chassez, Conon fut créé.

Conon Romain, surnommé Angelique, pour sa sainte vie, doctrine & beauté, fut esleu Pape, apres vne grande contention contre Pierre & Theodore: il mourut l'onzième mois de son Pontificat. 686.

Le siege fut vacquant deux mois, 25. iours.

SCHISME VIII.

Theodore Prestre Romain, homme riche, qui auoit corrompu la gendarmerie par argent, eut le siege quelques iours.

Paschal Archidiaque, conuaincu d'art magique durant le schisme de Theodore, eut aussi le siege quelques iours, & finalement ayans tous deux esté chassez, fut créé Sergius.

85. Sergius Syrien, homme de sainte vie, ordonna que l'*Agnus Dei* seroit chanté par trois fois en la Messe: il mourut l'an treiziesme, mois huit. iour treiziesme de son Pontificat. 687.

Le siege fut vacquant vn mois, 20. iours.

86. Iean 6. Grec, fut fort studieux à reparer les Eglises, avec les Autels, & rachapter les captifs du Thresor des Eglises; il mourut l'an 3. mois 2. iours 14. de son Pontificat. 701.

Le siege fut vacquant vn mois, 18. iours.

87. Iean 7. Grec, homme eloquent & de bonne vie, ayant fait reparer plusieurs Eglises, & icelles enrichir de peintures, & statues, mourut l'an 2. mois 7. iours 17. de son Pontificat. 705.

Le siege ne vacqua point.

88. Sizinus, ou Zosimus Syrien, homme de grande sainteté, mourut soudainement, fort vexé des gouttes de pieds, avec bonne volonté de ne rien obmettre de ce qui appartient à vn vray Pontife, le 20. iour de son Pontificat. 707.

89. Constantin Syrien, fut bien-aymé de tous, signamment des pauvres: ce Pape estant à Constantinopole, Iustinian II. Empereur luy baïsa les pieds par honneur: ainsi fut introduite la coustume qui dure encores, par cet Empereur. Il résista le premier hardiment de tous les Papes, en face à l'Empereur Philippes Bardane, qui vouloit oster les Images, & mourut l'an huitiesme, mois vn, iours 20. de son Pontificat.

Le siege fut vacquant vn mois, dix iours.

90. Gregoire 2. Romain, enuoye Boniface Moine docte en Allemagne prescher l'Euangile, & en conuertit plusieurs: excommunia l'Empereur Leo, surnommé Iconomachus, pour auoir entrepris d'oster les Images. Ainsi l'heresie de l'Empereur fut occasion de l'accroissement du siege Romain, par l'assistance des Catholiques: car lors Rome, & quasi toute l'Italie, se retira de l'obeyssance de l'Empereur: l'Exarcat cessa, occupé par les Lombards: & de là nos Princes furent appelez au secours des Papes, & par eux, comme tuteurs, deffendus, & enrichis, il mourut l'an 14. mois 18. iours 22. de son Pontificat. 716.

Le siege fut vacquant vn mois, cinq iours.

91. Gregoire 3. Syrien, homme docte en Grec & Latin, priua l'Empereur Leon 3. (meschant à la verité) & de l'Empire, & de la Communion des fideles, estant assiégé par le Roy des Lombards dans Rome, n'ayant support de l'Empereur, se retire à nostre Charles Martel, duquel il obtint ce qu'il desiroit, il mourut l'an 10. mois 8. iours 24. de son Pontificat. 731.

Le siege fut vacquant deux iours.

92. Zacharie Grec, personnage doué de plusieurs vertus, pacifia l'Italie, estant lors fort troublée, confirma l'election de nostre Pepin pour estre Roy de France, au lieu de Childeric, qui fut contraint de se faire Moine; & dispensa les François du serment de fidelité à luy fait, & mourut l'an 10. mois 3. iours 15. de son Pontificat. 742.

Le siege fut vacquant huit iours.

93. Estienne 2. Romain, que plusieurs obmettent, à cause qu'il ne vescu que 4. iours de son Pontificat. 752.

Le siege fut vacquant vn iour.

94. Estienne 3. dit 2. sage & vertueux, tant aymé de tous, qu'il fut porté sur les espauls d'aucuns iusqu'à l'Eglise de S. Iean de Latran: & de là est qu'encores auourd'huy les Papes se font porter. Il vint en France, & obtint secours de Pepin contre le Roy des Lombards, avec grands presens; sçauoir la seigneurie de Rauenne de grande estendue, qui souloit appartenir aux Exarchats, ou Lieutenants de l'Empereur, ayant sacré Pepin Roy de France, & donné aux François l'Empire Romain: ce qui fut apres executé par Leon 3. mourut l'an 5. & 29. iours de son Pontificat. 752.

Le siege fut vacquant 22. iours.

95. Paul Romain, frere d'Estienne, homme fort misericordieux enuers les pauvres malades & prisonniers, lesquels il visitoit de nuit luy seul, fut créé Pape, nonobstant l'election faicte par aucuns des Theophylactes. Paul meurt grand deffenseur des veufes, orphelins & de tous souffreteux, l'an 10. mois 1. de son Pontificat. 757.

Le siege fut vacquant vn an 7. mois, 7. iours.

SCHISME IX.

THEOPHILACTE Romain, Archidiacre, fut esleu par aucuns, durant le schisme contre Paul, tint le siege quelques mois. 757.

SCHISME X.

CONSTANTIN de Nepeselaïc, fut créé par force par les laïcs, & contre les Canons, occupa le siege vn an, vn mois, 10. iours. 786.

Philippe Moine Romain, durant le schisme fut créé par les laïcs contre Constantin, & occupa cinq iours, & tous deux en estans chassés, fut créé Estienne.

96. Estienne 4. dit 3. Sicilien, Moine, fut esleu Pape contre l'election de Constantin & Philippe tous deux Antipapes. Estienne ayant reuoqué en vn Concile de Latran les ordonnances de ce Constantin Antipape, & annullé le 7. Concile de Constantinople de l'Empereur Constantin 5. (aucuns disent Leon 3. son pere) en ce qui concernoit les Images; meurt l'an 3. mois 5. iours 17. de son Pontificat.

Le siege fut vacquant 9. iours.

97. Adrian Romain, des plus renommez en bonté, doctrine, & sainteté de vie, de tous ses predecesseurs, appelle Charlemagne Roy de France à son secours, contre Didier Roy des Lombards, qui perdit son Royaume en vn Concile de 135. Euesques, que Sigebert appelle General, donna à Charlemagne pouuoir d'eslire des Papes, & autres Prelats, ordonne le premier que ses Bulles seront sceellées en plomb: il mourut l'an 7. mois 20. iours 17. de son Pontificat. 789.

Le siege ne vacqua point.

SYNODE VII.

CONCILE vniuersel celebré de 350. Euesques à Nice, pour la restitution des Images, avec forme de les honorer. 789.

98. Leon 3. Romain, homme sçauant, aymant les pauvres, s'addonnant à prescher, recherchant les doctes, ayant esté battu quasi iusqu'à mort, & mis en prison par deux Prestres Romains, eschappé d'icelle il vint en France vers Charlemagne, lequel le remet en sa dignité, s'estant purgé par serment. Apres ayant 796.

PAP. ayant couronné Charles Empereur, il mourut le 20. an, 5. mois 18. iours de son Pontificat. CHR.

Le siege fut vacquant vingt iours.

99. Estienne V. dit IV. Romain, homme noble, docte, vint en France pour s'excuser touchant son eslection faicte sans le consentemēt de l'Empereur Louys le Debonnaire, lequel il couronna à Rheims, puis retourné à Rome, mourut le 6. mois, 23. iours de son Pontificat. 816.

Le siege fut vacquant deux iours.

100. Paschal Romain, Moine, estant esleu sans l'autorité de l'Empereur Louys Debonnaire, s'excusa par lettres & ambassades: alors l'Empereur quitta ceste belle prerogative & droit d'eslection, reseruant seulement que le nouveau Pape renouelleroit l'amitié par ambassades; soudain apres son eslection, mourut l'an 7. mois 3. iours 17. de son Pontificat. 817.

Le siege fut vacquant quatre iours.

101. Eugene 1. Romain, liberal aux pauvres, docte, fut esleu Pape, nonobstant l'eslection d'un Zinzinus: il mourut l'an troisieme, mois sixieme, iour vingt-quatrieme de son Pontificat. 824.

Le siege fut vacquant deux iours.

SCHISME XI.

102. **Z**inzinus Romain, créé durant le schisme contre Eugene, eut le siege quelques iours. 824.

Valentin Romain, homme eloquent & de bonnes mœurs, il mourut le premiere mois, dix iours de son Pontificat. 827.

Le siege fut vacquant trois iours.

103. Gregoire IV. Romain, donna conseil au Roy Louys Debonnaire, que la feste de Toussaincts fut celebree le premier iour de Novembre en France & Germanie, il mourut l'an 16. de son Pontificat. 828.

Le siege fut vacquant quinze iours.

104. Sergius 1. Romain, homme de bien, appelé auparavant Groin de porc, changea son nom, & donna le premier, selon la commune opinion, occasion à ses successeurs de changer leur nom à leur eslection: il mourut l'an 3. de son Pontificat. 844.

Le siege ne vacqua point.

105. Leon IV. Romain, Moine, fut fort homme de bien: resista aux Sarrazins venans avec grande armee contre les Neapolitains, & Romains: & ayant premierement inuoké Dieu, & donné congé d'aller contre les ennemis, les siens retournerent vainqueurs: il mourut l'an huitieme, mois trois, iours 6. de son Pontificat. 847.

Le siege fut vacquant six iours.

ADVERTISSEMENT.

Quelques Historiens, voire de grande autorité, mettent en ce lieu Jeanne 7. ou 8. Allemande ou Angloise qui sous habit d'homme, estant femme, estudia si bien qu'elle fut esleue Papesse, presida deux ans & quelques mois; au bout desquels enceinte delivra l'enfant publiquement en une procession, & mourut. Martinus Polonus, Plat. Volat. Philip. Berg. Nacl. & autres. Mais Onuph. & Genebrard hommes de grande doctrine, maintiennent que c'est une fable. & s'aydent de l'autorité de plusieurs grands personnages, outre beaucoup de raisons tres-doctement déduites par eux.

106. Benoist 3. Romain, contre son gré fut esleu, pleurant receut la charge, prenant Dieu à tesmoin, qu'il n'en estoit capable: toutesfois il estoit fort homme de bien, visitoit les malades, nourrissoit les pauvres, consolait les desolez, deffendant les vesues & orphelins: il fut depose, cependant Anastase vsurpe le siege, puis restitué, & mourut l'an deuxieme, mois huit, iour seizieme de son Pontificat. 855.

Le siege fut vacquant quinze iours.

SCHISME XII.

- A** Nastase III. Romain, créé durant le schisme, contre Benoist eut le siege pour quelques iours, & fuscita le douzième schisme. 855.
107. Nicolas le Grand, Romain, homme fort sçauant & digne de tel office, fit infinis Decrets, & entre autres que nul Prince seculier, ny homme lay presumast d'assister aux Conciles Ecclesiastiques, sinon qu'il fust question de la foy: que nul n'assiste à la Messe d'un prestre concubinaire: que le Baptême ne seroit reiteré, encore qu'il fut administré d'un Payen ou Iuif, pourueu qu'il fust au nom du Pere, du Fils, & du Saint Esprit: il mourut l'an neuuiesme, mois six, iours 20. de son Pontificat. 858.
- Le siege fut vacquant 7. iours.*
108. Adrian II. Romain, homme de bien & sçauant, liberal aux pauvres, humble enuers tous, iusques à lauer les pîeds aux Euesques, fut esleu Pape, sans attendre l'aduis des Ambassadeurs de l'Empereur, & mourut l'an 4. mois, 12. iours, & de son Pontificat. 859.

Le siege fut vacquant deux iours

SYNODE VIII. GENERAL.

- C**oncile vniuersel 4. tenu à Constantinople par 300. ou 383. Euesque, contre Photinus Euesque de Constantinople, qui fut reietté & excommunié. Ignace iniustement priué, & restitué. 869.
109. Iean 8. Romain, (car nous laisserons Ieanne) homme docte, vint en France eschappé des prisons des Romains, couronna trois Empereurs en quatre ans. Charles le Chauue à Rome, Louys le Begue en un Concile tenu à Troye, Charles le Gros, nos Roys, apres son retour à Rome, ce que iamais n'aduint à autres Papes. Il mourut l'an 10. iours 2. de son Pontificat. 872.
- Le siege fut vacquant trois iours.*
110. Martin 2. fut Pape par mauuais attente au Pontificat, & mourut l'an premier, mois 1. de son Pontificat. 882.
- Le siege fut vacquant deux iours.*
111. Adrian 3. Romain, ordonna derechef apres Nicolas, que nul Empereur ne s'ingereroit plus de l'eslection du Pape, il mourut l'an premier, mois 3. iours 19. de son Pontificat. 884.
- Le siege fut vacquant trois iours.*
112. Estienne 4. dit 5. Romain, se delectoit de la saincteté d'aucuns, mesmement d'un Berardus Euesque de Poitiers: il tint le siege six ans, neuf iours. 891.
- Le siege fut vacquant cinq iours.*
113. Formosus Romain, fut esleu Pape, tint le siege 4. ans, 6. mois, 18. iours, il fut priué de la dignité, puis remis par corruption. 895.
- Le siege fut vacquant cinq mois, deux iours.*

SCHISME XIII.

- S**ergius III. Romain créé durant le schisme contre Formosus, eut le siege quelque temps, lequel schisme fut cruel & scandaleux, & qui dura long-temps.
114. Boniface VI. Pape fut mis à mort le vingt-cinquiesme iour de son Pontificat, il ne fit rien digne de remarque en si peu de temps, comme ne firent ses six successeurs. Le temps ne fut oncques plus malheureux que durant leurs vies, l'un persecutoit l'autre indignement. 895.
- Le siege fut vacquant cinq iours.*
115. Estienne 7. dit 6. Romain, fit cesser les Decrets de Formosus, deterrer son corps, couper deux doigts, le mettre en sepulture de laïcs, en fin se repentant de ces vilains actes, se fit Moine ayant tenu le siege un an, deux mois, dix-neuf iours. 896.
- Le siege fut vacquant trois iours.*
116. Romain natif de Rome, approuue les actes de Formosus, abolissant ceux d'Estienne, tint le siege 4. mois, 23. iours. 897.

Le

Le siege fut vacquant vn mois.

117. Theodose II. Romain, homme seditieux par iuste iugement de Dieu, mourut le 20. de son Pontificat. Platine dit que lors les hommes paruenoient aux charges Ecclesiastiques par corruption, & non par vertu comme auparavant. 897.

Le siege fut vacquant vn iour.

118. Iean 9. Romain, Moine, fuyant à Rauenne, cassa les actes d'Estienne, ratifia les Decrets de Formosus en la presence de l'Empereur & de nostre Roy Charles VIII. le Simple, mourut, ayant tenu le siege vn an, 15. iours. 897.

Le siege fut vacquant vn iour.

119. Benoit 4. Romain, ne fit rien digne de memoire pour les grands troubles suscitez par plusieurs de ses predecesseurs, & mourut l'an 3. mois 6. iours 15. de son Pontificat. 898.

Le siege fut vacquant six iours.

120. Leon 5. ayant tenu le siege quarante iours fut emprisonné dans vn Monastere, puis contrainct par son successeur de se faire Moine: il mourut de dueil se voyant ainsi traicté par celuy qu'il auoit nourry. 902.

Le siege ne vacqua point.

SCHISME XIV.

121. **C**hristofle Romain, durant le schisme contre Leon, ayant si meschamment acquis le siege, comme nous venons de dire, le perdit sept mois apres, fut mis en prison, & mourut pauurement. 902.

Le siege ne vacqua point.

122. Sergius III. Romain fait emprisonner son predecesseur, commande de retirer le corps de Formosus, 113. Pape à qui il auoit esté competitor, hors du sepulchre, luy fait trancher la teste, comme s'il estoit viue: il mourut l'an 7. mois 3. iours 16. de son Pontificat. 902.

Le siege fut vacquant cinq iours.

123. Anastase III. Romain, s'estant comporté honnestement sans commettre acte digne de reprehension, mourut l'an deuxiesme, mois vn, iours vingt-deux de son Pontificat. 910.

Le siege fut vacquant deux iours.

124. Landus Sabin, homme de peu d'estime, mourut l'an 2. mois 6. iours 22. de son Pontificat. 912.

Le siege fut vacquant 26. iours.

125. Iean 10. Romain, addonné aux armes plus qu'à la pieté & religion, chassa les Sarrazins hors de Calabre, ayde d'Albert Marquis de Tuscan: & à raison qu'il s'attribuoit toute la gloire de ceste victoire, fut tué par les soldats l'an 15. mois 2. iours 15. de son Pontificat. 913.

Le siege fut vacquant vn iour.

126. Leon 6. Romain, s'estant comporté honnestement, selon la corruption de son siecle, mourut le 6. mois, 15. iours de son Pontificat. 928.

Le siege fut vacquant vn iour.

127. Estienne 8. dit 7. Romain, homme modeste & religieux, mourut l'an 2. mois vn, iours 15. de son Pontificat. 928.

Le siege fut vacquant deux iours.

128. Iean XI. Romain, n'ayant rien fait digne de memoire, mourut l'an quatreiesme, mois vniesme, iour quatorzieme de son Pontificat. 930.

Le siege fut vacquant vn iour.

129. Leon 7. Romain, ne fit rien digne de memoire, l'heresie des Antropomorphites (qui disoient que Dieu auoit forme corporelle) renouvellee. Ocho I. fut le premier Empereur qui donna le serment de fidelité à ce Pape qu'il deliura de prison, où il auoit esté mis par les Romains: & Leon luy confirma la puissance d'eslire les Papes, il meurt l'an 3. mois 6. iours 10. de son Pontificat. 935.

Le siege fut vacquant vn mois.

130. Estienne 9. dit 8. ne sortoit de sa maison, à cause des cicatrices qu'il auoit au visage des coups receus à vne sedition. Il mourut l'an 3. mois 4. iours 15. de son Pontificat. 939.

Le siege fut vacquant dix iours.

131. Martin 3. Romain, homme paisible, repara les Temples, nourrit les pauvres, il mourut l'an 3. mois 6. iours 14. de son Pontificat. 942.

Le siege fut vacquant trois iours.

132. Agapete 2. Romain, homme de bonne vie & amateur de paix, mourut l'an 9. mois 7. iours 10. de son Pontificat. 946.

Le siege fut vacquant douze iours.

133. Jean 12. Romain, fut le premier qui changea son nom, nommé des plus meschans, lubrique, cruel, parvenu à la dignité par la puissance de son pere, occupa tres-indignement ceste sainte place, 8. ans, 4. mois vn iour, ayant fait couper le nez à vn Cardinal, & le poing à vn autre, qui auoit escrit à l'Empereur Otho I. le scandale quel'Eglise souffroit de sa detestable vie. 956.

Le siege ne vacqua point.

134. Leon 8. Romain, apres que ce Jean 12. fut déposé pour sa meschante vie, en vn Concile tenu à Rome, quasi de tous les Euesques d'Italie, fut substitué, & tint le siege vn an 3. mois, dix-sept iours, Otho le grand, deffenseur de l'Eglise & fort religieux. Jean 12. incontinent apres qu'Otho fut party, fut rappelé des Romains seditieux & inconstants, & chasserent Leon 8. qui ne le voulut empêcher pour éviter le schisme. Jean ainsi restitué tint le siege trois mois, 18. iours, au bout desquels trouué en adultere, fut tué par le mary de la femme. Cestuy suivit bien mal la sainte vie de plusieurs de ses predecesseurs. 963.

Leon 8. fut remis par Otho, & tint le siege 8. mois 22. iours, & Benoist 5. fut banny & dégradé par Otho, apres auoir gagné & assiégé la ville. Leon voulant obuier à la malice des Romains qui procedoient à l'ellection par corruption & menees, ordonne en plein Synode, que nul ne fust fait Pape sans le consentement de l'Empereur, & restitua les donations faites à l'Eglise par Iustin.

Le siege fut vacquant six mois, vn iour.

SCHISME XV.

Benoist V. Romain, créé durant le schisme contre Leon, eut le siege quelques iours. 964.

135. Jean 13. Romain, fils d'Euesque, tint le siege six ans, vnze mois, cinq iours. Les Romains seditieux estans accoustumez de rejeter leur Euesque, le firent emprisonner par Pierre leur Preuost, le bannirent, & entendans qu'Otho I. venoit contr'eux à main forte, le rappellerent. Ce Preuost baillé au bourreau, fut deuëtu, mis sur vn asne, la face tournée, les mains liees sous la queue, ainsi mené par la ville, puis enuoyé en exil, ses adherans punis. 965.

Le siege fut vacquant treize iours.

136. Donnus 2. Romain, fut si modeste qu'il ne receut aucune ignominie des Romains, il mourut le 3. mois de son Pontificat. 972.

Le siege ne vacqua point.

137. Benoist 5. dit 6. ayant tenu le siege vn an, 6. mois, fut emprisonné par Cinthius citoyen Romain, où il fut estranglé, de laquelle iniure ne fut faite aucune justice. *Plat.* s'esbahit de la vicissitude des choses, veu que maintenant les souverains Euesques de Rome ont bien autre puissance. 972.

Le siege fut vacquant vn an, 10. iours.

138. Boniface 7. Romain ne fut pas long-temps au Pontificat, ne l'ayant occupé qu'vn mois, douze iours. 974.

Le siege fut vacquant vingt iours.

139. Benoist 6. dit 7. ayant rasché comme homme de bien, & de paix de persuader aux Germaines & Italiens, de s'accorder d'vn bon Empereur, la Republique estant fort affligée, tint le siege 9. ans, vn mois, dix iours. 975.

Le siege fut vacquant trois iours.

SCHISME XVI.

140. **E**ntre Boniface 7. Benoist 6. & Jean 14. fut le seiziesme schisme. Jean 14. Romain, fut emprisonné, soit pour sa meschante vie, soit par les 975. 984.

Le siege ne vacqua point.

141. Boniface 7. Romain, entre au Pontificat par moyens illicites, & par mesme moyen en tōba, ayant desrobé le thresor de S. Pierre, s'enfuit à Cōstantinople, d'où il estoit retourné, ayant attendu que lean 14. fut esleu Pape, auquel il fit tenir prison, & selon quelques vns luy fit creuer les yeux en prison, & mourut de faim, & gouuerna vn an, six iours. 985.

Le siege fut vacquant dix iours.

142. Iean 15. Pape, hay de tous, pource qu'il distribuait tout le bien de l'Eglise à ses parens & amis (en quoy il y a auourd'huy trop d'imitation) meurt de faim estant prisonnier, en ayant lors grand besoyn, par permission diuine, le 9. an, 6. mois, 10. iours. 985.

Le siege fut vacquant vn iour.

143. Iean 16. Romain, Pape sage & vaillant, tint le siege quatre mois. 985.

Le siege fut vacquant deux iours.

143. Gregoire 5. Saxon, cousin de l'Empereur Ortho troisieme, ayant esté contrainct de se retirer en Allemagne, par la menee de Crescens Consul, qui auoit fait eslire lean dix-septiesme Antipape: le premier desquels fut assommé du peuple, & l'Antipape priué du Pontificat, & de la vie, ayant eu premerement les yeux creuez. Cela avec autres causes recitees par Platine dōnerent lieu à l'institution de sept Electeurs de l'Empire, cōfirmee par Gregoire en vn Concile de Rome. Il tint le siege deux ans, huit mois, trois iours. 995.

Le siege fut vacquant 8. mois, dix iours.

SCHISME XVII.

Iean 17. Grec, créé durant le schisme, homme meschant, & detestable, que plusieurs mettēt au nōbre des Papes, occupa le siege six mois, auant que Gregoire fust restitué. On luy fit creuer les yeux, couper le nez, & les oreilles à Crescens, & apres pendre, où il fut massacré du peuple, selon Platine, comme a esté dit cy-deuant. 997.

144. Syluestre 2. Moine, natif d'Aquitaine, laissant son Abbaye, pour le desir qu'il auoit aux lettres, il s'en alla à Seuille en Espagne, tenuë pour lors des Sarrazins, estudia si bien qu'il fut Precepteur de nostre Roy Robert, de l'Empereur Ortho troisieme, puis Archeuesque de Rheims, de Rauenne, finalement Pape, il mourut l'an 4. mois, iours 12. de son Pontificat. 998.

Le siege fut vacquant 25. iours.

145. Iean 17. Romain, confirme la feste des morts, par le conseil d'Odile Abbé de Clugny, qui auoit esté estonné du bruit & voix gemissante autour le Mont d'Etna, causee tant par le fremissement de la mer bouillante, que par le vomissement & bruit esclattant qui sort du degorgement du feu, sortant de ceste montagne en Sicile, ayans ja esté les ceremonies pour les Chrestiens decedez, instituees long-temps auparauant par Gelase, il meurt le 4. mois, 25. iour de son Pontificat. 1003.

Le siege fut vacquant 19. iours.

146. Iean 18. Romain, homme addonné à oyssiueté, ne fit rien de remarquable, & mourut l'an 5. mois 8. de son Pontificat. 1003.

Le siege fut vacquant vn mois.

147. Sergius 4. Romain, homme prudent, liberal aux pauvres, gracieux à tous, gouuerna sagement le siege deux ans, neuf mois, dix-neuf iours. Volat. Plat. Geneb. s'estonnent comme le Pape estoit si homme de bien, attendu les troubles qui estoient en la legitime succession des souuerains Euesques, comme jadis en la Synagogue, sous les Antioches. 1009.

Le siege fut vacquant huit iours.

148. Benoist 7. dit 8. estant reierté par les Romains apres la mort de l'Empereur Henry 2. fut remis, auant accordé avec les ennemis, & tint le siege vnze ans, treize mois, vingt & vn iour. On raconte qu'il fut veu par vn Euesque apres sa mort sur vn cheval noir, le prie de donner son argent caché aux pauvres, & que celuy qu'il auoit donne ne profitoit de rien, venu de rapine, estant griefuement tourmenté. Plat. 1012.

Le siege fut vacquant 2. iours.

149. Iean 19. frere de Benoist, selon Plat. ayant long-temps fait la guerre contre 1014.

K k

DES PAP. les Romains, & sans estre promu aux ordres Ecclesiastiques, supporté de l'Empereur Conrad, fut esleu Pape, mourut l'an 8. mois neuf, iour 9.

Le siege fut vacquant 21 iours.

150. Benoist 8. dit 9. dit Tusculan, estant de vilaine vie fut deux fois deietté par les Romains, autres deux qui s'ensuiuent, esleus, & tint le siege 12. ans, 4. mois 10. iours. Il apparut en espee monstrueuse apres sa mort, disant auoir vescu sans loix & raison. *Plat Berg.*

SCHISME XVIII.

- Siestre 3. Romain, pendant le schisme fut esleu, & Benoist depose, puis trou- 1043.
ué plus indigne que Benoist, chassé, n'ayant tenu le siege qu'un mois, & Benoist remis. Ambition & corruption (vice trop commun entre nous) font plus que la vie Chrestienne pour paruenir aux dignitez, chose deplorable. *Plat.*
151. Jean 20. Romain, aussi créé durant & pendant le schisme de Benoist & Syl- 1045.
uestre, tint le siege un an, 22. iours. Ce schisme suscité par ces trois Papes, causa de grands maux. *Plat.*

Gregoire 4. Romain, ayant eu le Pontificat par resignation de Benoist, ou 1045.
plustost par vendition, fut contrainct par l'Empereur Henry 3. de le quitter un an, sept mois, vingt iours apres.

Concile de Sutrin pres de Rome, celebré en la presence del'Empereur Henry, où cest trois Papes sont deposez, l'eslection donnée de rechef à l'Empereur, & à ses successeurs pour euitier les schismes. *Herm. Contr. en sa Chron.*

152. Clement 2. Saxon, fut empoisonné par Damase 2. son successeur, le 9. mois 1047.
selon Platine: mais Onuphre dit que Damase fut homme de bien.

Le siege fut vacquant neuf mois, un iour.

153. Damase 2. de Bauiere sans aucune eslection se fit Pape, mais mourant le 23. 1048.
iour eschappa d'estre puny de ses fautes. *Plat.*

Le siege fut vacquant six mois, trois iours.

154. Leon 9. Allemand, homme de noble maison, de bonne vie, & de grand sça- 1049
voir, aymant les pauures & estrangers: de façon que sa maison estoit ouuerte à tous. L'on dit que nostre Seigneur s'apparut à luy en forme d'un pauure homme, qu'il fit coucher en son lit, puis disparut. Il meurt l'an 5. mois 2. iours 28.

Le siege fut vacquant un 2^e mois, 24. iours.

155. Victor 2. de Bauiere, fut esleu non tant volontairement, que pour complaire 1055.
à l'Empereur, eslisant un Allemand. Il meurt l'an 2. mois 3. iour 16.

Le siege fut vacquant quatre mois.

156. Estienne 10. dit 11. Moine Lorrain, met l'Eglise de Milan sous l'obeyssance 1057.
de celle de Rome, ayant esté deux cens ans chef de soy-mesme, il meurt sept mois, 28. iours apres.

Le siege fut vacquant six iours.

Benoist 9. dit 10. Romain, n'estant entré par la porte au Pontificat, ains par 1058.
la force, y demeura seulement neuf mois, vingt iours: puis deietté.

157. Nicolas 2. de Sauoye, homme de bonne vie, tint le siege deux ans, 3. mois 1059.
25. iours.

Concile tenu à Rome par le Pape Nicolas, de cent dix-huit Euesques, où il fut ordonné que l'eslection du Pape appartiendroit aux Cardinaux, Prestres, Euesques, approuuez toutesfois des autres Clercs & du peuple, eslisant un de leur College ou autre, combien que non orné du tiltre de Cardinal.

Le siege fut vacquant trois mois.

158. Alexandre 2. Milannois, homme docte, esleu en son absence, pour la renom- 1061.
mee de ses vertus, & le premier apres ceste tant sainte ordonnance des eslections: toutesfois partie des Euesques fauorisant l'Empereur ne l'ayant agreable, esleurent Candole Euesque riche & puissant à merueilles, & susciterent le 19. schisme. Bataille dure & aspre, la victoire demeure à Alexandre. Il meurt l'an vnze, mois 6. iour 5.

SCHISME XIX.

Honoré 2. esleu durant le schisme contre Alexandre, auparavant nommé 1061.
Candole Euesque, tint le siege, & fut Antipape 5. ans, & fut depose.

Gregoire 7. de Siene, Moine de Clugny, auparavant appelé Hildebrand, 1073.
excom.

excommunie l'Empereur Henry 4. & le Prince de son Empire, voulant entreprendre sur l'eslection, & conserant les Eueschez, fait eslire vn autre Empereur Rodolphe, Duc de Sueue, qui fut vaincu par Henry: est emprisonné trois fois, la premiere par Cinthius fils du Preuost de Rome, & puis par l'Empereur, & eschappé à l'ayde des Romains, de la Duchesse de Mantouë, Mathilde, & de Guichard le Normand, Prince de la Pouille, qui le mena à Salerne, où il mourut l'an 12. mois premier, iour 3. de son Pontificat. La querelle des inuestitures entre les Papes & Empereurs cause de grands maux. *Marr. Pol.*

Le siege fut vacquant vn an.

SCHISME XX.

- C**lement 3. fut en vn Concile tenu à Bresse, à la suasion de l'Empereur Henry IV. esleu, & Gregoire depose, qui tint le siege en schisme vingt & vn an, contre Gregoire, & ses successeurs.
160. Victor 3. Moine de Beneuent, tasche d'executer les sentences de son predecesseur contre Henry IIII. Empereur, & mourut l'an 1. mois 3. iours 4. de son Pontificat.

Le siege fut vacquant 5. mois, 23. iours.

161. Urbain 2. François Moine, tascha de reformer les mœurs des Ecclesiastiques, 1088. estant homme de vertu & d'erudition: & voyant qu'il n'estoit seurement en Italie: ne faisant cas de Matilde Comtesse de Mantouë, qui auoit tiré de prison Gregoire 7. & laissé son bien à l'Eglise, maintenant appelé le Patrimoine de saint Pierre, s'en vint en France, où il contraignit le Roy Philippe I. de reprendre sa femme, laissant celle avec laquelle il paillardoit. Il meurt l'an vniemesme, mois 4. iours 18.

Le siege fut vacquant quatorze iours.

162. Pascal 2. Toscan Moine, fut esleu contre son gré, estant vestu d'un manteau de scarlate, ayant vne couronne sur la teste, ceint d'une ceinture en laquelle pendoient sept clefs, & autant de seaux, signifiant la puissance de fermer & ouvrir, & monté sur vn cheual blanc, fut mené au lieu de Latran: vint en France pour reformer le Clergé, en vn Concile tenu à Troye, où il chastia plusieurs Prelats & prestres, retourné à Rome, reduit par armes plusieurs villes à son obeissance, confirme l'excommunication contre Henry 4. Empereur, sollicite son fils de prendre le gouuernement de l'Empire, est emprisonné par luy, apres luy auoir baisé les pieds, est contraint de luy permettre l'inuestiture des Eueschez & Abbayes vacantes: laquelle puissance depuis il quitta craignant de perdre l'Empire. En fin il mourut l'an 18. mois 5. iours 9. de son Pontificat.

Le siege fut vacquant trois iours.

Albert d'Atella créé durant le schisme, apres la mort de Clement 3. tint le siege contre Paschal 2. huit ans, quatre mois.

Theodoric Romain tint aussi durant ce schisme le siege 3. mois, quinze iours. 1102.

Syluestre 3. Romain, pendant le schisme apres Theodoric, tint aussi le siege 1102, contre Paschal. 2.

Le siege fut vacquant deux iours.

163. Gelase 2. natif de Caiette, fut battu & emprisonné, combien qu'il fut moine & de sainte vie, par vn nommé Cinthius riche Romain, deliuré par le peuple, apres auoir excommunié l'Empereur Henry I. & Gregoire 8. son Antipape, s'en vint en France, où il mourut l'an 1. iours 25. de son Pontificat.

SCHISME XXI.

- G**regoire 8. Espagnol fut créé durant le schisme, contre Gelase 2. & tint le siege trois ans.
164. Caliste 2. Bourguignon, fils ou frere du Duc de Bourgogne, estant créé Pape en France, s'achemina à Rome contre l'Antipape, lequel pris, est monté sur vn asne à reculon, tenant la queue au lieu de bride: puis mis en prison où il mourut. Caliste garda le siege dignement, en paix & concorde, l'autre Pape & Henry V. Empereur qui quitta son droit prétendu des inuestitures & collations des benefices, lesquelles auoient causé infinis maux, mesme depuis Gregoire 7. tint le siege cinq ans, dix mois, treize iours.

Le siege fut vacquant vn iour.

Kk ij

SYNODE VNIVERSEL.

165. **C**oncile Vniuersel celebré à S. Iean de Latran à Rome par 917. Euesques, 1123.
contre les Sarrazins & Turcs.
Honoré 2. Boulonois, homme de basse condition, neantmoins docte, pro- 1124.
meu plus par l'ambition d'aucuns, que par le consentement des bons, presida 5.
ans, 2. mois, 3. iours.

Le siege fut vacquant vn iour.

SCHISME XXII.

- C**elestin 2. Romain, esleu par quelques Cardinaux, esment le schisme con- 1130.
tre Honoré 2.
Innocent 2. intentaguerre à Roger le Normand qui se nomma Roy de Na-
ples: vaincu en bataille fut en prison, mais estant eschappé de prison vint en
France, où il assemble deux Conciles, vn à Reims, l'autre à Clermont, & ayant
obte nu secours du Roy Louys le Gros, & del'Empereur Lothaire, retourne en
Italie, & tint le Siege 13. ans, 7. mois, 8. iours.

Le siege fut vacquant vn mois, vn iour.

SCHISME XXIII.

- A**naclete II. Romain, fut esleu par les Romains pendant la prison de In- 1138.
nocent 2. & fut Antipape, lequel desroba les thresors & reliques, pour
soudayer ses bandes, & ayant excité ce schisme contre Innocent 2. il meurt de
desplaisir l'an 8.

Le siege fut vacquant quelques iours.

- Victor 4. Romain, fut creé apres la mort d'Anaclete, durant le schisme 1138.
contre Innocent 2. qu'il tint 5. ans.

SYNODE VNIVERSEL.

- Concile general tenu à S. Iean de Latran, par milles peres pour le droict du 1139.
Clergé, & contre les Antipapes.
167. **C**elestin 2. Toscan, meurt le 5. mois & 5. iours de son eslection de deuil & 1143.
facherie, pour le discord qui fut entre luy & le peuple, qui vouloit vn Patrice.
Aussi auoit-il esté esleu sans le consentement du peuple, ja exclus de droict par
Innocent 2. & la puissance reduite aux seuls Cardinaux. *Onuph.*
Le siege fut vacquant douze iours.
168. **L**ucius 2. Bolonois, ayant esté blessé de coups de pierres, par le peuple de Ro- 1144.
me, leur voulant oster certains Officiers par force, meurt le 11. mois, 4. iours.
Le siege fut vacquant vn iour.
169. **E**ugene 3. natif de Pise, Moine de sainte vie, disciple de saint Bernard, chaf- 1146.
sé de Rome, pour ne vouloir confimer quelques Consuls, ou plustost Senateurs,
s'enfuit en France, où il persuada au Roy Louys le Jeune, & à Richard Roy
d'Angleterre, pour le troisieme voyage de la guerre sainte, retourne à Rome,
où il mourut l'an 8. mois quatre, iours douze.
Le siege fut vacquant vn iour.
170. **A**naclase 4. Romain, liberal aux pauvres, mourut l'an premier, mois 4. iours 1153.
14. famine par tout l'Europe.
Le siege fut vacquant vn iour.
171. **A**drian 4. Anglois Moine, ayant conuertty les Noruegiens à la foy, il fut Pa- 1154.
pe, il excommunia Federic I. Empereur, pour luy auoir resisté, voulant adioin-
dre la Lombardie au siege de Rome, & mourut l'an 4. mois 8. iours 28.
Le siege fut vacquant trois iours.
172. **A**lexandre 3. de Siene, fort docte. Il chasse trois Antipapes, il eut grand 1159.
guerre contre l'Empereur Federic I. d'où plus grâde depuis Charlemagne qu'il
excommunia, lequel voulant prendre absolution estant à genoux deuant luy,
Alexandre le foule aux pieds, & commande chanter *Super aspidem & basiliscum*,
&c. à quoy l'Empereur dit, ie fais la reuerence à saint Pierre, non à vous. Ale-
xandre respōd, c'est à moy & à S. Pierre, *Volat.* Ce Pape a vesçu au Pontificat plus
qu'aucun,

Le siege fut vacquant vn iour.

SCHISME XXIV.

Victor 4. créé durant le schisme contre Alexandre 3. fut Antipape 4. 1159.
ans, 7. mois.

Paschal 3. de Cresme durant le schisme, fut créé Antipape cinq ans.

Caliste 3. de Hongrie, fut pendant le schisme créé, & fut Antipape sept
ans, 5. mois. 1164.
1169.

SYNODE GENERAL.

Concile general celebré à Latran (selon Genebrard) de 300. Euesques, 1180.
tant Orientaux qu'Occidentaux, pour la reformation des mœurs: & au-
quel l'heresie des Vaudois fut condamnée: ensemble ordonné qu'en l'eslection
du Pape les deux tiers conuenans en suffrages & aduis suffiroient, pour eüiter
Schisme à l'aduenir.

173. Lucius 3. scachant que les Chrestiens de la Terre Saincte estoient en pei- 1181.
ne pour leurs pechez, sollicite l'Empereur Federic nostre Roy Philippe Au-
guste & le Roy d'Angleterre à faire le 4. voyage de la Terre saincte, il mourut
l'an 5. mois 2. iours 18.

Le siege ne vacqua point.

174. Urbain 3. Milanois, aduertý de la prise de Ierusalem par Saladin Souldan 1185.
d'Egypte, possedee par neuf Roys Chrestiens l'espace d'octante-huict annees,
mourut de desplaisir l'an premier, mois dix, iours vingt-cinq.

Le siege fut vacquant vn iour.

175. Gregoire 8. de Beneuento, ayant fait diligence de hastier les gens de guerre 1187.
pour le recourement de la Terre saincte, mourut le premier mois vingt-sept
iours.

Le siege fut vacquant dix iours.

175. Clement 3. Romain, homme docte & de saincte vie, sollicita les Princes 1188.
Chrestiens d'auancer leur entreprise pour le recourement de la Terre saincte:
& mourut l'an 3. mois 2. iours 16.

Le siege fut vacquant 3. iours.

177. Celestin 3. Romain, interdit secrettement le Royaume de France, à cause 1191.
que Philippe Auguste auoit repudié sa premiere femme (qu'il reprint laissant la
seconde) dispensa vne Nonnain seur du Roy de Sicile, de se marier à l'Empe-
reur Henry 6. & mourut l'an 6. mois 6. iours vnze.

Le siege ne vacqua point.

178. Innocent 3. homme docte, comme il se void par ses Epistres decretales, 1198.
tint le siege dix-huict ans, 6. mois, 9. iours.

Le siege fut vacquant vn iour.

SYNODE GENERAL A LATRAN.

Concile vniuersel à saint Jean de Latran le plus celebre de tous ceux de 1215.
l'Europe, de 1285. Prelats & Ambassadeurs des Empereurs, Roys: contre
les erreurs de l'Abbé Ioachim, & autres. Plat. Tom. des Conciles.

179. Honoré 3. Romain, ayant couronné l'Empereur Federic 2. l'excommunia 1216.
pour estre rebelle au saint Siege, confirme les quatre ordres des Mendians: oste
aux Carmes l'habit bigarré de blanc & iaune: ordonna la saincte Hostie estre le-
uee & portee aux malades avec reuerence: & mourut l'an 8. mois 8. de son
Pontificat.

Le siege fut vacquant vn iour.

180. Gregoire 9. natif d'Anagnie, parent d'Innocent 3. fait amasser les Decreta- 1227.
les par Raymond Barch. son Chapelain, deffend de lire le Droiét Ciuil à Paris:
excommunie l'Empereur Federic 2. differant le voyage de la Terre saincte, qu'il
accomplit apres prenant Ierusalem. Il mourut l'an 14. mois cinq.

Le siege fut vacquant vn mois, vn iour.

181. Celestin 4. natif d'Anagnie, homme de bien & docte, mourut le 17. de 1241.
son Pontificat.

Le siege fut vacquant vn an, huit mois, quinze iours, à cause des Cardinaux detenus prisonniers par l'Empereur Federic 2.

182. Innocent 4. Geneuois, docte, ayant priué l'Empereur Federic 2. de l'Empire, pour estre rebelle au saint Siege : il ordonna que les Cardinaux iroient à cheual, & porteroient bonnets ou chappeaux rouges, pour signifier qu'ils estoient prests à respendre leur sang pour la defense de l'Eglise. Ainsi le Cardinal fut le supreme ordre & dignité entre le Clergé: & cet accroissement d'honneur ne fut que decadence de l'Eglise. Il mourut ayant escrit sur les decretales & authentiques, & vn liure de la Iurisdiction Imperiale & Pontificale, contre P. de Vives, qui attribua le tout à l'Empereur l'an vniesme, mois 5. iours 14.

Le siege fut vacquant treize iours.

SYNODE GENERAL A LYON.

Concile vniuersel celebre à Lyon en France contre Federic Empereur, où plusieurs Festes furent instituées, comme celles de S. Estienne, des Innocens, S. Iean Baptiste, des douze Apostres, S. Paul, de la Vierge Marie, S. Michel, & autres. Nostre S. Louys declaré chef de la cinquiesme expedition de la Terre sainte.

183. Alexander 4. d'Agnanie, docte & liberal aux pauvres, retira les Hermites de S. Augustin des bois, & les introduit es villes, leur commandant de prescher & confesser : condamne le liure de G. de saint Amour Docteur de Paris, qui estoit contre la paureté, & les Mendians: & mourut l'an 6. mois 5. iours 5.

Le siege fut vacquant trois iours.

184. Urbain 4. natif de Troyes en Champagne, fils d'un Cordonnier, Patriarche de Ierusalem, fut esleu Pape, les Cardinaux n'estans d'accord d'eslire vn de leur College: ayant institué la feste du S. Sacrement, couronné Charles Duc d'Anjou frere de S. Louys, Roy de Sicile: mourut l'an 3. mois 2. iours 4.

Le siege fut vacquant quatre mois, deux iours.

185. Clement 4. François, docte personnage, de grande pieté, & sainteté, & fort discret en la distribution des biens de l'Eglise, sans respect d'auancer ses propres enfans (car il auoit esté marié) ny ses nepueux, à l'un desquels il osta deux benefices en ayant trois; il tascha d'accorder les Princes Chrestiens: & mourut le 3. an, neuf mois, 25. iours.

Le siege fut vacquant deux ans, neuf mois, & deux iours.

186. Gregoire 10. natif de Plaisance en Lombardie, estant Archidiaque en la Terre Sainte, fut esleu Pape, les Cardinaux ayans esté en discord deux ans ou plus, donnerent occasion à l'un d'eux estant au Conclaue de dire: descourons la maison, car le S. Esprit ne pourra descendre & passer tant de couuertes: paroles à mon iugement nō Chrestiennes. Ayant fait de belles ordōnances touchant l'eslection en vn Concile general tenu à Lyon: entre autres que les Cardinaux ne sortiroient du Cōclaue auant l'eslectiō parfaite. Il mourut l'an 4. mois 4. iours 10.

Le siege fut vacquant 10. iours.

SYNODE VNIVERSEL II. TENU A LYON.

Concile general 2: de Lyon, où l'Eglise Grecque conuient avec la Latine, pour la 14. fois: mais cet accord ne dura long temps non plus que les autres. Nicéph. Greg. qui dit que l'Empereur de Grece Michel Palæologue s'y trouua.

187. Innocent 5. Bourguignon Iacobin, sçauant Theologien, reuoqua l'ordonnance de son predecesseur touchant l'eslection auant que sortir du Conclaue, il mourut le 5. mois, 2. iours.

Le siege fut vacquant neuf iours.

188. Adrian 5. Geneuois, reuoqua l'ordonnance de Gregoire 10. touchant l'eslection auant que sortir du Conclaue, & mourut le premier mois & sept iours.

Le siege fut vacquant 25. iours.

189. Iean 20. dict 21. de Portugal, docte Medecin, mais non propre à telle dignité, il mourut le 8. mois, 8. iours de son Pontificat.

Le siege fut vacquant 6. mois, 4. iours.

190. Nicolas 3. de la maison des Vrsins, homme d'entendement & de grand cœur, osta à Charles Roy de Sicile l'office de Senateur: incita contre luy le Roy d'Aragon, dont vindrent aux François les Vespres Siciliennes: chassa les Notaires & chiquaneurs de Rome, disant qu'ils viuoient du sang des pauvres, & voulāt faire vn sien

NOM.

DES sien nepueu Roy de Lombardie, & l'autre de Tosane, il mourut l'an 2. mois 8. DE
PAP. iours 29. CHR.

Le siege fut vacquant 6. iours.

191. Martin II. dit IV. de Tours, restitua Charles en l'office de Senateur, ex- 1281.
communal l'Empereur de Grece & le Roy d'Aragon, le priuant de son Royau-
me, & le donnant à Charles frere de Philippes le Bel. En fin il mourut l'an qua-
triesme, mois premier, iours 7. ayant esté de si sainte vie, que les malades rece-
uoient santé venans à son sepulchre.

Le siege fut vacquant 4. iours.

192. Honoré IV. Romain, homme de bonne vie, confirma l'excommunication 1285.
faite par son predecesseur contre Pierre d'Aragon, & mourut l'an deuxiesme &
deux iours.

Le siege fut vacquant dix mois, dix iours.

193. Nicolas I V. de Lombardie de l'Ordre des freres Mineurs, homme de lettres, 1288.
& fort discret en la distribution des benefices & biens de l'Eglise, mourut ayant
tenu le siege 4. ans, 1. mois, quatorze iours.

Le siege fut vacquant 2. ans, trois mois, deux iours.

194. Celestin V. Hermite, & autheur de l'Ordre des Celestins, fut esleu Pape apres 1294
par sa simplicité, se laissant decevoir par son successeur, luy ayant dit cauteleu-
lement de nuict qu'il laissast la dignité Papale, pour auoir ordonné que les Car-
dinaux iroient sur des asnes, à l'imitation de nostre Seigneur, (ordonnance tres-
sainte, & prodigieusement renuersee, comme dit Genebrard) il quitta la Pa-
pauté, & se retirant aux deserts, fut pris par Boniface son successeur, & mis en
prison, où il mourut de necessité le cinquiesme mois, & sept iours.

Le siege fut vacquant dix iours.

195. Boniface VIII. homme caut & fin, ingrat, cruel, arrogant, duquel il est 1294
dit, qu'il entra au Pontificat comme vn Renard, trompant ce saint homme Ce-
lestin, parlant à luy par vn tuyau de roseau, comme si c'estoit vn Ange, & par vn
pertuis fait en la chambre: regna comme vn lyon, disant auoir puissance de don-
ner & oster les Royaumes, & de fait ayant excommunié nostre Roy, donna le
Royaume à l'Empereur Albert: mourut cōme vn chien, ayant indignemēt occupé
cette sainte dignité huit ans, neuf mois, dix-8. iours. Il ordonna l'an du Iubi-
lé vne fois en cent ans: & fut le premier qui donna des Indulgences. En ce mal-
heureux temps l'Empire des Turcs print son origine en Othoman.

Le siege fut vacquant dix iours.

196. Benoist IX. dit X. Iacobin, de pauvre lieu, homme de sainte vie, & paci- 1303.
fique, ayant absous Philippes le Bel nostre Roy, de l'excommunication de son
predecesseur, & deux Cardinaux de la maison des Colonnes, mourut le 8.
mois, 6. iours.

Le siege vacqua dix mois, 27. iours.

197. Clement V. de Bordeaux, & Archeuesque du lieu, esleu en son absence, & 1305.
confirmé à Lyon par les Cardinaux, transporta le siege Romain en Auignon
pour euitier les seditions Italiques: on luy fit publier les Constitutions dites de
son nom Clementines: obtint Auignon (où le siege a demeuré septante-deux
ans) & le Comté de Nice de Louys Roy de Naples, en recompense du tribut
deu à l'Eglise Romaine: excommunia les Venitiens, vsurpans la ville de Ferr-
re, estant du Patrimoine de l'Eglise: en fin mourut l'an 8. mois dix, iours seize,

Le siege fut vacquant vn an, 3. mois, 17. iours.

SYNODE VNIVERSEL A VIENNE.

C Oncile general celebré à Vienne en Dauphiné de trois cents Euesques, où 1311.
les Fraticels, Beguins, qui vouloient eslire vn troiesme Ordre de saint
François, desquels le chef estoit vn Dulcinus, furent condamnez heretiques,
comme furent aussi les Templiers. Là fut ordonné que les langues Hebraïque,
Chaldaïque, Arabique, & Grecque seroient enseiguees es principales Aca-
demies.

198. Jean XXI. dit XXII. de Cahors, homme sçauant, fut esleu apres longues 1316.
contentions des Cardinaux. Il excommunia l'Empereur Louys quatriesme, à

Kk iij

NOM.
DES
PAP.ANS
DE
CHR.

cause de quoy il luy donna vn Antipape. Ce Pape tomba en quelques erreurs qu'il retracta, estant admonesté par les Theologiens de Paris, il mourut l'an dix-huictiesme, mois trois, iours vingt-huict.

Le siege fut vacquant 16. iours.

SCHISME XXV.

Nicolas 5. Cordelier, fut Antipape contre Jean 21. à la sollicitation de Louys quatriesme Empereur, & mourut prisonnier en Avignon, ayant crié mercy à Jean qu'il auoit fait bruller en effigie comme heretique de son Antipape, 3. ans, trois mois, 14. iours. 1317.

199. Benoit dix, dit vnze Moyne Tholosain, del'Ordre de Cisteaux, homme fort docte, & seuer, distribuant esgalement les biens de l'Eglise, sans respect de paureté, disant que le Pape n'auoit aucun parent : il reforma l'Ordre de Cisteaux, & Bernardins, leur fondant vn College à Paris, meurt, ayant tenu le siege sept ans, quatre mois, six iours. 1334.

Le siege fut vacquant vnze iours.

200. Clement 6. Limosin, Moyne, homme docte & liberal à tous, toutesfois il ratifia l'excommunication de Benoit, & Jean 22. contre l'Empereur, abregea le Iubilé à 50. ans, tascha d'accorder nostre Roy Philippes de Valois avec Edouard Roy d'Angleterre, & mourut l'an dix, mois sept de son Pontificat. I. du Tillet, dit qu'en ce temps les benefices estoient à vendre, tout obeissoit à l'argent. 1342.

Clement 6. celebra le second Iubilé l'an 1350.

Le siege fut vacquant vnze iours.

201. Innocent 6. Limosin, fort sçauant, donne les benefices à gens capables, & les contraint à y resider, retranche la depence à la maison pour ayder aux pauvres, faisant faire le semblable à ses Cardinaux : ses actions demonstrent l'exemple d'vn vray Pasteur, que tous doiuent imiter ; il meurt l'an 9. mois 8. iours 26. de son Pontificat. 1352.

Le siege fut vacquant vn mois quinze iours.

202. Urbain 5. Moyne de Limoge, Abbé de saint Victor de Marseille, homme docte, fort affectonné à resister aux Turcs, contre lesquels il fit prescher la Croisade : alla à Rome, & de retour mourut l'an 8. mois 2. iours 23. 1362.

Le siege fut vacquant dix iours.

203. Gregoire 11. Limosin, fils du Comte de Beaufort, homme paisible, voyant est de dissensions en Italie, & que quelques villes se retiroient de son obeissance, se retira à Rome, ainsi transporta le Siege sans le sceu des François : ce qu'il fit par l'aduis de son Precepteur Balde, il tint le Siege sept ans, deux mois, vingt-sept iours. 1370.

Le siege fut vacquant 12. iours.

204. Urbain 6. Neapolitain, à la poursuite des Romains est créé Pape, n'estant Cardinal, homme vindicatif, ne procurant la paix entre les Chrestiens, comme son deuoir le requeroit, ains s'efforçant de se venger des iniures à luy faites par les Cardinaux, & leane Roine de Sicile : ce qui causa le vingt-sixiesme schisme ; & ayant fait noyer cinq Cardinaux, mourut, ayant tenu le Siege vnze ans, six mois, cinq iours. 1378.

Urbain 6. celebra le troisieme Iubilé.

Le siege fut vacquant dix-neuf iours.

SCHISME XXVI.

Clement 7. fut esleu Pape par les Cardinaux, qui tint son Siege à Avignon, & fut recogneu Pape legitime par les François, Espagnols, & Anglois, qui fut le schisme le plus cruel de tous, & scandaleux, & qui dura enuiron 50. ans : il tint le siege 15. ans, vnze mois, 18. iours, contre Urbain & ses successeurs. 1378.

Le siege fut vacquant quinze iours.

205. Boniface 9. Neapolitain, doté de grandes vertus pour son aage, n'estant aagé que de trente ans seulement : mais complaisant à ses parens, il abusa des Indulgences, du temps duquel on en faisoit bon marché : on luy attribue l'invention des Annates, c'est à dire qu'il voulut auoir le reuenu de chacun an de tous les benefices : il eut pour Antipape Pierre de la Lune Espagnol, dit Benoit 13. il tint le siege 14. ans, 11. mois. 1389.

Boniface celebra le quatriesme Iubilé, l'an 1390.

1390.

Le

NOM.

DES
PAP.*Le siege fut vacquant 15. iours.*

ANS

DE
CHR.
1394.

- Benoist 13. Espagnol, auparavant dit Pierre de la Lune, apres Clement 7. tint le siege à Avignon durant le schisme contre Boniface 9. & ses successeurs, fut homme docte, & mourut l'an 30.
206. Innocent 7. natif de Sulmo, ayant fait mourir plusieurs Romains (qui le prioient d'oster les schismes & guerres) fut contraint des'enfuir, puis ayant accordé avec eux, retourna, & mourut l'an 2. iours 25.

Le siege fut vacquant 23. iours.

207. Gregoire 12. Venitien, Pape docte, ayant promis à son election de ceder au Pontificat, si Benoist seant à Avignon cedit, colluda avec luy, ce qu'estant decouvert, tous deux furent deposez par le Concile de Pise, & ne voulurent obeir; & tint le siege 8. ans, 7. mois, cinq iours.

SYNODE TENV A PISE.

Concile tenu à Pise de plusieurs Prelats, auquel furent deposez Gregoire 12. & Benoist 13. & Alexandre 5. esleu en leur place: mais tous les deux ne voulurent obeir au Concile, ainsi on eut trois Papes pour vn.

208. Alexandre 5. natif de Crete, Moyne, esleu par le Concile, personnage d'erudition, & de vertu: toutes fois plus martial que sa qualité ne requeroit, ayant esté Cordelier: il priva Ladislaus Roy de Naples, de son Royaume, pour avoir entrepris sur Ostie, & autres places de l'Eglise Romaine, & le donna à Louys Duc d'Anjou, frere de Charles 5. Sa liberalité fut si grande, qu'il souloit dire qu'il avoit esté riche Evesque, pauvre Cardinal, & Pape mendiant; il mourut le 10. mois, 8. iours.

Le siege fut vacquant 13. iours.

209. Jean 22. dit 23. Neapolitain, parvint au Pontificat par force, & non par election libre & canonique, homme fort expert aux affaires: mais si depravé, & si mal sentant de la foy, qu'il fut cité au Concile de Constance, emprisonné & depose, ayant deshonoré le siege 5. ans, 15. iours.

Le siege fut vacquant deux ans, 5. mois, 10. iours.

SYNODE VNIVERSEL DE CONSTANCE.

Concile general de Constance assemblé par la diligence de Sigismond Empereur, où il assista avec les 4. Patriarches, 29. Cardinaux, 47. Archevesques, 605. Evesques, 64. Abbez & Docteurs, où trois Papes furent deposez, Jean 23. seant à Bologne, Gregoire 12. à Rome, Benoist 13. en Espagne, & Martin dit 5. esleu en leur place du consentement de tous; ainsi finit le 29. schisme, là fut ordonné que le Concile estoit par-dessus le Pape.

210. Martin 3. dit 5. Romain, homme singulier en prudence, & iustice, ayant confirmé l'ordonnance du Concile, que le Pape y seroit subiect, & seroit célébré de dix en dix ans, mourut l'an treize, mois trois iours.

Le siege fut vacquant vnz iours.

Clement 8. Espagnol, durant le schisme apres Benoist 13. fut esleu par quelques Cardinaux, ou Anticardinaux Espagnols, & tint le siege comme Antipape, 4. ans.

211. Eugene 4. Venitien, de l'ordre des Chanoines Reguliers, homme de bonne vie au commencement: mais par mauvais conseil il troubla tout, incitant les Romains aux armes, & fut contraint de s'enfuir, prenant vn froc de Moyne, chassé à coups de pierres, & de traits, il tint le siege quinze ans, vnze mois, 21. iours.

Le siege fut vacquant vnz iours.

SYNODE VNIVERSEL DE BASLE.

Concile general à Basle pour la reformation de l'Eglise, contre les heresies des Hussites, & Annates, la substâce duquel est cõtenuë en la Pragmatique Sanction, publiee en vn Concile de l'Eglise Gallicane, tenu à Bourges. Là Eugene

NOM.
DES
PAP.

quatriesme fut depose, & Amedeus Hermite, auparavant Duc de Sauoye, es-
leu, nomme Felix quatriesme, soutenu par l'Empereur Federic 3. Charles 7.
Roy de France, & celui d'Aragon. Lors fut le 17. schisme, partie des Chrestiens
suivant l'un des Papes, partie l'autre, plusieurs neutres.

ANS
DE
CHR.

SYNODE VNIVERSEL A FLORENCE.

Concile general (les Grecs l'appellent huitiesme Synode) celebre a Flo-
rence, ou assista l'Empereur d'Orient, avec plusieurs Prelats Grecs & La-
tins, ou tous conuindrent en vnitè de foy pour la derniere fois, mesmes les Ar-
meniens, & Indiens.

SCHISME XXVII.

Felix quatriesme, esleu par le Concile de Basle, tint le siege neuf ans, cinq
mois.

212. Nicolas 5. Geneuois, de bas lieu, mais homme docte, amateur des doctes, tant
modeste, qu'il s'estimoit indigne d'une si excellente dignité, employa beau-
coup à dresser vne Bibliotheque : auquel Aymè de Sauoye, ou Felix 4. ceda le
siege pour oster le schisme, demeurant Cardinal & Legat Apostolique en ses
pais de Sauoye, il tint le siege huit ans, dix-neuf iours.

Le siege fut vacquant quatorze iours.

Nicolas 5. celebra le cinquiesme Iubile, l'an mil quatre cens cinquante.

213. Calixte 3. Espagnol, tost apres qu'il fut Pape il publia la guerre contre les
Turcs, comme il auoit voté auant que d'y paruenir, chose que l'on trouua ad-
mirable : ayant institué la feste de la Transfiguration, il mourut l'an troisieme,
mois quatriesme de son Pontificat.

Le siege fut vacquant douze iours.

214. Pie II. de Sienne, dit auparavant Aeneas Syluius, homme fort docte, ayant
esté Chancelier de l'Empereur Federic 3. enuoyé en Ambassade vers plusieurs
Princes, Secretaire du Concile de Basle, finalement fut Pape, deffendant son
autorité contre tous Princes : il fut contraire à Louys 9. pource qu'il ne luy
voulut obeyr par l'aduis de la Cour, à l'abolition de la Pragmatique Sanction,
Sommaire du Concile de Balle, que luy-mesme auoit approuué par deux do-
ctes liures escrits auant son Pontificat : possible changea-il de mœurs avec le
nom : tint le siege 5. ans, vnze mois, 27. iours.

Le siege fut vacquant seize iours.

Concile de l'Eglise Gallicane tenu à Orleans, à cause de la Pragmatique San-
ction que le Pape Pie II. vouloit abolir comme heresie : à quoy s'opposa la Cour
de Parlement de Paris, & les Vniuersitez : ceste assemblée fut aussi contre les
Annates, par lesquelles la Cour de Rome tire incredible somme d'argent de la
France *Duar. l. 5. c. 11.* recite tout au long les autres Papes oppugnateurs de ceste
Pragmatique Sanction.

215. Paul II. Venitien, ennemy des lettres, homme de belle representation, mais
superbe, accroissant sa Majesté par armes, & auaricieux, distribuant les bene-
fices Ecclesiastiques pour faire son profit, & du temps duquel tout se vendoit à
Rome : il surpassa tous ses predecesseurs en apparat, enrichissant sa mitre de
diamans, saphirs, esmeraudes, jaspes, perles, & autres pierreries de grand prix,
& voulut estre ven en telle sorte, augmentant aussi la pompe des Cardinaux de
la robbe rouge, avec le capuchon ; il reuoqua le Iubile à 25. ans, cassa les Abbre-
uiatures instituees par son predecesseur, en quoy il fit bien, ayant tenu le siege
six ans, dix mois, 26. iours.

Le siege fut vacquant 4. iours.

216. Sixte quatriesme, Ministre general des Cordeliers, homme docte, pour
oster l'enuie des quatre Mendians, il les fit tous esgaux en priuileges, il eut plu-
sieurs bonnes parties : mais il ayma trop les siens, comme ont fait plusieurs,
abusant grandement des biens de l'Eglise ; ayant tenu le siege treize ans, quatre
iours.

Le siege fut vacquant seize iours.

Sixte 4. l'an 1475. celebra le sixiesme Iubile.

Innocent

Innocent huitiesme Geneuois de petite maison, il fut taxé d'avarice, augmenta le nombre des Secretaires & Promoteurs, comme Pie II. & Sixte quatriesme est blâmé de ce que premier de tous les Papes il aduança aux honneurs & richesses ses bastards d'une façon non accoustumée, il tint le siege 7. ans, 10. mois, 27. iours.

Le siege fut vacquant vn mois, six iours.

218. Alexandre sixiesme, Espagnol, nommé auparavant Roderic Borgia, doué de grandes vertus : mais accompagné de si grands vices que l'on ne les pourroit reciter sans horreur : il fut esleu par corruption de plusieurs Cardinaux qu'il opprima apres, tascha par tous moyens d'amaasser de l'argent pour satisfaire à ses desirs, spécialement pour aduançer quatre siens bastards, l'un desquels fut Valentin Cetar qui fut Duc d'Vrbain ; & pour lequel il troubla toute l'Italie par les autres, il fit de Rome vne retraite de voleurs, bref il n'y auoit rien saint qu'il fust, qu'il ne vendit, comme l'on peut lire es auteurs de son temps, & Sannazarius a laissé par escrit ces vers en Latin tournez en François.

*Alexandre vend tout, il vend les clefs sacrees,
Les Mitres, les Anels, & les Croix dorees,
Il a tout achepté. Qui voudroit l'empescher
De les reuendre apres, en detail aussi cher?
Il tint le siege vinze ans, huit iours.*

Le siege fut vacquant vn mois, trois iours.

219. Alexandre sixiesme celebra le 7. iubilé l'an 1500. Pie troisieme de Siene, ennemy des François, estant en volonte de reformer l'Eglise, celebrer vn Concile, & dresser vne armee contre le Turc, meurt le 26. iour d'apres son eslection.

Le siege fut vacquant 24. iours.

220. Iules II. Geneuois, homme plus adroit aux armes qu'aux lettres, recouura Bologne & plusieurs villes sur les Venitiens, sçauoir Imole, Seruie, Rauenne & autres, avec l'ayde des François : apres il sollicita l'Empereur Maximilian, & Henry huitiesme Roy d'Angleterre, de leur faire la guerre pour les chasser d'Italie, ayant gagné la bataille à Rauenne contre luy, les Espagnols & Venitiens. Il excommunia les François, & donna le Royaume au premier conquerant, comme il auoit fait le Royaume de Nauarre enuahy iniustement par Jean Gippon pour Federic Roy d'Espagne sur I. d'Albret, & tint le siege 9. ans cinq mois 21. iours.

Le siege fut vacquant 18. iours.

SYNODE TENU A TOURS.

Concile de l'Eglise Gallicane tenu à Tours par tous les Euesques & la plupart des Docteurs de France, contre le Pape Iules II. vn autre à Pise, Milan & Lion, par l'autorité de Maximilian Empereur, & du Roy Louys douzieme contre le mesme Pape, deffendant son droit par autres.

SYNODE GENERAL A LATRAN.

- Concile general de Latran commencé par le commandement de Iules, & par luy empesché, & continué par Leon dixiesme & finy l'an 1517. pour la reformation de l'Eglise, & guerre contre le Turc.
221. Leon dixiesme Florentin, de la maison de Medicis, fut Pape à trente ans, estant docte, eloquent & liberal, il ayma les doctes & vertueux, vray est qu'il aymoient trop les plaisirs, il priua le Duc Urbain de sa Duché, & la donna à Laurens de Medicis son nepueu, pere de Catherine de Medicis Roynie de France, ayant publié la remission des pechez à ceux qui donnoient argent pour faire la guerre au Turc, & abrogea la Pragmatique Sanction, non sans tumulte & mur-

NOM.
DES
PAP.

mure de tout le Clergé de France. Concordats introduits, ensemble les decimés. Il meurt de joye, entendant que les François estoient chassés de Milan, l'an 8. mois 8. iours 10.

ANS
DE
CHR.

Le siege fut vacquant vn mois, 7. iours.

222. Adrian sixiesme, Allemand, sçauant personnage, vivant prudemment sans grande dépence, ne conferant les benefices à la volée, ne fut agreable aux Romains, combien qu'il fust des plus accomplis en toutes bonnes parties, ayant esté Precepteur de l'Empereur Charles cinquiesme, & tint le siege vn an, 8. mois, 9. iours.

Le siege fut vacquant deux mois quatre iours.

223. Clement septiesme, Florentin, de la maison de Medicis, cousin germain de Leon dixiesme, fut de grand esprit, fin, subtil, & politique, tint le party du Roy François contre l'Empereur Charles 5. traite le mariage de sa niepce Catherine avec Henry, lors Duc d'Orleans: assiege Florence ville de sa natiuité, pour les outrages que les Florentins faisoient à ceux de sa maison, & la print au bout de l'an (en quoy il n'est loué d'estre tant rigoureux contre sa patrie) y constituant Alexandre son nepveu premier Duc, lequel s'adonnant à violer des Dames pudiques, il receut son salaire, & fut tué par vn sien parent. Il tint le siege 10. mois, sept iours.

Le siege fut vacquant 17. iours.

224. Clement 7. celebra le 8. Iubilé l'an 1525.
Paul troisieme, Romain, de la maison de Farnese, doué de plusieurs grandes vertus, amateur de paix, qui tascha tousiours d'accorder le Roy & l'Empereur: mais il vexa trop les subiects de tribut quelque temps, & ayma les siens plus qu'il ne deuoit, faisant son fils Pierre Louys, Duc de Parme & de Plaisance, ce qui fut cause qu'il fut dechiqueté & mis en pieces miserablement par la noblesse & le peuple, lequel il voulut contraindre de venir demeurer à Plaisance. Il tint le siege 15. ans, 28. iours.

Le siege fut vacquant 2. mois 29. iours.

SYNODE VNIVERSEL DE TRENTE.

- Concile vniuersel tenu à Trente, commencé l'an 1542. puis transferé à Bologne 1546. continué à Trente 1551. par l'espace de huit mois, & acheué en ce lieu mesme 1564. contre les heresies, abus, & corruption des mœurs de tout le peuple Chrestien.
225. Iules 3. auparauant nommé I. Maria de Monte, changea de mœurs comme de nom, ayant fait de beaux actes estant Legat Apostolique au Concile, s'adonna à la guerre, gourmandise & volupté, se moquant mesmes de sa dignité. Il tint le siege quinze ans, vn mois, seize iours.

Le siege fut vacquant dix-sept iours.

226. Iules 3. celebra le 9. Iubilé l'an 1550.
Marcel II. de basse condition, homme docte & de vertu, laquelle possible le fit mourir par poison le iour son Pontificat 21.

Le siege fut vacquant 25. iours.

227. Paul 4. Neapolitain de la noble famille de Carafe, homme austere, bien zelé à la reformation des abus des Ecclesiastiques, detestant l'auarice, rejetant les resignations des benefices, en faueur d'autrui & les dépenses, bref estant né pour restituer l'Eglise à sa pristine splendeur. Il tint le siege seulement quatre ans, deux mois, 27. iours.

Le siege fut vacquant 4. mois, 7. iours.

228. Pie 4. Milanois, fort grand ennemy des Simoniaques, de ceux qui auoient plusieurs benefices, ensemble de ceux qui les gardoient pour autrui, lesquels il excommunie & declare subiects à restitution, tant eux que ceux auxquels ils sont gardez, ce qu'a confirmé son successeur, il tint le siege cinq ans, 11. mois, 15. iours.

Le siege fut vacquant 29. iours.

229. Pie 5. Alexandrin, Moyne iacobin, personnage de sainte vie, seuer, sobre, docte,

NOM. docte, n'ayant rien en recommandation que le service de Dieu, la correction des
DES mœurs Ecclesiastiques, l'extirpation des heresies, fut esleu miraculeusement, les
PAP. Cardinaux ne pensants à rien moins qu'en son eslection. Il persuade vne sainte
ligue à plusieurs Princes Chrestiens contre le Turc, sur lesquels ils gagnerent
vne belle bataille à Lepanto l'an 1571. en laquelle furent deliurez 2000. Chre-
stiens des Cadenes, 25000. Turcs occis, plusieurs pris prisonniers, 280. vaisseaux
pris, submergez ou bruslez. Estant tourmenté du calcul, il s'écrie, *Seigneur, aug-
mente la douleur, mais donne moy patience*; sentence vrayement Chrestienne: finale-
ment il meurt trop tost pour le bien & repos de l'Eglise, l'an 6. mois trois, iours
16.

Le siege fut vacquant vnze iours.

230. Gregoire 13. Gentil-homme Boulonnois, grand Iuriconsulte, tasche de sui-
ure les vestiges de son predecesseur, aduançant la vraye administration du serui-
ce de Dieu, reformant les abus des Ecclesiastiques, bastissant & reparant les
lieux sacrez, Colleges, & hospitaux pour les pauvres, instituant en plusieurs lieux
des Seminaires, secourant les affligez pour la religion, & infinies autres choses
dignes d'un vray Pasteur. Estant docte, il corrige les Gloses du Decret & reforme
tout le corps Canonique, il met fin à la reformation du Calendrier, chose sou-
uentes fois essayee par ses predecesseurs, ayant assemblé les plus sçauans en ceste
matiere, des principales nations de la Chrestienté: apres auoir aduertty les Prin-
ces Chrestiens, & les Vniuersitez plus fameuses, en fin il meurt l'an 12. iours vinge
sept, mois

Gregoire 13. celebra le 10. Iubilé l'an 1575.

Le siege fut vacquant 13. iours.

231. Sixte 5. auparauant nommé Felix Perret Cardinal de Montalt Toscan, lequel
tint le siege cinq ans, quatre mois, trois iours.

Le siege fut vacquant 18. iours.

232. Urbain 7. Romain ne tint le siege que l'espace de 13. iours

Le siege fut vacquant 2. mois, 9. iours.

233. Gregoire 14. Milannois, auparauant Euesque de Cremone, qui ne tint aussi le
siege que dix mois, dix iours.

Le siege fut vacquant 13. iours.

234. Innoncent 9. Bolonnois, auparauant Cardinal du tiltre saint Quarre, tint
le siege deux mois, vn iour, il fut empoisonné, comme l'on dit, pource qu'il n'e-
stoit si fauorable aux desleins des Espagnols, contre les François, comme ils es-
peroient de son eslection.

Le siege fut vacquant vn mois.

235. Clement huitiesme, Florentin, auparauant nommé Hypolite Aldobran-
din Cardinal de saint Pancrace, grand Penitencier, personnage de grande re-
putation, il donna l'absolution à nostre Roy Henry 4. consacré par les prede-
cesseurs, apres estre tombé malade d'un cararre, mourut le 3 Mars 1601. & de
son Pontificat le 13. an, 1. mois 4. iours.

Clement 8. celebra le 11. Iubilé en l'an 1600.

Le siege fut vacquant vingt-huict iours.

236. Leon XI. Florentin fils du tres-excellent Octaue, de la tres illustre famille de
Medicis, fut esleu d'un merueilleux applaudissement de tout le College des
Cardinaux, le peuple Romain en cas pareil fit aussi vne grande demonstration
d'alliegresse par ceste eslection: mais elle ne fut pas de longue duree, car à peine
auoit-il acheué le 27. de son Pontificat, que surpris d'une grosse fièvre, il deceda,
au grand regret d'un chacun.

Le siege fut vacquant 20. iours.

237. Paul cinquieme, Romain, auparauant nommé Bourgesius, fils d'un an-
cienne famille de Sienne, & né à Rome d'une Romaine, son pere y estant venu
habiter.

Le Pape Paul 5. ayant tenu le siege enuiron ans, mourut en l'an 1622. le 18.
Ianuier.

Et luy succeda au Pontificat trois sepmaines apres ses obseques le Cardinal
Ludouifio Archeuesque de Bologne, qui ayant esté esleu, & adoré Pape, plus

LI

par providence diuine que par la brigue des hommes, car il n'y pensoit nullement ; il prit le nom de Gregoire XV. & ne regna pas deux ans.

Neantmoins durant son Pontificat il a fait choses memorables, il accorda le different de la Valtoline, la prenant en sa protection : il gagna à l'Eglise cet apostat dangereux de Marc-Antoine de Dominis, jadis Archeuesque de Spalate, luy fit abjurer ses erreurs en sa presence & abhorer son detestable liure par luy composé contre la Monarchie du Pape.

Et pour autant que ce S. Pere auoit recogneu mille abus, brigues & pratiques qui se font & se voyent ordinairement aux eslections des Papes, qui vont au grand scandale de l'Eglise, pour ce sujet voulant reformer ce desordre, fit durant son Pontificat vne nouvelle Constitution, par laquelle il ordonna des formes & ceremonies qui seroient d'oresnauant obseruees en chaque eslection des Papes : Voicy la teneur d'icelle Constitution.

**GREGOIRE EVESQUE, SERVITEUR DES SERVITEURS DE
Dieu, à la memoire perpetuelle de la chose.**



E Seigneur Iesus-Christ, Fils du Pere Eternel, nostre Maistre & Legislatteur, duquel toute action est nostre Instruction, quoy qu'il portast toutes choses par le Verbe de Vertu, & qu'il n'y ait rien de caché deuant les yeux, toutesfois auparauant qu'il esleust & nommast ses douze Apostres à la charge de l'Apostolat, ce que nous ne hîsons point auoir iamais esté fait autresfois, il voulut passer la nuit en l'Oraison diuine, & auant qu'il commit la charge de ses ouailles au bienheureux S. Pierre, par trois sortes d'interrogation, il fit paroistre la

trine profession de son amour eternal, par cecy nous enseignant avec quelle diligence, soing & prudence nous deuons proceder en l'eslection de tous les Pasteurs, afin de les eslire bons & fideles, & principalement au fait de la succession du bien-heureux saint Pierre, qui est la lumiere du monde, le Docteur des Gentils, & le Pasteur des Pasteurs; C'est pourquoy nous sommes suffisamment admonestez que nous ne deuons passer ny obmettre aucune chose qui puisse mieux & plus honnestement servir en l'affaire de l'eslection du Pontife Romain, car il n'y va pas du salut d'un seul membre, mais il s'agit de tout le corps, quand on consulte du chef; ainsi donc, quoy que par diuers decretz des Pontifes Romains nos predecesseurs, & par ceux des Saints Peres, il ay esté saintement pourueu, que son eslection fut bien & raisonnablement faite, & qu'en icelle, non la chair ny le sang ou l'humaine sagesse, qui est vne pure folie enuers Dieu, mais que plustost toutes choses se dirigent & gouvernent par la grace du saint Esprit, toutesfois ainsi qu'un iour donne parole à un autre iour, & que la nuit donne la science à l'autre nuit, nous auons veu par experience qu'il n'y a point manque ny de deffaut de lieu à un plus salutaire remede.

Nous donc que le reignew, sans aucuns merites nostres, a commis au regime de son Eglise, craignans qu'au dernier iour, & en l'estroit iugement, le iuge rigoureux ne nous demande compte d'auoir negligé nostre deuoir en vne chose de telle importance, Nous auons ordonné de faire & executer ce qui est souverainement desiré par les vœux & suffrages de plusieurs, ayans donc pris vne meure deliberation avec nos venerables, les Cardinaux de la sainte Eglise Romaine, du conseil, aduis & consentement de nosdits freres, nous auons déclaré, & ordonné, par ceste nostre Constitution valide pour iamais, qu'à l'aduenir l'eslection du Pontife Romain ne se fera point autrement ny ailleurs qu'au Conclau, & iceluy clos & fermé, & apres auoir le premier iour celebre le saint & ordinaire sacrifice de la Messe en iceluy, en laquelle les Cardinaux ont accoustumé d'assister & d'y communier, & par les suffrages secrets des cdules des deux parts des Cardinaux presents au Conclau, encore que tous y fussent assistans, sans qu'aucun y manquast; ceux-cy donnassent la puissance à quelques-uns du Coliege des Cardinaux, lesquels auroient pareil pouuoir que tous lesdits Cardinaux ensembles de pouruoir d'un Pasteur à l'Eglise Catholique, ou bien que ceste eslection ne se face, sinon par tous & chacuns lesdits Cardinaux qui seront là presents au Conclau, nul n'en estant absent, comme si elle estoit celebree par inspiration diuine, sans auoir auparauant traité par aucune personne particuliere, & ce chacun par ce verbe, *Eligo*, prononcé d'une voix intelligible, ou par escrit, s'il ne se peut prononcer de la voix; mais pourtant, afin que l'eslection se face par la voye du scrutin, ou que l'accez au scrutin soit plus asseuré, nous ordonnons & decernons que cela soit fait par le nombre des suffrages, des 2. des 3. parts des Cardinaux presents audit Conclau, & declarons vouloir que ceste eslection soit faite,

facile, afin que de la sorte l'on ne compte point aux deux tierces parties le suffrage de la personne elleuë, & que nul ne procede par la voye du scrutin ou par l'accez du scrutin ou du compromis, & ne puisse nullement s'élire, ny se donner suffrage, que la personne qui doit estre elleuë se trouue au Conclauë, elle doit aussi estre mise au nombre des Cardinaux.

Dauantage, que nul ne soit tenu pour esleu par la voye du scrutin ou par l'accez du scrutin, sinon apres la publication de tous les suffrages, voire mesme de celuy qui sera esleu, si on recognoist qu'il a seulement le nombre des deux tierces parties, voire par cedules ouuertes & patentes, que s'il arriue que plusieurs soient nommez es cedules & qu'ils ayent emporté les deux tierces parties des suffrages, ny l'un ny l'autre ne pourra estre esleu en l'égalité des suffrages, mais bien cestuy-là sera esleu, qui sera plus grand & plus autorisé en suffrages, pourueu aussi qu'en vn seul suffrage il excède seulement les deux tierces parties.

De plus en chaque scrutin, il faut qu'auparauant que la cedula se mette dans la coupe, que chaque Cardinal face le serment qui suit à haute voix: Je prends le Seigneur Iesus-Christ à telmoing, lequel me doit iuger, que j'eliray celuy qui doit estre esleu par iugement selon Dieu, & que ie poseraï le mesme serment en l'accez: Ce serment n'est obmis de personne, & les cedules des suffrages tant du scrutin que de l'accez semblent deuoir estre imprimees, où il se pourra faire, & où il ne pourra qu'elles soient du moins escrites toutes d'une main, & ainsi imprimees ou escrites, qu'elles contiennēt les choses qui ont accoustumé d'estre exprimees en cedules, excepté les seuls noms ou denominations de l'élisant & de celuy qui est esleu, & les signatures qui sont au bas d'icelles, lesquelles choses seront escrites de la main de l'electeur au premier costé de la cedula, & celuy de l'eleu en l'autre costé: & derechef encor faut-il que le caractère & le signe dudit esleu soit corrompu & alteré, afin qu'il ne soit cogneu, que la barre ferme la part de la cedula, où le nom de l'electeur sera escrit, & qu'il soit scellé d'un cachet destiné à ce faire, & non du sceau dont chacun se sert.

Or afin qu'il se puisse cognoistre, si quelqu'un n'a point d'accez avec quelque autre, & s'il ne luy a point donné son suffrage au scrutin, toutes les cedules seront seellées de deux autres marques au bas d'icelles, ou par quelque sorte de nombre, ou par quelque diction de la sainte Escriture, ou de quelqu'autre signe, lesquelles marques & signes se trouueront de mesme tant en l'une qu'en l'autre cedula du scrutin que de l'accez. Par apres on plie ceste partie de cedula où estoient ces signes & ces marques, à ce que cela ne soit veu par les visiteurs, iusques à ce que l'élection soit parfaite & acheuée par le scrutin & par l'accez: auquel cas les accèz de la cedula s'ouurent par les scrutateurs du costé où sont lesdites signatures, qui les ayant veuës avec leurs sceaux, & d'autres cedules avec les mesmes signatures s'estans trouuées & données au scrutin, afin que l'on recognoisse, si ce sont les deux mesmes signatures, & de là il se voye que les deux suffrages n'ont pas esté donnez à vn Cardinal par vn mesme Cardinal. Que si entre ces cedules il ne s'en trouuoit aucune qui fut marquée de ces marques, desquelles l'accez de la cedula sera signée, ou si quelqu'un s'en approche, qu'il aura nommé au scrutin, en l'un & l'autre cas, le suffrage de l'accez soit nul: mais pour la suscription, ou le nom de l'electeur, il ne se pourra reueler s'il n'arriue que le sceau & les deux susdites marques ne sont les mesmes avec les seings & le sceau de quelqu'autre Cardinal, ou quelqu'autre difficulté pressante.

Et pour ce qui concerne le nom de celuy qui est esleu, qu'il soit escrit en la mesme maniere par les Cardinaux, qu'il est imprimé en fucille, & ainsi qu'on a accoustumé d'écrire & noter les suffrages au Conclauë.

Dauantage, afin que l'on consulte avec plus de prudence en secret, se feront les cedules des suffrages, avec plusieurs qui seront mises en plusieurs tables au milieu de la Chappelle, mais tellement separees & esloignées des Cardinaux, que ce qui y sera escrit ne puisse estre veu des autres.

Si quelqu'un ne peut s'approcher de la table & soit empesché de ce faire, à cause de son indisposition, il deura faire son suffrage en secret, & alors s'approchera le dernier des scrutateurs pour le prendre, & aussi afin que l'accez se face en secret, le scrutin estant publié, si l'élection n'aura esté celebrée en iceluy par le consentement des 2. partis aussi-tost auparauant que l'on vienne aux autres actes, les Cardinaux seront tenus, comme au scrutin, de faire vne cedula formée pour l'accez ausdites tables; l'usage de ces cedules pour l'accez sera tel. Celuy qui voudra s'approcher de quelqu'un des nommez au scrutin, son nom sera escrit, mais qui ne le voudra faire, afin qu'il ne puisse estre recogneu auoir approché & abordé aucun, au lieu du nom qu'il escriue ce mot, *Nemini*. Or nul au scrutin qu'en l'accez n'en doit nommer plusieurs à la fois, car autrement le suffrage, par lequel plusieurs auroient esté nommez seroit nul, bien est-il permis de s'approcher de l'un de ceux nommez en lad. cedula, ou autres pourueu qu'il porte quelqu'autre suffr. au mesme scrut. & soit mis au nombre des Cardinaux presens aud. Conc. Et

ordonnons, & declérons, qu'en chaque scrutin il ne luy soit permis de s'y presenter qu'une fois, non plus que de se retirer par accez de la nomination d'un autre, la cedula du scrutin estant faite.

Davantage auparavant que les cedules, ou les accez & scrutins soient ouverts par les scrutateurs, tous doiuent estre promptement jettez au feu, & en presence de tous par ceux-cy, & s'ils s'en trouue davantage presents au Conclaué que de Cardinaux, ils sont tous bruslez, & derechef on en vient aux suffrages. Que si quelqu'un n'observe aucune des choses susdites, ou qu'il contrevienne en quelque vne d'icelle directement, ou indirectement, il encourt de fait la sentence d'excommunication.

Plus, nous statuons & ordonnons, que si quelque infirmité retient quelqu'un de venir au scrutin, trois Cardinaux doiuent l'aller visiter choisis par sort, deuant la tenuë du scrutin, pour cet affaire d'entre tous les Cardinaux par le dernier des Diacres, tenant un coffret percé, mais vuide, lequel se ferme par les scrutateurs en la presence de tous, & la clef en demeure sur l'autel, qu'on luy porte aussi une cedula imprimee, en laquelle luy mesme il doit secrettement escrire, auoir fait le serment susdit, ainsi que les autres Cardinaux: & l'ayant escrite la jette dans le coffret, d'ou estant rapportee par les mesmes Cardinaux & icelle ouuerte, ceste cedula est mise par apres dans le calice. Par apres le scrutin estant publié, s'il en faut faire les approches, afin que les malades mesme y puissent venir, l'une des feuilles, dans lesquelles sont escrits les noms des Cardinaux & le nombre des suffrages, par les trois Cardinaux susdits, & ayant esté publiquement recogneu le nombre des suffrages que chacun a porté & mis dans le scrutin, lesquels par apres doiuent estre portez au malade avec une cedula imprimee, disposée & apprestee pour l'accez & le coffret, où elle a esté mise. Le malade ne se deura approcher de personne, que toutes choses soient gardees & conseruees, lesquelles font mention de la cedula du scrutin, & qui sont cy-dessus ordonnees sur peine d'encourir la mesme excommunication que dessus.

L'accez & le scrutin estant finy, soit que l'élection s'ensuiue, ou qu'elle ne s'ensuiue pas, les trois autres Cardinaux choisis & esleus par sort deuront recognoistre toutes les cedules, le sceel neantmoins & les deux autres signatures qui n'auront esté ouuertes, demeurans entiers, toutes lesquelles cedules, quoy que l'élection en soit suiue ou non suiue, soient inconapres bruslees, semblablement aussi afin que l'élection ne soit dilayee & prolongee. Nous detinent cretons & ordonnons que sous mesme peine d'encourir excommunication, le scrutin n'aye à se tenir deux fois le iour, mais qu'il s'acheue le matin apres la Messe ordinaire mais au premier iour seulement apres la Communion des Cardinaux, apres midy, à heure commode apres auoir chanté l'hymne, *Veni Creator*, & dit l'Oraison du saint Esprit, où s'il y a apparence de compromis pour l'élection, elle se doit observer & apres auoir sonné les cloches ordinaires des lieux du Conclaué selon la coultume, tous & chacuns les Cardinaux doiuent comparoir s'ils ne sont retenus par maladie, sur peine des mesmes excommunications.

Davantage que les Cardinaux s'abstiennent absolument de toutes sortes de pactions, brigues, associations, intentions, & autres obligations, menaces, signes de suffrages ou de cedules, ou autres choses signifiees, soit par parole, ou par escrit, ou par quelque façon qu'elle se donnât ou se demandent, tant pour le respect de l'inclusion que de l'exclusion, tant d'une que de plusieurs personnes, de certain ou creatures & autres concernans le don ou le respect des suffrages, & autres choses quelconques, lesquels interuenans, quoy que iurees par serment, nul neantmoins ne sera obligé de les garder ny tenir, & ceux qui feront au contraire, nous les tenons dès maintenant pour excommuniez, non pas que nous deffendions les traittez touchans l'élection à la charge qu'elle sera faite au Conclaué fermé & par les suffrages des cedules des deux tiers des Cardinaux presents audit Conclaué, &c.

Si quelqu'un presume attenter contre les presentes Constitutions, qu'il sçache qu'il encourra l'indignation de Dieu Tout-puissant & de ses bien-heureux Apostres, Saint Pierre & saint Paul. Donné à Rome au Palais de saint Pierre, l'andel l'Incarnation de nostre Seigneur, 1621. le 17. des Calendes de Decembre, de nostre Pontificat le premier.

s'ensuiuent

S'ensuivent les Cardinaux qui ont juré, promis & signé avec le Pape la presente Constitution.

MOY GREGOIRE EVESQUE DE L'EGLISE CATHOLIQUE,
S. P. Q. R. G. P. X. V.



Ntoine Card. Sauli, Euesque d'Ostiens. promets, vouë, & iure.

François Maria Cardinal du Mont, Euesque de Portuen. promets, vouë, & iure.

François Cardinal Sfortia, Euesque de Tusculan, promets, vouë, & iure.

A. Cardinal Montalte, Euesque d'Albe, promets, vouë, & iure.

Odoard Cardinal Farnese, Euesque de Sabinen. promets, vouë, & iure.

Octavius Card. Bandine, Euesque de Præneste, promets, vouë, & iure.

André Cardinal Peret, promets, vouë, & iure.

B. Cardinal Bevilacqua, promets, vouë, & iure.

F. tit. S. Praxede, Presb. Cardinal de Sourdis, promets vouë, & iure.

Moy Io. Baptiste du tiltre de SS. Marcellin, & Pierre, Card. Detus, promets, vouë, & iure.

Moy Dominique des SS. Apostres, Presb. Cardinal Principal, promets, vouë, & iure.

Moy Charles du tiltre de S. Cesar Prestre Cardinal Madruce, promets, vouë, & iure.

Moy du tiltre S. Chrysogone Prestre Cardinal Burghese, promets, vouë, & iure.

Moy M. tit. S. Onufre Prestre Cardinal Barberine, promets, vouë, & iure.

Moy Io. Garzia tit. SS. des quatre Couronnez, Prestre Cardinal Milline, promets, vouë, & iure.

Moy N. du tit. SS. Cyr, & sainte Iulite, Prestre Cardinal Lantes, promets, vouë, & iure.

Moy M. Angelus Touti du tit. S. Pierre aux Liens, Prestre Cardinal Nazareen, promets, vouë, & iure.

Moy F. du tit. S. Augustin, Prestre Cardinal Veral, promets, vouë & iure.

Moy Iean Bapt. du tit. S. Cecile, Prestre Cardinal Leni, promets, vouë, & iure.

Moy Dominique du tit. S. Marcellin és montagnes, Prestre Cardinal Riuarol, promets, vouë, & iure.

Moy P. du tit. S. Marie de Populo, Prestre Cardinal Philonard, promets, vouë, & iure.

Moy P. Paul du tit. SS. Neree, & Achilles, Prestre Cardinal Crescentio, promets, vouë, & iure.

Moy Gaspar du tit. sainte Croix en Hierusalem, Prestre Cardinal Borgia, promets, vouë, & iure.

Moy Robert du tit. saint Alex. Prestre Cardinal Vbaldin, promets, vouë, & iure.

Moy Tibere du tit. de S. Prisce, Prestre Cardinal Muti, promets, vouë, & iure.

Moy Gabriel du tit. saint Pancrace, Prestre Cardinal de Trejo, promets, vouë, & iure.

Moy Pierre du tit. saint Thomas en Parjon, Prestre Cardinal Campora, promets, vouë, & iure.

Moy Matthieu du tit. saint Marcel, Prestre Cardinal Priolus, promets, vouë & iure.

Moy S. Prestre Cardinal de sainte Susanne Bibliothecaire de la sainte Eglise Romaine, promets, vouë, & iure.

Moy Guido du tit. S. Iean devant la porte Latine, Prestre Cardinal Bentiuole, promets, vouë, & iure.

Moy Pierre du tit. saint Saluatorin Lauro, Prestre Card. Valere, promets, vouë, & iure.

Moy It. Frideric, Prestre Cardinal de Zollerren, promets, vouë, & iure.

Moy Cesar du tit. de S. Pierre au mont d'Or, Prestre Card. Gherard, promets, vouë, & iure.

Moy F. Define du tit. S. Clement, Prestre Card. de Cremona, promets, vouë, & iure.

Moy Estienne du tit. S. Marie en la voye, Prestre Card. Pignatelle, promets, vouë, & iure.

Moy L. Card. Ludouifio du tit. S. Marie Chancelier de la S. Eglise Romaine, promets, vouë, & iure.

Moy François du tit S. Matt. Merulan, Prestre Cardinal Sacrato, promets, vouë, & iure.

Moy M. Ant. du tit. S. Eusebe, Prestre Cardinal Gozadiane, promets, vouë, & iure.

Moy Alexandre du tit. S. Marie en la voye large, Diacre, Cardinal Esten, prom. vouë, & iure.

Moy François de S. Ange du marché aux Poissons, Diacre, Card. Bon Compagnon, promets, vouë, & iure.

Moy Hippolyte de S. Marie la Nonne, Diacre, Cardinal Aldobradin, promets, vouë & iure.

IO. BENINVS.

N. ODOT.

Registré en la Chancellerie des Brefs.

Ll iij

Ce Pape estoit tres-zelé Pere à l'Eglise, & faisoit ce qu'il pouuoit pour l'entretien de la paix entre les Princes Chrestiens, il employa son frere pour avec les Deputez du Roy accommoder l'affaire des Grisons avec le Roy d'Espagne. Et luy ayant esté remonstré par sa Majesté qu'il y auoit en France des maisons des Ordres saint Benoit, saint Augustin, Cleruaux & Citeaux, qui auoient besoing de reformation, il enuoya vn Bref au Cardinal de la Rochefoucault pour six ans, afin de faire ladite reformation, lequel Bref estoit en date du huietième Avril 1622. Le Roy en ayant aduis par ledit sieur Cardinal, le fait voir à son Conseil suiuant la resolution duquel sa Majesté permet audit sieur Cardinal faire lesdites refections, & d'appeller avec luy telles personnes qu'il iugeroit capables pour l'entiere execution d'iceluy, & ordonna par ses lettres patentes donnees à Carcassonne le quinziesme Iuliet, qu'en cas qu'il y eust quelque appellation, elle seroit iugée par les sieurs Cardinal de Rets, l'Archeuesque de Bourges, l'Euesque d'Angers & de Senlis, & les sieurs de Chasteauneuf, Iannin, Caumartin, de Roissy, de Marillac & d'Allygre, Conseillers d'Estat, avec les sieurs de la Poterie & de Lezeau, Maistres des Requestes, & ce priuatiement à tous autres Iuges.

Personne ne peut dire auoir esté à Rome, & recogneu veritablement ce que c'est de ceste ville là, s'il n'y a demeuré pendant le siege vacquant. Par ce qu'au lieu qu'en autre temps toutes choses cheminent selon l'ordre & la regle que l'autorité du Pape viuant peut prescrire, alors en vn instant on les void bouleuersees & changees tellement de face, qu'elles n'ont plus la ressemblance qu'elles auoient auparauant : alors les grandeurs adorees & idolatrees par la flatterie des courtisans sont tout à coup abaissées avec grande mortification d'elles-mêmes, & de façon qu'on void celuy qui se faisoit recognoistre pour trop superbe & dédaigneux, qui donnoit la loy à tout le monde, & qui vouloit aller du pair, & disputer la prestance avec les plus grands fort humilié & honteusement abaissé, estre contraint se courber & encliner bien bas deuant ceux qu'un peu auparauant il méprisoit, alors les Magistrats & ceux qui commandoient absolument sont deposez, ce qui donne hardiesse à tel duquel on ne faisoit aucun compte de pouuoir pretendre d'auoir assez de credit pour ouurir & fermer selon sa volonté le chemin qui peut conduire au sommet du Pontificat, d'en exclure celuy qui luy a esté peu courtois, & d'y en eleuer vn autre, lequel aux occurrences il aura recogneu officieux. Alors l'autorité des Iuges cesse, & chacun a la puissance d'écrire & de dire ouuertement ce que le respect en autre temps luy faisoit tenir caché, ce qui doit apprendre à ceux qui tiennent les premiers rangs dans les honneurs mondains à se comporter de telle façon pendant leur prosperité, que quand tels accidens arriuent, ils puissent estre esloignez de semblables occasions.

Il faut aussi remarquer que si tost que le siege Pontifical vient à vacquer, non seulement les meubles du Pape deffunct & tout ce qui est en sa chambre, est aussi tost enleué & emporté par ceux qui ont ce bon-heur d'y entrer les premiers, & ny laissent rien autre chose que les quatre murailles, pillent & s'emparent de sesdits meubles, de sa Biblioteque, & de tout ce qu'il a de plus riche & precieux, si de bonne-heure ses parens & amis n'y donnent ordre, auant que l'un luy ferme les paupieres.

On peut ajouster encores à ce qui a esté dit cy dessus, que la Cour Romaine n'est qu'un ramas de diuerses personnes qui s'assubjetissent & se rendent esclaves pour faire quelque fortune & accroistre leur propre condition. Or quand ceux-cy voyent qu'ils sont exclus des graces & faueurs qu'ils pretendoient par le moyen de quelques personages, aux occasions du siege vacquant, ils prennent hardiment le party d'un autre duquel ils esperent de l'auancement & font tous leurs efforts de luy ayder. C'est pourquoy ceux qui n'auoient peu rien faire sous le Pontificat de Paul V. estoient entierement décheus de leurs esperances, en le voyant d'une complexion si vigoureuse, croyant qu'il enseueliroit tous les Cardinaux qui aspiroient à la Papauté, il ne faut doncques pass'estonner s'il y en eut beaucoup qui se réueillerent sur l'aduis inopiné qui suruint au Pape, lorsqu'il estoit à S. Agnes.

Le Cardinal Borghese le voyant grandement malade le iour de la conuersion saint Paul, dépescha des Couriers & staffettes la nuit suivante pour faire reuenir les Cardinaux qui estoient esloignez de la Cour.

Le Pape cependant empiroit fort, mais les bons remedes que luy donnerent ceux qui estoient auprès de luy, firent qu'il receut ceste grace de Dieu que sa mort fut retardée iusques au deuxiesme Ianuier, auquel iour il rendit l'esprit sur les quatre heures du soir.

Ce seroit vn trop long discours qui voudroit raconter ce qui se passa dans la ville après ceste mort, c'est pourquoy remettant cela à d'autres, nous nous contenterons seulement icy de mettre par escrit les particularitez qui se sont passées dans le lieu, où les Cardinaux se renfermerent pour eslire vn successeur, joint que ce qui arriue au Conclau lors d'un siege vacquant,

vacquant, est quasi tousiours vne mesme chose, ou bien il y a fort peu de difference, mais ce qui se passe dans le Conclau, est aussi different d'un siege vacquant à l'autre, comme les affections & interets particuliers sont si dissemblables.

Après doncques que les obseques qui y ont accoustumé d'estre faictes apres la mort d'un Pape l'espace de neuf iours furent finis, le dixiesme, qui estoit le Lundy huictiesme Februrier, le Cardinal Iustinian chanta la Messe du saint Esprit dans l'Eglise de saint Pierre en presence de tous les Cardinaux. La Messe finie le Sieur Augustin Mascardy Secretaire du Cardinal d'Esté fit l'oraison ordinaire, *de electione Pontificis*, Par apres les Cardinaux firent la procession & entrerent dans le Conclau. Ils estoient 50. en nombre, & deux qui arriuerent incontinent apres.

Ils estoient entre eux diuisez en plusieurs factions.

La premiere qui estoit plus ancienne, estoit celle du Cardinal Montalte, qui auoit avec luy les Cardinaux creez par le Pape Sixte V. son oncle, sçauoir Sauli, Iustinian, Delmonté, & Peretti son nepueu.

La deuxiesme estoit d'Aldobrandin, qui auoit de son party les Cardinaux Bandini, Cesis, Beuilacqua, Bellarmino, Detigymnasio, Delfino, Sanuesio pio, tous creez Cardinaux par le Pape Clement VIII.

La troisieme estoit des creatures du feu Pape Paul V. conduite par Borghese, sçauoir les Cardinaux Barberin, Millino, Lanti, Leni, Tonti, Veralle, Caraffa, Ruarola, Filonardi, Serra, Araceli, Ascoli, Vbaldino, Mati, Sauelli, Ludouisio, Acquino, Campora, Prinli, S. Susana, Valerio, Roma Gerardi, Scaglia, Pignatelli, Caponi, Vrsino.

La quatrieme estoit des Espagnols, Lapatta, Maddruzzi & Borgia.

La cinquiesme estoit du Cardinal Bonli pour la France, & de quatre autres Cardinaux qui faisoient chacun à part, comme vne faction & qui n'estoient point compris sous aucun des autres, sçauoir Sforce, Farnese, Medias, & Esté, bien que on croye que si Medicis eust voulu se rendre chef de la faction, il eust esté suiuy de la plus part des Cardinaux Florentins.

Toutes ces factions s'unirent en deux principales, la premiere & la plus grande estoit de Borghese, à laquelle Montalte, Farnese & quelques Espagnols estoient joints.

L'autre estoit d'Aldobrandin & de ceux qui faisoient pour la France, bien que nous les ayons nommez comme creatures d'autres, qui auoient avec eux quelques malcontents de Borghese, entre autres Vbaldin & Vrsin se declarerent chefs de faction, pour excludre du Pontificat le Cardinal Campora, qui estoit avec trop d'instance & d'impetuosité porté en premier lieu par Borghese, lequel aussi tost apres la mort du Pape son oncle auoit repris avec grande chaleur, les pratiques qu'il auoit deux ans auparauant encommencees en faueur de ce Campora, desirant à quelque prix que ce fut le mettre en la chaise de saint Pierre plustost qu'aucun autre de ses creatures qui auoient beaucoup plus de merite & de capacité que celui-cy.

Aucuns disoient que Borghese auoit ce dessein si à cœur, afin qu'il peust establir d'auantage l'esperance qu'il auoit d'estre vn iour Pape, & possible successeur à celui-cy, lequel tenoit entierement sa fortune de luy, comme ayant esté son valet, esleué d'un fort bas lieu au degré du Cardinalat, voyoit que Campora estoit de fraische & robuste complexion, & qu'il pourroit encore viure au moins 15. ou 16. ans, pendant lesquels il auroit le loisir d'asseurer ses affaires sans contredit, la creation dernière des Cardinaux que son oncle auoit faict vn peu auant sa mort, ses creatures & affidez le confirmoient d'auantage en ceste esperance.

D'autres attribuoient ceste grande passion de Borghese pour Campora, à vne cause plus proche, & qui le touchoit de plus pres, sçauoir est afin de n'estre point recherché, & que l'on luy fist rendre compte de ses actions passees sous le Pontificat de son oncle, ayant la crainte qu'elles ne plairoient possible pas à vn Pape successeur qui luy eust esté moins affidé que celui-cy.

Le Cardinal d'Esté auoit autant de desir pour l'eslection de Campora que Borghese, & ne sçait-on penetrer son dessein si ce n'est que Campora luy eust promis de faire cesser les procez intentez contre ceux de la maison d'Esté à cause du pays de Commachio, ou bien de les remettre en la Duché de Ferrare, quoy que c'en ayt esté, il faisoit tous ses efforts, & auoit encore faict promettre au Cardinal Capponi, qu'il donneroit sa voix en faueur de Campora, & où il ne pouuoit aller en personne pour faire sa brigue, il enuoyoit ses amez & plus affidez, comme le Comte Fontanella & le Marquis Entio Bentiuoglio, cestuy-cy s'employoit de cœur & de courage pour Campora à cause de la promesse qu'il luy auoit

faicte que si il pouuoit estre Pape, il restitueroit le Bentiuogli aux anciens droicts & raisons qu'ils auoient sur la ville de Bologne, de laquelle leurs ancestres auoient autrefois esté chastez.

Mais quand bien mesmes ces promesses eussent esté iurees & signees par Campora, on ne croit pas pourtant qu'elles eussent esté obseruées par luy par apres, s'il eust peu estre Pape, on se souuient assez sur le subiect de l'exemple de plusieurs, qui paruenus au Pontificat avecque semblables artifices & promesses, prenoient apres leurs excuses, disans qu'ils ne vouloient point estre accusez de simonie, & ainsi faisoient le plus souuent tout le contraire de ce qu'ils auoient promis auparauant.

Et par ce que Borghese voyoit que le Cardinal Montalte pouuoit beaucoup ayder à son intention, comme s'estant trouué en plusieurs autres Conclaués & fort partis en semblables menées, aussi qu'il estoit chef de plusieurs Cardinaux, qui estoient ses creatures amis ou parens, il fit en sorte par belles parolles qu'il le tira de son costé, luy promettant de contribuer tout son possible à le faire eslire Pape, ou quelqu'un des siens apres la mort de Campora, ou bien s'il arriuoit que Campora fut exclus tout à fait, qu'il feroit en ce cas sa brigue plustost pour quelqu'une de ses creatures, que pour aucune des autres avec Montalte, il attira encore le Cardinal de Medecis qui auoit charge expresse du grâd Duc de ne donner sa voix qu'à celui que Montalte luy diroit. Ce Montalte croyoit au commencement pouuoit esleuer au Pontificat le Cardinal Delmonté, & ne rien faire pour Campora, mais quand bien mesmes il recogneut que son intention ne luy pouuoit pas reüssir, il voulut obliger Borghese, afin que s'il suruenoit que Campora ne peut estre esleu, il secondast puis apres son intention en faueur de Delmonté, mais en fin de compte il fut trompé.

Le Cardinal Farnese par le commandement du Duc de Parme son frere, s'estoit aussi ioint avec Medecis, mais non pas avec intention d'aider à Campora, c'est pourquoy il reprochoit à Medecis qu'il ne faisoit pas selon l'intention du grand Duc de se porter de ce costé, mais luy s'excusoit de ne pouuoir faire moins, pour la raison cy-dessus alleguée.

Borghese tira de son party les Cardinaux Espagnols par l'entremise du Cardinal d'Esté qui leur promettoit que si Campora estoit Pape il aideroit en tout & par tout au Roy d'Espagne, afin qu'il se peut rendre maistre de Venise, & de plus qu'il feroit Cardinal le frere du Duc d'Alburgez Ambassadeur.

Cependant que les Cardinaux sortoient en procession de saint Pierre pour aller en la Chappelle Pauline faire toutes les actions qui doiuent preceder la closture du Conclaué & eslection d'un Pape, ceux qui sçauoient le dessein de Borghese, & s'y vouloient opposer, enuoyerent en haste dire aux Ambassadeurs de Venise, qu'ils vinssent par ce qu'ils ne pouuoient plus hardiment parler, & à descouuert esmouuoir les esprits à l'eslection de Campora, on leur cōmanda fort qu'ils se diligentassent pour reprimer le premier effort de Borghese, par ce que on sçauoit bien qu'il auoit enuie de tenter le hazard, aussi tost apres que les Cardinaux seroient dans la Chappelle Pauline & que l'on auroit acheué de lire les Bulles ordinaires qui se lisent auparauant l'eslection d'un Pape.

Borghese se voyant suiuy d'un si grâd nombre de Cardinaux, ne faisoit difficulté aucune qu'il ne peust conduire ceste affaire selon son desir, & ne faisoit point de cōpte de la faction contraire, presupposant qu'elle n'auoit peu penetrer iusques dans le fonds de ses intentions, mais il se trompoit bien fort, sa brigue ayant esté descouuerte deux iours auparauant qu'on entrast au Conclaué, ayant eschappé au Cardinal Pignaselli de dire, nous irons assëurement au Conclaué avec un Pape desia fait, & ce sera Campora. Il dit cecy deuant un sien domestique qui n'affectionnoit pas trop Borghese, celui-cy aduertist aussi tost le Cardinal Vrsin, sçachant bien qu'il estoit ennemy capital de Borghese, tant à cause de ce qui s'estoit passé lors du mariage de leurs parens qu'aussi pour ce que depuis en toutes autres occasions il s'estoit tousiours ouuertement efforcé de luy nuire, Vrsin entendit volontiers cet aduis, & afin de mieux destruire le dessein de Borghese, il alla se joindre au Cardinal Vbalدين sçachant bien que celui là ne consentiroit iamais à l'eslection de Campora, ayant plus ouuertement qu'aucun déclaré qu'il se vouloit rendre chef de faction pour l'exclure du Pontificat, & pour ce s'estoit ioint avecques les François.

Le Cardinal Aldobrandin & autres mal-contens de Borghese, entre lesquels estoit le Cardinal Lancellotti qui auoit avec luy les sieurs Cardinaux Presientio & Filonarde, mais Lancellotti estant mort, ces deux-cy du commencement tinrent bon pour l'execution de Campora, mais au bout du compte, quand ce vint au fait & au prendre, ils quitterent leur party & s'accorderent avecque Borghese.

Les

Les Cardinaux n'estoient pas encore entrez en la Chappelle Pauline, lors que Vbaldin qui n'estoit à la procelion avecque les autres à cause qu'il estoit malade d'un catharre qu'il auoit, mesme auant la mort du Pape, vint par un autre chemin en la chambre du Conclau où aussi tost il fut visité par le Prince Peretti qui le pria fort instamment de ne point abandonner le Cardinal Vrsin, il luy respondit qu'il seroit de son costé iusques à la mort, & qu'il n'estoit nullement resolu de consentir à l'ellection de Campora, & que si il estoit forcé de ce faire, qu'il vouloit estre le dernier de tous à le recognoistre. Le Prince luy dit qu'il s'efforceroit de faire changer d'aduis au Cardinal Montalte son frere. Mais en fin il ne peut gaigner cela sur luy. Il obtint seulement par ses prieres & celle de Dom Francesion son nepueu qu'il deliurast les Cardinaux ses creatures de la promesse qu'ils luy auoient faite de ioindre leur voix à la sienne, excepté le Cardinal Peretti son nepueu.

A l'entree du Conclau les Cardinaux qui se declarerent pour exclure Campora, furent Aldobrandin avec neuf de ses creatures, Vrsin, Vbaldin & Bonfi. S. Forli un peu apres fut des leurs, mais auparauant il voulut parler aux Cardinaux Espagnols, & à l'Ambassadeur d'Espagne pour se pouuoir honnestement desgager de la parole qu'il leur auoit donnée, il se comporta si dextrement en ses excuses que le tout reüssit selon son desir, avec tout cela les dessus nommez n'estoient pas en nombre suffisant pour faire l'exclusion de Campora, cependant Borghese estoit tousiours ferme en sa premiere resolution de tenter à faire reüssir son dessein auparauant qu'on sortist de la Chappelle Pauline, & ce qui le confirmoit davantage estoit qu'il n'auoit veu à la Messe Aldobrandin, ny Vbaldin, qui estoient ceux qui luy deuoient estre cōtraires, croyant que ces deux ne deussent pas venir au Conclau, sinon vers le soir, Vbaldin, comme nous auons cy-dessus estant fort indisposé, & Aldobrandin aussi à cause d'un grand trauail qu'il auoit eu, venant en quatre iours de Rauenne à Rome, par une saison rude & un temps fort fascheux, & de fait il mourut le soir qu'on sortit du Conclau, Dieu l'ayant seulement conserué en vie pour contribuer de sa part & conduire à fin une action si importāte à la Chrestienté: Borghese dōc se trouua bien trōpé, voyāt que tous ces deux estoient entrez à la Chappelle Pauline auparauant luy, & commença à se deffier qu'avec ceux-cy qui luy seroient contraires, on eust encore soustrait les voix de quelqu'une de ses creatures, ou des autres qui luy auoient promis la leur. Or sçachant qu'il ne se pouuoit fier de tous, il resolut à lors de ne point passer plus auant, & que premiere-ment il falloit voir si tous ceux qu'il croyoit estre de son party estoient fermes, voire en ceste leur resolution.

Cependant le Cardinal Vrsin pour empescher le peril eminent, & trauerfer le dessein de Borghese par le Conseil du Cardinal Césier, pria le Cardinal Sauli Doyen de dire tout haut qu'il estoit las, & qu'il vouloit aller se reposer en sa chambre. Et partant qu'il ne pouuoit alors faire lire les bulles, ce bon vieillard se laisse persuader aisement, & se retirant ainsi il osta l'esperance à Borghese de pouuoir rien faire auparauant la closture du Conclau: au partir Borghese le pria quand ce viendroit l'occasion qu'il fit comme les autres, & qu'il donast sa voix à Campora. Il respondit qu'il ne se vouloit point engager de parole ny pour l'un ny pour l'autre, ny entendre parler d'exclusion ny indignation, qu'il feroit ce que le S. Esprit luy dicteroit.

Au sortir de la Chappelle les Cardinaux allerent en leurs chambres disner: Vbaldin & Vrsin qui auoient mangé auparauant eurent ce temps de plus pour penser à leurs affaires, ayans accordé premiere-ment entre eux & le Prince Peretti du moyen qu'ils deuoient tenir, Vrsin alla visiter le Cardinal Medicis pour le prier de ne vouloir point parler pour Campora, & ne se laisser ainsi mener par Montalte, qu'en ce faisant il ne suiuiroit pas l'exemple de son pere d'heureuse memoire, lequel pendant qu'il fut Cardinal fit tout ce qu'il voulut dans les Conclaus où il se trouua: à cela Medicis respondit qu'il ne pouuoit faire autrement pour la charge expresse qu'il auoit du grand Duc son frere: Vrsin repliqua, ie m'estonne qu'en une affaire de si gran de consequence comme celle-cy le grand Duc vous ait donné un commandement si pieux, ie m'asseure que s'il eust sçeu le preiudice que cela peut porter à la faculté dont ie suis, il ne l'eust pas fait, & si à present ie luy pouuois faire sçauoir, ie crois certainement qu'il reuokeroit la charge que vous auez de luy: derechef Medicis s'excusa disant qu'il auoit les mains liées, & qu'il n'en seroit autre chose, que pour cela qu'il ne debuait auoir peur de rien, car quand bien mesmes Campora seroit Pape, le grand Duc & tous ceux qui luy appartenoient auroient telle autorité sous son Pontificat qu'il pourroit estre à couuert contre tous ceux qui luy voudroient nuire: Vrsin respondit, vous estes mal informé du naturel de cet homme, & crois certainement que si la fortune luy reüssit qu'il soit Pape, ce que Dieu ne vueille.

Le grand Duc aura assez d'affaires pour se deffendre luy mesme, son pays & son Estat,

& par la grace de Dieu ma famille a assez de credit & de puissance pour se pouuoir defendre d'elle mesme, & pour rendre à la maison de Medicis le contr'eschange de la bonne volonté qu'elle nous a tesmoignée, comme autrefois desia nous luy auons aux occasions fait recognoistre: Vbaldin fut cependant voir Borghese à sa chambre qui le receut selon la coustume avecque beaucoup d'honneur & de cōpliment pour diuerses raisons, il tascha de luy persuader que son intention pour faire l'ape Campora estoit tresbonne, & qu'elle estoit fondee sur le bien & repos public, & à la fin luy faisant recognoistre cōme il auoit sçeu qu'il s'estoit mis du party des François, le pria de changer & joindre sa voix à la sienne: à cela Vbaldin respondit, ie ne me suis point laissé persuader aux François, mais eux & moy nous sommes d'accord pour faire ceste exclusion, & soyez asseuré que quand bien mesmes vous auriez ma voix vous ne pourriez rien faire de ce que vous pretendez, par ce que l'exclusion est asseuree quand bien mesme ie n'en serois pas, Borghese respondit, faictes moy ceste faueur que de me donner vostre voix, ie me fais fort puis apres du reste: quand Vbaldin entendit cecy, il dit, il est temps à present de leuer le masque & parler librement, ie vois bien qu'avec ma voix vous le pourriez faire Pape, ie vous dis franchement que ie n'y consentiray iamais, & m'excusez si ie fais tout mon possible afin qu'il ne le soit pas, ce n'est pas que ie ne voulusse contribuer ce qui dependroit de moy pour faire eslire quelqu'un de vos creatures, mais en ma consciēce ie n'estime pas ne recognois celuy cy digne d'une telle charge, & si vous voulez faire preuue de mon intention changez de resolution & choisissez en un autre parmy tant de creatures que vous avez beaucoup plus dignes pour leurs vertus & seruices qu'il ont rendus au public comme pourroient estre les Cardinaux Meline, Lanti Crescentio & Araceli, avec lesquels on peut encore mettre Ludouisio, & croyez que si vous voulez faire quelque chose pour ceux cy vous verrez que ie ne leur donneray pas seulement ma voix, mais ie vous puis quasi promettre celle de tous les Cardinaux qui se portent à l'exclusion de Campora: on ne sçauoit pas encore quand Vbaldin proposoit cecy que Ludouisio fut à Rome, mais il arriua iustement au Conclauē à l'heure mesme que l'on parloit de le faire Pape: Borghese dit enfin à Vbaldin, ie ne veux exclure aucun de ceux que vous avez nommez, Mais apres ie suis resolu d'ayder en tout & par tout à Campora: là dessus ils se separerent l'un de l'autre.

Vbaldin retourna aussi tost en sa chambre où le Cardinal Vrsin & Dom Ferdinand son frere l'attendoient, lesquels durant ce temps là taschoient de conuenir le Prince de Sulmonne nepueu du Pape, afin qu'il se declarast contre Campora, ils faisoient cela à fin que l'ayant de leur costé il peust faire changer d'aduis aux creatures de feu son oncle malcontents de Borghese, par ce que estans priés ils ne pouuoient estre accusez d'ingratitude faisant quelque chose pour le nepueu de celuy qui les auoit esleuez au Cardinalat, Mais ils ne peurēt rien gagner enuers luy, ce que voyant ils luy dirent, nous n'auons que faire de vous ny de vostre assistance, nous sommes d'une maison assez puissante pour nous pouuoir tousiours maintenir sans vous, comme nous auons fait cy deuant, encores qu'on ait voulu nous heurter, nous auons assez souuent veu des nepueux de Papes esleuez aux honneurs qui ont esté bien raualez, prenez garde à vous.

Le Prince Peretti arriua peu apres en ceste chambre d'Vbaldin, ils communiquerent donc tous ensemble de ce que chacun auoit fait: comme ils estoient sur ces pourparlers le Cardinal Ionti arriua dans le Conclauē venant de son Euesché, sa presence augmenta beaucoup l'esperance de ceux qui auoient enuie d'exclure Campora, tenant pour certain qu'il seroit tousiours des leurs: pour cet effect Vbaldin l'alla visiter aussi tost, & le trouua de l'aduis qu'il desiroit bien que d'autres Cardinaux de la faction contraire l'eussent desia veu. Et iustement au temps que Vbaldin entroit dans sa chambre Campora & Pignatolli en sortoient, cependant que Campora prenoit congé de Ionti, Pignatolli print occasion de parler à Vbaldin pour tascher à le diuertir de sa resolution, luy disant qu'il ne deuoit point se porter à ceste exclusion estant creature de Paul V. Et quand bien mesme il n'y auroit autre respect il estoit assez obligé à Borghese pour le seconder en son intention, qu'il auoit cecy fort à cœur. Et d'autant plus qu'il voyoit bien que tous les Cardinaux creés par Paul s'y portoient, & pour estre fait Cardinal par ce Pape là, il le debuoit faire plus volontiers, Vbaldin respondit, ie sçay assez ce que ie dois à l'heureuse memoire du feu Pape, ie ne manqueray iamais aux occasions de faire paroistre mon ressentiment, & ma bonne volonté: Mais le chapeau rouge que ie porte est teint du sang des Martyrs & de Iesus Christ mesmes, ie l'ay receu pour procurer avecques mon propre sang s'il est besoin, le bien public de l'Eglise: cela ne m'importe que beaucoup d'autres soient du party de Borghese, & vous particulierement. Les subiects qui ont esté cause que vous & moy nous auons esté Cardinaux sont bien differends, & ie ne suis point tant obligé à Borghese comme vous, ie sçay mieux

mieux que vous les obligations auxquelles ie dois satisfaire : si Borghese veut faire quelque proposition pour d'autres, il verra qu'il n'a point de meilleur amy & seruiteur que moy.

Sur ces discours il se separerent, & Vbaldin entra en la chambre pour voir Ionti, il y demeura quelque temps & au sortir il trouua l'Ambassadeur de France qui estoit venu courant au Conclau sans s'arrester pour dîner, & auoit desia parle à plusieurs Cardinaux : ils allerent ensemble à la chambre du Cardinal Sforce où ils ne demurerent gueres, & promirent l'un à l'autre de se trouuer en la chambre de Bejalaqua où Vbaldin alla tout droit, l'Ambassadeur alla cependant voir le Cardinal Bonfi lequel estoit arresté par ses gouttes dans la chambre : Vbaldin en allant trouua Vrsin, & comme ils parloient ensemble le Cardinal Iapatta & l'Ambassadeur d'Espagne passerent : Vrsin les acosta & leur dit, le Roy d'Espagne ne peut pas estre mieux seruy par aucuns Cardinaux estrangers que par nous deux, monstrant Vbaldin avec luy, mais il ne trouuera pas mauuais si selon son intention nous ne donnons pas nostre voix à Campora, ce qui nous empêche est que nous ne le trouuons pas digne de la charge qu'on luy veut donner.

Ces alleees & ces venues durerent iusques à la nuict sans que les Ambassadeurs & les Cardinaux reprissent haleine : durant ce temps arriua vn courier de Venise expedie par la republique à son Ambassadeur, on enioignoit aux Cardinaux Priuli & Valerio qu'en l'election du nouveau Pape ils ne fissent autre chose que ce que le Cardinal Delfin leur ordonneroit, auquel on escriuoit ce qui se deuoit faire pour le seruice & contentement de la republique : que si ils vouloient estre pour Campora, l'on les declareroit rebelles eux & leurs familles : avec ces menaces l'Ambassadeur creust auoir assez fait & assésuré l'exclusion, & pour ce il dit à Delfin qu'il se vouloit retirer en sa maison comme de fait il fist à trois heures de nuict : peu apres l'Ambassadeur d'Espagne s'en alla aussi laissant tout le soing de affaires au Cardinal Iapata, lequel pour lors tenoit l'election de Campora si assésurée qu'il dist à l'Ambassadeur qu'il l'attendist Mercredy à souper quand il iroit luy porter les nouuelles que Campora seroit Pape, il fut trompé, car il y alla encores plustost, mais ce fut en laissant dans le Palais vn autre que celuy qu'il se proposoit.

Le Prince de Sauelle Ambassadeur de l'Empereur n'auoit encores acheué ses visites par les chambres des Cardinaux, quand il se trouua à la chambre du Cardinal Madruzzo, il fit tous ses efforts y estant enuoyé par le Cardinal Borghese & Iapata pour auoir la voix de celuy-cy, luy disant qu'il feroit vn signalé plaisir à l'Empereur, au Roy d'Espagne & à toute la maison d'Autriche & à luy mesmes en son particulier, parce qu'en ceste occasion il feroit cognoistre à ses Princes que les soupçons qu'ils auoient de luy qu'il s'entendoit avec les Venitiens estoient faux, & que bien que il ne luy monstroie pas par escrit vn ordre expresse de l'Empereur, il suffisoit seulement qu'il luy fist recognoistre que les Ambassadeurs de France & de Venise ennemis de la maison d'Autriche faisoient tous leurs efforts pour exclurre Campora de la Papauté, voyant que les Princes de ceste maison ne pouuoient auoir vn Pape qui fit plus pour eux que celuy-cy, Madruzzo respondit qu'il vouloit attendre le lendemain matin pour prendre resolution là dessus, que pour lors il estoit temps d'aller dormir, qu'il affectionnoit assez, & qu'il scauoit fort bien le deuoir à quoy il estoit obligé enuers les Princes qu'il luy auoit nommez, qu'il feroit ce qu'il recognoistroit estre utile pour leur seruice, bien qu'il se souuenoit assez qu'à l'autre Conclau il auoit seruy l'Empereur mieux que personne avec la Medecine dans le corps, & ceux qui luy auoient esté contraires auoient esté recompensez, au contraire qu'il auoit eu deffiance de ses bons seruiteurs, mais qu'il esperoit que alors les choses ne succederoient pas de la façon : avec ceste resolution l'Ambassadeur se partit du Conclau.

Durant cecy les Cardinaux Vrsin, Vbaldin Pio & Sforce consulterent ensemble dans la chambre du Cardinal Beuilacqua, ils estoient allez auparauant voir en quelle resolution estoit le Cardinal Ionti, craignant qu'ayant veu Borghese, il n'eust changé d'aduis, & le trouuerent du nombre de ceux qui vouloient exclurre Campora disant, ie scay qu'il n'est pas digne de la Papauté à cause d'un nombre infiny de meschancetés qu'il a commises en sa ieunesse, s'est desia veu les procès veritables & les informations qu'on a autrefois faictes contre luy qui sont maintenant apportees dans le Conclau, par lesquels on void qu'il a tué vn homme & qu'il a esté Simoniaque, & ce qui me fait encores d'autant plus declarer contre luy, c'est que ie scay qu'il est ennemy iuré de la France & de la Republique de Venise, cela estant tout clair comme en le faisant Pape, c'est vouloir entierement destruire la Chrestienté, il y a prou d'exemples combien les Papes partiaux & ennemis de ces Seigneuries ont apporté de mal à l'Eglise : c'est pourquoy on en doit grandement craindre le pair en celuy-cy : Sforces luy dit qu'il parloit prudemment, que ce qu'il disoit estoit tres veritable. Et adiousta de plus, quand bien mesmes les considerations publiques ne vous

porteroient à ceste exclusion, la vostre particuliere vous y doit inciter & vostre propre interest, si vous n'avez enuie qu'on vous oste la vie apres que Borghese vous a osté l'honneur en vous publiant par tout pour meschant & trompeur, & vous ayant si long-temps banny de Rome: quant à moy apres auoir bien examiné vostre vie ie ne trouue point que vous ayez fait aucune fourberie de celle dont on vous accuse, sinon celle quand vous allastes prendre possession de l'Archiprestre de sainte Marie Majeur, avec vn cortegge de cinquante carosses, si cela se doit appeller fourberie, ie le laisse à penser à vn chacun: voila ce qui se passa avec l'onti: les Cardinaux donc de l'exclusion se trouuerent tous en la chambre de Beuilacqua, l'Ambassadeur de France estoit avec eux, Dom Antoine & Dom Ferdinand des Vrlins, Dom François Peretti Vulpio & Monseigneur l'Abbé d'Aumalle François: ces deux Prelats cy derniers nommez avderent fort à l'exclusion de Campora, parce qu'ils alloient & venoient, & faisoient les messages, principalement ce Monseigneur Vulpio, auquel le Cardinal Filonarde le voyant parler aux vns & aux autres, dit en se moquant, vous avez beau faire Monsieur le Prelat, vostre trauail ny seruira de gueres.

Cependant le Cardinal Pré apporta aux Cardinaux de l'exclusion les procez & informations contre Campora apres qu'on les eut leuës & recognu qu'elles estoient veritables chacun d'eux se partit pour aller publier aux autres & mettre en consideration quelle auoit esté la vie de cet homme: cependant que ceux cy trauailloient pour l'exclusion, Borghese ne dormoit pas pour s'asseurer de l'inclusion, voyant bien que tant plus il tardoit son party s'affoiblissoit dauantage: & craignant que les siens ne changeassent d'aduis, il se resolut de tenter la voix d'adoration sur les sept heures de nuict, & pour ce dit-il à Monseigneur Varette auquel comme Gouverneur du Bourg S. Pierre, appartenoit de faire fermer le Conclau, qu'il fist sortir au plustost l'Ambassadeur de France: les Cardinaux de l'exclusion deuinerent le dessein de Borghese, & afin de l'empescher ils resolurent de faire demeurer dans le Conclau l'Ambassadeur iusques au iour, ils enuoyerent aussi aduertir tous les Cardinaux qui estoient pour eux, qu'ils se tinssent sur leurs gardes, & leur dit-on le soupçon qu'on auoit, que peut estre on les appelleroit pour venir à la Chappelle: mais qu'ils ne sortissent point pour cela de leurs chambres, plusieurs d'entr'eux sur ce bruit se mirent vistement au liect, & donnerent charge à leurs conclauistes qu'ils ne laissassent entrer qui que ce fut qui les viendroit esueiller, Monseigneur Varette essaya plusieurs fois de faire sortir l'Ambassadeur de France: mais comme il luy dit hardiment qu'il ne sortiroit que quand il luy plairoit, quand bien mesmes tous les autres s'en feroient allez, cela fut cause que d'un long-temps on ne vint plus l'importuner.

Desja le Cardinal Vbaladin à deux heures de nuict auoit esté trouuer le Cardinal Madruze, pour au moins s'il ne pouuoit gagner autre chose sur luy, de prier qu'il attendist iusques au matin pour donner sa voix à Campora, il eut assez bõne responce, les Cardinaux Medicis & Sauelle y auoient esté depuis pour le gagner, cõme aussi l'Ambassadeur de l'Empereur, ainsi que nous auons dit, qui ne peurent rien faire, sur les cinq heures de nuict: les Cardinaux Sforce & Beuilacqua y furent aux mesmes fins qu'Vbaladin, ils eurent pour responce qu'il vouloit dormir, & qu'asseurement il ne donneroit sa voix à personne de toute la nuict, ceux-cy mesmes furent trouuer le Cardinal Iapatta, & par leurs prieres & raisons, ils firent en sorte qu'il promist le mesme que Madruze pour ceste nuict là: suiuant l'exemple de ces deux, plusieurs autres prirent la mesme resolution de vouloir attendre le matin, le Cardinal Borgia fit plus: car il dit librement qu'il vouloit estre du nombre de ceux qui excluroient Campora, qu'en cela il ne crovoit point manquer à ce qu'il deuoit à son Roy, qui ne luy donnoit point charge expresse de contribuer à faire eslire celuy cy plustost qu'un autre, seulement qu'il vouloit qu'on fist vn Pape duquel il ne se peut deffier, qu'en se portant pour celuy-cy il offenceroit grandement sa propre & bonne conscience, veu les informations qui estoient contre luy.

Comme ces choses se pratiquoient de la part de ceux qui estoient portez à l'exclusion, Borghese enuoya le Cardinal Sainte Susanne vers le Cardinal Bellarmin pour le gagner de son costé, & le faire aller à la Chappelle quand il seroit appelé, ce bon vieillard respondit qu'alors ce n'estoit pas le temps de faire vn Pape, qu'on deuoit attendre au matin auquel suiuant les coustumes anciennes de l'Eglise, & les canons il falloit premierement entendre la Messe, se communier tous & mettre en priere, afin que Dieu leur fut secourable pour les inspirer de faire vne bonne & vraye eslection: que pour luy il n'auoit aucune passiõ plustost pour l'un que pour l'autre, qu'il dõneroit sa voix à celuy que pour lors il iugeroit le plus digne, & à Campora mesme si c'estoit la volõté du ciel: il dit à Sainte Susanne, ie m'estonne à l'heure qu'il est comme vous courez avec si grande haste, Sainte Susanne en s'excusant dict, sçachez que ce n'est pas moy qui presse, mais ie ne puis faire autrement, cela m'ayant ainsi esté ordonné.

Au

Au mesme temps Borghese enuoya le Cardinal Filonard vers le Cardinal d'Aguino qui estoit au liect plus proche de la mort que de la vie, il alloit luy mesme faire sçauoir la resolution qui estoit prise, que sur les sept heures de nuict on meneroit Campora à la chapelle pour le faire elire Pape par adoration, cette commission fut executee par Filonardi avec trop d'indiscretion, car estant venu il dict brusquement, sus debout Seigneur Cardinal, leuez vous vstemment, il faut aller à la Chapelle, par ce que à ceste heure mesme Borghese veut faire Pape Campora, ces paroles estourdirent tellement ce bon vieillard lequel Borghese auoit iusques à lors tenu en vie, sur l'esperance qu'il luy auoit donnee, qu'il le feroit Pape, qu'il fut tout à vn coup abbattu par vne ambassade si indiscrete & de telle façon, qu'il en mourut peu apres.

Sainte Susanne retourna trouuer Borghese avec la response de Bellarmin qui n'estoit pas selon son desir, & sur ce s'en alla accompagné des Cardinaux Sauelle, Pignatelli, Filonardi, Roma, & le sieur Estio Bentiuoglio, trouuer les Cardinaux Valerio & Priuli pour sçauoir quelle certaine resolution ils donnoient de leurs voix, tous deux nonobstant les defenses qu'ils auoient eues de la response de Venise, respondirent que sans aucune exception ils vouloient donner leur voix à Campora.

Cependant que tout estoit en ces termes, & que l'exclusion de Campora estoit comme assuree, Vbaldin enuoya dire au Cardinal Ludouisio qu'il se resiouyst, & que les choses se passoient fort bien pour luy, que l'exclusion estant faicte il auroit bonne part à la Papauté.

Borghese qui estoit durant cecy fort travaillé par la passion de son esprit, se persuada que si cela luy pouuoit reüssir qu'il peut attirer Bellarmin de son costé, qu'à son exemple plusieurs autres le suiuroient, & ainsi la faction par luy encommencee pour Campora se pourroit conduire à sa fin, il se resolut donc de l'aller sonder de nouveau, il entra dans sa chambre, il l'esueillit en sursaut, ce bon homme se voyant ainsi importuné, dict en cholere, ces heures icy ne sont pas pour faire vn Pape, mais plustost pour faire *Opera tenebrarum*, & qu'on le laissast dormir, Borghese s'excula, & luy dit qu'il desiroit seulement sçauoir qu'est-ce qui le retenoit pour ne point vouloir declarer pour Campora : Bellarmin se respondit, la principale raison est celle que ie veux dormir, si vous voulez sçauoir autre chose, la chambre d'Vbaldin est icy proche, vous pouvez parler à luy, & il vous la dira pour moy : par ces paroles, Borghese entendit assez qu'il n'estoit pas pour luy, il passe outre avec les Cardinaux qui l'accompagnoient, & alla trouuer Madruze, pour tascher d'estre assuré de luy, il dit franchement que pour ceste nuict là, il ne se vouloit point leuer, & qu'il falloit attendre au matin, ils se seruirent de toutes sortes de raisons & artifices pour leur faire changer de resolution, mais inutilement, ils allerent apres vers lapatta pour le mesme subiect, & le trouuerent de l'aduis de Madruze, & de tous les autres, ausquels ils parlerent en suite, ils n'eurent pas meilleure response, Sauelle mesme amy de Borghese fut de l'opinion des autres, ce qui fit dire à Borghese sortant de sa chambre où il le laissa, O Dieu nostre faction se ruine, cet homme cy aussi nous eschappera des mains.

Vbaldin sçachant que ceux cy estoient allez parler à Madruze, il fut incontinent apres pour voir si on ne l'auoit point esbranlé sur ce qu'il auoit promis, il trouua que non, & le voyant bien resolu le laissa reposer. Desia Borghese & Esté, s'estoient abouchez ensemble, & confirmé sur la response de Bellarmin & de Madruze, ils faisoient grand cas d'auoir celuy cy des leurs pour la consequence. Esté qui auoit grandement ceste affaire à cœur, alla encore luy mesme trouuer ce Madruze, pour le persuader se vouloir declarer en leur faueur, apres donc luy auoir allegué plusieurs raisons, il luy dict en fin que s'il ne se resoluoit d'estre pour Campora, que lapatta & luy auoient vn courier pour mander à l'Empereur & au Roy d'Espagne, qu'il se portoit entierement contre leur seruice, Madruze respondit, que si lapatta escriuoit, que luy aussi de son costé feroit ses despeschés, qu'il ne se soucioit guere de ce qu'on pouuoit mander, qu'il luy suffisoit de n'auoir en ceste affaire aucun interest, que ce à quoy sa propre conscience l'obligeoit, qu'il s'asseuroit que ses lettres seroient aussi bien creuës que celles de lapatta, Esté luy dict là dessus, n'avez-vous pas promis de vous porter où lapatta & Borghese se porteroient, il est vray repliqua Madruze que ie l'ay promis, mais tant de nouveaux accidens qui sont suruenus depuis me deliurent de ma parole. Avec ceste fascheuse response, Esté retourna voir Borghese, lequel considerant que les affaires alloient mal pour eux, fit vn dernier effort pour conuertir Madruze, & croyant que son Conclauiste eust puissance sur luy, ils l'allerent trouuer & luy promirent vne Chanoinerie en l'Eglise de saint Pierre, s'il pouuoit faire changer d'aduis à son maistre, cest homme ayant entendu ceste inique proposition leur

fit vne maigre responce, & se mocqua d'eux, se monstrant genereux comme en effect il est.

Eux donc ayant veu que par aucun moyen ils ne pouuoient aduancer leur intention par commun aduis, se resolurent de s'aller coucher & de ne plus rien tenter pour ceste nuict là: Borghese en se retirant fut suiuy par Filonarde qui luy dit, n'avez vous point d'autre creatures que Campora pour faire Pape, voulez vous à present & pour iamais ruiner cet homme de reputation, voyez vous pas bien que la plus grande partie se bande contre luy, ie dis cecy sans aucun dessein: car ie me metteroie iusques dans le feu pour vostre seruice, c'est seulement pour vostre bien que i'en parle, Borghese respondit, i'ay bien d'autres creatures, mais la consideration de mon particulier & propre interest, veut que ie face tous mes efforts pour Campora, outre que me desistant a present m'estant déclaré si ouuertement pour luy, il iroit par trop de ma reputation.

Des-là Vbaldin apres estre party d'avec Madruze s'en estoit retourné à la chambre de Beuilaqua, il y trouua le Cardinal Pio, qui de sa part auoit fort prudemment trauaillé à ceste affaire, il leur conta comme il auoit rencontré le Cardinal Esté qui luy auoit dit, Seigneur Cardinal, sont ce là les ressentimens que vous tesmoignez auoir des bien faicts que vous avez receus de nostre famille, souuenez vous combien nous auons fait pour vous, Pio respondit, il est vray que i'ay receu des biens de la maison d'Esté, & i'espere me les conseruer, mais quand bien mesmes ie les perdroy pour le seruice de l'Eglise Romaine, i'en estimeroie la perte glorieuse, nous ferons Pape celuy que nous voulons, dict Esté, à vostre barbe & en despit que vous en ayez, essayez le, replicqua Pio, & vous verrez avec quel honneur cela vous reuilira, la mesme chose estoit presque arriuee entre Esté & Beuilaqua, par ce que Esté le priant de vouloir estre des siens, Beuilaqua luy refusa tout à plat, Esté luy dict, vous vous en repentirez, Beuilaqua repartit, mes semblables ne se repentent iamais de choses qu'ils font, parce qu'ils procedent tousiours en personnes d'honneur.

Comme les Cardinaux de l'exclusion de Campora furent reuunis ensemble & qu'ils se fussent donné la parole l'un à l'autre, ils virent que tout alloit bien pour eux, & aduiferent que les Ambassadeurs & tous les autres qui estoient dans le Conclau se pouuoient retirer en leurs maisons à cause que la nuict estoit desia fort aduancee: sur ces entrefaictes Monseigneur Varese retourna de nouveau prier l'Ambassadeur de France, qu'il luy pleust s'en aller afin qu'on fermast le Conclau, l'Ambassadeur estoit dans la chambre de Beuilaqua, sçachant que ce Monseigneur estoit à la chambre, sortit & luy demanda ce qu'il faisoit là, il dit qu'il venoit de la part des Cardinaux, chefs d'ordre pour dire à l'Ambassadeur qu'il sortist & qu'il estoit presque iour, Beuilaqua s'estonnant de l'importunité de cet homme, luy dict, vous voulez faire icy le maistre de camp, faictes premierement sortir les particuliers qui doiuent sortir, & puis vous viendrez avec plus de respect aduertir l'Ambassadeur du plus grand Roy de la Chrestienté, qui est icy venu avec vn zele de seruir à Dieu & à toute l'Eglise. Monseigneur Varese s'excusa, disant qu'il n'estoit pas demeuré personne dans le Conclau & qu'il estoit presque iour, le Cardinal repliqua, si vous faisiez bien vostre deuoir vous en trouueriez plus d'un, & particulierement le Marquis Bentiuoglia, qui est dans la chambre de Borghese, allez premierement faire sortir celuy-là & puis l'Ambassadeur sortira, quand il luy plaira: Monseigneur Varese alla aussi tost faire sortir ce Marquis & tous les autres qui estoient restez, puis apres l'Ambassadeur s'en alla sur les neuf heures de nuict & l'on ferma le Conclau, & les Cardinaux de l'exclusion se mirent vistement au liect, faisant cependant faire la sentinelle à leurs Conclauistes pour voir s'il ne passeroit rien, ils auoient aduisé avec l'Ambassadeur de France, que la matinee suiuite les Cardinaux de l'exclusion feroient ensemble vne petite congregation en la chambre de Beuilaqua où ils appelleroient les Cardinaux qui branloient au manche, deuant lesquels on liroit les informations contre Campora, & leur feroit on recognoistre que l'eslection de cet homme estoit du tout illegitimé & sans raison.

Les amis & affectionnez de Campora qui ne sçauoient rien cōme les choses estoient desia si bien disposées pour l'exclure, croyoient fermement qu'il auroit la Papauté, mais encore plus luy mesme tenoit cela infailible & si certain qu'estant visité par plusieurs personnes auant qu'on fermast le Conclau, il parla à tous plustost en terme de Pape que de Cardinal, & particulierement à vn des conseruateurs du peuple Romain qui visita tous les Cardinaux de la part de la ville, comme c'est la coustume, quand il fut voir Campora luy augurant le Pontificat, comme on fait à tous les vieux Cardinaux, il respondit, soyez certain que quand nous serons en autre dignité que la nostre presente, nous nous resouuiendrons de ce tesmoignage de vostre bonne volonté, & ne manquerons de soulager le peuple Romain & en faire estat, ainsi qu'il se doit, il y en eut quelques vns si hastez qui pour s'insinuer mieux des premiers en ses bonnes graces, baisèrent les pieds par anticipation, entre lesquels il y eut vn Marquis & vn Comte.

Le Mardy matin, à peine estoit il iour quand tous les Cardinaux se leuerent : chacun de la part recommença aussi tost à faire ses pratiques sur le subiect de Cāpora, le remors de la conscience travailloit l'esprit à plusieurs qui s'estoient trop facilement laissez persuader à Borghese, & enuoyerent dire aux chefs de l'exclusiō que quād l'exclusiō se presenteroit, ils dōneroient leur voix plustost à vn autre qu'à Cāpora, le ver de l'ambition, & non celuy de la conscience rongeoit l'esprit à d'autres sans leur donner aucun repos. Entre ceux-cy il y eust vn Cardinal qui enuoya dire à l'Ambassadeur de France auant qu'on fermast le Conclau, que bien qu'il ne se declarast ouuertement contre Campora en faueur de son Roy, neantmoins quand ce viendrait au fait & à prendre qu'il feroit paroistre, qu'il estoit son seruiteur & deux autres Cardinaux ainsi qu'ils luy auoient donné la parole.

Le matin donc estant venu, ceux de l'exclusion resolurent de ne point faire la congregation qu'on auoit proposé de faire, parce que l'exclusion n'estant pas encore si assēuree qu'on la peut publier à descouuert, il y auoit à craindre que Borghese, sçachant cecy ne fit quelque effort au contraire qui eust peu porter preiudice, ils arresterent donc de s'ayder les vns & les autres, par autre moyen, & pour ce Vbaldin fit entendre à Borgia, qu'il estoit pour lors temps qu'ils se declarassent tout à fait contre Campora, ce qu'ils firent, Presentio fut aussi gagné au mesme temps & avec celui-cy, on trouua le nombre suffisant pour faire l'exclusion.

Borghese de l'autre costé alla parler à tous les Cardinaux de son party pour s'assēurer de nouveau de leur voix, desirant faire reussir son dessein, apres la Messe quand on procederoit à l'eslection par Scrutin, & en suite par la voix d'accez: afin donc d'assēurer mieux son affaire, il aduisa pour le mieux que pas vn des siens ne bailleroit si voix à Cāpora par le Scrutin pour voir si dans le nōbre des autres, il ny en auroit point quelques vns qui fussent pour luy, & que s'il pouuoit seulement gagner trois voix qui luy manquoient, il feroit en suite que l'on iroit à l'accez, & par ceste voye Campora seroit esleu, mais il reussit autrement, car l'heure estant venue le Cardinal Sauli dict la Messe, & donna la communion à tous les Cardinaux excepté à Montalte, Aldobrandin, Cesis & Aguinō demeurez au liet malade, Farnese & Caponi estoient aussi demeurez au liet sous ce mesme pretexte, & ne vinrent point en la Chapelle, ils faisoient cela à dessein, afin de se desengager de la parole qu'ils auoient donnée pour Campora, Farnese ayant promis à Medicis, comme nous auons dit cy-dessus, & Caponi, à Esté & à Borghese, auquel depuis il dict, ie vous ay donné ma parole de me declarer pour Campora, ie vous la tiendray, mais contre ma volonté, & si par hazard, il luy reussit d'estre Pape, ie ne demeureray pas seulement vne heure apres à Rome, au contraire si vous vous vouliez vous resoudre pour Ludouiso, i'y contribuerois tout mon possible.

Apres que la communion fut faite, l'on cria, *l'extra omnes*, & l'on commença à lire bulles accoustumees que l'on n'auoit pas leuës le iour auparauant pour le subiect que nous auons remarqué: apres qu'on eut acheué, tous les Cardinaux iurerent de les obseruer, les Cardinaux, chefs d'ordre allerent prendre les voix par Scrutin de ceux qui estoient demeurez au liet, eux de retour on ferma la Chappelle & l'on receueillit les voix du Scrutin, le Cardinal Bellarmine eut le plus grand nombre, mais il faut les deux tiers, & parce que Borghese vit que l'on n'auoit gagné aucuns pour Campora, il ne peut executer son dessein de le faire eslire Pape par accez.

Apres cecy on ne fit autre chose, Vrsin content voyant que Borghese n'estoit venu à bout de ce qu'il pretendoit, commença le premier à ouurir la Chappelle & à s'en aller, Borghese & ses adherans sortirent aussi, mais bien faschez, entr'autres Pignatelli dit, ie me doutois presque bien qu'on nous donneroit ceste bastonnade, chacun donc en suite sortit pour aller disner, les Cardinaux de l'exclusion ne disoient mot & attendoient pour voir ce que Borghese feroit, il ne manquoit tousiours de faire tous ses efforts, & incontinent apres disner il enuoya appeller tous ceux de son party, l'un apres l'autre.

Comme on disnoit l'Ambassadeur de Venise enuoya demander audience, là dessus on inthima à tous les Cardinaux, qu'ils eussent à s'assembler apres disner, ce qu'ils firent, & fut du commencement arresté qu'on l'escouteroit, & qu'il vint, vn peu apres on se raduisa, & l'on luy fit dire qu'il ne vint point, ceste audience ainsi qu'on peut coniecturer n'estoit point demandee pour affaire qui fut suruenue: mais pour employer le temps afin qu'on ne procedast à l'eslection ce iour là, & que cependant on peust donner le loisir aux Cardinaux de Sauoye & Borromee de venir, & croyoit-on qu'ils deussent arriuer au soir, mais tous deux ne vinrent que quelques iours apres que le Pape fut créé par les voix de ceux-cy, l'Ambassadeur pensoit que l'exclusion de Campora en seroit dauantage fortifiée, ne sçachant pas que depuis qu'il estoit sorty du Conclau l'on auoit gagné deux voyes, ledit sieur Borghese qui eust soupçon du dessein de l'Ambas-

sadeur ne voulut pas que cela arrestast, & pour ce il fist reuoker ceste audience, apres donc qu'il eust dispé, comme nous auons dict, il fit appeller ses creatures, & ayant de nouveau tiré promesse d'eux qu'ils perseuereroient en la volonté d'estre pour Campora, il vouloit à l'heure mesme tenter la voix par adoration, mais il fut empesché par diuers accidens, entr'autres par ce que luy dit Campora mesme, qu'il voyoit ses affaires grandement douteuses, qu'il ne vouloit point se hazarder d'auoir vne exclamation publique, & à sa barbe comme il se doubtoit qu'il luy arriueroit infailliblement s'il en venoit là, y ayant plus de douze Cardinaux, outre ceux de l'exclusion qui branloient au manche: ayant donc ce soupçon ou plustost desfiance de soy-mesme, par ce qu'il scauoit en sa conscience à combien de Cardinaux il auoit fait desplaisir, & qu'il n'auoit obligé que fort peu pour ne dire pas vn, il dit à Borghese qu'il ne vouloit aller en la Chappelle, si vn nombre de Cardinaux assez suffisant pour le faire Pape ne venoit l'enleuer de sa chambre.

Borghese ayant eu nouuelle confirmation de la parole des siens, Beuilacqua en fut aduertey, & prenant pretexte de l'aller voir en sa chambre il s'esclaircioit de la verité, aussi tost il enuoya dire à Aldobrandin, qu'il s'habillast afin que s'il estoit besoin par sa presence il peust ayder à l'interest commun: il fit aussi donner aduis de cecy aux autres Cardinaux de l'exclusion, lesquels ne perdirent temps, & allerent reuoir ceux de leur party pour les confirmer tousiours en leur bonne resolution, & pour tascher de gagner tousiours quelqu'un de ceux qui estoient en doute, Borghese en fin se resolut de terminer ceste affaire, & pour ce il alla trouuer Montalte & Iapatta, afin qu'on arrestast l'exclusion de Delmonté, afin que s'il ne pouuoit faire eslire Campora l'on ne luy fit point celuy cy Pape à sa barbe, Iapatta dit à Borghese là dessus, i'en trouueray plus de cent pour exclure Delmonté, vn conclauiste qui estoit là present dit ouy, mais mille que vous promettiez que vous auriez pour exclure le Pape Leon II. ne furent pas suffisans.

Comme Borghese estoit avec Montalte, Medicis y suruint aussi tost qui dit à Borghese, Seigneur Cardinal, nous voyons bien que nostre brigue pour Campora, tant plus qu'elle va en auant, tant plus elle se rend impossible, l'exclusion est si descouuerte à present qu'il n'y faut plus penser, ie vous ay seruy en ceste occasion tant que i'ay peu, maintenant i'espere que vous correspondiez à la bonne volonté que ie vous ay tesmoignée en vous portant vous & tous ceux dont vous disposez pour faire eslire Delmonté, ceste proposition ne pleut gueres à Borghese, & luy respondit en s'excusant, il est vray que ie vous ay promis cela, ie veux vous le maintenir, mais ie suis asseuré que vous n'en viendrez à bout, parce que les Espagnols ne veulent point de luy: cependant qu'ils estoient sur ces discours arriue Borghese, qui aussi tost se desfia que si l'on parloit à Vrsin de Delmonté il y auroit danger qu'il ne fut esleu, & que les cent qu'auoit promis Iapatta ne seroient pas suffisans pour l'exclure: c'est pourquoy il para ce coup disant à Vrsin, Seigneur Cardinal, i'ay iusques à ceste heure faict ce que i'ay peu, afin que Campora fut Pape croyant que c'estoit le bien public, vous auez esté de contraire aduis & m'auiez empesché & faict tout ce qu'auiez peu faire pour trauerfer mon dessein, nous auons esté en cela contrepointez, & vous l'auiez emporté par dessus moy, maintenant ie veux faire chose qui puisse estre agreable à tous, & pour ce si vous trouuez bon que nous facions donc Ludouiso Pape ainsi que Vbaldin me le proposa hier, i'en suis tres content.

Vrsin à peine entendit - il nommer Ludouiso qui dit qu'il le vouloit bien, mais qu'il falloit qu'il en parlast aux autres Cardinaux de son costé, & estant ainsi tombé d'accord avec Borghese il partit pour aller trouuer Vbaldin, Beuilacqua, & les autres, & Borghese cependant vint à la chambre de Caponi où il trouua Vbaldin avec luy: Caponi prenoit alors ses habits pour aller à la Chappelle sur le bruit qui couroit qu'on y vouloit aller pour faire Campora Pape par adoration: Borghese les prenant tous deux par les mains & les menant à vn coing de la chambre luy dict ce qu'il auoit proposé à Vrsin: Vbaldin qui scauoit desia que tous seroient tres contents de Ludouiso sans attendre dauantage, luy dict qu'il le vouloit bien, & qu'il donnoit sa parole pour tous les autres Cardinaux de l'exclusion de Campora: Borghese luy dit, puisque vous vous en contentez le Pape est faict, ie m'en vais le dire à Montalte, Vbaldin s'en alla d'un autre costé pour trouuer Aldobrandin, en passant il rencontra Campora qui parloit en secret à Pignatelli qui ne scauoit rien de ce qui auoit esté arresté avec Borghese, il leur dict en riant, bonne nouuelle, nous auons vn Pape, Campora partist entendât cecy, & apres qu'il eust repris haleine, il respondit, pourueu que nous sortions d'icy bientoist, & que nous soyons hors de peine Dieu face sa volonté, il sera ainsi, repartit Vbaldin, & pour ce resiouyſſez-vous, Ludouiso est Pape, il suiuit son voyage & trouua Beuilacqua qui ne scauoit point encores ce qui s'estoit passé, & quand on

on

on luy dit que le Pape estoit fait il entra en doute que ce ne fust Campora, & en s'estonnant il dit, hé comment est-il possible, là dessus on le consola quand on luy dit que c'estoit Ludouïsio, sur ces entrefaictes Borgia vint, ils luy dirent la mesme chose que le Pape estoit fait, cette nouvelle fist pareil effect en celuy cy qu'aux autres, & plus grand encores ainsi qu'il demonstra disant ah! Messieurs, ie sçay que vous estes Gentils-hommes & d'extraction noble, ie m'estonne que vous vous estes laissez mener par le nez, & que vous vous estes fait ce tort à vous mesmes que manquer à vostre parole & à la protestation que vous avez faicte d'exclure Campora: Beuilacqua respondit, soyez certain que la croyance que vous avez de nous est veritable, & que nous sommes tousiours demeurez fermes en vostre propos, c'est Ludouïsio qui est Pape: Borgia entendant cela fut tout resiouy, & s'en alla avec eux à la chambre de Ludouïsio.

Le Pape ainsi esleu dans le Conclau & reuestu des habits Pontificaux fut porté à l'Eglise de S. Pierre, afin que publiquement il receut l'adoration des Chanoines: le peuple cependant accouroit confusement de tous costez pour le voir, & se resiouyr que le S. Esprit auoit fait eslire ce personnage qui estoit aymé, d'un chacun, n'y ayant presque personne de ceux qui sont habitez à Rome qui ne l'eust veu & cogneu par ce que de degré en degré il y a exercé avec toute integrité les charges qui se donnent aux hommes de merite, & comme tous sçauoient son facile accez, & la douceur dont il estoit indifferemment tant enuers les petits que les grands, eurent bonne esperance que chacun receuroit de luy des faueurs durant son Pontificat: ce qui les confirma dauantage en cecy, ce fut quand ils virent qu'il auoit pris le nom de Gregoire si recommandable à toute la Chrestienté, & particulièrement Gregoire XIII. qui fut Bolognois, comme celuy cy, qui se monstra si bon enuers tous qu'il merita le surnom sans contredit de pere General, de toute la Chrestienté. Autant de pas qu'on faisoit en portant le Pape on entendoit autant de voix & acclamations de ceux qui le regardoient, & luy de son costé faisoit paroistre en ses yeux qu'il recognoissoit tout le monde, & les caressoit avec vne douceur paternelle, ainsi dedans l'Eglise en laquelle il ny eust possible iamais tant de peuple qu'alors, chacun se voulant esclaircir de son eslection en le voyant, tous luy souhaitoient vne longue vie, afin qu'il peust reprimer les abus qui estoient en la Chrestienté, renouueller les faits heroïques de ses predecesseurs, & en chasser la pauureté laquelle accabloit fort les plus menues gens.

En fin sadite Saincteté apres auoir fait plusieurs grands biens à l'Eglise, deuint malade & deceda le 8. Iuliet 1623. à 22. heures, qui sont les dix d'icy.

Les Cardinaux entrerent au Conclau le 19. ensuiuant, où ils demurerent 10. iours, pendant lesquels ils eurent de grands differends, à cause de deux puissantes factions des Cardinaux, Borghese nepueu de Paul V. & de Ludouïsio nepueu de Gregoire XV. & ainsi chacun des Cardinaux qui se trouuerent au Conclau de Rome pour l'eslection du Pape, apres la mort de Gregoire XV. furent diuisez pour leurs factions & partis.


Mais en fin Dieu les inspira d'eslire d'un comun consentement le Cardinal Maphœus Barbarinus Florentin, Euesque de Spolette, Prefect de la signature de Iustice & Protecteur d'Escoffe; qui auoit esté fait Cardinal dès l'année 1606. à la priere du feu Roy Henry le Grand, de glorieuse memoire, pour son affection enuers la France, où il fut enuoyé Nonce du Pape Paul V. apporter le linge du baptesme de sa Maïesté aujourdhuy glorieusement regnante, il a pris le nom d'Urban VIII.

Depuis quelques mois il a fait trois Cardinaux, à sçauoir son frere Barbarin, qui estoit Capucin, & le nepueu du Cardinal Borghese, & le Seigneur Magalotti son beau-frere, & aussi a-il procedé en mesme temps à la beatificatiõ de Louys de Gonsague Iesuite de la maison de Mantouë, dont se sont faictes de grandes ceremonies tant à Rome qu'à Mantouë.

Maintenant les affaires de la Valtoline sont remises entre ses mains, Dieu vueille qu'il les termine au contentement des interessez, pour le bien & la paix de la Chrestienté.

DE TOSCANE.

SOMMAIRE.

1.  **STAT** de Florence composé de trois Republiques reduites en vn.
2. Description des villes de cet Estat, & premierement de la Ville de Florence, son grand circuit & agreable assiette, ses Palais & superbes edifices du Pratolin, du Poge & autres maisons de plaisir.
3. De la Republique & ville de Pise, son antiquité & autres singulieres remarques.
4. De Pistoie, ville iadis travaillée par les factions des Donats & Cerebis appelez noirs & blancs.
5. De l'Estat de Siene & de ses villes.
6. Estat de Florence loué pour ses vins Trebians, les melons du terroir de Pise & pasturage de Pistoie, Mines d'Albastre, azur, vitriol & autres mineraux: fontaines d'eau salée dont on fait le sel.
7. Subtilité d'esprit & frugalité grande des Florentins, fort amoureux de liberté, Siens libéraux, magnifiques & courtois, ceux de Prat sacrileges, ceux de Pistoie sanguinaires & meurtriers.
8. Fertilité du pays Siens & richesses des Florentins au trafic de soyes, laines, serges, & draps d'or.
9. Clergé de l'Estat de Florence possédant cinq cens milles escus de rente.
10. Revenus du grand Duc à quelle somme se montent.
11. Forces de l'Estat du grand Duc, consistans en l'assiette des montagnes sur les frontieres, forteresses en Siene, Florence & Pise.
12. Quel nombre de Caualerie y est entretenue.
13. Ses forces maritimes.
14. Ordre des Cheualiers de S. Estienne, institué par le Duc Cosme.
15. Des alliances & intelligences du grand Duc, avec les Princes voisins.
16. De l'administration de la Justice & election des Magistrats de cet Estat.
17. Des Archeueschez & Eueschez qui sont en Toscane.
18. Genealogie des Ducs de Florence.



Les Ducs de Florence, ayans vny les Estats de trois Republiques ensemble, c'est à sçauoir de Florence, de Pise, & de Siene, possédēt aujourdhuy la Prouince de Toscane, c'est à dire la plus grande, la plus noble, & belle partie d'Italie. Je ne veux pas me traualler à raconter toutes les guerres ciuiles, & les frequents changements de domination, tant pource que ce discours seroit long & ennuyeux, qu'aussi pource que c'est chose superflue de mettre icy ce qui est compris dans les histoires. Mais me reduisant seulement à l'Estat des choses presentes, ie diray que de mesme que la nature a doué ceste Prouince de tous les priuileges qu'elle a accoustumé d'octroyer par grace separément aux autres, aussi elle n'a pas voulu qu'elle cedast en situation à aucune, la mettant comme au milieu, ou pour mieux dire au nombril del'Italie, l'environnant de trois costez de fort hautes montagnes, & au quatriesme, qui est vers la Mer, & Campagne de Rome, où la nature a manqué, l'art a suppléé, veu que l'Estat de Siene est plein de forteresses, comme nous dirons en son lieu.

Ce Prince a en son Estat quinze villes, c'est à sçauoir huit dans l'Estat de Florence, qui sont Florence, Pise, Pistoie, Volterre, Arezzo, Bourg du S. Sepulchre, Cortone, & Montpuleian: En celuy de Siene il y en a sept, qui sont Siene, Montalcin, Grosset, Soane, Piece, & Masse.

La ville de Florence a de circuit six milles, & contient plus de 90. milles habitans. Elle est en lieu plain, & vny sur la riuier d'Arne, qui passe au milieu de la ville qui est iointe par quatre beaux ponts. Elle est aussi pauce d'une pierre carree, & a de fort belles places. Somme que c'est vne des plus agreables villes que on puisse voir, de sorte que les Italiens la nomment Florence la belle.

Dauantage le Palais du grand Duc est vn des plus superbes, & beaux bastimens de l'Europe. Il tient la place de plus de cinquante logis qui y souloient estre, & il peut loger au cops de logis où est la sale pour représenter les Comedies, vn grand nombre d'estrangers, cōme Seigneurs, Ambassadeurs, & autres, ausquels il est destiné, de sorte que ce Palais est vn des Pitty, qui ne cede à aucun d'Italie, & en surpasse plusieurs des Roys del'Europe, tant pour la grandeur du bastiment, pour l'Architecture, & pour l'ornement, que pour la beauté des iardins, fontaines, statues, & autres choses.

Ce

Ce fut autresfois vn dessein inegal aux forces d'un gentil homme nommé Luc de la maison de Pitty, qui fit toute la partie de deuant, mais estant deuenu pauvre en batissant, il fut contraint de le vendre au Duc Cosme.

On le fit mourir depuis pour des choses d'Estat. En fin Charles Archiduc d'Autriche dit, passant par Florence, que c'estoit vne ville qu'on ne deuoit monstrier qu'aux bonnes festes.

Outre ce Palais le Grand Duc en a vn autre en vn lieu escarté appelé Pratolin, avec plusieurs chambres, & sales, qui jettent de l'eau, comme celuy de Tiuly, & veritablement il sent fort sa grandeur. Il a encor d'autres maisons de plaisir, dont l'une est appelée Pogge esloignée de dix milles, & l'autre Castro, & toutes deux sont de grande beauté, tant pour l'assiette, que pour le bastiment, & les ornemens des fontaines, & autres choses, de sorte qu'il ne peut guere desirer de plus beaux logis.

Volterre est sur le sommet d'une montagne. Elle a ses murailles faites de pierre de taille, de la longueur presque de six pieds, & jointes ensemble bien proprement sans bitum. Elle a cinq belles portes, & à chaque porte vne tres-belle fontaine. Ses murailles monstrent assez son antiquité, de mesme que ses sepulchres, ses epitaphes en lettres Etrusques, ses tres-anciennes statues de marbre, & plusieurs autres choses.

Pise est mise par les anciens entre les lieux maritimes de la Toscane, & si ancienne qu'il y a fort peu d'Auteurs d'entre les plus vieux qui ne l'ayent comprise dans les histoires. Elle est assise entre deux fleuves, c'est à sçauoir entre l'Arne & Lefare, qu'à present on nomme Serchie, & ces ruières se joignoient ensemble du temps de Strabon à Pise, & s'estendoient de telle sorte, & alloient de si grande roideur, qu'il estoit impossible qu'on peust rien discerner d'un bord à l'autre. Mais à present le Serchie passe à Luques, & est fort esloigné de l'Arne. C'est vne ville fort grande, diuisée par vn fleuve, & conjointe avec deux ponts.

Les murailles en sont fort hautes, & de marbre. Il y a vn temple qui a ses portes d'airain, & aupres vne tour bastie par vn artifice exquis. Car par dehors elle pend, tellement qu'il semble qu'elle doit tomber à l'heure mesme, & au dedans elle est droite, & faite au niveau.

Les Fons où l'on baptise sont aussi des plus rares, mais le cimetiere encore plus; veu qu'il est clos de murailles, & de portiques & contient vn fort grand espace, & la terre consomme les corps dans vingt-quatre heures.

Ces quatre choses sont basties dehors & dedans de pierres exquises, & sont en vne mesme rue, non toutes ensemble, ny aussi fort loing l'une de l'autre. Elle fut autresfois si puissante qu'elle contesta contre les Venitiens, & les Geneuois. Elle s'accrut des maux que les Sarrazins firent à ceux de Genes l'an 933. Car il y en eut beaucoup qui se retirerent là, comme en vn lieu d'assurance.

En fin elle fut accablée par la route que les Geneuois donnerent à son armee près l'Isle de Giglio, ou du lis, veu qu'elle demeura si foible depuis qu'elle ne peut plus faire teste à personne, ains fut contrainte de ployer le col sous le joug des Florentins, desquels s'estant reuoltée à l'arriuee de Charles VIII. Roy de France, estant de nouveau subjuguée dans quinze ans, la ville demeura presque entierement deserte. Car ses citoyens impatiens de la domination des Florentins, passerent en Sardaigne, en Sicile, & en autres lieux pour y demeurer.

Mais le grand Duc Cosme tascha de la peupler, en y mettant vne Vniuersité, dans laquelle a fait lecture des lettres Iules Cesar Bulenger, Docteur en Theologie, qui a esté fort estimé dans Paris, tant à cause de ses Predications grandement doctes, que pour ses leçons en eloquence, par laquelle il deuoloppoit l'antiquité & la faisoit reuiure: il fut enuoyé à Siene pour en gouverner l'Vniuersité par le seigneur Marquis de Botty dit de Campille, par commandement du grand Duc, & y batissant vn beau Palais pour la demeure des Cheualiers de S. Estienne, & en donnant plusieurs exemptions aux habitans, toutesfois elle n'est encore aujourd'huy guere bien garnie d'hommes.

Pistoye est assise au pied du mont Apennin. Elle se ruyna par ses discordes, avec lesquelles elle entraîna Florence, & presque toute la Toscane. Car deux ieunes hommes de la famille des Canceliers, ou Chanceliers, estans venus aux grosses paroles, & l'un d'eux ayant esté blessé fort legerement, le pere de l'autre pour appaiser la querelle qui en pouuoit naistre, enuoya son fils, pour demander pardon au ieune homme, qui auoit esté blessé. Mais il s'en ensuiuit vn effect cōtraire; veu que le pere du blessé ayant fait prendre ce ieune homme par ses seruiteurs, luy fit couper la main sur vne mangeoire de cheuaux, & le renuoyant luy dist, va, & dis à ton pere que les bleseurs ne se guerissent pas avec des paroles, mais avec le fer.

M m iiii

Pour ceste cause vne cruelle guerre s'estant esleuee entre ces deux familles, dont l'une s'appella Blanche, & l'autre Noire, elles attirerent à leurs deux partis le reste de la ville, qui se veid plusieurs fois arrosée du sang de ses citoyens.

Les Florentins au lieu de faire mourir les chefs des 2. factions les tirerent comme en exil dans leur ville, où les Donats ayans pris la protection des Noirs, & les Cerehis des Blancs, Florence fut toute diuisee en blancs & noirs qui la trauaillerent assez longuement. Arezzo s'estant par ses longues dissensions presque ruiné de luy-mesme, fut vendu par Louys I. Duc d'Anjou, pour quarante mille florins d'or aux Florentins, de mesme que Cortonne fut vendue dans peu de temps apres aux mesmes par le Roy Ladislas.

Il y a encores d'autres bonnes places en l'Estat de Florence, comme Prato, Presche, S. Miniat, Empoli, S. Germain, Fiquene, Pietra santa, ou Pierre sainte, Barga est sur le bord de la mer Liurne, & plus auant Plombin à trois milles loing.

5. L'Estat de Florence confine avec celuy de Siene, ville ancienne, & qui ayant esté colonie des Romains s'assujettit en fin beaucoup de pais. Il survint vne guerre mortelle entre ceste ville, & Florence, depuis que les Guelphes, & Gibelins furent suscitez en Italie. C'est vne belle ville, & forte d'assiette, mais qui a perdu avec la liberté beaucoup de son peuple, & de sa splendeur. Elle a cinq milles de tour, & fait vingt mille ames, & n'est esloignée de Florence de plus de trente-trois milles. Les villes de l'Estat de Siene sont Pienze, Montaclin, Quins, Saone, Molle, & Grosset, avec 26. autres places fermées de murailles: mais avec peu de peuple.

Q V A L I T É.

6. **F**loréce est en vne assiette pleine, ceinte de montagnes, & distinguée de collines, il n'y a pais qui soit cultivé avec plus de diligence, ny de delicatise, & de soing. On y fait en peu d'espace de terre recolte de vins, huiles, grains, legumes, & fruiets en abondance, & l'on y void les villages espais au possible. Il y a des vins fort excellens entre lesquels celuy qu'ils appellent Trebian, tient le premier lieu, veu qu'il peut estre preferé en douceur à la maluoisie.

Le pais de Pise est propre aux bleds, & si fertile qu'il peut nourrir toute la Toscane. Toutesfois depuis la perte de la liberté, les laboureurs ont manqué aux champs, de mesme que les habitans à la ville.

Les vins de ce terroir ne sont guere estimez. Quant aux autres fruiets, il les produit moyennement bons, mais les melons sont bons par excellence.

La mer est proche delà, & pourtant c'est vn lieu propre à exercer la marchandise. L'air y est assez mal sain & dangereux, principalement aux estrangers. On croit que l'impureté de cet air vient de ce que le pais n'est pas habité.

Le pais des environs de Pistoie est montueux, mais il y a d'extremement bons pasturages. Volterre a son terroir plus riche de mines que de fruiet. Car on y trouue des veines d'Albastre, d'Azur, de Vitriol, & d'autres minéraux, & il y a des fontaines d'eau salee, de laquelle on fait de fort bon sel, & en abondance.

La riuere de Chiene coule par le terroir d'Arezzo, elle est bourbeuse & grandement dommageable à ceux qui en sont proches. Il est vray qu'on tasche tous les iours de seicher ces marescages, & de destourner les eaux. Au pied de l'Appennin vous auez le pais de Mugelle trauersé par la Siene, qui est agreable, & porte quantité de fruiets; & entre l'Arne, & le pais d'Arezzo, vous auez le Casentin qui est riche de grain, de vin, & de bestial: mais le Valdarno abonde fort en grains, Chianty en vins, & Mugelle en fruiets.

Les champs d'autour de Siene sont fort couverts d'herbes, & nourrissent beaucoup de bœufs, de beufles, & de brebis. Ils rapportent aussi force froment, vin, & huile, & abondent en toute sorte de fruiets.

M O E V R S.

7. **L**es qualitez des Toscans paroissent par excellence aux Florentins; veu qu'ils ont l'esprit subtil, de grande espargne, extremement accorts & aduisez, diligens, industrieux, propres à toute sorte d'arts, tant de paix que de guerre. Ils scauent prendre leur fait bien à point, demeurer sur leur aduantage, & ne laisser perdre, ny esgarer aucune chose. Ils ont defendu leur liberté iusques à l'extremité: mais par la trop grande subtilité de leurs esprits ils ont vescu en perpetuelles discordes, qui les ont en fin ruinez: de sorte que le dire de Thucydide est fort veritable, que les hommes qui ont l'esprit vn peu emoussé gouvernent mieux vne Republique, que ceux qui l'ont trop subtil. Ils sont excellents au fait de la marchandise, & n'ont leurs semblables à dresser des bastiments.

Il s

Ils vſent d'un veſtement modeſte, & graue, & paſſent tous les Tofcans en ciuilité, & à bien parler.

Ceux de Siene ſont fort differens de l'humeur de ceux de Florence. Car les Florentins ſont chiches, & retirez, & les Sienois liberaux & courtois aux eſtrangers, les vns pouruoient fort à l'aduenir, & ſont de fort dure deſſerre, les autres faciles, & viuants comme au iour la iournee, ceux là ſongent attentiuement à leurs affaires, & ſont diſſimulez, ceux-cy ſont ſimples, & portent le cœur ſur le front: ceux-là ne ſont attentifs qu'à leurs marchandises, & au gain, & ceux-cy ſont contents de leurs reuenus, & des fruitz que leur apportent leurs metairies.

Au reſte, les Italiens attribuent des qualitez aux citoyens des villes de cét Eſtat que ie ne veux paſſer ſous ſilence. Ils nomment les Florentins lents, ſplendides, & ſur tout lors qu'il vient des eſtrangers, comme il n'y a rien de plus prodigue qu'un homme chiche. Ils les appellent auſſi ruez en la marchandise.

Ceux de Siene ſont nommez tardifs au conſeil, & deliberations, heureux en guerre; mais ils doiuent bien maintenant auoir perdu ce nom, puis qu'ils ont eſté ſi malheureux que de perdre leur liberté, & les Italiens leur doiuent oſter ce tiltre, & cét epithete; magnifiques à l'endroit de leurs hoſtes, & leurs ennemis, magnanimes à pourſuiure la vengeance des of-fences qu'on leur a faites.

Ceux de Prate exercent des ſacrileges au temps de la guerre.

Ceux de Piſtoye ayment à reſpandre le ſang, portent à la guerre des poignards, & ſont excellens à parer aux coups qu'on leur jette.

Ceux d'Arrezzo traittent ſimplement, & preſque de leur ordinaire leurs hoſtes, & ſont volontiers des eſpees qui ont bonne pointe, & ceux de Piſe ſont inconſtans en leur conſeils & deliberations.

On dit que les femmes de Siene ſont belles, celles de Florence delicates, celles de Piſtoye faciles, celles d'Arrezzo tenantes & auaricieuſes.

RICHESSE.

SIL'Eſtat de Florence manque de froment, eſtant d'ailleurs tres-abondant en vin, chair, & autres choſes neceſſaires, celui de Siene en a d'autant plus grande abondance: à raiſon de 8. la fertilité de ſes champs, qui ne cedent en rien à ceux de la Pouille, de ſorte que non ſeulement il ſupplee à la neceſſité de Florence, mais en diſtribue encor aux Geneuois, Luquois, & autres circonuoisins, ſi bien que la fertilité du païs, & l'induftrie des habitans pour ceſte Prouince depart pluſieurs choſes aux eſtrangers, ayant peu de beſoing de celles des autres. Pour ceſte cauſe les richelſſes des particuliers ſont dignes de conſideration. Elles viennent de leur induftrie, ou de leur reuenue, comme les richelſſes des reuenus & rentes ſont ordinairement grandes en un païs gras, & fertile, où l'on reçoit un grand profit avec peu de peine, & où le païs eſt moins abondant, on void florir les arts, & la marchandise: & de là vient qu'en l'Eſtat de Siene, ceux qui y habitent ſont riches de rentes, & peu marchands: & en celui de Florence, les habitans ſont beaucoup plus riches par le moyen de leur induftrie.

Ceſte ville eſt pleine d'artifans de toutes ſortes, qui ſont avec grande diligence, & fort proprement quantité de draps de toutes façons, de laine, & de ſoye, & auſſi des draps d'or qui ne doiuent rien à ceux de Flandres.

Elle abonde principalement de ceux qui exercent l'art de la ſoye, & de laine, qui ſont miſes en vſage par les plus nobles, & riches de ceſte ville avec leur profit, & de tout le peuple, & ces ouurages ſont diſtribuez non ſeulement à cét Eſtat, mais à toute l'Italie, & à vne partie du reſte de l'Europe, & meſme il en va iuſques aux nouuelles Indes, & ceux qui y menent les ſerges gagnent cinquante pour cent, & il y a telle annee qu'on fait à Florence pour deux millions de ſerges, qui eſt vne choſe fort conſiderable.

Ces richelſſes des citoyens de Florence ont eſté cogneuës beaucoup plus grandes au temps de la liberté en pluſieurs guerres, & depences publiques, en vne grande quantité de Palais ſomptueux baſtis avec vne royale depence par des particuliers dans la ville, mais beaucoup plus dehors, comme on void en la plaine, & aux coſtaux qui ſont à l'entour.

Le Clerge eſt aſſez riche, à cauſe de pluſieurs Eueſchez, Abbayes, Preuoſtez, Hoſpitaux tres-riches, & grand nombre de Monafteres, & tout cecy monte en tout, à ce qu'on tient, à la ſomme de cinq cents mille eſcus de rente. 9.

Ceſte richelſſe des particuliers groſſit le theſor du Prince, veu que les richelſſes priuees ne ſont autre choſe que le theſor de celui qui domine, diuiſé en pluſieurs bources, principale- 10. ment lors qu'il ſ'en peut ſeruir, comme ceſtuy-cy fait facilement par le moyen des charges,

& impositions qui se pratiquent en ceste ville.

Les contrats de mariage payent huit pour cent, les contrats d'achat & de vente de terres, & de maisons payent semblablement la mesme somme.

Les loüages des maisons payent la dixiesme partie.

Ceux qui plaident payent vne certaine imposition appelée Sportola auant que de commencer le procez. Il y a la dace du bestial qui est mené à Florence.

Lors que la chair est pesée, elle paye vn quattrin pour liure. Les changes payent tant pour cent, & en fin il n'y a chose portée hors de Florence, ou faite dedans, qui n'aye sa charge. Or le Prince se seruoit encore de l'argent des particuliers en ses necessitez avec vne fort grande facilité, & c'estoit en ceste sorte. Quand il falloit qu'il pourueust à auoir cent ou deux cents mille escus, on faisoit vne liste de tous ceux qui auoient de l'argent comptant, qui estoient, comme ils sont encore, bien cogneus du Prince. Entre ceux-cy l'on faisoit vn repartiment, assignant à chacun la portion qu'il deuoit desbourcer, plus grande ou moindre, selon la quantité de ses moyens: toutesfois elle ne passoit iamais cinq mille ducats. Ce repartiment estant fait, on signifioit à chacun qu'il eust à payer sa part dans le terme de tant de iours; & ce terme n'estoit passé d'aucun, tant pour crainte de la peine, que pour ne perdre la grace du Prince. Et lors que chacun auoit donné ce à quoy il auoit esté cottisé, on assignoit autant de credit sur la taxe de tout l'Estat, qu'il y auoit d'argent payé, & dans le terme de vingt-huit mois (veu que ceste taxe s'exige en autant de temps) ils estoient remboursés de leur argent, & de ceste sorte le Prince se seruoit des biens de ses citoyens fort proprement aux necessitez, & mesme en ne les incommodant que fort peu. Mais le grand Duc qui est à ceste heure, n'y se pas (qu'on sçache) de ces façons de faire.

Les reuenus publics montent iusques à la somme d'un million & demy.

On tire de la seule ville de Florence, de toutes les daces, gabelles, & autres fortes d'impositions six cents mille ducats toutes les annees.

De Siene cent-cinquante mille ducats: de la Doane de Liorne cent trente mille.

De la dace des meules de moulin par tout l'Estat, excepté à Siene, cent soixante mille ducats.

Du sel, des mines de fer, & d'argent, presque pareille somme.

Après cela il gagne aux changes, sur lesquels il a vne grande quantité d'argent.

Il tire aussi vn grand profit de les galions qui portent des marchandises, & de ses galeres conduites jadis par le Cheualier de Beauregard, gentil-homme François, qui a fait de belles & grandes prises, lors qu'il a esté en courré. On tient que le feu grand Duc trouua au tresor de son predecesseur environ dix millions d'or, & pour deux millions de joyaux, & l'on doit croire qu'il a bien augmenté ceste somme.

F O R C E S.

II. **O**N peut dire que l'Estat de ce Prince est de fer, veu qu'outre la naturelle forteresse des montagnes qui le ceignent de trois costez en forme de muraille, il y a du quatriesme vn bon nombre de forteresses, qui sont en l'Estat de Siene, assis de ce costé-là.

On compte entre celles-cy cinq villes fortifiées, qui sont Siene, forte au possible, tant par nature, que par art; Montaclin pareillement du tout fort, tant par assiette, que par travail: mais Quinsi, Grosset, & Soane ont beaucoup de deffauts qu'on leur peut opposer. Outre les villes on trouue aussi en cet Estat quelques forteresses assez considerables, comme Radicofani, Montfalcon, Lucignan, Monterison, & autres, qui outre quelque deffaut en la forme, en ont encore en la quantité, estants petites places, & par consequent capables de peu de gens de deffence, & de peu de retraite.

En l'Estat de Florence toutes les villes de Mōtpulcain en Sus sont fort bien fortifiées, & particulierement Florence, veu que combien qu'elle ne soit route ceinte de murailles nouvelles, & à la moderne, toutesfois elle a deux bonnes forteresses, l'une qui est saint Miniât, assise sur vn costau qui commande à la ville, l'autre appelée le Chasteau en la Plaine, fait au temps de la liberré.

Ces forteresses basties principalement pour brider les peuples, peuuent seruire en vn besoing de quelque deffence contre les estrangers: Mais pour offencer elles ont quelque deffaut en la forme, & l'on leur peut opposer leur petitesse.

Le grand Duc tient à S. Miniât pour garde quarante soldats, & au chasteau cent. En cet Estat de Florence & de Pise, il y a d'autres forteresses, comme Empoli, Prato, Liorne, Castrocara en Romagne, & Sassio. Tous ces forts, de mesme que les premiers, ont beaucoup de deffauts en la qualité, mais beaucoup plus en la quantité, estans tous fort peu capables. Je ne

m'arre-

m'arrestera pas à les décrire plus particulièrement, pource que le temps ne le permet, & mon dessein m'en retire.

Quant aux hommes de guerre, & principalement ceux que le grand Duc tient sur terre, il a vne bonne & grande infanterie, enroollée par tout son Estat, jusques au nombre de trente six, ou trente huit mille. Tous ces hommes reüssissent fort bien, estants par nature bien disciplinez, comme c'est le propre de ceste Prouince, qui a produit anciennement, & porte encore de fort bons soldats.

Le Prince les fait donc exercer avec toute diligence, & plusieurs bons Capitaines sont employez à cet effect, outre qu'en particulier chacun tasche de bien tirer del'arquebuse, tant pour son plaisir, qu'à cause du prix proposé par le Prince.

On tire toute ceste gendarmerie, non seulement du plat-païs, mais encores des villes, excepté toutesfois de Florence; d'autant que peut-estre que le Prince n'estime pas que ce soit sagement fait mettre les armes en la main à ce peuple, & nul n'est exempt de cet enroollement, sinon les Prestres & escoliers. Il n'est permis de porter les armes, tant dedans que dehors la ville, à celuy qui n'est pas enroollé, ny à homme qui puisse faire proffion de soldat, ny dans l'Estat, ny dehors, sous grandes peines, s'il n'est de ce nombre.

Ces gens de guerre ont outre cela plusieurs priuileges, exemptions, tant de ne pouuoir estre mis en prison pour debtes, que d'autres choses, & ces priuileges estans inuiolablement obseruez, causent que plusieurs bons vieux soldats de la guerre de Flandres, de France, & de Leuant, s'y sont volontairement faits enrooller: de sorte que tant pour la quantité que la qualité, on pourroit dire que ceste troupe seroit la meilleure d'Italie. Chacun est obligé de payer ses armes qui luy sont baillées pour son vsage, & les doit tenir nettes, & en ordre pour toutes necessitez sans aucune dépence du Prince.

Le grand Duc peut en toute occurrence faire venir à Florence dans six ou huit iours au plus toute ceste gendarmerie, tant pource que Florence est presqu'au milieu de la Toscane, comme le centre, & esgalement voisine de toutes ses parties, comme aussi pour le bon ordre qu'il y a donné, disposant toute chose avec beaucoup de facilité.

Outre cela il a fait enrooller vn bon nombre de Castadors, dont il se sert encore en temps de paix, les faisant traualier aux forteresses, leur faisant destourner les riuieres, & meliorer les terres.

Quant à la Caualerie, ce Prince entretient ordinairement cent hommes d'armes, auxquels il donne en temps de paix sept escus par mois, & en temps de guerre l'ordinaire de la banque. 12.

Outre ce il entretient quatre cents cheuaux legers à trois escus par mois, en temps de paix, & en temps de guerre comme les autres ordinaires de la banque. Toute ceste Caualerie est de son Estat, & outre la paye elle a plusieurs exemptions reelles, & personnelles; de sorte qu'on en a fait des compagnies raisonnables. Et au cas qu'il sorte d'Alger quelque bonne troupe de Corsaires, on ne se fie entierement à la garde des Tours, que le Duc a pour cet effect en diuers lieux, qui se répondent par signaux l'un à l'autre, ains assure la Caualerie avec les Tours, & les Tours par le moyen de la Caualerie. Outre les susdites compagnies il entretient vne bonne troupe de cheuaux.

Voila les forces ordinaires. Mais quant aux extraordinaires, il y en pourroit auoir beaucoup plus, d'autant que l'Estat est peuplé, & remply du nombre de personnes que j'ay dit, & autant d'estrangers qu'il en pourroit entretenir à la solde, comme c'est la coustume des autres Princes.

Quant aux forces de la mer, le Duc Cosme en eut jadis fort grand soing, cognoissant combien elles estoient necessaires & importantes, & qu'un Prince ne se peut appeller grand, s'il n'est puissant sur la mer. 13.

Estant donc meu par ces raisons, & sollicité par ses propres pensees, qui aspiroient tousiours à choses plus grandes, il pourchassa, & obtint avec l'autorité de Charles cinquiesme la resignation de l'Isle d'Elbe du Seigneur de Plombin, qui en estoit maistre, tant pource qu'il ne la pouuoit deffendre des Corsaires qui l'auoient ruinee, qu'à cause qu'elle pouuoit pour son peu de deffence paruenir aux mains des Turcs, & qu'à raison de son assiette elle auroit beaucoup preiudicié, & porté dommage à toute l'Italie. Toutesfois il laissa tous les reuenus au seigneur de Plombin, & sous son gouuernement tous les villages & les lieux ouverts.

Cete Isle a vn port qui s'appelle l'ortoferrario, capable de quelque grande & puissante armee qui y puisse venir, comme en vn lieu commode; on y void arriuer toute sorte de vaisseaux qui vont au Ponant, ou qui en viennent, & qui passent apres à Liorne, déchargent leurs marchandises avec vn grand profit de ce Prince.

de deux Papes de la maison de Medicis, c'est à sçauoir premierement de Leon, & puis de Clement qui soumit entierement Florence à ceste famille. Au contraire le grand Duc reçoit vn grand bien de ceste amitié, tant pour la reputation de son Estat, & de ses affaires, qu'il augmente avec ceste vnion, qu'à cause des aydes & commoditez qu'il en reçoit, faisant du bien à plusieurs de ses seruiteurs avec les richesses de l'Eglise.

Estant donc poullé par ces considerations, & aduertty par ses succez, il taschera tousiours de faire qu'on n'elise pas vn Pape qui ne soit son obligé, & pour ceste cause, il s'esluye ordinairement de gagner l'amitié de plusieurs Cardinaux en diuerfes sortes, & principalement de ceux qui sont en quelque estime. Mais ceste amitié n'est de moindre profit au S. siege, à cause de la grande reputation qu'il reçoit de l'vnion d'un Prince si voisin & si puissant, d'autant que les deux Estats ne sont presque qu'une mesme chose. De sorte que les interets estans communs, & reciproques, on doit croire que ceste vnion doit estre soigneusement conseruee.

Quant au Roy d'Espagne, vn grand Duc François de Medicis ayant cy-deuant espousé sa belle sœur, il faut croire que ses successeurs sont avec luy en fort bonne intelligence, & mesme on tient, qu'à Florence on supporte entierement les Espagnols, & à cause de ceste estroite amitié avec son beaufrere, le Roy d'Espagne Philippes troisieme.

Ce n'estoit toutesfois, selon l'auis de plusieurs personnes de iugement, pour rompre entierement avec la France, pource que la Roynie luy est trop proche parente, & ne luy a iamais rendu que toute sorte de tesmoignages d'amitié. Mais il estoit à craindre en ce temps-là que la sollicitation de sa femme, & encor plus de quelques autres, qui pourroient estre pour quelques considerations mal affectionnez aux François, le retireroit de l'amitié que son pere portoit au Roy, & à la Roynie de France. Puis il void que les François sont assez esloignez de son Estat, & que le Roy d'Espagne en est proche par le moyen de Milan, & du Royaume de Naples; de sorte que l'alliance, & la commodité le pourroient attirer à embrasser du tout ce party. Dequoy les Roys de France se soucieront tousiours bien peu, puis que c'est vn Prince qui ne leur peut nuire en aucune sorte.

Pour le regard des Geneuois ils estoient en assez peu bonne intelligence avec le feu Duc François de Medicis, pour raison des Espagnols, mais puis que cestuy-cy ne s'est allié avec le Roy d'Espagne, il ne faut douter que ceste Republique ne soit desormais bien avec luy, & ne luy face voir tous les tesmoignages d'affection qu'elle pourra luy rendre. Toutesfois la pretention de la Corse, comme estant de l'Estat de Pise, pourroit empescher ceste amitié.

Quant au Duc de Sauoye, bien qu'exterieurement on ne voye que des offices d'amitié, & d'estime de l'un à l'endroit de l'autre, toutesfois l'un enuiant la richesse, la force, & le bonheur de l'autre, & l'autre la noblesse, la reputation, & la richesse du premier, on sçait assez qu'aux lieux où vne grande jalousie regne, il n'y peut auoir aucun desir de la grandeur, & de l'auancement du concurrent.

Ce Prince a bonne intelligéce avec le Duc de Mantouë, à cause du parentage, & l'on croit asseurement qu'ils ont mesme but pour leur conseruation, on ne sçauoit toutesfois si l'alliance prise en Sauoye ne refroidiroit point avec le temps l'amitié du Duc de Mantouë, pour quelques considerations qu'il vaut mieux taire qu'exprimer.

Quant au Duc d'Vrbain, à cause qu'il le tient moindre que luy en grandeur, & en force, il arrive bien souuent des fâcheries qu'apportent les limites des iuridictions.

Après cela les Luquois sont au milieu de l'Estat du grand Duc, enfermez de tous costez dans iceluy, deffailans de viures, & de toutes choses necessaires: & d'autant qu'ils ne les peuvent auoir que du grand Duc, ou par le moyen du passage de ces choses par son Estat, ce Prince les peut faire tomber entre ses mains sans coup frapper. Mais il ne le fait non plus que ses predecesseurs, & ne le fera peut estre, tant pource que ceste Republique estant recommandée à l'Empereur, & à la Chambre de l'Empire, il ne le pourroit faire sans l'offencer grandement, qu'à raison du profit qu'il reçoit peut estre plus grand de leur liberté, que si ceste Republique luy estoit entierement soumise, pource qu'il est asseuré de s'en pouoir seruir en ceste sorte à sa volonté, & necessité, & qu'il sera secouru de ses moyens avec emprunts, & autres voyes, & encor de ses gens, selon sa puissance. Au contraire, quand il s'en voudroit rendre maistre, il seroit asseuré que ces hommes accoustumez à la liberté qu'ils ayment extremement, & pleins de gloire, & plus riches d'argent comptant, & de meubles, que de possessions, abandonnant leur patrie, laisseroient les murailles, & non pas la ville; & par ce moyen le grand Duc perdrait la commodité qu'il en reçoit à ceste heure.

GOVERNEMENT.

Il faut maintenant que ie face vn discours de l'administration de la Iustice, de la distribution des Magistrats, & de toute la forme de la façon de viure vertueuse, & bien reglée de la ville.

Quant à la premiere partie du gouvernement, qui est le mantien des affaires d'Estat, combien qu'elle consiste toute en la volonté du Prince, toutesfois cestuy cy prend conseil de quelques-uns qui sont près deluy, & principalement de Dom Jean de Medicis, il n'y a point de Conseillers d'Estat: ce qui fait qu'on ne peut dire que le Conseil a opiné quelque chose, ains que c'est le vouloir du Prince: & mesme les deliberations qui se font, sont plus secretes, & plus asseurees.

Pour le regard de la seconde partie qui est celle des iugemens, elle est maniee par les mesmes Magistrats, deuant lesquels on la traittoit au temps de la liberré, tant au ciuil qu'au criminel, veu que les procez ciuils sont iugez par vn nombre de Docteurs de Rote; de mesme qu'à Il ome, & à Bologne, & les cau'es criminelles comme auparauant: la place de Gonfalonnier estant donnee à vn qui ayant changé de nom est appelé Lieutenant. On y void des Conseillers ordinaires, le Magistrat de huit, & tous les autres Magistrats de villes & des Podestaries, excepté toutesfois les Gouverneurs des villes principales qui sont enuoyez par le Prince, de mesme aussi que les Capitaines des fortresses, en la mesme sorte qu'on faisoit au temps de la Republique, sont tirez premierement hors des boëtes, où distinguant le tout en trois rangs selon la condition des hommes, tous les nobles y sont mis.

De la premiere boëte on tire les Magistrats de plus grande importance, de la seconde les moyens, & de la troisieme les inferieurs, & lors qu'on a tiré cinq gentils-hommes pour chaque Magistrat, celuy qui a plus de voix au Conseil est esleu. Les boëtes sont renouellees tous les cinq ans, & celuy qui veut passer de l'une à l'autre le peut faire en ceste occasion. Ces eslections sont autorisees par le Prince, qui les veut reconfirmer toutes.

Il est vray qu'il ne s'empesche presque iamais du fait des Magistrats, mais il a vn Secretaire appelé du criminel, qui void presque tous les procez plus importants, & luy en rapporte le contenu avec la sentence. Ce qu'il fait afin que les Magistrats sçachans que leurs actes sont sceus, & bien souuent examinez par le Prince, administrant la iustice comme il fait, pour la crainte de l'infamie, & de la peine: & il le fait aussi pour auoir la Seigneurie directe en toute chose. Il maintient ceste sorte de gouvernement, pource que se deuant seruir de personnes qui administrent la iustice, il veut avec ceste petite ombre de la liberté ancienne satisfaire en partie au desir des citoyens, d'autant qu'ils ont en quelque façon la commodité de contenter leur ambition par le moyen du profit qu'ils tirent des honneurs & charges publiques.

Cecy mesme est obserué à Siene, & pour le mesme respect, veu qu'on y void les anciens Magistrats, & Conseillers, l'autorité du Palais, où la Seigneurie demeure, & en fin les restes, & l'ombre de la Republique qui fut autresfois, & le grand Duc y tient vn gouverneur general, qui represente immediatement le Prince, avec souueraine autorité, qui a l'œil sur toutes choses, & rien ne se fait sans son sceu, ains mesme sans le sceu du Prince, aux affaires d'importance.

On void donc avec ceste face tout le gouvernement de ces villes, autant fameuses maintenant par leur noblesse, qu'elles furent jadis heureuses par leur liberté. Or pource que la splendeur avec laquelle les Princes ont accoustumé de viure, est vne chose qui represente plus leur Majesté, le grand Duc maintient vne Cour, ou maison assez considerable, qui surpasse, à dire la verité, les bornes du Duc, & n'arriue toutesfois à la magnificence des Roys. Il a un bon nombre de Gentils-hommes diuisez sous deux ordres, c'est à sçauoir de la bouche, & de la maison, avec grand nombre d'officiers & de seruiteurs. Dauantage, il y a à son seruice environ soixante enfans de Gentils-hommes, & de Seigneurs qu'il fait nourrir avec grand soing, & dresser à toute sorte d'exercices.



ORIGINE DE LA MAISON DE FLORENCE ET DES GRANDS DVCS DE TOSCANE.



HISTOIRE de la maison de Medici est autant memorable comme sa prudence en sa fortune est admirable, elle est meslee parmy celle de France, & desia par deux fois les François ont recouru aux fleurs de ceste maison pour faire refleurir & renaistre la branche Royale, & qu'il importe que nos Princes sçachent leur estoc maternel comme le paternel. ^{18.}

Pour sçauoir ceste Histoire, il faut sçauoir celle de Florence, & reprendre les seconds fondemens sous Charlemagne, apres que les Ostrogots l'eurent ruinee (comme dit Gio Vellani liure premier de son Histoire contre Guichardin) & se souuenir de ceste vaieureuse vertu & vertueuse valeur d'Euerard de Medici, Cheualier François en l'armee de Charles premier, lors qu'il passa en Italie contre Didier Roy des Lombards l'an 801. qui dès lors commença à faire voir ce que l'on deuoit esperer de sa famille & posterité par la deffaite de Mugelle Geant, qui remplissoit tout le pais de voleries & de brigandages: la ville de Florence dependoit de l'Empire, & estoit gouvernee par Consuls assistez d'un Conseil; & ce gouvernement dure encore aujourd'huy aux villes qui sont Imperiales, sans estre subiectes à l'Empereur.

Depuis que ceste fameuse faction des Guelphes & des Gibellins eut diuisé l'Italie, & la pluspart des Princes de l'Europe en deux contraires partis, & que les seditions ordinaires du peuple prompt à la colere, violent aux nouveautez, abbatu en ses peines & aspre en ses vengeance eust rendu ceste ville en tel estat qu'elle ne se pouuoit tenir entre la liberté & la seruitude, ny demeurer neutre pour les grands desseins de ses voisins, elle veid en moins de rien les ruines & de son repos & de sa liberté, car d'vnite qu'elle estoit elle se diuisa en deux factions.

Et comme il ne faut qu'une petite bluette de feu pour faire vn grand embrasement, vn petit trou pour faire abismer vn vaisseau, & vne petite querelle pour exciter vn grand trouble, le meurtre d'un seul gentil homme des Buondelmons tué le iour de Pasques entre le vieil pont de saint Estienne de Florence par les Amidei, irritez de ce qu'il auoit laissé vne fille de leur maison qu'il auoit promise pour en espouser vne autre, fut la premiere ouuerture, par laquelle les ciuiles fureurs entrerent en la Republique; ces deux factions pour se vanger plus aisément l'une de l'autre, & faire passer leurs passions particulieres sous les pretexts de la guerre publique echauffee entre les Guelphes & les Gibellins prirent diuers partis, les Buondelmons suiuirent les Papes, & se firent Guelphes. Les Amidei se rangerent du costé de l'Empereur & furent Gibellins.

La Republique n'auoit encore esprouué les estranges cupiditez qui comblent les Estats les plus heureux de ruines & de troubles, elle n'auoit encore senty ces violentes conuulsions qui affoiblirent & retirerent ses nerfs, les nouveautez n'auoient que bien peu alteré le temperament d'humeurs, car l'ancien ordre de son gouvernement subsistoit encore, & en cet ordre la paix & la seureté de l'Estat, qui estoit sous l'autorité des Consuls & Seigneurs ordonnez aux six quartiers de la ville pour veiller aux affaires publiques. Ceux de la maison de Medici y entroient à leur tour; mais depuis que l'Empereur Frederic eut passé en Italie avec vne grande armee de Gibellins, ses partisans se jetterent d'un plain sault sur le commandement de la ville pour se rendre maistres & depouiller les Guelphes de forces & d'autorité.

Il est vray que la corruption n'estoit si generale en ceste ville qu'il n'y eust plusieurs familles, & entre autres celle de Medici, esloignees de ceste contagion, pleines de vigueur pour releuer la chaleur naturelle, purger les mauuaises humeurs, remplir le corps de bon sang: ils

N n ij

ne voulurent pas guerir le mal, ny releuer les ruines publiques par celles des particuliers, mais ils firent tout ce qu'ils peurent, afin de retrancher la licence des méchans, & souffrir l'autorité des gens de bien.

Mais comme le naturel de la faction est de ne trouuer repos qu'au trouble, les Gibelins aduertis que Conrad auoit dressé vne celebre armee pour succeder aux desseins de Manfred, aux droicts de son pere, & courir les Guelphes en Italie, partirent promptement le lendemain, prennent l'occasion par les cheueux & brantlent pour se ruer sur leurs ennemis, les plus lasches des Arabes & les plus froids brûlent d'ardeur de venir aux armes, leur remuement seruit de trompette & de rocfin aux Guelphes, qui craignans d'estre preuenus, firent approcher Charles d'Anjou près de la ville, & donnerent tellement l'épouuante aux Gibellins qu'ils les sortirent de la ville, sans estre pressez, n'y attendre le son de la Martinelle, craignant que pis ne leur aduint.

(Les Florentins auoient vne cloche appelée Martinelle qu'ils faisoient sonner vn mois durant plustost que de marcher, afin d'aduertir l'ennemy, & luy donner temps pour s'ap-prester tant ils estoient vertueux, & magnanimes.)

Le pape Clement quatriesme donna le tiltre de Vicair de l'Empire en la Toscane à Charles d'Anjou.

Nicolas 3 de la maison des Vrsins, craignant que l'Italie ne se repentist d'auoir tant aduancé la grandeur de Conrad Prince estranger, luy brouilla sa fortune, & fit sous main qu'il quitta le gouuernement de Florence au Cardinal Latin Euesque d'Ostie, lequel reünit & reconcilia les Guelphes & les Gibellins en vne meisme conspiration pour la paix de leur ville.

Les Gibellins qui auoient plusieurs grands mouuemens pour se défier de la reconciliation de leurs ennemis, demanderent des ostages choisis des principales familles Guelphes, pour la seurété de l'observation du traité, par lequel le Pape nommoit les principaux Magistrats de la Republique.

Le traité portoit qu'il y auroit 14. Gouverneurs, 7. Guelphes & 7. Gibellins, esleus neant-moins tous les ans à la deuotion du Pape.

En ceste concorde ils prindrent & demantelerent Volaterra, contraignirent Pistoie, Arezzo & Siene de se liguier avec eux. La bonnace ne dura que dix ans & ne fut qu'un presage de la grande tourmente qui s'esleua tost apres: Car comme les Gibelins virent que Manfred, bastard de Frederic l'Empereur, auoit cassé les Magistrats de Florence & effacé toutes les marques de la liberté, & qu'il s'estoit saisi de Naples, & pris les armes contre les Guelphes, ils luy donnerent entree en leur ville, comme Protecteur, qui depuis s'en fist Seigneur, & laissa le gouuernement au Comte Iordan, lequel se retirant à Naples pour le seruice de son maistre, laissa pour Lieutenant le Comte Guy Nouello.

Le Pape Urbain 4. voyant l'auantage que les Gibellins auoient pris sur luy par la conquête de Florence, ne trouua rien plus prompt que d'appeller Charles d'Anjou, qui venoit victorieux de la bataille de Beneuent: le bon-heur de ceste victoire remit le courage aux Guelphes de Florence, avec lequel ils chasserent les Gibellins & le Comte apres.

Le peuple content de voir sa liberté restituee, & ceux qui la vouloient opprimer chassez, rappella tous les citoyens de l'un & de l'autre party, remit la ville en vn meisme consentement de se maintenir libres, & ne favoriser le Pape ny l'Empereur au preiudice de leur liberté, mais toujours avec ce malheur que ceux qui estoient aux premieres charges du gouuernement, aymoient mieux estre ruinez par la cheute de la Republique que par celle de leurs maisons.

Martin, natif de Tours amateur de la grandeur de la couronne des François, arriuant à la chaire de Rome, augmenta à Charles d'Anjou l'autorité que son predecesseur luy auoit retranché sur la Toscane, violente occasion de nouvelles presentations sur les Gibellins, qui furent esloignez des charges publiques, & les Magistrats au lieu de 12. reduits à trois, puis à six, puis à neuf, en fin à 12. sous le nom de Prieurs pour ne commander que deux mois.

Les Gibellins durant les flottes de ceste tourmente cedoient aux Guelphes. Charles d'Anjou qui en estoit le plus ferme pillier, ayant deffait en bataille rangée Conradin, luy auoit fait trancher la teste, & avec luy exterminé la maison de Suaube, laquelle auoit tenu l'Empire cent quinze ans & le Royaume de Naples 76. mais apres les Vespres Siciliennes la maison d'Aragon s'estant emparée des Royaumes de Naples & de Sicile, la ville de Florence com-mença d'ouuir les yeux & de se retirer de ses fatales diuisions, lesquelles la faisoient la fable de ses voisins.

Sur ce nasquit ceste fatalle querelle des Blancs & des Noirs, elle ressembloit vn torrent impetueux qui emporte plustost les belles plantes que les ronces; elle se

se rendit odieuse à la posterité par le moyen d'un grand nombre de citoyens meurtres, & par l'embrasement de dix-sept cens maisons qui rendit Florence tellement affoiblie, qu'elle ne sachant plus où se tourner, elle se rendit à Charles de Valois.

L'Empereur Henry entra en Italie pour releuer les Gibellins, assiegea Florence, mit en ban les Guelphes. Les Florentins recoururent à la protection du Roy de Naples, qui leur donna pour gouverneur le Duc Adrian, lequel ils chasserent, ne trouvant rien si doux qui ne fust leur liberté, & ne sachant ce qui leur estoit bon, appellerent Lando Dago-bio, & apres luy le Comte Guy Bontifoli.

La perte qu'ils firent contre Caltruccio de Luques fut cause qu'ils s'en retournerent mandier secours à Charles Duc de Calabre, lequel enuoya premierement le Duc d'Athenes, puis y vint en personne.

D'autre costé les exilés de Florence attirerent Louys de Baviere Empereur, cependant que le Duc d'Athenes établissoit son autorité en telle sorte qu'il ne luy restoit que le nom de Prince.

Le Duc d'Athenes pensant tenir la ville qui le tenoit, voulut espropper s'il la pouoit tenir, mais il se trouua trompé.

Car soudain ceux de la maison de Medicis le contraignirent à demeurer seulement protecteur & amy, & non maistre ny usurpateur, le dépouillant de ceste violente autorité.

Il est vray que la ville qui ne pouoit souffrir un tyran en souffrit plus de trente. La chose publique estoit estrangelement difforme & les gens de bien attendoient quelque reformation quand Sylvestre fils d'Aleman de Medicis, monta en la dignité de Gonfalonier semblable à celle du Dictateur Romain, mais les moyens de reformer l'Estat dependoient de l'autorité de tant de iugemens.

Sylvestre recogneut bien que son siecle n'estoit pas capable d'une bride si courte & si reglée, que la licence auoit par trop d'accroissement, qu'il y auoit du peril à remuer les choses passées, & neantmoins pour ne laisser le mal sans remede il fit voir qu'il ne desiroit rendre sa charge autrement remarquable pour une generale reformation des desordres passés.

Les mutins qui croyoient comme esclaves qui quittent la rame, se mettent en armes, s'emparent du Palais, mettent le feu aux maisons, & établissent en la ville un regime & gouvernement cyclopique.

Un Cardeur de laine des plus seditieux prit l'enseigne du Gonfalonier & sur l'appuy de quatre petits artisans établit la souveraineté à la discretion de la plus vile partie du peuple.

Ceste déplorable confusion, qui auoit effacé toutes les beautés de ceste Republique dura depuis l'année 1378. iusques à l'an 1381. que les nobles mastinez réueillèrent leur vertu pour se mettre en leur premiere splendeur, & l'Estat en l'ancienne police.

Lors parurent ceux de la maison de Medicis, qui estoient desia retenus pour les fauoris de fortune. Ceste maison quoy qu'elle fust battue de l'ingratitude ne perdoit iamais occasion de profiter à la Republique.

Vierry de Medicis appaisa la diuision, rendit au Senat son autorité & au peuple sa franchise, & auoit telle reputation, que s'il eust eu plus d'ambition que de preud'homme, il pouoit sans difficulté s'emparer de la puissance souveraine de la Republique & pouoit tromper la liberté de la patrie.

Elle estoit lors agitée dedans, par les diuisions des citoyens, & au dehors par les efforts & les armes des Vicomtes de Milan qui tenoient la campagne.

Jean de Medicis eut assez de prudence pour fortifier sa patrie en l'une & l'autre occasion : la guerre estrangere auoit cousté en peu de temps trois millions six cens ducats au thresor public, les particuliers en estoient du tout appauvris : il ne refusa de secourir les necessitez publiques de l'épargne de ses grandes richesses, & preferant la iustice commune à son propre interest, fit passer en forme de loy, que la contribution des fruits de la guerre seroit commune, & que les grands y entreroient comme les petits pour leur part, cela le fit appeller Dieu tuteur de la patrie, & dès lors le peuple n'approuua autre commandement que le sien, son bon gouvernement fut recogneu en sa plus haute prosperité depuis l'an 1384. iusques à la guerre contre le Vicomte de Milan.

Comme il s'acquiesça la bien-veillance envers le peuple, aussi alluma-il contre luy l'enuie des grands, premier monstre qui se presente à l'homme de bien, qui commence à faire paroistre sa vertu au bien de la chose publique.

Jean de Medicis marcha si seurement sur les pointes & les espines de ses enuieux, qu'il ne blessa iamais aux affaires publiques, ny sa conscience ny son honneur, & bien qu'il soit mal aisé de tenir sa veüe si nette & contrainte deuant ses pas, quand on a tout autour

M m iij

de soy des objects dignes pour la destourner, si est-ce quoy qu'il veist toute l'autorité du Senat couler entre les mains & ses amis, le conseilla de s'en saisir, il n'y voulut entendre, protestant qu'il ne desiroit autre autorité en la Republique, que celle que la loy luy pouvoit permettre: il rejettoit tous les honneurs qui estoient par dessus la qualité de citoyen, & lesquels pouvoient apporter de l'enuie à sa fortune & du trouble à sa patrie.

Cosme de Medicis, continua les maximes de son pere, & se rendit comme luy Directeur & Recteur de toutes les affaires, il auoit vne façon populaire & vn cœur de Prince, ses richesses ne luy seruoient que pour faire triompher ses vertus & acquerir des amis, desquels il disoit qu'on n'en auoit iamais assez. Il estoit vestu en citoyen & viuoit en Roy, sa maison le refuge des pauvres, l'autel des affligez, le temple de iustice, & la retraite des plus beaux esprits d'Italie, Cosme estoit tout en Florence, & sans luy Florence n'estoit rien. Et bien que ce soit le desir d'un bon citoyen de ne pouuoir plus que toute la Republique, si est-ce que son pouuoir n'auoit rien qui l'égalast.

Les grands jaloux de la croyance & de l'autorité qu'il auoit parmy le peuple, commencerent à veiller & espier ses actions, & firent croire au peuple qu'il auoit entrepris sur la liberté de la ville pour s'en rendre maistre, que sa liberalité & sa pitié n'estoient que la couverture de son ambition, la cupidité de marcher deuant, & donner la loy à ceux de qui on la reçoit, estant si violente, qu'il n'y auoit rien qui penetraist si auant en l'ame, la grace, la magnificence, la publique bien-veillance de Cosme est suspecte aux grands, on se resolt d'aller au deuant. Bernard de Gadagne, lors gonfalonier pour le mois de Septembre & d'Octobre 1433. le manda au Palais, & le fit mettre prisonnier. Les opinions les plus seueres tendoient à le faire mourir, les plus douces conclurent à l'enuoyer hors de la ville pour quelque temps, & l'on dit que Cosme auoit trouué en Bernard de Gadagne ce que Cesar ne peut trouuer en Brutus, & qu'il s'estoit laissé charmer à ses paroles & à ses liberalitez, il en sortit & se retira à Venise.

Il supporta cet exil aussi constamment que Metellus, aussi legerement que Rutilius, il ne laissa rien à Florence de ce qui luy estoit propre, car ses merites l'accompagnoient par tout, & trouua en tous lieux vn ordre commun en la nature, par tout sa propre vertu le suuit, & rendit son ostracisme aussi glorieux à sa fortune que celui de Nicias & d'Alcibiades. Les plus grands d'Italie luy offrirent, & secours & assistance contre l'ingratitude de sa patrie, laquelle ne peut long-temps souffrir l'eclipse de ce Soleil, & ne cessa qu'au bout de l'an, il ne fut rappelé & remis en ses premiers honneurs.

Sa patrie luy donna à son retour d'un consentement general le tiltre de Pere de la patrie, ce qui fut gravé sur son tombeau, & toute l'Italie le surnomma du nom de Grand.

La maison de Medicis a produit trois Princes, qui se sont acquis le surnom de Grands. Cosme le Vieil, Laurent & Cosme premier, Grand Duc, qui fit construire à grands frais vn hospital pour les pelerins en Hierusalem.

C'est luy qui jettâ les premiers fondemens de la Souueraineté de sa maison en la Republique de Florence par des voyes iustes & legitimes, & ausquels on recognoist de visibles tesmoignages de la prouidence de Dieu, pour recompenser le zele, la iustice & la religion de ceste maison, laquelle en a laissé les preuues en l'Europe & en l'Asie.

Toutes les actions de Cosme estoient royales, mais moderees d'un tel temperament qu'il ne passoit les termes de la modestie d'un citoyen, les Princes d'Italie eussent reputé à honneur son alliance, mais il ayma mieux choisir parmy ses citoyens des femmes à ses enfans, que de les chercher ailleurs.

Il maria Iean son fils à Cornelia d'Alexandrie avec peu de bruit, duquel sont descendus ceux qui en leurs nopces ont mis en teste toute l'Europe. Il donna à Pierre son fils Lucrece de Turnabuoni, & de leur mariage est venu Laurens de Medicis, surnommé le Grand ou le Magnifique: la posterité duquel est faillie en Catherine de Medicis Roine de France. Aussi de ce mariage de Pierre & de Lucrece il donna Blanche à Guillaume de Pazzi & Nonnina à Bernard Rucellai.

Iean de Medicis, laissa vn Posthume qui fut pere de Cosme premier, grand Duc; il mourut d'un coup de canon, poursuivant l'armée de l'Empereur, & fut regretté de toute l'Italie, laquelle, s'il eust vescu, il eust renduë Roine de serue qu'elle estoit. Comme on luy coupoit la jambe que la balle auoit fracassée, il disoit qu'il souffroit plus en la souuenance des poltrons qui auoient si mal fait, qu'au ressentiment des douleurs de sa blesseure, & regardât d'un œil ferme, sa jambe separée de sa cuisse, se mocquoit de ses amis qui se trauailloient pour son tourment, & les prioit qu'on fist venir Cosme son fils pour voir quels estoient les faits de la guerre, & que la perte des bras, & des mains & des jambes & des pieds estoient les coliers & les medailles des bons Capitaines.

Cela

Cela se faisoit à Mantouë en la maison de Louys de Gonsague, Marquis de Mantouë, où il fut visité du Duc d'Urbain: ces deux le plorerent: Le Roy François dit que si Iean de Medicis n'eust esté blessé, la fortune ne l'eust pas fait prisonnier. Il auoit toutes les qualitez conuenables à vn chef d'armée, infatigable au trauail, courageux aux perils, prompt & habile aux executions, comme il estoit sage & iudicieux aux entreprises: les soldats le suiuoient aussi allegrement à la charge qu'à la table, & l'on remarque qu'aux rencôtres plus dangereuses, il leur disoit, *Venez apres moy & iamaiz n'allez deuant*, il fut heureux en cela que la mort ayant priué sa vertu des moyens de regner en sa patrie, la destinee, ou plustost la faueur & bien-veillance du Ciel, qui donne les sceptres & les couronnes, le reserua heureusement à la prosperité.

Pierre de Medicis, fils puisné du Grand Cosme, auoit continué les maximes de son pere, mais sa ieunesse ne luy en rendit pas le fruit qu'il s'en promettoit: il trouua qu'indifferement toutes les grandes maisons de Florence, aussi bien que les petites auoient esté secourues de ses moyens, que chacun luy deuoit. L'or & l'argent est à tort appelé par Lycurgue la matiere des meschancetés. Ceux de la maison de Medicis s'en seruirent pour releuer leur fortune iusques où alloit leur merite, & par leurs grandes richesses obligerent les bons & donnerent occasion aux meschans d'estre gens de bien. Mais elles n'empescherent pas les coniurations de sa vie, lesquelles il eschappa en reuenant de sa maison de Carregio, & se destournant du chemin, où ses ennemis l'attendoient.

Laurens de Medicis son fils, apporta vn grand auancement aux anciens desseins de ceste maison, estant tenu en la Republ. comme Scipion Emilian à Rome, & doué des mesmes qualitez que l'histoire luy donne. Luy se voyant honoré du peuple, & asseuré de l'amitié des Ducs de Milan, parla bien plus haut: la seigneurie permettoit l'accroissement de ceste autorité, ou pour ne l'irriter à entreprendre dauantage, ou parce qu'elle recognoissoit bien le peril qu'il y a, & le danger où l'on met vn Estat, quand on en esloigne les familles mariees & esleuees en la conduite des affaires, pour en introduire d'autres.

Mais il sembloit que ceste maison fust fatale à la souueraineté de Florence, & qu'autre qu'elle n'y deust aspirer, estât riche de toutes les parties sur lesquelles l'ambition peut fonder ses esperances. Laurent estoit à Florence, ce que Pericles fut à Athenes, car quoy qu'en apparence la Republ. fust populaire, ce n'estoit en effect que Monarchie: Aussi l'Estat de Florence n'estoit pas si peu de chose, ny si petit qu'il ne meritaist bien d'estre désiré, car outre son ancienne estendue, il estoit augmenté des villes d'Arezzo, Liurne, Cortone, Pise, Montpulcian, Laurent se rendit si capable des affaires de la Republique de Florence, qu'à vingt ans ses Conseils furent estoutez & approuuez par les plus sages & experimentez, conduisant ses actions avec tant d'integrité, & ses Cōseils avec tant de iustice, qu'il ne proposoit iamais ce qui estoit agreable pour taire & dissimuler ce qui estoit bon. Il se plaisoit aux liures de Platō que Marcille Ficin auoit traduit pour son vſage, & disoit qu'il n'estoit possible de se rendre capable de l'administration publique sans cela, & vit sa reputation en la fleur de son aage esleuee & esparse par tout.

Le Roy Louys XI. fit estat de son amitié, luy offrit & donna secours contre Ferdinand Roy d'Aragon, sous la conduite de Monsieur d'Argenton, & le Soldan d'Egypte luy enuoya de grands presents pour gagner son amitié.

Matthias Roy d'Hongrie recourut à sa prudence aux affaires plus déplorées de son Royaume.

Le Pape Innocent VIII. faisoit tel estat de son amitié que pour la nôtier d'un nœud plus estroit, demanda sa fille Magdelaine pour François de Cibo son fils: le peuple de Florence l'honoroit, & ses ennemis mesmes ne pouuoient obscurcir la lumiere de sa vertu qui alloit reluisant au trauers les plus obscures tenebres de leurs diuisions: Il estoit autant malaisé de le mettre en comparaison avec quelqu'un, comme de trouuer vn semblable à Socrates. Quelques Seigneurs de la maison de Pazi, Saluiati & Bandini impatiens de la tranquillité de l'Estat & de la forme du gouvernement, se resolurent d'en abbatre les deux plus fortes Colomnes, Laurens & Iulien de Medicis, & entreprendre de les tuer en l'Eglise de S. Reparee, lors qu'ils entendoient la Messe, l'esleuation de l'hostie fut donnée pour signal de l'execution. François de Pazzi, voulant scauoir si Iulien estoit armé, le toucha & luy dit qu'il auoit pris de l'embonpoint en sa maladie, le trouuant desarmé, luy plongea vn poignard au droit du cœur. Les autres disent que ce fut d'une espee courte, lequel ayant reculé deux ou trois pas, tomba par terre François de Ponzzi se ruant sur luy pour l'acheuer se blessa à la jambe.

Iean Baptiste de Monsecco estoit là pour tuer Laurens, mais soit qu'ayant parlé à luy auant la Messe & recogneut tant de vertu & de douceur en ce Seigneur qu'il iugea le salut

public dependre de sa vie, ce qu'il fist retenu de la crainte de celuy en la puissance & tutelle duquel sont les Estats & ceux qui les gouvernent, il le laissa sauuer en la sacristie, le peuple y accourut: Laurent est conduit en son Palais, toute la ville en armé, n'a en la bouche ny au cœur que le nom de Medicis, les coniuérateurs sont prins & sans autre forme estranglez & pendus aux fenestres: entre lesquels fut l'Archeuesque Saluiati, chacun estoit tellement animé à ceste vengeance qu'on deterra le corps de Jacques Pazzi pour le trainer par toute la ville, avec le licol duquel on l'auoit estranglé, ils le desenterrent du tóbeau de ceux de sa maison, pour le mettre en la campagne, d'où il fut encore desenterré & trainé par la ville de Florence, & en fin ietté dedans l'Arne. Ceux là seulement furent sauuez ausquels Laurent pardonna, & qu'ils tira de la fureur du peuple. Les Pazzi, Bandin & Saluiati chassiez de Florence pour ce meurtre, supplierent le Pape Sixte IV. qui haïssoit les Florentins qui auoient pendu son Legat, & n'aymoit point les Medicis, & ne les vouloit prendre en sa protection. Ayant principalement pendu iceluy Legat Cardinal de Pise en habit Pontifical.

Alphonse Duc de Calabre fut general des forces que le Pape & Ferdinand d'Aragon leur donnerent, declarans que ceste guerre ne se faisoit contre les Florentins, mais contre la maison de Medicis, & qu'il n'y auoit autre moyen d'auoir la paix qu'en exautorant Laurent de Medicis, lequel voyant que la bonne fortune de sa maison estoit le pretexte de la guerre assembla les plus apparens de la ville, & apres leur auoir representé que leur maison estoit le pretexte de la ruine de la Republique, la cause de ceste émotion, declara neantmoins que puis que le Pape & le Roy d'Aragon disoient n'auoir leué les armes que contre luy, il ne deuoit estre si mal affectié au salut public que de ne le preferer au salut de sa famille, que pour ce il ne refuseroit iamais d'esteindre ce feu, & de finir la guerre par son propre sang, comme elle auoit commencé par celuy de son frere.

Il luy fut respondu que le salut du public ne se pouuoit separer du sien, & qu'ils se trouuoient si bien de ses sages Conseils, qu'ils estimoient leur conseruation dependre de la sienne.

Sous ceste assurance, il resista au dessein du Pape qui n'estoit qu'épine, lequel voyant que par la bonne conduite de Laurens, le trouble sortoit d'Italie, que la paix y entroit, & qu'en la Diette de Cremona où il auoit enuoyé le Cardinal de Mantouë pour son Legat, & où se trouuerent Alphonse Duc de Calabre, Louys Vicomte de Milan, Laurens de Medicis, Hercules d'Est Duc de Ferrare, Louys de Gonzagues Marquis de Mantouë & autres Seigneurs d'Italie, la resolution de faire la guerre aux Venitiens, estoit changee en vn accord, il en mourut de regret. Laurent auoit eut tant de fâcheuses iournees en sa vie pour le seruice de la Republique, & les travaux de l'esprit auoient comme vne lime sourde tellement usé sa vigueur naturelle qu'il en mourut en l'aage de quarante quatre ans, il n'estoit né qu'aux choses grandes, sa prudence aux entreprises importantes, sa constance en toutes les sciences tant pratiques que speculatiues, sa religion & pieté, sa splendeur & toutes ses actions, son courage contre l'enuie des siens & les conspirations des ennemis, luy donna par toute l'Europe vne reputation esgale à ses merites, mais son amour à la vertu & à l'extirpation du vice luy acquit en Italie la mesme gloire qui est demeuree à l'Empereur Aurelian par tout le monde. Les gens de lettres faisoient en sa maison autrefois les salies des colonnes & des statues des Princes: il enuoya Jean Lascaris Constantinopolitain pour recueillir les plus fameuses Biblioteques de l'Asie & de la Grece, de quoy enrichir la Librairie que son pere auoit cominee. Il en apporta des livres non seulement rares, mais vniques, & qui ne se peuuent trouuer ailleurs qu'en ce thresor: lequel a esté amplement enrichy par les Papes Leon, & Clement VII. il laissa la vertu en estime, le peuple en liberté, la noblesse en honneur & la ville en abondance de tout bien. De D. Clarice des Vrsins, il eut Pierre de Medicis qui espousa Alphonse des Vrsins, Jean, qui fut Pape, Leon X. & Iulien.

Quand Ferdinand d'Aragon receut la nouuelle de la mort de Laurent de Medicis, il dit qu'il auoit assez vescu pour luy, & trop peu pour l'Italie.

Après la mort de Laurent ceste faueur du peuple tourna le dos à la maison de Medicis quand Charles VIII. alla en Italie pour faire res fleurir la fleur de lys que Charles fils de Louys IX. auoit plantee au Royaume de Naples.

Pierre de Medicis fils de Laurent, recognoissant bien que les Florentins ne pouuoient empêcher son passage de viue force, luy alla au deuant, & pour sauuer le tout des fureurs de la guerre, luy remit quelque piece de la Toscane, & entr'autres Pise & Liborne. Ce fut vn traitté de ieune homme que le Pere auoit recogneu impetueux & imprudent. Ceste capitulation le rendit si odieux au Senat & au peuple, que par ordonnance publique luy & Jean son frere furent declarez ennemis de la patrie, leurs testes prisees, leurs maisons pillées, & les

les riches meubles recueillis par tant de soing & tant d'annees des plus rares endroits, vendus à la discretion du peuple, & leurs desseins condamnez comme contraires à la liberté de la Republique.

Le Roy Charles passant à Florence logea au Palais de Medici, Madame Alphonsine femme de Pierre de Medici, luy representa la ruine de son mary, de son enfant, de la maison, & supplia sa Maiesté pour son retour. Le Roy gaigna cela sur le Senat que Pierre de Medici retourneroit en sa maison & en ses biens, mais estant retiré à Venise, il fut oublié aussi tost que le Roy eut quitté Florence pour aller à Rome.

Il demeura dix ans en ceste peine, employant ores la protection du Pape Alexandre VI. qui le trompa, ne faisant iamais rien de ce qu'il disoit, ores celle de l'Empereur, qui ne luy seruit de rien, & n'ayant refuge plus assuré que l'armee du Roy Charles VIII. & Louys XII. au service duquel il mourut au service du Garillan. Estant à Venise il entreprit de surprendre vne porte de Florence sous la faueur de la nuit & l'intelligence de ses amis, si le iour ne l'eust surpris à vne demie lieue de la ville, & n'eust descouvert, puis condamné à mort ceux qui fauorisoient son dessein.

Depuis la maison de Medici fut tousiours en tourmente iusques à la promotion au Pontificat de Jules X. lequel fait Pape en vne nuit, & ayant l'esprit terrible & impetueux, comme dit Paul Ioue, & desireux de remuer en Italie, & de separer de l'amitié du Roy de France les Florentins, fauorisa & assista les Medici aussi constamment que le Pape Sixte IV. en auoit desiré & recherché opiniastrément la ruine, il honora Iean Cardinal de Medici de la Legation de Bologne, fit assigner vne iournee à Mantoue pour aduiser aux affaires de la guerre, il y enuoya son Legat. D. Raymond de Cordoue Vice-Roy de Naples s'y trouua, & les Ambassadeurs de l'Empereur, des Venitiens & des Suisses. La principale resolution de l'assemblée & la mieux executee fut pour mettre la famille de Medici aux biens & honneurs qu'ils tenoient à Florence. Le Pape pressa cela en telle sorte que ce fut la premiere expedition où le Vice-Roy de Naples employa les armes de tous les confederrez, il assiegea & emporta de viue force la ville de Prato, où furent tuez plus de deux milles hommes de la part des Florentins & plusieurs prins, dequoy espouuantez, la ville diuisee en elle mesme, & la maison de Medici y ayant encore de grands amis, & de puissantes intelligences, receut.

Iulien de Medici, lequel y fit son entree en Prince, & comme tousiours où la fortune va, le peuple y court, tous les ordres de la ville luy allerent au deuant, & luy donnerent le nom de Seigneur, que par modestie il refusa, ne voulant point vn Laurier infructueux, pour lequel vsage ne fera iamais querelle, comme disoit Aurelian; mais bien la fleur de Florence, qui en tout temps porte son fruit. Ce fut luy qui fit voir les armes de Medici à l'esgal de celles de Florence malgré les mal-veillans qui les blasonnoient par six pillules. La cause est bien plus illustre, Euerard de Medici pour affranchir la Toscane du Geant Mugel le combattit en duel & l'abbattit à ses pieds, comme le Geant voulut descharger sur luy vn coup de Masse, il se couurit de son paois en châp d'or, lequel receut l'impressiõ de six boules de fer pendantes à sa masse, lesquelles estoient encore sanglantes pour les meurtres qu'il auoit executez de frais, ce qui donna occasion à Euerard de prendre pour ses armes six besans de gueule en champ d'or. Je me porterois volontiers à vn autre blason, qui me fait croire que ce sont balons, & que ceux de ceste maison qui premiers les prindrent en leurs armes, vouloient faire entendre la diuerse agitation de leur fortune durant les mouuemens populaires de ceste Republique, comme la nature du ballon est quelquesfois de saillir & monter en haut, & autrefois se rouler par terre: car ceste maison s'est veue en Florence, tantost haute & tantost basse, & la pouoit on appeller comme Eluius Pertinax, le Ballon de la fortune: le nombre de ses Ballons estoit autrefois sans nombre; l'on trouue auourd'huy des Escussions qui en ont neuf, les autres huit, quelquesvns sept, les Medici de Milan n'en auoient qu'vn.

Le dernier assaut que la fortune fist contre les Medici, fut celuy qui affrâchit leur vertu de la tyrannie, & qui tira du profond des ruines leur grandeur & l'exaltation de leur maison. Les Florentins voyans que l'Empereur Charles V. auoit pris Rome, & que le Pape estoit prisonnier au Chasteau S. Ange, ils chasserent Alexandre & Hypolite de Medici, effacerent & arracherent de tous les endroits de la ville leurs amoiries, rompirent les statues de Leon & Clement, lequel mit par ses intelligences la ville en tel estat, qu'elle ne pouoit esperer autre felicité qu'en la seruitude. Il s'accorda pour ce avec l'Empereur, par l'armee duquel Florence fut assiegee & contraincte de receuoir ceste Loy du vainqueur: qu'Alexandre espousant Marguerite d'Autriche, seroit Duc & Prince de Florence, & apres luy ses enfans, hoirs & ayant cause. Laurent de Medici son cousin le tua & se sauua à Venise.

Ainsi à mesme iour en diuerses annees ceste premiere branche de la maison de Medicis est finie. Catherine de Medicis Roynede France estant morte le mesme iour qu'Alexandre son frere naturel auoit esté tué.

Cosme fils de Jean de Medicis, succeda à Alexandre, & monstra que les principautez viennent de Dieu, que les puissances souueraines ne sont point establies & affermies par conseils humains, & que les forces humaines ne peuuent rien contre ce que le ciel a delibéré pour la grandeur des familles qui sont selon son cœur.

Au temps de la mort de Laurent de Medicis il estoit retiré en son Palais de Mugello pour n'apporter point de soupçon à la grâdeur du Duc Alexandre, cōme le iour de cet accidēt il se pourmenoit en son iardin, il vit vne grande monstre de fleurs contre l'ordre du temps & de la saison: Cela luy fut vn augure asseuré de la nouuelle principauté sur la fleur des villes de l'Italie, qui trois iours apres se trouua entre ses mains plus espiée qu'esperée, il monstra vn grand trait de iugement & de iustice en vne si soudaine occasion, car ores qu'il sceust que le coup de Laurent de Medicis auoit ouuert la porte de sa grandeur & de sa fortune, il ne s'oppola pourtant à la publique vengeance que la loy luy demandoit contre ceste violence. Aussi doit tousiours vn Prince reuerer la memoire de celuy auquel il succede, Cesar s'empescha bien d'abbattre les statuës de Pompee, que les siennes ne fussent eleues & asseurees. Les Florentins recognoissans quel changement il y a de la seruitude à la liberte, ont bien fait depuis quelque semblant de reuenir à leur premier estat, mais toutes les fois que ces desseins leur sont venus en teste, ils ont veu tant de perilleux accidens pendre à plomb sur leurs testes, qu'ils ont changé leurs desirs de liberte en des resolutions d'obeyssance. Depuis qu'un peuple a vne fois accepté la domination d'un Prince, il ne s'en peut plus affranchir, & ceux qui l'entreprennent ne sont pas loüés, comme citoyens desirieux de la liberte de leur patrie, mais punis comme seruiteurs desobeyssans, & subiects rebelles.

Cosme fut Prince par toutes les voyes qui peuuent conduire au souuerain cōmandement: il succeda par la loy de la succession & capitulation de Florence, il fut esleu par le Senat, il conquist la ville ayant monstre en vne prompte & soudaine leuee de gens de guerre, ce qu'il pouuoit quand il en faudroit venir aux armes. Les moyens de paruenir au regne sont diuers, la façon de regner est tousiours semblable, les esleuz, les Conquerans & les successeurs au commencement commandent d'une esgale puissance, & pensent auoir droit sur leurs suiects, comme s'ils estoient nez pieds & poings liez sous leur domination. Cosme n'estoit pas comme cela addoucissant sa puissance de tant de moderation, qu'il ne vouloit iamais monstre tout ce qu'il pouuoit, tenant les volontés comme suspendues entre la liberte & la seruitude, attirant les gens de guerre par sa liberalité, le peuple par douceur, la noblesse par la communication des honneurs & par tous les attrait des douceurs de la paix.

Il est vray que Cosme de Medicis ayant vne armee dedans Florence se fit eslire Duc & sur la difficulté qu'on y faisoit, commanda vne escopeterie deuant le Palais qui hasta bien les Seigneurs & Magistrats de passer outre.

Par apres il s'establit avec tant de prudence que les Florentins faisoient gloire du ioug qu'il leur auoit imposé, comme les braues courtaults se iouent du mors, lequel ils mordoient au commencement.

Il accreut son Estat de celuy de Pise, le Roy d'Espagne luy donna l'investiture de Siene lors qu'il estoit en Flandres. Aussi le Duc de Florence prenant l'investiture de Siene à chaque renouvellement du Duc, paye en la receuant deux milles escus au Roy d'Espagne, & de plus est suiect ledit Duc de Florence entretenir au Roy d'Espagne, ayant guerre en Italie, le nombre de deux mille cinq cens hommes pour son seruire. Cosme vouloit que ses enfans fussent declarez quittes de ceste somme, & obligation au Roy d'Espagne: on mit en deliberation si on receuroit les mesmes droicts pour la seconde investiture, & fut resolu qu'ouy.

Le Pape Pie V. donna à Cosme le tiltre de Grand Duc de Toscane, le couronnant sollemnellement à Rome l'an 1569. d'une couronne estimee de cent & vingt milles escus: Et ces mots furent escripts en sadite couronne par le commandement du mesme Pape Pie V. *Pius V. Pontifex Max. ob eximiam diuini cultus & Catholica Religionis zelum precipuamque iustitiae studium donante.* Il disoit que le Prince ne se pouuoit estimer puissant, qui n'auoit point de puissance sur mer, & qui ne pouuoit ioindre les forces terrestres aux maritimes. Persuadé de ces raisons & sollicité de ses propres pensees qui aspiroient tousiours à choses grandes: il procura & obtint par le moyen de l'autorité de l'Empereur Charles V. que le Seigneur de Plombin luy remit & quitta l'isle d'Elba, la conseruation de laquelle est importante au repos d'Italie, pour estre le passage ordinaire de tout ce qui va & vient du Ponent. Il y fit


fit bastir vne ville entiere qu'il appella de son nom Cosmopolis, & fortifia les aduenues du port, de deux Chasteaux, qui par l'entour & les forces du dedans, la rend inexpugnable. Il institua l'Ordre des Cheualiers de S. Estienne à deux cens escus de pension sur les biens de l'Eglise, en faisant trois ans de seruice sur les galeres.

Après qu'il eut asseuré son Estat par les forteresses & le bon ordre qu'il y establit, il pourueut aux moyens de le maintenir & d'auoir tousiours à son cōmandement les nerfs de la Repub. Cela ne luy estoit impossible en vn Estat riche par le trafic de l'industrie des habitās, qui travaillent de toutes façons de draps de laine, de soye, & d'or si abondamment, qu'il se fait quelques fois en vne seule ville de Florēce, & en vn plus de deux millions d'or draps. De plusieurs moyens que la necessité des Princes a trouue pour faire fonds à leurs finances, il ne s'est seruy que du trafic des subsides & des impositions sur les marchandises, en quoy ses ministres sont si esueillez, qu'il ny a rien qui entre ou qui sorte de Florence, qui ne porte son grillet ou sa marque, si que l'on ne s'estonne plus, s'il laissa en mourant en ses coffes dix millions d'or & deux millions en pierreries. Les Princes mesmes, ceux qui entrent en des nouuelles principautez sont plus ambitieux que ceux dont les puissances sont mieux affermies, & regardent volontiers les Estats de leurs voisins, comme les adulteres les femmes d'autrui. Mais Cosme se contenta de l'establissement de sa domination, laquelle eust esté perilleuse & difficile s'il n'eust faict des amis dehors & dedans. De Madame Eleonor de Toledé, fille du Vice-Roy de Naples, François, Ferdinand, Pierre, Garcia, Isabelle, Eleonor. François espousa Madame Ieanne d'Autriche fille de l'Empereur Ferdinand le 18. Decembre l'an 1565. & Ferdinand Christine de Lorraine. Du mariage de François avec Ieanne d'Autriche, sont sorties deux filles Eleonor & Marie : Celle là est mariee au Duc de Mantouë : la vertu & la bonne fortune de celle-cy là reservee pour estre Royné de France, aussi ce fut en elle que le Roy Henry le Grand, de glorieuse memoire estant remis en la premiere liberté de se remarier, arresta toutes les pensees de son mariage. Il mourut l'an 1587.

Par apres luy succeda son frere Ferdinand, qui quitta le chapeau de Cardinal, & fut troisieme grand Duc de Toscane : Il espousa Catherine fille de Charles Duc de Lorraine : il mourut quelques années apres, de ce mariage il eust vn fils.

Cosme de Medicis second du nom, qui regna apres luy non fort long-temps, il espousa Magdelaine d'Autriche fille de l'Empereur Ferdinand deuxiesme du nom, duquel mariage est yssu Ferdinand II. de Medicis, fils de Cosme II. regne à present, & est le cinquieme Grand Duc de Toscane, & n'est aagé que de seize ans.





L'ESTAT DV DVC D'VRBIN.

SOMMAIRE.

1. **D** E l'estendue & confins de l'Estat du Duc d'Urbain, & les villes principales qu'il possède, avec la quantité de ses Châteaux.
2. Son terroir grandement fertile en bleds, vins, huiles, figues & autres fruits, mais son air est mal sain & maladeux en environs de Pezaro principalement & de Fossombrone.
3. Ses richesses consistans au trafic des vins de Pissaura & en figues seiches, & quel est le revenu de ce Prince.
4. Ses forces, sa gendarmerie & forteresses.
5. Catalogue des Ducs d'Urbain, qui ont seigneurie jusqu'à présent.

1. **U** Duc possède partie en Ombrie, & partie en la Marche, sept villes & plus de trois cens châteaux.
Les villes sont Urbain, Engube, Cagli, & Fossombrone; & celles-cy sont de la Duché d'Urbain: puis S. Leon qui est capitale de la Comté de Montefeltre, Senegaille, & Pissaura.
La longueur dudit Estat est d'environ 60. milles, & sa largeur d'environ trentecinq. Il confine, voire est entrelassé avec l'Estat de l'Eglise, de laquelle ledit Duc est feudataire, & avec celui du Duc de Florence, & il paye tous les ans de cens, & de reconnaissance pour tout l'Estat qu'il possède, la somme de deux milles deux cens quarante escus, tant à l'Eglise qu'audit Duc de Toscane.
Urbain est une des plus anciennes villes d'Italie, de laquelle Pline & Tacite font mention. Au temps de Conradin dernier Duc de Suabe, elle fut subjuguee par les Comtes de Ferrette, duquel les successeurs accroissant leur domaine par succession de temps, eurent aussi Eugubine. Ceste ville est belle, & bien bastie, & le Duc y fait ordinairement sa demeure. Pissaura a aussi de belles maisons, autant que ville qui soit en Italie, & Fossombrone nommée par les anciens, *Forum Senpronij*, est aussi fort peuplée.

QUALITE.

L E terroir d'autour de la ville d'Urbain est bon au possible, & du tout fertile, & porte d'aussi bons fruits qu'on en scauroit désirer.

Le pays des environs de Pissaura a un assez mauvais air, mais le terroir en est bon, & produit beaucoup de fruits, & principalement des figues, & des vins excellens à Fossombrone aussi, combien qu'elle aye un air fort mal sain, toutesfois son terroir abonde en froment & en toute sorte de bled, & de plus en vin, en huile, & en diuers fruits, qui sont d'un goût fort agréable: & pour le dire en un mot, cet Estat est fertile, & abonde de toutes choses nécessaires.

RICHESSES.

U Ne bonne partie de cet Estat est assise au riuage de la mer Adriatique, & est fort commode, & de fort grand profit, pour plusieurs choses qui y peuvent estre portées de toutes parts.

On porte les vins de Pissaura à Venise, dequoy les habitans tirent un grand argent, de
mes-

mesme que des figures qu'ils font seicher, lesquelles ils vendent aussi aux Venitiens, aux Boulonois, & à plusieurs autres.

Le reuenu de ce Prince en possessions, gabelles, & autant de rentes, est d'environ cent mille escus, & quand il voudroit charger son peuple, il ne faut douter qu'il n'en tirast vne plus grande somme: mais suiuant la coustume de ses predecesseurs, qui a esté d'entendre principalement à la conseruation de l'amitié de son peuple, il se contente de le laisser en ces termes, & viure avec moins d'argent.

Ce Duc ne tire point de plus grand profit d'aucune chose, que des grains de toutes les villes qu'il possède: veu qu'on void non seulement arriuer en la ville de Senegaille les bleds de l'Estat de son Excellence, mais encores de ceux de l'Estat de l'Eglise, conduits en ceste ville par personnes qui ont la hardiesse de les tirer hors de l'Estat du Pape, sans son sceu, & l'on y en meine fort grande quantité.

F O R C E.

Ce Duc doit estre grandement estimé, premierement pource qu'on pourroit tirer de son Estat plus de 1200. soldats aguerris, & qui suiuroient volontiers, & promptement leur Prince, si quelque occasion se presentoit de ce faire: & en second lieu, pource qu'encores qu'il ne possède pas vn grand reuenu, il est toutesfois maistre des cœurs de ses subiects, qui employeroient franchement, & avec affection leurs vies, & leurs biens pour son service. 4.

Quant aux lieux forts, la ville d'Vrbini est assez en deffence, mais Pifaure est estimée bien forte, & a vn fort bon chasteau, & outre ce, il y a quelques bonnes places pour leur contenir l'Estat de ce Prince.

LES DVCS D'VRBIN.

Federic de Montefeltre fut aux premieres annees de sa ieunesse adopté pour fils par Guy Balde Anthoine Seigneur d'Vrbini, qui ayant vescu plusieurs annees sans enfans, faisoit dessein que Federic deuoit demeurer heritier de son Estat. A raison dequoy Federic comme luy deuant succeder en ceste Seigneurie, eust beaucoup de moyen en vsant de courtoisie, & faisant obtenir plusieurs choses, & paroistre beaucoup de belles qualitez qui estoient en luy, d'acquiescer l'amour, & la bien-veillance de tout son peuple. 5.

Or Guy Balde Antoine eust en ses vieux iours vn fils nommé Ode Antoine, tellement que Federic demeura exclus de ceste seigneurie, & toutesfois l'affection de ce peuple en son endroit ne diminua nullement, veu que ses vertus la luy auoient trop acquise.

Ode Antoine apres la mort de son pere se donnant trop de licence en sa domination, fut tué par quelques conspirateurs estant fort ieune, sans laisser apres luy nuls heritiers: tellement que Federic fut appelé du commun consentement de tout ce peuple, & eust non seulement du Pape cet Estat en hief, mais encores fut créé premier Duc d'Vrbini.

Ce Federic laissa apres sa mort heritier de son Estat Guy Balde son fils, qui nonobstant qu'il print femme, s'estant addonné en ses ieunes ans à l'exercice de la guerre, demeura toutefois gouteux, & sans esperance d'auoir des enfans.

Ce fut ce Prince qui ne pouuant entendre à autre chose, à cause de son indisposition, fit dessein d'auoir vne belle Cour, & pleine d'hommes rares en toutes professions, si bien qu'vsant de courtoisie enuers tous les galants hommes, aussi bien qu'Elizabeth de Gonzague, voire allant l'vn vers l'autre à l'enuy, pour entretenir les hommes vertueux, il mist ensemble le plus grand nombre de telles gens qui fust lors, ou qui ayt encores esté en la Cour d'aucun Prince, & mesme donna la forme, & le modelle d'vne Cour bien ordonnée aux autres Princes.

Ce Guy Balde adopta pour fils avec le consentement du Pape, François Marie de la Rouere, fils d'vne sienne seur, & du Capitaine de Rome, qui estoit Seigneur de Senegaille, qui fut nepueu du Pape Sixte, & frere charnel du Pape Iules II.

François Marie s'addonna à l'exercice des armes, auquel il reussit si heureusement, qu'il merita d'estre appelé la lumiere & spendeur d'Italie. Il eust plusieurs honorables charges en la milice: il fut Capitaine general de la Republique de Venise, & de peu auant sa mort, il fut fait aussi general par terre de la Ligue qui estoit entre le Pape Paul III. l'Empereur Charles V. & la seigneurie de Venise.

François Marie possédoit outre la Duché d'Vrbini, & la Comté de Montefeltre, la ville de Senegaille, qui estoit possédée par son pere, & outre ce il eust encores du Pape

pour recompence de beaucoup d'argent qu'il deuoit auoir de l'Eglise, & pour plusieurs seruices faicts au Saint Siege, la ville de Pesare, qui souloit estre possedee par les Sforces.

Tandis que le Pape Iules II. vescu, François Marie demeura fort paisible en son Estat, ne chargeant nullément son peuple, & regardant sur tous à s'en acquerir l'affection, comme vne chose que les Princes doiuent estimer beaucoup plus qu'un grand thresor. Mais Leon ayant succedé à Iules, il eust de grandes falcheries, veu que le Pape le priua en peu de temps de tout l'Estat, & le donna à Laurens de Medicis, qui fut pere de Catherine de Medicis Roynede France.


François Marie n'ayant perdu avec son Estat la grandeur de son courage, sa valeur, ny sa prudence militaire, ny l'affection de son peuple, osa avec quatre milles Espagnols, qui incitez par sa valeur, suiurent volontiers, pauvres d'argent, & manquants de toutes choses, aller contre vne si grande puissance que celle du Pape, pour le recouurement de son Estat, & ayant fait un grand carnage des ennemis, recouura tout le sien dans peu de iours, fors que la ville de Pesare. Il eust de Leonor Gonsague sa femme deux enfans masles, c'est à sçauoir Guy Balde, & le Cardinal, & trois filles, dont l'une fut femme du Duc de Calabre Prince des premiers du Royaume de Naples, la seconde fut mariee au Seigneur Alphonse d'Est, & la troisieme femme du Marquis de Masse.

De sorte que Guy Balde a esté le quatriesme Duc, veu qu'encor que Laurens de Medicis se nommast pour un temps Duc d'Vrbini, toutesfois pource qu'il n'est pas de ceste lignee, il n'est pas mis par eux au nombre des Ducs. Il eust de sa seconde femme Victoire Farnese, & se voyant incommodé il se desmit de la Duché en faueur de son fils.

François Marie Prince de vif esprit, & fort addonné aux exercices du corps, qui espousa Dame Lucrese d'Est, sœur du Duc de Ferrare. Alphonse d'Est dernier Duc de ce Duché.


Après la mort de François Marie qui arriua au commencement de l'annee 1624. le Pape se vouloit emparer dudit Duché d'Vrbini, comme fief de l'Eglise, le Duc de Toscane le vouloit aussi auoir comme ayant espousé l'heritiere d'Vrbini. Toutesfois pour terminer ce different Guy Balde fut restably en la Duché, & regne aujourd'huy, & après sa mort ladite Duché retournera au Pape, il est vieil, caduc & aagé, & le grand Duc de Toscane, qui ne veut point auoir de differend avec sa Sainteté, luy cederá volontiers ce Duché d'Vrbini après la mort dudit Duc Guy Balde, pource que c'est un vray fief de l'Eglise.

L'E S T A T



L'ESTAT DV DVC DE MANTOVE.

SOMMAIRE.

- 

E que possède aujourdhuy le Duc de Mantouë.

 2. Antiquité de la ville de Mantouë, & comme elle fut bastie avant Troye.
 3. Possedee par divers Seigneurs, & finalement reduite sous la domination des Gonzagues.
 4. Situation de la ville de Mantouë, ses superbes ed fices, & Palais de Marmirolo.
 5. Du Marquisat de Monferrat, iadis possédé par les Paleologues, quand & par qui fut erigé en Duché.
 6. Pays de Monferrat de grand rapport, fontaine d'eau chaude & medecinales d'Aigue.
 7. Mantouians amateurs de la langue Hebraique, plus que nulle nation, simples en habillemens, & l'humour hardie & renuëche de leurs femmes.
 8. Quel est le revenu du Duc de Mantouë, & du Gouverneur de Monferrat.
 9. Liste des Ducs de Mantouë.

LE Duc de Mantouë ne tient pas vn petit Estat en Italie, & peut estre mis le premier apres le Grand Duc de Toscane. Il possède tout ce qui estoit anciennement de la iurisdiction de Mantouë, & tient outre cela le Marquisat de Montferrat, qui est encore plus grand que ledit Estat de Mantouë.

Quant à la ville de Mantouë, qui est en la Lombardie delà le Po, elle est plus ancienne que Rome de 670. ans, & fut bastie 60. ans auant la guerre de Troye. Ceste Cité fut iadis chef des 12. colonies des Hetruriens, mais selon les autres qui sont plus autorisez, Mante la deuineresse fille de Tiresie, en fut fondatrice. Elle fut subiuguée par les Gaulois, lors qu'ils passerent en Italie, & mirent bas l'ancienne autorité des Tolcans.

Depuis ayant obey aux Romains, & à l'Empire, tandis qu'il fut en grandeur, elle vint sous la puissance des Gots, & puis des Lombards, & ceux cy estans chassés d'Italie par Charles le Grand, elle fut encor remise sous la suiection des Empereurs. Mais leur puissance venant à manquer par le moyen des diuorces, & querelles des successeurs dudit Charles le Grand, ainsi que les villes d'Italie se mirent en liberté, Mantouë fit le semblable, iusqu'à ce que l'Empereur Othon II. en inuestit Theobald, ou Thedald, Comte de Canosse, luy donnant ceste ville, & la iurisdiction, pour les seruices qu'il luy auoit faits: mais la race de ce Thedald estant deffaillie, il aduint qu'en l'an de grace 1220. le Seigneur Sordet Vicomte de Goite, s'en rendit maistre, resistant aux tyrannies d'Ezzelin de Padouë. Cestuy-cy fut suiuy des tyrans de la maison de Bomalcozi, qui en furent chassés l'an de grace 1319. par les Gonzagues, & l'an 1328. Louys de Gonzague fils de Guy de Gonzague, sorty de race noble, & ancienne, comme celle qui estoit dès le temps que les Lombards commençoient en Italie, commença d'y commander.

La ville est grande, belle, & agreable, pleine de belles maisons, habitee de force personnes de qualite. Elle est assise pres du lac Benac, duquel vient la riuere du Mince, qui s'escoule iusques à Mantouë, & là faisant vn lac, enuironne la ville, & passant plus outre, va tomber dedans le Po. A cinq milles ou enuiron de Mantouë, en allant par vn grand chemin large, & garny d'arbres de tous costez, on trouue Marmiol, qui est vn Palais veritablement Royal, basty à fort grand frais, & capable de loger quelque Prince que ce soit, qui ne pourra qu'admirer la magnificence de ce bastiment. On void en ceste maison force belles fontaines, faites avec vn merueilleux artifice, des lacs pleins de toute sorte de poisson, & des iardins agreables au possible, & finalement de toute sorte d'arbres. Il y a quelques places en cet Estat, mais osté Mantouë, le reste est peu de chose.

Quant au Marquisat de Montferrat, il est enfermé entre le Tanare & le Po, c'est vn des sept Marquisats establis par l'Empereur Otton II. quien donna vn à chacun des fils d'Aléran de Saxe.

Ce Marquisat a esté possédé par la maison des Paleologues, iusques à l'an mil cinq cens.

00 ij

trente quatre, que Jean Georges dernier des Paleologues, estant mort, Charles V. declara le Duc de Mantouë legitime heritier de Montferrat, qui fut erigé en Duché l'an 1575. par l'Empereur Maximilian, & Guillaume III. Duc Mantouë, fut nommé premier Duc de Montferrat.

Or le Duc de Mantouë a en ce pays trois bonnes villes, c'est à sçavoir Casal, S. Vas, bastie par Sixte IV. l'an mil quatre-cens-septante quatre, qui est maintenant assez peuplée, & bien bastie. Albe, que Plin surnomme Pompeie, qui est plus grande que Casal, & Aique qui est assez bonne ville. Il y a outre cela les villes de Villeneuve, Balzole, Trine, Palais, Biance, & Libourne, qui appartiennent au Duc de Mantouë, & pour abreger, on tient qu'il possède icy environ soixante & cinq villes, outre vne infinité de villages.

Q U A L I T É.

6. **L**E pays d'autour de Mantouë est assez bon, & rapporte à ses maistres toute sorte de fruits estant bien cultivé. Sur tout il fait bon voir tout ce chemin, par lequel on passe allant de Mantouë à Marmirol.

Pour le regard du Marquisat de Montferrat, le pays est inegal, mais il est de grād rapport, & produit toute sorte de choses necessaires à la vie. Il commence environ à vne iournee loing des Alpes, & est separé par vne plaine qui est entre les collines dont il abonde, & les Alpes. Il n'a rien qui n'y soit cultivé, à cause de la bonté du terroir. Le Tanare arrose le costé gauche, & le Po le droict.

Il y a des fontaines d'eau chaude, & quelques-vns disent que l'herbe naist, & vient à croistre icy au milieu des eaux bouillantes.

Le terroir d'aupres Casal est partie en plaine, & partie en costau, & par tout il y vient grande quantité de froment, de vin, & d'autres fruiets de la terre.

L'air de la ville d'Albe est mal-sain, toutesfois son terroir est bon, & fertile, estant arrosé de la riuere de Tanare. La ville d'Aique est renommée à cause des fontaines d'eaux medecinales.

M O E U R S.

7. **L**Es Italiens estiment que ceux de Mantouë ayment entre les autres langues l'Hebraï. que plus particulièrement que nulle autre, de mesme qu'ils disent que les Calabrois s'addonnent fort à la Grecque. Ils tiennent aussi que ceux de Mantouë sont vils en matiere de recevoir les amis, & portent des habillements qui sentent l'enfance, & non la grāité virile, qu'ils escorchent les estrangers, & taschent d'en tirer iusques à la dernière maille. Quant aux femmes, on dit qu'elles sont hardies & reuesches tout ensemble. Les Montferrandois tiennent de l'humeur des Piemontois; si bien que l'ayant descrite dans l'Estat du Duc de Sauoye, ce seroit chose superflue de la ramentouvoir en ce lieu.

R I C H E S S E S.

8. **L**E pays du Duc de Mantouë est bon pour entretenir ses maistres, mais non pour tirer de l'argent des autres prouinces, si bien que les habitans peuuent bien viure de ce que la terre leur apporte, mais non faire trafic, & se rendre riches par le moyen de ce qu'ils en tirent.

On tient que le Duc de Mantouë en tire plus de cinq cens milles escus toutes les annees, & en auroit encores plus s'il ne traitoit ses sujets avec toute la douceur qu'on peut desirer.

F O R C E.

9. **L**A ville de Mantouë est forte au possible: tant par le moyen de son assiette, qu'à cause des fortifications qu'on y a faictes, outre lesquelles elle a ceste particularité, qu'on n'y sçauroit entrer que par des ponts, qui rendent l'accez bien difficile à ceux qui voudroient entreprendre de s'en rendre maistres.

Quant à Casal, ses murailles sont tres-fortes, comme ayans esté basties par les anciens Marquis de Montferrat, qui y faisoient leur demeure, & qui y bastirent vn tres-fort chasteau. Mais en l'an 1590. Vincent Gonzague, Duc de Mantouë, & de Montferrat, y bastit vn autre fort, tenu pour imprenable, que l'on nomme communement Citadelle. Outre cela, ce Duc a vne bonne forteresse à S. Sauueur, & vne des meilleures places que l'on voye à Pontstoure. Il en a encores plusieurs autres, mais le dénombrement en seroit trop importun. On tient la caualerie de Mantouë pour la meilleure d'Italie, au moins les Italiens mesmes luy en donnent ceste reputation.

G O V.

G O V V E R N E M E N T.

LE Duc de Mantouë a dans la principale ville son Senat, qui cognoist de toutes les choses qui appartiennent à la iustice en dernier ressort, & au Montferrat il a vn gouverneur qui se tient dans la ville de Casal, avec vn siege de iustice, pour toute la Duché de Montferrat.

L E S D U C S D E M A N T O V E.

Jean François de Gonzague succeda à son pere Jean François, Seigneur de Mantouë, & en fut fait premier Marquis l'an mil quatre cens trente trois, par l'Empereur Sigismond, qui luy donna aussi les armes de l'Aigle de sable en champ d'argent, avec la Croix rouge. Il mourut plein de gloire, ayant partagé la principauté entre ses enfans l'an mil quatre cens quarante quatre.

Jean François mourant, laissa a son fils Louys Mantouë, & tout ce qui est assis tirant à Verone.

Louys combattit longuement contre son frere Charles, & en fin demeura victorieux; mourut l'an 1478.

Federic III. Marquis de Mantouë estoit si bon à ses subiects qu'il leur prestoit mesme de l'argent, & fut extremement liberal: il mourut l'an 1484.

François son fils successeur, & fut le premier de tous les Princes d'Italie qui nourrit toujours vne longue barbe. Il fut estimé l'un des meilleurs Capitaines de son temps, & fut esleu General de l'armee des Venitiens, qui eurent deux victoires sous sa conduite. Il mourut l'an 1519.


Federic V. Marquis de Mantouë luy succeda, & fut esleu General de l'armee du Pape, & des Florentins encor ieune. Il fut nommé Duc de Mantouë par Charles V. Empereur, ainsi qu'il venoit d'estre couronné par le Pape Clement VII. à Bologne. Il espousa l'an 1531. Marguerite fille de Guillaume Paleologue, Marquis de Montferrat, & eut ledit Marquisat en dot. Il mourut l'an 1540.

François II. Duc de Mantouë, & Marquis de Montferrat, succeda en la Principauté, n'ayant encor que sept ans, & fut sous la tutelle de son oncle le Cardinal Hercule. Quelque temps apres son mariage avec Catherine fille de l'Empereur Ferdinand, estant tombé dans le Minel, & en ayant esté retiré il prit vne fievre qui l'emmena bien tost. Il mourut l'an 1550.

Guillaume succeda à son frere François aux Estats de Mantouë, & de Montferrat, qui fut erigé en Duché par l'Empereur Maximilian 2. l'an 1573. & ledit Guillaume mourut l'an 1587.

Vincent succeda à son pere Guillaume aux Estats de Mantouë, & de Montferrat.

Et à Vincent a succédé Ferdinand de Gonzague fils de Vincent, qui estoit Cardinal, dont il se desmit pour gouverner les Estats de son pere, & de son regne se sont passées plusieurs guerres entre le Duc de Sauoye & luy, au suiet du Marquisat de Montferrat, qui est pretendu par l'un & l'autre Duc.



ESTATS DV DVC DE MODENE ET DVCHE DE FERRARE.

SOMMAIRE.

1. **R**AISON pour lesquelles les Papes pretendent la Duché de Ferrare appartenir au S. Siege.
2. Ferrare rendu au Pape par Dom Cesar d'Est: & quel fu. le traité & accord entre sa Sainteté, & ledit Dom Cesar avant que d'en sortir.
3. Ferrare ancien azyle des Juifs, leur reformation par le Pape, & de la conspiration de leurs diverses Synagogues contre les Chrestiens.
4. Del' Estat de Modene, la ville de Modene iadis Seigneuriee par les Romains, puis ruinée par les Gots, Huns & Lombards, quand & comment rebâtie.
5. Seigneuriee par divers possesseurs.
6. De Rhegge & ses divers Seigneurs, avant que venir en la possession de Dom Cesar d'Est.
7. Terroirs de Modene & Rhegge, situés en bon air, abondans en bleds, seves & vins.
8. Citoyens de Modene & Rhegge subtils d'esprit, & ayans la liberté.

1. **E**s années passées le Pape sceust si bien débattre son fait contre Dom Cesar d'Est, qu'il le mit hors de Ferrare pour plusieurs raisons, par lesquelles il pretendoit que la Duché de Ferrare appartenoit au S. Siege. Il disoit premierement que la confession & declaration du peuple de Ferrare qui l'auoient pour son vray Seigneur, luy deuoit suffire pour toute preuve. En second lieu, qu'il y auoit des recognoissances de tous les Ducs de la maison d'Est, & en troisieme lieu vne infinité de Bulles, oïtroys, & inuestitures des Papes, commençant à Innocent troisieme. Dauantage il alleguoit que les Papes auoient bien souuent recouru Ferrare par voye de droit, & par armes, de la main de diuers qui la vouloient occuper. Outre ce, que plusieurs Empereurs auoient déclaré que la ville de Ferrare estoit du S. Siege, comme l'Empereur Charles fils de Charles le Grand, qui fut au temps du Pape Paschal I. qui confirma la donation que Pepin auoit faite, & nomma Ferrare du S. Siege, puis Otto I. en la donation qu'il fit au Pape lean II. confirma ladite donation qui fut aussi confirmée au Concile de Leon, avec tous les priuileges.

Quant au peuple, il disoit qu'au temps de Gregoire IX. Il fit au son de la cloche en pleine assemblee vn Procureur nommé Bonin pour prester obeysance au Pape, & le Pape luy oïtroya certains reuenus; qu'au temps d'Urbain IV. d'Honorius IV. & de Boniface VIII. ledit peuple recognoissoit le Sainct Siege en luy payant certains cens, qu'au temps de Clement V. qui fut l'an mil troiscens & vn, la cinquiesme année ledit peuple recogneut le S. Siege, & le Pape y enuoya vn Lieutenant & gouverneur, y fist des statuts, & ordonna la façon de son gouvernement, & fit vn nombre d'officiers, & le peuple fit vne infinité d'actes en recognoissance du S. Siege.

Et pource qu'au temps de Gregoire IX. ceux de la maison d'Est commencerent à gouverner pour le Pape, partant il disoit que lesdits Seigneurs d'Est, non seulement auoient tousiours gouverné pour le Sainct Siege, mais encore l'auoient recogne pour Seigneur de ceste ville, & que le premier qui fut Azon d'Est, y auoit esté estably gouverneur par le Pape Gregoire IX.

Qu'apres cela au temps de Gregoire XI. l'an de grace 1372. la premiere année qu'il donna inuestiture ausdits Seigneurs d'Est tenant à Ferrare le Cardinal Pierre Legat, il luy enuoya vne inuestiture en la personne de Nicolas & Albert enfans dudit Azon, leur vie durant, avec

avec vn cens de quatre mille ducats, commandant audit Legat de ne leur donner ladite inuestiture s'ils ne promettoient auparavant avec serment de rendre ladite ville apres le temps de l'inuestiture expiré, sans retenir les meliorations, ou autres dépenses, & declarassent premierement que ladite ville appartenoit au saint Siege, comme ils firent en l'an 1372. le 15. May.

Que lesdits d'Est auoient tousiours obtenu nouuelle inuestiture en prolongeant le premier octroy, depuis Boniface IX. qui leur confirma ladite inuestiture, & pour abreger qu'Alexandre VI. ayant fait alliance avec lesdits d'Est l'an 1501. confirmant toutes les inuestitures, commençant depuis Sixte 4. leur octroya vne nouuelle inuestiture iusqu'à la troisieme generation reduisant les cens à mille escus, à cause de tant de dépenses faites à la melioration de la ville.

Que Leon 10. au commencement de son Pontificat remit le Duc en son Estat qu'il tenoit auant la priuation de lules, & qu'apres ledit Leon à cause de Modene, & de Rhegge, priua & excommunia ledit Duc, qui fut remis par Adrian 6. avec certaines conditions qui ont tousiours esté obseruees, que le Duc ne pourroit faire du sel à Comaquis, mais seulement le saint Siege.

Que Clement VII. à cause que le Duc estoit entré en Rhegge durant le Siege vacant, l'excommunia, appellant les Princes Chrestiens à son ayde pour le recouurement de Ferrare, mais pource que le Duc fit plusieurs belles offres au Pape, il en aduint autrement.

Paul 3. inuestit ledit Duc, tant pour luy, que pour les decendans d'Alphonse, luy octroyant la Duché de Ferrare avec les appartenances, & les gabelles que ses predecesseurs exigeoient iustement, & l'inuestit encor de tous les droicts que le saint Siege pretendoit en toutes les autres terres tenuës par le Duc, à sçauoir Modene, & Rhegge, & ils s'accorderent qu'en cas de deuolution par ligne finie on citeroit les successeurs du Duc par contradiction, au cas qu'il n'y eust point de Procureur à Rome: ce qui estoit alors arriué. Et pource qu'on alloit que l'inuestiture de Paul 3. estoit pour la ligne decendante d'Alphonse grand pere du Duc deffunct, de qui on disoit que Dom Cesar estoit fils, le Pape répondoit que ladite inuestiture estoit pour la ligne des decendans masculins, naturels & legitimes, & que ledit Dom Cesar estant seulement naturel n'y pouuoit estre compris.

Et pour monstrier qu'il estoit naturel, ils faisoient voir l'arbre de la maison d'Est fait & imprimé par Hierosme Folier, & adressé au deffunct Duc Alphonse, où il mettoit que le pere de Dom Cesar qui se nommoit Alphonse n'estoit né de Laure Eustoique, & du Duc Alphonse, mettant la femme qu'il eut, & ne mettant ceste cy pour la femme, & qu'il n'apparoissoit pas qu'il eust esté legitimé par mariage subsequant, & quand on le voudroit prouuer, les paroles de Paul troisieme, ne deuoient estre entendues que des enfans legitimes, non legitimez.

Quant à ce qu'on pouuoit dire qu'il y auoit eu vn Duc naturel, & qu'à ceste cause la nature du fief passoit aux autres, le Pape répondoit qu'en tant d'années on ne trouuoit cela qu'une fois, & que par vn seul acte il ne falloit pas interer vne coustume, & depuis il disoit que ledit acte ne prouuoit pas vne coustume, mais tout le contraire, d'autant que ce naturel qui fut admis à ladite Duché, fut en cela expressement habilité par le Pape, si bien qu'on voyoit que sans ceste habilitation telles personnes estoient d'elles mesmes incapables, outre qu'il y auoit la Bulle du Pape Pie cinquieme, qui rendoit les naturels inhabiles à tels fiefs de l'Eglise.

Il disoit aussi qu'on ne deuoit auoir nul esgard à la pretension des meliorations qu'il disoit auoir esté faites en ladite Duché, & monter à tant de millions, pource qu'outre que par la Bulle du Pape Pie cinquieme, il estoit dit qu'elle ne seroit pas retenue pour les meliorations, on le deuoit tenir pour plusieurs raisons que ce n'estoient pas debtes, premierement pource que c'estoit vne speciale conuention & renonciation faite par lesdits Ducs au temps du Pape Gregoire 11. veu qu'ils promirent de rendre ledit fief, la ligne estant finie, sans pouuoir rien demander, & apres que lesdites dépenses, & meliorations auoient esté faites par taxes sur les vassaux, & sur les benefices de la Duché, & par consequent qu'on ne pouuoit rien pretendre de ce costé là, puis que ces meliorations estoient faites avec l'argent octroyé par le S. Siege, & recueilly de ses vassaux, & d'ailleurs qu'ayant vn pache, par laquelle il estoit dit qu'ils ne pouuoient bastir sans la permission du saint Siege, ils ne pouuoient rien pretendre pour ce regard.

Et quant à ce que Dom Cesar pretendoit que la nomination de la Duché appartient au peuple, par lequel il pretendoit estre nommé, le Pape répondoit que le peuple n'y auoit nul droit, suiuant vne declaration qu'il auoit faite au temps de Clement 5. & qu'elle cessoit, au

cas qu'il y en eust, par tant d'investitures faites par les Papes. Que s'il y auoit vne investiture de Gregoire 9. qui portoit en investissant le Duc qu'il le faisoit tel, pource qu'il estoit agreable au peuple, il n'y auoit toutesfois nulle nomination du peuple, ains le peuple disoit qu'il le faisoit, pource qu'il estoit compris en l'investiture de Jean 22.

11. En fin le Pape avec ses raisons, & vne armee qu'il leua, fit que Dom Cesar sortit de Ferrare, & demeura Duc de Modene, & de Rhegge, & le sommaire de l'accord fait entre la Sainteté, & luy, fut tel.

Que Dom Cesar vuideroit de Ferrare tout ce qu'il y auroit, dans le mois de Ianuier.

Qu'il renonceroit, & quitteroit le tiltre de Duc de Ferrare, & de Comte de Rouique.

Qu'apres que Dom Cesar seroit sorty de Ferrare, & sa iurisdiction, il ne pourroit plus retourner à Ferrare, ny dans ses limites.

Que l'artillerie seroit diuisee entre le Pape, & Dom Cesar, & que le Pape prendroit le 1.

Que dans l'espace de trois ans Dom Cesar vendroit tout ce qu'il auoit à Ferrare, ou au Ferrarois, autrement que tout seroit tenu pour confisqué.

3. Et quant à toutes les dignitez que luy, ou quelqu'un des siens obtiendrait à l'aduenir, ils les recognoistroient du S. Siege.

La ville de Modene esprouua beaucoup de miseres depuis qu'elle fut entre les mains des Romains, principalement lors que Marc-Antoine y assiegea Dece Brute, & apres elle fut remise sus, mais non fortifiée comme auparauant, afin de ne seruir de retraite aux seditieux. Puis ayant esté ruinee par les Gots, Huns, & Lombards, elle fut rebastie en ceste sorte.

Charles le Grand ayant dompté les Lombards, & fait Pepin Roy d'Italie, ainsi que les Italiens se virent alleurez en leurs biens, & qu'ils jouyssent de la liberté par le moyen des Gaulois, ceux qui estoient yssus des anciens citoyens de Modene, & qui se tenoient encor par quelques bourgades voy fines, cōploterent ensemble de rebastir leur ville, & en firent le dessein le long du riuage du fleuve Panare, où elle est à present assise, & pour faciliter ce dessein, il fut aduisé que chacun des principaux Seigneurs du pais sorty de parens Modenois, feroit à ses dépens vne des portes de la ville.

La premiere porte nommée Salicet, fut faite par les Bosquets, la porte saint Pierre par les Freddi, ou Froids; la porte de Sarragosse par les Gazzons, & celle de Rodecoque par les Gorzans.

Les Sazzoles bastirent celle qu'on nomme Bazzonarie; les Sauignans dresserent la porte de la Cité neufue; les Manfredy, Pedocchi, & Pandeltes, celle de Ganacette; les Pics, Pies, & Papazon celle d'Albaret, & ceux de la famille Rodee avec leurs amis firent bastir celle de S. Jean.

4. Ainsi ceste ville fut rebastie, mais vn peu loing de l'ancienne. Mais ce fut long-temps apres le regne de Charles le Grand que cecy aduint, au moins si l'on veut croire Volaterran, veu qu'il dit que cecy aduint seulement l'an de Grace 110. Mais ceste ville apres s'estre maintenue assez longuement en liberté sous la protection des Empereurs, devint en fin sujette du Marquis de Ferrare, nommé Oppize fils de Regnault d'Est, auquel elle fut liuree par le Legat du Pape Benedict II. le Pape y consentant moyennant dix mille escus de tribut, que le nouveau Seigneur denoit faire au S. Siege; & cecy fut accordé l'an de Grace 1304. Toutesfois l'Empercur Henry 7. comme ne trouuant rien bien de ce que les Papes faisoient, & vsurpant sur l'Eglise le droit des terres qui estoient du patrimoine d'icelle, fit François Pic de la Mirande son Lieutenant à Modene, de laquelle toutesfois il se reserua la Seigneurie.

Ce Pic en fut chassé par les Guelphes, Passarin, Buttrion, & Bonacolsi la tindrent paisiblement iusqu'en l'an 1327. que leur tyrannie trop violente les en chassa plustost que la conjuration des citoyens.

5. Derechef les Pies, Manfroy, & Guy entrerent au gouvernement par le moyen du Roy Jean de Boheme, qui ne fut si tost hors d'Italie, que ce Seigneurs pies liurerent Modene à son vray seigneur le Marquis de Ferrare, Obizze qui fut apres inuerty par le Legat du Pape Benedict 12. du Vicariat perpetuel de ceste ville, dont la maison de Ferrare a jouy iusques à l'an 1510. que le Pape Iules II. la luy raut, & la donna à l'Empercur Maximilian, premier qui l'engagea au Pape Leon 10. pour 40000. escus. Mais depuis le Pape Clement 7. estant assiégué au chasteau Saint Ange par les gens de l'Empercur Charles cinquiesme, Alphonse d'Est Duc de Ferrare s'aydant de ceste occasion recouura le sien, & entra en la possession de Modene & Rhegge, que quelques-uns ont tenu pour colonie de Lepide, & l'on tient qu'il fut ruiné, lors que les Gots irritez contre Stilicon ravagerent l'Italie, & s'esleuerent en l'an mil trois cents quatorze, les enfans de ceux qui estoient restez de sa ruine, ceignirent ceste ville de murailles.

Les

Les Comtes de Canosse en vsurperent la seigneurie l'an mil deux cents quatre vingts six, mais ils en furent chassés la troisieme année apres leur vsurpation par les Boulonnois, qui firent present de ceste ville à Obizze d'Est premier du nom, Marquis de Ferrare, l'an mil deux cents nonante deux, mais l'an 1326. les citoyens se rendirent à l'Eglise, & les gouverneurs que le Pape y mit furent tuez par le peuple, pour s'estre portez indiscretement. A la fin Martin de l'Escale, Seigneur de Verone acheta ceste ville des Foglians qui l'auoient vsurpee, mais auant que l'Escale y entrast pour en prendre possession, Louys de Gonzague y entrant occupa la Seigneurie, & fit bastir vne citadelle près la porte saint Nazaire.

Après cecy Feltrin de Gonzague, ne la pouuant tenir contre les forces de son frere, Seigneur de Mantouë, qui luy faisoit la guerre, la remit pour 60000. ducats à Barnabé, Vicomte, & Seigneur de Milan 1370. & elle demeura à ses successeurs iusqu'en l'an 1402. que plusieurs tyrans se firent Seigneurs de diuerses citez d'Italie. Ce fut lors qu'Ottrobon se fit Prince de Rhegge, mais il fut tué par Sforce Cotignole incité par Nicolle II. de la maison d'Est, & Marquis de Ferrare, qui s'en rendant maistre, la laissa pour heritage à sa maison iusqu'à ce qu'en l'année 1512. le Pape Iule II. l'osta aux Ferrarois, & la sousmit à l'Eglise, sous l'obeissance de laquelle elle demeura iusqu'à ce que le Duc Alphonse l'osta au Pape, & la laissa pour patrimoine à ses successeurs. Ces deux villes demurerent à Dom Cesar d'Est, puis l'ont retournees à l'Eglise.

En l'an 1598. Ferrare fut reünny au saint Siege, le Pape Clement huitiesme y arriva au mois d'Auril, & y demeura iusques à la fin de l'an, le principal soing de son sejour fut de mettre vn bon ordre au gouvernement de ses subiects qu'ils n'eussent point occasion de regretter le Duc Alphonse, ny ayant rien qu'un nouveau Seigneur doive plus eiter, que de donner occasion aux nouveaux subiects de soupirer le regne de son predecesseur.

Il rendit les choses en telle egalité & proportion que la ville de Ferrare, qui estoit auparavant fort diuisee en affection n'eust plus qu'un general consentement de son obeissance.

De tout temps Ferrare a esté l'azyle & la retraite des Iuifs, ils y ont demeuré avec tant de faueur & de gratification des Ducs, qu'on ne les distinguoit plus d'avec les autres.

Le Pape n'estimant raisonnable que la Synagogue allast du pair avec l'Eglise, non plus que Platon ne vouloit point que les Inquilins fussent esgalez aux Citoyens, qu'une troupe de vagabonds se preualust des faueurs du Prince au preiudice des originaires, ordonna qu'ils fussent recogneus, & distinguez par les mesmes marques qu'ils portent à Rome & autres villes d'Italie, mais par ce que les abus qui sont enuieillis en la tolerance de la coustume, ne doiuent estre reformez que petit à petit, & que tout changement doit auoir ses degrez, il se contenta de les faire cognoistre par vn cordon jaune qu'ils portoient à leurs chappeaux.

Il y en eut qui aymerent mieux quitter la ville que de consentir à ceste marque, & entre ceux là les Marrans (entre les Iuifs ceux là sont appelez Marrans qui ne sont nez Iuifs, mais qui ont reccu la Circoncision en quittans le Christianisme) se monstrent plus opiniastres, estans d'ailleurs grandement vlcerez de ce que la generale conspiration qu'ils auoient faite, il ya quelque temps contre les Chrestiens, n'auoit pris feu, car on auoit decouvert que les plus riches de toutes les Synagogues dispersees par le monde auoient fait vne bourse de cinq cens mille escus pour presenter au grand Seigneur, afin qu'il fist destruire le saint Sepulchre de Hierusalem, & oster ausdits Chrestiens ceste memorable marque de la Redemption & de la mort de celuy, par lequel ils ont acquis la vie. Les Princes, aux terres desquels ces Retaillez demuroient ne peurent souffrir, ny dissimuler ceste coniuuration, & les chastierent par de grandes amendes.

Des actions publiques du Pape pour le temps qu'il demeura à Ferrare, la plus celebre fut la stipulation en ses mains des promesses de mariages de quatre personnes de mesme nom, mesme famille, mesmes armes, Philippes d'Autriche troisieme du nom Roy d'Espagne, espousa Dame Marguerite d'Autriche, Albert Archiduc d'Autriche, espousa Dame Isabelle d'Autriche Infante d'Espagne, & tous ces mariages furent stipulez & consentis par ledit Pape Clement huitiesme, pendant son sejour de Ferrare.

QUALITE.

Le terroir des enuiron de Modene, abonde en bleds, & en febues, & autres choses nécessaires à la vie des hommes, & sur tout il porte des vins excellens. Et quant à Rhegge, son terroir est aussi fertile au possible, & porte grande quantité de froment, de febues,

d'orge, & toute sorte de grains, & de vins blancs qui ne doiuent rien à nuls autres qui soient en Italie.

Les enuirs de ceste ville sont dottez d'un air qui est bon & sain, & l'on y void regner peu de maladies.

M O E V R S.

7. **L**es citoyens de Modene se sont tousiours monstrez fort desireux de la liberté, & ont souuent exposé leurs vies pour la maintenir, & ceux de Rhegge ont esté de mesme. On a veu sortir de Modene d'excellens personages aux armes, & aux lettres.

Les Italiens disent que ceux de Modene sont subtils, aigus en leurs conseils, & aisez à appaiser lors qu'on les a offencez, & longs à traiter leurs hostes.

On dit aussi que leurs femmes sont de douce humeur, & nullement reuesches. Pour ceux de Rhegge ils sont affables, subtils, de bon esprit, & adroits en tout ce qu'on les veut employer, & finalement ils ont autant aimé la liberté, que gens qui soient en Italie, & l'ont conseruee le mieux qu'ils ont peu, ainsi qu'on void par la peine qu'ont eue ceux qui l'ont assujettie.

RICHESSSE, FORCE, ET GOVERNEMENT.

8. **C**es deux villes, & tous les enuirs sont assez riches, mais on ne peut encore bien parler de ce qu'en peut tirer leur nouueau Prince.

Quant à la forteresse, ces deux villes sont assez bonnes, & Rhegge plus que Modene, à raison d'une bonne citadelle qu'elle a, & ce nouueau Duc tient en toutes deux des gens de guerre pour se conseruer.

Quant au gouvernement, il est encor si nouueau qu'on n'en peut parler avec assurance, si bien qu'il vaut mieux le passer sous silence, attendant que le temps ay — y toutes choses.

Estar





E S T A T.
DE LA REPUBLIQUE DE LVQVES.
S O M M A I R E.

I.



- O** RIGINE du nom de la ville de Luques.
2. Sa situation, son enceinte & ses confins.
 3. Croix d'or, & de grand prix qui se void en l'Eglise de sainte Croix de Luques, engagée par les Pisans aux Luquois.
 4. Ville de Luques anciennement dominee par les Gots, par les Empereurs de Constantinople & plusieurs autres Seigneurs.
 5. Son terroir de grand rapport & situé en bon air.
 6. Luquois douez d'esprit subtil, d'un naturel courtois, amateurs de liberté, & d'un langage doux & pur.
 7. Leurs richesses consistant en argent & trafic de soye.
 8. Republique de Luques foible & de petite resistance.
 9. Conseil de Luques composé de trois sortes de personnes, du Gonfalonnier, Chef de la Republique & de son election par les Assorteurs, du Commandeur de la Seigneurie & son autorité.
 10. Des trois Secretaires, & quel est leur pouvoir & jurisdiction.
 11. Du Conseil du Colloque, composé de dix-huit citoyens.
 12. Des six hommes établis sur les finances.
 13. De la Rote composée de trois Docteurs étrangers.
 14. De la Cour des Marchands, composée de neuf hommes, & de l'office nommé de l'Abondance.
 15. Des Commissaires établis sur les gens de guerre.
 16. Du Consul des discoles, & quelle est sa charge.
 17. De l'office du logement, composé de huit personnes, qui prennent garde aux étrangers.
 18. De la garde du Palais.



L V Q V E S est vne fort bonne ville assise en la Toscane, ainsi nommée de Lucunon Roy des Toscans. Strabon dit que Luques est vne ville proche des montagnes de la Lune. Mais pour parler de ce qui est de nostre temps, je diray que Luques se trouue aujour d'huy auoir trois milles de tour. Elle est en vne plaine, non guere loing de quelques costaux sur la ruiere de Seruie. Elle est ceinte de bonnes murailles, ornée d'assez bonnes maisons. Du costé du Septentrion elle consiste avec la Carfagnane, bonne vallee & pleine d'un peuple guerrier, & prompt à la main. En tout le reste elle est environnée de toutes parts du grand Duc.

L'Eglise principale est nommée de sainte Croix. Il y a dans ceste Eglise vne croix d'or, que les Pisois engagerent aux Luquois, à condition de rachapt, mais elle n'a iamais esté rachetée.

On tient qu'elle vaut 15000. escus.

Ceste ville a eu diuers maistres, veu qu'elle a esté dominee par les Gots, par les Empereurs de Constantinople, par les Phaseols, Castruces, Spinols, par ceux de l'Escale, par les Florentins, & les Pisans. Et en fin elle fut sous la domination de Charles de Boheme qui en usurpa la Seigneurie, & établit en son lieu pour gouverneur un Cardinal, qui mit ceste ville en franchise pour 25. mille escus. Ce fut la premiere ville de Toscane qui receut la foy Chrestienne.

Q V A L I T É.

Le terroir de Luques est de petite estendue, mais ce qui s'y trouue est bon, & de grand rapport à les maistres. L'air y est assez bon, & les maladies ny sont guere en regne.

M O E V R S.

6. **L**es hommes y sont naturellement courtois & fort modestes, & de grande bonté, procedent avec beaucoup de franchise en leurs affaires, ont l'esprit subtil, & réussissent aux arts auxquels ils s'employent. Ils aiment leur liberté tout ce qui le peut, à raison dequoy on tient qu'ils employeroient jusqu'à la dernière piece pour la conserver. Presque tous les citoyens s'adonnent à la marchandise.

Les Italiens disent que les Luquois en matiere de science aiment fort l'estude des saintes lettres, qu'ils sont gentils à la reception de leurs hostes, & fideles envers eux, de mesme que de bonnaires aux offences receuës, & fort prompts à pardonner, & qu'en leur trafic ils ont leur foy en singuliere recommandation, & que leurs femmes sont volontiers chastes. La langue de Luques est estimee en Toscane fort douce & pure : & d'autant qu'elle n'a pas les accents ennuyeux qui sont presque communs à toutes les villes de ceste prouince.

RICHESSE.

7. **I**l y a de riches familles, pource que les hommes de ceste ville font de grands trafics, & ont des correspondances par tous les Estats de la Chrestienté, & encor ailleurs : mais leur principal trafic est en soye, pour laquelle ils ont grande reputation entre les Chrestiens, & au temps de Castruccio Castracani qui s'en fit seigneur, plusieurs familles en estants parties pour ne vouloir pas obeir au tyran, ceux qui s'en estoient retirez porterent l'art de la soye avec plusieurs richesses en diuers endroits d'Italie, & encor ils porterent à Florence l'art de faire le drap d'or, auquel ils excellent.

La Republique n'est pas riche comme ayant vne bien petite iurisdiction, mais il y a beaucoup de particuliers aylez, & accommodez au possible, & toute leur richesse consiste en argent.

FORCE.

8. **L**a ville de Luques est forte d'assiette, ceinte de bonnes murailles, & bien pourueüe de munitions & d'artillerie, & comprend vingt quatre mille personnes dans son pourpris, mais nonobstant tout cela, & quoy que les Gots qui estoient dedans ayent autres fois soustenus six mois le siege qui auoit esté mis deuant par Narses, Capitaine de l'Empereur Iustinian, toutesfois on tient qu'elle ne seroit capable de resister guere long temps au grand Duc, s'il entreprenoit de s'en rendre maistre, sinon qu'elle fust assistee de quelqu'autre, mais on croit qu'il en tire plus de profit, & de commodité la laissant ainsi libre, que s'il s'en estoit emparé.

GOVERNEMENT.

9. **L**e Conseil est le fondement de ceste Republique, de mesme que toutes les autres, pource que c'est de luy que dépend, & naissent tous les autres Magistrats qui sont membres de ce corps ordinaire.

Ce Conseil manie toutes les affaires d'Estat, & pour abreger, il est maistre de ceste Republique. Il est composé de trois sortes de personnes, veu qu'il y en a quelques vns ordinaires du Conseil qui y demeurent vne annee, quelques autres sont limitez à volonté, & ne sont pas ordinaires, & quelques autres sont subrogez en la place de ceux qui meurent, & durent vne annee en ceste charge. Somme que ce Conseil est de 160. citoyens, & d'ordinaire ils sont tousiours 120.

La ville de Luques est diuisee en trois parties qu'on nomme Tierciers, l'une est de saint Sauueur, l'autre de saint Paulin, & la troisieme de saint Martin. Le Conseil eslit donc la Seigneurie des trois susdits Tierciers, c'est à dire, elle crée pour chascun Tiercier trois hommes, qui sont en tout neuf hommes.

Outre les susdits ils eslisent vn Gonfalonnier qui est chef de la Republique, & cestuy cy est esleu vne fois du Tiercier de saint Sauueur, l'autre de celui de saint Paulin, & le troisieme de saint Martin, & les Tierciers estans finis on se remet à creer le Gonfalonnier de saint Sauueur, & ainsi successivement selon ledit ordre. Ces dix sont esleus en tout, tout les 3. annees, & tous excepté le Gonfalonnier sont nommez Anciens.

L'eslection se fait en ceste maniere. On cree trois hommes nommez Assorteurs, en prenant vn de chascun Tiercier. Ceux cy ont la charge de cõpter les balottes de ceux qui sont esleus, & apres que le Conseil a esleu quelque nombre d'hommes, ceux cy eslisent le Gonfalonnier, & prennent tousiours pour ceste charge celui qui leur semble plus propre, & plus

plus capable. Or lors que la susdite eslection se fait, lesdits Assorteurs demeurent en vn lieu separe, & comptent les balottes jusqu'à ce qu'elles arriuent au nombre, & lors qu'elles n'y sont pas, ils font balotter de nouveau jusqu'à ce qu'il y en ayt cent quatre-vingt, & de plus on ne publie les subrogez, ny les balottes au Conseil, ains cela est seulement sceu des Assorteurs. Et ain qu'il n'y puisse auoir de la tromperie du costé des Assorteurs, ils ont pour assembleurs 2. Religieux principaux, l'un de l'Ordre S. Dominique, & l'autre de S. Francois.

Ces Assorteurs ont autorité de mettre les hommes qui sont esleus pour Magistrats, pour le temps que bon leur semble, comme d'en establir l'un pour tel mois, & l'autre pour tel, & cecy eût fait par les Assorteurs, qui sont les premiers hommes de Luques, ils le tiennent secret, & ont par serment de ne le reueler point.

Après que les Assorteurs sont creez, on cree la Seigneurie, la charge de laquelle est d'oüyr les choses de iustice, & de voir les graces qu'on demande, & les requestes. Ceux qui sont de ce corps demeurent tousiours au Palais, & n'en peuuent sortir sous peine de la vie. La Republique les desfraye: du susdit corps de dix on en eslit vn avec tiltre de Commandeur, & ces neuf sont alternativement, & la puissance est de trois iours, durant lesquels il a l'autorité de commander à tous les autres, & même au Gonfalonnier. Il est bien vray que les Requestes qui s'adressent à la Seigneurie sont presentees au Commandeur, & s'il ne les veut proposer aux Seigneurs, il peut le faire: toutesfois il ne peut disposer des affaires sans l'autorité de la Seigneurie. Que si le Commandeur propose la requête à la Seigneurie, & qu'elle passe deux tiers, le Gonfalonnier la propose après au Conseil. L'autorité de la Seigneurie s'estend sur les estrangers, mais non sur les citoyens, & elle propose toute chose, mais n'en peut conclurre aucune.

L'office des Secretaires qui sont au nombre de trois, est fort important. Cens-cy ont seulement autorité aux choses qui concernent l'office de la Majesté de la Republique, & pour ce regard ils sont absolus, & par dessus le Gonfalonnier. Mais auant qu'ils facent aucune chose ils en donnent faire entendre la raison au grand Conseil. Et quelques fois il aduient, que le cas le requérant ainsi ils executent. & rendent raison au Conseil après la chose faite, ou pour n'auoir peu assembler le Conseil tout d'un coup, ou pource que le fait requeroit vne prompte expedition. 10.

Le Conseil du Colloque est composé de dix-huict citoyens, qui sont esleus par le Conseil. 11. Cens-cy au cas que les Seigneurs aient quelque doute en quelque matiere, & ne vucillent si facilement deliberer, ils s'assemblent, & consultent la chose qui doit estre proposée au Conseil, & après les discours faits par eux, ils deliberent ensemble avec la Seigneurie, si l'on la doit proposer, ou non, au Conseil.

Les six hommes ont charge de la dépense, & du reuenu du public, & pouruoyent, & commandent à toutes les choses qui concernent les finances, & sont comme gouuerneurs des reuenus. Ils ont vn Chambellan qui est executeur de leurs deliberations, & tous cens-cy sont esleus par le grand Conseil. 12.

La Rote qui est ordinaire en plusieurs villes d'Italie, est de 3. Docteurs estrangers qui doiuent estre de 50. milles loing de Luques. On change cens-cy alternativement, & au bout de tous les 6. mois vn d'iceux est fait Postat, l'autre est Iuge criminel, & l'autre ciuil, & celuy qui est Postat a. esté Iuge criminel, & le Postat precedent entre la place de ce Iuge criminel, de sorte que chacun de cens-cy est Postat, Iuge criminel, & Iuge ciuil à son tour. Si le Postat a par fortune entre ses mains vn citoyen il forme seulement le procez, & met par escrit son opinion touchant ce que le criminel a merité, & lors il est besoing qu'on aille au Conseil, qui approuue, ou desapprouue, ou modere l'aduis, & la sentence du Postat, qui en ce cas entre au Conseil. Quant aux estrangers, le Postat peut executer absolument la sentence sans autre formalité. Et en somme ces trois traittent aussi toutes les choses ciuiles. 13.

Ceux qui sont de l'office de la munition ont charge de faire que la munition des bleds ne manque de trois années continues. 14.

Ils reuoyent souuent les lieux où l'on tient les munitions, & y en remettent successiement à mesure qu'ils se consomment.

Et pource que dans la iurisdiction de Luques, on a ordonné quelques assemblees de personnes propres à manier les armes en vne necessité de guerre, il y a six Commissaires qui ont autorité sur les susdites troupes, & toutes les choses qui arriuent pour ce regard, passent par leurs mains, & ils en donnent sentence. 15.

Il y a pareillement trois Seigneurs qui ont charge de la santé du pais. Cens-cy prennent garde que les viures soient bons, qu'on jette dehors les immondices de la ville, que les habitants vsent de toute diligence pour la preseruer de peste, & tout autre semblable accident qui pourroit arriuer à la ville.

- Et pource que presqu'en toutes les villes on trouue assez de personnes qui ne voulans s'adonner à nul bien, pourchassent leur vie, & leur entretien avec mille méchancetez, & ne pratiquent ordinairement que les choses contraires aux bonnes regles de la vie civile, & politique, à ceste occasion les Luquois ont vn Conseil qui se nôme des Discoles, c'est à dire des hommes de mauuaise vie, vagabonds, de mauuais exemple, & méchans en leurs actions. Ce
16. Conseil s'assemble vn des iours de la sepmaine sainte, il est permis à tous ceux qui entrent au susdit Conseil de mettre dans vne boîte appareillée pour cet effect, des billets ausquels ils escriuent le nô du perdu, ou débauché qu'ils cognoissent, ou veritablemēt ils n'ecriuent rien dans ces billets, & si par fortune on trouue le nom de quelqu'un en plusieurs de ces billets, on le balotte au grand Conseil pour Discole, & lors que les deux tiers des balotes luy sont contraires, il est banny comme tel.

La sentence porte qu'il demeurera trois ans pour le moins à cinquante milles loing de la ville, & de sa iurisdiction. Que s'il n'obeyt durāt ces trois ans, & vient à contrarier à son ban, il y va de sa vie. Or aussi-tost apres que les deux tiers des balotes se sont trouuez contre ce vagabond, auant que le Conseil decende, on le publie pour Discole à tous les quatre coings de la place, & il faut que celuy qui est banny parte ce soir meisme de la ville. Les trois ans estans finis, & le banny estant de retour en la ville, s'il ne s'amende, son ban est renouuellé avec le meisme ordre. Et vrayement cecy a quelque ressemblance avec l'Ostracisme dont vsoient les Atheniens, mais il y a ceste difference qu'on bannissoit d'Athenes pour dix années, ceux dont la grandeur, & puissance estoit suspecte au peuple.

17. Il y a encor l'office du Logement composé de huit personnes, qui ont charge de prendre garde aux deportements des estrangers qui viennent à Luques, & de recognoistre ce qu'ils y vont faire & les hostes sont obligez de donner par escrit à cet Office les noms de ceux qui viennent à Luques, lors qu'ils ne sont pas de la ville. Et si par fortune quelqu'un mentoit, donnant à entendre vne chose pour vne autre, ils luy donnent l'estrapade pour tirer la verité. Que si l'on cognoist quelqu'un de la ville, & l'on le nomme à ces Seigneurs, ils s'enquierent soigneusement de celuy qu'ils ont pour suspect, & le trouuant homme de bien ils le laissent aller.

La Seigneurie eslit cent soldats estrangers, qui doiuent estre pour le moins de cinquante milles loing de Luques, pour la garde de son Palais. De ces cent on tire les Capitaines, & les Colônels. Il est deffendu à ceux-cy sur peine de la vie de s'aprocher des murailles de nuit, ny seuls, ny acompagnez, ains ils demeurent seulemēt à garder la Seigneurie. Car quāt à la garde des murailles elle est faite par les artisans de la ville, qui ont fême & enfans, & ceux-cy ont 3. escus de paye chacun par mois. Aux portes il y a des hommes de la ville, & chaque porte a deux citoyens pour Commissaires, l'un desquels y demeure depuis le matin quand la porte s'ouure, iusqu'à l'heure du disner, puis s'en va: & l'autre depuis le disner iusqu'à ce que la porte se ferme.



ESTAT DE LA REPUBLIQUE DE GENNES.

SOMMAIRE.

I.

DESCRPTION & diuision de la Ligurie, & pays de Gennes, & ses principales villes.

2. Ajicite, & circuit de la ville de Gennes, son ancienne puissance sur la mer.
3. A change, ouuent de Seigneurs, gouuerner par des Comtes, puis des Ducs.
4. De la ville de Sauone.
5. Del' Isle Corseque, sa largeur, circuit & confins, ses parties, villes & chasteaux.
6. Ligurie & pays de Gennes, montueux & plein de precipices, abondant en oluiers, citronniers & oranger.
7. Corseque, Isle abondante en miel, cire, vairins, huyle, figues, buis, alum, cristat & coral.
8. Des bains de Pirra Pola, dont les eaux chaudes en souffrees sont medicales.
9. Des poules sauages de l'Isle Gallinaire.
10. Liguriens jadis grands Pyrates, & la façon brutale des Corfes, Gennois & Liguriens modernes, de vis & subtil esprit, altiers & factieux.
11. Corfes d'un naturel sauage & vindicatif.
12. Reuenus de Gennes, & en quoy consiste celuy de la Republique.
13. De ses fortes places, & les galeres qu'ils entretiennent sur mer.
14. Son gouuernement & sa forme, du Conseil des 400. & du Conseil des cent nobles.
15. De l'election du Duc, Chef de la Republique, ses vestemens & son autorité.
16. Des Gouverneurs, & quel leur office.
17. Du Podestad estrangier & sa iurisdiction.
18. Des Scudic's souverains & leur pouoir.
19. De la Rote où se traittent les matieres & affaires civiles.
20. De l'autorité & office des Consuls.
21. De l'origine de l'office de saint George, & ses grands priuileges.
22. Des Proiecteurs de l'office de S. George, & la façon de les eslire.
23. De l'office des 44. & la cause de leur creation.
24. De l'Archeuesché de Gennes & ses suffragans Eueschez.



La Ligurie est assise entre la riuere de Var, & celle de Macre, ou Maigre, & a du couchant pour sa borne les Alpes qui diuisent la Prouence de l'Italie, du Leuant la Toscane, du Midy la mer Ligustique, qui s'estend enuiron cent soixante milles, & du Nort l'Apennin, & vne partie de la Lombardie deça le Po. Elle est proprement nommee Ligurie delà le Po, pour la distinguer de la Ligurie deça le Po, qui est le Mont. ferrat, & aujourd'huy l'on l'appelle Riuere de Gennes, ou coste, du nom de la premiere ville de Ligurie. Or la riuere, coste, ou contree de Gennes, est diuisee en Orientale & Occidentale, ayant au milieu Gennes pour sa ville metropolitaine. La partie Orientale est celle qui est depuis le port de Lune iusqu'à Gennes, & l'Occidentale celle qui s'estend depuis Gennes iusqu'à Monacho. Les places d'importance de ceste contree, & dont on peut faire estat outre Nice, & Villefranche, qui sont au Duc de Sauoye, & Monacho que le Roy d'Espagne a achepté depuis quelques annees du Seigneur qui le possedoit, auquel on croit qu'il a donné cent mille escus, il va Vintimille bonne ville, Arbengue, Cure, Final illustre Marquisat, ainsi nommé de la subtilité de l'air, Nole avec vn port raisonnable, & Sauone: & près de Sauone l'Apennin commence à se hausser, & s'estendant du long de la mer iusqu'à la ville de Bobbio comence à se retirer là vers le Nort, & va fendre l'Italie par le milieu iusqu'à la ville d'Ascoli de Fouille. Là il se diuise en 2. cornes, l'un finit avec le mont S. Ange, autrefois Gargane, & l'autre estât arriué fait 2. brâches assez près de Veni. & en est éd vne iusqu'à la terre de Bari, & l'autre iusques en Calabre. Mais retournant à la marine on trouue Gennes, ville capitale de

P p ij

la Ligurie, qui commande à la pluspart de ceste contree, & pareillement à l'Isle Gallinaire qui est auprès, & encor à l'Isle de Corse.

Gennes est assise au riuage de la mer Ligustique, avec vn port beau & magnifique, qui s'ou-
 11. urant du costé d'Afrique, a son regard au Midy, & la ville l'a aussi vers la partie Australe, tournant le dos au Nort. Elle est partie en pendant, & partie en plaine, & entre deux vallées, ayant 6. milles de tour, vn grand nōbre d'habitans, & de palais magnifiques, principalement le long du riuage : de sorte qu'on ne peut rien voir de plus beau, ny plus agreable : & ce n'est pas sans raison qu'on la nomme Gennes la superbe. Ceste ville a tousiours esté en reputation, & tenue pour l'une des clefs d'Italie à cause de son assiette. Elle fut autresfois merueilleusement puissante sur la mer.

De sorte que ses-citoyens ont obtenu des victoires signalees, & ont estendu les bornes de leur domination iusques à la riuere de Don, ou Tanais, car ils acquirent la ville de Theodosie, qu'on nomme maintenant Gasse en la Chersonese Taurique, & outre ce mirent sous leur puissance les Isles de Cypre, Lesbos, & Chie, & encor la ville de Pera en Thrace.

Ils furent au commencement sujets aux Romains, iusques à l'an de Grace six cents. Car
 111. alors Rotares Roy des Lombards la prit & la pillà. Mais apres qu'elle eut esté recouuerte, Charlemagne & Pepin son fils Roy d'Italie, & leurs successeurs, Roys de France l'ont gouvernee par l'espace de cent ans ou enuiron, y establisant des gouuerneurs qu'ils appelloient Comtes. Et quand les Sarrazins se jetterent dans l'Isle de Corse, & en prindrent possession, le Comte Ademar equipant des galeres s'en alla avec les siens en ceste Isle, la retira des mains des infideles, & la retint sous la puissance des Geneuois. En fin ceste ville a esté fort excellente en guerre sur la mer : de sorte qu'elle y commanda long-temps, & empescha que les Pyrates n'exercassent leurs vols à leur aise. Apres Charlemagne & ses enfans elle a soustenu beaucoup de tyrannies de ses citoyens, & pour ceste cause a esté quelquesfois contrainte de recevoir des Seigneurs estrangers, & qui plus est, elle perdit par ses dissensions civiles toute la domination qu'elle auoit sur la mer.

L'an 1258. il survint vn grand discord entre les Geneuois, & les Venitiens à cause de Tyr, & de Prolemaide, où les habitans de ces deux villes trafiquoient. Car les Geneuois ayans receu vn grand eschec des Venitiens, appellerent à leur secours l'Empereur de Constantinople, nommé Michel Paleologue, & pillerent la ville de Gaze, qui appartenoit aux Venitiens, prirent prisonnier leur Duc, & s'en allerent iusqu'à la riuere de Don, mortant en leur sujection plusieurs villes & citez.

L'annee 1337. ils instituerent vn Duc à la façon des Venitiens, lequel ils enuoyerent en Cypre, qui fut reduite sous leur puissance, prirent le Roy & la Royne, & les menerent prisonniers à Gennes : mais vn peu apres ils les deliurerent, leur imposant vn tribut annuel, & retindrent au Royaume la ville de Famagouste. Au reste, le premier Duc de Gennes leua vne armee contre les Venitiens, & fut deffaict : à raison de quoy il fut priué de sa charge, & mis en prison, puis on en mit vn autre en son lieu, qui assaillit vaillamment les Venitiens, & leur fit beaucoup de dommages, mais à la fin il mourut en guerre.

Lors les Geneuois creerent vn autre Duc qui alla trouuer l'Empereur de Constantinople, & fit si bien son deuoir aux guerres où il fut employé qu'il eut de l'Empereur l'Isle de Mytilene, ou Metelin, que les Geneuois ont tenuë iusques à l'an 1354. Apres ce Duc les Geneuois en creerent encor vn autre l'an 1381. qui fut le dernier, & apres luy ils prindrent Charles 7. Roy de France pour leur protecteur, qui y mit vn Lieutenant pour luy. Mais ces inconstans faschez des François, se joignirent au Duc de Milan, qu'ils eurent pour leur deffenseur iusqu'à l'an 1435. lors abandonnant le Duc Philippes ils creerent vn Duc : ce qui ne fut toutesfois agreable à plusieurs, pource que les vns tenoient le party des François, les autres du Duc de Milan. En fin ils vindrent sous la puissance des François, & y demurerent iusqu'à ce qu'André Dorie faisant cesser les seditions & debats des Adornes, & des Fregoses, dont les vns tenoient pour la noblesse, & les autres pour le peuple, mit ceste ville en l'estat auquel elle est en l'an 1528. Autour de la ville il y a des maisons plus superbement basties que dans Gennes mesme, comme à Alban, Bisagni, Misagno, Marasi, & autres lieux.

Sauone est aussi en Ligurie, & est ville ancienne, qui selon quelques-vns se nommoit jadis Sabatie, ou Sabare. Son circuit est de mil 5. cens pas, & il y a des bastimens magnifiques. Elle a esté sous la puissance de diuers, comme des Geneuois, des Vicomtes, & des Storses Ducs de Milan, & pareillement des François, & quelquesfois aussi à elle mesme. Mais maintenant elle obeit aux Geneuois. Il est sorty de ceste ville trois Papes, c'est à sçauoir Gregoire 7. Iules second & Sixte quatre.

Or passant à la riuere qu'on nomme de Leuant, on trouue derriere Capo di Monte, Porto fino, & Ripalle avec son golfe, & plus outre Chiauari, & Sestri, & Leuanto assez bons lieux, &

& les cinq places. On void apres vn petit golfe qui est tout port avec les places de Portrouenere, & de la Spetie, & plus outre Lerice. Ils possèdent encor Heresane qui est vne place forte, frontiere des Florentins, & de ce lieu dependent la cité de Vingtunille, & beaucoup de villages, de chasteaux, & de bourgs, & Piene.

La Corsegue est la moindre des trois Isles qui sont joignant l'Italie, dont les deux autres sont Sicile & Sardaigne. Les Grecs l'ont nommee Cyrnos, ou Cyrne d'un fils d'Hercule, & quelqu'un a tenu que c'est celle qu'Ouide nomme Teraphne. Elle a pour ses bornes du costé d'Occident & de Septentrion la mer Ligustique, du Léuant la mer Tyrrene, & l'Ionique, & du Midy le destroit de mer qui est entre elle & la Sardaigne. Car elle a du Nort le Cap Corse, & regarde du mesme costé Portrouenere, ou le Port de Venus de la riuere de Gennes, duquel il est esloigné de 60. milles, & non de 120. comme quelques vns ont dit. Elle est esloignée de Sardaigne, selon Strabon, de 60. stades, qui font sept milles & demy, les autres mettent vne lieue d'Allemagne qu'on peut faire en vne heure. Leandre met dix milles d'Italie, les autres 19. ce qui ne peut estre en nulle sorte. Mais Mercator qui a calculé plus exactement que nul autre, ne met que six milles. Strabon fait ceste Isle longue de 160. milles: mais veritablement elle ne l'est de plus de 120. Pline la fait large de 60. milles: & Strabon de 70. ce qui est veritable. Son circuit, selon Pline, est de 322. milles, & selon les autres de 305. & selon d'autres encore de 390. mais la verité est qu'elle est iustement de 325. milles. Elle est au cinquiesme climat, & occupe le 12. & 13. parallele, & sous plus grand iour d'Esté est de 14. heures, trois quarts, & quinze heures.

Ceste Isle fut premierement occupee par les Tyrrhenes, ou Toscans, puis par les Carthaginois, auxquels elle fut ostee par les Romains qui en jouyrent iusqu'à ce que les Sarrazins les en mirent hors, & ceux cy furent chassés par les Geneuois, & ceux là par les Pisans, & finalement elle fut sous la puissance des Papes: mais en dernier lieu elle reuint entre les mains des Geneuois, auxquels elle obeyt.

On diuise aujourd'huy ceste Isle en 4. parties, c'est à sçauoir au costé exterior, & en celuy de dedās, & au pais qui est deçà les monts, & en celuy qui est delà. Car la partie qui regarde le Soleil leuant se nomme costé interieur, & celle qui luy est opposée, le costé exterior. La partie qui est la plus proche de l'Italie se nomme deçà les monts, & celle qui regarde la Sardaigne delà les monts. Toutesfois les habitans s'appellent les vns les autres deçà & delà les monts, selon leur demeure.

Pline dit qu'il y auoit en ceste Isle 33. villes, ce quia esté aussi remarqué par Martian Capella. Et Strabon dit que ce n'estoient villes, mais chasteaux, & ne compte que 4. villes de son temps, entre lesquelles il y auoit deux colonies, l'une nommee Mariane de Marius, & l'autre Alerie enuoyee par Sylla. Mais aujourd'huy elle n'a presque qu'une seule ville apelée la Bastie, près de la mer, encor est-elle bien petite en l'extremité de Corsegue qui regarde la Sardaigne: il y a vn chasteau nommé Boniface, jadis nommé port de Syracuse, où il y a vn bon port. Il y a quelques annees que les Geneuois y enuoyerent vne colonie de gens de leur nation pour y habiter, qui bastirent vne petite ville aupres de Boniface, au port de la mer, qu'ils nomment Portoucchio, c'est à dire vieil port, enuiron demie iournee loing de Boniface. Quant à la ville d'Alerie, elle est à 3. lieues d'Allemagne, ou enuiron loing de la Bastie: mais elle est aujourd'huy ruinee, & n'y a que des pasteurs qui habitent. Son Euesché a esté transporté à la Bastie. Quant à Ajazze, quoy que les Corfes en fassent assez de cas, toutesfois ce n'est pas grande chose. Ceste Isle ayant esté possedee par les François quelques annees, fut rendue aux Geneuois par la paix faite l'an 1559. entre les Roys de France & d'Espagne.

QUALITE.

Le pais de Ligurie est pour la plus grande part aspre & montueux, & de tous costez on ne void que des rochers & des precipices qui laissent près de la mer des passages fort estroits, & selon Strabon il a esté jadis entierement sterile, & n'auoit rien digne de recit, sinon qu'au dedans (où il est presque tout montueux, plein de forests, & de precipices) il y auoit de fort grands arbres, comme il y a encor, dont ils vsoient à faire des vaisseaux, avec lesquels ils escumoient tout iusqu'au destroit de Gibraltar. Mais maintenant la terre est mieux cultiuee, & principalement il y a grande quantité de fort bon vin; veu qu'au terroir qui est près de la ville de Tabie, on en fait qui ne cede nullement à la maluoisie de Candie, c'est celuy qu'on nomme Apain.

Il y a aussi en Ligurie fort grande quantité d'huyle, tellement qu'il en rend quelquesfois iusqu'à mille barils. Près de la ville de S. Reme il y a force citrons, orangers, palmiers, limoniers, & autres arbres fructiers. Tout ce qui est aupres d'Andorie est plein de vignoble. En fin toute la contree de Ligurie est fort agreable, à cause des citronniers, orangers, oliuiers, & autres arbres dont elle est remplie. Mais toute la grace, & toute la beauté de la

riuiere de Gennes est ramassée en vn petit lieu proche de la ville, qui se nomme Nerui: car ce lieu a le meilleur air, & le plus temperé qu'on puisse desirer, tant de diuerses fleurs, qu'il est impossible de voir rien cōtenter plus la veüe, tant de fruiçts, que ce lieu sēble vn Paradis terrestre, & ce mesme lieu ne cognoist point d'autres saisons que le Printemps & l'Automne, qui ne l'abandonnent iamais. Le deffaut de ce pais est qu'il n'a guere de bled, ny de chair, mais ce peu qui s'y trouue est bon au possible.

7. Quant à la Corlegue, elle est encor aujourd'huy pleine de forests, & mesme au dedans du pais, à raison dequoy elle est peu propre à estre cultiuee, & ne porte gueres de froment, ny de legumes, qu'en quelques lieux où le pais est decouuert & arrosé, & engraisé par quelques eaux & riuieres. Toutesfois elle produit de bons fruiçts, & des vins excellens & delictats. Ceste Isle abonde en miel, en cire, & en raisins. & pareillement en huyle, & en figues. Il y naist force buis, selon Plin, & Diodore, & aussi l'on void vn grand nombre d'arbres venimeux, dont les mousches à miel ayans succé quelque chose, font vn miel qui est fort amer. Elle produit des chevaux forts, & fougueux au possible, & des chiens courans des plus grands qu'on voit, comme aussi vne espee de belier, que Plin nomme *Musmo*, & les habitans *Muscoli*, qui a du poil comme vne cheure au lieu de laine. On y trouue aussi de l'alun, & des mines de fer en la Comté de Nibie. Il y a pareillement des salines qu'on y nomme communément de la *Riz*, assez près du port saint Florent. Et près de Niobe il y a de profondes valles qui sont perpetuellement couuertes de neige, sous laquelle on dit qu'il y a force crystal. On trouue du coral dans la mer, entre la Corlegue, & la Sardaigne du costé de S. Boniface.
8. Il y a aussi des eaux chaudes ensoulfrees, que l'on nomme communément bains de *Pietra Pola*, qui sont bonnes pour la galle, & pour les nerfs retirez; & ailleurs encore il y a plusieurs eaux tant chaudes que froides, qui sont bonnes à diuerses maladies. Les trois principales riuieres sont Galum, Liamon, & Tauignan, qui se vont rendre dans la mer.
9. En l'Isle Gallinaire il y a force poules qui ne sont guere dissemblables des nostres, toutesfois elles ont ie ne sçay quoy de sauage, veu qu'elles ne font leurs œufs, ny leurs petits dans les maisons, mais seulement dans les bois.

MOEVRS ANCIENNES.

10. Les habitans de Ligurie auoient anciennement la reputation d'estre grands escumeurs de mer, & d'aller chercher par ce moyen ce qui leur faisoit besoing, & outre ce ils souloient changer le bois de leurs grands arbres à de l'huyle, du vin, & d'autres choses qui leur estoient necessaires: car la plus grande partie du temps ils ne viuoient que de lait, & de chair de brebis, ou de mouton, avec vn breuage qu'ils composoient d'eau & d'orge.

Quelques autheurs ont estimé que ceste nation estoit descendue de quelques Grecs, au moins c'est l'opinion de Strabon, mais Thucydide estime qu'elle est venue des Siciliens. Flore fait mention des Ligures qui se cachoient aux montagnes dans des grottes, & cavernes, comme les Ossubes, Deciat, & Buriat, il en est sorty autresfois de grands Capitaines.

Quant aux Corfes, Strabon dit que quand les Capitaines Romains faisoient quelques courses en ceste Isle, & qu'ils emmenoient vn grand nombre d'esclaves à Rome, on regardoit avec admiration, que ces barbares estoient tous sauages, & tenoient plus de la beste que de l'homme: car où ils se pourchassoient la mort en toutes les façons qui leur estoient possibles, ou bien ils ennuyoient si fort leurs maistres avec leur impatience, & leur peu d'esprit, qu'ils se faschoient d'y auoir mis leur argent, encore qu'ils ne leur eussent cousté que fort peu.

MOEVRS DE CE TEMPS.

Aujourd'huy les Geneuois & Liguriens ont depouillé ceste brutalité dont ils estoient pleins, & on ne void en eux qu'une fort grande indultrie, & vn esprit vif, & subtil, lequel ils font paroistre en leurs affaires, & au grand trafic qu'ils font, où ils ménagent si bien leur fait, que la plus grande partie en est riche. Ils s'exposent volontairement à de grands dangers pour le profit, & font de plus grands nauires qu'aucuns autres qui voyagent sur la mer. Ils se sçauent extrêmement bien conduire en ce qui est de leur Republique, combien qu'ils soient encor altiers, & factieux au possible, ne desirans que choses nouvelles: de sorte qu'ainsi qu'on vint dire au Roy François que les Geneuois se vouloient donner à luy, il répondit promptement qu'il n'en vouloit point, & qu'il les donnoit à tous les diables, tant leurs resolutions ont peu d'assurance. Ils sont pour la plus grande partie assez hauts, & agreables de visage. Ils vivent chez eux fort mesquinement, mais lors qu'il est questiō de faire quelque dépence qui

qui paroisse, ils sont du tout splendides, & pour mieux dire, excessifs.

Il y a encor entr'eux force bons hommes de guerre, & de bons Capitaines, comme on peut remarquer en la maison des Dories, & au Marquis de Spinola l'un des plus asseurez, plus vigilans, & plus aduisez chefs qu'on cognoisse. Ils sont encore vaillans sur la mer, & entendent sur tout fort bien le commerce.

Quant aux Corfes, ils ne sont pour la plupart guerres civilisez, & on ne trouue pas en eux ceste politesse qu'on void aux Italiens. Ils sont extremement cruels, & retiennent encores ce que Cesar a dit d'eux pour ceceregard, mais il y a bien de bons soldats, & des homes fort courageux, & quand ceste nation n'auroit point d'autre grand Capitaine que Monsieur le Marechal d'Ornano (comme en effect c'est tout l'honneur de ceste nation) encore peut-elle estre à iamais glorieuse pour ceste consideration. Au reste, ils sont tellement vindicatifs, que les Italiens ont vn Prouerbe commun qui dit, qu'il ne se faut fier en vn Corfe, ny viu, ny mort, pource qu'aussi tost que quelqu'un a esté tué, soudain tous les parens s'affemblem pour faire mourir le meurtrier, s'il leur est possible: & combien qu'il se face quelque accord entre eux, toutesfois c'est vne paix en laquelle il ne se faut guerres fier, veu qu'on seroit surpris lors qu'on y penseroit le moins, de sorte que le meilleur est de prendre garde de pres à soy, & de ne faire guere estroite amitié avec ses ennemis reconciliez.

Quant les Corfes sont en vn pays estranger, ils sont soigneux d'ayder les vns aux autres, & de se dire de maison, & de qualité, combien que la plupart de ceux qu'on void venir de leur Isle, soient rudes, & mal vestus tout ce qui se peut: aussi taschent-ils de les parer le mieux qu'ils peuuent, auant que de les laisser paroistre. Il y en a qui réussissent en pratiquant les autres nations, comme en effect i'en ay veu de bien civilisez, mais le nombre de ceux cy est fort petit. Il ne se trouue entr'eux guerres de personnes qui affectionnent les lettres, ou qui y ayent esté nourris, toutesfois ils les admirer aux autres. Mais auant que mettre fin à ceste partie, ie trouue à propos de mettre icy ce qu'on dit communement en Italie des Geneuois: on les nomme ignorans en matiere de conseil. On dit qu'ils traictent leurs hostes assez modestement, & mesme qu'ils ne prennent pas plaisir à les receuoir, qu'ils ne viuent que de laitues, qu'ils sont fort propres à leurs habits, & quant à la marchandise, on dit qu'ils sont extremement patiens, & qu'ils sont tousiours escumeurs, vilains, melquins, enuieux & affamez, & quant aux femmes de Gennes, on dit qu'elles sont fort laciues.

RICHESSE.

ON porte beaucoup de citrons, limons, oranges, & huiles, de la riuere de Gennes par l'Italie, & encores en d'autres Prouinces, avec vn remarquable profit des Geneuois.^{12.}

La Corseque porte des vins qu'on estime grandement à Rome où on les porte: dequoy les Corfes t rent de notables sommes d'argent. Au reste les Geneuois se sont tous mis sur les changes, & sur certaine sorte de gain, qui est vtile aux particuliers, mais qui ne porte nul profit à la Republique. Car le reuenue ordinaire de la ville n'est que de trente mille escus, qu'on tire en prenant tant pour feu, comme vne espeece de cens.

Quant au reuenue de la Republique, il cōsiste en douanes, gabelles, & autres droits, & est employé en la despence du Palais, pource que les autres terres de la Seigneurie fournissent les gages de leurs officiers, & de leurs gardes. Et ce reuenue qui peut reuenir à quatre cens mille escus, est hypothéqué, & assigné au Mont saint George qui le gouuerne sagement: & le depart à ceux qui participent au Mont, & fait fonds pour les necessitez de la Republique. Ils tirent d'Espagne tant de richesses, qu'il n'y a ville en Italie dont les particuliers soient si riches. Plusieurs ont eu pour payement ou pour assurance du credit qu'ils auoient fait des Estats d'importance, & en Espagne, & au Royaume de Naples. On peut assez cognoistre la richesse des Geneuois, aux aduances que le Marquis de Spinola a faictes de ses deniers, dont il a payé l'armee du pays bas, veu qu'on sçait assez que sa mere est allée souuent sur le Change demander à qui c'estoit que son fils deuoit, afin de l'acquiter; combien que le tout se montast à de grosses sommes, ainsi qu'on peut assez iuger. Or le Roy d'Espagne est tellement obligé aux Geneuois, qu'on tient que l'annee mil six cens, ils comptoient sur la place que ce Roy leur deuoit dix-huict millions. On peut assez estimer à quoy ceste somme est maintenant venue, si tant est qu'ils ayent continué de compter selon le cours de la place.

Quant à la Republique, l'on ne sçauroit dire ce qu'elle tire de net des pays qu'elle possede, & plusieurs tiennent qu'elle n'est pas riche, & que s'il luy suruenoit quelque affaue, les

seuls particuliers desirieux de se maintenir, fourniroient à ce qu'il faudroit, ven qu'il n'y a point, ou pour le moins il y a bien peu d'argent public à Gennes, qui n'a pas vn thresor plein d'or & d'argent, comme celui de Venise. Ce qui les rend peu soigneux de telle chose, c'est l'assurance qu'ils ont de la protection du Roy d'Espagne, qui est en effect comme leur maître. Aussi comme tel il leur sçait bien tirer en ses necessitez de bonnes plumes de l'aisle, à rendre quand la volonté l'en prendra; veu qu'ils n'en sçauoient tirer nulle chose d'autre sorte. Pour l'Isle de Corsegue, la Seigneurie dépend bien en garnisons, & autres choses ce qu'elle en peut tirer.

F O R C E.

13. **L**A Seigneurie de Gennes ne se peut guieres dire forte en Italie, pour le regard des places; car quant à la principale ville, elle a bien de bonnes murailles, & forces canons, mais non pour faire resistance. Mais elle se tient assez forte, comme j'ay ja dit, de ce qu'elle est sous la protection du Roy d'Espagne. Quant à la Corsegue, on fait estat de la Bastie comme d'une forte place, & aussi de l'Aiaze, & du Chasteau saint Boniface. Ceste Seigneurie tient ordinairement dans Gennes quelques compagnies de Corfes, pour la garde de la ville, & en Corsegue des Geneuois qui sont en garnison dans les bonnes places, & outre cela il y a quelques compagnies de chevaux legers qui courent du long de la coste pour empescher les surprises, & rauages des Turcs, qui toutesfois emmeinent bien souuent beaucoup de personnes en Alger, ou en quelques autres lieux d'Afrique. De sorte qu'il ne faut faire grand estat des forces des Geneuois, sinon sur la mer, où ils sont encores assez puissans, & aussi pour l'appuy qu'ils ont, qui leur pourroit bien manquer s'il auoit luy-mesme de la besongne taillee. Elle entretient aussi ordinairement quatre galeres pour garder la riuere de Gennes, outre que par les anciennes ordonnances, il y doit tousiours auoir vingt-cinq galeres en l'Arcenal, prestes à armer au besoing.

G O V V E R N E M E N T.

14. **G**ENNES prit en l'annee 1526. avec sa nouvelle reformation la forme du gouvernement qu'elle tient à ceste heure, qui est tel. On fit vne description de toutes les familles riches, tant nobles que populaires, qui auoient six maisons ouuertes dans la ville de Gennes, & le compte estant fait, on en trouua 28. de ceste sorte.

Toutes les autres qui resterent & qui estoient assez considerables, mais n'auoient pas six maisons ouuertes, furent ioinctes au nombre desdictes vingt huit familles, de sorte que le gouvernement demeura entre les mains des 28. familles, avec titre de nobles, en excluant ce peuple, laissant toutefois ceste ouuerture qu'ils peuvent adiouster au nombre des nobles dix personnes qui s'annoblissent ou par richesse, ou par vertu toutes les annees, & qui deuiennent de leurs corps.

Or de tout le corps de ces familles on fait vn Conseil de quatre cens personnes tous les ans, qui avec le Duc & les gouverneurs ont la conduite de la Republique.

Ce Conseil eslit le Duc, & les huit gouverneurs, & les gouverneurs ont charge de l'Estat durant deux annees.

Ce Conseil traite les affaires d'importance, & les choses qui concernent le bien de la Seigneurie, & les gouverneurs avec le Duc sont nommez particulierement la Seigneurie.

Mais si par fortune il faut manier quelque autre chose moins grande, & toutesfois de quelque consideration, la Seigneurie se sert d'un petit Conseil, qui est de cent nobles, esleus par la Seigneurie avec les balotes, & ceux cy sont pris du corps de quatre cents.

15. **L**E Duc est chef de la Republique, & a le titre & les honneurs qui luy conuiennent. C'est vne ancienne dignité en ceste ville, & celui qui y est estably, demeure en cet Estat deux annees, & habite au Palais public durant le temps de sa principauté, & tient pour sa garde cinq cens Allemands, representant presque en cecy la forme d'une principauté absolue.

Lors qu'il est esleu Duc, il est vestu deux iours à la Ducale, & apres il porte tout le reste du temps de son magistrat l'autre habit, mais pourtant de velours, & de satin rouge cramoysi, & quelquefois violet. Son autorité est fort grande, veu qu'il peut tout seul proposer au Conseil & au Senat quelque chose que ce soit, ce que tout autre Senateur n'oseroit faire. A raison dequoy, quiconque veut proposer quelque loy, & quelque party à la Republique, est contraint d'informer le Duc, & de passer par ses mains.

La

La façon d'eslire le Duc est telle. Le 3. de Ianuier le Senat s'assemble avec le petit Conseil, sans la personne du Duc precedent, pource qu'ayant acheué le terme de deux ans il s'en retourne le premier de Ianuier en sa maison, & demeure comme personne priuee Procureur à vie de la Republique.

Le petit Conseil avec le Senat eslit vingt-huict nobles, vn de chascue famille, qui sont appelez au Palais aussi tost qu'ils sont eleus, & sont enfermez en vn lieu separé, & avec les Senateurs, qui pour raison de leur aage, ou pour la contumace de la famille, sont inhabiles à estre Ducs, ils eslisent dix-huict hommes entr'eux, vn pour famille, qui font eslection avec les mesmes autres vingt huict, lesquels estant appelez & enfermez avec lesdits Senateurs, balottent ceux qui doivent estre proposez au grand Conseil, pour estre Ducs.

Mais il faut remarquer que l'on ne peut proposer au grand Conseil plus de quatre personnes, & il est necessaire qu'en l'eslection de ceux-cy les deux tiers des vingt-huict s'accordent entr'eux avec la partie desdits Senateurs, & ceste action estant finie, ils eslisent auant que de sortir de là autres vingt huict, vn pour famille, qui retourne balotter avec eux les quatre susdits, & leur peuuent oster de leur eslection les deux tiers, & en mettre au lieu de ceux qui ne seroient approuuez, vn, ou dauantage, mais du nombre du Senat. Ce qu'estant fait, le Conseil s'assemble, & l'on y propose les quatre hommes choisis, & proposez par les Eslecteurs, & celui des quatre qui a plus de balottes, demeure Duc.

Il y a huict gouverneurs qui sont assis sur le banc avec le Duc, comme ses Conseillers. L'office de ceux-cy dure deux ans, & ils ont avec le Duc le nom de Seigneuries. 16.

Ils gouvernent la Republique, & toutesfois ils ne peuuent resoudre seuls aucune chose, où il s'agit de l'interest du public, ou qui soit de grande importance, ains ils appellent pour cet effect le grand Conseil. Ces gouverneurs sont eleus à deux, par fois de six mois en six mois. Leur eslection se fait en ceste sorte.

On assemble le petit Conseil avec le Senat, & avec le Duc. Ceux-cy en eslisent 18. vn pour famille, lesquels esleus avec le Senat, & avec le Duc, proposent tantost 12. tantost 14. hommes au grand Conseil, qui avec les ballotes fait eslection de l'un d'entr'eux à la fois.

Le iour suivant ils obseruent la mesme chose à faire eslection du second, c'est à sçauoir le petit Conseil en eslit encor vingt-huict, & les vingt-huict font le reste, comme il a esté dit.

Chacun desdits huict Gouverneurs apres le temps de son office finy, demeure Procureur de saint George pour deux ans: de sorte qu'au Colleege des Procureurs on void tousiours les huict qui ont esté au gouvernement de la Republique, & tous ceux-cy interuiennent au Senat avec le Duc, & les huict Gouverneurs, delibérans des choses d'importance: & ces Gouverneurs ont charge de tout l'Estat, & deux d'entr'eux demeurent au Palais avec le Duc, & les autres six en leurs maisons, & se changent alternatiuement à deux par fois de trois en trois mois.

De ces Procureurs il y en a quelques vns à vie, & ce sont ceux qui ont esté Ducs, & quelques vns le sont seulement deux ans, c'est à sçauoir ceux qui ont esté gouverneurs. Ceux-cy ont la charge de faire les affaires du public, touchant les reuenus & choses semblables. Ce sont personages de grande reputation, & qui sont en grande estime.

Tous lesdits Magistrats entendent seulement au gouvernement de la Republique. Or quant aux iugemens, parlant premierement des criminels, on a communément vn Potestat 17. estranger qui est Docteur, auquel on donne d'honnestes gages. Cestuy-cy demeure en vn Palais proche de celui du Duc. Il cognoist, & donne iugement de tous crimes: mais il ne peut executer sa sentence si elle porte peine de mort, sans le consentement du Senat.

Il a avec luy deux autres Docteurs estrangers, dont l'un est appellé Iuge de malefice, & l'autre fiscal, & avecques l'ayde de ces deux Iuges le Potestat forme le procès aux criminels, & fait choses semblables. Outre les susdits le Potestat a son Lieutenant qui a soin des choses ciuiles, qui concernent seulement l'execution.

Il y a vn office de sept hommes appelez extraordinaires, qui represente presque la personne du prince, à cause qu'il est occupé en la conduite de la Republique.

Ils ont charge de prolonger & d'accourcir les procès, & de donner des tuteurs aux pupils, & s'il aduient que les parens ayent procès entr'eux, ou qu'il y en ait entre le pauvre & le riche, ceux-cy donnent ordinairement en tel cas le Magistrat que bon leur semble pour ouyr les parens, ou le pauvre & le riche qui plaident. L'office de ceux-cy dure six mois, & est de grande dignité.

Il y a pareillement vn Magistrat de cinq hommes, appelez Syndics souuerains, qui ont l'autorité de syndiquer, tant le Duc, que les Gouverneurs, quand ils sont à la fin de leur terme. Ils font encor mesme chose que les autres Magistrats de la Republiq. & ont autho- 18.

rité de punir le Duc & les Gouverneurs, s'ils trouuent qu'ils ayent failly.

Et quand le luge est hors de charge, & que le temps de celle des Gouverneurs est expiré, on fait crier par ordonnance des Souverains, que si quelqu'un a à dire quelque chose contre le Duc, & contre les Gouverneurs, il vienne en leur presence; & pour ceste cause le Duc, & les Gouverneurs demeurent huit iours au Syndicat, lesquels estans passez, on les punit si on les trouue en faute, & au contraire on leur donne vne attestation de leur innocence, avec laquelle ils les font apres Procureurs, si bien qu'ils ne le peuuent estre s'ils n'ont ceste patente ou certificat. Dauantage on appelle pardeuant ceux-cy de plusieurs Magistrats de la Republique, & finalement la grandeur de cet office est telle que la Republique esleut pour vn des premiers Syndics le Prince André Dorie, & ils sont assis avec le Senat, & au Palais pres du Duc.

19. Et pource que nous auons parlé cy-dessus des choses criminelles, afin de dire desormais quelque chose des ciuiles, il faut sçauoir que la Republique donne gages à cinq Docteurs estrangers, toutes les deux anneés, & ce corps de cinq se nomme la Rote.

Ces Docteurs prennent cognoissance des choses ciuiles, & demeurent au Palais du Duc, & les choses qui sont traitées deuant eux se iugent par la voye ordinaire des loix Imperiales, & les procez se font selon l'ordre iudiciaire ordonné par la Cité, qui vit à la façon ancienne.

20. Quant aux choses qui concernent les arts, il y a des Censeurs qui donnent ordre que les vendeurs, & tous les autres qui trafiquent de leur mestier, ayent des mesures, & autres choses semblables iustes, & selon les loix, & pouruoient aussi à leurs chefs qui sont nommez Contuls, & esleus entre les artisans.

Ces Consuls ont autorité aux choses de leur art & mestier, & entre les autres Consuls ceux de la soye peuuent beaucoup sur leurs hommes: de sorte qu'ils ont autorité de faire donner la corde, de bannir, d'enuoyer en galere, & d'ordonner autres peines à ceux qui font quelque faute.

On trouue en la ville de Gennes 40. Capitaines du nombre, & du corps des nobles, qui sont changez tous les ans. Chacun de ceux-cy a sous luy cent hommes du peuple, de sorte qu'ils font en tout 4000. personnes, & la Republique se sert de ceux-cy en toute occurréce, veu qu'ils font la garde quand on a quelque doute, & quand la Seigneurie sort dehors ces 40. Capitaines l'accompagnent tous vestus de velours, qui est l'ornement de ces Seigneurs.

Dauantage les hommes de toute la ville, & des faux-bourgs qui sont propres aux armes, sont enroollez depuis l'age de 20. ans iusques à 60. & rangez sous des Capitaines, qui sont obligez de se trouuer au besoin avec les armes en la main, selon qu'il leur sera ordonné.

La Republique a continuellement vn General, qui est intendant sur les armes, pour s'en seruir aux occurréces, & en temps de guerre.

21. L'office, & Magistrat de S. George, noble entre tous les autres en ceste ville, fut ordonné l'an 1407. Il a conserué durant long temps ceste Republique, qui n'ayant point de richesses naturelles, à cause que la qualité du pays ne le porte pas, a toutesfois eu des hommes d'esprit subtil, & de grand iugement, à trouuer la forme, & moyen d'auoir de l'argent, pour les entreprises, & necessitez de ceste Republique.

C'est pourquoy au temps passé, ceux qui gouernoient les affaires publiques prenoient de l'argent des personnes particulieres, tantost volontairement, tantost par contraintes. Il est bien vray qu'à raison de l'argent que les particuliers desboursoient, le public leur dōnoit de profit sept, huit, neuf, & dix, pour cent, selon la diuersité de temps, afin que telles gens ne receussent du dommage de ce service fait au public. Et afin que ces personnes prestassent plus volontiers, on leur donnoit assurance de leur argent sur les reuenus publics, vendant, par exemple, à quelques-uns les droits, & iurisdiccions du peage des grains, à quelques-uns la gabelle du vin, & à d'autres la gabelle du bled, & ce contract entre le public, & le particulier, fut nommé parmy eux *Comperar*, ou *achept*, comme si les particuliers auoient achepté (car *Comperar*, ou *Comprer* veut dire acheter) les droits du public: & il fut ordonné que quiconque presteroit cent liures, fut dit auoir vn lieu sur la *Comperar*, & qui en presteroit deux cens, deux, & ainsi des autres, de sorte que tels achepts multiplierent grandement, & il y en auoit qui estoient nommez achepts du chapitre, quelques autres de S. Paul, & d'autres du Soleil, & chacun estoit particulierement gouuerné par plusieurs citoyens qui auoient charge de payer iustement, & selon le deuoir, le profit deu aux Preteurs, & de compter entr'eux, & la Republique. Et à cause du grand nombre des achepts faicts, mesme par les nations estrangeres, & pour le grand nombre des Gouverneurs, il s'en ensuiuoit beaucoup de confusion, si bien que la Seigneurie resolut que tous les achepts seroient reduits à vn seul, nommé l'achept de S. George, & qu'il seroit gouuerné annee par annee par les citoyens, qui deuoient pouruoir, & donner ordre qu'on fust raison aux Preteurs, & de là nasquit le commencement de l'office S. George.

Et

Et pource qu'on cogneut que ledit office gouvernoit les choses susdites avec prudence & iustice, & qu'il y eust beaucoup d'affaires en ceste Republique, le nombre des lieux s'accroust grandement. Si bien que le commun alienant les rentes, la charge de cét office devint tousiours plus grande, soumettant à son gouvernement diuerses places, & communautés. A raison dequoy il aduint que cét office obtint plusieurs priuileges, premierement de la Seigneurie, puis de plusieurs Papes, des Empereurs, & des Seigneurs qui ont commandé à la ville de Gennes. De sorte que l'office S. George, encores qu'il depende du public, & de la Seigneurie de Gennes, & de ceux qui gouvernent le Palais, n'est toutes fois soubmis à la Seigneurie, ains tous ceux qui sont admis à la Seigneurie, ou au gouvernement de la ville, iurent de conseruer les priuileges du Magistrat de S. George, & de les maintenir. Et pource que naturellement les choses ont de foibles cōmencements, puis avec le temps deuiennent parfaites, ce Magistrat est mieux réglé maintenant qu'il n'estoit quand il commença. Or il ne respond aux Preteurs pour le regard du profit, vne somme determinee, mais selon la proportion de ses reuenus, plus ou moins, selon les occasions qu'il a de despencer pour la conseruation des choses qui concernent la charge, & selon que les gabelles & autres reuenus que la Republique assigne aux Preteurs profitent.

D'auantage il a acquis seigneurie avec plusieurs bons reuenus, ce qu'il n'auoit pas au cōmencement. Apres cecy l'on a fait de nouuelles reigles, & ordonnances, de sorte qu'il est beaucoup plus puissant, touchant les expeditions des causes, la punition des delinquants, & la façon de gouverner les peuples qui luy sont soubmis.

Et celuy qui considerera bien toutes choses, verra que pour raison de ce Magistrat, le corps de la ville contient presque deux Communautés, l'une grande, & l'autre petite.

La grande est gouvernee par le Palais, & comprend toute la ville; la petite est gouvernee par S. George seulement quant aux choses susdites, & comprend tous les Preteurs.

La premiere ou la grande est subiette à changement, & a esté souuent sous vn gouvernement plustost violent qu'autre, mais la petite a tousiours esté libre, ferme, & sous ses citoyens.

Il y a sur cét office de S. George huit gouverneurs qu'ils nomment Protecteurs. Ils durent vn an, & sont esleus tous les six mois quatre à la fois de tout le nōbre des Preteurs, creanciers du pays, ou estrangers, toutes fois iusques à certaine somme, & ils sont faits en ceste sorte. 22.

On tire au sort de tout le nombre des creanciers 80. hommes qui estans assemblez, aussi tost qu'ils ont esté tirez, on remet de nouveau dans la boîte lesdits quatre vingts, dont on tire au sort 34. qui estans enfermez ensemble ne peuuent partir du lieu où ils sont sans auoir esleu en balottant les huit Protecteurs, & il faut que celuy qui est esleu aye 16. balottes, afin de passer.

Or l'annee 1444. on crea vn autre office de huit hommes, qui se nomme l'office des Quarante quatre, à cause de l'annee en laquelle il fut créé.

La cause de la creation de ces 8. hommes fut, que l'office estant beaucoup augmenté en l'espace de trente sept ans: de sorte que les Protecteurs ne pouuoient terminer, ny restraindre en vn an les affaires qui leur suruenoient, à raison dequoy ils auoient de reste des emoluments, & des rentes en diuerses façons, afin de mettre ordre à ces restes, qui sont en effect la substance & la richesse de l'office, il sembla necessaire à ceux qui auoient part à l'achapt de creer quelques vns qui eussent la charge desdites choses, faisant que tout fust au profit du Magistrat de S. Georges, & donnant ordre que tout fust conduit secrettement, pour oster tout subiect de mal faire aux Seigneurs tyrans: & de ceste sorte on fit les huit citoyens, dont on en change deux tous les ans, & leur charge est de ramasser & gouverner ce qui reste tous les ans des choses que les huit Protecteurs ont maniees. 23.

Cét office a sous luy le gouvernement de l'Isle de Corsegue, & plusieurs villes & places d'importance, & c'est du mesme que sortent les despences qui se font pour la conseruation de la Republique.

Ceste Seigneurie enuoye toutes les annees en Corsegue vn gouverneur general qui se tient dans la Bastie, de mesme que la iustice que les Geneuois y ont establie, qui est veritablement rigoureuse aux Corfes, & presque du tout insupportable.

RELIGION ET CHOSE DE L'EGLISE.

LEs Geneuois, & les Corfes sont tous Catholiques. Gennes est vne Archeuesché qui a sous elle les Eueschez de Lune, maintenant Sarzane, de Bobie, d'Aprum, ou de Brunac, Metene, ou Maran, d'Accie, ou d'Amprun, de Noli, & d'Albengue, & en Corsegue l'Euesché de Nebie. 24.

En Corsegue il y a les Eueschez de Mariane, de Nebie, d'Ajasse, d'Alerie, & de Ciuita, dont quelques vnes sont sous l'Archeuesché de Pise.



E S T A T DE LA REPUBLIQUE DE RAGOVSE.

S O M M A I R E

1.

RAGOVSE anciennement appelée Epidaur, & de l'assiette des Epidaurès où l'on adoroit Esculape.

2. Origine du mot Esclavonie, son estendue, sa longueur, largeur, son climat, & ses principales villes.
3. Ragouze ville d'Esclavonie, tributaire au Turc: sa situation, & ses Isles.
4. Son terroir portant huile, vins, fruits, poissons gras, & des arbres chargez d'huîtres, qu'on cueille de trois en trois ans.
5. La Grausse Isle pleine de jardins, d'orangers, citroniers, & grenadiers. Langosse autre Isle abondante en olives, raisins, & renommée pour la pesche de Sardine.
6. Le naturel barbare, & cruel des anciens habitants de Ragouze, & tenans de l'humeur des Scythes dont ils sont descendus.
7. Coustume des Ragousois d'aller n'ester à moitié, & sans cheueux, au contraire des Hongrois, amateurs de l'égalité. La façon de leurs vestemens, & les concours plus en prix.
8. De leurs mariages & alliances, limitez par la loy à mille ducats d'or.
9. De leur langage, & instruction aux lettres divines & humaines.
10. Richesses des Ragousois consistans au trafic.
11. Leur petites forces.
12. Du gouvernement de Ragouze conforme à celui

- de Venise: & premierement du grand Conseil.
13. Des Pregads, Magistrats annuels, & leur Jurisdiction.
14. Du petit Conseil, la charge & durée de ce Magistrat.
15. De l'eslection du Recteur, chef de tous les Conseils.
16. Des cinq pourvoyeurs.
17. Des six Consuls instituez pour les causes civiles en premiere instance.
18. Des cinq Juges criminels.
19. Des officiers sur l'art de la laine.
20. Du College de Trente: commis sur les causes d'appel.
21. Des cinq hommes appellez pourvoyeurs de la santé: & leur autorité.
22. Des Commis sur la Douane.
23. Des Camerlingues.
24. Des trois Thresoriers commis à la garde du Thresor public, deniers pupillaires, & de post.
25. Des officiers de l'armurerie.
26. Autres officiers establis sur la vente des froments, vins, & reparations des chemins.
27. Des six Capitaines de nuit.
28. Du Notaire Secretaire.
29. Des Chanceliers.
30. Des Capitaines & Comtes envoyez aux Gouvernemens de dehors Ragouze.
31. Des trois Procureurs de l'Eglise Cathedrale de Ragouze.

1.



VANT que de m'engager davantage en ce discours, ie desire oster à ceux qui liront ceste œuvre la confusion de l'equivoque des noms, qui les pourroit faire chopper dès l'entrée. Car puis que nous avons entrepris de parler de Ragouze, qui se nommoit anciennement Epidaur, & qu'il y a eu d'autres villes de mesme nom, il est à propos de monstrier qui est celle-cy, & de ne la confondre pas indiscrettement avec les autres.

Il faut donc sçavoir qu'il y a le long de la mer depuis Venise jusques à Corinthe

Corinthe trois Epidaures, dont le premier est assis au golfe de Venise, & est celuy que nous appellons maintenant Ragoufe.

L'autre est au pays de Laconie, au golfe de Napoli, ceste ville est nommee à present Malvoisie, & la troisieme ville d'Epidaure, est celle du golfe d'Engie ou sein Saronique, qu'on nomme Cherronefe, ou Piguiade. Et afin d'esclaircir encore mieux la chose, c'est en la derniere qu'on adoroit Esculape.

Or pour venir à celle dont nous voulons faire mention, elle est assize en Esclauonie, qui est l'ancienne Dalmace, & qui prit son dernier nom des Slaues, qui au temps de l'Empereur Justinian premier, estans venus de Sarmatie passerent le Danube, & lors vne partie se rua sur la Macedoine, & l'autre sur la Trace, puis au temps de l'Empereur Maurice, qui mourut l'an six cens deux, & apres de Phocas son successeur, ils se rendirent maistres de la Dalmace.

Il est vray qu'aujourd'huy le nom d'Esclauonie s'estend depuis la riuere d'Arse iusques à celle de Drin; & sa longueur depuis vne riuere iusques à l'autre, est d'environ quatre cens quatre vingt milles, & sa largeur depuis les monts de Croatie, iusques à la mer, est d'environ cent vingt milles. Elle est entre le milieu du cinquiesme Climat pres du treziesme parallele, & le milieu du sixiesme, où le plus grand iour d'esté n'est de plus de quinze heures & demie. Son Meridien plus Oriental passe par le quarante-sixiesme degre, & le plus Occidental par le trente-sixiesme. Au reste la mer qui est entre l'Italie & la fin de l'Esclauonie, se nomme Adriatique, & s'estend par l'espace de six cens milles, & la plus grande largeur est de deux cens, la moindre de cent cinquante: & celle de son emboucheure de soixante, mais le reste qui va lecher l'Albanie & la Macedoine, se nomme mer Ionique. Vne partie de ce pays obeyt à la Seigneurie de Venise, l'autre aux Archiducs d'Autriche, & le reste au Turc. Ses villes plus renommées sont Flamone, Segne, Hone, Zare, pour laquelle les Venitiens, & les Hongrois ont guerre continuelle, Sebenic & Spelate. Mais la meilleure ville de tout l'Esclauonie, c'est Ragoufe qui se maintient en liberté, payant au Turc quatorze mille zequins: & en despensant encor autant en presents, & en logement des Turcs. Car c'est la coustume tyrannique de ceste nation barbare de ne se contenter du payement du tribut, mais nul estat ne fera ses affaires à la perte du grand Seigneur, qui ne dependra encore vn double tribut en presents tant au grand Turc, qu'au grand Vizir, Sultanes & principaux Bassas qui scauent manier les ressorts de sa volonte, parce que personne n'osant accoster sa hauteffe, il faut que tout passe par leurs mains. Ceste Republique a peu de pays en terre ferme, mais elle a sous sa puissance quelques petites Isles assez bonnes, qui sont assises entre Curxole, & le golfe de Cattaro.

L'ancienne ville d'Epidaure estoit au mesme lieu qu'on nomme aujourd'huy la vieille Ragoufe. Mais les Gots s'estans emparez de l'Italie, & par mesme moye de la plus grande partie de l'Esclauonie, & entre autres d'Epidaure, la raserent entierement. A raison de quoy les habitans qui ne scauoient où ils se pourroient retirer, commencerent de bastir la nouvelle Ragoufe, qu'on void maintenant, des ruines de la vieille. La ville est fort bien habitee, & en fort belle assiette sur la mer. Elle est toute pleine de fontaines d'eau douce, qui a esté conduite des montaignes voisines au grand profit de ceux du pays. Elle a vn petit port fait à la main, qui est assez commode d'vn costé, il y a vne montagne fort haute, & droite, au pied de laquelle la ville est bastie. Ils possèdent autour de la ville vn pays fort estroit, & outre ce ils ont plusieurs belles petites Isles sous leur obeyssance, entre autres celles de Langoste, dont la forme est pareille à celle d'vn amphitheatre.

QUALITE'

LE terroir est de sa nature sterile; mais les Ragousois employent tant de peine, & d'industrie à le rendre bon qu'ils en tirent de l'huile, du vin, & des fruiets excellens. Il y a vne certaine vallee où il s'assemble en Hyuer tant d'eau, qu'il s'en fait vn lac, où il se nourrit du poisson qui deuiet tellement gras, qu'on le fricasse sans huile avec sa graisse toute seule. Apres cela l'eau venant à seicher au Printemps, on seme au mesme lieu du grain qui y vient heureusement, si bien qu'vn mesme lieu rend du poisson, & du bled dans vne annee. Ils vsent apres cela de diuerses industries en la mer, & entre autres choses ils font que les arbres leur apportent des huistres. Car ils font baisser les brâches des arbres, les arrestent sous l'eau avec des cailloux; & dans deux ans il s'attache tant d'huistres à ces branches que c'est vne chose merueilleuse, puis la troisieme annee elles sont presque bonnes à manger.

Il y a sur la mer la Graoufe, qui est vn lieu fort agreable, plein de iardins, d'Orangers, de Citroniers, & de Grenadiers.

Ses principales riuieres ſont le Saue, & le Drau. L'ifle de l'Angoſte eſt environne de tous coſtez de fort hautes montagnes, où ſont les metairies des Ragouſois, & au milieu on void vne belle plaine qui produit grande quantité d'Oliues, & de Raiſins. On y peſche force Sardines.

M O E V R S A N C I E N N E S.

6. **L**es habitans de ce pays eſtoient autrefois cruels, & barbares, & ne s'addonnoient qu'à eſcumer continuellement.

Flore dit d'eux qu'en la premiere guerre contre les Carthaginois du temps de la Roynie Teure, ils ne ſe contentoient pas de piller, mais exerçoient toute ſorte de meſchancetez. Ce furent les Eſclauons qui firent trancher la teſte aux Ambaſſadeurs des Romains, & qui bruſlerēt ceux qui gouvernoient leurs vaiſſeaux, & ce qui augmenta la honte des Romains ce fut que ces peuples eſtoiēt alors gouvernez par vne femme. Procope dit auſſi que les Eſclauons (peuple Scythique) entrerent par force dans ces pays du temps de Juſtinian, & en fin ſ'y arreſterent, de ſorte que les anciens habitans embrasserent en partie les mœurs de ces eſtrangers nouvellement venus.

Tite Liue appelle ceſte nation ſarouche, & addonnée à faire des courſes ſur la mer pour y eſcumer quelque choſe. Auſſi les Romains auoient touſiours des legions en ces pays, tant pour d'autres occaſions, que pour brider le naturel, & l'humeur barbare de ces peuples.

M O E V R S D E C E T E M P S.

7. **C**eux de Ragouſe laiſſent croiſtre leurs cheueux depuis le milieu de la teſte en ſus, & portent raz tout le reſte. Au contraire les Hongrois ont cet endroit raz, & des cheueux partout ailleurs. Les femmes n'y portent les cheueux guere longs, & les rendent noirs avec artifice.

Tous viuent eſgalement ſans beaucoup de ceremonies, veu qu'ils n'vſent point de reuerence comme nous, & noſtent ny chapeau, ny bonnet, mais ſe ſalüent ſimplement l'un l'autre, ou de parole, ou par quelque action qui deſcouure naturellement leur intention. Ils ayment fort l'eſgalité entr'eux; de ſorte qu'il ya vne Loy qui porte qu'aucun citoyen ne peut eſtre Eueſque de Ragouſe, à fin qu'il n'y ait aucun d'entre eux qui aye plus grande preeminence en leur Republique, que celle qui leur eſt permieſſe par les loix.

Ils vont habillez diuerſement; veu que les plus ieunes vont veſtus à la Florentine, les autres portent des manteaux, & les plus vieux des manches comme les Seigneurs de Veniſe, & il eſt deſſendu de porter des habits de ſoye, excepté à celui qui eſt Recteur de la Republique, aux Docteurs & aux Cheualiers.

En Eſté lors qu'il fait bien chaud ils portent des iuppes de ſimple taffetas armoiſin. On peut voir le meſme retranchement aux habits des femmes, veu qu'elles ne portent toute leur vie que du drap, excepté que quand vne fille ſe marie, il eſt permis de porter de la ſoye durant vn mois. Il ya encor quelque choſe entre les femmes, qui monſtre la difference des qualitez, veu que les iours des feſtes, les Damoifelles ont accouſtumé de porter vne cappe doublee d'un ſandail rouge, qu'elles ſont obligees de porter apres qu'elles ſont mariees.

Au reſte elles portent du drap tanné, rouge, & bleu, & il leur eſt ſeulement permis de porter des manches de ſoye, comme bon leur ſemble.

8. **Q**uant aux mariages ils ont accouſtume de s'allier ſeulement avec des perſonnes de leur condition, c'eſt à ſçauoir le Noble avec le Noble, & un Gentil-homme ne peut prendre vne Bourgeoiſe, ou vne eſtrangere, afin de n'introduire pas en la race un ſang moins genereux, corrompant ſon ancienne Nobleſſe; & de là vient que les familles ſont tellement diminuees, qu'il n'y en a plus que vingt & trois, ou vingt quatre qui gouvernent, pource que les maiſons venant à manquer, comme toutes les choſes du monde ſont auſſi, les Nobles ne s'alliant point avec des Bourgeoiſes, ou des eſtrangeres, & n'en meſlant aucune parmy eux, ces maiſons ſont venues avec le temps à ce petit nombre.

Il eſt vray que ſi quelque Noble vouloit, ou par quelque deſſein, ou pour quelque commodité prendre vne femme qui ne fut pas du pays, il le peut faire, pourueu qu'il prenne vne Damoifelle dans le pays qui eſt depuis Zare, iuſques à Cattaro, & non autre-

autrement. Mais quiconque prend pour femme vne estrangere telle que nous auons dit, il doit auoir vaillant pour le moins mille ducats d'or, pour l'assurance de ceste femme, combien que cecy s'obserue fort peu. Et quant aux mariages ils sont limitez par la Loy à milles ducats d'or; mais auourd'huy l'on passe par dessus ceste ordonnance, tellement qu'un pere donnera trois, quatre, cinq, & six mille ducats, voire plus, selon les moyens, & la qualite de la fille.

On donne le mariage en argent auant que le mary futur voye la femme qu'il doit prendre, & lors que le contract est escrit, & toutes les autres ceremonies sont acheuees, il s'en va la voir en sa maison. Car c'est leur coustume de ne mugueter point vne femme qu'apres l'auoir espousee, selon l'ordre prescrit par l'Eglise Romaine.

Quant à leur langage, tous les ieunes hommes scauent ordinairement la lague Italienne qu'ils appellent Franque: mais ils vident seulement entre eux de leur langue Sclauonne.

Plusieurs d'entre eux s'addonnent aux lettres: & pour cet effect la Republique tient ordinairement dans Ragoufe avec gros gages vn Lecteur qui enseigne les bonnes lettres aux ieunes hommes, avec trois ou quatre repetiteurs. Ils font venir aussi toutes les annees vn bon Predicateur, qui presche seulement aux hommes, à cause qu'il parle Italien, & les femmes ne le peuuent entendre, ne sachans la langue.

Outre ce la Republique tient outre les Medecins de l'ame, des hommes pour remedier au corps, c'est à sçauoir deux Medecins, & deux Chirurgiens avec de fort bons gages. Ceux-cy sont obligez de visiter tous les malades sans tirer aucune recognoissance, spécialement des pauvres, & de faire tout ce qui est necessaire selon leur profession, pour la santé des citoyens.

RICHESSE.

CE n'est pas le pays des Ragoufois qui les rend riches, veu que c'est bien assez s'il les entretient, combien qu'ils vivent avec autant d'espargne qu'on sçauoit faire. Leurs grandes commoditez viennent du tres grand trafic qu'ils exercent, veu qu'ils ont beaucoup de bons vaisseaux avec lesquels ils vont en diuers lieux, gagnent gros avec le commerce. Ce qui leur fait grand bien, c'est que moyennant quatorze mille Zequins, ou Secquins qu'ils donnent au Turc toutes les annees, ils sont francs, & exempts de toutes sortes d'impositions, & de gabelles par tout l'Empire du grand Turc.

Mais il ne faut conclure pour cela que ce soit vne Republique fort riche, veu que sans le support, & l'appuy du Turc, elle auroit esté bien souuent en proye à plusieurs, & principalement aux Venitiens, & elle seroit bien empeschee, s'il falloit faire quelque grosse despence à entretenir des gens durant quelques annees.

FORCES.

LE deffaut des grandes commoditez fait aussi que les Ragoufois ne peuuent auoir de grandes forces, & s'ils subsistent, c'est à cause du support dont j'ay parlé. Leur ville est assez bien fortifiée, mais outre qu'elle est au pied d'une montagne qui luy commande, elle ne sçauoit soutenir vn grand effort.

Quant aux gens de guerre ils n'en tiennent que fort peu, veu qu'ils ont seulement leur garde de cent Hongrois avec vn Capitaine: mais la Republique se sert de ceux-cy, plustost aux executions qu'en autre chose qui leur soit necessaire. Pource que ces hommes là ne respectent personne, & pour ceste cause font tout ce qui leur est enjoinct, & sont fort fideles, de mesme que les Suisses dont les Princes se seruent pour la garde de leurs personnes. Ils ont aussi le chasteau de S. Laurens hors la ville, qui est assez bon, & la nouuelle forteresse vers la porte qui est du costé du Leuant. Mais toutes ces choses sont assez peu considerables, seulement bonnes pour resister à des gens qui ne se veulent pas opiniastrer à vne entreprise.

GOVERNEMENT.

Ragoufe n'a pas tousiours esté Republique, veu qu'elle a obey en diuers temps à diuers Seigneurs, tantost Grecs, tantost Albanois. Mais depuis qu'elle a embrassé la façon de viure, avec laquelle elle se gouverne maintenant, elle s'est maintenue avec quelque reputation.

Or les Ragoufois, lors qu'ils voulurent reduire leur ville en Republique, suiurent pour la plus grande part l'ordre de la Republique de Venise. Ainsi donc qu'ils se furent resolus

458 Estat de la Republique de Ragoufe.

de l'ordonner, ils instituerent vn grand Conseil, ſçachans que c'eſtoit le fondement d'une Republique, & comme vne baſe aſſeuree de leur ville. Tous les gentils-hommes de la ville entrent en ce Conseil, ſi toſt qu'ils ont atteint l'aage de vingt ans, & ſont receus en prouuant qu'ils ſont nobles, & ſortis de nobles. On cree en ce Conseil tous les Magiſtrats de la ville, qui ſont tels que ie vous les vay deduire.

Il y a premierement les Pregads, qui doiuent eſtre d'ordinaire ſoixante tous Gentils-hommes: mais il arriue bien peu ſouuent que ce Magiſtrat face nombre. Pluſieurs Gentils-hommes de meſme famille en peuuent eſtre, pource que (comme i'ay dit cy deſſus) les familles ont eſté reduites avec le temps à vn petit nombre. Ceux-cy ont charge des affaires de la Republique, & iugent encore les cauſes ciuiles par appel de trois cens ducats en bas. Ils iugent auſſi toutes les cauſes criminelles qui ſont importantes pour la qualité des perſonnes, comme ſi quelque Gentil-homme eſt accusé, ou ſ'il a commis quelque crime.

13. Ils demeurent vne annee en ceſte charge, & l'on les change ſelon qu'ils y vacquent, d'autant qu'ils ne ſont pas tous creez à la fois: mais peu à peu, & les vns apres les autres ſelon qu'ils finiſſent, & meſme ils peuuent eſtre reconfirmez.

14. Le petit Conseil ainſi nommé au regard du Grand, eſt le Conseil du Recteur, qui eſt compoſé d'onze perſonnes, toutes de diuerſes familles, qui aſſiſtent le Recteur ou chef de ceſte Republique. Ils reçoient & oyent les requestes, & les demandes des eſtrangers & des hommes priuez, les lettres, les Ambaſſades, & choſes ſemblables, & ſont preſque comme vne main, qui preſente aux autres Magiſtrats les choſes qui viennent deuant eux, & qui vont apres ſelon leur qualité aux offices deſtinez à telles matieres. Et ceux cy pour le regard des choſes qui s'offrent à eux, en decident quelques-vnes, & rapportent les autres aux Pregads. Ils ne demeurent en ceſte charge qu'une annee ſeulement, & ſortent tous enſemble, & les autres onze qui ſont creez par le grand Conseil, entrent auſſi tous enſemble au nouveau Magiſtrat, le premier de lanuiet, avec le nouveau Recteur.

Ce Recteur, qui eſt chef de tous les Conſeils, eſt eſleu au grand Conseil par trois ſortes d'eſlection, ainſi qu'on faiet encor de tous les autres offices: Et de ces eſlections en tous offices, l'une ſe faiet par voye de la Scrutin (que ie vous ay expliquée en parlant de l'eſlection des Papes) par trois Conſeillers du Recteur, & les deux autres ſont faietes au ſort.

Le Recteur ne demeure qu'un mois en charge, & il eſt obligé durant ce mois de ſe tenir au Palais. Il porte l'accouſtrement de Duc, c'eſt à ſçauoir vne robbe à manches ouuertes, & differentes des autres, à cauſe de ſon autorité. On luy donne d'eſtat cinq ducats, & non dauantage pour tout ce mois. Il eſt vray que quand il eſt Pregad pour le regard des appellations il a vn ducat le iour qu'il y aſſiſte.

Ce Recteur ſ'aſſemble avec les Conſeillers les iours ouuriers par le diſner, & les feſtes auſſi, mais pour quelque ſubiect. Il donne ordinairement le matin aux Pregads, ou au grand Conseil, ſelon l'occurrence, & le beſoin. Et ſi le Recteur n'y eſt par fortune, le plus ancien Conſeiller entre en ſa place, & l'on n'expedie aucune choſe ſans ſa preſence. On donne à ce Recteur vn Lieutenant qui a ſeulement iuriſdictiō iuſques à trois ducats d'or: & ceſtuy cy eſt ſon Lieutenant ſeulement aux choſes ciuiles, & non aux autres, & les Conſeillers ne peuuent eſtre eſleus Recteurs l'annee qu'ils ſont en leur Magiſtrat.

Il y a apres les cinq Pouruoyeurs, qui ſont hommes de cinquante ans en ſus, & doiuent eſtre de diuerſes familles, ils ont l'autorité de faire receuoir toutes expéditions faietes par quelque Magiſtrat que ce ſoit, & doiuent eſtre preſents, lors que les Conſeils ſ'aſſemblent. Ceux-cy peuuent eſtre faiets Recteurs deuant le Magiſtrat, & le ſont meſmes ordinairement. Ce ſont des principaux de la ville qui ont grande autorité, & ſont preſque tousiours du nombre des Conſeillers.

Il y a apres les ſix Conſuls, qui eſcoutent les cauſes ciuiles en premiere inſtance pour quelque ſomme que ce ſoit. Ce ſont ordinairement des hommes de grande autorité, & qui entrent au Conseil des Pregads, & l'on forme ſouuent des procez aux choſes qu'ils iugent. Or les parties n'ont pas de couſtume de faire des allegations, comme on faiet en pluſieurs lieux: ains ceux-cy voyans le procez, deliberent ce que la iuſtice requiert, & tire de chaque cauſe deux ducats pour cent. Ils ne peuuent eſtre Recteurs de deux ans, afin de ne deſtourner point les cauſes ciuiles, afin que le peuple ait la commodité de pouoir eſtre tout expedie aux procez qu'il a, d'autant que ceux-cy vacquent continuellement à les iuger.

On void auſſi cinq Iuges criminels, & les expéditions partent d'eux ſelon le iugement qu'ils font.

Il eſt vray que les nobles en ſont exceptez, veu qu'aux choſes criminelles ils vont par-
deuant les Pregads, & ceux qui ſont gagez par la Republique reſpondent pardeuant
le petit Conſeil.

Et il y a encor quelquesfois d'autres choſes que les cinq ne iugent pas, pource qu'il
ſemble bon aux Pregads d'en prendre cognoiſſance. Ces Iuges pour n'eſtre ordinairement
beaucoup occupez ſont faiçts recteurs, de meſme que les Pouruoyeurs.

Il y a encore trois officiers ſur l'art de la laine. Ceux-cy oyent ordinairement les differents ^{19.}
qui naiſſent entre les perſonnes qui exercent tel art. Ils entrent dans le nombre des Pre-
gads, & peuuent meſme eſtre Recteurs.

Ceſte Republique a encor vn College de trente, dans lequel il peut entrer pluſieurs ^{20.}
perſonnes d'une meſme famille. Ils cognoiſſent des cauſes d'appel iuſques à la ſomme
de trois cens ducats, & ont de gages chacun trois ducats l'annee, ce qui ſe fait à cauſe
que tous les Officiers de la ville ſont ſubieçts à quelque peine, s'ils ne vaquent à leurs char-
ges: car autrement ils ne les accepteroiēt pas, puis qu'elles ſont ſi peu vtils. Lors que quel-
que office vient à vacquer on ſupplee à ce manquement par le moyen de l'un de ceux qui
ſont en quelque autre office.

Quant à ce College il n'a charge d'autre choſe que de cognoiſtre des appellations, com-
me nous auons ja dit. Et quant aux Pregads on ſupplee auſſi au deffaut de leur nombre
lors que quelqu'un vient à manquer en prenant vn des pouruoyeurs de ce College.

Elle a pareillement cinq hommes qui pouruoyent à la ſanté, & de qui la charge eſt de ^{21.}
prendre garde que la ville ſe maintienne ſaine, & pour ceſte cauſe ils ſont appelez Pour-
uoyeurs de la ſanté. Leur autorité eſt grande, pource qu'ils puniſſent ceux qui ſont trou-
uez en faute, & qui vont contre les ordonnances de cēt office, & ſont fort ſemblables aux
Pouruoyeurs de la ſanté de Veniſe; & ils peuuent durant le temps de leur charge eſtre
Recteurs.

Il y a quatre hommes eſtablis ſur la Douane, qui ont ſoin des choſes appartenantes à ^{22.}
cet office, & exigent l'argent qu'on doit aux Douanes, & ſont toute autre choſe requiſe
en ceſte maniere.

Il y a encore deux Camerlingues, ou Chambellans, qui recourent l'argent qui eſt ap- ^{23.}
pliqué à leurs caſſes, mais ils n'ont pas pour cela le maniement du threſor public, & leur ar-
gent eſt employé en quelques occurrences de la Republique, & ſelon la volonté de ceux
qui ont charge de gouverner.

On y void encor trois Threſoriers, qui ſont volontiers hommes de grande autorité, ^{24.}
tant pour leur riçheſſe, que pour leur bonne vie. Ceux-cy ont le threſor public entre leurs
mains, & outre ce l'argent des pupils qu'on leur donne en depoſt & en garde. Ils demeurent
en leur office cinq ans, & peuuent eſtre faiçts Recteurs, & ordinairement les Recteurs ont
auparauant eſté Threſoriers.

Il y a ſemblablement des Juſticiers qui pourçaſſent que les choſes qui concernent les
viures aillent comme il faut, & prennent garde à ce que les poids, & les meſures, & autres
inſtrumens des marchands, & des artiſans aillent ſelon les Ordonnances: & en leur office
les arts qui leur ſont ſouſmis ſont marquez.

Et pource qu'en leur ville ils ont vn petit Arcenal ſelon leurs forces, ils ont vn Magi- ^{25.}
ſtrat nommé, & des Officiers de l'Armurerie. Ceux-cy ont ſoing de cēt Arcenal, & pour-
uoyent aux munitions par mer & par terre. Ce ſont de ieunes hommes qui ont encore des
Suruoyans ou Surueillans de plus grande experience qu'eux, & on les fait de temps en
temps ſelon les occasions qui ſe preſentent.

Dauantage, on meine à Ragouſe le froment d'ailleurs, & cecy ſe fait aux deſpens du pu- ^{26.}
blic. Il y a donc deux officiers qui ont charge de telle choſe, & de vendre ce froment pour
la Republique.

Les reuenus des Ragouſois conſiſtent pour la plus grande partie en vin, & pour ceſte cau-
ſe ils ont eſtably trois Officiers ſur les contrebandes, & ceux-cy ont la charge de les exped-
ier quand on les fait de vin, & il y a vne grande peine ordonnee contre les contreuenans,
pource que la loy commande qu'on ne face entrer nuls vins deſſendus.

Il y en a encore qui ont ſoing des ruës de la ville, & des lieux publics, faiſans repa- ^{27.}
rer les chemins, & les places, & ſemblables choſes, ſelon le beſoin, & ceux-cy ſont ieunes hommes,
pource que ce ne ſont pas offices de grande importance.

Il y a encore ſix Capitaines de nuit qui ſont l'un apres l'autre la garde par la ville durant ^{28.}
la nuit, avec les Hongrois, qui ſont enuiron cent avec leur Capitaine, & obeïſſent à ceux-
cy qui ouurent & ferment les portes de la ville. Ils demeurent deux mois en ceſte char-

ge: & l'on y garde cet ordre que ceux qui ferment la nuit les portes de la ville, ne les ouvrent pas, pource qu'on les change à la minuit.

29. Ils ont vn Secretaire, qu'ils nomment Notaire, qui se trouue en toutes les choses secretes.

Il y en a apres vn autre quia le mesme titre, mais n'entre en cognoissance des secrets importants de la Republique. Et ces deux Secretaires seruent aux occurrences à escrire des lettres, & font encore l'office de Notaires ordinaires.

Outre les susdits il ya trois Chanceliers, qui seruent aux Consuls, & aux choses ciuiles, & font encore des instruments, & l'un est au criminel avec le mesme office.

Tous les soirs ils enuoyent vn Capitaine au chasteau de Saint Laurens, qui est hors de la ville: & cestuy-cy n'a aucun appointment, mais est contrainct de ce faire.

Ils en enuoyent encor vn autre au nouveau fort, & ceux-cy y vont par ordre de rolle, & font ordinairement ieunes gens: mais lors que quelqu'un a passé quarante ans, il est hors de ceste subiectoin.

30. Les Capitaines & les Comtes qui vont au gouvernement de dehors pour l'Estat de ceste Republique, sont tous creez par le grand Conseil, & quelques-uns d'entre eux demeurent en charge sept mois, & les autres douze.

RELIGION.

CE peuple est tout Chrestien, & veritablement Catholique. La ville de Ragoufe a son Euesque qui y fait sa demeure ordinaire. Il ya trois Procureurs de l'Eglise Cathedrale, qui ont soin de la principale Eglise, & ont en gouvernement les reliques qui y sont, pour ce qu'il y en a en fort grande quantité, & qui sont enrichis d'or, d'argent, & de pierres precieuses. Ces Procureurs demeurent en charge toute leur vie, & peuuent estre Recteurs, & entrer aux autres Magistrats, comme de Conseillers, de Thresoriers, & autres offices.

ESTAT





ESTAT DE LA REPUBLIQUE DE VENISE. SOMMAIRE.

I.

DENOMBREMENT des chasteaux, villes & estats soumis à la Seigneurie de Venise.

2. Description de la ville de Venise, de ses Palais, & somptueux ediffices, de son Arsenal merueilleux, des coustumes & richesses d'icelle, & de tout ce qui s'y remarque de rare.
3. Des villes, chasteaux, & forteresses qui appartiennent à la Republique de Venise dans le continent d'Italie.
4. De la ville de Verone.
5. De celle de Bergame.
6. De la ville de Vincence.
7. De celle de Creme.
8. Du Friul, son estendue & ses villes, entr'autres d'Aquilee, bastie par les Romains.
9. De la marque Treuisane, bonté de l'air d'icelle & ses principales rivières, de ses villes plus celebres, de Treuisan & de Trente.
10. De la fertilité d'aucuns terroirs des villes de Venise, de Verone, abondante en bled, & fine laine. Bergame en olives, Friul, en vins excellens. Herbes medicinales de l'Istrie.
11. Pescheurs premiers habitants de Venise, & ses premiers fondateurs, comme aussi de Reuolto.
12. De Padoue & des Padoüans irresolus.
13. Des neuenus de la Republique de Venise.
14. Des exactions extraordinaires qui s'y font.
15. Des forteresses qui sont en l'Estat de Venise, & leur milice & gendarmerie.
16. Des forces maritimes & armee navale des Venitiens.
17. Police de la Seigneurie de Venise, & premierement du Doge ou Duc, & son pouuoir.
18. Du Conseil des dix & du Senas de Venise.
19. Deffauts remarquables en ceste Seigneurie.
20. Denombrement des Ducs de Venise.
21. Religion des Venitiens.



Les Venitiens possèdent en Lombardie, & en la Marque Treuisane sept florissantes villes, riches, grandes & peuplées, outre plusieurs belles autres places, chasteaux & forteresses.

Les villes sont Bergame, Creme, Bresse, Verone, Vincence & Padoue.

Les autres places sont Bassan, Castel-franc en la Marque, Treuise, & autres que ie laisse pour fuir la longueur.

Vers le Nord elle possède presque tout le Friul avec l'Istrie, qui est la derniere prouince d'Italie de ce coste là.

Elle maistrise preique tous les riuages, & routes les Isles de la Dalmatie, & Sclauonie, où il y a quelques bonnes villes, comme Zara & Catarro.

Elle possède encore à l'emboucheure de la mer Adriatique, l'Isle de Corfou, & outre ce l'Isle de Cephalonie, de Zante, de Cerigo, de Lucerigo & autres que nous dirons tantost.

Ces prouinces passées, elle est maistresse de l'Isle de Candie, & voila tous les Estats qui sont soumis à ceste Seigneurie.

Quant à la ville de Venise, tous les estrangers qui curieusement voyagent en Italie, considerans sa beauté, non seulement l'estimēt belle entre toutes les villes Italiennes, mais encore admirable, tant à cause du grand nombre de ses Palais, qui semblent plustost estre bastis pour des Roys, que pour des personnes qui semblent rechercher vne mediocrité honeste

en toute chose, qu'à raison de la multitude de ses temples.

L'excellence de ses Palais & magnifiques edifices consiste en ce qu'il n'y a parois ny murailles au dedans, qui ne soient ou de marbre, ou de jaspe, ou d'albastre, ou porphyre, outre ce la diuersité des colonnes, statues & peintures, les rendent grandement digne d'admiration.

Mais entre les principales pieces de ces grands corps de bastimens & Palais des Nobles, des Senateurs, des grands Seigneurs, ceux qui suivent, apres les Temples & maisons publiques qui surpassent toute la gloire d'Italie, voire de l'Europe, sont encore suffisantes d'estonner le curieux; d'où sont prouenuës tant de richesses & finances qu'il a fallu employer pour la perfection de ces merueilles du monde,

Le grand Palais de l'ancien Patriarche d'Aquilee, appelé Guinien, est l'un des plus superbes de Venise, car là dedans l'œil decouure plusieurs rangees de statues & effigies, d'un bon nombre de Césars & grands Capitaines anciens, toutes de marbre, de bronze & d'airain.

Dauantage, y sont representez vne grande quantité de beaux simulachres, statues & images des Dieux Payens, comme sont ceux de Iupiter, de Bacchus, de Mercure, de Iunon, de Pallas & Venus, taillees & trauaillées en cuiure, airain, & marbre, avec vn artifice nonpareil.

Plus on y void les simulachres & les idoles de la Deesse Fortune, du Dieu Genius & de Cupidon, faits & taillez de metaux pretieux & de grande valeur: lesquelles pieces antiques, le Cardinal Marinus Geminianus, & son grand perefurent curieux de faire apporter de plusieurs & diuers lieux de Grece & d'Italie à Venise, pour illustrer & decorer ce beau & superbe Palais. Et entr'autres choses, l'on remarque en iceluy plusieurs belles & rares pieces anciennes qui furent apportées des ruines de la tres-noble & florissante cité d'Aquilee, qui estoit jadis vne colonie des Romains, & qui fut ruinee de fond en comble par Atrila Roy des Huns, homme tres-cruel & barbare, & ce par le vouloir de ses Patriarches. Dans le pourpris de ce Palais, se voyent encore plusieurs petits liëts que les anciens Payens faisoient es Temples à leurs Dieux, & sur lesquels sont grauees quelques lettres & caracteres, avec plusieurs petits autels: entre lesquels se voyent les vœux que les anciens vouïoient au Dieu Belinus, inscrits & grauez sur des autels carrez, lequel Dieu Belinus estoit anciennement fort renommé entre les Aquileiens, & le tiennent entr'eux comme Dieu gardien, & tutelair de leur ville, ainsi qu'il se lit dans l'histoire d'Herodian & de Iule Capitolin, lequel Herodian, comme la ville d'Aquilee fut vne fois assiegee en vain, & battue par l'Empereur Maximinus Cesar, dit que ses Ambassadeurs ne furent iamais introduits dans la ville: & n'est point ce me semble hors de propos de rapporter le lieu de l'histoire qui est dans le susdit Herodian, liu. 8. de son histoire, il parle de cela, & lesquels tiltres grauez sur ceste table de marbre, cét Autehur rapporte pour monstrier l'antiquité de ceste piece, & le susdit Patriarche Grimanus assure en quelqu'un de ses œuures, que veritablement il a fait apporter d'Aquilee en cestuy sien Palais de Venise, ces belles remarques de l'antiquité.

Outre ce magnifique edifice si celebre & fameux en la ville de Venise, se voyent encore plusieurs autres braues & excellens Palais.

Et tout premierement outre le susdit, se void le superbe Palais du Duc de Venise, duquel les fondemens furent jettez en l'an 809. par Ange Partitatie Duc de Venise: & encore que par cinq diuerses fois ce Palais aye esté demoly & ruiné par accident de feu: neantmoins à toutes les cinq fois, il a tousiours esté reedifié & remis en vne plus belle perfection qu'auparavant, sa forme & figure est tetragonique, excepté qu'elle est quelque peu plus longue que large. Du costé du Septentrion, il va répondre au grand Temple de saint Marc de Venise vers le Midy, il a veü sur la mer du costé de l'Orient: à son entree dans la principale rue de la ville à l'Occident. Depuis la premiere porte de ce Palais iusques à l'Arsenal de la ville est vn angle & depuis cét angle, iusques à vn autre, qui est au pont de Paille du costé du Midy, en outre se voyent 36. grandes arcades, chacune desquelles est large de dix pieds soutenues sur 36. colonnes. Dauantage en iceluy Palais sont deux beaux frontispices, faits de belle pierre de marbre carré, blanc & rouge.

Il est aussi à noter que du commencement que ce grand Palais fut basti, il estoit couuert de plomb; & depuis ayant esté brulé par plusieurs fois, & notamment en l'an 1574. il fut refait & recouuert d'airain, & y furent adjoustez quatre beaux frontispices aux quatre principales portes d'iceluy: la 1. desquelles est proche le Temple de saint Marc, faite toute de marbre avec quatre belles grandes statues esleuees faites aussi de marbre blanc. Au dedans d'iceluy est vne belle grande place en forme de court, au milieu de laquelle sont deux puits qui sont ornez de diuerses grandes images & statues faites d'airain, sur lesquelles sont gra-
uées

uees plusieurs ceps & rameaux de vignes, avec des grappes de raisin en leur saison, & au bout de lad. court est vne autre porte, par laquelle on va à la mer: ainsi que l'on entre en ce Palais, tout au commencement à main gauche on void vn bel escalier fort artistement compassé de colonnes, & ainsi de plusieurs belles allees & galleries, par lesquelles on tourne tout à l'entour du Palais.

Pour les frontispices interieurs de ce superbe bastiment, ils ne sont aucunement dissimulables à ceux de dehors, excepté que par embas, il n'y a point de colonnes ny d'arcades comme aux autres, mais au milieu il y en a vne grande quantité.

La face de cet edifice qui regarde l'Orient est extrêmement riche & magnifiquement construite: car tout au faiste il y a 36. petites arcades avec autant de belles colonnes de marbre, sur lesquelles il y a vne fort belle gallerie propre à se pourmener & couverte de 54. autres petites arcades, & outre encores de 55. autres colonnes qui soustiennent lesdites arcades, & au faiste d'icelle elle est toute solide & decorée de plusieurs belles fenestres, de couronnes, fueillages & autres excellens ouurages grauez fort delicatement, sur le piedestal, de laquelle tout l'edifice est composé.

Aupres de la principale porte du Palais en entrant du costé du Septentrion, on trouue vn tres-beau & excellent escalier, lequel conduit aux salles & chambres du Duc de Venise: au pied duquel escalier se voyent deux grandes colonnes de marbre, l'une desquelles representent le Dieu Mars, & l'autre Neptune, & au faiste dudit escalier se voyent encores deux autres colonnes, l'une qui represente Adam, l'autre Eue sa femme, pieces qui ont tres-bonne grace.

En tout iceluy Palais on compte iusques au nombre de seize escaliers, entre lesquels il y en a quatre principaux qui conduisent tout à l'entour du logis.

Dans ledit Palais est vne tres-belle gallerie & pourmenoir qui regarde sur le grand Canal de Venise: aux deux bouts de laquelle sont deux montees qui conduisent à l'autre gallerie d'enhaut, & de laquelle nous auons parlé cy-dessus, & apres les premiers degrez de l'un de ces escaliers, se void vn eloge à la memoire de Henry troisieme de ce nom, Roy de France & de Pologne, escrete & burinee en lettre d'or, sur vne belle pierre de marbre, & aupres de ceste gallerie, se void vne espee de jardin & vn lieu decouvert, où est vne petite chappelle faite de la mesme façon que celle que les anciens Payens erigeoient en leurs maisons particulieres, où ils auoient accoustumé tous les matins de prier & d'aller offrir sacrifices à leurs Dieux tutelaires & particuliers, & est en celle-cy où ordinairement le Duc de Venise va faire ses prieres & oraisons.

Dauantage en ce petit lieu decouvert, se voyent vne infinité des petits sieges faits & construits en forme de tribunaux: du costé du Midy en reuenant vers l'Orient, se voyent de tres-belles & larges montees magnifiquement faites & basties, lesquelles conduisent aux chambres du Prince, c'est à sçauoir à main gauche & à main droite, & se vont rendre au College.

Bref pour dire en vn mot, celui qui entre en ce Palais, de quelque costé qu'il puisse jetter la veüe, il ne void autre chose que colonnes de marbre, que statues d'airain & de bronze, que voûtes & soliveaux dorez, & vne infinité d'ouurages excellens & magnifiques.

Le College est situé à l'Orient de ce Palais, esleué & soustenu sur des estages & grosses poutres de bois, qui par dedans est fort magnifique, car les planchers y sont tous dorez & les parois diuersifiées de plusieurs belles peintures & histoires. Là dedans le Duc fait sa residence ordinaire, au milieu duquel est son Throsne Ducal, là où il s'assit avec ses Conseillers ordinaires, quand il est question de traiter d'affaires concernant l'Estat de la Seigneurie, & c'est aussi en ce mesme lieu où il donne audience aux Ambassadeurs des villes & terres qui dependent de Venise, & à ceux qui luy sont enuoyez de la part de plusieurs Princes estrangers. Dans ce College est vne tres-grande & spacieuse sale, laquelle est enrichie & embellie de plusieurs belles peintures; toutes les Regions, villes, citez, chasteaux, forteresses, terres, domaines & seigneuries dependantes de la Republique de Venise, tant sur mer, que sur terre.

Là aussi se voyent onze belles & riches statues des Empereurs, tres-anciennes, faites d'ouurages antiques de bronze & d'airain.

C'est ordinairement en ceste sale où le corps de la Republique s'assemble quand il est question de deliberer sur quelques grandes affaires importantes à la Republique & Seigneurie.

De ce Palais en aduançant vers le Midy, du costé de la mer, l'on vient à trouuer les tribunaux des dix hommes, ou Gouverneurs de la ville, là où pareillement aussi toutes choses sont magnifiques & admirables.

Là auprès sont plusieurs grandes & spacieuses sales, où quelquesfois le peuple s'assemble pour consulter, & même pour créer de nouveaux Magistrats, laquelle creation se fait de la sorte.

CREATION DES MAGISTRATS DE VENISE.

Premierement, l'on fait asseoir les Patrices & Gouverneurs de la ville chacun en son ordre & selon sa dignité. Et est icy à remarquer que personne n'est admis en ceste assemblée, s'il n'est venu de la race des Patrices, & n'aye atteint l'age de 25. ans. Estans ainsi arrangez de part & d'autre sans dire mot, apres les voix des esclians avec des jettons, ou bien avec certaines petites boulettes d'argent, lesquelles sont diuisees par les distributeurs, qui vont de place en place, cela fait deux Collecteurs vont recueillir & ramasser ces petites boulettes dans des vases de bois qui ont l'entree fort petite, & dans lesquels on peut mettre la main, lesquels vases ont par embas deux petits coffrets, dans lesquels se diuisent les petites boulettes, les y jettant de telle sorte. que les Collecteurs mesmes ne sçauent auquel des deux coffrets est tombee chacune de ces boulettes, ou au droit, ou au gauche, & ne peut-on sçauoir par ce moyen, auquel desdits coffrets sont le plus de voix qui approuuent ou qui refusent le Magistrat qui doit estre esleu, & où il se trouue plus de voix au coffret, c'est de celuy-là qu'est ordinairement tiré le nom du Magistrat esleu.

Et parce il y a eu plusieurs grandes personnes qui ont escrit & remarqué vne infinité de belles choses, touchant la Republique de Venise, & les assemblees ordinaires qui s'y font, pour ce suiet, desirant reprendre mon dessein ie renuoye le Lecteur arriere de ceste cognoissance.

Reuenons à la description de nostre sale des assemblees publiques, laquelle Hierosime Capugnan Religieux Boulonnois de l'Ordre de saint Dominique, dit auoir en largeur 73. pieds & en longueur 150. qui fut basti l'an de nostre Seigneur 1309.

En icelle se voyent depeintes & representees au vif par aucuns des plus braues & celebres d'Italie, toutes les batailles & victoires des Venitiens, & outre plus se voyent par ordre, tous les Ducs, Princes, grands Seigneurs & Senateurs de la ville, & plusieurs autres figures d'hommes, tant de Venise que d'Italie, qui par leur haut sçauoir, & grande doctrine ont donné sujet, & laissé matiere apres leur mort de faire à iamais parler d'eux : mais comme toutes ces choses furent deperies & ruinees par l'accident de feu, qui brusta ceste sale en l'an de nostre Seigneur 1577. elle a esté rebastie en l'an 1583.

Ceste histoire est depeinte par detres-excellens ouuriers sur trois grandes tables ou carres, dont la premiere contient l'histoire de Frederic. La 2. celle du Pape Alexandre 3. & la 3. comme Constantinople fut vne fois reduite sous la puissance de l'Empire Venitien.


Les planchers de ceste sale sont tous azurez, & du costé de l'Orient, se void le Throsne du Prince de Venise: au dessus duquel contre la muraille, se void depeint vn Paradis contenant tout ce costé de muraille, à quoy faire fut employee vne desdites colonnes: Monsieur de Baut, maistre Peintre, & auparauant vn autre appelle Quiarionte y trauaillerent.

À l'opposite dudit Throsne du Prince de Venise, se void vne belle chaise toute de marbre, dans laquelle est vne image de nostre Dame, tenant son Fils le Sauueur du monde entre ses bras, avec quatre Anges qui l'environnent.

Ceste sale a ses voûtes de costé & d'autre diuisees en beaux rangs de fenestrages, dont les vnes regardent dans vne grande rue, & les autres sur la mer.

Delà l'on est conduit par vne belle galerie iusques à l'Arsenal du Palais du Duc, lequel n'est monstre sinon aux grands Seigneurs estrangers qui arriuent ordinairement à Venise pour voir les singularitez d'icelle.

*DU MAGNIFIQUE TEMPLE DE
Saint Marc de Venise.*



VPRÈS de ces sales de l'assemblée, ou plustost hostel de ville est la grande place publique de Venise, dans laquelle est construit le tres-sainct, tres-auguste, & tres-celebre Temple de saint Marc, merueilleux en artifice & admirable en beauté, lequel est l'un des plus beaux & riches vaisseaux qui se puissent trouver en toute la Chrestienté, & le plus magnifique, pour estre fait & basti au dedans de tres-beau marbre poly, le pavé de Porphyre, de Topase, les parois & voures d'Ophites, & d'autres petites pierres tres-fines & pretieuses, & enrichies de plusieurs belles couleurs & peintures tres-riches, representans diuerses histoires & plusieurs enblemes, enigmes & autres belles choses, lesquelles on ne se peut lasser de regarder. Entre lesquels enblemes on dit y en auoir plusieurs qui ont esté inuentez & excogitez par Ioachim Abbé de Sanflore, grand personnage à la verité, qui sçauoit fort bien iuger des choses futures, & qui par ses propheties a fait entendre long-temps auparauant qu'elles arriuaissent, les mutations & changemens des Republiques d'Italie.

Entre aucuns de ces enigmes ceux-cy sont remarquables.

Le premier, ce sont deux cocqs à longues crestes, qui déchiroient un renard, voulant par cela représenter la victoire de deux Roys de France par eux remportée sur Louys de Sforzia Prince de Milan, la seconde estoit de Louys le Gras & le Gros, sortant de Meaux: puis d'un lyon fort megre, qui estoit couché sur la terre, voulant par cela représenter le bonheur de la Republique de Venise, & de laquelle l'estendard & bannière porte empraint le lyon du saint Euangeliste saint Marc qu'elle reueré, & sa condition, sçauoir est que par le commerce & trafic de la mer elle s'est rendue riche & opulente, que par les guerres navales elle s'estoit rendue puissante & redoutable. Mais au contraire, ayant delaisné la mer pour entreprendre quelques expéditions en terre ferme, ceste Isle commença à s'affoiblir & à diminuer beaucoup de sa grandeur & de sa puissance.

Les pierres & murailles de ce Temple sont toutes couuertes de belles tables de marbre collees ensemble. Entr'autres à main droite, s'en voyent deux qui se tiennent ensemble, lesquelles ont esté sciees & coupees d'une mesme pierre de marbre blanc, en la jointure desquelles se voyent autant de lignes noires, qui representent aussi naïfement le pourtraict d'un homme, qu'il n'y a personne au monde qui n'y soit trompé, & qu'il ne dise que cela n'aye esté fait par artifice & industrie des hommes, bien que veritablement & de fait cela se fust ainsi rencontré, apres que ces deux pierres ont esté conjointes ensemble, chose à la verité merueilleuse, & laquelle Albert le Grand reput e pour miraculeuse metheore.

La voûte de ce Temple est composee d'un bel edifice ornée de plusieurs riches peintures & histoires diuerses, & est soustenuë par 36. belles colonnes toutes de marbre Phrigien, espais de deux pieds en diametre.

Le tour d'iceluy Temple contient cinq hemispheres tous couuerts de plomb.

Le portail qui regarde la grande place publique a cinq grandes portes d'airain, qui donnent entree en iceluy, & depuis le hault iusques en bas, est fait en forme Grecanique, & enrichies de plusieurs deuises & enblemes, & d'une infinité de belles rangees de statues de Dieux, faies & taillees de marbre. Au dessus de la porte principale, se voyent quatre chevaux faits de cuire & d'airain de Corynthe, lesquels embellissent l'entree de ce magnifique Temple; iceux ont esté faits par les Romains, au temps que Hiero triompha des Parthes, & furent mis sur son arc de triomphe, lesquels furent transportez à Constantinople par Constantin, & par apres les Venitiens s'estans rendus maistres de Constantinople, le firent transporter à Venise, & apposez sur le portail de ce superbe Temple de S. Marc, pour le rendre plus decorable & magnifique.

Il est vraiment ainsi, que l'aspect de l'entree, & du portail de ce grand & saint edifice, ravit en admiration ceux qui le considerent: car il y a un si grand nombre d'images & statues de marbre & d'airain, que veritablement & à bon droit il deuroit estre mis au nombre des merueilles du monde & de l'art, & dit-on que ce Temple fut commencé à bastir, & paracheué en 20. ans.

Au deuant de la principale porte est une grande pierre rouge toute quarree, sur laquelle est une lance de cuire grauee & enrichie de fueileages, sur laquelle, disent les Annales de

Venise; le Pape Alexandre troisieme, mit le pied sur le col de l'Empereur Frederic, où pour ce subiect furent gravez certains mots tirez du Psal. 90. de David: *super aspidem & basilicum ambulabis, & conculcabis leonem & draconem.*

Estant entré dans ce Temple on ne leue pas plustost la veüe, que l'on ne voye aussi-tost l'effigie tres-belle & tres-admirable de saint Marc, faite de marqueterie, & taillée à la mosaïque, laquelle a les bras estendus en hault regardant le Ciel.

Delà par certains degrez de marbre on entre dans le chœur, là où l'on peut voir la tres-grande & merueilleuse table de l'autel, qui a esté apportée de Constantinople à Venise, laquelle table est faite de pur or, & d'argent, embellie de plusieurs figures qui y sont gravées & enrichie d'un si grand & inestimable nombre de pierres pretieuses, de gemmes & de lapis, qu'il n'y a personne qui ne demeure estonné sur la richesse & valeur tant excellente d'une telle piece. Tout cet autel est couuert d'une belle voûte faite en croix de beau marbre, laquelle voûte est soustenuë de quatre belles colonnes, faites pareillement de marbre, à l'entreueüe desquelles sont représentées diverses histoires, tant de l'ancien que du nouveau Testament.

Derriere cet autel, se void une petite Chappelle, où repose le tres-saint & tres-auguste Sacrement de l'autel, où se voyent 4. belles colonnes toutes faites d'albâtre, lesquelles semblent estre de verre ou de cristal tant elles reluisent.

Entre plusieurs reliques dont le nombre est infiny en ceste Eglise, l'on y void le corps de saint Marc avec son Euangile escrit de sa propre main, & plusieurs autres choses rares & excellentes, que ie passeray icy sous silence.

Plus en ce Temple est un thresor merueilleux, dans lequel on a entrée à main droite par une porte de pierres rapportées fort artistement, recouverte d'or, & de plusieurs peintures: au dessus de laquelle se voyent les effigies & pourtraits des saints Patriarches, Saint Dominique & saint François d'Assise, lesquelles images & effigies, comme le commun dire est, furent faites & représentées par le sieur Abbé Joachim plusieurs années auparavant que ces saints personnages mourussent.

Le thresor rait la parole des regardans, pour les grandes richesses qui y sont, car en premier lieu, se voyent plusieurs images de Saints, & une grande quantité de couronnes toutes d'or, avec plusieurs chefs pareillement d'or, & enrichis de pierreries tres-belles. Là se voyent aussi une infinité d'escarboucles, de diamants, de topases, de chrisolites, hyacinthes & autres pierres de grande estime & valeur incroyable, avec plusieurs coquilles, gondoles & autres especes de vaisseaux à boire, faits & enrichis d'ouïches, de jaspe & d'agathes.

Là pareillement, se montrent les beaux dons & presens que plusieurs grands Princes & Monarques estrangers ont enuoyé à la Serenissime de Venise: & entr'autres choses, l'on void deux cornes de Lycornes, l'une grande & l'autre petite. Plus une riche escarboucle, qui fut apportée en ce thresor par le Cardinal Dominique Grimani. Plus une cruche couverte & enrichie d'une infinité de belles pierres pretieuses, qu'anciennement Vscassanes Roy des Perse enuoya en don aux Venitiens. Là pareillement, se void la mitre solennelle que l'on met sur la teste du nouveau Duc que l'on consacre; laquelle mesme il porte sortant de son Palais es festes solennelles & principales de l'année. Ceste mitre est extrêmement belle, car elle est toute brodée d'or, & recouverte de riches pierres pretieuses, & au bout de laquelle il y a une escarboucle de grand prix & valeur.

Ie ne peux raconter par le menu les grandes richesses qui sont en ce thresor, comme sont les calices, les vases, les encensoirs, les chandeliers, les burettes, bassins & autres vtenccilles d'or & d'argent employez à l'usage dudit sacrifice de la Messe.

Ce Temple fut construit en l'an 829. & furent apportées en iceluy plusieurs pierres & colonnes de marbre d'Athenes, de Grece, & de plusieurs autres lieux pour orner ce magnifique edifice: il est fait en forme de croix, & se voyent en tout son pourprix plus de 500. colonnes ou pilliers: de quelque costé que l'on voudra y entrer, on entre tousiours par une belle allée voûtée, dont le pavé est fait de petites pierres peintes, carrées & jointes ensemble fort subtilement & delicatement.

Aupres iceluy Temple de saint Marc, se void une fort belle tour faite, & construite de pierres carrées, ayant de chaque front en largeur plus de 40. pieds; elle ne touche point au Temple, mais elle en est distante par l'espace de 80. pieds, ses fondemens sont beaucoup plus profonds qu'elle n'a de hauteur depuis le rets de chaussée iusques à sa cime, comme remarque Sabellique en ses Enneades, le sommet d'icelle est couuert de belles tuilles de cuire d'ore qui reluisent merueilleusement & apparoissent de fort loing le Soleil luisant à ceux qui nauigent, & qui viennent à Venise, d'Istrie & de Liburnie, on môte en icelle par certains degrez de pierre, qui vont tousiours en tournoyant, depuis le pied de l'escalier iusques à la cime.

cime. Du hault duquel on peut contempler à son aise toutes les parties de la ville composée de plusieurs Isles conjointes les vnes avec les autres par certains ponts ; de là l'on decouvre facilement les six Regions de la ville, les rues, les places publiques, les Temples, les Monasteres, les Palais & autres edinces : Delà on apperçoit plusieurs autres Isles hors la ville, iusques au nombre de 60. lesquelles sont decorees de beaux Monasteres, Temples, edifices & jardins tres-agreables & plaisans, & en quelques vns se voyent de petits bourgs, qui estoient anciennement colonies des Aquileiens, Vincentins, Opiterges, Concordiens, Atestins, Arines, & autres peuples voisins des Venitiens, qui durant les guerres des Huns, sous la conduite d'Attila en Italie, se sont retirez en ces petites Isles comme en lieux seurs & asseurez.

Au deuant de la ville on void vn riuage courbé, fait en forme d'arche qui renferme la mer Adriatique, & s'estend près de 35. mille avec plusieurs Isles qui empêchent & retiennent les flots & furies de la mer.

Plus au deuant de ce riuage sont plusieurs estangs d'eau pour la seureté de la ville, & a ledit riuage cinq emboucheures, par lesquelles l'eau de la marine vient à remplir lesdits estangs, là se voyent deux ports de mer tres-profonds.

L'un appellé Clodian, l'autre Medoac, sur lequel il y a deux chasteaux & forteresses bien munies de tout ce qui appartient au fait de la guerre, qu'en vne necessité ils pourroient repousser les plus grands nauires de la mer.

De ceste tour l'on peut aussi voir les Alpes des Carmes, les Promontoires d'Istrie, au costé droit d'icelle on void le mont Apennin, qui traaverse toute l'Italie, avec le sommet des montagnes de la Gaule Cisalpine. Plus l'on void les Collines tres-nobles d'Engrauce, avec les emboucheures des fleues Arthesis & Eridan. D'autre part l'on peut considerer les Alpes couuertes des neiges des Noriques & Grisons.

Les fondemens de ceste tour furent jettez l'an de nostre Seigneur, 888. laquelle apres qu'elle eut esté bruslée, fut refaite & dorée en plusieurs endroits depuis le bas iusques en hault.

En icelle l'an 1517. fut mis & posé vn Ange fait de bois recouuert d'airain ou de cuiure doré, estant fait de la sorte que tousiours il semble que de sa main il face la benediction sur le peuple, & lors que quelque grand vent s'esleue il tourne & se retourne souuent à l'entour des gonds & tenons, ceste tour a de circuit 162. pieds en hauteur: depuis le pied iusques à la 1. table l'on compte 164. pieds: delà iusques à l'Ange il y a 152. pieds Depuis l'Ange iusques aux cloches il y a plusieurs belles colonnes & representations de lyons d'airain & de marbre, avec plusieurs beaux rangs de degrez fort faciles à monter.

Aupres d'icelle tour, contre les portes du Palais, se void vne belle galerie ou pourme-noir richement & industrieusement fait à la Corynthisienne, avec plusieurs belles deuises, emblemes, enigmes & hieroglyphiques. Et en ce lieu, lors que l'on tient assemblee publique au chambre de ville les Procureurs s'y trouuent.

L'on compte en ceste ville de Venise iusques au nombre de 450. ponts faits de pierres viues.

Il y a en outre plus de 8. mille barcs pour passer & se pourmener par tous les lieux de la ville.

Danantage il y a plusieurs canals, dont il y en a vn qu'on appelle le grand canal, qui est long de 1300. pieds & large de 40. Plus il y a vn pont fait sur le grand ruisseau & basti avec magnificence, en la structure duquel plusieurs milliers d'écus ont esté employez ; on monte au hault d'iceluy par trois beaux & magnifiques escaliers, dont celui du Midy contient 66. degrez, & chacun des autres 145.

En la description qui a esté faite des habitans de Venise, l'on a compté iusques à cent nonante mille, sept cens quatorze ames, pour les viures desquels il falloit 10892. septiers de farine tous les iours, qui reuiennent par an 69. mille 500. & 80. septiers.

Toute la Cité contient six mille de tour, ny plus ny moins.

Et afin que nul homme prudent & aduisé ne s'arreste aux niaiseries de plusieurs qui croyent que la Cité de Venise a pris son origine des Pescheurs, qu'il oye ce qu'en dit Cassiodore Senateur, & ce qu'il escrit aux Venitiens, parlant de Theodoric Roy des Ostrogots. *Vos qui numerosa nauigia in eius confinis possidetis & Venetia plena nobilibus*; Vous qui possédez quantité de nauires es confins de la ville ; & vous Venise qui estes pleine de Noblesse, & par lesquelles choses arriuees l'an de nostre Seigneur 495. c'est à dire l'an de la fondation de la ville 80. ou 90. l'on peut facilement cognoistre que les Venitiens n'ont peu en si brief espace de temps acquerir tant de Noblesse, comme Roys tres-puissans d'Italie, & auoir si grand nombre de nauires & vaisseaux, sinon par les richesses de leurs ancestres & n'eussent esté agrandis par les faits & prouesses de leurs peres.

Rr

DE LA GRANDE PLACE DE SAINT
Marc de Venise.



ENON s maintenant à décrire la tres-grande & belle place de saint Marc, embellie & enfermée de toutes parts de plusieurs beaux & superbes edifices, & principalemēt du costé des tēples de S. Marc & de S. Geminian, il y a de tres-beaux & magnifiques Palais, ornez & garnis d'excellents portiques & pourmenoirs, avec plusieurs belles & riches boutiques de marchands & ouuriers. Là ordinairement se voyent des gens de toutes les parties de l'Europe, non seulement, mais d'Asie & d'Afrique, là s'entendent diuerſes langues, là se voyent diuerſes sortes d'habillemens, & vne si grande affluence de peuple, & de toute sorte de nations, qu'il semble que Venise ne soit pas vne ville, mais bien vn autre petit monde.

Du costé de ceste place, qui regarde le riuage de la mer, se voyent esleuees deux belles grandes colonnes toutes solides, faites de marbre Phrigien, qui furent apportees de Constantinople à Venise, lesquelles s'apperçoient de fort loing par ceux qui nauigent en ceste ville, en l'vne desquelles se voyent les armoiries de la ville toutes dorées. Au milieu d'icelles est le lyon de saint Marc dépeint avec des ailes, & en l'autre est la statuē dorée de saint Theodore.

C'est contre ces deux colonnes que les condamnés à la mort sont suppliciez. Force autres colonnes ont esté apportees de Grece à Venise, par le Duc Sebastian Ziani dans certains nauires, & du depuis quatre cents ans en ça, toutes les trois sont de pareille grandeur, l'vne desquelles, pour estre trop pesante rompit tous les instrumens des Couureurs qui la tiroient du nauire, & tomba dans l'eau, & ne s'est peu auoir iusques à present, pource qu'elle est deualee iusques au fōd: & pour les deux autres, elles sont esleuees dans la place de saint Marc bien près l'vne de l'autre, & ce par l'industrie de Nicolas Nerratio, tres-excellent Sculpteur, au moyen de certains gros chables neufs, lequel ne demanda à la Republique de Venise autre recompense ny salaire de ses traualx, sinon qu'il fust licite aux joueurs ordinaires de tenir banque entre ces deux colonnes, ie ne sçay pas si cela est ainsi, ie le donne selon l'opinion du peuple de Venise qui le tient ainsi: Et de fait ordinairement les faineans & rien ne vailent, se trouuent en ce lieu, joians & menans vne vie faineante & paresseuse.

Il semble que ceste grande place ne soit qu'vne, & toutesfois elle est diuisee en quatre.

La premiere est aupres du Palais.

La deuxiesme, entre ledit Palais & la Bibliotheque, qui est distante depuis les colonnes dudit Palais iusques à l'horloge.

La troisieme est depuis le Temple de saint Marc iusques à celui de saint Geminian, au costé droit de laquelle sont les tres-superbes & magnifiques galeries à trois estages fort industrieusement proportionnees, & ornees de plusieurs belles colonnes solides faites de marbre.

La quatrieme est depuis le Temple de saint Marc iusques aux logis des Chanoines de ladite Eglise de saint Marc, laquelle place contient en longueur 470. pieds sur 120. pieds de large. De l'autre costé de ladite place, se voyent de tres-beaux & riches edifices, bastis avec grande industrie. Tout contre l'Eglise de saint Marc, se voyent trois enseignes attachees à trois grands arbres de Pins, lesquelles enseignes portent certaines figures d'airain, sur lesquelles est graué le Hyeroglyphique de la liberté de Venise.

La seconde place commence aux colonnes susdites, & prend fin à la porte de l'horloge, par laquelle on va du marché en la place: Ceste porte est faite de plusieurs pierres de marbre, & comprend en soy le tres-excellent horloge de la ville, dans lequel sont representez les cercles du Zodiaque, avec tous les signes celestes tous dorés, le Soleil & la Lune, entrant chacun mois en quelqu'un de ces signes. Plus se trouuent plusieurs statuēs d'airain composees par art de Mathematique, & de ce costé du Palais, est le thresor de la ville, tellemēt construit de pierres vnies & entrelassees de fer, qu'il n'est pas possible de trouuer vn petit morceau de fente. Estant entre là dedans, on void le lieu où est ledit thresor fait de marbre & doré en plusieurs endroits, aupres duquel on void encore la Bibliotheque de la ville qui commença par celle de Petrarque, qui fit le Senat de Venise heritier de la sienne. Par apres elle fut

fut augmentée par celle de Bellarius, d'Auicenne, d'Alexandre, & du Cardinal Grimani. Sur tous autres lieux sont merueilleusement beaux & admirables par excellence les ouvrages qui y sont, le frontispice de cet edifice est decoré de plusieurs belles colonnes que c'est chose digne d'estre comparée à la plus pretieuse chose de l'Europe, car iceluy frontispice est garny de seize belles arcades richement elabourées, garnies de leurs colonnes, différentes les vnes des autres par l'espace de 8. pieds: au dessus de ces arches sont 16. belles grandes fenestres, chacune desquelles est garnie de quatre belles colonnes de marbre, sur lesquelles sont attachez 16. beaux cercles: Plus en cet edifice sont 25. belles statues esleuées de la hauteur d'un homme, lesquels ouvrages sont tous faits à la Dorique, & à la Ionique, à la maniere des anciens, mais sur tout il n'y a rien qui resioüisse tant la veüe, ny qui soit plus agreable à voir que ce coing de cet edifice, qui regarde la grande place, lequel surpasse en excellence toute l'invention des anciens, & est cet ouvrage continué iusques au temple de saint Geminian, & de là iusques à la tour des Heures.

Je passe icy sous silence beaucoup de choses dignes de remarque, touchant les singularitez de ce thesor public & de la Bibliothéque, craignant l'ennuy du Lecteur. Je diray seulement que ceste place où est ce magnifique edifice, outre ce qu'elle est enrichie de plusieurs beaux bastimens de brique, elle est tellement superbe & magnifique, que Petrarque liure quatriésme *Suarum senilium*, dit qu'il n'en peut trouuer de semblable.

A un mille près de la ville est vne certaine Isle, où se voyent les belles & excellentes boutiques, où se vendent les belles glaces de Venise avec les beaux verres de cristal, laquelle Isle, ainli que racotent leurs histoires, fut occupée par les Altins & Opitages, regnât, & durant la guerre des Huns: A present ceste Isle est reduite en forme de petite cité fort civilisée & fréquentée de peuple, & est decorée d'un bon nombre d'Eglises & excellens edifices, & tant au dedans qu'au dehors de ceste Isle, se voyent de tant beaux & agreables jardins, qu'il n'est possible au monde de se trouuer en lieu plus delicieux: & entre les Temples magnifiques de ceste Isle, celuy de saint Pierre le Martyr, qui est le Monastere & le Conuent des Religieux del'Ordre de saint Dominique, est le plus celebre pour estre iceluy richement basty & embelly par dedans de plusieurs belles peintures.

En ce Conuent il y a vne tres-belle Bibliothéque garnie d'un nombre infiny de rares & bons liures, & avec ce en ceste mesme maison, se voyent plusieurs beaux & tres-excellens jardins de plusieurs nobles de Venise arrosez d'un grand nombre de belles fontaines qui y sourdent, & qui vont arrosans les plantes & les arbres fructiers d'iceux.

Delà il est loisible d'entrer aux boutiques & voir faire des excellens verres, où par un singulier plaisir l'on peut considerer la matiere chaude prise dans les fourneaux ardans avec des verges de fer que les ouuriers peuuent auoir.

Les habitans de ceste Isle surmontent tous les autres ouuriers du monde, & principalement en l'art de la verrerie, pour l'excellence de la matiere de laquelle ils se seruent, & qu'ils mettent en œuvre, d'où vient que les vases & les verres que l'on apporte de ce pais au nostre sont merueilleusement beaux, & si parfaitement clairs & nets, qu'ils semblent estre cristal naturel, & de fait qu'on l'appelle cristal de Venise.

Tous les iours les ouuriers de ceste Isle seruent à représenter mille choses antiques par leur art & industrie, failans paroistre diuerses sortes de vases colorez de toutes sortes de couleurs, graüces d'or & d'argent, de deuises, hieroglyphiques & autres choses gentilles, & non seulement ils font plusieurs vases & vaisseaux à boire, mais font toute sortes de vaiselles propres à mettre des viandes, lesquelles choses enrichissent tellement les histoires, que si Plin viuant voyoit ces choses, s'en estonneroit, & diroit que si ce n'estoit la fragilité de cet ouvrage, il n'y auroit ny or, ny argent qui les peut estimer.

Environ cinq cens pas de la ville, du costé de la Region de saint Marc, se trouue vne Isle appelée de saint Gregoire, où il y a un tres-somptueux Monastere, dont le Temple est de marbre, basty d'une industrie fort grande: En iceluy se voyent plusieurs tables sacrées & statues magnifiques qui y ont esté faites, & outre ce diuers monuments & sepulchres de Princes & de Ducs de Venise.

C'est vne belle chose & agreable à voir que le cloistre de ce Monastere, les sales, les refectoirs, les dortoirs, les chambres & la bibliothéque bien garnie de liures, avec les beaux & grands jardins, chose qui donne tant de plaisir & de contentement, qu'il est fort visité par les Ducs, Marquis, & grands Seigneurs, tant de Venise qu'estrangers.

A Venise il y a un tres-grand nombre d'Eglises & hospitaux, qui sont au nombre de 17. il y a vne infinité de Temples consacrez à l'honneur de plusieurs saints, qui sont des bastimens tres-riches, nobles & ornez d'une quantité de belles pierres de marbre, entre lesquelles il y en a

67. qui portent tiltre de Parroisse, 26. y sont desservies par plusieurs personnes saintes & deuotes, & 54. qui sont Eglises de maisons religieuses & reformees. Plus sont à Venise 18. Chappelles ou Stations pour les six grandes Contraires, entre lesquelles la plus grande est celle S. Roch, où vne grande multitude de peuple est enregistree.

Entr'autres edifices, le Temple de saint Dominique est vne structure fort admirable & superbe, decoree en beaucoup d'endroits de plusieurs belles statues de marbre, & peintures tres-excellentes, & est ce Temple consacré à l'honneur des deux freres lumeaux saint Jean & saint Paul.

En apres l'Eglise de saint Zacharie est encore vn bastiment tres-admirable & merueilleux. Et outre ces Temples, l'on void encore à Venise vne infinité de belles grandes maisons & superbes Palais: avec cela se voyent en diuers lieux plusieurs statues de citoyens illustres, tant Pionniers que Cavaliers, erigees aux depens du public, pour ceux qui par prudence, force, & valeur ont fort bien seruy & administree la Republique, & s'en voyent de marbre, iusques au nombre de 165. d'airain 23. Et entr'autres se void vne statue à cheual, faite en forme de Colosse de Barthelemy Coleon, homme tres-noble, que les Seigneurs de Venise luy firent eriger pour honorer la grandeur de ses merites, de sa vertu & fidelité grande enuers sa patrie.

En Venise il y a dauantage, près de 56. Tribunaux, ou lieux où l'on tient l'Audience & rend-on iustice à vn chacun, il y a dix portes d'airain, 27. horloges publiques, 124. halles publiques pour tenir assemblée, 53. places publiques, 114. tours d'Eglises garnies de cloches, dix cheuaux d'airain esleuez en diuers endroits, 155 puits pour l'usage public, 185. jardins de plaisir, 141. Palais & cent autres maisons, qui meriteroient certes d'estre appellees Palais pour la beauté & excellence de leur structure: de sorte qu'il n'y a pas vne ville en Italie, ny mesme en Europe qui puisse estre comparée à celle-cy.

Là s'y void le logis des marchands Allemands, laquelle a 512. pieds de circuit toute peinte par dedans, embellie de deux belles galeries, qui répondent l'une dans l'autre. Au dedans de ceste maison, se voyent iusques au nombre de 200. petites chambres tres-commodés pour loger lesdits marchands.

Pour les statues, peintures excellentes, & autres signes & remarques d'antiquité qui sont en Venise, elles ne peuuent estre nombrées.

L'on trouue en ceste ville en toutes les saisons de l'année près de 200. sortes de fruits, d'herbages & de poissons, avec abondance de viandes tres-delicates. Entre les grands Seigneurs, & les grands & riches de la Cité, ces viandes sont ordinairement seruies sur leurs tables pour estre les meilleures & les plus delicieuses.

Venise est si frequentée de Noblesse qu'anciennement on comptoit en icelle iusques au nombre de 58. Princes & Gouverneurs.

Le territoire d'icelle est le lieu le plus plaisant du monde, & fertile au possible.

Q V A L I T É.

LA Marque Treuisine a vn assez bon air, & bien temperé, ses champs sont agreables, & rapportent assez de froment, & d'autres grains, & de toute sorte de fructs, mais elle est principalement abondante en vin. On y trouue quelques metaux, & elle ne manque aussi de force troupeaux de bestial.

Les riuieres principales de ceste contrée sont la Piae, la Brente, le Bacgilio, le Tesin, l'Adige, l'Oglio, & l'Adige.

La valée de Valcamonique est pleine de mines de fer. Quant à Verone l'air y est fort sain, son terroir est en plusieurs lieux sterile, & le froment n'y vient jamais en abondance. Mais il rapporte force huiles & force vins excellens, mais fort espais & des fructs de toute sorte: & l'on y trouue de la laine fine en grande quantité. Elle a aupres le lac de Benac qui est plein de poissons de toutes sortes. Il y a vne montagne fort haute au dessus de la ville qui est renommée pour les herbes qui y viennent. Près la ville de Bergame le pais est raboteux & aspre, sterile du costé du Nord, à cause des montagnes, mais aux autres endroits il n'y manque rien de ce qui est necessaire à la nourriture del'homme, toutesfois le vin n'y croist point à cause de la froidure. Mais aux valons voisins, & subiets à ceste ville, on recueille force oliues, & en aucuns endroits d'assez bons vins, mais non en grande quantité. Autour de Creme, il y a force bleds, vins, & fructs, de belles & bonnes eaux, & du poisson en abondance. Le territoire de Treuis est agreable, gras & fertile.

Quant au Friuli il porte de tres-bons vins, & en abondance, mais il ne produit guere de froment, ny d'autres choses. Il est exposé aux changemens de l'air, & des vents. L'Istrie est montueuse, mais non aspre, & abonde en vins, huiles, froments, & pasturages.

Entre

Entre les autres montagnes il y en a vne qu'on nomme plus grande, avec vne belle fontaine au sommet, où l'on trouue des meilleurs simples que la medecine puisse demander, & pour ceste cause les Medecins des pais loingtains y vont pour les cueillir, ou les remarquer. Pole a vn mauvais air, de melme que la plus grande partie de l'Istrie, en la coste de la mer on en fait force sel, & l'on trouue beaucoup de poisson en ceste mer, à cause de la grande multitudine des Isles & des Golfes.

MOEVRS ANCIENNES.

LA ville de Venise tire son origine de leurs grands Ancestres, qui ont vescu quelques ^{17.} trois cens ans depuis Iesus-Christ, & ne sont pas venus de Pescieurs comme l'ay tantost dit cy-dessus d'Alcine, de Padouë, du mont Oppiterge, d'Heracleë, d'Aquilin, de Grade, de Capreole, & de Laureote à la venuë d'Attila l'an 456. & ses habitans retindrent les diuerses humeurs, & mœurs de tous ces lieux. Au reste ses citoyens ont esté de tout temps fort graues, & desirieux de conseruer leur liberté de toute leur puissance.

Quant aux autres lieux de la Marque Treuisane, & de Friuli, ils ont embrassé les mœurs ^{18.} de ceux qui s'en sont rendus maistres, mais sur tout les factions y ont regné comme au reste de l'Italie.

MOEVRS DE CE TEMPS.

Les Venitiens ont vne grande grauité, & contenance en leurs actions, mais sont fort seueres où ils ont la puissance, mesme iusqu'à l'excez. Ils ne parlent pas volontiers lors qu'ils sont à table, & ne sont bons hommes de cheual, pource qu'ils se trouuent dans vne ville où l'on ne vacque guere à cét exercice, à cause que les principaux voyages & combats des gentils-hommes Venitiens se font sur la mer.

Leurs esprits ne sont ordinairement si vifs que ceux de quelques autres nations d'Italie, mais ils ont vn tres-grand iugement, & reüssissent lors qu'ils s'adonnent à quelque science.

Dans ceste ville il y a force excellents, & rares hommes en tous arts, & toutes sciences,

On y laisse viure les Iuifs & les Grecs en leur religion, sans les troubler en aucune sorte. Pour le reste, on dit communément que ceux de Venise sont magnifiques, rusez & raiissans, que les Veronois sont studieux & fideles, & ceux de Padouë branlans au manche, & ceux de Vicence desirieux de vengeance.

Dauantage, on dit que les Venitiens apportent à la guerre de l'argent, ceux de Treuis des espées, que les Bressans sont propres à faire des retranchements, les Venitiens à faire vn appareil d'armée de mer, ceux de Padouë à manier les cheuaux, & ceux de Bergame à dresser des embuscades.

On dit aussi, quant aux femmes, que celles de Creme sont trompeuses, celles de Vicence constantes, celles de Venise sont insolentes, & sont les Princesses, celles de Verone sont gracieuses, celles de Bresse diligentes, celles de Treuis jalouses, & celles de Bergame rusees, comme aussi qu'elle a beaucoup d'hommes qui parlent mal, Padouë de bons soldats, Vicence beaucoup de Comtes, & Bresse des habitans peu charitables enuers les pauvres.

RICHESSES.

LA Seigneurie de Venise tire des Estats qui luy obeïssent deux millions d'or toutes les an- ^{19.} nées en temps de paix en la façon qui s'ensuit.

Elle reçoit huit cens mille escus des villes d'Italie, & de cét argent, Bresse, & Bergame toutes seules en donnent plus de trois cents mille. Elle tire de Venise sept cents mille escus de diuerses daces & gabelles, veu qu'on afferme celle du vin toute seule cent trente mille escus l'année.

On tire encore de l'argent de diuerses decimes & taxes imposées aux gentils-hommes, & au peuple de la ville mesme, & les autres cinq cents sont tirez du sel, qui se fait sur les lieux qui sont du long de la mer, & des daces & gabelles, & aydes que les villes maritimes donnent à la Seigneurie. Et quelques vns disent qu'elle en tiroit plus de cinq cents mille du Royaume de Cypre, lesquels toutesfois on tient qu'elle tire de ses subiects par vne autre voye.

Voila les reuenus de ceste Republique, qui est subiecte à l'accident des autres Principautez de la Chrestienté; c'est à sçauoir qu'elle consomme presque tout cét argent en dépenses ordinaires qui se font en l'entretien de la gendarmerie, aux armées de mer, en la fortification

des villes, & des chasteaux dont elle a besoin, & aux gages des Magistrats, & des Officiers de la ville. Araison dequoy l'on ne croit pas qu'elle en épargne aucune chose, & quand elle en auroit de reste, cela s'en iroit à payer les anciennes debtes qu'elle a faites. Si bien qu'on conclud que les reuenus ordinaires viennent à estre tous consommez, ou la plus grande partie aux dépenses ordinaires qui se font en temps de paix. Mais il ne faut croire pour cela que ceste Republique ne soit fort puissante, pource que les Princes & les Communautéz qui ont plus de manieres de tirer extraordinairement de l'argent, ont plus de puissance: & elle a de les moyens à suffisance, & mesme elle ne peut tirer avec moins de crainte & de danger que les autres Princes Chrestiens ne font de leurs peuples. Car lors que quelque guerre arriue à ceste Seigneurie, ou bien qu'il faut armer outre l'ordinaire, encore qu'il n'y ayt point de guerre, comme il aduient quand le Turc leue quelque grosse armée, elle recourt aux voyes extraordinaires, qui sont en grand nombre, & de diuerses sortes, qui se peuuent toutesfois reduire à trois.

14. La premiere est d'accroistre les decimes qui sont desia imposées aux gentils-hommes, & aux bourgeois qui ont quelques reuenus des biens immeubles, & cecy se fait en augmentant le nombre; c'est à sçauoir en faisant qu'au lieu qu'on ne payoit qu'une fois l'année auparavant, on paye deux ou trois fois selon la volonté du Senat, & semblablement quand on redouble les taxes que la Seigneurie fait payer aux marchands selon la valeur de leur marchandise, qui est presque la dixiesme partie de leur gain, & ces choses sont aussi payées par les nobles, & citoyens plus aisez que les autres. On peut enclore en ceste maniere premiere vne taille que le peuple paye quand on arme extraordinairement; veu que pour toutes les armées, il est tenu de payer tant d'hommes à la Republique.

Lors donc qu'elle recourt à ceste premiere maniere, elle le fait aisément, pource que tous payent volontiers, & donnent franchement ayde à leur patrie. Mais si ceste-cy ne suffit, elle recourt à la secōde, qui est que les gentils-hommes seruēt pour quelque tēps en leurs Magistrats sans payement, & dauantage elle ordonne que les premiers honneurs qui ont accoustumé d'estre donnez aux gentils-hommes plus merittans, soient vendus, mais non à perpetuité, ny à qui donne dauantage, veu que plustost que de les donner à vne personne indigne, ils les donnent souuent à celuy qui offre le moins, à cause que le moins offrant est de plus grande valeur, & plus remply de merite. Or par vn semblable moyen, en la guerre que tous les Princes Chrestiens firent en la Ligue de Cambray aux Venitiens, ils tirerent plus de cinq cens mille escus.

22. Vne autre façon de trouuer de l'argent se pratique aussi par ceste Republique, laquelle ils appellent Depost de Conseil, qui est telle que par argent ils declarent les ieunes hommes mineurs, capables d'entrer au Conseil, & de pouoir obtenir des offices.

La 3. façon de tirer de l'argent est quand la Republique par vne grande necessité est contrainte de prendre de l'argent à emprunt des particuliers, desquels n'en pouuant auoir amiablement, elle en a par force en vendant les meubles, ou les immeubles des citoyens, si la necessité le requiert: ce qui est tant effectué n'engendre pas comme en d'autres sujets vn tumulte, & vne emotion generale, ny considerable, comme par exemple. Si le Senat auoit resolu que le tiers des biens de tous particuliers citoyens fust vendu, & que selon le prix des biens de l'un & de l'autre il se fist vne masse, la Republique se diroit debitrice de ces particuliers, auxquels selon que le Senat ordonne, elle s'oblige de la rendre apres tant d'années la guerre estant finie, à tant pour an, c'est à sçauoir à deux pour cent, qu'elle vient à payer en trēte ans, & la republique paye les vieilles debtes en ceste sorte, qui se nomment Profit du vieil Mont, ou bien elle paye à cinq pour cent l'année, & cecy se nomme Mont nouveau, & encore Mont de subsidie. Et ces interests sont payez par la Republique pour debtes moins vieilles que les premieres, ou bien elle paye dauantage, & s'oblige à rendre en bref le principal, & cecy se nomme Mont tres-nouveau, lors qu'il a esté payé, & toutes debtes qui se payent dans 25. ou 30. ans, qui se passent sans guerre, qui est vne chose qu'elle fuit le plus qu'elle peut, s'esteignent facilement.

Elle a pareillement accoustumé de prendre l'argent à change, & d'en donner 8. pour cent à qui en a voulu donner, toutesfois pour 18. ans seulement. Outre ce, ils ont fait de plusieurs biens publics immeubles vn Lot, qui est vne espece de blaque tirée par billets publiquement en presence des principaux Senateurs.

Ce sont les manieres de trouuer de l'argent dont la Seigneurie s'est seruie aux guerres passées, & dōt elle se pourra seruir desormais à sa volonté. Elle peut encore accroistre les daces & les gabelles des marchandises, selon que le Senat determine.

Et pour abreger, elle a infinis moyens de tirer de l'argent sans bruit, & en toute assurance des nobles, des citoyens, & du peuple, mesmes aux grandes necessitez à l'exemple du Prince,

Prince, & plusieurs gentils-hommes & bourgeois ont donné de leur franche volonté à la Republique quantité d'argent, & il y en a eu quelques-uns qui ont donné les ioyaux & ornemens de leurs femmes, considerant que la Republique affligée en auoit plus de besoin en ses destresses que leurs femmes pour s'en parer. Et non seulement les particuliers de la ville de Venise ont donné de l'argent au public, mais aussi les villes qui luy sont subiectes, ont selon leur puissance donné à la Republique tout secours, outre les tailles qui leur estoient imposées d'une grande quantité d'argent. Ce qui aduint à cause que tous aiment la douce façon de gouverner de ceste Republique, & pareillement la droicte iustice qu'elle observe inuiolablement, tant enuers les pauvres que les riches. On a donc accoustumé de dire à bon droit dans Venise, qu'il n'importe que le public n'ait pas grande quantité d'argent, pourueu que les particuliers soient riches comme ils sont, pource que, comme nous auons desia dit, la Republique se peut facilement seruir de leurs biens.

Il faut donc croire que ce n'est chose aisée de sçauoir au vray la quantité qui se trouue au thresor de Venise. Maintenant voyons vn peu quelles sont les forces de ceste Republique, puis que nous auons assez amplement discoursu de ses richesses.

FORCES.

Ceste Seigneurie a pour son but principal de n'estre pas offensée, & de faire en telle sorte qu'elle n'ait aucun subiect d'auoir quelque crainte. Pour ceste cause elle a fait & fera toujours plusieurs forts pour la seureté de cet Estat. Et quant à ces forts (parlant en general) il n'y a Prince qui en ayt de si importants, ny si accomplis, veu qu'ils ont de gros & bons rempars, & des fossez profonds & spacieux, & il y a plusieurs villes fortes au possible, comme Threuisse, Lignagno, & Creme: quelques autres ont vn si grand circuit qu'elles ne peuuent estre assiegées que par vne armee innombrable, comme Padoue & Verone. Les autres ont leurs citadelles & forteresses qui les maistrisent en telle sorte, qu'elles peuuent aisément estre secouruës, comme on void à Bresse, Bergame, & Verone, qui a deux chasteaux l'vn sur l'autre au milieu.

Les chasteaux de la Marque reduits en forteresse, sont les Orcinoues, Assola de Bressan, Pesquiera, & Lignagno, & sur tout il faut admirer Palme la neufue en figure Endecagone, où a vnze bastions, quia ses principales portes & ruës droictes au possible, qui respondent toutes à vne place qui est au milieu de la ville, qu'on tient comme imprenable. Elle a aussi en Lombardie les Polesines de Rouigue, où il y a plusieurs places qui doiuent estre beaucoup estimees, & qui sont bien mises en deffence. Au Friuly, il n'y a point de fort chasteau que celui de Martan, allis entre des estangs & des marecages proche de la mer, mais fort au possible, pource qu'il est presque separé de terre ferme, horsmis d'vn costé qui se peut avec peu de gens deffendre aisément.

Il y a encor le chasteau d'Osoppe sur vne montagne tres-forte, qui empesche l'entree à celui qui voudroit passer en Italie avec vne armee par le principal chemin, & par les autres on n'y peut mener du canon.

Quant à la ville d'Vdine elle n'est guere forte, à cause de la terre mal propre à la fortification. En Istrie elle n'a point de bonne place que le Cap d'Istrie.

Aux riuages & Isles de la Dalmacie, & Esclauonie, elle a quelques villes avec quelques forts, comme Zara, & Catarro: mais les villes de la Dalmacie n'ont besoin d'estre fortifiees, pource qu'on n'y peut aller par terre avec vne armee, sinon pour y faire des courses de peu d'importance, & l'occasion de cecy procede des aspres montagnes, & des chemins fort estroits qui y sont.

Or pour la deffence de ces villes & forteresses, ceste Seigneurie se sert des hommes du pays qui sont tres-fideles, & en Lombardie elle en fait exercer environ vingt-cinq milles, qu'on nomme Cernides, pource que toutes les Iurisdiccions ou pays de ceste Seigneurie, ceux-là sont esleus qui se trouuent plus propres à l'exercice des armes & de ceux-cy, qui sont tous hommes de pied, on fait plusieurs monstres particulieres. Mais pour la plus-part ce sont des payfans qui ne sont parfaitement propres pour combattre en campagne, ny pour demeurer fermes en ordonnance. Et lors que la Seigneurie veut composer vne parfaite armee pour combattre, elle soudoye de ceux qui habitent aux villes qui luy sont subiectes, & encore des estrangers qui ne sont de moindre valeur que les autres.

L'Infanterie Italienne est courageuse, disposee, & forte pour donner la charge aux escarmouches, & assaillir les villes: toutesfois elle n'a pas vne ordonnance ferme comme l'Allemande, qui est estimee fort bonne: à raison dequoy ceste Seigneurie a eu autrefois tant de

R r iij

ses subiects que d'estrangers enuiron quinze mille hommes, & pour les raisons susdites elle donne solde à quelques cantons de Suisses, & Grisons, en telle sorte, que l'infanterie bonne, ou moyenne de les armées pourroit monter iusqu'au nombre d'environ trente-cinq mille hommes, & plus, & moins selon que le cas le requiert. Le reste est distribué pour la garde des villes, & pour les galeres. Les gens de pied ont trois escus de solde de chacun tous les quarante-cinq iours, quand ils sont employez, & aux grandes necessitez ils ont iusqu'à cinq escus par mois.

Quant à la caualerie, la Seigneurie a pour garde, & pour reputation six cens hommes d'armes bien choisis, qui souloient iadis auoir chacun trois cheuaux : mais auourd'huy ils n'en tiennent plus que deux, toutesfois il faut qu'ils soient beaux, & ceux-cy ont de solde chacun six-vingts ducats l'annee, & sont pour la plus grande part gentils-hommes des villes de Lombardie sujets à ceste Seigneurie, & combien qu'elle n'ait point de race de cheuaux, toutesfois ceste quantité pourroit s'accroistre iusqu'à mille ou quinze cens.

Elle auoit semblablement accoustumé de tenir en Lombardie enuiron mille cheuaux legers, mais elle cessa de faire ceste despence superflüe, à cause que celuy estoit chose fort aisée d'en pouuoir tousiours auoir vn bon nombre, outre qu'on se pourroit encor seruir des stradiots, & cappellets, qui sont en la Dalmacie, & autres lieux, & qui sont tres-propres pour empescher les viures aux ennemis, & pour donner à la queue des armées. Ces hommes sont experimentez, & prompts au possible & s'ils sont rompus ils se remettent en ordonnance, & se reünissent fort facilement. Elle pourroit tirer de la Dalmacie & autres Isles enuiron trois mille de ces soldats, & des villes d'Italie vn peu moins de cheuaux legers.

Aux armes de terre ferme, ceste Seigneurie se sert de Capitaines estrangers, ie dy le plus souuent, & spécialement en la creation d'vn Capitaine general, ou d'vn Gouverneur, & pour ceste cause elle a eu souuent à son service des Seigneurs absolus, comme des Marquis, & des Ducs, lesquels elle payoit, & recompensoit largement de leurs peines.

Elle donne à ses Capitaines en temps de guerre, comme pour compagnons, deux gentils-hommes de la Republique, hommes signalez en merite avec le titre de pouruoyeurs generaux, sans le consentement desquels le susdit chef ne peut entreprendre aucun combat, ny aucune faction d'importance.

DE L'ARSENAL DE VENISE.

OR pour traiter maintenant de la milice de la mer, comme peut estre de la chose principale & de plus grande importance, ie parleray premierement de son origine, afin que le fait soit mieux entendu. Je dy donc que ce n'est autre chose que l'admirable Arsenal de Venise, qui non seulement est fort grand, mais encore le plus beau, & le mieux fourny de toute chose necessaire à semblable mestier qu'Arcenal qui soit auourd'huy au monde. Il est en vn bout de la ville, & si proche de la mer, qu'il ne semble pas en estre diuisé, ains que c'en soit vne partie: chose qui luy donne plus de grandeur au iugement de ceux qui le considerent.

Il est enuironné de fort bonnes murailles, mais sans ramparts, pource qu'il ne peut estre battu, & l'on ne peut dire qu'il est assis en vne Isle, à cause qu'il est enuironné d'vn canal, & si nous le voulons nommer autrement, il luy faut donner le nom de Fort, ou de Serrail de Venise.

On y compte bien souuent deux cens galeres, outre beaucoup d'autres qui sont sur la mer qui ont accoustumé de monter iusqu'au nombre de quarante, il y en auoit vingt grosses, qui au regard des menuës, se peuuent nommer gens d'armes, pource qu'elles ne sont si legeres, ny a rames si propres qu'elles autres, mais aussi elles donnent vn plus grand heurt, & quand celles-là seules auroient bon vent en vn fait d'armes, elles seroient capables d'en attaquer cent menuës, & rendroient leur armée inuincible, pource qu'elles seruent beaucoup plus que les Nauires de guerre, à cause qu'outre les voiles elles se peuuent seruir des aurons.

Or il ya tant & de diuerses façons d'armer vne infinité de gens que c'est vne chose merueilleuse de le voir, & il y a tant de canons, non seulement suffisans pour tant de vaisseaux, avec les armes offensives & deffensives pour les soldats & mariniers, mais encor vne si grande quantité de toute autre chose, que cet Arcenal pourroit fournir les Nauires particuliers, les fortresses, & les armées de terre mesme, quand il seroit necessaire.

Quant au bois pour faire des vaisseaux neufs, il y en a grande abondance, non tant pour la

la quantité & grandeur des bois que la Seigneurie a pres de la mer, que pour le soing qu'on a par tout cet Estat de conseruer les chesnes qui sont aisément portez à Venise par la mer, & par les riuieres qui se vont rendre dans la mer assez pres de ceste ville.

Mais pour dire en vne seule parole ce qu'on peut asseurer de l'Arcenal, ie dy qu'en tout le monde on n'en peut trouuer vn semblable, ny mieuxourny de bons ouuriers, qui sont enuiron au nombre de trois cens à trauailler sans cesse, & avec telle diligence, que c'est vne merueille: tellement qu'on a veu souuent en moins de dix iours armer trente galeres de tout point, toutes prestes à combattre, & l'on doit croire qu'en fort peu de temps on les pourroit armer toutes.

Ils despencent donc beaucoup d'argent en cet Arcenal, auquel on ne fait autre chose que des galeres grosses & menuës, & des Fustes, pource que les particuliers ayans d'assez grands Nauires, la Republique n'en fait point, comme se pouuant seruir de ces vaisseaux en toutes ses necessitez.

Ils n'ont faute de vogueurs, pource que toutes les villes maritimes, & encor de terre ferme, avec la ville de Venise mesme en fournissent autant qu'il faut, & pour les soldats des galeres ils se seruent des hommes des Cernides.

Les Capitaines & Surcomites des galeres sont pour la pluspart gentils-hommes Venitiens dont le nombre est fort grand: de sorte que chaque galere outre le Surcomite a deux autres gentils-hommes de Venise pour les exercer en la discipline de la mer. Tellement qu'ils n'ont faute de rien que de biscuit, principalement quand il est cher: toutesfois ils y mettent bon ordre, ayans beaucoup de grands greniers dans lesquels ils conseruent vne grande quantité de froment, & d'autre sorte de bled, & du biscuit encore.

Pour la garde & seurété du Golfe de Venise, & des Isles de la mer Ionique, ils tiennent continuellement sur la mer des armées de 35. à 40. galeres, avec vn Prouediteur, ou Pouruoyeur, & vn Capitaine du Golfe: & cecy couste toutes les années à la Seigneurie 5000. ducats comptant le biscuit.

Ces galeres rendent non seulement la mer asseurée des Corsaires, mais sont encore cause que plusieurs gentils-hommes s'exercent aux armées de mer, encor qu'on n'y face point de guerre de grande importance, & d'ailleurs cela donne vne grande reputation à la Seigneurie.

Toutes les fois que le Turc s'arme, on grossit ce nombre de galeres d'un semblable, & en tel cas on fait vn General de l'armée; dont le nom est tant estimé des Turcs, qu'ils n'osent s'approcher beaucoup du Golfe, tant s'en faut qu'ils viennent pres de la ville de Venise. Mais encor que ladite garde soit fort puissante, toutesfois elle n'est capable d'asseurer tous les vaisseaux qui vont par ce Golfe, pource que les moindres qui ne s'esloignent guere de terre en la Dalmacie sont pillés par certaine sorte de Corsaires, appelez Vscouques, qui se retirent à la Seigne & au Fleue, terres de la maison d'Autriche: veu que ceux-cy venans avec quelques barques armées molestent en telle sorte les petits nauires qu'il faut que la Seigneurie tienne continuellement sur la mer vn Capitaine avec cinq Fustes armées, qui n'a autre charge que d'exterminer ceste engeance, & combien que ce soit chose de grande despence, toutesfois ce n'est pas peu de profit de chastier vne infinité de ces voleurs.

Or ce n'est chose malaisée de s'imaginer combien que la Seigneurie peut enuoyer dehors de galeres, & de nauires, pource que le bois, ny les armes, ny les hommes, ne l'argent ne luy manquant point, elle peut armer la quantité qu'il luy plaist: & combien que depuis long temps on n'ait veu dehors plus de cent galeres, & peu de nauires, toutesfois celui qui voudra considerer la chose plus auant, trouuera qu'il y a deux & trois cens ans que la Seigneurie n'auoit tant de forces, & toutesfois elle arma pour la conqueste de la terre Sainte deux cens nauires, ou galeres, & autant en la conqueste de Constantinople, lors que les Venitiens y allerent avec les François.

Doncques si la necessité pressoit les Venitiens, il faut croire qu'aujourd'huy qu'ils sont plus abondans en argent, & fort puissants en subiects, & qu'ils ont vn Arcenal mieuxourny qu'il n'a iamais esté, ils pourroient non seulement arriuer à ceste quantité de voiles, mais encore la surpasser, & s'ils ne le font, c'est pour ne mettre pas au hazard tant de vaisseaux en vne seule fois, & combien qu'ils cedent aux Turcs en nombre, ils ne sont pas moindres en puissance, & c'est chose toute certaine que s'ils estoient assaillis par les galeres Turques ils ne craindroient de les combattre, & pour ceste cause les Turcs n'ont iamais osé entreprendre de les attaquer.

17. **V**Enons maintenant à discourir de l'ordre avec lequel vne si belle Seigneurie s'est si long-temps gouvernee, & comme elle a duré plus longuement que aucune autre soit parvenue à nostre cognoissance, & de quelle sorte elle se conserve entiere parmy tant de guerres, & de troubles, si bien qu'il semble que ses subiects au respect des autres iouissent du siecle d'or, vivants en tranquillité & paix asseuree, & croissent tous les iours en prosperité & en richesse.

Ce que j'estime proceder principalement de la bonne volonté de Dieu, qui a soin particulier de ceste Republique, & d'ailleurs on ne peut nier que cela ne provienne d'un gouvernement bien réglé, institué par des hommes fort prudents, qui eussent esté tenus pour Philosophes moraux, ou actifs, s'ils eussent vescu durant les premiers siecles. Encor que ceste Republique soit gouvernee par les nobles, & non par le peuple, toutesfois on ne peut dire que ce soit un gouvernement de beaucoup, ny de peu de gens, & qu'encor qu'elle ait son Prince, ou son Duc, que ce soit le gouvernement d'un seul: mais elle est de telle qualité, qu'elle est composée de toutes les trois especes de gouvernement, d'où l'on n'en void proceder un seul tres parfait. Elle a donc un seul chef qui represente la majesté de l'Empire en l'habillement, & en la gravité ou reputation, & cestuy-cy est appelé Dogue, c'est à dire Duc, ou Capitaine, qui est un homme par lequel il semble que les autres soient conduits, à voir son habillement, & toute la façon extérieure d'un Prince absolu, & cestuy-cy est créé par les nobles mesmes par l'eslection, mais pour l'autorité il n'est rien plus que l'un des principaux nobles, veu qu'aux conseils il n'a qu'une seule voix comme les autres, & a en apparence la charge de répondre au nom de la Republique, aux Ambassadeurs, & aux lettres des Princes: mais il ne répond, ny escrit, selon que le Senat determine. Il a l'autorité d'entrer en tous les Conseils, & de dire son avis, ainsi que les autres: toutesfois chacun luy peut contredire comme bon luy semble.

18. On void apres le gouvernement de peu de gens, non des plus riches, ou des plus puissans, mais des plus sages, & plus remplis de merite: & ce gouvernement est de plusieurs, ou de dix tous seuls, & cecy se nomme le Conseil de dix, qui avec quinze autres Senateurs, & la personne du Prince & de six Conseillers a puissance de faire toutes deliberations, sans que sa resolution puisse estre revoquée.

Il y a beaucoup d'especes de gouvernement qui peuvent estre appelées de beaucoup de gens. Si ie voulois parler de chacun en particulier ie me rendrois ennuyeux, au lieu que j'ay proposé de me rendre tel le moins qu'il me sera possible. Mais ie diray seulement que toutes les sortes des susdits gouvernemens composent un seul Conseil qui ne peut estre appelé de plusieurs, pource qu'il n'arrive pas au nombre de deux cens vingt cinq, & cestuy-cy est vraiment le Senat qui se nomme *Li Pregadi*, les Priez: pource qu'au commencement de la Republique, on prioit les plus sages citoyens de venir donner leurs voix, & de dire leurs opinions, afin de deliberer, & de pourvoir aux necessitez de la Republique.

Ces Senateurs sont donc choisis d'un autre Conseil beaucoup plus grand, duquel l'on prend les plus aduisez, pource que c'est à eux de determiner les matieres de plus grande importance, comme par exemple celles de guerre, & de paix, ou quand il s'agit de fortification des places, de faire venir des Capitaines, d'envoyer des Ambassadeurs aux Princes.

C'est en ce Conseil qu'on lit toutes les lettres qui viennent à la Republique, & pour conclusion, c'est celui qui resout toutes les affaires de consequence. En dernier lieu ce Conseil la fait sembler Republique, combien qu'en effect elle ne le soit pas, & pour ceste cause il n'y entre que des nobles, dont on tient registre & compte particulier, & le noble ne peut entrer en ce Conseil pour donner sa voix avant qu'il ayt prouvé qu'il a passé l'age de vingt-cinq ans, & combien qu'il y en ayt quelques-uns qui par faueur speciale peuvent entrer à vingt ans ou un peu plus, toutesfois l'ordinaire est qu'on n'y entre qu'à vingt cinq ans.

Or les Gentils-hommes qui peuvent entrer en ce Conseil sont au nombre de 1500. Mais pource que plusieurs sont tousiours dehors aux exercices des Magistrats, & d'autres sont empeschez à d'autres affaires, il ne s'y assemble jamais presque plus de 1600. Ceux-cy s'assemblent tous les huit iours une fois, c'est à sçavoir le Dimanche matin, & aussi la matinee des autres festes; & c'est là qu'on cree les Magistrats, & qu'on distribue les gouvernemens de la Republique avec un merueilleux ordre. On eslit donc par plus grand nombre

bre de voix ceux qui doiuent entrer au Pregadi ou Conseil de dix, de mesme qu'aux autres conseils, & ceux-cy sont tousiours les plus sages, & plus entendus de toute la noblesse, & combien qu'il semble que la bonne fortune ayde à obtenir les Magistrats, toutesfois ils ne sont donnez à personne qui ne les merite, pource que si celuy qu'on propose n'est approuué à plus de la moitié du conseil pour bon & suffisant, il ne peut obtenir ce qu'il desire.

Je pourrois m'estendre icy sur le merueilleux ordre que ces Seigneurs tiennent à creer ces Magistrats, & à dire comme toute chose s'y passe paisiblement, & avec beaucoup de douceur: mais ie serois trop long, & peut estre ennuyeux. C'est pourquoy ie m'en deporteray pour venir aux autres particularitez de la conduite des Seigneurs de ceste Repub. Ils admettent quelques vns d'entre les ieunes gens à dire leurs aduis aux deliberations de la ville; chose qui semble ayder beaucoup à conuier plus fort la ieunesse à s'addonner aux choses graues & profitables à la Republique, outre qu'avec leur ardeur ils viennent à rechauffer la froidure des vieillards. En fin l'on ne void entr'eux qu'une egalité digne d'une merueilleuse louange. On n'a esgard ny à pauvres, ny à riches, ny à gentils-hommes, ny à roturiers, & ceux-cy ont encore quelque part en ceste Republique, iouissans de plusieurs offices, qui sont esleuez, & de grand profit, comme de ceux de Capitaines de quelques chasteaux, Secretaires & semblables. Et de là vient que le peuple est tres-affectionné à l'endroit des nobles, & se monstre pareillement fort humble, & les nobles sont ses protecteurs, le fauorisent en toutes ses necessitez, & l'aduancent aux honneurs, auxquels il peut paruenir.

Ceste Seigneurie a grand esgard à la pauvreté, à laquelle elle pourroit par plusieurs voyes, par lesquelles elle serend les miserables, ie ne diray pas sujets, mais esclaves, veu que la Republique despence vne grande quantité d'argent pour maintenir à bon marché le pain, & les autres choses necessaires à la vie de l'homme. C'est pourquoy il ne se faut estonner si le peuple supporte sans bruit toute charge aux necessitez de la Republique.

Les peuples des autres villes subjectes luy sont pareillement fort fideles: parce que celuy qui va pour les gouverner, n'a point d'autre but que de faire iustice à vn chacun, & d'ayder aux villes qui sont sous sa charge, veu qu'en ce faisant, il vient à obtenir à son retour de plus grands honneurs: mais s'y gouvernant d'autre sorte, il est puny, & non employé.

L'autre raison pour laquelle les peuples aiment le gouvernement des Venitiens est, pource qu'ils ne sont pas chargez de gabelles excessiues, comme quelques miserables villes sont par des tyrans.

Il me semble que i'ay fait voir en peu de paroles la forme de ceste Republique, que l'on verra si on veut plus amplement dans le liure que Contaren en a fait.

Or si nous la comparons aux autres qui ont esté deuant elle, sans en parler toutesfois de leur grandeur, & de leurs forces, mais seulement de la maniere, & de la composition interieure du gouvernement, & des bonnes loix; nous cognoistrans comme elle deuan-^{29.} ce en ceste particularité toutes les autres: pource que l'on peut dire que celles-là ont esté gouvernees par des homes auides de proye & de sang humain; & ceste-cy l'a esté par le Createur de toutes choses & trouuée & fondée par des Philosophes, avec vne parfaite cōposition. Et ie ne sçay qui nous pourroit seruir de plus grand exēple ou argument en cecy, que la Republique Romaine, qui ayant presque assujetty tout le monde, ne se peut toutesfois maintenir libre plus de sept cens ans: au lieu que ceste-cy enuironnée de tant de puissants ennemis, qui ont tousiours cherché de la ruiner, sans auoir jamais eu aucun Prince bien amy entre ses voisins; a peu par l'espace de douze cens ans, & plus, se conseruer libre & entiere, voire mesme a toute seule peu resister à la puissance desmesurée du grand Turc, & autrefois à celle de tous les Princes Chrestiens. Et ie ne sçay veritablement quelle force peut estre au iourd'huy capable de la vaincre, ou ruiner, pourueu que la discorde seul instrument capable de l'abatre, n'entre dans ceste Republique.

Mais il y a plus grande partie de ces sages & bons Senateurs, qui veillent continuellement, afin que cela n'arriue, & combien qu'il semble à quelques-vns, que pour les grandes meschancetez qui se commettent tous les iours dans la ville de Venise, elle ne peut euitier guiere long-temps sa ruine entiere, toutesfois les autres sçauent qu'outre que le Magistrat fait tout son effort pour remedier à tant de maux, il y a encore plusieurs deuotes personnes qui iempescheront que ce mal n'aduienne.

Or puis que nous auons raconté les perfections de ceste Republique, il ne sera mal à propos de particulariser ses deffauts, encores qu'ils soient assez peu considerables.

30. Le premier, & peut estre plus grand, est, qu'elle possède tant de pays si peuplé, pour la nourriture duquel elle a besoin des viures des autres, veu que si elle n'auoit la mer par laquelle on conduit à Venise grande quantité de grains, son pays endureroit presque vne continuelle necessité de pain, qui est vne chose fascheuse aux peuples. C'est aussi la seule occasion pour laquelle elle estime tant la paix avec le Turc, pource qu'il vient des pays de sa domination assez bonne quantité de grains aux Venitiens. Et pour ceste mesme cause elle estime tant la paix avec le Turc, pource qu'il vient des pays de sa domination assez bonne quantité de grains aux Venitiens. Et pour ceste mesme cause elle fait aussi grand estat du Roy d'Espagne, qui luy octroye bien souuent la traicte des grains de Sicile, & de la Poëlle.

Le second est qu'elle ne se sert que d'Infanterie Italienne, combien qu'il soit certain qu'elle a beaucoup perdu de son ancienne reputation; ce qui est venu de la diuersité de combattre: si bien qu'aux ordonnances fermes elle n'a rien de semblable à la Suisse, & Allemande. Tellement que ceste Republique deuroit auoir en ses armées vn bon nombre de Suisses & Allemands, & par ce moyen son infanterie seroit bien plus estimée.


La troisieme est qu'elle ne fait General d'armée vn de ses subiets, mais vn estrangier, ce qui est se mettre à la discretion d'autry, outre qu'il luy faut beaucoup despenser aux fortresses, pource que les hommes trouuans tous les iours de nouvelles façons d'attaquer, il est necessaire de les changer de temps en temps. En quoy elle a fait de grandes despences bien souuent, qui est vne chose qui diminue grandement l'heur de ceste Republique.

Mais ces defauts ne sont pas tous sans remdes, & pour ceste cause ces sages Senateurs ne regardent sans cesse qu'à remedier à tous les inconueniens de leur Republique, & n'ont autre but que de conseruer l'Estat en paix, & en liberté. Et vrayement ils ne seront pas troublez d'eux-mesmes, pource qu'ils ne laissent iamais aduancer les querelles particulieres qui naissent parmy eux, & les appaisent à la mesme heure, ou par amour, ou par la force du souverain Conseil de dix. Dauantage les citoyens, ou les nobles ne montent iamais à telle reputation, & ne paruiennēt iamais à tel degré, ou à si grande richesse, qu'ils puissent penser à se rendre tyrans, ains ils vivent entr'eux en grande paix & concorde.

RELIGION.

31. Les Venitiens sont bons & fermes Catholiques, de mesme que tous leurs subiects qui demeurent en Italie: mais ceux de l'Isle de Corfou suivent la religion des Grecs & schismatiques, & ceste Republique ne les trouble point en cela, afin de faire que ce peuple ne s'esmeue, & ne se fasche de la domination des Latins, & ne conuient les ennemis de ce nom à attenter quelque chose, combien toutesfois que la Seigneurie les bride par vn fort & par la garnison qu'elle y tient, il en est presque de mesme en Candie, dont le peuple est ennemy du nom des Latins, il est vray qu'il y en ait quelques vns affectionnez à l'Eglise Romaine.

DES



DES VILLES ET FORTERESSES QUI
SONT DANS LE CONTINENT D'ITALIE,
APPARTENANTES A VENISE.

DE LA VILLE DE BRESSE.



Bresse est la seconde ville de Lombardie qui appartient à la Seigneurie de Venise, assez belle & celebre non pour le tour de ses murailles, ou pour la multitude de ses habitans, veu qu'il n'y a pas plus de cinquante mille personnes dans Bresse, mais pour la grandeur de la Jurisdiction, pource qu'elle embrasse beaucoup de belles & bonnes places & des vallees importantes & peuplées. Entre les places qui luy sont subietes, on donne le prix à Asola & Salò sur le lac de Garde; & entre la vallee de Valmonique, qui a de longueur 50000. & est pleine d'habitans, elle comprend aussi les lacs d'Isée & d'Idre.

Cette ville est arrosée d'une petite riviere nommée Garcia, qui ne luy apporte pas beaucoup de commodité; cette cité est fort ancienne, & retient toujours son premier nom: elle estoit autrefois le chef & la Metropolitaine des Cenomans, & est encore fort belle aujourd'hui, & remplie de marchands nobles & riches au possible: elle est environnée de tres-fortes murailles & d'une citadelle, & ce qui la rend celebre est qu'elle est peuplée de personnes grandement aduisees, & d'un grand esprit, aussi aucuns des familles d'icelles sont honorez de l'honneur & dignité des Patrices Venitiens. Et encore qu'elle ne soit des plus grandes d'Italie, ny de long circuit, & qu'elle ne contienne pas plus de 50. mille personnes, elle tient pourtant le second lieu entre les villes de Lombardie, pour l'amplitude de son territoire & seigneurie: car sous icelle il y a plusieurs petites bourgades pleines de riches & opulens habitans, qui en dependent, entre lesquels lesdits Asola & Salò sont les plus renommez. Elle est aussi peuplée de quelques vallees fort populeuses, dont la plus considerable est la vallee Valmonique.

Maginus & quelques autres Topographes disent que le territoire de la ville de Bresse contient trois cens cinquante mille personnes comptant les petits enfans.

De cette ville sont yssus quelques Cardinaux & plusieurs personnes illustres, tant aux lettres qu'aux armes, elle depend de la Seigneurie de Venise: & a un territoire fort ample & estendu, car on trouve qu'il a en sa longueur pres de 50. mille, entre le bourg Limone, lieu où s'estend le Lac Benac, & la ville Vercane: & contient en sa largeur cent mille, sçavoir depuis Mose, distant de quinze milles de Mantouë, iusqu'à Dialengue, sciz au bout de la vallee de Camone: là le pays est fort frequenté & peuplé d'un grand nombre de bourgs, villages & de fort bons laboureurs & fermiers autant qu'un autre puisse estre: il est grandement fertile, & a esté tout l'arrousoir des anciens, car outre ce qu'il abonde de tout ce qui est necessaire à la vie, comme de froment, millet & autres legumes, en lin, en vin, en huile, & en grande quantité de fruits de diverses especes, il y a aussi quelques mines de metaux, principalement de fer & d'airain, d'où vient que les peuples champestres en tirent un grand profit. Il y a aussi la ville d'Vercane appelée vulgairement Orce, grandement fortifiée par les Venitiens, elle est honorée d'un siege Episcopal, & est une forteresse bien garnie & munie d'une bonne garnison, assise sur les frontieres du Duché de Milan.

DE LA VILLE DE VERONE.

Verone est une belle & grande ville embellie d'un tres-magnifique & superbe Amphitheatre & autres vieux monumens & reliques de l'antiquité: Elle contient environ quatre vingts mille personnes d'habitans.

Entre Verone & Padouë, il n'y a pas grande difference: quant à la grandeur de la ville, & au circuit des murailles, mais pour le peuple Verone surpasse Padouë, de la iuste moitié de ses habitans. C'est pourquoy les Venitiens entretiennent tant qu'ils peuvent les estudes & les exercices dans Padouë, afin de la rendre plus habitée.

DES VILLES DE BERGAME, VINCENCE ET CREME.

La ville de Bergame est assise sur la pente & sur la cime d'une montagne, & est une tres-ancienne cité; ses grands faux-bours sont joincts à icelle tout à l'entour de la mon-

tagne, & ne void on en la ville & en feldits faux-bourgs que toute sorte de magnifiques maisons & edifices: le peuple est curieux de gloire & d'honneur, & quoy que le langage de ce pays soit vil & grossier: Ils sont neantmoins douez d'esprit grandement subtil, & fort capable aux lettres & à manier toute sorte d'affaires, & ne cede rien en cela aux Florentins. Leandre Albert, dit que son territoire est grandement fertile, excepté le pays qui regarde le Septentrion, car il est fort aspre, raboteux, montueux & presque sterile: il y a forces vallees en tout ce pays, entr'autres sont celles-cy, Seriane, Brembane, la vallee de S. Martin, Mancane & autres, dont aucunes produisent du vin, de l'huile tres-douce & tres-suaue, les autres sont du tout steriles, sinon qu'elles abondent en veines & mines de fer: & celles qui ne sont propres à produire vins & bleds, seruent pour y enuoyer paistre les troupeaux, desquels ils tirent d'assez bonnes laines qui se portent & debitent par toute l'Italie.

La ville de Bergame est tres-forte & munie de murailles & d'une tres-bonne citadelle; elle est de l'obeyssance de la seigneurie de Venise.

La ville de Creme est tres-noble & est assise en une plaine, tres-belle & fort agreable, ample en ses espaces, & enceinte de tres-fortes murailles, elle abonde en richesses & en toutes choses qui sont utiles à la vie, elle est habitee d'un peuple qui tient beaucoup de soy, mais il est nombreux, elle est grandement agreable pour la beaulte de ses bastimens: son terroir est tresbon, fertile & arrosee de plusieurs fleuves & ruisseaux, le vin qui y est produit, est excellent, & les fructs abondans & delectables; il y a quantité d'agreables coulants d'eaux, pleins des meilleurs poissons, mais singulierement de lamproyes & de marsouyns ainsi vulgairement appelez, & qui sont d'un goust tres-suaue & gratieux. Son territoire n'est pas de grande estendue, mais il est capable de nourrir ses habitans: Elle est possedee par les Venitiens.

Pour Vincence elle est peu differente quant au nombre des habitans à Bergame & Creme & vaut bien autant que Modene qui a son Duc particulier: elle a un grand territoire, & tres-abondant en toute sortes de biens.

D V F R I E U L E T D E S E S V I L L E S .

8. **L**E Friul s'estend entre la Liurence, l'Istrie, les Alpes & le Golfe de Venise, il commence avec les Alpes, qui diminuant peu à peu finissent en belles campagnes.

Le Friul est un Duché, & le pays des peuples Carneans, lequel s'appelloit autrefois Liburnie; comme dit Blondus: il est aujourdhuy nomme Friul, & a pris ce nom de lule Cesar, qui faisoit passer par là ses troupes au deçà des Alpes: mais Blonde luy veut donner ce nom de lulefore, ville qui fut jadis ruinee & demolie par Cancane Roy des Bauiens: Ce pays du Friul est encore & proprement la Region d'Aquilee, ainsi dicte à cause d'Aquilee, ville Metropolitaine d'icelle, qui estoit tres-grande comme ce qui reste le monstre: maintenant ce pays retient le nom de Friul, quoy que ce soit par langage corrompu que luy ont donné les Venitiens.

Ceste Region a pour limites du costé d'Orient l'Istrie, que les uns disent estre diuisee d'icelle par le fleuve Sontio, ou Lizonte, les autres plus probablement, Formion, autres Risane ou Disane, ou selon encore d'autres, Albe, prez l'emboucheure duquel fleuve est situee la ville de Iustinopolis vulgairement appelle Cap d'Istrie: Vers le Septentrion elle a pour bornes les monts Iapidi, d'où se voyent les Alpes appelees de Iulia: du costé d'Occident elle a les Alpes des Grisons & des Suisses, & de ce costé mesme le fleuve Liguence la separe de la Marche Treuissine: & au Midy est bornee de la mer Adriatique.

Leandre Albert décrit autrement la situation. Elle commence, dit-il à la plaine qui approche & regarde la mer, puis allant tousiours en montant, elle se hausse & esleue premierement par collines, & finalement par ses tres-hautes montagnes, qui ferment presque les limites de tous costez, & de telle façon qu'estant ainsi couronnee de monts de toutes parts, ceste plaine semble estre un theatre, elle a quelques sorties & entrees par ou l'on en sort & y entre-on, ainsi que par l'emboucheure du fleuve de Sontio on passe en la Marche Treuise: de tous ses autres costez elle a les Alpes, & pource on ne peut entrer ny sortir de là, que par monts & collines, ou par les ports de mer.

Les peuples Euganeans, Venitiens, Truians, François & en apres les Romains ont habité ce pays, mais la grandeur Romaine diminuant elle tomba entre les mains des Lombards, & eut 14. Ducs du sang Lombard, qui luy commanderent, & deux Ducs de France, iusques aux temps de Charlemagne, auxquels elle demeura sous son Empire, & celuy de sa race iusques à Loys III. Roy de France, sous le regne duquel Berengarius heretique s'en empara, & luy ont succedé en iceluy Duché les Berengaires II. & III. lesquels deux derniers

derniers ayans esté pris par l'Empereur Othon, il en fit vn present royal à l'Eglise d'Aquilee. En apres l'Empereur Conrad adiousta encore à la munificence d'Othon, le reste dudit Duché du Friul avec le Marquisat d'Istrie, qu'il donna à ladite Eglise d'Aquilee, & ainsi le Patriarche d'Aquilee eut l'Empire, & la souveraineté de tout ce pays: iulques à tant que finalement les Venitiens, l'ont tout reduit sous leur puissance, environ l'an de nostre Seigneur 1420. & en iouyissent encore paisiblement auourd'huy: il est toutesfois ainsi qu'une bonne partie d'iceluy occupé par des Comtes & Seigneurs particuliers, qui neantmoins ne laissent pas d'obeyr à la Seigneurie de Venise, & plusieurs d'eux mesmes ont esté esleués à la dignité des nobles de la Republique.

Ceste Region a de grandes campagnes fort larges & arroseees d'eaux, mais tres-fertiles & abondantes, d'où vient qu'elle produit grande quantité de toute sorte de fruiçts par tout excepté es lieux proches des Albes, où sont les Collines steriles, mais au lieu il y a force chasteaux, il y a force vignobles qui produisent de bons vins, dont Plin fait mention au premier ordre des louanges qu'il donne aux bons vins, & l'appelle vin de Pucine, les habitants en conduisent grande quantité à Venise, comme aussi de toute sorte de fruiçts, & des pommes principalement de goût tres excellent, pour les forests & le bois de ce pays, ils sont pleins de beau bois & matiere propre à bastir, & fort abondante & agreable pour la chasse de venaison, elle a des prez grandement delicieux; des pasquis fort gras pour le bestail, & vn terroir tres-vtile tant à la necessité humaine qu'à la vie des animaux & aux delices des hommes, vn ciel temperé, vn air salubre, vn pays bref où se trouue quantité de pierres, de lapis, cornalignes, berils & force beau cristal.

Il y a en ceste Prouince vn beau fleuve nommé Hydra ou Idria, ou il y a vne mine d'argent, & non fort loing d'un lieu nommé Montfaucou, se trouuent des eaux chaudes fort medecinales, desquelles Plin fait mention & les appelle *Balnea montis falconis*, bains de Montfaucou. Il y a encore en ce pays le fleuve appelle Villanent, qui est fort nauigeable, qui prend sa source du mont Maurus, aupres du bourg de Phorny, ou se rencontre aussi vne fontaine admirable, car y iettant du bois, son escorce, ses branches & ses fucilles deuiennent pierres. La ville Metropolitaine de ceste Region est Vtine, cité d'assez belle grandeur & magnifique, non bastie par les Huns, comme disent quelques-vns, ny par les Ducs d'Autriche, mais est plus ancienne que tout cela, & est parlé d'elle beaucoup de fois chez Plin, en laquelle autrefois aussi a esté estably le siege du Patriarche d'Aquilee, apres qu'elle eust esté ruinee, c'est vne ville abondante & remplie de tout ce qui luy est necessaire, & qui a tousiours esté mere des beaux esprits qu'elle a fourny: La Republique de Venise enuoye vn President en ceste ville, qu'ils appellent Lieutenant pour leur rendre compte de leurs affaires. Ceste ville à cinq mille de tour & est peuplee d'environ 16. mille ames.

DE LANCIENNE VILLE ET TERRITOIRE D'AQVILEE.

EN ce mesme pays du Friul se voyent aussi les anciennes ruines & reliques de la ville d'Aquilee jadis siege Patriarchal d'Italie, laquelle estoit tres-riche, populeuse, & le sejour ordinaire des Empereurs d'où vint que l'on l'appelloit la secōde Rome: elle estoit ceinte de murailles tres-somptueuses, & embellie d'un magnifique appareil de quantité de Temples, amphiteatres & autres riches & somptueux edifices.

En icelle Octauius Cesar souloit y demeurer quelquesfois: là aussi Cesar Auguste ouyt le procez d'entre Herode & les Iuifs, & en donna son iugement, comme escrit Ioseph. Tiberius demeura là avec sa femme Iulia, où elle enfanta vn enfant hors de son terme, maintenant ce pays est presque desert d'habitans, & plus propre pour faire vne solitude qu'une demeure de peuple, & apres qu'elle eust esté plainement & entierement reduicte en flammes & en cendres par Attila Roy des Huns, avec le meurtre & homicide de pres de mille hommes, elle n'a esté repeuplee de nouveau, si bien que cet empeschement estant osté, les Herules, les Huns & Lombards passerent à leur aise, & vn peu auant nostre aage les Turcs.

Auourd'huy Aquilee semble plustost vn village qu'autre chose. Toutesfois elle garde encore son Eglise Patriarchale, illustre pour la memoire de S. Marc, & pour la puissance des anciens Patriarches qui y faisoient leur demeure & residence ordinaire.

On void en ce pays la riuere de Liurence, qui pour estre trop proche de la mer, ainsi qu'elle tombe des Alpes, n'a pas assez de temps pour arrester son cours rapide.

Sf ij

Sur ceste riuere on void les chasteaux de Contean, de Sacile & de la Motte. Pareillement sur la riuere de Lemon qui passe aussi par ce pays, on void la ville de Concorde & Portguare : sur celle de Tagliauiento les places de Latifare & Spilimbergue, & non guiere loing S. Daniel, & Osope.

Sur le Marison on void la ville de Ciuida d'Austria bonne & riche : puis sur le Lifonce celle de Gradisque & Goritie, places subiectes à la maison d'Autriche.

On void apres l'emboucheure du Timaue, & plus outre Trieste, ville qui donne le surnom au prochain Golphe.

Et pour reuenir à Aquilee, apres sa ruine & demolition, le siege Patriarchal fut transporté à Grado, à cause des frequentes courtes des barbares, sous le Pape Gelase. Mais les Venitiens ayant plusieurs annees apres obtenu vn Euesque, la dignité de Patriarche fut finalement transportee de l'Eglise de Grado à Venise sous Nicolas V. & Aquilee demeura avec son tiltre : mais pource que l'air de la ville est mal sain, le Gouvernement de Friuli, & tout ce qui importe a esté reduit à Vdene, ville qui a de tour 5000. & fait 16000. ames.

DE L'ISTRIE.

L'Istrie commence à la Riuere de Risan, ou Formion, & s'estend iusques à S. Vitte, où comme les autres veulent iusques à l'Asie qui est vn espace de deux cens milles.

Les meilleures villes de ceste Peninsule sont assises sur de petites Isles, comme à Iustino-poli, Rauigno : les autres sont Piron, Vinagne, Citanona, Parenze, Pole, qui du temps de Strabon estoit la limite de l'Italie.

Les Venitiens qui desirent la peupler, donnent à ceux qui veulent y aller tenir maison, certaine quantité de terre avec diuerles exemptions & franchises.

Aux lieux qui sont au milieu du pays, il n'y a point de places d'importance.

DE LA MARCHE DE TREVISE ET DE SES VILLES.

DE LA VILLE DE TRENTE.



A ville de Trente qui est l'une des plus belles qui soit en toute la Marche de Treuiss est d'autant plus celebre qu'elle a seruy de long sejour à plusieurs Cardinaux, Grands Princes & Seigneurs, Patriarches, Legars, Archeuesques, Euesques, Abbez, Generaux d'Ordre, Orateurs, Ambassadeurs de Roys, Souuerains, Estats & Republiques Chrestiennes & Catholiques assemblez tous en corps d'Eglise, sous la conuocation du Pape, & sous la conduite spirituelle du S. Esprit au Concile General, Vniuersel & Occumenique qui se tint par ordonnance du S. Siege en ceste noble ville de Trente, pour obuier à la naissance de l'heresie de Luther & de Calvin, & corriger les mauuaises mœurs & deprauations qui auoient cours entre les Chrestiens, & fluoient en tous les lieux de la Chrestienté au preiudice de l'auancement & de la gloire de la Religion Chrestienne.

Hierosime Capugnan Topographe d'Italie, escrit que ce Sacrosainct Synode general fut conuoqué au Temple magnifique de nostre Dame de ceste belle cité de Trente, dans lequel repose encores à present le corps sainct du petit enfant du grand Prestre des Iuifs S. Simeon, qui fut anciennement occis & massacré par les Iuifs.

Là dedans fut aussi mis en sepulture le corps de Hierosime Cardinal de Seripan, Legat du dit Concile de Trente, qui y mourut pendant la tenné d'iceluy, personnage de merite, bien versé en toute sorte de sciences, & fort renommé pour la sainteté de sa vie.

Les Chanoines qui sont ordinairement tous nobles & extraicts de maisons illustres, ont droit d'eux mesmes d'élire leur Euesque, que l'on recognoit pour Seigneur temporel & spirituel de ladite ville de Trente, & Prince du S. Empire Romain : à laquelle dignité ont succédé l'un apres l'autre, Christofle & Louys Cardinal de Madruse, & à present en est faisi & pourueu leur nepueu appellé Alithrand, lequel commande auiourd'huy à tous les Citadins de la ville de Trente : mais neantmoins les Venitiens ne laissent pas d'estre Seigneurs souuerains de ceste cité, comme de tout le pays, il y a vne forteresse & muraille assez forte, & auiourd'huy à cause du trouble de la Valtoline, ils y ont fait entrer vne forte garnison, comme aussi en toutes les villes, places, chasteaux & forteresses qu'ils possèdent dans le continent d'Italie.

DE

DE LA VILLE DE TREVISE.

LA ville & cité de Trevis est vne des plus anciennes de la Seigneurie de Venise, & fut edificée & construite par Osiris troisieme Roy des Argives, qui regna sur l'Italie l'espace de dix ans, lequel fut adopté par Denys le Tyran apres qu'il fut mort pour Roy & heritier du Royaume d'Egypte. Et pour autant qu'apres son decez vn certain bœuf apparut aux Egyptiens croyans que ce fust Osiris l'adorerent comme Dieu, & l'appellerent en leur langue Apis, qui signifie autant que Dieu en nostre langue Françoise, qui fut cause que ceste cité icy de Trevis, fut premierement appelée Apis, pour auoir esté construite & bastie par iceluy Osiris.

Et de fait en plusieurs & diuers endroits de ceste ville se voyent encore à present plusieurs anciennes peintures, entre lesquelles on remarque souuent la figure d'un bœuf & d'un Apis, duquel les Trevisins sont memoratifs, & donnent à cognoistre aux estrangers l'antiquité de leur ville.

D'autres donnent diuerses raisons, touchant l'origine & fondation de ceste cité, car entr'autres se sont trouuez aucuns qui ont dit, mais fabuleusement, qu'elle fut bastie par les compagnons du Troyen Antenor.

Les autres tiennent que ce furent certains Troyens sortans de la Paphlagonie, qui venans en Italie, pour y faire leur demeure donnerent commencement à l'edification de ceste ville.

Mais quoy que c'en soit, sans s'amuser à tant d'opinions brouillees & supposees, il est tres-certain que Trevis a esté edificée long-temps auparauant l'aduenement ou l'Incarnation de Iesus-Christ; elle n'est guiere moindre en grandeur & dignité que Paue: & encore qu'il semble que ce soit vne petite Isle, pour autant que de toutes parts elle est enuironnée d'eau, de sorte que comme pour ces eaux elle ne se peut pas prendre par force, elle a encores des murailles bien fortes & espoilles, garnies d'un bon nôbre de Canons & artilleries propres à chasser loing ses ennemis, & qui auroient quelque enuie de l'assiéger, & pour les tours elle en est assez bien munie à l'entour de ses murs.

La ville a esté long-temps appelée Turion: & de fait encore pour le iourd'huy les Armoiries de Trevis, sont vn escu blanc, sur lequel sont grauées trois tours avec trois creneaux de murailles.

En ceste noble cité, comme en la plus superbe & magnifique de la Marque Trevisane, les Lombards ont esleu le siege & le domicile du Marquis de la Prouince, qui en leur langue, veut autant dire que Magistrat perpetuel, qui fut cause que tous les Iuges du depuis s'appellerent Marquis de Trevisan.

En laquelle Marche Trevisane estoient anciennement six belles villes & florissantes cités basties; mais pour le present, il n'en reste pas plus de quatre qui soient renommées avec quelques chasteaux qui estoient jadis en tres-grand nombre.

Ce pays s'estend depuis le Levant iusques au Ponant, par l'espace de quarante mille pas, & du Midy au Septentrion, l'on prend en son estenduë cinquante milles pas.

Elle fut jadis reduite premierement sous l'Empire de Hanau, par apres elle tomba sous la puissance des Lombards, qui en furent incontinent frustrez par les Seigneurs particuliers qui jouirent quelque temps du domaine du pays.

Toutesfois ils en furent chassés par les Scalignes & Carenien, sous la Seigneurie desquels ceste Marche demeura assez longuement; mais en fin l'an de nostre Seigneur mil trois cens quatre vingt & huit, toutes les villes, cités, bourgades & chasteaux de la Marche de Trevis se soumirent volontairement à l'obeyssance des Venitiens, auxquels ils se sont tousjours monstrez fideles & loyaux sans iamais se rebeller ny se reuolter aucunement. Et l'an mil cinq cens huit ils embrasserent la Religion Catholique Apostolique & Romaine, & aussi tost lesdits Trevisiens edifierent vn beau & magnifique Temple en leur ville de Trevis, lequel ils dedierent à Dieu en l'honneur du Prince des Apostres S. Pierre, & outre ce changerent leurs armoiries, de sorte qu'en leur banniere & estendard, au lieu d'y grauer des tours noires avec trois creneaux de muraille sur vn escu blanc, grauerent sur vn escu rouge vne croix blanche avec deux estoilles: Et l'an mil trois cens dix-huit, fut en ceste belle cité fondée vne Academie & Vniuersité publique, qui estoit tres-florissante, & ce fut au mesme temps ou environ que celle de Paue fut aussi fondée.

Le fleuve Silis passe par apres de ceste ville, dedans laquelle entre plusieurs belles fontaines, dont l'eau cristalline est ja conduite de plusieurs hautes montagnes par certains conduits & canaux souterains. Du costé de l'Orient le grand fleuve Anax costoye ceste ville de Trevis, par lequel il arriue en icelle vne infinité de belles & bonnes marchandises, & vne grande quantité de victuailles.

Toute ceste Region est merueilleusement fertile & abondante en toute sorte biens, mais principalement les veaux & les connils y sont de tres-bon goust & estimez en Treuise pour viandes tres-delicatés entre les grands Seigneurs & les riches de la cité: Ces viandes sont ordinairement seruies sur leurs tables, pour estre les meilleures & les plus delicieuses.

Quant aux edifices de la ville de Treuise, ils sont fort excellens & magnifiques, & est si frequentee de Noblesse, qu'anciennement on comptoit en icelle iusques au nombre de plus de trois cens Gentils hommes, Seigneurs & Gouverneurs de villes & chasteaux, qui venoient là, & y enuoyoit leurs enfans és exercices qui s'y faisoient, tant aux lettres qu'aux armes.

Le territoire d'icelle est le lieu le plus plaisant du monde, & fertile au possible, & n'y a rien de desirable pour la vie, & le contentement des hommes qui ne se trouue en la ville & pays de cette Marche Treuisane, aussi ne se faut-il estonner si elle est si peuplee cōme elle se void, car elle est à vray dire le lieu des vrayes delices d'Italie, c'est assez parlé de Treuise.

A quatre lieues ou environ de la ville de Venise, en tirant vers terre ferme de l'Italie, se trouue vne petite ville nommee Alnite, dont il est ja parlé cy dessus, descriuant Venise, qui fut construite & edifiee par Anthonio Thioen, & depuis fut destruite par Attila Roy des Huns.

Entre Venise & Pauie, se treuve encores vn assez bon bourg appellé Nonal, lequel de tout temps a esté tres-riche & opulent.

De là, entirant vers le Septentrion, se void l'ancien bourg Asafon situé sur vne petite montagne, qui estoit jadis vne colonie des Romains, & où la Royne des Cypriens prenoit anciennement ses delices: laquelle à quatre iets de pierre de ceste ville, fit construire vn fort beau chasteau en vne belle assiette, dans lequel se voyoient plusieurs belles fontaines & piscines, pour autant que le pays y est fort propre: car du costé du Septentrion iusques aux Alpes, se voyent plusieurs belles collines, desquelles vn nombre infiny de fontaines decoulent, qui se diuisent en plusieurs & diuers endroiets, qui est cause que tout le pays d'alentour est merueilleusement fertile, & produit grande quantité de fruiets & de vin.


Entre les fleuves Anax & Elinance du costé d'Orient, se trouue vne petite cité appellée Coleglan, en partie assise sur vne belle & plaisante colline, partie en vne plaine qui s'estend vers le midy, laquelle cité est magnifique en bastimens & maisons, & jouit d'un Ciel si doux & clement, qu'il ne se peut pas dire combien les malades y sont rares, & se trouuent consolez quand il y en a, ce qui est cause qu'il est merueilleusement peuplé & frequenté par plusieurs marchands estrangers, & non sans suiet elle est appelée par les Allemands Lumilak, c'est à dire mansion ou demeure Royale, pour la grande beauté de ses edifices, & grand nombre de belles & excellentes fontaines qui y apportent l'eau plus claire que cristal.

Ce fut en ceste ville que les Seigneurs de Venise esleurent leur premier Magistrat en terre ferme, faisant grande estime de ceste cité ausquels elle a de tout temps esté suiète, comme encore à present elle est.

Au de là ledit fleuve d'Elinance du costé d'Orient en descendant vers la mer Adriatique, se trouuent plusieurs petites villes, comme Collate, Nemese ou Namefe & le chasteau de S. Sauueur, & quelques autres chasteaux, qui dependent de la seigneurie & tres-noble famille des Comtes Collatins, & des Opitargues.

Là aupres est la ville de la Motte, la fondation de laquelle est incogneuë, mais partant elle est renommee pour auoir esté le lieu natal de ce grand & tres-noble Cardinal Alexandre, personnage de merite, & grandement versé és lettres tant sacrees qu'humaines. Et voyla pource qui est de la grandeur de la Republique de Venise.

ESTAT



E S T A T
DE TOVTES LES ISLES DE LA
MER MEDITERRANEE, ADRIATIQUE ET
Ionique appartenantes à la Seigneurie de Venise.

S O M M A I R E.

I.

DE l'Isle de Crete ou de Candie, sa longueur, largeur, circuit, assiette & limites.
2. De l'Isle de Corcyre à present nommé Corfu, son assiette & limites, sa longueur & largeur, quand reduite sous l'obeyssance de Venise, son abondance & fertilité en miel, cire, & huile, oranges, citrons & de la

fontaine Chaldachie, les habitans de ceste Isle souffrent l'erreur Schismatique des Grecs parmi eux.

3. De l'Isle de Cephalonie & de son circuit.

4. De l'Isle de Zante, sa situation & circuit.

5. Golphe de Venise & de l'erreur qu'on fait sur la cognoissance de ce Golphe.

DE L'ISLE DE CANDIE.

CRETE ou Candie l'une des plus fameuses Isles de toute la mer Méditerranee, est en situation si belle, qu'elle semble auoir esté faite de la nature pour tenir l'Empire de ceste mer & d'une grande partie des terres maritimes de l'Europe, d'Asie & d'Afrique, ayant l'Egypte qui est d'Afrique à son Midy voisine de 450. mille. Elle regarde par Tramontane l'Archipelago, & du costé du Levant, elle est proche de Chypre de 500. mille, & de Chypre en Syrie il n'y a que 200. mille: au reste elle a en longueur 140. mille ou selon les autres 60. lieues de France d'Orient à Occident, & en largeur 60. & 600. mil de circuit, ou selon quelques-uns, six vingts lieues à en faire le tour par la mer: elle a au Ponent la mer Adriatique.

Son assiette est plus Orientale que celle du païs de la Moree, estant posée entre le païs d'Attique & celui de Cyrene d'Afrique, & n'ayant que deux iournees de mer pour aller à l'une ou à l'autre Prouince.

Ses costes sont fort montueuses & aspres, pleines de Caps, ou pointes qui s'avancent dans la mer, dont les principaux sont le Cap de Salomon, le Cap de spada, le Cap de saint Jean, ces deux icy font le bout de l'Isle, l'un du costé du Ponent, l'autre du Levant. La partie Meridionale la plus rude & montueuse est infectée des vents de Sud, & pource elle la prie de villes de reputation.

Entre ses montagnes plus renommées, sont celle d'Ida, nommée par les habitans Philoriti, Leuci, que Plin appelle Cadussi, qu'on dit aujourd'huy Madure & Dicte, & est aussi nommée Sethie, ceste montagne traaverse le long de l'Isle & en est la plus fameuse, tant pour le dictame qui y croist, que pour une infinité d'autres simples.

Il n'y a aujourd'huy en ceste Isle, selon Belon, en ses observations, que trois villes celebres, c'est à sçavoir Candie, jadis Marium, capitale de ceste Isle, qui en prend le nom, puis Canie, autrement Sydon, & après Rhetimo, que les anciens nommoient Rhetyme, elle fut jadis renommée pour auoir cent villes, & pource on l'appelloit Hecatonpolis.

Elle a un port qui n'est guere commode, mais ceux de Candie & de Canée sont extrêmement assurez & propres.

Sf iij

On y void les riuieres de Melipotane, Seasin, Cladile, Epicidorme, Gisso & Diuotro vers le Nord; Populiar vers l'Occident & Lineus au Midy.

La richesse de ceste Isle consiste aux pasturages de ses valons qui nourrissent quantité de bestial, & en maluoisie & vins excellens renommez & cogneus aux trois parties du monde, et quelles ils se transportent.

Pour le Gouvernement, les Venitiens depuis l'an 1594. qui l'acheterent d'un nommé Boniface, Marquis de Montferrat, ceste Isle semble estre faite pour dominer toute la Grece, d'autant qu'elle est peu eslogee du Peloponnese, & peut commander à toute la mer qui regarde la Grece.

Les Venitiens y entretiennent des Capitaines Italiens aux forts & aux nauires avec les garnisons de mesme; il y a un Gouverneur qui a le souverain commandement, & qui est Venitien, ordonné & changé de trois ans en trois ans par la Republique.

Ils tiennent force garnisons en toutes les places de l'Isle pour la desffiance qu'ils ont du Turc & de l'Espagnol, il y a de bons magasins aux ports & aux citadelles, garnis de toute sorte de munitions de guerre & quantité de canons.

Mais autant qu'elle est montueuse, autant a-elle de valons de grand rapport, & extrêmement fertiles, à cause qu'elle est arrosée d'une infinité de fontaine, ruisseaux & riuieres.

Dauantage la Vigne y vient à souhait, & produit en abondance du vin que ceux du pais nomment Maluoisie. Le laiët y foisonne pareillement, & l'on y a la chair à suffisance, si bien que les anciens l'ont nommée à bon droit Isle bien-heureuse, il y naist de plus beaux cyprès qu'on scauroit voir, & des arbres de toute sorte à faire nauire, ce qui est de grand profit à la Seigneurie de Venise, on n'y void aucune espece d'animal nuisible, farouche ny venimeux, hormis des phalanges, qui sont comme araignees, mais en Candie elles ne sont pas dangereuses.

Elle abonde encore en cheureux, daims & ysards ou chamois, mais on ny void guere de sangliers si ce n'est du costé de Canée: il y a des boucs estains qui ne sont plus grands qu'une cheure, & ont autant de chair que pourroit auoir un grand cerf, aussi il a le poil fauve & court, & porte outre ce une grande barbe noirestre, on le prend quelquesfois, lors qu'il est encore fort petit, afin de le nourrir parmy les troupeaux des cheures, & en tirer de la race, tant pour sa beauté que pour le goust de la chair: Ses cornes sont fort grandes eu esgard au corps, qui est comme celui de la cheure, mais il est si agile qu'il surpasse les cerfs à courir & les chiens à fleurer, veu qu'il sent les chasseurs qui le poursuivent de plus de cent pas, si bien que pour le prendre on lie des cheures domestiques aux aduenues & passages de la montagne, & le bouc estain les sentât va vers elles, & ainsi qu'il s'y arreste, les chasseurs ont beau loisir de le blesser, mais si le coup n'est mortel, quoy que la balle soit enuenimée & luy demeure au corps, il se guarit avec de l'herbe que les Simplistes appellent Dictame, qui est bonne contre les venins, veu que sa seule odeur fait mourir les serpens & autres bestes venimeuses.

Les habitans de Candie sont de leur naturel prompts à mal faire, les anciens mesmes leur ont donné le nom de menteurs: ils sont rusez, auaricieux, portans assez malaisément le travail, & n'apprennent aucun art ny aucune science parfaitement, il est vray qu'aujourd'huy, à ce que dit Belon, ils s'accoustument dès leur enfance, suivant leur ancienne coustume à tirer de l'arc, en quoy ils excellent, surpassans mesme en cela les Turcs, & mesme ils sont adroits & vaillans sur la mer, autant qu'ils l'ont autresfois esté.

En ceste mesme Isle de Candie, la ville dont l'Isle prend son nom & Canée aussi, sont tres-fortes tant par art, qu'à cause de leur assiette, mais Rhetymo & Scitie ne peuuent estre nommées fortes, qu'à raison du lieu où elles sont assises. Et en la ville de Candie il y a un assez bel Arsenal de galeres.

L'Isle de Candie a jadis tellement fleury que ses Roys tenoient en bride toute la Grece: les Cretois estoient estimez des meilleurs Archers de la terre, ils inuenterent la dance Pyttique du temps de leur Roy Cydon, ils estoient tous armez lors qu'ils la dançoient, & elle a esté tellement continuee en ceste Isle, que les paisans les dancent encore aux festes au plus chaud du jour en plein Esté, sans se soucier de l'ombre & avec leurs armes, à scauoir l'arc, la troufse, & l'épée, comme si sans cela ils ne pouuoient auoir bonne grace en dançant.

Les peuples plus excellens d'entre les Grecs ont pris leurs loix des Candiots, ainsi que Platon mesme tesmoigne & Plin après luy, & sur tous les Lacedemoniens en prirent la pratique: Une de leurs loix portoit, que les enfans fussent nourris en public, afin que les pauvres ayans mesme nourriture que les riches, n'eussent aucun subiect de les enuier, & il estoit aussi porté par les loix que pour accoustumer les enfans à ne rien craindre, ains plustost à supporter toute chose avec patience on les accoustumast aux armes, & à leur faire mépriser le

le chaud & le froid, la faim & la soif, & qu'ils vissent de l'arc & de la flèche en dancans, & eussent des habilemens propres à la guerre.

DE CORCYRE 'OU ISLE DE CORFOV.

Corcyre Isle renommee par les escrits des anciens, est celle qu'à present on nomme Corfou assise en la mer Ionique ou Golphe de Venise, regardant l'Italie du costé de la Calabre, & auoysinant l'Epire ou l'Albanie vers le Septentrion, n'en estant guere plus loing que d'un mille d'Italie, du costé qu'elle regarde la ville de Butriate, au lieu que ceste Isle est à 60. milles d'Italie, ayant la ville d'Otrante opposee.

Ceste Isle est le joiuet de tous ceux qui ont commandé sur la mer iusques à ce qu'en l'an de nostre Seigneur 1382. les Corcyrois se voyans exposez aux iniures de tout le monde, se donnerent aux Venitiens, qui les ont deffendus plusieurs fois de la furie des Turcs, & ont tellement fortifié ceste Isle, qu'il semble impossible qu'on s'en rende maistre. Elle est beaucoup plus longue que large, elle est faite en demie lune ou demy cercle, ayant deux pointes, dont l'une qui regarde l'Orient s'appelle Cap de Leuchin, près laquelle, & en la mesme assiette, dans le golphe on void vne autre pointe nommee le Cap blanc: l'autre regarde le Nort, & s'appelle de sainte Catherine, où l'on void le port de Cassope: & la troisieme qui est au milieu de l'Isle, est la pointe de saint Sydere, où est assise la ville de Corfou, & non loing de laquelle on void la pointe de saint Nicolas, ayant vis-à-vis l'Isle de saint Vitte & celle de Candilonissi, & de la pointe de Leuchin iusques à celle du port Cassope, est la longueur de l'Isle, qui a 54. milles d'Italie: mais sa largeur est consideree depuis le chasteau saint Ange, & elle est d'environ 14. milles d'Italie. Son circuit est d'environ quatre vingts milles, quoy que quelques-uns luy en ayent donné autresfois 300. Elle est diuisee en quatre quartiers que les Venitiens appellent Balies ou Gouvernemens, dont le premier qui regarde le Levant, s'appelle Leuchin, celui du Ponent, Laguire, le troisieme est la Balie du milieu, & le quatrieme porte le nom & tiltre de Loroc.

La ville de Corfou est la capitale de ceste Isle, & les autres adjacentes, sur lesquelles les Venitiens ont commandement.

Il y a encore à Corfou vne autre ville, qu'on nomme maintenant Pagiopoli, ou Palopoli.

Le port de la ville de Corfou est fort grand & capable d'une grande quantité de vaisseaux; Il y a encore les ports de Cassope & de saint Sidere, de Timon, de Cuny, de Spile & d'Euripe, mais ceux de Sidere & Timon sont dangereuses à l'abord. C'estoit en ceste Isle que se tenoit jadis Arcinous Roy des Pheagiens & Nausicaa sa fille, qui possedoient les beaux jardins dont parle Homere.

Ceste Isle de Corfou est montueuse, & le pais raboteux vers le Midy, mais aussi il y a plus de fleuves & ruisseaux qu'aux autres endroits, comme le fleuve Pinize, Mesongi, Euripe & Potami: Du costé du Nord elle est pleine, sauf qu'il y a vne montagne qui entre en la mer, au sommet de laquelle est assis Castel Noue. Il y a près de Palopoli vne fontaine en la mer nommee Cardachie, qui est si abondante en sa source, que non seulement ceux de Corfou en sont substants, à cause que la ville est pourueüe d'une eau grossiere, & mal saine, & pour ce que les citoyens s'en vont fournir avec des barques, mais encores les galeres & grands vaisseaux y vont faire égade. Près du mesme lieu on void les plus belles salines de tous les pais d'alentour, dont ceux du pais tirent du sel pour en payer la gabelle de la Seigneurie de Venise. Mais sur le destroit du Golphe du Promontoire de Pagiopoli près le lieu dit Necrotalassi, on void un petit Golphe sous lequel il y a comme un grand reservoir du meilleur poisson qui soit en la mer Mediterranee, & outre ce durant l'Hyver le gibier & les oyseaux de riviere y foisonnent. Ceste Isle jouyt d'un tres-bon air, & est fort sain, elle porte quantité d'orangers, de citronniers & autres semblables arbres.

Corfou abonde encore en miel, & en cire; le vin y croist bon & en abondance, mais sur tout on louë l'huile de Corfou, à cause de sa singuliere bonté. Au reste ceste Isle produit suffisamment des bleds & des fruits, il ne s'y trouve ny loups, ny ours pour nuire aux troupeaux, mais il s'y trouve quantité d'autres animaux bons à manger, & que les hommes ont accoustumé de poursuivre en chassant.

En ladite Isle de Corfon, il y a vne excellente forteresse, qui est comme la clef ou la porte pour entrer au Golphe, si bien qu'avec vne moyenne armee on peut empêcher l'entree à la plus puissante qui pourroit venir.

DE L'ISLE DE CEPHALONIE.

3. **E**N l'Isle de Cephalonie il n'y a nul fleuve, ny ruisseau, ny fontaine d'eau douce, tellement que les bestes qui ne sont domestiques voulans boire ouurent la bouche le soir & le matin pour recevoir la rosee.

DE L'ISLE DE ZANTE.

4. **C**E vx qui ont escrit de l'Isle de Zante, particulièrement Herodote, disent qu'en l'Isle de Zante il y auoit des fontaines qui vomissoient avec l'eau de la poix en grande abondance, on n'y trouue guere autre chose qui soit digne d'estre remarquee.

DU GOLPHE DE VENISE, ET DE L'ERREVR
qu'on fait sur la cognoissance de ce Golphe.

5. **L**E Golphe de Venise qu'aucuns pourroient prendre pour la mer Hadriatique, afin que nul ny soit trompé, il conuient sçauoir que les Mariniers du Leuant diuisent le corps de la mer Mediterranee en trois Golphes principaux.



Le premier qu'ils appellent le Golphe du Lyon, s'entend toute la partie Occidentale de ladite mer, depuis la Sardaigne iusques au destroit de Gibraltar.

Le deuxiesme est le vray Golphe de Venise, comprenant l'espace d'entre Malte & le Cap de saint Jean de Candie, ayant cent milles de longueur, borné au Septentrion de l'Isle de Cephalonie, de l'Isle de Zante & la Moree, au Midy de la Barbarie.

Le dernier & le plus dangereux de ces Golphes, est celuy de Serelis, lequel commence à Rhodes & finit au iusdit Cap de S. Jean de Candie; est environné des costes de Caramanie, Syrie & Egypte, & de l'Isle de Candie.

Quant au Golphe de l'Archipelago, il n'environne rien de son ancienne description, faisant la longueur depuis le Cerigo, jadis Cithera, iusques au destroit del Hellepont, & la largeur de la Grece à la Natolie.

Sur ces Golphes les Chrestiens & les Turcs font souuent naufrages.

Les Turcs & les Moress'y voyans en danger, apprehendans la iustice diuine, se meffians de leurs forces, ont recours aux moyens que leur religion ordonne pour se reconcilier avec Dieu; ils se depouillent tous nuds, se lauent sur les bords du nauire, depuis la cime de la teste iusques à la plante des pieds, & puis font leurs prieres. C'est vn point de la superstition Mahometane que ce lauement fait en forme deuë, suiuy de la contrition du peché & de la priere, purifie & remet l'ame en estat de grace.

DES CEREMONIES OBSERVEES EN L'ELECTION
des Ducs de Venise.



OV r pris au Senat pour l'election d'un nouveau Duc, tous les Gentils-hommes Venitiens, qui ont atteint l'age de trente ans, se rendent au Palais en vne sale, les portes de laquelle estant fermées, on met dans vn vase autant de ballotes qu'il y a de Gentils-hommes: mais les ballotes sont de deux couleurs, il y en a seulement trente de dorees, les autres sont blanches: Puis chascun Gentil-homme tire vne ballote. Ceux qui ont tiré des ballotes blanches demeurent en la mesme sale: & ceux qui ont tiré les ballotes dorees, sont menez en vne autre sale, là où on met dans vn vase trente ballotes, neuf desquelles sont dorees. C'est ce qu'ils appellent le sort des trente ballotes.

Ces trente Gentils-hommes ayans derechef tiré chacun vne de ces ballotes, les neuf qui rencontrent les dorees en nomment quarante. Ceux cy sont appelez les Eslecteurs de la premiere Election.

Ces quarante nommez, remettent quarante ballotes dans vn vase, douze desquelles sont dorees, puis retirent au sort, & les douze qui ont rencontré les dorees, sont dits les Eslecteurs de la seconde Election, car ils en nomment vingt-cinq.

Ces

Ces 25. qu'ils ont nommez remettent 25. ballotes dans vn vase, neuf desquelles sont dorees, puis tirent au sort, & les neuf qui tirent les dorees, sont dits Eslecteurs de la troisieme Eslection, car ils en nomment quarante-cinq.

Ces quarante-cinq remettent quarante-cinq ballotes dans vn vase, vnze desquelles sont dorees, puis retirent au sort, & les vnze qui rencontrent les dorees en nomment quarante vn, qui seuls eslisent le Duc en ceste maniere.

Ces 41. s'estans enfermez en la sale où s'assemble d'ordinaire le Senat, ils choisissent trois des plus venerables d'entr'eux, qu'ils appellent Prieurs del'Assemblée, & deux Secretaires: les 36. restans se diuisent en quatre, estant permis à vn chacun de choisir en quel lieu des 4. il se veut renger.

Ce fait, les Prieurs se mettent en vn siege releué, & les Secretaires appellent ces 36. l'un apres l'autre, lesquels en leur presence mettent chacun dans le coffret destiné à cet effect, vn petit bulletin ployé, où est escrit le nom de celui qu'ils eslisent pour Duc.

Chacun retourné en sa place, les Secretaires lisent ces bulletins deuant les Prieurs, puis font autant de bulletins qu'ils s'en trouue de nommez pour estre Duc, escriuans dans chaque bulletin le nom d'un nommé, & combien il a eu de voix.

Après on met tous ces bulletins pêle-mêle dans vn bonnet, d'où ils sont tirez l'un apres l'autre, & escrits selon l'ordre que l'on les tire.

Mais auant que commencer la derniere balotation des nommez pour estre Duc, pource qu'elle se fait selon l'ordre que les bulletins ont esté tirez, Si celui dont le nom a esté tiré le premier est en la compagnie, on le fait retirer en vne chambre à part. Et lors les Prieurs demandent s'il y a quelqu'un qui ait à dire quelque chose contre luy: S'il se trouue quelques reproches on l'appelle pour s'en iustifier: s'il ne le fait, il est exclus d'estre esleu Duc: s'il s'en purge, on le fait derechef retirer, puis on procede à la balotation, laquelle se fait en ceste façon. Sur vn banc deuant les Secretaires il y a deux vases, l'un pour le consentement, l'autre pour le refus: & aupres 36. balotes marquées. Puis on appelle l'un apres l'autre les 36. Eslecteurs, lesquels mettent en l'un des deux vases vne balote: Ce qu'ayans fait, s'il s'en trouue 25. dans le vase du Consentement, celui-là est déclaré Duc: sinon, exclus. Ce fait, on balote pour le second tiré nommé pour estre Duc, en la mesme façon qu'à ce premier: & s'il n'a 25. balotes dans le vase du Consentement, on balote pour le troisieme, & ainsi des autres, iusques à ce qu'il y en ait eu vn qui ait eu 25. balotes de consentement. Voila comment les Venitiens se gouuernent en l'Eslection de leur Dogge.

LES DVCS ET PRINCES DE LA REPUBLIQUE

*de Venise: & ce qui s'est passé de plus remarquable pendant le
gouuernement de chacun d'iceux.*



PAULUTIO Quafeste fut le premier Prince du peuple, choisi en Heraclee, en l'an six cens nonante sept, homme de singuliere iustice: Il iura entre les mains de Christofle Patriarche de Grade, de gouuerner selon les loix, & n'auoir esgard qu'au bien public. Il pacifia les differens avec Luitprand, Roy des Lombards, & fit amitié avec le Roy Aripert. Autant par son autorité, que par ses armes, il ramena à l'obeissance les Equilins rebelles, accreut le domaine, & gouuerna 10. ans, 6. mois, 8. iours. 32.

2. Marcel Tegalien, du mesme lieu d'Heraclee, fut esleu successeur par la commune voix du peuple, il estoit deuot, affable, & modeste, & beaucoup moins diligent au gouuernement, que son deuancier. Le Patriarchat de Grade fut transferé en Aquilee de son temps par Luitprand, & y ayant eu de grandes guerres pour le debat des Eueschez, il ne s'en entremit point, & mourut ayant esté Duc 9. ans, 21. iour.

3. Hortee Hippate, surnommé Vrse, noble d'Heraclee, s'acquist vne grande reputation par ses faits illustres. Paul Exarche eut recours à luy, l'armée Grecque estant rompuë, & le siege mis deuant Raouenne par Luitprand. Il reprit Raouenne, fit le nepueu du Roy son prisonnier, tua le Duc de Vicence, & remit l'Exarche en ses droits. Il refrena ceux d'Aquilee qui troubloient le repos public, & mit le courage en l'ame de la ieunesse, fut tué à l'occasion des dissensions de lesulains le 11. an, & 5. mois de sa Principauté.

Après la mort du 3. Duc l'an 737. il fut fait vne assemblée, en laquelle il fut arresté, & conclud, que l'on n'eliroit aucun Duc de six ans, que l'on establirait vn maistre de la gendarmerie qui seroit annuel: ■

qui ne dura que cinq ans, car en l'an 742. on proceda à l'eslection d'un Duc, & depuis ce temps là la Republique de Venise a eu tousiours des Ducs iusques à present. Le premier qui fut esleu en cét Estat, fut Dominique Leon: le 2. Felix Cornicula: le 3. Theodat fils d'Vrse, rappelé depuis nagues de son exil, & fut conuinué l'année d'apres: mais il mourut auant que son temps fust expiré. Le quatriesme, Julien Cepare fut subrogé en son lieu. Le cinquieme, fut Ciane Fabritiac, qui eut les yeux creux, & fut puis apres demis.

4. Theodat Hipate, fils d'Vrse, fut déclaré Duc, cinq ans apres la mort de son pere, durant lesquels le peuple s'estoit gouverné par vn maistre des soldats, & quittant Heraclee, se reduit à Malamoc. Là il fut le premier créé, & limita les confins avec Astulfe Roy des Lombards. Il fut tué par Galla citadin de Malamoc, l'an 13. de sa Principauté.

5. Galla de Malamoc, homme méchant & leditieux, s'estant montré cōme Protecteur de la liberté publique, fut establi en la place de Theodat, mais sa méchanceté ayant esté reconnue, & qu'il vouloit se rendre seigneur absolu, qui fut le subiect qu'il auoit pris pour faire tuer Theodat, le peuple luy creua les yeux, & dans l'an luy osta la dignité qu'il auoit usurpée.

6. Dominique Monegari de Malamocco, fut mis au lieu de Galla. Le peuple luy donna pour refrener l'autorité de Duc, deux Tribuns annuels: mais luy estant homme audacieux & arrogant, voulut tyranniser le peuple, lequel irrité, luy creua les yeux le 5. an de sa Principauté.

7. Maurice Galbaie, noble Heracleen, pour sa sagesse, iustice, & richesses, fut choisi à ceste dignité. Il fit son fils Duc avec luy, & gouvernerent ensemble. De son temps l'Eglise de Grade estant molestée, il envoya vn Ambassadeur vers le Pape Estienne, pour accorder le different. L'Euesché de S. Pierre de Castel Oliuolo fut erigé, & mourut ayant gouverné vingt-trois ans.

8. Iean Galbaie ayant esté Duc neuf ans avec son pere, gouverna encore seul la Republique neuf ans. Il fit apres ledit temps Maurice son fils compagnon de sa Principauté: mais tous deux estants de mauuaise vie & insupportables, pour auoir tué Iean Patriarche de Grade, le precipitant d'une fort haute tour, Fortunat successeur au Patriarchat, fit vne conjuration contre eux, & vn autre fut esleu Duc, dont estans estonnez, le pere se retira en France, & le fils à Mantouë le 16. an.

9. Obelerie estant esleu Prince par ceux de l'intelligence de Fortunat, prit son frere Beat pour compagnon, & encores Valentin leur troisieme frere, fut associé par eux à ceste dignité. Est à remarquer que de ces 3. Beat est mis au rang des Ducs en la sale du Conseil de Venise, à cause qu'Obelerie incita Pepin Roy d'Italie à faire la guerre aux Venitiens, & que Beat soustint la Republique ayant regné 5. ans.

10. Ange Partitiacie apres s'estre bien comporté en la guerre contre Pepin, fut esleu Duc, le peuple s'estant retiré à Realte. Il fonda le Palais Ducal au lieu où est encores celui qui a esté basti depuis. La diuision de l'Empire s'estant faite de son temps, les Venitiens furent laissez en leur liberté. La Cité fut diuisée en sestiers, le Pregadi, & la quarantaine criminelle instituée. Il gouverna 18. ans.

11. Iustinian Partitiacie ayant esté associé à la dignité par son pere, fut apres la mort d'iceluy confirmé par le peuple. Il rappella Iean son frere qui estoit à Constantinople, & le prit pour compagnon. Il agrandit l'autorité du peuple, & secourut Michell l'Empereur de Constantinople contre les Sarrazins. Le corps de saint Marc fut de son temps apporté d'Alexandrie, pris pour Protecteur, & l'Eglise qui est aujourd'huy fut consacrée à son honneur. Il mourut la deuxiesme année.

12. Iean Partitiacie frere de Iustinian, demeura en la dignité, & accreut l'Eglise saint Marc, qu'il fit deseruir par bon nombre de Prestres, etablissant le Primicerio. Il fit trancher la teste à Obelerius qu'il assiegea en l'Isle de Cursia; destruisit Malamoc qui s'estoit rebellé, & le peuple tourné du party d'Obelerie. Il fit la guerre aux Narrantins, qu'il surmontra. En fin se fit vne conjuration contre luy, & estant surprins par ses ennemis près l'Eglise saint Pierre où il alloit à la Messe, & depouillé par eux des enseignes de la dignité, ils le confinerent à Grade, la barbe raze, le huitiesme an de sa Principauté, il le fit Moine, & y mourut.

13. Pierre Tradonic de Polas estant comporté au contentement du peuple en la guerre de Pepin, fut esleu Duc. Il associa Iean son fils, & donnerent secours à l'Empereur de Constantinople, qui les en fit requerir par Theodose Patrice. Il fut fait Protospataire de l'Empire, au secours duquel il enuoya 60. galeres. Louys 2. luy accorda beaucoup de priuileges, & en fin fut tué par vne sedition, l'an 27.

14. Vrse Partitiacie, ayant appaisé la sedition, fut fait Duc. Les Turcs ayans rauagé la Dalmatie iusques à Grade, furent deffaits par luy avec Iean son fils qu'il auoit associé. Basile

Empereur

Empereur l'honora fort pour ceste occasion, & le fit Protospataire de l'Empire. Il gouverna 17. ans.

15. Jean Partitiatie fils d'Vrse, ayant esté confirmé en sa dignité, prit & brusla Comachie, rauagea la Comté de Rauenne pour se venger du Comte de Comachie, qui auoit fait prisonnier, & bleffé à mort Badoaire son frere. Estant deuenu valetudinaire, il fit baltir l'Eglise des SS. Cornelié, & Cyprian à Malamoc, & ayant gouverné cinq ans six mois, renonça à la dignité.

16. Pierre Candian fut esleu apres la demission volontaire de son predecesseur. Il estoit vaillant & expert aux armes, & neantmoins homme deuot. Il alla en personne avec dix galeres contre les Narrantins, lesquels comme larrons rauageoient, & couroient sus aux Venitiens. Combattant valeureusement contre iceux, il mourut à la seconde fois les armes en main. Il ne gouverna que 3. mois.

Dominique Tribun est mis au rang des Ducs par quelques-vns: Les autres qui ont moins curieusement recherché l'histoire, l'ont obmis, n'ayant esté que 3. mois Duc, & 13. iours, il ne se remarque rien de son temps qu'un certain priuilege accordé à Chioggia.

17. Pierre surnommé Tribun, fils de Dominique esleu Duc, obtint de Guyon Empereur & Roy d'Italie, la confirmation des anciens priuileges. Les Barbares Huns vindrent en Italie, bruslerent Heraclee, Capo d'Arge, & Chioggia. Ce Prince les destit avec beaucoup d'honneur, & ce fut la troisieme fois que les estrangers voulurent vsurper cet Estat. Il gouverna 14. ans.

18. Vrse Badoaire s'appelloit Partitiatie, & fut le premier qui changea ce nom. Il en uoya Pierre son fils à Constantinople, lequel fut fait Protospataire. L'an 920. il obtint de Rodolfe Empereur & Roy d'Italie la confirmation de l'ancienne autorité des Venitiens de battre monnoye. S'adonna du tout à la pieté, & l'an 10. il renonça à la dignité pour se faire Moine, & vescu saintement.

19. Pierre Candian estoit homme vaillant, & fit la guerre à Lanterio Marquis d'Istria, qui empeschoit le trafic des Venitiens, le surmonta, & reconquit les peuples de Capo d'Istria. Il vainquit Albert, fils de Berengarius Empereur, qui s'estant impatronisé de Rauenne, empeschoit le passage aux vaisseaux Venitiens. De son temps furent ramies les filles à marier par les Triestains, & recourees. Il gouverna 7. ans.

20. Pierre Badoaire fils d'Vrse fut racheté par luy des Esclauons. Il ne gouverna que deux ans sept mois tousiours en bonne paix, dont il se monstra fort amateur. Berengarius Empereur luy fit plusieurs faueurs pour ses merites.

21. Pierre Candian troisieme fils du deuxiesme Candian, associa à la dignité son fils Pierre, & par 2. fois arma 33. vaisseaux contre les Narratins. A la 2. fois il fit paix avec eux. Son fils estant blasmé par luy de ses mauuais comportements, se reuolta contre luy, & contre la Rep. Le peuple le voulut tuer, & fut enuoyé en exil: où s'accostant de Guyon, fils de Berengarius, il endommagea la Republique, dont son pere estant trauaillé, mourut l'an 15.

22. Pierre Candian 4. estant rappelé d'exil (encore que le peuple eust fait serment de jamais ne le receuoir) fut fait Prince avec tres-grand applaudissement. Il fit en sorte enuers le Pape Ieandouzieme, que l'Eglise de Grade fut faite Patriarchale, & Metropolitaine de tout l'Estat des Venitiens, & de l'Istrie. Othon Empereur luy accorda plusieurs honorables priuileges. Il ruina Vderze, & fut tué par vne sedition du peuple avec son fils, ayant gouverné 10. ans.

23. Pierre Vrseole estoit homme tout deuotieux, & fut esleu par le peuple contre sa volonté. Il alloit souuent en habit incogneu visiter les pauures, & hospitaux, apaisa les dissensions des Venitiens avec ceux de Capo d'Istria, qui se rendirent tributaires. Il s'en alla avec Beato Romualdo de Rauenne pour viure religieusement. Il gouverna 1. ans, 2. mois, 20. iours, & a fait plusieurs miracles.

24. Vital Candian, fils de Pierre 3. fit la confederation avec l'Empereur Otho. Il deuint malade tout au commencement qu'il voulut exercer sa charge, de maniere qu'ayant fait vn vœu de se rendre Moine, s'il recouroit sa santé, il l'accōplit ayāt gouverné 1. an ou enuiron.

25. Tribun Memie estoit fort riche, & non homme d'Estat. Il y eut de son temps grandes dissensions entre les familles Morosins & Caloprins, à l'occasion de quoy se firent de grands meurtres. Il tint le party des Morosins: ce qui donna subiect aux autres de se retirer à Verone vers l'Empereur Othon. Il donna l'Isle de S. George à l'Abbé Morosin: renonça à la Principauté le 12. an, pour se faire Religieux.

26. Pierre Vrseole 2. estoit homme accort, lequel fit en sorte avec les Empereurs Basile, & Alexius, que les Venitiens furent exempts des gabelles. Othon Empereur estant à Verone le fauorisa entr'autres choses, de tenir au Baptisme vn sien fils. Il fut le 1. qui estedit les consins

T r

sur la mer, acquerant plusieurs places en Istrie, & Dalmatie. Ayant fait acheuer l'Eglise & le Palais, il mourut l'an 18. de sa Principauté.

27. Othon Vrseole ayant gouverné quelque temps avec Pierre son pere, fut confirmé en la dignité à l'âge de dix-huit ans. Il s'acquit vne telle reputation que Geisca Roy de Hongrie luy donna vne sienne sœur pour femme. Il vainquit ceux d'Istrie, qui s'estoient rebelles, & alla en personne en Dalmatie à l'entreprise contre Cresmur. En fin les enuieux de sa gloire luy dresserent vne conspiration, qui apres luy ayants fait raser la barbe, il fut confiné en Grece l'an 1728. Pierre Cantranic, ou Barbolan, succeda à Othon: mais n'ayant peu appaiser les dissensions, tant pour le remuement des citoyens, que circonuoisins, fut contraint de quitter la dignité, & se faire Moyne. Orso frere d'Othon retiré à Constantinople, qui estoit Patriarche de Grade, fut constitué en attendant son retour. Il demeura environ vn an au Palais, & quitta la Principauté, entendant la nouvelle de la mort d'Othon. Dominique Vrseole voulut vsurper la dignité, & fut chassé par le peuple dès le lendemain, & mourut à Rauenne.

29. Dominique Flabenic fut esleu pendant son exil par la faction de ceux qui auoient chassé Dominique Vrseole. De son temps l'an 1040. fut fait vn Concile national pour le reglement des Ecclesiastiques. Il rendit la famille Vrseole soupçonnée à l'Estat pour ses moyens, & s'efforça de la supplanter entierement. Il gouerna 10. ans, 4. mois, 12. iours.

30. Dominique Contaren fut fort agreable au peuple. Il remit en paix la Dalmatie fort trauaillée pour la rebellion de Zara, fauorisa les Normands contre Robert Roy de la Pouille. La discorde qui estoit entre la Republique & Pepo Patriarche d'Aquilee fut appaisée par luy. Il fit bastir le Monastere de S. Nicolas sur le Lido, & mourut l'an 28.

31. Dominique Siluie estant au conuoy de son predecesseur, fut au milieu du conuoy par viue exclamation du peuple salué Duc, & s'acquit vne telle reputation, que Nicephore Empereur de Constantinople luy donna sa sœur en mariage. A la persuasion d'icelle fit guerre contre le susdit Robert Roy, & à la premiere fois remporta vne honorable victoire sur luy, s'emparant de Duras. A la seconde fois il combattit avec beaucoup de desauantage, dont suivit la diminution de son credit. Il encrousta de marbre l'Eglise S. Marc le 1. & y fit traualer de Mosaique, mourut le 13. an.

32. Vital Faliere estant fait Duc, obtint incontinent d'Alexius Empereur la souueraineté de Dalmatie, & Croatie. Henry successeur à l'Empire, luy fit de grandes faueurs, & estant venu par deuotion à Venise, tint au Baptême vne sienne fille. L'office de Proprio fut constitué de son temps, & l'ouurage de l'Eglise S. Marc continué. Il gouerna 11. ans.

33. Vital Michel par sa valeur sur mer estendit au loing les limites de la Republique. Il fit la guerre en Levant à la persuasion du Pape Urbain 2. pour conquerir la Terre sainte avec les Princes Chrestiens. L'Isle de Smirne, la Syrie, & Hierusalem furent ostées aux infideles. Il mourut le 6. an.

34. Ordelafrus Falerius fils de Vital, assista Baldoin Roy contre les infideles à la conqueste de la Terre sainte, & firent tels progrès qu'ils diuiserent l'Empire entr'eux par tout le Royaume de Iudee. Au 8. an de la Principauté Malamoc fut presque du tout brulé & submergé, ce qui occasionna de transferer le siege Episcopal à Chioggia. Il alla en personne à la guerre contre Zara, qui s'estoit rebellee, & ayant gagné la victoire, y estant retourné vne 2. fois, mourut les armes en main l'an 15. de sa Principauté.

35. Dominique Michel estant fait Duc par sa grande reputation & merites, alla par l'entremise du Pape Calixte donner secours aux Chrestiens en la Terre sainte. Il fit avec 100. vaisseaux leuer le siege aux infideles de deuant Ioppe. Il prit Tyro qu'il donna à Vanmond Patriarche de Hierusalem. Emanuel Empereur luy fit guerre, contre lequel il prit Chio, Rhodes, Samos, Meteplin & Istre. Il renonça à la Principauté l'an 15.

36. Pierre Polan gendre de Michel estoit fort sage, de maniere qu'il fut arbitre du different entre Conrad & Emanuel Empereur. Il fit guerre à ceux de Pise & Padouë qu'il vainquit. Il arma contre le Duc de la Pouille en faueur du susdit Emanuel, auquel il recouura plusieurs possessions prises sur l'Empire. Aucuns disent que ce fut son fils qui gagna les batailles, & que luy estant tombé malade, s'en retourna, & mourut le 18. an.

37. Dominique Morosin nettoya le golphe de certains Corsaires d'Ancone, dont le chef Cuiscard fut pris & pendu. Il fit assieger Pola, qu'il prit avec Parenzo, lesquelles villes s'estoient rebelles en Istrie. Eut confederation avec Guillaume Roy de Sicile, duquel il obtint plusieurs exemptiōs pour le trafic des marchands. Zara fut faite Metropolitaine à son instance, & fit que Dominique 9. son fils en fut esleu Comte.

38. Vital Michel second, subjuga les Tarentins qui s'estoient rebelles pour la troisieme fois. Il fit prisonnier Vlrice Patriarche d'Aquilee, & douze Chanoines. En cent iours il mit

cent galeres & vingt nauires en mer contre l'Empereur Emanuel. La famille des Iustiniани se trouua de son temps recuite en vn seul, qui estoit Religieux, lequel il retira du Monastere par consentement du Pape, & luy donna vne sienne fille en mariage: il vint vne grande peste de son temps, de laquelle le peuple luy attribuant la faute, il fut bleisé, & mourut, ayant gouuerné 17. ans, 27. iours.

39. Sebastien Ziani fut le premier esleu par dix Eslecteurs. De son temps y eut vn grand schisme en l'Eglise pour l'occasion de l'Empereur Frederic Barberousse, qui occasionna qu'Alexandre troisieme abandonna le saint Siege, Octavian ayant esté fait Antipape, Alexandre se retira à Venise, où ayant long-temps seruy au Monastere de la Charité, il fut en fin recogneu & leué par le Prince & Seigneurie. Barberousse fit la guerre contre les Venitiens à ceste occasion, Octavian son fils fut pris, qui moyenna la reconciliation, & que son pere vint à Venise baiser les pieds du Pape: il obtint plusieurs priuileges en recognoissance, & mourut l'an 5.

40. Aurie Maripiere fut le premier Duc esleu par les quarante creez à cet effect, apres la mort de Ziani. On luy donna six Conseillers pour autoriser ses deliberations. Il reconquit Zara qui s'estoit rebellee pour la quatrieme fois. Il enuoya au secours des Chrestiens contre les Mores qui vsurpoient la Terre sainte, huitante-huict ans apres que Baldoïn l'auoit deliuree. Ptolemaide fut reprise, & Andronicus successeur d'Emanuel Empereur deliura plusieurs marchands Venitiens. Il renonça à la Principauté le 14. an, pour se faire Religieux.

41. Henry d'Andule fut encores esleu par les 4. Ceux de Zara firent encores vne fois vaincus, & Pola conqueste. De son temps se fit la prise de Constantinople, & l'acquisition de l'Empire du Leuant, à quoy il assista les Princes & Barons François: il mourut le 13. an estant General de toute l'armee Chrestienne.

42. Pierre Ziane fils de Sebastien, fut fait Duc vn certain temps apres la mort du Dandolo, les Correcteurs estans lors instituez: de son temps vindrent des Ambassadeurs d'Athenes & d'Achaie, pour se soumettre à l'obeissance de la Repub. Candie fut peuplee d'une colonie de nobles Venitiens. Il espousa Constance fille de Tancrede Roy de Sicile. En fin il renonça à la Principauté, ayant gouuerné 24. ans.

43. Jacques Tepulus fut fait Duc par sort en concurrence de Renieri Candolo qui eut autant de voix comme luy. Candie se rebella, & furent les seditieux chastiez. Zara qui auoit secoué le joug, fut remise à l'obeissance. Il y eut guerre contre les Ferrarois, & contre Ezzelin qui s'estoit impatronisé de Padouë. En fin il quitta la Principauté le 21. an, & mourut peu apres.

44. Marin Morosin fut fait Duc par les 40. à cause de la concurrence precedente. De son temps fut encores enuoyee vne colonie de nobles en Candie, qui y bastirent Canea. Il fit guerre contre Ezzelin qui assiegeoit Mantouë, lequel de rage fit mettre en pieces 12. mille Padoitans qu'il auoit en son armee. Il mourut l'an 4. de sa Principauté.

45. Rayuier Zene estant Podesta à Fermo fut esleu Duc, & enuoyé leuer avec quatre galeres. Sous luy la Republique obtint vne signalee victoire contre ceux de Gennes: mais le contentement en fut bref, d'autant que Michel Paleologue chassa les François & Venitiens de Constantinople, aydé par les armes des Geneuois l'an 58. apres la prise d'icelle ville. Vne autresfois ceux de Gennes furent encores vaincus, & ayant gouuerné seize ans, il mourut.

46. Laurent Tepulus fut fait Duc pour la ressouenance de la victoire qu'il remporta sur ceux de Gennes à Tiro. Il allia fort noblement deux de ses fils avec des Dames estrangeres, à l'occasion de quoy se fit vne loy pour l'aduenir, que cela ne peut estre. Ceruia se mit en l'obeissance de la Rep. & les Bolonois furent vaincus. Il gouerna 7. ans, 25. iours.

47. Jacques Contarin à l'aage de 80. ans, fut de Procureur de S. Marc fait Duc. La loy contre les illegitimes, fut publiee, & eux exclus de toutes charges publiques. Il s'émeut quelques rebellions en Istrie, & par ceux de Gennes, qui furent appees. En fin pour son aage trop grand, il renonça à la dignité par l'aduis du Senat, ayant gouuerné 4. ans, 6. mois.

48. Dandule fut esleu estant absent. La Cité fut de son temps affligée par eau & tremblement de terre. Il se fit guerre en Istrie contre le Patriarche d'Aquilee & le Comte Coritia. A l'instance du Pape Nicolas, il secourut avec 25. galeres l'Archeuesque de Tripoli, mourut 7. mois apres l'an 8.

49. Pierre Gradonic homme courageux, deliura la Republique de 2. grands dangers, l'un pour vne grande disgrâce aduenüe en vne bataille contre ceux de Gennes: l'autre pour la conjuration de Bajamonte, qui fut reprimée les armes en main sur la place de saint Marc. Il fut ordonné que la Noblesse seulemēt auroit le gouuernemēt, & le Conseil des 10. institué.

Ayant gouverné vingt-deux ans neuf mois, il mourut.

50. Marin George estoit si bon, que l'on le surnomma le Saint. Venise fut toujours excommuniée de son temps, à cause de la prise de Ferrare. Zara se rebella pour la sixiesme fois, & y eut beaucoup de peine à la ranger à son deuoir. Il fit bastir le Monastere de S. Dominique, & mourut aagé de 81. an, la 1. année, ayant gouverné 10. mois, 10. iours.

51. Iean Sourence eut l'honneur du recouurement de Zara, & autres lieux alienez du vivant de son deuancier. Negrepont fut recouré, & fit guerre contre ceux de Gennes. L'excommunicatiō fut leuée à Venise par l'entremise de François Dandule qui se jetta aux pieds du S. Pere, vne chaisne de fer au col. Le nombre des Procureurs de S. Marc fut accru iusques à 6. Il gouverna 16. ans, six mois.

52. François Dandule qui s'estoit tant humilié pour sa patrie, fut esleué à la plus haute dignité qu'elle ayt. Ceux de Pola & Valesé se soumirent à la Republique. Ce qui occasionna la guerre contre le Patriarche d'Aquilee. Padouë fut prise sur Albert Scaliger, & Treuise, & la Comté demurerent à la Republique. Il fut de la ligue des Princes Chrestiens contre le Turc, & de son temps se trouuerēt 60. Ambassadeurs à Venise. Il gouverna 10. ans, 10. mois.

53. Barthelemy Gradonic Procureur de S. Marc, fut fait Duc à septante-six ans, par la cession d'André Dandule. De son temps aduint le renommé miracle de S. Marc, S. George, S. Nicolas qui deliurerent Venise d'une horrible inondation imminente. Candie se rebella, & les rebelles furent seuerement punis. Il y eut vne grande cherté en la Cité, qui occasionna vn mécontentement du peuple, & mourut l'an 4.

54. André Dandule qui auoit quitté au Gradonic, fit cesser la cherté, ayant enuoyé charger des bleds en Sicile. Il obtint du Roy de Babylone la nauigation libre en Egypte. Zara se rebella la 7. fois, & fut reprise. La guerre se fit à ceux de Gennes, & la Cité fut trauaillée de 2. grands accidents, vn tremblement de terre, l'autre de peste. Il gouverna douze ans, moins quelques mois.

55. Marin Phalere fut esleu estant Ambassadeur à Rome. Ayant receu vn injure de quelques particuliers qui ne fut pas vengée selon son desir, il delibera en l'aage de 80. ans, se faire Seigneur absolu. La conjuration decouuerte par Nicole Lion, il eut la teste tranchée dans le Palais, & fut ordonné qu'au lieu de son pourtrait seroit escrit, *Icy est la place de Marin Phalere, qui pour sa griefue faute a eu la teste tranchée.* Il fut Duc 10. mois.

56. Iean Gradonic surnommé Nafon, fut beau d'esprit, & laid de visage. La guerre se renouella contre Gennes qui se termina en vne paix. Il eut encore guerre contre le Roy de Hongrie pour la Dalmatie. Treuise fut assiégée de son temps, & y alla en personne. Il gouverna 1. an, 3. mois, 14. iours.

57. Iean Dauphin fut esleu Duc lors qu'il estoit dans Treuise pour la deffendre contre le Roy de Hongrie. Le Senat enuoya demander passage libre pour luy, lequel refusé, il sortit avec 200. cheuaux à la barbe de l'ennemy, & se rendit à Margliera où le Senat l'alla leuer. En peu de temps il termina ceste guerre là, & recouura Conilian, Serual, & Afolo. Il fit la paix pour la souueraineté de la Dalmatie, & mourut l'an 45. ayant gouverné 4. ans, 2. mois 11. iours.

58. Laurent Celse sur le faux bruit d'une victoire contre ceux de Gennes, fut fait Duc en recurrence de Pierre Gradonic, Leonard Dandule, & Marc Cornare, Candie se rebella, & y eut de grandes difficultez à la r'auoir. A ceste occasion se fit vne iouste & feste publique en la place S. Marc. Il mourut deux iours apres le 4. an de sa Principauté.

59. Marc Cornare homme fort docte & sage, enuoya en Candie, qui s'estoit rebellee, s'y fit vne fort cruelle guerre, le Pape ayant mesmes donné indulgence pleniére à ceux qui y iroient. Les rebelles ayans esté seuerement punis, la Republique fit present au Pape Urbain 5. de certain nombre de galeres, il gouverna 2. ans, 5. mois, 24. iours.

60. André Contarin s'enfuit sur le Padouan de crainte d'estre esleu Duc, comme presageant la ruine qui de son temps deuoit arriuer à la Rep. 1. se fit la guerre par ceux de Trieste, puis apres par le Carrara pour les confins de Padouë, qui fut telle que Chioggia estant pris, la Cité de Venise se trouua en extreme danger. Mais en fin il alla en personne s'opposer aux ennemis, les vainquit, & reprit Chioggia. Il mourut ayant gouverné 15. ans, 4. mois, 15. iours.

61. Michel Morefin estoit homme remply de doctrine & sagesse. Aucuns disent que de son temps l'Isle de Tenedos fut prise, & non du temps de Contarin son predecesseur. Il fut fait diuerses loix, & entr'autres celles qui ordonnent que les homicides qui estoient pendus eussent à l'aduenir la teste tranchée. Il ne vescu que quatre mois, 5. iours, & mourut au 74. de son aage.

62. Antoine Venier rigoureux obseruateur de la Iustice, fit confiner vn sien fils en exil, pour auoir trop legerement offensé la famille d'un noble Venitien. Il fit ligue avec Galeazzo Viconte

Vicomte contre le Carrara, sur lequel se prit Padouë. Il secourut l'Empereur Emanuel contre le Turc, & ayda à Sigismond Roy de Hongrie, qui depuis vint à l'Empire. La place de S. Marc, & celle de Realte furent grandement embellies de son temps. Il mourut 1. mois, 3. iours apres l'an 18.

63. Michel Stene eut la dignité de Procureur de saint Marc avec celle de Duc. Si gagna vne bataille importante contre les Geneuois. Le Carrara fut vaincu pour la derniere fois, & Padouë & Verone pris. Ceux de Vicence pour se deliurer de sa tyrannie se rendirent à la Republique. Ladislas Roy de Hongrie quitta semblablement Zara. Il mourut ayant gouverné 13. ans, 3. iours.

64. Thomas Marenige fut premierement general du Golfe. Il embrassa la paix pour faire que les citoyens trafiquassent. Udine vint à l'obeissance de la Republique, avec la patrie du Friul par la faueur des Seigneurs Sauorgnani qui furent faits nobles de Venise. Les Florentins furent secourus contre le Duc de Milan. Il mourut le 10. an, 3. mois.

65. François Foscare reprima fort le Duc de Milan qui empietoit sur la liberté d'Italie, Brescia, Bergamo & autres villes de Lombadie furent acquises, entre lesquelles Lode & Parme, & Rauenne en la Romanie. Il fut aussi fait de grands progrès en mer & en la Moree. Le Senat secourut Paleologue Empereur contre les Turcs qui vsurperent Constantinople l'an 1453. Il fut esleu arbitre par le Duc de Milan en certains differents de voisinage. Le Roy de Darie fut fait noble Venitien, puis le Duc pour sa grande caducité fut démis, ayant gouverné 34. ans, six mois.

66. Palchal Malpiere fut mis en la place de Foscare, estant Procureur de S. Marc, qui mourut deux iours apres sa demission. Il se fit vne loy, que pour l'aduenir le Duc ne peust estre déposé. De son temps l'Imperatrice fut introduite à Venise. L'Arcenal fut grandement accru, & entretint le peuple en paix pendant quatre ans, six mois, cinq iours qu'il gouverna.

67. Christoffe Mores encores fait de Procureur de saint Marc Duc, s'entretint quelque temps en paix, tant que le deuxiesme an de son gouvernement le Turc enorgueillly pour la prise de Constantinople declara la guerre aux Venitiens. Ils firent ligue avec le Pape Pie II. & le Duc de Bourgogne, mais le Pape venant à mourir, ils demurerent seuls, & soustindrent 10. ans la guerre. Il mourut ayant regné 9. ans, 6. mois.

68. Nicolas Tron eut le bon-heur, que de son temps les affaires de la Republique allerent assez bien contre le Turc. Pierre Morcenige general en l'Archipelago vny avec le Pape, le Roy de Naples & ceux de Rhodes, mit 85. galeres ensemble, & prit Satalie Cité de Panfilie. Il se fit encor ligue avec le Roy de Perse contre le Turc. Iacques Roy de Cypre estant venu à Venise, espousa Catherine Cornara fille adoptiue de saint Marc. Il gouverna vn an, huit mois, 5. iours.

69. Nicolas Marcel Procureur de saint Marc, apres quelques loix faites par les Correcteurs, fut esleu Duc. De son temps se fit vne coniuration en Cypre pour faire tomber le Royaume entre les mains de Ferdinand Roy de Naples. Pietro Morcenigo y alla avec vne grosse armee, appaisa tout, & fit seuerement punir les rebelles. Scutari fut assiégé du Turc, & vaillamment deffendu par Antonio Loretano. Ce Duc gouverna vn an, quatre mois, 17. iours.

70. Pierre Moncenigue fut esleu Duc pour la ressouenance de ses braues faits. Lepante fut assiegee de son temps par les Turcs, & vaillamment deffenduë par Antoine Loredan. Ils porterent leurs armes contre l'Isle de Stalimene, & le mesme Loredan monstra sa valeur à la deffendre. La fille du Roy Ferdinand vint à Venise avec le Cardinal son frere, où ils furent regalez. Ce Prince fit battre vne monnoye qu'il surnomma de son nom, & ne gouverna qu'un an, 2. mois, & 9. iours.

71. Andre Vendramine eut du malheuren son gouvernement, que l'armee Venitienne fut deux fois mise en route par les Turcs: l'une près Croya en Albanie, l'autre dans la patrie du Friul. En sa personne il eut l'heur qu'estant fort beau il eut vne femme tre. belle, & de beaux enfans, qu'il allia par mariages aux premieres familles. Il gouverna vn an, 8. mois.

72. Iean Mosenigue frere de Pierre Mosenigue, ayant continué la guerre contre le Turc, fit en fin la paix avec luy, moyennant qu'il laissast à Scutari & Scipula liberté du commerce, & pouuoit tenir vne bataille à Constantinople. Il se fit guerre contre Ferdinand Roy de Naples à l'instance du Pape Sixte 4. qui occasionna la longue guerre Sociale. En fin se fit la paix, la Republique ayant acquis Rouige & le Polesan. La Cite fut difformee de feu & de peste, & ce Prince mourut le 7. an, & 6. mois.

73. Marc Barbadic, la peste estant cessée, fit rebastir ce que le feu auoit brulé au Palais. Il auoit vne maxime differente de tous autres Princes, de sçauoir pardonner, oublier les

iniures particulieres qui luy estoient faites, & venger seuerement celles qui se faisoient contre l'Eltat. Le grand Seigneur luy enuoya vn Ambassadeur particulier pour congratuler son election. Il ne gouuerna que neuf mois.

74. Augustin Barbadic resista aux progres de Charles 8. Roy de France, lors qu'il fit la guerre contre ceux d'Aragon pour le Royaume de Naples qu'il conquist. Le Turc vsurpa sur la Republique Lepante, Modone, Corone. Le Royaume de Cypre fut mis sous la tutelle du Senat, & la Royne Catherine amenee à Venise. L'office de la Santé fut cree à l'occasion de la peste. Le Duc gouuerna 15. ans, 21. iours.

75. Leonard Loredan soustint vne tres-rigoureuse guerre contre les premiers Princes du monde, s'estant fait à Cambray vne ligue entre l'Empereur Maximilian, le Roy de France, celuy de Naples, les Ducs de Sauoye, Ferrare, & Mantouë, incitez par le Pape lules 2. Tout l'Eltat de la Terre ferme fut pris fors Treuise, mais en fin il fut recouuert. Il vescu en Principauté 19. ans, 8. mois, 20. iours.

76. Antoine Grimani estant general en vne deroute signalee, pour occasion de laquelle il fut demis de la charge de Procureur saint Marc, & conuaincu à Cherfos: Il rompit son ban & se retira à Rome près le Cardinal son fils, où il rendit de si bons offices, que non seulement il fust restably en sa dignité de Procureur, mais encores fait Duc en l'age 82. ans, & ne gouuerna qu'un an, 10. mois, 2. iours.

77. Andre Gritti ayant emporté la meilleure part de la gloire pour la reprise de Padouë, fut en grande estime. Il fit tant enuers le Roy de France, où il estoit prisonnier, que la Majesté s'allia avec la Republique, & que Verone & Brescia furent reconquises. Il sceut si bien se comporter au gré du Senat pendant les guerres d'entre l'Empereur Charles cinquiesme, & François premier, & encores contre Soliman. Il gouuerna 15. ans, sept mois, & huit iours.

78. Pierre Laude continua la deffence de la Republique contre le Turc, avec lequel il fit en fin vne paix, dont il sceut jouyr, & se maintenir pendant les guerres des susdits Charles & François: il gouuerna 6. ans, 8. iours.

79. François Donat vsint du benefice de la paix, orna la Cité de diuers beaux edifices, entr'autres celuy du Palais: il enuoya du secours à l'Empereur contre certains rebelles en Allemagne. Les Princes de Guise estans venus de son temps à Venise y furent regalez selon leur dignité. Il gouuerna 7. ans, 6. mois.

80. Marc Antoine Treuisan homme du tout deuotieux, rechercha que la Republique fust abondante en biens & en bonnes mœurs, empeschant par son bon exemple, que les vices ne s'y glissassent comme ils font en vne trop longue paix. Il gouuerna vn an, moins trois iours.

81. François le Viuiier sceut tellement gouverner la Republique, qu'encores que de son temps le Turc fist guerre en la Pouille, & le Roy de France en Toscane, la Royne de Pologne fut regalee à Venise. Il gouuerna 2. ans, 1. mois, 20. iours.

82. Laurens Prioli fut sollicité par le Pape de faire la guerre à l'Empereur, mais estant amy de la Republique il ne voulut l'offencer, & moyenna la pacification des affaires. De son temps se fit la paix entre la France & l'Espagne. Charles 5. mourut. Ce Prince gouuerna 3. ans, 11. mois, 8. iours.

83. Hierosme Prioli frere du precedent, jouyt des grands honneurs que le Pape Pie 4. fit à la Republ. que, laquelle il fauorisa singulierement d'oüyr les Ambassadeurs d'icelle en la sale des Roys. De son temps fut conclud le Concile de Trente, où il auoit enuoyé pour Ambassadeur Nicole de Ponte, & Mattheo Dandolo. La Republique tint au Baptisme le fils du Duc de Sauoye, né de Marguerite de France. Il mourut ayant gouverné huit ans, 2. mois, quatre iours.

84. Pierre Loredan pour la concurrence de deux autres, fut esleu contre l'esperance de tous & de soy-mesme. L'Arcenal brulla de son temps, & y eut vne grande cherté de toutes choses. Selim successeur de Soliman prit de là occasion de rompre la paix avec la Republique, à laquelle il demanda le Royaume de Cypre. Et se meut guerre à ce sujet. Il gouuerna 4. ans, 5. mois, 8. iours.

85. Louys Mocenigue, la guerre s'estant enflammee contre le Turc, perdit le Royaume de Cypre, Nicosia ayant esté prise, & Famagouste renduë. La Republique fit ligue avec le Pape Pie 5. & le Roy Philppes d'Espagne, de sorte que les armées jointes ensemble, elle obtint l'an 1571. vne signalee victoire contre les Turcs: peu apres Henry 3. Roy de France passa à Venise, où il fut magnifiquement regale. Ce Prince mourut le 7. an.

86. Sebastien le Venier fut esleu d'une commune voix, avec tel applaudissement que certains Turcs luy allerent mesmement baiser les pieds. Il se crea cinq Correcteurs sur les loix

loix, pour le reglement des affaires du Palais. La cité fut deliuree d'une cruelle peste, apres le vœu fait d'edifier l'Eglise du Redempteur. Le feu se mit au Palais qui l'endommagea fort. Ce Prince ne gouverna pas un an entier.

87. Nicolas du Pont fut créé Duc homme tres docte en toutes sciences, dont il avoit fait profession publique dans Venise. Il passa par tout les honneurs dont la Republique peut gratifier les citoyens. Le Seminaire de S. Marc fut institué par luy. Certains Princes du lappon estans arriuez à Venise y furent tres-favorablement caresez. Il fit bastir le Pont de Canareggio, & gouverna sept ans, neuf mois, treize iours.

88. Paschal Cicogne Procureur de Saint Marc, fut esleu ainsi qu'il oyoit Messe en une Eglise. De son temps y eut de grandes guerres en France & Espagne pour le Piedmont: & entre l'Empereur & le Turc pour la Hongrie. Il fist bastir la ville de Parma es confins de la patrie du Friul, & une forteresse nouvelle en l'Isle de Cefalonie. Il eut l'honneur de l'esmerueillable pont de Realte qu'il fit bastir: & gouverna dix ans, ou environ.

89. Marin Grimagni Procureur de S. Marc, fit tant au contentement du peuple que le jour de son eslection se firent des signes extraordinaires de ioye continuez plusieurs iours suiuvans. Le secon an de sa principauté il fit couronner en triomphe la Duchesse sa femme, à laquelle le Pape Clement VIII. enuoya la rose d'or. De son temps se firent de grandes allegresses, pour paix conclüe entre les Roys de France & d'Espagne. Sur l'occasion de la venue du Pape à Ferrare, acquis à l'Estat Ecclesiastique, le Cardinal Aldrobrandin passant à Venise y fut tres-honorablement caressé avec d'autres Cardinaux. Il y eut un si grand débordement d'eaux le 5. an de sa principauté, que les gondoles & barques estoient sur la place de S. Marc, comme en plaine lagune. Il mourut avec tres-grand regret du peuple, ayant gouverné dix ans, dix mois.

90. Leonard Donat ayant pour ses merites, prudence singuliere & dexterité au manement des affaires, passé par tous les honneurs que la Republique peut faire à ceux qu'elle recognoist fideles, fut mis en la place de Grimagni le dix lanuier 1606. Il avoit esté enuoyé Ambassadeur à Constantinople vers Mahomet nouvellement venu à l'Empire d'Orient pour luy faire au nom de la Republique les complimens accoustumez. Il a une telle pratique des affaires & memoire si heureuse, dans une ame recogneuë si saintement zeleé au bien commun, que le Senat luy defere plus qu'à aucun de ses predecesseurs.

La Cité a esté excommuniée de son temps par N. S. P. Paul V. pour des pretenions du S. Siege: & se peut dire que contre ces foudres il s'est monstré comme un rocher immobile à la deffence de l'Estat. Ainsi deux principaux pilliers de la Chrestienté menaçoient une grande ruine; n'eust esté que le tres-Chrestien Henry III. Roy de France, embrassa ces deux colonnes, les soustint l'une & l'autre pour les redresser, par l'entremise de ses Ambassadeurs, qui en ont erigé un arc triomphant à l'immortalité de sa gloire.

Tt liij





DES ESTATS DV DVC DE SAVOYE. SOMMAIRE.

1. **C**ONFINS & limites des pays du Duc de Savoie, diuisé en deux Estats, Piedmont & Savoie.
2. Description particuliere de la Duché de Savoie, ses Comptez & Baronnies.
3. Description du Piedmont, & ses principales villes.
4. De la Ville de Turin capitale du Piedmont, celebrée pour le siege & demeure des Ducs de Savoie, l'Vniuersité en toutes sortes de sciences, & le parc magnifique nouvellement dressé.
5. Du Marquisat de Saluzzes, & ses places plus importantes.
6. Des principales places de Piedmont fermées de murailles, outre les villes Episcopales.
7. Du Marquisat de Chene.
8. De la Comté de Nizze, diuisée en quatre Vicairies, & ses villes & places.
9. Fertilité du pays de Savoie & Piedmont, leurs lacs & principales riuieres.
10. Carrieres de Marbres nouvellement decouvertes.
11. Quel est l'humeur & naturel des Sauoyards & Piedmontois.
12. Richesses de Piedmont en mines d'or & d'argent, en trafic de fer, bestail, & draps de Pignerolle.
13. Calcul du revenu du Duc de Savoie.
14. Des forces du Duc de Savoie, ses forts & places de deffence, ses alliances & confederations.
15. Les pretensions du Duc de Savoie sur les autres Estats.
16. Quel est le Gouvernement du Duché de Savoie: du Senat de Savoie, & de celui du Piedmont.
17. Catalogue & denombrement des Ducs de Savoie qui ont seigneurie iusqu'à present.

1. **T**ous les pays qui sont sous la domination du Duc de Savoie estans pris ensemble continent du costé du Leuant avec l'Estat de Milan & de Montferrat, du Couchant avec la Bresse & la Franche Comté, du costé du Midy avec la Prouence, le Dauphiné, & plus bas avec le Geneuois, & la Comté de Nizze est baignée de la mer Mediterranée: & finalement ils continent du costé du Nort avec les Cantons des Suisses, de Berne, & de Fribourg.

Mais afin qu'on m'entende plus clairement, ie diuiseray le tout en deux seules parties, suiuant en cela la nature, veu que les montagnes ont diuisé cet Estat en Savoie & en Piedmont.

3. La Duché de Savoie a pour borne du costé du Ponant les deux riuieres du Rhin & du Rosne, & vers le Septentrion depuis les terres de la Iurisdiction des Suisses, & le Montjura ou Montjou iusqu'à la riuiere de Gennes, & au fleuve de Var, qui separe la Gaule d'avec l'Italie. D'un autre costé le pays de Savoie confine avec les nouvelles terres qui ont esté baillées au Roy de France pour eschange du Marquisat de Saluzzes, & s'en va iusqu'à Lozanne & autres places qui sont le long du lac Lemane, qui furent autresfois de la Iurisdiction des Ducs de Savoie. On compte la Comté de Maurienne, la Maurienne & le Marquisat de Suse pour partie de la Savoie, combien que ce soit du Piedmont. La Comté de Maurienne s'estend iusqu'à la riuiere d'Arche, où est la ville de Saint Jean de Maurienne, où est enterré Humbert I. qui receut la Comté de Maurienne, & la Duché de Savoie de l'Empereur Henry III. La Tarantaise est presque enfermée entre les montagnes des Alpes, & les riuieres d'Arc & d'Are, qui se melle avec l'Arch pres de Chamois. Ce pays a pour

a pour sa ville principale Moustieren Tarantaife, où est enterré Humbert II. Comte de Maurienne, qui adiousta à ses terres la Tarantaife.

Outre ce, il y a la Seigneurie de Folligny où est Ripaille, lieu fort agreable, & principalement renommé, à cause qu'Amedee VIII. premier Duc de Sauoye, s'estant despottillé de tous ses Estats, y fit profession de vie Monastique, & estant là, fut créé Pape par le Clergé assemblé au Concile de Basle l'an 1440.

Il y a encor la Duché de Cablais & les Baronies de Raud & de Gaz.

La capitale ville de Sauoye c'est Chambery qui est entre les montagnes, & assez bien bastie : les autres sont Nicy, S. lean de Maurienne, Moustier, Tonon, Montmelian, & quelques autres.

Le Piedmont, sans y comprendre la Comté de Nizze, s'estend depuis la riuere de Cesis jusqu'au Dauphiné, entre les Alpes, le Montferrat, & les Estats de Milan & de Gennes. Il a pour ses bornes du Leuant le Po, du Midy les montagnes de Gennes, du Couchant les Alpes Gauloises, & du Septentrion la riuere de Dorie. Quelques-vns luy donnent pour bornes du Leuant la riuere de Cesis, du Couchant le Mont de Tende & Corre, du Midy le Marquisat de Montferrat, & du Septentrion les Alpes Gauloises.

La ville capitale du Piedmont c'est Turin, les autres villes sont Vercel, Ast, Iuree, Oste, Mondeui, Fossan, Saluzze, Carmagnole, dont Ast & Iuree furent colonies des Romains aussi bien que Turin. Ast & Vercel ont grand circuit, & sont assez bien basties, principalement Ast, qui peut estre comparee aux plus magnifiques villes de Lombardie, pour la grandeur de ses Palais.

Vercel ville tres-ancienne est capitale des peuples Lybiques, qui sont entre les riuieres de Cesis & de Dorie. Ce fut où Leon IX. celebra vn Concile general contre Berengaire. Iuree que les escriuains d'auourd'huy nomment Lamporeggio, & que les anciens ont nommée Eporedia, est capitale des peuples Salassiens, auourd'huy Canauois. Elle est à l'entree du Val d'Oste sur la riuere de Dorie, en vne assiette si commode, que Berengaire & puis Ardoüin qui en furent Marquis, eurent bien le courage d'aspirer à se rendre Roys d'Italie. Oste bastie par Auguste est à la bouche des Alpes Grecques & Penines, qu'on nomme auourd'huy le grand & le petit mont S. Bernard. On passe par le grand dans le pays de Valais, & par le petit dans la Tarantaife. Ceste ville est capitale d'une vallee qui prend son nom d'elle. On y void encor auourd'huy force belles antiquitez, & entre autres vn arc qui est fort beau.

Turin est auourd'huy fort renommée pour la demeure des Ducs de Sauoye, & pour l'Vniuersité qui y est. Elle fut autrefois plus grande qu'elle n'est, mais les François qui l'ont possedee ne se soucierent d'en retrancher afin de la rendre plus forte. Elle est assise pres du Po en vn lieu fort important à l'Italie : à raison de quoy les Romains y menerent vne colonie, & Auguste l'honora de la porte qu'on nomme auourd'huy du Palais, & les Lombards y establirent le siege del'un de leurs quatre Ducs. Le Duc de Sauoye y a fait vn parc qui a de tour cinq ou six milles en vne des plus agreables assiettes d'Europe. Ce parc est environné du Po, de la Dorie, & de la Sure, & est plein de bocages, de petits lacs, de fontaines, & de toute sorte de chasse que ce Duc y a assemblée : & tout autour de Turin il y a tant de villages & de maisons de plaisir, qu'elles sont comme vn autre Turin.

Mondeui (que quelques-vns estiment auoir esté basti sous l'Empereur Conrad) est assis sur vne colline avec faux-bourgs espars çà & là : mais les plus grands sont au pied de la dicte colline sur la riuere d'Elle, qui se va rendre à deux milles de là dans le Tanare. Elle a plus de peuple qu'aucune autre ville de Piedmont. Entre les autres faux-bourgs il y a celui de Viq, d'où tire son nom vne nouvelle deuotion qu'on a à nostre Dame, à laquelle le Duc de Sauoye a basti vne Eglise, & en icelle vne chappelle où il veut que les Ducs de Sauoye soient enterrez.

Fossan est assis en vne colline sur la riuere de Stroure au milieu d'une campagne. Entre les autres bastimens il y a vn assez agreable chasteau.

La ville de Saluzze est assise pres des Alpes, & est capitale du Marquisat, qu'on nomme de mesme sorte, où le Po prend sa source. Ceste ville est assez grande, & a vn grand chasteau où il y a des lieux pour loger en hyuer, & d'autres pour demeurer en Esté. Les places plus importantes de ce Marquisat sont Dronere, & Carmagnole.

Il y a aussi Raul, Doglian, par lequel passe vne grande partie du trafic qui se fait entre le Piedmont & la riuere de Gennes, puis Verzole, Mante, & Pagny, & la riche Abbaye de Staffarde.

Ce Marquisat avec quelques terres de Prouence qui sont au delà des Alpes, a esté vnny de nostre temps au Piedmont, & le Duc de Sauoye a donné en contre-eschange au Roy de

France, à qui le tout appartenoit, la Bresse, & les autres terres des environs, qui sont de plus grande estenduë que le Marquisat de Saluzzes.

Mais Piedinont outre les citez ou villes Episcopales, il y a environ deux cens cinquante places fermées de murailles, entre lesquelles il y en a plusieurs qui ne cedent en rien à beaucoup de villes qu'on estime bonnes, comme Biele, Quiers, Cune, Suse, Auigliane, Riuole, Pinarol, Moncalier, Carignan, Raconis, Queyras, Bené, Villefranche, Vigon, Pancalier, Brusque, Bargé, Lauene, Sauillan, Cheue.

Biele, & Pinerol sont presque en mesme façon sous les Alpes diuisées en place, costau & plaine.

Mais la ville de Biele a vn grand tour, & de beaux bastimens, entre lesquels on compte par excellence les Conuents de saint Hierosme, de saint Dominique, & de saint Sebastien. Il y a à Pinerol vn chasteau. Quiers fut honoré par Federic Barberousse du titre de grande ville : & vrayement elle est telle pour ses belles Eglises, ses beaux Conuents, & ses maisons, & pour beaucoup de nobles familles, & de riches marchands qui y demeurent.

Cuny est assise entre la Stoure & le Gesse. Suse a iadis esté grosse ville, & de grande importance : mais depuis qu'elle fut saccagée, & bruslée par l'Empereur Federic Barberousse, elle n'a iamais peu recouurer sa premiere grandeur. Elle est toutesfois en vne assiette importante, pource qu'il y a deux chemins qui en partent, & vont par tous les Alpes, & l'un tend par Essilles à Briançon, l'autre par le Monfanois à Lyon.

Auillane est bonne ville, riche & marchande, & a vn chasteau qui est assis au haut d'une montagne, avec vne source d'eau viue. Riuole se vante de la naissance du Duc de Sauoye d'à present, qui y fait bastir auourd'huy magnifiquement.

Moncalier est assez grande ville, & Carignan est renommé pour son chasteau, & pour vn long siege qu'il a soustenu autresfois. Il y a forces nobles familles qui y ont fondé entr'autres choses vn Monastere de Religieuses qui doiuent estre toutes Dames.

Queyras est agreable pour ses ruës qui sont & fort droictes & fort larges, & Cené est fort d'assiette. On estime Raconis pour son Palais & ses reservoirs, & Busque pour le titre d'un des sept Marquisats des descendants d'Aleran.

Sauillan est renommé pour la beauté de sa place, & du Monastere saint Benoist, mais son assiette est telle que l'Empereur Charles V. passant par là en son voyage de Prouence, dict qu'il n'auoit iamais veu pays plus propre à entretenir vne armée : & le Duc Philibert Emanuel trouua ce lieu tant à son gré qu'il eut enuie d'y establir sa demeure, & de rendre Sauillan capitale de la Prouence. Briqueras n'a rien de recommandable que son assiette.

Cheue est capital d'un beau Marquisat qui comprend vingt six places. Il embrasse entre autres choses la vallee de Tanate, sur laquelle est ladite ville de Cheue, & Bagnasque, & Garesse & Ormee, à 15. milles de laquelle ledit fleuve naist d'une grosse fontaine. On passe de l'Estat de Cheue à celui du Mare & d'Oncille.

On trouue apres Mulazan, lieu de passage, & ayant passé le Pex on void la Quiuse, pays propre à habiter en Esté, puis la Trinité & la Montee, puis Grane chef d'une vallee : & apres Chental autresfois fortifié par le Marechal de Bellegarde. Polenze où fut l'ancienne Polenze, Celole, Carai, & entre la Maire & la Veraité, Caualemort, Casalgrosso, Causalion, Castagnol, Ruffie : puis entre le Gilbe & le Po, Morete, fief d'importance, Scarnafis, Legnasque, Irasque, Villart. Entre le Po & le Pele, Cardei, Stasfard, Cauor, Carfillane, Villar de Bobbi. Vn peu iadis au de là on voit Lucerne capitale d'une Comté & d'une grande vallee qui fait plus de vingt mille ames, outre laquelle y a la Perouse avec sa vallee.

On voit apres entre le Pele & la Quisole, Scalengue, Cercenasco, Virle, Piodes, Vinouo avec vn fort magnifique Palais des Seigneurs de la Rouere, Lombrisas, Cumiane, Piozasco, Orbazan, & entre le Sangon & la Dore Arpignan, Colegne, Monosterol. On trouue apres le Val de Stoure, & puis Lanz avec sa petite vallee, & plus bas l'agreable terre de Chirié. On entre apres en la vallee de Pont où sont Cornié & Valpergue. On aperçoit plus bas la riche Abbaye de saint Benigne. Entre l'Orque & la Quiusele on decouure plusieurs chasteaux, & sur la fin la forte place de Chiuas, & apres qu'on a passé la Dore, on trouue Baucie, Masin Comté, Cilian, Creschentin chasteau du tout agreable, Stropian, saint Germain, Sancier renommé pour le siege malheureux du Duc d'Albe, & plus au dessus Candel, lieu d'environ sept cens feux, Andorne de plus de treize cens, de mesme que Dioglie, Mos de sept cens feux, & Gattinare ville battie par les Seigneurs de la maison d'Arbore, qui en prin-

en prindrent apres le furnom, & qui en ont esté maistres desia durant quelques siecles.

Durant les guerres qui furēt entre l'Empereur Federic & les Papes, ces Seigneurs se retirerent de la subiection de l'Empire, & vescurent en ceste sorte iusqu'à ce que craignants l'ambition & la puissance des Ducs de Milan, ils se ietterent entre les bras d'Amé premier Duc de Sauoye. Delà le Po on descouure Bra, qui est de sept cens feux & dauantage, Caramagne, Someriuë, Cerisoles renommee par la deffaicte du Marquis de Gasi sous la conduite du Duc d'Anguien. Puis on voit Villastellon, Pœrin, Villeneuve forte place, Ganuelle, Cottemille diuisee en deux parties par la Bormie. On voit apres vn nombre infiny de chasteaux appartenans à la Comté d'Ast, & plus au dessus Coconas Comté qui est sous la domination de la maison de Sauoye depuis quelques annees par le moyen du Duc Charles.

Le Comté de Nizze a vingt-deux lieues de long, & vnze de large, entre le Var, au de là duquel toutesfois il y a quelques lieux qui en sont, & le Dauphiné, le Piedmont & la riuierre de Gennes.

Ceste Comté est diuisee en 4. Vicairies, dont les villes capitales sont Nizze, le Poget, Barcelonnette & Sospelle, à quoy l'on peut adiouster S. Estienne avec sa vallee, veu qu'en cor qu'elle ne porte Vicairie on compte plus de trente places fermees de murailles, outre plusieurs autres qui ne le sont pas.

La plus renommee de ces places c'est Villefranche, pour la commodité de son port, nommé par les anciens Port d'Hercule Monæce. On voit apres Ese, & plus auant Zobie, lieu où naquit l'Empereur Pertinax, & où l'on void encores auourd'huy les trophées de l'Empereur Auguste. Les autres places plus remarquables de ceste Comté sont Comtes, Pellie, Saourge, qui a vn fort chasteau, la Brique qui a enuiron quatre ou cinq cens feux.

Lantusque assez bonne place, & capitale d'une vallee, de mesme que saint Dalmace de la plaine: Boglie capitale d'une riche Comté, Poget confine avec la Prouence, Barcelonnette patrie du Cardinal Hugues, capitale d'une vallee, & lieu de bon trafic: Sospelle est vn bon lieu, bien basti, & entre autres choses, il y a vne fontaine d'eau delicate, que l'on y a conduite des montagnes voisines.

Mais pour dire particulierement quelque chose de Nizze, elle est belle, & bien peuplee, elle a ses maisons de cinq & de six estages, ses rues fort droictes, principalement celle qui va du pied de la montagne à la porte de saint Alov.

La Comté de Tende est conioincte à celle de Nizze, & ceste Comté s'estend iusqu'aux confins de Cune. On peut passer par quatre lieux du Piedmont en la Comté de Nizze, par la montagne de Corue, qui meine à Tende, par celle de Fenestre qui conduit à saint Martin, par celle d'Arnouue sur Vaudere, & par l'argenterie qui va à Barcelonnette.

QUALITE.

LA Sauoye a grande quantité de bleds en ses vallees, & force pasturages aux montagnes, & en quelques lieux de fort bons vins, comme à Montmelian, & à Mortene. Il y a aussi quelques lacs qui abondent en poisson: mais les plus renommez sont ceux de Nicy, du Bourget, & de Geneue. Elle contient beaucoup de grandes montagnes, tellement que celui qui marche par ce pays descouure tousiours de nouvelles choses, pource que tantost il void que les passages s'eslargissent, & tantost que les montagnes se restreussent, & que maintenant elle se haussent, puis elles se baissent, maintenant elles s'aduancent; maintenant elles se retirent, tantost elles te conduisent en vne plaine, tantost elles t'enferment dans vn vallon. Elle n'a rien de particulier, ny de remarquable. L'air y est assez sain: mais il y a quelques eaux qui font enfler la gorge à ceux qui en boient, & l'on appelle ceste enflure en ce pays le Goytre, qui veut dire le gosier, ou gras gosier.

Quant au Piedmont, il est arrosé du Po, du Tanare, de la Stoure, de la Dore, & d'environ vingt-huict autres riuieres grandes; ou petites, & de diuers canaux, dont il y en a huict au seul territoire de Cune. On tient communément qu'il n'y a endroict d'Italie plus agreable, plus abondant en grains, vins, fruits, chairs sauages, & autres, fromages, chataignes, chanvres, lin, & mineraux.

Le pays d'autour d'Ast est arrosé de riuieres, ombragé de bois, releué d'agreables collines, a de belles campagnes, & produit force fruits qui sont bons en perfection, & particulierement des melons qui sont des plus excellens qu'on mange. On mange à Vercel le pain le plus blanc, & les plus gras chapons, que l'on puisse voir. Plin fait mention de quelques mines d'or du pays d'autour de Vercel, dont on void encores quelques marques

vers Ponderan. Pres de Lamporeggio il y a grande quantité de chanvre. Le Val d'Oste dure plus de deux iournees, & est toute chargée de bleds à main gauche, & à main droite de vignes qui portent des vins excellens, dont les meilleurs sont ceux de Calogne. On void elleuer à vn quart de mille de Turin sur la rive du Po vne montagne qui se hausse, & s'abaisse, s'auance, & se retire de telle sorte en diuers endroits si à propos, qu'elle a par tout des eaux qui l'arrosent: elle porte de foins, des fruits des toutes sortes, & sur tout de fort bons vins.

Le terroir d'autour de Mondeui est de grande estenduë. Il a y des vins excellens sur le costau, quantité de grain sur la plaine, & vne infinité de chataignes sur la montagne. On y a descouvert de belles carrieres de marbre, & entre autres d'un certain marbre blanc avec de petites veines qui semblent du meral.

Le pays d'autour de Fossan abonde en froment, dont la recolte monte à enuiron cinquante mille charges l'annee: & pource qu'il est arrosé de gros canaux d'eau, il abonde encore en bons pasturages, & par consequent en chair.

Le Marquisat de Salusses a vn air fort temperé, à raison de quoy l'on y garde dans les vergers presque tous les fruits de la riuere de Gennes.

Doglian porte de bons vins, de mesme que l'agny, & autour de Pignerol il y a vn si beau vignoble, que quiconque le void peut estimer que ce pays a de quoy fournir du vin aux autres.

Pres de Cune il y a tant de canaux d'eau, que tout son terroir en est rendu fertile au possible, combien qu'il soit leger, & pierreux de sa nature. Il abonde en chataignes, parmy lesquels on seme le froment, si bien que les habitans recueillent d'un mesme lieu deux soustiens de la vie: & ce pays ne manque aussi de vignobles, & de prairies.

Le pays d'autour de Suse produit grande quantité de vins. Auillan a son terroir distingué de collines, de valles & de plaines, & de deux petit lacs. Riuali se peut vanter d'auoir vn bon air, & vn terroir agreable.

Moncalier est renommé pour l'excellence de ses vins, comme aussi Reuillasq qui est aupres, & les lieux de Gaz, de saint Mor, & saint Rafael. Bené iouyt d'un air extrêmement sain & temperé. Les terroirs de Vigon, Pancalier, & Villefranche, sont gras au possible.

Le Marquisat de Cheue abonde en chataignes, & en bestail, & l'on y fait en quelques lieux recolte de grande quantité de vins, principalement à Prier, où ils sont tresbons. Les valles du Marre, & d'Oneille sont si bien cultiuees, qu'elles semblent par tout des iardins, & il y a tant de fruits, & particulierement il y a de si bonnes huiles, que l'on n'en scauroit bien exprimer la bonté, & la quantité en est si grande, que le Piedmont se passe par le moyen de ce pays, des huiles estrangeres. On trouue de vins excellens à Gatinare.

Pour le regard de la Comté de Nizze, combien que le pays soit pour la plus grande partie aspre & montueux, toutesfois il est si bien cultiue, qu'aucune de ses parties n'a besoin de ses voisins, fors que Nizze qui manque de froment. Il court par les montagnes de ce pays enuiron douze riuieres qui sont abondantes en truites.

Le pays d'aupres de Comtes rapporte force huiles, & grande quantité de chataignes. Celuy d'aupres de Peille abonde en vin, en grains, & huile, qui est fort renommee pour sa bonté. Saourge a les mesmes qualitez. La Brique porte grande quantité de vins blancs, de grains, & de miel excellent. On y trouue aussi vn grand nombre de perdrix, & de faizans. On y recueille aussi force manne, du terebinthe, de l'agaric, & de simples fort exquis. Il court par sa vallee vne riuere nomme Leuence, qui sort d'une fontaine, qui en peu de temps grossit, diminuë, puis deffaut entierement.

Le terroir d'autour de Boglie porte force grains, & legumes, mais il manque de vin & d'huile: mais autour de Sospelle il y a des vins, de grains, des oliues, du bestail, & des chataignes. Mais Nizze qui abonde en autres choses, n'a du grain, ny de chairs pour la moitié de l'annee; à raison de quoy elle se pouruoit du froment de Prouence, & des chairs du Piedmont.

M O E V R S.

Combien qu'il semble que les Sauoyars se doivent sentir des mœurs des Dauphinois, ou de ceux du Piedmont leurs voisins, & que celles des habitans de Piedmont doivent estre reseruees lors que nous descrirons en general les mœurs d'Italie, toutesfois il ne sera mal à propos de dire quelque chose des vns & des autres. Les Sauoyars ont la niaiserie si naturelle, qu'encore qu'ils la perdent par la frequentation des autres nations, toutesfois ils

ils la retiennent en leur langage, & en l'apparence, & il y a telle difference entre les Dauphinois, & les Sauoyars, qu'on les peut distinguer aisément de premier abord. La plus grande part du menu peuple croit que le Duc de Sauoye est le premier Prince du monde, & il n'y a rien de plus lourd, ou plus mal aduenant en toute chose, & leur niaiserie estoit extreme avant les dernieres guerres: mais certainement les gentils-hommes y sont d'agreable conuersation, civilisez presque à l'égal de leurs voisins, & affectionnez à toute sorte de vertu & de gentillesse. Tellement qu'on void ordinairement dans Chambery vne aussi bonne cōpagnie, & aussi polie qu'on en sçauoit trouuer en plusieurs villes de France qu'on estime bonnes. Le peuple n'y est guere guerrier, & peu de gens d'autre nation sont capables d'en faire fuir vn grand nombre. Et quant aux gentils-hommes, ils ne manquent de courage, mais beaucoup ont faute d'adresse pour le combat de cheual.

Les Piedmontois sont bons pour la guerre & pour les lettres, ouuerts, ronds & francs, assez ciuils & courtois à l'endroit des estrangers. Ceux de Verceil font profession de noblesse & de grandeur, & desirant se faire estimer à leurs voisins. Les habitans de Turin ont peu de paroles, sont altiers, & prompts à la main, & font profession de noblesse. On void encore regner parmy eux les factions des Guelfes, & des Gibellins, qui sont esteintes en tout le reste de la Prouince. Ceux de la Biele sont d'esprit subtil, pratiquans, & ardans, & attentifs à leurs affaires, & ne se laissent tromper aisément aux contrats qu'ils passent. Quiers a des habitans fort industrieux, & ceux de Cune le sont aussi, & de plus fort courageux, comme ils ont fait paroistre en trois grands sieges. Bené a des habitans fort propres aux lettres, & aux armes. Bagé est renommee pour le grand nombre de moulins, & de bouriques, où il se fait grande quantité d'armes, dont les habitans se sçauent seruir des mieux aux occasions.

Le peuple de Nizze est fin & rusé, ciuil, & poly, & esgalement propre au trafic, & au maniement des armes. Au reste pour le general, il y a beaucoup de bons soldats parmy le peuple, & peu qui s'adonnent aux arts mecaniques, qu'ils estiment peu, se contentans de la vie & du vestement, & imitans en cela les nobles, sans exercer la marchandise, nonobstant la commodité que le Po leur offre pour trafiquer avec ceux de l'Estat de Milan, & mesme avec les Venitiens: mais ils ne s'en soucient guere, & permettent que les estrangers acquierent de grandes richesses avec leurs toiles, chanvres, laines, & foyes. Si bien qu'on peut dire que tout ce que les marchands gagnent, ils le reçoient en don des Piedmontois qui pourroient gagner cela s'ils vouloient. Mais ils n'ont autre chose en recommandation que de bien viure & faire bonne chere, & les artisans mecaniques mesmes ont accoustumé mesme de se traiter bien, de sorte qu'ils consomment en bonne chere tout ce qu'ils gagnent. Le Duc est assez fasché de ce qu'ils sont si nonchalans, & leur offre le moyē d'exercer la marchandise, & de faire quelque gain, faisant faire des canaux, & vsant de toute sorte d'artifices pour les esveiller.

Les Piedmontois ont faute d'industrie, mais ils recompensent ce deffaut par leur obeissance enuers leur Prince, & leur façon de viure assez simple, & sans reproche: car ils sont si doux, & de si debonnaires, en partie par vn instinct naturel, & partie aussi de crainte de la iustice, qu'ils vivent en bonne amitié, & l'on void parmy eux fort peu de meurtres.

RICHESSE.

LA Sauoye ne tire guere, ou point d'argent des contrees estrangeres: mais le Piedmont a^{12.} force commoditez qu'il fournit aux autres, tellement qu'il luy en peut venir beaucoup d'argent toutes les annees. On a veu combien ce pais estoit abundant en toutes choses aux guerres qui ont esté entre la France & l'Espagne; veu que les armées s'y arresterent l'espace de 23. ans, avec de grosses garnisons d'une part & d'autre, sans qu'il y eust iamais necessité de viures, & l'on a cogneu sa richesse en ce que le Piedmont a contribué au Duc de Sauoye durant les dernieres guerres de France, au gros desquelles Monsieur Desdiguieres alla porter la guerre dans le Piedmont, il contribua, dis-je, en peu d'annees vnze millions d'écus d'extraordinaire, outre le logement des gens de guerre. Il enuoye dehors des grains, du bestial, force chanvres, grande quantité de ris, des fromages, des vins, du papier, des futaines, & des foyes crus. Il contient enuiron cinquante Comtez, & enuiron 15. Marquisats, & vn grand nombre d'autres Seigneuries, qui ne cedent en rien aux premiers, outre 20. riches Abbayes, & force autres bons benefices. Il n'y a pas de personnes excessiuelement riches, pource que les biens sont distribuez en telle sorte, que chacun presque y a quelque part: toutesfois il ne manque de Seigneurs de quatre, de six, de 8. 12. & 15. mille ecus de rente.

Ce qui monstre encore sa richesse, c'est que le pais est tellement habité par tout, que ce fut assez à propos qu'un Cavalier Piedmontois, ainsi qu'un gentil-homme Venitien luy demandoit que c'estoit que le Piedmont; répondit que c'estoit vne ville qui auoit 300. milles de tour.

Il y a en la vallée d'Oste des mines d'or & d'argent. Ceux de Salusses font trafic de fer, & de bestail avec ceux de Prouence, & il se trouve en ce Marquisat de fort riches marchands. On porte aussi dehors les draps de Pignerol, qui sont assez bons. Ceux de Barge, & de lausanne font grand trafic des armes qu'ils font, & ceux de lausanne tirent encor assez d'argent de leurs cuirs, & de leurs toiles. On fait aussi à Moirans force draps que l'on porte vendre aux contrées étrangères.

La Comté de Nizze envoie dehors des huiles, des vins, des fruits de toutes sortes, des légumes, des toiles, quantité de filets que l'on vend aux Catalans, du papier, de gros draps de plusieurs sortes, du poisson salé, un peu de miel excellent, du bois de sapin pour les antennes & les arbres des galères, & des navires, qu'on conduit par le val jusques à la mer, & on les vend aux Genevois quelques fois cent escus la piece. Et pour abréger, ce pays se sert tellement du trafic, qu'entre Gennes & Marseille il n'y a ville plus marchande, ny qui aye plus d'argent, & elle est comme le magasin, & l'entrepôt des draps de laines qui viennent du Languedoc; & de ceux de soie qu'on porte de Gennes. Mais à vrai dire le pays est naturellement pauvre, & quelques fois on n'y trouve pas toutes les commodités pour l'argent: si bien que quand la Cour du Duc de Savoie s'y tient seulement deux mois, cela seul suffit pour la mettre en nécessité; mais pour ce que les hommes de ce pays ont une grande vivacité d'esprit, ils acquièrent par le trafic de grandes richesses. On a voulu jadis calculer le revenu du Duc de Savoie, lequel on comptoit en ceste sorte.

13. La Gabelle du sel, 50000. escus.

La Dace de Suse, 24000. escus.

La Traite Foraine, 18000. escus.

Les autres gabelles y comprenant la Dace de Villefranche, 23000. escus.

L'ordinaire ancien avec le Baliage, 70000. escus.

Les taxes ordinaires en Piedmont avec le changement des sels delà les monts, réduit à Dace ordinaire perpetuelle, 263. mille escus.

Confiscations de biens, condamnations, augmentations de Daces, compositions des mains mortes, qui sont hommes qui ne peuvent disposer de leurs biens, si ce n'est en accordant de donner tant au Prince à sa volonté; le tribut des Juifs, & autres choses semblables, cinquante mille escus.

Somme qu'il ne donnoient au Duc de Savoie que cinq cens mille escus toutes les années. Mais l'on voit assez par les onze millions d'extraordinaire, qu'il a tiré du seul pays de Piedmont en bien peu d'année, & par les sommes qu'il tire de la Savoie, que son revenu est de plus d'un million d'or par an, & que c'est un Prince qui ne manquera d'argent lors qu'il en voudra avoir une bonne somme de ses sujets, mesme sans qu'ils s'en sentent gueres foulez.

F O R C E S.

14. **I**L y a en Savoie quelques places fortes, dont la principale est Montmelian, dont le château a toujours esté tenu pour imprenable, jusques à ce que Henry le grand Roy de France de memoire eternelle, le prit. Il estoit commandé d'un petit haut, d'où on voyoit à plain ceux qui estoient dans la place. Si bien que le Gouverneur fut tout estonné lors qu'il se void salué le matin à coups de canoë, de ce lieu où l'on avoit conduit l'artillerie en grande diligence. On dit que le Duc de Savoie a fait escarper ce commandement, & que ce château n'est commandé d'aucun endroit. Il est extrêmement fort, & important, pour estre près de la frontière. Il y a encore les places de Conflans, de Charbonnières, & de l'Annonciade près de Romilly: mais tous ces forts sont bien peu de chose. Celui de sainte Catherine estoit bon, mais il fut abbatu l'année 1660.

Quant au Piedmont, il y a à Thurin une citadelle pentagone, où à cinq angles, ou bastions, qui est si belle, & si grande, que l'on n'en pourroit peut-estre trouver une égale. Et laissant à part le grand nombre des instruments de guerre qui y sont, il me semble à propos de dire une chose notable qui s'y trouve; c'est un puits qui est au milieu, où il peut aller boire cinq cens, voire mille chevaux, & davantage, sans s'empescher l'un l'autre en montant, ny en descendant. Le Duc tient ordinairement pour la garde de ceste citadelle, trois cens soldats, voire plus, bien payez. Outre ceste garnison il tient à Canas cinquante soldats, à Cune cent, à Ville-neuve quarante, & en plusieurs autres lieux qui ne sont immédiatement frontières, comme à Quiers, Fossan, Bientis, Ville-franche de Piedmont, & Suerne en la vallée d'Angrogne. Il tient aussi quelques soldats à Cahors, & à Suse, d'autant que la puissance de ses voisins le requiert ainsi.

Aiures ou Lamporeggio a un château flanqué de 4. bonnes tours, & en l'une des meilleures assiettes

assiettes que l'on puisse desirer. La Valee d'Oste est si forte, à cause de ses entrees qui sont estroites, & de ses passages qui sont malaillez, & pour le peuple qui s'y trouue, que quelques estrangers s'estant rendus maistres de tout le pays voyfin, n'eurent iamais le courage de l'attaquer.

Salusse a vn assez bon chasteau; mais Carmagnole est vne place presque imprenable, & où il y a force canons, & grande quantité de munitions de guerre & de viures. Pignerol a vn chasteau d'importance, qui domine toutes les vallées voisines.

Auillane a vn chasteau qui a iadis soubs le Duc Charles soustenu vne assez longue batterie. Briqueras est en vne des fortes assiettes que l'on puisse desirer, mais il n'est fortifié comme il seroit necessaire. Cental est assez bien fortifié: & Ciuas est vne place que l'on met entre les meilleures. Il y a aussi des garnisons à Baïd, & à Monquit, deux places moyennement bonnes.

Pour le regard de la Comté de Nisse, son aspreté est cause qu'il y a beaucoup de lieux extremement forts, & plusieurs passages si estroits, que dix hommes peuvent faire teste à mille, comme est celuy qu'on nomme, le Pas de la pucelle. On a adiouté à la forteresse naturelle celle de quelques chasteaux qu'on peut tenir pour imprenables à cause des lieux où ils sont, entre lesquels est celuy de Saourge.

Le Poger qui est sur la frontiere de Prouence, est vne assez bonne place, où le Duc de Sauoye tient vne garnison.

Ville-franche est assise en bas, & n'est guiere grande; mais sa forteresse peut bien estre nommée imprenable à cause qu'elle est toute en vn roc escarpé, & que tout ce qui est requis en vne fortification y est soigneusement obserué: il y a ordinairement du moins cent soldats estrangers.

Pour la ville de Nisse, l'on peut dire que ce n'est pas vn fort, mais vn assemblage de forteresses. Premièrement la ville est close d'une bonne & forte muraille, flanquée de bons bastions. Il y a en Cavalier vne montagne qui peut auoir de tour enuiron vn tiers de mille, avec des bords droicts & qui vont en precipice: & c'estoit-là qu'estoit anciennement la plus noble partie de la ville, avec l'Eglise Cathedrale, la demeure de l'Eueque, vn Monastere de vierges, & vn peu de forteresse, que l'on nomme auourd'huy le Danjou.

Or on dit que Charles de Bourbon passant d'Italie en Espagne, ayant considéré quel temps ce lieu, tint ce langage à ceux qui estoient pres de luy. Voila vne assiette dont l'on ne cognoist pas l'importance. Le patron de la galere sur laquelle il estoit, qui estoit habitant de Nisse, remarqua ces mots, & les fit entendre au Duc Charles, qui apres auoir considéré le fait, & regardé l'assiette plus soigneusement, ordonna qu'on la fortifiast, & la mit dans peu d'annees en tel estat, qu'elle soustint l'an mil cinq cens quarante trois, les assauts de Barberousse, qui se presenta deuant avec presque deux cens voiles, & la battit furieusement. Que si ce fort ne peut estre pris alors qu'il n'estoit pas acheué, que sera-ce à present qu'on l'a tellement fortifié, qu'apres qu'on aura bien balancé sa forteresse naturelle, & celle de la main qui y a esté adioustée, & outre ce, la contree où elle est assise entre l'Italie & la France, à six-vingts milles de Genes, & à cent trente de Marseille, on iugera à bon droit que c'est plustost la premiere que la seconde place d'Italie, & comme son boulevard. Entre autres choses il y a vn puits que Muce de Iustinople, qui demeura quelque temps à Nizze, auoit accoustumé de nommer le miracle du monde. On le fit par le moyen que ie deduiray. Ainsi qu'on iugeoit qu'il ne manquoit autre chose à vne forteresse de si grande importance, qu'une eau qui ne deffailloit iamais; vn Ingenieur Allemand promit au Duc Charles qu'il la trouueroit. Cestuy-cy ayant veu qu'au pied de la montagne il sortoit de l'eau de plusieurs costez, & particulièrement vne fontaine qui se va rendre là dessous dans la mer, estima qu'en creusant profondement le rocher, on pourroit arriuer à ses sources. Et se mettant en besogne avec ceste opinion, il y trauilla durant quelques mois: mais estant descendu assez bas, & ne trouuant l'eau, il s'enfuit à Venise, desesperé de son entreprise. Ce que le Duc Charles ayant sceu, le rappella à Nizze, & le poussa à continuer son dessein, qui fut accompagné d'un heureux succez.

Amplus haut endroit de la forteresse, on void le Donjon, separé du reste par vne muraille; & par toute la place il y a des lieux releuez qui peuvent estre fortifiés en telle sorte, que tout le lieu peut estre deffendu de pas en pas. A la fortification du Duc Charles, le Duc Philibert Emanuel adiouta celle qu'on nomme Citadelle, avec laquelle il embrassa le lieu, où les Turcs campez dresserent leur batterie. Le Duc de Sauoye tient en ceste place vne garnison ordinaire de quatre cens soldats, & vn nombre suffisant de canonniers de grande experience.

Entre Nizze, & Ville-franche on void la forteresse de S. Alban, qui est presque esgale.

ment distante de l'une & de l'autre de ces deux villes. Et pource que les places ne seruent de rien dans vn pays, s'il n'est garny de bons hommes, le Duc de Sauoye entretient ordinairement vn assez bon nombre de soldats en Sauoye, & en Piedmont, mais principalement il a les habitans de Piedmont, qui sont pour la plus grande partie nais à la guerre.

Quant à ce qu'il peut redouter, ou de quoy il se peut asseurer, il me semble qu'il est à propos d'en dire quelque chose.

Premierement il ne peut craindre, selon l'apparence, du costé de Milan, à cause de l'alliance estroite qui est entre luy, & le Roy d'Espagne. Et combien que ce Roy voye assez que son Altesse ne l'affectionne pastant que de coustume, pour quelques raisons qu'il vaut mieux taire qu'exprimer, & que ce refroidissement est cause qu'il a mis les garnisons Espagnoles hors de ses places, & mesme qu'il ne veut, comme on tient, recevoir plus de pension d'Espagne, toutesfois on ne se doit pas persuader que son beau frere voulust du tout rompre avec luy, principalement pour ce qu'une des raisons apparentes de ce changement, est qu'on ne luy tint pas la parole qu'on luy donna en le mariant avec l'Infante d'Espagne, qui estoit qu'on luy remettrait l'Estat de Milan. Et ce qui arrestera tousiours le Roy d'Espagne, ce sera la consideration du passage de ses gens de guerre au cas qu'il y eust encore guerre aux Pays bas, veu que s'il estoit mal avec le Duc, il luy seroit du tout impossible de leur trouuer passage.

Il est lié d'amitié avec les Princes d'Allemagne, pour le iugement qu'il fait qu'elle luy peut tousiours estre utile, & principalement il est bien avec les Princes de Saxe, à cause qu'il est descendu de leur maison.

Il a aussi bonne intelligence avec les Suisses, & principalement avec les Cantons Catholiques, à cause de la traite des grains qu'il leur permet, & qui leur est necessaire. Ceste bonne intelligence avec les Suisses sera tousiours vn grand appuy au Duc, comme nous pouons iuger par les choses passees, pource que tandis que Charles son grand pere eut alliance avec les Suisses, il demeura paisible en son Estat. Mais lors qu'il l'eut rompuë en ne leur payant les pensions promises, & par consequent se souciant fort peu de leur amitié, à l'arriuee du Roy François il perdit soudainement l'Estat de Sauoye, qui non seulement ne fut deffendu par eux, mais encore fut prise pour la plus grande partie par les mesmes qui disoient qu'ils se vouloient payer des vieilles debtes.

Il pourroit craindre du costé des allies des Geneuois, dont il est ennemy ouuert, & déclaré: mais ils ne le veulent mettre si legerement en campagne contre ce Duc, comme on a peu voir aux efforts qu'il a faits contre Geneue. Et quant à ceste ville, elle est trop foible pour assaillir, & ce sera bien assez, si elle peut se deffendre, & se garantir d'estre prise.

Quant au Duc de Mantouë, le mariage des enfans de ces deux Ducs les tiendra désormais, comme on peut iuger, en bonne intelligence, nonobstant l'ancien debat du Marquisat de Montferrat, qui a cessé par ce mariage.

Pour le regard du Roy de France, depuis l'eschange du Marquisat de Salusses à la Bresse & autres terres voisines, il ne se parle que d'amitié entre le Roy & son Altesse, principalement depuis que le Duc s'est degousté des Espagnols, & mesme il s'est faite vne tres-celebre alliance entre la France & la Sauoye, au moyen du mariage qui s'est fait l'an 1620. entre Victor Amedee Prince de Piedmont & Madame Christine de France, sœur du Roy Louys XIII. glorieusement regnant, dont les ceremonies se passerent à Paris pendant la foire de S. Germain, avec force festins, balers & feux d'artifice, ce qui lie & tient vnis ces deux grands Princes, sa Majesté tres Chrestienne & son Altesse de Sauoye d'un lien indissoluble de toutes bonne intelligence & affection.

LES PRETENSIONS DV DUC DE SAVOYE.

Pource qu'il pourroit estre quelquesfois utile de sçauoir les droicts que le Duc de Sauoye a sur les autres Estats, j'ay trouué fort à propos de les declarer en peu de paroles.

Premierement il a des pretensions sur Geneue pour plusieurs bonnes raisons, depuis que les Geneuois se retirerent de l'obeyssance de ce Duc l'an 1535. comme chacun sçait assez.

La premiere de ces raisons est qu'il se trouue des declarations des Empereurs, auxquelles il est specifié, qu'encore que les Euesques de Geneue fussent Seigneurs temporels & spirituels, & se nommassent Princes de l'Empire, ils deuoient toutesfois recognoistre pour superieur le Duc de Sauoye, & ses successeurs, & leur iurer fidelité, comme on trouue aux actes faits par lesdicts Euesques, iusques à l'an 1530. auquel temps on battoit encore à Geneue la monnoye avec les noms & figures du Duc de Sauoye.

Dauantage, on obserua tousiours iusques à ce temps, que les Ducs de Sauoye pouoient donner grace de tout crime tant fut-il enorme, comme bon leur sembloit, & les Euesques, ny les communautez ne pouoient sur les cas qui venoient à leur cognoissance, prononcer, ny faire executer la sentence sans l'auoir auparauant monstrée aux Magistrats cōmis par le Duc, afin qu'ils vissent si elle estoit iuste, & s'il la falloir publier, ou faire grace à celuy

qui estoit accusé de quelque crime.

Ceux de Geneue auoient fait ligue en l'an 1519. avec ceux de Fribourg & le Duc contre-disant à cela, ils eurent des Iuges arbitres qui donnerent sentence en sa faueur, par laquelle il estoit porté que la ligue estoit nulle sans son consentement, & tous les autres Cantons firent aussi leurs declarations contre Fribourg, qui vouloit soutenir ceste ligue, qui fut desfaiete par ce moyen.

Mais pour n'apporter plusieurs autres choses qui seruent à l'esclaircissement de ce droit il suffiroit de dire que le Duc Charles grand pere de cestuy-cy, alla souuent à Geneue avec Madame Beatrix sa femme, & toutes les fois qu'il y alloit, on luy presentoit les clefs de la ville, & l'on luy faisoit plusieurs autres demonstrations qu'on a accoustumé de faire aux Princes souuerains.

Voicy ce qui s'est extraict d'autres memoires en faueur de ceste pretention du Duc de Sauoye sur Geneue.

Lesdits Euesques de Geneue estoient ordinairement en different avec les Comtes de Geneue pour la domination de la ville, or pour abbreger, apres qu'un certain Euesque nommé Humbert fut mort, son successeur s'en alla voir l'Empereur Frideric premier, & impetra de luy qu'il fust seul Prince de Geneue, & ne fust succedé aux choses laïques à nuls autres qu'à l'Empereur, & dauantage qu'il demeurast exempt de tous tributs.

Mais apres que cet Euesque fut de retour à Geneue, on luy fit encores les mesmes fascherries, iusques à ce qu'un Côte nommé Guillaume encourât le ban Imperial à cause de sa rebellion, fut priué du fief qu'il tenoit de l'Euesque de Geneue. Or la guerre ayant duré longuement, & les forces de la ville, & de l'Euesque estans diminuées, les Geneuois appellerent un Comte de Morienne, qui fut depuis Comte de Sauoye. Mais il y eut encore entr'eux diuerses guerres, en sorte que ce Comte occupa plusieurs petites villes, villages & chasteaux qui estoient à ceux de Geneue & s'approcha bien près de la ville, & ne se contentant de ce qu'il auoit vsuré sans titre d'hommage non fait, il demandoit qu'on le remboursast des frais qu'il auoit faicts en ceste guerre.

Mais apres que l'Euesque luy eust respondu qu'il deuoit se contenter des choses qu'il auoit acquises du droit de fief qu'il luy auoit donné, il sortit de là beaucoup de nouvelles querelles, & la pluspart du peuple craignant que ce Comte de Sauoye ne s'irritast & ne fist paix avec leur ennemy commun à leur grand dommage, il luy accorda qu'il possederait en la ville mesme tout ce que le Comte de Geneue y possedoit auparauant, & ce à titre d'hypoteque, mais d'autant qu'y estant entré, il traictoit les Geneuois tyranniquement, quelques-uns des Chanoines & des Citoyens conspirant contre luy, rappellerent leur Comte, qui estant venu avec quelque armée fut vaincu par les Sauouars qui tenoient la ville, & entrerent dans les maisons des coniuérateurs, prindrent ceux qu'ils peurent & les desfirent. Ce discord a duré iusques à ce que les Comtes de Geneue ont failly, & que les Princes de Sauoye ont tiré à eux la iurisdiction desdicts Comtes.

Finalemēt Amé Prince de Sauoye fasché de se voir ainsi au dessous d'un Euesque, tacha de se mettre au dessus, & obtint de l'Empereur Charles IV. d'estre Vicaire de l'Empire en tout son pays, voulant que par ce titre l'Euesque de Geneue, luy fut subiect avec sa iurisdiction. Mais l'Euesque resista fort & ferme au Comte, & par ce moyen son autorité luy demeura & au peuple sa liberté, iusques au temps d'Amé VIII. nepueu du premier Amé, qui fut le premier Duc de Sauoye, & depuis fut Pape, nommé Felix. Cettuy-là impetra du Pape Martin la iurisdiction temporelle de Geneue, mais il ne peut iouyr du don, qui luy auoit esté faict, non plus que ses successeurs. Et ce pendant les Ducs de Sauoye n'ont point laissé de pretendre tousiours le droit de souuerains sur la ville de Geneue.

Il pretend le Marquisat de Montferrat, pour trois raisons: la premiere pource qu'il fut promis en dot à un Duc Sauoye, au cas que la ligne masculine des Paleologues, dont la maison est perdue, manquast: la seconde, pource qu'on luy promit pour ce dot cent milles escus, qui n'ont iamais esté payez, & la condition estoit, qu'au cas qu'on ne les payast en tel temps, on luy donneroit le Montferrat; la troisieme pource que le Marquis de Montferrat estant en guerre avec le Duc de Milan, qui luy pria son Marquisat, le Duc de Sauoye de ce temps-là avec une armée qu'il leua, & entretint à ses despens, le remit en son Estat, à raison dequoy le Marquis pour recognoissance d'une faueur si signalée, se fit son perpetuel feudataire, prenant la possession dudit Duc de Sauoye, & luy iurant obeyssance.

Mais ainsi qu'on traictoit ce procez deuant l'Empereur Charles V. il rompit la condition qui portoit que les masses venans à manquer en la maison des Paleologues, le Marquisat deuoit venir à la maison de Sauoye, & n'eut aucun esgard aux autres deux causes de pretentiō, d'autāt que la Duchesse de Mantouë estoit fille du dernier Marquis, disant, que puis

qu'elle estoit fille, elle deuoit aussi estre heritiere.

Il a encore pretention sur l'Achaie, pource que Philippes de Sauoye, fils de Thomas III. espousa vne fille du Prince d'Achaie, nommé Iambe, & par le moyen de ce mariage fit la guerre au Despote de la Grece, & à ses subiects, qui estans vaincus le laisserent apres maistre absolu en son pays, & il eut vn fils nommé Iambe, qui fut Prince d'Achaie, & cestuy-cy eut Amedee pour son fils, qui succeda en troisieme lieu, & mourant sans enfans males, eut pour successeur Louys son frere qui n'eut point d'enfans & vne Royne de Sicile voulant succeder, pretendait que le fief luy estoit escheu, ceda ses droicts au grand Maistre de Rhodes, & le Turc vint apres qui s'en empara.

Il pretend finalement droict à la Couronne de Cypre & au Royaume de Hierusalem.

DROICT PRETENDV PAR LE DVC DE SAVOYE.

On sçait assez que les Roys de Cypre estoient les vrayz Roys de Hierusalem: à raison dequoy si le Duc de Sauoye pretend droict à la Couronne de Cypre il pretend droict aussi au Royaume de Hierusalem, mais il nous faut declarer en cet endroit, comme il y pretend.

Les Ducs de Sauoye se disent estre Roys de Cypre par quatre moyens, à sçauoir par droict d'heritage, par droict d'adoption, par droict de renontiation, & par Testament.

Quant au moyen de l'heritage, est à sçauoir comme Anne de Lusignan, fille de Ianus Roy de Cypre, Hierusalem & Armenie, & de Charlotte de Bourbon, fut femme de Louys Duc de Sauoye, duquel mariage nasquirent seize enfans, tant fils que filles toutes mariees avec diuers Princes.

Nous ne parlerons pas maintenant d'Amedee II. du nom, Duc de Sauoye, aîné de ladite Anne, parce que les enfans d'iceluy sont morts; mais nous parlerons maintenant de l'autre sien fils Philippes, & lequel en sa vielleſſe & par faute d'enfans succedans, eut le Duché de Sauoye, auquel succeda son fils Philibert pere de Charles Emanuel, qui n'eut point d'enfans, au moyen dequoy son frere Charles Emanuel fut Duc apres luy, & à cestuy-cy succeda Emanuel Philibert, pere de Charles Emanuel, lequel est auourd'huy Duc de Sauoye. L'autre frere dudit Duc de Sauoye, & fils de ladite Anne de Lusignan, estoit Louys Comte de Geneue, lequel à raison de sa femme Charlotte de Lusignan sa cousine, eut le Royaume de Cypre, avec les titres de Hierusalem & d'Armenie, & fut chassé du Royaume & n'eut point d'enfans.

Le Roy Iean de Lusignan, eut vn frere nommé Iacques, lequel mourut en bas aage & enfant: & ainsi en fut de Marie sa sœur, & demeura l'autre sœur unique Anne femme de Louys Duc de Sauoye, laquelle engendra de son mary seize enfans. Ledit Roy Iean II. du nom, n'eut autres enfans que deux filles, l'une Cleopatre, qui mourut, & l'autre Charlotte, laquelle apres que le pere fut mort, eut le Royaume & fut couronnée estant veufue de Iean de Portugal, nepueu du Roy de Portugal, duquel elle n'eut point d'enfans, & elle se remaria à son cousin Louys Comte de Geneue, fils d'Anne de Lusignan, sœur dudit Iean II. & d'iceluy n'eut point d'enfans, & tous deux furent chassés & despoüillez du Royaume par Iacques II. bastart & fils illigitime dudit Roy Iean II. du nom, & frere de ladite Royne Charlotte.

Or apres que ladite Royne Charlotte fut morte sans heritiers ou enfans, le Royaume appartenoit à Anne, mais estant decedée, tout le droict dudit Royaume reuenoit tomber au Duc de Sauoye, fils de ladite Anne; mais comme ledit Royaume fut occupé par le bastart susnommé, ledit Duc retint seulement le titre de Roy, & se reserua le droict audit Royaume, ne pouuant d'auantage: Et de là vient que tous les Ducs de Sauoye depuis qu'ils eurent obtenu ce droict, s'intitulerent *Serenissimes* & s'attribuerent ce titre honorable d'*Aleſſe*. A ces causes tous les Ducs de Sauoye, lesquels se trouuerent yſſus de l'Estat & race de ladite Anne de Lusignan, se disent & portent heritiers du Royaume de Cypre, Hierusalem & Armenie.

Quant au droict qu'ils y ont par adoption la Royne Charlotte estant deboutée du Royaume, & n'ayant point d'enfans & heritiers de son corps, adopta pour successeur & heritier Charles I. Duc de Sauoye, fils d'Amedee second, premier cousin de ladite Charlotte, lequel nasquit de ladite Anne sœur unique du Roy de Cypre, & cette adoption & priuilege est porté, escrit & gardé aux Archiues du Duc de Sauoye & mentionné par Philebert Pingon, au liure qu'il a fait de la Genealogie du Duc de

de Sauoye, & ceste adoption fut semblable à celle de Jeanne Royne de Naples, laquelle adopta son cousin Charles de Duraze qui estoit heritier, & si ledit Duc de Sauoye n'eust esté cousin, & heritier ceste adoption eust esté semblable à celle de la mesme Jeanne premiere Royne de Naples; laquelle apres la premiere adoption adopta Louys premier Duc d'Anjou, lequel pour n'estre heritier n'obtint le Royaume, mais le premier adopté, & ladite adoption du Duc de Sauoye fut faite apres la mort du Roy Louys, Comte de Geneue, mary de ladite Charlotte adoptante, lequel mourut l'an 1481. le dernier de Feburier & de son regne le 15.

Quant au droit pretendu par renonciation Philebert Pingon, Conseiller du Conseil Privé du Duc de Sauoye, dist l'an 1525. à Thurin qu'il auoit veu aux Archiues du Duc de Sauoye, tandis qu'il recherchoit les choses autentiques pour dresser son liure de la Genealogie de Sauoye, quelques priuileges & escritures, comme ladite Royne Charlotte alla de Rome en Sauoye voir le Duc son cousin & son mary Louys, lequel elle trouua en l'Abbaye de Ripail, menant vne vie contemplatiue & solitaire, que ladite Royne estant là, renonça aussi audit Duc de Sauoye le Royaume de Cypre, & tous les droits d'iceluy; & que ceste renonciation soit vraye, l'an 1580. le sieur Dominique Secretaire du Duc de Sauoye & autres personnes dignes de foy confirmerent qu'elle estoit vraye & écrite en lettres d'or. le ne sçay pas pourtant si ceste renonciation est la mesme adoption susdite, ou bien vne autre.

Et quant au droit pretendu par testament, la susdite Charlotte Royne de Cypre, l'an 1481. se trouuant malade à Rome, fit son testament autentique le 25. Feburier, & laissa pour son successeur & legitime heritier son cousin Charles premier Duc de Sauoye, fils d'Amедее deuxiesme, issu d'Anne de Lusignan, vniue sœur du Roy Iean second pere de ceste Royne, qui testa ou fait testament, laquelle se transportant en l'Eglise de saint Pierre en la Chappelle où les Roys & Roynes sont receus, & en la presence du Pape Innocent huitiesme & de tous les Cardinaux, & quelques iours apres, elle mourut, & fut enseuelie en ladite Eglise de saint Pierre: Autres disent que le coffre fut transporté en la ville d'Assise en l'Eglise saint François, & l'an 1533. au sacre & Couronnement de Charles cinquiesme Empereur, Charles troisieme Duc de Sauoye, demanda à l'encontre des Venitiens, le Royaume de Cypre, comme disent les Boulonnois, qui vivent encore aujourd'huy, & se trouuerent presents audit Couronnement, & que le Pape Clement septiesme & l'Empereur Charles V. donnerent leur voix, en faueur du Duc de Sauoye; mais les Venitiens protestoient deuant le Pape & l'Empereur, qu'ils auoient ledit Royaume par donation des Gouverneurs & la Royne Cornare femme de Jacques second illegitime, lequel occupa le Royaume de Cypre par armes.

L'an 1570. le grand Turc fit perdre aux Venitiens & ausdits Ducs ledit Royaume, lequel il a empieté & occupé.

Les Ducs de Sauoye, depuis l'an 1485. que ladite Royne mourut aagée enuiron de cinquante. cinq ans, faisoient demander aux Venitiens ledit Royaume de Cypre; & entr'autres réponces qu'ils remportoient des Venitiens, estoit celle cy, *Cælum iussu Domini, terram dedit filiis hominum*, Comme s'ils eussent voulu dire par ces paroles, que Dieu leur auoit donné ce Royaume, & qu'ils ne cognoissoient autres heritiers qu'eux mesmes.

parce que comme il voulut aller voir l'Empereur d'Allemagne Henry troisieme à Veronne, il fut accompagné d'une grande suite de Noblesse, & l'Empereur ayant commandé qu'il entrast seul, il fit réponse qu'il n'y entreroit sans sa queue ou suite, dont aduerty l'Empereur luy donna entrée & à sa compagnie, & le surnomma Cauda, ou la grand Queue. Estant de retour en ses pais, il vesquit en grand repos iusques en l'an 1076. auquel an estant qualifié du tiltre de Marquis d'Italie par l'Empereur, il mourut & fut enterré avec son pere en l'Eglise de saint Jean de Maurienne, à laquelle il fist de grands dons, & l'augmenta de plusieurs bien-faits & belles prerogatives, il gouerna ses pais 28. ans ou environ. De son temps l'Eglise Catholique fut fort troublée à l'occasion de Berengarius Tourengear, Archidiacre de l'Eglise d'Angers, qui escriuit des liures touchant le saint Sacrement de l'Eucharistie contre la croyance de l'Eglise, & furent tenus trois Conciles contre son heresie, & entr'autres vn à Verceil en Piedmont, où il abjura son erreur, ce qui est inferé au corps du Decret de Gratian.

IIII.

Humbert 2. fils d'Amé premier fut le troisieme Comte de Maurienne: estant vn iour à la chasse, il aduint que la beste qu'il suiuit s'alla rendre près du lieu où estoit vn Comte de Venice, lequel oyant le cry des Veneurs monta à cheual, & vint rencontrer le Comte Humbert, & toute sa troupe, & luy fist le plus grand accueil & bien-venue qu'il fust possible, le festoyant en sa maison plusieurs iours, durant lesquels fut fait le mariage du Comte Humbert, avec la fille dudit Comte de Venice nommée Laurence, qui estoit des plus belles de son temps, & fut la feste celebrée en la ville de Carpentras, & en l'an 1080. il eut d'elle vn fils nommé Amé, qui naquit à Montmelian.

Il eut differend & guerre contre vn Seigneur de Briançon qu'il rangea à la raison, & quelque temps apres il subjuga les habitans du pais de la Tarentaise, & conquist la vallee d'icelle.

De son temps le Pape Urbain II. conuoqua vn Concile general en la vallee de Clermont en Auvergne, auquel fut entrepris & conclud le premier voyage d'outremer, pour le recouurement de la Terre sainte, par les prieres & exhortations d'un gentil homme Picard natif d'Amiens, de solitaire & sainte vie, nommé Pierre l'Hermite. Pour ce voyage se croiserent pour le moins trois cents mil hommes, & entr'eux y eut plusieurs grands Princes & Seigneurs, & l'un d'iceux fut ledit Comte Humbert, lequel fut à la prise de Hierusalem, dont Godefroy de Buillon fut estably premier Roy.

Après que la Palestine fut conquise, ledit Comte retourna en ses pais environ l'an 1100. où il fut persecuté & affligé de grandes maladies, & mourut l'an 1109. ayant gouerné trente-trois ans ou environ, laissant son fils Amé successeur de ses pais, & vne fille nommée Adélis ou Ælis, qui fut mariée avec Louys 6. surnommé le Gros Roy de France, dont est issu le Roy Louys le leune, pere de Philippe Auguste Dieu-donné.

De son temps fut le Pape Gregoire 7. nommé auparavant Hildebrand, lequel mist les Papes hors de page de la main des Empereurs, & fut institué l'Ordre des Chartreux en Dauphiné, par le bon Pere saint Brunon natif de Cologne. Ledit Comte Humbert mourut au Palais Royal de la principale ville de Monstier en la Tarentaise, où il gist.

V.

Amé second ou Amedee quatrieme, Comte de Maurienne, fut Prince preux & vaillant au fait des armes. Du viuant de son pere il auoit esté accordé qu'il prendroit à femme Clare ou Clarence, fille du Comte de Geneuois, mais il ne voulut entendre à la consommation de ce mariage, ains se maria avec Guigonne fille du Comte d'Albon, qui fut occasion de grandes inimitiez entre ledit Comte de Geneuois & luy.

Il eut de sa femme entr'autres enfans vn fils nommé Humbert qui luy succéda.

De son temps Henry cinquieme estant esleu Empereur d'Allemagne, voulant entrer en la Gaule pour se mettre en possession du Royaume d'Arles, qu'il pretendoit estre desappartenances de l'Empire. Et de fait il prit son chemin par la Maurienne, & pria le Comte Amé de l'accompagner au voyage de son couronnement en Italie, ce qu'il luy accorda, de sorte que l'Empereur ayant pris possession de la ville d'Arles, il se fist couronner à Milan, & depuis estant arriué à Rome il fut sacré & couronné le iour de Pasques l'an 4. Apres lequel couronnement, le Comte Amé demanda congé à l'Empereur de s'en retourner, ce qui luy fut accordé: & pour l'obliger dauantage, l'Empereur erigea le pais de Sauoye en Comté, & en fist proclamer Amé le premier Comte, & luy en donna l'investiture solennelle, à la char-

ge qu'il le tiendrait de l'Empire, & qu'il en feroit son premier & principal tiltre, & mesmes luy fist present de la Seigneurie de Baugey, ainsi Amé depuis ce temps-là se qualifia Comte de Sauoye: estant retourné en son païs, il eut guerre contre le Comte de Geneuois, lequel y perdit la vie, & Amé demeura pacifique. Durant le temps qu'il fut en paix, il fist bastir & construire l'Abbaye & Monastere de saint Sulpice, de l'Ordre de saint Bernard, Abbé de l'Ordre de Cleruaux, & vn autre de l'Ordre de Cisteaux, qu'il nomma Tamise. Il eut quelque differend avec le Roy de France Louys le Gros son beau-frere, qui continua avec son nepueu Louys le Jeune, mais il fut appaisé par l'entremise de Pierre le Venerable Abbé de Cluny, & de saint Bernard, lequel en outre persuada au Comte Amé de se croiser les ennemis de la foy, & de passer en Syrie, ce qu'il fist au mois de May l'an 1146. comme y allerent aussi l'Empereur Conrad troisieme & le Roy de France Louys le Jeune, où apres auoir combattu en plusieurs rencontres les Infideles, ils se delibererent de retourner chacun en ses païs & seigneuries, & le Comte Amé passant à son retour par l'Isle de Cypre, y mourut d'une maladie en l'an 1154. ayant gouuerné son Estat près de 45. ans. Le Roy de Cypre Guy de Lusignan le fist fort honorablement porter en l'Abbaye du Mont de S. Croix, où il fut inhumé. Il fut créé Lieutenant du saint Empire.

VI.

Humbert troisieme du nom fut 2. Comte de Sauoye apres le deceds de son pere Amé, il espousa Mathilde ou Mahault, fille du Comte de Flandres Theodoric, & de Sibille d'Anjou, dont il n'eut aucuns enfans, & sa femme estant mort en la fleur de son aage, il en receut vn grand déplaisir, & pour se consoler en Dieu, il entreprist de mener vne vie solitaire en vn Monastere & Abbaye qu'il fist bastir, & nomma Alpine l'an 1163. & receut l'habit de Religieux, où il demeura plus d'un an. Mais voyant que les Princes voisins se vouloient preualoir de ce changement de vie, & qu'ils estoient prests d'empieter ses Estats, il laissa la vie Monastique, & se remaria avec Anne fille du Duc de Salinge en Allemagne, de laquelle il eut vne fille nommée Agnes, qu'il voulut marier avec le fils du Roy d'Angleterre Henry second. Et y auoit apparence que ce mariage eust esté effectué, sinon que sa fille mourut à l'aage de sept ans, & fut bien tost suiue de sa mere Anne, dont le Comte Humbert receut telle fâcherie, que derechef il se retira du monde pour paracheuer ses iours en vn lieu solitaire qu'il fist bastir, & appella l'Abbaye de Haute Combe. Toutesfois il en fut reuqué par les instantes prieres de ses subiets, & pour la troisieme fois il se remaria avec Pernelle fille du Comte de Bourgogne, qui estoit veufue d'un Duc d'Autriche, de laquelle bien tost apres il eut vn fils nommé Thomas, & pour en rendre graces à Dieu, le Comte fonda vn Prieuré sous le nom de saint Maurice, qui depuis a esté appelé le Bourget, & fonda aussi vne belle Chappelle en la grande Chartreuse avec la maison de l'Hospitalité pour les suruenans. En l'an 1188. le Roy Philippes Auguste fist vn voyage en la Terre sainte, où le Comte Humbert l'accompagna, & les Chrestiens prindrent sur les Infideles la ville d'Acre, & peu de temps apres retournerent, & le Comte Humbert incontinent apres son retour tomba en maladie, dont il deceda l'an 1201. & fut inhumé à Haute-Combe, ayant gouuerné 47. ans ou enuiron.

VII.

Thomas succeda à son pere Humbert au Comté de Sauoye, estant en bas aage sous le gouvernement du Comte de Bourgogne son oncle maternel, iusques à ce qu'il fut paruenu à l'aage de discretion.

Il espousa Beatrix fille du Comte Guy de Geneuois, contre le gré & vouloir de son beau-pere, lequel il prit prisonnier, & luy fist ratifier le mariage de sa fille, & faire hommage solennel de son Comté de Geneuois, s'aduouant vassal & homme lige du Comté de Sauoye.

Après cela il accompagna Louis fils aîné du Roy de France Philippes Auguste en la guerre contre les Albigeois ou Vaudois, avec plusieurs autres Princes & Seigneurs: D'où estant de retour, il fist plusieurs conquestes au païs de Piedmont, parce que la lignee des Princes de Piedmont estoit fallie, il prit Pignerol & Vignon, où il fist bastir des Citadelles, puis Carignan & Montcallier, de sorte qu'il s'acquist le tiltre de Prince de Piedmont. Et apres auoir gouuerné ses Estats par l'espace de 32. ans, il mourut l'an 1233. ayant eu de sa femme huit enfans masles & deux filles. Il fut enterré en l'Abbaye de saint Michel près d'Auillane, au Marquisat de Suse suivant son testament, à laquelle Abbaye il auoit donné les villes de saint Ambrois & de lauent.

VIII.

VIII.

Amé ou Amedee troisieme de ce nom, fils du deffunct Comte Thomas, apres le decez de son pere fut quatrieme Comte de Sauoye & septiesme de Maurienne, il espousa en premieres nopces la fille du Comte d'Albon, Dauphin de Viennois, laquelle mourut bien tost apres sans enfans, & fut ensepulturee en l'Abbaye de Haute-Combe. Puis il fut marié en secondes nopces avec Cecile fille du Comte Raymond de Prouence, Princesse de grande estime & beauté, & de bien ancienne Noblesse, dont il eut vn fils nommé Boniface, & vne fille Constance. Il conquist assité des forces de son frere puisné de Sauoye, le pais de Chablais, & le Val d'Oste; & apres avoir gouverné treize ans, il mourut à Montmelian l'an 1246. & le 24. Iuin il fut inhumé en ladite Abbaye de Haute-Combe.

IX.

Boniface apres la mort de son pere Amé troisieme, fut cinquieme Comte de Sauoye, & surnommé Roland pour sa prouesse. Il eut guerre du commencement contre le Marquis de Montferrat, les Astisans, & les habitans de Thurin qui entreprenoient sur ses terres, desquels il fut victorieux. Et puis il assista Charles de France Comte d'Anjou & de Prouence, au voyage qu'il fist pour secourir Marguerite Comtesse de Flandres, dont estant de retour il alliegea la ville de Thurin, mais les habitans de ladite ville ayant imploré le secours du Marquis de Montferrat & des Astisans, ils furent secourus, & le siege leué, & le Comte Boniface & le Marquis de Saluces furent pris & menez prisonniers sous bonne garde en la ville d'Ast, où le Comte Boniface mourut de déplaisir l'an de salut 1256. ayant regné neuf ans & plus, & fut son corps apporté & inhumé à saint Jean de Maurienne. Il n'eut aucuns enfans, aussi ne s'estoit-il point marié, & n'auoit qu'une sœur nommée Constance qui ne luy succeda au Comté de Sauoye, par ce que c'estoit vn fief Imperial, auquel les filles n'estoient capables de succeder.

X.

Estant la succession de Sauoye par la mort du Comte Boniface deuoluë à Pierre de Sauoye son oncle paternel, fils du Comte Thomas, il s'en mist en possession, & receut les hommages & autres droicts de fidelité que luy firent les Seigneurs & Gentils-hommes du pais. Apres cela, se voulant venger de la mort de son nepueu Boniface, il assiegea Thurin, qui luy fut renduë apres vn long siege. Il eut guerre contre le Duc de Chophinguen que l'Empereur auoit enuoyé pour gouverner Cheblais & le Val d'Oste dependans de l'Empire, où ledit Duc fut pris prisonnier, & le Comte se voyant victorieux, entra au pais de Vaux qu'il conquist.

Il fist vn voyage en Angleterre pour visiter la Roynie Alienor sa niepce, fille de sa sœur Beatrix Comtesse de Prouence; & durant son absence le Comte de Geneuois son voisin, pour luy nuire, fist reuolter contre luy ceux du pais de Vaux, dont aduerty le Comte s'en reuint accompagné de quatre mil hommes de guerre, que le Roy Edoüart d'Angleterre luy auoit baillez, par l'assistance desquels il assiegea & prit les Chasteaux de Clees & de Rouë, & estant prest de donner bataille au Comte de Geneuois, il s'accorda avec luy par le moyen d'une paix qui fut traittee entr'eux, par les Comtes de Bourgogne & de Mâcon ses voisins. Puis apres il alla voir l'Empereur Richard d'Angleterre son oncle, pour luy faire hommage des Comtez de Maurienne & de Sauoye; ce qu'ayât fait, il demanda l'investiture des pais de Chablais, d'Oste, & de Vaux, ce qui luy fut bien tost accordé.

Estant de retour d'Allemagne, il fut affligé d'une longue maladie, dont en fin il mourut sans enfans, & institua son heritier & successeur au Comté de Sauoye & autres Seigneuries, son frere Philippes de Sauoye, laissant à sa fille Constance qu'il auoit mariee au Comte d'Albon, de grands legs & donations. Ayant gouverné douze ans, il deceda en l'an 1268. & fut enterré à Haute-Combe.

XI

Philippes apres le deceds de son frere succeda au Comté de Sauoye, lequel prit à femme en la ville de Salins Alix Comtesse Palatine de Bourgogne, fille vniue & heritiere vniuerselle d'Othon Comte Palatin de Bourgogne, qui estoit decendu de l'Empereur Frederic Barberousse. Il fut par le moyen dudit mariage Comte de Bourgogne, & peu de iours apres luy vindrent nouuelles de la mort du Comte de Sauoye son frere decedé sans enfans mâles, de sorte que la succession dudit Comté luy escheut, dont il prit possession, receuant les fide-

litez & hommages des Seigneurs du pais, & l'Anneau de saint Maurice. Il fut appelé Cōte de Bourgogne & de Sauoye, & gouverna lesdits pais en grande paix & tranquillité par son sens, s. geille & grande experience qu'il auoit acquise dès son ieune aage, estant nourry aux affaires d'Italie, & au fait du gouvernement & patrimoine de l'Eglise avec son frere Thomas. Il fut toutesfois pour la pluispart du temps malade d'hydropisie qui luy dura dix ans entiers, pendant lesquels voyant qu'il estoit hors d'espoir d'auoir des enfans, il fist venir deuant luy les trois nepueux, enfans de Thomas de Sauoye son frere, & de Beatrix de Fiesque sa femme, auxquels par testament il fist partage de ses terres & Seigneuries, & nommément donna à Amé puisne le Comté de Sauoye, & l'Anneau de saint Maurice. Il donna aussi aux pauvres ses beaux & riches meubles & joyaux, & des ornements somptueux à l'Abbaye de Haute-Combe, où il auoit esleu sa sepulture, & où son corps fut porté apres qu'il fut decedé, qui fut en l'an 1285. ayant gouverné seize ans ou enuiron.

XII.

Amé ou Amedee quatriesme de ce nom, surnommé le Grand, tant à cause de ses hauts faits d'armes, qu'à raison de sa hauteur & beauté corporelle, fut Comte de Sauoye apres son oncle; il fut nourry dès sa ieunesse en Italie où son oncle l'auoit mené, & y fut fait Cheualier. Il eut pour femme Sibylle Comtesse de Baugy & Dame de Bresse, par le moyen duquel mariage les Seigneuries de Bresse & de Baugy vindrent à la maison de Sauoye. Il eut guerre contre le Comte de Geneuois, aydé de Humbert Dauphin de Viennois, où le frere aîné dudit Amé fut tué. Il eut de sa femme deux fils, Edouart & Amé, avec trois filles.

La ville d'Iuree se mist en sa puissance, & sous son obeissance. Il prit sur le Comte de Geneuois les villes de saint Germain & d'Amberieu.

De son temps le Roy de France Philippes le Bel alla pour la derniere fois contre les Flamans, où le Prince Edouart de Sauoye fils du Comte Amé l'accompagna, comme aussi l'Empereur Henry de Luxembourg passa par la Sauoye, d'où le Comte Amé luy fist compagnie iusques à Rome, & assista à son sacre & couronnement.

Ledit Empereur crea le Comte Amé Prince de l'Empire, il ayda grandement les Cheualiers de saint Iean de Hierusalem en la prise de Rhodes, qui fut cause que l'écu de Sauoye fut à perpetuité decoré du saint signe & armoiries de la Religio de l'Hospital de saint Iean de Hierusalem, & que les Comtes de Sauoye prindrent pour leur devise F. E. R. T. signifiâns *Fortitudo eius Rhodum tenuit*, qui est à dire: Sa force a obtenu Rhodes. En fin le Comte Amé estant allé en Auignon vers le Pape, pour auoir secours de luy contre l'armee des Ottomans pour l'Empereur de Constantinople son gendre, il y mourut l'an 1323. & fut inhumé à Haute-Combe, ayant regné dix-huict ans ou enuiron.

XIII.

Edouart apres le deceds de son pere Amé, succeda au Comté de Sauoye, & ayant receu l'Anneau de saint Maurice, il en print possession. Il estoit de taille de corps grand, puissant & allegre, fort adroit aux armes, & tres-liberal. Il eut guerre contre le Seigneur de Foucigny son beau-frere, qu'il deffit par deux fois, & parillement le Comte de Geneuois, mais en fin il perdit la bataille de Varey, qui fut cause que le Comte Edouart se retira pardeuers le Duc de Bourgogne Eude son beau-frere, & de là en Bretagne vers le Duc de Bretagne, pour auoir secours d'eux; & estant venu à Paris faire ses doléances au Roy Philippe de Valois, il demeura malade cinq ou six iours seulement, & y mourut l'an 1329. ayant gouverné pres de six ans. Son corps fut embaumé, & mené à Haute-Combe où il fut enterré.

XIV.

Amé ou Amedee V. fut appelé au Comté de Sauoye apres la mort de son frere Edouart, la fille vnique d'iceluy nommée Marguerite femme du Duc de Bretagne, en ayant esté excluse par les Estats de Sauoye. Ayant pris possession dudit Comté, & receu l'Anneau de S. Maurice, il se maria avec Iole ou Yolant, fille du Marquis de Montferrat, dont il eut entr'autres vn fils qui fut nommé Amé, & d'autres enfans. Il attira à son alliance les Comtes de Geneuois & Seigneurs de Geix, & fit la guerre au Comte de Geneuois, sur lequel il reprit le chasteau de Monthous, & le deffit en bataille; puis il fist bastir deux chasteaux, l'un appelé les Marches, & l'autre les Mottes, pour aisseurer la ville de Chambery. En fin par le moyen & entremise du Roy de France Philippes de Valois, l'appoinctement & accord

accord fut fait entre les deux Maisons de Sauoye & Dauphiné.

Le Comte Amé étant en paix, fist construire l'Eglise des Iacobins ou freres Prescheurs de Montmelian, & la sainte Chappelle de Chambery. Bref, il fut toute sa vie grandement honoré de ses voisins, fort aymé de la Noblesse, & de tous ses subiects. Il laissa vn sien fils vnique nommé Amé, duquel eut la charge & tutelle Louys de Sauoye son cousin, & apres auoir gouuerné ses Estats douze ou treize ans, il mourut l'an 1342. & fut enterré en la Chapelle de l'Abbaye de Haute-Combe, où il a recueilly & ramassé tous les ossements de ses predecesseurs.

XV.

Amé ou Amedee 6. du nom, fut l'vnziesme Comte de Sauoye apres que son pere Amé 5. fut decedé, n'estant aagé que d'environ neuf ans, qui fut cause qu'il fut sous la tutelle de son cousin Louys de Sauoye Seigneur de Vaux, & du Comte Amé de Geneuois son Parrain, qui luy baillerent l'Anneau de saint Maurice, qu'il portoit ordinairement avec luy, pour auoir vn premier iour de May emporté l'honneur de Cheualerie en vn Tournoy general, étant armé & vestu & tous ses gens de Sendal verd, & ses cheuaux bardez, caparaillonnez & empennachez de verd, il prit si grand plaisir à ceste couleur verde qu'il s'en vestoit ordinairement, & de là il fut surnommé le Comte verd. Apres le deceds de Robert Roy de Naples, vne partie de la Seigneurie & Comté de Piedmont, se mist sous l'obeissance du Comte de Sauoye, & de Iacques de Sauoye Prince de la Moree.

L'Eueque de Sion étant chassé de son siege par la rebellion des communautéz du païs de Valais, vint à refuge au Comte Amé, luy demandant ayde & secours, ce qui luy fut accordé, & par l'assistance dudit Comte il fut remis en son siege, & ses subiects rebelles furent amenez à raison. Ledit Comte eut guerre contre le Dauphin de Viennois, sur lequel il prit par force quelques villes, ce qui donna occasion au Dauphin Humbert qui n'auoit point d'enfans, de mettre sa seigneurie & principauté de Dauphiné entre les mains du Roy de France, pour la deffence des inuasions & entreprises dudit Comte de Sauoye, & de fait le dit Roy achepta le Dauphiné, & Humbert se rendit Religieux de l'Ordre de saint Dominique au Conuent de Lyon, & depuis fut Archeuesque de Rheims, & Parriarche d'Alexandrie, & mourut à Paris l'an 1355. & est inhumé en l'Eglise des Iacobins dudit lieu. Apres ceste acquisition le Dauphiné fut donné en tiltre à Charles fils aîné du Roy Iean, car la vente en auoit esté faite, à condition que les fils aînez des Roys de France s'intituleroient Dauphins de Viennois, prenans le nom & armes du Dauphiné escartelees avec l'escu de France. Cela donna occasion au Comte de Sauoye de rechercher l'amitié & alliance du Roy Iean, & de son fils aîné, & pour empescher les occasions de guerre à l'aduenir, il fut accordé que le Comte Ame prendroit à femme Bonne seur du Duc Louys de Bourbon, & les limites de Sauoye & Dauphiné furent bornez par la riuieré du Guyer. Le Comte Amé quelque temps apres son mariage accompli, institua l'Ordre de l'Annonciade: il donna le colier de l'Ordre à 14. Cheualiers de choix & eslite, & luy faisoit le 15. étant Chef & grand Maistre dudit Ordre. Pour enseigne ils portoient vn grand colier d'or fait à trois lacs d'amour, dedans lesquels estoient entrelasiez ces mots, FERT. FERT. FERT. qui est la deuise des Comtes de Sauoye, & au bas dudit colier pendoit vne Image de l'Annonciation faite par l'Ange Gabriel à la Vierge Marie Mere de Dieu. Il fonda aussi vne Religion & Monastere de Chartreux au lieu de Pierre Chastel, pour prier Dieu pour le salut des Cheualiers dudit Ordre. Il combatit vaillamment & heureusement contre le Roy de Bulgarie, qui tenoit prisonnier l'Empereur Alexius, lequel il remist en l'Empire de Constantinople, & fit en Orient plusieurs beaux exploits de guerre, & étant de retour il eut guerre contre les Vicomtes Seigneurs de Milan qui auoient empieté sur ses terres pendant qu'il estoit absent. L'Empereur Charles 4. passant par la Sauoye, fut par luy magnifiquement traité à Chambery, mesmes il fut fait vn festin tres-somptueux, où les plats de viande estoient portez par des Barons & Seigneurs, montez sur de grands & braues coursiers qu'ils bailloient au Maistre d'Hostel, pour les poser sur la table dudit Empereur, lequel crea le dit Comte de Sauoye Prince du saint Empire, & Vice Empereur perpetuel, luy ayant baillé l'investiture de tous ses tiltres & dignitez. Finalement il accompagna le Duc d'Anjou en la guerre pour le recouurement du Royaume de Naples, apres auoir marié son fils aîné aussi nommé Amé, seigneur de Bresse, avec Bonne fille du Duc de Berry, auquel Royaume ils prindrent aucunes villes, mesmes la cité Royale nommée l'Aigle, Montellard, & saint Estienne, auquel lieu prit vne griefue maladie au Comte Amé, dont il deceda, au grand regret du Duc d'Anjou, & de toute l'armée de France, mesmes de ses ennemis. Il eut de sa femme Bonne de Bourbon deux fils, Amé & Louys. Il vescu environ 50. ans, en regna 40. & mourut le 1. ou 2. de Mars 1383. Aucuns disent qu'il mourut à Capoué.

XVI.

Amé ou Amedee 7. appellé le Rouge, douziesme Comte de Sauoye, apres le deceds de son pere le Comte Verd entra au regime & principauté de Sauoye en l'aage de 13. ans il remitt en son siege l'Euesque de Sion Messire Edouart de Sauoye, fils de Philippes Prince de la Moree, que les communes de Valais auoient chassé, lesquelles il reduisit sous l'obeissance de leur Euesque & Seigneur. Les habitans de la ville de Nice en Prouence le receurent pour Seigneur, il prit d'eux le serment de fidelité, ainsi il joignit la principauté de Nice à la Sauoye. Tout le temps que le Comte Amé le Rouge vesquit, il ayma sur tous plaisirs le deduit de la chasse, & vrayement par trop il l'ayma. Car vn iour comme il suiuoit vn sanglier en la forest de l'Orme à course de cheual, le voyant sortir du bois, il picqua si roidement apres pour y estre des premiers & le voir enfermer, qu'il tomba de son cheual qui s'estoit cabré, & se bleissa en la cuisse, qui luy causa vne inflammation dont il mourut le iour de la Toussaincts 1391. ayant regné 8. ans ou enuiron. Il est inhumé à Haute-Combe.

XVII.

Amé ou Amedee 8. du nom, apres le deceds de son père Amé 7. succeda au Comté de Sauoye aagé seulement de 8. ans, lequel demeura en la charge de sa mere Bonne de Berry, sage & vertueuse Princesse. Estant paruenue à l'aage de 20. ans. il consumma le mariage d'entre luy & la fille de Philippes le Hardy Duc de Bourgogne, qui auoit esté contracté entr'eux estans au berceau. Dès son ieune aage il prit grand plaisir à bastir, & ayant choisi vn lieu fort delectable sur le Lac de Geneue nommé Ripaille, à demie lieuë de la ville de Thonon, il y commença vn chasteau de plaisance qu'il ayma toute sa vie depuis, & y finit ses iours. Il donna aux Celestins la maison des Templiers de Lyon, & commanda à son fils Louys d'y faire bastir vne Eglise. Il enuoya du secours à son beau-frere le Duc Jean de Bourgogne pour la guerre qu'il auoit contre les Liegeois. L'Empereur Sigismond en l'an 1415. vint à Paris, & y fut accompagné par le Comte Amé, comme l'un des 4. Comtes du saint Empire, & en l'an 1417. ledit Empereur erigea le Comté de Sauoye en Duché, & en fist proclamer solennellement Amé premier Duc, lequel Duc moyenna la paix entre le Roy Charles 7. & Philippes le Bon Duc de Bourgogne.

L'an 1430. il institua & establir vn Senat ou Parlement à Chambery, & l'an 1433. il maria son fils Louys avec Anne fille vniue de Jean de Lusignan Roy de Cypre, & les nopces furent celebrees audit Chambery. Le Duc Amé ayant atteint l'an 56. de son aage, delibera de quitter le monde, & de finir le reste de ses iours en vne solitude, & de fait ayant laissé en l'an 1439. à son fils Louys ses principautez, il se retira à Ripaille où il y auoit vn Prieuré de l'Ordre de saint Maurice, & là prit l'habit d'Hermitte selon ledit Ordre, avec dix de ses Cheualiers & Gentils-hommes domestiques. Peu de temps apres il fut esleu Pape par les Peres du Concile de Basle, apres auoir depesé le Pape Eugene 4. & fut nommé Felix 5. Ce qui causa vn schisme en l'Eglise d'autant qu'en Italie & en France Eugene 4. fut toujours reconnu pour Pape, lequel schisme dura plus de neuf ans, mais il fut appaisé par l'entremise des Roys de France, d'Angleterre, & de Sicile, qui firent en sorte que le Pape Felix fist cession du Papat au Pape Nicolas cinquiesme, qui auoit esté esleu à Rome, apres le deceds d'Eugene 4. Ce qui aduint en l'an 1449. au mois de May, & le Duc Amé demeura Cardinal, Euesque de Sabine, Legat & Vicaire perpetuel du saint Siege Apostolique, & retourna en son Hermitage à Ripaille, où il vesquit le surplus de sa vie saintement, iusques en l'annee 1452. qu'il mourut le sixiesme an du Pontificat dudit Nicolas 5. aagé de 69. ans ou enuiron, & est enterré en l'Eglise Cathedrale de Lausanne.

Il gouerna les Estats 48. ans, iusques en l'an 1439. qu'il fut Pape.

XVIII.

Louys fils d'Amé, fut premierement nommé Comte de Geneuois, & puis son pere entrant en l'Hermitage de Ripaille, il fut Prince de Piedmont; & depuis son dit pere ayant esté esleu Pape en l'an 1439. il fut proclamé second Duc de Sauoye. Il fut Prince gracieux, fort simple, & debonnaire, & heritier de son pere, tant en ses biens qu'en ses saintes conditions, douceur, lenité & mansuetude. Il eut de sa femme Anne de Cypre plusieurs enfans males, & des filles, l'aînée desquelles nommée Charlotte de Sauoye, fut mariee avec le Dauphin de France, fils du Roy Charles 7. qui fut depuis Roy, & nommé Loys 11. Son fils aîné nommé Amé Prince de Piedmont espousa Madame Yoland de France, fille du Roy Charles 7. & son puîné nommé Louys, fut marié avec sa cousine germaine Charlotte, fille vniue & heritiere du Roy de Cypre, & ainsi à cause de sa femme il fut Roy de Cypre, mais luy & sa femme furent priuez dudit Royaume par Jacques le bastart, assisté des forces du Souldan d'Egypte. Le Duc Louys establir à Thurin vn Parlement en l'an 1459. & depuis long-temps apres s'estant

s'estant fait porter à Lyon pour y voir le Roy Louys II. son gendre, il y mourut l'an 1466. ayant esté Duc 26. ans entiers: son cœur fut inhumé au milieu du chœur de l'Eglise des Celestins dudit Lyon, qu'il auoit fait bastir du vivant & par le commandement de son pere Amé, & son corps fut apporté à Geneue, où il fut enterre auprès de sa femme Anne de Lusignan.

XIX.

Amé ou Amedee neuuesme du nom, fut troisieme Duc de Sauoye apres la mort de son pere Louys, decedé en l'an 1466. Il fut semblable à son pere & ayeul en bonté, simplicité, innocence, humilité, iustice, religion, douceur & debonnaireté. Il fut sujet au mal caduc qu'on appelle Epilepsie: Il eut de sa femme Yoland de France, qu'autres appellent Isabelle, Philebert & Charles, qui furent tous deux successiuent Ducs de Sauoye. Ledit Duc Amé estât en la ville d'Orleans mourut d'une disenterie ou flux de ventre, à la fin du mois de Iuin 1471. & son corps fut apporté à Verceil où il est enterre. Philippes de Bergame escrit qu'à la sepulture dudit Duc il se fit plusieurs miracles. Il auoit toujours esté fort charitable & tres-liberal enuers les pauvres, il regna près de cinq ans.

XX.

Philebert I. du nom apres le deceds de son pere Amé 9. fut quatrieme Duc de Sauoye, mais parce qu'il estoit en bas aage, il fut sous la tutelle de sa mere Yoland de France, laquelle le gouuerna sagement par l'espace de dix ans, avec l'Euesque de Geneue son oncle, mais ce ne fut sans beaucoup de peine. Car elle fut constituée prisonniere par le Duc de Bourgogne, toutesfois elle fut deliurée par le moyen du Roy Louys II. son frere, qui la renouya en Sauoye en liberté.

Le Duc Philebert fut marié avec Blanche Marie, fille de Galeas Vicomte Duc de Milan, à raison dequoy le Duc Galeas print en sa charge & sauuegarde le ieune Duc Philebert, & le garantit d'une conspiration que l'Euesque de Geneue son oncle auoit brassée contre luy, lequel fut fait prisonnier à Thurin, mais ledit ieune Duc estant venu à Lyon en l'an 1482. il mourut de maladie, aagé de seize ans huit mois, ayant regné vnze ans.

XXI.

Charles premier du nom frere de Philebert premier, & second fils d'Amé 9. fut 3. Duc de Sauoye apres la mort de son frere decedé sans enfans, il eut pour femme Blanche fille de Guillaume Marquis de Montferrat, & d'Elizabet de Milan fille de François Sforce, de laquelle il laissa vn fils aussi nommé Charles. Ce Duc Charles fut Prince autant vaillant & magnanime qu'il de son temps ait vescu. Il eut differend avec Louys Marquis de Saluces pour la recognoissance de superiorité, car ledit Marquis ne voulant faire hommage au Duc, il fut à force d'armes chassé du Marquisat, & enjouyt ledit Duc par l'espace de trois ans, iusques au 14. de Mars 1490. qu'il mourut à Pignerol aagé de 22. ans ou enuiron, ayant regné huit ans. Il est enterre aux Cordeliers dudit Pignerol.

XXII.

Charles deuxiesme du nom estant aagé seulement de huit mois, succeda à son pere Charles premier au Duché de Sauoye, sous l'administration & gouuernement de Blanche de Montferrat sa mere, laquelle se conduisoit par le conseil de Philippes de Sauoye, Comte de Bresse, grand oncle de son fils, Prince fort redouté, qui auoit de grands Estats en France, estant Chambellan, grand Maistre de France, Cheualier de l'Ordre saint Michel, de nagueres erigé par Louys II. Gouverneur du Dauphiné, & Capitaine de cent hommes d'armes, de sorte que ladite Duchesse gouuerna fort paisiblement & heureusement la Sauoye, & receut fort honorablement le Roy Charles 8. allant conquerir le Royaume de Naples, passant par Suse & Thurin, auquel elle presta ses bagues & ioyaux. Mais le ieune Duc mourut à l'aage de sept ans, le 16. Auiil 1496. & sa mere ne gouuerna la Sauoye sous le nom de son fils que six ans ou enuiron.

XXIII.

Philippes deuxiesme du nom Comte de Bresse, apres le deceds de Charles second son petit nepueu, fut septiesme Duc de Sauoye. Il estoit fils de Louys, fils d'Amé 8. qui fut le premier Duc de Sauoye, & frere d'Amé 9. & parce qu'il vouloit entreprendre contre son pere le Roy Louys 9. qui à cause de Charlotte de Sauoye estoit beau frere dudit Philippes, le retint deux ans prisonnier à Loches, mais estant en liberté il espousa Marguerite de Bourbon, fille de Charles Duc de Bourbon, & suiuit quelque temps le party de Charles Duc de Bourgogne contre le Roy Louys, son beau frere, lequel trouua moyen de luy faire

quitter le party de Bourgogne, luy donnant de grands Estats en France, où depuis il fist de grands seruices audit Roy Louys vnzième & à Charles 8. son fils. Il eut de sa femme Marguerite de Bourbon Philebert qui luy succeda au Duché, & Louyse de Sauoye qui fut mariée à Charles Comte d'Angoulesme, dont nasquit le Roy François premier de ce nom, & vne autre fille nommée Phileberte, qui fut femme du magnifique Laurent de Medicis frere du Pape Leon dixième & de Claude fille du Comte de Ponthieure de la maison de Bretagne sa seconde femme, il eut Charles qui succeda à son frere Philebert audit Duché, & Philippes de Sauoye Duc de Nemours & Comte de Geneubis, pere de Monsieur le Duc de Nemours. Il eut vn fils naturel nommé René, qui fut grand Maistre de France, duquel sont venus les Comtes de Tende & de Villars. Il ne fut Duc qu'vn an, six mois, & 21. iour, & vescu 59. ans, vnze mois, & trois iours, car il mourut en la ville de Chambery le septiesme Novembre 1497.

XXIII.

Philebert deuxiesme surnommé le Bel, succeda au Duché de Sauoye apres le deceds de son pere Philippes 2. & fut le 8. Duc. Il fut nourry en la Cour du Roy de France avec le Roy Charles huitiesme son cousin germain, lequel il accompagna à la conquête du Royaume de Naples: mais son pere voyant que la peste se mettoit en l'armee du Roy, le renuoya de Naples en Sauoye, puis venant le Roy Louys douzième à la Couronne, il assista ledit Roy à la conquête de Milan. Il espousa Marguerite d'Autriche fille de l'Empereur Maximilian en l'an 1501. de laquelle il n'eut point d'enfans, & approchant de l'age de 25. ans, il mourut d'une pleuresie en Septembre 1504. ayant esté Duc près de 7. ans. Sa veufue memoratiue du vœu que le Duc Philippes 2. pere dudit Philebert 2. auoit fait, de fonder & bastir vn Monastere au lieu de Brou, près de Bourg en Bresse, elle fist bastir ledit Monastere ou Abbaye de Brou, qui est le plus superbe & triomphant edifice, & de la plus plaisante structure, pour vn ouurage à la moderne qui soit en l'Europe. On fut trente-cinq ans à construire & parfaire ladite Abbaye, où fut inhumé ledit Duc Philebert avec sa mere & sa femme, & on dit que le bastiment cousta six-vingts mille escus.

XXV.

Charles troisième du nom, & 9. Duc de Sauoye, surnommé le Bon, fut fils de Philippes 2. & de Madame Claude Comtesse de Ponthieure, & succeda au Duché de Sauoye apres la mort de Philebert 2. son frere consanguin, & y fut receu l'an 1504. en Septembre, en excluant Louyse de Sauoye, qui fut mere du Roy François premier, sœur germaine dudit Philebert. Il eut pour femme Madame Beatrix de Portugal fille du Roy Emanuel de Portugal, Princesse de beauté & vertu indicible, dont il eut deux fils; Charles qui deceda en Espagne en la Cour de l'Empereur Charles 5. son oncle, & Emanuel Philebert qui fut Duc de Sauoye apres son pere. Estant paruenue à la dignité Ducale, il gouerna son peuple en grande paix & tranquillité iusques en l'an 1516. que le Roy François premier vint conquerir le Duché de Milan, où il gagna vne bataille tres-sanglante contre les Suisses, & apres sa victoire vint à Chambery voir le saint Suaire de nostre Sauueur, où il fut receu en grand honneur par le Duc Charles son oncle maternel. Puis suruindrent les guerres & esmotions à cause du changement de la Religion introduit par Luther, desorte que ceux de Geneue s'exempterent de l'obeissance de leur Euesque. En fin ledit Roy François premier, ayant de grandes pretensions sur la Sauoye, tant de son chef comme Roy de France, qu'à cause de Louyse de Sauoye sa mere, qui estoit sœur germaine du Duc Philebert 2. fist la guerre en Piedmont en l'annee 1536. & suivantes, 19. ans, iusques en l'an 1554. qu'il mourut à Verceil ayant vescu près de soixante-sept ans, & regné cinquante ans.


XXVI.

Emmanuel Philebert 10. Duc de Sauoye, succeda au bon Duc Charles troisième son pere. Il fut nourry en la Cour de l'Empereur Charles 5. son oncle maternel, où il fut Chef & Capitaine de l'escadron Imperial estant composé de quatre mil cheuaux. Depuis le deceds dudit Empereur il entra au gouuernement de l'Estat des Pais-bas, sous le regne de Dom-Philippes 2. Roy d'Espagne son cousin germain, lequel le fist General d'armee contre les François, & se trouua à la bataille de saint Quentin le iour de saint Laurent 1557. où l'armee François fut deffaite. Finalement la paix fut faite entre les Roys Henry 2. & Philippes 2. par laquelle la fille aisnée du Roy Henry 2. Madame Isabelle de France fut accordée avec le Roy Dom-Philippes 2. Et Madame Marguerite de France Duchesse de Berry fille du Roy François

François I. & sœur unique du Roy Henry, fut promise au Duc de Sauoye Emanuel Philebert, & par le moyen de ceste paix le Duc Emanuel Philebert fut restably au Duché, où estant paisible il a fait plusieurs sainctes Loix & Ordonnances, & fonde l'Vniuersité de Mont-royal qui a depuis esté transferée à Thurin, & mesme renouuellé l'Ordre des Cheualiers de l'Annonciade institué par Amé 6 le joignant à celuy de saint Lazare, & assignant aux Cheualiers la ville de Nice pour le sejour ordinaire. Il est decedé à Thurin le 30. d'Aoust 1580. recogneu de tous pour vn des plus prudens & sages Princes de son siecle, laissant pour successeur Charles Emanuel son fils vnique, & de la tres-illustre Princesse Marguerite de France. Il a esté Duc 26. ans ou enuiron.

XXVII.

Charles Emanuel apres le deceds de son pere Emanuel Philebert, fut l'vnzième Duc de Sauoye, estant aagé de 18. ans ou enuiron. C'est vn Prince doué d'un bel esprit, d'une grande memoire, & bien disant, grandement versé en l'histoire & aux Mathematiques, & sur tout grand Capitaine. L'an 1585. il espousa l'Infante Catherine d'Espagne, fille du Roy Dom Philippes 2. & de Madame Isabelle de France, fille du Roy Henry 2. De ce mariage sont issus 5. fils, Philippes Emanuel, Victor Amé, Philebert, Maurice, & Thomas, & quatre filles, Marguerite, Marie, Isabelle & Catherine, qui ont tous suruescu leur mere, qui deceda l'an 1597. au commencement du mois de Novembre. Durant les derniers troubles de la France il s'empara du Marquisat de Saluces par droit de bien seance, ce qui luy a causé de grandes guerres, & à ses subiects & voisins, mesmes contre les Sieurs de la Valette & Desdiguieres, Gouverneurs de Prouence & du Dauphiné pour le Roy tres-Chrestien, lesquelles guerres furent appaisées par le traitté fait à Veruins, entre les Roys Henry 4. & Philippes 2. en l'an 1598. auquel le Duc de Sauoye fut compris, à la charge que le surplus des differents d'entre ledit Roy Henry 4. & luy, seroit remis au jugement du Pape. Quelque temps apres le Duc de Sauoye vint à Paris, où il fut bien receu par le Roy, auquel il promist rendre dans le premier Iuin 1600. le Marquisat de Saluces, ou luy laisser la Bresse, Pignerol & les Vallées à son choix, par escrit solennellement signé. Mais ledit Duc estant de retour en Sauoye, & differant d'accomplir sa promesse, il y fut forcé par le Roy Henry le Grand en la mesme annee, car en peu de temps il se rendit maistre de la Sauoye, & des places qu'on estimoit impreuables, & par l'entremise du Pape Clement 8. la paix fut accordée & signée à Lyon le 17. Ianuier 1610. par laquelle le Marquisat de Saluces demeura audit Duc, & les Seigneuries de Bresse, Bugey & Veromeis avec leurs dependances, furent laissées au Roy en contreschange dudit Marquisat.



E S T A T DE LA REPUBLIQUE DE GENEVE. S O M M A I R E.

I.

ANTIQUITE' de la ville de Geneve, & sa situation.

2. En quoy son terroir abonde: les fruits qui y croissent, & la bonité de l'air du pays.
3. Genevois d'un naturel grossier, peu enclins & courtois aux estrangers.
4. En quoy consiste le peu de richesse qu'a ceste Republique.
5. Geneue ville forte & bien gardee: de son Arce-nal: & des forts qui sont en ce pays.
6. Forts de sainte Catherine & autres démolis par Henry le Grand Roy de France.
7. Des Comtes de Geneue. Pourquoi les Ducs de Sauoye pretendent que Geneue leur appartient. Quand & comment ils ont occupé la Jurisdiction desdits Comtes.
8. Cour souveraine à Geneue composée de vingt-cinq Senateurs: & quels sont les statuts & loix de ceste Republique.
9. Comment le Caluinisme a esté introduit & establi en la ville de Geneue.



1. La ville de Geneue comprise dans la Sauoye est fort ancienne, veu que Cesar mesme en a fait mention au premier liure de la guerre des Gaulles, assurant qu'il y auoit vn pont, passant outre le Rhosne, qui de son temps estoit sous la puissance des Suisses. La situation de ceste ville est plaisante, & du costé où le Rhosne sort de ce grand lac, qu'on nommoit anciennement le lac Lemman, elle est basse: mais depuis cela elle est esleuee sur vne petite montagne. Il y a à Geneue encor comme deux villes, au milieu desquelles on void passer le Rhosne, sur lequel il y a vn pont qui les conjoint. La grande ville est du costé du Midy, & la petite du Septentrion. Les Allemans l'appellent Genf.

Q U A L I T E'.

2. Le terroir d'aupres de Geneue est de bon rapport, veu qu'il produit du bled, du vin, des raues, des melons, toutes sortes de legumes, de l'orge, du foin, & de l'auoine. Ses fruits ordinaires sont des noix, des pommes, des poires de plusieurs sortes, des guignes, & des cerises, des meures noires & blanches, des chataignes, & des amandes: mais il y vient fort peu de figues. L'air est bon & sain: & l'Hyuer n'y est si fascheux qu'en Allemagne, ny l'Esté si importun qu'en plusieurs lieux de Dauphiné: dans le lac de Geneue on prend de beaux poissons de fort bon goust, principalement des truites saumonées qu'on porte à Lyon & ailleurs, & dont on fait si grand estat, comme de la plus delicate viande qu'on puisse manger.

M O E V R S.

Les habitans de Geneue sont assez grossiers en leurs mœurs & façons de faire, mais ils ont l'esprit bon, & se scauent assez bien conduire en leurs affaires, ils n'ayment guere à voir des estrangers dans leur ville, principalement si l'on a le moindre soupçon qu'ils sont Catholiques. Ils les plument aussi dans les hostelleries le mieux qu'il leur est possible. Ils se sont vn peu appriuoisez avec les François depuis que le II^e oy estoit en Sauoye, & que demandant lesien avec les armes en la main, il les garantit de beaucoup de dommages qui leur pou-
uoient

uoient arriuer, principalement du fort sainte Catherine qui fut rasé. Les femmes y sont plus chastes qu'en lieu du monde, & toutesfois quelques vnes ne laissent de faire l'amour en cachette. Tout le monde s'y met sur la grauité, & la retenue. Les gens de qualité qui se messent de parler François le parlent aussi mal qu'il est possible. Le menu peuple parle Sauoyard. Ils vont tous vestus fort modestement, & la coustume est qu'il n'y a point d'excez aux habits comme ailleurs. Aussi s'ils se mettoient sur ceste despence, leurs reuenus au bout de l'an seroient fort petits.

RICHESSES.

C'est chose assuree que les Geneuois ne sont gueres riches, & c'est tout ce qu'ils peuvent faire que de s'entretenir avec beaucoup de peine en vne honneste liberté. Et n'estoit leur grand travail à imprimer des liures de toutes sortes, & à inuenter, & faire force draps de soyes, ceste Republique seroit aussi tost pauvre, & abbatue. Puis ils vident d'un bon moyen de se maintenir avec quelques moyens, veu que l'espargne y est extrêmement pratiquée, & c'est aussi presque leur plus grand reuenue. Ils enuoyent aussi dehors de bons fromages, des chapons gras, & du fil d'or bien trauaillé.

FORCE.

La ville de Geneue est bien fortifiée, & fournie d'artillerie & de toute sorte de munitions de guerre. On y fait ordinairement bonne garde, & si tost qu'un estranger y arriue on espie les actions, & l'on prend garde à tout ce qu'il fait. Que si quelqu'un estoit si hardy de s'aller promener autour des murailles pour les considerer, outre qu'on ne luy permettroit longuement la veüe, il seroit tout aussi tost mis en prison, & en danger de perdre la vie. Il y a un Arcenal pres la Court qui est garny de toute sorte d'armes, & pourueu de tout ce qui peut estre necessaire pour soustenir un long siege.

Il y a & y a eu plusieurs forts en ce pays, & entre les autres celuy de S. Catherine où estoit l'artillerie que le Duc de Sauoye auoit là pour battre Geneue: mais il fut pris par nostre grand Roy Henry IV. l'an 1600. & razé. L'autre qui auoit esté aussi dressé vis à vis par ceux de Geneue fut aussi abbatu pour pacifier toutes choses. Le troisieme nommé Ripaille vint au pouuoir de ceux de Geneue par le moyen des François l'an 1589. & fut ruiné, de mesme que le 4. lors qu'il fut pris par les mesmes Geneuois. Il a aussi quelques tours, entre lesquelles on en nomme vne tour Maistresse, qui deffend Geneue du costé du Lac, & de la Sauoye, l'autre est nommée la Tour de l'Isle, ou de Cesar, qui est assise en la haute Isle pour la deffence du pont qui appartenoit jadis aux Suisses. Et puis que nous auons parlé des preparatifs que le Duc de Sauoye auoit fait pour l'assieger, i'estime qu'il sera fort à propos de dire pourquoy les Ducs de Sauoye pretendent que Geneue leur appartient.

Les Euesques de Geneue estoient ordinairement en different avec les Comtes pour la domination de la ville.

Or pour abreger apres qu'un certain Euesque nommé Humbert fut mort, son successeur s'en alla vers l'Empereur Federic I. & impetra de luy, qu'il fust seul Prince de Geneue, & ne fust sujet aux choses layes à nul autre qu'à l'Empereur, & dauantage qu'il demerast exempt de tous tributs. Mais apres que l'Euesque fut de retour à Geneue, on luy fit encor les mesmes fascheries, iusqu'à ce qu'un Comte nommé Guillaume encourut le ban Imperial à cause de sa rebellion, & fut priué du fief qu'il tenoit de l'Euesque.

Or la guerre ayant duré longuement, & les forces de la ville, & de l'Euesque estans diminuées, les Geneuois appellerent un Comte de Morienne, qui fut depuis Comte de Sauoye. Mais il y eut encor entre ceux-cy diuerses guerres, en sorte que ce Comte occupa plusieurs petites villes, & chasteaux qui estoient à ceux de Geneue, & s'approcha bien pres de la ville. Et ne se contentant de ce qu'il auoit usurpé sous tiltre d'hommage non fait il demandoit qu'on le remboursast des fraiz qu'il auoit faits en ceste guerre. Mais apres que l'Euesque luy eut respondu qu'il deuoit se contenter des choses qu'il auoit acquises du droit de fief qu'il luy auoit donné, il sortit de là beaucoup de nouuelles querelles, & la plus grande partie du peuple craignant que ce Comte de Sauoye ne s'irritast, & fist paix avec leur ennemy commun, à leur grand dommage, il luy accorda qu'il possederait en la ville mesme tout ce que le Comte de Geneue y possedoit auparauant, & ce à titre d'hypothèque. Mais d'autant que y estant entré il traitoit les Geneuois tyranniquement, quelques uns des Chanoines, & des citoyens conspirans contre luy rappellerent leur Comte, qui estant venu

avec quelque armee fut vaincu par les Sauoyards qui tenoient la ville, & entrerent dans les maisons des coniurateurs, prindrent ceux qu'ils peurent, & les deffirent. Ce discord a duré iusques à ce que les Comtes de Geneue ont failly, & que les Princes de Sauoye ont tiré à eux la iurisdiction desdits Comtes. Finalement Amé Prince de Sauoye fasché de se voir ainsi au dessous d'un Euesque, tascha de se mettre au dessus, & obtint de l'Empereur Charles IV. d'estre Vicaire de l'Empire en tout son pays, voulant que par ce titre l'Euesque de Geneue luy fust subiect avec sa iurisdiction. Mais l'Euesque resista fort & fermé au Comte, & par ce moyen son autorité luy demeura, & au peuple sa liberté, iusques au temps d'Amé VIII. nepveu du premier Amé qui fut le premier Duc de Sauoye, & depuis Pape nommé Felix. Cestuy-là impetra du Pape Martin la iurisdiction temporelle de Geneue. Mais il ne peut iouyr du don qui luy auoit esté fait, non plus que ses successeurs.


GOVERNEMENT.

IL y a à Geneue vne Cour où s'assembtent tous les iours vingt-cinq Senateurs pour les affaires de la Republique. Mais on a remarqué qu'ils ne font guere bonne iustice à vn estranger qui demande quelque chose à vn des habitans du lieu, de sorte que tous s'en retirent mal contents, lors qu'ils y ont quelque affaire de ceste sorte. Si quelqu'un desire scauoir les Statuts, & loix de ceste Republique, il y en a liure nouuellement imprimé à Geneue, qui pourra contenter les curieux.

RELIGION.

CEux de Geneue font profession de la nouvelle opinion, & n'ont aucun exercice de la Religion Catholique, ains leur ville est retraicte de ceux qui sentent mal de la Foy, & vne vraye pepiniere de Ministres, qui vont de là aux autres contrees. Chacun scait assez comme ceste ville, iadis siege de tant de bons Euesques, receut Calvin l'an 1539. & l'ayant recogneu pour chef, embrassa son opinion, & depuis s'y est tellement confirmée, qu'il semble impossible qu'on arrache iamais l'heresie de ceste ville par moyens humains, si ce n'est en exterminant tous ses habitans. Mais de mesme que le premier est insupportable, le second est tout cruel. Il en faut laisser le remede à Dieu, qui fait bien des choses plus merueilleuses.

ESTAT





E S T A T
DE LA REPUBLIQUE DES SVISSES
OV DES CANTONS DES LIGVES
DES SVISSES.

S O M M A I R E.

I.

- D** ESCRIPTION de la Suisse.
1. Du pays des Grisons & de ses limites.
 2. Des Valaisiens.
 3. Division des Suisses en 13. Cantons.
 4. Du Canton de Vry nommé Taurcan du temps de Cesar, d'où il a pris son nom.
 5. Vry village divisé en dix Communautés & premierement de Suits.
 6. De Vnderal.
 7. De Lucerne & quels sont les lieux de la juridiction de ce Canton.
 8. De Zurich.
 9. De Znach.
 10. Du pays de Glaris.
 11. De Berne, quand bastie; de ses villes & dependances.
 12. Du Canton de Fribourg.
 13. Du pays Descafuse: & d'où a prins son nom.
 14. Du pays d'Appenzel, pourquoy ainsi appellé & divisé en 12. Communautés.
 15. Des Valaisiens divisés en hanes & bas, en libres & subiects, & de leurs Communautés.
 16. Du Canton des Grisons divisés en trois ligues.
 17. Quelle est la fertilité du pays des Suisses & en quoy il abonde. Et quel est le rapport, & des choses que produisent les pays de Zurich & autres Cantons.
 18. Du naturel & mœurs des anciens Suisses & de leur vaillance en guerre du temps de Cesar.
 19. Du naturel des Suisses modernes & de leurs inclinations aux armes & au vin.
 20. Sterilité du pays des Suisses, excepté les pasturages.
 21. Situation & assiette du pays des Suisses naturellement fort, à raison des Alpes qui leur servent de remparts & deffences.
 22. Republique des Suisses composée de trois parties, & combien de Cantons chaque partie contient.
 23. Quand & comment les Suisses sont cantonnés, & conformément leur Republique.
 24. De la ligue des 3. Cantons faite à Baden l'an 1325. & ce qu'elle contenoit.
 25. D'une autre ligue de Lucerne, Vry &c. & ses articles.
 26. Assemblée faite à S. Gal entre les quatre susdits Cantons, ayant force de Loy & de ligue.
 27. Ligue de Zurich avec les Cantons & ses articles.
 28. Ligue de Zuch avec les 3. Cantons.
 29. Ligue de Glaris.
 30. Ligue hereditaire faite entre l'Empereur Maximilian, & Charles Archiduc d'Autriche & les Suisses.
 31. Union des 3. ligues des Grisons avec les Cantons.
 32. Conclusion & articles du droit & Canon avec les Seigneurs & pays des Valaisiens.
 33. Ligue de S. Gal & sa forme.
 34. La dernière paix faite avec ceux de Zurich le jour de S. Octavian l'an 1531.
 35. Paix de Berne l'an 1537. & ses articles.
 36. Moyens & voyes qu'ont tenu les Republiques plus fameuses, tant anciennes que modernes, pour estendre leurs Estats.
 37. Des deux Conseils publics établis aux villes de Zurich & de Basle, & de combien de personnes composés.
 38. De la diette generale & assemblée des Suisses.

41. Du mélange & diversité de Religion des Suisses, & de tout le trouble né aux Grisons & en la Valaisme sur ce subiect.

42. De leurs alliances avec les Roys & Estats de l'Europe, & du service qu'ils rendent en payant leurs pensions.



L est maintenant question de parler de plusieurs Estats qui sont comme en vn par le moyen de leur confederation, & bonne intelligence, qui s'est maintenue depuis fort long-temps, sans que personne ait entrepris de s'attaquer à ceste nation, ou que son dessein luy ait réussi lors qu'il l'a voulu effectuer. Et de fait les Suisses sont encor auourd'huy tellement vnies qu'un Prince qui se resoudroit de deffaire leur alliance, & qui y apporterait tous les artifices possibles, n'en verroit iamais vne bonne issue. Mais pour venir au point, & suivant nostre ordre considerer les limites de tout ce pays, ie dy, que la Suisse est vne province d'Alemagne, qui a pour ses bornes du costé du Leuant les Grisons, Constance, & vne partie de la Suaube: du Ponent le

Valais, & la Comté de Bourgogne, du Midy l'Estat de Milan pres de Come, & du Nort vne partie de l'Alsace, veu qu'on met Basle au pays des Suisses, pource que c'est vn des treize Cantons, & combien qu'elle se trouue en Alsace. Il y a outre cela les trois ligues du pays des Grisons, iadis appellé la haute Silésie, qui se sont alliees avec ces pays des Suisses: puis l'Abbaye, & ville de S. Gal, Mulhausen, & Rotuail.

Le pays des Grisons a pour ses limites du Leuant la Comté de Tirol, du Ponent les Suisses, du Midy l'Estat de Milan, & le pays de Bergame, & du Nort le pays du Roy des Romains, & a beaucoup de sa iurisdiction entrelassee parmy eux.

Outre cecy l'on compte les sept dizaines de Valaisiens iadis Sedunois, qui habitent sur le Rosne, & confinent du Leuant avec les Suisses du couchant avec la Sauoye, du midy, avec le lac Majour, & le Piedmont, & du Nort avec le lac de Geneue, & vne partie des Suisses. Tout ce pays des confederes est diuisé en trois parties, c'est à sçauoir en Suisses, Grisons & Valaisiens.

Les Suisses sont apres distinguez (afin de laisser les diuisions plus anciennes, comme Ergouie, Turgouie, Vetland, & autres semblables) en treize cantons, qui sont Vry, Suits, Vnderuald, Lucerne, Zurich, Zugh, Glarone, ou Glaris, Berne, Basle, Fribourg, Soleurre, Schiafrisen, & Appenzel.

Le premier Canton, qui est celuy d'Vry, n'a aucune ville, mais son principal lieu, & qui est chef des autres c'est Artorf, lieu ouuert, & esloigné de Lucerne enuiron vn mille d'Italie, & ce pays passe avec sa iurisdiction au delà du mont S. Gotard. On veut dire qu'il estoit nommé Taureau du temps de Iules Cesar, & que le nom est venu delà, d'autant que ceux mesme de Sibental appellent auourd'huy les Taureaux Vry, & ce pays a encor pour armes vne teste de Taureau en champ de sinople. Les habitans disent qu'ils sont descendus d'une race de payens nommez Gots, & Vres, qui furent apres faits Chrestiens. Apres plusieurs changemens de seigneuries, ceste partie sortie en dernier lieu des Alemans retourna à Zurich au temps que l'Empire fut transporté en Alemagne, & que toutes les terres qui auoient iadis esté de l'Empire de Rome, retournerent en liberté, commençant à se gouverner en forme de Republique, ne recognoissant autre superieur que l'Empire Romain, comme on void par les priuileges qui leur furent octroyez par Rodolfe d'Ausbourg Roy des Romains, & par d'autres Empereurs, & ne furent iamais subiects, comme quelques-uns veulent, à la maison d'Autriche, veu que l'Empire estant en ceste maison ils obeyssioient à l'Empereur nouvellement esleu, & non aux successeurs de ceste maison.

Or ce village d'Vry est diuisé en dix parties, ou communautez, qu'ils nomment Gnossmen.

Quant à Suits c'est vne ville assise sur le bord du lac de Lucerne, à la main droite venant d'Artorf à Lucerne, & ce village communique son nom à tout le pays des Suisses. Ceste ville fut hastie par ceux qui estoient partis du Royaume de Suece, que nous nommons Suede, pour chercher nouvelle demeure. On a donné le nom de ce village à tout le pays, ou pource qu'on combatit premierement pour la liberté dans les terres de Suits, ou pource que ceux de Suits furent les premiers exposez aux rauages de ceux d'Autriche, & furent les plus puissants des trois lieux qui se liguerent, de sorte que ce nom coula à tous les autres alliez.

Vnderuald est au dessous au Leuant, & est diuisé en haut, & bas, & la forest de Kernouald passe au beau milieu, & toutesfoistout le pays se nomme Vnderuald.

Lucerne

Lucerne receut ce nom du lieu où elle est assise, qui se nommoit anciennement Lucerne, à cause d'une tour où l'on mettoit de la lumière la nuit. Le commencement de son habitation fut un Monastere qui y fut fait par certain Vincard l'an 840. Elle a esté bastie pres du Monastere, & en partie à cause d'iceluy.

Il y a dans la ville mesme une rivièrè nommée Russi, qui sort du grand lac de ceste ville, comme le Rhin sort à Constance du lac de la ville, & comme la rivièrè de Lindmar sort à Zurich du lac de Zurich. De ce lac on va aux trois bourgs d'Vry, Suits, & Vnderwald, au pied d'une fort haute montagne qu'on nomme rompuë, ou montagne de Pilate, l'origine de ceste ville.

Les lieux de la Jurisdiction de ceux de Lucerne sont Vv'ken, & Sempach, Vvillifouu, la vallee d'Entlibouch, Rotenbourg, ou Rott, Hab-spurg, Berone, Chelampt, Merischliuanden, Ebicone, Horbe, & Krient.

La ville de Zurich est ancienne, & assise en un beau, & plaisant lieu, à l'issue du grand lac qui finit là, & dans lequel la rivièrè de Lindmar entre pres de Glaris. Ce lac separe la ville en deux parties, dont l'une est nommée la grande ville, & l'autre la petite, qui toutes-fois sont assemblees par trois ponts forts agreables. Ceste ville a sous elle les Gouvernements de Kybourg, de Grinou, Audelfingen, Grifensee, Eglisoun, Regensperg, Vadilifoullane, Vvadischouil, & Louffen, Vinterhur, & Steine, qui sont deux villes obeyssantes aussi à ceux de Zurich.

Zuah est une ville de laquelle un petit pays prent son nom. Ce pays confine du costé du Nort celuy de Suits, & la ville est assise sur le bord d'un petit lac. Ceste ville a sous elle la ville de Camp, le village d'André, Hunelberg, Ouacheuille, Steinhuse, S. Vvolfang.

Quant au pays de Glaris, c'est une vallee pres de la rivièrè de Lindmar. Elle n'est guere grande, & n'a de long que trois lieues d'Alemagne, & prend son nom du principal lieu du pays qui s'appelle Glaris. Elle est ceinte de trois costez de tres-hautes montagnes, & confine du Midy, & du Levant avec les Grisons, & du Ponent, les pays d'Vry, & de Suits. On met en ce pays la Comté de Hambur, & la Baronie de Humburg, & Ringenberg. Glaris commande à la Comté de Verdenberg, que les Seigneurs ou Magistrats du pays acheptèrent pour leur Republique l'an 1517.

Quant à Berne elle fut bastie par Bertold IV. Duc de Zeringen, & Comte de Vetlade, qui luy donna le nom d'un Ours qu'il prit en chassant, qui se nomme en Alemand Bern. Ceste ville est comme une presqu'Isle qui fait la rivièrè d'Ar, qui la lave de trois costez, & au bout elle a un pont de pierre, du costé que la ville regarde le Midy, ceste rivièrè passe en un lieu bas d'Occident en Orient, puis retourne, & tire vers l'Occident de la portee d'un canon. Le fond de ceste ville touche à la terre ferme, & si le destroit ou l'istme de ceste terre ferme estoit fossoyé, Berne seroit une Isle.

Or du costé du Midy, & du Septentrion il y a une fort grande hauteur iusques à la rivièrè qui coule en bas, & du costé d'Orient, il y a une montee aysee pour venir au plus haut de la ville.

Berne a sous sa puissance la ville de Lozanne, qui a une merueilleuse assiette, veu qu'elle occupe deux collines opposees, & la vallee, qui est au milieu. Elle a encor la vallee de Hasli, la ville d'Vvnderfeuvuen, la haute & la basse vallee de Simme, Frutigen, Sane, Aelen, Thun, Loupen, Signauu, Drachselvuald, Brandis, Sicomisouald, Burgdorff, Biereneck, Landehuot, Arberg, Nidovn, Erlach, Vvangen, Arouangen, Arburg, Biberstein, Schenkenberg, Lentzburg, puis les villes libres de Zoffingen, Arau, & Bruck.

Fribourg est assis sur une montagne qui est appuyee sur des rochers droicts, & d'autre costé elle est en une vallee close de montagnes, qui ne sont pas trop roides, & autour d'une montagne au plus bas de la ville, il passe une rivièrè de moyenne grandeur.

Le lieu ou le siege de la Iustice est assis sur un roc pendant. Les montagnes soustiennent les murailles, combien qu'en celle qui est du costé d'Orient, il n'y a nuls bastimens, excepté les tours, & forteresses, de quelque costé qu'on veuille aller par la ville, il faut monter, ou descendre.

Soleurre qui n'estoit anciennement qu'un chasteau, est en fin parvenu à la puissance qu'elle a aujourdhuy, & est bonne ville, qui a sous sa puissance des terres & des hommes. Elle est assise en une plaine, & c'est le lieu où S. Vrsè de la legion des Thebains, souffrit le martyre avec 66. de ses compagnons.

Le pays Deschaffuse est assise du costé de l'Alemagne, pres du Rhin, & de la forest noire. Ce pays prend son nom de la ville capitale, dont les murailles sont lauees du costé du Midy de l'eau du Rhin, & derriere vers le Nord, il y a une petite montagne, & dans la ville il y a

Mais afin de particulariser icy quelque chose, le pays des environs de Zurich est de grand rapport, & produit grande quantité de vin, & de froment. Toutesfois le vin est le plus souvent aspre, & ne peut meurir parfaitement, à cause du voisinage des Alpes. Mais ce vin meurit, ou pour mieux dire devient moins aspre étant gardé quelques années. Le lac de Zurich nourrit un nombre incroyable de poissons.

Le terroir des environs de Basle est bon, & porte de fort bon vin, & du froment en abondance; tellement que les habitans secourent même leurs voisins de leurs denrées, lors que quelque cherté & nécessité leur arrive. Il y a en ce pays de beaux & bons pasturages.

Le pays de Berne porte assez de vin & de froment: & quant à celui de Fribourg il produit toutes choses nécessaires, excepté le vin qu'on y meine d'ailleurs.

Quant au pays qui est du long du lac Lemane, les habitans se plaignent de la grandeur de l'Esté, & de la rigueur de l'Hiver. Et toutesfois le lac ny le Rhosne n'y gèlent presque jamais, & l'Esté n'y est pas si ardent qu'aux pays voisins qui sont en France. La terre est propre & facile à être cultivée, & est de fort grand rapport. Car on y recueille en abondance du vin, du bled, toute sorte de légumes, du foin, de l'avoine & de l'orge. Ses fruits ordinaires sont des noix, des pommes, des poires de plusieurs sortes, des guignes, des cerises douces & aigres, des meures blanches & noires, des châtaignes & des amandes. Il y vient fort rarement des figues. Le gibier n'y manque nullement non plus que le poisson & la venaison.

Ceux de Lucerne ont presque plus de commodité du lac qui leur est proche, que de la terre, combien qu'ils aient de fort belles prairies & de bons pastis propres à la nourriture du bétail. Ce pays est moins aspre que les autres.

Quant aux pays d'Uri, Suits, & Underwald, leur terroir porte assez de quoi nourrir les habitans. Quant à Glaris il y a grande quantité de laitage, & de bétail. Là parmy les destroits des montagnes on ne sème guieres de champs, ny l'on ne plante guieres de vignes. On y void de beaux vergers pleins de pommiers, & de belles prairies. On y porte d'ailleurs du vin, & du froment: Les lacs fournissent le pays de poisson, & les montagnes de venaison, & là même on trouve force gibier.

Pour le regard du pays de Valais, les sommets des montagnes blanchissent par tout, mais au bas, & aux vallées on void une agreable verdure. Tellement que ce pays produit même heureusement, pourveu qu'on y veuille prendre quelque peine, des grenades, des figues, des oranges, & abonde en grains, vins, saffrans, & laitages. Il naît aux montagnes divers animaux, & entre autres le bouc sauvage qui ressemble au cerf en grandeur, à la chevre pour le regard des pieds, & au bouc quant aux cornes, qui luy croissent d'un nud toutes les années. Il monte par tout où il peut arrester le pied en quelque sorte que ce soit. Il saute de precipice en precipice avec une merueilleuse agilité. Il demeure aux plus hauts sommets des montagnes, où la glace est extrêmement froide, & lors que le froid vient à luy faillir, la veüe luy manque. On trouve entre ces montagnes des vallons pleins de force glace, endurcie depuis fort long temps de telle sorte qu'on ne la scauroit distinguer d'avec le crystal, & en quelques endroits elle est si profonde, qu'elle fait quelques fois avec un fracas inestimable des ouvertures de trois cents pieds, voire davantage. C'est là que les chasseurs pendent leur chasse, afin que par le moyen du grand froid elle se garde plus longuement. Il y a entre ces precipices des veines d'argent, & quelques-unes de plomb, d'airain, de crystal, & d'agarc. Au terroir de Sion on decouvrit l'an 1544. une fontaine de sel. Il y a des fontaines d'eau chaude de plusieurs sortes, & des bains qui sont extrêmement salutaires. Il y a aussi en ce terroir certaines pierres qui brûlent, estans approchées du feu.

Quant au pays des Grisons, combien qu'il soit montueux pour la plus grande partie, toutesfois il a plusieurs vallées fort agreables, & qui produisent assez bonne quantité de choses nécessaires à la vie.

MOEURS ANCIENNES.

Les Suisses ont de tout temps esté fort bons hommes de guerre, comme on void assez par les affaires qu'ils donnerent à Cesar, qui les redoutant lors qu'ils demanderent passage pour traverser la Prouince Romaine, & s'en aller en Xaintonge, pour y établir leur demeure, fit dresser un mur pour les empêcher d'exécuter leur dessein, se souvenant que ce peuple avoit vaincu le Consul L. Cassie, & defait l'armée Romaine. Ils ne prenoient pas au reste guiere de peine de cultiver leurs terres, & ne trouvoient en leur pays assez de quoi s'entretenir, à faute de culture, & non du terroir qu'ils ont rendu maintenant

de bon rapport, & utile en tous lieux. C'est aussi chose asseurée que dès le temps de Cesar ils estoient diuisez par Cantons, ainsi qu'à present, mais ils n'en auoient que quatre, dont le principal estoit celuy de Zurich. Ce fut le peuple de Suisse, qui detint premier les Romains, & ce fut aussi le premier qui en porta la penitence. On peut cognoistre leur resolution, & la confiance qu'ils auoient en leurs forces, en ce qu'ils bruslerent leurs maisons, & laisserent tout en friche, lors qu'ils firent dessein de chercher nouvelle demeure. Mais ce traitt a veritablement beaucoup d'inconsideration & de barbarie. Quant à la polissure de l'esprit elle n'estoit guiere grande: toutesfois du temps de Cesar on trouua en leur camp des lettres escrites en Grec, & des tablettes de mesme, où estoit contenu le denombrement de ceux qui estoient sortis de leurs maisons, & de ceux qui estoient propres pour porter les armes, & mesmes ils n'y auoient oublié le nombre des femmes, & petits enfans, qui montoit en somme à trois cents soixante huit mille personnes. Cecy peut faire iuger qu'ils n'estoient si barbares qu'on les a creus, & qu'ils s'adonnoient aux lettres Grecques comme les Gaulois. Et quant à leur langue vulgaire, beaucoup de sçauans hommes tiennent qu'elle estoit particuliere au pays, plustost qu'Alemannde, & qu'elle a esté corrompue depuis que les estrangers vindrent de diuers lieux pour vsurper & posseder les Gaules. Si ie voulois amener icy les raisons des vns qui destendent mon dire, & des autres qui soustiennent le contraire, ie donneroie autant de peine à mon Lecteur qu'à moy-mesme. Il suffit de renuoyer les curieux à ceux qui en ont fait des discours entiers, & qui ayants fort soigneusement debattu le pour, & le contre, ont presque autant aduancé en fin que s'ils n'auoient rien escrit, comme il aduiant à tous ceux qui cherchent des raisons à perte de veüe, pour fortifier leurs coniectures.

Il ne faut douter que ces peuples n'ayent suiuy pour la plus grande partie les mœurs des Gaulois, du nombre desquels ils ont esté longuement tenus. Mais apres il fut remply d'une grande multitude de Cimbres, qui forcenez d'abandonner leur pays par vne inondation de la mer Oceane, coururent l'Allemagne, & occuperent vne partie de la Gaule Belgique, & ce pays ne suffisant à tant de gens, ils vindrent sur le Rhin, & demanderent aux Romains des terres, qui leur ayants esté refusees, vne partie passa en Italie, où elle fut deffaite par l'armée Romaine; & l'autre qui demeura au deçà des monts, s'arresta en Suisse au pays de Suintz & Vri.

Quelques autres escriuent qu'au temps de Sigisbert Roy de Suede ces peuples Septentrionaux abonderent en telle sorte, qu'une partie fut contrainte de chercher nouveaux pays. Ceux-cy ayants passé deçà le Rhin rompirent les Gaulois; dequoy les autres pays estonnez, leur depescherent des Ambassadeurs, auxquels ils ne demanderent autre chose, sinon qu'il leur fust permis de viure en cultiuant les terres sans le dommage des autres. A raison dequoy les Suisses leur permirent d'habiter la partie interieure de leur pays, qui est toute pleine de montaignes & de lacs: & ceux-cy cultiuerent le pays, & le rendirent fertile. Depuis les Histoires racontent que pres de l'Ocean Germanique il habita trois peuples appelez Saxons, Anglois, & Vietes. Les Anglois avec partie des Vietes allerent en la grande Bretagne nommee auourd'huy Angleterre, & establirent là leur siege.

L'autre partie des Vietes alla en Suisse, & s'arresta en Suisse, & ceux-cy furent appelez Suithes.

En fin ce peuple prit les mœurs de toutes ces nations: tellement qu'il s'en fit vn melange, duquel on ne sçauoit parler que malaisément, & par des coniectures, pleines d'une vaine subtilité, ou d'un embrouillement incroyable.

MOEURS DE CE TEMPS.

20. **L**es Suisses sont bons hommes de guerre, & propres à supporter toute sorte d'incommoditez, d'autant qu'ils sont nez en vn pays aspre. Ils pratiquent fort la guerre, & y gardent vn bel ordre. Ils ayment le Corselet, la pique, la grande espee, & le poignard; & se seruent aussi fort bien de l'arquebuse. Ils sont de moyenne taille, mais robustes. Le pays qui n'est pas de trop grand rapport est cause qu'ils s'adonnent à viure de leur industrie. Ils despendent peu en habits, & ne consomment guiere d'argent pour leur nourriture, excepté en pain, & en vin, veu que pour le reste ils se contentent de ce qu'ils ont, & ne font point d'estat de ce qui leur manque, & mangent assez de chair & de laitage.

Il leur suffit d'auoir vne estuue, où ils se puissent deffendre du froid. Ils tiennent peu de meubles en leurs maisons, & sont mal polis, rudes & aspres en

leur conuersation, & manquent presque entierement de mœurs & de façons de faire ciuiles.

Ils aiment extremement à faire carous, & y passent les iournees & les nuits entieres, & ceste fureur & vilainie est venue si auant qu'on ne sçauoit faire aucune affaire, ny contracter amitié qu'en beuuant à toute reſte, veu que ceux qui boient dauantage, ou qui s'en-yurent ſont eſtimez plus francs, & plus hommes de bien que les autres, qui reſuſent de faire ces excez dommageables au corps & à l'eſprit. Et meſme ils ne ſe contentent pas ſeulement de cela, comme on faiſt en Flandres, & en tous les Pays-bas: mais encor ſi quelqu'un reſuſe de ſe poyer de vin, ils luy porteront ſoudain le poignard à la gorge, & ce qui luy deuroit ſeruir de gloire, luy ſert de ſubieſt de querelle. Il faut toutesſois aduoüer qu'ils ſont prudents, & bien aduizez, puis qu'ils ont ſceu ſe maintenir ſi longuement en liberté, & viure paisiblement entr'eux, combien que leurs religions ſoient differentes. Outre ce ils ſont ſi bien que les plus grands Princes de l'Europe les recherchent pour auoir leur alliance, & les entretiennent avec force argent toutes les annees.

Pour le regard des lettres, combien qu'ils ayent de bonnes Vniuerſitez, toutesſois ils ne s'y adonnent pas tant qu'aux autres contrees, & leur principal meſtier eſt celuy de la guerre. Ce n'eſt pas qu'il n'y ait eu de ſçauans hommes, & qu'il n'y en ait encore: mais ce nombre eſt fort petit, & ie ne parle que de ce qui ſe pratique en ces pays ordinairement. Auſſi pour dire vray leur eſprit n'eſt pas des plus ſubtils, & tiēt vn peu de l'aſpreté des montagnes, mais ils ont cela, que quand ils ſe meſſent de profiler vne choſe, ils la conçoient fort bien, encor que ce ſoit avec beaucoup de peine. Il y en a peu de ceux qui ſe dépayſent qui ne retiennent touſiours quelque choſe de l'action du pays, & meſme il ſemble qu'ils l'affectent en leurs habits, & en autre choſe. Toutesſois ainſi qu'ils ont pratiqué hors de la Suisse, ils deuiennent rufeſ, & ſont plus mal-aizez à leurrer que les autres peuples qu'on tient plus remplis de fineſſe.

RICHESSES.

IL ne faut parler du pays des Suisses, comme d'une contree riche, & abondante de toutes choſes, veu que ſon aſſiette l'empêche de pouuoir eſtre tel, & ſon naturel fait qu'on doit encore l'eſtimer beaucoup de ce qu'il eſt capable de nourrir tous ſes habitans. Et ſ'ils viuoient comme on fait en beaucoup d'autres pays où toutes choſes abondent, ils ſe verroient bien toſt reduits à vne extreme miſere & pauureté. Mais leur grande eſpargne leur eſt vn bon reuenu, & apres cela l'argent qu'ils tirent des Princes voiſins fait qu'ils ne ſont pas incommodez, comme ils ſeroient ſi l'on ne payoit cherement leurs alliances. Ie confeſſe bien qu'on leur doit ſouuent beaucoup d'arriereage: mais en fin ils ſont payez en quelque ſorte, & les enfans meſmes qui n'ont pas cognoiſſance de ce qu'on leur donne, ſont entretenus par les Princes eſtrangers, qui ſ'eſſayent d'acquérir ceste nation, puis de la bien conſeruer en l'ayant acquiſe. Mas pour dire quelque choſe de ce dont ils peuuent tirer du profit, pource que dans la qualiré du pays ie l'ay marqué comme en paſſant: ie diray ſeulement qu'ils tirent quelqueſois beaucoup d'argent de la nourriture du beſtail, & de leurs paſturages. Il ſe vend à Zurich vne ſi grande quantité de froment, que c'eſt preſque choſe incroyable. Baſſe eſt auſſi vn grand abord des marchands, & à la riuere du Rhin qui luy apporte de grandes commoditez, & luy eſt merueilleuſement profitable. On porte force liures imprimez en ceste ville par toute l'Europe, & les marchands en reçoient de grandes ſommes. Lucerne eſt vn entrepoſt des marchandises qu'on porte de la France-Comté, & des pays voiſins en Italie, & de celles auſſi qu'on porte d'Italie aux autres contrees, d'autant que c'eſt là le chemin d'Italie pour paſſer par le mont ſainct Gotard, & les marchandises d'Italie deſcendent par le lac, & la riuere de Ruſſ dans le Rhin, & puis dans la mer: mais toute leur ri cheſſe n'eſt pas telle qu'on en doie faire quelque eſtime. Tellement qu'il ſera à propos de quitter ce diſcours & venir aux forces.

FORCE.

LE pays des Suisses eſt tellement enfermé de tous coſtez des Alpes, le peuple eſt ſi courageux & ſi opiniâtre à deſſendre ſa liberté, & ceux qui ont attaqué ceste nation y ont ſi mal fait leurs affaires, qu'il n'y a Prince en Europe qui vouluſt entreprendre la guerre contre eux, & de ſe rendre maiſtre des lieux qu'ils habitent. D'ailleurs on auroit ſi peu de profit de ce pays lors qu'on s'e ſeroit emparé, que ceux qui en oſeroiēt faire le deſſein, le fuyroient touſiours comme indiſcret, & qui peut apporter plus de perte que de

Y y ij

contentement. Ils se maintiennent aussi tellement unis, qu'il seroit bien malaisé de les forcer, & d'en rapporter entière victoire. Ils ont quelques villes, & places fortes, qui ne manquent de toutes les munitions de guerre qui sont nécessaires. Ils sont propres à soutenir de longs sieges, & à souffrir toute sorte d'incommodités : mais il ne valent rien pour assaillir quelque ville, & aller à la bresche la teste baissée. Que si quelqu'un s'essayoit de les forcer en leur pays, c'est sans doute qu'ils leueroient vne armee, & ne manqueroient, s'il leur estoit possible, de donner bataille, comme ils ont fait bien souvent à leur aduantage : & chacun doit craindre d'y faire mal ses affaires, veu que si dès le commencement, & aux temps qu'ils n'estoient pas tous liguez ensemble, des poignées de gens ont vaincu de iustes armées ; que ne pourra-on attendre, ou craindre d'une nation entière qui ignore la fuite, & qui se resout plustost à mourir, qu'à se monstrier lasche ?

G O U V E R N E M E N T.

32. **N**ous sommes venus maintenant à la principale piece de l'estat des Suisses, qui est leur gouvernement. Considerons-le donc particulièrement, & espluchons en toutes les parties. Le pays des Suisses est diuisé en quatre parties, qu'ils appellent *Gövv*, d'un mot Allemand qui signifie pays. Ces quatre parties sont Zurichgov, Vvislispurgergov, Argovu, & Turgovu. Et ceste Republique est composée de trois parties. En la premiere sont les treize Cantons, que les Allemands nomment *Orr*. Ceux-cy ont tous seuls ce pouuoir entre tous les alliez, qu'ils deliberent de toutes les choses qui appartiennent à la Republique, aux assemblees publiques, & donnent leur voix, & participent à toutes les commoditez & incommoditez de l'alliance. En la seconde partie on compte l'Abbé, & la ville de S. Gal, les Grisons, les Valaisiens, Ilortueil, Mulhusen, & Biel. En la troisieme on met les lieux qui sont venus au pouuoir de ceste Republique, ou de leur bon gré, ou par force d'armes : comme Turgovu, qui fut reduit sous la domination des Suisses l'an 1460. Bade (non pas le Marquisat qui est ailleurs) subiugué l'an 1415. & obeyssant aux huit premiers Cantons. Rhegust conquis l'an 1513. & gouverné par les treize Cantons. Sarungans vendu l'an 1483. par le Comte George de Vverdemberg, aux sept premiers Cantons qui le gouvernent. Les livres Prouinces prises l'an 1415. recognoissent l'autorité de sept premiers Cantons. Lugan, Locarne, Mendrese, le Val Madia sont paruenues au pouuoir des Suisses par la liberte de Maximilian, François Sforce Duc de Milan, qui leur donna l'an 1513. Ces lieux obeyssent à tous les Cantons, excepté à Appenzel, Bilitone, Bellizone, qui obeyssent aux trois premiers Cantons.

Mais afin de sçauoir de quelle sorte les Suisses se sont ainsi cantonnez, & ont formé vne Republique si redoutable : apres plusieurs changemens de seigneurie, les pays d'Vry, Suits & Vnderual ne vindrent à recognoistre en fin pour superieur, que l'Empire Romain, comme on void par les priuileges qui leur furent octroyez par Rodolph d'Ausbourg Roy des Romains, qui regna l'an 1291. & par autres Empereurs ses successeurs. Et ces peuples ne furent iamais subiects, comme quelques-uns veulent, à la maison d'Autriche, ainsi l'Empire estant en ceste maison, ils obeyssent seulement à l'Empereur esleu, & non aux successeurs de la maison d'Autriche.

Ces valles estans donc en liberte, les Empereurs leur enuoyerent leurs Gouverneurs Allemands, qui sans se mesler du gouvernement, & de l'administration de la Republique, deuoient rendre iustice aux peuples, & quelques-uns de ces gouverneurs furent chafsez, & les autres tuez par leur insolence ; pource qu'ils vsoient bien souvent de diuerses vilainies & meschancetez à l'endroit des peuples, ainsi que fit vn gouverneur d'Ondreuald, qui voulant qu'un d'entre eux fust mis sous le ioug d'une paire de bœufs, ainsi que celui qu'il destinoit à telle chose eust refusé de la souffrir, il commanda qu'il y fust mis par force, & l'autre s'en estant soudain fuy, le Gouverneur se mit en colere, & fit pour ceste cause arracher les yeux au pere de celui qui estoit eschappé.

Il aduint vne autre fois en la mesme vallee, que le Gouverneur pressant vne femme en l'absence de son mary, de luy apprestier vn bain chaud, & d'y entrer avec luy : ceste femme ayant differé iusqu'au retour de son mary, le Gouverneur plein de courroux fit qu'elle mourut d'un coup de hache.

Dauantage, le Gouverneur de Suits & d'Vry, poussé d'une grande folie dressa vn baston sur lequel il mit son chapeau, commandant que tous ceux qui passeroient par là fissent honneur à son chapeau. Il y eut vn Guillaume Zen qui ne voulut le faire, à raison de quoy il le fit venir, & luy comanda d'oster avec vn trait tiré d'une arbaleste vne pome qui estoit sur la teste d'un sien fils : le pere refusa durât plusieurs iours de le faire, mais en fin ne pouuant plus resister, il obeit, & avec l'ayde de Dieu il emporta avec son trait la pome qui estoit sur la teste

de

de son fils sans l'offencer. Et parce qu'il en auoit deux, le Gouverneur luy demanda pourquoy il auoit porté l'autre: à quoy Zen respondit que ç'auoit esté à cause que si son filseult esté offencé par le premier, il auoit resolu de tirer le second contre luy mesme. Le Gouverneur ayant ouy ces paroles, le fit prendre, & l'ayant mis en vne barque pour le mener en vn sien palais entre Vry, & Bruch, il eschappa de la barque, femit à fuyr par les montagnes qui sont autour du lac, & s'appareilla à la vengeance.

Les peuples de ces trois valles esmeus de ces meschancetez, & plusieurs autres, chasserent de toutes parts leur Gouverneur, & se mirent tellement en liberté, que les Empereurs y enuoyerent seulement apres des Iuges ciuils, qui ne pouuoient estre que de leur Seigneurie.

Or ayant diuision en l'Empire l'an 134. à cause qu'une partie des Electeurs auoit esleu Empereur Louys Duc de Baviere, & l'autre Federic Archiduc d'Austriche, & que pour ceste raison ils debattoient de l'Empire; & ces valles ne vouloient pas recognoistre Federic pour Empereur, pource qu'il auoit eu peu de voix, il leur fit la guerre, & enuoya Leopold son fils pour assaillir le pays de Suits, tenant pour certain que Louys ne les pourroit pas secourir.

Leopold estant donc entré avec vne assez grande armee au pays de Suits, qui est environné de tous costez d'eau & de montagnes, & estant arriué à Marguten, fut deffait par les gens des trois vallées, de Suits, Vry & Ondreuald, de quoy le pays estroit fut cause en grande partie, & la saison aussi, veu qu'il y auoit de la glace par tous les chemins, tellement que les cheuaux ne seruoient de rien en ceste bataille, & les Suisses en iettant seulement des cailloux des montagnes les estonnoient en telle sorte, qu'ils se precipitoient volontairement dans le lac.

Au mesme temps par le commandement de Federic, ils furent aussi assaillis par le Comte de Stambourg qui demeuroit à Veldane, du costé d'Ondreuald, & les Suisses estans paruenus de ce costé-là, ne leur laisserent passer la bouche, & finirent toutes sans estre assistez d'aucunes forces estrangeres.

Après auoir soustenu ceste guerre par l'espace de deux ans entiers, ils resolurent pour leur plus grande seureté, & tranquillité, de s'vnir ensemble; & firent vne Ligue, qui fut appelée des trois Cantons. Voicy ce qu'elle contenoit.

Am nom de Dieu soit, &c. Pource que la memoire de l'homme est debile, & passe bien tost, à raison de quoy il oublie aisément le succès des affaires, d'autant qu'il est fort vtile & necessaire que les choses qui apportent la paix, le repos, le profit, & l'honneur, soient mises par escrit.

A ceste occasion nous compatriotes d'Vry, Suits, & Ondreuald, faisons scauoir à tous ceux qui ces presentes liront, ou auront, que pour pouruoir, & remedier aux difficultez & mauuaises qualitez des temps, & pouuoir mieux demeurer en paix & concorde entre nous, & nous nous puissions plus facilement deffendre & maintenir nos corps & biens, nous nous sommes liez avec serment perpetuel, & stable l'un avec l'autre, & par ce serment nous auons approuué & promis de nous conseiller & ayder l'un l'autre avec la personne, & les biens, à nos despens, dedans & dehors le pays, contre tous ceux qui feront, ou voudront faire tort à quelqu'un de nous, tant en la personne, qu'aux biens, en telle sorte qu'il en reuinist du dommage à quelqu'un de nous: Et ce sont ceux à qui nous deuons donner ayde le mieux que nous pourrons, en leur faisant reparer le tort & le dommage receu, ou par quelque autre voye que ce soit.

Secondement, nous auons ordonné entre nous en ceste Ligue, qu'aucun de nos pays; ou Cantons, & moins encores aucun de nous en particulier, ne se rendra Seigneur, ny receura quelque Seigneur, sans la volonté des autres, ou sans leur conseil, ains chacun (soit male ou femelle) sera obeyssant à son vray Seigneur, aux seruices deubs, & honnestes, ou bien à sa vraye Seigneurie: mais non aux Seigneurs qui voudroient prendre quelqu'un de nos pays à force d'armes, & nous voudroient contraindre à quelque chose iniuste, veu qu'on ne leur doit faire aucun seruice tandis qu'ils seront en discord avec les nostres.

Nous auons encores accordé, qu'aucuns de nos Cantons, ny aussi des allies, n'aydera nul estranger, sans l'aduis des autres Cantons & allies.

Aucun des confederez ne traitera avec lesdits estrangers, sans le consentement, & le sceu des autres, tandis que les Cantons ne sont pas subiects. S'il aduenoit que quelqu'un trahist vn des Cantons, & le mit es mains d'autrui, ou n'obseruast quelque vne des choses cy-dessus escrites, il sera tenu pour traistre, & pour homme sans foy, & la personne sera mise entre les mains des Cantons, & ses biens seront confisquez.

Outre ce nous auons accordé qu'aucun de nous ne supportera, ou prendra aucun In-

ge, qui achète les Offices avec de l'argent, ou d'autres biens, s'il n'est Compatriote.

S'il naîtoit quelque différent ou guerre entre les confederez, les meilleurs, & plus sages estreindront ce discord, & termineront la querelle par accord, & si quelqu'une des parties y contredisoit, lors les confederez qui restent doivent assister les autres aux despens des contredifans. Si quelqu'un des alliez tuë l'autre il perdra la vie, sinon qu'il peust prouver (luy estant octroyé de ce faire) qu'il a fait ce meurtre pour la deffence de la personne, & si le meurtrier s'enfuit, celui qui le logera, ou le deffendra dans le pays sera banny, & ne pourra retourner au pays iusques à ce que les Cantons le permettront d'un commun accord.

S'il arriuoit encor que quelqu'un des alliez mist le feu aux maisons d'autrui, il ne pourra iamaïs retourner au pays, & celui qui le logera, ou assistera sera tenu à la reparation du dommage envers la partie interessée, & complaignante.

Aucun ne pourra faire gager l'autre que pour assurance, & ne pourra faire sans permission de son Iuge.

Chacun sera obeyssant à son Iuge, & se présentera devant luy quand il en seroit besoing.

Si quelqu'un s'oppose au Iuge, & est desobeyssant, ou fait du dommage à quelqu'un des alliez par la desobeyssance, lors ceux de la Ligue le contraindront de reparer ce dommage.

Partant afin que la présente Ligue & Capitulation, & toutes les clauses susdictes demeurent à perpetuité stables, & en leur vigueur, nous Compatriotes d'Vry, Sultz, & Ondreuald, auons apposé nos seaux à la présente, faictes à Baren l'an 1325. le 1. Mardy apres la feste S. Nicolas. En la mesme année tous les privileges leur furent confirmez par le susdict Empereur Louys.

Les dissensions de l'Empire estant apaisées, quelques autres pays poussez par le rude traitement de leurs Gouverneurs, & attirez par la douceur de la liberté, entrent en Ligue avec les trois Cantons susdicts. Lucerne y entra premierement en l'année 1332. puis Zurich en l'an 1351. & l'an 1352. Zug, Glaris, & autres. Le contract de la Ligue des quatre Cantons (laissant l'avant-propos que nous auons mis cy-deuant) est tel.

Ligue des quatre Cantons, de Lucerne, Vry, Sultz & Ondreuald.

26. **N**ous Senat, Conseillers, & Citoyens de la ville de Lucerne, & nous Compatriotes d'Vry, Sultz, & Ondreuald, publions & manifestons à tous ceux qui ces présentes liront, ou oyront, qu'afin de deffendre nos personnes avec moins de difficulté, nous nous sommes reciproquement promis de nous ayder l'un l'autre, & nous conseiller en toutes les choses cy dessous escrites, & en toutes autres honnestes & raisonnables. Nous de Lucerne, Vry, Sultz, & Ondreuald, auons reserué l'Empereur nostre Seigneur, & l'Empire Romain, & ce à quoy nous sommes obligez en son endroit, comme nous auons accoustumé de toute ancienneté; & de plus nous susdits de Lucerne auons reserué nostre ville, les Conseillers, & tous leurs estats, les bonnes coustumes envers les citoyens, & estrangers, comme il a esté fait par nos ancestres.

Nous susdits nous reseruons encor en nous-mêmes vne particularité en nos bornes, & limites, selon nos statuts & bonnes coustumes, comme nos predecesseurs ont fait par le passé.

Nous Citoyens de Lucerne nous devons contenter de tels droicts envers les trois Cantons, comme il a esté dit cy-dessus.

Nous susdits citoyens d'Vry, de Sultz, & Ondreuald, nous devons contenter de citoyens de Lucerne comme dessus; mais s'il aduenoit (ce que Dieu ne vueille) qu'aucun de nous, dedans, ou dehors voulust contraindre le deuoir à un autre, & luy faire tort, ou dommage; alors la partie qui sera offencée doit sur sa foy considerer si ce dommage luy est fait à tort, & lors ladite partie aduifera l'autre, & toutes deux avec la ville de Lucerne s'entr'ayderont contre les susdits, & contre qui que ce soit avec leurs personnes & leurs biens.

Nous Citoyens devons à nos despens ayder aux susdits Cantons, & au contraire, nous susdits Cantons devons ayder à nos despens aux citoyens de Lucerne, & le tout avec vne bonne & entiere foy, sans contradiction.

Si par malheur il naîtoit quelque différent entre nous susdits, en ce cas on eslira des meilleurs, & des plus sages, qui accommoderont à l'amiable tous nos debats, & au cas qu'une partie voulust contredire à tel accord, les autres alliez assisteront l'autre aux despens du desobeyssant.

S'il arriuoit des desordres entre les trois Cantons, & que les deux fussent d'accord, en ce cas aussi nosdits citoyens de Lucerne nous devons accorder, & ayder à solliciter le

riers

tiers à ce qu'il s'accorde avec les deux, si nous susdits citoyens de Lucerne cognoissons, & trouuons quelque chose qui nous semble meilleure pour les deux Cantons.

Nous auons encor accordé que nous susdits citoyens, & pour les susdits Compatriotes d'Vry, Suits, & Ondreuald, & pareillement les susdits pour les citoyens de Lucerne, nous pouuons prendre en gage l'un pour l'autre, & qu'aucun de nous ne pourra plus entrer en aucune sorte de Ligue ou capitulation avec aucun, dedans ny dehors, sans le consentement, ou sceu vniuersel des autres alliez.

Aucun allié ne gagera l'autre, sinon pour affermement, ou loüage, & cecy ne se pourra faire que moyennant la deuë sentence.

Celuy d'entre les susdits alliez qui contestera contre le iugement, ou sera desobeissant, si ceste desobeissance porte du dommage à quelqu'un des alliez, doit estre contraint à la reparation du dommage.

S'il aduenoit que quelqu'un des alliez commist quelque faute, pour laquelle il fust banny de sa iurisdiction (pourueu que ce ban fust signifié aux autres iurisdicions avec lettres patentes, & le seau de tel pais, ou de Lucerne) alors celuy qui est de ceste iurisdiction sera banny de la mesme sorte qu'il l'aura esté en l'autre, & si quelqu'un l'assiste, & luy donne à manger, ou à boire, qu'on le sçache, il encourra la peine de l'autre, sauf qu'il ne pourra encourir en aucune sorte la peine de mort.

Et de plus nous auons vniuersellement resolu que celuy des alliez qui n'observera toutes les choses susdites, voire chaque particularité cy dedans comprise, sera tenu pour personne qui manque de foy & de parole. Et afin que ces choses soient obseruees inuiolablement par nous tous, & par chacun en particulier, comme on a conclu avec toutes les paroles expresses, nous susdit Senat, Conseil, & citoyens de Lucerne, auons avec nostre seel commun, & de chaque Canton particulier, fait sceller la presente en foy de toutes les choses cy-dessus escrites, faites, & passées le premier Samedy auant la saint Martin, l'an 1332.

ASSEMBLEE FAITE A SAINT GALE ENTRE LES quatre Cantons, qui a vigueur de Loy, & de Ligue.



Nous Senat, & Conseil de cent, qu'on nomme le grand Conseil de la ville de Lucerne, & nous Amans, Conseil, compatriotes, & toutes les Communautés des trois Cantons d'Vry, Suits, & Ondreuald, au dessus, & au dessous de Silue, sommes entrez en differend entre nous trois Cantons, & l'autre partie; pource que suivant la teneur de l'article de nostre Ligue qui parle de volonté & accord, soit avec droit, procez, ou sentence, que telles choses fussent faites, ou traitées, on entend qu'autant que nous susdits de Lucerne mettrons de personnes en vne garnison ou affaire, nous susdits trois Cantons serons obligez d'en mettre autant de chaque Canton particulier.

Ce qui nous a semblé (à nous dis je de Lucerne) peu conuenable, deshonneste, & iniuste, & ces paroles n'ayans esté mieux declarees en la Ligue perpetuelle, à raison qu'on ne se souuient pas de ces aydes, à ceste cause en la presente diette d'un commun consentement, & meur conseil, nous nous sommes volontairement acordez que pour le regard de cet article, nous de Lucerne y deuons mettre autant de personnes, que nous susdits Cantons d'Vry, Suits, & Ondreuald, & tous trois ensemble terminer tout different, & affaire qui arriuera, & qu'aucune des parties ne sera plus, ou moins que l'autre. Pareillement s'il aduenoit iamais qu'il naquist des differents entre nous trois Cantons, & qu'il fust besoing de proposer, ou esclairsir la teneur de ceste Ligue perpetuelle pour raison de ces paroles, volonté, accord, droit, il faudra que tout ce different se termine avec esgal ayde, comme il a esté dit.

Et si tels desordres, ou differents naissoient entre nous de Lucerne, avec quelque un des Cantons, pareillement toutes & quantes fois qu'il procedera du deuoir pour le regard des deux parties, ils seront terminez avec ayde esgale, comme dessus. Et afin que les susdites choses durent perpetuellement, nous les auons confirmées avec serment, & auons obligé tant nous que nos successeurs, à les obseruer inuiolablement, & pource, nous les auons selles tant du seel de Lucerne, que des trois Cantons, & de nos pais, & en auons fait expedier quatre avec les mesmes paroles, & le mesme seel, dont nous auons eu vne expedition, Vry vne autre, Suits vne autre, & Ondreuald vne autre, toutes de mesme forme. Fait le premier Mercredy auant le Dimanche des Rameaux, l'an 1481.

Ceux de Zurich se liguerent avec les autres 4. Cantons, en l'an 1351.

Y y iiij

LIGVE DE ZVRICH AVEC LES IV. CANTONS.

28. **N**Ous Bourgmaistres, Conseillers & communs citoyens de la ville d'Vry, Suits, & Ondreuald, sçauoir faisons à tous, &c. qu'avec bon conseil, & meure consideration, pour raison d'une bonne paix, & deffence de nos biens, & personnes, & de toutes nos villes, & tous nos païs, & au profit & bien commun, nous nous sommes assemblez, & auons approuué, & iuré haurement deuant Dieu & ses Saincts, tant pour nous que pour nos successeurs, lesquels nous voulons estre perpetuellement compris en nostre Ligue, principalement pour auoir & obseruer vne perpetuelle confederation, qui estoit autresfois, & sera à l'aduenir sans tache, avec bonne foy, ferme, stable, & perpetuelle.

Et pource que les choses instables sont subiettes à l'oubly, & le cours de ce monde tourne & passe, & toutes choses se changent, à ceste cause nous susdites villes & communautéz, nous donnons l'une à l'autre ceste foy perpetuelle, & ce clair tesmoignage, avec lettres & escritures, de sorte que nous deuons estre prests à nous secourir l'un l'autre sans contradiction aucune, autant que nos biens & nos personnes s'estendront, contre quiconque nous voudra offencer en la personne, ou en nos biens, & en nostre honneur, voudroit avec force, & sans raison nous attaquer, & molester quelqu'un des priuilegiez qui sont compris en ceste Ligue à present, & l'aduenir, dans les limites cy-dessus escrites.

Premierement où l'Are naist, qui s'appelle au Grial, & delà en bas, & celle de Berne, où l'Are entre dans le Rhin, & de là iusqu'au costé où il naist, & de ce pont par les Grisons iusqu'à la forteresse nomme Reingembourg, iusques au delà de saint Gotard, iusques sur le mont de Platier, & delà iusqu'au Torsel, & vne autresfois iusqu'à Crinesel, où l'Are prend sa source.

Mais si dans ces bornes il y auoit quelqu'un compris en ceste Ligue qui fust endommagé en quelque sorte, tant aux biens qu'en la personne, alors le Conseil, & la communauté de la ville, ou païs qui se trouuera auoir receu le dommage, doit sur sa foy recognoistre le dommage, & lors que ce Conseil & ceste communauté, ou la plus grande partie de la ville, ou du païs qui aura receu le dommage, aura iugé de quel secours elle a besoing pour ceste affaire, elle en peut, & doit aduertir les autres villes & païs compris en ceste Ligue.

Et quant cét aduertissement sera fait, il faut aduertir par vn Courrier, ou par des lettres du Conseil, ou de la communauté de ceste ville, ou de ce païs, les Conseillers des trois Cantons sans aucune intermission, qu'ils donnent aduis aux villes de ce dont l'autre a aduerty sur sa foy: & elles doiuent de nouueau sur leur foy estre preparees soudainement avec tout ce qui fait besoing pour ayder à ceux qui ont receu le dommage.

Et aucun de nous des susdits Cantons ne traittera en nulle sorte avec aucun la presente Ligue, & ne cherchera ny d'effect, ny de parole aucune chose, par laquelle ce secours puisse estre empesché, retardé, ou esloigné.

Pareillement chaque ville ou païs, doit prester ce secours à ses dépens sans aucune doute.

S'il arriuoit quelque dommage à quelqu'un qui fust compris en ceste Ligue, en telle sorte, qu'il fust aussi tost besoing de secours, alors nous deuons de tous costez le secourir promptement, en telle sorte que tel dommage soit réparé, ou vengé sans aucun delay.

Mais si la chose estoit de telle importance qu'il fust besoing d'assembler quelque diette, & qu'il aduint cependant qu'une des villes comprises en ceste Ligue deust estre secourüe, il faudra soudain aller à la diette, à la maison de Dieu, del' Abbaye S. Marie, & aduiser à ce qui sera plus vtile, de sorte que ceux qui ont aduerty, soient promptement secourus.

S'il y auoit encore quelqu'un qui fust assiégué, on doit payer à ceste ville ceux qui l'aydent, ou qu'ils ont receus en ayde, & ces dépenses se feront pour le regard de leur siege.

S'il y auoit quelqu'un qui sans raison fist dommage à vn autre compris en ceste Ligue, quoy que telle personne habitast hors des bornes susdites, lors que l'on se plaindra de celui qui fera tel dommage, ou quelque represaille, & qu'il viendra entre les mains de nos confederéz, on gagnera, & sequestrera telle personne, & ceux qui luy ayderont, & leurs biens, & leurs personnes, & l'on fera reparer vn tel dommage le plus promptement qu'on pourra.

S'il aduenoit encore que nous susdits de Zurich eussions quelque different avec nos susd. allies de Lucerne, Vry, Suits, & Ondreuald, ou bien avec quelqu'un des particuliers (ce que Dieu vueille) il faudra que nous venions pour ceste cause à la diette à la maison de Dieu, & la ville de Lucerne, les trois Cantons tous ensemble, ou bien vn particulier qui aura different avec nous de Zurich, eslira deux preud'hommes, & nous en eslirons deux autres, & ces quatre iureront deuant Dieu & ses saincts, d'expedier soudainement ceste affaire, ou par accord,

ou

ou par iustice, & ce qui sera conuenu par ces quatre, ou par la plus grande partie, sera obserué par les deux parties sans aucune intermission.

Mais s'il arriuoit que ces quatre qui seront esleus pour telle chose, se diuisassent esgalement, ou quelque different se mist parmy eux, alors ils doiuent sur la foy qu'ils ont iurée, eslire, & prendre vn homme dans nostre Ligue, qui soit alors estimé commun en telle chose, & qui ne panche pas plus d'un costé, que d'autre. Et quant à celuy qu'ils auront esleu volontairement, ceux de ceste ville, ou de ce pais luy doiuent commander qu'il vacque à ceste affaire avec eux quatre, & s'efforce sur la foy de dépescher promptement telle chose. Et pour le regard de l'argent qui est deu, chacun doit oster à droict en la ville, & au pais où le deffendeur habite, & là encore sur leur foy il faut qu'on iuge & expedie incontinent telle affaire.

Aucun de ceux qui sont compris en ceste Ligue ne doit rien saisir, ou sequestrer l'un de l'autre, excepté si la seureté que le creancier a acceptee n'est pas approuuee, ayant aussi accordé que nul conferé compris en ceste Ligue ne doit estre gagé pour l'autre pour aucune chose.

S'il y auoit encore quelque personne comprise en ceste Ligue qui commist vn delict pour lequel il fust banny de sa iurisdiction, & qu'on fist sçauoir ce ban avec des seaux pendants de tel pais à l'autre iurisdiction: & celuy qui le logera lors, ou luy donnera à manger, ou boire, s'il est recogneu, encourra la mesme peine, sinon qu'il ne courra nullement fortune de la vie.

Nous auons encor reserué pour nous mesmes ensemble, ou pour quelqu'une de nos villes, ou de nos pais particuliers, qui se voudroient à l'aduenir allier avec quelque Seigneur, ou quelques citoyens, qu'ils ne le pourront pas bié faire, ains ceste Ligue de l'un avec l'autre sera perpetuelle, stable & ferme, & nous deuons conseruer toutes les choses declarees en la presente escriture.

On a aussi clairement conclu & déclaré, que si quelqu'un vouloit molester le Seigneur Rodolfe Bruiren Cheualier, qui est à present Bourgmaistre, & les Conseillers de ceste ville en leurs iugemens, & loix qu'ils ont faites, estans compris en ceste Ligue quand nous susdits de Lucerne, Vry, Suits & Ondreuald, serons aduertis seulement par vn Bourgmaistre, ou par vn Conseiller de Zurich, alors sur nostre foy nous serons tous prests à leur ayder, en telle sorte que le Bourgmaistre, les Conseillers & les Tribuns demeurent avec leur puissance, leurs loix, & leur iugement.

Nous susdits de Zurich, Lucerne, Vry, Suits, & Ondreuald nous sommes reseruez en ceste Ligue nostre Seigneur le Roy, & le S. Empire, & ce à quoy nous sommes obligez de toute ancienneté & bonne coustume.

Et de plus nous de Zurich nous sommes reseruez nos considerations, Ligues & approbations que nous auons faites auant ceste Ligue.

Nous susdits de Lucerne, Vry, Suist & Ondreuald auons reserué les Ligues & vnions que nous auons ensemble, & que celles-là procedent encore iusqu'à celles-cy.

Après cecy l'on doit singulierement sçauoir que nous auons clairement conclu pour le regard de ceux qui sont de ceste Ligue, qu'ils demeurent entierement en leur liberté, en leurs droits, & bonnes coustumes, ils ont fait iusqu'à present, en telle sorte toutesfois qu'aucun ne moleste ny retarde l'autre.

On a encor cōclu particulierement, afin que telle Ligue soit tousiours plus asseuree, que d'icy à dix ans enuiron le mois de May deuant, & après sans faute, comme les trois susdites villes ont ordonné, ou bien si l'on recherchoit telle chose de l'autre, nous deuons faire que ceste Ligue & vnion soit esclaircie avec les paroles, escritures & serments, & que toutes choses necessaires soient faites, & tous ceux qui passeront dix ans iurent d'observer parfaitement telle Ligue avec tous les poincts qui sont escrits en la presente, sans aucune contradiction.

Mais s'il aduenoit que toutes choses ne se fissent pas dans tel terme precisément, & qu'on prolongeast pour raison de quelque affaire, cela n'apportera nul preiudice à ceste Ligue, puis qu'on a conclu clairement qu'elle doit demeurer perpetuellement stable & ferme, avec tous les poincts & articles presents.

Pareillement avec vne bonne & meure consideration nous auons reserué que si pour nostre bien, comme il faut nous faisons de commun accord, ou maintenant, ou à l'aduenir, & aduisassions de faire ou dire autrement que nous n'auons dit ou escrit en ceste Ligue, nous pouuons faire tout cecy l'un avec l'autre, veu que nous qui sommes compris en ceste Ligue nous conseillerons tousiours vnanimement, & accorderons sans doute ce qui semblera plus vtile.

Et afin que tout ce qui est escrit par nous à present, & le sera à l'aduenir, tant par nous que par tous nos successeurs, demeure vray & stable à perpetuité, nous susdites villes & païs de Zurich, Lucerne, Vry, Suits & Ondreuald auons fait attacher nos seaux aux presentes, à Zurich le iour de S. Valbourg, le premier de May l'an 1351.

Zugh entra en Ligue avec les susdits Cantons l'an 1352. comme on void par escrit ce qui s'enluit.

LIGVE DE ZUGH AVEC LES V. CANTONS

29. **NOVS** Bourgmaistres, Conseillers, Citoyens, & communautéz de la ville de Zurich, Conseillers, Citoyens, & Communautéz de Lucerne, les Amans, Conseil, & les communs Citoyens de Zugh, & tous ceux qui y ont office: les Amans, Conseillers, Compatriotes des trois païs d'Vry, Suits, & Ondreuald, sçauoir faisons à tous, &c.

L'auant propos suit l'ordre des precedens de Zurich avec les quatre Cantons donnant les mesmes confins, comme on y void depuis le commencement du second chapitre.

Or s'il y auoit quelqu'un, &c. Qu'on lise l'article suiuant qui commence: Mais si dans ces bornes, &c. au commencement du deuxiesme chapitre qui est semblable entierement à cestuy cy.

Et si aucune des susdites villes, &c. Le deuxiesme chapitre est de mesme forme que cestuy cy.

Nous aussi ville & païs, &c. Bref ceste Ligue est de mesme que l'autre, & il n'y a que Zugh de plus. Donné à Lucerne l'an 1352. le premier Mercredy apres la S. Iean.

Glaris s'allia avec les autres confederez l'an 1357. comme on peut voir en sa Ligue.

LIGVE DE GLARIS.

30. **NOVS** Bourgmaistres, Conseillers, & communs Citoyens de Zurich, les Amans, & communs Compatriotes des païs d'Vry, Suits, Ondreuald & Glaris faisons sçauoir, &c. comme aux precedentes.

Et nous susdits de Zurich, Vranie, Suits, & Ondreuald, pour raison d'une bonne & particuliere amitié, permettons ausdits de Glaris de se pouoir allier à leur plaisir avec nos confederez de Berne, Lucerne, & Zugh, ou bien avec quelques-uns de ceux cy en particulier, avec pache toutesfois que ceste Ligue precedera l'autre, & sera perpetuelle: & nous susdits de Glaris ne nous alierons avec aucun, soit Seigneur ou autre, sans la licence & volonté de nos susdits confederez de Zurich, Vry, Suits, & Ondreuald.

Enfoy dequoy, &c. comme aux autres lettres en mettant Glaris. Donné le Lundy qui finit la sepmaine de la Pentecoste l'an 1357.

LIGVE DE BERNE AVEC LES III. CANTONS.

31. **NOVS** Senat, Conseillers & les deux cents Citoyens communs de la ville de Berne en Heuchelande, & nous Amans & communs Compatriotes d'Vry, Suits, & Ondreuald sçauoir faisons, &c.

Elle contient toute la teneur, & toutes les paroles de la Ligue de Zurich avec les quatre Cantons: mais le lieu de la Diette, c'est Riembolte.

Nous susdits de Berne pouuons aduertir les trois susdits Cantons contre ceux qui voudroient endommager nous & nos citoyens, & ceux que nous auons en gage, & qui sont proprement nostres, & non pour aucuns autres, & contre tels ils seront tenus de nous ayder, & sur toutes choses susdites nous trois Cantons deuons enuoyer lesdits secours par le Brunigh, iusques à Vnderfuen, & ceux de Berne donneront argent à chacun des nostres que nous leur aurons enuoyé armé, tous les iours durant tout le temps qu'ils lestiendront à leur seruice, & à leurs dépens, & nous nous contenterons de cecy, & que les nostres retournent de leur seruice à Vnderfuen, & non plus outre. Et nous susdits de Berne enuoyons nos gens pour secours aux susdits trois Cantons, ou à quelqu'un en particulier, on obseruera le susdit chapitre iusques à Vnderfuen. Et s'il aduenoit qu'ils fussent assiegez communément, alors nous de Berne y deuons aller à nos propres dépens.

Et s'il arriuoit quelque guerre qui touchast à tous, & qu'alors nous susdits de Berne, ou nous trois Cantons allassions contre les ennemis, & les endommageassions en quelque lieu que ce fust, pour tout cecy aucun qui sera compris en ceste Ligue, ne comptera nuls dépens à l'autre.

Si nous de Berne prenions & assaillions le païs d'enhaut nos voisins, alors les trois païs seront

seront obligez d'affaillir les ennemis, & les endommager tant qu'ils pourront, & pour telle faction nous ne compterons point de dépens l'un à l'autre: & au contraire si nous susdits 3. Cantons assaillons, on observera le même article.

Nous susdits de Berne nous sommes obligez que si ceux de Zurich, & de Lucerne auoient besoing d'ayde, & s'ils la demandent ausdits trois Cantons leurs alliez, quand nous serons aduertis par lesdits trois Cantons, nous sommes obligez d'enuoyer promptement nostre secours à nos dépens, & de l'enuoyer où les autres iront.

Et si lesdits de Lucerne & Zurich ne donnoient lesdits secours ensemble avec ceux des susdits trois Cantons pour assister nous de Berne, nous ne payerons nulle chose à ceux de Zurich, & de Lucerne. Et s'il aduenoit qu'en quelque temps il fallut que communément nous de Berne & nousdits trois Cantons enuoyassions nos gens au secours l'un de l'autre, nous auons conclu que s'il arriuoit qu'une partie allast endommager les ennemis, &c. comme le second chapitre.

Si quelqu'un compris en ceste Ligue auoit quelque plainte ou demande contre un autre, il ira à la Diette comme dessus.

Et l'electeur choisira un homme hors de son pais, ou de sa ville, qui sera neutre, & ceux de son party le prieront qu'il prenne ceste affaire sur sa foy, & apres lesdites parties, tant le demandeur que le deffendeur en prendront deux autres chacun pour sa part, & ces cinq sur leur foy expedieront promptement l'affaire, ou par accord, ou par iustice, sans aucune contradiction. Le reste est comme aux autres.

Si quelqu'un compris en ceste Ligue estoit en possession de quelque chose, personne ne l'en osterà sans raison, ains chacun l'aydera & deffendra au pais avec raison.

**LIGUE HEREDITAIRE FAITE ENTRE L'EMPEREUR
Maximilian, & Charles Archiduc d'Autriche, & les Suisses.**

XXXII.



NOUS Maximilian par la grace de Dieu Empereur des Romains, tousiours Auguste, Roy d'Allemagne, Hongrie, Dalmacie, & Croacie, Archiduc d'Autriche, de Bourgogne, Brabant, Comte Palatin, &c. pour nous mesmes, c'est à sçauoir en nostre propre nom, & aussi comme Protecteur, & au nom de l'Illustrissime Charles Archiduc d'Autriche, & Duc de Bourgogne, & de Brabant, Prince d'Espagne, Comte de Flandres, & de Tirol, &c. d'une part, & noms, &c. de la Ligue des Suisses, c'est à sçauoir de Zurich, Berne, Lucerne, Vren, Suits, Ondreuald dessus & dessous Silue, Zug avec l'office de dehors. Glaris, Basle, Fribourg, avec l'Abbaye & ville de S. Gal, & le pais d'Appenzel d'autre part: confessons, publions, & manifestons à chacun par la teneur des presentes, comme nous Maximilian eileu Empereur des Romains, par nostre bonté, & benignité speciale, & par le deuoir sommes prests, selon qu'il conuient de gouverner en bonne paix, tranquillite & concorde tous les nostres, & ceux qui sont du saint Empire, spécialement nos hereditaires & fidelles, de quelque degré, sorte & condition qu'ils soient pour augmenter & accroistre leurs biens, & garder qu'à l'aduenir ils reçoient aucun dommage, ayant humainement ordonné & considéré sur ce la commodité de nos illustrißimes maisons d'Autriche & de Bourgogne, comme elles sont voisines de ladite Ligue des Suisses, & leur peuuent bien seruir, encor que cela ayt esté fait humainement par nostre oncle Sigismond d'Autriche, comme ayant eu perpetuelle vnion avec nostre cher frere Louys de France, pour luy, & pour lesdits Suisses, lesdites lettres donnees à Malines le 10. de Iuin mil quatre cents septante quatre, & en la teneur suivante d'vnion hereditaire.

De celle qui fut faite à Zurich le Lundy auant S. Gal l'année 1477. avec accord que les Suisses seroient subiects, & se monstrent fideles executeurs & pleins de bonne volonté, & bons voisins du susdit Empereur des Romains, selon qu'ils nous conuient, & ausdites maisons d'Autriche, & de Bourgogne, & ce à l'honneur du tout-puissant Dieu.

Nous Empereurs Maximilian, comme Archiduc d'Autriche auons pour cause de nos pais qui nous sont venus par la mort de nostre susdit oncle Sigismond, & pour les appartenances d'iceux aussi comme Protecteur de nostre cher & bien aymé Charles Prince d'Espagne, à raison de sa Comté de Bourgogne, avec bon & meur conseil, vraye cognoissance, & pleine consideration, auons ordonné l'vnion perpetuelle du Roy Louys, & les suivantes vnions hereditaires l'une avec l'autre comme s'ensuit.

Premierement nous dites parties, & pareillement tous nos successeurs & heritiers, sujets & compatriotes, & tous ceux qui naissent de nous, pouuons & deuons auoir part à l'aduenir perpetuellement à ladite vnion, avec vrayes deffences & promesses, & toute autre maniere, qu'ils seront aydez par chacune de nos Principautez, Comtez, Seigneuries, villes, pais & limites, & auront tout droit d'achepter, & de se fier l'un de l'autre, sans peril & prejudice des entreprises, & seront assurez de la personne & des biens, & pourront aussi traiter & pratiquer par tout sans empeschement, charge, & innouation d'aucune de nos ordonnances, en toutes sortes sans aucune fraude ou dommage.

Pareillement nous Empereurs, & Charles susdits voulons qu'aucun de nos sujets & successeurs ne face contre la Ligue generale, ny en general, ny en particulier, ny face mal à aucun des contederez, d'où il puisse naistre quelque guerre.

Semblablement nous de la commune Ligue des Suisses voulons que nos successeurs, tous les nostres, & ceux qui sont à present, ou seront à l'aduenir à nous, avec charge de deffence & promesses, ou qui en autre sorte seront possédez par nous, tant hommes que villes & chasteaux, avec tous nos peuples ne fassent mal ou scandale dont quelque guerre puisse naistre au gracieux Empereur, & à Charles Archiduc, leurs heritiers successeurs & subiects compris en ceste Ligue, ou autres qui deuiendront leurs adherans en general, & en particulier.

Et afin que ceste louable conclusion & vnion entre nous dites parties, & entre nos successeurs, subiects, & appartenans puisse perseuerer avec plus grande intelligence, nous auons declare, que s'il aduenoit en peu de temps, que nous Empereur en nos pais compris en ceste vnion, & comme dessus, & nous Charles Archiduc en nostre Comté de Bourgogne, fussions attaquez, ou nos heritiers, & successeurs, que nous susdits Suisses aurons fidele esgard à l'Empereur, & aux siens, afin qu'ils ne soient pas offencez contre toute raison.

Et pour meilleure paix, & tranquillité nous dites parties auons specialement consenty que nous Empereur Maximilian, & Charles Archiduc, pais, & gens compris en ceste perpetuelle vnion, avec tous ceux qui à l'aduenir y seront adjoints, & appartenans, ne fassent aucune chose qui puisse esmouuoir guerre, & nous dits Suisses en vlerons de mesme.

Ceux qui en particulier, ou en general, à present, ou à l'aduenir, auront besoin de protection, & deffence, qui sont ou seront adjoints, & appartenans à nous Archiduc d'Autriche, à nos Principautez, villes, & iurisdicions comprises en ceste Ligue, ou ceux qui en la mesme forme, à present, ou à l'aduenir, en general, ou en particulier sont, ou seront adjoints, & appartenans à nous Suisses, & qui auront quelque plainte, procez, action, & pretention, si les parties peuuent avec raison estre accordees, le demandeur peut requerir la partie aduersé de venir à la raison, & en fin deuant les Euesques de Constance, & de Basle, presens & futurs, la partie requise se presentera sans autre delay, sinon que la forme des loix le portast autrement, & tel affaire sera terminé dans trois mois, depuis qu'il sera commencé, & si vne partie ne comparoit, & n'obeit, ce qui sera iugé s'excutera sans aucune appellation, ny requête, sinon que quelqu'un fist paroistre qu'il eust esté destourné, & empesché par quelque grande necessité, ou autre chose.

Les differens des fiefs hereditaires, biens immeubles, de violence, & petites debtes d'arget, & semblables causes se plaideront en la forme suiuaire, Ces fiefs seront plaidez deuant le Seigneur du fief, & selon le droit des heritages, & causes, au iugement des lieux où les biens, & où les violences sont faites, sinon que si celui qui a fait violence s'estoit retiré hors de ladite iurisdiction, & s'en vouloit fuyr, alors chacun pourra rechercher plus outre iustice contre le fuyant, & les autres procez, & differens seront plaidez deuant les Iuges ordinaires des lieux, où les deffendeurs habitent, & ce qui sera iugé raisonnable ausdites causes sera obserué par toutes les parties, sans aucun delay, appel, ou requête.

Afin aussi qu'à l'aduenir on soit preserué de telle violence il a esté conclu, auant qu'ils entrent en droit selon l'ordonnance du iugement, que l'une, & l'autre partie donnera assurance qu'en perdant chacun sera satisfait de son dommage.

Les parties qui plaideront s'obligeront tousiours par escrit à l'endroit des Iuges esleus pour terminer le procez, de n'en prendre aucune mauuaise opinion, & comme il a esté conclu par le tres-Christien Roy de France Louys en la perpetuelle intelligence.

Pareillement en l'vnion hereditaire faicte par nostre oncle Sigismond Archiduc de bonne memoire, où les 8. Cantons, c'est à sçauoir Zurich, Berne, Lucerne, Uri, Suintz, Ondreual, Zug, & Glaris ne sont compris.

Mais nous dites ville Basle, Fribourg, Schiaffusen cependant avec lesdits huit Cantons de ladite Ligue, & aussi nous Abbé avec l'Abbaye & ville de S. Gal, & le pays d'Appenzel, avec

avec nostre ville, nos chasteaux, pays, & lieux, sommes depuis peu en ça venus avec lesdits douze cantons en perpetuel droit civil des pays adjoins, &c. comme dessus.

Et nous Empereur Maximilian, Charles Archiduc, &c. acceptons en la perpetuelle union, comme dessus lesdits de Basle, Fribourg, Soleurre, Sciaffuse, l'Abbaye, & ville de S. Gal, comme les autres susdits Cantons, ainsi que dessus.

Et afin qu'ausdicts endroits toutes discordes soient ostées: on a conclu que de tous co-
tez tous actes, & propos deshonestes cesseront, & quiconque y contreviendra sera con-
damné selon la forme des paroles, sans aucune faueur.

Pareillement tous les 10. ans chacune des parties se fera lire la presente vnion pour mieux
sçauoir ce qui doit estre obserué.

Semblablement nous dites parties auons reserué en ceste vnion le S. Siege, le S. Empire,
& tous ceux à qui nous sommes obligez.

Nous auons aussi reserué que la Ligue, vnion, & intelligence, droit civil, & droit des
parties, & ceste nostre hereditaire vnion, declaration, renouvellement avec les meliora-
tions sera en general, & en particulier par nous dites parties, & par nos heritiers, succes-
seurs, subiects, &c. à l'aduenir inuiolablement, & sans fraude obserué & executé.

Et sur ce par grace speciale nous auons consenty, nous Empereur pour nous, & comme
Protecteur de Charles Archiduc pour augmentation de bonne volonté, de donner toutes
les années ausdicts Suisses en la ville de Zurich, le iour de la sainte Croix de May, & à cha-
cun desdicts Cantons par honneur, deux cents florins de Rhin, & à l'Abbé de saint Gal, &
aupays d'Appentzel, cent florins chascque année à chacun, iusques à tant que ledict Char-
les d'Autriche sera entré en possession de ses Estats hereditaires.

Et nous Empereur voulons aussi que ledit Charles paruenue en aage de maiorité, confir-
me la presente vnion avec serment, &c.

Et en foy de la presente scelee du seel de nous Empereur, & Charles Archiduc, & heri-
tiers, & successeurs de tous deux, nous nous obligeons d'observer, & executer inuiolable-
ment tous les articles, & points de la Ligue, & pour ce nous auons cy attaché nos seaux, &
iuré d'observer, &c.

Donné à Bude en Hongrie le 7. Feurier 1517. de nostre Empire le 15. & de nostre regne de
Hongrie le 21.

Vnion des trois Lignes des Grisons avec les Cantons.

Nous Bourg-maistre, Senat, Amans, Conseillers, Compatriotes, & communautéz de 33.
Zurich, Lucerne, Suintz, Vnderuald dessus & dessous Siluie, & Zug, & ses Officiers,
Claris, & les sept Cantons d'une part, & nous Amans, & communautéz de Rifestriz, Fio-
ghs & communauté de Lugres, amans, & communauté de Iordi, & en la Ioppe, Amans, &
communauté d'Vbersauh, Amans, & communauté d'Illris, Amans, & communauté de
Scor, Amans, & communauté de Rhegemburg, ensemble avec la Toscane, & Retz, A-
mans, & communauté de Chirinald, Amans, & communauté de Musocoo, & Rogeret:
& toute la vallee d'Atrifoye, Amans, & communauté de Teulur, Amans, & communau-
té de Scoppouiem, Amans, & communauté de Fiuz, tous communement de la Ligue
Grise en l'Alme Rhetie d'autre-part, nous sommes ensemble vniz en vne perpetuelle, & fi-
delle Ligue, &c. Quel vn honore l'autre, qu'on ne moleste personne, qu'on se secoure, &
deffende l'un l'autre, &c.

Et s'il naistroit quelque different parmy nous, &c. il faudra aller à Valestant, & là le
terminer.

Et s'il y auoit quelque different entre des personnes particulieres on agitera la cause au
lieu où le deffendeur habite, si l'on manque à luy faire droit, il le peut rechercher ail-
leurs.

Et qu'à l'aduenir en s'alliant avec d'autres, on ne preiudicie à la presente, & qu'elle per-
siste parmy toutes les autres qui se feront.

Si toutes les deux parties venoient à auoir guerre avec quelqu'un, qu'alors aucune par-
tie n'accepte la paix, que l'autre n'y soit aussi comprise.

En foy de quoy, &c. donné le Mercredy auant la saint Jean 1393.

Pour venir aux Valaisiens en l'an 1417. on vit allier avec Lucerne, Suintz, Vnderuald, &
Vri ces cinq dizaines, Sion, Sidres, Visp, Brig, & Gembs.

Depuis en l'année 1528. l'alliance fut renouvellee par l'Euesque, son chapitre, & les 7.
dizaines de tout le Valais, avec Vri, Suints, Ondreuvald, Lucerne, Zurich, Fribourg, &
Soleurre, & en l'an 1475. ils s'estoient alliez avec les Bernois.

Conclusion, & articles du droit commun avec les Seigneurs, & Pays des Valaisiens.

34. **P**remierement nous N. N. sommes alliez ensemble en droit commun, & ainsi que nos predecesseurs ont esté, &c.

Que nous nous devons amiablement ayder l'un l'autre, &c.

Et d'autant que pour beaucoup de raisons plusieurs villes se sont departies de l'ancienne foy Chrestienne, quand elles nous en voudroient retirer, nous nous devons ayder, & secourir l'un l'autre à nos despens.

On iugera les homicides, où ils auront esté cōmis, & aucun ne gagera, &c. cōme cy-dessus.

Aucun n'ordonnera des charges, daces, ou autres choses aux sujets de l'autre, mais l'on viura publiquement comme par le passé, &c.

S'il aduenoit, &c. quel'on puisse s'entremettre avec l'autre.

Nous nous reservons tous deux l'ancienne liberté, & la vie que nous avons maintenue par le passé.

Nous nous reservons aussi les plus vieilles Liges, venant à forclorre seulement le chapitre qui concerne la foy Chrestienne, pour la deffence de laquelle on doit empescher quelque vieille Ligue que ce soit.

A ceste Ligue se sont encore joints l'Euesque & le Chapitre de Surs, & deux dixaines Sus, & Reuen, qui se reservent les plus anciennes Liges.

En foy, &c. Donné le iour saincte Catherine, 1528.

L'Abbé & ceux de S. Gal firent perpetuelle alliance avec les Cantons de Zurich, Lucerne, Suintz & Glaris en l'an 1454. encores qu'ils fussent feudataires del'Empire.

LIGVE DE SAINT GAL.

35. **N**ous Bourg-maistre, &c. de Zurich, Berne, Lucerne, Suintz, Zugh, & Glaris: nous Bourg-maistre, Conseillers, & Citoyens de la ville de saint Gal, nous sommes perpetuellement alliez.

S'ENSUIT LA FORME DE LA LIGVE.

SEcondement nous nous devons deffendre l'un l'autre, &c. & aucune partie ne doit cōmencer guerre, ny faire paix, ou ligue sans le consentement de toute l'autre, ou de la plus grande partie.

En nos differens nous devons obeir au fidelle conseil des parties non interessées, & nous accommoder ensemble, ou par accord, ou par raison.

Si entre nous dits confederéz &c. comme cy-dessus.

Si quelqu'un faisoit un meurtre, ou quelque autre mal & dommage, il sera iugé, & chastié selon la Loy de la Iurisdiction où il aura fait quelque mal.

Nous avons reservé l'un à l'autre &c. comme cy-dessus.

S'il arriuoit quelques differens qu'on les despeche, &c.

En foy de quoy &c. Donné le Iendy apres la Pētecoste, l'ā mil quatre cēs cinquante huit.

Mulrhan son s'allia avec les autres, l'an mil cinq cents quinze, & sa ligue contient mesme chose que les autres, cōme aussi celle de Rotuyl cōfirmee l'an mil cinq cēs dix-neuf.

La dernière paix faite avec ceux de Zurich, le iour de saint Oclavian l'an 1581.

36. **N**ous Capitaines Bannerals, Conseillers de guerre & de paix, & communautéz des cinq Cantons, c'est à sçavoir Lucerne, Vren, Suintz, Vnderuald, & Zugh, d'une part, & nous &c. De Zurich, Berne, Basle, Schiafuse d'autre, toute chose laissée sommes venus à vraye & fraternelle paix ensemble, &c. Ceste paix contient quelques articles de religion, & quelques autres particuliers &c.

Premierement que les cinq Cantons demeurent en l'ancienne Religion Chrestienne avec leurs adherants.

Ceux de Zurich &c. demeurent en la nouvelle religion.

Qu'ils ne se mesprisent l'un l'autre pour raison de la Foy.

Qu'elle demeure en la teneur des autres Liges.

Qu'on laisse aller les prisonniers de tous costez avec payement raisonnable.

Que tous differens nez entre nous en la presente guerre, & auparavant soient annullez.

En foy de quoy &c. Donné le iour de saint Oclavian, l'an mil cinq cents trente & un.

PAIX DE BERNE L'AN 1537.

37. **C**ESTE paix fut conclue par l'entremise du Roy de France, & la guerre estoit entre lesdits cinq Cantons & les autres, pour raison de la religion, à cause qu'ils suivent l'Eglise Romaine, & ils conclurent que chacun croiroit à sa mode, & premierement que de la nouvelle foy on pourroit venir à l'ancienne, & celui qui voudra demeurer en la foy en laquelle il se trouve, le pourra faire.

Brengard, Maligier & Frimon, & chacun se reserve ses amis, & adherants.

Pour raison de la foy, ils ne se mespriseront pas l'un l'autre.

Toutes les deux parties retourneront sous la forme des ligues iurees.

Ceux de Berne payeront aux cinq Cantons cinq mille escus au soleil, pour les dommages faits à plusieurs Eglises.

Les prisonniers payeront premierement la despence.

Par la presente paix tous les differents nais auparavant seront abolis, & jamais on ne les pourra ramentevoir.

En foy dequoy, &c. Donné la vigile de sainte Catherin l'an 1537.

Voila les traictez faits entre ces peuples, qui peuuent presque entierement apprendre au Lecteur de quelle sorte ils se gouvernent.

Or ces peuples sont diuisez en dix-neuf membres, dont est composé vn corps seul & bien vny, & ces membres sont les treize Cantons, les Grisons, les Valaisiens, saint Gal, Murtan, & Rotuul. Surquoy il faut remarquer que les Republiques dont on a quelque memoire ont tenu trois voyes pour s'estendre.

La premiere fut celle qu'observerent les Spartains, & les Atheniens, qui apres auoir conquis les Citez, se les rendoient aussi tost sujettes, & n'ayans pas le pied assez fort pour soutenir vn si grand fardeau se ruynèrent. Car c'est chose malaisée de tenir par force les places qui ont accoustumé d'estre libres, & ce moyen est plus inutile que nul autre.

L'autre chemin fut tenu auant que l'Empire Romain s'esleuast, par les Toscans, qui auoient douze villes, entre lesquelles estoient Fiezoli, Arezze, & Volterre, il y auoit vne ligue de plusieurs Republiques, entre lesquelles il n'y auoit nulle difference d'autorité, & ils rendoient compaignes de leur puissance les terres qu'ils venoient de conquerir.

La troisieme voye a esté tenue par les Romains, qui s'associerent plusieurs Republiques, qui viuoient toutes sous mesme loy, & les Romains se reseruoient la seule autorité de commander, & d'entreprendre.

Cette façon fut iugée meilleure que routes les autres, ainsi qu'on en vit les effects. Apres cestuy-cy on peut mettre celle des Toscans avec laquelle ils tindrent l'Empire de la Toscane, & d'une grande partie de Lombardie, & demurerent longuement libres & paisibles, iusqu'à tant qu'il vint vne vertu qui accabla la leur.

Leur façon qui est obseruee auiod'huy par les Suisses, & leurs confederes, qui sont tous vne Republique diuisee en plusieurs, entre lesquels il n'y a nulle distinction de degrez, veu qu'ils ont chassé tous les Seigneurs qui auoient Iurisdiction en leur Estat, & il n'y a parmy eux point d'autres Superieurs que ceux qui sont Magistrats.

Tous les autres sont esgaux, combien qu'il y en ait quelques vns qui sont beaucoup estimez des autres pour leur prudence, & entr'eux l'on estime fort la noblesse, comme on fait aussi à Argentine, où nul ne peut estre admis aux Magistrats & dignitez de la ville, s'il ne prouue qu'il est gentil-homme de quatre races.

Mais afin de dire encor quelque chose particuliere de leur gouuernement, vous deuez sçauoir qu'on eslit de chaque compaignie vn nombre esgal de personnes, lors qu'il est question d'aller en quelque conseil public.

Or il y a deux Conseils publics aux villes de Zurich & de Basle, qui sont de plus grande autorité, c'est à sçauoir le grand Conseil, lors que plusieurs s'assemblent au nom de tout le peuple, & cestuy-cy n'est assemblé qu'aux plus importantes & pressantes affaires du public, & le petit qui gouuerne tous les iours la Republique, & cognoist les differents des citoyens. À Zurich le grand Conseil est de deux cens hommes, à Basle de deux cens quarante-quatre. Le petit Conseil du Zurich est de cinquante hommes, & celui de Basle de soixante-quatre. Car on met en douze de chaque compaignie au grand Conseil: mais à Zurich on en choisit dix-huit d'entre les nobles. Ceux de Zurich donnent trois hommes pour bande, ou tribu pour le petit Conseil, & ceux de Basle quatre. Ils adioustent à cela deux Consuls qui sont chefs du Conseil public en chaque ville. Et à Basle il y a outre cela deux Tribuns, qu'on nomme Chefs avec les Consuls. Dauantage à Zurich la compaignie des nobles enuoyent six hommes au petit Conseil, au lieu que les autres compaignies n'en enuoyent que trois, & encor les autres six sont esleus de quelque compaignie, ou tribu qui plaist au Magistrat. Le petit Conseil est diuisé en vieil & nouveau.

On nomme vieil Senat ceux qui ont vaqué à leur office l'espace de demie annee. Or encor que ceux-cy s'assemblent lors qu'on tient le Conseil, toutesfois ils ne sont pas tousiours appelez, & il y a des choses qui se font seulement par le nouveau Senat. A Basle le grand Conseil est diuisé de mesme, & le petit Conseil s'assemble ordinairement trois ou quatre fois toutes les semaines. Chaque Senat a pour Chef vn Consul qu'ils appellent Bourg-maistre, c'est à dire maistre des Citoyens, qui est esleu par le grand Conseil. Ceux qui ont plus de pouuoir apres les Consuls, sont Tribuns, que ceux de Zurich nomment Oberistemei-

Z. z. ij

ster, & ceux de Basle Zunffrmeister. Il y en a trois à Zurich, & deux à Basle. Si quelqu'un en desire sçavoir davantage pour ce regard, qu'il lise Iosias Simlerus qui en a écrit tout au long.

Venons maintenant au point qui est plus considerable. Tous ces Cantons vivent en façon de Republique, veu qu'ils font tous vn corps ensemble, & estans separez ils sont membres, combien que chaque Canton ayt son Chef pris de sa principale ville, ou bourgade. Car chacun fait son assemblée particuliere, mais quand il se traite quelque chose de grande importance, on tient la Diette generale en vne des villes ordonnees entre eux, à laquelle quatre ou cinq hommes des principaux de chaque ville, ou bourgade se vont rendre. Et aux deliberations qui s'y font, elles sont toutes de bon accord, combien qu'une ville n'aye nulle auctorité sur l'autre. Et s'il aduient que la guerre se fasse pour tous les Cantons, chacun met pour sa rate part ce qui est necessaire pour ceste guerre, & ce qui est conquis est commun à tous. Il est vray que si par fois deux ou trois Cantons acquierent ensemble quelque chose avec les armes, la conquête n'est pas aux autres, mais à ceux-là seuls qui l'ont faite. Et combien qu'il semblast aux autres qu'ils y doivent participer, ainsi qu'il est arrivé, ils ne peuvent, pour ce que le Roy de France a iugé, estant requis par eux comme luge en ceste difficulté, que la conquête particuliere appartiendroit aux particuliers. Et pour ceste cause quand vn Canton veut faire particulièrement la guerre, on fait leuee de gens sur ses terres. Mais s'il falloit vne armee (par exemple pour le Roy de France) de vingt-cinq mille hommes de pied, on bat le tambourg, & tous les Cantons donnent les hommes qu'ils veulent, & lors les Capitaines en eslisent vingt-cinq mille entre trente-cinq ou quarante, renuoyent les autres en leur maison, & chaque Canton a son principal estendart.

Les Valaisiens ont pour Prince & Seigneur, tant temporel que spirituel, l'Euesque de Sion, par octroy de Charle-Magne, confirmé apres par d'autres Empereurs, & cet Euesque est esleu par les Chanoines de Sion, & par quelques Deputez de toutes les sept dizaines. On donne apres à ce Prince vn luge pour les causes profanes qui est appelé Capitaine, & toutes les deux années à Noel les Deputez de l'Euesque, & les dizaines eslisent le nouveau Capitaine. Chaque dizaine a ses luges & Officiers, de mesme que les six Communautés nommees Bannieres, ont leurs Gouverneurs & leurs luges.

Quant aux Grisons, ils se gouvernent populairement, & tiennent de deux en deux années leurs Diettes à Chur, où ils creent les Officiers, & publient les Loix,

RELIGION.

41. Des treize Cantons il y en a quelques-uns qui sont entièrement Catholiques, d'autres qui sont meslez, & d'autres qui sont Heretiques tout a fait.

Les Catholiques sont Suits, Vren, Vnderuald, Lucerne, Zugh, qui sont contigus, l'un à l'autre, Fribourg & Soleurre, sont diuisez des cinq, & entre eux mesmes, & Soleurre est pour la plus-part Catholique, & Fribourg Heretique, de mesme que Zurich, Berne, Basle & Schiaffuse.

Les meslez sont Glaris, & Appentzel. Ces deux estans entre les Cantons Catholiques, & les Heretiques, participent des qualitez des vns & des autres. Il est vray que les principaux d'Appentzel, & la plus grande partie du peuple sont Catholiques.

Le premier Cantō où l'heresie mit le pied, fut celui de Zurich, pour raison de certain mescontentement, né du manquement de la paye que les habitans pretendoient leur estre deuë par le Pape Iule II. à quoy ils furent incitez par Zuingle, & l'année mil cinq cents vingts-six, abolirent la Messe en tout leur pays, & luy substituerent la Cene, & la mesme secte s'estédit aux Cantons de Fribourg, & de Basle, le 16. de Ianvier l'an mil cinq cents vingt-huit à Berne, apres vne lōgue dispute faite deuant le Senat on ietta par terre les images des saincts, & on y abolit la Messe.

Quant aux Grisons, ceux de la Ligue Grise sont pour la plus grand part Catholiques, & les autres presque tous heretiques, qui suyuent la doctrine de Zuingle, qui renouuella l'erreur iadis condamné du Sacrementaire Berenger. Toutesfois on fait l'Office à la Catholique, à Chur, ou Coire, & Fustemberg, où l'Euesque est obligé à demeurer la moitié de l'année, & à Rossun, fief des Archiducs d'Austriche.

En la vallée Agnadine, & en la Pregalie, qui appartiennent à la Ligue de la maison de Dieu, & en plusieurs lieux des huit contrees, il y a des villages où l'on n'a dict la Messe depuis beaucoup d'années en ça. Posclau lieu de la Ligue de la maison de Dieu, est diuisé en Heretiques, & Catholiques: mais ceux-là ont continuellement vn Ministre, au lieu que les autres ont esté quelques années sans Prestres. Il est permis à chacun entre les Grisons de

de viure comme bon luy semble, & de suyure la Religion qu'il veut, & toutesfois ceux de la nouvelle opinion tyrannisent bien souuent en cela les Catholiques, veu qu'encor qu'ils se seruent de Ministres de toute nation, ils ne veulent que les Catholiques ayent des Prestres estrangers, & ceux du pays qui font leur deuoir sont subiects à mille outrages. Qui fut en partie cause en l'an 1620. du massacre qui se fit desdits Grisons Protestans par les Catholiques de la Valtoline, qui se reuolterent contr'eux, & qui est cause aussi de la perte de toute cette vallee occupee maintenant par le Roy d'Espagne contre toute sorte de droit, & au subiect dequoy les armes se leuent auourd'huy en Italie, Sauoye, Suisses & Grisons pour la restablir en son premier estat.

MEMOIRE CONCERNANT LES TROVBLES ET
Remuement des Grisons.

LE feudy neufuiesme iour de Decembre stil ancien l'an 1580. le noble Seigneur Anthoine Calmons Secretaire ordinaire & Ambassadeur pour Monsieur le Duc de Milan à presenté vne lettre de creance du Seigneur & Prince Dom Carlo d'Arragon Duc de *terra noua* Seigneur de Castel Lontiano, Gouverneur de la Duché de Milan premier Capitaine en Italie.

Aux honorables & prudens Seigneurs Bourg-maistres & Cōseilliers de la ville de Coire, ayans en premier lieu presenté les amiables recommandations de son Altesse aux trois ligues en general & apres auoir proposé & remontré comme son Altesse auoit ouy & entendu que les Commissaires des trois ligues auoient entrepris sur les subiects de la Valtoline quelque nouveauté ou changement concernant la Religion Catholique par lequel il ne leur seroit concede l'exercice de ladite Religion Catholique, à ce qu'on peut comprendre principalement par deux poincts.

Pour le premier, en ce qu'ils ont donné ordre d'instituer vn nouveau College ou Seminaire à Sondrio par lequel la nouvelle Religion pourroit estre propagée au singulier & grād detrimēt de la Religion Catholique.

Pour le second ils ont faict prohibition & deffence de receuoir Prestres estrangers, & d'autant que les Catholiques Valtolins, ne sont pourueus de Prestres dedans leur pays, ils seroient contraincts laisser cheoir & decliner leur Religion.

Or d'autant que les terres, pays & subiects du Roy Catholique touchent & confinent avec les subiects desdites trois ligues Grises audit pays de de la Valtoline, de maniere qu'il n'y a rien eutre deux, & estant sadite Maiesté de nulle autre resolution sinon d'entretenir & conseruer en ses pays ladite Religion Catholique, & par ainsi reculer de bonne heure toute occasion qui pourroit suruenir au contraire a celle fin que telle & semblable infection ne vienne à auoir lieu & que sadite Maiesté n'aye occasion d'extirper icelle avec forces d'armes & effusion de sang, comme encore auourd'huy se fait es pays bas l'a où il a duré l'espace de 20. ans, estans au reste sadite Maiesté, & ses magistrats & Ministres, qui ne sont voisins de nulle autre intention sinon de bien voisiner & demeurer en bonne amitié avec les trois Ligues, mais que par semblable alteration & changement de Religion en la Valtoline il pourroit venir grand danger aux pays & subiects de sa Maiesté, elle ne veut supporter ny souffrir ny peu ny moins telles innouations, ny l'endurer ny permettre. Or donc son Altesse en nom & de la part de sadite Maiesté requiert le plus amiablement qu'elle peut les trois Ligues generalement qu'elles veulent leuer & oster de ladite Vallée ledit seminaire, & en ce cas qu'elles ne s'en voulussent passer le transferer autant de deça, qu'elle ne veut aussi consentir que lesdits Catholiques ayent des Prestres à leur contentement & selō leur besoing & pour l'assistance qu'ils doiuent faire à Milan d'vn nōbre de Soldats qu'aucun ne soit contrainct ny forcé, ains qui volontairement vouldra marcher leur doit estre accordé & concede sans contradiction pourueu qu'eux mesmes n'ayent affaire de leurs Soldats demeurans à son seruice tant qu'elle en aura besoin, toutesfois que le tout se face avec Conseil & consentement des Seigneurs des 3. Ligues dans le terme de dix iours apres qu'ils auront esté demandez, lesdits sieurs des Ligues veulent aussi accorder 300. Soldats d'vne garde en la Duché de Milan quand sa Maiesté leur demandera & en aura besoing & les laissera aller avec leur Regent ordinaire.

Et quand il arriuera que sa Maiesté & son Gouverneur de la Duché de Milā auroit aussi besoin de conduire Soldats, preparement & munitiōs de guerre de l'Allemagne en Italie pour la tuition dudit Duché & Seigneuries d'Italie, telle gendarmerie & infanterie aura libre & asseuré passage, sans empeschement par les trois Ligues Grises pourueu qu'ils passent à la

file, & non plus de 50. à la fois sans offenser personne en payant les victuailles & se comportans tous raisonnablement, toutefois que tels passages sans le congé & volonté desdits sieurs des trois Liges afin qu'il soit fait raisonnable provision, ladite Maesté Catholique s'offre de faire le semblable & le reciproque des susdits points declarez à l'endroit desdites trois Liges Grises & gens de leur obeysance, tant pour le secours que pour le passage & deffence de leur pays avec les mesmes conditions susdites.

Item ceux desdites trois liges & de leur obeysance, pourront librement & seurement, aller, voyager, venir, retourner & negotier sans estre recherchez ny molestez ny en leurs corps, ny en leurs biens par toutes les villes, terres & Seigneuries de ladite Duché, qu'on s'abstienne par tout de disputer, ny faire porter ou conduire liures deffendus au pays, ains celui qui y contreviendra soit puny, par ceux qui pour cela seront deputez, & le reciproque se doit entendre par tous ceux de ladite Duché & Cité de Milan.

En outre ladite Maesté Catholique & Gouverneur, accordent & permettent ausdits sieurs Confederez des trois liges, tant de ça que de là les monts l'achapt de toutes sortes de marchandises & biens meubles, horsmis fourment, seigle, riz & autres legumes, & sera permise ausdits sieurs des 3. liges, une quantité pour leur necessité, & pour prevenir tout abus qui en pourroit estre fait de part & d'autre, pourveu que les marchandises soient veuës faites & elaborées en ladite Cité & Duché de Milan, ils les pourront librement conduire sur ladite Duché, ville & terre de Milan en leurs pays & terres sans greuement de peages, traictes, tailles & autres imposts appartenans à la chambre de Milan ny à autres particuliers feudataires & communautéz.

Parmesme moyen doivent aussi estre renouellez & restablis les vieux privileges & franchises dudit Duché de Milan pour tous ceux des trois liges & leurs subiects de quelque qualité qu'ils soient à pied ou à cheual, ils pourront aller, passer, retourner, sejourner & negotier avec leurs biens & marchandises, sans payer tribut, subsides, peages, traictes, tailles ny imposts, qu'ils soient receuz au temps de peste en ladite Duché, avec certification de la santé.

S'il aduient debat & different entre la Maesté Catholique, son Gouverneur & Lieutenant dudit Duché de Milan & les 3. liges, la cause se vuidera à Chauenne ou à Morbegno deuant les Juges & Arbitres à ce deputez des deux partys, à la Sentence desquels ils acquiesceront.

Et afin que lesdits Sieurs des 3. liges cognoissent la bien-veillance, amour & liberalité de ladite Maesté envers eux, elle veut d'oresnauant tant que cette alliance durera, bailler & payer à chaque ligue d'or pistollers lesquels sortiront de la chambre des Comptes de Milan & seront rendus & deliurez dans la chambre de Chauenne sans cousts ny frais ausdits sieurs des 3. liges: & sans aucune difficulté.

Sur ce lesdits sieurs des 3. liges ont clairement reserué toutes & chacunes leurs autres alliances, iuré aussi toutes anciennes cartes & seaux qu'ils en auront receu ou baillé, que cette capitulation n'aye à porter preiudice à icelle, & ne se deura rien faire au contraire d'icelles par les vns, ny par les autres, afin qu'elles soient tenuës valides & inuiolablement obseruees.

Que cette sincere alliance & amitié aye à estre ferme & inuiolablement obseruée de point en point, tant que la Maesté Catholique & son fils Ferdinand Prince d'Espagne & Duc de Milan demeureront en vie & dix ans apres le decès d'eux continuant pour leurs successeurs qui seront intitulez Ducs de Milan iusques au bout desdites dix années.

**DES DIFFERENTS ENTRE L'EUESQUE DE COIRE ET LES
Grisons d'où est arriué le trouble pour la Religion.**

Les Euesques de Coire ont auant cent ans eu de grandes disputes & differents (souuent depuis renouuelez) avec les Grisons, de tous lesquels ils sont Seigneurs spirituels: mais principalement avec la ligue de la Cadde qui est la plus grande des trois liges grises, de laquelle ils estoient aussi Seigneurs temporels, qui est la cause du nom qu'elle porte de Cadde, comme ligue de la maison de Dieu, parce qu'ils estoient sous l'Euesché.

Mais le plus grand desdits differends comme il est facile à croire, fut au temps du changement de la Religion, qui aduint quant & celui des Suisses, que se trouuant audit siege episcopal vn nommé Paulus Euesque, & accablé de plusieurs ennemis & trauaux de plusieurs ames, fut enfin contraint d'accorder à ladite ligue de la Cadde les six articles qui suivent.

1. Qu'il laisseroit demeurer tout le pays en la Religion moderne.
2. Qu'il ne resigneroit l'Euesché à nul autre sans le vouloir & sçauoir du Chapitre de la Cadde

- Cadde en general.
3. Qu'il n'engageroit ny ne rendroit aucune chose des proprietéz de l'Euesché sans le consentement dudit Chapitre de la Cadde.
 4. Qu'il rendroit compte audit Chapitre & à la Cadde des choses & appartenances de l'Euesché, quand il en seroit requis.
 5. Qu'il laisseroit en force & vigueur les ventes que la Caddée auoit faictes de quelques proprietéz de ladite Euesché, au temps dudit Euesque Paulus.
 6. Et qu'il pouruoiroit tousiours personnes de la Caddée, aux offices de l'Euesché comme Maistre d'hostel, Bailly de Surstuns & Capitaine à Furstambury & Ramus.

Et faut noter que ce qui donna grande occasion à ce tumulte & mal-veillance desdits de la Cadde contre ledit Paulus, fut que luy estant estranger & Secretaire de l'Empereur Maximilian, paruint audit Euesché par resignation & composition avec son predecesseur, qui estant en assez mauuaise intelligence avec lesdits Grisons, s'estoit retiré en la Cour dudit Empereur : & en ce temps estant arriué le changement de la Religion en Allemagne & en Suisse, le differend ayda peut-estre beaucoup à la faire ausdits Grisons, pour le moins est il certain que s'il voulut auoir quelque repos, il fallut qu'il accordast lesdits six articles & avec tout cela en eust il bien peu durant 38. ans qu'il fut Euesque.

Entre ledit Paulus & Beatus, qui est auourd'huy Euesque de Coire y en a eu deux, dont le dernier nommé Thomas, estoit de la famille de l'anta.

A la mort de cettui-cy, arriué l'an 1565. y eut vne grande Brigue entre ces deux maisons de Planta & Salis, qui sont ennemis & les premiers de cette nation, à qui toucheroit ladite Euesché, en quoy les Planta, par la grande autorité du feu sieur de Rothmus, qui a peut-estre esté la principale cause d'auoir faict machiner & aduancer la mort qu'on luy a faict souffrir au dernier tumulte, preualurent d'une voix à l'election pour ledit Beatus, qui le debuioit garder au fils dudit Rothmus, Doyen de Coire, encore ieune : mais les Salis, ayans l'autre partie des voix du Chapitre & la faueur de la Cadde, introduisirent comme de force vn des leurs en ladite Euesché, où il tint bon quelque temps, durant lequel se firent quelques voyages à Rome d'une part & d'autre : & finalement au bout de quelques mois par la precedete conduicte de feu Monsieur de Bellicure, lors Ambassadeur pour la Majesté tres-Christienne en ces pays, & l'interuention des Suisses, ledit Beatus comme legitiment esleu fut reçu & installé : estant à presumer que ce qui fit entrer si auant le General de ladite Ligue de la Cadde & fauoriser à la partie de Salis, outre le credit qu'ils ont en icelle, estans recôneus les premiers en antiquité, en biens & en nombre d'hommes, qui sont habitez en la pluspart des communes d'icelle, ce fut pour essayer d'estre aussi en l'election la promesse qu'ils auoient exigée dudit Euesque Paulus, à sçauoir qu'il ne resigneroit l'Euesché à nul autre sans le vouloir & sçauoir du Chapitre de la Cadde.

Tant y a qu'en la poursuite de ce differend, furent faictes de part & d'autre de grandes assemblees, mangeries & despences, & empruntez de grosses sommes de deniers, partie par ladite Ligue en general & partie par les Salis en particulier, dont les obligations & parcelles montent à 20. ou 25. mille florins.

Soubs pretexte du payement desquelles sommes ladite Ligue & lesdits Salis ont longuement querellé contre ledit Euesque pour en estre payez des reuenus de l'Euesché, partie desquels ils ont saisis & tiennent encore auourd'huy en sequestre ou recherche nouuelles conditions aux sermens qu'aucunes communes luy doiuent prester comme hommes de l'Euesché & donné autres traueses qui peuuent tomber en la fantaisie de personnes si licentieuses, comme ont tousiours esté ceux-cy & qui ont quasi tous changé de Religion, & n'ont faute de Ministres de la nouvelle opinion qui mettent du bois au feu, au lieu d'y apporter de l'eau.

L'Euesque pour se redimer de ces vexatiōs eut recours à Messieurs les Cätōns des Suisses, lesquels escriuirent aux 3. Ligues grises, qui par plusieurs fois y ont mis la main & faict quelques arbitremens, mais ny estans obeys, lesdits sieurs Suisses y enuoyerent aussi des Ambassadeurs, qui proposerent & baillèrent certains moyens par escrit pour venir à quelque accord, & cela encoren'ayant peu sortir effect, ains se renouellant tousiours quelque tumulte, à cette occasion lesdits sieurs Suisses y enuoyerent derechef 7. Ambassadeurs au nom des 17. Cantons, lesquels au mois de Novembre 1569. donnerent certaine Sentence ou arbitrement, confirmans par icelle les moyens baillez par les precedens Ambassadeurs Suisses, & vne Sentence des 3. Ligues Grises donnez à Illan en l'an 1566. qui ne se font peu voir ny en sçauoir la teneur, ny ayant quel Euesque qui les ait & tient à Fustemberg au Comté du Tyrol, où il faisoit continuelle residence ne se fiant dans Coire.

Par cette derniere Sentence il appert que les parties auant que se soumettre à ce que les

arbitroient lesdits sept Ambassadeurs firent quelques protestations de part & d'autre. La Cadde entr'autres choses, que ce fust sans preiudice de ses frâchises, & qu'elle fust deschargée des despences faictes en la controuerse desdits Euesques, & l'Euesque qu'il ne fust tenu de payer aucune chose qui seroit ordonnee que premieremēt on ne luy eust fait les sermens qui luy sont deubs, & relasché les sequestres de ses reuenus, sans lesquelles protestations & conditions, lesdits Ambassadeurs ordonnerent que ledit sieur Euesque fourniroit dixhuiēt cens florins pour ayder telles desdites despences que bon luy sembleroit, en quoy semble y auoir de l'ambiguité & estre demeuré aux parties de quoy disputer de nouveau.

Depuis ledit Euesque a continuellement demeure audit Fustemberg sans s'estre laissé voir à Coire qu'en ce Pytch de la saint Martin qu'il y arriua apres les deux Ambassadeurs Suissés qu'il y auoit fait venir, & en est party incontinent apres eux, qui est cause que faisant ses despeschés audit Fustemberg en Suisse & ailleurs, on n'a peu estre informé du fonds de ces differends iusques à present.

Que deslors il y auoit chose dont ledit Euesque auoit à rendre compte à Dieu, c'est qu'en ceste obstination & negligence de pouruoir & veiller sur son troupeau ce peu de communes qui retiennent encore la Religion Catholique en ladite ligue de Cadde, dont n'en y a plus que celle de Sursetz, & quelque partie en deux ou trois des autres, d'onze qu'elles estoient, sont pour quitter la Religion & prendre la Protestante que tient tout le reste de ladite ligue, y ayans deux causes assez specicules pour les y porter, l'une qu'ils demeureront deschargez des reuenus que ledit Euesque prend sur eux, dont ils doiuent les arrerages depuis sa promotion à l'Euesché, plustost que payer.

L'autre qu'estant luy ordinairement absent de son Euesché, n'y ayant personne qui face les visites par les Parroisses, comme c'est la coustume, dont son Chapitre se plaint fort, lesdits Catholiques demeurent quasi sans Pasteur, mais non sans sollicitation de Ministres de l'autre Religion, qui ne demandent qu'à les lier de leur party.

Les pratiques de Salis ayans tousiours continué es Grisons se sentans fortifiez des Grisons Protestans, & de la ligue de la Cadde, poursuivirent le Planta qu'ils auoient pour ennemis, lesquels meslez & assistez de quelques autres dudit party des Planta, apres auoir communiqué de leurs desseins, tant avec l'Empereur qu'avec le Gouverneur de Milan, conspirerent sur la vie des Grisons Protestans residans avec les Catholiques dans la Valtoline, & executerent leur conspiratiō sur les principaux desdits Grisons qu'ils massacrerent estans aux Presches & en leurs maisons par tous les lieux de ladite Vallée, sous pretexte de la Religion Catholique oppressee par lesdits Grisons Protestans, & des torts & iniustices qu'ils disoient leurs estre faictes par les mesmes, les principaux auteurs de ces meurtres, furent lesdits Planta & Robustel, qui souleuerent & porterent toutes les communes Catholiques à commettre le massacre, non sans opinion qu'on a tousiours eue d'y auoir esté portés par les pratiques estrangeres.

Ainsi les Valtolins Catholiques ayans tyranniquement faict mourir les Officiers desdits Grisons Heretiques au mois de Juillet, de l'année mil six cens vingt, se presumās que dans peu de tēps ils seroient surchargez d'une grande & puissante armee Protestante, que les sieurs des Ligues assembloient de toutes parts, pour se vanger d'une si signalée entreprise, & de la mort de tant de peuples massacrez, au iour de la susdite expedition, & qu'ils n'estoient pas assez puissans pour se pouuoir deffendre contre les Suissés, Holandois, & toutes autres sortes de gens de guerre leuez en leur faueur, es cantons de Berne & de Zurich, enuoyerent humblement supplier le Gouverneur de Milan (qui n'attendoit que cette occasion pour s'en emparer) comme plus proche Estat Catholique voisin de les prendre en sa protection & sauuegarde, & de leur enuoyer secours prompt & suffisant pour s'opposer à la deffense de l'armee des Grisons en la Valtoline.

Ledit Gouverneur de Milan ayant receu sur cela la volonté du Roy d'Espagne son Maistre, non seulement donne puissant secours de caualerie & d'infanterie ausdits Valtolins, avec lequel ils se deffendent desdits Grisons, & mettent leurs armées en pieces: mais de plus lesdits Milannois se saisissent de toutes les forteresses de la Vallée y bastissent de nouveaux forts iusques au nombre d'onze, fortifient Chiauenne, Sondrio & Coire, & tiennent toute ladite ville sous leur pouuoir & subiection.

Aussi tost recongneut-on que ce fut alors que l'Espagne estoit venuē à bout de son dessein proietté il y a plus de deux cens ans, qui est de fermer le passage de l'Italie aux François, & empescher le secours que les Venitiens & autres Estats d'Italie pourroient esperer de leurs amis & aliez estrangers en cas de necessité, que c'estoit la commodité que de tout temps l'Espagne auoit desirée, pour faire passer aisément les troupes d'Italie en Allemagne & pays-bas, & pour ce sur ceste inuasion, le Roy de France à iuste droit s'interesse, Sauoye, Venise

Venise, les Suisses, & vne grande partie d'Italie, ont droit de se plaindre d'une telle entreprise, & viennent aux résolutions d'une guerre, pour restablir les choses en l'estat qu'elles estoient.

Sur cet affaire la Maïesté tres-Chrestienne enuoye Monsieur le Duc de Bassompierre son Ambassadeur extraordinaire en Espagne, pour venir à quelque grand accord de ladite Valtoline, & au moyen d'y pacifier le trouble esleué entre les Catholiques & les Grisons; estant à Madrid & le poinct consulté au Conseil de Castille, furent resolu des articles suiuaus.

1. Que la Valtoline seroit remise en l'estat qu'elle estoit auparauant.
2. Que tout ce qui auoit esté fait par les Catholiques sur les Grisons seroit aboly, cassé & annulé, & que lesdits Grisons leur en accorderoient pardon.
3. Que les forts & fortifications y faictes depuis le mois de Iuillet 1620. seroient demolis & abbatus, & les garnisons Milannoises & estrangeres congediees.

Mais pource que les Grisons n'auoient voulu signer ledit pardon accordé aux Catholiques Valtolins, lesdits Catholiques ne voulurent en aucune façon souffrir la restitution de ladite Vallée ausdits Grisons pour la crainte qu'ils auoient d'estre massacrez est à retourner sous leur domination, & comme la Maïesté tres-Chrestienne & les autres Princes & Estats alliez pressoient lesdits Valtolins d'accepter ledit traité fait à Madrid entre les deux Couronnes, & de rendre la Vallée aux Grisons sous la protection des deux dictes Couronnes, & qu'à faute de ce faire, de demolir leurs forts, rendre le pays libre comme il auoit esté, & faire retirer les garnisons Milannoises qu'ils y auoient appellees, ils y seroient contraincts par la force des armes, lesdits Valtolins, Clergé & Catholiques de ladite Vallée, dresserent vne longue remonstrance à ladite Maïesté tres-Chrestienne, laquelle fut presentee au Roy en l'année 1622. en son Chasteau Royal de Fontainebleau par deux Religieux deputez desdits Valtolins, luy deduisans les causes & raisons pour lesquelles il ne se pouuoient résoudre à consentir le restablissement de la Valtoline aux Grisons heretiques, & voicy comme ils parlent, selon la traduction de leur remonstrance tournee d'Italien en François, & selon le dessein de ceux qui en veulent demeurer Maîtres.

Sire, Nous Clergé & habitans Catholiques de la Valtoline, aduoitions & confessons auoir veritablement trop long temps differé à nous venir ietter aux pieds de vostre Maïesté tres-Chrestienne, comme aussi de sa Maïesté Catholique, pour vous faire entendre la nue & simple verité des choses, ainsi qu'elles se sont passees en la Valtoline; vous faire voir l'Estat miserable digne de larmes & de compassion de nous autres, la necessite extreme dans laquelle nous nous trouuons reduits, & en ce faisant supplions humblement vos sacrees Majestez de nous secourir & assister fauorablement.

Mais la cause de ce retardement estoit en partie, que nul de nous autres, ne s'osoit librement presenter à la Cour de vostre Majesté, pour la residence que faisoient en icelle les Grisons, nos ennemis iurez, desquels certainement nous ne pouuions apprehender que toute sorte de mauuaistraitement.

La cause aussi de ce differer a esté en partie, l'effroy espouuëtable qui nous a tiré cōme hors de nous mesmes, sur le desespoir des remedes à nos maux, & nous a rédus cōme bestes, laches, rompus & abbatus de courage, voyans qu'en ceste extrême misere nous estions delaissez & abandonnez de tous Princes & Potentats, & que ne pouuions auoir l'oreille fauorable de vostre Majesté ny du Roy Catholique, pour vous faire entendre la iustice de nostre cause.

Or maintenant qu'il a pleu à Dieu d'illustrer des rayons de sa diuine lumiere. Premièrement l'esprit & iugement des Seigneurs Suisses des cantons Catholiques, & que par icelle, ils ont peu cognoistre le preiudice qui importoit tant à la Foy Catholique, qu'à l'equité de nostre cause en ce fait, où il n'y alloit rien moins que de la ruine & generale desolation de la vie, des biens, de la Foy & Religion Catholique, de plus de six vingt milles ames habitantes en ceste vallee: ayans aussi veu lesdits Sieurs, le traité qui fut fait à Madrid le 25. Avril 1621. entre vostre Majesté & le Roy Catholique, & que beaucoup de temps auoit esté consumé en l'agitation de cet affaire, pour estre de consequence, se sont, par Decret public, resolu de ne point consentir le restablissement des Grisons, & à ceste resolution se sont ioincts les cōfederes de vostre Majesté, & le canton mixte d'Appenzel, iugeans trop clairement de l'interest trop preiudiciable qui heurtoit la conseruation de la foy Catholique & la seureté de nos vies.

Ce fut donc alors que commençans à respirer, nous rappellâmes nos esprits, & reprenâmes courage, nous nous résolûmes d'accourir à vostre Majesté, comme aussi au Roy Catholique; afin que tres-humblement prosterner à ses pieds, nous vous presentassions le present memoire, qui peut seruir pour instruction, sommaire de la verité des choses qui se sont passees en ces

derniers troubles de la Valtoline: nous promettans de la Royale bonté de vostre Maiesté que nous recognoissons si zelee à la foy Catholique & si contraire à l'heresie, voire tellemēt affectionnee à ce qui est de la iustice, que c'est avec raison qu'elle porte le digne nom de Iuste, qu'ayant ietté l'œil sur la iustice de nostre cause, & celle qui concerne la Religion Catholique, non seulement elle se trouuera esmeuë de ne s'employer pour l'exécution du susdit traicté & reestablishement de ladite Vallee aux Grisons, mais receura en sa Royale protection de pauvres familles Catholiques miserablement abandonnées, comme aussi la Religion Catholique en icelle Vallee, de la conseruation de laquelle il s'agit principalement en ce fait, duquel vostre Majesté tirera vne entiere cognoissance par la consideration de ces deux poincts.

Dont le premier sera, de faire voir que nul quel qu'il soit, ne peut insister que le susdict traicté soit entretenu & executé, & la Valtoline restituee aux Grisons, sans faire tort à la Iustice, & offencer la Religion Catholique, les saincts Canons, & encourir les peines portees en la Bulle, *In Cena Domini*.

Le second, que ce n'est assez à vostre Majesté de ne poursuivre pas seulement l'exécution dudit traicté & le reestablishement que dessus: mais recognoissant l'extreme peril auquel nous sommes reduits, vous estes arriuë au tēps où la loy de l'amour & de la charité vous inuite, voire vous oblige à secourir vostre prochain en son vrgente necessité.

Quant au premier. Il y a de longues annees que les Valtolins ont des paches & des conuentions passees & accordees entr'eux & les Grisons; & appert mesme que du temps que la Valtoline fut donnee pour payement de solde aux Grisons par le Roy de France lors Duc de Milan, ils estoient non comme vassaux des Grisons, mais comme alliez & confederez, ainsi qu'il se void par la teneur des contractz & traictéz autentiques soigneusement gardez en nos Archiues: & pour ce respect ne se sont iamais liez par serment de fidelité avec eux. Mais du depuis l'heresie s'estant glissée entre ces peuples, & y ayant alteré les esprits, les Grisons se trouuans plus puissans que nous, & ayans de leur secte & heresie, les principales testes de nostre Vallee, ils commencerent peu à peu à nous traicter, non comme alliez & confederez, mais comme esclaves & vassaux, & par ce moyen vsurperent vne domination tyrannique, non seulement sur nos vies & nos biens, mais aussi sur la liberté de nos ames & faict de nostre Religion, à laquelle nous voulans faire renoncer, voulurent introduire parmy nous les miserables sectes de Zuingle & de Calvin, à quoy s'opposant nos deuanciers fort genereusement les menaçans d'appeller les Princes Catholiques voisins, pour se ietter en leur protection, on vint aux termes d'un accommodement & d'accord, & moyennant lequel, exercice de la Religion Catholique, & la liberté de la foy, furent laissez en leur entier, comme il se void par les conuentions enregistrees aux Registres de ladite Vallee: mais avec succession de tēps, le nombre des huguenots Calvinistes s'estant accru tant des originaires du pays, que de l'arriuee de quantité d'autres estrangers, qui de plusieurs Estats & pays Catholiques couroient en ceste Vallee, comme à vn azyle sous la protection des Grisons, leur tyrannie deuint si excessiue & prodigieuse, qu'au lieu de maintenir & garder les pasches & conuentions faictes pour la liberté Catholique, tout commença d'aller selon le bransle & la passion desdits Grisons qui se rendirent maistres du Gouvernement absolu sur nos vies & consciences, excitez à ce traictement, par la rage & fureur malicieuse des Ministres boute-feux de la Chrestienté.

Nous faisons icy pour cause de briefueté les barbaries extremes par lesquelles on nous fit passer par vne forme d'auarice monstrueuse & inique, agissans contre les Catholiques par dessus tout ordre de raison & iustice, les spoliens de leurs biens, & leur rendant tant d'iniustice, que nul d'eux ne se pouuoit pas asseurer de sa cause gagee en des silences passez en iugement en leur faueur, & mesmes depuis long-temps, puis qu'au renouvellement & changement de chaque Gouverneur du pays, tous silences & iugemens se renouvelloient, & falloit en obtenir de nouvelles par argent, faute de quoy, les vieilles estoient cassées & lacerees, voire mesmes rendues aux parties aduerses pour de l'argent, en fin ils nous faisoient souffrir & endurer tout ce que des ames melchantes & desloyales, qui n'ont autre Dieu ny felicité que l'argent & l'yrongnerie, se peuvent imaginer, tenans le vice pour vertu, & faisans estat de ne iamais garder ny parole, ny serment, ny promesse, de maniere que ne pouuions entre leurs mains esperer traictement meilleur, que si nous eussions esté entre les mains des Scythes & des Tartares.

Nous dirōs seulement ce mot, que non contents d'interdire la liberté de nostre Religion rompsans toutes conuentions faictes avec nous, ils ont enleuë nos biens & substances, ont deffendu l'exercice de nostre Religion, tout culte & deuoir Ecclesiastique, prins les biens & reuenus de l'Eglise, & se sont saisis de tous les legs pieux delaillez aux Eglises par les fidel-

les mourans, pour participer aux Messes & prieres d'icelles apres leur mort, lesquels legs ils ont appliquez à l'entretien du seminaire de la ieunesse huguenote & des Maistres & Regens huguenots appelez de Geneue en ladite Vallee: Ils ont plus obligé les Catholiques aux gages & pensions des Ministres huguenots, les ont priez de leurs Eglises, qu'ils ont metamorphosées en Synagogues du diable: & es lieux où il n'y auoit qu'une seule Eglise Catholique, ils vouloient qu'elle fust commune à eux & aux Catholiques, de sorte que où se chantoient les Cantiques de loüanges à Dieu, & où se celebroit la sainte Messe, là mesmes les idolatres de Baal encensoient ses Autels, en presence de l'Arche où se preschoit la verité Catholique de la parole de Dieu, en la mesme chaire, les Ministres heretiques vomissoient leurs blasphemmes & abominations contre les mesmes diuines paroles: il estoit dauantage prohibé & defendu aux Catholiques d'edifier aucune Eglise nouuelle, & publier Indulgences ou lubilez, priuerent l'Euesque de Como (au Diocese duquel ladite Vallee est situee) de toute sa iurisdiction, l'empescherent de faire ses visites ordinaires, & chastier les delinquans de son Clergé: & estans vne fois tombez d'accord avec luy pour luy laisser la permission de faire ladite visite, moyennant cinq cens escus qu'il leur donna; ils n'eurent si tost recou l'argent, & luy commence la visite en ladite Vallee, qu'ils procurerent de le prendre prisonnier, comme de fait ils se mirent en deuoir de le faire, & s'en garantit par la fuite, se voulans eux-mesmes ingerer de corriger & chastier le Clergé Catholique, disposer des charges & benefices Ecclesiastiques, & iuger les causes Ecclesiastiques, beneficiales & matrimoniales, chastians aussi seuerement ceux qui abiurans l'heresie se rendoient Catholiques, & ceux qui les auoient receuz en leur abiuration & aydez à leur conuersion, punissans les Prestres & Curez, avec dix milles indignitez qui seroient ennuyeuses à deduire.

Non contens des choses cy dessus, afin de ne voir que la Religion huguenotte regner en la Vallee & extirper la Catholique, se veirent aussi excitez par leurs Ministres qui ont tout pouuoir absolu sur leurs cœurs & consciences, d'entrer en resolution de priuer de vie les principaux Chefs, tant du Clergé que des autres Catholiques les plus zelez & affectionnez à la Religion, desquels ils pouuoient à iuste tiltre craindre & apprehender qu'ils ne s'opposassent à leurs desseins pernicieux: & ceste resolution prise, commencerent ceste persecution, par la personne du sieur Nicolas Rusca Archiprestre de la ville de Sondrio, personnage de sainte vie, & de grande doctrine, premier pillier de la Religion Catholique, lequel par des tourmens extraordinaires, ils firent souffrir le Martyre l'an 1618. (la vie duquel & son martyre, ont esté escrits & imprimez par trois diuers Autheurs, pour en rendre tesmoignage à la posterité) avec quelques autres des principaux Catholiques de la Vallee, pour en suite continuer sur tout le Clergé & sur la Noblesse, & de ceste sorte interuenir les autres petits Catholiques, & les contraindre à suiure leur miserable secte: aussi disoit souuent le Capitaine & Vicaire huguenot de la Vallee, il ne passera pas vn an que nous ne soyons tous d'une mesme Religion, & de fait en suite de cecy fut trouuee vne conspiration par les Ministres & Grisons en la ville de lant lieu de la ligue Grise, laquelle aussi desirons faire entendre à vostre Majesté, en laquelle fut resolu de faire vn general massacre de tout le Clergé, & la Noblesse de ladite Vallee & des autres personnes plus zeleees à la foy Catholique, & y prirent la forme & le iour en laquelle & quand tout se deuoit executer. Resolution de nos ennemis qui nous porta à de grandes extremitez, & sur ce desespoir de nos vies où nous eussions esté reduits, nous nous assemblames, & nous voyans tous ensemble, consultames en secret des moyens de pouuoir euitier la cruelle mort qu'on nous vouloit faire endurer, & liberer la Vallee de l'heresie qui s'y alloit rendre absoluë sur la ruine de la Religion Catholique, pour lequel dessein ceste presentation auoit esté esmeuë contre nous: apres auoir longuement consulté des remedes de nous sauuer, nous n'en trouuames aucun plus expedient en ce necessaire besoin que de nous resoudre aux armes, & preuenir par mesme effect nos ennemis au dessein qu'ils auoient proietté d'executer sur nous & sur nostre Religion, ce fut donc en ceste resolution que prenant les armes pour la deffence de nos vies & de nos Autels, nous mismes à mort tous les officiers des Seigneurs Grisons & tous les habitans huguenots de la Valtoline, lesquels peurent tomber entre nos mains. Ceste action executee en ceste extremite, nous appellasmes aussi tost des Religieux de diuers ordres pour prescher la parole de Dieu, confesser, faire accepter le Calendrier Gregorien, la Bulle, *In Coena Domini*, & le saint & sacré Concile de Trente en ladite Vallee, nous rappellasmes l'Euesque, y fut restablie la sainte inquisition, furent abrogez & cassez tous les Decrets donnez contre la Religion Catholique, & le tout se trouua ainsi en peu de temps reduit au gouvernement Catholique, action qui réussit avec tant de facilité & bon-heur, que manifestement on cogneut que la main de Dieu auoit esté avec nous, & auoit conduit à la perfection vne si iuste & si necessaire entreprise, les personnes Catholiques de ladite Vallee, avec le consentement toutefois des autres, qui furent les

entrepreneurs de ceste deffaitte: & ainsi de nous seuls avec l'ayde de Dieu, & sans l'assistance d'aucun Prince, nous auons vengé courageusement nostre liberté: & nous estimions veritablement allez forts sans rien craindre pour pouuoir de nous seuls resister aux efforts des Grisons, si eux seuls venoient à la vengeance: mais ayans eu aduis du depuis qu'ils venoient fondre sur nous avec vne armee tiree des cantons de Berne & de Zurich, & que nous n'estions bastans pour y resister, nous eusmes recours au Gouverneur de Milan, comme l'Estat Catholique voisin le plus proche & commode, lequel nous suppliasmes instamment de nous assister de ses forces contre le dessein de nos ennemis, ce qu'il fit apres beaucoup de difficultez & ainsi fortifiez & de la faueur du Ciel & de ce secours de Milan, nos forces vnies & prenans courage, nous receusmes nosdits ennemis vn peu plus vertement qu'ils ne s'estoient promis & desfilmes entierement leur armee, Dieu voulant encore à ceste fois chastier les insolences execrables qu'ils auoient de nouveau exercees en la ville de Bormio & autres places du pays, où ils profanerent le tres-Sainct & tres-Auguste Sacrement de l'Eucharistie, briserent les Autels & les Images des Saints, mais entr'autres vne fort venerable Image de la Vierge Marie, tenuë en grande deuotion par le peuple Catholique de ladite Vallee, laquelle fut par eux tiree à coups d'harquebuses: outre cela auoient encore pollué les vaisseaux sacrez, desrobé & volé les Calices, platines & autres vstencilles sacrees des Eglises, parties desquelles furent mesme encore trouuees dans leur bagage, sous les armes de leurs morts, voulant la diuine vengeance, par ces spectacles estranges & miraculeux, ainsi que recognoissent ceux qui ont esté telmoins oculaires de ces choses, faire voir sa protection puissante sous laquelle il prenoit la iustice & la cause des Catholiques.

De façon que c'est donc maintenant que la Vvaltoline a vengé sa liberté, laquelle elle a reconquise à la pointe de l'espee, ayant employé la iustice des armes pour la iuste defence de leurs vies & Religion Catholique à present libre, nette & purifiée de toutes sortes d'heresies & de sectes contraires.

Du depuis nous auons appris que sur ces changemens se sont faicts à Madrid quelques formes d'articles entre vos Majestez Tres-Chrestienne & Catholique, pour la restitution de la Vvaltoline; à quoy nous n'auons que cecy à respondre, qu'en matiere de Religion & où l'on traite des choses qui nous interessent, nous disons que la Vvaltoline ne peut pas estre restituee aux Grisons, ny nous remis sous la tyrannie de leur ioug, sans qu'au prealable nous n'en ayons donné nostre contentement & sans auoir esté ouys en nos iustes plaintes & raisons par vostre dite Majesté Tres-Chrestienne & Catholique.

Car nous auons regagné nostre liberté, & nous sommes redimez du ioug tyrannique des Grisons: en premier lieu parce qu'ils ont rompu tous traictez, paches & conuentions faictes & passees avec nous, & ont interdit la liberté de nostre Religion, & partant *frangenti fide non danda fides*. Secondement pour la defence de nostre dite Religion, qui oppresse par tant & longues annees parmy eux s'en alloit esteinte & extirpee selon leur intention. 3. pour nostre defence necessaire nous auons faict ce que dessus, non sans auoir prealablement tenté toutes autres voyes & remedes, & n'en ayans recogneu d'autres plus certains pour liberer la vie de nos personnes, celle du Clergé & de tous les Catholiques innocens sinon que nous deffaire de ceux-là mesme qui estoient alterez de nostre sang & desireux de s'en souiller les mains: raisons suffisantes lesquelles feront voir, comme nous auons deu & avec iustice par ceste action nous descharger du ioug insupportable des Grisons & reconquerir nostre liberté avec la domination premiere que nous auons en la Vallee, qui n'admet aucun doute, & la mesme raison naturelle le permet & le veut; par quelle forme de Iustice nous peut-on priver de nostre liberté & de la iuste domination que nous possedons en la vallee: puis qu'il est ainsi que nous ne recognoissons en terre autre Seigneur que l'Empereur, lequel l'est directement du pays, & nous des fruits: nous ne faisons aucun doute que vostre Majesté ne recognoisse à presēt que cela est cōtre toute iustice & faire la restitution de la Vallee entre leurs mains, ce seroit s'engager à tous lestorts qu'inailliblement nous aurions à souffrir retourner sous l'indigne traitement d'iceux, & s'obliger en des pechez enormes qui requerroient auant qu'estre pardonnez toute sorte de restitution aux interessez.

Sur le troisieme article, où il n'est traité d'autre chose que de la Religion: on y agit du reestablisement de l'heresie en ladite ville qui causera l'affoiblissement non seulement de la Religion Catholique en icelle, mais l'extirpation infaillible d'icelle: ce qui se trouue clairement, car le susdit article 3. est de telle teneur que pour ce qui concerne la Religion en la Vvaltoline, Contard de Bormio & de Chauenne, toutes nouveautez y introduites depuis l'an 1617. en ça, seront leuees & abolies, duquel article s'ensuiuent necessairement deux choses: la premiere, que toutes ordonnances, decretz, prouisions faictes contre la Religion Catholique auant le commencement de ladite annee 1617. seront par ce 3. article à estre confirmees.

confirmées & approuvées, car il est certain que, *exceptio firmat regulas in contrarium in casibus non exceptis*, & que par le même article leldits Catholiques n'auront raison de se plaindre, si les choses susdites se mettent en pratique & à execution par les Grisons, puis que les nouveutez & autres choses introduictes contre la foy Catholique avant le premier iour de l'an 1617. ne pourront jamais estre abolies comme auparavant ils les pouvoient faire pour l'entretien de leurs conuentions cy dessus declarees.

Or toutes choses cy deuant declarees ayans esté faictes & perpetrees par les Grisons contre les Catholiques, sans comprendre le Martyre dudit Archiprestre, & tous les decrets, exils & bannissemens de Religieux & autres ordonnances faictes au preiudice de la Religion Catholique avec plusieurs sortes de violences & iniustices touruees en vs & courumes ont esté faictes avant le commencement de l'annee 1617. comme il se sçait, & se voit même par les susdits decrets; dont il s'ensuit necessairement que tous moyens & raisons ostées par consequent aux Catholiques de pouoir se defendre & servir de leurs anciennes conuentions contre leldits decrets & ordonnances, establies du depuis; car il est sans doute que leldits Grisons, allegueront pour pretexte qu'il en aura esté autrement ordonné par les deux Couronnes de France & d'Espagne, raison indubitable pour laquelle leldits Grisons voudront faire leuer toutes les nouveutez introduictes en faict de religion contre leur heresie depuis ladite année, comme ainsi soit qu'en l'annee 1620. fut par nous introduitte la sainte inquisition, l'auctorité de l'Eglise restablie, le Calendrier Gregorien receu, le sacré Concile de Trente accepté, les legs pieux delaissez employez à vsage requis, les biens restituez aux Eglises qui en auoient esté spoliees par les huguenots, le Seminaire heretique aboly, les Ministres & les Regens huguenots chassiez, & purgé en tout & par tout la Vvaltoline de toute heresie, & defendu la liberté de se faire huguenot permise auparavant à vn chacun, ordonné que nul Apostat ne soit accepté par la Religion de la Vvaltoline, & finalement ayans tout à fait effacé les marques & vestiges de la malice huguenotte, & reduit le tout conforme aux loix & ordonnances de la religion Catholique: il est tout asseuré suivant l'article que les Grisons aboliront toutes choses qui seruent à la conservation de nostre religion comme renouvelles contre les ordonnances faites avant le commencement de l'annee 1617. ainsi qu'il leur est accordé par ledit article, & reduiront le tout en l'estat qu'estoit la religion Catholique avant ladite année en laquelle, comme est dit, l'heresie & toutes les choses cy deuant racontées, retourneront en vigueur contre nous, car eux estans rendus absolus maistres de la vallee qui leur pourra dire *Quare sic facis*, & qui sera le Prince qui se voudra obliger de les empêcher de mal faire.

Qu'il soit donc veritable que tout ce qui a esté fait par nous contre les Grisons ait esté pour la seule defence de la religion Catholique, & pour nous liberer des oppressions qu'ils nous faisoient, sauuer la vie du Clergé, & des Catholiques, & preuenir la cruelle resolution & conspiration qu'ils auoient faite de faire vne boucherie generale de tous les Ecclesiastiques & des principaux Catholiques & pluszelez à la foy, & qu'en cette resolution nous nous soyons aydez de l'assistance d'aucuns Princes qui nous ayent induits à ce faire pour leur interest d'Estat, cela se verifie par la propre confession de nos ennemis, lesquels ont composé vn Martyrologe auxquels ils marquent pour Martyrs tous ceux qui ont esté par nous tuez, les nommans chacun d'eux par leur nom & surnom, & rendans raison de cette resolution derniere, qu'eux mêmes voulans establiir vne Eglise Evangelique, qu'ils appellent en Boulce, terre de la communauté de Telio, & que les Catholiques y entretiendroient vn de leurs Ministres, leldits Catholiques s'y opposent à main armée, & parmy le mouuement le Ministre Brusio fut bastonné à mort, & vn ieune huguenot de Triano tué, ce sont ceux cy qu'ils appellent premices des Martyrs; sans aduouer qu'eux mêmes au precedent auoient vrayement Martyrisé le sieur Blaise Piatty frere du Curé de Telio Gentil-homme d'honneur, seulement pour auoir dit, que s'ils vouloient establiir vn Ministre en Boulce, & nous oster l'exercice de nostre religion & Eglise, qu'il le voudroit sçauoir, l'intitulation du liure est, *Vray Narré du massacre des Evangelistes fait par les Papistes Rebelles en la plus grande partie de la Vvaltoline en l'annee 1620. le neuuesiesme iour de Iuillet & iours ensuiuans, stil vieil, mis en lumiere pour information plus necessaire & admonition à tous les Estas plus libres, & d'exemple à tous vrais Chrestiens, de perséuerer en la pure profession du S. Euangile Math. 5. 10. Bien-heureux sont ceux qui sont persecutez pour la iustice, car à eux est le Royaume des cieux*, cecy est l'intitulation dudit liure desdits tuez, lesquels à plainē bouche il appelle Martyrs, comme occis seulement pour la foy Evangelique, qui sont ceux là même toutefois qui furent par nous mis à mort pour purger d'heresie ladite ville, & deliurer nos vies de la mort qui les menaçoit: d'où l'on void clairement qu'en cette action il ny a eu autre motif que le pur interest de la religion Catholique, & qu'il a esté tres necessaire de venir à cette

extremité pour la defence necessaire de la foy Catholique, là où les ayans preuenus nous leur auoient empesché d'executer leur derniere conspiration contre nostre vie faite & tramee non pour autre subiet que pour extirper entierement la religion Catholique en ladite vallee: partant que les politiques & interressez ne s'imaginent point que nulle autre raison nous ait stimulez en ceste resolution, il ny a eu autre consideration que le seul respect de la religion, car pour toutes autres choses elles se toleroient au mieux qu'il estoit possible, & nous estans attendus au secours qui nous estoit promis pour nous defendre contre leurs efforts, nous fallimes & retardames à nous resoudre à l'extremité, manquement qui faillit estre cause de nostre ruine finale.

Il ne faut pas, Sire, que vostre Maiesté preste l'oreille à ceux qui ont peu d'esgard & d'interest au bien spirituel des ames & de la foy Catholique, mais seulement à la raison d'Estat.

2. Quelle guerre peut on apprehender en Italie, pourquoy tant de menaces de gens d'armes si vostre Maiesté auoit à plaisir de se faire informer de la verité comme tres jalouse que nous la croyons estre de la foy Catholique, & affectionnée en ce qui est de la ialousie & de la raison, de telle sorte que là où il y va de l'interest ou de l'une ou de l'autre, il ny a plus de raison ny de maxime d'Estat, ny supplication de Potentats qui la puisse esbranler en la solidité de son zele & de son equité, nous auons cette ferme croyance que vostre Maiesté tourneroit ses yeux de compassion sur nostre propre misere, & qu'au lieu des heretiques Grisons, que chacun recognoist pour gens sans foy diuine ny humaine, receuroit en sa Royale & paternelle protection nous autres pauvres Catholiques abandonnez de tout le monde.

Est-il croyable qu'elle se resoudroit à laisser la guerre qu'elle poursuit à present avec tant de bon-heur & de felicité à chasser les huguenots de France pour enuoyer ses armées en Italie & faire fondre ses armes sur nous pauvres Catholiques pour la defence des heretiques? qui pourroit croire cecy d'un Louys le Iuste si zelé à la foy Catholique. Ceux qui donnent ces Conseils, & vont persuadans à V. Maiesté qu'à faute de ce faire la guerre s'eleuera en Italie, la veulent priuer de la bonne opinion que tout le monde conçoit d'elle, & qui est le plus riche & pretieux ioyau qui illustre vostre diademe, d'auoir en vostre Maiesté un grand Roy Tres Chrestien si affectionné à la religion Catholique, si grand fleau des heretiques & de l'heresie en quelque lieu qu'elle se trouue, & la veulent charger d'une grande tache d'infamie: sacree Maiesté plaie de considerer, qu'il ne manque pas d'autres moyens pour conseruer la paix & le repos d'Italie, que de restituer la Valtoline aux Grisons, que si l'interest des Estats d'aucuns Princes & Potentats d'Italie, sollicitent vostre Maiesté à prendre cet affaire en main, pourquoy ne ferions nous pas avec vostre Maiesté ce que les Grisons font: ne vous fiez vous point d'auantage à des Catholiques qu'à des huguenots, qui font gloire de negarder fidelité ny tenir parole ny promesse asseurée à personne: Si nous auons appelé à nostre secours le Gouverneur de Milan, ce n'a esté que pour le voisinage Catholique & la commodité du prompt secours au besoin qui nous en faisoit, sur l'aduis inopiné que nous eumes de l'armée huguenotte leuee es cantons de Berne & de Zurich par les Grisons pour venir fondre sur nous & nous tailler en pieces: en mesme temps nous auons demandé que l'on fist quelques forteresses es lieux plus necessaires & auantageux à nostre defence, non pas que nous ayons donné la domination de nostre vallee à personne, car en toutes façons nous voulons estre libres: mais seulement leur auons confiez iusques à ce que les affaires ayent pris quelque forme d'accommodement: car s'il plaist à vostre Maiesté de nous proteger de son autorité & puissance contre les Grisons & ceux de Berne & de Zurich en sorte qu'ils ne nous molestent, nous garderons seuls lesdites forteresses, que nous iugeons absolument necessaires pour nostre conseruation avec l'assistance & Royale protection de vostre Maiesté: que si les autres Potentats peuvent pretendre & esperer autre chose de nous & des Grisons, s'il en arriue quelque traité le tout sera effectué de nostre part avec plus grande fidelité que celle des Grisons: car vostre Maiesté sçait qu'il y a plus d'assurance de se fier à nous qui sommes Catholiques & suyons la vraye foy, qu'à des perfides huguenots, qui non comme heretiques seulement, mais aussi comme Grisons, sont accoustumez de ne tenir iamais parole ny fidelité, ainsi mesmes que les Ambassadeurs de vostre Maiesté luy pourront rendre un ample témoignage: lesdits Grisons sont altiers de leur humeur, nation fiere & superbe, qui au lieu de recognoistre les graces & les faueurs qu'ils recoiuent d'elle, se vantent qu'elle est obligée à leur protection & à les remettre en l'estat duquel ils sont priuez, & ce en consideration de l'ancienne ligue qu'ils ont avec les Roys de France vos predecesseurs: Mais si vostre Maiesté daigne se ressouuenir des raisons cy-dessus deduites,

elle recognoistra non seulement n'auoir aucune obligation à la pretenduë protection des Grisons, car il ny a pache ny confederation qui oblige quand il est contraire à la loy de Dieu, qui veut estre preferé à toute sorte de contractz; mais elle verra comme elle est obligée de les abandonner comme des ennemis de Dieu, de la S. Eglise Catholique, & de tous les Princes vrayement aussi Catholiques, & sur cette recognoissance, nous ouurira les bras de sa protection & se rendra fauorable à nous autres pauvres Catholiques abandonnez, ses tres-humbles seruiteurs qui sont prests de respendre iusques à la dernière goutte de leur sang pour son service, comme n'ayans iamais eu aucune obligation enuers lesdits Grisons, voire mesmes d'autant moins est elle obligée à leur assistance, qu'eux mesmes ont rompu la capitulation de Madrid sans iamais auoir voulu iurer & promettre en icelle nostre impunité & le pardon de l'action passée resolu en la-dicte capitulation, à raison dequoy ils ont desobligé vostre Majesté & se sont rendus de sa protection par ce refus iniuste & cruel.

Que trouue on de bon aux Grisons pour estre si auant portez dans les faueurs & bonnes graces de vostre Majesté, & veuz d'elle d'un œil si debonnaire & tout plein de bien-veillance en leur endroiect, si elle a esgard à leur creance, ils sont tous heretiques perfides, meschans, saccageurs d'Eglises, vsurpateurs des biens Ecclesiastiques & ennemis des Catholiques. Si à leur naturel, ce sont gens de vile & basse condition qui n'ont autre plus grande diuinité en respect, que l'or & l'argent, dont l'amas & la garde est estimée d'eux *ius naturale & diuinum*, gens parmy lesquels on tient la parole donnée pour crime, & grand blasme si elle est tenuë & gardée.

Et de vray il n'y a chose qui plus dispose vostre Maieité à quitter la protection des Grisons, & la reseruer pour nous, que la consideration de vous mesmes, vous representant que vous estes LOVYS XIII. surnommé le IUSTE, fils aîné de la sainte Eglise, deffenseur de la Foy & ennemy des heretiques, & qui avec le laiect, auez pris dès vostre enfance vne haine immortelle contre l'herésie, grand amateur de iustice, qui preferé tout interest d'Estat à la gloire du service de Dieu, car nous sommes asseurez que sur ceste consideration recognoissant que ceste restitution de la Valtoline aux Grisons est contre toute iustice, & porte vn preiudice notable à la Foy Catholique, vostre Maieité changera de dessein, & ne permettra iamais que plus de six vingt milles ames Catholiques soient exposees à la rage cruelle de nos ennemis iurez.

Quant au second poinct, qui est de l'obligation qu'a vostre Majesté de nous secourir par le precepte de la charité en nostre extrême necessité, vostre dite Majesté le peut assez cognoistre par ce qui a esté dit: car il ne nous sera iamais possible de nous resoudre à retourner sous le ioug tyrannique des Grisons; ne pouuans plus pour beaucoup de iustes raisons donner foy & creance à leurs promesses & parolles, & nous y vouloir contraindre par la force, ce seroit exposer à la boucherie la vie de plus de six-vingts milles innocents, qui seroient incontinent deuorees par la rage insatiable de ces loups enragez, remplir la Vallee de meurtres continuels: car de nous fier en eux ce nous seroit folie, premierement pour estre les Grisons naturellement perfides, qui ne scauent que c'est que de garder la foy ou la promesse iurée, comme vostre Maieité pent apprendre de Monsieur de Vicq qui a demeuré aupres d'eux tant d'années Ambassadeur de France, & le confessera aussi tout autre Prince ou Estat qui aye traicté avec eux, si iamais il s'est recogneu qu'en toute sorte de contractz & traictéz, la foy ou la parole donnée ait esté tenuë & gardée du costé desdits Grisons, ny autre personne qui ait negocié avec eux: & de fraische datte que le Duc de Feria Gouverneur de Milan, dist si la ligue Grise a gardé les conuentions arrestées avec luy cét hyuer dernier, car au contraire il se sçait que plusieurs communautéz apres auoir iuré & signé les articles dudit traicté, du depuis en firent & iurerent d'autres entr'eux au preiudice des premiers. Que l'Ambassadeur de vostre Maieité confesse aussi le traictement qu'il a reçu des Grisons, comme encore la Republique de Venise de son costé tesmoignera tousiours de l'infidelité de ce peuple. Sur ces considerations toute la puissance de vostre Maieité, voire de tout le monde, ne suffira pas pour changer le naturel des Grisons, tres-bien obserué des Seigneurs Suisses, avec leur forme de Gouvernement variable, lequel n'a autre stabilité que sa perpetuelle inconstance, & partant avec beaucoup de iugement & prudence, ils n'ont iamais voulu promettre pour eux, ny cautionner leur foy. Secondement nous disons que toutes les assurances & promesses tant de vostre Maieité que de tous les Princes & Estats du monde ne peuent asseurer nos vies, & nos substances, voire la Foy Catholique Apostolique & Romaine, les Gri-

sons retournez parmy nous, car se voyans les Maistres, ils voudront entierement disposer à leur volonté de l'ordre du gouvernement, ils supposeront mille sortes de faux pretextes, pour executer sur nous leur premier dessein, & ce qu'ils auoient cy-deuant projecté faire tout d'un coup & nous massacrer tous à la fois, ils le feront peu à peu, & lentement nous feront mourir, & alors qui sera le Prince qui voudra venir voir ce qui se passera en nostre Vallee, & quel le mal-heureux de nous autres, tous assubjettis à cet ancien ioug, sera si usé d'auoir recours à quelque grand Potentat, sans encourir la peine de rebelle, & alors quel moyen de recourir à vostre Majesté, sans estre asseurez qu'auant qu'elle nous eust secourus, nos maisons seroient reduites en cendres iusques aux fondemens; puis que mesme en ladite Vallee, pendant la domination desdits Grisons, les Gouverneurs particuliers chastioient seuerement qui osoit se plaindre d'eux, & qui accouroit à leur supreme Tribunal pour en demander Iustice, quand on nous aura coupé la gorge, à quoy nous seruira la protection de vostre Majesté, voire mesme la poursuite & vengeance qu'elle en pourroit prendre par les armes: tiercement au troisieme article de Madril s'est traité le point de la Religion, où l'on ne requeroit qu'une seule chose aux Grisons, sçauoir de promettre nostre pardon, & souscrire à nostre impunité accordé au second article, plusieurs de leurs communautéz se deffendirent de cela, & ne voulurent iamais ny la souscrire & promettre: pour celles qui se firent, ce fut avec des protestations & reserues du tout contraires à l'assurance de ladite promesse, ce qu'ils firent pour la crainte qu'ils auoient des armes de Zurich, & autres plus puissantes communautéz; & quelque remonstrance qu'ait peu faire Monsieur Gouffier Ambassadeur de vostre Majesté aupres d'eux, il ne luy a pas esté possible d'obtenir d'eux ceste promesse: comment donc serions nous asseurez avec eux, puis qu'ils negardent iamais ny foy ny parole qu'ils donnent, se soucians peu de promettre, mais de ne nous rien observer: tant est forte & violent la passion & la haine qu'ils nous portent, & telle qu'elle n'a sceu denteurer en leur cœur sans se declarer, disposez à la vengeance, en ce qu'ils ont mieux aymé rompre ladite capitulation, que de rien promettre de leur costé à nostre aduantage, tant ils sont affamez de nos vies & alterez de nostre sang, ce qu'estant il se voit comme vostre Majesté n'a plus aucune sorte d'obligation de garder ledit traité, ny les prendre en sa protection, puis qu'ils ont manqué de leur costé en chose si essentielle, ce que vostre dite Majesté remarquera s'il luy plaist.

En quatriemesme lieu, si nous forcez par la necessité de nostre iuste deffence & de la foy Catholique, auant que d'en venir à vne finale & derniere resolution, de mettre à mort tous leurs officiers avec tous les huguenots qui estoient en la Vallee, & que nous pouuions attrapper, ils nous traictoient desia avec vne si grande tyrannie, faisant dessein de faire vn massacre general de nous tous, quoy qu'ils eussent quelque forme d'effroy des armées Catholiques voisines, que feroient-ils maintenant deuenus plus insolens que iamais, par la victoire qu'on leur veut faire obtenir sur nous, se voyans si fauorisez de vostre Majesté & de tous les Princes d'Italie, & nos forteresses entre leurs mains, lesquelles sans doute ils feroient seurement garder, pour nous tenir obligez à leur subiection & nous traicter à leur plaisir; il est tout asseuré que ces taureaux enragez au souuenir de leur sang par nous espanché, ne se verroient iamais assez rassasiez du nostre, car non contents de s'en yurer d'iceluy, disent tout haut, qu'ils pretendent s'en laver les mains. C'est ceste verité mesme que sceut fort bien recognoistre Monsieur de Montholon Ambassadeur extraordinaire de vostre Majesté, lequel a dict aux nostres enuoyez à Lucerne, qu'il voyoit bien qu'il estoit impossible restituans la Valtoline aux Grisons, d'asseurer nos vies, nos personnes, & la foy Catholique es promesses d'iceux, ains que le tout courra risque de tomber en vne pitoyable desolation: mais que la raison d'Estat ne pouuoit pas permettre que les forteresses demeurassent ez mains de ceux qui les tiennent à present. Toutes-fois nous ne pouuons croire que vostre Majesté voudroit preferer la raison d'Estat à l'honneur de Dieu, à la iustice, & au salut de la Foy Catholique, Apostolique & Romaine, voire à celuy de son ame: celuy qui auroit ce sentiment se feroit cognoistre mal sentir de la Foy, ou d'estre tout à fait Politique ou Atheiste. En apres, si bien en toute façon, il est necessaire que les forteresses ja faictes demeurent en leur estat, pour nostre deffence & seureté: ce n'est pas à dire pourtant que desirions qu'elles demeurent entre les mains de ceux qui les occupent à present; mais que l'on cherche quelque bon expedient pour nostre assurance & le repos public, autre que celuy de nous exposer à vne finale misere & extirpation de nos personnes & Religion, & nous les retirerons, & ne dou-

tons point que vostre Majesté n'en puisse trouver d'autres s'il luy plaist d'en auoir besoin. Et d'icy naist l'obligation au peuple de la Charité en vostre dite Majesté, car si elle ne nous secourt, nous sommes abandonnez de tout le monde, puis que la Majesté Catholique se void auoir promis l'execution dudit traité touchant la susdite restitution de la Vallee: d'autres sur vne, nous auons plus de subjets de craindre que d'en esperer du secours: de sorte donc que vostre Majesté seule est toute nostre esperance apres Dieu, elle seule nous peut secourir, & ne doubtons point de sa bonne volonté, car nous sommes assurez que vostre dite Majesté ne voudroit pas changer sa conscience, & souiller son ame du sang de tant de milliers d'innocens, voire tant d'ames priuees de l'exercice de la Foy Catholique, ny permettre que des gens perfides & desloyaux, lesquels pour chose du monde ne nous garderont rien de ce qu'ils promettent, soient les souuerains dominateurs de nostre pays & de nos personnes: Et qui seroit celuy qui se voudroit charger d'une si importante charge en son ame, & de s'obliger à rendre compte à Dieu du sang & des ames de tant de pauvres Catholiques? ce ne sera pas vostre Majesté qui par consequent demeurera éclaircie par cecy, qui est vainement employer & consommer tout soing, estude & travail pour nous faire croire que nous soyons assurez de nos vies, de nostre foy Catholique, & de nos biens, restituant la Valtoline aux Grisons, car iamais ils n'observeront ce qu'ils promettent, ny avec toutes leurs promesses ne prendrons aucune assurance en eux, ny à sorte de protestations de Princes, ny promesses de secours & protection qui y porte nostre confiance, car pour les raisons cy-deffus dictes & beaucoup d'autres, on ne verroit en ceste Vallee qu'un rauage & continuel espanchement de sang de part ou d'autre, & par consequent il est aussi perilleux aux Grisons de s'y reestabli qu'à nous de nous reduire à leur puissance, *difficillimum est imperare nolentibus*. Plaise donc à vostre Majesté de pouruoir d'autres moyens pour l'assurance du repos public de l'Italie que certuy cy a esté proposé & suiuy iusques à present, nous sçauons que Dieu luy en suggerera d'autres, & en ceste sorte nous serons tousiours prests de la seruir, & donner toute sorte de contentement possible, que si l'on traite autrement & à nostre interest, toute raison & deuoir de conscience veut que nous soyons ouys, auant qu'on se resoude à quelque sorte de fin, & que l'on ne conclue point à la susdite restitution de la Vallee, qui est nostre, sans nostre adieu & consentement, & partant s'il plaisoit à V. Majesté d'enuoyer son Ambassadeur en lieu où nous puissions estre à couuert des embusches des Grisons nos ennemis, avec un ordre de traiter d'autres moyens plus aptes & raisonnables pour le repos public, elle trouuera tousiours en nous un cœur vraiment loyal & entier pour la seruir à son contentement. Nous n'auons en cecy pretention plus chere que la conseruation de nostre liberté & de la foy Catholique, nous nous accommoderons à toutes autres choses, & rendrons à vostre Majesté des preuues & tesmoignages de services avec plus de cœur & de courage que si nous estions ses propres vassaux; nous vous coniuons d'estre nostre protecteur puis que sous l'ombre des fleurs où nous nous iettons nous esperons viure & receuoir tout bonheur: nous sommes resolu de ne souffrir à l'aduenir la tyrannie des Grisons, & perdre plustost mille fois la vie que de retourner sous leur domination, c'est pourquoy prosternez aux piés de vostre Majesté nous la supplions en toute humilité & la coniuons par le sang que le fils de Dieu a respendu pour tant d'ames humaines, de faire reluire en action, le zele admirable que vous portez à la foy Catholique, monstrez vostre puissance en debellant les monstres infernaux qui se sont souleuez contre nous, faites paroistre vostre grande magnanimité, en secourant de pauvres ames miserables qui appuyent toute leur confiance sur vostre misericorde & bonté, considerans que sous de grands pechez contre la Iustice & foy Catholique vous ne pouuez vous entremettre de faire restituer ladite vallee aux Grisons, & que la charité Chrestienne vous oblige de nous secourir en nostre extreme misere *Ne trahas bestias animas consciences Deo, & animas pauperum ne obliniscaris in finem*, & sur cette assurance nous demeurerons tres-humbles & tres-obligez seruiteurs à vous rendre service en toutes occasions, & prions à iamais l'eternel tout puissant qu'il comble de bons & tres-heureux succez toutes les glorieuses entreprises de vostre Majesté.

Sa Majesté tres-Chrestienne qui est parfaitement bon voisin & bon amy ne peut voir ses allies & anciens confederes souffrir l'oppression de leur propre patrie, sans y porter la main fauorable de son secours, apres auoir tenté auparavant toutes sortes de moyens legitimes & raisonnables pour remettre la paix entre lesdits Grisons & conseruer la Religion Catholique en son exercice, & laisser les protestans en leur liberté viuans les vns avec les autres comme bons compatriotes sans trouble ny jalousie sous la protection & amitié des Princes leurs amis & allies.

Voyons donc le sage procedé de sadite Maïesté en cet affaire de la Valtoline & la bonne intelligence des Suisses les vns avec les autres. Le Roy qui a tousiours eu l'œil porté à leur bien & conseruation, fit venir de Rome le Marquis de Cœuvres son Ambassadeur après la Saincteté, pour faire le mesme Office d'ambassade de sa Maïesté vers lesdits Suisses, leur remontrer la bonne affection & sincere volonté pour le bien & repos de leur Republique.

Pendant cela, arriue quelque temps apres le rappel du commandeur de Sillery Ambassadeur du Roy vers sadite saincteté, Monsieur de Bethune Conseiller de son Conseil d'estat, personnage grandement exercé en telles negociations, & qui a esté dignement employé vers les plus grands Princes & Estats de la Chrestienté pour leur tesmoigner les pures intentions de la Maïesté pour l'entretien de la paix publique comme grand arbitre & terminateur des differents qui suruiennent en icelle. Ayant donc recogneu sadite Maïesté la fidelité & longue experience dudit sieur de Bethune, l'expedia son Ambassadeur à Rome pour y représenter les iustes interets que le Roy auoit de s'entremettre du reestablisement des Grisons en la Valtoline, contre les desseins d'Espagne, dont le different auoit esté remis pour en venir à quelque raisonnable accord, à l'arbitrage du Pape: aussi se trouua à Rome le Duc de Pastrane Ambassadeur d'Espagne pour deffendre cette vsurpation de ladite Vallée, en laquelle le Roy son Maistre vouloit auoir son passage libre d'Italie en Allemagne, ce que Monsieur de Bethune refusa au nom du Roy son Maistre, alleguant contre la proposition d'Espagne que sa Majesté ne pouuoit accorder ledit passage au Roy d'Espagne par ladite Vallée pour des causes & raisons qui l'interessent en la protection de ses aliez, & que tout ce qu'elle desire n'est que l'execution du traité fait à Madril touchant ladite restitution de la Valtoline & des Grisons: different qui mettoit sa Saincteté en anxieté bien grande pour ne pouuoir accorder ces deux grands Roys, prests d'en venir aux armes, de sorte que cet affaire est demeurée ainsi iusques à present sans aucune decision, sinon forces leuées de gens de guerre de part & d'autre pour faire deguerpir l'Espagne par la force sinon de volonté.

Pour ce qui touche les Suisses aussi Monsieur le Marquis de Cœuvres se trouuant en leur assemblée de Baden, fit avec toute sorte de raisonnables persuasions, tout ce que l'art d'un bon orateur peut inuenter pour entretenir l'vnion, la paix & la bonne intelligence entre lesdits Cantons Suisses tant Catholiques qu'autres, & leur declarant les bonnes & pures intentions de sa Majesté tres-Chrestienne pour le bien & repos de leur Republique, leur remontra ce qui suit en cette celebre Harangue qu'il leur fit, comme il suit. *Magnifiques Seigneurs.*

Le Roy mon Maistre, vostre meilleur amy, allié & confederé, ayant tousiours ez occasions & affaires importantes qui se sont presentées en ces quartiers, assez fait paroistre le soin qu'il prend de vos interets, desirant continuer en vostre endroit les effects de son affection & royale bien-veillance, m'enuoye extraordinairement, pour en cette assemblée generale vous en confirmer les assurances, ensemble celle de l'estime qu'il fait de vostre amitié, par laquelle il a creu estre obligé, pour le bien, aduantage & commodité de vostre Republique de vous représenter comme ayant pleu à Dieu de benir ses labours & le soing que sa Majesté prend de la conduite generale de ses affaires elle est paruenue à tel point, que tous les peuples iouissans d'un doux & assuré repos, ne respirans qu'une entiere & fidele obeyssance, a aussi tost ietté ses yeux & ses pensees au dehors avec les mesmes intentions & desirs qu'elle a tousiours eu de meriter du public, d'empescher ou arrester toute sorte d'vsurpations & de procurer à ses amis & aliez un bien qu'elle a si soigneusement recherché & establi chez l'oy, qui est la felicité d'une bonne paix & concorde.

Or comme vous luy estes en singuliere recommandation, tant par inclination naturelle, que d'ancienneté d'alliance, aussi employe elle vers vous tres-volontiers ses Offices & ses Conseils, vous exhortant d'y correspondre & de les vouloir embrasser, puis qu'ils ne tendent qu'à vous affermir en cette assemblée generale, par la decision de tous vos differents, une si ferme & stable vnion, qu'elle ne puisse jamais estre esbranlée par ceux, dont tous les desseins n'ont autre but que la diminution & perte entiere de vostre liberté; ce qui conuient à vos prudences de considerer attentiuement estant bien plus facile de preuenir le mal, que d'y remedier.

J'aurois sur ce subiect beaucoup d'occasion de vous dire combien de mal & d'affoiblissement peut apporter à vostre grandeur cette des. vnion, si la Maïesté ne vous auoit plusieurs fois fait représenter que vos Estats n'iroient jamais prosperans, que vostre amitié ne seroit recherchée ny désirée des grands, vos forces & vos puillances redoutées, qu'autant qu'on vous verroit affermis en une parfaite amitié & concorde, le deffaut qui s'en est trouué

parmy vos communs amis alliez & confederez, a produit le mal & l'oppression qu'ils sentent à present.

Vous ne devez douter, *Magnifiques Seigneurs*, qu'il ne soit pour gagner plus auant, soit par force ou par artifice ou corruption, & que vous ne soyez menacez de semblable peril, voire d'une peruersion entiere de vostre Republique, si vostre mauuaise intelligence continuë, estant certain que tous Estats & corps naturels viuent & se maintiennent par les mesmes causes & moyens qu'ils ont esté composez & establis, se destruisans & ruynans par leurs contraires.

Il vous conuient donc, *Magnifiques Seigneurs*, en ce danger recueillir vos cœurs, & animer vos courages pour vous maintenir & conseruer au mesme point que l'vnion & la generosité de vos predecesseurs vous a conseruez, afin que la posterité cognoisse que vous n'avez pas esté moins jaloux qu'eux de vostre conseruation, & que par leur exemple vous estes incitez à maintenir en son entier la succession & heritage acquis par leur sueur & leur sang, afin de la transmettre à vos enfans en estat aussi glorieux & paisible que vous l'avez receuë.

C'est donc le premier soin du Roy, mon Maistre, l'esprit duquel est trauerse du miserable Estat auquel sont reduits les Grisons vos communs amis, alliez & confederez, n'ayans pas moins de douleur de leurs miseres & calamitez qu'il en auroit de ses propres subiects, bien qu'il ne soit que trop veritable que pour auoir negligé les serieux & veritables conseils de sa Majesté, ils sont tombez en l'oppression qu'ils souffrent à present.

Vous auez assez cogneu, *Magnifiques Seigneurs*, avec quels soins & sollicitudes sa Majesté a embrassé leur reestablisement en la Valtoline, & devez semblablement vous souuenir que ce qui a retardé l'executiō du traicté de Madrid, a esté le refus qu'aucuns des Messieurs des Cantons ont fait pour lesdits Grisons, dont vous voyez la mauuaise suite, qui leur est entierement imputee dans le public, soit que l'industrie & artifice d'autrui preueust ceste perte ou autrement, la preuoyance que sa Majesté auoit eue de tous ces fascheux accidens & le peril où la longueur & le temporisement pouuoient porter cet affaire, l'auoient fait resoudre, il y a tantost pres de deux ans de quitter les voyes de negotiation pour se seruir de la force, si elle n'en eust esté dissuadee par vos aduis & conseils, ayant sur vos instantes prieres depuis la premiere negotiation, laquelle a esté du depuis agitée par l'espace de huit mois à Rome & produit diuers articles, dont les vns n'ayans point esté acceptez par le Roy Catholique, sa Majesté n'a pas peu ny deu acquiescer aux autres, par plusieurs grandes raisons importantes au public, à vos interets & conseruation, ensemble son honneur & dignité.

La plus grande difficulté qui ait arresté sa Majesté, a esté la demande faicte par les Espagnols de leur passage dans la Valtoline, dont vous iugez & cognoissez la consequence, sans qu'il soit necessaire que i'estende dauantage les raisons qui ont meü sa Majesté à ce refus: seulement vous en allegueray-je vne assez forte & puissante cōtre le consentement desdicts passages, qui seroit vne ouuerture & entree aux armées de la maison d'Autriche dans vos Estats & pais, dont la suite ne peut estre que tres perilleuse & dommageable. Sa Majesté a commandé sur ce subiect à Monsieur de Bethune, son Ambassadeur à Rome, de représenter au Papel l'interest qu'elle a de ne point donner son consentement pour lesdits passages, & de faire instance vers sa Sainteté que la restitution de la Valtoline soit executee aux conditions portees par le traicté de Madrid avec la seureté requise & necessaire pour la Religion Catholique. Elle continuera donc ceste procedure tant qu'il y aura lieu d'esperer contentement pour lesdits Grisons, ainsi que la iustice & la raison le requierent, son intention estant de preferer tousiours les voyes amiables à celles de rigueur, desirans neantmoins receuoir sur cela vos bons aduis & conseils, afin qu'en ceste cause commune à vous si importante, vous preniez ensemble vne resolution conuenable, sa Majesté se promettant que vous seconderez ses bonnes & droictes intentions.

Le Roy mon Maistre, m'a aussi commandé, *Magnifiques Seigneurs*, rouchant le payement de vos pensions & esclaireissement de vos debtes, de vous faire scauoir que tant que les affaires de son Royaume luy ont peu permettre, il vous a fait sentir les effects de sa royalle beneficence, vous ayant enuoyé les mesmes contributions que vous souhez auoir du temps du feu Roy Henry le Grand son Pere, de glorieuse memoire. Du depuis les inouuemens & vrgentes affaires de son Estat, ont empesché qu'elle n'ait peu vous faire tenir si ample voicture de deniers: maintenant qu'elles se reestablissent, & que ses finances sont dignement & exactement administrees, elle vous a dès l'annee passée enuoyé vn secours de six cens mille liures, qu'elle a voulu continuer, voire y adiouter encore en la presente annee: elle ira tousiours l'augmentant & le fera d'autant plus volontiers qu'elle cognoistra que vous vous en

repdrez dignes par vos bōs deportemens, tant enuers la Couronne, qu'enuers vostre patrie meſme, vous la trouuerez tousiours en tout avec ce meſme ſoin & deſir: car pour l'introduction du ſel de France en vos Cantons, elle n'a autre deſſein que de vous en faire receuoir de l'aduantage & commodité, l'vſage dudit ſel eſtant beaucoup plus ſain & à meilleur marché que celuy que vous pouuez tirer d'ailleurs, ainſi que Meſſieurs du Pais de Valais & Comté de Neuf-Chaſtel, l'ont eſprouvé par l'eſpace de 20. ans, & la difference qu'il y a de l'un à l'autre: ſa Maieſté m'a donc commandé de vous en faire les offres, ainſi que generalemēt de tous les viures & denrees qui abondent en ſes Eſtats, dont vous pouuez auoir beſoin, eſtāt tres-aieſe & content que vous ſes bons amys, aliez & confederez ayez commerce & communication avec ſes ſubiects, ne pouuans contracter que de bonnes mœurs & vous fortifier les vns les autres en bonne deuotion vers ſa Couronne: Mais comme ſa Maieſté par tant de preuues & fauorables demonſtrations donne manifeſtement à cognoiſtre, combien à l'exēple de ſes predeceſſeurs, elle deſire cultiuer & entretenir voſtre alliance & confederation, auſſi entēd elle que d'autre part vous y apportiez & contribuez ce que vous deuez, qu'il ne ſoit rien changé ny innoué aux anciens traictez que vous auez avec ſa Couronne, & que ſous quelque couleur & pretexte que ce ſoit, rien n'y ſoit alteré, meſme que ſi aucunes entrepriſes ſe faiſoient au preiudice, que vous les euitiez & repariez en mettant toutes les choſes au premier Eſtat. C'eſt auſſi ce que ſa Maieſté attend & ſe promet tant de la prudence & ſageſſe de vos Conſeils, que quand vous conſidererez que voſtre alliance a eſté faiſte avec la France, vous auez eſté cōtinuellement recherchez, & voſtre amitiē reſpectee d'aucūns vos voiſins, qui auparauant entreprenoient plus à découuert & hardiment qu'ils n'oſent auioird'huy faire avec leur fineſſe & artifice contre voſtre liberté. le ſerois trop lōg à exaggerer les fruits & auantages ſignalez que vous auez receus depuis que voſtre alliance a eſté contractee, cōme auſſi de quelle ſincerité & franchise elle a eſté obſeruee, tant de ſa Maieſté que de ſes Predeceſſeurs, laquelle deſirant plus que iamais la faire valoir pour l'affermiſſement de voſtre Republique dont elle a tousiours pourchaſſé l'vnion, comme la plus ſolide voye & fondement de voſtre liberté, auſſi ne ſe peut-elle laſſer de la vous conſeiller. Ne defaillez donc point d'amour & de pieté enuers voſtre patrie, faites ceſſer toutes ſortes de ſouppçōs & mauuaises intelligences, qui pourroient eſtre parmy vous, renforcez les liens d'amitiē & confederation avec ſa Maieſté, & par l'exemple des maux de vos voiſins, empeſchez ceux qui pourroient tomber ſur vous, & vniffans toutes vos volontez à ſuiure les ſages & fidelles conſeils qui vous ſont donnez, iouyſſez non ſeulement du repos & fidelité que le Roy mon Maieſtre, vous ſouhaite, mais ioignez vous auſſi avec luy pour le faire reuiure & remettre parmy vos communs amis aliez & confederez Meſſieurs les Grifons, ainſi qu'ils auoient accouſtumé de la poſſeder, lors que la ſeule alliance de France y a ſtoiy.

Il reſte, *Magnifiques Seigneurs*, à vous dire de ma part que receuant tousiours tres-grand honneur que le Roy ſe daigne ſeruir de moy & m'employer en ſes affaires, ie tiens à bonheur & contentement particulier que mon enuoy & legation ont eſté vers voſtre Republique pour l'eſtime & adminiſtration de laquelle i'ay tousiours fait grand eſtat de vos actions genereuſes & des vertus heroïques de voſtre nation: vous le cognoiſtrez encore plus clairement par les offres de mon ſeruiſſe, dans les occasions qui ſe pourroient offrir, tant pour le general que pour le particulier, & de quel zele & candeur i'accompliray tousiours les ordonnāces de ſa Maieſté, me promettant que vous y ſçaurez correſpondre, par toutes vos actions & reſolutions que prēdrez ſur les propositions de ſa Maieſté avec autant d'affection & de ſincerité que vous & vos Predeceſſeurs, en auez eſté tousiours doüez & accompagnez.

Telle fut la harangue que fit Monsieur le Marquis de Cœuvres Ambaſſadeur extraordinaire du Roy en Suiſſe, en leur aſſemblee generale tenuē à Baden. Par apres ledit Sieur ayāt receu quelques gens de guerre de Monsieur le Conneſtable, & eſtant aſſiſté du ſieur Baron de Vaubecour avec quelques Enſeignes de ſon Regiment, & quelques Cornettes & autres ſecours de la part des Suiſſes, il ſurprit vn paſſage important nommé Suich, pour empeſcher l'entree à la Valtoline à l'Archiduc Leopold, paſſage qu'il a fortifié de canons, munitions & bon nombre de gens de guerre: Par apres accompagné & aſſiſté de quelques troupes de Grifons, ils ſont entrez dans Coire, que les ennemis tenoient, & en ont chaſſé l'Eueſque, homme ſeditieux, & les Partifans d'Eſpagne, en eſperance de paſſer outre avec de plus grandes forces.

Jalouſie d'Eſpagne ſur la France pour l'alliance des Suiſſes, extrait de l'Hiftoire de la Paix, de Pierre Matthieu Hiſtoriographe.

IL y a long temps que le Roy d'Eſpagne a faiſt cognoiſtre ſa jalouſie pour l'alliance generale de la Couronne de France avec les treize Cantons Suiſſes, ayans dreſſé de longue-

main

main ses intentions pour en auoir la part, nos Roys l'ont tousiours empesché, & iamaïs n'y a peu mettre le pied comme Roy d'Espagne, bien qu'il y ait alliance pour le Domaine de la maison d'Autriche.

Aussi quand sous le regne du Roy Charles neuuiesme le Roy d'Espagne demanda d'estre receu en ladite alliance des Suysses, Monsieur de Bellicure Ambassadeur de France, voyant que les Suysses Catholiques estoient quasi persuadez de preferer les nouvelles amitez aux anciennes, leur representant les grands secours qu'ils auoient receus de la Couronne de France, pour l'affermissement de leur liberté, & comme au contraire la maison d'Autriche auoit fait tous les efforts pour l'estouffer.

Les Suysses ont fait la guerre contre Leopold Archiduc d'Autriche, tué à la bataille de Morpach, & contre Albert & Maximilian Empereur, ils eurent contre ce dernier huit rencontres en huit batailles en huit diuers lieux.

Qu'ils deuoient prendre garde à ne se fier à l'alliance d'une maison offensée, en laquelle saignoit encore la playe de la mort de trois Princes defaits par leurs armes.

Qu'il n'ignoroit point que le Roy d'Espagne, comme descendu de la maison d'Autriche n'eust des desseins hereditaires sur eux pour raison dequoy la grandeur & prosperité de ses affaires leur deuoit estre suspecte.

Ces remonstrances porterent si vluement en leur persuasion que tous les Ambassadeurs d'Espagne s'en retournerent, comme ils estoient venus.

Mais depuis les guerres ciuiles, le Roy se veid chargé de tant d'affaires au dedans du Royaume, qu'il ne luy fut possible de penser au dehors: Ce fut vne belle occasion au Roy d'Espagne de faire ses affaires parmi les Suysses, & de gagner le ieu, puis que personne ne iouoit contre luy, & comme les amitez mercenaires s'éuanoüissent quand l'argent manque, les eueus de France ne paroissans plus en Suisse, l'Espagnol fit semer tant de ducats par les petits cantons qu'ils estoufferent toutes les premieres semences des fleurs de Lys, de sorte que l'on vid en France Suisses contre Suisses, les vns rendans deuoir au Roy, comme ses aliez, les autres armez contre son service comme stipendiez par le Roy d'Espagne.

Quand ils virent qu'ils n'estoient payez de leurs pensions, que leurs Capitaines & Colonels ne retiroient rien de ce qui leur estoit deu, les cinq petits cantons s'attacherent plus estroittement avec le Roy d'Espagne, & le Colonel Phister, qui auoit vne grande croyance parmy eux, leur apprit à ne ietter les yeux que sur le Soleil qui se leuoit aux Indes, leur fit oublier leurs vieux amys! les Cantons plus puissans demeurèrent tousiours ferme en l'amitié du Roy.

La prudence de feu Monsieur Bruslard, du depuis Chancelier de France, se monstra en ceste mauuaise saison: car il entretint le service du Roy, cõtre toute esperance au plus fort des troubles, & lors que le Roy n'auoit pour sceptre que sa lance, pour son Louure qu'une tente, pour tout credit l'esperance, & le droit legitime de la Royauté. Il se peut dire qu'il a fait vn grand service à la France en ceste charge, & les plus sages se sont estonnez comme il sceu maintenir les affections de ces Peuples, lors qu'elles n'estoient soustenuës que des paroles de sa prudence, & comme il a peu faire durer si long temps l'esperance parmy le commun desespoir des affaires de France.

Le Roy auoit fait ce qu'il auoit peu pour leur donner de l'argent, la Cour de Parlement auoit verifié quelques Edicts dont la Finance estoit destinte pour les contenter, comme celui de la Reünion des Greffes à son Domaine, celui de la marque des cuirs & de la maistrise des mestiers.

Cependant que les Capitaines & Colonels trauiilloient à l'exetution, l'Ambassadeur entretenoit les autres de belles paroles, & en de grandes esperances. Il leur cõmuniqua les conseils du Roy pour l'establissement de ses affaires, & le payement de ce qui leur estoit deub. Le Roy neantmoins leur enuoya argent en Suisse le 19. Iuin, sous l'escorte du Gouverneur Lyon: mais comme il n'y en auoit pas tant comme ils en attendoient, & que la plus grande partie estoit destournée pour ceux qui auoient seruy aux dernieres occasions, cela ne fit qu'accroistre les mecontentemens & crieries des autres, de telle façon que sur le cõmencement de l'annee 1598. Morfontaine Ambassadeur du Roy, quitta sa charge pour venir en France. Ceux qui pensoient faire profit de ceste retraite, firent courir le bruit qu'elle auoit esté contrainte & forcee: mais c'estoit luy mesme qui s'y estoit disposé, pour le iugement qu'il faisoit que c'estoit le bien des affaires du Roy, s'estant offert de faire ce voyage & se charger de leurs demandes pour diuertir vne grande Ambassade qu'ils luy vouloient enuoyer, de laquelle on n'eust pas eu si bonne raison, que sur les lieux, aussi les Suisses ne tarderent guiere à demander son retour, apres lequel il mourut & fut enterré à Soleurre en vne belle & riche sepulture.



DISCOVRS
DE L'ESTAT DV DVC DE
LORRAINE.
SOMMAIRE.

1. **L**ORRAINE, iadis nommée *Austrasie*; Origine du mot *LORRAINE*, ses limites & les principales rivières qui arrousent ce pays.
2. Villes principales de la Lorraine & particulièrement de la ville Capitale de *Nancy*, séjour ordinaire du Prince.
3. De ses Comtez & Seigneuries.
4. Fertilité & abondance de ses vins, bains, salines, divers métaux, pierres d'*azur*, poissons & carpes de trois pieds de long, *Cassidoines* d'admirable grandeur, miroirs & ouvrages de verre.
5. Naturel & humeur des Lorrains, tenants du *François* & de l'*Allemand*.
6. Richesses des Habitans consistans au trafic des pierres d'*azur*, des perles, des miroirs & verres des *Cassidoines*, des toiles, des mines d'*argent* & de salines.
7. Revenu du Duc de Lorraine, en quoy consiste & à combien se monte tous les ans.
8. Forteresses de Lorraine, ses voisins & allies.
9. Dénombrement & Catalogue des Ducs qui ont commandé en Lorraine.
10. Principale origine de la Maison de *Guise*.
11. Des Princes & Princesses de la Maison de *Guise*.
12. Des Princes & Princesses de la Maison de *Mayenne*.
13. Des Princes & Princesses de la Maison d'*Aumale*.
14. Des Princes & Princesses de la Maison d'*Elbeuf*.
15. Des Princes & Princesses de la Maison de *Mercur*.

1.



LOYS le Debonnaire eut quatre fils, qui ayans meü la guerre contre leur pere, partagerent entr'eux toutes ses principautez, tellement que *Lothaire* son fils aîné eut pour sa part l'Empire, l'Italie, la Gaule Narbonnoise, & tous les pays qui furent apres compris sous le seul nom de Lorraine, *Loys* l'Allemagne, *Charles* la France depuis la Meuse iusques à la Mer Oceane: & *Pepin* l'Aquitaine. *Lothaire* eut outre *Loys* qui succeda en l'Empire, vn autre *Lothaire*, qui demeura Roy de Lorraine. Et ce pays que les Allemans nommerent *Lota-ryck*, ou *Lot-reyck* ou *Lothary regnum*, en Latin, fut transformé en ce mot de *Lotharingia*, par corruption du mot, & ceux du pays le nommerent Lorraine: pour le faire plus court, ont tient que les bornes de la Lorraine estoient autrefois plus grandes, & qu'elle fut nommée *Austrasie*, diuisée en haute & basse, & contenuë entre les rivières du *Rhein*, de l'*Escaud* & de la *Meuse*, & par ce moyen la basse a diuers noms auourd'huy, & subiecte à beaucoup de Princes, & la haute retient le nom de Lorraine.

Elle a maintenant pour ses limites du costé du Levant l'*Alsace*, & ce qui se nomme d'un nom particulier *Vvestrasie*, du Midy la *Bourgongne*, du Couchant la *Champagne*, & du costé du Nort la forest d'*Ardenne*, & rencontre aussi tost apres ceux de *Luxembourg*, de *Treues*, & des pays voisins, qui ont esté iadis des parties de Lorraine. Ce pays est arrosé des rivières de *Meuse*, *Moselle*, *Sare*, *Voloy*, *Mortane*, *Meurte*, *Selle*, *Hide*, & quelques autres. La *Moselle* & la *Sare* y coulent pour la plus grande partie, les autres l'arrousent toutes entières

tieres sans s'aller desgorger dehors. La Moselle prend sa source en la Montagne de Vogese, allez pres de la source de la Saone vn peu au dessus du bourg qu'on nomme Bussan, & ayant patte par les villes de l'Eltraye, Remiremont, Espinal, Charmes & Bion; s'en va droit à Toul, puis à Fruard, & par le pays de Mellin & de Treues se va rendre dans le Rhin à Confluence. Lucius Verus fit dessein du temps de l'Empereur Neron, de joindre la Moselle, & la Saone par le moyen d'un canal, afin que les armées vinssent d'Italie par mer, puis estans portees par le Rhone & par la Saone, s'allaient rendre par ce canal dans la Moselle, puis dans le Rhin, & de-là dans la mer Oceane: & les difficultez des chemins estans ostez, on peut aisément voyager du Ponent au Nort, ainsi que dit Corneille Tacite. La Meurte ayant receu beaucoup de riuieres, s'approche peu à peu de la Moselle en lieu plain parmy des prairies, & luy fait compagnie par vn assez long espace, n'y ayant que bien peu de terre entre les deux canaux, iusques à ce qu'aupres de Conde, qui est à main droite, elle se mesle avec la Moselle, qui reçoit aussi la riuere de Selle pres de Mets.

La ville capitale de Lorraine c'est Nancy, demeure presque ordinaire des Ducs. Elle n'est pas grande, mais elle est en vne assiette agreable, & commode, & le Palais des Ducs est assez beau. On y void l'Eglise de saint George, où est le tombeau de Charles le Hardy Duc de Bourgongne tué par les Suisses, & Lorrains, en vne bataille l'an mil quatre cens septante sept. Il y a dans la mesme Eglise de S. Georges quelques tombeaux des Ducs de Lorraine sans inscription. Il y en a de mesme en quelques autres Eglises: car ils n'ont point de lieu particulierement destiné pour cet effect.

La meilleure partie des derniers Ducs est à S. François, qui est de l'autre costé du Palais, on y peut voir le superbe tombeau de René, qui vainquit Charles Duc de Bourgongne: & c'est là mesme que sont enterrez le Duc Antoine, & son fils François, & Claude de Valois femme de Charles, & fille de Henry II. La Meurte passe du long des murailles de Nancy, pres duquel on void le lieu où mourut le dernier Duc de Bourgongne, pres d'un ruisseau lequel il vouloit passer. Pour tesmoignage de cecy il y a vne Croix de pierre avec vne inscription en François sur vne lame d'airain. Vn peu au dessus, au lieu où l'on dit que la bataille fut donnée, il y a vne Chappelle qu'on nomme des Bourguignons, avec le cimetiere, & vne table d'airain où il y a des vers François pour memoire de ceste bataille.

Après Nancy on met le lieu de saint Nicolas, qui s'est peuplé pour la reputation qu'il a d'auoir des reliques de saint Nicolas, & ce lieu est tellement grand auourd'huy, qu'il ne semble pas vn bourg, ains pourroit estre nommé l'une des meilleures villes de Lorraine, s'il estoit clos de murailles, tant les maisons y sont bien basties, & les rues belles, & tant il a de peuples: mais on l'estime principalement à cause de la marchandise, & des artisans; & ouuriers de toutes sortes.

A vne petite lieüe de Nancy on void Fruard, à trois lieües loing Ormes, à vn peu davantage Bayn & Luneuille, à quatre lieües loing le Pont à Mousson, celebre par son Vniuersité & Gerbeuiller, puis Charnies, Chastenoy, Moranges & Vaucouleur, d'où estoit Ieanne la Pucelle, qu'on a nommé d'Orleans, puis Maxan sous Bresse, Dompierre, Deneure, Hudon, Chateau, Ramberuile, Raon, Bellemont, Neuf-Chateau, Mugit, Marchainville, Espinual, Bruyeres, d'Arney, Ormont, Valderfing, Beaurains, & à 13. lieües de Nancy Vaigny, & à 14. l'Eltraye, outre ces villes sont encore en Lorraine les villes de Charme Simie, Chastel sur la Moselle, Clermont en Argonne, Gondrecourt, iamais forteresse, Astenay, Marsac forteresse, Falsbourg Lutsebourg, Blasmont, Fontenay en bauge, Homboneg, saint Anaud & plusieurs autres.

Les Comtez de Lorraine sont Vaudemont qui est à cinq petites lieües de Nancy, Chaligny à demie lieüe de Nancy, Amance à sept lieües loing de Mets vers le midy, qui estoit autrefois la Chancellerie de Lorraine, Richécourt assez pres du lac qu'on nomme la Garder lac, d'où coule vne riuere qui se mesle à la Meurte entre saint Nicolas & la ville de Rosieres, Remiremont à main gauche de la Moselle qui fait là vne Isle, aux parties plus Meridionales de la Lorraine. La Mothe assis sur vne riuere qui se rend aussi tost dans la Moselle.

Les Seigneuries de Lorraine sont Marsal assez pres du lac Lindere, où il y a vne Isle avec la ville Techemful, Remereuille à trois milles loing de Nancy, S. Bellemont, Ramberuile, Hombarq, Mariemont, Sandacour. Au reste il faut mettre avec la Lorraine le Barrois, qui s'estend iusques à Neufchastel. Sa ville principale est Bar le Duc, ainsi nommée pour difference des villes de Bar sur Seine, & Bar sur Aube. Ses autres villes sont la Mothe, Ligny & Arq, & il y en a encores quelques autres, mais elles ne meritent pas qu'on s'y amuse. Enfin ceste Duché en y comprenant le Barrois, à quatre iournees d'estendue depuis Astenay iusques à Darné, & trois depuis Bar le Duc iusques à Biche.

Les droits que les Ducs de Lorraine pretendent auoir au Royaume de Hierusalem.

René Comte de Vaudemont à cause de sa Mere Violète fille de René Duc d'Anjou, obtint le Duché de Lorraine, & fut appelle René II. du nom, & apres que son grand pere ou ayeul fort vieil & chargé d'ans

René premier Duc d'Anjou, Comte de Prouence, Roy titulaire, ou de nom seulement de Naples & Arragon, & de Hierusalem, fut decedé, il se declara son legitime & plus prochain heritier, comme luy appartenant de succeder audit René premier, mais il fut empesché par Charles second du nom d'Anjou, Comte du Maine, fils de Charles frere dudit René premier, & pource que ledit Charles estoit Prince du sang de la maison de France, & qu'Anjou, & Tours estoient appanages de la Couronne de France, à laquelle la femme ne peut succeder par la loy Salique, ayant obtenu le Duché d'Anjou & Touraine apres son oncle René premier, il eust aussi le Comté de Prouence, & s'attribua les tiltres des Royaumes. Ce neantmoins ledit René second, Duc de Lorraine luy fut contredisant tant qu'il luy fut possible, mais il ne peut pas prendre, ny leuer les armes contre luy, & n'ayant ledit Charles second lignee, il auoit adopté Louys XI. Roy de France, lors qu'il estoit Dauphin. René ce neantmoins retint les tiltres des Royaumes de Naples, Sicile, Aragon & Hierusalem, & s'efforça par armes d'acquérir & emporter le Royaume de Naples des heritiers d'Alphonse, & celui d'Arragon des heritiers & successeurs de Jean.

Je laisse à parler de Godefroy de Buillon, & de Baudoin freres, Ducs de Lorraine & Roys de Hierusalem, pource qu'ils n'eurent lignee, de maniere que Baldoin & de Burge eut & obtint ledit Royaume, & Guillaume frere desdits Godefroy & Baldouin eut le Duché de Lorraine, duquel sont sortis René second, & ses successeurs Ducs de Lorraine, & ce René pourtant, ainsi que nous auons dit, les armes de Hierusalem, les laissa à tous ses heritiers & successeurs, comme nous voyons auourd'huy que les portent les Ducs de Lorraine, & les Ducs de Guise, issus de l'estoc des Ducs de Lorraine, s'acconimodant & leurs successeurs aussi, avec les Roys de France, lesquels s'appellent pareillement Roys de Naples, de Hierusalem, & Comtes de Prouence, & desquels ils ont eu le Duché de Bar le Duc, celui de Guise & de Mayenne en recompense de la Prouence, parquoy les Ducs de Lorraine & de Guise, ne portent les armes de Hierusalem autrement que comme pretendans du Royaume de Naples.

QUALITE.

4. **C**ombien que la Lorraine soit iointe & entrelassée à des montagnes & des forests, toutesfois elle n'a besoin des autres prouinces, & porte assez de froment & de vin pour sa prouision. Elle produit diuers animaux. Elle a force estangs qui abondent en poisson, & avec cela des bains à Plombieres, où il se fait des cures, & se guerit des maladies & des blessures les plus admirables qui se puissent dire, où l'on va de toutes parts, qui doiuent estre fort estimez, & des Salins dont le sel est tres excellent. Elle produit diuers metaux, comme de l'argent, du cuiure, du fer, de l'estain, du plomb, & elle ne manque pas mesme de perles qu'on pèche au pied du mont Vogese, autrement le mont des Faucilles. On y trouue aussi des pierres que les habitans nomment d'azur ou d'azul. Il y vient aussi de la matiere dont on fait les miroirs, & les ourages de verre, & telle qu'il ne s'en trouue point de semblable aux autres prouinces de l'Europe. Il y naist aussi des Cassidoines d'admirable grandeur, tellement qu'on en fait des pieces de fort belles coupes. Dauantage il naist en Lorraine de fort bons cheuaux, dont il y en a beaucoup qui valēt les cheuaux Turcs, & ceux du Royaume de Naples. La Moselle porte grande quantite de saumons, de perches, truites, carpes, brochets, d'alauses, & d'autres poissons. Il y a entr'autres choses vn lac qui a quatorze lieues de tour, où l'on trouue des carpes de trois pieds de long, qui sont d'vn goust extremement agreable.

MOEURS.

5. **C**ombien qu'il puisse sembler que i'ay compris les mœurs des Lorrains parmy celles des François, toutesfois il ne sera mal à propos d'en dire icy particulierement quelque chose. Les Lorrains sont meslez en matiere de mœurs, & pour parler plus clairement, tiennent vn peu du François, & vn peu de l'Allemand. Ils ont quelque partie de la courtoisie & ciuilité du François: mais ils n'ont pas son air ny sa gentillesse, & sont vn peu rudes en conuersation, & d'vne certaine façon qui ne seroit pas receuë en la Cour de France, ny mesme parmy

my ce qui est de plus galant aux pays qui sont esloignez de la Cour. Et c'est en cecy qu'ils n'ont peu le garantir entierement de la contagion du voisinage des Allemands, lesquels ils imitent aussi pour la plus grande partie à boire d'autant, & à passer les iournees entieres à boire caroux. Il sort d'assez bons soldats de Lorraine, & i'en ay veu des troupes qui ne faisoient pas mal leur devoir. Le peuple y est assez franc, & n'est si corrompu qu'en beaucoup d'autres Prouinces, & s'il y en a quelqu'un qui veuille faire le fin, ses règles sont recogneuës pour peu subtiles: car les esprits n'y sont pas des plus deliez; combien qu'il s'y trouue quelques habiles gens de mesme qu'aux autres pays que l'on tient encores plus rudes. Les Gentils-hommes y sont bons, francs & veritablement nobles, & quelques uns d'entr'eux viuent presque à l'Alemãde, les autres taschent de former leurs actions à la Françoisë. Sur tout la Cour du Duc de Lorraine s'efforce d'imiter en toute chose celle de France. Aussi y a il, pour ce qu'elle contient, de bien galants hommes; & fort polis, & parmy ce nombre beaucoup de François qui se sont mis à la suite, & ont affectionné le seruice du Duc. Quant à ce Prince, ce seroit superfluité de vouloir dire ses perfectionis, puis que l'on sçait assez les belles qualitez de ceux de la maison de Lorraine; qui naissent tous avec tant de courage, & de gentillesse, qu'ils sont admirez de ceux qui les voyent, & n'estonnent moins ceux qui ne les voyent pas par la reputation qu'ils ont acquise, & qu'ils conseruent entiere par leurs actions, où la courtoisie & la generosité paroissent ordinairement avec tant d'esclat, que celui qui ne les estime, & ne les louë, est plein d'enuie ou de haine, ou manque de paroles pour les exprimer, ou d'esprit pour les recognoistre.

RICHESES.

Les Habitans font aujourd'huy vn grand profit des pierres d'azur qui se trouuent en Lorraine, & des perles que l'on peïsche aussi au pied du Mont Voële. Et ils ne tirent aussi peu d'argent de la matiere qu'ils ont pour les miroirs & les verres, de mesme que de leurs Cassidoines, qui sont belles au possible, & propres à faire de beaux vases. Les cheuaux de Lorraine portent pareillement vn grand profit à leurs maistres, qui en vendent en assez grand nombre. Les Lorrains font aussi beaucoup d'argent de leurs toiles, & de leurs ouurages qu'ils portent vendre par toute la France, par l'Allemagne, & ailleurs. Et les mines d'argent rendent aussi cette prouince assez riche.

Le Duc de Lorraine tire de son pays douze cens mille escus, voire dauantage, & entre autre reuenu il y a des salins qui luy produisent vn grand & certain reuenu, & se fait le sel par vn admirable artifice lequel se distribue tant en ladite Prouince qu'ez autres pays circonuoiains, & s'il faisoit des impositions & daces comme les Princes d'Italie, il tripleroit son reuenu à raison de la fertilité du pays & de la grande quantité de peuple qui y habite, & le reste de son reuenu vient de bois, grains, prairies, mines d'argent, & choses semblables. Le peuple n'y est nullement foulé de tailles: à raison dequoy il vit en repos, & deuient de iour en iour plus riche.

FORCES.

La principale forteresse de Lorraine, c'est la ville de Nancy, qu'on commença d'agrandir & fortifier à la Royalle l'an mil cinq cens octante sept, pource que le Duc craignoit que les Allemands, qui passerent alors en France avec vne grosse armee qui sembloit deuoir faire tout trembler, ne luy ruinaissent son pays & sa ville, ceignit les faux-bourgs de murailles, augmenta le tour de la ville de Nancy, & la mit en estat de deffence avec vne telle propretude, qu'il pensa qu'elle suffiroit pour euitier vn si grand orage, & pour fuir d'estre à la discretion de ceste nation qui pensoit lors que tout luy estoit de bonne guerre. Le Duc y a fait travailler depuis à bon escient, tellement que c'est vne place des meilleures de la Chrestienté bien fortifiée à la moderne. Il y a dans Nancy vn Arsenal aussi plein d'armes & de munitions, qu'aucun qui se trouue presque en Europe. Bar-le-Duc a vn bon chasteau, qui est entre la haute & basse ville. La Motte dont cy dessus est fait mention pour son assiette & fortification est imprenable, comme aussi le Chasteau de Iamais sur la frontiere de Luxembourg, Astenay, Clermont, sont aussi tres-fortes places. Il y a quelques autres places assez considerables sur la frontiere; mais qui sont petites. Ce Prince se peut sur tout asseurer de ses gens, qui luy sont extremement affectionnez, & ne manquent nullement de courage, de sorte que s'il estoit besoin de mesler les mains, son pays estant peuplé comme il est, &ourny de bons hommes, sans doute il donneroit de la peine à celui qui le viendrait attaquer: mais il est hors de crainte de ce costé là, veu qu'il est en fort bonne intelligence avec les Princes Allemands, tant ses voisins, qu'autres, comme aussi les Majestez tres Chrestiennes & Catholiques, desquelles il a l'honneur d'estre si proche parent qu'il n'en doit esperer que toute assistance & faueur.

DES DVCS DE LORRAINE.

9. **L**A Lorraine a eu autrefois des Roys qui commandoient à vne estenduë de pays beaucoup plus grande, que n'est celle qu'on void sous la puissance du Duc qui est à present. Quant à la succession de ses Ducs, elle a esté fort souvent interrompue. Le premier qui fut ordonné Duc, se nomma Charles, & le second fut Othon, du temps duquel la Lorraine fut separée de l'Alsace, & l'Alsace erigee en l'Angras. Cét Othon mourut environ l'an 1020. Il eut pour successeur,
- Godefroy son fils, qui mourut l'an 1070. Cestuy - cy eut pour successeur Godefroy le Bossu, qui fut tué l'an 1076.
- Lors l'Empereur Henry IV. bailla ceste Duché à son fils Conrard, mais elle fut depuis rendue à la maison de Godefroy, c'est à sçavoir son nepveu de par sa sœur, qui fut Godetroy de Buillon Roy de Jerusalem.
- Baudouin son frere succeda au Royaume, & en la Duché, & apres luy le troisieme frere nommé Eustache. Toutesfois quelques - vns disent qu'apres Baudouin Henry de Limpurg occupa par force la Duché, & fut le septiesme Duc l'an 1106.
- Après cela l'Empereur Henry V. bailla ceste Duché à Guillaume Comte de Louvain, qui eut pour successeurs,
- Theodoric son fils.
- Thibaut fils de Theodoric, auquel succeda
- Frideric, sous qui le pays de Brabant fut separé de la Lorraine.
- Après Frideric vn certain Mathieu fut Duc, qui laissa apres luy son fils nommé Simon, & vn autre fils nommé Frideric, qui mourut l'an de grace 1239. Cettuy - cy eut pour successeur
- Matthieu son fils, puis
- Frideric fils de Mathieu, & apres Frideric
- Thibaut son fils, qui mourut l'an 1311.
- Frideric fils de Thibaut.
- Raoul fils de Frideric, qui mourut l'an 1346.
- Iean fils de Raoul, qui espousa Sofie fille d'Ebernard Comte de Vvitemberg, & mourut l'an 1382. & fut enterré à Nancy, & laissa pour son successeur
- Charles son fils, qui n'eut qu'une fille mariee à René Roy de Sicile, fils de Louys Duc d'Anjou. Cettuy - cy fut Duc de Lorraine par le moyen de sa femme: il laissa vn fils nommé Iean, & vne fille nommée Yoland, qui fut femme de Frideric de Vaudemont.
- Iean succeda à René son pere, & laissa apres luy
- Nicolas son fils qui demeura sans hoirs l'an 1464.
- Alors la Lorraine parvint entre les mains de Frideric fils d'Antoine Comte de Vaudemont, à cause de sa femme Yoland fille de René Roy de Sicile. Cestuy - cy remit la Duché en la puissance de ceux de la maison de Buillon, & c'est de luy que sont venus tous ceux qu'on nomme aujourdhuy de la maison de Lorraine, dont ie m'essayeray de représenter icy la Genealogie.
- René Duc de Lorraine, & Comte de Vaudemont, qui ayant esté chassé de son estat par Charles Duc de Bourgogne, le recouura avec l'ayde des Suisses faisant mourir son ennemy en vne bataille qui se donna près de Nancy. Cestuy - cy ayant repudié sa premiere femme fille du Comte de Tancarville, qui estoit sterile, espousa Philippe fille d'Adolfe d'Egmond, Duc de Gueldres, Iuliers & Comte de Zutphen & de Catherine de Bourbon fille de Charles Duc de Bourbon & d'Agnes de Bourgogne, elle espousa René Duc de Lorraine, fils de Fery Comte de Vaudemont & d'Yoland d'Aueru fille de René d'Anjou Roy de Sicile & Comte de Prouence.
- De ce mariage nasquit Anthoine de Lorraine, il eust vn fils appelé François Duc de Calabre, Lorraine, Bar, & Gueldre, mourut l'an 1546. ayant espousé Chrestienne de Danemarch.
- Charles Duc de Calabre, Lorraine, &c. qui espousa Claude de Valois, fille de Henry II. Roy de France, dont il eut
- Henry Duc de Calabre, Lorraine, &c. & Charles Cardinal de Lorraine Euesque de Mets, apres leur mort.
- Charles Comte de Vaudemont a espousé la fille d'Henry deffunct Duc de Lorraine, & luy succede aujourdhuy en ses Estats.

Principale Origine de la Maison de Guise.

Claude de Lorraine Duc de Guise & d'Aumale, le plus renommé Prince de son temps au fait de la guerre, espousa Anthoinette de Bourbon, fille de François Duc de Vendôme & de Madame Marie de Luxembourg: De ce mariage naquirent onze enfans, sept fils & quatre filles, sçavoir

1. François de Lorraine, appelé d'Aumale puis Duc d'Elbeuf.
2. Charles, Cardinal de Lorraine, Archevesque de Rheims.
3. Claude de Lorraine Duc d'Aumale.
4. Louys de Lorraine Cardinal de Guise Evêque d'Alby.
5. Philippes de Lorraine, decedé en bas aage.
6. François de Lorraine Grand Prieur de France.
7. René de Lorraine, Marquis d'Elbeuf.

Marie de Lorraine, mariée premierement à Louys d'Orleans, Duc de Longueville: puis à Philippe de Croy Duc d'Archev.

Renee de Lorraine, Abbessé de Saint Pierre de Rheims.

Anthoinette de Lorraine, Abbessé de Four-Monstier.

Louyse de Lorraine seconde fille de Claude Duc de Guise & d'Anthoinette de Bourbon, eut pour premier mary René de Nassau & Chalon, Prince d'Orange, duquel elle n'eust enfans, & pour second Philippe de Crouy, Duc d'Archev, qui en eut Charles de Crouy, Marquis d'Haures, Pere d'Alexandre de Croy, Duc de Croy, marié à la fille aisnée du Marquis d'Urfé, il fut dernièrement assassiné en sa maison au mois de Novembre 1614. à Bruxelles au grand regret de la Flandre.

De François de Lorraine aisné de Claude Duc de Guise sont issus Henry de Lorraine Duc de Guise, Charles de Lorraine Duc de Mayenne, & Claude de Lorraine Duc d'Aumale, & autres René de Lorraine, Marquis d'Elbeuf.

Princes & Princesses de la Maison de Guise.

François de Lorraine Duc de Guise, qui fut tué à Orleans par Poltrot l'an 1563. s'appel-
loit Prince de Joinville, Marquis de Mayenne, Pair & grand Maître de France, Es-
pousa Anne d'Est, fille d'Hercules d'Est, second du nom, Duc de Ferrare & de Renee de
France, fille puisnée du Roy Louys XII. de laquelle il a eu plusieurs enfans, trois fils & vne
fille sçavoir,

Catherine de Lorraine seconde femme de Monseigneur Louys de Bourbon, Duc de Montpensier, morte sans enfans.

Henry de Lorraine, Duc de Guise & de Cheureuse Pair & Grand Maître de France, Gouverneur & Lieutenant pour le Roy, ez Comtez de Champagne & de Brie, qui a espousé Catherine de Cleves, Comtesse d'Eu, seconde fille de François de Cleves, Duc de Nevers & de Madame Marguerite de Bourbon, de laquelle il a eu plusieurs enfans, entr'autres 4. fils & quatre filles sçavoir,

Charles de Lorraine Duc de Guise, de Joyeuse, Prince de Joinville, Pair de France, Gouverneur & Lieutenant General pour le Roy en Prouence, & Admiral des mers du levant: qui a espousé Henriette Catherine de Joyeuse, fille unique de Henry Duc de Joyeuse Comte de Bouchage & de Catherine de la Vallée & veufue de Henry de Bourbon, Duc de Montpensier, de laquelle il a eu plusieurs enfans, sçavoir,

François de Lorraine, Prince de Joinville.

Deux Gemeaux decedez en bas aage.

Henry de Lorraine Abbé de S. Denys en France & de Fescamp.

Charles, Louys de Lorraine & de Joyeuse.

N. de Lorraine Chevalier de saint Jean de Hierusalem.

N. de Lorraine & deux filles. Le 2. fils de Henry de Lorraine & de Catherine de Cleves Comtesse d'Eu, est Claude de Lorraine, Duc de Cheureuse, Grand Chambellan de France, Gouverneur Lieutenant pour le Roy au pays d'Auvergne, il a espousé Ayme de Rohan fille d'Hercule de Rohan Duc de Montbazou Grand veneur de France, de laquelle il a vne fille.

Le 3. fils fut Louys de Lorraine, Cardinal de Guise, Archevesque de Rheims, Duc & Pair de France, Abbé de Clugny & de S. Denys en France, est mort l'an 1621. pendant le siege de S. Jean d'Angely.

Et le 4. François Paris de Lorraine Chevalier de l'ordre de S. Jean de Hierusalem, Lieutenant General pour le Roy en Prouence, il mourut à Baux en Prouence d'un esclat de canon le premier juin 1614.

Louyse de Lorraine seconde femme de Monseigneur François de Bourbon Prince de Conty, d'eux n'est sortie qu'une fille, nommée Marie, morte en bas aage.

Catherine de Lorraine est decedee sans avoir esté mariée.

Marie de Lorraine Abbessé de saint Pierre de Rheims.

Ieanne de Lorraine Abbessé de Joüarre & Prieure de Prouille.

Princes & Princesses de la Maison de Mayenne.

12. **C**harles de Lorraine, second fils de François de Lorraine, Duc de Guise & d'Anno d'Est de Ferrare, a esté Marquis, puis Duc de Mayenne, Pair & Grand Chambelan: il eut de Henriette de Sauoye sa femme, fille d'Honoré de Sauoye, Marquis de Villars, Admiral de France deux fils & deux filles, sçavoir,

Henry de Lorraine, Duc de Mayenne & d'Aiguillon, Pair & grand Chambelan de France, Gouverneur & Lieutenant General pour le Roy en l'Isle de France, puis en Guienne: il espousa Henriette de Gonsague fille puisnée de Louys de Gonsagues Duc de Nevers & d'Henriette de Cleues, laquelle deceda en couche d'un fils qui mourut incontinent apres. Ce genereux Prince, apres avoir demeuré plusieurs années veuf, pendant lesquelles il a fait paroistre son courage, & s'est fait renommer pour sa bonté & magnanimité, iusques à tant qu'il fust malheureusement tué deuant Montauban au mois de Septembre 1621.

Charles Emmanuel de Lorraine Comte de Sommerive, mort en Italie, sans avoir esté marié.

Catherine de Lorraine, fille aisnée de Charles de Lorraine, Duc de Mayenne, espousa Charles de Gonsagues, Duc de Nivernois & de Rethelois, Prince de Mantoue, Pair de France, Gouverneur & Lieutenant General pour le Roy ez Prouinces de Champagne & de Brie, qui en a eu six enfans, trois fils & trois filles, sçavoir,

François de Gonsagues Duc de Rethel, ieune Prince decédé au mois de Septēbre 1622.

Charles de Gonsagues de Cleues, Prince de Porcian, & maintenant Duc de Rethel apres le deceds de son aisné.

Ferdinand de Gonsagues, & de Cleues & Duc de Mayenne.

N. de Gonsagues de Cleues.

N. de Gonsagues de Cleues.

N. de Gonsagues de Cleues.

Rene de Lorraine, fille puisnée de Charles de Lorraine Duc de Mayenne, femme du Comte de sainte Floure Mario, fils aisné du Duc de Sforce en Italie, duquel elle a eu un fils.

Princes & Princesses de la Maison d'Aumale.

13. **C**laude de Lorraine troisieme fils du Duc de Guise & d'Anthoinette de Bourbon, a esté Duc d'Aumale, Pair de France Gouverneur pour le Roy au Duché de Bourgogne, fut tué deuant la Rochelle, l'an 1573. & a eu de son Espouse, Louyse de Brezé, fille de Louys de Brezé, grand Seneschal de Normandie, Seigneur d'Anet, & de Diane de Poitiers, Duchesse de Valentinois, fille de Iean de Poitiers, Seigneur de S. Vallier, trois fils & trois filles, sçavoir,

Charles de Lorraine, Duc d'Aumale Pair de France, lequel a eu deux fils & deux filles de Marie de Lorraine, sa cousine, fille de René Marquis d'Elbeuf.

Charles de Lorraine, mort ieune.

Henry de Lorraine aussi.

Marguerite de Lorraine, laquelle n'a esté mariée.

Anne de Lorraine femme de Henry de Sauoye, Duc de Nemours, de Chartres & de Geneuois, duquel elle a eu deux fils, sçavoir,

François Paule de Sauoye, Prince des Geneuois.

N. de Sauoye, Duc d'Aumale.

Henry de Lorraine second fils de Claude de Lorraine Duc d'Aumale, & de Louyse de Brezé a esté Comte de S. Vallier, est mort ieune.

Claude de Lorraine, Chevalier de l'Ordre de S. Iean de Hierusalē, a esté le 3. fils de Claude de Lorraine Duc d'Aumale, & fut tué dans S. Denys, y estant entré, par le sieur de Vic qui en estoit Gouverneur.

Ieanne de Lorraine, ou selon les autres, Catherine a esté la troisieme femme de Nicolas de Lorraine Comte de Vaudemont, duquel elle a eu

Henry de Lorraine, Comte de Chaligny, & Eriē de Lorraine, Euesque de Verdun.

L'aisné

L'ainé a eu de sa femme Claude Mouy des fils & filles, entr'autres, qu'on ne peut assez louer quoy que vians.

Charles de Lorraine Euesque de Verdun apres Eric de Lorraine son oncle, lequel a quitté cét euesché, pour se rendre de la compagnie des Iesuites à Rome.

Henry de Lorraine, Comte de Chaligny, & Marquis de Mouy.

François de Lorraine Euesque de Verdun apres son frere Charles.

Diane de Lorraine seconde fille de Claude de Lorraine Duc d'Aumale a esté la premiere femme de François Duc de Luxembourg & de Pinay, Pair de France duquel elle a eu,

Henry Duc de Luxembourg & de Pinay, Prince de Tingry, lequel a eu de Magdelaine de Montmorency, fille de Guillaume de Montmorency, Seigneur de Thoré & d'Anne de Lalain, deux filles, l'une mariee au sieur de Brantes, l'autre au ieune Duc de Vantadour,

Marie de Lorraine, Abbessé de Chelles, Louyse de Lorraine, Abbessé de nostre Dame de Soissons.

Princes & Princesses de la Maison d'Elbeuf.

René de Lorraine, Marquis d'Elbeuf, septiesme fils de Claude de Lorraine, Duc de Guise, & d'Anthoinette de Bourbon, espousa Louyse de Rieux, fille de Claude, Seigneur de Rieux, & de Madame Susanne de Bourbon de la maison de Montpensier, d'où sont issus vn fils & vne fille, sçauoir,

Marie de Lorraine, femme de Charles de Lorraine Duc d'Aumale son voisin.

Charles de Lorraine Duc d'Elbeuf, Pair de France, a eu pour femme Madame Marguerite Chabot, troisieme fille de Leonor Chabot, Comte de Charny, grand Escuyer de France, duquel mariage sont sortis deux fils & trois filles, sçauoir, Charles de Lorraine, Duc & Pair de France, Comte de Harcourt, qui a espousé Catherine Henriette legitime de France, de laquelle il a eu deux fils & vne fille sçauoir,

N. de Lorraine, Comte de Harcour.

N. de Lorraine, Comte de l'Islebonne.

N. de Lorraine.

Henry de Lorraine, fils puîné de Charles premier du nom Duc d'Elbeuf, Comte de Brionne, appelé Comte de Harcour.

Claude Leonor de Lorraine, femme de Louys Gouffier Duc de Rouennois & Marquis de Boissy, dont elle a eu plusieurs enfans, desquels l'ainé porte la qualité de Marquis de Boissy. Henriette & François de Lorraine, Religieuse.

Marie de Lorraine fille aînée de Claude Duc de Guise & Anthoinette de Bourbon, a esté mariee deux fois, en premieres nopces avec Louys d'Orleans, premier du nom Duc de Longueuille, duquel elle eut deux enfans, François d'Orleans, 3. du nom Duc de Longueuille, lequel mourut le 12. iour de Septembre 1551. âgé seulement de huit ans, estant sous la tutelle de son ayeul maternel Claude Duc de Guise.

Louys d'Orleans né le 4. iour d'Aoust 1537. deux mois apres la mort de son pere deceda ieune. Marie de Lorraine espousa en 1. nopces le Duc de Longueuille, puis en 2. nopces Jacques Sieur du nom, Roy d'Ecosse, & eut de cét Prince deux fils qui moururent & vne fille nommée Marie Stuart Royné d'Ecosse, laquelle espousa en premieres nopces François 2. Roy de France fils de François premier, duquel elle n'eust enfans, & en secondes nopces espousa Henry fils du Comte de Lenox, duquel elle eust vn seul fils sçauoir,

Jacques Roy de la grande Bretagne & d'Irlande Pere de Henry Prince de Galles decedé l'an 1612.

De Charles Duc d'Yorc, aujourdhuy Prince de Galles, fiancé à Madame Marie de France sœur du Roy Louys XIII. & du depuis mariee audit Prince.

Elizabeth mariee à Federic V. Comte Palatin du Rhin duquel elle a eu plusieurs enfans.

De Marguerite Stuart née l'an 1598.

Princes & Princesses de la Maison de Mercœur.

Nicolas de Lorraine Duc de Mercœur en Auvergne & Comte de Vaudemort, fut secôd 15. fils d'Anthoine Duc de Lorraine & de Bar, a esté mariee trois fois.

En premieres nopces à Marguerite d'Egmond & en eut Henry, Catherine & Marie morts ieunes, & Louyse de Lorraine, femme du Roy Henry III. Roy de France & de Pologne.

En secondes nopces il espousa leanne de Sauoye fille de Philippe Duc de Nemours, dont il eust trois fils & vne fille, sçauoir,

Bbb iij

Philippe Emanuel de Lorraine Duc de Mercœur & de Ponthieure , qui espousa Marie de Luxembourg , fille de Sebastien de Luxembourg, Seigneur de Marrigues, de leur mariage sont issus.


Philippe de Lorraine decedé ieune, François de Lorraine Duchesse de Mercœur qui a espousé César Monsieur Duc de Vendosme , Gouverneur & Lieutenant General pour le Roy en Bretagne , qui en a eu deux fils & vne fille, sçavoir, Louys de Vendosme, Duc de de Mercœur, François Pierre de Marrigues, & Isabelle de Vendosme.

Charles de Lorraine second fils de Nicolas de Vaudemont de sa seconde femme, a esté Cardinal & Euesque de Toul.

François de Lorraine Marquis de Chaussins meurt sans auoir esté marié.

En troisieme nopces Nicolas de Lorraine Comte de Vaudemont , espousa Jeanne de Lorraine fille de Claude Duc d'Aumale, de laquelle il eut Henry de Lorraine , Comte de Chaligny, mort en Hongrie, laissant trois fils de sa femme Claude de Mouy, fille de Charles Marquis de Mouy.





DISCOVRS
DE L'ESTAT DES DIX-SEPT
PROVINCES DES PAYS-BAS.

QUE TIENT LE ROY D'ESPAGNE
sous le gouvernement d'Isabelle Claire Eugene, Infante & Sere-
nissime Archiduchesse de Flandres sa Tante.

ET LES ESTATS DE HOLLANDE ET
Prouinces vnies.

SOMMAIRE.

1.  RIGINE du nom des Pays-Bas.
2. Sa situation & limites, son circuit & grandeur.
3. Riuieres les plus celebres des Pays-Bas, leurs sources & cours.
4. Division du pays en 17. Prouinces & combien il y a de villes & villages en chaque Prouince.
5. Comment elles ont esté vnies sous un mesme Seigneur & reduictes sous la domination d'Espagne.
6. Donation des Pays-Bas faictz par le Roy d'Espagne Philippe Second à l'Infante sa fille en faueur du mariage avec Albert Archiduc d'Autriche.
7. Comment l'Archiduc Albert prit possession des Pays-Bas, en vertu d'une procuration de sa future esponse l'Infante d'Espagne.
8. Les pays qui sont auourd'huy sous l'Archiduchesse & la description des plus belles villes, commençant par la Flandre.
9. Description du Pays d'Arcon & de ses plus celebres villes.
10. Du Cambresis & de ses limites.
11. Du Pays de Haynault.
12. Du Comté de Namur.
13. Du Duché de Luxembourg.
14. De la Duché de Brabant & de ses villes principales.
15. Pays-Bas propre à nourrir du bestail.
16. Mer des Pays-Bas, ses commoditez & incommoditez.
17. Ses Forests, notamment de la Forest d'Ardenne.
18. Naturel des habitans du Pays-Bas quel, & comme ils sont amateurs de liberte.
19. Peintres excellens ez Pays-Bas, & qui a esté le premier qui a meslé les couleurs avec l'huile.
20. Reuenue du Prince des Pays-Bas à quoy se peut monter.
21. Ses forces consistans en fortresses & une armee entretenue dans les garnisons.
22. La forme du gouvernement des Pays-Bas.
23. Conseillers du Prince & par quelles loix lesdits Conseillers se conduisent.
24. Des Commissaires enuoyez par les Prouinces & la façon d'assembler les Estats de la Religion des Pays-bas.
25. Archeueschez & Eueschez des Pays-Bas.
26. Catalogue des Seigneurs & Comtes de Flandres & des Capitaines ou Lieutenans qui ont commandé aux guerres des Pays-Bas.
27. Des dernieres guerres entre le Roy d'Espagne & les Hollandois, du siege de Breda.



COMBIEN queles choses de cét Estat ayent esté cy-deuant & par plusieurs fois fort confuses, & embrouillees, pour les diuers possesseurs qui ont occupé les Prouincès, tantost separément, tantost toutes ensemble. l'espere neantmoins esclaireir le tout, & en escrire par bon ordre & sans obscurité. Car apres auoir dict en general les limites & l'estendue de toutes ses Contrees, comme il est diuisé en dix-sept Prouincès, comment & par quices pays ont esté vnies sous vn mesme Seigneur: quand & comment ils sont venus en la maison d'Espagne. Je viendray apres à particulariser ce qui est à present sous la puissance du Serenissime Archiduc Albert d'Autriche & de la tres-illustre Princeesse Isabelle Claire Eugene sœur de Philippe III. à present Roy d'Espagne: comme ils sont entrez en possession dudit pays: Et d'autre part ie représenteray ce que les Estats des Prouincès vnies des pays possèdent aussi. Que si ie ne contente entièrement en cecy les plus curieux, au moins ie pourray leur opposer la difficulté du fait, & la peine que i'ay prise de leur satisfaire, rapportant ce que i'ay veu moy-mesme estant au pays, ou ce que i'ay appris par le discours des autres.

Et afin de commencer, la basse Allemagne est ainsi nommée, pour ce que les mœurs, la langue & les loix de ses habitans ne different gueres de celles des autres Allemans: le nom de basse luy est donné, pource que ceste contree est plus proche de la mer que le reste de l'Allemagne, & pource aussi qu'au respect de la haute son terroir est moins esleué, & ses campagnes plus basses. Ceux du pays l'appellent en leur langue Nederlant.

On l'appelle aussi presque par toute l'Europe Flandre, en prenant vne partie pour le tout, ou pour la puissance & splendeur de ce pays au regard des autres, ou à cause des grands trafics & des foires de Bruges tres-anciennes, où les marchands souloient aborder de toutes parts, ou pource que ce pays estant plus proche de la France, d'Espagne, d'Italie, d'Angleterre, son nom a esté cogneu & diuulgué plus que ceux des autres.

Or laissant cette curiosité que ie tiens pour superflue, de mesme que tout ce qui est de pareille estoffe, le Pays-bas a pour ses limites du Nort la mer Oceane, du Sud la Lorraine, & la Champagne, del'Est, les riuieres de Meuse, & du Rhin: & del'Ouest encore la mer, & la partie del'Artois qui regarde la Picardie.

Tout ce pays a de circuit, selon Guichardin, enuiron mille milles d'Italie, ou trois cens quarantelièues de Flandre, & contient sept degrez & demy de longueur: c'est à sçauoir depuis le vingt-deuxiesme degre & demy iusques au trentiesme. Mais quant à la largeur il comprend cinq degrez, c'est à sçauoir depuis le quarante-huictiesme degre & demy iusques au cinquante-troisiesme & demy. A raison dequoy le Pays-bas est mis entre le milieu du septiesme climat, & le commencement du neuuesme, & en ceste espace la diuersité du plus grand iour d'esté est de trois quarts d'heure, Car au milieu du septiesme climat le plus grand iour est de seize heures, & au commencement du neuuesme il est de seize heures, & trois quarts. Et ce pays contient tous les paralleles qui sont enfermez entre le seiziesme & le vingt-vniesme.

Les principales riuieres de ces Prouincès sont le Rhin, la Meuse, l'Escaud & l'Ems: les moindres sont la Moselle, l'Ae, la Sambre, la Dese, Demere Nethe, Ruer, Berekcl, Niers, Scarpe, Dentre, Hayne, & autres. La plus grande c'est le Rhin, duquel nous parlerons faisans mention de l'Allemagne. Quand à la Meuse elle vient du mont Vauguez non guieres loing des sources de la Seine, & de Marne, & coulant vers la Septentrionale, rase saint Thibaut, où elle commence d'estre nauigeable. De là elle passe à Verdun, & va à Moson, & Maisiere. Et de là tournant vers le Nort elle passe à Charlemont, Bouines, Dinant, & Namur: & receuant là le Sambre elle va à Stochem, Ruremonde, & Ventlo, où se tournant vers l'Ouest elle borde les villes de Cuichx, Graue, Goustein, & Meghen: puis receuant au village de Hervvede vne partie du Rhin, & luy donnant aussi de ses eaux, elle se mesle avec l'Oual, & soudain ces deux riuieres regardantes leurs noms se separant & coulent chacune à part à Lauestein, où elles enferment l'Isle de Bome, & derechef elles s'assemblent, & perdans leur nom prennent celui de Merou, & passans en ceste sorte à Vvorkom & à Gorchom, elles paruiennent fort grosses à Dordrecht où ayant fait l'Isle d'Iselmonde, la Meuse reçoit son propre nom, & le retenant apres auoir passé à Rotterdam, & Vlaerdingue elle se va rendre dans la mer pres de la Brille avec tant de violence, que courant encor par vne longue espace elle conserue la douceur de son eau.

Quant à l'Escaud il vient du Vermandois pres de l'Abbaye de S. Martin, puis passant

par

paissiblement entre le Catelet, & Beurevoir s'en va à Cambray; De là passant par le pays de Haynault il baigne la ville de Valenciennes, & deuenant nauigeable apres auoir receu la Hayne; il passe à Condé, puis grossi de la Scarpe il coule à S. Amand, & de là tournant vers le Nord il passe à Tournay à Audernade, & à Gand, où il reçoit la Lis, & la Lieue, & quelques autres eaux. De là il va en serpentant à Denremonde, ou receuant le Dendre il s'achemine à Repelmonde, & y reçoit le fleuve Rupel, & vn peu apres la Dele, puis estant ainsi gros & enflé, il s'en va lauer les murailles d'Anuers, & fait vn bon & assésuré port pour les nauires, puis coulant vn peu plus auant, & se fendant en deux branches, il diuise le Brabant, & la Flandre de la Zelande: veu que tournant à main gauche vers le Midy il suit les riuages de la Flandre; & prenant vn autre nom s'appelle de Hont, & de-là il s'achemine à la mer du Ponent par la Zuytbeuerlande, & Vvalacrie, & à la main gauche ayant laissé les limites du Brabant, continuant son cours; & gardant son vieil canal se va dégorger dans l'Océan par les riuages de l'Isle de l'Escaud. Au restete fleuve porte le flux de la mer iusques à Gand, qui est en comptant les destours, & serpentements, par l'espace de plus de 30. milles. Pour le regard des autres ie remets le curieux à la lecture des Geographes, sur lesquels ie semble meisme auoir desia trop enjambé.

Le Pays-bas contient dix-sept Prouinces, à sçauoir quatre Duchez, Brabant, Limbourg, Luxembourg, & Gueldre: huit Comtez, Hollande, Zelande, Flandres, Artois, Haynault, Zémul, zutphen, & le Marquisat du S. Empire, & cinq Seigneuries, à sçauoir Malines, Vtrecht, Frise, Ouerissel, & Groningue. Elles sont nommées dix-sept Prouinces, pource qu'on en a donné 17. titres aux Princes, & ne s'en peut donner autre raison de cette appellation bien qu'il y aye dauantage de Prouinces.

Aux generales assemblees tous les pays n'y sont pas conuozquez; ne donnent pas leurs voix, ny ne contribuent pas selon cet ordre aux impositions generales. Car le Marquisat du saint Empire d'Anuers n'est point compté entre les Prouinces, la Duché de Limbourg avec Valckembourg, & Dalam ressortissent sous Brabant.

Tournay & Tournesis, avec l'Isle, Douay & Orchies ordinairement ne sont pas nommez entre les dix-sept Prouinces, & toutesfois elles contribuent toutes deux, chacune comme vne Prouince: Comme font aussi Valenciennes & Drente. Ce pays-bas enuiron l'ā mil cinq cens cinquante du temps de l'Empereur Charles V. accorda à l'Empereur selon sa demande; la somme de trois cens mille florins par mois, ce qu'on appelloit Nouentale ou Nouenaire, Limbourg, Luxembourg, Gueldre, & Groningue ne payent rien de ceste imposition, estants frontieres, lesquelles estoient appannies, & fort en arriere, tellement qu'il n'y eut que ces treize, tant Prouinces que Villes, lesquelles contribuerent: Assauoir, Brabant, Flandres, Artois Haynault, Valenciennes, l'Isle, Douay, Orchies, Hollande, Zelande, Namur, Tournay, Tournesis, Malines & Vtrecht: toutesfois on estime que les autres ne sont pas forclosés es conuocations & assemblees generales.

On a compté en ces Pays-bas plus de deux cents villes murees, & bien cent cinquante places, lesquelles auoient iurisdiction & priuilege de ville, & plus de six mille villages: mais durant ces longues guerres dernieres ils ont esté bien amoindris & ruinez. Afin neantmoins de contenter le Lecteur curieux, ie luy proposeray icy vn general denombrement, auquel il pourra voir combien il y a de villes & villages en chaque Prouince.

Combien il y a de villes & villages en chaque Prouince du Pays-bas.

È S Q V A T R E.

<i>Duchez</i>	<i>Villes.</i>	<i>Villages.</i>
BRABANT.	26.	700.
LUXEMBOURG.	23.	1169.
LIMBOURG.	5.	123.
GVELDRE.	24.	300.

E S H V I C T.			
Comtez	Villes.	Villages.	
HOLLANDE.	23.	400.	(:)
ZELANDE.	10.	101.	
FLANDRE.	35.	1178.	
ARTOIS.	12.	754.	
HAYNAULT.	24.	950.	(:)
NAMVR.	4.	184.	
ZVTPHEN.			
LE MARQUISAT.			

E S C I N Q.			(:)
Seigneuries	Villes.	Villages.	
VITRECHT.	5.	70.	
FRISE.	11.	345.	
OVERISSEL.	11.	101.	
GROVNINGE.	1.	145.	
MALINES.	1.	9.	

Auant la Natiuité de Iesus-Christ, les Romains & Iules Cesar comprénoient ce pays sous la Gaule Belgique ou Belge ainsi appelée à cause des habitans hautains & hardis qui ne pouuoient souffrir qu'on leur ostast leur liberté, leurs coustumes & priuileges. Tellement que c'estoit, au rapport de Iules Cesar, le plus fort & valeureux peuple de toute la Gaule. Ils auoient alors diuers noms, & les nommoit-on Germains, Bataues, Frisons Aduatices, Menapiens, Atrebates, Neruins, Morins, &c. Les Germains sont auourd'huy les Allemans: les Bataues sont les Hollandois, & en partie les Gueldrois: les Frisons ceux de Frise: les Aduatices ceux d'Anuers: Les Menapiens en partie ceux de Gueldre, & de Cleues: Les Atrebates ceux d'Arras & esenuirons: les Neruins, ceux de Tournay, les Morins, les Flamands, &c.

Le pays estant diuisé en Prouinces, ils ont bien receu quelques seigneurs comme souuerains, mais à certaines conditions, prenans tousiours bien garde qu'ils ne deussent puiffans de peur d'estre subiuguez: & partant, ils les aymoient principalement à cause de cela, lors qu'ils estoient encore ieunes. Ces Prouinces viuans ainsi en paix avec leurs Seigneurs & se bandans par ensemble en temps de necessité, ont souuent fait de grands faits d'armes, tant contre les Romains que contre les autres nations, mesme contre les Turcs & Sarrazins, comme il appert qu'ils ont fait sous la conduite de Godefroy de Bouillon & autres Rois de Ierusalem: comme aussi sous Baudouin Comte de Flandres, qui gagna l'Empire de Constantinople, & plusieurs semblables entreprises, comme on peut voir en leurs Chroniques & Histoires, tellement que ils ont tousiours esté fort estimez & redoutez. Bref c'est vn peuple duquel le renommé Historiographe Corneille Tacite a escrit comme s'ensuit. *Les Gaulois contribuoient pour leur liberté, les Germains pour leur butin, mais les Batauois pour la gloire & l'honneur.* Voyla pourquoy aussi les Empereurs Romains les choisissoient pour leurs gardes, comme les tenants pour les plus fideles & valeureux de tous les peuples du monde. Mesmes quelques vns d'entr'eux, notamment les Batauois & Frisons, ont esté declarez compagnons & amys du peuple Romain. Ainsi en parle Tacite.

Or combien que tous ce Pays-bas & Prouinces ayent esté par cy-deuant diuerses souuerainetez & Prouinces sous differents Princes, si est-ce qu'ils ont en fin esté reduicts sous quatre Ducs de Bourgogne. Puis apres sous les Archeducs d'Autriche, & finalement sous vn seul seigneur à sçauoir, sous l'Empereur Charles cinquiesme, & son fils Philippe Roy d'Espagne. Il sera bon de reciter icy en bref comment, quand, & en quelle maniere ils ont esté reduicts sous ces derniers icy, & que cela demeure pour memoire perpetuelle, que les Espagnols sont bien paruenus au Gouuernement de ces Pays-bas, non pour les gouuerner comme leurs propres subiects, c'est à dire comme estans subiects à leurs loix, mais comme vn peuple libre en suyuant leurs propres loix & priuileges.

Loyys de Malestroit du costé de son pere, Comte de Flandres, de Neuers, de Ræel, de Salines, d'Anuers, & de Malines, & du costé de sa mere, Comte de Bourgogne & d'Artois, auoit vne fille nommee Marguerite, laquelle il auoit eüe de sa femme Marguerite fille de Iean troisieme, Duc de Brabant: cete fille espousa en la ville de Gand en l'an mille

trois cents soixante neuf, Philippe de Valois surnommé le Hardy, qui estoit pour lors Duc de Bourgongne, & le plus ieune fils de Jean Roy de France. De ceux cy naquit Jean sans peur, Comte de Flandres, de Bourgongne, d'Artois, &c. Ce Jean de Vallois espousa en l'an mil quatre cents quinze Marguerite fille du Comte de Haynault, Hollande, Zelande & Frise: & fut meurtry à Montereau en France, en l'an mille quatre cents dix-neuf, le dix-neufiesme Septembre, estant aagé de quarante huit ans, & apres auoir regy 15. ans: ce qui arriua, comme on dit, à l'instigation du Dauphin. Son fils vnique Philippe le Bon succeda en sa place, aagé de vingt-trois ans estant Duc de Bourgongne, Comte de Flandres, d'Artois, de Bourgongne, Palatin, Marquis du saint Empire, & Seigneur de Salines & Malines. Outre ce en l'an mille quatre-cents vingt-neuf il succeda par la mort du Comte Dideric de Namur, à ladite Comté de Namur l'ayant premierement acheptee, & par la mort de Philippe Duc de Brabant, lequel mourut sans enfans, il eut en l'an mil quatre cents trente, les Duchez de Lorraine, de Brabant & de Limbourg, & par la mort de Iacoba Comtesse de Hollande, &c. sa niepce, il eut en l'an mil quatre cents trente six, les Comtez de Haynault, de Hollande, Zelande & Frise. En l'an mille quatre cents quarante trois, sa tante luy donna la Duché de Luxembourg, premierement comme Tuteur & puis apres comme Seigneur. Il fut le premier de la maison de Bourgongne qui institua l'ordre de la Toison d'or à Bruges en Flandres, lors qu'il espousa Isabeau de Portugal en l'an mil quatre cents cinquante. Il mourut à Bruges en l'an mil quatre cents soixante sept, estant aagé de soixante & douze ans, apres auoir regné quarante huit ans. Il laissa pour heritier en tous les pays son fils vnique, nommé Charles de Valois, ou le Guerrier, lequel succeda au gouuernement des pays de son pere estant aagé de trente quatre ans. Il achepta du Comte Arnault d'Egmond la Duché de Gueldre & la Comté de Zutphen, & ce outre vne pension annuelle pour la somme de 92000. escus d'or, en mourant il confirma ladite vente par testament, faisant le Duc Charles son heritier, & desheritant son fils Adolphe, pource qu'il s'estoit rebellé contre luy. Ce Duc print possession du pays de Gueldre en l'an mille quatre cents soixante & treize. Il tascha de faire vn Royaume de tous les Pays-bas, promettant à ceste fin de donner sa fille vnique en mariage au fils de l'Empereur Frederic III. & l'eust appellé le Royaume de Bourgongne, d'autant que la Bourgongne auoit esté vn Royaume auparauant. Mais pource que chaque Prouince estoit souueraine, & auoit ses Priuileges, droicts & reuenus à part, mesme differentes mesures & poids, & n'auoient iamais voulu consentir à leurs Princes autre puissance sinon limitée, il ne peut, & cela fut mis en arriere. Ce braue guerrier fut tué deuant Nancy en l'an 1477. le cinquiesme de Ianuier, estant trahy par vn Comte Italien appellé Campebasso; qui estoit à son service, & ce par l'instigation de Louys XI. Roy de France, des Suisses & Lorrains apres auoir gaigné trois batailles. Il estoit aagé de quarante quatre ans, & laissa vne fille vnique appelée Marie de Valois aagée de dix huit ans, laquelle espousa en l'an mille trois cents soixante & dix-sept, le dix-huictiesme Aoust, Maximilian d'Autriche, lequel reprit sur le Roy de France tout ce que ledit Roy auoit prins & osté à sa femme. Il reestablit l'Ordre de la Toison d'or, lequel estoit fort auily, & l'an mille quatre cents soixante & dix-huit, ils eurent deux enfans ensemble, vn fils nommé Philippe, & vne fille nommée Marguerite. Marie de Bourgongne la cinquiesme année de son mariage tomba de cheval & mourut de la cheure. Maximilian gouerna ces pays pour vn temps en faueur de son fils Philippe: mais non pas à la bonne foy, car il tascha d'aliener & de separer du Pays-bas les Prouinces de Brabant, Haynault, Hollande & Frise, pour les donner à son pere Frederic Empereur, & fit plusieurs choses au preiudice de ces pays, En l'an mil quatre cents nonante deux, son fils Philippe fut reconnu pour Prince par tous les Pays-bas, & confirmé comme Seigneur hereditaire d'iceux: en l'an mille quatre cents quatre vingt seize, il espousa en la ville de Lier en Brabant, Madame Ieanne d'Espagne, que les Pays-bas estant auparauant vnis par ensemble par plusieurs mariages, sont finalement venus par ce mariage à la maison d'Espagne, & combien qu'ils soient paruenus à quelque parfaite prosperité, si est-ce par ce moyen qu'ils sont tombez en vne longue guerre, voire en des troubles & guerres ciuiles au grand dommage & preiudice desdits pays, ainsi par ce moyen les 17. Prouinces ont esté sous le Gouuernement du Roy d'Espagne entre les soixante & septante ans.

QUALITE.

Quant à l'Artois il est riche de froments, dont il enuoye grande quantité en Flandres & en Brabant, où il n'en vient point ordinairement, si bien que la plus grande partie de leurs habitans fait du pain de seigle. Il n'y a point de vin, combien qu'on tienne que le pays est capable d'en porter, & que c'est la nonchalance de ceux qui y demeurent qui est

cause de ce deffaut, plustost que l'assiette. L'air y est bon, sain, & serein.

Le pays de Haynaut iouit d'un air doux & temperé, & son terroir est fertile, & porte principalement grande quantité de froment, Il y a force prairies, pasturages, pommiers & autres choses nécessaires à la vie. Il y a pareillement des mines de fer & de plomb, & des carrieres de diuers marbres, & aussi d'un certain caillou que les Liegeois nomment Houille. Ces cailloux nourrissent la flamme de mesme que les charbons, & l'on n'en vſe que pour faire du feu avec vn peu de bois.

La Comté de Namur est montueuse, mais agreable, d'un air sain & temperé. Son terroir porte les choses qui sont nécessaires à la vie. Il y a aussi des mines de fer & de plomb, & des carrieres où l'on coupe des pierres de toutes sortes, & principalement des marbres tirans sur le noir qui approchent fort du jaspe. Et il n'y a pas long-temps qu'on a commencé d'y tirer des Houilles qu'on brusle. Il y a des riuieres qui abondent en poisson, & de belles fontaines d'eau viue, comme aussi des forests où l'on trouue vne grande quantité de bestes sauuages & noires.

Le pays de Luxembourg; combien que montueux, est toutesfois bon & fertile, & iouit d'un air assez gracieux. Il y a vn endroit qui porte force bled, & quantité de vin, & l'autre recompense ce defaut par le grand nombre de ses bestes sauuages, & noires qui sont des meilleures. Il y a des mines de fer assez pres de Macderſcheid aux Seigneurs de Keyle, Croemberg, & Sleide, vers la ville nommee Hellental.

Le Brabant iouit d'un fort bon air, & a vne plaine fertile qui porte quantité de bleds, combien que ce qu'ils nomment *Die Kempen*, ou la campagne, soit vn peu sterile à cause du sable. Et toutesfois ceste partie rapporte eneor quelques fructs, & n'est pas du tout inutile.

La Flandre a vn air extremement temperé. Son terroir est fertile; principalement du costé qu'elle est proche de la mer, & de la France. Il y a de beaux pasturages, comme on peut assez cognoistre en ce qu'on a acoustumé d'y mener force poulains des contrees voisines, à cause de la bonté del'herbage. Dauantage il nourrit beaucoup d'animaux domestiques qui sont d'un goust exquis, & vn nombre incroyable de bestes fauues, & noires. Elle ne manque aussi de herons, de faisans, perdrix, paons, & cigongnes.

MOEVRS ANCIENNES.

Cesar nous dict que les Belges, qui sont ceux du Pays-bas, entre lesquels il comprenoit aussi les Picards, estoient vaillants & resolu au possible, pource qu'ils estoient esloignez de la ciuilité, & courtoisie de la Prouince plus polie, & que les marchands ne les frequentoient guieres, & ne leur portoient les choses qui seruent à ramollir, & rendre effeminez les courages: & pource aussi qu'ils estoient voisins des Allemands qui habitoient au delà du Rhin, avec lesquels ils estoient en guerre continuelle. On peut cognoistre leur valeur, & l'extreme desir qu'ils auoient de deffendre leur liberté en ce qu'ils s'essayerent de se retirer de l'obeyſſance & de la domination des Romains, mesme du temps de Cesar. Les Neruiens, qui sont ceux de Tournay, ne permirent iamais aux marchands qu'ils leur apportassent du vin ou d'autres choses à vendre. Et pour dire quelque chose de particulier, les habitans de la Comté de Flandres ont esté si addonnez aux armes, & si remuans, qu'ils n'ont iamais peu viure en paix, & ont iadis couru avec les armes au poing la Syrie, la terre Sainte, & Ierusalem. Il y a aussi long-temps que ce peuple s'addonne au trafic, & y reüssit heureusement, de mesme qu'il s'est montré penible à defricher le pays, & le rendre meilleur en toute sorte.

MOEVRS DE CE TEMPS.

Les Flamands sont volontiers grands, mais on estime qu'ils estoient beaucoup plus anciennement, ce que Cesar attribue principalement à la liberté de leur vie, à la coustume de ne faire nulle chose contre leur volonté. Ils sont beaux, paisibles, peu coleres, peu ambitieux, ouuerts, prompts à toute chose, penibles, industrieux & fideles, capables de tous arts, & de toutes sciences, & plustost addonnez au vin qu'à l'amour. Ils sont assez ciuils selon le pays, & si fascheux, que mesme ils en font quelquesfois insupportables. Ils sont de legere creance, à raison de quoy on les void aisement deceus. Il n'y a gens plus soupçonneux ny plus opiniaſtres. Ils ont force babil, & oublient assez tost les courtoisies & faueurs qu'ils ont receus, de mesme aussi que les offenses qu'on leur a faictes. Ils ayment fort peu les autres nations,

nations, & s'amusent à inuenter tous les iours quelque chose de nouveau. Quant à la musique ils l'ont réduite parfaite, veu qu'il n'y a peuple qui aye plus d'inclination à cet art que celtuy-cy. Il sont assez vaillans sur la terre, mais plus à pied qu'autrement, veu qu'ils sont mauvais hommes de cheval, & ont vne coustume de ne venir jamais aux mains avec les ennemis, & se joindre à eux le moins souuent qu'il leur est possible. Mais il faut aduouer que sur la mer ils sont invincibles. Ils entendent fort parfaitement la navigation, apprennent diuerses langues, trafiquent fort accortement, & font grande quantité de draps de soye, de laine, de lin de diuerses sortes & sur tout de la tapisserie dont on fait fort grande estime, & qu'on enuoye non seulement par tout l'Europe, mais encor aux Indes, & en Afrique. Ils font le plus souuent du pain de seigle, & boient de la biere plus ordinairement que du vin qu'on leur porte de France & d'Espagne. Ils vont bien vestus, & sur tout bien proprement. Leurs maisons sont continuellement nettes plus qu'en aucun lieu de l'Europe, & leurs meubles si luisans, & si bien tenus que la vue en est agreable. Ils bastissent presque par tout d'une mesme sorte, & leurs maisons sont tellement faites, qu'il semble presque qu'elles soient à un mesme maistre, tant ils se plaisent aux villes à faire que leurs hauteurs soient égales.

Les femmes sont belles, mais il n'y en a pas en si grand nombre qu'on croie, & mesme ce malheur accompagne leur beauté, qu'elle passe en la plus grande partie avant qu'elles ayent atteint l'age de 30. ans, si bien qu'elles sont apres toutes laides & ridees. Elles y sont propres & hardies, & conuersent librement avec les hommes. Elles ont ce mal qu'elles aiment le vin, & mesmes vous ne sçauriez conuier vne ieune fille de si bon matin à boire, qu'elle ne soit toute prestee à vous faire raison. Celles qui ne boient point de vin prennent de la biere si demesurément qu'elles en demeurent accablees, & le plus souuent si tost que vous serez arriué, la fille du logis, qui sera belle & ieune, viendra avec un pot plein de biere, & vous couiera à boire à vos despens, & met la premiere le nez dans le pot, & si vous ne faisissez continuer la feste, ce seroit vne incivilité, & vilenie. Je sçay bien qu'il y en a beaucoup que ceste dissolution porte aux effects de l'amour: mais j'asseureray avec verité qu'il y a en ces pays moins de femmes qui se gouvernent mal qu'en plusieurs autres où l'on ne fait pas profession de l'yrognerie. Avec toutes ces debauches qui ne peuuent estre nommées extraordinaires à cause de l'accoustumance, & de la nourriture que ces femmes ont prise par maniere de dire dès le berceau, elles ne laissent neantmoins de conduire bien sagement leur mesnage, & mesme bien souuent elles se meslent de trafiquer & de contracter pour quelques negoces avec les uns & les autres. Elles affectent fort d'aller vestues à la française, vôt toutes seules par la ville, & aux prochains lieux avec peu ou point de compagnie, sans estre nullement soupçonnées. Et pource que leurs marys leur laissent souuent tout le maniement de leurs affaires, elles en deuiennent superbes, imperieuses, & du tout insupportables.

Les Princes, Seigneurs, & tous autres de quelque condition qu'ils soyent, donnent aux aînez des maisons les nôtres de leurs peres, cōbien qu'ils soient viuans, & en la fleur de leur age; & les Gentils-hommes preferent tousiours leur fille aînée aux autres, cōbien que toutes ayent pareil mariage: tellement qu'ils donnent les autres à des hommes auxquels ils refuseroient l'aînée, laquelle ils reseruent à vne meilleure condition. Et ils ont ceste particularité qu'ils contractent aisément mariage avec les estrangers si l'occasion s'en presente. On trouue du tout meslant, & pour mieux dire vilain, que les ieunes hommes espousent des vieilles, les vieillards de ieunes filles, les roturiers des damoiselles, les maistres leurs chambrières, & les maistresses leurs valets. Il n'y a point de nation qui excelle tant en la peinture, Jean Eikius qui estoit de ce pays monstra le premier la façon de mesler les couleurs avec l'huyle. Ils ont accoustumé aux iours qui sont dediez au S. dont ils portent le nom, & durant le temps du Carneual, de festiner leur parents & amis, & les traicter magnifiquement, veu qu'ils aiment sur tout les bâquets, & la bonne chere.

RICHESSES.

Les Flamands sont riches par le moyen de la mer, & du trafic ordinaire qu'ils exercent. Les mestiers auxquels ils s'adonnent leur apportent mille commoditez, & la vente des draps de soye, & laine qui s'y font, & de la tapisserie qu'on recherche si curieusement leur apporte de grandes sommes de deniers.

On ne sçauoit estimer cōbien leur rapportent de profit les marsoûins qu'ils font, de mesmes que les saumons, & quant aux harans qu'ils enuoyent dehors tous les ans, on ne sçauoit presque croire la quantité de l'argent qu'ils en tirent des Allemans, des Anglois, des François, des Espagnols & des Italiens.

FORCE.

L'Archiduc se peut vanter qu'il a de fort bonnes places, non seulement capables d'une longue deffence, mais par maniere de dire imprenables. Car on ne pourroit guere trouuer vne plus forte place que la citadelle d'Anvers qu'on tient pour l'une des mieux fortifiées de l'Europe, selonc les regles de ce temps. Bossleduc qui est en Brabant de mesme qu'Anvers est assez considerable. Puis sur la mer Grauelines, à deux lieues loin de Calais, est fourny d'une infinité de canons, & fort au possible, & apres Dunkerque, qui outre la forteresse de ses murailles a des habitans fort courageux. On void encor au pouuoir de l'Archiduc

sur le mesme riuage la forte place d'Ostende qui luy a donné tant de peine durant trois ans & demy qu'il l'a assiégée.

Quant au pays d'Artois il a la ville d'Artois, qui est assez forte pour faire vne grande resistance. Terouenne pourroit estre bien deffendu & soustenir vn fort siege. Hedin n'est pas moins important, voire mesme il est mieux fortifié, & est sur la frontiere de la France. En Haynaut, Mons est fort, & Valenciennes aussi, & en ceste dernière ville il y a vn arsenal garny suffisamment de toute sorte d'armes & de munitions qui peuuent estre requises en temps de guerre. Philippeville, & Mariembourg sont deux lieux tres-forts sur la frontiere de la France. Namur a vne bonne forteresse, & qui peut faire grande resistance. Et pour acheuer en vn mot, tout le pays de l'Archiduchesse est garny de fort bonnes places, tellement que celuy qui l'attaquera aura tousiours beaucoup de peine. Quant aux hommes les villes sont fournies d'habitans courageux, qui ont autrefois donné des tesmoignages de leur valeur. Mais outre cela ce Prince entretient tousiours vne armee composee d'Espagnols d'Italiens, d'Anglois, d'Alemands, & de ses suiets, & ceste armee auant la trefue se tenoit en hyuer dās les garnisons, & sur le milieu du Printemps elle se mettoit en campagne, & estoit employee au siege de quelques places. Maintenant plusieurs de ces gens de guerre ont esté cassez, & ne sont plus en si grand nombre. Ce qui reste est entretenu en diuers lieux sur les frontieres.

G O V V E R N E M E N T.

Les formes du Gouvernement sont l'vniuerselle que le Prince tient par tout, & la particuliere dont chacun de ces Estats vse selon ses priuileges & coustumes.

Le Prince a trois Conseils, dōt le premier est appellé Cōseil d'Estat, le secōd Priuē, le troisieme des Finances. Le Conseil d'Estat a vn Presidēt, & vn nombre infiny de Conseillers, pource qu'on en appelle plus & moins selon les occurrences. En ce Conseil on traite toutes les deliberations appartenantes à l'Estat, comme de paix, de guerre, d'Ambassadeurs, d'intelligences, d'aduis du dedans, & du dehors, & c'est à cestuy-cy que les affaires plus importantes des autres Conseils sont rapportees.

Au Conseil priuē il y a 12. Docteurs esleuz par le Prince. Il y a vn President & l'on y traite de toutes les iuridiques, pource qu'il a la preeminence sur tous les autres Conseils, & c'est celuy qui consent aux priuileges, qui donne les graces, pardons, remissions, fait les loix, statuts & Edicts, & c'est à luy aussi qu'appartient la cognoissance, & le iugement des debats, & questions des limites du pays, & des principaux de la seigneurie. Aux choses plus difficiles, & plus hautes, il communique avec le Conseil d'Estat, de mesme que ce dernier fait avec luy lors qu'il suruient quelque chose de iustice.

Au Conseil des Finances, il y a trois Seigneurs du pais nōmez Chefs, ou Intendāts des Finances, vn Thresorier, vn Receueur, & autres moindres Officiers: ce conseil manie tout le domaine du Prince, & les tailles qu'il luy paye. On y fait les taxes, & les payemens tant aux occurrences de la paix que de la guerre. Il y a vne Chābre des Cōptes qui est cōme vn membre du Conseil des Finances, & 7. Maistres des Cōptes, avec d'autres moindres offices. C'est là que vont rendre cōpte, & receuoir leurs quittances en tēps determiné tous ceux qui manient les deniers du Prince en Brabant, aux pais adherans, & en la Duchē de Luxembourg: & cōbiē qu'il y aye au pais quelques autres Chambres, outre la susdicte qui reside à Bruxelles avec les trois Cōseils dont nous auons fait mention, neantmoins toutes les Chābres ont accoustumé de rendre compte au Conseil des finances, comme à leur souverain Magistrat.

Outre les susdits Magistrats il y a en la plus grāde partie des susdits Estats vn Gouvernemēt particulier, auquel cōme à vn Lieutenant on rapporte les affaires principalemēt de la guerre.

Le Prince a sēblablement en la plus grande partie des Estats vn Conseil en son nom qui est appellé en Brabant la Chācellerie, & à Malines, & entrē autres lieux le Parlemēt. En ce Conseil il y a tantost douze, tantost seize, & tantost dix-huict Cōseillers avec vn Presidēt, & l'on y voit interuenir aussi l'Aduocat du Prince, le Procureur Fiscal, & quelques autres moindres Officiers qui sont presque tous gagez par le Prince: & l'autorité de ces Magistrats est grāde tant aux choses civiles que criminelles, & là l'on peut appeller nō seulement toute sorte de personnes, mais le Prince mesme, s'il y a quelqu'un qui pretende contre luy quelque chose en iustice. C'est en ces sieges que vont les appellations de tous les autres Magistrats de cet Estat particulier, & en trois d'iceux cōme en Brabant, à Malines, & en Haynaut, on iuge diffinitiuement.

En tous les susdits Cōseils, on se conduit par les loix cōmunes, si les municipales, ou les priuileges, ou les commandemens (car il nōment ainsi les resolutions du Prince) ny sōt cōtraires.

Outre les susdits Officiers le Prince enuoye tous les ans des Commissaires par la plus grāde partie des terres principales pour reuoir par le menu les comptes des entrees, & sorties des lieux, & en Brabant où le Prince a par octroy particulier du Pape autorité aux lieux sacrez, les Commissaires font la visite des Eglises, des Monasteres, & des Hospitaux.

Quand le Prince doit traiter avec les Estats, ou pour de nouvelles loix qu'il veut faire, ou

de la sorte qui sensuit. Il commande par ses lettres à tous les Estats de le trouver en tel temps en vn certain lieu, & ce lieu est ordinairement la ville de Bruxelles.

En toutes les Villes, Comtez, & places principales par ancienne preeminence, on sçait qui sont ceux qui doivent aller à l'assemblée, & combien ils sont, & en effect il y en a vn grand nombre. En ceste assemblée il y a trois ordres de personnes.

Le premier ordre est l'Ecclesiastique, le second la Noblesse, le troisieme les villes principales de l'Estat. Chacun de ceux-cy a pouuoir d'obliger la communauté, mais non d'accorder iamais, sinon avec expresse condition, que tous les autres Estats viennent à faire le mesme. La proposition se faict en ces assembles en vne grande sale en la presence du Prince par vn President, ou quelqu'un des Conseillers des Estats, & c'est là qu'ils s'estudient avec de bonnes raisons & douces paroles, de persuader ce qu'ils veulent.

La proposition ayant esté ouye, les Estats prennent temps pour respondre, puis chacun considere meurement en particulier ce qui a esté proposé, & donne par escrit la responce, qui n'estant pas au contentement du Prince, l'affaire ne se termine pas, veu qu'on essaye de persuader la chose: mais si cela ne se peut finalement, il faut que le Prince l'endure, & remette l'affaire à vn meilleur temps.

Encor que le principal gouuernement, & toutes les preeminences plus substantielles de la seigneurie soient en la personne du Prince, toutesfois toutes les villes, & les lieux voisins ont vne administratiō particuliere, & vne tres-grāde liberté avec leurs loix, coustumes, & priuileges.

Ces loix, coustumes, & priuileges ont vne grande difference, pource que leldits pays ont esté possedez durant plusieurs siecles par diuers Princes, & ont combattu mesme bien souvent entr'eux avec des haines du tout mortelles, & mesmes ils different en poids, mesures, & mœurs, & qui est de tres grande importance, ils sont differens de langage, qui est vne chose si incompatible, que l'Empereur Charles V. ayant plusieurs fois mis en deliberation, quel moyen il y auroit de reduire ces Estats en vn seul corps, & leur donner le nom & la forme d'un Royaume, il ne fut iamais possible d'en trouver le chemin. Mais avec toute ceste diuersité, ils conuiennent tous aux qualitez des membres qui font vn corps, veu que l'Estat de toutes les villes, & places a vn gouuernement particulier, qui ne differe en autre chose qu'au nombre de ceux qui se meslent du gouuernement, & cecy naist de ce qu'un lieu est plus grand que l'autre.

Le gouuernement particulier de chaque ville signalee est composé de 4. membres. Nous nommerons le premier en nostre langue Seigneurie nouuelle, & cecy comprend tous les Magistrats grands, & petits qui sont en charge. Le second est la vieille Seigneurie, qui comprend tous ceux qui ont esté en quelque Magistrat ou charge d'importance. Le 3. est nommé la Bourgeoisie, qui consiste en autant de Capitaines, qu'il y a de ruës en la ville. Anuers en a 16. Le quatriesme membre embrasse tous les chefs des mestiers, appelez Doyens qui sont aussi diuers en nombre selon les villes. Anuers en a 54. & de tous ces quatres membres est composé le gouuernement particulier. L'exēple de cecy sera le gouuernement de la ville d'Anuers, duquel les autres ne different que fort peu, ou point, si ce n'est touchant le nombre.

La façon de former le gouuernement particulier en la ville d'Anuers est donc telle. La seigneurie presente, nomme 9. gentils-hommes, & 9. autres sont nommez par les Capitaines des ruës, qui sont au nombre de 18. A cecy l'on adioust la seigneurie qui est à lors en authorité, qui peut aller iusqu'à pareil nombre de 18. si bien qu'ils sont en tout 39. qui aspirent à la future seigneurie. Tous ces noms sont enuoyez au Prince, qui en eslit 18. & ceux-cy sont appelez Schemats, qui veut dire Senateurs, qui ont authorité d'eslire deux Bourg-maistres qui sont autant que deux Consuls, dont l'un traite avec le Prince ou les autres Estats, les affaires de son pays, & l'autre qui demeure dans la ville a le soing du gouuernement, donnant audience aux Bourgeois, & aux estrangers. De sorte que le Magistrat de la ville d'Anuers consiste en 18. Schemats, & vn Bourg-maistre, qui a grande authorité tant aux choses civiles que criminelles: mais pour l'execution de la iustice, il y a deux Lieutenans du Prince, l'un pour le criminel qu'ils nomment Scultet, l'autre pour le civil appellé Amman, qui sont des charges que le Prince donne, & ceux-cy precedent tous les autres. L'office du Scultet, est de faire prendre les delinquans, en demander iustice au souverain Magistrat, & executer apres les sentences qui en resultent.

L'office de l'Amman est d'ouyr les causes civiles, demander aux seigneurs qu'ils expedient, & facent iustice, & donnent les sentences aux despens de ceux qui plaident.

Ce mesme Magistrat souverain eslit sans interuention du Prince, ny de ses Commissaires, quelques Magistrats inferieurs, & entre les autres deux Tresoriers nobles de la domination du peuple, & vn Receueur du peuple à la nomination des nobles, & ces officiers exigent, & despensent les deniers du public par ordonnance du susdict souverain Magistrat, qui cree encore les Conseillers populaires

qui sont à Anvers au nombre de 12. tous du nombre des Doyens des mestiers, comme des mariniens, boulangers, iardiniers, forgerons, & semblables, & en la seigneurie de Malines le Magistrat est diuisé par esgale portion, pour ce que des 12. Senateurs ou Schemats, il y en a six nobles, & six autres du nombre des Doyens des mestiers, & les plus honorables sont les poissonniers, les bouchers, les boulangers, les iardiniers, & les brasseurs de biere. Ces Conseillers populaires vont au Conseil comme les autres seigneurs, escoutent les requestes des supplians, & en dient leur aduis, non seulement vivement, mais encor seditieusement lors qu'on traite de desbourcer quelque argent qui doit venir entre les mains des gentils-hommes, veu que ceste sorte d'hommes n'est capable de proceder avec grauité, & moderation au degré de la superiorité, de maniere que l'insuffisance, l'insolence, & l'instabilité du peuple & la perpetuelle jalousie que ces Conseillers populaires qui se trouuent puissans à cause du grand nombre d'hommes qui les suit, nourrissent contre les gentils-hommes, ont causé tant de dangereuses reuoltes en tout temps, & sous tous les Princes, ven que de 36. qui ont dominé depuis Loys de Harlembec premier Comte de Flandres, tous ont essayé quelque rebellion, excepté trois seulement.

De ces bonnes villes, il y en a qui ont vne bonne quantité de reuenus publics, & celle d'Anvers entre autres a 250. mil escus de reuenue par an. Mais celle-cy & les autres estoient fort endebtees en l'an 1556. & il faut croire qu'à cause des guerres continuelles elles sont encor plus auourd'huy, principalement à raison du defaut de l'industrie des arts, & de la marchandise, fondement principal de tous les Estats de Flandres, & Anvers seul perd tous les ans chose qui ne se peut estimer, à cause que les troubles ont interrompu tout son commerce. L'autorité des Seigneurs qui ont des chasteaux, terres & autres iurisdiccions, est fort limitee, veu qu'ils ne peuvent opposer leurs vassaux en aucune chose, ny accepter d'eux des presens volontaires sans expres consentement du Prince, ains les Seigneurs laissant aux peuples le gouuernement selon leurs loix, & coustumes, iouissent des tiltres & biens seigneuriaux avec toute modestie. Il est vray qu'il y a des Seigneurs, qui ont quelques particulieres iurisdiccions tellement absolues qu'en ce ils ne recognoissent autre supérieur que Dieu seul.

L'Estat Ecclesiastique est fort puissant & riche par tout le pays, tellement que pour arrester la grandeur de ces richesses, afin qu'elles ne creussent pas dauantage, Charles V. fit vne loy qui portoit qu'aucun Ecclesiastique ne pourroit acheter des biens immeubles sans expresse licence du Prince, & aux subsides qui luy sont payez, le Clergé paye sa part separément, & les conuentions que le Prince de ce pays a avec le Pape, sont presque semblables à celles de France, veu que c'est luy qui nomme, & le Pape qui confirme les Prelats, & aucun rescrit ne s'exécute sans le bon plaisir du Prince, & outre cela par commission du Pape, il ne peut tirer ses subiects hors de l'Estat pour aucune cause, ains il faut qu'il mande des Commissaires deputez par ces lieux, pour quelque cause qui se doie debattre. Les tiltres extraordinaires que le Prince de ces Estats a, sont Chanoines de S. Seruais, & Abbé de S. Geltrude, qui est vn fameux Monastere de Religieuses. Il se nomme aussi Vicair perpetuel del'Empire en toute la Frise, iusques au pays qui se nomme Bethmarie aux confins de Dannemarc, qui est vne preeminence obtenue par Maximilian, de l'Empereur Frideric son pere, tant pour soy que ses successeurs.

R E L I G I O N.

EN tous les Estats de l'Archiduchesse on ne voit autre exercice que celui de la religion Catholique, mais il ne faut pas croire pour cela qu'il n'y ait point de personnes qui suivent l'opinion de Luther & de Calvin, veu qu'il n'y a guiere de villes, au moins de celles qui se sont iadis reuoltees, où il ne se trouue beaucoup de telles gens. Mais ils n'osent faire paroistre leur opinion se voyans bridez & prests à estre punis si la chose estoit sceue. Quant à ceux qui embrassent veritablement, & non par apparence seulement la Religion Catholique, ils sont si affectionnez à la foy, qu'ils tiennent qu'il est impossible de les en tirer, & mesme il semble que le voisinage des Lutheriens, & Calvinistes leur apporte plus d'ardeur & de zeile.

Archeueschez & Eueschez des Pays-bas.

Quant à l'Estat Ecclesiastique de tous les Pays-bas en general il est composé de trois Archeueschez & quinze Eueschez. A sçauoir l'Archeuesque de Cambray a sous luy les Eueschez d'Arras, Tournay, S. Omer, & Namur.

L'Archeuesché de Malines a sous luy les Eueschez d'Anvers, Gand, Bruges, Bossedue, Ipre, Ruremonde.

L'Archeuesque d'Vtrecht a sous luy les Eueschez de Harlem en Hollande, de Deuenter en

en Gueldre, de Mildebourg en Zelande, de Leuwarden & de Groningue en Frise.

L'Archeuesché de Cambray fut erigé par le Pape Paul IV. en l'an 1561. car auparavant ce n'estoit qu'un Euesché, & le premier Euesque fut nommé S. Diogene Grec de nation, il fut sacré Euesque de Cambray à Arras, par l'Archeuesque de Reims en l'an 390. & ont esté tousiours depuis les deux Eueschez conioints sous vn mesme Euesque, iusques en l'an 1094. en laquelle année ils furent separez, & l'Euesché de Cambray comprend sous sa Iurisdiction les villes de Cambray, Mons, Condee, Athee, Queinoy Landrecy, Auesnes, Biuche, Beaumont, Brenne, Soignes, Manbege, Chimay, & presque tout le pays de Haynault, Cambresis, & quelque peu de l'Artois, vne partie des villes de Valenciennes, & Tournay.

Le Clergé d'Arras apres auoir longuement poursuiuy la separation, finalement obtint du Pape Urbain XI. son Euesque particulier, en l'an 1094. l'Euesque a sous sa Iurisdiction les villes d'Arras, Douay, Bethune, Bapaume, Lens, Armentieres, Bouchain, la Bassée, vne partie de Valenciennes, avec plusieurs bourgs & villages.

L'Euesché de Tournay fut erigé l'an de grace 480. & quelques temps apres fut ioint à l'Euesché de Noyon, & ont bien esté ioints ensemble 600. ans sous vn mesme Euesque, tellement qu'en l'an 1123. la separation fut accordée par l'Euesque de Noyon, & quitta l'Euesché de Tournay. Saint Bernard s'employa fort vers le Pape Eugene pour obtenir la separation d'iceux.

L'Euesché de S. Omer a esté erigé par le moyen que la ville de Teroüenne étant demolie par l'Empereur Charles V. l'an 1553. le reuenue de l'Euesché de Teroüenne fut diuisé en trois, à sçauoir vne partie à l'Euesché de Boulongne pour la France, vne autre partie à l'Euesché de S. Omer pour l'Artois, l'autre partie à l'Euesché d'Ipre pour la Flandre. Partant l'Eglise Collegiale de saint Omer fut erigee en Cathedrale l'an 1559. ayant sous sa Iurisdiction dix villes, à sçauoir S. Omer, Aire, Hesdin, Grauelinge, &c. avec plusieurs villages tant en Artois qu'en Flandres, de 42. lieües en longueur, & 39. en largeur.

L'an de grace 1559. l'Eglise Collegiale de saint Rombaut à Malines fut erigee en Metropolitaine, outre les Eueschez qui sont sous elle, furent assignees 17. villes, Malines, Louvain, Bruxelles, Tillemont, Lande, Diste, Arscot, &c. avec plusieurs villages, comprenant en longueur 60. lieües, & en largeur 30.

L'Eglise Collegiale de nostre Dame d'Anuers fut en l'an 1115. erigee en Cathedrale avec la Iurisdiction Episcopale sur 7. villes, à sçauoir Anuers, Liere, Berghes, &c. plusieurs villages iusques à 56. lieües en longueur, & 30. en largeur.

L'Eglise Collegiale de S. Iean de la ville de Gand en l'an 1559. a esté erigee en Cathedrale, contenant en son Diocese quatre villes, Gand, Audeuarden, &c. & plusieurs villages, en longueur 46. lieües, & 24. en largeur.

L'Eglise Collegiale de S. Iean l'Euangeliste à Boisleduc en l'an 1559. fut changee en Cathedrale, ayant sous soy dix villes, Boisleduc, Helinont, Bomel, & avec plusieurs villages de 60. lieües en longueur, & 30. en largeur.

L'Eglise Collegiale de saint Donat à Bruges en l'an 1559. fut changee en Cathedrale, comprenant sous soy 9. villes, à sçauoir Bruges, l'Ecluse, Ardembourg, &c. avec plusieurs villages de 54. lieües en longueur, & 15. en largeur.

Le Monastere des Chanoines reguliers en l'Eglise de S. Martin à Ipre en l'an 1559. a esté erigé en vne Eglise Cathedrale de Chanoines seculiers, contenant sous sa Iurisdiction Episcopale dix villes, Ipre, Dunkerke, Furnes, &c. avec plusieurs bourgs & villages de 54. lieües en longueur, & 23. en largeur.

L'Eglise Collegiale dressée en l'honneur du S. Esprit à Ruremonde en l'an 1559 fut changee en Cathedrale avec la Iurisdiction Episcopale sur dix villes, Ruremonde, Nimegué, Zutphes, Vennelo, &c. & plusieurs villages de cinquante lieües en longueur, & 3. en largeur.

L'Euesche d'Vtrecht l'an de grace 690. fut erigee par le Pape Sergius, & fut erigee en Metropolitaine l'an 1561. & a sous soy les Eueschez cy-dessus dictes. Quant aux limites de son Euesché particulier d'Vtrecht, il comprend tout le territoire d'Vtrecht, & vne partie de Hollande & Gueldre, avec les Seigneuries de Buren, Culembourg, Vianen, &c. où sont comprises 30. villes avec plusieurs villages de 90. lieües en longueur & 40. en largeur.

L'Eglise parochiale de S. Bauon en Harlen fut en l'an 1559. erigee en Cathedrale, ayant sous sa Iurisdiction 12. villes en Hollande, & plusieurs villages de nonante lieües en longueur, & 30. en largeur.

L'Eglise Collegiale de S. Leuin à Deuêter fut en l'an 1559. erigee en Cathedrale avec la Iurisdiction de 25. villes, & plusieurs villages de 72. lieües en longueur, & 46. en largeur.

Ccc iij

L'Eglise Collegiale de S. Pierre à Middelbourg fut en l'an 1559. changee en Cathedrale, ayant sous sa Jurisdiction dix villes, avec plusieurs villages de 56. lieues en longueur, & de 33. en largeur.

L'Eglise Parochiale de S. Vir à Leuwarden fut en l'an 1559. changee en Cathedrale avec la Jurisdiction de dix villes, & plusieurs villages contenant 72. lieues en longueur, & 50. en largeur.

L'Eglise Parochiale de S. Martin à Grouninge fut en l'an 1559. erigee en Cathedrale, comprenant sous sa Jurisdiction tout le territoire de la ville qui est de tres-grande estendue, avec les Isles de Rollinghe, & Borchin.

Auiourd'huy que les Estats des Prouinces vnies occupent l'Euesché d'Vtrecht, & autres Eglises suiuentes, ils ont avec le changement de Religion confondu l'ordre hierarchique quel'Eglise Romaine y auoit estably.

LES SEIGNEURS ET COMTES DE FLANDRES.

LYderick dit le Buc fut fait le premier Forestier du pays & contree de Flandres, l'an de l'Incarnation 621. par Dagobert Roy de France, pour luy & ses successeurs, & gouverna le pays 52. ans, mourut de son aage l'an 92. & l'an de l'Incarnation 692.

Anthoine II. fils Lyderick, succeda à son pere l'an 692. au gouvernement de Flandres. En ce temps les Gots, Vvandales, Huns, & autres telles gens barbares & estrangers, se mirent à courir & piller le plat pays sans aucune resistance dudit Forestier, lequel se retira en France avec les siens.

Bouchart fils 3. de Lyderick dit Buc par le trespas d'Anthoine son frere fut priué de l'Estat de Forestier de Flandres, par Theodore Roy de France, toutesfois luy octroya la seigneurie de Halebecke. Le pays de Flandres fut derechef ruiné par les Huns, Gots, Vvandales, & autres nations descendues pour la 2. fois, tellement que la pluspart de la Flandre demeura desolée & inhabitee enuiron cent ans.

Estorede ou Estoreyt fils de Bouchard fut par le decez de son pere & mere Prince de Louvain, seigneur de Halebecke, & Forestier de Flandres, il deceda l'an 792.

Lyderick Prince du Buc, fils d'Estorede, ayant espousé vne noble Dame d'Allemagne nommée Flandrine, de laquelle le pays a pris son nom. Cestuy-cy fust ordonné grand Forestier, par Charles le Grand, pour en son nom nettoier les chemins, & la contree des voleurs & brigands, dequoy il s'acquitta vertueusement, à cause dequoy il fut inuesti premier Comte d'Halecke. Il gouverna comme Prince vertueux ce pays 44. ans sous les Roys de France, Charlemagne & Louys Debonnaire son fils, & trespassa l'an 836. il estoit fort bon Chrestien: il fit venir plusieurs Euesques, Pasteurs, Prestres & gens sçauans pour conuertir les Payens qui y restoient encore en grand nombre.

Inguelran ou Inguerran fils de Lyderick deuxiesme succeda à son pere au gouvernement de Flandres, & au Comté d'Halebecke l'an 836. vesquit sous le Roy de France Loyus Debonnaire & Charles le Chauue, ausquels il fit hommage de ses terres & seigneuries, il fit rebastir & edifier plusieurs villes, chasteaux & edifices ruinez, trespassa l'an 832. ayant gouverné vingt quatre ans.

Odoacre ou Audacre fils de Inguerran, succeda à son pere au gouvernement de Flandres l'an huit cents cinquante deux, gouverna vnze ans, fit semblablement reparer plusieurs villes, & enuironner la ville de Gand de murailles, deceda l'an 861.

Baudouin surnommé Bras de fer, fils dudit Odoacre, à cause de sa magnanimité; & de ses faits excellens. Il emmena par force la belle Iudith veufue du Roy Edouard Roy d'Angleterre, fille de Charles le Chauue Empereur, & Roy de France, qui fut cause qu'il fut quelque temps sans pouoir obtenir grace de l'Empereur qui s'adoucit finalement, & le fit premier Comte de Flandres, & luy donna pour douaire tout le pays de Flandres; reseruant toutesfois à soy & à ses successeurs la souueraineté dudit Pays, apres auoir gouverné la Prouince de Flandres 25. ans en qualité de Forestier, & 15. ans comme Comte, il trespassa en la ville d'Arras, l'an 877. ou selon aucuns 879.

Baudouin le Chauue, fils de Baudouin bras de fer, fut secōd Cōte de Flandres, il obtint plusieurs victoires cōtre les Danois & Normāns, il trespassa en l'an 919. & gist à S. Pierre lez Gand.

Arnould le vieil surnommé le Grand, fils aîné de Baudouin le Chauue, fut III. Comte de Flandres l'an 919. il eust grande guerre contre la maison de Normandie, avāt fait tuer le Duc Guillaume, dit lōgue espée, estāt âgé de 20. ans il mourut l'an 964. & gist à S. Pierre lez Gād.

Baudouin le Jeune troisieme du nom, & quatriesme Comte de Flandres, deuint par transport volontaire de son pere, estant fils unique Comte de Flandres, apres auoir gouverné trois ans, trespassa en l'an 967. & gist à saint Bertin.

Arnould le Jeune, II. du nom, fils vnique le Baudouin le Jeune, V. Comte de Flandres print le gouvernement l'an 968. lequel trespassa d'une fièvre chaude à Gand, le 13. May l'an 988. gist à S. Pierre lez Gand.

Baudouin à la belle barbe, IV. du nom, sixiesme Comte de Flādres, fils aîné d'Arnould le Jeune, au commencement de son gouvernement, il eut guerre contre l'Empereur Henry II. il estoit vaillant homme, & pour ce l'Empereur l'aymoit, & luy donna la Vvalachie, & les Isles de Zelande, pour luy & ses hoirs, & de là vint vne longue guerre entre les Flamans & Hollandois, apres auoir gouverné le pays l'espace de 46. ans, & trespassa l'an 1035. gist à S. Pierre lez Gand.

Baudouin V. du nom dit Debonnaire, ou de l'Isle, fils vnique de Baudouin à la belle barbe, fut le septiesme Comte de Flandres, il eust en son temps guerre contre l'Empereur Henry III. & apres auoir gouverné le pays l'espace de trente trois ans trespassa en l'an 1067. & gist à S. Pierre.

Baudouin VI. du nom, dit de Mons, surnommé aussi le Paisible, huictiesme Comte de Flandres, fils aîné de Baudouin V. du nom, il ne porta oncques armes ny espee, son gouvernement fut fort paisible, & trespassa l'an 1070.

Arnould le Simple III. de ce nom, neufliesme Comte de Flandres, fils aîné de Baudouin de Mons, il fut grandement trouble par son oncle Robert le Frison, qui sous couleur d'entendre à la tutelle de ses nepueux les priua de leur succession, & lequel hazarda deux batailles contre son oncle, dont en la dernière fust occis l'an 1071.

Robert I. de ce nom surnommé le Frison, dixiesme Comte de Flandres, fils puisné du Comte Baudouin V. du nom, apres la mort d'Arnould le Simple en la bataille, & son frere Baudouin avec sa mere Richilde, en fuite en Haynault, print ledit Comté sans resistance aucune: deceda l'an 1077.

Robert le Jeune Frison, surnommé de Ierusalem, vnziemesme Comte de Flandres, fils aîné du Comte Robert I. succeda l'an 1077. se croisa contre les infideles, allant en France au couronnement du Roy Louys, passant le pont de Nelle pres Meaux, son cheual trebuchât il tomba dessous, dont le troisiemesme iour apres il mourut l'an 1111. gist à saint Vast d'Arras.

Baudouin VII. de ce nom surnommé la Hache: II. Comte de Flandres succeda l'an 1111. il fust bon iusticier & mourut 1119. ayant constitué auant son trespas, & par son testament son heritier Charles de Danemark son cousin fils de Canut Roy de Danemarchk, gist à Bertin.

Charles I. de ce nom, surnommé le Bon, treiziesme Comte de Flandres fut auant le trespas de son cousin Baudouin institué son heritier, & prit le gouvernement l'an 1119. merita le nom de Bon par le moyen de ses vertus & sainte vie. Bannit les Iuifs de la Cour de Flandres. Il deceda sans hoirs l'an 1121. & gist à S. Christophe à Bruges.

Guillaume de Normandie XIV. Comte de Flandres, seul heritier de Normandie, toutesfois priné de son heritage & Duché de Normandie par son oncle Henry Roy d'Angleterre. Fut institué en ladite Comté l'an 1128. par Louys le Gros Roy de France: à son aduenement il s'estoit porté modestement. Mais si tost qu'il pensa estre asseuré, il deuint cruel & tyran, qui fut la ruine: Car en son lieu les Nobles & Estats de Flandres esleurent Thierry Comte d'Elface, fils de Thierry d'Elface & de Madame Getruë de Flandres, fille de Robert premier dit le Frison, ce qu'il voulust empescher à force d'armes, & fut tué au siege d'Allost l'an mil cent vingt-neuf, gist à Bertin.

Thierry d'Elface XV. Comte de Flandres, fut par les Prelats, Nobles, & peuple de Flandres receu à la Comté. Il estoit Prince merueilleusement subtil, vaillant & discret, il fit quatre voyages en la terre Sainte, & auant que faire le quatriemesme voyage il inuestit son fils aîné Philippes du Comté de Flandres, & estant de retour, luy en laissa le gouvernement, & se retira au Monastere de Vvatene qu'il auoit fondé, deceda aagé de 69. ans l'an 1168. gist à Vvatene.

Philippes d'Elface fils aîné de Thierry, surnommé le Grand, parcellion de son pere, fut le XVI. Comte de Flandres, il fut Prince fort prudent, fit deux voyages en Syrie au secours du Roy de Ierusalem son cousin, il mourut à son dernier voyage deuant Aire, & fut par le commandement de sa femme inhumé à Cleruaut, & mourut sans hoirs apres auoir gouverné la Flandre 22. ans ou enuiron.

Baudouin VIII. du nom Comte de Haynault & de Namur, XVII. Comte de Flandre de par sa femme Marguerite d'Elface seur de Philippes d'Elface, succeda par le trespas de son beau-frere en l'annee 1192. il estoit descendu en droite ligne de Baudouin dit de Mōs, expulsé par Robert le Frison son oncle. Il eut guerre contre Thiery de Beuues Comte d'A-

loft, contre Henry Comte de Namur, & contre le Comte de Neuers. Il deceda l'an 1395. gist à Mons en Haynault, en l'Eglise S. Vaudru.

Baudouin dit de Constantinople IX. du nom XVIII. Comte de Flandres, succeda au Comté de Flandres l'an 1194. & au Comté de Haynault, par ainsi ladite Comté de Flandres retourna à son vray & legitime heritier, qui auoit esté iniustement possedee par Robert le Frison, & ses successeurs depuis l'an 1072. que ledit Robert défit à la iournee de Cassel, Arnault, qui estoit vray Comte de Flandres, & en chassa Baudouin depuis Côte de Haynault frere dudit Arnould, iusques à ceste année 1194. Il fut esleu Empereur de Constantinople, & en l'an mil deux cens cinq, fut pris par le Roy de Bulgarie, & enuoyé en Turquie: gist en Grece.

Ferdinand de Portugal fils du Roy Sanche de Portugal Comte XIX. de Flandre de par sa femme Dame Ieanne Comtesse & heritiere dudit pays, fille aisnee du Comte Baudouin IX. du nom. Il eut rude guerre contre Philippes Auguste Roy de France, & fut pris à la iournee du Pont à Bouines, & mené prisonnier au Louure à Paris, où il fut 12. ans. Finalement eslargy, peu apres il trespassa l'an 1232. gist à Margiettes.

Thomas fils puiné du Comte Thomas de Sauoye, fut aussi à cause de sa femme Ieanne XX. Comte de Flandres pour vn temps, & mourut sans hoirs.

Ieanne Comtesse de Flandres & de Haynaut, fille aisnee de Baudouin dit de Constantinople, succeda au gouuernement desdits Comtez l'an 1195. lors aagée de 7. ans, sous la tutelle de son oncle Philippes Comte de Namur, iusques à ce qu'elle espousa Ferdinand de Portugal: elle mourut l'an mil deux cens quarante trois & gist à Margiettes aupres de son premier mary.

Marguerite seconde fille de Baudouin IX. du nom Empereur de Constantinople, succeda par le trespas de Dame Ieanne sa sœur es Comtez de Flandre & Haynault: estant veufue de son deuxiesme & dernier mary. Or estans sous la tutelle de Bouchart ou Bouchard d'Auesnes, fils de Iacques d'Auesnes, yssu d'une noble & ancienne maison de Haynault, Treuost & Chanoine de saint Pierre de l'Isle son parent, lequel estant aueuglé de la beauté de sa pupille, fit tant à cause de sa ieunesse qu'il la deceut & suborna, & dont elle engendra de luy deux enfans masles, & depuis elle espousa Guillaume de Bourbon seigneur de Dampierre & de saint Disier, frere d'Archambault seigneur de Bourbon, duquel elle eust aussi trois fils & vne fille qu'elle prefera aux deux premiers illegitimes, quant à la succession de la Comté de Flandres tenant les deux premiers pour bastards, ce qui luy donna beaucoup de troubles & de fascheries, par ainsi elle establit heritiers les enfans de Dampierre, & trespassa l'an 1279. gist à Flines.

Guillaume dit de Dampierre fils aisné de Guillaume Dampierre & de Dame Marguerite Comtesse de Flandres, par l'accord & transaction passée avec Iean d'Auesnes Comte de Haynault son frere illegitime, obtint le tiltre de Comte de Flandres, & fut le XXI. Comte: Il se croisa, & fut outre mer avec le Roy Louys: à son dernier voyage il fut pris prisonnier des Turcs ou Sarrazins, dont il paya grosse rançon, estant de retour il deceda peu apres l'an mil deux cents cinquante & vn: gist à Flines, ayant gouuerné ses pays trois ans, il mourut sans hoirs.

Guy de Dampierre second fils de Guillaume de Bourbon seigneur de Dampierre & de Marguerite Comtesse de Flandres fut le vingt. deuxiesme Comte de Flandres il estoit Prince sage & vertueux, mais il se fioit trop à ses amis dont il luy en prit mal: il mourut prisonnier à Compiègne aagé de plus de quatre vingt ans, l'an mil trois cens quatre, gist à Flines, ayant gouuerné 54. ans.

Robert III. de ce nom surnommé de Bethunes, pource qu'auant qu'estre Côte il estoit Seigneur de Bethunes, fut le vingtroisiesme Comte de Flandres, Prince vertueux & hardy: il remit au Roy de France les villes de Lille & de Douay, il alla en Sicile avec Charles Roy de Sicile, & Duc d'Anjou son beau pere, contre le bastard Manfred, lequel il tua de sa main propre: il mit à mort Iolente de Bourgongne sa seconde femme, avec la bride de son cheual, pource qu'elle auoit empoisonné Charles son fils du 1. mariage, il deceda en l'an 1322. en la ville d'Ipre, aagé de 82. ans, & gist à S. Martin audit Ipre.

Louys de Neuers dit de Cressi, pource qu'il fut tué à la bataille de Cressi, fils unique de Louys Comte de Neuers, & de la Comtesse de Rethel, succeda à son pere & mere es Comtez de Neuers de Rethel, & aussi à la Comté de Flandres à Robert de Bethunes son ayeul paternel en l'an 1322. (nonobstant que Robert dit de Castel son oncle paternel, se voulut saisir de la Comté de Flandres) & trespassa en l'an 1346.

Louys dit Malain ou de Masle, pource qu'il fut né à Male en la Comté de Flandres, fils unique

vnique de Louys de Neuers de Cressi, succeda en l'an 1346. és Comtez de Flandres, Rethel, & Neuers: & par le deceds de sa bisayeule maternelle, aux Comtez d'Arras, & de Bourgongne, Prince vrayement courageux & bellicueux, mais vn peu trop vindicatif, ayant gouuerné trente huict ans fut tué par le Duc de Berry pour quelque différent pris par ensemble sur la Comté de Bolongne. Il mourut l'an mil trois cens octante quatre, gist à saint Picot à Lille.

Philippes de France surnommé le Hardy, fut 4. fils de Iean de Valois Roy de France & frere germain de Charles V. par le don desquels il fut Duc de Bourgongne, & apres par alliance de mariage Marguerite fille vnique & heritiere vniuerselle du Comte Louys Malain, fut X X V I. Comte de Flandres, Duc de Brabant, Comte d'Artois, de Bourgongne, & Seigneur de Salins & Malines. Il eut grande autorité en France, pource qu'il estoit Prince tres sage, & trespassa à Haut l'an 1404. gist à Dijon en Bourgongne.

Iean Duc de Bourgongne fils aîné de Philippes Duc de Bourgongne & de Marguerite Comtesse & heritiere de Flandres, &c. succeda en la Duché de Bourgongne, és Comtez de Flandres, Artois, & Bourgongne, & Seigneuries de Salins & Malines, l'an 1404. il estoit homme de petite stature, mais de grand courage, il chastia les Liegeois. Il fut tué sur le pont de Montreau sur Yonne l'an 1419. il gouuerna ses pays 15. ans: il gist aux Chartreux lez Dijon en Bourgongne.

Philippes dit le Bon pour les admirables vertus qui estoient en luy, fut fils vnique de Iean de Bourgongne Duc de Bourgongne Comte vingt-huictiesme de Flādre, d'Artois, de Bourgongne, Palatin, Seigneur de Salins, de Malines: fit alliance avec les Anglois pour mieux vanger la mort de son pere, ce qui causa de grandes guerres en France. Il chastia les rebelles de Gand, & subiuga les Liegeois, ruina Dinant, ioignant à sa maison les Duchez de Brabant, de Luxembourg & Limbourg, & les Comtez de Hollande, Zelande, Haynault, & Namut, estant pour lors la maison de Bourgongne en supreme grandeur & autorité, institua aussi le noble ordre de la Toison d'or l'an mil quatre cés dix-neuf: mourut aagé de 72. ans l'an mil quatre cents septante & sept en la ville de Bruges, gist à Dijon.

Charles appelé en sa ieunesse Comte de Charolois fils vnique legitime du bon Duc Philippes, succeda à son pere en la Comté de Flandres, & fut le 29. & fut en general heritier de la maison de Bourgongne, Prince tres-hardy & bellicueux, lequel du viuant de son pere mena vne grosse armee deuant Paris, il chastia les Liegeois rebelles à leur Euesque son cousin. Sur la fin de son aage il perdit trois batailles: la premiere à Morat en Suisse: la seconde à Grangi, la troisieme à Nancy, où il perdit la vie en l'an 1476: gist à Bruges en l'Eglise Nostre Dame.

Maximilian surnommé Cœur d'acier, d'Archiduc d'Autriche, fils de l'Empereur Federic troisieme, espousa, au desceu du Roy Louys vnziesme, Madame Marie fille vnique, & heritiere de la maison de Bourgongne. Il fut pris prisonnier à Bruge par les Flamands, & detenu l'espace de neuf mois, & fut deliuré pour la crainte qu'on eut de son pere qui marchoit à grande puissance pour le secourir: il trespassa l'an mil cinq cents dix-neuf, gist à Nieuustat en Allemagne.

Philippes dit Croit-conseils, fils aîné de l'Archiduc Maximilian, qui fut Empereur de Rome, succeda en toutes les Duchez, Comtez, & autres Seigneuries delaisées par le trespas de sa mere l'an mil quatre cents octante & deux, estant encore bien ieune sous la tutelle de son pere, & endura la Comté de Flandres beaucoup de maux. Ce Prince combien qu'il fust ieune, estoit de bon entendement, & deceda fort ieune en Espagne, non sans grand soupçon d'auoir esté empoisonné l'an 1505. son pere encore viuant, & gist à Grenade.

Charles V. Empereur de Rome, Roy d'Espagne, fils aîné de Philippe Archiduc d'Autriche, Duc de Bourgongne, & Comte de Flandres, &c. succeda à son pere l'an 1505. en tous les biens & seigneuries delaisées par le trespas de son dit pere, Prince vrayement digne de memoire, il fit plusieurs actes memorables trop longs à reciter: il trespassa en Espagne l'an 1558. & gist à Grenade.

Philippes fils vnique de l'Empereur Charles le Quint nasquit le vingt-vniesme May mil cinq cents vingt-sept, fut inuesty du viuant de l'Empereur son pere, de toutes les Duchez, Comtez, & autres Seigneuries des Pays-bas, estant aagé de 22. ans, à sçauoir l'an mil cinq cents quarante neuf, & depuis apres la mort de son pere Roy d'Espagne, &c. enuoya diuers Gouverneurs és Pays-bas, sous lesquels il y a eü de grandes guerres ciuiles, tant pour la religion, que pour les priuileges de chacune Prouince: tellement qu'une partie d'icelles se sont soustraites de son obeyssance, s'estans vnies ensemble sous pretexte de leurs priuileges, & de leur religion. Finalement, se sentant sur le declin de sa vie en May 1598. donna en mariage.

la fille aînée Isabelle Claire Eugenie à l'Archiduc Albert d'Autriche son nepueu, & en faveur du mariage, leur donne tous les Pays-bas en general, la Comté de Bourgogne, & de ceda le 13. Septembre 1598. aagé de 72. ans.

Albert Archiduc d'Autriche & Isabelle Claire Eugenie suiuant leur donation que si' insereray cy apres, prennent posselliõ des Pays-Bas, qui estoient sous l'obeissance de Philippe second pere de ladite Isabelle & du consentement de Philippe troisieme Roy d'Espagne, rachent par douceur de réunir tous les Pays-Bas en leur obeissance, l'Archiduc escrit à ceste fin lettres aux Estats des Prouinces vnies. Ce que ne pouuant effectuer vient à la force, & apres auoir fait la guerre à route outrance par l'espace de neuf ans ou enuiron se resolut de rascher à auoir la paix à quelque prix que ce soit, enuoye par deuers les Estats pour cet effect: pareillement les Roys de France, d'Angleterre s'y employent: finalement il fait trefue avec eux, & iouit paisiblement par ce moyen des Prouinces & Villes cy-deuant deduites l'espace de douze années.



DISCOVRS



DISCOVRS
DES ESTATS GENERAUX
DES PROVINCES VNIES DES PAYS
Bas, & de ce qu'ils tiennent.

SOMMAIRE.

1. **D**ENOMBREMENT & description des pays & terres qu'occupent & tiennent les Estats des Provinces Unies des Pays-bas.
2. Situation de l'Isle de Zelande, & autres voisines, leurs confins & estendue.
3. Description de la Hollande, & ses principales villes, entre autres d'Amsterdam.
4. Du Duché de Gueldre, & ses villes.
5. Des pays d'Overijssel.
6. Utrecht.
7. La Frise Orientale & Occidentale.
8. Groningue.
9. Qualité de l'air des Isles Zelande, Hollande, &c. leurs bons pasturages, & des frequents tremblemens de terre en l'isle de Hollande. De quel naturel & humeur sont les peuples de ces Isles & pays d'Utrecht, Frise, & autres Provinces: & de la procerité & grandeur de corps des Hollandois.
10. Richesse grande des Estats des Pays bas, procédante du trafic de mer, des pasturages & pesche de Hollande: de la Medecrappe, Coriande, pasturages, & fromens de Zelande, & des chevaux de Frise.
11. Les fortresses & places de deffenses que tiennent aujour'd'uy ces Provinces unies des Pays-bas.
12. Quel est le gouvernement & police de ceste republique, tant sur mer que par terre. La forme de convoquer leurs Estats & Assemblies: Comment les affaires s'y proposent & resoudent par les sept Provinces. Du conseil d'Estat desdites Provinces: de quelles personnes, & de combien de Seigneurs il estoit composé en l'annee mil six cents vingt.
13. Des Estats de la Prouince de Hollande: la forme de les assembler: quelles villes de la prouince y sont assemblees: & les points principaux pour lesquels ordinairement ils sont convoquez. Du grand Conseil & Chambres de compte, & monnoye d'icelle prouince.
14. Des Estats de la Comté de Zelande, & de quelles villes sont composéz.
15. De la Principauté & Estat d'Utrecht: ses membres.
16. De l'Estat & Seigneurie de Frise partie en trois quartiers. De la forme & lieu où se tiene leur Assemblye.
17. De l'Estat d'Overijssel, composé de trois Iurisdicctions.
18. De l'Estat & police de la ville de Groningue, & des Ommelandes, ou Iurisdicctions champêtres, distribuees en trois parties.
19. De la Religion des Provinces unies, quand, & comment le Calvinisme, & autres sectes se sont glissées en ce pays.
20. Articles de la trefue accordez, & arrestez l'an 1609. entre l'Archiduc Albert, & les Estats Generaux des Provinces unies des Pays bas.
21. Genealogie des Comtes de Hollande, Zelande, & seigneurs de Frise.

1.



D'A V T A N T que ce que l'on nomme communemēt aujourd'huy les Estats generaux des Prouinces vnies des Pays bas, est vne espece de Republique, & que le Roy d'Espagne & l'Archiduc ont traicté avec eux comme avec des Souuerains, j'ay creu qu'il seroit à propos de mettre icy au mieux qu'il me sera possible, ce que j'ay peu voir & apprendre en ceste Republique. Je commenceray donc par le denombrement des pays qu'ils tiennent, puis j'en continueray la description.

Ils possèdent aujourd'huy toutes les Prouinces de Zelande, Hollande, Frise, Vtrecht, Groningue, & les terres ou pays d'alentour, Oueryssel, Drente, la Comté de Zutphen, & trois quartiers du pays de Gueldres, avec encores quelques parcelles du pays de Brabant, & Flandres, tous lesquels pays contribuoiēt cy-deuant à la guerre.

2. L'Isle de Zelande avec les Isles voisines, sont assises entre les bouches des riuieres de Meuse & de l'Escaut, & ont pour leurs bornes du Nort la Hollande, du Leuant le pays de Brabant, du Midy la Flandre, & d'Occident la mer Germanique.

Les Isles de Zelande sont au nombre de sept, dont il y en a trois qui sont au delà des bouches de l'Escaut vers le Brabant, & le Leuant, & pour ceste cause se nomment Orientales, c'est à sçauoir Scalde, Duuelande, & Tolen: & quatre deçà l'Escaut vers l'Occident, c'est à sçauoir Vvalcheren, Zuytbeulande, Nortbeulande, Vvolserdijck. Des Isles qui sont au delà del'Escaut, la plus grande est Salde, que ceux du pays nomment Tlantuan Schouuen: son circuit est maintenant de sept milles, mais autrefois ceste Isle a esté plus grande, & seulement distinguée de la Nortbeulande par vn petit destroit. Ses principales villes sont Zirzee, & Brouershaue.

On tient que Zirzee est la plus ancienne ville de toutes celles de Zelande. Elle fut bastie l'an 1349. par vn certain Siringue.

Elle a esté longuement renommée, & en estime, à cause de son port, & d'vn grand abord de marchandise: mais depuis que son port a esté comblé de sable, elle n'est plus si riche, ny tant estimée. Brouers haue n'a presque pour ses habitans que des pescheurs, & qui vivent de la mer.

Duuelande a quatre milles pas de circuit. Il n'y a que des villages: l'an 1530. elle fut couverte des flots de la mer: mais apres qu'on eut fortifié les leuees, & mis hors la mer, ce dommage fut réparé dans peu de temps apres. Tolen est limitrophe de Brabant, & séparée par vn petit destroit.

On y void la petite ville de Tolé, d'où n'est guere esloigné l'agreable lieu de S. Martin Dijck. Au deçà del'Escaut vers le Leuant la principale Isle est Vvalkeren, qui regarde du Leuant le pays de Brabant, du Midy la Flandre, du Nort la Hollande, & du couchant l'Angleterre: c'est la capitale de toute la Zelande, aussi chacun la nomme presque Zelande, & de mille estrangers qui vont en ce pays-là, il n'y en a pas peut-estre vn qui s'en aille avec la cognoissance de son vray nom.

Elle a dix mille pas de tour: ses villes sont Middelbourg, Flessingue, Armude ou Armue, & Vere. Il y a beaucoup de villages.

Middelbourg est vne bien belle ville, où l'on void de beaux logis, principalement la maison de ville qu'ils embellissent tous les iours. Ses rues, & ses places sont fort belles.

Le lieu où les marchands & bourgeois de la ville s'assemblent tous les matins, qui est fait en cloistre, est merueilleusement agreable, & son havre est fort assésuré, & fort commode. C'est la principale de toutes les villes de Zelande, & l'vn des grands abords des marchands qui sont en tous les Pays bas.

Flessingue est vne bonne ville, & la premiere qu'on trouue en venant par mer de Calais. Et fut engagée par les Estats à la feuë Royne Elizabeth d'Angleterre, de mesme que la Briele pour quelque somme d'argent qui luy estoit deuë. Et le Roy d'Angleterre y tient encores aujourd'huy vn Gouverneur Anglois qui y a vne garnison entretenuë.

Armue a vn bon port, mais la ville est petite & pauvre, & il y a enuiron trois ans & demy qu'on auoit obligé les passagers à s'aller embarquer à Armue pour aller en Hollande, afin de rendre la ville bonne, & luy rendre son premier lustre par ce passage: car il y en a plusieurs qui tiennent que ç'a esté autrefois vne bonne ville.

Zuydbeulande a vne assez grande estenduë qui regarde les riuages de Brabant, & de Flandres, toutesfois elle a receu tant de dommages depuis quelques années, qu'elle est plus petite de la moitié.

La ville de Romersualle en semble comme arrachée, & ceste ville est toute enuironnée de

de la mer, & ne subsiste que par la negotiation du sel. C'estoit là que que les Comtes de Zelande auoient accoustumé de prester le serment. Du costé d'Occident de ceste Isle on void la ville de Goese sur vne bouche de l'Escaut qu'on nomme Scenge. C'est vne ville plus agreable que grande, & est toute seule en ceste Isle.

Norbeuelande avec la ville de Corrichene, & plusieurs villages, fut inondee du deluge qui aduint l'an 1532. toutefois on la remet peu à peu. Volferdijch est petite Isle, où il n'y a que deux villages. Et pour reprendre toute la Zelande ensemble, elle a dix villes, & cent villages ou quelque peu dauantage.

Ceste Prouince apres auoir beaucoup souffert, toutes ses villes ayans esté ou forcees par famine, ou assiegees: les leuees du pays percees, tellement qu'on passoit à basteau au plat pays, s'est en fin demeslee, sortant de misere & florissant derechef en trafic, en peuple, & en nauire, suivant leur deuise, *Luctor & emergo.*

La Hollande a pour ses bornes d'Occident la mer Britannique, du Nort la Cimbrique, du Levant vn destroit qui decouure la Frise, du Sudest le pays d'Ouerissel, & du Midy celui d'Vtrecht.

Son circuit est de soixante milles: sa largeur est fort petite, veu qu'on tient que du milieu du pays vn voyageur peut aller iusques à ses extremittez en trois heures, & mesme il y a des lieux où l'on ne compte qu'un mille, & mesme moins depuis ce milieu iusques à la mer, ou vn golfe de mer.

Ses villes sont Dordrecht, autrement Dort, Delft, Leyden, Harlem, Amstelredam, ou Amsterdam, Goude, Naerdem, Mude, Vvesop, Edem, Parmerende, Armer, Inkuse, Horne, &c. Dordrecht est la principale ville de toute la Hollande: elle est plus longue que large, & a deux fort longues rues, outre force petites qui sont des plus belles qu'on scauroit voir.

Il y a vne fort belle Eglise conuertie en Temple, où preschent ceux de la nouvelle opinion, & l'on y void aussi vn Hospital où les soldats blesez au seruice des Estats, ou deuenus bien malades, sont seruis aussi bien & proprement, qu'ils se scauroient desirer.

Harlem est grande ville, & bien bastie, où l'on void la plus belle Eglise de Hollande, qui est pres de la place.

Leyden est assis sur le lieu que Ptolomee, & Plin nomment le milieu de la bouche du Rhin. Amstelredam, est auourd'huy l'une des meilleures villes de l'Europe, & bastie sur des pilotis comme Venise. Il y a deux cens quatre-vingts ans ou environ que Giselbert Amstel la fortifia, & y fit de bons rempars, & des portes, & des tours: mais le tout ayant esté bruslé par l'enuie de ses voisins, elle commença d'estre fermee de muraille, l'an mil quatre cens octante deux.

Elle est maintenant habitee de toute sorte de nations, & a osté tout le trafic, & toute la reputation à Anuers. On y void non seulement demeurer des Italiens, Espagnols, Portugais, Anglois, Escossois, François, Polonois, Danois, Suedois, Nouergeois, Liuoisiens, & Allemands: mais encores des Indiens, Americains, & Orientaux, & des Mores. Goude est assise sur l'Isle, & est belle & riche ville.

Outre les villes que nous auons dict cy dessus, il y a la Haye, où le general de l'armee & les principaux des Estats se tiennent. Ceste Prouince du commencement des guerres a esté la plus ruinee qu'aucune autre Prouince: ses villes ont esté assiegees, prinles, bruslees, &c. Mais en fin elle est par la guerre venue à vn repos, croissant en prosperité & grandes richesses, accroissant vne partie de ses villes, & celors qu'elle a eu ses voisins pour frontiere: tellement que le peuple y est si fort accru, & il y a telle abondance de nauires, qu'il n'y a auourd'huy pays au monde qui luy soit semblable; nauigent par tout le monde, & florissent en trafic de marchandise, comme l'on peut voir quand on considere les villes d'Amsterdam, Rosterdam, Inchuse, & plusieurs autres.

La Gueldre a pour ses limites du costé du Nort la Frise, & vn golfe de la mer Germanique, nommé vulgairement Zuyderzee, du Levant la Duché de Cleues, du Midy celle de Juliers, & d'Occident le Brabant, & la Hollande.

Ceste Duché comprend vingt-deux villes, dont les principales sont Nimegue, Ruremonde, Zutphen, & Arnhem.

Nimegue est vne ville ancienne assise sur le bord de l'Oual, qui est fort profond en ce lieu. Elle est sur vn pendant du costé qui regarde la Duché de Cleues; le reste est bas.

Ruremonde est sur la bouche de la riuere de Rure, qui se descharge en la Meuse, & ceste ville est riche, puissante, & agreable. Zutphen est sur le bord de l'Issel.

Arnhem est assez bonne ville, & assise sur la bouche droicte du Rhin.

Les villes de moindre consideration sont Hatten, Elbourg, Hardenic, Vvagingus

Tiel, Bomel, Brochorst, Doufboarg, Doutcom, & quelques autres.

Ces pays icy ont beaucoup enduré: car toutes les meilleures villes qui y sont, ont esté assiegees, prises, & pillées. Voyla pourquoy aussi leur prosperité est bien petite au prix de celle des autres Prouinces. Les Archiducs possèdent en ce pays la ville de Grolle.

5. Le pays d'Oueryssele du Nort la Frise Occidentale, du Midy la Gueldre, de l'Orient la Vvestphalie, & d'Occident le grand golfe nommé Zuydsee, & la riuere d'Issel. Les villes de ceste Prouince sont Deuenter, Campen, Zuuel, Stenvrijck, Vuollenhoue, Hassle Outmarfse, & Oldefeele.

Deuenter est la principale ville, belle & bien garnie de tout ce qui luy est necessaire, & est assise sur l'Issel. Ce ne seroit iamais fait de vouloir parler des autres.

6. Quant au pais d'Vtrecht il est petit, mais la principale ville est fort belle. Ce pays a pour borne le Midy, du Nort la Hollande, & du couchant la Gueldre.

Il y a huit villes, & soixante-dix villages, ou dauantage. Ses villes sont Vtrecht capitale du pays, grande, & merueilleusement agreable, demeure ordinaire d'un grand nombre de Noblesse, Amerford, Rheen, Montfort, & Dufstad, autrefois puissantes & riches villes, mais depuis miserablemēt ruinees par les Normands. En ces dernieres guerres la ville d'Vtrecht a souffert du Duc d'Albe plus d'iniure & de tort qu'aucune autre Prouince, & mesme a esté depuis en grand danger, à cause du discord: mais estant vnies avec les autres Prouinces, reuiuent peu à peu à sa premiere grandeur & prosperité, croissant de iour en iour en trafic.

7. La Frise Occidentale, ou Vvestfrise, a pour ses limites du Septentrion, & du Couchant, la mer Oceane, du Midy l'Oueryssele, du Leuant la riuere d'Emes qui la separe de la Vvestphalie. Ses principales villes sont Leuuarde, & Groningue, combien que l'on mette la seigneurie de Groningue communément à part. La Frise Orientale a pour ses villes Emdem sur la bouche de la riuere d'Emes & Aurich, qui est de tous costez enuironné de forest.

L'Archiduc tient en ce pays vne petite ville nommee Linguien, & Oldenzeel, où il y a de bonnes forteresses & garnisons.

8. Groningue, & le pays d'alentour, avec leurs voisins, ont beaucoup souffert, la ville a esté forcee, & assiegee plus d'une fois, & les pays circouoisins ont esté gastez: mais sont maintenant en vn paisible estat, chargez toutefois d'impositions, estans pour la plus part sous contribution, laquelle ils payent aux garnisons de Linguien, & Oldenzeel: tellement que les villages ne se peuuent pas encore bien restablir. Bref le pays de Frise a beaucoup enduré & s'est tousiours porté vaillamment en la guerre, s'estant bien acquité à cōtribuer à la guerre pour les Estats vnies des Paysbas.

Neantmoins les Prouinces vnies des Pays bas sont toutes auourd'huy en meilleur estat, que les autres Prouinces, pource qu'elles ont la mer libre, & ouuerte, grand nombre de nauires, la mer Oceane du Nort, & quelques riuieres assez à commandement, les peuples en grande abondance, qui se sont venus là rendre des autres Prouinces, sous espoir de trafic & gain, & pour auoir la liberté de la Religion sans aucune recherche, mesme pour la navigation, à quoy ledit pays est fort commode, lequel s'est agrandi par la guerre, combien que cela semble estrange, & contre nature & raison, florissant merueilleusement, comme appert par ses forteresses, agrandissemens des villes, rampars, & somptueux edifices.

Q V A L I T É

L'Air de Zelande n'est guere bon, & est moins sain que celui des Prouinces voisines, principalement en Esté, à cause des marecages, & des estangs dont l'eau devient puante, & les vapeurs infectent l'air qui leur est prochain, ou bien à cause que le pays a trop peu d'arbres: toutesfois elle a ce bien, qu'elle n'est guere sujette à la peste, ny aux maladies contagieuses.

Son terroir est gras & de grand rapport, & l'on y recueille du bled plus blanc, & plus pesant qu'en tout autre pays. Il porte force lauriers qui deuiennent fort grands, & vne grande quantité d'herbes autant medicinales, que de bon goust, & propres à manger.

Il y a aussi de bons pasturages, non seulement au deça des leues, mais encores sur le bord mesme de la mer, où l'on void paistre quelques milliers de bestail.

On y void en abondance toute sorte de fruits, beaux & bien meurs, excepté le raisin qui n'y peut bien meurer.

Aussi n'y en a-il qu'en quelques treilles, où il pourroit plustost qu'il ne meure.

Quant à la Hollande on y void bien souuent trembler la terre sous les chariots, & les chevaux,

chevaux, & il est advenu vn cas qui fit voir combien ce pays est creux, & vuide, veu qu'une vache estant rōbee dans vn trou, fut trouuée morte en la mer au bout de trois iours. D'auantage vne partie de la Hollande se nomme Ouaterlande, c'est à dire pays d'eau.

Elle est diuisee par plusieurs estangs, & marais, & par beaucoup de canaux tirez artificieusement de ces riuieres, & de la mer, & combien qu'elle fust autrefois pleine de bois, & de forests, neantmoins à present il n'y a gueres d'arbres, à cause de la trop grande humidité.

Son air est doux, & sain, nonobstant ceste humidité, à cause des bons vents qui y regnent & du grand nombre des hommes, qui y habitent. Son terroir est si bas, que l'eau est plus haute en beaucoup d'endroits, & pour ceste cause il y a des digues, & des leuees de tous costez.

Il produit peu de froment, & peu de fruiçts, de mesme aussi que du lin; mais il y a de fort bons pasturages, qui nourrissent vne grande quantité de bestail, principalement des bœufs & des chevaux.

Le pays d'Oueryssel est plein pour la plus-part, & fertile, & porte entr'autres choses de bon froment.

Le pays de Gueldre abonde principalement en bleds, & a de fort bons pasturages; tellement qu'on y enuoye de Danemarch du bestail qui est fort maigre, afin de l'y engraisser.

Quant à Vtrecht en tirant vers Viane, & Arnhem, vous ne trouuez rien que sables: mais ailleurs son terroir rapporte assez, & est plus cultiué, & semé que celuy de Hollande, pour ce qu'il n'est pas si bas, ny si humide.

La Frise est vn pays plein, & marescageux, il a force prairies, où l'on nourrit grande quantité de bestail. On y trouue certaine terre, de laquelle on fait des tourbes, qui brûlent comme du charbon, mais sont grisastres, & entretiennent fort bien le feu avec vn peu de bois.

On y seme peu de grain, pour ce que le pays est si bas, principalement vers la mer, que depuis le commencement de l'Automne iusqu'au Printps, il est presque tousiours couuert d'eau, à cause dequoy l'on y void les villes & les villages en des lieux releuez, & environnez de bonnes leuees & deffences; mais par le moyen des pasturages, & des tourbes, les habitants ont des bleds, & des vins, & aussi des bois d'ailleurs.

Mais pour mieux entendre que c'est que des tourbes, il faut sçauoir que c'est vne espeece de terre qui s'engendre en des lieux gras, & marescageux, & qui est tellement cuite au Soleil, qu'elle est du tout propre à receuoir & entretenir le feu, & il y en a de plusieurs sortes, selon la qualité du pays.

On les tire de la hauteur de vingt-cinq & trente pieds. On en fait certaines pieces qu'on laisse long temps au vent, & au Soleil pour les seicher, & les reduire à perfection: & lors elles reçoient le feu si tost qu'on l'approche d'elles, & rendent vne fort grande chaleur, & leur charbon dure plus que celuy du bois. L'an 1567. le feu s'estant mis en vne grande campagne de tourbes, s'estendit avec vne flamme, & vne fumee fort espaisse, tellement qu'il sembloit que tout le pays fust en feu.

On brûle encores en Frise du fient de vache sec. Il y naist de fort grands bœufs, voire des meilleurs de l'Europe, & de grands chevaux, qui sont en assez bon nombre.

La Frise Orientale abonde en chevaux, bestes priuees de toutes sortes, & en chasse. Il y a aussi force legumes, grande abondance de grains, & assez bonne quantité de sel.

M O E V R S.

LEs habitans de Zelande sont de bon esprit, preuoyans, & accorts: ils sont de moyenne taille, combien que les Annales rapportent que Guillaume le Bon Comte de Hollande mena aux nopces de Charles le Bel Roy de France, vne Zelandoise extrêmement grande, pres de laquelle beaucoup de grands hommes ne sembloient que petits nains: & si forte qu'elle portoit en chaque main vn tonneau de bierre, & transportoit où elle vouloit vne soline que huit hommes n'auoient peu leuer. Ils sont fort experimentez en la nauigation. Ils sont fort propres en leurs maisons, tellement que leurs meubles de bois semblent des miroirs.

Ils sont merueilleusement attentifs à leurs affaires, & fort entendus en faict de marchandise. Quant au boire & au manger, ils sont semblables au reste des Pays-bas.

Le peuple de Hollande surpasse en grandeur les autres nations d'Europe, & quant aux femmes, elles sont ordinairement belles, mais leur beauté n'est pas de longue duree, ny si charmante que celle des femmes d'Angleterre. Hors de l'yurongnerie que les Hollandois pratiquent, ils sont assez ciuils.

Les villes y sont fort bien policees. Ils retiennent encore leur ancien courage, & sont fiers, & hauts à la main, & comme gens qui possèdent vn pays riche, & fort au possible, & de grand commerce, ils ne font nul estat de la force, & puissance des Prouinces voisines.

Quant aux peuples de Gueldre, & de Zutphen, ils ont esté les derniers qui sont venus du temps de Cesar sous la puissance des Romains, & les premiers qui se sont affranchis au declin de l'Empire.

Dans Vtrecht vous auez vn grand nombre de noblesse ciuile. Les Damoiselles y vôt entierement vestuës à la Françoisë, excepté qu'elles portent la Huque, qui est vn voile noir qui couure leur visage, & leurs habits.

Les Estats n'ont rien de si poly que les habitans de ceste ville, & de la Haye.

Quant aux Frisons, ils sont en grand nombre, & quelques-uns les tiennent pour fort courageux: mais ie n'ay rien veu en eux qui me doie imprimer cette opinion: ils vont aux coups comme les autres, estans commandez: mais l'on n'apperçoit pas en eux vne trop grande ardeur de courage.

Sur tout il ne leur faut pas parler de venir aux mains, & de se ioindre.

Ils sont si superbes, qu'ils en sont du tout insupportables. Il y en a vne grande partie qui s'addonne à la marchandise. Ils hayssent fort les adulteres, & ayment extrêmement la liberté.

RICHESSES.

12. **L**es Estats ne peuuent faillir d'estre grandement riches, à cause du grand trafic qu'ils font par mer, & du grand abord des marchans qui y viennent de tous costez: car outre le profit que plusieurs particuliers desdits Estats font avec eux, il n'y a marchandise entrant en Hollande, qui ne paye vne grosse imposition & gabelle qu'ils ont mise sur toute chose qui entre en leurs havres.

Quant à la Hollande, sa richesse consiste en pasturages, qui y nourrissent vn nombre incroyable de cheuaux, de bœufs, & de vaches, qui rendent tant de lait, qu'on tient que le fromage, & le beurre de Hollande rend à ses habitans plus d'un million d'or toutes les années. Et outre celuy que l'on mange sur le lieu, ils en enuoyent vne fort grande quantité en Angleterre, en Allemagne, en France, & en Espagne.

Ils tirent encore vn grand profit de la rubie, qu'ils nomment Meedecrappe, qui est nécessaire pour faire que les draps ne se destaignent. Ils tirent encores vn grand argent de leur pêche, & sur tout de leurs voyages qu'ils font sur la mer, d'où ils emmenent quelquesfois des vaisseaux pris qui sont de grande valeur, & l'on ne scauroit croire combien ce seul pays a de grands nauires de guerre, ou marchands.

Tellement que la Hollande sans auoir des vignes, du lin, ny du bois, & peu de grain, abonde toutefois en vin, froment, & toiles, qui rendent aussi à ses habitans vn grand profit, de mesme que les passements de fil, poinctes, & dentelles qu'ils font en grande quantité. Ils vendent aussi assez bien leurs cheuaux, dont ils font de bonnes sommes.

La Zelande a aussi sa Meedecrappe qu'elle enuoye par toute l'Europe, & dont elle tire vne grande somme d'argent, de mesme que du Coriandre. Ses pasturages aussi luy portent vn grand profit, veu qu'il s'y nourrit grand quantité de bestail qui est vendu ailleurs, & qui rend ses maistres riches.

Ces bestes sont non seulement plus grandes que les autres, mais encores d'un goust plus delicat, à cause de l'herbage quia ie ne scay quelle propriété de mieux nourrir que les autres. Et ce qui rend encores la Zelande riche, c'est le grand abord des marchands qui pratiquent à Middelbourg, & aussi des gabelles & impositions qu'on leue de toutes les marchandises que l'on y porte.

Ils ont vn singulier artifice à cuire du sel noir, & sale, que l'on porte des pays Occidentaux, veu qu'ils le mettent dans de grandes chaudieres, & le rendent si blanc, & si net, qu'il semble à la neige. Or ils mettent de l'eau de la mer sur le sel grossier d'Espagne, ou de Bretagne, & pour cent liures de sel d'Espagne, ils font cent quarante & cinq liures de sel plus net & plus affiné, qu'ils vendent en Angleterre, en Dannemark, & par toute l'Europe.

Dauantage ils tirent vn grand profit de la negociation du froment, & de leur bled, qui est des meilleurs que l'on voye.

Quant à la Frise, elle a ses cheuaux qui se vendent par toute l'Europe, & qui sont bons pour porter des hommes armez de toutes pieces, & de pesantes charges. Pour le reste elle tire du profit comme les autres terres que les Estats tiennent, qui n'ont rien de si remarquable, qui me face iuger qu'il soit à propos de discourir dauantage de leurs richesses.

Je

Je diray seulement que leurs villes tesmoignent assez que les commoditez ne leur manquent nullement, & que les longues guerres qu'ils ont soustenuës, monstrent bien qu'ils sont puissants, & riches, combien qu'ils ayent emprunté quelques parties de la Roynie d'Angleterre, & de quelques Princes qui auoient interest en leur conseruation.

F O R C E.

ON ne scauroit presque croire sans le voir, combien tout le pays que les Estats tiennent, est fort, veu qu'en premier lieu la Zelande est environnée de la Mer, & outre ce toutes ses auenuës sont si bien fortifiées, qu'il est impossible d'y trouuer vn abord aysé pour entrer dans le pays, sans le consentement des habitans.

Vous y auez la ville de Flessingue que la mer bat de trois costez, & qui est assez bien munie de canons, pour empescher les effects d'une grosse armee.

Aussi ceste seule ville fut cause que toutes les autres du Pays bas qui sont aujourd'huy libres, prindrent les armes, & s'affranchirent de la domination des Espagnols; tellement que leurs habitans qui ont composé ceste Republique ont traicté en dernier lieu avec le Roy d'Espagne, & l'Archiduc comme souuerains, & ont esté recognus pour tels en ceste dernière trefue.

Middelbourg est aussi vne place considerable: mais le fort de Ramekens est vn lieu d'importance, & peut-estre l'un des meilleurs, que l'on puisse voir. Venant apres en Hollande, vous auez Dort, ou Dordrecht, qui est environné d'eaux de tous costez, & bien fort. Rotterdam qui est vne bonne ville de deffence, & Gorkom qui n'est pas peu considerable. Quant à Vtrecht, la ville est fort belle.

En Gueldre on void Nimegueville forte d'œuvre de main, & d'assiette. Arnhem est vne de ses meilleures places. Zuthen est assez considerable, mais non qu'elle soit en telle deffence que l'autre. Pour le pays d'Oueryssel, vous y voyez la ville de Deuenter, qui est forte, & munie de tout ce qui est necessaire pour vne longue deffence: & en Frise Grouningue est vne place qui ne peut guere aysément estre emportée.

Je n'aurois iamais fait si ie me voulois amuser au denombrement des places fortes qui sont en tous ces pays, comme le Tolus, autrement Cinquesans, ou le fort de Skint, qui est presque imprenable, enfermé de l'Oual, & de l'Isel & percillement saint André, Tiel la Brise, qui sont capables d'arrester les plus fortes & plus grandes armées.

Il suffit de dire que ce pays est si bien fortifié de toutes parts, qu'une armee qui les voudroit gagner pied à pied, quoy qu'extremement forte, & tousiours en campagne, n'y scauroit guere aduancer en beaucoup de temps. Il faut aussi considerer que les Estats pourroient inonder tout le pays, s'ils se voyoient reduits au desespoir, en rompant leurs digues, principalement en Hollande. D'ailleurs ils ont tousiours vn grand nombre de gens de guerre qu'ils entretiennent sur les frontieres, & dans le pays. Et quant à la mer, ie n'estime pas qu'il y ait nation qui soit plus puissante, ny si capable de faire de grands effects. Somme que toutes choses leur sont fauorables pour le regard de la force, comme l'on a peu voir assez en la longue guerre qu'ils ont maintenuë contre le Roy d'Espagne, qui ayant veu qu'il n'y pouuoit guere aduancer, & que ce luy estoit vne continuelle perte d'argent, & d'hommes, a esté contraint en fin de s'accommoder avec eux, & leur accorder la plus grande partie de leurs demandes.

G O V V E R N E M E N T.

Toutes les affaires d'Estat des Prouinces vnies des Pays bas, tant pour la guerre, tant par mer, que par terre, & de ce qui en depend, les alliances, & confederations qu'elles ont avec les Roys, Princes, & Potentats estrangers pour la leuee des deniers qui se doiuent trouuer, tant pour la guerre, que pour les affaires d'Estat, & generalement de tout ce qui concerne pour le bien, & repos des Prouinces vnies, sont dirigées, & gouvernées par les Seigneurs, & Estats generaux d'icelles Prouinces, desquelles l'assemblée est dressée des principaux colleges de la Noblesse, des Magistrats, & superintendans des villes en chacun quartier & Prouinces respectiuellement.

Les Estats particuliers desquelles Prouinces choisissent, & y commettent annuellement autant de personnes que bon leur semble, auxquels ils donnent plein pouuoir & autorité d'aduiser, & resoudre avec les deputez de toutes les autres Prouinces sur chacun point qui y sont mis en deliberation, & sur toutes autres choses qui s'y pourroient représenter, comme pour le bien & seruice de l'Estat se trouuera conuenir.

D d d iij

En laquelle assemblée desdits Seigneurs Estats Generaux les affaires se proposent, ad-
nisent & resoudent de la part de chacune Prouince respectiuelement, & non teste pour teste.
De maniere qu'à present les resolutions se prennent en ladite assemblée de la part des sept
Prouinces, dont la premiere est la Duché de Gueldre & Compté de Zutphen (combien
que Zutphen soit vne Prouince à part soy outre les dix-sept Prouinces de tout le Paysbas:)
la seconde est la Prouince de Hollande & Vvestfrise: la troisieme Zelande: la quatrieme
Vtrecht: la cinquiesme Frise: la sixiesme Ouerissel: la septiesme Groningue; & les Ommel-
landes. En ladite assemblée desdits Seigneurs Estats Generaux comparoissent, en estans se-
mons, les Gouverneurs de chacune Prouince respectiuelement, & le Conseil d'Estat, pour y
ayder & aduiser & resoudre de toutes matieres qui y sont proposees & requises.

Au Conseil d'Estat desdites Prouinces vnies les aduis se donnent, & les voix se recuei-
lent teste pour teste, dont les Conseillers sont commis par les Sieurs Estats Generaux, sur
l'election & presentation qu'en fait chacune Prouince en son regard, auxquels ils ont ser-
ment de fidelité suivant les instructions qui en sont faictes: lequel Conseil d'Estat estoit cō-
posé en l'annee mil six cens, de tous les Gouverneurs des Prouinces, & du Prince Henry
Federic de Nassau: M. George Gilpin Agent du Roy de la grande Bretagne.

Pour la Duché de Gueldre les sieurs d'Oyen & de Brynem. Les sieurs Matenelle pour
la Noblesse, Beuren de Dordrecht, & Boulans, d'Amsterdam pour Hollande & Vvestfrise,
Fernande Alleman pour Zelande, Fook pour Vtrecht, Kaminga & Frans. Iansen pour Fri-
se: Itterlom pour Ouerissel, & Rengers pour Groningue, & Ommelanden avec leurs Se-
cretaires Chrestien Huygens, & Zuylen.

Les Estats de chacune Prouince retiennent leurs droits, priuileges & coustumes que
d'ancienneté ils ont eu & possédé, gouvernant & administrant les affaires de la Prouince,
tant par eux-mesmes que par les colleges & officiers qu'ils y ordonnent aussi bien en ma-
tiere d'Estat, & ce qu'en depend, comme de la guerre, finances, iustices, & autres presque
sur vn mesme pied & bon ordre.

Comme pour exemple en Hollande & Vvestfrise, les Estats de la Prouince de tout tēps
ont esté representez par les Barons, Cheualiers, Nobles, & par les bonnes villes d'icelle, sās
que les Ecclesiastiques ou Clergé y ayent iamais esté recogneus pour membres d'iceux: les-
quels Seigneurs & Nobles signalez sont appelez à ladite assemblée, non seulement pour y
opiner & ayder à resoudre sur les poincts proposez, mais aussi sur toutes choses occurrentes
& concernantes le bien, repos, tranquillité & assurance de la prouince: lesquels ainsi assem-
blez communiquent, aduisent, & resoudent sur le tout avec l'Aduocat du pays comme le
premier en ladite assemblée des Estats, les recueille & recite ouuertement.

A ladite assemblée sont ordinairement appelez les principales villes de la Prouince à
sçauoir Dordrecht, Haerlen, Delff, Leyden, Amsterdam, Goude, Rotterdam, Gorcom,
Sciedā, Schoouheuē, Briel, Almar, Hoorme, Inchuyfen, Edam, Monickendam, Medem-
blyck, & Purmereyndem.

Quand il vient quelques affaires de grande importance, comme à la reception d'un nou-
veau Prince, à traiter de la paix, ou à entreprendre nouvelle guerre, on est accoustumé d'y
appeller aussi les autres villes de ladicte Prouince qui ensuyuent Vværdem, Ondeuater,
Gheertruydenberg, Heusden, Naerden, Vveesp, & Muyden: nulles autres, parce qu'elles
appartiennent aux Seigneurs particuliers, ou qu'elles ne sont villes formées comme celles
cy dessus.

Ledites villes peuvent y envoyer leurs deputez en nombre competant munies de com-
missions, & plein pouuoir en la mesme forme & maniere que nous auons dit des Nobles
plus signalez.

La conuocation desdits Seigneurs Nobles & villes de Hollande, & les points principaux
pour lesquels elle se fait, se conduisent par ledit Aduocat du pays, & par les Conseillers
commis ausdits Estats: lequel Aduocat fait les propositions; & estans les opinions & aduis
desdits Seigneurs Nobles mis en forme, il les declare & recite avec raisons pregnan-
tes.

Ce fait il demande & recueille par ordre les voix des villes: & en cas de varieté & diuer-
sité d'opinions, il travaille & tasche de les accorder, concluant selon la pluralité des voix
en conformité desquelles se forment les resolutions.

Les principaux poincts pourquoy ladite assemblée se tient, est pour le faict de la guerre
tant par mer que par terre, pour les contributions des deniers, à la reformation de tous abus
qui pourroient suruenir pour le repos & tranquillité du pays, pour entretenir l'vnion & con-
cord par toutes les villes de la Prouince, generalement tout ce qui touche l'Estat du pays,
la Religion, Iustice, Police, moyens des contributions foraines, Domaines, biens Ecclesia-
stiques, ●

stiques, & le tout au plus grand profit & soulagement de la Prouince. Et ladicte assemblée se tiét ordinairement à la Haye, qui est vne place ouuerte assise au milieu du pays cinq ou six fois l'an, ne fut que la necessité & occurrence des affaires la requissent extraordinaire, ou en autre lieu: & à l'exécution & entretenement des resolutions prises par lesdits Estats en leur assemblée, sont enchargez, & specialement commis vn d'entre lesdits Seigneurs & Nobles, l'Aduocat du pays, & vn de chacune ville principale.

Lesdits deputez Conseillers n'ont point seulement la charge de l'entretienement des resolutions prises en l'assemblée des Estats, mais aussi de toutes choses concernans le bien de la Prouince, le repos & l'uniõ des quartiers, membres, & villes, ayans la cognoissance & iudicature de toutes questions & differents touchant les contributions, & moyens du pays, & de ce qui s'ensuit: ensemble de toute matiere de confiscation à cause de la guerre, de tous troubles, tumultes, seditions, perturbation du repos public, trahisons, falsifications de monnoyes, & de toutes autres choses concernans le public, esquelles ils iugent par Arrest.

Es matieres de Iustice ordinaire, tant entre les manans & habitans du pays, que forains & estrangers, les Presidents & gens du Grand Conseil, ont la suprême Iudicature esdits pays, lesquels iugent souverainement & par Arrest: des sentences desquels n'escheent que reuision ou proposition d'erreur: A quoy de la part desdits Estats, sont ordonnez conioinement les Presidents & Gens dudit Conseil des Reuisiteurs, en nombre competent.

Monseigneur le Gouverneur, President, & Gens du Conseil de la Cour Prouinciale desdits pays ont la cognoissance & l'entremise de beaucoup de choses concernans la police du pays, & Iudicature ordinaire en plusieurs cas civils & criminels, comme aussi des causes qui y deuoluent par appel, des sieges des villes & ressorts inferieurs des villages & du plat pays. Lesquels expedient leurs actes & commissions sur le nom dudit Seigneur Gouverneur, President, & Cõseil: mais ils sõt droict de la part de la souveraineté de ladicte Prouince.

A l'administration des domaines de ladicte Prouince y a vne Chambre de Maistres Auditeurs, & Greffiers des Comptes.

Et combien que la Haye soit vne place ouuerte distante de deux mille pas de la mer du Nort, si est-elle le plus plaisant lieu qui soit en toutes les dix-sept Prouinces du Pays-bas: les surpassant en richesses, beaux edifices, belles places, plaisants jardins, & en grand nombre de Noblesse: il y a plus de deux mille grandes & belles maisons, & en bastit-on encores tous les iours, voire des rues entieres. Là est la Cour du Prince ou Gouverneur de Hollande, Zelande, & de la Frise Occidentale, qui est auourd'huy le Seigneur Maurice Prince d'Orange, &c. Comme encores aussi les Estats generaux des Prouinces y tiennent leurs assembles & residences: comme aussi les Estats de Hollande, & leurs deputez, Conseillers ordinaires, les Presidents, & gens du grand Conseil: ceux du Conseil Prouincial, & ceux de la Chambre des Comptes.

Outre tous lesquels Conseils y a encores vn Conseil de Brabant pour les villes & villages du ressort de la Duché de Brabant qui sont sous l'obeyssance des Estats generaux des Prouinces vnies, où les procès émanez de ladicte Duché sont ordinairement instruits & terminez, sous l'autorité, & en vertu de la commission desdits Seigneurs Estats Generaux, en la mesme forme & maniere que de tout temps on a vsé en la Chancellerie, Conseil, & Cour feodale de Brabant: afin que par ce moyen chacun puisse estre maintenu en ses Priuileges accoustumez.

Au reste le regime & administration des villes & Prouinces vnies, & notamment en la Prouince de Hollande & Vvest-frise, se gouverne selon leurs anciens droicts, Priuileges, status & coustumes, où il y a pour la plupart vn Baillif ou Escouette, qui de la part desdits Estats y est estably comme leur Officier. Il y a aussi des Bourg-maistres, Escheuins, Thresoriers, Maistres de fabriques, Maistres des orphelins: Conseil & Vvoetschapen, qui se font des notables de la bourgeoisie.

Les Bourgmaistres & Escheuins sont annuellement renouvellez suivant la domination en nombre redoublé, fait par les Vvoetschapen, esleus par le Gouverneur de la Prouince, ou en son absence par les Presidents & Gens du Conseil Prouincial, combien qu'en aucunes villes l'election des Bourg-maistres soit absolue, & en aucunes les Escheuins ordonnez par l'Officier au nom desdits Seigneurs Estats. Le nombre des Bourgmaistres est selon la coustume des villes: comme à Dordrecht vn, en aucunes quatre, lesquels trauaillent plus en choses politiques, au bon ordre & regime de la ville, sur les biens, & reuenus d'icelle, au repos vniue des bourgeois & habitans.

Les Escheuins consistent en la plus-part des villes au nombre de sept, lesquels ont la cognoissance & Iudicature de toutes causes, tant civiles que les criminelles, Les Thresoriers,

Maistres des ouvrages, & Maistres des orphelins sont en la plus-part des villes annuellement establis par le Bourg-maistre. Les Thresoriers ont la recepte de la ville d'ot ils rendent compte, les Maistres des ouvrages ou fabriques ont l'œil sur les ouvrages publics, les Maistres des orphelins ont par superintendance le regard, & prennent soin que les biens des pupilles soient bien regis & gouvernez sous bons pleiges. Les Vvoescapen qui sont luez au Conseil sont en la pluspart des villes en service continuel leur vie durant. Ceux-cy sont creez des plus notables bourgeois de la ville, eux & les Bourgmaistres representans tout le corps de la ville, aduisent & resoluent sur toutes choses qui leur sont proposees, tant du bien commun du pays, que de la ville en particulier.

Pour le regard des monnoyes qui se forgent par toutes lesdictes Prouinces vnies des Pays-bas, il y a trois Generaux, lesquels au mandement desdits Seigneurs Estats comparoissent la part où ils sont mandez, pour y aduiser sur le faict desdictes monnoyes.

Ladite Comté de Hollande & de Vvestfrise a deux monnoyes, l'une ancienne & plus priuilegiee pour la Hollande en la ville de Dordrecht, l'autre pour la Vvestfrise en la ville de Horne.

Les Estats de la Comté de Zelande consistent en la Noblesse, & es villes des Isles de Vvalchren, Schouven, Suytbeneland, Tolen, Noortbel, nouvellement recognuë sur la mer, Duynelandt, Vvolphaerts-dyck & Philips-landt. Ils tiennent leurs assemblees generales à Middelbourg, où pour le plus ordinairement reside le College de leurs deputez qui s'y assemblent tous les iours, pour traicter, disposer, vuidier de toutes affaires concernant l'Estat.

Ladite Comté de Zelande a retiré à soy la Chambre des Comptes pour le faict des domaines, & generalement de toutes receptes appartenantes à tout l'Estat qui se souloit autrefois traicter conioinctement avec celle de Hollande, Vvestfrise & la Haye. Mais maintenant ladite Chambre pour ladite Comté de Zelande est establie en ladite Cour à Middelbourg.

Zelande a pareillement sa monnoye en ladite Cour, laquelle est sujette aux Generaux des monnoyes.

Les appellations des sentences ciuiles de toutes les villes, Baillifs, & Iurisdicatures de Zelande ressortissent au Conseil Prouincial à la Haye: sauf que ceux de Middelbourg ont par priuilege leur choix d'appeller ou audit Conseil Prouincial, ou pour euitier ceste instance, au Grand Conseil. Mais les criminels s'exercent sans appel par les hauts Iusticiers chacun en sa Iurisdiction & ressort.

Quant à la police & religion on s'y gouverne comme on fait generalement par toutes les autres Prouinces vnies leur confederez.

La Principauté & Estats d'Vtrecht consiste encore pour le iourd'huy en trois membres, à sçauoir l'Ecclesiastique des cinq Colleges chanoinaux, de la Noblesse, & des villes: l'Ecclesiastique pour le premier du siege Cathedral de saint Martin, de saint Sauueur, de saint Jean, & sainte Marie, qui sont indifferemment choisis des deputez qui sont à present au College desdits Estats. Pour le second membre sont la Noblesse: pour le troisieme membre les Bourgmaistres & deputez des villes de ladite Principauté & Estat. A pareillement vn Conseil Prouincial, duquel ne gist aucune appellation, toutesfois en cas de reuision on peut l'auoir par deuers les Estats de la Prouince. La chambre des Comptes est retenuë & deservie par le College desdicts Estats. Ladite Principauté a aussi sa monnoye particuliere, comme elle a eu de tous temps, & est subiecte ausdits Generaux des monnoyes. La police & la religion s'y maintient comme par toutes autres Prouinces vnies leurs confederez. Il y a aussi pour toute ladite Principauté quatre Mareschaux qui sont pour le iourd'huy chacun en son quartier.

20. L'Estat & seigneurie de Frise est departie en trois quartiers (qu'en leur langue ils appellent *Goien*) à sçauoir d'Ostergoë, Vvestergoë, & des sept forests. Mais pour le iourd'huy suivant le regime & gouvernement du temps present, les villes font le quatrieme quartier, *Goër* ou membre de l'Estat. Ostergoë consiste presentement en vnze Bailliages qu'ils appellent *Gruenies*. Vvestergoë en huit Bailliages. Les sept forests consistent en dix Bailliages. Le *Goër* ou quartier des villes, fait pour le iourd'huy en l'assemblee des Estats de la Prouince le quatrieme membre. Icelles villes souloient par cy deuant estre affectees au *Goër*, dās lesquelles s'ot situees Ostergoë, Vvestergoë, ou des sept forests: lesquelles villes fermees sont en nombre d'onze, dont les huit fermees sont villes fortes, à sçauoir, Lucuueedem, Bolsuuhurt, Dockum, Frauike, Harlingenceek, Staureren, Sloten, & trois autres anciennement priuilegiees de droit de villes, qui ne sont pas murees, à sçauoir Ist, Vvorchum, & Hiodelopam, esquels quatre quartiers consiste toute la Frise. Les Estats de ceste Prouince ont

ont de toute ancienneté esté representez par les Nobles, & plus signalez ou notables propriétaires, tant des villes que du plat pays. Mais maintenant à la leuonice du Gouverneur & des deputez aux Estats, sont appelez aux iournees & assemblees generales, certains nobles, & notables propriétaires du plat pays, & de chacune ville, pour deputez à ce idoines & capables, suiuant les lettres d'Estat qui leur sont enuoyees, lesquelles lettres s'adressent aux Grietmans ou Baillifs & au Bourgmaistre des villes respectiuellement. Lesquels en chacū Bailliage & ville, chacun en son regard conuoquent les nobles, les plus signalez du plat pays, & les Escheuins, Conseil, & lurez en chacune ville, lesquels ayans oüy & entendu les causes du mandement, choisissent alors & deputent chacun de son Bailliage & ville deux personages, ausquels est donnee commission & pouuoir de comparoir à ladicte iournee & assemblee generale, pour y resoudre des poincts & affaires, pour lesquels ils sont mandez, & de toutes choses occurrentes selon l'exigence du cas, ce que requis peut estre. Chacun Bailliage y enuoye ordinairement deux Deputez, à sçauoir l'un de la noblesse, l'autre un des plus notables propriétaires, chacune ville principalement celles qui sont fermées y enuoyent un de leur Conseil, & un des lurez d'entre la commune, sans aucun respect au degré de Noblesse: comme aucunes places es sept forests, ne recognoissent & ne deputent aucuns gentils-hommes faute de noblesse, mais ordinairement au lieu d'iceux ils y enuoyent des plus vieux Fonsiers & priuilegiez notables, avec contentement des nobles des autres quartiers. Ladite assemblee & conuocation generale se tient ordinairement en la ville de Leevvaerden, maintenant Capitale du pays, & assise au centre du pays, vne ou deux fois l'an, ne fust que les affaires extraordinaires, & la necessité du temps le requist. Ces deputez ont la cognoissance & iurisdiction de toutes les affaires concernant la contribution de la Prouince, confirmation des biens Ecclesiastiques, des Dicaiges, d'Eccluse, en somme de toute l'administration des affaires politiques de la guerre, & des finances, les Receueurs sont tenus tous les ans de venir rendre compte pardeuant la Chambre des Comptes, à laquelle sont annuellement ordonnees quatre personnes, à sçauoir de chacun quartier un. Lesdicts Estats ont aussi leurs monnoyes particulieres en la ville de Leevvaerden, aussi sujette aux Generaux. Les Baillifs avecques des Assesseurs en leurs Bailliages, sur le plat pays: & les Bourgmaistres, Escheuins, & Conseil des villes, ne iugent seulement qu'en matiere ciuile, donnent leurs sentences au nom de la Seigneurie souveraine de Frise, desquelles se peut appeller à la Cour Prouinciale, & non au College des deputez des Estats. La Cour Prouinciale est composee du Gouverneur, Presidens, & Conseillers, ausquels seuls appartient seulement la cognoissance & iurisdiction des choses ciuiles & criminelles. Mais il faut que les Baillifs & Magistrats des villes renuoyent les criminels avec leurs informations à ladicte Cour, où leurs procez sont faits par le Procureur General, selon la qualite du delict, elle tiert la seance aussi à Leevwarden. Les Estats de ladicte Prouince ont depuis quelques années erigé vne Vniuersité à Franicker. Pour le fait de la Religion elle s'y conduit comme es autres Prouinces.

L'Estat d'Oueryssel, porte ce nom pour estre assise & situee outre, ou pardelà le fleue d'Yssel: toute la Prouince est departie en trois belles iuridictions, la premiere est *Saland*,¹⁷ la deuxiesme *Tuenter*, la troisieme qui est au milieu des deux *Vollenhouen*. *Saland* a plusieurs villes comprises en soy, à sçauoir, *Deuenter*, *Campen*, *Zuunol*, & autres. La *Tuente*, la ville d'*Oldenzeel*, *Otmarsum*, & autres. *Vollenhouen* a ville & chasteau de mesme nom à present ruinee par les guerres dernieres, là où souloit estre jadis la Cour des Euesques d'*Vtrecht* & la ville de *Steenvvyck*, & autres. La souveraineté de cette Prouince appartenoit jadis aux Euesques d'*Vtrecht*: mais depuis estât paruenue avec la Seigneurie d'*Vtrecht* à l'Empereur Charles le quint, & à Philippes son fils, sous condition de les conseruer en leur Priuilege, sous pretexte de quoy ils se sont avecques les autres Prouinces vnies soustraict de l'obeyssance dudit Roy Philippe. Ladicte Prouince n'a iamais recogneu que deux membres en son gouvernement, à sçauoir la noblesse, de laquelle sont choisis les Gouverneurs, & les trois villes Imperiales, *Deuenter*, *Campen* & *Zuunol*, par lesquels deux membres sont vuidées toutes difficultez qui se presentent en cest Estat, & ce que par eux, selon les constitutions du pays, aura esté ordonné & decreté, demeure ferme & stable. Et comme la noblesse en preeminence ne cede à nul, aussi ne font les villes si ce n'est en leur ordre & degré, Dont *Deuenter* est la premiere, *Campen* la seconde, & puis *Zuunol* apres: chacune de ladictes villes iuge par arrest, & ont chacune droit de battre monnoye. L'assemblee des Estats de ladite Prouince se fait diuersement tant generale que particuliere selon leurs anciennes coustumes, & preeminences, tantost en vne place, tantost à l'autre, les deputez souuent s'entrenchargent. Au fait de la Religion, ils se gouvernent par tout comme es autres Prouinces vnies leurs confederéz.

18. Quant à l'Estat & regime de la ville de Groningen & des Ommelandes (qui sont Iurisdic-
tions champêtres, consistant en plusieurs villages du territoire de ceste Prouince) il faut
entendre que ladicte ville & Ommelandes situées entre les riuieres d'Embe & Lauris, sont
& font vne Seigneurie & Prouince nombrée entre les dix-sept Prouinces du Pays-bas, qui
sont indifferemment representez & regis par commun accord des Estats d'icelle: en sorte
que tous droicts du Domaine, que jadis le Prince comme Seigneur de la Ville & Prouince
souloit auoir, sont regis & gouuernez par le commun aduis desdicts Estats, tant pour les fi-
nances, reuenus, contributions, biens Ecclesiastiques, tant en la ville, que vieux Baillia-
ges Goorrecht & Ommelandes, lesquels Estats, ensemble leurs deputez tiennent ordinai-
rement leurs iournees & assemblees en ladite ville de Groeningen. Le regime de la ville ap-
partient au Magistrat d'icelle tant seulement, qui consiste en quatre Bourg-maistres, &
douze Conseillers, & ce aussi bien en fait de Iustice (en quoy il iuge par Arrest) qu'en cas
de police: sauf que les choses concernantes les priuileges & biens de la ville, doiuent estre
communiquées au Magistrat de la porte, & aux vingt-quatre Iurez. Les deux vieux Baillia-
ges, & le Goorrecht ressortissent sous la Iurisdiction de la ville, où ceux du Conseil ordon-
nent annuellement des Drossarts, Amptmans, ou Baillifs, (qui n'est qu'un mesme fait)
des ingemens desquels se peut appeller pardeuant ledict Conseil, qui en iuge par Arrest. La
moitié dudit Conseil, & Iurez y sont annuellement desmis, les places desquels sont rem-
plies: à sçauoir que le Gouverneur desnomme cinq personnes d'entre les vingt-quatre Iu-
rez, lesquels cinq choisissent de toute la ville huit Conseillers. Les huit nouveaux Conseil-
lers avecques les autres huit vieux qui restoient, eslisent quatre Bourg-maistres. En ou-
tre ledit Sieur Gouverneur desnomme hors du nombre desdicts vingt-quatre Iurez, enco-
res autres cinq personnes, lesquels en choisissent douze d'entre la commune de la ville, pour
remplir la place de douze desmis, de sorte que les douze nouveaux Iurez, & les douze vieux
restez, choisissent d'entre eux trois Auan-parliers, ainsi qu'ils appellent, lesquels tout du
long de l'annee portent la parole pour tous lesdits Iurez. Ladicte ville a beaucoup de beaux
priuileges, entre autres elle opine la premiere aux Estats de la Prouince, elle a aussi vne
monnoye.

Les Ommelandes sont repartis en trois quartiers, à sçauoir de *Fiuelingo*, *Mudsigno*, & le
Vestquartier, ayant chacun leurs droicts par escrit en diuerses seigneuries, comme sieges de
Iudicature, qu'ils appellent *Gritenies* ou *Bailliages*.

RELIGION.

19. EN tous les pays que les Estats tiennent, ils ne permettent aucun exercice de la Reli-
gion Catholique, de sorte que toutes les Eglises y sont conuerties en Temples, où les
ministres de la nouuelle opinion preschent & font les prieres, & la Cene à leur mode. Que
si l'on en trouue en quelque lieu qui fassent exercice de la Religion Catholique en particu-
lier, & secrettement, si tost qu'ils sont surprins sur le fait, ils sont condamnez à de biē gros-
ses amandes, comme à Vtrecht, où la plus grande partie des habitans est Catholique, il ar-
riue presque tous les iours qu'on y dit dans les maisons plus de cinquante ou soixante Mes-
ses. Il n'y a guieres d'autres villes sous les Estats, qui ne soient peuplées de plus d'habitans
tenans la nouuelle opinion, que d'autres.

Que si l'on desire sçauoir comment l'heresie s'est glissée en ces pays, ie le feray entendre le
plus briuelement qu'il me sera possible. Cette nouuelle opiniō y prit pied durāt les guerres,
qui furent entre la France & l'Espagne, & ce mal fut descouuert apres la conclusion de la paix,
entre Philippes II. Roy d'Espagne, & Henry II. Roy de France. Car l'an 1566. le Roy d'Es-
pagne estant informé du danger qu'il y auoit que l'heresie n'infectast les Paysbas, & ayant
ordonné qu'on y gardast les Decrets du Concile de Trente, & les Edicts faits par Charles
V. son pere contre les heretiques, beaucoup de gens creurent qu'il y vouloit introduire l'In-
quisition d'Espagne, qui est veritablement vne inuention aussi-heureuse & cruelle qu'aucu-
ne qu'on sçauoit practiquer, puis qu'elle fait mesme pourrir en prison les plus innocens &
plus Catholiques. Tellement que ceux-cy se persuadant qu'on les vouloit traiter de cette
sorte, firent ligue ensemble, & estans venus à Bruxelles, presenterent à Madame Margue-
rite d'Autriche gouuernante du pays vne requette, par laquelle demandoient qu'on les
laissast viure en liberte de conscience, & soudain comme s'ils eussent avec ceste requette
donné le signal à leurs compagnons, il entra dans Anuers force hommes mal affectionnez
à la Religion Catholique, qui y ruinerent les Eglises, profanerent les autels, firent mille
outrages aux personnes sacrees, & tout ce qui se peut faire au mespris des sacremens. Ils fi-
rēt le mesme à Bosleduc, à Valenciennes, à Gât, à Audenarde, à Bruxelles, à Vtrecht, les Reli-
gieux

gieux de saint François furent chassés de Delft, & mesmes les Chartreux d'Amsterdam. Ceux de Bruxelles faisoient instance qu'on leur permît leurs presches des Ministres, & desja l'on preschoit sans autre permission par tout le pays de Bruges, de Gand, de Hype, d'Audenarde, & Anvers estoit desja vne rerraicte de Calvinistes, & de Lutheriens, & d'Anabaptistes. Valenciennes accepta non seulement les Ministres Calvinistes, mais encor pour obtenir & monstrier vne entiere liberte de conscience, se tira ouuertement de l'obeyllance du Roy d'Espagne, & Tournay fit le mesme, certain Ministre ayant eu la hardiesse de prescher dans la ville de Nimegue, les habitans ayans mis la main aux armes, deposerent premierement cinq Senateurs de leur dignité, comme les soupçonnant d'heresie, & mirent en leur lieu autant de Catholiques; puis ayans chassé le Ministre, bruslerent en pleine place la chaire où il auoit presché.

L'annee d'apres Marguerite d'Autriche fit vn Edict contre tous ceux qui auroient la hardiesse de faire exercice de la nouvelle opinion, & appaisa la Frise par le moyen du Comte d'Aremberg, & recouura Tournay, & Valenciennes, par le moyen du seigneur de Noircarmes, & le Comte de Megue reduisit Vtrecht à la deuotion du Roy d'Espagne. On chassa d'Anvers les Ministres, & les lieux de leurs assemblees furent fermez. Cependant le Duc d'Albe vint pour estre Gouverneur des Pays-bas avec vne armee. Cestuy-cy mit à son entree en prison les Comtes d'Egmont, de Horne, & plusieurs autres, & leur fit trancher la teste, disant qu'ils auoient fauorisé les rebelles. Le Prince d'Orange craignant pareil traitement s'enfuit en Allemagne, où il assembla vne grosse armee, s'asseurant de l'affection des Flamans, & de les induire aisément à se reuolter. Mais le Duc d'Albe, bien qu'ayant moins d'hommes, le contraignit de sortir du pays, son frere Louys ayant desja esté defait en Frise. Il sembloit que tout estoit reduit en bon estat par le moyen de ceste victoire, quand le Duc, qui par la mort des Comtes d'Egmont & de Horne, & quelques autres seigneurs auoit aliéné le courage de la noblesse, voulant encore exiger opiniastrément l'an 1570. & 71. le vingtiesme & centiesme denier, se rendit encor odieux au peuple, & donna subject aux reuoltes qui arriuerent. Car le Prince d'Orange, & les siens conuiez par les habitans de quelques villes, & s'asseurant du mescontentement des autres, surprindrent en vnenuict Flessingue, la Bruille, & presque toute la Zelande, fors que Middelbourg, & quasi toute la Hollande, fors qu'Amsterdam (pource que le Duc n'ayant iamais fait la guerre sur la mer, estimant peut-estre peu les lieux maritimes, ne s'estoit soucié que de se rendre fort dans le pays) & outre ce, Mons, Ruremonde, Malines, Amesfort, Suelle, Campe, Zutphen, & autres places d'importance. Or ceux de la nouvelle opinion estans de la partie, on ne scauroit exprimer combien ils traiterent cruellement les Religieux & les Prestres. Le Duc d'Albe ne perdant pas courage assembla des troupes, fit vne armee, & recouura Mōs, Zutphen, & Malines. Mais tandis qu'il assiegeoit Harlem, qui se rendit l'an 1573. ses ennemis mirent le siege deuant Middelbourg, ville capitale de Zelande. L'annee suivante le Duc eut pour successeur au gouvernement Louys de Reguefens, qui s'essaya de secourir Middelbourg avec quelques nauires armees, afin de ne perdre entierement la mer. Mais l'armee s'estant perduë par quelque desordre qui s'y trouua, la ville se rendit à composition. Toutesfois Mondragon Colonel des Espagnols, ne perdant courage pour tout cela, fit passer son armee à pied par vn bras de mer à Zirxee, & assiegea la ville, qui se rendit finalement l'an 1577. Le Prince d'Orange estoit reduit au petit pied, par la perte de ceste place, comme n'ayant presque plus autre chose que l'Isle de Vualcheren, où Flessingue, & Middelbourg sont assis. Mais pource qu'il estoit deu trente payes, ou plus aux soldats Espagnols, ils passerent en Terre ferme, se mutinerent, & s'estans fortifiez en la ville d'Alost, reduisirent les affaires de leur Roy en plus mauuais estat que iamais. Car plusieurs bruits diuers de leur reuolte s'estans espendus, les Estats declarerent & firent publier la guerre contre les Espagnols. On mit en prison le Comte Hernest de Mansfeld, & le Seigneur de Barlemont, & quelques autres du Conseil, pource qu'ils se monstroient contraires à ce dessein. Les chasteaux de Gand, & d'Vtrecht furent assiegez, & pris tous deux. Le Prince d'Orange fut appellé, & il se fit vne ligue entre les Catholiques, & les protestans, avec vn fort grand aduantage du Prince & des protestans, qui estoient desja presque perdus. Ils mirent ensemble cinquante-trois mille hommes de pied, & seize mille chevaux, & en mesme armee on disoit la Messe à la Catholique, & la Presche à la Huguenote. Par ce moyen ceux de la nouvelle opinion retournerent à Anvers, & y gaignerent quelques Eglises. Mais les Espagnols vindrent assaillir Anvers, & Mastric, & prindrent & saccagerent ces deux places. En mesme temps Don Iean d'Autria, ou d'Autriche, vint d'Espagne, & s'accommoda à la necessité, fit premierement vne suspension d'armes, & apres, pource qu'il n'estoit pourueu ny de gens, ny d'argent, & que les ennemis auoient toutes ces choses à commandement, il

L'an 1606. les Archiducs de Flâdres auoiēt deputé les sieurs de Horst & Gévart pour aller à la Haye en Holâde, & accorder Paix ou Trefue avec Messieurs des estats des Prouinces vniées Surquoy ils auoiēt communiqué en secret avec quelques vns desdits sieurs des Estats. Mais d'autât que lesdits deputez des Archiducs n'auoiēt apporté aucunes lettres aux Estats de la part de leurs Alteſſes, & qu'ils n'auoiēt nulle cōmissiō & pouuoir par escrit, ils retournerēt les querir à Bruxelles, d'où ils reuindrēt à la Haye le 10. Iāuier. Suiuāt leur cōmissiō & pouuoir, ils cōmuniquerēt avec le Prince Maurice, puis rechercherēt d'auoir audience, laquelle ils eurent le 13. dudit mois, en laquelle ils conclurēt, *Que les Estats des Prouinces vniées deuoient bien cōsiderer & peser l'inconstāce de la fortune, principalement au fait de la guerre: & par là se deuoient résoudre à vne Paix ou à vne Trefue, afin que les Pays-bas peussent estre remis, et reuennir en repos, et en tel estat qu'ils estoient auparauant la guerre.* Le 17. dudit mois les Estats leur firent ceste responce, Qu'ils recognoissoyēt que leurs Alteſſes persistoient tousiours en leurs mal fōdees pretentions d'auoir droit aux Prouinces vniées des Pays-bas, veu qu'il estoit notoire à tout le mōde, qu'il n'y auoit aucune sorte que ce soit (fors par armes & force) ils eussent aucune chose à pretēdre ou s'entremettre aux villes vniées des Pays-bas: Au cōtraire, les Estats des Prouinces vniées tenoiēt pour bonnes & vallables cōsideratiōs estre fōdez en droit, *Que ce qui estoit prins par force ou par pratique suiuāt le decret Vtrecht Vniō & confederatiō, seroit repris pour la manutention dudit Decret lequel auoit esté fait pour de grādes & importātes cōsideratiōs.* Par lequel decret pour plusieurs causes ils auoiēt rendu cē à l'obeyssāce de l'Espagnol, & lesdites Prouinces vniées estoient declarees vn Estat libre & Republique. Decret qui estoit passé 25. ans y a, & lequel par plusieurs & diuers actes, traictēz & confederatiōs avec plusieurs Roys & Potērats de toute la Chrestientē, auoit esté confirmé & approuuē. Par làt qu'ils estoient entieremēt resolu, que ce qui auoit esté prins sur les Prouinces vniées, cōtre le Decret d'Vtrecht-vniō, de le recōquerir, & ne pouuoient pour ceste fois donner autre respōce que ce que cy deuāt ils auoiēt fait entēdre à l'Empereur & aux autres Princes qui s'estoiēt entremis de tascher à pacifier les differents de ces presēts troubles: à ſçauoir. Que cōtre Dieu & l'hōneur ils ne pouuoient trouuer seureté de traicter en aucune maniere que ce fust avec ceux qui penseroiēt pretēdre cōtre ledit Decret, approuuē, cōfirmē, & defēdu par les Prouinces vniées des Pays-bas. Au cōtraire, qu'ils protestoient contre leurs Alteſſes, à cause de la diuisiō, perte & desolation en quoy lesdites Prouinces vniées, & mēbres d'icelles pourroient tōber par leur deffence en vne si iuste guerre & cause. Avec ceste respōce se retirerēt les Ambassadeurs de leurs Alteſſes, puis ils enuoyerēt de Bruxelles vn escrit aux Estats de ceste teneur: *Que l'intentiō de leurs Alteſſes n'estoit nullemēt de gagner ou pretēdre aucune chose sur les Prouinces vniées desdits Pays-bas, mais qu'elles vouloiēt les laisser cōme elles estoient.* Et si les Estats estoient de ceste volōté & intentiō de traicter paix ou trefues, leurs Alteſſes y entēdroient volōtiers. Sur la fin du mois de Feurier, Icā Ney, General des Cordeliers fils de Martin Ney, biē cogneu du Prince d'Orāge, s'achemina vers la Haye en Holâde avec pouuoir de leurs Alteſſes pour continuer le traictē: il demeura coy vn tēps au petit village de Rissvic pres la Haye: & quād l'ō eust entēdu de luy les causes de sa venue, & qu'il eust en personne cōferé avec le Prince Maurice, il entra dans la Haye, où il fut visité de plusieurs Seigneurs. Sa charge estoit pour recognoistre à quoy on estoit demeuré des propositiōs du sieur Horst, d'autāt, leur dit-il, quel'intētiō de leurs Alteſſes n'estoit en traictāt de Paix ou de trefue ameliorer ou deteriorer le droit ou les pretentiōs des Prouinces vniées des Pays-bas, mais vouloiēt traicter avec eux en l'estat qu'elles estoient à presēt. Surquoy on luy dit, que premiere mēt & deuāt que d'entrer en aucun traictē, leurs Alteſſes deuoient recognoistre les Estats & Prouinces vniées des Pays-bas pour libres & frācs: ce qu'il se chargea de faire entēdre à leurs Alteſſes. & pour ce faire il partit le 9 Mars de la Haye & entra au bateau de chassē du Prince Maurice pour aller à Anuers, & de là à Bruxelles, d'où il retourna le 19. du mesme mois à la Haye. Il apporta lettres des Archiducs ausdits sieurs des Estats, dont la substance estoit: Et afin que plus cōmodement & heureusemēt tous leurs differents fussent accordez par vne bōne Paix, ils offroiēt vne Trefue & cessatiō d'armes pour huit mois pendant laquelle il ne se feroit aucun acte d'hostilité, prinſes de villes, forteresse, sieges, ou surprinſes, ne constructions d'aucuns forts de part & d'autre.

Cette lettre leuē, & le General Ney ayant eu audience: les Estats luy donnerent responce par escrit, Qu'ils auoient agreable les offres des Archiducs pour le traictē de paix, dont ils donneroient aduis à tous ceux auxquels ils le deuoient donner. Qu'ils acceptoient la Trefue de huit mois aux conditions portees par la lettre des Archiducs, à commencer le quatriēme May: pourueu aussi qu'on entrast en Conference pour traicter des affaires dans le premier de Septembre.

Après que les conditions pour la Trefue de huit mois furent redigees par escrit, & dans icelles mis. Que les Archiducs promettoient de les faire ratifier au Roy d'Espagne dās trois mois: Et de donner ausdits sieurs des Estats deux actes, l'vne de ladite ratification, l'autre, v-

ne particuliere & generale renonciation du Roy d'Espagne aux Pays & Prouinces vnies, avec declaration qu'il n'y pretendoit rien, le General Ney s'en retourna à Bruxelles pour les faire signer aux Archiducs, avec promesses de se retrouver incontinent à Lillo, où lesdits sieurs des Estats enuoyeroient vn Commissaire pour receuoir de luy les Lettres des Archiducs par lesquelles ils aggreroient lesdites Trefues, & promettoient d'effectuer lesdites conditions: & qu'en mesme temps aussi ledit Commissaire bailleroit pareilles lettres desdits sieurs des Estats audit General Ney.

Theodore Doula Commissaire des Estats estant arriué le quatorziesme Autil à Lillo, il y eut encor quelque dispute sur la forme des lettres que luy vouloit bailler le General Ney, lequel pour monitrer que les Archiducs ne desiroient en cest affaire que d'y cheminer avec toute sincerité, il les fit derechef dresser en la mesme forme que celles des Estats, & en grâde diligence les enuoya à Bruxelles, d'où on les luy renuoya signees & sceelées suiuant le desir desdits Estats avec vn present d'une chaine d'or que le General Ney donna audit Doula de la part des Archiducs.

Toutes ces choses accordees, les Estats firent par tous les pays de leur obeyssance publier des lettres Patentes, dans lesquelles ils mandoient à tous leurs subjects, Que par la grace de Dieu les affaires des Prouinces vnies des Pays-bas estoient paruenues à ce poinct, Que les Archiducs s'offroient de traicter la Paix avec eux comme Estats libres, francs pays, & Prouinces auxquelles leurs Altessees ne pretendoient rien, ny ne vouloient pretendre, soit que l'on accordast avec eux, ou vne Paix, ou vne longue Trefue. Pour à laquelle Paix paruenir, par l'aduis du Prince Maurice, & des Conseillers des Estats, on auoit accordé vne Trefue & cessation d'armes par tous les Pays-bas durant huit mois, à cōmencer du quatriesme May. Ce qu'ils auoient fait afin que telles affaires fussent cōmuniquées aux Roys de Frâce, d'Angleterre, & de Danemark, aux Electeurs & autres Princes du saint Empire: avec lesquels ils estoient en alliance & amitié, & recognoistre leurs conseils & aduis, afin qu'ils ne fissent rien qu'à la gloire de Dieu, à l'augmentatiō de leur Religio, & à l'vtilité publique. mais que cōme il falloit deuant toutes choses rendre grace à Dieu, pour tant de benefices que les Prouinces vnies auoient receus de sa liberale main durant ces guerres, il falloit aussi premieremēt prier Dieu de dōner sur ce sa grace & benediction: Et que pour cest effect ils assignoient au neuuesme du mois de May le iour pour ieusner & faire prieres par tous les Pays des Prouinces vnies.

Le pouuoir donné par les Archiducs au General Ney portoit, de declarer & interpreter les difficultez qui pourroient suruenir sur lesdites Trefues. Ce fut pourquoy il s'en retourna encor avec Doula à la Haye. Aucuns du Conseil des Estats n'en furent pas cōtents, toutesfois il se comporta avec telle dexterité, qu'il accorda toutes les difficultez pour les limites & pays qui seroient comprins en ladite Trefue. Plus, qu'il y auroit Trefues par toute la mer Septentrionale, & mesme dans tout le destroit d'entre la Frâce & l'Angleterre, à cōmencer du quatorziesme Iuin: Aussi que les nauires de guerre des Estats lesquelles couroient les riuages d'Espagne, seroient reuoquees six semaines apres, & que toutes voyes d'hostilité ne se feroient sur mer qu'entre gens de guerre.

Le Roy tres-Chrestien ayant receu lettres des sieurs des Estats sur la conclusion de ladite Trefue, & du traicté de pacification qu'ils esperoient faire, despescha incontinent Monsieur le President Ianin, avec les sieurs de Roilly & de Busenval vers lesdits Estats. Arriuez à la Haye ils eurent audience le 18. May, en laquelle ils presenterent, Que les Estats sçauoient bien quelle amitié, bien-veillance & assistance sa Maiesté tres-Chrestienne leur auoit iusques à present demonstré: Dequoy il auoit tant plus iuste occasion de se plaindre d'eux, lesquels estoient entrez, sans son conseil, si auant en vn traicté de Paix. Toutesfois que comme il les auoit par cy-deuant aymez, sa Majesté desiroit continuer ceste mesme amitié, soit qu'ils conclusent, ou la Paix, ou la guerre. Puis ils les requierent de deputer aucuns avec lesquels ils peussent communiquer & tenir conseil: ce qui fut fait.

Aussi le Roy d'Angleterre ayant receu aduis de tout ce que dessus par Iean Berk, Syndic de Dordrecht, & par Iacques de Maldere, enuoyez vers luy par lesdits sieurs des Estats, il despescha pour assister audit traicté de paix qui s'y feroit, le sieur Richart Spenser Baron, & Rudolfe Vinvad, lesquels arriuerent à la Haye au commencement du mois de Iuillet.

Les Archiducs vserent de tant de diligence pour auoir l'acte d'approbation & consentement du Roy d'Espagne promis par les articles de la Trefue, que le 24. Iuillet Loys Verreken arriua du matin à la Haye, où l'apresdisnee mesme il eut audience, en laquelle il la presenta aux Estats, & estoit de ceste teneur.

Après que sa Majesté informée des articles que ses tres-chers frere & sœur les Archiduc & Infante, Princes Superieurs & Proprietaires des Pays-bas ont accordez pour vne Trefue de huit mois & cessation tant d'armes que de tous actes d'hostilité, & de deputer personages de qualité pour traicter d'une paix generale, ou de plus longues trefues, il les a eu

pour agreables, & les a ratifiez & confirmez comme s'il les auoit faits luy mesme : promettant iamais ny contreuenir.

• Les Estats trouuerent que ceste approbation n'estoit en la forme qu'elle deuoit estre. Premièrement pource qu'elle n'estoit euee qu'en papier, qu'elle n'estoit soublinee que de ces mots, *Ioel Ré, & seulement sceellée du petit seau*. Secondement que les Archiducs estoient nommez Proprietaires des Pays-bas: & Tiercement, *Que la cause principale y auoit esté obmise, En qualité & comme les tenans pour pays & Provinces libres, &c.* Ce qui fut cause qu'ils la declarerent imparfaite, tât en la forme qu'en la qualité de ce qu'elle cōtenoit par euee.

Verreiken tascha de contenter les Estats le mieux qu'il peut, leur remontrant qu'ils deuoient s'en contenter, & que le principal defaut venoit de la nonchalance de l'Escriuain: & que n'ayant peu obtenir, il demanda six iours de terme pour scauoir la volonté des Archiducs sur ces nouuelles difficultez.

Le 2. d'Aoust il monstra la responce des Archiducs aux Estats, portant qu'ils desiroient les contenter de ce qu'ils demandoient, qu'ils en rescriroient au Roy d'Espagne dont ils auroient responce en bref: mais aussi qu'ils requeroient les Estats de faire retirer leurs Nauires de guerre des limites d'Espagne.

Pour responce ils baillerent à Verreiken trois minutes sur lesquelles ils desiroient que l'approbation fust dressee, toutes trois en diuerses langues, scauoir, en Latin, François & Flaman. Sur l'instance de faire retirer leurs nauires des limites d'Espagne, ils promirent aussi de commander, que si dans six semaines apres le 24. Iuillet il y auoit aucuns de leurs subiects qui continuassent de faire la guerre vers l'Espagne, ils seroient declarez Pirates: mesmes qu'ils se rendroient soigneux de tascher à faire rendre ce qui auroit esté pris. Mais pour le point d'acheminer ce traicté de la paix ou longues trefues, qu'ils ne le pouuoient faire iusques à ce que l'on les eust fait certains de l'approbation, & renonciation du Roy d'Espagne, ainsi qu'ils la desiroient.

Plus l'Aduocat Bernefeld, par commandement du Prince Maurice, luy dit, que les Estats ne trouuoient pas bonne la procedure du General Ney, en ce qu'il faisoit de grands presens aux Officiers des Estats employez en ceste negociation, ce qu'il ne pouuoit faire sans le commandement de leurs Alteses, puis que c'estoit de leur argent. Car si cela se continuoient & que l'on le peust recognoistre, ceux qui auroient eu des presens seroient punis comme traistres, & donneroit on occasion aux Estats de n'entrer en aucune Conference.

Sur ce pour parlé de Paix, non seulement aux Pays-bas, mais aussi par tout le monde, l'on a eu diuerses opinions, & ne pouuoient ceux qui cognoissoient les puissances d'Espagne croire que le Roy d'Espagne voulust donner l'approbation promise par les Archiducs. Autres au contraire disoient que l'Espagnol ayant despendu plus de 120. millions d'or à ceste guerre, & répandu tant de sang, sans beaucoup exploicter, donneroit l'approbation requise. La raison, disoient-ils, est, que la gendarmerie se mutine, les marchands sont fort en arriere, & peu d'argent deuant eux, l'Espagne mesmes est agitée des flottes des Pays-bas, & les nauigations aux Indes empeschees, bien que le Roy face vne grande despence, & qu'il fournisse les ports & haures de garnisons. Dauantage les Hollandois courent aux Indes, & ne pillent seulement les nauires du Roy, mais aussi font au commerce des espiceries grand dommage, ne se contentas pas d'aller aux Indes Orientales, les offencer & tenir en cōtinuelles craintes, mais aussi qu'ils auoient dressé vne compagnie qui deuoit durer trente six ans, pour courir aux Indes Occidentales, ce que les creanciers du Roy d'Espagne deuoient craindre, car si la flotte d'Espagne demeueroit vne fois, ils perdroient l'aduance de leurs deniers. Dauantage quand les Estats seroient reduits à l'extremité, l'apparence estoit plustost qu'ils se donneroient à la France.

Mais les discours des esprits Politiques estoient, que difficilement on croiroit que les Estats entendissent à vne Paix, attendu qu'on ne pouuoit comprendre comme ils pourroient durant icelle conseruer & entretenir leur Estat & leurs Provinces. Qu'en la Paix il leur pourroit aisement venir vne diuision pour raison du manquement de gouvernement general: aussi qu'ils seroient contrains de leuer les impositions & contributions, principalement quand les Archiducs les osteroient de leurs pays: & ne pourroient conseruer l'intendance sur mer sans conuoy & argent de licence. Plus, quand ils laisseroient les choses au premier estat, il n'y auroit point de doute que le commerce ne se transportast à Anuers, d'autant que les marchands cherchent les lieux où ils ont à donner le moins d'argent. Plus, qu'ils seroient quittez de leurs gens de guerre: que leur Religion ne seroit pas sans estre agitée: Et dès que les Communes auroient vn peu gousté de la Paix, elles ne seroient pas aisées à faire rentrer en la guerre. Aucuns demandoient, qui payeroit les debres dont tant que la guerre auoit duré on n'auoit pas fait grande instance. Autres disoient, qu'il

ne seroit pas aussi possible de les conseruer tous au Gouvernement, qu'ils ne fussent gaignez & corrompus par presens. De rentrer aussi à la guerre, il y auoit peu d'apparence, le peu d'heur que les estats y auoient eu les deux dernieres annees estoit la cause de l'accord des Trefues de huit mois, fait assez soudainement. Tels & semblables discours tenoit-on en diuers pays. Retournons au fil de l'histoire.

Le 15. Octobre le Marquis Spinola escriuit aux États, & leur fit entendre que la Ratification estoit venue d'Espagne: a ceste fin leur demandoit pour le General Ney, & le sieur de Verreiken, vn passeport, lequel luy ayant esté enuoyé, ils arriuerent le 24. à la Haye: & le 25. en l'assemblée des États, monstrent ladite Ratification datée du 8. Septembree à Madril, écrite en papier, en langage Espagnol, soubsignee *To el Re*, & scellée comme on a accoustumé de sceller les Edicts en Espagne. La Declaration des Archiducs, & la promesse qu'ils auoient faicte aux États y estoit premierement transcrite: puis la Ratification du Roy d'Espagne en telle signification.

Après qu'au susdit Traicté leurs Alteſſes ont promis qu'ils obtiendroient de nous lettres en forme de ratification, consentement & declaration (comme les États auoient déjà obtenu de leurs Alteſſes) avec les clauses generales & particulieres *renonciations & obligations*: Nous apres meure deliberation, de nostre science & volonté franche, pleine puissance Royale, sommes contents que leursdites Alteſſes accomplissent leur promesse, & procurent le principal Traicté pour la Paix, ou de la Trefue en nostre nom, ou au leur, avec les États, que nous tenons pour Pays, Prouinces & États libres, auxquels nous ne pretendons rien: Acceptant & recognoissant tout ce qui est contenu en la susdite declaration de leurs Alteſſes, l'approuuant par parole & en foy de Roy, voulant l'entretenir, comme si dès le commencement nous l'eussions promis, accordé & ratifié, ne voulant endurer qu'il y soit contreuenue. Promettant aussi, que tout ce qui sera fait au contraire, directement ou indirectement, vouloir le restablir & reparer: nous y obligeant en parole de Roy, avecques generales & particulieres renonciations & obligations: & ce aussi tost que la Paix ou longue Trefue sera concludé. Et tout ce qui sera necessaire pour la manutention d'icelle nous le ferons expedier aussi tost en la meilleure forme, & l'enuoyerons aux États afin qu'ils en recoiuent contentement. Reseruant aussi, qu'au cas que le Traicté de Paix, ou longue Trefue ne se face, ceste ratification n'aura lieu, & sera comme si iamais elle n'eust esté expedice, sans que les États en puissent pretendre aucun droit, demeurant les choses au premier estat.

A la presentation de ceste ratification le General Ney haut-loua le cœur ouuert du Roy d'Espagne, qu'il asseura estre sans feintise, disant qu'il sembloit interpreter ses promesses, & ne vouloit s'obliger plus outre que ce qu'il vouloit tenir. L'Audiencier Verreyken tesmoigna aussi comme leurs Alteſſes pensoient de bonne foy à la paix, comme il se pouuoit recognoistre facilement en tout ce qui s'estoit traicté entr'eux par cy-deuant.

Les lettres de ratification ayant esté leuës & receuës par les États, du commencement on les trouua viciueuses en la forme, & en ce qu'elles contenoient: En la forme, en ce qu'elles n'estoient point signees du nom du Roy, ny escrites en parchemin, mais sur simple papier. En la teneur, pource qu'elles estoient mal escrites, & plusieurs mots oubliés, & d'autres interposez qui pouuoient faire vne double intelligence, & lesquels on n'auoit mis suiuant ce que l'on auoit donné par escrit. Après que les États eurent communiqué lesdites lettres aux Ambassadeurs de France & d'Angleterre, ils demanderent ausdits Ney & Verreyken Commissaires des Archiducs, s'il n'y auoit point moyen d'obtenir vne autre ratification, lesquels responderent, que difficilement cela se pourroit faire.

L'affaire estant remise en Conseil, presents les Ambassadeurs de France & d'Angleterre, lesdits Commissaires responderent, que par lesdites lettres de ratification il estoit assez déclaré tant en general que par articles expres, que le Roy d'Espagne & les Archiducs tenoient les Prouinces vnies pour pays & estats libres, & auxquelles ils ne pretendoient aucun droit: Plus, que les États auoient assez de puissance par l'aide de tant de Roys, Princes & Republiques dont ils estoient aliez, de maintenir leur liberté quand ils ne se pourroient pas accorder au traicté general de Paix, ou de Trefue, avec le Roy Catholique & les Archiducs.

Les États apres vne longue deliberation avec le Prince Maurice & plusieurs Ambassadeurs, firent responce ausdits Commissaires des Archiducs, Que lesdites lettres de ratification estoient non seulement imparfaites en la teneur & en la forme, mesmes que l'on en pourroit tirer vne nullité de tout ce qui auoit esté promis par la derniere clause.

Maisencores qu'il y eust du subject de considerer si on deuoit à cause desdites Lettres de ratification entrer en Traicté de Paix, toutesfois afin de mettre fin aux longues guerres sanglantes, & que par la Paix les Prouinces des Pays-bas peussent estre remises en leur premier estat, ils alloient enuoyer par routes les villes & citez des pays & Prouinces vnies, pour proposer ladite ratification à ceux qu'il en falloit communiquer, & puis que dans six semaines on feroit sçauoir ausdits Commissaires des Archiducs, si on passeroit outre au Traicté de Paix, ou non: Avec expresse protestation, &c.

Ceste responce fut donnee le troisieme Nouembre aux Commissaires des Archiducs: en la leur donnant on leur demanda s'ils vouloient laisser les originaux de ladite ratification aux Estats: ce qu'ils respondirent ne pouuoir faire sans commandement des Archiducs.

Le General Ney prit la charge de s'en aller en poste à Bruxelles pour en rapporter la resolution, d'où il retourna le quatorzieme du mois: & estant entré en communication, il declara qu'il auoit commandement de les deliurer, en prenant vn recepillé, portant, Que leurs Alteſſes auoient satisfait à leurs promesses, & qu'au cas que le Traicté de Paix ne reuſiſt, que les Estats leur rendroient lesdits originaux. A quoy les Estats firent responce pour derniere resolution, qu'ils desiroient auoir lesdits originaux, sans bailler recepillé, & qu'ils ne pouuoient comprendre comme leurs Alteſſes auoient satisfait à leurs promesses, veu que iusques à present ils n'auoient obtenu l'escrit en la forme qu'ils auoient promis: car les originaux qu'ils leur presentoient estoient de foy nuls, & ne croyoient les deuoir rendre quand ils les auoient rectus. Sur ceste responce le General Ney reprit encor la poste, & s'en alla à Bruxelles, d'où il retourna à la Haye le vingt-neufiesme dudit mois, avec commandement de laisser lesdits originaux, ce qu'il fit: puis luy & Verreyken s'en retournerent à Bruxelles, pour y attendre la responce que l'on leur auoit promise enuoyer dans six semaines sçauoir est, si on passeroit outre au Traicté de Paix, ou non.

Les Estats Generaux suiuant ladite responce auoient renuoyez les deputez extraordinaires vers les principaux & particuliers des Prouinces & villes de leurs pays dès le dixiesme Nouembre, pour conferer & consulter si sur ladite Ratification du Roy d'Espagne, ils deuoient entrer en Traicté, ou non, leur enchargeant d'estre de retour au 10. Decembre; & apporter chacun sa commission & resolution par escrit. Auquel commandement ils ne faillirent de retourner à la Haye audit iour: où estans derechef assemblez le 10. dudit mois, & veu tous les pouuoirs & commissions, la pluspart desquels concludoient, Que nonobstant le defect qui se trouuoit à la ratification, que l'on passeroit outre, avec ceste exception que l'on demeureroit au fondement de la liberté des Pays, contre lequel, ny contre la souueraineté & gouvernement d'iceux, ne seroit rien touché, quitté ou laissé.

Surquoy le 24. Decembre les Estats manderent aux Archiducs vn escrit de ceste teneur.

Après auoir encor reprins les precedentes protestations & declarations contenues en la responce du deuxiesme Nouembre, desquelles nous ne sommes resolu de nous departir, nous sommes contents entrer en Traicté avec les Deputez de vos Alteſſes, desirans à ceste fin que vous les enuoyez à la Haye. Dauantage à cause que la Trefue de huit mois expire le 4. Ianuier, nous laissons à vos Alteſſes de considerer s'il seroit bon de la prolonger durant ledit Traicté pour six semaines ou vn mois.

Voyla tout ce qui s'est passé en ceste annee atx Pays bas, tant au Traicté pour la Trefue ou cession d'armes faicte pour huit mois, qu'aux seuretez des approbations & ratifications que rechercherent les Estats, afin d'estre recognus par le Roy d'Espagne & par les Archiducs, estre vne Republique souueraine & libre. Nous dirons l'an suiuant ce qui se passa au Traicté general pour la Paix, ou longue Trefue entr'eux.

Sur ce que l'Empereur eut aduis aussi que les Estats vouloient entrer en Traicté avec le Roy d'Espagne, il leur enuoya le neufiesme Octobre vne lettre, dont la teneur estoit, Que les Estats pouuoient bien se souuenir quelle peine, trauail & despense, feu son pere l'Empereur Maximilian auoit faicte à faire cesser la guerre des Pays-bas, & les ramener à vne Paix: & que luy ensuiuant les vestiges de son pere auoit tousiours continué, comme il seroit facile à voir par plusieurs Traictés & Ambassades; c'est pourquoy il s'esbahissoit que sans luy l'on se soit entremis de traicter de telles affaires; encores plus que l'on ne luy ait donné aucun aduis de ce que l'on entreprend de faire des Prouinces vnies des Pays-bas, vne Republique; veu que les Estats sçauent tres-bien que lesdits Pays sont fiefs mouuans du saint Empire, comme cela se peut voir aux Archiues, inuestitures, indults, concordats, & resultats du saint Empire.

Que lesdits Estats eussent à considerer qu'en cest affaire de tel haut fief mouuant du

sainct Empire, ne se pouuoit rien faire ny entreprendre au contraire, sans le sçeu & consentement de sa Majesté Imperiale, qui estoit chef & souuerain Seigneur de fief, pour changer la nature du fief: que ce qu'ils feroient ne pourroit auoir fermeté suivant les ordonnances & statuts faits sur les droicts des fiefs.

Desirant à ceste fin sçauoir d'eux comme les choses en alloient, & iusques où ils en estoient, à fin que son droict & celuy du sainct Empire fust conserué: aussi qu'ils n'eussent à passer outre sans son consentement, ou quitter aucune chose qui peult luy preiudicier, ou au sainct Empire.

Cette lettre demeura sans response. Aussi n'y auoit il pas d'apparence que les Estats qui s'estoient rendus libres par les armes contre vn si puissant ennemy que l'Espagnol, voulussent aduouer d'estre vassaux de l'Empire.

Verreken alloit & reuenoit souuent de Bruxelles à la Haye, offrant au Prince Maurice & au Conseil des Estats de traicter avec eux d'une Trefue à longues annes au nom des Archiducs, comme avec vn Estat libre: suivant la proposition par escrit baillee par les Ambassadeurs des Roys de France & d'Angleterre.

Le Prince Maurice, & le Conseil des Estats, reputoient toutes ces propositions artifices, par lesquels les Espagnols vouloient reduire les Prouinces vnies à subuersion & ruine, principalement pource que Verreken en ses offres ne faisoit nulle mention de l'agregation du Roy d'Espagne en la forme que les Estats l'auoient requise.

Ils escriuirent sur ce subiect plusieurs lettres aux Prouinces & aux particuliers des villes vnies, afin qu'ils eussent à enuoyer leurs Deputez à la Haye, munis de ferme resolution pour empescher que leurs ennemis ne fissent tomber l'Estat en vne perpetuelle seruitude.

Cependant les Deputez extraordinaires de toutes les villes des Prouinces vnies se rendirent à la Haye, entre lesquels il se trouua diuers aduis sur le faict de traicter vne longue Trefue, les vns la desirant d'une façon, les autres d'autres. En fin les mesmes Deputez qui auoient esté esleus par les Estats pour traicter de la Paix, le furent pour traicter de la Trefue, & se rendirent à Breda.

Le Marquis Spinola avec ses condeputez pour les Archiducs se rendirent aussi en mesme temps à Anuers: où par le trauail, soin & diligence du President Ianin & Elie de la playe, Ambassadeurs du Roy Tres-Chrestien: & de Richard Spenser & Rodolphe Vinvod, Ambassadeurs du Roy d'Angleterre, la Trefue fut concludë & arrestee le neuuiesme Auil à Anuers dont voicy la teneur.

I.

Premierement, lesdits Seigneurs Archiducs declarent tant en leurs noms que dudit Seigneur Roy, qu'ils sont contents de traicter avec lesdits Seigneurs Estats Generaux des Prouinces vnies, en qualité & comme les tenans pour Pays, Prouinces & Estats libres, sur lesquels il ne pretendent rien: & de faire avec eux, es noms & qualité susdits, comme ils font par ces presentes, vne Trefue aux conditions cy-apres escrites & declarees. Il a reuouqué cela par apres.

II.

A sçauoir que ladite Trefue sera bonne, ferme loyale & inuiolable, & pour le temps de douze ans, durant lesquels il y aura cessation de tous actes d'hostilité de quelque façon qu'ils soient entre lesdits Seigneurs Roy, Archiducs, & Estats Generaux, tant par mer, & autres eaux, que par terre, en tous leurs Royaumes, pays, terres & Seigneuries, & pour tous leurs subjets & habitans, de quelque qualité & condition qu'ils soient, sans exception de lieux ny de personnes,

III.

Chacun demeurera saisi, & iouïra effectivement des pays, villes, places, terres, & Seigneuries qu'il tient & possede à present, sans y estre trouble, ny inquieté de quelque façon que ce soit, durant ladite Trefue: En quoy on entend comprendre les bourgs, villes, hameaux, & plat pays qui en dependent.

IV.

Les subjets & habitans es pays desdits Seigneurs Roy, Archiducs & Estats, auront toute bonne correspondance & amitié par ensemble durant ladite Trefue, sans se ressentir des offenses & domniages qu'ils ont receu par le passé. Pourront aussi frequenter & se iourner es Pays l'un de l'autre, & y exercer leur trafic & commerce en toute seureté, tant par mer, autres eaux que par terre.

Ce

Ce que toutefois ledit Seigneur Roy entend estre restreint & limité aux Royaumes, pays, terres & Seigneuries qu'il tient & possède en l'Europe, & autres lieux & mers, où les subjects des Roys & Princes, qui sont ses amis & alliez, ont ledit trafic de gré à gré. Et pour le regard des lieux, villes, ports, & haures qu'il tient hors les limites susdits, Que lesdits Seigneurs Estats & leurs subiects n'y puissent exercer aucun trafic sans la permission expresse dudit Seigneur Roy. Bien pourront-ils faire ledit trafic si bon leur semble es pays de tous autres Princes, Potentats, & peuples qui le leur voudront permettre, mesmes hors lesdits limites, sans que ledit Seigneur Roy, les Officiers & subiects, qui dependent de luy, donnent aucun empeschement à ceste occasion ausdits Princes, Potentats, & peuples qui le leur ont permis ou permettront, ny pareillement à eux, ou aux particuliers avec lesquels ils ont fait, & feront ledit trafic.

V.

Et pource qu'il est besoin d'un assez long temps pour aduertir ceux qui sont hors lesdites limites avec forces & nauires, de se desister de tous actes d'hostilité, a esté accordé, que la Trefue n'y commencera que d'aujourd'huy en un an: Bien entendu que si l'aduis de ladite Trefue y peut estre plustost, que deslors l'hostilité y cessera: mais si apres ledit temps d'un an quelque hostilité y estoit commise, le dommage en sera réparé sans remise.

VI.

Les subiects & habitans es pays desdits Seigneurs Roy, Archiducs, & Estats, en faisant trafic es pays l'un de l'autre, ne seront tenus payer plus grands droicts & impositions que leurs subiects, & ceux des amis & alliez qui seront le moins chargez.

VII.

Et auront aussi les subiects & habitans desdits Seigneurs Estats, la mesme seureté & liberté es Pays desdits Seigneurs Roy, & Archiducs, qu'elle a esté accordée aux subiects du Roy de la grande Bretagne, par dernier traicté de Paix & articles secrets faicts avec le Connestable de Castille.

VIII.

Ne pourront semblablement les marchans, maistres de Nauires, pilotes, matelots, leurs nauires, marchandises, denrees, & autres biens à eux appartenans, estre saisis & arrestez, soit en vertu de quelque mandement general ou particulier, & pour quelque cause que ce soit, de guerre ou autrement, ny mesme sous pretexte de s'en vouloir seruir pour la conseruation & deffence du pays. On n'entend toutesfois en ce comprendre les saisies & arrests de Justice par les voyes ordinaires à cause des debtes, propres obligations & contractz vallables de ceux sur lesquels lesdites saisies auront esté faictes, à quoy il sera procedé selon qu'il est accoustumé par droict & raison.

IX.

Et pour le regard du commerce des Pays-bas, & des daces & impositions qui se leueront sur les denrees, s'il est trouué cy-apres qu'il y ait de l'exces, & qu'il en soit incōmodé, à la premiere requisition qui en sera faicte d'une part ou d'autre, Commissaires seront deputez pour les regler, & moderer par aduis commun, si faire se peut, sans que pourtant la Trefue soit rompue, au cas qu'ils n'en puissent demeurer d'accord.

X.

Si quelques sentences & iugemens auoient esté donnez entre personnes de diuers partis non deffendus, soit en matiere ciuile ou criminelle, ils ne pourront estre executez contre les personnes des condamnés, ny sur leurs biens, durant ladite Trefue.

XI.

Lettres de Marque & represailles ne seront octroyees durant ledit temps, si ce n'est à cognoissance de cause, & es cas esquels il est permis par les loix & constitutions Imperiales, & selon l'ordre estably par icelles.

Ecc iij

XII.

On ne pourra aborder, entrer, ny s'arrester aux ports, haures, plages & rades es pays l'un de l'autre avec nauires & gens de guerre en nombre qui puisse donner soupçon, sans le congé & permission de celuy, sous lequel sont lesdits ports, haures, plages, & rades, sinon qu'on y fust ietté par tempeste, ou contraint de le faire par necessité, & pour euer quelques perils de mer.

XIII.

Ceux sur lesquels les biens ont esté saisis & confisquez à l'occasion de la guerre, ou leurs heritiers, & ayans cause, iouiront d'iceux biens durant ladite Trefue, & en prendrôt la possession de leur auctorité priuee, & en vertu du present traicté, sans qu'il leur soit besoin d'auoir recours à la iustice, nonobstant toutes incorporations au fîsq', engagement, dons en faicts, traictés, accords & transactions, quelques renonciations qui ayent esté mises esdites transactions, pour exclurre partie desdits biens, ceux à qui ils doiuent appartenir, à la charge neantmoins qu'ils n'en pourront disposer, ny les charger ou diminuer, pendant le temps de ladite iouissance, sinon qu'ils en ayent obtenu la permission desdits Seigneurs Archiducs ou Eltats.

XIV.

Ce qui aura lieu aussi au profit des heritiers du feu Seigneur Prince d'Orange, mesme pour les droits qu'ils ont es salines du Comté de Bourgogne, qui leur seront remises & delaisées, avec les bois qui en dependent. Et quant au procez de Chasbelbelin intenté du vivant dudit feu Seigneur Prince d'Orange en la Cour de Malines, contre le Procureur general du Roy Catholique, lesdits Seigneurs Archiducs promettent de bonne foy de leur y faire rendre Iustice dans vn an, apres la poursuite qui en sera faicte par eux, sans aucune remise, & en toute droicte & sincerité.

XV.

Si le fîsq' a faict vendre d'une part & d'autre quelques biens confisquez, ceux à qui ils doiuent appartenir en vertu du present traicté, seront tenus se contenter de l'interest du prix à raison du denier seize, pour en estre payez chacun an durant la Trefue, à la diligence de ceux qui possèdent lesdits biens, autrement leur sera loisible de s'en adresser au fond & heritage vendu.

XVI.

Mais si lesdites ventes auoient esté faictes par Iustice, pour les debtes bonnes & legitimes de ceux à qui lesdits biens souloient appartenir auant la confiscation, il leur sera loisible ou à leurs heritiers & ayans cause, de les retirer, en payant le prix dans vn an, à compter du iour du present traicté, apres lequel temps ils n'y seront plus receus, & ladite retraicte & rachapt, ayant esté faict par eux, ils en pourront disposer, comme bon leur semblera, sans qu'il leur soit besoin d'en obtenir autre permission.

XVII.

On n'entend toutefois donner lieu à ceste retraicte, pour les maisons situees dans les villes, vendues à ceste occasion, pour la grande incommodité & notable dommage qu'en receuroiēt les acquereurs, à cause des changemens & reparations qu'ils pourroient auoir fait esdites maisons, dont la liquidation seroit trop longue & difficile.

XVIII.

Et quant aux reparatiōs & melioratiōs faictes es autres biens vendus, dont le rachapt est permis, si elles sont pretendues, les Iuges ordinaires y feront droict à cognoissance de cause, demeurant le fond & heritage hypothecqué pour la somme à quoy les meliorations seront liquidees: sans neantmoins qu'il soit loisible ausdits achepteurs vser du droict de retention pour en estre payez & satisfaits.

XIX.

Si quelques fortifications & ouurages publics ont esté faicts d'une part ou d'autre avec permission & auctorité des Superieurs, en des lieux dont la restitution doit estre faicte par le present

present traité, les propriétaires d'iceux seront tenus se contenter de l'estimation qui sera faite par les luges ordinaires tant desdits lieux, que de la iurisdiction qu'ils y auoient sinon que les parties s'en accordent de gré à gré.

XX.

Quant aux biens d'Eglises, Colleges & autres lieux pleux, assis dans les Prouinces vnies, lesquels estoient membres dependans d'Eglises, Benefices & Colleges, qui sont en l'obeyssance des Archiducs, ce qui n'a esté vendu auant le premier de Ianuier 1607. leur sera rendu & restitué, & y rentreront aussi de leur auctorité priuee, sans ministre de Iustice, pour en iouyr durant la Trefue, & sans en pouuoir disposer, selõ qu'il a esté dit cy-dessus, mais pour ceux vendus auant ledit tẽps, ou donnez en payemẽt par les Estats d'aucunes des Prouinces, la rête du prix leur sera payée chacun an, à raison du denier seize, par la Prouince qui aura fait ladicte vente, ou donné lescdits biens en payement & assignee aussi en sorte qu'ils en puissent estre asseurez. Le semblable sera fait & obserué du costé desdits Seigneurs Archiducs.

XXI.

Ceux à qui les biens confisquezz doiuent estre restituez, ne seront tenus payer les arrerages des rentes, charges, & deuoirs specialement affectez, & assignez sur iceux biens, pour le temps qu'ils n'en ont iouy, & s'ils en sont poursuiuis & inquietez d'une part ou d'autre, en seront renuoyez & absous.

XXII.

On ne pourra pretendre aussi pour les biens vendus ou accordez, afin d'estre dicquez ou redicquez, sinon les redevances, ausquelles les possesseurs se sont obligez par les traictez sur ce faicts avec les interests des deniers d'entree, si aucuns ont esté donnez, aussi à raison du denier seize, comme dessus.

XXIII.

Les iugemens donnez pour biens & droicts confisquezz avec parties qui ont recognu les Iuges, & ont esté legitiment deffenduz, tiendront & ne seront les condamnuez receus à les contredire sinon par les voyes ordinaires.

XXIV.

Lesdits Seigneurs Archiducs & Estats commettront chacun endroit soy les Officiers & Magistrats, pour l'administration de la Iustice & Police, es villes & places fortes, lesquels par le present traité, doiuent estre renduz aux propriétaires, pour en iouir durant la Trefue.

XXV.

Les meubles confisquezz, & fruiçts qui seront escheus auant la conclusion du present traité, ne seront subiects à restitution.

XXVI.

Les actions mobiliaries, qui ont esté remises par lescdits Seigneurs Archiducs ou Estats au profit des debtors particuliers, auant le premier de Ianuier 1607. demeurent esteintes d'une part & d'autre.

XXVII.

Le temps qui a couru pendant la guerre, à commencer depuis l'année 1567. iusques à prtẽsent, ne sera compté pour induire prescription entre ceux qui estoient de diuers partis.

XXVIII.

Ceux qui se sont retirez en pays neutre, durant la guerre, iouiront aussi du fruiçt de ceste Trefue, & pourront resider où bon leur semblera, retourner mesmes en leurs anciens domiciles, pour y habiter en toute seureté, obseruant les loix du pays, sans qu'à l'ocasion de la demeure, qu'ils feront en quelque lieu que ce soit, leurs biens puissent estre saisis, ny eux priuez de la iouyssance d'iceux.

XXIX.

Aucuns nouveaux forts ne seront faicts durant ladite Trefue dans les pays-Bas d'une part ny d'autre.

XXX.

Les Seigneurs de la Maison de Nassau ne pourront estre poursuiuis ny inquietez durant ladite Trefue, en leurs personnes ou biens, soit pour debtes contractees par le feu Seigneur Prince d'Orange, depuis l'an 1567. iusques à son trespas, soit pour les arrerages escheus pendant le saisissement & annotation des biens, qui en estoient chargez.

XXXI.

S'il y a contreuention à la Trefue, faite par quelques particuliers sans commandement desd. Seigneur, Roy Archiducs, ou Estats, le dõmage sera reparé au meisme lieu où la contra-

mention aura esté faite, s'ils y sont surpris ou bien en celuy de leur domicile, sans qu'ils puissent estre pourſuiuis ailleurs en leurs corps ou biens en quelque maniere que ce soit. Et ne leur sera loisible de venir aux armes, & rompre la Trefue à cette occasion, mais bien permis en cas de denegation manifeste de iustice, de se pouruoir ainsi qu'il est accoustumé, par lettres de marque ou reprefailles.

XXXII.

Toutes exheredations & dispositions faites en haine de la guerre, sont declarees nulles, & comme non aduenues.

XXXIII.

Les subiects & habitans es pays desdits Seigneurs Archiducs & Estats, de quelque qualité & condition qu'ils soient, sont declarez capables de succeder les vns aux autres, tant par testament qu'ab intestat selon les coustumes des lieux : & si quelques successions estoient cy-deuant escheuës à aucuns d'eux, ils y seront maintenus & conseruez.

XXXIV.

Tous prisonniers de guerre seront deliurez d'une part & d'autre, sans payer rançon.

XXXV.

Et afin que le present traicté soit mieux observé, promettent respectiuellement lesdits Seigneurs Roy, Archiducs, & Estats, de tenir la main, & employer leurs forces & moyens, chacun endroit soy, pour rendre les passages libres, & les mers & riuieres nauigeables seures, contre l'incursion des mutins, pirates, corsaires & voleurs, & s'ils les peuuent apprehender de les faire chastier avec rigueur.

XXXVI.

Promettent en outre de ne rien faire contre & au preiudice du Traicté, ny souffrir estre fait, directement ou indirectement, & si fait estoit de le faire reparer, sans aucune difficulté, ny remise, & à l'observation de tout ce que dessus, ils s'obligent respectiuellement mesmes lesdits Seigneurs Roy & Archiducs, leurs successeurs, & pour la validité d'icelle obligation, renoncent à toutes loix, coustumes, & choses quelconques à ce contraires.

XXXVII.

Sera le present Traicté ratifié, & approuué par lesdits Seigneurs Roy, Archiducs, & Estats, & les lettres de ratification desdits Seigneurs Archiducs & Estats, deliurees de l'un à l'autre en bonne & deuë forme, dans quatre iours. Et quant à la ratification dudit Seigneur Roy: lesdits Seigneurs Archiducs ont promis, & seront tenus la donner dans trois mois, aussi en bonne & deuë forme, afin que lesdits Seigneurs Estats, leurs subiects & habitans, puissent iouyr effectivement du fruit du present traicté en toute seureté.

XXXVIII.

Sera ledit traicté publié par tout où il appartient, incontinent apres la ratification qui en sera faite par lesdits Seigneurs Archiducs & Estats, cessans dès à present tous actes d'hostilité.

Ces Articles furent publiés le quatorzième d'Auril, à Anuers.

Le peuple en demonstra vn grande resiouyſſance: les vns alloient rendre graces aux Eglises, toutes les cloches, & entr'autres vne à laquelle il faut vingt-quatre hommes pour la mettre en branle, & qui s'entend à quelques lieuës à la ronde, ne firent que sonner ceste iournee.

Quatorze trompettes alloient par la ville deuant les Magistrats, lesquels par les places & carrefours, publioient.

Qu'il soit notoire à tous, qu'en l'honneur de Dieu, pour le salut de la Chrestienté, & principalement pour le repos des Pays-bas, Trefues fermes & inuiolables ont esté faites pour douze ans, entre le Roy d'Espagne, & l'Archiduc, nos Souuerains Princes & Seigneurs d'une part, & les Estats des Prouinces vnies d'autre, tant par mer que par terre, pour tous chacuns leurs subiects, de quelque qualité & condition qu'ils soyent.

Pendant lesquelles douze annees le trafic sera libre entre leurs subiects, tant par mer que par terre, par tous les pays des vns & des autres.

Estant loisible à vn chacun de rentrer en la possession de ses heritages, ainsi qu'il est amplement contenu aux Articles de ladite Trefue.

Parquoy il est enioint au nom du Roy, Archiducs & Estats, à tous leurs subiects de n'effrainer lesdites Trefues, sur peine d'estre punis comme perturbateurs du repos public.

Après ceste publication toute l'artillerie tant de la citadelle & de la ville, que des Nauires qui estoient sur le port fut tiree. Ce ne furent que festins, & les feux de ioye s'y firent la nuit en si grand nombre, qu'il sembloit qu'Anuers fust deuenue tout en feu. Bref par toutes les

les villes & villages des Pays-bas, on en fit des feux de resiouissance.

Les Ambassadeurs de France & d'Angleterre, retournerent à la Haye, apres ceste publication. Celuy de France par commandement qu'il auoit de sa Majesté, d'exhorter lesdits Estats de donner à leurs subiects Catholiques Romains l'exercice libre de leur Religion, n'ayant trouué à propos de parler de cét affaire deuant ou durant le traicté de la Trefue, le leur demanda à son retour par vne Harâgue qu'il leur fit: ce qu'il ne peut gagner sur eux: bien obtint-il, qu'ils ne seroient plus recherchez pour leur Religion, ny de l'exercice qu'ils en feroient pour leurs familles en leurs maisons.

Après que lesdits Ambassadeurs eurent renouelé & cōfirmé les alliâces que leurs Maistres auoient avec les Prouinces vnies: le Prince Maurice & les Estats leur firent festin magnifique, & leur donnerent plusieurs beaux presens: puis le deuxiesme Iuillet ils partirent pour s'en retourner vers leurs Majestez, & leur rapporter tout ce qui s'estoit passé en vne si heureuse & longue Ambassade.

Le Roy ayant sceu par le President Ianin tout ce qui s'estoit passé en la Conference pour la Paix des Pays-bas, le renvoya incontinent à la Haye, avec charge d'employer son autorité, & faire condescendre les Estats à vne Trefue à longues annees.

Quant à D. Pedro de Toledé, apres auoir esté long temps à Paris festoyé & receu d'un bon œil, il s'en retourna en Espagne.

Le President Ianin fut receu magnifiquement des Estats, & ayant communiqué avec les Ambassadeurs Anglois du fait de ladite Trefue, & eu les aduis d'Angleterre pour ce necessaires: il dressa par escrit la Remonstrance suiuant, laquelle ils signerent & baillerent auxdits sieurs des Estats sur la fin du mois de Decembre.

Les Deputez des Roys qui sont pres de Messieurs les Estats, lesquels au defaut de la Paix ont dès le vingt-septiesme du mois d'Aoust proposé & mis en auant vne Trefue à longues annees, à certaines conditions contenues en vn escrit, communiqué auxdits sieurs les Estats en leur Assemblée generale, puis à Messieurs les Deputez des Archiducs, avec priere & exhortation aux vns & aux autres de s'y vouloir conformer.

Ayans esté aduertis que plusieurs du costé des Estats la reiettent & condamnent comme si elle deuoit estre cause de leur ruine, entre lesquels il y a des personnes de grande qualité & merite, ils ont estimé faire chose digne de leur soin & affection de respondre aux raisons qu'on met en auant tant de bouche que par petits liurets & escrits, & de les représenter à vostre Assemblée, afin qu'elle puisse mieux choisir avec prudence & meur iugement ce qui est aussi plus conuenable à leurs affaires, & doit estre plus vtile pour leur conseruation, & le contentement des Princes qui sont leurs vrais amys, & n'ont autre but en leurs conseils, que de chercher le salut & la prosperité de leur Estat.

On dit en premier lieu, que la liberté n'est pas bien asseurée, & pour tousiours parler par les mots contenus en nostre escrit & en la premiere Trefue, Et nous respondons que si le zele de ceux qui sont de ceste opiniõ ne va qu'au public, qu'il y en a assez pour les contenter. Car la liberté n'estant restreinte ny limitée au temps de la Trefue, mais accordée en mots generaux & indefinis, c'est autant que si ces mots, pour tousiours, y estoient adioustez, attendu que c'est vn acte qui de nature ne reçoit temps ny condition, s'il n'est nommement dit & exprimé.

Il faut aussi considerer que ce n'est pas de l'oëtroi & concession des Princes avec lesquels vous traictiez, que deuez tenir vostre dite liberté, car vous avez tousiours maintenu que vous estiez afranchis de leur subiection par vn decret public & solemnel fondé en bonne raison: & que des lors la prise des armes pour la deffendre a esté iuste & licite, par ainsi qu'on ne vous a peu qualifier en quelque temps que ce soit subiects rebelles: ce qui toutefois aduendroit, s'il falloit rechercher & obtenir d'eux non vne simple confession & declaration qu'ils vous tiennent pour libres, mais le tiltre entier & absolu de vostre liberté, lequel ne pourroit commencer en ce cas qu'au iour de la concession qui vous en auroit esté faite.

Vous ne deuez non plus demander qu'ils vous quittent, cedent & remettent quelque chose du leur, pource que les Souuerains ne sont que simples administrateurs à leurs Estats, & ne leur est loisible de les amoindrir au preiudice de leurs successeurs, par quelque traicté que ce soit, ny ayant que la seule force qui leur puisse oster & faire perdre ce qui leur appartient: aussi quiconque l'occupe sur eux, soit subiect, ou estranger, doit pouruoir que la mesme force qui le luy a fait acquerir, dure, pour le luy faire conseruer, du moins pour vn si long temps que la possession immemorale, & l'oubliance & foiblesse de son ennemy, l'en rende Maistre & Seigneur.

Vous n'avez donc à requerir d'eux sinon qu'ils vous recognoissent ce que vous estiez sans eux & malgré eux, c'est à dire, libres; comme vn tiltre & qualité sans lequel recognu & ad-

uoit vous n'eussiez voulu traicter avec eux, ny avec autre Souuerain quel qu'il soit.

Or ce qui est contenu en ladite premiere trefue, & en nostre escrit, l'exprime si clairement, que personne n'en peut douter avec raison: & qui plus est ces mots adiouttez à la recognoissance de vostre liberté, Qu'ils ne pretendent rien sur vous, seroient mesmes suffisans pour les exclurre à l'aduenir de tous droicts de superiorité & autres quelconques, s'il y a quelque moyen de les quitter & remettre par traicté.

Nous fîmes aussi ceste declaration deslors qu'on commença à traicter du point de la souueraineté. Qu'il y en auoit assez en la premiere Trefue, pour vous maintenir libres au preiudice des Archiducs, lesquels auoient fait la recognoissance y contenue, & qu'on en pourroit autant dire du Roy d'Espagne, quand il auroit fait la mesme declaration, ou ratiifié celle desdits sieurs Archiducs.

Mais nous ayant esté dit lors, qu'on pouuoit esperer vn plus grand esclarcissement, & voyant aussi que plusieurs le desiroient avec ardeur, comme s'il eust esté necessaire pour la seureté publique, il me sembla qu'on le deuoit tenter, & nous nous resiouîmes quand l'eust obtenu. Non toutefois, quand on consentit de vous quitter les noms, tiltres & armes; car ceste declaration, qui nous sembloit honteuse, & sans exemple, faicte avec si grande facilité par des Princes qui n'estoient en estat de faire choses indignes de leur grandeur, nous fut declaree suspecte, ne pouuant imaginer la cause d'un office si specieux qui depuis nous a esté cogneü.

Mais on obiecte, s'il est vray que les mots contenus audit escrit soient suffisans pour asseurer vostre liberté, pourquoy les deputez des Archiducs fût ils difficulté d'adiouster l'explication requise. Ils respondent, qu'ils ne sont tenus ny obligez à rien de plus; que c'est aussi tout ce qu'ils ont promis au nom du Roy d'Espagne, & peu obtenir de luy encores avec tres-grande difficulté; son conseil estant plustost disposé à rompre ce traicté aux conditions par vous requises, qu'aider à la conclurre, ainsi qu'on s'en doit contenter, sans les presser outre l'obligation & le pouuoir, attendu qu'en effect il y en a assez, & que ce qu'on pretend y faire adiouster seruiroit plustost à les offencer, que pour asseurer dauantage vostre liberté.

C'est pourquoy nous estimons qu'on fera mieux & plus sagement de s'en contenter, qu'en voulant essayer d'obtenir ce qui n'est pas necessaire, perdre l'occasion de faire vn traicté qui vous doit faire iouyr d'un bon & asseuré repos durant la Trefue: & donner aussi esperance qu'elle deuiendra Paix absoluë, si vous vous conduisez bien.

Si ces raisons ne vous contentent, considerez à qui vous auez besoin de persuader qu'estes vrayement libres & exempts tousiours de la subiection d'autrui: n'est-ce pas aux Princes qui sont vos amis & intereliez à la conseruation de vostre liberté. Or ils vous declarent par nous qui sommes leurs Ministres, qu'il y en a assez pour leur donner ceste croyance, & pour contenter mesmes la raison & le iugement à quiconque voudra examiner ceste affaire sans passion.

Puis il est certain que les Princes, avec lesquels vous traictez, ne vous mettront iamais en iustice pour auoir l'explication de cest article, mais vous feront la guerre si bon leur semble apres la Trefue expiree, sans vous en declarer la cause, ny si c'est comme à subiects rebelles, ou comme à iustes ennemis.

Ils ne vous rendront non plus raison de leur victoire, si leurs armées sont heureuses, ny vous à eux de la vostre, si l'heur est de vostre costé: mais en vserez de part & d'autre avec discretion, & ainsi qu'il vous plaira.

C'est donc le sort des armes qui doit estre seul arbitre & Iuge souuerain de ce different, non les mots de ce traicté, qu'on interprete tousiours au domage de ceux qui sont foibles & vaincus, quoy qu'ils soient couchez si intelligiblement que personne n'en doie douter: & iamais au preiudice des victorieux, lesquels ont eu le moyen de prouuer la validité de leur droict par leurs armes.

On dit encores que le Roy d'Espagne aura loisir pendant ceste Trefue de faire amas de finances pour renoueller la guerre quand elle sera finie, avec plus de force & vigueur qu'il ne pourroit à present, qu'il en est espuisé par la longueur de la guerre. Mais il aduient peu souvent que les grands Roys & ieunes comme est celui-cy se mettent à thesauriser, estans de leur naturel plus enclins aux prodigalitez & despenses superflues qu'à l'espargne.

Puis ne vous ayans plus pour ennemis, il en cherchera d'autres qui l'espuiseront aussi bien de finances & de moyens que ceste guerre ici: car il commande à vne nation fiere, ambitieuse, & impatiente de repos. Vous au contraire, qui ne penserez point à vous accroistre, mais seulement à vous conseruer, & viure en amitié enuers tous vos voisins.

Et

Et s'il y a grande apparence qu'estans deschargez des despeses de la guerre, & obligez seulement à l'entretienement de quelques garnisons pour vostre conseruation, vous euerés toutes autres despeses superflues pour acquitter vos debtes, & amasser quelque fond qui puisse vous seruir contre les necessités de l'aduenir: tant pource que le passé vous a enseigné qu'en deuez vser ainsi: que pour estre la coustume des Republiques de mettre leur reuenu à profit.

Aucuns y adioustent aussi qu'elle luy donnera le moyen de faire des pratiques parmy vous, & d'en corrompre quelques vns pour vous diuiser, & en fin assubjetir.

Qu'il y a desia des semences de dissension entre les Prouinces & les villes mesmes l'une contre l'autre, que l'oisiueté & le repos feront croistre: au lieu que durant la guerre la crainte des ennemis tient vn chacun en deuoir, vnion & amitié.

Ce mal peut arriuer, & est sage de le craindre & preuoir pour s'en garentir, non pour le mettre en si grande consideration qu'il faille perpetuellement demeurer en guerre pour l'euer.

Et neantmoins c'est vous le conseiller que vous voulez persuader de reietter la Trefue à ceste occasion: car la guerre ne peut iamais finir à vostre aduantage par vne victoire absolue contre vn ennemy si puissant que celuy auquel vous auez affaire. Et vous ne scauriez nō plus penser en quelque temps que ce soit à vous remettre en repos, soit par Paix ou par Trefue, que vous n'y rencontriez tousiours la crainte, de mesmes dangers & inconueniens.

Et encores plustost en paix qu'en trefue, d'autant que la paix entiere & perpetuelle a pres- que tousiours pour compagnie vne grande seureté, qui nous rend nonchalans, & par ainsi exposez à toutes sortes d'embusches, surprises & perils.

Au lieu que la crainte de rentrer en guerre, lors que la Trefue sera finie, vous doit seruir d'un poignant aiguillō, pour vous contraindre à demeurer bien vnīs, & tenir ensemble toutes les pieces de vostre Estat.

Elle vous doit rendre encor plus soigneux, vigilans & affectionnez à contribuer ce qui sera requis pour vostre conseruation: & vous tenir pareillement en plus grande desiance des Princes qui pourroient encor deuenir quelque iour vos ennemis. C'est pourquoy il y a des gens sages & affectionnez à vostre Estat, qui tiennent ceste voye du milieu entre la guerre & la paix, qui est la Trefue, vous deuoir estre plus vtile & asseuree, que le changement tout à coup d'une extremité à l'autre.

Dauantage quand on considere la constitution de vostre Estat, & que corrompre peu de gens parmy vous est peu de chose, & ne sert de rien à cause des changements frequens des Magistrats, qui ostent le moyen de s'attacher à plusieurs ensemble, qui ayent vne puissance d'assez longue duree, pour conduire quelque trame contre l'Estat, ceste crainte semble du tout vaine: adiustez y encor l'amour de la liberté empreint es esprits de tous vos habitans y ayant à present peu de personnes qui soient nez du temps de l'ancienne subiection, ou qui n'ayent esté nourris & eleuez par vn si long temps en liberté, qu'ils ont tous en horreur le nom de seruitude: & vous iugerez qu'il n'y en a vn seul, en vostre Estat, qui veuille ou ose ouurer la bouche pour vous y faire retourner sans se mettre en danger d'estre à l'instant puny comme traistre & ennemy de son pays.

Le peril des pratiques & corruptions seroit bien plus à craindre durant la guerre, si quelque mauuaise fortune vous arriuoit, laquelle seule seroit vn plus grand changement en vostre Estat, & es volontez de vos peuples en vn moment, que les pratiques de plusieurs mois & annees à l'endroit de quelques particuliers: car lors chacun voudroit sortir du danger & confusion: & sans consulter en commun avec choix & iugement, ce qui seroit vtile pour l'Estat, ils se plaindroient aussi tous, mais trop tard, de leurs superieurs, qui auroient eu le moyē de les mettre en quelque asseuré repos, & neantmoins en auroient trop inconsiderement reietté le conseil. Il y en a aussi qui mettent en auant avec raison, que ceste Trefue ne peut estre asseuree sans auoir vn bon nombre de gens de guerre, pour la conseruation des places frontieres & autres, où il sera besoin de tenir garnison; & neantmoins que le peuple, n'ayant plus d'ennemis à descouuert, fera difficulté de contribuer ce qui est requis pour les entretenir: par ainsi la solde & les gens de guerre venans à defaillir tout y sera à craindre. Il est bien necessaire à la verité de pouruoir à cest inconuenient, au mesme temps qu'on fera la trefue, & de regler deslors les garnisons, comme aussi d'obliger les Prouinces, par serment solennel & decret public, à contribuer leur cote tant que la Trefue durera. A quoy l'on les pourra mieux disposer, ny ayant que Trefue, que si la paix eust esté faicte comme a esté dit cy dessus.

Mais ils adioustent encores, s'il est vray que les grandes garnisons soient necessaires, que la trefue ne diminuera en rien vos despeses; aussi ne vous sera vtile.

FFF

Et la response est, qu'elles ne peuuent estre si grandes que ne faciez espargne de plus d'une moitié, avec ce qu'euiterez les dangers de la guerre, auxquels seriez exposez, si vous n'estiez assiste d'un grand secours, dont vos Deputez nous ont souuent remonstré auoir le soin, outre vos propres moyens, quand il ne faudroit mesme que soustenir la guerre sans entreprendre sur vos ennemis, qui est toutefois un commencement de foiblesse, auquel si vous estiez reduits, on ne pourroit attendre autre chose que la perte de l'Estat en peu d'années.

On allegue encor pour raison l'aduis de Lipsius contenu en vne sienne Epistre qu'on fait maintenant courir par tout, pour monstrier que luy homme sage, affectionné à vos ennemis, & leur subiect, conseilloit de faire des trefues avec vous, pour vous ruiner: mais il entendoit de celles qui sont pour peu de temps, & qui deuoient seruir de preparatif pour vous faire deuenir subiects, car on ne parloit point pour lors de vous recognoistre pour libres & de vous exempter du tout de ceste ancienne subjection: aussi ne pouuoit-il preuoir que vos armes deussent estre si heureuses, que de vous donner le moyen & pouuoir de traiter avec un tel aduantage, ny pareillement que deux grands Roys vos voisins, & plus proches de vous que ceux qui pourroient auoir le desir & les forces pour vous nuire, se deussent obliger enuers vous, pour rendre ceste trefue assuree & inuiolable: qui sont considerations de grand prix, & qui sans doute luy eussent fait changer d'aduis.

Puis les exemples alleguez par luy pour fortifier son opinion en ont tant d'autres contraires que ce ne seroit pas prudence de les tenir pour regles infaillibles d'Estat.

Vous pouuez sur ce subiect vous souuenir du traité de Gand fait en l'an 1576. qui fut très mal gardé, & neantmoins si utile à la Prouince de Hollande, qu'ayant eu loisir de cinq ou six ans pour establir quelque forme de gouvernement entr'eux & acquiter leurs debtes, elle se mit en estat de soustenir le faix de la guerre, qui tomba sur elle, apres que les Prouinces de Flandres & de Brabant eurent esté subiugues.

Ce qu'elle n'eust peu faire, si les ennemis occupez à démolir ce rempart qui estoit deuant eux, se fussent attachez tout à coup à leur pays.

L'exemple des Suysses sert aussi pour confirmer le conseil que nous vous donnons d'accepter ceste trefue, car eux s'estans esleuez contre leurs Seigneurs, pour cause presque semblable que vous, apres auoir soustenu l'effort d'une longue & perilleuse guerre avec diuers euenemens, prindrent conseil de la faire finir par vne trefue, qu'on leur offroit à conditions toutefois moins aduantageuses que celles que vous conseillons: pendant laquelle ils establirent un si bon gouvernement entr'eux, qu'on ne leur fit onc depuis la guerre: ayans expérimenté avec grand profit, Que les trefues apres vne longue guerre, se conuertissent ordinairement en vne paix perpetuelle, sans auoir traité: d'autant que les Souuerains qui sont contrains de souffrir quelquefois la perte de ce qu'ils ne peuuent conseruer, aiment mieux s'accommoder à telles surseances & cessations d'armes, qui laissent quelques opinions es esprits d'un chacun qu'ils peuuent encor recouurer quelque iour ce qu'ils ont perdu: que de la quitter du tout pour vne paix absoluë qui a de la honte: & assubiectir à ceste necessité de confesser & recognoistre qu'il y a de la lascheté en eux, ou de la foiblesse en leurs Estats & affaires.

Or vous pouuez esperer de iouyr du mesme bon-heur si vous estes sages: car ils ont eu pour eux des commoditez & aduantages qui ont destourné leurs ennemis de renoueller ceste guerre: A sçauoir, un grand nombre de bons hommes chez eux pour se deffendre, sans qu'ils ayent besoin d'en emprunter d'autrui: des montagnes qui les enferment pour la plupart, & rendent leur pays inaccessible, pauvre & sterile, qui diminue l'enuie d'y entreprendre, & rechercher un petit gain parmy de grands perils. Vous auez aussi de vostre costé la mer, & de grands fleuues nauigeables, qui vous enferment presque de toutes parts, grand nombre de nauires, de pilotes, mariniers & matelots qu'on peut dire estre des meilleurs soldats, pour les combats de mer, qui soyent auourd'uy en la Chrestienté, lesquels vous conseruez.

Ensemble la vigueur militaire, & l'industrie de nauiger qui est en eux par le trafic & la continuation des longs voyages qu'ils pourront faire comme de coustume. Or c'est de tels soldats que vous auez besoin, ayant esgard à la situation de vostre Estat. Et quant aux auxiliaires, s'il y en faut adiouster, vous sçauiez chez qui les prendre: & auez aussi un fonds & reuenue ordinaire qui pourra suffire pour y subuenir sans l'aide de personne, apres que vous auez eu quelque loisir de respirer. Et outre ce que dessus la bien-veillance & amitié des grâds Princes qui sont tellement interessez en la consideration de vostre liberté, qu'ils auront tousiours soin d'empescher que vous ne la perdiez, soit par impuissance, ou mauuaise conduite, non seulement durant la trefue, mais en quelque moyen que ce soit, afin qu'ils tirent les mesmes fruits de vostre amitié au besoin, qu'auiez receu de la leur.

Et cecy doit seruir de response à vne fourde obiection qu'on fait courir parmy vous pour vous destourner d'accepter ceste Trefue; à sçauoir, Qu'apres qu'elle sera finie vos amis peuent estre n'auront pas lors la mesme volonte, ou pouuoir de vous assister, qu'à present; & peut estre vous mesmes ne sçerez en si bon estat de vous defendre.

C'est Dieu seul qui peut iuger certainement de l'aduenir: mais s'il est permis de coniecturer quelque chose par prudence; les mesmes raisons d'estat, qui ont meu ces Princes à vous secourir, ne sont pas prestes de finir: & tant qu'elles dureront, la mesme volonte durera en eux.

Et si il n'y a rien qui ait tant de pouuoir sur les souuerains que l'interest de la seureté de leurs Estats, dont la conseruation des amis qui peuuent estre vtiles fait partie: & qui iuge de leurs intentions avec ceste regle & mesure, plustost que par les alliances, amitez, & autres deuoirs & obligations, il ne se trompe gueres.

Quant à vostre Estat, il ne peut faillir d'estre mieux aussi lors; si vous le conduisez bien; ce qu'on doit esperer & croire, qu'apres auoir tant despensé, trauaillé, & couru de perils; pour acquerir la liberte de la seureté & reputation de vostre Estat, vous aurez encor le mesme soin, la mesme prudence, la mesme foy & interpreté les vns enuers les autres, pour vous conseruer & garder vn si precieux acquest, plustost que de vouloir presumer qu'ils deuiendront meschans & ennemis les vns des autres, pour vous deschirer, desfaire & ruiner. Par ainsi nous iugeons que ceste Trefue vous sera profitable, au lieu d'estre cause de vostre ruine.

Ne vous arrestez donc point à ces escrits qu'on fait semer parmy vous, pour la faire trouuer mauuaise. C'est en vostre assemblee, & au lieu auquel on traicte des affaires, qu'il faut dire son aduis, car tout ce qu'on fait ailleurs, est dangereux, & ne peut seruir qu'à esmouvoir le peuple contre les Magistrats & Superieurs, sans profiter au public.

On leur a mesme voulu faire croire par quelques vns de ces escrits, pour les induire plus aisément à reietter ceste Trefue, qu'elle auoit esté proposée par l'artifice & finesse de vos ennemis. Et toutesfois elle vient des Roys & Princes qui sont nos Maistres, lesquels sont tant affectionnez à la conseruation de vostre Estat, que personne ne les sçauoit deuaancer en ce soin & desir de vous vouloir procurer du bien. Ils sont aussi recognus pour estre si sages & confidez, qu'il n'auroit pas esté aisé de les surprendre, ny de leur faire mettre en auant de mauuais conseils, au lieu de bons & vtiles.

Nous ne sentons point mal pourtant de l'intention & du zele de ceux qui donnent tels aduis, car il y en a qui ont fait si grande preuue de leur foy & affection enuers vostre Estat, qu'on n'en doit aucunement douter.

Aussi aduient-il souuent, que les gens de bien & sages se trouuent diuisez en opinions, & n'ont toutesfois qu'un mesme sentiment es affaires publiques, acompagné d'un bon & loüable desir à profiter à leur pays, Nous les prions aussi de faire le mesme iugement de nous, & vostre Assemblee qui doit deliberer du salut public, de choisir en ceste diuersité l'aduis qui sera fortifié des meilleures raisons, sans y apporter autre preiugé.

Estant neantmoins bien requis qu'oultre les raisons par nous deduites, vous vous en representiez d'autre que la prudence & la consideration de vostre interest veulent que laissez au pensement d'un chacun en particulier, sans les exprimer par cest escrit: autrement ceux qui tiennent l'aduis contraire, auxquels il est permis de dire tout, sans faillir contre l'Estat, auroient un tres grand aduantage, & vous ne seriez suffisamment informez pour y prendre une bonne resolution.

Nous adiouterons encor ce mot pour conclurre nostre Conseil, que s'il y a des dangers & inconueniens à la Trefue, comme il y en a sans doute, que ceux de la guerre sont beaucoup plus grands; certains, & comme presens, & que vous pouuez euitter les premiers par une bonne & sage conduite: ainsi le remede est en vos mains: au lieu que les autres sont inuitables, du moins est-il bien certain, que le moyen de les surmonter depend d'autrui, non de vous mesme: & qu'il n'y a rien qui soit si bien vostre, que ce surquoy vous auez un entier & absolu pouuoir: confidez-le sagement, & que vous rencontrerez mal-aisément par cy-apres en quelque temps que ce soit, tant de commoditez ensemble, pour sortir avec aduantage de ceste guerre, qu'à present.

Les Archiducs sont Princes qui aiment le repos, & d'une foy entiere, pour garder sincerement ce qui vous sera promis. Le Roy d'Espagne est induit à leurs prieres de vous accorder des conditions plus aduantageuses qu'il ne feroit sans eux. Vous estes aussi assistez de la faueur & bien-veillance de grands Roys & Princes, dont la consideration & respect sert de beaucoup pour y apporter de la facilité. Et le temps peut faire naistre des accidens & changements es affaires & volentez: qui seroient cause de produire des effects du tout contraires. Ainsi signe P. Iannin, Spencer, Veinvod.

Maintenant que les Estats generaux des Prouinces vnies des Pays bas font vn corps de Republique, depuis qu'elles ont secoué le joug de l'Espagne, & se sont distraictes des autres pays avec lesquels elles estoient regies sous vn meisme Prince: Il m'a semblé à propos, comme nous auons mis en la fin du discours des Estats de l'Archiduc Albert, les Côtes de Flandre; proposer pareillement, & mettre en ce lieu les Seigneurs, & Côtes des principales Prouinces vnies, sçauoir est Hollande, Zelande, & Frise.

Car l'on verra plus apertement par telle succession de Seigneurs, quel a esté le gouuernement des pays qu'elles possèdent, auant qu'elles eussent prins forme de Republique: & comme de tout temps & ancienneté elles ont séparément en leurs Seigneurs & Comtes, tât que finalement souz Philippes premier du nom, elles commencerent d'estre gouuérnees, & iointes aux autres Prouinces des Pays bas.

LES COMTES DE HOLLANDE, ZELANDE, ET Seigneurs de Frise.

LE pays de Hollande fut erigé en Comté l'an de nostre salut 863. Charles le Chauue Roy de France, pour les vertus loüables de Thierry d'Aquitaine, luy donna tous les pays de Hollande, avec vne portion de Frise. Et depuis en l'an 868. le treiziesme Auiil, la Zelande luy fut donnée par Louys Roy de la Germanie, à la requeste d'Emme femme du Roy Louys.

Thierry II. par le trespas de son pere le Comte Thierry d'Aquitaine fut second Comte de Hollande & Zelande, Seigneur de Frise.

Arnoult l'an 988. apres le trespas du Comte Thierry 2. du nom son pere, succeda es pays de Hollande, Zelande, & de Frise.

Ce Côte Arnoult obtint del'Empereur Otto 3. à tenir les Comtez de Hollande, & Zelande, & les Estats de Frise nuëment en fiefs de l'Empire, & non plus de la Couronne de France, comme il auoit fait iusqu'à present.

Ledit Comte Arnoult fut tué en vne bataille contre les Frisons, le 18. Octobre 993. apres auoir gouuerné la Hollande & Zelande.

Thierry 3. du nom, apres la mort de son pere Arnoult, fut 4. Comte de Hollande & Zelande, & sieur de Frise.

Thierry 4. du nom, apres le trespas de Thierry son pere, fut 5. Comte de Hollande, & Zelande, & Seigneur de Frise. Il ne fut point marié, & mourut le 13. May 1048. apres auoir gouuerné ses pays 9. ans.

Floris I. du nom, estoit auparauant Comte d'Ost-Frise, qui apres la mort de son frere Thierry 4. cinquieme Comte, fut fait sixiesme Comte de Hollande, Zelande, &c. lequel apres auoir gouuerné ses pays 14. ans, fut mis en route en vne bataille avec deux mille six cens des siens, pres de Heusden, en laquelle il fut tué.

Gertrude veufue, mere, & gouuernante du ieune Comte Thierry fils de Floris, gouuerna vn an le pays.

Robert dit le Frison, espousa Geltrude veufue du Comte Floris, du consentement de toute la noblesse, & des Estats de Hollande, & de Zelande, & meisme le firét curateur du ieune Comte Thierry, fils de Floris.

Godefroy le Bossu Duc de Lorraine, 9. Comte de Hollande, & Zelande, Seigneur de Frise par vsurpation.

Thierry 5. du nom, 10. Comte de Hollande, & de Zelande, Seigneur de Frise, fils du Comte Floris, apres le trespas de Godefroy le Bossu recouure les biens patrimoniaux, entra en Hollanded'où il auoit esté si long temps dechassé, & y fut par tout receu avec grande ioye & magnificence, & recogneu pour leur Comte & Seigneur naturel, tellement qu'estât deuenu malade, il mourut l'an 1092. le 15. des Cal. de Iuillet, apres que sa mere Geltrude depuis le trespas de son mary, eust gouuerné 1. ans, Robert le Frison son beau pere 8. ans. Godefroy le Bossu 4. ans, Guillaume Euesque d'Vtrech vn an, & luy 15. ans, faisant en tout 30. ans, depuis la mort de son pere.

Floris dit le Gras, second du nom, vnzieme Comte de Hollande, & Zelande, Seigneur de Frise, fils du Comte Thierry cinquieme lequel apres auoir paisiblement gouuerné ses pays l'espace de trente vn an, mourut l'an mil cent trentetrois ans, le sixiesme du mois de Mars.

Thierry 6. du nom, fils de Floris 2. fut 12. Comte de Hollande & Zelande, Seigneur de Frise, apres auoir gouuerné ses pays 40. ans, mourut l'an 1163. Il eut beaucoup de guerre contre les Frisons, & autres ses voisins.

Floris

Floris 3. du nom, apres la mort de Thierry son pere fut 13. Comte de Hollande & Zelande, Seigneur de Frise, il eut beaucoup d'affaires en son temps, & mourut au voyage de la Palestine apres avoir gouverné ses Prouinces 27. ans.

Thierry 7. du nom, apres la mort du Comte Floris son pere, fut 14. Comte de Hollande, de Zelande, & Seigneur de Frise, apres avoir regy ses pays en grandes guerres continuelles 13. ans, il mourut l'an 1203.

Ade fille vniue du Comte Thierry 7. succeda à son pere, & fut Comtesse 15. mais elle ne regit qu'un an ses pays, & mourut sans enfans.

Guillaume premier du nom, 16. Comte de Hollande, de Zelande, & de Frise, estant ja auparavant Comte d'Oost-frise, & Thierry septiesme du nom, ayant esté appelé par les Nobles de Hollande, se rendit toute la Hollande & Zelande subiecte, lequel mourut apres auoir regy lesdicts pays dix-neuf ans, l'an 1223.

Floris quatriesme du nom, par le trespas du Comte Guillaume son pere dix-sept. Comte de Hollande, Zelande, & Seigneur de Frise, lequel apres auoir regy ses pays en tout honneur douze ans, mourut à Clermont, & laissa un fils nommé Guillaume, aagé de six ans tant seulement.

Guillaume 2. du nom, apres le trespas de son pere fut 18. Comte de Hollande, & de Zelande, aagé de six ans, fut gouverné sous la curatelle de son oncle Otto Euesque d'Vtrecht, & depuis la mort de l'Emperereur Federic estant bien aisé, il fut esleu Roy des Romains, fut par le Pape Innocent proclamé Empereur en la ville de Lyon, quatre ans apres son election, lequel mourut en l'an 1255. apres auoir regy ses pays de Hollande & Zelade, 11. an, & l'Empire sept ans.

Floris cinquiesme du nom, apres la mort de Guillaume son pere, estant seulement aagé de demy an, fut dix-neuf. Comte de Hollande, & Zelande, & Seigneur de Frise : lequel mourut apres auoir gouverné ses pays, tant de soy-mesme, que par ses tuteurs quarante deux ans.

Iean premier du nom, vingtiesme Comte de Hollande, Zelande, &c. succeda à son pere, lequel mourut sans enfans le quatriesme des Cal. de Nouemb. l'an 1300. auquel defaillit la race des Comtes yssus en droicte ligne des Ducs d'Aquitaine, qui depuis Thierry premier auoit duré quatre cens trente sept ans, & par son trespas escheurent ces pays au Comte de Haynaut, venus par alliance du costé maternel des Comtes de Hollande.

Iean Comte de Haynaut, second du nom vingt-vniesme Comte de Hollande, & Zelande, & Seigneur de Vvest-Frise, fut fils de Iean d'Auesnes, & de Dame Alix sœur du Roy Guillaume, Comte de Hollande, &c. & par ainsi fils de la grande tante de ce dernier Comte Iean premier.

Guillaume troiesme du nom, auparavant Comte d'Oosternante, par le trespas de son pere fut 22. Comte de Hollande, Zelande, & Seigneur de Frise, adiousté à sa Comté de Haynaut. Pour sa bonne vie fut appelé le Bon, & mourut le 9. de Iuin 1337. apres auoir regy ses Prouinces pacifiquement l'espace de 33. ans.

Guillaume 4. du nom, 23. Comte de Hol. & Zel. Seigneur de Frise, & Comte de Haynaut, apres la mort de son pere Guillaume dit le Bon, fut tué en vne rencontre contre les Frisons, & mourut sans enfans le 24. Septembre 1346.

Marguerite Imperatrice, femme de l'Emperereur Louys de Bauiere, 24. dominant en Hollande & Zelande, &c. sœur du Comte Guillaume 4. fut au mesme an 1346. honorablement receüe, & recogneuë Dame, & Princesse desdits pays, & ayant receu les hommages & feautez, amplifia grandement leurs priuileges & franchises.

Guillaume de Bauiere cinquiesme du nom, fils aîné de l'Emperereur Louys de Bauiere, & de ladite Marguerite, fut le 25. Comte de Hollande, de Zelande, Seigneur de Frise, & Comte de Haynaut.

Guillaume de Bauiere sixiesme du nom, apres le trespas de son pere Albert de Bauiere, fut vingt-septiesme Comte de Hollande, & Zelande, Seigneur de Frise, & aussi Comte de Haynaut.

Iacqueline de Bauiere fille vniue & heritiere de Guillaume de Bauiere sixiesme du nom succeda apres le trespas de son pere en toutes ses seigneuries & Comtez, aagée enuiron de dix-sept ans : & le mesme an mil quatre cens dix-sept elle fut receüe, & print possession de ses pays patrimoniaux de Hollande, Zelande, Frise, comme elle auoit fait auparavant en Haynaut.

Et neantmoins au preiudice de ladite Iacqueline, Iean de Bauiere soy disant tuteur de Hollande obtint aussi de l'Emperereur Sigismond oncle de sa femme en feauté & hommage les Comtez de Hollande & de Zelande, & la seigneurie de Frise, comme detolué à l'Empire

par la mort du Comte Guillaume de Bauiere son frere , pere de Madame Jacqueline decedee sans hoirs masles.

Il mourut à la Haye en Hollande le iour des Roys l'an 1429. apres auoir gouuerné le pays de Hollande, Zelande & Frise en qualité d'Auoüe enuiron six ans : & pendant lequel temps les pays furent tousiours en guerre, & qui finalement fit paix en l'an 1419. le 19. Iuillet avec Jacqueline de Bauiere, laquelle apres la mort de son oncle Iean jouit de toutes ses seigneuries: elle fut mariee quatre fois: elle fut contrainte par force pour retirer son quatriesme mary des prisons d'entre les mains de Philippes Duc de Bourgongne, pour lors aduoüe de Hollande, &c. de ceder & transporter toutes les seigneuries en general audit Duc de Bourgongne, mourant sans enfans: Apres lequel transport, peu de temps apres mourut ayant esté Dame & vraye heritiere des Comtez de Hollande, Zelande, Haynaut & seigneurie de Frise en grands troubles & fascheries, causees par l'ambition du Duc de Bourgongne, l'espace de 19. ans. Elle gist à la Haye, n'ayant vescu que 36. ans.

Philippes premier du nom, Comte de Hollande & de Zelande, seigneur de Frise, fils de Iean Duc de Bourgongne par resignation de Madame Jacqueline derniere Côtessè de Hollande de la maison de Bauiere, laquelle mourut sans hoirs, comme heritiere tant du costé paternel que maternel, succeda esdits pays.

Par ainsi il fut Duc de Bourgongne, de Brabant, de Limbourg, Comte de Flandres, d'Artois, de Bourgongne, de Haynaut, de Hollande, & Zelande, & de Namur, seigneur de Frise, de Salines, & de Malines, Marquis du S. Empire.

Il acquit quelque temps apres par achapt, l'ayant premierement conquise par armes au nom de la veufue du Duc, la Duché de Luxembourg: il nasquit le iour saint Pierre & saint Paul l'an 1359. sa mere fut Madame Marguerite de Bauiere seur du Comte Guillaume, pere de Madame la Comtesse Jacqueline, & ladite Dame Marguerite de Bourgongne mere de ladite Comtesse fut seur du Duc Iean de Bourgongne : & partant tante paternelle dudit Duc Philippes: ainsi tant du costé paternel que maternel, lesdicts pays luy escheurent sans difficulté.

Il estoit Prince valeureux & de grand courage, redouté de ses ennemis: il estoit de haute stature, beau de visage, & subiect à cholere, toutesfois amateur de la paix, surnommé le Bon, mais d'une ambition extrême de s'agrandir, comme il le fit bien paroistre à tant de faux tours qu'il fit à sa cousine Jacqueline Comtesse de Hollande.

Il deceda le 5. iour de Iuin 1467. aagé de 73. ans, apres auoir gouuerné le pays de Hollande, Zelande, Haynaut, Frise, & autres, tant en qualité de Comte & seigneur, que de curateur, enuiron quarante ans.

Charles dit le Belliqueux, fils vnique du bon Duc Philippes né à Dijon en l'an 1454. par le trespas de son pere succeda aux Duchez de Bourgongne, de Brabant, de Limbourg, de Luxembourg, aux Comtez de Bourgongne, d'Artois, de Flandres, de Haynaut, de Hollande, de Zelande, & de Namur, les Seigneuries de Frise, de Salines, de Malines, & du Marquisat du S. Empire. Il acheta de l'Empereur Sigismond la Comté de Ferrette au pays d'Elzette pres de Basle en Suyse. Il requit l'Empereur Federic d'eriger la Bourgongne en Royaume, ce qui luy fut refusé: il fut tué à la bataille de Nancy en l'an 1467.

Marie fille & vnique heritiere de Charles, dit le Belliqueux, fut Duchesse de Bourgongne, &c. & succeda en toutes lesdites proninces apres le trespas de son pere, elle n'estant aagée que de dix-huict ans sous la garde noble & curatelle du Duc de Cleues & du sieur Ravensteyn son frere.

Maximilian Archiduc d'Autriche fils de l'Empereur Federic estant aagé de vingt ans ou enuiron, il espousa Marie de Bourgongne Duchesse de Bourgongne, &c. & fut à cause de sa femme Duc de Bourgongne, &c. & Comte de Hollande, Zelande, &c. lesquels pays il gouerna 12. ans ou enuiron: il deceda en l'an 1519. gist à Nicustad en Allemagne.

Philippes second du nom, Comte de Hollande, Zelande, Seigneur de Frise, fils vnique de l'Archiduc Maximilian d'Autriche, depuis Empereur, & de Marie Duchesse de Bourgongne, &c. fille du Duc Charles le Belliqueux, nasquit à Bruges le 20. Iuin 1478. il estoit aagé de quatre ans quand sa mere mourut: depuis le trespas de laquelle en qualité de regent ou curateur l'Archiduc Roy des Romains son pere gouerna les pays en grands troubles, à cause des partialitez qui regnerent tant en Hollande qu'en Flandres, iusqu'en l'an mil quatre cens nonante-quatre, quel'Archiduc Maximilian Roy des Romains par le trespas de son pere fut couronné Empereur. Le Prince Philippes son fils estant lors aagé de seize ans, il fut appelé Archiduc d'Autriche, Duc de Bourgongne, de Lothier, de Brabant, de Styer, de Carinthie, de Limbourg, de Luxembourg, & de Gueldre, Comte de Halbourg, de

de Flandres, d'Artois, de Bourgongne, de Ferrette, de Kyburch, Palatin, de Haynaut, de Hollande, de Zelande, de Namur, de Zutphen, Marquis du S. Empire, & de Burgau, Landgrave d'Elstathen, seigneur de Vvindsmark, de Portenau, de Salins & Malines: & deceda en Espagne, estant ieune son pere encore viuant, l'an 1505. gist à Grenade.

Charles second du nom trente cinquieme Comte de Hollande, Zelande, Seigneur de Frise, fils aîné de Philippes d'Autriche, fut né à Gand le 24. Feurier l'an mil cinq cens: apres le trespas de son pere il herita de toutes les Duchez, Comtez & Seigneuries de son pere, apres auoir gouuerné ses pays enuiron quarante-quatre ans, remis tous les Pays-bas en l'an mil quarante-neuf, es mains de son fils Philippes, & mourut en Espagne l'an 1558. gist à Grenade.

Philippes d'Autriche, trente-sixiesime Comte de Hollande, Zelande, &c. fils unique de Charles second du nom Roy des Romins, lequel de son viuant le fit venir d'Espagne aux Pays-bas, pour (s'il eust peu) le faire aussi bien succeder à l'Empire qu'à ses autres Royaumes, tât d'Espagne, de Naples, de Sicile, que des Pays bas, & autres dont l'Empereur de son viuant se deslailit, & en herita son fils: deiques Pays-bas il print possession: & receut les sermens de fidelité des Seigneurs & de tous les deputez des Prouinces & villes Capitales. Madame Marguerite d'Autriche fille bastarde de l'Empereur Charles V. femme d'Ostasio Farneze, Duc de Parme & de Plaisance, ayant esté preferée par l'aduis du Cardinal de Granuelle à tous les Princes d'Autriche & au Prince d'Orange & Comte d'Egmont pour en l'absence du Roy gouuerner les Pays-bas, estant arriuée à Bruxelles où le Roy fit assembler les Estats du Pays-bas, l'ordonna gouuerneur General de toutes les 17. Prouinces en l'an 1559. afin que luy par consequent eut le principal maniment du gouuernement desdits Pays, ce qui causa de grandes diuisions entre les grands du Pays & autres Seigneurs du Conseil d'Estat des Pays bas, sous laquelle il y eut de grands remuemens pour la Religion esdits Pays, qui ont esté causes qu'en l'an 1581. les Prouinces d'Hollande, Zelande, Frise & autres se sont vnies ensemblement en forme de Republique qu'ils nomment Estats qui gouuernent à present lesdites Prouinces.

Guerret des Pays-Bas depuis la Trefue finie.

Les douze années des Trefues expirees au Prin-temps de l'annee 1621. aussi tost le Marquis de Spinola reprit Iuilliers, & le Duc de Neubourg vn fort que les Hollandois auoient basti sur le Rhein entre Bonne & Cologne, & fut depuis appelé le fort de sainte Elizabeth.

L'annee suiuite au mois de May les Hollandois firent vn cruel rauage sur le Brabant.

Le Prince Henry de Nassau suiuy de 4000. mousquetaires, 2000. cheuaux & 400. chariots butina tout le Brabant, deux lieues au delà de Bruxelles, & y prit des prisonniers à la porte mesme.

Brusla 22. villages & emmena vn grand butin, il emmena aussi 200. payfans prisonniers pour les contributions non payees des la cession des Trefues & 800. cheuaux desdits payfans sans perdre que 200. hommes, & le fils naturel du Prince d'Orange, qui fut tué dans la fosse de Herentales: il fit contribuer Arescor, & puis se retira dans Breda à cause des Escluses que ceux de Louuain auoient leuë & ceux de Malines retenu, qui grossissans la riuere eussent faict surnager & emporter leurs ponts qu'ils auoient dressé sur le Deuter, avec vne redoute gardee de quelques Soldats & 2. pierre de campagne pour leur retraicte.

Le Comte de Berghe n'y arriva assez à temps, ny les garnisons qui se ramassoient pour les enfermer, & se sauuerent riches & refaicts dans Breda.

Ils deuoient encor se ioindre au Prince d'Orange, qui estoit party avec 100. au 200. pontons pleins de gens, & de toute sorte de munitions de viures & de guerre pour vn siege: le dessein fut creu auoir esté sur Hult, ou le sas de Gand. Le Côte Henry repassa le Rhin apres leur retraicte.

Cependant le Marquis de Spinola estoit à Bruxelles, qui picqué de ceste brauade des Hollandois, protesta de s'en venger, & dès lors projecta le siege de Berghe sur le Zoom, lequel il entreprint d'exécuter sur la my-Iuillet, deux mois apres.

Siege de Berghe sur Zoom par le Marquis de Spinola.

La ville de Berghe sur Zoom fut reduite sous la puissance des Hollandois, l'an 1577. en la forme & maniere qu'il a esté déclaré cy-deuant en ceste histoire, laquelle ie redigeray icy par abregé.

Dom Jean d'Autriche, feignant de vouloir entretenir les Estats d'Hollande en paix, leur

Fff iij

disant que ce qu'il auoit fait par le passé, n'estoit que pour la seureté de sa personne, il comença à leur proposer des conditions dures & irraisonnables, & contraires aux precedens contrats de pacification, comme si desia il les eust suppeditez; cela se voit en ceste histoire cy-dessus.

Cependant le sieur de Treslon s'estant déclaré du party des Allemands qu'il deuoit introduire dans la ville d'Anuers, proposoit vn serment nouveau aux soldats & Capitaines de la Citadelle, en faueur de Dom Iean, directement contraire à celuy qu'ils auoient fait aux Estats d'Hollande; lesquels Capitaines & soldats estoient assez aduertis des lettres interceptées; à raison dequoy ledit Treslon se rendit suspect & odieux à toute la garnison de la Citadelle, sauf à sa compagnie, & en escriuit à Dom Iean Pontus de Noyelle, sieur de Bourgs, Capitaine d'une compagnie en ladite Citadelle, qui refusant de faire le serment proposé par ledit Treslon, se joignit avec la pluspart des Capitaines qui tenoient le mesme party, & se mit en armes à l'encontre de Treslon & des siens.

Il y eut quelques harquebusades tirées, dont aucuns furent blessez, & Treslon ne se voyant le plus fort, se retira en son logis, où de Bourgs le print au collet: & ayant chassé ceux de satisfaction, le liura avec la Citadelle és mains des Estats, qui enuoyerent mettre ordre par tout.

Les Allemands de Foucher & de Fronsberg, entendans le bruit de la Citadelle, se mirent en armes, & sur le soir se mirent en la place de Merbruge: & de là enuiron la minuit se retirerent à la ville Neufue, le plus fort quartier d'Anuers, à cause des hayres qui se retranchent.

Dom Iean escriuit incontinent au Colonel Foucher, se complaignant de ce que les ennemis s'estoient saisis d'Anuers, & qu'il allast le trouuer à Naimor pour commander à tous les Allemands, à cause que le Baron de Bronsberg estoit malade. Mais les soldats du Colonel Foucher ayans receu ceste escorne à Anuers, le mutinerent contre iceluy Foucher qui s'estoit retiré à Berghe sur Zoom, & le dixiesme Septembre, le prirent prisonnier, puis le liurerent aux Estats d'Hollande, avec ladite ville de Berghe.

Voyla les fautes que fit Dom Iean d'Autriche, il faillit la reprise de la Citadelle d'Anuers, & laissa perdre ladite ville de Berghe sur Zoom, par la mauuaise conduite de ses Capitaines, avec beaucoup d'autres places que les Hollandois prirent au mesme temps sur luy.

Huict ans apres, sçauoir l'an 1586. le Prince de Parme voulut reconquerir ceste place tant importante, la fit assieger par mer & par terre, avec vne forte & puissante armée: mais apres auoir esté quelques mois deuant, d'autres affaires pressantes le rendant necessaire ailleurs, leua ledit siege, & se retira.

Du depuis les Hollandois ont fortifié ceste place en la forme & maniere qu'elle se void aujourd'huy.

Or considerans l'importance d'icelle, par laquelle ils ont le pied libre dans la Campagne & Pays de Brabant, qu'icelle estant perdue & reprise par l'Espagnol, incommoderoit grandement la Zelande, presque destachée d'avec la Hollande, donnant dans le bras de mer, qui est entre deux, qui seroit vn moyen de diuertir le secours qui se conduisoit aisément à l'Escluse, resolurent de la fortifier en telle sorte, qu'elle fust rendue imprenable à leurs ennemis.

Du costé d'Anuers, ils ont fait vne puissante demie lune, destachée des murailles de la place, avec des retranchemens fort grands, sur laquelle ils ont logé quantité de canons & mortiers.

A main gauche de ladite demie lune, & s'estendant iusques à vn fort nommé Kyckindepot, ladite tranchee est garnie de quatre redoutes, & ledit fort tout enuironné de canons.

De Berghe il y a vn canal qui vient de la mer, par lequel peut commodement arriuer le secours en la place, quoy qu'elle soit assiegee, & sans que les assiegeans le puissent empêcher; pour la conseruation duquel canal, & seureté desdits secours qui y arriueront par iceluy, dans la place, iusques à son emboucheure en la mer, il y a onze forts bien garnis de canons, avec quantité de redoutes, & longues pallissades, toutes le long de la digue, iusques à la mer: au milieu de laquelle digue, est le bourg nommé Tertolen, bien fortifié & muni.

Du costé de Steembergen, ils y ont fait de grands dehors puissamment fortifiez, avec forces redoutes tranchees, & grands retranchemens.

Le flux du Zoom qui arrose ceste place, rend vne partie de ce pays tout marescageux, à cause des eaux qui s'y débordent fort souuent. Là dedans de tout temps les Hollandois ont entretenu vne forte garnison, & la moindre a esté de deux à trois mille soldats, sans les habitans qui sont fort aguerris.

Après les trefves passées, la ville de Iuilliers reprins par l'Espagnol, & les guerres d'Allemagne assoupies, le Marquis de Spinola ietta son dessein sur ceste place, sur lequel il repassa plusieurs fois, avant que d'entreprendre à l'exécuter, il s'achemina de ce costé-là avec son armée, sur la fin de Iuillet, & donna vn tel ordre pour le siege de ceste place, que chacun y accouroit d'Anuers & de Bruxelles pour le voir.

Car ayant prins la ville de Steembergen, fit aussi-tost traualier aux tranches, fit faire vn fort au dessous dudit Steembergen, pour s'asseurer de la conduite des viures en son armée, print son quartier du costé dudit Steembergen, sur, & autour la montagne, appelée aux Conins, proche le bourg d'Alteren, esloigné environ deux traiçts de mousquet de ladite de Berghe, où il commença à faire traualier aux tranches, depuis le pied de ladite montagne, iusques au dehors de deuant Berghe, avec vne diligence incroyable. Ce fut là mesmé où ledit Marquis fit dresser deux furieuses batteries sur ledit dehors, qu'il endommagea fort avec son canon: & du depuis encore vne autre batterie qu'il fit dresser sur la montagne de Roffelsberch, vis à vis les deux autres: de sorte que de l'vne desdites batteries il tiroit sur le port: de la seconde aux flancs desdits dehors, & de la troisieme à costé d'iceux, iusques dessus la ville.

Il logea l'autre partie de l'armée de l'autre costé de la place, sur, & autour la montagne appelée Raderemberg, fort proche du bourg de Borchulier, en laquelle estoient les Italiens & Vallons, premierement commandez par le Comte de Salazar, & du depuis par Dom Gonçales de Cordoua. Venons donc à ce siege.

Ledit Marquis de Spinola ayant donc prins la ville de Steembergen, qui se rendit à luy le seiziesme Iuillet, alla le mesme iour mettre le siege deuant ladite ville de Berghe.

D'abord il eut esperance d'emporter la demie lune d'vn fort, appelé le nouueau coupe-gorge: mais bien attaqué, bien deffendu, il y fit donner deux furieuses attaques: & fut gagnée ladite demie l'vne, avec perte de part & d'autre: mais quelques iours apres ceux de dedans la regagnerent de viue force sur les Italiens, qui s'en estoient saisis, avec perte de quelques six vingts soldats: & derechef fut gagnée par les Italiens en dépit des Hollandois, qui ne les pouuant plus chasser de là, à cause de la tranchee que les assiegeans auoient conduite iusques sur le bord du fossé, ils eurent recours aux mines qu'ils firent de ce costé, & qui eurent effect, tel qu'il sera dit cy-apres.

Le Prince d'Orange, lequel se trouuoit pour lors avec son armée, campé prez le Reez sur le Rhein, entendant nouuelles de ce siege, pourueut soudain à cette place du secours qui luy estoit necessaire.

La nuit suivante dudit iour de Iuillet, les assiegez mirent hors quelques soldats pour la garde d'vne Colline prochaine, & dont la perte leur eust esté grandement importante.

Le 19. dudit mois, sortirent 60. caualiers vers vn lieu nommé le Reybergh, en intention d'apprendre des nouuelles de Spinola, mais ayans esté decouuers, furent contraints de s'en retourner plus viste que le pas.

Les 20. & 21. dudit mois, entrèrent dans Berghe les Regimens des sieurs de Locqueren, Famas, & Hinderson: tellement que la garnison montoit à quelque cinq mille hommes.

Au mesme temps arriuerent aussi audit Berghe, Raef, Dexter, David d'Orleans, Tretoraut, Oinquez, Clair, & vn Anglois, tous ingenieurs des Estats d'Hollande, lesquels avec l'aduis de Ribouen Gouverneur de la place, tracerent quelques forts, appellez en langage du pays Hornverck, c'est à dire, ouurages de Cornes, & Ruelins, auxquels fut traualle d'vne extrême diligence, pendant que leur canon tiroit incessamment sur les assiegeans.

Le 22. ceux de la ville fortirēt sur le Raybergh, sur le quartier de Dom Louys de Velasco: & ayans trouué quatre Cornettes sur leurs armes, ils ne les oserent attaquer, pour estre trop esloignez de leur secours: ils furent contraints de se retirer, avec perte de vingt-cinq des leurs, & entr'autres du Capitaine Siton.

Durant ce temps, le traual des assiegez s'aduançoit fort, & furent paracheuez les trois bastions qui vont droit au Kiichindepot, & desseigné hors la porte de forest, vn nouuel ouurage de Cornes, le grand fort paracheué, le Coupe-gorge retranché, & plusieurs fosses élargis, & ramparts releuez, furent aussi paracheuez les ouurages de Cornes, au quartier des sieurs de Loqueren & de Famas: & voyans que les assiegeans aduançoient vn fort vers le Raybech, ils tirerent vne ligne de soixante verges vers ce costé pour les incommoder d'vantage.

Le 23. Iuillet, les assiegeans commencerent du costé du havre à battre Berghe, donnans quelquesfois au trauers des maisons & havres des nauires: ils effleurerent aussi l'appuy du pont, avec quelques ruines & dommages, ce qui obligea les assiegez, voyans quantité de

batteries dressées de ce costé-là, de redoubler leur travail aux forts qui estoient sur ceste advenue.

La nuit suivante, quelques cheuaux Hollandois firent sortir de Berghe par deux costez du Midy, & du Nort, les sentinelles Espagnoles les ayans apperceus, & donné là dessus l'alarme au camp, ils se retirerent sans effect.

Ces iours, & mesme le 24. les assiegeans receurent du costé d'Anuers quantité de fagots, panners, ais, poutres, & autres vtenlilles, & mesme de la poudre, plomb, mesches, boulets, & autres provisions de guerre: ce qui ne retardoit en aucune façon l'aduancement de leurs ouurages vers la ville; tellement que de là en auant ils firent sentir leurs mousqueta-des aux assiegez.

Les iours suiuaus, les Espagnols se tindrent fort cois, aduançans tousiours neantmoins leurs approches, sur tout vers le fort, dit le nouveau Coupe-gorge, & celuy qui s'appelle l'enhuuy des payfans.

Le premier iour d'Aoust, quatre-vingts canalliers de la ville sortirent, & pensoient passer entre les tranches & les montagnes, tenant toute l'armee en allarme, où il y eut quelque escarmouche fort rude, & de quatre-vingts qu'ils estoient, ne retournerent pas quarante dans la place.

Le 2. Aoust, les assiegez enuoyerent aux assiegeans quantité grande de canonnades: & sur les deux heures apres minuit, firent sortir quarante mousquetaires, qui se contenterent de mettre l'alarme au camp.

Les quatre iours suiuaus se passerent en travaux & canonnades.

Le sixiesme, vn coup de canon du Marquis de Spinola, emporta les deux jambes de l'ancien Maieur de Berghe.

Le neuuesme, quelques canalliers & pietons firent sortie, & passerent par Burchuliet, où ils surprirent quelques soldats qui se reposoient dans les bleds, dont ils en tuerent quelques vns.

Le dixiesme les assiegeans firent vn grand bruit du costé du North, tellement que les assiegez s'attendoient d'estre assaillis: mais ils sceurent que ce bruit estoit, à cause de quantité de provisions qui estoient arriuees en l'armee.

La nuit suivante se passa en travail de part & d'autre: & encore que les assiegez fissent mine d'attaquer, si n'en firent ils rien.

Le onzieme ceux de la ville firent sortie, mais à leur mal-heur, & à leurs despens, car ils perdirent le Capitaine Fryers, les sieurs de Preaux, & quantité de soldats.

De l'onze à quatorze, ne fut faite aucune chose memorable.

Le quinzieme les assiegez paracheuerent vne demie lune, à la pointe du fort, dit Coupe-gorge, de laquelle les Espagnols s'approcherent sans bruit, le 16. Aoust, pensans surprendre la sentinelle perduë: mais ayant tiré son chup, qui donna l'alarme, elle se retira en la demie lune, laquelle fut viuement attaquée par les Espagnols qui furent neantmoins soustenus par les Capitaines Cary, Raef, Dexter, & par le Colonel Hinderfon, qui y auoient leurs compagnies, & furent les Espagnols rafraischis par sept diuerses fois: en fin les assiegez estans secourus, repousserent les Espagnols, ce qui ne se fit pas sans grande perte d'hommes: car le combat dura depuis les dix heures du soir, iusques sur les cinq heures du matin: les Espagnols y perdirent plusieurs Capitaines, Lieutenans & Enseignes: mais aussi ils eurent la gloire de gagner ladite demie lune, & repousserent les assiegez qui y perdirent les Capitaines, Cary, & Raef Dexter, & le Colonel Hinderfon, qui receut vne mousquetade en la cuisse. Pendant ce temps, les forts d'entre la porte de la forest, & celle de Boisle-duc, enuoyerent quelques deux ou trois cens canonnades, sur les mesches qu'ils voyoient paroistre, mais tout cela en vain. Neantmoins vn peu de temps apres, les assiegez regaignerent ladicte demie lune sur les assiegeans.

Durant le combat, les assiegez ayans fait monter plusieurs garçons à cheual, sous la conduite de sept ou huit Capitaines, donnerent iusques au village de Bargulier, où ils ne firent autre mal que d'y mettre le feu.

Enuiron sur le midy fut accordée vne heure de trefue pour retirer les corps de part & d'autre: mais les Espagnols se seruirent de cet aduantage pour aduancer leur travail, ce qui fut cause que ceux de la ville firent tirer sur eux.

Le dix-neuuesme arriuerent de renfort à Berghe quelques Suisses, & autres gens de guerre.

Le vingtiesme enuiron sur les 10. heures de nuit l'Espagnol attaquade rechef la susdite demie lune, y fit vn grand effort, y eut plusieurs tuez & bleuez de part & d'autre, & ne peurent l'emporter.

Le 21. arriuerent en la ville six Enseignes de gens de pied, & fut tiree ce iour-là quantité de canonnades de part & d'autre.

Les 22. 23. & 24. se paillèrent en canonnades, dont furent blesez à mort, deux Enseignes Anglois des assiegez.

Le mesme iour s'embarquerent deux Cornettes de caualerie, pour aller à Breda, & à 60. autres caualiers fut permis d'y aller par terre. Ceux-cy costoyans le village de Bargvliet, se rendirent le lendemain à Breda.

Enuiron ce temps, tous les forts des assiegez furent acheuez, ne restans à parfaire que quelques lignes trauesantes.

Les 26. & 27. entrerent en la ville sept compagnies d'infanterie, avec le Colonel Morgan, le Lantgraue de Hessen, & Guillaume de Nassau, & alors la garnison montoit bien à dix mille hommes.

Le mesme iour furent tuez deux matelots en la ville: l'un sur la porte de Steemberghen, & l'autre au fort dict l'ennuy des payfans.

Le Colonel Morgan avec vn certain François, Capitaine des coffres, visiterent tous les forts & redoutes.

La nuit precedente le vingt-huictiesme, au quartier des Anglois, les Espagnols firent vne mine du costé de la demie-lune, cy-deuant attaquée, & ceux de dedans ne la peurent recognoistre.

Le vingt-neufiesme Aoust, les Espagnols dresserent vn grand amas de fagots, vis à vis du grand Horuueck, afin de l'attaquer, mais ils en furent diuertis par vne sortie des assiegez, & lesdits Espagnols estans renforcez sur l'heure de vingt-deux compagnies qui leur vindrēt, sous la conduite de Dom Inigo de Brosgado, attaquèrent vne demie-lune, au quartier d'un Capitaine Hollandois nomme Famas, laquelle ils ne peurent prendre, cela se fit pourtant avec vn grand carnage, nonobstant lequel lesdits Espagnols aduancerent vn grand retranchement derriere ladite demie-lune, il y eut plus de trois cens hommes tuez en ce combat de part & d'autre, du costé d'Espagne y mourut Dom Inigo de Portugal.

Le quatriesme Septembre le Marquis fit attaquer vne demie-lune, qui regarde le North, d'où il fut repoullé trois fois, à la quatriesme, il s'en rendit maistre: mais les assiegez s'opiniastrent à la regagner, la reconquirent, avec perte de quelques vns de leurs Capitaines.

Le septiesme lesdits assiegez scachans que ledit sieur Marquis auoit fait faire vne mine sous ladite demie-lune du North, en firent vne autre pour la preuenir: mais ne l'ayant peu faire, celle du Marquis ioua la premiere, qui ruina tout leur trauail, & enseuelit plusieurs des Hollandois dans la terre.

Le 8. Septembre apres midy, entre 4. & 5. heures, arriuerent au Camp du Marquis de Spinola 57. compagnies de gens de guerre, avec quelques pieces de canon, qui estoient les troupes de Dom Gonçales de Cordoua.

Le mesme iour ledit Marquis fit faire vn fort à Santuliet, village situé entre Berghe & Lillo, pour empescher le secours de ce costé-là.

Les 13. & 14. Septembre, ledit sieur Marquis ayant fait tirer toute vne matinee & vne apresdinee sur Berghe, endommagea fort grande quantité de maisons, & ruina quelques tours, dont on entendoit les voix des femmes & habitans qui crioient de frayeur.

Le 16. dudit mois, ledit Marquis fit iouer encore vne mine du costé du North, où il fit sauter quantité de soldats, qui furent tuez & blesez pour la pluspart.

Le 17. furent renuoyez soixante caualiers de Breda à Berghe.

Le mesme iour, le Marquis de Spinola ayant fait prier les assiegez de mettre leurs femmes & leurs enfans dehors, & qu'il leur feroit donner passeport pour se retirer en assurance; promettant au reste faire vn effort sur la place, digne de memoire, ne peut pour cela les estonner: de sorte que sur ces menaces, ils ordonnerent que les compagnies qui ne logeoient hors la ville que quatre iours, elles en demeureroient huit.

Le mesme iour encore, fut trauaillé de part & d'autre à l'entour, & au dedans de la demie-lune des Morts, elle estoit minee de tous les deux partis; la mine des Hollandois estoit quelques pieds au dessous de l'autre, elle ioua sur les neuf heures du soir, mais sans effect, ce qui donna bonne esperance aux assiegeans d'y faire leurs affaires, ce qu'ils firent, faisant iouer leur mine aux despens de quelques vns des assiegez: mais pour cela ils ne gaagnerent pas ladite demie-lune.

Le 18. fut employé aux trauaux de part & d'autre, sans intermission de canonnades & mousquetades.

Le mesme iour fut enuoyé force linge aux assiegez, qui fut employé à faire coissins & oreillers pour appliquer aux poitrines & autres parties des malades & blesez.

Le 19. les assiegeans firent jouer vne autre mine par dehors à la demie lune des Mors, & les Hollandois vne par dedans: tellement qu'un certain François, de ceux de dedans, aperceuant que les Espagnols se preparoient à faire jouer la leur, n'en peut si tost aduertir les compagnons, qu'il n'y fust surprins luy mesme avec plusieurs autres.

Le 20. Septembre le Marquis de Spinola fit battre fort furieusement la place, & canonna le temple & tour de la ville plus fort qu'il n'auoit encore fait, y fit de grandes ruines au grand regret & estonnement des habitans: les assiegez presumoient que le Marquis faisoit cela pour se vanger de ce que le Gouverneur d'Uendick estoit entré dans la Flandre avec deux mille soldats, & huict cens Matelots, & quelques pieces d'artillerie, & ayans passé la riuere de Leyre, auoit bruslé & saccagé quelques villages iusques à Gand, à faute d'auoir payé la contribution.

Dauantage, les Espagnols menaçoient fort leurs ennemis de la venue des Cosaques & Polonois.

En ce temps mesme, les assiegez dresserent vne grande batterie entre les deux havres, & retrancherent la Digue du havre iusques à la contr'escarpe, faisant vn rampart pour empêcher les approches des Espagnols vers le havre, & esleuerent vn Raclin dedans le Poldre, & munirent tres-bien le fort dudit havre, dressans vne demie-lune au deuant, pour l'asseurer dauantage.

Ce mesme iour fut tué vn grand Seigneur d'Espagne, nommé Dom Garzia de la famille de Punentelli, homme fort aguerri, dont le Marquis de Spinola eut vn grand regret.

Le vingt-vniesme Septembre, les Hollandois de Berghe firent ordonner les ieunes & les prieres publiques, donc pour quelque dessein mauuais.

Ce mesme iour les assiegez escriuirent en Zelande, pour auoir seize canons avec l'equipage & provisions, pour alceoir dedans la batterie Royale, d'autant que le Marquis de Spinola employoit toutes ses forces, pour incommoder le havre.

C'est chose estrange, que si grand nombre de canonnades & mousquetades n'ayent mis la ville, & ceux de dedans sans dessus-dessous, car les assiegez furent contraincts d'enleuer les balles de fer, & de plomb, qui estoient dans les ruës, avec des broüettes, & les porter au magazin public, nul ne s'osoit arrester hors sa maison, & n'y est resté rien d'entier.

Le 28. Septembre, les assiegez firent iouer d'autres mines du costé du quartier des Italiens, qui n'eurent autre effect, sinon qu'elle enseuelit le fils du Duc de Beneuent, grand d'Espagne, & quelques neuf soldats.

Vn peu auparauant aussi fut tué du costé des assiegez, vn des enfans du sieur Arnould, François de nation, de la Religion pretendue reformee, qui s'estoit retiré avec son aîné en Hollande, avec le Comte de Candale aîné du Duc d'Espéron, pour seruir les Estats contre les Espagnols.

Le lendemain vingt-neufiesme, les assiegez firent iouer encore vne autre mine du costé des Vallons, & à l'instant firent vne sortie tres-grande où du costé du Marquis de Spinola, fut tué le sieur d'Oigny, Gouverneur de Bapaume, qui auoit commandement sur deux mille cinq cens hommes, tous vieux soldats tirez des garnisons par ledit Marquis, pour s'en seruir en ce siege, desquels en demeura quelques six vingts.

Ainsi de iour à autre l'armee Espagnole diminuoit deuant Berghe, tant au ieu de mines, qu'aux sorties & combats, que par la maladie tres-aspre qui se mit au Camp, que pour la perfidie des soldats, qui se rendirent aucuns dans Berghe, pour estre mal payez, & nourris en l'armee.

Le trentiesme Septembre, les assiegez eurent aduis que le Prince d'Orange, ayant joint à ses troupes l'armee de Mansfelt, & leur ayans fait donner des armes, & ce qu'ils auoient besoin, estoit arriué à Gertruydenberg, menant avec luy la plus grande partie de son armee, pour secourir ladite ville de Berghe.

Le mesme iour ils furent encore aduertis que le Comte Henry de Nassau deuoit arriuer au soir à Rosendal, avec partie de la caualerie, & que le Prince d'Orange le deuoit suivre en gros avec l'armee, composée de vingt-six mille hommes de pied, & huict mille chevaux.

Le marquis de Spinola voulut donner quelque forme de diuertissement à l'armee du Prince d'Orange, qui plus de quinze iours auparauant se dispoisoit pour venir contraindre les Espagnols de leuer le siege de deuant Berghe.

Pour ce subiet donc ledit Marquis manda au Comte Henry de Berghe, qui estoit du costé du Rhin, qu'il jettast quelques mille ou douze cens hommes dans la Frise, pour y sonner l'alarme, & donner sujet au Prince d'Orange de diuiser son armee, & y enuoyer vne partie de ses troupes, pour la defense du pays: mais il n'eut aucune necessité de le faire, car ceux qui se jettoient ainsi dans la Frise, trouuerent le pays tellement armé & souleué contr'eux, qu'apres

qu'après avoir deffait quelques 80. Soldats Espagnols à la campagne, & mis les autres en fuite, six cents s'estans conferuez dans vne Eglise, furent contraints de se rendre sans armes & sans defense, aux poursuivans qui les laisserent aller la vie sauve seulement.

Cependant le Prince d'Orange ne desiste point de son dessein, & estant assuré de la bonne defense que les siens faisoient dans Berghe, & du peu d'advancement que l'armée du Marquis de Spinola y avoit fait, se resolut de les aller secourir. Mais il attendit l'arrivée de l'armée de Mansfeld, qui luy avoit donné advis de son rendez-vous en bref pres de luy.

Peu de personnes en France, ignorent la venue du Comte Ernest de Mansfeld, & peu en sçavent le principal motif.

L'incommodité qu'il avoit receu dans le Palatinat avec son armée, & en suite des environs de Treves, & dans l'Alsace, l'avoit reduit à de grandes extremitez: Le proche voisinage de trois puissantes armées, commandee par l'Archiduc Leopold, Dom Gonsalve de Cordoue, & le sieur de Tilly, la perte de tout le Palatinat, deux ou trois meschantes places exceptees, le peu de seureté qu'il y avoit pour luy de traicter avec l'Empereur, le Roy d'Espagne, & l'Infante du Pays-bas, le firent resoudre à iouër à quitte ou au double, de têter vne autre voye qui luy pouvoit mieux reussir, si son projet avoit lieu. A cela seruoient deux choses, l'une l'arrivée de l'Evesque d'Alberstat, de la maison de Brunswic en son armée, avec septante deux cornettes de cavallerie, & six mille hommes de pied, & l'autre les semences plusieurs fois retirees de M. de Bouillon, qui le prioit de venir en France, où il ne trouveroit aucune resistance, ains assistance de dix mille hommes de pied, & deux milles chevaux, que les sieurs de la Trimouille, de la Suze, de Roussi, & autres luy fourniroient, avec argent & munitions pour soudoyer son armée aussitost qu'elle approcheroit la Meuse: que luy ou le Prince de Sedan son fils se mettroient à leur teste pour les conduire.

Poussé donc de toutes ces considerations, & plus encôres sous l'esperoir de faire sa condition avec le Roy, pour entrer à son service, s'il voyoit lieu de ce faire, il leue le siege qu'il tenoit devant Saverne, moyennant quelque somme d'argent, tourne la teste de son armée vers la Lorraine, & demande passage au Duc pour entrer dans la France, menaçant, en cas de refus, d'obtenir par la force de ses armes ce que la courtoisie luy auroit denié.

Son armée estoit composée de douze mil hommes de pied, huit mille chevaux, quatre demy canons, deux quarts de canons, deux couleuvrines, six pieces de campagne, soixante chariots de munitions, deux mille de bagage, & six mille femmes. Le Duc de Lorraine qui avoit assez legerement, & sur des paroles simulees du Comte de Mansfeld, congedié quelques semaines auparavant cinq mille hommes de pied & deux mille chevaux qu'il avoit leués, ne trouvant les moyens d'empescher le passage luy accorda à la condition qu'il demandoit de ne souffrir estre fait aucun desordre, en fournissant des viures pour la nourriture de son armée durant quatre iours qu'elle demeureroit en ses pays, ne laissant cependant ledit Duc de mander sa Noblesse & sa Milice pour se mettre sur la defensive en cas de besoin.

Mansfeld entre donc dans la Lorraine, où non seulement ses gens se donnerent la licence du pillage, mais aussi celle des meurtres, violens, incendies, & autres cruautés si grandes, que les pauvres Lorrains que l'on traittoit, au dire des Allemands, comme amis, n'ont jamais trouvé tant de cruauté parmy leurs plus fiers ennemis; ayans mesme séjourné 12. ou 15. iours dans les pays de ce Prince, qui a veu de ses yeux la desolation d'iceux, sans permettre que M. de Vaudemont & le Prince de Falzebourg, qui avoient en extreme diligence amassé quatre mille hommes de pied, & 15. cents chevaux, chargeassent ces fourrageurs.

Après avoir ravagé la Lorraine, ceste nuée vint fondre sur les Eveschez de Mets & Verdun, n'y laissant que ce qu'ils n'ont peu emporter, & les flammes que leur rage allumoit par tout où ils passoient.

Le commandeur de Fromageres, & le sieur de Montigny, Gouverneurs de Mets & Verdun, voyans venir cest orage à eux, se pourueurent de ce qui leur estoit necessaire pour attendre les sieges dont ils estoient, ce sembloit, menacez: Mesmes ceux de Verdun acheterent quantité de grains, dont M. de Bouillon, peu de semaines auparavant les avoit desgar nis, avec des pistoles qui ne se sont trouves de si bon alloy que celles qu'il reçoit de ses pensions.

Les raisons qui l'avoient porté à acheter, non seulement les grains des Verdunois, mais aussi vne tres-grande quantité du Duc de Lorraine, qu'il avoit payé de mesme monnoye que les autres, ie le laisse au iugement des plus aduisez.

En ceste extremité, le Roy estant absent de Paris esloigné de deux cents lieues, occupé en des entreprises qu'il importoit de luy faire abandonner: Les conseils ont esté differens, les uns trouvoient à propos de ruiner tout le long de la frontiere, dix ou douze lieues de largeur, jusques à brusler les granges & les pailiers, & tout ce dont les ennemis pouvoient

· tirer de commodité, estimât nécessaire de ruiner entierement vne partie de la Prouince pour conseruer le surplus. Mais cet expedient si ruineux bien que proposé de bonne part ne peut entrer en l'Esprit de Monsieur le Duc de Neuers, qui ne peut supporter & moins procurer vne telle calamité aux peuples que le Roy a mis en sa protection.

Cela d'ailleurs eust esté inutile contre vne armee accoustumee, & endurcie à la fatigue, qui eust facilement en vne iournee passé le pays ruyné, & entré aussi tost dedans celuy qui estoit conserué. Les autres proposerent de faire approcher de la frontiere l'armee Espagnolle, qui estoit en Alsace, conduite par Dom Gonçales de Cordoua, General de l'armee d'Espagne au Palatinat, & les autres insistoient de faire venir vne partie de l'armee de Baviere, qui estoit par de là le Rhin, sous la charge du Baron d'Anholt, & s'estoit separé du Comte de Tilly. Ce conseil sembloit assés pour la deffaicte de l'armee ennemie, mais il estoit dangereux au Royaume, dans lequel toutes ces armées, qui eussent monté à soixante ou quatre-vingts mille hommes, venoient fondre avec vne despense innombrable au Roy, & la desolation des Prouinces où elles s'alloient rencontrer. Il estoit honteux à la France, laquelle plus que Prouince du monde, peuplée d'hommes aguerris, pouuoit avec vn peu de temps, pour se recognoistre & resister à ses ennemis, & les ruiner sans le secours des estrangers.

Pour ce faire, la Roynie & le Cōseil qui sont à Paris, sur les aduis de M. le Duc de Neuers, resolurent de faire vne armee, pour laquelle avec le pouuoir d'y commander, ils luy enuoyent des commissions pour faire des gens de guerre, tant de pied que de cheual.

Le Duc d'Angoulesme se presente pour y seruir, & faire sa charge de Colonel de la caualerie legere, avec protestation d'obeyr sans ialousie, aux commandemens du Duc de Neuers, auquel il en donne des assurances par vn Gentil-homme qu'il luy enuoye expres, prend des Commissions pour faire des leuez, comme aussi fait Monsieur le Duc de Montbason, pour assembler des troupes en l'Isle de France, & les conduire en l'armee, Monsieur le Duc de Chaune vient en poste de Picardie, offre de faire à ses despens quatre mille hommes de pied, & 500. cheuaux Monsieur le Comte de saint Paul qui est à Orleans enuoye sa compagnie de cheuaux legers, & le regiment de Monsieur le Duc de Fronzac son fils, on fait venir deux regimens qui auoient esté leuez en Bourgongne pour enuoyer en l'armee du Roy, & le Duc de Bellegarde se prepare avec plus de trois cents Gentils-hommes pour les amener en personne: le Duc de Longueuille qui estoit le plus esloigné de ceste frontiere, avec les deux compagnies de cheuaux legers qui estoient sur pied, en fait leuer d'autres en Normandie, & de ceste Prouince, fait venir avec luy sept ou huict cents Gentils-hommes volontaires: C'est à l'enuy l'un de l'autre que chacun veut resmoigner son affection, au seruice du Roy, en vne occasion de telle consequence.

Mais d'autant que tout cela ne se peut assembler qu'avec du temps, il se trouue qu'on est preuenu, que le Comte de Mansfeld est desia en Lorraine, où l'on luy fournit des viures pour ses soldats, & des rafraischissemens dont on fait present à ses Chefs, que cela luy facilite l'entree en Champagne où l'on le presse d'entrer pour descharger la Lorraine, & qu'il n'en est qu'à quatre ou cinq iournees pour son armee: Monsieur le Duc de Neuers qui est seul avec deux cents cheuaux dedans Chaalons, estime que par artifice il faut arrester ceste grande force, & amuser le Comte de Mansfeld pour peu de iours, pendant lesquels les troupes du Roy, dont on luy donne les commandemens s'assembleront pour venir à luy.

Le Comte de Mansfeld qui auoit preueu l'accommodement d'Allemagne, auoit recherché les occasions d'employer son armee, de laquelle depend sa fortune, sans permettre qu'elle fust dissipée, & se voyant à la veille de cet inconuenient, par la trefue qu'on alloit accorder, auoit enuoyé en diuers lieux, & de plusieurs il auoit esté desiré, principalement des Hollandois, qui eussent bien voulu prendre toute son armee ou vne partie, il auoit dès long-temps enuoyé au Roy, pour s'offrir à son seruice, fait porter paroles & memoires signez de luy par par vn nommé Guichard: Qui en faisant des voyages pour le Roy en Allemagne, auoit veu le Comte de Mansfeld, & de sa part porté plusieurs propositions à sa Majesté: Les Espagnols commencent de leur costé à apprehender la puissance de ceste armee, qui pouuoit du lieu où elle estoit passer par les Archeueschez de Treues & de Cologne, où il n'y auoit point lors de resistance, & se ioindre aux places que tient le Prince d'Orange: bien que la distance des lieux fust grande, l'Infante Archiduchesse de Flandre resmoignant la crainte qu'elle en a, enuoye apres plusieurs visites le Duc de Bornouille vers le Comte de Mansfeld, lequel il rencontre à Mouza en Lorraine, luy propose des conditions aduantageuses que depuis Mansfeld a fait entendre, sçauoir deux cents mille escus qu'on luy promettoit donner, ce qu'il refusa, & ay-ma mieux aller seruir les Hollandois.

Durant les approches de Mansfeld, Monsieur de Botillō sollicite de tous costez ses amis, les coniure & prie d'assister à ce coup la Religion, dont il disoit la liberté s'estouffer dans
les

les progresz des armées du Roy, que ce n'estoit pas ce qu'on disoit n'avoir dessein que sur les Rebelles, mais vn pretexte pour ruiner les vns & les autres, qu'il y alloit de la cause de Dieu, & de plusieurs milliers de fideles, qui estoient sur le point d'estre persecutez, qu'ils auroient pour eux le Roy de Boheme, qui peu de iours auparavant s'estoit ietté dans Sedan avec douze cheuaux, en qualité d'Escuyer du Capitaine Melin, & finalement ceste grande armée du Comte de Mansfeld, & de l'Euesque d'Alberstat, & que c'estoit à ce coup qu'il falloit par vn grand effort faire vne bonne guerre, ou vne bonne paix.

Quelques vns des principaux de sa Religion qui se trouuerent pres de luy, se mirent en deuoir de s'atisfaire à son desir, mesmes de surprendre quelques places, mais ils trouuerēt par tout qu'il n'y auoit rien à gagner pour eux. Il eut encores recours à vn autre moyen pour auoir de l'argent, & enuoya sous main quelques vns du pays par toutes les maisons des Gentils-hommes, aux Bourgs & Communantez, afin de les disposer & induire à donner de l'argent pour les garantir & sauuer de l'incommodité, que l'armée des Allemands leur apporteroit. Ce qui a reüssi tellement à son desir, que peu ont refusé de fournir argent sous espoir d'estre conseruez.

Parmy tous ceux qui estoient menacez & qui auoient le plus de sujet d'apprehender, il n'y auoit personne qui avec plus de raison eut sujet de penser à sa conseruation que M. le Côte de Grand pré Gouverneur de Mouzon. Il n'auoit alors que sa compagnie de 50. hommes, & deux cens du regiment du sieur de Vaubecourt. Il ne voyoit aucunes troupes en Champagne pour le secourir. D'auantage sa place estoit defectueuse en tous ses dehors & en quelque chose au dedans.

L'inimitié inueterée de M. de Bouillon luy faisoit croire que s'il auoit quelque credit en ceste armée estrangere, il seroit le premier attaqué: poussé donc de ces raisons & de l'affectiō qu'il a tousiours eu au seruice de sa Majesté, il donne aduis à Monsieur de Neuers de ce qui se passoit en la frontiere, & le supplie de l'assister d'hommes dont il auoit tres-grand besoin.

Il donne ordre cependant de reparer les defauts de sa place, fortifier le petit fauxbourg de la ville, fait faire deux demy-lunes, vn esperon & des coudoirs aux endroits qui se pouuoient disputer par dehors, y logeant au mesme temps des hommes qu'il auoit fait leuer en diligence par le sieur de Cadnet enseigne de sa compagnie.

Les sieurs de S. Simon & des Ormeaux qui commandoient les deux compagnies qui y estoient en garnison, eurent aussi commandement de les remettre de deux cents hommes chacune, à quoy ils ne perdirent aucun temps & seruirent sa Majesté en ceste occasion, & en toutes autres qui se sont presentees bien & fidellement.

M. de Neuers qui estoit auolé en Champagne au premier bruiet de l'approche de Mansfeld, preuoyant avec prudence qu'il ne pouuoit en peu de temps luy opposer des forces suffisantes pour l'empescher, enuoye vers luy le sieur de Montereau à dessein si on le pouuoit gagner, de le faire entrer au seruice du Roy, ou au defaut de ce auoir le temps de se fortifier d'hommes & mettre en campagne vne armée de douze mil hommes de pied & quinze cents cheuaux qu'il auoit charge de leuer pour s'opposer aux desseins de Messieurs de Bouillon, Mansfeld, Brunswick, & tous autres.

Il ne laisse cependant de visiter les principales villes de son gouvernement, remarquer les choses qui manquoient en chacune d'icelles pour y remedier: & voyāt que Mouzon estoit sur le point d'estre assiegé, il commande aux Sieurs de Marcheuille, Haudrecy, Roquan, Chastelet, & Verriere de s'y ietter avec chacun vne compagnie de cinquante hommes, qui furent logez dans le petit fauxbourg, outre ce renfort, ledit sieur Comte fit choisir par les sieurs de Cumieres son Lieutenant au gouvernement, & Peltier Sergent Major, quatre cents hommes des villages dependants d'iceluy, qu'il diuisa en quatre compagnies commandees par les sieurs de Nouion, Lestanne, Dassy, & la Roche Gentils-hommes du pays, & icelles destinees à garder les dehors, avec les recrues des deux regiments du sieur de Vaubecourt, laissant pour la garde de la ville, sa Compagnie de deux cents hommes, les deux vieilles dudit sieur de Vaubecourt de chacune cent, & les habitans qui sont de sept à huit cents, portans les armes.

Ces choses ainsi ordonnees pour la conseruation de la place, Mansfeld qui auoit esté 12. ou 15. iours au de-là de la Meuze, attendant l'effet du traité commencé entre M. de Neuers de la part du Roy & luy, voyant que la chose n'alloit si viste qu'il eust desiré, se resolut d'attaquer Mouzon, si M. de Bouillon qui pressoit avec instance, voire avec importunité, luy donnoit sujet de contentement, suiuant les promesses qu'il luy en auoit faictes.

Pour cet effet on les preuint. Le Lundy 8. iour du mois d'Aoust, Māsfeld fit inuestir la ville, avec toute sa cavallerie, & luy avec l'infanterie & ses canōs passēt la riuere de Meuze, & se vint

camper à l'Estage, village distant d'une lieue de Mouzon..

A l'approche de la cavalerie, Monsieur le Marquis de Dampierre, ieune Seigneur plein de courage, & de merite, qui s'estoit venu ietter dans la place, avec espoir d'y rencontrer occasion de bien servir le Roy, sortit assisté de dix ou douze des siens, & de quatre-vingts braues hommes, donnant charge à Cadnet de le secourir avec cinquante autres, en cas de besoin.

Ordre qui fut si bien oblerué, qu'aux yeux du sieur de Grand-pré, il fut tué 70. ou 80. soldats des ennemis, plusieurs blesez, 20. chevaux, & deux chariots pris, se retirans sans perte que de deux soldats seulement.

De l'autre costé de la ville, les capitaines qui y sont logez firent aussi vne sortie, où ils tuèrent 40. ou 50. hommes, & rentrent avec du bagage & grand nombre de prisonniers.

Ces escarmouches furent continuees les iours suivans avec pareil succez, pendant lequel temps le traicté que M. de Neuers taschoit de faire avec Mansfeld s'aduançoit, l'union de ce grand corps d'armee composee de gens qui vivent sans ordre, sans discipline, sans obeyssance, & sans payement, estant venu à terme, la pöme de discorde se mesla parmy eux: Brunsuick veut servir M. de Bouillon, pourueu qu'il luy donne 60000. escus; & Mansfeld au contraire offre sa vie, son service, & celui de ses troupes au Roy; moyennant certaines conditions que ledit Seigneur Duc de Neuers accepte sous le bon plaisir de sa Majesté, ce qu'il assure luy faire entendre promptement. Brunsuick s'achemine à Sedan pour faire son traicté, pendant que ses maudites troupes brusloient 15. ou 20. beaux villages, tant de la Preuosté de Mouzon qu'autres lieux circonuoisins: parmy ces deux diuisions il en parut vne troisieme, le 12. iour de ce mois, de 2. ou 3. mille chevaux, sans colonel, ny capitaines, vont en troupes trouuer Mansfeld, à dessein d'auoir de l'argët, ou de se saisir de sa personne, & de son canon au default de payement: il donne si bon ordre à ses affaires, qu'il les renuoya sans auoir ny l'un ny l'autre, mais avec vn tel mescontentement, qu'ils se separent d'avec luy, & s'en vont ayder à ceux de Brunsuick à gaster les grains, massacrer hommes, femmes & enfans, & mettent le feu par tout où ils passent, s'approchans d'une lieue de Sedan. Mansfeld se voyant affoibly des troupes de Brunsuick, & d'une partie des siennes qui estoient mutinees, & voyant l'intentiö du Roy, que Monsieur de Neuers luy auoit fait entendre, par laquelle sa Majesté tesmoigne agréer le service qu'il luy veut rendre, il se resolut pour sa seureté de demander retraite pour sa personne, & son canon, dans le petit fauxbourg de Mouzon, & de faire camper son armee au bout du grand fauxbourg.

Le Dimanche quatorzieme du mois, Mansfeld enuoya le Colonel Tournon, qui a tres-bien & dignement seruy le Roy en ces occasions, trouuer M. le Comte de Grand-pré, pour le prier de se voir le mesme iour, ce qu'ils firent au bout du fauxbourg, & là fut conclud entre eux que le canon entreroit le lendemain dans le fauxbourg, ne reseruant que six petites pieces de campagne pour la teste de l'armee. Le 15. huit pieces d'artillerie furent amenees, & fut choisi deux logis dans ce fauxbourg, l'un pour le logement du General, & l'autre pour le Commissaire de l'artillerie, le tout en la garde de cinq cens hommes des nostres.

La Royne sur les aduis qu'elle auoit eu de tous costez, que ceste armee venoit en France auoit commandé à M^{seigneur} de Neuers de leuer vne armee, à laquelle se deuoient ioindre, Messieurs de Vaudemont, Duc de Cheureuse & d'Angoulesme, le sieur Dandelot, & autres: mais considerant prudemment que ce ne seroit chose si tost preste à marcher pour secourir les places qu'on pourroit assieger, & ne laisser la campagne libre: Sa Majesté auoit par l'aduis de son Conseil conuié par ses lettres Dom Gonsal de Cordouë, General d'un armee d'Espagnols, & Bourguignons, de suivre Mansfeld, & le cöbattre en quelque part qu'il allast. D^o Gonsal aduertty de la volonté du Roy Catholique son maistre, trauersé diligemment le pays de Luxebourg, & vint poser son camp le 15. iour de ce mois à Tretaigne pres d'Yuoÿ, à vne lieue de Mouzon, d'où il enuoya vn Gentilhomme de sa part, avec lettres audit sieur Comte de Grand-pré, par lesquelles il le prie luy mäder la contenance de l'ënemy, ce qu'il est prest à faire, ce qu'il aura agreable, & qu'il iugera estre vtil au bien & service du Roy Tres-Chrestien, soit de le combattre, ou autrement: que son armee est cöposée de dix mil hommes de pied, & de 4. à 5. mille chevaux, tous resolus à bien faire, & rendre service à sa Majesté, s'ils sont employez. Ledit sieur Comte de Grand-Pré qui scait en quels termes sont les accommodations de Mansfeld, qui a son canon & sa personne, s'il veut, en ses mains, qui est assuré par lettres de M. de Neuers, que sa Majesté a agreable se servir de luy, & de ses troupes, & que mesmes il tient dans Mouzon le ieune Duc de Veymar de la maison de Saxe, que Mansfeld luy enuoya dès le 12. du mois, pour assurance de sa part, le tēporise prudēment sans faire vne absoluë responce, remettant à la Royne, & à M. de Neuers, de la faire. Cependant le remercie de sa bonne volonté qu'il luy prie de continuer, en attendant la responce qui viendra dans peu de iours.

Le Comte Mansfeld ne s'assure point à cela, il se revint avec le Duc de Brunzuic, & r'assemble tout le meilleur de sa Cavallerie & de son Infanterie, laisse les malades de son armee, brulle quatre cents de ses chariots pour avoir les cheuaux & y monter les gens de pied, & ayant encore avec luy de sept à huit mille cheuaux, estant appelé du Prince d'Orange pour l'ayder à secourir Berghe Obzoon, que le Marquis Spinola tenoit assiegee, il se resolut de l'aller trouver, voyant qu'il ne feroit pas ses affaires en France, & qu'il couroit risque d'estre defait par l'armee du Roy qui estoit de vingt mil hommes, & qui s'aduançoit sur les frontieres de Champagne pour le joindre.

Il ne voulut pas attendre cela, il prend son chemin par la Tyrasche & Guise avec ledit Duc de Brunsuic avec ses sept à huit milles cheuaux & quatre milles hommes de pied, garnis de quelques pieces de campagne & autres armes qu'ils auoient tirees de Sedan par la supplication du Prince Palatin qui s'y estoit retiré. Par ce passage Mansfeld se jette dans le pays de Haynault où il commence à brusler, & piller, & à tailler en pieces les habitas du pays qui auoient embarrasé les chemins avec forces poutres de bois & arbres coupez.

Don Gonzales de Cordoua General des Espagnols, qui estoit au Luxembourg avec dix milles hommes de pied & cinq milles de cheual, s'aduance avec son armee par vne tres-grande diligence pour couper chemin audit Mansfeld, & le combattre dans le pays, comme il fit: mais n'ayant assez de forces pour resister à la cavallerie puissante de Mansfeld, il fut cōtraint de se fendre, & de quitter le passage aux troupes dudit Mansfeld, apres y auoir perdu quelques Capitaines Espagnols de reputation, avec son bagage qu'il perdit: mais il le recourrit apres le second combat.

Ledit Gōzague pour cela ne perd nullemēt courage; car receuant quelque secours del'armee de Spinola, notamment celuy du vieil Colonel Gaucher, qui y accourut avec douze cents maistres, gaignerent le deuant de l'armee de Mansfeld proche le bord de Fleuru, où le combat fut beaucoup plus aspre que deuant. Le Duc Christian de Brunsuic y eut le bras blessé, & du depuis luy fallut couper, estant arriué à Breda: quelques Ducs de Saxe, & autres Seigneurs Allemans furent pris prisonniers fort blessez & conduits à Bruxelles avec plusieurs Capitaines & Soldats que la Serenissime Infante traicta & fit traicter fort humainemēt: lesdits Ducs de Saxe apres auoir esté bien pensez par commandement & soing de ladite Dame Infante à Bruxelles en furent quittes pour quelque rançon. 29. Enseignes & Drappeaux furent portez à ladite Dame Infante avec forces Cornettes & guidons de Cavallerie, qui tous furent plantez dans la grande Eglise de S. Argold de Bruxelles.

Quant à l'Infanterie qui suiuiot Mansfeld, ne pouuant pas suiure la cavallerie qui se hastoit de gaigner Breda, elle demeura lassée & receuē en plaine campagne malade, & grandement affamee & debilitée de force, il y auoit quatre milles hommes de pied qui furent tous taillez en pieces par le Colonel Gaucher, & tout le canon & le bagage desdits Mansfeld & Brunsuic qu'ils conduisoient, pris & emmenez par ses soldats; à la verité le Gaucher eut bon marché de ceste deffaicte, car c'estoient tous soldats qui n'auoient la force ny le pouuoir de se deffendre, la plupart malades, & sans armes.

Ainsi Mansfeld & Brunsuic courent tant nuit & iour que finalement ils se rendent à Breda avec sept à huit milles cheuaux qui leur restoient encore, qui furent logez es enuirs dudit Breda par le Prince d'Orange qui leur fit donner leurs necessitez avec le temps de se reposer.

Cependant le siege de Berghe se continuē tousiours avec nouueaux effects & nouvelles executions.

La nuit du 26. Septembre le sieur Morgan Colonel, trompa les assiegeans par vn tel stratageme, c'est qu'il fit mettre plusieurs chappeaux sur des bastons en sorte que les ennemis les pouuoient voir, lesquels s'amuserent à leur ietter plusieurs grenades en regardant attentiuement l'effet, cependant qu'il fit couler plusieurs soldats sur le vètre iusques au lieu où estoient leurs ennemis, & les prenans par derriere les tuerent tous.

En cetemps les assiegez recogneurent auoit fait demordre à leurs ennemis de ce qu'ils auoient aduancé cinquante verges du costé de Septentrion, & soixante de celuy de Midy.

Le vingt-neufiesme Septembre ceux de dedans donnerent l'alarme aux tranches de l'ennemy avec seize ou dix-huit mousquetades, dont fut tué le maieur des Vvalons & vn Marquis Espagnol, ce qui fut cause que les Espagnols triplerent leurs gardes en cest endroit.

Le mesme iour enuiron quarante Espagnols se retirerent en la ville, portans les premieres nouvelles de l'arriuee du Prince d'Orange à Gertruydenberg, menant avec luy la plus grande part de son armee pour secourir la ville.

Le treptiesme entrerent encor en la ville quarante Espagnols, confirmans les nouvelles precedentes.

Ledit iour ceux de la ville furent aduertis par ceux de Breda, que le Prince Henry deuoit arriuer ce soir à Rosendal avec partie de la Caualerie, & que le Prince d'Orenge le deuoit suivre avec le gros de l'armee, composee pour lors de vingt-six mil hommes de pied & huit mil à cheual.

Ceux de la ville apprirent encor par lettres d'Anuers, que l'Espagnol y faisoit courre le bruit que tous les forts de dehors la ville estoient pris il y auoit long temps, & que le Marquis Spinola estoit logé dans les fossés il y auoit bien trois semaines, faisant conduire des mines iusqu'au dessous du Temple, lesquelles on feroit iouer à l'instar d'une celebre assemblée. Que le Haure estoit tellement incommodé qu'aucun vaisseau n'y pouuoit plus entrer ne sortir: adioustans que les meilleurs canons, & tout ce qu'il y auoit en la ville de quelque valeur en estoit party à la bonne heure, & qu'auant qu'il fut huit iours la place seroit à la mercy des Espagnols, & que là dessus se faisoient tous les iours des gageures en Anuers. Vn autre adioustoit que l'on auoit desia ordonné vn Gouverneur pour la place, laquelle renduë le Marquis s'en yroit à Tertollen en Zelande, Dom Louys de Velasque à l'Escluse, Cordoua garderoit la campagne de crainte que Maurice attendrast rien, & que Henry de Bergue & Anhold s'en iroient avec leurs gens & les troupes de Bauiere en Frise, & qu'en ceste sorte auant qu'il fut six semaines, ils seroient Maistres absolus de tout.

Voilà le bruit que faisoient courir les Espagnols en Anuers, & autres villes de leur party. Mais cependant voicy Mansfeld & le Duc de Brunswic, qui ioignent avec leur grande armee celle du Prince d'Orange, & voyons vn peu comment cela se fit que ledit Comte de Mansfeld peust arriuer aupres dudit Prince à Breda, car il fut cause de la leuee de ce siege de Berghe.

Le premier d'Octobre, ceux de Berghe s'apperceurent que l'Espagnol auoit transferé les canons du costé du North, & croyoient que ce fust pour les alioir sur les Landes, pour la bien-venue du Prince d'Orange, qui se resolut de secourir la place avec l'ordre qui suit.

Il leua premierement toutes les Garnisons des places moins exposées au danger de leurs ennemis, les laisse en garde aux seuls habitans, qui en entreprennent la defense, faict visiter les maisons des Armeniens & Gomoristes, desquelles on enleue les armes, & ne leur laisse-on seulement vn cousteau qui ne soit espointé pour estre plus assuré d'eux: faict tenir le Comte de Candale, & autres Capitaines qui estoient dans Berghe, plus propres à la campagne, qu'à la garde d'une ville, faict donner des armes & des habits aux Reistres & Allemands de Mansfeld, faict embarquer ses troupes pres de Graue, pour se rendre en l'armee deuant Breda, où il se rendit en personne, pour conduire ce secours à Berghe.

Le Marquis de Spinola ayant eu aduis de ce dessein du Prince d'Orange, & recogneu qu'il deuoit venir par terre en corps d'armee deuant Berghe, fit aduancer les troupes d'Allemagne du Baron d'Anholt, du Duc Frideric de Saxe, & du Comte de Holstein entre Anuers & Breda, & donne promptement ordre au Comte Henry de Berghe, qui commandoit à une armee de douze mille hommes vers Nieuwegue, au Duché de Cleues, de s'aduancer au plustost pour ioindre lesdites troupes d'Allemagne, & attendre le Prince d'Orange au combat, & luy empescher le passage de Breda à Berghe.

La verité est telle que sans comprendre l'armee du Marquis de Spinola qui estoit deuant Berghe, le Comte Henry de Berghe ayant ioinct lesdits Allemands avec ses troupes, pouuoit faire avec eux nombre de plus de vingt-deux mille hommes, sçauoir dix mille chevaux, & plus de douze mille hommes de pied, nombre capable de combattre l'armee du Prince d'Orange. Mais plusieurs sortes d'accidents arriuerent, qui firent mesconter ledit sieur Marquis, & l'obligerent à leuer le siege de deuant Berghe: sçauoir, les intelligences qu'il se promettoit en la place, qui ne réussirent pas: la maladie qui se mit en son camp, la mutinerie des Italiens, & le defaut que fit le Comte Henry de Berghe, de ioindre lesdits Allemands, auant que le Prince d'Orange se fust mis en chemin pour venir à Berghe.

Ledit Prince d'Orange, qui auoit vn autre dessein que celui que le Marquis de Spinola s'estoit imaginé, qui estoit de se rendre deuant Berghe par mer, & plustost que ledit Marquis n'eust pensé, ayant fait quelque mine de vouloir tenter le passage de Breda à Berghe par terre, s'embarqua le vingt-huictiesme de Septembre de nuit, avec toute son armee, pour descendre & prendre terre à deux lieus dudit Berghe, à la veue du Marquis de Spinola, & contre l'esperance de l'armee qui le vouloit attendre au combat entre Anuers & Breda: fait couler dans Berghe six mille soldats, pour rafraischir la garnison, & pour s'en seruir au dessein qu'il auoit de perdre entierement le camp dudit Marquis: ce qui luy eust esté facile de faire, si ledit Marquis n'eust usé de prudence, sur l'aduis qu'il eut de ce qui s'alloit executer à la ruine de son camp.

Il reçoit donc aduis que les Hollandois auoient practiqué quelques siens Officiers de guer-

re au

re au quartier des Italiens, qui estoient les plus proches du peril, au moyen desquels traistres se deuoient poser les sentinelles, ordonner des soldats de la faction pour les rondes, la nuict que l'exécution se deuoit faire, en telle sorte que les sentinelles de ladite faction estans posées avec le mot donné & communiqué aux Hollandois, huit ou dix mille hommes füsēt sortis de la place, & à la faueur des traistres & des leurs sentinelles, ayans passé iusques aux tranchées, eussent massacré tout ce qui s'y fust trouué: pendant quoy l'armée du Prince d'Orange, qui feroit alte à deux lieues de là, se fust aduancée sur le quartier du Marquis de Spinola, qui se fust alarmé de ceste nouvelle sorte sur le quartier des Italiens, eust mis & taillé tous les gens en pieces, se fust failli de tout le Camp, & eust ruiné entierement ledit Marquis: ioinct d'ailleurs, comme i'ay dict, que le Comte Henry de Berghe, qui auoit ordre de s'aduancer pour ioindre les Allemans, retarda trop d'un iour.

Toutes lesquelles choses seruans à la ruine de l'armée Espagnole, le Marquis de Spinola ayma mieux par prudence, se résoudre à la leuee dudit siege de bonne heure, que d'attendre qu'il y fust forcé.

C'est pourquoy le Dimanche deuxiesme Octobre, sur les six heures du soir, il fit mettre le feu en les quartiers, & en fit faire autant, & à la même heure à Dom Gonçales de Cordoua, au quartier des Italiens, & enuoya tout le canon, & toutes les munitions de guerre dans Anuers, preuenans en ceste sorte les ennemis, & se retirant de deuant Berghe sans plus grande perte.

À l'instant il congedia la pluspart des soldats Italiens, leur payant quelque somme de plusieurs monstres qui leur estoient deuës, desirans se retirer en leur pays iusques au Printemps, ne pouuans, disoient-ils subsister dans vn pays où le froid est si rude en hyuer.

Le Comte Henry de Berghe arriua le lendemain troisieme Octobre dans la ville d'Anuers, apres la leuee dudit siege, où apprenant ces nouvelles en eut regret iusques au mourir, luy-même se donnant la faute de ne s'estre aduancé plustost: on ne laissa pas de luy donner vne partie du blasme de la leuee dudit siege, aucuns se voulans persuader qu'il auoit esté gagné du Prince d'Orange, & auroit voulu par ce retardement favoriser son Cousin ledit Prince d'Orange: mais nullement, car iamais il ne se trouua plus desplaisant que lors qu'il vit ce siege leué, & qu'il n'auoit peu vser d'assez grande diligence pour s'opposer au secours de Hollande & à l'arriuee de Mansfeld. Voyla le succez du siege de Berghe où l'Espagnol a perdu plus de dix mil hommes qui ont esté tuez, & deux mil qui se sont rendus en la ville, sans cōpter ceux qui se sont retirez ailleurs, la perte de ceux de la ville monte à six cens hommes de morts, & bon nombre de blesez.

Ceux de la ville ont tiré pendant le siege, deux cens mil canonnades. Dans Breda, Mansfeld, Brunswic s'y estans rafraischis & leur caualerie assez bien refaite, leurs chevaux referrez & leurs soldats arriuez de nouveau, fut resolu d'aller, secourir les assiegez de Berghe & de faire leuer le siege au Marquis de Spinola.

Le quatrieme d'Octobre, arriuerent à Bergues sur le Zoom le Prince d'Orange & le Comte de Mansfeld avec trente Cornettes de Caualerie, & furent receus de ceux de la ville en grande magnificence & allegresse.

Le même iour, le Prince d'Orange, le Comte de Mansfeld, & tous les Colonels de la ville & autres Officiers, allerent visiter les forts & ruelins, ordonnant sur le champ ce qui deuoit estre osté & explané, puis se retira ledit sieur Prince pour donner ordre aux autres affaires.

Le cinqiesme dudit arriua à Bergues le Prince Henry de Nassau avec le Comte Ernest, suivis de plusieurs Seigneurs & Gentils-hommes.

Ledit iour, le Prince d'Orange estant à Rosendal depescha quelques regimens pour la prise de Steemberghen, lesquels arriuez furent sommer la ville, qui ne se voulut rendre qu'apres auoir esté honoree de quelques canonnades, ce qu'estant fait ils se rendirent soudain, on laissa dedans vnze Compagnies pour la garde, on trouua dedans quatre mille muids de farine, dont la garnison s'accommoda.

Il ne s'est pas fait de guerre es pays-Bas depuis le siege de Berghe l'an 1612. sinon en l'vnestphalie entre les Lieutenans de l'Empereur, le Roy d'Espagne, le Duc de Bauiere, contre les Hollandois, Mansfeld & l'Euesque d'Alberstad dit le ieune, Duc de Brunswic.

Sur la fin de l'annee 1623. le Comte Henry de Berghe ou Côte de Monts, Sublet d'Espagne & grand Maistre de Caualerie des armées de l'Infante des pays-Bas, fauorisé des grandes glaces des riuieres passa par dessus avec le canon, & où ils firent vn grand rauage emmenant quantité de bestail, forces viures, nombre de prisonniers, & à cause de froidures ne peurent y subsister dauantage, car elles estoient telles que sans cela ledit Comte de Monts eust pénétré bien auant dans la Hollande: ce qui allarma fort tous les Hollandois, & le Prince

d'Orange mit ordre à ce que les places dudit pays d'Vtrech fussent renforcées de nouvelles garnisons : Le Comte de Monts s'en retourna, ses soldats ne pouuans supporter les froids, ioinct qu'ils y estoient entrez sans viures ny munitions.

En Allemagne en Vvestphalie l'armee d'Alberstat qui estoit de 300 mille hommes fut defaite par le Comte de Tilly, les Hollandois furent entierement challez d'Allemagne & d'Vvestphalie, apres la prise de Lipstat par les deux Comtes d'Embden en Aoust & Nouembre 1623. & peu apres Mansfeld fut mis en deroute voulant passer par Breme & Brunswic pour retourner en Boheme, où tous les principaux de ses colonnels & Capitaines furent pris & menez à l'Empereur.

En cette année 1624. le Marquis Spinola ayant communiqué son dessein à sa Maiesté Catholique d'Espagne son Maistre, & ayant appris le contenu de sa volonté, suiuant icelle, la premiere chose qu'il faict est de faire construire & composer vne grande quantité de Pôtons propres à jeter sur les fleuves & riuieres pour y faire passer commodement vn grand nôbre de gens de guerre, qui faisoient lors soupçonner à leurs ennemis & aux Flamands mesmes, qu'il auoit quelque grand dessein de tres-grande importance à entreprendre & executer en bref, comme de vray il en auoit vn bien grand, duquel il n'est encore venu à chef, qui fut cause que les sieurs des Estats d'Hollande & le sieur Prince d'Orange soignerent à leur conseruation & à l'assurance de leurs places & forteresses, à faire prouision de quantité de viures, munitions de guere, & principalement d'un bon nombre de soldats & fortes garnisons, desquels ils auoient affaire, tant à la garde de leurs places, que pour preuenir les courtes que faisoient Henry de Berghes Comte de Monts du Costé du Rhin & de la Meuse d'une part, les Espagnols & Flamans d'un autre.

Tout le temps de cette partie dernière de l'année, ledit Marquis Spinola s'employa à faire de grandes & prodigieuses leues de gens de guerre tant de pied que de cheual : il prend les vieilles garnisons de toutes les places fortes des pays de l'Archiduchesse, & y remet de nouveaux Soldats : faict venir quelques huit mille Italiens Soldats pietons & quelque Cavalerie, qui estoient partis, plus de six mois auparauant du Milannois, lesquels seiournerent quelque temps en la Franche Comté & dans la Duché de Luxembourg, attendans le commandement d'avancer selon le temps & la saison que l'on auroit affaire d'eux.

Les Hollandois aussi de leur costé preuoyans sur eux quelque nouuel orage à tomber se resolurent de solliciter les Princes & Estats leurs voisins, amis & allies pour estre aiseurez de leur faueur & protection contre la mauuaise volonté des Espagnols leurs ennemis, ils enuoyent leurs Ambassadeurs extraordinaires en France vers sa M. Tres-Chrestienne, laquelle ils supplient continuer sa bonne affection enuers eux, à quoy sadite Majesté promit entretenir leur alliance avec sa Couronne, de mesme que le feu Roy son Pere Henry le Grand, que Dieu absoluë, auoit faict à leur grand soulagement & conseruation de leur liberté : aussi enuoyerent d'autres Ambassadeurs en Angleterre pour obtenir du Roy Serenissime de la grand' Bretagne toute promesse de secours & faueur pour la conseruation desdits Estats des Pays-Bas, vnis selon l'affection & confederation de la bonne assistance des forces d'Angleterre, de laquelle ils n'ont iamais manqué, comme ils recognoissent, tant sous le regne fauorable à leurs Estats de la feue Royn Elizabeth, que de celui de sadite Majesté Serenissime de la grand' Bretagne.

Ils enuoyerent d'autres deputez encore vers le Roy de Dannemarch, & iusques à Venise pour tirer qui des vns de l'argent, qui des secours d'hommes & gens de guerre, qui des autres des grains & munitions de guerre.

Pendant ce temps Mansfeld sort de France & va en Angleterre, où il ne fut pas long-temps, & n'y apprit autre resolutiō que des promesses que l'on luy fit de l'employer à la guerre pour la restitution du Palatinat du Rhin en Allemagne, qui auoit esté deliberee au Parlement d'Angleterre : on ne l'assura autrement, pour ce qu'alors sa Majesté Serenissime & les Estats du Royaume estoient tous assemblez en Parlement pour l'affaire importante de l'alliance à renouveler entre la France & l'Angleterre par le mariage qui s'alloit contracter entre le Serenissime Charles Stuart Prince de Galles fils du Roy de la grand' Bretagne, & la Serenissime Marie de France, troisieme sœur de sa Majesté Tres-Chrestienne pour l'accomplissement duquel contract & accord touchant ledit mariage, il y auoit Ambassadeurs extraordinaires de part & d'autre, le Comte de Fiat fils de feu Monsieur de Beaulieu Rusé, en Angleterre pour sadite M. Tres-Chrestienne, & le Milord de Haye & encore vn autre, enuoyez par le Serenissime Roy de la grand' Bretagne à la Cour de sadite Majesté Tres-Chrestienne, où finalement le tout se conclud avec de grandes joyes & solemnitez, tant à Paris qu'à Londres, ainsi que nous dirons cy-apres.

Cependant Mansfeld s'ennuyant en Angleterre, passa en Hollande pour passer le réps, void

void la guerre qui s'y alloit eschauffer contre les Espagnols qui alloient assieger Breda, cōme il se vera incontinent, & se voyant inutile en ce pays, ayant sçeu la conclusion des Estats & de l'Assemblée du Parlement d'Angleterre, y voulut repasser.

Où l'on luy promet de bien tost l'expedier avec hommes & argent pour commencer la guerre au Palatinat, se promettās les Anglois que les Princes protestās d'Allemagne se leueront en faueur du Roy de la grand' Bretagne, quand ils verront vne armee sur pied qu'il y aura enuoyee, car plusieurs desdits Princes protestans n'obeyssent à l'Empereur que par force, & s'ils se voyoient quelque peu soustenus de quelque Prince estrange, ils prendroient aussi tost l'essor de leur liberté & renouelleroient avec eux la guerre avec plus grande resolution que jamais: mais pour maintenant ils sont bridez par les fortes armées de l'Empereur & du Duc de Bauiere, qui les empeschent de faire ce qu'ils voudroient bien.

Cen'est plus en Angleterre ce qu'ils promettoient faire à leur Roy, pendant la tenuë du Parlement du Royaume, où les Estats dudit Royaume luy faisoient offre de luy fournir les millions & les milliers de gens de guerre pour faire la guerre contre le Roy d'Espagne: aussi la M. serenissime se doutoit bien qu'ils feroient prou de promesses, mais peu d'effets & d'execution, non pas qu'ils ne le pussent faire, car il y a des Millords en Angleterre opulents en argent & Finances, mais peu se veulent cottiser & ouurir la bourse, de sorte que maintenāt le commencement des leuees de soldats est fort petite, mais il faut excuser que la saison rigoureuse de l'hyuer est contraire à mener la guerre, estant veritable que si c'estoit en vn autre temps, les Anglois ne seroient que trop desirieux de contribuer de leurs moyens pour le recouurement du Palatinat, l'Espagnol en cette vsurpation ne les ayant que trop indignez, & a le Roy Serenissime assez de forces tant par mer que par terre, pour attaquer le Roy d'Espagne, & le contraindre avec ses amis & allies à rendre ce qu'il a viurpé, comme il n'y a aucun doute qu'il y sera forcé, quelque effort qu'il face au contraire.

Il est maintenant grandement necessiteux d'argent & son peuple pauvre, pour les auoir taxez à payer ce qu'ils ne pouuoient pas fournir, & de fait la necessité des affaires du Roy est si grande pour auoir tant d'armées à nourrir & payer, tant en Allemagne qu'en Flandres, Milannois, Franche-Comté, contre les Pirates d'Alger & contre les Hollandois, au Bresil & aux Indes Orientales, qu'il a esté contraint de faire battre de la monnoye de cuiure par toute l'Espagne, & enioint à tous ses suiets d'y changer toutes les pistoles & reales qu'ils peuuent auoir pour d'autre monnoye de cuiure, promettant à seldits suiets la reprendre pour leur estime en or & argent lors qu'il aura eu quelque relasche en ses affaires.

Et pour ce qui concerne le commerce des Espagnols avec les marchands estrangers qui feroient refus de prendre ladite monnoye de cuiure en l'achapt & payement des marchandises, a esté ordonné que pour faciliter ledit commerce au contentement desdits marchands qui trafiquent en pays estrangers, seront les changes establis aux villes maritimes & frontieres pour changer ladite monnoye de cuiure en espeece d'or & d'argent, selon que ladite monnoye aura esté eualuee, par l'Edict du Roy.

Voyons maintenant ce qui se passe au Pays-Bas, depuis la fin du mois d'Aoust, iusques à present.

Nous y verrons premierement la ville de Breda, bloquée, puis assiegee au nom du Roy d'Espagne par le Marquis de Spinola, en la forme & maniere qui suit.

Pour paruenir au bloquement de la ville de Breda, est necessaire de raconter comme le Marquis de Spinola apres la resolution prise, a assemblé grand nombre de gens d'armes tant à pied qu'à cheval, estant le rendez-vous à Ballador, vn bourg enuiron vne lieue loing de la ville de Lire, dans laquelle ville il auoit fait emmener tous les canons pour les mener plus commodement au lieu où il estoit besoin.

Tout cecy estant donc préparé s'en est allé le dix-neufiesme Iuillet à Turnhout & Hoogstraten, lesquels lieux il a fortifiez pour y cuire du pain & brasser de la biere pour son armée sans empeschement, & à ceste fin il a fait faire plusieurs fours & chaudières.

De là il s'en est allé plus outre loger dans les bourgs Chaen, Bacrle & Gilsen, enuoyant vers la ville de Graue souz la conduite du Comte Iean de Nassau Gouverneur de Diest, vne grande quantité de gens tant à pied qu'à cheval, & quelques petits bateaux & chariots, feignant de vouloir suivre avec toute son armee, pour cependant amuser le Gouverneur de Breda Iustin de Nassau, afin qu'il enuoyast vne partie de la garnison à l'assistance de ladite ville de Graue, & ainsi à l'impourueu assaillir la ville de Breda, Mais cela ne succeda point selon l'opinion du Marquis, c'est pourquoy ledict Comte Iean de Nassau retourna avec ses gens & admonitions, trouuant les enuiron de Mast & de la ville de Graue si bien gardez, que il ne vit moyen de rien attenter sur eux: le Marquis ne pouuant venir par telle voye au bout de ses desseins, demoura là quelques semaines sans rien entreprendre, comme s'il ne pen-

soit à rien moins qu'au siege de ladicte ville de Breda, laissant librement & sans empescher d'entrer dans la ville les gens des Estats d'Hollande, & aussi passer & repasser, vendre & acheter à tous ceux qui vouloient, & tant plus pource qu'il estoit defendu de par le Prince Maurice de ne point biaiser de la biere double, ou mener hors la ville aucune sorte de grains, froment, biere ou autre sorte de victuailles.

Toutes ces dissimulations ayant duré quelque temps, & ne voyant rien emmener hors de la ville, mais au contraire amener tous les iours, s'en est allé à la fin à Ginneken qui est vn bourg esloigné d'vne demie-lieue de la ville, où le Gouverneur le iour precedent auoit fait brusler aucunes maisons, ayant laissé vn Moulin, lequel seruiroit bien à ceste heure au Marquis, si ce n'eust esté vn Anglois qui au grand seruice de la ville auoit mis le feu dedans ledit Moulin.

Doni François Medina menoit l'auantgarde, venant la nuit entre le vingt-sixiesme & vingt-septiesme d'Aoust au susdit lieu, & fust suiuy du Marquis le lendemain avec toute son armee, la diuisant son armee en trois.

La premiere sous la conduite du sieur Paolo Baglioni, s'estend de la porte de Bosleduc ou Tetringle iusques à la riuere de Merck.

La deuxiesme sous le Comte Iean de Nassau est logé à Hage.

La troisieme (estant à Ginneken) est commandée par le Marquis, mesme ayant en compagnie le Comte de Salazar, & sont logez dans la maison de plaisance du Gouverneur de Breda Iustin de Nassau.

Le vingt-huictiesme aucuns batteaux avec les vaisseaux du Gouverneur de Seuenbergen allans à Breda & venans enuiron Galder, furent assaillis dudit sieur Baglioni par des Mousquetaires qui auoient avec eux deux pieces de campagne.

Les Soldats du vaisseau dudit Gouverneur de Seuenbergen se defendirent gaillardement, tandis que les gens des autres batteaux s'enfuyoient par l'autre costé de la Merck, & se retirant dans la ville, comme aussi firent apres ceux dudit vaisseau du Gouverneur, & se sauuerent ainsi par la fuite.

Le Marquis ayant pris ces batteaux fit faire tout aussi tost desdits batteaux deux Ponts sur la riuere, pour empescher par ce moyen l'entree & la sortie de la ville par la riuere, & pour la garde de ces Ponts a fait faire à chascun bout vn fort.

Le trentiesme dudit mois le Marquis Spinola a fait faire deux batteries apres vn Moulin nommé de Schorsmeulen entre Ginneken & la ville, Ceux de la ville ont tiré quelques fois sur leldites batteries sans pouuoir rien effectuer, pource qu'elles sont assez loing de la ville, aussi ont ils mis le feu dans les maisons, iardins & arbres de là à l'entour.

Le trente-vniemesme on a mené dans l'armee du Marquis d'autres Canons & pieces d'Artilleries, poudres, viures & autres munitions de guerre.

Aucuns François volontaires estoient d'aduis de se mettre dans la ville la nuit suivante pour s'exercer à la guerre, mais estans descouverts & poursuiuis de l'ennemy en furent pris trois prisonniers, les autres se sauuerent.

En somme, les chemins tout à l'entour sont fermez que personne ny peut aller ny venir sans estre pris, tant par les gens de pied que de cheual, qui se tiennent la pluspart dans les bourgs Galder, Ryberghen & Etten, lieux par lesquels on pouuoit entrer en la ville.

Le Prince d'Orange voyant que le Marquis de Spinola avec vne armee de plus de 30. mille hommes, tenoit Breda inueltie de toutes parts avec les forts & les redoutes, il fait tout ce qu'il peut pour empescher l'entier blocquement de la place, & gagner le passage pour assister les assiegez de viures & de ce qu'ils auroient affaire: mais la ville est tellement bloquee & serree de prez, qu'il est impossible d'y pouuoir entrer ny sortir, sans courir risque d'estre battuz & tuez, joint que ledit Prince d'Orange estoit & a tousiours esté de beaucoup inferior à l'armee d'Espagne, tant en cavallerie qu'infanterie, & que quoy qu'il eust peu de gés de guerre en toute son armee, ce n'estoit point gens pour estre exposez à la boucherie, puis que ce peu seruoit à la conseruation de la Hollande, estoient les meilleures garnisons de leurs plus fortes & importantes places, & lesquelles estans perduës elle eust souffert vne desolatio & vne oppression grande de la part de leurs ennemis.

C'est pourquoy le susdit Prince d'Orange conseruoit le plus qu'il luy estoit possible sadite petite armee, composée de quelque 8. ou 9. mille hommes tant de pied que de cheual, tous soldats bien-faits & grandement experimentez en l'art militaire, mais qu'il ne falloit pas exposer au choc contre vn ennemy si fort & si puissant & si redoutable, & hazarder tout le Camp Hollandois par vne funeste bataille que le Marquis luy demanda deux ou trois fois, sans que par grande prudence ledit sieur Prince d'Orange voulust prendre au mot, mais

mais seulement eust bien désiré se rencontrer en escarmouches avec les Espagnols, car entre parties egales, ils eussent montré celuy qui eust eu du courage de reste : mais le Comte Henry de Berghe grand Mareschal de Camp, menant tousiours quatre à cinq mille Cavaliers, pour s'opposer aux approches & desseins des Hollandois, empeschoit & retenoit ledit Prince d'Orange d'hazarder la sienne.

Ce que voyant qu'il ne pouuoit pas reüssir heureusement à ce qu'il entreprenoit, & que ledit Comte de Berghe le talonnoit tousiours de pres, il se resolut ne pouuant assieger de place pour diuertir les Espagnols dudit siege de Breda, d'empescher les passages des conuois qui venoient de Flandres & du Brabant dans l'armee: mais le Marquis de Spinola y donna si bon ordre, qu'il y auoit tousiours trois mille cheuaux conduits par vn des Chefs de l'armee, à la suite & compagnie deldits conuois, il ne les a iamais peu empescher de passer librement à leur barbe & à leur veüe, sans les oser attaquer.

Le Prince d'Orangen'ayant peu empescher les conuois de Flandres & de Brabant pour l'armee du Marquis de Spinola, ny en jeter aucun dans Breda pour rafraischir les garnisons & les assiegez qui n'en ont plus guere de reste, cela fut cause qu'il rassembla toute son armee en vn corps de Camp, laquelle il amena à vne demie lieuë de celle de Spinola, où il se campa & se fortifia de quantité de tranchées, & comme le Marquis le veid approcher de si prez, croyant qu'il eust quelque desir de combattre, ledict sieur Marquis fit demander audit sieur Prince d'Orange, s'il vouloit venir à quelque bataille, ce qu'il n'accepta pour le subiect de la conseruation des Pays des Estats, lesquels luy auoient defendu d'entreprendre aucune bataille avec l'Espagnol, parce que s'ils y auoient du pire, cela causeroit la ruine de leurs Prouinces, & la perte de tout ce qu'ils auoient de braue & de valeureux pour la conseruation de leur liberté & Pays.

Le Marquis de Spinola voyant que le Prince d'Orange n'auoit charge desdits Sieurs Estats de combattre, ny d'empescher son armee au risque d'une bataille fatale pour l'inégalité de ses forces, ayroit mieux s'entretenir avec les ennemis par escarmouches qu'autrement, taschant par tous moyens possibles de jeter quelque nombre de gens de guerre dans Breda avec quelques munitions de viures, ce qu'il ne peut faire pour estre ladite place fermee & bloquee de tous costez, de forts, tranchées, redoutes, canons, deffences, hommes, & sentinelles vigilantes au possible.

Mais pour autant que cela donnoit de l'ombrage audit Marquis de Spinola, & que ce Camp si proche de luy, donnoit des alarmes frequentes à son armee, il resolut de faire decamper de là le Prince d'Orange: ce qu'il fit finalement par la leuee & laschement des digues & escluses qu'il fit faire, dont les eaux inonderent toute la campagne, voire mesme iusques au Camp dudit Marquis.

Ce qui fut cause que ledict sieur Prince d'Orange retira promptement son armee de là qui eust pery dans les eaux, abandonnant les tranchées & forts qu'il auoit fait commencer à esleuer pour se camper là & incommoder aucunement lesdits assiegeans.

Voyant qu'il ne pouuoit que faire pour le secours des assiegez & que tous les desseins auoient esté rompus par les Espagnols, il repassa en Hollande & ayant fait vne reueüe sur son armee, se resolut de s'aller camper entre Anuers & Malines, avec dessein d'empescher les conuois qui viennent d'Anuers au siege de Breda, ce qui luy fut impossible de faire, parce qu'estant foible en Caualerie, son ennemy assistoit tousiours lesdits conuois avec trois mille cheuaux sans l'assistance des villes, qui estoit vn moyen de combattre avec perte grande de part & d'autre.

Mais on ne pert pas descourir que par les effects empeschez vne conspiration & entreprise que ledit sieur Prince d'Orange auoit sur la Citadelle d'Anuers qu'il vouloit tascher & s'efforcer d'executer, pendant qu'il y auoit peu de garnisons aux places, que l'on ne se deffioit des Hollandois, les croyans assez en peine pour sauuer Breda, & que tout le Brabant & la Flandre couroient à ce Siege, il s'approche donc d'Anuers avec quelque Caualerie & se loge dans l'Illo forteresse tres-dommageable à ladite ville d'Anuers, estans en icelle fait venir quelques gens de guerre qu'il tire des garnisons de Beerghes ob Zoom, & ayans ainsi enuiron trois mille hommes pour favoriser son entreprise, enuoya les entrepreneurs destinez pour asseoir les pontons aux fossés & planter les eschelles aux murailles afin de la surprendre par escalade: ces Ingenieurs du Prince d'Orange estoient tellement experimentez au fait des escalades & surprises qu'il ne s'est veu de pareils engins, instrumens & machines de guerre qu'ils conduisirent subtilement, secrettement & à la desrobée sur le bord du premier fossé de cette Citadelle: Ils auoient espié vne occasion fauorable qui sembloit ayder à cette entreprise, si Dieu n'y eust plus travaillé que les garnisons à sauuer ladite place: ils espierent au mois d'Octobre, vne nuict en laquelle il faisoit vn vent & vne tempeste tres-forte, im-

meuse & grandement violente, laquelle quoy qu'elle leur apportast beaucoup d'incommo-
ditez, estoit aussi le moyen aux sentinelles de la garnison de la Citadelle d'entendre le bruit
que pouuoient faire leldits ingenieurs.

Dans ladite Citadelle il n'y auoit pour lors que cent hommes de garnison souz vn Lieut-
enant qui encore estoit malade cette nuit & incommodé de sa perlonne. Il estoit assez
habille homme & valeureux, Italien de nation, le reste de ladite garnison estans allez avec
ceux d'Anuers pour assister les conuois audit siege de Breda.

Ledit fleur Prince d'Orange donc commence à commander à ses ingenieurs & soldats
d'aller rompre la premiere porte de ladite Citadelle, faire des Ponts aux fosses & preparer
vne secrette escalade avec echelles, cordes & autres inuentions de guerre.

Pendant que ces Ingenieurs & autres Officiers de l'dits Hollandois vont commencer le
travail des ponts & opposer les engins & machines propres à rompre les portes premieres, le
Prince d'Orange s'approche de la place avec trois mille hommes de guerre partie Caualle-
rie, partie Infanterie, & seloge attendant que l'entreprise eust reussi entre la pallissade qui est
entre ledit l'Illo & la ville d'Anuers, ayant donné commandement au reste des garnisons de
Berghe sur Zoom & dudit l'Illo de se tenir prests à tout moment & d'auancer promptement
sitost qu'ils en auroient le signal.

Cette armee dudit Prince d'Orange estoit suivie d'un grand nombre de chariots & cha-
rettes chargees de viures & munitions pour ietter dans la place, afin de la munir estant prise,
& y asséurer leurs nouvelles garnisons, leldits chariots & bagages estoient couverts de grā-
des pieces de draps, sur tous lesquels & sur les couvertures estoient faconnez de grandes
Croix de Bourgogne, afin de tromper les Espagnols s'ils arriuoient là fortuitement, &
creussent que c'estoient de leurs gens.

Les susdits ingenieurs & ouuriers travaillerent avec tant de precipitation & tant de di-
ligence qu'en moins de rien, ils rompent la premiere porte de ladite Citadelle d'Anuers, &
se font chemin pour arriuer à la seconde muraille afin d'y dresser les eschelles pour y monter
& l'escalader, comme ils s'estoient proiettez, ils auoient ja dressé leurs Ponts dans le fossé
plein d'eau à fond de cuue, sans que les sentinelles de la Citadelle, qui estoient sur la murail-
le & dans les bastions eussent peu entendre ces ouuriers rompre cette porte, fors & excepté
vn soldat Espagnol, car la grande tempeste de vent qui regnoit alors & qui assurdissoit les
oreilles, empescha que les autres sentinelles ne peurent rien ouyr, cela aussi incommoda fort
les ennemis à dresser leurs Ponts & la cheute d'une eschelle par le vent sur les planches des-
dits Ponts fit parler ce soldat Espagnol, en sentinelle, qui montant sur la contrescarpe &
demandant *qui va là* par trois diuerses fois, au bout desquelles il tire son coup de mousquet
sur ceux qu'il oit fuir, dont il en blesse quelques vns, ce que firent aussi apres qu'il les eust
aduerris les autres sentinelles de la Citadelle qui estoient de ce costé là, & autres qui resueil-
lerent le Lieutenant de ladite Citadelle avec toute la garnison qui arriuerent tous sur les re-
parts, chargent les ennemis, qui avec la plus grande diligence qu'il se peut faire, se retire-
rent au grand galop droit à l'Illo & à Berghe sur Zoom avec le Prince d'Orange, maudis-
sant l'Espagnol qui auoit empesché l'escalade & auoit eu trop bonne ouye, ils n'eurent le
loisir d'emmener leurs chariots, & voyoit on comme retournans de dessus le bord du fossé
avec des rroupilles marquées de Corix de Bourgogne.

Aussi l'allarme se donne dans la ville d'Anuers, sortent quelque nombre de bourgeois
armez, qui avec les soldats de la Citadelle font quelque poursuite sans trouver que ceux qui
hastoient le bagage & les chariots pour les sauuer: leldites garnisons de la Citadelle emme-
nerent tout ce qu'ils trouuerent auoir esté delaisé des ennemis sur les lieux & qu'ils n'auoient
pas eu le temps d'emporter, comme chariots, Ponts, eschelles & mille sortes d'engins & de
machines qu'ils quittoient pour fuir & se sauuer plus promptement, & y demeura forte gar-
de le reste de la nuit tout autour de ladite Citadelle, dans les Tours, bastions, Gabiona-
des & boulevards.

Quant audit Espagnol, sentinelle de ladite Citadelle, qui estoit cause du vain effort des
ennemis, & qui les descouurit & donna l'allarme en ladite Citadelle.

Messieurs de la ville d'Anuers le voulurent conduire en la ville où ils le traicterent super-
bement, l'habillerent fort magnifiquement avec vn beau panache de Seigneur, & en cet e-
quipage l'enuoyerent à Bruxelles à la Serenissime Infante, où il fut recompensé amplement
de la bonne vigilance, & luy fit expedier ladite Serenissime Archiduchesse vn breuet pour la
premiere place de Capitaine qui vaqueroit.

Dans ladite ville d'Anuers les *Te Deum* & feux de ioyes furent faicts, tous loüans Dieu
d'auoir ainsi guaranty vne place de telle importance qu'estoit cette Citadelle d'Anuers, en
laquelle on fit entrer encore trois cens soldats pour accroistre la garnison, & mit on tous les
Canons sur les bastions & boulevards d'icelle.

Cette

Cette place est la plus importante de tout le Brabant & Flandre, & si elle eust esté surprise par les Hollandois, la ville d'Anvers & celle de Bruxelles, voire tous ces pays là, eussent esté en peu de iours occupez, & le Siege de Breda contraint de se lever.

Le Prince d'Orange ayant fait la retraicte honteuse de son dessein pour pensè sur ladite Citadelle d'Anvers, retourne en son armee, les soldats Hollandois & ses ingenieurs bien fachez d'avoir perdu leur peine & leur travail, sans profiter du succez qu'ils s'estoient promis, & auquel ils s'estoient preparez il y avoit ja long temps.

Le Marquis de Spinola qui reçoit cette heureuse nouvelle de ceste funeste entreprise faillie & manquee, en est grandement resiouy, & promet à ceux de Breda qu'ils n'auroient si bon marché de luy qu'auparavant, ceux dudit Breda ayant sçeu la faute de ladite surprise de la Citadelle d'Anvers en furent fort marris; car c'estoit leur esperance & attente de recenoir quelque soulagement par la prise de ladite Citadelle d'Anvers, qui eust bien attristé ledit Marquis & troublé ses affaires, il s'esperoient par là la leue du siege & de jouyr du repos qu'ils n'avoient peu trouver depuis l'establissement du Câp & du bloquemēt de la place. Plusieurs Gentils-hōmes François & enfans de bōnes & grandes familles, s'estoient entermez dās Breda, pour avoir l'hōneur à defēdre vne place d'une telle importāce, & y faire paroistre leur courage & valeur, suivāt le naturel de la natiō: mais leur esperance demeura sans effect en ce que ledit Marquis se resolut de tenir seulement Breda bloqué & assiegé, avec ses grandes trēchees & ses trēte huit forts, garnis de leurs redoutes & corps de garde, sans la battre ny attaquer avec le canō, quoy que deuant cette forte place, qui est l'une des plus fortes de l'Europe, il y aye fait amener près de cēt pieces d'artilleries, tāt de fōte que de fer, avec quātité innombrable de poudre & de munitions de guerre, tous lesquels canōs & artillerie sōt auourd'huy distribuez & divisez par autāt de quartiers qu'il y en a au Câp & par tout les trēte huit forts, dressees toutes en batterie, quand ledit Marquis cōmandera de dōner. Iustin de Nassau frere naturel du Prince d'Orāge, estoit Gouverneur en son nō du Chasteau de Breda, il le fut aussi pendāt le cōmencement du siege, mais incontinent apres il devint malade d'une grāde maladie de siebure laquelle l'allita avec tel excez & tāt de violēce, que finalement il mourut dans ledit Breda, & furent faictes ses funerailles avec beaucoup de ceremonies & d'honneur. Les Espagnols prirent courage sur la mort de ce Gouverneur qui estoit tres-grand Capitaine, fort courageux, grandemēt sage & de tres bō Cōseil, aussi toute la ville & la garnison en porta vn dueil extreme, pour ce que c'estoit luy qui y entretenoit l'ordre & la police entre les soldats: de telle sorte que les bbourgeois n'en recevoient pas grande incommodité, ny telle insolence des gens de guerre telle qu'ils ont receu du depuis, pressez qu'ils se voyent de la faim & de la necessitè de beaucoup de choses qui leur manque.

Il ne se sont pas faictes des sorties importantes durant tout ce siege qui dure encore, parce que nul n'oseroit paroistre au dehors, sur peine d'estre renvoyé promptement dedans par les Canonnades & mousquetades de l'armee Espagnolle, ceux qui l'ont entrepris en sont mal trouvez & a tousiours esté cette licence ainsi prise par les volontaires qui sont dedans, sans la volonte & le consentement dudit Iustin de Nassau pendant qu'il estoit de la ville & qu'il vivoit, aussi avoit il tres-expressement prohibé & deffendu toutes ces sorties inutiles que pour perdre des hommes, disant que telles façons de faire ne luy aubient jamais agreé.

Quantité de Gentils-hommes François sortirent dudit Breda pour se retirer, estans pris par les soldats Espagnols estoient menez au quartier du Marquis de Spinola, car il l'avoit commandé aux siens sur peine de la vie, & là il essayoit de les bien traicter, leur donner argent s'ils en avoient besuing, les laissoit retourner à la place s'ils le desiroient, ou bien les faisoit conduire iusques à la prochaine frontiere de France avec vne escorte, de chevaux des siens, mais il ne leur permettoit d'aller en l'armee du Prince d'Orange ny en Hollande, il les recevoit ainsi gracieusement cognoissans qu'ils s'estoient quelque peu enfermez dans Breda pendant le siege pour apprendre l'exercice de la guerre, & voir la disposition de ses armées campées, & la resolution des assiegez pour leur deffente, & ainsi les laissoit aller avec bons passe-ports signez de sa main, fort satisfaits du bon traictement dudit Marquis de Spinola.

Plusieurs autres des assiegez se sont évadez passans au travers les eaux des fossez en ayans iusques aux mammelles, & se refugioient ainsi de nuit & à la desrobée en l'armee du Prince d'Orange, pour s'exempter de la disette & de la necessitè qu'on souffre & endure là dedans cette ville de Breda.

Après que ledit Prince d'Orāge eust fait tout ce qu'il eust peu pour pouvoir dōner quelque secours d'hōmes & de viures aux assiegez de Breda, & que tout luy estoit reussi vaine-

ment & sans aucun succez, les sieurs des Estats d'Hollande avec lesquels il fut consulter de cet affaire à la Haye le Comte, se resolurent d'enuoyer des Ambassadeurs de toutes parts chez leurs amis, aliez & voisins pour obtenir quelque secours & assistance d'hommes & d'argent.

Ils somment le Roy Serenissime de la grand' Bretagne de la promesse qu'il leur auoit faicte de les assister de forces & de moyens capables de resister à leurs ennemis, selon la resolution derniere que sadite Majesté Serenissime en auoit prise avec les Estats d'Angleterre à la fin de la derniere assemblée du Parlement, ils luy représenterent que la leuee du Siege de Breda qui leur seroit facile à faire & cōtraindre le Marquis de Spinola à se retirer avec ses troupes, moyennant son secours d'Angleterre: qu'estant ledit Siege leué, & la Hollande garantie de l'apprehension qu'elle a de la perte de cette place qui les incommoderoit grandement, ils se disposeroient pour luy faire assistance & passer avec leurs troupes avec luy en Allemagne, afin de commencer la guerre pour la restitution du Palatinat contre ceux qui l'occupent à present, ce qui se pourroit commencer sur la saison du printemps prochain, toutes les incommoditez desdites Prouinces vnies des Pays-Bas, estans leuees & temperees, par ledit secours de ses armes.

En Frâce aussi les Ambassadeurs d'Hollande estans en Cour supplierent sa Majesté tres-Chrestienne, qu'en faueur des anciennes alliances, il luy pleust luy donner quelque assistance, toutefois ceste assistance n'a esté autrement faicte sinon que quelques Capitaines Hollandois ont leué quantité d'hommes qui se sont volontairement mis à leur solde, sans qu'ils fussent commandez n'y empeschez de personne pour y aller, ny pour n'y pas aller, afin de leuer toute sorte de ialousie à qui ce soit qui en voudroit prendre sur ce sujet.

Ils deputerent encore en Dannemarch sous le credit de sa Majesté Serenissime d'Angleterre, son parent & leur allié, comme encore vers quelques Princes d'Allemagne protestans, dont ils n'ont encore receu aucune assistance, de sorte que de tout ce qu'ils se promettent, c'est d'estre secourus d'Angleterre par l'armée que Mansfeld y leue.

Ces diuerses leuees ayans ainsi esté recherchées par les Hollandois en diuers pays chez leurs aliez, pour faire vne forte armée bastante pour contraindre le Marquis de Spinola de leuer le Siege de deuant Breda, par les courses & rauages qui s'y pourroient faire par les gés de guerre, & particulierement par ledit Mansfeld, fut cause que par le commandement aussi de l'Infante Archiduchesse Serenissime des Pays-Bas & par le Conseil du Roy d'Espagne assemblé à Bruxelles fut resolu, que par tous les pays & Prouinces possedez aujourdhuy par ledit Roy d'Espagne au Pays-Bas & par toutes les villes, & bourgades d'iceluy qui luy obeissent, de leuer encore quinze mille hommes de pied & trois mille cheuaux, vieux soldats tirez des garnisons des places, & de plus que chaque ville sans excepter aucune, tiendrait perpetuellement tant de nuit que de iour les armes prestes pour courir sus aux premiers ennemis qui entreroient audit pays, de sorte que les gés de guerre leuez pour l'Espagnol audit pays sans cōprendre les habitans des villes tous armez, il se compte iusques au nombre de plus de trente mille hommes de pied, & plus de huit mille cheuaux, qui pour viure & se reposer sōt dispersez par les villes, attendās l'occasion de prēdre les armes & de marcher: il y a aussi pour le mesme dessein de l'Espagnol six mil hommes de pied & 2000. cheuaux faisant partie de l'armée de Tilly, enuoyez par le Duc de Baviere dās le Duché de Luxembourg pour le secours des Espagnols en cas de necessité: de sorte que tāt de gens de guerre, tāt de places renforcees de garnisōs sur la frontiere par l'Espagnol, dōneroit iuste occasion aux Roys & Princes voisins d'armer & se tenir sur leurs gardes sur la ialousie de tant de forces leuees par le Roy d'Espagne audit Pays-Bas. Mais iusques icy il n'y a eu aucun trouble entre les deux partis, car la plupart des troupes sont rentrees en garnisō dās les places & forteresses desdits Pays. Pendant ledit Siege de Breda arriva à Bruxelles, Sigismōd Prince de Pologne & fils aîné du Roy de Pologne, lequel estoit suivy de quelque quarante Gentils-hommes des meilleures familles de toute la Pologne, d'assez bon nōbre d'officiers domestiques & quelques chariots de bagage. La Serenissime Archiduchesse des Pays-Bas estant aduertie de l'arriuee dudit Prince, cōmanda au Marquis de Spinola qui estoit deuant Breda d'enuoyer de sa part trois mille cheuaux de sa plus belle noblesse au deuant de luy, à quoy obeyssant ledit Marquis, fit choisir les plus apparens Gentils hommes de toute l'aristee, avec quelque nombre de Seigneurs & Capitaines du Cāp, qui furent le receuoir iusques à la ville de Maestrich, d'où ils le cōduirent biē assisté iusques à la ville de Bruxelles, où ladite Dame Serenissime Archiduchesse fit dōner ordre qu'il fust receu en cette dite ville, avec tout l'hōneur & magnificēce deuē à vn tant illustre Prince & fils d'vn tant puissant Roy, qui par sa grande valeur & tres admirable courage deffit il y a quatre ans passez cent quarante mille Turcs & Tartares de l'armée de quatre cēs mille hommes que Soldan

Soldan Solyman avoit amenee en la Podolie, laquelle il mit en déroute, ayant penetré avec soixante mille Cosaques Polonois jusques aux pavillons du grād Seigneur, qui fut cause qu'il se retira à Constantinople.

Ainsi donc que l'Archiduchesse Serenissime l'avoit ordonné ledit Seigneur Prince fit sō, entree dans Bruxelles, la Bourgeoisie armee, & ayant esté le recevoir hors la ville, avec vn equipage grandement pompeux: à l'entree il fut salué de tout le Canon & mousquetades de la ville, & conduit de là à l'hostel du Marquis de Spinola où il fut logé, seruy & traité aux fraiz & despens de ladite Dame Archiduchesse: il fut blessé à ladite entree d'un coup de balle tiré par vn habitant ignorant au maniemēt des armes, mais la playe fut aylée à guarir.

Cene furent que ballets, que festins, iouxtes, tournois, festes & banquets nompareils faicts audit Prince de Pologne par les plus grands Princes & Seigneurs du pays qui estoient expressement venus & arriuez du siege de Breda pour avoir l'honneur de le saluer, & de luy baiser humblement les mains, lesquels il reçut tous avec vne tres-grande humanité, douceur & affabilité extraordinaire ne pouuant parler autrement que Latin & Italien, dont il a esté entendu par lesdits Princes & Seigneurs du Pays-Bas & de la Cour de Bruxelles.

Pour acheuer donc le discours de son desir qu'il eust de voir le siege de Breda & le campement merueilleux du siege du Marquis de Spinola, il se mit donc en chemin de Bruxelles audit siege, suiuy de tous les Seigneurs & grands Capitaines qui luy estoient venus faire la Cour audit Bruxelles, où la Serenissime Archiduchesse fit vne prodigieuse despence, n'espargnant rien qui fut capable de recevoir vne grandeur recogneüe qu'elle n'y employast, comme estant alliee avec ledit Prince qui estoit fils de la sœur de l'Empereur allié par consequent de la maison d'Autriche & d'Espagne.

Estant arriué au Camp devant Breda, il fut magnifiquement receu par le Marquis de Spinola, qui enuoya au deuant de luy plus de six mille Caualliers, & luy mesme luy fut au rencontre avec tous les Chefs & Capitaines de son armee.

Là il ne fut iamais si estonné que lors qu'il veid cette grande & puissante armee dudict Marquis de Spinola, tenir cinq grandes lieues à l'entour de Breda, composée de quarante mille hommes, & prez de cent canons de batteries, toute laquelle milice, viuoit avec telle police & si bel ordre, qu'il n'y auoit parmy vn si grand nombre de gens de guerre aucune confusion ny desordre, nul ne s'aduanee ny ne sort de son quartier ou de son corps de garde, vne obeyssance si grande que c'estoit merueille de veoir l'assiette d'un tel Camp, enfermé dans des trenchées aussi fortes que la place, & de trente huit forts & redoutes que l'on ne peut auoir qu'avec canons & tres-grande puissance.

Après que ledit Seigneur Prince eust seiourné quelques iours audit siege, où il estoit logé avec ledit Marquis de Spinola en la maison de plaisance, scize à demie lieue de Breda, appartenante au Prince d'Orange, il s'en retourna à Bruxelles avec vne fort grande assistance presque de toute la Noblesse de l'armee, pendant quoy ceux de Breda firent vne sortie iusques aux prochains forts, & ayans ja commencé d'en attaquer quelques vns & gagné quelques trenchées, le Marquis retourna fort promptement, lequel surprit ceux qui ne furent assez habilles pour regagner assez tost la ville, & en demeura sur la place quantité de part & d'autre, mais des assiegez le plus du tiers de ceux qui estoient sortis furent tuez du canon & des mousquetades qui pleuuoient sur eux comme grelle.

Ledit Seigneur Prince de Pologne après auoir loué l'armée d'Espagne à ladite Dame Serenissime Archiduchesse, l'ayant tres-humblement remerciée de tant d'honneur qu'elle luy auoit fait faire par toutes les villes de son obeyssance, mais singulierement à Bruxelles, ayant enuoyé de ses Gentils hommes vers ladite Dame, pour la supplier de ne faire aucunes ceremonies ny preparatifs pour le recevoir, luy qui disoit ne venir veoir qu'à voyager pour auoir l'honneur de la saluer & admirer les guerres du Pays-Bas, se partit de Bruxelles avec ses hommes non sans estre suiuis de fort riches presens, & de là s'en est allé en Italie.

Le Duc de Neubourg a aussi esté receu à Madrid, qu'il se peut vanter n'auoir iamais rien veu de semblable à l'honneur que luy a rendu & luy a fait rendre sa Maiesté Catholique en pleine Cour.

L'Archiduc Charles frere de l'Empereur, Euesque de Preslau en Silesie & grād Maistre de l'ordre Teutonique en Allemagne, y a esté aussi fort bien receu, mais il est decedé audit Madrid au grand regret du Roy d'Espagne & de toute sa maison.

Ce Prince estoit fort altier de son humeur & courageux, grandement superbe: de sorte que par tout où il auoit passé en Italie par toutes les villes des Potentats & Republiques d'icelle, on estoit mal satisfait de son arrogance.

Acheuons de veoir ce qui se cōtinuē au siege de Breda, mais il faut auāt que arriue la fin de ce siege de Breda, que nous voyōs ceux qui cōmandent aux quartiers de l'armee, & cōmēt

. H h h ij

ils se sont campez & fortifiez, puis nous parlerons de l'incommodité du Camp, à cause de la saison pluvieuse.

Le vous diray donc que l'on a travaillé à faire des forts & redouttes, afin d'oster l'entree & sortie de Breda, premierement le Maistre de Camp Paulo Baghiony avec six mille hommes de pied & mil cheuaux, alla prendre le Peiesto de Gerheiden, où il s'est fortifié & rendu Maistre de certaines escluses, pour noyer le Pays en cas de besoin pour rendre ce Peiesto tant plus fort.

En apres le Comte Iean de Nassau alla prendre vne maison appartenant au pere du Conseiller Montens, & y fit quelques redouttes, entre ces quartiers de Ietringen.

Le Baron de Balanzon s'en alla fortifier audit Ietringen.

Le Prince de Brabant fortifia aussi vne petite Chappelle en deca Ietringen: de sorte que de là à Ginneken iusques audit Iettrheyden, le tout est serré de redouttes & forts, & par la situation du pays qui est plein de fossés & de hayes, grandes troupes ne peuuent entrer en Breda, ny aucuns chariots ny charrettes, où il faut qu'ils forcent les forts ou redouttes faicts sur les chemins.

Le Marquis de Campolatarra a faict des forts & redouttes allant de Ginneken à Hage, iusques au ruisseau qui va de Sundert à Breda, & le Comte d'Isenbourg en a faict aussi avec des redouttes au delà ledict ruisseau vers Hage, où il a faict encore vn fort entre ledict Hage & Breda à vn traict de canon avec intention de le continuer, iusques à se donner la main avec ledit Baghiony, qui a mis vn pont sur la riuere qui va dudict Breda vers la mer.

Le sieur Maistre de Camp Dom Francisco de Medina partit de Gilze de nuict auparauant l'armee, & alla prendre vn Moulin à eau, entre Ginneken & Breda, aduenue principale des Hollandois vers l'armee du Marquis, & l'a bien fortifié. Voyla tout ce qui s'est passé iusques à maintenant, n'ayans faict ceux de dedans aucunes sorties, ny les François volontaires qui y sont, ne desirant le Gouverneur ces façons de faire.

Les fours sont faicts au Camp pour cuire le pain à suffisance pour toute l'armee, les brasseries y sont dressées pour auoir plus grande quantité de biere.

Il est encore à remarquer que l'Infante Serenissime ayant esté aduertie du dessein que l'ordisoit auoir les Princes & Estats estrangers voisins de faire entrer des armées entieres dans les Prouinces, pour par vn rauage general contraindre le Marquis de Spinola à leuer le siege de Breda, pour defendre le pays, & s'opposer ausdites armées que les Hollandois faisoient venir particulièrement d'Angleterre, sous la conduite de Mansfeld accoustumé de longue-main à tels rauages.

Pour ce subiect ladite Dame Archiduchesse, fit publier le mesme Edict & Ordonnance, qui se fit esdits Pays-Bas, dès le temps de l'Empereur Charles cinquieme, sçauoir que les habitans du plat pays fourniroient & entretiendroient à leurs despens, chaque communauté de villages quatre hommes, & les villes vne certaine quantité d'hommes & de cheuaux à leurs despens, & chaque bourgeois deuoit tenir ses armes prestes pour se deffendre & garder sa ville.

Ce qui a esté excuté par toutes les Prouinces obeyssantes au Roy d'Espagne, où tous les laboureurs & autres habitans de la campagne ont tout transporté leurs biens meubles, grains & provisions dans lesdites villes & forteresses dudit pays, & ne se trouue auourd'huy au plat pays aucune chose à prendre & piller, si ce n'est que leurs ennemis ne se mettent à brasser; mais ils y sont attendus avec si bonne affection, par plus de vingt cinq mille homes, tous soldats du pays, qu'ils se verront auoir de la peine de s'espandre dans lesdites Prouinces, ils attendent singulierement Mansfeld, qu'ils promettent traicter en reuâche du rauage qu'il fit avec ses coureurs & pillards il y a trois ans dans les Pays-Bas, en luy empeschant tous les passages qu'il pourroit prendre pour y entrer: tant il y est hay, & mesprisé, & n'y a homme qui ne hazarde sa vie dans tout le pays pour le défaire, & ce sans comprendre l'armee que le Marquis de Spinola tient deuant Breda, qui ne doit bouger, quoy que le pays fut plein de secours pour les Hollandois, & se vantent qu'ils seront secourus en ceste necessité des troupes de Tilly, qui sont assez puissantes & proches des Prouinces du Roy d'Espagne, sans qu'ils ayent besoin de tirer des troupes dudit Camp: on ne sçauoit pas iuger quels seront les euemens de cette guerre, & pource c'est chose mal asseurée, que de se donner la victoire auant que les armées se voyent, & que elles en viennent aux mains les vnes avec les autres.

L'Infante Serenissime voyant la mauuaise saison d'un hyuer pluvieux, ayant eu aduis de la quantité grande des eaux qui incommodent grandement l'armee du Roy d'Espagne deuant Breda, estant vn plat pays subiect à tels marescages d'eaux, de telle sorte que les soldats estans en l'eau iusques à la my-jambe, inondez, necessiteux & tellement trauallez de maladies & de famine, que plus de dix mille y sont morts depuis le siege sans coup ferir, c'est pourquoy ladite Dame Serenissime ayant compassion d'une si grande misere que souff-

eroient les soldats; elle fut esmeüe d'une telle commiseration qu'elle commanda que l'on fît faire à ses propres fraiz & despens quinze mille paires de bottes, qui seroient enuoyees à l'armée pour estre distribuees aux pauvres soldats, qui estoient flottant iusques au genouil dans les eaux, les Ponts & Pontons que le Marquis de Spinola y ait fait jetter dessus n'empeschent pourtant pas ceste incommodité.

Ladite Serenissime Infante voulant encore leur donner courage, y fit aussi conduire une tres-grande quantité de ronneaux de bieres pris à Bruxelles, Anvers, Malines, Louvain & Bosseduc, avec plusieurs sortes de viures, outre & par dessus les convois ordinaires qui s'y conduisent avec douze mille hommes d'assistance.

Le Prince d'Orange ces iours passez voyant que tous ces secours promis sont longs à venir, particulièrement le grand corps d'armée qu'il devoit y faire passer d'Angleterre, Mansfeld, se resolut à un dernier effect qui fut de faire remonter l'eau des escluses & des rivières sur le Camp du Marquis de Spinola, ce qu'il projecta de faire sur le renouveau de la lune de Ianvier dernier, mais il luy fut impossible de faire réussir ce dessein, car il ne peut faire monter l'eau iusques à Breda, pour estre le pais plus haut que la Hollande.

Quant à ceux qui sont enfermez dedans Breda la necessité commence à les presser fort puissamment particulièrement des bieres, du sel & du vin, & le Gouverneur de la place qui y commande n'est pas resolu de si perdre & de voir les siens se consumer par tant de necessité, s'il ne leur arrive quelque secours & convois: ce qui est estrangement mal-aisé de faire en ces Prouinces, où les eaux sont excessiuement grandes par le débord des rivières, de sorte qu'ils n'y peuvent aller qu'avec des tres-grandes incommoditez aux Cavaliers, ny Infanterie, & iamaïs ne veid-on telle opiniaïstreté & si grande resistance parmy tant de maux & de difficultez que les uns & les autres endurent pour la defence de leur party, sans en venir aux mains, ny tirer les uns sur les autres aucunes mousquetades ny canonades, ce qui fait iuger toutesfois par les plus iudicieux que la saison de dits pluyes continuans, le siege de Breda ne peut pas encore subsister un mois entier sans quitter la partie de part ou d'autre ou sortir de là par accord, traité & composition, à quoy chacun de son costé taschera à condescendre le plus tard qu'il leur sera possible, parce qu'il y va beaucoup de la gloire, tant du Marquis Spinola que pour les assiegez & de l'avantage tant pour les Espagnols, que pour le salut & la conservation du bien & repos des Estats generaux des Prouinces unies des Pays-Bas.

Le temps & la saison nous feront veoir l'issüe de ce siege en peu de semaines, Dieu veille que ce soit pour le profit & utilité de la Chrestienté, & non à la ruine d'aucun.

Et pource que ie n'ay parlé cy devant de la situation de ladicte ville de Breda, & de sa prise sur l'Espagnol, & des sieges qu'elle a soustenus autrefois, & pource ie diray en ce lieu ce que l'histoire en remarque avec les fortifications d'icelle.

La ville de Breda est scituée au pays de Kempen, loin d'Anvers de 8. lieües, 6. de Bergues sur le Zoom, & deux de Gertrudenbergue, en une campagne abondante en bleds, ayant les champs & prairies entourees d'arbres, & le pays fort bocagerux.

Elle est embellie de deux rivières, la principale desquelles est appelée la Merck. C'est une belle & plaisante ville, dans laquelle il y a plusieurs belles demeures & maisons de Gentils-hommes, & une fort belle Eglise au costé du Nort, en laquelle, les Comtes de Nassau ont fait bastir une belle Chappelle, il y a aussi une fort magnifique sepulture du Prince René de Chalons: Au dessous en une caue sont les tombeaux des anciens Seigneurs de Breda. Entre toutes les belles maisons, on voit le magnifique Palais des Barons & Seigneurs de ceste place, lequel fit bastir le Comte Henry de Nassau oncle de Guillaume de Nassau Prince d'Orange.

Ce Palais est basti en forme d'un Chasteau, environné de doubles fossez remplis d'eau. Il y a aussi un fort beau Arsenac remply de toutes sortes d'armes, & de beaucoup d'artillerie. La ville durant ces guerres a esté fortifiée de Boulevarts, Ravelins, & d'ouvrages de cornes; de sorte qu'à present on la tient pour une des plus fortes villes frontieres des pays unis.

La Baronnie d'icelle s'estend fort loing, & est de grand reuenu, ayant sous soy les Seigneuries de Steenbergue, Rosendal, & Oosterhouldt, qui luy sont annexees.

Breda est la capitale ville de ladite Baronnie ayant entre autres preeminences & iurisdiction une Cour Fiscale, & un siege, lequel est commun & indiuïs sous ceste Cour ressortent par appel la ville de Steenbergue, & les 16. villages du pays de Breda; & outre ladite Cour il y a un siege Escheuinal, devant lequel il faut que les Bourgeois & les habitans comparoissent à la premiere instance.

L'an mil cinq cens nonante le Comte Philippes de Nassau parla de la part du Prince Maurice à un certain gentil-homme de Cambray appelé Charles d'Heraguieres, touchant

H h h iij

une certaine entreprise que le Prince auoit sur le Chasteau, & la ville de Breda, par le moyen de certains mariniers qui estoient accoutumez à mener des tourbes & du bois audit Chasteau de Breda.

Ledit Herauguieres s'estant pourueu de toutes choses necessaires, resout à ce vn certain Adrian de Bergue, qui estoit accoustumé de liurer des tourbes audit Chasteau d'entreprendre le fait, Herauguieres donc & Adrian ayans accommodé vn batteau capable de septante soldats, & ayant mis tout autour & dessus le batteau des tourbes à fin de cacher les soldats, resolurent d'executer l'entreprise le vingt cinquieme Feurier de ladite annee: mais la gelee les empescha pour quelques iours non sans grand danger d'estre descouverts. Puis apres le troisieme iour de May apres midy, l'eau estant montee, l'ecluse du Chasteau estant ouuerte ils firent entrer le batteau, lequel s'estant bien deschargé des tourbes qui estoient là dedans, sur les vnze heures de nuict Herauguieres fit sortir ses gens, & estant assisté par l'ayde du Capitaine Lambert, & Capitaine Jean de Fernes, nonobstant la grande resistance que firent les gens au dedans, à la fin gagna le Chasteau, incontinent apres la prise arriua le Prince Maurice, & s'assuiettit ainsi la ville.

L'an mil six cés nonante neuf le Seigneur Grobbendonck gouverneur de Bosseduc fit vne entreprise sur la ville de Breda traittant avec de la Roche, simulant de vouloir faire entrer ledit Grobbendonck avec ses gens pour la somme de 2000. escus, qui à ceste fin estoit venu le dix septiesme de Feurier la nuict deuant la porte avec 4000. hommes de pied & 11. cornettes de Caualerie, mais ceux de la ville estans aduertis de tout par ledit de la Roche, auoient ouuert vne porte pour attraper leurs ennemis, & les amener ainsi dans le trébuchet. Toutesfois contre la resolution du Gouverneur & de son Conseil pour certaines raisons fut tiré sur les ennemis, lesquels nonobstant ne laisserent pas d'approcher de la ville avec grand courage qui les contraignit de leuer le pont-leuis, parquoy ils furent contraints de se retirer d'où ils estoient venus, laissant enuiron cent hommes.



DISCOVRS



DISCOVRS
DE L'ESTAT DE L'EMPIRE
D'ALLEMAGNE.

SOMMAIRE.

1. **D**E la grandeur & estendue de l'ancien Empire des Romains, son declin & affoiblissement notable par les guerres civiles, par le transport du siege de Rome à Constantinople, en troisieme lieu par le partage qu'en fit l'Empereur Constantin à ses enfans, les diuisant en trois parties.
2. Diuision de l'Empire d'Orient & d'Occident, & quel en fut le partage au siecle de Charlemagne.
3. Qualité d'Allemagne: sous quel climat elle est située, air fascheux, & son dur Hyuer, abondance en toute sorte de bleds & legumes, mines d'or, d'argent, cuivre, fer, & plomb, fontaines & mines de sel, vignes, saffran, sapins, &c.
4. Remarque particuliere des choses que chaque Prouince d'Allemagne porte & produit, & premierement de l'Alsace, abondante en froment, vins & pasturages.
5. Allemands pourquoy appelez anciennement Germains, n'ayans l'usage de l'or, de l'argent, ny de l'espec. Quelles estoient leurs armes & façons de combattre.
6. Election de leurs Roys, comment se faisoit avec celle des Chefs & Capitaines d'armees.
7. Femmes martiales d'Allemagne, & fort courageuses: leurs sacrifices d'hommes à Mercure: observation de la nouvelle Lune en leurs entreprises: leurs assemblees en armes: leurs exercices hors le temps de la guerre: leurs assemblees en temps de paix: leurs habillemens: Chasteté de leurs femmes: leurs bāquets & festins, où se traitent les affaires de paix & de guerre: leur armee partie en trois saisons: exercice de leur ieunesse aux armes.
8. Remarque particuliere des mœurs de quelques peuples de Germanie.
9. Des Saxons diuisez en quatre Estats addonnez à la superstition des Idoles, au culte & adoration des arbres, fontaines & forests, de l'art de deuiner, dont ils se seruoient.
10. Façons de viure, & loix de Saxe en Saxe.
11. De ceux de Baviere.
12. Allemands d'apresent diuisez en quatre Estats, & quels sont leurs mœurs en general, leurs façons de viure, d'habits, & exercices.
13. Particularitez de chaque Prouince en leurs loix & pour leur maniere de viure, vestemens, naturel de corps & d'esprit.
14. Richesses d'Allemagne en mines d'argent, & autres metaux, fontaines & puits d'eaux salces, trafics & ouvrages de diuers arts: foires de Francfort: reuenus des villes & Princes seculiers.
15. Du reuenue de l'Empereur.
16. Quelles forces les Empereurs Charles V. & Maximilian II. ont tiré d'Allemagne, lors qu'ils ont armé contre le Turc.
17. Nombre de soldats que l'Empire peut leuer.
18. De la caualerie & infanterie Allemande.
19. Ses forces maritimes.
20. De deux choses qui manquent à l'Empire.
21. Quand & par qui l'Empire hereditaire a esté fait electif.
22. Les trois membres de l'Empire dont les 7. Electeurs font le premier.
23. Du second nombre des Grands & des Nobles.
24. Du troisieme membre de l'Empire composé de villes franches.
25. Des Conseils des Cercles, & à quoy instituez.
26. De l'institution de la Chambre Imperiale de Spire.
27. Des charges & dignitez de l'Empire reduictes au nombre de quatre.
28. Quelles sont les seances aux Diettes, & de l'ordre gardé es processions publiques.
29. Des trois Conseils qui se trouuent aux Diettes, & de quelles personnes sont composez.
30. De la Religion diuersa des Allemands, du com-

commencement & progres de l'heresie Lutherienne, Zuinglienne, & autres : & de l'estat auquel elle est maintenant, & quelle Religion tiennent

les sept Metropolitains.
31. Liste & Catalogue des Empereurs d'Occident, leur vie, regne & mort.

1.



L'EMPIRE Romain, qui s'estendoit sous Trajan depuis la mer d'Espagne, iusques par delà le Tygre, & de l'Ocean Atlantique iusques au golfe de Perse, & depuis le mont d'Atlas iusques à la forest Caledoine, & touchoit la riuere d'Elbis, & passoit la Danoüe, commença à decliner, premierement par le moyen des guerres ciuiles de Galbe, d'Othon, & de Vitellius, au tēps desquels l'armee qui estoit en la grande Bretagne passa en terre ferme, & Hollande, & les pays voisins se reuolterent, & en peu temps les frontieres etraus despourueues de gens de guerre, les Sarmates passerent la Danoüe, & les Alains les portes Calpies: les Persans acquerirent de la puissance, & de la reputation, & les Gots coururent la Misie & la Macedoine, & les François entrerent en Gaule.

Constantin remit apres l'Empire en son ancienne splendeur, pource qu'il esteignit les guerres domestiques, & les tyrans, brida les Barbares, & fit arrester & demeurer en repos les nations ennemies du nom Romain. Toutesfois il fit les deux choses qui affoiblirent en partie ceste Monarchie.

L'une fut qu'il transporta le siege de l'Empire de Rome à Constantinople, au moyen de quoy il desinua la ville de Rome, & affoiblit l'Empire; pource que c'est chose toute claire, que de mesme que les plantes transportees en des terres fort differentes de climat & de qualité, retiennent bien peu de leur vertu naturelle, aussi les choses humaines, & particulièrement les Seigneurs perdent beaucoup de leurs forces avec les grands changements.

Ce fut le sujet qui conuia le Senat Romain à ne consentir iamais que le peuple laissast la ville de Rome pour celle des Veies, qui estoit beaucoup plus belle & plus commode, principalement apres que Rome eust esté ruinee par les Gaulois.

L'autre chose fut, qu'il diuisa l'Empire en trois parties pour le distribuer à ses enfans: ce qui aduint l'an de grace 341. tellement que d'un grand & puissant Estat, il en fit presque trois avec vne remarquable diminution de l'autorité & des forces, & ses fils estans venus à s'entreprendre la guerre, se consumerent tellement l'un l'autre, que l'Empire en demeura presque comme vn corps priué de sang: & combien qu'il se reünit quelquefois sous vn Prince, toutefois il fut des lors si facile à se laisser emporter aux diuisions, qu'on le vit bien souuent partagé en deux: si bien que l'Orient eut vn Empereur, & l'Occident vn autre, iusqu'à tāt que Odoacre Roy des Herules estant venu en Italie avec vne grande armee contraignit Auguste de quitter par desesperoir l'Empire d'Occident, ce qui aduint en l'an de grace 466. pource que les Huns auoient desia passé le Danube.

Alaric Roy des Vandales auoit pris Rome, & les mesmes Vandales auoient pris Rome, & les mesmes Vandales auoient occupé premierement l'Andalusie, puis l'Afrique, & les Alains le Portugal, les Gots la plus grande partie de l'Espagne, les Anglois la grande Bretagne, les Bourguignons la Prouence, les Francons la Gaule, & les Huns la Pannonie, auourd'huy Hongrie.

L'Empereur Iustinian soustint vn peu cet Estat, venant que par le moyen de ses Capitaines, il chassa les Vandales d'Afrique, & les Goths d'Italie l'an cinq cens cinquante-six, mais cela dura bien peu, pource qu'en l'annee 613. les armes & la secte de Mahomet commencerent à trauailler tous les deux Empires, qui demeurerent en peu de temps oppressez par les Sarrazins, lors qu'ils se rendirent presque entierement maistres d'un costé de la Syrie, de l'Egypte, & de l'Archipelague, & de l'autre de l'Afrique, de la Sicile, & de l'Espagne, qu'en l'an 735. ils se saisièrent encor de Narbonne, d'Auignon de Tolose, & des pays voisins.

De sorte que peu à peu l'Empire d'Occident fut ruiné tout à fait, & celui du Leuant demeura si foible, que la ville de Constantinople peust à grande peine se deffendre contre les Mahometans, tant s'en falloir qu'elle peust donner secours à ceux du Ponant. Ce que Leon 3. ayant bien consideré (outre que les Empereurs Grecs fomentoient l'impieté & les heresies) resolut de donner l'Empire d'Occident au grand Charles Roy de France, ce qui aduint l'an de salut 800.

2.

L'Empire d'Occident fut donc diuisé de celui d'Orient, en telle sorte que les Grecs eurent pour leur part depuis Naples, & depuis Siponte en tirant vers le Leuant avec la Sicile; Beneuent resta aux Lombards; les Venitiens comme neutres, demeurerent libres, & le reste fut à Charles le grand, ou Charlemagne.

Blonde dit que ceste diuision fut premerement approuuee par l'Imperatrice Irene, puis confirmee par l'Empereur Nicephore.

On

On dit que par ce moyen le Pape Leon transporta l'Empire aux Allemans, pource que Charles estoit Alleman de sang & d'origine, de mesme que tous les Francs qui vindrent en Gaule estoient de Franconie province d'Allemagne.

L'Empire demeura donc par ce moyen diuisé, en telle sorte qu'il n'a iamais peu estre vny depuis, combien qu'Emanuel Comnene ayant seul la priuation de Federic premier, fit de grands offres au Pape Alexandre troisieme. Tellement que ceste desvnyon commença par le transport du siege Imperial de Rome à Constantinople, & arriua à son comble en la creation de Charlemagne, qui demeura possesseur de ce qui luy auoit esté assigné par le Pape.

Depuis l'Empire fut reduit à l'estroit, tellement qu'il n'auoit que l'Allemagne & vne partie d'Italie, pource que le Pape iouïssoit paisiblement en Italie de beaucoup de pays, & les Venitiens qui estoient presqu'entre les deux Empires viuoient avec vne liberté absolue, avec tout leur Estat, sans dependre d'aucun, & les Royaumes de Naples, & de Sicile, que les Normans auoient ostez aux Grecs, estoient deuenus siefs de l'Eglise, premierement sous l'Antipape Clement, puis sous Nicolas II. & ses successeurs, qui approuuerent en cela pour le bien public ce que l'Antipape auoit fait & la Lombardie, & la Toscane en partie par la felonnie de Henry 4. & de Federic 1. & 2. Empereurs à l'endroit des Papes qui en partie, à cause de la mutine humeur des peuples, donnerent tousiours plus de peine, & de despesne aux Empereurs, qu'elles ne leur en apportèrent d'aide, ou de profit.

C'est pourquoy Rodolfe non seulement ne se soucia d'aller en Italie (à cause que les aduersitez & les desastres de ses predecesseurs l'estonnoient) mais encor vendit la liberté aux peuples qui la voulurent achepter, à fort bon marché: car elle ne cousta pas plus que dix mille escus aux Luquois, ny plus de six mille aux Florentins.

Ainsi la force manquant en Italie à l'Empire avec la reputatiõ, il ne luy resta presque autre chose que le nom, & les Vicomtes à Milan, & quelques autres ailleurs, s'emparerent de tout ce qu'ils peurent, sans porter autre honneur à l'Empereur que de luy demander l'investiture. Mesme François Sforce ayant conquis l'estat de Milan avec les armes, ne se soucia d'en obtenir l'investiture, estimant qu'il se pourroit maintenir en possession de cét Estat par les mesmes moyens qu'il l'auoit acquis. Pour conclusion, l'Empire est auourd'huy entierement reduit à l'Allemagne, & mesme en beaucoup de lieux l'autorité de l'Empereur est comme aneantie.

Q U A L I T É.

L'Allemagne est sous le sixiesme, septiesme, & huietieme climat, entre le quarante-sept, & cinquante-cinq degré de hauteur, & le vingt-quatre, & quarante-six de longueur. Le plus grand iour d'Esté au parallele du costé du Su est de quinze heures & demie, & du costé du plus proche du Nort de dix-sept & vn quart.

Or combien que Corneille Tacite escriue que l'air y est fascheux, & Seneque que l'Hyuer y dure tousiours, toutesfois elle iouït d'un air assez doux & temperé, qui est vn peu froid, mais qui aide à la santé & à la force.

La terre y porte du froment, de l'orge, du seigle, du millet, de l'anoine, & toute sorte de bleds, & de legumes en abondance. Les champs sont fertils, & les prairies y produisent grande quantité d'herbe.

Il ya aussi en Allemagne plusieurs mines d'argent, de cuyure, de fer de plomb, & d'autres metaux: & mesme il y a de l'or en quelques endroits.

Il ya aussi de fort bonnes fontaines, & mines de sel. Pline a dit qu'en l'ancienne Germanie on trouuoit du crystal, des onyces, des topazes, & autres pierreries.

Il ya aussi force beaux iardins & vergers, dont la venue est merueilleusement agreable en Esté, & en Automne.

On a tellement cultiué ce pays qu'il y a mesme bien peu de reste de la forest Hercynie, combien qu'elle continst soixante iournees de chemin, & il n'y a que la forest noire, celle d'Othon, & celle de Boheme, dont on ne se sert que bien peu. Toutesfois elles ne sont pas si espouventables qu'au temps passé, ains sont pleines de villages, & de monasteres.

Il ya aussi grande quantité de vignes, principalement vis à vis de la forest noire, du long du Rhin; de mesme que du long du riuage du Neccar, & du Mein. Mais du costé qu'elle confine avec la haute Pannonie, non seulement elle porte d'excellent vin, mais encore du saffran, qui est bon au possible.

On y void aussi grande quantité d'arbres qui portent fruits, mais elle est moins fertile du costé qu'elle s'estend vers la mer, & la Vistule; & toutesfois elles portent en ces lieux-là du froment en abondance.

Au reste la haute Allemagne a peu de marescages, & de montagnes fascheuses, veu que celles qui y sont se trouuent fort fertiles, & meisme les Alpes dont le sommet est tousiours couuert de neiges, ont à leur pied de tresbons pasturages.

Les montagnes de la forest noire portent forces sapins, dont l'on tire grande quatité de poix; & meisme les bornes de ces montagnes produisent de fort bons vins. Ceste Prouince ne nourrit point de vers à soye, & ne produisent nuls oliuiers.

Mais venons aux particularitez de chaque Prouince, apres auoir consideré generalement toute l'Allemagne.

4. L'Alle produit du froment en abondance, & principalement en la plaine, où il y a aussi de tresbons fructs. Les montagnes & les collines portent de bons vins, & les pasturages sont aussi extremement bons aux montagnes & aux vallees.

Le terroir de Vvittemberg est en partie aspre, & ne peut produire du vin, mais a d'excellents pasturages, & en partie est pierreux, & plein de sable, mais propre à porter des fructs: & il est aussi en partie champestre, & plus propre à l'agriculture. Il y a aussi des riuieres peuplées de poisson, de meisme que des lacs, & des estangs.

La Franconie est en partie plaine, & en partie est bossée de quelques collines. Et quoy que son terroir ne soit pas gras en quelques endroits, ains plein de sable, toutesfois il porte assez de froment & des legumes, comme aussi des oignons, & des raues plus grandes qu'aucune autre Prouince, de meisme que des choux pommez.

Le pays est aussi couuert d'Arbres fructiers, & il y a pareillement force prairies, qui nourrissent grande quantité de bestail de toutes sortes: & en plusieurs lieux on void de fort bonnes vignes, principalement pres de Vvirtzburg. Il y a plusieurs forests, où l'on trouue force chasse. Pres de Bamberg, on trouue grande quantité de reglisse.

La Suaube est partie plaine, & partie montueuse. Mais elle est fertile, & bien cultiuee par tout, sinon aux lieux où il y a des lacs, des forests, ou des montagnes.

Il y a grande quantité de chasse, & force gibier, du froment en abondance, & grand nombre de bestail. On y void aussi force riuieres qui viennent de tous costez se ietter dedans le Rhin. Tout le pays est au reste bien sain, & l'on trouue aux montagnes, & à l'entour du fer, de l'argent, & d'autres metaux.

La Boheme abonde en orge, & en froment: mais elle manque d'oliuiers, & a fort peu de vignes, qui ne produisent meisme guiere, à cause du vent du Nort, auquel elle est entieremēt exposée, qui laisse fort rarement meurir le raisin. Elle produit force safran, dont la couleur, le suc, & l'odeur est fort agreable. Elle abonde tellement en argent qu'on ne void presque rien que de l'argent aux veines qu'on y trouue.

Ses mines sont au terroir de Cronlauu, & pareillement en ceux de Bud veifz, & Kurtéberg. On tire aussi de tresbon or de quelques pays, & on y trouue aussi de l'estain, du plomb, du cuiure & du fer, dont ce pays abonde. Mais il y a principalement de fort bonnes mines de fer pres de la ville de Beram. On y trouue aussi des escarboucles, & des amethystes.

La Morauie a la plus part de son terroir gras, & par consequent propre à porter des bleds, & les collines y sont pareillement propres pour la vigne, dont ceste terre n'est pas ennemie, comme celle de Boheme. Tout y est cultiué, & si remply de gens qui s'adonnent à travailler en la terre, qu'on n'y a presque laissé aucun lieu pour faire paistre le bestail.

Iean Dubrauen escrit qu'on y trouue de l'encens, & de la myrrhe, non qui tombe de quelque arbre, mais qui est tirée de la terre, & l'on en trouue seulement en vn lieu qu'on nomme Gradisque.

Le haut pays de Bauiere est presque tout plein de montagnes, & de forests, arrosé de lacs & de riuieres rapides, & pour ceste cause propre au pasturage, & porter des arbres fructiers, qui produisent du fruct en abondance. Mais aux lieux de campagne elles portent assez de froment.

La basse abonde en froment, bestail, poissons, oyseaux, bestes sauvages, & autres choses necessaires à la vie humaine. Ce pays aussi nourrit grand nombre de porcs par le moyen de ses glands, & de ses pommes sauvages. Il y a aussi en ce pays force fontaines de sel, mais il a pour la pluspart faute de vin. On y trouue aussi grande quantité de cuyure & de fer.

Le pays d'Austriche est plain, & exposé aux vents du Nort. Il produit assez de froment, de vin, & d'autres fructs. L'air y est fort sain. On y trouue de l'argent en abondance.

Quant à la Comte de Tirol elle abonde en mines d'argent, d'airain, & de leton. Les montagnes de ceste contree sont fort hautes, tousiours couuertes de neiges, & abondent en bestes sauvages.

Pour le regard de la Styrie, c'est vn pays tout montueux. excepté du costé du Leuant, où l'on void de belles plaines. Il y a de belles mines de fer & d'argent.

La

La Carinthie a des vallées & des Collines qui produisent force bled. Il y a aussi grand nombre de lacs & de rivières.

La Vestphalie est plus propre à nourrir le bestail, qu'à porter du bled. Il y a des forêts en quelques endroits. Le terroir est mal propre pour la vigne: mais il y vient divers fruits, comme des pommes, de noix, & des glands, dont ils nourrissent grande quantité de porcs. Il y a aussi force métaux au terroir de Cologne.

La Duché de Cleves jouit d'un air doux & temperé, & son terroir produit du froment en assez grande quantité. Il y a de bons pasturages, & assez bon nombre de rivières qui l'arrosent.

Quant aux pays de Juliers il produit du froment en abondance, & une herbe de laquelle les teinturiers usent. Il y a plusieurs animaux domestiques, principalement de fort bons chevaux.

Le pays de Hesse porte en abondance toutes choses nécessaires à la vie de l'homme, fors du vin, dont toutefois il n'est entièrement dépourvu, veu que auprès du Rhin il en produit.

Il y a du bestail en grand nombre. Le terroir de Vvaldech particulièrement porte beaucoup de bled & de vin, est arrosé de plusieurs rivières, & riche d'une grande quantité de mines, d'où l'on tire de l'or, de l'argent, du cuivre, du vis-argent, du fer, du plomb, du sel, & de l'alum.

La Turinge produit du bled en assez grande quantité, & une herbe que les Latins nomment *Isatide*, & nous de la guesde, qui sert aux teintures.

En Saxe on trouve grande quantité de métaux, & l'on y voit plusieurs belles rivières qui portent du poisson à foison, & outre ce de grandes commoditez aux habitans.

En la Comté de Mansfeld on trouve force métaux, & des cailloux aisez à briser, qui estans eschauffez rendent du cuivre avec une assez grande quantité d'argent. Il y a aussi en ce pays un lac salé, dans lequel si les pêcheurs jettent leurs filez trop avant, ils se brûlent de même que s'ils estoient mis au feu.

La Lusace porte du froment, & d'autre sorte de bleds en abondance: de même que la Silésie, qui a aussi grand nombre de réservoirs à poisson.

La Misne produit aussi quantité de froment, de vin, de miel, & nourrit force bestail. On trouve aussi en ce pays des mines d'or.

Le pays du Liege est beau & fertile au possible, & a plusieurs belles rivières pleines de poisson, & pareillement de belles forêts où l'on trouve force bestes sauvages, comme aussi des montagnes & des vallées, qui portent quantité de vins & de fruits. Il y a aussi des mines de fer, & de charbons, qu'ils nomment *Lilanthraces*. On y trouve semblablement beaucoup de salpêtre, & de fort bonnes eaux, propres à guérir diverses maladies, entre lesquelles est celle de Tongres, dont Plin, & quelques autres font mention.

Quant au pays de Treves il est inégal, veu qu'en quelques endroits il a des montagnes abruptes & stériles, & ne porte que de l'avoine, & en quelques autres il a des montagnes verdoyantes & fertiles, & qui produisent principalement du vin. Il porte encore beaucoup plus du côté du Rhin, & de la Moselle.

Au reste elle est arrosée presque par tout de rivières, de torrens, & de petits ruisseaux qui viennent à se mêler avec la Moselle, & de là se déchargent dans le Rhin. Ceste grande quantité d'eaux fait que les habitans sont pourvus abondamment de poisson.

Les forêts de ceste cötée sont pleines de sauvagines: il y a en ce pays deux lacs d'une profondeur admirable, à sçavoir celui d'Ulme, & celui de Laiche, au dernier desquels on trouve des pierres vertes, jaunes & rouges, qui ne sont guiere moins belles que les esmeraudes, les hyacinthes, & les rubis. Il y a aussi par tout ce pays forces mines d'airain, de plomb, d'argent, & de fer, & pareillement des eaux propres & salutaires aux malades.

MOEURS ANCIENNES.

Les Allemans nommez autresfois Germains, à cause de leur force, selon quelques-uns, pource que ce mot Germain, signifie tout mâle & tout robuste, & selon Strabon pource qu'ils imitoient les façons de faire, & estoient comme semblables à eux en naturel & en grandeur de corps, & couleur de visage; si bien que les Romains leur donnerent ce nom de Germains, comme s'ils eussent recogneus pour freres les Gaulois, à cause que le Latin appelle Germains ceux qui sont freres & sortis d'un même ventre: les Allemans, dis-je, ont de tout temps esté tenus pour vaillans & courageux au possible. Avant qu'entrer en bataille ils chantoient un Hymne en l'honneur d'Hercule, lequel ils disoient avoir esté quelquesfois en leur pays, & ussoient de nombres, & mesures, quoy que sans aucune proportion en leur chant, qui

estoit inuenté pour estonner les ennemis. Ils estoient soudains, & marchoient avec vne grande precipitation en leurs affaires. Ils estoient mal propres au trauail, & ne pouuoient endurer long-téps les incommoditez qu'apporte la guerre, principalement la soif, & la chaleur.

Ils n'auoient iadis aucun vsage d'or ny d'argent, & faisoient aussi peu d'estat de la vaisselle d'argent qu'on donnoit à leurs Capitaines, ou dont on faisoit present à leurs Princes, que si c'eut esté de la terre : l'or & l'argent a esté cogneu & estimé par eux, seulement à cause des trafics & des commerces.

Il y en auoit peu iadis entr'eux qui vsassent d'espee, ains plustost ils auoient de longs bastons & espieux, ou piques, avec vn peu de fer au bout, armes propres pour combattre l'ennemy, soit qu'il fallust l'attaquer de loin, soit qu'il fust besoin de venir aux mains : les homes de cheual portoient des lances & des escus, & ceux de pied lançoient plusieurs traits, entrans au combat, ou bien ils combattoient nuds, ou bien ils vsoient d'un hoqueton court, & n'y auoit nulle diuersité d'habits qui distinguait les compagnies, & seulement ils peignoient leurs escus diuersement, afin de ne s'entrecognoistre. Il y en auoit peu qui vsassent de corcelet, ny corps de cuirasse, & peu qui armaient leur teste de morion, bourguignote, ou salade. Ils n'auoient grand soin de la beauté, & vitesse de leurs cheuaux, ny de les faire voleter en rond, & se contentoient de leur apprendre à passer vne carriere bien droicte.

Celui qui perdoit son escu au combat estoit tellement hay, & detesté, qu'il n'estoit receu, ny aux sacrifices, ny aux conseils, & assemblees publiques, ce qui causoit que plusieurs ne voulans suruiure à ceste honte, aduançoient leur mort avec vne corde.

6. Leur Roy estoit choisi du corps des nobles, & n'auoit puissance de faire court à sa fantaisie, ny vser de toutes choses à son plaisir absolument.

Ils ellisoient pour leurs chefs d'armees ceux qui surpassoient les autres en vertu, & qui scauoient mieux effectuer que commander. Il n'estoit permis à aucun de battre ou de faire mourir les autres, fors au seul Prestre, afin qu'on creust que c'estoit Dieu seul qui chastioit les forfaits.

Ils portoient ordinairement en guerre quelques tableaux qui representoient leurs Dieux, & pour cet effet les tiroient des temples bastis aux forests. Lors qu'ils alloient à la guerre, ils vouloient que leurs plus proches, & les choses qui leur estoient plus cheres ne s'elloignassent guiere d'eux, afin qu'en presence de leurs amis ou ils vainquissent glorieusement, ou ils mourussent avec honneur & louange.

Quand ils estoient blesez, ils se retiroient vers leurs meres, & leurs femmes, qui n'estoient pas si delicates qu'elles ne comptassent les playes, ne les visitassent, & n'apprestassent à manger aux soldats, en les incitant à bien combattre.

Aussi on trouue par escrit que les Germains estans presque deffaicts, ont rembarré bien souvent leurs ennemis, à l'incitation de leurs femmes, à l'esprit desquelles ils donnoient quelque preuoyance, & sainteté : à raison dequoy ils ne reiettoient point leurs conseils, & ne mesprisoient leurs aduis en leurs assemblees.

Ils auoient certains iours ausquels ils immoloient des hommes à Mercure, mais ils n'offroient que des bestes à Mars, & à Hercule. Ils vsoient aussi de sort, & d'augures. Aux choses de peu d'importance, la resolution des affaires dependoit des chefs des citez : mais aux faicts de consequence, il falloit que tout le corps de la ville fust assemble pour en determiner.

Ils ne commençoient aucune entreprise que durant la nouvelle Lune, ou lors qu'elle estoit pleine, & ne comptoient pas les iours, mais faisoient leur denombrement par les nuits. Lors qu'ils venoient aux assemblees ils estoient armez, & s'ils vouloient monstrier qu'ils s'accordoient à l'aduis de quelques vns, ils ne faisoient que branler leurs piques, qui estoit le plus honorable signe de leur approbation, mais si la chose leur desplaisoit, ils le signifioient par vn grand murmure.

Ceux qui s'enfuyoient de la guerre, ou qui trahissoient leurs amis, estoient pendus au premier arbre qu'on trouuoit, & les lasches, & ceux qui n'auoient aucune force, estoient iettez dans les bourbiers, & couuerts de fange, ou bien precipitez dans les marais, & l'on y mettoit vne claye de bois, afin qu'ils n'en peussent sortir, comme s'ils eussent esté d'auis qu'il falloit punir publiquement vn forfait, & toutesfois cacher, & couvrir la honte de ceux qui l'ont faite.

Il n'estoit permis au Magistrat de faire chose quelconque, fust en privé, fust en public, sans auoir ses armes. Ils estoient fort curieux d'estre bien suyuis, d'autant que ceux qui auoient la plus gentille, & plus belle troupe de ieunesse à leur suite, estoient renommez sur tous autres. C'estoit infamie au soldat de luriure son chef mort en la guerre, sinon qu'il fust decedé apres auoir emporté la victoire. Aussi le Prince combattoit pour vaincre, & ceux qui le suyoient batailloient pour la conseruation & deffence.

Ils

Ils embrassoient la guerre de gayeté de cœur, & sans aucune necessité, comme ceux qui ne pouuoient viure sans combattre; de sorte qu'ils tenoient à lascheté de se pouruoir en travaillant de quelque chose necessaire, si on la pouuoit acquerir par la force en combattant.

Lors qu'ils n'estoient plus à la guerre, les plus vaillans & illustres n'auoient autre soucy que de dormir, de manger, & de boire, laissant à leurs femmes la charge de leurs maisons & labourages, à quoy les vieillards estoient pareillement employez. Leur demeure ordinaire estoit en des villages & hameaux, dont les maisons estoient separees.

Leur habillement estoit vn hoqueton fermé, & attaché d'une boucle, ou d'un lasset, & au defect de ce, d'espines. Les plus riches differoient en habit des pauvres, non pour le porter plus large, mais pource qu'il estoit plus estroit, & si bien approprié au corps, qu'il sembloit estre collé contre les membres qu'il couuroit, & l'habillement des hommes & des femmes estoit semblable.

Les Germains entre toutes les nations, tant Orientales, que Septentrionales, se sont dès le commencement contentez d'une seule femme, combien qu'il y en eust qui en espousoient plusieurs. Ce n'estoit pas la femme qui portoit le douaire à son mary, ains l'homme le donnoit à son espouse. Ils ne se soucioient de parer leurs femmes, ou d'employer leurs biens en bagues, & en meubles, ains ils donnoient vne paire de bœufs attelés, vn cheual tout bridé, vn escu, la pique, & l'espee.

C'estoit chose merueilleuse de voir la pudicité, & la continence de leurs femmes, veu qu'on ne les voyoit presque iamais aux jeux publics, ny aux festins. Aussi l'on oyoit dire peu souuent parmy vne nation si peuplée qu'il y eust vn adultere.

Que s'il aduenoit qu'une femme fust conuaincuë de crime, on luy coupoit premierement les cheueux, puis son mary la conduisoit toute nue en pleine place devant ses parens, la priuant du droit de sa maison, & apres elle estoit fouettée par tout le village. Il n'y auoit nul moyen, ny espoir de reconciliation depuis qu'une femme s'estoit tant oubliée.

Il n'estoit permis entr'eux de se mocquer des vices d'autrui, d'autant qu'ils estimoient que ceste coustume estoit plus propre à corrompre les bonnes mœurs que bonnes pour remedier aux mauuaises.

Les ieunes hommes commençoient tard à sçauoir que c'estoit de l'accointance des femmes, & par ce moyen leur ieunesse estoit plus gaillarde, & l'on ne precipitoit aussi guere les mariages des filles, à fin que les deux parties fussent plus puissantes pour la generation.

L'homicide commis estoit recompensé par certain prix, & nombre de bestail, & le meurtrier accordant avec la partie, satisfaisoit à toute la maison de celui qui auoit esté meurtry. Ils prenoient grand plaisir à recevoir & loger les estrangers, & c'estoit vne grande faute entr'eux de refuser sa maison, & sa table aux suruenans. Ils prenoient plaisir à s'entrefaire des presens sans se reprocher toutesfois aucune chose: pource qu'ils ne s'estimoient nullement redevables les vns aux autres pour chose qu'ils eussent receuë.

Ils passoient les iours & les nuicts à faire grande chere, de sorte qu'ils ne tenoient nullement pour vice l'yrongnerie. Aussi apres boire l'on ne voyoit que querelles, & toutesfois on y voyoit plustost faire vn meurtre, qu'on n'y oyoit dire vne parole iniurieuse. Ils traictoiēt des affaires de paix, & de guerre en banquetant. Ils n'estoient iadis anciennement rusez, ains disoient simplement & naïfvement leur pensee.

Le iour d'apres qu'ils auoient consulté, retractoient les choses resoluës, à fin d'y deliberer encor comme ceux qui ne sçauoient que c'estoit de feindre, ny dissimuler, & s'arrestoient à ceste seconde deliberation, comme ne pouuans errer apres auoir consulté si bien vne affaire. Leur boisson estoit composée d'orge, & faicte à la semblance du vin: mais ceux qui se tenoient pres des riuieres auoient du vin qu'on leur apportoit des pays estrangers. Pour leur viande ils auoient des pommes sauvages, & de la farine fraîchement mouluë, & du lait caillé.

Ils apprenoient à leur ieunesse à passer dextremēt par des rangs de piques, & d'espee nue, afin de rendre les hommes adroits aux combats.

Ils estoient tellement addonnez au jeu, qu'apres auoir perdu tout leur bien, ils engageoient encor & vendoient la liberté de leurs personnes, de sorte que celui qui perdoit demouroit esclau de l'autre. Et quoy que le perdant fust ieune, & robuste, si se laissoit il lier, & vendre comme vne beste au marché.

Ils partissoient l'annee en trois saisons, à sçauoir en Hyuer, Printemps, & Esté comme ceux qui ne cognoissoient l'Automne, à cause qu'ils n'auoient ny vin, ny fructs à recueillir en ce tēps. Leurs larmes estoient bien tost passées au trespas de quelqu'un, mais la douleur demouroit longuement empreinte en leur ame. C'estoit l'office des femmes de pleurer & lamē-

ter, & celuy des hommes estoit d'auoir seulement memoire du mort.

Mais pour parler en particulier des mœurs de quelques peuples de Germanie, les Saxons estoient grands elcumeurs de mer, comme nous apprenons d'Apollinaire. Avant que de quitter le pays qu'ils auoient ravagé, ils auoient de coustume de prendre chaque dixiesme de leurs prisonniers, qu'ils massacroient avec vne execrable ceremonie. Ils croyoient que par ce moyen ils s'acquittoient enuers leurs Dieux, en sacrifiant ceux qu'ils prenoient en guerre.

8. Ils ne laissoient guere leurs voisins en paix, mais ils viuoient paisiblement entre eux, & les Seigneurs pouruoioient avec grande courtoisie aux choses qui estoient necessaires à leurs citoyens. Ils estoient extrêmement curieux de la conseruation des familles, & races de leur ancienne Noblesse, & ne vouloient guere s'acointer des estrangers, ny s'allier de moindres qu'eux.

9. Ce peuple estoit diuisé generally en quatre Estats, c'est à sçauoir de nobles, de frâcs, d'affranchis, & d'esclaves: & il estoit deffendu par leur loy de quitter son rang en contractant mariage. Tellement qu'il falloit que le noble espousast vne femme de sa condition, & ainsi des autres, & si quelqu'un contreuenoit à ceste ordonnance il y alloit de sa vie.

Ils auoient de bonnes loix pour la punition des forçats; comme si quelque meurtre auoit esté commis, on auoit esgard à la condition de celuy qui auoit esté tué, & n'y auoit presque iamais peine de mort, sinon pour celuy qui faisoit homicide en quelque temple, veu qu'il n'y auoit lors aucune remission, mesme quiconque se mettoit en embusche, & qui espioit l'occasion de ce faire, encor, qu'il n'executast pas son mauuais dessein, il estoit banny, & condamné à grosses amendes.

Les larcins y estoient punis avec plus grande seuerité, veu que trois sols anciens estans desrobez, il n'y alloit que de la teste de celuy qui les auoit pris. Les boute-feux, & ceux qui vsoient de violence passoient sous la rigueur de mesme sentence. Quant aux heritages nul ne pouuoit priver son legitime heritier, ou ayant droit de succession pour la donner à vn autre, sinon qu'il la donnast à l'Eglise, ou qu'il fist le Roy son heritier.

Au reste les Saxons estoient iadis addōnez à la superstition des Idoles, & adoroient les arbres fort verds, feuillus & chargez de brâches, & pareillemēt les belles fontaines. Ils auoient encor vn gros tronc d'arbre fiché en terre en lieu descouuert, qu'ils appelloient l'rainfual, qui signifie colonne vniuerselle, comme s'il eust soustenu toutes choses. Ce tronc fut abbattu par Charles le grand, lors qu'il eut subiugué les Saxons, & qu'il les transporta en Flandres & en Brabant, afin qu'ils ne remuassent plus mesnage en leur pays.

Ils adoroient aussi Mercure, auquel ils sacrifioient (comme les autres Allemans) à iours certains ceux qu'ils prenoient en la guerre. Ils ne trouuoient nullement conuenable à la majesté de leurs Dieux, qu'on les enfermast dans des temples, ou qu'on fit aucune statue pour les représenter, iugeants qu'il estoit impossible à l'homme de comprendre ce qui est de la diuine Majesté.

Ils dedioient les bois de haute fustaye, & les forests plus sombres, & plus espaisées à leurs Dieux, & y disputoient des plus grands secrets de la nature avec beaucoup d'honneur & de reuerence. Ce peuple fut encore addonné à la contemplation du vol, du manger, & des entrailles des oyseaux, afin de deuiner par ce moyen les choses à venir.

Ce peuple deuinoit iadis en ceste maniere: ceux qui vouloient sçauoir quelque chose prenoient des verges de quelque arbre fruietier, & les mettoient en plusieurs pieces, lesquelles ils marquoient de diuerses sortes & couleurs, & les estendoient sur quelque habillement blanc & net, sans vser d'aucun ordre en ce faisant. Si la consultation touchoit le public, le Prestre predoit à ceste façon de sort; & si c'estoit pour quelque cas particulier, le pere de famille, & maistre de la maison où cela se practiquoit, ayant fait sa priere aux Dieux, avec les yeux esleuez en haut, leuoit trois fois ces verges ainsi espandues, & selon que la marque tournoit, il predisoit l'heureuse ou mal'heureuse issue de l'affaire, & si les marques deffendoient l'entreprise, on la differoit à vne autre fois. Si les verges du sort marquoient qu'on l'entreprist, il falloit encor que le sort en signifiait l'issue.

Ils nourrissoient aussi des chevaux blancs dans les bois & forests, aux despens du public, & prenoient garde qu'ils n'eussent iamais seruy. Ils les attelloient à vn chariot dedié pour ce seul effect, qui estoit accompagné du Prestre & du Roy, ou Chef de la Cité, ou de la Prouince, qui prenoient garde au hannissement & bruit de ces chevaux: tellement qu'il n'y auoit sorte de divination à laquelle ils adioustassent plus de foy qu'à ceste-cy, d'autant qu'ils estimoient ces animaux comme ministres des Dieux, & qui sçauoient leurs secrets. Ils auoient encor vne autre maniere & sorte par laquelle ils prenoient coniecture de l'euement des guerres de plus grande importance. Car ils contraignoient chacun de leurs captifs pris

pris en guerre, & qui se trouvoit de la nation à qui ils auoient à faire, de combattre contre celuy des leurs qu'ils choisissent, quiconque emportoit le dessus seruoit de prejugé pour la victoire future.

Quant à ceux de Suaube ou Sueue, César dit en ses Commentaires, que c'estoit vn grand peuple fort addonné aux armes, voire plus que tout le reste des Germains: qu'ils auoient ces bourgades & cantons, dont chacun fournissoit tous les ans mille soldats aguerris; qui sortoient de leurs pays pour attaquer leurs voisins, & que cependant ceux qui demeuroient travailloient tant pour se nourrir que pour fournir aux frais de ceux qui alloient à la guerre, & que ceux-cy qui estoient demeurez y alloient au bout de l'an, quand les autres se venoient rafraeschir.

Il dit aussi qu'ils n'auoient ny champ, ny terroir qui fut à quelqu'un en particulier, & qu'il ne leur estoit permis d'arrester plus d'un an en vn lieu pour y habiter, qu'ils ne viuoient guere de pain, mais de lait, & de chair, & s'addonnoient surtout à la chasse, & aussi qu'ils n'estoient accoustumez dès leur enfance à aucun deuoir, ny assubietis sous la rigueur d'aucune discipline.

Ils estoient tellement endurcis au travail, que encor qu'ils habitassent en vn pays bien froid, toutefois ils n'auoient autre habit que de peaux, qui estoient mesme si courtes & estroittes, que la plus grande partie de leurs corps demouroit descouvert, & ils se baignoient aussi souuent es riuieres.

Ils permettoient aux marchands l'entree en leur pays, plus pour vendre le pillage qu'ils faisoient durant la guerre, que de desir d'auoir quelque chose des pays estranges.

Ils ne prenoient plaisir d'estre bien montez, comme les Gaulois, veu qu'ils se contentoient des cheuaux qui naissoient en leur pays, & les accoustumoient si bien au travail, qu'ils les rendoient bons pour le service.

Ils descendoient souuent de cheual pour combattre à pied, ayans appris leurs cheuaux à ne bouger cependant d'une place.

Ils n'estimoient rien plus vilain que d'vser de selles, tellement qu'encor qu'ils vissent vn grand nombre de gens qui auoient leurs cheuaux sellez, ils ne craignoient point de donner dedans & les assaillir.

Ils ne souffroient qu'on portast du vin en leur pays, disans que cela ramolissoit les hommes, & ne seruoit qu'à les effeminer.

Ils estimoient que ce leur estoit beaucoup d'honneur s'il y auoit beaucoup de pays voisins du leur en friche, d'autant que c'estoit signe qu'il y auoit grand nombre de peuples qui n'auoient peu soutenir leurs efforts.

Tellement que d'un costé de Sueuiens il y auoit de six cens mille pas de terre non cultivée.

Tacite dit qu'ils s'accourcissoient les cheueux en les noiant & entortillant sur la teste, & que les Princes les portoient mieux peignez & agencez que les autres.

En certaine saison de l'annee on enuoyoit en vne forest sacrée certains deputez de chaque quartier de la Germanie, & là ils massacroient & sacrifioient vn homme en vn lieu touffu, & fort couuert d'arbres.

Il n'estoit permis de mettre le pied en ce lieu sans auoir les mains liees, afin d'auouer qu'on estoit moindre que les Dieux: & si par hazard quelqu'un tomboit en terre, il ne luy estoit loisible de se leuer, ains il se trainoit.

Ceste folle superstition rendoit à recognoistre d'où ils auoient pris origine, & le lieu où Dieu regnoit. Vne partie de Sueuiens sacrifioit aussi à la Deesse Isis.

Au reste les Romains ayans attiré les Sueuiens à leur obeyssance, & amitié, ils leur firent tousiours cet honneur de les mettre les premiers aux armes, & de leur donner la pointe aux combats plustost qu'à toute autre nation.

Ceux de Baniere descendus des Boïens, selon Polybe, habitoient en des hameaux bastis sans aucune muraille ny closture, & la terre estoit leur lit avec vn peu de paille.

Ils viuoient de chair, & s'addonnoient seulement à la guerre, & au labourage, viuants fort eschassement, & ne faisans aucun estat des arts & sciences.

Leur richesse estoit en or & bestail, à cause qu'ils pouuoient facilement transporter ces choses s'ils estoient contrains de changer de demeure. Chacun d'eux taschoit d'acquiescer autant d'amis qu'il luy estoit possible, & ains tant plus vn homme auoit de gens à sa deuotion, tant plus il estoit estimé & redouté.

12.

A Viourd'huy les Allemans sont diuisez en quatre Estats & manieres de gens.

Le Premier est du Clergé, qui comprend les gens d'Eglise seculiers & reguliers, ou religieux.

Ceux-cy ont de grâds reuenus, & sont fort honorez de tous autres lors qu'ils se trouuent scians & de bonne vie. Car ce peuple mesprise aisément les Prelats & Ministres de l'Eglise, qui sont ignorans, & débordéz.

Les religieux portent des habits seants à leur condition. Les Prestres non moines, ont des robes larges & lōgues, de couleur noire: leurs bonnets sont de laine & fort creux, & nō pointus, qui leur entrent en la teste iusques aux oreilles. Lors qu'ils vont par la rue ils portent des chapperons sur les espaules, qui sont ou de soye ou de laine. Ils ont aussi des mules avec des fouliers dedans, ou bien des mules seules sans escarpins, lesquels ils laissent estans au logis.

La plus grande partie de ceux-cy s'addonnent à oyseté, & n'a grand soucy des lettres, ains seulement de boire, de iouër, & de faire bonne chere.

Le 2. Estat est de la Noblesse qui comprend les Princes, Comtes, Barons, Cheualiers, & simples Gentils-hommes. Les Princes sont plus prizez que les autres, non tāt pour leur grandeur, ou pour l'ancienneté de leur maison, qu'à cause qu'ils sont plus puissants que les autres, comme ayans forces terres, seigneuries & reuenus. Mais c'est vne merueille de voir que les Princes, les Comtes & les Barons, & leurs semblables, obeyssent aussi tost qu'ils ont mandement de l'Empereur, comme ses sujets & hommes liges: & cependant les plus petits Gentils hommes se disent exempts de telle sujection, & ne vont à la guerre s'ils ne sont payez, & toutesfois ils appellent l'Empereur leur Prince & le recognoissent pour tel.

Tous les Nobles penseroient se faire grand tort s'ils s'addonnoient au trafic, & à la marchandise, & exerceoient quelque art mecanique, & croient qu'il leur tourneroit à deshonneur s'ils prenoient vne femme roturiere, & qui ne fust de leur qualité. Ils mesprisent la compagnie & frequentation des bourgeois des villes, & pour ceste cause bastissent des chasteaux & fortressez aux champs, où ils vivent en liberté avec leurs familles.

Quelques-vns d'entr'eux frequentent les Cours des Princes, & les suiuent à la guerre, d'autres se tiennent cazaniers en leurs maisons, viuants de leurs rentes.

Tous les Gentils hommes vont à la chasse, & disent que cēt exercice n'appartient qu'à eux, & qu'ils en ont l'octroy & priuilege des Princes. Que si vn paysāt ou quelqu'un du tiers Estat est conuaincu d'auoir chassé, principalement aux lieures, biches, dains, cheureux, & cerfs, il y a plusieurs endroits où l'on luy creue les yeux pour punition du faict, en quelque autres il en perd la vie: il est toutefois permis à chacun de chasser aux bestes qui portent dommage.

Au reste les Nobles sont grand chere, & s'habillent magnifiquement. Les hommes & femmes portent force chaines d'or, & des bagues, & les vns & les autres portent des habits de soye de toutes couleurs.

Lors qu'ils vont dehors ils sont suiuis d'une grande troupe de leurs domestiques & marchent avec telle gravité, qu'on les distingue aisément du peuple. S'ils vont vn peu loin c'est à cheual, d'autant qu'ils tiennent que ce leur seroit deshonneur d'aller à pied, & disent que c'est signe d'une grande misere & pauvreté, & toutefois lors qu'ils ont faute de quelques choses necessaires, ils ne trouuent pas messeant de le piller & le raur. S'ils ont receu quelque offence, ils ne s'adressent que fort rarement & bien tard à la iustice, & font assemblee de force gens de cheual, s'essayēt de prendre vengeance par la voye des armes, tellement que pillant, bruslant & rauageant les terres de leurs ennemis, ils contraignent ceux qui les ont offencez de leur faire reparation suffisante. Ils sont superbes, pleins d'inquietude, auares, & tiennent les pauvres paysans en estrange seruitude.

Le 3. Estat comprend les citoyens & bourgeois des villes, dont les vns sont immédiatement subiects à l'Empire sans recognoistre autre Seigneur: les autres outre l'Empereur ont des Princes, ou sont sujets aux Ecclesiastiques.

Les citoyens des villes vivent en grande amitié & concorde: se portent fort honnestement ensemble, trafiquent ensemble en public, en particulier, & bien souuent se festinent les vns les autres. Ils s'entredeçoient bien peu souuent, & ont fort peu de noises ensemble.

En quelque temps, heure, ou lieu qu'ils se rencontrent, ils se saluent courtoisement,

nent, & avec beaucoup d'honneur. Tous vont vestus assez simplement, & vivent mesnagerement les iours ouuriers, mais aux iours de festes ils sont vn peu plus liberaux: ceux qui travaillent font quatre repas le iour, & les hommes qui demeurent en repos n'en prennent que deux.

Le vestement ordinaire des hommes est de laine, & celuy des femmes de toile, ou de treillis, quelquefois aussi de laine, mais aussi fort bigarré. Ils ayment sur tout d'estre habillez à la Françoisé. Ils s'habillent de noir aux funerailles de leurs parens, & en portent le deuil trente iours, & pendant ce terme ils font prier trois fois pour le deffunct, c'est à sçauoir le iour de l'enterrement, le septiesme, & le trentiesme. C'est vn peuple affectionné au service de Dieu, tellement qu'il n'y a artisan quelconque qui ne se mette en priere auant que faire sa besogne.

On y entretient les ieunes gens, qui pour estudier se sont volontairement bannis de leurs pays, & errent par le monde, & l'on en void quelquefois si grand nombre en vne ville, qu'on pourroit s'estonner à bon droit comme il est possible qu'on en entretienne tant. Les citoyens les logent pour l'honneur de Dieu, puis ils vont mendiant leur pain, en chantant de porte en porte, & ils en sont fournis en abondance. loignant chaque Eglise de paroisse, il y a vne maison qui est au public, où l'on lit les arts liberaux, & ces pauures & les enfans de la ville, & autres y sont enleignez par gens gagez pour cet effect, qui sont remplis de sçauoir.

Les bastimens des riches sont de pierre, & à chaux & sable: les pauures ont leurs loges basses faictes de bois & de terre. Les vns & les autres couurent leurs maisons de thuille ou d'ardoise. Au pays de Saxe & en plusieurs autres endroits ils les couurent de lates.

Le dernier rang & estat est des payfans, & gens de villages, qui cultiuent les terres & dont la condition est miserable, Ils demeurent loing les vns des autres, chacun avec sa famille, viuans pauurement & mesquinement.

Leur pain est bis, & la pluspart d'auoine. Pour leurs viandes ils ont des feues & des pois, pour breuage de l'eau toute pure, ou de la bierre. Leurs habits sont vn hoqueton de toile, des giestres, & quelque meschant chapeau de feutre.

Ces gens sont tousiours sans repos, & mal propres, & sales en leur ménage. Ils portent vendre ce qu'ils ont aux villes voisines, soit fruit, bestail, ou autre chose, & de l'argent qu'ils en font, ils en achèptent ce qui leur est necessaire, d'autant qu'ils ont peu ou point d'artisans qui se tiennent parmy eux en leurs villages.

Les iours de festes ils s'assemblent apres midy sous quelque arbre, & en lieu public, où ils communiquent de leurs affaires. Apres cela les ieunes payfans se mettent à dancer au son de la flute, & les plus anciens vont à la tauerne où ils boient d'autant.

Les homes ne marchent iamais en public sans quelques armes pour s'en seruir si besoin y eschoit. Ils sont souuēt des coruees pour le service de leurs Seigneurs, labourant leurs terres, les enlemençant & recueillant les fruits, portant les grains aux greniers, fendant & abbatant le bois, seruant d'aide aux maçons qui bastissent. Bref il n'y a seruitude à laquelle les Seigneurs ne disent que ceste sorte de gens est obligee.

Mais apres auoir parlé en general des mœurs des Allemands, voyons vn peu les particularitez qu'on remarque en beaucoup de Prouinces.

Ceux de Saxe boient si desmesurément, que ceux qui versent ne sçauoiēt presque fournir aux beueurs: tellement qu'on met vn grand pot sur la table où chacun en prend autant qu'il veut, & par ce moyen ils sont carroux à outrance. Ils sont tellement adonnez à l'yrognerie, qu'ils conuient, voire mesme contraignent à boire chacun. Le pis est qu'ils ne se contentent pas d'auoir beu iusques à s'enyrurer, & rendre leur gorge, veu qu'ils continuent iour & nuict ceste vie. Celuy de la troupe qui boit le mieux, non seulement rapporte louange & honneur de sa vilenie, mais encore est couronné d'vn chappeau de roses ou d'autres fleurs, & herbes, ou quelque gentillesse pour le prix de sa victoire.

Leur façon de faire s'est espandue par toute l'Allemagne. Tandis qu'ils banquettent, si quelqu'un passe pres d'eux soit le maistre du logis, ou autre, tous ceux qui ont quelque verre plein, se leuent & boient à sa bone grace, & cela veut dire qu'il faut aussi qu'il boie à eux. Ils tiennent pour leur ennemy celuy qui estant souuent conuié à boire, ne leur fait raison: tellement que ce mespris est plusieurs fois vengé par quelque meurtre.

Les viandes des Saxons sont dures, mal apprestees, & de grosse digestion: comme du lard, des saucilles & endouilles seichees à la fumee, des oignons truds, & du beurre salé: & en quelques endroits ils font cuire le Dimanche la viande qu'ils mangent apres tout le long de la semaine.

Quant aux enfans ils ne les nourrissent pas avec de la bouillie, mais leur donnent de la viande solide, mais fort maschee par la mere ou nourrice, à raison dequoy les Saxons accoustu-

mez à ceste nourriture, sont plus robustes que les autres, & souffrent les incommoditez de la vie avec plus de patience. Ils ont un langage particulier: mais quant à l'habillement, ils ne different guiere du reste des Allemans.

Les Vestphaliens sont ingenieux, & bons guerriers, mais vicioux & rusez.

Les Francons ne different ny en proportion de corps, ny en façons d'habits du reste des Allemans. Ils endurent fort le travail, & sont addonnez, tant hommes que femmes, à cultiver les vignes, tellement qu'aucun n'y demeure sans rien faire.

Ce peuple pressé de pauvreté vend son vin, & boit de l'eau, d'autant qu'il mesprise la biere. Ils sont insolents, fiers de leur naturel, ayans bonne opinion d'eux-mesmes, & mesprisent toutes les autres nations, voire meisme mesdisent si fort des autres, que les estrangers qui frequentent avec eux n'ont garde de leur dire le pays de leur naissance, s'ils ne sont trop legers à parler.

Ceux qui souffrent patiemment leur arrogance sont les bien venus, & lors qu'ils les ont essayez avec ceste fascheuse façon, ils les recoivent souuent pour leurs allies, & leur donnent leurs filles & parentes en mariage. Ils sont au reste fort deuots, & toutesfois addonnez au blasphemé & au larcin, dont l'un luy semble beau, & l'autre loisible.

Cinq semaines deuant Noël on void tous les Ieudis des enfans, tant filles que garçons, qui vont heurtans de porte en porte, & chantent des chansons qui contiennent la prochaine Natiuité de nostre Seigneur, & par lesquelles ils souhaitent le bon an à toute la compagnie, & pour cet office plusieurs leur donnent des pommes, des poires, des noix, & d'autres les estreintes de quelque petite piece d'argent.

Le iour de Noël ils posent la representation d'un enfant nouvellement né sur l'autel, autour duquel les garçons & les filles vont sautant & dansant, & les vieilles gens chantent.

Le premier iour de l'année les parents & amis s'entretiennent, & se touchans la main se souhaitent l'an nouveau heureux, passent ce iour à faire grande chere ensemble, & suyuant l'ancienne coustume de leurs ayeuls, ils s'enuoyent des presents les uns aux autres.

Le iour des Roys chaque maison fait un gasteau composé de farine blanche, de miel, de poivre, & de gingembre, puis un Roy est creé comme s'ensuit.

La Dame du logis est celle qui fait le gasteau, auquel en le paistrifiant elle met une petite piece d'argent, puis le faisant cuire en l'atre bien net, le coupe en autant de pieces qu'il y a de personnes en la maison, & donne à chacun la sienne. Toutesfois il y a des pieces assignees, premierement à nostre Seigneur, puis à la Vierge, & aux trois Sages qui le vindrent adorer: & toutes ces parts sont donnees aux pauvres. Celuy qui se trouue auoir la part où est la piece d'argent, est salué comme Roy, assis en chaire, & esleué trois fois avec trois cris & reioüissance de toute la compagnie. Le Roy ainsi leué en haut a de la craye en la main droite, & toutes les fois qu'on le hausse il fait autant de croix au plancher de la chambre où l'assemblée se fait.

Durant les 12 iours qui sont entre Noël & la feste des Roys, il n'y a maison en Franconie qu'on ne parfume avec encens ou autre chose odoriferante, pour empescher les sorcelleries.

Par Careme prenant les Franconiens vestus en diables, ou en satyres, vont courant par les rues, & frappent sans discretion les passans avec des petits sacs pleins de cendre.

Le iour des Cendres en plusieurs lieux les garçons de toute une paroisse s'assemblent, prennent toutes les filles, qui durant toute l'année ont plus frequenté les dances que les autres, & les attellent comme cheuaux, ou iuments à un chariot, sur lequel est assis un menestrier qui ioué de quelque instrument, puis les conduisent en cet equipage iusqu'à la premiere eau qu'ils rencontrent.

Durant les Rogations plusieurs paroisses s'assemblent, & les filles & petits garçons marchent aux processions avec des chapeaux de fleurs sur leurs tetes & des baltons de saule verd en leurs mains.

Les Prestres de chaque Eglise escoutent attentiuement le chant de leurs paroissiens, & ceux qui ont mieux chanté, ont suyuant leur sentence, & l'ancienne coustume, certaines mesures de vin pour se defalterer.

Durant les iours de Pentecoste on obserue tant en ce pays que presque en toute l'Allemagne, que tous ceux qui ont des cheuaux, ou qui en trouuent d'emprunt s'assemblent & meinent aussi à cheual un Prestre qui porte le S. Sacrement, & en cet equipage ils font le tour par tout le territoire, chantant des hymnes & oraisons, & priants Dieu qu'il vueille garder les fructs de la terre.

Le iour saint Urbain, les vigneronns aux lieux où le vin croist, mettent une table en quelque lieu public, & la couurent d'une belle nape, de feutilles, herbes & fleurs odoriferantes, & posent dessus l'image saint Urbain. Que si le iour est clair & serain, ils boient à grands

grands traits, & se reioutissent en l'honneur du saint, mais s'il pleut, ou si le temps est couvert, ils jettent de la boue contre son image, & salissent d'eau vilaine & puante la nape, & ce qui est dessus, pource qu'ils croient que la vigne encor en fleur portera du vin, ou ne produira que bien peu, selon que ceste iournee sera belle ou laide.

Le jour de saint Jean Baptiste les hommes & femmes vont dançants autour du feu de joye, & se font des chapeaux d'armoise, & verucine, & portent des bouquets de fleurs qu'ils appellent *Esperons*, & regardent seulement le feu par les entr'ouvertures de ces fleurs, estimants que ce regard empesche que de toute l'annee ils n'aient nul mal aux yeux.

Ceux qui s'en veulent aller avant que le feu soit esteint, y jettent premierement les herbes dont ils sont ceints, puis disent telles paroles. Avec cecy s'en aillent & soient mis à néant, & deuorez du feu tous mes malheurs.

En mesme saison ils ont des pots de terre tout percez, que les filles courent de roses, & autres fleurs, puis y mettent dedans vne chandelle allumee, & les poussent au haut des maisons pour seruir de falots.

Aux villages les ieunes gens à marier portent des pins tous entiers, & en coupent toutes les branches d'embas, & embellissent le haut de l'arbre de miroirs, pieces de verres, escussions & autres choses luyfantes, & plantent cet arbre qui demeure ainsi paré tant que l'Esle dure.

En Automne lors que les raisins sont meurs, il n'est permis à personne de vendanger sans le congé du Seigneur, à qui l'on doit la dîme, & faut que tous ceux qui ont des vignes en vn cartier vendangent ensemble, & aux vallons on met au pied du vignoble, qui est aux costaux, ce qui appartient au Seigneur. Il faut que ceux qui veulent vendanger plus tard que les autres, non seulement aient permission de ce faire, mais encores qu'à leurs propres despens ils facent porter les dîmes au pressouer du Seigneur.

Les vendanges finies, à cause qu'à Vvitzbourg il y a des ieunes hommes commis à controller ceux qui payent, ces ieunes gens font des torches de paille, & les allument, & entrêt avec ceste clarté le soir en chantant dans la ville, estimants qu'avec ceste ceremonie ils purgent & brulent l'Automne.

Les Franconiens celebrent avec grande joye les festes de saint Martin, & de saint Nicolas, l'vne à table, & en beuvant d'autant: l'autre à l'Eglise, & en priant.

Aussi lors que chacun taste ses vins, & mesme à Vvitzbourg, & en plusieurs autres lieux on en donne aux pauvres

On y fait combattre en vn parc, & clos 2. sangliers eschaufez, afin qu'ils s'entre-deschirent l'vn l'autre à belles dents, & lors qu'ils sont tous deux à bas, & fort blesez, le peuple en a vne partie, & l'autre est distribuée aux Magistrats.

Le jour de saint Nicolas les enfans qui vont à l'escole en essient trois d'entr'eux, l'vn desquels est l'Euesque, & les autres sont les Diacres.

Cet Euesque fait à plaisir est ce iour là conduit à l'Eglise par toute la troupe des escoliers, reuestu d'habits Pontificaux, avec lesquels il assiste au seruice diuin, à la fin duquel luy & les Diacres s'en vont chanter de porte en porte pour amasser quelque argent, & nient que ce soit aumosne, ains seulement secours charitable deu à l'Euesque.

On apprend aux enfans à ieusner la veille de ce saint, & à cet effect on leur met la nuit lors qu'ils dorment quelque piece d'argent dans leurs souliers, leur faisant entendre que c'est la liberalité du saint, tellement qu'il y en a qui ieusnept avec tant d'ardeur qu'on est contraint pour leur santé de les forcer de manger.

Quant à ceux de Sueue, les plus riches, & plus puissans d'entr'eux s'adonnent presque tous à la marchandise, & font vne bourse commune pour cet effect, où chacun sçait quelle somme il doit mettre, & de cet argent ils achèptent ensemble non seulement des soyes, & des espiceries, mais encor des quinquailleries, & menuës nippes, comme cuilliers, esguilles, miroirs, poupees, & achèptent aussi les vins & les bleds pour les garder, & les reuendre 2. pres au double de ce qu'ils leur coustent.

Et mesme ceux cy ont lettres des Princes, par lesquelles il est deffendu de prendre ailleurs des vins, ou des bleds qu'aux lieux où se font leurs marchez, comme à Stugarol, & autres villes où sont leurs magasins. Il est vray que ce ne sont pas eux qui font le trafic, mais ils ont des facteurs qui leur rendent compte.

Quant à ceux de basse qualité, le mestier auquel il s'employent le plus, c'est à faire des roiles, à quoy ils sont tellement adonnez, que durant l'Hyuer on void en plusieurs endroits, non seulement prendre la quenouille aux femmes, & filles, mais encor aux hommes, & aux garçons, qui filent avec elles.

Ils font certain drap de lin, entretissu de coron, qu'ils nomment Pargath, & du treillis qui est tout de toile, lequel ils appellent Golsch en leur langue.

Les Sucuiens sont fort enclins à la paillardise, & les femmes y font d'aussi bonne composition que les hommes scauroient souhaiter, & l'un & l'autre sexe commence de bonne heure à se mêler de ceste besongne, & s'en retire bien tard.

Aussi il court vn commun prouerbe, que le seul pays de Suaube suffit pour fournir toute l'Allemagne de femmes qui s'abandonnent, ainsi que la Franconie de brigans & de gueux, la Boheme d'heretiques, la Bauere de larrons, la Vvestphalie de faux témoins, & de parjures, & la Marche du Rhin de gourmands.

Pour le regard de ceux de Bauere, ils sont si sales, si rudes, & si brutaux, que si l'on vient à les comparer au reste des Allemands, on les pourra iustement nommer Barbares.

Mais les vices dont ils sont plus entachez, sont la discourtoisie & le larcin. Ils s'habillent volontiers de bleu, & portent plus volontiers des botines, ou brodequins qu'autre chaussure. Les plus deuots d'entr'eux vont souuent en pelerinage à grandes troupes, sur tout à Aix la Chappelle.

L'Austriche a des Princes qui portent le titre d'Archiducs, & lors que quelqu'un parvient à ceste dignité, ils viennent de ceremonies estranges: car non guieres loin de la ville de S. Vite, en vne grande & profonde vallee, l'on void des ruines d'une ville, dont l'on ignore le nom, & pres de ces ruines en vne belle prairie est dressée vne grande pierre de marbre: ils y font monter dessus vn païsan, à quice droit eschet par succession, & qui a vne vache noire, & pleine pres de luy à la main droite; & à la gauche vne iument maigre & deffaite, & tout autour vne infinité de payfans, & d'autre peuple.

Le Duc arrive apres cela, accompagné d'une grande troupe de noblesse, & l'on porte deuant luy les habits & ornemens Ducaux, & tous ceux de sa suite sont superbement equippez: mais le Prince est vestu assez simplement, comme celuy qui porte l'habillement d'un païsan, le bonnet, les souliers, & la houlette d'un berger: si bien qu'on le prendroit plustost pour vn homme de ceste condition, que pour vn Prince.

Celuy qui est assis sur la pierre, voyant venir l'Archiduc, s'escrie en langue Esclauonne: Qui est celuy-cy qui marche si superbement? Et la multitude qui l'assiste respond, que c'est le Seigneur de tout le pays.

Lors le payfan demande s'il sera iuste en ses iugements, s'il desire le bien du pays, s'il est de libre condition, & de sang illustre, s'il merite ceste dignité, s'il gardera les commandemens de Dieu, comme bon Catholique, & deffenseur de l'Eglise.

Lors tous crient qu'ouy; & celuy qui est sur la pierre dit apres: Par quel moyen me pourrai il oster de ceste place? Lors le maistre d'hostel du nouveau Prince respond: Ce lieu sera acheté de vous par le prix de soixante pieces d'argent: ces bestes seront vôtres, & ces habits que le Duc a sur luy, & outre ce, vous & vostre maison serez exempts de toutes tailles, imposts & subsides.

Après cela le payfan frappe doucement de sa main la iouë du Duc, l'aduissant d'estre iuge equitable: & ce faict, descend de son siege, prend ses despoüilles, & se retire, & le Duc monte sur la pierre, & desgainant son espee, se tourne de tous costez, & promet au peuple tout deuoir de bon Prince, & de iuge equitable.

Quelques vns tiennent qu'on luy porte encore de l'eau dans vn chapeau de villageois, & qu'il en boit pour assurance de sa future sobriété. De là ils vont à l'Eglise voisine du lieu, dediee à la Vierge Marie, & le Duc y assiste au saint service avec toute sa troupe.

Les ceremonies estans finies, le Prince despoüillant son habit rustique, prend celuy de Duc, & festine avec sa noblesse.

Après disner on reuiet au pré, où le Duc oyt les complaints d'un chacun, & fait droit à tous receuant la foy & l'hommage de tous ses vassaux & subiets. Les payfans ont ce priuilege d'investir le Duc de la dignité, pource que ce furent les premiers qui receurent l'Euan-gile en ceste contrée.

Ils ont vne estrange façon de proceder contre les larrons, & ce vers le quartier où est assise la ville de Klagen. Si vn homme est soupçonné de larcin, il est soudain pendu & estranglé, puis on luy fait son procez: & s'il est trouué innocent il est despendu & enterré, & ses funeraïlles sont faites aux despens de la communauté de la ville: mais s'il est iugé coupable, on le laisse au gibet, iusques à tant qu'il tombe par pieces à terre.

L'habillement des Carinthiens est de laine sans aucune teinture, & ceux-cy portent ordinairement des chapeaux, & parlent tous Esclauon. Mais les Stiriens sont grossiers & rudes, & ont tous de si grosses loupes autour du gosier, qu'elles les empêchent de parler.

Ceux

Ceux-cy toutesfois imitent les Allemands en façons de faire, & en habillemens, & mesme en parole, excepté ceux qui se tiennent le long de la rivièrè du Drauu, qui vsent de la langue Esclauonne.

Quant à ceux de Bohème ils ne parlent Allemand, mais Esclauon: toutesfois on en trouue plusieurs qui vsent encores aujourd'huy de la langue Allemande, principalement en preschant.

Ce peuple ne fut iamais lié en general d'aucune loy qui les achemine à la vertu, ains la volonté a seruy de loy à chacun d'eux. Ils sont au reste grands, ont l'estomach large, & les cheveux blonds, sont ambitieux, glorieux, arrogans, mesprisent les autres, & ne sont guieres differents des Allemands en tout le reste.

Pour conclusion, les peuples d'Allemagne font profession d'estre fort loyaux, & pour dire vray, ils sont plustost nez à la simplicité qu'à la ruse, laquelle ils ne sçauent pas imaginer d'eux-mesmes: mais en vn pays estranger ils sont d'autant plus propres à tromper les autres, quel'on se desfie moins d'eux, & l'on peut dire que la châteté est plus louée, que gardée en ceste Prouince.

Ce n'est pas parmy eux vn vice de s'enyrer, & mesme ils disent que les fins & trompeurs ont introduit l'abstinence du vin, afin de ne descourir leurs mauuaises pensées apres auoir beu.

RICHESSES.

L'Allemagne ne peut faillir d'estre riche, puis qu'elle a tant de belles mines d'argent, & 14. de tous metaux, voire mesmes d'or, plus que toute autre Prouince de l'Europe, & qu'outre ce, qu'elle est fertile en beaucoup d'endroits, elle est fort marchande, pource que les Allemands sont plus soigneux de trafiquer que toute autre nation, & s'addonnent à diuers arts & mestiers: si bien qu'ils font des ouurages merueilleux & rares.

Dauantage, elle est naturellement pourueue de plusieurs grosses riuieres nauigables: tellement que les viures & les marchandises se transportent aisément d'un lieu en vn autre.

Outre ce, la nature luy a encore fait ce bien de luy donner en des lieux fort esloignez de la mer, des fontaines & des puits d'eau salee, laquelle ils font cuire, & en tirent du sel parfaitement bon.

Ils tirent de l'argent de leur pois, & de leurs vins qui sont portez loing de leur pays. Leurs foires sont aussi considerables, principalement celles de Francfort, où il arriue des marchands de toute l'Europe, & mesme quelquefois d'Afrique & d'Asie.

L'Alsace fait beaucoup de deniers de son argent, de son cuiure, & de son plomb: la Franconie de ses vins, & de sa reglisse, dont l'on charge de grands chariots qu'on meine aux pays estrangers: la Morauie de son encens, & de sa myrrhe: la Bauiere de ses pourceaux gras qu'elle enuoye en diuers endroits del'Europe, de mesme que de son autre bestail, & du froment & du sel, dont elle a force fontaines: & semblablement d'une grande quantité de fer & de cuiure, qu'on enuoye au Danube toutes les sepmaines, & qu'on distribue apres à diuerses parties de l'Europe. Quant à l'Austriche, elle tire aussi de grandes sommes de l'argent de ses mines, de mesme que la Comté de Tirol, qui abonde aussi en cuiure.

Le pays de Iuliers tire beaucoup d'argent de sa guesde, qui est propre aux teinturiers: celui de Hesse enuoye dehors force laines, & pareillement de l'or, & de l'argent, du cuiure, du vif argent, du fer, du plomb, du sel, & de l'alum, en grande quantité.

La Turinge reçoit aussi de grandes commoditez de sa guesde, & la Misne de l'or de ses mines. Bref à parler generalement del'Allemagne, elle ne cede en richesses à aucune Prouince del'Europe.

Mais pour venir au particulier, il faut sçauoir que les reuenus des villes, & des Princes seculiers, sont grandement accrez par le moyen de l'vsurpation des biens d'Eglise, & des charges imposees sur le peuple.

Mais pour le regard des reuenus de l'Empereur, premierement les villes franches, qui sont en nombre de 60. & estoient autrefois 96. sont obligees de contribuer les deux quinty, ou cinquiemes, de ce qu'on resout aux Diettes: mais entre celles cy il y en a quelques-vnes qu'on appelle Imperiales, pource qu'elles payent à l'Empereur certains cens, qui se montent en tout quinze mille florins, ou francs.

Ces villes ont toutes d'assez bons reuenus, qui surpassent de beaucoup la despence, & l'on estime que l'Empire a plus de sept millions de rente en tout; de quoy l'on ne doit faire peu d'estat, pource que les peuples n'estans pas chargez comme en Italie, donnent, outre

l'ordinaire, de fort gros subsides, quand la necessité le requiert, à leurs Princes.

L'Empire est obligé, au moins par coustume, de payer à l'Empereur, quand il va à Rome pour recevoir la Couronne, vingt mille hommes de pied, & quatre mille chevaux, pour huit mois, & cecy s'appelle l'Ayde de Rome, dont l'Empereur peut embourser vne bonne partie.

Quelquesfois aussi on octroye à l'Empereur des expéditions contre les heretiques, tantost contre les Turcs, en vertu desquelles il a leué vne fois quatre cens mille florins, ou francs.

En fin l'Empereur a mieux de quoy que beaucoup de gens ne se persuadent, veu qu'il tire seulement de l'Alsace, de la Suzube, & du pays des Grisons, où la maison d'Autriche a quatorze communautéz qui sont sous la jurisdiction, environ 2. millions & demy de rente ordinaire, & autant d'extraordinaire.

FORCES.

Avant qu'entrer plus avant, il sera bon de considerer quelles forces les Empereurs précédens ont tiré de l'Allemagne, puis que c'est d'elle presque toute seule qu'ils les peuvent auoir. Charles V. eut environ 90. mil hommes de pied, & 30. mille chevaux, lors qu'il alla à Vienne contre les Turcs, & mesme il y en auoit beaucoup de ceux-cy qui estoient d'Espagne, ou d'Italie.

Maximilian I. auoit pres de cent mille hommes de pied, & trente cinq mille chevaux, à lauarin contre les mesmes Turcs, sans que l'on y vist iamais deffaut, ou cherté de viures. Lors que l'Empereur Charles V. faisoit la guerre aux Protestans les deux armées qui tindrent quelques mois la campagne, estoient composees d'environ cent cinquante mille hommes.

Et pour en parler à fonds, les forces d'Allemagne sont veritablement fort grandes, à cause qu'ils ont les viures en grande abondance, & que le moyen d'vuir les forces est aysé, à cause des riuieres qui s'y trouuent.

Quant aux gens, l'on croit que l'Empire peut mettre en campagne deux cents mille hommes en tout, dont l'on a veu l'experience en ce que nous auons desia dit, & encores en d'autres occasions.

Car depuis l'an 1560. l'on n'a presque iamais cessé de faire la guerre en France, & aux pays Bas, avec vn bon nombre d'Allemands, dont on a fait souuent de grosses leuees, tant d'infanterie, que de caualerie.

En mesme temps on vit mener en France, au Duc des deux Ponts, douze mille hommes de pied, & huit mille Reistres pour ceux de la Religion, & d'autre costé il y auoit cinq mille chevaux Allemands sous le Duc d'Aumale, & deux mille sous le Comte de Mansfeld pour les Catholiques: & Guillaume de Nassau auoit aux frontieres de Flandres, & de France huit mille chevaux, & dix mille Fantassins de ceste mesme nation, & le Duc d'Albe trois mille.

Je laisse à part le nombre des Allemands qui entrerent aux Pays Bas sous la conduicte de Casimir, & en France sous le mesme, l'an 1587. & depuis bien souuent.

Finalement en quelque endroit de l'Europe qu'on face la guerre, il y a tousiours force Allemands, au nombre desquels ie ne mets pas les Flamans, qui ont fait quelquefois des armées de huitante mille hommes, ny les Suisses qu'on estime pouuoir faire six vingts mille hommes de pied pour leur deffence, & qui en ont quelquefois enuoyé dehors trente mille, comme ils firent lors qu'il fut question de deffendre l'Estat de Milan contre le grand Roy François.

Mais retournons à nostre discours, la meilleure Infanterie Allemande vient des pays de Tirol, de Sueue, & de Vvestphalie, & la meilleure Caualerie est celle de Brunswic, mais beaucoup plus celle de Cleues, & de Franconie.

Ils manient beaucoup mieux l'espadaon, la picque, & l'espieu, que l'arquebuse. Ils réussissent grandement aux batailles, & en plaine campagne, tant pour rompre, que pour soutenir l'ennemy.

En quoy ils sont aydez de l'ordonnance qui leur est presque naturelle, & de leur façon de marcher graue, & lente, & des armes de deffences dont ils vsent.

Mais il faut qu'ils ayent vn chef de quelque autre nation, qui se sçache seruir accortement de ce qu'ils ont de bon; pource qu'on a veu rarement qu'ils ayent fait quelque chose digne de leur gloire ancienne sous la conduite d'vn chef Allemand.

Ils ne sont pas propres aux assauts, à cause qu'ils sont ordinairement pesants & chargez de cuisine, comme on dit.

Ils

Ils sont plustost constans, que hardis, & furieux, que vaillans: veu qu'ils n'entreprennent chose où ils facent paroistre vn grand courage, & lors qu'ils sont victorieux, ils tuent sans esgard d'age, ny de sexe, tous ceux qu'ils rendent ontrent: & si la guerre dure, & qu'ils soient assiegez, ils se rendent bien tost, & s'ils campent, ils ne peuvent auoir la patience de chercher la victoire en temporisant.

Si le premier effort ne leur reüssit, ils demeurent comme stupides, & n'entreprennent plus outre: s'ils sont vne fois rompus, & mis en fuite, ils ne se remettent iamais plus.

Leurs armées sont de grande despence, & de grand empeschement, pource qu'ils meinent leurs femmes à la guerre, & consomment tant de viures, que c'est chose malaisée de les conduire, & impossible de les maintenir, & l'on sçait assez qu'on ne peut rien esperer de bñ sans les viures.

Leurs chevaux sont aussi plustost forts que courageux: & pource que de dix chevaux qu'ils meinent à la guerre, il y en a huit qui partent de la charruë, & du labourage, ils ne font pas bon seruice à leurs maistres, & deuiennent lasches en voyant le sang: au contraire des genets, qui prennent alors plus de courage, & pour conclusion l'Infanterie Allemande vaut plus en son genre, que la Caualerie.

Or les forces de la mer ne sont pas moindres que celles de la terre, combien qu'elles ne soient pas tant employées, veu qu'il y a des villes qui ont les vnes cent, les autres cent cinquante vaisseaux, par le moyen desquels ils peuvent faire teste aux forces des Roys de Danemarck, & de Suede.

L'Allemagne est si puissante avec toutes ses foyes, qu'estant bien vnée, elle ne peut craindre aucun ennemy.

Il faut adiouter à ces forces en ces necessitez, les secours des Princes d'Italie, de Sauoye, & de Lorraine.

Ces Princes n'ont iamais manqué aux Empereurs au besoin; & en la guerre de Segeth Emanuel Duc de Sauoye, enuoya à l'Empereur 600. arquebusiers à cheual, Cosme Duc de Florence trois mille hommes de pied soudoyez.

Alfond second Duc de Ferrare y alla en personne avec quinze cens chevaux bien en ordre, qu'il n'y auoit point de meilleure caualerie en ceste armée.

Le Duc Guillaume de Mantoue y alla aussi avec beaucoup de gens fort alestis de mesme que Henry de Lorraine Duc de Guise avec trois cens gentils-hommes. De sorte qu'avec ces troupes, & celles que le Pape Pie cinquième y adiusta, Maximilian second (à qui l'Empire, en vne Diette tenuë l'an 1566. à Ausbourg, auoit accordé quarante mille hommes de pied, & huit mille chevaux pour huit mois, & 20. mille Fantassins, & quatre mille chevaux pour les trois années d'après) eut sous ses enseignes outre les garnisons, cent mille hommes de pied, & trente cinq mille chevaux.

Mais il y a deux choses qui manquent à l'Empire; dont l'une est l'union des courages, l'autre la promptitude des forces.

Les courages sont des-vnis; tant pour le soupçon que les villes franches ont des Princes, qu'à cause des différentes Religions qui donnent de la des fiance aux vns & aux autres, veu qu'outre le debat ordinaire des Catholiques avec les heretiques, ces derniers sont encore tellement contraires entr'eux, qu'ils se hayssent furieusement les vns les autres, de sorte que les Lutheriens veulent vn mal mortel aux Calvinistes, aux Anabaptistes, & autres; & ceux-cy leur rendent le change.

A raison dequoy tous viennent fort froidement aux Diettes; & y estans, employent plus de temps aux choses qui concernent la Religion, qu'en celles d'Estat.

La promptitude leur manque pareillement, pource qu'il est assez malaisé de faire assembler les Diettes, sans lesquelles on ne peut rien faire, & il faut laisser passer 3. mois depuis le iour de la signification de la tenuë de ces Estats, ou Diettes, iusques aux Diettes mesmes, & lors que tous sont assemblez, l'on perd beaucoup de temps, à cause de la diuersité & contrariété des opinions, & les resolutions prises, sont executées fort lentement, combien que la guerre requiere la diligence, & les occasions eschappent en vn moment.

Il y a encorés vn autre inconuenient, c'est à sçauoir que lors que l'on a deliberé de donner tant de gens à l'Empereur, pour tant de temps, ils ne sont iamais tous ensemble, pource que quand les vns s'acheminent à l'entreprise, les autres estans desia au bout de leur terme s'en retournent chez eux; & les autres ne sont encorés mis en campagne.

Tellement que l'Empereur ne peut iamais faire Estat assésuré du secours qui luy a esté promis. Maximilian second pensoit de remedier à cet inconuenient, qu'il auoit esprouué en l'entreprise de Segeth en se faisant donner ce secours, non pas en hommes, mais en argent, pource qu'il croyoit qu'il feroit marcher avec l'argent toutes les gens dont il auroit besoin,

ou du moins *une* bonne partie. Mais c'est folie de penser que l'on puisse venir l'Allemagne, ou que l'on puisse effectuer aucune chose d'importance, tandis que des opinions la tiendront ainsi divisée.

Pour conclusion, il ne faut estimer pour toutes les choses dites cy-dessus, que l'Empereur soit foible, comme quelques ignorans aux affaires du monde voudroient faire croire: car il a beaucoup de pays, & beaucoup de gens, grande quantité de viures, & assez d'argent pour fournir à quelque entreprisse.

Mais tout son mal vient du voisinage du Turc, qui le confine depuis les monts Carpathiens, jusqu'à la mer Adriatique, & qui est capable non seulement d'affoiblir, mais encores de consumer de plus grandes forces que les siennes.

Et de fait on void assez que tous les Princes voisins des Ottomans par terre, demeurent espuisés d'argent, tandis qu'ils ont la paix avec eux, à cause des grands frais qu'il leur faut faire aux fortifications, & à l'entretien des garnisons; & entrent encores en plus grande despence durant la guerre: car le Turc a de si grandes forces, & si promptes en toute saison, qu'il est mieux armé en temps de paix, que la plus grande partie des autres Princes n'est en temps de guerre.

Tellement que ceux qui le confinent, doivent estre tousiours en alarme, & auoir crainte d'un ennemy si puissant. Or auant que l'Empereur remist le Royaume de Hongrie à l'Archiduc Matthias, qui en est maintenant Roy, il entretenoit aux frontieres pres de vingt mille soldats, & outre ce, il faisoit de grands frais à fortifier, & à d'autres choses.

Maintenant il a un peu retranché de ceste despence, tant à cause qu'il l'a laissé faire au Roy Matthias, qu'à raison qu'il a trefue avec le Turc. Toutesfois il faut qu'il fournisse tousiours beaucoup de choses à ce nouveau Roy, qui n'est encores bien installé, & a trouué des dissensions en son Royaume.

GOVERNEMENT.

CE fut le Pape Gregoire V. qui institua les sept Eslecteurs. Et combien que Charles le Grand par l'ordonnance du Pape, mist l'Empire à l'eslection des Princes d'Allemagne, toutesfois cela n'eust lieu qu'après que la race de Charles fut faillie, veu que tandis qu'elle dura, le fils succeda à l'Empire au pere: mais le Statut de Gregoire V. qui vint à forclorre tout droit de succession, mist l'Empire à la libre eslection de sept Princes, l'an de grace 1002. Le suiet qui conuia le Pape à rendre eslectif l'Empire, qui estoit demeuré hereditaire en la maison de Charles le Grand, fut pource que Otton III. n'eust aucuns enfans: mais les causes en furent diuerses, car en premier lieu l'Empire estant grandement affoibly, le Pape, & l'Empereur pensèrent qu'ils le remettroient, & fortifieroient par le moyen du personnage qui seroit esleu sans esgard de succession: & après cela on voulut assoupir les dissensions qui procedoient du trop grand nombre des Eslecteurs.

L'Empereur est donc chef de l'Empire, & a sous luy trois membres, aux assembles desquels l'on consulte, & prend resolution de toutes les affaires de l'Empire.

Le premier est celuy des sept Eslecteurs, qui sont

L'Archeuesque de Mayence, grand Chancelier de l'Empire en Allemagne, qui a en sa Chancellerie toutes les Escritures des Diettes.

L'Archeuesque de Treues, grand Chancelier de l'Empire de France.

L'Archeuesque de Cologne, grand Chancelier de l'Empire en Italie.

Le Roy de Boheme, grand Eschanson de l'Empire.

Le Comte Palatin du Rhin, grand Escuyer tranchant, ou plustost grand Maistre de l'Hostel de l'Empire.

Le Duc de Saxe grand Marechal, & Iuge de la Cour, qui porte l'espee deuant l'Empereur.

Le Marquis de Brandebourg, grand Chambellan de l'Empire.

Ceux cy ont pleine puissance d'eslire l'Empereur, afin que nul ne s'attribuë la dignité Imperiale comme hereditaire.

Le second membre est des grands, & des nobles, qui sont,

Les Archeuesques de Magdebourg, de Saltzbourg, de Bezançon & de Breme.

Les Evêques de

Bamberg.
 Vvurtzburg.
 Vvornis.
 Spire.
 Strاسبurg.
 Eichstätt.
 Pr. Auspurg.
 Costantz.
 Hildeshim.
 Paderbon.
 Chur.
 Halberstat.
 Ferden.
 Munster.
 Oseburg.
 Passau.
 Frisingen.
 Kempse.
 Gurck, ou Goritz.
 Seckavu.
 Hauande.
 Basle, ou Basel.
 Sitten, ou Vvallis.
 Regensburg.
 Maissen.
 Naumburg.
 Minden.
 Lubeck.
 Vvtricht.
 Camin.
 Sverin.
 Geneue.
 Canuerick, ou Cambray.
 Verdun.
 Losanne.
 Metz.
 Toul.
 Luyck.
 Treng.
 Brixen.
 Merspurg.
 Labach.
 Vienne.
 Bradembourg.
 Ratzenbourg.
 Schelesvick.
 Hauelburg.

*Les Princes & Seigneurs
seculiers*

Le Duc de Baviere.
 L'Archiduc d'Autriche.
 Le Duc de Saxe.
 Le Palatin de Baviere.
 Le Duc de Juliers, de Cle-
 ues, & de Berg.
 Le Marquis de Brande-

bourg.

Le Duc de Brunswic.
 Le Duc de Lunenbourg.
 Le Duc de Pomeran.
 Le Duc de Mekelbourg.
 Le Duc de Launenbourg.
 Le Duc de Holsten.
 Le Duc de Lorraine.
 Le Langraue de Hessen.
 Le Duc de Vvittenberg.
 Le Duc de Zvveybrug.
 Le Duc, & Comte de Span-
 heim.
 Le Marquis de Bade.
 Le Landgraue de Luechtberg.
 Le Prince d'Anhalt.
 Le Comte de Hennenberg.
 Le Burgraue de Messen.

Les Ecclesiastiques.

Le Prince, & Abbé du Fuld.
 Le Pr. & Ab. de Hiersfeldt.
 Le Pr. & Ab. de Kempten.
 L'Ab. de Reichenavv.
 Le Pr. Preuost de Vvisséburg.
 Le Pr. A. de saint Gal.
 Le Pr. A. de Salisfeldt.
 Le Pr. Preuost d'Elvvangen.
 Le maistre de l'ordre des Fr.
 Teutoniens.
 Le Maistre de l'ordre des Che-
 ualiers de saint Jean.

Les Abbez de

Vvaingarten.
 Salmansveiller.
 Kreutzlingen.
 Murpach.
 Vvalkenriedt.
 Schurtern.
 Vveissenovv, ou Minderavv.
 Saint Blaise.
 Maulprun.
 Le Pr. & Ab. de Corbey.

Les Abbez de

Schussenriedt.
 Rittershausen.
 Steinam Rhin.
 Scafhafen.
 Kempefeck.
 Vvaldsachsen.
 Finsideln.
 Rockembourg.
 Ochsenhausen.
 Le Preuost de Selts.

Les Abbez de

Saint Gilen de Noremberg.
 Nuembourg.
 S. Maximin pres de Treues.
 Heueldshausen.
 Si Jean-Curtel.

K x x

Gengenbach.
 Konisbrun.
 Rodt, ou Roden.
 Markthal.
 Rockenhausen.
 S. Pierre im Schwartwald.
 Le Preuoſt d'Odenheim.
 Le Prince, & Abbé de Stable.

Les Abbez de

Saint Didier.
 Berkenhausen.
 Elchingen.
 Hentzingen.
 Vtlenis.
 Plankembourg.
 Yſſul.
 Pfeſſers.
 S. Iean en Thurtal.
 Peteshausen de Conſtance.
 Pruim.
 Reishaim.
 S. Heimeran de Ratiſbonne.
 S. Gregoire de Munſter.
 Muncherode.
 S. Corneille de Munſter.
 Vverden.
 Auriſperg.
 Yrſe.
 Brun.
 Echternaken.
 Heruorden.

Les Preuoſts de

Camberg.
 Berchtolſgaden.

Les Abbeſſes de

Quedelnbourg.
 Ellen.
 Alt. Munſter to regensburg.
 Pr. Ober Munſter to Regens-
 burg.
 Kauffingen.
 Lindovv.
 Pr. Gernrode.
 Buchavv.
 Rorenmunſter.
 Hippach.
 Gutenzel.
 Beundt.

Baley. { Coblentz.
 { Elſas.
 { Oſterich.
 { In der Ertſch.

Les Comtes de

Heſſenſtein.

Kirchberg.
 Vviſenſtaig.
 Lauffen.
 Montfort.
 Furſtemberg.
 Zimmeren.
 Otingen.
 Sultz.
 Hohen Zollern.
 Caſtel.
 Vertheim.
 Reineck.
 Hohenloe.
 Erpach.
 Leininghen.
 Falckſtein.
 Hanavv.
 Luchtemberg.
 Naſſavv, Breda, & Dilem-
 borg.
 Vviſbaden, & Iltztain.
 Salbrucken.
 Vvaldtpurg.
 Naſſau en Vveilpurg.
 Beilſtein.
 Konigſtein & Epſtein.
 Eiſenberg le haut.
 Eiſenberg le bas.
 Merſen.
 Budighen.
 Vvirmemberg.
 Solms.
 Arſnberg.

*LES COMTES DV RHEIN.**Les Comtes de*

Horn.
 Seyn.
 Vvintzlingen.
 Reyen.
 Biſtch.
 Salm.
 Vveldentz.
 Dengen.
 Rappin.
 Hardech.
 Hohenſtein.
 Vvolkenſtein.
 Schaumburg, & Giengen.
 Dieremburg, & en Some-
 ravv.
 Manſfelt.
 Stolberg.
 Buchlingen.
 Barbey, & Mullingen.
 Gleichen.
 Schwartzburg.
 Suemberg.

Iud,

Iud, Seigneur de Kuech.

Ples.

Plavven.

Vveda, & Ringelberg.

Olnbrug.

Lochenstain.

Regestain.

Vvestfreislandt.

Ostfreislandt.

Vander Lipp, ou de la Lippe

Oldenburg.

Hofe.

Delmonhorst.

Vvestemburg.

Munzemburg.

Lemgovv.

Vvaldeck.

Diepholt.

Steinfort.

Benthem.

Brunchorst.

Vuitgenstein.

Spigelberg.

Biuerldorff.

Teckeloborg.

Dortmund.

Vvindorff.

Rippershoden.

Hagen, ou de la Haye.

Hoonfels.

Leiseneck.

Bergen.

Mandercheid.

Reiferscheidt.

Egmont, & Isselstein.

Tubinge.

Blankenberg, ou Blanmont.

Kirchungen, Krehanges.

Les Barons de

Cundelzingen.

Geroltzeck.

Ober Heuen.

Rapolestain.

Strauffen.

Degenberg.

Obersulzberg.

Tautenberg.

Sonnenberg.

Vinenberg, ou Vanneberg peut estre

Les Seigneurs de

Tussen.

Stugart.

Iutlingen.

Schenningen.

Rapoltskirchen.

Hohen Rechperg.

Berletick.

Hohen Konigsparg.

Hohenfeldt, & Tipoltzkirch.

Braides.

Reichelsperg.

Limburg.

Kunsech.

Kunseckerberg.

Geravv.

Reichenstein.

Muntzenburg.

Lostenstein.

Ridberg.

Linge.

Somiriff.

Bergen, & Vvaelheim.

Vvidenfels, ou peut estre Vvider-

fels.

Haber, ou Hauer.

Senster.

Roggendorff.

Alendorff.

Kunigfuckerberg.

Morspurg, & Befort.

Brandenstein, & Ransf.

Vvolffstein.

Permont.

Fronsbek.

Flackenstain.

Vvitten.

*Le troisieme membre de l'Empire est celui des villes
franches, qui sont*

Aix la Chappelle au pays de Juliers.

Anvers au Duché de Brabant.

Ausbourg au pays de Suabe.

Basle en Suisse & à present Cantons non

Berne en Suisse ^{contribuables.}

Byberach en Suabe.

Boppert sur le Rhin.

Boichorn.

Campen en Oueryssel.

Cologne sur le Rhin.

Colmarc en Elsat.

Constance en Suabe.

Deuenter en Oueryffel.
 Dortmund en Vvestphalen.
 Dunkelspöel en Suabe.
 Deyren en Iuliers.
 Euer en Berinvvout.
 Ertfort en Turinge.
 Eslinge en Suabe.
 Francfort sur le Meyn.
 Francfort sur l'Oder.
 Fridberch en Vvederevvavre.
 Friburch en Brisgavvre.
 Gheylhuysen en Vvedevvæ.
 Ghinghen en Suabe.
 Gortinghed en Saxe.
 Groeninghen en Frise.
 Gemunde en Suabe.
 Hagenau en Elsatén.
 Halle en Suabe.
 Halle en Turinge.
 Helpron en Suabe sur Neckar.
 Hamburch en Oostlande.
 Heydesfelt.
 Innen.
 Ingelsheim au dessus de Rhincan.
 Kaufstouren.
 Keyfersberch.
 Keyferslutern en Vvestryck.
 Kempen en Suabe.
 Kuyr en Svits.
 Landau pres de Spyere.
 Lindauv en Suabe.
 Lubeeck en Saxe.
 Lucerne en Suisse.
 Luneburch en Saxe.
 Meydenburch en Saxe.
 Memminghen en Suabe.

Metsen Lorraine, à present France.
 Mayence sur le Rhin
 Mulhuysen en Turingen.
 Mulhuysen en Sonckauere.
 Noorthuysen en Turingen.
 Neurenbergh.
 Nymegen en Geldre.
 Noorlingen en Suabe.
 Oderneheym sur le Rhin.
 Oppenhen sur le Rhein.
 Pollendorp.
 Poppinghen en Suaben.
 Ravesburg.
 Regensburg en Baviere.
 Rorenburg sur le Tuber.
 Rosem ou Rosheym.
 Rootvvyl en Suaben.
 Sainct Gal en Suisse.
 Sleystant en Elsaté.
 Spyers sur le Rhin.
 Svynfort en Franconie.
 Treves sur la Moselle.
 Vverlinghen en Suaben.
 Vveerde sur le Danube.
 Vlm en Suabe.
 Vvanghen en Suabe.
 Vvelsel sur le Rhin.
 Vvelsen Cleues.
 Vetzelaer en Hessen.
 Vvyle en Suabe.
 Vvimpfen sur le Neckar.
 Vvynsheym en Franconie.
 Vvyssenburch.
 Vvorms sur le Rhin.
 Zurich en Suisse.
 Zvvolen Overysfel.

Outre cet ordre des trois membres, afin d'empescher les diuisions de l'Empire, & pour
 conseruer vne paix commune en Allemagne, les Prouinces de l'Empire ont esté diuisees en
 quelques Seigneuries qu'ils appellent cercles, où sont les Conseils particuliers de l'Empire.
 On institua premierement six cercles à Ausbourg l'an 1500 puis dix l'annee 1522. à Norim-
 berg. Or chaque cercle eslit de son corps vn Gouverneur seculier ou plustost intendant du
 Conseil, qui est Prince, Comte ou Baron, ou gentil-homme fort releué, à qui l'on donne
 du mesme corps six Conseillers, hommes seculiers, honorables, & fort aduisez.

Le premier cercle est celuy de Fran-
conie.

Le second de Baviere.

Le 3. d'Austriche.

Le 4. de Suabe.

Le 5. du Rhein.

Le 6. des Electeurs du Rhein.

Le 7. de la basse Allemagne, ou de Vvestpha-
lie.

Le 8. de la haute Saxe.

Le 9. de la basse Saxe.

Le 10. de Bourgongne.

Outre ces conseils des Cercles, afin de iuger comme il faut les causes de plus grande
 importance, on a institué la chambre Imperiale de Spire, dont le chef, ou souuerain iuge
 est Prince, ou du moins Comte, ou Baron seculier, si l'on en trouue quelqu'un qui soit ca-
 pable de ceste charge.

On a donné à cestuy. cy six assesseurs: à scauoir deux Comtes, ou Barons, deux Iurif-
 consultes, & deux Cheualiers, que l'Empereur y met à raison des terres qu'il possede heredi-
 tairement en l'Empire. Chaque Electeur y en a encor mis vn, & chaque cercle deux, & tous
 ces Assesseurs, ou Cōseillers sont moitié Iurifconsultes, moitié choisis entre les Cheualiers.

Or quant à ce que nous auons dit des membres de l'Empire, & des officiers, Munster
 dit qu'apres les sept Eslecteurs on ordonna 4. Ducs, 4. Marquis, 4. Landgraues, 4. Bour-
 graues, 4. Comtes, 4. Barons, 4. Cheualiers, 4. villes, 4. villages, & 4. paylans.

Et

Et encores les Empereurs non contents creerent à plusieurs fois d'autres Ducs, & de nouveaux Comtes, & qui plus est ont erigé plusieurs Comtez en Duchez, combien que par succession de temps plusieurs Duchez ayent esté abolies, comme celles de Souabe, de Limbourg, de Zeringen, de Voitrland, & quelques autres.

Les charges & dignitez reduites au nombre de quatre.

Les quatre Ducs.

Brunswic.
Bavieres.
Souabe.
Lorraine.

Les quatre grands Mareschaux.

Bappenheim.
Juliers.
Misne.
Vinstinge.

Les quatre Landgraves.

Turinge.
Hessen.
Luchtemberg.
Alface.

Les 4. Bourgraves.

Meidenbourg.
Nurnberg.
Reneck.
Stronbourg.

Les 4. Comtes chefs de guerre.

Flandre.
Tirol.
Aldenbourg.
Ferare.

Les 4. Abbbez principaux.

Fuld.
Kempten.
Vvisslembourg.
Murbach.

Les 4. Bourgs de l'Empire.

Aldenbourg.
Meidenbourg.
Rotembourg.
Meckelbourg.

Les 4. Cheualiers.

Andlau.
Meldingen.
Strondeck.
Fronberg.

Les 4. villes metropolitannes.

Auxbourg.
Aix la chappelle.
Metz. Lubec.

Les 4. Villages.

Vlme.
Bamberg.
Haguenau.
Selestad.

Toutesfois plusieurs de ces dignitez sont changees, ou du tout abolies par la mort de ceux qui les possedoient.

Les seances aux Diettes doivent estre telles.

Les 4. Rustiques.

Cologne.
Ratisbone.
Constance.
Saltzbourg.

Les 4. Marquis.

Mein.
Brandebourg.
Moraue. La basse Badé.

Les 4. Comtes.

Cleue.
Schvvartzembourg en Saxe.
Cilie, ou Gretz.
Sauoye.

Les 4. Seigneurs.

Milan.
Scale.
Padouë.
Mirandole.

Les 4. montagnes de l'Empire.

Murnenberg.
Friberg.
Heidelberg.
Nurnberg.

Les 4. Barons.

Limpourg en Franconie.
Thulsi & Raconie Seig. de Tockembourg.
Vvvesterbours.
Aldenuaden.

Les 4. possessions de l'Empire.

Ingelheim.
Altdorff.
Liechtenau.
Dencckrendorff.

Les 4. Veneurs.

Hurn.
Vrach.
Schombourg.
Metsthpres de Coures.

Les 4. offices hereditaires de Souabe.

Le Trenchant de Vvalpourg.
L'Eschanfon de Radach.
Le Mareschal de Maredorf.
Le Chambellan de Kemnat.

Les 4. seruiteurs.

Vvaldeck.
Hirten de Fulchen.
Arnsperg.
Rabnau.

Quand l'Empereur est assis l'Archevesque de Treues doit estre assis viz à viz de luy, l'Archevesque de Mayence à son costé droit & l'Archevesque de Cologne à gauche.

Le Roy de Boheme lors que ce Royaume n'appartenoit pas à l'Empereur, estoit à la main droite de l'Archevesque, le Comte de Palatin du Rhin doit estre assis pres de luy, puis le Duc de Saxe à la main gauche de l'Archevesque, & pres de luy le Marquis de Brandebourg.

Quand on fait des processions publiques ils doiuent garder cet ordre.

L'Archevesque de Treues doit aller deuant l'Empereur, & les deux autres le costoient l'un deçà l'autre delà, & le Roy de Boheme suit incontinent apres.

Or l'Archiduc d'Autriche, comme Prince de l'Empire n'a point de place entre les Princes seculiers à cause du differend de la presence, mais entre les Ecclesiastiques qui precedent.

En la Diette d'Ausbourg tenuë l'an 1548. toutes les Prouinces de Bourgogne furent mises sous la protection de l'Empire, & la place du Prince de ce pays fut assignee particulièrement entre les Ecclesiastiques, combien qu'en la Diette de Ratisbonne qui se fit depuis le Roy d'Espagne n'enuoya pas vn homme en sa place.

Le Duc de Lorraine s'ouloit estre tenu pour Prince de l'Empire, mais maintenant ceste maison est passée en France.

Les Citez franches de l'Empire qui ne cognoissent point d'autre Seigneur que l'Empereur, vivent avec leurs loix & presque toutes ont vn estat populaire, & meslé, combien qu'en quelques vnes, entre lesquelles est Morember, les Principaux gouvernent. Leur forme de gouvernement n'estoit pas au commencement en grande estime, lors qu'avec argent, ou faueur elles acquirant leur liberté des Empereurs, ou des Princes qui les dominoient.

Il n'y a personne qui puisse estre nommé Empereur si le Pape ne l'a couronné: mais il peut bien estre appellé Cesar, ou Roy des Romains, ou Roy de Germanie, s'il a esté esleu par les Electeurs.

L'Empereur ne commande pas absolument en l'Allemagne, ains la gouuerne par la voye des Diettes; à raison de quoy il est plus, ou moins puissant, selon que pour obtenir quelque chose aux Diettes, il empesche ou n'empesche pas que lon luy contredie, se faisant aymer, & craindre tout ensemble.

Les trois Estats viennent aux Diettes, & de ceux cy on fait trois Conseils.

Les electeurs entrent au premier, & quand le Roy de Boheme se trouue autre qu'Empereur il ne vient pas aux Diettes, & est absent des consultations, & plustost arbitre qu'Electeur: d'autant que si les voix des autres sont esgalement diuisees, c'est à sçauoir qu'il y en ait trois d'un aduis & trois d'un autre, celui à qui il donne sa voix est esleu.

Le second Conseil est composé de tous les autres Princes tant seculiers qu'Ecclesiastiques auquel entrent aussi deux pour tous les autres, & deux autres pour tous les Comtes, & Barons de l'Empire. Le troisieme Conseil est des villes.

L'Empereur, ou le Roy des Romains propose à tous ceux cy que bon luy semble, & chaque Conseil se retire pour voir ce qu'on doit resoudre sur les choses proposees.

Mais quant aux villes, encor qu'elles puissent dire leur opinion par maniere de Conseil, elles n'ont toutesfois aucune voix aux deliberations. Le Conseil des Electeurs est le dernier à dire son aduis, & le plus estimé.

L'Estat de l'Allemagne est maintenant fort peruertie, de sorte que si l'Empereur publie vne Diette les Princes n'y veulent pas venir, & y mandent leurs Agens, auxquels ils ne donnent autorité de resoudre aucune chose, s'ils ne sont premierement aduertis de ce dont on veut traiter, & pour cette cause on expedie fort peu d'affaires.

RELIGION.

^{29.} L'Allemagne fut infectée d'heresie en ceste maniere. Luther commença de s'esleuer contre l'Eglise l'an mil cinq cens dix-sept, à quoy il fut poussé par l'envie conceüe contre les iacobins, que le Pape Leon dixiesme auoit preferez en la publication des indulgences aux Augustins, du nombre desquels il estoit.

Cecy depita tellement Iean Staupice Vicaire general de l'ordre de saint Augustin en Allemagne, & ledit Martin Luther, Lecteur ordinaire à Vvitemberg, qu'ils renuerferent toute chose.

Il commença donc à médire du Clergé par escrit, & vne voix, ayant beaucoup de subiect de faire des inuectiues contre la dissolution, & le desbordement qui regnoit entre les Eccle-

siastiques. Il commença de crier contre les reuenus de l'Eglise qui estoient employez en pōpes, en vanitez, & en choses pires. Il fut aidé en cecy des Poëtes, & des Orateurs de son temps, qui commencerent à se ruer sur les mœurs des Prestres & des Moynes, & les peintres encor luy presterent la main, peignant les Prestres & les Euesques en forme de loups, de regnards, de diables, & choses semblables, & en remplissant les boutiques, & les lieux publics, & priez

De sorte que l'Allemagne fut seduite en peu d'années, oyant tant de maux de gens d'Eglise, & en voyant les figures qui exprimoient vne certaine ruze, & meschanceté. Ce qui fit encor mieux croire ce qu'on disoit du Pape, & de la vie du Clergé de Rome, ce fut la mauuaise opinion que les Allemans ont des Italiens, d'autant qu'ils les tiennent pour trompeurs, & malicieux, & de peu de conscience, tellement qu'on se persuadoit toute chose à leur desauantage, & principalement sur le sujet des indulgences publiees par Leon dixiesme, & de l'argent qu'on amassoit.

Mais ce qui aida grandement à l'heresie, ce fut que Luther esleua la puissance seculiere au dessus de l'Ecclesiastique, au moyen dequoy il attira de son costé plusieurs Princes, & entre les autres Iean Federic Electeur de Saxe, & vn certain Sichingi Capitaine renommé parmi les Allemans. Mais il n'y eut rien qui luy acquit plus d'applaudissement, & de faueur, que la sensualité de sa doctrine.

Car Luther cognoissant le naturel des Allemans addonnez à faire grande chere, & à boire avec excez, ne leur proposa pas des heresies speculatiues, qui eussent besoin d'vne grande subtilité d'esprit, mais proportionnees à leur capacité: & à leur sens, c'est à sçauoir materielles, & charnelles.

Il osta l'abstinence, & les ieusnes, le vœu de chasteté, & la discipline de la Religion, & permit aux Moynes & aux Religieuses de se marier, puis il osta l'autorité premierement au Pape, & aux Euesques, puis aux Princes, aux Magistrats seculiers.

De sorte que ce ne fut pas vne merueille de voir que les peuples à qui lon proposoit vne doctrine si agreable aux sens, & si fauorable à la chair, l'acceptassent si promptement. D'auantage pour s'autoriser de plus en plus, il permit aux laïcs d'vsurper les richesses, & les reuenus de l'Eglise, de prendre les calices & les reliquaires d'or & d'argent, & de rendre les Abbayes, & mesme les Eueschez hereditaires.

Mais encor que l'heresie de Luther fut pour les susdites raisons, & pour plusieurs autres, receüe avec tant de facilité des Allemans, elle ne manqua d'estre contrariee mesme par d'autres heretiques. Car l'an mil cinq cens vingt-cinq, on vit esleuer contre Luther Vlric Zuingle, qui renouella l'heresie de Berengaire, & eut pour compagnons Ecolampade, & Carlostade mortels ennemis de Luther: puis Bucer tascha de se mesler parmi eux, & apres Calvin inuenteur d'vne nouvelle Cene.

Or les Lutheriens, & les Zuingliens ont souuent essayé de s'accorder, mais ils sont tousiours demeurez en plus grand debat.

Ils firent pour cet effet vne assemblee à Maspurg à l'instance de Philippe Landgraue de Hesse, en laquelle toutesfois on ne peut obtenir, qu'encor qu'ils ne fussent d'accord touchant la Cene, ils fussent amis & en bonne intelligence quant au reste. Mesme Luther defendit aux habitans de Francfort de communier avec les Zuingliens, & Zuingle en vn sien liure nommé Luther faux-Propheete, bouffon effronté, heretique incorrigible, seducteur, & finalement Antechrist. Calvin d'autre costé s'attacha à Luther, & aux siens, les nommant gens sans esprit, race de Geans, & leur donnant semblables Epithetes.

Ils s'assemblerent en fin les vns & les autres à Constance, l'an 1534. & à Vvitemberg l'an 1536. afin de trouuer quelque forme de concorde: mais ce fut en vain.

Or les premiers qui receurent l'heresie de Luther en Allemagne, furent ceux de Mansfeld, patrie de Luther, & ceux de Saxe, dont le Duc Iean Federic prit la protection de la personne, & de la doctrine de cet Apostat. Et pource que les premiers qui en furent atteints furent les Escoliers, & les Docteurs de Vvitemberg, ceste heresie vint à s'espandre de là par tout l'Allemagne.

Cependant le Duc George de Saxe defendoit son Estat de ceste peste, mais il ne peut faire longue resistance, pource que Henry son frere estoit ja peruert, & luy ayant succédé en son Estat l'an 1530. incontinent il fit transporter Luther de Vvitemberg à Lipse, & en mesme temps tous les pays de Misne, du Turinge, & de Saxe, qui estoient sous sa domination, receurent ceste malheureuse doctrine: pource que les terres qui estoient de l'Electorat estoient desia corrompues, & dès l'an 1535. Henry de Zuphen auoit infecté Breme & Ioachim Vvesfeld Hambourg.

L'heresie estoit entree dans Lubec par permission de Henry de Bastel qui en estoit Eueque.

que, & dont les successeurs ne se souciaient beaucoup du reste, se contenterent des revenus temporels.

Finalemēt George d'Aul Euesque de ce lieu, fut si effrontement meschant & impie, qu'entre autres choses il fit enterrer le Messel Romain avec pompe solennelle.

La Religion Catholique fut vn peu soustenuë par le moyen de la victoire que l'Empereur Charles cinquiesme obtint contre les Protestans l'an 1547. Mais elle fut apres beaucoup abbatuë par la rebellion, & par la guerre que luy firent Maurice Electeur de Saxe, & Albert Marquis de Brandebourg.

Finalemēt l'Empereur en vne Diette tenuë à Spire, fut induit sous pretexte de garder la paix publique, à signer le decret de laisser l'exercice de la confession d'Ausbourg libre en Allemagne, iusques à ce que par vn Concile general, ou par quelque autre voye, on eust mis ordre aux affaires de la Religion; & l'an 1552. en la Diette de Posse, il fut deffendu aux Protestans d'interdire aux Catholiques, & en particulier aux Ecclesiastiques, l'exercice de l'ancienne Religion en leurs Estats, & l'an 1555. en la Diette d'Ausbourg, on donna liberté à tous les Princes, & Estats de l'Empire, de suiure la Religion Catholique, ou la secte de Luther, & de passer de l'vne à l'autre, avec condition que le Prince seculier ne perdrait par ce changement non seulement son Estat, mais mesme ne feroit aucune perte de sa reputation, mais quel Ecclesiastique perdrait son Estat, & que ceux à qui il appartiendroit en esliroient soudain vn autre qui seroit Catholique.

Les heretiques demanderent encor apres qu'on permist aux subiects de viure en leur volonté, & que les Princes fussent obligez de leur octroyer ceste liberté de conscience: mais les Princes d'Autriche, & de Baviere s'y opposerent.

Depuis ce decret l'heresie se respanoit sans empeschement par toute l'Allemagne, veu que l'an 1556. Otton Henry Palatin du Rhin, & Charles Marquis de Bade exterminerent la Messe, & la Foy Catholique de leurs Estats, & apres Nicolas Galle sema l'heresie de Luther à Ratisbonne, & Martin Kemnise à Brunswic, & la mesme secte s'espandit par les pays d'aupres de Strasbourg.

Cependant il nasquit d'autres heresies, veu que les Anabaptistes entrerent en Vvestphalie l'an 1532. & se saisirent de la ville de Monster l'an 1534. & apres auoir creë vn Roy furent en fin ruinez par l'Archeuesque de Cologne, & l'an mil cinq cens cinquante & vn, André Osiandre se rendit autheur d'vne nouvelle heresie, & mesme de la secte des Lutheriens on vint naistre celle des Vbiquitaires. Mais pource qu'Auguste Electeur de Saxe defendoit l'erreur de Luther pour se maintenir grand, & puissant par le moyen des Lutheriens, & le Comte Palatin, pour mesme effect aduançoit de tout son pouuoir le Calvinisme, pource que la discorde est fille naturelle de l'heresie, ils ne se peurent iamais accorder quelque assemblee qu'ils fissent.

Ayant ainsi monstré le commencement, & le progres des heresies en Allemagne, voyons maintenant l'estat auquel elle se trouue pour ce regard.

Veritablement de nostre temps il semble que d'vn costé l'heresie s'estende, & s'aduance, & de l'autre que la foy Catholique prenne accroissement.

L'heresie croist, pource que les Princes Calvinistes, & les Lutheriens se metent en possession des Abbayes, & des Eueschez, & les laissent comme vne partie de leurs heritages à leurs successeurs.

Or les Princes heretiques s'essayent d'introduire leur secte par tout où ils mettront le pied. Toutesfois il reste en la plus grande partie des villes quelques Eglises, & marque de la Religion Catholique, comme à Minde, quoy que presque toute heretique, on void encor des Chanoines Catholiques, & en la grande Eglise on celebre le seruice diuin à la Catholique.

A Vlme, à Strasbourg, à Neubourg, aux Estats de Brandebourg, Saxe, de Brunswic, il y a encor force Couents de Religieuses, toutesfois il est deffendu en quelques lieux d'y en mettre d'autres, & de les voiler, & mesme on ne le scauroit quelquesfois faire à faute d'vn Euesque Catholique, ou de quelqu'vn qui ait ceste charge.

Pour reuenir à nostre propos, ceux du Palatinat du Rhin ont esté forcez de passer quatre ou cinq fois de la secte de Calvin à celle de Luther, selon qu'il a pleu à leur Comte.

Auguste Duc de Saxe fut chef de la secte de Luther, & Christierne son fils apres la mort de son pere introduisit en Saxe le Calvinisme, & cestuy estant mort le Duc Federic son tuteur a chassé le Calvinisme, & introduit la secte de Luther.

Tous les Princes d'Allemagne suiuent la secte de Calvin, ou celle de Luther. Les Sectateurs de Luther sont les Marquis de Brandebourg, les Ducs de Saxe, de Brunswic, & de Vvtemberg, les Comtes de Mansfeld, & les villes franches heretiques, qui confinent avec la mer

mer, & la France. Calvin est suivi des Comtes Palatins du Rhin, de ceux de Strasbourg, & de la plus part des villes maritimes.

A parler generally les Nobles sont plus infectez d'heresie que les autres, & les riches que les pauvres, & les villes que les villages, & les villes franches plus que les Princes, chose digne de consideration. veu que de tât de terres frâches qui sont en Allemagne il ne s'en presenta en vne Diette qui fut tenuë il y a quelques annees, pour les Catholiques que 3. petites terres de Suaube, à sçauoir Gamöde, Dincheelspille & Vberlinque, au lieu que les Princes d'Autriche, les Ducs de Bauiere, & de Cleues (qui sont maintenant finis) & Philippe de Bade, & le Landgraue de Leutimberg se sont constamment maintenus en la foy Catholique, & l'on a veu retourner à la foy le Comte Viric d'Elprestein, & Jacques Marquis de Bade, & quelques autres.

Pour reuenir à nostre propos, les citez franches sont toutes souillées d'heresie, excepté les trois que nous auons nommees. Toutesfois il y a quelque nombre de Catholiques à Norimberg, à Vlme, à Francfort, à Aix la Chappelle, & en quelques autres lieux. *

Mais pour monstrier l'estat auquel la Religion Catholique est en ceste Province, il faut que nous considerions les Eglises Cathedrales, d'autant que l'autorité des Euesques, & des Chapitres a entretenu en grande partie, la religion qui y reste.

L'Allemagne a donc sept Metropolitains, qui sont ceux de Magdebourg, de Treues, de Mayence, de Cologne, de Saltzbourg, de Bezançon, & de Prague.

L'Archeuesché de Magdebourg avec les Eglises de Masdebourg, Masberg, Nambourg, Nauebourg, Brandelbourg, Lubec, Seuerme, Sebourg, Celuth, Racembourg (ausquelles celle de Milnie qui en estoit exempte a esté adionstee) est non seulement heretique, mais encor sous la puissance des Princes Lutheriens, qui en disposent comme de leur heritage.

L'Archeuesché de Treues est la plus nette de toute l'Allemagne, veu que non seulement dans la ville, mais encor par tout le Diocese, on ne souffre autre Religion que celle qui merite veritablement ce nom.

Ce qui est procedé en grande partie de ce que ceste ville n'a iamais eu Euesque qui ne fust Catholique, & d'ordinaire fort zelé.

L'Archeuesché de Cologne s'est avec beaucoup de peine maintenuë constamment en la Religion Catholique, n'ayant iamais voulu permettre aux heretiques l'exercice de leur religion, & l'an 1543. quelques vns ayans descouvert que l'Archeuesque Herman auoit intention d'introduire l'heresie dans la ville & dans toute la Diocese, ayant fait venir de Lipsé pour cet effect, Philippe Melancthon, & de Strasbourg, Martin Bucer, le Senat & le Chapitre s'opposèrent à son mauuais dessein, & firent tant que l'an 1549. Herman fut déposé par l'ordonnance du Pape, & Adolfe mis en sa place. Toutesfois il ne s'est peu faire que quelques lieux (cest Archeuesché a dix-sept bonnes places, & terres) n'ayent esté infectez.

On met sous cest Archeuesché les Eglises de Liege, de Munster, d'Osnaburg, & de Minde. Quant au Liege, la foy Catholique s'y est maintenuë iusques à present, de mesme qu'en toute la Diocese qui est fort grande.

Munster a esté trauaillé des Anabaptistes, comme nous auons dit cy-dessus, mais ceux cy ayans esté esteints, la ville retourna à son premier estat.

L'Eglise d'Osnaburg a esté grandement trauaillée par cy-deuant, & de nostre temps. Car l'erreur de Luther y prit pied dès l'an 1521. & bien que dix ans apres les Ministres Lutheriens en fussent chassés, toutesfois ils furent apres admis & supportez par les Chanoines, & l'Euesque.

Depuis l'an 1574. iusques à l'an 1586. Henry de Saxe vsurpa ceste Eglise, de mesme que celle de Breme. Quant à Minde, il n'y a rien plus qui sente la Religion Catholique, qu'une partie du chapitre, & la celebration du service diuin.

Pour le regard de l'Archeuesché de Mayence, l'heresie y est en diuers endroits, mesme en la grande ville d'Erford, & les Gentilshommes, & l'Archeuesque raschent de se deffendre des Conseillers Lutheriens. Les Iesuites qui ont soin de l'Vniuersité aident fort à cela. Ils ont en la mesme Diocese deux autres Colleges, l'un à Cöflence, l'autre à Helingenstad aux frontieres d'Italie.

Pres d'Helingenstad on void le lieu de Molius, où depuis quelque temps les Lutheriens ont publié vne forme de priere contre le Turc, le Pape & les Iesuites.

Or quoy qu'Erford soit presque tout Lutherien, toutesfois le Clergé s'y est bien assez maintenu, avec quelques autres, & le Senat, bien qu'heretique, a fait crier, qu'aucun ne soit si hardy de donner de l'ennuy aux Catholiques tandis qu'ils preschent, ou font leur exercice en leurs Eglises: & par le commandement de l'Empereur, les Lutheriens ont esté contraincts de rendre vne Eglise qu'ils auoient ostee aux Catholiques.

L'Eglise de Strasbourg est en fort grande reputation en Allemagne, à cause de la Noblesse qui est requise aux Chanoines qui y sont. Mais presque tous y sont heretiques. Bamberg est diuisé en deux partis de melme que la Diocese, où il y en a vne bonne partie de Catholiques.

Pour le regard de Spire, le nombre des heretiques surpasse de beaucoup celuy des Catholiques. Les Chanoines de l'Eglise Cathedrale desireux de conseruer ce peu qui reste, ont institué vn petit seminaire de douze ieunes hommes, par le moyen duquel, & du College des Iesuites, on espere d'augmenter la foy.

Quant aux habitans de Vvormes, ils se sont premierement soustraicts de la Iurisdiction temporelle, puis de la spirituelle de leur Euesque, & l'exercice de l'heresie est fort libre entr'eux, bien que le Clergé y soit pour la pluspart Catholique.

Ceux d'Herbipoli sont presque tous Catholiques, à cause du grand soin que leurs Euesques ont eu d'en chasser l'heresie.

Ceux de la Diocese d'Ausbourg sont presque tous Lutheriens à cause qu'il y a ordinairement dans la ville seule 15. Ministres qui preschent. Mais il y a deux choses qui aident à la verité de la Religion Catholique, l'vne la constance du Senat en la foy, l'autre vn Collège de Iesuites que les Foutres y ont basti.

Il y a d'ailleurs plus de Catholiques que d'autres à Ginsbourg, à Vertinge, & Almangauie, & diuers Conuens de Religieuses.

Quant à Hyestad il n'y a point d'exercice public de l'heresie. En la Diocese d'Hildesie, il y a vn grand nombre de Lutheriens : mais le Clergé de l'Eglise Cathedrale s'est tousiours maintenu en son entier.

Venant maintenant à l'Archeuesché de Saltzbourg, c'est chose asseuree que ceste ville est presque exempte d'heresie. Mais à Ratisbonne qui en dépend, on fait profession publique de l'erreur de Luther, & y a peu de Catholiques, en ostant le Clergé, qui s'y maintient assez bien par l'assistance du Duc de Bauieres.

La Boheme a receu l'heresie des Hussites, dont l'auteur fut bruslé à Constance avec Ierolme de Prague, l'an mil quatre cens dix sept. Leur principale heresie estoit que la Communion sous les deux especes estoit necessaire tant aux laïcs qu'aux Prestres.

Ceste heresie ouurit encor la porte aux Anabaptistes qui sont detestez des Lutheriens, des Caluinistes, & des Picards.

Ces derniers tirent leur origine d'vn certain Picard, qui porta de Flandre en Boheme l'heresie des Adamites, qui ont aussi embrassé les heresies de Luther, de Caluin, & de quelques autres ce qui leur a plu.

Le Picard apprit à ceste nation de se mesler publiquement, & sans aucun respect de sang, ny de parentage avec les femmes, à quoy l'on adiouta de grands crimes, lesquels on execute auourd'huy le plus secrettement qu'il est possible. Car il y en a quelques vns en Boheme qui vont sacrifier en des lieux sousterrains, & pour ceste cause on les appelle Grueberhaimer en leur langue, & durant leur seruice, si tost que le Ministre dit ces paroles de l'Ecriture, *Croissez & multipliez, & remplissez la terre*, on esteint toutes les chandelles, & chacun empoigne la premiere femme qui luy vient en main. Apres ceste meslange chacun se remet en sa place, & les chandelles estant rallumees on paracheue l'office.

Les Bohemiens Hussites se moquent des obseques anniuersaires, & prieres faictes pour les morts, disans que c'est vne inuention pour rassasier l'auarice des Princes.

Ils font aussi risée des benedictions faictes sur l'eau, sur les cierges, & les rameaux, & tiennent que les diables sont inuenteurs des Religions des quatre Mendians. Ils disent qu'il est permis à chacun de prescher l'Euangile.

Les Hussites ne reçoient point la confirmation & l'Extreme-Onction pour Sacremens de l'Eglise : & tiennent beaucoup de poincts touchant la Confession, le Baptisme, & choses semblables avec les Caluinistes. Mais il y a auourd'huy peu d'Hussites en Boheme, il y a grand nombre d'Anabaptistes, & de Picards.

La Morauie est pleine de toute sorte d'heresies, mais particulièrement de celle des Anabaptistes, & des Picards. On tient qu'il y a bien cent mille Anabaptistes, mais que les Picards surpassent de beaucoup ce nombre. Toutesfois la ville d'Olmus capitale de la Prouince, est presque entierement Catholique.

On peut dire le mesme de quelques autres bonnes villes de la iurisdiction de l'Euesque. Il y a à Olmus vn college de Iesuites, & vn Seminaire fondé par le Pape Gregoire XIII. Nichelbourg qui est vne bonne ville de Morauie, se fit entierement Catholique l'an 1581. avec les bourgades voisines, & l'Euesque donna l'annee d'apres le Sacrement de la Confirmation à quatre cens personnes.

La Slesie est plus infectée que la Moravie. Il y a plus de soixante ans que l'erreur de Luther y regne, & il y a des Zuingliens, outre les Anabaptistes, & les Picards.

Vratislaue capitale ville de la Province, est prinée de Catholiques, horsmis du chapitre de l'Eglise Cathedrale, qui a fait venir de bons Predicateurs depuis quelques années, qui ont converty beaucoup de personnes.

Quant à l'Autriche, il y a la ville de Vienne qui est pour la plus grande partie Catholique: pour le moins les Ministres n'y preschent nullement, les heretiques n'ont aucune Eglise à Neostat, & l'on n'y fait publiquement profession d'autre Religion que de la Catholique.

Il y a long temps que les villes de Crens, & de Stetin furent infectées de l'erreur de Luther, & quoy que l'an 1583. l'Empereur Rodolphe en chassast ceux qui y semoient ceste secte, toutesfois on y avoit fort peu avancé, l'Evesque de Polley enuoya apres vn Predicateur Catholique qui y fit tel fruit, que la ville sembla soudain estre presque toute changée. Guillaume de Scochirohen a réduit par mesme voye sa ville d'Anteche, où tous se sont convertis, fors que trois ou quatre, qui demeurerent comme tesmoins de la conversion des autres.

En Stirie où est la ville de Segouie sur la rivièrre de Cailo, & en Carinthie où sont les villes de Gourque, & de Lauante, les Nobles qui s'y tiennent, & en tout le pays ont presque tous quitté la foy, sinon à Strasburge, où la residence de l'Evesque les maintient vn peu en devoir. Mais les gens de village sont presque tous Catholiques, & s'ils errent, c'est plustost par faute de quelqu'un qui les enseigne, que par malice ou par obstination. Toutesfois les Nobles, & les Bourgeois s'aident vn peu à releuer la bonne Religion.

Car en la ville de Grats capitale de la Stirie, le Senat qui estoit tout heretique l'an 1586. & qui avoit deffendu au peuple d'aller aux Predications de ceux qu'ils nommoient Romains, est maintenant pour la plus part Catholique, & le Pere Michel Cardan reduisit à la Foy les places de Fustensfeld, & d'Aritperg l'an mil cinq cens quatre-vingts six, & n'avança pas peu en la ville de Poëtonie.

Entre les Estats que la maison d'Autriche possède, celui de Tirol est le plus exempt d'heresies, à cause du soin qu'en ont eu les Seigneurs.

Tellement qu'il se maintient presque entierement net, & si quelqu'un y erre c'est secrettement, & mesme les bons exemples, & les saintes instructions que donnent de tous costez beaucoup de Religieux & gens d'Eglise, maintiennent les vns, & remettent les autres: l'Empereur Ferdinand fonda en cet Estat deux Colleges pour l'instruction de la jeunesse, l'un à Ale, l'autre à Ispruch, & par ce moyen l'Evesque de Brissine, ville assise au milieu de la Province, maintient sa Diocese nette d'heresies. Ceste Eglise confine avec celle de Trente qui est aussi fort Catholique.

Cet Evesché a sous sa jurisdiction temporelle environ soixante mille ames, & sous la spirituelle pres de deux cens mille.

Quant au pays de Bauiere il est tout Catholique.

*Briefue description des Empereurs d'Occident, commençant à IVLES CESAR 30.
fondateur de cet Empire, & continuant iusques à MATTHIAS II.
à present regnant.*

1. **I**VLES CESAR fut fondateur de la Monarchie Romaine, & toutesfois il prit le nom de Dictateur perpetuel, au lieu de celui d'Empereur, il vescu 56. ans, regna 3. ans & 7. mois apres ses guerres finies, & fut tué par Brutus, Cassius, & autres conspirateurs l'an du monde 3886. qui fut l'an du monde 708. apres Rome bastie, & en l'Olympiade 174. & avant la naissance de nostre Sauveur Iesus Christ.
2. Octaue Auguste nommé pareillement Cesar, nepveu de Iules luy succede, & prend le nom d'Empereur, qui signifioit chef. d'armee, & en fait le titre d'une domination absolue sur tout ce qui obeyssoit aux Romains. Il vescu 75. ans moins 15. iours. regna 56. ans, 12. ans avec Antoine, & Lepide Triumvirs, & mourut l'an du monde 3943. de Rome bastie 765. & en l'Olympiade 198. l'an de grace 14.
3. Tibere beau fils d'Auguste de par Liwie, adopté par luy, l'an du monde 3979. apres la fondation de Rome 760. ans, & le 17. an de grace fut esleu Empereur. Il tint l'Empire 23. ans: de sa nature il estoit fascheux, moqueur, vilain, cruel & malicieux: l'an 15. de son Empire, nostre Seigneur Iesus Christ aagé de trente ans fut Baptisé par S. Iean: le 18. an de l'Empire de Ti-

bere fut crucifié: le 19. an saint Paul alla en Damas, & fut conuertý à la Foy. Vescut 78. ans, & regna 23.

4. Caius Caligule petit nepueu de Tibere, né de Germanicus, fils de Druse, qui estoit frere de Tibere, l'an du monde 4001. de la fondation de Rome 789. & l'an de grace 39. ce fut vn monstre horrible, cruel, & espouventable, qui se souilla en toutes sortes de melchance- rez: il eut la compagnie de ses trois sœurs. Vescut 28. ans, & regna trois ans, dix mois, huit iours.

5. Claudenepueu de Tibere, fils de Druse succeda l'an du monde 4005. de la fondation de Rome 793. & de l'an de grace 43. estant aagé de 50. ans: il paruint à l'Empire à beaux deniers contans, promettant à chaque soldat 350. eiscus. Il auoit profité és bonnes lettres, ayant eu Tite-Liue pour Precepteur. Il fut empoisonné par sa femme estant aagé de 64. ans, & regna 14. ans.

6. Neron beau fils de Claude, & son gendre adopté par la ruse d'Agripine, l'an du monde 4019. de la fondation de Rome 807. & de l'an de grace 57. aagé de dix-sept ans fut créé Em- pereur par les gensdarmes, ausquels il promit autant d'argent que Claude leur auoit donné. Il fit tuer sa mere Octauia Popea, & ses deux femmes, Seneque son Precepteur, & plusieurs autres, les Chrestiens furent sous luy horriblement massacrez. Il se tua luy-mesme, se perçant de son espee de part en autre. Vescut 32. ans, & en regna vn peu de moins de 14. La famille des Césars defaillit en luy.

7. Sergius Galbe de la maison des Sulpices, fut esleu par les legions d'Espagne; & puis con- firme par le Senat, c'estoit vn bon Prince: mais par les menées d'Othon, il fut tué dans le marché de Rome, sa teste portée à Othon. Vescut soixante & treize ans, & ne regna que 7. mois 7. iours.

8. Siluius Othon, de qui les soldats auoient tué Galbe, paruint à l'Empire par la mort d'i- celuy, c'estoit vn monstre vilain, compagnon des paillardises de Neron, eshonté, impudér, ambitieux. Mais estant vaincu par Vitellius se tué avec vn poignard, apres auoir regné seule- ment quatre mois: & vescut 38. ans.

9. Aulus Vitellius grand gourmand, & fort cruel, & paillard, il estoit sanguinaire & cruel, ayant fait massacrer plusieurs Gentilshommes Romains, tellement que les soldats le tue- rent, & jetterent sa charogne dans le Tibre. Et ne vescut que cinquante-sept ans, & regna huit mois.

10. Fl. Vespasian de la race des Flauiens, apres les grands desordres & cruautéz exercees sous les Caligola, Claude, Neron, Othon, & Vitellius, fut salué Empereur du viuant des autres, il restablit vn bon ordre aux Prouinces, legions, armées, loix, & en la iustice: il enuoya son fils Tite assieger Hierusalem le 14. Auril l'an 2. de son Empire l'an de grace 72. ans: il mourut d'un flux de ventre avant 69. ans 3. mois 7. iours, il regna 10. ans.

11. Tite Vespasian succeda à son pere l'an du monde 4043. de la fondation de Rome 831. & de l'an de grace 81 surnommé *les delices du genre humain*, à cause de sa iustice & liberalité: il par- donna à son frere Domitian, qui auoit machiné sa mort: saisi d'une fiebure mourut à l'aage de trente-neuf ans, cinq mois, & vingt-cinq iours, ayant regné deux ans, deux mois, vingt iours.

12. Domitian succeda à son frere l'an du monde 4045. de la fondation de Rome 833. & de l'an de grace 83. il ne ressembloit à son pere, ny à son frere, estant cruel, couuert, desliant, soup- çonneux, traistre, vilain, rapineux, & persecuteur des Chrestiens, c'est la 2. persecution, cō- ptant celle de Neron pour la premiere: il se limita tous les iours vne heure pour s'esbatre à prendre des mousches, & fut appelé chasseur de mousches. Il fut incestueux, paillard, & pour laquelle il perdit la vie aagé de 45. ans, & le 15. de son Empire.

13. Nerva estant ja fort aagé fut Empereur l'an du monde quatre mil soixante-vn, de la fon- dation de Rome 849. & de l'an de grace 99. c'estoit vn bon Prince & iuste: & remit les biens & estats à ceux que Domitian les auoit à tort ostez. Il fit cesser les persecutions contre les Chrestiens, il abolit les jeux publics, il adopta pour fils Marc Vlpe Trajan né en Espagne, & rendit son Empire florissant sur tous les autres: & mourut aagé de soixante & vnze ans, ayant regné vn an quatre mois.

14. Vlpe Trajan entra à l'Empire quand Nerva luy enuoya à Cologne le decret de son ado- ption l'an 42. de son aage, l'an du monde 462. de la fondation de Rome huit cens cinquante, & l'an de grace 100. Il estoit sage, grand Iusticier, bien aduisé en guerre, hardy, & heu- reux à l'execution, par le decret du Senat il fut appelé le tresbon Prince: il fit dresser les Bi- bliothèques, il escoutoit souuent Plutarque: & comme il alloit pour reprimer les Iuifs, il mourut aagé de 64. ans, & regna 19. ans, 6. mois, 15. iours.

15. Adrian l'an du monde 4080. de la fondation de Rome 868. & de l'an de grace 118. tint l'Empire

l'Empire: il fut adopté par Trajan, mais il escriuit au Senat, qu'il n'acceptoit l'Empire si le Senat ne luy commandoit: il estoit sage & bien versé aux affaires, sçauant, & bien disant, tantost doux, tantost cruel, qui parcourut les Prouinces de l'Empire Romain plus que tous les autres Empereurs: sa vie fut tellement odieuse sur la fin de ses iours, qu'il demandoit que on le fust mourir: il vescu 72. ans, & 3. mois, & regna 21. an, 11. mois, les os furent enterrez au chasteau S. Ange à Rome.

16. Antonin Pie l'an du monde 4101. de la fondation de Rome 889. & de l'an de grace 139 gendre d'Adrian, & son fils adoptif, fut Empereur, homme beau & plein d'esprit, d'eloquence, & tres-debonnaire: c'est le seul Prince pur du sang de ses subiects: il reuera grandement l'autorité du Senat, il ordonna gage aux professeurs de Philosophie, & autres sciences, il fit oster les daces des limites de l'Empire: il auoit souuent à la bouche, *Qu'il aimoit mieux sauuer la vie à vn de ses subiects de l'Empire, que tuer mille des ennemis.* Parquoy le Senat l'appella le pere de la patrie: il mourut aagé de 70. ans, ayant regné 13. ans, son corps fut enterré au sepulchre d'Adrian.

17. Antonin Verus, ou veritable, gendre de l'autre Antonin, luy succeda à l'Empire, au commencement il s'adioignit de son frere Lucius Verus, & lors l'Empire fut gouuerné par deux Empereurs, ayans puissance esgale: mais cét Antonin fut bon, sage, iuste, modeste, liberal aux hommes doctes & assez heureux en guerre. Il y eut sous luy persecution esmeuë contre les Chrestiens, laquelle cessa, ayant obtenu vne bataille par le moyen d'vne legion de Chrestiens, apres laquelle il abolit les edicts faicts contre les Chrestiens: il suruescut Lucius Verus de huiet ans, & il mourut aagé de 61. an, & fut Empereur 18. ans.

18. Lucius Verus ayant esté associé à l'Empire par Marc Antonin son frere, pour le peu de temps de son regne, n'est pas nommé entre les bons ny mauuais Princes: il regna avec Antonin 11. ans, il mourut aagé de 42. ans, puis porté au sepulchre d'Adrian.

19. Commodus l'an du monde 4143. de la fondation de Rome 931. & de l'an de grace 182. succeda à son pere Marc Antonin Verus, la Monarchie Romaine a esté en sa fleur depuis Iules Cesar iusques à Marc Antonin, mais depuis elle fut agitée de continuelles seditions & guerres ciuiles. Commodus dés l'age de 12. ans estant aux estuues par vn soudain despit il fit jeter le maistre dans la fournaise ardante d'icelle, presage de sa cruauté: il beuvoit d'ordinaire toute la nuit iusques au iour, se veautroit en toute sorte de vices execrables avec 300. concubines, & autant de ieunes garçons, il forma sa vie à celle de Caligula, il occit miserablement l'Infante Lucilla sa soeur, & viola les autres, il fut tué par Martia sa concubine, & par Letus grand Preuost de l'Empire, son corps fut par le commandement du Senat ietté dans le Tibre. Il regna 13. ans.

20. Pertinax succeda à Commodus l'an du monde 4156. de la fondation de Rome 940. & de l'an de grace 194. son pere estoit vn serf affranchy, & il auoit esté maistre d'escole, puis soldat, & finalement fut aduancé de telle sorte qu'il gouerna les Prouinces Rhetie, Norique, Misie & Dalie. Et d'autant qu'il estoit Romain, les meurtriers de Commodus l'esleurent Empereur, mais voulant reformer les soldats Pretoriens, il fut hay d'eux, & pour cét effect tous le meurtrirent, puis porterent sa teste au bout d'vne lance au cāp de Iulian son successeur: il estoit aagé de 60. ans, & ne regna que 6. mois.

21. Iulian, pource qu'en vn siecle si corrompu les grands n'auoient point d'autorité, les gens de guerre estoient insolens & audacieux iusques au bout. Supplicia Preuost de Rome, & Didius Iulian furent si effrontez de marchander à quel prix ils auroient l'Empire: Supplician promit à chaque soldat Pretorien 500. escus, Iulian promit 615. escus à chacun, & par ainsi il fut esleu Empereur, c'estoit vn gourmand, iouëur de dez, & lequel ne tenoit pas promesses aux soldats: de là on commença à le hayr, & deuint si lasche, auare & vilain, que pour cét effect il fut tué par vn soldat incogneu, & ne fut Empereur que sept mois, quatorze iours.

22. Pescennius Niger Gouverneur de Syrie, fut salué Empereur par les gens d'armes de Syrie, mais Seuerus qui auoit esté esleu par le Senat, alla au deuant de Niger lequel il combattit par 3. fois, & Pescennius Niger & sa femme furent tuez en la troisieme bataille, & Seuerus demeura seul Empereur, les biens de Pescennius furent tous confisquez, & sa race esteinte.

23. Seuerus l'an 4157. du monde, de la fondation de Rome 945. & de l'an de grace 195. succeda à Iulian: & fut honorablement receu du Senat & des gens de guerre, & proclamé Empereur: estant arrivé au Capitole il degrada les soldats qui auoient tué Pertinax, & les bannit de l'Empire: il fit mourir Letus aussi, qui auoit esté autheur du meurtre de Commodus & de Pertinax, subingua Pescennius Niger en Syrie: il fit vn voyage en Angleterre, où il mourut à Yorc: il estoit homme fort vaillant, qui laissa en mourant autant de bled au

peuple de Rome qu'il luy en faloit pour septannees: il vescu 65. ans, 9. mois, 25. iours: il regna 18. ans.

24. Claudius Albinus se fit Empereur en France, Seuerus ayant deffait Pescennius reuint à Rome pour faire la guerre à Albinus qu'il auoit associé à l'Empire avec luy: mais Albinus deuint traistre & perfide, machinant la mort de Seuerus, ce qui causa Seuerus de mener vne grosse armee contre Claudius Albinus, lequel commandoit en France comme vn Empereur des Romains, & luy donna bataille pres la ville de Lyon, où Albinus fut deffait & pris, & mené à demy viif à Seuerus, lequel le fit decapiter, & puis ietter à la riuere, & fit exterminer toute la famille & les amis d'Albinus: cela fait Seuerus fut seul Empereur.

25. Antonin Bassian Caracale fils de Seuerus, fut Empereur l'an du monde 4175. l'an de Rome 963. l'an de grace 203. c'estoit vn incestueux & monstre cruel: il tua de sa main son frere Geta pendu au col de sa mere Iulia, criant, à l'aide ma mere on me tuë, elle fut toute couverte du sang de son fils, & fut blessée à la main: neantmoins depuis elle se maria à son beau-fils Bassian. Il fit mourir à Rome grand nombre de Senateurs entre autres Papinian Preuost de la ville. En fin il fut tué à l'instigation de Macrin, grand Preuost de l'Empire, par vn soldat nommé Martial, duquel il auoit fait mourir le frere. Le corps fut enuoyé à Iulia sa maresse & femme: elle le voyant se ietta dessus, & s'y fit mourir. Voila la fin des incestueux. Il vescu quarante trois ans, & regna six ans.

26. Antonin Getra du vivant de l'Empereur Seuerus son pere, fut associé avec luy, & estoit son puisné, ieune Prince qui monstroie qu'il seroit heritier des vertus de son pere: mais l'Empereur Bassian conspira sa mort, & pour y paruenir, il espia de le trouuer seul, & vn iour estât en la chambre de sa mere Iulia, seconde femme de l'Empereur Seuerus, il le tua. Ce meurtre tant execrable acquit beaucoup d'ennemis à Bassian.

27. Macrin l'an du monde 4182. l'an de Rome 970. l'an de grace 210. grand Preuost de l'Empire, fut créé Empereur par l'armee qui estoit en Assirie. C'estoit vn serf affranchy qui auoit esté Tabellion du temps de Commodus. Il fit son fils Diadumenus Empereur au commencement de son Empire. Il s'addonna à iouer, & commença à estre hay des soldats, à cause de son naturel chiche, & reuesche: il fut cruel, & inuenteur de supplice: il fit coudre deux soldats (pour auoir violé leur hostesse) en des peaux de bœuf, leur laissant la teste dehors, afin qu'ils peussent parler l'un à l'autre, iusques à tant que la vermine, & puanteur, & autres sortes de tourmens les fissent mourir. Il fut tué en Antioche, apres auoir regné quatorze mois.

28. Varius Heliogabale fils de Bassian, comme on estimoit, fut Empereur par les artifices de son ayeule Maesa. l'an du monde 4184. l'an de Rome 972. l'an de grace 222. Il associa à l'Empire son cousin Alexandre: il amena sa mere au Senat, & la fit opiner cōme Sénateur. Là elle publia maintes loix appellees Matrimoniales, il se licentia à toutes dissolutions abominables, & surpassa en vilenie Neron & Caligula: se monstra plus monstre que humain: il viola les vierges Vestales, il se fit coupper les parties honteuses pour penser estre comme les femmes, & se maria comme femme, & habita avec luy comme femme: finalement parueniu au comble de sa meschanceté, fut tué avec sa mere dans vn retraits où il s'estoit caché, son corps jeté à la voirie par la conspiration des soldats, aagé de dix-sept ans, & regna deux ans, huit mois.

29. Alexandre Seuerus fut du consentement des soldats Pretoriens, & du Senat fait Empereur, l'an du monde 4187. l'an de Rome neuf cens soixante-quinze, l'an de grace deux cens vingt-cinq estât encore ieune, & gouerna l'Empire par le Conseil d'Ulpian. L'acte le plus seuerus qu'il a fait, est la mort de Thuringus Veronius, lequel il fit enfumer, d'autant qu'il ne faisoit iustice, & prenoit argent des deux parties. Il fit vn Edict, lequel il voulut estre obserué inuiolablement, & entre autres choses il y auoit *Ne fais à autrui chose que tu ne voudrais qu'on te ffit*. Il commença à estre hay à cause de sa seuerité, & fut tué en Gaule par les soldats à la sollicitation de Maximin: il ne vescu que trenté neuf ans, trois mois, sept iours, & regna treize ans.

30. Maximin, né de bas lieu en Thrace, & de pere & mere barbares, nommé Empereur par les soldats sans le consentement du Senat, l'an du monde 4200. l'an de Rome 988. l'an de grace 238. fit aussi son fils Maximin Empereur. De son premier mestier il estoit berger en Thrace, il vint à Rome du tēps de Seuerus, & il estoit fort & robuste à merueille, courroit aussi viste à pied que le cheual de Seuerus: il fut receu Archer sous Bassian, il eut charge de mille hommes de pied. Estant deuenu Empereur fort cruel & superbe, le Senat le declara ennemy de l'Empire à cause de ses meschancetez: il fit mourir cruellement tous les seruiteurs d'Alexandre son predecesseur: tellement que les soldats ayans sceu la volonte du Senat, couperent la gorge à Maximin, & à son fils dans sa tente, comme ils dormoient en plein midy, le pere aagé de loixante ans, & le fils de dix-neuf ans, ayant regné trois ans.

31. Gordian

31. Gordian l'aîné fut malgré luy avec son fils poussé au siege Imperial, étant âgé de 60. ans, pour deliurer le peuple de la tyrannie de Maximin. Le Prince Gordian son fils fut occis à la sollicitation de Capellus, & le bon Empereur redoutant par trop la fureur de ses ennemis, se pēdit, afin de ne tomber vif entre leurs mains: il ne regna que cinq mois, il fut regretté de tous les gens de bien: il estoit bon peintre, sculpteur, & sçauant.
32. Pupienus Maximus fils d'un serrurier, s'estant par les hauts faicts d'armes obtenu toutes les dignitez quel'on pourroit desirer, il deuint si fier & si superbe, tellement qu'il exerça de grandes cruautéz sur les Romains, qui occasionna les soldats à le hayr, & conspirerent contre luy, & contre Albinus, & esmeurent grand tumulte contre eux au Palais, duquel dechassez, ils les trainerent à leurs tentes, & là les tuerent ayans regné deux ans.
33. Caelius Balbinus fut esleu Empereur avec Pupienus, pour reprimer la meschanceté de Maximin: il estoit Espagnol, sçauant, appaisoit les seditions qui iournellement naissoient à Rome, par sa belle eloquēce & sçauoir: mais la fortune talōna tellement ce Prince, qu'estās les deux Gordians tuez en Afrique, le peuple de Rome aspiroit à vn autre Gordian, & eussent desiré que Balbinus & Maximus eussent cedé leur dignité à iceluy Gordian, lesquels par la haine des soldats & du peuple Romain, furent tuez, & ne tiurent l'Empire que deux ans.
34. Gordian II. âgé de seize ans, commença à gouverner l'Empire l'an du monde 4203. l'an de Rome 991. & de nostre salut 241. apres que Maximin & son fils furent massacrez au siege d'Aquilee, & que Pupienus & Balbinus aussi furent tuez à Rome. Il fut Prince amy de iustice, honneste, paisible, fort aimé, & reueré des siens plus que nul autre Prince. Bref rien ne manquoit en luy sinon l'age, qui seruit de sujet à vn Arabe nommé Philippe, de le rendre odieux aux gens-d'armes, leur remonstrant le bas age de cet Empereur, & gagna neuf soldats Pretoriens, qui tuerent ce bon Prince en l'age de 12. ans, & de son Empire le 6.
35. C. Valens Hostilianus fut créé Empereur par le Senat à Rome pour empescher que l'ordre de la Republique ne fust peruertey, apres les nouuelles receuës de la mort de l'Empereur Gordian, qui les troubla fort: l'Empereur Hostilianus estoit vn braue Prince, mais il estoit ja oppressé de maladie qui luy fit finir bien tost ses iours.
36. Philippe Arabe apres auoir fait tuer Gordian, paruint à l'Empire l'an du monde 4209. l'an de Rome 997. & l'an de salut 248. il vint à Rome l'an 2. de son Empire: il fit celebrer les jeux Seculiers, qui ne se faisoient qu'au commencement d'un siecle, le premier iour de May au 1000. an de la fondation de Rome. En ces jeux vne grande partie de Rome fut bruslee, pour le grand nombre de flambeaux allumez de nuict. On lit qu'il fut le premier Empereur Chrestien, & en haine de ce, Decius son Lieutenant en Illyrie, se reuolta, & fut nommé Empereur: il se resolut d'aller à l'encontre de Decius, laissant son fils à Rome: mais les soldats Pretoriens luy couperent la gorge. Cela entendu à l'armee de Philippes, les soldats le tuerent aussi étant à Veronne. Il regna cinq ans.
37. Decius fut esleu Empereur l'an du monde 4314. de Rome 1002 de grace 252. Il estoit de Hongrie de noble famille: il le fut du consentement du Senat, son fils Decius fut aussi nommé Empereur, il persecuta fort cruellement les Chrestiens, il fit mourir à Rome Fabian Pape, Alexandre en Hierusalem, Babias en Antioche avec ses trois fils furent martyrisez. En diuers lieux l'on n'oyoit que gemissemens des pauvres Chrestiens, qui estoient contrains de faire leurs demeures aux deserts, parmy les bestes sauages: il combatit les Gots par deux fois, dont à la derniere luy & son fils furent tuez, le pere âgé de 50. ans, n'ayans regné tous deux que deux ans, six mois.
38. Quintus Herennus Hetruscus n'est pas mis par quelques historiens entre les Empereurs, toutesfois son portraict se trouue au liure de Hubert Golrius & qu'il estoit fils de Decius.
39. Vibius Gallus Hostilianus succeda à l'Empire apres la mort de Decius: ayant esté esleu par la legion qui demeura entiere en la guerre des Scythes: & de là trouua accez au Senat, lequel consentit à l'appeller Auguste, & de fait le salua pour tel, ainsi il le fut plus par fraude que par vertu, & plus propre à porter vne quenouille, qu'une espee, qui fut cause que l'Empire fut grandement trouble.
40. Volusian apres que l'obscurité de ses troubles fut cessée par la deffence du preux Emilian, & que la splendeur de la paix parut, l'Empereur Gallus retourna à Rome, establissant Volusian son fils compagnon à l'Empire, & commanda qu'il fust salué Cesar comme luy, & leur regne eust esté plus court (pour estre recogneus vicieux tout outre) si la peste si horrible ne fut suruenue par l'espace de dix ans sur la terre, & il n'y eust aucun endroit exempt. Cependant Emilian fut esleu par les soldats Empereur, dont les Gallus & Volusian, pere & fils preparerent vne forte armee pour aller combattre Emilian, & il y eut vne sanglante bataille en laquelle le pere & le fils furent deffaicts, & iceux tuez sur le champ: ainsi Emilian se saisit

de l'Empire, & fit guerre ouverte aux amis de Gallus, les faisant mourir par tout où il les pouvoit attraper. Gallus ne regna que deux ans, 8. mois, & Volsian 2. ans.

41. *Æmilian* apres la deffaicte du pere & du fils en Mauritanie, de pauvre race, mais à cause de ses victoires obtenues en plusieurs lieux, il deuint si presomptueux, & se promettoit rât de faueur, qu'il osa bien escrire au Senat, qu'en peu de iours il deliureroit la Thrace, Mesopotamie, & l'Armenie, de l'oppression de ses ennemis: mais il fut trompé, car il receut nouvelles comme les soldats d'*Apian* auoient insticué vn autre Prince pour le mettre hors l'Empire: mais les chefs de guerres considerans la grandeur du nouveau Empereur, & la race d'*Æmilian*, les deux armées ensemble consentirent à sa mort, & fut tué par les soldats, de son aage 40. ans, & auoit regné 3. mois.

42. *Licinius Valerian* l'an du monde 4218. de Rome 1600. & de grace 256. desia vieil, fut esleu par l'armée qui estoit en Baviere: il estoit de la race des *Cornéliens* à Rome, & aimé du Senat à cause de sa vertu & vaillance, & fut du consentement du Senat & de toutes les autres armées receu Empereur. Du commencement il se monstra bening enuers les Chrestiens, mais apres vn Magicien d'Egypte l'incita à les persecuter, & de sacrifier des hommes aux Idoles: ce qui ne dura long-temps, car estant allé faire la guerre aux Perses, fut deffaict & pris prisonnier: le Roy de Perse nommé *Saporez*, se seruoit du dos & de la teste de *Valerian* au lieu d'esca-beau, toutes les fois qu'il vouloit monter à cheual: & finalement le fit escorcher tout vif. Il ne tint l'Empire que 2. ans.

43. *Gallien* apres la prise de son pere, fut nommé Empereur l'an du monde 4223. de Rome 1011. & de grace 261. monstre semblable à *Neron*, la peste du genre humain, & le plus vilain, & cruel qui fust oncques: addonné à ses plaisirs sans se soucier de retirer son pere, se faisant hayr des gens de guerre. De son temps il y eut trente de ses Lieutenans qui furent saluez Empereurs chacun à son armée, tous tyrans dont ils s'entretuerent la plus-part: ce qui affoiblit beaucoup l'Empire, & luy apres auoir perdu plusieurs batailles contre *Posthumus*, fut tué par vn *Esclauon*. Il regna 15. ans. C'est en l'histoire de ce *Gallien* qu'il est premierement parlé des François, qui ont secouru les Romains en leurs guerres.

44. *Salonin Valerian* regna durant la captiuité de *Valerian* son pere avec son frere *Gallien*: mais il estoit au contraire de son frere, vn Prince bon, sçauant, sage, modeste, liberal, & fort docte: le Senat le tenoit en grande reputation: mais la haine que le peuple portoit au vicieux *Gallien* son frere, empescha l'amitié du peuple: tellement qu'estant avec son frere à la bataille contre *Postumus*, il fut poursuivy iusques à Milan, là où les François les mirent au fil de l'espee, & leurs corps furent enterrez audit lieu.

45. *Labienus Postumus*, estant la Republique Romaine presque ruinee, fut esleu Empereur par les Gaulois. *Gallien* & *Valerian* freres ne voulans point de compagnon, vindrent vers la France pour combattre *Postumus*, lequel les ayant deffaicts, se rendit maistre de routes les Gaules, & en auoit desia fait vn Royaume à part, mais vn nommé *Lollianus*, l'un des Capitaines, occit ledit *Postumus*, ensemble son fils, que le pere auoit associé avec luy à l'Empire, & fait proclamer Auguste par les François.

46. *Flaue Claude* fut esleu Empereur par l'armée qui estoit pres de Milan, & le Senat l'approuua, en l'an du monde 4203. de Rome 1021. & de salut 271. Les mots qui sont recitez au Senat sont tels: *Claude Empereur, tu es nostre frere, tu es nostre pere, tu es nostre amy, tu es bon Senateur, tu es vn vray Prince*. Par là on peut voir combien ce personnage estoit excellent: il chassa les Gots, & les railla en pieces: il chassa le Tyran *Aureole* de la Republique, & mourut apres auoir regné deux ans.

47. *Aurele Quintille*, frere de l'Empereur *Claude*, fut esleu par le Senat pour le merite des vertus de son frere: mais il estoit merueilleusement craintif & peureux, lequel aimoit la vie priuée; c'est pourquoy les gens de guerre cognoissans son humeur, esleurent *Aurelian* en l'armée: cela entendu par *Quintille*, deuint triste & fasché, vn desespoir le prit, il se fit seigner le pied en l'eau, afin de ne sentir point la mort si rigoureuse, mourant le 27. iour apres son election.

48. *Aurelian* esleu Empereur par les gens de guerre l'an du monde 4235. de Rome 1023. & de grace 273. homme vaillant, & bien exercé à la guerre: il deffit les *Marcomanes*, & *Sueues*: l'Italie pacifiée, il entra dans Rome, appaisa les seditions qui y estoient, fit mourir les seditieux, mena son armée contre *Zenobia* Roynne de grand courage: la print & la mena en triomphe à Rome: il mena son armée en Suabe, dont il chassa les *Bohemien*s, & s'en voulant aller en Orient, les gens de guerre le tuerent pres de Byzance, & regna 5. ans, 6. mois.

49. *Tacite* l'an du monde 4241. de Rome 1021. & de nostre salut 279. pour sa vertu fut esleu Empereur par le decret du Senat; auquel les armées de l'Empire en auoient laissé la charge. Il fut prins, & esleu du corps du Senat, & esleué au throsne Imperial: alors la Republique

blique Romaine vſa de ſon iugement à l'election des Empereurs, il mourut d'une fièvre en la ville de Tarſe le ſixieſme mois, vingt iours de ſon Empire.

50. Annius Florian apres la mort de ſon frere Tacite, ſe ſaiſit de l'Empire: mais d'autant que c'eſtoit vn Prince mal-adroict, & de mauuaiſe façon, tant d'eſprit que de corps, les gens-d'armes eſleurent Probus: ce que voyant Florian, il ſe fit ſaigner le pied en l'eau, dont il mourut le ſecond mois apres ſon election.

51. Valerius Probus l'an du monde 4141. de Rome 1030. & de grace 280. fut par les voix de l'armee qui eſtoit en Tarſe du contentement du Senat, & de toutes les armées de l'Empire eſleu Empereur: ſi toſt qu'il fut Empereur, il ramena toutes les forces & armes d'Orient en Gaule, il vainquit les François, & Allemands, il reprima les Gots en Aſie, il nettoya la Cilicie de tous brigands, pres de Syrmium, il preſſa les ſoldats de trauailler à deſſeicher certains lieux aquatiques, mais les ſoldats ſe mutinerent contre luy, & le tuerent là, & regna ſix ans.

52. Carus natif de Narbonne, grand Preuoſt de l'Empire, fut créé l'an du monde quatre mille deux cens quarante-huit de Rome 1036. & de grace 286. Il associa ſes deux fils avec luy, Numerian & Carin: il fit guerre aux Perſes qui s'eſtoient reuoltez, & les rangea à l'Empire, il donna bataille aux Sarmates, en laquelle il tua mil ſix cens hommes, & print vingt mille priſonniers & de grand butin. Il entreprit la conquête de Cteſiphon, mais eſtant paruenue au fleuve de Tygris, ſuruint vn ſi grand & ſi effroyable orage, foudres, & tonnerres impetueux, que ce bon Empereur en fut accablé, apres auoir regné deux ans.

53. Numerian ſucceda à l'Empire par la mort de ſon pere, Prince des plus parfaicts & accomplis de ſon tēps, docte & ſçauant, bon Orateur, vaillant Cheualier, qui auoit eſté avec ſon pere en la guerre Perſique: ce Prince eſtât ſeul au gouuernement de l'armee, tout malade & deſolé de la mort de ſon pere, Aper ſon beau-pere, grād Preuoſt de l'Empire, eſpia l'heure & le temps de tuer ce Prince, lequel eſtant ainſi malade, ſe faiſoit porter en lictiere, à laquelle Aper arriuant, feignant le vouloir conſoler, le tua miſerablement, & puis ferma la lictiere ſans que perſonne s'en apperceut, & ne regna que deux ans.

54. Carin durant ces choſes ſejoirnoit en Gaule, viuant en lieſſe & bon temps, qui print ſin par la mort deplorable de ſon pere & de ſon frere, il ſ'empara de l'Empire Occidental des Gaules, ce qui cauſa de grandes & ſanglantes guerres, lequel on peut appeller la peſte & la poiſon du genre humain, le plus ahominable que le ciel ait fait naître. Ce mōtre eſpouſa neuf femmes, deſquelles il faiſoit auorter les enfans quand elles deuenoient groſſes. Diocletian eſleu à Rome, regnoit paiſiblement. Carin marche avec vne puiffante armee contre luy, & ſe donnerent pluſieurs batailles rangees l'un à l'autre, finalement à la derniere, celle de Carin fut deſſaite, & demeura mort ſur le champ, ayant regné deux ans.

55. Diocletian magnanime & prudent, fut eſleu Empereur l'an du monde 4250. de Rome 1038. & de noſtre ſalut 288. fit Maximian ſon compagnon d'Empire, & pource qu'il eſtoit beſoin d'auoir pluſieurs chefs, ils en nommerent encores deux autres: Diocletian nomma Galere Maximin, & Maximian nomma Flauius Conſtantius pere du grand Conſtantin. Les Empereurs Diocletian, & Maximian ſ'aſſemblerent à Nicomedie, afin d'exterminer les Chreſtiens: ils firent vn Edict, que tous, & en quelque lieu que ce fuſt, ſacrifiſſent aux dieux, à peine de la vie. Ceste perſecution dura dix ans, & fut remarqué qu'en vn mois ils firent mourir dix-ſept mille perſonnes: Diocletian & Maximian en vn meſme iour, de leur volōté, quitterent l'Empire, & peu de temps apres Diocletian ſe fit mourir ſoy-meſme, & beut du poiſon, ayant regné 25 ans.

56. Valere Maximian associé à l'Empire, homme cruel, furieux & rude d'entendement, appaiſa vn grand tumulte des païſans qui s'eſtoient reuoltez: il alla en Afrique, où il mit fin à de grandes entrepriſes: Il deſfit les Gentians, & erigea ſur eux vn trophée immortel de ſa victoire inſigne: il quitta le ſceptre Imperial apres auoir regné 10. ans, pour retourner à l'Eſtat priué de ſa premiere condition.

57. Conſtans Prince fort doux & humain, ayant eſté appellé à l'adminiſtration de l'Empire, il partagea avec Galere Maximin, & eut pour ſa part la Gaule, l'Eſpagne, l'Italie, & le Dauphiné, leſquels il gouuerna paiſiblement: il paſſa en Aſie, & dompta les Perſes, & mourut en Angleterre, ayant eſté Empereur 4. ans.

58. Galere Maximin ayant partagé l'Empire avec Conſtans, il eut pour apannage Illyrie de Grece, & d'Orient, il eſtoit fils d'un berger, mais cruel, ſanguinaire, barbare, vaillant, & hardy, qui luy cauſa de grandes victoires & conquêtes; il eſleut avec luy pour Empereur Maximin, & Seuerus, & ſe reſerua pour luy les pays Illyriques, où il ſe retira avec ſa femme: il fut ſaiſi d'une griefue maladie, & voyant qu'on ne le pouuoit guarir, il ſe tua luy-meſme.

59. Maximin II. fut fait Empereur, & eut pour appannage la Prouince Orientale: il associa avec luy Licinius, homme vaillant, dont il se repentit, mais trop tard; il estoit vaillant & adroit, gagna plusieurs batailles contre les Perses, & autres nations barbares d'Orient, il persecuta les pauvres Chrestiens, desquels il faisoit vne cruelle boucherie. Dieu luy enuoya vne cruelle maladie qui luy print aux parties honteuses, d'une puanteur si horrible, que nul ne pouvoit approcher de luy: & voyant que son mal continuoit, il se tua luy-mesme, ayant regné 16. ans avec ses compagnons, & deux ans luy tout seul.

60. Seuerus associé à l'Empire par Galere Maximin: c'estoit vn bon Prince & vaillant: il eut de cruelles & sanglantes guerres contre Maxence, lequel practiqua si bien les soldats Pretoriens, que sans contradiction du Senat, il fut esleu Empereur: Seuerus apres auoir perdu la bataille s'enfuit honteusement, & fut pris à Rauenne, où il fut meurtry cruellement.

61. Maxence paruint à l'Empire par ruse, cautelle, & finesse, se faisant eslire par les soldats Pretoriens, & confirmer par le Senat, il estoit grandement turbulent, cauteleux & malicieux. fort cruel & meschant: de sorte que Seuerus qui auoit esté esleu Empereur par toute l'Italie, & Afrique, fut desfait & meurtry par luy: Ce qu'ayant entendu Constantin qui estoit pour lors en Gaule, voulut en auoir la raison, & passa en Italie, & donna bataille à Maxence, en laquelle il fut desfait pres le Pont Miluius par Constantin, ayant regné l'espace de 7. ans en tyran, cruel & vicieux.

62. Licinius successeur de Maximin, lequel l'auoit associé à l'Empire, estoit de bas lieu, & fort ignorant, brutal, & hayssoit les lettres: il persecuta fort les Chrestiens, à l'occasion dequoy Constantin le Grand luy fit rude guerre: l'ayant vaincu, il fut occis par ses gens mesmes, estant aagé de septante ans, ayant regné quatorze ans: il auoit espousé Constantia sœur de Constantin le Grand, de laquelle il eut vn fils nommé Licinius le leune, lequel Constantin crea Empereur.

63. Martinian fut esleu Empereur par Licinius, lors que Constantin luy faisoit la guerre: il estoit inconstant, mais hardy: il dressa vne armee pour secourir Licinius contre Constantin, mais il fut desfait, & mis en route: il hayssoit fort les Chrestiens: il finit miserablement ses iours, ayant vescu quarante ans, & regné deux ans.

64. Constantin le Grand estant en France, fut mandé par le Senat pour chasser Maxence, mais il doutoit s'il deuoit mener ses forces, ou non: mais Dieu luy fit veoir au Ciel vne Croix de couleur de feu, avec vne escreteau contenant: *Sois victorieux en cecy*. Ce qui le fit resoudre, & marcha vers Rome, & vainquit Maxence, & le noya puis apres dans le Tybre. Tellement qu'apres la deffaicte de Maxence, Constantin, & Licinius furent Empereurs ensemble, l'an du monde quatre mille deux cens septante deux, de Rome 1060. & de salut 310. à sçauoir Constantin en Occident, & Licinius en Orient: ils vescurent en paix environ cinq ans, mais Licinius descourant sa haine contre les Chrestiens, & les persecutant à outrance, ils se retirerent vers Constantin, lequel dressa vne armee, & avec son fils Crispus attaqua pres de la ville d'Andrinopolis en bataille rangée Licinius, lequel y fut tué, ainsi Constantin demeura seul Empereur, & remit toutes choses en bon estar, comme l'Eglise, la iustice, & les Loix. Le 26. an de son Empire, on commença de bastir les murailles de Bisance, & par luy nommée Constantinople, & y fit transporter le siege de l'Empire, il vescut 66. ans, & regna trente ans, dix mois, vnze iours, il auoit deliberé auant sa mort de se faire Baptiser au fleuve du Iourdain.

65. Crispus fils aîné de Constantin le Grand, apres la mort de Licinius fut ioinct à l'Empire par son pere: il estoit docte & sçauant, & fut institué es bones lettres par Lactance Firmian. Il fut à la guerre contre Licinius, mais il ne vescut pas long-temps. Aucuns disent que sa belle mere seconde femme de Constantin, nommée Fausta, le requist d'auoir sa compagnie; voyant l'enormité du peché, il se retira, elle se voyant refusee, alla trouuer l'Empereur son mary, luy declarât que Crispus son fils l'auoit sollicité de son deshonneur, avec vne voix plaintiue, & entremeslee de larmes hypocrites: cela entendu par Constantin, adioustant foy aux paroles de sa femme, commanda soudainement qu'on le tuast: ce qui fut fait incontinent. Aucuns disent que l'Empereur fit tuer Fausta sa femme, apres auoir descouvert toute la verité du faict.

66. Constantin II. l'an du monde 4303. de Rome 1019. & de nostre salut 341. avec ses deux freres, tous trois fils de Constantin le Grand, succederent à leur pere, qui par son testament leur auoit partagé l'Empire, c'est à sçauoir Constantin qui estoit l'aîné, eust la France, l'Espagne, les Alpes, l'Angleterre: Constans eust l'Italie, Afrique, & Illyrie: le puîné, Constantius, ou Constance. eut l'Orient, & fut seul Empereur: car l'aîné estoit plus superbe & fretillant que les deux autres: non content du partage que son pere luy auoit laissé, fit la guerre à son frere Constant pour luy oster l'Italie, là où estant avec son armee fut deffaict pres d'Aquilee,

d'Aquilee, & foulé aux pieds des chevaux, dont il mourut aagé de vingt-cinq ans, ayant regné par l'espace de trois ans.

67. Constans au moyen de la mort de Constantin, sa part fut augmentée de tous les pays de son frere: il estoit aagé de vingt ans quand il deffit son frere. Au commencement il fut iuste & fort vaillant, fut Arrien, & perlecuta grandement les Catholiques, & cōmit beaucoup de cruauté.

Qui fut cause qu'en Ausbourg l'on fit Empereur Magnentius, lequel tua Constance dormant au liēt. Sa mort est notable, en ce que luy-mesme auoit sauué en Esclauonie ce Magnentius, que les soldats vouloient tuer, & l'auoit couuert de sa robe: il regna treize ans.

68. Constance le dernier des trois fils de Constantin le Grand, mena vne armée de soixante mille hommes contre ce meurtrier Magnentius, qui vint au deuant en Esclauonie avec le nombre de trente mille hommes, tant François qu'Allemands: Constance gagna la bataille, Magnentius s'enfuit à Lyon, où apres auoir tué ses amis desquels il se déffoit, il se tua luy-mesme.

Constance demeura seul Empereur: il eust plusieurs guerres contre les François, & aussi contre les Allemands: il fit Iulian son cousin Empereur pour les contre-quarrer, pēdant qu'il faisoit la guerre contre les Sarmates & Perses: il mourut d'une fièvre en Cilicie aagé de quarante & vn an, & regna vingt-quatre ans.

69. Magnentius ayant tué son maistre Constance, se saisit de l'Empire qu'il ne garda guerres, ayant esté mis en fuite, & son armée deffaicte: il regna trois ans, six mois.

70. Iulian l'Apostat, qui auparauant auoit esté compagnon de Constans, en l'an de grace trois cens soixante-cinq, l'espace de six ans, & demeura seul Empereur vn an, & sept mois.

Estant encore ieune, l'Euesque de Nicomedie l'instruisit à la Religion Chrestienne, de laquelle il fit profession, & lisoit en l'Eglise. En secret il alloit ouyr le Sophiste Libanius lequel luy fit prendre les liures & opinions de Iamblicus Maximus Philopophe Payen, & des lors desdaigna la doctrine Chrestienne, & suiuit les opinions Payennes. Il deuint ennemy iuré des Chrestiens: se voyant seul Empereur, il sacrifia des hommes, il publia des Edicts contre les Chrestiens, fit ouurir les Temples des Idoles, deffend de bailler aucuns Estats aux Chrestiens, ne permet que leurs enfāts fussent receus aux escholes de Rhetorique, escrit contre les Chrestiens, & en despit d'eux, exhorte les Iuifs à restablir leur estat, finalement il mourut miserablement aagé de trente ans.

71. Iouian, ou Iouinian, l'an du monde 4329. de Rome 1117. & de nostre salut 367. bon Prince & Catholique: il pacifia avec les Perses, il reuint en Asie, & remit plusieurs peuples, & les Eglises en bonne paix, r'appella les bannis pour la Religion, commanda qu'on restituast aux Eglises les reuenus que Iulian leurs auoit ostez, fit refermer les Temples des Idoles, & mourut ayant regné seulement huit mois.

72. Valentinian l'an du monde 4330. de Rome 1118. de nostre salut 368 il estoit de Hongrie: du temps de Iulian il auoit esté priué de ses Estats, d'autant qu'il estoit Chrestien, il fut bon Prince, & prudent, il fit venir son frere Valens de Hongrie, & le fit Empereur avec luy, puis quelque temps apres son fils Gratian aussi.

Valentinian laissa à son frere l'Orient, & luy s'achemina és Gaules; il deffit les Allemands, il deffit les Saxons, il fit punir rigoureusement ceux qui vendoient à faux poids & fausse mesure, leur faisant couper les mains; il mourut de fièvre en Hongrie aagé de cinquante-cinq ans, & regna 11. ans, 8. mois, 20. iours.

73. Valens qui auoit esté Empereur avec son frere, il le suruescut de trois ans: c'estoit vn ignorant, cruel, qui nonobstant les remonstrances de son frere, fut Arien: il traicta fort cruellement les Chrestiens, il fit la guerre à Procopius qui se vouloit faire Empereur, lequel ses gens d'armes liurerent à Valens, lequel le fit mourir: il alla contre les Gots pres d'Andrinople, là où il fut blessé, on le porta dans vne cabanne, en laquelle les ennemis mirent le feu où il fut brulé tout vif, & regna 15. ans, 5. mois.

74. Gratian, & Valentinian II. fils de Valentinian I. furent Empereurs ensemble l'an du monde 4344. de Rome 1132. de grace 382. Gratian fit part de l'Empire à Theodose, avec lequel il regna 4. ans, ayant regné auparauant 8. ans avec son oncle Valens: il estoit docte, Poëte, & vn des premiers Orateurs de son temps: apres la mort de Valens il rappella les Euesques Chrestiens, & chassa les heretiques, & commanda à toutes les Eglises de tenir d'un commun accord le Symbole de Nicee: il reuint en France là où il tenoit plus compte des soldats Allemands que des Romains: tellement que le gouuerneur de Lyon luy coupa la gorge aagé de 32. ans.

75. Maximus homme cruel & meschant, apres avoir fait mourir l'Empereur Grätian son maistre qui se laissoit gouverner par luy, se saisit de l'Empire, & deffit l'Empereur Valentinian II. frere de Gratian en bataille, lequel fut contraint de se retirer en Orient vers Theodose, lequel assembla vne puissante armee, & deffit Maximus qui fut pris & mis à mort, & ne regna qu'un an.

76. Valentinian II. par le secours de Theodose retourna en France, laquelle il gouverna sept ans comme Empereur; mais Eugene Secretaire & Arbogastus Got de nation Colonel, corrompirent par argent les valets de chambre de Valentinian, tellement qu'estant à Vienne en Dauphiné, ils l'estranglerent avec vne corde.

Eugene se fit nōmer Empereur, fut pris & amené à Theodose, aux pieds duquel il se ietta, mais les soldats le mirent en pieces, & Arbogastus se tua luy-mesme.

77. Theodose l'an du monde 4345. de Rome 1133. de nostre salut 383. Espagnol, & de race noble, fut le dernier Empereur d'Orient & d'Occident, ensemble, apres avoir vaincu Maximus, & fait mourir, il retourna à Rome, où il fit fermer les Temples des Idoles, & abolit du tout les sacrifices des Payens, & leurs Bachanales qui auoient duré iusques au temps de Valens.

Il redressa la Religion Chrestienne, les bonnes Loix, la iustice; mais les nouuelles luy vindrent que Valentinian auoit esté estranglé, & que Eugene & Arbogastus auoient vne grosse armee vers les Alpes, qu'ils auoient déclaré qu'ils reestabliroient les sacrifices des Payens. Par ainsi Theodose se resout de les aller attaquer, fait peindre à ses estendarts le nom de Christ, d'autant qu'une nuit estant en priere, & sommeillant, luy apparut quelqu'un qui l'exhorta à aller attaquer ses ennemis qu'il deffit en pieces, & mourut à Milan l'an 65. de son aage le 17. Septembre, apres avoir regné dix sept ans.

78. Arcadius apres la mort de son pere Theodose succeda avec son frere Honorius à l'Empire, à sçauoir Arcadius en Orient, l'an du monde, 4361. de Rome 1150. & de grace 400. il fut Prince debonnaire, & bon Catholique, son pere luy auoit laissé pour tuteur Rufin. estimant qu'il luy seroit fidele, mais Rufin, François de nation, se proposa de se faire Empereur, car il attira Alaric Roy des Gots pour effrayer Arcadius, mais la trahison estant decouuerte, il fut tué par des soldats Italiens. Il vescu 13. ans apres la mort de son pere.

79. Honorius fils de Theodose & frere d'Arcadius, fut Empereur d'Occident, & eut pour tuteur Stilicon.

En l'an vnzieme de son Empire, & de l'an de grace 409. Redegise mena vne armee de 100000. Gots en Italie, laquelle fut deffaite & exterminée par Stilicon, & Redegise pris, & il fut estranglé.

Après ceste victoire, Honorius eut opinion que Stilicon se vouloit faire Empereur, à cause dequoy il le fit tuer avec son fils Eucherius.

Alaric Roy des Gots vint à Rome, apres avoir esté deuant deux ans, la prit le premier, iour d'Auril l'an 16. de l'Empire d'Honorius, & de l'an de grace 414. & de Rome 4376. il regna seize ans

80. Theodose II. fils d'Arcadius, aagé de neuf ans, succeda à son pere l'an du monde 4374. & de Rome mil cent soixante six, de grace quatre cens douze: & de l'an quinziesme de l'Empire d'Honorius, son tuteur s'appelloit Anthemius, par la sagesse duquel il fut bien instruit en la crainte de Dieu, & les affaires publiques bien gouvernees. Il pacifia avec les Gots, & s'en seruit contre les Huns & Perses, & finalement fit aussi paix avec eux. Il remit les Eglises d'accord, & assembla vn Concile en la ville d'Ephese contre Nestorius, puis mourut à Constantinople, ayant regné 42. ans, ayant vescu cinquante & vn an.

81. Valentinian III. fut associé à l'Empire par Theodose II. apres la mort d'Honorius, l'an du monde 4392. de Rome 1180. de nostre salut 430. & de l'an 9. de l'Empire de Theodose II. & fut le dernier Empereur d'Occident iusques à Charlemagne: il estoit adultere, magicien, meurtrier de grands Capitaines qui luy auoient fait seruice. Boniface son Lieutenant en Afrique, fut deffait par les Vandales: tellement qu'ils s'emparerent de Carthage l'an 34. de l'Empire de Theodose II. le septiesme de Valentinian III. de l'an de nostre salut 445. Il regna trente ans.

82. Martian Lieutenant de Theodose II. succeda à son maistre, & fut Empereur d'Orient, l'an du monde 4416. de Rome 1214. & de grace 454. homme sage, vaillant, & craignant Dieu, pour appaiser les troubles de l'Eglise, il fit paix avec les Perses, & avec les Vandales en Afrique, ayant regné six ans, il mourut à Constantinople.

Il faut remarquer qu'apres la mort de Valentinian l'Empire Romain fut dissipé & mis en pieces: car les François tenoient vne grande partie de la Germanie & des Gaules, les Ostgots, la Hongrie, les Vuesgots,

*V*estgots, les Espagnes, les Vandales, l'Afrique, & plusieurs se nommerent Césars en Italie: tellement qu'il y eut en l'espace de 10. ans 9. Empereurs qui regnerent, & succederent l'un à l'autre, & se tuèrent l'un l'autre, le premier fut appelé Augustule, ce nom diminutif d'Auguste donna sujet de dire que l'Empire des Augustes deuoit perir en Italie: car vn nommé Odoacre de Rugie durant ces horribles confusions se ietta en Italie, & la fouragea l'espace de quatorze ans, en l'an de Christ 465. Leon le Grand viuant à Constantinople, & prit Rome, se fit appeller Roy de Rome & d'Italie, & monta en triomphe au Capitole, & se fit couronner, exposa Rome au sang, carnage, & pillage, & plusieurs villes circonuoisines: il donna la ierce partie des terres aux siens, & commit vne infinité de meschancetez, & dominerent en Italie iusques au regne de Iustinian.

83. Leon le Grand de Thrace, l'an du monde 4423. de Rome 1221. & de nostre salut 461. fut esleu Empereur à Constantinople, par les suffrages du Senat & gens de guerre, puis couronné par le Patriarche Anatolius, c'estoit vn bon Prince craignant Dieu: il regna dix-sept ans.

84. Zenon estoit gendre du Lieutenant de l'armee de Leon, fut l'an du monde 4441. de Rome 1236. de grace 479. fait Empereur par son fils, d'autant que par le testament de Leon le Grand il auoit nommé Leon II. fils de Zenon: mais Leon II. venant à mourir fit son pere Empereur, lequel enuoya Theodoric Roy des Gots en Italie, comme son Lieutenant contre Odoacre, lequel fut vaincu & tué par Theodoric. De son viuant Constantinople fut presque tout bruslé par le feu violent qui y prit, & à ce feu fut bruslé plus de six vingts mille volumes de bons liures manuscrits. qui fut vn grand dommage. Zenon fut fort cruel, miserable, grand yurongne, & se souillant en son yurongnerie, estant plein de vin, tellement que l'Imperatrice sa femme le fit enterrer tout viuant, ayant regné dix-sept ans.

85. Anastase surnommé double pruneille, fut en l'an du monde 4456. de Rome 1244. de nostre salut 494. Empereur par la faueur de la femme de Zenon il guigna la faueur du peuple en abolissant quelque tribut annuel, il reprima quelques seditions, fit trêue avec les Perses, il maintint ouuertement l'heresie d'Eutiches, chassa de Constantinople Euphemius qui l'auoit couronné, puis fit tuer Macedonius son successeur, & fit beaucoup de maux à l'Eglise, son regne fut fort pernicieux aux Chrestiens, estant ja vieil de 87. ans, la foudre & le tonnerre tomba sur luy, & fut reduit en cendre, ayant regné 27 ans.

86. Iustin fils d'un berger de Thrace l'ã du monde 4448. de Rome 1271. de grace 521. estât deuenu par sa vaillance Capitaine des gardes d'Anastase, & respecté des soldats, receut quelques deniers d'Amantius pour gagner les soldats, & acheter les voix pour Theocretian son amy: mais Iustin le practiqua pour luy, & du consentement du Senat & des gés de guerre fut receu Empereur. Amantius & Theocratian taschent de leur en venger, ce qu'ayant decouvert Iustin, il les fit mourir. Il fut bon Catholique, chassa les Arriens, & fit beaucoup pour les Eglises d'Orient. Or estant vieil il crea Empereur de son viuant Iustinian son nepueu en la presence d'Epiphanius Patriarche de Constantinople, & du Senat, lequel Epiphanius couronna Iustinian & sa femme, & Iustin mourut le 11. de son Empire, ayant laissé Iustin qu'il auoit adopté pour son fils.

87. Iustinian qui en l'an du monde 4490. de Rome 1278. & de grace cinq cents vingt-huict, auoit esté collegue de Iustin l'espace de quatre mois, & demeura apres seul Empereur, il estoit nepueu de Iustin, il enuoya Bellissaire son Lieutenant contre les Perses, lesquels il reprima & pacifia. Il fut aussi enuoyé en Afrique où Carthage se rendit, & fut Gilimer Roy des Vandales prins, & l'Afrique remise sous l'Empire, & fut le dernier Roy des Vandales. Bellissaire fut enuoyé encore en Italie; en laquelle en cinq ans il reprint toutes les villes occupees par les Gots, spécialement Rome en l'an 11. du regne de Iustinian, & en l'an de grace 537. & retourna à Constantinople, mais derechef Totilas releua la puissance des Gots en Italie, & Narses y fut enuoyé qui les chassa heureusement hors d'Italie, mais il y attira les Lombards. Du temps de Iustinian le recueil des Loix fut fait, & depuis appelé *Le droit Civil*. Le Concile fut tenu à Constantinople: les fortifications pour brider les courses des Barbares, il regna 38. ans.

88. Iustin II. l'an du monde 4528. de Rome 1317. & de grace 566. petit fils de Iustinian fut créé Empereur, modera les impôts & vsures: mais à cause de sa maladie ne peut manier les affaires, Martin son Lieutenant fit la guerre durant 4. ans aux Perses, & sous son regne fut le commencement des Exarques à Rauenne, & du regne des Lombards en Italie. Et ne regna que vnze ans.

89. Tibere II. l'an du monde 4539. de Rome 1327. & de grace 579. fut seul Empereur, & furét couronné luy & sa femme par le Patriarche Eutiche, il perseuera en l'Eglise Catholique, & fit beaucoup d'aumosne pour l'entretienement des pauvres familles, & fit exercer

bône iustice, cōme il faisoit oster de terre vne croix d'or enchassée dās du marbre, il ne vouloit qu'on marchast dessus, il enuoya Maurice de Capadoce contre les Perles, lequel les deffit, & recouura Mesopotamie; & à son retour Tibere luy donna pour femme la fille Cōstantine, & le designa Empereur en presence de l'armee, & mourut ayant regne 7. ans.

90. Maurice de Capadoce succeda à son beau pere l'an de Rome 1333. & de grace 584. & fut couronné par le Patriarche nommé le Ieuſneur. Caignan Roy de Hongrie prit Syme ville de l'Empire, & gagna vne bataille contre Maurice, & print 12000. prisonniers Romains, & suruint vne peste en l'armee qui fit mourir sept fils de Caignā en vn meſme iour: cela le fit retirer, & manda à Maurice qu'il luy payast vn eſcu pour chacun prisonnier, & les luy renuoyeroit, ce que Maurice ne voulut faire: irrité de ce, il fit couper la teste aux 12000. prisonniers, à ceste occasion, & pour autres laschetes, les soldats se mutinerēt, & pensa estre tué à coups de pierres vn iour de Noël comme il entroit à l'Eglise. Finalement les troupes qui estoient du long du Danube esleuerent Phocas, & le saluerent. Empereur, lequel fit tuer Maurice, & toute sa famille aagé de 63. ans, & regna 10. ans.

91. Phocas l'an du monde 4366. de Rome 1355. & de salut 604. Thracien de nation, & de bas lieux, ayant esté couronné aux fauxbourgs de Constantinople par le Patriarche Cyriaque: apres le meurtre de Maurice il fit mourir ses amis, il fut cruel, meschant, dissolu, rauisseur de femmes d'autrui, massacreur des innocents, exacteur & pilleur des Prouinces, yurongne, & paillard: & pendant qu'il s'amusoit à exercer ce que dessus, Caignan Roy de Hongrie, & les Perles, fourrageoient l'Empire. Car Cosroës Roy de Perse osta aux Romains la ville de Ierusalem, & print la Syrie, tua 90. mille Chrestiens, & emporta la vraye Croix où nostre Seigneur auoit esté crucifié, à cause de ce Phocas fut hay du peuple. Priscus gendre de Phocas se ioignit avec Heraclius gouuerneur d'Afrique, & vn nommé Photius a qui Phocas auoit rauy sa femme, se liguèrent, & arriuerent en meſme temps à Constantinople avec leurs armées, se faisièrent de Phocas, auquel les soldats coupperent les bras & les iambes, & les parties honteuses, puis ils luy trancherent la teste ayant regné 8. ans.

92. Heraclius fils d'Heraclius gouuerneur d'Afrique, apres l'execution de Phocas, fut du consentement du Senat & des armées esleu Empereur, l'an du monde 4373. de Rome 1363. & de nostre salut 612. Il fut couronné par le Pape Sergius, le meſme iour espousa Fabia Eudoxia, qui fut aussi couronnée. Il pacifia avec Caignan Roy des Huns, il enuoya aussi pour pacifier avec Cosroës Roy des Perles, il fit responce qu'il ne poseroit point les armes, que le Dieu des Perles ne fut adoré par tout, & qu'il ne vouloit qu'abolir le service de Dieu & des Chrestiens. Heraclius ne s'estonne, se fie en Dieu, meſme son armée en Syrie pres d'Arot. Cosroës s'estoit retiré chez soy, & fut puny de son orgueil par vn moyen notable choisi de Dieu, qui est que Cosroës nomma pour successeur son fils puisné nommé Mardassez, Siroës qui estoit l'aîné, print son pere Cosroës, auquel il couppa la gorge, apres auoir tué son frere Mardassez, & se fit Roy par ce moyen, & pour estre plus alleuré il fit paix avec Heraclius, & mit en liberté les prisonniers, entre lesquels estoit Zacharie Patriarche de Hierusalem, & rendit aussi la vraye Croix. Sous cēt Empereur, commença la detestable secte & Religion de Mahomet, & regna 31. an.

93. Constantin III. fils d'Heraclius fut fait Empereur par le Senat l'an du monde 4605. de Rome 1396. & de nostre salut 644. Il fut fort mal-heureux en guerre contre les Sarrazins, il tua son frere Theodose, & fit mourir des gens de bien, qui le reprenoient de ce qu'il adheroit aux erreurs des Monothelites. Par son mandement Theodore Calioppa, Exarque de Rauenne, prit par trahison le Pape Martin, & l'enuoya prisonnier à Constantinople, d'où Constantin le relegua en Chersonnese Taurique, où il mourut de faim tost apres. Constantin fut en Italie contre les Lombards, là où il fut deffait, & avec lesquels il fit trefues, & apres auoir pillé Rome vint en Sicile où il fut estranglé, comme il se lauait en vn bain, & regna vingt-sept ans.

94. Constantin IV. le Barbu son pere l'associa à l'Empire l'an du monde 4651. de Rome 1423. & de nostre salut 670. lors que l'armee de mer des Sarrazins approcha de Constantinople, d'où elle fut repouſſée, & furent contraints de faire paix avec les Gots pour 30. ans. L'Empereur assembla à Constantinople le 6. Concile contre les Monothelites, & apres auoir pacifié l'Empire d'Orient à l'Eglise, mourut paisiblement, ayant regné dix-sept ans.

95. Iustinian II. fils de Constantin le Barbu fut fait Empereur par son pere, l'an du monde 4649. de Rome, mil quatre cens quarante, de grace 687. homme cruel, sanguinaire, il y eut deux flateurs qui furent cause de la ruine, à ſçauoir Theodose Moine, qui fut en tel credit que Iustinian l'appelloit general ou grand Maistre, l'autre Estienne, Chappellain de l'Empereur. Ces deux mignons traicterent rudement les Capitaines de l'Empire, entre au-

tres

tres Leontius qu'ils tindrent prisonnier deux ans: mais estât échappé il se fit Empereur à l'aide du Patriarche, & coupa le nez à Iustiniā & l'enuoya en exil en vne Isle où il fit attacher des cordes aux pieds de ces deux mignons, lesquels furent trainez par la ville, & furent bruslez par apres. Tybere III. d'Apsimare retournant d'Afrique d'où il auoit esté chassé par les Sarrazins avec son armee, n'osant se trouuer pres Leontius, fut salué Empereur par ceste armée, & s'estant saisi de Leontius, il luy couppa le nez, & le tint prisonnier. Et Iustinian trouuant le moyen de recouurer son Estat par le moyen du Roy de Bulgarie, lors il fit lier Leontius Tybere d'Apsimare, & les fit trainer par les rues, puis leur ayant mis le pied sur le col, leur fit arracher les yeux, & trancher les testes, & fit prendre Heraclius frere de Tybere d'Apsimare. Cela fait les gens de guerre d'autre coste esleurent Empereur Philippicus Bardanes lequel prit son chemin vers Constantinople: fit arracher d'un Autel Iustinian & son fils Tybere, lesquels furent rués par son commandement. Il regna dix ans auant son exil, & six ans apres son retour: voila en peu de temps trois Empereurs mis à mort.

96. Leonce ou Leon estoit Prestre & Patriarche de Constantinople, il conspira avec certains seditieux de chasser l'Empeur Iustinian, ce qu'il fit, & executa, & entra avec sa troupe seditieuse au Palais, & le fait confiner en exil, comme il a esté dit, & se fait saluer Empereur Auguste, & ne fut Empereur que 3. ans.

97. Tybere III. Apsimare vsurpa l'Empire sur Leonce, & fit prendre Leonce: & luy ayant fait couper le nez, le tint prisonnier. Et pendant ces choses, Iustinian banny alla vers son oncle, le Roy de Bulgarie auourd'huy dite Hongrie, par son moyen vint & entra dans Constantinople, fit prendre Tybere Apsimare vsurpateur, & Leonce qui estoit prisonnier, les fit trainer à la queue des chevaux par les rues, à la presence du peuple, & estoient presque tous desmembrez, & puis on leur couppa les testes, ayant Tybere regné sept ans.

98. Philippicus Bardanes conduisoit l'armée de mer de Iustinian, & fut esleu Empereur par ladicte armée, cela fait, il vient à Constantinople, là où il fit tuer Iustinian & son fils Tybere. Philippicus estant paisible possesseur de l'Empire, casse & annulle les Decrets du sixiesme Concile, & à la persuasion d'un moine, & pour le fauoriser, d'autant qu'auparauant il luy auoit predit qu'il seroit Empereur par l'augure qu'il en veit d'une Aigle, ombrageant le chef dudit Philippicus dormant. Par son commandement les images furent abbatues, & iettees hors des Temples, ce qui fascha extrêmement Anastase II. lequel par son impatience & temerité grande, avec ses consors, luy creua les yeux, & les chassa hors de l'Empire, apres auoir regné deux ans: il fut protecteur des Monothelites & autres heresies.

99. Anastase II. homme fort docte, fut en l'an du monde 4667. de Rome 1468. & de grace 715. Esleu Empereur, & d'autant qu'il aymoit la paix del'Eglise, il reprima tous les ennemis du 6. Concile, il amassa vne forte armee, & l'enuoya contre les Barbares & Arabes: mais les Capitaines n'eurent pas de fidelité: car rebroussant le chemin coururent sus à l'Empereur, & l'assaillant de meismes armes qu'il auoit preparé pour autrui, en ceste furieuse rencontre Constantinople fut prise & saccagee, & Anastase demis, puis enclos, & relegué en un monastere, apres auoir regné vn an, trois mois.

100. Theodose III. ayant esté autheur de la sedition & saccagement fait par les soldats de Constantinople, & du despoüillement d'Anastase del'Empire, se fit nommer Empereur: il estoit de Constantinople, & de bas lieu, mais de grand esprit, toutesfois aucuns escriuent qu'il fut contraint d'accepter le gouuernement de l'Empire. Au commencement il fit remettre les Images aux Temples, sa domination acquit par sa vertu l'obeissance & amour de son peuple, neantmoins Leon Isaure son mortel ennemy, luy faisoit cruellement la guerre, dont le peuple estoit affligé: mais Theodose estant las de tant de guerres ciuiles, se resolut de quitter l'Empire de son bon gré, ayant gouuerné deux ans, il se rendit Moine dans vn Monastere.

101. Leon III. auparavant nommé Isaure Canon, estant en l'armée contre les Sarrazins, & ayant entendu que Theodose estoit esleu Empereur il reuint de Nicomedie ayant pris le fils de Theodose, & composa tellement avec le pere, qu'il quitta l'Empire. Ainsi se fit prestre le serment par les Capitaines & soldats, l'an du monde 4670. de Rome 1471. & de grace 718. & le 2. an de son Empire les Sarrazins assiegerent Constantinople: mais ils furent chassez, & leurs nauires bruslez, & les ayant chassez il fit la guerre aux Images, & commanda par Edit qu'elles fussent ostees des temples: à ceste occasion il fut nommé *Iconomach*, c'est à dire ennemy des images, & regna 24. ans.

102. Constantin V. surnommé Copronyme, parce que quand il fut baptisé il lascha son ventre sur les fonds: il fut couronné du viuant de son pere Leon Isaure par le Patriarche Germain, l'an du monde 4704. de Rome 1495. & de grace 741. Il fut bien plus vehement à chasser les Images hors des Temples que son pere: ce qui occasionna qu'un nommé Arta-

bardus fut esleu Empereur, du consentement du Patriarche & de la noblesse : mais Copronyme au bout de deux ans défit Artabardus en vne bataille, & l'ayant prins, il luy creua les yeux & à ses deux fils, & au Patriarche, il le fit fouetter monté sur vn asne, la face vers la queue qu'il tenoit d'une main, & fut ainsi pourmené par les rues, il estoit magicien, homme adonné à tous vices, il regna 35. ans.

103. Constantin VI. l'an du monde 4744. de Rome 1535. & de Christ 782. fils de Leon & d'Irene, estant aagé de 20. ans, voulut manier luy-mesme les affaires de l'Empire, & pour cet effect cassa quelques seruiteurs de sa mere : elle avec ses complices, sollicita l'armée de iurer qu'elle ne recognoistroit point Constantin pour Empereur, mais l'armée d'Armenie detestant cela, fit le serment au fils, puis apres les autres armées ensuiuirent cest exemple, & pour cela la trahison ne celloit : car Constantin ayant regné sept ans, sa mere prenant occasion sur ce qu'il auoit laissé sa femme, & mise en vn Monastere pour en prendre vne autre, enuoya certains soldats prendre prisonnier son fils, estans en leurs mains, luy creuerent les yeux, dont il mourut de tristesse peu de iours apres, & Irene regna trois ans apres son fils, & son fils quinze ans.

En ce temps l'Empire fut diuisé en deux : qui fut l'an de grace 801. Mais nous lairrons les Emperours d'Orient, & commencerons aux Emperours d'Occident.

104. **C**harlemagne apres la mort de Constantin VI. fut appelé en Italie contre les Lombards, lesquels il chassa d'Italie, conquist à force d'armes les villes de Rome, Rauenne, Milan, & toutes les forteresses de la Pouille, & Campanie, donna la paix à l'Eglise qui auoit esté opprimée l'espace de 100. ans par les Lombards, tellement qu'il fut déclaré Empereur des Romains par le Pape Leon, à la grande ioye de tout le peuple. Voyant que sa mort approchoit, il déclara son fils Louys Empereur, & Roy des Romains, & il fit son nepueu Benard Roy d'Italie, en l'an 813. & peu apres il mourut aagé de 72. ans, l'an de grace 814. ayant regné Empereur 14. ans.

105. Louys surnommé le Debonnaire seul fils de Charlemagne, apres la mort de son pere fut couronné à Aix. Il fut hay des Printes de l'Empire, à cause de sa cruauté contre Benard, & les parens & alliez d'iceluy. Il fit Lothaire son fils aîné Roy de Bauiere, Pepin Roy d'Aquitaine, & retint le puîné pres de soy, luy donna le titre de Roy d'Italie, ce qui esmeut Benard fils de Pepin Roy d'Italie, de leuer les armes contre l'Empereur : mais sa venue en Italie effroya & mit en fuite Benard & ses alliez, lequel se liura luy-mesme à l'Empereur, & l'emmena prisonnier à Aix, luy fit creuer les yeux, puis il le mit en vn Monastere l'an huit cents dix huit : au lieu de Benard, il fit son fils Lothaire Roy d'Italie & Empereur, ses enfans conspirerent contre luy, & contrainquirent leur pere de se rendre à eux, & se rendit Moine à Soissons, mais les autres fils de Louys, quelques temps apres eurent compassion de leur pere, le remirent en sa dignité Imperiale. Ainsi Louys fut remis vn an apres, & pardonna à ses enfans qui luy crierent mercy, au retour de ce voyage, Louys mourut aagé de 64. ans, ayant regné 27. ans, il fut enterré à Mets.

106. Lothaire succeda apres la mort du pere : il s'alluma vne sanglante guerre entre les freres, laquelle affoiblit tellement les François qu'ils en furent presque entierement ruinez. Les historiens disent qu'en la premiere bataille il y eut plus de 100000. hommes de tuez : mais les Seigneurs de l'Empire les accorderent, tellement que des Royaumes de Louys le Debonnaire furent faites quatre parts, Louys eut la Germanie, Charles fut Roy de France, Lothaire eut l'Empire, l'Italie, & les pays qui sont entre le Rhin, & la Moselle, Mets, & Treues, Pepin fils de Pepin eut l'Aquitaine : ceste transaction fut publiée l'an de grace 843. Quelque temps apres Lothaire quitta volontairement l'Empire, & se rendit Moine, au Monastere de Brume l'an de grace 855. où il mourut l'an suiuant, ayant regné 15. ans.

107. Louys II. fils aîné de Lothaire, descendit en Italie, pour chasser les Sarrazins : mais la peste se mit en son armée, & fut contraint de laisser le pays de Beneuent en garde à Adagise, Lombard, Prince de Salerne, lequel en l'absence de l'Empereur print le party des Grecs, & fit reuolter presque toute l'Italie. Apres que Louys eut receu ces nouuelles, il retourna en Italie pour chastier ces traistres, ayant repris les villes qui s'estoient reuoltees, & contraingnit Adagise de s'enfuir, il fit executer ses compagnons, & l'Italie estant pacifiée, il mourut à Milan l'an de grace 874. ayant regné 19. ans, il estoit docte, prudent, Religieux, & prompt à donner Conseil.

108. Charles le Chauue, fils de Louys Debonnaire, ayant entendu la mort de Louys sans enfans, dressa vne armée, passa en Italie, pour oster l'Empire aux Allemands, & arriua à Rome,

me, où il fut déclaré Empereur, le 25. iour de Decembre l'an de grace 875. mourut à Mantoue, & estimoit on qu'un Medecin Iuif son familier nommé Sedechias, l'auoit empoisonné, il deceda l'an du monde 4846. & de grace 878. ayant esté Roy de France 36. ans, & Empereur 2. 109. Charles le Gros, fils de Louys, surnomme Germanique, heritier du Royaume d'Italie, de par Carloman & d'Allemagne, à cause de Louys, apres que le Pape Jean l'eust déclaré Empereur, chassa heureusement les Sarrazins hors d'Italie, puis apres il retourna en Allemagne, & gouuerna la France en qualité de tuteur de Charles le simple. Finalement il fut hay & méprisé de ses suiets, à cause de ses maladies, & que son esprit se portoit aussi mal que son corps, on le fit renoncer à l'Empire, & Arnoul fut mis en son lieu, il mourut tost apres en un petit village de Suabe le treiziesme Ianuier l'an du monde 4850. & de grace 888.

110. Arnoul fils bastart de Carloman, estant Empereur, l'Italie se remplit de tumultes & seditions. Berenger & un Duc de Spolere s'entrebattoient à qui seroit Roy d'Italie. Arnoul empesché en vne guerre contre les Esclauons de Morauie, ne peut aller en Italie qu'il n'eust dompté ses peuples, ce qu'ayant fait il passa en Italie, où il appaisa les troubles qui estoient à Rome, & fut par le Pape Forinose qui l'y auoit fait venir, déclaré Empereur l'an 10. apres auoir pris le gouuernement de l'Empire, & finalement ayant pris Spolere par force, il vint assieger le Chateau de Cauarin, dans lequel estoit la femme de Guy, laquelle cauteleuse, voyant qu'il n'y auoit moyen de resister, corrompt à force d'argent un des domestiques de l'Empereur, lequel donna un breuuage empoisonné à son maitre, duquel Arnoul mourut le 29. Nouembre l'an du monde 4802. & de l'an de grace 900. & de son Empire 12. ans.

111. Louys III. ayant esté créé Empereur apres la mort de son pere Arnoul, gouuerna quelque temps l'Empire, par l'ayde d'Otton Duc de Saxe, & d'Otton Archeuesque de Mayence, ses tuteurs: les discordes Ciuiles qui auoient commencé du viuant de son pere, prindrent accroissement par tout. L'Italie & l'Allemagne sont remplies de diuisions & de guerres Ciuiles. Les Hongrois amassez gastent & pillent les limites de Baviere. L'Empereur Louys alla au deuant avec le plus de force qu'il peut, & leur donna bataille qui dura depuis le neufiesme d'Aoult iusqu'au 12. mais en fin il fut deffait & mis en route, & il perdit la plus brane noblesse d'Allemagne, les Hongrois victorieux gaignerent pays, iusqu'à ce que Louys acheta la paix à grand prix, ce qui fut cause de la mort, car de regret, il tomba malade & mourut le 12. Ianuier, l'an du monde 4873. de grace 911. & de son Empire douze ans.

112. Henry I Oiseleur fut esleu à l'Empire l'an de grace 919. & procura tant qu'il peut d'appaiser les guerres Ciuiles, & remettre l'Allemagne en paix, ce qu'il fit. Il fit la guerre aux Sclauons lesquels il surmonta en bataille, puis fit la guerre aux Danois, lesquels il surmonta aussi en plusieurs batailles: ce fait, il alla en Boheme: & print Prague ville capitale du pays, il rendit Boheme tributaire de l'Empire, & tandis les Hongrois reuindrent en Allemagne. Henry alla au deuant, leur donna bataille, où ils perdirent plus de 40. mille hommes & chassa le reste hors d'Allemagne. Apres ceste grande victoire, il s'apprettoit pour aller en Italie, il fut surpris d'une apoplexie qui se tourna en paralysie, tellement qu'apres auoir designé son fils Othon Empereur, il mourut aagé de 60. ans, regna 18. ans, 937. ans apres la natiuité de Iesus-Christ.

113. Othon II. succeda à son pere Henry l'Oyseleur. Il fut surnommé le grand à cause de ses beaux exploits, avant pacifié la Germanie, & les Royaumes estrangers, & rafermy l'Empire. Il fut sacré à Aix par Hildeberg Euesque de Mayence, l'an de grace 939. & apres il passa en Italie, où il reestablit le Pape Jean 3. & fit declarer son fils Othon Empereur: estant de retour en Allemagne, il fut surpris d'une apoplexie dont il mourut l'an de grace 974. & le 37. de son regne.

114. Othon III. succeda à son pere l'an de grace 975. le commencement de son Empire fut heureux, la fin ne le fut pas, ayant donné ordre à l'estat d'Allemagne, il dressa une grande armee pour aller contre les Grecs & Sarrazins: estant arrivé il donna bataille aux Grecs & Sarrazins, où il fut deffait & mis en route, l'Empereur iettant les armes, print la fuite vers le Golphe de Tarante & Rosane, se ietta à la mer en nage pour se sauuer: mais il fut pris des nauires des ennemis, & n'estant point recogneu, paya rançon aux Mariniers. Otho ayant perdu son armee & presque tout l'Empire, recueillit tout ce peu de reste de son armee: puis recommença la guerre en laquelle il tailla en pieces tous les garnisons des Sarrazins, & fut surnommé le passe-port des Sarrazins, & mourut d'un flux de ventre le 8. Decembre l'an de grace 986. & du monde 4945. & au 10. an de son Empire, il fut enterré à Rome.

115. Othon IV. fut déclaré Empereur, à son aduenement remet l'Allemagne en paix, l'Italie

M m m

estoit affligée de seditions, il s'estudia comme il pourroit la mettre en repos. Crescens auoit vsurpé à Rome vne puillance de Consul, & chassa le Pape de son siege. L'Empereur y alla avec son armee, il s'arresta à Rauenne, reçoit nouuelle de la mort du Pape, incontinent ordonne pour successeur son cousin Bruno fils d'Othon, lequel fut appelé Gregoire V. Il l'enuoye à Rome deuant, & va apres, où ayant esté receu, il pardonna à Crescens, se fait declarer Empereur par le Pape, se resolut de s'en retourner en Allemagne, à peine est-il dehors que Crescens de son autorité priuée chasse le Pape Gregoire, fait Pape vn nommé Jean de Plaisance, l'Empereur oyant ces nouuelles, reuint à Rome, entra dans la ville & print Crescens, & le fit mettre sur Aune, la teste tournée vers la queue, le fit pourmener par les rues, & apres auoir souffert mille maux, il le fit pendre à la porte avec 12. de ses compagnons: l'Empereur ayant restably Gregoire, fit vne ordonnance du consentement du Pape, il la confirma & publia, à sçauoir qu'à l'aduenir les Allemands seulement auroient tout droit & pouuoir d'estire l'Empereur Romain, & ne seroit loisible au Pape de proclamer Empereur Prince quelconque, sinon celuy que les Seigneurs d'Allemagne auroient esleu, les Romains se mutinerent d'autant qu'on leur ostoit toute puillance de donner leur voix en l'eslection des Empereurs. Othon va à Rome pour la dernière fois amouraché de la veue de Crescens, elle voyant que l'Empereur se preparoit pour retourner en Allemagne, & ne l'espouseroit point, de despit l'empoisonna, & mourut le 20. Octobre l'an de grace 1001. ayant regné 19. ans.

116. Henry I. surnommé le Saint, paruint à l'Empire vn an apres la mort d'Othon, il surmonta ceux qui s'estoient opposez à son eslection, il surmonta les Henetiens qui auoient rejetté la Religion Chrestienne, & apres auoir mis ordre aux affaires d'Allemagne, dressa vne armee, passa en Italie, pour trois raisons. La premiere afin de confirmer la possession de l'Empire aux Allemands. La deuxiesme, afin de dompter le Marquis d'Androuin, que les Eueques & la Noblesse d'Italie auoit fait Empereur à Milan. La 3. pour faire teste aux Sarrazins, & Grecs. Estant entré en Italie, il gagna deux batailles contre Androuin, lequel fut vaincu & tué en ceste guerre, Henry fut prins, & ayant trompé ses gardes, il se precipita d'une muraille en bas, mais il se desnoua la cuisse, & depuis il fut surnommé le Boiteux. Finalement il mourut le 13. Iuillet, l'an de grace 1024. & du monde 4986. & au 24. an de son Empire.

117. Conrad le Salique, fut esleu Empereur. Il passa en Italie, afin de tenir en bride tous ceux qui voudroient tendre à reuolte, il confirma la possession de l'Empire baillee aux Allemands, & pour se faire declarer Empereur, auant que partir d'Allemagne, il designa son fils Henry pour Empereur, estant de retour en Allemagne il mourut de mort soudaine, le 4. de Iuin, l'an de grace 1039 & du monde 5001. ayant esté Empereur 15. ans, il est enterré à Spire, 118 Henry surnommé le Noir, succeda à son pere, au commencement il se trouua enuélé de 2. grosses guerres, l'une contre les Boëmiens qui refuserent de payer tous les ans le tribut qu'ils deuoient, Henry les surmonta qui les contraignit de payer, & retourner sous le ioug de l'Empire. L'autre pour restabli Pierre Roy de Hongrie, qui auoit esté chassé par Othon chef des Bohemiens, Henry marcha en Hongrie, où il défit Othon pres Iauarin, & lequel fut prins & mené au Roy, qui luy fit trancher la teste, qui fut le 4. Iuillet 1044. Pendant ces guerres, l'Italie & la ville de Rome sont troublez par Benoist neuuesme. Siluestre 3. & Gregoire 6. à qui seroit Pape: l'Empereur va en Italie, & par l'aduis d'un Concile assemblé par son autorité Imperiale, ces trois Papes sont deboutez & au lieu fut estably Clement deuxiesme, & ayant esté déclaré Empereur par le Pape, il ramena son armee en Allemagne, il n'estoit pas encore en Germanie, que le Pape mourut de poison, & apres luy vn autre Pape nommé Damase, qui ne vécut que 23. iours, l'Empereur establi vn autre Pape nommé Leon 9. lequel suivit l'Empereur en Allemagne, & quelque temps apres l'Empereur renuoya Leon en Italie, laquelle estoit pleine de seditions, l'Empereur y retourne de rechef, & auant que partir il fist couronner son fils aagé de quatre ans à Aix, Empereur: il demeura en Italie vn an, où il remit toutes choses en paix: à son retour il dressa vne armee contre les Sclavons, laquelle fut toute défaite. L'Empereur fasché demeure malade & mourut pour auoir voulu aualler vn trop gros morceau de pain, le cinquiesme Octobre l'an de grace 1056. il auoit regné 17. ans, & vécut 40. ans, & fut enterré à Spire.

119. Henry IV. aagé de sept ans commença à estre Empereur durant sa ieunesse, il y eut de sanglantes guerres Ciuiles, & fut contrainct de mettre la main aux affaires à l'aage de treize ans. L'Allemagne fut embrasée de guerres Ciuiles, il surmonta Othon Duc de Bauiere, le Pape Gregoire septiesme l'excommunia à la poursuite des Saxons,

Saxons, enuoye vne bulle par laquelle Henry estoit proscrit de l'Eglise, & le Pape enuoya a Raoul Duc de Suabe, vne couronne d'or, & commanda aux Euesques d'Allemagne de quitter le party de Henry, & se ranger avec Raoul, lequel accepta le nom d'Empereur, & fut couronné à Mayence. Il y eut neuf batailles entre Henry & les Saxons. Raoul est défait & bleffé à mort: car la main droicte luy fut coupee, auant que mourir, on luy rapporta la main, lors adressant sa parole aux Euesques qui estoient pres de luy, Voilà (dit-il) la main qui a presté le serment & la foy que j'ay faulcée par vostre perfidie à l'Empereur, de laquelle vous rendez compte deuant Dieu.

L'Empereur ayant donné & soustenu 62. batailles contre ses ennemis, se veit despouiller de la dignité imperiale par son propre fils. Or comme il vouloit vanger vn tel ouurage, dressant vne armee, il mourut au siege, aagé de 56. ans le septiesme Aoust 1106. ayant regné 50. ans.

120. Henry V. succeda, à son aduenement, il surmonta Henry Duc de Lorraine, & Robert Comte de Flandres, & les contraignit de luy iurer fidelité, il mena son armee à Rome, il fut en l'an mil. 111. proclamé Empereur par le Pape Patchal, & par vne publique declaration furent confirmez les anciens priuileges de l'Empire. A peine l'Empereur estoit-il hors de Rome, que le Pape ne rescindast toutes les ordonnances d'iceluy, & retracta sa promesse, & à la suscitation les Saxons leuerent vne grosse armee, & donnerent bataille à l'Empereur l'an 1115. le 11. Ianuier, en laquelle il fut desfait: derechef l'Empereur retourne en Italie, mais le voyant ainsi agité par les armes du Pape, & par infinies seditions de lesuiets, transporté de rage & fureur, ne se souciant plus de sa patrie, joint la priere des Euesques, qui le prioient de quitter quelque chose de son droit, il accorda au Pape ce qu'il demandoit, ce qui fut publie à Vormes, l'an 1122. le 23. Septembre. Ayant appaisé la haute Allemagne, il alla à Vtrecht, pour y mettre le pays en paix, où il tomba malade, & mourut le 23. Iuillet, l'an de grace 1125. & du monde 5807. ayant regné 22. ans.

121. Lothaire II. de Saxe enuahit l'Empire malgré les Princes Allemans, il entra en concurrence avec Conrad, qui estoit fils de la sœur de Henry 5. mais saint Bernard appointa ces deux Princes, & l'Empire demeura à Lothaire. L'Empereur alla par deux fois en Italie, & pacifia les affaires, dressa l'estude des loix & l'ordre de la iustice, pour l'ornement du pays. Comme il retournoit en Allemagne, fut surprins d'une maladie, dont il mourut en chemin, le 6. Decembre 1138. & de l'an du monde 5100. ayant regné 11. ans.

122. Conrad II. apres la mort de Lothaire fut esleu Empereur par les Estats tenus à Mayence. Il surmonta Henry le superbe Duc de Saxe, & de Bauiere qui vouloit estre Empereur. Guelfe son freres'enferme en la ville de *Wormsberg*, & apres vn long siege, accable de famine, est contraint de se rendre, la ville est donnee en proye aux soldats, les femmes supplierent l'Empereur qu'il leur permit de sortir avec tout ce qu'elles pourroient porter. L'Empereur leur accorde ceste requeste, & pensoit qu'ils deussent emporter ce qu'ils pourroient de leurs richesses, mais elles les laisserent, & chargerent leurs maris sur leurs espaules, & prindrent leurs enfans sur leurs bras, & sortirent en tels equipages. L'Empereur voyant l'amitié de ces femmes, leur fit vn banquet & leur pardonna, depuis il fut en Asie avec le Roy Louys, il combatit le Turc en bataille rangée pres la riuere de Meandre, où il en fit vne telle boucherie que ceste riuere deuint rouge comme sang, & couuerte de corps morts: ayant par telle victoire chassé ses ennemis, le chemin fut libre pour aller en Ierusalem. L'Empereur reuint en Allemagne, ayant demeuré quatre ans audit voyage, il mourut à Bamberg, le 15. Feurier 1150. ayant regné 15. ans.

123. Frideric surnommé Barbe-rouffe, fut esleu par le testament de Conrad, il accepte l'Empire, vient à Rome, où le Pape Adrian IV. le couronna le vingt-huictiesme Iuin, il retourne en Allemagne. L'Italie se reuolte contre l'Empereur, il s'y achemine, leur donne bataille en laquelle il y eut 12000. Romains tuez sur le champ, puis assiegea & print Rome. Le Pape Alexandre excommunia l'Empereur & vint à Venise: où il se prosterna aux pieds du Pape, lequel mit le pied sur le col de l'Empereur, & fit crier à haute voix, *tu marcheras sur l'aspic & le basilic*, l'Empereur respond au Pape. *J'obray, non à toy, mais à saint Pierre*. Le Pape respondit, *& à moy, & à saint Pierre*. Apres que l'Empereur eut l'absolution, & ayant pacifié l'Italie, reuint en Allemagne, se prepare à la guerre d'Asie, gaigne trois batailles sur les Turcs pres d'Icône, le met en déroute. Saladin s'enfuit hors d'Asie, Frideric poursuit les victoires, conqueste la Cilicie, taille en pieces l'armée des Sarrazins: chasse les troupes de Saladin hors de la petite Armenie, l'Empereur battu de chaleur se voulant baigner en vne riuere, s'y noya le 10. Iuin 119. & regna 37. ans

124. Henry VI. succeda à son pere Frideric, l'an de grace 1195. du consentement des Princes de l'Empire. Il espousa Constance, fille de Roger, Roy de Sicile, laquelle apporta à son mary pour dotaire, le Royaume de Sicile. Henry passa en Italie, où il fut couronné par le Pape Celestin. Estant poullé par le Pape, il enuoya vne belle armee en Asie, accompagnée des plus grands Seigneurs & Princes de l'Empire, mais la mort inopinée de Henry rompit le cours de leurs entreprises. Henry estoit allé en Sicile pour faire armer & equiper sa galere, afin de suiure l'armee: mais estant à Messine, fut empoisonné par sa femme, pour la haine qu'elle luy portoit, à cause de ses adulteres, il mourut l'an du monde 6160. & de grace 1198. & regna 7. ans, & laissa son fils Frideric âgé de cinq ans, sous la tutelle de son frere Philippe.

125. Philippe I. I. fils de Barbe-rousse, fut esleu Empereur: Il eut de grandes guerres, la plupart des Princes estoient du costé de Philippes, mais le Pape & les autres Princes empeschoient Philippe qu'il ne fust Empereur, & le Pape auoit promis la couronne à Othon fils de Henry V. & excommunia Philippe. Ce qui occasionna de grandes guerres entre Othon & Philippe: & en fin l'Empire demeura à Philippe. Alors le Pape enuoya deux Cardinaux pour donner l'absolution à Philippe, lequel il reconcilia avec Othon par le moyé du mariage de sa fille. Toutes choses ainsi accordees l'Empereur estant à Bamberg pour se faire medeciner, fit sortir de sa chambre tous ceux qui y estoient, & demeura seul avec Henry Truchefs, avec lequel il passoit le temps: sur ce Othon de Vuitelsbach surnommé le Jeune, sans monstrier mauuais visage entre dans la chambre, & donna vn coup de poignard dans la gorge de l'Empereur, dont il mourut le 22. Iuin l'an de grace 1208. & du monde 5170. ayant regné dix ans: l'Imperatrice voyant son mary ainsi tué mourut de tristesse.

126. Othon V. eut l'Empire apres la mort de Philippe, mais il n'en iouyt pas long-temps: car il en fut debouté par la sentence du Pape qui l'y auoit esleué, il fut couronné à Rome par le Pape Innocent 3. mais l'Empereur s'estant rendu maistre de la Romagne, Ancône, & la Pouille, le Pape l'excommunia, l'Esque de Mayence publia l'excommunication en Allemagne, dont sortirent plusieurs guerres ciuiles: Othon se voyant assailly de tous costez, & que les Princes auoient esleu Empereur Federic II. se retira en Brabant, où apres auoir perdu vne bataille contre Federic, & se voyant abandonné des siens, renonça de son gré à l'Empire le 3. an de son gouuernement.

127. Federic II. fut couronné à Aix l'an de grace 1213. il fit alliance avec Philippe Roy de France, Othon quitte l'Empire, Federic pacifie l'Allemagne, on luy propose de faire la guerre en Asie, ce qu'il promet: part de Brunswic avec son armee pour y aller le 11. Aoust 1228. ioint l'armee des Chrestiens à Ptolemaide, fit vne trefue de deux ans avec le Sultan fort auantageuse: il rentra en la possession du Royaume de Hierusalem, les prisonniers Chrestiens relaschez sans payer rāçon, & apres auoir donné bon ordre en la Palestine, reuint en Italie, le Pape excommunia l'Empereur, dont sortirent de grands troubles, ayant recogneu que ses amis, & le bon heur luy deffailloient, se retire en Sicile, en chemin il fut empoisonné, & mourut au Chasteau de la Pouille le 3. Decembre 1250. âgé de 54. ans, ayant regné 32. ans.

Après le deceds de Federic il y eut des Schismes à l'Empire, iusques à Rodolphe, dont la plusspart des Historiens qui escriuent les vies des Emperours, mettent pour interregne & vacance de l'Empire tous ce temps là, ne vou'ans pas enir pour Emperours les suyuants iusques à Rodolphe, qui furent esleus par diuers parens, durant les guerres ciuiles, & a'uant aussi qu'ils ne furent pas couronnez à Rome: c'est pourquoy aussi nous ne les comptons point pour Emperours, & les mettrons seulement selon leur ordre.

Conrad fils de Federic 2. fut créé Roy des Romains du viuant de son pere, & empisonné par Manfred son frere bastard, l'an de grace 1254.

Henry de Landgraue de Turinge fut esleu Roy des Romains en hayne de Federic 2. & de Conrad son fils, & mourut d'vn coup de fiesche deuant Vlme, au meisme an qu'il fut esleu Roy des Romains.

Guillaume Comte de Hollande fut esleu Roy des Romains, & approuué par le Pape Alexandre, & comme il pensoit aller à Rome se faire couronner, il mourut de son regne le 9. & de salut 1255.

Richard frere du Roy d'Angleterre fut aussi esleu Roy des Romains par Conrad Archeuesque de Cologne, & Louys Comte Palatin du Rhin, & mourut le 6. an de son regne en uier 1257.

Alphonse Roy d'Espagne, qui auoit aussi esté esleu par l'Archeuesque de Treues, & le Marquis de Brandebourg l'an 1257. en Ianuier, les Eslecteurs ne se pouuans accorder.

128. Rodolfe de Haspourg aagé de 54. ans, fut esleu en la ville de Francfort solemnellement par les Eslecteurs de l'Empire, le 1. Octobre 1273. & fut couronné avec grande solennité, il se resolut d'esteindre en Allemagne toutes seditions, tumultes, brigandages & guerres: & pour cet effet il fit marcher les troupes contre le Marquis de Bade, & les confederez de Suabe, & les contraignit de demander paix. Puis marche en Autriche contre Otracrus Roy de Boheme, & le surmonta en deux batailles, lequel fut tué en la seconde le 26. Aoust 1278 il fit raser plus de 70. chasteaux & places fortes, qui seruoient de retraicte aux brigands: fit mourir par iustice 29. des principaux chefs, il n'entra point en Italie, mais il se tint en deuoir avec le Pape. Tellement que par sa sagesse, prudence, vertu, & felicité, esteignit les guerres ciuiles, & fut cause que l'Allemagne fut restauree, apres auoir esté si longuement troublée, estant ja vieil il mourut le 15. Iuillet, l'an de grace 1591. & du monde 5253. ayant regné 19. ans, est enterré à Spire.

129. Adolphe de Nassau fut le 1. de May 1292. à Francfort par vne iournee Imperiale esleu Empereur. A son aduenement il se presta au Roy d'Angleterre qui auoit guerre contre le Roy de France, moyennant cent mil escus, qui fut cause que les Princes de l'Empire ne tindrent plus compte de luy, & se mocquerent ouuertement. Finalement Albert d'Autriche estant inuesty del'Empire se mit en campagne. Adolphe vint au deuant de luy, ils se rencontrent pres de Spire, où la bataille fut donnée le 2. Iuillet 1298. en laquelle Adolphe fut tué de la main d'Albert comme il se releuoit ayant esté renuersé par terre, & apres auoir regné 8. iours.

130. Albert fils de Raoul, Duc d'Autriche, fut receu au gouvernement de l'Empire par les 7. Eslecteurs, qui tous d'une voix le proclamerent Empereur le 15. Iuillet, où se trouua si grande foule de gens que le Duc de Saxe y fut estouffé. Albert n'entra point en Italie, toutefois il y establit des Gouverneurs, & pria le Pape Boniface 8. de le vouloir proclamer Empereur; ce qu'il fit, & avec cela le Pape donna à l'Empereur le Royaume de France, d'autant qu'il auoit excommunié Philippe le Bel. Albert ne fit point la guerre hors d'Allemagne, mais dans le pays à diuers Seigneurs & Princes, pour plusieurs & diuerses occurrences, il fut tué pres du Rhin par son propre neveu, auquel il auoit osté la Duché de Suabe, comme à vn prodigue, estant accompagné de quelques Barons, le premier de May, l'an de grace 1308. & du monde 5270. ayant regné 10. ans.

131. Henry 7. Comte de Luxembourg fut le 1. de Nouembre esleu par les Eslecteurs à Francfort, & confirmé par le Pape, à la charge qu'il rendroit l'Italie paisible dans 2. ans, l'Italie qui n'auoit veu Empereur depuis 60. ans, nageoit en son propre sang espuisée de richesses par les tyrans qui la tenoient esclau d'une estrange sorte, à cause dequoy elle imploroit le secours de l'Empereur. Il mene son armee en Italie, toutes les villes se mettent en sa sauuegarde, il se fait couronner à Milan. Les Guelphes & Gibelins sont en trouble, l'Empereur fauorise les Gibelins, & surmonte les Guelphes, & fait faire de terribles executions. Cela fait il va à Rome où il fut déclaré Empereur le 1. d'Aoust 1312. Il assiege les Florentins, lesquels n'en pouuants plus apostèrent vn moine Iacobin, lequel empoisonna l'Empereur à Beneuent, en luy baillant le saint Sacrement par vne Hostie: ainsi mourut ce grand Prince le iour de saint Barthelemy 24. Aoust 1313. ayant regné 6. ans, gist à Pise.

132. Federic 3. d'Autriche fut esleu Empereur, & ensemble Louys de Baviere fut esleu aussi, Louys fut couronné à Aix, & Federic avec moindre suite fut couronné à Bonne par l'Archeuesque de Cologne, incontinent l'Allemagne fut partie en 2. factions, & cela alluma vne cruelle guerre ciuile, laquelle dura 8. ans: il y eut destrefues, & essaya-on de pacifier ces differents, tellement que le iour S. Michel l'an 1323. Federic fut deffait & pris prisonnier, & mis en vn Chasteau sur le Nabe, fut deliuré, à condition qu'il pourroit tenir le titre d'Emp. avec Louys sa vie durant, & non point les droits & la puissance de l'Empire. Il fut empoisonné d'un breuuage amatoire l'an 1330. le 13. de Ianuier.

133. Louys IV. demeura apres la mort de Federic seul Empereur, il passa en Italie où il se fit couronner luy & sa femme: il eut de grandes contentions contre le Pape Iean 22. qui résidoit lors à Auignon, tellement que ce Pape l'excommunia, & fit eslire Charles fils du Roy de Boheme. Louys fit publier vn Edict d'abolition, touchant ceux qui aubient suiuy le party de Federic, par ce moyen il remit à soy les Princes Allemans, il fit tenir vne Chambre Imperiale à Strasbourg, où il declara la cause pourquoy le Pape l'auoit excommunié, & qu'il se soumettoit à vn Concile, le Pape commanda à tous les Princes Allemans & Italiens de quitter le party de Louys, tellement qu'il ne peut auoir l'absolution, ce qui causa de grands troubles: il mourut vn an apres l'election de Charles: le 11. Octobre l'an de grace 1347. l'an du monde 5039. & gouverna l'Empire 33. ans.

134. Charles 4. du vivant de Louys fut esleu Empereur : mais apres la mort de Louys, les Electeurs lereietterent, & esleurent en son lieu Gontier Comte de Schwartzembourg en Turinge, l'an 1349. le 2. Feurier, mais il ne vescut guieres, car Charles corrompit son medecin par argent, tellement qu'un iour Gontier estant indisposé, au lieu d'un breuvage fut empoisonné par ce Medecin : il se douta d'estre empoisonné, car il contraingnit le Medecin d'aualler le reste, il le vit tomber mort devant luy, & Gontier ne vescut guieres apres, gist à S. Barthelomy à Francfort. Charles estant demeuré seul Empereur passe en Italie l'an 1354. receut la couronne de fer à Milan, il alla à Rome où il fut déclaré Emp. estant de retour à Niers il tint vne grande iournée Imperiale où fut fait cetant celebre Edict de Charles, sous le nō de la Bulle d'or. Il sollicita les Electeurs que son fils fust designé Emp. ce qui fut fait en l'an 1376. car Venceslas fut couronné Emp. & espousa Ieanne fille du Duc de Bauiere Comtesse de Hollande & Zelande. L'Emp. ioyeux d'auoir esleué son fils en la plus excellente domination de la Chrestienté, mourut à Prague le vingt septiesme May 1375. ayant regné trente ans.

135. Venceslas âgé de 15. ans, 6. iours apres son eslection fut couronné Emp. ce Prince auoit la face tres-difforme & contrefaite, il ressembloit mieux à vn Magot qu'à vn Prince, il estoit hebeté, vilain, lascif, cruel & sanguinaire, il auoit mauuaise grace, son corps n'estoit propre que pour gourmander, paillarder, yronngner : il estoit soupconneux & cruel, tuât des hommes à sa table, à sa chambre de sa propre main. En fin ses subiects le prirent prisonnier, le mirent en vn cachot l'espace de 4. mois, dōr il eschappa : tous les Electeurs le desmirēt de sa dignité Imperiale 22. ans apres la mort de son pere, il mourut à Prague âgé de 57. ans, de son regne fut inuentee l'artillerie par vn moine.

136. Robert Comte Palatin du Rhin (apres que Venceslas fut deietté de l'Empire) fut esleu Empereur, Prince de vif esprit, sage & vaillant en guerre, fut couronné à Cologne par l'Euesque dudit lieu, estant couronné passa en Italie pour empescher que Galeas Duc de Milan ne vint au bout de ses desseins, mais l'Empereur ayant perdu la bataille, se retira en Allemagne, & laissa les Italiens s'entretuer, ayant pacifié l'Allemagne mourut en paix chez soy le 18. May 1410. & l'an du monde 3372. ayant regné 10. ans.

137. Sigismond Roy de Hongrie & de Boheme fut esleu Empereur, & si tost qu'il le fut il tascha d'appaiser les troubles de la Chrestienté, & d'vnir tous les Princes pour recommencer la guerre contre le Turc. Lors il y eut trois Papes, à scauoir Benoist 111. à Auignon, Jean 23. à Bologne, Gregoire 12. à Rimini. Sigismond poulsuit vn Concile pour remedier à ces maux, il fit vn voyage par l'Italie, la France, l'Espagne, & l'Angleterre en grande diligence : il fit tant que les Roys & Princes accorderent quel'on tiendroient vn Concile à Constance, là où se trouuerent les Roys & Princes Chrestiens, & les Empereurs de Grece & Trebizonce aussi en personne : l'Empereur retourne en Italie le 27. Decembre 1431. fit son entree à Milan : & ayant receu la couronne de fer, il prit son chemin à Rome où il fut couronné le iour de la Pentecoste 22. May : de là il se retire en Hongrie, mais il y eut vne horrible guerre ciuile en Boheme à cause de la mort de Iean Hus qui fut brulé au Concile de Constance. Finalement il deuint malade & mourut à Zuonne l'an du monde 3376. & de grace 1437. ayant esté Empereur 27. ans, Roy de Hongrie 31. Roy de Boheme 17. aagé de septante & vn an : c'estoit vn excellent Prince, mais mal-heureux en femme & en guerre.

138. Albert d'Austriche gendre de Sigismond luy succeda à l'Empire & aux 2. Royaumes de Hongrie & de Boheme l'an 1438. il eut quelques guerres en Boheme, mais elles furent tost assoupies, & l'annee suiuiante il fut surpris d'une dysenterie pour auoir trop mangé de melons, il mourut en Hongrie le 27. Octobre 1439. ceste mort precipitée fut la semence de nouveaux troubles.

139. Federic V. d'Austriche, fut esleu Empereur le 30. Mars 1440. il osta le schisme suruenue en l'Eglise touchant le Concile de Basle : il alla à Rome, il espousa Eleonor fille d'Edouard Roy de Portugal, fut déclaré Roy de Lombardie, & deux iours apres il fut avec sa femme déclaré Empereur des Romains, l'an 1442. ayant entendu que l'Allemagne estoit en grand trouble, se hesta d'y retourner, mais si tost qu'il y fut arriué il appaisa tout. Finalement il mourut d'un flux de ventre fort aagé, ayant regné cinquante trois ans. En ce temps l'Art de l'IMPRIMERIE fut inuenté en Allemagne, & les premiers liures imprimez à Mayence, l'an 1440. la ville de Constantinople fut prise par le Turc.

140. Maximilian fils de Federic paruint à l'Empire le sixiesme Feurier 1486. il fut fort amateur des gens doctes & fit reuiure en Allemagne toutes les bonnes sciences qui estoient presque ensevelies, il eut plusieurs guerres dedans & dehors l'Empire, il fut aux

guerres sanglantes d'Italie, esquelles il fut peu heureux: mais il eut forte guerre pour la Sicile contre Charles 8. Roy de France. Il eut aussi guerre contre les Suisses. Finalement il tint la dernière journée Imperiale en grande cōpagnie des Princes de l'Empire, en la ville d'Ausbourg, où il fut parlé de la guerre contre le Turc. Car Selima uoit exterminé les Mamelus, & fait pendre le dernier Sultan d'Egypte: & il mourut d'un flux de ventre le 12. Ianuier 1519. aagé de 59. ans, vn mois, & 20. iours, & auoit regné 31. ans vnze mois.

141. Charles V. Roy d'Espagne fut esleu Empereur par les Electeurs, le 18. Iuin 1520. prist les armes contre le grand Roy François son compétiteur en l'Empire, fit ligue avec le Pape & le Roy d'Angleterre: il enuoya le Duc de Bourbon en Italie, pour secourir Antoine de Leue qui estoit assiégé dans Paue: ces deux chefs donnent bataille aux François, le Roy François, & les principaux chefs furent pris prisonniers, donna pour femme Eleonor sa sœur au Roy de France, apres luy auoir fait payer deux millions d'or de rançon: il retourna en Allemagne, & se delibera d'aller au deuant du Turc à Vienne, & luy presenter bataille, mais le Turc s'enfuit avec beaucoup de perte: les Princes Protestans d'Allemagne luy firent la guerre, lesquels il mit en route: il pacifia l'Allemagne, fit vne ligue avec Iules III. pour chasser les François d'Italie: leua vne puissante armée en Allemagne, vint assieger Mets, là où il trouua que sa bonne fortune commençoit à le laisser: apres que son fils eut espousé Marie Royne d'Angleterre, il luy donna le Royaume de Naples, & se trouuant fort tourmenté de gouttes, renonça à tous ses Estats, & quitta l'Empire à Ferdinand son frere, l'an 1555. & puis fut à Bruxelles, où il fit faire le serment à tous les Seigneurs d'obeyr à son fils Philippes, & puis se retira en Espagne, mourut le vingt & vnième Septembre 1558. aagé de cinquante sept ans, huit mois, & 21. iour, ayant regné trente huit ans Empereur, & 44. Roy d'Espagne.

142. Ferdinand d'Autriche, frere de Charles V. fut le 5. de Ianuier 1531. proclamé Roy des Romains en la ville de Cologne, & couronné à Aix le 11. du mesme mois, nonobstant la protestation de nullité faicte par l'Electeur de Saxe des protestans. Ce different dura quelques annees, mais il fut assoupy. Maintenant il faut venir à l'election de Ferdinand pour estre Empereur, l'an 1558. les Electeurs assemblez à la maniere accoustumée, ils esleurent Ferdinand Empereur, lequel enuoya Cuzman son Ambassadeur à Rome, pour faire entendre au Pape son eslection. Il tint l'an 1559. vne journée Imperiale à Franc-fort, en laquelle on traita de la paix & de la Religion. L'an 1561. les Princes Protestans d'Allemagne s'assemblerent à Noremberg: comme ils estoient là, suruindrent deux Legats du Pape Pie, pour les exhorter, & prier de se trouuer au Concile de Trente, & qu'ils auroient audience: presenterent les lettres du Pape aux Princes. Au mois de Novembre 1562. l'Empereur, les Electeurs, & autres Princes assemblez pour eslire vn nouueau Roy des Romains, Maximilian fils de l'Empereur Ferdinand, peu auparauant couronné Roy de Boheme fut esleu Empereur, & couronné Roy avec grandes pompes & ceremonies, le vingt-cinquième Iuillet 1564. Ferdinand mourut à Vienne en Autriche, aagé de soixante ans, neuf mois, & quelques iours, ayant esté seul Empereur sept ans. Gist à Pragues: il eut quinze enfans de Anne Royne de Hongrie.

143. Maximilian II. fils de Ferdinand d'Autriche, fut esleu Empereur peu apres la mort de son pere: il tint sa premiere Diette à Ausbourg, où spécialement fut traité de la guerre contre le Turc, & le Vauode de Transylvanie, & quelles forces il falloit employer à la defence du Royaume de Hongrie contre le Turc, ennemy hereditaire des Chrestiens, l'Empereur demanda aux Estats d'Allemagne 40000. hommes de pied, & huit mille chevaux, pour faire teste au Turc, qui desia estoit entré en la Hongrie. En ceste annee 1566. Soliman Empereur des Turcs passa en Hongrie avec vne armee de 60000. hommes de pied, & grand nombre de gens de cheval: & avec ceste armee il passa le Danube, puis la Draue, sur laquelle il auoit fait bastir vn pont pour passer son armee: ce pont fut dressé en 14. iours, il estoit long de & large de 41. toises, il fut fait en extreme diligence, avec basteaux liez & enchaifnez ensemble par vne artifice admirable: assiege Segeth petite ville de Hongrie, deuant laquelle il mourut d'un flux de sang. Cependant Mahomet celant la mort de Soliman, print la ville d'assaut, qui fut vne grande perte, tant de la mort du Comte Serim, que des autres braues soldats morts en ceste place, & bien cent pieces d'artillerie prinses en ceste place. Derechef, à l'instance de l'Empereur l'Archeuesque de Mayence assigna vne journée Imperiale à Fulden, pour aduiser aux moyens de maintenir l'Allemagne en bonne paix. Au reste il tascha de ioindre le Royaume de Pologne à sa maison, pour rendre l'Empire plus ferme, pour repousser l'impetuosité du Turc: il fut marié 29. ans, & eut de sa femme 16. enfans: il mourut le 12. Octobre 1576. ayant regné 12. ans.

144. Rodolphe II. fils aîné de Maximilian, par le deceds de son pere parvint à l'Empire, & succeda au Royaume de Boheme & d'Hongrie, aagé de 15. ans: il a eu à diuerses fois de grandes guerres en Hongrie contre le Turc, avec diuers succès de part & d'autre. Finalement trefues furent accordees le douzième Nouembre 1605. entre l'Empereur & le grand Seigneur, lesquels durent encores à present: depuis il est arriué de terribles changemens en Transylvanie & Hongrie, tant en l'estat qu'en la Religion: tellement qu'en l'année 1608. il fut contraint de ceder & quitter à l'Archiduc Mathias son frere, le Royaume de Hongrie, & toute l'Archiduché d'Autriche, sans en rien reseruer, & mourut sans enfans le dixième Feurier 1612. ayant regné trente-cinq ans, quatre mois, aagé de soixante ans.

145. Mathias frere de Rodolphe, luy succeda à l'Empire, & fut eslen Roy des Romains à Francfort, le treizième du mois de Iuin l'an 1612.

146. Ferdinand II. ja couronné Roy d'Hongrie & de Boheme 1618. apres la mort de son cousin Mathias, Empereur des Romains, arriué le vingtième Mars 1619. fut promu à l'Empire dans la ville de Francfort, car ledit Mathias mourant sans enfans, laissa par sa mort le Roy Ferdinand, ainsi donc suiuant la demission de son Altesse de Flandres, & le droit qui estoit escheu audit Roy Ferdinand, tant par la demission de sondit cousin l'Archiduc de Flâdres, que par l'adoption que feu Mathias auoit faite de sa personne, & en vertu de son couronnement comme Roy de Boheme, & de son droit de premier Electeur seculier del'Empire: l'Archeuesque de Mayence (auquel seul appartient la charge d'aduertir les Princes & Electeurs du saint Empire de la mort de l'Empereur, & sommer lesdits Princes & Electeurs pour se trouuer à la Diette ordinaire, pour proceder à l'eslection d'un autre souuerain Magistrat & administrateur del'Empire) suiuant les anciennes coustumes, & en vertu de la Bulle d'orde Charles 4. conuoca & adiourna personnellement au 20. Iuillet l'an 1620. la dite Maïesté Ferdinand deuxiesme de ce nom comme legitime Roy de Boheme, & par consequent premier Electeur de l'Empire pour proceder à l'eslection d'un Roy & Empereur des Romains.

Election de l'Empereur Ferdinand II. à la Couronne Imperiale.

LE 8. Aoust stil vieil se trouuerent à Francfort les trois Electeurs Ecclesiastiques, & trois Ambassadeurs des Electeurs seculiers, avec pleines charges & pouuoir de leurs maistres de consentir à ladite eslection du Roy Ferdinand: l'ordre de leur arriuee fut tel.

LE Lundy suiuant, le 21. 11. de Iuillet, sont arriuez en la ville de Francfort le tres-reuerend en Dieu, tres-illustre Prince, & Sr, Sr Lothaire Archeuesque de Trier, Archichancelier du saint Empire en France, & au royaume d'Arles, & Electeur: comme aussi le soir du mesme iour l'Ambassadeur du tres-illustre Prince & Sr, Sr Iean Sigismond Marquis de Brandebourg, Archichambellan du saint Empire, & Electeur, Duc de Prusse, Juliers, Cleue, Berg, & Stetin, &c.

Finalemēt le Mercredy ensuiuant, le 23. 13. Iuillet, arriua aussi le tres-illustre, & tres-puissant Prince & Sr, Sr. Ferdinand II. Roy d'Hongrie & de Boheme, &c. Archiduc d'Autriche, Duc de Bourgogne, Styrie, Kerenten, Crain, & Vverttemberg, Marquis de Morauie, Comte de Habsburg, Tirol, &c. avec braue, & grand train, & bel appareil, auquel il y auoit iusques à cent arquebusiers à cheual: lesquels sieurs & Eslecteurs, & Ambassadeurs des seldits, furent tous receus, & introduits splendidement en la ville de Francfort, par la cavalerie qui auoit esté leuee par la ville, & dont la plus grande part estoient bourgeois.

Ledit sieur Roy Ferdinand second ayant laissé pour la garde de Vienne son frere l'Archiduc Leopold s'en alla à Ratisbonne, & de là à Francfort, ayant donné pouuoir audit sieur Archiduc de faire desarmer la bourgeoisie de Vienne, & vne partie de la garnison ostee, afin de s'asseurer contre la mauuaise volonté de ses habitans.

Ordre & Seante des Eslecteurs, Seigneurs, & Ambassades au Conseil tenu au Rommer, ou maison de ville.

Or apres que les Eslecteurs du saint Empire de Mayence, Trier, Cologne, & l'Administrateur del'Eslecteur Palatin, sçauoir Albert Comte de Solins, qui estoient neuf Seigneurs, assistez de plusieurs gentils hommes, entr'autres de Iean Richard Comte de Hanou Duc des deux Ponts, le Duc de Saxe, & les Ambassades del'Eslecteur de Brandebourg, les Ambassadeurs de l'Eslecteur de Saxe sçauoir Volgand Comte de Mansfeld, cinq Chefs en nombre

nombre, assistez de 50. chevaux. Et Adam Gans, chef de l'Ambassade de Brandebourg, & avec luy deux autres collegues avec suite de plus de 80. chevaux, furent arriuez dès le Mardy ensuiuant le 22. 11. de Iuillet, comme aussi en apres par diuerles fois, ils tindrent conseil par ensemble au Rommer, ou maison de ville, en vne sale spécialement à ce dedice. Il y eust en ceste sale sept sieges couuerts de velours noir, & cussins de mesme, disposez par ordre, l'un apres l'autre pres la fenestre, sur lesquels s'assirent lesdicts Eslecteurs, l'Administrateur, & l'Ambassadeur, à sçauoir pour commencer à la main droicte, premierement le Palatin, apres luy le Roy de Boheme en qualité d'Eslecteur: & apres sadite Majesté, l'Eslecteur de Mayence, puis celuy de Trier, celuy de Cologne, celuy de Saxe, & en fin celuy de Brandebourg. Au deuant d'eux estoit dressée vne table longue, couuerte de velours noir, à laquelle estoient assis les Chanceliers, Secretaires desdits Seigneurs: & sur les bancs d'aléctour, & autres sieges, estoient assis leurs principaux Conseillers.

Mais entre autres choses, desquelles (qui furent tout aussi tost tirees en consultation) le le point du iurement en fut vne: lequel selon la teneur de la bulle d'or, les bourgeois de la ville sont tenus de iurer. Parquoy & apres que Messieurs les Eslecteurs l'eurent requis, tant du Senat, que de la bourgeoisie & des soldats gagez de la ville: & pour cet effect eurent designé le Samedi 26. 16. de Iuillet, avec exprez commandement de faire sortir de la ville tous ceux qui n'appartenoient à la suite des Eslecteurs. Dequoy l'honorable Magistrat en aduisa ses bourgeois & habitans, dès le Vendredy au deuant, par le son du tambour & cry public.

Forme du serment que le Magistrat, le Senat, & les soldats de Francfort, prestent aux Eslecteurs du saint Empire.

Le 9. Aoust ensuiuant, Messieurs les Eslecteurs, & l'Ambassade de l'Eslecteur de Brandebourg, le sieur Adam Gans, noble Seigneur de Putlitz, estans assis sur des chaires de velours noir, en l'ordre que dessus, en la sale haute de la maison de ville, en vn lieu releué de planches d'environ vn pied de hauteur: l'honorable Magistrat de Francfort leur presta le premier ledit serment, en la forme qui leur fust proposée par le Chancelier de l'Eslecteur de Mayence, le sieur François Philipps Eaut, & à peu pres de ceste teneur. À sçauoir qu'auât toutes choses le Magistrat de Francfort deuoit en toute fidelité promettre, & iurer au tres-reueréd Prince & Sr, Sr Iean Schvveikhard, Archeuesque de Mayence, & Eslecteur, &c. se presentant en son nom, & au nom des autres Srs Eslecteurs, joint à l'administrateur de l'Electorat Palatin, & à l'Ambassadeur de l'Eslecteur de Brandebourg, de vouloir maintenir en toute fidelle diligence, & serieuse preuoyance tous & vn chacun des Eslecteurs, soit de la surprise l'un de l'autre, en cas qu'il suruint de la mesentente entr'eux, soit contre toute iniure qui pourroit estre faicte à eux, ou à aucun de ceux qu'ils ont en leur suite à Francfort au nombre de deux cents chevaux, à peine des punitions intimees par la bulle d'or. Et pendant le temps de l'eslection, de ne laisser ny permettre à aucune personne, de quelque estat & qualité qu'il puisse estre, en aucune façon entrer en la ville de Francfort, horsmis à leurs messagers, & gens de cōmandement: aussi ceux qui durant, ou apres l'entrée des Princes s'y pourroient estre fourrez, de faire sortir de la ville sans delay par voye de fait, sous peine mentionnée en la bulle d'or.

Aussi tost apres cela, le Senat le leur promit en main, & iura publiquement, & en presence de beaucoup d'assistans, selon la forme du serment proposé par le Chancelier de l'Eslecteur de Mayence. Cela fait, l'Administrateur de l'Eslecteur Palatin, & l'Ambassadeur de l'Eslecteur de Brandebourg, se leuerent pour s'en aller vers la fenestre de la sale qui regarde sur la place, & de la virent la bourgeoisie, qui selon l'aduis qu'elle en auoit receu le iour de deuant, s'y estoit rassemblée pour faire le mesme serment. Et en mesme temps les soldats qu'on auoit rassemblez de tous les quartiers de la ville en vne place qu'on nomme le Ramho, & depuis conduit en bel ordre sur la place deuant le Rommer, ayans fait vn cercle, presterent de mesme le serment qui leur fust proposé, & ce à la veuë de Messieurs les Eslecteurs. Les iours ensuiuans Messieurs les Eslecteurs à diuerses fois, & presque tous les iours retournerent à leurs sessions & consultations, comme auparauant & au mesme lieu, & finalement destinerent le 18. Aoust pour le iour de l'eslection, qui s'est aussi tenu & obserué comme s'ensuit.

Le Mardy le iour precedent de l'Eslection, deuant midy, l'honorable Magistrat de la ville de Francfort, fit de nouueau sonner le tambour, & proclamer, que tous & vn chacun des estrangers, & de ceux qui n'estoient compris en la suite des Eslecteurs, ou qui ne se fut obligé par serment au Senat, eust quant & quant à vider la ville. Et apres midy toutes les portes de la ville furent closes & fermées.

Ceremonies observees en l'Election Royale qui se fait au Temple de S. Barthelemy : les habits & vestemens Electoraux : l'ordre & rang que tiennent les Electeurs allans audit Temple, & le serment qu'ils presentent à l'Autel, auant qu'entrer au Conclave d'Election.

Mercredy le 18. Aoust, se fist election Royale, & premierement la bourgeoisie fut en armes, rassemblée en diuers endroits de la ville, singulierement ceux qui auoient esté mis à deux rangs depuis le Rommer, iusqu'à l'Eglise de saint Barthelemy, parurent en tres-bel equipage.

En apres le Magistrat fit sonner vne demie heure durant vne grosse cloche, qu'on nomme la cloche de l'alarme. Apres sept heures les Electeurs se rassemblerent au Rommer, ou Maison de ville, y estans venu tres-pompeusement à cheual, & y ayans tardé enuiron vne heure à s'habiller de leurs habits Electoraux en diuerses chambres; estans habillez, vindrēt à s'entr'attendre en la grande sale du Conseil. Sur les huit heures ils descendirent du Rommer, monterent à cheual, & cheuaucherent selon l'ordre qui s'ensuit, vers le temple de S. Barthelemy. Premierement vn grand nombre de Conseillers, Nobles, & d'autres estats au service des Electeurs marchoit deuant; les Mareschaux des Electeurs de Mayence, & de Trier, Iean Philippe de Hoheneck, & de Melchior Sr d'Eltz, chacun d'eux portant en main vne espee en vn fourreau doré, suiuiuent à cheual: apres le tres-reuerend en Dieu Prince & Sr, Sr Iean Schvveikhard Electeur de Mayence, & le tres-reuerend en Dieu Prince & Sr, Sr Lothaire Archeuesque de Trier, suiuiuent vestus de leurs habits Electoraux, à sçauoir de robes escarlattes fourrees, & parees par dehors d'hermine blanche, & d'une mitre de mesme couleur, & fourure: en apres cheuaucherent les Mareschaux de l'Archeuesque de Cologne, & du Royaume de Boheme, l'un desquels, à sçauoir, celui de Cologne portoit en sa main vne espee en vn fourreau doré, & le Marechal de Boheme vne autre en vn fourreau de velours rouge. Et immediatement apres eux suiuiuit le tres-reuerend, tres-illustre, & tres-generaux Prince & Sr, Sr Ferdinand Archeuesque de Cologne, &c. à droite: & sa Maesté Royale, comme Roy de Boheme, & en qualité d'Electeur, à gauche, vestus & parez de mesmes habits & bonnets, que les deux premiers Electeurs Ecclesiastiques: mais sa Maesté Royale estoit encore ornee par dessus son bonnet, de la Couronne de Boheme. Apres luy marchoient Pleickhard de Helmstert, Marechal du Palatinat, & le Sr Maximilian de Pappenheim Marechal du S. Empire, chacun desquels portoit semblablement en main vne espee dans vn fourreau doré, & apres suiuiuent à cheual les tres-illustres Princes & Srs, Srs Iean Palatin du Rhin, Administrateur de l'Electorat Palatin, à droite, Sr Iean George Duc de Saxe, Iuliers, Cleue, & Berg, &c. Electeur, au milieu, & le Sr Adam Ganz, Sr de Putlitz, &c. comme Ambassadeur de l'Electeur de Brandebourg, à gauche: entre lesquels les deux Electeurs du Palatinat, & Saxe, auoient aussi chacun vne robe de velours rouge, fourree, & paree par dehors d'hermine, & vn bonnet semblable aux autres Electeurs Ecclesiastiques: mais l'Ambassadeur de Brandebourg estoit habille de noir ainsi qu'à l'ordinaire, on ne portoit aussi deuant luy aucune espee, d'autant que l'Electeur de Brandebourg n'estoit luy-mesme present en personne. Et en cet ordre estans passez entre les deux rangs des bourgeois bien equippez, & arriuez à S. Barthelemy, qui est vne grande Eglise bastie en croix, & ornee d'une belle & haute tour deuers le septentrion, ils descendirent & entrerent au Temple, là où dès leur arriuee les trompettes des Electeurs dont il y auoit grand nombre, & qui estoient colloquez sur vn eschaffaut fait à propos, commencerent tous ensemble à sonner, & au dessous les tambours de camp à battre: ce qui rendit de soy vn singulier esclat, lequel ils continuerent iusques à ce que les Electeurs fussent entrez au chœur, qui estoit fort bien orné de toutes sortes de belles & riches tapisseries tissées d'or & de soye, comme aussi les sieges des Electeurs estoient couverts de velours noir, & les coussins de mesme, horsmis ceux du Roy de Boheme qui estoit tres-richement paré d'une piece de drap d'or. Or chacun des Electeurs ayant pris le siege qui luy auoit esté préparé, à sçauoir les Electeurs de Mayence, de Boheme, & du Palatinat, à droite du chœur: au milieu là où le Chantre a accoustumé de se seoir, celui de Trier; & à gauche celui de Cologne, & de Saxe, ensemble l'Ambassadeur de l'Electeur de Brandebourg, & quelques-uns de leurs principaux Conseillers, & du Clergé ayans eu entrée, le Sr & Marechal de Pappenheim ferma les huis. Et tost apres on commença à sonner les Orgues, & à chanter *Veni sancte Spiritus*, que les Musiciens acheuerent du haut de la gallerie qui respond dans le chœur.

Sur ce le Suffragant de Mayence se mit à faire l'office de la Messe: mais le Palatin, aussi Saxe & Brandebourg, qui n'ont pas accoustumé d'assister à ces sacres, se retirerent avec leurs gens

gens au conclaue de l'election, qui est tout ioignant le chœur, au droict costé, & s'y ar-
resterent iusqu'apres la Messe faicte, qui fut entremeslee de tres-bonne musique,
puis retournerent à leurs places: & apres qu'on eut chanté & acheué l'hymne *Veni sancte Spi-
ritus*, les Electeurs avec l'Ambassadeur de Brandebourg se rendirent deuant l'Autel, où ils
furent conduits chacun par son Marechal, portans vn glaive au fourreau, horsmis le susdit
Ambassadeur de Brandebourg, & là en vertu de la bulle d'or ils presterent le serment en ce-
ste sorte, à sçauoir qu'vn chacun d'eux monta sur le plus haut degré del'Autel, se tourna
deuers les assistans, & l'Electeur de Mayence entre deux leur ramenteust les causes de leur
assemblee, & que c'estoit pour faire le serment porté par la bulle, & qui se doit faire au-
parauant l'election. Et là dessus luy mesme le premier le rendit es mains de l'Electeur
de Trier, puis l'ayant requis, & leu aux autres Electeurs, en mesme sorte, ils iurerent
aussi tous, les Ecclesiastiques mettant la main sur l'estomach, & les seculiers sur les Euan-
giles.

L'Electeur de Mayence requist aussi que deux Notaires en prissent acte, & la mis-
sent par note, & qu'ils en fissent vn, ou plusieurs instruments: il y en eust qui se
presenterent, & toute la noblesse & autres assistans, furent requis, & prins à tes-
moins.

Le serment fait, les Electeurs s'en retournerent vers leurs sieges, & apres que l'on eust a-
cheué de chanter l'Antiphone *Veni sancte Spiritus*, avec les autres Collectes qui y dependent,
ils entrerent en la chappelle Imperiale, ou conclaue d'Election, qui est vne place estroi-
cte, & en long, ioignant au chœur deuers midy, & ayant vn Autel bien paré, com-
me elle estoit oultre ceste en ce temps de belles & riches tapisseries tissues de fil d'or &
de soye, & là se mirent à proceder à l'election d'vn Roy des Romains, & Empereur pour
l'aduenir.

Or auoit-on aussi appresté à l'Ambassadeur du Prince Palatin vne place ornee & tapif-
see de drap d'or, en haut sur la voute du Temple, vis à vis du chœur à la fenestre du milieu,
d'où se pouoit voir bien commodement tout ce qui se traictoit dedans, & dehors le
chœur.

Mais apres que les Electeurs eurent esté ensemble en la Chappelle, ou conclaue d'ele-
ction, & que pendant ce temps ils eurent par deux diuerses fois fait entrer & resortir leurs
Conseillers principaux, & Notaires, enfin estant tombez d'accord de l'election, & la pro-
clamation faicte en la Chappelle d'election, ils en sortirent, le tout ayant duré enuiron vne
heure. Et en premier lieu sortit l'Electeur de Mayence, puis celui de Cologne, & de Trier,
qui conduisoient au milieu sa Maiesté Royale de Hongrie, & de Boheme, comme esleu
Roy des Romains. A la fin sortirent le Palatin, Saxe, & Brandebourg: & les trompettes
& clairons recommencerent à sonner, & les tambours à frapper, ce qui donna vn grand re-
tentissement en l'Eglise, comme encore toutes les grosses cloches qui furent sonnées sur les
tours en signe d'applaudissement, & les gros canons qu'on lâcha de ioye sur les remparts
de la ville. Cependant sa Maiesté fut menee vers le haut Autel du chœur, & elle s'agenouilla
sur le plus haut degré d'iceluy; mais les Electeurs demurerent debout à costé d'icelle, puis
on comença à chanter *Adiutorium nostrum in nomine Domini*: Item le Pseaume, *In virtute tua la-
tabitur Rex*. &c. & autres prieres conuenables à l'action, & en faueur du Roy nouvellement
esleu: icelles acheuees, les Electeurs mirent le Roy sur l'Autel, & on chanta le *Te Deum laus*
damus, depuis vn bout iusqu'à l'autre, & ceà trois chœurs, à sçauoir sur les Orgues, en Mu-
sique; & tiercement sur les trompettes & clairons du Roy, & des Electeurs.

*Theatre erige au deuant du chœur pour le Roy des Romains nouvellement esleu, &
pour les sept Electeurs.*

Cela fait, on r'ouurit vne porte à la main droicte du chœur, & on releua la M.R. de dessus
l'Autel, & les Electeurs & l'Ambassadeur de Brandebourg la reconduisirent par le chœur
vers le theatre erigé par dehors au deuant du chœur, suspendu & couuert de tous les costez
de toute sorte de belles tapisseries: il y auoit sur ce theatre sept chaires couuertes de velours
noir, pour les Electeurs.

Et outre ces sept, il y en auoit encore vne autre releuee d'vn degré plus haut que les au-
tres, & couverte de drap d'or, sur laquelle s'assit le Roy nouvellement esleu: mais les Ele-
cteurs s'assirent chacun en son rang, à sçauoir l'Electeur de Mayence, & l'administrateur Pa-
latin à sa droicte; l'Electeur de Cologne, celui de Saxe, & l'Ambassadeur de Brandebourg
à sa gauche, de Trier au milieu: l'Administrateur tenoit en main la pomme de l'Empire, Sa-
xel'espee, & l'Ambassadeur de Brandebourg le sceptre. Cepédāt que chacun des Electeurs
prenoit sa place, les trompettes sonnoient, & les tambours battoient, & eux ayans cessé, la

proclamation se faisoit par le Reuerend sieur *George Friderich Greiffencloc de Boirabgrād* Preuost de Mayence & Vormepresque en ce sens.

Proclamation & publication de l'Eslection.

Que veu par la mort de feu tres-illustre, & tres-puissant Prince & Sr, Sr Mathias 1. Empereur Romain de tres-heureuse memoire, le saint Empire estoit demeuré vaquant, les tres-reuerends, tres-illustres, tres-generaux Princes & Srs, Srs Electeurs & Ambassadeurs icy presens, s'estoient ainsi qu'il conuient, & selon la teneur des loix Imperiales dressees sur ce fait, mutuellement accordez del'eslection & choix d'un autre Chef, à l'honneur & gloire du tout-puissant, à l'utilité & salut de l'Empire Romain, & à l'augmentation de la Chrestienté : & que pour lors ils denommoient & declaroient le tres-illustre, & tres-puissant Prince & Sr, Sr Ferdinand II. Roy de Hongrie, & de Boheme, &c. Archiduc d'Autriche, nostre tres-clement Sr, & l'eslisoient au nom du tout-puissant, pour Roy des Romains, & Empereur à venir. Ceste mutuelle Eslection se publioit de la part des Eslecteurs, & leurs depurez, afin qu'un chacun d'ores en auant sçache rendre l'honneur & le deuoir comme il conuient à la Majesté Royale esleuë.

Après ceste publication, les trompettes & tambours recommencerent leurs sons de resjouissance, & cependant les Eslecteurs avec la Maiesté Royale se leuerent de leurs chaires, & descendirent du theatre, & premierement celuy de Trier, puis les trois Eslecteurs seculiers, ensemble l'Ambassadeur de Brandebourg, l'un à costé de l'autre, à sçauoir l'Ambassadeur du Prince Palatin avec la pomme de l'Empire, à la droicte le Saxe avec l'espee nuë au milieu, Brandebourg avec le sceptre à la gauche, la Maiesté Royale suiuoit, & peu apres Mayence à dextre, Cologne à fenestre.

Ainsi ils sortirent du temple, & monterent à cheual deuant la grande porte d'iceluy, conduisirent la Maiesté en l'ordre que dessus, iusques à son Palais, en la maison qu'on appelle au grand Braunfels : mais au deuant d'eux marchoient en premier lieu les Officiers de la Maiesté, puis ceux de l'Eslecteur de Saxe, & apres eux tous les autres Officiers des autres Eslecteurs, comme aussi les trompettes de la Maiesté, lesquels les uns apres les autres remplissoient les rues du retentissement de leurs trompettes & tambours. Enfin apres les principaux Conseillers des Eslecteurs suiuoient les Eslecteurs eux-mesmes avec la Maiesté, en l'ordre que dit est. Ainsi par la grace de Dieu s'est heureusement acheuë l'eslection Royale : & la Maiesté Royale de Hongrie & Boheme, Ferdinand II. est d'un vnanime contentement des Eslecteurs, & à la ioye & applaudissement d'un chacun esleu pour Roy des Romains, & chef du S. Empire.

Or combien que l'Eslection fut faite selon le recit qui en a esté deduit, si est-ce que les Eslecteurs continuerent à se rassembler les auant-midis au Rommer en la maison de ville, pour y deliberer & resoudre des affaires importants, & concernans l'Empire.

Le reste du temps se passoit en mutuelles caresses, festes & banquets qui se sont faicts à diuerses fois, & tres-somptueux, avec grand appareil, tant de la part des Princes Eslecteurs, que des autres Princes, Comtes & Seigneurs, qui désaussi tost apres l'eslection aborderent en grand nombre en la ville. Apres les banquets il se voyoit toutes sortes de beaux & nobles exercices, courses, comme à courir la bague & manier cheuaux, iusques à ce que le couronnement Imperial, pour lequel on faisoit toutes sortes d'appareils, se parfit heureusement.

Diuision des Cercles de l'Allemagne.

Tout l'estenduë de l'Allemagne & les Prouinces comprises sous le nom de la Germanie, sans comprendre l'inferieure que nous auons descrite cy deuant, est diuisé en dix Cercles.

Le premier cercle est celuy de la Franconie.

Le second Cercle, celuy de Suabe.

Le troisieme Cercle est celuy de Bauiere.

Le quatrieme Cercle est celuy d'Autriche.

(:)

Le cinquieme le Cercle du Rhin.

Le 6. des quatre Eslecteurs du Rhin, Mayence, Cologne, Treue, & le Palatinat du Rhin:

Le

Le septiesme, le Cercle d'Vestphalie.
Le huitiesme, le Cercle de la haute Saxe.
Le neuuiesme, le Cercle de la basse Saxe.
Le dixiesme, celuy de Bourgogne.

(:)

Prouinces comprises en la Franconie , premier Cercle.

MAis pour venir à sa description, il faut parler en premier lieu generally de ce pays, dont les confins sont en dispute. Les plus anciens ont borné l'Allemagne de la riuere du Rhin, du Danube, de la mer, du Don, ou Tanais, & du Pont Euxin, ou de la mer Majeur. Ceux qui sont venus apres, comme Strabon, Ptolomee, Pomponne Mele, Plin, & plusieurs autres, tant Grecs que Latins, l'enferment entre le Rhin & la Vistule: Tacite dit que les Allemans sont plustost separez des Sarmates & des Daces, par vne mutuelle crainte, & par des montagnes, que par la Vistule.

Or aujourd'huy l'on donne à l'Allemagne toutes les Prouinces, dont les habitans vsent de la langue Allemande: si bien qu'elle contient au delà des limites de Ptolomee & du Danube, la Rhetie, ou le pays des Grisons, la haute Pannonie, & vne partie de l'Esclauonie, iusqu'au pays de Trente.

Les Allemans ont aussi occupé au delà du Rhin, les villes de Constance, Ausbourg, Strasbourg, Vvormes, Mayence, Confluence, Bonne, Cologne, & beaucoup d'autres lieux iusqu'à la mer. On range aussi les Suisses aujourdhuy entre les Allemans, de mesme que les Prussiens qui demeurent au delà de la Vistule. Tellement que l'Allemagne s'estendrait au delà du Rhin, iusqu'en Picardie, & en Bourgogne du costé d'Occident, & iusqu'aux Alpes du costé du Midy; contiendrait du costé du Leuant la Prusse au delà de la Vistule, & seroit bornée de la mer du costé du Nord.

Mais laissant à part ce que j'ay dit ailleurs de la basse Allemagne, en parlant des Pays bas, & aussi de la Suisse, en parlant de la Republique des Suisses, & passant sous silence les Estats qui ne recognoissent pas l'Empereur, ie commenceray par l'Alsace, ou le pays d'Ellas, qui est aux frontieres de la Suisse. Ceste Prouince est diuisee en haute & basse: la haute est vn Landgrauiat, & contient la Suntgoie, & la Prigoye. Toute ceste contrée contient grand nombre de villes, de bourgs & de villages, & est habitée de tous costez. Ses principales villes sont Rubeaquum, qui fut bastie par les Romains, maintenant Rufach, & Schlestat, où Selestad en la haute Alsace, Fribourgien Brigoye, & Argentine, ou Strasbourg en la haute Alsace: ce dernier lieu est fort au possible, & l'on y void vne tour admirable, veu qu'elle est haute de 574. pas Geometriques.

Le pays de Vittemberg, ou Vvirtemberg, confine du Leuant, & du Midy, avec partie de la Suaube, du Nord avec la Franconie, du Couchant avec le Palatinat du Rhin. Le Neccar passe par le beau milieu de ce pays. Il y a en ceste contrée forces villes & chasteaux, outre vne infinité de villages. Sa capitale ville est Sturgarde: les autres villes principales sont Tubinge, où il y a Vniuersité, & Vvitemberg, qui communique son nom à toute la Prouince.

La Franconie, autrement France Orientale, & vulgairement Frankenland, a pour ses limites du Midy la Suaube, & la Baviere; du Couchant le Rhin, du Leuant la Boheme, & le pays de Turinge, & du Nord le pays de Hesse, & la Turinge susmentionnée. Ses principales villes sont Herbipolis, communément Vvirtzburg, dont l'Euesque se nomme Duc de Franconie, non toutefois de tout le pays, mais de la plus grande partie. On void apres Bamberg, belle & bonne ville. Toute ceste Prouince obeyt à cinq Princes, à sçauoir aux Euesques de Vvirtzburg, de Bamberg, & de Mayence, au Burgrau de Noremberg, & au Comte Palatin du Rhin.

Assez pres de Franconie, pres de la riuere du Rhin, on void la ville de Spire, où est la chambre Imperiale, puis Vvormes, qui est renommée à cause des Diettes & assemblees: apres cela Mayence, vulgairement Ments, dont l'Archeuesque est Eslecteur del'Empire. Ceste ville est forte, tant à cause de son assiette, que de ses murailles, & de son peuple. Elle est assise sur le Rhin, & sur le Mein. Francfort sur le Mein est renommé à cause des foires qui s'y tiennent deux fois toutes les années, & à raison aussi que c'est le lieu où l'Empereur est esleu.

Le second Cercle contient ces pays.

La Sueue, ou Suaube est la plus haute partie de tout l'Allemagne: elle est bornée du Leuant de la Boheme, du Nord de la Franconie, du Couchant de l'Alsace, & de la riuere

du Rhin : & du Midy de la Bauiere & des Alpes. La source du Danube est en ce pays, qui fut autrefois vn Royaume, puis deuint Duché, & est maintenant sous diuers Princes, dont aucun ne porte le tiltre de Duc de ce pays. Toutefois le Duc de Vvittemberg en tient la meilleure partie. Ses principales villes sont Auspurg, ou Ausbourg, assise sur la riuere de Lech, & aussi riche qu'aucune autre qui soit en Allemagne.

Vlme sur le Danube, qui n'est pas du tout si grande, & est toutesfois fort riche & marchande : & Norlinge assise en vne belle plaine, ayant 3000. de tour. Il y a encore beaucoup d'autres villes Imperiales, qui se nomment Franches.

L'Empereur qui regne aujourd'huy possede aussi le Royaume de Boheme, communement Behaim, qui est dans les limites de l'Allemagne. Ce Royaume a pour ses confins du Leuant la Morauie, & vne partie de la Slesie : du Midy l'Austriche & Bauiere, du Couchant le pays de Noremberg, & du Nord la Saxe, & la Misne. La forest Hercynie l'environne de tous costez : il est de forme ronde, & l'on passe son diametre en trois iours de chemin. Les autres disent qu'il a de longueur 36. lieues de Boheme. Les riuieres qui passent par ce Royaume sont l'Albie, que les Bohemes nomment Labe : Multaue, communement Vltauue, & en Allemand Vvolda : & outre ce l'Egre, Saffage, Gifere, Mife, & Vatro, qui se desgorge dans le Labe. Prague, autrefois Bubien. & Marobude, est la capitale ville, & en contient 3. c'est à sçauoir la vieille Prague, la nouuelle & la petite, qui est separee des deux autres par la riuere d'Vltauue.

La Morauie, iadis Marcomanie, vulgairement Merheren, tire son nom de la riuere de Moraue, elle est separee de la Hongrie, & de la Pologne du Leuant, de la Boheme du Couchant & de la Slesie du Nord par des montagnes, & des forests, ou des riuieres : mais elle est plaine du costé de l'Austriche, qui la confine du Midy. Ses riuieres sont la Morane, la Noire, la Suitte, Trayze, Igle, Haue, & Suarte. Il y a en Morauie deux Comtez, avec quelques autres Seigneuries. Sa principale ville est Olmuz, que les Bohemes nomment Holomatz : celle qui la suit se nomme Prunne, en Allemand Brin, & en Bohemois Brno.

Troiesme Cercle & ses Prouinces.

Bauiere, communement Bayern, contient la contree que tenoient iadis les Narisses, que l'on nomme aujourd'huy Nardaouu, & est separee des autres par le Danube : & pareillement elle embrasse le pays des Noriciens, & les Vindeliques communement Licatiens, ou Lechrains. Ce pays est borné du Nord de la Franconie, du Couchant de la Suaube, du Midy des Alpes, & du Leuant de l'Austriche & de la Boheme. Il y a 2. Bauieres, à sçauoir la haute & la basse : la haute est au deça du Danube, & du costé des Alpes & du Midy. Ses principales villes sont Monarchies, vulgairement Munchen, sur le bord de l'Isar (c'est la demeure du Duc) Ingolstad, où il y a vne fameuse Vniuersité. Fressing ville Episcopale, & generalement en tout le pays il y a 34. villes assez bonnes.

La basse Bauiere au delà du Danube, contient 34. villes, 46 bourgs, & plusieurs chasteaux & villages. Ceste partie s'appelle Norgoye : sa ville capitale est Noremberg, qui a huit mille de circuit, contient beaucoup de beaux & superbes bastiments, & est ceinte de deux murailles. Les autres villes principales sont Ratisbonne, vulgairement Regenspurg, iadis *Augusta Tiberia*, & auparauant *Arriobriga*, assise sur le Danube. Passauu sur l'emboucheure de la riuere d'Inn, qui se descharge dans le Danube. Lanshut sur l'Isar, & Stalzburg, ville Archiepiscopale, sur la riuere de Saltz.

Quatriesme Cercle & ses Prouinces.

L'Austriche communement Oestreich, ou Austorlich, ou bien Osterland, c'est à dire terre Orientale, s'appelloit iadis la haute Pannonie. Elle a pour ses confins du Leuant la Hongrie, du Sud les monts de Stirie, qui s'estend depuis les Alpes, iusques en Hongrie, & au delà : du Ponant la Bauiere, du Nort la riuere de Teye, & la Morauie. Les riuieres d'Austriche sont le Danube, qui passe par le milieu du pays, l'Onase, le Traune, l'Erlaf, la Treisie, l'Ipsie, la Melice, la Marchie, la Teye, & la Leytce. L'Austriche est vne Archiduché, dont la capitale ville est Vienne, iadis *Flauiana*, ou *Iulio bona*, qui est belle, riche, & fort peuplee, & a vne belle Vniuersité.

La Comté de Tirol est assise entre le Thesin, & l'Oen, ou l'Inn, & les Alpes, & a tiré son nom de la petite ville de Tirol. Ce pays fut iadis vne partie de la Rhetie : ses confins sont du Nort la Bauiere, du Midy la Lombardie, du Leuant la Marche Treuisane, & le Friuli, du Couchant le pays de Suisse. Ses principales villes sont Insprug, demeure du Seigneur de la Prouince,

Prouince, & lieu où est la chambre, & le Parlement des pays d'Austriche; puis Brixen sur l'Isè, & apres Trente, ville renommée à cause du Concile, qui s'y tint l'an 1546. sous Paul III. Il y a vn fort beau Chateau. On y void aussi la ville de Maran sur le Thein, & celle de Bolzan, & encore la Hale.

La Stirie, iadis *Valeria*, & communement *Steïrmark*, est vn petit pays qui confine le Nord avec l'Austriche, du Couchant avec la Carinthe, du Midy avec la Croace, & l'Esclavonie, & du Leuant avecque la Hongrie. Elle fut erigee en Duché par l'Empereur Federic Barberousse. Il y a plusieurs Comtez en ce pays, & entre autres celui de Vvaraldin sur le Drauu, & celui de Lebnam sur la Mure. Ses principales villes sont Celie, ou Cilte, Fruch, & Greczie, avec vn tres fort chateau, qui regarde l'Austriche, & pareillement la ville de Sepian.

La Carinthie, communement *Kaerndten*, confine du Couchant, & du Midy avec le Friuli, & la Carniole; du Leuant, & du Nord avec la Stirie. Ses meilleures villes sont Vvolkmarch, & Villac, routes deux sur le Drauu, Marchburg, Clagens fut iadis *Claudia*, ville bien fortifiée: mais S. Vite est la ville capitale de la Prouince.

Il y a deux Carnioles, l'vne qu'on nomme seiche, & vulgairement *Vnderkrain*. Les Princes d'Austriche y possèdent plusieurs villes, & entr'autres Gorice assise sur le bord de la riuere du Sonte. L'autre Carniole se nomme *Oderkrain*, & est assise entre les montagnes Noriques, & pierreuses. Sa principale ville est Lubiane, que les Allemans appellent *Lau-bach*.

Cinquiesme Cercle & ses pays.

Le pays de Vvestphalie est pris par quelques vns pour la vraye & ancienne Saxe: ses limites sont du Leuant la riuere de Viser, du Nord la Frise, & le pays d'Vtrecht, du Couchant le Rhin, & du Midy les montagnes de Hessen, nommees *Obnobies* par Ptolomée. Ses principales villes sont Monster, Dusseldrop, Vvesal, Oldembourg, Osnabourg, Minde, & Heuorde. Vne bonne partie de ce pays obeyt à l'Euesque de Cologne, qui est assise sur le Rhin, & a double fossé, double muraille, 84. tours, & 19. parroisses.

La Duché de Cleues est assise deçà & delà le Rhin, entre Cologne, & le bas pays d'Vtrecht. La Seigneurie de Rânistein est iointe à la Duché de Cleues: ses meilleures villes sont Cleues, Vvesel; Reez sur le Rhin, Ringelbourg, Kernendonck, Duyssbourg, & quelques autres.

Le pays de Iuliers, ou de Guelich, a pris son nom de sa capitale ville: qui est forte, & qui a esté prise ces annees passees par le Marquis de Brandebourg, & Duc de Neuf-bourg. Ces pays & celui de Cleues sont maintenant disputez par plusieurs qui pretendent y auoir droit.

La Duché & Euesché du Liege a du Nort & de l'Oüest le Brabant, du Leuant la Meuse avec la Duché de Lembourg, & du Su la Comté de Namur. Ceste Euesché embrasse la Duché de Bouillon, le Marquisat de Franchemont, la Comté de Borchlon, ou de Loot, & la Comté d'Hezbane, dont la principale ville est Botkuuorm, outre plusieurs Baronies, & Abbayes. Il y a au reste vingt-quatre villes, outre celles qui sont du Diocèse d'Vtrecht, dont la principale est celle du Liege assise en vne plaisante vallée, & proche de la Meuse.

L'Archeuesché de Treues, vulgairement *Trier*, est bornée du Nort de la Comté de Nassau, de la Duché de Monts, & de l'Euesché de Cologne. Du Leuant de la Ringouie, & du pays de Hessen, du Sud du pays de Vvestrich, & de la Duché des deux ponts, & du Couchant de la Duché de Luxembourg. Il y a en ce Diocèse de Treues 4. Comtez avec quelques Baronies, & autres Seigneuries. Au reste la ville capitale du pays c'est Treues, qui est vne des plus anciennes du monde. On y void aussi l'ancienne ville de Confluence.

La Holface, vulgairement *Holsteni*, a pour ses bornes du Leuant la riuere de Bilene, du Couchant la Dithmarsie, du Midy l'Elb, & du Nort la riuere d'Eidore, qui est de ce costé la limite de Dannemark. Mais ie ne veux parler plus amplement de la Holface, pource qu'elle appartient au Roy de Dannemark, à qui nous reseruons vn discours particulier.

Sixiesme Cercle des quatre Esleuteurs du Rhin.

Le pays de l'Archeuesque de Mayence s'estend du Rhin, & a d'assez belles villes, il confine à celui de Cologne, & au Palatinat du Rhin: dans ce pays est la riuere du Mene où est

N n n ij

bastie la ville de Francfort, ville où les Empereurs d'Allemagne sont esleus & couronnez: elle est aussi celebre à cause des belles foires qui s'y tiennent à Pasques & en Septembre.

Le pays du bas Palatinat du Rhin est la plus belle principauté d'Allemagne, mais les guerres qui s'y sont faictes depuis quatre ans l'ont grandement ruiné, il y a de tres-belles villes, comme Heildeberg, Vvormes, Frankendal, Oppenheim, Veusnach & autres: il est diuisé en deux parties, haut & bas Palatinat, le bas est sur le Rhin, & s'estend iusques à Treue, le haut va iusques aux frontieres de Bauiere, cette principauté est auourd'huy detenuë par l'Empereur, le Roy d'Espagne, & le Duc de Bauiere, qui en tient vne grande partie, & apres la retraicte du Prince Federic Palatin du Rhin, il s'est fait receuoir Esleeteur de l'Empire en la Diette de Ratisbonnel'an 1623.

Le pays, ou Lantgrauiat de Hessen confine du Leuant avec la Turinge, du Midy avec la Franconie, du Couchant avec la Vvestphalie, & du Septentrion avec le Duc de Brunswic, l'Euesque de Minde, & quelques autres Seigneurs: ses principales villes sont Maspurg, où il y a vne bonne Vniuersité, Cassel, où le Lantgraue se tient, & apres Pubac, & Asfeld. Il y a quelques Comtez sous ce Lantgraue, dont la principale est celle de Valdeck.

Le pays de Turinge a du Leuant la riuere de Sal, du Nord la forest Hercinie, du Couchant la riuere d'Vver, & du Midy la forest de Turinge, que l'on nomme Thuringevvald. Ce pays est vn Lantgrauiat, qui n'a de longueur & de largeur que douze lieues d'Allemagne, & toutefois il contient douze Comtez, avec autant d'Abbayes, cent quarante quatre citez, & autant de bourgs, ou petites villes, outre 2000. villages, & 250. chasteaux. Sa capitale ville est Erfourt assise sur la riuere de Gere, & l'une des plus grandes d'Allemagne, les autres meilleures villes sont Vveymar sur l'Ilm, & Isenach sur le Nesse, où il y a bonne Vniuersité.

Septiesme Cercle & ses Prouinces.

L'ancienne Saxe, ou Sachsen, comprenoit autrefois la Vvestphalie, l'ancienne Marche, Misne, Lusace, Mansfeld, & quelques autres pays: veu qu'elle embrassoit tout ce qui estoit entre le Rhin, & l'Elb, & la mer Germanique, & la riuere de Leydore iusques en Heissen, & aux frontieres de Turinge. Tellement que Brunswic estoit comme au milieu de ce pais. Mais maintenant on diuise la Saxe en haute & basse: la capitale ville de la haute, c'est Vvitemberg sur la riuere d'Elb. Quelques vns mettent aussi Torge en cette haute Saxe, mais il est plus à propos de la loger au pays de Misne.

Huictiesme Cercle, basse Saxe & ses pays.

La capitale ville du bas pays de Saxe, c'est Albe, assez pres de laquelle est la ville de Mäsfeld, capitale d'une Comté. Les Comtez de Lauemburg, Meckelmburg, & Lunemburg, sont aussi sous le mesme bas pays de Saxe, selon quelques vns: de mesme que le pays de Holface, Stormar, & Dithmarsie. Au dessus de Saxe, du costé du Nord, on void Magdebourg assis sur l'Elb, & fort d'assiette & de murailles, dont l'Archeuesque porte le nom de Primat d'Allemagne; combien que les Archeuesques de Mayence, de Treues, & de Cologne, qui sont Esleuteurs, ne luy cedent nullement, non plus que l'Archeuesque de Saltzbourg.

Neufuiesme Cercle.

Le Marquisat de Brandebourg est au Leuant de la nouvelle Saxe, & est diuisé en deux parties, c'est à sçauoir en la vieille Marche arrosée par la riuere de Spree. La capitale ville de ceste vieille Marche c'est Brandebourg, sur la riuere de Havel. Mais la principale ville de la nouvelle Marche, c'est Francfort sur l'Odere. On y void aussi Berlin, demeure du Marquis, qui est vn des Esleuteurs de l'Empire, & doit estre mis entre les plus puissans Princes d'Allemagne, veu qu'outre ces deux Marches il possede quelques villes, & Comtez aux pays de Lusace, & de Slesie: & l'on tient que son Estat a de longueur 60. lieues d'Allemagne, où l'on conte 55. villes, & 64. bourgs.

La Comté de Mansfeld est vne partie de la vieille Saxe, & a pour ses confins du Leuant la riuere de Sal, avec l'Archeuesché de Magdebourg, & le Diocèse de Mersebourg: du Midy la Turinge, du Couchant les Comtez de Schuuartzembourg, de Stolberge, & quelques autres petites Seigneuries voisines. Il y a sous ceste Comté quatre autres Comtez, à sçauoir Arnstet, Vuypre, Vvethin & Quernfurt, outre le Palatinat de Saxe, & quelques autres Principautez. Ses principales villes sont Mansfeld, assez pres de laquelle est Leimbach, puis Eisleben, & Vuypre.

La

La Luface assise entre l'Elb, l'Odere, & les montagnes de Boheme, est diuisee en haute & basse, & toutes deux appartiennent à la Saxe. Elle est arrousee de la riuere de Nefse. Sa principale ville c'est Gorlitz, apres laquelle est Zittau sur la Nefse.


La Silesie, vulgairement Die Schleste, est bornee du Su de la Morauie, & de la forest Her- cinie; de l'Ouest de la Luface, & d'une partie de la Boheme, du Nort, & de l'Est de la Pologne. Sa longueur est de 200. mille pas, & sa largeur de 80. mille. Il y a en ce pays plusieurs vniuersitez. Sa ville capitale est Vratillaue, communement Bressau, où il y a Euesché & Vniuersité. Vne autre de ses meilleures villes, c'est Nisse, ou Neysee, qui est aussi Euesché. Il y a 15. Duchez en ceste Prouince, dont six ont esté partagees à trois anciennes familles, & les autres sont escheuës au Roy de Boheme.


Le pays de Misne communement Meyssen, a du Levant la Luface, du Midy la Boheme, du Nort la Marche, ou le Marquisat, & la Saxe, & du Ponant la Turlinge. Il y a en ceste Prouince beaucoup de citez & de chasteaux. Sa capitale ville c'est Misne, qui a vn chasteau fort au possible. Les autres principales sont Dresden, demeure du Prince, & ces deux premieres sont sur l'Elb, & Lispe où il y a vne bonne Vniuersité. On y met aussi Torge, & quelques vns mettent les deux dernieres en Saxe, confondant la Misne avec le pays de Saxe.

Le dixiesme Cercle & ses pays.

Il y a aussi en la Comté de Bourgogne Besançon, qui est ville Imperiale, & qui fut iadis nommee Chrysopolis. Le Doux passe par le milieu, presque par tout, & en toute la meilleure partie : mais ce fleuve n'arrouse pas le costé de la porte, par laquelle on va à Dole.

Nnn iij





DV ROYAVME DE HONGRIE.

SOMMAIRE.

1.  Velles Prouinces & pays sont compris sous la Hongrie, & d'où elle a pris son nom.
2. Qu'ils sont les bornes de ce Royaume, & son climat.
3. Division du pays de Hongrie en deux parties, & d'où vient le nom de Bude, ville capitale du Royaume, sa belle & forte assiette.
4. Description des autres principales villes, entre lesquelles est Stridon, patrie & lieu de naissance de S. Hierosme: & Iaurin vulgairement Rab, ville imprenable en apparence, & neantmoins prise sur le Turc par un Gentilhomme François, le sieur de Vanbecourt.
5. Des froments de Hongrie, se chageës en autre meilleure espeece la troisieme année. Des vins sulfureux, de force odeur, & enjurants soudainement.
6. Description des riuieres, lacs, fontaines d'eaux chaudes medicinales, & montagnes plus renommées de ce pays.
7. Du sel mineral de Maromarusie, & eaux miraculeuses convertissans le bois en pierre. Autres eaux bouillantes, transformans leur elemēt en pierre. Autres mineuses qui coulent en hyuer, se glacent & gellent en Esté. Autres qui amolissent le fer comme boüe. Autres qui sont la chrysocolle, ou soudure d'or.
8. Des mines d'airain de Mensole: & de l'abyssme du Comté de Zolie, de si mortelle odeur qu'elle tue les oyseaux volans par dessus.
9. Hongrie habitee en diuers temps par diuerses nations barbares, de Pannoniens, Gots, Huns, Scythes.
10. De la disposition des neuf Cercles qui enuiroñoient anciennement tout le pays, & du moe des guerres qui se donnoit d'un Cercle à autre.
11. Hongrois anciennement farouches, seditieux, vindicatifs: aujourd'hui civilisez, & addonnez à l'exercice des armes. Leur maniere de viure, & habillemens de leurs mariages, & funerailles. Leur langage & façon d'escrire particuliere.
12. Coustume des Hongrois, porter moustaches longues & barbe raze.
13. Leur richesse en bestail & abondance de viure, & les petites forces de ce Royaume.
14. Des deux Magistrats principaux de la Hongrie, dont le Palatin est le premier, & des autres officiers du Roy.
15. Du duel & combat d'armes, ordonné en causes difficiles à iuger.
16. Des successions dont les seuls masles sont capables.
17. Diuersité de sectes de religion qui regne en Hongrie, & de la grande conformité du Calvinisme avec le Mahometisme.
18. Du nombre des Archeueschez, & Eueschés de cet Estat.
19. Liste des Rois de Hongrie, leur regne & mort.
20. Relation des differens & troubles suruenus l'an 1605. en ce Royaume pour le faict de la Religio, & pour les charges & dignitez aux armées.
21. Articles de la paix faicte pour la Hongrie avec Botscay en Septembre 1606.
22. Conference de Debrita entre les Ambassadeurs & Deputez de l'Empereur & de l'Archiduc Mathias, & de ce qui y fut conclu pour la decision de leurs differens.
23. Ceremonies obseruees en Hongrie, en la reception, sacre, & couronnement du Roy Mathias.



Vis que cet Estat a tousiours esté separé de l'Empire, il est à propos d'en faire un discours particulier, afin qu'on reconnoisse le pays que le Roy Mathias auoit sous sa puissance, n'estant que le Roy de Hongrie.

- La Hongrie comprend aujourd'hui toute la basse Pannonie, nommée la seconde Proconsulaire, tout le pays des lazygiens Metanastes, que Ptolomee enferme entre le Da-

nube & le Tibisce, & les monts de Sarmace : & embrasse encor la partie de la Dace, qu'on nommoit Transilvanie, qui a toutesfois les Vayuodes, & n'obeyr pas à ce nouveau Prince. Elle a tiré ce nom des Huns, ou Hongres, peuples des Scythes qui s'y sont habitez, & qui sont sortis de luhre ou Iugrepays de Scythie, allés du costé du Nordouest, qui est maintenant tributaire du Duc de Molcouie.

Ce Royaume a pour les bornes du Midy la riuere du Suaue, qui le separe de la Croace, & de la Seruie, qui sont en la partie de l'Esclauonie, qui regarde la mer Adriatique, du Nort la Pologne & la Russie, diuisees par le mont de Carpathe : du Ponant l'Austriche, iadis Province capitale de la haute Pannonie, avec la Moraue, & la Stirie, & du Leuant la riuere de Tibisce, aujourd'huy Tisse ou Patille : Mais si nous voulons enclore en ce Royaume la Transilvanie, il aura pour limite du Leuant les deux Valachies, c'est à sçauoir la Soufapine, & la Moldaue, separees par la riuere d'Alute, nommée pour le present Olipar les Hongrois, & Alipar les Allemans.

On loge ce Royaume entre le milieu du 6. ou 7. climat, tellement qu'il comprend le 16. & 17. paralleles, & son plus grand iour d'esté est au dessus de quinze heures & demie iusques à seize.

La Hongrie est diuisee en deux parties, dont on nomme l'une au deça du Danube, & l'autre au delà, & le milieu de la dernière est arrosé de la riuere de Tisse.

La ville capitale du Royaume est Bude, qui porte, comme on dit, le nom du frere d'Attila, ou bien l'a tiré des Budins peuples de Scythie, dont Herodote fait mention. Appian, Irenique, & Althamere le prennent pour la Curte de Ptolomee.

Les autres pour l'Aquincum du mesme auteur, & l'Antonin. Elle est vulgairement appelée Offen. Si l'on considere l'assiette de ceste ville, qui est en partie montueuse, & bien fortifiée, on iugera qu'il est impossible de voir rien de plus agreable, ou de plus fort en toute la Hongrie. Elle fut prise par Soliman Empereur des Turcs le 20. d'Aoust 1526.

Les autres sont Bosonie, communement Preszbourgh, bonne ville, où la riuere de Lext diuisant la haute l'annonie d'avec la basse, se mesle dans le Danube. Ceste ville est ancienne, iouyt d'une agreable assiette, & d'un bon air, & surpasse en beauté plusieurs villes de Hongrie. Il y a au fauxbourg au sommet d'une haute montagne un Chasteau fort au possible.

On void pareillement en Hongrie Belgrade, nommée par les Anciens Taurinum, vulgairement Albegrecque, & en Allemand Griechs, Vveissemburg, qui fut prise par Soliman l'an de salut 1520. Apres cela du long du Danube on trouue Singidun que le Turc prit l'an 439. A my-chemin de ces deux villes, on void le champ de Maxons, où lean Huniade emporta une victoire signalée sur Mahomet Empereur des Turcs, l'an mil quatre cents cinquante six.

Contre mont le fleuve on trouue plusieurs lieux emportez par les Turcs sur les Chrestiens, comme la ville de Valpe, prise l'an 1543. celle de cinq-Eglises sur le Draue, prise en la mesme année 1543. celle de Zigerth prise l'an 1566. On void encor en ce Royaume Strigonie sur le Danube, communement Gran, iadis Archeuesché, & maintenant la proye des Turcs. Albe regale ou Royale autrement Stulveyseburg, place destinée à la sepulture, & au couronnement des Roys de Hongrie, & prise par le Turc l'an 1543. Presque en la mesme contree on void Stridon patrie de saint Hierosme, & pareillement la forte ville de Komore, que les Turcs ont tant de fois attaquée en vain, & qui est une Isle de mesme nom. Il y a aussi Iauarin, vulgairement Rab, place assise sur le Danube, qui semble imprenable, & toutesfois a esté premierement prise par le Turc, puis reprise par l'industrie du sieur de Vaubecourt, Gentil homme François : Je passe sous silence les autres villes, comme peu considerables.

QUALITE.

LE Royaume de Hongrie est naturellement pourueu de toutes choses, veu qu'il y vient des grains de toutes sortes, & diuers fruiets en grande abondance.

Car la terre y est si fertile que le froment se change la troisieme année en une meilleure espece, & il y a en ce pays de fortes de froment qui different des nostres, & le terroir produit du bled, sans estre presque cultivé.

Elle porte aussi diuerses sortes de vins qui sont fort sains, & si excellens qu'il y en a quelques uns qui ne cedent nullement à ceux de Candie. Celuy qui croist pres de la ville de Sirmie est des premiers, mais celuy qui vient en la Comté de Pissil est d'une facheuse odeur, & enyure aussi tost, à cause des eaux chaudes & soufrees.

Elle abonde tellement en bœufs & en moutons, que c'est chose merueilleuse. Il y a aussi force lieures, dains, cheureux, cerfs, sangliers, loups, ours, & semblables bestes: de mesme que diuerses sortes d'oyseaux, principalement des tourtres, des perdrix, & des faisans. Dauantage on y trouue force veines d'or, d'argent, de cuiure, d'acier & de fer: & non seulement on y rencontre de l'or aux mines, mais encor dans le sablon des riuieres. Il y a toutesfois peu d'estain, & de plomb.

6. Au reste il n'y a presque pays qui aye plus grand nombre de grosses riuieres que la Hongrie, ny qui soient plus nauigables, ou plus abondantes en poisson. Vous y voyez le Danube, le Saue, le Draue, & le Tyssé, dont les trois premiers sont communs à quelques autres Prouinces, mais le Tyssé n'appartient qu'à la Hongrie. Cestuy-cy naist en Maramusie sous les hauts sommets du mont de Carpathie, & est plus abondant en poisson que tous les autres fleuves de Hongrie.

Car on y prend grande quantité d'esturjons, de brochets, dont le foye a quelquesfois demie aulne de longueur, des carpes, & d'autres poissons. Il y a encor d'autres riuieres, outre les susnommees, qui nourrissent grande quantité de truites, saumons, perches, lamproyes, barbeaux & autres poissons, & l'on void aussi rouler de l'or parmy leur sable.

Il y a aussi de grandes montagnes, dont la plus renommee est celle de Zarchzal, iadis nommee par les Grecs Carpathe, à cause du fruit & rapport de ses mines. La seconde est celle de Matran qui est couuerte de vignoble pres d'Agrie. La troisieme & plus grande de toutes est Erdel.

On void semblablement en Hongrie plusieurs lacs, dont le principal est celuy de Palaton, en Aleman Plathe, qui a de longueur 40. milles d'Italie, & 8. lieues de Hongrie. Ce pays abonde aussi en sel mineral; qu'on coupe ainsi que de la pierre à Maromarusie, & ailleurs, & il y a aussi vne fontaine, dont l'eau tombant en terre s'endurcit & transforme en pierre. Il y a force bains & eaux medecinales, principalement aux enuirs de Bude.

7. On y void aussi des eaux chaudes, d'où les poissons estans tirez viennent à mourir s'ils sont mis dans de l'eau froide. Les eaux de la Comté de Liptoue, pres du village de saint Jean, sont bonnes contre la galle.

Au terroir de Zepus il y a des eaux où le bois se transforme comme en pierre, & pres de l'Eglise de saint Martin au mesme lieu, il sort vne eau qui semble bouillir, qui se conuertit en pierre, tant dessus que dessous la terre, & ceste pierre est presque semblable à celle de Ponce.

On trouue assez pres de là des eaux nitreuses, qui coulent en hyuer, & se gellent tellement en esté, qu'on a accoustumé d'y aller chercher de la glace.

8. Il y a en la Comté de Zolie vn abyssme, ou vne ouuerture de terre, qui iette vne si grande & mortelle puanteur, qu'elle fait mourir les oyseaux qui volent dessus.

Pres de la ville de Smolnice dans les montagnes, il y a certaine eau qui tombe dans des fosses, où le fer deuient en peu de temps aussi mol que de la boue, & si l'on vient à le fondre, on en fait de tres-bon cuyure.

Pres de la ville de Bistric, en Allemand Mensole, il y a de fort riches mines d'airain, qu'on appelle maintenant Royales, d'où il sort vne eau verte, qui fait la chrysocolle, ou soudure de l'or.

MOEURS ANCIENNES.

9. **L**A Hongrie a esté long-temps la retraicte de plusieurs estranges nations. Car elle a esté premierement habitee des Pannoniens, & Peoniens, puis sur la decadence de l'Empire Romain, des Gots, qui en furent chassés par les Huns.

Les Lombards les en sortirent apres, & s'y tindrent 42. ans: puis les Huns leur succederent sous leur Roy Attilé, qui enrichit ce pays des despoilles des autres nations. Mais Charles le Grand les vainquit, & leur osta vn grand thresor qu'ils auoient principalement assemblé à Bude.

En fin l'an de grace 900. du temps de l'Empereur Arnould on vit fondre en ce pays les Hongrois venus de Scythie, qui s'estans ioints aux restes des Huns rauagerent toute l'Allemagne, & furent en fin vn peu mattez par la perte qu'ils receurent sous l'Empereur Otton, pres d'Ausbourg, l'an 954.

10. Iadis les habitans de ce pays l'auoient tout environné de neuf cercles, que les Allemans nomment Hagyes, dont chacun estoit tellement dressé, & fait de pieces de bois de hestie, ou de chesne, ou de sapin, qu'il contenoit vingt pieds de large d'un bord à l'autre, & auoit autant de hauteur.

Or tous les lieux ainsi entourez estoient remplis de craye fort gluante, & ferme, ou de pierres fort dures, & le dessus des ramparts estoit couvert de grosses mottes de terre encore toutes herbuës, & au coing de ces ramparts ils auoient plante des arbrisseaux, qui estans espars çà & là, representoient des arbres & des herbes tout le long de la forteresse. D'un cercle à l'autre il y auoit l'espace de vingt lieues d'Allemagne, & la dedans les bourgs, villages, & hameaux estoient tellement disposez, qu'on pouuoit entendre de l'un à l'autre la voix d'un homme.

Les portes estoient basses & estroites, & en lieu escarté, afin qu'ils peussent plus facilement, & mieux à couuert sortir pour aller faire leurs courses, & pilleries : & chaque cercle donnoit le mor du guet à l'autre de tout ce qui arriuoit, ou se proieettoit, par le son des trompettes.

Procopie distingue les Huns, appellans les uns blancs, & les autres Nomades. Il parle des blancs en ceste sorte. Les Huns Euthalites ne meinent pas vne vie pastorale, comme le reste des Huns, ains se tiennent fort propres, & sont les plus beaux, & blancs d'entre les Huns.

Ceux-cy ne vindrent iamais faire des courses aux terres des Romains, & ne sont d'un farouche regard comme les autres. Ils ont un Roy qui leur commande, & les plus heureux d'entr'eux ont vingt amis qui sont ordinairement à leur table, & ont part à leur puissance, & bourse, & fortune.

Les Peoniens n'auoient aucunes villes selon Appian Alexandrin, ains se tenoient en des hameaux selon leurs familles, & n'vsoient d'aucun iugement commun, n'ayans aucun Prince qui leur commandast, ou qui presidast sur les autres.

Les habitans de Hongrie ont esté iadis estimez farouches, remuans, seditieux, inconstans, auaricieux, desireux de vengeance, & peu amis des estrangers.

MOEURS DE CE TEMPS.

Les Hongrois sont auourd'huy d'un assez doux naturel, & assez polis & civilisez. Ils aiment l'oyssiveté, & à demeurer sans rien faire, ou s'amusent à l'exercice des armes. Mais ils s'addonnent bien peu aux arts & mestiers, non plus qu'au trafic & commerce, ils sont robustes au possible.

Leurs mœurs sont toutesfois naturellement rudes, & leurs courages plus propres, & disposez à la guerre qu'à la paix. Ils méprisent leurs aises, & commoditez, & ne se tiennent aux villes que comme estrangers, & avec dessein d'en sortir bien tost.

Les grands logent leurs delices en leurs iardins, & en leurs bains, & ne se soucient en leurs baillimens que d'estre au large. Le reste se tient en des cabannes, & loges petites, & mal faictes. Ils ne dorment dans le lit iusques à ce qu'ils sont mariez, mais se couchent sur des tapis, ou sur le foin, chose commune à la plus grande partie des nations voisines.

Leurs habillemens sont longs & magnifiques. Ils ne donnent aux femmes pour toute chose en les mariant qu'un accoutrement neuf. L'habit des femmes est estroit, & les couures iusques au col.

Elles portent par dessus leurs robes de longs manteaux, & couurent leurs testes de coiffes, ou d'autres atours de soye, ou de lin, & cachent tout, excepté les yeux & le nez, & la plupart portent des perles, & des pierreries.

Dauantage les hommes & les femmes portent des brodequins qui vont iusques à mi-greue. Ils portent le deuil de leurs parens & amis trespassés un an entier, & quelquesfois l'espace de deux ans. Ils rament toute leur barbe, & ne laissent venir que les moustaches, qui sont quelquesfois fort grandes.

Ils ont un langage particulier qui approche toutesfois fort du Bohemois. Ils ont aussi vne particuliere forme de lettres : toutesfois ils vsent le plus souuent de celle des lettres Romaines. Ils sont fort superbes & hautins, puissans en guerre, & plus adroits à cheual qu'à pied. Ils sont fort obeyssans à leur Prince, & à ses Lieutenans.

RICHESSES ET FORCES.

Combien que la Hongrie enuoye en Italie, & en Allemagne grande quantité de bœufs, & de moutons, dont le nombre est presque incroyable ; & que quelques-uns rapportent qu'il y a tel païsant qui aura cent bœufs aux paltis, & ne les verra qu'ils n'ayent triplé, tellement qu'on tient que des chairs de ceste Prouince on pourroit nourrir toute l'Europe : & combien qu'il y ait force argent, cuyure, fer, acier, & mesme de l'or, & qu'elle enuoye en

diuers endroits du monde beaucoup de calcante qui est verd , & qui se vend assez bien , toutesfois on peut assez iuger que ce Royaume n'est guere riche , & qu'il fait assez de s'entretenir par le moyen des fruidz qui y prouiennent , & qui sont les principales richesses. Aussi il n'y a rien eu qui l'ait plus fait subsister , ny qui ait maintenu ses armées que l'abondance des viures qui s'y trouuent.

Il est vray qu'aujourd'huy depuis que les Turcs se sont rendus maistres d'une grande partie du pays , les terres y sont moins cultiuees , & ne rapportent plus tant qu'elles souloient faire. Toutesfois ce que les Chrestiens tiennent est bien entretenu , & capable de nourrir assez de gens , combien que les guerres qui ont longuement duré l'ayent rendu moins peuplé. Mais le nouveau Roy Mathias estant paruenue à l'Empire , il peut conseruer ce qui reste aux Hongrois , si durant ce calme il se pouruoit pour les occurrences de la guerre. Et ie croy que si le Turc venoit fondre sur ce pays , difficilement le pourroit-il soutenir sans les forces de l'Empire.

La puissance de ce Royaume n'est bastante à celle des Ottomans , ses richesses sont trop petites pour pouoir faire de grandes leues , pource que le pays n'est guere riche de soy pour le deffaut des ports de mer , & du trafic , d'où l'argent vient aux Royaumes , & outre ce , le Turc en occupela meilleure partie. Il confesse que les Hongrois sont bons guerriers , mais on ne doit aussi mépriser les Turcs , qui les surpassent en nombre , & ne leur cedent pas en valeur.

GOVERNEMENT.

14. **L**E Roy de Hongrie gouuerne son Royaume par le moyen de deux Magistrats , dont le plus haut est diuisé en trois Magistrats.

Le premier gouuerne le Royaume au nom du Roy : On compte en ce rang le Palatin du Royaume , qui est le premier apres le Roy , & Iuge du Roy mesme , s'il est accusé ; & cestuy-cy est esleu par ceux du Royaume , & son office n'est pas hereditaire. Il y a encor le Iuge de la Cour , qui est vn des Iuges ordinaires du Royaume ; puis le Chancelier perpetuel , qui est Archeuesque de Strigonie , & Primat du Royaume , & est nommé premier Secrétaire , & a la charge d'ordre le Roy quand il est esleu , & de sceller les patentes , & les priuileges. Il y a encor le Maistre de la Cour , qui est contraint de suiure le Roy , & est son Conseiller intime. Dauantage le maistre des Tauerniers Royaux a la charge des mines , & des Salins , & cognoist & iuge des causes des villes , bourgades & Chasteaux en ce qui concerne le fisc du Roy.

Le second Magistrat est commis aux iugemens , & ce Magistrat comprend 3. Officiers de fort grande autorité , c'est à sçauoir le Vice Palatin du Royaume , le Iuge personnel de la presence , qui tient la place du Roy aux iugemens , & est sur les Iuges , & le Vice iuge de la Cour.

Les moindres sont ceux qui sont plustost executeurs des Iugemens que Magistrats , c'est à sçauoir 1. Protonotaires du Iuge personnel , le Protonotaire du Vice-Palatin , & Protonotaire du Vice-Iuge de la Cour. Tous ceux-cy sont appelez Maistres , & ont pour adioints ceux qui s'ensuyuent. Le Secrétaire de l'Archeuesque de Strigone qui est appelle Fiscal , douze Assesseurs , & quelques Notaires iurez.

Il y a outre cela les Officiers du Roy , comme le Thresorier du Roy , le Grand Chambellan , & les autres Chambellans , le grand Maistre de l'Hostel du Roy & les autres maistres d'hostel , le grand Eschançon , les Gentils-hommes seruans , les Huilliers , & plusieurs autres moindres Officiers.

Ils iugent selon le droit escrit. Mais ils ont encor vne autre maniere de vider les differents qui suruiennent entr'eux. Car si la chose est difficile à iuger , ils ordonnent qu'elle se decidera par le combat des deux parties : qui se fait en presence du Roy , ou de son Lieutenant. La victoire est adiugée au plus fort , & celuy est tenu pour victorieux qui estonne tellement d'abord son ennemy qu'il recule en entrant dans le Camp , où y estant entré est si viuement poursuiuy , qu'il est contraint de sortir hors du lieu qui leur est limité.

Ceux qui combattent à cheual courent premierement avec leurs lances l'un contre l'autre , puis mettent la main aux espees , & quant à ceux qui combattent à pied , ils ont leurs parties honteuses cachees , & le reste du corps tout nud.

Les seuls masles heritent en Hongrie , & s'ils decedent sans enfans masles , les femmes ne leur succedent pas , ains le Roy à qui les biens du deffunct demeurent acquis.

RELIGION

RELIGION.

Outre la secte de Mahomet qui est fort espandue en ce Royaume, à cause des places que les Turcs y tiennent, c'est chose assensee qu'il y a plusieurs sortes d'heresie.

Car non seulement on y voit regner celles d'Allemagne, mais encor l'Arrianisme y a pris pied, & l'Atheisme mesmes y est estably. Et c'est chose digne de consideration que les villes subiettes au Turc sont fort peu infectees d'heresie, & qu'au contraire les autres qui sont demeurees aux Chrestiens en sont toutes pleines.

Ce qui vient de ce que le Turc n'endure pas aisement qu'on altere quelque chose en ses Estats pour petite qu'elle soit, les heretiques ne sont pas si insolens parmy ces barbares; qu'entre les Chrestiens, de crainte d'estre empalez. Antoine Posseuin raconte qu'un ministre Calviniste voulant vne fois persuader au Bassa de Bude de luy permettre d'enseigner sa secte aux Chrestiens, alleguoit entre autres raisons qu'il n'y auoit grande difference entre la loy de Mahomet, & le Calvinisme. Car, disoit-il, nous nions comme vous la priere des Saints, nous tenons le Purgatoire pour vne chose fabuleuse, & les images & statues pour idoles.

Vous prenez plusieurs femmes, ou concubines, & nous ne faisons pas grand scrupule qu'une femme laisse son mary, & se joigne avec vne autre, bien que marié. Dauantage, c'est chose commune à vous & à nous de faire des Eglises des estables, & de conuertir les Autels en mangeoires. Vous ne faictes conte de la virginité, & nous auons mis par terre les anciens Conuents des Vierges.

A quoy le Bassa respondit: à ce que le voy nous serôs aisement d'accord en toutes choses, sinon que vous nous laissiez l'eau, & vous enyurerez volontiers de vin.

Mais pource que j'ay dit que les villes suiuettes au Turc, sont communement nettes d'heresie, & que le contraire se trouue en celle des Chrestiens, il faut scauoir que la Hongrie a deux Archeueschez, & 17. Eueschez. Les Archeueschez sont Strigongne, & Colasse. Celle-là a sous elle six Eueschez, & ceste-cy 8. Le reste recognoit l'Archeuesque de Spalatte.

Les Eueschez suiuettes à Strigongne sont celle d'Agrie où il n'y a nuls Turcs; mais la ville, & la Diocese est pleine d'heresie: celle de Iauarin (vn tiers de la Diocese est du Turc) celle de Nitrie, où l'Euesque se tient, & le Chapitre, mais avec vn peu de la Diocese libre: celle de cinq Eglises, & celle de Vaccie (toutes deux entierement du Turc) celle de Vesprin, qui s'est entierement perdue avec la prise de la ville; car quant à la Diocese elle estoit desia toute aux Turcs.

La Metropolitaine, qui est Strigongne, fut prise avec la plus grande partie de la Diocese l'an 1541. & le Chapitre se retira, & se maintient à Tirnaue: & l'Eglise est gouuernee par vn Administrateur que l'Empereur y a mis.

L'Archeuesché de Colasse est toute du Turc, & routes ses Eueschez luy sont aussi suiuettes, excepté celle de Transiluanie (qui est vne chose hors de nostre discours) & celle de Zagabrie, dont l'Euesque qui demeure dans la ville, a mille florins, ou liures de rente, mais la Diocese est du Turc.

L'Archeuesque de Spalatte a sous luy trois Eueschez; c'est à scauoir celle de Segnie habitee des Vsqques, avec huit ou dix Prestres au plus, celle du Moldruch, partie sous le Turc, & partie sous le Comte de Sdrin, & celle de Ticin, toutes sous le Turc.

Le Cardinal George Drafcouit, pour ayder à sa nation, obtint de l'Empereur Rodolphe vne partie des reuenus de la Preuosté de Turrochie pour l'institution d'un Seminaire de la ieunesse Hongroise en la ville de Vienne; & desia les Hongrois reprennent avec allegresse la doctrine Chrestienne, & les ceremonies de l'Eglise.

ROYS DE HONGRIE.

Le premier Roy Chrestien de Hongrie fut Geyza, qui s'estant fait baptiser, voulut estendre la foy Chrestienne par son Royaume, & fut en cela assisté des Alemands.

Estienne son fils, qui est mis au nombre des Saints, fut Roy de Hongrie, l'an de grace 997. Il espousa la sœur de l'Empereur saint Henry nommee Gizele, & en eut entre autres enfans saint Emery, qui mourut ieune auant son pere.

Pierre neveu d'Estienne de par sa sœur luy succeda, & se rendit insupportable par sa paillardise. Il fut chassé hors du Royaume par les Hongrois, qui mirent en son lieu le beau frere de saint Estienne.

Aba qui gouverna le Royaume plus debordément que Pierre, & se rendit odieux par son orgueil. Il fut tué en guerre le 3. an de son regne, & depuis Pierre fut appelé, qui se gouverna plus en tyran qu'en vray Roy, & exerça grande cruauté contre les Prestres, & prophana les Eglises, & les pillâ Il fut finalement pris, & les yeux luy furent creuez la 2. année apres qu'il fut remis en son Royaume, & mourut le mesme an.

Andre cousin de saint Estienne, fut fait Roy l'an 1007. reestablit la Religion Chrestienne en Hongrie, & fit redresser les Temples qui avoient esté abbatus, puis le voyant vieil ordonna Roy son fils Salomon.

Bela frere d'Andre le poursuivit par guerre, & obtint victoire sur luy, & apres sa mort il s'en alla à Albe Royale, où il se fit couronner. Ce Bela cheut si lourdement la 3. année de son regne, qu'il se brisa tout le corps, & mourut bien tost apres, laissant le Royaume à Salomon son nepveu.

Salomon apres la mort de Bela fut remis au Royaume l'an 1063. par le moyen de Henry 4. qui luy avoit donné sa sœur en mariage.

Geyza chassa Salomon du Royaume, & fut proclamé Roy à Albe-royale: puis ainsi qu'il vouloit de son bon gré rendre le Royaume à Salomon, il mourut apres avoir regné 3. ans, & lors les Hongrois ne voulurent pas s'appeller Salomon qui mourut en vn hermitage, où il se retira en fin, apres avoir beaucoup tracassé & tasché d'avoir son Royaume.

Ladislaus homme de bien, saint & iuste, & qui se contint en perpetuelle chasteté, fut esleu Roy du consentement de tous, combien qu'il le refusast, & apres plusieurs victoires, il mourut l'an de grace 1095. & de son regne le 19. apres avoir ordonné que son fils Alme luy succederait au Royaume, combien qu'il fust le plus ieune.

Alme quitta le Royaume à Coloman son aîné, mais apres cela les freres entrerent en debat, & les Hongrois qui ne vouloient endurer vne guerre intestine entre les freres, ordonnerent qu'ils combattroient l'un contre l'autre, & que le victorieux seroit Roy.

Coloman refusa le combat, pource qu'il estoit bossu, boiteux, & louche. En fin il fit crever les yeux à Alme, & à son nepveu, & voulut faire arracher les deux bourses à Bela son nepveu, afin qu'il ne peust avoir lignée: mais le bourreau craignant l'ire de Dieu, & que le Royaume demeurast sans boirs, arracha celles d'un petit chien, & les luy portant le contenta par ceste sainte tromperie. Coloman mourut d'une fascheuse maladie, l'an de salut 1114. & de son regne le 11.

Estienne son fils fut Roy, n'ayant pas encore 8. ans, & cependant vn autre gouverna le Royaume en son nom. Il regna 18. ans, & pource qu'il n'avoit nuls enfans, il adopta son cousin germain Bela fils d'Alme, & le declara Roy par son Testament.

Bela, quoy qu'aveugle, il gouverna le Royaume en paix, & mourut d'hydropisie, l'an de grace 1141. & de son regne le neufiesme.

Geyza son fils regna apres luy, & mourut l'an de grace 1161.

Estienne fils aîné de Geyza fut son successeur au Royaume, & mourut l'an 1173.

Bela frere d'Estienne.

Emeric son frere aîné regna 8. ans, & mourut l'an de salut 1200.

Ladislaus son fils ne regna que 6. mois.

Andre frere d'Emeric, succeda à son nepveu Ladislaus, & mourut l'an de grace 1235. & de son regne le 34.

Bela fils aîné d'Andre regna six ans, & l'an 1275.

Estienne son fils luy succeda, & mourut le 3. an de son regne.

Ladislav fils d'Estienne, surnommé Chune, fut tué l'an 1299. apres avoir regné environ 14. ans.

Andre fils d'Estienne regna 11. ans, & mourut l'an 1301.

Après la mort d'Andre, les vns esleurent Venceslas Roy de Boheme, & les autres Otton Duc de Baviere, qui fut honteusement chassé de Hongrie, apres y estre entré avec grandes magnificences.

Charles fils de Charles Martel Roy de Sicile, que quelques vns appellent Corolobert fut esleu Roy de Hongrie l'an mil trois cens six.

Louys son fils aîné encor ieune, fut fait Roy, fit grosse guerre aux Neapolitains, & obtint plusieurs victoires sur les Italiens. Il mourut âgé de 36. ans, l'an de salut 1381. apres avoir laissé son Royaume entre les mains de sa fille Marie, à laquelle il bailla en mariage Sigismond fils de l'Empereur Charles.

Marie gouverna quelque temps le Royaume sous la conduite, & par le Conseil de Nicolas de Gare, à cause qu'elle estoit encore fort ieune. Mais en fin les Hongrois enuoyerent l'Evesque de Sagabrie en Pouille vers Charles fils d'Andre pour l'inciter à venir en Hongrie pour

pour estre Roy. Il y vint, & le Roy Sigismond, ayant vn peu auparauant espousé solennellement Marie qui estoit paruenue en aage s'enfuit vers son frere Venceslas.

Mais Charles fut tué l'an 1585. par les menees de Marie, & de sa mere, & de Nicolas de Gare. En fin la Royne mere Elizabet fut noyee par Hornac amy de Charles, & la ieune Royne menee prisonniere en Croace, & mise en seure garde. Sigismond leue vne grande armee, prit Hornach, le fit attacher à la queue d'un cheual, & trainer par diuers lieux, puis tenailler, & finalement mettre en quatre quartiers.

Ce fut ce Sigismond qui ayant dressé vne grande armee l'an 1396. & mesme eu des François à son secours, fut deffait avec vne perte de gens signalee, par Bajazet Empereur des Turcs, pres de Nicopolis. On tient qu'il y eut en ceste bataille 10. mille Chrestiens, & 60. mille Turcs tuez.

Ce Roy & Empereur tout ensemble, mourut l'an de grace 1439. de son aage le 70. de son regne de Hongrie le 15. de son regne des Romains le 27. de Boheme 17. & de l'Empire le cinquiesme.

Albert Duc d'Autriche gendre de Sigismond, fut en mesme temps créé Roy de Hongrie, & Empereur des Romains, il mourut d'un flux de sang pour auoir mangé trop de melons, l'an 1439.

Vladislas frere de Casimir Roy de Pologne est appelé pour estre Roy. Il vient en Hongrie, & est receu comme tel. La veufue du Roy Albert fait vn fils apres la mort de son mary: & fait tant avec quelques Princes qu'on oingt, & couronne solennellement à Alberoyal, vn iour de Pentecoste Ladislas, qui n'auoit pas alors encore 4. mois. En fin ceux qui suyoient le party de Vladislas furent les plus forts.

Ce Roy fut tué en la bataille de Varne, où les Chrestiens furent miserablement deffaits par Amurat Empereur des Turcs.

Ladislas fut créé Roy apres la mort de Vladislas. Mais à cause que l'Empereur Frideric refusa de leur donner Huniade, fut esleu gouuerneur de Hongrie, & entra par force en Autriche, & y fit beaucoup de dommage.

Apres plusieurs debats Ladislas fut mené à Vienne, & receu en grand honneur par les Bohemois, & Hongrois. L'an de salut 1458. Ladislas fut fiancé à Magdeleine fille de Charles Roy de France, & ainsi qu'on dressoit l'appareil des nopces il mourut presque soudainement âgé de 19. ans & ne languit que 36. heures.

Mathias Coruin, fils d'Huniade fut esleu Roy de Hongrie en l'âge de 18. ans. Et combien que l'Empereur Federic eust esté esleu en mesme temps, il s'accorda avec Mathias, qui fut couronné par les mains de Frideric la 6. annee de son regne, & de salut 1464. Il mourut sans aucuns enfans apres auoir regné 37. ans. Vladislas fils de Casimir Roy de Pologne, que les Bohemiens auoient receu pour leur Roy, fut aussi esleu Roy de Hongrie apres la mort de Mathias.

Louys succeda à son pere Vladislas au Royaume de Hongrie, & mourut en bataille contre les Turcs, l'an 1526.

Ferdinand d'Autriche Empereur luy succeda & fit la guerre aux Turcs en Hongrie l'espace de 38. ans.

Maximilian d'Autriche Empereur.

Rodolphe II. Empereur, apres auoir tenu long temps le Royaume de Hongrie tel qu'il est, l'a remis entre les mains de Mathias d'Autriche, qui a esté Empereur, & l'a gouuerné. Apres le decez duquel en iouit à present Ferdinand 2. Empereur d'Allemagne, Roy d'Hongrie & de Boheme.

Sommaire recit des differents suruenus audit Royaume, depuis la paix faicte avec le Turc en l'annee 1605. iusques à present, pour l'intelligence tant du Gouvernement, que de la Religion de cet Estat.

Les differents qui arriuerent en Hongrie, tant pour les Religions que pour les charges & dignitez aux armées furent cause de grands maux, car Boriscay Iltan, Duc de Kismarie se reuolta contre l'Empereur en la haute Hongrie, & Transiluanie, ayant attiré plusieurs grands Seigneurs de son party, sur l'assurance que luy donna le Turc, ce Boriscay se met aux champs avec nombre de Heiducques, qui sont gens de cheual, & se fait nommer Prince de Transiluanie, & heritier de Battory, fait vne declaration contre les Lieutenans de l'Empereur, lesquels estoient 4. qui ioignent leurs troupes ensemble, & vont au deuant de Boriscay, viennent aux mains, les Hongrois tant de pied que de cheual se rendēt à Boriscay, & se battēt 6. heures durāt, où Bellioeu se préd la fuite: les Allemans & Silesiens raillez en pieces. Pets, & Pallas Lippay demeurent prisonniers de Boriscay, lequel enuoya Pets, Herdar, Balcha, & quelques drapeaux enuers le Turc pour luy monstrier son affection, & Pallas Lip-

pay fut Lieutenant de Botscay, & publierent qu'ils ne prenoient les armes que pour la liberté de leurs consciences, & pour empêcher les persecutions Euangeliques contre le Clergé, & les Iesuites, lesquels furent contraints de se sauuer à Vienne, ceux de Cassouie se reuolterent, & mirent les Prestres & le Clergé hors leurs villes & se font Protestans, selon la confession d'Ausbourg, Bast Lieutenant del'Empereur fait publier vn pardon general de l'Empereur, qui ne seruit de rien: assiege Cassouie en vain, ayant vne garnison dedans de 6000. hommes, leue le siege, à son retour prend Epper & autres places, aux conditions de les laisser viure en leur Religion, suivant la confession d'Ausbourg: mais poursuuy par Botscay, il perdit 30. chariots d'argent & draps qui venoient de Vienne: ceste armee de Botscay espouuanta les places voisines, les Allemans & soldats estrangers furent taillez en pieces.

Bast exhorte Botscay par ses lettres d'entendre à la paix, & ramener tous les subiets de l'Empereur à leur deuoir, Botscay fait responce qu'il est content, à la charge que la principauté de Transiluanie luy demeureroit, & qu'il seroit Lieutenant en Hongrie, que les François & Vualons en sortiroient, que les gens de guerre seroient payez, que la Religion protestante ne seroit empêchée, que Bellioeuse qui auoit occasionné les troubles seroit mis entre ses mains pour en faire iustice, que l'Empereur viendrait en personne aux Estats à Ponsion, & que les Allemans ne sortiroient de leurs garnisons pour picorer.

Bast voyant ces demandes ne fait responce, toute la Transiluanie obeît à Botscay, reçoit quelques deniers du Turc dont il en paya sa gendarmerie, & conuoqua les Estats de Hongrie en vne assemblée generale au dernier Aueil, les Comtes de Herin, Nadaste & Bedu, lesquels auoient combattu le Turc, se rendent du party de Botscay, lequel auoit vne armee de 15000. hommes, tellement que la Transiluanie, la Morauie, & la Valachie obeïssent à Botscay, ce qui donna occasion à l'Archiduc Matthias, & au nom de l'Empereur, de le rechercher de paix, avec conditions auantageuses à Botscay, pour cet effet depute Helie Hali, lequel confere avec le Commissaire de l'Empereur, & luy donne à cognoistre que son maistre ne s'éloigneroit iamais de la paix, en luy accordant ce qu'il auoit premierement demandé, & que dauantage qu'au Senat de Hongrie il n'y auroit autre Euesque que celui qui seroit Chancelier, que personne ne seroit contraint en sa Religion, que les Euesques seroient nobles & enfans du pays, & que tout le passé fust aboly de part & d'autre.

Pendant ces choses la guerre se continua de part & d'autre: mais le Turc ayant aduis des alées & venues pour vn accord entre l'Empereur, & Botscay, enuoya son grand Vezir en Hongrie, pour traiter de paix aussi avec l'Empereur.

Botscay enuoya vers le grand Vezir, qui estoit arriué à Bude, & demande des Ambassadeurs, pour l'informer des propositions faites pour la paix de Hongrie, ne voulant contreuenir aux promesses faites au grand Turc, de ne faire paix avec l'Empereur sans luy donner aduis, & qu'il fit maintenir les Turcs en leur camp.

Le Vezir ne demandant pas mieux que la paix s'y resout, tellement qu'il fut arresté que Botscay deputerait des Ambassadeurs de sa part à Vienne, pour faire la paix d'Hongrie entre l'Empereur & luy, & que l'Empereur & le Vezir deputeront personnages de qualité pour accorder quelques trefues, & vider leurs differens, & s'assembleront aux enuirs de Komorre, ce qui fut executé apres vne guerre de 15. années. Le traité de la paix pour la Hongrie faite avec Botscay au mois de Septembre 1606. à Vienne contenoit six articles, desquels voicy le sommaire.

21. Premierement qu'on viuroit en liberté de conscience, par toute la Hongrie comme les Catholiques, Lutheriens & Calvinistes, & n'y auroit que ces trois Religions.
1. Que l'Archiduc Mathias demeureroit Lieutenant general de l'Empereur par toute la Hongrie: & que tout demeureroit en l'Estat qu'il est.
3. Que Botscay demeureroit Prince de Transiluanie, Comte des Sicules, & Palatin de la haute Hongrie, & que ses enfans masculins luy succederoient, & à faute de ce le tout retourneroit à l'Empereur, les filles seroient mariees selon leur qualité, aux despens de l'Empereur.
4. Que pour l'aduenir le Palatin, les Tresoriers generaux seroient élus par les Estats du pays.
5. Que nul ne tiendrait benefice s'il n'est du pays.
6. Qu'une abolition generale seroit publiee, afin que tout fust mis en oubly de part & d'autre. Pour vne si heureuse paix les feux de ioye en furent faits à Vienne, & par tout. Mais la ioye ne dura beaucoup pour Botscay: car apres tant de trauaux au lieu de iouyr de ceste paix, son Chancelier l'empoisonna pour iouyr de ses Estats, ce qu'ayant apperceu,

le fit prendre, & ayant confessé, il luy fit trancher la teste. Apres tous les remedes faits à sa maladie, Botscay ne laissa de mourir à Cassouie le 13. Decembre: mais premier que mourir fit assembler les Estats, auxquels il recommande d'obeyr à l'Empereur, & luy faire bon & loyal seruice, & de viure en paix les vns avec les autres.

Cette paix de Hongrie faite & signee à Vienne, l'Archiduc Matthias enuoya deux des Deputez bien accompagnez trouuer les Deputez de Vezir, où il fut aduisé entr'eux des lieux qui seroient compris en la trefue, & afin d'estre plus en seureté sur le lieu pres de Komorre, les Ambassadeurs de Botscay s'esloignerent de ladite assemblée enuiron sept lieues Françaises, afin d'estre arbitres des differents qui pourroient suruenir.

En fin le 6. Octobre partirent de Vienne les Deputez, sous la conduite de Colonia Budian, & de ses troupes allans quant & eux les 2. Bachats de Bude prisonniers à Vienne, l'un nommé Soliman, & l'autre Aly, & menoient aussi six chariots, sur lesquels y auoit 20000. florins, & vne horloge tres-belle, & quelques vases d'argent; l'on deuoit faire present de ces choses au grand Turc.

Le Bascha de Bude avec 24. nauires montant le Danube y arriua aussi, comme font aussi les deputez de Botscay, pour donner leur conclusion à ceste paix tant desirée. Les Deputez donc de l'Empereur, du Turc, & de Botscay apres plusieurs assemblées, en fin ils accorderent quinze articles, & les signerent, desquels voicy le sommaire.

Chacun rentrera en ses biens, rebastira maisons & Chasteaux, & remettra en l'estat qu'ils estoient auant la guerre.

Que l'Empereur s'appellera pere, & le Turc fils, & seront les tiltres qui se donneront l'un à l'autre par leurs Ambassadeurs: & s'escriuans respectiuellement, ils vseront du mot d'Empereur, & non de Roy, les Tartares seront compris en ceste paix, avec deffence à eux de faire aucun dommage sur les terres de l'Empereur, ny en Hongrie.

Les Royaumes, terres, & seigneuries de la maison d'Autriche seront compris en ceste paix, que tous actes d'hostilité seront deffendus, & les transgresseurs punis par iustice exemplaire. Ne sera permis de costé ny d'autre de surprendre quelque forteresse, ville, maison, ny aucun prisonnier, & n'envoyer aucun espion à la Hongrie.

Que le traité de paix fait à Botscay sera gardé de bonne foy. Les marchands pourront librement trafiquer & voyager sur les limites du pays, & se tiendra quatre ou cinq toises par an aux lieux qui seront nommez pour cet effect.

Les partialitez & diuisions qui pourront arriuer selon les occurrences du fait, le Bascha de Bude, le Gouverneur de Iauarin, & celui d'Esclauonie auront autorité de les appaiser, & si elle est d'importance, l'Empereur & le Turc en seront mediateurs. Les prisonniers seront mis en liberté selon leur qualité, sera enuoyé par l'Archiduc Mathias vn Ambassadeur avec presents, comme pareillement fera le Vezir Amurathes à l'Archiduc Mathias, l'Empereur en fera autant au grand Turc, avec vn present de 200000. florins.

Le Turc en fera autant à l'Empereur de pareille valeur. Ceste paix sera ferme & stable pour vingt ans, entre leurs Majestez, enfans, ou leurs successeurs, & s'entr'enuoyeront Ambassadeurs de trois ans en trois ans, avec presens exquis. Sera permis de part & d'autre de se faire payer de leurs debtes que chacun iouyra de tous les priuileges & franchises, comme auant la guerre, & Vaccia demeurera à l'Empereur, & Gran au Turc.

Le Bascha de Bude traitra magnifiquement les Chrestiens, donna à chacun d'eux de beaux presens: il y eut grande reioüissance à Constantinople & aux pays de l'Empereur pour la paix.

La mort de Botscay suruenant apres, apporta diuers changemens à ses Prouinces, & la paix estant mal obseruee en Hongrie, par les courses que faisoient les Imperiaux & autres.

Or pour remedier à ces desordres, se fit vne assemblée des Seigneurs de la Hongrie & Transsylvanie, lesquels desiroient que leur Roy demeurast dans le pays, afin que sa presence dissipast tous ces nouveaux remuëmens, & font vne protestation dans l'Eglise Cathedrale de Presbourg qu'apres auoir attendu en vain sept semaines, l'Archiduc Mathias depuis le iour assigné de l'attente, & des Estats, qu'ils s'en retourneroient vers ceux qui les auoient enuoyez.

Les Seigneurs de la haute Hongrie font vne autre assemblée à Cassouie le quatorzième Octobre, où ils se resolurent de ne separer la Hongrie d'avec la Transsylvanie. Les Heiducques mal contents ne laissent pour toutes ces assemblées de continuer leurs ravages, prennent quelques Chasteaux, se declarent amis des Turcs, & ennemis des Allemans & Vallons. L'Archiduc Mathias s'achemine à Presbourg, où se tenoient les Estats de Hongrie, le quinzième Ianuier, avec 100. chariots, & 200. cheuaux: l'Euesque de Iauarin & tous les Seigneurs le furent receuoir, le Cardinal l'Archeuesque de Gean y arriua aussi,

O o o ij

fera tenir vne Diette pour leuer vne contribution , pour payer les gens de guerre des frontieres.

Sera mis entre les mains de l'Archiduc tous les tiltres, enseignemens, priuileges du Royaume d'Hongrie, dans 2. mois, & que l'Empereur cederà à l'Archiduc, sans y reseruer aucun droit, & à ses enfans males, tout l'Archiduché.

Que la paix seroit ratifiée entre les Seigneurs d'Hongrie & le Turc, du consentement de sa Majesté : & qu'aduenant la mort de l'Empereur sans enfans males, l'Archiduc succedera au Royaume de Boheme, & s'il y a des maistres, il sera leur tuteur pendant la moitié avec les Estats dudit Royaume.

L'Archiduc promettra aux Estats, en cas que le Royaume de Boheme luy aduienne par succession, de prester le serment de tous leurs priuileges, ou en cas qu'il fut esleu Roy, comme les Roys ont accoustumé de faire, & que l'Archiduc mettra en les titres designé Roy de Boheme, & qu'il aura aussi l'administration de la Morauie.

Que l'Archiduc sera recogneu en la temporalité de l'Euesché d'Esmutz, lequel est subiect au Royaume de Boheme. Que la Silesie auroit les priuileges par l'intercession de l'Archiduc, que l'Empereur leur auoit accordé, qu'il ne sera contribué par les Estats de Boheme pour la guerre, que ce qu'ils auoient accoustumé pour les frontieres de la Hongrie contre le Turc, & que l'Empereur portera en ses titres toutes les qualitez des Prouinces qu'il a cedees à l'Archiduc, & par mesme moyen l'Archiduc renonce à la Comté de Tirol, & la cederà à l'Empereur : & l'Archiduc fera faire contribution annuelle à l'Empereur, à l'assemblée des Estats, & que tout ce qui s'est passé de part & d'autre sera nullement recherché.

Ce sommaire des dix-sept articles, apres auoir esté leus, accordez, & signez de part & d'autre, la couronne de Hongrie, & toutes les marques royales furent deliurées à l'Archiduc, sçauoir, l'espee du Roy Estienne, la pomme d'or, les brodequins, vn vestement antique, & le sceptre Royal : lesquelles choses furent envoyées iusques au camp par l'Empereur, où l'Archiduc pour les receuoir auoit fait mettre son armee en bataille, & les fut receuoir avec nombre de Seigneurs, l'artillerie fut tirée par trois fois, & les soldats tirerent trois coups chacun, & apres toutes ces choses l'Archiduc leua le siege de deuant Prague, ayant separé son armee en trois pour se retirer à Vienne.

Le Roy Matthias arriuant à Vienne, les habitans le vont receuoir le 14. Iuillet, & luy firent entree comme à leur souverain Seigneur. Au mesme temps arriua à Vienne l'Ambassadeur du Turc enuoyé par le Bascha de Bude pour la confirmation de la paix avec le Roy, avec presens : & ayant eu audience, s'en retourna avec ratification de ce qu'il demandoit, puis fut enuoyé de par le Roy vn Ambassadeur à Constantinople avec riches presens.

Le Roy Matthias part de Vienne, & arriua à Presbourg le 22. Octobre, il fut receu en grande magnificence par les Seigneurs d'Hongrie, il y auoit plus de 10000. hommes en armes : il luy fut présenté le 6. Nouembre les articles confirmez en l'Edict 1606. de pacification, dont en voicy vn sommaire de tout.

Premierement, que l'exercice des Religions protestantes demeureront libres par toutes les villes du Royaume, & mesme en celle où il est pour le present, & esliroit son siege.

Que nul gouuerneur Allemand ne seroit installé en aucune place de Hongrie, & qu'à toutes les villes frontieres du costé du Turc il y sera posé des Gouuerneurs nés dudit Royaume, la couronne de Hongrie sera gardée par les seculiers, sera esleu vn Palatin avant toutes choses : que le Roy fera sa residence dans le pays, & à son absence le Palatin aura toute puissance avec les Senateurs, & ce qu'ils feront le Roy l'aura pour agreable.

Que les Estats du Royaume ne seront venaux, & ne seront donnez qu'à ceux qui seront nez du pays. Que les Iesuites restablis dans le Royaume, & les Ecclesiastiques n'aurent la vogue comme par le passé.

Que la reddition des deniers Royaux ne se fera qu'à la Chambre des Comptes à Presbourg, & que les monnoyes estrangeres seront mises au billon, & aduenant la mort du Palatin, pendant l'eslection d'un autre, le President de la Cour de chasque Prouince gouuernerà.


Les articles cy dessus furent présentées au Roy, & apres quelques modifications que le Roy y voulut apporter, Helie Haski fut esleu Palatin, & Matthias proclamé Roy de Hongrie le 14. dudit mois, & fut sacré & couronné dans l'Eglise saint Martin le 19. dudit, dont en voicy les ceremonies.

La Couronne est apportée sur vn chariot Royal, depuis le Chasteau iusques à l'Eglise, avec dix enseignes, & le coffret couuert d'un drap d'or, le tout fut mis dans la Sacristie, quatre des premiers Senateurs estoient aux quatre coins du chariot, & les autres Senateurs & grâds

Seigneurs le suiuoient: Le Roy vestu à l'Hongrienne monté sur vn cheual richement enhar-
naché accompagné de son frere l'Archiduc, de plusieurs Seigneurs de diuerses nations, ar-
riua à ladite Eglise: & ayant esté quelque peu dans la Sacristie, deux Euesques le viennent
querir pour le mener deuant l'Autel: mais premier que luy marchoiert dix Seigneurs qui
portoient les dix enseignes, & cinq autres qui portoient ce qui s'ensuit: Le premier portoit
la Croix. 2. la Paix. 3. l'espee Royale. 4. le Sceptre, & 5. qui estoit le Palatin Helie Haski, la
Couronne, le Cardinal Forgasi faisoit l'office, assisté de plusieurs Euesques & Prelats, le-
quel oignit & sacra le Roy dès le commencement de la messe, & luy mit la Couronne sur la
teste durant l'Euangile, le peuple criant tout d'une voix, viue le Roy de Hongrie, sur la
fin de la Messe, le Roy print l'espee Royale, que tenoit Colinita Marechal d'Hongrie, la-
quelle il ietta par trois fois sur les Ecclesiastiques en forme de croix, puis receut la Com-
munion de la main dudit Cardinal.

La Messe dite, on fit largesse de pieces d'or & d'argent: ce faict le Roy entra par vne
gallerie de l'Eglise saint Martin, dans celle des Deschauffez, où apres luy auoir leu l'E-
uangile, il fit vingt-deux Cheualiers: de là estant vestu d'ornemens Royaux, la couronne
en la teste, monta à cheual, sortit par la porte saint Michel, & arriua à vne colonne cou-
uerte d'un drap, & presta là le serment aux Hongriens, & eux à luy; puis monta sur vn che-
ual induit à sauter vne butte de terre, laquelle il sauta par trois fois, puis ietta l'espee en l'air
par trois fois en forme de croix: cela fait, il remonta au Chasteau, où le festin estoit
preparé.

Après ce couronnement, il fut contraint d'oster aux Allemands leurs dignitez, char-
ges, estats, & offices qu'ils tenoient en Hongrie, ayant pacifié la Hongrie, & remis tous sa
couronne ce que les Chrestiens y tenoient: il s'en retourna à Vienne pour y pacifier aussi les
troubles esmeus pour la Religion. En fin Matthias en sept mois s'est fait couronner Roy
de Hongrie, recogneu Archiduc d'Autriche, & Marquis de la Morauie, dont il a iouy ius-
ques à present.





DISCOVRS DE L'ESTAT DV ROY DE POLOGNE.

SOMMAIRE.

1.  Rigue, & etymologie du nom de Pologne, l'estendue, & les Prouinces de ce Royaume.
2. Division de la Pologne en haute & basse, & leurs principales villes.
3. Description de Cracovie, ville capitale de la basse Pologne: ses places voisines, & Duchez.
4. De Liouonie, sa capitale, & autres principales villes.
5. Lituanie, ses bornes, sa capitale ville, ses Duchez & Palatinats.
6. Samogitie, sa longueur & confins.
7. La Massouie, etymologie & origine du nom de ceste Prouince, sa capitale, & autres principales villes.
8. Volhinie, son assiette & Prouinces.
9. Polodie, ses limites, & capitale ville.
10. Russie, etymologie de son nom, ses bornes, pays, & ville capitale.
11. Podlassie, quand & par qui vnüe à la Pologne: ses villes principales.
12. Pomeranie: ses confins, son estendue, ses principales villes & Isles.
13. La Prusse, ses bornes, & longueur, ses principales riuieres: quand reduite en Principauté seculiere, diuisee iadis en douze Duchez, maintenant en deux pays: sa capitale ville Mariembourg.
14. En quelles choses abonde la Pologne, & l'incroyable nombre d'abeilles, dont les forests sont pleines. Des mines d'azur, de plomb, fer, cuiure, & de sel.
15. Polonois originaires, & descendus des Slaues: leurs ceremonies à l'imposition des noms de leurs enfans: quels dieux ils adoroient en general.
16. Le feu, le bois, & les serpents adorez iadis des Lithuaniens, & consultez par leurs Prestres en leurs maladies: leur sacrifice du Coq, leurs festes, & leurs ceremonies des obseques & sepultures.
17. Maniere de viure des Polonois de ce temps, la forme de leur manieres à escrire, & de l'usage de la langue Latine, commun aux villes & villages: le naturel hautin, & magnanime des nobles, leurs facons d'habits, & armes.
18. Leurs richesses en grains & bleds de toute sorte, miel, cire, lin, chanvres, bestail, & notamment des salines d'Olcen, & Velisques, azur, mines de fer, ambre, fourrures, & peaux de Martes, & autres bestes.
19. Des reuenus du Roy de Pologne, à quoy se montent toutes les annees: & des biens de la Noblesse.
20. Les forces Polonoises en quoy consistent: du nombre grand de leur caualerie: de la conduite de leur artillerie, & autres munitions de guerre des fortes places de ce Royaume: de leurs nauires, galeeres, & autres forces maritimes.
21. Leurs confins, sans ennemis, qu'amis, & leurs puissants Alliez.
22. Leur forme de gouuernement, & police moderne plus semblable à vne Republique qu'à vn Royaume: Des Nonces terrestres, leur autorité & assemblees & deliberations publiques de cet Estat. De l'autorité de leur Roy, & de la Noblesse.
23. De la discorde des Ordres des Senateurs & Cheualiers: des familles nobles, & des Prouinces.
24. Des deux membres qui composent tout l'Estat de Pologne: & quel est le nombre des Archeueschés & Eueschez, des Palatins, Mareschaux & autres dignitez de ce Royaume.
25. De l'heresie Lutherienne, & autres Sectes introduites en Prusse, & en tout l'Estat de Pologne par des marchands, & par l'Apostasie d'Albert de Brandebourg: & quelles sont les Prouinces qui ont retenu la foy de l'Eglise Romaine.
26. Genealogie des Ducs & Roys de Pologne.



A Pologne ou Polanie est ainsi nommée, à cause de ses plaines, qui sont au langage du pays appelées Poles, & a pareillemēt le nom de Royaume de Lechires, de Lechus premier Roy habitant en Pologne, qui établit son siege à Gnesne environ l'an de salut 550. Ce Royaume est plus grand auourd'huy qu'il ne fut iamais, à cause de la Lithuanie, & de la Liunie, qui ont esté adioustées à cet Estat. Il s'estend depuis les riuieres de Note & d'Orbe, qui la diuisent de la Marque & de l'Odere, qui la separe presque de la Silesie, iusques à la Beresine & au Mieper, qui la diuisent de la Moscouie, & de la mer Baltique, iusques à la riuere de Mester, qui la diuisent de la Moldaue, & s'estend encore iusques aux monts de Carpathie, qui la separent de la Hongrie. Tellement que depuis les confins de Silesie, iusques aux frontieres de Moscouie, entre le Ponāt & le Leuant, il occupe presque six vingts lieues d'Allemagne, & autant depuis les extremitez de la Liunie, iusques aux frontieres de Hongrie. Et pour ce qu'il est d'une forme qui approche de la rondeur, il est beaucoup plus grand qu'on ne croiroit. Il contient vn bon nombre de grandes Prouinces, c'est à sçauoir, la haute & basse Pologne, la Moscouie, la Prussie, la Podolie, la Russie, la Volhinie, la Liunie, & la Lithuanie. La Pologne fut trouuée comme deserte: la Prusse & partie de Pomeranie, Podolie, Volhinie, Malouie, & Liunie, ont esté conquises par forces d'armes, & la Lithuanie, à laquelle la Samogitie, & partie de la Russie, appartenoit premierement; auoit esté du patrimoine de la maison des Jagellons: car l'an 1386. Jagellon iadis Duc de Lithuanie, espousa la Princesse Edigie, qui estoit restée seule de la maison Royale de Pologne, & fut fait Roy avec trois conditions, c'est à sçauoir, qu'il se feroit Chrestien, qu'il induiroit aussi les siens à embrasser la foy Chrestienne, & qu'il vniroit son Estat à la Couronne de Pologne. Les deux premieres conditions furent accomplies, mais non la troisieme, qui ne l'a esté que de nostre temps, lors que la maison des Jagellons est venue à deffailir: car les Roys ne se voulans priver d'un Estat patrimonial, & duquels ils estoient Seigneurs absolus, ny le soubmettre à l'eslection des Polonois, differerēt tousiours l'accomplissement de cecy, sous pretexte qu'ils craignoient que les Lithuaniens se reuoltassent, & que par ce moyen ne vinssent à leur faire prendre ce qui leur appartenoit. Mais voyant d'un costé que les Princes de leur sang venoient à māquer (veu que la race a pris fin, quant aux masles, en Sigismond Auguste Roy de Pologne) & d'autre part, redoutans la puissance des Moscouites, ils ont esté contraints de l'vnir à ceste Couronne.

Quant à la Liunie, elle estoit anciennement des Cheualiers Teutoniques, qui y auoient vn grand Maistre: mais ayans esté priuez d'une grande partie de leur Estat, par le grand Duc de Moscouie, l'an 1538. pour punition de l'heresie qu'ils auoient embrassée, ils se recommanderent à Sigismond Roy de Pologne, qui les prit en protection: il est vray que la Prouince ne fut deliurée de la domination du Moscouite, que par le Roy Estienne, l'an mil cinq cēts quatre-vingts deux.

2. Or venant maintenant à dire quelque chose en particulier des Prouinces, apres en auoir parlé en general: la Pologne est diuisée en haute & basse; la haute qu'on nomme aussi Septentrionale, est coupee presque en deux parties par la riuere de Varte: & la basse qu'on appelle Meridionale, est arrosée de la riuere de Vistule.

La haute Pologne, qui a pour voisins les Saxons & les Prutheniens, a receu ce nom de haute ou de grande, pour ce que, comme nous auons dit, Lechus premier fondateur des Polonois, y mist son siege, en y bastissant la ville de Gnesne. Ceste Prouince contient ces villes principales, qui en ont d'autres moindres en leur distrait & iurisdiction, c'est à sçauoir, Posnanie, ville capitale & Metropolitaine, qui a sous elle les villes de Kosciem, Medzyrzeczu, Ostresovv, Vulchavv, Sremk, Prenec, Rogosno: Caliz qui a sous elle Gnesne, Pizadry, Vvarre, Naklo, Land, Konin, Slupeza, Kolo: Siradie, que l'on prenoit pour vne grande Duché, qui appartenoit aux seconds fils des Roys de Pologne, a ces villes sous elle, Orluie, Patek, Bresnie, Karnazeuue, Inoulodz, Eiechovv, & autres: Cujauie, ou Vladislauie, qui a sous elle Bidgolte: Preste, qui a sous elle Radzaeiou, Crusphicie, & Kouualovv: Rouam, qui a sous elle Sochaczouie, Gostinin, & Gambin: Ploczko, qui a sous elle les villes de Bielesko, Raczyayas, Siegrez, Srenko, Milauue, Plonkso, & Radzanovv: Dobrinie, qui a sous elle les villes de Slonck, Ripin, & Gorzno.

Quant à la basse Pologne, depuis que le siege Royal a esté transporté à Cracouie, on l'a preferée à la haute; & ceste cy a 3. villes principales, à sçauoir Cracouie, ou Cracou, Sandomire, & lublin, dont chacune a sous elle plusieurs autres villes.

Cracouie

Cracouie ou Krazou, est la ville capitale de la basse Pologne ; & c'est celle que Pierre Appian dit estre mesme chose que Carrodumun de Ptolomee : mais sans m'arrester à luy débattre ceste opinion , & voulant seulement poursuivre mon discours, ie dis qu'en ceste ville on void le chasteau, ou palais des Roys de Pologne, & que c'est le lieu où on les couronne, & enterre : à raison dequoy c'est la plus renommee place de tout le Royaume : il y a aussi vne belle & grande Vniuersité au mesme lieu. Le plus grand iour d'Esté y est de seize heures , & de la huitiesme partie d'une heure. Il y a 3. autres villes qui sont contiguës à Cracouie, à sçauoir Clepardie, Stradomie, & Casimire : & ceste ville a sous elle celles de Biecz, Vvoynicz, Sandecz, Lelouian, Kzyaz, & Proszouice. Il y a aussi au distrait de Cracouie deux Duchez, à sçauoir celuy de Zaton, d'Osuiiecine. Sandomire a sous elle les villes de Checiny, Korczin, Vuislicie, Pilzne, Opozno, Polouiec, Zauichost, Zarnouu, & Malegost. Iublin a sous elle les villes d'Vrzendvu, Lulovu, Parcovu, & Casimire.

La Liuonie est vne fort grande Prouince , qui a de longueur pres de la mer Baltique, enuiron six vingt & cinq lieues d'Allemagne , & sa largeur est pour le moins de quarante. Elle a pour sa borne du Levant la Russie sujette au Moscouite, separee toutesfois par la riuere de Nerue, & le lac de Beybas : du Midy la Samogitie, du Couchant de la mer Baltique, & du Septentrion la Finlande, separee par le golphe Fintuque, ou de Finland.

La capitale ville de Liuonie se nomme Rige, ou Rig, assise assez pres de l'emboucheure de la Diuine : & les principales apres celle cy sont Riualie, vulgairement Reuel, ou selon les Russiens, Roliuue, qui a vn grand & beau port au golphe de la mer Baltique ; Derpt, ou Derbten, & selon les Russiens, Iuryougorud, assise pres du bord de la riuere de Bec entre deux lacs, au milieu de la Prouince. Les autres grâdes villes accompagnées de beaux chasteaux, outre les susnommees, sont Vende, ou Vvendem au milieu du pays, Velin, Pernouie, Volmarie, ou Vvalmer, Vvesembourg, Vitesten, & Narua. Ce pays obeit pour la pluspart au Roy de Pologne : mais il y a quelques lieux en petit nombre, qui recognoissent le Moscouite, & le Roy de Dannemarc, & quelques autres obeyssent au Roy de Suede, comme Reuel, & Narue, & d'autres petites places.

La Lithuanie, qui a grande estendue, est proche de Moscouie, & a pour ses bornes du Levant la partie de la Russie, qui recognoist le grand Rnez : du Couchant la Podlasie, Massouie, & Pologne, & se destournant vn peu vers le Nord, la Prusse : du Nord la Liuonie, & la Samogitie : & du Midy la Podolie, & Volhinie.

Ceste Prouince contient plusieurs Duchez & pays, & est diuisee en certains Palatinats, de mesme que la Pologne : comme au Palatinat de Vilne, de Troc, de Minsce, de Nouogrod, de Brest, de Kiouie, & autres qui peuuent estre prins pour des pays : toutesfois il y a peu de villes, mais beaucoup de villages. La capitale ville de Lithuanie, c'est Vilne, qui est aussi grande que Cracouie avec tous les fauxbourgs. On y compte aussi Nouogrod, qui a de circuit sept lieues d'Allemagne : mais elle est sous le grand Duc de Moscouie, & fut prise par les Moscouites l'an mil quatre cents septante sept. La principale riuere de Lithuanie c'est celle de Neper, ou Neyper (nommee Borysthene par Ptolomee) qui venant de Moscouie, & coulant au dessous de Chiouie, se descharge dedans la mer Pontique.

Samogitie est proche de la Lithuanie, & a cinquante milles de long. Elle a pour ses confins du Nord la Liuonie, du Couchant la mer Baltique, ou Germanique, qui est appelée proprement le golphe Baltique, & ceste mer la borde tournant vn peu vers le Septentrion : & la Prusse en est aussi proche. Il n'y a point de belles villes qui la rendent remarquable : bien y a-il plusieurs villetes & villages, qui appartiennent tant au Roy, qu'aux Gentils-hommes, mais les maisons y sont du tout mal-basties.

La Massouie est vne Prouince de grande estendue, ioincte à la Pologne, & porte le nom d'un Massae, qui en estoit Duc, & qui estant entierement desfaict par Casimir Duc des Polonois, en l'an 1045. s'enfuit en Prusse, où apres auoir esté diuersement tourmenté, il finit sa vie avec vn licol. Elle confine du Levant avec la Lithuanie, du Couchant avec la Pologne, du Septentrion avec la Prusse, & du Midy avec la Russie & la Pologne. Ceste Prouince auoit autresfois son Prince particulier, & estoit destinee aux seconds fils des Roys de Pologne : mais Jean, & Stanislas vniques heritiers de cet Estat, estant morts ieunes en l'an 1526. ceste Duché reuint à la couronne de Pologne.

Marchouie est la ville capitale de ceste Prouince, & a sous elle les villes de Czirko, Egrad, Zekrozin, Czieknanouu, Czernierensk, Poltounok, Rosan, Varka, Blonic, Zarsin, Gapzick, Prasni, & Loraza. Ceste Prouince fut estrangement ruinee, & rauagee par Mendog

Duc de Lithuanie, principalement en l'an 1246. & 1260.

La Volhinie est assise entre la Lithuanie, la Podolie, & la Russie : elle appartenoit au grand Duc de Lithuanie, mais maintenant elle est unie au Royaume de Pologne. On la divise en trois Prouinces, à sçavoir, de Leucko, de Vvolodomire, & de Ryzemenec, qui sont aussi les noms des trois villes capitales, qui en ont beaucoup d'autres sous elles.

La Podolie a pour ses limites du costé du Midy la Moldaue, pres la riviere de Tyre, maintenant appelée Nijester, au Levant de grandes campagnes desertes, & inhabitées jusques au marais Meotide, ou mer des Zabaques. On ne voit presque en ce pays que de petits villages fort espars, à cause des continuelles courses des Tartares. Sa capitale ville est Camyeniec, presque diuinement bastie entre des precipices, & si forte, que les Tartares en ont esté souvent repoulléz avec grande perte: de même que les Valaques, & les Turcs. On y trouue aussi la ville de Lembours renommée, à cause des chairs salées qu'elle enuoye en beaucoup d'endroits.

La Russie, qu'on nomme aussi Roxolanie, ou Ruthenie, a esté iadis, selon quelques-uns appelée Rosseye, qui vaut autant dire que peuples espars, à cause que ces peuples occuperent toute la Sarmatie d'Europe, & une partie de celle d'Asie : & estendirent leurs colonies, depuis la mer glaccée, jusqu'à la Mediteranee, & au golphe Hadriatique, & depuis la mer Majeur jusqu'à la mer Baltique : de sorte que tous les peuples qui vrent de la lague Esclauone, & suivent la Religion, & ceremonies des Chrestiens Grecs, sont communement appelez Russiens, ou Rutheniens. Or ie ne veux pas parler en ce lieu de toute la Russie, dont la plus grande partie obeyt au grand Knez : mais seulement de celle que l'on nomme Noire, & selon les autres Rouge, ou Meridionale.

Donc la Russie Noire est bornée du costé du Midy des monts de Sarmatie, qui sont aussi nommez Carpetiens, & Tartares : du Levant de la Volhinie, Podolie, & Moldaue : du Nord de la Lithuanie, & du Couchant de la Pologne.

Ceste Russie contient les pays & villes de Lempurg, d'Halicie, de Belze, de Chelmo, & de Promessie, qui en ont beaucoup d'autres sous elles. La capitale ville de toute la Prouince c'est Leumpurg, où est le siege de l'Archeuesque.

La Podlasie grande Prouince, a du Couchant la Morauie, & du Levant touche la Lithuanie : elle fut autrefois sous la domination des Lithuaniens : mais l'an 1569. elle fut unie au Royaume de Pologne par Sigismond Roy de Pologne, & grand Duc de Lithuanie. On y void les villes de Byelsko, Brasko, Suras, & Tykolzin, où l'on garde le threor du Roy : on y void aussi Knyssin, où est une maison royale, avec un grand parc remply de diuerses sortes d'animaux, & de beaux canaux & reservoirs tous pleins de poissons. Vous y trouuez aussi les villes de Narevv, & de Vasilkovv, & semblablement celle d'Augustovv, ville fort grande, fondée par le Roy Sigismond Auguste.

La Pomeranie confine avec la mer Baltique, & s'estend par un long espace de terre depuis les extremités de l'Holface, jusqu'aux frontieres de Liuonie : Elle est nommée Pomeranie, ou la Prouince de Pomeran, comme qui diroit maritime, & ce en langue Esclauone. Ses premiers habitans l'appelloient le pays de Pamorcy, & les habitans mêmes estoient nommez Sidines. Il y a 40. villes entourées de mer & de fossez, outre plusieurs autres, & beaucoup de chasteaux & Monasteres. Ses principales villes sont assises pres du riuage de la mer, & il y a bien peu auant dans le pays, & le riuage est si bien fortifié par la nature, & accommodé en telle sorte, qu'il ne craint aucun desbordement de la mer, & donne un grand accez aux nauires.

Ses villes qui sont dans le pays, sont Stetin, capitale de tout le pays, qui donne son nom à une Duché, Neugarde, Lembourg, Stargard, Bergard, Camenez, Publin, Grifenburg, & plusieurs autres : celles du riuage sont Colberg, Camin, Costin, Gribsuuald, où il y a Academie fondée l'an 1546. Sundt, Puck, Revncol, Louemburg, Hechel, Stralivnde, ville agreable & de grand traffic, & plusieurs autres. On y voyoit autrefois la belle ville de Iuiluy, maintenant Voltin, qui est pour le iourd'huy ruinée : mais sur tout l'on y void la ville de Gdaun, Dants, ou Dantzic, qui est environ à cinq mille loing de la mer. Il y en a qui mettent ceste ville en Prusse.

Il y a tout aupres du pays de Pomeran trois Isles, à sçavoir, Rugen, où l'on compte cinq villes ; Vfedam, ou Viedom, où l'on en compte trois ; & Voline, où l'on n'en met qu'une.

La Prusse, que quelques autres nomment Borrusse, Prutenie, Vlmiganie, & Hulmigerie, a pour ses bornes la mer Baltique du Septentrion, la Lithuanie & Samogitie du Levant, le pays de Pomeran du Couchant, & la Pologne & la Masovie du Midy. Sa longueur qui s'estend

stend du Nord au Sud, contient cinquante huit lieues de Pologne, à sçauoir depuis la ville de Torunie, qui est sur la frontiere de la Masouie, iusques au chasteau de Memle, & sa largeur est de cinquante lieues. Ses principales riuieres sont la Vistule, Nemen, ou Cronon, Nogat, Elbing, Vvser, Bassarie, Alle, Pregel, Oise, Drebus, Lique, & Lauie.

Ceste Prouince a esté quelque temps sous les Cheualiers Teutoniques; mais vn peu apres l'an 1419. les pays & villes de Prusse voulurent recognoistre Casimir Roy de Pologne, & se reuolterent contre les Cheualiers, & depuis encore apres l'an 1450. la Prusse ne voulut plus obeyr à ces Cheualiers, & se soumit au Roy de Pologne, & les soldats de l'Ordre qui estoient en garnison vendirent Mariembourg, avec plusieurs autres villes & chasteaux, l'an 1457: 476000. florins. Toutesfois les Cheualiers ne voulans prester serment au Roy de Pologne, l'an 1498. ils s'entreferirent la guerre avec diuers euenemens, iusques à ce que la Prusse fut reduite en principauté seculiere, sous Albert Marquis de Brandebourg trente-quatriesme, & dernier grand Maistre de ces Croisez, qui fut fait Cheualier de l'Ordre, & Prince seculier à Cracouie, par Sigismond Roy de Pologne, apres qu'il luy eust presté serment solennel; & le susdit Roy luy donna toutes les terres de Prusse, pour les tenir de luy comme son hommelige.

Or la Prusse fut iadis diuisee en 12. Duchez, ou Prouinces, l'an 573. par Venedus son Prince, selon le nombre de ses enfans, à chacun desquels il assigna vne Prouince, qui portoit le nom de Seigneur. Ces Prouintes ou Duchez sont Sudaue, qui fut entierement rauagee par les Croisez, Sambie, aujourd'huy Szamland, Nethanie, Nadraue, Bardouie, Garlinde, Varmie, ou Vermelande, Hogkerland, Culme, Poemsanie, & Milchlouie. Chacune de ces Prouinces contient beaucoup de villes basties en diuers tēps par les Cheualiers Teutoniques, veu qu'apres que la Religio Chrestienne fut establie en ce pays, les Croisez y bastirēt 72. chasteaux, & 62. villes principales, dont le nombre est maintenant augmenté; tellement qu'il n'y a pour le present Prouince en Pologne, où l'on trouue tant de villes & de si beaux chasteaux.

Maintenant la Prusse est diuisee en deux pays, à sçauoir en celui du Duc & du Roy: le Duc a son siege à Montroyal, que les habitans nomment Cunizberg, ville maritime, où l'on void vne Vniuersité fondee par Albert premier Duc, qui a commencé par le moyen du Roy de Pologne, de iouyr entierement de toutes ces terres, comme vassal du Royaume de Pologne. Mariembourg est la capitale ville de la Prusse, c'est à dire, de celles que le Roy possede particulierement, outre ce qu'il a accordé au Duc. Il y a aussi vne belle Vniuersité à Königsberg.

Q U A L I T É.

LA Pologne est vn pays plain, couuert de beaucoup de forests, & remparé au dedans de peu de montagnes. Ce pays est froid, à raison dequoy il est priué d'oliuiers & de vignes: ^{14.} mais il abonde en toutes autres choses que la terre a accoustumé de produire: car il y vient grande quantité de froments, d'orge, & de toutes sortes de legumes; tellement que les autres pays qui sont au delà de la mer, se sentent de sa fertilité. Elle abonde aussi en bestial de toutes sortes & en poissons. Il est vray que selon la grandeur elle est trop peu cultiuee, veu qu'il y a beaucoup de grandes forests où l'on trouue vn grand nombre de bestes sauvages. Il y a aussi force oyseaux, & grande quantité de fruiets, de beurre & de cire. Et quant au miel il s'y en trouue en telle abondance, qu'il n'y a presque assez de place pour le loger, car tous les arbres & tous les bois noircissent de ruches d'abeilles.

On n'y trouue point de mine d'or, ny d'argent, excepté au terroir de Cracouie, où l'on dit qu'il y en a vne d'argent, de mesme qu'à Sandomaite, où l'on en trouue aussi vne d'azur: mais ce pays produit du plomb, du fer, & du cuyure bon en perfection, & il y a grande quantité de sel, principalement de celui de mine, qui est excellent. En Pologne le plus grand iour d'Esté n'est pas moindre de seize heures, & ne passe aussi lesdites seize heures, & quarante minutes.

La Liuonie est vn pays plein de marescages pour la plus grande partie, & n'ayant aucunes montagnes. Il y a beaucoup de riuieres qui l'arrosent, & toutefois beaucoup de lieux demeurent sans estre cultiuez, combien qu'ils soient capables de produire beaucoup; car il porte du froment, & toute sorte de fruiets en si grande abondance, qu'il en enuoye vne bonne partie aux Prouinces estrangeres. Ce pays abonde semblablement en poissons, & en bestes domestiques & sauvages, principalement en cheuaux, qui sont assés au possible. Il s'y trouue aussi grande quantité de cire, de miel, & de poix seiche. Il ne porte point d'oliuiers, ny de vignes. Il y a beaucoup de lacs, dont le principal nommé Beybas, qui a quarante-cinq milles;

de long, abonde en diuerses sortes de poissons.

La Lithuanie est aussi pour la plus grande partie marecageuse, & pleine de forests, & pour ceste cause peu accessible. Il y a de fort grands lacs, qui semblent des mers en quelques endroits. Il y a aussi beaucoup de riuieres navigables, qui sont plus frequentees en Hyuer, qu'en autre temps, à cause que les estangs & les marests estans glacez, le chemin est plus aisé. L'air n'y est pas temperé, ains fascheux, & froid au possible. Il n'y naist aucuns animaux qui ne soient petits; & il y a outre les bestes que l'on trouue en Allemagne, des buffles, des elans, & des cheuaux sauvages. Ce pays produit aussi du froment en abondance, mais il y meurt fort peu souuent. Il n'y croist aucune vigne, & il manque aussi de sel, qui y vient d'Angleterre. Il s'y trouue force martes, zibelines, & grand nombre d'hermines, cōme aussi beaucoup de poix, de miel, & de cire. A Vilne le plus grand iour d'Esté est de 17. heures, & la huietieme partie d'une heure, & n'est pas moindre en toute la Prouince de seize heures, & une sixiesme: toutesfois aux extremittez qui tirent vers le Nort, le plus grand iour d'Esté est presque de 18. heures.

Quant à la Samogitie, elle est du tout froide, & presque tousiours gelee. Elle abonde en forests, aux arbres desquelles on trouue grande quantité de miel, qui est meilleur, plus delicat, & plus blanc, & a moins de cire meslee en ce lieu qu'en aucune autre.

La Massouie est pour la plus grande partie pleine de bois, où l'on trouue grande quantité de beuffles, & des vers ou taureaux sauvages.

La Volhinie produit en abondance toute sorte de grains, & de fruiets; & a force forests, où l'on trouue grand nombre de bestes sauvages, & des estangs qui foisonnent en poissons. Il y a quantité de bons pasturages, & de miel.

Pour le regard de la Podolie, elle est aussi fertile tout ce qui se peut, tellement que pour vn an on a accoustumé de recueillir cent, & en remuant vn peu les terres, & y semant du froment elles portent trois annees de suite: & mesme il n'est pas besoin de semer les champs toutes les annees, ains seulement il faut secouer vn peu la moisson, & les grains qui y demeurent seruent de semence pour l'annee suyuante. Les prez y portent aussi du foin en abondance, & tellement grand, qu'on ne voit point presque paroistre les cornes des bœufs au dessus de l'herbe, & mesme elle couure vne perche dans trois iours. Toutesfois la terre y est dure, & pleine de pierres, tellement qu'il y faut du moins six paires de bœufs pour labourer: ce qui travaille grandement les bœufs, & ceux qui les menent. On trouue pareillement en ce pays force troupeaux de bœufs, & de brebis, grand nombre de bestes sauvages, & du miel à foison. Il abonde aussi en sel & en cheuaux.

La Russie meridionale est fertile au possible, & abonde en cheuaux, en bœufs, en brebis, en martes & en renards. Il y a telle quantité d'abeilles, que non seulement elles cachent & logent leur miel dans les ruches, & dans les creux des arbres, mais encore dans les rochers, & dans les cauernes de la terre. Il n'y croist point de vigne. Il ya force riuieres qui l'arrosent, & beaucoup d'estangs qui foisonnent en poisson. On dit qu'au terroir de Chelme, les branches du pin coupees & laisseees sur la terre deux ou trois annees, s'endurcissent, & transforment en cailloux. On y trouue aussi force craye blanche.

Le pays de Pomeran est plain, & n'a que fort peu de montagnes. Il est fertile à parler generalement, & arrosé de beaucoup d'eaux. Il a ses champs bien cultivez, & force riuieres navigables. Il abonde tellement en animaux priuez, en froment, beurre, miel, cire, & choses semblables, qu'il fournit de toutes ces choses aux autres pays.

Les habitans de ce pays recueillent de l'ambre, que le flux de la mer iette au riuage, mais ils en trouuent bien moins que ceux de Prusse.

La Prusse produit toutes choses en abondance, & est beaucoup plus heureuse que toutes les contrees qui luy sont voisines. Car elle est de tous costez agreable, & commode au possible, à cause du grand nombre de ports qu'elle a sur la mer Baltique, & des diuers golphes de mer, & costes. L'air y est doux & temperé, tellement qu'on y void grande quantité de bestial de toutes sortes. La terre y porte aussi à foison du froment, qui surpasse de beaucoup en bonté celui de Pologne & de Lithuanie. Ce pays abonde en abeilles & en miel, de mesme que toutes les contrees Septentrionales, & ces mouches font leur miel dans les creux des arbres. Il y a de fort grandes forests, & du tout espaisseees, remplies de grandes & puissantes bestes sauvages, entre lesquelles on compte les beuffles, & les elans, & les cheuaux sauvages. D'auantage, il y a force riuieres, estangs & lacs, qui abondent en poisson: & mesme il y a quelques lacs de ceste nature qui ont de tour sept lieues de Pologne. Les habitans trouuent aussi au dessus de la mer Baltique de l'ambre nommé Burstin par les habitans, qui est ietté par le flux de la mer, & par les tempestes, au riuage.

Comme ainsi soit que les Polonois sont descendus des Slaues, aussi ont ils retenu leurs mœurs assez longuement, si bien qu'en sçachant celles des vns on vient aussi tost à auoir cognoissance des autres. Pour en dire quelque chose, lors qu'ils vouloient imposer le nom à quelqu'un de leurs enfans, ce qui ne se faisoit qu'ils ne fussent desia grands : ils le conduisoient au Temple de leurs Dieux, & luy coupoient les premiers cheveux qu'ils leur offroient comme par arrhes du service qu'il leur deuoit rendre. A cet effect on appelloit les parens & les amis pour se resiouyr, & l'on y sacrifioit vn pourceau, & de l'eau mixtionnee, & faite comme nous faisons l'hydromel. Les Dieux qu'ils adoroient estoient Iessan, c'est à dire Iupiter, Ladron, qui estoit Pluton, Niam, Diane, Marzam, Mars, Zezilia, Ceres, & Zienane, qui estoit Venus, ayans pareille opinion de ces Dieux que les autres nations, & leur sacrifians en la mesme façon que les Grecs & les Romains, solemnifians leurs festes avec banquets, dances, chansons, & toute sorte de resiouyssance. Et mesme Duglosse historien, dit que ceste façon de s'esjouyr auoit duré iusques à son temps, qui fut quelques annees apres que ces Polonois eurent receu la Religion Chrestienne, voire mesme à present, lors que les Lithuaniens se resiouyssent & dancent, ils repetent plusieurs fois ce mot de Ladon en chantant, avec vn grand battement de mains. Ils auoient encore, comme dit Duglosse pour Dieu, Ziuie, qui signifie ceste force vitale de l'air qui donne vigueur aux choses animees. Ils adoroient encore le Dieu, ou la deesse Pogode, qui estoit la serenité & temperie de l'air.

Quant aux Lithuaniens, ils auoient anciennement pour leurs Dieux, le feu, les bois, les serpents qu'ils nourrissoient mesme en leurs maisons, comme leurs Dieux domestiques, & leurs offroient sacrifices. Ils adoroient le feu sacré, & l'entretenoient en telle sorte qu'il ne s'esteignoit iamais : & les Sacrificateurs & Ministres de leurs Temples luy fournissoient tousiours force matiere, afin qu'il ne defaillit point. Quand quelqu'un estoit malade, ses amis se retiroient vers ses Sacrificateurs, & leur demandoient s'il couroit fortune de mourir, ou s'il deuoit demeurer en vie. Ces Sacrificateurs venoient au feu de nuict, & le lendemain donnoient responce à ceux qui leur auoient fait la demande, disant qu'ils auoient veu pres du feu l'ombre du malade. Il y en auoit d'autres plus auant dans le pays qui adoroient le Soleil & les bois, & selon qu'un arbre estoit plus haut ils luy rendoient plus d'honneur. Ils estoient iadis si pauvres, & de si petite reputation enuers les Russiens, que les Seigneurs & Princes de Kinie ne pouuoient tirer d'eux en signe de subiection, que des haillons, des drapeaux, du liege, & autres choses viles, tant ils estoient pauvres. I'ay oublié de dire qu'ils immoloient des coqs à leurs serpents, & les nourrissoient de lait. Ils auoient des festes solempnelles tous les ans apres la moisson vers le mois de Septembre, & lors qu'ils reuenoient de la guerre ils brusloient pour sacrifice les despoüilles prises sur leurs aduersaires, & mesme vn des ennemis prisonnier seruoit de victime. Quand quelqu'un d'entr'eux mouroit ils brusloient avec son corps ses plus riches meubles, & les plus beaux cheuaux, offrans du lait & du miel sur le tombeau. Auant qu'ils eussent receu la foy Chrestienne, il n'y auoit que les nobles qui eussent l'usage du drap & des louliers, veu que le peuple s'habilloit de lin, & se couuroient de peaux de bestes sauvages.

Pour le regard des Samogites, ou Samogetes, il n'y a pas long temps qu'ils ne sçauoient que c'estoit d'or ny d'argent, ny de cuiure, ny de fer, ny de vin. Il estoit permis entr'eux à vn homme d'auoir plusieurs femmes, & au fils d'espouser sa belle mere apres la mort de son pere, & au frere sa belle soeur. Ce peuple auoit pour son plus grand Dieu le feu qu'il estimoit sacré, & qui ne s'esteignoit iamais, estant entretenu en vne haute montagne par leur Sacrificateur. Ils auoient des forests qu'ils adoroient comme saintes, & comme demeure de leurs Dieux, & estoient tombez en telle folie, qu'ils pensoient que ces forests, & les bestes qui y demouroient estoient saintes, & que tout ce qui y entroit deuoit estre reputé pour saint. Ils auoient en ces bois des foyers separés les vns des autres pour les maisons & familles, dans lesquels ils brusloient les corps de leurs grands amis avec leurs cheuaux, selles, & harnois, & leurs meilleurs accoustremens. Ils mettoient pres de ces foyers des escabeaux ou quelques sieges faicts de liege, sur lesquels ils apprestoient des viandes faites de farine en forme de fromages, & versoient de la biere sur le feu, estans abusez iusques-là, qu'ils croyoient que les ames de leurs morts, dont ils auoient bruslé le corps, venoient là de nuict, & y prenoient leur refection. Si quelqu'un d'eux venoit à faire la moindre violence à ces forests, ou aux oyseaux, ou aux autres bestes qui y estoient, les mains ou les pieds

luy deuenoient courbez par art diabolique.

Ceux de Diuonie ont esté longuement barbares & inciuils, & addonnez à l'adoration des Dieux presque semblable à celle que nous auons ja descrite en parlât des autres. La simplicité de ce peuple estoit si grande, qu'apres auoir pressé le miel ils portoient hors la cire comme vne ordure & superfluité. Il auoit ordinairement ce mot de Iehu en la bouche, dont ceux de ce temps en sçauent l'explication.

Ceux de Prusse furent anciennement fort cruels & barbares, & grands beueurs, ayants pour leurs plus grandes delices, le lait des iumens, auant qu'ils sceussent l'usage de l'hydromel. Ils prenoient autant de femmes que bon leur sembloit en mariage, & les tenoient aussi sujettes que si elles eussent esté leurs seruantes. Lors qu'ils estoient las, ou de travail, ou de trop boire, les bains & les estuues leurs aydoient à se remettre, & mesme au plus fort de l'hyuer ils auoient accoustumé de se baigner dedans l'eau froide. Ils enterroient leurs morts avec leurs plus riches meubles, armes, & cheuaux, & sacrifioient à ceux qui mouroient en la bataille quelque vn des ennemis qu'ils auoient pris. Ils adoroient le feu, le Soleil, la Lune, les bestes, les serpents, & plusieurs autres choses. Ils estoient fort charitables enuers les necessiteux, & mesmes alloient au deuant de ceux qui estoient en danger de la mer, & les secouroient, ou bien aydoient à ceux qui auoient esté travaillez par les Corsaires. Ils ne faisoient nul estat de l'or ny de l'argent. Ils auoient quantité de belles fourrures qu'ils donnoient pour d'autres vestemens de laine.

MOEURS DE CE TEMPS.

17. **L**es Polonois sont à present entierement esloignez de la cruauté des Sarmates anciens, & de leur rudesse. Ils sont sages & discrets en leurs actions, & fort courtois à l'endroit des estrangers, excepté le menu peuple qui tire d'eux iusqu'au dernier denier, lors qu'il le peut faire. Ils boiuent volôtiers, ainsi que tous les peuples Septentrionaux, mais l'usage du vin y est fort rare, & les habitans ne sçauent que c'est de cultiuier les vignes. Ils ont certaine boisson avec du bled, & autres choses qu'ils nomment ceruoise, & qui est comme la biere. Les caracteres dont ils vsent en escriuant sont composez en partie du Grec, & en partie du naturel de leur pays, & les hommes & les femmes s'y habillent presque à la façon des Grecs. Les Polonois abhorrent le larcin, & la volerie, & le pays est tellement asseuré de ce costé là, qu'en hyuer on verra faire vn grand chemin à vn homme tout seul, avec vn petit chariot tiré par vn ou 2. cheuaux. Ce sont des homes réplis de grâde industrie, & qui ont la cognoissance de plusieurs langues, principalement de la Latine, dont chacun vse comme de sa langue vulgaire aux villes & villages, & elle est commune tant aux riches qu'aux pauvres. Les Gentils hommes Polonois aiment à estre superbement vestus & armez. Ils sont vaillans de leur naturel, & quoy que leurs ennemis ayent de l'aduantage sur eux pour le regard du nombre, ils ne laissent de les attendre, voire mesme de les attaquer. Les nobles qui ne sont pas de condition releuee, n'endurent pas aysément les outrages qu'ils ont receu des grands Seigneurs, mais l'offensé s'essaye d'en tirer raison en assemblant autant de ses parents & amis qu'il luy est possible.

En fin pour parler generalement des Polonois, ils sont plustost prodigues que liberaux, pource qu'ils ne font que festiner, & se plaisent à tirer force personnes, & à nourrir grand nombre de seruiteurs.

Quant aux Lithuaniens, ils se conduisent allans par leur pays en Hyuer par l'estoile du Nort, ainsi qu'on fait sur la mer. Ils n'ont aucune usage de monnoye.

Les femmes de ce pays ont des amis par la permission de leurs maris, & s'en seruent au ieu d'amour quand bon leur semble, & toutesfois si vn homme marié auoit quelque maistresse, il en seroit blasmé.

Les mariages sont entr'eux si peu asseurez, qu'ils les rompent aysément, & se quittent d'vn commun accord, se marians & remarians autant de fois qu'ils en prennent fantaisie.

Le vin n'y est guere en usage; le pain y est fort bis à cause que le bled n'est guere criblé, ny la farine sassee.

Les troupeaux les pouruoient de breuage, pource qu'ils ont du lait en abondance, d'où ils se seruent en lieu de vin. Ils parlent Esclaouon de mesme que les Polonois. Lors que les Lithuaniens ont guerre contre quelque vn, ils y vont plustost avec grand appareil, que bien en point pour combattre. Aussi leurs forces s'escoulent incontinent, & s'ils sont contrains de poursuiure, ils renuoyent soudain ce qu'ils ont de plus precieux & de plus cher, soit cheuaux ou

ou bagages, en leurs maisons, & suivent le General plus par force, que de desir qu'ils ayent de le servir, & de combattre. Cecy se void en ce que les grands, qui sont obligez de servir le Roy avec quelque nombre de gens, rachetent ceste servitude & subiection avec grande somme d'argent, & cecy est tellement ordinaire entr'eux, & leur retourne à si peu de honte, que les Chets & Colonels font crier à son de trompe parmy les armées, que s'il y en a quelques vns qui se vueillent retirer, ils le pourront faire en apportant de l'argent, & qu'on leur donnera leur congé. Ils sont si licentieusement dispensez de tout faire, que ceste liberté si debordée les fait abuser de la condition en laquelle ils vivent.

Ils portent les habillemens longs à la façon des Tartares, mais ils ont la lance & l'escu comme les Hongres. Ils ont de bons chevaux, mais ils sont tous chastrez, & jamais ils ne les fèrent. Ils les conduisent à leur fantaisie avec vn simple canon, sans vser d'aucun mords qui soit faicheux, ou rude.

Le peuple y est miserable, & tenu en grande captivité, d'autant que les grands qui vont par le pays accompagnés d'un bon nombre d'estaniers, entrent dans les maisons des paysans, & y ravissent ce que bon leur semble, & mesme les battent bien souvent à outrance. Il n'y est loisible à vn fermier de venir avec les mains vuides devant son maistre; & quant aux autres, outre le cens & la rente, ils sont obligez de donner toutes les semaines trois ou quatre couruees. Que si la femme de leur Curé est morte, ou s'il se marie, ou quelque enfant luy soit né, ils sont contrains de luy bailler certaine somme d'argent, sur ceste consideration seulement, qu'il les oyt de confession durant toute l'année. Si quelqu'un a commis vn crime digne de mort, il faut qu'il se pendre luy-mesme, si tost que le commandement luy en est fait de par le Prince, autrement il est battu, tourmenté, & deschiré cruellement, avant qu'on le face mourir.

Les Liuoniens sont fort addonnez à la gourmandise & à l'yurongnerie, & ceste dissolution & desbauche se pratique plus aux maisons des grands Seigneurs, qu'en tout autre lieu. Celuy qui peut porter plus de vin, & tenir plus longuement coup à manger & à boire, est le bien venu: mais finalement il est payé de goute, flux de sang, hydropisie, ou quelque autre semblable mal.

Quelques Gentilshommes vsent de liberalitez envers ces goulus & yurongnes, & ce pendant pour entretenir ceste liberalité, rançonnent les paysans: tellement que tout ce que les derniers peuvent acquerir avec beaucoup de sueur & de peine, les premiers les despencent en excez & desbordemens. Les paysans sont presque tous serfs, & quand quelqu'un ne pouvant porter la faim, ny le foyet, ou la grande tyrannie des Seigneurs, s'en va, si les Gentilshommes le peuvent attraper apres, ils luy coupent les pieds, afin qu'il ne s'en puisse plus fuir. Ces pauvres serfs sont nourris de viandes si aspres, que les porceaux ne daigneroient presque taster de ce qu'ils mangent. Ils portent des souliers faicts d'escorce, & la paire ne leur couste que trois deniers. Au lieu de chanter ils heulent comme des loups, & ont sans cesse, comme au temps passé, le mot de lehu en la bouche. Quand on leur demande ce qu'ils entendent par ce mot de lehu, ils respondent qu'ils ne scauent, mais qu'ils suivent en cela la coustume de leurs predecesseurs. Bref ces pauvres gens vivent comme des bestes, & sont traittez presque de mesme. Quand ils veulent mettre en terre quelque homme mort, ils tournent autour de luy en beuvant d'autant, & le convient à boire, espandans sa part sur luy. Et quand ils le jettent dedans la fosse, ils mettent pres de luy vne coignée, du vin, des viandes, & vn peu d'argent pour faire son voyage; & tandis qu'ils estoient tenus sujets par les Cheualiers Teutoniens, ils disoient à leur mort, va t'en en l'autre monde, où tu auras domination sur les Teutoniens, comme ils l'ont eue sur toy en ce monde. Quant aux mariages, si quelqu'un veut espouser quelque femme, il faut bien souvent qu'il la ravisse. Les habitans de Liuonie sont de diuerses nations, veu qu'il y a des Liuoniens, des Curons, & des Litiens, lesquels ont diuers langages. Toutefois aux chasteaux, & dans les villes l'on parle pour la pluspart Alemand.

On tient que les femmes de la ville de Reig en Liuonie sont braues & pompeuses, & mesprisent les autres qui viennent de quelque autre pays. Elles seroient bien marries si on ne les appelloit Dames. Elles ne s'addonnent presque à faire chose que ce soit, ains vivent continuellement en oysiveté & en delices. Au lieu de filer leurs quenottes, ou de faire quelque autre besongne de femme, elles ont des coches, ou chariots branflans, dans lesquels elles se font promener l'Hyuer, & des nasselles en Esté, pour s'aller esbattre sur l'eau.

Les Samogitiens sont de belle & grande taille, mais peu ciuils, rudes, & barbares. Ils sont audacieux, & prompts à la guerre, ont des corselets, & s'aident d'espieux semblables à ceux

dont nous vsons, mais ils sont plus courts. Leurs chevaux sont fort petits, & toutesfois ils leur donnent tant de peine, que c'est chose estrange. Ils rompent la terre pour forte qu'elle soit, non avec le fer, ains avec des focs de bois, de mesme que les Moscouites. Vn de leurs Gouverneurs qui les vouloit soulager, leur fit porter des focs de fer: mais estant advenu que durant 2. ou 3. ans la terre ne rapporta que bien peu, à cause que l'air estoit mal temperé, ce peuple lourd commença à se mutiner, & à dire que ce mal-heur procedoit de ce qu'on faisoit cultiver contre la coustume, avec le fer, qui rendoit leurs terres infertiles; tellement que le Gouverneur fut contraint, afin d'ouïr l'edition, de les laisser labourer à leur fantaisie. Et à cause que le peuple y est si grossier, le diable les estonne souvent avec des visions fort estranges.

Ils espousent plusieurs femmes, & sans aucune consideration de sang, ny de parentage; veu que le fils apres la mort de son pere espouse sa belle mere, & le frere ne fait conscience de prendre sa belle sœur à femme. Ils n'vient d'aucune monnoye, & bastissent leurs maisons fort basses, couvrans ces logettes de bouë & de chaume, & faisans le toit ainsi que les barques ou galeres, & au sommet ils font vne fenestre si grande, qu'elle donne clarté à toute la maison.

Le feu brulle tousiours dedans, tant pour apprester leur viande, qu'à cause du froid, qui y est si vehement, que presque tout le long de l'année les riuieres y demeurent glacees. Ils font l'âtre, ou le foyer, au milieu de la maison, afin que le pere de famille estant assis, puisse en se chauffant prendre garde à son mesnage & à ses troupeaux, pource que les hommes & les bestes couchent sous vn mesme couuert, sans aucune separation.

Les plus riches & puissans au lieu de vases, ou de coupes d'or, en ont qui sont faites de cornes de buffles. Ils n'vsent point d'estuues, ny de poiles, comme leurs voisins: mais ils sont naturellement enclins à la diuination, aux charmes & forcelleries, & à l'observation des augures. Ils mangent presque tous du pain fort bis, & qui ne vaut gueres. Ils ne boient le plus souvent que de l'eau, & vsent rarement de biere, & de medon. Quant à l'habillement, & au langage, ils ne different gueres des Lithuaniens.

Les Masouiens ne sont differens des Polonois quant aux mœurs & aux habits, & n'vsent de mesme langage, excepté qu'ils y adioustent encore quelques sifflemens, qui les rendent vn peu differens. Au reste ils sont courageux, & vaillans au possible. Les Volbinieus sont aussi pleins de valeur & de courage, mais ils ont mesmes mœurs & mesme langage que les Russiens.

Les Russiens Meridionaux sont forts & vaillans, & vsent en guerre de l'arc, & d'vne picque de douze pieds de long. Ils bayssent estrangelement le nom de Roy. Les Polonois ont des colonies presque en toute ceste Russie, & presque tous les Cheualiers, & les principaux du pays sont Polonois.

Les habitans du pays de Pomeran ont gardé la langue & les mœurs des Vandales iusqu'au temps qu'ils ont receu la foy Chrestienne, veu qu'ils ont appris deslors le Saxon, lequel ils parlent encore auourd'huy.

Les Prussiens, principalement les Nobles, descendent des Allemands, & retiennent beaucoup de leur naturel. Ils bastissent plus haur que les Polonois, & leurs coustumes sont de plus longue durée que celles des autres. Ils ont aussi plus d'art & d'industrie, & vne beaucoup plus grande police que les autres: pource qu'à parler à la verité, les Allemands deuantent beaucoup tous les autres peuples du Nord, soit en artifices, soit en administration, & reglement des villes.

RICHESSES.

Les richesses des Polonois consistent en la grande quantité de grains, & de bleds de toutes sortes, dont le pays abonde en telle façon, qu'il secourut l'an 1390. & 91. non seulement les pays voisins: mais encore la riuiere de Gennes, Rome, & le pays de Toscane, combien que leur voisinage fut en grande necessité de semblables viures. Ils sont aussi force argent de leur miel, & de leurs cires, de mesme que leurs lins, chanures, & de leurs bœufs, & de leurs moutons, de leurs chevaux, & de leurs buffles. Mais la principale richesse vient des Salins d'Ocen, qui furent trouuez en l'an 1252. & pareillement de ceux de Veitque. Ce sel vient en partie de quelques mines, & en partie de quelques fontaines: de maniere qu'on en tire d'vne sorte en grande quantité de la terre, & l'on y fait aussi du sel par decoction.

Ils

Ils ne tirent pas aussi peu de profit de leur azur, & de leurs mines de fer, & de cuiure, lequel ils trouuent en abondance. Quant à l'ambre qu'ils trouuent sur le riuage de la mer, ils en font de grands deniers toutes les années: & encore ils en peuuent tirer quelque peu de leurs mines de souffre.

Au reste, si l'on oste le port de Dantzic, on n'y trouuera guere autre place marchande qui soit de grande importance. Car quant à ce qu'on tire des autres ports de Prusse, & de Liouonie, il n'enrichit pas ce Royaume d'argent, & mesme ne peut presque payer les draps de soye, & de laine, qu'on y porte de Flādre, & d'Angleterre, ou bien les vins & sucres, fruiçts & espices qu'on y porte d'Espagne, & de Portugal, ou bien la maluoisie de Candie qu'on y vend soixante escus le tonneau, voire d'auantage. Mais pour dire quelque chose de Dantzic, on tient pour chose asseuree, qu'il s'y vend, ou change tous les iours plus de mille charges de froment, & seigle, outre le bois, la poix seiche & liquide, le lin, le chanvre, la biere, & vne infinité d'autres marchandises.

Pour reueir à nostre discours, les Polonnois vendent aussi grande quantité de fourrures, & de peaux de diuerses bestes, comme des Martres & Renards, qui sont fort cheres. Mais pour conclusion, le pays n'estant pour tout cela trop marchand, hors-mis le lieu de Dantzic que nous auons dit, & n'y ayant guere de trafic aux villes, n'y trop d'industrie aux habitans du pays, & d'ailleurs, les Polonnois estans de tel naturel qu'ils ayment à faire bonne chere (principalement les nobles) & despencent excessiuement en festins, & en habits, si bien qu'ils consomēt plus que leur reuenue ne porte, veu qu'ils mangēt plus d'espices qu'aucune autre nation, & que les vins & draps de soye, & mesme la plus grande partie de ceux de laine, leur viennent de dehors, il est force que le pays soit pauvre d'or, & d'argent, parce qu'un Royaume ne peut estre riche, s'il n'est tel qu'il en sorte beaucoup de marchandises, & qu'il y en entre fort peu, afin que la sortie luy apporte de l'argent, & l'entree ne luy en face pas desbourcer. Et de fait, c'est d'où vient la richesse du Royaume de Naples, & de l'Estat de Milan, dont l'un enuoye dehors grande quantité de grains, de vins, d'huile, de soye, de safran, de fruiçts, de cheuaux, & d'autres choses, par le moyen desquelles il tire de grandes sommes de deniers des estrangers: l'autre pouruoit beaucoup de pays de grains, de riz, draps, & de ferremens, & de toute sorte de marchandises, & en reçoit bien peu des autres. Que si le Royaume de Naples (on peut dire le mesme de la Sicile) auoit autant d'ouuiers, & de gens d'industrie, qu'il a de fruiçts, & de biens naturels, il ne trouueroit guere de pays qui luy peussent estre comparés.

Mais pour reuenir à la Pologne, ses reuenus ne sont si petits que quelques-uns estiment: xix car premierement les reuenus du Roy, qu'on tire principalement des mines de sel & d'argent montēt à six cēs mille escus toutes les années. Il est vray que le Roy Sigismond Auguste en engagea vne partie, & le Roy Henry vne année auparauant qu'il en partist, voulant obliger vne partie de la noblesse, en aliena pour plus de trois cens mille tolars de rente. Mais les Roys peuuent augmenter grandement le reuenue par la mort des possesseurs, appliquant à la couronne les biens qu'ils ont accoustumē d'oētroier aux particuliers. Or le Roy peut espargner la plus grande partie de ce reuenue, d'autant qu'il est deffrayē avec la Cour par la Lithuanie, & encore, aux moins en partie, de la Pologne, tandis qu'il demeure en ces Provinces. Et veritablement on n'estimera cecy peu de chose, si l'on considere que les Royaumes d'Escoffe, de Nauarre, & de Sardaigne, ne passent pas cent mille escus de rente, ny le Royaume d'Arragon, six cens mille en trois ans. Les reuenus du Roy de Pologne seroient plus grands s'il n'estoit si liberal à l'endroit de ses Palatins & Chastelains, auxquels il donne ordinairement les deux tiers, & quelquefois plus de tous les droiçts de leurs gouuernemens. Mais aux necessitez de la guerre & des entreprises d'importance, apres la deliberation des Diettes, on charge le peuple de grosses tailles, qui se paient sur les terres, ou sur les daces de la biere, qui arrivent à telle somme, que par le moyen de cet argent le Roy Estienne soustint vne fort grande guerre contre le Duc de Moscouie, l'espace de trois années.

Quant à la noblesse, les biens sont ordinairement assez bien partagez entre les Seigneurs & les Gentils-hommes, car il n'y en a aucun qui soit de beaucoup plus riche que les autres, & les plus grands reuenus ne sont de plus de vingt-cinq mille escus. Il faut excepter de ce nombre les Ducs de Cuslande, & de Guinsberg. Mais quant à ceux-cy, quoy qu'ils recognoissent pour superieur le Roy de Pologne, duquel ils sont feudataires, toutes-foiis ils ne sont pas membres vifs du Royaume, pource qu'ils ne s'assemblent, & ne se trouuent pas aux Diettes, & n'ont aucune part en l'eslection du Roy ou bien au gouuernement

du Royaume: & ne passent comme Seigneurs du pays, ains comme estrangers, comme ils sont veritablement, pource quel'vn est de la maison de Dannemarc, à sçavoir le Duc de Curlande, & celui de Gunisberg, est de la maison de Brandebourg: car toute la Prusse fut iadis des Cheualiers Teutoniens qui auoient vn grand Maistr particulier: mais ne pouuans resister aux forces des Polonois, ils se soulmirent comme feudataires au Roy Calmir. Finalement, la grande Maistrise estant tombee entre les mains d'Albert de Brandebourg, il deuint Lutherien, & de grand Maistr Duc de Prusse.

F O R C E S.

Les forces de ce Royaume consistent en viures, argent, gens de pied & de cheual, armes & munitions de guerre. Nous auons assez parlé cy-deuant des viures & de l'argent, venons maintenans au reste. Les nobles sont obligez de seruir le Roy à leurs despens pour la defense de cet Estat. Ceux-cy se seruēt de cheual, armes, partie à la façon de nos homes d'armes, partie vn peu plus legerement, & en partie aussi à la maniere des Tartares. Ces derniers sont nommez Cosaques, le mestier desquel est de piller, saccager, & ruiner toute chose, & tous vont à la guerre magnifiquement vestus, avec des casques bordees d'or & d'argent, bigarrees d'vne infinité de couleurs, avec forces plumes, ailles d'aigle, peaux de Leopard & d'Ours, & avec beaucoup d'enseignes de diuerses façons & couleurs, & plusieurs autres ornemens propres pour les faire regarder aux leurs, ou pour les faire paroistre terribles aux ennemis. Ils ont des cheuaux de moyenne taille, mais beaucoup plus prompts, plus adroits, & plus courageux que ne sont ceux d'Alemagne. On tient que la Pologne feroit en vn besoin cent mille cheuaux, & la Lithuanie soixante & dix mille, qui reuiendroient enuiron à cent mille qui pourroient seruir. Il est vray que les cheuaux de Pologne sont beaucoup meilleurs que ceux de Lithuanie.

Ils font tel estat d'vn grand nombre de caualerie que mesprisant toutes les forces des autres, ils ne se soucient guere de faire des forteresses. Ils croient que les armées conduites par ces lieux ouuerts contre les ennemis, doiuent combattre de meilleur courage pour la patrie, pour les femmes, pour les enfans, pour la liberté, & pour tout leur bien. Ils font profession de ne tourner iamais le dos aux ennemis, quelque accident qu'il leur arriue.

Sigismond Auguste Roy de Pologne s'essaya bien souuent de faire retoudre les Diettes à la fortification de Craconie, à cause du voisinage del'Empereur: mais il ne les peut iamais induire à faire ce qu'il desiroit: tant pour ce qu'ils ne veulēt pas donner aux Roys occasiō de se rendre maistres absolus par le moyē des garnisons, qu'aussi pource qu'ils disent qu'ils ont assez de courage & de force pour deffendre le Royaume.

Ils n'ont point de gens de pied, pource que tout le peuple du Royaume est diuisé en marchans & artisans qui habitent dans les villes, & en laboureurs qui se tiennent aux champs & aux villages, avec la subiection que nous auons dit: tellement que les armes restent entre les mains des seuls Gentils-hommes qui n'ont acoustumé d'aller à pied à la guerre. Mais lors qu'ils ont eu besoin de quelque Infanterie, ils se sont seruis de celle d'Alemagne, & de Hongrie. De sorte que le Roy Estienne eut en son entreprise de Liuonie enuiron seize mille hommes de pied de ces deux nations, & plus de quarante mille cheuaux du Royaume en son armée.

Quant à la conduite de l'Artillerie & aux Castadours, ils se seruent pour cet effet des Tartares, & des payfans du Royaume. Ce Royaume est assez bien pourueu de canons & de munitions de guerre, tant pour ce que la noblesse en a beaucoup en ses Châteaux & maisons particulieres, qu'à cause que la Pologne estant si proche del'Alemagne qui produit beaucoup de metaux, & qui est force maistres pour fondre, & manier l'Artillerie, & tout ce qui appartient au mestier des armes, elle n'en peut māquer en aucune sorte, & elle en abonde d'autant plus qu'elle a moins de forteresses.

Il n'est pas qu'il n'ayt des places d'importance, & qui sont de quelque consideration, comme les forteresses de Lemberg, & de Camenez en la Russie Meridionale: le chateau de Cracouie en la basse Pologne. Polosque aux frontieres de Moscovie, & Mariembourg, avec quelques autres places qui sont en Prusse, & en Liuonie, & qui ont esté fortifiees, non par les Polonois, mais par les Cheualiers Teutoniens, qui en estoient maistres.

Ces forces de Pologne, dont nous auons fait mention, sont telles & en nombre, & en qualité, qu'il y a peu de Royaumes en l'Europe, ie ne diray pas qui les surmōtent, mais qui les egalent. Il ne manque à ces forces que la promptitude. Car il

Car il y a quatre conditions qui sont requises aux forces de quelque Estat que ce soit, à sçavoir qu'elles soient propres de cet Estat, & non empruntees ny mandiees d'ailleurs, nombreuses, vaillantes & agiles: propres pource qu'on ne se doit fier en autre ne mal aysément: nombreuses, afin que quelque inconuenient estant arriué on en aye toujours de reste, qui puisse reparer la perte, ou empescher vne plus grande: vaillante, pour ce que le nombre ne vaut rien sans la valeur, & mesme il nuit bien souuent beaucoup plus qu'il n'aide: agile, afin qu'on les puisse aysément & proprement mettre ensemble, & les pousser en besoin le requerra.

Or les Polonois manquent de la dernière de ces quatre conditions. Car l'agilité d'une milice despend principalement de deux choses, à sçavoir de l'autorité du Prince, & de la promptitude de l'argent. En Pologne le Roy ne peut résoudre, ny entreprendre vne guerre, ny imposer des tailles pour faire de l'argent sans le consentement des Diettes.

Les Diettes où il faut assembler beaucoup de gens, sont comme des machines de beaucoup de pieces, qui n'aduancent guieres qu'en vn fort long temps: & au maniemment des armes on doit tenir pour prompts, & tost prests les Princes qui se peuuent résoudre d'eux mesmes, & qui ont l'argent à commandement: autrement lors qu'il faut assembler, ou disposer les Diettes ou les Estats à la resolution de ce qu'on propose, & qu'il faut apres cela exiger & ramasser de l'argent, on met tant de temps à ces choses, qu'il en reste peu pour l'entreprise, & l'occasion eschape cependant.

D'ailleurs en Pologne les Seigneurs & Gentils-hommes font de si grandes despences allans aux Diettes, & y demeurans, qu'ils n'ont que bien peu d'argent pour se pouoir entretenir apres en vne armee.

Il se pourroit bien faire toutefois qu'on se résoudroit promptement s'il estoit question de la defense & conseruation de l'Estat, pour ce que la crainte du mal, & la consideration du danger rendroient chacun diligent. Mais ie croy qu'il y auroit beaucoup de longueur s'il falloit penser à l'entreprise de quelque conquête, pource que l'esperance du bien ne nous esmeut pas avec tant de force, que la crainte & l'apprehension du mal. Toutesfois on a veu que le Moscouite osta à Sigismod premier, l'estat de Pologne & de Simolêque, sans qu'il monstast quelque ressentiment digne d'un Roy & d'un si grand Royaume. Et le mesme Moscouite assaillit la Liuonie, qui s'estoit mise sous la protection de Sigismond, sans qu'il y trouuast aucune resistance.

Mais il faut dire que les forces de Pologne nombreuses, vaillantes, qui ne despendent de personne, auront tousiours autant d'agilité, & de promptitude que le Roy aura d'autorité, & s'y acquerra de puissance.

Nous en auons vn exemple en la personne d'Estienne Battori, au temps duquel la Pologne non seulement s'est maintenue en reputation d'estre capable de se deffendre des forces estrangeres, mais encore de faire des conquestes d'importance sur de puissans ennemis. Mais pource que nous auons parlé de l'agilité, qui est vne chose extremement importante aux forces d'un Estat, il ne sera pas hors de propos d'adiouster icy les causes de ceste agilité.

Les principales sont donc, comme nous auons ja dit, l'autorité du Prince, qui donne mouuement, & l'asleurance de l'argent prest, qui le maintient, pource que nous auons veu de puissantes armees, qui consumoient le temps inutilement à cause que le chef estoit lent, & nous auons encor des victoires importantes au possible, qui n'ont profité d'aucune chose à faute d'argent, sans lequel on ne peut faire marcher les Soldats. La qualité des soldats est aussi grandement considerable.

Car on ne peut nier que l'infanterie Allemande & Bohemienne ne manque d'agilité, qui est propre du François, de l'Italien, & de l'Espagnol, non seulement pour ce qu'ils sont plus disposés de leur personne, mais encor pour ce qu'ils se contentent de moins à la guerre. S'ils manquent de vin ils ne deffailent pour cela, & ne perdent pas courage s'ils viennent à estre sans chair, & tousiours ils supportent mieux les mes-ailes & les incommoditez de la guerre.

Dauantage la qualité des cheuaux importe de beaucoup en cecy, veu que les Flamans surpassent de beaucoup les Frisons, & les cheuaux d'Allemagne aussi bien que les Polonois, & les Hongres: les Genets d'Espagne surpassent les cheuaux Turcs, & les Barbes sont plus vistes que les autres. Quant aux coursiers de Naples il ne vont pas si vistes que les Genets, mais ils durent beaucoup plus au travail, & ont avec cela assez de vitesse.

Or l'experience a monstré que la caualerie Allemande n'est pas propre pour donner la chasse aux ennemis, ou pour les fuir, à cause qu'elle est trop pesante: au contraire si les Valaques, les Hongres les Polonois, les Turcs, & les Mores de Barbarie ont mis quelqu'un

en route, il ne leur peut échapper, & si quelqu'un les a mis en desordre il ne les peut suyure: pource que maintenant ils sont au dos de leurs ennemis, & soudain ils sont beaucoup esloignez.

Quant aux entreprises maritimes, les nauires ont fort peu d'agilité, pour ce qu'elles ne se peuuent remuer, ny tourner sans vent: les grosses galeres se remuent vn peu mieux, mais non gueres, si bien qu'il n'y a que les galeres communes qui sont bonnes à cet effect.

C'est pourquoy nous auons veu que les armées Chrestiennes qui mettent vne bonne partie de leurs forces aux nauires, ont perdu bien souuent vne bonne partie de l'Esté, qui est le temps auquel il falloit faire quelque effect, & que les armes Turquesques s'en despechoient promptement. Mais il n'y a rien qui rende les Turcs plus agiles que nous, que leur coustume de viure & se contenter de peu: pour ce que le vin, & semblables delicatesses empeschent plus nos armées que tous les viures des Turcs ensemble ne font les leurs. De sorte qu'il ne se faut estonner si lors qu'ils vont à quelque entreprise, ils sont si bien pourueus de canons, de balles, de poudre, & de toute sorte de munitions: pour ce qu'ils chargent de ces choses les chariots par terre & les galeres par mer, & non de vins ou choses semblables: & pour conclusion ils vont à la guerre pour combattre, & non pour yrongrer.

Mais pour reuenir à nostre propos, les Polonois confinent avec les Suedois qui ont quelques places en Liuonie, & avec le Marquis de Brandebourg, & l'Empereur, entant que Roy de Boheme, & il y a enuiron cent ans que les Roys de Pologne n'ont eu guerre avec ces Princes: mesme le legitime Roy de Suede, estant Roy de Pologne, il ne se peut faire la guerre à luy-mesme, & est seulement apres à demander vne partie de son Royaume, detenuë par son oncle Charles.

D'ailleurs ce Prince ayant espousé vne fille de la maison d'Austriche, il peut viure en paix du costé de l'Empereur. Et quant aux Princes d'Allemagne, les forces sont tellement contre-pesées, que les Allemans ne craignent pas que les Polonis forcent leurs villes qui sont bien fortifiées & munies de tout ce qui leur est necessaire, sçachants aussi que l'Infanterie leur manque, & les Polonois n'ont aussi peur des Allemans en campagne.

De l'autre costé les Polonois confinent avec les Moscouites, le Precop, & le Turc. Quant au Moscolite, i'en ay dict ce qu'il faut au discours de la Moscouie. Pour le regard du Precop des Tartares, de la Chersonese Taurique, il peut mettre en campagne enuiron cinquante mille cheuaux, & beaucoup plus avec l'aide des autres Tartares ses amis, comme il fit l'an 1569. lors qu'à la sollicitation du Turc, il en mit quatre-vingt mille contre les Moscouites, & quant il brulla la ville de Mosque l'an 1561. Mais cestuy-cy ne peut continuer longuement vne entreprise d'importance, & c'est plustost son faict de piller, de picorer & d'assassiner, que de faire la guerre comme il faut & de combattre: tellement qu'il est plus dommageable que dangereux.

Ses gens trauaillent grandement la Podolie, & la Volinie. On a quelquefois consulté en quelle façon on pourroit remedier à leurs courses: & l'on a proposé de fortifier quelques Isles de Borystene, que les Tartares passent pour entrer dans les Estats des Polonois, & d'y tenir quelques vaisseaux armez, & toutesfois la chose n'a pas esté executée.

Le grand Turc s'est fort approché de la Pologne en se rendant maistre de la Valachie, qui estoit iadis feudataire de la Couronne de Pologne, suyuant quelques conuentions qui s'estoient passées entre Alexandre Palatin de Valachie, & Ladislas Roy de Pologne l'annee 1403. & encor l'an 1432. entre Elie Palatin & Ladislas III. Ceste Prouince faisoit iusques à cinquante mille cheuaux, & abondoit en toute sorte de biens: mais les guerres l'ont presque renduë deserte, si bien qu'elle feroit à grand peine ving-cinq mille cheuaux. Mais i'ay assez fait voir au discours de l'Empire du Turc, les aduantages ou desauantages qu'on peut trouuer en ces deux Princes: si bien que ieremets les Lecteurs à ce que i'en ay dit en ce lieu.

GOVERNEMENT.

A Voir le gouvernement de Pologne, & le considerer soigneusement & de pres, il semble que ce soit plustost celuy d'une Republique que d'un Royaume.

Car les nobles, qui ont grande autorité aux Diettes, & aux Conseils, eslisent le Roy, & luy donnent telle autorité que bon leur semble: & la puissance de ces nobles s'agrandit, & s'augmente tous les iours: veu que pour le regard de l'eslection du Roy, ils n'ont aucune loy ny regle, ou forme de la faire, ny par escrit, ny par tradition.

On sçait seulement que l'Archeuesque de Gnesne a souueraine autorité aux interregnes (c'est luy qui denonce les Diettes, preside au Senat, & proclame le nouveau Roy) & que

que le mesme avec l'Archeuesque de Leumpurg, & leurs Suffragans qui estoient au nombre de treize, & les Palatins au nombre de vingt-huit, & les grands Chatelains qui estoient trente en nombre, avant que le Roy Estienne eust institué de nouveaux Euesques, Palatins, Chastelains en Liunie, lors qu'il la conquist, & quelque petit nombre d'autres personnes entrent en ceste election. Les Nonces terrestres y ont encor vne certaine autorité.

Ils appellent ainsi certains, qui sont comme Agens des tours, ou cercles de la noblesse, qui se tiennent, & se font par les Prouinces, comme on void en France les tours des Barons, principalement aux Prouinces qui se conduisent par Estats, & non par Esleus. Ceux-cy au temps des Dietes s'assemblent en vn lieu proche du Senat. Ils eslisent là deux Mareschaux, par le moyen desquels ils signifient leur desir au Senat: & ils ont depuis quelque temps en ça acquis tant de reputation & d'autorité, qu'ils semblent les auteurs & les chefs des publiques deliberations de Royaume, & il y en a eu quelques vns qui ont mieux aymé estre Nonces que Senateurs.

Tous ceux-cy ensemble restreignent de plus en plus la puissance de leurs Princes toutes & quantes fois qu'ils procedent à quelque nouvelle election. Mais encor que la couronne de Pologne depende de la libre election de la noblesse, on ne lit pas toutesfois qu'ils ayent jamais priué le sang royal de la succession pour transporter le Royaume en quelque autre famille, sinon vne fois, lors qu'ayant demis Ladislas (qui fut toutesfois remis apres) ils esleurent Venceslas de Boheme: mesme ils ont tousiours porté honneur & respect, aux enfans de leurs Roys, comme anciennement à Edige, qu'ils marierent au Roy Iagellon, & de nostre temps à Anne mariee au Roy Estienne.

Et l'on sçait assez aussi que Sigismond III. a obtenu la couronne de Pologne, principalement pource qu'il estoit fils de Catherine seur de Sigismond Auguste, & de la susdite Anne. Mais iacq̃ que l'autorité du Roy, comme nous auons ia dit, depende d'autrui, en ce qui est de l'election: toutesfois elle est absoluë en beaucoup de choses depuis qu'il a esté esleu. C'est luy qui fait publier les Diettes, & qui prescrit le temps & le lieu que bon luy semble.

C'est luy qui eslit les Conseillers seculiers, & qui nomme les Euesques qui demeurent apres Conseillers, sans qu'on y obserue autre formalité. Il est maistre absolu des retenus de la couronne, ou du domaine, & Seigneur absolu immediatement de ses subiects (il n'a nul droit sur ceux des nobles) & execute absolument les deliberations faites aux Diettes. Il est souverain Iuge des nobles aux causes criminelles, & a entre les mains tout le moyen de bien faire à qui bon luy semble. Finalement, il a autant de pouuoir qu'il a d'accortise, & de prudence.

Or a raison des choses que nous auons dictes, les nobles vivent en Pologne avec vne fort grande liberté. Ils font ce qu'il leur plaist, & les ordonnances du Roy (comme ils disent eux-mesmes) ne durent que trois iours, & ils se portent en son endroit comme s'ils estoient ses freres. Et de mesme que le Roy gouuerne ses subiects, qui sont tels immediatement, avec autorité absoluë, aussi ils disposent immediatement de leurs vassaux, sur lesquels chacun d'eux a vn pouuoir plus que royal, tellement qu'ils les traitent comme des esclaves.

Les Roys de Pologne pour affermir leur Empire, ont fait vne chose remarquable, veu que de mesme que les Romains augmenterent leurs forces, en communiquant la bourgeoisie de Rome, & le droit du pays Latin, aux habitans des villes & des Prouinces conquises: aussi ils ont grandement estendu, vny & affermy leur Estat, en faisant part des priuileges de la noblesse Polonoise aux Prouinces conquises, ou par force d'armes, ou par autre voye, & en esgalant leur noblesse à celle de Pologne.

Ce fut en ceste sorte que le Roy Ladislas vint la Russie & la Podolie à la Pologne: Sigismond premier la Prusse, Sigismond Auguste la Lithuanie, & Estienne la Liunie: en quoy ils se monstrent fort iudicieux & aduisez, pource que les honneurs estans pareils, & les commoditez esgales, les hommes en deuiennent plus vnis aux necessitez & aux dangers.

Les choses dignes de consideration touchant le gouuernement, sont que la diuersité des sectes qui se trouue au Royaume de Pologne produit de perpetuelles noies & inimitiez entre ces peuples, & fait qu'elles ne penetrent pas seulement aux Prouinces, aux villes & maisons, mais s'engendrent encore entre le pere & le fils, & entre le mary & la femme.

● Auantage, la discorde des dependances est grande en ce Royaume, pource que ceste couronne estant suiète à election, pousse les coeurs de plusieurs à l'esperer, & à pourchasser de s'obliger les Polonois par diuerses voyes, & principalement à l'occasion de leurs voyages, pource que la ieunesse de ce Royaume desireuse de voir les autres pays, arriue en d'autres Estats, où elle est caressée par les Princes, & ces ieunes gens estans de retour en Pologne, sont conuiez par les courtoisies receues, à se rendre partisans des Princes qui les ont obligez: &

ils ne peuvent montrer ceste partialité qu'en l'eslection du nouveau Roy, où l'un peut autant que l'autre; & par ce moyen on void naistre vne diuision de courages, qui n'apporte point de desordre durant la vie du Roy, ven que ceste nation est extremement fidele à son Prince: mais il se pourroit faire que ces differens & professions ouuertes de faueur & d'affection, les feroit secrettement entrer en defiancel'un de l'autre.

Il y a vn autre different qui est celuy des ordres du Royaume, à sçauoir de l'ordre des Senateurs, & de celuy des Cheualiers. Pour l'intelligence dequoy il faut sçauoir, qu'encor que leur principale intention soit tousiours de maintenir leur commune liberté, qui est égale en son chef de noblesse, neantmoins la necessité du gouvernement a introduit que ceux qui se trouuent dignes de quelque conduite sont plus estimez, & de plus grande puissance que les autres: & pourtant ceste dignité superieure est reduite à deux degrez, sçauoir au Palatinat, & à la Chastelenie, pource que les Roys du temps passé introduisirent peu à peu d'appeller ces hommes de grande dignité aux consultations publiques, combien qu'ils eussent pouuoir de faire toutes choses sans eux, de disposer, de recompenser, & de punir de leur propre mouuement.

Depuis on ordonna que ces dignitez feroient vn corps de Senat, sans lequel le Roy ne pourroit consulter, ny deliberer des choses publiques. Le reste de la noblesse est presque en nombre infiny à cause de la grandeur de ce Royaume, & afin que chacun des nobles, lors que l'occasion requiert qu'on face des ordonnances publiques, y puisse interposer son autorité & son consentement, ou au contraire, chaque Palatin à la requisition du Roy doit appeller toute la noblesse de son Palatinat en vne ville particuliere, & ayant exposé les choses qui se doiuent traicter, & leur volonté estant arrestee suiuant le desir des plus signalez, ils eslisent 4. ou 6. de leur corps, qui se nomment Nonces, ou Messagers terrestres, qui se trouuent avec les autres deputez des autres Prouinces au lieu ordonné par le Roy, où les Estats generaux se doiuent tenir, & ces deputez vnis font vn corps qu'on appelle l'ordre de Cheualiers, moindre en dignité que le premier, mais égal en autorité, & partant cetui-cy est coustumier de contredire à l'approbation de l'ordre des Senateurs.

La cause de ceste discorde naist, de ce que l'ordre des Senateurs a pour but de complaire à la volonté du Roy, à laquelle ils s'accordent tousiours, comme ceux qui sont recompensez du Roy mesme: & l'ordre des Cheualiers, a pour but le bien public, & ceux-cy croient que s'ils ne resistent, ils ne peuvent maintenir leur liberté, & empescher le soupçon de la tyrannie: si bien qu'ils s'opposent tant qu'il leur est possible à l'autre ordre.

L'autre discorde est celle des familles nobles, entre lesquelles il reste peu d'intelligence, & au cas qu'on vint à l'eslection de quelqu'un de ces maisons, lors que l'interregne arriue, il pourroit naistre de grandes fautes, selon qu'ils auroient plus ou moins de puissance.

La derniere discorde est celle des Prouinces, comme la Lithuanie, Russie, & Liuania, d'autant que les Gentils-hommes de ces Prouinces endurent peu volontiers, leurs pays estans plus grands d'estre gouvernez, & suiets des Polonois.

Mais il y auroit bon moyen de remedier à toutes ces choses, suiuant l'exemple du Roy Estienne, qui s'essayoit aux Estats generaux d'accorder les points de la Religion, & d'establir vne forme aux futures elections, afin que les partis des nobles demeurassent vains, & qu'on empeschast par ce moyen plusieurs desordres qui pourroient naistre de ces discordes, & affections diuerses.

Quant aux differens des ordres des Senateurs, & des Cheualiers, il taschoit de les estindre le mieux qui luy estoit possible. Il appaisoit les dissensions des nobles, se montrant semblable à tous, & les appellant également aux dignitez du Senat, en distribuant pour recompense les reuenus publics, estant seuer aux remuans & seditieux, & finalement en se rendant protecteur des bons & paisibles, & de quelque condition qu'ils fussent.

Pour le regard des differens des Prouinces, il faudroit faire comme luy, qui les esteignoit avec beaucoup d'art, principalement ayant esleu pour sa demeure la ville de Grodme assise aux frontieres de la Lithuanie & de Pologne, à cause dequoy il sembloit qu'il fit également part de sa faueur & de sa grace, aux vns & aux autres, & pour conclusion il taschoit de contenter toutes les parties.

Maintenant pour particulariser & specifier mieux les choses qui concernent le gouvernement de ce Royaume, il faut sçauoir qu'il y a deux membres qui composent son Estat Politique.

34- Le premier est celuy des Princes Ecclesiastiques, c'est à sçauoir, de deux Archeuesques, dont le premier est celuy de Gnesne, Primat du Royaume, & Legat nay du Pape en toute la Sarmace, qui a l'autorité de couronner les Roys: l'autre est celuy de Leumpurg en la Russie meridionale. Ce membre est encor composé de plusieurs Euesques qui sont presque tous

tous grâds Princes, cōme celuy de Krackovv en la basse Pologne, celuy de Posnan en la haute: celuy de Ploco en Massouie, celuy de Chelme en Volhinie, celuy de Presmil en Russie, celuy de Camenes en Podolie, celuy de Kiouie, & plusieurs autres.

L'autre membre est des nobles lays qui sont les Palatins, Chastelains, grands Mareschaux, Chanceliers, Vis-Chanceliers, Colonels, Capitaines, & autres. Mais apres les Princes Ecclesiastiques, le Chastelain de Cracouie tient le premier lieu pres du Roy, & est suiuy des Palatins de Cracouie, & de Vilne. Parmy les Palatins il y a quelques principaux Chastelains meslez: & apres, les autres Chastelains grands & petits occupent les places.

Les Palatins de tout le Royaume de Pologne sont ceux de Cracouie, de Sandomir, de Lublin en la basse Pologne, de Posnan, du Calis, de Sirard, de Lanecie, d'Vladislaue, de Brest, de Rau, de Ploc en la haute Pologne; le Palatin general de Massouie: celuy de Drohic general de Russie, celuy de Belzen Palatin general de Podolie: celuy de Volhinie en Lithuanie, celuy de Vilne, celuy de Troc, celuy de Minsce, celuy de Kiouie, celuy de Mischislaue, celuy de Vitebscie, & celuy de Poloie.

Dauantage, ceux de Culme, de Mariembourg, & de Pomeranie. Il y a enuiron en tout le Royaume 60. Chastelains, & deux Archimareschaux en Pologne, & autant en Lithuanie. Il y a pareil nombre de Mareschaux en l'une & l'autre de ces deux Prouinces, & les vns & les autres ont diuers noms: car on appelle les vns terrestres, les autres de cour. Il y a pareillement deux Chanceliers, & autant de Vis-Chanceliers, qui ont deux seaux, & vont apres les Mareschaux.

Il y a deux generaux d'armee, dont l'un est en Pologne, & l'autre en Lithuanie. Il y a pareillement 40. Capitaines generaux en la basse Pologne, 30. en la haute & 12. en Massouie, qui sont au choix du Roy.

RELIGION.

AV commencement del'heresie des Hussites, ceste peste commença à s'espandre par les pays suiets à la couronne de Pologne: mais le Roy Ladislas assisté des Seigneurs & des Euesques du Royaume, s'y opposa de toute la puissance: car ce Roy refusa la couronne que ceux de Boheme luy offroient, & par ce moyen empecha que ceste heresie ne passa de Boheme en Pologne, & l'on ordonna en vne Diette generale du Royaume, que quiconque receuroit, ou fauoriseroit l'heresie en quelque sorte que ce fust, fut puny sans exceptiō. Mais pource qu'au commencement que Luther sema son heresie, les ieunes gens alloient estudier à Lipse, & à Vvitemberg, en partie pour apprendre la langue Allemande avec les lettres, en partie par curiosité, ils retournoient en leurs maisons ou heretiques tout à fait, ou moins affectionnez Catholiques.

Si bien que Sigismond qui regnoit lors, deffendit aux ieunes gens d'aller estudier en ces lieux. Ceste deffense arresta quelque peu le cours de ce mal: mais non pas du tout, pource qu'en partie à cause de la liberté des Gentils-hommes Polonois, en partie à cause du voisinage des pays infectés d'heresie, & pareillement par le moyen du commerce de la mer Baltique l'heresie prit pied en ce Royaume, & mesme quelques vns y renouvelerent les opinions d'Arrius & d'Ebion.

Les premiers qui receurent la doctrine de Luther, & de quelques autres heretiques, furent ceux de Prusse, pource que les marchands y porterent avec leurs marchandises ce venin d'Allemagne, & l'espandirent en partie avec des liures, & apres cela les Ministres & Maistres d'escole l'aduancerent encore mieux. Tellement que l'an 1225 le peuple de Dantzic desireux de nouveauté, cemme poussé par la fureur de la secte de Luther, deposa le vieil Senat, & en crea vn nouveau de gens indignes, fit Consul vn Notaire, prophana les Eglises, & en emporta les meubles, & fit mille indignitez aux Prestres & Religieux.

Et bien que le Roy s'y estant transporté appaisast la ville en quelque sorte, toutefois la Religion Catholique y demeura tellement en desordre, que les Catholiques perdirent les Eglises, & le seruice de Dieu en fut presque du tout banny.

De sorte qu'il ne reste pour le present à Dantzic qu'un Conuent de Religieux de l'ordre de saint Dominique, qui y officient encor auourd'huy librement, & vn Monastere de Religieuses dans la ville, & vn autre dehors. Depuis quelques annees en ça on y a permis l'entrée à quelques Iesuites qui n'y ont aucun College, & y preschent seulement, & font leurs autres exercices: & ceux-cy en ont conuertiy vn assez bon nombre.

Mais pour retourner à l'histoire du progres del'erreur de Luther, & des autres sectes en Prusse, les desordres dont i'ay parlé, furent suiuis de l'apostasie d'Albert de Brandebourg, qui à la persuation de Henry, & de George ses freres, deuint Lutherien, & de grand Maistre

ler, la mort du Roy Estienne rompit ce dessein : mais ils y furent remis l'an 1591. par l'autorité du Roy Sigismond, & des Estats du Royaume.

Les lieux qui sont possédez par les Rois de Suede & de Dannemarc, ont seulement retenu quelque foible estincelle de la foy, & demeurent priuez de tout secours spirituel.

Quant aux lieux où les Polonois se sont habitez, l'on a tasché de reduire leurs habitans à la voye de salut, & l'on y travaille tousiours. Il y a pour cet effect vn College de Iesuites à Derpt, ville presque esgale au Rig, & aux frontieres de la Moscouie. Et pour conclure le discours de ce pays, le Roy Sigismond fit vn Edict l'an 1589. par laquelle il deffendit aux Ministres Lutheriens de precher en Liuonie.

Mais pour le regard de la Pologne, l'heresie de Luther y estant desia espandue, quelques Ministres Caluinistes ou Zuingliens y allerent l'an 1560. & furent receus par vn certain François Lismanin Apostat : & apres auoir presché contre le Pape, les Saints, les Religieux, & la Messe, ils s'attaquerent mesme au mystere de la Trinité, & semerent en peu de iours de si meschantes doctrines, que la moins mauuaise estoit l'Arianisme. De là nasquirent en toutes les deux Polognes, haute & basse, les secrets & blasphemés des Duites, Trinitaires, Arriens, Sectateurs de Paul de Samosate.

Le Roy Sigismond Auguste qui n'auoit nuls successeurs, leur permit presque toute liberté, estant bien aysé de contenter en cela les nobles, & de leur laisser suivre la secte qui leur plairoit. Et pource que les Gentils-hommes furent abreueuez les premiers de ces doctrines, ils corrompirent aisément beaucoup de gens, partie en desobligeant les Catholiques, partie en donnant les chaires des Colleges aux heretiques, & partie en publiant de nouueaux Catechismes. Et ceux-cy eussent fait encores pis, si Sigismond ne fut mort en bref : mais ayant eu pour successeur Henry, puis Estienne Battori, le cours de ces mauuaises doctrines fut vn peu arresté. Ce dernier pourchassa pour cet effect que les Eueschez fussent mis entre les mains de personnes de bonne vie.

Il vfa de mesme soin en l'eslection des Senateurs & officiers de la Couronne : il institua des Seminaires, dressa des Colleges, & reforma l'Vniuersité de Cracouie.

L'an 1569. le Ministre Caluiniste de Cracouie se conuertit, & abiura publiquement son heresie, & le Temple de ceux de ceste secte fut bruslé par les enfans l'an 1587. & depuis encore l'an 1592. Or encor qu'en toutes les deux Polognes il y ait beaucoup d'heretiques, toutesfois il y en a plus en la basse qu'en la haute. Il y a là plusieurs Caluinistes, Ebionistes, & Anabaptistes, principalement aux enuirs de Lulin. A quatre lieues ou enuiron de ceste ville est celle de Leuatonie, où les heretiques enuoyent leurs enfans aux estudes.

Quant aux Lithuaniens, ils estoient iadis subiects aux Moscouites : mais Barry grand Cam de Tartarie, ayant presque atterré les Russiens, ceux de Lithuanie, dont Erdizuil estoit lors Prince, vindrent à se soustraire de leur domination. Depuis Mindoch grand Duc de Lithuanie se fit Chrestien, & fut honoré du tiltre de Roy par le Pape Innocent III. mais il retourna bien tost à l'Idolatrie.

Finalelement l'an 1386. & le 14. iour de Feurier, Jagellon grand Duc de Lithuanie receut la foy Chrestienne, & fut baptisé, & ayant espousé l'Infante de Pologne, fit baptiser aussi ses subiects de Lithuanie.

Mais à cause du peu de soin qu'on a eu de les instruire depuis de la grandeur du pays, de la melange des Russiens (qui outre l'heresie, & le schisme ont encore mille estranges superstitions) & à raison aussi du destourbier de l'heresie de Luther & d'autres sectes de ce temps, les habitans n'ont pas esté bien confirmez en la vraye foy : car en Lithuanie, & en Samogitie, qui est vne de ses dépendances, l'on descouure en beaucoup de lieux plusieurs restes d'idolatrie.

En quelques lieux ils adorent vn Dieu domestique qu'ils nomment Dinstipan, c'est à dire, Seigneur de la fumee, ou de la cheminee, & luy offrent vne paire de poulets, & font de grands festins à son honneur. A quatre milles loing de Vilne, en vn village du Roy, nommé Lauanaschi, on adore encores auourd'huy les serpents.

Les Samogitiens nourrissent encore en beaucoup d'endroits certains serpens noirs qui ont quatre pieds, & les regardent sortir chez eux, & y retourner, avec grande superstition, & s'il leur aduint quelque inconuenient, ils estiment que le peu d'honneur qu'ils portent à ces serpens, en est cause.

Les mesmes portent grand honneur au feu, au foudre, aux bois, au Soleil, à la Lune, & aux arbres qui sont fort hauts, ou qui sont remarquables pour leur vieillesse. En plusieurs endroits de Lithuanie, ils sacrifient des truyes grasses à la Deesse

Tellus ou Terre, & diuers animaux au Dieu Ziemienny. Il y a aussi quelques Mahometans, depuis que Vitold Prince de Lithuanie emmena l'an 1396. vne horde de Tartare, & la logea sur la riuere de Vache, à deux milles loing de Vilne, & leur permit de viure à la Mahometane & il y en a encores en quelques autres lieux.

Les Zuingliens dresserent il y a beaucoup d'annees, vn College à Vilne, avec grands frais, & y corrompirent presque toute la ieunesse de Lithuanie: mais il est auourd'huy presque desert par le moyen des Iesuites, aux escholes desquels à cause de la reputation de leur doctrine, les heretiques mesmes, & les Schismatiques mandent leurs enfans, & tous les iours il s'y conuertit beaucoup de personnes signalees. L'autorité & le zele incroyable de la maison de Radiuil, ayde grandement en Lithuanie à la conuersion des heretiques, & à l'edification des Catholiques.

Pour le regard des Russiens Meridionaux, les nobles suiuent la pluspart l'Eglise Romaine (combien qu'il y en a quelques-vns d'entr'eux qui sont heretiques) & le peuple recognoit l'autorité du Patriarche de Constantinople, & suit les erreurs des Grecs. A present en toute la Russie, y comprenant aussi la Lithuanie, on ne compte que cinq Eueschez Romains, ou Latins, à sçauoir Vilne, Samogitie, Kiouie, Ianovv, & Luceorie, avec l'Archeuesché de Leumpurg.

Mais les Russiens ont deux Archeueschez, à sçauoir, celuy de Vilne, & celuy de Leumpurg (ceste-cy porte encore le tiltre de Metropolitaine) & six Eueschez, à sçauoir, de Plosque, de Velodemire, de Luceorie, de Pinsce, de Kiouie, & de Presmil: Il y a encore à Leumpurg vn Archeuesque ou Patriarche des Armeniens, à cause que ce peuple trafique en grand nombre en la susdite ville, & à Camenis, & aux environs.

Volhinie, qui est comprise sous la Russie (de mesme que la Podolie) est la demeure du Duc d'Ostrogoye, qui a sous luy plus de quatre mille feudataires. Cestui-cy est chef de ceux qui viuent à la Grecque.

Somme les Prouinces subiectes à la Couronne de Pologne, qui sont proches de la mer Baltique, participent grandement aux heresies d'Allemagne; & celles-cy sont la Prusse, & la Liuonie. Celles qui confinent avec la Silesie, la Morauie, & la Hongrie, sont tachées des heresies de leurs voisins: mais celles qui s'aduancent vers le Midy & le Leuant, suiuent pour la pluspart les erreurs des Grecs, & ne sont pas exemptes des heresies de ce temps.

Mais afin qu'on recognoisse & puisse iuger le nombre des Schismatiques, i'en donneray icy deux exemples. Luceorie ville de Volhinie, contient environ mille feux: il y en a cent & sept de Catholiques, & les autres sont de Russiens Grecs, & quelques-vns d'Armeniens.

En la ville de Paloce, que le Roy Estienne gagna sur les Moscouites; les Grecs ont sept Eglises, & les Latins vne, qui est mesme demeuree sans Prestres l'espace de plusieurs anneés. Il y en a plusieurs en la basse Pologne qui suiuent les heresies modernes, neantmoins le nombre des Catholiques y est beaucoup plus grand que celuy des heretiques. Quant à la haute Pologne, elle est beaucoup moins infectée d'heresies, ce qui est entre autres choses pourueu du soin des Archeuesques de Gnesne, à la iurisdiction desquels elle appartient presque toute. On trouue encores peu d'heretiques à Plosque, de mesme qu'à Vladillaue: mais il n'y a pays qui en soit plus exempt que la Massouie, où l'on ne sçauroit presque trouuer vn heretique public.

GENEALOGIE DES DVCS ET ROYS DE POLOGNE.

26. **L**ech fut le premier qui eut commandement sur les Polonois: mais les histoires de Pologne ne disent pas en quel temps il obtint ceste principauté.

Après sa mort, ses enfans, & les enfans de ses enfans dominerent selon l'aînesse: leurs faits, & les temps de leur domination ne sont point marquez dans les histoires.

Après que la race de Lech fut toute esteinte, les Princes & grands Seigneurs delibererent au commencement de choisir & d'establir sur eux quelque Prince: mais en fin tous furent d'aduis de viure en liberté, si bien qu'ils esleurent douze Vvoye vuodes, ou Palatins seulement pour administrer la iustice à vn chacun, & pour gouverner les charges publiques.

Long temps après les Polonois s'ennuyans du gouvernement des Palatins, d'autant qu'ils cherchoient plustost leur profit particulier, que le bien commun, voulurent auoir vn Prince pour les gouverner, & esleurent Cracus, qui demouroit au pied des montagnes Sarmatiques, pres de la riuere de Vistule. Ce fut luy qui fit bastir Cracouie.

Il laissa pour son successeur Cracus son fils aîné. On tient que cecy estoit 400. avant la Natiuite de nostre Seigneur. Ce Cracus fils aîné du premier, ayant pris possession de la Pologne, fut tué par son frere, qui se rendit par cét homicide odieux, & detestable à tous: & apres se voyant ainsi hay, mourut de tristesse.

Lors les habitans de Cracovie receurent Vande leur sœur pour leur Princesse. On dit qu'elle s'immola aux dieux pour vne grande victoire qu'elle obtint contre les Teutons, & se ietta du haut du pont en la riuere de Vistule.

Après que la posterité de Cracus fut faillie, le peuple choisit encore douze hommes pour gouverner leur pays: mais ils entrerent en dissension, & cependant les ennemis entrerent par force dans la Pologne, saccagerent, & rauagerent tout, sans que les Gouverneurs leur resistassent.

Le peuple voyant cecy, esleut pour Prince souuerain vn homme vaillant, bien experimenté à la guerre, & fort aduisé, nommé Premislaus, à qui ils baillerent le nom de Lesko, à cause de sa grande finesse. Il fut le cinquiesme gouverneur apres Lech premier de ce nom.

Après sa mort on fit Duc vn ieune homme, qui fut appelé Lesko I I.

Il laissa pour successeur vn sien fils nommé Lesko I I I. qui regna fort sagement, & eut vn fils legitime nommé Popyel, & vingt bastards. Il laissa la principauté à Popiel, & bailla à chacun des autres vne Prouinte.

Les enfans de Lesko troisieme.	{	Popyel legitime.	{	Semouite.
		Boleslaus.		Semonislaus.
		Calimire.		Bogdale.
		Vladislaus.		Spitzigure.
		Eratislaus.		Spitzmere.
		Oddo.		Sbignee.
		Beruin.		Sobeslaus.
		Pribislaus.		Vissimire.
		Premislaus.		Czessimire.
		Iaxa.		Vislaus.
		Semian.		

Popyel estant installé, se fascha des montagnes de Cracovie, & transporta son siege à Gnesne, qui est en plat pays: puis celieu luy desplaist, si bien qu'il choisit vne nouuelle demeure entre des lacs, & y bastit la ville de Cruicnize, où il establit le siege de sa principauté. En fin fut mangé des rats.

Après la mort de Popyel, les Polonois esleurent pour leur Duc vn homme de village, nommé Pyast, qui faisoit du miel: il estoit homme d'assez petite stature, mais fort robuste.

Semouite fils de Pyast luy succeda, & poussa bien loing les limites du Royaume: il laissa vn fils en bas aage, nommé

Lesko, qui fut du temps de l'Empereur Arnoul, & de Michel l'Empereur de Grece.

Lemonislaus son fils luy succeda, & laissa apres la principauté à son fils.

Miesko, qui regna l'an de salut 963. Quelques vns le nomment Mietzlaus: il se fit Chretien à l'instance de Boleslaus Roy de Boheme, de qui il espousa la fille nommee Dambrovuke.

Boleslaus son fils luy succeda, & espousa en l'an de salut 985. Iudith fille de Geysa de Hongrie. Cestui-cy fut créé Roy par l'Empereur Othon, couronné l'an 1001. car auparauant tout cet Estat n'estoit qu'un Duché, & ses Princes estoient nommez Ducs, ou Gouverneurs. Il mourut l'an de grace 1014.

Mietko, ou Mietzlaus son fils succeda: il ne faisoit rien que par le conseil de sa femme, & estoit du tout addonné à toute sorte de plaisirs, pour ceste cause les peuples que son pere auoit subiuguez, se retirerent de son obeyssance, comme les Bohemiens & les Morauiens: toutesfois il retint en sa suiection les Russiens qui se vouloient aussi reuolter.

Cazimir son fils apres s'estre rendu Moine à Clugny, fut fait Roy, quitta le Cloistre par la permission du Pape, à la charge que chaque chef de maison du Royaume de Pologne (excepté les Gentils-hommes) payeroit vn denier de rente toutes les annees aux successeurs de saint Pierre. Il fut couronné à Gnesne l'an de grace mil quarante & vn, & mourut l'an mil cinquante & huit.

Boleslaus son fils aîné fut couronné Roy la mesme année 1058. Cestuy-cy s'addonna à toutes dissolutions, & en estant repris par Stanislaus Euesque de Cracouie, qui l'excommunia le voyant endurcy en son péché; il le tua d'un coup d'espee. Le Pape l'ayant sceu, osta la couronne au Roy de Pologne, & rendit tous les suiets absous de l'obeyssance du Roy, qui deuint bien tost apres enragé en Hongrie où il s'estoit retiré, & mourut.

Vladislaus son frere luy succeda l'an de grace 1082. mais il ne fut point couronné, combien qu'il se fit appeller Roy, pource que les Euesques craignoient de desobeyra au Pape. Finalement, se sentant accablé de vieillesse, il diuisa le Royaume à ses deux fils: il donna la meilleure part au legitime, nommé Boleslaus, & à Sbignee son bastard la Massouie, la haute Pologne, Pomeran, & Prusse: il mourut l'an de salut 1102.

Le Royaume de Pologne estant ainsi diuisé, Sbignee meut la guerre à son frere Boleslaus, qui n'eut pas grand peine à le vaincre, & rengea sous son obeyssance tout ce que Sbignee possedoit: de sorte que ce miserable fut contraint de se ietter aux pieds de son frere, & obtint de luy qu'il demeureroit Duc de Massouie. Finalement, pource que son frere l'importunoit tousiours, & luy estoit rebelle, il le fit tuer. Apres plusieurs beaux faits, ayant perdu vne bataille, il mourut, à ce qu'on dit, de tristesse, l'an 1139.

Vladislaus son fils aîné, qui auoit eu pour sa part les terres de Cracouie, Stradie, Lancicie, Slesie, Pomeran, & la souueraineté du Royaume, fut esleu Prince souuerain selon son Testament: mais n'estant pas content de sa portion, luy osta la huietiemesme partie du Royaume, il manda à tous de se retirer de l'obeyssance de ses freres, & leua gens contr'eux: mais ils entrerent en Cracouie, & gagnerent le Chasteau, & le contraignirent de sortir hors de Pologne, & de s'enfuyr en Allemagne vers Conrad Roy des Romains.

Boleslaus le Crespe son frere par le consentement de ses freres, & des grands Seigneurs du pays, fut fait souuerain Seigneur du pays, apres la fuite de Vladislaus, l'an de grace 1106. Il mourut l'an 1173. & fit Testament au profit de son fils unique Lesko.

Mietzlaus oncle de Lesko, & frere de Casimir, fut esleu pour souuerain Duc de la haute Pologne, & Duc de Pomeran, & on luy adiousta encore Cracouie, avec toute la Prouince: mais d'autant qu'il deuint tyran, on mit en son lieu Casimire son plus ieune frere, qui mourut soudainement l'an 1192. apres auoir prins certain breu-uage.

Lesko fils aîné de Casimire, surnommé le Blond, luy succeda. Mietzlaus marry de cela fist tant enuers Helene mere de Lesko, qu'estant desia fort ancien il r'entra en possession de la Monarchie, & de Cracouie: mais depuis ce Mietzlaus s'en estant allé en la haute Pologne, Lesko fut derechef mis dans le Chasteau de Cracouie: toutesfois Mietzlaus fut remis en la souueraine principauté de Cracouie l'an 1202. Mais il mourut tost apres, & laissa la Seigneurie à Lesko, & mourut l'an 1227.

Boleslaus le Chaste succeda à son pere Lesko, & mourut l'an 1274. apres auoir regné trente-sept ans. Surquoy il faut remarquer que Conrad qui s'estoit porté comme tuteur des enfans de Lesko, gouerna depuis l'an 1227. iusques à 1243.

Henry de Barbu fut successeur de Boleslaus le Chaste.

Lesko le Noir vint apres, & mourut l'an 1289.

Boleslaus Duc de Massouie fut esleu apres luy, mais bien tost apres démis.

Henry surnommé Preu-d'homme, luy succeda, & mourut l'an de grace 1290.

Henry fils de Boleslaus, Duc de Legnits, fut son successeur, & apres sa mort ses deux Duchez furent diuisees à deux Ducs. Celle de Cracouie escheut à Premislaus, & Vladislaus Locketek eut la Duché de Sandomitie.

Ces Polonois ayans considéré apres cela, que le meilleur estoit de n'auoir qu'un Prince qui fut recogneu de tous, esleurent l'an de grace 1295. au mois de Iuin, Premislaus 2. pour leur Roy, & il fut oingt & sacré en l'Eglise de Gnesne. Il fut en fin tué par l'enuie des grands du Royaume, en l'age de 38. ans, apres auoir regné seulement sept mois, & vnze iours.

Vladislaus Locketek fils de Casimire fut apres esleu Roy: mais depuis à cause de sa dissolution, il fut démis l'an 1300. & on esleut

Venceslaus Roy de Boheme, qui fut sacré à Gnesne, & mourut l'an 1305.

Vladislaus Locketek trouua apres moyen de se faire Duc de Cracouie: mais quelques Polonois esleurent cependant pour leur Prince Henry Duc de Glagouie, & ce furent ceux de la haute Pologne, de Posnan, & de Calisie: toutesfois Locketek eust tousiours victoire contre son competeur Henry, & fut accepté pour souuerain par tous les autres Polonois.

Ce Locketek obtint du Pape la couronne Royale, qu'il prist au Têple de Cracovie l'an 1310. Il mourut l'an de grace 1333.

Casimire son fils luy succeda, & regna quarante ans.

Loys Roy de Hongrie, fils de la sœur de Casimire, fut esleu Roy de Pologne, & couronné l'an 1370. & gouverna le Royaume douze ans.

Huduigue la plus ieune des 2. filles de Loys, fut sacree Royne de Pologne, & les Polonois luy baillerent pouvoir de gouverner le Royaume, iusqu'à ce quelle eust espousé quelque Prince. En fin Jagello grand Duc de Lithuanie, encores idolatre, l'espousa, à la charge de se rendre Chrestien, & d'vnr la Duché de Lithuanie à la couronne de Pologne.

Jagello grand Duc de Lithuanie, fut Roy de Pologne par le moyen de son mariage avec Huduigue, l'an mil trois cens huitante six, & à son baptême il fut nommé Vladislaus: il mourut l'an de grace mil quatre cens trente quatre.

Vladislaus son fils luy succeda, & regna dix ans; & mourut l'an vingt & vn de son aage.

Casimire son frere, grand Duc de Lithuanie, fut appelé à la couronne de Pologne l'an 1445. & mourut l'an de grace 1492.

Jean Albert fils aîné de Casimire, luy succeda, & mourut l'an 1501.

Après la mort de Jean Albert, les Polonois esleurent Alexandre son frere, qui mourut à Vilne au voyage contre les Tartares, ayant quarante cinq ans de sa passez.

Sigismond le plus ieune de tous les enfans de Casimire, fut esleu Roy de Pologne l'an 1506. Il mourut l'an 1549.

Sigismond Auguste son fils succeda à son pere le mesme an 1549. & mourut l'an 1573.

Et Henry de Valois fut appelé à la couronne de Pologne la mesme année 1573. partit environ la my. Octobre pour y aller: mais Charles IX. Roy de France son frere, estant mort, il laissa la Pologne pour venir regner au pays de sa naissance l'an 1574.

Estienne Battory de la maison des Princes de Transylvanie luy succeda, & fit longuement la guerre aux Moscouites, & autres, avec de grands aduantages. Il mourut l'an 1587.

Sigismond fils aîné du Roy de Suede, & de la fille de l'Empereur Sigismond, & d'Anne Royne de Pologne, luy a succédé. Il debat l'héritage paternel contre son oncle le Duc Charles depuis fort long-temps, tantost avec perte, tantost avec aduantage. Ceste guerre destourne les Polonois de faire valoir leurs armes & leur courage contre le Turc, ou le Moscouite.





DISCOVRS
DE L'ESTAT DV ROY
DE DANNEMARC.

SOMMAIRE.

1.  **VELLES** Isles & pays comprend le Royaume de Dannemarc, ses bornes & parties principales, desquelles la premiere est appelée Iutie ou Iutland, ancienne habitation des Cimbres: sa limite, longueur, & largeur.
2. Des quatre grands Eueschez compris dans la Iutie, & quels gouvernements, Isles, Citez, Chasteaux sont contenus sous chaque Euesché.
3. Du rocher Skarringh'int d'enorme grandeur, & du redouble angle de Iutie, & description des Duchez de Schleser vrich, & d'Holface assises dans la Iutie Meridionale: Origine de ces deux noms, leurs villes & Chasteaux.
4. De la Scanie, Province iadis diuisee en deux Duchez: ses gouvernements, villes & Chasteaux, & de l'admirable Horloge de Londe, representant tous les mouuements des Astres & Spheres du Ciel.
5. De l'Isle Solande, sa longueur, largeur, ses villes & Chasteaux.
6. De l'Isle Fionie, ou Fyngne, diuisee en 24. gouvernements: son assiette & limites, ses principales villes, Chasteaux & Isles contenues dans son enceinte.
7. De la Noruege, & ses bornes, ses Chasteaux, gouvernements & villes.
8. De l'assiette de l'Islande diuisee en 4. parties: ses Eueschez & Monasteres.
9. De la bonté de l'air, & fertilité des Provinces de Dannemarc: de leurs bons pasturages, & puissans cheuaux. Des champs rapportants alternativement les 3. années poissons & grains. Mines d'or, argent, plomb, airain. Des pesches de Merlus.
10. Fontaine dont la fumee transforme en pierre ce qu'elle touche.
11. Les poissons veneneux & d'excessive longueur.
12. Des montagnes d'Islande couvertes de neiges, & vomissantes flammes, & feux par le pied.
13. De l'origine des Cimbres, & descente de ceste nation en Italie.
14. De la bonne complexion & disposition de corps & d'esprit des peuples de Dannemarc, leur naturel & maniere de viure & vestemens.
15. Leur richesse au trafic de bestail, grains, poissons, cheuaux, draps de Vracman, soulfre, beurre salé.
16. Des richesses du Roy de Dannemarc, & en quoy elles consistent.
17. Quel nombre de vaisseaux il peut armer.
18. Combien il y a de Gouvernements (appellez Harets) en Dannemarc. De la forme & ceremonies observees au couronnement & sacre des Roys.
19. Des cinq Ordres qui sont en tout le Dannemarc, & des principales dignitez, & offices de ce Royaume.
20. Du gouvernement & police particuliere de chaque Province.
21. Heresie de Luther, quand & par qui introduite en ce Royaume.
22. Liste des Roys qui ont regné en Dannemarc.



Le Royaume de Dannemarc comprend vn si grand espace de terre & de mer avec plusieurs Isles, c'est à sçauoir la Chersoneuse Cimbrique, maintenant Iutie, la Cithmarie, Scanie, Hallande, & toutes les Isles qui sont encloses dans le Golphe Codan entre la Iutie, & la Scanie, & ce Royaume a sous sa puissance toutes les nauigations de la Noruege, qui est maintenant vnica ceste couronne. On y met aussi la Duché d'Hollace, & l'Isle d'Islande.

Le Dannemarc est seulement joint en deux endroits à la terre ferme. Il est borné du Ponant de la mer Germanique, du Leuant de la Baltrique, du Septentrion de la Noruege & Suede, du Midy del'Hollace & du Pomeran. Or tout le pays des Danois est composé de plusieurs parties, dont les principales sont la Iutie, Fionie, Selande, & Scanie, outre les Isles proches de chacune de ces parties.

La Iutie communement Iutland, que quelques-vns veulent nommer Gothie, demeure ancienne des Cimbres, est nommée Chersoneuse Cimbrique par les Historiens & Geographes, & diuisée en Meridionale & Septentrionale. Sa borne du costé du Midy est la riuere d'Eyder, & sa longueur est d'environ 80. milles en tirant du fleue d'Elb vers le Nort. Sa plus grande largeur est de vingt milles. La Septentrionale s'estendant vers la Noruege finit pres de Scage, ville renommée entre les mariniers, à cause des bancs qui se rencontrent aupres. Ce pays a sa plus grande largeur aupres d'Alebourg, d'autant que le golphe de Limford coulant par là, & perçant toute la Iutie du costé du Ponant, & excepté vn petit espace separant la iurisdiction de Gvensulle, du reste fait presque vne Isle de toute ceste contrée, & s'estendant enfin par vn large canal, & faisant beaucoup d'Isles avec ses branches, distingue & limite beaucoup de Prouinces avec son cours. Ceste Iutie est diuisée en quatre grands Eueschez, c'est à sçauoir de Rip, d'Arrhus, d'Aalborg, & de Vvibourg.

L'Euesché de Rip comprend 30. gouuernemens, 7. citez, & dix chasteaux Royaux. La Roïne Dorothee veufue de Christierne 3. fonda vne Academie à ses despens à Koldinge. Le Diocese d'Arrhus contient 31. gouuernemens, 7. citez, & 5. chasteaux. La ville d'Arrhus est renommée à cause du port que fait le grand cap de Hellenis qui s'estend enuiron l'espace de 2. milles, depuis le Chasteau de Kahoe, par le pays de Mols, iusqu'à la haute montagne d'Eslembanergh. Ce Diocese a sous luy les Isles de Samsoe, Hielm, Zuen, Hiarnoe, Gerno, peut estre Hilgenes & plusieurs autres. L'Euesché de Vandalie, d'Aalborgon, de Burglauie comprend 13. gouuernemens, & 6. citez. Ses parties plus signalées sont Vvendysse, Handheret, Thyland, & Morloe. Vvendysse ou Venslie, c'est à dire terre & siege des Vandales, comprend 6. gouuernemens, 3. villes & vn chasteau. On void en ce pays le mont Alberg, où l'on trouue quelques marques & reste des anciens Geans. Ses Isles proches sont Grysholm, Hertzholm, Tydholm & autres.

On void en Hanheret vn rocher d'estrange grandeur nommé Skarringk. Ce pays a sous luy les Isles d'Oland & d'Oxholm, 4. gouuernemens, vne ville nommée Thystad, où Christierne 3. fonda vne Academie, & le Chasteau Orunne. Il a sous luy des Isles d'Hansholm, Ostholm, Iegen, Ciflan, Egholm, Bodum, & Morsee, trois gouuernemens, vne cite nommée Nicapie, & le Chasteau de Lundstod, qui a aupres vne Isle nommée Ageroe. Le Diocese de Vvibourg embrasse 16. gouuernemens, trois citez, & autant de chasteaux; Pres de la presqu'Isle de Vvenslie, où elle finit en pointe, on void l'Angle de la Iutie qui est si redoutable à ceux qui voyagent sur la mer. Tout le riuage Occidental de la Iutie est tel, que ceux qui veulent aller par mer en Nouerge, ou en Leuant, sont contrains d'esuiter & de fuyr ceste coste par vn long destour.

La Iutie Meridionale dite Nordalbinge comprend les deux Duchez de Schleszvvick & d'Hollace. La Duché de Schleszvvick tire son nom de sa ville capitale. Ce pays se nommoit iadis la Duché de Iutie, que Vvaldemar petit nepueu d'Abel Roy de Dannemarc receut le premier en fief du Roy Henry enuiron l'an de grace 1280. Or le general gouuernement de ces Duchez appartient au Roy de Dannemarc & à Adolphe Duc d'Hollace, alternativement, & l'vn apres l'autre. Crantzius nomme la ville de Schleszvvick Heidebui en Heideba, disant qu'une Roïne de Dannemarc nommée Hethe luy donna ce nom. Ceste ville est fort commode pour le trafic, à cause d'un bon port qu'elle a. On void assez pres de ce lieu le fort ou Chasteau de Cotorpe, où il y a vne doane qui est si bonne qu'on a veu telle année 50000. boeufs de Dannemarc qu'on menoit en Allemagne qui y ont payé le peage. On void enco-

re en ceste Duché la ville de Flemsbourg assise entre de fort hautes montagnes & sur le bord de la mer Orientale, sur laquelle son port s'estend, qui est si commode, si profond, & si assuré, que presque tous les habitans peuvent de leurs maisons charger & descharger les vaisseaux de marchandise. On trouve encore en ce pays les places d'Hussene, & de Haderslebie. Les Princes, Seigneurs & Gentil-hommes y ont force maisons & Châteaux.

L'Holface qui tire ce nom de l'abondance du bois qui y est, qui s'appelle Holt en Allemand, a pour les bornes du Levant la rivière de Bilen, du Couchant la Store, du Midy l'Elb, & du Nort l'Eidere. Elle est divisée en 4. parties, c'est à sçavoir en Dithmarsie, Kolface, Stormarie, & Vvagræ. Les principales villes d'Holface sont Segeberg qui est en Vvagræ à 4. milles de Kubec : Itzoboa belle d'assiette : Store qui est entourée d'une belle rivière navigable : Chilonie, vulgairement Kile, qui a un bon port où les marchands viennent se rendre d'Allemagne, de Liuonie, de Dannemarc, & de Suede. On voit encore les places de Crempe & de Remholtsbourg, & encore en Dithmarsie Heininkste & Tellinckste, & en Stormarie Hambourg sur l'Elb.

La Scanie est une fort grande Prouince du Royaume de Dannemarc jointe à la Suede. Quelques-uns la nomment Scandinavie, au lieu de Scandanie, c'est à dire plaisante Danie, ou plaisant pays de Dannemarc : les autres l'appellent Scanie, les autres Sconingie, & vulgairement Sconen. Ceste Scanie est entourée de mer de toutes parts, excepté d'un costé où il y a un bras de terre qui s'estend vers le Nort, & de là se recourbe vers le Levant où il se joint à la Suede, mais il y a entre deux de grandes forests & d'aspres rochers, par lesquels on va si malaisément de Scanie en Gothie, partie de Suede, qu'on a beaucoup moins de peine à y aller par mer. Ceste Prouince a esté jadis divisée en deux Duchez : c'est à sçavoir en celles d'Hallande & de Blekinge, maintenant elle contient 23. gouvernemens & 15. citez. Sa ville capitale est Londe, demeure de l'Archevesque du Royaume. Il y a aussi la cité de Malmogeu d'Elleboggen principale ville de tout le pays, à cause de ses foires, & du trafic qui s'y fait. On voit en Hallande le Chateau de Nvarbourg basti sur le sommet d'une fort haute montagne. Les Isles proches de la Scanie sont celles de Landoe, Hannoe, Bornholm, Isle fameuse, divisée en quatre Gouvernemens, & contenant trois citez & un chateau : Gotlande où est l'ancienne ville marchande de Vvisby, maintenant moins peuplée, & moins riche. Pres du destroit de Sunde il y a un chateau Royal nommé Cronebourg, où est la garnison de l'extrémité de la coste de l'Isle de Selande. Federic second Roy de Dannemarc fit jeter ses fondemens dans la mer avec de fort grands frais, & maintenant ce bastiment est si assuré qu'il n'y a rien qui le puisse esbranler. Il y a en la ville de Londe un horloge merueilleux, & fait avec un grand artifice où l'on voit les mouvemens du Soleil & de la Lune, & choses semblables, & toutesfois & quantes que l'heure veut sonner, on voit venir deux Chevaliers l'un contre l'autre, qui se donnent autant de coups que la grosse cloche pendue en la tour sonne d'heures. Il y a encore beaucoup d'autres singularitez en cet horloge, comme les 3. Roys ou Mages qui vont adorer Iesus-Christ entre les bras de la Vierge, lors que l'heure sonne : mais si l'on en vouloit faire la description entiere elle pourroit estre ennuyeuse.

L'Isle de Selande ou Sialande est la plus grande de toutes celles de Dannemarc, sa longueur est d'environ deux iournees, & sa largeur est presque d'autant. Elle comprend quinze citez, & douze châteaux Royaux. On compte entre ses villes Haffnie ou Copenhagen, ville capitale de tout le Dannemarc, grande & riche, & pourvue d'un port fort commode & assuré à cause du voisinage de l'Isle d'Amaggen. Au dessus d'Haffnie on voit Helsingthore, & aupres le chateau de Cronebourg dont j'ay parlé, & de l'autre costé au delà de la mer le chateau de Helsingbourg, avec une ville de mesme nom. C'est là que la Selande & la Scanie s'approchent tellement l'une de l'autre avec leurs caps, qu'elles ne laissent entre elles qu'un petit espace de mer appelé Diefund. C'est là que tous les vaisseaux qui tendent vers le Levant sont contraints de passer, & de payer le peage au Roy de Dannemarc. Et d'autant qu'il y a un chateau de chaque costé, lors que la nécessité le requiert, le Roy peut tellement boucher ce passage avec les nauires, qu'il empêchera quelque armée que ce soit de passer outre. Il aduient bien souvent qu'on y voit arriver en un iour 200. voire 300. vaisseaux de divers endroits d'Europe. On voit encore en ce pays Roeschildie, jadis Eueschié, où l'on voit encore de belles tombes de plusieurs Roys & Ducs : mais elle est maintenant pauvre & despeuplée. Or la Selande a sous elle les Isles d'Amagrie Huen, ou Vven, Moensland où est la cité de Stegoë, & plusieurs autres.

La Fionie, vulgairement Fuynen, tient le premier rang entre les Isles du Golphe Codan apres

apres la Selande. Elle tire son nom de sa beauté, veu qu'elle est extremement agreable, tant à cause de son assiette, que de ce qu'on y apperçoit : & elle est separee de Dannemarc par vn petit deltroit nommé Middelfar, qu'elle semble y estre iointe. Elle regarde la Iurie du costé du Couchant & la Selande du Levant, & l'on croit qu'elle est au milieu de tout le Royaume de Dannemarc. Elle est longue de douze mille pas, & large de quatre. Sa ville capitale est Otteriche, assise presque au milieu de l'Isle. La Fionie est diuisee en 24. gouuernemens, seize citez, & six chasteaux Royaux. Les autres citez autour d'Ottersche, qui est comme leur centre, sont presque esgalement esloignees, & tellement basties au bord de la mer, qu'elles trafiquent commodemēt non seulement en la mer Baltique, mais encore par la Suede, Noruege, Russie, Flandres & Allemagne. Entre ces villes on compte Nibourch, Scienbourg, Faborch, Assens, Bogens, Middelfar, Kertemynde. Les principaux chasteaux sont Neubourg, Hagenscovv, Hingsagal, Eschebour, & la Cour de Rugard. Il y a en cestelle beaucoup de villages, & de maisons de Gentils-hommes. On void en la ville d'Ottersche deux belles Eglises, l'une dediee à Saint Canut, l'autre à Saint François.

Les Isles comprises sous la Fionie sont au nombre de 90. assises du costé du Midy, & pour la pluspart habitables. Les principales sont Langeland, la Vylande, Falstrie, Alse, Tosinge, Aroc. Celle de Langeland a de longueur 7. lieues d'Allemagne. On y void la ville de Runkepinge, & le chasteau royal de Tranekere, & plusieurs villages, parroisses, & maisons de Gentils-hommes. Falstria a de longueur environ 4. lieues d'Allemagne, & contiēt les villes de Stube-copen, & Nicopen. Arie esloignee d'Elysie demy lieue, a 3. parroisses, & quelques maisons de Gentilshommes, avec la ville & le chasteau de Kopimg. Elle appartient avec l'Elysie à la Duché de Slesuic, Elysie ou Alse, ou Alsen, ayant 2. lieues, & 4. de longueur, n'estant gueres esloignee de la Duché de Slesuic, regardāt le Golphe de Flembourg, est separee des premieres terres des Anglois par le mesme Golphe. Il y a en l'Isle d'Alsen la ville de Lundebourg, avec vn chasteau de mesme nom, puis Norboch, Osterholm, Die Holle, & Gammelard. Elle a 13. Parroisses fort peuplees qui peuuent fournir promptement vn bon nombre de gens de guerre.

Tassinge, ou Tossinge, Isle principale entre plusieurs autres, apres Svinebourg ville de Fionie, a vne lieue de longueur. De ceste Isle de la ville d'Assens il y a 2. lieues iusques en Iurie : & de Nibourg en Selande quatre lieues par la mer Baltique, qui est souuent fort dangereuse.

Aroë assise à l'entrée de la Duché de Slesuic, où l'on passe en Fionie par le Golphe d'Arse à la ville d'Assens, contient quatre villages peuplez. On compte encore pres de là les Isles de Romso, Esdelo, Ebelo, Bokobrande, Zoroe, Aggernis, Hellenis, Iordo, Birkolm, & autres. On voit encore en l'Isle d'Huene, où l'on voit le chasteau d'Vranibourg, plein d'instrumens de Mathematique, fort admirables, & fort assurez. Il y a aussi l'Isle de Malmogie petite, mais bonne, où l'on voyoit autrefois les chasteaux de Synderbourg, de Nordbbourg, Karhecidie, & Hamere : mais on n'en voit aujourdhuy que les fondemens, & les ruines.

La Noruege, qui obeyt au Roy de Dannemarc, a pour ses bornes du costé du Midy le Dannemarc, du Ponant la mer Oceane, du Levant la Suede, & du costé du Nord les Laponiēs, 7. desquels elle est separee par de fort hautes montagnes tousiours conuertes de neige. La Noruege fut iadis vn Royaume florissant, dōt la puissance s'estēdoit bien loing : mais il est aujourdhuy sous la domination des Danois. On y compte 5. chasteaux Royaux, & sept principaux gouuernemens, dōt le premier du costé du midy est Bahus. Les villes qui luy sōt sujetes sōnt Marstrād assise en vne Presqu'Isle, puis Koēgees, Cōgel, & Oddevvold ou Odvvald : le 2. chasteau est Aggerguse, qui a sous luy les villes d'Ansloye, siege Episcopal, puis Tonsberg, ou Koningisberg, Fridrichstad, Saltzbourg, & Schin, ou Schon, & la grande & petite Hammarie.

Le troisieme chasteau est Bergenguse, sous lequel sont les Citez de Berg, & de Staffanger. Berg, ou Bergue, est la ville la plus marchande, & le grenier de toute la Noruege, & demeure du Gouverneur, & de l'Euesque. Il y a aussi vn port du tout commode, & assuré.

Le quatrieme chasteau est celui de Nidrosie, vulgairement Truntheim, & iadis Trondon, iadis place Metropolitaine de toute la Noruege, maintenant reduite en forme de bourg.

Le 5. chasteau de Vvardhus, qui n'est nullement fortifié, & est seulement ordonné pour la demeure du Gouverneur de ce pays en Esté.

L'Islande que quelques-vns prennent pour Tule, & qui sont combatus en cela par Saxon 8.

Grammairien, Crantzius, Milius, Ioue, & Peucer, est assise, non sous le premier Meridien, comme quelqu'un l'a marquée : mais à huit degrés au delà. Sa longueur est de cent lieues d'Allemagne, & même il y en a qui en adjousterent encore quarante-quatre. Sa largeur est de 65. lieues d'Allemagne. Elle est sujette aux Roys de Dannemarck, depuis l'an de grace 1260. & est divisée en quatre parties. On nomme la partie Orientale Aufslendingafjordung, l'Occidentale Vvestfjordung, la Septentrionale Nortlendingafjordung, & la Meridionale Suydlendingafjordung. Ils n'ont point de villes, & ont en leur lieu des montagnes. Ceste Isle a deux Eueschez, c'est à sçavoir Holm, qui a sous soy les Monasteres de Pingore, Remedsted, Modur, & Munkeniere, & celle de Scalholt, qui a sous soy les Monasteres de Videy, Pirnebar, Kirkebat, & Sckirde.

Q U A L I T É.

LA Iurie Septentrionale produit grande quantité de froment, de seigle & orge, & choses semblables. Elle abonde aussi en pasturages en quelques endroits, & nourrit tant de bœufs, & de vaches, qu'on en meine un nombre incroyable aux Prouinces estrangeres, principalement en Allemagne, où il en passe tous les ans près de 150. mille. Il y naît aussi de beaux & puissans cheuaux, qu'on transporte ailleurs en grand nombre. On prend force poissons en ceste mer, & principalement des harans. Les habitans de ce pays sont fort sujets aux rheumes, catharres, squinance, & aux pleuresies.

Quant à la Meridionale, la Duché de Slesuic abonde aussi en bestail, & quant à celle d'Holsace, elle est pleine de bois & de forests. Mais on n'y trouue guere de grands & forts chesnes, ains seulement presque par tout des faux, du fruit desquels les pourceaux, qui y sont en grand nombre, s'engraissent. Les champs rapportent alternatiuement toutes les troisiemes années force poisson, & force grain. Car durant trois ans on laboure, on peine, & l'on moissonne un champ, puis durant trois ans on lasche dessus les estangs, afin que le poisson se nourrisse de l'herbe, & que les champs s'engraissent de la bourbe que l'eau emmeine. Il n'y a en ce pays, ny vignes, ny oliviers : mais on y trouue grand nombre de bestes sauvages, & pareillement beaucoup de cheuaux. Il y a beaucoup de riuieres qui arrosent ce pays, dont la principale est Eidere. Il y en a encore quelques autres : mais on en doit nommer plusieurs plustost ruisseaux que riuieres. Au reste, du costé que la mer Baltique arrose l'Holsace, & la Duché de Slesuic, elle fait de beaux Golphes qui sont fort commodés pour les marchands : & en quelques endroits on pesche grande quantité de poissons, & principalement de saumons. Le pays est plein, & a bien peu de montagnes.

La Scanie ne cede à aucun pays en bon air, en bonne terre, en commodité de ports, en richesses maritimes, en pescherie de lacs, & de riuieres, en bestes sauvages, en mines d'or, d'argent, d'airain, & de plomb.

L'Isle de Gotlande abonde en froment, en beurre, fromage, & en diuerses sortes d'animaux. Il y a aussi de fort grands sapins, & de belles pierres propres à bastir. La Selande porte toute sorte de grains en abondance.

La Fionie a un bon terroir, & de grand rapport, car elle produit du bled en abondance, & principalement du seigle, & de l'orge, & cecy arriue sans qu'on le meliore avec le fumier. De sorte que Munster a écrit qu'il put fort à l'entree des villes à cause du fient du fumier qu'on y iette, sans s'en seruir à engraisser les champs. Elle nourrit aussi un nombre presque infiny de bœufs, de vaches & de cheuaux. Il y a aussi dans ceste Isle beaucoup de forest, où l'on trouue force chevreux, cerfs, lievres, & renards. La mer voisine fournit une grande quantité de poissons.

L'Isle de Lavvlande porte tant de froment, & de noisetes, que c'est chose presque incroyable : & celle de Falstrie rapporte aussi beaucoup de froment, & en pourroit ses voisins. Celle d'Alcen est pleine de forests, & l'on y trouue force cerfs, & plusieurs autres bestes, tant fauves que noires. Il y vient aussi du seigle à foison, l'on y trouue pareillement quantité de poisson de mer, & d'eau douce. Les pasturages y sont beaux, & pour ceste cause il s'y nourrit de bestail en grand nombre. La Malmogie n'est sterile, ny inutile en aucun endroit, & porte force grains, & abondance de fruits, de mesme qu'elle nourrit beaucoup de cheuaux, de daims, de lievres, conils, & perdrix. Elle est fort commode, & propre pour la pescherie. Il y a une petite forest de coudriers, dont les noisettes ne sont iamais rarees de vers, & ceste terre ne souffre point de tesson. Et combien que l'Isle soit petite, il y a toutes fois force ruisseaux, & fontaines d'eau douce, & entr'autres il y a une fontaine qui ne gele iamais,

ce

ce qui est fort rare en ces contrees.

L'air est fort doux en Noruege, & de sorte que la mer ny gele point, & la neige y est fort peu de temps. Mais la terre n'est pas des plus fertiles, & ne suffit presque pour nourrir ses habitans. Elle abonde en menu bestail, & en plusieurs bestes sauvages. On y void entre les autres des ours blancs d'une grandeur extraordinaire, & pareillement des castors. Au reste, le riuage de Noruege, qui est du costé d'Oüest, est plein de force baleines, contre la fureur desquelles les mariniers vsent de Castoreum detrempe, qui est vn remede fort pressant, pour ce que tout aussi tost qu'on l'a ietté dans la mer ces monstres se cachent au fonds de l'eau. On prend en ceste mer grande quantité de merlus qu'ils appellent Stocn Kaifch. Ils le prennent principalement au mois de lannier, pource qu'il se seiche plustost à cause du froid.

Quant à l'Islande elle est très froide, & pour la pluspart n'est nullement cultiuee, principalement du costé du Nord, à cause de la bize qui y souffle avec tant de vehemence, qu'elle n'y laisse croistre aucune chose. La terre n'est aussi propre pour recevoir la semence, & ne porte aucun froment: mais on tient qu'elle produit tant d'herbe, que si l'on n'empesche le bestail de paistre, il est en danger de mourir pour trop manger. Ionas confesse qu'il n'y a en ce pays autres bestes de travail que des chevaux & des bœufs: & les bœufs & les vaches y sont sans cornes, mais les moutons ne sont pas de mesme. Ils ont de petits chiens en grand nombre, de mesme que des faucons blancs, & des corbeaux blancs qui sont ennemis des aigleaux, & des pourceaux, & les travaillent au possible. Il y a aussi des ours, & des lievres blancs, & des aigles qui ont la queue blanche, qui sont appelez par Plin Pygarges. Il y a peu de bois par tout l'Isle, où l'on ne trouue presque que des genevriers. On y trouue vne fontaine, dont l'exhalation, & la fumee transforme en pierre tout ce qu'elle atteint. Il y en a vn autre dont l'eau tue de mesme que si l'on beuvoit du poison. Quant à la mer proche de ceste Isle, elle fournit vn nombre infiny de poissons à ses habitans. Je me rendrois ennuieux si ie voulois faire le denombrement de tous ceux qu'on y trouue: ie parleray de quelques vns. Il y a vn poisson nommé Nahual, dont la chair faict mourir aussi tost ceux qui la mangent. Il a vne dent en la partie de deuant la teste qui s'aduançe dehors de la longueur de sept coudées.

Quelques-vns l'ont vendue pour vne corne de Licorne. On croit qu'elle est contraire au venin. Ce monstre entier est de la longueur de 40. aunes. Le Roïder a de longueur 130. aunes, & n'a point de dents. Sa chair est bonne, & agreable à manger, & la graisse guerit plusieurs maux. La Baleine de Bretagne est de la longueur de 30. aunes, n'a nulles dents, & à la langue longue de 7. aunes: il y a encore vne espece de Baleine qu'on y voit rarement, qui semble plustost vne Isle qu'un poisson. Il y a encore le Stautusualur semblable en quelque sorte, à la raye; mais par maniere de dire, infiniment plus grand, qui semble vne Isle, & renuerse les nauires avec ses aïles. On y trouue encore des Seeuans, & bœufs marins, de couleur grise, & plusieurs autres.

Il y a en Islande trois montagnes fort hautes, dont les sommets sont tousiours couverts de neige, & le pied est tousiours tout en feu. La premiere s'appelle Heclé; la 2. la Croix; la troisieme Helge, c'est à dire Sainte. Il y a assez pres de celle d'Heclé des mines de souffre. Quelquesfois ceste montagne tonne à bon escient, & iette des cailloux d'estrange grandeur, vomit du souffre, remplit tous les environs de cendres, tellement qu'à vingt milles de là l'on ne peut cultiuer la terre. Ceux qui veulent rechercher la cause de cet embrasement, tombent bien souuent tous vifs dans des ouuertures, & gouffres, qui sont tellement couuertes de cendres, qu'on ne s'en peut prendre garde. A cause dequoy l'on nomme ce lieu, la prison des ames souillees. Il faut adiouster à cela, que la glace qui se fond au bout de 8. mois venant à donner, & faire grand bruit contre le riuage, les habitans disent que c'est la plainte, & le cry des ames damnees. Le mont Helge est de mesme nature: il y a toutesfois de plus vn gouffre, ou bien vne ouuerture, où l'on voit plusieurs illusions, & fantosmes.

M O E V R S A N C I E N N E S.

Pource que ce pays a iadis esté la demeure des Cimbres, il sera bon de dire quelque chose de ce que les anciens nous ont appris de ceste nation. Les Cimbres vindrent fondre en Italie 105. annees avant la natiuité de Iesus-Christ. Silanus ne peut soustenir leur premier effort, ny Manile le second, ny Scipion le troisieme. Tous ceux-cy furent deffaits, & mis en fuite, & l'Italie estoit perduë, si Marius ne se fust trouué de ce tēps-là. Ces Cimbres sont venus des Cimmeriens, qui estans entrez fort auant dans l'Asie, estans chassés par les Scythes,

& tendans tousiours vers l'Occident, passerent en Scandie, puis en la Chersonnese Cimbrique. Plutarque en la vie de Marius, rapporte qu'on disoit que toutes & quantes fois que les Cimbres remuoient, ce qui n'estoit pas tousiours, mais lors que la commodité de la saison le permettoit, ils attaquoient les pays voisins, & appelloient d'un nom commun Celto-scythes tous les peuples qui estoient en leur armée. Les autres disent que les Cimmeriens, qui ont esté cogneus des Grecs presque de toute ancienneté, n'estoient pas en grand nombre, ains estoient certains seditieux chassez par les Scythes, qui passerent du marest Meotide en Asie sous la conduite de Lygdame, & que les plus vaillants s'arrestèrent sur le bord de la mer, & se mirent à habiter vn pays couuert, & plein de bois, qui s'estendoient iusques à la forest Hercinie. Festus dit que ce mot de Cimbres signifie en langage Gaulois, des larrons ou voleurs.

MOE VRS DE CE TEMPS.

14. **L**es habitans de ces pays Septentrionaux de Iutie sont froids & secs, assez grands, beaux de visage, de bonne couleur, paisans, soupçonneux, rusez, & pleins de pouruoyance en leurs affaires. Ils sont volontiers sains, mais superbes, & aiment les leurs, & estiment ce qu'ils font: mangent & boient beaucoup, digerent bien, & pour ceste cause sont de l'ogive. Ils ont vne grande seuerité en leurs mœurs, & à cause de la grande chaleur qu'ils ont au cœur, ils sont volontiers quereleux, se precipitent aux dangers, aiment à voyager, & à chasser, deffendent obstinément leurs opinions, & toutesfois sont enclins à la iustice; Ils apprennent aisément toutes langues, aiment les lettres, & obseruent religieusement les paches qu'ils ont faictes. Ils ont beaucoup d'enfans, & leurs femmes enfantent mal-aisément, sont belles, & bien aduisées, & auaricieuses, & sçauent bien conduire leur ménage. Achille Gassarus dit que c'est en ce pays qu'un Moine a inuenté l'Artillerie. Les habitans de Noruege sont simples, aiment les estrangers, & les recueillent, & il n'y a chez eux ny voleurs, ny larrons, ny escumeurs de mer, du moins telles gens sont en petit nombre.

Les Islandois couchent sous vn mesme roict avec les bœufs & les cheuaux. Ils vivent fort simplement, & ne recherchent autre chose que ce que la nature octroye aux hommes. Leurs monragnes leur seruent de villes, & les fontaines de delices. Il est vray que les marchands Anglois ne laissent pas viure ces gens en repos, ny avec leur ancien contentement, pource que frequentans ceste Isle pour en rapporter du poisson, ils ont porté beaucoup de vices avec les marchandises estrangeres. Ils mettent en vers les faicts memorables de leurs ancestres, ou les grauent dans le rocher. Ils vivent pour la pluspart de poisson, lequel ils seichent, puis reduisent cōme en farine, & en vsent en lieu de pain: & les plus magnifiques, & plus delicats d'entr'eux vsent de biscuit. L'eau leur seruoit iadis de breuuage, & les plus riches beuuoiēt du lait, mais aujourd'huy ils y sçauent mesler du bled qu'on y apporte d'ailleurs, & hayssent l'eau toute seule. Ceux de Lubec, d'Hambourg, & de Rostoch qui frequentent ceste Isle y portent de la farine, du pain, de la biere, du vin, des draps d'Angieterre, de la toile, du fer, de l'acier, de l'or, de l'argent, des rubans pour les femmes, & du bois pour les bastimens, & pour les vaisseaux.

RICHESSES.

15. **L**a Iutie Septentrionale enuoye en Alemagne vn fort grand nombre de bœufs, comme i'ay ja dit, & outre ce force beurre, & fromage, & grande quantité de suif, & de cuirs, comme aussi beaucoup de cheuaux qu'on meine encore en beaucoup d'autres contrees, & qui sont fort estimez pour leur bonté. Elle faict aussi beaucoup d'argent de son poisson, & principalement du haran que ses habitans prennent. L'Hollace enuoye grand nombre de ses cheuaux aux autres Prouinces. Ceux de Fionie tirent de grandes sommes du poisson qu'ils prennent, & de mesme que leur froment qu'ils enuoyent dehors, mais principalement de leur seigle, & orge. Elle enuoye aussi en Alemagne & ailleurs vn grand nombre de cheuaux, & de bœufs. La Scanie debite grande quantité de poisson, d'argent, de cuiure & de plomb, & la Gotlande vend force froment, fromage, beurre, peaux, sapins pour faire des masts de nauires, & encore force chaux.

La Noruege reçoit beaucoup d'argent de ce poisson, qu'on nomme poisson de Berg, qui est delicat au possible, & est porté bien loin par les marchands qui y abordent. Elle ne tire pas moins de profit du merlus qui s'y prend, & pareillement beaucoup de belles peaux qu'on y va querir, d'une grande quantité de beurre, de suif, de cuirs, de graisse de baleine, de poix

poix liquide , de cheurons de chesne, de mastz , & daiz.

Les marchands enrichissent grandement les Islandois , d'autant qu'ils emportent de ceste Isle du drap nommé vulgairement Vvarman, de grands monceaux de souffre, du poisson endurey, & seiche, du beurre, du suif, de la laine, force peaux de faucons blancs, des chevaux, & choses semblables. Ils y ont telle abondance de poisson qu'ils en dressent des monceaux fort haut au delcouvert, & les vendent en ceste sorte. Il y a aussi tant de beurre salé qu'ils en remplissent des caisses longues de 40. pieds, & hautes de 5. outre les tonneaux ordinaires.

Quant aux richesses du Roy de Dannemarc, elles consistent au grand nombre du bestail, & du poisson de la Chersonese, & des Isles voisines où l'on trouue tant de poisson, que les harans seuls montent à vne somme presque incroyable : & il y en a si grande foison d'autre sorte qu'on ne scauroit presque naviger par ce destroit qui est tout plein de retraictes propres & agreables à ces animaux. Il tire encore vn grand profit du merlus qui est enuoyé en diuers lieux. Mais ce qui luy rapporte dauantage c'est le destroit qui est entre Elsinore, & Elsimbour qui se nomme le destroit du Zont, pour ce que c'est vn passage si estroit qu'aucun vaisseau n'y peut passer sans permissiõ des gardes que le Roy y tiët. Or il est force que tous les vaisseaux qui passent par la payent vne bonne gabelle au Roy de Dannemarc. On peut comprendre à quelle somme peut arriuer ceste gabelle par la multitude des nauires de Hollande, Zelande, France, Angleterre, Escosse, Noruege, & de la mer Baltique, qui passent continuellement par ceste mer, dont les peuples ont besoin des vins de Rhin, & de France, & d'Espagne, des sucres, & especes de Portugal, & des lieux voisins, & des fruiçts d'Andaluzie, de mesme que ces pays ont besoin de miel, de la cire, des peaux, & des grains de Prusse, Liuonie, Moscouie, & pays voisins. Toutesfois il y en a plusieurs qui tiennent que le Roy de Dannemarc ne peut auoir grand argent, tant pour ce qu'en ses Royaumes il n'y a nulle chose d'importance fors que le poisson, ny aucune ville de grand trafic, qui puisse attirer l'argent, & entretenir le commerce. Il ne reste donc que les gabelles des passages, & le profit de quelques ruines de Scanic, & les chevaux, & le bestial de Iutie, & le bois & le poisson de Noruege & des Isles. La place de Vardus rapporte encore quelque profit à ce Roy, pour ce que depuis quelques années en ça les Anglois ont commencé de voyager entre la Noruege & la Groenlande, & quelques autres passent à Colmigraf, les autres à Chilchene proche de Saint Nicolas. Ils trafiquent avec les Russiens, & en rapportent du suif, de la cire, du miel, & du lin. Les Escossois & François pratiquent le mesme. Presque au milieu de ce Golphe, on void l'Isle, & la place de Vardus bien fortifiée par Frideric deuxiesme. Les susdits marchands payent en ce lieu la gabelle de leurs marchandises.

FORCES.

Les guerres que les Danois ont eu contre ceux de Suede monstrent assez quel nombre de gens le Roy de Dannemarc peut faire ordinairement, & de quelle façon ils se portent aux guerres qu'ils entreprennent. Mais pour discourir particulièrement de ce que ce Prince peut faire par terre, on ne l'a guere peu voir iusques à present, pour ce qu'il n'a faict aucune entreprise d'importance sinon contre les Ditmarsiens, qui ayant esté subiuguez par le Roy Valdemar, puis s'estans reuoltez, furent apres diuers accidens qui arriuerent depuis l'an mil cinq cents iusques à l'an mil cinq cents cinquante neuf, subiuguez finalement par Federic second Roy de Dannemarc : mais ils auoient deffaict auparauant en vn combat lean fils de Christierne. Pour le regard de ce qu'il peut par mer, on le peut iuger par les armées qu'il a dressées quelques fois, veu que Christierne II. à l'instance de Henry II. Roy de France, enuoya en Escosse contre les Anglois vne armée de cent vaisseaux, sur lesquels il y auoit dix mille soldats. Je croy bien qu'ayant vne si grande estendue de coste de mer, tant de ports en Dannemarc, Scanie, & Noruege, & vn si grand nombre d'Isles dedans, & dehors la mer Baltique, il peut mettre ensemble vne grande flotte, pourueu qu'il ayt de l'argent, mais nous auons desia monstre comme il n'en scauroit auoir grande quantité.

Quant aux forteresses ses pays en sont assez bien pourueus de tous costez, & c'est aussi la chose qui l'asseure dauantage.

GOVERNEMENT.

Tout le Dannemarc est diuisé en 184. gouuernemens qu'ils nomment Hærets, & est diuisé par autant de gouuerneurs scauans & entendus aux loix du Royaume : Le

Rrr

Roy est pluſtoſt eſleu par les principaux, qu'il ne paruiſſent au Royaume par ſucceſſion. On couronne les Roys à Hafnie en l'Egliſe noſtre Dame deuant l'Autel, les Senateurs du Royaume les y meinent, & l'on porte deuant eux vne eſpée, vne boulle & vne couronne.

Le port de ces choſes n'eſt particulier à aucune famille, mais ſelon que quelqu'un a du mérite il eſt employé à tel office. Apres cela le Roy eſt contraint de iurer de garder les articles qu'on luy propoſe, qui ont eſté en vſage depuis quelque temps, & deſſendre la Religion Chreſtiéne, & les droits, & couſtumes du Royaume. L'Eueſque de Roſchilde l'oingt apres, & la couronne luy eſt miſe ſur la teſte par les Senateurs, qui luy preſtent alors le ſerment, s'ils ne l'ont fait auant ſon couronnement. Cela fait le Roy fait quelques Gentilshommes Cheualiers en les frappant doucement avec l'eſpée. Les Senateurs & principaux du Royaume ont touſiours eu libre autorité d'eſlire les Roys; & l'ont encore, mais ils ont preſque tousjours mis au thrône Royal le fils aiſné du Roy, ſinon qu'il y eut cauſe ſuffiſante pour les en deſtourner. Ils n'ont permis que le Royaume fut diuiſé, ſinon qu'ils y ayent eſté contraints par quelque guerre ciuile.

Il y a cinq Ordres en tout le Dannemarc.

Le premier eſt de la maiſon du Roy.

Le ſecond de la nobleſſe. Mais il faut ſçauoir qu'entre ces nobles il n'y a nuls Comtes, ny Barons, ains que tous peuuent monſtrer leur nobleſſe par vne longue ſuite d'anceſtres. Ils portent des boucliers ſimples, & penſent que ce ſeroit deſroger à nobleſſe, de les changer, & aggrandir.

Il y a encor quelques-uns qui reſtent des familles de ceux qui aſſiſterent au traité fait entre Charlemagne, & Hemming Roy de Dannemarc, comme les Vrés & quelques autres. Ceux-cy poſſèdent leurs biens avec Iuriſdiction haute, & baſſe, & ont pouuoir de chaffer ſur leurs biens, comme les Comtes en Alemagne.

Tous leurs biens tant meubles qu'immeubles, laiſſez par les peres & meres, ſont eſgalement partagez entre les freres, & les ſœurs ſont auſſi, par ſpecial priuilege, admises à ce partage, en telle ſorte toutesfois que le frere prend deux parts, & la ſœur vne, & ſi les maſles ont par preciput les Chateaux. Ainſi les aiſnez n'emportent pas la plus grande partie.

On eſlit de cét ordre des nobles les Senateurs du Royaume, qui ne paſſent guere ſouuent le nombre de vingt-huict. Le Royaume les nourrit, & chacun d'eux a vn chateau tandis qu'il eſt en office, & ne paye rien au Roy de ce qu'il tient, excepté qu'en temps de paix & de guerre chacun d'eux eſt obligé de nourrir certain nombre de gens de cheual, & de les auoir preſts toutes & quantesfois que le Roy les mande, à leurs deſpens.

Si l'on enuoye des Ambaſſadeurs hors du Royaume le Roy les entretient, & leur donne de quoy ſe maintenir honorablement. Le Roy donne auſſi quelque entretient aux autres Gentils-hommes, ſoit qu'ils demeurent à la Cour, ſoit qu'ils ne s'y tiennent pas. Car le Roy a certaines terres nommees en Danois Verlehninge, c'eſt à dire biens faiçts, dont il pouruoit ceux qui meritent, ou pour toute leur vie, ou pour quelques annees. Ceux-cy ſont obligez d'entretenir quelques hommes de cheual, & de payer certaine ſomme au Roy, toutesfois en telle ſorte que pour leur trauail, & pour leurs ſeruices ils prennent auſſi quelque partie du profit.

Il y a auſſi vne ordonnance en Dannemarc par laquelle il eſt deſſendu au Roy d'achepter des biens immeubles des nobles, afin qu'il n'arriue quelque ſedition entre le Roy & les principaux du Royaume. Toutesfois il eſt permis au Roy d'eſchanger des biens avec les nobles, mais les nobles ne peuuent achepter nuls biens des payſans royaux. Car quelques payſans ont des biens hereditaires qui ſont preſque francs.

Il y a en Dannemarc vn grand Maiſtre pareil à celui de France; ceſtuy-cy ſe tient le plus ſouuent à Hafnie, comme Lieutenant du Roy.

Apres cela le Mareſchal a ſoin en temps de paix, & de guerre de ce qui appartient à la guerre. L'Admiral fait faire, & refaire les vaiſſeaux, & ordonne toutes les annees ce qui eſt neceſſaire pour la marine. Ceſtuy-cy a ſous luy vn autre Admiral, & en chaque nauire vn Capitaine qui eſt de race de Cheualiers.

Il y a auſſi le Chancelier du Royaume par deuant qui l'on appelle de toutes les Prouinces, & Iſles, & de luy au Roy.

Toutes les Prouinces ſont diuiſees en Hazrets, ou Diocèſes, qui comprennent beaucoup de Parroiſſes. Ceux qui plaident debattent premierement là leur droit, puis il eſt permis d'appeller au Iuge de la terre où l'on eſt, & de luy au Chancelier, & en dernier lieu au Roy, &

& aux Senateurs, qui donnent l'Arrest diffinitif.

Les Danois ont vn droit escrit drellé par Voldemar 1. & par les Euesques & Senateurs de Dannemarc. Si les premiers iuges donnent vne sentence iniuste, ils sont condamnez à l'amende de la moitié de leurs biens, dont le Roy prend vne moitié, & la partie interellée l'autre.

Le Chancelier qui suit volontiers la Cour, a pour adioints 7. ou 8. nobles Secretaires, & le Roy meisme traite toutes affaires. Que s'il arriue quelque cas d'importance, le Roy fait assembler le Conseil. Il n'est permis au Roy d'imposer aucune taille sur le Royaume, & sur les payfans des nobles, sans le consentement des Senateurs, & des principaux du Royaume.

Il y a vn Intendant general des finances qui reçoit tous les reuenus du Royaume, & tous les peages, tant de mer que de terre, entend les comptes, les contreroolles, & donne quittance à ceux qui apportent l'argent. Cestuy-cy a deux commis nobles, & plusieurs du peuple, & a pour cecy de bons gages.

Le troisieme ordre est celuy du Clergé, auquel il y a eu sept Euesques, comme l'Archeuesque de Londe, & les Euesques de Kochilde, d'Ortensche, de Rip, de Vvibourg, d'Arthus, & de Slesuic, & cet ordre comprend aussi les Chanoines. Ceux-cy ont les decimes du Royaume, qui sont toutesfois diuersement partagees en diuerses Prouinces. Les Euesques recoiuent la moitié des decimes, le Roy en a l'autre moitié: toutesfois les Chanoines & Pasteurs tirent de la part de l'vn & de l'autre quelque portion. Les nominations des Euesques & autres Prelats, appartiennent de tout temps aux Roys de Dannemarc, ainsi qu'on void par la reponce de Voldemar premier Roy de Dannemarc, qui rescriuit au Pape, qui luy demandoit choses semblables: nous auons receu le royaume de nos subiects, la vie de nos parents, & la religion de l'Eglise Romaine, laquelle si tu redemandes, ie te la renuoye par les presentes.

Christierne III. ordonna que les Ecclesiastiques ne vendroient aucune chose, sans exprés commandement du Roy.

Le 4. ordre est des bourgeois & des marchands qui se tiennent aux villes & bourgades. Ceux-cy ont leurs particuliers priuileges dont ils iouissent, & ont aussi leurs champs propres & leurs forests limitees. De ceux-cy de mesme que des enfans des payfans on eslit les Euesques, Chanoines, Pasteurs, & Senateurs des villes, des Secretaires pour les Chasteaux & forterelles, des Gouverneurs & Capitaines des nauires, & l'on en establit aussi quelques-vns sur les peages. Ceux-cy iugent les petites causes, & ont le plus souuent pour President vn du corps de la noblesse.

Le cinquiesme ordre est des payfans qui sont de deux sortes. Les premiers sont nommez Freibunden, qui signifie francs laboureurs. Ceux-cy possèdent des fonds hereditaires, & en payent quelque tribut toutes les annees. Ils s'addonnent aussi à la marchandise, & à la pesherie. Ils ne sont subjects à nulles couruees, & ne payent aucunes tailles que du consentement des Senateurs, & Conseillers du Roy. Les autres ne possèdent aucuns biens hereditaires, ains les afferment du Roy, des Nobles, ou du Clergé, & sont obligez enuers leurs seigneurs à plusieurs couruees, selon qu'ils ont conuenu avec le maistre des fonds qu'ils tiennent.

Or d'autant que tous les nobles sont esgaux en ce Royaume, & qu'il n'y a aucun tiltre de Duc, de Comte, ny de Baron, il n'y a personne qui soit si riche qu'il s'oze opposer à la famille des Roys, pource que l'heritage paternel se partage tousiours entre les fils & les filles. Les Cheualiers tiennent leur premier rang en Dannemarc, & le Roy ne donne cet ordre qu'à des personnes pleines de merite.

Il y a à Vibourg vn Conseil où se vident les causes ciuiles presque tout le long de l'année, & c'est là qu'on iuge les differens des terres, & des heritages, & choses semblables, & pareillement de tous crimes.

Les villes de la Duché de Slesuic iouissent des mesmes priuileges que celles de Dänemarc, & leurs habitans vsent de mesme droit. Les suiets peuuent appeller quelque Magistrat que ce soit aux Senateurs, & non plus outre.

L'ordre des Senateurs est composé le plus souuent de 24. hommes, qui sont de l'ordre des Cheualiers, & l'on leur adioust vn Chancelier general, & deux Docteurs au nom de chaque Prince.

Ceux d'Holsace auoient autresfois quarante-huit hommes qui presidoient à tout le pays, & les appellations de toutes les Parroisses alloient pardeuant eux. Mais depuis qu'ils ont esté subiuguez, & diuisez en deux parties, on choisit en chacune douze hommes, avec vn Gouverneur, qui est le plus souuent Docteur, ou licentié en droit. Tous ceux-

Rrr ij

cy ont assez bons gages des Princes, & l'on leur adioute vn Secretaire, & vn President du corps de la noblesse de Holface. Celuy qui y est de la part du Roy est le plus souuent le Gouverneur de Steimbouurg, & celuy qui y met le Duc est gouverneur de Gorttorpe. Mais il est permis aux sujets d'appeller pardeuant les Senateurs des deux Duchez de Slesuic, & d'Holface, & non plus outre. Ils ont eu iadis vn droit escrit, qui est vn peu changé & reformé selon le droit commun.

L'Holface a 4. Ordres, c'est à sçauoir, de la noblesse du Clergé, des bourgeois, & des laboureurs, qui sont de deux sortes, de mesme qu'en Dannemarc.

Les nobles ont leurs terres avec iustice haute, moyenne, & basse, & droit de chasser.

Ces terres sont la plupart allodiales, & hereditaires. Il y en a aussi quelques vnes qui sont feudales. Il n'y a pas plus de vingt-quatre tiges de familles nobles, mais il y a plusieurs maisons qui sont sorties & descendues de la chacune, comme les Ranzouiens tiennent plus de 150. chasteaux, & beaucoup de terres. On en trouve presque autant des familles des Alefeldes, & des Povvisches. Les causes des nobles sont iugees par le Senat des Duchez. Il est permis, en donnant suffisante caution, d'appeller des arrests du Senat à la Chambre Imperiale. Les bourgeois ont des privileges particuliers, & vsent du droit Romain, ou de celui de Lubec. Les subjects peuvent appeller des sentences du Senat des villes, aux citez destinees pour cest effect, & il est permis encore d'appeller de celle-cy aux Senateurs d'Holface, & encore de là à la Chambre Imperiale, moyennant caution. Les causes des payfans se plaident en plaine campagne par leurs Aduocats. Elles se plaident en presence de quelques nobles du lieu avec les Gouverneurs, & deux Assesseurs qui sont comme tesmoins, & apres qu'on a ouy les demandes & deffences des vns & des autres, on fait retirer toute l'assemblée des payfans, puis apres auoir meurement deliberé sur le tout, on rappelle les plaidans, & lors l'on prononce leur sentence.

Quant à l'Islande, il y a deux Euesques qui sont comme Gouverneurs, l'un de la partie Septentrionale, l'autre de la Meridionale, & chacun d'eux a vne escole publique iointe à sa maison, où il est tenu d'entretenir à ses despens vingt-quatre enfans, & les faire instruire.

RELIGION.

21. **C**Hristierne second Roy de Dannemarc, ayant donné entrée en Suede à l'heresie de Luther, fut aussi cause qu'elle s'espandit par le Dannemarc, car y estant retourné de son village de Suede, il descourrit dans peu de temps qu'il estoit Lutherien.

Mais il fut bien tost puny de son impieté, veu qu'estant pris par les siens, puis chassé du Royaume avec sa femme & trois enfans, l'an mil cinq cents vingt trois: il demeura longtemps en la basse Allemagne sous l'ombre & la protection de Charles V. son beau frere. Depuis ayant dressé en l'an mil cinq cents trente deux vne armée de mer, il prit la route de Dannemarc. Mais ayant premierement esté combattu d'une furieuse tempeste, qui mit à fonds beaucoup de ses vaisseaux & de ses gens, & estant apres cela defait par ses ennemis, il vint entre les mains de Christierne son successeur, & mourut en prison. Christierne qui luy succeda, s'estant allié de Gostaue Roy de Suede (tous deux prindrent deux sœurs de Jean Duc de Saxe, fauteur de Luther) tourna son esprit à l'entiere destruction de la foy en ses Royaumes. Ce qu'il obtint facilement mettant tous les Euesques de ses Estats en prison où ils moururent. Et c'est chose digne d'estre ramentuë, que de tant d'Euesques de Dannemarc, Noruege, Islande, Suede, & Gothie, il n'y en eut pas vn qui abandonnast la foy Catholique, ny pour les grandes promesses qu'on luy fit, ny pour la longueur de la prison, ny pour aucun rude traitement qui leur fut fait. Les peuples de Dannemarc, de Noruege, & des autres pays subjects à ceste couronne, estans donc demeurez sans Pasteurs sous vn Roy Lutherien, ce ne fut pas chose mal aisée de les seduire & peruertir par le moyen de Ioachim Pomeran, ministre Lutherien. Christierne eut pour successeur Federic, qui fut Lutherien, addonné à la gourmandise & yuongnerie. Aussi mourut-il en faisant grâde chere le Vendredy Saint. Sous luy les Danois sont non seulement deuenus plus obstinez en l'erreur de Luther, mais encore se sont addonnez à l'art Magique plus qu'aux bonnes lettres. Celuy qui regne auourd'huy est aussi Lutherien, & maintient passionnément ceste heresie en ses Royaumes.

ROYS

ROYS DE DANNEMARC.

Long-temps avant Iesus-Christ, Dan qui a donné son nom à tout le pays estoit Seigneur de Dannemarc.

Il engendra Humble, & Lothar.

Humble succeda premierement, puis fut chassé par Lothar.

Son fils Schiod luy succeda apres.

Cran fut successeur, & mourut en la guerre qu'il eut contre Suibdager Roy de Noruege, qui espousa par force la fille du Roy de Dannemarc, & conquista ce Royaume.

Froton son fils.

Haldan fils de Froton, meurtrier de Roen, & Scats ses freres.

Helgon par la mort de Roen son frere est entierement Seigneur de Dannemarc.

Rolfo son fils luy succeda & est tué, & le Royaume fut mis sous l'obeyssance d'Atisle Roy de Suede: & Hothier frere d'Atisle fut Roy de deux Royaumes.

Roric fils d'Atisle.

Vviclet.

Vvermond son fils.

Vso fils de Vermond qui rendit le pays de Saxe tributaire, & delourd & niais & lasche, devint sage, bien aduisé, & magnanime, & de begue bien parlant.

Dan son fils.

Huclet.

Froton second.

Dan troisieme.

Fridleue.

Froton troisieme son fils, lequel on tient auoir esté du temps que Iesus-Christ nostre Seigneur vint au monde.

Hiarne.

Fridleue.

Froton quatrieme.

(:)

(:)

Ingel.

Olaue.

Harald premier.

(:)

(:)

Froton cinquieme.

Haldan deuxieme.

Harald second fut vaincu par Eric ou Henry Roy de Suede, qui rangea Dannemarc sous son obeyssance: mais Haldan en redeuint maistre, & pareillement de Suede. Vnguin estoit lors Roy de Gothie, & Haldan l'ordonna pour gouverner le Royaume de Dannemarc apres luy.

Vnguin eut pour successeur

Sivald premier.

Sigar.

Sivald deuxieme.

Haldan troisieme.

Harald troisieme qui fit la guerre septans en Suede, & y mourut.

Olo fils de Siuard Roy de Noruege, & nepveu de Harald de par sa sœur.

Emond.

Siuard, ou Sivald troisieme.

Buthus son frere.

(:)

Iameric, fils de Siuard.

Broder son fils.

Siuard quatrieme incogneu, & de quil'on ignoroit la race.

Bior, fils de Snio succeda à son pere.

Harald quatrieme.

Germo son fils.

Gotric, ou Godefroy, qui fut du temps de l'Empereur Charlemagne. Il fut homme vertueux, & addonné à la guerre, & fort liberal.

Rrr iij

Olaue son fils.

Huming fils d'Olaue.

Siuard fils de la fille de Gotric, & du Roy de Noruege.

Regnier fils de Siuard, qui estoit prompt à frapper, & addonné à la paillardise.

Siuard.

Eric ou Henry, qui fut baptisé avec son frere Harald à Mayence.

Erid fils de Siuard, nepueu de Regnier, qui estoit demeuré presque seul du sang Royal, qui ayant persecuté les Chrestiens en sa ieunesse, mourut toutesfois Chrestienne-ment, s'estant conuertý par les remonstrances d'Anscat Archeuesque de Ham-
bourg.

Canute son fils regna apres luy, & mourut sans-monstrer aucun signe de Chrestien.

Froton.

Gormo.

Harad, ces trois furent bons Chrestiens.

Gormo 3. succeda apres, & fut persecuteur de la Religion Chrestienne.

Harald fils de Gormo Chrestien.

Sueuo Oton son fils, qui v'surpa le Royaume du viuant de son pere, puis quitta la foy Chre-
stienne: & apres se conuertit, estant chassé de son Royaume, où il retourna apres la mort
d'Eric Roy de Suede, qui s'en estoit rendu maistre.

Canute fils de Sueuo Otton, surnommé le Grand, à cause qu'il rangea sous son obeyssance 5.
Royaumes, c'est à sçauoir, Suede, Noruege, Angleterre, Dannemarc, & Normandie.

L'Empereur Henry III. espousa sa fille Gunilde.

Canute III. qui mourut ayant regné 2. ans, sans aucuns enfans.

Magnus fils d'Olaue Roy de Noruege.

Sueue nepueu de Canute le grand de par sa sœur.

Harald son fils, qui mourut ayant regné deux ans.

Canute frere de Harald, qui fut tué par ses propres sujets en Iutie, dans vne Eglise, à cause
qu'il les contraignoit de payer la dixiesme partie de leurs biens.

Olaue son frere, qui mourut en Cypre.

Harald son fils, qui fut chassé pour son orgueil.

Nicolas fils de Sueuo fut mis en son lieu, & fut tué par les siens.

Eric luy succeda, & fut tué pareillement.

Eric fils d'Aquin, nepueu d'Eric le Grand, qui fut rendu Moine, & pourtant le Royaume
escheut à Sueuo, nepueu d'Eric le Grand.

Vvaldemar, enuiron l'an 1161.

Cannte son fils.

Vvaldemar son frere, qui mourut l'an 1242. apres auoir regné 40. ans, souuent victorieux, &
souuent vaincu.

Eric son fils aîné luy succeda, & fut tué par son frere Abel.

Abel succeda au Royaume: mais il fut accablé par les villageois en Frise.

Christophle son frere.

Eric son fils, qui mourut l'an de grace mille deux cents quatre-vingts six, & fut tué par ses
domestiques.

Eric son fils aîné luy succeda, & mourut l'an de grace 1311. apres auoir regné trente-cinq
ans.

Cristophle frere d'Eric mourut l'an 1333.

Valdemar son fils luy succeda, & fut chassé du Royaume, puis remis, puis derechef
chassé, & apres restably. Il mourut finalement l'an mille trois cents septante &
cinq.

Marguerite fille vnique de Valdemar, ayant espousé Aquin Roy de Noruege, fut Roynne des
deux Royaumes de Dannemarc, & de Noruege, puis vainquit Albert Duc de Mekel-
bourg, qui auoit esté appelé par les Suedois pour regner sur eux, & par ce moyen elle fut
aussi maistresse de Suede.

Eric Duc de Pomeran adopté par Marguerite, fut esleu Roy l'an de grace mille qua-
tre cent & vnze, mais il se retira apres en Pomeran l'an mille quatre-cents trente &
huiet.

Christophle Duc de Bauiere est esleu apres luy Roy de Dannemarc, l'an mille qua-
tre cents trente-neuf, & mourut l'an de grace mille quatre cents quarante &
huiet.

Chrestien, ou bien en Danois Christierne, Comte d'Aldembourg, fut esleu Roy de Dannemarc, & de Noruege, apres la mort de Christophle. Il mourut au Royal chateau de Coppenhagen l'an de grace mille quatre cents quatre-vingts vn, apres auoir regné trente quatre ans.

Iean son fils succeda au Royaume.

Christierne second fils de Iean, fit longuement la guerre aux Suedois, & finalement fut chassé meisme du Royaume de Dannemarc, à cause de sa tyrannie : & voulant recouurer son Royaume, il fut pris par Christierne son oncle, & mis en prison à Sumdebourg en Holsace, où il mourut.

Frideric Duc d'Holsace, oncle de Christierne, fut apres sa mort Roy de Dannemarc.

Christierne III. fils aîné de Frideric.

Christierne IV. qui regne en la presente année 1612.



Rrr iij



DISCOVRS DE L'ESTAT DV ROY DE SVEDE.

SOMMAIRE.

1.  *GRANDE* estendue du Royaume de Suede, ses principales Prouinces, & ses bornes.
2. Description de la Gothie, ses limites, & meilleures places.
3. De la Finlande, & ses villes.
4. De la Boddie, ou Bothnie.
5. De la Lapponie, son estendue & limites.
6. Autre diuision de la Suede en 11. Prouinces contenant 11. Duchez, & 12. Comtez.
7. Autre partition de ce Royaume en 7. Eueschez, & combien chaque Euesché contient de paroisses.
8. Fertilité de la Suede en miel, argent, airain, plomb, acier, poissons de toute sorte: aspre & montueux en plusieurs endroits, d'un air temperé, pur & sain.
9. Particuliere description des choses dont chaque Prouince abonde.
10. Naturel valeureux des anciens habitans de Suede, leurs costumes & loix, leurs Dieux, & diuerses sortes de sacrifices, leurs armes & façon de combattre.
11. Constitution robuste de corps, & de bonté d'esprit des modernes Suedois: la simplicité de leurs mœurs: les diuerses sortes de pain & viandes dont ils vsent: la façon de leurs vestemens, habitations & edifices.
12. Leurs richesses consistans en l'abondance de viures, mines de plomb, d'airain, & d'argent.
13. Des reuenus ordinaires & extraordinaires du Roy, & combien de tonnes d'or entrent tous les ans dans ses coffres d'espargne.
14. De la gendarmerie Suedoise, & quelles compagnies d'Infanterie & Cavalerie sont ordinairement entretenues en chaque Prouince.
15. Des forces navales de cet Estat, & quel nombre de vaisseaux peut armer le Roy en temps de guerres.
16. Denombrement des principales forteresses de ce Royaume, ses Alliez & confins aduersaires.
17. Des Vicomtes, Lamens, Lansmens & autres Iuges & Officiers commis à l'administration des iustices de chaque Prouince.
18. Des loix establies contre les vsures, adulteres, homicides.
19. Des Officiers commis sur les reuenus & finances du Roy.
20. Sectes de Luther, & Calvin, comment, & quand introduites en Suede.
21. Catalogue & denombrement des Roys qui ont regné iusques à present.



Les affaires de Suede sont en tel estat, que l'oncle vsurpe & detient à son nepueu le Royaume qui luy appartenoit legitimement, de sorte que le Duc Charles s'est rendu comme Roy d'une partie de ceste Monarchie: & le Roy Sigismond de Pologne, vray heritier de Suede, en a conquis l'autre avec les armes, & dispute le reste tous les iours. Or encores que cela soit, ie ne laisseray de représenter ce Royaume, comme s'il estoit entre les mains de son Seigneur legitime, afin de contenter le Lecteur curieux qui desirera estre aussi bien informé de cet Estat, que des autres.

Pour venir au point, le Royaume de Suede comprend la Duché de Finlande, & la Gothie, la Boddie, ou Bothnique, vne partie du pays des Lapons, la Scricfinie, & vne partie de

de la Corelie, les Isles Alandes, & quelques autres, bien que de petite estime. Or on peut aisément recueillir de la quantité des degrez sous lesquels diuerses Prouinces du Royaume de Suede sont assises, que le pays est de grande estendue, veu que de Stokolme, qui est au soixantième degré, & est la demeure des Roys de Suede, iusques aux Lapons seulement où l'on compte plus de mille milles d'Italie, & depuis les limites de Dannemarc iusques à Stokolme, qui est quant à la longueur comme au milieu du Royaume; il faut vingt grandes iournees de cheual si l'on y veut arriuer: & ceux qui ont voyagé de long & de large par la Suede, la tiennent plus grande de beaucoup que toute l'Italie, & la France ensemble, & encore beaucoup plus en y adioustant les Lapons, & la Duché de Finlande.

Le pays de Suede a pour les bornes du Couchant la Noruege, du Nord la Lappie & la Bothnie, du Leuant la Finlande separee par le golphe Bothnique, & la Liuonie, diuisee aussi par la mer, & du Sud la Gothie. Il y a en ceste Prouince beaucoup de Duchez & de Seigneuries, comme la Duché d'Angermanie aux frontieres des Lapons, depuis celles de Midelphat, ou Midelpad, de Ientie, Dalecarlie, Vermelande, Dalie, Helsinge, Gestricie, Fieringe, Caperdalie, c'est à dire, Vallee de Latone, & Ouplande, ou Vplande. La ville Royale & capitale est Holme, que les habitans appellent Stokolm: & les Russiens Stokolne, qui est forte par art, & par nature: car elle est assise dans des marescages, ainsi que Venise. On y void encores la ville d'Vpsale, où il y a Vniuersité, & celle de Nicopie, qui est maritime.

La Gothie, qui signifie en Allemand bonne terre, est limitee du Leuant de la mer Occidentale, du Couchant des montagnes de Noruege, & vne partie du Royaume de Dannemarc, qu'on nomme Scanie, du Septentrion la Suede, & du Midy la Mer Oceane. Les meilleures places de Gothie sont Loduse, où il y a vn bon port. Vvalburg, ville accompagnée de son Chasteau, Calmur grande ville, ayant vn bon port, & plusieurs autres, dont quelques-vnes portent tiltre du Duché.

La Finlande est bornée du Leuant, du Midy, & du Ponant, de la mer, & separee de l'Estat de Moscovie par le Golphe Finnique, ou de Finlande, & par la riuere de Polme: mais il a pour borne du Nord la Boddie, ou Bothnie Occidentale, & la Corelie. Les Russiens nomment ce pays Chainskasemla. Ses meilleures villes sont Abo assise au pays d'Vplande, & Vvibourg aux extremitez du pays.

La Boddie, ou Bothnie, est diuisee en Orientale, & Occidentale, selon Magin, mais selon les autres en Septentrionale, & Meridionale.

La Laponie s'estend depuis les frontieres de Suede iusqu'à la mer du Nord. Là est le marais de Lule, long de trois cens milles. Il faut remarquer que ceux qui sont plus Orientaux, payent tribut au Moscouite, & sont nommez Dikiloppes, c'est à dire, Lappes, ou Lapons sauages: mais les Occidentaux obeyssent au Roy de Suede, & tiennent le pays que l'on nomme Scrichonie, Corelie, ou Carelie, selon Iean le Grand, est au de là du Golphe de Finlande, & s'estend iusques à la mer glaccée: son plus grand iour d'Esté est de vingt heures & demie. Hexholin, ou Kexolin, est la ville capitale.

Le Roy de Suede tient encores en Liuonie, Riuaile, Narue, Pernouie, & quelques autres. Outre ce, il a les Isles Alandes, où sont les villes de Vames, Vibourg, & Castrolme.

Il y en a qui font vne autre diuision de la Suede, c'est à sçauoir, en vnze Prouinces, qui contiennent vnze Duchez, & douze Comtez. Les Duchez sont Vplande, Gothie Occidentale, appelée Vvestrogothie; Gothie Orientale, appelée Ostrogothie; Smoladie, Vesmanie, Dalakarlie, la grande Duché de Finlande, en laquelle sont comprises celles de Satagonde, de Caralie, & de Tauastie. Les Comtez sont Helsinge, Angermanie, Gestricie, Midelpadie, Bothnie Orientale & Occidentale: Vlande, Verinlande, Nuice, Dalie, & celle de l'Isle d'Vlande, qui appartient routesfois à la Finlande.

L'autre diuision est en Eueschez, qui estoient anciennement au nombre de sept, en y comptant l'Archeuesché d'Vpsale. A celles-cy l'Euesché de Vibourg en Finlande fut adioustée, les autres sont celles de Lincopie, de Vetros, appelée Aroscoisie, celle de Scare, l'Imperiale, appelée de Strigonie, celle de Vexime, & celle d'Abe, nommée Aboen en Finlande.

En la Diocese d'Vpsale, il y a cent septante & vne paroisses, & ceste Diocese s'estend iusques aux Lapons, & comprend la Finmarchie, & en celle-cy il y a huit paroisses fort grandes. La Diocese de Lincopie a deux cens vingt-six paroisses, celle de Vexime deux cens dix: celle de Sacare autant que celle de Lincopie: celle de Streigne a cent paroisses: celle d'Abe a cinq cens paroisses qui sont pour la plus grande partie fort peuplées. De sorte qu'en Finlande il y en a quelques vnes qui contiennent mille familles, d'autre huit cens, d'autres cinq

cens, & quelques autres moins. Le nombre de ces paroisses est tel que i'ay dit sans y compter celles de plusieurs villes ou places, qui peuuent monter à vn bon nombre.

Q V A L I T E'.

LA Suede est la plus fertile Prouince de toutes celles du Nord, & porte grande quantité de grains. Il y a aussi beaucoup de miel, d'argent, d'airain, de plomb, d'acier, & de fer, principalement pres de Salbourg on trouue del'argent pur, qui n'est meslé avec aucun autre metal. Il abonde merueilleusement en poissons de toutes sortes, soit de lac, de mer, ou de riuere: toutesfois elle est en beaucoup d'endroits aspre, montueuse, humide, & marescageuse: ces endroits rapportent moins de bleds & de fruiçts que les autres. Tout le riuage vers la Liuonie est plein de rochers fort pointus, qui rendent ceste coste inaccessible, & où les loups passent lors que la mer est gelee, & y deuiennent aueugles de trop grand froid, ainsi qu'on dit. Il y a forces grandes plaines, où l'on void toutesfois beaucoup de pins, de sapins, & de chesnes: toutesfois l'on seme communement entre ces arbres. Le pays ne manque pas de fleuves, mais ils ne portent point de vaisseaux pour la plus grande partie, à cause qu'ils sont empeschez par les arbres qui tombent dedans, ou par de grands rochers, ou bien leurs canaux ne sont pas bien dressez pour les ayder à couler, & aussi pour ce qu'ils sont gelez plusieurs mois de l'annee.

L'air y est communement bien pur, & par consequent toute la Suede est fort saine, & il n'y a pas vn air si aspre, ny insupportable, ny de si grandes froidures qu'on se persuade, toutesfois aux lieux où il y a des marescages, & des eaux qui croupissent, l'on sent vn air pesant, & l'on void de grands brouillards. On y vit beaucoup, ordinairement, & principalement aux montagnes, & autres lieux plus exposez au vent du Nord, & mesme on y void des hommes qui paruiennent à l'age de cent trente, ou cent quarante ans, & encore beaucoup de gens y viuroient autant, s'ils n'abregeoient leur vie par trop manger, & trop boire, outre que mesme en la Cour du Roy l'on ne trouue pas presque deux Medecins, ou Apotiquaires. On prend en ces pays force beuſtes, qui sont d'vne grandeur extraordinaire.

La Gothie abonde en grains, en bestail, en cheuaux, en poissons de mer, & d'eau douce, en plomb, en fer, & en argent: elle a plus de pasturages que les autres pays Septentrionaux; sur tout on y trouue force letton, & pres de la ville de Tragualle de fort bon fer.

La Flandre est encores plus agreable que la Prouince qu'on nomme particulièrement Suede, la surpasse en bonté, & rapporte plus de bled qu'elle, parce qu'elle est pour la plus grande part plaine, & n'est si montueuse, ny si marescageuse. La Bothnie n'est pas de grand rapport, mais en l'vne & l'autre on trouue force animaux qui ont de belles peaux, & pareillement du poisson en abondance.

La Lapponie ne produit nuls bleds: il y a force ours blancs, & quantité d'hermines. En lieu de cheuaux ils ont des Rangers qui sont de la grandeur d'vn mulet, & de poil d'asne, & ont des cornes presque semblables à celles d'vn cerf, hormis qu'elles sont plus courtes, & ont moins de branches. Ces animaux ne portent pas la charge sur le dos, mais tirent les charrettes si legerement, & si viste, qu'ils feront en vn iour & vne nuit 150. milles. Au Solstice d'hyuer, c'est à dire, quand le Soleil est paruenue au signe du Capricorne, & qu'il est en l'Hypogee, ou au lieu opposé à l'Auge: la nuit y est de trois mois avec vn peu de lumiere qui dure bien peu d'heures.

M O E V R S A N C I E N N E S.

LEs Gots sont anciennement sortis de Suede, & des pays voisins, & ont assez monstré quelle estoit l'humeur de toutes les nations de la Presqu'isle de Scandio, ou Scandinavie, où est la Suede.

Les Gots ont donc assez tesmoigné que ceux de ce pays estoient vaillans, & ne pouuoient croupir sans rien faire, veu qu'ils sont sortis en grand nombre de ces pays, & ont dominé en beaucoup d'endroits de l'Europe assez longuement, mesmes ont tenu l'Italie par beaucoup d'annees. Ils estoient cruels, mais non toutefois si barbares qu'on les veut faire, comme nous pouuons voir par leur conduite lors qu'ils ont occupé quelque pays, & par leurs actions de faire ordinaires, particulièrement par vne Epistre de Sidonius Apollinaire, qui décrit les façons de faire de Theodoric. Leurs loix nous apprennent pareillement assez, que ceste nation estoit assez ciuillisee & policee, mais que les autres peuples se flattoient, & hayssans ces nouveaux conquerans, ne trouuoient agreables aucunes de leurs actions, & les blasmoient en tout ce qu'ils pouuoient. Quelques-vns ont tenu qu'il y auoit vne loy par-

my eux, par laquelle il estoit porté, qu'on ne pourroit eslire aucun pour leur Roy, qui ne fut gras, & de grolle corpulence. Ces Gots ont tousiours hay mortellement les Danois, ou habitans de la Chertonele Cimbrique. On tient que leurs caracteres, qu'on nomme Gothiques, sont fort anciens, & pour ceste cause, que ceste nation auoit joinct les armes aux lettres: Leurs femmes alloient à la guerre, & se mesloient parmy les coups de mesme que les hommes: ils mettoient en vers les faits de leurs ancestres, & les chantoient.

Ils adoroient le dieu Thore, comme le plus puissant de tous les dieux, qui auoit vne couronne en la tette, vn sceptre en la main, & douze couronnes autour de luy. On tient que c'estoit le mesme que Iupiter, pource que ces peuples Septentrionaux chomoient fort religieusement le leudy, qui estoit le iour de Iupiter. Ce qui persuade encore cela mesme, c'est qu'auourd'huy on appelle encore en Suede les esclairs, les tonnerres, les foudres, & choses semblables, le bruit de Thoron.

Ce Duc en auoit à ses costez deux autres, sçauoir Othin, & Frigga: Othin representoit Mars estant tout armé, & les Gots croyoient qu'il les assistoit en toutes leurs guerres, & toutesfois ils luy dedierent le Mercredy, qui est le iour de Mercure. Ils luy sacrifioient ceux qu'ils prenoient en guerre. Frigga estoit la deesse de la beauté, de la grace, des amours, & presidoit selon leur opinion, aux nopces, & à toute sorte de plaisirs. On luy auoit dedie le Vendredy, ou le iour de Venus, & mesme auourd'huy on nomme encore en Suede quelques estoilles, la quenouille, & le fuseau de Frigga par vne tradition ancienne. On donnoit à ceste deesse vn arc & vne espee, à cause qu'en ces pays les femmes estoient nées à la guerre, & combattoient, comme i'ay dit, ainsi que les hommes. Outre ces trois diuinitez, ils en auoient plusieurs autres. Ils adoroient vn Methotim, qui auoit esté grand Magicien, qui auoit ordonné plusieurs ceremonies particulieres pour le seruice des dieux. Fro Satrape des dieux, fut aussi logé parmy eux, & adoré pres d'Vpsale: on luy sacrifioit des victimes noires, & on faisoit des jeux de nuict en son honneur toutes les annees. Ils adoroient encores Hollerc, qui fut grand guerrier, & si grand Magicien, qu'il vsoit d'un os couuert de caracteres au lieu de vaisseau pour passer la mer. Ils adioustoient à ceux cy Vagnost, Hadinge, & Rostioph de Finlande, à cause qu'il predisoit beaucoup de choses.

On met avec ceux cy Rostare, qui se pleust tant au sang humain, qu'on luy vouoit les ames de ceux, contre qui l'on faisoit la guerre. Il y en auoit encores beaucoup d'autres, qu'on estimoit enfans du grand Thoron, ou d'Othin.

Les Gots obseruoient en leurs sacrifices le nombre de 9. considerant peut-estre à la Pythagorique, que ce nombre impair qui vient de trois fois trois, deuoit estre preferé aux autres. Et de fait, Zamolxis, & quelques autres Philosophes leur pouuoient bien auoir appris cela. Et combien qu'ils rendissent tous les iours quelque honneur aux dieux, toutesfois ils les honoroient encores plus solemnellement chaque mois, leur sacrifiant durant 9. iours chaque iour neuf sortes d'animaux, adioustans encores à cela des victimes humaines. Et quant à l'homme qui deuoit estre sacrifié il estoit plongé tout vif dans vne fontaine, qui estoit là pres, & s'il y mouroit, on tenoit cela pour bon signe, & les Prestres le tirans de là, l'alloient pendre en vne forest qu'ils tenoient pour sacree, & croyoient qu'il auoit esté transporté entre les dieux.

Ils croyoient l'immortalité des ames, & qu'elles alloient en vn lieu plus agreable, où presidoit certain Dieu nommé Bleixe, à qui ils enuoyoit sur vn vaisseau à cinq rames, vn messager, auquel ils commandoient de demander à ce Dieu ce dont ils auoient besoin. Ils estoient tellement affectionnez au seruice de leurs dieux, que lors qu'ils oyoient quelque bruit en l'air, ils descochoient leurs fleches, monstrans qu'ils vouloient secourir leurs dieux, lesquels ils croyoient estre lors assaillis par quelques autres. Dauantage, ils auoient des marteaux d'airain, avec lesquels ils faisoient grand bruit, & imitoient le tonnerre.

Ils auoient aussi de coustume, lors qu'ils alloient au combat, d'immoler des cheuaux, & d'emporter les testes au deuant de leurs armes; & apres les victoires, ils sacrifioient aussi à leurs dieux, & faisoient des jeux en leur honneur. Leurs armes estoient l'arc & la fonde. Voila à peu pres ce qu'on peut dire des anciennes façons de faire des Gots, & de ceux du Royaume de Suede.

On pourroit rapporter icy les mœurs des Herules, Vandales, & Lombards, qui sont sortis de Scandie. Mais c'est assez d'auoir rapporté icy celles que les Gots & Suedois ont suivies, selon le recit de Iean le Grand Archeueque d'Vpsale.

^{11.} **L**es Suedois sont naturellement forts, robustes, & vaillans, tant à pied qu'à cheval, & sur la mer. Ils reçoivent les estrangers avec beaucoup de courtoisie, & eschangent avec eux leurs poissons, belles peaux, cuirs de bestes sauvages, & autres, leur beurre, leur suif, & leurs metaux.

Les paroisses sont esparées par les forests, & autres lieux plus couverts, où la commodité de bastir des maisons, d'avoir grande quantité de bois, & d'estre deffendus du vent du Nord, les retient plus volontiers, & ils ont en leurs maisons leurs troupeaux, & les artifices pour accommoder tout ce qui est nécessaire pour le viure, ou le vestement. Cela cause qu'on ne trouve pas en ce Royaume de si grandes villes, ny si peuplées qu'aux autres.

On use en tous les pays suiets à la couronne de Suede, de deux langues diuerses, à sçavoir de la Suedoise, dont on se sert en toutes les Prouinces de Suede, & en Gothie, Noruege, & Dannemarc. Surquoy l'on peut remarquer que la langue Saxonne approche fort du Suedois en plusieurs mots, comme le Flamand & l'Anglois. Apres il y a la langue Finlandoise, dont on use, non seulement en la grande Duché de Finlande (excepté en vne Prouince où la Suedoise se conserve & se pratique) mais encores en vne bonne partie des enuirs de Riualle, ville de Liunie; & les gens de qualité y parlent, & entendent la langue Allemande.

Les esprits de Suede sont assez propres à apprendre, non seulement les arts manuels, & les mestiers: mais encores les disciplines, sciences speculatives, & les langues, entre lesquelles, ceux qui tiennent quelque rang dans le pays, & qui sont qualifiez, apprennent communement la langue Allemande, ou la Latine, ou bien toutes les deux ensemble: & quand ils apprennent les autres, ils n'ont pas mesme difficulté en la prononciation, que les Allemands ont en l'Italienne, ou en la Latine.

Leurs mœurs sont communement simples, & telles que les peuuent auoir des personnes, qui n'ayans pas veu les grandeurs du monde, ny des choses qui leur aiguissent l'esprit, ou picquent leur volonté, vivent sans beaucoup de desir d'honneur, ou d'autre chose, estans contents de la nourriture naturelle: & pour ceste cause ils ne se soucient pas de cultiuer plus grande quantité de terres, que celle qui leur est nécessaire, veu que s'ils vouloient couper plusieurs grandes forests inutiles, ils recueilliroient grande quantité de grain, qui estant semé au mois de May, vient à estre moissonné en Aoust, à cause de la grande chaleur & force du Soleil qui est presque tousiours sur la terre. Mais quoy que ceste ancienne simplicité regne encore en plusieurs, toutefois depuis la venue des soldats estrangers, c'est à sçavoir des Allemands, Anglois, Escossois, & autres, ils ont perdu beaucoup de ceste naïfueré, ayans augmenté leur défiance naturelle: & leurs hostelleries ne sont pas ouuertes sans bourse deslier, comme elles ont esté quelquefois.

Il est vray que les voyageurs despensent fort peu, d'autant que les Suedois n'ont accoustumé de demander aucune chose pour le logis, ou les viures: & le plus souuent ceux qui voyagent, logent aux anciennes Cures, qui est vn signe de l'hospitalité qu'on y pratiquoit au temps que la Religion Catholique y regnoit: & il n'y souloit auoir nuls voleurs, & s'il y en a, c'est depuis qu'un grand nombre de vagabonds s'est allé rendre en ce pays, à cause de la guerre. Ils vsent de force bains, principalement aux villes où les personnes d'un & d'autre sexe, vont assez communement.

Les femmes y sont assez modestes & sages, comme celles qui s'abstiennent de l'yronnerie. Leurs viandes sont communement du grain de deux sortes. Ils sement l'un au mois de May, & l'autre au mois de Novembre. Ils cueillent en Aoust du seigle, qui est fort commun, & font diuerses sortes de pain, à sçavoir de grain pur & de grain mellé. L'orge qui y vient est assez bon, & pour ceste cause ils employent vne bonne partie de leur froment à faire la biere, qui est communement leur breuvage, combien qu'ils en ayent d'autres, dont les riches vsent, comme les vins du Rhin, d'Espagne, & de France, & le medon, appelé hydromel, & l'eau de vie.

Quelques pauvres gens en temps de cherté mangent du pain de farine faicte d'escorce de pin, & quelques autres de celle de sapin, qui estant de qualité plus chaude, ayde, comme on dit, à l'estomac, & non seulement ils en vivent, mais en deviennent robustes.

Ils ont de la chair en abondance, dont ils font la plus grande partie, comme des boeufs, pourceaux, oyes, & semblables animaux. Ils ne mangent presque iamais de veau, ils vsent de poisson frais, salé & fumé, & d'autre non salé durant le grand froid, & pareillement de faizans & de perdrix, dont la chair est plus dure, que celle des pays plus temperez. Ils au-

roient

roient des legumes en abondance, & de toutes sortes, s'ils y mettoient soin : mais ils n'vont gueres que de pois communs, ou d'autres qui sont comme des pois chiches, ronds & blancs, & de quelque peu de febues.

Le beurre & le fromage leur seruent pour l'entree & issuë du repas. Ils ne se soucient gueres communement du fruit, combien qu'ils ayent grande quantité de poires, prunes, cerises & fraises : & combien que les herbes y naissent trois ou quatre mois de l'annee, toutefois ilss'en soucient fort peu, sinon des choux, qu'ils salent & gardent pour l'hyuer.

L'habillement du menu peuple est simple, & presque pareil à celui du peuple de Lombardie, quant à la forme : toutefois ils vrent de bonnets, & autres habillemens de peau, mais c'est fort simplement.

Les femmes des villes, & principalement à Stokolme, portent sur leurs robes vn long manteau de drap noir, avec force plis.

Les Gentils-hommes sont vestus à l'Allemande, & quelques-vns de la Cour à l'Italienne, mais le plus souvent à la Françoisise.

Quand ils voyagent, les payfans portent pour leurs armes, des coignees en lieu d'espees. Les Gentils-hommes & leurs seruiteurs portent avec leurs espees, de petites arquebuses.

Leurs maisons (excepté les Eglises qui sont de pierre) sont de bois, mais beaucoup mieux faites que celles qui sont aux campagnes de Pologne. Toutesfois il y a des villes qui ont leurs maisons de pierre. On n'y vse pas proprement d'estuues, mais de cheminees, qui se peuvent, apres que le bois est reduit en charbons ardans, fermer avec vne lame de fer, qu'on peut pousser dedans, & retirer quand on veut, excepté en quelques lieux, où il y a des marecages.

Les Lapons sont petits, mais fort adroits. Ils manient l'arc des mieux : ils vrent d'habillemens estroits : en Hyuer ils portent des peaux de veaux marins, ou d'ours toutes entieres, les noient sur la teste, & n'y laissent de l'ouuerture que pour la veüe, ce qui a donné suiet à quelques-vns d'escrire qu'ils sont tous velus. Ils demeurent en des logis fort bas, qui sont couverts d'escorces d'arbres, ou de gazons, & mottes de terre.

Quelques autres disent qu'ils vivent sous des tentes, à la façon des Tartares. Ils sont grandement addonnez à la chasse, & à la pesche, & par ce moyen ils s'entretiennent, & font part de leur poisson à leurs voisins. Ils accommodent les vaisseaux, non avec des cloux, mais avec des nerfs & des crochers.

Ils ont vne langue particuliere, qui est fort malaisée aux estrangers. Ils sont grands sorciers, & font venir les vents, les nuees, & les tempestes, & font beaucoup de choses estranges. Il n'ont ny du pain, ny du sel, & ne vivent que de poissons & bestes sauvages. Ils sont d'un naturel amoureux & lascif, & ne se tiennent presque jamais en vn lieu.

Ils sont fort sauvages & soupçonneux, & fuyent l'abord des estrangers, se cachans si tost qu'ils les apperçoivent. Ils eschangent leurs peaux à d'autres marchandises. Ils commencent vn peu maintenant à s'appriuoiser, à cause de la frequentation des estrangers.

RICHESSES.

Les richesses de ce Royaume consistent en l'abondance des viures, qui y est fort grande ; car ils ont force grains, chair, poisson frais, salé & fumé, tellement qu'on n'y trouue presque vn seul mendiant, & les pailans estoient jadis, & sont mesme encores en plusieurs endroits logez presque pour neant.

Mais ses principaux thresors viennent des mines de plomb, d'airain & d'argent, & de quelque peu d'or ; & les premiers metaux s'y trouuent en si grande quantité, qu'on tient qu'il n'y a contree en Europe, qui deuançe en cecy le Royaume de Suede. On descouure ces mines par tout, bien que les payfans les cachent autant qu'il leur est possible, afin de n'y porter pas le bois necessaire, & de n'y travailler pas ainsi qu'ils sont obligez.

On tire de l'argent extremement fin du pays de Vestrors, & si ceux de la Prouince n'estoient tant ennemis de l'industrie des estrangers, leurs richesses seroient encor' plus grandes, pource que les Suedois ne scauent ny espargner le bois, ny recueillir la fumee des mineraux pour les couleurs, & ne trouuent pas bon qu'on descouure les veines des mines : & ce qu'ils fuyent les estrangers, procede non de haine qu'ils leur portent, mais de crainte d'estre deceus par eux, pource qu'ils sont fort simples en leurs mœurs, actions & manieres de faire, & peu travaillez d'ambition & d'avarice.

Quant aux reuenus du Roy, il y a quatre sortes de choses, qui font le corps de ses reuenus ordinaires, depuis que ce Royaume a laissé la Religion Catholique. Ses reuenus viennent donc des fruiets des biens Ecclesiastiques, des mines, des tailles, & des dismes des grains & autres viures, comme aussi des peaux, & finalement des gabelles, ou douanes.

L'ay dit depuis que les Suedois se sont distraits de la Religion Catholique, veu qu'auparavant l'Archeuesché d'Upsale, les autres six Eueschez, & beaucoup de Monasteres, possédoient de fort grands fonds, dont ils receuoient de bons reuenus. Mais les Ministres ont si bien ioué de la langue, qu'ils ont persuadé aux Roys de s'emparer des biens, meubles & immeubles, assignant de beaucoup moindres reuenus aux Euesques. Ce qui fit au commencement que l'on assembla vn grand thresor, qui tombant entre les mains du Roy Henry, fut dissipé en fort peu de temps par le moyen des guerres.

Les mines produisent de l'argent, dont on fait les talers de Suede, qui sont fort estimez pour leur bonté. Et pource qu'il s'y trouue de l'or en petite quantité, on y bat fort peu d'escus. Outre les talers, il y a des quarts & demy quarts de talers, & vne sorte de monnoye appelée Rosques, & vne moindre de demie rosques, ce qui signifie monnoye ronde, & vn taler en fait trente-deux. Or combien qu'ils abondent en cuiure, toutesfois on n'y bat point de monnoye de ce metal, excepté qu'on en met quelque peu dans les rosques.

On trouua pareillement, il y a quelques annees, certaine mine de sel, mais elle disparut apres, comme quelques vns pensent, par la nonchalance de ceux qui s'en deuoient prendre garde.

Le Roy a la dixiesme de toutes les mines où l'on ne traueille pas à ses despens, & pour ceste cause il paye les siens avec du cuiure & d'autres metaux: & si les paysans ne cachotent les veines de diuerses mines qu'on descouure tous les iours, & s'il y auoit vn nombre de bons & diligens maistres, on iuge que le profit qu'on en tireroit, monteroit à vne grande somme.

Outre cecy, le Roy a par tout son Royaume la taille & les dismes des grains, de seigle & d'orge, du beurre, des poissons, des bœufs, des peaux, & choses semblables, & on n'a peu sçauoir la somme de tout cecy, combien qu'on en tienne certain compte en la Chambre Royale & Thresorerie. Tant y a qu'il entretient non seulement l'armee & les officiers de mer, mais aussi les autres de terre ferme, & les officiers du Royaume, & de la Cour.

Quand le Roy doit faire la guerre pour la deffence de son Royaume, ou bien enuoyer des gens dehors, il le fait signifier aux Prouinces, qui fournissent la quantité de viures qui est necessaire.

Il y a toutesfois ceste difference en la contribution, que les nobles, ny leurs suiets ne contribuent ordinairement: mais quand on fait les contributions generales pour la guerre du consentement des nobles, leurs suiets ont accoustumé de payer la moitié de ce que ceux qui sont immediatement suiets au Roy, doiuent donner.

Le peuple est pareillement obligé de contribuer pour le dot de chaque fille du Roy, quand elle se marie, & la somme de ceste contribution a esté depuis long-temps, de cent mille talers, outre la vaisselle d'argent, & les ameublemens de sa maison.

Le reuenue des peaux est tantost plus grand, tantost plus petit, selon que les neiges sont grandes, ou petites, veu que tant plus il y en a, tant plus on a accoustumé de prendre de bestes.

Du pays des Lapons plus Septentrionaux le Roy tire la plus grande partie des peaux, & sa Maesté pour en sçauoir la verité, y enuoye tous les ans vn Commis, qui vsc de telle diligence à sçauoir combien on a pris de bestes, que le Royné peut estre trompé. Les peaux qui sont separees & choisies pour le Roy, sont distribuees en la Cour à ses parens & amis, & pour recompense aux Marchands, qui ont donné, ou doiuent donner des marchandises, pour l'usage de la Cour.

Le Roy n'a autre tribut de ces Lapons, d'autant qu'ils ne s'occupent qu'à chasser aux bestes, lesquelles ils changent apres en autres choses necessaires, combien qu'il y en a quelques vns qui traueillent de l'aiguille, & font de leur main plusieurs beaux ourages, qui montrent qu'ils sont ingenieux.

Il n'y a presque aucunes daces, gabelles, ou impositions, que celles des ports de mer. Il est vray que le Roy a accoustumé d'auoir de ceux du pays, qui ne luy donnent pas des viures à proportion de leurs biens, de qui cinq talers, de qui six, de qui huit, & dauantage par annee: & quand le Roy fait du bien à quelques vns, il a de coustume de luy octroyer certain nombre de paysans, comme suiets tributaires, à qui plus, & à qui moins, selon leur merite.

On comptoit en l'annee mil cinq cents septante huit, qu'on mettoit d'ordinaire au thesor du Roy toutes les anneés, en deduisant les charges extraordinaires, & les depenses, environ six ou sept tonnes d'or, dont chacune est prise pour cent mille talers d'Allemagne.

Toutesfois les seules forteresses de Riuaile & de Vibourg, qui sont sur les frontieres de l'Estat de Moscouite, coustent par an cent mille talers de depense. Beaucoup de personnes de iugement tiennent que le Roy auroit beaucoup plus de reuenue, si la disposition du temps, la multitude des artilans, & autres, eust esté telle qu'on la desiroit, veu que sa Majesté ayant beaucoup de vaisseaux, qui pourroient, pour la plus grande partie, voyager bien loin, l'on tient qu'il pourroit enuoyer aux autres pays, grande quantité de beaux arbres, & de matiere de navires, & beaucoup de grains, & en rapporter pour l'usage du pays du sel, & d'autres choses necessaires, que les marchands estrangers vendent au double de ce qu'elles valent, au lieu que d'autre sorte, on les auroit à beaucoup meilleur compte.

Semblablement on tireroit dauantage des mines, si l'on y employoit les estrangers, tant pour epargner le bois, comme j'ay desia dit, que pour d'autres choses. Toutesfois du seul airain qu'on tire en deux ou trois mines seulement, la dixiesme du Roy montoit l'an septante huit, à cinq cens squipons & dauantage, & la valeur de ces squipons est de trente mille talers.

Il est vray que l'on tire neuf fois plus de cuiure, mais cela s'en va au profit de ceux qui les tirent. Mais si le Roy veut satisfaire à ceux cy par vne autre voye, il peut retenir pour luy tout le cuiure & l'airain qu'on tire des mines: & pour ceste cause, il y a vn Surintendant du Roy, qu'ils appellent Faue, qui est comme son Facteur ou Commis general.

FORCES.

Chaque Prouince a ses gens de pied & de cheual ordinaires. Aux Royaumes de Suede & 14.
de Gothie, on compte environ trente-deux enseignes de gens de pied, & chaque Enseigne environ sept cens hommes. Ceux cy sont prests en toutes occasions, à marcher où il faut, & sont presque tous arquebusiers. On trouue bien peu de picquiers, à cause de la multitude, & de l'espaisseur des bois, qui les empescheroit de manier, ou porter leurs picques: & la caualerie pour la mesme raison, n'use aussi de lances, mais d'escopettes, ou de pistolets, à la façon des Reistres.

Ces soldats estans neés dans ces pays, & accoustumez aux viandes qui se conseruent, supportent aisement le froid, & ne se soucient nullement de la delicatelle, ou diuersité des viandes: Outre que chacun de ceux cy fait ses souliers, & ses habits, le bois des arquebuses, & autres choses necessaires. Et on a veu bien souuent au Chateau de Stokolme des soldats en sentinelle, qui veilloient avec vne grande patience durant les plus grandes froidures, sans estre releuez presque de toute la nuict, encores qu'en hyuer elle dure dix-huit heures.

Chaque compagnie a son Capitaine, son Lieutenant, & son enseigne. Le Capitaine mesme en temps de guerre quand on combattoit dans le pays contre le Roy de Dannemarc, ou le Moscouite, n'auoit pas plus d'un habillement l'année, avec quatre talers de solde, & l'exemption, tant pour luy que pour vn petit nombre d'autres, du tribut que l'on paye ordinairement au Roy.

Le soldat ne iouyt d'aucune exemption, si ce n'est randis que la guerre dure, ou que l'on est en quelque deffiance, & qu'à ceste cause on se tient en armes, & iadis il n'auoit autre paye par moys, que cinq parties d'un taler. Ainsi qu'ils marchent, les fourriers les departent, & logent en diuerses maisons: mais lors que tout est ensemble, & qu'ils marchent en bataille, ou qu'ils campent, le Roy leur donne des viures sans les faire compter sur leur paye, & si l'ennemy les prend, le Roy est coustumier de les rachapter du sien, & de payer leur rançon, & si quelqu'un perd vn cheual au combat, le Roy est obligé de luy en donner vn autre.

La Caualerie semblablement en chaque compagnie, qui est moindre en nombre, que non pas celle de l'Infanterie, a vn Capitaine, vn Lieutenant, & vn Enseigne, & l'on n'auoit accoustumé de donner aux hommes de cheual, que vingt talers par an, & vn habillement, avec les exemptions, & conditions, dont j'ay fait mention cy-dessus. Toutesfois, les Chefs des compagnies, & ainsi à proportion, les autres plus considerables, receuoient autant de payes, qu'ils auoient de seruiteurs apres eux, s'ils les suiuiant à cheual.

Il y a vnze compagnies ordinaires de Caualerie en Suede & Gothie, & deux en Finlande: toutesfois si le Roy en desire auoir vn plus grand nombre, il le peut bien aisement, pourueu qu'il y ait de l'argent.

En Finlande il y a deux compagnies, l'une de simples soldats, l'autre de Gentils-hommes : & le subiect pour lequel il y a peu de gens en vn si grand pays, c'est à cause qu'il est contraint de fournir la plus grande partie des mariniers, & gens pour seruir aux armées de mer, de mesme que sont encores quelques Prouinces plus Septentrionales, qui, ou pource qu'elles sont montueuses, & steriles, comme l'Angermanie, ou pource qu'elles manquent de chevaux, comme la Dalecarlie, sont subiectes à fournir l'armée de mer d'un bon nombre de mariniers.

En Smolande, en Vvestrogothie, & Ostrogothie, il y a quelques compagnies de Gentils-hommes à cheual, & la Vvestrogothie abonde en noblesse plus que les autres : & nul ne peut estre Capitaine de gens de pied, ou de cheual, s'il n'est noble.

Leurs chevaux sont vn peu moindres que les Frisons, mais puissants, & accoustumez à la peine, & à manger peu de chose.

L'ordre du Royaume est de faire toutes les années la reueuë de toutes ces compagnies, & d'aduertir les Seneschaux du lieu, & du iour, auquel elle se doit faire. Dauantage, en la Cour du Roy les Gentils-hommes seruoient en telle sorte, qu'il y en auoit tousiours trois cens & cinq, tous prests à monter à cheual avec leurs armes ; toutesfois les Conseillers, & quelques autres nobles, en estoient exempts. Il est vray qu'on donnoit aux Gentils-hommes qui seruoient, pour raison de leurs seruiteurs, quelque estat par chacun mois, & pour chaque seruiteur à cheual, l'on donnoit tous les mois au moins cinq talers.

Le Roy estant paisible, auoit ordinairement cinquante nauires de guerre, sous la charge d'un Admiral. En l'an mil cinq cens septante-huict, sept de ces nauires estoient comme de bons galions : les autres portoient enuiron cinquante pieces de canon de fonte, l'un portant l'autre.

Le Roy scait ordinairement où il peut prendre six mille mariniers, en comptant avec ceux-cy non seulement la chorme, mais encores les Officiers des nauires : & il en pourroit auoir beaucoup dauantage, d'autant que toute la coste de Finlande, qui est longue de plus de quatre cens milles, celle de la mer Bothnique, qui est presque au double, le riuage du Royaume de Suede, & quelques Isles, donnent continuel subiect aux gens de ces pays d'aller sur mer, & par consequent, de se rendre hardis & experimentez.

En la guerre que Iean troisieme Roy de Suede, eut avec le Roy de Dannemarc, adant que leur accord fut fait à Stretin, le Suedois mena septante nauires, outre plusieurs autres bons vaisseaux, & outre la caualerie qu'il auoit en terre ferme, il auoit sur les nauires dix-huict mille hommes, qui lors qu'il en estoit temps, prenoient terre pour combattre, pource qu'en ces contrees on a de coustume de combattre en hyuer sur la glace, tant pour la facilité de passer les lacs & les fleuves glacez, qu'à cause qu'on porte alors les viures plus aisément, & l'Esté l'on combat sur la mer.

La façon d'entretenir ce nombre de mariniers, couste vne grande somme d'argent au Roy : mais du tribut que les Prouinces luy payent, il leur distribue de la chair, du poisson, du beurre, du seigle, & de l'orge, sur la plus grande partie des payes.

De là vient que le Roy peut mettre en mer à peu de frais quelques vaisseaux de guerre toutes les années, d'autant qu'il ne donne aux mariniers que des viures, au lieu d'argent, & toutesfois ils en sont beaucoup plus contens que du reste, comme gens à qui il suffit d'auoir leurs necessitez, outre que le Roy a plusieurs beaux bois, & des mines abondantes en fer & en airain, dont quelques Eglises sont mesmes couuertes : tellement que le Roy Iean III. disoit, qu'une guerre qui coustoit vn million au Roy d'Espagne, ne luy reuenoit pas à cent mille talens.

La quantité des mines fait encores qu'en ce pays là il y a grand nombre de canons, tant aux forteresses, que pour armer les nauires. On a compté au seul Chasteau de Stokolme, quatre cens pieces, partie doubles canons, partie couluerines, & autres moindres, & l'on peut iuger par là quel nombre il y en auoit en tout le Royaume.

Les plus grands vaisseaux sont au port de Stokolme, & y demeurent assurez sans ancre, pource que depuis la haute mer, iusques à Stokolme, on nauige entre des escueils enuiron quarante milles d'Italie. On compte ordinairement en ce port, lors que la glace est desia fonduë, & que les vaisseaux estrangers arriuent, de deux à trois cens nauires.

Les autres nauires sont en quelque port de Suede, mais beaucoup plus en ceux de Finlande, pour faire teste au Moscouite, & pour empescher qu'on ne luy porte d'Allemagne, ou d'autres endroits, des choses qui luy donnent plus de moyen de nuire à la Suede.

Il y souloit auoir en ces pays beaucoup de forteresses, mais par diuers accidens de

guerres, par diuerses deffiances, & autres occasions, il y en a eu beaucoup qui ont esté rui-
nees; combien toutesfois que depuis la guerre de Sigismond Roy de Pologne, & legitime
heritier de Suede, fait à son oncle Charles iniuste vlturpateur de ce qui luy appartient, l'on
en a dressé vn grand nombre.

Les principales qui sont auourd'huy en estre, sont celles qui s'ensuiuent. Vers la mer
d'Ouest à Elsbourg, place proche du lac de Venus, il y a la forteresse d'Elfelsbourg; & non
loing de là encores deux autres, dont l'une est nommée Goltbourg, comme qui diroit, cha-
steau d'or; & l'autre Croneberg.

On voit apres vers la mer Baltique, & six lieues loin de Scanie, Prouince du Royaume
de Dannemarc, le Chasteau & la place de Calmas, & en Ostrogothie le Chasteau de Vasse-
ne. Il y a la forteresse de Borizolomie en l'isle d'Vlande, puis celles de Scechorgue, Nico-
pie, Vicerbin, Gripselmie, & le chasteau d'Vpsale. On voit encores les forts Chateaux de
Stokolme & d'Ourbou, qui en est esloigné d'onze lieues. Ce sont les forteresses que l'on
compte au Royaume de Suede.

Quant à celles de Filandre, il y en a vne en la ville d'Abe, vne autre plus auant appelée
Elsingofors, vne autre à Tauastie appelée Iaffausthaans, qui signifie mesme chose, que mai-
son de Tauast. Elle est encores appelée Hiler, c'est à dire, Chasteau-neuf. Il y en a aussi vne
à Vibourg, ville proche de Moscouie. Il y a encores en Liuonie le Fort de Riuaile, & outre
ce, celui d'Ennuessel.

Le Roy de Suede confine du Ponant avec le Roy de Dannemarc, & du Levant avec le
Moscouite. Les Suedois ont receu beaucoup de dommages des Danois, veu qu'entre les
autres Christierne I. assiegea Stokolme, la força de se rendre, & vñant d'une extreme cruau-
té à l'endroit de ses habitans, la remplit de sang & de corps morts.

Leur hayne procede des pretentions que le Roy de Dannemarc a sur la Suede: mais le
moyen de la molester ainsi, vient de la commodité des lieux & des ports, principalement de
l'isle de Gotlande, qui est membre de la Gothie. A raison dequoy les Suedois pretendent
qu'elle est de leur domination, & qu'ils y ont droit. Mais depuis que Gustaue eust recou-
uré le Royaume, & que Henry & Iean ses fils l'ont gouverné l'un apres l'autre, combien
qu'il y ait eu de grandes guerres entre les Danois, & Gustaue, toutesfois ce Royaume s'est
bien maintenu, & la ville de Lubec, qui est fort puissante en ces mers là, se mettant tantost
d'un party, tantost de l'autre, contrebalancer tellement les forces de ces deux Roys, qu'elle
ne permet que l'un ny l'autre s'aggrandisse excessiuement, à cause du danger auquel elle se-
roit aussi tost reduicte.

Le Suedois fait la guerre au Moscouite avec plus d'auantage, pource que Finlande, qui
confine avec la Russie par le moyen des lacs & marecages dont elle est pleine, a ses entrees
malaisées & dangereuses, & il est arriué plus d'une fois que les armées des ennemis se sont
perduës en ces eaux glaces.

Dauantage, le Suedois est coustumier de tenir en ces mers là la pluspart de ces vaisseaux.
Il y a la forteresse de Vibourg, qui est extrêmement bien munie. Il a encores aux confins du
grand Duc de Moscouie, Narue, & Riuaile, dont nous auons parlé cy-dessus, & quel-
ques autres places, par le moyen desquelles il le bride, & en verité l'on doit estimer bonnes
les forteresses qui se maintiennent dans les terres d'autrui, d'autant qu'elles deffendent leur
pays, & trauaillent celui de l'ennemy, & deffendent tant mieux le leur, qu'elles s'en trou-
uent plus esloignées, pource que tandis que l'ennemy prend beaucoup de peine apres elle;
le pays amy demeure paisible, & par ce moyen l'on conserue les gens & l'argent, & l'on fait
les provisions qui sont requises pour les secourir & maintenir.

Dauantage, elles trauaillent tant plus l'ennemy, qu'elles en sont plus voisines. Mais les
forteresses qui sont en son pays, ne font que deffendre le sien, & le deffendent avec vn fort
grand aduantage, pource que toutes les fois qu'elles sont attaquées, il est force que les pays
endurent de fort grands dommages, & que son estat soit plein de troubles & de bruit, &
exposé en proye aux ennemis.

Mais pour reuenir au Roy de Suede, il a autant d'aduantage sur le Moscouite, pour la
deffence de ses estats, que les forces maritimes ioinctes à celles de terre ferme, en peuuent
apporter contre vn Prince qui n'a point de forces sur la mer.

G O V V E R N E M E N T.

POur discourir du gouvernement de Suede, il faut sçauoir que les affaires de ce Royau- 17.
me estans paisibles, il est gouverné par vn Roy, qui ayant esté cy-deuant electif, fut fait
hereditaire au temps de Gustaue.

Le Roy a ordinairement 12. Conseillers, & outre cecy, plusieurs autres Officiers, pour ce que ce Royaume est non seulement diuisé, comme i'ay dit, en Prouinces, Duchez, & Comtez : mais encores chaque Prouince est diuisée en Territoires, ou Distracts, & Iurisdicions, qui comprennent quelques Paroisses, qui plus, qui moins, & chacune d'elles a son Lansman, ou Consul. Apres cela chaque Territoire a son Vicomte, qui est comme vn Podestat d'Italie.

Il y a par dessus les Vicomtes d'autres Officiers, qui sont comme les Seneschaux de France, appelez par les Suedois, Lamans, comme souverains Iuges : de sorte qu'on appelle des Vicomtes à ces Lamans, & des Lamans au Conseil du Roy, & de ce Conseil au Roy-mesme. Ces Lamans visitent vne partie de leur iurisdiction chaque annee, iusqu'à ce qu'ayant acheué de faire leur visite entiere, ils la recommencent, & de mesme que cecy ayde à cognoistre plus clairement l'estat des affaires, & à y mettre vn plus present remede : aussi apporte-t'il du soulagement au peuple ; veu qu'ils exigent le tribut des paroisses qu'ils visitent vne annee, sans en charger les autres.

Or les territoires estoient autrefois departis en telle sorte, qu'à chaque centaine de familles qui habitoient hors les villes, on assignoit comme vn centenier, ou moindre Iuge, qui en certain temps de l'annee, encores qu'il ne face pas sa demeure parmy eux, leur va pourtant administrer la iustice : & le Roy, selon la valeur & le merite des personnes, donne quelquefois à vn de ces Iuges deux cents familles. Toutes ces charges sont donnees à des hommes, partie nobles, & partie qui meritent tels offices par leur esprit & preud'homme.

Le Lansman, ou Consul de chaque paroisse est ordinairement pris du corps des payfans mesmes, & aux occurrences il a recours au Vicomte, & aux autres choses, ce Lansman a charge de se trouuer au lieu où le Roy fait sa demeure, lors qu'il mande les deputez de quelques Prouinces, afin d'ouyr ce qu'il faut faire, & cecy arriue coustumierement presque vne fois toutes les annees.

Le Lansman a encores la charge de faire que les voyageurs soient adressez aux logis, & qu'on les pouruoye de chevaux, ou de Sletes en temps de glace, ou de neige : ces Sletes sont de petits chariots sans roues.

Les Vicomtes ont peu d'estat, veu qu'ils reçoient des Exaeteurs Royaux, qui sont disposez par tout le Royaume, vn habillement toutes les annees, outre quarante talers pour hommes : toutesfois ils ont des exemptions, des presens, & choses semblables.

La Smolande seule, qui confine avec le Royaume de Dannemarc, & est vne Prouince assez ample, a enuiron cinquante deux Vicomtes, où sont les plus vaillans hommes de Suede, & quelquefois elle s'est mutinee avec trente mille hommes propres à porter les armes.

Quant à Stokolme, il faut sçauoir que la ville mesme fait 4. Consuls pour son gouvernement politic & ordinaire. Ceux cy demeurent en cet estat toute leur vie. Deux d'entr'eux precedent successiuement les autres toutes les annees, & tous quatre (combien qu'assistent de quelques vns, qu'ils nomment Senateurs, & qui sont Bourgeois) s'assemblent, & deliberent des choses de la police. Neantmoins ils distribuent entr'eux quelques charges particulieres, comme des bastimens, de iuger, & de publier les nouvelles ordonnances : ce qui ne se fait toutefois sans que le Lieutenant du Chasteau de Stokolme y interuienne, & ce Lieutenant est par dessus les Consuls, & aux faits de consequence, les Conseillers du Roy qui se trouuent à la Cour, renuoyent les matieres.

Le nombre des Senateurs qui assistent les quatre Consuls, est de douze, l'office desquels dure toute leur vie, sinon qu'ils fussent desmis pour quelque faute, ou qu'ils recherchassent d'en estre deschargez pour d'autres causes.

18. Les loix dont ils vident generalement sont anciennes, & depuis le temps de saint Henry Roy de Suede, elles ont duré iusqu'à present en ce Royaume, excepté les loix Ecclesiastiques, qui demeurent toutesfois incorporees avec les autres, & quand le Cardinal Raymond alla en ces pays du Nord, l'on y adiousta vn article, qui est appelle Ecclesiastique, auquel on a declare que les enfans des Prestres, ou Moines, seront tenus en pareil degre, que ceux qui sont nez d'adultere.

Les loix de Suede ne font particuliere mention d'aucune usure, sinon au cas qu'un debiteur fust pressé par plusieurs creanciers de payer ce qu'il deuroit ; & si quelqu'un des creanciers auoit presté au debiteur avec quelque pache d'interest, le creancier perd le droit de luy demander la dette ; & mesme on a de coustume de punir non seulement l'usurier, mais encores celui qui s'embrouille avec des gens de ceste sorte.

Et toutesfois d'autant qu'en ces Royaumes on ne souloit prester que gratuitement, ce vice n'est pas frequent, si non à Stokolme, où plusieurs ont porté cestemeschanceté d'Allemagne, avec beaucoup d'autres.

L'adultere y est puny de mort, & beaucoup plus irremissiblement si vn homme marié le commet avec vne femme mariée, pource qu'on le met alors au pouuoir du mary, afin qu'il soit chastié: & s'il n'est marié, on le condamne pour la premiere fois à vne grande amende pecuniaire. Mais il arriue peu souuent qu'estant surpris la seconde fois, il n'ait la telle tranchée.

Celuy qui bat vn autre, paye cinq talers d'amende: & s'il luy coupe quelque partie, comme vn doigt, ou autre chose, il paye le double: & s'il demeure estropié de quelque membre, on donne entiere reccompense. S'il blesse en la teste, ou en la poitrine, & que le blessé meure auant la fin de l'année, celuy qui a blessé est condamné à mort comme homicide. Les corps de ceux qui ont esté ruez, si le criminel n'est present, ne sont enterrez iusques à tant que l'on aye fait mourir le meurtrier, combien que plusieurs semaines se passent quelquesfois, sans qu'on en puisse faire l'execution.

On impose peine au iuge, qui estant requis pour la seconde fois, de donner sentence diffinitive, la differe, & par ce moyen les procès n'y sont nullement menez en longueur.

Cecy procede presque d'une ancienne ordonnance, par laquelle il est deffendu d'auoir ny Procureur, ny Aduocat: tellement que chacun propose son fait deuant le Iuge.

Mais si c'estoit vne vesue, ou vn pupil, ou vne personne insensée, ou du tout lourde & grossiere, le plus proche parent en poursuit le procès, & s'il n'y en a point, le Senat cree vn Tuteur, & l'affaire s'expedie en peu de temps. Il est vray que le Iuge est excusé pour quelques circonstances, quand il estime avec raison qu'il ne peut prononcer si tost la sentence.

Quant aux Officiers establis sur les reuenus du Roy, il y a premierement vn Commissaire, qui signe les mandats de tout ce qui est assigné pour pension ou gages à chaque Officiers. Et combien que le Commissaire general ne manie pas l'argent, à raison dequoy ses heritiers ne sont en danger d'en rendre compte, toutesfois on ne paye aucuns gages, ny aucune pension, sans signature.

Ce Commissaire general a sous luy vn Tresorier qui reçoit l'argent du Roy, le garde le met au thresor du Roy, & en tient compte. Avec ce Tresorier, il y a dix Chambriers, ou maistres des Comptes, qui ont & tiennent en la secretaireie les registres de tous les reuenus du Roy, & ceux-cy s'assemblent avec le Tresorier, selon les occurrences, & rendent compte toutes les années deuant le Commissaire general, & en presence aussi de quelques Conseillers du Roy: & le Tresorier en chaque Prouince, diuers exacteurs qui luy portent des tailles, & tout ce qui appartient au Roy, qui est apres mis au thresor.

R É L I G I O N.

LE Roy Gustaue sollicité par vn certain Olaus, Pierre Nenicius Lutherien, & par vn Laurens André Archidiacre de Srenge, mais desia peruert, & infecté d'heresie, introduit la secte de Luther en Suede, pour le desir qu'il eust de s'approprier les biens de l'Eglise à son nouveau aduenement à la Couronne. Tellement qu'il s'empara de tout ce qu'il voulut, & fit vne ordonnance, par laquelle il fut dit que les Eueques ne possederont que ce qu'il plairoit au Roy.

Il mit les Vniuersitez de son Royaume entre les mains des Lutheriens, deffendit à tous d'aller estudier hors du Royaume, excepté à Vvitemberg, & en quelques autres Academies heretiques, en faisant brusler les anciennes Librairies, & porter en son Royaume force liures heretiques, & traduire en langue vulgaire la Bible, avec postilles, & des interpretations fausses, & faictes à plaisir: tellement qu'il abolist en ses Estats la foy Catholique, & aduança l'erreur de Luther autant qu'il luy fut possible. Toutesfois le Caluinisme s'espandit aux pays sujets à Charles III. fils du Roy Gustaue, Duc de Vermelande, de Sudermanie, & de Nericie, Henry fils de Gustaue, & son successeur plus proche, n'y mist nul remede. Iean son frere, qui luy succeda, ayant bon entendement recognoissoit assez cet erreur, & lisoit les liures des anciens Peres: mais de crainte de quelque reuolte, & de son frere Charles, il ne s'osa decouvrir entierement. Toutesfois la conuersation de sa femme Catherine, fille de Sigismond Roy de Pologne, luy fist garder beaucoup de coustumes Catholiques, veu qu'il obseruoit le Carisme, s'abstenoit le Vendredy de manger de la chair, conserua le Monastere de Vasilene,

Si iij

porta beaucoup d'honneur à sainte Brigide, & luy donna vne châsse d'argent, de mesme qu'aux os de saint Henry Roy de Suede, lesquels il fit porter aux Prestres Catholiques en l'Eglise d'Upsale, reprocha bien souuent aux Ministres Lutheriens & Calvinistes, leur ignorance, leur erreur & effronterie, redressa les Eglises qu'il auoit abbatuës, & mesme il fit refaire l'Autel d'où il se souuenoit auoir veu distribuer au peuple la sainte Eucharistie. Il enuoya premierement vn Ambassadeur à Pie quatriesme, puis à Gregoire treiziesme, laissa l'exercice de la foy Catholique libre à la Reyne, & luy permist de nourrir aussi Catholiquement Sigismond leur fils, qui est aujourd'huy Roy de Pologne, & legitime heritier de Suede. Mesme la Reyne obtint quelques Iesuites pour la consolation, & pour l'assistance des peuples. Ces Iesuites firent quelque profit iusques à la mort de la Reyne, qui aduint l'an mil cinq cets octante trois. Et bien tost apres ils furent chassés du Royaume: de sorte qu'il y a bien peu de reste de la Religion Catholique. Et aujourd'huy que Charles oncle de Sigismond usurpe sur son nepueu le Royaume de Suede, il a du tout aduancé l'erreur de Calvin, duquel il suit l'opinion: de sorte que les habitans des Prouinces qui le recognoissent, sont deuenus presque tous Calvinistes, toutesfois il y reste beaucoup de Lutheriens.

ROYS DE SVED E.

Iean Olaus le grand, fait vn long denombrement des Roys de Suede, dont les noms seroient ennuyeux. Il me suffira doncques de commencer, comme quelques autres, par

Sichtrug, qui fut Roy de Suede, long-temps avant la natiuité de Iesus-Christ, & fut tué par Gran, Roy de Dannemarc, qui mist ce Royaume sous son obeyssance: mais Suibdager Roy de Noruege, vainquit Gran, & fut Roy de Noruege, Suede, & Dannemarc.

Hasmond son fils luy succeda au Royaume de Suede, & de Noruege.

Vffo fut successeur de Hasmond.

Hindin regna apres luy, puis

Hunding.

Regnier fils de Hunding.

Hontbrod fils de Regnier, sous qui le Royaume de Suede fut soubmis aux Danois.

Atisle & Hothier ses fils recouurerent le Royaume de leur pere, moyennant certain tribut qu'ils deuoient payer: mais Rolfo Roy de Dannemarc vainquit Atisle, & mit la Suede sous son obeyssance. Lors Hiartuar, natif de Suede, gagna tellement les bonnes graces de ce Roy, qu'il luy octroya le pays de Suede en tiltre de Duché, à condition de certain tribut, & pour le rendre plus fidelle, il luy bailla sa sœur en mariage. En fin Hiartuar tracha la teste à Rolfo, & les Danois tuerent Hiartuar. Lors Hothier frere d'Atisle se mit en possession du Royaume, & rangea le Dannemarc sous son obeyssance, mais il en fut chassé par Baldeer.

Or laissant icy quelque temps, auquel les Suedois n'ont rien fait de memorable, ie viendray au temps d'Auguste, auquel Abric estoit Roy de Suede.

Eric son meurtrier luy succeda du temps de nostre Seigneur Iesus-Christ.

Haldan fils d'Eric regna apres luy, & fut tué.

Siuard son fils luy succeda.

Apres luy Eric fils de sa fille, & de Froton Roy de Dannemarc, regna en Suede.

Eric fut tué en guerre, & eut pour successeur

Haldan, qui ne se souciant d'auoir des enfans, declara pour son successeur

Vnguin, qui laissa à son fils Siluad les deux Royaumes de Dannemarc, & de Suede.

Regnaud fut Roy apres Siuald, puis

Aluier, qui estoit l'un des plus grands Seigneurs de Suede.

Iugo fils aîné d'Aluier.

Ingel frere d'Aluier.

Riugo fils d'Ingel succeda, estant encore enfant: il eut pour successeur

Gotar qui fut tué en guerre par les Danois.

Iarmeric fut apres luy Roy de Dannemarc & de Suede, enuiron l'an de grace trois cents octante.

Il faut icy faire vn grand sault par faure de bonnes & veritables histoires, veu que ie passe de Iarmeric iusqu'à Froto, qui tenoit le Royaume de Suede, lors que Louys fils de Charlemagne, estoit Empereur: cestuy cy fut tué par des femmes de Noruege.

Herot,

Herot, ou Gerot.

Sort, qui fut vaincu par Regnier Roy de Dannemarc, & laissa le Royaume à

Biorn fils de ce Regnier, qui eut pour successeur

Vvichfert son frere.

Eric troisieme fils de Regnier.

Ostene le tua, & succeda au Royaume: mais les freres d'Eric vengerent sa mort & chasserent Ostene, & le Royaume escheut à Strubiorn fils du Roy Biorn.

Eric fils d'Olaue, nepueu de Regnier, chassa Eric, & devint Roy de Suede.

Eric son fils luy succeda, & fut le premier des Roys de Suede qui receut publiquement la Religion Chrestienne, & en son baptisme fut nommé Jacques.

Cela aduint l'an de salut 1000. au temps de l'Empereur Henry.

Esmond frere bastart de Jacques seulement Chrestien de nom, luy succeda.

Stinkel bon Roy & bon Chrestien regna apres luy: il abolit l'idole que le peuple adoroit en la ville d'Vptale, & mourut enuiron l'an 1100.

Depuis il y eut deux Henrys, ou Erics, qui debatirent le Royaume longuement, & en fin s'entretuerent l'un l'autre.

Halstene fils de Stinkel premier regna apres leur mort: mais il fut bien tost chassé par la mutinerie du peuple.

Anaximandre fut lors esleu Roy, mais pour ce qu'il ne vouloit rien quitter de la rigueur de la Religion, il fut chassé, & Aquin mis en sa place.

Magnus fils de Nicolas Roy de Dannemarc, luy succeda.

Suerco.

Charles son fils.

Eric regna apres Charles, & vescu iuques à l'an de salut 1249.

Birgier.

Valdemar succeda à Birgier, & ainsi qu'il estoit au voyage de la terre sainte, son frere Magnus s'empara du Royaume, & ne le rendit iamais tant qu'il vescu.

Birgier fut son successeur, & associa son fils Magnus au royaume, & pour ce que ses freres luy auoient donné beaucoup d'ennuis, il les fist tuer apres les auoir festinez. Ce fait esmeut contre luy les Princes & Seigneurs du pays, qui le chasserent avec sa femme, & firent trancher la teste à son fils Magnus. Lors ils firent Roy

Magnus fils d'Eric, à qui Birgier auoit fait trancher la teste. Cestuy-cy adiouta la Noruege au royaume de Suede, & mourut l'an 1316.

Magnus son fils luy succeda en ses deux Royaumes: il fut en fin demis.

Albert fils du Duc de Meckelbourg, est mis en la place de Magnus septiesme. Cestuy-cy fut pris avec son fils Eric, par Marguerite femme d'Aquin fils de Magnus, & detenu sept ans prisonnier, & lors Marguerite devint Reyne de Suede, Noruege, & Dannemarc.

Eric Duc de Pomeran, fils adoptif de Marguerite, luy succeda en ces 3. royaumes: mais en fin il fut contraint de quitter tout, & se retirer en Prusse.

Christophe Prince Palatin, & Duc de Baviere, nepueu de cet Eric de par sa soeur, fut esleu Roy de trois royaumes, d'un commun accord de tous les grands Seigneurs des trois pays.

Après la mort de Christophe, les Suedois voulurent auoir un Roy à part, qui fut de leur nation, & esleurent Charles Canut, qui n'estoit pas de fort noble race. Cestuy-cy ayant regné presque sept ans, commença à cognoistre qu'il s'estoit rendu odieux à chacun, & pour ce ayant mis le thesor du royaume en lieu seur, & estant monté sur un nauire, il se retira à Dantzic. Lors les Seigneurs du royaume appellerent Christierne pour estre leur Roy. Ce Christierne auoit esté esleu Roy de Dannemarc & de Noruege, & par ce moyen ces trois royaumes furent derechef sujets à un Prince. Les Suedois luy firent longuement la guerre, à cause qu'il n'auoit gardé les conuentions en sa reception, qui fut l'an de grace mil quatre cents soixante neuf, de sorte qu'il fut en fin chassé de Suede, où il luy resta seulement deux fortresses. Sur ces entrefaites, Charles qui auoit esté autresfois Roy, vint à mourir.

Iean fils de Christierne, apres auoir longuement fait la guerre à la Suede, rangea ce royaume sous son obeyssance, mais il en fut apres chassé, & en partit secretement.

Christierne fils de Iean continua d'un grand courage les guerres que son pere auoit commencées, & sur tout, rascha de se faire Roy de Suede: mais quand il vit que les Suedois le repoussioient, & se deffendoient vaillamment, il y voulut proceder

par ruse, tascha de les des-vnir, & sollicita principalement vn certain Gustaue, ou Gostaue, qui se disoit Archeuesque d'Vpsale. Cestuy-cy l'an mil cinq cents dix-sept, en gaigna plusieurs, & les fit retoudre de liurer le Royaume entre les mains de Christierne. Apres quelques guerres Gustaue est despouillé de son Archeuesché, & lors que Christierne vint avec vne grande armée, & en fin apres auoir eu du pire, fist trefues avec ceux de Suede pour sortir de leur Royaume. Il reuint apres mettre le siege deuant Stokolme, & y estant entré par composition, fist meurtre cruellement les Senateurs, & les citoyens.

Gostaue fils d'Eric, autre que le meschât Archeuesque d'Vpsale, s'estât sauué de Dänemarc, où il auoit esté emmené entre les autres ostages que le Roy Christierne auoit receus par finelle de ceux de Stokolme, commença à se declarer Protecteur du pays, & le quatrieme an apres la guerre commencée, il s'habilla en pauvre homme, & s'en alla par tout le pays remonstrer sa misere au peuple. En fin il chassa les Danois, & fut couronné Roy de Suede.

Eric, ou Henry son fils, luy succeda, & pour ses mauuais deportemens fut mis en prison par ses sujets, & y mourut.

Iean son frere, & fils de Gostaue, Prince lettré, & de bon entendement, regna apres luy.

Sigismond fils de Iean luy a succédé, sans iouir toutesfois paisiblement du Royaume de Suede, dont il possède seulement vne partie, debattant le reste contre son oncle le Duc Charles, qui le luy vsurpe, aigrissant principalement les Suedois contre luy, qui est Catholique, par le moyen des sectes de Caluin & de Luther qu'ils ont embrassées.

Or comme parcy deuant les Polonois ont eu de cruelles guerres avec les Suedes, dont le Roy retient les Prouinces qui luy appartiennent, finalement ils ont désiré de part & d'autre respirer quelque peu par vne suspension d'armes, & vne trefue qui a esté entre les deux Roys de Pologne & de Suede de la teneur qui suit.

Nous Commissaires deputez par autorité Comitiale des sacrées & Royales Maiestez de Pologne & de Suede nos tres-clement & debonnaires Seigneurs, & de la tres-Illustre Republique, du Royaume & grand Duché de Lithuanie, nous faisons sçauoir & tesmoignons à tous ceux qu'il appartiendra ou pourra appartenir que comme auparauant qu'en l'assemblée des Commissaires de Pologne & de Suede les droicts eussent esté receuz, & qu'il eust esté accordé, que l'on donneroit de nouveaux Commissaires de part & d'autre qui entreprendroient & poursuuiroient derechef le traité de la paix, nous insistans sur ces choses, nous sommes conuenus avec les Commissaires du tres-illustre Prince le Seigneur Gustaue Adolphe du Royaume de Suede, Jacques de Legordie-Senateur du Royaume de Suede & Marechal de Camp & general des armées, & magnifiques Seigneurs Henry Flemming des Lieûs & Erbe, chef de la milice de Finnonie, le Seigneur Adam Schraffer de l'Alpe & Vvest font Commissaires en Estone aux limites de la forteresse de Dales. Et comme en cette assemblée on ne peut pas de prime abord agir d'une paix ferme & assurée, craignant que le fil commencé de la concorde ne se rompit expirant la cessation d'armes, & que toute esperance de paix ne fut rejetée & mesprisée, selon le pouuoir & le mandement que nous auons receu de nostre tres-serenissime Roy & Royaume de Pologne & grand Duché de Lithuanie, nous aurions prolongé vne autre cessation d'armes constituée sur la premiere commencée le premier Iuin l'an 1624. & prolongée iusques au dernier Mars stil vieil del'année 1625. sur ces conditions suivantes.

La premiere que les Trefues seroient prolongées depuis ledit temps premier Iuin 1624. entre les principaux des nostres, nos Royaumes de Pologne & de Suede & entre les Prouinces, Camps, armées, & sujets tant d'un party que d'autre iusques audit iour dernier Mars de l'année 1625. stil vieil, & promettons que la Sacrée & Royale Maiesté Sigismond nostre tres-clement Seigneur & tous les ordres du Royaume de Pologne & du grand Duc de Lithuanie, garder & conseruer iusques à l'issuë dudit iour prescript ces Trefues par nous permises & establies sainctement & religieusement.

Or il a esté ordonné & arresté entre nous, qu'il ne s'excitera aucune guerre de part ny d'autre auparauant qu'elle ait esté denoncée en stil vieil deux mois auant le premier iour de Iuin, auquel temps la partie qui sera aggressiue & voudra recommencer la guerre, le denoncera par vn Herault d'armes, par lettres publiques & par vn trompette, selon la coustume & la forme militaire à l'autre partie.

Or nonobstant la susdite denonciation de la guerre, les trefues ne laisseront pas de de-

meurer fermes, & seront iusques audit premier iour de Mars de l'an mil six cents vingt cinq, itil vieil.

Que s'il n'os' est fait legitiment aucune declaration, ny aucune publication de guerre, ny de part ny d'autre, alors en vertu des conditions que dessus, ces mesmes trefues se doiuent obseruer sainctement & inuiolablement prolongées & estenduës iusques au premier Iuin de l'année suiuaute, sçauoir 1626. avec les mesmes articles & conditions qu'elles ont esté faites. Par apres en ceste cessation d'armes, toutes choses demeureront au mesme estat qu'elles s'ont maintenant, & ce que l'un & l'autre party possèdent à present, se tiendra & conseruera paisiblement sans aucune nuisance ny aucun empeschement d'une partie à l'autre, sans tort ny iniures, sans incursions, trahisons, ny machinations manifestes ou cachées.

Nous promettons en 3. lieu & protestons de franche volonté que nostre Roy serenissime, le Royaume de Pologne & le grād Duché de Lithuanie qu'ils ne feroient aucun acte d'hostilité ny aucune expedition ou entreprise de guerre, manifestement ny secrettement iusques audit iour prescript de l'expiration desdites trefues, ny par mer ny par terre, cōtre le Roy de Suede, le grād duché de Finlādie, cōme aussi cōtre les lieux de Liouonie qui s'ont maintenāt soumis à la puissance de Suede, cōme aussi contre les autres Prouinces, villes, citez, ports, sujets, ny mesmes aux pays, territoires, & haures du Royaume de Pologne, du grand Duché de Lithuanie, ou ailleurs: tous preparatifs d'actes d'hostilité qui auroiēt esté faits en quelque autre endroit contre le Royaume de Suede, durant ceste cessation d'armes seront semblablement defendus.

En quatriesme lieu afin qu'il soit traicté avec plus de puissance & de commandement d'une paix ferme & stable; ou des trefues de plus grande estendue de temps, & que cette affaire soit faite cependant par meilleure Commission de temps, nous supplierons la serenissime & Royale Maïesté nostre tres-Clement Seigneur surcecy, & si cela s'obtient, comme aussi du lieu, du temps & de l'enuoy, l'illustre Seigneur le Palatin de Micislafue en rendra certain au plustost l'illustre Seigneur le Comte de Suede General d'armées.


En tout euenement toutesfois qui pourroit se trouuer en la nouuelle Commission commencée, il n'y aura rien qui deroge ou qui preiudicie à la presente suspension des armes: mais au contraire elle demeurera en sa force & vertu, iusques à ce que le terme prefix pour reprendre les armes, arriue.

Mais aussi si ladite Commission (Dieu aydant) se recommence & qu'il soit conuenu entre les Commissaires auant ledit iour dernier Mars, de l'an 1625. alors, sans attendre aucun terme prefix, ce qui aura esté ordonné suiura & sera mis à execution.


Toute conuersation, negoce & commerce sera libre & permis à tous les sujets du Royaume de Suede de quelque nation ou condition qu'ils soient avec ceux de nostre pays, & tous les chemins seront libres & asseurez par la Pologne, Liouonie, Curlandie, & Lithuanie, tant par mer que par terre, & ne sera commise aucune sorte d'iniures ny preiudice contre eux.

Quant aux iniures tant personnelles que reelles qui arriueront sous cette cessation d'armes, vne partie ne se vengera point de l'autre, mais la Iustice en sera demandée aux Officiers & Magistrats competās qui sera administrée par tout où elle sera requise, & sera aussi exercée vne seuerie peine contre tous ceux qui violeront la paix fortifiée & confirmée par la foy publique.

Tous prisonniers captifs qui sont encores detenus de part & d'autre, seront mis en liberté sans aucun delay, retardement & rançon.



DISCOVRS DE L'ESTAT DV TVRC.




DISCOVRS DE L'ESTAT DV TVRC.

Estats du Turc en Europe.

SOMMAIRE.

- 1 **D**ESCRIPTION de l'estendue des Estats de l'Empire du grand Seigneur, & des pays qu'il occupe à present en Europe, Asie & Afrique.
- 2 Particuliere description des Royaumes & Estats tenus par le Turc en Europe.
- 3 Topographie particuliere de la Trace ou Romanie, province où est située Constantinople.
- 4 Singularitez de la ville de Constantinople.
- 5 Description generale du Serrail, ou de la Cour du grand Seigneur.
- 6 Du Couronnement des Emperours Turcs, des tiltres & qualitez qu'ils prennent, & de leurs vestemens & exercices ordinaires.
- 7 De la table du grand Seigneur, & de ses viandes.
- 8 De sa grandeur & gravité, son serment & alliance, & de la reception qu'il fait aux Ambassadeurs des Princes estrangers, des œuvres manuelles du grand Seigneur, & de ses amours.
- 9 De ses femmes, de leur vie, logement & conduite de ses parens, du mariage de ses filles, de ses enfans masles, & de leur education, & des ceremonies de leur Circoncision.
- 10 Des presents faits au grand Seigneur, & de ceux qu'il fait.
- 11 Des thresors du Serrail, & du revenu du grand Seigneur.
- 12 De sa magnificence en ses entrees & sorties de son Serrail, & de Constantinople.
- 13 Du Diuan public dans le Serrail, pour l'exécution des affaires generales.
- 14 Des enfans du tribut, & des Eunukes blancs, & autres.
- 15 Des officiers du grand Seigneur servans au Serrail, & des viures bruinaires de la provision du Serrail.
- 16 Du train, & de la Cour de l'Emperour des Turcs.
- 17 De la grandeur des Bassas Turcs.
- 18 Des emprisonnemens frequens entre les grands de Turquie, de leurs salles desbauches.
- 19 Des Amours des Dames de la Cour du Turc, & de leurs ardantes affections entre elles.
- 20 Les quatre principaux Bassas de la Porte, & des favoris du grand Seigneur.
- 21 Des armes & du Seau du grand Seigneur.
- 22 De la mort, deuil, funeraillles & sepultures des grands Seigneurs.
- 23 Mœurs anciens des Thraciens farouhes & rudes, & de leurs costumes, celles de Thraces, leur Religion.
- 24 Mœurs des Thraciens de ce temps, & de la forme de vivre des Turcs en Thrace, & à Constantinople.
- 25 De la Grece ou province d'Attique, de la Macedoine, de l'Epire, le Peloponese, & autres pays.
- 26 Villes de la Macedoine anciennes.
- 27 De l'Epire partie d'Albanie.
- 28 De l'Achaie.
- 29 Du pays des Lorcois, & Opunsiens, de la Phocide, où est Delphe, de la Beotie, de l'Attique, de la contrée Megaride.
- 30 Du Peloponese, ou Morce du nom moderne, de l'Arcadie, du pays de Corinthe, du pays d'Argie, pays Laconique, de Lacedemone, de Messene, de l'Elide, de l'Achaie propre, de Syzione, d'Arcadie.
- 31 Qualitez des pays, provinces & peuples d'icelles.
- 32 Macedoine pays temperé plus que nul autre en l'Europe.
- 33 Albanie fertile, agreable, espee d'or incognue, arrivée en icelle du temps d'Aristote.
- 34 Theffalie meilleure contrée de Macedoine, fort agreable & celebre pour l'estime de ses chevaux.
- 35 Du mont Olympe celebre en bois & lauriers: du mont Athos, tant renommé des Portes, sous leurs

- couvert de neiges, il est abondant en arbres fruitiers, vignes, oliviers, & en sel mineral de la vallee de Tempé.
- 36 Sterilité du pays d'Epire & Attique.
- 37 Fertilité du Peloponèse, & aspreté du pays d'Arcadie, où se faisoit un vin rendant les femmes fécondes & les hommes enragés, & où naist l'If, arbre veneneux en son fruit & en son ombrage, & faict mourir ceux qui en usent.
- 38 Du naturel des anciens peuples de la Grece, & premierement des Macedoniens guerriers adonnez aux sciences & aux festins: vices des Theffaliens, ceux de la vallee de Tempé, Religieux, aymans les sacrifices & festins.
- 39 De l'oracle de Dodone & de son bois: antiquité des Doriens & Pelagiens, vaillance des Eoliens, rusticité de Phocienne.
- 40 Subtilité d'esprit des Atheniens, & peuple d'Attique, leurs Deitez, festes, mysteres & sacrifices.
- 41 Du genereux courage des Lacedemoniens: Ceremonies de leurs mariages, & autres coutumes.
- 42 De la barbarie qui regne parmy les Grecs modernes, leur langage approchant plus l'ancien Grec, que l'Italien ou Latin: leur façon de boire & manger, leurs vestemens & meubles.
- 43 De l'ancienne Police & Gouvernement d'Athenes, leur origine, les ordres dont estoit composée, des loix de Solon, de l'origine de ses Tributs, de l'élection de ses Magistrats, du Senat des Areopagites, & de la subtilité de leurs iugemens: Des Nomothetes, & de leur difference d'avec les Nomophylaces, de la Jurisdiction des cinq cens hommes pour les causes civiles: du Tribunal Iliaque & Iliaze, des ioyistes, Demarques, Creotetes, Syrofilaces, & autres Magistrats & dignitez de la Republique d'Athenes.
- 44 De l'ancienne Police de Sparte, & comment gouvernee par les loix de Lyncurque, de leurs mariages, naissance de leurs enfans, nourris aux larcins, & autres mœurs, & Police des Spartiens.
- 45 De la Religion des Grecs modernes.
- 46 Des Isles de l'Archipelague, qui appartiennent au Turc, & ce qu'il posside en Esclavonie, leur situation, circuit & villes principales, leur fertilité & singularitez, mœurs & coutumes anciennes & modernes.
- 47 De l'Isle de Chypre, sa division, sa situation, longueur & bornes: naturel des habitans, mœurs Police & Religion.
- 48 De l'Isle de Rhodes, sa situation & circuit, & du celebre Colosse d'airain iadis eslevé en la ville de Rhodes ayant vingt coudées de hauteur.
- 49 Description des pays de la Bosnie, la Bulgarie, Servie, Rusie, & ce que le Turc possede en Hongrie, quelles sont les villes principales, mœurs & façons de faire des peuples de ces pays.
- 50 Des Royaumes d'Alger, de Tunis & de Trenisen scituez en Afrique.
- 51 De l'Egypte & pays des Tozlodites son voisin.
- 52 Description des Terres que le Turc possede en Asie.
- 53 Discours des Turcs en general, de leurs mœurs, forces, gouvernement.
- 54 De la doctrine, loix & Religion de Mahomes.
- 55 Liste & Catalogue des Emperours de Constantinople, tant Chrestiens que Turcs, depuis que l'Empire d'Occident fut separé de celui d'Orient, donné à Charlemagne.
- 56 Des articles accordez par Achmat Emperour des Turcs pour le profit de la Chrestienté, en faveur du Roy de France Henry le Grand d'heureuse memoire par l'entremise de Monsieur de Breves son Ambassadeur à Constantinople.
- 57 Du grand trouble arrivé en Turquie apres la mort de Sultan Osman, & des cruelles guerres que faict au grand Seigneur le Sophi de Perse par la renouë de ses propres Bassas.



LE GRAND Monarque qui s'est rendu si redoutable à la Chrestienté durant un si grand nombre d'annees, & qui a tousiours empieté sur nous iusqu'à ceste heure que la guerre de Perse le tient en ceruelle, & les reuoltes des siens luy donnent assez d'occupation, ne donne qu'avec beaucoup de sujet l'alarme aux Estats de la Chrestienté qu'il auoisine, veu qu'il a tant de moyen de faire vne grosse armee, en la leuant sur les pays qu'il posside, que ceux qui seroient sans apprehension d'un tel deluge de gens, manqueroient du tout de iugement, & se rendroient dignes de souffrir le mal, dont ils n'auroient eu la crainte, & contre lequel ils ne se seroient pourueus de remede. Et ain que l'on voye combien de pays il a sous sa domination, & combien il est puissant de tous costez, ayant par tout son Empire lié, & ioinct ensemble en quelque maniere: i'en vay faire premierement la description le mieux qu'il me sera possible: puis ayant fait le denombrement de tout ce qui luy obeyt, ie viendray aux descriptions particulieres des Royaumes, ou des Prouinces, & considereray separément toute chose.

L'Empire

L'Empire du Turc, s'estend en Europe du long des nuages du golphe de Venise depuis les frontieres des Ragousois, en enuironnant tout l'Archipelague, & le Propontide, ou la mer de Marmore, & vne bonne partie du Pont Euxin, ou de la mer Majour, iusques à la ville de Theodosie, maintenant Caffa, assise en la Chersonnese Taurique, autrement Perodoska, Gezara, ou Gazaria, ou bien Prucuply, selon Postel. Mais en ce qui est plus auant dans le pays, il s'estend depuis Bude iusqu'à Constantinople: & tout cét espace contient la plus grande & meilleure partie de la haute Hongrie: la Thrace, autrement Romelli, ou Romanie, tout le pays de la Grece, c'est à sçauoir, la Macedoine, l'Epire ou Albanie, l'Achaie, le Peloponese maintenant Moree, avec toutes les Isles de la mer Egee, à preient l'Archipelague, horsmis quelques vnes qui sont sousmises aux Venitiens, & vne partie de l'Illyrie, ou Esclauonie: & outre ce le Royaume de Bosne, & la Seruie, la Raschie, & la Bulgerie.

Doncques ce que le Turc tient en Europe, est borné du Leuant de la mer de Marmore, du pont Euxin, ou mer Majour, & de la mer Egee: du costé du Midy de la mer Cretique, ou de Candie, & encores de la mer Mediterranee: du costé d'Occident de la mer Hadriatique: & du Nord d'une partie de la Hongrie, de la Transylvanie, & de la Moldaue. Le circuit des riuages de ses Estats en Europe peut estre de dix mille, & enuiron cinq cens mille d'Italie: & en mesurant la superficie, & reduisant le tout au mille carrez, il peut estre enuiron de trois cents douze mille cent cinquante neuf milles d'Italie.

En Affrique, il possede toute la coste de la mer, depuis la ville de Velez de Gomera, iusques à la mer rouge, exceptez quelques lieux qui recognoissent le Roy d'Espagne, & luy obeyssent, & en cét espace on met les Royaumes d'Alger, de Tunes, & Tripoli, de Barbarie, & toute l'Egypte, c'est à sçauoir depuis Alexandrie iusqu'à la ville de Siene, maintenant Asne, avecques vne partie d'Arabie Trogloditique, depuis la ville de Sues, au golphe Arabique iusques à la ville de Suaquen. Tout le riuage que le Turc domine en Affrique, est de mille sept cents cinquante milles, & la superncie de toute l'Egypte peut estre d'environ 356160. milles.

Mais pour ce que ces pays sont inhabitez en plusieurs endroits, & pleins de lieux deserts, & aussi habitez en partie par des gens qui n'obeyssent pas au Turc, nous pouuons dire qu'il domine en Afrique. quant à la superficie de la moitié de ceste quantité, qui seroit enuiron 178080. mille carrez.

En Asie il possede ce que Ptolomee met en la premiere table de ceste partie de la terre, c'est à sçauoir le Pont & la Bithinie, que l'on nomme Turquie, & la partie que l'on appelle proprement Asie, auourd'huy Natolie, la Phrigie, nommee de nostre temps Parie & Berycie. la Lycie appelée vulgairement Briquie: la Paphlagonie, la Galacie, la Pamphylic, la Cappadoce, l'Armenie mineur nommee Anadule, & la Cilicie appelée Caramanie, qui sont auourd'huy toutes comprises en ceste partie, qui porte le nom general de Natolie, dont les prouinces & parties ont toutes changé de nom, principalement les villes. Le circuit de ceste Presqu'Isle de la petite Asie, ou de la Natolie, en prenant depuis Alexantrette, iusqu'à Trebisonde, appelée Trapezus par Ptolomee, est de 2400. milles ou enuiron.

Le Turc possede encoi vne bonne partie de ce que Ptolomee met en la troisieme table de l'Asie, le reste estant occupé par les Tartares & Perses: & ceste partie est la grande Armenie, que les Turcs appellent Turcomanie.

Il domine encoi ce que Ptolomee met en la quatrieme table de l'Asie, c'est à sçauoir l'Isle de Chypre, la Syrie appelée Surie, la Palestine ou Iudee, & le riuage de la Surie, en prenant depuis Firanide iusqu'en Alexandrie, & est de 430 milles, ou enuiron. L'Arabie Pierreuse auourd'huy Baraab: la Mesopotamie dite Diarbech, l'Arabie deserte, & Babylonie, ou Bagadet, où deuenoient les Caldees.

Il tient encoi partie de ce que Ptolomee met en la cinquiesme table de l'Asie, c'est à sçauoir l'Aznie, appelée Asme par ses habitans. Et partant donc de Trebisonde il monte vers le Septentrion iusques au destroit que les anciens nommoient Bosphore Cimmerien, que les Italiens appellent Bouche de S. Iean, ou mer de la Zone, qui borne avec le Chersonese que l'on nomme Gazarie, du costé du Nord, c'est à sçauoir iusqu'à Matrique, qui est peut estre ce que Ptolomee appelle Harmanassa, & il y a de chemin de riuage ou de coste enuiron quatre cents cinquante mille, & partant apres de Sues, que Ptolomee peut estre mis sous le nom de *Climas Presidium*, & enuironnant l'Arabie heureuse, iusqu'à l'emboucheure de la ruiere du Tygre, appelée Tigil, il y a de chemin du long du riuage 3750.

Et assemblant tout ce que le Turc possede de maritime en Asie, l'on trouue qu'il y a 7030. mille, ou enuiron: & la sur-face de tout le pays qu'il domine en Asie est 7.0640. milles quarrez.

Mais pour ce qu'en tout ce pays il y a vne bonne partie de lieux deserts, ou qui n'obeyssent pas au Turc, comme en l'Arabie heureuse: pour ceste cause venant à soustraire de ceste quantité le quart, qui est de 177660. mille quarrez, il reste 531980. mille carrez.

Or tout ce que le Turc possède en Asie, est borné du Levant du golphe Persique, ou de la mer d'Elcalif, de la riuere du Tygre appellé Tygil, & d'une partie du riuage de la mer Caspie, que l'on nomme auourd'huy la mer de Baccus: de l'Occident du golphe Arabe, ou de la mer rouge, de l'Archipelague, du destroit de Constantinople, & de la mer Majour, du Nort de la mer Majour, & d'une partie du marest Meotide, autrement mer des Zabacques, & d'une partie de la Samarie Asiatique: du Midy de l'Ocean Meridional, ou Indique de la Mediterranee, & de la mer Majour.

Or r'assemblant tout ce que le Turc possède aux riuages de la mer aux trois susdites parties, nous trouuerons que le tout monte à vnze mille deux cents quatre-vingts mille, & la surface de toute la Seigneurie aux susdites trois parties, est d'un million deux cents trois mille deux cents dixneuf mille.

THRACE OV ROMANIE.

POUR ce que la Capitale ville de l'Empire du Turc est en Thrace, que l'on nomme auourd'huy Romeli, ou Romanie: i'ay creu qu'il falloit commencer par ceste partie. Et pour ce ie dy que la Romanie est vne Prouince pres du Pont Euxin, ainsi nommee, à cause que sa principale ville, qui est Constantinople, a esté nommee Nouuelle Rome. Ceste Prouince a esté aussi nommee Arie Perce, Odrysse, Emonie, Bistonie, Crestonie, & Scythonie, & Thyras en Hebreu, selon le tesmoignage de Iosephe. Ses habitans estoient jadis nommez Strimoniens, Bardes, Dolongues, Briges, & Sithimes.

Elle a pour ses bornes du Levant la mer Majour, que les Turcs nomment Maurotalassa, ou Caradeniz le destroit de Constantinople la mer, de Marmore, & l'Hellepont, ou destroit de Gallipoli. Du Nord elle a pour ses limites le mont Heme, que les Italiens nomment Chaisne du monde, Montagne argentee, Contegnazze, les Turcs Balkan, & les Esclauons Cumonize: du Couchant la haute Mesie, & vne partie de la Macedoine: du Midy l'Archipelague. Elle commence à la riuere de Strymon auourd'huy Stromone, ou selon Belon, Marmare, & selon les autres Rhendiue, & Rhendin, qui est la borne de la Macedoine de ce costé, & du costé de la mer Majour. Elle a de long vingt iournees: sa largeur depuis le mont Heme, iusques au destroit de Constantinople, qui est le chemin de sept iours.

La Thrace est assise entre le quarantedeuxiesme degré de l'elevation du Pole iusques au quarantequatriesme, ou le plus long iour est de quinze heures & vn quart. Sa longueur contient depuis le quarantesepiesme degré, iusques au trentesixiesme.

Les lieux plus renommez de ceste contree sont Abdere, que les autres veulent nommer Clazomene, patrie de Democrite, maintenant Polystilo selon Sophian, & Astrizza selon quelques autres. Nicopoli assise au mont Hemes, & Philippoli est bastie en vn costau, dont les ruines sont aussi admirables que celles d'aucune autre ville. Il y a vn Amphitheatre fort beau, qui est demeuré entier iusques à present, & pourroit durer encores longuement, si les Turcs n'en ostoient les degrez, qui sont de marbre: il est de figure spherique, y a-il aussi d'autres restes de l'antiquité, comme quatre colonnes fort hautes, & grosses, qui restent de l'Eglise dedice à saint Claude, & encor plusieurs statues de marbre. Ceste ville est auourd'huy assez peuplee.

Hadrianople que les Turcs nomment Endrem, est plus grande vallee que Philippoli, ou la ville de Philippe: mais elle n'est point ceinte de murailles, & ses bastimens ne sont guieres beaux: toutesfois elle tient le premier rang apres Constantinople en toute la Thrace, & a jadis esté la demeure des Empereurs des Turcs, comme d'Amurath premier, l'an 1363.

Trajanopoly, ou la ville de Trajan, est encores auourd'huy assez peuplee. Selymbrie au riuage du Propontide, a vn port capable de petits vaisseaux, & des seins pour les plus grands. Perinthe, maintenant nommee Heraclee, ainsi qu'autrefois est assise sur le sein Malliac: ou golphe de Zithou, a vn beau port capable de nauires marchands, & des galeres. Il y auoit autrefois vn Amphitheatre de marbre, qui estoit merueilleusement estimé. Apollonie, au riuage du Pont, maintenant Sissopoli.

Il faut maintenant considerer vn peu plus particulierement la ville de Constantinople, & scauoir le temps de sa fondation & nomination.

4 Les Grecs vn iour se trouuerent en peine d'auoir vn lieu commode pour bastir vne ville nouvelle au pays de Thrace, & ne pouuant en resoudre iugerent, que le meilleur estoit d'aller

d'aller trouver l'Oracle d'Apollon Pythien, qui estant consulté là dessus, respondit qu'ils commençassent les fondemens en Thrace vis à vis du territoire des aueugles, ainsi nommez les Chalcedoniens, qui les premiers ayans mis le pied en cette prouince là, n'auoient eu l'esprit de recognoistre la fertilité du beau terroir, qu'ils auoient trouué & auoient choisi l'autre costé de la mer, sur les costes de l'Asie, & se logerent là en vn lieu assez desagréable, infertile & desert, iadis appelé la ville de Chalcedoine, & par les modernes le bourg de Scutari.

Pausanias donc Prince des Spartes, prit le soing d'edifier vne ville au lieu que l'Oracle auoit designé, & Byle General de la flotte Megarienne la baptisa de son nom, & l'appella Byzance, nom qu'elle a retenu & porté l'espace de plusieurs siecles, avec la gloire de se vanter d'estre estimée, au iugement mesme des Grecs, la plus fameuse & fertile de leurs Citez, & commença de se rendre celebre sous le regne dudit Roy de Sparte, l'an du monde 3536. & auant l'Incarnation de nostre Seigneur Iesus-Christ 670. ans, sous ce nom de Bizance, iusques au regne de l'Empereur Constantin : & estoit dès lors, comme encore à present, la porte de l'Europe, & le Pont pour passer de l'Asie en icelle.

En fin ledit Empereur Constantin s'estant resolu de laisser au monde de tres-insignes tesmoignages de sa grande pieté, delaisant aux Souuerains Pontifes de l'Eglise Romaine, tout l'Italie, pour riche patrimoine d'icelle, se retira en Orient, & emmena avec luy les plus puissans Seigneurs du Pays, & de sa Cour, qui pouuoient troubler la nouvelle liberté Ecclesiastique : & sur l'antiquité de Byzance, fit bastir vne superbe Cité sur le modele de la ville de Rome qu'il appella nouvelle Rome, & du depuis pour eterniser son nom l'appella Constantinople : la grandeur de ses murailles, la seurété de ses fortereffes, la beauté de ses Palais & edifices, la richesse de ses Colomnes, qui sembloient auoir attiré en ce lieu là tout le marbre, tout le iaspes & le porphyre de la terre, estoient les rares merueilles de son Architecture.

Cette ville fut premierement le siege des Empereurs Romains en Orient quand ils eurent abandonné Rome, & du depuis des Grecs, apres la diuision de l'Empire, & finalement apres la prile, qui arriua sous Mahomet second, Empereur des Turcs, l'an 1453. elle fut arrestee pour la demeure des Ottomans.

A raison dequoy Constantinople est auourd'huy fort riche, merueilleusement peuplée, & comme le centre de toutes les nauigations, & de tous les commerces de l'Empire du Turc.

Mais sur toutes ces choses paroissoit vn magnifique Temple, que la pieté de ce grand Prince Constantin auoit consacré à la diuine Sagesse, sous le nom de sainte Sophie, dont le bastiment & les thresors sembloient auoir enuié quelque chose de la gloire du Roy Salomon à vn pareil dessein, au moins selon le temps & le pouuoir de Constantin.

Sept riches lampes donnoient sujet aux esprits curieux d'y remarquer leur rare artifice; elles receuoient toutes à la fois l'aliment qui nourrissoit leurs flammes, & vne esteinte toutes les autres s'esteignoient : Ce fut en l'an de salut 333. Ceste ville ainsi la Roynie de la terre veit peu d'annees apres son Restaurateur triomphant du Roy de Perse, & receut la grace d'enfermer dans son sein le pretieux tresor du Christianisme, vne partie de la Croix du Redempteur du monde, trouuée par la soigneuse pieté de sainte Helene, Mere de l'Empereur Constantin : sa ioye, sa pompe & son lustre, estoient arriuez à tel point, qu'il sembloit n'y pouuoir rien plus estre adiousté, elle est par succession de temps le siege de plusieurs grands Monarques terriens : Seuerus & son fils Antonin, enuiet & rauissent à son Restaurateur, la gloire de l'auoir nommée, ils la font appeller Antonie, du nom de l'un d'eux. Mais tout ce qui a commencement en ce monde doit auoir fin, & les plus belles choses payent tribut au changement.

En l'an de grace 1453. vn Mardy troisieme iour de la Pentecoste, fut prise de force la ville de Constantinople, & voicy les causes & les sources de ce malheur arriué. Il y auoitjà longues annees auparauant qu'un miserable Schisme auoit tourmenté l'Eglise & troublé la Chrestienté : on croyoit qu'apres auoir pris fin, elle quelque repos, & que la fin de ceste fièvre qui la tourmentoit fust passée : mais las ! parmy ces confuses & cruelles confusions de l'Eglise en Occident, les Chrestiens d'Orient qui auoient dès long temps beaucoup enduré, furent entierement ruinez : ils estoient ja reduits en fort pauvre estat l'an 1396. (& durant l'espace de 50. ans pendant le tintamarre de ce Schisme, & les opiniastrés guerres de France & d'Angleterre,) il y aduint bien de plus grands changemens. Nos Roys & Princes auoient vn fort long temps, & en vain essayé à reconquérir la Iudee, & y auoient consommé vne infinité d'hommes & d'argent, sans rien aduancer : mais Constantinople, Chef de l'Empire Oriental, demouroit toujours debout avec la Grece, Macedoine, Thessalie

& pays circonuoisins, la Sclauonie, la VValachie, Ruffie, Seruie, Bulgarie, & vne partie de la Natolie, dont Trebizonde estoit Chef de l'Empire.

En cette foiblesse, qui regardoit sa ruine, la vanité ayant esté si grande entre les Chrestiens que de prouigner deux Empires, l'un European, & l'autre Asiatique, & puis chaque Empire estant diuisé en diuerses particules tenues par diuers Despotes ou Seigneurs Souuerains, afin que parmy tant de Seigneurs, il n'y en eust point.

Ces confusions amenerent, fortifierent & establirent du tout les Turcs (horribles mains de Mahomet) ennemis de la Chrestienté; ie n'entre pas au discours particulier de ceste histoire Orientale, car elle n'est pas de mon sujet: seulement ie marque la suite du temps, pour monstrier la desolation de cet Empire d'Orient.

Après que nos François eurent quitté cet Empire imaginaire d'Orient, les Paleologues le firent & le pourmenerent diuersement suivant leurs passions. Michel, Andronic, Jean Mauuel ayant fait monter sur le Theatre, & en diuerses occurrences, & en diuers succez, les plus horribles tragedies que l'impieté pouuoit enfanter, au grand deshonneur du nom Chrestien.

En fin Constantin Paleologue donna la dernière quittance de l'ancienne possession de l'Empire, pour en faire vne nouvelle obligation en faueur des Turcs, afin que son nom rencontrast à son malheur.

Il se lit par l'histoire d'Hongrie, quelle breche auoit fait Bajazet en Hongrie, y faisant vn si grand carnage de nos François, lors qu'il print prisonnier Jean Duc de Bourgogne. Ce commencement de victoire en apparence deuoit passer outre, & emporter lors Constantinople, laquelle il assiegea: mais Dieu voulant donner quelque relâche aux Chrestiens pour les faire deuenir meilleurs, reprima ce Tyran par vn autre Tyran; car Bajazet pris par Tamberlan Empereur des Tartares, porta lors la peine de sa cruauté: mais il laissa la conquête de ceste grande ville à sa posterité, au point que la sage & iuste Prouidence de Dieu auoit ordonné, à sçauoir 58. ans apres; car la bataille en laquelle Bajazet fut vaincu, apres auoir vaincu nos Chrestiens fut donnée l'an 1395. & Constantinople fut pris l'an 1453. le 29. iour de May par Mahomet second, petit fils de Bajazet, instrument propre pour chastier l'impieté, la cruauté, & l'exécrable abandon à toute sorte de dissolution, qui auoit lors vogué entre les Chrestiens, & mesme en ceux qui auoient entr'eux la premiere autorité.

Ce Mahomet estoit fils d'Amurath, né d'une Mere Chrestienne, fille du Despote de Seruie, & instruit par sa mere en la Religion Chrestienne, afin qu'il fust plus propre à chastier les Chrestiens, qui confessans Dieu de bouche, & le renians par effect, ne pouuoient estre ruinez par instrument plus propre, & correspondant au crime, dont ils estoient coupables, que par vn Tyran athee; lequel ayant gousté la vraye Religion l'auoit vomie pour n'auoir point de Religion, en se moquant de tout ce qui porte nom de Religion.

Ce Mahomet en l'age de vingt ans voulant establi son Empire, comme aîné de sa famille, pour n'auoir point de compagnon, fit tuer ses deux freres, Tursin & Calepin, l'un le faisant noyer dans vn bassin, & l'autre le faisant estrangler. Ayant ainsi fait mourir ses deux freres par deux de ses Bassas, Moyse & Haly, il fit mourir les deux meurtriers pour le sang de ses freres, en espendant le sang de ceux qui l'auoient espendu.

Ayant ainsi installé son Empire apres ces solemnitez, il bande tout esprit pour ruiner les Chrestiens, tous diuisez par estranges partialitez, & les conuiant à leur ruine, il se saisit pied à pied des pays de l'Empire, mais appelé par les Chrestiens pour demeller leurs querelles, & fortifiant à dessein le foible contre le plus fort, homme ingenieux, actif, penible, impetueux, l'autorisant par vne formidable seuerité.

S'estant saisi des pays, ayant embrouillé les affaires des Chrestiens, & bigarré leurs cœurs par diuerses intelligences, il luy fut aisé d'assieger Constantinople, car il l'eust secouru.

Les plus grands ennemis qu'eussent les Chrestiens dans le pays, estoient les Chrestiens mesmes. Les Paleologues avec les Eglises d'Orient auoient eu recours au Pape, à l'Empereur, au Roy de France, & par leur faueur, aux Conciles de Pise, Constance, de Basle, consecutiuelement l'un apres l'autre: mais ils n'auoient rapporté que vent, desespoir, moquerie.

Ainsi Mahomet bien assuré de l'estat de ses ennemis, assiege Constantinople, qui n'estoit plus que le masque de l'Empire, vne grosse masse de murailles, tesmoignans que le grand bastiment de l'Empire estoit ruiné.

L'Empereur Constantin Paleologue, qui consigna son autorité à Mahomet, n'auoit pour tout que quelque secours de Geneuois & Venitiens: & Mahomet auoit 250. vaisseaux de guerre

de guerre & deux cents mille combattans , entre lesquels les plus agueris estoient ramassez des pays , qui faisoient profession du nom Chrestien : Les assiegez se voyans à ce desespoir , firent tout ce qui se pouvoit faire pour vendre cherement leur vie aux victorieux.

Mais qu'eussent-ils fait ! leurs murailles estans toutes par terre par l'horrible foudre de l'artillerie Turquesque , leur port emporté par la rempeste de tant de vaisseaux armez , & eux accablez par vne infinie multitude ? ainsi l'assault general donné , Constantinople est emporté de vne force.

La ville estant ainsi prise par vn costé , comme Constantin Paleologue & ceux de sa troupe se veulent sauuer par vne porte libre , ils furent si viuement poursuivis par les Turcs victorieux , que la porte estant bouchée par la foule plusieurs furent estouffez , entre lesquels se trouua Constantin : Le Turc estant irrité d'auoir perdu de son sang , s'assouit du sang des pauvres gens de Constantinople , tuant tout pelle meile , sans difference d'aage ny de sexe , jeunes , vieux , femmes , filles de la plus effrenée cruauté , qu'on ne le peut escrire sans effroy , ny le lire sans larmes : Tous les hommes Chrestiens y souffrent , ou la mort du glaive , ou la rigueur de l'esclavage , les femmes & les filles sont le jouet de la lubricité des Turcs , puis apres cruellement massacrees.

Quand nous nous mettons deuant les yeux que ce beau pays de l'Orient , cette ville Capitale de l'Empire , où la voix de l'Euangile auoit esté retentie par les boucltes sacrees de tant de saincts personages & signalez Docteurs de l'Eglise , qui ont heureusement seruy en leur temps , est auourd'huy le donjon d'impieté , la forteresse d'erreur , le rendez-vous de toute sorte de barbarie & d'iniquité , & d'où Mahomet s'eleue pardessus tous les Roys de la terre.

Quelques vns disent que Mahomet fit ces cruantez à la prise de Constantinople , pour vengeance du sang & de l'embrasement que iadis les Grecs firent des Troyens & de Troye , dont les Turcs , disent-ils , sont descendus aussi bien que les François.

Mais plustost dire , que c'est pour punition de l'impieté de , Grecs , lesquels blasphemans contre le Ciel , nioient que le S. Esprit procede de Iesus-Christ , seconde personne de l'ineffable Trinité.

Mahomet fut le premier qui y posa le trosne Ottoman , elle changea de nom parmy eux , qui l'ont nommée *Stanibol* , la grande , la Royale , l'abondante : Ses beaux lieux souffrent la mesme inconstance , ses places sont appelez Baestans , le superbe Hippodrome , est dit la place aux cheuaux , Atmaydan , & le merueilleux Temple de sainte Sophie , deuiant la premiere & maistresse Mosquee de la superstition de Mahomet.

Cette ville est scituée sur vne pointe de terre ferme aduancée dans le canal , qui vient du Pont Euxin , ou mer Majour , appelée par les Geographes le Bosphore de Thrace.

Le tour de la ville est de treize mille , & selon quelques vns de seize , voire mesme selon les autres de dixhuiet : on tient qu'il y a sept cents mille personnes : elle est mouillée en trois endroiets par les flots de la mer. Du costé de Septentrion par vn Golphe ou bras de mer nommé la Corne , que le Bosphore pousse dans l'Europe : vers l'Orient elle est arrosée en l'extremité du canal , ou Bosphore du Midy par les ondes du Propontide , & sa partie Occidentale plus solide à la terre de Thrace pour les fermes limites : Sa forme plus longue que large est triangulaire , ses murs d'une extraordinaire hauteur , avec deux fausses brayes , enferment sept collines dans son sein : la premiere sert de Beatre à la Maison Imperiale du Prince , où elle est commodément & superbement assise : la derniere regarde l'extremité de la ville opposée à celle-cy , & voit sur la terre ferme le chemin qui conduit à Adrianopolis : Mais entre la troisieme & quatrieme , où s'estend la vallee appellée la grande , est encore vn aqueduc d'une rare structure , que le grand Constantin fit tirer de sept lieues loing de la ville , & Solyman second l'aduança deux lieues au delà , & accrut le courant des eaux en si grande abondance , qu'elles jaillissent par les tuyaux de 740. fontaines qui la versent au public , sans conrer celles qui se diuisent en plusieurs endroiets , pour fournir le grand nombre de bains qui seruent , & aux delices , & aux superstitions des Turcs. Sur la derniere des sept collines se voyent encore les anciens bastimens d'une forteresse munie de sept tours , au milieu de sa situation : les Turcs l'appellerent *Giedicula* , c'est à dire la forteresse des sept tours , dans lesquelles les merveilles de l'artifice estoient si grandes , que ce qu'on diroit à vne tour s'entendoit à toutes les autres , non tout à la fois , mais successiuent , & par ordre : deux cents cinquante soldats en font la garde , commandez par vn Capitaine qui en a le soin , lequel ne peut sortir hors d'icelle sans le congé du grand Vizir , excepté deux fois l'annee , aux deux iours qu'ils fessent leurs Barrans ou Pasques.

Les premiers Emperours Turcs qui possederent Constantinople , logerent leurs thre-

sors dans ces tours : l'une estoit pleine de lingots, & de monnoye d'or, deux d'icelles en-ferroient la monnoye blanche & les lingots d'argent : vne autre auoit les diuerses armes & parures pour les hommes de guerre, & les harnois des cheuaux enrichis d'or, d'argent & de pierreries. La cinquiesme seruoit à mettre les anciennes armoiries, les medalles & autres pretieuses reliques de l'antiquité. La sixiesme contenoit les diuerses machines de guerre : & la septiesme accompagnée des archiues & papiers de l'Empire, où est vne belle gallerie, dans laquelle estoient placees les riches despoüilles, que Selim premier du nom remporta de Tauris, lors qu'il triompha de la Perse. Tous ces Thresors y furent conseruez, iusques au regne de Selim second. Mais il est souuēt des Estats comme des familles particulières en celles cy, les vns ont amassé avec peine, ce que les heritiers prodiguerent dissipent, là quelques Roys accumulent les richesses, qui seruent de matiere à la prodigalité de leurs successeurs : Car ce Prince lasche & effeminé, qui ne sembloit estre né que pour la ruine de son Empire (si les Chrestiens eussent sceu prendre les occasions) dissipa aux frais de l'armée nauale, que la iournée de Lepanthe soumit à la valeur des Chrestiens, & auparavant à la guerre de Cypre, la meilleure des immenses thresors que les peres auoient entassez dans ces tours là : le reste d'iceux seruit aux lasciuetez & passions desreiglees de ses concubines. Du depuis Amurath son fils changea le lieu des thresors de l'Empire & des tours, les transfera dans son Serrail : ainsi l'on approche de loy ce que l'on ayme, & puis que l'argent possede le cœur des hommes, il doit bien auoir son departement dans leurs Palais. Ce changement a depuis destiné ces lieux des thresors pour estre les prisons des Roys, ou Princes, que les Turcs prennent à la guerre : car la forteresse estant de grande estendue, les captifs y ont plus de liberté, si on ne les enferme dans la tour noire, qui est depuis peu d'annees l'ordinaire prison des gens de qualité, où estoit en l'an 1617. le Duc Koresk, Prince Moldaue, & où les Ienissaires rebelles emprisonnerent & estranglerent leur grand Seigneur Sultan Osman l'an 1622.

Constantinople a dans l'enclos de ses murs plus de deux mille Mosques ou Temples des Turcs bastis par leurs Empereurs : car ie ne descriis les raretez de ceste ville Imperiale que telles qu'elles sont auourd'huy, on pourra voir les merueilles de l'ancienne dans P. Gillius, qui en a escrit.

La principale de routes ces Mosques, est celle qui a esté dressée dans l'ancien Temple de sainte Sophie, basti par l'Empereur Iustin, laquelle a esté appelée des Turcs *Asophia* : elle a six belles & somptueuses façades, ses murailles sont de brique, reuestues dedans & dehors de marbre blanc, de Porphyre, & autres riches pierres : les portiques ouuerts autour par six portes augmentent sa beauté : quatre portes de l'Eglise en ouurent l'entree, la hauteur de sa voute couuerte de plomb au dessus, monstre la magnificence de son ouurage : seize grosses colonnes luy seruent de premier soustien, quatre sont de marbre jaspé de l'Isle de Cypre, quatre de marbre blanc, quatre de Porphyre, & quatre d'une autre pierre aussi riche : Entr'autres, il y a vne pierre de marbre, sur laquelle les Turcs croient que nostre Dame luya les linges de nostre Seigneur, & pour ceste cause ils luy portent vn grand honneur, d'autant qu'ils tiennent Iesus-Christ pour vn grand Prophete : quarante-huict autres colonnes de moindre grandeur, mais de mesme matiere, seruent encore au soustien de cette grande machine, & vne moindre & plus basse voute est encore soustenuë par 24. colonnes de mesme marbre & porphyre : les rares statues & riches images dont Constantin l'auoit ornee ne s'y voyent plus. Mahomet second les voüa au sac de la ville quant il la prit : Seulement vne image de la Vierge qui enfanta le Dieu homme, y est demeuré entiere dans le milieu de la voute, non sans vne particuliere prouidence du Ciel : Les Turcs y ont tiré vn voile au trauers pour en deffendre la veüe, mais cela n'empesche pas que les Chrestiens n'y montent avec des eschelles pour contenter leur deuotion, quand aux heures permises ils peuuent entrer dans la Mosquee : ceste Eglise estoit de son temps beaucoup plus grande qu'elle n'est : il y auoit vne Abbaye qui s'estendoit bien auant dedans la place, où est à present le Serrail : mais les Turcs deuenus maistres de la ville la ruinerent, n'en laissant rien que le chœur qu'ils ont reserné pour leur Mosquee.

La largeur & longueur de ceste Eglise pourra estre mieux representee par sa hauteur, laquelle est la limite de la portee d'une harquebuse : le dessous d'icelle est vouté, garny d'autels, & remply de diuerses sepultures, pour le respect desquelles les Turcs ont fait murer les portes. En vn endroict proche de là, se trouuent dix grosses pipes pleines d'huile du temps mesme de Constantin, qui ont duré iusques auourd'huy, les longues années l'ayant blanchy comme du lait : il sert maintenant aux medicaments que composent les Apoticaire du grand Seigneur.

Au sortir de là on voit plusieurs Cubes, qui sont des lieux faits en forme de Chappelles, couuertes

couverts de Dômes , & toutes de marbres , où sont enterrez les fils des grands Seigneurs.

Aupres de sainte Sophie, l'on voit le logis de Lasuadar, duquel il peut aller sous terre & par eau douce, neantmoins iuques dans le Serrail.

Par ces mêmes lieux cambrez on descend dans deux grottes, qui vont sous le pavé de la ville, l'une conduit au grand Serrail, & l'autre mene bien avant sous Constantinople, inutiles aujourdhuy, excepté l'une d'icelles, qui reçoit le iour par quelques ouvertures que le temps y a faites, laquelle sert à tirer la soye, & rapporte au coffre du Chafna, ou de l'Espagne, trois ou quatre sequins de rente seulement : Mais les belles & antiques fabriques qui decoroient les environs de ce merueilleux Temple, ont esté ruinees par les Empereurs Turcs, excepté celles qui seruent d'habitation à quelques Congregations de Religieux de l'Alcoran.

Outre cette grande & admirable Mosquee, il y en a quatre principales, les durables marques de la magnificence des Empereurs Turcs.

La premiere fut bastiee par Mahomet second, apres qu'il eust triomphé de Constantinople, il l'a fit edifier sur le modele de sainte Sophie, mais elle est de beaucoup plus petite, il l'enrichit de soixante mille ducats de reuenu, fit bastir autour d'icelle deux cents belles Chambres en Cube, couvertes de plomb, tant pour le logement des Prestres qui la deseruent, que pour y recevoir les pelerins estrangers, de quelle nation & Religion qu'ils soient où ils sont nourris trois iours : hors du cloistre sont aussi basties cinquante autres Chambres pour les autres pauvres.

La seconde Mosquee a esté faite par Bajazet second, fils du même Mahomet.

La troisieme par Selim premier, fils de celuy-cy.

Et la quatrieme par Solyman, second fils de Selim : ces trois derniers Princes sont enseuelis chacun vn dans le paruis de sa Mosquee en des superbes tombeaux, sur lesquels esclairent sans cesse vne grande quantité de lampes ardantes, & des Prestres Turcs y recitent l'Alcoran, & prient à leur mode pour les ames de ces Monarques.

Or la principale de ces quatre, est celle de Solyman second : elle surpasse à la verité en marbre, & autres pieces de prix, la pompe de celle de sainte Sophie, mais elle cede aux merueilles de son Architecture, à laquelle personne n'a encore peu atteindre.

Selim second fonda sa Mosquee dans la ville d'Adrianopolis : Achmat decedé depuis quelques annees, employa d'excessiues sommes de deniers à la fabrique de celle qu'il fit bastir es dernieres annees à Constantinople, & les autres Empereurs Turcs n'en ont peu faire bastir pour n'auoir par aucunes conquestes aggrandy l'Empire de leurs deuançiers : Car la loy de l'estat, conforme à celle de la Religion, defend aux Princes Turcs de bastir aucuns Temples, s'ils n'ont estendu les bornes de leur Empire dans les terres des Chrestiens, où ils facent prescher l'Alcoran, aussi bien telles ceuures de pieté ne pourroient pas seruir au salut de leurs ames disent les Mustiphe, lesquels s'opposent à tels desseins, si leurs Empereurs le vouloient entreprendre.

Les Chrestiens Grecs ont dans Constantinople quarante Eglises pour faire le seruice diuin à leur mode.

Les Armeniens en ont quatre.

Et les Latins moins fauoritez que ceux-là, sont logez dehors la ville à Galata, dicté aujourdhuy Pera, où en faueur du feu Roy Henry le Grand, Roy de France & de Navarre, de tres-heureuse memoire, le Grand Seigneur y tollere vn College de Iesuites, qui y celebrent seulement le seruice diuin, & autres Chrestiens. Celieu de Pera, est au bout des jardins du Serrail au delà du canal, où les Chrestiens ont quatre Eglises pour leurs deuotions & saints mysteres.

Les Iuifs ont bien le credit d'estre dans la ville en neuf diuers quartiers, iusques à 38. Synagogues. Les murailles de ceste Imperiale Cité sont demeurees en leur entier : Elles sont encore doubles du costé de terre ferme, excepté vers la porte appelée Ayachapezi, c'est à dire Porte sainte, à cause de la grande multitude de corps saints qui estoient en vne Eglise proche de ceste porte là. Mahomet second entra par icelle pour souiller & contaminer la sainteté du lieu : dixneuf portes, tant du costé de terre ferme que vers la mer, seruent à l'entree de ceste ville. Plusieurs grandes places sont estendues à la commodité publique : Quelques-uns ont conserué les anciennes Pyramides & ouurages de bronze des Empereurs Chrestiens ; entr'autres celle qu'on nomme le Petrome, nommé des Turcs Arme-dan, contenant enuiron 500. pas en longueur, & cent en largeur : au milieu duquel il y a vne aiguille toute grauee de hieroglyphiques, non du tout si haute que celle du Populo à Rome. On y void aussi trois grands serpens de marbre (les autres disent de bronze) plus hauts

que deux hommes, se rampans à mont, entortillez l'un dans l'autre, l'un desquels est entamé à la gueule: Les Turcs disent qu'autresfois, ainsi que trois serpens persecutoient ceux de la ville, le peuple eut en fin recours aux prieres adressees au Ciel, & s'estant deliuré par ce moyen de ces animaux, erigea ceux pour memoire, ainsi que fit Moysé au desert: les autres disent que Mahomet second entrant dans la ville, creut en les voyans qu'ils estoient l'ouvrage de quelque sorcier enchanteur, & poussant son cheual vers eux, fit pour s'en esclaircir, cette breche avec sa lance. Il y a aussi en ceste mesme place vne fort belle colonne, d'œuvre rustique, dont toutes les pierres sont liees ensemble, sans chaux ny ciment, ayant au dedans vn escalier. C'est en ceste place que les caualiers s'exercent les Vendredis & les autres iours de feste nommee Berlan. Tous les iours le marché public se tient en quelque vne de ces places. Le Vendredy il est en trois lieux: les plus celebres se font les iours de Mercredy, leudy & Vendredy: ils les appellent *Schibazar*, c'est à dire marchez des choses necessaires à l'usage: Autour de ces lieux sont dressees plus de deux mille boutiques de fripiers, qui vendent dequoy fournir à la necessité de ceux qui veulent reparer à bon marché leur mauuaise mine, & la dace de ces vieilles nippes n'est pas si petite, qu'elle ne rende tous les ans aux coffres du Prince six charges de monnoye, qui valent vnze mille sequins, ou quarante mille liures: car l'exaction Turque fait profit de tout. Les boutiques des marchands surpassent le nombre de quarante huit mille: elles sont diuisees selon la diuersité des arts ou marchandises en diuers lieux, mais chaque mestier a son quartier, mesme en diuers endroiets pour la commodité du public. Les seuls orfeures, ioualliers & marchands de drap d'or, sont en vn seul lieu appellé Baystan, qui veut dire marché: les autres sont Bazar: Ce lieu pretieux & opulent est entouré de murailles larges de six pieds: il a quatre porte double l'une deuant l'autre, comme vne petite ville voutee tout autour. Cette riche halle a 24. colonnes qui soustiennent la voute, sous laquelle il y a plusieurs petites boutiques, comme des armoires dans la muraille, ou dans les Pylastres, chacune est large de six pieds, & longue de quatre, là ces riches marchands desployent & estalent sur des petites tables qui sont au deuant les brillantes beautez de leurs pretieuses marchandises. Les guains sans doute doivent estre plus grands qu'en ces lieux icy, & la debite plus frequente, puis qu'ils payent au Prince 500. sequins tous les ans, ou deux mille francs pour auoir la permission d'y vendre: ce sont la seulement ioualliers & marchands de draps d'or: les orfeures sont au dehors autour des muraille de ceste place, & donnent chacun cent sequins, ou quatre cents liures tous les ans pour mesme fin.

Dans vne autre rue on voit vne grosse colonne de Porphyre fermee en plusieurs endroiets de cercles de fer: D'un autre costé il y a vne autre colonne appelee Histriale fort haute, toute de marbre, releuee à personages, comme celle de S. Pierre & de S. Paul, qui est à Rome: au dedans il y a vn escalier qui va iusques en haut, qui est tout rompu, & n'estoient quelques liens de fer qui le tiennent, il courroit grande fortune de tomber.

On voit apres cela l'ancien Palais de Constantin, qui n'est autrement beau: mais il a cela de bon qu'il est assis en bel air.

Il y a encore dans la ville deux Eglises de Chrestiens, l'une dediee à S. Nicolas, & l'autre à nostre Dame, surnommee de Constantinople, qui est petite & assez entiere.

Outre le Baystan susdit: il y en a vn autre moindre entouré de murs, & soustenu de seize Pylastres: dans l'enclos d'iceluy se vendent les toiles & les soyes: mais au dehors est le detestable marché, où se vendent les hommes & les femmes: d'une part on y achete les esclaves desia instruits à seruir, ou à exercer quelque sorte de mestier, & de l'autre ceux qui ne scauent rien faire. Ces lieux representent mieux que ceux qui sont escrits cy-deuant: l'estroyable pourtraict de la tyrannie Turc, elle oblige à l'esclauage ceux que le Roy du monde a creés libres, les marchands y visitent telles marchandises, & ceux qui veulent acheter voyent premierement à nud les personnes de l'un & l'autre sexe, manient les parties de leurs corps pour voir si elles sont saines, & decouurent ce que la nature mesme s'est efforcee de cacher: là les femmes, si elles sont belles, sont cherement acheptees pour seruir aux lubriques passions de quelque hideux & espouventable More: Celles à qui la nature a desnié ses graces, sont prises pour seruir à la chaire percee des grandes Dames Turques, & lauer avec de l'eau les parties de leurs corps, qui seruent à descharger leur ventre, autant de fois qu'elles en ont besoin. Le reste des miseres de ceste seruitude se dira ailleurs en vn autre endroiect; car à la verité ils sont dans ce trauail la plus facheuse matiere de ceste histoire. Qui peut aussi sans gemir voir vn nombre infiny de Chrestiens chargez des fers d'un violent esclauage par la barbarie des Turcs?

En vn endroiect proche de là, ces infidelles tiennent vn autre marché, où se vendent seulement des nourrices, & de ceste iniuste trafic les Partisans du Prince tirent

seize

seize mille sequins pour la dace, ou soixante quatre mille liures.

Plusieurs autres lieux de ceste superbe ville, rendent aux coffres du thresor le reuenu de plusieurs bonnes sommes de deniers.

Les cabarets qui vendent publiquement du vin aux Chrestiens & aux Iuifs : mais en secret aux Turcs, & qui sont plus de quinze cents en nombre, payent 36. mille charges de monnoye, & chaque charge vaut seize cents trente trois sequins.

Les riuages de la mer qui regardent Pera, rendent pour la dace du poisson qui s'y vend dixhuiet charges de monnoye par an.

La halle, où les bleds, farines & legumes se vendent, rapporte annuellement quatorze charges de monnoye.

Celle où les marchandises qui viennent du Caire se debitent, vaut tous les ans du profit au Chafna ou Thresor Imperial 24. charges de monnoye.

La grande Dace qui se leue depuis le Chasteau de Gallipoli iusques à celuy de la mer noire sur les espiceries & autres marchandises qui sont chargees sur les nauires, vaut cent quatre-vingts chars de monnoye.

Les grandes boucheries & tueries de moutons & de bœufs qui sont hors la ville, & fournissent le dedans d'icelle de la viande necessaire, donne trente deux charges de monnoye, elle sont dites en Turc Chazanare, deux cents Caplaplers ou bouchers les seruent, vn supérieur nommé Caplabassa les commande, quia soing & prend garde qu'on fournisse des viandes fraiches : & personne ne peut tuer bœuf ny mouton sans sa permission, excepté pour faire des sacrifices à la Turquie. Les Iuifs acheptent de luy la licence de le fournir eux mesmes de chairs necessaires. Au reste, si ce Caplabassa auoit par son auarice enchery le prix des viures & des viandes, outre la taxe ordinaire ordonnée par la police, & que les larcins vinssent à la cognoissance du grand Seigneur, rien ne le pourroit exempter des rigueurs d'une cruelle mort : il est deschiré tout vif & mis en quatre quartiers qu'on fait porter sur les boucheries, pour seruir d'exemple aux autres : de sorte que la crainte le tenant en son deuoir, il prefere l'vtilité publique à son profit particulier.

L'Impost qui se leue aux mois d'Octobre & de Septembre sur le grand nombre de bestail qui vient de Hongrie pour fournir Constantinople, est trop grand pour estre supputé facilement : car pendant ceste grande foire où le peuple seulement, & non les bouchers, peut achepter, on y void des troupeaux de vingt cinq mil bœufs & quarante mil moutons.

Le Tresor reçoit encore vn denier inestimable de la vente des maisons, nauires, vaisseaux de mer, & barques à voile, que nous appellons lors & ventes, & les deux pour cent pour toute sorte de marchandise de mer, valent le reuenu de grandes & inestimables sommes.

La Dace de ceux qui s'embarquent pour voyager, qui est d'un aspre par teste, s'ils sont Turcs : de deux s'ils sont Chrestiens ou Iuifs, n'est pas de peu d'importance.

Le Tribut appelé en Turc Charay, qui se leue sur les Iuifs de Constantinople à vn sequin pour teste pour les masses, vaut vnze mille trois cents sequins tous les ans, quoy qu'il y ait parmy ceste nation là plusieurs hommes francs de ce Tribut.

Ils donnent de plus vn present de trois mille sequins tous les ans pour la confirmation de leur Priuilege, & auoir vn Rabin Chef de la Synagogue, & douze sequins pour la permission d'enterrer leurs morts.

Les Chrestiens Grecs à trois mille, ou vne lieuë autour de Constantinople, payent par chacun maille vn sequin au Turc, qui reuiert le tout à la somme de trente huit mille sequins : ils en donnent outre ce vingt cinq mille tous les ans, pour le Priuilege d'auoir vn Patriarche, & conseruer le nombre de leurs Eglises.

Le droit de leurs sepultures leur couste plus de trois mille sequins.

La Dace appelée des Vierges, ayde encore à remplir les coffres du grand Seigneur, ou la bourse de ses Tresoriers, il se leue sur les filles qui se marient, desquelles on tient registre, si elles sont Turques, elles ne doiuent que deux tiers d'un sequin, les Iuifues le payent entier, & les Chrestiennes vn sequin & demy.

Les Chrestiens Latins sont exempts pour la plus part de violence & oppression de ces iniustes Daces : car ils se disent estre à quelque Ambassadeur de Roy ou Prince franc : les Albanois, ceux de Raguse, & les Geneuois ne payent rien.

Or pour le payement de tant de Tributs, dont le peuple est foulé par le tyran des Regions Orientales, il est bien necessaire qu'on y forge diuerses sortes de monnoye.

Aussi dans Constantinople la grande monnoye Imperiale travaille sans cesse en or & argent : mais personne ne peut estre admis à la forme de ces pretieux ouurages, s'il n'est Grec de nation, par Priuilege particulier du grand Seigneur : lequel a conféré ceste grace aux

Grecs, en consideration de ce que les mines d'or & d'argent sont dans le Domaine Grec 400. hommes y travaillent iournellement. Et le maistre de ceste riche monnoye doit fournir au Serrail tous les premiers iours des mois de l'annee dix mille sequins d'or, & vingt mil de monnoye blanche forgee de nouveau : le grand Seigneur ayant ainsi ordonné que la monnoye qui se depend au Serrail soit neufue. Le mesme fermier a ce pouuoir de faire publier, que quiconque a pardeuers soy des monnoyes estrangeres, qu'il ait dans trois iours à les luy apporter pour en receuoir le iuste prix sur peine de confiscation d'icelles : Il a encore l'autorité de prendre des lingots des mines autant qu'il luy en faut pour la fabrique.

Les mines qui fournissent en partie l'or & l'argent qui se forge en monnoye en l'Empire du Turc en Europe, sont cinq en nombre.

L'une est fouillée dans le pais de la Macedoine, sous les racines d'une montagne appelle Mont-Santo, & celle-cy rend l'or.

L'autre qui est de mesme, est ouuverte sur la Bulgarie aux confins de la Macedoine.

Les trois d'argent sont dans la Grece, riches & fecondes au possible.

De toutes lesquelles on tire au iour ce que la nature auoit iagement caché pour estre parmy les hommes, ce qui cause les querelles, engendre les mepris, rompt l'amitié, corrompt la concorde, viole la pudicité, trouble les Estats, offusque les esprits, raut la vie, detroune souvent la raison de son siege, & desrobe l'homme à soy-mesme.

Mais pour reuenir à ceste grande ville Imperiale de Constantinople, la magnificence des Princes qui la possèdent auourd'huy, & les richesses de quelques Bassas ou grands de la Cour, y ont fait bastir plus de 300. Carraousseraile : ce sont des lieux grands & vastes pour loger des estrangers.

Le nombre des Hospitiaux pour les pauures & les malades vient iusques à 89. 9. d'iceux sont les principaux. Les Empereurs Turcs, qui ont basti de superbes Mosques, les ont ioincts à la structure d'icelles, où ils sont des eternelles marques de leur pieté.

Il y a contre cela vingt Colleges pour l'instruction de la jeunesse Turque, & la demeure des Escoliers, qu'ils appellent en leur langue *Softhas*, c'est à dire Sages estudians, quoy qu'ils ne soient rien moins que cela. Ils ont chacun vne chambre pour leur departement, deux lits, vn tapis pour table, quatre pains par iour, vn potage, & vne chandelle : on leur donne deux habits tous les ans, & ont leur paye du reuenu du College, des Maistres & Precepteurs pour les enseigner, qui sont nommez *Softhani*, c'est pour la premiere annee qu'ils entrent dans le College : car la seconde on adioust à leur entretenement vn aspre par iour, qui peut valoir vn sol, apres deux, trois ou quatre, selon le nombre des annees qu'ils y sont : avec ce maigre reuenu, ces bourgeois Turcs ne pourroient pas faire vn trop grand ordinaire, s'ils n'en receuoient d'ailleurs : mais le gain qu'ils font à escrire des liures, (car les Turcs ne se seruent point d'Imprimeries) n'est pas si petit qu'il ne fournisse abondamment à leurs necessitez, voire à leurs desbauches. Ils vont encore par les maisons enseigner les enfans des personnes de qualité. Mais il ne sort point d'aucun autre lieu de la Turquie de jeunesse plus perduë que sont ces Escoliers Turcs : Il n'y a sorte de meschanceté qui passe la fripponerie, qu'ils ne commettent impunément : les Priuileges desquels les Empereurs Turcs les ont honorez, ou plustost l'abus d'iceux les a jettez à toute sorte d'audace : on ne les peut pendre pour aucun crime qu'ils ayent commis, si leur general n'y est present, à qui seul ce pouuoir a esté donné : il est vray que la presence du Prince empeche dans Constantinople l'insolence de leurs debordemens : Mais la ville de la Caramanie & Natolie en sont grandement importunees. Amurath troisieme, voulant à cause de quelques troubles suruenus, sçauoir le nombre de tels galans, ils se trouuerent monter à plus de neuf mille, tant en Grece qu'en Natolie, sans conter ceux qui estudient en Surie, au Caire, en Arabie, & ailleurs.

Vn autre grand lieu ceint de murailles, & fermé de bonnes portes, decore encore la Cité de Constantinople : les Turcs l'appellent *Serayane*, c'est à dire la Sellerie, où se font les selles & les riches harnois des cheuaux de guerre & de parade : c'est vn indicible plaisir à ceux qui ayment la caualerie de voir quatre mille ouuriers dans ceste place, travailler dans leurs boutiques avec vne louable propriété aux diuerses parures des cheuaux. Là les vns sement de grosses perles rondes sur la selle d'un cheual Arabe de l'escurie du garnd Vizir : les autres attachent vn mors de pur or à des renes d'un riche cuir rouge du pais de Russie : quelques vns mettent estriuières à des estrieux d'or enrichis d'un nombre de Turquoises de la vieille Roche : les autres attachent sur vne vieille croupiere vne quantité de pierres precieuses : icy paroist & iette mille feux, que superbe selle qu'on doit enuoyer au Serrail : le nombre de diamands dont elle est enrichie la rendent inestimable : le mors, les estrieux d'or cou-

d'or couverts aussi de diamants, les houpes de perles, qui sont aux renes; celles qui sont aux pendants de la croupiere, & les autres beautez de ce Royal harnois ravissent à l'admiration de leurs merueilles les yeux de ceux qui les regardent, & persuadent tacitement à quelques vns, que la fortune paree des choses plus precieuses qui releuent d'elle, doit monter à cheval & aller en triomphe par Cōstantinople, pour faire voir aux Turcs qu'elle habite maintenāt chez eux.

Au milieu de ceste place est baillie vne Mosquee pour la deuotion de ces ouriers, & vne belle fontaine au mesme endroict, mise pour leur cōmodité avec grāde abondāce d'eau douce.

Deux autres grandes places enuironnees encore de murailles, seruent dans Constantino-ple aux logemens des Janissaires, qui sont la meilleure Infanterie de la Milice Turque: l'vn de ces lieux est dit *Escudalar*, c'est à dire les vieilles habitations: il est de forme quarrée & diuisee en plusieurs petits logis, dans lesquels demeurent les Caporaux appelez *ababasis*, qui signifie Chefs de gloire: ils sont enuiron 150. de ceste qualité, & chacun d'eux commande à 200. Janissaires, qui n'oseroient sortir du lieu sans congé: les portes sont fermees la nuit, & les clefs sont gardées par le Capitaine.

L'Arsenal est vne des plus belles & des plus merueilleuses choses qui soient à Constantino-ple: il est sur le riuage de la mer, & contient cent quatre vingts arches, sous chacune desquelles entre vne grande galere, voire trois y peuuent estre à couuert. Les Officiers qui seruent à cēt Arsenal & tirent paye pour ce faire, sont ordinairement en nombre de 46. mille: mais la plus grande force est le bon ordre qu'on y tient, par lequel il y a certains marchands qui ont fait party de tenir d'ordinaire 80. galeres fournies de tout ce qui est necessaire & prest pour aller en mer: les munitions des poudres se gardent dans plusieurs tours és murs de la ville, qui regardent Pera, on l'apporte du grand Caire, où les Sultans la font faire. Les greniers dans lesquels on garde la prouision de bled, & d'autres grains, sont bastis en vn coing de la vill: vers Pera, les murailles en sont tres-fortes, & les portes sont de fer: là il y a dequoy viure plusieurs annees, mais tous les trois ans on en renouuelle le grain. Du temps d'Amurath troi- sieme, on y trouua vne grande quantité de miller, qui s'y estoit conserué sain & enuer l'espace de quatre vingts ans.

Or ceste grande Cité Imperiale ne peut estre heureusement regie sans l'exercice de la Iusti- ce, qui est l'ame du monde, & l'ordre de la raison, vn Iuge souuerain en est le Chef: les Turcs l'appellent *Stamboulcadi*, c'est à dire, le Iuge de Conitantinople. Il cognoist indifferement du ciuil & du criminel, & personne ne peut estre executé à mort en ce lieu-là, s'il n'a luy-mesme condamné. Quatre Lieutenans Generaux separez par les quatre principaux quartiers de la ville, exercent sous luy la mesme Iustice: mais de leurs sentences on appelle au Iuge.

Outre ceux cy, il y a vn grand Capitaine de Iustice appellé *Sombasy*, qui fait la plus grande faction de sa charge dans les prisons, à ouir les causes, & en faire son rapport au grand Vizir, Il a au si quatre Lieutenans sous luy separez aux quartiers de la ville, pour l'ordre & la police d'icelle, & vn grand nombre de moindres Officiers, comme Sergens, & autres vi- les gens qui le seruent.

Les prisons de Constantinople sont separees en deux chambres, & embellies (si toutesfois il il y a de belles prisons) d'vn grand preau au milieu, avec vne agreable fontaine: Il y a deux esta- ges. à celle d'embas où sont logez les miserables criminels; à celles d'enhaut sont les detenus pour choses ciuiles. Icy les Iuifs sont separez des Turcs, & les Turcs des Chrestiens: mais là bas ils sont pêle-mêle. cōme personnes que le crime & le meschef a rendu communs. Les aumos- nes & les bonnes ceuures qui s'y exercent par les Turcs, surpassent en peu de iours celles qui se font en nos contrees, en nos annees: la charité Turque enuers le prochain surmonte la nostre, & semble que par tels biens le Ciel les souffre dans l'Empire du monde: car son equité recon- pense le bien, en quel sujet que ce soit, aussi bien qu'elle punit le mal. Les Empereurs Turcs y exercent eux-mesmes la compassion, ils deliurent souuent grand nombre de prisonniers ciuils en payant pour eux leurs debtes.

Voila ce qui est de plus remarquable dans la ville de Constantinople, si bien qu'il faut main- tenant venir aux fauxbourgs, auant que de faire la description generale du Serrail, & de là aux lieux circonuolins, pour voir ce qu'il y a de beau.

Premierement l'on void au bout de la ville, de l'autre costé du port prés des eaux dans la Mosquee d'Ajoug Sultan, en laquelle le grand Seigneur, lors qu'il paruient à l'Empire, va pren- dre son epee. De l'autre costé l'on void les Elcuries avec quelques jardins du grand Seigneur. Plus auant au bord du port est l'Arsenal, où il y a enuiron le nombre de 150. galleres desar- nees hors de l'eau, & enuiron 60. dedans l'eau, toutes prestes: & plus auant il y a vne place appelee Topana, où l'on void vn grand nombre de canons desmontez, dont quelques vns sont tour- nez contre le port.

Il n'est pas raisonnable de laisser derriere vne petite Isle de rocher, qui est au bout

du canal, deux mille dans la mer Noire, toute deserte, mais remarquable pour vne colonne de marbre blanc mise au sommet d'icelle par le grand Pompee, apres qu'il eust deffait Mithridate.

Retournant prez de Constantinople, l'on trouue sur le canal de la mesme mer deux tours, l'une deça, l'autre delà, qui gardent ceste emboucheure; & c'est en ce lieu icy que l'on met en prison les Cheualiers de Malte & d'autres Chrestiens de qualite pris en guerre. Il y a delà à la ville enuiron dixhuiſt mille, & l'on void d'un costé & d'autre vn grand nombre de maisons de plaisir & de beaux jardins, puis vis à vis de la ville, & en Asie est Galata, auioird'huy Pera, scituee entre l'Arsenal & la place de Topana, & habitee la plupart de Chrestiens, Franques & Grecs, les vns & les autres y ont bon nombre d'Eglises, dont la plus belle, & de nostre creance est celle de saint François: les autres sont sainte Marie, saint Jean, saint Antoine, saint Benoist, saint Pierre & sainte Anne, toutes seruiſes à la Romaine: autour de ce lieu il y a plusieurs maisons & villages, comme Casambacha, Persistar, & la demeure des Ambassadeurs, tant de France que d'Angleterre & de Venise.

Plus loin & du mesme costé, l'on voit vn grand village nomme Scutari, qui appartenoit à la Sultane Mere de Mahomet, qui y fit bastir vne Mosquee de grand prix, & vne fort grande & belle maison, où tous les passans de quelque Religion qu'ils soient peuuent loger, & sont nourris durant trois iours: Les Turcs nomment ce lieu Caruaserat.

Aupres de ceste prouince, on trouue la Chersonese dite de Thrace, & communément le bras de S. George, où est la ville de Gallipoli, qui est à quatre iournees de Constantinople. Ce fut la premiere place d'Europe, que prit Amurath premier, l'an 1363. & n'a aucunes murailles, & son port n'est capable de grands vaisseaux: toutesfois il y a vn sein ou golphe, qui peut assez contenir: Ceste ville est habitee des Grecs, Iuifs & Turcs: c'est vn grand passage de l'Europe en Asie.

Or tout le destroit de mer depuis Gallipoli, où finit le Propontide, iusques à l'Archipelague est nomme Hellespont, où est le destroit des chasteaux, qui a vn quart de lieuë de large. C'est où sont les deux chasteaux de Sest & d'Abide (renommez pour les amours de Leandre & de Hero) nommez communément Dardanel, & par les Turcs Bogazasser. Sest est ceste Chersonese de Trace au pendant d'une colline, en forme de Trefle. Abyde est en la Natolie.

Quant au Propontide, c'est la mer qui est enfermee entre les deux destroits, à sçauoir entre celui de Thrace ou de Constantinople, & celui de Gallipoli, & maintenant on le nomme, de Marmore.

DESCRIPTION GENERALE DV SERRAIL DV GRAND SEIGNEVR.

IL y a trois sortes de formes de Serrails dans la ville de Constantinople, l'un desquels est appellé *Eſchy Saray*, c'est à dire le vieil Serrail, qui fut la premiere Maison Royale bastie dans la ville, apres que les Turcs s'en furent rendus maistres, il est scitué presque au milieu d'icelle, sa forme est quarree, & son circuit embrasse trois mille d'Italie, ou vne grande lieuë de France, telle qu'on les fait en Languedoc, ou en Prouence: Les Dames qui ont seruy aux Empereurs defuncts, leurs sœurs, si elles ne sont mariees, & les nourrisſes de leurs enfans le possèdent pour leur loge nent, duquel elles ne peuuent sortir si on ne les marie: Vne Dame à laquelle l'age & la prudence ont acquis du merite, a le soin & la conduite des autres, comme superieure, elles l'appellent *Cheira Cadun*, c'est à dire Grand' Dame. Le grand Seigneur en ses plus solitaires humeurs se retire par fois quelques iours en ce lieu là, pour y chercher la consolation, qu'il ne trouue pas ailleurs.

L'autre Serrail est de moindre estenduë: il est scitué à l'Hippodrome, & sert auioird'huy à la solemnité des jeux, Pompes & Carrouſels des Princes Turcs, ensemble d'Academie à quatre cens pages du grand Seigneur, qui sont en iceluy instruits aux lettres Turques, à tirer des armes, & autres exercices dignes d'iceux: ils sont nourris & enseignez aux despens de leur Maistre, & ne sortent point de là, qu'ils ne soient faicts *Eſpays*, c'est à dire hommes d'armes: Ce lieu s'appelle *Ebreyn Bassay Saray*, qui veut dire le Serrail d'Ibraim Bassa, lequel estoit gendre de Sultan Soliman second, & son fauory pour vn temps, il le fit bastir à ses despens.

Le troisieme est appellé *Bryuch Saray*, c'est à dire le grand Serrail, maintenant l'ordinaire habitation des Empereurs Turcs: c'est aussi de celui-là que nous entendons parler.

Ce grand Serrail, la demeure des grands Seigneurs, & de leur famille, est plaisamment planté au mesme endroiſt, où jadis fust bastie l'ancienne Byſance, sur vue agreable pointe de terre ferme, qui regarde l'emboucheure de la mer Major: sa forme est triangulaire: deux costez d'icelle sont mouilleez par les ondes de la mer Egee. La troisieme est appuyee de la ville: Il est ceint tout autour de fortes & hautes murailles, munies de plusieurs tours, qui en font la

defenſe

deffense meilleure : il a cinq mille de circuit, qui font deux lieües & demie de France : plusieurs portes à son entree, tant du costé de la mer que vers la terre : vne principale du costé de sainte Sophie est ordinairement ouverte, les autres ne le sont que quand il plaît au grand Seigneur. Celle-cy est gardée de iour & de nuict par des Compagnies de Capigis qui sont portiers, lesquels se releuent les vns les autres, & la nuict quelques lannissaires, qui sont hors la porte dans de petites loges de bois montees sur rouës, font sentinelle, & aduertissent quand il est besoin le corps de garde de Capigis.

Dans les tours qui sont sur les murs aux enuirs du Serrail dorment Azamoglans, (c'est à dire enfans sans experience) de ceux du Tribut, pour voir si quelqu'un n'approcheroit point par terre, ou des vaisseaux par mer, ceste Maison Imperiale, & en tel cas ils tiroient quelques pieces d'artillerie, qui sont là chargees pour mesme effect.

Les chambres & les salles Royales du departement du Sultan, sont disposees selon les diuerses saisons de l'annee : celles où il se retire en hyuer, sont scituees en des lieux plains & esgaux : les autres où il va chercher le frais pendant les importunes chaleurs de l'Esté, sont basties sur diuerses & naturelles collines : quelques-vnes voyent les agitations de la mer, & celles-là sont dites *Chiofhi*, c'est à dire cages, & lieux de belle veüe. Les Sultans vont quelquesfois en ces lieux-là prendre seuls les plaisirs de ceste belle veüe, & quelquefois y appellans leurs Dames, meilent les molles delices de leur lasciuue conuersation.

Assez proche de ce beau lieu, c'est celuy où le grand Seigneur donne audience aux Ambassadeurs, reçoit ou congedie les hommes qu'il enuoye des Prouinces esloignees. Il est scitué dans le plan d'une Court sur vne petite Ile, esmaillée de plusieurs belles fleurs, & arrosée de quelques agreables fontaines superbement embellies, selon leur coustume : au dedans se voit vn *Sopha*, c'est à dire vn Throsne couuert, de quelque riche tapis d'or, parmy lesquels en paroist vn de velours rouge cramoisy, en broderie de grosses perles rondes : Ce throsne s'appelle le Throsne de dehors, à la difference de celuy qui est dedans la Chambre du grand Seigneur, & c'est dans celuy-là que s'assit Otman second dernier massacré, ne pouuant posseder l'autre, qui estoit au dedans ou son oncle Maltapha fut enfermé en l'an 1617. là sont donc assis les Empereurs Turcs en telles actions.

Les murailles de ceste Chambre sont reuestuës de certaines pierres blanches, cuites & teintes de diuerses couleurs, qui en rendent la veüe tres-agreable.

La Chambre qui est attachee à celle-cy, à ses murs reuestus de placques d'argent, porfilez d'or, & son pauer couuert de riches tapis à la persienne, d'or & de soye.

Le departement où sont logees les femmes & filles vouës au plaisir de l'Empereur, est comme vn grand Monastere de Religieuses : mais on n'y garde pas le vœu de Chasteté. Il a ses dortoirs, ses refectoirs, ses bains, ses galleries, les jardins delicieux, & les belles fontaines en si grand nombre, qu'on les voit rejaillir en toutes les allées, & de tous costez on entend le doux de leurs charmans gasouils : les autres logemens pour les domestiques du Serrail, ont avec la beauté de leurs structures les commoditez de leur situation.

Deux grands lieux sont ioincts à ces bastiments, dont l'un sert au Chasna de dehors : (car il y en a vn au dedans plus retiré des domestiques) les Mosques, bains, Escoles, cuisines, lieux pour courir à cheval, luitter, tirer de l'arc, representer quelque action, augmentent les merueilles de ceste maison Imperiale, dont il a esté parlé en general : maintenant faut descendre aux descriptions particulieres des lieux d'icelle, au moins de ceux qu'on a peu voir iusques icy : car personne de dehors n'entre dans le Serrail si l'Empereur n'en est absent, encore faut-il estre favorisé singulierement de quelque personne de credit & d'autorité en celieu-là : car les Turcs croiroient offenser la Majesté de leur Prince, de permettre l'entree de son departement au Serrail, à quiconque que ce soit, estranger ou autre.

La premiere muraille du Serrail est proche de la premiere Mosquee de sainte Sophie, avec la grande maistresse porte de ce superbe Palais, ornee d'un grand portail peint en lettres d'or, à fueillages & compartimens à la Ianesque, cinquante Capigis avec leurs armes, qui sont harquebuses, arcs, fleches & cimenterres la gardent : par icelle on entre dans vne grande & vaste place, ou court quarree, d'environ vn demiquart de lieüe de longueur, & autant de largeur, dans laquelle à main droiète est l'Infirmierie du Serrail gardée par vn Eunuque, qui a sous luy vn grand nombre d'hommes employez au seruice des malades du mesme Serrail : de l'autre costé à main gauche on voit plusieurs chariots & grande quantité de bois pour l'usage de la maison : au dessus est

Court faict l'entree du département de l'Empereur, laquelle est defendue à quiconque que ce soit, excepté aux esclaves qui le seruent: Que si quelque grand Bassa pressé de quelque important affaire desire y entrer, il en faut premierement avoir la licence de la bouche du Prince.

L'entree de ceste porte conduit vers la sale, où entre le Sultan pour donner audience à quelque Ambassadeur de Prince estrange. Le lieu est diversifié de plusieurs grandes beautés, la Court est toute pavée de marbre, & l'œil y reçoit un grand plaisir par la decoration de plusieurs belles fontaines qui y sont. Il y a là dedans quantité de tabernacles & chambres fort agreables, où le grand Turc prend les repas plus ordinaires: car il s'y plaît singulierement à cause de plusieurs beaux bains & portiques.

Le grand Seigneur a encore une demeure d'esté en un autre costé de sa maison Imperiale, où il passe la saison des chaleurs, pour ce que les veüs d'icelle se portent sur la mer, sur un lac & sur des jardinages, avec de belles platte-formes embellies de fontaines, & aqueducs excellens, où il prend ses esbats avec ses favoris familiers, prenans son plaisir à voir quelques bouffons & Eunuques s'entretenir & s'entrebattre dans l'eau.

La Chambre du grand Seigneur est la plus magnifique des Chambres Imperiales & Royales d'aucun autre Prince tel qu'il soit: car au lieu de tapisseries à ramages ou personnages d'or, d'argent & de soye, comme il se voit es Maisons & Louures de nos Princes, ce ne sont que murailles de bois d'ebene de grand prix, enrichies de perles & de marqueteries d'or & d'argent.

Le liest du grand Seigneur est de velours rouge cramoisy, la couche & quenouille ou pilliers tout d'argent doré: les bonnes graces, contrepontes tout en broderies d'or & de perles, avec franges toutes d'or pur.

Le plancher de la Chambre est couvert de grands tapis de Turquie fort fins & exquis, garnis d'une grande quantité de coussins & oreillers de drap d'or, enrichis de perles & piergeries.

Pour mettre les chandelles au soir, il y a des chandeliers de cristal, embellis d'un nombre grand de pierres fort pretieuses.

Il n'a pour ordinaire compagnie que certains bouffons esclaves qui luy donnent mille plaisirs, & à ceux-cy il donne l'or & l'argent des bourses que le Thresorier general de son Serrail luy fournit par chaque semaine.

On disoit que les Turcs ont les livres & Imprimeries en haine & mespris, si est-ce que près de la Chambre du grand Seigneur se voit un cabinet, où il y a une tres-excellente & curieuse bibliotheque, où sont quantité de bons livres rares & curieux, & superbement couverts, elle s'appelle la Bibliotheque particuliere: Il y en a une autre pour les Pages & Officiers du Serrail, remplie de volumes de toutes langues & nations: Il y en a encore de l'ancienne Bibliotheque de l'Empereur Constantin le Grand, de largeur plus d'une brasse, leurs feuilles sont de velain si artistement paré, que l'on viroit plustost estre soye que peau: ces peaux ne sont imprimees: car l'Imprimerie en Turquie n'y peut estre admise: entre ceux-cy sont les livres du vieil & nouveau Testament, tous couverts d'argent doré à l'antique, semés d'un nombre grand de pierres pretieuses: le prix & la valeur d'iceux les a conservez, & plusieurs autres ont esté deschirez, lacerez & bruslez des Turcs au sac de Constantinople, ceux qui restent sont tellement estimez, que nul n'y ose pas toucher.

Les Mosques du Serrail sont au nombre de deux; l'un est du costé du quartier du grand Seigneur, tant pour luy que pour les Officiers qui approchent plus près de sa personne: l'autre est pour les Sultanes, femme & fille de plaisir dudit grand Seigneur, pour les Eunuques & pour les esclaves.

Finallement pour les jardins qui rendent le séjour & la gloire du Serrail admirable: il y en a jusques au nombre de vingt, sçavoir dixhuit, tous sur le bord & riuage de la mer, où y a quantité d'arbres fructiers aromatiques, rares, odoriferans, & d'une agreable beauté: il y en a trois particuliers à la personne du grand Seigneur, & quelques autres pour les Sultanes, & autres femmes du Serrail.

Voilà ce qui est de la magnificence moderne du Serrail, ou maison Imperiale du grand Seigneur, pris la plus part des memoires de Thevet Cosmographe François, & du livre du Serrail faict & dressé par Monsieur Baudier, duquel j'emprunte volontiers la verification des choses plus veritables qui se vantent de la magnificence de ce grand Prince des Ottomans, ainsi que ie feray encore traitant cy-apres de sa personne & de sa Cour.

DE LA PERSONNE DV GRAND SEIGNEVR.

6 **C**E que nous avons à voir singulierement en ce qui concerne la personne de l'Empereur des Turcs, est de la premiere action, par laquelle il prend possession de sa souveraineté, & reçoit en main la puissance de commander absolument en grand & redoutable Monarque, à tous ceux qui recognoissent le sceptre & le pouuoir des Ottomans : C'est premierement l'action Royale & Imperiale de son sacre & couronnement : car apres qu'un grand Seigneur est allé de vie à trespas, le fils ou autre successeur du defunct, que l'on veut faire grand Seigneur est mandé de la ville ou Prouince, en laquelle il est Bacha ou grand Gouverneur : (car jamais les Empereurs de Turquie ne souffrent leurs successeurs aupres d'eux) & vient à Constantinople, comme un incogneu du costé de la mer, où il est receu par le grand Maistre du Palais Imperial, avec quelques galleres que l'on enuoye au deuant de luy : ayant quitté la galere on l'introduit au Serrail, & le fait seoir au Throsne Imperial des grands Seigneurs, où estant alors tous les Seigneurs & grands Dignitaires, ou Officiers de l'Empire le viennent adorer, & luy baiser le bord de sa robe comme à leur Empereur & souverain Seigneur : apres ceux-cy le public le va saluer & recognoistre, & tant par la ville que fauxbourgs de Constantinople sont faites proclamations publiques à son de trompe, que chacun aye à recognoistre un tel Prince pour souverain Empereur des Turcs, & de là les mesmes proclamations se font par toutes les Prouinces, pais & villes dependantes de sa grandeur Ottomane : & observe Monsieur Baudier en son Serrail, & se voit Chalcondile : que le cry accoustumé d'estre fait en telles proclamations consiste en ces mots, *Que l'ame de l'Inuincible Empereur Sulean N. iouisse d'une immortelle gloire, & d'une eternelle paix, & que l'Empire de Sultan N. puisse florir & prosperer en toute felicité par longues années.* Par apres se tient une assemblee generale au Diuan ou Conteil, où se rendent tous ceux qui ont accoustumé d'entrer au Conseil Imperial, comme les Bassas, grands Gouverneurs & Officiers de l'Empire, où l'on delibere des choses plus importantes & necessaires à la conduite generale de l'Empire, & toute ceste assemblee se tient en l'absence du nouuel Empereur : le Conseil finy, tous ceux qui y ont assisté vont saluer sa Majesté Imperiale, sans autre ceremonie, & de là entrent en une longue salle où est appresté un fort superbe & magnifique festin.

Le dîner acheué, on fait assembler au Serrail tous les grands de la Cour, avec la Noblesse ordinaire de sa Majesté, & nouveau grand Seigneur monté sur un cheual de bataille, & le plus superbe & excellent qui soit en ses ecuries, tout reluisant de perles & diamands, sort triomphamment du Serrail, luivy de tous les Seigneurs, Chefs & Capitaines, tant de la garde de sa personne Imperiale, que de son Palais, avec tous les Officiers & autres grands Dignitaires de sa Couronne, & en ceste magnificence se pourmene par les places & grandes rues de la ville de Constantinople, & se fait voir & cognoistre au peuple, qui crie le voyant & posans les genouils en terre, *Vive & regne longuement le Sultan N.* ayant fait ceste monstre Imperiale, auant que rentrer au Serrail, il est conduit au grand Serrail de sainte Sophie, où se font les prieres pour feliciter son heureux aduenement à l'Empire, & apres quelques harangues panegyriques faites à sa Majesté Imperiale : le grand Mufti s'approche d'elle pour luy donner la benediction, luy ceindre l'espee Imperiale au costé, & exiger de luy le serment d'amplifier la grandeur de l'Empire, & s'obliger aux loix & constitutions mentionnees dans l'Alcoran, lequel il iure & promet entretenir & garder : & l'ayant promis entre les mains du grand Pontife Mufti, il luy donne la benediction par sept fois, auxquelles & à chacune desquelles le peuple respond *Amen* : ces ceremonies acheuees, le grand Seigneur se retire en son Serrail, & chaqu'un en son quartier.

Les iours suivans, il s'occupe à visiter les galeres & vaisseaux de mer, s'informe du nombre & de l'equippage d'iceux : visite son Arsenal, void la quantité des canons & munitions de guerre, des armes, des machines, de l'ordre qui s'observe en l'entretien de sa gendarmerie, tant de Constantinople que par tous les lieux de son Empire.

Quant aux Tiltres & qualitez que s'attribuent les grands Seigneurs de Turquie : ils sont certes insolens, & par trop superbes & arrogans : ils s'appellent Roy des Roys, Seigneur de tous les Seigneurs, Prince de tous les Princes, Tiltres sans comparaison, semblables à celui que S. Iean en ses Reuelations attribue pour plus grands au tout puissant Createur du Ciel & de la terre ; telle estoit la presumption de Selim Ottoman : mais vous aurez bien cy-apres d'autres Tiltres d'orgueil, lors que ie rapporteray les articles que passa Achmat premier, pour le bien de la Chrestienté en faueur du Grand Henry Roy de France, de memoire immortelle.

Pour ce qui est de la façon de se vestir & habiller du grand Seigneur, il n'y a rien qui exce-

de l'or-

de l'orgueil & l'excellence de sa Majesté, au contraire les vestemens ordinaires ne passent pas le prix & la valeur de plusieurs grands qui frequentent à sa Porte : Mais aux ceremonies plus grandes, & aux pompes & magnificences où il veut paroistre en Majesté Imperiale au public, comme en la circoncision des Princes ses enfans, ou quand il veut donner audience aux Ambassadeurs de quelques Empereurs ou Roys estrangers, il prend des robes de drap d'or, toutes parsemees & enrichies de perles, pierreries & diamands, qui le rendent tout brillant & esclatant aux yeux de ceux qui l'envisagent : pour l'ordinaire les habits sont plus long que ceux des grands de sa Cour, & au lieu que les Seigneurs ont des souliers garnis de ferremens, le grand Seigneur n'en porte que de coupez par ramages & fucillage.

La table où mange ordinairement l'Empereur des Turcs est assise sur quatre colonnes, & tant lesdites colonnes que le dessus, le tout est d'argent massif, tres-beau & reluisant : elle est basse & esleeue seulement de trois pieds, sur laquelle il boit & mange tous les jours, & plus en la saison des chaleurs, qu'en temps d'hyuer & courts iours.

Le pain qu'il mange est fait de fine fleur de farine petrie avec lait de chieure, dont y a quantité au Serrail.

Son premier repos, qui est comme son desjeuner se fait à la pointe du iour, au lever du Soleil, heure en laquelle il se leve tous les matins.

Les plats qui se portent sur les tables, & dans lesquels les viandes sont servies devant luy, sont doubles, & tous d'or, & ne s'en sert aucun qui ne soit couvert : on en met sur table jusques au nombre de vingt-cinq ou trente, pour tout autant de sortes de viandes, dont il est servi par les Maîtres d'Hostels & Escuyers de table, & autres officiers de cuisine, qui le servent enoûil avec un tres-grand respect.

Ses viandes ne sont point assaisonnees, ny de sel, ny d'espices, ny de verjus ou vinaigre.

Ny luy, ny aucun autre Seigneur ne parle dans la Chambre où dîne le grand Seigneur, si ce n'est par signe, encore faut-il qu'il soit fait arriere de sa veüe : le parler ny est permis qu'aux bouffons & badins de sa Cour, qui seuls ont liberte de rire, & luy donner du plaisir par leurs actions & grimaces, le long de son dîner.

Son boire est jus de citron, & limons mixtionné d'une liqueur douceuse & agreable, tiree de l'expression de plusieurs bons fruits, duquel il use avec une cueillier : car le vin ne se sert point en Turquie à la table de ceux qui observent la loy de Mahomet, comme des grands Seigneurs, qui principalement sont estar de l'entretenir sur tous autres.

Une chose est à remarquer, que dans le Careme de trente iours seulement que les Turcs observent tous les ans en quelque saison de l'annee que le grand Mufti leur annonce, la vaisselle d'or, d'argent, ny les vaisseaux de noix d'Inde n'ont point de cours sur les tables du grand Seigneur, ny des grands de sa Cour à son imitation : mais seulement de porcelaine jaune pour sa table, & de bois ou de terre pour les autres, & ne mangent aucune chose pendant les jeunes de Careme, qu'ils ne voyent les estoiles du Ciel.

D'avantage pour ce qui est de son repos de nuit, il n'y a aucun lit dans sa chambre de iour, sinon le lit de parade, dont est parlé cy-devant, qui est dans une chambre, en laquelle il ne couche pas : en celle où il couche, le lit ne se dresse que lors que le sommeil le veut prendre, il se fait sans couche & sans chalit, mais sur le mesme plancher, où les valets de sa Chambre estendent plusieurs fois & espais tapis de Turquie, sur lesquels ils estendent les matelats de fin cotton, & ce lit est entouré de courtines faites de soye & toiles d'or, entre lesquelles le grand Seigneur prend ordinairement son repos de la nuit, y ayant des lampes qui brulent perpetuellement la nuit dans ladite Chambre avec des Gardes à la porte d'icelle, & tout autour de son lit.

C'est chose estrange de ce qui se raconte de la Majesté orgueilleuse de ce Prince, auquel on n'oseroit parler, ce qui est non seulement deffendu : mais bien d'avantage, il est tellement excessif en superbe & gloire, que nul n'oseroit pas lever seulement la veüe pour l'envisager, sans encourir le crime de leze Majesté, non pas mesme les Bassas : Il n'y a que le grand Mufti & le grand Vizir, qui allans pour le saluer & adorer, se presentent devant sa face, les mains jointes, & les yeux humiliez vers la terre, & en ceste sorte se iettent à genoux à ses pieds, avec un respect tres profond, sans lever la teste pour le regarder, & ainsi le saluent sans le voir.

S'il va par la ville, les pauvres n'ayans peu obtenir iustice de ses Officiers, luy presentent leurs requestes au bout d'une gaulle, ou d'une verge : pource qu'estans couche par grande humilité contre terre, la veüe portee en bas pour ne l'oser regarder, ils ne peuvent pas porter leur main iusques à la lienne pour luy donner. De sorte que ses plus familiers mesmes ne luy parlent que par signes, & est grandement requis le silence aupres de sa personne, & par tout au Serrail, où il ne s'entend aucune voix, toutes choses se disans & s'expliquans par signes :

Le grand Seigneur mesme garde ce silence, la loy de l'Empire luy deffendant de parler aux siens: mesme les Sultanes les femmes n'osent pas luy parler, que par l'entremise des esclaves muets qu'elles ont avec elles.

Outre ce que Monsieur Baudier rapporte de la coustume pareille de l'Empereur des Abissins tiree de l'histoire de François Alvarez, par le lieu qu'il cite, qui est le chap. 54. de la description de l'Ethiopie, faite par ledit Alvarez, où parlant du respect orgueilleux & superbe que cet Empereur se fait porter, tant par ses sujets que par les estrangers, fait mention de l'action qui se passa en la Cour au iour que l'Ambassadeur du Roy de Portugal eust la premiere audience de sa grandeur, ledit Alvarez qui y estoit present dit ainsi.

„ Le Mercredy premier iour de Nouembre de l'an 1520. apres deux heures de nuit, le Preste-
 „ Ian nous fit appeller par vn Page, pour à quoy obeir, chacun d'entre nous se mit en ordre, &
 „ prîmes le chemin d'un circuit de palis, à la porte duquel estans paruenus, nous y trouuâmes
 „ des portiers, qui nous firent demeurer & attendre par l'espace d'une heure, non sans endurer
 „ un merueilleux froid, à cause d'un vent sec, qui tiroit en ceste endroict-là, d'où nous vîmes
 „ devant l'autre circuit plusieurs personnes tenans des torches allumees en main, & pour autant
 „ qu'on nous faisoit tant musier, nous commençâmes à descharger deux mousquets: sur ce le
 „ Preste-Ian nous fait demander pourquoy nous n'en auions amené plusieurs autres, dont
 „ l'Ambassadeur fit response, que nous ne venions pas pour mouuoir ny faire guerre, qui nous
 „ faisoit ainsi aller sans armes, mais que nous auions apporté avec nous trois ou quatre de tels
 „ bastons à feu pour nous recreer seulement. Or estans ainsi en attendans, cinq des principaux
 „ de la Cour nous vindrent aborder, entre lesquels estoit un nommé Adrugas, à qui nous fus-
 „ mes enchargez lors que nous arriuâmes: Iceux avec la parole du Roy, firent incontinent les
 „ ceremonies accoustumees, enquoy nous les ensuiuîmes tout soudain, puis commençâmes à
 „ cheminer cinq ou six pas, faisant une pose au bout d'iceux, avec ceux qui nous accompa-
 „ gnoient, lesquels nous cottoyèrent tousiours, comme s'ils nous eussent menez par la main,
 „ & d'un costé & d'autre: il y auoit deux hommes portans chacun une torche allumee, qui se
 „ prindrent à dire l'un apres l'autre à haute voix, *hunca hiale huchia abeton*: c'est à dire ie t'amene icy
 „ Seigneur ceux que tu m'as commandé, & n'auoit pas plustost l'un de ces deux acheué que l'autre
 „ recommençoit, tousiours continuans l'un apres l'autre, iusques à ce que nous ouyîmes au
 „ dedans une voix de plusieurs ensemble, qui disoient *Casacinelet*, qui vaut à dire, entrez dedans;
 „ nous nous aduançâmes un peu, & puis nous arrestâmes, & furent de rechef repetees les pa-
 „ roles susdites, tant que de rechef on respondoit au dedans, comme on auoit desia fait: tel-
 „ lement que nous fîmes bien dix postes depuis la premiere entree iusques à la seconde, & à
 „ chaque fois que l'on venoit à respondre au dedans, *Casacinelet*, à cause que c'est la parole du
 „ Preste Ian, ceux qui nous menoient baïssoient la teste & les mains iusques en terre, & nous
 „ avec eux, & passans la seconde entree, nos guides commencerent à prononcer autres paro-
 „ les, qui estoient, *Caphun hyam, Caynha Afrangues abeton*, qui est à dire, Seigneur, nous amenons
 „ icy les franques, comme vous nous avez commandé, lesquels ils repeterent autant de fois
 „ qu'ils auoient fait au commencement, & attendoient la response au dedans, qui estoit com-
 „ me la premiere, & ainsi de pose à autre arriuâmes aupres du Mastabe, qui est le liest ou couche
 „ du Preste-Ian, au deuant duquel il y auoit plusieurs torches allumees, qui estoient celles les-
 „ quelles nous auions veü en la premiere entree, que nous en contâmes 80. par rang en
 „ bon ordre: pour maintenir, lequel micux serré, ceux qui les tenoient portoient deuant d'eux
 „ quelques cannes en main fort longues, & trauersantes à la hauteur de l'estomach, estans ces
 „ torches fort esgales. Ce Mastabe estoit dressé à l'entree d'une grande maison à un estage, &
 „ est bastie sur de grosses colonnes de cyprez avec leurs voutes, flechissantes sur le plan du cha-
 „ piteau d'icelles, embellies de peintures, estans par dessus couuertes d'aucuns aïx, qui descen-
 „ doient iusques à fleur de terre. La couuerture du comble est faite d'herbe du pais, laquelle les
 „ habitans nous acertenerent pouuoir durer le temps de la vie d'un homme, à l'entree de la
 „ maison, il y auoit cinq courtines tendues au deuant du liest, dont celle du milieu estoit de drap
 „ d'or, & les autres de soye fine, au deuant desquelles on voyoit un grand & riche tapis estendu
 „ sur le plan, & aupres d'iceluy, deux grands draps de cotton, tout le reste estoit couuert de nat-
 „ res peintes, en sorte que l'on ne voit rien sur le plan, & ainsi estoit d'un bout à l'autre plein de
 „ torches allumees, rangees comme nous auions veu les autres allumees. Or ainsi que nous
 „ estions en ceste sorte arrestez, nous ouïmes du dedans des courtines la parole du Roy, qui
 „ sans exorde ny harangue nous fit response.

Voilà la folie & preiemptueuse gloire de ces superbes Empereurs, qui croient comme un Alexandre que le monde soit trop estroit pour comprendre les bornes de leur grandeur sourcilleuses, & qui seront finalement reduits à posseder cinq petits pieds de terre.

S'il faut parler de la maniere avec laquelle le grand Seigneur se gouuerne en la reception des Am-

des Ambassadeurs des Princes estrangers, il faut sçauoir, que comme il y a deux sortes d'Ambassadeurs, les vns de grands Empereurs, Monarques & Roys tres puillans : comme de l'Empereur d'Allemagne, du Roy de France, du grand Sophi de Perse, du grand Cham de Tartarie, du Roy de Pologne, du grand Duc de Moscouie, du Preste-Ian : les vns sont des Princes, Estats & Republiques de mediocre consideration, comme de Venise, de Florence, de Geneue, de Raguse, de Maroc, & autres.

Quand il est question de receuoir vn Ambassadeur d'un bien grand Prince, si tost qu'il est arriué à Constantinople, il a le credit de visiter tous les Grands Officiers & Dignitaires de la Porte du grand Seigneur, & de se concilier leur faueur aux affaires, par lesquelles il est enuoyé à ceste porte de la part de l'Empereur, ou du Roy son Maistre.

Quelques iours apres, le grand Seigneur estant aduertie de l'arriuee de cet Ambassadeur, le fait aduertir, qu'il a pour agreable, qu'il aye l'honneur de luy baiser la robbe.

Le iour de l'audience venu, qui est tousiours à l'issüe, ou au commencement de l'assemblée du Conseil au grand Serrail, par commandement du grand Seigneur, & du Vizir, pour faire paroistre aux yeux des estrangers la magnificence Imperiale de sa Majesté, font mettre toute la Gendarmerie du Serrail en double haye & rang, depuis la porte premiere & principale qui entre en la premiere Cour du Serrail, iusques à l'entree du lieu où se tient le Conseil, & de celuy où le grand Seigneur donne ordinairement ses audiences ausdicts Ambassadeurs.

On enuoye à l'Ambassadeur, que l'on attend à l'audience vne robbe faite à la Turquie, de drap d'or, à franges d'or & de soye, & habille-on les plus apparens de sa maison de mesme, avec la toque de velours noir en teste, on leur amene aussi pour le conduire à l'audience des cheuaux des meilleurs & plus beaux qui soient es Ecuries du grand Seigneur.

La Noblesse de la porte le va receuoir pour l'amener au Serrail, en grand nombre & magnificence, tant pour les pierreries & brodure d'or & d'argent de leurs habits, que pour celles dont les selles, mors & brides de leurs cheuaux sont enrichis.

Deux Bassas vont coste à coste de luy, & ne le quittent point, qu'ils ne l'ayent liuré entre les mains du grand Vizir, qui le prend par la main, le conduit en vn ban préparé près du sien en la salle du Conseil, couuert d'un grand tapis d'or de Turquie, iusques à l'arriuee du grand Seigneur en son Diuan.

Aupatant l'audience, il se fait vn festin à l'Ambassadeur, où assistent tous les plus grands de la Porte pour luy faire compagnie : & le festin acheué, le grand Seigneur superbement & magnifiquement vestu, brillant de tous costez, pour le nombre infiny des diamands, rubis, & autres pierres, dont son Turban, sa Robbe, & iusques aux roses de ses souliers sont garnis, attend l'Ambassadeur en sa chambre, & cependant se fait apporter à disner.

Ayant disné, le grand Maistre des Ceremonies de la Maison Imperiale, avec le grand Vizir, prennent Monsieur l'Ambassadeur, & le conduisent en sa presence en la Chambre Imperiale toute reluisante d'or & de pierreries, où il est introduit par vne Compagnie d'Eunuques qui se presente à eux à la porte de ladite Chambre, où deux Capigis le reçoient par dessous les bras, & le presentent au grand Seigneur, deuant lequel s'inclinant il luy baise le bord de la robbe, comme aussi font tous les Gentils-hommes de sa Maison. Cela fait il tire la lettre de creance de l'Empereur, ou du Roy son Maistre, qu'il presente humblement au grand Seigneur, qui ne luy fait aucune responce : mais ayant parlé à son grand Vizir, ledict Vizir luy dit quelques briefues paroles, apres lesquelles l'Ambassadeur se retire de la Chambre.

L'autre Ambassadeur de quelque Prince ou Estat inferieur au plus grand, n'est point honoré avec des pompes semblables, ils entrent bien au Serrail avec la robbe de Turc, mais ils ne sont pas festinez, ils ne jouissent pas de la visite du grand Vizir, ny de l'assistance des Bassas comme le premier.

La forme de iurer l'entretien d'une Alliance du grand Seigneur, avec vn Prince ou Estat estranger, est remarquée telle par Monsieur Baudier en son Serrail.

Je iure & promets par le grand Dieu, qui a crée le Ciel & la Terre, par les ames des septantes Prophetes, par la mienne, par celles de mes ancestres, de garder à N. & N. tous poincts & droicts d'Alliance, & d'amitié constituez iusques à present, & de les tenir pour sacrez & inuolables, comme ils sont declarez par mon seinz.

Venons aux autres actions es choses qui concernent encore la personne du grand Seigneur. Et tout premierement de mesme que toutes choses sont assuietties au triomphe de l'amour accouplées à son char, comme celuy qui dompte tout à quoy il s'attache, aussi se prenant aux Triomfes des grands Monarques, il se rend Maistre & vainqueur de leur cœur, & engage leurs personnes à l'adoration de ses idoles, & à l'inclination de ses loix : mais s'il y a

Princes au monde agitez de l'amour, sont singulierement les Emperours de Turquie : aussi pour ce sujet tous les grands qui gouvernent les Prouinces dans les Estats du grand Seigneur, sont autant de chasseurs qui chassent aux lacs d'amour, qui en ploient tous leurs soins à recouurer des filles capables d'assortir les amoureuses passions de ce Monarque. ils les achèptent des Meres, leurs parens, où les rauissent & enleuent hors de la maison de leurs Peres, ou dans les guerres, les leparent d'avec le butin des soldats, les captiuent, les instruisent à la gentillesse, les accoustument aux chants, aux airs, aux mignardises & douceurs des voix, aux instrumens de musique, à dancier, à bien parler, & estans ainsi parfaitement instruiestes les enuoyent pour present au grand Seigneur, duquel ils tirent pour ces soins de tres-belles recompenses : ces belles filles reduites au Serrail du Turc, avec plusieurs autres, sont exposees à la concupiscence d'iceluy, les faisans toutes assembler ou dancier ensemble, pour choisir celle avec laquelle il desire coucher : & selon le contentement qu'il en reçoit, il l'enrichit, & luy donne pension & quantité de seruiteurs Eunuques & d'esclaves pour estre serui en Sultane & Princesse en ce mesme Serrail, iusques à ce qu'il plaise audit grand Seigneur la donner en mariage à quelque grand de sa Porte. La premiere de ces femmes ou filles qui acouche en ce Serrail, si c'est d'un fils qui doit estre successeur à l'Empire, elle est appelée Royne, on la couronne d'une couronne de pierreries, & luy fait le grand Seigneur auoir tout train de Royne & d'Imperatrice. Il n'espouse aucune de ces femmes ou filles de son Serrail, de sorte qu'elle luy seruent toutes de concubines, & sont les enfans, quoy que successeurs à l'Empire enfans nez de concubinage, & non de legitime mariage, si ce n'est que quelquefois l'amour qu'il porte à celle qui la premiere luy a engendré un maile, ne luy face espouser par la violence de son ardeur : quoy que les loix de son Conseil ne veulent que leurs Emperours n'espousent aucunes femmes.

- 9 Les femmes du grand Seigneur sont de deux sortes, femmes sont appellees celles qui ont ja eu sa compagnie : les autres qui ne l'ont eue s'appellent filles, & le sont veritablement encore. Ces femmes ont leur quartier à part dans le Serrail des femmes du grand Seigneur, elles sont seruiées, & viuent en toute libertez : les filles sont à un autre quartier, viuent toutes en commun, & hors les repas, ont des chambrettes où elles se retirent avec des matrones qui en ont chacune dix sous leur gouvernement.

Le vieux Serrail sert pour le logement des sœurs du grand Seigneur, qui sont separees là dedans des concubines d'iceluy, elles sont grandement riches en meubles & pierreries, & selon leur qualité, n'espousent que des plus grands Bassas de l'Empire.

Les autres parens du grand Seigneur viuent aussi en ce vieux Serrail, avec un train sortable à leur maison.

La Mere du Prince y loge aussi, mais elle iouit de la liberte de faire & aller où bon luy semble : Les filles & Princesses dudit grand Seigneur sont eleuees & nourries avec elle fort chèrement, & ne peuuent estre mariees qu'à des Chrestiens Renegats.

Pour les enfans males, si tost qu'ils sont nez, ils sont logez & eleuez tous ensemble au Serrail, s'ils sont d'une mesme mere : mais de plusieurs meres leurs logemens sont separez.

A treize ans ces ieunes Princes sont circoncis, qui est l'une des plus grandes ceremonies qui se facent en Turquie : la Pompe se fait à l'Hippodrome, qui est une grande place à Constantinople, d'environ quatre vingts toises de longueur, & de quarante de largeur, bastie artistement sur une quantité de pilliers & arcades. Là se font les magnificences de la circoncision des enfans du grand Turc.

Le iour venu l'Empeur y vient à cheual, avec le Prince son fils à son costé, vestu d'une robe de drap d'or, & tout brillant de diamands : il est monté sur un cheual enharnaché d'un très-riche harnois, là se trouuent le grand Vizir, les Beigliebirgs d'Europe & d'Asie, & quantité de Bassas de la Porte, suivis des lannissaires, & de toutes les Gardes du Serrail. Toutes ces compagnies entrans à l'Hippodrome sont salüees de fifres, tambours, trompettes, & autres instrumens, qui font retentir l'air de leurs sons & voix, avec acclamation du peuple, crians *Vive Sultan N. Vive Sultan N. son fils.* quelques cierges allumez precedent ces deux Princes, lesquels sont picquez & ornez de brillans, & embellis de fleurs, hauts comme des chesnes de quarante pieds de hauteur.

Estans entrez en la place, ils prennent leurs sieges : le Pere se met dans un Tabernacle à luy separé, sous un Portique fait à l'Arabique, qui regarde toute la place : aupres de ce Tabernacle du grand Seigneur, est ioinct celuy des Sultanes : de l'autre costé est la Chambre du fils, où il entre à son siege qui y est dressé. De part & d'autre se placent les Bassas, les Ambassadeurs Chrestiens & Mahometans.

Le Mufti souverain Pontife des Turcs commence la ceremonie, paroist le premier dans la place, & s'assit avec Mahomet dans un Tabernacle porté sur le dos d'un chameau, il tient un liure,

liure, qu'il lit & fueillette sans cesse, & autour y a quantité de Prestres & Moynes Mahometans, tenans aussi des liures : là le Mufti descendant de son Tabernacle entre dans le Palais où il fait ses presens, qui consistent en quelques liures de la loy, & apres il se retire avec son clergé. En apres suivent les deux Patriarches Grecs, & Armeniens, assistez de leur Clergé, & vestus de chappes noires : là aussi paroissent toutes sortes de marchands Turcs, chacun venant apporter & faire son present & selon sa profession, servant quelque plat de leur mestier, puis apres suivent les feux d'artifice, & la representation des maisons artificiellement faites & composees au grand contentement de tous, entremelées de plusieurs sortes de bastelleries, & malquarades, avec lesquelles faisant les prieres à la Turque, acheuent toute la ceremonie de la Circoncision du Prince.

Pour ce qui est des presens qui se font à la Cour de l'Empereur des Turcs, il sont inexplicables. 10

1 Tous les Bassas & grands Dignitaires de l'Empire luy en doiuent faire à certain temps de l'année, & en la Circoncision de ses enfans, comme aussi quand ils retournent de leurs Gouvernemens.

2 Les Viceroy & Generaux d'armes ayans obtenu quelques victoires, sont tenus faire presens au grand Seigneur.

3 Les Bassas retournans d'Egypte & du Caire luy font des presents en monnoye de quatre ou cinq millions de liures.

4 Les Generaux d'armes font aussi des presents au grand Turc.

5 Le Patriarche Chrestien donne au Sultan nouvellement couronné vn present honorable, que les Grecs appellent Peiquefion.

6 Les Turcs donnent aux Eunuques du Prince plusieurs riches presens pour se les rendre favorables, & se les obliger.

Le grand Seigneur aussi de son costé qui reçoit ces presens, en fait aussi.

1 Les Sultanes sont enrichies de ses presents.

2 Le Mufti & son Precepteur en sont honorez.

3 Les Bassas en reçoivent de tres grands, & consistent en pierrieres, & en bourses pleines d'or monnoyé, robes de drap d'or, panaches & enseignes.

4 Le Chasnadar Bassi, qui est le grand Thresorier, employe tous les ans en drap d'or pour les robes qu'on donne, quatre millions de liures : mais tous ces presents du grand Seigneur retournent à luy : Si les Sultanes meurent leurs belles hardes sont à luy. Si les Bassas meurent il prend tout comme fait le Maistre sur ses esclaves : & ainsi il semble qu'il donne, & s'il ne donne pas.

Quant aux Thresors du grand Seigneur, ils s'acquierent vne partie par les armes : il les met en son Serrail, hors & dedans son departement : De hors semer l'argent des despences ordinaires & extraordinaires pris sur tout le reuenu de l'Empire. Le grand Vizir & le grand Thresorier en ont les clefs : l'autre lieu du Thresor est au quartier interieur du grand Seigneur, & pour l'ordinaire sous sa chambre, où il dort : il est sous la charge du Chasnadar Bassy Eunuque blanc, son fauory, qui en a vne clef, & l'Empereur vne autre. 11

Il y en a vn troisieme dans le Serrail des Sultanes, pour la despence de la Sultane Royné, afin qu'aucun homme de son Serrail n'y puisse aller, les portes en sont de fer, on les mure tout autant de fois qu'on y met de l'argent, & ceux qui l'y portent sont des muets, au silence desquels le Sultan en fie le secret : ils le charient dans de grands sacs de cuir en façon de bourses, & les descendent dans des cisternes, qui sont faites exprés pour le serrer, ainsi l'argent qui se perd avec peine, se garde avec crainte, & s'il se perd, c'est avec douleur.

Pour ce qui est du reuenu annuel de l'Empire du Turc, il est diuisé en deux, en ordinaire & extraordinaire : L'ordinaire monte tous les ans à vingt millions d'or : l'extraordinaire n'est pas moindre, mais plus incertain : car il ne se recueille que sur les aubenes & choses casuelles, & quand les Turcs meurent sans hoirs, tout est au Prince : outre cela il est le premier & principal economé des benefices de son Empire : car si on laisse quelques legs aux Prestres pour lire l'Alcoran, il regarde ce qui est necessaire pour l'entretienement du nombre des Prestres ordonnez, & prend le reste : ainsi qui pourroit faire l'entier calcul du reuenu de l'Empire du Turc, trouveroit sans doute qu'il surpasseroit les sommes de quarante millions d'or, tant de l'ordinaire que du casuel.

La magnificence & la pompe se voit en ses issues de son Serrail par terre, & de Constantino- 12
ple, & son entree en triomphe, & sa Pompe sur la mer.

Mais pour dire vn mot de la premiere qu'il fait quand il veut faire admirer sa grandeur à quelques Ambassadeurs estrangers : il choisit donc le iour du Vendredy (qui est aux Turcs, ce qu'à nous le Dimanche) d'aller à la Mosquee faire ses deuotions & se monstrier au peuple. Il sort

par la grand porte de son Serrail à cheual, simplement vestu comme il a accoustumé d'estre en son Palais, sa teste couverte d'un petit turban pour estre plus leger: il est suyui de pres de Bassas, & d'autres personnes de sa maison: Le Capitaine du Guet, qu'ils appellent Sobassi va deuant avec cinquante archers pour preparer son passage. ses plus familiers l'accompagnent, les Eunuques de sa chambre, les pages & ceux qui seruent sa personne, le Capitaine des Pages, celui des Capigis à l'entour de luy, pour receuoir les plaintes & placets qu'on luy presente en passant.

Voyla comment il sort du Serrail pour se pourmener par la ville, mais quand c'est pour aller aux champs, il veut à son retour faire esclatter sa pompe aux yeux des Ambassadeurs de Perse, principalement il s'en va pourmener en quelque chasteau des champs proche la ville, & donne aduis dès le soir que le lendemain il veut faire son entree à Cōstantinople avec gloire & magnificence, & que toutes choses luy soient preparees pour luy aller au deuant: les voyers donnent ordre aux ruës, dans lesquelles on respand force sable, cōme aussi tout le long du chemin iusques au lieu champestre d'où le grand Seigneur doit partir, son train, les Bassas, & tous les Grands & officier de sa Cour, se disposent pour paroistre à ceste entree Royale. Et alors vous voyez des troupes de Gens-d'armes marcher les premiers, suivis d'un superbe Regiment Turc: en apres viennent les Cadiz ou Iuges de Constantinople & toute la Iustice en corps, les Prestres & Docteurs de la loy de Mahomet; le grand Vizir accompagné des autres, & de tous les Bassas & gouverneurs de l'Empire: les hommes du Serrail & Officiers de la maison Imperiale, avec les marques de sa grandeur, les premiers desquels sont, dix homes à pied menas en main dix cheuaux barbes & Turcs, harnachez à la Royale, avec les celles rehaussées de broderies d'or, & de perles: cinquante Janissaires à pied, soixante archers à pied avec leurs arcs & fleches, au milieu desquels marche le grand Seigneur, vestu d'une riche robe de drap d'or en broderie de perles & diamans, son turban paré de pannaches de plumes de heron, avec vne ceinture de diamans à la pointe d'iceluy, monté sur vn beau cheual, harnaché à l'Imperiale: trois ou quatre cens hommes le suivent à cheual portans en main les marques de leurs charges d'officiers de la Couronne: Plus vn nombre d'Escuyers suivent à cheual avec plusieurs gentilshommes, en apres marchent grande quantité de Musiciens, chantans & jouans des instrumens en passant: cent Pages du Sultan, tenant chacun vn faucon sur le poing, plusieurs Eunuques parmy eux, trente gardes de la porte, cinquante fauconniers, grand nombre de ieunes Pages, tirez des enfans du Tribut, font la fin de cette pompe Imperiale, laquelle peut faire quinze mille hommes.

Quand le grand Seigneur se veut aussi pourmener sur mer, il sort par vne des portes d'un jardin de son Serrail, regardant la marine, monté sur des Brigantins de seize ou vingt bancs, se place sur la poupe, couverte de tapis de Turquie ou de velours: ses familiers & Eunuques sont debout deuant luy. Les enfans de Tribut voguent à la rame & font voler le vaisseau sur l'eau par leur dexterité: d'autres vaisseaux suivent celui du Sultan, pour faire retirer ceux qui seroient au passage pendant ceste pourmenade: il est entreterenu par son grand jardinier, qui tiët le timon du vaisseau, qui a seul permission de parler à luy: & apres qu'il a contenté son esprit en cette pourmenade, il retourne en son Serrail.

- 13 Maintenant faut dire quelque chose du Diuan ou Conseil du grand Seigneur qui se tient quatre fois la sepmaine en la seconde cour du Serrail, dans vne tres belle salle: c'est là où se trouvent les Officiers de la Iustice qui la rendent esgallement à tous, & les parties y plaident en personne sans Procureur ny Aduocat, car les Turcs abhorrent les chicaneurs & chacun amene sa partie par le poing au Diuan, où il faut qu'il se iustifie luy-mesme, & apres la deposition sommaire de deux tesmoins, la cause est iugee promptement.

- 14 Les officiers de ce Diuan sont le Bassa, le grand Vizir President, les deux Beglierbeya de Natolis & de Romanie, les deux Iuges des armées appelez des Turcs Cadilesgueres Supérieurs des autres Iuges, les Thresoriers generaux des finances appelez Testardars, le grand Chancelier, vn Secretaire d'Estat, nommé Notangi, les Secretaires des Bassas, avec vn grand nombre de Notaires appelez Zafitchi, le Chiaou Bassi, chef de tous les Chiaoux de Turquie: tous lesquels en leur place estoient dans le Diuan chacun selon son rang & qualité. Le Cōseil est comme celui du Louure, Conseil des parties, il dure depuis l'aube du iour, iusques à midy, & apres le disner ils vont rendre compte au grand Seigneur des affaires qui se sont passées au Diuan, & voit-on l'ordre de la Iustice de la Cour du Turc.

Outre le grand nombre d'Officiers qui seruent ordinairement au Serrail, il y a des Azamoglans ou enfans de Chrestiens & de tribu, hommes de vile condition, choisis neantmoins par les Princes, par les Capigis du grand Seigneur, entre les hommes les mieux faitz & les plus enrichis des dons de nature, ils choisissent les plus adroits de leurs enfans de trois l'un, ce qu'ils font de trois en trois ans, & appellent cela exiger le tribut du grand Seigneur sur les Chrestiens, & en ayant assemblé vn grand nombre ils les amènent au Serrail, où ils sont habillez

billez des couleurs du grand Seigneur, & à la Turque, portant perpetuellement vn bônnet jaune. Le grand Vizir en choisit des plus adroits pour la guerre; on les circonçoit, & les met-on sous la garde du grand Iardinier du Serrail, qui les employe où ils sont necessaires, on les instruit aux armes & aux luitres on met vne partie d'iceux aux vaisseaux de mer, on en exerce aux mestiers & arts des artisans, on en donne aux Bassas, & aux grands de la Porte, qui les font servir à des offices vils & mesprisables: En fin tous ces ieunes enfans sont entretenus aux despens du Grand Seigneur.

Entre ces enfans de Tribut, ceux qui sont tirez de bon lieu sur les Chrestiens sont separez des autres au Serrail, où ils sont eleuez & nourris honnestement, & dressez aux exercices qui les rendent dignes des charges de l'Empire: on leur apprend la Loy de Mahomet, le maniement des armes: ils sont tous esclaves Chrestiens, mais cet esclavage les conduit à la liberté de commander aux Prouinces. Le grand Chambellan du Serrail en introduit quelques vns dans le nombre, nais des Turcs naturels recommandables pour leur gentillesse: mais cela avec permission du Prince: ils ont des Eunuques blancs pour maistres fantasques & ombrageux, qui leur font souffrir toutes sortes de peines.

Il y a encor plusieurs autres officiers seruans au Serrail à la Cour du Grand Seigneur.

15

Premierement les quatre Eunuques blancs sont choisis en leur enfance d'entre les enfans tirez des tributs des Chrestiens: ceux-cy sont les principaux, & les premieres testes du Serrail apres l'Empereur.

Le premier est le Capi Aga grand Chambellan de l'Empire Turc, le plus autorisé de tous au Serrail, comme celuy qui peut parler seul au grand Seigneur, quand bon luy semble.

Le 2. est le Chasnadar Bassi, ou Thresorier du tresor secret du Prince qui en a vne clef, & le Prince vne autre. Le 3. est Chilergi Bassi, c'est à dire grand Despensier, ou comme maistre de Garderobe, il a le soin des habits du Prince, & de tout ce qui sert à la personne. Le 4. est le Seruiagassi, qu'on appelleroit Capitaine du Chasteau ou du Louure: il a esgard sur tout le Serrail, & soin de visiter tous les lieux d'iceluy, & de faire tenir tous les logemens d'iceluy en bon estat.

2. Outre ces Eunuques ainsi eleus aux grandes charges du Serrail, il y a d'autres hommes qui seruent ordinairement la personne du Sultan, comme sont ses valets de chambre, & autres officiers de dignité plus eminente, tous ordonnez par trenteine, trente pour chaque sorte d'habit & vestement du grâd Seigneur, son mesnage, bagages, armes, marques Imperiales, richesses, & ornemens Imperiaux.

3. Autres officiers seruent à sa bouche & à sa table en assez grand nombre, commandez neantmoins par quatre Chefs, les Argibassi, qui prèd garde sur le deuoir d'un chacun: Le Mimmut Page qui fournit tous les iours les deniers de la despence: Le 3. est le Checaya, qui est comme Controolleur General de la maison Imperiale: il suit de pres l'autorité du Maistre d'hostel. Le 4. est le Murpariazigi, qui est comme vn Clerc d'office.

Il y a d'autres officiers au Serrail encore moindres que ceux cy: vous y auez les Baltagis pour la fourriere & le bois en nombre de plus de 200. Les Bostangis ou Iardiniers, en nôbre de plus de 800. Les viuandiers & poulaillers 500. Les palfreniers 800 de sorte qu'il y a au Serrail 14. mille bouches & officiers commensaux, tant du grand Seigneur, que des femmes & Sultanes, & de leurs departemens particuliers.

Quand le grand Seigneur sort de son Serrail, pour s'en aller en quelque Prouince lointaine: il mene avec luy vne suite & vn train hors de toute comparaison de puissance ordinaire d'aucun autre Souuerain. 36. mille Iannissaires, sont ses gardes ordinaires de pied. 44 mille Spasi est sa cavalerie legere, 2. mille Capigis, sans les Archers de sa porte. 2. mille Solachis, sont les gardes de pied, qui enuironnent tousiours la personne du grand Seigneur. 4. mille Chaoüs, sont les homes qu'il employe aux ambassades & aux expeditions de Iustice. Il a encor 5. cens gentilshommes seruans, qui portèt la viande iusques à la porte de sa chambre, qui est la receüe par ses Pages: Il y a vn nombre d'autres hommes de plus basse fonction: mais non moindre en nombre. Les palfreniers sont 3. mille: Les piqueurs de chasse, 3. mille: Les Balthagys qui railent le bois pour la cuisine 8. mille: Les Thaugys, ou pouruoyeurs, ou viuandiers, mille: Les Therezi Tailleurs de Court, 2500. Des Boulangers 600.

Et si le voyage est pour la guerre, les officiers de l'artillerie sont quarâte six mille hommes.

Les Sebegis travaillans à la fabrique des armes, & qui les nettoient sont 14. mille hommes.

Les maistres Tufechgys ou harquebusiers en nombre de sept mille. Des Topeys ou Canoniers huit mille. Il y a outre cela vn nombre infini d'autres menus officiers qui suivent le train du grand Seigneur. Les bettes de voitures sont ordinairement vingt mille, sçauoir, dix mille chameaux, & dix mille mulets, qui est l'ordinaire de la seule maison du Sultan, sans faire estat du train des Bassas qui le suivent qui est encor tresgrand. Et ainsi la supputation du nombre des hommes qui suivent la Cour du grand Seigneur se monte à cent cinq mille six cens hommes pour vn voyage de paix: Mais si c'est pour la guerre le nombre monte à cent quatre vingt mil-

le hommes, sans compter les gens de combat.

- 17 Le viens d'icy à considerer la grande autorité des Bassas Turcs, ceux-cy sont grandement riches, grandement puissans, à cause du pouuoir que leur dōne le grand Seigneur aux Prouinces, sur lesquelles ils commandent, & quelquesfois grandement insolens.

Ces tant riches & somptueux Bassas ne vont pas à petit train quand ils marchent en voyage, & principalement lors qu'ils vont prendre possession de leur gouuernemēt, dont le Sultan les a honorez, leur equipage qu'ils font aller deuant, & la belle compagnie de Gentils-hōmes & domestiques qui les suiuent surpassent la suite des plus grands Princes de l'Europe, on peut employer vn iour entier à voir passer leur train, le iour qu'ils font leur entree en quelque ville capitale de leur gouuernement: il faut quelquefois tenir les flambeaux allumez le iour defaillant auparauant la fin de cette pompe: aussi toute l'estude de ces Bassas est de paroistre grands & orgueilleux deuant les hommes, & n'espargnent aucune despence pour se faire seruir par vn nombre tres-grand de seruiteurs & valets: ils sont curieux de belles escuries, garnies de bons cheuaux, & de grand nombre de pallefreniers pour les penser: vous en verrez quelquesfois auoir des escuries capables de monter vn regiment de Caualliers, avec douze ou quinze cens mulets pour le port de leur bagage, & bien autant de chameaux: ils ont aussi grand nombre de femmes concubines, qu'ils font garder par des Eunuques noirs, en quoy ils consomment de grand tresors: leurs logis sont des Palais Royaux, bastis avec des despences incroyables: mais cecy n'est rien à l'esgard du luxe de leurs meubles & ornemens de chambres & de salles.

- 18 Parmy ces grands Seigneurs de la cour du grād Seigneur, il y a mille enuies & mille jaloufies les vns sur les autres: & quand ils ne peuuent s'entre-nuire ouuertement, ils le font par inuentions malicieuses, & par empoisonnemens: ils se seruent de ces abominations pour se vanger des Princes.

- 19 Entre les grands de la Cour du Sultan, il y a quatre Bassas principaux qui gouuernent & regissent avec le grand Seigneur la machine de ce puissant Empire: il y a le grand Vizir, le Capitaine de la mer, l'Aga des Iannissaires, & le Capitaine de Constantinople, appellé le Capitain Bassa: ils occupent les premieres charges de l'Empire, ils sont bien veus du Sultan, & honorez de tous les autres grands de sa Cour. Le premier Vizir est Lieutenant general de l'Empire, & de toutes les armées du grād Seigneur, il est grand Chancelier & chef du Conseil. le Capitaine de la mer est grand Admiral & General des armées nauales du grād Seigneur: l'Aga des Iannissaires commande à toute l'infanterie Turque, & est seul Colonel d'icelle. Le Capitaine de Constantinople commande à la ville, & a cognoissance des affaires d'icelle. Tous ces quatre Bassas quoy que differens en charges & honneurs sont neantmoins tous puissans en autorité, qui est telle, que quand il leur plaist, ils priuent le Prince de sa Couronne, & transferent l'Empire au pouuoir de qui il leur plaist.

- 20 Il faut encor pour acheuer le discours du grand Seigneur, & de son Serrail, dire quelque chose des amours insatiables des femmes de la Cour, & de leurs impudicitez lubriques & des-honnestes auxquelles elles se laissent aller.

Les vnes allans aux bains trouuent façons de voir ceux desquels elles sont passionnees: les autres qui ont les bains chez elles, cōme plus qualifiees, se seruent d'autres subtilitez, & par l'emprunt des habits de leurs esclaves, se desrobēt pour jouir de l'obiet de leurs amours. Si elles ne le peuuent faire par cēt artifice, elles ont recours aux dōs & aux presens, par lesquelles la corruption se glissant entre les hōmes & les femmes qui en ont la garde, elles viennent à bout de leurs mauuais desseins: mais le mal est, que si elles s'addonnent à quelque gentilhomme estranger: apres qu'elles s'en sōt seruies, & l'ont rēdu las & recreu en telle sorte qu'il ne leur peut plus seruir en ce ieu, elles trouuent inuention ou de le poignarder, ou de se vanger par poison sur sa vie. Elles ont des messagers d'amour qui vont par la ville de Constantinople chercher sujet de dōner du contentement à leurs passions demesurément importunes.

- 21 Passons aux armes & seau du grand Seigneur, en quittāt ces vilaines impudiques. Les Empe-reurs de Turquie n'ont aucunes armes particulieres grauees, & la famille Othomane n'en porte iamais: ils ont rayé & effacé toutes celles de la noble race des Paleologues Seigneurs souuerains de Constantinople. Les Turcs on marque de leur tyrannie & cruelle domination, & non de leur maison particuliere: ils les representent par vn globe du monde, & vn croissant de Lune au dessus, & les mesmes sont aux enseignes & drapeaux de guerre, & non d'autres, les tours & les clochers les portent, & les pelerins de la Meque au bout de leur bourdon.

Le sceau du grand Seigneur est composé de certains caracteres Arabes qui expriment son nom, celuy de son pere, & l'orgueil de sa felicité presente.

- 22 Finalement pource qui concerne la mort, le dueil, & les funerailles du Grand Seigneur, faut premierement parler de sa maladie. Quand il est malade, le premier Medecin s'assemble avec plusieurs autres au Serrail, où ils consultent pour sa guarison;

guarir : mais nonobstant leurs sciences & remedes , quand Dieu a borné les iours des Princes, ils ne passent iamais la dernière heure de leur vie. Le grand Seigneur qui eschappe ainsi de leurs mains, meurt selon le decret de nature: mort qu'il est, celuy qui luy doit succeder prend le deuil noir pour peu de iours, a la teste couverte d'un petit turban, & fait mine de regretter la mort de son predecesseur, encor qu'il abonde de ioye en son ame.

Si c'est à la guerre que cet Empereur decede, tous les Bassas prennent le petit turban pour le deuil, toutes les enseignes, & l'estendart Royal sont renuersees la pointe contre terre, iusques à ce que le nouveau Sultan quitte le deuil, & prenne l'habit Imperial.

Le corps du grand Seigneur decede est mis dans vn cercueil couuert d'un grand linge fort riche, on met dessus son turban: les Ministres de l'Alcoran portent cierges & flambeaux a dās, marchans deuant le corps, chantans en leur langue, & à leur mode: puis suit le Mutaferaga qui porte le turban de l'Empereur au bout d'une lance, avec vne queue de cheual attachee apres: les Iannissaires, les Spachi & le reste de la garde Imperiale suivent le cercueil: & apres suivent les Officiers du Serrail, chacun en son rang & en son ordre, sous la conduite du Maistre d'Hostel: le grand Escuyer porte les armes du grand Seigneur deffunct, & la banniere Royale traînant à terre. Tous les Bassas, & tous les grands de la Porte y rendent leurs derniers devoirs, assistent à ses pompes funebres en habits de deuil. En cest enterrement on y fait aller iusques aux chevaux du grand Seigneur decede, portans leurs selles renuersees en haut: ils ont des couuertures de velours noir, traînant iusques à terre. Le corps de l'Empereur est enterre tout joignant la Mosquee qu'il a fait bastir de son vivant dans vne Chappelle separee. Le cercueil est couuert de velours noir: Si le grand Seigneur est mort en guerre, on y met au dessus son timbre, sinon son turban est esleue & attaché contre la muraille plus proche de sa tombe, avec des plumes de heron: deux chandeliers garnis de cierges dorez sont mis aux pieds du sepulchre, & y a des Prestres gagez pour prier pour son ame telō l'Alcoran. Tous les Vendredis iours de Mosquee, les tombeaux Imperiaux sont parez de nouveaux poisles, & couverts de fleurs, ceux qui viennent à la Mosquee en tels iours prient pour les morts, pleurent & gemissent sur leurs tombes & prennent vn bouquet de ces fleurs s'en retournans.

Et voila ce qui se peut dire en general, tant de la ville de Constantinople, que de la magnificence du Serrail, & de la gloire, puissance, orgueil & Majesté du grand Seigneur. Voyons le reste du pays de Thrace ou Romanie, où ceste ville Imperiale est icituee.

QUALITE DV PAYS DE THRACE.

LE pays de Thrace est froid pour la plus grand part, & abondant en hommes. On y void force belles plaines, où il se fait grande recolte de bled, & de legumes: & outre ce tirant vers la mer on recueille de bon vin. Plin mesme loue ceste Prouinte de fertilité, & estime son bled pour sa pesanteur, & son vin pour sa bonté & sa force. Mais dans le pays & loing de la mer la Thrace est plus froide, à raison dequoy elle est moins propre à porter bled & vin. Elle manque d'arbres vniuersellement, & ses grandes plaines sont entre-coupees en certains lieux de quelques petites collines. On accommode icy l'alun au village de Chapsyllar, qui estoit autrefois vne ville nommee Cypsele.

Les montagnes de ceste contree sont celle d'Heme, celle de Rhodope, qui est fort aspre, & tousiours blanchissante de neige: Orbelle, & Pangee, qui a des mines d'argent, de mesme qu'autresfois: puis Messape non guiere loing de la mer, admirable pour l'aspreté de ses rochers.

Ses riuieres sont Hebre, auourd'huy Marise, selon Mercator, ou Valise suivant Nicolas de Nicolai: Nefse auourd'huy Charafon selon Belon: Mélas, maintenant Gensui, & Strymon: qui est la borne de la Macedoine.

L'Hebre porte, comme on dit, de l'or dans son sable, & il est si lent qu'on ne scauroit iuger de quel costé il coule. Son eau est trouble, mais douce, & en Esté elle est si froide, qu'on diroit que c'est de la glace. Or il vient tant d'eau des montagnes en hyuer, qu'elle deuiant plus rapide, & inonde vn grand pré qu'on nommoit autrefois Dorisque, où l'on ne fait nuls bastimens, mais en esté on y nourrit force chevaux, & il y a aussi des vergers qui portent force fruits d'esté.

L'Hebre reçoit la riuere de Theare qui est la meilleure de tout ce pays contre les maladies, & principalement contre la gale des hommes, & des chevaux. Elle a trêchuiet fontaines, parties froides, & parties chaudes, qui coulēt d'un mesme rocher. Darius ayant pris plaisir au bon goust de son eau claire, dressa tout auprès vne colonne avec vne inscription à sa louange en lettres Grecques.

La riuere de Nefse, ou Charafon descendant de la montagne d'Heme est fort lente, & vn peu plus petite que le Strimon, ou Stromone: toutesfois il traîne beaucoup de sable. On void pareillement icy le lac de Bilton, ou Bouron, qui est maritime, & qui porte de fort bon poisson.

Le Bosfore Thracien contient trente bon ports, partie en Asie, partie en Europe, mais

plus en ceste partie-cy, qu'en celle-là. Il change son cours, qui est fort rapide en sept lieux remarquables, où rencontrant quelques caps, la mer est grandement agitée : à cause dequoy l'on ne peut voyager en quelques endroits vers la mer Noire, si ce n'est en tirant les vaisseaux avec leurs cordes du long du riuage, ou changeant de route d'un lieu à l'autre.

Du temps de l'Empereur Capronyme, tout le Bosfore & vne bonne partie de la mer Major gela tellement que la glace estoit haute de vingt cinq coudées, & grande quantité de neige estât tombée la dessus, la glace creut sur la superficie de la mer encor vingt coudées, de sorte qu'on marchoit librement dessus, & les hommes, & les bestes, & les charrettes mêmes toutes chargees passoient d'Europe en Asie, & de Constantinople iusques aux emboucheures du Danube, comme par terre. La glace s'estant apres rompuë en Feurier, & mise en fort grandes pieces, qui sembloient des petites isles chargees d'animaux partie en vie, & partie morts, les glaçons furent poussez du costé de Constantinople; où ils abbatirēt quelques bastimens d'importance assis sur le bord de la mer.

Il n'y a partie de la Mediterranee qui abonde plus en poisson que le Bosfore. Il en passa de là au commencement de l'Hyuer vne infinité vers le Propontide, puis ils retournerent au Printemps à la mer Noire, pource qui ayant de grosses riuieres qui entrent dans la mer Noire, l'eau y deuient plus froide qu'ailleurs en Hyuer, & pource qu'il est même fort bas, les tempestes l'agitent & le tourmentent au possible. Cela fait que les poissons fuyans le froid, & la furie des vents changent de lieu, & se retirent en la mer de Marmore en Hyuer: mais au Printemps ils retournent au Bosfore, à cause des eaux de ceste mer, qui n'est pas si sale que les autres, & des riuieres qui s'y desgorgent. Tellement qu'on ne sçauoit dire combien on prend alors de poisson dans le destroit du Bosphore, principalement à Constantinople, où les femmes mêmes, quand elles n'ont autre chose à faire, peschent des fenestres de leurs maisons: mais principalement on y prend de ieunes Toms, que les Grecs appellent Pelomides.

MOEVRS ANCIENNES.

23 **L**es habitans de Thrace estoient estimez farouches & rudes, & leur nombre estoit si grand qu'Herodote a dit, que s'ils eussent esté gouvernez par vn seul Prince, & qu'ils fussent demeurez d'accord, il eust esté impossible de les vaincre, pource que c'estoient les plus forts hommes de toute la terre, mais il adioust qu'ils estoient foibles à cause de leurs diuisions. Mais combien qu'ils ne fussent pas tous de bon accord toutesfois ils auoient mêmes mœurs, excepté les Getes, & les Thraules & ceux qui demeuroient au dessus des Chrestones.

Les Getes se persuadoient qu'ils ne mourroient point, mais qu'au partir d'icy ils s'en alloient trouuer leur Dieu Zamolxis.

Ce Zamolxis fut vn disciple de Pythagore, qui estant retourné en son pays, & voyant que les Thraces viuoient barbarement & presque à la brutale, leur donna des loix, & les enseigna à ceux du pays, puis les persuada que s'ils les gardoient, ils iroient au partir de ceste vie en vn lieu où ils iouiroient de toute sorte de contentemens.

Ayant donc acquis quelque reputation de diuinité parmy les Thraces, il s'esloigna d'eux, & les quitta, sans qu'on sceut la route qu'il auoit prise, leur laissant vn grand desir de le reuoir.

Ils luy enuoyent ordinairement quelqu'un sur qui le sort tomboit avec vn vaisseau, à cinq hommes de rame, afin de luy aller remonstrer leurs necessitez au lieu où ils le trouueroient.

On donnoit la charge à quelques vns d'entr'eux de tenir trois dards, & aux autres de prendre cét homme qui auoit les pieds & les poings liez, & le jeter en haut, afin qu'il tombast sur les dards, & s'enferrast. Et s'il mouroit en même temps, ils croyoient que leur Dieu leur estoit propice: mais s'il demeuroit en vie, ils accusoient ce messager d'estre vn meschant homme. Cestuy là estât ainsi blasmé ils en enuoyent aussi tost vn autre, luy faisant entendre leur desir.

Lors qu'il tonnoit & esclairoit, les Thraces décochoient des fleches contre le Ciel, menaçans Dieu, veu qu'ils n'en croyoient point d'autre que le leur.

Les Thraules faisoient les mêmes choses: mais en la naissance, ou mort de quelqu'un des leurs, ils pratiquoient vne façon de faire particuliere. L'enfant estant né tous les parens assis autour de luy lamentoient son entree en ce monde, racontans toutes les necessitez & miseres auxquelles il estoit engagé, & déplorant sa condition, comme entièrement mal-heureuse. Mais si quelqu'un venoit à mourir ils l'enterroient en riant, & se resjouissoient de ce qu'il estoit affranchy des miseres de ceste vie.

Mais chacun de ceux qui demeuroient au delà des Chrestiens auoit plusieurs femmes, & lors que quelqu'un mouroit, ces femmes entroient en vn grand debat, sur ce que
chacune

chacune avançoit qu'elle auoit esté plus aymée de son mary que les autres. Il y auoit grosse assemblée pour escouter leurs raisons, & celles qu'on iugeoit auoir esté plus aymée, estoit menée sur la tombe de son mary, où son plus proche parent luy tranchoit la teste, & soudain on l'enterroit avec son mary, & lors toutes les autres s'estimoient du tout malheureuses, & plo- roient pour le iugement donné en faueur de l'autre, pource qu'elles se tenoient par ce moyen fort deshonorées.

Les autres Thraces vendoient leurs enfans, suivant l'ancienne coustume du pays, & les pe- res, meres, ou proches parens ne gardoient nullement leurs filles, mais leur laissoient faire l'a- mour avec ceux qui leur estoient plus agreables.

Ils auoient toutesfois vn soin fort particulier de la chasteté de leurs femmes, lesquelles ils achetoient cherement. Elles auoient quelques marques qu'on leur auoit imprimees sur le front & celles qui n'en auoient aucune, estoient estimees de basse estoffe.

On les vendoit au plus offrant & dernier encherisseur: les plus belles estoient exposees pre- mierement en vente, & emportoient le prix auquel elles auoient esté taxees. Mais les laides a- chetoient les hommes qu'elles vouloient espouser. Les hommes & les femmes faisoient bon- ne chere ensemble pres du feu, iettans de la graine & semence de certaines herbes sur la braise, & ceste odeur les ayant vn peu estourdis, ils tenoient pour vne grâde resioüissance de se mon- strer comme yures, ayans les sens hebetez.

Ils tenoient pour chose honorable de ne rien faire, & de viure de larcin, comme au con- traire ceux d'entr'eux qui cultiuoient la terre estoient mesprizez & tenus pour vilains, & vils au possible.

Ils honoroient communement Mars, Bacchus, Diane, & Mercure, & iuroient par le dernier, se croyans descendus de luy.

Tous les Thraces auoient leurs maisons fort basses, leurs viures estoient tousiours en mes- me prix; & quant aux vignes elles n'y estoient nullement en vsage.

Lors qu'il estoit question d'essire vn Roy, la Noblesse ne l'emportoit pas sur le reste, mais ce- luy qui auoit plus de voix estoit preferé à tous les autres. Car le peuple essisoit quelqu'un dont les mœurs estoient sans reproche, & la clemence fort recognüe, & qui outre cela fut desia ad- uancé en aage. Mais on demandoit ces choses en celuy qui n'auoit nuls enfans: car en ayant on ne l'essisoit iamais, combien que ses actions le rendissent recommandable, & s'il en engédroit apres son election, il estoit priué de la Royauté, tant les Thraces fuyoiēt de rendre le Royau- me hereditaire.

Encore que le Roy se monstroît fort equitable, toutesfois ils ne vouloient pas que toutes choses luy fussent permises. Tellement qu'on luy donnoit quarante hommes, qui estoient cō- me les assesseurs, afin qu'il ne fut pas seul iuge aux matieres criminelles. Et s'il estoit trouué coupable, on le condamnoit soudain à la mort: toutesfois on luy portoit cet honneur qu'au- cun ne mettoit la main sur luy: mais toutes choses luy estans defendues & deniees par vn pu- blic consentement, il estoit en fin contraint de mourir de faim.

On faisoit les obseques des grands Seigneurs en ceste sorte. Le corps estoit porté en place publique, où durant trois iours tuant diuerses bestes pour le sacrifice, ils faisoient grande cho- re. puis ayant fait quelque plainte sur la mort, ils l'enterroient ou brusloient, mettant les cen- dres sous la terre, & ayans dressé vn tombeau dessus, ils proposoient toutes sortes de combats, dont le plus ordinaire estoit celuy d'homme à homme.

Les armes dont ils vsèrent en l'expedition de Darius, à ce que dit Herodote, estoient telles. Ils portoient des morions de peau de renard, & des chemises, avec lesquelles il auoient des sayes de beaucoup de façons, & quand aux jambes ils portoient des chausses de peau de che- ureul, & portoient outre cela des dards, des escus, & des petits poignards.

Ils estoient fort adroits à tirer de l'arc, duquel ils se disoient estre inuenteurs. Ils vsoient de mesme langue que les Scythes. Pline escrit que toute la Thrace estoit diuisee autrefois en cin- quante bandes: Voyla tout ce qu'on peut presque dire des mœurs anciennes des peuples de Thrace, voyons vn peu maintenant comme on y vit en nostre siecle.

MOEVRS DE CE TEMPS.

LEs habitans de ce pays ont les cheveux fort espais au sommet de la teste, sont extreme-²⁴ ment fort farouches, tureux, & pleins de cruauté, ils aiment à boire autant que nation qui soit sur la terre, de sorte qu'on en voit plusieurs qui s'enyurent à toute heure, & n'estoit la defence que Mahomet a fait aux Turcs de ne boire point de vin, on verroit bien pra- tiquer d'autres dissolutions en ceste prouince. Mais pource que la Thrace est compo- sée de plusieurs sortes de personnes, & principalement Constantinople, de Turcs, de Iuis,

& de Chrestiens, & qu'on ne sçauoit pour ceste cause discourir generalemēt de tous les trois, d'autant qu'ils ont des particulieres façons qui les distinguent les vns des autres, ie prendray chacun de ces trois à part, pour considerer ce qui est en eux de plus remarquable.

Les Turcs ne sont pas civilisez, comme beaucoup d'autres nations qu'on voit en Europe, & leurs habits ont ie ne sçay quoy de mal propre, & que nous ne pouuons regarder sans deſdain. Car le linge ne couure par les extremitez de leurs accoustremens, & ce qu'ils portent est si mal basti, qu'il semble qu'il ne faut pas vn tailleur entendu pour les habiller, ains seulement vn homme qui sçache tant soit peu bien coudre.

Il n'y a aucun entr'eux qui mange estant assis sur quelque banc chaire ou escabeau, ains tous prennent tous leurs repas assis à terre, comme les tailleurs font ordinairement par deça dans les boutiques, lors qu'ils trauaillent sur quelque grande table. Leur nappe & table est le plus souuent de cuir de bœuf, ou de cerf, non courroyé, & encor velu, fait & taillé en rond, & ayant deux pieds & demy de large, avec des boucles & anneaux de fer, qui seruent à le fermer avec vne courroye, ainsi qu'on fait vne bourse, & elle s'estend aussi tost, & est bien-aysément portee. Ils n'vsent d'aucunes seruiettes pour s'essuyer les mains.

En quelque lieu qu'ils s'assient, soit en leurs maisons, soit aux Mosques, ils ont des tapis velus, ou des nattes de jonc, & il y a des endroits qu'ils font plancher, pource qu'ils sont trop bas ou trop sales. Ils n'ont aucun vsage de cloches & ne souffrent que les Chrestiens qui demeurent parmy eux, & dans leurs terres, en ayent.

Tant hommes que femmes portent leur habillement assez long, & large, & ouuert par le deuant, afin qu'en se baissant ils se puissent plus aisément couvrir & cacher, ce qui est de honteux aux hommes faisant leurs affaires.

Ils regardent d'auoir le dos tourné contre le Midy, lors qu'ils vident leur ventre, à cause que c'est la partie qu'ils regardent en faisant leur priere, & seroient bien marris que quelqu'un les vit en cet estat, tant ils ont peur qu'on prenne garde comme i'ay ja dit, à ce que les hommes sont naturellement soigneux de cacher.

Les Turcs mangent d'un bouc chastré plus que d'aucune autre viande, & c'est le subiet pour lequel il vient par deça tant de bons marroquins de Turquie. Ils mangent aussi de la brebis & du mouton, & grand nombre de cheureaux, & d'aigneaux: mais assez peu de bœuf, & toutes ces viandes sont plustost rosties que d'autre sorte. Au reste ils mettent dans vn grand plat, ou plustost, s'il faut ainsi dire, dans vne grande jatte, toute la chair pêle-mêle, sans auoir quantité de plats comme nous, pour ranger à part chascune chose sur la table. Ils n'vsent iamais de chair de pourceau, & leurs sauces plus appetissantes sont composees d'ails, & d'oignons, dōt le plaisir s'estend mesme iusques aux personnes de noble condition, & aux Princes. Leur pain ordinaire est assez bis, & ce qui en est cause, c'est qu'ils mettent dedans plusieurs semences, qui font qu'il ne peut estre bien appresté comme il faut.

Mais pour venir à leurs autres conditions & façons de viure, il n'y a nation plus arrogante, ny qui vueille plus auoir le dessus en tout que la Turquie, qui mesprise toutes les autres. Et ceste fierté procede des victoires que ces barbares ont obtenues de tous costez, & pour la grande estendue de la domination de leurs Princes. Ils sont extremement addonnez à la paillardise, & à toutes sortes de salété iusques à la Sodomie, qu'ils exercent comme publiquement, mesme dans les galeres, où elle leur est du tout commune, aussi bien que le manger & le boire. Ils sont desloyaux tout ce qui se peut, & ne se soucient nullement de manquer à leurs promesses: tellement que leur infidelité a esté cause de la perte de beaucoup de Chrestiens, qui s'asseurans sur leur parole se sont rendus, & ont apres esté miserablement massacrez, ou menez en seruitude. Il ne faut croire que les Turcs portent honneur aux Ambassadeurs, & que le droit des gens soit gardé parmy eux, comme il est entre les Chrestiens: veu que si le grand Seigneur soupçonne quelque Ambassadeur, il le fait soudain mourir sans qu'il ait beaucoup de pretexte de ce faire, & mesme les principaux de la Cour n'estas pas bien satisfaits de quelque Ambassadeur Chrestien ne manqueront de luy dresser des aguets, & de luy faire des affronts insupportables.

Ceste nation n'est nullement nee aux lettres, ains seulement aux armes, ou leur multitude, obeyssance, & assurance du paradis de Mahomet, & de la destinee seruent beaucoup plus que leur courage. Toutesfois quant aux lettres ils ont parmy eux quelques liures, & quelques Docteurs, non pour les lettres humaines, ou la Philosophie, mais seulement pour l'intelligence de la doctrine de Mahomet, sur laquelle on a composé vne infinité de volumes pleins de disputes.

Ils ont les Chrestiens tellemēt en haine, qu'ils ne les sçauoient nommer que aussi tost ils ne les appellent chiens, cōme i'ay veu moy-mesme estat avec vn Chaions du Vice-Roy d'Algea,

avec qui i'estois assez familier, veu qu'encor qu'il me tesmoignast beaucoup d'affection, & me rendit autant d'honneur que le peu de courtoisie de ceste nation en peut permettre: toutesfois il ne se pouuoit tenir en me faisant quelque discours des Chrestiens de les nommer chiens à tous propos, descourant animosité contre eux par ses paroles.

Ils sont si auaricieux, qu'ils font leur profit de toutes choses, & ce qui les conuie à faire amas d'argent avec tant de soing, c'est que le grand Seigneur ne donne les terres aux Turcs que pour en iouir durant leur vie: tellement qu'eux qui veulent laisser quelque chose à leurs enfans, assemblent tout l'argent qu'ils peuvent, afin qu'ils ayent dequoy s'entretenir, sans raualler leur condition, combien qu'ordinairement lors que les Peres ont bien seruy, & que les enfans font paroistre quelque generosité de courage, on leur laisse bien souuent la iouissance de ce que les peres ont possédé, en attendant qu'avec l'aage ils puissent paruenir à leurs charges. Je diray encor ce mot, que les Turcs n'eussent iamais enduré la demeure des Chrestiens, tant religieux qu'autres en leurs terres, s'ils n'y eussent esté conuiez par l'esperance du profit, qu'ils tirent du Tribut qu'on exige sur eux toutes les annees, & le saint Sepulchre mesme, qui est resté entier dans la ville de Hierusalem, seroit maintenant en pieces, si les Turcs n'eussent creu que les Chrestiens attirez par ce saint & venerable lieu, y viendroient en pelerinage, & y porteroient force argent. Aussi monstrent-ils assez ce qui les a poussez à le souffrir, veu qu'on ne vit iamais gens plus aspres à la curee, ny qui rançonnent plus insolemment les deuots, mais miserables Chrestiens qui s'engagent à ce voyage, & qui sont curieux de voir le lieu où nostre redemption a esté consommée.

Les femmes Turques sont honnestes en leurs habits, sont si proprement agencees qu'on ne scauroit guiere voir rien de plus propre, & de plus modeste. Leur coiffure est pointue, & au dessus elles portent vn voile si gentiment accoustre, qu'encor qu'une partie pende, si elles veulent sortir dehors, ou se trouuer en compagnie, où il y ait des hommes, elles s'en couurent soudain le visage, sauf les yeux, & outre ce elles portent sur leurs habits vn linge blanc delié, couurant tout le reste, en telle sorte que les hommes ne peuvent recognoistre leurs femmes parmy les autres, alors qu'elles sont en troupe. Elles ne se trouuent aussi iamais en lieu où les hommes soient assemblez, & c'est chose tellement rare, & contre la coustume que l'homme parle à vne femme en public, que si vous demeuriez vn an en leur compagnie, vous ne le pourriez presque voir vne seule fois durant tout ce temps. Que si l'on voyoit vn homme en public discourant avec vne femme, ou allant avec elle aux champs, on le trouueroit du tout estrange.

Ceux qui sont mariez ne se jouent iamais tant soit peu avec leurs femmes en presence des autres, & n'ont iamais aussi parole avec elles, à cause que l'homme garde tousiours vne mesme seuerité enuers sa femme, qui ne manque d'estre continuellement fort respectueuse en son endroit.

Les grands Seigneurs qui ne peuvent estre tousiours avec leurs femmes les laissent sous la charge de certains Eunuques, qui les gardent si soigneusement, qu'il est impossible qu'un autre que leur mary les entretienne, & qu'elles viennent aux effects qui les peuvent deshoner: car encor qu'elles en eussent la volonté, comme quelquesfois elles n'en manquent nullement, elles ne scauroient l'effectuer en aucune sorte. Toutesfois les esclaves dont elles disposent à leur fantasie, & qui ne sont pas ordinairement soupçonnez comme les autres, franchissent ceste difficulté, & font plustost leurs maistres cornards que nuls autres: Mais s'ils sont trouuez sur le fait, ou qu'on les conuainque d'auoir fait l'amour à leurs maistresses, ils sont punis avec des tourments, qui font mesme horreur à ceux qui les imaginent.

Mais afin de dire quelque chose de ce que les Turcs pratiquent ordinairement dans Constantinople, il faut scauoir qu'aux iours de leurs festes, qu'ils nomment Beclan, les caualiers viennent ordinairement en l'Hippodrome à cheual, chacun vn baston en la main, en forme de lance gaye, ou Zagaye, & estant diuisez en plusieurs bandes, lancent ceste espee de dards les vns contre les autres. En quelques autres endroiets les cheualiers galopant autour d'une perche, tirent de l'arc contre vne boule coupee, qui est au bout de ceste perche.

Dans toute la ville de Constantinople on n'vse point de charroy, ains l'on se sert d'Armeniens, comme de faquins, & crocheteurs, pour porter tout ce qui est necessaire; ceux-cy sont Chrestiens de creance semblable à celle des Grecs.

Vous voyez quelquefois aller par Constantinople des Turcs yures avec tant d'insolence, qu'il ne se pratique rien de semblable en toute l'Europe, qui est Chrestienne: S'ils rencontrent durant la fumee de leur vin, quelque Chrestien par la ville, il se ruent aussi tost dessus, luy font mille outrages, & le pis que i'y voy, c'est qu'il n'y a nul moyen de tirer sa reuanche de ces iniures, autrement on receuroit aussi tost quelque grande punition, tant les Turcs sont curieux de faire respecter les leurs, encor que coupables, & tant ils desirent que les autres souffrent,

combien qu'innocens : ne prenant pas garde que voulant conseruer par ce moyen leur autorité, ils ancantissent la Iustice par la mesme voye.

Les Turcs ont cela de bon, qu'ils se montrent fort charitables, & grands aumoniens : mais c'est sans discretion, ny iugement, veu qu'ils donneront aussi bien de l'argent pour l'entretien des bestes, que pour celui des hommes.

Quant aux Chrestiens qui vivent parmy les Turcs, ils vsent presque tous de leurs façons de faire, horsmis ceux d'estrange contree, qui vivent chacun à leur mode, mais ils ont de coustume presque tous d'aller entierement vestus à la Turque, excepté qu'on les recognoit par l'habillement de teste, qui n'est pas semblable à celui des Turcs, ie dy cecy de ceux qui ne sont pas de ses terres, ou qui viennent des païs, où ceste façon d'habillemens n'est en vsage.

Les femmes de la Perse vont si proprement vestuës, ou pour mieux dire si pompeusement, qu'elles conuient le plus retenu à quelque pensée amoureuse à cause des attraits dont elles vsent d'ordinaire pour chatouiller les cœurs, & volontiers ces Franques font l'amour fort librement, & semblent estre au monde pour seulement plaire aux plus curieux, qui trouvent assez de sujet de se contenter en les accostant, veu que leur conuersation est plus libre, & plus familiere que celle des Turques.

Les Iuifs sont aspres au gain, & s'adonnent principalement à la marchandise, laquelle ils exercent avec tant de tromperie, & d'vsure, qu'ils semblent auoir entierement mis leur conscience à l'abandon, & n'auoir autre soing que de deuenir riches, & de se mettre à leur aise. Il y en a quelques-vns entr'eux qui s'adonnent à la medecine, & qui reüssissent tellement, que les Princes & Seigneurs, voire mesme les autres Turcs se seruent volontiers de telles personnes.

RICHESSE, FORCE, GOUVERNEMENT ET RELIGION.

POVR ce que nous auons entrepris de discourir à la fin de toutes ces choses, nous y renuoyons le Lecteur qui les verra desduites bien amplement en leur lieu, & pour ceste cause i'en quitte icy le discours, afin de venir aux autres Prouinces.

LA GRECE.

LE nom de Grece est pris en diuerses façons chez les Autheurs : car ils appellent proprement & veritablement Grece, la Prouince que Ptolomee nomme Attique, en laquelle estoit la fameuse ville d'Athenes, & en second lieu en estendant ce nom plus outre, on comprend sous luy quatre Prouinces, qui sont la Macedoine, l'Épire, l'Achaïe, & le Peloponese, & les autres païs qui sont contenus sous ces quatre, & apres cela les Isles de la mer Ionique, & de l'Egee, & c'est en ceste sorte qu'on prend communément auourd'huy le nom de la Grece. Finalement on peut aussi estendre ce nom en telle maniere, qu'il comprend la Thrace, vne assez bonne partie de la petite Asie, ou Natolie, outre les susdites Prouinces que les Grecs ont autresfois possedee, où ils ont iadis enuoyé leurs colonies: outre ce l'endroiët de l'Italie, qui fut autresfois nommee la grande Grece, & qui porte maintenant le nom de haut Calabre.

Mais à la prendre comme on fait communément, elle a trois mers qui la bornent, c'est à sçauoir l'Ionique du couchant, la Lybique du Midy, & l'Egee du Leuant, & quant au Septentrion elle est bornée par les montagnes, qui separent la Macedoine de la Thrace, de la haute Mysie, & de Dalmatie.

Ceste Grece prise comme nous auons dit, y comprenant aussi l'Isle de Candie, de laquelle nous auons discouru parlant de l'Estat de Venise est enclose entre la parallele du 34. degré de hauteur, qui est le dixiesme, ou le plus long iour est de 14. heures & vn quart, & la parallele de 43. degrez de latitude, ou eleuation, qui est le 14. où le plus long iour est de 15. heures & vn quart, tellement qu'en tout cét espace, le iour artificiel n'a point de plus grande difference, & diuersité que d'une heure.

Quant à la longitude, elle est enfermee entre le Meridien du degré, & celui du 55. au moins il ne s'en faut que bien peu. Les Venitiens y tiennent quelques pieces: mais elles sont de si peu de valeur, qu'elles ne meritent pas d'estre ramentuës : Tellement qu'il faut donner tout au Turc, de mesme qu'on ne laisse de donner à l'Empereur de Marroc, toutes les Prouinces que nous auons descrites en leur lieu, encore que les Portugais y tiennent des pieces plus importantes, & y soient plus assurez que ceux qui y sont pour la Seigneurie de Venise. Mais afin de venir aux particularitez, considerons la Grece selon les parties, & faisons en vne description suffisante.

La Macedoine se nommoit anciennement Emathie, selon Plin, & Peonie, puis Emonie, selon

selon Tite-live. Mais aujourdhuy Gerbele & Niger tiennent qu'elle s'appelle Albanie, toutesfois l'opinion de Magne est, qu'on nomme seulement ainsi la partie de la Macedoine, qui est vers la mer Ionique : Mais la partie Orientale entre le sein Strymonique, maintenant le Golphe de Contesa, & le sein Thermayque aujourdhuy Golphe de Salonique, est appelée Iamboli. Et quant à celle qui est au milieu, elle retient encor aujourdhuy le nom de Macedoine.

Ce país est assis entre deux grandes mers ; c'est à sçavoir entre l'Egee, ou l'Archipelague ou il faict deux pointes du Levant, & la mer Ionique du Ponent, entre les rivières de Drilon, maintenant Drino, ou Lodrina, & Celidne, que quelques-vns nomment faullement Salnich du Nord : la Macedoine a pour sa borne la Dalmacie, la haute Misie, & vne partie de la Thrace, separee par les rivières de Drilon, & de Strimon, du costé du Midy l'Epire, proprement Albanie, & l'Achaye.

Gerbele met six Prouinces en Macedoine du costé qu'elle touche la Grece ; c'est à sçavoir l'Emathie, la Pierie, la Pelagie, l'Estiote, la Theffalie & la Phtiotie, entre lesquelles la Theffalie, maintenant Comenolitari, selon Castalde, est la meilleure. Vous y avez les montagnes d'Olympe aujourdhuy Lacha, selon Castalde, qui est haut au possible, veu qu'il y a plus de dix stades, selon Plin, iusques à son sommet, & par ce moyen, si nous prenons huit stades pour vne lieuë, il y aura plus d'une lieuë à monter, à raison dequoy les habitans du país nomment son sommet Ciel, d'autant que les vents n'y soufflent en aucune sorte. Il y a aussi Pelion, maintenant Petras, selon quelques-vns. Cette montagne est si haute que Dicarque, selon le tesmoignage de Plin, l'ayant mesuree trouua qu'elle avoit 1250. pas de hauteur. La montagne d'Osia, que Sophian appelle Colonno, & Pinet Olliro, est aussi en ceste contree, de mesme que celle de Pinde, maintenant Mezzono, du pied duquel sort la rivière de Pennée.

Vous y voyez aussi le Mont Nymphée : mais le plus fameux de tous, c'est celuy d'Athos, qui s'appelle aujourdhuy Montagne Sainte, ou selon les Grecs qui s'y tiennent *Agiosoros*, qui est mesme chose. Il est en forme de Chersonese, y ayant vn destroit de 1500. pas, joint la plaine. Son circuit est de 75. mille, sa longueur contient trois iournees de chemin, & sa largeur n'est qu'environ de demy-iournee. Ceux qui voyagent sur la mer, voyent son sommet de plus de 30. mille loin. Ce fut ceste montagne qu'un Architecte voulut tailler en figure d'homme au temps d'Alexandre, qui ne presta guiere l'oreille à ce dessein. Ceste montagne estoit autrefois dediee aux Caloyers, moynes Grecs, de l'Ordre de S. Basile, & l'on leur avoit donné vn Priilege, qu'on leur maintient encor aujourdhuy, qui est, que aucun, ny Grec, ny Turc, n'y peut habiter, s'il n'est Calois Grec. Aussi il demeure environ six mille de ces Caloyers en divers lieux de ceste montagne, où il y a environ 24. grands & anciens Monasteres clos de bonnes murailles. Il y a entre les autres deux fort renommez, c'est à sçavoir celuy d'Vnrope-di, & celuy d'*Agios Ioua*.

La Macedoine a quatre principaux Golphes du costé de la mer Egee, c'est à sçavoir le Golphe de Contessa, le Syngitique, autrement Golfe du mont Saint, le Torionaque, maintenant le Golfe d'Ajomama, & celuy de Theffalonique, ou Salonique, outre le sein Pelagique, qu'on nomme maintenant le Golfe d'Armire.

Les rivières plus renommez de Macedoine sont outre celle de Strymon, ou Stromon, sur la frontiere de la Thrace, celles d'Arius, que les vns nomment Bardare, les autres Vardari, & c'est la plus belle de toutes, & a vne eau fort douce, qui coulant du mont Scandie apres vn long cours se vont rendre dans le Golfe de Salonique. Les anciens disoient que les brebis qui beuvoient de ceste eau deuenoient noires. Il y a encor l'Erigone, qui s'appelle maintenant Vistritze, selon Sophian, & Deuode, selon Mercator. Ceste rivière sortant des Monts d'Illyrie, ou Esclaunie, & coulant par la Peonie, & du long des villes d'Heraclee, d'Edese, se va rendre dans le Vardare.

L'Aliaemon, maintenant Pelecas, selon Sophian, & Platamon, selon Mercator, vient des monts Canaluies de Peonie, & separe la Macedoine de la Thrace. Son riuage est extrêmement mal-aisé. On tient que si l'on veut auoir des brebis blanches, il leur faut faire boire de ceste eau.

La rivière de Pénée, aujourdhuy Salempire, & Lycostome selon Sophian, Pezin selon Thuer, & Azababa, selon Mercator, & quelques autres, estant grossie de quatre fleuves se va rendre dans ce Golphe Theffalonique.

On void aussi en Theffalie le lieu de plaisir que les anciens Escriuains ont nommé Tempé, qui a cinq mille pas de long, & presque six mille de large, estant assis entre les deux montagnes d'Osse, & de l'Olympe, & arrousé tout au beau milieu de la belle rivière de Pennée ou Azababa.

Il y a encor le Chersonese de Patalene, en l'extremité duquel on voit le promontoire Cane-stree, maintenant Capo Canistro, & celieu estoit autrefois separé du reste de la Macedoine par vne muraille.

- 26 Les villes nommees de Macedoine furent autrefois Theffalonique, Pelle, Stagire, Apollonie, Dyrrachium, Aulon, qui sont encore à present habitees. Theffalonique fut florissante entre toutes les autres au temps d'Auguste, & fut la Capitale de toute la Macedoine, ayant vn grand nombre de peuple, & estant assise en bon lieu : entre les riuieres de Chabris, & d'Echedore. On la nomme auourd'huy Salonique, & ceste ville est grande, renommee, & tellement riche, & marchande, qu'on la peut comparer à Naples en Italie : sur tout il y a force marchands qui tiennent toute sorte de marchandise des Indes. Elle fut quelque temps entre les mains de la Seigneurie de Venise : mais en fin Amurath, fils de Mahomet l'osta à ceste Republique. On voit assez près de là le village de Siderocapse, comme dit Belon, qui semble vne ville. Il s'appelloit autrefois Chrisiles.

Pella qui se nomme maintenant Ieniza, selon Sophian, & Zuchria selon Niger, renommee par la nourriture que Philippes, & Alexandre le grand son fils y print, fut autrefois fort illustre. Stagire, ville, où ce grand Philosophe Aristote prit naissance, est assis près du mont Athos, au riuage du Golfe de Contese, où l'on voit encore beaucoup de ses ruines. Elle se nomme maintenant Stelar, selon Niger, selon Sophian Libanoua, & au rapport de Nicetas Macra. Apollonie a esté ville fort renommee sur la riuere d'Echedore. Ce fut où Cesar Auguste apprit les lettres Grecques. Niger la nomme Cerés, & quelques autres Piergo.

Dyrrachium, qu'on nomma pareillement Epidaume, & qu'on appelle auourd'huy communément Durazzo, est vne ville assise au riuage de la mer Ionique. Elle est fort peu habitee, à cause du mauuais air, qui procede des marecages qui sont à l'entour. Bajazet l'osta aux Venitiens l'an 1449. Elle est esloignee de Brindes, autrefois Brunduse, ville de Pouille au Royaume de Naples d'environ cent mille : La ville d'Aulon, qui a aussi vn port est sur la mer Ionique, & se nomme maintenant Valonne. Il y a vn fort chasteau : mais le reste est sans muraille. Ceste ville est esloignee de la terre ferme d'Italie d'environ 60. milles de chemin de la mer, c'est à sçauoir de la ville d'Hidronde, ou d'Ovrante.

Belon met aussi la ville de Cauale en Macedoine, qu'il croit mal à propos auoir esté nommee Bucephale. Il dit qu'elle est maintenant fort peulee (au lieu qu'autrefois elle estoit presque despourueüe d'habitans) à cause de la commodité d'vne eau de fontaine, donc Abraham Bassa fit refaire le canal ceignant en mesme temps la ville de nouvelles murailles, y batissant aussi vn logis, appellé Charbacara, pour receuoir & nourrir toute sorte de passans. On met semblablement icy Croye, qui est dans le pais, non loing de la riuere de Lisan, que Sophian tient pour l'Antigonie des anciens : mais on croit qu'il s'abuse, pour ce qu'Antigonie estoit au pais d'Epire sur le fleuve Celidæ, tellement que ce seroit plustost Epicarie, selon la situation que luy donne Ptolomee. Ceste ville a esté rudement assiegee par les Turcs, tant auant Scanderbeg, ou George Castriot, qu'apres sa reuolte : & en fin elle est venue sous leur puissance, apres auoir enduré mille maux.

- 27 L'Epire est vne partie de l'Albanie, & le reste est compris en la partie de la Macedoine, qui tend vers la mer Ionique. Castalde estime que l'Epire est maintenant le pais de Ianne : mais la situation faict aisément cognoistre que la Prouince de Ianne, ainsi nommee de la ville de Ianne, est par delà le mont Pinde de Theffalie. Richer, & Ænee Syluius, ou Pape Pie II. nomment l'Epire Larte : mais ce pais n'est qu'vne partie de l'Epire. Ceste prouince a pour ses bornes du Leuant, la Riuere d'Achelois autrement Aspri, selon Sophian, Gathoci suiuant Niger, Aracheus, selon l'aduis de Mercator, & de Castalde. Et encore selon les autres Aspropotamo : du Midy la mer Hadriatique, du Ponent l'Ionique, iusques à la riuere de Celydne, ou Pepylychne, que Castalde nomme Salnich faussement : d'autant que Salnich est plustost le fleuve Lous, de Ptolomee : Car Celydne est vne petite riuere qu'on voit près du port de Ragouse entre la Valone, & les monts Acroceraunies, qu'on nomme maintenant de Chimara. Et ce pais a du Nord la Macedoine.

Il s'estend vers la mer Mediterranee l'espace de deux cents vingt mille pas, entre les riuieres de Celydne, & d'Achelois. On diuisoit autrefois ceste Prouince en Chaonie, qui estoit appelée proprement Epire, & qui tend vers l'Occident, & en Acarnanie, qu'on nomme auourd'huy Duché ou Despotat, ou petite Grece, & ceste partie tend vers le Soleil Leuant iusques à la riuere d'Achelois.

Gérbele met outre ces prouinces Thesprotie, Amphilochie, & Ambracie, & Ptolomee Cassiopée, Dolopie, & Almene, qui sont toutes entre la Chaonie & l'Arcananie, Mercator diuise l'Epire en ancienne & nouuelle, nommant vieille Epire, ce que les Latins nommoient ainsi, & prenant pour nouuelle la partie de Macedoine, qu'on nomme maintenant Albanie.

Les ports

Les ports de ceste contree sont Panorme, Onchesme, Cassiope, vulgairement Cassopo, Buthiro, où est la ville de Butrinte : mais le golphe de Larte, autresfois lein d'Ambracie est meilleur que tout le reste.

La ville d'Ambracie a esté jadis Capitale de tout le païs, & la demeure des Roys d'Epire. Elle se nomme maintenant Larte, prenant ce nom d'une rivièrè qui en est proche. Nicopoli a esté autrefois vne bonne ville, & fort peuplée. Elle s'appelle maintenant Preuese. Auguste la bastit en memoire de la victoire Nauale qu'il obtint sur Marc-Antoine. Gerbele mer aussi Actie Colonie d'Auguste entre les villes d'Acanarnie. Les nouvelles tables la nomment Capo Figalo.

L'Achaye, que Ptolomee appelle Hellade, a maintenant le nom de Liuadie aux nouvelles 28 Tables. Elle a pour ses bornes du Nord la Thessalie, près de la rivièrè de Sperchie, du Sein Maluc, & du mont Oete, du Couchant le fleuve d'Achelois, du Levant en reflexissant quelque peu vers le Nord la mer Egee, & la Myrtos, iusques au promontoire Surie, qu'on appelle maintenant le Cap de colonnes, à cause qu'on y voit les ruines des colonnes du Temple de Neptune & du Midy, elle regarde le Peloponese, ou la Moree, qui luy est coniointe seulement par vn Isthme, ou destroit large de cinq mille, environ sur son milieu. Il trouue ces neufs Regions chez les Auteurs, la Doride, l'Hellade, l'Etolie, les païs de Locrenses, & des Opuntiens, la Phocide, la Beoce, l'Attique & la Megaride.

La Doride est assise près du mont de Parnasse, où estoit la langue Dorique, qui fut trouuée entre les autres fort douce & gentile. Gerbele, dit que l'Hellade est environnée des autres Prouinces, qui sont du Nord la Phtiotide du Midy, la Phocide, du Levant l'Attique, la Beoce, & du Levant & du Ponent la Doride.

L'Etolie est assise entre le mont Callidrome, & la mer Ionique. Il y a eu autrefois de belles villes, dont la principale estoit Calydon, qui est auourd'huy ruinée ainsi que les autres.

Le païs des Locrois & Opuntiens, auoit pour sa principale ville Amphisse qu'on met en- 29 cor avec le mesme nom aux nouvelles tables, combien que Niger die qu'elle se nomme Lambino. On met aussi en ce païs la ville de Naupacte, que quelques autres logent en Etolie, au port de Lepante, qui s'appelle ainsi, à cause de la ville qui a auourd'huy le nom de Lepante. Le Turc osta ceste ville par force aux Venitiens, au mesme temps que Dutazze en Macedoine, & Modon, autresfois Methone, & Coron furent reduits sous la puissance.

La Phocide est près du mont Parnasse. Sa principale ville a esté Delphes, à cause de l'Oracle d'Apollon, qui conduisoit beaucoup de gens à aller, pour ce qui leur deuoit arriuer; & ce fut aussi le sujet pour lequel tant de personnes y enuoyèrent tant de presents inestimables.

La Beoce auoit pour sa principale ville Thebes, assise entre les rivièrès d'Ismene, & d'Asopie, & maintenant l'on nomme ses ruynes Stibes, ou Thiva.

L'Attique est toute du long de la mer, vers laquelle elle s'estend avec deux caps, dont l'un est nommé Sunie, autrement Cap des colonnes, & l'autre Cynosure. La ville d'Athenes estoit autrefois Capitale de ceste prouince. Elle porte auourd'huy le nom de Setines, & n'est plus qu'en bourg, où il y a vn Chasteau, qui estoit iadis le Temple de Minerve.

La contree Megaride, qui print son nom de la ville de Megare, est assise près du destroit. Les montagnes plus renommées d'Achaye sont celles de Parnasse, Citheron, Helicon & Hymente. Parnasse est tout entouré de forests, & a deux sommets. Citheron est vne montagne haute, rude, & mal-aisée, contiguë aux montagnes de Megare, & d'Attique.

Les plus fameuses rivièrès de ces païs sont l'Ismene, que Strabon appelle Cnope, & apres l'Asopie, & l'Eueue.

Il y a aussi plusieurs seins, ou golphes, dont les plus remarquables sont du costé du Midy, vis à vis de la Moree; c'est à sçauoir le sein Naupacte, ou Golphe de Lepante, & le Sein Corinthiatique. Et vers la mer Egee, il y a le Sein Pelasgique, maintenant le Golphe d'Armitè, & le Sein Maliac, auourd'huy le Golphe de Ziron.

Le Peloponese fut iadis appellé Egiale, Apie, Argios, & Pelasgir, & auourd'huy on le nomme communément Moree. Il est assis entre la mer Egee, & l'ionique, & n'est iointe à l'Achie 30 que par le seul Isthme, qui est si solide, que aucun ne l'a peu encore couper: Car quelques Princes curieux, comme le Roy Demetrius, Iules Cesar, Caligule, Neron, & quelques autres l'ont voulu separer de tout le reste de la Grece, afin que la nauigation de la mer Adriatique à l'Egee fust plus courte, & moins perilleuse, & le Peloponese fust plus asseuré, à raison dequoy l'on a quelquesfois dressé vne muraille sur l'Isthme depuis vne extremité iusques à l'autre, du

destroict de terre, afin de rendre la Moree plus forte.

Ceste muraille estoit nommee Hexamite, & auoit de longueur cinq mille : Amurath Empereur des Turcs l'abbatit, & saccagea toute ceste presqu'Isle. Mais l'annee 1453. elle fut rebastie en quinze iours par les Seigneurs Venitiens, qui y enuoyerent expressément trente mille hommes pour y travailler : toutesfois elle fut en fin ruinee par les Turcs : Cet Isthme se nommoit Corinthiaque, à cause que la ville de Corinthe y estoit bastie; c'est veritablement le plus fameux destroict de terre qui soit en toute l'Europe.

Au reste la Moree a du Leuant la mer Cretique, du Ponant la mer Ionique, & Adriatique, du Nort le Sein de Corinthe, & que Strabon appelle la mer Crysee, & Alcyonique, & Solphien Golphe de Patras, & pareillement le Sein Saronique, nommé par Castalde Golphe d'Engie, & c'est entre ces Golphes que le destroict est posé. Et quant au costé du Midy le Peloponese a la mer Mediterranee.

Sa longueur depuis l'Isthme iusques à Modon, de cent septante cinq mille, & son circuit d'environ six cents. Il est fort capable à cause de sa figure qui approche de la rondeur : car il ressemble fort à la feuille d'un plantan, ou Plane.

Les Arcadiens, Cynuriens, Dryopes, Lemniens & Corinthiens, ont habité ce pais.

Ceste presqu'Isle est comme bouleuert de toute la Grece, & encore c'en est auourd'huy la partie mieux peuplee. Elle a esté fort renommee, à cause de la ville de Mycenes, & des Republiques & Principautez des Argiues, Lacedemoniens, Sycioniens, Eliens, Arcadiens, Pyliens, & Messeniens. Mais auourd'huy tout ce pais est sujet au Turc de mesme que le reste de la Grece, combien qu'il ait esté opiniastrement deffendu par quelques Despotes, ou Seigneurs de Grece, & par les Seigneurs de Venise.

Les principales riuieres de ce pais sont Asope, maintenant Arbon, selon Theuet, Encie, auourd'huy Ighac, Alphec, maintenant Ropheca, ou Orpheau, selon Sophian, & Niger, & Carbon, si l'on veut s'arrester aux mariniers Italiens. Il y a cent quarante petites riuieres qui se vont rendre dans ce fleuve.

Panise, que Niger nomme Stromio, & Castalde, & Mercator Pirnaze, Eurotas, auourd'huy Balisopotamie, selon Sophian, Mercator, & quelques autres : mais Iris, selon l'opinion de Niger : & Inachus, qui s'appelle auourd'huy Planizze.

Le pais de Corinthe est du long de l'Isthme. Il auoit pour sa Capitale ville Corinthe, de qui le circuit estoit d'unze mille : & ceste ville estoit forte par le moyen d'un Chasteau qui regardoit la mer Ionique, & l'Egee.

Le pais d'Argie suit celuy de Corinthe du costé du Leuant, où la mer Cretique vient mouiller le bord de la contree. Ortelius dit qu'on la nomme auourd'huy Romanie.

La riuere d'Inaque, ou de Planizze y passe, & se va rendre dans le Sein Argolique, ou le Golphe de Napoli, ainsi appellé à cause d'une ville maritime, qu'on nomme Napoli, ou Naples de Romanie, autres *Nauplia nauale*.

La ville d'Argos estoit iadis la plus renommee de ceste Prouince. Elle s'appelle encor auourd'huy de mesme, & est assise en un liou fort agreable, & arrosee de la Planizze.

La ville d'Epidaure estoit pareillement icy, & c'estoit celle qui se rendit renommee par le Temple d'Esculape. où tant de malades receuoient prompte guarison.

Le pais Laconique exposé au Midy, est le plus beau de tous, & s'estend vers les promontoires de Malee, & Tenazie, maintenant Capo Malio, & Capo Metaphan, & embrasse plusieurs beaux Seins, ou Golphes, le plus large desquels est celuy qu'on nomme Laconique, auourd'huy Golphe de Colochine.

La riuere d'Eurotas, maintenant Vasilopotamo, passe par le milieu de ceste prouince, & se va rendre dans le Sein Laconique.

La ville de Lacedemone estoit Capitale de ceste Prouince. On la nommoit aussi Sparte, & maintenant elle s'appelle Misithre. On void aussi une autre ville d'Epidaure au Sein Argolique, autre que celle qui est au Varonique. Elle est encore assez peuplee, & se nomme Maluasie.

Le pais des Messeniens est enfermé entre le Sein Messenien, maintenant le Golphe Coron, & par la mer Ionique. Il s'estend en long vers le Midy, & la mer Lybique. Sa principale ville estoit Missenes, que Castalde appelle Martagie. & quelques autres Mosenigue, & Nithin.

C'est en ce pais que sont les fameuses villes de Methone auourd'huy Modon, demeure d'un Sangiac Turc, & Caron, lesquelles deux villes ont esté prises par les Turcs sur les Venitiens : puis on y void Pyle, maintenant Nauarrin : Cyparisti, maintenant Arcadie, qui fait nommer le Sein qui luy est voisin, Golphe d'Arcadie. Il y a en ce pais un Cap difficile & facheux, autresfois nommé Coryphase, & maintenant Capo Zunhio.

L'Elide regarde le Couchant, & est posée entre la Messenie, l'Achaie, & l'Arcadie.

Ses meil-

Ses meilleures villes estoient Elis, que quelques-vns disent mal à propos, auoir auourd'huy le nom de Beluedere : Olympie, maintenant Lareganico & Pise, que quelques vns veulent estre meisme chose qu'Olympie.

Le promontoire Chelonite appartient aussi à ce pais. On l'appelle auourd'huy Capo Torinese, à cause du nom d'une ville qui en est fort proche.

Il y a vn autre pais du Peloponese, qu'on nomme proprement Achaie, pour le distinguer de celuy qui est dans le continent de la Grece, qu'on nomme autrement Hellas. Il est assis du costé de Septentrion entre la montagne de Stymphale, & le Sein Corinthiaque. Sa principale ville fut Egire, assise sur vn costau rude & mal-aisé. Elle est maintenant ruinee, & se nomme Xilocrasto.

On voyoit icy pareillement la ville d'Egie, appelée par les Modernes Vostize, ou Bostisan, & ruinee par les Turcs.

La ville de Patras se void aussi en ceste Prouince. Et quant à Dyme, elle est maintenant abbatue & se nomme Chiarenza, communiquant son nom au plus prochain Cap, qu'on appelloit autrefois le Promontoire d'Araxe.

On void icy le Promontoire Rhie & vis à vis celuy d'Antirrhie, qui sont deux Caps de la Grece qui enferment le Sein de Corinthe : & ce lieu se nomme auourd'huy destroit des Chasteaux de Lepante, & les Caps sont appelez Chasteau de Lepante vulgairement Dardanel.

Le petit pais de Sycione est entre l'Achaye proprement dite, & la riuere d'Alope. Sa principale ville estoit Sycion, auourd'huy Basilique, selon Sophian : Mais Mercator met Vasilicon en ses tables la distinguant de Sycione, d'autant qu'il les met tous deux.

L'Arcadie, iadis aussi Pelasgie, est au milieu du Peloponese. Ses montagnes plus renommées estoient Cylene Pholoé, Licee Menale & Parthenie. La principale ville de ce pais estoit Magalopolis auourd'huy Leontari si nous nous arrêtons à Sophian, & Loudario, & si nous croyons quelques autres.

QUALITÉ.

A P R E S auoir descrit le plus exactement qu'il nous a esté possible, en telle sorte que le Lecteur ne puisse receuoir de l'ennuy, il nous faut considerer la qualité de tous ces pais, dont nous auons fait cy deuant quelque mention.

Ce pais surpassoit autrefois tous les autres de l'Europe en temperature, & bonté d'air, & son terroir estoit merueilleusement agreable, portoit toute sorte de fruiets, nourrissoit force troupeaux de bestial, les poissons abondoient en les mers, & en les riuieres, & toutes richesses fondoient en ce lieu par maniere de dire, pource qu'on y peut aller aisément, à cause d'un grand nombre de Golfes, de port d'Illes, & de presqu'Illes, & de tant de fleues navigables. Mais il faut considerer l'estat present de toutes ces prouinces, afin de scauoir s'il respond à celuy du temps passé.

La Macedoine est fertile de tous costez, & enuironnee de grandes montagnes. Ce qui est du costé de la mer Ionique est plein, mais fort couuert de forests.

Toute la partie qu'on nomme Albanie est assez grande, mais fertile & bien agreable. D'auantage elle porte de l'or & de l'argent, & meisme, selon le tesmoignage d'Aristote, on y trouua iadis vn elpee d'or qui estoit incogne.

On tire encor de l'Asphalte des veines de la terre, assez pres des villes, d'Apollonie, & d'Aulon, ou la Vallonne.

La Thessalie, ou Comenolitari est la meilleure contree de Macedoine, veu que c'est vne fort grande plaine toute entouree de hautes montagnes de fort grand rapport, & merueilleusement agreable, & où il se nourrit des cheuaux qui sont beaucoup estimez.

Le mont Olympe porte grande quantité de bouys, & de lauriers, & que l'on tient qu'il n'y a nuls loups en ceste montagne.

Le mont Osse Collono, ou Olire est couuert de neige, & de grandes forests, & il y a principalement tant de pins que leurs branches, lors que le vent souffle, font vn bruiet semblable au tonnerre. Le mont Pinde est aussi sujet à estre ordinairement couuert de neige.

Quant au Mont Athos, son plus haut sommet est continuellement blanc, & la neige ne s'en retire iamais. Il y a de l'herbe en grande abondance, beaucoup de plantes, & vne infinité d'arbres fructiers. On y void aussi grande quantité de vigne & d'oluiers & beaucoup d'autres arbres, qui sont continuellement verds, comme les lauriers des oliuers sauages, & des myrtes.

La vallee de Tépé est tousiours merueilleusement agreable. La Chersonese de Patalene estoit iadis si fertile qu'il y auoit 7. villes: mais maintenât elle est toute couuerte de bois, & ne raporte

que bien peu de chose. Pres de la Vallonne on tire du sel mineral en abondance, & le terroir y porte d'aussi bon vin qu'on en puisse boire en aucun lieu d'Europe.

- 36 Quant à l'Epire, il est aujourdhuy fort despeulé, & son pais est sterile, & plein de forests en beaucoup d'endroits: toutesfois en tirant vers le riuage de la mer, il est d'assez bon rapport. Il y naist aussi de grandes bestes à quatre pieds, principalement des bœufs, des chiens, de mesme que les moutons: mais on n'y void naistre nul asne. Les monts Acroceraunes sont suicets à estre frappez du foudre, & fort redoutez de ceux qui voyagent sur la mer: car routes & quantes fois que l'on void esleuer des petites nuees, il se leue en mesme temps de grandes tempestes.

Pour le regard de l'Attique, son terroir est maintenant sec, & aride: mais du temps que le pais estoit gouverné par les Oripinaires, ce defaut naturel estoit reparé par l'industrie, & la diligence des habitans, qui tiroient de leurs pais fort bonne prouision de ce qui estoit necessaire à la vie: l'air y est extremement doux, & temperé, & il y faict aussi bon demeurer, qu'en lieu quel'on puisse choisir.

Le pais de Beoce à son terroir humide, & marescageux, mais gras, & fertile. Pour ce qu'il est assis au milieu des montages, d'où sortent plusieurs riuieres, lacs, & marests, l'air y est grossier au possible.

La Prouince Doride iouit d'un assez bon air, & son terroir produiroit assez de choses, s'il estoit bien cultivé: mais maintenant que les Turcs en sont maistres, tout y va en decadence, & la plus grande part des terres est en friches.

Quant à la Region de Megare, le pais est aspre. Le mont de Parnasse est tout couuert de forests, & ses sommets de neige. Le mont de Cytheron porte du bouys en abondance. Mais la montagne d'Hymette a le meilleur terroir que l'on puisse voir, & qui est capable de porter toute sorte de fruiets. Il y a grande quantité de fleurs ordinairement, & grand nombre d'abeilles qui le vont succer, & qui tirent de là un miel excellent, qui est tant loué par Alexandre Aphroditee.

- 37 Le Peloponese abonde en toutes choses qui sont necessaires à la vie, & qui peuvent mesmes servir aux delices: car il y a de fort belles plaines, & des costaux qui portent toute sorte de fruiets. Aussi c'est encores aujourdhuy l'endroit le plus peulé de la Grece.

Le pais de Laconie est le plus beau de tous ceux de la Moree: il y a de grandes campagnes labourables, qui sont fertiles, mais mal aisees à cultiver, pour ce que le terroir se courbe entre les montagnes, & l'on y rencontre de l'aspreté à cause des costaux qui l'environnent. Plin assure que la terre trembloit bien souuent en ce pais, ce qui faict assez paroistre qu'il y a force lieux creux.

Le promontoire de Mallee est tellement fascheux, & la mer qui est autour est tellement agitée des vents, que ceux qui voyagent, le passent faisans un grand tour, & s'ils en vsoient autrement, ils courroient plus souuent grande fortune.

Quant au pais d'Arcadie, il est plus aspre que tout le reste de la Moree: il est semblablement froid, & sujet à de grands broüillards. Plin dit qu'il le faisoit en ce pais certain vin qui rendoit les femmes fecondes, & les hommes enragez, & les fruiets, ou graine de l'If qu'on cueilloit en ceste contree estoient si venimeuses, que quiconque dormoit sous cet arbre, ou mangeoit de ce mauvais fruiet, venoit à mourir.

MOEVRS ANCIENNES.

- 38 **P** V is que nous avons mis la Macedoine premiere en la description de la Grece, il nous faut aussi considerer premierement les anciennes mœurs de ses habitans.

Les Macedoniens ont esté grands guerriers, ainsi que l'on peut iuger aisément par les conquestes qu'ils firent sous Philippes, & encores plus sous Alexandre le grand. Que si ce Royaume a produit forces hommes guerriers, les lettres y ont aussi eu grande estime: ce que l'on peut cognoistre aux epithetes que ses sçauans, nommément les Poëtes donnerent aux Muses, veu que l'on trouuera que les lieux plus signalez où ils ont estably le sejour des Muses sont en Macedoine: Car elles ont esté nommees Pimpleides, de la fontaine de Pimplee, & Libetrides, de la ville de Libetre, assise sur le mont Olympe: d'auantage, Aristote seul qui print naissance en la ville de Stagire en Macedoine, nous seruira de garant pour ce regard, puis que l'on n'a iamais veu homme plus comblé de toute sorte de science.

Les Macedoniens ont esté fort somptueux en leurs festins, ainsi qu'on peut voir en Athenes, lors qu'il fait mention des nopces de Caran premier Roy de Macedoine, auxquelles chaque estranger reçeut à son parterment un vase d'argent en pur don: cas extraordinaire en ce temps-là, auquel une petite magnificence estoit tenuë pour chose rare.

Quant aux Thessaliens qu'on loge en ce Royaume, les anciens auteurs ont remarqué qu'ils estoient

estoyent trompeurs, & qu'ils ne gardoient presque iamais la foy qu'ils auoient promise. D'auantage ils estoient remarquez pour les plus dissolus des Grecs, non tant en habits, qu'en festins, & le seul desir de viure licentieusement, & sans auoir des voisins qui les blasmaient, fut cause qu'ils furent enclins à receuoir en leurs pais les Perses, qu'ils imitoient en delices, aussi tacherent-ils par tous moyens de les introduire en Grece.

Ils estoient pareillement accusez de grande gourmandise, & tenus pour hommes, qui ne pouuoient iamais estre rassasiez. On les tenoit aussi pour tellement addonnez à la paillardise, que leur des-bordement ce fait a esté blasmé tout ce qui se peut par ceux qui ont escrit de leurs façons de faire. Mais tous ces vices n'empescherent pas qu'ils ne fussent vaillans hommes, & tels qu'ils ont fait sentir aux autres Grecs, que leur dissolution ne les rendoit pas si mols & si laches qu'on les estimoit, & que leur bonne chere ne les rendoit pas incapables de manier les armes, & de battre ceux qui se pensoient estre plus braues que les autres.

Ils firent cognoistre cecy aux Peloponesiens combattans contr'eux en faueur des Atheniens : mais ils eurent ce mal, que ne pouuans oublier leur naturelle inconstance, ils trahirent leurs amis, & souffrirent que les Atheniens fussent deffaits par ceux de Lacedemone non sans vn grand blâme de la caualerie Thressalienne, qui estoit renommee entre toutes celles de la Grece.

Ceux qui demeuroient en la delicieuse vallee de Tempé, & qui se renoient nommément du long de la riuere de Penee, s'assembloient souuent, faisoient des sacrifices aux dieux, & banquettoient tous de compagnie, ayant mis fin à leurs fols Offices. Et d'autant qu'il y en auoit tousiours quelques-vns qui offroient aux Dieux, & sacrifioient en ce lieu: ceux qui voyageoient sur ceste riuere sentoient tousiours de bonnes odeurs, passans du long de ceste vallee, & c'estoit aussi pourquoy l'on honoroit ce lieu, & qu'on l'estimoit sacré aux Dieux.

En la ville de Dion, selon Polibe, il y auoit de belles escolles, ce qui monstroit assez qu'ils estoient curieux de bonnes lettres. L'idole à qui l'on portoit plus d'honneur en ceste ville, estoit celuy d'Adonis, & cecy tesmoignoit combien les Citoyens prisoient les delices de l'amour.

A Tricale on honoroit Esculape, & l'on y voyoit vn Têple fort magnifique, basti à son honneur, & au dedans vn nôbre innny de tableaux où estoient les noms & les portraits de ceux qui auoient esté deliurez de diueres maladies de ce malin esprit, Dieu permettant que le diable fit des miracles en son regne, & parmy ceux qui s'estoient atrachez à la creance de son pouuoir.

Quant à l'Epire, on tient que les Chaoniens sortirent iadis de Thraces, & ceux-cy furent mis entre les plus barbares. On dit aussi que la Prouince de Chaonie fut ainli nommee, à cause que les habuans tenoient ordinairement la bouche beante, & entr'ouuerte.

Les Acarnaniens portoient ordinairement vne longue cheuelure, & ne la faisoient couper en aucune sorte. Ils estoient tenus pour bons coureurs & bons meneurs de chariots, sur lesquels on combattoit, où l'on alloit aux courtes Olympiques, comme on voit en Pausanie, qui fait gagner le prix à vn Acarnanien, nommé Polycle, non à la seule course d'Olympie, mais encor en la Pitie, l'Ismique & Nemee. On attribuoit encor à ce peuple la dexterité de bien tirer de la fonde. On tenoit aussi les Acarnaniens pour sages & bien aduisez, qui auoient bien dressé l'Estat de leur police : de sorte qu'il y en a qui disent qu'Aristote fit 158. liures sur le seul sujet du gouuernemēt, & des loix de ceste natiō: mais les liures se sont perdus avec la police.

En Epire on voyoit aussi l'Oracle de Dodone, auquel on accouroit de toutes parts. Herodote dit sur ce sujet, que les Prestres de Dodone disoient qu'il sortit anciennement deux colombes noires du pais d'Egypte, dont l'une vola vers l'Afrique, & l'autre tira vers l'Epire, & que ceste derniere s'arrestât sur vn Hestre par la en voix humaine, disant qu'il falloir dresser vn Oracle en ce lieu là, & que elle leur declaroit la volonté des Dieux, ainli qu'elle fit depuis. Il adiouste apres que c'estoient des femmes, que les Dodoneens receurent d'elles les responses de leurs Dieux. Le bois de Dodone donna lieu à ce qu'on dit, que les hommes au commencement viuoient de glands, à cause que les Pelagiens se tenans en celieu, & n'ayans encor l'industrie de s'aider du bled & en faire du pain, s'aiderent des fruits des arbres, & pour ce que le gland leur estoit plus à commandement en ce lieu que tout autre fruit, ils en tiroient leur nourriture.

Ceux d'Ambracie auoient vne Lyonne pour leur deesse qu'ils honoroient, pour ce que Periandre Corinthien tyrannisant iadis ceste ville, fut mis à mort par vne femme qu'il entretenoit, qui portoit le nom de Lyonne, & par son moyen les Ambraciots furent deliurez des cruantez, & fureurs de ce tyran. Ils estoient aussi fort curieux, ainli que Plin nous apprend en son histoire naturelle, lors qu'il dit, que Fulue Flaque Capitaine Romain ayant pris Ambracie, emporta les effigies des neuf Muses qu'il y trouua, merueilleusement bien faites de la main de Zeuxis, excellent peintre de son age.

Venons maintenant à l'Achaye. Les Doriens sont estimez apres les Pelagiens les plus anciens de la Grece: de sorte que Plin ose nommer tout le reste de ce qui porte le nom Grec, Barbare,

sauf les Ioniens, Doriens, & habitans d'Etolie. Aussi les Ioniens & Doriens sont ceux qui se sont faits renommer plus que tous les autres peuples de la Grece, & qui ont conduit plus de colonies en pais estrange, comme ayant surmonté vne partie de l'Asie, & s'estant fait cognoistre en Sicile.

Les Doriens ont conduit de leurs Citoyens à Calcedoine, ville bastie sur l'emboucheure de la mer Majour, ou Pont Euxin : ils ont esté fort addonnez à la guerre, vaillants, & hardis entre tous les Grecs ; ils portoient sur les morions & bourguignottes des crestes, d'où pendoient des queue de cheuaux, qu'ils ageançoient en ceste sorte pour se rendre plus terribles, & donner plus d'estonnement à leurs ennemis aux combats.

Pour le regard des Locrois Opuntins, suiuant Pausanie, les premiers habitans de leurs pais ignorans l'usage des habits, s'armoient contre le froid de peaux cruës de bestes qu'ils tuoient, ainsi que font encores à present les peuples plus voisins du Nord, & mettoient le poil contre leur chair, afin de se donner plus de chaleur. Ces Locrois honoroient Minerue Zosterie, entre toutes les autres Deitez, à cause des ceintures, ou baudières qu'ils portoient ainsi que Minerue, les lians à leurs espauls en escharpes, & y pendans leurs espees, ainsi que l'on peut encores voir aux statuës des soldats & Capitaines, tant Grecs & Barbares, que Romains. Les mesmes estoient anciennement fort recommandez pour leur vaillance, estans tres-bien armez, ainsi que tesmoigne Pausanie, disant que du temps de la guerre Persique, les Locrois furent armez pesamment, & porterent de bien fortes armes. Il adiouste encores, qu'Homere dit que ce peuple se trouua en la guerre contre les Troyens, avec l'arc & la fonde.

Les Eoliens eurent aussi la reputation d'estre vaillants hommes, tellement que Pausanie dit que lors que les Gaulois passerent en Grece sous la conduite de Brenne, les Eoliens furent des premiers qui leur resisterent. Aussi les louë-il comme les plus forts d'entre les Grecs d'alors, tesmoignant que leur ieunesse estoit la plus florissante & gaillarde de toute la Grece. Ils vsoient en guerre de fondes, & s'en aidoint mieux que des arcs ou des fleches, ainsi que dit Eustathie sur Homere. Allans à la guerre ils auoient le pied droict couuert de quelque chausseure, & le gauche tout nud.

Pour le regard des Phocenses, combien qu'on mette en leur pais le mont Helicon, où l'on disoit que les Muses faisoient leur seiour, comme si ceste Prouince eust esté la demeure des hommes de sçauoir : toutesfois Strabon suiuant l'opinion d'Ephore, dit que c'estoient gens rustiques, grossiers, & qui abhorroient du tout les lettres. Ce qui fut cause que quelque vaillance qu'il y eust en eux, ils ne peurent iamais conseruer la grandeur, & la puissance que leur Capitaine Epaminonde leur auoit acquise : de sorte que la guerre estoit leur seul exercice.

Mais afin de voir encores quelle estoit leur naturelle fureur, on dit d'eux ce qui se lit aussi des habitans des Isles Baleates, que sortans de leur pais pour voyager sur mer, ils alloient tous nuds, portans trois fondes, l'une au col, l'autre ceinte sur les flancs, & la troisieme en la main, qu'ils estoient merueilleusement adroits à tirer des pierres. Ce peuple a esté tenu pour stupide, & d'un esprit du tout lourd. Si quelques hommes d'entre les Beotiens estoient endebtez, & ne satisfaisoient à sa debte Il tost qu'il eut esté raisonnable, on le menoit en plein marché, & place publique, ou le faisant seoir, on le couuroit d'un panier, en se mocquant de luy, & cecy seruoit d'amende honorable, & de note d'infamie à ceux qui auoient esté traitez de ceste sorte. Mais touchant ce que nous auons dit de leur peu d'esprit, ce n'est pas à dire qu'il n'y ait eu des hommes doüez d'un gentil esprit, veu qu'Amphion vn des plus anciens Poëtes Lyriques en sortit, puis ce grand deuin Amphiaras, & outre ce le renommé Poëte Pindare.

40 Ceux du pais d'Attique estoient hommes fort entendus en ce qui est de la mer, & en marchandise. Ce fut aussi en ce pais qu'on vid fourmiller les gens de sçauoir, qui sortoient tous d'Athenes, & s'espadoient apres par toute la Grece, & ailleurs. C'est pourquoy l'on a escrit que Minerue planta, & produisit l'oliuier, en donnant son nom à la ville d'Athenes, d'autant que l'abondance & la douceur du fruit de cet arbre, a vn grand rapport à la fluidité de l'eloquence, & à la douceur des lettres & sciences. Ils furent les premiers qui inuenterent la drapperie, & l'usage de laines, & qui enseignerent aux Grecs les comoditez des bleds, & de la vigne, leur apprenant à labourer les champs, & à y ietter la semence, au lieu qu'auparauant ils n'vsoient que de fruitages : Cecrops Roy des Atheniens institua le premier entre les siens l'accouplement de l'homme, & de la femme par legitime mariage, & pour ceste cause l'antiquité luy a donné deux faces.

Il y auoit en Athenes dās le Temple de Minerue des Vierges voüees, & dediees à ceste Deesse, qui gardoient perpetuellement certain feu près de sa statuë qu'ils tenoient auoir esté enuoyee du Ciel. Ceste statuë auoit la forme d'une femme belle & grande, ayant vne robe iusques aux talons, & sur la teste vne espee de bourguignotte, sur le tymbre de laquelle on voyoit le monstre Sphinx, & des Griffons grauez de chaque costé de la bourguignotte. Elle auoit apres sur l'estomach la teste de Meduse, vne lance en la main, & à ses pieds son bouclier, & vn dragon qui se

qui se tenoit près de sa lance, & quelques-uns tiennent qu'elle avoit une Chouette sur la crosse de son armet, à cause que cet oiseau luy estoit sacré. C'est pourquoy Demosthene allant en exil, dit que Pallas prenoit plaisir à trois bestes desagréables, c'est à sçavoir au Dragon, à la Chouette, & au peuple.

On a fait les Atheniens inventeurs de l'huile, à cause qu'il n'y avoit point d'oliviers en toute la Grece ailleurs qu'en Athenes. On ne peut nier que les Atheniens n'ayent esté fort courageux : veu que les guerres faites, tant par mer que par terre, en rendent fort suffisant témoignage.

En la ville d'Athenes & d'Eleusis, l'on honoroit particulièrement Cerés, qui avoit sa feste nommée Thesmophories. En ceste solemnité les femmes, comme dit Plutarque, s'abstenoient de toute viande, & couchoient sur la terre à l'imitation des sacrifices des Egyptiens : & nous pouvons voir dans Ovide, qu'elles demeuroient neuf iours sans avoir la compagnie des hommes : Elian tesmoigne, que durant ceste feste les femmes mettoient en leur lit de l'herbe nommée Hagne, tant à cause qu'elle chassoit les serpens, que pour ce qu'elle amortit l'ardeur de l'amour, & faict qu'on n'est nullement violenté par ceste passion.

Quant aux mysteres d'Eleusis, differents des Thesmophories, il estoit deffendu de les publier, à peine de la vie : & pour ceste cause Alcibiade étant accusé de les avoir descouverts, fut contrainct d'aller en exil, & s'il eust esté dans Athenes, on l'eust mal traité. Aussi fut-il excommunié, (s'il faut ainsi dire,) par l'Ordonnance de tous les Sacrificateurs, ce qui fut la cause qu'il se revolta contre les Atheniens, & leur fit la guerre. Or de mesme que ces sacrifices, pour estre tenus plus excellents que les autres, estoient appelez mysteres, aussi les ministres avoient le nom de Mystes. Il y avoit deux sortes de mysteres; c'est à sçavoir de grands & de petits : les grands estoient privilegez, & l'on n'y recevoit aucun estranger, suivant l'Ordonnance d'Eumolphe. Tellement qu'Hercule desirant y estre receu, ne peut l'obtenir iusques à ce qu'il eust esté faict naturel du pais, étant adopté par un gentil-homme Athenien nommé Philie. Ces sacrifices estoient si plains d'abomination, que le diable voyant bien que si l'on venoit à les publier, ils seroient abolis, deffendoit par visions à ceux qui en pouvoient écrire, de les descouvrir en aucune sorte. Pausanie confesse que la Deesse luy commanda en songe de ne profaner ses mysteres, en les faisant cognoistre à tout le monde.

Mais afin de faire mieux sçavoir ce qui se peut dire touchant ce faict, il ne sera mal à propos de le prendre de plus haut. Voicy comme Clement Alexandrin en parle en l'Oraison aux Gentils. Les enfans de la Terte, Baube, Disaule, & Triptoleme, & outre ce Eumolpe, & Eubulee, demeuroient à Eleusis. Triptoleme estoit bouvier, & Eumolphe pasteur, de qui sont sortis les Eumolpides, qui avoit charge d'aller annoncer la feste de Cerés. Baube ayant logé en sa maison la Deesse, luy presenta à boire de ie ne sçay quel breuvage composé, qu'elle ne vouloit prendre, pource qu'elle estoit toute esplorée pour la perte de sa fille. Baube se fâchant de ce refus, & croyant que ceste femme ne meritoit guieres de respect, pour ce qu'elle estoit en assez mauvais équipage, descouvrit ses parties honteuses, & les monstra à Cerés. Elle prenant plaisir à ce spectacle, prit la tasse & la mit en son panier. De sorte que toute la ceremonie de ceste feste n'estoit que la representation de ce badinage, veu que le mot du guet de ces mysteres estoit, l'ay ieusné, l'ay beu maintenant du breuvage, ie l'ay pris de la corbeille, & l'ay mis en mon panier.

Afin de specifier doncques toutes ces sottises, l'on y portoit des corbeilles, en l'une desquelles il y avoit des fleurs, & en l'autre des espics (l'une signifiant le Printemps, & l'autre l'Esté & la moisson) & outre ce on y portoit la figure de la nature d'une femme, à cause que ceste folle Baube avoit monstré son devant à Cerés.

Et d'autant que ceste femme avoit usé d'une grande diligence à la poursuite de sa fille, aussi l'on allumoit une infinité de torches, & de flambeaux, mettant sur un chariot les choses que ces Portepaniers honoroient : & il n'y avoit autre chose dans les paniers que l'on mettoit sur le chariot, que des quenouilles & des fuseaux, de la laine mise en œuvre, de petits gasteaux, une poignée de sel, & la figure d'un dragon dédié à Bacchus, des grenades, du cœur du lyerre, & du pavot. Les grands mysteres d'Eleusis se celebrent au mois de Juin, & les petits au mois de Novembre.

Les Opuntins reueroient Hercule, en l'honneur duquel ils celebrent tous les ans une feste, en laquelle on luy sacrifie un bouc, un belier, & six taureaux. Ils avoient encore une autre sorte de sacrifice non sanglant, dont Plutarque parle en ceste maniere. Qui est celui que les Opuntins nomment Crithologue.

Le mot signifie un qui amasse de l'orge : d'autant que les Grecs aux plus anciens sacrifices usoient de ce grain, & chacun de ces Citoyens offroit les premiers espics de l'orge : d'où vient que le Prestre qui avoit la charge de lever ces premiers fruits, estoit appelé Crithologue.

Or les Opuntins auoient deux Sacrificateurs, l'un qui auoit la charge de sacrifier aux Dieux, & l'autre aux Demons, & Genies. A ce propos diray, que les premiers Grecs, & mesme quelques vns entre les Romains, ont detesté l'effusion de sang en leurs sacrifices : de sorte que les Opuntins se contentoient de ceste simplicité, d'offrir à leurs Dieux des pains d'orge, ou des gâteaux faits de ce mesme grain, avec vn peu de sel. Ceux de Megare sacrifians à Terce, vsoient en lieu d'orge de petites pierres, comme si leur Dieu eust esté sans cognoissance, puis qu'il se contentoit de si peu de chose. Mais les Prestresses Eleusines qui seruoient deuant Propylee, n'eussent osé offrir à l'Idole que des gâteaux d'orge, qui fut venu du terroir d'Eleusis.

Près de la ville de Calydon l'on voyoit le Temple d'Apollon Lathree, & dans la ville celuy de Diane, à laquelle on sacrifioit en ceste sorte. On dressoit en premier lieu autour de l'Autel, sur lequel on vouloit sacrifier du bois verd, dont chaque piece auoit seize coudées de long, & au dedans de l'Autel tout estoit plein de bois menu fort sec, & aysé à bruster. Ainsi que le iour de la solemnité approchoit, on preparoit des degrez de terre molle, afin de pouuoir monter à l'Autel, & le iour venu l'on faisoit vne magnifique procession, où la Prestresse, qui deuoit estre Vierge, marchoit apres les autres, assise sur vn chariot que deux cerfs deuoient tirer. Le lendemain de la feste on celebroit le sacrifice general, auquel on menoit sur l'Autel toute sorte d'oiseaux bons à manger, & toute espee de victimes, puis des sangliers, des biches, cerfs, & de cheurueil. Quelques-vns y mettoient des loups, & petits ours, les autres des bestes plus grandes, & plus farouches, & l'on y offroit aussi des fruiets des arbres domestiques. Le feu estant mis on bruloit ces bestes, dont quelques-vnes venans à fuir, il falloit qu'elles fussent ramenees, afin de parfaire le deuoir du sacrifice.

A Lepante, ou Naupacte, l'on honoroit autrefois Neptune, comme aussi Diane, & semblablement Venus dans des grottes, & lieux sousterrains.

Il y auoit encore vn Temple dedié à Esculape.

Les Orchominiens qui estoient en la Phocide, ont esté grands guerriers, & forts en cavalerie si bien que les Thebains furent vn long temps leurs tributaires, iusques à ce qu'Hercule les deliura de ceste seruitude. Ils auoient vn Temple dedié aux Graces.

Les Lebadiens ont esté plus renommez pour la superstition, que pour autre chose, d'autant que les Grecs estoient de telle humeur, qu'ils croyoient que le vray moyen de se rendre immortels, estoit d'inuenter quelque nouvelle ceremonie, ou religion.

C'estoit là que l'on trouuoit l'autre de Trophonie, où l'on ne pouuoit descendre sans s'estre premierement tenu au logis qui estoit sur l'entree de cet antre (ce logis estoit dedié au Genie, & à la bonne Fortune). & tandis qu'il se tenoit là, il falloit qu'il vescuist chastement & sobriement, & qu'il se lauast en des bains chauds, & encore qu'il sacrifiasst à Trophonie, à ses enfans : & outre ce, à Iupiter surnommé le Roy, à Apollon, & Saturne, & Cerés que l'on appelle Euporé, laquelle on disoit auoir esté nourrice de Trophonie. Il falloit que le Prestre assistast au sacrifice qu'on faisoit de chaque beste, afin de considerer ses entrailles, & dire à celuy qui vouloit descendre, s'il trouueroit Trophonie favorable.

La nuit que quelqu'un deuoit entrer dans la grotte, il falloit qu'il sacrifiasst vn belier sur la fosse, inuoquant Agamedes, & quelque bon-heur que les precedents sacrifices eussent monstré, si les entrailles de ce belier n'estoient correspondantes aux autres, on n'auoit rien aduancé : mais si elles estoient semblables, on y pouuoit descendre avec assurance.

Celuy qui deuoit descendre estoit premierement conduit au fleuve Hercinne, où les Prestres l'oignoient d'huyle, & deux enfans âgez de treize ans, & fils de quelque Ciroyen de Lebadie, qu'ils nommoient Mercurus, le lauoient de l'eau de ce fleuve. Apres cela il n'estoit pas soudain conduit vers l'Oracle, ains vers la source de ce fleuve, où il falloit qu'il beust de l'eau d'oubly, comme ils disoient, afin qu'il ne se souuinst plus de chose qu'il eust auparauant pour pensee. Apres cela il goustoit d'une autre eau qu'on appelloit, de memoire, pour se souuenir de tout ce qu'il verroit estant au trou de cet Oracle. Il regardoit apres la statue, qu'il n'estoit loisible de voir à autre qu'à celuy qui descendoit dans l'autre, qui faisoit ses prieres deuant cet Idole, & l'ayant adoré, s'en alloit vers l'Oracle, reuestu d'une robe de lin, ceint de petites bandes, & ayant en ses pieds des pantoufles prises au mesme lieu. Celuy qui descendoit auoit des gâteaux mieilleux, & ainsi qu'il y auoit vn peu sejourné, il se sentoit attiré comme par l'impetuositè de quelque riuere rapide, qui l'emmenast, & le couurist avec ses eaux.

Il sortoit par le mesme lieu qu'il estoit entré, & les pieds les premiers. Les Prestres le receuoient soudain, & l'asseoient sur vn siege, qu'ils nommoient de la memoire, non gueres loing de l'entree, où ils s'enqueroient de luy de ce qu'il auoit veu, & ouy dans l'autre.

Cela fait, ils le recommandoient à ceux qui auoient charge de le traicter, iusques à ce qu'il fust reuenu à luy. Ceux cy le menotent au logis du Genie, & de la bonne Fortune, encores tout estonné, & en tel estat, qu'il n'auoit cognoissance, ny de soy-mesme, ny des personnes qui le seruoient, &

voier, & il falloit que ceux qui entroiēt dedās cēt antre, y laiffassent vn tableau, ou tout ce qu'ils auoient veu & ouy, deuoit estre graué, afin qu'il en demeurast quelque memoire à la posterité.

Les Cheroneens honoroient sur tout Dieu, vn Sceptre Royal, disant que Vulcan l'auoit forgé pour Iupiter, & que cestuy cy l'ayant dōné à Mercure, ce dernier en fit present à Pelops, apres lequel il paruint à Arree, puis à Thyeste, puis à Agamemnon. Il est vray qu'ils ne luy bastirent aucun temple, ains seulement celuy qui estoit esleu Prestre toutes les annees pour les ceremonies de ce Dieu ridicule, tenoit ce Sceptre en sa maison, & luy offroit tous les iours des sacrifices, dreslant vne table sur laquelle on mettoit toute sorte de chairs, & de viandes, comme en vn festin.

On faisoit aussi à Cheronee (ville celebre pour la naissance de Plutarque) des senteurs de fleurs incorporees ensemble, comme de roses, de lis, & d'Iris, ou flamme, & ceste composition appaisoit les douleurs, de mesme que par le moyen de l'onguent faict de roses, ils gardoient les statues de bois de vermoulure.

Les Cheroneens auoient encore ceste coustume, que sacrifiant à Leucothee, deesse marine, & nourrice de Bacchus, le Secretain se tenoit à la porte du tēple avec vn foliet en la main, & crioit qu'il n'y eust serf, ny femme esclau, ny Etolien, ny Etolienne, qui prist la hardiesse d'entrer aux lieux saints tandis que les sacrifices se feroient.

A Platees, on ordonna pour perpetuelle memoire de la victoire obtenue sur les Perseans, la feste de la Deliurance, & l'on dressa l'image de Iupiter Elutherie, ou Libérateur, au lieu où la bataille s'estoit donnee, où les Grecs s'assembloient toutes les annees, & s'exercoient à la course tous armez, à l'honneur de leur Conseruateur, & il y auoit vn prix assigné pour ceux qui vainquoient les autres à la course.

On adora premierement à Oroe cēt Amphiaræ Thebain, qui fut englouty tout vis par la terre, & apres que les Oropiens l'eurent edifié, tous les Grecs rendirent des honneurs diuins à ce Deuin, à qui l'on dedia vn temple, & des ieux, combats qui furent nommez Amphiaræes.

Ceux de Megare adoroient l'idole de Iupiter, où ils auoient aussi basti vn temple à la nuict, qu'ils honoroient comme Deesse. Ils adoroient aussi Iupiter le poudreux, l'oratoire duquel n'auoit nulle couuerture, non plus qu'à Rome celuy qui estoit dedié au Dieu Terme.

Pour le regard de la Moree, on sçait assez combien les citoyens de Corinthe ont esté vaillans, & combien ils ont aymé & defendu leur liberté, ils adoroient la Deesse Venus, & Isis y estoit aussi honoree en vn bois, où l'on luy faisoit des sacrifices. On y a de mesme rendu des honneurs diuins aux Cyclopes, auxquels les Corinthiens bastirent vn temple & dresserent vn Autel, sur lequel ils leurs sacrifioient. Ils auoient encor vn lieu sousterrain dedié à Palemon, où ils croyoient qu'il s'estoit caché. Ce lieu seruoit pour faire serment des choses douteuses, & quiconque se pariueroit (dit Pausanie) fut-il Corinthien, ou estranger, ne pouuoit euitier la punition de son pariurement. Mais pour reuenir à Venus, que nous auons dit y auoir esté honoree, on pouuoit paillarder dans son temple sans crainte d'estre puny, & la coustume du lieu estoit telle, qu'on y nourrissoit iusqu'à mille femmes desbauchees, qui s'abandonnoient à tous ceux qui vouloient auoir jouissance d'elles.

Les Corinthiens quoy qu'estimez bons guerriers, estoient toutesfois tant addonnez aux delices, que leur mollesse fut cause de la loy publiee à Lacedemone, que nul estranger y fut receu, ou communicat avec les Spartains, pource que par le moyen de l'acointâce des estrangers, la ville de Corinthe estoit tombee en ceste corruption des mœurs.

Les Trezeniens auoient vn bois, & vn temple dedié à Hippolite, où l'on luy faisoit des sacrifices. Il n'y auoit fille preste à marier, qui ne fut obligee par la loy des Trezeniens d'aller offrir sa cheuelure en ce temple auant qu'espouser, & Lucian adioust qu'il falloit que ceux qui estoient en adolescence offrissent la premiere despoüille de leur barbe.

Les Lacedemoniens estoient braues, vaillans au possible, comme ils monstrent par la longue autorité qu'ils eurent sur toute la Grece. Aussi n'estoient nullement adonnez aux choses qui leur pouuoient apporter de la mollesse, comme nous ferons voir au discours particulier de leur gouvernement. Ils auoient certaines festes Gymnopedies, où des enfans nuds qui estoient les plus solennelles de toutes, & les ieunes hommes y dançoient tous nuds en l'honneur d'Apollon. Ils adoroient les Parques, & leur auoient dedié vn temple au lieu le plus apparent de la ville. Il y auoit à Sparte vn lieu nommé Ephebee, où les ieunes hommes immoloient à Mars vn petit chien, estimant que ceste victime luy estoit du tout agreable, & ce sacrifice se faisoit de nuict: Tandis que ces ieunes gens estoient attentifs à leur sacrifice, ils faisoient battre ensemble des sangliers qu'ils auoient appriuoisez, & lors qu'ils combattoient au lieu des exercices, il aduenoit le plus souuent que celuy dont le sanglier auoit vaincu les autres emportoit la victoire sur ses compagnons.

Ce lieu où les ieunes hommes combattoient estoit enuironné d'eau comme vne Isle, il y

regne tellement parmy les vns & les autres, qu'on n'y trouue point d'Academie en aucune ville, & il n'y a plus aucun entr'eux qui se soucie de faire instruire les enfans, & de leur donner cognoissance des lettres.

Tous vsent indifferemment d'un langage fait & tiré de l'ancien Grec corrompu, mais les vns parlent plus gentiment & plus correctement que les autres. Toutesfois leurs mots approchent plus du vieil langage Grec, que l'Italien ne fait du Latin.

Les habitans des villes qui sont sousmises aux Venitiens, parlent aussi parfaitement Italien que Grec, mais les payfans & villageois n'vsent d'autre langue que de la Grecque. Il faut faire pareil iugement de ceux qui sont sous la puissance des Turcs. Car ceux qui sont aux bonnes villes parlent également Grec & Turc: mais ceux qui se tiennent au villages & hameaux, ont seulement cognoissance de la langue Grecque. Ils retiennent encor les propres noms des choses, excepté aux lieux où les autres nations ont esté plus souuent, & cela se void aux villes plus maritimes, qu'en celles qui sont auant dans le pays. Car ils ont pratiqué si longuement les Turcs & les Italiens, qu'ils ont meslé parmy leur langue beaucoup de mots de ces nations qui les frequentent. Les Turcs ont aussi emprunté beaucoup de mots des Grecs, pour exprimer des choses qu'ils trouuoient en Grece, dont ils n'auoient auparauant cognoissance.

Or combien que les Grecs n'vsent pas d'un mesme mot en toutes ces Prouinces, pour exprimer vne chose, toutesfois ils approchent fort des mots anciens, principalement aux choses qui ont des noms propres.

Les nobles, & les plus riches s'habillent à la mode de ceux qu'ils recognoissent pour Supérieurs, mais le menu peuple, tant de la domination des Venitiens, que de celle des Turcs, soit qu'il habite aux Isles, ou en terre ferme, ne retient aucune chose des mœurs anciennes. Tous ceux qui en sont portent ordinairement les cheveux longs, & coupent ceux qui sont sur le front, & au deuant de la teste. Ils vsent de bonnets doubles, & fort espais. Tous ont le plus souuent peu de meubles, de mesme que les Turcs, & ne couchent pas sur des lits de plume, mais sur des matelats pleins de bourre. Ils sont coustumiers de ne mettre point d'eau dans leur vin, & font encor auourd'huy des carous à toute reste. Mais les femmes n'assistent pas à leurs dissolutions, ny ne festinent pas avec eux. Ils ayment beaucoup mieux manger du poisson que de la viande.

Les Macedoniens, principalement ceux qui sont de l'Albanie que nous auons mise en Macedoine, sont farouches, & semblables aux Scytes. Ils sont vaillans au possible, principalement aux combats qui se font à pied. Il n'y a homme au monde qui prenne plus de peine pour butiner quelque chose, qu'eux. Ces Albanois ont un langage particulier, different du Grec, & de l'Esclauon.

Quant à l'Epire, qui est vne partie d'Albanie, ses habitans sortent en Esté par troupes hors de leur pays, à cause de la sterilité, & vont en Macedoine, Romaine, & Natolie, où ils travaillent pour les Turcs, & se loient pour moissonner les bleds, & les cribler, & nettoyer. Ceux cy s'en retournent apres en Automne chez eux pour y viure durant l'Hyuer, & le Printemps avec leurs femmes & enfans. Ils ont un langage particulier, different de celui des Grecs, lequel toutesfois ils n'ignorent.

C'est de ce pays que viennent les Aidones, Vscocques, Martelosses, & Morlaques, qui sont des hommes vistes au possible, indomptez, propres à supporter toute peine, & vaillans tout ce qui se peut, qui ne s'amusent qu'à voler aux montagnes d'Albanie, & en tout le Royaume, & en tout le Royaume de Bosne, & en Dalmacie, où ils se meslent aussi d'escumer de petits esquifs.

GOVERNEMENT ANCIEN D'ATHENES.

P Ource que nous remettons le discours des richesses, des forces, & du gouvernement de la Grece, à la cōseruation generale de l'Estat du Turc, que nous destinons pour la fin, & que plusieurs qui sçauent combien la police des Atheniens estoit sagement ordonnee, pourroient desirer ceste piece, aussi bien que celle des Lacedemoniens, ie me suis resolu de mettre le gouvernement des vns & des autres, afin qu'ils ne puissent desirer en cét œuvre aucune chose de celles qui sont estimees comme essentielles & necessaires.

La ville d'Athenes fut iadis extremement estimee & gouvernee par des hommes du tout aduisez qui formerent la Republique. On attribua le commencement de ceste ville à Minerue, pour signifier que c'estoit la sagesse, & la prudence qui l'auoit bastie. Thesee fut son Restaurateur, mais Solon fut celui qui luy fit plus de bien, veu qu'il donna de relles loix aux Atheniens, que les autres nations n'ont pas deldaigné de suiure les mesmes ordonnances; & les Romains fondans leur Estat, enuoyerent des Ambassadeurs pour auoir les Loix de Solon, les

aduouant par ceste action pour les plus excellentes qui fussent au monde. Voicy donc l'ordre de ceste Republique.

Les Atheniens qui prenoient plaisir à se dire originaires du pays, & non descendus de quelque autre nation ny venus de quelque autre lieu, furent distinguez par trois noms: dont le premier estoit celuy d'Eupatrides, c'est à dire nobles, & tels en Athenes, que les Patriciens estoient à Rome, le second estoit celuy de Geomores, c'est à dire rustiques, ainsi nommez, pource qu'ils obtindrent iadis vne partie des champs de l'Attique pour les labourer, les troisiemes furent les artisans qui exerçoient dans la ville les Arts, & les Mestiers mechaniques. Mais ce nom de Dimiougé, qui veut dire Artisan, signifioit encor le mesme que Peageur.

Ceux qui surpassoient les autres en honneur, & en aage se nommoient Demogerontes, comme Senateurs qui reçoient du peuple vne souveraine autorité. Le premier nom d'Indigene ne fut pas donné au fonds, au lieu du peuple, ny à la Cité, mais seulement à ceux, dont les predecesseurs par commun consentement de tous, auoient seulement vescu dans Athenes, & qui pouuoient assurer qu'ils n'auoient eu d'ailleurs leur origine. Ils garderent ces noms iusqu'à ce qu'on vit naistre ceux des factions, par le moyen desquelles arriua la diuision entre le menu peuple & la Republique, qui dura iusqu'au temps que Dracon ordonna les Magistrats, & fit que les Atheniens establirent l'Oligarchie, c'est à dire, la domination de peu de personnes. Leurs noms estoient les Pediees, Diacries, Parales, & Etimories. Les premiers fauorisoient comme plus fort avec leurs richesses l'Oligarchie. Les Diacries embrassoient le gouvernement populaire, comme estans marris que les plus puissants tinssent le premier rang en la Republique. Les Parales fauorissant tantost vn party, & tantost l'autre, se rangeoient du costé que bon leur sembloit, empeschant leur propre liberté, & celles des autres. Cependant toutes les iniures tomboient sur les miserables Etimories, qui estoient les hommes de peu de moyens, pour ce qu'ils estoient contraints toutes les annees de donner la sixiesme partie de leurs biens aux plus puissans. Et par ce moyen il arriuoit que les miserables citoyens desnuez de toute assistance estoient contraints de faire bas, & de se soubmettre à la volonté de plus riches.

Mais afin qu'on puisse mieux cognoistre le peuple d'Athenes, & quel soing, & quel esprit les Magistrats eurent de le retenir en son deuoir, il m'a semblé à propos de rapporter icy ce que en dit Polybe en son 6. liure.

Le peuple d'Athenes, dit-il, fut semblable au Pilote de quelque nef abandonnee & égaree: Car de mesme que le Pilote commande à ses vaisseaux, de sorte qu'ils luy obeyssent promptement, lors qu'ils sont réunis apres auoir esté en desordre, ou à cause de quelque furieuse tempeste, ou pour la crainte des ennemis, & de mesme que ces vaisseaux estans en assurance, commencent en quelque sorte à mespriser leur chef, tellement que chacun est de differente opinion, d'autant que ceux-cy veulent passer outre, & ceux-là forcent le Patron de prendre port, de mesme, di-ie, qu'on peut trouuer estranges ces debats, & de voir que les vns calent les voiles, les autres s'efforcent d'aller plus auant par le moyen des auirons qu'ils manient, d'où vient qu'ils tombent souuent en de grands dangers, il en arriua tout ainsi à ceux d'Athenes. Car leur Republique ayant surmonté beaucoup de grands dangers, tant par la vertu du peuple, que par celle de plusieurs Magistrats, & Capitaines, se ruina finalement parmy des choses de peu d'importance, & des escueils qui n'estoient nullement à craindre. Voila ce qu'en dit Polybe.

Mais pour venir aux remuemens des seditieux, ces hommes estans de si mauvais accord, & ayant des volonteés si diuerses, ils ne pouuoient faire autre chose que rechercher la Monarchie, ou faire vn chef qui gouvernast des esprits si discordans & bigarrez. Doncques par le consentement de tous, & specialement du menu peuple, Solon fut appellé au gouvernement tant pour son integrité, que pource qu'il n'auoit iamais consenti à aucune chose de celles qui se faisoient au preiudice du peuple.

Or encor qu'il refusast ceste dignité, toutesfois il ne voulut manquer au secours de la Republique desia desesperée, & pource il s'essaya de la remettre avec sa prudence, & son conseil. Mais il pensa premierement qu'il falloit releuer ceux qui estoient accablez par la puissance des grands, si bien qu'il fit vne loy, par laquelle il declara nulles toutes les obligations que les pauures auoient passees aux riches, iusques à soubmettre leurs corps à seruitudes, & ordonna qu'on n'auroit aucun droit sur la liberté des personnes, pour raison de quelque interest qui fust deub. Ceux à qui il communiqua ceste loy auant qu'il la publiast, furent appelez Creocopides, c'est à dire coupeurs des debtes des autres: ce qu'ils firent pour gratifier à ceux qu'ils cognoissoient desirer d'une telle loy. Quelques autres disent que les hommes de basse condition, & peu de moyens, se pouuoient affranchir de leurs debtes, & que pour ceste cause le prix de l'argent fut augmenté, si bien que ce qui valoit auparauant septante dragmes, fut depuis estimé cent mines, & les debtes estoient payees à raison du prix ancien.

Mais

Mais toutes ces deux choses ne sont pas supportables l'une sans l'autre, pourcé que le retranchement des debtes auroit esté aussi fâcheux aux creanciers, qu'agreable aux pauvres: tellement que ce n'auroit pas esté vn moyen d'esteindre le feu de ces factions, mais plustost vne occasion de le renforcer. L'accroissement des mines adioustées n'auroit pas esté suffisante aux pauvres pour payer, au lieu qu'il faut croire, que Solon fit en mesme temps tous les deux, c'est à sçauoir, qu'il augmenta aux riches ce qu'ils ne pouuoient auoir recouuré des pauvres suivant la loy. Et pource que tous Legislatteurs doiuent commencer de donner exemple par eux-mesme, il remit du sien six talens d'or qui estoient enuiron quarante, ou quarante-cinq mille escus.

Au temps que les affaires estoient sur le point de se changer la loy qu'on auoit faicte ne pleut pas, pource que les riches disoient qu'ils auoient esté mal traictez, & les pauvres attendoient les Champs Attiques, toutesfois avec le temps, & eu esgard à la paix qui estoit née de telle loy, elle fut tellement approuuée d'un chacun, qu'ils luy donnerent le nom de Sifachrie, & la mirent entre les choses plus sacrées.

Les affaires estant ainsi accommodees peu à peu, il resolut, comme bon medecin, de faire qu'on ne tomba plus en ceste misere, & pource il voulut qu'on estimast le bien du peuple, afin que chacun selon les moyens, estant de bonne vie peust auoir des honneurs, & dignitez en la Republique, ne faisant nulle difference entre le peuple & les gentils-hommes: prenant garde toutesfois à ce que les nobles qui se trouuoient lors en quelque Magistrat ne fussent contraints le laisser malgré eux.

Et par ce moyen il joignit ceux qui estoient de condition releuée avec les autres qui se trouuoient de plus basse qualité, & ce d'autant plus qu'il n'estoit permis auparauant à aucun du peuple d'estre en charge, & d'exercer quelque office en la republique.

Il diuisa doncques le peuple en quatre parties, par le moyen de ceste inuention du Tribut qu'on deuoit payer, & leurs noms furent Pentacosiomedimnes, Hippes, Zefrit, & Thite.

Le vaillant des premiers hommes en dignité, estoit estimé cinq cens muis. C'estoit le premier cens, & ceux-cy estoient les premiers hommes d'Athenes apres l'ordre des Senateurs. La charge de Pentacosiomedimnes estoit, quand il arriueroit quelque besoin de faire ce qui estoit necessaire à la Republique.

Ceux-cy estoient suivis de ceux qui auoient vaillant trois cens muis, & l'on les nommoit Hippes, pource qu'ils pouuoient nourrir des cheuaux, & en temps de guerre ils estoient obligez de payer ce qui suffisoit pour entretenir vn homme, & vn cheual toute vne année. Les Zefrites alloient apres, qui auoient vaillant cent cinquante medimnes, c'est à dire demies mines.

Aristote ne fait mention de ceux-cy aux institutions de Solon dont il a parlé aux Politiques. Les Orfeures, Teinturiers, & autres artisans de pareille estoffe estoient les Thites, & ceux-cy ne payoient à la Republique, qu'un escu qu'ils nommoient Thitique, Ces derniers ne pouuoient iamais obtenir aucun Magistrat, tandis qu'ils estoient pour leur peu de moyens en ce bas degré.

Solon ayant ordonné les choses en ceste sorte, rendit saine la Republique, qui estoit auparavant en mauuais estat. Et afin que le pouuoir d'approuuer les loix fust plus grand, en les imposant aux nobles, & au peuple, il les fit approuuer aux premiers, en leur promettant la duree des tables, & à ceux-cy en leur faisant esperer la diuision des champs Attiques.

Et ayant recogneu que c'estoit vn fort grand bien, il leur pleut en telle sorte, qu'ils consacrerent cette loy à l'immortalité.

Après auoir veu comme la paix fut renduë au peuple, il me semble qu'il est raisonnable de voir vn peu la premiere origine des Tribus. Toutes les nations & villes, comme dit Tite-Liue, ont accoustumé de dire qu'elles viennent de quelques hommes illustres, ou veritablement de ceux que la folle antiquité a mis au nombre des Dieux, & pource plusieurs font leurs protecteurs & fondateurs, Iupiter, Mars, Mercure, Pallas, Vulcan, & semblables monstres.

Les Atheniens furent de ceux qui ne se contentans pas d'une seule noblesse, c'est à sçauoir, de celle de Pallas, donnerent beaucoup de noms à diuerses parties de leur peuple qu'ils appelloient Tribus, & ces noms estoient tirez des Eponomes, ou Heros, dont la memoire dueroit parmy les hommes, pource qu'ils auoient des statues, non tât pour leur vertu, qu'afin que les autres les imitassent & s'effayassent de deuenir meilleurs.

Il y eut au commencement quatre Tribus: L'une fut nommée Cecropide de l'ancien Cecrops: L'autre Autochton, c'est à dire indigene, ou originaire: la troisieme Atee, & la quatrieme Paralie. Or Cranaus recherchant ces noms de plus loing en fait quatre differents. Il nomme vne de ces Tribus Cranaide luy-mesme, l'autre Attide, la tierce Diacrite, & la quatrieme Mezogene. Attide du nom du pays, Diacrite, vn lieu esleué d'Athenes, & les Mezogenes la partie du milieu.

La mere d'Erichtonie pour couvrir son adultere fit semblant qu'il estoit fils de Iupiter, & ce fils feignant de rendre grace à son pere, ostant les vieux noms en mit aux Atheniens quatre tirez de ceux des Dieux: si bien qu'il nomma vn Tribu Diade du nom de Iupiter, l'autre Athenade de celui de Minerue, la troisieme Ephesiade de Vulcan, & la quatrieme Possidonie de Neptune, & ayant diuisé chascune de celles-cy en trois parties leur nombre paruint à douze.

Ces douze parties diuisees durerent iusques au temps d'Alcmeon enuiron six cens & soixante annees. Cestuy cy par la reponce de l'Oracle d'Apollon les nomma dix Tribus, en consideration des Princes de grande reputation qui regnerent auant luy.

On leur donna le nom de Cecropie, Erectee, Egee, Pandionie Acamante, Leonte, Eneide, Hipporoonte, Antioque, & Eante, auxquelles on adiouta, l'Antigonie, & Demetrie, pour parfaire le nombre de douze, & chascune de celles-cy fut diuisee en trois parties, tellement que toutes ensemble faisoient le nombre de trente-six. On verra de quelle importance fut cet établissement en la suite de nostre discours. Ayant donc cogneu le peuple, & fait le denombrement de ses parties, il est temps de venir au discours de leurs Magistrats.

On eslioit donc les Magistrats en trois sortes, c'est à sçauoir par sort, avec le balotement du peuple, & avec l'eslection par dignité. On eslioit par sort tous les Magistrats qui estoient establis pour leurs iugemens. Le Senat qui estoit esleu en ceste sorte, se nommoit le conseil de cinq cens hommes. Le balotement du peuple se faisoit lors qu'on vouloit eslire les Capitaines les Maistres de Camp, & les Generaux des armées.

Ceux qui estoient esleus par dignité, par noblesse, & par richesse estoient appelez Chora-ges, & seruoient aux ieux & aux sacrifices, auxquels ils vsoient de grandes liberalitez, & magnificences, & ceux cy estoient au nombre de dix. On voit donc que la Republique estoit assemblée par ces trois liens. Car les Iuges defendoient avec la raison la ville des iniures des citoyens, des voisins & des estrangers: les soldats conseruoient & augmentoient l'estendue de la domination, & la religion maintenoit les ames nettes. Je traiteray maintenant par ordre de ces dignitez com mençant aux Areopagites.

Le Senat des Areopagites a esté pour sa iustice & seuerité renommee entre tous ceux dont les Historiens ont fait quelque mention. Et de mesme qu'il estoit en grand honneur, aussi son nombre n'estoit pas petit, combien qu'il fust incertain, & ceste incertitude procedoit de neuf Thesmothetes, dont nous parlerons en leur lieu: pource qu'ainsi qu'ils auoient acheué le temps de leurs Magistrats, qui duroit vn an, & rendu compte de leur charge aux Logistes, quelques vnes estoient receus entre les Areopagites. Ceux qui deuoient aller aux Logistes, dont le Magistrat estoit establi pour raison du public disoient leur nom à vn homme public, qui deuoit trier ces paroles. Qui veut accuser de quelque meschanceté vn tel qui est à la fin de son Magistrat. Par ce cry tous les accusateurs qui pouoient prouuer estoient admis. Le iugement ieure de ses Logistes faisoit que peu de gens se trouuoient innocens & irreprehensibles pour augmenter le nombre de cet ordre. Quiconque estoit accusé d'auarice ou chose semblable, n'estoit iamais receu en ceste compagnie. Et afin qu'aucun ne peut vler de tromperie, on examinait les personnes en la presence du peuple & du Senat. Les Thesmothetes en ostant donc plusieurs tous les ans, laissoient le nombre incertain. Ceste institution fut inuentee par Solon avec la seuerité des Efetes, qui estoient au nombre de cinquante & vn auant Solon, & iugeoient des causes capitales, chose qui appartenait au Roy auant qu'ils fussent establis. Doncques avec le nom de ceux cy, Solon establi vn Senat de grande autorité en la Republique, veu qu'il cognoissoit non seulement des crimes, mais encore des autres choses qui estoient de plus grande importance. Le Magistrat des Areopagites estoit nommé par les Grecs Adiadoxon, c'est à dire perpetuel, & plein de soucy. Et combien qu'il punit publiquement tous les criminels, toutesfois leur propre matiere estoit celle des empoisonnemens, des meurtres, des blessures, des embrasemens, des embusches, & des trahisons brassees contre la patrie, & plusieurs autres choses.

Ils auoient accoustumé de iuger en ceste sorte, Celuy qui estoit accusé estant deuant eux, apres la premiere question accompagnée de coniectures, de tesmoins, & de preuues, ils donnoient soudain leurs iugemens, sans donner de longs delais au preuenue. Il n'estoit loisible aux Areopagites de se laisser mouuoir à compassion. Ils ressembloient en seuerité aux Efetes en ce qu'ils punissoient le crime selon la grandeur du fait.

Il estoit aussi defendu aux Orateurs de chercher des discours pour esmouuoir les Iuges. Le criminel estant mis en prison (preuenons le cas que ce soit pour quelque meurtre) on faisoit appeller aux crieurs publics, les parens domestiques & amys du mort, selon l'aduis desquels on imposoit la peine, & la sentence estoit selon le dommage receu.

Mais

Mais de mesme que les Areopagites vsoient de grande diligence à donner ces iugemens , aussi il aduenoit peu souuent qu'ils eussent la charge de ce faire. Ils iugeoient seulement trois iours envn mois , & ne s'assembloient qu'au besoing , & pour des affaires d'importance. Lucian dist que les Areopagites auoient accoustumé de iuger la nuict , & avec silence , afin qu'ils ne fussent surpris par l'artifice de ceux qui parloient en presence de plusieurs , & pareillement afin qu'on ne vint à interrompre les iugemens , & les plaidoyers des autres , cependant qu'ils escoutoient. Et veritablement ils pratiquerent le silence avec beaucoup de raison , veu qu'ils estoient plus attentifs à oïr le criminel , & ne descouuroient les secrets des iugemens , & ils escrinoient les sentences , afin de ne se departir iamais de l'aduis de ceux qui estoient plus aduancez en sçauoir & en aage , ou bien afin de respondre à mesme faict.

Valere le Grand dist , que ce Senat auoit le soing de sçauoir ce que chacun des Atheniens faisoit , & de quels moyens il s'entretenoit , & outre de faire que les hommes fussent honnestes , & qu'ils se souuinssent qu'ils deuoient rendre raison de leur vie. Le mesme Senat voulut que les bons Citoyens fussent ornez d'une couronne , & mist ceste coustume en auant , comme sçachant que l'honneur est le vray entretien de la vertu.

Venons maintenant aux Nomothetes dont le nom comprend plusieurs sortes de dignitez , que ie declareray auant que dire autre chose. Je trouue en Suide qu'il y eust trois Nomothetes , ou Legislateurs à Athenes , cest à sçauoir Dracon , Solon , & Escille , non le Poëte , mais vn autre natif d'Athenes.

Outre ce les Atheniens entendoient par ce mot de Nomothete vne assemblee de mille citoyens , qui auoient puissance de faire obseruer les loix , & de les voir , les changer , & les accommoder , ainsi qu'ils iugeoient estre necessaire.

Ceux-cy auoient l'autorité de dire au peuple , si les loix proposees leur plaisoient , ou non , & les propositions qu'on en faisoit ne pouuoient estre valables , si elles n'estoient signees de tous les Magistrats Nomothetes.

Ceux-cy souloient encore assister aux iugemens des causes d'importance , & si le demandeur , ou le defendeur n'obeissoit à leur sentence , ils le condamnoient à trois drachmes d'amende en la presence de l'Arcon. C'est icy l'opinion de Pollux. Mais Budee raconte plus amplement ce faict , & en quelle sorte l'on auoit accoustumé de proposer ces loix. Voicy ces paroles.

Demosthene rapporte , que Solon ordonna entre autres choses , que quand quelque loy seroit proposee au peuple , elle seroit premierement recitee par le Legisateur , puis ecrite en quelque lieu de la ville qui fut remarquable , & fort frequenté du peuple , & apres que le Secretaire la donnast à lire à l'assemblee , afin que si quelque chose n'estoit pas comme il falloit , on la peut corriger , & qu'en dernier lieu elle fust monstree aux Nomothetes , afin qu'ils l'approuassent , & que par ce moyen elle vint à estre obseruee.

Ces Nomothetes differoient des Nomophilaces , ou gardiens des loix , pource que les Nomothetes les eussent en vain approuuees , si elles n'eussent esté mises en vñage , & gardees , & qu'on n'eust iugé selon ce qu'elles portoient : qui estoit la particuliere charge des Nomophilaces. Ciceron exprime leur office au troisieme liure des loix en ces paroles. Les Grecs plus diligens , qui creient les Nomophilaces , non seulement remarquoient les lettres , mais encore les faicts des hommes , & les reduisoient en Loy.

Au second rang de la dignité , l'on mettoit les Nomophilaces , le chef desquels auoit vn bonnet de lin. Et combien que les Areopagites eussent quelquesfois le soing de faire , & de conseruer les loix , toutesfois cela n'otte rien aux Nomophilaces , puis qu'il n'y a chose qui empesche qu'un office ne se mesle d'autres choses que de celles qui luy sont ordinaires , lors que le temps le requiert.

Il y auoit apres les cinq cens hommes qui souloient cognoistre des choses ciuilles , & des actions journalieres des hommes. Ceux-cy estoient bien souuent Lieutenans des Areopagites , & leur nombre faisoit que la meichanceté n'y pouuoit trouuer place. Et pource qu'une telle multitude assemblee en vn lieu , pouuoit à grand peine executer ce qui estoit necessaire , on la souloit diuiser en dix parties selon le nombre des tribus , & chaque cinquantaine auoit les iours auxquels elle iugeoit , & il auoit trente-cinq iours auxquels ils faisoient le deu de leur charge. Or ce nombre de iours repeté dix fois , vient à faire selon les Atheniens l'an Lunaire de trois cens cinquante iours. Mais le nostre Solaire à plus que le leur 15. iours & vn quart , & à cause du trop grand nōbre de ces cinquante ils en esliuoient

dix qu'ils appelloient Presidents, dont on en tiroit sept au sort toutes les semaines, & tous les iours chacun presidoit aux choses qu'il falloit expedier, & le soir on portoit les clefs des fortresses à celui qui auoit esté President durant ce iour là: mais nous parlerons de cecy plus bas. Ce nombre de cinq cens estant au bout de son terme, l'on nommoit lors Printanie, l'assemblée de ceux-cy qui auoient, comme plusieurs tiennent, le soing des froments de recouurer les deniers du thresor public, de faire qu'on ne commençast pas les procez mal à propos, & semblables choses.

Ces Pritanes payoient de l'argent assemblé des consignations de ceux qui plaidoient, les Iuges, & ceux qui auoient faict quelque bon seruice à la Republique. Ils estoient ainsi nommez pour le lieu où ils rendoient Iustice, & où ceux qui auoient merité quelque chose de la Republique estoient nourris. Cét ordre prenoit ordinairement garde aux Edicts, aux Décrets, & aux Loix, & donnoient sentence des Loix prises au rebours, & au contraire du sens auquel elles deuoient estre entendue. Et veritablement le peuple se fut aisément peu reuolter sans cette pouruoyance: pource qu'il demande, & approuue bien souuent des choses qui luy sont dommageables, si la prudence, & le conseil des autres n'y remédie. Ceux-cy auoient le soing du temps de la guerre, de la paix, des trefues, des Ambassades, & des Edicts.

On souloit escrire en ceste forme au dessous de ces ordonnances: Policle Prince, le seiziesme de Iuliet, les Iuges de la Republique estant de la Tribu de Pandion, Demosthene Peathonien fit le decret: Et celui qui estoit la nommé estoit Arcon, de l'office duquel nous parlerons en son lieu, & la Tribu nommée estoit de ces cinquante hommes qui estans tirez des cinq cens gouvernoient la Republique.

Pource que le nombre des causes ciuiles croissoit tous les iours, & les cinquante n'estoient suffisans pour les entendre, ils prenoient pour leur ayder quarante quatre arbitres, en partie par sort, & en partie par election. Il falloit qu'ils passassent soixante ans, & qu'ils fussent estimez gens de bonne vie. Ils estoient tousiours en des lieux, où ceux qui plaidoient en pouuoient trouuer à tout moment vne bonne partie, & ceux cy se gouvernoient en ceste sorte. Le demandeur, & le deffendeur esleuoient de ce nombre ceux que bon leur sembloit, avec pache, que s'ils commençoient de contester deuant eux, il falloit acheuer: autrement celui qui n'obeyssoit à leur sentence estoit puny. Ceux qui estoient esleus par sort n'estoient point receus pour examiner la cause, mais pour rapporter au Senat. afin qu'il en iugeast. Les Grecs, au lieu des balottes d'or & d'argent, vsoient de febues blanches, & noires.

Le Zitieres, c'est à dire enquesteurs, différoient fort peu des Dietetes, l'office desquels selon Pollux, estoit de rechercher les causes dont la nature n'estoit euidente, pour en rapporter la verité au Senat. Quant aux arbitres esleus, si quelqu'un d'eux commettoit quelque chose indigne de ce rang, où il estoit griesuement puny, ou bien chassé avec grande infamie de la compagnie des autres.

On traitoit tous les iugemens des choses saintes deuant eux, comme deuant des saints hommes. Pollux escrit aussi qu'ils ne pouuoient ouyr aucune cause qui passa la valeur de dix drachmes.

Ils auoient aussi des Capitaines des galeres nommez Trierarques, dont les Autheurs n'escriuent pas le nombre, pource que selon que la necessité le requeroit, on en augmentoit ou diminuoit le nombre. On sçait seulement qu'il y en auoit douze qui auoient ceste charge, & qui au temps de la paix auoient le gouvernement du lieu où les nefs estoient arrestees. Au temps de la guerre ils obeyssioient aux Capitaines & aux Generaux. Les Trierarques auoient aussi la charge de refaire & gouverner les galeres à leurs despens pour la Republique.

Ce Magistrat n'estoit pas contraint, ains on donnoit ceste charge au nombre des citoyens. C'est office deffaiect peu à peu, fust mis en meilleur estat par Demosthene, qui fit vne Loy touchant ceux qui seroient esleuz pour telle charge, comme on voit en beaucoup de lieux, & particulierement en l'Oraison contre Elcine. Voyez-vous, dit-il, Atheniens, combien de commoditez ie vous ay apportees gouvernant la Republique Car voyant le defect des choses qui appartiennent à la mer, & les Citoyens exempts de tributs, ayant payé peu d'argent, & que ceux qui auoient moyennement du bien reçoient la charge, & que par ce moyen vostre Republique s'empiroit, ie fis vne loy, par laquelle les Citoyens estoient contraincts de payer selon la taxe, ce qui se deuoit de droit, & i'ay defendu les pauvres du tort qu'ils receuoient de telle chose. Vn peu plus bas il le dit plus clairement.

Par la premiere constitution des Loix, ils souloient payer ensemble les frais d'une galere, en quoy les riches ne mettoient que fort peu, tandis que les pauvres citoyens estoient accablez de charges: Mais il fut ordonné par ma Loy qu'on feroit l'estime des moyens d'un chacun, & que celui qui fournissoit auparauant la dixiesme partie des frais d'une galere, pourroit satisfaire

satisfaire à deux en tout. A raison dequoy ils ne vouloient premierement estre nommez Triarques, mais Contributeurs.

On trouue dans Pollux, qu'il y auoit onze hommes appelez Nomophylaces, & Eparques, c'est à dire, Presidents. Les dix hommes, dit-il, estoient esleus de chaque Tribu, & le Chancelier parfaisoit le nombre. L'Office de ceux-cy estoit de conuaincre les larrons, & iuger ceux qui estoient retenus en prison, & les punir de mesme que les autres malfaiçteurs qui nians le faict deuant eux estoient enuoyez deuant autres Iuges, & s'ils confessoient le crime deuant ces derniers, les premiers leur imposoient la peine. Ces vnze hommes estoient semblables à ceux qu'on nomme en France Preuost des Mareschaux. Le lieu où ces vnze iugeoient se nommoit Nomophylachion, & ce lieu auoit vne porte nommee Xaronion, par laquelle on souloit mener les criminels aux supplices. Suide remarque que ces Nomophylaces estoient differens des premiers, pource que ceux-là forçoient les Iuges à viure selon les loix, & ceux-cy contraignoient tout le menu peuple.

Quant aux dix hommes qui presidoient, combien qu'ils deuoient estre mis avec les cinq cens hommes, d'entre lesquels ils estoient esleus, toutesfois pource que j'ay suiuy le plus grand nombre aux Magistrats, & que ceux-cy estoient remarquables, j'en ay voulu faire mention particuliere.

On tiroit doncques cinquante hommes des cinq cens qui estoient en dix tribus, & des cinquante on tiroit dix hommes qui gouernoient la Republique. Mais quelqu'un me pourra demander, en quelle sorte on peut eslire celuy que la vertu rend illustre & louable. A quoy ie responds, que cela se fait aisément, ainsi qu'on void entre les Venitiens, qui ordonnent premierement les esleçteurs par sort, qui appellent, & finalement les noms des appelez estant mis dans le vase, ontire les sorts selon les voix. J'ay desia dit qu'apres qu'on en auoit choisi cinquante de ceste troupe, on en eslisoit de ce nombre dix par sort, avec des voix muettes, c'est à sçauoir avec la pluralité des sebues. On voit donc que cecy estoit meslé avec le sort, & toutesfois ce n'estoit pas oster la recompence à la vertu, ains iuger selon elle. De ces dix qu'on choissoit, il n'y en auoit que dix qui peussent obtenir l'office de President. Ainsi le sort tomboit en telle sorte entre ces dix homes, que les trois qui restoient ne se renoient nullement offencez pour telle chose. Et pource que celuy qui estoit en Magistrat estoit nommé President, tous auoient part à l'honneur de ce nom, & l'on regardoit soigneusement qu'aucun ne fut deux fois dās vne mesme annee en ceste charge, durāt laquelle il auoit tousiours riçre luy les clefs du chasteau du Tresor public, & le seau de la Republique: & toutes les fois que les Pritanes appelloiēt le Senat, il eslisoit dans les neuf tribus neuf Presidēts, mais de celle qui estoit nommee Pritanense, de laquelle il estoit chef, on ne souloit point en prendre vn autre. Apres cela il eslisoit par sort de ces neuf vn successeur, auquel on peust cōmettre le gouuernement de la Republique.

En son Audience, il auoit le soin de faire qu'on ne laissast en arriere aucune chose de celles qui pouuoient instruire & esclaircir le Iuge.

Harpocraton dit cecy des Epithetes, parlant de la sentence d'Isce contre Elpagore: Il y a, dit-il, deux Epitheres en Athenes, l'un esleu par sort par les Pritanes, & l'autre par les Proedres, l'office desquels est declaré par Aristote.

Hiperide remarque qu'on nomme communément Epithete tout homme qui a l'intendance de quelque affaire. Le Proedre estoit comme le chef de la Police. Leur dignité estoit fort grande, comme on void en ces propos de Demosthene.

L'vnziēme iour du premier mois, apres que le Crieur public l'aura fait sçauoir, qu'on aille donner les voix, pour approuuer les loix: premierement celles qui appartiennent au Senat: puis celles qui concernent le peuple, & en troisiēme lieu, celles qui sont introduites par les neuf hommes.

Que la premiere partie de ceux qui doiuent donner les voix, soit de ceux auxquels il semble que ces loix qui sont pour le conseil, & pour le Senat, doiuent estre approuuees: La seconde ceux auxquels il semble à propos de contredire.

Ce second balotement des loix sera prescrit: & s'il arriue qu'il faille abroger quelques loix qui ont esté auparauant introduites, les Pritanes qui sont alors en charge, seront le dernier iour des balotemens avec le Senat pource fait & les Proedres iugeront aussi de la mesme chose. Apres qu'on commande de quel lieu on doit tirer l'argent pour donner aux Nomothetes, afin qu'ils puissent gouuerner la Republique. Que ces Nomothetes soient de l'ordre de ceux qui iurent en Eliee. Apres l'Eliee, si les Pritanes n'ont le Senat selon les loix preicrites, & si les Proedres ne se gouuernent equitablement, que chacun des Pritanes soit condamné à mille drachmes, qui soient consacrees aux Thresors de Pallas, & chacun des Poedres en donne quatre cens à la mesme Deesse, & qu'on donne leur accusation à l'office des Teimothetes. Qu'on voye si estant en Magistrat, ils doi-

uent quelque chose au public, que les Tesmothetes les mettent en prison s'ils les conuainquent, & s'ils refusent de ce faire, qu'ils soient soumis à la note d'infamie, chassés de la compagnie de l'Areopage, comme mesprisans le gouvernement des loix. Avant que le Senat s'assemble pour donner les voix, celui qui voudra proposer quelque loy, l'écrira au lieu des Eponimes, afin que selon leur nombre le peuple peust auoir des Nomothetes le temps de les pouoir premierement examiner. Et quiconque demandera qu'une nouvelle loy soit introduite, la mettra non seulement une fois, mais tous les iours au lieu des Eponimes, iusques à ce que le Senat s'assemble. Que l'Eponime eusse de tout le nombre des Atheniens cinq hommes, qui auront la charge de defendre les loix.

C'est assez parlé des loix, il faut mettre maintenant la forme du serment, tirée du mesme auteur: il se faisoit donc en ceste sorte.

Les Tyrans, ny les principaux ne seront iamais assistez par ma faueur, ny par mon secours en la Republique, & ie ne seray iamais du costé de celui qui aura corrompu le peuple Athenien, ou qui ordonnera, ou voudra le contraire. Je ne permettray iamais qu'on face les nouvelles tables, & le partage des debtes actiues des autres, ny celle des champs Attiques, & des maisons. Je ne rappelleray nul banny. J'endureray qu'on chasse de la ville celui qui ne iurera point ces loix, ny les ordonnances du Senat & du peuple Athenien, & ie ne permettray qu'on face tort à aucun. Je n'establi ray aucun Magistrat, afin que celui qui n'a rendu compte du Magistrat passé, en puisse auoir un autre, ou des hommes, ou de ceux qui sont esleus par les Poedres avec les febues: & ie ne permettray qu'aucun exerce deux fois un Magistrat en une mesme annee, ny deux Magistrats aussi dans le mesme temps. Je ne receuray aucune recompence. Apres auoir ouy l'accusateur, & le defendeur, ie le condamneray avec le deuoir sans affection, & sans exception de personnes, lors que ie cognoistray qu'il le merite. Je iure par Iupiter, par Neptune, & par Ceres qu'ils me ruinent avec ma famille, & mes enfans, si ie n'observe les choses susdites. Voila les paroles de Demosthene.

Or ayant parlé suffisamment des dix hommes, & de leur office, il est temps de discourir des assembles pour les voix, ou suffrages.

Ilaque, & Iliase estoit le plus grand Tribunal, auquel les iugemens publics se traittoient par mille ou quinze cens Citoyens des plus signalez de la ville. Il y en auoit cinq cens en un lieu, mille en deux iugemens, quinze cens en trois. Iliastai estoit mesme chose, que rendre le droit en ce lieu; & l'Iliase estoit s'assembler aux iugemens. Lyfias vsa de ces deux mots en mesme signification.

Les balottes dont ils vsoient pour donner leurs voix estoient de deux sortes, l'une estoit entiere, & l'autre percee, & vuide, & avec celle-là ils venoient à absoudre, & à condamner, à affermer, & à contredire. Ils auoient un vase, par lequel ils mettoient le suffrage en deux urnes, dont l'une estoit de bois, & l'autre de bronze. L'interprete de l'Oraison de Demosthene pour Timocrate est fort different, pource qu'il dit qu'au lieu de pierres ils vsoient des febues noires & blanches, afin qu'on les peust distinguer, au mesme qu'une des pierres estoit pleine, & l'autre creuse: au lieu que Chiamestai signifie eslire un Magistrat avec les febues. Surquoy on dit que Pythagore vouloit qu'on s'abstint des febues, non pource qu'elles sont venteuses, mais pour signifier que celui qui vouloit viure paisiblement & sans ambition, & n'estre point sujet aux coups de la fortune, ne deuoit s'empescher d'aucun Magistrat, ny desirer les dignitez qui se donnoient par le moyen des febues.

Il y en auoit dix Apodestes, c'est à sçauoir un pour chaque Tribu. Ceux-cy estoient semblables à ceux qu'on nomme auourd'huy communément Collecteurs des tailles. La charge de ces Apodestes estoit telle: Apres qu'il auoit receu les lettres de la Republique (comme les Esleus ont accoustumé de faire en France, quand il faut exiger quelque somme de ceux de la Province pour quelque importante affaire du Roy) ils contraignoient ceux qui deuoient à la Republique de payer selon leurs moyens. L'Antigreffier, ou Controlleur assistoit à la reception des deniers, & lors qu'ils estoient receus, il escriuoit la part de chacun: & les distributions des autres comptes estoient remises aux Logistes.

Si apres le compte fait il restoit quelque chose à payer, ils le payoient selon leur puissance. Mais s'il naissoit, comme il arriue bien souuent quelque chose pour laquelle il fallust plaider, on contestoit deuant les neuf hommes, & ils promettoient de payer ce qui seroit iugé en donnant caution.

Les Apodestes differoient sans plus de ceux-cy, en ce qu'ils pouuoient seulement recevoir, mais non pas contraindre. Apres ceux-là, on establissoit les Thresoriers, les Capitaines des guerres, ceux qui auoient la charge de la chasse, puis les Receueurs des presens, & ceux qui auoient soin des autres ceuures necessaires.

Il y auoit apres les Logistes, ou Maistres des comptes, au nombre de dix, tirez des Tribus. Or tous ceux qui estoient sur la fin de leur Magistrat, dans les trente iours qui precedoient leur

terme

terme, estoient obligez de leur rendre compte de tout ce qu'ils auoient manié. Aristote escrit que ceux-cy different des Eutines, qui oyoient vne autre sorte de compte.

Les Eutines estoient assis avec les neufs Princes, & voyoient tout ce qu'on auoit pris au public, lors que quelqu'un estoit à la fin de son Magistrat.

Il y auoit deux Logistes, dit Pollux, en Athenes, les vns qui manioient les affaires du Senat, & les autres ce qui estoit necessaire hors du Senat. Tous ceux-cy estoient esleus par le Senat, afin qu'ils peussent voir les comptes de tout le manient de la Republique.

On peut tirer de l'Oraison d'Eschine contre Demosthene, & Ctesifon l'office de ces Logistes. Premièrement la loy commande, dit-il, que le Senat des Areopagites soit escrit chez les Logistes, & ne soit exempt de leur rendre compte, & là elle veut que les Logistes soient maistres de ce venerable Senat, & apres que les cinq cens hommes rendent compte de leur Magistrat. Car la Republique se deffie tellement de ceux qui n'ont rendu compte des choses qu'ils ont maniees, qu'elle veut soudain que telles gens ne puissent aller hors de la ville, qu'ils n'ayent nulle puissance sur leurs biens, & ne puissent consacrer aucune chose aux Dieux, ny astringer leurs esclaves, ains que tous leurs biens soient engagez à la Republique: quelqu'un dira qu'il n'est pas raisonnable que celuy qui n'a rien despensé ny exigé pour la Republique rende compte: Mais il n'y a aucun qui doive estre exempt de rendre le compte de la ville. Il adioute vn peu apres: Il falloit, ô Demosthene, laisser dire au Crieur public, selon la coustume du pays, s'il y auoit quelqu'un qui voulut accuser. Voila ce que dit Eschine.

Veritablement si ceste loy auoit lieu parmy nous, on osteroit le larcin des Collecteurs, & de plusieurs autres, principalement si l'on receuoit vne fois les plaintes de ceux qui les pourroient accuser & conuaincre.

Il y auoit des Controlleurs, ou Antigrahes, qui escriuoient les comptes.

Eschine dit que l'on eslioit premierement l'Antigraphe par suffrages, & cestuy-cy deuoit en tous les aduenemens des Pritanes reciter au peuple le compte des reuenus.

Suide dit qu'il y eut vn Antigraphe au Senat, & l'autre en l'administration publique. Il y auoit encor selon le mesme auteur, trois secretares qui escriuoient les actes du Senat, & les gardoient.

Les Grecs veulent qu'il y en eut vn en chaque Tribu, ce qui est vray semblable, pource qu'il eust presque esté impossible, qu'un tel fardeau de la Republique, né de la sedition du peuple, fust soustenu seulement par trois Secretaires, puis qu'il y auoit tant de Iuges, & qu'ils estoient distribuez en tant d'ordres.

Eschine adioute, que les Secretaires gardoient dans leurs liures les noms de ceux qui n'auoient pas encore rendu compte à la Republique, de ce qu'ils auoient manié.

Les Atheniens apoint encor des Demarques, ou Tribuns du peuple, non toutesfois entierement tels comme nous cognoissons, en considerant leur charge.

Plusieurs escriuent qu'il y eut dix chefs des Tribus, Pollux dit qu'ils succederent au lieu des Nacraires, & qu'il y eut en chaque Tribu douze parties, dont la chacune se nommoit Nacraire, à laquelle vn Demarque commandoit. Les Nacraires estoient tenus de fournir à la Republique en temps de guerre deux chevaux, & vn nauire. Il y auoit donc six vingts Nacraires, autat de Demarques, & autat de nauires, & deux cens quarante chevaux en temps de guerre, sans ceux qui estoient entretenus du thresor public. Ils auoient premierement soing de ce qui appartenoit aux choses nauales: à raison dequoy ils estoient du tout fascheux aux pauvres, d'autant que chacun d'eux payoit à raison des champs, des maisons, & des marchandises qu'il possedoit, & de l'art ou mestier qu'il exerçoit: & s'ils ne payoient, on les pouuoit gager iusques à la valeur de la somme deuë.

Or afin que les Demarques peussent recouurer argent du peuple avec moins de foule, escriuoient aux Prouinces & aux champs Attiques, ce que chacun y auoit de sterile ou de bon rapport, & exigeoient selon les moyens, & les mestiers dont ils se mesloient.

Après que les Demarques auoient receu l'argent, leur second office estoit descrire tous les ieunes hommes, ausquels l'age permettoit de gouverner les successions & heritages, ce qui reuenoit au grand profit de la Republique, pource qu'il n'estoit permis aux mineurs, qui manquoient de l'experience des choses de manier leurs biens, tandis qu'on les voyoit en estat de dissiper toute chose. Dauantage, toutes & quantes fois qu'il naissoit quelque debat sur l'age de quelqu'un, on auoit recours au liure, auquel ils escriuoient tous ceux qui naissoient, & par ce moyen on venoit à s'esclaircir de ce doute.

Le troisieme profit que l'on en tiroit, c'estoit l'eslite des hommes propres à la guerre, chose qui estant imitée par les Turcs, les fait abonder en soldats qui se rendent bons au possible.

Il y auoit dix Ephtines, ou Creostes, pour recouurer les debtes, dresser, & voir les comptes. Ceux cy esleuz par les neuf principaux hommes, aux plus grandes necessitez

de leur patrie , augmentoient les gabelles , & les tailles , & exigeoient tout ce qui estoit deu. C'estoit à eux que l'on comptoit l'argent , lors que l'on auoit rendu compte aux Logistes. Ils oyoient les comptes des moindres Magistrats , & traittoient de ce qui auoit esté receu par le Magistrat , outre le salaire ordonné par la chambre publique. Ils oyoient outre cela les causes des Ambassades finies. Ils auoient ordinairement avec eux vn Secrétaire , ou Greffier , qui leur disoit le nom de chacun , afin qu'on le chargeast selon ses moyens. Et quand il arriuoit deuant eux quelque procez de choses du Fisc , ils mennoient les defendeurs deuant les plus grands Iuges , & pareillement ceux qui n'auoient dequoy payer , dequoy Ilocrate faict mention sur la fin de son Trapezitique. Ce Greffier tenoit compte du froment que chacun contribuoit , afin qu'il fut mis au grenier public. Ceux qui manioient ce grain , estoient nommez Sityometres , ceux qui le gardoient , Sytosylas , & le lieu où il estoit s'appelloit Barosylacie. Ceux qui auoient la charge de faire qu'il fut porté par toute la ville , se nommoient Sitones , ou Clefs des viures , surquoy ie diray que les Romains eurent vn soin si particulier de ce qui cōcernoit les viures , qu'ils voulurent aux despens du public conduire dans le Nil des riuieres , par lesquelles on peut mener grande quantité de froment en Alexandrie , & finalement à Rome , & ils eurent le soing d'en faire les canaux , avec des frais incroyables , avec vne loy , qui condamnoit à la mort ceux qui rompoient les leuees du Nil, qui estoient les bords des canaux. Mais retournons aux Sitons, qui n'estoient gueres differents des Secretaires, se nommoient Logomographes ou Escriuains des comptes , pource qu'on les mettoit au lieu des Epigraphies.

Pource que nous auons parlé des ieunes gens qui estoient escrits dans les Iournaux, nous en ferons maintenant plus ample mention. Auant qu'ils eussent pouuoir de gouverner les heritages , ils alloient durant deux ans par les pays circonuoisins , comme cherchans d'apprendre le mestier des armes , & lors depuis la dix-huictiesme annee de leur aage , iusques à la vingtiesme , ils estoient nommez Periopoles , c'est à dire , faiseurs de tours , ou allans à l'entour : & Ephebes , c'est à dire , ieunes , à cause de l'aage : & Ephodes , pour le voyage qu'ils faisoient. On les nommoit encores Episcopes , qui est le nom donné à nos Euesques , c'est à dire Enquesteurs , ou Visiteurs du pays, non qu'ils eussent ceste charge , mais pource qu'au besoing ils se trouuoient instruits des lieux , & des chemins du pays. Apres ces deux annees , comme pour recompence de leur trauail , ils acqueroient le nom de Lisarchotes , pource qu'on laissoit leur heritage. Et lors qu'on leur donnoit la puissance de le gouverner , & d'en disposer , ils faisoient ce serment : Iamais ie n'auray honte de porter les armes. Je n'abandonneray iamais le Capitaine sous lequel i'auray esté mis , ie combateray pour ma patrie , ou seul, ou avec plusieurs : i'iray contre quelque pays que ce soit auquel on m'enuoyera , ie consentiray à l'équité des iugemens eternels, Si quelqu'un n'obeyt à la loy , & la veut abolir , ie l'empeschерay de le faire , i'adoreray tousiours les Sages de ma patrie.

Au reste, il y auoit particulièrement six hommes qui estoient nommez Lisarques. Ceux-cy toutes les fois que les grands Conseils s'assembloient , auoient puissance d'élire trente Coadjuteurs , qui marquoient avec vn fil rouge tous ceux qui estoient paresseux à ouyr les loix , & venir au Senat, & faisoient si bien qu'ils estoient punis.

Le Tribunal des Eliees estoit remply de Themothetes , & le Roy y commandoit. Il estoit cinquante pieds loing du lieu des Iuges , afin que les Officiers qui estoient presens prissent garde qu'aucun ne passast auant qu'il eust presté serment.

Il y auoit neuf hommes principaux , qui ne pouuoient estre esleus pour cét office, qu'apres auoir iuré qu'ils estoient nez de pere & de mere Atheniens, & que leurs predecesseurs estoient de la ville d'Athenes. On leur demandoit apres s'ils estoient Indigenes , & originaires de ce lieu, ou s'ils auoient tiré leur origine de quelque autre peuple, puis si Iupiter tutelaire estoit leur Dieu, & Apollon leur autheur. On s'enqueroit d'eux touchant leur vie passée , s'ils auoient vsé de bien-faits à l'endroit de leurs parens, s'ils auoient pris les armes pour leur patrie , & pour les autels & s'ils auoient mérité les honneurs qu'ils auoient obtenu , & s'il se trouuoit que tout cela fut, ils estoient receus, & non autrement.

Les Arcopagites leurs demandoient toutes ces choses. Ce premier serment fait, ils adioustoient : Qu'ils obeyissent aux loix à perpetuité, qu'ils ne demandassent iamais la statue d'or pour quelque grand bien qu'ils eussent faict à la Republique : qu'ils ne cherchassent pas le gain aux iugemens. Ainsi qu'ils auoient promis tout cecy, ils estoient menez & conduits par le Senat en l'Acropoli, forteresse des Atheniens, où ils refaisoient les mesmes promesses.

Quand ils estoient dans le fort, combien que fussent appelez Arcontes , toutesfois il y en auoit six qui souloient auoir le nom de Themothetes & quand aux autres, l'un se nommoit Eponime, l'autre Roy, & le troisieme Polemarque, ou maistre de la guerre.

L'Eponime gouvernoit les Bacchanales , & les festes d'Apollon & de Diane. Ils oyoient les débats entre le mary & la femme, & ceux aussi qui estoient entre les parents. Il condamnoit à quelque peine ceux qui offensoient les autres , où leur faisoient tort par arrogance. Ils auoient soin des orphelins, ausquels ils souloient donner des tuteurs hommes de bien, qui souloient rendre droit entre les legitimes , & les heritez instituez. Ceux-cy se nommoient en Grec *Chiron Epitropi*, c'est à dire Protecteur des veufues, ou bien *Orfanon Epitropi*, Tuteurs des orphelins. Ils conseruoient les veufues qui estoient demeurees enceintes apres la mort de leurs maris. Ils auoient soin des Posthumes , & de faire que les veufues fussent exemptes de toutes charges.

Quant au Roy , sa premiere charge estoit qu'il auoit soing de faire faire les sacrifices à Bacchus , & à Cerés , selon la coustume , avec ceux qui auoient charge des ieux. Les Atheniens auoient en tous leurs ieux des Coadjuteurs , qui non seulement preloient aux ieux, & aux festes qui se faisoient, mais encore despençoient du leur , selon les moyens qu'ils auoient , seulement pour auoir le nom des chefs de toutes ces solemnitez & magnificences : & ceux-cy mesmes propoient les recompences, en partie du leur , & en partie du public. Ce Roy cognoissoit apres les sacrifices , des dissensions qui naissoient entre les Genetes , qui estoient ceux qui participoient à mesme famille & generation , pour ce que le peuple d'Athenes estant diuisee en certaines parties, elles estoient nommees Fyles : c'est à dire, Tributs qui estans encor particulieremēt diuisees en trois parties, croyent les Triptes, qui estoient aussi nōmez Frairies, dont la chacune diuisee en trente parties , à cause des serments , engendroit la nonantieme partie des Atheniens, les peres desquels on souloit appeller Genetes, entre lesquels on rendoit raison de l'administration des choses sacrees: Harpocracion rapporte aussi qu'Ille parlant pour l'heritage d'Appollodore en son Oraison, appelle Genetes ceux là mesme, dont ie fay mention.

Outre ce, ils introduisoient les causes criminelles , ausquelles il s'agissoit de la vie deuant les Arcopagites, & estoient les premiers à donner sentence selon le crime.

Dauantage, ils souloient cognoistre des debats des choses inanimees , comme de l'endommagement du chemin public, & de la ruine des maisons, & choses semblables.

Le troisieme Prince estoit le Polemarque , qui presidoit aux choses sacrees de Diane , & de Mars Enialien , pour ce qu'ils croyoient que ces deux auoient intendance sur les guerres : Il auoit encores le soin des combats , qui se faisoient en estocade , & pour la partie. Ce fut iadis vne belle coustume en Athenes, que tous ceux qui estoient morts combatans pour leur patrie, estans au liure lournal, estoient souuent ramentus avecques allegresses publiques : tellement qu'on recitoit leurs noms, & leurs beaux faits d'armes , avec mille louanges , & lors les ieunes hommes faisoient vn combat , que l'on nommoit Epitaphique , ou de la sepulture , auquel ils s'animoient à preferer le bien de leur Republique à leur vie.

Outre cecy, le Polemarque auoit soing des vers, & des chansons , que l'on donnoit aux ieunes hommes, afin qu'ils les chantassent aux ieux publics. Dauantage, il presentoit aux Arcopagites ceux qui auoient abandonné leur rang en la guerre , & qui auoient fuy au milieu des dangers , & requeroit que l'on les condamnast, & pour conclusion il se mesloit de la conduite des choses militaires.

Plusieurs ont escrit qu'il gardoit la nuit les clefs des portes de la ville , & auoit soin desdites portes , comme les Maires , & Escheuins en France. Et pour ce que ce Polemarque auoit l'intendance des choses de la guerre, ie desire parler maintenant des Capitaines.

Le Polemarque estoit suiuy de deux Hipparques, ou Colonels de la caualerie , ausquels , selon Aristote, non seulement les gens de cheual obeissent, mais mesmes toute l'armee, & ceux-cy chastioient les meschans , & ceux qui se mocquoient de leurs commandemens.

Ils auoient aussi le soin de faire que nul ne quittat son rang , ou le Capitaine , qu'il auoit esleu vne fois, sans cause legitime, & sans leur congé, sous peine de la vie , que nul ne fit outrage au peuple , & semblables choses que l'on deffend coustumierement aux soldats. Ceux-cy mettoient en ordre les Centeniers , les Dixeniers , & les moindres soldats. Il y auoit apres en Athenes dix Philarques, ou Capitaines des Tributs.

Les Tesmothetes souloient eslire les Colonels de la caualerie, & d'ailleurs leur office estoit de faire que les Iuges gardassent les choses escrites , & iugeassent selon les loix. Ils pouuoient faire assembler le Senat à leur volonté: Ils auoient le soin d'annoncer au peuple ce que le Senat auoit resolu. Ils donnoient de la peine aux Magistrats qui publioient des loix , ausquelles tous n'auoient pas consenty: & c'estoit aussi leur charge d'ordonner des peines aux faux tesmoins, & de condamner ceux qui accusoient fausement , & de donner places aux Iuges selon leur rang.

Aux Conseils du Tribunal , auquel le Roy dont nous auons parlé cy-deuant, les Conseillers, & amis du Roy estoient assis , & lors qu'ils estoient apres à iuger vn procez criminel , s'ils

ne pouuoient trouver l'auteur de quelque dommage, ils rompoient le procez, & le iettoient dans l'eau, pour remarque de peine.

Aux iugemens plus solempnels on voyoit assister six Paredres, qui deuoient tous estre hommes de fort bonne vie, & sans reproche, & pour ceste cause auant qu'ils peussent s'asseoir pres des autres, il falloit qu'ils rendissent compte de leurs actions passees, deuant les cinq cents Pritanes la premiere fois, la seconde deuant les Areopagites, & lors on oyoit tous ceux qui les vouloient accuser de quelque faute.

La cause de ceste seuerenqueste estoit, qu'on leur remettoit entre les mains des choses pleines de danger, & de grande importance, & auxquelles il estoit besoin d'une grande integrité. Ils prenoient garde aux Secretaires, & à ceux qui escriuoient ce que le Iuge dictoit, afin qu'ils ne changeassent aucune chose.

Ils auoient encores des Capitaines des colonies, qui remarquoient & enuoyoient ceux qui estoient esleus pour peupler des lieux, ou de l'ancienne possession des Atheniens, ou nouuellement acquis par eux, & ceux-cy partageoient les terres du pais, ou de la ville, selon le sort qui escheoit à chacun.

Il y auoit encores dix hommes, nommé Tamies, qui estoient gardiens du thresor public, & qui en presence des Senateurs ostoient du tresor ce qui estoit necessaire pour l'usage du public, & principalement pour conseruer en bon estat les nauires, & choses appartenantes à la mer, dont l'on a veu souuent despendre la conseruation, non seulement d'Athenes, mais encores de toute la Grece.

Mais ils auoient particulierement soin de deux vaisseaux de merueilleuse grandeur, l'un desquels estoit nommé Paralie, & l'autre Ammon : combien qu'il y a des auteurs qui adioustent au Paralie, Salaminie.

Outre ce que dessus, lors qu'ils venoient au deuant du Senat aux publiques supplications, ils souloient porter l'image d'or de Pallas, les enseignes de la victoire donnee iadis par leurs Capitaines, & les autres ornemens des choses sacrees. Cecy est dit suivant l'opinion d'Harpocraton.

Les Tamies m'ont remis en memoire des Ellinotamies, l'office desquels estoit de conseruer, & manier les deniers qu'on tiroit de la partie de la Grece, qui estoit sous la domination des Atheniens, afin que ceux-là se portassent de mesme aux choses sacrees, que ceux-cy aux Tributs : Pollux dit encor qu'ils auoient accoustumé d'exiger, & d'amasser l'argent des Isles. Les auteurs Grecs rendent la raison de ce nom en telle sorte. Apres que le Roy des Perles eust esté vaincu par les Atheniens par mer, ces victorieux diligens à conseruer leur autorité, commanderent que tous les autres leur fissent tribut pour payer les frais de la guerre nauale, par le moyen de laquelle le commun ennemy des Grecs auoit esté chassé, pour ce que la plus grande partie de la despence auoit esté premierement faite par eux : & pour ceste cause ils nommerent ceux qui reconouroient cet argent, Ellinotamines, c'est à dire Gardiens de la Grece.

Il faut ioindre à ceux-cy les Hellanodiens, qui auoient charge des choses sacrees de tout le pais sujet aux Atheniens, de mesme que les autres de garder le thresor public. Ils receuoient doncques les deniers que l'on donnoit pour les choses sacrees, & les remettoient apres aux Chorages pour la despence des sacrifices : ce qu'ils auoient accoustumé de faire aux sacrifices, & ieux de la ville, exigeant des Citoyens & des habitans d'Athenes.

Les Ginaiconomes deliberoient des ornemens des Damoiselles, puis de toutes les autres femmes, afin qu'il n'y en eust aucune qui portast chose indigne de son rang, & que chacune s'habillast selon les moyens. Ceux-cy ordonnoient vne amende pecuniaire contre celles qui en vsoient autrement, & leur sentence estoit aussi executée.

Il y auoit encore vne loy du marcher, proposée par vn certain fils de Philippe. Elle portoit, que si quelqu'un estoit peu honneste en son alleure, elle deuoit estre condamnée à mille dracmes d'amende. Pollux escrit que ceux-cy estoient au nombre de vingt.

C'estoit aussi la coustume de ces Ginaiconomes, de prendre garde aux festins, & aux conuiez, & à leur nombre. Je tiens cecy d'Athenes, qui dit que ces Ginaiconomes, avecques les Areopagites, prenoient garde aux compagnies des hommes en chaque maison, tant aux nopces qu'aux sacrifices, pour ce que l'on y touloit manger excessiuement, & puis s'enyurer : Mais cet Auteur ne s'accorde pas avecques Platon touchant le nombre des conuiez : veu qu'il ne veut pas qu'il y ait aux nopces plus de dix personnes, c'est à sçauoir cinq hommes, & autant de femmes : mais cestuy-là escrit vne chose aduenüe, & cestuy-cy vne imaginee, ainsi que toute sa Republique.

Ceux que les autres Auteurs ont nommez Oinottes, c'est à dire, qui prennent garde au vin, sont nommez par Platon en sa Republique, Minamones, à cause (comme ie croy) qu'ils ramenteuoient les loix : pour ce que de mesme que les Ginaiconomes empeschoient que les femmes

femmes passassent certaines bornes en leurs habits & ornements, & prenoient garde au nombre des conuiez, & à la façon des viandes : aussi ceux-cy imposoient des loix touchant l'usage du vin, afin que si quelqu'un estoit condamné pour auoir trop beu, il apprist à ses despens de ne boire pas tant à l'aduenir.

Mais ces Olinottes n'estoient pas gens de grande consideration : il y en auoit trois, qui furent aussi nommez Ostralmes, pour ce qu'avecques leurs aduertissemens ils rendoient les yeux de l'entendement à ceux, qui pour auoir trop beu, les auoient perdus, ou esgarez. Les Symposiarques ne differoient de ceux-cy que pour le regard du nom.

Il y eust aussi dix hommes qui auoient soin du Palais, & mettoient le prix aux choses, afin que l'on achetast, non pas à la volonté des vendeurs, mais selon le iuste prix, & à celle fin aussi que l'on n'achetast quelque chose, qui ne vallust rien, au lieu de la bonne marchandise. Ils prenoient aussi garde à ce qu'aucun Citoyen ne gardast plus de bled & de vin, qu'il ne luy en falloit pour son entretien, & celuy de sa famille : & ceux-cy mesmes faisoient que tout le froment qui venoit dans la ville, au dessus de ce qui estoit necessaire, estoit mis en des lieux publics, au nom de la Republique : & c'estoit pour ce qu'ils le vendoient à iuste prix, combien que la disette des viures fust fort grande.

Les Episcopes, ou Euesques, estoient ceux qui auoient soin des affaires des Prouinces. Ceux-cy estans ordonnez comme arbitres par toutes les Prouinces, recherchoient ce qui concernoit les procez, les offenses publiques, & sa Iurisdiction. Si quelqu'un auoit voulu contester deuant eux ils donnoient sentence, à laquelle il falloit obeir, comme si elle eust esté donnee par le principal Magistrat.

Les Iuriscultes disent, que les Euesques sont establis sur toutes les choses qui sont exposees en vente. Et c'est de la diligence dont vsoient à prendre garde à toute chose, que les Chrestiens ont donné le nom d'Euesque à chaque Chef de Diocese.

GOVERNEMENT ANCIEN DES LACEDEMONIENS.

LA ville de Sparte, autrement de Lacedemone, fut illustre par des beaux faicts de plusieurs grands Capitaines, au temps que la Grece florissoit, & ce d'autant plus que Lycurgue l'ayant reglee avecque ses loix, fut cause quelle demeura long temps en vigueur. Mais depuis qu'elle commença de les mespriser, elle vid incontinent sa decadence, & sa rui- 44
e. Or pour ce que j'ay trouué l'establissement de ce Legislateur du tout remarquable, ou pour mieux dire merueilleux : j'ay pensé que ie deuois à mon Lecteur le discours, de la façon avec laquelle ceste Republique s'est gouvernee.

Lycurgue ne suiuit pas en cecy l'opinion des autres : mais estant plustost de contraire aduis à plusieurs, fit en telle sorte, que sa patrie surmonta en bon heur toutes les autres. Car quant à la multiplication des enfans, il y en a quelques-vns qui nourrissent avec peu de viandes, mais delicates tout ce qui se peut, les filles qui leur semblent propres à engendrer. Ils leur deffendent entierement le vin, ou bien le leur font boire fort trempé. Mais peut-on esperer de veoir iamais naistre quelque chose de grand de ces femmes eleuees en ceste sorte : Mais Lycurgue iugea qu'il suffisoit que les femmes esclaves fissent les habillemens. Ayant donc veu que c'estoit chose fort importante d'auoir des enfans des femmes de libre condition, il ordonna principalement que les femmes exerceroient leurs corps de mesme que les hommes. Apres il institua tant entre les hommes qu'entre les femmes, les courses, & les combats, pour ce qu'il iugea que les enfans qui naistroient de telles personnes, seroient fort robustes.

Mais alors que l'homme & la femme estoient mariez ensemble, il estoit enioinct au mary (comme j'ay remarqué en passant dans les mœurs des Grecs) d'aller voir & de quitter sa femme, en telle sorte qu'il ne fust veu de personne. Enquoy Lycurgue eust bonne raison, veu qu'il considera que l'on paruenoit par ce moyen avec plus de desir, & de douceur, aux plaisirs du mariage, & qu'ils les empeschoit aussi de tomber malades, combien qu'ils fussent robustes, serrant ainsi le bouton à la premiere ardeur, & ne se laschant que lors que l'un & l'autre n'estoit plus si affamé de ce plaisir.

Dauantage, il ordonna qu'il ne seroit pas permis à chacun de se marier à sa fantaisie, & que l'on ne feroit les nopces, sinon quand l'on seroit paruenue à vn aage meur, d'autant qu'il iugea que cela deuoit beaucoup aider à la fecondité, & à la force. Et s'il arriuoit que quelque vieillard eust rencontré vne ieune femme, à cause que c'est la coustume des gens de cet aage, de garder soigneusement leurs femmes, il estoit ordonné que le vieillard choisiroit vn homme, dont le courage, & le corps luy satisferoit plus, & que le menant en sa maison, il luy mettroit sa femme entre les mains, afin d'en auoir des enfans. Et au cas qu'il n'y eut personne qui voulut sa femme, & qu'il desiroit d'auoir des enfans libres, il fit pareillement vne loy, qui portoit, que s'il

en auoit veu vne seconde, avecques la permission de son mary, il pouuoit auoir des enfans d'elle.

Il y a beaucoup de choses semblables contenuës aux loix de Lycurgue : Car elles veulent que les hommes puisse tenir deux femmes chez eux, & que les maris puissent acquerir des freres aux enfans nez d'elles, qui ayent esgale part en la famille, mais non aux moyens. Par ceste institution d'engendrer des enfans, differente de celle des autres Grecs, chacun se peut assez imaginer de combien il rendoit les Lacedemoniens plus excellents en grandeur & en force que les autres Grecs.

Maintenant apres auoir discouru de la naissance des enfans, ie veux parler de la façon de les eleuer, tant parmy les Lacedemoniens, que les autres Grecs : car ceux qui demouroient au reste de la Grece, & particulièrement ceux qui desiroient de nourrir noblement leurs enfans, aussi tost qu'ils entendoient ce qu'on leur disoit : les mettoient entre les mains de leurs esclaves lettrez, & les enuoyoit encores incontinent apres à des maistres pour apprendre les lettres, la Musique, & les choses qui appartenoient à la lutte. Outre ce, ils amolissoient avecques les souliers les pieds des enfans, les paroient de diuers habits, & leur donnoient de la viande selon la capacité de leur ventre : Mais Lycurgue, au lieu de ces esclaves Pedans, auxquels chacun donnoit particulièrement ses enfans à gouverner, voulut qu'ils fussent sous la charge & conduite de l'un de ceux, du nombre desquels l'on esliuoit les plus grands Magistrats, & pource qu'il instruisoit les enfans, on le nommoit Paidonome. Il donna à cestui-cy l'autorité d'assembler les enfans, & de pouoir chastier ceux qu'il trouueroit faisant quelque chose, avecque finesse & meschanceté.

Il luy adiousta encores du nombre de ceux qui estoient desia creux, quelques-vns qui deuoient porter les verges, quand il en estoit besoin, & en frappant les enfans. Il aduint de là que les enfans estoient honteux de ces coups, & obeïssoient facilement à ce qui leur estoit commandé.

Au lieu de porter des bas, il ordonna qu'ils iroient pieds nuds, pour ce qu'il preuint qu'avec vn tel exercice ils pourroient plus aisément monter, & descendre, & estre plus vistes à la course sans souliers, & bas, s'ils auoient exercé leurs pieds que d'autre sorte. Et à cause de la diuersité des habits qui estoit auparauant introduite, il voulut qu'ils s'accoustumassent toute l'année vn seul accoustrement, iugeant que par ce moyen ils seroient plus capables de resister au chaud & au froid.

Dauantage, il voulut que l'on donnast à manger à l'homme en telle sorte, qu'il ne fut pas accablé de trop de viande, & qu'il s'accoustumast à souffrir les incommoditez, d'autant qu'il cogneust que ceux qui seroient faicts à ceste façon de viure, seroient beaucoup plus capables au besoin de supporter plus longuement le travail sans manger : & outre ce qu'ils auroient moins besoin de pitance, & mangeroient quelque viande qu'on leur presentast : & mesme il vid bien que pour conseruer la santé, & augmenter la beauté de la taille, il valloit mieux vser d'un aliment qui rendit le corps sec, & delié, que d'un qui le rendit gras, & plein de chair. Mais afin qu'ils ne fussent aussi trop pressez de faim, il ne voulut que ceux qui enduroient quelque nécessité, eussent avec fainctise les choses dont ils auoient besoin, ains il leur permit de les desrober, crainte de mourir de faim : ce qu'il fit, afin que celuy qui ne scauoit autre moyen d'en auoir, en acquist avec son industrie. Et veritablement c'est chose claire, qu'il faut que celuy qui veut desrober quelque chose veille la nuit, & n'espargne durant le iour ses artifices, s'il veut obtenir ce qu'il desire. C'est donc chose toute claire : que celuy qui veut rendre les enfans plus accorts touchant les choses necessaires à la vie, que courageux, il les doit instruire en ceste sorte.

Mais quelqu'un dira : pourquoy il vouloit que celuy qui seroit surprins en desrobant fut battu bien rudement, puis qu'il tenoit le larcin pour vne bonne chose : A quoy ie responds, que ce fust pour la mesme raison, pour laquelle aux autres choses que les hommes enseignent, punissent celuy qui ne les faict pas comme il faut, & que de mesme il vouloit que l'on chastiait ceux qui se laissoient surprendre, pour ce qu'ils manquent d'esprit & d'industrie à desrober.

Il vouloit encores que ceux qu'il auoit faict battre, desrobassent d'un lieu aspre, & mal-aisé grande quantité de fromages, voulant inferer par là, que celuy qui a eu du mal durant peu de temps, a accoustumé de se resiouir longuement lors qu'il rencontre quelques fortunes.

On void encores qu'en cecy, vn homme lent & delicat n'est nullement propre, lors qu'il est besoin d'vter de diligence, & qu'au contraire il tombe en plusieurs inconueniens.

S'il arriuoit que le Paidonome partist, afin que les enfans ne fussent alors sans maistre, il vouloit que le Citoyen qui se trouuoit present, eust autorité de commander aux enfans ce qui luy sembloit

sembloit bon à faire, & qu'il les punit s'ils faillioient en quelque chose : & par ce moyen il fit que les enfans se comportoient avec plus de retenue, & viuoient avec plus de honte : pour ce que les enfans, ny les hommes, n'ont accoustumé de craindre personne plus que leurs maistres. Et afin que quand quelque homme ne se trouuoit presens, il y eust quelqu'un qui prit garde aux enfans, il ordonna que celuy qui seroit plus retenu, & plus graue en toute chose que les autres, les gouuernast, & par ce moyen ils n'estoient iamais sans maistre.

Il est à ceste heure temps de parler de l'amour des filles, pour ce que cecy appartient encore à la discipline. Les autres Grecs, comme les Boëtiens accoustumoient ensemble les garçons, & les filles : mais il y en auoit quelques autres qui ne permettoient pas seulement que les Amans parlassent avec les filles. Lycurgue estoit de contraire opinion : veu que s'il y en auoit quelqu'un qui fut espris de l'amour de quelque fille, ayant recogneu la beauté de son esprit, il leur permit de demeurer ensemble, & iugea que c'estoit vne tres-honneste discipline. Que si l'on iugeoit que quelqu'un fut seulement amoureux du corps de sa fille, il ordonna qu'il s'abstint autant de ceste fille, que le pere s'abstient de son fils, & le frere du frere, en ce qui estoit des plaisirs de Venus.

Nous auons assez discouru de la discipline des enfans, & chacun pourra considerer bien aisément à part luy avec quelle discipline des Grecs, les enfans pouuoient deuenir plus obeissans, & plus honnestes, & finalement où c'estoit que les hommes se rendoient plus continens aux choses necessaires : Car depuis que les autres sortans de l'eschole de l'enfance estoient paruenus à la ieunesse, soudain quelques-uns n'auoient plus de maistres ny de gouuerneurs, ains viuoient en toute liberté.

Mais Lycurgue cognoissant que les ieunes hommes auoient naturellement le courage altier, avec vn desbordement estrange, & vne fort grande inclination à toutes sortes de plaisirs, il les soumit lors à de grands trauaux, & s'essaya de faire qu'ils fussent continuellement occupez. Et adioustant encore, que si quelqu'un refusoit de faire ce qu'il enioignoit, il ne paruiendroit iamais à aucune chose honorable : Il ordonna que non seulement les personnes publiques destinees à ce gouuernement : mais encore les parents prissent garde aux leurs, afin que demeurant sans aucune crainte dans la ville, ils ne deuinssent vagabonds, & insolents. D'auantage leur voulant donner vne honnesteté naturelle, il commanda qu'en marchant ils tinssent les mains sous le manteau, & ne discourussent nullement, ny regardassent autour d'eux : mais tinssent la veüe basse. Et veritablement on void en cecy, que le naturel des hommes est plus robuste en ce qui regarde la pudicité, que celuy des femmes. On ne pouuoit donc ouïr leurs voix, non plus que s'ils eussent esté de pierre, ny leur voir nullement tourner les yeux, non plus que s'ils eussent esté proprement de bronze.

Quand ils se trouuoient en quelque banquet, il leur suffisoit de respondre à ce qu'on leur demandoit. Il voulust aussi qu'on eust vn grand soin touchant l'institution des ieunes hommes, pour ce qu'il iugeoit, que s'ils deuenoient tels qu'il falloit, il en viendrait, sans doute, vn tres-grand bien à la Republique.

Voyant donc que tous ceux qui se souloient exercer naturellement à l'essay, les cœurs estoient escoutez avec grande attention, & les jeux de la lutte regardez avec grande allegresse : il iugea qu'il seroit à propos d'encourager les ieunes gens en ceste sorte au debat de la vertu, & qu'ils pourroient arriuer par ce moyen à vne grande perfection de bonté. Je vous monstrey donc en quelle sorte il les enflammoit à telle chose.

Les Ephores eslissoient trois hommes des plus florissans, nommez Hippegrites, à cause qu'ils assembloient la caualerie. Chacun de ceux cy choissoit cent hommes, declarant pour quel respect il preferoit les vns en honneur, & refutoit les autres.

Ceux qui se trouuoient deshonnez venoient au combat, & contre ceux par lesquels ils n'auoient pas esté commandez, & contre les autres qui leur auoient esté preferez, & l'un prenoit garde à l'autre, s'il voyoit qu'on fisse quelque chose qui ne fust honneste.

De là venoit qu'on voyoit vn debat fort utile à la Republique, où l'on monstroit ce qu'un homme de bien deuoit faire : & les deux partis s'essayoient autant qu'il leur estoit possible de se rendre pleins de vertu : si la Republique auoit besoin de quelque chose, ils la secouroient aussi tost à l'enuy l'un de l'autre.

Ils estoient encore contraincts d'auoir soin de leur santé, pour ce qu'ils se battoient à coups de poings toutes les fois qu'ils se rencontroient, & luttoient aussi ensemble, tant ils auoient enuie de se surmonter l'un l'autre en toutes choses.

Tandis qu'ils combattoient en ceste sorte, tout homme qui s'y trouuoit present, & qui auoit quelque autorité, les pouuoit separer, & s'il y en auoit quelqu'un qui ne voulut pas obeïr, le Paidonome les faisoit appeller en iugement deuant les Ephores qui le punissoient severement, comme ceux qui auoient ordonné qu'aucun ne se laissât surmonter à sa cholere, en telle sorte qu'il refusast d'obeïr aux loix.

Or quand ils estoient paruenus à vn aage plus meur, & à de grands Magistrats, quelques Grecs sans se soucier de la force du corps les chargeoient de l'entreprise de la guerre. Mais Lycurgue fit vne loy qui portoit, que c'estoit chose loüable aux hommes de cet aage d'aller à la chaille, si ce n'estoit entant qu'elle empeschast quelque office public, afin qu'ils supportassent aussi bien que les ieunes gens le travail de la guerre.

Or Lycurgue cognoissant bien que les Lacedemoniens, de mesme que les autres Grecs, faisoient des festins en leurs maisons, & considerant combien telles choses tendent au vice, il les attira à manger en public, estimant que par ce moyen ils ne pourroient passer au delà de ce qui leur seroit permis.

Les hommes oysifs ont accoustumé de faire mal à propos plusieurs choses, & les riches ressemblent aussi quelquesfois aux oysifs, d'où vient que tandis qu'ils estoient assis à table, elle n'estoit iamais ny vuide ny somptueuse, pour ce qu'ostant tous les breuuages superflus, qui nuisoient au corps & à l'esprit, il permit à chacun de boire quand il auroit soif, sçachant que c'estoit vne chose du tout saine & agreable de boire en ceste sorte: Car en s'assemblant ainsi, qui eust esté celuy qui eust peu ruiner, ou son bien, ou son corps à manger & à boire excessiuelement?

Aux autres villes, les hommes d'esgale condition ont accoustumé de se frequenter, d'où vient qu'ils n'ont aucune honte entr'eux: mais Lycurgue messa dans la ville de Sparte, la discipline & l'experience des vieux avec la gaillardise des ieunes. Et c'est chose qui touche la patrie, de permettre à chacun de dire ce qu'il aura fait honorablement dans la ville, à raison dequoy on ne voyoit là nulle vilainie, ny yurongnerie, ny aucune acte deshoneste, & pour conclusion on n'y oyoit aucune parole honteuse. Et il naissoit encore ce bien de manger publiquement ensemble, que quand ils retournoient au logis ils estoient contraincts de se pourmener, & de prendre soigneusement garde de n'estre point accablez de vin, comme ceux qui sçauoient fort bien qu'ils ne deuoient pas demeurer au lieu où ils auoient soupé, & qu'il leur estoit besoin de se seruir de la nuit de mesme que du iour, pour ce que celuy qui estoit encore sous le gouvernement de quelqu'un, ne pouuoit se faire esclairer la nuit.

Ce grand personnage considerant apres, que ceux qui se mettoient à travailler apres le repas auoient bonne couleur, & estoient sains & robustes, au lieu que les autres qui viuoient en oysiueté deuenoient mal sains, il pourueut semblablement à cecy: & pour ce il ordonna, que le plus aduancé en aage d'une troupe, prendroit garde que les autres ne mangeassent pas beaucoup. Aussi ie croy qu'on en trouueroit mal aisément quelques-vns qui surmontassent les Lacedemoniens en santé, & en force de corps, pour ce qu'ils estoient en perpetuel exercice de tous leurs membres.

Outre ce que dessus, au lieu qu'aux autres villes chacun est maistre de ses enfans, de ses esclaves, & de son argent: Lycurgue voulant faire que les Citoyens, sans s'offencer nullement entr'eux iouissent d'un bien reciproque, ordonna que chacun pourroit commander à ses enfans, & à ceux d'autrui des choses raisonnables. Et si quelque enfant battu par vn autre s'en plaignoit à son pere, il estoit blasmé s'il ne le battoit encore, tant on estimoit qu'ils ne commandoient aux enfans rien qui fut mauuais. Il ordonna encore mesme chose touchant les esclaves, tant propres, qu'appartenants à autrui, s'ils estoient contraincts se seruir d'eux en quelque chose.

Il voulut encore que les chiens de chasse fussent mis ensemble. Ils appelloient donc ceux qui estoient incommodez à la chasse, & s'il y en auoit quelqu'un qui s'y pleust moins, il enuoit volontiers ses chiens dehors. Ils se seruoient en mesme sorte de chevaux, veu qu'un qui ne pouuoit marcher, ou qui n'auoit point de charrette, où auoit besoin d'aller promptement en quelque lieu, prenoit librement le premier cheual qu'il trouuoit, & lors qu'il s'en estoit seruy, le rendoit gracieusement. Et tous les lieux où ceux qui s'estoient retirez de la chasse auoient besoin des choses necessaires à la vie, il ordonna que ceux qui auoient soupé laissassent les choses apprestees, & que ceux qui en auoient besoin les recogneussent, & apres auoir prins ce qui leur faisoit besoin, vinsent à remettre tout le reste. Ainsi les pauvres communiquant avec eux participoient aux choses qui se trouuoient en ce lieu, toutes les fois qu'elles leur estoient necessaires.

Aux autres villes chacun est attentif, selon ses forces, à assembler de l'argent, veu que l'un s'addonne à l'agriculture, l'autre à la marchandise, l'autre à la nauigation, & quelques autres vivent d'artifice. Mais Lycurgue deffendit aux hommes libres de toucher à aucune chose qui tendit à amasser de l'argent, & ordonna seulement qu'ils s'occuperoient aux choses qui apportent la liberté aux Citoyens: Car quel besoin estoit-il d'assembler des richesses en vn lieu, où les choses necessaires estoient esgalement partagees.

Aucc

Aux autres villes chacun est attentif, selon ses forces à assembler de l'argent, ven que l'un s'addonne à l'agriculture, l'autre à la marchandise, l'autre à la navigation, & quelques autres vivent d'artifice. Mais Lycurgue défendit aux hommes libres de toucher à aucune chose qui tendit à amasser de l'argent, & ordonna seulement qu'ils s'occuperoient aux choses qui apportent la liberté aux Citoyens : Car quel besoin estoit-il d'assembler des richesses en un lieu, où les choses nécessaires estoient esgalement partagees.

Avec ceste institution, il fit encore qu'on ne desiroit pas l'argent pour en prendre quelque plaisir. Mais qui est beaucoup plus : il ne falloit pas penser au gain pour s'habiller, puis qu'ils n'avoient pas d'accoustremens de parade. Il ne laissoit pas faire amas d'argent pour le despendre en compagnie, ven qu'il iugea que les hommes pouvoient mieux servir leurs amis avec les travaux du corps, qu'avec les despenfes, comme celuy qui voyoit que l'un portoit de l'industrie de l'esprit, l'autre des richesses. Toutesfois il ne voulut pas qu'en ces choses aucun se peust enrichir par le dommage de l'autre. Il ordonna aussi vne espece de monnoye de d-x mines, qui estant portee en vne maison ne pouvoit estre cachee aux maistres ny aux seruiteurs, pour ce qu'en voulant tenir beaucoup secret, il estoit besoin d'un grand lieu, & d'une charrette : Car on faisoit vne curieuse recherche de l'or & de l'argent, & si l'on en trouuoit en quelque lieu, le possesseur estoit puny. Pouuoit-on donc trouuer quelqu'un qui se voulut traualier à assembler de l'argent dans vne ville, où ceste acquisition apportoit plus de mal, qu'on ne receuoit de plaisir de son usage ?

On void par là, que les Lacedemoniens estoient fort obeissans aux Magistrats & aux loix : & ie croy que Lycurgue n'entreprit iamais de dresser si bien sa Republique, sans auoir auparavant accordé ensemble les Gentils-hommes qui se trouuoient à Sparte. Je fais ceste coniecture, pour ce qu'aux autres villes les plus puissans ne veulent qu'on estime qu'ils craignent les Magistrats : mais à Sparte les Princes mesme obeissoient principalement aux Magistrats, & tenoient à beaucoup de gloire de se monstrier humbles, & d'obeir, croyans que par ce moyen les autres suiueroient leur exemple, ce qui aduint veritablement.

Mais il est encores vray semblable qu'il ordonna la puissance des Ephores, cognoissant que l'obeissance estoit un fort grand bien, tant en la Republique qu'en la guerre, & durant la paix, pour ce qu'il estima, que tant plus le Magistrat auoit de grands hommes, tant plus les Citoyens craindroient de desobeir.

Les Ephores pouuoient donc punir ceux qu'ils vouloient, & pouuoient aussi auant le terme priuer de leur office ceux qui exerçoient quelque Magistrat, les mettre en prison, & mesme les mettre en iugement, & en danger de leur vie, s'ils estoient coupables. Mais ceux qui auoient si grande autorité, ne laissoient de dominer tousiours à leur volonté ceux qui estoient establis en quelque Magistrat, ains plustost, comme ceux qui preloient aux combats Gymniques, ils punissoient promptement ceux qui commettoient quelque chose contre les loix.

Mais ie trouue belle sur toutes les autres, l'invention que Lycurgue pratiqua pour rendre les Citoyens obeissans aux loix : Car il ne publia pas les loix au peuple qu'il n'eust auparavant esté avec les Princes à Delphes, pour demander à l'Oracle, si la Cité de Sparte seroit heureuse en obeissant aux loix qu'il luy auoit donnees. Et lors que l'Oracle eust respondu, que c'estoit chose vtile aux Lacedemoniens, il les publia, iugeant que ce seroit vne chose impie de n'obeir pas aux loix confirmees par l'Oracle d'Apollon.

Il faut encore trouuer Lycurgue admirable en vne chose, qui est, lors qu'il ordonna aux Lacedemoniens de preferer vne mort honorable à vne vie honteuse. Il fit donc en telle sorte que les bons viuoient heureusement, & les meschans miserablement : pour ce qu'aux autres villes quand quelqu'un devient meschant, il en acquiert seulement le nom, & nonobstant le bon & le meschant pratiquent en mesme place : mais à Sparte chacun eust eu honte d'estre en la compagnie d'un homme vicieux, ou de s'esprouuer avec luy à la lutte. Et bien souuent encor un meschant, lors que ceux qui jouoient ensemble à la balle s'estoient separez, n'estoit pas receu d'un costé ny d'autre, & au bal il estoit mis au lieu moins honorable, & par les rues chacun le fuyoit autant qu'il luy estoit possible, de mesme qu'aux assemblees : & mesme entre les plus ieunes il cedit à un chacun.

Il se rendit aussi digne d'admiration, lors qu'il voulut qu'on s'addonnast à la vertu iusques à l'extreme vieillesse : Car ayant mis le iugement de cet aage en la borne de la vie, il ordonna que les vieillards seroient obligez d'auoir soin de l'honnesteté, & de la bonté. Et ayant ordonné que le combat de la vie fust entre les mains des vieillards, il voulut que la vieillesse fust beaucoup plus estimée que la force de la ieunesse. Et certainement elle se doit exercer en ce combat contre toutes les choses humaines, pour ce qu'encores que les exercices de la lutte soient beaux, toutesfois ce sont exercices du corps, mais le combat & la vieillesse rend témoignage

du bon esprit & courage. Or d'autant que l'esprit est plus excellent que le corps, d'autant les exercices de l'esprit surmontent ceux du corps. Pourquoy ne louerons-nous donc grandement celle ordonnance de Lycurgue, qui ayant cogneu que ceux qui s'addonnent lentement & laschement à la vertu, ne peuvent mettre en honneur leur patrie, voulut qu'on exerçast publiquement toutes les vertus à Sparte?

Lycurgue voulut qu'on ne punit moins celuy qui manifestement ne se seroit soucié de devenir tres-bon, pour ce qu'il iugea que ceux qui volent quelque chose, faisoient seulement tort à ceux à qui ils la prenoient : mais il estimoit que les Republiques estoient trahis par les faineans & vicieux. Il semble donc qu'il auoit raison d'ordonner de griefues peines contre telle sorte de personnes.

Il adiousta encor à cecy vn nécessaire ornement de la vie ciuile : car il voulut que ceux qui ne manquoient nullement à leur deuoir, eussent esgale part en la Republique, ne faisant aucun compte de la foiblesse du corps, ny du manquement des moyens. Mais si quelqu'un se monstroït nonchalant & lasche en son Office, il ne vouloit pas seulement qu'il fust compté entre les Citoyens.

Quant aux choses de la guerre, les Ephores deuoient donner aduis du temps auquel il falloit enuoyer l'armée dehors, tant aux hommes de cheval, qu'à ceux qui estoient armez pesamment, & premierement aux gens de pied, puis aux artisans. Il ordonna pareillement que les instruments qui sont nécessaires à la guerre y fussent tous menez, ou avec les charrettes, ou autrement, & en ceste sorte chacun pouuoit voir aisément ce qui manquoit.

Il vouloit premierement que les soldats eussent vne casaque vermeille, & vn escu de bronze : pour ce qu'il cogneut que cét habillement estoit tres-propre à la guerre, & nullement commun avec celuy des femmes, d'autant qu'il estoit plustost net, & plus tard sale. Il permit encor à ceux qui passoient les ans de l'enfance de porter vne longue perruque, iugeant que par ce moyen ils sembleroient plus grands, & plus heureux.

Cecy estant ordonné en ceste sorte, il distribua les gens de pied & de cheval en six Tributs. Chacune de ces Tributs de la ville auoit vn Tribun, quatre porte-enseignes, huit cinquantierniers, & seize chefs d'escadre. Mais à cause qu'il y en a beaucoup qui estiment que l'ordre des Lacedemoniens estoit embrouillé : ie desire leur faire voir qu'ils croient autre chose qu'il ne faut : pour ce qu'en l'ordre des Lacedemoniens on voit que les Chefs sont ordonnez, & chaque rang a les choses qui luy sont nécessaires. Et ceste institution est si aisée à apprendre, qu'aucun de ceux qui peuvent cognoître les hommes, ne s'y abusera iamais : Car les vns auoient charge de conduire, & les autres commandement de suivre. La façon de faire mouuoir la troupe estoit recogneüe par vne parole du Chef de l'Ordonnance. Les escadrons estoient tantost plus ferrez, & tantost moins, & s'il n'y a la chose qui soit si difficile à apprendre. Et combien qu'il aduienne quelquesfois qu'ils se mettent en desordre, on trouue malaisément quelqu'un qui puisse entendre l'Ordonnance qu'elles ont à la rencontre de l'ennemy, si ce n'est vn qui soit instruit en la doctrine de Lycurgue.

Les Lacedemoniens trouuoient encor bien aysees les choses que les autres tiennent pour fort difficiles en combattant : pour ce que quand ils marchoient en pointe l'escadron venoit à la fin, & si la bataille des ennemis venoit contre avec cét ordre, ou commandoit lors au chef de l'escadron de se mettre à main gauche au front en façon d'escu, & demeurer tousiours en cét estat, tandis que la bataille des ennemis se tiendroit ferme. Que si ce pendant les ennemis attaquoient par derriere, tous les rangs se tournoient, ain que les forts s'opposassent tousiours aux ennemis.

Mais quand le Prince se mettoit du costé gauche, ils ne iugeoient pas toutesfois qu'on leur eust donné les pires endroicts, à cause que si quelques-uns eussent essayé de les enuironner de tous costez, ils auoient cét aduantage qu'ils ne doiuent pas trouuer les parties nuës, mais les armées. Que si pour quelque consideration il sembloit vtile, que le general de l'armée eust la pointe droite, en faisant pointe de la bataille, ils ordonnoient leurs gens en telle sorte, que le general se trouuoit du costé droit, & les derniers du gauche. Et si la bataille deuoit alléuement estre attaquée par la pointe droite des ennemis, ils ne se soucioient que de tourner toutes les enseignes en façon de galere, avec la proue contre les ennemis. Mais si les ennemis les attaquoient du costé gauche, ils ne leur laissoient pas faire, ains les repoussioient, & ainsi la dernière escadre estoit ordonnée en façon d'escu.

Pour le regard de la façon de camper, Lycurgus iugeant inutiles les coings d'une ordonnance carrees, vouloit que les Lacedemoniens campassent en rond, si ce n'estoit qu'ils fussent peu asseurez, à cause de quelque montagne. Il ordonna les corps de garde de iour & de nuict, & pour ceux qui raschoient de sortir la nuict du camp, il ordonna qu'ils seroient remarquez par les Scirires, qui auoient la charge de ne laisser sortir aucun de son rang, & auoient encor loin des estrangers qui alloient autour.

Et quant

Et quant à ce qu'ils marchaient tousiours avec des armes d'ast, il faut sçavoir que cela se faisoit, pour ce qu'ils ne laissoient point les armes aux esclaves. Et il ne faut aussi s'estonner de ce qu'ils ne se tenoient esloignez l'un de l'autre, ny des armes, sinon autant qu'ils se pouvoient empêcher entr'eux: par ce qu'ils faisoient cecy pour leur seureté.

Mais il est temps de parler de l'honneur, & de l'autorité que Lycurgue donna au Roy dans l'armée.

Premièrement la ville nourrissoit le Roy, & ceux qui estoient avec luy: On voyoit en garde les compagnons, ou qui mangeoient ensemble, & avec eux les Tributs des soldats, afin que se trouvant tousiours presens, ils se peussent mieux conseiller, s'il en estoit besoin. Les compagnons sont trois autres hommes ensemble de mesme rang. Ces deux ensemble auoient tel soin de toutes les choses necessaires, qu'ils estoient continuellement attentifs à ce qui appartenoit à la guerre.

Quand le Roy vouloit mener l'armée dehors, il sacrifioit premièrement dans la ville à Iupiter le conducteur, & autres Dieux: & s'il auoit sacrifié là quelque chose, le Prestre, qui estoit nommé Pythore, à cause du feu qu'il portoit prenant, le feu de l'autel marchoit devant iusques aux frontieres du pais, où le Roy sacrifioit de nouveau à Iupiter, & à Minerue. Or aussi tost qu'on auoit sacrifié à ces deux, on passoit lors aux frontieres, & le feu perpetuel pris de ces sacrifices marchoit devant, & les victimes de toute sorte marchaient apres, pour les sacrifier quand il en estoit besoin. Il se faisoit le mesme à la pointe du iour, voulant acquerir premièrement la bien-veillance de Dieu. On voyoit autour du sacrifice ceux qui auoient charge en l'armée.

On y voyoit encor assister deux Ephores, qui ne faisoient rien, si le Roy ne les appelloit: mais estans attentifs à regarder ce que chacun faisoit, chastioient ceux qui tomboient en faute. Les sacrifices estans paracheuez, le Roy faisoit assembler le Conseil, & commandoit ce qui se deuoit faire.

Quand le Roy menoit dehors l'armée, s'il ne paroïssoit personne qui se vint opposer à luy, nul ne marchoit devant luy, fors les Scirties, & les gens de cheval qu'on auoit enuoyez pour descouurir. Mais s'ils iugeoient qu'il fallut combattre, le Roy prenant avec luy l'escadron de la premiere Tribu le conduisoit, la faisant tourner iusqu'à ce qu'il se venoit trouuer au milieu de deux Tribus, & entre deux Tribuns, ou Maistres de camp.

Lors qu'on tuoit la cheure à la veüe des ennemis, la loy vouloit que toutes les trompettes sonnassent, & que nul Lacedemonien ne se trouuast sans Couronne: & elle commandoit aussi qu'on eust à tenir les armes nettes: Mais Lycurgue voulut que le Roy ordonnast quand il seroit temps de camper, & qu'il monstrest le lieu, où il falloit s'arrester & faire logement de l'armée.

L'autorité d'enuoyer des Ambassadeurs, de traiter des alliances, & de mouoir la guerre appartenoit encor au Roy, que tous alloient trouuer lors qu'ils vouloient faire quelque chose. Et s'il naissoit quelque different, le Roy le remettait aux Iuges des debats, si c'estoit pour raison de quelque argent aux Thresoriers, & si c'estoit pour quelque butin à ceux qui le venoient.

Lycurgue assigna encor au Roy les dons qu'il voudroit prendre des choses qu'on sacrifioit, & apres il luy ordonna des fonds en telle quantité, qu'il n'auoit besoin d'aucune chose necessaire, & ne pouoit aussi s'eleuer pour en auoir trop. Et afin que les Roys mangeassent en public, il ordonna les festins publics, & au soupper il les honora d'une double portion, non point afin qu'ils mangeassent deux fois autant que les autres, mais afin qu'ils en peussent donner à qui bon leur sembleroit. Il leur donna encor deux compagnons, qu'il pouoit choisir à sa volonté, & ceux-cy se nommoient Pitres. Il leur donna encore un cochon à chaque cochonnement de truie, afin que s'il estoit besoin d'auoir le Conseil des Dieux en quelque affaire, on eust des victimes à commandement. Il leur fit encore faire un estang pres de leur Palais, & sçachant combien il estoit necessaire en beaucoup de choses.

Tous les Magistrats faisoient honneur au Roy de leurs sieges, excepté les Ephores. Le Roy & les Ephores prestoient tous les mois serment l'un devant l'autre: les Ephores au nom de la ville, & le Roy pour luy-mesme. Le serment du Roy estoit, qu'il commanderoit selon les loix à la ville, & celuy de la ville qu'il maintiendrait tousiours le regne en estat. Quant aux honneurs qu'on faisoit aux Roys de Lacedemone lors qu'ils estoient morts, ie diray seulement ce mot, & que les loix de Lycurgue portoient qu'on les honorast, non comme hommes, mais comme demy-Dieux.

RELIGION.

45 **P**Ov a ce que nous avons assez parlé dans les mœurs des Grecs, de leur ancienne Religion, lors qu'ils estoient adonnez à l'idolatrie, nous viendrons à celle qu'ils tiennent maintenant. Les Grecs se sont retirez de l'Eglise Romaine depuis bien long temps, & se sont establis des Patriarches qu'ils recognoissent pour leurs Chets. Au reste il y a quatre Patriarches des Eglises Grecques, à sçavoir celuy de Constantinople, celuy d'Alexandrie, celuy de Jerusalem, celuy d'Antioche, desquels nous parlerons en leur lieu : mais ceux qui sont dans le vray país de Grece, ne recognoissent pour leur Chef que le Patriarche de Constantinople. Quant à leur creance nous la mettrons tout au long en parlant des Moscouites, qui ne different d'eux qu'en bien peu de choses.

Au reste il y a force Caloyers, c'est à dire, Prestres & Moynes Grecs, qui sont esendus par la Grece, où chacun jouit du libre exercice de sa Religion en payant tribut, non toutesfois sans recevoir par fois mille desplaisirs de ces Barbares, qui dominant avec vne cruauté du tout insupportable.

Mais afin de dire quelque particularité de cecy, le Mont Athos fut iadis destiné pour la demeure des Caloyers de saint Basile, auxquels, comme dit Belon, on donna vn privilege qui est demeuré iusqu'à maintenant, à sçavoir qu'il n'y a aucun qui y puisse demeurer s'il n'est Caloyer Grec. Il y a environ six mille de ses Caloyers, qui demeurent en divers endroits de ceste montagne, où il y a environ vingt-quatre anciens, & grands Monasteres clos de bonnes murailles, pour resister aux ennemis & aux Corsaires, qui ne les vont toutesfois trouver guiere souvent pour leur faire outrage. Il y a deux principaux Monasteres, dont l'un se nomme *Vntopedi*, & l'autre *Agias Laura* : & là dedans on void de belles Reliques qu'on va voir de toutes parts, & des Temples superbement bastis, & richement ornez. Au reste les Grecs estiment ce mont de mesme que nous faisons Rome, & les ceremonies Grecques y sont soigneusement obseruees, & ces Caloyers ont acquis plus de reputation de sainteté, que les autres de toute la Grece.

Les Turcs mesmes les ont en si bonne estime, qu'ils leur font de grandes aumosnes. Il n'y a personne entre-eux qui viue sans rien faire, & qui n'exerce quelque art mecanique : Car tous sortent le matin des Monasteres portans leurs instruments, avec lesquels ils trauaillent pour entretenir toute la famille : les vns trauaillent aux vignes, les autres coupent des arbres, les autres font des navires, bref chacun exerce quelque art. Ils portent des habits de peu de prix, & sont vestus à la façon des Hermites. Ils ne portent point de chemises de chanure, ny de lin, mais de laine, qu'ils filent & cousent eux-mesmes. Ils ne s'addonnent nullement à l'estude des lettres, & mesmes il y en a beaucoup parmy eux, qui ne sçavent lire ny escrire. Que s'il y a quelqu'un qui passe de fortune par ceste montagne pour quelque affaire que ce soit, les Caloyers luy fournissent des viures sans en tirer nul argent.

LES ISLES

DE L'ARCHIPELAGE, QUI APPARTIENT AV TVRC, ET CE QV'IL possede en Esclauonie.

SOMMAIRE.

EN ce present discours, l'Auteur faisant vne description des Isles de l'Archipelage subiectes au Turc, declare leurs noms tant anciens que modernes : la situation, estendue & circuit de chacune, leurs portes & villes. En second lieu il fait vne remarque de ce qui y croist, & se void de singulier & exquis en chaque contrée, commençant par l'Isle de Thasse, abondante en marbre blanc, en pins, & iadis en mines, qui venoient au Roy Philippe de Macedoine tous les ans quatre-vingt talents. Samothrace en miel & en Dains, Lemnos en lin, chanure, bleds, legumes, vins, chairs, laines, figues, noix, amandes, oliues, huistres appellees *Gaiderepedes*, sources d'eau chaude, la terre sigillée medicinale contre la peste & de fluxion : Negrepont remarquable en son Destroit de mer, pour son flux & reflux de cinq à six fois le iour, abondante en Brebis sans fiel, en huilles & vins, & carrieres de marbre, & en Amiante pierre qui se reduit en lin, dont se fait la toile qui se blanchit dans le feu : Melo, Isle fameuse pour ses sources d'eaux sulfurees, oliuiers, veines d'argent, & carrieres de marbre : & pour vn certain lieu, la terre duquel ne se peut espuiser : ains cauee se remplit aussitost sans main d'homme. L'on trouve aussi des Grenouilles qui ne coassent iamais en l'Isle Polyandre :

La Calamite

*La Calamite en Sifano : le marbre blanc Lychmite, & la pierre fardée en Paros : l'Ophire ou pierre Crapan-
dine, & les guêpes de mortelles picqueuses en Naxe. Le marbre & l'Aloes en l'Isle de Lero : le vin Hip-
pocoon, les Cypres & l'Erebinte en Coos : Oranges, maluoysie, & le mastic en Chio : l'Agathe, le vin
excellent, & le Crimmon & mazza en Lesbos. Le miel & les Dains en Samothrace. En troisieme lieu
suit la description des mœurs & naturel, tant des anciens que des modernes habitans de ces Isles, leurs loix,
& costumes de chaque païs : les Deitez qu'ils adoroient, leurs sacrifices & superstitions, & quelle est la
Religion de ces contrées en ce present siecle.*



A mer Egée est vne partie de la mer Mediterranee, qui separe la Grece & l'Euro- 46
pe de ce costé là del'Asie. Les Modernes l'appellent Archipelage, & les Turcs
la mer Blanche : Les Isles de ceste mer sont ordinairement diuisees par les an-
ciens en Cyclades & Sporades. Ils nomment Cyclades celles qui sont proches
l'une de l'autre en façon de cercle, & ce sont toutes celles qu'on void autour
de Dele, enuiron au nombre de cinquante selon Isidore, combien que quelques autres n'en
mettent que douze. Mais on appelle Sporades celles qui sont esparées en la mer Egée vers la
Crete & l'Asie, & qui sont deçà, delà, sans ordre. Or de mesme que nous auons commencé
par la Thrace au discours de la terre ferme, nous ferons aussi l'entree de la description de ces
Isles, par celles qui sont vis à vis de ceste Prouince.

L'Isle de Thasse, que Ptolomee appelle Thalassie, & qui a eu iadis le nom d'Erie, &
d'Ethrie, selon Eusebe & Pline est proche de la Thrace, entre la bouche du fleuve Nesse, &
du mont Athos. Elle a de tour quarante mille selon Niger, ou cinquante, ainsi que quelques
autres disent. Il y a vne ville qui porte le nom de Thasse, & est assise en la plaine, aupres du
grand Golphe vers le Nord, & son port est esloigné de deux milles de la terre ferme de Mace-
doine. Du costé du Midy il y a deux villes assise en pendant : veu qu'en ceste endroict elle est
toute montueuse.

L'Isle de Samothrace est esloignée d'environ dix mille de la terre ferme de Thrace. Pline
dit qu'on la nommoit iadis Dardanie : mais auourd'huy on la nomme Samandrachi. Il y a
grand nombre de ports en ceste Isle, où l'on void vne ville assise sur vne fort haute montagne
du costé de Septentrion.

L'Isle d'Imbre, maintenant l'Embre, selon Sophian, s'estend en longueur du Septentrion
au Midy, & est plus longue que large. Son circuit est d'environ trente mille. Elle est assise
presque au milieu de la Chersonese de Thrace, & de l'Isle de Samothrace, & est esloignée pres-
que également de l'un & de l'autre d'environ dix mille. Il y a vne ville assise au pied des mon-
tagnes.

L'Isle de Lemnos, iadis appelée Ophiuse, à cause de la multitude des serpens qu'on y trou-
uoit, qui moururent tous, comme quelques-vns ont dit, eust apres le nom de Diospolis à cau-
se de deux villes qu'elle auoit, mais à ceste heure elle est nommée communement Stalimene.
Elle est plus longue que large, tirant de l'Est à l'Ouest, & comprend en tout environ cent mil-
le. Il y eust iadis en ceste Isle deux principales villes, à sçauoir Lemnos, autrement Myrine,
qui est maintenant peu celebre, combien qu'elle ne soit pas ruinee : & son mal vient de ce qu'elle
est moins peuplée qu'elle n'a iamais esté. Elle est assise sur vne colline qui prend sur la mer,
& a vne place, où l'ombre du mont Athos paruiet au Solstice, encor qu'il y ait de l'un à l'autre
environ 87. mille, & combien mesme que le Soleil ne soit pas prest à se coucher. L'autre
ville est Hephestie, maintenant Cochine, entierement ruinee. Au reste encor que ladite Isle
n'aye pas grand tour toutesfois il y a 75. bourgs, ou villages. Pline dit qu'il y auoit en ceste Isle
vn Labyrinthe, semblable à ceux d'Egypte, & de Candie : mais Belon dit qu'on ny en voit plus
aucune marque.

Mais l'Isle d'Eubee, maintenant de Negrepont, surpasse veritablement toutes celles de
ceste mer en grandeur, & est comme Royne de l'Archipelage. Elle est separee du riuage
d'Attique seulement par vn petit destroict, & esgale presque toute la coste en l'Attique, & de
la Beoce en sa longueur. Sa largeur est d'environ vingt mille, & tout son circuit est de trois
cents soixante cinq. Elle fut iadis nommée Macra, & Macris, Abantias, Chalcis, Chalcodon-
tis, & Assopis, à ce que Pline rapporte. Nous la nommons Negrepont, & les Turcs Egribos,
comme Meline estime. Les anciens ont tenu que ceste Isle estoit iointe à la terre ferme de
Grece, & qu'elle en fut arrachée par vn tremblement de terre : ce qu'on se peut assez persuader,
tant pour le voisinage, qu'à cause qu'elle est encore sujette à estre esbranlée par ces tremble-
mens. Sa ville Capitale estoit Chalcis, qu'on appelle maintenant Negrepont du nom de l'Isle.
Elle est assise en plaine du costé que la mer est restraite dans vn petit destroict, & est iointe
par vn pont à la terre ferme. Ceste ville fut prise par Mahomet II. l'an mil quatre cents cinquante
& vn, avec grand meurtre de Chrestiens, & maintenant les Turcs y habitent avec eux pelli-

mele. Il y a encor la ville de Caryste, qui se nommoit autresfois Chironie. On voit icy le Promontoire de Caphare, fameux par les naufrages des Grecs, nommé Figere par Niger, & Chimy par Sophian.

Melos est releuee assez haut en mer, vis à vis du Promontoire Malie, Cap, du Peloponese. Elle fut iadis appelee aussi Nimallide Siphne, Acyton, & Zephurie, & est plus ronde qu'aucune qui soit en la mer Mediterranee, ayant quelques vingt lieues Françoises de circuit. Il y a vne ville au pied d'une montagne, deuant laquelle on void vne belle campagne qui s'estend iusques à la mer.

Pres de Melos on voit vne autre petite Ile nommee autrefois Polygee, & à present Fauconniere, qui est maintenant deserte, comme la plupart de celles qui luy sont voisines : & vers l'Orient on voit Cynuse, ou Elchinuse, que les Modernes nomment Polino, ayant vne ville qui porte mesme nom.

On void apres celle qu'on nommoit iadis Phelocandre, & qui porte maintenant le nom de Policandre. On trouue pres de ceste Ile celle de Laguse maintenant Chrestienne, & celle de Sichin, iadis Oenos, & maintenant Sicandre toutes presque de pareille grandeur, qui ont vers Midy l'Ile Therasie, à present Tsiere celle de Saturnin, iadis Callista, c'est à dire, tres-belle, fameuse par la naissance du Poëte Callimaque.

Pres de Therasie vers le Leuant, on void Anaphé que les Modernes appellent Namphio, au beau milieu de la mer, ayant vne ville assise sur vn rocher, & au pied d'icelle vn fleuve qui arrouse sa plaine.

Assez pres de là, on void la petite Ile d'Iues, maintenant Palme, ou quelques-vns assurent que le Poëte Homere fut iadis enterré. Ceste Ile a vn beau port, mais est mal habitee à cause des Corsaires, qui y abondent à toute heure.

L'Ile de Zie, iadis Cee, est loing du Promontoire Surie, ou Cap des Corquonnes, enuiron dix lieues, & en a treize de circuit. Elle est creute du costé du Nord, & faite en forme d'un croissant de Lune. Elle fut aussi nommee Ceos d'un Gean, fils de Titan, qui habita le premier. Elle a son port vers la partie Occidentale : On l'a aussi nommee autrefois Hydruse.

Pres de ceste Ile on voit celle de Fermentie, que les anciens nommoient Scyrie, & Oenos, qui n'est guieres moindre que Zie : puis on trouue Zephene qu'on appelle Seripe, ayant vne ville de mesme nom vers le Midy, & vne large campagne qui s'estend iusques à la mer. Elle a de circuit quelque treize lieues Françoises.

Au dessous de l'Ile de Zephene on void celle de Siphano, qu'on nommoit autrefois Siphne, ou Syphe, Acis, Meropio, fort belle à voir. Elle a dix lieues Françoises de tour, & vne ville bastie sur le Leuant, qui est assez bonne : on void du costé d'Occident le Goulphre nommé Schinost, & du Midy le port où estoit iadis la ville Capitale de tout le pais Insulaire.

Les Isles susnommees sont la plupart des Cyclades, qui sont autour de l'Ile de Dele. Mais entre-elles vers l'Orient on void encor l'Ile de Paros, qui a retenu son ancien nom : Elle fut autrefois nommee Demetriade, Zacynthe : tout ainsi que Zante, Hyrie, Hyleesse, Cabarnis, & Minoc, elle a cinquante mille de circuit, qui font pres de vingt lieues, & s'estend en longueur du Ponant au Leuant : & au milieu on void vne belle & large campagne, avec plusieurs beaux bastiments, & vn Temple ancien qui est encore en son entier. On y voit aussi le mont de Campiese, qui est fort haut, au pied duquel est assise vne ville bastie avec des pierres d'une grandeur demesuree. Ce mont se nommoit iadis Marphetic. La ville de Paro est du costé d'Occident, quoy que l'ancienne fut sur le bord de la mer, le long du riuage du fleuve Asope. Le port est vers le Septentrion, pres du chasteau qu'on nomme Cephalo, & le port est appelé Boni. Le reste du costé du Nort est tout environné de montagnes : Ceste Ile paruint entre les mains des Venitiens du temps de l'Empereur Henry, frere de Baudouyn Comte de Flandres : mais Mahomet prenant Negrepoint, se saisit aussi de ceste Ile.

L'Ile de Nixie, autrefois Maxos a vingt bonnes lieues Françoises de circuit, & auoit il n'y a pas long temps vn Duc, comme Candie sous la puissance des Venitiens : mais Selym pere de Solyman l'osta à la Seigneurie de Venise. La ville qui a commandement sur tout le pais, & de laquelle l'Ile prend le nom de Nixie, est assise vers le Septentrion sur vne haute montagne, elle a esté nommee autrefois Ile de Venus, Die, & Dionisie : come aussi petite Sicile, & Calipolis.

Vers le Leuant de Nixie, on void l'Ile d'Amurge, iadis Brutore, qui a vingt lieues de tour & trois portes, dont l'une porte le nom de sainte Anne, l'autre de Calors, & le troisieme de Catapla.

Tirant vers la coste de la petite Asie, pres d'Amurgospoli, ou Brutore, on descouure l'Ile de Claros, à present appelee Calamo, qui a quelques dix lieues de tour, & de fort hautes montagnes. On y voit les ruines d'une ancienne Cité, qui est du costé du Leuant. Il y a le long de ceste Ile vn Goulphe nommé Calamo, & vne ville portant mesme nom.

Plus haut

Plus haut que Claros on void l'Isle de Lero, maintenant Lerte, qui a quelques dix huit milles de circuit. On y voit encor vn chasteau du costé du Leuant, & du Midy le Port de Lepide, où fust iadis assise la ville capitale de l'Isle au pied de la montagne.

Assez pres de ces Isles on voit celle de Pathmos, & maintenant Palmose, où saint Iean l'Euangeliste fut confiné par Domitian. Et quoy que ceste Isle, & plusieurs autres ses voisines soient Asiatiques, si est-ce que ie les embrasse avec les Grecques, tant pource qu'elles tenoient la langue Grecque, & obeyssioient à ses Empereurs, qu'à cause qu'il m'est plus aisé de les descrire en les voyant proches, que si ie voulois suiure trop exactement celles qui appartenoient à l'Europe, sans rapporter aucun fruit au Lecteur avec toute ma peine.

Ceste Isle n'a qu'environ sept ou huit lieux Françoises de circuit, & est comptee entre les Isles Sporades, tant par les anciens que par les modernes.

L'Isle de Coos, maintenant Longo, & des derniers tirant vers le Leuant, le long de la coste d'Asie. Elle a son estendue du Nort au Midy, & cōtient de longueur environ dix-huit lieux. Elle fut iadis nommee premierement Merops. Les Turcs ont accoustumé de l'appeller Stancou. Vers le Leuant on void la ville capitale nommee Arange, qui a vn lac au milieu, qui tarrit en Esté. On y void des magnifiques bastimens tous de marbres. On void encores hors de la ville les murailles du Palais du grād Medecin Hyppocrate, natif de ceste Isle mesme qu'Appelle. On y void encor la ville de Coë, que les Turcs nomment Stancou, de mesme que l'Isle qui n'est guiere esloignee de la petite Asie, & est vis à vis de celle de Cypre.

Autour de Longo on void plusieurs petites Isles peu renommées, comme Hiali, Nisari, Chirac, Lefindre, Piscopie, Lire, Carchi, Limone, Lenite, Zinare, dont nous laissons la description comme peu vtile.

L'Isle de Samos retient encore son ancien nom, & est plus renommee que grande, s'estend du Leuant au Ponant, & ayant vingt lieux de circuit. Elle fut nommee apres que les Cariens l'eurent abandonnee, Druyse, Antemuse, Melamphile, Cyparisse, & Stephane, c'est à dire, couronne. Il y eut iadis vne bonne ville, les ruines de laquelle paroissoient encore le long de la mer, y ayant vn port & Arsenal, qui est fort beau, & spacieux, avec vne fort haute leuee.

Mycone l'vne des cyclades vers l'Occident, auiourd'huy Micolé, a quelque huit lieux de circuit. Elle a vn port avec son mole, & Arsenal, & est toute habitee, ayant au Leuant le port & bourg de sainte Anne, au Midy saint Estienne, & entre l'Est & le Nort le port de Panderne.

Pres de là on void l'Isle de Giare, maintenant Stopodie, qui n'est guiere grande, & est ceinte de plusieurs rochers. Les Romains y enuoyoient en exil ceux qu'ils condamnoient comme dignes de mort, comme aussi les autres Isles desertes d'entre les Cyclades seruoient pour mesme chose.

Dele est la plus renommee des Cyclades, à cause de l'Oracle d'Apollon. On le nomme auiourd'huy Dile. Elle fut iadis appelee Ortygie, à cause des cailles qu'on y void plustost qu'ailleurs. Elle a eu aussi les noms d'Asterie, Lagie, Cerhe, Mydie, Cynethe, & Pyropile, & encore de Cinthie, à cause d'une montagne qui y est. Ceste Isle estoit diuisee par le moyen d'un petit canal en deux parties, en l'une desquelles on voyoit le grand Temple d'Apollon, duquel on void encore quelque reste.

Pres de Dele on void l'isle de Rhene, iadis Celaduse, & Artemise, & l'on la nomme auiourd'huy Dile, aussi bien que Dele.

Andro est aussi l'vne des Cyclades, & a pour le moins vingt lieux de France de tour. Elle fut iadis nommee, comme dit Myrsyle l'Esbien, Auron, Autandre, Lassie, Nouagrie, & Epage. Sa ville est vers l'Orient, & le fort est assis sur vn escueil, & pour y aller il faut passer sur vn pont leuis.

L'isle de Chios est opposee à la Chersonese d'Ionie, maintenant nommee de Smirne, n'y ayant entre deux qu'un canal d'eau d'environ deux lieux & demie, tout entouré de bancs & escueils. Elle est assise entre les Isles de Merelin, & de Samos, & fut premierement nommee Ethalie. Son circuit est d'environ trente lieux. Sa longueur s'estend du Septentrion au Midy, & est diuisee en deux parties, l'une nommee Apanomeree, qui signifie partie d'en haut, & l'autre Catomeree, c'est à dire, partie d'en bas. Elle fut prise par Solyman, l'an 1566.

On void à l'opposite du pays de Phrygie, que les Turcs appellent maintenant Sarcum, la belle Isle de Lesbos, auiourd'huy Metelin: du nom de sa ville capitale autresfois Mytilene. Elle fut iadis appelee Antisse, puis Pelasgie & apres Macaree, du nom du fils de Iupiter, surnommé Cynace. Elle eut encor le nom d'Emerthé, Ethalacie, & Egyre, ainsi que Plin nous enseigne. Son circuit est d'environ quarante de nos lieux.

Quant aux lieux qui appartiennent au Turc en Esclauonie, on compte premierement en terre ferme Castelnouo, ou Chasteau neuf, assis sur vne basse colline pres du Sein Rizonique,

maintenant le Golphe de Cataro. Les Turcs l'ont osté aux Espagnols depuis n'aguières.

La ville de Scodre, qu'on nomme communément Scutari, a esté quelquesfois sous la puissance des Venitiens, mais maintenant elle obeyt aux Turcs: Elle est à 18. mille loing de la mer, & sur vn rocher fort droict, ayant au dessous du costé du Leuant vn lac qui a de circuit environ 130. mille, & tout autour des montagnes, fors du costé de Septentrion.

Le Turc y possède encore les petites & mal peuplées villes de Buduë, Antiuare, & Dulcigno: que Ptolomee nomme Vlcinium, & quelques autres Olchinium, qui furent pris sur les Venitiens par Selim 2. Empereur des Turcs.

Q V A L I T É.

QUANT à l'Isle de Thasse, elle abonde en marbre blanc, dont les Romains faisoient grand estat: & en ses montagnes on trouue aussi vn fort grand nombre de pins, & de sapins: & l'on peut voir par des monceaux d'escume de metal qu'on y void encore, qu'il y auoit autresfois de fort bonnes mines: ce qu'on peut aussi cognoistre aisément, pource qu'elles rendoient toutes les années à Philippe Roy de Macedoine quatre vingts talens.

L'Isle de Samotrace abonde en miel, & en daims, & celle de Lemnos est fertile plus qu'elle ne fut jamais, & porte du lin, du chanvre, du bled, des legumes, & du vin en abondance. Il y a aussi grande quantité de chairs, de laine, & de plusieurs autres choses. Elle a toutesfois faute de bois, principalement vers la partie Orientale qui est plus seiche. Mais celle qui regarde l'Occident & le Midy, est plus humide & verdoyante.

Les lieux qui sont humides, & assis entre les costaux, portent des figues, des noix, des amandes, & quelques oliues. Il n'y a point de riuere en ceste Isle, mais les habitans font vne grande pesche au riuage de la mer, où ils trouuent force poisson, & particulièrement des huîtres, qu'ils nomment Gaideropedes, c'est à dire, pieds d'asne, qui different grandement des nostres. Il y a aussi des sources d'eau chaude, qui n'a pas toutesfois tant de chaleur que beaucoup d'autres.

On trouue en ceste Isle, & non ailleurs la terre qu'on nôme Sigillee, ou Scelee, qui est bonne principalement contre la peste, & les fluxions. On en fait de petites masses, qui sont marquées des caracteres Turcs. On vse d'vne grande ceremonie pour la tirer, veu qu'on vient seulement le sixiesme iour du mois d'Aoust de boucher le trou où elle est, & il n'est permis de le voir tout le reste de l'année, & meime il est defendu aux habitans d'en transporter ailleurs, sur peine de la vie. Les Ambassadeurs des Princes en emportent le plus souuent, lors qu'ils viennent de Constantinople, & croient faire vn bon present, lors qu'ils en donnent à des hommes de condition releuee.

Pour le regard du Negrepont, la mer est fort rapide en son destroit, & l'on dit qu'il y a flux & reflux quatre, & selon les autres six fois-chaque iour: Tellement que les vaisseaux mesmes qui ont bon vent ne peuuent bien souuent rien aduancer. Aristote ne pouuant sçauoir la cause de cecy en mourut de fatcherie.

Ceste Isle au reste abonde en bled, legumes, vin, & huyle, & l'on y void aussi fort grande quantité d'arbres, principalement de ceux qui sont propres à faire des vaisseaux. On dit que les brebis de ceste Isle n'ont point de hiel, mais ie ne sçay si c'est chose controuuee ou non.

On trouue près la ville de Cariste de grandes carrieres de marbre, & pareillement la pierre Amiante qu'on reduit en fil, comme le lin, on en fait de la toile, qui se blanchit estant iectee au feu lors qu'elle est sale.

En l'Isle de Melo on trouue de bonnes sources d'eaux sulphurees ou souffrees, propres pour la santé des hommes. Le terroir de ceste Isle est si gras & fertile, qu'on y semoit iadis des grains, qui estoient paruenus à leur plus grande hauteur dans quarante iours, au bout desquels on en faisoit la recolte. Elle abonde aussi en Oliuiers, & porte encore quelques vignes. Il y a quelques veines d'argent, & du meilleur soulfhre qui se trouue. On y a veu autrefois de beau marbre de plusieurs couleurs, que Luculle porta le premier à Rome. On dit d'vn certain lieu de ceste Isle, que si l'on y vient à cauer, la terre surcroist aussi, & les creux qu'on y fait se remplissent, sans que personne y mette la main.

L'Isle de Policandre est aspre pierreuse, & difficile à cultiuer, & celle de Seriphe, ou Serfene a des grenouilles qui ne croissent iamais, & si l'on porte de ces bestes ailleurs, comme dict Plin, elles crient ainsi que les autres.

En l'Isle de Sifano, on trouue la calamite, mais on ne sçait où sont les mines d'or & d'argent, qui la rendoient autrefois si renommee, veu qu'il n'y en a nulle marque.

Quant à Paros, il y auoit force marbre blanc qu'on nomma Lychnite, à cause qu'on le tailloit au commencement pour en faire des lampes. Solin dit qu'il croist à Paros vne sorte de pierre, qu'il nomme Sarde, qui estoit plus excellente que le marbre, & toutesfois ne pouuoit estre

estre mise au rang des pierres precieuses. Mais Pline (de qui Solin est le frere) n'a fait aucune mention de ceste pierre Sarde en l'Isle de Paros. On dit que mettant dans la mer du costé où est l'Arcenal, quelque chose blanche, elle devient incontinent noire. L'air de ceste Isle est si bon & serain, que les habitans vivent longuement, & mesme ceux qui sont chargez d'ans y sentent fort peu les incommoditez de vieillesse.

L'Isle de Nixie, ou Naxe, a encore grande quantité de vignes, aussi bien qu'au temps passé: On y trouve vne pierre que les Grecs appellent Ophites: Nous la nommons Serpentine, ou Crapaudine, qui ne naist point parmy les carrieres, ains sous terre. Il y a aussi quantité de Guespes, ou plustost des Taons, dont la morsure est mortelle, aussi bien que celle d'un Scorpion, si l'on n'y remédie de bonne heure. Il y a aussi des veines d'or assez bonnes, mais soit que les habitans n'ayent l'industrie de le tirer, ou que le Turc en ait fait expresse défense, on n'en tient pas compte, non plus qu'aux autres endroits de la Grece.

En l'Isle de Lero, ou Lerte, on trouve grande abondance de marbre, & le pays est fertile au possible. On y cueille l'Aloës, qui est tant estimé de nos drogueurs, pour le bien qu'il fait aux hommes. Celle de Coos, ou Lango abonde en fruits, & nourrit vne grande quantité d'animaux. On y cueille aussi force bon vin, dont le meilleur s'appelloit anciennement Hippocoon, à cause que le terroir auquel il croissoit avoit nom Hippon. On y voit aussi de beaux cyprès, fresnes, & terebintes, & il s'y engendre aussi, selon Pline, force vers à soye. Elle a un lac vers l'Occident, qui porte grand prejudice au pays, d'autant que ses exhalaisons & vapeurs sont si infectes, qu'il est impossible qu'on les souffre, tellement que l'Isle est toute deserte de ce costé-là, & ces vapeurs sont plus nuisibles en Esté, qu'en autre temps de l'année.

L'Isle de Samos ne peut porter la vigne, quoy que ses voisines en soient fort peuplées, mais selon Strabon, toutes autres choses y abondent, combien que quelques autres dient que le froment n'y vient guiere bien: mais que les oliuiers y croissent à souhait. On dit qu'il se trouva vne fois tant de rats en l'Isle de Mycole, qu'ils en chasserent les habitans.

En l'Isle de Chio on trouve si grand nombre d'orangers, qu'on en presse le jus dedans des tonneaux, qu'on enuoye apres en Constantinople, & en autres lieux, pour mettre avec les viandes, & en user comme on fait pardeça du verjus. Les arbres qui portent le mastic sont du long de la mer fort petits & bas, ayans la feuille comme le buis, ou Lentisque. On les taille treize fois l'année près du tronc pour en faire distiller le mastic, qui sort comme des larmes. On taille pareillement d'autres arbres qui produisent la terebentine, & l'on tient qu'elle ne se trouve en nul autre lieu que là, & aux Indes, où il croist des deux susdictes especes. On y void encor sur des arbres fort hauts certains fruiets en forme de febues en escorce, nommez en Italien Caroubis, & en Grec Ondorine, & d'autres arbres appelez Visques, qui portent le glu dont, le fruiet est en forme de grosse capres. L'Isle de Chio est aussi fort recommandée pour la maluoisie qu'elle porte, qui n'est toutesfois si bonne que celle de Candie. On portoit autrefois de Chio à Rome les huilles de Cabas, ainsi qu'on les porte aujourdhuy de Prouence à Paris, & par toute la France.

L'Isle de Lesbos, ou de Metelin est de grand rapport, & les fruiets qui y croissent sont de fort bon goust: L'air y est fort bon & sain. On y void force montagnes, dont on tiroit jadis du marbre, qui n'estoit pas toutesfois si beau que celui de Paros, & la pierre d'Agate qui est en assez grande estime.

Le vin de ceste Isle est tenu pour le meilleur qui soit aujourdhuy en toute la Grece. Elle nourrit aussi quantité de bons chevaux, qui sont petits: mais forts & bien pris, & proportionnez.

On y fait force fromages, & il y a du froment en grande abondance. On en fait deux sortes de drogues dont les Turcs se servent en leurs potages, l'une s'appelle en langue Turquesque Trachana, & l'autre Bouhort, que les Romains nommoient anciennement Crimnon, & Maza.

Il y a en l'Isle de Samothrace grande abondance de miel, & aussi grand nombre de dains. Quant aux lieux qui sont en Esclauonie, le discours de Ragouze, & de ce que les Venitiens possèdent en ce pays, peut assez faire cognoistre la qualité.

MOEVS ANCIENNES.

EN l'Isle de Zie, ou Cée, lors que les vieilles gens se faschoient de viure, ils s'empoisonnoient de leur bon gré, pour n'estre plus sujets aux foiblesses & aux ennuis de vieillesse, & il estoit aussi permis à chacun de se faire mourir avec la permission du Magistrat. Et ceste coustume s'observoit principalement en la ville de Iulier, d'autant qu'il y avoit vne loy qui portoit ces mots: Que ceux qui ne pourront bien viure, ne meurent point au moins deshonnêtement, & que ceux qui passeront l'age de soixante ans, meurent de poison, afin que les viures suffi-

sent pour les autres. *Ælian* le tesmoigne ainsi en sa diuerse histoire, disant que ceux qui estoient desia cassez, faisoient vn sacrifice solemnel, durant lequel estans couronnez de fleurs ils beuoient du jus de la cigue, comme se sentans desormais incapables de profiter aux pays. Les Poetes tiennent que ceste Isle fut iadis habitee par les Nymphes Corinthiennes, & que pour ceste cau se elle leur estoit consacree.

L'Isle de *Zerphene* auoit iadis pour son Dieu tutelair *Apollon*, qui y estoit adoré en grande reuerence.

Ceux de l'Isle de *Siphne*, ou *Siphano*, furent autresfois si puissans, qu'ils oserent debatre contre les *Lacedemoniens* de la souveraineté de la Grece, en quoy l'on peut assez cognoistre que c'estoient gens courageux, & pleins d'une fort grande resolution.

Ceux de *Paros* ont esté iadis accusez de desloyauté, & de n'estre point hommes de parole, à cause de *Miltiade* General de l'armee des Atheniens, les ayant surmontez, & eux luy ayans promis de luy obeir, ne luy tindrent point la parole qu'ils luy auoient donnee, & pource l'on disoit en commun proverbe, faire comme ceux de *Paros*, c'est à dire fausser sa foy.

Ceux de *Nixie*, ou *Naxe*, n'estoient guieres spirituels. Plusieurs Dames se retiroient iadis en ceste Isle, où en memoire du tort fait à *Ariadne*, & detestant la desloyauté des hommes, elles viuoient en perpetuelle chasteté.

Il y auoit iadis en l'Isle de *Cos* vn temple dedié à *Esculape*, à cause qu'*Hypocrate* se disoit yssu de sa race. On s'adressoit là comme aux autres temples de ce Dieu imaginé, & vray diable, pour receuoir guerison.

Les *Samiens* portoient vne particuliere reuerence à la Deesse *Iunon*, & la seruoient avec plusieurs sortes de festes, & sacrifices. Ils firent sa statue, où elle estoit representee, comme vne fille qui espouse, à cause qu'ils tenoient que *Iunon* estoit née en ceste Isle, & y auoit esté nourrie durant sa virginité, puis mariee à *Iupiter*. Ils luy dedierent aussi vn bois, auquel ils nourrissoient les Paons portez d'outre mer. On faisoit iadis en ceste Isle des plus beaux vases de terre que l'on sceut voir.

Les Atheniens honorerent tellement l'Isle de *Dele* (outre les Perfes) qu'ils en firent oster tous les tombeaux & ossemens des hommes, lesquels ils voulurent estre mis en l'Isle de *Rhene* qui en est voisine, & qui deuoit seruir de cimetiere à *Dele*, ayant esté dediee pour cet effect, par *Polycrate* tyran de *Samos*, lors qu'il commandoit sur la mer: Apres la dedicace faite par les Atheniens, ils ordonnerent vne feste solemnelle tous les cinq ans, à laquelle l'on voyoit assembler tous ceux qui estoient de la lignee des Ioniens, & où l'on s'exerçoit à la course, à la lutte, & à la Musique, & les citez franches y faisoient des dances publiques en l'honneur d'*Apollon*. Il n'estoit loisible de nourrir aucun chien en ceste Isle.

Les Chiois estoient iadis puissans sur la mer, & y ont commandé, s'estans affranchis, & ayans estably entr'eux vne belle communauté, & Republique, comme les plus riches. Mais en fin ils furent contraincts de venir sous la puissance des Atheniens, puis aux Macedoniens, & apres aux Romains, & derechef aux Grecs qui commandoient à Constantinople.

Il naquit en l'Isle de *Metelin* plusieurs grands personnages. Et il semble que ce fut vne pepiniere, tant en Philosophes, que de ceux qui cherchoient les lettres plus agreables, & qui ne requierent pas que l'esprit soit si tendu, *Theophraste* en est sorty, & *Pittaque*, l'un des sept Sages de Grece, comme aussi le Poëte *Alcee*, & *Sappon* la Poëtesse, dont les vers sont encore trouuez si mignards. Elle porta pareillement l'Orateur *Diophante*, & *Theophane* l'Historien, & le grand Poëte, & iouëur de harpe *Arion*, de meisme que *Therpandre* grand Musicien, & Poëte.

Les Lesbiens ont iadis adoré *Bacchus*, à cause, comme dit *Pausanias*, que les pescheurs de *Methymne* ayant tiré de la mer vne teste faite de bois d'oliuier, & voyant qu'elle ressenoit ie ne sçay quoy de grand, quoy que la forme fut estrange & fort esloignée de celle des Dieux de la Grece, allerent demander à la *Pythie*, quel Dieu, ou bien quel Heros estoit representé par ceste teste, & la responce fut, qu'ils honorassent *Bacchus*, surnommé *Cephalenien*.

L'Isle de *Samothrace* fut iadis fort renommee, à cause des ceremonies des Dieux que l'on y obseruoit, veu qu'il y auoit vne escole, où l'on apprenoit tous les sacrifices qu'il falloit offrir à chaque Dieu.

MOEVRS DE CE TEMPS.

Combien que l'on viue presque en toutes ces Isles à la Grecque, toutesfois il ne sera point hors de propos de dire quelques particularitez des mœurs de ceux qui y habitent aujourdhuy.

Premierement il faut sçauoir qu'il y a vn si grand nombre de Corsaires autour de toutes ces Isles,

Isles, que leurs habitans sont contrains d'y prendre garde en ceste sorte. Il n'y a sommet de montagnes aux Isles, où l'on ne mette des gardes du long du iour, afin qu'ils regardent s'ils n'apperceurent point en mer quelques corsaires : car ils iugent aysément de loing si c'est vn vaisseau d'escumeurs ou d'autres. Or ils n'ont si tost descouvert quelque vaisseau de ceste sorte, qu'ils font du feu avec leur fusil, & de iour que le feu ne paroist de guieres loing, ils ont des matieres qui causent beaucoup de fumee, & s'ils y a plusieurs vaisseaux, l'on fait aussi des signals en diuers lieux, & lors tous les ports voisins sont aduertis de la veüe de ces pestes communes, & taschent de s'en donner garde.

Quant à la nuit, le feu est aysé a voir, & pource ils se seruent alors de fanaux, faisant autant de feux qu'ils auront veu de vaisseaux, & les voyageurs appellent la mer nette, lors qu'ils ne voyent point de signal sur ces môtagnes, & au contraire trouble lors qu'ils y en apperçoient.

L'Isle de Pathmos, ou Palmose, est habitée de Chrestiens Grecs, viuans en toute liberté, en payant tribut au Turc, & ayant d'ordinaire des Magistrats Turcs. Le terroir y est cultiué par les Chrestiens, & l'on y voit vn grand nombre de Caloyers.

Les Insulaires de Cos ont vne folle superstition, veu qu'ils disent que l'on y a veu vn serpent de grandeur démesurée, lequel ils tiennent pour vne Fée, disans que c'est la fille d'Hypocrate qui est encore en vie, comme celle qui fut iadis grande Magicienne.

Les Turcs habitent seuls en la ville de Stancou, sans auoir aucun Chrestien qui s'y tienne, non plus qu'en tout autre lieu de l'Isle, excepté en deux villages au plat pays, où l'on souffre que quelques Chrestiens Grecs se tiennent.

En l'Isle de l'Esbons il n'y a que des Turcs qui se tiennent en la ville de Metelin, où d'autres faisoient profession du Mahometisme: mais les Grecs se tiennent aux champs pour cultiuer, & y labourer les vignes.

En l'Isle de Stalimene, ou Lemnos, tous les Grecs s'adonnent au labourage, & viuent là sans crainte qu'aucun les tourmente, estans deliurez de ceste peine par les soldats qui gardent les forteresses. Il y a aussi force Caloyers de mesme qu'en toutes les autres Isles qui sont en la mer Mediteranee.

Quant à l'Isle de Chio, les Turcs ne veulent permettre qu'aucun Chrestien loge dans la ville qui porte mesme nom: combien que l'Euesque de Franques n'ayt laissé d'aller celebrer la Messe en l'Euesché qui est dans la ville, où il y a aussi vn certain lieu, où tous pauures Chrestiens & passagers peuuent loger trois iours & trois nuits, sans qu'il leur en couste rien.

L'on y void prez du fossé leurs sepultures avec de grandes pierres, & banderoles.

A quinze mille ou enuiron de la ville, il y a des casals, ou grandes maisons, où logent cinquante ou soixante paylans, qui ne s'adonnent en certaines saisons, qu'à nourrir des perdrix, & ont l'industrie de les prendre trois iours apres qu'elles sont escluses.


Ils les accoustument si bien à leurs logis, qu'ils les laissent tout le iour aller par la campagne, & pour les faire retourner le soir, chacun s'en va avec vn grain de froment en la bouche, & se couche par terre. Lors les perdrix volans bequeter ce grain, recognoissent chacune son maitre, & ainsi chacun reprend les siennes. Ce qui les rend fort communes, & à bon prix en ceste Isle.

L'ISLE DE CYPRE OV CHYPRE.

SOMMAIRE.

CE discours declare qui ont esté les premiers habitans de ceste Isle, & les Seigneurs qui y ont commandé auparauant qu'elle fut prise par Selim, & reduite au pouuoir du Turc. Quelle est sa situation, son circuit, sa largeur, sa longueur, en quel climat, & sous le quantiesme paralelle. Quels sont ses Caps, ou promontoires. Et come elle fut iadis diuisee en quatre parties, auourd'huy en douze côstrees. Ses principales villes, ses bourgs, ses villages, & ses montagnes. Son terroir abondant en toute sorte de fruiets, & principalement de citrons, limons, oranges, de raisins noirs, nommez Zibiles, de dattes, sucre tiré de cannes, de saffran, coriandre, lentisques, terebinte, coloquinte, rheubarbe, scamonee, mines d'or, chrysocolle, calchante, alun, fer, cuivre, pierres precieuses, esmeraudes, diamans, chrystal, coral blanc & rouge, & la pierre d'Amiante dont on fait de la taille qui ne bruste pas estans mise au feu, ains s'y blanchit, coton, laine, sel. Quel furent les loix & costumes an-

ciennes de ce pays, auquel la paillardise estoit permise, & l'impudicicé loüable: adorans Venus pour Déesse, tutrice & patronne de l'isle. Quelles nations occupent maintenant ceste Isle. Quelle forme de police & gouvernement ils ont tenue sous la domination des Venitiens, & quelle est celle dont ils usent sous les Turcs, auxquels ils obéissent à present.

47  ESTE Isle qui a esté premierement habitee, comme l'on dict, par Iaphet fils de Noë, puis sous la domination des Tyrans Grecs, apres que la Monarchie des Assyriens fut esteinte, tomba apres sous la puissance des Romains, & par leur moyen obeit aux Ptolomes Roys d'Egypte, & lors elle retomba entre les mains des Romains. Apres cela les Empereurs de Constantinople la possederent environ l'espace de huit cens ans. On la vid apres sous des Roys de la maison de Lusignan de France. Depuis elle vint à estre subiette aux Venitiens, l'an 1473. & demeura en leur pouuoir iusques à l'annee 1570. qu'elle fut prise par Selim Empereur des Turcs.

Ceste Isle a esté nommee autrefois Crypte, ou Crypton, à ce que dit Volaterran, c'est à dire, sousterraine, à cause qu'il semble que les flots de la mer la cachent. On l'appelloit aussi Cerastris, à cause du grand nombre de ces montagnes, dont les pointes semblent des cornes. Elle eut aussi le nom de Cethoine, puis d'Amarusie, selon Strabon, & aussi de Phaphie, de mesme que de Salaminie, & de Macarie ou bien-heureuse, d'Amacantis, Asperie, Colinie & Erofe.

Elle est assise, selon Ptolomee au milieu du sein Illique, communément golphe de Lajaze, & est contigue à la mer d'Egypte, & est entre les riuages de Cilice, & de Syrie. Elle regarde du costé du midy la mer d'Egypte, & celle de Syrie: & est aussi bornée du Leuant de la mesme mer du Syrie, & du sein Illique, du Couchant de la mer Pamphylie, & du Nord de Cilice.

La partie qui regarde le Leuant, est esloignée de la Syrie, ou Surie, environ cent mille, qui est vn chemin que l'on peut faire en vne nuit. La partie qui regarde le Midy est esloignée d'Alexandrie de la navigation de trois ou quatre iours, & auant de l'Isle de Rhodes du costé du couchant. Elle est à soixante mille loing de la Cilice, ou Caramanie.

La longueur de ceste Isle est du Ponant au Leuant, & quelquefois elle fait des Istmes, ou destroits de terre aux costez qui determinent sa largeur. Elle est assise au commencement du quatrième climat, sous la dixiesme paralelle, selon les modernes, & son plus grand iour d'Esté est de quatorze heures & demie, ou environ. Elle comprend trois degrez celestes en sa longueur. Son circuit, selon Strabon, est de trois mille quatre cens vingt stades, qui font quatre cens vingt-sept mille. Plin dit que son tour est de trois cens septante cinq mille. Les autres disent que voyageant par mer à l'entour, l'on trouue cinq cens mille pas, & que sa longueur est de deux cens mille, & sa plus grande largeur est de cinquante ou soixante. Mais il y en a encores quelques vns qui luy donnent cinq cens cinquante mille de circuit, deux cens de longueur, & deux cens trente de largeur.

Elle a plusieurs promontoires, ou Caps, comme du Ponant le promontoire Acamas, maintenant Cap de saint Pisane, ou Epifane, le promontoire Drepan, auourd'huy Trapan, ou Melechier: celui de Zephire, maintenant Punta, ou Punte, ou Molota, ou Melonta, ou Cap de Chelidone. Du costé du Midy l'on void le promontoire Phœurie, nommé Cap blanc: celui de Corie, maintenant Cappodeilegatte: celui de Dades, maintenant Cap de Chiti: celui de Throne, maintenant Cap de Pila. Du Leuant on voit le promontoire Pedale, maintenant Capo de Griego, ou Cap de Grec, & au sommet de l'Isle celui de Clides, maintenant le Cap de saint André. Du Nord, on void le promontoire Cromnyon, maintenant Cap de Cormachiti, ou Cornacchiette. Au reste, entre le Cap de Cormachiti, & celui de saint Epifane, l'on void la mer Pamphile, maintenant le Golphe de Settalie, qui estoit autrefois fort dangereux, l'espace de trois cens mille.

Ptolomee nous apprend que ceste Isle estoit iadis diuisee en quatre parties, c'est à sçauoir, en l'Orientale, que l'on donnoit à Salamine, en l'Occidentale que Paue occupoit, en la Meridionale, qui estoit l'Amathusie, & en la Septentrionale qui estoit la Lapathie. Mais auourd'huy elle est diuisee en douze parties, que l'on nomme communément centrees, qui sont, Nicolie, Famagouste, Paphie, Andine, Limisse, Masote, Saline, Massorie, ou Sinori, Crusoc, Pantalie Cerine, & Carpalie.

Diodore, Plin, & Mele, assurent qu'elle contenoit neuf beaux Royaumes & quinze bonnes villes, dont quelques vnes ont esté ruinees par grands tremblemens de terre. Ses principales villes estoient la nouuelle Paphos, en la religion de Paphie. Elle porte encore auourd'huy le titre de ville, & se nomme communément Baphos, selon Niger: l'ancienne Paphos qui estoit en la mesme Prouince: Cythere, qui donna nom à toute l'Isle, & qui n'est plus auourd'huy: mais en son lieu on void la ville de Conuclie, qui est des meilleures de l'Isle. Il y auoit aussi Curias, au lieu où l'on void maintenant la ville de Piscobie, qui est aussi des meilleures, & principales

pales. On y voyoit Amathus , qui est maintenant toute destruite.

Dauantage , la ville de Ceraunie , maintenant Cerines , bastie par Cyrus ainsi qu'il eust subiugué les neuf Roys de l'Isle. Ceste ville est assise en la partie Septentrionale l'Isle Mais Nicotie , qui fut nommée autrefois Lettre , puis Leuocote , & la demeure des Roys , est assise en la plaine de Massare. A trente-six mille de Nicosie l'on void Famagouste , autrefois Salamis , puis Constancienne , ville signalée. Il y en a quelques vns qui tiennent que Famagouste estoit autrefois Tamasse , & quelques autres estiment que c'estoit vne des quatre villes qui auoient le nom commun d'Asinoé.

On compte outre ces villes enuiron huit cens cinquante villages , ou bourgs ouuerts , en mettant toutesfois parmy ce nombre quelques villes ruinees , qu'ils appellent communément Casaux , qui comprennent enuiron cent soixante mille habitans. Il y a beaucoup de ces lieux qui peuuent estre comparez à des villes , tant pour leur grandeur , que pour le nombre du peuple. Les meilleurs sont , Lapitho , Sicuri , saint Iean de Carpesse , Lescara , saint Constantin , Limnati , Silicu , Pellendrie , Chillani , Collosse , Piscopie , Salines , Conuelie , Crime , Arzos , Omodos , Crusoc , Solie , Marfou , & Lesque. Tous les Casaux , ou bourgs estoient diuisez en trois parties , dont la moytié appartenoit à la Chambre du Roy , & le reste en partie à l'Estat Ecclesiastique , & en partie aux nobles laiz.

Il y a plusieurs montagnes en ceste Isle , mais celle d'Olympe est la plus haute de toutes. Les Grecs l'appellent Trohodos , & elle a de tour dixhuit lieues. On y void par tout force Monastères de Caloyers Grecs , de l'ordre de S. Basile.

QUALITE.

Toute ceste Isle a esté iadis si pleine de bois , qu'on ne la pouuoit cultiuer , & combien que les habitans eussent consommé vne grande partie de ce bois à fondre les metaux , & faire des Nauires , toutesfois ils ne pouuoient guieres descouurir la terre , tant de bois poussoit tousiours. En fin ils ordonnerent que ceux qui voudroient couper des arbres , le pourroient faire , & que chacun possederait comme propre les champs qu'il auroit descouuert & nettoyez. Strabon dit que l'Isle de Cypre ne cedit de son temps à aucune autre , veu qu'elle portoit du vin & de l'huyle en abondance , & auoit assez de froment pour la nourriture de ses habitans. Or elle est maintenant fertile au possible , & abonde de tout ce qui est necessaire à la vie humaine : Car outre la grande quantité de froment & d'autres grains , & fruiets de la terre qu'elle porte , elle produit de fort excellent vin , que l'on garde iusqu'à quatre vingts ans , & dans ce temps , de noirs ils deviennent blancs , & sont de bonne odeur , & d'un goust du tout agreable.

On emporte de Cypre ce beau & grand raisin noir , qu'on nomme communément Zibile , & on a accoustumé d'y cueillir toute sorte de fruiets qu'on a ailleurs , & principalement les limons , citrons , & oranges , qui surpassent en goust ceux des autres pays. Elle ne porte pas des chastaignes , des cormes , ny des eerises : mais elle produict force dattes , & du sucre qu'on tire des cannes , le safran , la coriandre , & la lentisque. Et outre les herbes communes , elle a des sebues d'Egypte , ou Colocasies , & autres herbes qui sôt de fort bon goust. Il y a du miel qui est excellent & blanc , & du sucre qui est noir , & est nommé vulgairement Melazzo. Ce pays porte aussi beaucoup de choses medecinales , comme la terebinte , la coloquinte , la rhubarbe , la scamonee & choies semblables , comme aussi vne herbe , des cendres de laquelle on fait du saun. Elle a aussi quantité de mines d'or , de Chrysocole , de calchante , d'alun de fer , & de laton : mais elle a plus d'airain que d'autre chose. Elle produict aussi quelques pierres pretieuses , comme l'éméraude , le diamant , le crystal , le corail blanc & rouge , & la pierre d'amiante , dont on fait de la toile qui ne brulle pas estant mise au feu , ains s'y blanchit. Les habitans tirent aussi de grandes commoditez de leur coton , de la laine qu'ils ont en grande quantité , & le poil de leurs cheures , dont ils font des camelots. Ils tirent aussi force sel d'un lac qui n'est guieres loing de la mer , qui a douze mille de circuit , & dans lequel il tombe vne petite riuere qui descend du mont Olympe. Ceux qui demeurent en ceste Isle sentent vne fort grande chaleur , pource qu'elle est assise au trente-cinquiesme degré ou enuiron de hauteur Boreale , à raison dequoy le Soleil n'est guieres elloigné d'eux , lors qu'il est au Tropique d'Esté , ou de l'Ecreuisse. Toutesfois le Nord souffle fort au bourg de Cerines , & adoucit grandement ceste incommodité par le rafraichissement qu'il apporte au gros de l'ardeur : & l'air est fort subtil aux montagnes.

Son air est plus souuēt mal sain & desagreable , à cause des estangs qui poussent de mauuaises

vapeurs. Il n'y a point de riuieres, ains seulement s'il le faut ainsi dire, de torrens, qui venans à ce tarir, laissent les habitans avec vn grand deffaut d'eau, qui est peut estre la plus grande incommodité qui puisse arriuer à ceux de Cypre. On rapporte qu'avant le temps du grand Constantin ceste Isle fut abandonnee par ses habitans l'espace de 36. années, durant lesquelles on n'y vid iamais pleuvoir. Il n'y a qu'un port propre pour l'abord des nauires pres de Famagouste. Il est vray qu'il y en auoit autrefois plusieurs, mais ils sont maintenant remplis à cause de l'impetuosité de la mer.

MOEVRS ANCIENNES.

CESTE Isle a esté iadis en grande reputation, pource que combien que les Poëtes ayent faict naistre Venus de l'escume de la mer : toutesfois la commune opinion estoit, qu'elle auoit pris naissance en l'Isle de Cypre. Et de faict, l'on croit que ceste belle Deesse d'amour fut iadis Dame de ce pays, & que pour couvrir son impudicité, elle ordōna que les femmes y pourroient paillarder sans aucune crainte. Ce fut aussi de là que vint la coustume, que les filles de Cypre auant que prendre mary, venoient à certains iours sur le bord de la mer, pour se presenter au premier estrāger qui vouldroit iouyr pour son argent, & avec ceste sorte de gain elles assembloient quelque somme pour payer leur dōuaire, & satisfaire à la Deesse Venus pour le raiuissement de leur honneur. Dauantage les Cypriots auoient appris les cruelles façons des Barbares de l'Asie, veu que Teucer leur ayant enseigné d'immoler les hommes, & d'espandre le sang humain, en adorant le Diable sous le nom de Iupiter, ils continuerent iusques à ce que l'Empereur Adrian en abolit la coustume.

Les Roys de ceste Isle portoient autrefois des habillemens de teste faicts comme des mythres de nos Euesques, à la façon des Roys de Perse, auoient leurs robbes longues, ainsi qu'on les void porter auourd'huy aux Turcs : & quant au reste, ils viuoient à la Grecque. Les habitans ont esté iadis si riches, & puissans, qu'ils ont enuoyé des colonies en diuers lieux, & ont assez longuement commandé sur toute la mer Mediteranee, & basti plusieurs villes en Espagne.

MOEVRS DE CE TEMPS.

LES habitans de ceste Isle sont ciuils, & viuent splendidement, & delicieusement. Ils portent de l'affection aux Estrangers, & les traittent avec vne grande courtoisie. Ils sont vaillans & nez à la guerre, robustes tout ce qui se peut, merueilleusement dispos, mais du tout subiects à la melancholie.

Ceux qui s'y tiennent sont de diuerses nations : toutesfois l'on y void beaucoup plus de Grecs que d'autres. La plus grande partie de ces habitans vindrent en ceste Isle au temps du grand Constantin, d'Egypte, de Iudee, de Syrie, de Cilice, de Cappadoce, de Pamphylic, de Thrace, & de plusieurs endroits de la Grece : apres que l'Isle eut esté abandonnee à cause du deffaut de l'eau. Mais pour le regard des gentils-hommes de Cypre, ils sont pour la plus grande partie sortis de France : car apres la perte de la Terre sainte, il y eut beaucoup de François qui se retirerent en ceste Isle avec le Roy Guy de Lusignan, enuiron l'an 1163. Mais depuis que les Venitiens en deuiendrent maistres, non seulement les nobles de Venise qui demeuroient en Cypre estoient recognus pour gentilshommes de ceste Isle : Mais encore tous les citoyens des terres de la Seigneurie de Venise, deuenoient gentilshommes Cypriots, lors qu'ils s'estoient tenus cinq ans en la ville de Nicosie.

Il y a dans ceste Isle, comme en toutes les autres, des mœurs meslees, veu que quelques vns y viuent à la Venitienne, n'ayans oublié leurs mœurs anciennes : les autres qui sont Turcs viuent à la Turque, & peu à peu tous commencent à s'accoustumer aux façons de faire de ceux qui leur commandent.

GOVERNEMENT.

TOUS les Cypriots qui demeurent hors des villes, sont diuisez en cinq diuerses conditions, c'est à sçauoir en Parices, Leiffteres, Perpiaires, Albanois & Venitiens blancs. La condition des Pariciens estoit la plus miserable, d'autant qu'ils estoient traitez comme esclaués : car ils payoient iadis certaines sommes à leurs maistres toutes les années, & supportoient d'autres charges fort fascheuses : veu qu'ils doiuent deux coruees chacune d'un iour enuier à leurs Seigneurs, toutes les sepmaines, & outre ce leur donnoient la

troisième

troisième partie de tous les fruits de la terre. Ces Seigneurs avoient tout pouvoir sur eux, tellement qu'ils les pouvoient emprisonner, bannir, battre à coups de baston, & les tourmenter: bref ils en pouvoient faire tout ce que bon sembloit, excepté qu'il leur estoit défendu de les mettre à mort: car le Roy seul avoit ceste autorité: mais il leur estoit permis de les vendre, & de les changer, & les pouvoient aussi se racheter pour le prix de soixante escus ou environ. Toutesfois leurs fonds demeuroient Parices, c'est à dire, obligez à leurs Seigneurs avec la mesme condition. Ceux qui s'estoient affranchis en ceste sorte, se nommoient Leiffteres, c'est à dire, libres: & leurs enfans estoient de mesme condition que les Peres, exceptez ceux qu'ils avoient engendrez avant leur delivrance, veu que ceux-cy sont tenus pour Parices.

Les Leiffteres payoient la cinq ou sixième partie des fruits qu'ils avoient recueillis. Au reste il estoit défendu aux Leiffteres de se joindre par mariage avec les Princes, pource que les enfans qui naissoient de tels mariages, estoient tenus pour Parices.

Les Perpiaries sont quelques-uns d'entre les Parices, qui obtindrent la liberté du temps des Roys de Cypre avec tous leurs enfans, & successeurs, à condition toutesfois de payer toutes les années quinze Perpirs, qui sont certaines pieces de monnoye de Constantinople: mais les fonds de ceux-cy demeurent subiects comme auparavant.

Les Albanois sont certains peuples recevant solde, qui furent autresfois mis en ceste Isle pour la garder, & ceux cy engendrerent en Cypre des enfans qui reçoivent la solde aussi bien que ceux qui portoient les armes, jusques à ce que ceste Isle eut esté prise par les Turcs.

Les blancs Venitiens sont certains habitans de l'Isle qui estoient libres, tant eux que leurs enfans, en payant seulement aux Roys, ou bien à la Republique de Venise quelque somme d'argent.

Ceste Isle vint à estre subiecte aux Venitiens l'an 1473. & demeura en cest estat jusques à l'an 1570. qu'elle fut prise par Solin Empereur des Turcs.

Pour le gouvernement dont le Turc y use, nous en parlerons au discours general de la police de son Empire.

RELIGION.

Il y a eu autresfois quatorze Eueschez en ceste Isle, qui estoient toutes Grecques. Mais elles furent reduites à quatre par le Pape Innocent III. en faueur de la Reine Alix. Il laissa donc l'Archeuesché de Nicosie double, l'une Grecque, & l'autre Latine, l'Euesché de Famagouste pareillement double: l'Euesché de Paphos aussi double, de mesme que celle de Limisse.

Or ces Eueschez Latines ont leurs bourgs, & leurs decimes: mais les Euesques Grecs exigeoient tous les ans certaine somme des Prestres & Diacres qui leurs estoient subiects à la façon des Prelats Grecs des autres provinces.

Les Archeuesques, & Euesques Grecs recognoissoient les Euesques Latins pour les superieurs, voire en telle sorte qu'apres que les Grecs avoient esté esleuz Euesques par le Conseil du Roy, ils estoient confirmez par les Euesques Latins, & quand il y avoit quelque procez pardevant les Euesques, on appelloit des Grecs aux Latins.

Les Euesques Grecs ne demouroient pas aux villes cy-dessus mentionnees, ains le Pape Alexandre 4. leur assigna d'autres sieges, comme on lit en sa Somme Alexandrine. Car l'Archeuesque Grec de Nicosie avoit son siege en l'ancienne ville de Solie, & se nommoit Euesque de Solie, & conducteur, ou chef du peuple Grec de Nicosie: l'Euesque de Paphos se tenoit en la ville d'Arzos: celui de Limisse eut pour sa demeure Amathonte: mais pource que ceste ville n'estoit habitee, il se tenoit en la ville de Lescare. Finalement l'Euesque de Famagouste faisoit sa residence à Capasse, toutesfois avec le temps ils sont retournez aux susdictes villes, excepté l'Euesque de Limisse, qui est demeuré tousiours à Lescare. Il ne faut taire aussi que l'Archeuesque Latin de Nicosie, qui s'appelloit Archeuesque de Cypre, ne recognoissoit aucun Patriarche, ains dependoit immediatement du Pape: à raison dequoy l'on nommoit Primat du Royaume, & Legat né du saint siege. Mais il faut sçavoir qu'apres cela sous le Pape Pie 4. les Seigneurs Venitiens deindrent patrons de cest Archeuesché, & vouloient eslire quatre hommes l'un desquels estoit nommé Archeuesque par le Pape.


Outre les Eglises Grecques & Latines, il y a encor d'autres sectes en ceste Isle, comme des Armeniens, Cofres, Maronites, Indiens, Nestoriens, Georgiens & Iacobites, qui furent toutes chassées par Saladin apres la prise de Jerusalem, & chacune de tes sectes à son Euesque.

Les Turcs y laissent viure vn chacun en sa liberté de conscience, de mesme qu'aux autres pays où ils dominent, veu qu'ils ne demandent rien que la Seigneurie, & le paiement du tribut qu'ils exigent toutes les années.

L'ISLE DE RHODES

SOMMAIRE.

L'Isle de Rhodes anciennement appelée de divers noms : & renommée pour son Colosse d'airain d'énorme hauteur. Quelle est sa situation, & combien comprend de mille. Sa célèbre ville de Rhodes, fortifiée, & munie de trois ceintures de murailles, ses treize tours, & cinq châteaux : donnée par l'Empereur de Constantinople aux Chevaliers de Saint Jean, & à présent occupée par les Turcs. Fort sujette aux débordemens d'eaux. Abondance en pasturage, orangers, citronniers, oliviers. L'ancienne valeur & puissance de ces Insulaires, esprouvée par les Grecs & Romains. Leurs loix touchant les charges & affaires publiques. Addonnez à l'exercice des sciences. Arts liberaux, à la Magie & Sorcellerie. Immolans à Saturne les hommes. Les habitans de ceste Isle pour le present estans Turcs, Juifs & Chrestiens Grecs, vivant chacun selon sa loy.

48  **C**ESTE Isle fut jadis nommée Ophinsé, Asterie, Etheree, Trinachie, Corymbie, Pœesse, Atabirie puis Macarie, & Colosse, à cause du grand Colosse qu'on y voyoit, qui fut mis entre les sept merveilles du monde. Il estoit tout d'airain, & avoit le pouce de la main si gros qu'il n'y avoit personne qui le peut embrasser avec les deux bras. On a laissé par escrit qu'il avoit 70. coudées de hauteur. Les Egyptiens le mirent en pieces, & en chargerent neuf cens chameaux.

Elle est esloignée de 20 mille de la terre ferme d'Asie, & comprend environ 140. ou selon les autres 35. mille.

Il n'y a maintenant qu'une bonne ville, qui se nomme Rhodes, de mesme que l'Isle, ainsi qu'elle faisoit anciennement. Elle est exposée au Soleil Levant, & assise partie sur vn costau, partie pres le rivage de la mer. Il y a trois ceintures de murailles, treize tours fort hautes, cinq Châteaux, & quelques autres fortresses, qui la rendent comme imprenable.

Ceste ville a esté jadis fort renommée, & beaucoup plus anciennement que sous les Chevaliers de saint Jean de Jerusalem, & qu'elle n'est aujourdhuy sous les Turcs. Car apres que les Chrestiens eurent esté depossédez de la terre Sainte, ceste ville avec l'Isle entière fut donnée par l'Empereur de Constantinople aux Chevaliers de saint Jean, l'an 1308.

Mais l'an 1522. Solyman Empereur des Turcs s'en rendit maistre, ayant pris la ville par composition, qui fut telle que les Chevaliers sortirent de l'Isle en pleine liberté, & les habitans du pays demeurèrent s'ils voulurent.

Toutes les maisons des Chevaliers de Rhodes y sont encore aujourdhuy entieres, avec les armoiries, peintures, sculptures, & inscriptions, que les Turcs ont conseruees.

QUALITE.

PRES de la ville de Rhodes on void vne plaine du costé du Nord (car l'autre est montueux) qui est pierreuse, & peu large : mais elle a assez de longueur, & l'on void plusieurs vallons, & collines proche de la ville, avec vn grand nombre de vignes, & d'arbres fructiers, qui y viennent par Art, & industrie des hommes, veu que le naturel du lieu ne porte pas telles choses.

Ceste Isle a esté fort sujette au débordement des eaux : mais on a tasché de faire escouler les eaux, & desseicher les marais : tellement que le pays a esté rendu fertile, & non plus si sujette à telles inondations, dont elle a esté affligée, principalement par trois fois ; La dernière aduint apres que le Roy Antigone eut vaincu Eumene, & ce fut alors que toute l'Isle fut couverte d'eau, & que tous les habitans furent noyez. Cecy n'aduint pas par vn débordement de la mer, mais par des orages & pluies fort estranges, qui commençant par gresle sur le beau commencement du Printemps furent si impetueuses qu'abbatant plusieurs maisons, & tuant grand nombre de personnes, qu'il s'en fallut de bien peu que la ville qui estoit basse ne fut ruinée entièrement par ce ravage.

Mais

Mais pour dire encor quelque chose de la bonté de ceste Isle en general elle abonde en pasturages, & produit vne grande quantité d'orangers, de citronniers, d'oliviers, & autres arbres qui gardent perpetuellement leur verdure.

MOEVRS ANCIENNES.

Les victoires que les Romains ont eues par le moyen des armées Nauales des Rhodiens, & la courageuse defence des mesmes Insulaires contre les Romains avant qu'ils fussent rangez sous la domination, peut assez faire cognoistre combien ce peuple estoit vaillant, & né aux armes.

Les Rhodiots ont aussi furieusement combattu contre Cassie. Mais aussi long temps auparavant ils vserent diuersement de leurs forces, tantost pour les Lacedemoniens contre les Atheniens, tantost pour les derniers contre les autres, selon le party qu'on leur faisoit. Car c'estoit vn peuple qui estoit libre, & dont l'on mendoit le secours, comme on fait auourd'huy celuy des Suisses.

Il faisoit suuant vne ancienne loy que les riches soustinsissent les charges des plus petits,

Il y auoit aussi des hommes destinez aux œuvres du public, qui fournissoient des viures à ceux qui travailloient, & prenoient garde que rien ne manquast de ce qui estoit necessaire, & principalement en ce qui concernoit le fait de la marine.

D'auantage il y auoit quelques secrets en leur Arcenal, qui n'estoit loisible à aucun de regarder, & si quelqu'un estoit si hardy que d'y ietter l'œil dessus, ou d'y entrer, il estoit soudain condamné à perdre la vie.

La ville de Rhodes fut louée pour les sciences & arts liberaux qui y florissoient, tellement que les Romains mesmes y enuyoient leurs enfans pour apprendre les bonnes lettres.

Les Rhodiens n'auoient si grande douceur en leur langage que ceux du pays d'Attique, & ressentoient trop tout ensemble la rudesse des paroles de leurs voisins, & le trop du babil des Aiatiques.

Les habitans de ceste Isle, quoy que fort civilisez, immoloient, comme dict Eusebe, vn homme à Saturne toutes les années.

Ils estoient au commencement grands forciers, & si dangereux, qu'avec l'infusion de certaine eau charmee ils gastoient les semences, & faisoient mourir les bestes. Ils estoient grands escrimeurs, subtils artisans, de gentil esprit, & remplis de belles inuentions.

MOEVRS DE CE TEMPS.

La ville est habitee des Turcs qui vivent à la mode de leur nation, & de Iuifs qui y sont allez d'Espagne. Mais quant aux Chrestiens ils ne peuvent y demeurer la nuit, d'autant que les Turcs les ioupponnent, & ont peur de quelque sedition ou trahison. Durant le iour il leur est permis d'y demeurer tant que bon leur semble, sans qu'on le trouue mauuais.

Ceux qui demeurent aux villages sont pour la plus grande partie Chrestiens Grecs qui cultivent les vignes & les iardins, & labourent les terres. Ceux-cy vivent presque entierement à la façon des autres Grecs.

DES ISLES DV PROPONTIDE, APPELLEES DES MODERNES DE MARMORA.



Le Propontide est proprement la mer de Constantinople, dans laquelle coule l'eau de la mer Noire & se va rendre en l'Archipelago, c'est ce que l'on appelle l'Helespont de Thrace ou de Grece separant l'Europe d'avec l'Asie: il y a plusieurs Isles en cette mer, dont les plus celebres sont.

Poodon fort agreable & plaisante, distante de huit mille de Constantinople, & tellement belle, qu'on ne la peut considerer sans estre conuicé à l'amour, ou à la solitude. Sur le sommet d'une montagne de ceste Isle il y a vn petit Conuent de Religieux Grecs, qu'ils nomment Caloiera avec son Eglise, & au dessous tirant vers le riuage se voyent les ruines de grands bains antiques, avec des escaliers tout autour, en forme

d'amphitheatre, & plusieurs autres masures de vieux Palais, qui font cognoistre que le lieu fut autrefois bien accommodé.

L'Isle du Prince est scituee au Solphe de Nicomedie à huit mille de l'Isle Pordon, elle est assez grande, peuplée de Grecs, & bien fertile, y ayant de bōs villages, quantité de vignes, bois & prairies au riuage de la mer.

L'Isle de saint André est à la bouche dudit Golphe, elle estoit jadis appelée Besbiens, accompagnée de deux autres petites Isles inhabitées de personnes : mais neantmoins cultivées & tenues en valeur par le peuple de Miquaquous, qui est vn grand bourg de terre ferme au bord de la mer, sur le penchant d'vne coste à main gauche, entrant dans le Goulphe, il est habité de Grecs, de peu de Turcs, & de quelques Juifs, & les Chrestiens Latins y font le plus petit nombre, & neantmoins y ont vne Chappelle desservie par vn Cordelier Observantin de Galata. Quant au pays, il est montueux, mais grand & abondant en toute sorte de biens, sur tout y croist quantité de vins blancs excellents, qui se portent à Constantinople, à Bursa, & autres villes voisines.

Vis à vis de l'Isle de Tenedoc au fond du Goulphe se voyent les ruines d'vne ville que ceux du pays disent avoir esté Troye la Grande, & du bord dudit Goulphe y a vn escueil sur lequel est vne petite Chappelle, où de là on passe en terre ferme, où tout à l'instant dudit riuage se void vne vieille muraille faicte de brique, de marbre & de ciment, large de quinze pas, & tire trois mille de long, depuis le bord du Goulphe iusques au fond de celui d'Aidmo, à cet endroit viennent à se rencontrer comme deux cornes de croissant, qui font vne peninsule de tout le pays d'entre-deux, qui ne tient à terre ferme que par ce destroit, clos & fermé de ceste muraille, & lequel destroit à ce qu'on dit estoit jadis coupé par vne grande fosse, qui joignant les bornes des deux Golphe, faisoit vne Isle de cette terre : mais par succession de temps s'y estant accueilly du sable, la fosse s'est remplie, & le terroir remis en son premier estat de Peninsule.

Au milieu de ladite muraille se void vne grosse tour quarrée, & vn portail fort haut, que les Grecs du pays nomment Porteser, tenans d'vne commune opinion, que là estoit l'vne des principales portes de Troye la grande, nommée Seu : à main droite estoit bastie ladite ville sur des hautes montagnes qui se voyent toutes blanches de ruines, parmy lesquelles restent encore sur pieds des pans de murs & de Tours entre des monceaux de marbre admirables, & qui signalent en leur desolation la splendeur & la gloire du passé. Ayant cheminé environ vne lieue Françoisse entre la muraille susdite & la ville, au trauers d'vne forest de fenouils & de lauriers creus parmy les masures, on trouue le Palais de Priam ancien Roy de Troye, ainsi ce lieu est appelé du vulgaire : son assiette est à la pointe d'vne colline ronde assez eminente, regardant à son pied vers Tramontane, vn beau & plaisant valon avec vn lac entouré de prairies, & borné d'vn costé de montagnes, couuertes & reuestuës d'arbres, où la veüe venant à se soutenir, faict vne agreable perspective, du costé de Leuant, il a le Golphe de Palerme, & au Ponent celui d'Aidmo, ayant derriere soy au Midy ces montagnes où estoit ladite ville de Troye la grande.

Quant à l'edifice dudit Palais de Priam, il n'en paroist plus rien qu'vn comble de pierre de marbre noir, taillées & elaborees bien artillement, & quasi encore toutes entieres, & de grosseur merueilleuse, avec vn debris de statues & colonnes deplorables. Ceste quantité de marbre se prenoit anciennement dans l'Isle de Marmora, & autres lieux voisins, elloignez seulement de huit à dix mille de là.

Dessous les ruines susdictes, dedans la terre, se void vn bastiment encore bon & sain, & dont les materiaux sont si bien liez que rien ne s'y desvint sinon en quelques endroits où les pierres ont esté leuees pour s'en servir. Ce sont de grandes voûtes bien faictes, entrelassées les vnes dans les autres, comme les rues d'vne ville, estendues des deux costez vers les deux Golphes, esquels il y avoit anciennement de beaux ports : descendant là dedans avec la lumiere, car on n'y peut aller autrement, on y trouue vne belle fontaine, dont l'eau est si fraische, qu'à peine en peut on goster. Il y a quelques annes qu'il y avoit quantité d'ouuriers là dedans qui en tiroient les plus belles pierres de marbre pour le sepulchre que le grand Seigneur Amet faisoit faire à Constantinople, en l'honneur de Sultan Mahomet son pere. Sur la cime d'vne montagne du mesme lieu, reste encore toute l'enceinte des murs d'vn vieux Chasteau.

Au bas du susdit Palais de Priam se void encore vn vieil Temple, dont la croupe & la moitié de la closture sont encores entieres.

Près ce vieil Temple, au milieu d'vne place ronde & creusée vn peu dans terre, il y a vne fontaine environnée de grands arbres, dont les branchages espais & feuillus seruent comme de gardiens à ce frais séjour des Nymphes, pour empescher que les brillans regards d'Apollon ne souillent la couche de leurs froides chastetez.

En la

En la coste de Grece est le fort Syrdocastro, nomnié des Turcs Zemchie, basti en Grece au faiste d'un petit Cap, sous lequel il y a un assez bon port : On tient que c'est le premier fort que les Turcs ayent eu en Europe, lequel Amurath IV. Empereur fit construire pour la seureté du passage de ses troupes qu'il traïssoit d'Asie en Europe.

A l'entree de l'Helespont sont bastis deux forts Chasteaux appelez les clefs de Constantinople : l'un basti en Asie, l'autre en Europe, & separez de trois mille l'un de l'autre, de la largeur du Canal qui les diuise : ils sont entre les mains d'une forte & seure garde, & construits exprès en ces deux endroits, à ce qu'aucun vaisseau ne les puisse outrepasser, & s'auoïner de Constantinople plus près de deux cents mille, que ce ne soit avec licence & consentement de ceux qui commandent esdites deux places, autrement s'ils se vouloient hazarder de passer sans rendre ce deuoir, on les mettroit à fonds à coups de canon, y en ayant là suffisante quantité braquez & flanquez à fleur d'eau pour cet effect. Ledsits deux Chasteaux sont ceux qu'on appelloit anciennement Lesbos & Abydos : Celuy de Natolie est assis en plaine rase & esgale sur la rive de la mer, ayant derriere & aux costez, qui ne sont battus de la mer des murets qui le rendent assez fort : sa forme est carree, & y a trois tours à chaque face, & dans son enclos un donjon. L'autre, que les anciens appelloient Sestos, est dans la Chersonese Prouince d'Europe sur le bord de la mer, & au pied d'une haute montagne qui le commande, & le couure : tout son bourg est à mont la coste, plus grand, plus beau, & meilleur que celuy de Natolie. Tous vaisseaux en entrans sont tenus de les saluer, ce qui se faict en baissant la principale voile, pliant & despliant l'estendard par trois fois, & tirans quelques volees de canon : Au sortir il faut qu'ils jettent le fer, & qu'ils demeurent là iusques à ce que ceux de la place ayent faict la visite.

Au delà de Tenedos, à main droïte est l'Isle de Stalimini, jadis appelee Lemnos, où les Princes de Grece firent jadis leur festin & protestation pour s'en aller assieger Troye. J'ay parlé de ceste Isle cy-dessus, descriuant celles de l'Archipelague : Il ne reste rien d'en dire, sinon qu'en icelle se prend la terre sigilee, & se faict l'ouuerture de la veine une fois l'an seulement, le sixiesme iour d'Aoust en grande ceremonie : Tous les Religieux & aloyers du mont Athos avec le Patriarche des Grecs y vont en procession, suivis du peuple des Isles voisines qui y abordent de toutes les costes de l'Archipelague.

LA BOSSINE, LA BVLGARIE, SERVIE, RASCIE, ET CE QUE LE TURC POSSEDE EN HONGRIE.

LA Bossine, ou Bosne est un pais d'Illyrie nommé Dardanie par Orose, & par quelques autres haute Messie. Elle prend son nom de la riuere de Bosne, qui se delcharge dans le Saue. Tout ce pais est diuisé en deux parties, dont l'une s'appelle le Royaume de Bosne, l'autre la Duché. Il est assis entre le Danou & l'Esclauonie. 49

Le Royaume de Bosne occupoit le bas pais, & sa Capitale place estoit Couadze, ou Iaieze, assise au sommet d'une montagne entre deux riuieres, avec un Chasteau imprenable. Le Turc se rendit maistre de ce Royaume l'an 1464. & fit escorcher le Roy de Bosne nommé Etienne, qui estoit aussi Despote de Rascie, & de Seruie.

La Duché de Bosne occupoit le haut pais voisin des Ragousois, & le Duc s'appelloit aussi Duc de saint Sabe, ou d'Herzegouine, ou de la Montagne noire. Ceste Duché paruint aussi entre les mains des Turcs la mesme année 1464. Tellement que toute la Bossine n'est auourd'hui qu'un Gouuernement. La demeure du Beglierbie est à Bagnialuque. Il y a encor les lieux de Boschegue, Clisso, Herzogoune, Like, Sazsichne, Isuornik, Cifrem, & Allatchiachissar.

La Seruie, que beaucoup de gens prennent pour l'ancien pais de Tribales, & la haute Messie, est assise entre les Royaumes de Bosne, & la Bulgarie. La ville principale de Seruie estoit Sanderomie, que quelques-uns nomment Spenderobe, les autres Simandrie, ou Simandrie, les Turcs ou Semonder, & les Hongrois Zendrem. Ceste place est assez proche de Belgrade sur le riuage du Danon, ou Danube. Elle fut prise par Amurat Empereur des Turcs, l'an 1438. Vous auez aussi Prisdens, où l'Empereur Iustinien prit naissance.

Les autres meilleures villes de ce pais sont Vidine, nommee par les Turcs Kiratouu, assise près du mont Argentaire, puis Nouogarde, qui est aux frontieres de Seruie, & que quelques-uns appellent mal à propos Nouveau Mont, & apres le Mont-noir.

La Bulgarie, comme qui diroit Vulgarie, est ainsi nommee de certains peuples, qui estans partis d'auprés de la Volgue enuiron l'an 666, s'emparerent de ce pais qu'on pense estre la basse Messie des anciens. Elle est assise entre la Seruie, la Romanie, & le Danub. Sa principale ville c'est Sofie, que Niger prend pour la ville de Tibisque de Ptolomee. Elle est assise en lieu fort commode, & est grande & bien peulee, mais nullement forte. Il y a encore Nicopolo, que les Turcs nomment Nigeboli.

La Rásie est entre la riuere de Termes, & le Danube. Ses principales places sont Zarsonie, Crusoueccie, Couin, Nouebarde, Seuerin, Calambes, Colombette Bodo. Ce pais eust autrefois vn Despote particulier, qui fut depossédé par Amurath.

Le Turc possède encor en Beslarabie, qu'on tient pour vne des prouinces de Meldanie, les villes de Kilim, Bermen, ou Moncastre, où se tient vn Sagiac sujet au Beglierbei de la Grece. Ces villes furent prises par le Turc avec le pais l'an 1485.

QUALITE.

LE Royaume de Bosne est plein de montagnes fort aspres, & de peu de rapport. Tout l'aduantage qu'il a en cecy, c'est qu'elles rendent le pais plus fort. Il y a aussi des mines d'argent, qu'on y trouue en grande abondance. On tire aussi de ce pais des meilleurs faucons qu'on voye.

La Bulgnarie est pour la plus grande partie aussi pleine de montagnes & s'estendant tantost vers le Danon, tantost vers le Danube, tantost la Romanie, à son pais du milieu plus aspre que le reste. Et combien que les lieux plus bas contiennent quelques plaines & vallees, toutesfois la plus grande partie est couuverte de forests fort espais, ou bien ces plaines sont toutes desertes. Aussi ce fut ce qui consuma l'armée de Ladislas Roy de Pologne.

La Seruie, & Raicie sont de meisme nature : mais la Seruie surpasse les autres en ce qu'elle a des mines d'or, & est semblable la Bossine, à cause de celles d'argent.

Et quant au pais que le Turc possède en Hongrie, nous parlerons de sa qualité, lors que nous ferons particuliere mention de ce Royaume.

MOEURS.

LEs façons de faire de ceux-cy sont semblables à celles des Esclauons, que nous auons ja descrites pour la plus grande partie. Ils se sentent aussi quelque peu du voisinage des Polonois. Et ces nations sont presque toutes addonnees au vin, fort rustiques & grossieres. Il ne se faut guieres asseurer sur leur parole, pour ce que ce sont gens qui faillent leur foy pour peu de chose. Ils sont nez à supporter toutes sortes de peine & de fatigue, & ne se laissent pas aytément accabler au trauail. Mais il n'y a rien de plus fascheux que leur conuersation.

Ils sont plains de courage, & non de vaillance, pour ce que leur resolution part d'une brutalité qui est en eux, plustost que des choses qui font qu'on donne à vn homme la qualité de vaillant.

DES ESTATS ET TERRES QUE LE TVRC POSSEDE EN ASIE.

SOMMAIRE.

- | | |
|------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|-------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| <p>1 A P R E s auoir descrit toutes les prouinces & pays que le Turc possède en Europe : il conuient maintenant voir les terres qu'il occupe en Asie, auant qu'entrer au discours separé par l'Auteur faict cy-apres des Turcs en general, monstrant quelles sont leurs mœurs, richesses, forces, Gouvernement & Religion.</p> <p>2 Il commence donc la description par l'Asie mineure, qu'on appelle auioird'huy Natolie, ou haute Turquie, qui contiens plusieurs prouinces, & declare ses bornes, sous quel cl'mat, en quel paralelle, & quelle est la largeur de tout ce pays.</p> <p>3 Particuliere description des prouinces de la haute Turquie, & premierement du Pont & Bithynie iadis separées, leurs bornes, & villes principales.</p> <p>4 L'Asie, ses bornes & villes principales.</p> <p>5 La Phrygie, haute & basse, où se voyent encor</p> | <p>les ruines de la grande ville de Troie.</p> <p>6 La Carie, Mysie, Ionie, Doride, Lydie, Lycie : leurs limites & villes.</p> <p>7 La Galace ou Gaulegrece, ses bornes & son estendue.</p> <p>8 Pamphlie.</p> <p>9 Cappadoce.</p> <p>10 La Cilice.</p> <p>11 La basse Armenie.</p> <p>12 Turcomanie.</p> <p>13 La Georgie.</p> <p>14 L'Arabie diuisee en Deserte & Petree.</p> <p>15 L'Arabie heureuse, sa figure & ses meilleures villes, entre lesquelles est la Meque, ville en laquelle Mahomet est né.</p> <p>16 Idumee.</p> <p>17 La Syrie diuisee en cinq prouinces, desquelles la premiere est la Palestine.</p> |
|------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|-------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|

17 Me-

- 17 *Mesopotamie ou D'arben.*
 18 *Quelle est la qualité & bonté de l'air, & terroir des diverses provinces, & en quelles choses elles abondent: & sont en premier lieu remarquables les grandes & belles rivières de Natolie, les bords de Bythinie propres à faire nautes, la pierre Sinnadique semblable à l'Albâtre de l'Asie: les eaux chaudes de Hierapolis qui se pétrifient: la pierre d'Aimant de la Carie. Le vermillon de l'ionie. Le sablon d'or des rivières de Lydie, & le safran de l'ionie. Les trouffes d'animaux du Mont-Chimere en Lycie, le sommet duquel est habité des Lyons, le milieu des cheures, le bas de serpens. Les vins, fruits, métaux, argent, cuivre, fer, alun, crystal, jaspes, onix, albâtre, chaux, abeilles de deux sortes de la Cappadoce. Les cedres du mont Aman, & les forêts de myrtes en Cilice: & les loups nommez Squilque: Les dattes, la manne, le corail, & la pierre d'Amethyste de l'Arabie Petree. Les Palmiers, le nard, la casse, la canelle, la myrrhe, l'encens de l'Arabie heureuse. Les roses, les melons, citrons, Oliviers, figuiers, grenades, vignes portant trois fois l'an raisins de la Palestine. Le baume, l'Idumee, les cannes du miel & du sable de Celo propre à faire le verre en la Phénice.*
 19 *Naturel, mœurs, coutumes, & loix des anciens*

- Arabes, Sabeans, Nabatheens, Juifs, Cappado-ciens.*
 20 *Description de la façon de vivre prescrite par Moïse aux Juifs, & leurs plus remarquables loix: De la sortie des enfans d'Israël hors d'Egypte, & leur passage en Judée mal entendue des Payens: Des trouffes de Juifs, & Pharisiens, Saduceens, Esseniens.*
 21 *Relation des mœurs naturel & manière de vivre des Turcs, Arabes, Juifs, & autres nations habitans les provinces de l'Asie: leurs façons d'habits, leurs viandes, leurs armes, leurs logemens sous tentes, sous palmiers, ou en des maisons sous terre.*
 22 *Leurs richesses consistans au trafic du cotton, pierre d'aimant, aux mines de cuivre, aux camélots, fer, alun, crystal, aspe, pierre d'onix, albâtre, tribut des pelerins du Saint Sepulchre, & de Medine, especeries, pierreries, perles, encens.*
 23 *Nombre des forteresses & places plus importantes de toutes les provinces d'Asie sujette au Turc.*
 24 *De quelles Religions & Sectes sont ceux qui habitent ces pays: & premierement des Chrestiens, Latins & Grecs, diuisez en plusieurs sectes, sçavoir est Melchites, Nestoriens, D'oscariens, Armeniens, Iacobites, Maronites, Coïtes, leur origine, & leurs erreurs en la foy.*



Le grand Turc occupe tout le pais qui est entre le Pont-Euxin, ou la mer Majour, la mer Egée, ou l'Archipelague, la mer Mediterranee, l'Egypte, le Golphe Arabe, le Persique, la riviere du Tygre, la mer Caspie, & le destroit de terre, ou Istme, qui est entre la mer Caspie & le Pont-Euxin.

Nous commencerons maintenant par l'Asie mineure, laquelle nous prenons icy pour toute la Chersonese, ou presque Isle entre la mer Majour, & celle de Cilice, & de Pamphilie, qui s'estend vers l'Archipelague, & se nomme aujourdhuy Natolie, ou haute Turquie. Elle comprend les provinces de Pont & Bithinie, la province particulièrement appelée Asie, la Licie, Galace, la Pamphilie, la Cappadoce, la Cilice, & la basse Armenie. Elle a pour ses bornes du costé du Levant la riviere d'Euphrate, qu'on nomme à present Apherat, ou Frat: du Midy la mer Mediterranee, qui prend tantost le nom de la mer Lycie, tantost de Pamphilie, & tantost de Cilice ou Caramanie, selon les pais par lesquels elle passe: du Couchant l'Archipelague de Grece, & du Nort, la mer Majour. Elle comprend vn grand espace de terre, veu qu'elle est enfermee entre le 36. degré, & 21. & le 45. degré: c'est à sçavoir, entre le milieu du 4. climat, & du 11. parallele, & le milieu du 6. climat, & le 15. parallele, ou le changement du plus grand iour n'est que d'une heure. Car la partie qui approche plus du Su, a son plus grand iour de 14. heures & demie, & la partie qui approche plus du Nort de 15. heures & demie. La largeur de ce pais, selon Plin, est de deux cents mille pas ou environ, c'est à sçavoir depuis le Sein Issique, ou le Golphe de Lajasse, iusqu'à Trebisonde, qui est en la contree du Pont. En quoy il est d'accord avec Herodote, qui dit que l'Isthme de l'Asie mineure, contient environ cinq iournees d'un homme qui marcheroit bien.

Le Pont & la Bythinie furent iadis deux provinces separees par la riviere de Sangar, qui passoit au milieu, mais elles furent apres reduites en vne province, qui se nomme aujourdhuy Bursie, selon Giraue, ou Beclangial, selon Castalde & quelques autres. Ceste province est bornee du Couchant de l'Emboucheure du Pont, du Bosphore Thracien, & d'une partie de la Propontide: du Nort d'une partie du Pont-Euxin, du Midy de la province nommée particulièrement Asie, pres de la riviere de Rhyndace, & du Levant de Calace, pres de la Paphlagonie. En ceste province on voyoit iadis les fameuses villes de Chalcedoine, Nicomedie, Apamie, Pruse, Nicee, & Heraclee du Pont.

Chalcedoine, colonie de ceux de Megare, a esté renommée à cause du quatriesme Concile qui s'y tint, mais elle est à present ruinee. Toutesfois il y en a qui disent qu'elle est debout vis à vis de Constantinople, & diuisee par vne partie du Bosphore l'espace de sept stades, & que c'est

ce qu'on nomme Galata. Les autres disent que c'est ce qu'on nomme aujourd'huy Scutari, qui est vis à vis de Constantinople.

Nicomédie est vne ancienne ville assise sur vn coustau fort agreable, & ayant plusieurs sources d'eaux, qui faict que beaucoup de Turcs & de Grecs y habitent combien qu'elle soit ruinee.

Pruse aujourd'huy Bursie, ou Burse est grande ville assise pres du mont Olympe. Ce fut autrefois la demeure des Ottomans, auant qu'ils eussent pris Constantinople.

Nicee maintenant Nichie, selon Niger, & Ilinich selon les autres, fut iadis la Capitale de la Bythinie. Elle est assise pres du lac d'Ilinic.

La Prouince nommee particulièrement Asie, maintenant Sabrum, ou Sarcum a pour ses bornes, selon Ptolomee, du Couchant vne partie de la Propontide d'Hellespont, & l'Archipelague: du Midy la mer de Rhodes, & partie de la Lycie & de la Pamphilie: du Leuant la Galace, & du Nort le Pont, & la Bithinie, & vne partie de la Propontide. Elle comprend le pais de Phrygie, Carie, les deux Mysies, l'Eolie l'Ionie, la Doride, & la Lydie.

La Phrygie est diuisee en haute & basse. La haute est du costé du Leuant, & la basse du Couchant & celle cy est appelee Hellespontique, & Troade semblablement. Castalde dict qu'on la nomme à present Sarcum.

La haute Phrygie a aujourd'huy, aussi bien qu'autrefois, plus de villages que de villes: On y compte la ville de Midaie, iadis demeure du Roy Midas, pres de la riuere de Sangar. Apamie nommee aussi autrefois Ciboris, fut la plus grande des villes de Phrygie.

La basse Phrygie, ou la Troade est vis à vis du mont Athos. La ville de Troye estoit assise en ce pais, où l'on void aussi le mont d'Ide, maintenant Gargare: On void aussi les ruines admirables de la grande ville de Troye, comme l'ay dit cy-deuant parlant des Isles de Marmora: c'est à sçauoir les mafures de quelques tours, & les fondemens des murailles. Hors de pourpris des murs de la ville on void sur les grands chemins de grands sepulchres de marbre d'une piece. On void encore les ruines de deux Chasteaux bastis de marbre Il y a encor de grâds Colosses anciens par terre, & autour des murailles des portes, presque entieres, suiuant le rapport de Bellon, qui dict aussi que les riuieres de Simois, de Xante, de Scamandre sont de petits ruisseaux, qui tarissent en Esté, & ont bien peu d'eau en hyuer.

La ville de Pergame estoit aussi en la Troade, & fust la Capitale de ceste prouince, & la patrie du Medecin Galen. Ce fut là qu'on trouua l'vtage de parchemin. Il n'en reste plus auourd'huy que quelques ruines, & l'on nomme encore ce lieu Pergame.

La Carie assise entre l'Ionie, & la Lycie, eut iadis pour la ville Capitale Halicarnasse auourd'huy Metlie. Tabu est vne fort bonne ville de Carie. Pres d'Halicarnasse à main droite comme ce le mont de Taurus. Quelques-vns mettent ausi Milet en ce pais: les autres le donnent à l'Ionie.

La Mysie est diuisee par Ptolomee en haute & basse. Il y auoit iadis en ce pais vne ville nommee Lampsaque, assise sur l'Hellespont, droit à droit de Calliopoli, mais elle a esté ruinee, & le lieu où elle estoit se nomme auourd'huy selon Niger, Apitco, & selon Sophian Lamblique. Abyde, maintenant Auco, fut vne colonie des Milesiens: c'est là qu'est le deistroit de l'Hellespont de la largeur de sept stades.

Ceste ville dure encore auourd'huy, & est assise en vn lieu marescageux, & bien fortifiée & son Chasteau avec celui de Secte, qui est vis à vis, est vne des clefs de l'Empire des Turcs: Car on tire de ces Chasteaux des coups de canon contre les vaisseaux qui veulent entrer dedans l'Hellespont, ou en sortir sans permission du Turc. On y voyoit autrefois ausi la ville d'Adramitium, colonie des Atheniens, maintenant nommee Landermitti. C'est en ce pais qu'est la riuere du Granique, maintenant Lassar, selon Niger, ou Alexandre vainquit les Satrapes de Darius.

Le pais d'Eolie est au riuage de la mer Egee, & ses villes maritimes sont Myrine, Cume, maintenant Castri, & Forcee ayant deux ports, auourd'huy Foglia Vecchia, ou Fueille vieille, qui auoit iadis deux mille & demy de circuit, selon Tite-Liue.

L'Ionie a de longueur en droite ligne quarante mille, & deux cents du long de la coste où est la ville d'Ephese, maintenant Figene, ou Fiene, selon Castalde: mais retenant son nom ancien selon Sophiad: Elle est renommee à cause du Concile qui s'y tint, & du Temple de Diane rangé entre les sept merueilles du monde. Quelques-vns logent Milet en ceste prouince.

La Doride s'aduanee dans la mer en forme de pointe, & contient la ville de Gnide, renommee à cause de la statue de Venus. La place où elle estoit se nomme Capo Chio, ou Crio. Quelques-vns mettent ausi en ce pais Halicarnasse, auourd'huy Melsie, comme nous auons dict, suiuant Sophian, & Chasteau S. Pierre, selon Niger, & Vadian. Ce fust en ceste ville que

ville que regna Masole Roy de Carie, à qui Arthemise fit bastir vn superbe tombeau.

La Lydie fust nommee aussi Meonie : Sa capitale ville fust Sardis, où estoit la demeure de Cresus : Elle fust abbatuë par vn tremblement de terre, & rebastie par Tybere.

La Lycie fust iadis nommee Mylas, & Ogygie. selon Estienne Giraue; diët qu'à present on luy a donné le nom de Brique. Castalde luy baille celui d'Aldinelli: mais Theuet diët que les Arabes l'appellent Benelaacam. Ceste prouince tend principalement à la mer qu'on nomme Lycienne à cause de ce pais, & a pour ses bornes du Couchant, & du Nord la Carie, du Levant la Pamphilie, selon le Mont Malicyte qui va iusques à la mer, & du Midy elle est bornée de la mer de Lycie enuiron vingt mille pas de navigation. Il y auoit autresfois 60. villes, dont on en voyoit encor 36. debout du temps de S. Paul. Les principales estoient Xanthe, Patare, Pinnarre, Olympe, Myrre, & Lymire. La capitale estoit Patare. Il y auoit aussi la ville de Telmesse, pres d'un cap, ou promontoire du mesme nom. Les anciens auteurs mettent icy la montagne Chymere qui brulloit de nuit. Sa capitale ville du iourd'huy c'est Fisco, où il y a vn fort bon port.

Galace, ou Gaulegrece ayant pris ce nom de Gaulois, qui se meslerent parmy les peuples d'Asie du temps de Pyrrhe Roy des Epirotes, est auourd'huy nommee Chingare, selon Castalde. Elle a pour ses bornes du Couchant la Bithinie & la Phrygie, du Levant la Cappadoce: du Midy la Pamphilie, du Septentrion le Pont-Euxin, où son riuage s'estend 250. mille pas. Sa plus fameuse ville est Ancyre, communément Angouty, renommée à cause des camelots ondez & non ondez qui s'y font. On met ceste prouince le pais de Paphlagonie, où est Sinope, assise sur vne coline de la Presqu'Isle sur la mer Maieur, avec vn bon port. Il y aussi Amise ville maritime, maintenant Simiso.

Pamphilie nommee par Plin Popfopie, porte auourd'huy le nom de Setilie, selon Giraue & quelques autres. Theuet dit que les Arabes l'appellent Zina: mais Belon assure que l'on a donné à ceste prouince, & à la Cilice, le nom de Caramanie, où sept Sangiacs du Turc se tiennent. Elle est limitée du Levant de la Cilice, & d'une partie de la Capadoce: du Couchant de la Licie, & d'une partie de la Prouince d'Asie: du Nord de la Galace, & du Midy de la mer de Pamphilie, qui est tousiours orageuse. Sa coste est d'environ 150. mille pas. Ses villes sont Perga, qui est au milieu du pais sur la riuere de Cataracte, puis Side, & Aetalie maritimes. Aetalie qui est capitale du pais, porte maintenant le nom de Satalie, & est la plus grande & plus forte de routes les villes de la contree, & communique son nom au Golphe qui est proche.

La Cappadoce, ou Leucosyne, selon Strabon, & quelques autres maintenant Almasie ou Amasie, selon Castalde & Genech, selon Theuet ou Toccato, Alleluien selon Pinet, s'estend iusqu'à la mer Maieur, & est bornée du Couchant de la Paphlagonie, d'une partie de la Pamphilie, & de la Galace: du Midy d'une partie de la Cilice: du Levant de l'Antitaurus, grandes montagnes pres de la basse Armenie, du mont Moscie, & d'une partie de l'Euphrate, & du Nord, du pont-Euxin. Ses riuieres sont Halys, maintenant Ottomagiuch, iadis limitée des Royaumes de Cresus, puis Isis, maintenant Gazalmach, & Thermodon auourd'huy Pormon, ses meilleures villes sont Trebifonde, nommee Machomach par les Barbares, iadis siege d'un Empire. Quelques-vns font Amasie capitale de Paphlagonie: mais Ptolomee, & beaucoup d'autres, nous apprennent qu'elle appartient à ceste prouince. Ceste ville retient encore auourd'huy ce nom, & le communique aux pais voisins. Elle est assise en vne profonde vallee sur la riuere de Gazalmach. Ce fust la partie de Strabon, & c'est maintenant la demeure d'un Beglierbei du Turc, qui se nomme Beglierbei d'Amasie & de Cappadoce. Quelques vns mettent la ville d'Inconium en Cilice: mais selon Ptolomee elle appartient à ce pais, & est appelée Conia ou Cognia. Elle est assise assez prez de quelques hautes montagnes, & arrosée de plusieurs ruisseaux qui en descendent. Sa figure est ronde, & ses murailles sont anciennes, & les tours carrees: il y a huit portes, & vn bon nombre de belles Mosques & estuues.

La Cilice, que Iosephe nomme Tharse, est appelée Chalach des Hebreux, Niger tient qu'on la nomme auourd'huy Turcomanie & Finicie: mais ceux qui luy donnent le nom de Caramanie, doiuent estre suivis: car la Turcomanie n'est autre chose que la haute Armenie. Or la Caramanie, qui comprend aussi quelques parties de quelques autres prouinces outre la Cilice, & principalement la Pamphylic, a pour ses bornes du Couchant la Pamphylic, du Nord le mont Taurus, du Levant le mont Aman, vulgairement Montenegro, ou Montnoir: & du Sud la mer de Cilice de la navigation d'environ trois cents mille pas: la ville capitale fust Hama, ou Hamla, iadis Tharse, assise en vne belle vallee, arrosée de la riuere de Cydne. On y void aussi la ville d'Adene, que Ptolomee appelle Adane, qui est grande, mais ouuerte, & a vn Chateau avec quatre tours carrees. Belon dit qu'on trouue en Cilice vne ville nommee Heraclee, qui est fort grande, assise pres du mont Taurus en vne belle plaine, & esloignée de trois iournees d'Adene, du costé du Nord, & du Ponent.

La basse Armenie porte encore ce nom aujourdhuy selon Niger, mais Giraue luy donne celuy d'Anadule, Castalde de Pegian, & quelques autres l'appellent Gench. Elle est nommée Pirme au liure des Notices. Ses bornes sont du Levant l'Euphrate, par laquelle elle est diuisée de la Turcomanie, ou haute Armenie: du Couchant la Cappadoce: du Midy la Cilice au dessus du mont Taurus, & vne partie de la Syrie sur le mont Aman: & du Nord le Pont, auquel lieu on dit qu'elle finit en angle, quel'Euphrate, & l'Antitaurus viennent à faire: mais le Turc n'en est pas entierement maistre.

Pour acheuer la description de ce que le Turc possède en Asie: venons maintenant à vne partie de la haute Armenie, comprise sous le nom de Turcomanie, qui embrasse aussi la Georgie. Ceste prouince confine du Nord avec la Colchide, aujourdhuy Mingrelie: du Couchant avec l'Euphrate, & la basse Armenie: du Levant avec le reste de la haute Armenie, qui est en la Georgie: & du Midy avec la Mesopotamie, maintenant Diarbec, & avec la nation des Curdes. Ses montagnes sont Periandre, aujourdhuy Chielder: l'Antitaur maintenant montagne noire, & quelques autres. La ville capitale du pais est Efechie, que quelques-vns tiennent pour ce qui est resté d'Artaxare.

On trouue pres de la haute Armenie le pais de Curdistan, selon les Perles & les Turcs, & de Keldan, selon les Arabes. Castalde le nomme Gorden, & le met entre le pais de la haute Armenie.

La Georgie autrement Gurgistan, comprend l'ancienne Iberie, avec vne partie de la haute Armenie, & peut estre de l'Atropatie. Ceste prouince touche du Couchant la Mingrelie ou Colchide: du Nord la Zemrie, iadis Albanie: du Levant la moyenne Atropatie, maintenant Seruan, & du Midy la partie de la haute Armenie, qu'on nomme Seruan. Ce peuple auoit maintenu tousiours sa liberté iusques à nostre temps, se ioignant tantost avec les Perlians, tantost avec les Turcs, & a eu plusieurs Seigneurs naifs du pais: mais elle est maintenant pour la pluspart sous la puissance des Turcs, qui y ont plusieurs villes, & places fortes, comme Tesse, Lori, Clisque, Gori & Toman.

Toute l'Arabie prise ensemble est vne fort grand' prouince, qui est enfermée entre deux golphes en forme de ce Presqu'Isle. Ces golphes sont celuy d'Arabie, autrement la mer rouge d'Occident, & celuy de Perse d'Orient. Du Midy elle a la mer Oceane, & du Septentrion la Syrie, & la riuere d'Euphrate. Or ceste Presqu'Isle d'Arabie est diuisée en trois parties, c'est à sçauoir en la Deserte, la Petree, & l'Heureuse.

L'Arabie Deserte, nommée Aspre par Aristide, basse par Seruius, & creuse ou profonde par Lucian, est appelée des Hebreux Cedar. Ses bornes sont du Levant les montagnes de Babylone, & vne partie du golphe Persique, du Nord la Mesopotamie pres de la riuere d'Euphrate: du Couchant la Syrie, & l'Arabie Petree, & du Midy les montagnes de l'Heureuse.

La Petree touche la Syrie du Couchant, & du Septentrion, & confine du Levant avec la Deserte, & du Midy avec l'Heureuse. Plin, Strabon, & Ptolomee la nomment Nabathee: Tyrius l'appelle Seconde, & quelques-autres luy donnent le nom de Basse. Mais elle reçoit celuy de Petree de la ville de Petra qui est capitale de cét prouince. Ceste prouince s'appelle aujourdhuy Barra, selon Ziglere, Bengaucal selon Castalde, & Battha Chalha. C'est icy que le mont de Sinay est tant renommé en la sainte Escripture, à cause que la loy y fust donnée à Moysé. Ceste montagne est fort haute, & faicheuse à monter, & il y a des degrez taillez de main d'hommes de pierre-viue, & quelques-fois dans le rocher, afin que les cheuaux, & autres animaux y puissent plus aisément passer. On void en ce mont vn Couuent de Moines Chrestiens Maronites, qui vivent à la Grecque. Ils sont en nombre de cinquante, & reçoient les pelerins Chrestiens, qui y vont en deuotion. Il y a encores en ce pais vne autre montagne fameuse, nommée Oreb, & maintenant Orel, qui n'est pas si haute que celle de Sinay. Ces deux montagnes sont celles que Ptolomee appelle Melanes. La capitale ville du pais fut Petra, que l'escripture nomme Petra du desert, où l'on ne peut guiere aller à cause du mauuais chemin. Il y en a plusieurs qui tiennent que c'est mesme chose que la Meque, lieu de la natiuité de Mahomet: ce qui n'est pas vray semblable, ains il semble plustost que c'est ce que les chartes nomment Petra-d'Est. Et de fait l'on tient que la Meque est en l'Arabie Heureuse.

L'Arabie Heureuse iointe aux autres deux, est en forme de Presqu'Isle, entre les golphes d'Arabie, & de Perse: & la nauigation d'autour de ce pais est d'environ 3504. mille. Solin & quelques autres l'appellent Heureuse, & Virgile Panchaie: mais à present elle porte le nom d'Ayaman, ou de Giamen. Ses meilleures villes sont Medine, Tanalbi, Meque, Ziben, Zibi, & Aden, outre les autres qui ne sont paruenues à nostre cognoissance.

Medine Tanalbi, c'est à dire la Cité du Prophete, est assise du costé de l'Arabie-Petree, & est assez peuplée. C'est là qu'est le cercueil de Mahomet, pres duquel on void environ 3000. lampes allumées.

La Meque,

La Meque en laquelle Mahomet est né, n'est guieres loing de l'ancienne Petra : toutesfois ce n'est pas la mesme, ains ce pourroit plustost estre la ville de Mechare de Ptolomee. C'est vn lieu assez agreable, mais enfermé entre des montagnes, & des deserts, & sans aucune muraille. Il y a pres de six mille maisons. On void tous les ans trois carauanes, qui partent du Caire, de Damas, & des Indes, & s'en vont à la Meque par deuotion en l'honneur de Mahomet qui y est né, puis de là s'achement à Medine, où est le cercueil de ce faux Prophete.

Ziden est ville maritime, & est à quarante mille loing de la Meque. Elle n'a point de murailles, mais ses maisons sont assez belles.

Zebeth, ou Zibit est vne belle ville, & capitale de ceste Arabie. Elle est assise en vne plaine entre deux montagnes, & sur vne riuere de mesme nom, & à demie iournee de la mer rouge. Elle fut prise apres Aden par le Turc, qui y enuoye vn Beglerbey avec force gens.

Aden est ville Royale, assise sur le bord de la mer rouge, assez prez du destroit de Babel mandel : car c'est la plus belle ville d'Arabie, & non seulement elle est forte d'assiette, mais encores de main d'homme : & il y a de beaux bastions, vn bon fort, & vn port bien fermé. Elle contient enuiron six mille maisons, est bien peuplee. Les Turcs prirent ceste ville, & tout le Royaume par ruse, & finesse, l'an 1538. & en perdirent le Roy. Ils y tiennent auourd'huy vn Beglerbey avec force gens de guerre.

En sortant de l'Arabie on entre en l'Idumee, qui commence au lac de Sirbonne, & s'estend vers le Leuant iusqu'en Indee. Ceste prouince contient Gaze, ville tres ancienne, entre laquelle, & le Caire, on trouue Cartie, puis Ostracine, Rhinocorure, Ascalon, & Azor.

La Syrie, qui est vne fort grande prouince en l'Euphrate, la Cilice, l'Arabie, & la mer Mediterranee, commence au 32. degré, & finit au 36. Elle est diuisee en cinq prouinces, c'est à sçauoir Palestine, Phenice, Celestrie, Surie, & Comage.

La Palestine, qui est entre la mer Mediterranee, & l'Arabie, est diuisee en deux parties par la riuere de Iordain. La Tribu de Ruben, & la moitié de la Tribu de Manasse habitoient au delà de ce fleuve, & les autres de l'autre costé. Ceste derniere est diuisee en trois parties, dont l'vne se nomme proprement Indee, l'autre Samarie, & la troisieme Galilee. La Indee est entre la mer Morte, & la Mediterranee : Hierusalem est sa ville capitale. C'est en ce pais qui est Ierico en vne plaisante vallee, longue d'enuiron trente mille, & large de quinze : La Samarie prenoit son nom de sa ville principale, qui se nomme auourd'huy Naplos. La Galilee est diuisee en basse & haute : celle-là commence à la mer Tyberiad, large de cinq mille, & longue de douze : & presque en son centre Nazareth. Ceste-cy commence au lac Samaconite & s'estend iusques au mont du Liban. Il n'y auoit iadis prouince qui fut à proportion si peuplee que la Palestine : car n'estant longue de plus de soixante mille, ny large de plus de soixante. (veu que les bornes de sa longueur estoit Dan, & Berlabee) au denombrement que Dauid fit faire, on y trouua vn million, & trois cents mille hommes propres à manier les armes, outre la Tribu de Benjamin. Maintenant elle est despoüillee de tous ses ornemens, fors de la beauté de son terroir, & de sa bonté.

DU ROYAVME DE HIERUSALEM.

EN TRES toutes les Principautez & Seigneuries du monde, le Royaume de Hierusalem est estimé tenir le plus honorable lieu, soit que cela soit arriué, ou par election diuine, ou pour les bonnes qualitez qui sont en iceluy, ou pour ce que les hommes semblent estre naturellement enclins à l'aimer & honorer.

Les Hebreux & les Chrestiens ne me desnieront pas cela, & les Turcs mesmes nous accordent comme le souverain Createur a esleu ce Royaume de Hierusalem, afin de luy estre reserué pour faire cognoistre la gloire de sa diuine Majesté. pource voulut nostre Dieu que ce lieu fust nommé de ce nom excellent de Hierusalem, & qu'elle fust mesme honoree du nom de Terre Sainte, pour les benedictions & priuileges diuins qu'il semble auoir donnez à ceste terre plus qu'à aucune autre de l'vniuers. Le premier homme y a esté créé, elle la nourry & l'a estably maître de tous les animaux, & de toutes les creatures : Là mesme le fils de Dieu Redempteur du genre humain a operé tout ce qui estoit necessaire au salut de l'homme : En ceste terre ont esté accomplies les mysteres plus hauts de nostre Redemption, les Oracles & Propheties anciennes contommees en la personne de Iesus-Christ : auquel ceste terre a donné naissance temporelle, & a esté si heureuse & fauorisee, que dans icelle il a voulu passer le temps de sa vie illustree de mille & mille miracles : & finalement pour plus grande faueur y a voulu mourir, y a voulu patir, resusciter & monter au Ciel pour nous preparer la voye du Paradis, ayant encore reserué ceste terre, pour y venir tenir les dernieres assises au iugement final, pour y iuger les vians & les morts : Je ne veux m'arrester à raconter les Patriarches & Prophetes qui ont veu en ce lieu, ny les visions qui leur y ont esté faites. Ces choses sont cause qui allument journellement le desir des hommes d'aller veoir ces saints lieux. Noté apres le Deluge

uniuersel s'estant parry de l'Armenie & du mont Gordien, où l'Arche s'estoit arrestee, s'en retourna en son pais, & en son heritage de primogeniture en ceste haute montagne, en laquelle (comme les Hebreux Cabalistes asseurent) Adam, Abel, Enoch, Noé, & Melchisedech auparavant le Deluge auoient accoustumé d'offrir leurs sacrifices & diuines offrandes, & Noé aussi apres le Deluge y retourna comme deuant pour y offrir & sacrifier comme il fouloit : En ceste montagne Melchisedech edifia & bastit ceste sainte Cité, laquelle il nomma de son nom, & de sa dignité sacerdotale Hierusalem, c'est à dire ville sacerdotale de Salem, il en fit l'assiette sur trois sortes de montagnes, de Syon, d'Oliuet, & de Caluaire.

Or les Chananeens enfans de Cain, selon le partage & diuision des terres faites par leur ayeul, Noé les enuoya en Afrique pour y habiter, & leur cōmanda de laisser l'Asie à Sem: mais eux passant par ceste terre Sainte, & la trouuant agreable & belle pour habiter, ils mespriserent le commandement de Noé, rauirent ceste terre à leur frere Sem, & s'y habituerent. Dieu estant indigné de ceste vsurpation, & de ce que la famille de Sem estoit frustree de son heritage qui leur appartenoit: il appella d'entre les Chaldeens le vray heritier Abraham, & luy promit cet heritage, non seulement à luy, mais aussi à sa maison & à ses enfans qui deuoient sortir de luy. Aussi pour ceste mesme raison Dieu deliura-il ceste famille d'Abraham de la captiuité d'Egypte, & les fit rentrer en cet heritage de leurs peres, d'où furent chassez les Cananeens iniustes, vsurpateurs d'icelle. La sainte Escriture asseure encore que les cruelles guerres que les Princes Chaldeens ont faites aux Hebreux, n'ont esté que pour le grand desir qu'ils auoient de posseder ce Royaume, lequel finalement ils prirent & ruinerent, & les Israélites eschappez du trenchant de l'espee, menez captifs en Babylone: Cyrus Roy des Perles y ayant transporté la Monarchie des Chaldeens, meu de pitié, deliura les Hebreux de ceste captiuité, & leur permit de retourner chez eux, & rebastir la sainte Cité de Hierusalem avec le Temple. Alexandre le Grand ayant ouy parler de l'excellence de ce Royaume, apres auoir dompté Darius, & cōquis la Perse, tourna les armes vers Hierusalem, non autrement qu'un Lyon furieux: mais voicy qu'il deuiet plus doux qu'un agneau, quand il void venir au deuant de luy Iaddo grand Prestre de Hierusalem reuestu de ses habits Pontificaux, & accōpagné de son Clergé: car aussi tost se ietta à bas de son cheval: il se coucha en terre, & adora le nom de Dieu de quatre lettres, le nom tetragrammatique qui estoit escrit en vne lame sur le front du grand Prestre: chāgement prouenant, non d'autre part que de la prouidence de Dieu: il entra dans le Temple, offrit les sacrifices sans faire aucun mal aux Iuifs, puis se retira leur donnant plusieurs graces & priuileges. Dans l'histoire des Machabees, nous trouuōs qu'Antiochus & Ptolomee, membres de la Monarchie Grecque d'Alexādre, donnerēt plusieurs batailles aux Iuifs pour se rendre maistres du Royaume de Hierusalem. Herode aussi assit de la faueur des Romains, arracha des mains des Asimodeens & Machabees, ce florissant Royaume, fit massacrer presque tous les Princes du sang Royal, pour y mieux asseurer sa Courōne & sa tyrānie, & apres luy les Romains l'ont voulu posseder: Iules Cesar, Pompee le Grand Marc-Anthoine, Auguste, l'ont assez tesmoigné, cōme il se void en Tacite: la parole de l'Empereur Titus, dōna vn grād desir de ce faire aux Romains, & luy-mesme le voulut entreprendre, & de faict se voyant Maistre de l'Empire Romain, & de toutes ses prouinces & richesses, ne croyoit rien auoir, s'il n'adioustoit encore à ses sceptres la Couronne du Royaume de Hierusalem, allant à la conqueste d'iceluy en personne avec vne puissante armee, dont il se rendit maistre, ruina Hierusalem, tua vne partie des Iuifs, & fit les autres captifs qu'il emmena en triomphe à Rome en nombre d'un million.

L'Empereur Adrian sçachant qu'il y auoit encore des Iuifs qui s'estoient ramassez & recueillis en Hierusalem apres la ruine qu'y fit Titus, fit destruire la ville de Hierusalem iusques aux fondemens: puis en ayant regret la fit rebastir, & l'appella Heliā: Ce mesme desir naturel esmeut Cosdras Roy de Perse à enuahir ce Royaume, mais il n'en iouït pas long tēps: car l'Empereur Heraclius, indigné d'auoir perdu vn si grād tresor, se mit en campagne, deffit cet vsurpateur Cosdras, & rapporta de Perse la vraye Croix avec les captifs qu'il ramena, auquel tēps arriva ce miracle, par lequel nous celebrōs annuellement la feste del'Exaltatiō S. Croix, le 14. Septēb.

Les Empereurs Sarrazins sçachans que leur loy Mahometane, a quelque fondement en la Loy de Moyse, & en la Loy de Iesus-Christ, & que ces deux loix furent instituees au Royaume de Hierusalem, auquel est le Sepulchre de nostre Sauueur, lequel ils confessent avec nous, deuoir faire le dernier & uniuersel lugement en iceluy Royaume, eux ayant pris forces & accroissemēt (car ils auoient enuahy le Royaume de Cosdras Roy de Perse) ils conquererent encore la terre Sainte, & afin de conseruer plus long temps ceste conqueste, ils consacrerent le Temple de Salomon à leur faux Prophete Mahomet, laissant aux Chrestiens l'Eglise du saint Sepulchre: & le plus louuent estoient en guerre contre les Empereurs de Constantinople pour le deffendre, & par les armes ils se sont maintenus en ceste vsurpation depuis l'an 636. iusques en l'an 1099. que le tres-pieux & religieux Prince Godefroy de Buillon Duc de Lor-

de Lorraine, assisté de plusieurs autres Princes & Cheualiers Chrestiens, y entra avec l'armée de la sainte Vniō. & reprit le Royaume de Hierusalem sur lesdits Sarrazins, & fut esleu le premier Roy Chrestien, & depuis ses successeurs l'ont tenu iusques à l'an 1187. auquel ce Royaume fust derechef reconquis par les Sarrazins: & les restes dudit Royaume, qui estoient encore demeurées en la puissance des Chrestiens, furent enuahis par leids infidelles en l'an 1290. durant lequel temps que ce Royaume fust au pouuoir des Chrestiens Occidentaux, diuers Princes par le moyen de diuers mariages & alliances, ont iouy de ceste Couronne iusques à l'enuahissement d'icelle par les Turcs, ainsi que ie feray voir dans la suite des Roys de Hierusalem, depuis Godefroy de Buillon iusques au temps de la perte dudit Royaume.

GENEALOGIE DES ROYS DE HIERUSALEM ET DE CYPRE,

ET PRINCIPALEMENT DES ROYS DE LA MAISON DE LUSIGNAN.

GODEFROY de Buillon, fils d'Eustache, Comte de Bologne & de la Comtesse Ide, fut adopté pour fils par Godefroy Duc de Lorraine, duquel la femme estoit la tante maternelle, occasiō qui leur succeda pour paruenir au Duché de Lorraine, parce qu'ils estoient decedez sans hoirs: il espousa en premieres nopces Sybille fille de Foulques Côte d'Angers, qui mourut sans enfans: & en secondes nopces Florence fille d'Holophernes Duc de Calabre: & desirant ce Prince magnanime s'acheminer avec les autres Princes au Leuant au recouurement de la terre Sainte, vendit la Cité de Mets, & ayant dressé vne belle armee prit la route du Leuant, luy sa femme & les deux freres, Baudouin & Eustache: & apres mille beaux exploicts d'armes qu'il fit avec les autres Princes Chrestiens en l'Asie mineure, en Antioche, & autres villes contre les Sarrazins, l'an de grace 1099. le 15. iour de Iuillet, vn iour de Védredy à l'heure de Midy, la ville de Hierusalem fut prise, seant en l'Eglise le Pape Urbain II. en l'Empire d'Occident Henry IV. & en l'Oriēt Alexius Comneno, regnāt en Frāce Philippe I. du nom, ce qui arriva trois ans apres la croitade de l'dits Princes pour ceste executiō. Huit iours apres lesdits Princes tous d'un consentement eleurent Godefroy pour premier Roy de Hierusalem, par ce qu'il auoit esté le premier qui auoit monté à la bresche, & sur la muraille de la ville du cōmencement: Raymōd Comte de Thoulouse y cōtredit, mais il s'y accorda par apres. Ce Prince Godefroy, cōme humble & Religieux, estant saluē Roy refusa la Courōne royale, se disant indigne de porter vne Courōne d'or & precieuse, au lieu où le Sauueur du monde auoit esté couronné d'espines: il en accepta volontiers le Gouvernement, auquel il establit de belles Loix & Ordōnances, qui du depuis ont tousiours esté appellees en langue Françoisē, *Asises de Hierusalem*. Il fit eslire vn Patriarche Latin, & crea des Euesques & Archeuesques: pour les autres villes il institua le Clergé, & vne Cour seculiere, fit plusieurs choses dignes de louange: mais la premiere annee de son regne, il laissa la Hierusalem terrestre pour monter à la celeste: son corps fust, ainsi qu'il auoit ordonné, ensepulturé au mont de Caluaire. Il mourut sans hoirs.

Baudouin I. du nom succeda au Royaume de Hierusalem à Godefroy son frere, l'an 1100. il quitta l'habit de Clericature, & ses benefices de Rheims & Canbray & se maria à Guttire, fille de Guillaume Duc de Normādie, qui depuis fut Roy d'Angleterre: elle l'alla trouver au Leuant: mais incontinent mourut à Maresie dans l'Asie mineure sans enfans. Apres la mort de Godefroy, iceluy Baudouin donna l'administration de la Duché de Lorraine à Guillaume son ieune frere: il espousa en secondes nopces la fille de Tafroc Prince d'Armenie, laquelle par apres il repudia. & prit Adelesie veufue de Roger Comte de Sicile: toutesfois estant malade, promit à son Confesseur reprendre sa femme, & quitter Adelesie: Il trespassa l'an 18. de son regne, & le iour des Rameaux fust enterrié au mont de Caluaire avec Godefroy son frere.

Baudouin II. Comte de Bourg ou de l'Isle en Flandres, fils du Comte Rettef & de Melisene, fust le 3. Roy de Hierusalem l'an 1118. il espousa Morphie fille de Gabriel Duc de Metelene, ville d'Armenie mineure: il estoit premierement Comte d'Edisse, & donna ceste Comté à son cousin germain Geüelin de Courtenay, prenant pour luy possession du Royaume de Hierusalem: Il mourut l'an 13. de son regne, & le 21. iour d'Aoust fust mis au tombeau de ses predecesseurs au mont de Caluaire.

Foulques Comte d'Angers & de Thorō fust 4. Roy de Hierusalem, l'an 1131. il espousa en premieres nopces Guibar, fille unique & heritiere d'Helie Comte du Mans, par laquelle il fut aussi Comte du Mans: estāt decedez il s'en alla en Hierusalem, où il espousa en secondes nopces Melisene fille de Baudouin II. par le moyen de laquelle il succeda audit Baudouin au Royaume de Hierusalem, l'an 11. de son regne, poursuivāt vn lieure en la campagne de Ptolemaide tomba du haut de son cheual, dont il mourut: il fust enterrié avec ses predecesseurs au mont de Caluaire.

Baudouin III. du nom fils du Roy Foulques & de Melisene Royne, succeda à son pere l'an 1142. à la Couronne de Hierusalem: il fust couronné le iour de Noël, l'an 13. de son aage: sa mere gouerna l'Estat pendant son bas aage, & apres auoir regné 20. ans trespassa l'an 33. de son aage, le 25. Feurier, son corps fust inhumé au mont de Caluaire avec ses predecesseurs.

h ij

Amaulry fils de Foulques & de Melisene, fust par son pere fait Côte de Ioppe & d'Ascaloné, il espousa en premieres nopces Agnes fille de Iasselin second Côte d'Edisse, laquelle il fust force de repudier venant à la Couronne de Hierusalem, parce qu'on trouua quil y auoir de la consanguinité par degrez d'affinité, & en secondes nopces prit Marie fille de Iean Comneno Protocasto del'Empire, frere d'Emanuel Empereur, l'an 11. de son regne il mourut, & le 15. de Iuillet son corps fust porté au mont de Caluaire.

Baudouin quatriesme du nom, fils du Roy Amaulry, de sa premiere femme, succeda à son pere au Royaume de Hierusalem, l'an 1173. en l'an 13. de son aage, seant à Rome Alexandre 3. & en France Louys pere de Philippe Auguste : ce Roy Baudouin estoit trauaillé de lepre, occasion de quoy il regna peu: il fust ensepulturé avec les predecesseurs, l'an de grace 1184. le 16. Mars.

Baudouin cinquiesme du nom fils de Sybille Comtesse de Ioppe, (heritiere de la Couronne & sœur de Baudouin quatriesme) & de Guillaume Longue-espee, Marquis de Montferrat, apres la mort de son pere, estant aagé de cinq ans fust deliure & couronné Roy par Baudouin 4. son oncle, l'an 1184 apres la mort duquel il succeda au Royaume : il trespassa le 8. mois de son regne, non sans soupçon de poison.

Guy de Lusignan 9. Roy de Hierusalem, apres la mort de la Royne Sybille, sa femme & de ses 4. enfans durant le siege de Ptolemaide, par laquelle femme il auoit esté déclaré Roy : & voyant que les droicts de la Couronne de Hierusalem estoient escheus à Isabeau, sœur de sa femme: il passa tous les droicts quil y pretendoit à Richard Roy d'Angleterre, duquel il acheta le Royaume & l'Isle de Cypre la somme de cent mil escus, ainsi que ledit Roy d'Angleterre l'auoit auparauant vendue aux Templiers, apres l'auoir ostee aux naturels Ducs Grecs qui la tenoient au nom de l'Empire d'Orient.

Donc l'an 1193. ce Roy Guy avec toute sa Cour, & son frere Amaulry estant avec luy, qui estoit Connestable de Hierusalem, pressa en Cypre où il fit edifier les Eglises Latines, y edifia & munit quantité de forteresses, fit bastir la ville de Lemisso, quil appella Nicosie, & institua vne Cour Royale: Il fit 300. Cheualiers ou Barons: il voulut que la ville de Nicosie fust capitale du Royaume, & plusieurs autres choses quil fit: En fin l'an 3. de son regne en Cypre, qui estoit le 12. apres son couronnement en Hierusalem, il mourut, & fust ensepulturé en la ville de Nicosie en l'Eglise des Cheualiers Templiers.

Henry Comte Palatin de Champagne fils d'Henry Comte, & de Marie de France, espousa la veufue d'Emfroy & de Conrad, appelée la Royne Isabeau, à cause dequoy il fust déclaré dixiesme Roy de Hierusalem: il ne fust point couronné à cause que Guy viuoit encore en Cypre, qui auoit cedé tous les droicts de la Couronne à Richard Roy d'Angleterre.

L'an 1196 Amaulry de Lusignan Cōnestable de Hierusalē, eut premieremēt pour femme Ciue d'Iblim, fille de Baudouin de Ramate: Il s'en estoit venu en Cypre avec le Roy Guy son frere, & fust le premier Connestable de Cypre: puis apres il succeda à son frere au Royaume, toutesfois il ne fut couronné pour lors, d'autāt que Cypre n'estoit encore reduite en Royauté: & quoy quil fust souuētes fois semond & interpellé de se faire couronner par l'Empereur d'Orient, il n'y voulut toutesfois iamais cōsentir, ayment mieux receuoir la courōne de l'Empereur d'Occidēt.

Donc l'an 1200. Henry Empereur d'Occident, enuoya au Leuant Henry d'Hyperbolie son Chancelier portant 2. Couronnes, l'une pour Amaulry de Lusignan, & l'autre pour Leon Prince, & depuis par le moyen de ceste Couronne, Roy d'Armenie. Ainsi le Roy Amaulry estant couronné peu de iours apres le decez de sa femme, il fust incontinent appelé par les Princes de Hierusalem, qui luy donnerent en secondes nopces la Royne Isabeau, veufue de Henry Comte Palatin de Champagne, ensemble la Couronne du Royaume. Or ceste Royne Isabeau estant pareillement decedee, à cause que les droicts de la Couronne de Hierusalem venoient à Marie, fille premiere nee d'Isabeau: ce Roy s'en retourna en Cypre, où il mourut l'an 13. de son regne, & fust enterré en l'Eglise Cathedrale de sainte Sophie à Nicosie.

Iean Comte de Brienne appelé en la Cour de Philippes Roy de France, Prince Dauphin, espousa en premiere nopces Marie Royne de Hierusalem, fille aînée de la Royne Isabeau, & fust Roy à cause d'elle.

Federic second Empereur, Roy de Naples & de Sicile, apres la mort de la Royne Isabeau sa premiere espousa en lecondes nopces Iole heritiere du Royaume de Hierusalem, femme, & fille dudit Roy Iean, Comte de Brienne, en faueur de quoy il fust couronné Roy de Hierusalem.

Conrad fils de Federic second Empereur, & d'Iole Royne de Hierusalem, y succeda estant morte.

Conradin son frere y succeda aussi.

Hugues premier de Lusignan, fils d'Amaulry & de Ciue, succeda à son pere au Royaume de Cypre: il espousa Alison leconde fille de la Royne Isabeau.

Emfroy

Emfroy troisieme de Thoron, & auoit pris pour Espoux Conrad Marquis de Montferrat, duquel estoit issu la Roynie Marie : par ainsi le droit du Royaume de Hierusalem appartenoit plustost à Alison Roynie de Cypre : Mais puis qu'il plaisoit ainsi au Patriarche de Hierusalem, & aux Estats d'icelle, & qu'ils auoient couronné la Roynie Marie deuant qu'Alison sa seur fust Roynie de Cypre : ce Roy Hugues ne print point le titre de Roy de Hierusalem : finalement apres Jean de Brenne Roy de Hierusalem, & luy leue le siege de deuant le Caire : il s'en retourna en son Comté de Tripoly, où il mourut apres auoir regné treize ans : fut son corps porté en Cypre, & en enterré en l'Eglise des Cheualiers Hospitaliers de saint Jean.

Henry premier de Lusignan, fils du Roy Hugues premier, succeda au Royaume de son pere l'an 1224. qui l'auoit laissé fort ieune : il espousa la seur de Beimond Prince d'Antioche, appelée Plaisance : auant que ce ieune Roy fust en aage pour regner, le Seigneur d'Iblin & de Barut en auoit la tutele, & le gouvernement du Royaume. En ce mesme temps Federic second Empereur tascha de l'enuahir par ruse, mais il fust contrainct de se retirer. Du temps de ce Roy, vn autre sien cousin maternel fit son entree en Cypre, sçauoir saint Louys Roy de France, avec la Roynie & ses freres, au deuant duquel alla le Roy Henry, la Roynie sa femme, & tous ses Princes & Barons, & ce en la Cité de Nicosie, d'où il se conduisit en celle de Nicosie : Ce Roy s'estant versé avec saint Louys en la guerre sainte, à Damiette, au Caire, il fust pris, & retourna apres sa deliurance en Cypre : l'an 33. de son regne il mourut, & gist son corps en l'Eglise du saint Cymitiere de la ville de Nicosie.

Hugues second de Lusignan, dict aussi Huguet, pour ce que fort ieune il auoit esté laissé au Royaume par son pere le Roy Henry, duquel il estoit fils unique. Sa mere pourtant avec Jean de Iblin qui estoit gouverneur du Royaume, & Seneschal de Cypre, auoient l'administration du Royaume : Ce Roy auoit fiancé la fille de ce gouverneur & Seneschal : mais le mariage ne peut estre consummé, par ce que le Roy mourut en l'aage de quatorze ans, qui estoit le 10. de son Royaume : Il fust inhumé en l'Eglise de S. Dominique, au costé dextre du grand Autel. La Roynie sa mere regna apres luy.

Hugues troisieme de Lusignan, Prince d'Antioche, son cousin Hugues second estant mort sans heritier, il luy succeda au Royaume de Cypre l'an 1266. & apres la mort aussi du Roy Conradin, comme plus proche parent succeda au Royaume de Hierusalem. Apres donc s'estre fait couronner Roy de Cypre à Nicosie, passa en Phoenicie, & en la Cité de Tyr receut la couronne de Hierusalem par le Patriarche & les grands Maistres des Cheualiers croisez & Religieux : il prend femme en la famille d'Iblin : à ce Roy icy S. Thomas d'Aquin dedia son liure du bon regime & gouvernement des Princes : Il fit bastir vne fort belle Abbaye, pres du chasteau de Cerines, & la donna à l'Ordre de Premonstré, en laquelle Abbaye il fust apres son trespas inhumé, l'an 17. de son regne.

Jean premier de Lusignan, fils premier né de Hugues troisieme, succeda aux Royaumes de son pere, & receut la Couronne de Cypre l'an 1283. en la ville de Nicosie, & celle de Hierusalem en la ville de Ptolemaide : il ne vequit qu'un an apres son pere, & n'eut femme ny enfans : Il gist en l'Eglise du S. Cymitiere de la ville de Nicosie.

Henry second de Lusignan, succeda es Royaumes de son frere l'an mil deux cents quatrevingts quatre, & apres auoir receu la Couronne de Cypre en la ville de Nicosie, il s'en alla faire couronner Roy de Hierusalem en la Cité de Ptolemaide : Il fust le dernier couronné Roy au Royaume de Hierusalem : car les autres Roys ses successeurs s'en faisoient bien couronner Roys : mais cela se faisoit à Famaguste au Royaume de Cypre, & pour ce estoient appelez Roys Titulaires. Il mourut l'an trente trois de son regne, bon iusticier, patient, constant, vierge & continent, n'ayant esté marié, & fust enterré en l'Eglise de saint François. De son temps tout ce qui estoit du Royaume de Hierusalem fust enuahy par les Turcs, & ne demeura rien aux Chrestiens, au Leuant ou en Asie, sinon les Royaumes de Cypre & d'Armenie.

Hugues quatrieme de Lusignan, fils de Guy Connestable de Hierusalem, succeda au Royaume à son cousin Henry second, l'an mil trois cents dixsept. Il fust couronné Roy de Cypre en la ville de Nicosie, & en la Cité de Famaguste, fust selon l'institution de son predecesseur couronné Roy de Hierusalem, avec les ceremonies & solemnitez requises. Ce fust le premier qui en fust couronné Roy hors du Royaume : Il espousa Alison d'Iblin. Il alla par toute l'Italie & la France avec son fils aîné, en intention de pratiquer les Princes Chrestiens, & leur demander secours pour reconquerir, sinon tout le Royaume de Hierusalem, à tout le moins les restes que son predecesseur auoit perdu : finalement l'an trente-six de son regne il mourut, & gist à Nicosie au Cloistre des Freres Prescheurs, prez la porte de l'Eglise : Sa tombe est contre terre seulement d'un simple marbre,

mais beau toutesfois, & vis à vis y a vne autre pierre dedans le mur, qui contient son Epitaphe.

Pierre de Lusignan Comte de Tripoly, à cause de ses hauts faicts & actes genereux fut nommé le Grand, succeda à son pere au Royaume de Cypre l'an 1353. & selon l'institution de son ayeul il receut la Couronne de Cypre à Nicosie, & celle de Hierusalem à Famaguste. Estant avec son pere en Italie au Royaume de Naples, il espousa Leonore niepce du Roy d'Aragon, apres avoir visité plusieurs Roys & Princes Chrestiens il retourna en Cypre chargé de deniers, de presents & de promesses, où tost apres il dressa avec le grand Maistre des Cheualiers de Rhodes vne armee de cent cinquante vaisseaux, de laquelle il voulut luy-mesme estre le chef & conducteur, & avec icelle combattit & vainquit sur mer le Sultan Empereur du Caire, print la ville d'Alexandrie, la pillà & saccagea avec d'autres villes d'Egypte, puis passa en Pamphilie à l'encontre de l'Empereur des Turcs, sur lequel il print la forteresse do Candelloro, & quelques autres Chasteaux, apres lesquelles expeditions il s'en retourna en Cypre: Il fit encore vn voyage d'Italie, apres lequel retourné en Cypre, & ayant trouué que la Roynne sa femme ne luy estoit fidele en mariage, il deuint tout furieux & cruel, tellement qu'il fut tué par ses propres freres, puis enterré au sepulchre de son pere, en l'Eglise de S. Dominique, l'an dixsept de son regne.

Perrin de Lusignan, fils de Pierre le Grand, apres que son pere eust esté tué, fut proclamé Roy par ses oncles, & autres Princes du Royaume, l'an 1370. apres auoir prins la Couronne de Cypre à Nicosie, alla receuoir celle de Hierusalem à Famaguste. Il mourut le 11. de son regne, & gist au sepulchre de ses peres en l'Eglise de S. Dominique.

Iacques premier de Lusignan fut Seneschal de Cypre, oncle du Roy Perrin, & frere de Pierre le Grand. Les Genoïs l'auoient emmené pour ostage à Gennes, où il fust emprisonné dans le Chasteau nommé Phare, à cause que le Roy Perrin s'estoit allié des Venitiens, & du Duc de Milan son beau-pere, à l'encontre desdits Genoïs, & s'estoit mis en effort de reprendre Famaguste. Or ce Roy Perrin estant decedé, les Ambassadeurs du Royaume vindrent à Gennes, redemandans au Senat leur Seneschal, comme le plus proche heritier de la Couronne de Cypre, ce qu'ils impetrerent aussi tost. Le Senat donc desirant gratifier à ce nouveau Roy, alla au lieu où il estoit emprisonné, & d'allegresse l'en retira, luy demandant pardon du mauvais traitement qu'il auoit receu, puis le mena, luy, sa femme, & leur petit fils qu'il auoit eu durant son emprisonnement honnorablement à la Cour, où fust fait vn accord, par laquelle le Roy laissoit à perpetuité au Senat la ville de Famaguste: ce qu'estant fait & passé le Roy monta sur les galeres de Cypre, ses Ambassadeurs avec luy: Le Senat enuoya d'autres galeres pour le conduire, & luy faire compagnie, avec quelques siens Ambassadeurs expressément enuoyez aux Princes & Estats du Royaume, pour leur faire approuuer les capitulations du susdict accord, & les faire publier. Le Roy apres auoir esté receu avec la Roynne sa femme fort honnorablement à Nicosie, il y print la Couronne de Cypre ce iour mesme, & ne pouuant le lendemain aller à Famaguste, il y receut aussi la Couronne de Hierusalem. Puis Leon de Lusignan Roy d'Armenie son cousin estant mort en France sans hoirs: Il se fit couronner Roy d'Armenie en la Cité de Nicosie, & de là en auant se mit à fortifier des places & chasteaux, & fit tout de nouveau dresser trois forteresses, sçauoir est le chasteau de Sigure, Caue & Potamie, comme aussi la Citadelle de Nicosie, & plusieurs autres entreprises dignes de memoire: Il mourut l'an vingtiesme de son regne, & gist en l'Eglise de saint Dominique dans la grand' Chappelle au sepulchre du Roy Hugues second, & là mesme du depuis fust ensepulturee la Roynne sa femme.

Ianus de Lusignan, né en la prison du chasteau du Phare à Gennes, où son pere auoit esté mené pour ostage, & à cause de Genua ou Ianua, estoit appelé Ianus, succeda au Royaume paternel 1402. Il espousa Charlotte fille de Iacques de Bourbon Comte de la Marche. En vn mesme iour contre la façon de faire de ses predecesseurs: Il receut les trois Couronnes de Cypre, de Hierusalem & d'Armenie, l'an 1416. ou selon les autres l'an 1420. Le Soldan du Caire desirant se vanger des dommages que le Roy Pierre de Lusignan luy auoit faicts en la prise & saccagement d'Alexandrie, & autres places, apres auoir dressé vne armee de mer l'enuoya en Cypre, & la fit assaillir au depourueu, print la ville de Nicosie, ou Lemoson, la saccagea & brulla, & fit marcher son armee vers Nicosie, où le Roy le vint rencontrer, lequel y fust vaincu, & contrainct de se sauuer & retirer aux montagnes, puis ayant remis sus vne autre armee, alla de rechef contre les Sarrazins, où il fust encores vaincu, son armee mise en route, luy prisonnier avec bon nombre de Princes & grands Seigneurs, & son frere Henry Prince de Galilee, tué avec beaucoup d'autres des siens: Les Sarrazins poursuiuans leur victoire prirent la ville de Nicosie, se firent maistres presque de tout le Royaume, horsmis de Famaguste, & quelques autres places & chasteaux. Le Roy captif, reserué pour vn triomphe fut emmené au Caire,

Caire, d'où il fut par apres deliuré & racheté par quelques Nobles de Cypre. Ce fut le premier qui se rendit tributaire. Estant de retour en Cypre, il se contrista tant de ses infortunes, qu'il trespassa l'an 29. de son regne. la Royne sa femme estant premierement decedee, & furent enterrez en l'Eglise de S. Dominique, en la grand Chappelle, sous vne fort belle tombe vis à vis du sepulchre de son pere.

Iean 2. de Lusignan, fils du Roy Ianus, & de Charlotte de Bourbon, succeda au Royaume de son pere l'an 1430 & en vn mesme iour fut couronné Roy de Cypre, Hierusalem, & Arménie. Il eut pour épouse la fille de Iean Iacques Paleologue, Marquis de Montferrat, laquelle pour le changement d'air mourut bien tost apres. En secondes nopces il espousa Helene fille d'André Paleologue, Despot de la Moree, frere de Iean Empereur de Cōstantinople, qui assista au Concile de Florence: elle mourut au mois d'Auril l'an 1459. en la Chābre Royale au Conuent des Iacobins, & ordonna sa sepulture au Monastere Grec de Manchana, qu'elle auoit fondé depuis peu de temps, où aussi estoit son Confesseur. Trois mois apres, le Roy mourut en la Chambre Royale de Sainct Dominique, & fut mis au tombeau de son pere l'an de son regne vingt-neuf.

Charlotte de Lusignan, fille du Roy Iean 2. du viuant de son pere l'an 1459. desia veufue de Iean fils du Roy de Portugal, & Prince d'Antioche, succeda au Royaume paternel, puis espousa en secondes nopces son cousin, Louys Comte de Geneue, fils de Louys Comte de Sauoye, & d'Anne de Lusignan, sœur du Roy Iean son pere. Elle fut couronnée premierement, & vn an apres le Comte son fiancé la vint trouuer, l'espousa, & fut couronné Roy de Cypre. Elle fut depossedee du Royaume par le Soldan du Caire, & Iacques son frere bastart en fut déclaré Roy par ledit Soldan.

Après la mort de ce frere bastart, les Venitiens veulent maintenir Catherine sa femme. Quoy voyant, elle fait vn voyage à Rome vers le Pape Sixte 4. en fin elle deceda, & son corps fut porté en la ville d'Aslie, où il fut inhumé en l'Eglise de saint François. Iacques fils bastart du Roy Iean 2. Soudiacre, & eleu Archeuesque de Cypre apres la mort de son pere, Charlotte sa sœur legitime auoit pris par droit de succession le Royaume de Cypre: Mais cetuy pour estre trop odieux aux Princes & grand du Royaume, fut trouuer avec quelques vns des siens le Soldan du Caire. à ce qu'il luy pleust le mettre en possession du Royaume de son pere, & empescher que sa sœur n'en fut inuestie. Sur ces entre-faites l'Empereur des Turcs Mahomet 2. enuoya lettre au grand Soldan du Caire, par lequel il luy mande, moytié par prieres, moytié par menaces, qu'il eust à chasser de la couronne du Cypre Louys de Sauoye, & de mettre en son lieu Iacques, comme estant habille homme, & le fils du Roy, au reste amy des Mahometans, & declara ledit Soldan par les plus grands des siens, & par son fils mesme, ce Iacques bastart, Roy de Cypre. & l'enuoya avec armee pour occuper le Royaume. Il espousa Catherine fille de Marc Cornato Venitien: & en apres son mariage il mourut à Famagulle, & inhumé assez pauurement & miserablement en la 12. année de son regne, de son aage le 33 l'an 1472. aucuns ont creu qu'il auoit esté empoisonné.

Iacques 3. de Lusignan né apres le deceds de son pere Iacques 2. bastart, & de Catherine Cornato Venitienne, estant seul fils legitime, succeda au Royaume de son pere l'an 1472. toutesfois sa mere gouernoit le Royaume avec les Gouverneurs & Tuteurs que le Roy decédé y auoit laissez. Elle tint le Royaume par l'ayde des Venitiens 14. ans, iusques en l'an 1489. Lesdits Venitiens aussi tost commencerent par le consentement des Nobles du Royaume à establir & créer des Officiers & Magistrats en Cypre, & par ce moyen ce Royaume vint entre les mains desdits Venitiens. La Royne Catherine estant en l'Eglise de saint Marc de Venise donna au Duc & Senat de Venise, qui là estoit assemblé vne lste de Cypre toute d'argent, ainsi que cela se void empreint en marbre en l'Eglise de saint Sauueur à Venise sur la porte de la Sacristie: Puis le Senat donna à la Royne, sa vie durant le Chasteau d'Asule, au Diocese de Treuifin, & à ses parens permission de porter à iamais parmy leurs armes celles de la maison de Lusignan, & à George frere de la Royne, il luy bailla la petite Commanderie en Cypre, à raiton du douaire de ladite Dame Royne, laquelle estant decedee, son corps fut porté à Venise, puis enseuely en l'Eglise du saint Apostre.

CATALOGVE DES PATRIARCHES LATINS DE HIERUSALEM.

DAgobert Euesque de Pise six mois apres la prise de la sainte Cité de Hierusalem, l'an 1099. (auquel temps Simeon Patriarche Grec mourut) fut fait le premier Patriarche Latin par le Clergé, & par l'autorité de Godefroy Roy de Hierusalem, qui luy bailla la quatriesme partie de la ville, comme en iouïtoit le Patriarche Grec par permission des Sarrasins.

h. iiii

Vn an apres au iour de Pasques le Roy luy donna toute la ville , trois ans apres ce Patriarche demanda au Roy Baudoin 1. la Cité & Iurisdiction d'icelle, que Godefroy luy auoit donnee, dont Baudoin luy refusa.

Ebremare prestre, homme simple, & assez peu lettré du vivant du Patriarche Dagobert fut par Baudoin 1. & l'Archidiacre Arnoul esleué au Patriarchat, qui le firent aussi consacrer: Il fut cité à Rome, d'où il fut par le Pape renuoyé avec Gibelin Archeuesque d'Arles Legat, qui auoit charge de iuger de sa cause au Royaume meisme de Hierusalem, lequel Legat le desmit du Patriarchat, & luy donna l'Euesché de Cæsaree.

Sibelin Archeuesque d'Arles & Legat Apostolique, apres la mort de Dagobert & la priuation d'Ebremare, estant la decrepite & chargé d'ans fut esleu Patriarche, il mourut le 3. an de son Pontificat.

Arnoul de Males couronné Archeuesque de Hierusalem, qui auoit entretenu finement les autres Patriarches, le fut finalement: mais pour ses mauuais deportemens le Pape enuoya l'Euesque d'Orleans comme Legat en Hierusalem, qui le priua du Patriarchat. Arnoul va à Rome & fit tant par ses ruses & sa bonne mine enuers le Pape, qu'il fut restably: il mourut l'an 8. de son Pontificat.

Garemond François, natif de Piquigny, Diocese d'Amiens fut esleu Patriarche durant son Pontificat, commença l'ordre des Cheualiers Templiers, qu'il confirma, enrichit & amplifia: Il tint vn Concile national en la ville de Naple de Samarie: il fut Gouverneur du Royaume avec Eustache Grenier, & avec le Connestable de Bais, à l'ayde duquel & des Venitiens il prit Tyr sur les Sarrazins, lors que le Roy Baudoin 2. estoit captif entre les mains des Turcs, il mourut l'an 10. de son Pontificat.

Estienne Cheualier, depuis Religieux, & Abbé de saint Iean de la Vallee, Diocese de Chartres, d'où il estoit, natif de lieu noble, proche parent du Roy Baudoin 2. fut fait Patriarche de Hierusalem l'an 1128. il fut empoisonné parce qu'il demandoit trop de choses au Roy, & mourut l'an deuxiesme de son Pontificat.

Guillaume Flamand du Chasteau de Mecline, Prieur du saint Sepulchre, homme simple & de peu de sçauoir, fut fait Patriarche de Hierusalem, l'an 1130. il estoit agreable à tous, il mourut en Octobre l'an quinze de son Pontificat.

Foulcher Archeuesque de Tyr, ayant quasi l'aage de 100. ans fut fait Patriarche, & pour ce que les Templiers luy refusoient les Decimes, & luy estoient rebelles, il les fit citer à Rome, d'où estant retourné avec gain de cause, il mourut fort vieil, & plein de iours.

Amaulry, François, du Chasteau de Noele, au Diocese de Noyon, Prieur du saint Sepulchre, fut fait Patriarche contre la volôté d'Ernole Archeuesque de Cæsaree, & d'Arnoul Euesque de Bertheen, à raison dequoy il enuoya à Rome Adrian Federic Euesque de Prolemaide, qui luy apporta la confirmation, & le manteau du Patriarchat auant que les emuleurs y eussent esté.

Eraclie Archidiacre de Hierusalem, fut esleu Patriarche du consentement de tous, il mourut de tristesse d'auoir veu les Roys pris, les Princes tuez, & Hierusalem avec le Royaume, pris par les Sarrazins.

Albert Hermite Euesque d'Ascalone, fut fait Patriarche, pource que la sainte Cité estoit occupee par les infideles, il iouïssoit du tiltre seulement, avec quelques Iurisdicions, & residoit en la ville de Prolemaide. Ce fut luy qui premierement assembla les Hermites du Mont-Carmel, & les reduisit en Monasteres, leur bailla les regles, constitutions, & l'habit de leur ordre, lesquels puis apres furent reformez par Innocent 3. Pape, qui deputa pour reformateur de leur regle Hugue 1. Cardinal de l'ordre de saint Dominique, lequel les reduisit en l'estat & regle qu'ils tiennent à present.

Après ce Patriarche, il y en eut beaucoup d'autres, tous residans en la ville de Prolemaide, & depuis que Hierusalem fut tombé es mains des Sarrazins, ils establirent le Patriarchat en la Citadelle de Nicosie en Cypre.

Hierusalem, au siege de laquelle il mourut plus d'un million de personnes, & il resta plus de cent mille prisonniers, n'a maintenant plus que cinq mille habitans: & si la sainteté du lieu n'y attiroit perpetuellement vn grand nombre de Chrestiens, ceste ville seroit peu de chose. Ceste prouince est trauessee du Iourdain, qui naissant au pied du mont Liban de deux fontaines, dont l'une se nomme Ior, l'autre Dan, par deux lacs, dont le premier est celuy de Galilee, l'autre de celuy de Tyberiadé, qui est plus grand. Finalement il se rend dans la mer morte, nommee des Grecs Lac Asphaltite.

La Phenice est sur la marine, vis à vis la Iudee. Ses principales villes furent Sidon & Tyr, aujourd'huy Sait, & Sur. Tyr estoit vne Ile, mais si proche de la terre ferme, qu'Alexandre remplit la mer de terre, & la cōbla lors qu'il y tenoit le siege. Le Prophete Ezechiel parle bien
au long

au long de sa grandeur, richesse, & magnificence. Sidon estoit presque esgal à Tyr en beauté, & en puissance. Toutes deux estoient renommées, à cause de la teinture de la pourpre, que les Poëtes nomment tantost Tyrienne, tantost Sidonienne. On n'en void presque nulles restes à present, non plus que de Ioppe & d'Acre.

La Surie s'estend depuis Tyr iusques au golphe de la Laiazze, auquel espace sont contenues les villes de Barut, de Tripoli, & de Tortose, dont Barut, & Tripoli sont fort marchandes, & au milieu du pays de Damas, & Laodicee. Damas est vne belle ville assise en vne grande vallee: ses maisons sont plus belles dedans que dehors: ses rues sont estroictes & tortuës: mais ce qui la rend plaisante, c'est la grande quantité d'eau qui va par les maisons, & arrose les jardins a plaisir. Il y a vn Chasteau excellent, basti par vn Florentin Mammelu, qui deuint fort riche, & Gouverneur de ceste ville qui est la capitale de la Prouince.

La Celesyrie est proprement le pays qui est entre le Liban, & l'Antiliban, où est la source de l'Oronte, auourd'huy Farfare, sur le riuage duquel est la renommee ville d'Antioche: qui est maintenant vn sepulchre d'elle-mesme, & vn amas de ruines, plustost qu'autre chose. On y void toutesfois encor debout les murailles, qui sont fort belles, & tellement basties, que trois personnes peuuent marcher de front tout autour. Il y a encor vn assez bon nombre de tours, & vn Chasteau assis sur vn costau. On y void encores la maison où saint Pierre se tenoit, & vn petit lieu où il baptisa beaucoup de gens. On trouue aussi à l'emboucheure de l'Oronte, Selucie Pierie, à present Soldin.

La Camogene est la partie de la Syrie, qui suit le cours de l'Euphrate, iusques aux frontieres d'Armenie, Alep est la ville capitale, qui tient le troisieme lieu entre les villes de l'Empire du grand Turc. Elle est assise sur la riuere de Singa, & a vn canal d'eau sous terre, d'où sortent plusieurs fontaines publiques, & priuees. Elle embrasse quatre costaux, sur l'vn desquels on void vn fort grand Chasteau, ses fauxbourgs sont grands, mais n'y a autre bastiment d'importance que les Mosques, & les magazins pour les marchands estrangers. On peut iuger du grand nombre du peuple qui y est, parce que l'an mil cinq cens cinquante cinq, il mourut en la ville, & aux faux bourgs, plus de six vingts mille personnes en trois iours.

QUALITE.

LA Natolie iouyt d'un air doux, & temperé, & ses champs produisoient iadis quantité de grains, le bestail y trouuoit des pasturages en abondance: & pour abteger, ses habitans auoient tout ce qui est necessaire à la vie plus qu'à suffisance. Mais pour le iourd'huy ceste contrée n'est plus si fertile, ny si bien cultiuee qu'elle estoit iadis: toutesfois aux lieux qui sont plus proches de la mer elle est plus fertile, & de mesme qu'on y cultiue mieux la terre, aussi elle y produict dauantage. Les lieux qui sont auât dans le pays, sont la pluspart de grandes cāpagnes, où l'on sème du froment, de l'orge, & du cotton. Elle est arrosée de plusieurs riuieres, dont les principales sont, l'Iris, l'Halys, Parthenius, à present Dolap, le Sangar, qui se vont rendre dans la mer Majeur, puis l'Ascagne, maintenant Ilnic, & le Phyndace, auourd'huy Sindi, qui deschargent leurs eaux dans Propōtide: Dauantage Scamandores, à present Simores, qui se rend dans l'Hellespont. & apres cela le Cayque, ou Giruasti, l'Herme, ou Sarabat, le Gaystre, que Castalde nome Chayci, & Ortelius, Chias, & le Meandre qui a six cens destours, & qui est nommé Madres. Toutes ces riuieres se vont rendre dans l'Archipelague.

Il a pareillement le fleue de Melas, à present Gensui, qui se descharge dans l'Euphrate, outre plusieurs autres qui vont desgorger leurs eaux dans la mer Mediterranee.

La Bythinie produict force bleds, & pouruoit la Cour du grand Turc de farines, principalement ce qui est près de Burse. Ce pays abonde aussi tellement en bois, & en matiere propre pour faire les vaisseaux, qu'il semble que les galeres y tombent naturellement toutes faictes dans ceste mer, tant elles y sont promptement despechees. Près de Nicee on trouue de l'orpiment en assez grande quantité.

La prouince particuliere d'Asie estoit iadis renommee à cause de la pierre Synadique presque semblable à l'Albastre, qu'on en tiroit pour faire des colonnes à Rome.

En la Troade l'on trouue le pays d'auprés de Troye fort maigre & sterile, & avecques cela les eaux y manquent: mais le terroir d'auprés de Pergame est fort bon, & rapporte beaucoup. Il y a aussi des carrieres de pierre, où l'on a trouué autresfois des hommes qui s'y estoient cachez durant les guerres, conuertis en pierre. Strabon met près de Hierapolis des eaux chaudes, qu'il dit se conuertir aisément en pierre de tuf, ou touue. On y met aussi des eaux si propres à teindre les laines, que la teinture faicte avec des herbes & racines, cede à celle-là.

Quant à la Carie, l'on a iadis estimé le terroir d'auprés de Mangelie, pource qu'il portoit du froment en abondance, & proche de ceste ville l'on trouue aussi la pierre d'Aymant, nommée

des Latins, *Magnes*. Il y a pareillement des montagnes en Carie, où l'on prend de la pierre blanche pour bastir, qui est fort luisante. Ceste Prouince a esté autrefois fort esbranlée des tremblemens de terre.

Pour le regard de la Mysie, l'on tient que les vignes qui sont au terroir d'Aspie; ou de Lampsie, portent des raisins en abondance. En Ionie on tiroit du vermillon de la terre qu'on y faisoit cuire, & en quelques endroits on y recueilloit du vin bon par excellence.

La Lydie auoit autrefois plusieurs riuieres, qui descendent du mont Tmolus, qui portoient de l'or parmy leur sablon. Ceste Prouince doncques auoit beaucoup d'or, & portoit aussi de l'argent, & outre ce le pays estoit fort bon, & bien cultivé. La montagne de Tmole a esté fort estimée, pour estre fertile au possible. Entre autres choses il y auoit force vignes, & grande quantité de safran.

La Lycie est fort aspre & fascheuse, à cause du mont Taurus qui y prend son commencement; toutesfois les campagnes sont fertiles. Le sommet du mont Chimere estoit iadis plein de lions le milieu de Cheures, à cause des bons pasturages, & le bas de Ierpens. C'est ce qui a donné subiect aux Poëtes de feindre vne beste nommée Chimere qui auoit la teste, & la poitrine de lyon, le ventre de cheure, & la queue de dragon. Les tremblemens de terre ont fait beaucoup de dommage en ce pays.

En Pamphylic, de mesme qu'en Cilice les cheures ont le poil fort doux, & fort delicat, tellement qu'il ne cede pas en molesse à la soye, & ce poil a encores ceste propriété qu'il est blanc comme la neige.

Quant à la Capadoce, elle abonde en toute sorte de grains, en vin, & en fruiëts, côme aussi en argent, en cuivre, en fer, alun, crystal, iaspe, onix & albâtre qui n'est guere beau. Ce pays nourrit aussi grande quantité de cheuaux: Il y en a d'autre part qui disent que ce pays est aspre, & à faute de plusieurs choses necessaires à la vie. Plin dit que près du fleuve Thermodon il y a deux sortes d'abeilles dont les vnes font du miel dans les arbres, les autres qui en font à trois rangs sous terre. Les sommets du mont Argee y sont couverts de neige tant en Esté qu'en Hyuer.

Le terroir d'aupres d'Amasie, ou Gazalmach est desert, & toutesfois fort propre à la nourriture du bestial. Près de Conia l'on void force vignes, qui portent d'aussi bon vin qu'on en scauroit trouuer en pas vn autre lieu.

La Cilice est diuisée en deux. Il y en a vne partie qui est appelée Aspre, qui est du costé du Couchant, & l'autre Champestre qui tend au Leuant. Ceste cy a de belles riuieres, porte force fruiëts, & toutes sortes de biens, & nourrit grand nombre de cheuaux. Or la plus grande partie de la Cilice est moyennement cultivée, à cause de la commodité des eaux dont elle est arrosée. Toutesfois son terroir est plein d'argile, & dénué de bois, qu'il faut aller querir aux montagnes qui sont esloignées de plus de deux iournees, entre lesquelles est celle d'Amman, où il croist des Cedres fort hauts, & des geneuriets, & diuerses autres plantes. Or il y a beaucoup de lieux en Cilice qui sont fort agreables, veu qu'il y a plusieurs arbres qui sont toujours verds: mais il y a d'ailleurs quelques lieux champestres & steriles, qui sont de grande estendue, & ne sont possédez d'aucun: tellement que chacun y peut faire paistre ses pourceaux, & l'on y nourrit force troupeaux de ces animaux, de mesme que des cheures, dont les habitans font grande quantité de beurre & de fromage.

Les poils de cheures y sont aussi fort mols & delicats comme de la soye. Il y a là des forests de myrthes qui portent du fruiët blanc, & pareillement des terebintes & des pins. Les fleuves de ce pays sont de Pyrame, maintenant Malmistra, qui sortât du beau milieu d'une plaine, bien loing au delà du mont Taurus, fait vn bruit semblable à vn tonnerre, qui s'entend de bien loing: & la riuere de Cydne, qui sortant de l'Antitaurus, est froide, rapide, & tres-claire. Plin a dit que son eau est propre à guerir la goutte.

On y trouue aussi de petits loups qui vont par troupes, que les Grecs nomment vulgairement Squilaques, qui sont si larrons, qu'ils ne craignent point d'aller trouuer la nuit ceux qui dorment, & de leur desrober tout ce qu'ils trouuent, comme des bonnets, des souliers, & choses semblables. Belon dict que près d'Heraclee il y a vne belle plaine, qui porte toute sorte d'arbres fruiëtiers, & qu'on y nourrit vn grand nombre de cheuaux.

La haute Armenie est toute pleine de montagnes, & des costaux, toutesfois il y a des valles qui produisent force fruiëts. On tient que ce pays est fort fertile, & abonde en animaux: mais il est grandement subiect aux neiges, qui y sont quelquesfois fort hautes.

La Georgie a force montagnes & forests, à raison dequoy elle est presque inaccessible aux ennemis. Toutesfois elle est fertile, & a quelques plaines, & quelques plaitantes valles, arrosées de plusieurs riuieres dont les principales sont le Cyre & l'Araxe.

L'Arabie Deserte a de grandes solitudes, & toutesfois y a assez bon nombre de bourgs & d'habitans,

d'habitans, principalement près de l'Euphrate, & des montagnes de l'Arabie Heureuse, l'autre partie du coëté du Couchant est toute pleine de sable.

La Petree est tenuë par les anciens pour du tout sterile, toutesfois ce qui est proche de la Syrie porte plus que le reste. Elle est fort deserte, & manque de beaucoup de choses necessaires à la vie. Elle a principalement faute de bois & d'eau douce. Il y croist des palmiers, qui portent des dattes grosses, rousses, & tendres, & qui ne sont guieres humides. La manne y tombe pareillement, & quant aux riuages, il y naist du corail qui est assez beau, mais creux par dedans. On trouue aussi en ce pays l'Amethyte.

L'Arabie Heureuse est plus cultiuee que les deux autres, & arrosée de plusieurs riuieres, dont quelques vnes font des lacs. Elle porte de l'orge, & d'autres grains, du miel, de la cire & diuers fruiëts, comme des pommes, des poires, des citrons & choses semblables: & l'on sème icy deux fois, de mesmes qu'aux Indes. Dauantage, ce pays produit des palmiers, du nard, de la casse, de la canelle, de la myrrhe, & plusieurs herbes odoriferantes: sur tout elle porte de l'encens en abondance. On y trouue aussi quelques metaux, & diuerses pierreries, & près du riuage on pèche de fort belles perles. Ce pays nourrit aussi de fort bons cheuaux, & des moutons, dont la queue pèse quelquesfois vingt liures. Mais pour parler particulièrement, le terroir qui est près de Medine est sterile, & ne rapporte que bien peu de chose, de mesme que celui d'aupres de la Mesque, où l'on trouue fort peu d'eau.

La Palestine est fort agreable, diuersifiée de costaux, & de belles plaines, & arrosée de grande quantité d'eaux. Il y pleut fort peu souuent, & toutesfois la terre y est de grand rapport, car elle produit du froment, & d'autres grains, & fruiëts en abondance. Les roses y sont de fort bonne odeur, & il y vient quantité de rue, de fenouil, de sauge, & d'autres bonnes herbes. Il y vient aussi force oliuiers, figuiers, & grenadiers. On y void pareillement vn grand nombre de palmiers, & beaucoup de vignes: car encores qu'on defende l'usage du vin aux Turcs, toutesfois il y en a icy bonne quantité, & l'on y vendange trois fois l'année. Il est vray que ce pays ne porte pas des pommes semblables aux nostres, ny des poires, ny des cerises, ny des noix, & autres fruiëts que nous auons ordinairement par deçà, mais on les y porte de Damas.

Il y a en ceste Prouince certains fruiëts que l'on garde sur les arbres tout le long de l'année, comme de grands citrons, & des pommes de Paradis. Dauantage, il y a des melons, & des concombres bons par excellence, & autres fruiëts semblables. Elle produisoit aussi iadis du baulme dont elle manque à ceste heure: mais elle a du miel, & quelques cannes sauvages de sucre.

On y trouue bon nombre de cheureuls, de lieures, de perdrix, de cailles, & semblables animaux: mais quoy que l'aye fait ce pays si fertile, toutesfois il y a des endroits qui sont presque deserts, à cause du grand nombre de rats, & de souris qui s'y trouuoient. tellement que si quelques oyseaux ne les mangeoient, les habitans du pays n'y pourroient semer aucune chose qui leur peut estre de quelque rapport.

Du long du riuage du Jourdain, il croist beaucoup de saules, de bruières, & plusieurs sortes de cannes.

Le lac Samachonite tarit le plus souuent en temps d'Esté, & il y croist des arbrisseaux, & des herbes, où les lions, & quelques autres bestes se cachent.

Les plaines près du lac Genzareth sont desertes, à cause d'un arbre plein d'épines qui vient en telle abondance, qu'il empesche qu'on n'y peut rien semer. Toutesfois les Iuifs demeurent maintenant près de ce lac, à cause de la pêche, & rendent ces lieux mieux cultiuez qu'ils n'estoient auparauant.

La mer morte qui est longue de cinq iournees en tirant au Nord, au Su, & large de cinq lieues, tendant de l'Est à l'Ouest, selon les autres longue de septante mille, & large de dixneuf ierte vne grande fumee, & pousse dehors de grands brouillards, qui rendent tout ce terroir sterile à demi lieuë à l'entour. Ceste mer ne porte aucun poisson, & l'on ne void aupres nuls oyseaux, & si l'on y ierte quelque beste, elle ne va iamais au fonds, ains se rend au riuage, encor qu'elle ait les pieds liez.

La Galilee est naturellement fertile, & produit toute sorte d'arbres, & est fort bien cultiuee. Toutesfois la basse qui s'estend au delà du Jourdain est en quelques lieux aspre & deserte.

La Samarie est partie montueuse, & partie champestre. Elle est plaisante, fertile & abonde en fontaines & eaux douces. Il y a force jardinages, & force lieux plains d'oliuiers, & de toutes choses necessaires à la vie. Les costaux proches de Naples sont couuerts d'arbres fruiëtiens, & les oliuiers y sont gros au possible, comme dit Belon.

Quant à la Iudee, le pays qui est proche de Ierusalem est bien cultiue, & porte quantité de pommes, d'amendes, de figues, & d'olmes. Les lieux montueux abondent de toute sorte d'arbres, & d'herbes sauvages, & aromatiques, & lors qu'il y a des rochers on y fait des degrez avec grand soing: tellement qu'on y plante force vignes, & autres arbres fruiëtiens, comme

des oliuiers, des figuiers des orangers qui portent des fruiçts en grande quantité.

Près de la ville de Rama il y a bon terroir, mais fort peu d'habitans, à raison dequoy les champs y sont fort peu cultiuez, & les Grecs qui y demeurent y sement du froment de l'orge, & quelques legumes, mais il y a peu de vignes. Le terroir qui est près de la ville de Gaza est fertile, & abonde en oliuiers, figuiers, orangers, & vignes. Il y vient aussi quelques palmiers: mais les dates y meurissent rarement, à cause que le pays est vn peu froid.

L'Idumee est merueilleusement fertile aux lieux qui sont proches de la mer & de la Judée, mais sterile sur les frontieres de l'Arabie, où il y a aussi force montagnes. Il y croit force palmiers, & l'on y trouuoit autrefois du baulme. Ceux qui en ont escrit, disent que les estrangers ne s'en peuuent guiere bien rendre maistres, à cause des lieux deserts qui y sont, & du defaut de l'eau. Toutesfois il y a des fontaines, mais elles sont cachees, & n'y a que les habitans du pays qui le sçachent.

Quant à la Phenice, le terroir d'auprès de Sidon est fertile, & produit assez grande quantité de cannes de miel. Celuy d'auprès d'Acon, ou Ptolemaide est aussi de grand rapport, & l'on y trouue de bons pasturages, force vignoble, & grand nombre de vergers, où l'on recueille diuers fruiçts. La riuere de Belo qui passe près de cette ville est renommee à cause de son sable, dont on se sert pour faire le verre.

Le pays d'auprès d'Emisse, ou d'Haman a force eau, & produit toutes choses necessaires à la vie. On y void vn grand nombre d'arbres fruiçtiers.

MOEVRS ANCIENNES.

Les Arabes ne faisoient anciennement aucun estat des arts & sciences. Ils laissoient tous croistre leurs cheueux & quant à la barbe quelques vns la rasoient le plus près qu'ils pouuoient, & les autres non. Celuy qui estoit le plus ancien d'entr'eux auoit tout pouuoir par dessus les autres. Ils possedoient toutes choses en commun par lignees & mesme jouissoient des femmes en commun, tellement que le premier d'entr'eux qui entroit dans la maison, & auoit laissé son baston à la porte, iouissoit premier de la femme commune, & pour le regard de la nuit, elle la passoit avec le plus ancien. En ceste sorte ils s'estimoient tous freres les vns des autres, & auoient compagnie de leurs meres & de leurs iœurs, tant ils estoient brutaux.

L'adultere y estoit puny de mort, & celuy estoit tenu pour adultere qui auoit iouy de quelque femme qui n'estoit pas sa parente. Tous ceux qui estoient nez en la famille estoient tenus pour legitimes maris. Ils n'auoient aucun loin des corps morts: & quant à ceux de leurs Roys trespassés, ils les enterroient en vn fumier. Ils gardoient leur foy & promesse sur tous autres: & quand ils vouloient promettre quelque chose par leur foy, vn tiers se mettoit entre les deux qui contractoient, & frappoit la paulme de sa main, à laquelle ils faisoient que les plus grands doigts des contractans s'approchoient, & apres auoir pris vn petit poil de l'habit d'vn chacun d'eux, il le teignoit du sang de la paulme & en espendoit sur ses sept pierres premierement preparees pour cet effect au milieu des deux parties, & ce faisant inuoquoit le Dieu Denis, & Vranie. Cela fait, ce mediateur faisoit promettre à l'vn d'eux, qu'il estoit obligé par l'accord de se rendre deuant certain Iuge qu'il luy nommoit, soit que le contractant qui demuroit obligé fut du pays, soit qu'il fut estranger, & ceste façon estoit trouuee honneste, & se gardoit entre ceux qui faisoient quelque nouvelle amitié, ou alliance. La canelle estoit recueillie par les Prestres de leur loy qui sacrifioient auparauant quelques bestes, & ne l'amassoient qu'entre les deux Soleils. Celuy d'entr'eux qui auoit plus d'autorité partageoit les monceaux de canelle avec vne hache, & l'on en reteruoit premierement vn faisceau en l'honneur du Soleil: & ils estimoient que s'il estoit également diuisé il prenoit feu par le moyen de l'ardeur des rayons du Soleil, & se brusloit de luy mesme.

Il y en auoit parmy les Arabes qu'on nommoit Ophiophages, pource qu'ils ne viuoient que de serpens. Quelques-vns aussi se seruoient de chameaux, tant pour combattre que pour porter des charges, & ne viuoient que de lait & de chair. Il y en auoit d'autres appelez Debes, qui s'adonnoient aux pasturages & à cultiuer les terres. On disoit d'eux qu'ils trouuoient entre les mottes de terre de l'or, de la rondeur & grosseur d'vne noix, & qu'ils y enchassoient des pierres precieuses, & en faisoient des carquans, dont ils paroient leurs mains & leurs cols. Ils vendoient l'or aux estrangers & aux nations voisines, & en bailloient trois liures pour vne de cuire, & deux d'argent pour vne d'autres metaux.

Entre les Sabeans, il appartenoit au seul Roy de iuger de tous différens. Leurs Roys estoient esleus par la faueur du peuple qui distribuait cet honneur à ceux qui estoient de quelque lignee, où l'on trouuoit que quelques Roys auoient esté auparauant esleus.

Ces Roys croyoient fermement que s'ils fussent tortus hors de leur Palais Royal ils eussent

sont esté lapidez, & pour ceste cause ne mettoient iamais le pied hors de leur porte. Ils auoient des lits & des grandes chaires, dont les pieds estoient d'argent massif, & le reste de leurs meubles estoit somptueux au possible. On disoit aussi d'eux qu'ils auoient esté tousiours exempts du desir de posséder par force, ou par rapine les choses d'autrui.

Les Garéens, qui estoient d'autres Arabes, auoient tous leurs meubles d'or & d'argent, & les entrées de leurs maisons, les parois, & les couuertures estoient d'yuoire.

Les Nabatéens estoient moins magnifiques que les autres. Celuy d'entre eux qui laissoit diminuer son bien encourroit note d'infamie, & au contraire les Panchaiens vsoient en guerre de chariots & diuisoient l'estat de leur Royaume en trois. Ils mettoient au premier rang les Prestres de leur loy: au second les laboureurs, & gens de trauail, & au troisieme les gens de guerre, entre lesquels estoient compris les Pasteurs. Les Prestres decidoient tous les differens qui suruenoient, tant entre les particuliers qu'aux affaires de la chose publique, sinon quand il estoit question de condamner à la mort.

Les laboureurs apres auoir cueilly les fruiets de la terre les mettoient en commun, & ceux d'entre eux qui estoient trouuez les meilleurs laboureurs estoient deputez iusques au nombre de dix à la requeste des autres, & par la deliberation des Prestres, pour distribuer les fruiets à vn chacun.

Les Pasteurs estoient obligez de faire diligence d'apporter en public les choses qui concernoient les sacrifices, & autres choses qui se distribuoient en detail à nombre de poids, & n'auoient rien de particulier entre eux fors leurs maisons & jardins. Quant aux tributs, & autres choses, tout estoit mis entre les mains des Prestres, qui distribuoient également à vn chacun selon sa necessité, & quant à eux, ils prenoient double part du consentement des deux autres Estats. Ils vsoient de beaux habillemens, pource que leurs laines estoient beaucoup plus fines que les autres. Ils vsoient indifferemment tant hommes que femmes de dorures, & portoient des chaines au col, des bracelets aux bras, & des anneaux d'or aux oreilles à la mode des Perses, & portoient des souliers de couleur, & d'estrange façon. Ils laissoient aux gens de guerre la deffence du pays. Les Prestres y viuoient en grandes delices, & toutesfois chastement. Ils portoient de longues Aubes de lin fort delices, & quelques vns portoient des robes de fort fine laine. Leurs chefs estoient couverts de mitres faictes d'orfeuries, ils vsoient de tous ornemens d'or, comme les femmes, exceptez de ceux des oreilles. Ils vaquoient principalement au seruice de leurs Dieux, dont ils recitoient les faicts en Musique en leurs hymnes. Ils se disoient descendus de Iupiter, disant qu'il estoit venu en leur pays, lors que conuerlant avec les hommes il gouuernoit l'Empire du monde.

Il n'estoit permis de transporter ailleurs l'or, l'argent, & les autres metaux, non plus qu'aux Prestres de sortir hors de leurs temples & lieux sacrez: tellement que celuy d'entr'eux qui eust esté trouué ailleurs eust peu estre mis à mort, sans que le meurtrier en eust esté repris.

Ils gardoient fort curieusement les dons qu'on auoit anciennement faicts aux Temples. Le siege ou estoit l'image de leur Dieu, auoit six coudees de longueur, & quatre de largeur, & estoit tout d'or d'un ouurage magnifique.

Toute la terre qui estoit à deux cens stades à l'entour du Temple estoit reputée sainte, & le reuenu qui en prouenoit estoit dédié, & appliqué au seruice des Dieux.

Les Iuifs qui possederent autrefois la Iudee, la Samarie, la Galilee, & quelques autres pays receurent leur façon de viure de Moyse, à qui Dieu limita ce que son peuple deuoit faire. Le serois trop long, si ie voulois dire icy tout ce qui estoit de leurs loix, à raison de quoy ie ne rapporteray icy que les plus remarquables, remettant pour le reste le Lecteur à ce que l'Ecriture, & Iosephe en dient.

Il ordonna donc premierement, que les enfans fussent dès leur ieune aage instruits en la loy, comme en celle qui contenoit toute sorte de bons enseignemens. Que celuy qui blasphemeroit le nom de Dieu fust pendu, & demeurast sans sepulture. Que rien de ce qui se trouueroit acquis par fornication ne fut destiné ou offert au Temple. Il establit en chaque ville sept personages excellens en iustice & en prudence, auxquels il donna autorité de iuger tous differens suruenans, en appellant avec eux deux Leuites, & s'il y auoit quelque difficulté signalée, il vouloit qu'elle fust decidée par l'aduis du plus grand Prestre de la loy. Il ne voulut qu'on adioustât foy à vn seul tesmoing, ains ordonna qu'il y en eut deux pour le moins, & encore sans reproche. Il ne voulut point qu'une femme fust receüe en tesmoignage, non plus qu'un homme de seruite condition. Il estoit deffendu de cueillir du fruiet d'un arbre, sinon quatre ans apres qu'il auoit esté planté, & Moïse cōmanda que deslors on cōmençast à payer la disme. Il voulut qu'on distribuast quelque partie des fruiets cueillis apres la disme payee aux proches parés, & aux hostes estrangers, & que le reste fust à celuy qui l'auroit planté: il ne voulut qu'on empeschast les

passans d'entrer aux terres d'autrui pour cueillir le fruit dont ils auoient besoin pour leur nécessité presente. Il defendit de prendre en mariage les filles qui s'estoient publiquement exposees, ou celles que les autres auoient desia espousees. Il ordonna que la fille impudique qui auroit esté prise en mariage, comme estat pucelle, fut lapidée ou bruslée viue. Si quelqu'un auoit eu compagnie d'une fille fiancée à quelque autre, & que la faute fut du consentement de tous deux, l'un & l'autre estoient mis à mort, & si la fille estoit forcée, celui qui vsoit de ceste violence en portoit la peine. Celle qui auoit esté delaissee veufue sans enfans, deuoit estre prise par le frere du mary deffunt, afin que les linees se perpetuassent: & s'il refusoit de ce faire, il falloit qu'il allegast des iustes raisons de son refus deuant les Iuges establis pour cet effect, qui ayant trouué les causes iustes luy permettoient de se marier ailleurs. Le deuil des trespassés ne deuoit durer que trente iours. Le fils qui disoit iniure à son pere ou à sa mere estoit pendu hors de la ville. Il estoit ordonné que les ennemis qui seroient par eux mis à mort en guerre seroient enterrez. Un creancier ne deuoit tenir le gage receu d'un pauvre debteur qu'un iour entier, & si le debteur ne pouuoit satisfaire, il falloit qu'il se mit au seruice de son creancier, iusqu'à ce qu'en le seruant il eut satisfait à la dette. Si quelqu'un achetoit un serf de sa nation, il le deuoit affranchir publiquement. Celui qui trouuoit une beste égarée, estoit obligé de la ramener à son troupeau, ou de la garder iusques à ce que le maistre la vint querir. Celui qui estoit atteint d'auoir présenté du poison à quelqu'un estoit contraint de le prendre luy-mesme. Celui qui auoit faict perdre un œil à quelqu'autre, deuoit estre puny de la perte du sien. Le Taureau qui auoit causé la mort d'un homme estoit accablé de pierres, & l'on ne pouuoit legitimement manger de la chair. Le fils ne deuoit souffrir en son corps ny en ses biens pour la faute du pere, ny au contraire.

Moysé ordonna pareillement que les choses prises par force sur son peuple, par les nations estrangeres, ou par quelques uns de sa nation, fussent auant que passer plus outre, redemandées par des Heraux, & qu'au cas que ceux qui luy auoient emportées ne les voulussent rendre, on leur denonçast la guerre.

S'il aduenoit qu'il fust question d'assiéger l'ennemy, il n'estoit permis de toucher aux arbres fruitiers. Tous rebelles deuoient estre mis à mort, & les autres ennemis qui se rendoient volontairement deuoient estre tributaires. En temps de guerre il n'estoit permis aux femmes de manier les armes dont les hommes se deuoient seruir.

Il estoit defendu de manger du sang de quelque beste que ce fust. Les ladres, & ceux qui perdoient leur semence estoient chassés hors des villes, de mesme que les femmes durant leurs mois. Ceux en la maison desquels quelqu'un estoit mort se deuoient absenter de la ville l'espace de sept iours. Il estoit defendu à une femme accouchée d'un enfant male d'entrer au Temple, sinon quarante iours apres l'enfantement, & celle qui auoit faict une fille n'y deuoit entrer de quatre-vingts iours. Celui qui se deffoit de la chasteté de sa femme deuoit offrir au Temple un tonneau de farine d'orge, & deuoit apres presenter sa femme aux portes du Temple, ou le Prestre l'enqueroit sur son serment, si elle auoit esté chaste, & apres le serment faict, si elle s'estoit pariurée, il luy arriuoit un desnouement du haut de la cuisse, avec une putrefaction de ventre, & ceste miserable femme mouroit en ceste sorte. Si elle auoit vescu chastement, elle portoit son fruit dans dix mois sans aucune douleur de ventre, & le Prestre effaçoit apres le nom de la femme qu'il auoit auparauant escrit en parchemin, & luy donnoit à boire. Tous adulteres, incestueux, & Sodomites estoient punis de mort. Il estoit defendu aux Prestres qui n'auoient leurs membres sains & entiers, d'approcher de l'autel, & toutesfois ils deuoient estre nourris de ce qu'on offroit au Temple. Toutes les terres possédées par les Iuifs deuoient estre laissées en repos de sept en sept ans. Toute terre qui portoit fruit d'elle mesme deuoit estre commune une fois de cinquante en cinquante ans, tant à ceux du pais qu'aux estrangers, & cet an estoit nommé lubilé. Les creanciers deuoient lors dōner respic à leurs debteurs, ou les tenir quittes pour une partie. Les serfs deuoient estre alors mis en liberté, & les terres vendues à vil prix estoient rendues à ceux qui les auoient aliénées.

Les Israélites sur tous autres peuples ont esté fort religieux, & adonnez aux ceremonies, ils ont au commencement vsé de deux sortes de sacrifices, dont le premier estoit nommé holocauste fait par le plus riche, auquel il falloit que la beste qu'on vouloit sacrifier n'eust plus d'un an. Le Prestre arrosoit le bord de l'autel du sang de la beste sacrifiée, la mettoit apres en pieces, puis la brusloit sur l'autel. Les gens de plus bas sacrifioient des bestes âgées au dessus d'un an, & apres en auoir respandu le sang sur l'autel, ils mettoient dans le feu les reins, la gresse, les entrailles, & les cuisses droictes demeuroient aux Prestres, & tout le reste deuoit estre mangé dans deux iours apres par ceux qui faisoient le sacrifice. Ceux qui estoient plus pauvres estoient obligez d'offrir deux Colombes ou deux Tourterelles: dont l'une estoit sacrifiée,

sacrifice, & l'autre demouroit aux Prestres. Celuy qui commettoit quelque crime par mégarde deuoit offrir vne brebis qui n'eust qu'un an, ou bien vn bouc. Celuy qui se sentoit coupable de quelque crime secret deuoit sacrifier vn mouton. Les Prestres se nourrissoient au temple de chairs de toutes ces bestes. Il faut remarquer qu'aux sacrifices, tant publics, que particuliers, on appliquoit certaine mesure de farine au sacrifice d'un agneau, au sacrifice d'un belier double mesure, & à celui d'un taureau trois mesures. Ils auoient aussi de coustume d'arroser les sacrifices d'huile. La coustume portoit de sacrifier tous les iours vne fois le matin, & vne fois sur le soir vn agneau. Au iour du Sabbath ils faisoient double sacrifice. Le premier iour de chaque mois ils sacrifioient deux bœufs & sept agneaux, vn belier, & vn bouc pour purger les crimes. Outre ce ils adioustoient deux boucs, dont l'un estoit mis hors du temple, & seruoit pour les pechez du peuple, l'autre estoit mené aux faux-bourgs, & brulé au mois de Mars, & au commencement de leur annee lors que la Lune estoit pleine, & que le Soleil passoit par le signe du belier, ils faisoient le sacrifice de l'Agneau Paschal, parce qu'en tel temps ils estoient sortis d'Egypte. Ils obseruoient aussi certains iours de festes des Azymes, ou pain sans leuain, & pendât chacun de ces iours ils brusloient en leurs sacrifices deux taureaux, vn belier, & sept agneaux, & l'on y adiouste encore vn bouc. La seconde sorte des sacrifices des Azymes estoit à l'entree des nouueaux fûiets, & graine qu'on presentoit au temple avec certaine mesure d'huile, & vn agneau pour holocauste. Il y a beaucoup d'autres choses à dire pour ce regard : mais il faudroit vn liure entier pour les mettre toutes : de sorte qu'il me suffira d'en auoir touché les points principaux.

Or les Autheurs Sacrez & Payens ne s'accordent pas touchant les Iuifs : car Corneille Tacite, sans rapporter à la volonté de Dieu, la sortie des enfans d'Israel hors d'Egypte, & leur passage en Iudée, dit qu'il aduint en ce temps, vne maniere de gale en Egypte, qui estoit fort fâcheuse. Tellement que le Roy Bochoris fut contraint de demander remede à Iupiter Hammon, & l'Oracle luy respondit, qu'il falloit purger son Royaume des Iuifs, qui estoient desagréables aux Dieux, & les enuoyer viure ailleurs : ce qu'il fit, & en fin, après qu'une infinité de gens malades de ceste gale se furent assemblez en vn lieu, l'un d'entr'eux, nommé Moïse, les gaigna si bien, qu'il leur persuada, qu'ils ne deuoient croire ny à Dieu, ny à homme tors qu'à luy, & de ceste sorte ils prirent le premier chemin que la fortune leur offrit, & s'en allerent au hazard, & n'eurent durant leur voyage autre travail que de la soif, qu'il leur conuint endurer, & qu'il les eust fait perir, s'ils n'eussent aduisé vn troupeau d'ânes sauvages, qui apres auoir pris leur pasture, tirerent deuers vn rocher fort couuert, à cause de la forest qui estoit à l'entour, auquel lieu ayant trouué à boire, ils receurent de Moïse des ceremonies, toutes contraires à celles des autres hommes. Il dit encor, qu'ils mirent aux lieux plus saints de leur temple, l'effigie de l'asne, par lequel ils auoient trouué le lieu où ils s'estoient desalterez, & auoient esté mis en vn bon chemin pour paruenir au pays où ils auoient depuis fait leur séjour, & qu'ils sacrifioient vn belier, pour se moquer de Iupiter Hammon, & vn bœuf en mespris des Egyptiens, qui adorent cet animal sous le nō du Dieu Apis. Il dit encor que les Iuifs s'abstenoient de manger de la chair de pourceau, pour euitier la gale & la lepre, à laquelle cet animal est subiet, & s'ils s'abstenoient de tout œurre le septiesme iour, pource que ce fut celui auquel ils furent en repos, & que pour mesme sujet ils passoient la septiesme annee sans rien faire, & que quelques vns disoient, que c'estoit en l'honneur de Saturne, à cause de la faim qu'ils auoient endurée. Selon le mesme Auteur, ils ne banquetoient iamais les vns avec les autres, couchoient tous à part, & estoient fort enclins à paillardise. La premiere chose qu'ils faisoient, c'estoit de mespriser les Dieux. Ils auoient opinion que les ames de ceux qui mouroient en bataille, ou par punition de quelque crime, estoient eternelles, & que tous iroient au Ciel, ou en Enfer, selon le bien ou le mal qu'ils auroient fait.

Or il y auoit trois sectes entre les Iuifs, qui auoient vne façon de viure toute differente de la commune. L'une estoit des Pharisiens, l'autre des Esseniens, & la troisieme des Saduceens. Les Pharisiens menoient vne vie austere en apparence, interpretant à leur volonté les traditions de Moïse. Ils portoient des cartes en leurs fronts, & bras gauches, où les dix commandemens de la loy estoient escrits. Ces cartes ont esté appellees Phylacteries. Ils portoient aussi de plus grandes bordures de robes, & y cousoient des épingles, afin que leur picqueure les fit souuenir des commandemens de la loy. Ils attribuoient toutes choses à Dieu, & à la Predestination : il est vray qu'ils confessoient que l'inclination & deliberation de l'homme luy aydoient à faire, ou à mespriser les choses iustes : toutesfois qu'en toutes choses l'homme estoit conduit par la destinee qu'ils disoient cōsister au mouvement des corps celestes. Ils n'estoient iamais contraires à l'opinion de leurs anciens, & maîtres : ils attendoient le iugement de Dieu à la fin de ce monde, & tenoient que les ames des hommes estoient incorruptibles, & que les seules ames des bien viuans passaient de corps en autre iusques au iour de la Resurrection, & que celles des meschans

estoyent enuoyées en des prisons perpétuelles. Les Saduceens nioient ceste destinee, disant que Dieu cognoissoit toutes choses, mais qu'il estoit à la disposition de l'homme de faire bien ou mal. Quant aux trespassez, ils estoient d'opinion qu'après ceste vie, il n'y auoit ioye, ny tourment pour eux. Ils nioient la Resurrection des morts, & croyoient que les ames perissoient avec les corps, & n'estimoient qu'il y eut aucuns Anges. Ils receuoient seulement les cinq livres de Moyse. Ils estoient fort seueres, & communiquoient bien peu entr'eux. Les Esseniens viuoient du tout comme Moynes, & s'abstenoient de mariage, & toute compagnie de femmes, non point en horreur du mariage, ou desir de laisser perir le genre humain, mais par crainte de la legereté & incontinence des femmes, lesquelles ils estimoient garder peu de toy à leurs maris. Ils mettoient tout leur bien en commun, & tenoient à deshonneur d'vser d'onguens, & d'estuues: & au contraire tenoient pour chose honorable de se soucier peu de leur personnes, & ce leur estoit assez d'auoir leurs vestemens blancs. Ils ne parloient aucunement des choses mondaines auant le Soleil leué, ains prioient Dieu que le Soleil se leuast, & apres chacun d'eux mettoit la main à quelque besongne iusques à cinq heures qu'ils lauoyent leurs corps dans l'eau, puis prenoient leur refection en grand silence. Il n'estoit permis entr'eux de iurer, & ils croyoient que c'estoit aussi mal fait que de se parjurer. Ils ne receuoient aucun en leur secte, sans qu'ils l'eussent esprouué auparavant l'espace d'un an entier, & par apres l'auoir receu ils estoient deux ans à l'esprouuer, & à recognoistre ses mœurs. S'ils le trouuoient en peché ils le chassoient de leur compagnie, & leur enoignoient de ne manger que des herbages, & de faire ainsi penitence iusques au dernier moment de sa vie. Quand dix d'entr'eux se trouuoient assis, aucun d'eux n'eust osé parler sans le congé de neuf autres. Ils se gardoient de cracher deuant eux, ou à costé droit, & obseruoient si estroitement le Sabbath, que ce iour là ils n'osoient mesme faire leurs necessitez, & lors qu'ils les vouloiēt faire, ils portoient vn pic de bois, duquel ils creusoyent la terre pour les cacher, tant ils craignoient de faire quelque chose qui fut au mepris de la diuine clarte. ils viuoient longuemēt, à cause de la simple vie qu'ils menoient, & mangeoient la pluspart du temps du fruit des palmiers. Ils n'vsoient aucunement d'or, ou d'argent monnoyé, & tenoient pour plus heureuse mort celle qui arriueroit à l'homme pour le zele de la iustice. Ils disoient encor que les ames estoient créées dès le commencement, & que chacune prenoit en son temps vn corps, & que celles qui sortoyent des corps en estat de bonté & d'innocence, alloient viure au delà de la mer Oceane en certain lieu, où elles jouissoient de toutes delices, au lieu que celles qui partoient du corps en mauvais estat alloient en des lieux inhabitables, à cause des grâdes froidures. Quelques vns d'entr'eux predisoient les choses à venir: quelques vns se marioient aussi mais n'auoient compagnie de leurs femmes que bien peu, & ceux-cy disoient qu'ils prenoient des femmes de peur de donner occasion, & exemple aux autres hommes de laisser perir tout le monde, ils s'en fussent entierement abstenus.

Ceux de Capadoce estoient de tel naturel, qu'ils ne pouoient viure sans Roys, & l'on dit qu'ils estoient iadis fort meschans. C'estoit en ce pays qu'on dit que les Amazones se tenoient près la riuere de Thermodon. Il y a eu en la Doride, en Ionie, & en Eolie de fort excellents hommes qui ont escrit des mieux en Grec. Les Phrygiens furent les premiers qui trouuerent les augures: la flute, & l'instrument à trois cordes, en Lycie la ville de Telmese estoit renommée à cause des augures & de l'interpretation des songes. Les Ciliciens ont esté tenus pour grands voleurs. Les Pheniciens inuenterent les lettres, & la nauigation, & auoient plus de commerce avec les nations que les autres peuples. Les Iduméens estoient iadis barbares, remuans & seditionieux, & aymoient les choses nouvelles.

MOEVRS DE CE TEMPS.

EN la Natolie on voit le milieu du pays habité de gens de basse condition. Les Turcs naturels qui sont en tout ce pays sont plus simples, & plus naïfs que les autres, & ne sōt si cruels que ceux qui ont quitté la Religion Chrestienne. Il n'y a point là de noblesse de race, ains tous sont esgaux, & tenus par les Turcs en façon d'esclaves. Les payfans y sont du tout oyseux, & paresseux ne prenant que bien peu de peine à cultiuer la terre, principalement ceux qui sont plus riches: & si les serfs ne faisoient le labourage, la terre y seroit bien tost en friche. La Capadoce est habitée de Grecs, de Turcs de Iuifs, d'Arabes, d'Armeniens. Il y a peu de gens qui demeurent en Cilice, & ceux qui y font leur sejour, à ce que dit Belon, ne s'adōnent, ny à pescher, ny à voyager sur mer & laissent la terre mal cultiuee, quoy qu'elle soit bonne, & qu'il y ait plusieurs eaux qui l'arrousent. En Idumee les habitans de Carie se seruent de pigeons pour donner aduis au Caire de ce qui se passe. On leur met des lettres souz les ailes, & ils ne s'arrestēt point qu'ils ne soient arriuez au pigeonier du chasteau, où ils trouuent leurs compagnons. Il y a six iournees d'un lieu à l'autre, & par des pays deserts.

La Palestine a des habitans presque de toutes nations, comme des Arabes, des Turcs, des Iuifs, des Grecs, des Syriens, Armeniens, Georgiens, Nubiens, Indiens, Egyptiens, & autres.

autres. La Galilee est habitee pour la pluspart des Arabes, qui sont petits & menus. & portent vn long Doliman qui leur va iusques aux gras de la jambe, & fait de poil de cheure blanc, & noir. Ils portent par dessus vne robe plus longue que le Doliman avec des manches fort longues & larges, ont des bonnets noirs & pointus. Ils vsent en guerre d'arcs, d'elpees, & de poignards.

Quant à la Iudee, il y a beaucoup de gens de diuerses nations qui se vont rendre en Ierusalem, & qui y habitent, & quiconque veut entrer au S. Sepulchre doit payer neuf escus. Les Pelerins qui y arriuent sont receus, chacun selon sa religion dont il fait profession. Les Latins sont recueillis par les Religieux de l'ordre S. François, qui demeurent hors de la ville, au mont de Sion: Les Grecs sont receus par les Caloyers qui se tiennent dans la ville près du S. Sepulchre, & les autres, comme les Abyssins, Georgiens, Armeniens Nestoriens, Maronites, & autres logent chez ceux de leur secte, dont chacun a vne chappelle particuliere. Les Religieux de l'ordre S. François qui sont pour la pluspart Italiens, ont accoustumé de creer des Cheualiers du S. Sepulchre, & leur grand Maistre donne des patentes aux pelerins, qui y ont esté enuoyez par quelque autre, afin de certifier qu'ils y ont esté. Près de Rama on ne voit que des Grecs, des Turcs, & des Arabes, qui sont fort attentifs à cultiuer, & entretenir leurs vignes. Les Iduméens sont presque semblables en mœurs aux Arabes leurs voisins.

Les Arabes sont bruns, spirituels, subtils, superstitieux, adonnez au trafic, desireux de vengeance, & de troubles, ayants fort les nouveutez & les chāgemens des affaires. Ils sont presque tous grands voleurs, & donnent beaucoup de peine aux voyageurs. Ils ont plus de ruzes & d'industrie, que de force: ils combattent sans ordre, & se confient en leur nombre: ils attaquent leurs ennemis de plusieurs costez, iusques à ce qu'ils les rompent. Et lors que leurs ennemis les assaillent, ils sont aussi tost espars deçà, delà, & s'enfuient quelquefois avec vne soudaineté merueilleuse. Ils sont extremement adonnez aux femmes, & en espousent plusieurs, & n'en laissent sortir aucune en public qui n'ait la face couverte. Plusieurs se tiennent sous des palmiers ou rochers, & en des maisons qui sont sous terre. Ils vont à demy-nuds, & portent des manteaux, & des chausses larges. Leurs armes sont des arcs, & des fleches, & des dards fort longs. Ceux qui vont par l'Arabie Deserte se cōduisent à cause des sablons par les estoilles: & il n'y fait pas bon voyager sans estre bien accompagné, à cause des voleurs Arabes: & avec cela il faut auoir des viures pour beaucoup de iours. Ceux de la Petree vivent pour la pluspart de dattes, qui sont la meilleure, & la plus commune viande qu'ils ayent. Sur le bord de la mer rouge, ils salent & sechent au Soleil vne grande quantité de poissons qui se gardent longuement. En l'Arabie heureuse, il y a beaucoup de gens qui s'amusent apres le bestail, les autres s'addonnent à la marchandise.

Les vrais Arabes logent sous des tentes, & ceux qui se tiennent aux villes sont appelez Mores. Ils vivent ordinairement de gasteaux cuits sous la braize. L'huile est vne de leurs delices. Le thresor de ceux-cy consiste en chameaux, en quelques chevaux, & en leurs armes, qu'ils laissent pour heritage. Ils ne ferment point leurs chevaux, & vsent de selles fort legeres: Ils ont grande opinion de leur noblesse.

Les habitans de Turcomanie sont grands voleurs, qui tirent leur origine des Tatars, & passent la vie sous des tentes, gardant leurs troupeaux. Il y en a toutesfois qui sont natifs du pays qui s'addonnent au labourage, & aux arts mechaniques. Il s'y fait de bons tapis, & camelots ondez, & autres.

Les Curdes vsent de mesmes façons de faire. Les Georgiens sont en grand nombre, & vailans au possible, principalement ceux qui se tiennent aux montagnes. Ils sont aussi forts & robustes, & ont gardé leur liberté iusques à nostre temps parmy les Mahometans: mais il a fallu en fin qu'ils ayent cedé aux Turcs.

RICHESSE.

LE principal reuenu de la Natolie vient du cotton qui y croist en abondance. La Bythinie La son orpiment qu'elle distribue aux autres nations. La Carie tire assez d'argent de son ay, mant qu'elle depart & debite. La Galace a des mines de cuivre, qui luy portent vn grand profit toutes les annees.

Les Pamphyliens tirent de grandes sommes de leurs camelots ondez, & autres qui sont des plus beaux qui se voyent. Les Cappadociens sont vn grand pront de leur argent, de leur fer, alun, chrystal, iaspe, pierre d'onix, & albatre.

Les Ciliciens sont aussi grande quantité de beaux camelots du poil de leurs cheutes, & en tirent beaucoup d'argent des estrangers. Ceux de Iudee retirent aussi beaucoup des pelerins qui vont au S. Sepulchre toutes les annees. La Phenice est encor vn pays de grand trafic, & de grand abord. Mais l'Arabie Heureuse est sur tout fort marchande, & ne peut qu'estre fort riche, à cause de ses especeries, pierrieres, & perles que ses habitans vendent aux marchands estrangers.

qui les y vont quérir. Entre-autres choses elle porte de l'encens qui suffit à tout le reste du monde. La Mesque est vn lieu de grand trafic, où viennent beaucoup de marchands d'Ethiopie, & des Indes, & d'autres endroits. Il y vient vn grand argent tous les ans, à cause des pelerinages, de mesme qu'à Medine. Quant à Aden c'est le lieu le plus marchand de tous, & riche au possible, à cause d'une infinité de choses qu'on y porte des Indes, d'Ethiopie, & de Perse, qu'on vient apres quérir, & qu'on ne tire pas d'entre les mains des marchands qui y demeurent sans le bien payer. Car ces gens sont fort entendus à faire bien valoir ce qu'ils ont.

F O R C E S.

23 P Remierement la ville de Burge en Bythinie, où les Empereurs Turcs se sont tenus quelques temps, est assez bien fortifiée. En Caramanie vous voyez la ville de Larande, dont la forteresse est fort estimée, tant pour son assiette, que pource qui a esté fait de main d'homme. En Paphlagonie on voit Amasie, où il y a bon & fort chasteau, basti sur la plus haute colline, avec vne bonne garnison de Turcs. La ville de Trebisonde en Cappadoce ne doit pas estre mesprisee, veu que c'est vne place assez importante, & assez bien fortifiée depuis que les Turcs la tiennent. Au pays d'Ayaman en Arabie, on void trois grandes villes qui sont fortes au possible, c'est à sçavoir, Manta, Nazua, & Baila, & grand nombre de bons chasteaux. Aden est assez fort, a de bons bastions & vn chasteau, fort tout ce qui se peut. Le port est bien clos, & le Turc y tient vne bien grosse garnison. Le Turc y tient aussi vn Bassa Zibit avec quelques milliers de soldats.

Quant à la Syrie, le chasteau de Damas est assez bon, & celuy qu'on void à Antioche n'est pas à mespriser. En Camogene la ville d'Alep est de grande importance, & son chasteau basti sur vn costau, la rend encor plus forte.

Le reste qui se void en tous ces pays n'est guiere considerable, & d'ailleurs ie serois peu discret en m'y arrestant par trop, puis que ie fay dessein de discourir en general des forces du Turc.

R E L I G I O N.

O Vtre les Mahometans qui demeurent en tous ces pays d'ont nous parlerons apres cy dessus, il y en a plusieurs autres qui sont de diuerses religions & sectes, dont nous ferons icy quelque discours, laissant toutesfois ce que nous auons mis ailleurs. Car il y a premierement des Iuifs qui sont esparus par toutes ces contrees: & quant aux Chrestiens il y a quelques vns qui obeyssent à l'Eglise Romaine, & quelques autres qui en viuent separez. Quant aux premiers, outre les marchands Venitiens, Ragousois, François, & autres qui trafiquent en grand nombre de Tripolly à Damas, & en Alep, & en quelques autres villes d'Asie, & de Surie, & sont assistez aux choses spirituelles des Religieux de S. François qui habitent en Ierusalem, & à Bethseem, on trouue vn petit peuple qui vit parmy les Armeniens à la Latine. Alangiacane est vn Chasteau à deux iournees loing de Tauris, qui a vingt-cinq villages sous sa iurisdiction, qui recognoissent l'Eglise Romaine, jaçoit qu'on y parle Armenien.

Les habitans de ces lieux furent conuertis par le Pere Barthelemy Bolognois de l'ordre de S. Dominique, qui fut fait Euesque d'Armenie, l'an 1337 sous Iean XII. Il y auoit lors comme nous auons dit, vingt cinq village: mais à present il n'y en a que douze qui persistent en l'obeyssance de l'Eglise Romaine, & des autres treize, les vns se sont remis sous le Patriarche de la haute Armenie, les autres ont esté ruinez durât les guerres que les Turcs ont eu contre les Perses: & ces douze villages Latins sont enuiron mil deux cens maisons. Ils sont assistez aux choses spirituelles des Religieux de S. Dominique, sous vn Archeuesque du mesme ordre, cela par leur Chapitre, & par les Principaux des villages, puis confirmé par le Pape.

Il n'y a guiere de temps que les Latins auoient des Eglises à Burse mesme, & à Trebisonde: mais par faute de Prestres les Eglises & ceremonies Latines se sont perduës, tellement que la Religion des Armeniens, ou celle des Grecs leur a succédé.

Venons maintenant aux autres Chrestiens qui sont diuisez en trois sectes, c'est à sçavoir en Melchites, Nestoriens, & Dioscoriens.

Les Melchites ont tiré ce nom de Melech, qui veut dire Roy ou Prince, pour ce que ceux cy ont suiuy tant en la foy, qu'aux Conciles, l'exemple des Empereurs de Constantinople, & de ceste secte sont tous ceux qui tiennent en Asie la Religion des Grecs sous les Patriarches de Constantinople, d'Alexandrie, d'Antioche, & de Ierusalem, dont celuy d'Antioche ne se tient pas en Antioche mais à Damas. Ces quatre Patriarches sont esleus par les Euesques du pays, & de nostre temps, ne recherchent pas la confirmation du Pape, côme ils faisoient au temps passé: mais demandent la licence de l'eslection au Bassa du Turc, & la confirmation du grand Seigneur, & exercent leur iurisdiction sous ceste autorité qui leur est donnée. Les Patriarches elisent, & consacrent les Archeuesques, & Euesques qui leur sont subiects.

Il est vray que quelques-vns d'entr'eux recourent au Pape pour receuoir de luy la confirmation. Tous ces Patriarches Melchites, & leur Archeuesque & Euesques sont moynes de S. Basile, de l'Ordre duquel il y a beaucoup de Conuents par tout le Levant. Mais les plus renommez sont ceux de S. Sabe en Hierusalem, de sainte Catherine au mont Sinay, & du mont Sainct sur l'Archipelagne. Ces Melchites retiennent toutes les erreurs iadis condamnées par les Grecs au Concile de Florence, & l'ontient qu'il y a plus de gens de ceste secte en Levant que des autres : car toute la Natolie en est pleine, & pareillement la Surie, & mesme elle s'estend iusques en Egypte. & de là iusques en Corrazzan, prouince de Perse. On met encor entre les Melchites les Georgiens, qui recognoissent sous vn Metropolitain l'autorité du Patriarche de Constantinople. Ceux-cy inuoquent S. George comme leur Aduocat. Il y en a quelques-vns d'entr'eux qui se sont rendus Mahometans.

Il y a aussi en ceste partie que nous auons descrite des Nestoriens. des erreurs desquels nous parlerons au discours de l'Estat du Sophy. Ces Nestoriens parlent Caldee, Arabe, Turc, & le langage de Curdestan, selon les lieux où ils se trouuent, mais ils celebrent l'Office diuin en Chaldeen.

On y trouue encor des Dioscoriens qui sont diuisez en trois sectes, à sçauoir en Armeniens, Iacobites & Costes. Les Armeniens donnent tiltre de Patriarche à plusieurs de leurs Prelats, faits partie avec la faueur du Turc (ceux-cy afferment les impositions & tributs que les maisons des Armeniens payent au Turc,) & partie esleus pour coadiuteurs des susdits Patriarches, du contentement des Euesques, ou du peuple. Mais ils ne donnent Tiltre de Patriarches vniuersels qu'à deux seuls, l'un desquels est estably sur la haute Armenie : l'autre sur la basse. Celly-là demeure au Monastere d'Ecmeazin, proche de la ville d'Eruan en Perse : & celly cy est la ville de Sis en Caramanie assez prez de Tarse. Ceste secte d'Armeniens est de bien peu moindre que celle des Melchites. Car les villes & les prouinces des deux Armeniens, de la Cilice, Bithynie, Surie, Mesopotamie en sont pleines : & mesmes on en void bon nombre en Perse. On trouue encor vne infinité d'Armeniens en toutes les villes de l'Empire des Ottomans, où il y a quelque trafic, comme à Burse, à Angore, Trebisonde, Alexandrie au Caire, à Constantinople, & à Caffé. La raison pour laquelle ils ont tant de liberté par les Estats du Turc, c'est pource qu'outre qu'ils sont de grand esprit, & bien entendus au commerce, à cause de certain teimoignage d'affection que leurs predecesseurs rendirent à Mahomet, il les recommanda passionnément à ses successeurs : tellement qu'ils ont eu de grands priuileges, par le moyenn desquels ils trafiquent librement avec les Mahometans. Les Armeniens habitent à Sis en Ad à Mira & aux environs à Tarse, à Laiazzé, en Alep, & à Darande. Il y a environ vingt mille familles. Ils ont dix-huit monasteres, & vingt-quatre Euesques.

On void à Sis le Palais. & les ruines du Chasteau du Roy d'Armenie, avec deux Eglises qui en sont proches l'une du Sauueur, qui estoit au Roy, l'autre de sainte Sophie, qui estoit au Patriarche. Ils n'ont point d'autres images que des croix d'airain & de fer, toutesfois il y a diuerses Reliques en des Reliquaires d'argent. Le Patriarche souloit iadis titer vn maidin de chaque maison : mais le Turc luy a osté ce droit, de sorte qu'il vit maintenant d'offrandes & d'aumosnes, & pour se maintenir plus aisément, il visite continuellement la Prouince, & entretient sa fille des amendes qu'il impose à ceux qui deffailent. Les Armeniens celebrent l'office en leur langue, combien qu'ils en parlent beaucoup d'autres, & ils viennent tellement de la Turquesque à Constantinople, qu'ils ne sçauent pas presque la paternostre en Armenien.

Ils ont plusieurs erreurs qui sont communes, tant à eux qu'aux Dioscoriens : mais les leurs particulieres sont qu'ils consacrent en vin tout pur : qu'ils mangent des œufs & du lait le soir du Samedy Sainct, & mangent de la chair tous les Vendredis, depuis Pasques iusques à l'Ascension. Ils celebrent l'Annonciation de la Vierge le 6 d'Auril, la Natiuité de nostre Seigneur le 6. de Ianuier : la Purification le 14. Feurier : la Transfiguration le 14. d'Aoust. Ils assurent que Iesus Christ estoit exempt des passions & des necessitez de la nature humaine. Ils s'abstiennent durant cinq Samedis de l'année de tuer de la chair, & d'en achepter, en memoire du temps, auquel les Idolatres prenoient leurs enfans, & les sacrifioient aux Idoles. Aux Messes des Treipassez ils benissent vn agneau, & luy mettant dessus la robe du Prestre ployee, ils donnent à manger du sel benit, & le menent autour de l'Eglise auant que le tuer ; & apres la Messe ils le mangent. A raiton desquelles choses quelques vns les nomment Sabbatins, & Iuhannistes, comme addonnez aux ceremonies des Iuis, & à l'heresie de Iulian l'Apostat. Toutesfois ils pensent estre conformes avec l'Eglise Romaine, pource qu'ils sont tous seuls des Sectaires Orientaux qui celebrent avec du pain sans leuain, & pour le regard de ce qu'ils ne mettent point d'eau au vin : ils disent que l'Eglise Latine en vloit ainsi anciennement : ils font aussi le signe de la croix avec deux doigts, & non pas avec vn seul, comme les Iacobites, & le font premierement du costé droit, puis du gauche, & non au contraire comme les Iacobites. Ils se

souuiennent de leur premiere vnion avec l'Eglise Romaine au temps du Pape Syluestre, de l'Empereur Constantin.

Pour venir aux Iacobites, il faut sçauoir que Dioscore & Eutyches ne voulans consentir au Concile de Chalcedoine, eurent des Sectateurs qui se diuiserent, comme dit Leonce, en douze sectes, entre lesquelles fut celle des Iacobites, ainsi nommee d'un certain Iacob Syrien, qui vesquit du temps de Pelage II. & de l'Empereur Maurice. On fait passer sous ce nom vne partie des Chaldeens qui habitent aux villes, & villages de Mesopotamie, Babylone & Surie, en nombre de cent soixante mille maisons, ou enuirou, & les principales sont en Alep, à Caramit, & en Tur, montagne de Mesopotamie.

Ils estoient iadis sujets à deux Patriarches, dont l'un demouroit en la susdite montagne de Tur, & l'autre au Monastere de Gifran, pres de la ville de Mordin, qui est vne si haute montagne, que les Turcs disent que ceux qui s'y tiennent ne voyent iamais voler les oyseaux sur leur testes. Mais aujourd'huy les Iacobites n'ont qu'un Patriarche, qui est celuy de Gifran, qui pour la plus grande commodité demeure à Caramit. Ce Patriarche a sous luy vn Metropolitan en Hierusalem, & vn autre à Mutali, & a des Archeuesques à Damas, en Orse, à Saur, à Caramit, & en Cypre : & d'autres Archeuesques, & Euesques par les susdites prouinces, avec plusieurs Conuents de Religieux de l'Ordre de saint Antoine.

Les Iacobites celebrent en Chaldeen, & parlent Arabe, Turc, & Armenien. Outre les erreurs qui leur sont communes avec les Armeniens, ils en ont de particulieres. Quant ils font le signe de la croix, ils se signent avec le doigt qui est proche du pouce, pour signifier vne vnitè de nature, de volonté, & d'operation en Iesus-Christ. Ils mangent contre la regle & coustume vniuerselle des Chrestiens du Leuant, du laitage, & de la chair le Mercredy & le Vendredy au soir apres le Soleil couché, disans que quand le iour est faully, le terme de l'abstinence est desia passé, & que le leudy & le Samedy sont commencez.

Avec ceste malice, ils mangent de la chair toute l'annee, sinon en Careme. Quelques Arabes qui demeurent aux mesmes villages, & lieux, où se tiennent les Iacobites se sont vnies avec eux, & se nomment Xemsinir, c'est à dire, Solaires, pource qu'entre les autres superstitious ils ont celle-là qu'ils adorent le Soleil.

On croit encor que les Maronites sont vn rejetton des Iacobites : car ces deux nations estoient iadis sujettes au Patriarche d'Antioche, qui est maintenant entre les mains des Melchites, & demeure à Damas, & toutes deux se seruent de la langue Chaldaïque, & de mesmes caracteres Syriacs. Ils auoient les mesmes erreurs touchant l'vnitè de la volonté, & de l'operation de Iesus-Christ. Toutes deux pretendent le Patriarchat d'Antioche, tellement que les Patriarches des Iacobites laissans leur nom propre prennent celuy d'Ignace, & ceux des Maronites, celuy de Pierre, & tous deux se nomment Patriarches d'Antioche. Ils tirent le nom de Maronites, ou de Marone village du mont Liban, ou de l'Abbé Maron, ou comme on tient communément de Maron Heresiarque. C'est la moindre secte qui soit entre les Chrestiens d'Orient, veu qu'il n'en y a qu'au nombre de douze mille maisons, la pluspart pauvres. Ils demeurent aux villages du mont Liban, & aux villes de Surie. Toutefois la secte la plus affectionnee à l'endroi du siege de Rome, dequoy elle a fait profession depuis quatre cents ans en ça, & mesme Pierre Patriarche des Maronites enuoya des Ambassadeurs au Concile de Latran, l'an 1515. Le Pape Gregoire leur enuoya deux Iesuites, qui ayans fait celebrer vn Synode, où se trouuerent le Patriarche & ses Euesques, les induisirent à vne entiere profession de la foy Catholique. De sorte qu'ils bruslerent les liures pleins d'erreurs, & reduisirent en deux Monasteres les Religieuses esparées, deça, delà, donnant ordre à ce que les enfans fussent instruits en la doctrine Chrestienne.

Le Patriarche des Maronites est de l'Ordre de S. Antoine. Il est esleu par les Euesques & les Religieux, puis confirmé par le Pape. Il se tient à Tripoli de Surie. Il a quelques Conuents de S. Antoine, & quelque petit nombre d'Euesques, qui n'ayans point de demeure asseuree sont comme ses coadiuteurs. Ils inuoquent entre les autres Saint Maron, combien qu'ils dient que ce n'est pas l'Heresiarque, mais vn Abbé de fort sainte vie.

Entre les Maronites, on en trouue quelques-vns qui sont nommez blancs, qui n'estans point baptisez se disent Chrestiens, & se confessent & communient secretement : & neantmoins viuent exterieurement à la Mahometane.

Les Curdes sont la plus part Iacobites, & Nestoriens, mais avec beaucoup d'autres erreurs, & vne extreme ignorance des choses diuines. Il y a aussi parmy eux beaucoup de Mahometans.

DES

DES ESTATS DV TVRC

EN AFRIQUE.

Des Royaumes d'Alger, de Tunes & Tremisen en
Barbarie & Mauritanie.

SOMMAIRE.

L' AUTEUR ayant discouru des pays que le Turc occupe en l'Europe & en Asie, il vient à la description de ceux auxquels il commande en Afrique, commençant par le Royaume de Tremisen, declare ses bornes, son estenduë, en longueur & largeur, & les Provinces que iadis il comprenoit. Et ayant décrit la ville d'Alger & son Royaume : il vient à parler du Royaume de Tunes, lequel il diuise en cinq Provinces, remarque leur estenduë, situation, & principales villes : entre autres s'arreste à la description de Cartage la plus ancienne du Royaume de Tunes, & iadis capitale de toute l'Afrique : Puis descendant à deux autres remarques de la fertilité de ces Provinces & mœurs, ou naturel de leurs habitans : Quant au premier, il dit auoir abondance de grains, huiles, olives, dattes, & de toutes sortes de fruits, en la plupart, boucs, bœufs & chevaux. Pour le regard des mœurs & costumes de ce pays, les femmes portent la chevelure longue, & un cercle d'airain en chaque cuisse, & qu'elles estoient anciennement communes : mais maintenant viennent à la façon des Turcs, qui leur commandent : ils ont esté de tout temps rusez, perfides & desloyaux, y ayant en ces pays deux Religions, le Christianisme, & le Mahometisme, ou la loy de Mahomet : de laquelle sera parlé amplement cy-apres, traitant de la Religion des Turcs.



LE ROYAUME de Tremisen, ou Telenim, à la Mauritanie Tingitane, en laquelle sont compris les Royaumes de Fez & Maroc, du costé du Ponant, selon la riuere de Muluie, du Leuant, celle d'Ampaga, du Midy les Numides Getuliens, & de Septentrion la mer Mediterranee, qui regarde l'Isle de Sardaigne. Iean Leon d'Afrique approche fort de Ptolomee en la description du Royaume de Telenim, lors qu'il dit, qu'il prend fin du costé d'Occident au fleuve Zha, & en celuy de Muluie, & à pour ses bornes du Leuant le grand fleuve, qu'on tient pour celuy que les modernes nomment Magrada (qui a esté cogneu par les anciens) sous le nom de Bugarades : du Midy les deserts de Numide, & du Nord la mer Mediterranee.

Ce pays fut appellé Mauritanie Cesaree du temps des Romains. Son estenduë en longueur d'Orient en Occident, est de 380. mille, mais sa largeur n'est au plus que de 25. mille, c'est à sçauoir depuis la mer Mediterranee iusques aux deserts de Numidie, à raison dequoy il est sujet aux continuelles courses des Arabes qui habitent parmy ces deserts. C'est ce qui a fait aussi que les Roys de ce pays ont recherché l'amitié des Numides en toutes façons, combien qu'ils ne leurs ayent iamais peu satisfaire.

Ce Royaume de Tremisen comprenoit iadis quatre provinces, qui portoient les noms de leurs villes capitales, c'est à sçauoir, de Tremisen, Tenez, Bugie, & Alger : mais à présent il ne luy reste que Tenez, & Tremisen. Ceste derniere ville faisoit autrefois de 16. & 17. mille feux : mais premierement à cause des guerres de Ioseph Roy de Fez, qui l'assiegea l'espace de sept ans, puis de la guerre qui fut entre l'Empereur Charles V. qui l'auoit prise sous sa protection, & les Turcs qui s'en rendirent finalement les maistres : & pareillement à cause des guerres d'entre le Serif & le Turc, elle est beaucoup diminuee.

La ville d'Alger estoit iadis sous le Royaume de Tremisen : mais à cause des charges insupportables, elle se reuolta & se donna au Roy de Bugie. Elle fust depuis au Roy d'Espagne à qui Barberouffe l'osta l'an 1515. maintenant elle est sous le Turc, & est deuenue riche, & renommee, à cause des butins qui y font vne infinité de Corsaires qui s'y retirent, & pour ce que c'est aussi la demeure d'un Lieutenant du Grand Seigneur. Elle est assise sur le pendant de quelques montagnes, à trois mille de circuit, & contient environ quatre-vingt mille personnes. Vne petite Ile luy sert de port, combien que petit & sujet au vent de Nord. Les Turcs ont continuellement fortifié ceste place, & l'ont renduë comme imprenable. Ceste ville est autrement nommée Gezair, & le Royaume d'Alger s'estend iusques à Tercot, ville de quatre mille feux, & iusques, & à Guargale qui est de six mille.

Le Royaume de Tunes comprend tout ce qui est depuis le grand fleuve iusques à la riuere du pays de Mefrat : si bien qu'il contiendra toute la contree, que les anciens nommoient pro-

prement Afrique, ou petit Afrique, & pareillement l'ancienne Numidie. Quelques vns diuisent ce Royaume en cinq parties, qui sont la province de Bugie, & de Constantin, le pays de Tunes, celui de Tripoli, & celui d'Ezzab.

La province de Bugie commence au grand fleuve, & s'estend iusques aux montagnes de Constantine, pres de la mer Mediterranee, & cet espace est d'environ cent cinquante mille : & sa largeur est presque de quarante mille.

Il y a quelques villes qui sont petites, mais assez peuplees, comme Necaüs sur la frontiere de la Numidie, & Cholo pres de la mer Mediterranee. Mais Burgie est la principale ville qui communique son nom à tout le pays. Elle est fort ancienne, & bastie sur vne haute montagne pres de la mer, par les Romains, Falzal estime que c'est celle que Ptolomee appelle Thabuaque. Sabellique la prend pour Vzaër, Sannure pour la Salde : mais Castalde, à l'opinion duquel les mieux entendus s'arrestent, tient que c'est Igilgili, pour ce que la situation est toute semblable. Il y eut iadis en ceste ville de beaux Temples & Colleges, & des logis du tout magnifiques, & outre ce des Hospitiaux, & des Monasteres à leur mode : mais la ville fut prise l'an mil cinq cent huit, par Pierre de Nauarre, & depuis elle est demeuree sans ornement, & sans beauté.

Le pays de Constantine est assis entre le mont de Constantine sur la frontiere du pays de Bugie, & le territoire de Tunes, pres la riuere du Guadilbarbar. Sa principale ville est Constantine, que Marnolius prend pour celle que Ptolomee nomme Culcuë, la mettant en la nouvelle Numidie. Toutesfois Paule Ioue, & Olivier, qui a commenté Mele, & quelques autres encore, tiennent que c'est plustost Cirte, demeure du Roy Massinisse, que Ptolomee appelle Iulie. La ville est ceinte de hautes & fortes murailles, qui sont fort anciennes. Elle est presque toute entouree de rochers fort hauts.

On y compte maintenant environ huit mille familles. Il y a beaucoup de belles maisons : & l'on voit hors de la ville vn grand nombre de beaux & anciens bastimens, entre lesquels il y a vn arc triomphal à la façon des Romains.

On met aussi en ce pays la ville de Bosne, autrement Hippone, bastie par les Romains à cent mille, ou environ loin de la mer, & renommee à cause de saint Augustin qui en fut Euesque.

Le pays de Tunes est assis en la riuere de Guadilbarbar, que les anciens ont nommee l'E-stang Hipponite, où est la longueur du pays de Constantine, & la riuere de Capes, qui faict quelques lacs, & qui estoient autresfois le Paluz, ou Maraiz Tritonide. Ce pays est renommé à cause de la ville de Tunes, capitale de tout le Royaume.

Il y a en ceste contree plusieurs belles villes, dont les principales sont celle de Tunes, que nous auons desia nommee, qui est nommee par Ptolomee, Themise, ou Thunise. Ce fut au commencement vne fort petite ville : mais apres la ruine de Carthage elle commença merueilleusement à se peupler, & enrichir tellement, qu'aujourd'huy elle est tenue pour la premiere ville de toute la contree : Elle est fort spacieuse, ses ruës sont estroictes, ses edifices bas & ferrez, & couuertes en terrasses : on y compte environ dix mille familles, & son circuit est environ de cinq mille.

Les Turcs s'en impatroniserent, & du pays ensemble au temps qu'ils prirent la Goulette : En ayant chassé les Espagnols, se firent les Mores tributaires qui en estoient Seigneurs naturels, & y auoient vn Roy : toutesfois ils ne les ont peu entierement dompter, & ne sont bien paisibles que des lieux maritimes, estans contraints pour leuer le Tribut des terres vn peu éloignees, d'y enuoyer tous les ans vn camp.

Il y a vn Bassa ou Vice-Roy de la part du Grand Seigneur, & quatre mille Janissaires soldoyez pour la garde du pays : l'autorité du commandement est entre les mains de ceux cy, ou du moins de Cara Usman, qui gouuerne en leur nom si absolument, que tous les Magistrats & le Bassa mesme prennent loy de luy.

Le Diuan où Conseil se tient en la maison de l'Aga Colonel desdits Janissaires dans la Cour, sous le couuert d'un auuent qui est deuant la sale : l'ordre de la seance represente la figure d'un escusson.

Le principal Corsaire de ce pays est Marat Raya, viel Corsaire Turc, des plus renommez de ce siecle, en ayant exercé le mestier durant 60. ans avec tant de prosperité, qu'il semble auoir eu la mer & les vents aux gages de sa fortune, comme celle cy à la solde de sa valeur, se pouuant vanter avec verité d'auoir pris des galleres de tous les Estats Chrestiens, qui en tiennent, sans que iamais on l'aye sceu accrocher : il est aagé de 80. ans, petit de stature, homme toz bourgeonné au village, & braue & courageux au possible : il a deux galleres siennes, à 26. bancs les mieux armees de chormes & de soldats qui soient en toute la Turquie : elles n'ont point de Rambades, afin qu'elles courent plus legerement quand besoin est de chasser ou de fuir. La

Goulette

Goulette estoit assise assez pres de Tunes, sur le destroit d'un estang long de dix mille, par lequel on va à Tunes.

Cartage la plus ancienne ville de ceste contrée, & autrefois capitale de toute l'Afrique, fut bastie par les Pheniciens, comme on croit, septante-deux ans avant la ville de Rome. Quelques-uns disent que son circuit estoit de vingt-deux mille : Elle estoit presque environnée de tous costez de la mer. Ceste ville osa iadis collaterer la fortune des Romains : elle estoit scituée en une peujnsule sur trois collines, separees entre elles de vallons spacieux, la plus haute baignee de la mer, fait le Cap susdict, qui retient le nom de la ville, & regarde le Cap bon port Grec : l'autre a le fort de la Goulette au Ponent, & sur sa cime se recognoissent encore les masures du Chasteau de Bufa : la troisieme a par Mestre une large campagne plantee d'oliviers, qui s'estend cinq à six lieues en longueur, & à trauers d'icelle est dressé un aqueduc sur des arcades, lequel souloit des montagnes prochaines conduire l'eau en la ville : c'est la plus entiere piece qui reste de l'antiquité de ce pays de Cartage.

Il y avoit au milieu un fort nommé Byrse, qui comprenoit un peu plus de deux mille pas. Ceste ville fut prise & bruslee par Scipion l'an six cents deux apres Rome bastie : mais ayant esté rebastie par Cesar, qui y transporta une colonie, elle fut encor florissante, & depuis elle recut beaucoup de maux des Vandales, Gots, & Sarrazins, & a esté mal traitée en telle sorte, qu'il n'y a qu'environ la vingtiesme partie de ceste ville qui soit habitée. Il n'y reste qu'une petite partie des murailles, quelques aqueducs, & un bien petit nombre de ces anciens bastimens. On dit qu'il s'y trouve environ 25. boutiques de marchands, & cinq cents maisons, qui sont toutesfois fort basses & mal basties.

Bisert, ou Benart est une ville fort ancienne assise sur la mer Mediterranee, & pres d'une riviere, qui estant fort petite au commencement, devient peu à peu merueilleusement grande. Il y a là un beau port de mer, & capable de recevoir de grands vaisseaux. Quelques-uns disent, que ceste ville est mesme chose qu'Utique, qui tenoit le premier rang apres Cartage, & qui devint fort renommee par la mort de Caton. On compte aussi en ce pais la grande ville de Cairoan, assise en une plaine deserte & sablonneuse, & celebre à cause des études de Jurisprudence, selon les loix du pais, & des superstitions des Arabes, qui y sont soigneusement observées.

Le pays de Tripoly commence au fleuve, & Golpes de Capes, & s'estend iusqu'au pres du pays de Mesrat, au delà de la ville de Tripoly. Quelques-uns disent que ceste province s'estendoit autrefois du costé de Septentrion avant qu'elle fut submergée, à raison dequoy les habitants fuyans ce malheur se retirerent du costé du Midy. Il y a en ceste province plusieurs villes, dont la principale est la nouvelle Tripoly, qu'on nomme autrement Tripoly de Barbarie. Ceste ville a acquis de la reputation de nostre temps, à cause des Corsaires qui y demeurent, & qui escument toutes les costes d'Italie, au lieu qu'autrefois il y avoit un grand abord de marchands Genevois, Venitiens, Siciliens, & autres.

Ezzabe dernière province du Royaume de Tunes, est assise au delà de celle de Tripoly vers le Levant. Elle comprend quelques villes qui ne sont pas de grande importance. Le principal pays de ceste province se nomme Mesrat, qui est pres de la mer Mediterranee, & à cent mille ou environ de Tripoly, & ce pais contient plusieurs bourgs, & villages bastis, tant en la plaine qu'aux montagnes.

Q U A L I T É.

S I nous voulons considerer en general le Royaume de Tunes, il faut dire qu'il est assez fertile, propre à nourrir force bestial, & à porter un grand nombre d'arbres qu'on y void principalement du costé du Ponant : car de celui du Levant, il n'est guiere de bon rapport, & a ce mal qu'il n'a guiere d'eau.

Mais pour venir à esplucher les choses plus par le menu, le pays de Bugie est en quelques endroits agreable, & de bon rapport, ven qu'il produit assez grande quantité de grains & de fruits. Mais en quelques autres, il est si sterile qu'on ne scauroit rien voir de plus miserable.

Le terroir de la ville de Bugie n'est propre à porter des bleds, mais produit des fruits bons par excellence. Il y a en ce pays des montagnes merueilleusement hautes & aspres, où l'on void force forests, & grande quantité de fontaines, comme aussi un grand nombre de boucs, & bœufs, & de chevaux.

Au pays de Constantine on trouve force huiles & bleds, grande quantité de beurre, à cause des troupeaux qu'y s'y nourrissent. On void pres de Bone une fort grande campagne, longue de quarante mille, & large de vingt-cinq, qui porte des bleds en abondance.

En la prouince de Tunes, on void près de la principale ville, & à quatre ou cinq mille loin tout à l'entour des campagnes pleines d'oluiers : mais elle manque de froment & de toute autre chose de grains, à cause que les habitans n'osent labourer les champs qui sont autour de la ville, de peur des Arabes qui courent de tous costez à toute heure.

La prouince de Tripoly porte grande quantité de dattes, & de fruiçts de toutes sortes, mais elle n'est nullement propre à porter des bleds : toutesfois elle produict de l'orge assez abondamment.

La prouince d'Ezzab a force belles campagnes, où le froment ne peut venir non plus que les autres grains : mais en recompense, il y a grande abondance d'olives, & de dattes, & de plusieurs autres fruiçts.

MOEURS ANCIENNES.

Les femmes de ce pays, auoient anciennement en chacune de leurs cuisses vn cercle d'airain : ce qui s'obserue encor auourd'huy en plusieurs endroits d'Afrique parmy les Mores, & portoient la chevelure fort longue. Ils estoient en quelques endroits si peu civils, ou pour mieux dire si sales, qu'ils mordoient & tuoient à belles dents les poux qu'ils prenoient sur eux, & apres les iettoient en terre. Ceux cy s'appelloient Andrimachides, qui estoient mis entre les Poënes, qui enuoyoient & produisoient leurs filles vierges, prestes à marier à leur Roy, qui despuçeloit celle d'entre celles qui luy estoit plus agreable, & en faisoit l'essay auant qu'elle vinst entre les mains de son mary.

Ceux qui se tenoient vers le Maraiz Tritonide se rasoient le deuant de la teste, & portoient les cheveux longs par derriere. Au contraire, les Auses portoient leurs cheveux sur le deuant, de mesme qu'on les donne à l'Occasion. Les filles de ceste nation dreisoient toutes les annes vn combat le iour de la feste de Minerue à l'honneur de ceste Deesse, & combattoient à coups de pierre & de baston à outrance. Celles qui mouroient en ce combat portoient le nom de fausses Vierges, & de corrompuës, & celle qui s'estoit portee plus vaillamment au combat, estoit tousiours honoree par les autres pucelles, qui l'armoient de toutes pieces, & sur tout d'une bourguignotte faite à la Corinthienne, avec vne creste, semblable à celle de nos morions, & la faisant monter sur vn chariot branlant, l'alloient pourmener en triomphe le long du lac Tritonide.

Ce peuple mesme s'accointoit des femmes confusément, & quant aux enfans qui naissoient de tels accouplemens, lors qu'ils estoient paruenus en aage, on les menoit en l'assemblee des hommes, où ils choyissoient celui avec lequel ils vouloient demeurer, qui estoit tenu pour leur pere : & tous les trois mois ils s'assembloient pour ce sujet.

Ceux de ce quartier estoient estimez perfides & desloyaux, voire en telle sorte, que leur vice vint en Prouerbe : de sorte que lors qu'on vouloit signifier que quelqu'un auoit manqué de parole, & faussé sa foy, c'estoit assez de dire qu'il estoit Poëne.

Ils estoient de tout temps rusez, comme leur Capitaine Hannibal fit assez cognoistre aux Romains, & quant au courage ils n'en manquoient nullement : mais les factions & les enuies regnoient parmy eux, & ceste diuision avec la mollesse prise à Capoë, furent cause de l'entiere perte d'Hannibal.

Le Roy de Tremisen auoit accoustumé de ne parler qu'aux plus grands de sa Cour, qui estoient apres despeschez selon sa fantaisie. Il auoit pour ses officiers vn Lieutenant General, qui marchoit en guerre avec pareille autorité que le Roy mesme : vn grand Secretaire qui escriuoit, & respondoit au nom du Roy, vn Thresorier, & encore vn autre qui distribuoit les finances, où il estoit requis, & selon que le Roy le commandoit. Le cinquiesme estoit le Capitaine de la porte, ou plustost le grand Maistre qui commandoit aux Gardes du Roy : & quant aux Chambellans, bien qu'il y en eust, si ne seruoient ils, sinon lors que le Roy donnoit audience, veu qu'en sa chambre il estoit seulement seruy par des esclauës, & par ses femmes & ses Eunuques.

MOEURS DE CE TEMPS.

Les habitans de ce pays vivent presque de mesme sorte que ceux des Royaumes de Fez, & Marroc, dont nous auons fait mention ailleurs. Il est vray qu'ils s'accommodent vn peu à la façon de viure des Turcs qui leur commandent. Les Arabes y vivent aussi comme ceux dont nous auons parle, traictant de l'Empire de Marroc.

Ceux qui sont originaires du pays, n'ayment guieres les Turcs qui ont autorité sur eux, & s'il arriuoit quelque trouble, ce seroient les premiers qui mettroient les mains contre ces vsurpateurs de leurs Prouinces.

Les hà-

Les habitans du Royaume de ce pays sont de bonne complexion, supportent le travail bien ay sément, & parviennent le plus souvent à vne parfaite vieillesse, si la fin de leurs iours n'est aduancee par vne mort violente. Ils sentent peu de maladies, & ne les craignent guieres.

Ceux qui se tiennent en la prouince de Bugie sont riches, nobles, & gentils & aussi civilisez qu'on en puisse trouuer au reste de la Barbarie. Ils ont vne ancienne coustume de peindre vne croix noire au dessus de leurs machoires.

Les habitans du pays, comme particulièrement de Tunes ne sont guiere riches, principalement ceux qui sont nobles, qui n'exercent nulle sorte de trafic. Leurs mœurs sont semblables à celles des autres Prouinces, excepté que ceux de celle-cy sont plus versez aux lettres que les autres, ceux d'aupres de Carthage sont superbes au possible, combien qu'ils soient du tout misérables.

Au reste, tout le pays qui est pres de la mer, est plein de Corsaires qui escument continuellement, & rafflent tout ce qu'ils rencontrent. Il y a force Chrestiens qui sont tous esclaves, & particulièrement en la ville d'Alger, on en compte vingt cinq mille, qui ont les humeurs, & les mœurs des pays, où ils sont nez : mais vivent à la discretion de ceux qui les ont sous leur puissance.

RICHESSE.

Ces pays ne peuuent faillir d'estre riches, puis que les marchands y abordent de tous costez, excepté à Tripoly, où les escumeurs de mer font leur demeure ordinaire, à raison dequoy les Venitiens, Geneuois qui auoient accoustumé d'y aller trafiquer, troyent ce lieu comme dangereux.

On void à Constantine vn grand nombre de marchands qui vendent des draps, & de la laine, comme aussi de l'huile, de la soye, & de la toile, & beaucoup d'autres choses. Les Geneuois, & quelques autres vont à Bonne, pour faire emploie de grains & de beures, & les mesmes se transportent à Tunes en grand nombre pour le trafic, de mesme que les Venitiens, & plusieurs autres marchands.

La nourriture du bestail rapporte vn fort grand profit aux habitans de ces pays, & le grand nombre des esclaves qu'ils font trauailler leur est vn profit inestimable.

RELIGION.

Tous ceux de ce pays font profession toute ouuerte de la loy de Mahomet, de laquelle nous parlerons à fonds, lors que nous traicterons en general de la Religion des Turcs. Et quant aux esclaves Chrestiens, ils y vivent en leur Religion avec vne infinité de miseres, estans traitez de mesme, ou peut estre plus rudement, que ceux qui se trouuent dans les terres de l'Empereur de Maroc.

DESCRIPTION MODERNE DE LA BARBARIE, TUNIS, ET ALGER, SELON LES MEMOIRES du voyage d'Orient de Monsieur de Breues, Ambassadeur de sa Majesté Tres-Chrestienne au Leuant.

La coste de Barbarie s'aduance hors en sa courbe pres en septante mille de mer, comme vne longue table, aux deux coings de laquelle s'elueent deux montagnes ou Promontoires, distans vingt mille l'vn de l'autre: car tel est la largeur de ladite table: celui qui regarde le Leuant s'appelle Calybia, du nom d'vne forteresse qui est à la cime, iadis bastie par les Espagnols: celui de la partie opposite du Cap bon est vne grosse Roche, sur laquelle n'y a autre bastiment que deux eschauguettes.

Aupres du Cap bon sont deux Ilettes nommez Zimbres, ou escueils scituez à l'opposite, & tout contre le Cap bon, separees entr'eux enuiron d'vn mille, estant le petit droit deuant le Cap, & le plus grand au Ponent: cestui-cy est haut, aspre, raboteux, & entre-coupé de precipices, au reste memorable.

Il y a le Goulphe de la Goulette, à la bouche duquel sur main droite, en entrant se void le Cap de Carthage: il est distant de douze mille de Tunis, & y a vn Lac qu'il faut trauerser pour y arriuer.

Ledit Golphe, port de Tunis, est de forme presque ronde, ayant dix ou douze mille de diametre: sa bouche regarde le Grec Leuant, & sa trauerse est au Siroc. Il y a vn Lac de douze

mille, lequel courant par le Ponent à costé d'une partie dudit Golphe iusques au pied des collines, où Tunes est saluée, laisse entre deux une estroite langue de terre qui fait la separation, & sert comme de digue pour empêcher que l'eau de la mer ne se mette avec celle dudit Lac.

Sur ce destroit fut basti le fort de la Goulette en son temps la meilleure place d'Afrique, à l'edification de laquelle les Espagnols consommèrent quarante ans, & la laisserent perdre en quarante iours, il n'en reste plus auourd'huy que les masures, & au milieu d'icelle un coing de boulevard, où ceux de Tunis tiennent trente Janissaires pour la garde du port, & dix pieces de canon, on y void les ruines de deux fossés à fonds de cuve, esquels coule l'eau de la mer: le plus proche du Donjon avoit quinze pas de large, l'autre estoit si spacieux qu'une galley pouvoit voguer, & cestuy cy couppant ceste langue de terre, que j'ay dit faire la separation du Golphe & du Lac, donnoit passage aux bourgeois qui venoient de la ville au port pour le chargement & deschargement des vaisseaux.

Entre l'un & l'autre fossé, sur un large rempart il y avoit deux forts, l'un deffendant le Donjon du costé de Lebesche: l'autre scitué vers le Grec, cestuy cy ayant esté pris le premier par les Turcs: le Gouverneur, peu de iours apres trouvant à propos d'abandonner l'autre, comme il retiroit ses soldats dans le Donjon, leurs ennemis leur donnerent à dos, & les chargerent si rudement & de si prez, qu'ils entrerent pelle-mesle avec eux dans la forteresse, & s'en rendirent Maistres l'an mil cinq cents septante quatre, le iour de saint Barthelemy vingt-quatriesme Aoust à Midy, du regne de Philippes II. Roy d'Espagne, & de Sultan Selim Empereur des Turcs, ainsi fut laschement perdue ceste place quarante iours apres que Siuan Bassa & Cochiali Capitaines es mers du Grand Seigneur l'eurent assiegee avec une armee de trois cents galeres, vingt grosses naues, & plusieurs Caramonfaux, qui sont vaisseaux de diverse grandeur, desquels les Turs se servent en marchandise.

Ledit Siuan Bassa General de l'armee, ayant fait venir devant soy le Capitaine qui commandoit dedans la Goulette, nommé Dom Pietro de Carroga, luy donna un soufflet, en luy reprochant aigrement sa lascheté, puis le fit mettre aux ceps, où il mourut peu de iours apres en chemin de Constantinople.

Celuy qui gouverne auourd'huy Tunis s'appelle Cara Osman, Turc de nation, simple Janissaire, sans charge, cordonnier de sa premiere vacation: mais qui par les menées & factions gouverne depuis quinze ans en çà l'Etat de Tunis au nom de la Milice des Janissaires, si absolument, que toutes choses dependent de luy, n'osant aucun, non pas le Bassa mesme, rien entreprendre que par son aduis, & bien qu'il demeure à la porte du Palais dudit Bassa, avec la troupe de ses compagnons pour sa garde: toutefois il ne se peut resoudre dedans aucun affaire, ny prendre aucune determination au Divan, ou Conseil dudit Vice-Roy, que premierement elle ne soit communiquee à Cara Osman, & ce qu'il arreste, ayant recueilly les voix de ses compagnons passe pour loy irretragable. Quant à sa personne, il est de moyenne taille, gros & robuste, de contenance fiere, & arrogante à merueille, ayant l'œil furieux, & qui ne regarde jamais en face, le visage plain & rond, portant le menton raz, & la moustache grande comme tous les autres Janissaires de Barbarie: son vestement simple, & non different du commun, un bonnet rouge entouré de trois ou quatre plis de Turban, la chemise ou aloc iusques au dessus le genouil, un saye de drap violet venant à la moitié des cuisses: par dessus une longue robe de mesme estoffe qu'il porte ordinairement à la fantaisie, troussée autour du col, & pendante de costé d'autre, comme les cornettes des Conseillers du Parlement, & avec cela une paire de gros couteaux à la ceinture.

Vers la ville de Tunis, le long de ce destroit de terre susdite, sur ledit Lac se void une certaine espeece de grands oyseaux appelez des Mores Louzé, & des Turcs Calouues, lesquels ont les jambes fort menuës & greslees, hautes de plus de deux pans & demy, le corps de la grosseur d'un heron, couvert de plumes blanches, le manteau des ailles incarnates, & les grosses plumes noires: le col tres-long, reuestu d'un duvet blanc, rougissant de mesme que le fond d'une rose blanche nouvellement esclose, le bec de pareille couleur, ressemblant un cartilage courbé, au milieu en dos de rasoir, & long d'un demy pan, ils sont en si grand nombre, que l'eau en est toute couverte.

Pour revenir à Tunis, outre ce que dict est cy-dessus, elle est la ville capitale du Royaume appellé de son nom, scituée en la province, iadis nommée Mauritanie, en pays sec & pauvre, ayant à son Midy une longue suite de hautes montagnes, bonnes & fertiles, habitées de Mores, lesquels demeurent en des Donary qui sont villages ambulatoires, composez de cent ou deux cents petites tentes, qu'ils changent & transportent de lieu à autre,

à autre, selon la commodité des saisons & pasturages pour leur bestail, dont ils nourrissent grande quantité, principalement de chevaux. Ces tentes sont rangees de telle façon qu'il y a plusieurs ruelles comme en vn Camp, & au milieu d'une grande place où ils retirent le bestail, les dernières sont entrelassées les vnes dans les autres, de façon qu'elles seruent de mur au Donary, auquel n'y a que deux entrees, l'une pour le passage des animaux, & l'autre pour la gent & le peuple: de nuit on les bouche avec de gros faisceaux d'épines, de peur que les Lyons & autres bestes sauvages n'y entrent.

Tunis a du costé de Tramontane le Lac susdict long de douze mille sur le bord meridional, auquel les Espagnols auoient vn fort qu'ils perdirent peu de temps apres la Goulette: on passe à trauers sur les ruines d'iceluy pour aller de la ville au lieu d'où partent les barques, qui tous les iours vont à la Goulette.

Les femmes de Tunis sont lubriques & publiques, & ce qui est à remarquer, est qu'au milieu de la roye publique, elles se presentent là toutes prestes à toute heure, au desir des passans, lesquelles avec le premier qui en demande sans se cacher en presence d'un chacun, font leur petite besongne priuément à la Diogenienne: & les Mores cognoissans que la naïueté & franchise de ce commerce semble estrange aux estrangers, plus civilisez qu'eux, pour leur en oster l'estrangeté, & les y appriuoiser chaque fois que les estrangers trauesent par le milieu de ses femmes, s'esbattent à qui en offrira le spectacle: mais premierement leur font donner deux ou trois aspres pour payer la poste: ils ne les ont pas si tost mis és mains de ces commeres, qu'elles les serrent contre leurs bouches, & elles mesmes s'esquipent au combat, se couchant emmy la place, plustost naïsument qu'effrontément, puis commencent la luitte, passans les iambes sur les espauls, & les enlaceans fermement autour du col des compagnons, à la mode du pais: quoy fait prenant vne petite cruche pleine d'eau qu'elles ont tousiours près de soy à cet vltage, nettoient & lauent leurs corps, conformément aux loix de la Religion Mahumetane, lesquelles lians la pureté & mondicité de l'ame avec celle du corps ordonnent ce lauement aux leuis, apres qu'elles ont satisfait aux fonctions naturelles: Ceste ceremonie acheuee elles se rasent.

Il faut aussi obseruer que les Tures de Barbarie ont vne Musique composee de quatre sortes d'instrumens, qui rendent vne harmonie agreable: ils ont deux sortes de tambours, vn ressemblant aux nostres, qui accompagnent les menestriers de villages, lequel portans pendu au col, ils le touchent de la main droite avec vne petite massue courbe par le bout comme vne croisse, & de la gauche en frappent le reuers avec vn menu sion de verge: les autres sont d'airain, & de la grandeur d'une salade ou d'une bourguignotte, ainsi clos d'un bout, ne pouuant estre battus que par vn costé: il y en a tousiours deux ensemble, lesquels voulans toucher ils les posent en terre & se baissent, & les touchent avec deux petites houssines fort delices: voila leur commune Musique, tant pour la paix que pour la guerre. Pour leurs Noces, Circoncisions, & autres festes & solemnitez, aux ceremonies publiques, comme au Berran, qui est leur Pasque, ou à la Circoncision du Prince, ils y adioulent d'autres gros tambours, qu'à peine six hommes les peuvent porter.

Alger ville capitale du Royaume, est scituee sur le penchant d'une roide colline, & s'estend du sommet d'icelle iusques au riuage de la mer, representant la face d'un theatre, estans les maisons esleuees par degrez l'une plus haute que l'autre: de sorte que toutes, sans que les premières nuient aux dernières, iouissent esgalement de l'aspect de la mer: sa figure est quadrangulaire, plus longue que large: ses edifices serrez sans iardinaiges, ayant seulement leurs petites courts, & dessous icelles des cisternes, esquelles se reçoient les eaux de pluye, pour s'en seruir au besoin, d'autant qu'il n'y a aucunes sources dans la ville, ains y est l'eau apportee de dehors par canaux, & aqueducs, qui se peuvent trencher aisément de celuy qui l'assiégeroit, & pour cela fouissent-ils lesdites cisternes: les maisons sont couuertes, en terrasses & enduites de chaux dedans & dehors, tellement que de fort loing, la ville se voit comme vne tache blanche dans la montagne. Autour des murailles qui ferment le costé de la mer de quatre en quatre cents pas sont basties de grands hostels, en chacun desquels loge vne compagnie de Janissaires, & dedans leurs enclos y a des courts spacieuses, où les soldats se peuvent ranger en bataille. Elle a bien quatre cents mille de circuit, & contient plus de cent mille ames y compris les dix mille de la garnison.

Il y a vne Citadelle autour des murailles, en laquelle sont plus de deux cents pieces de fonte, tant grosses que petites.

Dehors du costé du Midy, sur le sommet d'une montagne sont construietes deux forteresses

qui la commendent , & vers le Nord à cent pas de la porte y a vn esperon sur le rivage de la mer , que l'Occhialy fit faire pour flanquer la coste , & en empêcher l'abord aux galeres ennemies.

La principale force du Royaume d'Alger consiste en ces dix mille soldats entretenus en ceste ville , tant en paix qu'en guerre , sçavoir six mille Janissaires , entre lesquels sont trois cents Mausoulagas qu'ils appellent , huit cents Boulocbassiss , six cents Odobassiss , & le reste soldaches , ou simples soldats : plus trois mille , tant Topigia & Mutafaragas , que Dognengia & Spagis , & mille Morisques , Granadins , ou Tagarins.

Lesdits Janissaires sont le corps de la Milice , & gouvernent absolument l'État d'une façon la plus tumultueuse & estrange qu'on vid iamais , ne recognoissans le Grand Seigneur non plus que le Bassa , lequel bien souvent ils iettent en prison , s'il manque de leur donner leur paye à iour nommé : au reste sont presque tous Chrestiens reniez , gens perdus , sans foy , sans conscience & sans Religion , ramassez comme en vn clouaque de tous les États de Turquie , & de Chrestienté , & bannis ou fugitifs de leurs pays , pour l'enormité des crimes par eux perpetrez : Ils vont tous rases , fors la moustache , brauement armez , n'espargnans les trente , quarante , ou cinquante escus en vne harquebuse , tres-bien vestus , comme de soye , d'escarlata , qui leurs viennent iusques aux genouils : la pluspart de leurs habits & sayons garnis de boutons d'argent ou d'or , & par dessus vne longue robe de mesme estoffe , en teste vn bonnet rouge avec vn petit Turban à l'entour , aux jambes ils portent des chausses d'escarlata , & des boutines de marroquin de diuerses couleurs.

Les Chefs , comme les Boulocbassiss , Odabassiss , & autres differens des simples Janissaires , par la coiffure , s'affutans d'un chaperon rouge , dont ils replient la queue sur l'oreille , & ceignent la testiere de sept ou huit tours de Turban rouge , comme cordons l'un à costé de l'autre. Ceux d'entre les gens de guerre qui ne sont point mariez , tirent outre leur paye ordinaire quatre pains le iour pour deux deniers , lesquels pains ils vendent seize deniers , & ce en toute saison , quelque cherté de grains qu'il y aye.

Outre ceste soldatesque , qui ne fait que la dixiesme partie du peuple de la ville , elle est encore habitee de Mores & de Iuifs , ceux-cy en grand nombre : mais pauvres plus qu'en autre lieu du Levant , d'autant qu'ils ont leids Mores pour compagnons de commerce , aussi fins & rusez qu'eux. Ils se vestent de long à l'usage du pays , portans sur leur soustane vn baracan ou grande cape de serge noire , tissue d'une piece sans couture avec son capuchon derriere. Les vns se couurent la teste d'un bonnet noir ou violet gros , haut en forme de poire : les autres , sçavoir ceux qui descendent de Catalogne , & leur posterité se coiffent d'un chapperon de drap noir , dont la queue leur pend derriere iusques à la ceinture , semblables iustement à ceux qu'y portent les vieilles matrones de Paris.

Quant aux Mores , leur étant aussi bien qu'aux Iuifs interdit le maniment des armes , ils s'addonnent au trafic , leurs habillemens estans longues soustanes de couleur de baracana blancha , par dessus leurs coiffures ils ont des Turbans blancs , desquels ils passent deux ou trois plis sous leur gorge.

Les femmes des vns & des autres , par la ville se couurent & enveloppent tout le corps d'une grande piece de serge , ou d'estamine , & se cachent le visage avec deux linges , l'un qui leur voile le front iusques sur les paupieres d'enhaut , & l'autre la partie inferieure de la face , tellement qu'elles ne monstrent que les yeux , & dessous leurs mantes elles portent souranes de diuerses estoffes , de soye & de brocard. Au lieu de chausses elles vsent de longs calçons , de toile fine , qui leur devalent iusques aux chevilles des pieds , & se parent le col , les bras & les iambes d'orseueries , enrichies de ioyaux & pierres precieuses : elles se teignent les ongles en rouge , avec vne certaine herbe appelée des Turcs , & des Mores *Quena* se nourrissent les paupieres , les sourcils & leurs cheveux avec de l'antimoine brulé.

D'ESCIPTION DE L'EGYPTE, ET LA TROGLODITIQUE SA VOISINE.

SOMMAIRE.

AV Royaume de l'Egypte se trouuent plusieurs choses dignes de remarques s'il y en a au monde : mais auant que de les toucher l'Auteur expose l'assiette du pays, la pluralité des noms dont les anciens ont baptisé l'Egypte. D'où les Egyptiens ont tiré leur origine. L'estendue de ceste province en longueur & largeur. Sa figure ressemblant à vne bande desployee de son long. Sous quel climat, & en quelle paralelle. Les diuerfes partitions que les anciens ont fait de ce pays, & comme iadis elle estoit diuisee en haute & basse. Le grand nombre de ses villes montans 26. mille, du regne l'Amasis : Le nom des plus renommées, entre lesquelles est Syene, où se monstre vn pays fort profond, auquel on ne void point d'ombre, le Soleil entrant au signe de l'Ecreuisse. Memphis celebre pour la demeure des Roys d'Egypte, & pour le voisinage des Pyramides mises entre les sept merueilles du monde. La ville du Caire de figure triangulaire, qui a dans son enceinte vne Tour, par le moyen de laquelle on cognoist & prenoit la fertilité ou sterilité future de toute l'Egypte. Alexandria, ville bastie en forme de Croissant, où l'on void de belles cisternes, les ruines des anciens Palais de Cleopatra, & du Roy pere de sainte Catherine. Dix esquilles hautes de dix toises, & autres singularitez, Damiette & autres. Le Nil fleuve admirable en son nom, qui en ses terres porte le nombre des iours de l'annee, & celebre pour ses sept bouches, qui inondans les terres d'Egypte les rend fertiles : la source duquel ignorée des anciens a esté descouuerte en nostre temps. Entre les superbes edifices de ce Royaume sont les sepulchres des Roys, les obelisques, les Sphinx, les Pyramides. Vient en suite la consideration de ses richesses causees de l'abundance de toutes sortes de grains, coton, sucre, vins de longue garde, palmiers, sycomores, grenades, oranges, le tamaru, l'alcaneseruant au teinct des Egyptiens : L'ametiste, & autres pierres precieuses, pierres aërites ou d'aigle doüees de telle vertu, qu'elle font surprendre & recognoistre les larrons. Et pres du Caire croist l'arbre portant le baume. Quant au naturel des Egyptiens, & grande subtilité d'esprit, il suffit dire que l'antiquité leur a donné & attribué l'inuention des sciences : les femmes s'y trouuans mesme capables d'exercer la marchandise, & faire tous autres offices de l'homme : ce qui se pratiquoit anciennement. Le reste du discours de l'Auteur est fort notable, touchant l'ancienne forme du dueil des Egyptiens. Leur façon d'escrire de la main droite à la gauche, & les deux sortes de lettres dont ils vsoient, l'vne sacrée, & l'autre commune & profane. Les vestemens des Prestres, leurs sacrifices, leurs viandes, les festins, à la fin desquels se monstroient vne schelette, ou corps mort. Les pompes de funerailles & obseques, tant Royales que des particuliers. Les Deitez qu'ils adoroient sous la figure de toute sorte d'animaux. Leur naturel, façon de viure, & Religion de ce temps. Leurs loix & costumes anciennes faites sur le trafic, & le larcin, & touchant le mariage de leurs Prestres. L'autorité des Roys : l'ordre qu'ils tenoient à traicter les affaires : & leurs ceremonies au sacrifice du Taureau qu'ils faisoient aux Dieux. Finalement, & pour le dernier poinct est representé quel est l'estat de la Religion à present en Egypte, & quelle est la maniere de viure des Chrestiens appellez Coptes, ou Chrestiens de la Ceinture des Roys qui ont regné en ceste Monarchie, & de son Gouvernement depuis la destruction de l'Empire Romain, iusques à l'inuasion d'icelle par les Turcs.



QUELQUES anciens Auteurs ont voulu que l'Egypte fut vne partie du monde, & separee de l'Afrique, & de l'Asie, entre lesquels ils l'enferment.

Les autres qui prennent le Nil pour la vraye borne de l'Asie & de l'Afrique, mettent vne partie de ce pays en Asie, & l'autre en Afrique.

Mais Ptolomee, & plusieurs autres qui ont pris le Golphe Arabique, ou la mer rouge pour vne borne plus commode de ces deux parties, ont logé l'Egypte en Afrique.

Elle fut iadis nommée Aerie, Aërie, Potamie, Ogygie, Melambole, Hepheltie, Myare, & Ethiopie encore, à cause des Ethiopiens qui s'y tenoient, ainsi qu'Estienne, & Eustathie nous rapportent. Mais le nom d'Egypte luy vint de l'vn de ses Roys frere de Danaus, ou de la riuiere du Nil, qui se nommoit autresfois Egypte : ou des peuples de Merceu descendans de la race de Cham, qui, selon le tesmoignage de Iosephe, furent appelez Egyptiens.

Ce pays a aussi receu plusieurs noms, ou epithetes de diuers Auteurs, veu qu'Apollodore le nomme la Religion des Melampodes, à cause de sa grande fertilité, & suivant Plutarque en Osiris, on luy donnoit le nom de Chemie aux ceremonies sacrées des Egyptiens. Et peut estre qu'on disoit ce mot au lieu de Chamie, ainsi qu'Ortelius a fort gentiment remarqué, à cause de Cham fils de Noé.

Dans les liures sacrez des Hebreux, ceste contree s'appelloit Mesraim, comme dit Iosephe, Chus, si nous voulons croire à Arias Montanus. Sur quoy ie ne veux pas taire que

Les Egyptiens ont tiré leur origine de Mesraim fils de Chus, qui sortit de Cham fils de Noé. Les Arabes appellent ce pays Mezré, & ses habitans Chybit, du nom de celui qui domina le premier en ces quartiers.

Les Turcs les nomment Elchebits selon Pinet, ou bien Elquibet, à ce que dit Marmolie.

Ceste province s'estend en longueur du Midy au Septentrion par vn long espace. Elle a pour ses bornes du costé d'Occident les deserts de Barce, de Lybie, & de Numidie, & le Royaume de Nubie : du Midy le pays de Bugie, & le Nil, ainsi que dit Leon d'Afrique, d'autant qu'il faict en cét endroiēt vn petit serpentement, & se destourne quelque peu du Ponant au Levant.

Mais Pline suiuy de plusieurs pour ce regard, met la fin de l'Egypte de ce costé pres de la ville de Siene, qu'on nomme maintenant Asne. Les autres disent, qu'il a du costé du Midy des Cataractes, qui sont des precipices fort estroicts, par lesquels le Nil tumbant avec vne grande abondance d'eaux, ne semble pas couler, mais se precipiter avec vne grande & extreme violence.

Il a pour sa borne du Levant les deserts d'Arabie, qui sont entre l'Egypte & la mer rouge, & toute ceste contree est deserte, sans eau, à huit iournees de longueur. Il aboutit du Nort à nostre mer, qui est nommée en cét endroiēt mer d'Egypte du pays qu'elle borde. Ce qui faict assez cognoistre que les anciens ont nommé seulement Egypte, ce qui est habité, & arrosé du Nil, c'est à sçauoir le pays qui est enuironné de grands deserts, commençant depuis les lieux qui sont proches de Siene iusques à la mer Mediterranee. Et ceste partie qui est assise des deux costez du Nil, depuis Asne iusques à Alcair, ou au Caire, ressemble à vne bande deployee de son long, si vous en exceptez les destours de la riuere, comme dit Strabon, qui sont en tres-grand nombre.

Ceste figure est faite par quelques montagnes, pres desquelles le fleuve coulant tout droiēt, & restreint entre elles, n'est continuellement large de plus de cinq cents stades, ou d'environ trente sept mille, & mesme il n'a pas par tout ceste meisme largeur. Mais quelques modernes disent qu'il n'est large que de sept ou huit mille, & mesme qu'il est quelquesfois tellement contrainct entre les montagnes, que sa largeur est seulement de quatre ou cinq mille.

Mais depuis le Caire, ou pres d'iceluy ceste riuere se diuisant en deux principales branches, donne à l'Egypte vne figure triangulaire, dont les deux costez sont deux canaux du Nil, descendant de deux costez dans la mer, c'est à sçauoir à main droiēte, iusques à l'emboucheure Pelusique, ou de Damiette, & à main gauche iusques à l'emboucheure de Canope, où est à present la ville de Rosette.

La base de ce triangle est la coste de la mer d'Egypte, entre l'emboucheure de Damiette & celle de Rosette, qui s'estend l'espace d'environ trois cents stades, ou cent soixante-deux mille d'Italie, selon Strabon, ou suivant quelques autres de cent septante mille pas.

Doncques la partie la plus Septentrionale d'Egypte, qu'on nomme la basse Egypte, est en forme d'Isle, enfermee de la mer, & de ces deux canaux du Nil, & comprise sous le nom de Delta par les anciens Historiens, Geographes, & Poëtes, pource qu'elle est fort semblable à ceste lettre Grecque.

Ceste Isle a de circuit, selon Strabon, environ trois mille stades, qui font trois cents septante cinq milles d'Italie. Toutesfois les modernes disent que ce Delta contient de circuit environ trois cents mille, veu que depuis la ville de Rosette iusqu'à Damiette on compte cent quarante mille, & chaque canal est long de septante mille. Ptolomee appelle cecy le grand Delta, lequel il diuise encor en petit, & troisieme : appellant petit Delta, ce qui est contenu entre le fleuve de Bubaste & de Busire, & troisieme ce qui est compris entre les riuieres de Bubaste, & d'Atribe.

Tous prennent presque la longueur de l'Egypte, depuis la ville d'Asne iusques à la mer Mediterranee : & ceste estendue est selon Plin de cinq cents octante cinq mille pas, mais quelques modernes disent qu'elle contient environ cinq cents mille.

Leon d'Afrique estend la longueur de ce pays par delà Asne, iusques à la grande & ancienne Asie, qui est esloignee du Nil d'Egypte d'environ quatre-vingt mille du costé d'Orient : & de Midy sur la frontiere du Royaume de Nubie, & des peuples de Bugie. Le meisme auteur le faict long de quatre cents cinquante mille d'Italie : mais à cause qu'il les faict plus grands qu'il ne faut, il est besoin selon l'opinion de Sainct d'y adiouter vn quart, tellement qu'il y aura environ cinq cents soixante deux mille ordinaires.

Il est assis assez pres du Tropique de l'Escreuice, en tirant vers le cercle Arctique, entre le septiesme & le dixiesme parallele, principalement sous le second climat : A raison de quoy son plus grand iour d'esté est d'un peu plus de treize heures & demie, & aux parties plus Septentrionales, il ne passe de guiere quatorze heures. Il est enclos entre le Meridien d'Alexandrie & de

& de Tenesse ou Teneze : dont le premier passe par le 60. degré & demy, & l'autre près de 63. degré & vn quart.

Nous trouuons diuerses diuisions de ce pays dans les auteurs, veu que ceux qui separent l'Asie de l'Afrique par le moyen de la riuere du Nil, diuisent ceste prouince en trois parties, c'est à sçauoir, en l'Egypte d'Asie, autrement Thebayde, & maintenant Said, ou Seid : en l'Egypte d'Afrique, qui est partie qui tire au Ponant, & en la basse Egypte, comprise vers le Nort, entre la diuision du Nil, sous la forme de Delta.

L'Egypte estoit encore diuisee anciennement en haute & basse. On nommoit haute la partie longue & estroite, qui commence aux Cataractes au dessus de Syene sur la frontiere d'Ethiopie, & finit près du Caire. La basse comprenoit ce qui estoit enclos entre les deux canaux du Nil, depuis le Caire, iusques à la mer Mederrane sous la forme de la lettre Delta, ou d'un triangle.

Il y en a d'autres qui diuisent ceste prouince en haute, moyenne & basse. Ils prennent la basse depuis la frontiere susdicte d'Ethiopie, & l'estendent seulement iusques à Antinoë, ville assise sur le Nil, que Leon d'Afrique appelle Anthius: & ceste-cy est mesme chose que Thebayde, ou le pays de Sahid.

Ils prennent pour moyenne Egypte la partie qui est entre la ville d'Antibe, & le sommet du grand Delta, qui se nomme Heptapolis, & Heptanomie.

La basse Egypte est selon ceux-cy, la partie comprise sous la figure de Delta, & ceste-cy fut appellee par les Romains Augustamnique, ou Augustamie. Iustinian la diuise en ses nouvelles Constitutions, premiere & seconde.

Finalemēt Leon d'Afrique apporte vne diuision de l'Egypte, qui fut faicte lors que les Mahometans s'en rendirent maistres. Il la diuise donc en trois regions, c'est à sçauoir en celle de Sahid, c'est à dire terrestre, qui est depuis les frontieres de Bugnie, iusques au Caire, & c'est icy la haute Egypte: en l'Errisie, qui est la contree Occidentale du Nil depuis le Caire iusques à Rosette, & en la Bachrie, ou Marcennuë, qui est du costé d'Orient est proche de la riuere du Nil.

Il faut aussi sçauoir que l'Egypte fut autrefois diuisee par Alexandre, en plusieurs gouuernemens; & que les Romains pratiquerent apres mesme chose. Herodote met dix-huict gouuernemens, ou Nomes: Strabon 19. Ptolomee 46. Plin enuiron 50. Mais Orthelius a recueilly de diuers auteurs plus de 66. Nomes.

Pour le regard de ces villes, quelques vns ont escrit qu'il y en auoit autrefois enuiron 28. mille lors qu'Amasis regnoit, & Diodore dist qu'on en voyoit encor de son temps trois mille. Mais Orthelius n'en a peu trouuer que trois cens, quelque diligence qu'il ayt peu apporter en ceste recherche. Tellement qu'il faut croire que ces anciens auteurs comprenoient en ce compte les bourgs & les villages. Toutesfois, nous ne nions pas que les guerres des Syriens, des Ethiopiens & des Romains n'ayent fumé plusieurs villes. Mais laissant ceste dispute, ie dy, que les plus renommes d'Egypte estoient Syene, Thebes, qu'on nommoit aussi Diospolis, Tentyre, Heliopolis, Memphis, Babylon, Alexandrie, Peluse, & quelques autres.

Siene maintenant Asne, est precisément sous le Tropique de Cancer, ou de l'Ecceuisse. Ce fut en ce lieu, selon le tesmoignage de Plin, qu'on fit vn puits fort profond, auquel on ne void point d'ombre, lors que le Soleil est au commencement de l'Ecreuisse.

La ville de Memphis assise par delà le Nil, du costé de l'Occident, fut autrefois la demeure des Princes d'Egypte, & les Pyramides, dont les auteurs ont fait tant de mention, en sont bien peu esloignees. Le Caire succeda au lieu de ceste ancienne ville, & fut le seiour ordinaire des Soudans d'Egypte.

Il est vray que plusieurs tiennent que le Caire est au mesme lieu où l'on voyoit iadis Babylon. Car Bellon qui a esté par tous ces pays, semble asseurer que la ville nommee Babylon par les anciens, estoit vn peu au dessus du Caire, & de fait, on void plusieurs ruines & restes de beaux & magnifiques bastimens en ce lieu, qui est auourd'huy vn village, où il demeure assez bon nombre de Chrestiens Grecs, & Armeniens, & l'on y void vne Chappelle, où il y a vne vouëte sous terre, ou l'on dit que la bien-heureuse Vierge demeura cachee avec son fils nostre Seigneur, lors qu'elle s'en fuit de Iudee.

La ville du Caire est plus longue que large, & la forme est triangulaire. Elle est fort grande & ceinte de murailles, non toutesfois de tous costez, pource que la plus grande partie est bordée du Nil qui luy sert de murailles. Hors du pourpris des murailles on void beaucoup de bastimens, & vn fort qui est en l'un des coings sur le rocher où quelques degrez ont esté taillez, & dont la demeure est saine & agreable: d'autant qu'en regardant des fenestres, & iettant la veüe tout à l'entour le plus auant qu'il est possible, on void tout le pays d'Egypte.

La plus grande partie des maisons est couuerte d'un double paue, à cause de la chaëte, &c

les portes des maisons sont tellement basses & estroictes qu'il se faut baïsser par necessité lors qu'on y veut entrer. Toutesfois, les maisons des grands ont des hautes portes qui sont hautes comme celles qui sont en Europe.

Il y a en ceste ville comme vne tour solide, par le moyen de laquelle l'on cognoit la fertilité qui doit estre en Egypte toutes les annees, en y remarquant combien la riuier du Nil vient à croistre: car il y a diuerses marques par lesquelles on iuge de la recolte. Car quand le Nil paruiet au plus haut trou, l'on vient à recueillir du bled en abondance, & de ceste sorte ils iugent des biens qu'ils doiuent auoir selon la hauteur de cét eau. Toutesfois le Baron de Beauueau en son voyage, dit que c'est en vne Mosquee nommee Eschial, que l'on mesure, combien le Nil croist en vne colonne qui s'y trouue. Mais Palerne en ses Peregrinations, dit que c'est vne Isle près du Caire, que l'on va prendre garde à la hauteur de ceste riuier, de laquelle nous ferons mention en parlant de la qualité de l'Egypte.

Il y a aussi dans le Caire vn lieu ceint de murailles, nommé Bascstan, où l'on vend force argenterie, draps d'or, d'argent & de soye, & quelques rares espiceries. C'est là que beaucoup de gens accourent, & s'assemblent ordinairement pource que l'on y void ce qui se peut trouuer de plus rare en toute la ville. Quelques vns disent que toute ceste ville a plus de huit mille de circuit, & plus de 24. mille ruës qui se ferment la nuit.

Il y a dedans & dehors la ville de fort beau iardins, qui outre les herbes ordinaires, portent des cannes de casse, de tamarie, des palmiers, des sycomores, des oranges, des citrons, & des limons sauages, & encore des cannes de sucre, & les hayes qui entourent ces jardins, sont toutes plaines de Chameleons.

Au dessus de Materce qui est vn beau iardin assez près du Caire, l'on void vn Obelisque dressé, plus grand, & plus gros, que ceux qui sont en Alexandrie, & mesme que celuy que l'on void en l'Hypodrome à Constantinople.

Quant aux Pyramides d'Egypte, à ce que dit Bellon, elles sont en vn lieu esleuëe, & commencent à paroistre de quarante milles pas de loing. Les Egyptiens nomment, comme il dit, ces Pyramides, Pharaons: & elles semblent plus admirables à ceux qui les regardent de près, que les auteurs ne les ont descrites: car les anciens ourages des Romains sont bien peu de chose, au regard de ces merueilleuses masses de pierres. On les void en vn lieu fort desert à quatre mille loing du Caire, à trois iets de pierre par delà le Nil. La plus grande surpasse aussi en beauté toutes les autres. Elle a par le pied trois cens pas de carrure, qui sont de douze cens de tour, & sa hauteur peut auoir six cens pieds. Les pierres dont elle est faicte, sont presque esgales, ayant trois pieds de long, deux de large, & autant d'espaisseur, & quoy que le sommet semble estre faict en poincte, à cause de sa hauteur, toutesfois il est faict en terrasse de vingt & vn pied de carreure.

Le Baron de Beauueau, de qui i'ay tiré ce que dessus, dit qu'en entrant dedans il descendit enuiron cinquante pas premierement, puis remontant enuiron quarante, il tira vneallee large de quatre pieds, haute de cinq, & longue d'enuiron trente pas, qui auoit au pied vne petite chambre, carree d'enuiron huit pas, mais toute ruinee, & pleine d'ordure: & retournant par la mesmeallee, il vid à main droite la bouche d'vne cisterne fort grande & profonde, & montant soixante huit marches, il entra dās vne chambre fort haute, & reuestue de marbre, longue de quatre pieds & demy, large de vingt & vn, où l'on void vne grande pierre creuse de marbre Thebrique, epaisse de trois ou quatre doigts, longue de douze pas: large de cinq, & profonde cinq & demy. La pierre en est si fine, que frappant dessus avec vne autre, elle sonne clair comme vne cloche.

Voila ce qu'en dit ce Cheualier, au dire duquel ie m'arreste, comme estimant qu'vn homme de sa qualité met les choses ainsi qu'elles sont, sans les déguiser en aucune sorte.

Belon dit qu'elle a des degrez qui s'aduancent par dehors, & trois cens vingt quatre pas en chacun de ses costez. Dauantage, qu'il y a depuis la base iusques au sommet deux cens cinquante degrez, dont chacun est de la hauteur de cinq semelles, à raison de neuf poulces pour semelle. Il dit que sa largeur est telle, qu'vn bon & fort archer estāt en son faïste, & descochant en l'air vne fiesche, ne la pourra pas faire aller si auant qu'elle ne tombe sur ses degrez, au lieu d'aller par dela la base. Il dit que le sommet est plein, & a deux pas de diametre, & que cinquante hommes s'y peuuent tenir à leur aise.

Ie ne parleray pas des autres, d'autant que ce seroit vne curiosité superflue: mais ie diray seulement qu'vn peu au dessus de la Pyramide, l'on void le grand Colosse du Sphinx, proche du canal du Nil. I'en laisse la description, pource que Plin, Herodote, & quelques autres, l'ont assez suffisamment faicte.

La ville d'Alexandrie fut autrefois vne des premieres villes du monde: veu qu'elle cedit seulement à Rome, pour le regard du nombre des habitans. Elle est assise, selon le Baron de Beauueau,

Beauveau, en vn lieu sablonneux, & sur le bord de la mer, bastie en forme de croissant, plus large que longue, & diuisee en vieille & nouuelle. La premiere a bien trois mille de long, ayant au dedans outre plusieurs choses rares, deux montagnes de sable qui y sont encloses. Ses anciennes murailles sont encores debout, mais le dedans est presque deshabité. Tous les bastimens sont creux au dessous, & remplis de cisternes, qui sont soustenuës par tout de pilliers de marbre, à cause de la necessité de l'eau, d'autant que l'on n'en a point d'autre que celle que l'on conduit du bras du Nil, appellé Calix, par certains canaux, pour remplir ces cisternes vne fois l'année, qui est le quinzième d'Aoust.

Il y a là de fort belles & grandes ruës, ausquelles l'on peut voir plusieurs antiquitez, & ruines, entre autres l'on y void les ruines du Palais du Roy Coste, pere de sainte Catherine, & près de là six colonnes de marbres, de vingt pas de tour, & hautes de trois toises hors de terre. On y void aussi le long d'une ruë, le lieu où saint Marc fut decapité, il y a là vne Eglise où les Confesseurs gardent la pierre sur laquelle la teste luy fut tranchée, & la chaire où il preschoit.

Il y a encores vne Eglise dediee à sainte Catherine, où l'on void vne colonne carree, sur laquelle on treucha la teste à ceste vierge.

Près des murailles du port, l'on void deux esguilles presque semblables, toutes graues de lettres hieroglyphiques, dont l'une est toute couchée, & couverte la pluspart de terre: l'autre est haute de dix toises hors de terre, ayant vnze pieds de carreure.

On void plus haut, la place où estoit anciennement le Palais de Cleopatre, où elle auoit vne gallerie qui auançoit sur la mer, ainsi que l'on peut voir par ses ruines.

Hors de la ville l'on void vne colône que Cesar fit dresser en memoire de la desfaire de Pompee, qui est de marbre, & assez haute: la base & les chapiteaux sont de quatre-vingt pieds de Roy, & y en a vingt-huit de tour.

Quant à la ville neufue, elle est vn peu plus plaisante, assise en vne plus belle plaine, ayant à main gauche le vieil port, qui est defendu d'un Chasteau de la vieille ville: mais à cause de la difficulté on ne s'en sert plus que pour mettre quelquefois des galeres & des galiotes.

A main droite l'on void le port neuf, qui n'est qu'une place combatue de la Tramontane, ou du vent du Nord, mais il est defendu d'un costé & d'autre de deux Chasteaux, qu'ils nomment Farilos. dont l'un est sur vne petite Presqu'ille, & n'a point d'autre eau douce que celle que l'on y porte des cisternes de la ville.

L'autre est vis à vis, & il faut que tous les vaisseaux passent à la mercy de l'artillerie de ces deux Chasteaux, & sans ces deux ports, la ville seroit vn peu de temps deshabitee pour le mauvais air qui y est.

L'Isle du Phare, que l'on met vis à vis d'Alexandrie, n'est plus vne Isle comme du temps de Cesar, & de Ptolomee: car le lieu est ioint à la terre ferme, & a vn Chasteau plein d'incommodité, pource qu'il y faut porter tous les iours sur des chameaux de l'eau qu'on puise aux cisternes d'Alexandrie.

A demie iournee au dessus d'Alexandrie, l'on void Rosette, belle ville, assise sur le Nil, & à 8. mille, ou enuiron de la mer. Les maisons y sont bien basties, & enrichies de dorures, & de peintures, choses rares en ces Prouinces.

La ville de Damiette est aussi fort renommee, & assise près de la mer Mediterranee: c'est elle que les anciens nommoient Pelusium, & qui fut aussi appelee Eliopolis, du nom du Prince Elie, ou Alie, qui l'auoit ceinte de trois murailles. Suide la nomme Clef de l'Egypte: mais Ortelius estime que Pelusium est ce qu'on appelle aujourd'huy Teneze.

Outre ces villes, il y en a encores d'autres assez renommees, comme Michaelé, qui est presque aussi grande que le Caire, & Fuca, ou Foua. qui est apres le Caire plus grande que toutes les autres, & vis à vis l'Isle d'Edibeb, que le Nil faict en ce lieu. Il y a encores vn grand nombre de villes & villages en Egypte, principalement près de la riuere du Nil, qui les rend agreables, & leur est extremement commode.

Quant aux villages qui sont esloignez du Nil, les habitans les ont faiçtes en des lieux hauts, pour euitier le desbordement de l'eau: les maisons y sont basties d'un limon espais, & gras, & fort tenant, & les couverts sont pointus: toutesfois il s'en trouue aussi qui sont plains.

Pour le regard des Tryclodites, ils occupent le pays qui est outre le riuage de la mer rouge, qui est à main droite, & l'Egypte. Ptolomee les appelle Arabes Ichtiophages, & Castale dit que ce pays se nomme maintenant Sirie: mais il semble que les modernes l'appellent à present Arabie Toglodityque.

Les lieux principaux de ce pays sont Grondol, ou Corondol, avec vn assez bon port.

Alcoffer, ou Chozair, que quelques vns prennent pour l'ancienne Berenice de Ptolomee, c'est là que les montagnes s'ouurent pour donner passage aux fruiçts qu'on porte du pays des Abyssins.

Il y a aussi Suaquen, qui est la Ptolomais de Mele, selon l'opinion d'Orthelius. Plin la nomme Epitheras, & Ptolomee Theron, près de ceste ville il y a vn fort bon port. Le Turc y tient ordinairement vn Bassa, qui commande à toute la contree.

On voit aussi près de la mer rouge, & cōme à la teste du golphe Arabique la ville de Suez, que Pierre Gilliez, & Belon prennent pour l'Asinoé de Ptolomee, Zieglere la prend pour la Potidie de Strabon: mais quelques autres tiennent que c'est Hero, ou la cité de Heros, qui estoit florissante au possible du temps de Ptolomee Roy d'Egypte. & des Romains, à cause de force marchandise qui y venoient des Indes & d'Arabie, qui estoient portees de là par le grand Caire, & par l'Alexandrie en Egypte. Mais auourd'huy elle n'est guiere marchande. ny peuplee, à cause de la grande difficulté de routes choses, combien que le Turc ait fait tout ce qu'il a peu pour la rendre bien habitee.

QUALITE.

L'Egypte est seulement arrosée de la riuere du Nil, qui rend son terroir de grand rapport. On a donné beaucoup de noms à ce fleuve, dont on rapporte diuerses raisons, car Diodore l'a nommé Aëros, c'est à dire, Aigle, à cause de la vitesse de son cours vers les cataractes. Il a aussi esté nommé Egypte d'un Roy du pays qui communiqua son nom au Royaume, & à la riuere. Festus dit qu'on l'a nommé Melus, & Eustachie & Plutarque Mela. Cedren, & Epiphane le nomment Chrysoroas, c'est à dire, coulant en or, & Denys luy donne le nom de Syene. Il fut aussi nommé anciennement Siris, Triton, Diris, Astape, & Astaboras. Les saintes lettres l'appellent Seor, ou Sihor, c'est à dire trouble, à cause de la bourbe qu'il porte avec luy en Egypte, & les mesmes luy donnent le nom de Gehon, & de Phison.

Les Egyptiens l'on nommé Noym, les Abyssins Tacui, selon Barius, ou Abanhi, selon Martian, les Africains Nil, & ceux du pays Taccali, & Abanhi. Il y a diuerses opinions touchant la source de ce fleuve, & tous sont presque incertaines: Mais on sçait auourd'huy fort assurément qu'il ne vient pas des montagnes de la Lune, ainsi que Ptolomee assure, ains d'un fort grand lac nommé Zaire, qui est en la haute Ethiopie, entre le Royaume de Congo, ou Maninicongo, & le pays de Monomotapa, ou Benomotapa, sous l'vnziesme degré, ou enuiron de hauteur du pole Antarctique: & c'est aussi chose assurée que ce fleuve courant par plusieurs & diuers pays avec beaucoup de serpentemens, fait vn grand nombre d'Isles, dont la plus grande est celle de Meroé: Mais lors qu'il est entré dans l'Egypte, il coule entre des montagnes qui l'enferment des deux costez, puis il va faire le Delta, après s'estre espandu par plusieurs destroits & valles: car autant que les montagnes s'estendent & sont esloignées l'une de l'autre, autant ce fleuve s'estend, ou se retraisit, & fait le pays, habitable de diuerses figures: & derechef il s'espand par les campagnes, reprenant son cours naturel.

Or le Nil, tandis qu'il coule du long de l'Egypte, est fort semblable à la riuere de Po, à ce que dit Belon, principalement comme elle est depuis Ferrare iusques à son emboucheure: car on peut voyager aisément sur l'un & sur l'autre à voiles déployez, & aller contremont, ou contrebas de la riuere.

Les anciens Auteurs ne sont pas d'accord touchant le nombre des bouches du Nil: car quelques-uns en mettent sept, comme Mele, Strabon, Diodore, & Herodote: les autres neuf avec Ptolomee, & Plin vnze, mais les modernes assurent qu'il n'y en a que trois ou quatre, comme Guillaume de Tyr, & Pierre Belon, qui rapportent ce qu'ils en ont veu, de mesme que quelques autres: car il se diuise en quatre branches à quatre mille loin du Caire, dont les deux sont les deux bouches principales & nauigables, c'est à sçauoir, celle de Damiette, & celle de Rosette. Toutefois au temps du desbordement plusieurs ruisseaux auxquels la riuere est diuisée, sont nauigables. Mais en autre temps les grands vaisseaux n'y peuuent voyager, à cause des marescages, & du sable, mais seulement on les peut passer à gué.

Au reste ce fleuve est extrêmement fecond, veu qu'il nourrit beaucoup de poissons fort renommés, & outre cela des animaux, & des monstres espouventables, comme des cheuaux, & veaux marins, des crocodilles & autres, qui sont fort dommageables aux hommes. On dit qu'il ne vient point de vent de ce fleuve, & que son eau est douce sur toutes les autres du monde: & ce peut-estre à cause qu'elle est fort cuite, & par ce moyen moins epaisse, & plus subtilisée, ou bien à cause de son long cours, veu que l'on tient qu'il n'y a riuere au monde qui coule par vn si grand espace de terre.

Quelques uns nous rapportent que le Nil escrit en Grec, en exprimant le nombre que vaut chaque lettre, contient le nombre des iours de l'annee, en ceste sorte, N. 50. E. 5. I. 10. A. 30. O. 70 = 200.

Le desbordement en Egypte commence enuiron du dixseptiesme du mois de Iuin, auquel temps

temps ceste riuere croist durant quarante iours de suite, & décroist par vne mesme espace de temps.

Cecy arriue lors que l'Ethiopie qui est au dessus de l'Egypte, a ses longues pluyes premierement aux dernieres montagnes : & lors que ces pluyes ont passé, le debordement cesse, & la riuere se retire.

Et veritablement c'est chose admirable de voir croistre ce fleuve, quand les autres décroissent, & de voir amoindrir lors que les autres viennent à grossir.

Or durant le temps de son accroissement iusqu'à la fin de sa retraicte toutes les villes d'Egypte sont comme des Isles, pource qu'elles sont assises sur des lieux hauts, afin que le desbordement du Nil ne leur puisse nuire. Tellement que l'on n'y peut aller que sur des batteaux en nageant : & c'est lors que presque toutes les bestes sauvages se noyent, & celles qui peuvent eschapper, s'enfuient en des lieux plus esleuez, & les animaux domestiques que l'on tient lors dans les estables, y sont nourris par leurs maistres, qui ont auparauant pourueu à leur nourriture.

Au reste, d'autant que la quantité de creuë du Nil a esté moindre autresfois, l'on peut coniecturer qu'elle sera nulle quelque iour, & que le riuage esgalera la hauteur du fleuve.

Il y en qui tiennent, suivant le tesmoignage de Strabon, que l'Egypte fut toute couverte, submergee anciennement de la mer, iusques aux marescages d'aupres de Peluse, du mont Cassic, & de Sarbonide: mais que par le moyen du Nil, qui porta continuellement avec son inondation du limon, & de la bourbe, elle deuint telle qu'on la void. Et ce qui fait foy de cecy, c'est vn grand nombre de coquilles de mer que l'on y trouue sous le sable.

Le pays d'Egypte est plain, bas & sans montagnes : à raison dequoy l'on ne le peut voir de guieres loin. Son air est chaud, & nuisible, qui fait que pour esuiter la grande, & insupportable ardeur de l'esté, & pour prendre la fraischeur, & recevoir quelque vent, les habitans ont accoustumé, selon le raport de Leon d'Afrique, de bastir en toutes les villes, de fort hautes tours, qui ont au plus haut, & au bas vne porte, qui est vis à vis des maisons, & le vent vient au bas par le faiste. Toutesfois ceste Prouince n'est pas subiecte aux vents du Midy, qui sont ardans comme le reste d'Afrique, ains elle est principalement exposée aux vents du Nord; qui sont humides, au lieu qu'aux autres pays ils dessèchent.

Le pays n'est aussi subiect aux tremblemens de terre, ny aux pluyes, dont il n'a pas besoin, à cause que la terre est tous les ans engraissee par le grossissement du Nil. Et s'il y tombe quelques pluyes, ce qui aduient toutesfois fort rarement, elles apportent des catharres, des fleurs, des enfleurs de couillons, & autres maladies.

Au reste il est fertile au possible, à cause de ce desbordement du Nil, au defaut duquel on y void vne cherté extrême. Il y a plusieurs fossez qu'on y a faitz, afin que les villes, qui sont loing du Nil au milieu de la Prouince, ne fussent despourueues d'eau, lors que le Nil viendroit à s'écouler.

Troge assure que la terre d'Egypte est si seconde, qu'il n'y a pays qui porte en plus grande abondance les choses qui sont necessaires pour la nourriture de l'homme.

Aussi plusieurs d'entre les anciens ont nommé l'Egypte, Grenier de la terre, & Plin assure que la grandeur de l'Empire Romain, n'eust guieres peu durer sans la richesse, & le grains d'Egypte, d'autant que l'abondance, ou la famine du peuple Romain, ne dependoit que de la riuere du Nil.

Le mesme dit encores, que la terre d'Egypte abonde tellement en herbes bonnes à manger, que ce pays se peut aysément & fort facilement passer de bled.

On doit doncques plustost admirer, que l'on ne peut estimer les richesses d'Egypte, si l'on considere la magnificence, l'orgueil des sepultures des Roys, le Labyrinthe, & Obelysques, les Pyramides, & les Sphinx qui furent parfaits avecques vne despence incroyable.

Ceste prouince abonde de toute sorte de grains, & de Legumes. Elle a de tous costez de fort bons pasturages, & des oliuiers en fort grand nombre. Toutesfois la haute Egypte, ou le pays de Sahid, surpasse toutes les autres parties en abondance de legumes, & de lin, & en nombre d'animaux, de poules, & d'oyes.

La partie de la basse Egypte exposée au Leuant, qui s'appelle Errife, produit abondance de fruiets, d'orge, & de ris, & la partie Occidentale grande quantité de Coton, & de sucre. On moissonne en ce pays au commencement d'Auril, & tout aussi tost on bat le bled, tellement qu'environ le vingtiesme du mois de May, il ne reste plus vn seul espic à couper.

Les champs qui sont autour du Nil, pour la plus grande partie, à ce que dit Belon, sont pleins de ris, & de cannes de sucre. Mais au delà du riuage du Nil, on cultiue mal-aysément les jardins, pource qu'il faut par le moyen de certains instrumens que les bœufs portent, auoir perpetuellement de l'eau pour les arroser.

Outre les herbes, & les grains, il y a de fort bon vin, & en grande abondance en divers lieux: veu que proche du lac Mareotide on recueille de tres-bon vin, qui est de longue garde. Mais il n'y a guieres d'huyles, ny de bois taillis, & mesmes l'on n'y void guieres d'autres arbres que des palmiers, qui ne valent rien pour faire des bastimens. Ces palmiers deviennent merueilleusement hauts par tout le pays d'Egypte, & l'on a veu, selon le recit de Belon sorti d'un seul tronc vingt grands arbres, separez. Outre les palmiers, les jardins portent aussi des sycomores, de la casse, des grenades, des oranges, & du tamaris, dont la plus grande partie devient extremement haute: mais les tamaris n'y viennent point sans estre semez, & viennent aussi aux lieux secs, qu'en ceux qui sont humides. Quant aux sycomores, ils sont si verts qu'ils surpassent en verneur tous les autres arbres.

On y cultive aussi soigneusement un arbrisseau nommé Alcane, duquel on void des bois taillis, ils rend jaunes les feuilles lors qu'elles sont seiches, & les femmes qui demeurent dans les terres du Turc en teignent leurs mains, leurs pieds, & une partie de leurs cheveux. Il y a aussi grande quantité de fleurs & de bones senteurs: veu que Plin donne aussi des parfums precieux à l'Egypte, combien qu'il assure que les fleurs n'y sentent guieres bon ordinairement, pource que l'air y est plain de brouillards, qui viennent du voisinage du Nil.

Outre les bestes cruelles & nuisibles, dont ce pays abonde, il nourrit un grand nombre d'animaux domestiques, comme des bœufs, des chameaux, des chevaux, des asnes, des moutons, & des cheures: toutes lesquelles bestes y deviennent fort grandes, à cause de leur temperature de l'air, de l'abondance du pasturage, & de la bonne nourriture de l'herbe, arrosée de l'eau du Nil. Entre les autres animaux l'on y void des moutons gras, & gros au possible, qui ont des queues fort espesses qui pendent à terre: & ces moutons ont la laine noire.

Et pource que ce pays est fort marecageux en hyuer, il nourrit plusieurs oyseaux d'eau, principalement des cygognes, dont l'on void un si grand nombre en quelques lieux herbeux du Nil, que l'on en void les champs & les prez tout couverts.

Il s'engendre aussi en ce pays une si grande quantité de grenouilles, que si les cygognes ne les deuoroient, on ne verroit autre chose. Il y a force chameleons, à ce que dit Belon, que l'on trouue parmy les arbrisseaux, & qui ne vivent pas de vent, comme plusieurs ont escrit, combien toutesfois qu'ils puissent demeurer sans manger toute une année.

Or les poules n'ont pas accoustumé de faire eclorre, ny de couuer les poussins en aucun endroit d'Egypte, ains l'on se sert pour cet effect de la chaleur des fournaies. Davantage, ce pays à toujours abondé en metaux, principalement aux lieux qui sont plus proches de l'Ethiopie, & l'Amerhisie, & plusieurs autres pierres precieuses s'y engendrent. On trouue une si grande quantité de pierres Actites, ou d'Aigle près d'Alexandrie, que l'on en peut charger des navires: & ces pierres ont ceste particuliere vertu, qu'elles font surprendre, & recognoistre un larron ainsi que Belon remarque en ses Observations.

Les femmes d'Egypte sont secondes à merueille, de sorte que le plus souvent elles sont trois ou quatre enfans à la fois, & mesme on a remarqué que les enfans qui naissoient en ce pays dans le huitiesme mois, ne sont pas en danger de mourir, comme ils sont aux autres contrees.

Près du Caire, & au lieu nommé Meteree, l'on trouue l'arbre qui porte le baume: & aux environs d'Alexandrie l'on void un grand nombre de certaines cheures que l'on nomme Gazelles, & l'on y void aussi force grenades, limons, oranges, citrons, figues & cerises, & d'autres sortes de fructs que nous n'avons pas en ces contrees. On trouue encore aux environs d'Alexandrie grande quantité de legumes, de ris, d'orge, & d'epeaute.

Il est vray que ce terroir seroit sterile, si les habitans ne mettoient une grande diligence à le cultiver: & principalement aux endroits qui sont esloignez du Nil à cause de l'eau qu'il faut avoir par le moyen des bœufs, & de certains instruments.

L'Isle d'Edibeb abonde en cannes de sucre, en sycomores, & palmiers, en toute sorte de legumes, & en ris.

Quant à l'Arabie Trogloditique, c'est un pays sterile, sablonneux, desert, & non cultivé, & mesme on l'habite fort peu, à cause que l'on n'y peut avoir de l'eau qu'à bien rarement.

Pour le regard de la ville de Suez, il n'y a point d'eau à deux mille tout à l'entour: car ils puisent d'un certain puits, qui est à deux mille loing de la ville de l'eau qu'ils portent sur des chameaux, mais elle est un peu amere & salee.

MOEURS ANCIENNES.

Les Egyptiens ont esté toujours merueilleusement ingenieux, & spirituels, de sorte que Macrobe nomme l'Egypte, Mere des arts: pource que les habitans de ce pays ont inventé la

ré la Geometrie, Arithmetique, & Medecine, & plusieurs autres arts. Ils se sont addonnez les premiers de tous aux observations des astres, à la magie, & aux sorcelleries.

Ce furent les premiers qui inuenterent les noms des douze Dieux, & qui dresserent aussi des autels, des idoles, & des temples, & qui mirent les figures d'animaux en leurs statues: ce qui faict cognoistre assez clairement, qu'ils ont sans doute prins origine des Ethiopiens, qui ont introduit premierement toutes ces choses au monde, ainu que Diodore Sicilien nous raconte.

Les femmes d'Egypte exerçoient iadis la marchandise, tenoient tauerne, & faisoient tout ce qui est de l'office des hommes: au lieu que leurs maris estoient faineans, enfermez en leurs maisons, & s'il falloit porter quelque fardeau, les hommes le mettoient sur leur teste, & les femmes le portoient sur leurs espaules. Les hommes s'accroupissoient pour pisser, & les femmes au contraire faisoient de l'eau toutes droictes, alloient à leurs affaires dans leurs maisons, & banquetoient en plaine rue.

Il n'y auoit femme en Egypte qui peust estre Prestresse au temple d'aucun Dieu, ny d'aucune Deesse. Et quant aux Egyptiens, ils n'estoient consacrez à vn Dieu particulier, mais à tous ensemble. Il y auoit vn souverain Pontifice esleu d'entre les Prestres, qui laissoit à son decez son fils successeur de sa dignité, & souveraine Prestrise. Les enfans legitimes, selon l'ordonnance du pays, ne refusoient de nourrir leurs parents, & n'y estoient nullement forcez, au lieu que les femmes y estoient contrainctes, si par fortune elles faisoient les retives.

On voyoit plusieurs autres peuples, qui auoient de coustume en portant le deuil, & plorans leurs morts, de couvrir leur teste de bouë, & de laisser croistre leur barbe, & leurs cheveux. Mais les Egyptiens se faisoient tondre, & coupoient leur barbe, & paistrilloient la paste avec les pieds, & avec les mains, & quelques-vns disent qu'il ont introduict les premiers la circoncision parmy les hommes. C'est l'opinion des anciens auteurs Grecs qui ignoroient l'histoire sacree des Iuifs.

Ils escriuoient en tirant de la main droicte à la gauche, comme on le void encor pratiquer aux Hebreux, aux Arabes, aux Turcs, & aux Perseans. Leurs femmes portoient simplement vne robe, & les hommes comme plus mols & effeminez en auoient deux.

Ils vsoient aussi de deux sortes de lettres, l'vne qui estoit sacree, & l'autre permise à vn chacun, ou pour dire en vn mot, commune: mais cecy estoit tiré des Ethiopiens. Il falloit que les Prestres razassent de trois en trois iours le poil qui estoit sur tout leur corps, afin qu'ils ne portassent aucune souilleure au temple & au sacrifice. Ils portoient des vestemens de lin tousiours franchement lauez, blancs, & nets, disans qu'ils se tailloient le prepuce pour estre plus nets, & qu'il estoit plus feant d'estre sans ordure, qu'autrement en quelque sorte que ce fust. Ils auoient des fouliers faits du bois d'vn arbre qu'on nomme Papier.

Ils ne semoient en Egypte des febues, & n'estoit permis d'en manger, si par fortune on n'y en portoit de quelque autre pays: & mesme il fut defendu aux Prestres de les regarder, pource qu'ils croyoient que ceste espece de legume estoit souillee, & impure. Leur coustume estoit de se lauer tous les iours d'eau froide, trois fois le iour bien souuent, & deux fois la nuit. Les sacrificateurs Egyptiens ne mangeoient iamais les testes des animaux qu'on auoit sacrifiez, ains ils les maudissoient premierement avec des execrations estranges, & des mots cruels & abominables, puis les vendoient au premier estranger qui passoit, ou s'ils ne se trouuoient marchands pour les acheter, on les iettoit dans le Nil.

Tous les Egyptiens immoloient les bœufs, les taureaux, & les veaux: mais il estoit defendu de sacrifier les vaches & les genisses, à cause qu'elles estoient dediees à la Deesse Isis, à laquelle ils portoient vn honneur particulier. Ils viuoient de pain de seigle, & vsoient de biere, à cause qu'il n'y croissoit point de vin. Ils mangeoient aussi des poissons crus en partie, & seichez au Soleil, ou salez & confits en leur saumure. Ils auoient aussi pour leurs viandes des oiseaux crus salez, les plus riches d'entreux mangeoient des cailles & des canards qu'ils tenoient pour leurs plus grandes delices.

Lors qu'ils estoient assemblez en quelque festin, & apres que le repas estoit finy, il y en auoit qui portoient vn corps mort fait de bois, ou autrement bien representé, ayant vne ou deux coudees de hauteur, & monstroient ceste figure à chacun de ceux qui assistoient au festin, luy disant, Boy, & mange, & regarde cestuy-cy: car ayant vescu à ton aise, tu luy seras semblable apres ta mort.

Lors que les plus ieunes rencontroient ceux qui les deuançoient en âge ils se destournoient du chemin pour les laisser passer, & les voyans venir en vne assemblée, se leuoient pour leur faire place, & donner leur siege: & lors qu'ils se rencontroient par les rues, ils se sauoient sans parler, tendant seulement la main, & l'abaissant iusques aux genoux.

Ils portoient des habillemens de lin frangez aux manches, qu'ils appelloient Casitries, iettant

par dessus des manteaux blancs pour les couvrir : car les vestemens de laine estoient défendus quand on entroit dans les temples , & l'on n'eust osé les enterrer avec le corps d'un trespaslé.

Ils estoient fort sobres, veu qu'ils ne mettoient sur la table que du veau, & quelque oye, & il y auoit certaine mesure de vin ordonnée à vn chacun par repas, afin qu'on ne remplit le ventre plus que de raison, & que personne ne but iusqu'à s'enyrer.

Les Roys vsoient avec vne telle douceur enuers leurs subiects, qu'ils gaignoient le cœur & l'amitié d'un chacun : de sorte que non seulement les Prestres, ains tous les autres, auoient plus de soucy de la conseruation & prosperité du Roy que d'eux mesmes, ou de leurs femmes & enfans.

Lors qu'un Roy estoit mort, c'estoit pitié de voir le deuil que tous en menoient en general, deschirant leurs habits, & fermant les temples, n'allans ny à foires, ny à marchez, ne solemnisant aucunes festes, soüillant leurs testes de bouë l'espace de deux mois douze iours, portant vn linge ceint dessous les bras, & s'assemblant deux fois le iour deux ou trois cents tant hommes que femmes, ainsi accoustrez, pour renouveler le deuil, & la complainte, chantant cependant en vers les vertus, & la sainteté de vie du Roy qui estoit mort en ce dernier lieu.

Durant tout ce temps ils ne mangeoient d'aucune viande cuite, & s'abstenoient de boire du vin, & de toutes viandes delicieuses. Ils ne se lauoient ny oignoient, ny ne couchoient dans le liét, & n'auoient alors la compagnie de leurs femmes, ains durant tout ce temps ils pleuroient & lamentoient la mort du Roy, comme de leur enfant propre.

Ainsi que toutes ces choses se faisoient, on dressoit tout l'appareil des funeraillies, & le dernier iour, le corps estant porté deuant la porte, & sur l'entree du tombeau & sepulchre, où l'on recitoit vn abrégé & sommaire de la vie, & des actions du Roy desfunct, & lors il estoit permis à chacun d'accuser le trespaslé.

Les sacrificateurs assistoient encor en ce lieu, & l'otioient la vie passée de celuy dont le corps estoit exposé à la veüe du peuple : qui approuuoit avec battement des mains, & force acclamations ce qui estoit de louable, reiettant avec vn grand & fascheux bruit les choses qui luy desplaisoient au discours de ceste vie. C'est ce qui a bien souuent causé que plusieurs Roys, dont le peuple est ennemy, & des actions desquels le peuple s'offençoit, en oyant faire le discours, furent priuez de l'honneur de leurs obseques, & de la pompe accoustumee aux funeraillies des Roys. Et ce fut veritablement ceste crainte qui en contraignit plusieurs de viure iustement, pource qu'ils estoient asseürés que le peuple ne manqueroit à les deshoner, & à desnier ces derniers offices à leurs corps.

Au reste les Egyptiens ont esté les plus superstitieux, ou pour mieux dire les plus ridicules d'entre tous les idolatres, veu que non contents des statues des hommes, ils ont encore adoré les bestes viues & mortes, cōme les chars, les chiens, les ichneumons, espreuiers, ibides, loups, crocodilles, & vn grand nombre d'autres animaux. Et tant s'en faloit qu'ils eussent honte de faire publique profession de ceste folie & bestialité, qu'au contraire ils s'estimoient digne de louange, & d'honneur, lors qu'ils pratiquoient vne si vilaine idolatrie. Ils portoient les figures & representations de ces animaux autour de leurs villes, & par les villages, les monstrant de loin comme dieux conseruateurs auxquels il falloit porter honneur.

Lors que quelqu'un de ces Dieux des Egyptiens mouroit, ces fols le mettoient dans vn beau linge, le saluant avec grands cris & hurlemens, & battant estrangement leurs poiétrines, puis l'oignant avec liqueur de cedre, & autres drogues precieuses & aromatiques, il les enterroient en certains lieux destinez pour cest effect, afin que leurs charongnes durassent dauantage.

Si quelqu'un mettoit à mort vne de ces bestes, il n'y auoit nul moyen de luy sauuer la vie, à cause que le peuple y accourant le massacroit fort cruellement, & sans attendre ce qui en seroit ordonné par iustice. La crainte que plusieurs auoient d'estre mal traittez en ceste sorte, faisoit que lors qu'on voyoit quelqu'un de ces animaux morts, on se mettoit aussi tost loin d'eux en lamentant ceste perte, & pour faire cognoistre que cela n'estoit pas arriué par leur faute.

La charge de nourrir ces deux bestes, estoit donnée à des gens de qualité releuee, qui s'y portoient soigneusement, & les entretenoient à grands frais, veu que leur nourriture estoit d'un breuuage delicat fait d'epeure, ou escorgeon & de bouillie faite de fleur de farine, & il y auoit encor pour ces animaux d'autres viandes composees avec du lait, & outre ce, on mettoit deuant eux des oyes tant bouillies que rosties pour les rassasier. Ils donnoient à ceux qui viuoient de chair crues, des oyseaux pris à la chasse avec des filets, ou autrement & pour le faire plus court on employoit beaucoup d'argent, & de peine pour leur entretien.

Il

Ils estoient si fols que voyant mourir ces bestes ils les pleuroient, & en menoiēt vn grand dueil, comme si leurs enfans fussent decedez, & les enterroient avec beaucoup de fraiz & de magnificence, tellement que du temps de Ptolomee surnommé Sage Roy d'Egypte, vn beuf estant mort à Menphis de trop de vieillesse, celuy qui auoit charge de le nourrir employa en ses funerailles vne grande somme qu'il auoit eue pour sa nourriture, & emprunta encor du Roy cinquante talents d'argent pour faire la despence de ses obseques ridicules.

Quant aux honneurs qu'on rendoit aux hommes mors, les Egyptiens estoient excessifs encor en ceste despence. Car aussi-tost que quelqu'un estoit decedé, les parens du deffunct s'assembloient, se couuroient la teste de bouc & alloient autour de la ville, lamentans & plorans sans cesse, iusques à ce que le corps estoit enterré.

Durant ce temps, ils ne se lauoient comme de coustume, ne beuuoiēt du vin, ny ne prenoient nourriture d'aucune chose delicate, & tous les accoustremens dont ils vsoient alors, estoient de peu de valeur. Leurs enterremens estoient de trois sortes, les vns somptueux, les seconds moyens, & les autres de peu d'importance. En la premiere ils employoiēt vn talent d'argent: en la seconde vingt mines: & pour la troisieme, elle se faisoit à si peu de frais qu'elle ne meritoit pas qu'on en tint compte.

Ceux qui auoient la charge des funerailles, comme y estans nez & nourris dès leur ieune aage, portoient les rooles des despenses pour s'enquerir des parents du mort combien ils vouloient despencer, & lors qu'ils auoient conuenu du prix, on leur liuroit le corps, afin que les preparatifs des obseques fussent selon la despence qu'on y vouloit faire.

En premier lieu, le Greffier, ou Escriptuain ayant mis le corps sur la terre nue marquoit sur la hanche combien il failloit fendre, & inciser du corps du costé gauche. Celuy qui auoit charge de faire l'incision prenant vne pierre Ethiopique fendoit le costé du mort, puis s'enfuyoit soudain à toute course, estant suiuy des assistans, qui en le maudissant luy iettoient des pierres, comme s'il eut commis quelque crime, d'autant qu'ils auoient par opinion que celuy qui faisoit ceste ouuerture au corps de quelque hōme, deuoit auoir vne haine secrette contre le trespasé.

Ceux qui saloyent ou embaumoient le corps, estoient tenus entr'eux pour hommes signalez & recommandables, veu qu'ils pouuoient frequenter les temples, & conuerser avec les Sacrificateurs. Lors que ceuxcy estoient pres du corps, l'un fendoit par dedās toutes les entrailles, sauf le cœur, & les roignons, & soudain vn autre lauoit cet endroit avec du vin Phenicien, parmi lequel ils mettoient de bonnes odeurs, puis ils oignoient tout le corps de liqueur de cede premierement, & apres de diuerses compositiōs aromatiques par l'espace de plus d'un mois: & non contents de l'auoir oingt de ceste sorte ils faisoient encor infusion de myrrhe, de canelle, & d'autres espiceries, tant pour conseruer longuemēt le corps sans pourriture, que pour le rendre de bonne odeur.

Ce corps estant embausmé de ceste façon ils le rendoient aux parens, apres auoir premierement si bien ageancé les membres & toutes les parties du corps iusques aux sourcils & paupieres, qu'on eut iugé que c'estoit vne homme endormy.

Apres cela ils commençoient le discours de sa vie dès son enfance, & racontoiēt sa pieté vers les Dieux, son sçauoir, l'innocence de ses mœurs, puis venant à l'aage parfait, sa religion, sa iustice, son integrité, sa continence, & sa sagesse. Cela fait, ils inuoiuoient les Dieux infernaux, les prians de mettre le mort au rang des bien-heureux. Le peuple respondoit à les prieres, louant hautement le mort, comme celuy qui iouyssoit de l'ayse des ames fortunées.

Lors chacun enterroit son mort en son propre sepulchre: & quant à ceux qui n'en auoiēt point de particulier, on les mettoit en la maison dans la plus forte muraille qui y fut, y dressant le cercueil tout droit, & maçonnant la closture, afin que les successeurs s'estant enrichis, & faisant tout deuoir de payer ce qui estoit deub par le deffunct, eussent moyen de l'enterrer honorablement.

Lors qu'ils empruntoient de l'argent, ils auoient coustume de mettre en gage les corps de leurs parens: & s'ils manquoient à les rachepter, ce leur estoit vne fort grande infamie, & outre ce ils estoient eux mêmes priuez de sepulture.

Pour finir ce discours, les Egyptiens s'estimoient tous gentils hommes, & ont esté quelques fois pareilleux, delicats, nuables, venteux, grands parleurs, & peu veritables en leurs discours. Ils estoient naturellement superbes, furieux, & plus prompts à remuer, & innouer quelque chose, qu'à bien faire quelque affaire.

Ils estoient inutrieux, & peu vaillants, & ignoroient les loix, & sur tout ne pouuoient souffrir la domination des estrangers. Ils estoient si subiects à esmouuoir les seditions, & à sy laisser glisser, qu'ils ont esmeu de grands troubles pour de fort legeres causes.

MOËVRS DE CE TEMPS.

IL reste aujourdhuy de vrais Egyptiens, veu qu'ils sont reduits à vne poignée de Chrétiens, & les autres s'arrestant au Mahometisme, se sont mellez parmy les Africains, & les Arabes. Car la noblesse ancienne d'Egypte qui s'estoit retirée aux lieux maritimes, après que l'Empire Romain eut esté transporté en Grece, & s'en alla au cœur du pays en la province de Sahid, ou la haute Egypte, lors que les Mahometans se ruèrent sur l'Egypte. Toutesfois il n'y a nation qui retienne plus quelque chose de l'antiquité que fait ceste-cy, veu qu'on leur voit encore porter dans les villes des habillemens tous semblables à ceux que les anciens auteurs nous ont décrits.

Ceux qui demeurent dans les villes sont d'une couleur qui tire sur le blanc, mais les villageois sont bruns au possible. Ils sont pour la plupart bons, & pleins de franchise, & plaisans en leur conuersation. Mais les habitans de la basse Egypte surpassent ceux de la haute en civilité. Car la partie qui est au cœur de la Prouince n'est guiere fréquentée des estrangers, si ce n'est d'un petit nombre d'Ethiopiens : mais en l'autre, qui est du long de la mer, on voit aborder force hommes d'Europe, de Barbarie, & d'Assyrie. Ils sont gais sur tous ceux des autres nations, & ont de tout temps vne grande disposition à dancier, & faire mille sauts perilleux.

Ils vsent des robes estroites, cousues sur le deuant, & qui vont iusques aux talons, avec des manches fort estroites. Toutesfois ils vsent en Esté d'une toile de coton de diuerses couleurs : & en Hyuer des draps à fonds de coton. Toutesfois les marchands, & riches bourgeois font le plus souvent leurs robes de quelque drap d'Europe. Tous portent sur la teste vn turban, qu'ils nomment vulgairement Dulipan : & c'est par cét habillement de teste qu'on distingue les hommes de diuerses sectes, en Egypte, ainsi qu'aux autres pays qui sont sous l'obeissance du grand Turc. Ils vsent encore de la chaussure ancienne d'Egypte. Les femmes ne paroissent iamais en public, sans auoir la face voilée, de même qu'en toute la Turquie.

Leon d'Afrique dit qu'ils vsent bien souvent en leurs repas de fromage frais & fort salé, de lait aigre, & endurcis en certaine sorte. Mais combien qu'ils le tiennent pour vne de leurs delices, toutesfois les estrangers n'en peuuent goûter, & le mal pour ceux de quelque autre pays qui arriuent parmy eux, c'est qu'ils meslent de ce lait aigre presque en toutes leurs viandes.

Ils ont leurs maisons si basses, qu'elles semblent plustost faites pour loger des canes que des hommes, pour ce que la plupart du temps ils couchent, & prennent leurs repas sous des arbres, principalement sous des palmiers, afin de se rafraichir par le moyen du vent qu'ils reçoient. Car les Egyptiens & les Arabes prennent plaisir sur toutes les nations du monde de coucher la nuit au descouuert sur la terre, n'ayant qu'une robe pour se couvrir.

Ils sont bons nageurs au possible, & deuiennent tels par contrainte, pource que lors que ce pays est tout couuert de l'eau du Nil, il leur est nécessaire pour faire leurs affaires s'en aller d'un village à l'autre : sinon qu'ils veuillent vser de petites barques, comme plusieurs font.

Les Alexandrins & plusieurs autres habitans des villes d'Egypte parlent naturellement l'Arabe d'Afrique : mais les Turcs qui sont mellez parmy eux vient d'un langage fort different.

Quant aux Troglodites ils sont communément rudes, barbares, & pauvres au possible : mais outre les originaires, il y a beaucoup de Mahometans Turcs, & Arabes qui habitent en ceste prouince.

GOVERNEMENT ANCIEN.

TOUT le pays d'Egypte estoit anciennement diuisé en plusieurs parties, & gouvernemens : chacun auoit un Gouverneur qui prenoit garde à tout ce qui estoit requis au maniment des affaires. Or le reuenu, domaine, & tribut estoit diuisé en trois lots, dont le premier estoit pour les sacrificateurs, qui estoient extrêmement honorez du peuple, tant pource qu'ils estoient consacrez aux Dieux, & auoient la charge des choses sacrées, que pour leur singulière doctrine, par laquelle plusieurs estoient aduancez.

On distribuoit donc ce reuenu aux Prestres pour l'employer aux sacrifices & ornemens des Temples, & à secourir ceux qui estoient en nécessité, & auoient besoin de quelque assistance. Car les Egyptiens n'auoient garde d'oublier aucune chose qui seruiſt aux ceremonies de leurs Dieux, & n'estimoient aussi que ce fust bien fait de laisser sans support, & nourriture,

nourriture, ceux qui départoient le sçavoir, & seruoient de conseil pour le profit, & aduantage de la Republique veu qu'ils estoient tousiours appelez au Conseil, & à l'effect des choses plus importantes, à cause qu'ils pouuoient à l'aduenir, & predisoient les futurs succez des affaires, ou par le moyen de l'Astrologie, ou en deuinant à la consideration des victimes qui estoient immolees: outre qu'ayant les histoires en main, ils produisoient les faicts des anciens, afin que les Roys prissent en les voyant aduis, & conseil de ce qu'ils auroient à faire.

Les Egyptiens ne suyuient pas la coustume des Grecs, qui vouloient qu'il n'y eut qu'un homme, ou qu'une femme qui presidast aux choses sacrees: veu que plusieurs auoient le mesme honneur, & s'adonnoient au seruice des Dieux, laissant la mesme charge à leurs enfans pour heritage. Ces personnes estoient franches de Tailles, & de tous subsides, & honorees sur toutes les autres du Royaume apres le Roy.

L'autre portion du reuenu du Royaume estoit pour le Roy, qui l'employoit aux frais des guerres, & l'entretien de sa maison, & en departoit liberalement aux hommes vaillans, & illustres, en donnant à chacun selon son merite.

Cela faisoit que le peuple n'estoit greué, ny chargé d'aucun tribut extraordinaire: pour ce que les gens de guerre estoient soudoyez, ou recompensez de la troisieme partie du reuenu, ce qui estoit ordonné afin qu'ils fussent plus affectionnez à s'exposer aux perils, & hazards pour le bien public.

Leur Republique fut aussi diuisee en trois estats pour le seruice, & soustien de tout ce corps, c'est à sçauoir en laboureurs, & pasteurs, & en artisans. Les premiers ayant pris à ferme à vil prix les terres du Roy, des Prestres, ou des soldats s'exerçoient des leurs enfance au labourage, où sans cesse ils employoient tout le reste de leur vie: qui estoit cause qu'ils furent les plus excellents laboureurs de la terre, fut qu'ils tinssent cela de nature, & comme pour heritage de leurs ancestres, ou que le long exercice les en fit si bons maistres.

Les pasteurs ne s'amusoient aussi à autre chose qu'à gouverner leurs troupeaux, & ainsi qu'ils l'auoient appris de leurs predecesseurs passant toute leur vie en cét exercice.

Pour le regard des artisans, c'est sans doute que les arts mechaniques furent conduits en Egypte à leur perfection, pource que ceux qui s'en mettoient n'exerçoient autre office, que celui, que la loy leur octroyoit, & qu'ils auoient appris & receu de leurs ancestres, & n'estoient admis au maniment des affaires publiques. De sorte que l'enuie de celuy sous qu'ils faisoient tel apprentissage, ny l'ambition des honneurs ne les empeschoient de paruenir à vne parfaite cognoissance de ce qu'ils recherchoient.

Leurs iugemens ne se faisoient à la volce, ains avec grande prudence, pource qu'ils croyoient que les bienfaits estoient de grande consequence pour le bien public. Ils auoient aussi opinion que le vray moyen d'exterminer toute meschanceté, c'estoit de punir les meschans, supporter les affligez, & auoir pitié de ceux qui estoient reduits à quelque necessité & misere, & qu'au contraire tout estoit en confusion & en desordre, si l'on laissoit impunies par faueur, ou par presens les fautes qui meritoient la mort.

Pour ceste cause ils choissoient dans les villes de Memphis, Heliopolis, Ceres, Messer, & Thebes, des hommes de bonne reputation, pour en faire des Iuges, dont les sentences n'estoient moins equitables que celles des Areopagites d'Athenes. Ceux cy estans creés tiens en nombre estoient pour President & chef du Conseil celuy qu'on cognoissoit pour le plus vertueux, & excellent & sage, & l'assemblee mettoit en son lieu vn autre pour Conseiller, & Adiuteur, afin que le nombre fut parfait. Ceux cy estoient entretenus à grands frais, mais sur tout on donnoit vn bel estat au President, qui portoit vne chaine d'or avec vne medaille toute enrichie de pierreries, l'on voyoit en ceste medaille l'image de Verité, par laquelle ils donnoient à entendre que c'estoit elle qui deuoit guider le cœur du Prince en son iugement.

Or l'arrest de quelque cas estant dressé, & l'image de la Verité mise en auant, on portoit les liures des loix, qui estoient huit en nombre, pour ne s'esgarer du droit on la cause proposee: & la coustume portoit que celuy qui accusoit vn autre de quelque crime, donnast son dire par escrit, & fit entendre fort par le menu, comme le cas auoit esté executé, & combien il estimoit ceste faute preiudiciable.

On donnoit à l'accusé certain temps assez suffisant pour pouuoit respondre à chascun article de l'accusateur, & mettre le tout par escrit deuant les Iuges, & lors il nioit, ou alleguoit des raisons pour se iustiner, ou remonstroit que la faute ne meritoit si grande punition, ou amende que celle que l'accusateur auoit proposee. Les Iuges ayans ouy deux fois chacune des parties, & le faict estans mis au Conseil, toutes choses debatues & conclues, le President tournant l'image de la Verité vers la partie qui auoit plus de droit, pronon-

çoit la sentence de ce, dont il estoit question : & voila l'ancienne façon de playder , & de donner iugement en Egypte.

Et pource que nous auons parlé des loix, & ordonnances en general, il ne sera hors de propos d'éplucher vn peu par le menu les anciens statuts de ce peuple , afin qu'on cognoisse combien ils auoient mieux ordonné leurs affaires que tous autres , & si leur ordre n'estoit le meilleur , & plus vtile.

En premier lieu, celuy qui se pariuroit en iurant, estoit sans remission mis à mort , comme conuaincu de double crime , entant qu'il ne gardoit plus le respect qu'il deuoit aux Dieux , & aneantissoit la foy , qui sert d'un grand & tres-estroit lien pour conseruer la société humaine.

Celuy qui voyant voler & deualiser vn passant ne tenoit compte de luyder , & n'empeschoit sa mort, ou la perte de ce qu'il portoit , s'il le pouuoit faire, estoit sans remission mis à mort : & lors qu'il ne le pouuoit secourir, il estoit obligé de denoncer le faict , & les voleurs qui auoient commis le crime, s'il les cognoissoit. Que s'il y manquoit, il estoit mis en iugement , & fouetté iusques à certain nombre de coups , & tenu trois iours prisonnier sans manger aucune chose. Celuy qui accusoit faussement vn autre estant conuaincu de calomnie , portoit la mesme peine que celuy qu'on auoit accusé eust soufferte, si la deposition se fust trouuee veritable.

Les Egyptiens estoient contraincts par la loy de porter aux Presidents leurs noms par escrit, & de luy declarer aussi l'estat dont ils se mesloient, & si quelqu'un estoit trouué menteur, ou si l'on trouuoit qu'il vescuist d'un gain sale , & qui fust contre les loix , on le faisoit mourir par iustice.

Si quelqu'un auoit tué vn homme de franche condition, ou bien vn esclaue, de propos deliberé & sans iuste suiet, il n'y auoit nul respit pour luy, ains il luy falloit perdre la vie selon les loix, qui n'auoient aucun esgard à la condition du meurtrier, ains à l'ordonnance , afin de destourner les hommes de se faire outrage les vns aux autres, & qu'en punissant le meurtre commis en la personne d'un esclaue, la vie des libres fust en plus grande assurance.

Les Legislatours des Egyptiens n'auoient estably aucun supplice contre les peres qui feroient mourir leurs enfans : ains il leur estoit seulement enjoint que par l'espace de trois iours continuels , & d'autant de nuits , ils se tinssent près du corps mort , & afin qu'ils n'y manquassent, on y mettoit des hommes pour y prendre garde. Ils vsoient de ce iugement gracieux, pource qu'ils estimoient chose iniuste de faire perdre la vie , à celuy qui l'auoit donnée à son fils, & tenoient plustost pour chose raisonnable de les punir par vne douleur, & repentance de leur cholere precipitée, que par vn autre tourment, qui seroit trop leger, au prix de ce desplaisir, qui rendoit leur vie fascheuse, & pire que la mort. Mais si quelqu'un estoit si desnature que de tuer son pere, il y auoit vn supplice cruel ordonné pour sa punition : veu qu'apres l'auoir percé & eschiqueté avec des poinçons & des ganiuers , & avec des cannes aiguës , ils le faisoient brusler tout vif, estimant que c'estoit le plus detestable crime du monde, de priuer de vie celuy de qui l'on tenoit, & l'estre, & la conseruation & nourriture.

Lors que quelque femme condamnée à la mort estoit enceinte , on attendoit qu'elle fust deliurée : d'autant qu'ils tenoient que ce seroit commettre vne grande iniustice, si l'on punissoit avec ceste criminelle l'enfant innocent , & si l'on faisoit mourir deux personnes pour la faute d'une seule.

Quant aux ordonnances de la guerre, elles estoient telles. Celuy qui abandonnoit son rang au combat, ou refusoit d'obeir à son Capitaine, estoit rendu infame, cassé, & priué de tout honneur, & de toute esperance de gloire, & il luy estoit deffendu de iamais porter armes , & de retourner à son premier exercice.

Ceste loy accoustumoit les hommes à bien faire, & à craindre plus que la mort vne marque si honteuse & pleine d'infamie.

Ceux qui descouuroient les secrets à l'ennemy, & pratiquoient avec luy, auoient par la loy la langue coupee : & quicóque rognait, ou falsifioit la monnoye, changeoit ou gastoit les poids & mesures, falsifioit les signatures & contrefaisoit les escritures , & corrompoit les cedulaes & les instruments, ou actes publics auoit les deux mains coupees : afin que le membre qui auoit failly se sentist à iamais de sa faute, & que les autres prenans exemple à ce supplice se donnassent garde de tomber en pareille faute.

Les loix procedoient encor fort rigoureusement contre ceux qui s'oublioient à l'endroit des femmes : veu que celuy qui forçoit vne femme de libre condition estoit chastré, & perdoit le membre, & ses deux adoints : pource qu'en faisant ce mal , il auoit commis trois grands & estranges forfaits, à sçauoir , l'outrage, le rapt & corruption de la femme d'autrui, & auoit causé vne confusion & melange des enfans bastards avec les legitimes. Celuy qui estoit surpris en

en quelque adultere sans violence estoit condamné à recevoir mille coups de verges, & l'on coupoit le nez à la femme, afin que par la mutilation de ce membre, elle fust punie en la partie qui est vn des plus beaux ornemens du visage.

Quant aux coustumes & ordonnances faites sur les trafics, & commerces, on tient que Boccoris en fut l'Autheur.

Ces loix portoient, que si quelqu'un nioit d'avoir receu l'argent qui luy avoit esté presté sans cedula, le creditur devoit estre creu à son simple serment : veu que les Egyptiens estoient hommes qui faisoient grand estat de la solemnité des sermens, comme de chose sainte, & religieuse. Car pource qu'on adiouste malaisément foy à ceux qui iurent à tous propos, aussi se donnoient-ils soigneusement garde, que les gens de bien ne fussent contrainsts de iurer que fort tard, afin qu'ils ne perdissent la reputation de leur preud'homme.

Il estoit semblablement ordonné qu'il ne seroit pas raisonnable de refuser de croire celuy à qui l'on auroit presté sans cedula, lors qu'il iureroit en sa propre cause. Le Legislatteur ne voulut que l'usure promise par escrit esgalast le double de ce qui avoit esté presté : & ordonna que le payement seroit pris seulement sur les biens du debiteur, sans qu'on le peust empoigner au corps, ny le mettre en prison, ou le rendre esclave, veu qu'il creut qu'il suffisoit que les biens fussent soubmis à telle obligation, & que les corps des Citoyens estoient obligez à la Republique, qui s'en vouloit servir en temps de paix & de guerre : Car il iugeoit qu'il eut esté mal à propos, que les soldats qui hazardoient leur vie pour le salut de leur partie, fussent emprisonnez pour des debtes.

Les Egyptiens avoient vne loy touchant les larcins qui estoit telle. Ceux qui avoient resolu de les practiquer, se devoient faire enrooller au registre du Prince des Sacrificateurs, & luy porter la chose desrobée, aussi tost que le larcin avoit esté commis : & d'autre costé il falloit que celuy à qui l'on avoit pris quelque chose, vinst escrire, & denoncer deuant le mesme, le iour, & l'heure de sa perte. Par ce moyen les larcins estans facilement descouverts, celuy qui avoit perdu recouroit son bien, sauf que la quatriesme partie estoit ordonnée pour le larron, pour punition de celuy qui avoit si peu soigneusement pris garde à ses affaires, d'autant que le Legislatteur estima qu'il valoit mieux qu'on perdist vne partie de ce qui avoit esté desrobé, qu'estre entierement privé de la chose volée.

Les Prestres Egyptiens espousoient vne seule femme : les autres en avoient autant qu'ils vouloient, & qu'ils en pouvoient nourrir. Il n'y avoit pour lors aucun entr'eux qui fust estimé bastard, encor qu'il eust esté engendré de quelque esclave : d'autant qu'ils estimoient le seul pere autheur de la generation, & que la mere ne seruoit que pour recevoir la semence, & luy donner nourriture, qui n'estoit de guiere grande despense, veu qu'ils entretenoient leurs enfans de racine de ionc, & d'autres choses qu'ils cuisoient sous la braise, ou bien ils leur donnoient des herbes qui croissent dans les marais, les faisans bouillir, ou les mettant sur les charbons, ou quelquesfois ils les leur donnoient toutes crües. Ils faisoient aller les enfans pieds nuds, & le plus souvent sans aucun bahillement : en quoy ils estoient favorisez de la temperature de l'air naturel à ceste prouince. Somme toute la despense que les parens font pour leurs enfans iusqu'à ce qu'ils soient en aage, ne leur pouvoit couster vingt drachmes, ou du moins elle ne passoit pas ceste somme.

Les Prestres instruisoient leurs enfans aux lettres tant sacrees, que prophanes, & leur apprenoient sur tout la Geometrie, & l'Arithmetique : Pour le regard de l'escrime & de la lutte, ils ne vouloient qu'on les y accoustumast, à cause que ces exercices estoient trop violens & dangereux, si l'on y employoit tous les iours des corps qui estoient encor si tendres.

Ceux qui voyageoient, ou estoient en guerre, estoient traictez sans faire aucune despence, s'ils tumboient malades, à cause que les Medecins y estoient nourris & salariez du public, & estoient tenus par la loy de prendre garde aux malades, & de les guerir suivant les Ordonnances, receptes, & escrits des anciens de leur art, qui estoient autorisez, & en reputation parmy eux. Si le medecin ayant suivy les regles du liure sacré n'avoit peu guerir le malade, on ne l'accusoit point de sa mort, mais s'il le guerissoit en vñant d'autres remedes, on le faisoit mourir sans remission : à cause qu'ils estimoient iustement que l'ordre de penser vn malade qui avoit esté depuis long temps garde par les Medecins, & inventé avec beaucoup de peine par les anciens, estoit beaucoup meilleur, que les receptes nouvellement faites.

Quant aux Roys d'Egypte, ils n'abusoient pas si licentieusement de leur puissance, que les Princes des autres nations, qui n'avoient pour toute loy que leur volonté : veu qu'il falloit que, fust à lever les Tributs, fust en leur nourriture, ils se gouvernassent selon les loix & ordonnances communes des pays, ainsi que dit Diodore en son deuxiesme liure.

Ceux qui estoient de la suite du Roy, & qui le seruoient ordinairement, estoient non esclaves, fussent-ils estrangers, ou nez, & nourris en leurs maisons, ains enfans des gentils-hommes

Prestres, qui passoient l'age de vingt ans, & qui deuoient estre plus sçauans & mieux morigés, que tous les autres, afin que le Roy fut conuie par la presence de ces seruiteurs si pleins de vertu, à ne faire chose qui pent estre blâmée, d'autant que nuit & iour ils l'assistoient, & éclaircioient en ses actions & affaires.

Il y auoit des heures ordonnées de iour & de nuit, auxquelles la loy permettoit au Roy de traiter des affaires : veu que le matin il receuoit les lettres, requestes, & autres memoires de ce qu'il luy falloit executer, afin que respondant à tous il y pourueut avec le temps, & à son rang, & selon iustice. Cecy faict, estant accompagné d'une troupe d'hommes meurs & sages, il se lauoit le corps, puis estant vestu richement il alloit faire priere aux Dieux, & des sacrifices au Temple : auquel estant arriué, apres qu'on auoit mené au coing de l'autel les bestes destinées pour le sacrifice, le Prestre en presence du Roy, & tout le peuple l'oyant, luy souhaitoit longue & heureuse vie, pourueu qu'il se monstast doux, & iuste enuers les sujets. Apres la priere il se mettoit à discourir des vertus du Roy, & monstroient combien il honoroit les Dieux, aimoit les hommes, & estoit iuste, sage, chaste, veritable, magnanime & liberal.

Si quelque faute estoit arriuee au gouuernement, il en purgeoit & excusoit le Roy, la reietant sur ses officiers qui luy auoient donné faux aduertissement, & l'auoient mal conseillé contre la loy, & la iustice.

Cela paracheué, le Prestre exhortoit le Roy à bien viure, & à se rendre par ce moyen agreable aux Dieux, & luy conseilloit de suiure l'aduis de ceux qui luy propoheroient la vertu, & les exercices qui rendent la vie des hommes glorieuse.

A la fin le Roy ayant sacrifié vn Taureau à ses Dieux, le Prestre lisant les faicts, dicts memorables des hommes plus illustres, exhortoit le Roy à gouuerner le peuple avec toute douceur & iustice à leur exemple, sans s'amuser à l'auarice, à l'entassement des thesors. Il falloit aussi que ses actions plus particulieres, comme de se pourmener, lauer, coucher avec sa femme, & autres semblables, fussent mesurees selon l'ordonnance, sans l'outré passer en aucune chose.

RELIGION.

L'EGYPTE est peuplée de Mahumetans, de Chrestiens, & de Iuifs en bien petit nombre. Quant aux Iuifs & aux Mahumetans, nous remettons le discours de leur creance ailleurs. Mais pour entamer celuy des Chrestiens, ceux d'Egypte sont, ou estrangers, ou natifs du pais. Les estrangers y viennent pour raison du trafic qui s'y faict, principalement en la ville d'Alexandrie & au Caire.

Car ce Royaume assis entre la mer Rouge, & la Mediterranee, voit le Ponant avec le Levant par le moyen d'un fort grand trafic, & est comme vne eschelle, par laquelle les richesses des Indes, & du Levant passent en Natolie, en Afrique, & en Europe.

A raison dequoy l'on y voit venir, non seulement les Venitiens, Florentins, & Ragousois en grand nombre, mais encor les François, & les Anglois. Les Religieux de saint François qui demeurent en Hierusalem s'employent à leur assistance spirituelle, s'en allant administrer les sacremens, prescher la parole de Dieu aux Chrestiens qui traquent en Egypte, & le besoin de leur assistance croist continuellement à cause des heretiques Anglois qui pratiquent ceste Prouince.

Les Chrestiens natifs d'Egypte, restez de l'inondation des Barbares, & de la cruauté des Sarrazins, des Mammelus, & des Turcs, ne passent pas les nombres de cinquante milles personnes qui habitent çà & là, principalement aux villes du Caire, de Messie, de Montsalut, de Buquet, d'Elchiafe, toutes assises sur le Nil, il y a encor beaucoup à Minie, dans le territoire de laquelle on void diuers Monasteres. Mais les plus fameux de toute l'Egypte sont ceux de S. Antoine, de S. Paul & de S. Macaire.

Le premier est en la Trogloditique en vne montagne où saint Antoine fut battu par les diables. Le second n'est guiere loin de cestui-cy au milieu des deserts. On void le troisieme parmy les deserts de Boulacques du costé d'Occident.

C'est le Monastere nommé Nitre, dans les Histoires des saints Peres, pource, comme l'estime, qu'en ceste contree les eaux du Nil condensées, & referrees par la force du Soleil aux lieux bas, se conuertissent en sel, & en nitre.

Il a eu vn magnifique Couuent sur le Nil, à six milles de la ville de Menfie, sous le nom de S. Georges. On y a veu plus de deux cents Moynes avec vne signalée commodité des passans qui y estoient receus, & traittez courtoisement : mais tous les Moynes estans morts de peste, il y a enuiron cent cinquante ans, le lieu demeura abandonné.

Mais pour dire quelque chose de la qualité des Chrestiens, ils se nomment Cofites, & Chrestiens de la ceinture : pour ce qu'encor qu'ils soient baptizez comme nous, ils sont circon-

cis com-

ais comme les Juifs : tellement qu'il semble que leur foy ne passe plus bas que la ceinture : Mais qui est pis , ils suivent depuis mille ans en ça l'heresie d'Eutiches , qui admettoit seulement vne nature en Iesus-Christ, de sorte que par le moyen de ceste heresie, ils se separerent de l'vniõ de l'Eglise Romaine. L'occasion de ce Schisme fut le mauuais Concile d'Ephese , assemble par le Dioscore pour la deffense d'Eutiches , qui auoit desia esté condamné au Concile de Calcedoïce par six cents & trente Peres, assemblez par l'autorité de Leon I. Et les Cofites craignans que ce fust aduoüer deux hipostasies de mettre deux natures en Christ, deuindrent Eutychiens, pour ne se vouloir plonger en l'erreur de Nestorius.

Ils disent la Messe en langue Chaldaïque , disant par plusieurs fois *Alleluia*. Ils lisent l'Euangile premierement en Chaldeen , & puis en Arabe. Quant le Prestre dit , *Pax soit avec vous* , ou *Pax vous soit donnee* , qui est nostre *Pax vobis* , le plus ieune d'entr'eux va touchant la main à tout le peuple qui assiste à ceste Messe. Apres la consecration donne vne petite piece de pain simple à chacun des assistans. Ils obeyssent au Patriarche d'Alexandrie , & disent qu'ils tiennent la foy du Prete-Ian.

ESTATS DE L'EGYPTE DEPVIS LE VRAY EMPIRE ROMAIN.

LEs Egyptiens comptent près de trois cents ans, depuis le temps qu'eux, de libres, francs & nobles qu'ils estoient, ont esté reduits sous l'esclavage & pure seruitude des Romains, la fortune ayant ballotté diuersement cet Estat par la diuersité des changemens & mutations estranges qui y sont arriuees.

Or auparauant que de faire voir comme ils sont decheus de leur liberté, & de leur Seigneurie ancienne, il est besoin icy de faire entendre quelles diuerses fortunes ceste Principauté a souffertes, quelles tempestes passees, & à quelles fins finalement a esté reduite la fortune des Egyptiens.

L'Egypte, apres la decadence de l'autorité Romaine, & la diuision de l'Empire apres auoir esté regie premierement par les Pharaons. en apres par les Peres, par les Princes Ptolomees, & par les Romains qui l'auoient reduite en Prouince, elle escheut en la domination des Empereurs de Constantinople : mais peu d'annees apres, les Egyptiens lassez & ennuyez, que les Grecs regnassent sur eux avec trop de fast, d'auarice & superbe : Pour ceste cause ayans appellé les Sarrazins à leur ayde, chasserent & mirent hors leur pays tous les Grecs qui s'y estoient establis, & s'eleurent pour Roy Calyphe Capitaine des Sarrazins, qui descendoit de la race du faux Prophete Mahomet, lequel leur ordonna de nouvelles loix touchant la superstition Mahometane, melles des erreurs de la secte d'Arrius, & de la doctrine Iudaïque pratiquée parmy les Nations d'Orient.

Depuis Calyphe, tous les autres Roys d'Egypte qui luy ont succedé par diuerses successions, ont pris le nom de Calyphes, en renouellant la coustume des Pharaons, & des Ptolomees.

Le dernier des Roys de ce nom là escheut au temps que les Chrestiens sous la conduite de Godefroy de Buillon & de Raymond, ayant couru toute l'Asie & toute la Surie par leurs armes victorieuses, fonderent le Royaume de Hierusalem.

Ce Roy estant molesté par les armes d'Aumery, qui auoit succedé à Baudouin au Royaume de Hierusalem, & ne pouuant que malaisement soutenir vne si pesante & onereuse guerre avec ses seules forces ; demanda au Soldan de Surie armes & secours : ce Soldan qui s'appelloit Sarracon y conduit vne armee en personne, & comme il estoit autant desloyal que prompt & hardy aux entreprises de consequence, ayant destruit & reprimé les efforts d'Aumery, estant devenu le plus fort en Egypte, se saisit de la personne du Calyphe, qu'il fit prisonnier, & se saisit du Royaume d'Egypte, n'attendant rien moins que ce trait de perfidie & de tyrannie de ce Soldan Sarracon.

Depuis ce temps-là, les Calyphes ayans perdu la Seigneurie seculiere du Royaume d'Egypte, y eurent seulement la charge des choses diuines, leur estant donnee la puissance de couronner les Roys, comme nous voyons que les Empereurs Romains par ancienne coustume reçoient leur couronne du Pape.

Au Soldan Sarracon succeda vn sien fils nommé Saladin, qui deffit assez de fois, & mit en route les armes Chrestiennes en Surie & en Palestine, & finalement ayant fort affoibly leur puissance ruina tout le Royaume de Hierusalem.

Apres Saladin, qui mourant laissa son Royaume à son frere, plusieurs fils & arrierefils tindrent l'Egypte iusques à Melechala, qui estant le dernier des enfans de ces Roys, fit continuelle guerre aux Chrestiens, & ayant (comme Dieu permit qu'il arriua) perdu tous ses vieux

& les plus valeureux de ses soldats aux guerres, par tant de batailles qu'il donna, se deffiant de l'humeur des Egyptiens & de leur affection, comme de ses forces, remit vne puissante armee sus pieds compoſee de serfs & d'esclaves exposez en vente: En ce temps les Tartares peuples de Scithye auoient enuahy l'Armenie & l'Alie par les portes Caspiennes, & auoient vendu en plein marché par droit de guerre les peuples Comans qui sont voisins de Capadoce, apres auoir esté domptez en bataille: ayant donc Melechſala achepté vn grand nombre de ces Comans pour vne grande somme de deniers, les mena en Egypte, & les arma pour la guerre, & par leur effort non seulement il deffendit les limites de son Royaume, ains encore assiegea S. Louys Roy de France en son Camp d'Esté pres de Damiette, qui fut iadis Heliopolis, ou Pelusium, & tost apres luy ayant deffait son armee par vne memorable bataille, il le prit vif, dont il paya rançon pour sa deliurance, laissant la sainte Hostie au Barbare, pour le gage & ostage de plus pretieux qu'il eust pour la moitié de la somme.

En fin les serfs de son armee ayant conspiré contre luy, le tuerent & massacrerent sur ceste felicité de victoire, en telle sorte qu'estant mort, le plus hardy & le plus courageux des Comans nommé Turquemen, se saisit de la Principauté, & se voyant esleué en vn si haut degié s'oublia de son Premier estat, & par vne outrecuidance trop grande, venant à mespriser ses conſorts qui luy auoient mis la principauté entre ses mains, le prindrent en tel deldain, qu'il fust massacré en sa maison par vn Cathos aussi Cavalier Coman.

Cathos estant salué Roy, & Soldan sur ceste mesme Principauté, par l'exercite, & ayant tué quantité de Tartares laissez par Hialon en Surie, fut aussi massacré par trahison, & fut la Seigneurie d'Egypte transferee à Bandocader son meurtrier.

Ce Bandocader fut vaillant aux armes, & sous sa conduite les Esclaves Comans chasserent Richard Roy d'Angleterre, & le reste des armées Chrestiennes hors de Surie.

Apres Bandocader qui mourut empoisonné, Elpis, & apres luy Melech, & Vstreph iouïrent du Royaume, l'vn desquels chassa de Tripoly les Chrestiens, & l'autre ayant attaqué Ptolemais, qui estoit la seule ville demeuree en la garde des Chrestiens, les força d'en sortir avec vne grande & puissante armee.

Apres ceux-cy, par vne longue fuite de temps plusieurs vaillans personnages de telle condition, ont tenu l'Egypte, mais leurs noms ne sont point cogneus: par ce que leurs gestes, encores qu'ils fussent memorables, n'ont esté en ce temps-là redigez en nuls memoriaux de lettres ny d'écrits.

Toutesfois de la souuenance de nos Peres, Caritbeies fut de beaucoup plus renommé en puissance & en guerre, & ayant appris de main en main la discipline de ses ancestres, augmêta & continua le train de ceste guerre seruile, plus diligemment & liberallement que nul autre avant luy: en sorte neantmoins que l'on se donnoit de garde par vne grande preuoyance de la multitude des sous-serfs, qui peu de temps auparauant auoient faite vne coniuration & pris les armes, & auoient suscitè vne fascheuse guerre au Roy mesme, & à les Cheualiers leurs Maistres.

C'est ce Soldan, qui estant Roy d'Egypte, par vne singuliere bien-veillance, fit eslime des Princes Chrestiens, selon qu'il auoit ouy parler qu'vn chacun d'eux estoit excellent en magnificence, & en vertu d'esprit, enuoya entr'autres pour present vn Cameleopard, animal de prodigieuse hauteur, à Florence, pour Laurent de Medicis. Cestuy-cy ayant surmonté les Turcs en Cilicie, & debella par grande valeur, les Perses qui auoient enuahy la Surie du costé de Mesopotamie, dompté les Arabes en portant ses armes iusques à la Meque, & aux dernieres fins de l'Arabie heureuse, & gagné le surnom de Grand, partit de ceste vie, l'an trentetrois de son regne, presque au mesme temps que les François combataient contre les Venitiens à Taro.

Estant mort Caritbeies, Achardin & Campsonnia, qui obtenoient les plus grandes charges en Egypte, apres auoir longuement debattu entr'eux par grandes forces de la Principauté, fort cruellement, & mis toutes choses en troubles, en tumultes & en armes, ayans fait diuiser les Mammelus en factions, donnerent occasion à Mahomet, fils de Caritbeis, d'enuahir la Principauté d'Egypte. Mais deux ans apres iceluy Mahomet, qui auoit enuahy le siege paternel contre les loix & constitutions de l'ancienne institution d'Egypte, en banquetans avec ses Courtisans, fut massacré par vn Cercassien: lequel, par ce qu'il auoit fait cela, comme ayant eu esgard à la cause publique des esclaves, & sembloit auoir restitué le droit de declarer leur Soldan à la Principauté, & d'obtenir icelle Principauté aux Mammelus, fut salué pour Soldan d'Egypte par la tres-grande faueur de tous, & neantmoins Giapalat, qui estoit Gouverneur de Damas, & de Surie, estant allé iusques au Caire avec vne forte armee, le dejeta de son Trône Royal, & le fit prisonnier.

Si est-ce que les Mammelus de faction aduerſe & ennemis de ce Giapalat, qui regnoit cruellement,

cruellement auaricieusement, & tyranniquement, le prirent en personne, & le mirent en garde seure dedans la Roque d'Alexandrie, sous la conduire & la garde de Tomoubeies.

Quand cetacte fut fait, Tomoubeies n'ayant rien au premier point de sa Principauté en plus grande recommandation que de surmonter en cruauté & tyrannies excessiues, voire en auarice, & en toute sorte de meschanceté Giapalat, qu'il auoit fait secrettement estrangler : en peu de temps s'acquit la haine generale du peuple en telle sorte, que les Mammelus par conseil public, ordonnerent incontinent de le prendre & punir.

Ainsi Tomoubeies au huitiesme mois de sa Principauté, lors qu'il taschoit par vn lieu souterrain à s'éuader, & à fuir en desespoir de son salut, estant assiegé & pris fut cruellement maltraité par les amis de Giapalat.

Après la mort de Tomoubeies, les principaux de la Cour d'Egypte, afin d'obuier aux seditions sanglantes des Mammelus, par lesquelles on auoit combattu par l'espace de quatre années, presque à l'extermination de leur entretien, presentèrent la Principauté à Campson Gauri, homme iuste & martial, & nullement ambitieux : Cestui-cy estonné de la fraische calamité de tant de Soldans, qu'il auoit veu tomber par leur ambition ruineuse, en peu de mois, lors qu'il vid qu'il estoit porté au Palais Royal sur les espauls des principaux Seigneurs du pais & des g's de guerre, qui l'auoient hautement eleué à ceste grade de Principauté commença à refuser cet honneur souverain, & à resister grandement à ceux qui le vouloient saluer Soldan, & à dire qu'il en estoit indigne : & finalement ayant la larme à l'œil, à prier ses amis, & les principaux de la Cour, que puis qu'il estoit si content de viure en son particulier, il ne voulussent le jeter en vn manifeste peril de sa vie, attendu qu'il n'auoit aucun argent prest pour departir aux soldats, comme tous les autres Soldans auoient accoustumé de faire à leur aduenement à la Couronne, & qu'il n'estoit pas homme pour auoir tant de conseil & d'authorité, qu'il estoit necessaire de rompre les impetuosités des sedicieux, en telle confusion où toutes choses se voyoient reduictes. Au contraire les Grands Seigneurs l'admonesterent qu'il n'eust à mespriser par vne folle obstination d'esprit, & par vne friuole modestie, l'occasion de la fortune pretendue, & qu'il se laissast recevoir au Gouuernement de la Republique, affligée de maux interieurs, & tresbuchante à sa ruine, & acceptast ce nom de Soldan qui luy estoit offert par l'vniue affecton d'vn chacun. En fin ils luy promirent tous par serment, qu'ils ne luy manqueroient nullement à entretenir la dignité de Soldan, ny de main, ny d'industrie, ny de leurs biens, & que les soldats ne demanderoient point le Donatif auant que les Receueurs & Thresoriers eussent amassé & recueilly sous l'authorité publique, tel argent des Tributs des Prouinces de leur appartenance.

Par lesquelles exhortations Campson estant confirmé, souffrit patiemment d'estre appelé Soldan, & entreprit la charge d'administrer l'Egypte. Or apres qu'il eust de distribué en nom de Donatif vn million d'or aux soldats, & qu'il eust par sa singuliere moderation, fait auoir bonne opinion de soy, quant à sa Preud'homme & Prudence, il appaisa l'Estat de l'Egypte, troublé & tourmenté par troubles & tempestes au dedans, apres en auoir fait mourir aucuns par poison, qui brassoient quelques nouveutez, & par telle industrie, qui dura seize années, iamaïs la Surie ny l'Egypte n'ouïrent parler de tumulte ny de guerre : Aussi à la verité Campson estoit digne du nom du tiltre qu'on luy donnoit de personnage heureux & tres bon, si luy qui auoit par sa vertu fondé vne si bonne paix, pleine de tranquillité & d'opulence, eust mieux aymé puis apres viure en vn domestique repos, & souffrir la tranquillité publique, que non pas par la prise temeraire des armes hazarder la fortune.

Ainsi donc Iachis & le Cadilescher estans partis d'Agogna, arriuerent dans peu de iours vers le Soldan Campson, qui pour lors estoit campé sur le fleue Orontes, auourd'huy nommé Farfara, ceux-cy ayans esté amiablement receus par luy, & ayant par apres discoursu sur le sujet de leur deputation par harangues eloquentes & celebres, le Conseil assemblé au logis, & en la maison Royale du Soldan Campson, respondit que l'ancienne coustume des Soldans d'Egypte qui obtenoient le principal lieu au fait de la Religion, de maintenir avec industrie & diligence, les Roys & peuples Mahometans en paix & bonne amitié, de laquelle il auoit singulierement esté curieux d'observer & entretenir, que pour il est entré armé en la Prouince de Surie, afin de persuader ceste paix à Selim, que s'il persistoit en son opiniastrété à la guerre, & continuoit d'attaquer Ismaël, qu'il scauoit luy estre conioinct par alliance, il pourueroit à la conseruation de la dignité & reputation, & ne souffriroit pas d'auantage que par l'ambition & conuoitise d'vn homme si ambitieux, le trouble fust suscité entre les choses diuines & humaines.

Ces Ambassadeurs scachans que Selim ne quitteroit iamaïs les armes, dirent que la paix leur estoit fort à souhait, & esperoient flechir le courage de Selim. comme ayant entree familiere en ses plus secrets Conseils.

Et ainsi sur ceste esperance, estans renuoyez avec presens, ils retournerent vers Selim, qui pour lors estoit à Cezaree.

Aussi de son costé Campson ayant remué son camp qui estoit à Orontes, vint à Comagene & à Alep, ville edifiée des ruines de Hierapolis, par Aleppius Prefect de l'Empereur Lelian, laquelle Hialon Roy des Scythes, prit d'assault, & la brûla entierement pour luy auoir valeureusement resisté, lors que les Chrestiens debatoient de la possession de Iudee & de Surie, avec les Soldans d'Egypte.

Après que Selim eust esté aduertie par ces Ambassadeurs de Surie, qui auoient tout espié au Camp des Egyptiens, de la venue & du nombre de ses ennemis, & de l'arrogance de Campson, se resolut de luy faire la guerre par vne autre voye que celle qu'il auoit tenue par cy-deuant, il feignit d'aller attaquer les Perses, & fit aduancer son bagage auant luy iusques à Sinac, iadis appelé Sebaste, puis le respendant en Mesopotamie entre en Comagene, & attaque ses ennemis au despourueu, & declara son dessein aux lanissaires & gens de la garde: ceux-cy s'estans leuez d'entre les bandes, ils s'escrient qu'il les menast où il luy plairoit. Selim mena son armee par plusieurs chemins differents & incogneus: mais qui luy estoient fort auantageux, & promit recompense aux soldats pour les encourager à trauerser ces lieux faicheux, il enuoye des espions, pour descouurir & recognoistre le lieu où estoit l'armee du Soldan Campson, & fit si bien son affaire, qu'il osta le moyen à Campson de sçauoir nouuelle de la sienne.

En fin, sur l'aduis que Selim approchoit avec son armee, Campson qui le cherchoit s'arresta pour l'attendre au combat: son Camp estoit en lieu commode & auantageux sur le fleuve Singa: les Mammelus qui estoient avec eux, à peine estoient ils douze mille, mais auoient vne grande suite de vallets brauement armez & montez sur des cheuaux: à la verite Campson auoit vne armee braue & inuincible, si on eust combattu par prudence: les Mammelus portans longues barbes, hideux sur les yeux qui menacent, musculeux & fournis par tout le corps, & se manians fort dextrement, entrent en bataille avec tel artifice, que tost apres les premiers coups de lances donnez, ils combattent par agilité & vigueur, maintenant de l'arc, ayans ietté leurs escus sur leurs dos, puis d'une masse de fer, & par fois du cimeterre, ainsi que le lieu & la rencontre le requeroient: leurs cheuaux estoient puissans & genereux, & fort semblables à ceux d'Espagne en leur taille & viffesse, & ce qui est par dessus l'opinion des hommes de ce temps, estoient tant dociles, qu'ils entendoient les signes & les voix de leurs cheuaucheurs, comme les ayans apprises par nature & par coustumes, & par ces signes leuoient les lances & les fleches hors de terre, en les mordans avec les dents, ils cognoissoient l'ennemy, & le harpoient aux dents, & battoient avec force ruades tout ce qui estoit à l'entour d'eux, sans s'estonner à la veüe de leur sang: on voyoit à tels cheuaux des freins & des mords d'argent, des selles dorées, & des bardes de fer à ouurage escaillé pour le col, & pour la poitrine: le cavalier qui les monte est content d'un halecret ou d'une cuirasse iointe avec lames de fer. Les Cavaliers des premiers rangs, & les riches portent leurs armets sur la teste: les autres s'estiment estre bien couverts contre ceux qui frappent de taille, par un accoustrement de teste fait de linge, & ployé en rond avec plusieurs tours, les vns dedans, les autres en mignotise & brauerie: mais les simples Cavaliers vïoient de chapeaux velus & rouges, qui ne peuuent estre coupez d'outre en outre à grands coups d'espee. De toute laquelle armee Campson ordonna cinq bataillons.

Quant à Selim il auoit ordonné sa bataille en telle sorte, que sa Cavalerie d'Asie estoit à sa droite, & celle d'Europe à sa gauche, & l'Infanterie des lanissaires & soldats de la garde avec le canon au milieu, & les plus braues lanissaires & Cavaliers tenoient le front: le combat commence apres plusieurs efforts, la victoire balance: mais voicy le mal pour Campson, c'est que Cayerbeies feignant estre pour luy, le trahit, & fut car se que Selim vainquit, & fut tué Campson au combat, avec Damasquin & le Tetrarche de Tripoly, & tous les siens desfaicts: & donna Selim le pillage du Camp à ses soldats, alors se rendit à luy Alep: ceste bataille fut donnée le vingtiesme Aoust: Damas & autres villes de Surie, voyans approcher les armes de Selim se rendent à luy, comme aussi Tripoly, Barut, Sydon, & Ptolemais.

Les Mammelus refugiez au Caire sous la conduite de Gaselli, esleurent pour Soldan Tomoubeies, tous ayans grande esperance en luy, qu'il releueroit leur grandeur & fortune. Estant nommé Soldan, & receu Prince d'Egypte, il met sus pied de fort grandes armees, & ayant ioinct Gaselli avec luy combattirent Sinam Bassa Lieutenant General de l'armee de Selim, où l'armee de Tomoubeies fut desfaite, & se sauua au Caire tout blessé.

Par apres Selim allant ioindre Sinam Bassa, entra en Egypte avec vne puissante armee contre Tomoubeies, qui estoit sorty du Caire, s'estoit campé vers le iardin de la Materce, avec tout son canon & attirail, & s'y estoit retranché. Tout le reste des Mammelus estoient assemblez avec force cavaleries Arabes: l'armee de Selim approchant fut fort endommagée par les traités & artileries de Tomoubeies, & sans doute les Turcs eussent esté mis à vauderoute sans la

ains la trahison d'aucuns qui estoient au camp de Tomoubeies, qui decouurerent à Selim ses desseins, & les embusches que Tomoubeies luy dressoit : Le combat pourrant fut furieux, & la victoire fort douteuse à cause de l'artillerie des deux partis, la bataille, s'acheua en quatre combats, où les Mammelus firent merueilleusement bien, & les Arabes aussi, lesquels rompirent la garde, les Janissaires & la Cavalerie d'Europe du Turc, son Lieutenant General Sinambassa y fut tué : La bataille dura quatre heures entieres, où Tomoubeies fit des merueilles : mais en fin son armee se diuisant fut mise en deroute, de sorte que sonnant la retraite, afin que ses gens semblassent se retirer, non pour la crainte des poursuuans, mais par commandement de leur Chef. Les Mammelus fuirent vers le Caire.

Ceste bataille fut donnee vn Ieudy vingtquatriesme Ianuier, l'an de nostre Seigneur mil cinq cents dixsept : en la poursuite des fuyards fut pris le Diadare chargé de plusieurs playes, & avec luy Bidon, auquel vn boulet tiré d'un fauconneau auoit rompu le genoüil.

Le lendemain Selim commanda qu'ils fussent mis à mort.

Cependant Tomoubeies ne perdant point courage rallia les Mammelus, & campe entre la nouvelle Memphis & la riuere du Nil, & arma iusques à huit mil esclaves Éthiopiens, & ayant ouuert l'ancien arsenal, auoit donné des armes aux enfans des Mammelus, à quelques Mores ses vassaux, & à des Iuifs & des Arabes, en voulant faire guerre plus grande contre les Turcs, & se resolut la nuit suivante de brusler leur camp.

Selim voyant ce dessein, que quelques Mammelus luy auoient reuelé, commande que l'armee soit sur pieds toute la nuit, & qu'on allumast des feux de toutes parts en tous les quartiers de son camp, diligence qui empescha l'intention de Tomoubeies, qui faisant quelques cheuauchees vers le camp Turc, fut repoussé avec grande perte par le premier bataillon, pour s'estre trop temerairement aduancé : Et aussi sans doute Tomoubeies eust esté entierement defaict ceste nuit-là, si se voyant aduerty par la lueur des feux du camp Turc, & voyant le peril eminent où il s'engageoit, il n'eust faict retirer les autres compagnes.

Après cela Tomoubeies se retire au Caire avec toute son armee qu'il faict entrer dedans, où ils armerent toutes les familles de la ville, & garnissent le plus haut de leurs maisons de bastons, & de traits, prient les Egyptiens chacun en son quartier de prendre les armes, & se tenir sur leurs gardes.

Selim estant aduerty de la retraite de Tomoubeies au Caire, & de tous les Mammelus avec luy, & de toute son armee, approcha son camp de la ville, & exhorta ses gens à tout vaincre. Les soldats Turcs brusloient après la proye, & estans ordonnez n'attendoient plus que le signe de Selim pour donner dedans le Caire, quand Selim estant entré par la porte de Bassucla enuoya sa cavalerie par plusieurs endroicts ensemble, & les Janissaires par la voye plus large : la cavalerie du Turc se battit rudement avec la cavalerie de dedans parmy les rues du Caire : mais le choc fut bien plus rude quand les Mammelus vindrent aux mains avec les Turcs, aux fortifications & retranchemens qu'ils auoient faicts en la ville, & que les Turcs taschoient à demolir : ce n'estoit pas iusques aux femmes qui ne voulussent estre du combat : de sorte que par ce conflict on voyoit les Turcs tomber les vns sur les autres dedans les fosses cachees : ils tuoient à coups d'harquebuses tout ce qui paroissoit aux fenestres des maisons, les rues estoient toutes trempées de sang : Ce conflict cruel dura deux iours & deux nuits, & ne sçauoit-on lequel des deux partis auoit du pire ou du meilleur : neantmoins les Mammelus qui estoient peu, furent contraincts de ceder au travail, se retirerent, reculerent, & se cachèrent dans les lieux les plus secrets & incogneus de la ville, abandonnans leurs fortifications & retranchemens.

Au troisieme iour se voyans au dernier hazard, se battirent avec tant de valeur, qu'ils repousserent les Turcs en arriere, & surprirent quelques fauconneaux : auquel cas, on dit que Selim desespera de la victoire, & commanda qu'on mist le feu à la ville, aux maisons de pas en pas. Les Turcs combattirent plus laschement que deuant, oyans les cris & les efforts des Egyptiens, & attendoient que l'on sonnast la retraite, quand il fut annoncé par plusieurs ensemble, que les Egyptiens ayans esté repoussez de leurs places, & surmontez sur vn autre quartier à la poursuite de Mustapha, auroient mis leur dernier secours en la fuite : Car Mustapha conduit & guidé par les Egyptiens & Mammelus, traistres à leur patrie, estoit arriué à vne grande place, où les Mammelus auoient rangé leurs cheuaux tous sellez & bridez, afin que s'il arriuoit quelque chose de pressé, ils se retirassent promptement, & estans montez dessus se sauassent es lieux qu'ils auoient destinez : Mais Mustapha en ayant dechassé la garde qui estoit de muletiers, saisit & emmena tous ces cheuaux : ce qui debilita grandement les Mammelus, & leur fit perdre courage : Ils s'enfuirent hors le Caire vers le Nil, qu'ils traufferent au moyen de quelques vaisseaux qui estoient prests avec Tomoubeies : vne autre partie se cacha es maisons des Egyptiens, & autres s'enfuirent à la campagne.

les autres, en nombre de plus de deux mille, se renfermerent dans vn temple de faux Dieux le plus grand de la ville, où s'estans long temps defendus, se rendirent à la discretion du vainqueur, dont partie furent massacrez par commandement de Selim.

Selim tenant la victoire entre ses mains, fit esteindre le feu de la ville, & envoya des trompettes, & commanda de publier, que tous Mammelus qui se voudroient rendre en douze iours seroient pris à salut, & non hors le temps : A ceste publication les Mammelus sortoient des lieux cachez, & se venoient rendre entre les mains des Turcs, qui aussi les ayans enchainez les conduisirent és prisons, où ils les massacrerent.

Tomoubeies remet sus vne autre armee, qu'il leue en la Region Seieſtique, vers la Cyrenaique, au delà du Nil : d'Alexandrie luy estoit arriuee vne nouvelle compagnie de Mammelus qu'il auoit appelez : plusieurs autres grandes troupes luy iuruindrent, dont il composa vne puissante armee.

Selim ayant aduis de cela, est sollicité par Albuchomar personnage Egyptien, de faire accord avec Tomoubeies, luy desseignant ses forces, qui luy pouuoient raur la victoire des mains, & mettre sa personne & son armee en danger. Selim au contraire enuoyaa ses Ambassadeurs à Tomoubeies, auquel il commanda par eux de mettre les armes bas : Les Mammelus les voyans se ruent dessus, & les massacrerent sans les auoir ouïs, ce qui irrita grandement Selim, & alors se resolut de vanger ceste iniure.

Il fit faire vn pont sur le Nil, par lequel il fit passer toute son armee : Tomoubeies le voyant, s'approche avec quatre mille Caualliers armez, & deux fois autant de Mores & Arabes, estant party de bon matin de son camp, pour tromper & surprendre les Turcs.

Mustapha General de l'armee de Selim, aduertie de l'arriuee de Tomoubeies, crie à l'arriuee, Voyla Tomoubeies qui arriue : tous ceux qui estoient passez, & ceux qui estoient encores sur le pont, s'aduancent pour les aller recevoir : Selim enuoye par Mustapha force scoperie de Grecs, qui forcerent & repousserent furieusement Tomoubeies : Alors les Mammelus ne pouuans plus combattre, leurs cheuaux estans las, recreus & fatiguez, il ne resterent plus que les Arabes & les Mores, qui soustindrent grandement contre les Turcs : toutes fois les lanissaires à pied suruenans sur les gens de Tomoubeies, mirent tout en fuite & en deroute.

Le lendemain Mustapha poursuivant leurs ennemis, prirent Tomoubeies sur vn canal d'un fort profond Palus, où il estoit arresté.

Au troisieme iour il fut mené au Caire. Selim qui le vouloit faire mourir ne le voulut point voir : il le fit mettre entre les mains des gehenneurs, afin qu'il sceust de luy où estoient les tresors de Campson.

Le iour d'apres, il commanda qu'il fust mené par toutes les places de la ville du Caire, & sur les plus celebres rues, chargé sur vn vil Chameau, habillé d'une robe vsee, & les mains liees derriere le dos, comme les malfaiteurs & larrons ont accoustumé de les auoir, afin que les Egyptiens vissent celuy mesme qu'ils auoient honoré pour Prince & Soldan : vn peu deuant, estant la chance tournee, & luy precipité en vne extreme misere, finir les iours de sa vie, & de sa Principauté ensemble, par vn mortel & fatal cordeau, & le laisserent pendu avec vn crochet de fer à la volute, afin qu'il fust veu & moqué des passans.

Telle mort fut donnee à Tomoubeies, dernier des Princes Soldans d'Egypte, le treizieme iour d'Auril apres la Natiuité de nostre Seigneur, l'an 1517. vn iour de Lundy apres Pâques.

Ainsi la Principauté des Egyptiens a esté esteinte & tombee entre les mains tyrannique du Turc, qui y domine auourd'huy absolument, & estend son pouuoir en Afrique de ce costé là iusques dans l'Ethiopie, où Empire du Prete-Ian, duquel il a encore vsurpé vne grande partie de l'un de ses Royaumes, qui est Celuy de Barnagas.

DISCOVRS DES TVRCS EN GENERAL.

MOEVRS DE CE TEMPS.

LEs Turcs sont en partie naturels, qui ont tiré leur origine des Scythes ou Tartares, & descendent aussi en partie des Chrestiens Apostats : Ils ont pour la pluspart le visage large, & les membres bien proportionnez, & sont naturellement gros & robustes : Ils ne laissent croistre leurs cheueux, ains seulement leur moustache : Ils ont l'esprit assez lourd, & sont lents, & paresseux, & tardifs en leurs affaires : Ils ne sont nullement propre au labourage : Ils sont

Ils sont avarés au possible, & ayment l'argent sur toutes les nations du monde: Aussi la justice se vend en Turquie, par maniere de dire, au plus offrant & dernier encherisseur, & les Turcs ne font plaisir à personne, s'ils n'en reçoivent de l'argent. Ils sont humbles entr'eux, & obeissent estroitement à leurs superieurs, gardant vn grand silence, & se tenans fort coiz devant eux. Mais ils sont insupportablement superbes à l'endroiect des estrangers, insolens, vendeurs, & si arrogans, qu'ils n'estiment pas qu'il y ayt au monde nation qui se puisse comparer à la leur. Ils montrent en parlant vn grand orgueil, sont trompeurs, & ne tiennent parole, sinon entant que la chose leur est aduantageuse. D'auantage ils sont oisifs & faineans, & addonnez à la gourmandise, & à l'yurongnerie, tellement qu'ils passeront quelques'ois trois iours entiers à faire grande chere, & ils boient volontiers du vin, mesme avec excez, bien que leur loy le deffende. Ils sont aussi fort enclins à la paillardise, & mesme pour la plus grand' partie Sodomites: ce qu'on void sur les vaisseaux, où ils ont tousiours quelques-vns destinez pour souffrir ce malheureux effect. Ils croient de leger, sont extremement superstitieux, & adioustent foy aux songes, aux presages, & aux deuinations, & tiennent que la destinee d'vn chacun, & l'heure de sa mort est eicrite sur son front, & que nul ne peut fuir ceste heure: ce qui faict qu'ils se precipitent si remerairement aux dangers.

Les Turcs ont permission d'auoir autant de femmes qu'ils en peuuent entretenir, & les maris se separent facilement, & sont diuorfe d'avec leurs femmes, qui sortent peu souuent du logis, encor c'est avec le visage couuert. Elles vont pompeusement vestuës, & portent force or & pierreries, & elles ont aussi de coustume de teindre de rouge leurs cheueux, leurs mains, leurs pieds: mais principalement leurs ongles. Elles vont aussi aux estuues deux fois la semaine de mesme que les hommes.

Ils ne jouent, ny aux cartes, ny aux dez. Ils sont charitables & grands aumosniers, non seulement à l'endroiect de ceux de leur secte: mais encor à l'endroiect des Chrestiens, & des hommes de toutes sectes: voire mesme ils se monstrent charitables enuers les animaux, veu qu'ils acheptent quelque fois des oyseaux, qu'ils mettent en liberté par maniere d'aumône.

Leurs habillemens sont longs & ouuerts par le deuant iusques aux pieds, excepté la chemise qu'ils portent hors de leurs chausses, tellement qu'on la void quelquesfois lors qu'ils marchent. Leurs habillemens sont de fine laine, & de soye, garnis quelquesfois de perles & de pierreries: Leur turban est blanc, excepté de celuy de ceux qui se disent parents de Mahomet, qui le portent verd.

Ils n'ostent pas le turban lors qu'ils veulent saluer quelqu'vn, & luy faire honneur: & chez eux le costé gauche est le plus honorable. Ceux qui sont riches, & qui tiennent quelque rang parmy eux, vont presque ordinairement à cheual. Ils sont sales en leur manger, & n'ont les delices qui sont parmy nous. Ils mangent trois fois le iour, c'est à sçauoir à l'aube du iour, à midy, & au soir. Ils n'vsent nullement de nappe, ny de seruiette, & ne s'assient pas à table sur des escabeaux, ny sur des chaires, mais à terre, ayant les jambes croisees comme nos tailleurs ont quelquesfois, & ils sont en ceste posture autour d'vne table ronde qui est fort basse.

Ils mangent au reste toute sorte de chair, excepté de celle de pourceau, qui est defendue par leur loy. Ils se nourrissent le plus souuent de riz: & les Turcs Asiaticques ne mangent pas volontiers du poisson, mais ceux d'Europe l'ayment beaucoup plus que la chair. Ceux qui sont bons obseruateurs de leur loy s'abstiennent du vin, & ne boient que de l'eau: mais les plus riches y meslent du miel, ou du sucre, & en hyuer ont de coustume d'esteindre dans l'eau vn charbon ardent, afin qu'elle ne leur nuise. D'auantage les Turcs vsent fort de jus de pauot, & il n'y a aucun d'entr'eux qui n'en prenne, afin d'estre plus hardy, & de ne craindre les dangers: Ils s'accroupissent en pissant.

Leurs maisons sont pour la pluspart de bois & de terre, & sont estroictes, & mal basties: & ils tiennent que c'est vn grand peché de bastir des maisons qui durent plus que la vie d'vn homme. Toutesfois ils bastissent de belles Mosques, ou Mesquites, & de beaux Hospitiaux pour receuoir les passans, de mesme que des baings publics, auxquels ils adioustent de tres-belles fontaines, non seulement pour la commodité des hommes, mais encor des bestes, & aussi afin qu'ils ayent des lieux tous prests, & propres pour se lauer auant qu'entrer dans leurs Temples. D'auantage, ils sont fort curieux de faire des aqueducs, & conduits d'eau, & de faire pauer les grands chemins, toutes lesquelles choses sont magnifiques en Turquie.

Ils pourpient tousiours les moyens d'auoir de l'aduantage sur leurs voisins, & ce qu'ils ne peuuent obtenir par force, ils taschent de l'auoir par ruse, & par peradie. Que si leurs entreprises ne réussissent heureusement, ils n'ont point de honte de prendre la fuite. Toutesfois ils sont assez bons soldats, & qui est le meilleur, ils sont soigneux de garder vne bonne discipline Militaire. Ils sont fort obeissans à leurs Chefs, supportent patiemment la peine, & toute sorte d'incommoditez: se cõtencent de peu de viande, & qui ne vaut guere. Ils ont pour leurs armes

des lances, des traits, des masses d'armes, des haches, & des espees, qu'on nomme communément symeterres, où ils n'espargnent le plus souvent l'or ny l'argent pour les enrichir. Ils gardent vn grand silence, & vne grande modestie, non seulement lors qu'ils campent, où qu'ils s'arrestent en quelque lieu : mais encor lors qu'ils font chemin : veu qu'encor qu'ils soient en fort grand nombre, ils partent bien souvent d'un lieu deuant le iour si coyemēt, qu'il y a peu de voisins qui s'en donnent garde. Ils n'vsent point d'enseignes, de guidons, ou d'estendars, ains seulement ils ont vne lance qui a au sommet quelques houpes de diuerses couleurs, par le moyen desquelles chacun se sçait retirer pres de son Capitaine. Ils ont toutesfois des fifres & des tambours pour encourager le soldat.

Tandis quel'Empereur des Turcs est en quelque guerre, les Turcs qui sont dans les villes prient pour les soldats qui sont au camp, tant en leurs festins qu'aux assemblees des Mosques : & prient encore pour ceux qui sont morts en quelque combat, les estimant bien-heureux de n'auoir pas mis fin à leurs iours, parmy les pleurs & gemissemens de leurs femmes. Ils descendent les victoires de leurs ancestres, & les chantent fort volontiers, croyans que ceste façon de faire sert de beaucoup pour animer les soldats, & pour les rendre plus hardis en toutes entreprises.

Ils n'vsent d'aucun sceau ou cachet, soit aux patentes du Roy, soit aux autres lettres, & ne les marquent d'aucune figure. Ils n'ont aucun vsage de cloches, & ne souffrent que les Chrestiens qui demeurent en leurs terres en ayent, ils quittent leurs souliers lors qu'ils veulent entrer aux Mosques, & les reprennent lors qu'ils en sortent.

En quelque lieu qu'ils s'assissent, soit en leurs maisons, soit aux Mosques, ils y ont des tapis velus, ou de nattes de jonc, & il y a d'autres endroicts qu'ils font plancher de bois, pource qu'ils sont trop bas, ou bien sales & bourbeux. Ils ne sont trop addonnez à la contemplation, ny à l'estude des lettres. Ils ont toutesfois de belles & grandes escoles, où l'on lit les loix publiques par leurs Princes, & les enfans y sont instruits, afin de sernir aux Mosques, & d'estre capables de gouverner la chose publique.

Les Turques ne se trouuent iamais en lieu où les hommes sont assemblez, & il leur est encores fort estroictement deffendu d'aller au marché, de vendre, & d'achepter en sorte quelconque : & en la grand Mosquee elles ont vne place du tout esloignée de celles des hommes, tellement close, que personne ne peut les voir, & moins y auoir entree. C'est chose rare de voir vn homme qui parle à vne femme en public, que si vous demeuriez vn an parmy eux, à peine le pourriez-vous voir vne seule fois. Ceux qui sont mariez ne se jouent iamais tant soit peu avec leurs femmes en presence des autres, & les maris tiennent tousiours leur reputation pres de leurs femmes, qui leur portent d'autre part beaucoup d'honneur.

Les grands Seigneurs qui ne peuuent estre continuellement avec leurs femmes, les laissent sous la charge de certains Eunuques, qui les gardent tellement, qu'il est impossible qu'autre que leurs maris les entretiennent, & qu'elles fassent tort à leur honneur.

RICHESSE.

L'EMPIRE du Turc comprend des païs qui sont abondans en toutes choses : car y a-il païs plus riche de froment, & de toute sorte de grains, que l'Egypte, l'Afrique, la Surie, & l'Asie, ny qui rapporte plus de toutes sortes de chose que la Hongrie, la Grece, & la Thrace ? En tous ces païs il y a des villes, dont la richesse est inestimable, c'est à sçauoir, Constantinople, le Caire, & Alep, & plusieurs autres. Constantinople est vne ville où les marchands abordent de toutes parts, & où presque tout l'argent de l'Empire du Turc vient à fondre. Alep est la plus grande ville de Surie, & comme le centre où tout le trafic de l'Asie se reduit, & se vient rendre. Le Caire est comme le magazin, non seulement des richesses de l'Egypte, & d'une bonne partie de l'Afrique, mais encor des Indes, & ses thresors conduits de ça par la mer rouge, & apres des chameaux sont distribuez aux païs bordez de la mer Mediterranee.

Quant aux reuenus du grand Turc, il y en a quelques-vns qui tiennent qu'il n'a que huit millions d'or de reuenu ordinaire, disent qu'encore qu'il semble qu'il doive tirer beaucoup plus, de tant de terres, toutesfois cela n'arriue pas, pource que les Turcs n'ont soucy que des armes, qui sont de leur nature plus propres de ruiner, & à destruire, qu'à conseruer & enrichir les païs : & les Turcs pour entretenir leurs armes, & continuer leur entreprises, consomment les peuples en telle sorte, qu'ils leur laissent à grand peine ce qui leur est necessaire pour leur entretien. A raison dequoy les sujets desesperez de pouuoir iouir, non seulement des richesses : mais des commoditez qu'ils pourroient pourchasser avec leur travail, & leur industrie, ne s'employent au labourage, ny au trafic, sinon entant que la necessité les presse, & les force de s'y ranger : car que sert-il de semer ce qu'un autre doit recueillir ? ou de recueillir ce qu'un autre doit

doit consumer ? C'est pourquoy dans l'Estat des Ottomans l'on void de grandes forests , & de grands pais deserts. Au pais de par deça , la cherté procede de la multitude du peuple : mais elle prouient en Torquie du deffaut des hommes qui travaillent , pource que les villageois & payfans meurent pour la plus grande partie, ou aux voyages qu'ils font , conduisant les viures , & les autres choses necessaires pour les armées : car de dix mille hommes qu'on tire de leurs maisons pour ramener, il n'en retourne pas ordinairement la quatriesme partie , à cause des incommoditez du changement d'air, & du grand travail : & ce d'autant plus que les Turcs desarment tous les Hyuers , à raison dequoy ceux qui sont employez pour ramer , ne sont iamais bien accoustumez à la mer & à la peine.

D'autre part, le commerce & le trafic est presque tout entre les mains des Iuifs, ou des Chrestiens d'Europe , tels que sont les Ragousois, les Venitiens , les François & les Anglois : & en vn si grand pais qu'ils possèdent en Europe , ils n'ont point d'autres villes de grand trafic que Constantinople, Caffé, & Salonique, ou Thessalonique : en Asie Alep, Damas, Tripoly , & Aden : & en Affrique le Caire, Alexandrie, & Alger. Pour conclusion tout le mal vient de l'abandonnement de l'agriculture, qui est le fondement des reuenus. C'est elle qui fournit de la matiere aux arts, & les arts la fournissent à la marchandise : & lors que le labourage faut, tout manque.

Mais encor que les reuenus ordinaires ne se montent, selon ceux-là, qu'à ce que j'ay dit (veu que selon quelques autres ils vont iusqu'à quinze millions) toutesfois il faut aussi faire grand estat des extraordinaires, & principalement des confiscations, & des presens : car les Bassas, & les autres Officiers de ceste Couronne, qui succent le sang des sujets du Turc, assemblent des thresors inestimables, qui viennent en fin pour la pluspart entre les mains du grand Seigneur. On tient qu'Abraham Bassa emporta hors du Caire la valeur de plus de six millions : Mehemet Visir en auoit encor plus grande somme : Occhiali, outre les autres richesses auoit cinq mil esclaves. La Sultane, sœur de Selim II. auoit 2500. sequins de rente tous les iours, & estoit si riche, qu'elle commença vn Aqueduc, qui deuoit aller du Caire à la Mecque, pour la commodité des Pelerins, qui estoit vne entreprise d'vn grand Prince, & vn ouurage infiny, par maniere de dire. D'ailleurs le grand Seigneur, peut aisément trouuer des sujets d'oster les biens, & la vie à qui bon luy semble. Apres cela les presens se montent à de grandes sommes, veu qu'aucun Ambassadeur ne se peut presenter deuant luy sans presens, & il n'y a personne qui puisse esperer vn office, vne dignité, ou quelque charge d'importance, qu'avec de l'argent : & nul ne retourne d'vne province, dont il a eu le Gouvernement, ou d'vne entreprise acheuee qui s'oste presenter deuant le Turc les mains vuides : & l'on sçait assez qu'il ne faut offrir des choses de petit prix à vn si grand Seigneur. Les Vayuodes de Moldaue, de Valaquie, & de Transiluanie, se maintiennent en leurs Principautez à force de presens qu'ils luy font, & ceux de Valaquie, & de Moldaue, se changent tous les iours, pource qu'on donne ces dignitez à celuy qui offre d'auantage, & pour pouoir bailler ce qu'on a promis : on destruit le pais, & l'on cōsume le peuple. Mais avec tout cela, l'on a veu que les guerres de Persé ont espuisé les coffres, & contumé les richesses du Turc, pource que d'vne part, tant à Constantinople, que par tout l'Empire, la valeur de l'or augmenta de beaucoup durant quelque temps, tellement qu'vn escu valoit au double de ce qu'il auoit accoustumé de valoir : & les carats, & l'alloy de l'or & de l'argent, se haussā de telle sorte, que cela donna sujet aux Janissaires de mettre le feu à Constantinople, & d'espouenter non seulement les autres, mais encores le grand Seigneur : & en Alep on demanda au nom du Prince vn emprunt de 60000. escus aux marchands. Voila ce que l'on peut dire de ses richesses, veu que pour le regard des Timars i'en reserue le discours à celuy des forces.

F O R C E.

LEs forces du grand Seigneur consistent en l'argent, en la cavalerie, infanterie, flottes & munitions. Pour le regard de l'argent, nous en auons desia parlé cy-dessus. Mais quoy que nous auons dit que ces reuenus ne sont pas si grands que l'estendue de ses pais le semble requierir, toutesfois il a de ses Estats vn profit qui est de plus grande importance que ses reuenus. Ce profit n'est autre chose que le grand nombre de ses Timars : car les Empeieurs des Turcs se rendent immediatement maistres de tous les fonds qu'ils acquierent avec les armes, & en laissent ce qu'il leur plait à ceux du pais (qui n'en ont iamais que bien peu) diuiser le reste en Timars, qui sont comme des Commanderies, qu'ils donnent aux soldats qui leur ont fait de bons seruites, à condition toutesfois qu'ils entretiendront tant de cheuaux tous prests pour la guerre. Ceste façon de faire a esté vn des meilleurs ordres qu'ils ayent tenu pour la cōseruation de leur Empire : pour ce que si les gens de guerre n'estoient interessez aux terres pour le profit qu'ils en reurent, tout seroit desia ruiné : car les Turcs mesmes ont de coustume de dire, qu'il

ne croist plus d'herbe au lieu où le cheval du grand Seigneur met le pied. Ces Timars entretiennent environ cent cinquante mille chevaux, tous prests & en point pour marcher au premier commandement qui leur en est fait, sans que le Prince débourse vn seul denier pour cét effect, & toutesfois ce nombre de gens de cheval ne peut estre entretenu pour guiere moins de quatorze millions d'or. A raison de quoy ie m'estonne de quelques-vns, qui faisant comparaison des reuenus du Seigneur avec ceux des Princes Chrestiens, ne font aucune mention d'une si grande partie de la richesse des Ottomans. Et de fait, en la guerre que le Turc fit aux Perses, il y a vingt ou trente ans, il conquist vn si grád pais, qu'il fit quatre mille Timars. Cét établissement de Timars, & l'ellire des Azamglians, ou ieunes gens qu'on esleue & prend pour estre Janissaires, sont les deux fondemens de l'Empire Turquesque, & semblent instituez à l'imitation des Romains: car les Empereurs Romains se seruoient mesme pour la guerre de leurs sujets, dont l'armee Pretorienne, qui ne s'esloignoit iamais de la personne de l'Empereur, estoit composee: & Tacite monstre que l'ellire qu'on faisoit des ieunes gens pour cét effect, occasionna la reuolte des Flamans. Au mesme Empire Romain, il y auoit des Timars donnez par vsufruit aux gens de guerre durant leur vie, & pour recompense des seruices qu'ils auoient rendus. Alexandre Seuerus oütroya aux heritiers des soldats de pouuoir iouir de ces prouisions, pourueu qu'ils allassent à la guerre, & non autrement. Constantin le Grand donna à ses Capitaines qu'il recognoissoit auoir bien fait, les terres, qui iusques alors auoient seulement esté donnees pour en iouir durant la vie: & mesme en France les Fiefs qui n'estoient que pour certain temps, sont deuenus perpetuels sous quelques-vns de nos Roys, qui voulurent contenter ceux qui leur pouuoient donner des affaires.

Mais pour paruenir à nostre propos, ceste caualerie Turquesque fait deux effects importants, dont l'vn est, qu'elle tient en bride les sujets du Turc, en telle sorte qu'ils ne se peuuent si tost remuer, que ces gens de cheval ne soient sur eux, & pour ceste cause ils sont diuisez par tout en cét Estat: l'autre, qu'une partie de ceste Caualerie est tousiours en point pour les entreprises qui suruiennent. Ainsi elle sert comme de garnison, & de souldien de l'Estat, pour empêcher les seditions, & de nerf principal pour la guerre. Outre ceste caualerie, le Turc entretient vn bon nombre de gens de cheval payez prez de sa personne, & ceux-cy sont diuisez en Spahes, Vlufages, & Caripices, qui sont comme les pepinieres des principaux Officiers de l'Empire, veu que c'est de là qu'on tire ordinairement les Bassas, les Beglierbeys, & les Sangiacs. Outre ceux-cy, l'on compte encores les Alcanzes: & de plus, ceux qui viennent seruir le Turc de Tartarie, Valaquie, & Moldaue.

L'autre partie des forces est l'infanterie, qui consiste aux Janissaires, auxquels on considere deux choses, à sçauoir la nation, & la disposition au maniement des armes. Quant à la nation, on ne reçoit point ordinairement au roole des Janissaires les hommes d'Asie, mais ceux d'Europe: pour ce que les Turcs tiennent les premiers peuples pour mols, & lasches, comme en effect ils ont tousiours esté plus prests à fuir, qu'à mesler les mains. Au contraire les peuples d'Europe ont tousiours eu la reputation de guerriers, & de gens de courage: tellement qu'en Leuant les soldats Asiatiques du Turc portent le nom de Turcs, mais les Europeens sont nommez Rumi, c'est à dire Romains. Quant à la disposition, on prend les enfans, auxquels l'on void de plus grands indices de force, d'agilité & de courage, qui sont les trois parties requises en vn soldat. On enuoye faire ceste recherche vne fois au bout de trois ans, si ce n'est que la necessité conuie de la faire plus souuent. Ces enfans estant menez à Constantinople, sont visitez par l'Aga, qui fait perdre le nom de l'enfant, & la cognoissance de ses pere & mere, & mesme de sa patrie. Apres cela, l'on en mande partie en Natolie, & partie aux autres Prouinces, où apprenant la langue, la loy, les vices, & façons de faire de ceux avec lesquels ils frequentent, ils deuiennent Mahometans, & l'on en distribue vne partie par les Serrails du Grand Seigneur, qui sont à Constantinople, & à Pere, & les plus beaux de visage, & plus dispos de leur personne sont pour le Serrail particulier de ce Prince. Or tandis qu'ils portent le nom d'Azamoglians, ils n'ont point de chef certain, & ne s'occupent en des exercices qui leur soient determinez: mais les vns sont employez aux iardins, les autres aux bastimens, les autres aux seruices domestiques, & choses semblables. Au bout de certain temps ils sont appelez au Serrail des Azamoglians (ils se nomment ainsi, iusques à ce qu'ils viennent à estre Janissaires) sous leurs chefs. Ceux-cy les employent à diuers exercices manuels, & penibles, & avec tout cela ils sont mal nourris, & mal vestus: ils dorment en des lieux fort grands, & semblables aux dortoirs des Religieux, avec de la lumiere, & des gardes, sans la licence desquels ils ne peuuent bouger de là. Ils apprennent apres à tirer de l'arc, & de l'harquebuz, & ayans acquis quelque habitude, & pratique en cela, ils sont faitz Janissaires, ou Spahes, & ceux-là ne tirent moins de cinq, ny plus de huit aspres: & ceux-cy en tirent dix. Apres qu'ils sont Janissaires, ils vont à la guerre, ou en garnison, ou demeurent à la Porte, ou Cour du grand Turc, & ces derniers ont pour leur habitation

habitation trois lieux qui sont grands comme des Monasteres. Ils vivent là sous leurs chefs. Les ieunes seruent les plus vieux à faire la despence, & à cuisiner, & choses sèblables, avec grãd respect & grand silence: & ceux d'une mesme troupe, ou esquadre, vivent ensemble à vne table, & dorment en certaines salles fort longues: & si par hazard quelqu'un demouroit vne nuit dehors sans congé, le soir d'après il auroit force coups de baston: & la discipline y est si grande qu'après que quelqu'un a esté battu, il va baiser les mains à son chef. Ils ont plusieurs privileges, sont respectez nonobstant leur insolence, & craints de chacun. En leurs voyages ils saccagent les maisons des Chrestiens, sans qu'on s'en puisse reuancher seulemēt de parole: en achetant ils font le prix des choses à leur plaisir: ils ne peuuent estre iugez que par l'Aga, & ne sont punis de mort sans vn grand danger d'esmeute: à raison dequoy on les fait mourir peu souuēt par iustice, & mesmes ils sont executez fort secrettement. Ils ont mille presens des vns & des autres, veu qu'on en donne quelques vns aux Ambassadeurs pour leur seruir de garde: & d'autres aux voyageurs de qualité, & semblables personnes qui veulent marcher en assurance par l'Estat du Turc. L'election du Prince est entre leurs mains, pource qu'on ne peut dire qu'elle soit faicte, s'ils ne l'approuuent, & tous les Empereurs nouuellement receus leur donnent quelque chose, & leur augmentēt leur pays. Lors qu'il arrive quelque grosse guerre, vne partie des Janissaires y va sous la conduite de l'Aga, ou de son Lieutenant. Le nombre des Janissaires est de quatorze mil hommes. Ces gens de guerre se sont abastardis de nostre temps, premieremēt pource que les Turcs, mesme d'Asie, sont faits Janissaires, au lieu qu'auparauant on ne receuoit en ce nombre que des Chrestiens d'Europe: d'auantage, pource qu'ils se marient contre l'ancienne coustume, & sans doute la longue demeure qu'ils ont faite à Constantinople, qui est vne des plus delicieuses ville du monde, les a ramollis & rendus insupportables. On tient communément que le nerf des forces du Turc consiste en ses Janissaires, outre lesquels il y a des Asapés, qui sont gens de pied de peu d'effect, & qui seruent plus avec le pic, & la pale, qu'avec l'espee: & sont plus propres pour lasser les ennemis avec le nombre, que pour les vaincre avec la valeur. Ce sont ces derniers qui ont de coustume de remplir les foïsez de corps morts, & de faire eschelle aux Janissaires pour monter sur la muraille de leurs ennemis.

Quant aux forces maritimes, premierement il n'y a Prince qui aye plus grande commodité de faire des armes de mer que le Turc: car les forests d'Albanie, & de Caramanie: mais sur tout celles de Nicomedie, & de Trebisonde, sont si grandes, si espaisles, & pleines d'arbres propres pour faire des vaisseaux de toutes sortes, qu'il semble, par maniere de dire, que les galeres tombent toutes faictes de ce bois dans le golphe de Nicomedie, & dans la mer Noire. Il n'a pas aussi faute de gens entendus pour mettre ce bois en œuvre, pource que l'auarice meine meime en ses Arsenaux des charpentiers Chrestiens, tellement que l'année d'après la perte qu'il fit à Lepante, il mit sur la mer vne armee qui eut le courage de tenir ferme deuant la Chrestienne. Il a pareillement vn assez grand nombre de gens experimentez en mer, à cause des galeres qu'il tient en garde à Metelin, à Rhodes, en Chypre, en Alexandrie, & pour la retraicte qu'il donne aux Corsaires à Tunes, à Bone, à Bugie, & en Alger, d'où il tire au besoing des chefs, & est le nerf de ses mariniers. On a veu ce qu'il pouuoit faire tant aux armees qu'il a eues à Malte, au Curfolaires, qu'à Lepante, & à la Goulette.

Dauantage, il a force munition de guerre, & vn grand nombre de canons. Il en tira de Hongrie cinq mille pieces, en gaigna plus de 500. en Chypre, & presque autant à la Goulette. Les Turcs ont des pieces d'artilleries si grandes & grosses, que le seul vent, sans parler du coup, esbranle les murailles. Ils ont fort grande prouision de poudre & de balles, comme ils monstrent à Malte où ils tirerent plus de soixante mille balles de fer, à Famagouste où l'on en conta dix-huict mille, & à la Goulette où en trente neuf iours ils esplanerēt, & abbatirēt à coups de canon toutes les fortifications que les nostres auoiet faictes en 40. ans. Or aux lieux où ils ne font iouer l'artillerie, ils employent le noyau, & où cestuy cy n'a lieu, ils remplissent les foïsez de terre, & si cecy ne suffit, ils les combrent des corps de leurs soldats.

Les Turcs ont trois choses qui espouuantent, c'est à sçauoir vn nombre infiny d'hommes, vne grande discipline, & force munition. La multitude caule naturellement la confusion à raison de quoy bien souuent les grandes armees ont esté vaincues par les petites: mais la multitude des armees Turquesques garde vn si bon ordre, que mesme par ce moyē elle vaine le plus petit nombre des ennemis qu'on peut ordonner plus aisément. De sorte qu'ils surmontent les autres en art & en nombre, & leur discipline est si bonne, qu'ils ne cedent en ceste partie aux Romains mesmes. Elle consiste en beaucoup de choses, à sçauoir, en la distribution des viures, veu qu'ils vivent d'un peu de pain cuit sous la cendre, & de ris avec de la poudre de chair sechee au soleil, & le vin leur est defendu comme il fut aux Carthaginois. Au camp chaque dizaine de Turcs a son chef, auquel ils obeissent sans repliche. On ne void point de femmes en leurs armees. Ils gardent vn merueilleux silence, & tant de soldats sont gouuernez par les signes qu'on

leur fait de la main & de l'œil sans parler, & mesmes ils laissent quelquesfois sauuer les prisonniers pour ne faire point de bruit la nuit. Ils punissent sur toutes choses les querelles & les larcins. Quand ils marchent ils n'oseroient entrer dans les champs semez, ny dans les vignes. Les vaillans sont asseurez de la recompence, & les lâches du chastiment. Ils ne logent iamais dans les villes, & l'on ne leur permet nullement d'y aller coucher. Apres cela les Ottomans ont de coustume de faire tousiours la guerre en quelque lieu pour les tenir en exercice. Mais c'est peu de chose que la discipline despourueüe d'armes, & d'autres choses necessaires à la guerre, pour ce qu'un Geant nud, pour fort & puissant qu'il soit, sera vaincu par un enfant bien armé, par maniere de dire. Mais le Turc marche à la guerre avecques un si grand appareil de machines & d'instrumens necessaires, qu'il semble ne faire estat d'autre chose, comme l'on peut voir aux ruines qu'il laisse en tous lieux qu'il attaque.

Il confine avec le Persan du Levant, le long d'une ligne qu'il faut tirer imaginaiement depuis Tuaris iusqu'à la Balzere. Il fait la guerre veritablement au Sophi avec auantage, à cause de l'infanterie qui manque à ce Roy, & de l'artillerie, & des munitions semblablement. Que si les Persans ont vaincu quelquesfois les Turcs en campagne, ils ont tousiours perdu beaucoup de pays, iusques à ce temps, qu'ils ont commencé de se remettre. Soliman leur osta la Diarbeque, Amurat la Medie, & non seulement ils ont receu de grandes pertes, mais encores leurs amis: veu que Selim I. despoüilla de l'Empire d'Egypte & de Surie les Mammelus: & Amurat III. ruina presque entierement les Georgiens confederez avec le Sophi.

Il fait la guerre avec les Portugais qui le confinent du Midy par la mer rouge avec grand desauantage, pour ce que tout ce qu'ils ont à demeller se doit debattre avecque des forces navales: en quoy les Portugais ont autant d'aduantage sur luy, que l'Ocean Indique en a sur le Golphe Persique, ou sur la mer Rouge: car ils ont aux Indes des places & des ports, & mesme des Estats, & des Seigneuries, où ils trouuent du bois, des viures & tous appareils pour la mer en abondance, & mesme ils n'ont pas faute de Princes qui les assistent. Au contraire le Turc n'a autre place d'importance au Golphe Persique, que la Balzere. La coste d'Arabie, dont il se pouoit seruir, n'a que quatre places assez foibles, & avec cela il luy est mal aisé d'armer, tant en ce lieu qu'en la mer Rouge, pour ce que le pays manque presque entierement de propre à faire des vaisseaux.

C'est pourquoy lors qu'il a voulu armer sur la mer Rouge, veu qu'il le peut encores moins au Golphe Persique, il a esté contraint de faire conduire de la matiere des ports de Bithinie, & de Caramanie, par le Nil iusques au Caire, d'où les chameaux la portent apres à Suez, où il y a un Arsenal. Mais toutes les fois qu'il a entrepris quelque chose contre les Portugais, il n'en a rapporté que de la honte, & du dommage, comme il aduint l'an 1538. à Diu, & l'an 1552. en l'Isle d'Ormus, & l'an 1580. à Mombozze, où les Portugais prirent quatre galeres, & une galiotte du Turc, qui pensoient s'arrester en ces mers sous la faueur de ce Roy.

Il confine du Midy par la mer Rouge avec le Prete-lan, ou le grand Negus, & sans doute il a de l'aduantage sur luy, tant pour le regard des Capitaines, & des soldats, que des armes & des munitions: car c'est chose certaine que ce Prince a ses Estats despourueus de fortes places, & de gens de guerre sans armes. A raison dequoy le Prince de Beruagas, qui estoit son Lieutenant du costé de la mer Rouge, perdit toute ceste coste de mer, & fut reduit à payer tribut au Turc pour auoir paix.

Il a bien plus de pays en Afrique, que le Serif, pour ce qu'il occupe tout ce qui est entre la mer Rouge, Velez de la Gomere: combié que celui que le Serif tient soit plus fertile, plus riche, plus vny, & plus fort, mais ils ne s'entreont la guerre, à cause du voisinage du Roy d'Espagne.

Il nous resté maintenant de voir les Princes Chrestiens qui confinent avec luy. Le premier est le Roy de Pologne on a veu ce que ces deux Princes peuuent l'un contre l'autre aux entreprises passees. D'un costé il semble que le Turc estime & redoute presque les Polonois, d'autant qu'ayant eu subiect de leur faire la guerre plusieurs fois, comme sous le Roy Henry de Pologne, durant la guerre que Iean de Vayuode de Moldanie eust contre les Turcs, ou plusieurs Polonois combattoient contre eux, & sous Sigismond troisieme, aux courses de Colâques, & au remuement de Iean Siamoschi General du Royaume, il n'a point monstré de resentment avec son orgueil ordinaire, & n'a tasché de se venger des outrages qu'on luy a faits.

Dauantage, les Polonois non seulement n'ont rien entrepris outre le Turc depuis Ladislas, mais mesme n'ont pas secouru les Moldaues & Valaques leurs alliez, & se sont laissé oster ce qu'ils tenoient sur la mer Majeur, ou le Pont Euxin, bien que cela soit plustost venu du defect du courage de leurs Roys, que de celui de la noblesse Elienne Battoi, bien que vaillant & courageux Prince, tenoit pour une entreprise fort dangereuse de venir aux mains avec les Turcs, & toutesfois discourant avec ses familiers, il monstroient qu'avec trente mille hommes de pied ioinct à la cavalerie de son Royaume, il entreprendroit une guerre contre luy: & desait en auoit quelque dessein,

Les

Les Princes d'Austriche confinent avec les Turcs plus que tous les autres du costé du Nord. Ce qui est cause qu'ils despensent beaucoup en garnisons de leurs fortresses, où ils entretiennent plus de vingt mille hommes, partie à cheval, & partie à pied, & avec le secours d'Allemagne joinct à leurs forces particulieres, ils ont esté plus attentifs à deffendre & à garder, qu'à conquies-ter le leur, ou estendre leur Seigneurie, & Ferdinand tanta l'entreprise de Cude, & de Possé-que, avec plus de valeur que de fortune. Il est vray que cela ne procedoit pas de la foiblesse des hommes, mais du deffaut de l'agilité, & de l'adresse. Je veux dire que les armées de ce Prince estoient assez grandes & fournies de toutes choses necessaires, mais elles estoient composées d'Allemands, & de Bohemois, Qui sont lents tardifs & peu propres à debattre quelque chose contre les Turcs qui sont agiles, & adroits aux factions militaires.

Les Venitiens confinent encores avec le Turc par mer & par terre l'espace de plusieurs centaines de milles, & se maintiennent contre luy, en fortifiant au possible leurs places, en se pourvoyant de bled à temps par le moyen du negoce, & en se portant vaillamment aux occasions qui se sont offertes, tant pour le bien de leurs Estats, que de la Chrestienté.

Quant au Roy d'Espagne qui le confine pareillement, il n'y a pas grande difference entre ses forces, & celles des Ottomans; car quant à l'argent on peut assez voir au discours de ce monarque qu'il ne cede rien au Turc, quoy que l'on y adiouste la valeur des Timars, en mettant toutesfois d'autre part en conte ceux qui sont obligez de le servir à leurs despens en ses Royaumes. Davantage la cavalerie que le Turc entretient par le moyen des Timars, n'est pas si redoutable pour la valeur, que pour le nombre, pource que les Timariots sont ramolis, & rendus lascies pour la commodité des villages, & des lieux qui leur ont esté assignez: & le desir de s'enrichir des fruits de leurs terres, & d'esparner quelque chose, leur fait plustost desirer la paix que la guerre: tellement qu'ils quittent peu volontiers leurs maisons, & vont aux entreprises avec plus de desir de s'en retourner iouyr de leurs delices, que de combattre. Que si vn peu de butin acquis avecques les armes en main rend vn soldat moins desireux de la guerre ou du combat, que fera vne possession de beaucoup de biens accompagnée de femme, & d'enfans que l'on laisse au logis.

D'ailleurs, il est certain que ceste Cavalerie entretenue par le moyen des Timars, a plustost esté instituee pour tenir en bride les peuples subiuguez, que pour aller à la guerre contre ses ennemis: car les subiects du Turc luy obeissent par force, & le hayssent au possible, tant à cause de la Religion, que de sa façon de dominer. Les Arabes, & les Mores luy veulent mal à cause de la diuersité de leurs sectes, & les Chrestiens qui sont plus de deux tiers de son Empire, le detestent, tant à cause de sa Religion, que de la maniere de sa domination: de sorte, que la plus grande partie de ceste Cavalerie demeure employée en ses maisons, ne se pouvant bouger sans danger de l'Estat. Davantage, elle est diuisee par vn si grand espace de pays, & tellement esparlée deçà delà, qu'il n'en peut aller guieres grand nombre à vne entreprise, ny s'entretenir long temps aux armées sans tomber en necessité, si elle n'a autre ayde que celle des Timars.

L'experience des choses passées nous a monstré que leurs forces sont pareilles, pource qu'on oppose la fuite de l'armée Turquesque deuant Malte, à la perte de l'armée du Roy d'Espagne en l'Isle d'Alzerbe, à la perte du Pignon de Velez à la perte de la Goulette. Ces deux Princes ont esté esgalement empeschez l'vn en Perse, l'autre au Pays bas, qui a esté cause qu'ils n'ot peu se faire la guerre l'vn à l'autre avec de grandes forces. Les susdites guerres ont esté d'extreme despense à ces deux Princes, à cause que les pays se sont trouvez esloignez, mais elles ont plus cousté au Roy d'Espagne qu'au Turc, pource que encor que la Perse soit esloignée de Constantinople, d'où la pluspart des forces parroit, toutesfois elle confine avec la Diabèque, & quelques autres de ses Estats à raison dequoy l'armée estoit aisément pourueue d'argent & de viures, au lieu que les Pays bas sont diuisez d'vn grand espace des autres Estats de ce Roy. On peut adiouster à cecy d'autres considerations, que le desir de briefueté me fait passer sous silence.

GOVERNEMENT.

LE Gouvernement des Ottomans est absolu, pource que le grand Turc est tellement maître de tout ce qui se trouve dans les Estats, que les habitans le nomment ses esclaves, & il n'y a aucun qui se puisse dire maître. Je ne diray pas de la maison où il se tiét, ny des terres qu'il cultiue, mais encor de soy-mesme, excepté quelques familles qui furent priuilegiées par Mahomet II. à Constantinople: & il n'y a si grand personnage en Turquie qui se puisse atteuer, ie ne diray pas de l'estat auquel il se trouue, mais mesme de la vie, si ce n'est par grace du grand Seigneur. Il maintient ceste Seigneurie absolue par deux moyens, l'vn est qu'il oste entierement les armes à ses subiects: l'autre qu'il met toute chose entre les mains de ceux qui ont renié la re-

ligion Chrestienne, & qui ont esté emmenez par voyes de desmes de ses Estats en leur enfance. Par ces deux voyes il ioiut de deux biens : l'un est qu'il priue les provinces de la fleur & du nerf de leurs hommes, pource qu'on choisit les ieunes enfans plus robustes, & plus propres aux armes : l'autre que par ceux-la mesmes il s'arme, & s'assure luy mesme.

Le premier siege des Empereurs Turcs a esté à Burse, ou Prese ville de Bithynie, & fut apres transporté à Andrinople, & depuis à Constantinople, où il est encor. Cét Empereur a pour la garde environ 4000. Janissaires, dont le Colonel est nommé Aga, & outre ceux-cy il y a 1500. hommes de cheval qui reçoivent paye du grand Seigneur, & sont diuisez en Spacheglians, Vlofages, Silistaires, & Caripices, outre les gens de cheval qui sont sous les Beglierbeis. Ceux-cy sont tous payez de la Casne, ou de l'espargne du grād Seigneur. Outre ceux cy le Turc a dix mil autres Janissaires espars par tout son Empire, qui sont soldoyez semblablement, & les Capitaines de ceux cy ne recognoissent autre Supérieur que le grand Seigneur. Il y a encore les Timariots dont nous auōs parlé au discours des forces de ce Prince. Tous ceux-cy obeissent aux Sangiacs, & les Sangiacs aux Beglierbeys.

La Cour du Turc est vulgairement nommee Capy, c'est à dire porte, où il y a plusieurs offices, dont le denombrement seroit ennuyeux. Il y a des offices dans le grand Serail pour le service du Prince, & ceux cy sont exercés par des Eunuques, qui ont sous eux d'autres hommes chastrez. Hors du Serail il y a plusieurs offices pour le gouvernement de l'Empire, dont le premier est celuy du Mufti, qui est l'interprete de l'Alcoran. Il y a apres cestuy cy les Cadilesquers, qui sont souverains Iuges de toutes causes, & comme Patriarches, deuant lesquels on interiette les Appellatiōs. Il n'y en auoit autres fois que deux en tout cet Empire, dont le premier estoit de Rumelie, c'est à dire Romanie, ou d'Europe, & l'autre de Natolie. Mais Selim I. y en adiousta vn troisieme qui iuge en Egypte, Syrie, Arabie, & Armenie. Ces Cadilesquers ont autorité sur les autres Cadis, qui sont les Iuges particuliers des provinces. Apres les Cadilesquers sont les Visirs Bassas, qui sont Contailleurs du grand Seigneur, & le nombre de ceux-cy est incertain. Il n'y en auoit iadis que trois ou quatre, mais il sont à present au nombre de neuf, entre lesquels est le grand Vizir, que les Turcs nomment Vezirazem, qui gouverne tout seul l'Empire avec vne grande puissance, & l'Empereur prend ordinairement conseil de luy aux affaires d'importance.

Ceux qui ont beaucoup de puissance apres ceux-cy sont les trois Beglierbeis, qui sont comme Generaux d'armees. Le 1. est Beglierbey de Romelie qui a authorité sur toute la Romanie ou Grece. Le 2. est Beglierbey de Natolie ou de toute l'Asie : & le 3. s'appelle Demzi Beglierbey, c'est à dire General de la mer : & ceux cy ont mesme rang & seance que les Visirs Bassas au Diuan, ou en l'Auditoire public où plusieurs autres officiers s'assient.

Les Prouinces subiectes à l'Empire du Turc sont diuisees en plusieurs Sangiacs, qui estoient iadis au nombre de 720. mais depuis la guerre des Perles ils furent beaucoup augmentez de nombre. Ceux cy sont Gouverneurs des Prouinces, & ont au dessus d'eux des Beglierbeys ou Bassas dont il y en a six en Europe, c'est à sçauoir le Bassa de Romelie, ou de Grece, le Demzi ou Capitaine de la mer, le Bassa de Bude, ceux de Thesmiuar, de Bone, & de Caffé. Il y en a quatre en Afrique, à sçauoir d'Alger, de Tunes, de Tripoly, & de Missir, qui est estably sur le Caire, & sur toute l'Egypte. Il y en a en Asie vingt neuf, à sçauoir de Natolie, Caramense, Siuas, Tocat, Dulgariid, Halep, Scham, Tripoly de Surie, Maras, Diarbeque, Bagadet, ou Babylone, Bassere, Caramanie, ou Laxeï Gemen ou Aden de l'Arabie Heureuse, Chebeiz de Chipre, Sheherezul en Assirie, Vvan aux frontieres de Perse, Arzerum en la haute Armenie, Testis aux frontieres du Gurgistan. Fasse en Mingrelie, Sochun aux confins du Gurgistan, Batin, la mesme Reuan & Somaquie, comme on peut voir en Leonclaius.

Il y a quatre Arsenaux du Turc. L'un est à Pere, qui a 133. loges dediees à autant de galeres. Le second est à Gallipoli, de 20. loges, & le Capitaine ou General de la mer a la charge de ces deux-cy, avec quelques vns de ses Sangiacs. Le troisieme est à Suez pres de la mer Rouge : où il y a 25. Loges. Le dernier est à la Balzere sur le golphe Persique, qui contient 15. galeres, & ces deux sont sous la charge de Beglierbeis de la Balzere & du Caire.

Les Turcs ont ceste coustume apres qu'ils se sont emparez de quelques provinces d'en exterminer toute la noblesse, principalement ceux qui sont du sang Royal : & quant aux familles riches & puissantes, ils les transportent en d'autres lieux accoustumez à leur domination. Toutesfois ils permettent à chacun de suivre la religion que bon luy semble, & ne contraignent aucun de la renier : mais ils ne permettent à leurs subiects de combattre, & d'aller à la guerre sous vn autre Prince.

RELIGION.

RELIGION.

MAHOMET fils d'Abdala Idolatre de la race d'Ismael, & d'Hennine Juifue tous deux 54
d'assez basse condition, naquit l'an 562. Ainsi qu'il fut des-jà grand, les Arabes Scenites
accoustumez à faire des courses & à piller, le prirent & vendirent à vn marchand de Perse, qui
le cognoissant propre au negoce l'affectionna, & en fit tant d'estat, qu'après la mort de son mai-
stre il espousa la veufue. Estant ainsi riche il esleua son esprit plus haut, & se servit du temps, qui
estoit fort propre pour remuer. Les Arabes estoient lors mal-satisfaits de l'Empereur Hera-
clius. Les heresies d'Arrius & de Nestorius auoient miserablement deschié l'Eglise, les Juifs
faisoient vn grand nombre. Les Sarrazins estoient puissans, & l'Empire Romain estoit plain
d'esclaves. Mahomet voyant ceste occasion forma vne loy ou tous eurent quelque part. Il fut
aydé en cecy de deux Juifs Apostats, & deux heretiques dont l'vn Iean de la secte de Nestorius,
& l'autre Sergius de celle d'Arrius. A raison dequoy le principal but de ceste loy fut de renuer-
ser la diuinité de Iesus-Christ, combattue malheureusement par les Juifs, & par les Arriens. Il
persuada en premier lieu faisant entendre à sa femme, & par son moyen à ses voisins, que l'An-
ge Gabriel parloit à luy, tellement qu'il attribuoit le mal caduc dont il estoit atteint à la splen-
deur de cet Ange qui l'abbatoit à terre: puis il l'estendit en permettant tout ce qui agree au sens
& à la chair, & en offrant liberté aux esclaves qui receuroient sa loy. De sorte qu'estant pour-
suiuy par les maistres des esclaves qui s'estoient ioinct à luy, & lesquels il auoit reuoltez, il s'en-
fuit à Medine Tualdi, & y demeura quelques temps. C'est de ceste fuite que les Mahomet-
rans prennent le commencement de leur Here, ou dénombrement de leurs annees. Mais il n'y
a rien qui aydast dauantage à estendre la secte de Mahomet que la multitude des victoires de Ma-
homet qui desfit les Perseans, se rendit maistre de l'Arabie & chassa les Romains de Surie, & ses
successeurs estendirent apres leur Empire depuis l'Euphrates iusques à la mer Atlantique, oc-
cuperent les Espagnes, la Sicile & plusieurs autres Prouinces, & presque avec vn cours conti-
nuel de victoires subiuguerent ou travaillerent le Leuant, & le Ponant durant 300. ans.

Mais pour retourner à la loy de Mahomet, elle embrasse la circoncision, & la distinction
des viandes nettes & immondes, en partie pour asseurer les Juifs: elle nie la diuinité de Iesus-
Christ pour allecher les Arriens qui estoient alors puissans: elle est pleine de beaucoup de fa-
bles pour s'accommoder aux Idolatres, & lasche la bride à la chair pour se rendre agreables à
la pluspart des hommes.

Ils confessent vn Dieu, & honorent Iesus-Christ, non comme fils de Dieu, mais comme
Prophete né de Marie Vierge: mais ils ne croient pas qu'il soit mort en croix. Ils ne portent
point d'honneur aux images, & n'en veulent point auoir. Le Vendredy est leur iour du repos,
comme le Dimanche est le nostre. Ils ont vn Careme de treize iours, qu'ils appellent Rama-
dan ou Romodan, durant lequel ils ne mangent rien le iour: mais quand la nuit est venue ils
mangent tout ce qui leur plaist, horsmis de la chair de pourceau, & pareillement ils s'abstiennent
du vin & des femmes. Ils ont apres cela leurs Pasques nommees Bayran qui durent trois iours:
& pendant ce temps ils se resiouissent en toutes les façons qu'ils peuuent. Toutesfois ceste feste
n'arriue pas tousiours en mesme temps de l'annee: ains tantost elle est en Esté, tantost en Hy-
uer, tantost au Printemps, tantost en Automne: ce qui arriue à cause qu'ils ne mesurent pas leur
annee selon le cours du Soleil, mais de la Lune. C'est pourquoy ils prennent soigneusement
garde à la nouvelle Lune, & la saluent, & portent la figure de son croissant, de mesme façon que
nous faisons celle de la croix.

Ils sont circoncis à la façon des Juifs, non toutesfois apres le 8. iour, mais apres la 8. annee.
Ils n'ont point de cloches, mais au lieu de cela leurs Prestres vont sur de hautes tours, d'où ils
appellent les Turcs à haute voix par cinq fois de iour ou de nuit pour venir prier.

Les Mahometans ne veulent estre appelez Turcs, d'autant que ce non signifie bannis en
Hebreu, mais Musulmans, c'est à dire croyans bien.

Il y a quatre sectes, qui sont comme 4. ordres de Religieux entre les Turcs: qui different en
façon de viure, en habits, & en ceremonies. Ceux-là sont les Torlaques, Deruis, Kalenders, &
Huguimaies, qui sont tres-meschans & vicieux, & deçoient le simple peuple. Ils conuertent
sans scrupule avec les Chrestiens, mangent & negotient avec eux fort librement, & quelques-
fois mesmes prennent en mariage leurs filles, & les laissent viure selon leur loy, & religio. Mais
ils hayssent les Juifs au possible, & les mesprisent comme les plus viles gens du monde, & ne
daignent manger avec eux, ou espouser leurs filles, & mesme vn Juif n'est receu au nombre des
Mahometans, qu'apres auoir esté baptisé à la Chrestienne.

Les Turcs non seulement s'abstiennent de blasphemer le nom de Dieu, & de Mahomet,
mais encor celuy de Iesus-Christ, & de la Vierge Marie, ou de quelques Saints, & punissent

144 Les Empereurs de Constantinople.

griefvement les blasphemateurs de quelque secte ou condition qu'ils soient.

Ils assurent que ceux qui garderont estroitement les loix de leur Mahomet iouyront de la vie eternelle, & d'un Paradis plein de delices, qui sera un iardin enuironné de deux beaux ruisseaux, posé sous un Ciel serein & un air bien temperé, où ils auront tout ce qui leur viendra à souhait, sçauoir forces viandes exquisés de toutes sortes, & de belles femmes qui les serui- ront en vaisseaux d'or & d'argent. Ils tiennent aussi que les Anges leur seront là leurs eschantons, & leurs porteront du lait dans des vases d'or, & du vin en des tasses d'argent. Au contraire ceux qui viendront à enfreindre les loix de l'Alcoran, sont menacez de l'enfer, & de mort eternelle. Toutesfois pour adoucir ceste crainte, ils ont esperance que celui qui croira fermement à l'Alcoran en mourant, quelque grand pecheur qu'il ayt esté, sera sauué sans doute quelconque.

LES EMPEREURS DE CONSTANTINOPLE, TANT CHRETIENS QUE TURCS DEPUIS QUE L'EMPIRE d'Occident fut séparé de celui d'Orient, & donné à Charlemagne.

55. **C**ONSTANTIN VI. fils de Leon IV. fut Empereur apres son pere l'an de salut 780. il regna 9. ans bien ieune avec sa mere Irene, & tous deux estans persuadez par Therasius Patriarche de Constantinople, firent tenir un Concile de 350. Euesques, par lequel il fut dit qu'on remettroit aux Eglises les images que Constantin V. en auoit fait oster. Quelque temps apres Constantin priua sa mere du Gouvernement de l'Empire, & fit arracher les yeux, & couper la langue à Nicephore, sentant qu'on le vouloit secrettement faire Empereur.

Il resserra aussi dans un Monastere Marie la femme, fille de Charlemagne, puis print vne concubine par le conseil de sa mere, qui desiroit que son fils fust hay du peuple : peu de temps apres elle le fit prendre, l'aveugla, & le fit mettre en prison où il mourut l'an 798. puis elle regna toute seule 5. ans ou enuiron. De son temps Charlemagne fut couronné Empereur d'Occident. 801.

Nicephore qui estoit Patricien, usurpa l'Empire sur Irene l'an 803. Il fut bon au commencement, puis meschant, & fut tué combattant contre les Bulgaires.

Stauratius son fils fut blessé en la mesme bataille, & demis de l'Empire trois mois apres que Michel Curopalate, qui auoit espousé Procopie sa sœur, & l'on luy enuoya finir ses iours en un Monastere.

Michel Curopalate dit Rangabé, fut Empereur l'an 811. Il estoit lasche, & si bien qu'en la premiere bataille qu'il eut contre les Bulgaires, il s'enfuit & s'alla rendre en un Monastere, ne voulant plus estre Empereur.

Leon Armenien V. du nom, fut fait Empereur l'an 813. Il estoit auparauant Colonel de la gendarmerie de Michel Curopalate. Il fit couper les genitoires au fils de Michel, & les bannit. Il ne voulut point remettre les images qu'il auoit fait abbatre, & fut tué dans l'Eglise durant le service diuin, la 8. année de son Empire. Sa femme fut resserree en un Monastere, & ses enfans furent cachez.

Michel le Begue, ou Traule, meschant & meurtrier de Leon V. fut Empereur l'an 820. il mourut du flux de ventre.

Theophile fils de Michel le Begue, paruint à l'Empire l'an 829. Il fut bon iusticier, mais il detesta les images des Saints, & punit ceux qui leur portoient honneur. Il s'attrista à l'extremité d'estre tousiours defaict aux batailles qu'il donnoit, & ayant quitté le manger, & ne beuuant que de l'eau froide, il prit la disenterie, & mourut.

Theodore apres le decez de Theophile son mary, cōme Tutrice de son fils Michel, gouverna l'Empire assez heureusement, l'an de salut 842. & remit les images des saints aux Eglises. En fin Michel estât capable de gouverner, sa mere se rendit Religieuse, & luy quitta l'Empire, l'an 856.

Michel fils de Theophile succeda à son pere dès son enfance. Il fit Basile de Macedoine son compagnon d'Empire, & fut aussi-tost tué par cet ingrat, ayant regné onze ans, neuf mois & 5. iours, depuis que sa mere fut rendue Religieuse, qui sont en tout 25. ans, 10. mois & 14. iours.

Basile Macedonien fut receu Empereur l'an 867. Il fut tué par un cerf qui luy donna de ses andouillers dans le ventre.

Leon VI. surnommé le Philosophe, commença de gouverner l'Empire l'an de salut 886. Il alloit quelquefois tout seul la nuit en habit desguisé, pour sçauoir si l'on faisoit bon guer. Mais vne fois les gens qui le faisoient le battirent, & le menerent en prison, puis il leur donna de l'argent pour recompence.

Alexandre frere de Leon VI. luy succeda l'an 904. Il fut addonné à ses plaisirs, & mourut du flux de sang qui luy tomboit du nez, & du membre viril, apres auoir gourmandé & ioué excessi- uement

ment à la paume: Car montant tout eschauffé sur son cheual, & s'estendant il se rompit vne vaine, & mourut.

Constantin VII. fils de Leon VI. fut en l'age de 7. ans delaisé par son pere sous la charge & tutelle de sa mere Zoé, & commença de tenir l'Empire apres son oncle Alexandre l'an 906. Il fit reuiure les lettres en Grece, & laissa à s^{on} fils vn liure traittât des affaires de l'Empire, que les Venitiens gardent cōme vn grand tresor. Il regna 14. ans avec sa mere Zoé, 2. avec Romain Lecapen, qui le cuida du tout chasser de l'Empire, & enu^{en} 13. ans seul, qui fut en tout pres de 55 ans.

Romain Lecapen troubla si fort Cōstantin en l'Empire, qu'il fut cōtraint de le receuoir pour compaignon l'an 920. Il bailla sa fille Helene en mariage audit Constantin, & voulut vsurper entierement l'Empire pour luy, & pour son fils Christofle, Mais il fut pris en vne guerre qu'il eut contre Simeon Duc des Bulgaires par ses fils Estienne & Constantin, qui le despoüillerent de l'Empire, & le mirent en vn monastere: mais en voulant faire de mesme à Constantin ils furent pris & resserrez eux mesmes. Ainsi Constantin demeura paisible, & seul Empereur.

Romain le ieune fils de Constantin septiesme fut Empereur l'an 959. sous la conduite de Nicephore Phocas. Il chassa sa mere, & ses sœurs qui gaignerent leur vie apres au ieu d'amour, & quant à luy estant addonné au ieu & à la gourmandise, il mourut empoisonné.

Nicephore Phocas fut Empereur l'an 963. Il recouura la Cilice, & la plus grande partie de la Natolie des mains des Sarrazins, & incontinent apres prit de nuit Antioche. Mais à cause que pour taire toutes ces guerres il mettoit force impositions sur son peuple, & qu'il fit battre la monnoye de mauuais alloy, en fit diminuer le poids, il fut hay des siens, & tué de nuit dormant dans sa chambre par Iean Zimisces, & Theophanie femme de Nicephore donna mesme entree au meurtrier, & à ceux qui estoient avec luy.

Iean Zimisces fut Empereur l'an 969. Il fut vaillant, & recouura toute la Bulgarie que les Roxolains tenoient, & apres il fut empoisonné. Il fit compaignon de son Empire Basile & Constantin freres, enfans de Romain, predecesseurs de Nicephore.

Basile II. & Constantin VI. furent Emperours l'an 976. Sous eux toute la Bulgarie fut assuettie à l'Empire de Constantinople s'estant tousiours auparauant reuoltée. Constantin fut compaignon de l'Empire avec son frere Basile: apres sa mort fut Empereur pres de trois ans & mourut plongé dans les delices. Romain Argyre, ou Argyropile, gendre de Constantin VIII. luy succeda l'an de salut 1029. Il fut par la trahison de sa femme Zoé & de son paillard, noyé en se baignant aux estuës.

Michel Paphlagon paillard de Zoé. & qui auoit suffoqué au bain son mary Argyropile, fut par elle fait Empereur de Constantinople, l'an 1034. il tomboit du mal caduc, escumant de la bouche. Il estoit vn peu beau, & pource fut aymé de Zoé, mais il n'auoit guiere d'entendement: en fin il mourut hydropique.

Michel Calaphar fils adoptif de Zoé, luy ayant iuré qu'il ne tiendrait l'Empire que d'elle, fut fait Empereur l'an 1042. Peu apres il machina contre Zoé, disant: qu'elle le vouloit empoisonner. Ainsi l'enferma dans vn Monastere, & la fit tondre. Mais le peuple s'estant mutiné contre luy, fit Theodore sœur de Zoé, Imperatrice: & retira Zoé, du Monastere, poursuivit Calaphar, & luy creua les yeux, & à son frere.

Zoé retirée du Monastere fut remise au gouvernement de l'Empire avec sa sœur Theodore. Ce fut en la mesme annee que Michel Calaphar regna 4. mois, Zoé aagée de 60. ans, mais encore toute amoureuse rappella d'exil Constantin Manomach, & le prenant pour mary, le fit Empereur, lors que ces deux femmes auoient à peine tenu l'Empire trois mois.

Constantin IX. fut nommé Monomache, ou Monomaque qui estoit de race Imperiale, fut fait Empereur par sa femme Zoé l'an 1042. Il fut lasche & addonné à ses plaisirs, & tint vne belle paillarde au lieu de sa femme: toutesfois il vint à bout de deux grandes guerres ciuiles, & de quelques autres. Zoé mourut aagée de 70. ans, & luy estant tout gousteux, & surpris d'une pleuresie, mourut quelques annes apres.

Theodore sœur de Zoé qui auoit tenu l'Empire enuiron trois mois avec sa sœur le gouverna toute seule apres la mort de Monomaque l'an 1055. enuiron deux ans. Elle conduisit si bien les affaires que tout fut en repos durant son gouvernement. Mais d'autant que les maladies la pressoient avec l'age, par les remonstrances de ses seruiteurs, elle fit participant de l'Empire vn homme desia vieil nommé Michel, & ne vescu guiere apres.

Michel l'ancien fut Empereur de Constantinople, avec & apres Theodore: il eut à peine regné vn an qu'Iaac Commene le demit de l'Empire: de sorte que viuant en homme priué il mourut aussi tost apres.

Iaac Commene fut Empereur l'an 1058. il priua de l'Empire Michel l'Ancien & fut vaillant & de grand courage, mais arrogant, Il estoit de noble lieu, & diligent en ses affaires. Mais vn mal de costé le prit cōme il estoit à la chasse: si bien que n'esperant plus de santé il se fit Moyne.

& prononça Empereur Constantin Ducas du consentement du Senat & du peuple. Constantin Ducas X. de ce nom, parvint à l'Empire l'an 1060. Il fut deuot, & grand iusticier, mais auare, & pource hay des siens, & mesprisé des ennemis. Il mourut aagé de 60. ans, laissant sa femme Eudoxie, & trois de ses fils heritiers del'Empire.

Eudoxie & ses fils tindrent l'Empire apres Constantin Ducas. Ceste femme pouuoit bien gouverner les affaires, si la guerre ne fut venue de dehors. Mais pource que les estrangers se ruoient de tous costez sur l'Empire, l'opinion de ceux qui tenoient qu'il falloit qu'un homme capable en print la charge, l'emporta. Si bien qu'Eudoxie contre la promesse faite à son mary mourant : apres auoir régné 7. mois & quelques iours, se remaria à Romain Diogene, dont elle se repentit bien tost, estant faschee de l'arrogance de cet homme qui vouloit tout gouverner.

Romain Diogene tint l'Empire de Constantinople l'an 1068. Il fut pris en guerre par les gens du Turc Sultan Azant qui luy fit honneur, & le renuoya avec presens, apres auoir traité de paix avec luy. Mais tout fut renuersé tandis à Constantinople. Eudoxie fut chassée, Diogene demis, & Michel de Constantin fut fait Empereur, & fit arracher les yeux à Diogene, puis l'envoya en exil, auquel estat il mourut, & fut enterré par sa femme Eudoxie. Michel surnomé Parapinace, à cause de la grande famine qui fut de son temps, homme mal propre à telle charge fut Empereur l'an 1071. Côme il s'amusoit à composer des vers sous son maître Psellus, les Turcs assaillirent l'Empire de tous costez, principalement du costé de l'Asie. Lors on fut d'aduis d'élire un autre Empereur, & Michel fut mis en un monastere avec sa femme & son fils.

Nicephore Botoniat de la lignee de Phocas fut mis au lieu de Michel Parapinace l'an 1078. Il fut deicté par les Commenes, & reserré en un Monastere, où il vesquit peu de temps.

Alexi^e Cômene fils de l'Empereur Isaac tint l'Empire l'an 1081. Il s'efforça de rōpre l'Empire des François, pour le recouremēt de la terre Se, mais enfin il fut cōtraint de promettre qu'il fourniroit des viures, & autres choses aux François. Il mourut d'une lōgue maladie aagé de 70. ans.

Caloian fils d'Alexius tint l'Empire l'an 1118. il mourut d'un coup de dard que luy-mesme auoit empoisonné, s'en frapant en la main, en le voulant lancer contre un sanglier.

Manuel, frere, ou comme quelques-vns disent, fils de Caloian tint l'Empire l'an 1142. Ce fut un Prince fort perñide & plein de meschanceté. Il fit guerre contre les Turcs, & apres auoir regné pres de 38. ans, il vescut en monnoye, & mourut de maladie.

Alexius fils de Manuel parvint à l'Empire l'an 1180. & le gouuerna sous Andronic son cousin german, qui fut son tuteur, puis son cōpagnō d'Empire, & en fin son meurtrier. Car il luy fit secrettemēt trācher la teste, & ietter sō corps dās la mer, lors qu'Alexius n'auoit pas pl^e de 15. ans.

Andronic Commene fils d'Isaac tint l'Empire apres Alexius l'an 1183. Guillaume Roy de Sicile luy fit la guerre pour venger la mort d'Alexius, & comme il estoit assailly de tous costez, Isaac l'Ange luy vint dōner dessus, le vainquit, chassa de l'Empire, le prit, luy fit arracher un œil : le fit monter sur une asnesse à reculons, le couronna d'aux, ou de porreaux, luy bailla à la main la queue de l'asnesse en lieu de sceptre, & luy fit faire monstre en ceste sorte par Constantinople. Lors le peuple luy disant mille pouilles, luy ietta de la boue contre le visage, & le pourluit à coups de pierre & de baston. Ainsi tout meurtry, & rompu il mourut, & fut pendu, & les femmes encore à beaux crochets le deschirerent, & mirent en petites pieces.

Isaac l'Ange parvint à l'Empire l'an 1185. Son frere puîné Alexius luy arracha les yeux & l'Empire, & le tint en prison, iusqu'à ce qu'Alexius fils d'Isaac obtint secours des François & Venitiens, & deliura son pere, qui mourut bien tost apres, pour auoir pris trop d'air apres auoir esté si longuement en prison.

Alexius l'Ange frere d'Isaac fut Empereur apres luy l'an 1195. Mais il fut en fin chassé comme nous auons dit par Alexius fils d'Isaac, à l'ayde de Baudouyn & des Venitiens.

Alexius le ieune fils d'Isaac l'Ange fut remis au siege de l'Empire l'an 1204. Mais ainsi qu'il cōmençoit de gouverner, Murziphle sorty de bas lieu, mais elleué par luy le tua. Ce Murziphle trouuāt apres de la resistāce s'enfuit de nuit avec sa fēme, ses putains, & les thresors, & peu apres fut ramené de la Moree prisonnier en Constantinople, où il mourut miserable. Tellemēt que la ville demeura aux François & Baudouyn fut en Leuāt premier Empereur de la natiō François.

Baudouyn Côte de Flandre fut fait Empereur l'an 1205. Il recouura tout ce qui estoit de l'Empire de Cōstātinople, fors Andrinople, qui fut prise par Theodore gēdre d'Alexius le meurtrier pour le dot de sa femme, & fut le siege de son Empire. Et cōme les François l'assiegeoient, & estoient sur le poinct de la prendre, Baudouyn fut pris & mis à mort, ayant à peine regné un an.

Henry frere de Baudouyn fut Empereur apres luy l'an 1206. Il laissa heritiere sa fille Yolād, qui estoit mariee à Pierre d'Auxerre.

Pierre de Courtenay petit fils de Louys le gros Roy de France, Comte d'Auxerre succeda à l'Empire par le moyē de sa fēme Yoland l'an 1216. la teste luy fut trāchee en un festin par Theodore Laicare, qui se disoit Empereur d'Andrinople & des Grecs, qui l'auoit attiré sous ombre de paix,

paix, & sous vn faux ferment. Quelques autres disent que Lascare auoit mis des embusches aux forests de Theffalie au lieu appellé Tempé, & qu'il y surprit Pierre, l'emmena, & le fit mourir en captiuité. Sa femme Yoland tint l'Empire deux ans durant sa prison.

Robert fils de Pierre ayant ouy les nouuelles du desastre de son pere, part de France, & va à Constantinople, où il est receu Empereur l'an 1220. Il prit à femme vne ieune Dame promise à vn Gentilhomme de Bourgongne, qui ne pouuât souffrir ce tort monta au Palais coupa le nez de la Dame, & ietta sa mere qui auoit dressé ce nouveau mariage, dans la mer. L'Empereur qui alloit à Rome pour prendre la couronne n'en osa dire mot, mais apres retournât en intention de se venger, il mourut de maladie en Achaye.

Baudouyn II. fils de Robert succeda à son pere l'an 1228. en fin Michel Paleologue entra dans la ville par intelligence, ainsi que Baudouyn estoit à l'entree du destroit de Constantinople avec vne grosse armee. Lors les Grecs recouurerent l'Empire de Constantinople, que les François auoient tenu pres de soixante ans.

Michel Paleologue, à qui Theodore Lascare mourant laissa en garde Iean Lascare son fils, comme la brebis au loup, surprit Constantinople l'an 1259. ayant premierement chassé Guillaume Roy d'Achaye, avec l'ayde des Gennois, & usurpé son Royaume. Il vint au Cōcile à Lyô, & le Pape Gregoire X. & luy, en deuindrent si bon amis, que pour ceste cause il fut tellement hay des Grecs, qu'apres sa mort il ne receut aucun honneur de sepulture. Toutesfois l'Empire demeura aux siens pres de deux cens ans, & iusques à ce que les Turcs le prirent.

Andonic II. fils aîné de Paleologue succeda à son pere l'an 1283. Il fit son fils Michel, que quelques-vns tiennēt auoir esté son gendre, participant à l'Empire, mais il mourut en l'an 1319. De sorte qu'il appella lors vn autre Andronic Constantin Despot pour auoir part à l'Empire au lieu de Michel dont Andronic fils de Michel irrité s'esleua contre l'Empereur son grand pere, & le vainquit avec l'aide des Gennois, mais les Venitiés le retablirent. En fin il mourut aagé de plus de 70. ans.

Andronic III. fils de Michel, fit plus de six ans durant la guerre à son grand pere. Ils firent souuent la paix par le moyē de leurs amis : mais elle ne tint point iusques à ce qu'en fin l'an 1332. le ieune Andronic entra finalement dans Constantinople : & y estât ne fit autre mal à son ayeul que de le laisser regner avec luy tant qu'il vescu. Apres la mort de son ayeul il rapporta victoire de ses ennemis, puis estant aagé de 50. ans, il fut surpris d'une fièvre, & d'un mal de teste dont il mourut dans quatre iours.

Iean Cantacuzen fut tuteur de Iean Paleologue, & son compagnon d'Empire, l'an 1341.

Iean Paleologue, nommé aussi Caloian succeda à son pere l'an 1341. Son tuteur Iean Cātacuzen fut chassé, mais il fit apres 5. ans la guerre cōtre Iean Paleologue, & sa mere, & fut le premier qui mena les Turcs armez en Europe. En fin Constantinople se rendit à luy, & lors qu'il la tint, il ne fit tort à personne, & se porta seulement pour compagnon d'Empire de Iean à qui il donna sa fille en mariage. Apres cela Iean Paleologue ayant esté banny fit la guerre, assisté principalement des Turcs, auxquels il donna premiere habitation en Europe, & il entra dans Constantinople l'an 1357. Lors Cantacuzen laissa l'Empire, se retira dās vn Monastere, & Matthieu son fils voulant faire du compagnon avec Paleologue, fut contraint de s'en desister. Iean Paleologue mourut l'an 1384. ayant regné 16. ans avec Cantacuzen, & 27. ans tout seul, qui font en tout 43. ans : & Andronic son fils aîné, qui toutesfois n'est mis au nombre des Empereurs, tint l'Empire l'espace de trois ans.

Manuel fils de Iean Paleologue paruint à l'Empire l'an 1387. & le plus remarquable de sa vie est, qu'il laissa sept fils, dont l'aîné nommé Iean, succeda à l'Empire.

Iean fils aîné de Manuel succeda à l'Empire l'an 1421. Cestuy cy estant plus addonné à la paix qu'à la guerre, accompagné des Princes & Prelats de toute la Grece, assista sous l'autorité du Pape Eugene IV. de ce nom au Concile de Ferrare, qui fut depuis transporté à Florence. Lors des deux Eglises Grecque & Latine, n'en fut fait qu'une. Estant de retour à Constantinople, il ne vescu guieres apres, & mourut sans laisser des enfans, l'an de grace 1445.

Constantin II. fils de Manuel, apres la mort de son frere Iean, paruint à l'Empire l'an 1445. Estant auparauant Roy de la Morce, il fut appellé Dragon, pour la cruauté qu'il exerceoit contre les Turcs. Mais quand Constantinople fut prise par Mahomet II. fils d'Amurath II. lors se retirant à la porte de la ville pour s'enfuir il fut estouffé en la presse de ceux qui fuyoient le 29. May 1453. Sa teste fut portee par tout le camp des ennemis au bout d'une lance. Ainsi Constantinople esleuee & enrichie par Constantin fils d'Helene, sous ce Constantin fils d'une autre Helene, fut prise, & reduit sous la puissance des Turcs.

Quoy qu'il sēble à propos de mettre icy de suite les Empereurs Turcs, depuis celuy qui se redit maistre de Constantinople : toutes-fois pource que ie discours icy de l'Empire de ces Princes, i'ay iugé meilleur de les mettre tous en ce lieu, & de commencer depuis le temps que les Turcs commencerent à viure sous vn Monarque de la famille des Ottomans.

Ottoman donc fils d'Orthogule, fut Empereur des Turcs l'an 1300. Il fut le premier qui renouuella la gloire de sa nation, qui auoit pris Ierusalem l'an 1008. mais auoit esté vaincuë par les Chrestiens sous Godefroy de Bouillon: de sorte que ceux qui restèrent se retirerēt à Nicee, & n'eurent depuis aucun Roy de renom iusques à cestuy-cy qui se fit Monarque, & qui tient le premier rang en l'histoire des Turcs. Il subiugua grande partie de la Bithinie, & prit plusieurs forts pres la mer Pontique. Mais ce qui l'honora d'auantage, fut la prise de la ville de Sina, autresfois appelée Sebastia. Il mourut vieil, la premiere annee du regne de Philippe de Valois.

Orchanes fils d'Ottoman fut Empereur des Turcs apres son pere l'an 1328. Il fut plus vaillant que son pere, liberal, & de bonne grace. Il conquist le pays de Mysie, Lycaonnie, Phrygie & Carie, prit Prusse, auourd'huy Burse, demeure ancienne des Roys de Bithynie, & y receut vn coup dont il mourut la premiere annee de Iean Roy de France. Il regna 22. ans.

Soliman fils d'Orchanes regna 2. ans apres son pere, fit la guerre aux Grecs, passa d'Asie en Europe où il deffit les Bulgaires, & prit en Thrace les villes d'Andrinople, & de Philippopoli. Quelques autres disent qu'il mourut du viuant de son pere, estant tombé du cheual à la chasse, & que peu de tēps apres son pere en mourut de duel. C'est pourquoy quelques vns ne le mettent pas au rang des Empereurs Turcs.

Amurath I. fils d'Orchanes fut Empereur des Turcs l'an 1350. Cestuy-cy incité par Iean Paleologue enuoya 2000. Turcs à son secours, ce qui fut la source de la ruine de Constantinople. Car estant alleché de la richesse de l'Europe, il fit passer vne autresfois dās les galeres Geneuois 6. mille Turcs, sous couleur de donner secours à l'Empereur de Constantinople, mais en intention d'vsurper la Grece. Ainsi il trauersā le bras de l'Hellestōt en Abyde, il prit Callipoli, & autres villes, puis se rua sur l'Empereur mesme qui ne s'en doutoit point, prit Seruie, & Bulgarie, & en deffit les Princes. Mais vn des gens de Lazare Despote de Seruie, en vengeance de son maistre qui estoit mort, tua Amurath l'an 1378.

Baiazeth Empereur des Turcs I. du nom, apres la mort de son pere Amurath tua Soliman son frere aîné par trahison, & iouy seul de l'Empire l'an 1378. Pour venger la mort de son pere, il fit la guerre contre Mare Sr. de Bulgaire, le vainquit, & le mit à mort, & subiugua vne grande partie de son pays. Il fut appelé Bajazet Hildrin, c'est à dire, foudre, tant il estoit prompt en ses affaires. Il subiugua presque toute la Grece, & assiegea Constantinople, mais il fut pris par Tamerlan, qui le mit en vne cage de fer, & le mena en cet estat par tout le pays d'Asie, & de Syrie; & en fin Bajazeth mourut en ceste misere. Apres son decez on tient qu'il y eut enteregne iusques à Mahomet l'un de ses fils.

Iosua, ou Cyrisclebes, qu'aucuns nomment mal Calaprin, fils aîné de Baiazeth, apres la défaite de son pere fut despoüillé de l'Asie par Tamerlan, & mené captif à l'Empereur de Constantinople, qui le traitta en Prince, puis le laissa aller en Asie, où il recouura le Royaume de son pere. Il fut tué par son frere Mustapha, autrement Musulman en la fleur de son aage, l'an 1407.

Mustapha, ou Musulman, fut Empereur des Turcs fort peu de temps. Car son frere Moysse s'empara de l'Estat, & le chassa. Quelques-vns nomment ce Mustapha Orchanes II. & disent qu'il a esté fils & heritier de Iosua, & qu'il fut tué par Moysse son oncle paternel: mais Moysse en porta bien tost la punition qu'il meritoit. Car il fut aussi tué par son propre frere Mahomet. Il y en a qui escriuent que ce Mahomet regna immédiatement apres Baiazeth son pere, & ne font aucune mention de Iosua ny de Mustapha, ny de Moysse, ains mettent aussi tost apres Baiazeth son fils Mahomet. Moysse chassa & mit à mort son frere Mahomet, où selon les autres son nepueu Orchanes, & apres il fut aussi tué par Mahomet son frere: ces deux ne sont mis par quelques vns au rang des Empereurs Turcs, par ce qu'ils n'ont guieres regné.

Mahomet I. frere de Iosua, Mustapha & Moysse fut Empereur l'an 1407. Il y en a qui luy attribuent ce qu'on dit de Iosua. Il reprit toutes les places que Tamerlan auoit prises sur son pere, chassa hors de Galace du pays du Pont, & de Cappadoce ses propres parents. Estant de retour en Grece, il se tint à Andrinople, où il mit le siege de son Empire, chassant les Chrestiens qui y estoient. Il mourut de 12. ans de son Empire, & de nostre salut 1418.

Amurath II. fils de Mahomet I. succeda à son pere l'an 1418. Il ordonna le premier pour la garde de son corps les lanissaires Chrestiens reniez. Il assaillit les pays de Hongrie, Boïne, Albanie, Valaquie, & Grece. Il print Thessalonique sur les Venitiens. Il tint l'Empire 32. ans, & le laissa à son fils Mahomet II. l'ā 1450. Mahomet II. fit tuer aussi tost sō ieune frere. Il fut tres-meschant, & ne croyoit en aucun Dieu, & disoit que Mahomet estoit faux Prophete, & sēblable à luy: & se mocquoit des saincts Patriarches & Prophetes. Il acquit, & laissa le surnom de grand à la maison des Ottomans. Il ruina l'Empire de Constantinople, prenant ceste ville par assaut le 29. May 1453 & n'en fit moins de l'Empire de Trebisonde. Il prit douze Royaume, & deux cens villes sur les Chrestiens l'an 1478. Il assiegea l'Isle de Rhodes, mais elle fut biē defenduë par les Cheualiers & leur grād Maistre Pierre d'Aubusson, ou d'Amboise, François. En fin il mourut de colique l'an 58. de son aage, & le 31. de son Empire.

Baiazeth

Baiazeth II. de Mahomet II. fut Empereur par le moyen des Janissaires l'an 1481. Il subjuguâ la Valachie, puis alla contre le Sultan d'Egypte, qui fut le plus fort. Il prit sur les Venitiens Lépante, Modon, & Duras.

Selim son fils puîné, qu'il auoit par le moyen des Janissaires preferé son aîné, & déclaré Empereur de son vivant, le chassa, puis l'empoisonna l'an 1512.

Selim fut Empereur l'an 1512. Il adiousta au meurtre de son pere celui de ses freres Achmet, & Corcut, & fit estrangler sept enfans de ses freres. Il vainquit, & chassa le Sophy de Perse, & deffit les deux Soldans, Campton, & Tomoubeye, avec les Mammelus, & Arabes. Il adiousta à son Empire l'Egypte, & l'Arabie, & prit le grand Caire: puis estant de retour en Grece, il s'engendra en ses reins vn vlcere, qui croissant tousiours le fit mourir la huitiesme année de son Empire, & de nostre salut. 1519.

Soliman, que quelques vns disent estre, I. de ce nom Empereur des Turcs, recouura la Syrie, deffit Gazel qui s'estoit reuolté, prit Belgrade, & Rhodes, puis Bude par deux fois. Il print en l'an 1543. Strigogue, & Alberegade en Hongrie. Il conquist les Royaumes d'Assyrie, & de Mesopotamie, avec la ville de Babylone. Il rauagea les frontieres d'Armenie, & de Mede, & de Perse, & prit Tauris ville capitale de Perse par deux fois. Il fit estrangler son fils aîné Mustapha, pour complaire à sa concubine Rose, qui desiroit que son fils Selim fut Empereur apres son pere. Il assiegea l'Isle de Malte, & Vienne en Autriche, mais il fut repoussé par le Grand-Maître François, nommé Pierre Parisot, ou la Valette, & par Charles V. Empereur, & Soliman mourut l'an 1566. en Hongrie, deuant le Chasteau de Sighet qu'il assiegeoit, apres auoir regné 74. ans.

Selim II. par le moyen de Mehemet Bassa, entra en possession de l'Empire auant que la mort de son pere fut decouuerte. Il prit l'Isle de Chypre l'an 1571. mais il perdit son armee Nauale la mesme année, en la bataille de l'Epanthe qu'il eut cõtre les Chrestiens: Toutesfois il la remit sus bien tost apres, & ayant recouuré en Afrique Tunes, & la Goulette sur le Roy d'Espagne, il mourut l'an 1574. & de son Empire le 8. Il fit tout ce que dessus par ses Bassas, tandis qu'il prenoit ses plaisirs, estant fort addonné aux femmes, & au vin.

Amurath III. fils de Selim iouyt de l'Empire 8. iours, apres que son pere fut mort l'an 1574. Il fit tuer cinq freres qu'il auoit, & deux concubines de son pere qui estoient enceintes. Il comença à gouverner n'ayant que vingt huit ans. Il estoit fort affectionné à la Religion Mahometane, & grand iusticier. Il s'addonnoit tort aux femmes, & à bien manger. Il fut pere de 107. enfans, & deuint fort gros & gras, & mourut en Ianuier 1595. année de son Empire & n'ayant encor atteint la 30. de son aage.

Mahomet III. succeda à son pere Amurath l'an 1595. Il fit mourir dix-neuf de ses freres, & quelques concubines de son pere qui se trouuerent grosses au temps de son decez. Il fit mourir son fils aîné, & sa mere pour s'estre enquis des Astrologues combien de temps il regneroit. En l'an 1603. le Sophy de Perse reprit sur luy Tauris, & Bages, & de tres-grands pays que Selim I. & Soliman II. auoient vlsurpez sur luy. Il mourut de peste en Ianuier 1604. apres auoir regné neuf ans.

Achmet succeda à l'Empire de son pere en l'an 1604. n'estant aagé que de 16. à 17. ans. Il prit l'an 1605. Strigogne, & quelques autres places en Hongrie. On dit qu'aux armées il fait porter le corps de son pere enbaumé dans vn cercueil de plomb, ayant opinion que ses desseins auront meilleure issue. Il a fait trefues avec l'Empereur Rodolphe, & ceux de la maison d'Autriche pour 15. ans, & a tourné ses armes entierement contre le Sophy. Cestuy a passé quelques articles en faueur du Roy de France Henry le grand, par l'entremise de Monsieur de Breues pour lors son Ambassadeur à Constantinople, & ce pour le fait du commerce libre en Orient, pour tous ceux qui y trafiqueront sous la banniere de France, & aussi pour la conseruation du saint Sepulchre, & autres lieux sacrez de la terre sainte, qui sont entretenus en leur entier, & avec la deuotion des Chrestiens en faueur dudit feu Roy.

A cestuy-cy a succédé Sultan Osman son fils, au lieu de son oncle Mustapha, qui pour estre inhabile à l'Empire, fut renfermé en sa chambre au Serrail. Sultan Osman fut massacré & assassiné par les Janissaires avec son premier Vizir l'an 1622. au mois de May.

Lesquels tirerent de sa chambre Sultan Mustapha son dit Oncle, & le firent regner enuiron vn an apres le massacre de Sultan Osman.

Mustapha derechef enfermé a esleué à l'Empire Sultan Amurath frere dudit Sultan Osman, qui a fait mourir le grand Vizir, & poursuivant la vengeance de la mort de son frere Osman sur les Janissaires, s'est acquis vne guerre sanglante, par la rebellion de quelques siens Bassas, supportez & secourus des armes du Persan, comme celui de Babylone, qui a rendu la ville au grand Sophy. Celuy de Damas aussi reuolté avec toute la Surie, & Mesopotamie, la mutinerie des Janissaires acheminât ce puissant Empire à sa dernière desolation, par les puissans progres des armes du Persan rédu Maître presque de toute les Prouinces que le Turc tient en Asie, & d'une autre part furieusement attaqué par les Polagues & Cosaques de Pologne, qui rauagent les pays voisins & maritimes de la mer Noire.

DISCOURS
DE L'ESTAT DV SOPHY DE PERSE.
SOMMAIRE.

- 1 **O** Rigine du Sophy de Perse & de l'establissement & progres de la foy de Mahomet.
- 2 Situation, limites & confins du Royaume de Perse.
- 3 Description des Prouinces contenues en cet Estat de la Medie.
- 4 Del Assyrie.
- 5 Susiane.
- 6 Mesopotanie.
- 7 Panchaie.
- 8 Parthie.
- 9 Hircanie. (.)
- 10 Margiane.
- 11 Bachanie.
- 12 Pa:opamisse.
- 13 L'Arie.
- 14 Drangiane.
- 15 Gedrosie.
- 16 Carmanie.
- 17 Relation plus moderne des plus notables Prouinces qui ont duré sous la seigneurie de la Perse.
- 18 De la Prouince maintenant appellee Parc.
- 19 De Hierach.
- 20 De Kachon.
- 21 Aderbaïon.
- 22 Gaylon.
- 23 Korason.
- 24 Kermou.
- 25 Maurenabar.
- 26 Vsbex.
- 27 Description de la fertilité d'une partie des Prouinces de ce Royaume, sterilité de l'autre partie.
- 28 Abondance en ce pays de Bitum & naphie, amome, otro, dates, froment, figues, arbres, & autres raretez.
- 29 Coustumes & façon de vivre des anciens Persans, de la demeure des Roys aux montaignes, & des tributs qu'ils leuoient sur leurs peuples.
- 30 De la celebration de leurs nopces, pluralité de femmes permise, exercice de laieunesse, & forme de leurs armes & habits.
- 31 Ceremonies de leurs obseques, de leurs sacrifices, & des deitez qu'ils adoroient.
- 32 De l'ancienne valeur des Parthes & maniere de combattre.
- 33 Du naturel effeminé des Medois, leurs alliances avec effusion de sang.
- 34 Vestemens des anciens Assyriens, & leur coustume de porter anneau & Sceptre en main.
- 35 Loy & coustume Assyrienne, d'exposer en vente les belles filles, pour du prix en marier les laides.
- 36 Autre coustume d'exposer les malades en place publique, pour recevoir conseil & remede de ceux qui auoient esté trauaillez de semblable maladie.
- 37 De l'oignement des corps morts avec miel, & de leur sepulture, & funerailles pareilles à celles à Egypte.
- 38 Coniunction charnelle des Dames Assyriennes avec les Estrangers, en l'honneur de la Déesse Venus.
- 39 Des Mages Assyriens appelez Chaldeens, en pareil honneur que les Gymnosophites, & Prestres d'Egypte: Quelle fut la doctrine touchant la Diuinité & moralité des choses naturelles.
- 40 Coustume des Carmaniens, d'aller en guerre, & combattre monté sur des asnes: & de ne se marier qu'ils n'eussent fait sejin de quelqueteste de leurs ennemis tuez en bataille.
- 41 Sexagenaires de la Margiane, par la coustume du pays, assommez, & leurs corps mangez par leurs parens.
- 42 Ciuilité & naturel courtois des Persans modernes, addonnez aux sciences, au trafic, commerce, & arts mechaniques, courtisans les Dames, magnifiques, & somptueux en habits, & usans à presens de langage Arabe.
- 43 Leurs richesses consistans en draps d'or, & de soye, & pareillement au trafic des perles, & pierreries.
- 44 Quels sont les reuenus, & richesses du Prince Persan.
- 45 Quelles sont ses forces: infanterie, & milice Persans, & quel nombre de caualerie il peut mettre aux champs.
- 46 Des puissans Estats ennemis avec lesquels il cõfine.
- 47 Gouvernement du Royaume de Perse, different de celui des Turcs.
- 48 Des quatre sectes principales de la Religion Mahometane: & quelle des quatre est suivie des Persans de ce siecle.
- 49 Des Iuifs, & Chrestiens Melchites, Nestoriens, Armeniens, habitez en Perse.
- 50 Abregé de Chronique des Roys de Perse, selon l'Historiographie Mirxond.



L'EMPIRE des Sophis est auourd'huy mis entre les plus puissantes Monarchies de tout l'Orient, & quoy qu'il aye demeuré quelque temps accablé par le moyen des Sarrazins, puis encore par les Tartares, qui le mirent bas premierement sous Chingis, puis sous Tamerlan, ou Tamberlan, toutesfois il a recouuert sa gloire ancienne presque de nostre aage par la valeur d'Ismaël Sophy, de l'origine duquel il sera bon de discourir en celieu, pource que c'est chose qui importe à la cognoissance de l'Estat, & du Royaume de Perse.

- I Il faut doncques sçauoir que Mahomet autheur de ceste mal-heureuse secte qui regne auourd'huy en tant d'endroits, ayant acquis vne grande reputation aupres des Arabes, avecques

ques sa nouvelle doctrine: eust pour seconde femme Aïsse, fille d'un certain Bubac, homme de grande autorité, & extrêmement riche: & moyennant la faueur de ce Bubac, d'Omar, & d'Ottomar, ses parens, assembla un grand nombre d'Arabes, & conquit sous couleur de Religion beaucoup des païs voisins.

Cependant il donna en mariage à Ally son cousin Fatime sa fille, née de sa première femme, & venant à mourir en l'âge de soixante & trois ans, luy laissa l'Estat, & la supériorité de toute sa secte, avecques le nom de Calife. Mais Bubac marry & indigné, de ce que Mahomet qui s'estoit fait grand avecques sa faueur, luy auoit préféré Ally, qui n'estoit encores qu'un ieune homme, chassa Ally de cet estat, Estant, assisté d'Omar, & d'Ottomar, qui vouloient plus tost cestui-cy que l'autre pour Calife, d'autant qu'il estoit de leur sang, aussi pource que son âge leur donnoit quelque espoir d'une prompte succession, comme il aduint. Bubac eust donc pour successeurs ces deux-cy l'un apres l'autre, & Omar fut tué d'un esclave, & Ottomar en une sedition: tellement que la charge de Calife reuint à Ally, qui n'en iouit pas toutesfois paisiblement, pource que Maïe, sous pretexte qu'il auoit presté la main à la mort d'Ottomar son maistre, luy fist la guerre, & finalement le fist mourir en la ville de Cuse, assise pres de l'Euphrate au dessous de Begadet, qui s'appelle pour ceste cause Massadal, c'est à dire, maison d'Ally, pource qu'il y fut enterré. Apres la mort ceux de Cusa declarerent Calife Ocen fils de Fatime, qui fut encores démis, puis empoisonné par Maïe, qui se rendit Calife absolu, & eust pour successeur l'as son fils. Ocen laissa douze fils, entre lesquels fut Mahomet Mahadin, que les Mahometans tiennent n'estre encores mort: de sorte qu'ils l'attendent, disans qu'il doit venir conuertir tout le monde: & pour ceste cause à Massadal, où selon eux, ceste conuersion doit commencer: il y a tousiours un cheual en point, que l'on offre à la Mosquee avec grande feste. Or à cause des differents qu'Ally eut avec Bubac, Omar, Ottomar, & Maïe, il y a eu apres de grands débats, pource que les Persans tiennent qu'Ally estoit par le testament de Mahomet déclaré vray Calife, & les Arabes fauorisent les trois premiers. Les choses estant ainsi irresolues, enuiron l'an 1369. les Mahometans, ou Mores (pour suiure la façon de parler plus briefue des Italiens, & Espagnols) se trouuans sans Calife (car ceux-cy finirent l'an 1255. en Mustacen Mumbila, qui fut tué par Allacu Roy des Tartares) il se leua en Perse un nommé Sophy, Seigneur de la ville d'Ardeuel, qui se disoit yssu du sang d'Ally, du costé de son neveu Muse Cercin, qui estoit un des douze fils d'Ocen, en memoire duquel il changea la façon du turban, y adioustant douze pointes, & mist en credit & reputation sa secte. Cestui-cy eut pour successeur Guinne son fils, & ce dernier eust pour le sien Aydar, qui espousa une fille d'Assembec, Prince puissant en Syrie, & en Perse, mais nouvellement estably: mais son fils nommé Iacob Bec le fist tuer, craignant, le credit & l'autorité d'Aydar, puis donna deux fils, d'Aydar, c'est à sçauoir, Ismaël, & Soliman, à Amanzar son Capitaine, avec commandement de les mettre à Zafque, lieu fort, assis aux montagnes: mais Amanzar detestant la cruauté de son maistre, les fist nourrir en sa maison avec ses enfans: & estant deuenu extrêmement malade, ayant peur qu'il leur arriuaist quelque mal, leur donna deux cents ecus, & des cheuaux, leur conseillant d'aller trouuer leur mere. Ismael, qui estoit l'aîné, estant arriué en sa maison, fist aussi tost dessein de venger la mort de son pere: & apres quelques entreprises heureusement executées, prist le tiltre de Protecteur des faicts d'Ally, duquel il descendoit, fist son turban plus haut, & manda des Ambassadeurs à tous les Princes Mahometans du Leuant, les exhortant à receuoir son enseigne avec sa secte. Par ceste voye, & par le moyen de la bonne fortune qu'il eust en ceste entreprise, il se rendit redoutable à tout le Leuant, tua Ocen, qui se nommoit Roy de Perse, avec dix de ses freres: tellement qu'il ne resta que Morabee, qui alla demander secours à Selim premier de ce nom, Empereur des Turcs. Il vainquit en bataille rangée, pres du Lac de Van, Sabacan Roy des Tartares du Zacatay, & voulant poursuiure la victoire, & pour cet effect passer la riuere d'Abbian avec son armée, il en fut destourné par un Astrologue, auquel il adioustoit beaucoup de foy, qui luy dit qu'il voyoit beaucoup d'heureux succez à l'aller, mais qu'il ne voyoit aucune disposition pour le retour. Cestui-cy laissa à ses successeurs un tres-grand Estat, qui contient beaucoup de grands païs, qui le recognoissent tous pour souverain, combien qu'ils ne fussent pas tous immédiatement sous la Couronne, comme le Royaume de Macram, de Patany, de Guadel, & d'Ormus, qui est maintenant tributaire des Portugais. Les Georgiens luy obeïssent aussi, ou du moins faisoient la guerre sous luy: mais pour le iourd'huy l'Empire du Sophy n'a pas ses bornes si esloignées, & est limité de ceste sorte.

Il est assis entre l'empire du Turc, les Tartares du Zacatay, le Royaume de Cambaye, la mer Caspie, ou de Bachu: & le Golphe de Perse: Tellement que du Leuant il est séparé des Indes, & du Royaume de Cambaye par des deserts, & des Montagnes, & cōfine du Nort en partie avec les Tartares, pres du fleue d'Oxe, ou d'Abiani, en partie avec la mer de Bachu: du Couchant avec les Turcs pres de la riuere du Tygre, & du Lac de Gioco: & du Midy, il est borné du Golphe de Perse.

Cet espace de terre est fort grand, & comprend environ 38. degrez du Levant au Couchant veu que son Meridien plus Oriental est au degré 120. & le plus Occidental passe par le 28. de gré de l'Empereur. Apres cela il occupe du Sud au Nord environ 20. degrez, c'est à sçavoir de pais le 23. degré iusques au 43.

- 3 Or le Royaume de Perse contient les Prouinces de Medie, d'Assyrie, de Suse, de Mesopotamie, de Perse, de Parthie, d'Hircanie, de Margiane, de Baëtre, de Paropamisè, d'Arie, de Drangiane, de Gedrosie, & de Carmanie : & combien que le Turc en ayt gaigné quelques-vnes, toutesfois le Sophy en a recouuert aujourd'huy la plus grande partie.

La Medie se nomme pour le iourd'huy Seruan, & borne du Levant avecques l'Hircanie, & la Parthie, du Couchant avec la haute Armenie, & l'Assyrie du Midy avec la Prouince particuliere de Perse, & du Septentrion avec la mer Caspie. Ce fut autresfois le pais le plus puissant de l'Asie, & estoit diuisé en haute Medie, & Atropatie.

La haute Medie contient maintenant le pais qui est autour de la ville de Tauris, que quelques-vns croient estre mesme chose qu'Ebatane, du moins Ortelius & Minador sont de ceste opinion : au lieu que Paul Ioue tient que ce doit estre Tetua, & Niger Tigranoama, mais fausement selon l'opinion du docte Magin. Ceste ville est assise au pied de la montagne d'Oronte, & esloignée de la mer de Bachu d'environ huit iournees : son circuit est d'environ seize mille, mais elle n'est pas close de murailles. Il y auoit deux cents mille habitans avant qu'Amurat la prist l'an mil cinq cents octante cinq : mais depuis elle a beaucoup perdu, comme l'on tient. Ce fut autrefois le siege Royal des Sophys, auant que Tamas le transportast en la ville de Casbin, qui est la derniere demeure de ces Roys, & plus Meridionale que Tauris. Il y aussi la ville de Turcoman entre Tauris & Casbin, & outre ce en la haute Medie on compte les villes de Situ, de Sultanie, & de Nassuan, qui est, selon quelques-vns, mesme chose que l'ancienne Nasuane, ou Artaxate. On y void aussi la ville d'Ardoüille, en laquelle ont regné Guinet, Sederin, & quelques autres auteurs de la secte des Sophys. On y compte semblablement Marant au bout de la Medie, & Sancazin lieu proche de Tauris, renommé par la guerre, qui a esté entre Amurat Empereur des Turcs, & du Sophy de Perse. Et combien que les Turcs ayent tenu assez long temps vne partie de ce pais, si le peut-on bien attribuer auourd'huy au Roy de Perse, d'autant qu'il a tout reconquis sur le Turc depuis peu d'annees.

L'Atropatie est la plus Septentrionale partie de la Medie, pres de la mer de Bachu, & est separée de l'Armenie par la riuere de Canat : sa ville capitale est Sumaquié, assise entre Derbent, & Eres. Il y a encor les villes de Sechi, sur les frontieres de Gurgestan, Iauat aux confins de la haute Medie, & Eres, qui a esté iadis renommée à cause de la grande quatité de soye qui en venoit.

- 4 L'Assyrie, que Niger nomme Adrise, Giraua Azemie, Pinet Moul, Mercator Sarh, & Castald Arzerum, & à qui quelques-vns donnent aussi le nom de Cussestan, est assise entre la haute Armenie du Septentrion, la Mesopotamie du Couchant, la Susiane du Sud, ayant des montagnes entre deux, & le pais des Medes du Levant. Elle a esté iadis en reputation à cause de l'Empire qui y estoit estably, & de la ville de Ninie, assise pres de la riuere du Tygre, & plus grande que Babylone. Elle contenoit iadis les Prouinces d'Arapachir, d'Adiabén, & de Sittacen, que quelques-vns nomment auourd'huy Botan, Sarca, & Rabia.

- 5 La Susiane, ou la province de Suses, à qui Niger donne le Nom de Chus, & Mercator de Cusistan, & bornée du Nord de l'Assyrie, du Couchant de Babylone pres de la riuere du Tygre, du Levant d'une partie de la Perse, & du Midy du Golphe Persique. Elle a pris ce nom de Susiane de la renommée ville de Suses, qu'on appelle maintenant Chus, selon Niger, & selon quelques autres Sustré, & qui est bastie sur la riuere d'Enele, maintenant Tirtir, & auoit iadis quinze mille pas de tour, étant plustost longue que d'autres figures.

- 6 La Mesopotamie nommée dans l'Ecriture Aram, ou Charam, & pour le iourd'huy Diar-bech, selon Mercator : mais seulement partie de l'Azemie, dont l'Assyrie fait le reste, selon Belon, est assise entre les deux fameuses riuieres d'Euphrate, & du Tigre, & a pour ses bornes du Septentrion la haute Armenie, pres du mont Taurus, du Couchant la Syrie pres du fleuve Euphrate, du Levant l'Assyrie separée par le Tygre, & du Midy l'Arabie deserte. Ses principales villes sont Orsé qui a sept mil pas de circuit, & est renommée pour la mort de Crassus, Caramit, c'est à dire, En Turc ville noire, & se nommoit iadis Amida, & est au pais qu'on nomme Alech, & capitale de toute la Mesopotamie, qui fut prise par Selim Empereur des Turcs, Merdin siege du Patriarche des Caldeens, & Mosus siege du Patriarche des Nestoriens, dont l'autorité s'estend iusques au Cathay, & aux Indes.

- 7 La particuliere prouince de Perse, fust iadis nommée Pantaie, du nom de son Roy Pantee, puis les Grecs luy donnerent le nom de Cephee, & apres elle receu celui de Perse, à raison de Persee, qui fut transporté de Grece en Asie : mais maintenant elle s'appelle Erasi, ou Frastan, selon Mercator, combien que quelques-vns estiment que ce soit l'Azemie, & que Cedren
nomme

nommée là dedans, du pais Chérasan. Elle a pour bornes du costé du Nord la Medie, du Couchant la Susiane, du Levant la Carmanie, & du Sud le Golphe de Perse qui reçoit son nom de ceste prouince, & s'estend au long d'icelle de la longueur d'environ six mille pas : Sa ville Royale c'est Siras, qui se nommoit iadis Persépolis, selon quelques vns, ou Cyropolis selon les autres, & fut autresfois la demeure des Mages Roys d'Orient. C'est aujourdhuy vne des plus belles & des plus grandes villes du Levant, veu qu'elle a vingt mille pas de tour, en y comprenant toutesfois les faubourgs, & est assise sur la riuere de Bindimir, & contient soixante mille maisons.

La Parthie, maintenant Charassen, selon Niger, prenant ce nom de sa ville capitale Charas, selon Mercator nommée Arach, ou selon Alphonse Hadrian Iex, a pour ses confins du Levant la Prouince d'Arie, du Midy la Carmanie deserte, du Couchant le pais des Medes, & du Septentrion l'Hircanie. Ses principales villes sont Cassan, qui est fort riche, Sembran, Teracan, Amadan, Imammadulasat. Malam, Massiar, Sasuar, Coran, Culbat, Cur, Cien, Turbat, Tur-sus, & autres : Mais la capitale est Hispaham, que quelques vns disent estre l'Ecatompyle des anciens, & qui est si grande & si belle, que les Peres disent que c'est la moitié du monde.

L'Hircanie est nommée par quelques Barbares, selon Niger, Girgiam, ou Corcam : mais il dit qu'elle est nommée Mesandre du costé des villes de Strahue, & d'Errit minado, escrit que toute l'Hircanie s'appelle Mesandre, mais Erythree la nomme Hyrach. Marie Angiolisse luy donne le nom de Straue, & Mercator de Diargument. Ses limites sont du Couchant la Medie, du Levant la Margiane, du Midy la Parthie, le mont Coron estant au milieu, & la mer de Bachu du Nord. La capitale ville de ceste prouince est appelée Hyrcan, & est tres forte d'assiette : Les Scythes la nomment Charizat selon Plin : Les autres villes Bestan, Mesandran, & quelques autres.

La Margiane est nommée Tremigan par Pinet, & Niger tient que c'est vne partie de la Tartarie de Zacatay : mais Castalde, & quelques autres l'appellent Iesilbas. Elle a pour ses limites du costé du Levant la Bactriane, du Couchant l'Hircanie, du Septentrion la riuere d'Oxe, & du Midy vne partie de l'Arie capitale ville de la Margiane est Antioche, à qui quelques vns donnent aujourdhuy le nom d'Indioy. On met icy le marest d'Oxiane, qu'on nomme maintenant le lac de Barbacamber, ou de Maru.

La Bactriane porte aujourdhuy le nom de Battet selon Ramusius, mais Castol, & d'autres la nomment Charassen, & Niger veut que ce soit vne partie de la Tartarie de Zacatay. Elle a pour ses bornes du Levant & du Septentrion la Zogdiane pres de la riuere d'Oxe, & du Couchant la Margiane pres des montagnes, & du Midy la Prouince d'Arie, le mont de Paropamisse estant au milieu. Il y a eu anciennement de belles villes en ce pais, dont quelques vnes furent basties & ruinees par Alexandre. Mais la ville Royale fut Bactre, qui tira ce nom d'une riuere, qui s'appelle aujourdhuy Bochara selon Niger, & selon le mesme est encor capitale du pais, & lieu de la naissance du Medecin Auicenne & de Zoroastre. Quelques autres disent qu'Istigia est la capitale ville de ceste Prouince, qui n'est pas toute sous la domination des Sophis.

Le Pais de Paropamisse, ainsi nommé, pour ce qu'il est fait en façon d'Isle, veu qu'il est entouré de riuieres presque de tous costez, a le nom de Dache selon Niger, mais Minadoc luy donne celui de Candahar, & les autres de Sablestan : Ses limites sont du costé du Nord, vne partie de la Bactriane pres du mont de Paropamisse, du Levant l'Arie, du Sud l'Arosie, & du Levant les Indes. Gandahar est la ville capitale du pais.

L'Arie, à qui Niger donne encore aujourdhuy mesme nom, & les autres celui d'Eri, est nommée par Castalde Corfan, & par Mercator Sernere, est enclose entre la Margiane, & la Bactriane du Septentrion, & a pour sa borne du Couchant la Parthie, & la Garmanie deserte, du Midy la Drangiane, & du Levant le pais de Paropamisse. Il y a en ce pais trois riuieres principales, à sçavoir Arie, Tonelet, & Arapen. On y void aussi le marais Arien, qu'on nomme aujourdhuy le Lac de Burgien : Sa ville capitale est Eri, qui a de tour treize mille pas.

La prouince de Dagiane se nomme maintenant Sigestan, selon Mercator, & plusieurs autres : mais Niger dit que l'Aracolie avec la Drangiane, s'appellent Segestan. Quelques autres disent qu'on nomme cela le Royaume de Cabul, qui est sur la frontiere du Royaume du Sophy costé de l'Ouest, & qu'il y a vn Roy particulier qui est Mahometan : Ses bornes sont du Nord, & de l'Ouest l'Arie, au dessous du mont Bagoé, du Midy vne partie de la Gedrosie, & de l'Est l'Aracolie. Ceste Prouince est diuisée en deux par la riuere de Drangie, que les nouveaux faiseurs de cartes nomment Ilment : & ce pais est tellement clos de montagnes, que ceste riuere ny trouue presque point de passage.

La Gedrosie porte aujourdhuy le nom de Charman, selon Niger, & de Circan, selon Castalde. Mercator la nomme Gest, & Giraua & Moler l'appellent Guzarate : mais c'est chose

assuree que Guzarate est le Royaume de Camboye. Elle a pour ses limites du Septentrion la Drangiane, & l'Aracofie, du Couchant la Carmanie, du Levant vne partie des Indes, ou le Royaume de Camboye, & du Sud la mer des Indes.

La Darmanie, aujourdhuy Chermain, est diuisee en deux selon Ptolomee: Vne partie s'appelle deserte, & l'autre est comprise sous le seul nom de Carmanie, & est nommee la haute, par quelques autres. Quelques-vns la nomment maintenant Culcinde la Carmanie deserte, ou il n'y a nulles villes, mais seulement quelques villages fort espars. Ses limites sont du Septentrion, la Parthie, du Couchant vne partie de la province de Perse: du Midy l'autre Carmanie, & du Levant l'Arie.

- 16 L'autre Carmanie est assise entre la Gedrosie deserte, vne partie de la Perse, & la mer Indique, & est appelée haute, ou grande, pour la distinguer de la deserte. Toute ceste Prouince a d'estendue pres de la mer deux cents lieues: mais il n'y a nul bon port, ny abort pour les nauires, à cause des escueils & des bancs. La ville capitale du Pays est Chirman. Quelques vns diuisent aujourdhuy la Carmanie en deux parties, dont l'une se nomme Dulcinde, & est la partie plus Orientale aux frontieres de la Camboye, & contient les Royaumes de Macran, Eraçan, Guadel, & Patan, qui estoient iadis tributaires des Roys de Perse: & tout ce pais-là est mal habité. L'autre partie de Carmanie est plus Occidentale, a des portes plus commodés, & beaucoup de villes.

C'est succinctement ce qu'on en retrouve parmy les auteurs, & les relations de quelques-vns qui ont voyagé en ces contrees-là: mais il semble que l'exiere, duquel il sera parlé cy-apres particulièrement, l'ait aucunement mieux distinguée, nommant toutes choses par leurs noms propres, faisant par ce moyen cognoistre & remarquer plus clairement les lieux où se sont passées les actions pour signalees, qui se verront dans le sommaire de l'histoire en suite de ceste petite relation. Car comme il a esté fort exacte à rechercher tout ce qui estoit rare par tout où il a passé: encores s'est il dauantage estudié d'auoir vne plus signalee cognoissance des affaires, & de la situation de ce grand Royaume pour le dessein qu'il auoit d'en escrire quelquesfois l'abregé de l'histoire, comme il a fait. Il intitule donc ainsi ce petit discours, qu'il a escrit sur ce sujet.

REVELATION DES PLUS NOTABLES PROVINCES, ET QUI ONT PLUS LONGVEMENT duré sous la Seigneurie de la Perse.

- 17 **L**A Perse, dit-il, que les naturels du pais appellent Parc ou Agem, d'où vient qu'on appelle communément les habitans Pary ou Agemy, estant vne des plus grandes Monarchies, des plus celebres & plus peuplées qui soient au monde, ne se peut pas decouuoir ny borner certainement pour la varieté qui se trouue en la domination, les Royaumes & prouinces de laquelle ont esté tantost de fort grande, & autresfois de bien petite estendue, desquelles ie rapporteray brieffuement celles qui ont le plus longuement persillé sous ce Gouvernement, & qui ont le moins changé, & des principaux peuples encore, pour seruir de plus grande lumiere à ce qui en a esté escrit, laissant le dire de la situation aux professeurs de la Cosmographie.
- 18 **P**A R C. Ceste prouince n'est pas des plus grandes du Royaume, ayant la grande & noble ville de Seyraz pour capitale: elle est abondante en bleds, chairs & fruiçts, ayans grande quantité d'eaux roses, & de cordoüans, ou marroquains: desquelles choses elle fait vn grand trafic avec tous les Royaumes sujets à la Perse, on y travaille aussi en quelques estoifes de soye de celle qui croist aux environs. Celle qui par apres a le plus de reputation, c'est la ville de Lar ou Lara, comme disent les Portugais, de laquelle les Laris ont pris leur nom, vne sorte de monnoye d'argent tres-fin, fort cognüe, & qui a grand cours par tout l'Orient. Ceste-cy est chef d'un Royaume, on y fait les meilleurs arcs pour tirer qui soient en toute la Perse. En ceste ville au mois de Septembre, l'an de salut 1593. il s'y fit vn si grand tremblement de terre, qu'outre plus de 1200. maisons qui furent renuersees, la plus grande partie des murs fut ruinee, & plusieurs cisternes (car ils n'ont point d'autre eau en ces quartiers là que celle qui vient de la pluye) & fit mourir trois milles personnes. Il y a encor en ceste prouince de Parc, Tarom, Iaharom, Kazron, & Lastam, qui porte l'Ingo (qui est Lassa tretida Strahabânôn, les habitans de laquelle sont tous chauues) Neri, les termes de laquelle sont abondantes en veines de fer & de fin azur: il se fait la aussi de fort bonnes armes, & autres choses fort curieuses, Paçah & Daraguerd celebres à cause des fruiçts verds & secs dont ils ont en abondance avec de l'eau rose. Il y a encore outre ceux-cy plusieurs autres lieux qui sont de moindre estime.

Hienak.

Hienak. C'est vne autre province de la Perse, grande & importante, qui a pour sa métropole ¹⁹politaine Lulphaon, Cité fort peuplée, & qui a esté quelques fois le siège des Roys de Perse: Il y a vn fort grand commerce, estant bienourny de tout ce qu'il luy est nécessaire. Les lieux & villes plus remarquables de ceste province sont Yard renommée, non pour sa grandeur, mais pour estre fort plaisante & délicate, & pour les riches tapis Persiens qui se font en icelle, qui sont les meilleurs de tout le monde. Il y aussi quantité de soye & d'excellente eau rose.

Kachon est renommée pour la grande abondance de soyes de toutes sortes qu'ils ont là ²⁰dedans. Son territoire est fort fertile en toutes sortes de fruits, entre lesquels on fait fort cas de coings de Kachon, comme fort excellents. Il y a encor Kom, Saoah, Kazuin Cité célèbre, la Cour, à présent des Roys de Perse, depuis la dernière perte de Tabriz, Amedon, Nuhaoand, Iargazin, Damaoand, Taharon, Rey Charear, où on recueille grande quantité de manne, mais non pas de la plus pure, & plusieurs autres lieux de moindre réputation.

Aderbion, ou Azarbaion. Quant à ceste province elle est fort grande, la principale ville, ²¹de laquelle est la fameuse Tabriz, la Cour des Roys de Perse, auparavant qu'elle fut en la puissance du Turc: on retrouve en elle abondance de plusieurs choses rares, estant outre cela fort bien fournie de tout ce qui luy est nécessaire: elle a aussi vn grand commerce avec la Russie, Pologne, Moscovie, Circassie, Gurgestan, & avec toutes les provinces de Perse: elle produit de l'argent en quelques endroits, quantité d'alun, & de garance ou pastel, que les habitants appellent Calanges. En ceste province il y a encor Seyrnan, Naxtohan, Hordobat, Ardaueil, ou Hardeuil, Halkhan, & plusieurs autres.

Gueylon, ou Guylan. Ceste autre province est sous la domination de la Perse, & de grande ²²estendue, aussi contient-elle plusieurs grandes & riches contrées: elle costoye la mer Caspienne, qui a pris son nom de ceste province: car les Perses l'appellent *Daryah Guyluny*, c'est à dire Mer de Gueylon, elle est diuisée en cinq Gouvernemens, les Citez principales desquels sont Rach, Laion, Gaechkar, Langar, Canou, Kudam: & quant à Gueylon ils l'appellent communément *Eusafed*, c'est à dire l'Inde blanche, à cause que c'est vne terre plaisante & fertile: elle confine la Moscovie, que les Perses appellent Moscuu.

Ces villes suivantes sont sur le riuage, & aux environs de la mer Caspienne.

Mazanderon, Strabat, Bostam, Sabzabath, Nichabur, d'où sont venus les Turcs, & ²³autres qui toutes souloient estre iadis chefs des Royaumes & Provinces: mais maintenant elles sont reduites sous des Gouvernemens particuliers de la Perse: toutes ces Citez sont fort peuplées.

Karason. Les Portugais l'appellent communément Corasou, qui est vne autre province sujette au Royaume de Perse, en laquelle il y a plusieurs peuples & villes de fort grande réputation: la première de toutes lesquelles est Meched ville grande & peuplée, & en laquelle les Roys de Perse, & depuis encor Schaeh Ismael Sophi ont leur sépulture. Il y a aussi la ville de Thun tres-abondante en plusieurs fines soyes: Tabas fort peuplée, Kahera fertile en safran, Hrey où se recueille grande quantité de tres-bonne manne: les murs de laquelle sont baignez de la fresche riuere de Habra, Marvvo, Herat, & autres en grand nombre. On tire aussi de ceste province grande quantité de tapis Persiens, de l'assa fretida, & autres choses, abondantes encor en ce qui est nécessaire pour la vie: elle auoit esté tousiours sujette aux Roys de Perse: mais elle est maintenât en partie sous la domination des Vlbeques, qui les voyans occupez à la guerre contre les Turcs, entrèrent en leurs terres, & s'emparèrent en ceste province de beaucoup de places.

Kermon. Ceste province est entre la Perse & Karason, la Cité principale de laquelle ²⁴s'appelle du mesme nom, qui est fort peuplée, mais qui n'est pas fort vieille: elle donne quantité d'eau roses, de tapis Persiens, Tutie, de l'herbe contre les vers, & du sumach.

Il y a encor en la Perse plusieurs autres Provinces.

Sagistam, Turbastam, Kablestam, Nim, Rut, Sphaar, Siftam, Curdestum, Lorestam, & plusieurs autres qui ne sont pas si célèbres, lesquelles ne sont point nommées icy, de crainte d'ennuyer le Lecteur.

Toute la terre de Perse, ou pour le moins la plus grande partie est fort bien fournie de bleds, de chairs, de fruits verds & secs, tant de ceux de nostre Europe, que d'autres, le tout à bon prix: le peuple est blanc, beau, & de gentile disposition: leur habillement est quasi semblable au Turquelque: ils suivent la secte de Morth Aly, qui est différente de quelques articles de celle de Mahomet. Ils combattent pour la plupart du temps à cheual, avec la lance & l'esu; les arcs, les fleches, le coutelas, ou cimeterre, chemise de mailles, massés à la genette: Ils sont forts en la guerre, & souffrent beaucoup en icelle. Les Perses sont tous addonnez à la lecture des liures, dont ils font grand cas. Il sont fort vertez à la Poésie, en laquelle ils ont eu des hom-

mes fort excellens, lesquels leur ont laissé des œuvres fort polies. Ils sont d'amoureuse complexion, & ont la cognoissance de tous les arts & sciences speculatives, & les Professeurs d'icelles les traittent avec beaucoup de curiosité & de subtilité. Leur droit commun ne tient point plus de volumes que celui de la secte de laquelle il font profession, commettant l'administration de la iustice à personnes de reputation. Les hommes y sont fort jaloux, & les femmes peu chastes. En fin la Perse est vne des plus polies Monarchies du monde, & qui ne doit pas estre mise entre les plus petites.

Il viennent ordinairement de toutes les parties de la Perse à Harmuz de grandes caravanes pour trafiquer avec les Portugais, & beaucoup de Chrestiens, Gentils & Mores qui y resident, avec lesquels ils trafiquent de ce qu'ils ont; à sçavoir, or, argent, soyes estilees & mises en œuvre, des brocardors, tapis Persiens, cheuaux, pastel, alun, thutie, rheubarbe, eau rose, & autres diuerses marchandises, comme en contre-eschange ils enleuent de là des robes & des toques tres-fines, du cloud, de la canelle, de l'agnus castus, cardamome, gingembre, du macis, noix muscades, du sucre, de l'estain, du sandal, & sapin qui est du bois de bresil, de la porcelaine de la Chine, du musc, de l'ambre, bois d'aloës, pierres fines, semence de perles, de l'Inde (couleur qu'on employe au lieu de pastel) de l'acre, & plusieurs autres sortes de choses. Les Perses n'ont point d'autre navigation que celle de la mer Caspie, & quelques-vns qui passent en l'Inde le font par Harmuz en nauires Portugaises, ou autres avec leur permission.

Tous les habitans de Perse sont Mores Chyays, qui font la meilleure partie, ou Payens Garyazdye qui adorent le feu, lesquels, bien qu'ils soient plusieurs, sont peu toutesfois au regard des autres. Il y a aussi des Juifs qui vivent en leur liberté par toutes les prouinces de la Perse, & y ont bien de huit à dix mille maisons. Il n'y a pas peu aussi de Chrestiens, Armeniens, & Nestoriens.

25 **MAVRENAHAR.** Ainsi appellent-ils les terres qui sont au delà du fleuve Getum, qui les separe du Karason, là est Koarrazin & Gazuetien, apres suit Turquestan, Vsbeke, Tatur Keato, Kotan, & autres quasi sans nombre, non moins riches & opulentes que belliqueses.

26 **VSBEKE.** C'est vne tres-grande prouince, & qui auoit esté de tout temps sujette à la Perse, maintenant elle n'en est pas seulement separee, mais luy fait la guerre, & luy a vsurpé quelques terres de sa domination. Ceste prouince est d'une fort belle estendue, & contient plusieurs peuples & Citez de reputation: La metropolitaine est Balk, là est aussi Samarkand, patrie de Teymurlangh, Damarand, Bokara, patrie de Boaly, ou Auicenne, Kachghar, & Achghar, d'où vient la bonne rheubarbe, & plusieurs autres choses.

Les habitans sont bellicieux, ils combattent à cheual avec l'arc & les fleches, la lance, l'espee, l'escu, & la cotte de maille, fuyant tousiours: mais ils n'ont pas laissé de nos iours d'accroistre beaucoup leur Seigneurie, entre autres ils ont conquis le Royaume de Kandar, le Roy duquel il y a quinze ans, se voulant fortifier, se fit vassal du grand Mogal, lequel encore qu'il soit bien puissant, n'a peu toutesfois le reestabli en son Royaume. Les Vsbeques n'ont point de Roy qui vienne à la Couronne par heredité, mais quand le chef qui les gouverne est mort, ils en elisent vn autre. Ces peuples sont membrus & forts, & parlent du milieu des narines comme les Chinois, ausquels ils ressemblent fort en gestes, en façon de faire, & en leur prononciation: c'est ce qu'en dit sommairement Texiere, qui sert comme d'une introduction à son histoire, d'autant qu'il parle de tous ces peuples, & les noms estans changez, & ne se rapportans nullement aux anciens, le Lecteur se trouueroit quelquefois bien embrouillé aux narrations qui s'y rencontrent, principalement aux temps que les affaires de Perse ont esté en plus grande confusion.

QUALITÉ.

EN toute ceste longue estendue de pais, on trouue vne grande difference touchant la qualité de la terre, veu qu'en quelques endroits elle est extrêmement fertile, comme du costé du Golphe Persique, à cause du grand nombre de riuieres qui l'arrosent, & pareillement du costé de la mer Caspie, tant à cause de la commodité des fleuves, qu'à cause aussi que l'air y est plus temperé, & le vent plus frais. Le reste est du tout sujet à la secheresse, & despourueu d'eaux, & il y a beaucoup de deserts, & des montagnes fort aspres. Dauantage il n'y a point de riuere commune, & mesmes tous les fleuves y sont fort peu nauigables, toutesfois le pais abonde en metaux & en pierrerie. Mais il faut esplucher toutes les parties de cet Empire, & considerer la qualité de chaque prouince.

Quant au pais des Medes, il est pour la plus grande partie, montueux & froid, principalement du costé du Nord, à raison dequoy l'on y void peu de grains, & l'on n'y trouue presque que des fruits des arbres, & des bestes sauages: Car le bled n'y vient guere bien, & l'on n'y nourrit

point d'animaux prîvez: Mais la partie qui est du costé du Midy abonde au possible en froment, en vin, & animaux domestiques. La haute Medie iouit d'un bon air pres de Tauris, combien que les vents y regnent, & qu'il y face vn peu froid. Le terroir de ceste ville est fertile en toutes choses. Quant à l'Atropatie elle est fort fertile à cause des riuieres d'Araxe & de Cire qui l'arrosent: & il y auoit iadis grande quantité des soyes.

L'Assyrie est vn pais plain, abondant en fleuues, & fertile au possible. Quant à la Susiane du costé du Golphe Persique, elle est marescageuse. Il y fait extremement chaud à cause de quelques montagnes fort hautes qui y sont du costé du Nord, & qui la deffendent de ce vent de bize. Il produict force froment, & grande quantité d'orge, toutesfois il y a quelques lieux pleins de bitum, où les plantes ne croissent que malaisémēt: & les eaux qui en sortent sentent le bitum, & engendrent du mal aux intestins, à raison dequoy les hommes y vivent fort feu. Il y a sur tout force napte qui sorte pres de la ville de Suze. On y trouue aussi grand nombre de serpens dangereux, & qui font beaucoup de maux aux personnes.

La Mesopotamie est merueilleusement fertile en quelques endroicts, & propre à la nourriture du bestail: mais en quelques autres endroicts elle est si sujete aux grandes ardeurs, que beaucoup d'animaux y endurent pour son extreme chaleur. Il y a en ces lieux-là bien peu de fontaines, & mesmes les habitans sont si rusez & si malicieux qu'ils les cachent. Il fait fort mauuais en Hyuer en ce pais-là, à cause de la bouë, d'où ceux qui voyagent ne peuuent presque retirer leurs pieds. Il y a encor en ceste prouince de grands deserts, & beaucoup de lieux de grande estendue, où l'on ne trouue que sable, sans y pouuoir appercevoir aucun fruit. Toutesfois il y vient de l'ammone qui est vne drogue de bonne odeur. Il y vient aussi force naphete, ou bitum liquide. Le terroir de la ville de Caramit est noir & fertile au possible: & celuy de la ville de Merdin abonde en coton.

Quant à la Prouince de Perse elle est de diuerse nature, veu que sa partie Septentrionale est montueuse & froide, & peu propre à porter des fruits. On y trouue des Emeraudes, mais elles ne sont gueres claires. Le milieu de ce pais est assez plein, & pourueu de beaucoup de riuieres & de lacs, & produict abondamment toutes choses. Mais la partie qui tire vers le Midy, & qui tend au Golphe Persique est chaude, venteuse, & marescageuse, & ne porte autre fruit que des dattes de palmier.

Pour le regard de la Parthie elle est fort pleine de bois, & ceinte de fort hautes montagnes, & combien qu'elle soit sujete aux grandes chaleurs, elle porte toutesfois toutes choses, & principalement de grands arbres, mais elle ne porte nuls oliuiers. Elle est arrosée d'une assez grande quantité d'eaux.

L'Hircanie est pleine & fertile, veu qu'elle produict en abondance du froment, du vin, des figues, & des fruits, & portent aussi des arbres qui distillent du miel, y fait aussi force soye. La partie qui tire vers le Septentrion est pleine de grandes forests, où l'on void force chesnes, pins, sapins, & il y a aussi grand nombre de bestes sauages, comme Tygres, Pâtheres, & Leopards: mais la partie qui est proche de la mer de Bachu est tousiours pleine d'herbes, & de fleurs, à cause de l'humour des eaux douces qui sortent des rochers qui sont au dessus.

La Margiane est pour la plus grande partie deserte, & pleine de sable, excepté la partie qui est arrosée des riuieres de Marge, d'Arie, veu que cét endroict est fertile au possible. La partie deserte est maintenant appelée le desert de Bigul: mais celle qui est cultiuee fut iadis nommée le champ Margien, ayant de tour cent quatre vingts & dix mille pas, Antiochus Soter, selon Niger, l'environna de murailles; car c'est vn lieu où il vient de beaux ceps de vigne, qui sont tels, que deux hommes n'en peuuent quelquesfois embrasser vn seul. Ces ceps portent bien souuent des raisins de deux coudées de long, & la nature du terroir, & l'air de ce lieu porte, qu'il n'y a que cét endroict en toutes ces contrees, où l'on voye des vignes, & qui est plus admirable: ce pais est de tous costez entouré de montagnes, & presque par tout de sable.

La Bactriane est de diuerse nature, veu qu'elle est cultiuee en partie, & en partie deserte: La partie cultiuee est proche de la riuiere d'Oxe, & produict du froment, & choses semblables. Il y a d'assez bons paturages, & beaucoup d'eaux, & elle porte presque toutes sortes d'arbres, excepté l'oliuer: Quant à la partie deserte on n'y voit rien que du sable, & les voyageurs y passent comme en vne mer, en se conduisant par les estoilles, d'autant que bien souuent il n'y a point de chemin à cause du mouuement du sable, principalement lors que le vent d'Oüest vient à souffler, qui remue quelquesfois tellement le sable, que les passans en demeurent couuerts, & y meurent: Dauantage ce pais produict des metaux, & quelques pierres precieuses, comme des esmeraudes, hyacinthes, & chrysolites, & est arrosée de plusieurs riuieres, qui se rendent toutes dans l'Oxe.

La prouince d'Arie est sujete aux grandes chaleurs, & environnée de deserts & de forests, & de montagnes. Et a toutesfois quelques lieux champêtres qui portent des fruits, pres des

montagnes qui les defendent de l'ardeur du Soleil. En ces champs, outre les autres fruits, il y vient de bon vin, qui dure iusques à nonante ans. On y recueille aussi vne drogue semblable à la myrrhe, & il y vient aussi des saphirs noirs, & comme iaunes.

La Georosie est pour la plus grande partie deserte, & pleine de sable, & à grande faute d'eau, combien qu'elle ait des pluyes en Esté, & est sujette aux ardeurs du Soleil, à raison dequoy elle est infertile : toutesfois elle produict le nard & la myrrhe.

La Caramanie deserte est aussi infertile, & exposée aux grandes chaleurs, & quant à la haure, les endroiës maritimes sont deserts & desnuez d'arbres, excepté qu'on y voit des palmiers, de la branche Vrsiue, & des bruyeres : mais le milieu du pais est assez bon, & porte beaucoup de fruits, mesme de bon vin.

MOEURS ANCIENNES.

Les Roys Persans faisoient bastir leurs Palais sur des montagnes, où ils tenoient leurs thresors, & argent des tailles, & tributs leuez sur le peuple, & ce en tesmoignage de leur espargne & bon meynage. Or ils exigeoient les gabelles & les tributs, & les peages diuersement, prenant argent du trafic qui se faisoit sur mer, mais de ce qui passoit en terre ferme, ils se contentoient des choses dont chaque pais abondoit, comme laines, drogues, medicaments, & choses semblables, iusques à y comprendre le bestail. Quelque grandeur que le Roy eust entre les Perses, il n'eust olé faire mourir vn homme s'il n'auoit commis qu'un simple crime, & nul Persan ne pouuoit vser d'aucune rudesse contre ses domestiques. Chacun espousoit plusieurs femmes, afin d'auoir lignee, & encore il luy estoit permis d'auoir grand nombre de concubines. Aussi les Roys proposent prix & recompense à ceux qui en vn an engendroient grande multitude d'enfans, lesquels estans nez, n'estoient representez à leurs peres qu'ils n'eussent atteint l'age de cinq ans : car la loy du pais vouloit qu'ils fussent nourris durant ce temps delicatement en la compagnie des femmes. La raison de cecy estoit, afin que si durant ce temps quelque enfant venoit à deceder, le pere ne l'ayant pas veu n'en receut si grande fâcherie.

Ils celebrent leurs nopces sur le Printemps, environ l'Equinoxe. La premiere nuit l'Espoux ne mangeoit en tout son souper qu'une pomme, ou quelque peu de moëlle de chameau, & apres cela s'alloit coucher le long de son Espouse.

La ieunesse de Perse, dès le cinquiesme an de son aage iusques au vingtquatriesme, apprenoit à se tenir à cheval, à voltiger, à tirer le dard, & la fleche, & sur tout à parler veritablement. Aussi les ieunes gens auoient pour maistres & gouuerneurs les plus sages & vertueux, sobres & continens qu'on pouuoit choyrir, qui leur enseignoient, & racontotent des histoires & fables honnestes, les louanges des Dieux, & des chansons qui contenoient les faicts des vaillans & illustres personnages, & ce quelquefois en chantant, & d'autrefois en leur recitant comme vne leçon. Les enfans s'assembloient pour ouïr cela au son d'une clochette, au lieu ordonné pour cet effect, & là l'on demandoit conte aux enfans de ce qu'ils auoient ouy dire. Ils se rendoient fort adroïts à la course, choisissant quelque enfant de grande maison pour leur Capitaine, & falloir que le champ où ils courroient contint au moins trente stades, dont la chacune est de cent vingt-cinq pas, afin de s'endurcir contre le froid & le chaud : ils exerçoient à passer à nage les torrens & les riuieres impetueuses, trouuillant tousiours sans cesser, & estant soigneux de tenir leurs habits bien nets, & leurs armes sans rouilleure. Leurs fruits plus delicieux estoient les raisins du Terebinthe, qui est l'arbre qui porte la poix-raisine, & les glands, & les poires sauuages & aigrettes, leur viande ordinaire apres auoir couru, sué, & travaillé en leur long exercice, estoit du pain tres-dur, d'assez mauuais goust, du cresson alenois avec vn grain de sel, de la chair bouillie & rostie, & de l'eau claire pour tout breuuage.

Lors qu'ils alloient à la chasse, ils suiuoient leur proye à cheval avec des dards & iauelots acerez, & force fleches, & vsoient aussi du iect de la pierre avec des fondes. Leur ordinaire exercice auant Midy estoit de planter & enter les arbres, d'arracher les racines, de s'occuper au iardinage, & à cultiuer les terres, ou à forger, tremper, & accoustre leurs armes, & d'autres s'amusoient à tistre de lin, ou à faire des filets pour la chasse, & la pesche. Les enfans estoient parez richement, & nourris si delicatement durant leur enfance, qu'il n'estoit permis de les mener à la chasse.

Ils auoient vne certaine pierre nomme Pirtope, de grand prix entr'eux, qu'ils n'eussent pour rien laissé toucher à vn corps mort, tant ils l'estimoient, & le feu mesme n'estoit point porté aux funerailles, afin qu'il ne semblast qu'ils tinssent peu de compte de celui qu'ils auoient en si grande reuerence. Dès l'age de vingt ans iusques à cinquante ans, ils suiuoient les armées, ne scachât que c'estoit de plaider, ny du trafic de marchandise. Ils vsoient de petits boucliers faits en forme

forme de lozange, & outre le carquois & l'arc ils portoient l'espee & la dague allant à la guerre, & vn bonnet fait en pointe, & auoient deuant le corselet fait d'escaille bien forte. Les Princes portoient des hauts de chausses, & leur hocqueton à manches venant iusques aux genoux, & doublé de blanc, & par le dehors peint ou teint diuerfement : En Esté ils alloient vestus de pourpre, & en Hyuer diuerfement, & selon leur fantaisie : Le peuple portoit double habit, qui leur alloit iusqu'à my-cuisse, & en teste vne grande entortilleure de linge, presque semblable à leurs turbans du iourd'huy. Leurs lits & vases à boire estoient enrichis d'or : Ils consultoient de leurs affaires à ieun, mais ils n'en prenoient ny donoient resolution qu'apres auoir bien beu, estimant les affaires mieux traitées, quand l'estomac & le cerneau estoient vn peu eschauffez de vin, que lors que le ieune les rendoit languissans & sans force.

Ceux qui s'entrecognoissoient & estoient esgaux en fortune, aage & grandeur, se caressoient en se rencontrant, & le baisoient à la bouche. Ils baisoient ceux qui estoient vn peu moindre qu'eux à la iouë : mais ceux qui estoient de basse condition passant deuant les grands leur faisoient vne grande reuerence. Ils enterroient les corps des trempassez oingts de cire, excepté ceux de leurs Mages, qu'ils laissoient sans sepulture pour estre deuorez des chiens. Ils auoient vne sale & vilaine coustume de toute ancienneté, que les fils se mesloient avec leurs propres meres. Ils estimoient vn grand forfait de cracher deuant leurs Roys, & disoient que les Grecs estoient detestables, en ce qu'ils asseuroient que les Dieux estoient sortis des hommes : ils tenoient pour chose vilaine d'estre endebté, mais sur tout de dire mensonge. Ils permettoient aussi aux peres qui tomboient en necessité de se soulager & secourir, en prostituant & abandonnant leurs filles.

Ils estimoient que le Ciel estoit Iupiter, & adoroient le Soleil qu'ils appelloient Mithra, selon quelques-vns, sur toute autre Deité. Ils adoroient encore la Lune, Venus, le feu, la terre, l'eau, & le vent, sans vser toutesfois de statue, ny d'autel quelconque, voire & sans auoir aucun Temple, sacrifiant en lieu haut, & sur quelque coline, afin que chacun le vist, & que la chose fust plus proche des Cieux. Ils offroient la beste du sacrifice à l'autel toute couronnée, mais chargée de maledictions, & apres l'auoir mise en pieces (le Prestre faisant cet office) chacun en portoit sa part en sa maison, sans que les Dieux en eussent aucune reserve : d'autant que leur opinion estoit que les Dieux ne demandoient que l'ame de la chose sacrifiée : toutesfois quelques-vns d'entre eux auoient accoustumé de bruler les entrailles suivant la façon des Grecs, & des autres nations en leurs sacrifices.

Lors qu'ils sacrifioient au feu, c'estoit du bois sec en ostant l'escorce, & iettant par dessus la graisse plus voisine des os, & puis y espendant de l'huyle : Ils ne souffloient iamais le feu avec la bouche, ains avec vn esuentail : & si quelqu'un estoit si hardy que d'y souffler, ou ietter dedans quelque chose morte, ou sale, on le faisoit mourir sans remission.

Il n'y auoit aucun entr'eux qui se lauast dans les riuieres, & nul n'y pissoit, ny iettoit aucune beste morte : voire mesme il estoit defendu d'y cracher, & finalement ils honoroient l'eau en ceste sorte. Lors qu'ils arriuoient pres de quelque Lac, riuere, ou fontaine, ils faisoient vne fosse, dans laquelle ils coupoient la gorge à l'hostie, & beste du sacrifice, prenant sur tout garde que le sang ne coulast point iusqu'à l'eau prochaine, à cause qu'il eust pollué & souillé toute leur ceremonie, & la chair de la beste tuee estoit mise par les Prestres sur du myrth, & du laurier, & brulée avec des buches fort menuës & delices, & non sans vser de certaines imprecations & maudissons, durant lesquelles ils mesloient à leur sacrifice du lait, du miel & de l'huyle. Ces maudissons n'estoient adressees à l'eau, ny au feu, mais plustost à la terre, & ils les continuoient assez long temps, tenant cependant vn faisceau de verges fort menuës de myrth. Celuy qui desobeissoit au Roy, apres qu'on luy auoit coupé la teste & les bras, estoit ietté aux champs : & priué de sepulture.

Quant aux Parthes qui ont esté tenus pour extrêmement vaillans, auant que la richesse les rendissent superbes, ils alloient vestus assez grossierement, & auoient vn habit particulier à leur nation : mais si tost qu'ils furent deuenus puissans, leurs habillemens furent riches, & pleins d'or en toute pierre, ou blancs en perfection, enquoy ils imiterent les superfluités des Medois.

Quant au fait des armes, ils auoient leurs soldats & gens-d'armes non choisis d'entre les hommes francs & libres de condition, mais pris entre leurs esclaves : ce qui estoit cause qu'il n'estoit permis à aucun du peuple d'affranchir vn serf, si bien que le nombre en croissoit de iour à autre, & leurs forces en deuenoient plus grandes. Ils les tenoient aussi chèrement, & les nourrissoient avec pareil soucy, que leurs enfans propres, les dressant à bien tirer de l'arc, & à manier vn cheual, afin de s'en seruir en guerre, & de là venoit que le Roy marchant en guerre auoit tousiours vne puissante caualerie prestre à tous euenemens. Aussi lors qu'ils s'atraquerent à Marc-Anthoine, entre cinquante mille hommes de cheual qu'il y auoit, il ne s'en trouua que huit cents qui fussent de libre condition, tous les autres estans esclaves.

Ils ne sçauoient combattre bras à bras, & venir aux mains en bataille rangée, & moins encor aller à l'assaut de quelque ville, & la forcer. Leur combat estoit à course de cheual, ou en fuyant, & quelquefois dissimulant leur fuite, afin de se ruer sur l'ennemy, s'il se mettoit en desordre, & n'ysoient point de trompettes, ainsi que faict nostre cavalerie, mais de tambours comme nos gens de pied.

Ce peuple faisoit iadis si peu d'estat de l'or & de l'argent, qu'il ne s'en seruoit que pour l'ornement de leurs armes. Quant à la vie priuée, ils estoient fort sujets à leurs plaisirs: c'est pourquoy la pluralité des femmes y estoit receüe: mais ils estoient si ialoux de leur reputation, que la seule mort purgeoit la faute des adulteres. Et afin de ne tomber en tels inconueniens, les marys ne souffroient iamais que les femmes se trouuassent, ie ne diray pas aux festins des hommes, mais en leur presence. Quelques-vns ont laissé par escrit, que les Parthes qui ne pouuoient auoir lignee, produisoient leurs femmes à ceux qu'ils tenoient pour leurs bons amys, afin qu'ils en eussent des enfans par leur moyen.

Ils ne viuoient que des bestes qu'ils prenoient à la chasse, & trafiquoient, & parlemoient ensemble à cheual. La difference des Estats & conditions entre les Parthes, fut iadis remarquable en cecy, que les nobles & francs marchants par pais alloient à cheual, & les serfs alloient à pied comme estafiers.

Les morts n'y estoient guerres honorez, veu que leurs corps estoient laissez sur terre pour la pasture des chiens, & des oyseaux, & lors qu'ils auoient mangé toute la chair, ils enterroient leurs os assez soigneusement.

Ils estoient assez deuotieux, & addonnez au seruice de leurs Dieux, mais superbes, seditioneux, fins, trompeurs, & opiniastres, comme ceux qui tenoient que la cruauté & violence estoit chose vertueuse aux hommes, & la douceur & courtoisie aux femmes. Cela faisoit qu'ils n'estoient iamais en repos, ains falloit, ou qu'ils s'entreussent la guerre, ou qu'ils attaquaient leurs voisins.

Ils estoient fort secrets en leurs affaires, & de peu de paroles, & s'ils obeïssent à leurs Roys & Magistrats, c'estoit plustost pour crainte du chastiment, que pour inclination qu'ils eussent à telle chose. Ils ont esté louëz d'une grande sobriété en leur manger, mais on a tenu qu'ils faisoient peu d'estat de leurs promesses, sinon en tant que la necessité le sembloit requérir.

- 33 Les Medois ont tousiours esté tenus pour mols & effeminez, mais ils estoient fort adroits à cheual, & à tirer de l'arc, & portoient vn singulier honneur à leurs Princes. Ils portoient vne tyare & bonnet rond, en forme de turban, & leurs robes avec des manches. Les Roys de ce peuple auoient priuilege d'auoir plusieurs femmes, mais en fin chacun vsurpa pareille licence, sauf que la difference estoit telle, que le Roy en tenoit autant qu'il vouloit, au lieu que les autres n'en pouuoient espouser & tenir que sept. Les femmes mesmes tenoient à grand'honte, si quelqu'une se contentoit d'un mary, & pensoit que cela causaist sterilité, si pour le moins chacune n'en auoit plus de quatre pour son passe-temps.

Ce peuple faisoit alliance à l'imitation des Grecs, & d'autresfois en se blessant au bras & aux iointures de l'espaule, d'où sortoit grande abondance de sang, pour tesmoignage & assurance de la foy iurée. Et d'autant que du costé que ce pais est plus proche du Nord, il est sterile, il faisoit seicher des amandes, dont ils faisoient de la farine, & du pain pour leur nourriture, y adioustant des pompes, qu'ils paistrissoient en faisant des masses pour leur vsage. Leur boisson estoit faite de certaines racines, & ils ne mangeoient que chair de sauuagine, & ne tenant compte des animaux qui leur estoient domestiques.

- 34 Les Assyriens vsoient jadis de deux robes, dont l'une estoit longue, leur allant iusques aux talons, & l'autre courte par dessus: toutes deux estoient de lin, & par dessus encor ils portoient vne robe fort blâche, ayant des souliers semblables à ceux des Thebains. Ils nourrissoient leurs cheueux, portant de hauts bonnets pointus, à la façon des mittres, & Caselbas des anciens Persans, & ne sortoient iamais dehors sans estre musquez, & parfumez. Chacun d'eux auoit vn anneau qui luy seruoit de cachet, & portoit vn sceptre en main, sur lequel estoit proprement tiré quelque fleur, ou quelque sorte de fruit, ou chose semblable: car c'estoit vne chose mesfaisante entre eux de sortir de leurs maisons, & de paroistre en public sans auoir le sceptre, & quelque figure qui l'ornast.

- 35 Quant aux loix, dont ce peuple vsoit, elles portoient, que les filles vierges qui estoient d'age d'estre mariees fussent menées tous les ans au marché, & mises en vente à cry public à quiconque les voudroit prendre en mariage, & l'on mettoit en auant premierement les plus belles, afin qu'on y mist l'encher. Mais celles qui n'estoient pas si recommandables par leur beauté, qu'elles peussent conuier les hommes à y mettre leur argent pour les auoir, ou bien celles qui se trouuoient si laides, qu'elles n'eussent trouué qui les eust voulu receuoir chez eux, quoy qu'elles

qu'elles ne leur eussent rien coûté, estoient mariez de l'argent, avec lequel les belles auoient esté achetées. Herodote tient que les anciens Venitiens qui le tenoient en la colle d'Illyrie vsoient de pareille façon de faire.

Il estoit ordonné pareillement, que si tost que quelqu'un seroit malade il demanderoit conseil à celui qui auroit esté atteint de semblable mal, & tascheroit de suivre l'ordre que l'autre auoit tenu, afin de guerir: & cecy se pratiquoit au commencement lors qu'ils n'auoient encore nulle cognoissance de medecins. Quelques autres escriuent qu'ils portoient leurs malades en la place publique, & que la loy commandoit que tous ceux qui auoient autresfois essayé semblable incommodité vinsent vers le patient, pour luy dire par quels moyens ils auoient recouru à la santé.

Les corps de leurs trespassés estoient oints de miel, & leurs obseques & funerailles se faisoient de mesme entr'eux qu'entre les Egyptiens. L'homme Assyrien estant couché avec sa femme n'osoit la toucher, ny elle luy, sans se lauer auparauant d'eau fraiche.

L'ancienne coustume de quelques Dames d'Assyrie, estoit de se mesler charnellement avec quelque estranger en honneur de la Deesse Venus. Et lors que elles vouloient le faire, elles alloient au Temple de ceste Deesse en grand' troupe, couronnées, & fort richement parées pour se presenter & rendre plus agreables aux hommes. Chacun des estrangers qui vouloit iouir d'elles, regardoit celle qui luy plaisoit le plus, puis mettoit sur ses genoux telle somme d'argent que bon luy sembloit, & elle estoit tenue de le suivre vn peu loin du Temple, où ils entroient en parfaite cognoissance ensemble, & le prix de ceste impudicité estoit employé pour le seruice du Temple. Il y auoit entre les Assyriens des maisons & des familles qui ne viuoient que de poisson, qu'ils faisoient secher au Soleil, & puis estant ils le pilloient dans vn mortier, & de ceste farine conseruee ils faisoient des gasteaux bien paistris, dont ils se seruoient au lieu de pain.

Il y auoit en Assyrie des Mages, surnommez Chaldeens, qui estoient en pareille reputation que les Prestres, & Deuins en Egypte, ayant la charge des choses sacrees, & des Temples & Sacrifices, s'adonnans toute leur vie à l'estude & contemplation de la Philosophie, & s'exercans en la science des Astres, pour sçauoir par le cours d'iceux les euenemens d'icy bas, taschant de profiter à tous, & de les deliurer de danger, d'incommodité, & donnant presque raison asieuree de toutes choses.

Ces sages Chaldeens n'alloient pas hors de leurs pais pour apprendre ces sciences, ainsi que les Grecs: ains vn chacun les apprenoit de ses parens, les tenant d'eux comme par succession, & les enfans estoient instruits aux maisons, afin que par ce soin ordinaire ils peussent mieux profiter. Leur science n'estoit point fondee sur des doutes & opinions, ainsi que celle des Grecs, ains ils persistoient constamment aux choses qu'ils auoient vne fois apprises, au lieu que les autres auoient diuerses opinions touchant les principes & causes de chaque chose. Les Chaldeens tenoient pour chose veritable & asseuree, que le monde n'auoit pas esté créé, & soustenoient qu'il estoit sans commencement, & qu'il n'auoit iamais fin, que la disposition de l'Vniuers estoit conduite par la prouidence diuine, que les corps celestes ne se mouuoient pas d'eux mesmes, ny par hazard, & par accident: mais qu'il y auoit quelque vertu diuine qui les mouuoit, & causoit leur influence. Ils attribuoient vne grande force aux planettes, & mesme à celui que les Astrologues appeller Saturne, estimant le Soleil le plus plaissant & agreable Astre de tous, & luy donnant vne force singuliere plus qu'aux autres. Toutesfois en leurs diuinations ils s'arrestoient plus sur les aspects de Mars, de Venus, de Mercure, & de Iupiter, à cause que ceux-là (comme ayans vn cours qui leur est propre) donnoient cognoissance de l'aduenir, comme s'ils eussent esté messagers & interpretes de la volonté des dieux. Ces Chaldees predisoient aussi ce qui deuoit arriuer par les souffler des vents, la force des pluyes, ardeurs de l'Esté, par l'apparition des Cometes, & defauts du Soleil, & de la Lune, & par tremblement de terre, & choses semblables. Ils imaginoient outre ce d'autres estoiles sujettes aux premieres, & disoient que les vnes alloient errant, & auoient leur course par nostre hemisphere, & les autres alloient visiter le reste du rond au dessus de nous.

Ils se faignirent douze dieux principaux, à chacun desquels ils donnerent place au Zodiaque, & assignerent son mois à chacun. Ils comptoient hors du Zodiaque vingtquatre estoiles, dont il y en auoit douze qui regardoient le Septentrion, & douze autres le Midy. Ils croyoient que celles qui apparoiSSoient estoient pour le seruice des viuans, & que les autres estoient pour le seruice des trespassés, & leur éclairoient sous terre. Ils faisoient vn calcul si ridicule des années, qu'ils comptoient 43000. ans depuis leur plus ancienne memoire iusques à la venue d'Alexandre en Babylone: toutesfois quelques-uns les excusent, disant que c'estoient des années lunaires.

Les habitans de Carmanie vsoient iadis d'asnes en la guerre, pource qu'ils auoient faute de

chevaux, & sacrifioient vn asne à Mars. Nul ne prenoit femme entr'eux qu'il n'eust coupé la teste de quelque ennemy qui estoit portee au Roy, qui la faisoit mettre en son Palais, & couper menu la langue, laquelle il mesloit avec du pain, en goustoit, & la bailloit à manger à celuy qui l'auoit apportee, & à ses familiers, celuy qui en auoit plus apporté estoit en meilleur estime que les autres.

- 41 Quant à ceux de la Margiane, Strabon escrit que de son temps, lors que quelqu'un estoit paruenue à l'age de septante ans, on le mettoit à mort pour vne bien legere faute, & ses proches parens venoient apres manger son corps. Quant aux vieilles femmes ils les suffoquoient, puis leur donnoient sepulture. Arriuant qui mourut enuiron en la 70. annee n'estoit point mangé, mais enterré.

MOEURS DE CE TEMPS.

- 42 Les Persans sont auourd'huy à parler generally les plus doux, & plus gracieux hommes qu'on puisse voir au reste du monde, & c'est chose fort asseuree qu'ils sont plus liberaux qu'aucuns autres qu'on cognoisse. Leurs mœurs ne sont pas barbares comme celles des Indiens, & des Scytes leurs voisins, ains ils sont gentils au possible, s'addonnent à tenir en leur pais vne fort belle police, & outre ce ne mesprisent pas les lettres. Il y en a beaucoup parmy eux qui sont consommez, & fort sçauants en Medecine, & en Astrologie, & d'autres qui affectiionnent la Poësie, & y reüssissent en telle sorte, qu'on trouue leurs inuentions & leurs façons de parler du tout, ie ne diray pas gentiles, mais admirables. Vn Poëme Persan paruenue à Rome entre les mains d'un Cardinal François extrêmement entendu en toutes choses, qui se le fit expliquer, en rend suffisant tesmoignage.

Ils s'addonnent pareillement au commerce, & aux arts mechaniques, & font vne grande quantité de draps de soye. Les freres, sœurs, & autres parents gardent vne grande amitié entr'eux, & l'on y fait grand estat de la noblesse; enquoy ils sont contraires aux Turcs qui la mesprisent, & n'estiment que ceux qui se rendent recommandables par leurs actions. Il y a aussi parmy eux beaucoup d'hommes Illustres, & qui sont venus d'une ancienne tige, & sont riches de longue-main: & finalement ils doiuent estre de beaucoup preferez aux Turcs, tant pour le regard de la noblesse, que de la civilité & de la gentillesse de l'esprit. Dauantage, ils sont courtois au possible à l'endroict des estrangers, & leur font vn gracieux accueil, & les traittent selon le pais le mieux qu'ils peuuent: mais ils sont grandement sujets à la jalousie. A raison dequoy les femmes n'ont pas permission de se monstrier aux estrangers, combien qu'en toute autre chose ils leur donnent tout le contentement qu'elles desirent, & qu'ils les adorent par maniere de dire, au contraire des Turcs qui tiennent leurs femmes comme des esclaves. Les femmes y sont merueilleusement belles, & y vont si bien parées pour donner encore quelque plus grand esclat à ceste beauté, qu'on ne peut rien voir de plus agreable.

Les Persans se laissent volontiers emporter à leurs passions, autant que gens qui soient au monde, & se plongent dans toutes sortes de plaisirs, cherissant le jeu d'amour sur toute chose. Ils vont magnifiquement vestus, sont ordinairement parfumez, & portent mesme des pierrieres. Ils ont ce malheur, qu'encor qu'ils espousent plusieurs femmes, ils ayment toutesfois les ieunes enfans, & se ruënt à la poursuite des masles aussi ardamment, ou peut estre plus que des femmes. En quoy ils imitent les Turcs, & d'abondant ils ont des lieux detestables destinez à ces voluptez, où l'on garde des ieunes enfans pour cet effect.

Leur langage est gentil & fort agreable, & est pratiqué par vne bonne partie des Cours des Princes du Leuant. Ils auoient autresfois des caracteres particuliers, qu'on ne trouue plus presque auourd'huy parmy les anciens monuments. Mais depuis le temps qu'ils ont receu la secte du mal-heureux Mahomet, ils ont aussi vsé de langue Arabique.

On les nomme Azames, ou Azamies, à cause de l'Assyrie, qui porte le nom d'Azamie, comme quelques-uns estiment. Ils ont aussi le nom des Persans, à raison de la prouince de Perse, qui est la principale du Royaume, & celuy de Cheselbas, à cause du bonnet rouge qu'ils portent, & encor ils s'appellent Sophiens, pource qu'ils sont sous la domination du Sophy.

RICHESSE.

- 43 ON fait vne si grande quantité de draps de soye en Perse, que les habitans du Royaume en ont non seulement à suffisance pour eux, mais en vendent encor beaucoup aux nations, qui sont mesmes assez esloignees de la Perse, veu qu'on en porte par tous les pais du Leuant, & mesmes iusqu'en Syrie. Il se fait pareillement en Perse grande vente & grand trafic de perles & de pierrieres: Ce qui rend le pais de Perse riche, c'est la commodité de la mer, par le moyen de laquelle on y aborde de beaucoup d'endroits pour aller querir ce qu'on desire. Mais

fire. Mais pour particulariser quelque chose on trouue en la Prouince de Perse des esmeraudes que les marchands acheptent à bon prix, pource qu'elles ne sont pas trop claires. C'est aussi ceste prouince qui fait part des soyes à beaucoup d'autres : de mesme que fait l'Hircanie, ou le pays de Diargument.

Le Bactriane produit aussi des metaux, & quelques pierres precieuses comme des esmeraudes, hyacinthes, & chrysolites, dont ses habitans tirent vn profit remarquable. En la prouince d'Arie on recueille ie ne sçay qu'elle drogue semblable à la mirrhe que les Persans vendent assez bien aux estrangers, de mesme que leurs Saphirs noirs & jaunes. La ville de Chirmain en Carmanie est renommee à cause de la grande quantité de draps d'or & d'argent que les habitans y font & debitent.

Venons maintenant aux reueus que le Roy peut auoir, apres auoir veu en quoy consistent 44 les richesses de son peuple. Veritablement on n'a peu sçauoir iusques à present à quelle somme montent les reueus de ce Prince; veu que ceux mesmes qui ont esté expressement pour s'enquerir des moyens de ce Monarque, n'en parlent pas tous de mesme sorte: Car les vns luy donnent trois millions d'or de rente, & les autres cinq millions. Toutesfois il y a deux choses qui peuuent faire comprendre aisément que ce Prince ne peut estre que fort riche. L'une est que Tammas Sophy de Perse qui regnoit n'aguere, ordonna qu'on ne leueroit plus la gabelle de ce qui entroit dans ses Estats, & en sortoit, & ceste gabelle montoit à 90. mille toman, c'est à dire (pource qu'un toman vaut vingt escus) à vn million huit cens mille escus: ce qu'il n'auroit fait sans doute s'il n'eust eu de grâds reuenus d'ailleurs, qui l'eussent conuié à soulager en ceste sorte les estrangers, & ses subiects qui se mesloient du trafic. L'autre chose est, que tous les estats de Perse sont diuisez par les Persans en sept prouinces, ou pour mieux dire generalitez, dont celle d'Ispeen rend sept cens mille escus, & celle de Syras autant, qui ne sont pas toutesfois les plus riches, veu que celles de Corassan & de Diargument les surpassent de beaucoup, dont l'une abonde en metaux & en turquoises, & l'autre en soyes.

Mais si quelqu'un demande d'où il tire son reuenue, puis qu'il s'est despoüillé de la gabelle qui luy pouuoit apporter l'entree & sortie des marchandises: ie luy respondray qu'il le tire des terres de la domination, de la disme des fruits, & du profit des mines & des boutiques, veu que celui qui veut dresser vne boutique ou vn magazin de quoy que ce soit, est obligé de payer certaine somme au Roy toutes les annees. Il reçoit aussi beaucoup de presens des particuliers, & des dons des communautez; & les confiscations, & choses semblables luy apportent des sommes assez notables; outre les tributs des Princes suiets à la couronne, comme celui de Lar, & quelques autres.

F O R C E S.

Les forces de ce Royaume consistent plus en valeur qu'en nombre des hommes. Il y a trois 45 sortes de soldats, l'une est de ceux que le Roy entretient continuellement pres de luy, l'autre est des Timariots, veu qu'il a vn grand nombre de gens de cheval, qui en lieu de solde ont des terres qui leur sont assignees pour leur entretien à la façon des Turcs. La troisieme sorte est d'estrangers qu'on tire pour de l'argent, ou de Gurgistan, ou de Tartarie. Mais parlant des deux premieres sortes qui sont proprement du Royaume, & qui appartiennent au Roy, les vns & les autres de ces soldats ne combattent qu'à cheval, d'autant que les armes sont entre les mains des nobles, il n'y a volontiers guiere d'infanterie: & de là vient aussi que les Persans sont entierement priuez des forces maritimes. De sorte qu'encor qu'ils ayent d'un costé la mer de Bachu, & de l'autre le golphe Persique; toutesfois ils ne se sont iamais seruis d'armes de mer ny d'un costé ny d'autre. Et mesme bien que la mer de Bachu ait huit cens mille de longueur, & six cens de large, toutesfois on n'y voyage point dessus, & on ne void en tous ces lieux de par delà autres vaisseaux que ceux des Portugais, qui costoyans le riuage du golphe Persique se maintiennent maistres, par le moyen des flottes qu'ils tiennent ordinairement en l'Isle d'Ormuz.

Et combien que le pays abonde en metaux & en trempe excellentes, principalement la prouince de Corassan, toutesfois ils n'ont guiere d'usage de l'artillerie, & encore moins de pratique pour fortifier, de battre, d'assiéger, de garder, & de deffendre vne place, pource que toutes ces choses sont propres de l'infanterie, au lieu qu'il appartient à la caualerie de combattre en campagne, ou les Perses sont certainement capables de faire plusieurs grands effects.

Outre ce la milice Persane a vn autre deffaut important, qui est le manquement d'union, & ceste diuision procede de deux causes: l'une est la grandeur des Princes, qui est ordinairement accompagnée d'orgueil & d'opiniastreté, l'autre est la difficulté de la conduite & des voyages: & ce deffaut vient du manquement des eaux & des riuieres nauigables. Car les riuieres de Perse sont telles qu'on ne va point dessus, ou si l'on y va, c'est si peu que ce n'est pas chose qui puisse grandement seruir. Toutes ces riuieres courent, ou au Golphe Persique, ou à la mer Caspie,

laissant le pays du milieu sans eau, à raison dequoy elles seruent peu pour vñir les forces des Persans, & les mettre ensemble, veu que le milieu du Royaume demeure sec, & n'y a aucune riuere qui soit commune presque à tout l'Estat comme pourroit estre la riuere de Loire à la France, le Po à la Lombardie, la Vistule à la Pologne, la Schelde à la Frandre. Il y a outre ce force deserts & montagnes qui trauersent & diuisent le pays; à raison dequoy ce Royaume est fort semblable à l'Espagne, où il n'y a point de riuieres de grand trafic, si ce n'est aux extremitez, & où il y a force montagnes, & beaucoup de contrées comme desertes, à cause de leur secheresse. Toutefois la nature voulant ayder au commerce, & à la commodité de la vie humaine, a pourueu la Perse aux lieux qui manquent de riuieres nauigables, de chameaux qui sont du tout propres à porter la charge, veu qu'ils l'endurēt beaucoup plus pesante qu'un cheval, & durent plus longuement à la peine. Car le chameau portera vne charge de mille liures, & continuera son voyage l'espace de quarante iours & d'auantage: & pour ce qu'il doit aller par des lieux secs, tels que la Lybie, l'Arabie, & la Perse, où l'eau & la pasture manquent, il ne boit ordinairement que de cinq en cinq iours vne fois, & en vn besoin il demoura sept, voire dix iours entiers sans boire: & pour le regard du manger, apres qu'on l'a deschargé, il luy suffit de manger vn peu d'herbe, ou de branches d'arbres: tellement qu'il n'y a point d'animal qui dure d'auantage à la peine, ou qui soit de moindre despence. A raison dequoy il est fort propre pour les pays secs de l'Asie, & de l'Afrique, où les hommes ont grande faute d'eau, & de viures: de sorte que les chameaux n'en ayans pas grand besoin pour eux, en peuvent porter grande quantité pour leurs maistres. Il y en a de trois sortes, les vns sont petits, & ne seruent que pour porter les hommes: les mediocres ont deux bosses, & sont encore bons pour porter des charges: les plus grands, & plus gros sont ceux qui portent iusques à mille liures.

Pour le regard du nombre des gens de cheval que le Roy de Perse peut mettre en campagne, on l'a veu aux guerres qui se sont passées entre Ismael, & Selim premier de ce nom Empereur des Turcs: & encor entre le mesme Ismael, & Soliman, & entre Codabade, & Amurat troisieme, veu qu'aucun de ces Roys n'a iamais mis ensemble contre les Turcs plus de trente mille chevaux: mais armez en telle sorte, qu'ils n'ont iamais crainct la rencontre d'une beaucoup plus grande armee. Ceux qui sont plus aisez, & plus riches s'arment ainsi que nos homes d'armes: les autres, qui sont les deux tiers, se contentent de salades, de mailles, & d'escus, & se seruent tantost de l'arc, tantost de la lance.

Le Sophy confine du Leuant avec les Mogores, du Septentrion avec les Tartares du Zacatay, du Ponant il a le pays du Turc qui le borne par vn long espace, & du Midy il a le Royaume d'Ormus, autrefois tributaire des Sophys, & pour le present du Roy d'Espagne.

Il n'a guiere affaires avec les Mogores, pour ce que de mesme que la France & l'Espagne ne se peuvent offenser l'un l'autre, à cause que les passages sont estroits, & que l'assiette des frontieres est aspre & fascheuse. si bien qu'elle rend difficile la conduite des viures, & l'entretien des armees: ainsi que les confins des Indes, & de Cambaye occupez par les Mogores, & par les Persans, il y a des montagnes & des deserts, qui ne permettent pas que ces Princes se puissent attaquer l'un l'autre, au moins avec de grandes armees: principalement à cause que la caualerie en laquelle consistent les plus grandes forces des vns & des autres, ne se peut manier aisément en des lieux estroits, & en des passages si mal-aisez. Toutesfois il combattent aux frontieres de Cabul, & de Sablestan, dont quelques Princes Mogores se sont rendus Maistres.

Le Sophy ne confine pas immediatement avec le grand Cam, d'autant qu'il y a entre-eux deux, premierement quelques Princes, puis vn grand desert, & il semble que la riuere d'Oxe, ou d'Abian ait esté de tout tēps destinee pour seruir de borne à son Empire. Ceste riuere naissant au pays de Sablestan, sous la montagne de Dalanguer, apres vn fort long cours, durant lequel elle croist grandement, à cause d'un grand nombre de riuieres qu'elle reçoit, se desgorge dans la mer de Bachu, & vient à separer du costé du Nort le Sophy, du Zacatay. Or le Sophy n'a iamais eu la hardiesse de passer ceste riuere, & Saba Roy de Zacatay l'ayant passée fut defait par Ismael en vne grande bataille. Cyrus Roy de Perse fit faire sur ceste riuere vn pont sur lequel il passa avec vne grande armee, voulant aller contre Tamyris Roine des Scythes, qui le mirent en pieces avec tous ses gens.

Le Sophy confine avec le grand Turc par toute la longueur Occidentale de son Empire: c'est à sçauoir depuis la mer de Bachu iusques au Golphe de Saure, qui est l'espace presque de quinze degrez, & veritablement il n'a point d'ennemis plus dangereux, ny qui luy doiuent donner plus de crainte: veu qu'autant de fois que le Turc est entré dans son pays il a tousiours fait quelque perte, excepté depuis quelques annees, que le Sophy à chauffé les esperons aux Turcs, & en a rapporté des victoires signalees.

Toutesfois on peut dire, que ce qui causoit tant de pertes au Sophy, c'estoit la façon de mener la guerre, d'autant que s'assurant sur le nombre & la valeur de sa caualerie, & sur son artillerie

artillerie & munitions de guerre, il ne faisoit nul estat des fortèsses, ains ruynoient celles qu'ils prenoient & faisoient peu d'estat de celles qu'ils auoient retenues, iugeant que celuy qui employe ses forces à la conseruation des places, ne peut estre guiere fort en campagne. Mais depuis estans contraincts par la necessité, ils se sont fortifiez de tous costez, ont dressé de bonnes places aux lieux de passage, & en ceux qui estoient propres pour cet effect; & ont basti des citadelles aux villes d'importance, les pouruoyant de canons, de soldats, & de tout ce qui leur estoit necessaire.

Quant aux Portugais d'Ormuz, il n'a rien à demesler avec eux, pource qu'il n'a point de forces maritimes, sans lesquelles on ne scauroit recouurer ce Royaume, & d'ailleurs les Portugais n'ont moyen de faire des conquestes auant en terre. Et mesme le Sophy Tammaz estant vne fois poussé à l'entreprise du Royaume d'Ormus, demanda qu'elles choses naissoient en ceste Ile, si c'estoient des grains, des raisins, des fructs, ou quelque autre chose, & ayant appris que le terroir de ce pays estoit sterile, & que tout y manquoit, mais que le trafic de la marchandise qui rendoit ce Royaume riche, luy pourroit apporter de grandes commoditez, il s'en moqua, disant, qu'il auoit donné à son peuple quatre-vingts & dix mille Tomans de pareille nature, qui venoient dans ses coffres toutes les annees.

GOVERNEMENT.

IL faut aduotier que les Persans sont gouuernez plus politiquement que tous les autres Mahometans, dont on peut auoir cognoissance, & que la puissance Royale est veritablement mieux reglee parmy eux, qu'elle n'est en aucun Royaume de leur secte. Car on scait assez que presque tous les autres Roys exterminent la noblesse, & se seruent des esclaves, & mesme font mourir leurs freres, ou bien les auenglent. Mais la noblesse est grandement estimee parmy les Persans. Les Roys traittent gracieusement leurs freres, & ont ordinairement sous eux des Princes, qui sont riches, & puissants, ce qui n'est pas parmy les Turcs, qui ne peuuent nullement souffrir la Noblesse en aucun lieu, & ne permettent qu'aucun demeure Prince, ou Seigneur de quelque pays, au contraire si tost qu'ils sont les plus forts ils deffont le monde des maistres naturels, & mettent en leur lieu des gens venus de peu, qui n'en deuiennent pas Seigneurs, mais gouuerneurs seulement, qui peuuent estre changez à toute heure. En fin c'est chose assuree que ce Royaume est tellement policé, & si bien conduit, que son gouuernement ne cede point à celuy des principautez de nostre Europe, à ce que disent ceux qui y ont esté, & qui ont considéré les façons de viure de ce peuple: mais le malheur a tousiours esté tel, qu'aucun n'a pris la peine de specifier la façon de ce gouuernement, de sorte que ce defaut causera que nous n'en pourrons discourir qu'en general, sans en particulariser aucune chose.

R E L I G I O N.

APRES la mort de Mahomet auteur de la malheureuse secte, qui a pour le iourd'huy si grand cours par le monde, Aly, Abubequer, Omar, & Odman les patens escriuirent chacun pour soy, d'autant qu'il n'y eut aucun d'eux qui ne se pretendit son vray successeur. Et ce debat fut la source de quatre sectes principales: Aly fut auteur de celle qu'on nomme Imemie, qui fut suiue des Persans, des Indiens, de plusieurs Arabes, & des Gelbins d'Afrique. Quant aux autres sectes, i'en ay remis le discours au recit de la religion des Turcs, où i'ay resolu d'en parler amplement, & tout au long. Les Persans ont plus du raisonnable & du naturel que les autres, & se sont mis en reputation, quant à leur secte, presque de nostre age, comme nous auons ja dict, par valeur d'Ismaël Sophy, qui se disant estre de la race d'Aly, mit sa secte en credit, & denonça la guerre à ces voisins qui ne la voulurent accepter. Il portoit le turban rouge avec douze pointes, en memoire des douze fils d'Ocen, fils d'Aly, & voulut que tous ceux qui suiuroient le portassent de mesme. Beaucoup de gens se rangerent à sa suite & secte, & principalement tous ceux qui habitent en l'Euphrate & l'Abian, & la mer Caspie, & le Golphe Persique: De sorte que depuis tous ces peuples se sont arrestez à ceste opinion.

Il y a aussi en l'Empire du Sophy quelques Iuifs, dont les predecesseurs demeurent en Assyrie, lors qu'Esdras & Nehemie ramenerent le reste en la terre sainte, & ceux-cy qui s'arrestèrent en ces pays là esleurent, comme dit Origene, vn chef de la maison de Dauid, & le nommerent chef des bannis, puis ils bastirent vne ville sur le bord de l'Euphrate, & la nommerent Neardee, qui veut dire fleuve de science.

Il y a pareillement en Corosani prouince de Perse des Melchites, qui retiennent routes les erreurs iadis condamnées par les Grecs au Concile de Florence, & ceux-cy obeyssent au Patriarche d'Antioche.

Ils s'y trouuēt aussi des Nestoriens introduits en Perse, suivant Paul Diacre, par la malice de Cosroé Roy de Perse, qui voulant faire despit à l'Empereur Heraclie, par qui il auoit esté defeat & mal mené, saccagea toutes les Eglises des Chrestiens qui estoient en ses Estats, & en ayant chassé les Catholiques, mit en leur place les Nestoriens, qui se sont meslez parmy les Assyriens, les Mesopotamiens, les Medois & les Parthes.

Il y a aussi beaucoup de Chrestiens Armeniens qui sont passez en Perse, de crainte des armes Turquelques, & ceux-cy ont deux Patriarches, dont l'un qui est recogneu en la haute Armenie, demeure au Monastere d'Ecmeazin pres de la ville d'Eruan en Perse: l'autre qui est obey en la basse Armenie, se tient en la ville de Sis en Caramanie, Mais nous remettons à parler de leur creance au discours des religions, qui se trouuent dans le pays du grand Turc. Voila tout ce qu'on peut dire des religions des Persans, qui sont tellement ennemis des Turcs, qu'encor qu'ils recognoissent tous deux Mahomet, pour premier autheur de leur secte, toutesfois ils ne hayssent pas moins ces barbares, que nous faisons: & l'on estime que si les Princes Chrestiens eussent fait plus d'estat de l'Ambassade que le Sophy mada en Europe ces annees passées, qu'ils ne firent, il y eut eu quelque esperance de reduire peu à peu ce Prince à la foy Chrestienne.

DISCOVRS DES ROYS DE PERSE, SELON QUE LES AVTHEVRS GRECS ET Latins en ont escrit.

S O M M A I R E.

- 1 **C**ronique abregée des Roys de Perse selon la sainte Bible, Philon & autres auteurs.
- 2 Autre Chronique abregée selon Herodote, Xenophon, Iustin & autres beaucoup plus ample que la precedente.
- 3 Cyrus ruine la Monarchie des Medes, & établit celle des Perses.
- 4 Histoire de Daniel ietté dans la fosse aux lions, & pourquoy les Iuifs ont permission de bastir leur temple: Cyrus conquiert la Lydie, prend Cræsus Roy d'icelle, fait la guerre aux Scythes, desquels il fut vaincu, sa mort.
- 5 Son cloge, fut le premier appelé le Roy des Roys, apporta aux Perses l'usage de la robe longue, & de la Tyare selon quelques-uns.
- 6 Cambises conquiert l'Egypte, fait tuer son frere Smerdis, ses sacrileges & sa cruauté, finalement sa mort.
- 7 Smerdis un des Mages se fait recognoistre pour Roy, & comment il fut descouuert.
- 8 Comment Darius Histaspé vint à la couronne de Perse, ses reglemens & ses conquestes, restablit la souveraine sacrificature entre les Iuifs, la grande armée qu'il preparoit pour fonder sur la Grece, si la mort ne l'eut preuenu.
- 9 Xerxes déclaré successeur de son pere, à cause qu'il estoit né son pere estant Roy, & les autres freres auparavant, il chastie rigoureusement les Egyptiens qui s'estoient reuoltez, sa puissante armée tant par mer que par terre pour ruiner la Grece, ses defaites & sa mort.
- 10 Pretensions d'Artaban, sa meschanceté descouuerte & son chastiment. Artaxerxes prend la vengeance de la mort de son pere Xerxes, enuoye une armée de 300000. hommes contre les Egyptiens, renuoye Esdras en Ierusalem, & luy fit de grandes courtoisies.
- 11 Cyrus fils de Darius fait prisonnier & pourquoy, en quel temps mourut Darius le Bastard.
- 12 Cyrus se sauue de la prison, les perfections de ce Prince & sa mort. Artaxerxes Mnemon aime la paix & tasche de mettre les Grecs d'accord d'entr'eux.
- 13 Les Iuifs ne se pouuans accorder, Darius Occhus enuoye coner eux Bagose qui leur impose tribut: origine des Iuifs Abrams, reuolte d'Artabaze & sa mort cause que le pais d'Egypte, Phenice & Chypre retourne sous la domination des Perses, Darius & ses enfans empoisonnez par Bagose.
- 14 Darius despoillé de son Empire par Alexandre le Grand, & en quel temps.
- 15 Quant & comment le Royaume de Perse retourna en son ancienne splendeur. Origine d'Artaxere & sa grandeur, perd une bataille contre l'Empereur Alexandre Mamee, estoit fort versé en la science des Mages.
- 16 Sapore conquiert une partie de la Mesopotamie & plusieurs villes sur les Romains, perd une bataille contre l'Empereur Gordian, en gagne une autre contre Valerian, où il print cet Empereur prisonnier. Odenal Roy des Palmiriens defeat Sapore en une grande bataille qui luy empescha le cours de ses conquestes.
- 17 Vardame fait paix avec l'Empereur Probus Carue, reconquiert sur les Perses la Mesopotamie.
- 18 Narsee homme de grandes entreprises: vaincu par Maximian en une grande & honorable bataille, qui ruina les affaires des Perses.
- 19 Misdulé couronné dès le ventre de sa mere. Sapore grand

- per grand ennemy des Chrestiens, obtint huiet fois la victoire contre l'Empereur Constans: mais il fut vaincu en Armenie par Arface, deffait l'armee de Julian l'Apostat, & fait la paix avec l'Empereur Iovinian.
- 20 Disputes pour la succession de la couronne de Perse entre les enfans de Sapore: cruauté de d'Artaxerxes.
- 21 Isdigertes tuteur du ieune Empereur Theodose, & les bons offices qu'il fit à son pupille. Il persecuta du commencement les Chrestiens: mais en fin il s'opposa à la persuasion d'Antioque, le gouverneur du ieune Empereur Chrestien son fils qui estoit demoniaque, guery par les prieres du bon Euesque Machuite.
- 22 Varanen persecute les Chrestiens, vaincu par Theodose le ieune, qui arreste la persecution, paix entre l'Empereur & luy.
- 23 Guerre entre Perose & les Euthalites, origine de ce peuple, Perose rend hommage & iure fidelité au Roy des Euthalites, sa perfidie qui luy couste la vie.
- 24 Valens se rend tributaire des Euthalites. Canadate en secon le iong, cruauté de ce Prince, & son estrange ordonnance pour rendre les femmes communes.
- 25 Les Regens du Royaume de Perse deuient estre du sang Royal, conseil de Gusanascade sur ce qu'on feroit de Canade, deliurance de ce Prince par le moye de sa femme, & de Seofse se retire deuers l'Empereur Anastase secouru par le Roy des Euthalites, rentre en possession de son Royaume; dispose d'iceluy deuant sa mort, pourquoy il s'adoucit contre les Chrestiens.
- 26 Cosroé addonné aux lettres, honore les gens de sçauoir, fit la guerre à l'Empereur Iustinian, avec lequel il fut contraint de faire paix, appelée la paix sans fin qu'il rompit incontinent, deffait plusieurs fois par Belser, meurt de regret, & pourquoy.
- 27 Guerre d'Hormisda contre les Romains, grande & notable deffaiete d'Hormisda par l'Empereur Tibere: autre deffaiete notable d'iceluy par Philippique Capitaine Romain, perd Nisibin & une partie de la Mesopotamie, & la ville d'Arsemene, rend les Turcs ses tributaires, depose de son Royaume, cruauté execrable de Cosroé enuers la femme & les enfans de son pere qu'il fit mourir à coups de bastons.
- 28 Conspiration contre Cosroé qui se sauue pour auoir inuoué le Dieu des Chrestiens, remis en son Royaume: histoire remarquable des Turcs marquez d'une croix sur le front, prend les Chrestiens pour garde de son corps, Narfe se reuolte contre l'Empereur Phocas secouru par Cosroé.
- 28 Toute la Mesopotamie & pais Syrien conquis par Cosroé, la Palestine, Armenie, Capadoce, Galatie, & Paphlagonie, les villes d'Edesse & Caposse Cesaree, de Capaduce, & la ville de Damas, avec la sainte cité de Ierusalem, emportant la sainte Croix en Perse, deffait finalement par l'Empereur Eraclius son fils, le fait mourir en prison au pain & à l'eau, siroé deliure tous les Chrestiens captifs qui estoient en Perse.
- 29 Des Roys de Perse, Mahometans chassez par les Tartares, Tamerlan se fait Seigneur de la pluspart de l'Orient, Vjun-Cassan descend de Tamerlan.
- 30 Vjun-Cassan espouse la fille de l'Empereur Trebisonde, donne sa fille à Secaider, sainteté de vie de la femme d'Vjun-Cassan, les guerres de ce prince contre l'Empereur Turc Mahomet deffait par eux & son fils Zognel occis, reuolte de Vgueli Mehemet contre son pere, qui se retire vers les Turcs, ruse d'Vjun-Cassan pour se deffaire de son fils.
- 31 Histoire tragique de la mort de Iacub Patifcha, de sa femme & de son fils. Secaider prend les armes contre son prince.
- 32 Deffaiete & mort de Secaider, nourriture d'Ismael Sophy, sa premiere entreprise, mauuaise ordre d'Alamur Roy de Perse, bataille entre luy & le Sophy, qui obtient la victoire, prend Taurus, & sa grande cruauté enuers sa propre mere.
- 33 Ismael prend le Turban au bout rouge, d'où est venue le nom de Kacelbas, victoire d'Ismael contre Marat-Can, conquiste le Diarbete, ses ruses pour se deffaire des principaux Seigneurs du pays, conquiste la meilleure partie de la Sydulie; tue le Roy de sa propre main, autre deffaiete de Marat-Can, les Tartares font la guerre au Sophy, prend Sumachia & la cité de Darbane, amour des soldats enuers Ismael, laquelle devise il faisoit mettre en sa monnoye, Selim Empereur des Turcs fait la guerre à Ismael, qui fut la cause de l'inimitié de ces deux Princes, bataille de Zalderane perdue par le Sophy, Taurus rauagee par Selim.
- 34 Reuolte de Vlana Perse contre Tamerlan, conquistes de Soliman sur les Perses, qui se rend maistré de l'Assyrie & Mesopotamie, prend Bagadet, & rauage deux fois Taurus: son armee, deffaiete par Deliment Capitaine de Perse.
- 35 Ruse d'Ismael cause de luy faire perdre le Royaume & la vie. Conquistes d'Amurat Empereur des Turcs sur Mahomet dit l'Aueugle. Deffaiete des Turcs par Abas Roy de Perse, qui enuoye des Ambassadeurs à l'Empereur Rodolphe

CHRONIQUE DES ROYS DE PERSE, SELON LA SAINTE
BIBLE, PHILON, ET AUTRES AVTHEVRS.



Vis que parlant des autres nations, on a iusqu'icy tenu cet ordre de descrire non seulement la situation des Prouinces, mœurs, & Regions des peuples, leurs forces, leurs richesses, & choses plus rares qui se retrouuent entr'elles, mais aussi de traiter sommairement des Princes qui leur ont commandé, de leurs guerres & conquestes, accroissement, changement, ou decadence: il semble qu'on seroit tort à la nation des Perles, si ayant autrefois tenu la Monarchie de l'Vniuers, & commandant encor à present à de si fieres & puissantes nations, on passoit sous silence leurs plus signalees actions, & les noms des Princes qui luy ont commandé, comment encore leur seigneurie a esté souuēt changée de famille en autre, au moins selon qu'en vn tel esloignement dans vne si profonde antiquité, & la diuersité des opinions que les plus anciens & modernes Autheurs ont tenu sur ce subiect, le pourront permettre.

Or entre les modernes il se trouue vn Espagnol nommé Teixiere, lequel ayant leu vne histoire Perlienne escrete par vn nommé Turix Mir xond. Persien de nation en fait vn sommaire, par lequel il semble auoir esclaircy & deduy en bon ordre la succession de ces grands Princes, depuis l'origine de ceste Monarchie, iusqu'à present: mais d'ailleurs c'est avec vne telle dissemblance de tout ce qu'en ont escrit les Autheurs qui l'ont precedé, qu'il est tres-difficile de les accorder, & neantmoins on ne fera peut estre point vn mauuais iugement de croire qu'il a le plus approché de la verité, & que s'il contredit en quelque chose tant à ce qui en est escrit en la sainte Bible, qu'ailleurs, c'est plus à cause du changement des noms que chacune nation a voulu conuertir en sa langue, que des personnes, ou des actions qui se sont passées durant le temps au moins contenu aux liures Saints: car pour les autres elles y sont souuent bien différentes. Toutesfois pour contenter l'esprit de ceux qui adioustent plus de foy à la Chronologie & Genealogie de ces Princes, descrite par l'antiquité, on a pensé qu'il estoit plus à propos d'en faire premierement la description le plus succinctement qu'il sera possible, selon ce qui en a esté tenu iusques icy, puis y adiouster des relations de Teixiere, afin qu'on en puisse plus nettement iuger quelle foy doit estre adioustee aux vns ou aux autres, me reservant neantmoins d'y adiouster selon les occurrences, non pour contredire l'auteur de Teixiere, mais pour quelques actions notables qui pourroient auoir esté obmises signamment contre les Turcs.

Et d'autant que Philon & Matasthenes Autheurs anciens, sont de differente opinion avec les Grecs, & neantmoins s'accordent à ce qui s'en retrouve en la sainte Bible, il sera bien à propos de rapporter icy ce qu'ils en disent, à sçauoir que Cyrus ayant conquis le Royaume des Medes sur Astiages, laissa ledit Royaume des Medes à son oncle Darius, avec l'ayde duquel il prit Babylone, & transporta la Monarchie Assyrienne aux Perles. Deux ans apres ledit Darius retourna en Mede, & Cyrus regna seul en Babylone, & depuis ayant entrepris de faire guerre contre les Scythes, il laissa son fils Cambises Roy en son absence, selon la coustume des Perles, qui estoit de donner au Roy au pays le plus proche du sang de celuy qui estoit Roy, quand ce Roy marchoit pour faire guerre à quelque nation estrangere, qui pourroit la cause pourquoy ces autheurs ne mettent point Cambises en l'ordre successif des Monarques, & qu'il n'est aussi parlé des deux freres Mages qui vsurperent frauduleusement l'Empire, comme il sera dict en son lieu, & ne durerent que peu de mois, Darius fils d'Hystaspes ayant esté esleu Roy. Xerxes fils de Darius luy succeda, mais ils ne le mettent point non plus au nombre des Monarques, d'autant que s'en allant incontinent faire la guerre aux Grecs, il laissa le Royaume à Darius Longuemain son fils: mais les historiens Grecs n'ont pas laissé de conter Xerxes & Cambises en ordre successif entre lesdits Monarques: ce qui est cause qu'ils nombrent plus d'annees en ladite Monarchie, à sçauoir 922. & ceux-cy 161. en ceste sorte.

Cyrus avec Darius son oncle regna 2. ans.

Cyrus seul regna 22. ans.

Darius fils d'Hystaspes esleu Roy, surnommé Artaxerxes Assuerus regna 20. ans.

Darius Artaxerxes-Longuemain 37. ans.

Darius Notus 19. ans.

Artaxerxes Mnemon 55. ans.

Darius Occhus 26. ans.

Arsenes 4. ans.

Darius dernier Monarque, desfaict par Alexandre le Grand, qui transporta la Monarchie aux Grecs, sixans.

AVTRE

AVTRE CHRONIQUE ABREGEE SELON LES
AVTRES AVTHEVRS GRECS ET LATINS.

Pour desduire maintenant ce qu'en disent Herodote, Xenophon, Justin, Agathie, Procope, & plusieurs autres auteurs qui ont parlé de ceste nation, les vns comme en passant, les autres de propos deliberé: il sera à propos d'ouyr parler Iosephe sur leur origine. Sem, dit il, fils de Noé eut 5. fils, lesquels possederent l'Asie, depuis l'Euphrate iusques à l'Ocean Indien: car Elyme laissa de son sang les Elyacaites, desquels les Perses sont descendus. Mais quant à l'appellation Persienne, elle n'est pas de si longue-main: car ils furent depuis dits Paveiliens, d'un Roy portant ce nom, puis Cepheniens & Artheens, & à la fin Persans de Perseus fils de Iupiter & d'Andromede, selon que dit Herodote: mais quelle fut la succession de ce Perseus, il ne s'en trouve rien par escrit, & non sans cause: car incontinent le pays Persan fut soumis à la Monarchie Assyrienne, sous laquelle il demeura iusqu'à ce que Sardanapale fut chassé de son siege, & occis par Arbacé premier Prince Medois, & Belochphul Roy de Babylone: la Monarchie des Medes comprenant les Persans, Baëtriens, Parrhes & Hircaniens, à laquelle le dernier qui y commanda fut Astiagé, lequel perdit sa Seigneurie à la sollicitation de Harpagé, marry cōtre le Roy de ce qu'il luy avoit occis son fils, & fait manger la chair cuite d'iceluy, Car cet Harpagé cherchant les moyens de se venger, manda à Cyrus petit fils d'Astiagé qui estoit lors en Perse avec son pere, vivant homme privé: que s'il vouloit venger son iniure, & la sienne (son ayeul l'ayant voulu faire mourir) qu'il avoit moyen de luy donner telle entree au Royaume des Medes, qu'il se feroit aysément Monarque, & delivrerait les Perses de servitude. Ce qu'ayant entendu Cyrus, il fit tant envers les siens qui se revolterent & secouerent le ioug des Medes, leur refusant tribut & obeysance. Astiagé aduerty de ces nouvelles, manda à Cyrus qu'il eust à luy venir rendre compte de sa rebellion, à qui le Prince respondit qu'il iroit plustost vers Astiagé qu'il ne voudroit, ce qui fit mettre le Roy en armes: & ne se souciant plus du tort qu'il avoit fait à Harpagus, il luy donna la charge de tout l'armée à son grand malheur: car venant au combat, tous les plus grands qui avoient intelligence avec Harpagus se mirent du costé de Cyrus, & les autres qui n'en sçavoient rien, s'enfuyoient se voyans abandonnez de leurs compagnons, & de là s'ensuiuit la route de l'armée d'Astiagé, lequel fut contraint de s'enfuir, non sans menasser Cyrus de le faire mourir. Et s'estant apres adressé à ses Mages & devins pour sçavoir l'evenement de ses affaires: tous luy conseillerent de ne plus suivre son nepveu, ains de luy laisser iouyr du bon-heur que les destinces luy avoient mis en main, mais luy, croyant que ceux qui luy donnoient ce conseil, fussent partisans de son ennemy, il les fist tous pendre, puis assemblant de rechef tout ce qu'il avoit de force, il vint luy-mesme à la bataille comme il avoit esté à l'autre, mais non à si bon marché, car ses troupes deffaites, il fut fait prisonnier de Cyrus, qui le despouilla de sa Monarchie, sans toutesfois le faire mourir, ains voulut qu'il commandast sur les Hircaniens: car l'Empire d'Astiagé s'estendoit iusques-là, & du costé d'Occident il venoit osté les Assyriens, Syriens & Iuifs) iusqu'au fleuve Halys, & la Capadocie, le reste estant au Roy de Lydie.

Regne de Cyrus, & Ciaxaré ou Darius.

6

Cyrus ayant ainsi vaincu son ayeul, commença de regner avec son oncle Ciaxaré, autrement Darius, fils d'Astiages, selon quelques-vns, & qui auroit plustost esté son frere: car Zonare le fait fort vieil, & neantmoins Astiages quand il fut deffait par Cyrus, qui estoit celle mesme année, estoit luy-mesme à la bataille qu'il perdit. Ce fut ce Ciaxaré qui fit ietter le Prophete Daniel dans la fosse aux lions: car comme il y eust vne grande jalousie entre ces deux Princes à cause du grand honneur que chacun rendoit à Cyrus pour sa vaillance: les courtisans de Darius prenans un suiet là dessus pour se venger de Daniel, luy persuaderent de faire un Edict, par lequel durant trente iours nul de son Royaume ne presentast aucune requeste à Prince, Seigneur ny Roy quelconque, non pas mesmes à aucun Dieu qu'à luy seul: car par ce moyen, disoient-ils, on retrancheroit le chemin à ces sujets d'avoir recours à Cyrus, ainsi qu'ils avoient en toutes leurs affaires, luy presentans leurs requestes comme à leur souverain Roy, qui toutesfois n'auroit aucun soupçon ny mescontentement sur cet Edict: veu, dit Zonare, qu'on n'en excepteroit pas mesme les hauts Dieux. Or ces deux Princes n'ayans regné que deux ans ensemble. Cyrus commença de regner seul par la mort de Ciaxaré, lequel avoit auparavant ravagé l'Assyrie, & deffait en champ de bataille le Monarque Assyrien: mais cestui-cy s'estant allié de plusieurs grands Princes tels que ceux des Arabes, Syriens & Lydiens, ceux-cy faisoient apres des maux infinis aux Medes, qui fut cause de faire resoudre Cyrus d'abatre ceste gloire Babylonienne, comme de fait apres plusieurs routes, & deffaites qu'il leur fist souffrir, il vint mettre le siege devant la superbe & ancienne ville de Babylone, & la prist d'assaut, apres laquelle conqueste il prit en grace les Iuifs, leur donna licence d'aller rebastir le Temple de servir **DIEU** selon leur loy, & le prier pour luy, & son Royaume. Si qu'ils commencerent lors à ba-

fir le Temple, & clore la Cité de Hierusalem : ce qui aduint l'an du monde 2427. en Olympiade soixantième, regnant à Rome Seruius Tullius.

R. gne de Cyrus, seul premier Monarque des Perses.

Les Medes ainsi subiuguez, & les Assyriens accablez, Cyrus pour se venger du Lydien, lors le plus puissant Prince de l'Asie, passa le mont de Taur, ou Cortheistan, & l'Aman ou montagne Noire: & enuoyant son grand amy Harpagus en la petite Asie pour la dõpter, il fut quant à luy contre Cresus, le vainquit en bataille, le prit prisonnier, & peu s'en fallut qu'il ne le fust bruller, sans le souuenir du bon aduis que Solon auoit autresfois donné à ce Roy Lydien, à sçauoir que l'homme ne se deuoit dire heureux iusqu'à sa mort, comme l'Histoire en est assez triuiale. En la ruyne du Royaume Lydien fut enveloppee toute l'Asie, depuis l'Hellespont iusques au Cortheistan, laquelle bransloit sous Cresus, bien que les Grecs Ioniens d'Asie vescuissent en liberté, alliez seulement du Lydien, lesquels toutesfois furent contraints de faire joug sous le Persan, & le recognoistre pour souuerain : de sorte que Cyrus commandoit alors depuis la mer Egee, & le Propontide, iusqu'aux Indes & terres Orientales : mais comme l'ambition est insatiable, non content de ceste grandeur, se resolut d'assuiettir les Scythes, qui auoient fait de grands ravages en l'Asie, si qu'avec son armee il tira vers ce costé Scythique, qui est outre le fleue Araxe, & par delà les Bactriens & Hircaniens, en la Region des Massagettes & Issedons, qui estoient ceux que l'on appelle Tartares, & la Region du Samureund. Or Cyrus n'ayant encore rencontré aucun Prince assez puissant pour luy faire teste, & sçachant qu'il n'y auoit pour lors qu'une femme qui commandast à ces Scythes & Massagettes, qu'on appelloit Tomiris, l'enuoya demander en mariage, non qu'il se souciait d'elle, mais pour auoir moyen d'empier son Royaume. Mais elle entendant les desseins du Persan, luy deffendit l'entree en ses terres, & arma ce qu'elle peust de forces, pour faire teste à Cyrus, faisant vn sien fils unique General de son armee, lequel n'estant encore pratiqué aux ruses de la guerre, fut surpris en vn stratagemme de Cyrus : car cestuy cy feignant de s'enfuyr, laissa son camp remply de vins & de viandes, ou entrans ces pauvres Massagettes, non accoustumez à telle delicatesse, banquetterent, & beurerent de telle sorte, qu'ils s'endormirent en ceste yuressse: mais ce fut leur dernier sommeil : car Cyrus qui estoit aux escoutes suruint la dessus, qui en tailla vne partie en pieces, & prit le reste prisonnier: Entre les captifs fut Spagarpisé fils de Tomiris, & chef de l'armee: La Royne aduertie du desastre de son fils, depescha vn Herault vers Cyrus pour le r'auoir, l'admonestant de sortir sa terre, où qu'elle le saoulleroit de guerre plus qu'il ne voudroit. Cependant Spagarpisé supplia Cyrus de le faire deliurer: ce qu'il fit par courtoisie, & alors ce Prince se voyant à deliure, & ayant encore l'espee au costé, detestant son malheur de se voir ainsi captif, s'occit deuant le Roy de sa propre main. Tomiris ayant responce du refus de Cyrus, vint le combattre avec le reste de ses forces, & bien que les Persans, & Medois fissent merueille de bien combattre, si est-ce qu'ils furent à la fin vaincus, & la pluspart taillez en pieces, & entre les morts fut aussi le grand Cyrus, pour s'estre par trop fié en son bon-heur, & n'auoir pris exemple sur le desastre des Roys plus puissants que luy, lesquels il auoit ruynez, & priuez de leurs Seigneuries. Tomiris sçachant ceste mort, en fit aussi tost chercher le corps, lequel ayant trouué, elle luy fist trancher la teste qu'elle mist dedans vn vase plein de sang, en luy disant par moquerie: Rassasie toy du sang en ta mort, duquel tu fus si insatiable en ta vie. Telle fut la fin du grand Cyrus: les Perses emporterent le corps qu'ils porterent à Pasagarde, où son tombeau fut dressé. Ceste Pasagarde estoit anciennement le siege des Roys de Perse. Aussi Alexandre le Grand y fut-il après qu'il eut brulé Percepoly: c'estoit là aussi où les Prestres sacroient les Roys.

Quant à Cyrus, s'estoit vn fort courtois, liberal, vertueux, & gentil Prince, ayant ce qui estoit digne d'estre respecté, assez iuste & equitable, vaillant aux combats, & des plus grands entrepreneurs de la terre: sa demeure ordinaire quand il n'estoit point occupé à la guerre, c'estoit es citez de Suze, Ecbatane ou Babylone: ce fut luy se semble qui fut le premier appelé le Roy des Roys, car on le trouua en l'inscription de son tombeau, au rapport de Strabon, lequel tiltre fut continué à ses successeurs, ainsi le peut-on voir chez Eldras, liure 1. chapitre 7. & aux Epistres meslangees d'Hypocrates, en celle qu'Artaxerxes escriuit à Poëtus: ce fut aussi Cyrus qui apporta l'usage de la robe longue aux Roys de Perse, qui estoit vn vestement selon Procope, & d'or & de pourpre diuersifié de plusieurs figures animaux terrestres & d'oiseaux: les Grecs appellent ce vestement *chiton*, outre ce ils auoient la tunique qu'ils appelloient *chiton* quelquefois vn manteau de pourpre: on dit toutesfois que ce manteau estoit plustost vne sorte de robe, ayant les manches pendantes iusques sur la main. On ne peut pas asseurer si ce fut luy ou Artaxerxes qui commença à porter la tyare, mais tant y a qu'elle se portoit dès ces plus anciens tẽps. Cyrus laissa en fin pour successeur son fils aîné, qu'il auoit eu de sa femme Cassadane fille de Pharnaspé (qu'il aimoit de telle sorte, qu'il porta non seulement le dueil à sa mort, mais il voulut encore que les subiets fissent le semblable) apres auoir regné 29. ans, ce qui aduint l'an du monde enuiron 3435.

CAMBIER

Cambises II. Monarque des Perses.

Cambises plus cruel que vaillant, & autant insolent superbe & ennemy de vertu, que son pere auoit esté doux & affable, & doté de belles parties digne d'un grand Roy, sans pieté encore & qui mesprisoit toute religion, aussi empescha-il aux Juifs de bastir leur temple en Ierusalem, & desrendit qu'on leur fournist rien pour ce faire comme on faisoit auparavant par le commandement de Cyrus. La premiere expedition de ce Roy fut contre Amasis Roy d'Egypte, la fille duquel il demanda en mariage, y estant induit par son Medecin qui estoit Egyptien & ennemy du Roy Amasis, car il sçauoit bien qu'Amasis receuroit vne grãde affliction de bauler sa fille, & la refusant qu'il estoit impossible qu'il eschapist de la main des Perses. Amasis qui ne pensoit pas à la trahison que cestuicy luy jouoit, & encore moins quelle estoit celle qu'il enuoyoit, fut si mal auisé qu'au lieu d'enuoyer sa fille à Cyrus il mit en sa place vne belle Princeesse nommee Niretis fille du Roy Egyptien Apiré, qu'Amasis auoit fait mourir, laquelle estant en Perse, comme le Roy la saluant l'appellast fille d'Amasis: Vous vous trompez, dit-elle Sire, car ie suis fille d'un plus homme de bien qu'Amasis, à sçauoir du Roy Apiré qu'Amasis a fait traistresseusement mourir, & s'est emparé de son Royaume. Cecy aida beaucoup à irriter Cambises se voyant moqué par Amasis: si qu'ayant iuste occasion de venger la mort de son beau pere, & de recouurer l'heritage de sa femme, il passa en Egypte par le moyen du Roy d'Arabe, dẽnt Amasis & son fils Pnammenec, & estant arriué à Memphis il fit tirer le Roy Amasis de son tombeau, & le fit fouetter tout ainsi que s'il eust eu quelque sentiment, & non content de cela le fit ietter au feu, bien que ce fut contre la religion de Perse, lesquels adoroient pour lors le feu: puis il se resolut d'aller contre le Roy d'Ethiopie, mais il fut contraint de quitter son entreprise, & s'en retourner en Egypte où il ruina alors les temples d'Apis, & tua le bœuf sacré que les Egyptiens adoroient, le blessant à la cuisse, il auoit aussi enuoyé vne grande troupe de soldats pour ruiner le temple d'Amon en Lybie, mais ils furent repoussez par les pluyes, l'orage, tempestes & foudres: de sorte qu'ils s'en retournerent sans rien faire. Mais bien que ceux cy ne fussent que des faux Dieux, il en fut toutefois rigoureusement chastié: car premierement il deuint comme furieux, faisant mourir ses plus proches & ses plus grãds amis, entre autre son frere Smerdis pour vn songe qu'il auoit fait, que Smerdis estoit assis sur le trosne Royal, & que du ciel il touchoit les estoiles, & cela fut cause qu'il enuoya en Perse Prexaspé l'un des Mages, & le plus grãd & fidelle amy qu'il eust, pour tuer Smerdis ce que l'autre executa, puis il establit la loy licentieuse d'espouser sa propre seur, chose non auparavant pratiquée entre les Perses: surquoy ayant cõsulté les Iuges, ils luy dirent qu'il n'y auoit loy quelconque qui oõtroyast telle accointance, trop bien y auoit il vne autre loy qui dispensoit les Rois de faire ce que bon leur sembleroit, garantissant ainsi leurs testes, s'ils eussent dit autrement que selonc les volontez de ce tyran, lequel ayant espousé deux de ses seurs, il tua la plus ieune, d'autant qu'elle auoit pleuré son frere Smerdis n'agueres occis. Il estoit fort adõné au vin & s'en yuroit presque tous les iours, encor que le vin luy fut contraire, d'autant qu'il estoit sujet au haut mal, & comme durant son yurognerie il eut demandé à Prexaspé qui auoit occis Smerdis, quelle opinion auoient de luy les Persans, l'autre luy respondit qu'ils l'auoient tres-bonne, excepté qu'ils trouuoient estrange qu'il se troublast par trop boire, de quoy Cambises coléré, il se fit amener le fils de Prexaspé & decochât son arc luy assena droit dans l'estomach, disant que s'il ne luy auoit atteint le cœur qu'on le pouuoit à bon escient appeller yurongne: & de fait l'enfant ayant esté ouuert on trouua la fleche auoir passé par le milieu du cœur: le pere le voyant, & estant contrainct de louer celuy qui l'auoit priué de successeur: & de la en auant il faisoit massacrer les plus braues de sa suite à la moindre fantaisie qui luy venoit, lesquels apres il demandoit, ne se souuenant pas de les auoir fait mourir.

Mais Cambises fut payé tout à coup de ses meschancetez, car s'en allant d'Egypte il oût nouvelles que les Mages s'estoient reuoltez, & auoient occupé le royaume de Perse, & principalement Pazisité auquel il se fioit le plus, & Smerdis frere de Pazisité: cela luy causa beaucoup d'ennuy tant pour la trahison de ce Mage, que pour le souuenir qu'il auoit d'auoir faire mourir son frere à tort: mais comme il se voulu mettre en chemin pour aller contre ses rebelles, ainsi qu'il montoit à cheval son espee degainant luy donna dans la cuisse au mesme endroit qu'il auoit frappé Apis, duquel coup l'os estant offensé, & la gangrene s'y estant engendree, il mourut pres d'Ecbatane, selonc l'oracle qui luy en auoit esté donné apres auoir esté monarque des Perles 7. ans & cinq mois, sans laisser aucuns enfans qui luy pussent succeder, car les femmes ne venoient point à la succession en Perse.

Regne du Mage Smerdis.

Or personne ne croyoit que Cambises eut fait tuer son frere, bien que deuant son trespas il l'eust declaré: car on croyoit qu'il le disoit afin que les Persans le vengeassent de ce qu'il auoit usurpé la courõne, ioint que Prexaspé qui l'auoit occis n'auoit garde de le cõfesser: de sorte que

tous les Seigneurs receurent d'un commun accord Smerdis pour Roy, le croyant estre enfant de Cyrus. Le Mage ainsi parvenu à l'Empire pour si establir & gagner les cœurs d'un chacun, enuoya par toutes les provinces un rabais des tailles & impositions qu'on souloit lever sur les peuples, ce qui luy concilia les volontez d'un chacun : de sorte qu'il n'y avoit personne qui ne fut à son commandement, les Perses exceptez : car Smerdis s'assurant bien s'il se laissoit voir qu'il seroit reconnu, ne se monstroient en façon du monde au public : si qu'ils commencerent à soupçonner que c'estoit le Mage, pour s'en esclarcir voicy cōme ils y procederēt : Otan fils de Pharnapée un des plus grands Seigneurs de Perse, s'adressa à une sienne fille nommée Phedyne, laquelle avoit esté à Cambises, & lors seruoit encore au Mage de concubine. Otan demanda avec qui elle couchoit, mais elle ne luy en peut rendre de raison, d'autant qu'elle n'avoit jamais veu Smerdis fils de Cyrus : depuis elle luy manda que pas une des femmes ne parloit à sa compagnie, car le Roy les avoit separees l'une de l'autre ; cela fit croire davantage au Persan que c'estoit le Mage, & pour s'en esclarcir du tout, il dit à sa fille que comme elle seroit couchée avec luy qu'elle tastast s'il avoit point d'oreilles, à cause qu'il sca voit que le Mage Smerdis avoit eu les siennes coupées par le commandement de Cyrus : la fille ayant obey & trouué que son mary estoit efforillé en aduertit son Pere, lequel descouvrit toute ceste affaire à Aspolatine, & Gobria principaux entre les Persans : ces trois cy en gagnerent trois autres, à sca voir Intapherne, & Megabyse, & Hidarme. Darius estant arriué de son gouvernement de Suse fut encor associé à ceste conspiration, disant estre assuré que Smerdis frere de Cambises estoit mort : si bien que ces sept Seigneurs conduisirent si heureusement leur entreprise que les Mages furent taillez en pieces, & Prexaspée meurtrier de Smerdis fils de Cyrus, se precipita luy-mesme du haut du Palais royal, apres avoir déclaré la verité du fait, & irrité tout le monde contre les Mages qui regnerent environ 8. mois : de sorte que la race de Cyrus ne fut pas de grande duree entre les Perses, & le troisieme heritier ne jouit point de ses conquestes.

D A R I U S fils de Histaspée 4. Monarque des Perses.

8 Apres donc la mort des Mages il falut venir à l'eslection, & d'autant que les sept Seigneurs susnommez estoient esgaux en grandeur ils resolurent qu'au lever du Soleil ils sortiroient tous sept aux champs, & que le cheual qui hanniroit le premier seroit celuy qui donneroit la couronne à son maistre : ce qu'estât advenu à Darius par la ruse de son escuier, il fut aussi jugé digne de commander sur la Monarchie des Perses. Il estoit fils d'Histaspée un des plus grands de Perse, & lequel Cyrus avoit voulu faire mourir, d'autant qu'il avoit songé qu'il ravissoit à ses enfans la couronne. Or comme il avoit la reputation d'un des plus vaillans du royaume, tous les Asiaticques luy rendirent volontairement obeissance, excepté les Arabes, lesquels bien qu'ils eussent esté domptez par Cyrus & Cambises, si ne les avoit on jamais peu ranger à se rendre tributaires. Ce Darius espousa les deux filles de Cyrus, tant pour illustrer d'avantage sa famille, que pour se rendre les Perses plus affectionnez : puis ayant pacifié toutes choses en son Empire en 4. ans de son regne. Il donna puissance aux Juifs de rebastir le temple & les murs de la cité de Jerusalem, leur fournissant or & argent, materiaux & viures pour ce faire : leur commandant de prier Dieu pour sa santé, & pour l'establissement de sa couronne. C'est ce Prince cy qui est appelé Assuerus en la sainte Escripture, & pour raison duquel a esté faite l'histoire d'Esther ou Hadessa, par le moyen de laquelle les Juifs furent sauvez de la conspiration d'Amán, & advancez en honneur en la maison du Prince. Le premier reglement que ce Prince fit par tout son Empire, ce fut de le despartir en dix-huict gouvernemens & provinces qu'il appella Satrapies, sur lesquelles il imposa des tailles & impost pour l'entretien de sa maison, & fournir aux frais de la guerre, & sur chacune Satrapie il mit un gouverneur, ce qui fut cause que les Persans tenans cela pour avarice, & non pour preuoyance, disoient que Cyrus avoit esté le pere du peuple, Cambises seigneur & tyran, mais que Darius estoit marchand. Les choses ainsi mises en bon ordre, il alla faire la guerre aux Babylo niens qui s'estoient reuoltez, s'estans resolus à soutenir tout malheur plustost que de se rendre, mais Zophire fils de Megabyse un des sept Princes qui occirent les Mages, s'estant fait inciser le nez & les oreilles, & couper ignominieusement les cheveux, il s'alla rendre aux Babylo niens, feignant que Darius l'avoit ainsi outragé, lesquels n'ignorans point la qualité ny la grandeur du personnage, creurent facilement ce qu'il disoit : & l'ayans introduit dans leur ville, ils le firent leur General, où du commencement il fit merueilles contre les Persans en faueur de ceux de dedans, lesquels par cet artifice admirans sa valeur se fierent tellement en luy, qu'ils luy mirent les clefs de leur ville entre ses mains. Zophire ayant lors ce qu'il desiroit, fit si bien qu'il introduisit son Prince dans la ville, lequel ayant puny feuerement les Babylo niens de leur reuolte, donna la cité, appartenances & dependances à Zophire, voulant que pour l'amour de luy elle fust exempte de tous subsides. Ceste guerre ainsi acheuée, Darius voulant prendre vengeance tant de la mort de Cyrus, que de la deffaitte des Persans par les Scythes, se resolut de faire la guerre à ceste nation, mais il ne prit pas le chemin de

min de Cyrus vers le Levant ains de l'Hellepont, & passant en la Thrace ioignit avec vn pont le Bosphore & d'estroit de Bizance à present Constantinople, & entrant en Europe fut vers les Moscouites & autres Scythes se tenans le long de la mer Maiour, du fleuve Boristhen & du Danube: mais voyans que les Scythes ne faisoient que harceler son armee sans vouloir venir à vn combat general, & cependant par diuerses surprises luy tuoient plusieurs de ses gens, craignant aussi qu'ils ne rompiissent les ponts du Danube, & ne luy empeschassent le retour en son pais, il quitta là son entreprise ayant perdu nonante mille hommes ce qui sembloit n'estre rien, car on tenoit que ceste armee n'estoit pas moindre de 7000. combatans: ce fut lors qu'il subiugua la Macedoine, la Thrace, & les Perniens sous la conduite de Magabize fils de Zophire, qui estoit chef d'une partie de ses forces, s'estant principalement rué sur ces provinces, à cause qu'Aminte Roy de Macedoine auoit faict mourir des Ambassadeurs qu'il luy auoit enuoyez, comme aussi en ce mesme temps il enuoya Amasis contre les Africains, à cause qu'ils auoient surpris quelques vns de ses vaisseaux, & occis Arcesilaus general sur iceux, lequel estoit Roy du pays Cyreneen qui auoisine l'Egypte, mais sa mort fut vengée par cet Amasis en la prise de la ville de Bercé, qui est en l'Afrique Occidentale. Bien tost apres, Otan que Darius auoit laissé gouverneur de la Thrace print la ville de Bizande & Chalcedon, avec les Isles de Lesbos, Andros & Imbros. Et d'autant que les Ioniens s'estoient reuoltez contre Darius persuadez par Aristagore leur Seigneur, qui auoit esté incité à ce faire par Histice Milelien. Il fit marcher ses forces contr'eux, & lors les Atheniens se faisans de la partie, allerent assieger la cité de Sardis en Lydie, qu'ils prindrent & bruslerent, ce qui causa entre-eux vne longue & cruelle guerre, car Darius ayant enuoyé contr'eux Artapherne, cestuy-cy vint aux mains avec les Grecs, Ioniens, & Milleliens, les vainquit, & print la cité de Miler, & plusieurs autres de l'Asie, quil rendit tributaires, comme furent aussi la pluspart des Isles domptees par Mardonius General de son armee de mer, lequel subiugua derechef les Macedoniens, encore qu'il eust perdu vingt mille hommes par vn grand orage & tempeste de mer, ne laissa pas d'entrer en la Thrace, battre les Thraciens, prendre leurs villes, & les assujettir à l'Empire de Perse, tellement que Darius estoit lors le plus puissant Prince de tous ceux qui ayent porté le tiltre de Monarque auparauant luy.

Darius restablit aussi alors la souueraine sacrificature entre les Iuifs, leur faisant toutes les faueurs qu'il luy estoit possible, à cause de son espouse. Ester, & comme les Cariens peuple de la petite Asie, voisins de la Cilice: ores Catamanie eussent voulu rompre les cours de ses prosperitez, il arma contre eux, & les vainquit comme il fit les Eretriens: Mais en récompense les Atheniens plus fauorisez du Ciel qu'aydez & defendus par leurs propres forces, sous la conduite de leur Capitaine Miltiades desfirent ses armees en bataille rangée en la plaine de Marathon, Mardonius étant general des troupes Persiennes, cela fut cause que Darius delibera de mettre sus vne si puissante armee, qu'elle fust suffisante de foudroyer & ruiner la Grece; & de faict, il fut trois ans à la preparer, mais cōme il la vouloit faire marcher, eut aduis de la reuolte d'Egypte, toutesfois ayant plus à cœur le desir de se venger de l'affront qu'il auoit receu, il ne laissa point de se mettre en chemin contre les Grecs, la mort seule arresta le cours de ses entreprises, vne maladie l'ayant surpris par le chemin qui l'osta de ceste vie, l'an 36. de son regne, du monde, trois mille quatre cens nonante huit, en la septante troisieme Olympiade.

XERXES. V. Monarque des Perses.

Darius ayant ainsi finy ses iours, il laissa vne grande contention entre ses enfans pour la succession à la Royauté: car Ariamene, ou selon d'autres Artabazane étant l'aîné de tous les fils disoit, que selon la coustume des Perses qui donne le droit à l'aîné d'estre heritier presomptif, la Couronne luy appartenoit, cestuy-cy estoit de la fille de Gabrias. Au contraire Xerxes fils d'Arosse, fille de Cyrus, bien qu'il fust le plus ieune de tous, disoit que les autres n'estoient point fils de Roy, ains d'un homme priué, le different fut vuidé par cette sentence des Estats du pays, à sçauoir que les autres estoient enfans de Darius, mais que Xerxes estoit né fils de Roy: ce droit d'ainesse a toujours esté conserué aux linees Royales des Rois de Perse, il n'y eut que Cosroé qui fut preferé à son frere Gabada, lequel estoit l'aîné, à cause que cestuy-cy estoit laid.

Aussi tost que Xerxes se vit paisible possesseur du Royaume, il alla contre les Egyptiens, lesquels ayant domprez, il assiettit plus rigoureusement que n'auoit faict Darius, & leur donna pour gouverneur Achmené son frere de pere lequel fut depuis tué par Inare Africain, & Roy de Lybie. L'Egypte pacifiée, Il continua le dessein qu'auoit feu son pere, de subiuguer la Grece, ayant esté quatre ans à en dresser l'appareil, outre ce que Darius auoit faict auparauant, si bien qu'il surmonta les forces assemblees par tous les Roys qui auoient esté auparauant luy, son armee se montant iusques au nombre d'un million d'hommes, & s'en fit l'assemblee en la ville de Sardis. Mais comme il se persuadoit non seulement de dompter les hommes, mais encore d'arrester les flots impetueux de la mer faisant donner le fouet à l'Hellepont, pour ne lai-

ser pas vn passage libre à son armee au milieu de ses ondes. Il se veid deffait par vne poignée de gens, premierement à Salamine par les Atheniens, sous la conduite de Themistocles, depuis à Platees sous celle d'Aristide, si bien que ce qu'il fit de plus remarquable en cette expedition, ce fut d'auoir rauagé les contrees par où il auoir passé, brûlé la ville d'Athenes, & fait vn pont sur la mer, depuis ayât encore rassemblé des forces aussi puissantes qu'auparauât, ayant vne flotte de six cents voilles, ou 359. selon les autres, sous la conduite de Titbraustes, & vne tres-puissante armee de terre sous celle de Pherandates, l'vne & l'autre armee fut deffait pres le fleuve Eurymedon, par la valeur & bonne conduite de Cymon Athenien. Ce qui rabaisa tellement l'orgueil & la presumption de Xerxes qu'il fut contraint de se retirer chez soy, & de faire ce notable traité de paix avec les Grecs, par lequel il promit & iura que de là en auant ses armees n'aprocheroient point plus pres de la Grece que de la carriere d'vn cheval, & ne navigeroit point plus auant que les Isles Chelidoniennes & Cyances avec galeres ny autres vaisseaux de guerre. Bien tost apres, il fut occis ainsi qu'il dormoit, par Artaban le mesprisât à cause de ses desastres, & se persuadant de se pouuoir faire Roy : mais il tomba luy-mesme dans le piege qu'il s'estoit préparé, ainsi mourut Xerxes, qui auoit fait trembler toutes les nations de l'Vniuers, par ses puissantes armees, lesquelles toutesfois ne firent aucun effect digne d'vn si grand appareil apres auoir regné vingt & vn an.

- 10 Artaban ayant ainsi assassiné traistreusement son Prince, s'adresse au plus ieune des enfans Royaux nommé Artaxerxes luy disant que Darius son frere aîné auoit tué le Roy son pere, le priant de se ioindre avec luy auant que Darius occupast le Royaume: mais qu'il le deuançast en vengeance sur luy vne si cruelle mort. Ce qu'ayant entendu Artaxerxes meu d'vn iuste desdain s'arme, & se fit suivre surprenant son pauvre frere qui ne s'attendoit rien moins qu'à cela & le fit mourir. Artaban despesché de celuy duquel il se doutoit le plus se fortifia de ses enfans, & entrant au Palais vint se ruer sur Artaxerxes, lequel il blessa, mais non pas mortellement, si que le Prince s'estant à l'heure sauué à la fuitte recueillit toutes ses forces, & en la plus grande diligence qui luy fut possible se vint ruer sur le traistre qu'il tailla en piéces, demeurât par ce moyen en vne iouissance paisible de sa Royauté. Artaban s'estant assis sur le throsne Royal sept mois seulement qui acheuent la derniere année des Perles.

ARTAXERXES VI. Monarque des Perles.

- 11 Dés aussi tost qu'Artaxerxes fut estably en la Royauté, il poursuivit cruellement tous ceux qui auoient consenty & donné la main à la conspiration faite contre Xerxes son pere, changeant ou ruinant les gouuerneurs des Satrapes, desquels il ne se fioit point, & polissant si bien son Royaume que tout le monde louoit la sagesse de ce ieune Prince, vers lequel s'enfuit Themistocles Athenien chassé par l'enuie de ses concitoyens, & fut le bien receu & caressé par ce grand Monarque, eependant les Egyptiens voyant à leur aduis les affaires des Perles bien esbranlez se reuolterent & firent vn Roy chassant les Gouuerneurs, Iuges, Thresoriers & Receueurs & autres officiers qui estoient pour le Persan en Egypte & s'allierent des Atheniens pour donner plus d'effroy au Roy de Perse, lequel enuoyant Acamené fils de Darius, avec trois cens mille combatans, eut presque aussi tost la nouuelle comme les Atheniens auoient deffait toute son armee, tasche d'inciter les Lacedemoniens contre les Atheniens, ce que n'ayant peu faire il enuoya encore trois cens mille hommes contre les Egyptiens sous la conduite de deux excellens Capitaines Megabize & Artabaze, lesquels apres plusieurs combats, assauts & siege de villes, contrainrent les Egyptiens de s'estranger de l'alliance Athenienne & à la fin accorderent avec les Atheniens qu'on les laisseroit sortir en seureté de la Prouince: pourueu qu'ils ne se mēlassent des affaires du Roy de Perse en Egypte, puis mourut ayant regné quarante quatre ans, il fut bon Prince & qui embrassa la paix, vñant de grande courtoisie aux Iuifs, enuoyant Esdras en Ierusalem pour l'establissement de leur police, auancement du Temple & reuenus ordonnez pour l'entretien & sacrifices d'iceluy.

XERXES II. du nom.

Artaxerxes laissa à sa mort 2. fils, l'aîné nommé Xerxes II. du nom qui ne regna que 2. mois.

SOGDIAN.

L'autre nommé Sogdian qui ne regna que huit mois sans que l'vn ny l'autre ayent fait chose digne de memoire, c'est pourquoy ils ne sont point ordinairement mis au rang des Roys, mais j'ay suiuy en cecy Eulebe qui les a compris en ce nombre en sa Chronique.

DARIUS surnommé le bastard VII. ou selon les autres XI. Monarque de Perse.

- 12 Apres la mort des Princes susdicts Darius surnommé le bastard paruint à l'Empire sous lequel les Egyptiens s'emanciperent & se feirent libres, & regna sur eux nommé Sait, avec ce Darius s'allierent les Lacedemoniens, & les Medes se reuoltans furent par luy subiuguez & contrains de venir le recognoistre pour Seigneur, & ce Roy auoit deux enfans de Parisatide sa femme, l'aîné appelé Artaxerse, & le plus ieune Cyrus, cettuy-cy estoit vaillant, sage, courtois,

sage, courtois, & bien-aimé de chacun, lequel le Roy fit Satrape de Lydie & Ionie, & luy commanda de donner secours aux Lacedemoniens contre leurs aduersaires. Mais son insolence contre quelques Seigneurs du sang, qui ne l'auoient salué à la Royale, à sçauoir les mains encloses dans les manches de leurs robbes, qu'il fit mourir pour ceste occasion, fut cause que son pere estant malade le manda venir pour rendre raison de son forfait, & en estre puny, luyuant le iugement des Sages : à quoy obeissant Cyrus laissa son Lieutenant Lysandre Lacedemonien, duquel & des autres Grecs, il se seruit depuis contre son frere, luy estant sur le chemin, il fut aduertuy de la mort de son pere, fut neantmoins conduit vers son frere, qui le detint prisonnier, & mourut Darius le bastart en l'an du monde trois mille cinq cents soixante & deux, l'annee mesme que la Cité d'Athenes fut prise, & bruslee par les Lacedemoniens, & Demetrius le Tyran fut chassé de Sicile, & lequel an fut estimé remarquable à cause de ces trois choses, la mort d'un grand Roy, la disposition d'un autre, & la ruine de la plus illustre Cité de Grece : & regna Darius dixneuf ans.

ARTAXERXES II. du nom VIII. Monarque des Perses.

Artaxerxes, second du nom, succeda à son pere, & fut surnommé Mnemon, cestuy-cy tenant son frere Cyrus en prison, & luy brassant rien moins que sa ruine, le ieune Prince qui n'en esperoit pas moins, fit tant par ses menées, qu'il força les prisons, & se sauua, & s'enfuit en Grece, où estant, il assembla des forces, & fut suiuy des Grecs, & Ioniens, à cause qu'il auoit esté nourry parmy eux : & sans mentir, si dès le commencement le malheur ne l'eut suiuy, & que son trop de cœur & vaillance n'eussent acheminé ses pas à se fourer trop auant en la bataille, il eut chassé son frere de son siege : car il auoit la grace de sa mere, estoit désiré des Perses, & aimé presque de tout le monde. Mais ayant receu en un combat vne blessure en la teste, le pauvre Prince en mourut en la fleur de son aage, tenant desia son frere en tel estat, qu'il ne sçauoit presque de quel bois faire fleches.

Ce Roy aymoit fort le repos & la paix, & ayant appaisé les troubles suscitez par son frere, n'eust autre estude qu'à mettre accord entre les Grecs, comme il fit tout au contraire de ses predecesseurs, qui n'auoient tasché que de les tenir en diuision, aussi les Grecs entioyerent vers luy vne solennelle & grande Ambassade, en laquelle estant Pelopidas Thebain : fut comme recite Plutarque, honoré sur tous les autres, & ayant regné ce Prince trente six ans il mourut, laissant pour heritier Darius Artaxerxes.

DARIUS ARTAXERXES, surnommé Ochus, IX. Monarque de Perse.

L'entree du commencement du regne de ce Monarque, fut contre les Iuifs, lesquels faisant des brigues pour le fait de la souueraine Prestise, il y eust entre iceux un nommé Iean, lequel occit dedans le Temple Iesus son frere, qui estoit souuerain Pontife, mais Dieu ne laissa ce forfait impuny : car le peuple perdit sa liberté, & le Temple fut polluy par l'entree de Bagoas, lequel y punit le delinquant, & imposa la taille de sept ans aux Iuifs, & quelque temps apres Ochus prenant certaine ville d'iceux, en bannit les Citoyens d'icelle, & les transporta pres de la mer Caspie, qui sont ceux qu'Eusebe appelle Abramis, & lesquels obseruent encore quelque chose du Iudaïsme. Contre ce Darius se reuolta un de ses Satrapes & principaux Capitaines, appellé Artabaze, & tint teste longuement contre les Lieutenans du Roy, soustenu des forces des Prouinces voisines : mais en fin il perdit la vie, & le Roy reconura le pais d'Egypte, Cypre, & Phenisse, & prit par trahison la Cité de Sydon, faisant occir celuy qui l'a luy auoit trahie. En fin ayant regné vingt & six ans, il fut empoisonné (avec tous ses enfans, un excepté) par Bagoas Eunuque, & Arsamé eschapé de ce venin, regna en la place de son pere, mais son regne ne fut guiere long : car dedans l'an quatriesme, le mesme Bagoas l'empoisonna avec tout le sang Royal, & toutesfois ne peut-il empieter le Royaume, qui vint à Coloman, grand Seigneur Persan, & qui se fit appeller Darius IV. du nom, lequel Bagoas pensant empoisonner, comme il auoit fait les autres, il luy fit à luy-mesme prendre le poison qui luy vouloit donner, & par ainsi fut puny de ses meschancetez.

DARIUS IV. du nom, & dernier Monarque de Perse.

Darius ainsi vengé de Bagoas paruint à l'Empire, où il ne fut pas longuement : car ayant regné six ans, Alexandre le Grand luy fit la guerre, le despoilla de son Empire & de sa vie, & ruina la Monarchie de Perse en l'an du monde trois mil six cents trente cinq, en la cent douzieme Olympiade, & depuis que Cyrus la raut aux Medes, deux cents vingt-huict ans, qui n'est pas grand chose, qui prendra esgard à celle des Assyriens, qui dura par tant de siecles : mais elle ne fut pas si puissante que celle des Perses.

Le Royaume de Perse retourné en sa premiere splendeur ; & quant & comment.

La Monarchie des Perses ainsi abbatuë demeura esclaué, & comme enseuelie dans celle des Macedoniens, laquelle dura bien l'espace de 293. ans, mais neantmoins ils ne commanderent pas long-temps en la Perse : car apres la mort d'Alexandre le Grand, les Seigneurs Macedo-

niens se faisoient la guerre les vns aux autres, à qui seroit le souverain entr'eux, un Arlage Gentil homme Parthe, d'autres disent Bactrian, pour l'amour duquel tous les Roys des Parthes se nommerent Artacides, prenant son temps sur ceste diuision, se rua sur Andriagore Persan, auquel Alexandre auoit donné le Gouvernement des Parthes, le despoilla du pais Parthian, & s'en rendit souverain, sans vouloir despendre ny releuer du Prince de Macedoine : ce qui aduint en l'an de la creation du monde, trois mille sept cents dix-sept, Olympiade cent trente-trois. Si bien que la puissance Grecque s'aneantissant en Leuant, les Parthes auparavant incogneus, & sans force se firent Monarques de l'Orient, ce qui dura l'espace de deux cents ans, iusques au temps d'Artaban dernier Roy de Parthes, lequel fut priué de la Monarchie, & de la vie par Artaxaré, ou Artaxerxes Persan de nation, mais yssu de bas lieu, l'origine duquel on raconte en ceste sorte. C'est que sa mere fut mariee à un nommé Pauec, homme de basse & vile condition, comme estant conroyeur de son mestier, lequel neantmoins estant grand iudiciaire : & preuoyant, comme on dict, par sa science ce qui deuoit aduenir, il aduint un iour qu'un certain Gentil homme appelé Sanné, passant le terroir des Cadusiens vint un berger chez Pauec, bien que sa demeure fut fort pauvre, lequel voyant par ces arts que son hôte deuoit estre le chef d'une famille tres-grande & tres-illustre, il se contrista de premier abord, de ce qu'il n'auoit ny sœur ny fille, ou autre femme en sa maison qui luy touchast de sang, pour luy faire auoir la compagnie de Sanné, & auoir de luy des enfans qui luy touchassent de consanguinité : en fin voyant qu'il n'auoit point d'autre moyen pour paruenir à ce bonheur, il banda les yeux à toute consideration, & luy mit la nuit sa propre femme coucher avec luy, esperant de changer d'estat & de fortune. De cet accouplement illicitement fait, sortit cet Artaxaré duquel est question, lequel fut nourry en la maison de son pere putatif : mais ayant l'enfant acquis de grands honneurs par sa vaillance, tous deux vindrent en debat à qui il estoit. Pauec le disant estre sien, & Sanné l'auoit engendré : mais en fin il fut conclud qu'il seroit appelé fils de Pauec, yssu de la semence de Sanné. Telle fut, selon Agatie, l'origine de ce Roy, lequel se fit presque en un moment Roy de toute l'Asie, ce qui aduint l'an de nostre Seigneur deux cents vingthuit, seant à Rome au saint Siege Urbain premier, & tenant l'Empire, Alexandre fils de Mamee, contre lequel le Persan eut guerre qui contraignit le Romain de se retirer, qui estoit passé iusques au pais des Medes : toutesfoi il y a grand'apparence qu'il deffit seulement quelque camp volant de l'Empereur, & qu'Alexandre avec toutes ses forces, ayant liuré la bataille au Persan, le deffit, d'autant qu'il demeura toujours en la Syrie, & Mesopotamie, attendant la guerison de son armee, le Persan n'ayant l'assurance de l'attaquer, ce qu'il n'eust fait s'il eust demeuré vainqueur au premier combat, & ce qui tesmoigne bien que les Perles n'eurent pas du meilleur, c'est ainsi qu'on peut accorder Lampride avec Herodian.

Or ceste Artaxerxes mourut ayant regné quinze ans, il estoit fort versé en la science & ceremonie des Mages & Philosophes entre les Perles, ce qui fut cause que celle sorte de gens fut plus en credit, & insolente que iamais : car ils n'estoient oncques paruenus au degré de licence si effrene, que lors que regnoit cestui-cy leur compagnon, car sans leur autorité, il n'y auoit rien de bien fait.

SAPORÉ I. du nom, II. Roy de Perse.

Saporé premier du nom, & deuxiesme en rang de ceste nouvelle race des Roys de Perse, qui vint à la Couronne l'an de grace 243. seant au saint Siege Anthere, & tenant à l'Empire Gordian, qui eut une grand' guerre contre ce Roy, lequel faisant profit de la discorde qui estoit entre le Senat & les deux Maximins, occupa la pluspart de la Mesopotamie & Syrie, de sorte que le ieune Empereur Gordian fut contrainct d'armer contre luy, en quoy il fut si heureux qu'il le vainquit, luy ostant plusieurs villes qu'il auoit occupees sur l'Empire, ce que declare Gordian mesme en une sienne Epistre qu'il en escriuit au Senat. Mais Gordian ayant esté occis par l'Arabe Philippe, lequel on dict auoir esté le premier des Empereurs qui fit profession du nom de Chrestien, Saporé ne laissa de suivre sa pointe : car Philippe ne fut longuement en l'Empire, comme aussi ne fut le tyran, & persecuteur du nom Chrestien, ains se rua sur la Syrie & Cilicie, & Capadoce, au deuant duquel, comme Valerian fut allé pensant l'effroyer de sa presence, cestui-cy en obtint une si glorieuse victoire : qu'ayant defait les Legions Romaines, il print l'Empereur Valerian, & le conduisit prisonnier en Perse, où il mourut en ceste miserable seruitude, chose non iamais encore aduenue à l'Empire Romain, que de voir captif son souverain, toutesfoi Odenat Roy des Palmyreniens, occupant l'Empire de Leuant, s'opposa aux efforts de Saporé, & estans venus aux mains, le Persan fut vaincu & poursuivy iusques en Assyrie : Odenat iouit du bagage & Concubines du Persan, & de fait, si ce Palmirenien ne se fut opposé au Persan, c'estoit fait de l'Empire de Rome. De là auant se contient en son pais sans rien remuer, & ayant regné trente & un an, il laissa ce monde, & eut pour successeur Ormisdate.

ORMISDATE

ORMISDATE III. *Roy de Perse.*

Ormisdade ne regna qu'un an sans faire rien digne de remarque.

VARDANE IV. *Roy de Perse.*

Vardané fut successeur d'Ormisdade, mais on ne trouve rien de luy non plus que de l'autre: car les Perses furent long temps sans rien remuer, voire comme dit Vopisque, ils enuoyerent des Ambassadeurs & prelers à l'Empereur des Romains, Aurelian.

VARDANE II. *du nom V. Roy de Perse.*

A Vardané premier, succeda Vardané second du nom, cinquième au rang des Roys de Perse, lequel aucuns appellent Narsee, cestuy-cy eut guerre contre Probus Empereur: mais ils firent la paix, quelques villes demeurans aux Perses, de celles qu'il auoit conquises: & cecy fit, Probus ne pouuant contenir ses soldats en deuoir, aussi fut-il occis bien tost apres, & eut Vardané beau loisir de se pourmener, & de conquerir en Orient. Si Carus nauf de Narbone, avec ses enfans Carin & Numerien, s'estant fait Empereur, ne luy eut fait empeschement, lequel reconquit la Mesopotamie sur Vardané, passa iusques bien auant en l'Assyrie, & eut fait davantage, si la mort ne l'eut saisi. Vardané regna seize ans.

VARDANE III. *du nom, VI. Roy de Perse.*

Vardané III. du nom, qui ne vesquit que quatre mois, pource Narsee vint à la Couronne.

NARSEE VII. *Roy des Perses.*

Cestuy-cy fut homme de grandes entrepreises, & se faldant que les Romains tinssent en l'Asie les terres qui luy sembloit estre de l'ancien appennage des Perses, en voulut auoir la raison, pource fut contre l'Armenie & Mesopotamie, qu'il esbranla fort par guerre: mais il fut repoussé par Galere Maximian, la premiere fois qu'il battilla contre luy, & eut la fortune favorable: mais la seconde fois lors qu'il combatit entre Carra & Callinique, comme il y fut allé plus temerairement que laschement, à cause qu'à peu de forces il y auoit assailly vne tres-puissante armee, il fut chassé & battu, & se retira vers Diocletian, duquel il fut si mal receu, qu'on dit qu'il le suiuit à pied tout vestu de pourpre vn long espace de chemin, sans que iamais l'Empereur voulust qu'on arrestast son chariot pour luy parler, cela fut cause qu'il fit aussi tost vne grande leuee d'hommes par l'Illyrie & pais Mesien, & prenant la route de Leuant, il encontra Narsee, Aseub, Dormisde & Sapore en Armenie Mineur, le combatit avec tres-heureux succez, & avec non moindre conseil, que force & vaillance, veu que luy-mesme suuy de deux ou trois hommes à cheual fit l'office d'Espion, & fit visiter le champ de l'ennemy, lequel ayant vaincu, il cassa Narsee, prit son bagage, & butina ses thresors, eust pour prisonniers les femmes, sœurs, & enfans, & emmena vn nombre infiny de la noblesse de Perse, & des richesses desquelles on ne scauroit dire la valeur, & força le Roy Narsee de se retirer és plus cachees solitudes de son Royaume, pour laquelle si grande victoire luy retournant en Mesopotamie, ou Diocletian estoit avec les forces pour le seconder, il fut receu amiablement, & avec honneur tel qu'on fait à ceux qui triomphent, & emmena les femmes & sœurs de Narsee en Italie, comme encore ses enfans, lesquels furent menez deuant son chariot, lors que triomphant il entra dedans Rome: ainsi Narsee qui aspirait à l'Empire d'Asie perdit, & ce qu'il auoit conquis, & cinq de ses propres Prouinces, outre le Tigre: lesquelles tomberent en la main, & sous la puissance des Romains. Apres ce mal-heur si grand, les affaires de Perse furent bien fort reculez, & Narsee ne vesquit guere plus longuement: ains trespassa celle année mesme de sa deffaitte, & de son regne le septiesme.

MISDATE VIII. *Roy de Perse.*

Misdaté son fils luy succeda, qui fut huitiesme Roy de Perse, & viuoit du temps de Constantin le Grand, il fut par le commandement de son pere couronné au ventre de sa mere, chose non leuë d'autre, qu'un fruit non encore en lumiere aye porté la Couronne d'un Royaume: il mourut ayant regné sept ans neuf mois, l'an de nostre Seigneur 310. seant à Rome Mareel, & tenans l'Empire Maximian Galerius, & Constantin le Grand, sans auoir fait aucune chose digne de memoire.

SAPORÉ II. *du nom, & IX. Roy de Perse.*

Saporé fils de Misdaté parueni en aage pour commander, recouura tout ce que ses predecesseurs auoient perdu outre le Tigre en l'Assyrie & Mesopotamie, & en l'an de nostre salut 19 trois cents trente six, au mesme temps que les Chrestiens commencerent à paroistre en ses terres, & sollicité par les Mages & Sacrificateurs, de la volonté desquels dependoit fort toute ceste famille d'Artaxare, torty d'un homme de mesme vacation, il se mit à persecuter furieusement nostre sainte Religion, & fit mourir le saint Euesque Symeon, avec cent autres bons & fideles hommes en vn seul iour son gouuerneur mesme, & auant procedait par exaction & subides, & à la fin par bannissement & supplices, iusqu'à ce que Constantin le Grand le pria par lettres de cesser d'ainsi traicter les amys de l'Empereur de Rome. Apres la mort de Constantin,

Saporé se mit à persecuter les Chrestiens plus que iamais, comme on le peut recueillir de l'Histoire Ecclesiastique: de sorte que les pauvres solitaires qui se tenoient par les deserts & solitudes d'Assyrie & Mesopotamie, sentirent la fureur de ce tyran, lequel se fit Seigneur des pais l'auoisinants, & pour ce recommença la guerre entre luy & les enfans de Constantin, en laquelle les Romains ne gagnerent autre cas que des bastonnades, ainsi que le rapporte Eutrope Historien Romain, disant, Constans eut la fortune diuerse, & fort contraire: car il souffrit de grandes afflictions des Perseans qui luy prindrent souuent des villes, en assiegerent d'autres, luy mirent au fil de l'espee plusieurs de ses armées, & en somme iamais il n'eust combat contre Saporé, duquel le barbare n'emportast la victoire, sauf que pres la Cité de Syngar, ou le meilleur estant de son costé, la furieuse temerité des soldats luy osta ceste felicité, que de dompter à celle fois l'orgueil de son aduersaire. Plus clairement en parle Pomponius Letus, lors qu'il dit ainsi, Constans ne feit onc rien en Leuant qui luy reüssit heureusement: d'autant que son enemy eut tousiours le dessus: car l'an vnziésme de son Empire, la palme & victoire estant rauie vne seule fois fut reperdue par la temerité des soldats pres de Syngar: aussi Constans ayant huit fois esté vaincu, comme en ceste bataille, la victoire fut pour luy, elle demeura aux ennemis, non sans grand' perte, d'autant que Syngar fut perduë & Bizabde & Amide. Apres ceste bataille Saporé se rua sur les Armeniens, & fut assieger la Cité de Nisibis, mais les Massagettes l'assallirent, & il alla contre eux, non que pour cela on laissast le siege, & tandis Constans enuoya vers luy pour auoir la paix, laquelle luy fut oütroyée. Saporé apres ce, fut guerroyer les Armeniens, mais il apprit que la fortune ne luy suyuoit pas par tout: car Arface le vainquit, & le força de se retirer en Perse: mais ceste guerre Armenienne ne fut de grands cousts, & causa des ruines & deffaites insignes à l'Empire de Rome: car Iulian l'Apostat pensant faire mieux ses besongnes contre Saporé, que son predecesseur y alla avec ses forces, toutesfois il s'y fit massacrer, & son armée mise en route, d'autant qu'il combattoit contre celuy qui auoit Dieu pour garand, quoy qu'infidelle: mais il s'en seruoit pour la punition de cet Apostat, le plus desloyal & infidelle homme de la terre, lequel fut occis le deuxiesme an de son Empire, & de nostre salut trois cents soixante-sept, & le cinquante huitiesme du regne de Saporé Roy de Perse. La mort de cet Empereur, & la deffaire des Romains ne haussa le cœur de Saporé, comme celuy qui considera le nombre infiny des siens deffaits, la multitude des Elephans occis, chose non encore veüe, & veit les Romains encore dispos & prests à recommencer la noise, ayans vn chef si bon & si vaillant qu'estoit Iouinian, & pour cela il n'osa passer outre, ce qui fut cause que la paix fut faite: quoy que non trop auantageuse pour les Romains, & qui toutesfois leur estoit necessaire, veu l'eschec que le Persan auoit faict d'eux, & qu'ayans cestui cy en teste, & d'autres se reuoltans, il seroit aisé d'esbranler la grandeur de l'Empire, & neantmoins Ammian condamne fort ceste paix, comme procedant d'un cœur mol & effeminé, & accuse Iouinian comme homme coulard, & de peu d'effect: mais il luy faut pardonner à cause qu'il se transporte en ses affections, & que presque il ne peut louer que son Iulian l'Apostat, à la suite duquel il fut à la guerre.

ARTAXERXES X. Roy de Perse.

- 20 Saporé aagé de septante ans, & ayant regné autant que vescu, mourut l'an de nostre salut trois cents septante neuf, laissant son fils Artaxerxes, heritier & successeur de la couronne, mais non de son bon-heur: car Saporé ayant eu plusieurs femmes, auoir eu des plus illustres trois enfans. Ormisda, Ardanassé & Narsé, & de celle qui estoit de plus bas lieu, excellente toutesfois en beauté, il eust Artaxerxes: quand à Ormisda, il tenoit le party des Romains, ce qui donnoit le droit d'aisnesse à Ardanassé, qui deuoit succeder à la Couronne: mais son pere l'ayant recogneu d'un naturel trop cruel, ne voulut onc entendre à le faire son successeur. Car comme les Mesopotamiens eussent fait present d'une tente de cuir de chameaux enrichie d'or, & autre broderie, il la donna à son fils Ardanassé, luy demandant si ce present là ne luy estoit pas fort agreable, il respondit que s'il estoit Roy il auroit bien plus de plaisir de voir vn paillon faict de cuir & de peau des hommes: tellement que ceste response, & plusieurs actions cruelles de ce Prince luy firent perdre la succession: car son pere ayant assemblé le conseil, il fut conclud par le commun consentement que Saporé commanderoit & succederait apres à son pere: mais ils ne rencontrerent pas mieux en Saporé: car son pere estant decedé, il fit aussi tost mourir son frere Ardanassé, creua les yeux à Narsé, mit en prison Ormisda, & donna commencement à son regne avec vne infinité de cruautéz & de tyrannies; de sorte qu'il ne se faut pas estonner s'il se porta si rigoureusement contre les Chrestiens, puis qu'il ne pardonnoit à son propre sang. Ormisda estant prisonnier, sa mere, sa femme & sa sœur furent le voir avec le congé du Roy, lesquels luy donnerent vne lime avec laquelle il lima & rompit ses fers, & s'enfuit, se retirant à l'Empereur Constantin le Grand, auquel il fist de signalez services.

Artaxerxes

Artaxerxes donc iouit de la paix que son pere auoit iuree avec les Romains, & des Prouint-
tes qu'on luy auoit quittees, sans qu'il eust guerre à personne: & ayant regné vnze ans il mou-
rut, laissant pour successeur Saporé son fils.

SAPORÉ II. *du nom Roy de Perse.*

Saporé deuxiesme du nom fils d'Artaxerxes, regna cinq ans sans faire chose digne de
memoire.

VARANÉ XII. *Roy de Perse.*

A Saporé succeda Varané, lequel garda encore fidellement la paix avec les Romains,
voyant l'heur qui les accompagnoit depuis que Theodose le Grand estoit venu à l'Empire, &
sous le regne des enfans duquel, à sçauoir d'Honorius & Arcadius, il tenoit le Royaume de
Perse, lequel ayant gouverné dix ans il mourut.

ISDIGERTÉ XIII. *Roy de Perse.*

Isdigerté vint à la Couronne, l'an de grace quatre cents six, seant à Rome Innocent pre-
mier du nom, ce fut en cestuicy qu'Arcadius eut vne telle confiance, qu'il le constitua tuteur
du ieune Theodose son fils, tant pour tenir en bride les remuans, que pour empescher que du
costé d'Orient son fils ne fust inquieté en sa Seigneurie: & comme on luy eut porté ce testa-
ment il le receut avec grande ioye, maintenant la paix avec les Romains, que son pere & ayeul
auoient iuré avec vne grande equité & fidelité: & qui plus est il enuoya vn Gouverneur pour
le petit Prince nommé Antioque, homme excellent, vertueux & sage, & digne d'vne telle
charge, lequel se rendit le Protecteur de l'Empire, & le Conseruateur des droicts de son mi-
neur: ce qu'il manda au Senat en ceste maniere, au rapport de Paul Diacre: *Arcadius estant
mort, & m'ayant esleu tuteur de son fils, ie vous enuoye vn homme capable de tenir ma place: qu'il n'y aye
donc homme si hardy de dresser embusches à l'enfant, afin qu'une guerre intolérable ne soit cause de la ruine
des Romains.* Et afin qu'on n'eust aucune doute de ses intentions, il renouuella les alliances
d'entre les Perfes & les Grées, mesme qu'Antioque escriuoit souuent à Isdigerté, pour le bien
& support des Chrestiens: de sorte que la foy Chrestienne s'espandit grandement par le pays
de Perse, à quoy trauailloit beaucoup le bon Marunthe Euesque de Mesopotamie, Car au-
parauant tout cecy, ce Roy les persecutoit cruellement, plus poussé à ce faire par les Mages
& Sacrificateurs de ses Dieux, que par sa propre malice & instinct naturel: Ce fut en ceste per-
secution que Auda Euesque de sainte vie abbatit assez mal à propos le Temple du feu adoré
par les Perfes, & le Roy luy commandant de le rebastir, Il ayma mieux mourir que de ce fai-
re; en quoy il estoit plus louable qu'en le desmolissant, ayant en voulant bien faire esté causé
de tant de mal: toutesfois, comme il a esté dict, elle cessa du viuant mesme de ce Roy, qui
voulut en cela satisfaire non seulement aux Empereurs, mais encore au bon Euesque Marun-
the, lequel, selon Paul Diacre, luy auoit guery Varané fils du Roy susdict, lequel estoit demo-
niacle. Mais Socrates en son histoire Ecclesiastique, rapporte que cela aduint à cause que Isdi-
gerté estant subiect en vn grand mal de teste que les Mages ne luy auoient sçeu guerir, Marun-
the avec le signe de la croix luy osta, sans que iamais le Roy en fut apres tourmenté: ce qui fut
cause en partie que ce Roy donna licence à ce bon Euesque de bastir tout autant d'Eglises que
bon luy sembleroit en ses terres & seigneuries: de sorte qu'il y a grande apparence qu'il se fust
fait Chrestien sans les Mages, qui auoient vn grand pouuoir dans le pays. Il mourut l'an de gra-
ce 427. ayant regné 21. an, laissant son fils Varané heritier de la couronne.

VARANÉ II. *du nom XIV. Roy de Perse.*

Varané deuxiesme du nom pourueu à la Couronne des Perfes, se monstra d'autant plus se-
tiere persecuteur des Chrestiens, que son pere les auoit fauorisez. Et dés aussi tost que son pere
fut decédé, il declara la guerre à l'Empereur Theodose deuxiesme du nom, & surnommé le
Ieune, lequel toutesfois luy estant venu à l'encontre le vainquit, & l'eust pouruiuy avec plus
de violence, n'eust esté que les Chrestiens qui estoient en Perse luy estoient en soucy, crai-
gnant que ce Tyran ne les tourmentast encore pis que deuant. Il auoit commencé la persecu-
tion aux Princes & grands Seigneurs qui auoient receu la foy, desquels il desappointoit & re-
duisoit en telle extremité, qu'ils estoient contrains d'aller garder les chameaux, ou de faire
quelque mestier plus vil: puis les voyant ferme en la foy, il les faisoit mourir de plus cruel gen-
re de mort que les Mages pouuoient excogiter, lesquels estoient ses Conseillers ordinaires:
mais ceste derniere deffaite qu'il receut par Theodose fit cesser ceste persecution. Car l'Em-
pereur sans auoir esgard à l'aduantage qu'il auoit sur luy, pour le bien & repos des Chrestiens
enuoya Helion Patrice & Anatolius Preteur d'Orient, en Perse, pour rechercher de paix Va-
rané, lequel ne refusa point la condition, ains promit de faire la volonté de l'Empereur, &
deshors cessa la persecution. Il regna vingt - ans, & mourut l'an 447. seant à Rome Leon pre-
mier du nom, & lors que Theodose faisoit la guerre contre les Vandales.

VARANÉ III. du nom XV. Roy de Perse.

- 22 Varané troisieme du nom estant pressé de la necessité qui auoit fait accepter le repos à son pere: ne remua rien, ains se contint tousiours en repos que son pere auoir obrenu, & mourut apres auoir regné dix sept ans quatre mois.

PEROSÉ XVI. Roy de Perse.

Perosé luy succeda au Royaume, grand guerrier, hardy & d'un fort haut courage, lequel plus par temerité que par bon conseil perit en l'entreprise contre les Neptalites, non tant par la force de ses ennemis, que par son indiscretion & folie: car au lieu de marcher en deffiance par le pais de ses ennemis, il auoit vne telle presumption, se fiant en ses forces, que les autres eurent le moyen de le surprendre lors qu'il l'esperoit le moins, perissant ainsi avec toute son armee, sans auoir acquis aucune gloire ny reputation. C'est ce qu'en dit Agatias: mais Procope appelle ces Neptalites Euthalites, & dit ainsi: Perosé Roy des Perses vint en dispute pour les limites de son pais avec les Huns Euthalites, lesquels on appelle Albes, contre lesquels il alla avec vne puissante armee.

Or ces Euthalites sont de la race des Huns, & toutesfois ne sont point leurs voisins, avec lesquels ils ne marchent point, ny ne leur sont point limitrophes, ains auoisinent les Perses du costé du Septentrion: la Cité principale desquels est dite Gontia sur les limites des Persans, lesquels ont souuent combattu pour les confins de leurs terres avec leurs voisins, & ne sont point Nomades (c'est à dire Pasteurs) comme le reste des Huns, aussi n'entrèrent-ils iamais dans les terres des Romains pour les guerroyer, si ce n'a esté en la compagnie des Persans. Ils sont, dit-il, blancs en couleur, propres, & n'ont le regard furieux, comme les autres, aussi ne les imitent-ils pas en leur bestialité, ayans quelque police entr'eux. Car les Euthalites obeissent à vn Prince & seul Monarque, & s'occupent à viure ciuilement & politiquement, vsans de raison & iustice avec leurs voisins, comme sont toutes les nations ciuilisees. Ceux qui entre eux sont estimez les plus heureux, sont ceux qui ont iutques à vingt amis ou dauantage, avec lesquels ils mangent d'ordinaire, ayans leurs biens, & la Seigneurie commune ensemble, & ont coustume que quelqu'un des leur mourant, ils les portent en terre. Puis il adioust, que Perosé se voyant en lieu, d'où il luy estoit impossible d'eschapper, le Roy des Euthalites luy manda, que s'il vouloit se deliurer de ce peril, il n'y auoit point d'autre moyen que de luy venir faire hommage, & iurer, suyuant la coustume de son pais, que iamais les Persans ne feroient guerre aux Euthalites. Perosé en ayant demandé conseil aux Mages, ils luy responderent, que quant au serment, il en pouuoit faire à sa discretion: mais quant à l'adoration, reuerence & hommage que le Roy des Euthalites demandoit, que cela estoit impossible, veu que les Perses n'auoient licence d'adorer autre chose que le Soleil.

Mais ils luy donnerent ce conseil, à sçauoir, que le matin sur le point de iour il allast vers l'Euthalite, & que se retournant vers le Soleil leuant il luy fist la reuerence, & adorast le Soleil: car par ce moyen il eschapperoit du peril, conserueroit son honneur, & ne violeroit en aucune façon les coustumes de Perse.

Ainsi le sauua-il pour lors, mais il fut aussi desloyal à garder sa promesse, comme il auoit esté considéré en sa conduite: car il ne fut pas si tost de retour en son pais, qu'il assembla vne armee pour marcher contre les Euthalites, ayant laissé son fils Cauadé au pais pour gouverner en son absence: & ce fut lors qu'il y demeura avec les autres enfans, toute sa noblesse, & les plus vaillans hommes d'entre les Perses, apres auoir regné vingt ans, l'an de nostre Seigneur quatre cents octante quatre, seant pour lors à Rome le Pape Simplicius, & Leon tenans l'Empire des Grecs, portant aussi le tiltre d'Empereur de Rome.

VALENT XVII. Roy de Perse.

- 23 Cestui-cy estoit frere du Roy deffunct, lequel gouuerna le Royaume apres la mort de son frere, à cause du bas aage de Cauadé, mais il ne fut qu'un ombre de Roy, sans faire rien digne de memoire: & à la verité s'estoient les Euthalites qui gouuernoient plustost que luy, & auxquels il se rendit tributaire, à cause de son humeur paisible, & nullement propre à manier les affaires si embrouillees qu'estoient lors celles de Perse: cela toutesfois ne dura pas long temps: car il mourut ayant regné quatre ans, & payé deux ans de tribut.

CAUADÉ I. XVIII. Roy de Perse.

Valent estant par mort, Cauadé fils de Perosé vint en fin à la Couronne: à son aduenement il trouua les Perses fort tyrannisez par les Euthalites: mais comme il estoit Prince belliqueux, & qui n'eust pas peu demeurer en repos, quand bien il eust eu la paix de toutes parts: il print bien tost les armes contre ses ennemis, commençant par les Euthalites, & les vainquit, secouant le joug de leur domination: il fit aussi la guerre aux Romains, & autres peuples ses voisins, desquels il emporta souuent la victoire. Il estoit naturellement cruel, & si colere, qu'il estoit impossible de l'appaiser quand il s'y estoit mis: son esprit remuant ne luy pouuoit permettre

permettre aussi de s'arrester qu'il ne brouillast quelque chose, soit avec autrui, ou avec les siens, & en son Estat : de sorte qu'il prenoit plaisir à changer les anciennes constitutions & Ordonnances de Perse, & en faire de nouvelles : vne entre autres indignes d'un grand Roy, & qui pensa renuerter son Estat, celle, à sçavoir par laquelle il vouloit que toutes les femmes fussent communes : car tous les Estats de ses pais trouuerent la chose si hors de raison, & de la bienséance que les Seigneurs & le peuple, comme au son d'un toclin se reuolterent vnaniment contre luy, le prindrent & le mirent en prison, ayant regné vnze ans.

BLASÉ, ou LAMASÉ XIX. Roy de Perse.

Cauadé ainsi mis prisonnier, & n'ayant aucun hoir mâle pour tenir sa place, les Perses s'assemblerent pour eslire vn Roy, & choisirent Blasé frere du feu Roy Peroté: car selon leur coustume il ne leur estoit pas loisible de faire aucun Regēt du Royaume, s'il n'estoit du sang Royal, si ce n'estoit que ce sang fut venu de quelque famille de basse condition. Cestui-cy estant esleu Roy, mit aussi tost en deliberation au Conseil, que c'est qu'on deuoit faire de Cauadé : le peuple ne vouloit point en sorte aucune qu'on le fit mourir, quoy qu'au Conseil les opinions fussent diuerses : car Gusanascadé qui estoit Chanarangé : c'est à dire le Gouverneur du pais, voyant le peu de resolution du Conseil, tira vn petit cousteau au long d'un doigt, & gros à l'aduenant que les Perses portoient ordinairement pour rogner leurs ongles, & le montrant aux autres, leur dit que ce petit cousteau suffisoit pour lors à faire ce que vingt mille hommes apres ne pourroient executer, declarant par là les maux que feroit Cauadé, s'il eschappoit vne fois de leurs mains : mais toutes ses persuasions ne peurent gagner sur les Perses de faire mourir leur Roy : bien consentit-on que ce Prince qui estoit cruel & mal aduisé fut mis en prison perpetuelle, & Blasé, Lamasé, ou Zambazé (car on luy donne tous ces noms) commença lors à regner, homme iuste, courtois, & fort debonnaire, & sous lequel les Persans se faisoient désormais fort de viure à leur aise: mais Cauadé leur fit bien changer de penſee par le moyen d'un amy qui se nommoit Seosé, lequel se tenoit pres de la prison.

Cestui-cy estant vn iour & nuit à reſuer sur les moyens qu'il pourroit trouuer pour deliurer son Prince, ne taschoit que de rechercher les moyens pour parler à luy : d'autant qu'il estoit permis à la femme de Cauadé de l'aller veoir, & luy donner ce qui luy seroit necessaire : Seosé fit entendre par elle, que là où il auroit moyen de sortir, Seosé auoit les cheuaux, & autres choses prestes pour le cōduire là part où il voudroit aller, & luy designa le lieu où tout l'appareil seroit dressé. Ce qui fut soudain executé : car la Dame estant en prison despoüilla ses habits, & vestit ceux de son mary, & luy vestu en femme sortit aysément de la geole, & avec Seosé & les troupes qu'il auoit secrettement amassées, il s'enfuit vers le Roy des Euthalites, qui luy donna sa fille en mariage. D'autres disent qu'il s'en alla de là vers l'Empereur Anastase : mais il y a fort peu d'apparence que cēt Empereur Chrestien ait voulu donner sa fille à cēt infidele qui auoit desia plusieurs femmes : cela estant bien plus vray semblable ce que disent les autres, que ce fut la fille du Roy des Euthalites qu'il espousa pour lors, veu mesme que les Perses auoient fait mourir celle qui auoit preferé la liberté de son mary à son contentement, & mis sa vie au hazard pour le tirer de seruitude. En quoy les Perses firent bien cognoistre leur animosité contre ce Prince, puis qu'ils ne pardonnerent pas mesmes à la charité coniugale, laquelle ils deuoient plustost reuerer que chastier en ceste Princesse.

Avec les forces donc du Roy des Euthalites, Cauadé s'achemina contre les Perses, lesquels luy venans à l'encontre, il mit soudain en fuite, & de là s'en venant au pais, & Satrapie de ce Gusanascadé, qui auoit donné conseil qu'on le fit mourir, il le desapoincta de sa charge de *Chanarangé*, ou Gouverneur, & y mit Adergunibade en sa place: puis estant venu au Palais Royal, il s'en saisit sans grande difficulté, faisant mourir Zambasé, & Gusanascadé, puis il fit son grand amy Seosé qui l'auoit deliuré de prison, *Adrastadaram Selané*, qui estoit vn Magistrat ayant charge sur toute la gendarmerie, tel à peu pres que le Connestable en France. Et Seosé fut le premier & le dernier, auquel iamais vn tel Estat fut conféré en Perse.

CAUADÉ fort de prison, de rechef Roy de Perse.

Cauadé ayant ainsi reconquis son Royaume, & deuenu sage par ce reuers de fortune, se gouerna par apres plus modestement qu'il n'auoit fait auparauant. Or denoit-il de grands deniers au Roy des Euthalites, cela fut caute qu'il en enuoya emprunter à l'Empereur Anastase: mais en ayant esté refusé cela luy seruit de pretexte de luy faire la guerre: tellement que les Perses le ruerēt sur l'Armenie, & y firent des maux infinis, prirent aussi la Cité d'Amide, & voulans passer plus outre, ils en furent destournez par les Euthalites qui leur firent la guerre. Ce qui fut caute qu'Amide fut recouuerte par les Romains, lesquels, comme dit Procope, corrompirent à force d'argent le Gouverneur de la ville, que Cauadé y auoit laissé. Ce pendant Cauadé se voyant vieil, & craignant quelque changement d'Estat en Perse apres sa mort, il resolut d'ordonner de son successeur. Comme donc il eut trois fils, il tascha de donner le Royaume au

plus ieune, nommé Cosroé, d'autant que l'aîné qui se nommoit Cauadé, ne luy estoit point agreable : & le second appellé Bazé, estant borgne, ne pouuoit venir à la Couronne, pource que la loy de Perse en exclut tous les estropiés, ou qui ont faute de quelque membre. Mais le troisieme luy estoit plus agreable, à cause mesmes qu'il l'auoit eu de sa propre sœur nommée Abenede : & pratiqua tant cecy, qu'en fin il obtint. Dés lors il se mit à persecuter les Chrestiens, faisant à quelques-vns couper le jarret, qui pour cela ne laisserent de cheminer : mais assiegeant vn certain Chasteau des Indiens, appellé Azubdabar, & ne le pouuant forcer, il l'emporta par la priere des Chrestiens, dedans lequel il trouua vn thresor inestimable, ce qui fut cause que desormais il ne fut plus si cruel, ains qui plus est, il permit à quiconque voudroit de se faire baptiser, & en fit surseoir les recherches & punitions. Il eust guerre contre l'Empereur Iustin, qui ne fut de grande duree, car la paix s'ensuiuit tost apres, & Cauadé fit mourir tout, tant qu'il trouua des Manicheens en son Royaume, à cause qu'ils auoient tasché de faire son fils Roy, luy estant encore sain, & plein de vie : & ayant regné depuis sa deliurance de prison trente ans, & vnze auparauant. Il tint en tout le Royaume quarante & vn an, qu'il laissa paisible à Cosroé, à cause que l'aîné de ses enfans fut occis avec les Manicheens, pour auoir conspiré contre son pere : & aduint la mort de Cauadé, l'an de grace 532. seant à Rome Boniface I. & Iustinian tenant l'Empire.

COSROE XX. Roy de Perse.

- 25 Cosroé vint apres son pere à la Monarchie des Perles, des louanges duquel parle Agathie en ceste sorte : Non seulement, dit-il, ce Roy est loué & admiré par les Persans, qui le prisent plus que de raison, ains encore plusieurs d'entre les Romains le font homme studieux, & amy des bonnes lettres, qui paruint à la cognoissance parfaite de nostre Philosophie, tourna plusieurs oeures Grecques en sa langue Persienne, & y en a mesmes qui le font si bon Platonique, que Thimee n'estoit pas pour le surpasser : mais Agathie ayant proposé cecy, dit franchement cela estre impossible en vn homme barbare, né, nourry & eleué entre des courtisans mols, effeminez, ignorans, & flateurs : de sorte que les gens de sçauoir ne pouuoient auoir loisir d'instruire ainsi ce Prince. Et ce qui luy donna ce bruiet, fut pour la grande multitude d'hommes de sçauoir qui frequentoient en sa Cour, chacun s'esbahissant qu'un Roy grand, puissant, & sur tout barbare, aymast de telle sorte les bonnes sciences, & fist tel compte de ceux qui en faisoient profession. Ailleurs toutesfois Agathie le loue par dessus Cyrus & Xerxes.

Quant aux affaires de la guerre, ayant eu affaire contre l'Empereur Iustinian, qui auoit surmonté les Goths, la plus fiere, orgueilleuse, & puissante nation de la terre, & faict teste aux Vandales, & autres sortis de Septentrion, avec lesquels neantmoins il fut contrainct de faire paix pour cent & dix ans, laquelle on appella la paix sans fin. Mais Cosroé ne la peut tenir, ains dans trois ans apres il l'a rompit, & courut iusques en Cilicie & Syrie, prenant la grande Cité d'Antioche. Mais Belisaire luy allant à l'encontre, le fit retirer, & le vainquit, ainsi que desia il auoit faict à la premiere guerre.

Après ceste deffaire, il se retira en Perse : mais il ne demeura pas long temps qu'il ne reuint sur les terres de l'Empire, comme celuy qui aspirait à plus grande chose qu'au Royaume Persan, & se rua sur la Comagene, iadis Eufratise : mais Belisaire luy empecha encore ses desseins, & le vainquit. Ceste guerre fut fort longue, car elle continua 34. ans, du temps des Empereurs Iustinian & Iustin, & iusqu'à tant que Martin, cousin de l'Empereur Iustin vint contre les barbares, & leur donna bataille en vn lieu appellé Sagarthe, où il les vainquit. Ce fut ceste mesme année que mourut Cosroé, ayant regné 42. ans, ayans eu tousiours quelque chose à demeller avec les Romains. Agathie dit qu'il mourut de regret en la Cité Royale de Seleucie, d'autant que Maurice General de l'armée de l'Empereur Iustin en Orient, estoit venu fortuitement faire des courses vers les confins des Arpiens, voisins d'un village, où Cosroé estoit pour lors de sejour, mettant le feu de toutes parts, & passant le fleuve de Zirma, mettoit tout à feu & à sang par où il passoit : & luy qui n'auoit point accoustumé d'estre ainsi braué en sa presence, prit cela si à cœur, qu'on fut contrainct de l'emporter du lieu qu'il estoit, à Seleucie, où il mourut, ayant regné selon Agathie 48. ans. Cecy aduint l'an de nostre Seigneur 574. seant à Rome Iean III. tenant l'Empire Iustin le Jeune, & regnant en France Clotaire sorty du sang de Clouis.

HORMISDA XXI. Roy de Perse.

- 26 Hormisda fils de Cosroé, paruenue à la Couronne apres la mort de son pere, esperant bien mieux faire ses affaires contre les Romains, que n'auoit fait son pere, vint courir les terres Imperiales, enuoyant Armiardané son General, lequel ayant fait les courses, s'en retourna riche des despoüilles en la maison, emmenant quant & soy vn nombre infiny de prisonniers : mais il fut repoussé la seconde fois qu'il se mit en campagne : car Tybere estant venu à l'Empire apres Iustin le Jeune, enuoya vers Hormisda ses Ambassadeurs, pour luy offrir la paix à son nouuel aduenement. Mais le Persean deuenue plus superbe par son heureux succez, refusa tout appoinsement,

tement, & ne voulut entendre à aucune composition. Ce qui irrita grandement Tybere, & fut cause qu'il assembla vne tres-puissante armee avec plusieurs camps volans, pour assaillir le Persean de toutes parts. Hormisda cependant estoit allé ravager l'Armenie, & les deux armées s'estans finalement rencontrées, ils se donnerent vne forte sanglante bataille: mais à la fin les Babiloniens tournans le dos, furent cause d'esbranler tout le reste, & de la perte entiere du Persean, si qu'il fut entierement deffait, son panillon & bagage pris, ses Elephans, & ce qu'il auoit de plus riche. Et pour la confusion qui fut en ceste bataille. Hormisda fit vne loy, par laquelle il est deffendu que d'oresnauant les Roys de Perse n'eussent à se hazarder d'entrer aux combats, de crainte de la perte de leurs personnes. Apres ceste deffaitte Hormisda arma de rechef, mais Tybere ayant enuoyé contre luy deux vaillans chefs de guerre, Maurice, & Narleres, les Perles furent à celle fois si bien battus, qu'ils leur osterent ce qu'ils auoient auparauant sous leur puissance, & qu'ils auoient conquis du temps des Empereurs Iustinian & Iustin: Neantmoins Hormisda talchant d'effacer sa honte par quelque genereuse action, s'efforça de poursuivre la vengeance des tors qu'ils auoient receus, mais le tout en vain: car il ne faisoit qu'accroistre sa perte, d'autant que Philippique Lieutenant de l'Empereur prit sur luy Nilibin, Cité de Mesopotamie, & passa bien auant dans le Royaume de Perse, d'où il emmena vne grande proye qu'il conduisit seurement en la Region des Medes. Et deux ans apres Maurice tenant l'Empire, le mesme Philippique entra en Perse, & ravageant de toutes parts donna vn grand estonnement à tout le pais, ayant pris la Cité d'Armene, & vaincus les Perseans en vne bataille, de laquelle ils se faisoient fort d'emporter la victoire, à cause que les Mages les en auoient asseurez: mais l'éuenement démentit leurs fausses predictions: car ils y receurent vne lourde secousse. En somme tout le temps que regna Hormisda, il ne combatit qu'une fois heureusement contre les Romains, pour laquelle deffaitte l'Empereur Maurice deposa Philippique de la charge de General de son armee, & mit vn nommé Commentiel en sa place, qui estoit Gouverneur d'Orient.

En ce mesme temps Hormisda fit les Turcs ses tributaires, les prenant apres à sa solde pour marcher contre les Romains: mais tout cecy n'empescha point que Bara General de l'armee Perlienne ne fust mis en fuite, & la pluspart de ses soldats taillez en pieces. Ce qui fut cause qu'Hormisda le desapoincta de sa charge: ce que cetui-cy ne pouuant supporter, se reuolta contre son Roy, faisant vne telle conspiration contre luy, qu'en fin Hormisda fut depose de son siege, emprisonné, & iniurié par Bindoé, que ce Roy tenoit en prison, & que Besta son frere auoit deliuré par la coniuration du susdict Bara: de sorte que Cosroé, fils de Hormisda, fut mis en la place de son pere, quelques protestations ou remonstrances que peust faire ce pauvre Roy captif, & qu'il mist en auant les biens qu'il auoit faits aux Perles, de les auoir defendus contre la puissance des Romains, d'auoir tant de fois exposé sa vie pour leur salut, & de leur auoir encores de nouveau rendu les Turcs tributaires: mais tout cela ne peust faire changer de resolution à ses sujets mutinez. Il les pria encores, que puis qu'ils auoient ainsi si opiniatremment resolu de le demettre de la Couronne, de ne luy point donner Cosroé pour successeur, qu'il auoit vn autre fils plus propre à regner, homme doux & paisible, au lieu que cestui-cy estoit naturellement cruel, & ambitieux. Mais ce fut ce qui hastia encore dauantage sa totale ruine: Car Cosroé voyant que son pere luy estoit contraire, vsant de la fortune qui se presentoit, se fit couronner Roy de Perse l'an de nostre Seigneur 589. & les factieux prenant le pauvre Hormisda, sa femme, l'autre fils, vlerent d'une tres-grande cruauté, tant sur la mere que sur l'enfant, les faisant seyer comme vne piece de bois à la veüe de Hormisda, lequel fut contraint de contempler ce piteux spectacle, & voir mourir sa femme, & son fils mieux aymé, façon toute estrange & cruelle, puis on luy creua les yeux à luy-mesme, & condamné à passer le reste de ses iours en vne prison perpetuelle, où Cosroé le traita pour quelque temps assez doucement: mais le pere ne se pouuant empescher d'accuser son ambition, trahison & felonnie: à la fin ce fils detestable fit tant battre son pere à coups de baston, que le pauvre Prince en perdit la vie.

COSROÉ II. du nom, XXII. Roy de Perse.

Cet execrable parricide s'estant ainsi estably sur le throsne des Roys de Perse, par le sang, & la vie de son pere, les Perles trouuerent le faict si estrange, qu'il n'y eut pas vn d'entre eux qui ne se resolust d'en prendre la vengeance, & qui ne recogneust bien que ce Roy estoit tel que son pere l'auoit depeinct, à sçauoir, ambitieux, cruel, & sans aucune pitié. De sorte que ceux qui s'estoient auparauant reuoltez contre le deffunct, & auoient esté cause de sa ruine, furent ceux-là mesmes qui conspirerent contre celuy qu'ils auoient eux-mesmes estably, vengeans ainsi le sang d'Hormisda, de la mort duquel ils auoient esté cause: car le mesme Bara, ou Varame, ne pouuant supporter vne telle melchanceté, fit vne nouvelle conspiration contre Cosroé, lequel entendant que cestui-cy marchoit contre luy avec les forces du Royaume, luy alla au deuant avec vne autre armee qui n'estoit point à mespriser, & se vindrent rencontrer

en vne campagne pres le fleuve Zabe : mais Cosroé voyant que de iour à autre ses soldats s'en alloient au camp de l'ennemy, & qu'on luy dressoit des embusches pour le faire mourir, il tua premierement plusieurs de son armee, desquels il se dénoit. Dequoy le camp s'estant tout esmeu, & mis en armes, il se sauua soudainement à Corcese avec ses femmes, trois enfans, & quelques-vns de la Noblesse de Perse qui le voulurent accompagner, (& comme luy-mesme confessa depuis) il paruint iusques à ce lieu par miracle, ayant prié en son cœur, & inuocé le Dieu des Chrestiens comme son Sauueur, & sa meilleure & plus seure guide. En fin il se vint ietter entre les bras de l'Empereur Maurice, où il trouua en luy ce qu'il en esperoit : car il luy donna de telles & si puissantes forces, qu'il mit son ennemy en route, & outre le nombre infiny des morts, Narsé General du camp Romain, prit six mille Perles naturels qu'il donna à Cosroé : & quant aux Turcs, il les enuoya à l'Empereur à Constantinople.

L'Histoire est fort remarquable de ses Turcs, qui furent enuoyez à l'Empereur Chrestien: car comme ils estoient tous marquez au front avec vn fer, & de l'ancre bien noire, & qu'en icelle marque il y eust vne croix emprainte, l'Empereur s'enquit d'eux de quoy leur seruoit ceste figure, puis qu'ils ne l'honoroiert point, ny celuy encore qui auoit souffert mort en icelle marque : ils respondirent que quelque temps auparauant ils auoient eu vne peste fort estrange au pais Persien, de sorte que presque personne n'en eschappoit: mais y ayant quelques Chrestiens parmy eux, ils leurs apprirent de porter ainsi le signe de la croix, & que sans faillir ils verroient cesser celle pestilence : ce qu'ils firent, & aussi tost ils sentirent l'effect de ceste deliurance, & que c'estoit la cause pourquoy ils portoient ainsi la marque de leur salut & guerison.

Après ceste victoire Cosroé estant institué en son throsne, ne se fia plus aux Perseans, ains retint mille Chrestiens près de sa personne, que Narsé luy donna des plus gentils compagnons de ses troupes, & ainsi la necessité de Cosroé mit fin à la guerre des Romains avec les Perses, laquelle dura seize ans, & iusques à ce que Phocas ayant occis Maurice, occupa tyranniquement l'Empire des Romains, l'an de grace six cents quatre, seant à Rome le saint Pape Gregoire surnommé le Grand: car alors Narsé qui auoit seruy Maurice, & fait de grands, & notables seruices à l'Empire, se voyant maintenant entre les mains de ce tyran, se reuolta, & s'empara de la Cité d'Edesse en Mesopotamie. Ce que voyant Phocas, il commanda à Germain Gouverneur d'Orient de l'assieger : mais Narsé eut recours à Cosroé qu'il auoit remis en son throsne, le priant de le secourir en ce sien affaire. & d'assembler le plus de forces qu'il pourroit, afin de courir sur les terres des Romains. Cosroé se sentant redevable à Narsé, ne faillit aussi tost d'enuoyer toutes ses forces, qui liurerent le combat à Germain, lequel perdit la bataille, & luy blessé à l'espaule, mourut à quelques iours de là de sa blessure. Cosroé eust encores vne autre victoire contre les Romains, en laquelle il fist trancher la teste à tout autant de Chrestiens portans les armes, qui luy tomberent en main ; ce qu'entendant Phocas, il trouua moyen de faire venir Narsé vers luy, promettant par serment de ne luy faire aucun desplaisir : mais des qu'il le tint, il le fit bruler tout vif.

- 23 Cependant Cosroé se fit maistre de toute la Mesopotamie, & pais Syrien, & emmena vn fort grand nombre de prisonniers, sans que pas vn luy fit resistance, tant les affaires de l'Empire estoient lors en mauvais termes. Et l'année d'après Cosroé vint de rechef sur les terres Romaines, & se saisit de la Palestine, & de la Phenicie, & des terres & Prouinces d'Armenie, Capadoce, Galathie, & Paphlagonie, & vindrent en fin iusques à Calcedoine, gastans, brullans, butinans, & emmenans hommes, femmes, enfans, & bestial en leurs terres. Si grand dommage porta à la Chrestienté la tyrannie de Phocas, & le despit de Narsé, qui ayma mieux voir vn barbare ruiner tout, que non pas vn sien ennemy iouir en liberté de l'Empire.

Mais après la mort de Phocas, Heraclius tenant l'Empire, & seant à Rome Boniface IV. Cosroé affriandé aux conquestes des terres des Chrestiens, se mit de rechef en campagne, l'an de nostre Seigneur six cents treize: & vint en Syrie, où il print les Citez d'Edesse, & Capesse, & courut iusques à Antioche, où les Romains luy venans faire teste, furent rompus & mis en fuite, & y fut fait vn tel & si grand massacre, que peu de Romains se garantirent à ceste fois de passer sous l'espee de leurs ennemis : puis Cosroé continuant ses conquestes, print la Cité de Cesaree, & de Capadoce, & en ceste mesme saison les Sarrazins commēcerent à faire des courses sur le pais de Syrie, en laquelle Prouince Cosroé print la Cité de Damas, & emmena vne infinie multitude de peuple en captiuité. Ce qui causa que l'Empereur Heraclius luy escriuir, le priant de se déporter de l'effusion de tant de sang humain, & prenant tribut des Prouinces qu'il tenoit, condescendre à la paix. Mais le Persien qui aspirait à la Monarchie, ne voulut point entendre, mais vint en la sainte Cité de Hierusalem, l'an six cents quinze, laquelle il print, comme aussi Zacharie le Patriarche fut mené prisonnier en Perse, & les ornemens Ecclesiastiques, ioyaux, & richesses des lieux Saints. Sur tout il emporta la sainte Croix, en laquelle Iesus-Christ nostre Seigneur souffrit mort pour le rachapt des hommes. Après cela,

cela, Cosroé se rendit si effroyable, que l'Egypte, Alexandrie, & Lybie, & iusques en Ethiopie, tout luy obeissant, il conquist encores plusieurs villes en l'Asie : de sorte que plusieurs commencerent à douter s'il n'emporterait point la Monarchie du monde.

Cecy esguillonna tellement Heraclius, que faisant la paix avec les Anares, & les Huns, il vint contre les Perses, secouru des Sarrazins, & venant aux mains il les deffit en prenant cinquante mille prisonniers, lesquels il laissa aller depuis sans rançon : mais Sarbora General de l'armee Persienne, usant de l'infidelité naturelle aux barbares, courut encores sur les Chrestiens. A ceste cause Heraclius s'arma de rechef, & reconquit tout le pais viurpé par les Perseans, iusques à la terre des Medes, recouura la sainte Croix, & la rapporta en Hierusalem. En fin Cosroé ayant regné l'espace de trente-neuf ans, mourut miserablement, estant occis par son propre fils, qui le fit mettre en prison avec vne chaine de fer au col, le nourrissant de pain & d'eau, & luy reprochant qu'il en auoit fait mourir plusieurs de tel genre de supplice, receuant ainsi par son propre fils le chastiment de la cruauté qu'il auoit exercée enuers son pere.

SIROË XXIII Roy de Perse.

Siroé ayant ainsi fait miserablement mourir son pere, vint à la Couronne des Perses : mais son regne ne fut pas long : car il ne dura qu'un an, durant lequel il deliura tous les Chrestiens qui estoient lors captifs en Perse, & enuoya sain & sauf le Patriarche de Hierusalem, avec les ornemens & ioyaux Ecclesiastiques en son pais de Palestine.

ADHESIR XXIV. Roy de Perse.

Après la mort de Siroé regna Adhesir son fils, lequel ne tint la Principauté que sept mois, à cause que Sarbara luy courut sus, l'occit, & s'empara du Royaume, sur lequel il pretendoit, il y auoit long temps.

SARBARA XXV. Roy de Perse.

Sarbara ne fut pas long temps en la iouissance de ce qu'il auoit tant desiré : car ayant regné six mois, ses sujets l'occirent comme n'estant point du sang Royal.

BORNAN XXVI. Roy de Perse.

Les Perses s'estans ainsi deffaits de Sarbara, ils eleurent en son lieu Bornan fils de Cosroé, lequel ne iout de la Couronne que sept mois.

HORMISDA II. du nom XXVII. Roy de Perse.

Hormisda second du nom, luy succeda, & fut le dernier des Roys de Perse, de la race d'Artaxaré, sur lequel les Sarrazins & Mahometans conquerent le pais Persan, l'an de grace 634. & 413. depuis qu'Artaxaré osta la Monarchie aux Parthes, ayants occis Artaban leur souverain.

Des Roys de Perse Mahometans.

D'ES CRIE maintenant la genealogie, & la succession des Arabes, qui ont possédé la Perse lors que le Mahometisme s'establit en ces quartiers là, cela est si confus, & ceux qui en ont escrit en parlent avec si peu d'ordre, qu'à peine le lecteur en pourroit il tirer quelque instruction, ces siecles-là n'ayans point rencontré des Historiens si diligens qu'un Agathias, qui en ayant voulu obseruer l'ordre particulierement. Laisant doncques les choses en leur obscurité, cet Abregé ne permettant pas de s'estendre sur ce sujet, comme la chose le desiroit, il suffira de dire que les Arabes ayans tenu longuement ceste Prouince, les Turcs vindrent apres qui les en depossederent en leurs premieres courtes : lesquels passans outre, vindrent en la petite Asie, où ils dresserent apres ceste Monarchie que nous voyons à present, desquels sortirent alors ces Noradins, & Saladins, qui depuis firent tant d'ennuis aux Chrestiens en la Terre Sainte. Mais ceux-cy estans chassés, & de leurs pais Turquestan, & de la Perse, par les Tartares avec changement de race, aduint aussi celuy de l'Etat, & du nom des Prouinces : car Zazatay frere du grand Cham de Tartarie, ayant pris iadis les terres nommées Margiane, Segdiane, & Bactriane, elles furent aussi dites Royaume de Zazatay, comme à present elles sont appellees : Apres cecy Ocatacham viurpant les Royaumes de Mede, Parthe & Perse, il voulut que tout cela fut dit Azamie. De là est venu que les Persans sont appelez Azemiens.

Ceste race des Tartares regna en Perse depuis enuiron l'an 1260. iusques à ce que Tamerlan se fit Seigneur de la plus part de l'Orient, apres auoir vaincu Bajazet Empereur des Turcs. Car des enfans de Tamerlan sont sortis les Roys de Perse qui ont regné iusqu'au Sophy, le regne desquels n'a esté de guieres longue duree : car Tamerlan mourut l'an de grace 1403. Le Sophy empieta le pais de Perse, enuiron l'an de nostre Seigneur 1478. De sorte que ce grand Viun-Cassan, qui eut si long temps affaire contre les Turcs, estoit fils de Tamerlan, ou de l'un de ses enfans, comme ainsi loit que les terres de Zazatay sont demeurees sans guerre tous la Seigneurie des Roys de Perse, depuis qu'Viun-Cassan en eut chassé un certain nommé Iaula, que l'on disoit estre encores de l'ancienne race des Sarrazins.

VSVN-CASSAN, ou ASSAMBET, Roy de Perse.

30 Vfun-Cassan s'estant ainsi rendu paisible possesseur de son pais, s'allia avec l'Empereur de Trebisonde, espousant Despinacaton, que cet Empereur Chrestien luy bailla en mariage, pour auoir du support contre Mahomet second du nom Empereur des Turcs qui luy faisoit la guerre. Ceste Dame eut permission d'Vfun-Cassan de viure en liberté de conscience, & avec exercice de sa Religion, ayant ordinairement avec elle des Caloyers, qui celebrent le diuin seruice deuant elle: eut d'Vfunchassan vn fils, & trois filles, la premiere desquelles fut donnee pour espouse à Sechaidar pere de Sophy, & les deux autres se tindrent avec sa mere lors qu'elle se retira avec le congé de son mary, pour viure solitairement en vne ville d'Assyrie nommée Iscartilbiert, où elle fut vn long temps avec ses filles nourrie aux despens du Roy, qui luy faisoit richement fournir toutes choses necessaires iusqu'à la mort: & elle decedee, fut enterree en la Cité d'Amid, en l'Eglise S George, où encores l'on void son tombeau. Vfun-Cassan eut guerre contre le Turc, & pour le faict de son beau pere l'Empereur de Trebisonde, & pource que le Persan querelloit le pais de Cilicie, à present Caramanie, que le Turc disoit estre sien. Or comme il perdit la Caramanie, le Turc s'en estant faict le Maistre, aussi ne peut-il rien faire pour le support du pauvre Trapesontin, lequel Mahomet vainquit, & se fit Seigneur de ses terres, ainsi qu'il auoit faict de celle de Caraman, non que les Perses ne soient aussi vaillans que les Turcs: mais pource que l'usage du canon estant entre eux incogneu, & le Turc en ayant en abondance, il les estonna, & rompit avec ceste tempeste orageuse de l'artillerie. Ce qui fut cause qu'Assambey requist aux Venitiens de faire la guerre au Turc, & que de son costé il ne failliroit de l'assaillir, & qu'au reste les Turcs l'ayant mis en route avec leur artillerie, ils feroient bien de l'en secourir, afin qu'à forces pareilles ils puissent affronter leur aduersaire.

Le Turc cependant fit grande assemblée pour courir sus au Persan, & luy faire la guerre en vengeance de ce qu'il auoit secouru Pirohomat Roy de Caramanie, & ayant passé la Palestine & Syrie, trauersa le fleuve Fraat, & vint iusqu'au lac d'Argis, ou Gelucalat, & prit la Cité d'Artingan, pour n'estre point forte ny tenable. En ces quartiers luy vint au deuant Vfun Cassan avec ses forces, & ayant ses enfans en sa troupe, le premier nommé Calul, le second Vgurlimehemehr, le troisieme Zainel: & son camp assemblé de diuerses nations telles que sont Perses, Parthes, Albanois, & Georgiens Tartares, & ce neantmoins Vfun-Cassan voyant l'ordre que tenoient les Turcs à se camper, il en fut tout estonné, & ayant esté long temps sans mot dire, à la fin dit ces paroles, *Baycabexem ne deriadir*, qui signifie. Ha! nls de putain, quelle mer voicy: car il disoit que l'ost Turquesque ressembloit vne mer: puis voyant comme les Turcs commençoient à passer: il renuoya vne troupe & escadron des siens pour leur empêcher le passage, & là s'attacha vne furieuse escarmouche, où mourut grande multitude de peuple tant d'un costé que d'autre: mais la deffaitte des Turcs estoit plus grande, à cause que les Persans se pouuoient donner secours les vns aux autres: ce qui n'estoit loisible aux Turcs, plusieurs desquels estoient noyez, ne sçachant suyure le gué du fleuve. Et à la fin mis en route. Vfun-Cassan en fit vn piteux massacre, & la nuit venant, les fit retirer, chacun sonnant la retraite: mais la victoire demeurant à Vfun-Cassan, à cause qu'il perdit peu d'hommes des siens, ou par glaue, ou par la force, & impetuosité des eaux, voire vn seul n'en fut faict prisonnier, là où les Turcs perdirent douze mille hommes, entre lesquels, il y auoit plusieurs hommes de remarque. Et cecy fut l'occasion que Mahomet n'osa passer plus outre aux pais du Roy de Perse, voyant la difficulté si grande de le vaincre à cause des riuieres, deserts: & montagnes qu'il faillloit passer. Le Turc se retirant, les Persans prindrent plus grand cœur, & passant le fleuve, furent si fols que de donner dessus les Turcs: mais ceste furie ne leur dura guieres, car Vfun-Cassan fuyant sur vn cheual Arabe, donna occasion aux autres de faire le semblable: & en ce desordre fut occis Zainel son fils. Il est vray que les Perses combattirent sept à huit heures, & eussent encor tenu telle plus long temps, n'eust esté qu'Vfun-Cassan craignant que Mustapha fils de Mahomet Roy Turc ne l'enfermast avec ses troupes, prit la fuite comme dit est, & causa la mort de son fils, & de dix mille hommes de ses soldats, & de la perte de la Cité de Caratsar, qui estoit chef du pais sujet au Gouvernement de Iacnel fils d'Vfun-Cassan, qui fut occis en la susdite bataille: apres laquelle en l'an mil quatre cents septante quatre, comme le Roy Persan fut de propos d'aller à l'herbe, suiuant la custume de ces pais, que pour le chaud on est contrainct de changer de pasture deux ou trois fois l'annee, estant pres de la Cité de Soltanie, il luy fut porté nouvelle comme Vgurlimehemet s'estoit reuolié de luy, & auoit prise la Cité de Siras, & pour ce le pere dressant son armee s'en alla si tost pour punir son fils de telle folie: Vgurlimehemet oyant que le Roy venoit contre luy n'eut garde de l'attendre, ains prenant sa femme, enfans, meubles & joyaux, il s'enfuit vers le Turc, enuoyant de ses gens pour auoir sauf-côduit de Bajazeth II. du nom, lequel le fit soudain entendre à Mahomet son pere, qui voulut que le sauf-conduit luy fut donné, mais il deffendit à son fils de sortir de la Cité

Cité d'Amasie pour aller au deuant du Persan, lequel il desiroit bien qu'il fut honoré, mais que cependant on prit garde qu'en son fait n'y eut quelque cautelle & tromperie. Vgurlimehemet se doubta de ceste desfiance, pource enuoya-il sa femme & les enfans deuant comme pour ostages: puis il arriua avec quelques trois cens chevaux, & Bajazet le receut fort courtoisement, le traitta & banquetta avec grande magnificence. Apres ceuy le fils du Persan fut vers le Turc Mahomet qui luy fit encore meilleur visage que son fils, & luy promit de le faire Roy de Perse, & de destruire Vsun Cassan qui luy estoit mortel ennemy.

Ainsi il luy donna forces, & Vgurlimehemet reprenant la route de son pais avec les troupes Turquesques, ne fut pas si tost à Siras, qu'il se mit à faire des courses sur les terres de son pere. Vsun-Cassan, enuoya quelques soldats pour luy faire telle, mais non en si grand nombre qu'on ne vit bien qu'il ne se soucioit pas beaucoup de ce que son fils entreprenoit, mais c'estoient ruses pour le plustost attrapper, car il fit courir le bruit d'estre fort passionné de la reuolte de ce sien fils, & qu'il l'eut ainsi perdu, & pource on feignit encore qu'il estoit fort malade, & pour mieux le faire croire il fut quelque temps sans sortir de sa chambre, & sans que personne y entrast que ceux auxquels il auoit plus de fiance: si bien que le bruit courut iusqu'à Constantinople que Vsun-Cassan estoit griefuement malade de melancholie de ce que son fils l'auoit ainsi delaisé. Or ce bruit de sa maladie croissant de iour à autre, quelques vns de ses plus loyaux donnerent à entendre qu'il estoit mort, enuoyerent lettres à Vgurlimehemet qu'il s'en vint occuper la Seigneurie auant que pas vn de ses autres freres le deuançast, & afin qu'il ne se doubast de fraude on celebra les obseques du Roy par tout le pais, ce qui donna plus d'assurance à Vgurlimehemet qui auoit receu trois messages secrets qu'on luy auoit enuoyez pour cet affaire, de s'en aller à Tauris où il fut receu & conduit au Palais, auquel il trouua son pere sain, sauf & sans maladie quelconque, qui le fit empoigner & mourir sans aucun esgard que ce fut son fils, & celuy que iustement il deuoit ordonner son successeur à la couronne.

Après la mort de ce pauvre Prince rebelle, Vsun-Cassan dressa vne grosse armee en l'an mil le quatre cents septante-sept, seignant d'aller contre le Turc, mais ce fut pour courir ius au Roy de la Georgeanie, iadis Iberie, à cause que les Georgeaniens luy auoient refusé secours lors qu'il estoit allé contre le Turc. Mais le Roy & encore vn autre sien voisin practiquerent l'accord avec quelque somme de deniers qu'ils luy donnerent, & ainsi retenant vn fort qui est sur les passages appelez Tissis, il se retira à Tauris, où en l'an de nostre Seigneur mil quatre cents septante huit, laissant quatre fils, trois d'une meisme mere, & le quatriesme qui estoit sorty de Despinacaton Panceffe de Trapezonde, lequel estant aagé d'enuirõ vingt & vn an, fut estranglé par la conspiration des freres, lesquels ne vouloient pas que le fils d'une Chretienne, & luy meisme peut-estre se ressentant de la profession de sa mere eust quelque commandement sur la Perse.

IACUB PATISCHA II. Roy de Perse de la race d'Vsun-Cassan.

Le second des enfans d'Vsun Cassan qui s'appelloit Iacub Patischa fit accord avec son troiesime frere nommé Mango qui fut cause que l'aîné fut contraint de s'enfuir, si bien que Iacub se fit Roy l'an mil quatre cents septante & neuf. Cestui-cy eut guerre avec le Souldan d'Egypte, lequel enuoya ses Mammelus iusques en Assyrie en l'an mil quatre cents octante deux: & apres longue guerre diuers combats, escarmouches & surprises, les Perseans emporterent la victoire, repousserent l'Egyptien, & chasserent de l'Assyrie & Mesopotamie, où ils estoient entre ce qui aduint l'an de grace 1487. Ce Iacub Patischa qui vsurpa la Seigneurie de Perse print à femme la fille du Seigneur de Samurra, laquelle fut cause de sa ruine: car elle estant extrêmement desbordée, s'amouracha d'un gentil homme de la suite de son mary, & d'autant que son galant n'estoit pas petit compagnon, elle ne cherchoit aussi que les moyens de faire mourir son mary afin que son Seigneur vint à la couronne, lequel elle voyoit estre des plus proches pour luy succeder. Ainsi ayant intelligence avec son paillard, elle composa & mesla avec luy vn poison fort subtil & dangereux: puis dressant vn baing odoriferant comme les Perseans ont de coustume d'en vser, Iacub y vint avec vn sien fils aagé de sept à huit ans, & entrant au baing y fut vn fort long temps: puis s'en venant au ferrail des Danies, elle qui scauoit que son mary souloit boire sortant du baing, luy vint au deuant, luy presenta en vn vase d'or le breuuage de sa mort avec vne contenance plus gaye que de coustume, sauf que la traistresse n'auoit pas si bone couleur, ce qui donna quelque soupçon au miserable Prince: & pour ceste cause il voulut que sa femme fit l'essay, ce qu'elle n'osa refuser, ainsi elle beut, puis le Roy lequel donna à son pauvre enfant: & fut cette mixtion de telle & si violente operation que dedans la minuict ensuiuant tous trois en moururent: ce qui donna vn grand estonnement & confusion à toute la Cour, voyans les Princes & Seigneurs vne mort si soudaine, laquelle causa de grands troubles par tout le Royaume de Perse, qui vint comme en cōqueste & partage entre les plus forts: car ceux qui estoient du sang d'Vsun-Cassan vsurperent des Seigneuries celles qui leur vindrēt le mieux à propos.

IULAUER III. Roy de Perse de ceste lignee.

Iulauer parent du deffunct Roy succeda; car l'autre estoit mort sans hoirs, lequel regna trois ans, & ne fit chose digne de memoire.

BASYNGIR IIII. Roy de Perse de ceste lignee.

A Iulauer succeda Basyngir celuy qui auoit conspiré la mort de Iacub avec sa paillarde d'espouse, lequel ne regna que deux ans.

RUSTAN V. Roy de Perse de ceste lignee.

Après luy vint vn nommé Rustan, ieune Seigneur aagé d'environ vingt ans, & lequel en regna sept: ce fut contre luy que le pere du Sophy fit la guerre. Cestuy-cy se nommoit Secaidar, & auoit (comme il a esté dict) espousé l'aînée des filles d'Vsun-Cassan, estant le chef de la secte de ceux que depuis on appelle Sophis: c'est à dire, de ceux qui ne reçoivent point l'Alcoran, qui suivent l'interpretation de Halygendre de Mahomet, lequel auoit dressé vne nouvelle secte en la doctrine Mahometisme.

Or sous ce Secaidar il y en auoit plusieurs espars çà & là qui suiuoient son opinion, & le reueroient comme vn saint homme, lequel se tenant à Ardeuil cité assise non guere loin du lac de Vasthan, preschoit sa doctrine au peuple, & en auoit attiré vn nombre infiny à sa suite. Il auoit six enfans, trois males, & autant de femelles, ennemy mortel des Chrestiens. Les Mahometans croyans faire paroistre leur perfection, d'autant plus qu'ils portent de haine aux Chrestiens: cestuy-cy alloit fort souuent faire des courses sur les Circassiens, lesquels se voyans ainsi pressez par la grande puissance des Sophiens, eurent recours au Roy de Perse, qui lors se nommoit Alamut.

ALAMUT VI. Roy de Perse de ceste lignee.

- 32 Cet Alamut auoit succédé à Rustan, & estoit lors à Tauris quand on luy apporta les nouvelles que Secaidar s'estoit emparé de la ville de Derbent, assise sur la mer Caspie, seruant de passage & deffence d'aller de pays en autre pour n'y auoir qu'vn destroit. Cela fut cause qu'Alamut enuoya vne armee contre les Sophians, lesquels se preparerent à la bataille, & venans aux mains quelque resistance que les Sophians sceussent faire, & qu'ils eussent fait mourir plus de quatre mille Persiens, si est-ce toutesfois en fin qu'ils perdirent la bataille: Secaidar estant occis sa teste luy fut tranchée, & donnée aux chiens pour la deschirer, le reste des Sophians fut mis en route, & la pluspart taillee en pieces: car la haine qu'on leur portoit estoit si grande, que quelque part qu'on en sceust quelqu'vn, il estoit impossible de luy sauuer la vie.

Les enfans de Secaidar aduertis de ceste nouvelle s'ensuyrent, l'vn en la Natolie, l'autre en Alep, & le troisieme en vne Isle nommée Armining assise sur le lac de Vasthan ou Gelucalar: cestuy-cy se nommoit Ismaël, aagé de treize ou quatorze ans, beau à merueilles, la façon grande, & neantmoins courtoise, & qui promettoit en la face quelque chose de grand à l'aduenir. Le Prestre Armenien qui print cet enfant en garde estoit grand Astrologue, & sçauant en la Iudiciaire, lequel fut de tant plus soigneux de l'eleuer, qu'il recogneut par sa science que cet enfant estoit pour aduenir vn iour à vne grande seigneurie. A ceste cause il le tenoit secret à cause qu'on le cherchoit par tout pour le faire mourir. Ce Prestre talchoit de l'endoctriner en la loy Chrestienne. A quoy peut estre il eust gagné quelque chose, si l'ambition n'eust d'auantage possédé le cœur de ce ieune Prince que la pieté, mais luy qui auoit d'autres intentions demanda le congé à son maistre & gouverneur qu'il tenoit au lieu de pere, comme il respecta aussi toute sa vie le lieu d'Armining, se montrant assez fauorable aux Chrestiens. Et partant d'Armining il s'en alla à Chilan où il se tint chez vn Orfevre grand amy de la secte Sophiane, & affectionné seruiteur à la maison de Secaidar. De là il escriuoit souuent à ses amis se tenans à Ardeuil, avec lesquels pratiquant ainsi par lettres & secrets messages: en fin ayans, ce leur sembloit, fort bien disposé leurs affaires, ils se resolerent de venger & la mort de leur Prophete Secaidar, & la deffaite & massacre des Sophiens à Derbent par les soldats d'Alamut.

La premiere entreprise d'Ismaël fut sur le chasteau de Maumutaga assise sur la mer Caspie, lequel il emporta par surprise, à cause que nul ne pensoit en luy, & que la place estoit sans aucunes forces, & sans que les gardes se souciaissent beaucoup de se tenir aux portes. Ce chasteau leur seruit de retraite, apres auoir fait leurs courses, cōme estant en lieu imprenable, & ayant tout moyen de se fournir de viures sur la mer, à cause que là abordent tous vaisseaux qui voguent le long de la mer Caspie.

Or voulut le bon heur d'Ismaël qu'au bourg assis au dessous du chasteau, il trouua vn thesor d'vn prix inestimable, avec lequel il commença à gagner le cœur des hommes, à faire leuee de soldats, enuoyer des presens aux grands, & à se seruir de tous les artifices qu'ont accoustumé d'vser ceux qui aspirent à l'vsurpation des Empires, ne laissant rien en arriere qui peut seruir à l'aduancement de sa cause: si bien que luy qui n'auoit que deux cens hommes lors qu'il prit le chasteau susdit, avec lesquels il commença plus hardiment à courir les terres d'Alamut, & à gagner

à gagner pays, comme querellant la couronne à luy deuë pour estre yssu de la fille d'Assambey, & que celuy qui regnoit n'estoit point, comme ils disoient, du sang Royal de Perse.

Alamut d'autre part voyant l'impossibilité de prendre & forcer Maumutaga, ne voulut y enuoyer arinee pour l'assieger, ioint qu'il pensoit que le Sophy ne passeroit point outre, ains se contenteroit de ceste piece, & que cependant luy tenant le bec en l'eau, & faisant son compte de l'assailir il cesseroit de se tenir sur ses gardes, & ainsi il auroit avec le temps le moyen de l'attrapper & le punir de ses fautes tout à vne fois. Mais c'estoit compter sans son hoste: car Ismaël ayant assemblé vne assez puissante armee, vint assieger la cité de Sumachia grande & riche ville, assise entre les Armeniens, & les Medes, non loing de la mer Caspie. Sermanglogli Roy d'icelle, ne se voyant pas assez fort pour tenir teste aux Sophians, quitta la ville, & s'enfuit au chasteau de Calistan, qui estoit vne place imprenable: & Ismaël print Sumachia, & y fit vn pitreux massacre d'habitans, en laquelle il s'enrichit, & les autres soldats de son armee, tellement qu'il les attiroit par ses largesses & courtoisies, si que le bruit estoit presque espars par tout l'Asie, qu'Ismael estoit le plus sage, vaillant, courtois, & liberal Prince de la terre: ce qui estoit cause que plusieurs se faisoient Sophians seulement pour participer aux butins & conquestes de ce Prince.

Cependant Alamut voyant l'heureux succez de son ennemy assembla ses forces, comme le Sophy de son costé, & ne s'oublia point, & enuoya vers les Roys d'Iberie ou Georganie, qui estoient trois, l'vn appellé Scenderbey, le second Gargarambey, & le troisieme Muzambey, pour leur demander secours avec grandes promesses d'affranchir les Chrestiens par toute la Perse (car les Georgiens font profession de la Religion Chrestienne) proposant encore d'enrichir tous ceux qui le voudroient suivre.

Ces trois Princes luy enuoyerent chacun d'eux 3000. Cheualiers, & iusques à six mille Iberiens, tous vaillans & hardis guerriers, & des meilleurs combattans qui se retrouuent en tout l'Orient, lesquels venans trouver Ismael à Sumachia furent par luy courtoisement receus, & leur fit de grands presens des richesses qu'il auoit gaignees à Sumachia. Alamut qui n'estoit lors aagé que d'environ seize ans, & Ismael de dix-neuf, voyant le grand appareil de son aduersaire vint à Tauris, & de là print la route de Sumachia, en resolution de l'aller trouver & de là combattre, comme aussi Ismael luy alla au deuant accompagné seulement, à ce qu'on dist, de seize à vingt mille hommes: mais tous gens deslite & tres-bons combatans. Ces deux ieunes & courageux Princes se rencontrerent entre Tauris & Sumachia, où ayant vn grand fleuve seruant de barriere à l'vn & l'autre, & le Sophy fit tant qu'il en trouua le gué, & de nuict au degeu de son ennemy, vint sur le point du iour donner dessus l'armee d'Alamut de telle furie, qu'auant presque que ses gens fussent desenyuez & cueillez, Ismael en auoit mis la plus part en piece: de sorte qu'Alamut fit beaucoup de se sauuer à Tauris, avec quelque petite troupe des siens, car tout le reste fut mis au fil de l'espee par Ismael, lequel ayant reposé son camp l'espace de quatre iours, il s'achemina vers Tauris, où il entra sans resistance pour n'estre la ville telle qu'elle peust faire resistance à vne armee, à cause qu'elle n'est point ceinte de murailles, ny le peuple d'icelle guiere propre pour la guerre. Ismael exerça là de grandes cruautéz sur toute la race de Iacub, de laquelle il ne laissa pas vn seul en vie, ains faisoit ouurir les ventres des femmes enceintes, & en tirer le fruit, qu'il fit massacrer, & non content de s'acharner sur les viuans, il faisoit la guerre aux morts: car ayant faict chercher le corps de Iacub & d'autres Seigneurs, & sur tout de ceux qui se trouuerent à la bataille de Derbent où Sataidar son pere fut occis, les ossements desquels il fit brusler à la place publique, & pour monstrier combien l'effusion de sang luy estoit agreable, il commanda qu'on luy amenast trois cens paillardes publiques, ausquels il fit trencher les testes. & autant en fit-il de quatre cens hommes de ceux qui estoient de la suite du Roy Alamut, comme aussi on ne sçait pour quelles raisons ils firent tuer tous les chiens qui se trouuerent en la cité de Tauris, & pour comble de route meschanceté & cruauté, il fit mourir sa propre mere, laquelle comme il a esté dict, estoit de la famille d'Vsun-Cassan: mais que le Sophy auoit eu horreur, à cause qu'elle estant encore ieune apres la mort de Sataidar elle s'estoit remariée à vn grand seigneur de Perse, l'vn de ceux qui s'estoient trouuez en la bataille de Derbent: car de là il faisoit consequence qu'elle hayssoit son premier mary, & auoit en horreur tout ce qui en estoit sorty, & que partant elle s'estoit remariée à cestuicy, afin que le fruit qui en sortiroit peust paruenir à la couronne, & en priver ceux du premier liét: mais en quelque façon & pour quelque occasion que ce puisse estre qu'il commit ce paricide, il a tousiours fait paroistre qu'il a esté vn des cruels Princes qui ianais porta couronne, & ainsi faillit la lignee Royale des descendans d'Vsun-Cassan, apres auoir tenu la couronne de Perse l'espace de

23 Ismaël s'estant ainsi estably en la iouyssance du Royaume, continua ses victoires & rigneït tout ensemble cōtre ceux qui luy voulurent resister, ce qui fut cause que plusieurs grands Seigneurs vindrent luy faire hommage, luy baiser la main, & prenoient le Casselbas ou Tulban, au bout rouge, qui est la propre marque des Sophians, comme faisant profession de sa secte, quoy que dedans leur cœur ils eussent vne opinion toute au contraire, & y eut fort peu de Perses qui refusassent d'accepter le Casselbas, craignans sa force & sa fureur: or tandis qu'Ismaël se tenoit à Tauris faisant feste & s'esioüissant avec ses Capitaines, voicy Muratchan Sultan de Bagadeth sorty du sang d'Assambey qui luy vint faire la guerre, ce qui mit fort en cervelle Ismaël, lequel toutesfois ne perdant point courage, assembla ses forces, exhortant ses soldats, & les animant, de sorte qu'encore que Muratchan fit le semblable, & tout le deuoir d'un bon & vaillant chef de guerre, si bien que le combat dura vn iour entier, avec vne telle opiniastreté, & si grand massacre de part & d'autre qu'on tient que depuis Darius il ne s'estoit point donné en Perse vne semblable bataille, la victoire & l'honneur en demeura neantmoins à Ismaël, l'autre estant contrainct de s'enfuir en Babylone, ceste victoire aduint enuiron l'an 1499. Ismaël n'ayant pas encore atteint l'an 19. de son age.

Après cecy Ismaël se resolut de reduire sous sa puissance la prouince de Diarbek ou Mesopotamie qu'il sçauoit auoir esté de tout temps sous la domination des Roys de Perse, & estoit pour lors sous la puissance de plusieurs particuliers entr'autres Sultan Calib Seigneur d'Azanchise, lequel aduertý des desseins d'Ismaël vint de son mouuement, & auparauant que d'en estre semond pour l'obliger d'auantage à le bien traiter, luy baiser la main, print le Casselbas, & s'offrit pour luy estre bon & fiddle subiect & seruiteur, ce qu'Ismaël eut si agreable qu'il luy confirma son estat, & luy donna sa sœur en mariage: il vsa encores de beaucoup de courtoisie à l'endroit de quelques Turcs venus de la Natolie, qui luy presentèrent leur serance, & prindrēt le Casselbas, le principal desquels auoit nom Vstagalou Momutbeg, auquel le Sophy donna le gouvernement de Diarbek, sauf les citez d'Aranchef & Amide, qui demorerent à son beaufrere Sultan Calib, lequel ayant passé les bornes qui luy auoient esté limitees par le Sophy, comme on en faisoit courir le bruit, on luy fit commandement de quitter ces citez à Vstagalou, auquel aussi on manda que bien que Calib fut beaufrere du Roy, si est-ce que sa Maiesié entendoit qu'il eut superintendance de la prouince, qui fut cause que Calib refusant d'obeyr à ce mandement, pour ce que les Curdes de la nation desquels il estoit, obeyssent fort mal volontiers aux Sophians, fut poursuiuy par Vstagalou, que le Sophy auoit aussi honoré du mariage d'une autre sienne sœur, qui luy osta la plus par de sa Seigneurie, & le tout par les menées du Sophy, qui le faisoit expres pour ruiner tous les Princes naturels du pays qui luy pouuoient faire teste, assésuré que les estrangers par luy aduancez, n'auroient moyen de long temps de luy faire resistance. Le pays de Diarbek reduit sous son obeyssance, il aspira incontinent à celuy des Aliduliens peuples de la petite Armenie qui auoient usurpé quelques terres du viuant de l'Acub, assembla de grandes forces l'an 1510. Vstagalou qu'il y auoit enuoyé auparauant n'y ayant sçeu rien faire. Il y vint doncques en personne, & fit vn plus grand amas de gens de guerre que de coustume, non qu'il en fut de besoin pour ruiner ceux à qui on auoit affaire, ains seulement pour ce qu'il craignoit que le Turc ou l'Egyptien n'entreprissent la deslense de celuy qu'il vouloit chastier: ainsi enuoya-il à l'un & à l'autre les prier de ne se mesler point des affaires de l'Aliduly, & quant à luy il protestoit de ne rien entreprendre sur quel que ce fut de ces deux Princes, ayant ceste assurance, il courut le pays d'Aliduly qu'il cōquist pour la plus grande partie, occit quelques vns des enfans Royaux, & fit vn grand massacre de ce peuple: mais à la fin il fallut qu'il se retirast à cause des grandes & excessiues froidures qu'il faisoit en ce pays: mais en s'en allant il print la ville de Calirie ou Cefaree deslenduē par le Carbey fils d'Aliduly, quoy que ce Prince fut bien accompagné, & que la place fut fournie de toutes choses necessaires, en laquelle s'estant saisy de ce ieune Prince, il print plaisir de luy trancher la teste de sa propre main, comme il fit aussi incontinent apres à son predecesseur Alamut, car ayant esté trahy par Anubey, auquel il auoit toute confiance: si tost qu'il fut amené deuant Ismaël, il le tua de sa propre main.

Or estoit-il d'un naturel du tout impatient du repos, cela fut cause qu'ayant mis fin à la guerre d'Aliduly, & voyant que Sultan de Babylone, Muratchan, dont nous auons parlé cy-dessus, luy pouuoit quereller sa couronne, il resolut de le ruiner du tout, & print son sujet turc ce que cestuy-cy apres la mort d'Alamut s'estoit mis en possession de la grande cité de Siras, chef & Metropolitaine de la Perse, comme se disant le plus proche du sang Royal des enfans sortus d'Vn-Cassan: tous les deux Princes auoient grand nombre de peuple, mais Ismaël auoit les

Augit les plus vaillans, & Muratchan s'estoit plus fortifié en forçant plus ses subiets à le suivre, que de bonne volonté qu'ils eussent de marcher sous son enseigne, se resouvenans que l'autre fois que Muratchan auoit bataillé contre le Sophy pres de Tauris, de trente mille combatans qu'ils estoient, ne s'en sauua presque vn seul. Ceste contrainte de ses gens luy donna vne mauuaise esperance de la victoire, pour ce enuoya-il vers Ismael, le prier de le receuoir pour son vassal, mais Ismael fit trancher les testes aux Messagers, disant que si Muratchan auoit desir de le recognoistre pour Seigneur, il fut venu luy-mesme luy presenter son seruice, sans luy enuoyer d'autres pour ce faire: cecy entendu par Muratchan, & craignant qu'il ne luy en aduint comme au Roy Alamut, se desroba de son camp, & prenant trois mille hommes choisis entre ceux qu'il pensoit luy estre plus fidelle, s'entuit en Alep: mais estant arriué au fleuve Euphrate, il fit rompre les ponts, dont bien luy en print car le Sophy le faisant poursuiure avec vne fois autât de gens de guerre, il n'eut pas si tost passé le fleuve qu'il se vid à dos les Sophians, qui s'en retournerent par ce moyen sans rien faire, & Muratchan se sauua en Alep, où avec Ali-duly, il fut traité & entreteu aux despens du Souldan d'Egypte.

Les affaires du Sophy prosperant ainsi, il commença d'estre redoutable à ses voisins: de sorte que le Cham des Tartares qu'ils appelloient Iesclbas, à cause qu'ils portent le Turban verd, voulant destourner le cours de ses prosperitez, vint courir sur le pays de Corasan, & print plusieurs belles villes le long de la mer Caspie, telles que sont Eyé Straui, où se font de fort bonnes soyes, Amixandarant & Saré, ce qui fut cause que le Sophy vint sur les frontieres, pour empêcher le Tartare de passer outre, comme il fit, encores que le Tartare taschoit de le surprendre, seignant d'aller visiter le sepulchre de son Prophete Mahomet, & faire ce pelerinage de la Mecque. Mais le Persan n'y voulut onc entendre. Apres cecy, comme Sermandoli Roy de Seruan, qui estoit le pays des Medes, eut rompu l'accord fait entre luy & Ismael, le Sophy courut sur luy, ruina le pays, & luy osta la seigneurie, & de là passa en Carapac, où il choysit deux Capitaines, l'un appellé Dalebey, l'autre Bairabey, auxquels il laissa la charge de la conquête de Sumachia qu'ils prindrent sans aucune resistance, comme aussi fut pris depuis le chasteau des Calastans, & tous les forts qui sont depuis le mont Taur, iusques au plus haut recoin de la mer Caspie & à la cité de Derbent, si bien que tous les Seigneurs de ce pays prindrent le Casselbas, & firent hommage au Sophy.

Au demeurant, il estoit en telle reputation parmy les siens, que peu s'en falloit que ses soldats ne l'adorassent, ayans telle confiance en luy qu'ils alloient à la guerre pour son seruice sans aucunes armes deffensives, & combatans avec la poitrine & l'estomach à decouvert, ils crioient Schiac, Schiac, qui signifie en langue Persienne, Dieu, Dieu, comme l'appellans à tesmoing de leur bonne volonté. Or c'estoit au Sophy que ce nom de Schiac estoit rapporté: car encores en ses tiltres auourd'huy on appelle Sciach, Ismael, & en sa monnoye il auoit fait grauer d'un costé ces mots, *Illahé, Illallahé, Muhammeduis fessul allahé*, c'est à dire, il n'y a point de Dieux, qu'un seul Dieu, & Mahomet est Messager de Dieu, & au reuers il y auoit ces mots, *Ismael haïf billahé*, c'est à dire, Ismael est Vicair de Dieu, que si quelqu'un vouloit bien prier, il n'y soit point d'autres termes, dit Leonclaius Schiac accomplisse ton desir, & qu'il soit favorable à tes entreprises, il changea aussi la forme des prieres que Mahomet auoit instituees, & en fit d'autres toutes differentes: voila comment pour l'amour de luy les Perses prindrent en haine les autres sectateurs de Mahomet: de sorte que celui qui auoit commis tant de cruautéz, & fait mourir sa propre mere, qui estoit heretique en sa loy, & auoit remply son pays de flammes & de sang, fut neantmoins tenu par les siens comme un Dieu, & luy mesme souffrit qu'on le nommast ainsi, tant l'esprit de l'homme se laisse aisément transporter par la presumption, & tant nous auons un grossier & lourd sentiment de Diuinité, de la rapporter à choses si basses & si imparfaites. Voila doncques sommairement l'origine des Sophians, & comme ils sont paruenus à la grandeur de laquelle ils iouissent à present.

Mais comme il venoit de sortir de ceste guerre, il rentra bien-tost dans vne autre: car la maison Orthomane ayant esté de tout temps ennemie, non seulement des Sophians, mais encore de la famille d'Viun Cassan, & de leurs deuanciers, estans les seuls qui representent auourd'huy le party du Caraman, les descendants duquel se sont autrefois retirez en Perse, & lesquels ayans tousiours esté les mortels aduersaires des Monarques Turcs, la haine leur est d'autant augmentee que ceux cy se sont emparez de leur seigneurie. A ceste vieille querelle deux occasions se presenterent pour leur mettre les armes en la main, deux ieunes Princes, à sçauoir Selim Empereur des Turcs, & Ismael nouveau Roy de Perse, tous deux ambitieux, vaillans, entreprenans, cruels & fort heureux en leurs entreprises. Or ce qui doit entretenir les volontez, & qui concilie le plus les amitez, ce fut la cause de leur guerre: car Ismael ayant enuoyé des Ambassadeurs vers Selim, pour le conioyr avec luy de son ioyeux aduenement, pour tous presens il luy enuoya un grand Lion. Selim qui comprenoit assez que ce Hieroglyfe, le vou-

loit taxer de cruauté, se mit en fort grande colere contre l'Ambassadeur, si bien que quoy qu'il luy peust dire, que ce que son Roy en faisoit n'estoit que pour presenter à vn grand & Royal courage, la beste la plus courageuse, & la plus Royale de toutes, cela ne le peust satisfaire: de sorte qu'il renuoya l'Ambassadeur sans aucun honneur, ny sans en faire aucun cas, & quand il fut en son logis, il luy enuoya quelques grands chiens qui auoient la gueulle toute ensanglantée pour les emmener quant & luy en Perse, commandant aux siens que sans aucun delay cet Ambassadeur eut à se retirer vers son maistre, & qu'on l'accompagnast iusques à ce qu'il fut hors des terres des seigneurs Otthomans.

Cestuy-cy retourné vers son maistre, mit en si grande furie Ismael, qu'il iura de s'en venger, comme il esperoit faire par le moyen d'Amurat Zeleby nepueu de Selim, qui apres la mort de son pere Achmet auoit esté contraint de se retirer à sauueté en Perse, ce fut cestuy-cy que le Sophy arma contre le Turc, si bien que cestuy-cy vint le premier contrir les terres de son oncle, lequel reduit à lors à la deffensue, mena vne tres-puissante armee en Perse, lors qu'Ismael y pensoit le moins, ne s'attendant pas que son ennemy d'eust vser d'vne telle diligence, si que mal informé mesme de leurs desseins, il estoit allé faire la guerre aux Coraxens, peuples qui habitent les riuages de la mer Hircanienne, quand on l'assura que les Turcs estoient entrez dans son pays, cela le fit retourner plus viste que le pas: car ses ennemis estoient desia arriuez pres de Tauris, en fin ils se donnerent ceste signalee bataille de Zalderane, la victoire de laquelle demeura aux Turcs, apres auoir esté bien disputee, & Ismael contraint de se sauuer dans vn marest tout fangeux, perdant la meilleure partie de ses gens, & tout son bagage: ceste bataille fut donnee l'an mil cinq cens treize, en fuite de laquelle Selim print la ville de Tauris, laquelle ayant conseruee quelque temps en son entier, il pillá depuis, & emmena vn bon nombre des habitans à Constantinople. Ainsi comme il se retiroit, Ismael luy donna sur la queue, & desfit vne partie de ses gens, avec le pillage de tout son bagage: en fin Ismael apres auoir regné vingt ans, il passa de ceste vie l'an 1525. ayant laissé quatre enfans, avec vne tres belle & ample Seigneurie, à laquelle il auoit donné vn commencement fort heureux.

SCHAMON XATHAMAS ou THACHMAS II. Roy de Perse de la famille des Sophians.

XA Thamas le fils aîné d'Ismael, paruint à la Couronne des Perses, apres la mort de son pere, ayant eu presque tout du long de son regne quelque chose à demesler avec les Turcs, vn Seigneur du pays nommé Vlana, ayant esté vne des causes principales de la guerre, s'estant reuolté contre son Roy, & rangé du party des Turcs, si bien que Soliman qui regnoit pour lors sur eux, entra avec vne puissante armée en la Perse, print & pillá la ville de Tauris, & y fit bastir vn fort, lequel toutesfois les Perses reprindrent avec grand massacre des Turcs: mais cela n'empescha pas que Soliman ne se rendit le maistre de toute l'Assyrie, & Mesopotamie, & particulièrement de Bagadet la capitale du pays, où il fut couronné Roy de Perse par le Calife du lieu, & depuis ayant seiourné quelque temps, il retourna encore pour la seconde fois à Tauris, contraignant Tachmas de s'enfuyr: les Turcs y firent à ceste fois vn merueilleux degast, enleuans de là tout ce qu'il y pouuoit auoir de rare & de beau, & mettans le feu en tous les lieux circonuoisins: mais Delyment vn Capitaine Persan eut bien apres la raison, car suivant l'arriere-garde à la trace, il fit en sorte qu'il la surprint à son aduantage, la tailla en piece, & mit Vlana en fuite, ceste deffaitte aduint le treizieme iour d'Octobre, l'an mil cinq cens trente-six. Delyment se retirant ainsi plein de gloire & d'honneur vers son Roy, tant y a qu'encores que les Turcs ayent rauagé pour lors tant de Prouinces, si est-ce que quelques-vns ont laissé par escrit que de pres de cinq cent mille hommes (nombre merueilleux) qui passerent l'Euphrate, il n'en retourna pas de sains & dispoits plus de quatre vingts mille. Depuis encore Baiazer le fils de Soliman s'alla ranger vers les Perses, lesquels se seruirent vn temps de ceste occasion avec de l'aduantage: mais en fin Soliman craignant que ceste guerre alast en longueur, & que sur ses vieux ans, il luy en aduint du malheur, il negocia en sorte avec Tachmas, qu'il luy persuada faire mourir Baiazer, qui s'estoit refugié chez luy, trahissant ainsi son hoste pour quelque argent qu'il en receut. Il regna 53. ans, & mourut l'an 1576. laissant deux fils Schach Ismael & Mehemet l'aveugle.

SCHACH ISMAEL III. Roy de Perse de la lignee des Sophians.

35 Ismael fils aîné de Tachmas, succeda à son pere à la Couronne de Perse, mais ce fut pour peu de temps: il mourut vn an dix mois apres, sans auoir rien fait digne de remarque, on raconte toutesfois ceste histoire d'vne autre sorte, c'est que le plus ieune des enfans de Tachmas nommé Cardar s'empara du Royaume. Cestuy-cy ayant mis ses freres en prison, comme il se void en assurance de sa Royauté, il se monstra d'vn courage si lasche, que les grâds du Royaume commencerent à le mespriser, puis à le haïr, si qu'ils le massacrèrent, & tirerent son frere
Ismael

Ismael hors de prison, & l'assirent sur le trône Royal, auquel ne se trouvant trop assuré par l'exemple tout récent qu'il auoit de la mort de son frere, voulant recognoistre en fonds la bonne volonté de ses subiets, il se cacha en ses Palais, & se conduisit si secrettement en son dessein, qu'ayant fait publier sa mort, elle fut facilement crüe, principalement par ses ennemis, lesquels avec ceste creance se dispenserent de descouvrir toutes leurs plus secretes pensees, assurez ce leur sembloit qu'il ne leur en pouuoit arriuer aucun mal; puis qu'il estoit mort, mais les mouchards qui auoient esté mis au guet pour recognoistre les actions & les parolles d'un chacun, en aduertirent fidellement Ismael, lequel sortant de son sepulchre, comme vn corps nouuellement resuscité, parut à ses ennemis, non comme vn fantosme, mais comme vn Prince iustement irrité: mais il s'y comporta si cruellement, qu'il remplit tout de meurtres, ce qui causa de nouveaux troubles & des confusions inopinées entre ses subiects, qui augmentèrent encores par la publication de sa nouvelle loy, qu'il vouloit estre embrassée à Casbin, faisant mourir les des-obeyssans qui ne la vouloient pas suivre. Toutes ses cruautéz furent cause qu'il se fit vne fort grande coniuration des Sultans, c'est à dire, des plus grands du pays, qui vint à tel point que sa propre sœur nommée Perca, qui s'entendoit avec les Sultans le tua: ce qui confondit vniuersellement tout cet Empire, de sorte qu'il sembloit que la Perse s'en alloit ruinée, & qu'il n'y auoit chose qui fut capable de resister aux moindres attaques de ses ennemis: ceste foiblesse & confusion d'Estat allant empirant tous les iours, ils eleurent au trône Royal Codabande, homme ignorant des affaires du gouvernement, & de la guerre, malade des yeux, qui a fait dire à quelques vns qu'il estoit auetugle, craintif, & inconfidéré en ses actions, & ce qui empottoit le plus, peu, ou point estimé des Sultans. Si bien qu'à raison de toutes ces choses ce Royaume iadis tant redouté commença d'estre mesprisé de ses voisins, & de ceux qui en estoient esloignez.

SCHACH MAHAMED dit l'aveugle I. Roy de Perse de la race des Sophians.

Après donc tous ces remuemens que vous avez entendus estre arriuez sous Ismael Mahamed l'aveugle vint à la couronne, lequel estant tel qu'il a esté dit cy dessus, cela donna subiect à Amurat Empereur des Turcs de faire plusieurs entreprises sur les Perles, y enuoyant vn de ses Bassats nommé Mustapha, lequel print le fort d'Eres, les villes de Sumachy & Deunenopy, & se rendit maistre de tout le Seruan, toutes fois les Perles en reprindrent vne partie par après: tout le regne de ce Prince, qui ne dura que six ans, se passant ainsi en prise & reprises, & quelques desfaictes qu'ils souffrirent de part que d'autre.

SCHACH AVAS V. Roy de Perse de la race des Sophians.

Ce Prince commençoit desia à manier les affaires du viuant de son pere, & depuis estant paruenue à l'Empire reprint sur les Turcs Tauris, & deliura vne bonne partie de la Perse, avec plusieurs desfaictes, tant d'une part que d'autre. Il fit trefues toutes fois, avec eux: mais ce n'estoit que pour reprendre haleine: car quelques temps après principalement sous Achmet Empereur des Turcs qui regne à present, laquelle recommença plus sanglante qu'auparauant, il enuoya quelques Ambassadeurs, tant vers l'Empereur Rodolphe, que vers l'Archiduc d'Autriche, pour empescher de conclure la paix, qui se negotioit lors entre les Chrestiens & les Turcs, afin de pouuoir plus facilement deffaire son ennemy: mais les affaires de la Chrestienté estoient si descousues & leurs forces si debiles qu'il fut contraint de s'accommoder à ce qui estoit de plus necessaire, mais quant à luy il ne laissa pas de continuer la guerre, & en estoit encore en ces termes en l'an 1609. ayant desia regné trente trois ans.

C'est succinctement ce qui se trouue des Roys de Perse dans les Auteurs, tant anciens que modernes, reste maintenant à voir vn Catalogue d'iceux, pour le soulagement du Lecteur, les distinguant selon les diuerses lignees.

MONARQUES DE PERSE.

<i>Ans du monde.</i>		<i>Ans du regne.</i>	<i>Mois.</i>
3427.	1. Cyrus & Ciaxare ou Darius.	2.	
	1. Cyrus seul.	2.	
	2. Cambises. En luy finit la race de Cyrus.	7.	5.
	3. Smerdis Mages, du costé des mailles.	0.	8.
3464.	4. Darius fils de Histaspé.	36.	
	5. Xerxes.	21.	
	6. Artaxerxes.	44.	
	7. Xerxes, deuxiesme du nom.	0.	2.
	8. Sogdian.	0.	8.
	9. Darius le Bastard.	19.	

Année de salut.

Année de règne.

Mois.

10.	Artaxerxes.	36.	
11.	Darius Artaxerxes surnommé Occhus.	4.	
12.	Darius quatriesme du nom.	6.	

LIGNEE DES ARTAXARIDES.

Année de salut.

228.

1.	Artaxarxe ou Artaxerxes.	15.	
2.	Saporé.	0.	
3.	Hormisdaté.	1.	
4.	Vardané.	0.	
5.	Vardané deuxiesme du nom.	6.	
6.	Vardané troisieme.	0.	4.
7.	Narsée.	7.	
8.	Misdaté.	7.	9.
9.	Saporé.	70.	
10.	Artaxerxes.	11.	
11.	Saporé deuxiesme.	5.	
12.	Varanné.	10.	
13.	Idegerté.	21.	
14.	Varanné deuxiesme.	20.	
15.	Varanné troisieme.	17.	
16.	Perosé.	20.	
17.	Valent.	4.	
18.	Cauadé.	11.	
19.	Blasé ou Lamadé.	2.	
20.	Cauadé derechef.		
21.	Hormisda.	44.	
22.	Cosroé.	15.	
23.	Siroé.	39.	
24.	Abxasir.	1.	
25.	Sarbara.	0.	7.
26.	Bornan.	0.	
27.	Hormisda.	0.	
		4.	

634.

LIGNEE D'VSUN-CASSAN OV ASSAMBAY.

1403.

1.	Vsun-Cassan.	11.	6.
2.	Iacob Parissu.	12.	10.
	Iulauert.	3.	
	Bay Singir.	2.	
	Rustan.	7.	
	Alamut & Murat.	3.	

LIGNEE DES SOPHIANS.

1495.

	Ismaël Sophy.	20.	
	Schaech Tachmat.	53.	
	Schaech Ismael.	1.	10.
	Schaech Mahamed autugle.	7.	
Jusques en l'an 1609.	Schaech Abas.	33.	

P R E F A C E.

CETTE Histoire abrégée des Perses est si remplie d'actions dignes de remarques que si on les vouloit particulariser selon la methode qu'on a tenue par tout ce Livre, il faudroit plustost faire une relation qu'un Sommaire: & ceste longue repetition seroit plus ennuyeuse & mal agreable, qu'utile & profitable au Lecteur qui auroit plustost fait de lire tout ce petit abrégé, la lecture duquel est si succincte qu'elle ne luy peut apporter que du contentement. Il suffira seulement de dire pour un plus grand esclarcissement, & pour luy donner quelque lumiere, que ceste Chronique abrégée des Roys de Perse se diuise en plusieurs familles: la premiere commençant à Kayumarras fils d'Aras, fils de Sem, fils de Noé, iusques à Alexandre le Grand, par l'espace de pres de mille ans. Apres Alexandre, il y eut un entre-regne de septante ans, & depuis iceluy les Perses estans rentrez dans leurs dominations, un des descendants de Darch entra dans ceste succession interrompue, qui dura encore plus de trois cens ans: de sorte que ceste premiere famille de Kayumarras premier Roy de Perse, dura plus de mil trois cens ans: le dernier Roy d'icelle fut Iax Degerd, qui en fut depossédé par les Arabes & Califes de Bagadet, lesquels sont distinguez en trois familles: la premiere, d'Homar qui ne dura que dix-sept ans: la seconde, fut celle de Ben-Humya qui dura environ quatre-vingt dix ans: apres vint celle de Ben-Abas, qui dura six cens & douze ans ou environ: mais les derniers Califes ne portoient plus que le nom: chacune Prouince estant commandee par un Roy, qui toutes fois estoit Arabe, mais ils en furent en fin chassez par les Tartares, sous leur chef Chinguis Kam, qui desposseda du Califat Almostacem, le cinquante-huictiesme & dernier Calife, par les armes victorieuses d'Ola Kuxan Tartare sien Capitaine, lequel fit mourir le Calife. Les Magoles ou Tartares de la race de Chinguis-Kam commanderent nonante-sept ans ou environ. Apres eux vindrent les descendants de Temurlang, qui gouuerne ent, non pas un seul, mais plusieurs en mesme temps, ce qui rend ceste famille la plus embroillée en ceste histoire, & ce l'espace de deux cens ans: le dernier d'iceux un nommé Mirza Abucar, fut chassé & fait occir par Kara-Issust-Turkoman, la Perse estant lors diuisee en deux parties des Kara-kyonlu & des Akuyonlu: ce luy cy fut le premier des Kara-kyonlu qui commanda à la Perse: mais ils ne durerent que soixante-trois ans, car ils furent chassez par les Akuyonlu, qui eurent pour chef Ozud-Acembek, mais ceste famille ne dura que trente quatre ans, ayans esté chassez par les Sophians, qui eurent pour chef Cha, Ijmael, Sophy, qui commença de conquerir la Perse, l'an mil cinq cens vn, les descendants duquel regnent encore à present, ayans desia regné plus de cent ans.



P A R S auoir succinctement décrit de la Perse, & des Roys qui luy ont commandé depuis qu'ils commencerent à tenir la Monarchie sous Cyrus leur premier Roy, iusques à present, selon que les Autheurs tant anciens que modernes en ont écrit: il sera maintenant bien à propos d'en faire voir l'ordre, & la succession comme elle se trouue dans les Annales écrites par les Perses mesmes, & compilées par Carik-Mircond, ainsi qu'il a esté promis au commencement de ce petit Sommaire.

Il dit donc qu'en la Prouince d'Azerbaion ou Aderbaion, comme elle s'appelle à present, qui a pour capitale la riche & fameuse cité de Tauris ou Tebris, l'une des plus peuplée qui soit en l'Orient. Les habitans de ceste Prouince voyans les diuisions qui naissoient iournellement entre eux, pour n'auoir point de chef qui leur commandast souverainement, eurent d'un commun accord un Roy appelé Kayumarras, lequel du commencement s'excusa autant qu'il luy fut possible, s'estimant trop foible pour une si grande charge: toutesfois il fut tellement importuné par les prieres de tous en general, qu'en fin il consentit à l'ellection qu'ils auoient faite de sa personne, & alors le transportant en un lieu public, ceux qui estoient deputez à cela le vestirent en presence de tout le peuple de robes differentes à celles du commun: & pour marque de Royauté, ils luy mirent en la teste une sorte de petite capuche, qu'ils appellent tagé, qui est autant entre eux comme à nous une Couronne: & pour recognoissance d'obeyllance & de vasselage, ils luy allerent tous baiser la main, coustume qui se pratique encor en ces contrees-là. Ce Kayumarras, selon Mircond, estoit fils d'Adam, fils de Sem, fils de Noé, que les Perles appellent Adam Affany, c'est à dire second Adam, d'autant qu'aussi-tost que celuy cy fut créé Roy, il voulut qu'on l'appellast Adam: de là est venu l'erreur entre les Perses du temps du Paganisme, lesquels tenoient que leur premier Roy auoit esté Adam premier, pere de tous les hommes.

KAYUMARRAS I. Roy de Perse.

Ce Roy comme il fut le premier en commandement en la Perse, aussi fut il le premier qui y apporta de l'ordre & de la police, faisant regner la iustice entre les siens, lesquels il deslenda

valeureusement contre tous leurs ennemis, laissant ainsi son Royaume paisible à sa posterité, apres auoir regné quarante ans.

Or ce Kayumarras auoit vn fils nommé Nazek, adonné à la vie solitaire & contemplation des choses naturelles, qui se retira avec sa femme en la prouince de Damoand, depuis Aderbaion, & à present de Hierak: & cōme ce Prince estoit de fort bon entendement, son pere alloit quelquefois le visiter de son viuant, lors qu'il pouoit auoir quelque relasche de ses plus grandes affaires: mais on ne sçait pourquoy ny comment il fut trouué mort dans sa petite retraite, ayant receu plusieurs playes, sans que la femme ny pas vn des siens eussent peu decouurir qui auoit fait le coup. Apres donc auoir esté pleuré de sa famille, & qu'on eut bruslé le corps selon la coustume de ce tēps-là, comme chacun estoit desireux de sçauoir qui auoit commis vn si meschant acte: ils trouuerent en fin que c'estoit quelques coureurs des contrees voisines: dequoy ayant esté aduertty Kayumarras, il assembla des forces de toutes parts, & alla les rencontrer en la contree de Macharek, & obtint victoire contr'eux en la prouince de Trabastan, où apres auoir taillé plusieurs en pieces il emmena plusieurs captifs en sa maison, lesquels luy seruirent apres à bastir la cité de Balk, laquelle il fonda, comme il fit aussi celles de Stahhar, où il tenoit la Cour, Ardenel, Kabulstan, Kamuz, Macroa, Nachibem, qui est Nidue, Gertion, Sagiston, & Goms, toutes lesquelles estoient subiectes au domaine de Perse, il en fonda encores plusieurs autres en diuerses prouinces, comme il se dira selon les occurrences. Celle de Balk estoit en la prouince de Vzbek fort peuplée, riche, belliqueuse, comme sont celles de ceste contree.

S I A M E K second Roy de Perse.

Nazek ayant à sa mort laissé sa femme enceinte au bout de quelque temps de là elle accoucha d'un fils appelé Siamck, lequel son ayeul fit nourrir & instruire selon les loix du pays, puis arriué en l'age de discretion, avec le consentement du peuple il le declara son successeur. Et en fin renonçant au gouvernement il le mit entre les mains de Siamck, lequel à peu de iours de là alla courir les terres de ses ennemis, & les ayant rencontrez avec leur armee, il leur liura la bataille, en laquelle il demeura victorieux: mais il achepta cherement ceste victoire, car ayant receu vne mortelle blessure, il fut emporté diligēment en sa tente où il mourut, laissant sa femme enceinte, laquelle il coniuira en mourant que si elle accouchoit d'un enfant male, qu'elle fit en sorte qu'il prist vengeance de ses ennemis: & en disant ces paroles il rendit l'esprit, de sorte que le Royaume retourna entre les mains de Kayumarras, lequel à l'instant alla contre ses ennemis, qui estoient entrez en la Perse, les vainquit & emmena plusieurs captifs, entre lesquels il y auoit plusieurs qui auoient esté cause de la mort des Princes cy-dessus nommez. On attribue à ce Kayumarras l'inuention de la plupart des armes, desquels on vŕe en ces quartiers là, & particulièrement pour les bardes & autres enharnachemens de cheuaux.

O U C H A N H III. Roy de Perse.

Apres la mort de Kayumarras, Ouchanh fils de Siamck entra en possession du Royaume, lequel il gouerna avec le consentement d'un chacun: & comme il eust assemblé vne armee: ses ennemis estans venus l'assaillir en vne terre qui estoit proche Damoand, où il leur liura le combat, où il fut blessé d'un coup de pierre duquel coup il mourut, laissant vn fils apres luy, qui se nommoit Thamures, apres auoir regné 50. ans.

T H A M U R E S D I U B A N D IIII. Roy de Perse.

Ouchanh estant mort Thamures son fils luy succeda lequel fut surnommé Diuband, c'est à dire en langue Perlienne dompteur de diable. à cause des insignes victoires qu'il obtint contre les ennemis des Perses qu'ils hayissoient comme le diable. Et d'autant que son peuple auoit beaucoup souffert durant les guerres passees, il le deschargea pour trois ans de tous impôts, & comme il estoit autant amateur de la paix qu'enclin aux armes, desirant laisser son Royaume mieux expolicé qu'il ne l'auoit trouué, il fit plusieurs belles ordonnances pour le repos d'iceluy. Ce fut luy qui crea premierement en Perse vn premier Vizir ou Vvzir, que quelques vns par corruptiō de langage appellent Guasile, qui est le premier & plus souverain Magistrat apres le Prince. Il establit pareillement des garnisons sur la frontiere de Ardebajon, comme celle qui est l'une des principales de Perse, & la plus importante.

Les victoires & sages conduites de ce Prince, furent cause que plusieurs Seigneurs ses voisins se vindrent ranger sous sa domination. Mais apres toutes ces prosperitez il suruint vne grande peste en la prouince qui fit mourir beaucoup d'hommes & grande quantité de bestial, de laquelle Thamures ne se peut exempter qu'il n'en mourust en la prouince d'Vbek en la ville de Balk, ayant regné cent ans.

I A M B X E D V. Roy de Perse.

A Thamures Giuband succeda au Royaume Iambxed, qui selon les vns estoit fils du defunt, les autres disent son frere, & d'autres son cousin, homme de grande prudence & de grand entendement,

entendement, & qui outre ce n'auoit pas moins de vaillance, ayant adiousté à sa domination sept grandes Prouinces qui se gouvernoient toutes par leurs loix & coustumes, faisant plusieurs bonnes & grandes choses pour les maintenir en paix, & deliurer des maladies contagieuses, auxquelles elles estoient subiectes par le conseil de deux fort renommez Medecins qui florissoient en ce temps, l'un desquels s'appelloit Faelasuf Rabon, & l'autre Faeychagorres, & se souuenant de la peine qu'il auoit eue du temps de Tamures à cause de la necessité: desirant y pouruoir pour l'aduenir, il fit faire plusieurs grands greniers, dans lesquels il fit mettre toutes sortes de prouisions pour s'en seruir à la necessité. Il inuenta les cottes d'armes, les poignards, & si on luy donne l'inuention d'auoir le premier fait faire des ioyaux d'or, & d'auoir fait mettre en œuvre les pierres precieuses. Il fit faire aussi des estoifes de soye de couleur, desquelles il portoit des robes. Il aymoit fort les choses aromatiques & d'agreable odeur, qu'il faisoit venir à grands frais des contrees plus esloignées. On tient encore que ce fut luy qui apporta en Perse l'usage du vin, duquel toutesfois il vsoit sobrement: à propos dequoy on raconte vne histoire d'une sienne esclauue qu'il aymoit fort pour sa grande beauté, laquelle estant fort tourmentee d'une grande douleur de teste, & le Prince luy faisant faire tout ce qui luy estoit possible pour la guarir, sans qu'aucun remede luy peust donner de l'allegeance, elle toute desesperée de recouuer sa santé, se cacha secrettement au lieu où l'on enfermoit le vin, & qui estoit gardé en ce pays-là comme vn thesor, elle en but vne bonne quantité: & apres quelques heures se sentant alleegee de sa grande douleur, elle retourna boire plus qu'auparauant: ce qu'ayant fait, & se retrouvant entierement guarie, elle descourrit aussi tost au Roy comme le tout s'estoit passé, lequel admirant la force de ceste liqueur en fit bien plus grande estime qu'il ne faisoit auparavant.

Ce Prince residoit la meilleure partie du temps en la Prouince & cité de Sagistam, & pour pouuoit mieux descouurir ce qui se passoit par ses prouinces, & y donner l'ordre qu'il y verroit estre necessaire. Il fonda la cité de Scyras, laquelle est le chef du Royaume, qu'on appelle proprement la Perse. La cité de Scyras estant fondée, Iambxed y fit sa demeure ordinaire, où il commença à traicter du gouvernement, & des choses qui auoient iusques alors esté en confusion & sans ordre: donnant aux Sages le soing & le gouvernement general de tout, il voulut que les gens de guerre eussent vne iurisdiction distincte des autres, ne voulant point que les laboureurs & ceux qui cultiuoient la terre s'entremissent de faire autre chose. Il donna aussi quelque reglement aux arts mecaniques, les accommodant à l'usage & vtilité de tous: en sorte que autant qu'il estoit possible chacun fut content de son mestier.

Outre ce, il donna de bonnes loix, procurant le bien de son peuple: de sorte que la Perse iouyt de son temps de la paix, santé & richesse: toutesfois ceste prosperité se conuertit bien tost en trauail & misere, car Iambxed voyant ces pays si florissans, & attribuant le tout à son sçauoir & bonne conduite, fut si priué d'entendement qu'il se fit adorer comme Dieu, faisant mettre en tous les lieux publics de ses Estats, que tous sur peine de la vie eussent à l'adorer: mais il ne demeura pas long temps impuny de ceste impieté: car en la contree de Sagistam s'eleva contre luy vn fort renommé Capitaine nommé Ahad, parent de Iambxed, lequel assemblant vne grosse armee, en donna la conduite à vn sien cousin nommé Zoahk, qui vint au dessus de Scyras, où il trouua Iambxed qui luy venoit au deuant avec vn autre puissant exercite, & s'estans liurez le combat, la victoire demeura à Zoahk, & Iambxed demeura prisonnier, & fut mené à son ennemy, lequel le fit massacrer en sa presence. Il laissa vn fils à l'aage de trois ans, nommé Frayhdun, qu'il auoit eu d'une femme nommee Framak, laquelle se cacha avec son fils: de sorte qu'elle ne fut point trouuee. On ne trouue point combien ce Prince a regné.

Zoahk Tyran de Perse.

Le tyran Zoahk ayant ainsi fait mourir son Roy, s'empara du Royaume. Il estoit cousin de Iambxed, des descendans de Kayumaras, & fils de Heluan, homme illustre, & qui estoit descendu en droite ligne des Roys d'Arabie. Ce Zoahk fut fort adonné à l'estude des choses naturelles, auxquelles il se rendit fort excellent, & neantmoins auoit l'inclination fort maligne, le visage laid, d'un regard terrible, hay de tous, apres auoir regné quelque temps, il luy vint vn mal auquel les Medecins ne peurent iamais donner aucun remede, si que desesperé de recouuer la santé, esmeu par vne illusion diabolique, & suiuant mesme le conseil d'un sorcier, il se persuada qu'il n'y auoit aucun remede qui le peust deliurer du mal qu'il souffroit, sinon en se frottant du sang humain, si qu'il commença vne pitoyable execution de tous aages & sexes, faisant vn grand deluge en la cité de Scyras. Ce que voyant les plus sages, l'allerent trouuer pour l'en dissuader, & luy oster l'usage d'un remede tant inhumain, luy conseillant d'vser de moutons au lieu d'hommes, luy monstrans par plusieurs raisons que cela estoit plus propre pour la santé, auxquels il afferma que deux couleures luy rongeoient continuellement les entrailles, & passa plusieurs annees en ce martyre, au milieu duquel on dit qu'il songea vne nuit que trois hom-

mes le lioient, l'un desquels le tua d'un coup de massue qu'il luy donna à la teste: les deux autres luy ostant la ceinture de laquelle il estoit ceint, l'attacherent avec icelle par les pieds, & le transporterent en la terre d'Amoand.

Zoahk ayant fait ce songe, comme hors de soy, fit appeller tous les Sages du pays, lesquels luy dirent que cela signifioit qu'il seroit privé du Royaume, & de la vie: car entre les Perses la ceinture est marque d'honneur, & de dignité, laquelle on luy avoit ostée. Or craignoit-il que ce malheur luy arrivast par Frayhdun fils de Iambxed: cela fut cause qu'il le fit chercher de toutes parts, mais sa mere Framak l'avoit destourné, dequoy estant grandement irrité Zoahk, il deschargea sa cholere sur Aspeen pere de Framak, & le tua. La mere qui craignoit qu'elle ne peust tousiours garder son enfant si secrettement qu'il ne fust descouvert, le bailla à un vacher pour le garder. Ce qu'oyant Zoahk, il vint luy-mesme trouver le vacher, mais il avoit prevenu: car il l'avoit caché dans un petit cuvier qu'il avoit fait expres: de sorte que Zoahk ne l'ayant point trouvé, il s'en vengea sur les vaches, dont il fit mourir une grande quantité.

En la cité de Hispaon, chef de la Prouince Hyerak en la Perse, qui auit esté autrefois le siege des Roys, il y avoit un homme d'importace & de valeur nommé Kaoah, & surnommé Angar, qui en langage Persien signifie ferronnier ou forgeron, à qui Zoahk avoit fait mourir deux fils qui estoient desja en aage d'homme & de grande reputation, desirieux de se venger, fit une conspiration de plusieurs qui hayssioient Zoahk, & ayant assemblé bon nombre de gens de guerre, print plusieurs citez de la Perse, qu'il courut au long & au large, & y fit un grand ravage, les armées de Zoahk le rencôtrant plusieurs fois, mais il en fut tousiours le vainqueur. Si bien qu'encouragé par ce bon succez, il engrossit son champ, & print la volée d'Amoand, ou Zoahk tenoit la Cour, & en chemin se saisit de la ville de Hrey, chef anciennement du Royaume, & incontinent apres celle de Karason. Ceste ville de Hrey est encore celebre, tant pour sa grâdeur, que pour les choses excellentes qui se retrouvent en elle, entre autres la manne, pour estre la plus parfaite & la plus pure qui soit en aucun lieu, laquelle se transporte en grande quantité à Ormus, ou Harmuz, & de là par tout l'Orient. Kaoah Angar s'estant ainsi emparé de Hrey, il assembla à l'entour de luy tout le peuple, & tous les siens, auxquels il declara que ce qui l'avoit mené à ceste entreprise n'estoit qu'un zele de la liberté de sa patrie, pour laquelle il luy sembloit devoir faire tous les efforts de la delivrer auparavant que de partir de ceste vie, remettant aux Dieux apres sa victoire de donner le gouvernement du Royaume à qui il leur plairoit. Alors tous d'une voix s'escrierent qu'ils le reconnoissoient pour Roy & Seigneur. & qu'à luy seul appartenoit le Royaume pour sa valeur. Mais luy en s'excusant dit qu'il ne donneroit jamais une telle tache à sa famille & à sa renommée, que d'avoir le nom de Tyran: mais qu'ils avoient Frayhdun le fils de Iambxed, lequel il desiroit qu'ils reconneussent & luy obeyssent comme à leur Roy. Ce qu'estant accordé par toute l'assemblée, on ne parla plus que d'aller combattre Zoahk lequel leur vint à la rencontre, & se donnerent une grande & sanglante bataille, que Zoahk perdit, & estant pris fut emmené devant Frayhdun, où estant il fut tué d'un coup de massue qu'on luy donna à la teste: puis luy ayant defait sa ceinture, luy lierent les pieds, & le traînerent en la terre d'Amoand, ainsi qu'il avoit songé. Les Perses font grand cas de la science de ce Prince aux choses naturelles, & de sa longue vie: toutesfois on ne dit point combien il a regné, la ressemblance du nom a fait penser à plusieurs que ce Zoahk fut Zoroastes, ce grand & celebre Magicien.

FRAYHDUN VII. Roy de Perse.

Frayhdun ayant ainsi obtenu la victoire de Zoahk, parvint par sa mort au gouvernement du Royaume, & ayant rangé toutes choses sous son obeyssance, fit Kaoah Capitaine general de ses armées, avecques un fort bon appoinctement, & l'envoya vers les terres de Magareb, qui sont terres devers le Ponent: & à Garchacef son parent un autre bon appoinctement à Macharek, qui est la partie Orientale. Kaoah fut vingt ans en son entreprise, durant lesquels il reduisit en l'obeyssance de Frayhdun plusieurs Prouinces, & Royaumes, à la fin desquels il fut contremandé par Frayhdun, qui le fit Seigneur de Hispaon & à Aderbaion, où il fut fort bien receu des naturels habitans, qu'il gouverna l'espace de dix ans, avec beaucoup de satisfaction d'iceux, & du Roy, au bout desquels il mourut. Ce qui causa une grande tristesse à Frayhdun, lequel laissa la jouissance de ses possessions à ses parens: & pour le regard de ses enfans, il les fit resider à la Cour, les honorant beaucoup, & leurs faisant de grands biens. Quand à luy il espousa une des filles de Kaoah, qu'il avoit fait mourir: il avoit eu auparavant un fils nommé Irege, d'une si grande Dame Persienne: il en eut depuis deux autres de ceste dernière femme l'un nommé Salm, & l'autre Tur, qui furent d'un aussi mauvais naturel que leur ayeul Zoahk. Quant à Irege, il estoit fort courtois, & à ceste occasion aymé, seruy & respecté de tous: ce qui donnoit un grand contentement à son pere, qui l'aymoit par dessus les autres.

La Perse

La Perse florissoit alors en vne grande paix, & Frayhdun se voyant chargé d'ans, & de maladies, desirant d'ordonner de ses affaires deuant que de mourir, assembla les plus grands de son Royaume, pour sentir d'eux leurs volontez sur celuy qu'ils desiroient pour son successeur: tous d'un commun consentement demanderent Irege. Ce qui ne déplust nullement à Frayhdun, lequel toutesfois pour oster tout sujet de mescontentement aux autres, donna à Salm les terres de Magareb, qui sont vers le Ponent, & à Tur celles de Macharek, qui estoient vers l'Orient, à Irege il laissa la Perse, Assyrie, & Mesopotamie; avecques tiltre de Roy, afin qu'il fut recogneu de ses freres: & marquant à chacun les bornes de sa iurisdiction, il enuoya les deux derniers en leurs terres, avec chacun vne armee pour la deffence d'elle.

Quand à Tur, il fonda vne ville, qu'il nomma de son nom Turon, de laquelle le Royaume & la Region fut depuis nommee Turquestan, comme elle s'appelle encores aujourd'huy. Ceste ville est situee pres la mer Caspie, vers l'Orient, & aux terres qu'ils appellent Maurenahar. Ce fut icy le commencement & l'origine d'où sont yssus les Turcs, & de là occuperent-ils ce qu'ils possèdent aujourd'huy: De sorte que ce n'est point des Turcs, ou Troyens, ny des Thraces qu'ils sont descendus: mais de Tur fils de Frayhdun, qui donna à ce pais-là le nom de Turquestan, c'est à dire, Prouince, ou Region de Tur. Salm, & Tur, ayans ainsi leur partage, furent fort mal-contens de se voir reduits sous la subjection de leur frere qu'ils disoient estre bastard, si bien qu'ils commencerent à faire chacun à part soy quelques entreprises, puis ayant communiqué leurs desseins par lettres les vns aux autres, ils assemblerent leurs forces, & s'en vindrent à la Prouince d'Aderbajon, d'où ils escriuirent à Frayhdun leur pere, se plaignans de ce qu'il auoit preferé leur frere bastard, luy ayant donné la souueraine authorité que s'il vouloit les en priuer, ils s'en retourneroient en paix, sinon qu'ils seroient contraints de deffendre leur droit.

Frayhdun le fit aussi tost entendre à Irege, luy mandant que sans aucun retardement il eust à se preparer pour marcher à l'encontre d'eux: mais Irege desirant de sortir de ceste affaire par des moyens plus doux que son pere desiroit, il luy proposa de les aller trouuer: dequoy le pere le reprit aigrement, sans y vouloir consentir. Mais Irege qui desiroit la paix, & le soulagement du Royaume, prenant avecque soy les plus sages, & les plus prudens de sa Cour, les alla trouuer pour conferer avecques eux, sans que son pere en sceust rien. Eux qui ne desiroient autre chose, se firent aussi tost de sa personne, & luy firent trancher la teste, qu'ils enuoyerent à leur pere, lequel pour vn cas si lamentable deschira ses vestemens, monstrant des signes d'une extreme douleur. Irege laissa vn fils nommé Manucher, lequel Frayhdun mit à la place du pere. Cestui-cy fit la guerre à Salm, & à Tur, & les vainquit en vne bataille: & eux pour se sauuer, se cachèrent entre les morts, où estant cherchez en diligence, & trouuez, furent emmenez deuant Manucher, lequel tout à cheual donna vn si grand coup d'espee à Tur, qui luy mit la teste à bas: dequoy Salm prit vne telle espouuante, qu'il tomba mort subitement à ses pieds: Ainsi moururent ces deux, avec plus de douze mille hommes de leur armee, que morts, que prisonniers. En ce temps Frayhdun estoit auégle, & fort malade, vers lequel s'en alla Manucher victorieux, & comme le bon homme ne le peust veoir, & qu'il eut demandé qui c'estoit: l'autre luy respondit: Je suis vostre petit fils Manucher, vengeur du sang d'Irege massacré, de Salm, & de Tur. Ce que entendant Frayhdun, il le receut à bras ouuerts, avec toutes les demonstrations d'amour, & d'allegresse, & ostant de sa teste la Tyare d'or qu'il portoit, il la mit sur celle de son petit fils, comme en confirmation du Royaume qu'il luy auoit donné, & voulut qu'il eust pour Vvazir Som, fils de Narimon, homme sage, & de grande valeur. Ce qu'ayant fait, il mourut bien tost apres. Frayhdun fut vn bon Roy, sage, & amy de ceux qui estoient, fort, courageux & liberal. On recite de luy plusieurs belles & grandes choses, lesquelles ne peuvent estre deduites en la briefuete de ce sommaire, en la supputation des temps que font les Perles: ils disent que ce Frayhdun estoit du temps d'Abraham.

MANUCHER VIII. Roy de Perse.

Par la mort de Frayhdun, Manucher fils d'Irege commença de gouuerner seul ses Royaumes: & comme ils estoient de grande estendue, il fut contrainct d'enuoyer son Vvazir Som Narimon vers les parties Orientales. Comme cestui-cy estoit en son Gouuernement, il luy naquit vn fils, lequel dès le ventre de sa mere se trouua tout couuert de poil grand, & blanc: Som Narimon triste & espouuanté d'un cas si estrange, le fit nommer Zal. Cecy paruint iusqu'aux oreilles du Roy, lequel escriuit au pere qu'il luy enuoyast ce ieune enfant pour le voir: ce qu'ayant fait, le Roy consulta tous les Sages sur ceste nouveauté: tous lesquels asseurerent que ce petit seroit vn iour fort vaillant aux armes, & fidelle à son Prince. Ce qui fut cause qu'il voulut qu'il fut élevé à sa Cour, iusques à ce qu'il fut paruenue en aage de pouuoir aider à son pere, en

intention de le faire après Gouverneur des terres de Nim Ruës : c'est à dire les terres du Midy, qui fut la retraicte de Zal. Par apres comme cestui-cy s'exerçoit vn iour qu'il estoit de repos à la maison, il luy prit enuie de sortir de ses limites, & d'aller au Gouvernement de Kabuscum, qui toutesfois despendoit de celuy de son pere: aussy auoit-il mis pour Gouverneur vn Capitaine qui estoit fait de sa main, nommé Merabah, lequel sçachant sa venue, alla au deuant le recevoir avec presens de grand prix, & pour auoir l'honneur de luy baiser la main, & l'emmena sur le champ chez luy, ne se pouuant laisser de le louer deuant sa femme, & deuant sa fille, qui estoit d'une grande & extreme beauté, nommée Rudabah, les vertus, & la valeur de Zal. Ce qui pleut tant à la fille, que sans l'auoir veu, elle s'estoit affectionnée à ce ieune homme, ne sçachant toutesfois les moyens de luy faire cognoistre sa passion. Mais en fin elle s'aduisa d'enuoyer ses esclaves se promener vers le pavillon de Zal, faisant semblant de cueillir des fleurs : si que passant par là, il eut quelque sujet de demander à qui elles estoient : celles-cy ayant dextrement executé ce qui leur estoit commandé, rencontrèrent Zal, lequel leur ayant demandé à qui elles estoient, elles respondirent qu'elles estoient à Rudabah fille de Merabah, les beautez, & les perfections, de laquelle ils luy racontèrent si particulierement, qu'il ne fut pas moins affectonné de son costé qu'elle l'estoit du sien. Ceste affaire ayant esté negociée depuis si discrettement de part & d'autre, qu'en fin ils trouuerent moyen de se voir secrettement, ils se donnerent la foy & promesse de mariage. Ce qu'estant fait, Zal se retira de Merabah, & s'en retourna à Nim Ruës, où estant arriué, il deuint si triste & plein d'inquietude, pour l'absence de celle qu'il aymoit : que ne pouuant plus la supporter, il se resolut d'aller trouuer son pere, & luy descouvrir sa passion, le suppliant qu'ils allassent tous deux trouuer le Roy, pour impetrer de sa Majesté permission de se marier : ausquelles prieres le pere n'ayant peu resister, ils furent donc en Cour, où du commencement le Roy se monstroir difficile à luy permettre ce mariage. Toutesfois vaincu en fin de leurs importunités, il leur permit, si que s'en retournant apres à Kabuscum, ils celebrerent les nopces de Zal, & Rudabah, lesquels eurent bien tost apres vn fils nommé Rostan, duquel il sera fait souuent mention cy-apres. Aussi est-ce à son occasion que ceste Histoire est racontée.

Manucher auoit desia gouverné son Royaume en paix l'espace de cinquante ans, quand il se souleua contre luy au pais de Turquestan vn Capitaine nommé Afraciab, fils de Pachang Roy de Turquestan, sous pretexte de venger la mort de Tur. Cestui-cy ayant assemblé gens de toutes parts, mit sus vne puissante armée, avec laquelle il entra en Perse. Manucher le sceut : mais en fit si peu d'estat, qu'ayant donné assez mauuais ordre à ses affaires, il fut contrainct de recevoir le combat à son grand desaduantage, laissant la victoire à son ennemy, pour se retirer en grand' haste en la forteresse de Amal, où le victorieux le poursuit, & l'assiégea de toutes parts. Il fit toutesfois ce qu'il peut pour le faire entendre à quelque composition de reddition : mais ce Prince s'estant opiniastreté à la resistance, l'autre se resolut aussi à le forcer, & se rendre maistre de la place. Mais ce n'estoit pas l'intention des siens, lesquels voyants l'Hyuer s'approcher, deliberoient desia de quitter tout pour s'en retourner en leurs pais. Dequoy estant aduertty Afraciab, craignant quelque chose de pis, pensa qu'il estoit plus à propos de traicter de la paix, que de faire vne si honteuse retraicte. Quelques vns furent doncques deputez de part & d'autre pour cet effect : en sorte que la paix fut concludé, à condition que le fameux fleuve de Ichun seroit d'ores-en-auant les bornes de la Perse, & du Turquestan.

La paix ainsi accordée entre-eux, & Afraciab avecque son armée retiré au logis, Manucher sortit de la forteresse, prenant le chemin de la Royale Cité de Sagistam, où il tenoit pour lors sa Cour. Mais à peine Afraciab estoit-il sorty de la Perse, que Manucher fist tous ses efforts d'assembler vne grande & puissante armée pour marcher contre luy : dequoy l'autre estant aduertty, & n'ayant point encore licencié ses troupes, vint se ruer sur la Perse, où il fit de grands ravages. Mais à bien assailly, bien deffendu : car Manucher plus prouident qu'il n'auoit esté la premiere fois, ayant son armée toute preste, donna avecques vne telle impetuosité contre ses ennemis, qu'il les deffit, & en emmena vn fort grand nombre de captifs. Ce qui luy acquit la paix le reste de son regne, qui fut fort long : car on tient qu'il ne regna pas moins de six-vingts ans, laissant vn fils nommé Naudar, auquel il donna plusieurs bons & sages conseils auparauant que de mourir, touchant le Gouvernement de ses Royaumes.

NAUDAR IX. Roy de Perse.

Les nouvelles de la mort de Manucher, & du nouvel aduenement à la Couronne de Naudar, estans portées au Turquestan, Pachang Roy de ceste Prouince, appella ses fils pres de sa personne, pour les inciter à ne perdre pas ceste occasion sur ce changement de Prince, non encores bien estably, Afraciab fut celuy qui donna le premier son consentement, comme estant plus practiqué aux affaires de Perse que ses freres, si bien que mettant la main à l'œuvre il assembla vne armée (comme l'on dict) de quatre cents mille hommes, tant à pied qu'à cheual, qu'il fit marcher

marcher droict à Sagistan: Naudas en estant aduerty, appella aussi tost Som Narimon pere de Zal, qui gouernoit Kabulstam, à ce que sans auoir esgard à son aage il le vint trouuer, comme il nist, avec de fort belles troupes. Estans ensemble ils traicterent de ce qui estoit de faire pour le meilleur. Som s'en alla donc au deuant d'Afraciab: mais sa grande vieillesse ne luy pouuant permettre le travail du chemin, la maladie luy suruenant le fist mourir: ce qui apporta vne grande resiouissance à Afraciab.

Naudar qui pensoit suivre incontinent Som avec la teste de son armee s'en allant vers Mafandaron, se rencontra sans y penser dans ses ennemis.

Ayant donc fait halte, & les deux camps estans l'un de deuant l'autre, vn soldat des Turcs se mist en auant, demandant le combat contre quelqu'un des Perses, à l'encontre duquel se presenta vn nommé Kobad, petit fils de Kaoah Angar, duquel il a esté parlé en la vie de Fraydum. Le combat fut à l'aduanche de Kobad, qui tua Basmon, & l'ayant despoüillé, se retira en son logement. Les Turcs ayant souffert vn si bon succez avec vn grand mescontentement, rassemblerent aussi tost leurs troupes, & vindrent inuestir celles de Naudar, luy donnant la bataille, durant laquelle il survint vne si grande pluye, qu'ils furent contraints de se separer, à cause principalement de l'obscurité. En ceste separation Naudar recogneust bien qu'il n'estoit pas bastant pour resister aux forces de Afraciab. Ce qui fut cause qu'il fist encores venir à son secours deux de ses fils, l'un nommé Thus, & l'autre Gostam, accompagnez de Caren frere de Kobad qui estoit sorty de Sagistan, d'où il auoit tiré toute sa famille & thresors, & les auoit transportez à Albors Kurh. (c'est vne certaine contree où les Perses Payens souloient adorer le feu.)

Afraciab sceut aussi tost la deliberation de Naudar: celà fut cause qu'il enuoya au deuant d'eux vn sien Capitaine nommé Karahhon qui les rencontra, & combattit contr'eux. Caren y demeura sur la place, & les principaux de ceste troupe se sauuerent comme ils peurent. Durant que ces choses se passoient ainsi, Afraciab combatit pour la seconde fois contre Naudar, & le vainquit avec la perte de plusieurs Perses, & grand nombre de captifs, du nombre desquels estoit Naudar, lesquels Afraciab vouloit faire tailler en pieces sans Agarires son frere, lesquels firent mener les Capitaines en vne forteresse. Ceste victoire si signalée obtenüe par Afraciab, luy donna l'assurance d'enuoyer vne armee de trente mille hommes à Sagistan, lieu de la Cour de Naudar, laquelle ville se rendit bien tost. La nouuelle de ceste victoire s'espandit par toutes les Prouinces de Perse, paruint iusques au lieu où se tenoit Merahb beau-pere de Zal, lequel prepara aussi tost vn present de ce qu'il auoit de plus precieux, & l'enuoya à Afraciab, luy faisant dire qu'il descendoit de la famille de Zoahk, duquel il estoit parent: si que pour ne pouuoir faire autrement, il auoit esté contrainct de rendre obeïssance au Roy de Perse: mais puis qu'il auoit maintenant l'honneur de luy appartenir, il luy rendroit bien plus volontiers toute sorte de seruite, & d'obeïssance, luy payeroit autant ou plus qu'il faisoit aux autres. D'autre costé il aduisa secrettement, & en diligence son gendre Zal de ce qui se passoit, ce qu'entendant, il fit vne leuee, & au plustost qui luy fut possible, sans qu'on s'en doutast ny estre apperceu, il se saisit de Sagistan. Ce que Afraciab ressentit grandement, de sorte que plein de cholere & d'ennuy, il enuoya trancher la teste à Naudar, mourant ainsi, apres auoir regné sept ans.

AFRACIAB I. Roy de Perse.

Afraciab s'estant ainsi emparé de la Perse, le manda à son Pere Pechangh, Roy de Turquestan, & avec quel succez ses affaires auoient heureusement reüssi, depuis il se conduisit si tiranniquement enuers son peuple, que tous les Perses conspirerent contre luy, demandans Agarires, auquel ils escriuirent par le moyen d'un Perse nommé Kaharan, le prians de les assister. Cestui-cy leur respondit qu'ils appellassent à leurs secours Zal, & qu'ils commençassent la guerre de leur costé: ce qu'ils firent dès le Printemps prochain, & Zal qui estoit lors à Sagistan donna ordre à tout ce qui estoit necessaire à la guerre, enuoyant Ghechuad Capitaine de grande reputation, vers Tabrastam, pour faire des menées en ces contrees-là. Ces choses ne se peurent negocier si discrettement, qu'elles ne vinssent à la cognoissance d'Afraciab, lequel assés de tout ce qui se passoit, & de leurs intelligences mesmes, que son frere Agarires tenoit le party des Perses, l'enuoya tuer: & Zal pour vengeance de ceste mort qu'il ressentit avec beaucoup d'impatience, incita tout ouuertement les Perses à la guerre contre les Turcs, lesquels s'estans assemblez de toutes parts, ils allerent presenter la bataille à leurs ennemis, laquelle dura tout vn iour avec grand meurtre, tant d'une part que d'autre, la nuict les separant sans qu'on peust remarquer qui auoit l'aduantage. Et de là s'estans retirez chacun chez l'oy, ils continuèrent à s'écarmoucher six mois entiers, où il se perdit beaucoup de peuple en toutes ces rencontres. Et là dessus survint vne grande cherté & famine, suyue d'une maladie contagieuse: si que la maladie ayant gagné tous les deux camps, chacun fust obligé de rechercher la paix, laquelle

ne fut point desagréable à Afraciab qui fut content de se retirer à Turon, laissant la Perse après l'avoir tenue l'espace de douze ans.

BAZAB XI. Roy de Perse.

Afraciab ayant ainsi quité le Royaume, les Perses en donnerent le Gouvernement à Bazab qui estoit de la maison Royale, lequel le receut : mais comme il avoit dōsja quatre-vingts ans, il prit pour compagnon vn sien cousin, nommé Garchaséf. Et d'ailleurs considerant Bazab la misere & le tourment auquel avoient vescu les Perses durant les guerres passées, il procura à son possible de cōserver la paix, comme il fit tant qu'il vescu, qui fut bien peu, quitént libéralement à son peuple les droicts Royaux, pour le pouvoir r'avoir de leurs pertes passées, & pour la commodité de la Perse il y attira deux rivières, encore que leur liét en fust fort elloigné, l'une desquelles il appella Habin, & l'autre Razabin. Jamais il n'eust de thresor, ny n'en voulut avoir : que s'il recevoit quelque somme, il la distribuoit à ses Capitaines, & soldats. Mais d'ailleurs il estoit fort gourmand & addonné à boire & à manger, & inuenta plusieurs sortes de sauces & potages. C'est ce que Mir-Kon dit de plus remarquable.

KAYKOBAD XII. Roy de Perse.

Par la mort de Bazab Kaykobad neveu de Naudar parvint au Royaume, & fit son Capitaine General Rostan fils de Zal, & estant accompagné de Ghecuad, Karaen, & autres Capitaines en grand nombre, se mirent en embuscade au deuant d'Afraciab, qui leur venoit à l'encontre avec vne grosse armée : de sorte qu'il fut deffait, la victoire demeurant aux autres : Rostan faisant tant d'armes, qu'il contraignit Afraciab à demander trefue pour deux iours, pour la grande crainte pour laquelle il estoit pour lors, lesquels luy furent accordez, à condition de traiter de paix, laquelle ses su-efts luy approuverent, & enuoyerent vers Kaykobad pour l'accepter, mais les Perses n'y ayans point voulu entendre, ils vindrent à vne seconde bataille, en laquelle Afraciab fut vaincu, où ils combattirent plus opiniattement qu'auparavant. Et comme l'on estoit en la plus grande ardeur du combat, Rostan demanda qu'on luy monstrast Afraciab, lequel voyant, il se mit à courre à toute bride contre luy, & comme cestuy-cy estoit d'une grande force & dextérité, il le ietta par terre, luy lia les pieds avec vne corde, d'autant que c'estoit la coutume en Perse, & laquelle est encores aujourdhuy en vsage, de porter vn cordeau avec soy pour tirer de l'eau aux cisternes qui sont fort cōmunes en ce pais là le mena à course de cheval, & le laissa entre les morts. Or comme Afraciab estoit fort aduité, il fist en sorte qu'il se detacha, & y mit vn autre mort en sa place, puis sans qu'il fut apperceu, il fist en sorte qu'il sortit de là, & eschappa pour ceste fois. Rostan tout ioyeux, vint porter ces bonnes nouvelles au Roy, pensant qu'il n'y eust qu'à enlever Afraciab, ce qu'il offrit de faire : mais voyant la tromperie, tout confus & plein de honte, luy demanda pardon, iurant qu'il ne le tromperoit pas vne autre fois. Quant à Afraciab, il s'en alla au Turquestan, d'où il enuoya vn Ambassadeur à Kaykobad luy demander la paix, laquelle luy fut accordee. Cela fait, Kaykobad ayant departy ses thresors à ses gens de guerre, se retira en ses terres, auxquelles il administra iustice, faisant office de bon Prince tout le temps qu'il vesquit. Il perdit la veue long temps apres, & son indisposition augmentant de iour à autre : il mourut en Isfaon chef de Kyerak, où il tenoit sa Cour, laissant en son lieu son fils Kaykaus, apres avoir regné cent ans.

KAYKAUS, ou SALOMON XIII. Roy de Perse.

L'occasion des querelles precedentes avoit donné l'assurance à vn Capitaine Persien, de faire des menees en la ville & Prouince de Masandron, à l'aduenement de ce nouveau Roy à la Couronne. Ce qui fut cause que Kaykaus leua vne puissante armée contre luy, & l'environna de toutes parts. La ville estoit forte, & bien pourueüe de gens, & de bastions, pour se bien defendre. Cela fit retrancher quelque stratageme à Kaykaus, puis que sa force n'estoit pas suffisante pour en avoir la raison Il feignit dōc d'avoir faute de provision, & trouua moyen d'avoir quelques intelligences avec les assiegez, lesquels gaignez par le prix excessif qu'on leur donnoit de leurs denrees, les vendoient sans consideration : & comme ils s'en fussent desja degarnis d'une grande quantité, ils esprouverent bien tost, que par faute d'iceux ils viendroient en la puissance de Kaykaus : ce que luy-mesme tenoit autrement du tout impossible. Ceste ville de Masandron est des plus fameuses de ces quartiers-là, au delà des terres de Gueylon, se ioignant du costé du Nord à la mer Caspie. Les naturels habitans de ceste nation sont forts & belliqueux, & sont nombrez entre les sujets des Roys de Perse.

Masandron ainsi conquis, Kaykaus visitant ses terres, entra en celles de l'Arabie, entre laquelle & la Perse il y a vn destroit de mer, nommé le sein Persique, au deuant duquel le Roy Arabe nommé Zaulzogar, vint avec toute son armée pour le combattre, où l'Arabe fut vaincu & s'enfuyt (laissant son pais) en vne forteresse, en laquelle il se fioit beaucoup, & où il tenoit pour lors toute sa famille, & vne fille qu'il avoit d'une rare, & excellente beauté. Quelques pour-parlers se traicterent, qui se terminerent en vne paix, moyennant que Zaulzogar donneroit sa

roit sa fille Sodabâ pour femme à Kaykaus, vn sien frere la luy amena avec mille belles esclaves, & ainsi celebrent les nopces avec l'vniuersel contentement de tous.

Cependant que ces choses se passoient ainsi en Arabie, Afraciab entra sur les terres des Perles avec son armee, où il fit de grands degasts : il fut toutesfois repoussé & battu, si qu'il fut contraint de se retirer. Quant à Kaykaus ayant ordonné les choses necessaires au Royaume d'Amon, & en la meilleure partie des terres qu'il possedoit en ceste contree, il s'en retourna en Perse avec sa femme Sodaba, où arriué qu'il fut il ordonna à Rostan les Gouvernemens de Sagistan & Kabulstam, avec plusieurs autres honneurs, preeminences, & liberalitez. Ce Prince auparavant que d'aller en Arabie auoit vn fils qu'on appelloit Syaueux, auquel Rostan auoit voué beaucoup de seruite & d'affection : cestuy-cy estoit vertueux, aymé de tous pour sa douceur & courtoisie : ce qui ne plut guiere à Sodaba, proposant dès l'heure de le mettre mal avec le Roy. Faignant donc de l'aymer luy fit entendre son desir, que le ieune Prince ayant en horreur s'en deffendit autant qu'il luy fut possible : mais la malicieuse Sodaba desirant d'executer son dessein, vn iour que le Roy estoit fort mal accompagné, elle entra tout courant dans la sale où il estoit, les cheueux esparpillez, pleurant & se donnant de grâds coups à la poitrine, se plaignant que Syaueux l'auoit voulu forcer : aussi tost on se saisit de Syaueux, & le mit-on en vne fort estroite & obscure prison : mais la cause ayant esté examinée à la rigueur, il fut déclaré innocent : le Roy la manda venir incontinent apres pour la faire bruller, mais ses prieres, & l'affection qu'il luy portoit l'en empêcherent.

Il a esté dit cy-deuant, qu'Afraciab en s'en retournant le long du riuage de Ichun alla contre la Cité de Balk, capitale de Vabec, Kaykaus enuoya lors contre icelle son fils Syaueux avec douze mille cheuaux, & autant d'infanterie, luy ordonnant de passer par Sagistan, & se ioindre à Rostan avec les plus grandes forces que l'autre pourroit amener quant & soy.

Syaueux donc partit d'Isfaon, où estoit la Cour de son pere, & s'en alla à Sagistan, où Rostan luy ayant fait vne reception digne de sa grandeur, ils commencerent à traicter quel chemin ils prendroient pour marcher contre l'ennemy. S'estans donc mis en chemin, ils arriuerent à deux lieues de l'ennemy, & comme ils alloient recognoistre par quel endroit on l'attaqueroit, on assure qu'Afraciab trois nuits apres donna la bataille, en laquelle il fut mis en route, & mal mené : de quoy il y eut vne si grande crainte, qu'il se resolut d'entendre à bon escient à la paix, & de se deliurer de ce soin continuel, employant à celle negociation vn sien cousin nommé Garcenes, qui sceut si bien manier ceste affaire que Syaueux, Rostan, & ceux du Conseil luy accorderent, en donnant aduis au Roy Kaykaus, lequel le trouua fort mauuais, despeschant sur l'heure son oncle Thus, fils de Neudar, avec des lettres fort aigres à Syaueux, luy commandant qu'il suiuit Afraciab en quelque lieu qu'il fut, & qu'il luy liurast la bataille là où il le trouueroit, & à faute de le trouuer, qu'il fit vn rauage en la terre de Thus : & pour le regard de Rostan, à cause de son vieil aage, il luy permit de se retirer.

Syaueux pour accomplir le commandement de son pere, & l'accord fait avec Afraciab fit marcher son armee à Thus, & luy s'en alla trouuer Afraciab. Cestuy-cy auoit en son camp vn Capitaine appellé Pironde Vayfa, avec lequel Syaueux auoit quelque cognoissance & amitié, & le voyant venir l'alla dire avec vn grand contentement à Afraciab, lequel sçachant sa venue alla fort loing au deuant de luy, & le mena en sa tente, luy donnant vn siege esgal au sien : & pour monstrier combien il l'estimoit, il le maria avec vne sienne fille nommée Franguys. Ce mariage ne plut point à Garcenes frere d'Afraciab, ny aux grands de la Cour, qui tenoient cela pour vne honte qu'on leur faisoit : de sorte qu'ils conspirerent de tuer Syaueux, lequel l'ayant sceu le communiqua à sa femme Franguys qui estoit grosse, la priant qu'au cas que telle chose luy aduint, & qu'elle accouchast d'vn fils, qu'elle le mit entre les mains de quelque personne de la Perse. Peu de iours se passerent sans que les coniurez ne missent à execution leur dessein, & le massacrerent, voulans faire le mesme à sa femme Franguys, afin de faire périr la creature qu'elle disoit auoir dans le ventre : mais Pironde Vayfa la defendit. Ceste-cy ayant enfanté en son temps vn fils, on l'appella Kaykozrao, lequel le mesme Pironde Vayfa fit cacher au camp iusqu'à ce que Guyn fils de Gudars l'enleua par apres en Perse, laquelle eut beaucoup de ressentiment de la mort de Syaueux, & principalement le pere, lequel se voulant venger de la mort de son fils donna vne puissante armee à Rostan, avec commandement expres de liurer la bataille à Afraciab, ce qu'il fit, le deffit & vainquit, faisant mourir Garcenes son frere : si que Rostan s'en alloit victorieux quand il eut aduis que Chaydah fils d'Afraciab venoit au deuant de luy avec vne autre armee. Rostan alors (en la compagnie duquel estoit Frayborz fils du Roy Kaykaus, & frere du mort Syaueux) recommença le combat avec plus d'animosité qu'auparavant, & recognoissant Chaydah courut contre luy la lance à l'arrest, & le renuersa mort par terre, ce qui fut cause de mettre le reste des Turcs en fuite. Rostan poursuivant sa victoire entra dedans

Turon, le lieu où estoit la Cour d'Afraciab, & le Chef du Turquestan, que les Perses pillerent & mirent à sac, ostant tous les thresors & richesses des habitans d'icelle. Franguys femme de Syauex, estoit pour lors en ceste ville, laquelle Rostan enuoya prier de luy monstrier son fils: dequoy elle s'excusa, disant qu'elle ne scauoit où il estoit, si bien que Rostan s'en retourna en la Perse, auquel le Roy fit plusieurs honneurs & presens, & le renuoya à son Gouvernement.

Le Roy Kaykaus desiroit infiniment d'auoir son petit fils Kaykozrrao fils de Syauex & de Franguys, qui estoit lors à Turon, cela fut cause qu'il enuoya au Turquestan Guyn fils de Gudarz, noble Persien, & de grande suffisance, pour negocier ceste affaire, laquelle il fit si dextrement reüssir, qu'il entra à Turon, vit Franguys, & le petit Kaykozrrao, auquel il persuada d'abandonner ce pais là, & s'en venir en Perse, ce qu'ils firent, accompagnez seulement du mesme Guyn, & de Pirond Tayfa, leur aidant le long du chemin, iusques à ce qu'ils fussent arrivez à la Cour du Roy de Perse, où ils furent receus comme il leur appartenoit. Au bout de quelque temps le Roy Kaykaus voyant reluire plusieurs vertus & perfections en son petit fils Kaykozrrao, le fit Capitaine general de ses armées: faisant aussi plusieurs recompenses à Guyn pour ses services. Cecy fut cause d'un grand contentement à la Cour Royale entre Thus oncle de Kaykaus, à cause de Frayborz autre fils de Kaykaus, & Kaykozrrao: car cestuy-cy supportoit fort impatiemment, que les descendans d'un sang si cruel & si ennemy de la Perse, fut preferé aux naturels du Pays: si bien que la Cour fut diuisee en deux partialitez, l'une de Frayborz: l'autre de Kaykozrrao. auquel Guyn s'estoit ioinct pour le secourir. Tous ces diuorces estoient fort contraires à l'intention du Roy, lequel pour y remedier fit ce qui ensuit.

A l'heure gouvernoit la ville d'Ardauel vn Bahaman, lequel couroit & infestoit toute la terre de Perse, Kaykaus fit donc deux camps esgaulx en nombre d'hommes, & en forces, en donnant à vn chacun des pretendans, leur disant que celui qui auroit le premier le dessus de l'ennemy, ce seroit aussi celui qui deuanceroit son compagnon en grandeur, & en dignité: dequoy ils furent tous deux contents. Frayborz perit le premier, & ne fit aucune chose digne de memoire: mais Kaykozrrao combattit contre Bahaman, le vainquit & s'assubietta la Cité d'Ardauel, & retourné à la Cour, fut déclaré heritier du Royaume, & Guyn son Capitaine general. Et quant à Kaykaus il se retira en solitude, apres auoir regné, comme on dit, cent cinquante ans.

Ceste ville d'Ardauel, où Ardauil est vne Cité en la Perse en la Prouince de Ardebaion, distante de peu de iournees de Tabris, ou Tauris, non moins grande que renommee, à cause qu'elle a esté la partie de Cheque, Aydar pere de Cheque, ou Cha Ismaël Sophy, les descendans duquel regnent encor auourd'huy.

KAYKOZRAO IV. Roy de Perse.

Kaykozrrao ainsi paruenue à la Royauté, autant par sa valeur & bon-heur, que par la particuliere bien-veillance de son ayeul dès son aduenement à la Couronne, pour donner vne preuve à son peuple, qu'il n'auoit point fait mauuais iugement de luy, il reforma la iustice, qui s'estoit toute deprauee & corrompue pendant les guerres passees, taschant de remedier aux pertes & ruines d'un chacun, par sa liberalité & manüetude, puis il assembla ses Estats, auxquels il propoia la guerre qu'il pretendoit de faire aux Turcs, en satisfaction de la mort qu'ils auoient donnée à son pere: ce que tous approuuerent & s'offrirent de le suiure: de sorte qu'il enuoya Frayborz frere de son pere, & Thus son grand oncle & fils de Naudar, avec trente mille cheuaux pour courir les terres du Turquestan. Kaykozrrao auoit vn fils nommé Syauex, lequel prenant de fort mauuaise part, que l'on fist la guerre à son ayeul, comme s'il eut receu quelque grande iniure se retira à Turon. Pirond Vayfa, lequel comme il a esté dict cy-dessus estoit venu en la Perse avec Guyn, quand il emmena Kaykozrrao avec sa mere Franguys, & s'y estoit marié, ayant eu vn fils qu'on appelloit Ferud, lequel comme il fut venu en aage s'en alla à Turquestan. Le Roy aimoit ce ieune homme comme son fils: si bien que lors qu'il enuoya Frayborz au Turquestan, ayant entendu que Ferud auoit la garde d'une forteresse, il commanda expressement à ses Capitaines qu'ils se detournassent d'icelle, mais eux estans obligez par le chemin qui les conduisoit d'y passer, ils prindrent leur chemin à l'entour d'icelle: ce qu'ayant entendu l'ennemy il fit vne sortie sur iceux, & les combattit, mais il demeura sur la place, ce qu'ayant entendu le Roy de Perse il en eut vn extrême deplaisir, & comme on luy dit que Thus auoit esté la cause, il le fit venir en la Cour, & mettre en prison, Frayborz & Gudarz continuerent la guerre contre les Turcs, où ils eurent mauuais succez, d'autant que Pirond Vayfa les vainquit avec vn grand massacre des Peres, & entre autres loixante & dix Cauahiers tous de la famille de Gudarz, lequel avec Frayborz se retirerent en la Perse: le Roy toutes-fois ne se rebuta point de ceste desconuenue, ains despescha vn autre fois Gudarz avec
vne autre

vne autre armee, & avec luy Thus qui estoit retourné en grace : ils partirent donc pour aller à Turon, ils n'estoient pas encore sortis de la Perse, qu'ils trouuerent leurs ennemis qui destruisoient tout deuant eux, lesquels ils combattirent, mais les autres leur résisterent avec vne telle impetuosité, que les Perses furent contraints de se reserrer dans la terre de Demon, où ils les environnerent de toutes parts, leurs ostant tous les passages.

A la renommee de ce siege, vindrent deux Roys voisins du Turquestan, l'un nommé Hhakon, l'autre Changel, avec vne armee pour le secours des Turcs, ce qui mit les Perses en extreme destresse, se tenant pour abandonnez de tout secours : Mais Kaykozrrao estant aduertty de la misere où ils estoient reduits, manda incontinent à Rostan qu'il eut à partir en la plus grande diligence qui leur seroit possible : aussi chemina-il sans se donner aucun relasche, iusques à ce qu'il eut atteint les ennemis. Les Perses estans aduertis de sa venue, en receurent vne telle ioye, que tous en baiserent la terre en action de grace, & se ioignans à luy allerent combattre leurs ennemis, avec tant de courage & de valeur, que la meilleure partie d'iceux demeura sur la place, & entr'autres Hhakon, l'un des Roys de leurs allies. Kaykozrrao ne se contenta pas encore de ceste deffaitte : mais enuoya quatre autres armees en differents endroiets pour ruiner le Turquestan, la principale que conduisoit Gurdardx allant contre Balk, lequel eut à combattre Pirond Vayssa, celuy qui auoit la meilleure armee des quatre, que Afraciab auoit enuoyé contre les Perses, lesquels emporterent l'honneur de la victoire par la mort de Pirond Vayssa, la teste duquel fut enuoyee à Kaykozrrao, laquelle il vit avec vn grand desplaisir, pour la nourriture qu'il auoit receue de luy. On dit qu'en ceste guerre demurerent que morts que captifs plus de cent mille Turcs, & vnze de leurs principaux Capitaines: Kaykozrrao fit de grandes recompenses à tous ceux qui auoient bien seruy en ces iournees, donnant à Frayborz la terre de Kyché, ou Kaché, & Macron, Royaumes qui sont vers Goadel, à l'entree du Sein Persique.

Afraciab ayant refait son armee entra de rechef avec vn sien fils en la terre de Kaorrazin, sur les contins de la terre de Turon, où estoit lors l'armee des Perses, lesquels vainquirent les Turcs, firent mourir le fils d'Afraciab, & le contraignirent de se retirer en vne forteresse avec sa famille, où ne se tenant pas fort assuré, & voulant se retirer ailleurs il tomba entre les mains de Kaykozrrao, avec sa femme & ses filles, qui furent prises quelque temps auparauant, & traitées avec beaucoup d'honneur & de respect. Quelques mois apres Afraciab fut pris luy-mesme, & tué, donnant ainsi par sa mort la fin à ceste longue & facheuse guerre, laquelle estant terminée de la sorte Kaykozrrao à l'imitation des Roys ses deuanciers, se voulut retirer de la Cour & des affaires : & n'ayant aucun fils il mit en son lieu Lorasph, nepveu d'un frere de Kaykaus, y contredisans quelques-uns des plus grands, puis mourut peu de temps apres, ayant premierement rendu toutes les terres, & les facultez que ses predecesseurs auoient ostées à leurs sujets, & payé toutes leurs debtes, il fauorisa les pauvres, rendit la iustice esgale à vn chacun, & contenta les gens de guerre qu'il auoit employez. Iamais n'entreprint affaire d'importance sans bon & meur conseil.

Du temps de Kaykozrrao, il y auoit en la Perse deux celebres Philosophes, l'un nommé Hhorez, l'autre Lokman: de ce dernier il se trouue quelques œuvres entre les Perses, qui tesmoignent qu'il estoit d'un grand esprit, entre les autres vn liure de comparaisons & exemples fort semblables à celles d'Esopé : aussi y a-il grande apparence que c'est de luy qu'ils veulent parler, d'autant que racomptant sa vie, ils disent qu'estant grand Philosophe, il auoit esté esclave fort fidele, gracieux, & qu'il mourut condamné, vne chose seulement met en doute, qu'il assure qu'il estoit luif : ils ont vn Prouerbe entr'eux, qui dit, Il n'est point de besoin d'enseigner Lokman pour monstrier le profond sçauoir de ce personnage.

LORASPH XVI. Roy de Perse.

Kaykozrrao n'ayant laissé aucun enfant male, la Couronne vint entre les mains de Lorasph, selon l'ellection qu'il en auoit faite auparauant que de mourir : cestuy-cy, comme il a esté dit, estoit nepveu du frere du Roy Kaykaus, & le plus proche à succeder à Kaykozrrao : mais d'autant qu'il estoit recogneu pour vn homme seuer & cruel, son establissement fut empesché par les plus grands du Royaume, & particulièrement de Kalk, pere de Rostan, toutesfois il l'emporta contre tous, & fut déclaré Roy, apres cela il sortit de Isfaon, & visita ses terres iusques à Balk, enuoyant de la Gudars avec vne armee contre la Mesopotamie, Syrie & Palestine, lequel en peu de temps mit sous sa puissance toutes les terres de Babylone, & de Dimes Kychan, qui sont celles de Damas, puis marcha contre Beyt Almokadas, c'est à dire Hierusalem: car en langue Arabesque Beyt signifie maison, & Almokadas, c'est à dire des Saints : le Roy d'icelle se rendit à condition de payer tribut, pour seureté duquel accord il donna plusieurs personnes notables en ostage, lesquelles Gudars fit massacrer à peu de iours de là ayant esté assuré que les luifs se vouloient rebeller contre son Roy, & s'estoient assemblez en intention de luy faire la guerre, ce qui fut cause que Gudars ayant rassemblé ses forces, retourna

contre Hierusalem, laquelle il battit & força, à la prise de laquelle les Perses vserent de terribles cruantez enuers les Iuifs, en emmenant vn grand nombre de captifs en Perse, ou Gudars se retira avec plusieurs autres victoires. Le Roy Lorasph auoit deux fils, l'aîné s'appelloit Gustasph, le plus ieune s'appelloit Zaria : Gustasph estoit fort superbe & altier, mais d'ailleurs fort belliqueux, lequel ayant disposé quelques siens amis à des nouveutez qu'il desiroit, il fit en sorte qu'ils se rebellerent avec luy contre son pere pour le chasser du Royaume, bonne partie d'iceux le suiuit du commencement : mais le pere ayant amassé le plus de gens qui luy fut possible, le poursuivant sans perdre temps ny occasion, le fit sortir du Royaume, ne sentant pas ses forces bastantes pour resister à celles de son pere ny pour se conseruer dans le pais, si bien qu'il se sauua seul, & en mauuais equipage, passa au Turquestan, où estant arriué par vne certaine aduventure, il se maria sans estre cogneu, à la fille du Roy de ce pais-là ce qui aduint en ceste maniere.

C'estoit vne coustume ancienne au Turquestan, que lors que le Roy vouloit marier quelque sienne fille de s'assembler en vn camp, où tout le peuple s'assembloit, qui estoit en ceste saison-là en la Cour, chacun le mieux en poinct qui luy estoit possible, lesquels s'estans tous mis en ordre, celle qui deuoit estre mariee estoit prise du Roy son pere par vne main, & en l'autre tenoit vne pomme d'or de la figure & grandeur d'une orange, toute enrichie de tres-fines pierrieres : puis estant mise en lieu où elle pourroit voir particulièrement ceste assemblée, regardoit & consideroit l'un apres l'autre fort long temps, finalement en ayant remarqué quelqu'un qui luy plaisoit, elle luy alloit donner ceste pomme, & cestui là estoit tenu inuiolablement pour son mary. Or il arriua qu'au temps que Gustasph entra en la Cour, le Roy vouloit marier vne de ses filles, laquelle par curiosité, ce nouveau venu voulut aller voir : mais son aduventure voulut qu'il pleut à ceste Princeesse, si qu'elle luy donna la pomme de quoy le Roy son pere fut fort marry pour ne recognoistre Gustasph, & les grands qui se trouuerent-là firent plusieurs plaintes, comme si tout ordre eust esté renuersé : de sorte que pour euer qu'à l'aduenir il n'arriuaist semblable chose, on fit vne loy, par laquelle il ne seroit plus permis d'oresnauant aux filles du Roy d'estre mariees à d'autres qu'à ceux de leur qualité & merite. Ce Roy auoit encore deux autres filles d'une rare beauté, qui luy furent demandees par deux fils d'un Roy sien voisin, auxquels il les promit, à condition qu'ils reduiroient sous sa puissance deux des plus grands Seigneurs de ces pais, & qui auoient esté cause de beaucoup de mal en son Royaume : le party & l'entreprise leur semblerent fort difficiles : mais ayant eu cognoissance de la valeur de Gustasph, ils trouuerent moyen de luy faire entreprendre ceste charge à la persuasion de ses amis : feignant donc qu'il s'en alloit à la chasse avec vne suite necessaire à son dessein, il donna vn si bon ordre, se conduisit si dextrement en ceste entreprise, qu'il les prit & les dompta, les mettant en la puissance des deux freres qui estoient avec luy, lesquels les allerent presenter au Roy, lequel fit grand cas de ce faict d'armes là, & leur donna les deux filles : peu de iours apres le Roy ayant dressé ioustes, Gustasph s'y comporta avec tant d'adresse, & de galanterie que le Roy le loua fort, à quoy il respondit qu'il ne le falloit pas estonner s'il auoit vne telle dexterité à ce battre à cheual avec vn baston de Canne, luy qui auoit nettoyé le Royaume des perturbateurs d'iceluy, ce que le Roy ayant entendu & informé comme le tout estoit passé, en demeura dauantage satisfait.

Gustasph cependant sçachant combien son pere luy vouloit du mal, pour s'estre retiré chez ses ennemis, & qu'il cherchoit moyen de s'en vanger, pensant au grand different qu'il auoit eu avec son pere, & de combien il auoit deu ressentir son absence, ne sçachât point encore en quel lieu il s'estoit perdu, il se resolut de luy faire la guerre, & avec ce desir, il persuada à son beau pere de luy refuser le tribut qu'il luy payoit pour son pais, ce que le Turc fit contre sa volonté, luy enuoyant vn Ambassadeur de sa part pour luy denôcer la guerre. Ceste nouveauté estonna fort le Roy Lorasph : & s'enquerant de la cause principale qui mouuoit le Roy des Turcs à se reuolter, trouuant les raisons de l'Ambassadeur trop foibles pour vne affaire si importante, il decourrit en fin que c'estoit vn estranger, homme de valeur, qui par vne inopinee aduventure auoit espousé la fille de ce Roy, qui estoit cause de tout ce mal. Cela fut cause qu'il s'informa plus particulièrement qui estoit cet estranger, & trouua en fin que c'estoit son fils Gustasph, de quoy estant bien asseuré, il despescha vn Ambassadeur vers son ieune fils, nommé Zaria, frere de Gustasph, afin qu'eux deux ensemble l'allassent trouuer, & l'incitassent de venir prendre la possession du Royaume. Gustasph ayant eu aduis de ceste despesche partit de la Cour au deuant d'eux auparauant que son beau pere en eust la cognoissance, & parla à son frere Zaria, receuant la Tiare que son pere luy enuoyoit, il la mit en sa teste, & fust aussi tost proclamé Roy de Perse de toute ceste assemblée, ce qu'estant fait, il fit appeller son beau-pere, lequel estant arriué-là, & le voyant en cet estat fut troublé & confus, pensant que ce fut quelque menée & trahison pour le deposseder de son Royaume : mais ayant sçeu comme le tout s'estoit passé, il l'embrassa

Il l'embrassa plusieurs fois avec grand ioye. Gustasph ayant pris incontinent apres congé de son beau-pere, il s'en alla en Perie, emmenant quant & luy sa femme Karahud (car ainsi s'appelloit la fille du Roy, qui luy auoit donné la pomme) & grande compagnie de gens & de chameaux chargez de grandes richesses : Lorasph son pere le receut avec des demonstrations de grand amour, qui eurent encor d'auantage pour ses seruites qu'il luy rendit par apres, en fin le pere ayant passé quelques ans avec ses fils, lailé du maniment des affaires se retira de la Cour pour passer ses iours en vne vie solitaire, où il mourut quelque temps apres, donnant à son fils de tres-bons & necessaires conseils, pour le Gouvernement de son Estat, on auoit sus-nommé Lorasph Balkah, d'autant que la meilleure partie du temps il residoit à Balk.

GUSTASPH XVI. Roy de Perse.

Quand Lorasph se retira de la Cour, il laissa son fils Gustasph, ou Gustasph commandant au Royaume: cestui-cy fut vn Prince fort vaillant à la guerre, & prudent à la paix, fort addonné à l'idolatrie & veneration du feu, à laquelle superstition il fut tellement zélé, qu'il fit la guerre à ceux qui ne vouloient pas suiure son opinion, comme il fit à Ariasph, ou Ariasph Roy de Turon pour l'auoir repris en vne de ses lettres, sur ce qu'il luy mandoit qu'il suiuit la secte de Zarducht qui estoit celle de feu, c'estoit de la prouince d'Arderbajon ou Ararbajon, c'est à dire prouince du feu, que ceste superstition auoit pris son cours, & celuy qui fut le premier inuenteur de ceste secte, s'appelloit Zarduch c'est à dire, amy du feu. Gustasph donc en cholere du peu de respect qu'Ariasph auoit rendu à le reprendre en ses lettres, se mit en campagne, accompagné de son frere Zazir, & de Sphandiar son fils, avec le plus grand nombre de gens de guerre, qu'il peust prenant la volte de Turon donna la bataille contre Ariasph, le vainquit, mettant à mort ses fils & ses freres, & sans perdre temps s'en alla contre Turon, laquelle il prit & saccagea, & de là s'en retournant en Perse, où arriué il fit mettre en prison son fils Sphandiar en vne forteresse nommée Guerdkuh en la contree de Rudbar, pour quelque soupçon qu'il auoit de luy : durant que cecy se passoit en Perse, Ariasph ayant assemblé vne nouvelle armee entra dans le pais, print Balk qu'il saccagea, emmenant captiues quelques filles de Gustasph, & ne se contentant pas de cela, il entra plus auant dans la prouince, avec vne telle promptitude, que Gustasph n'ayant pas assez d'assurance pour l'attendre seul, ayant appelé son conseil, il fut d'aduis de deliurer son fils Sphandiar, & luy donner la charge de ceste guerre, laquelle cestui-cy ne voulut point receuoir ny sortir de prison: en fin toutesfois aux prieres de son frere Iamasph, & avec la parole que son pere luy donna, de luy laisser la charge du Royaume, s'il reuenoit victorieux, il se mit en chemin avec vn bon nombre de gens de guerre, il marcha contre Ariasph, donna la bataille, & emporta la victoire, & s'en retourna avec icelle en Perse, son pere luy alla aussi-tost au deuant, luy demonstrent toute la bien-veillance qu'il se pouuoit, il luy dict toutesfois que ceste victoire deuoit estre estimée peu de chose, tant que les sœurs seroient captiues entre les mains de l'ennemy: dequoy Sphandiar ayant honte, & pour ne faillir à son obligation, il fit vne eslite de toute son armee de vingt quatre mille hommes, douze mille de pied, & douze mille de cheual, & accompagné de Buchutan son ieune frere, poursuivit son ennemy: mais ils aduiserent par le chemin de se separer, ce qu'ils firent à vn carfour, dont les trois chemins alloient tous à Turon, donnant le plus grand chemin à Buchutan son frere, où il y auoit de grandes prairies, le chemin estant plus aisé à tenir, avec commandement, qu'estant arriué en vn lieu nommé Paruindez, il se mit en embuscade avec ses troupes, & se tint la coy sans bruiet, de crainte qu'ils fussent entendus de ceux de Turon, & comme il faisoit desia nuit: comme c'estoit la coustume en ceste ville d'allumer alors de grands feux, qu'alors il donnaist dedans, avec la plus grande impetuosité qu'il pourroit.

Quant à Sphandiar, prenant avec luy quelque compagnie, allerent par vn autre chemin habillez en marchands, à Aptikon, c'est à dire sept Roys, ou sept Seigneurs, ayans porté avec soy forces ioyaux, & pierreries de grande valeur: car c'estoit la coustume des Perses allans à la guerre, de porter quant & eux toutes leurs richesses, lequel chemin estoit beaucoup plus court que celui de Buchutan: Si bien que Sphandiar arriua à Turon avec ses compagnons en sept ou huit iours, se presentant ainsi en accoustrement de marchand deuant Ariasph, avec les ioyaux qu'il portoit, se conduisant de sorte en son entreprise qu'il fut logé dans le palais mesmes du Roy, & comme il eut eu aduis que son frere estoit arriué au rendez-vous, il demanda permission de faire le iour suiuant vn banquet au Roy, & à ceux de sa cour, qu'il auoit intention de dresser en la campagne voisine de la ville, & sur l'occasion de ce festin, il fit plusieurs feux pres de la mutaille d'icelle. Buchutan qui auoit l'œil au guet, les descouurit incontinent, & alors sortant de son embusche vint occuper tous les chemins, & avec vne grande impetuosité entra dans la ville où il fit vn grand massacre, & la saccagea, ne reseruant pour luy de tout le pillage qu'un throsne d'or, enrichy de fines pierreries d'une merueilleuse beaulte avec vn Elephant blanc. Cela fait il deliura ses deux sœurs que Sphandiar liura à son frere Buchutan, pour les

remmener en Perse, & quant à luy, il prit son chemin vers la mer de l'Inde pour forcer quelques nations à suivre la superstitieuse opinion du feu, de là il s'en retourna en Perse, où il fut fort bien receu de son pere, lequel au lieu du Royaume qu'il luy auoit promis, il luy fit faire plusieurs grandes & perilleuses entreprises, desquelles il sortit à son honneur, finalement son pere voulust qu'il allast chercher Rostan qui s'estoit retiré en Siston, sans le venir trouuer au commencement de son regne. Sphandiar y fut : mais contre sa volonté, & seulement pour obeir à son pere, auquel il dit que ce n'estoit pas accomplir ce qu'il luy auoit promis, & que c'estoit mal recogneu l'obligation qu'il auoit à Rostan, il s'en alla donc à Siston menant avec luy vn sien fils nommé Bahaman, lequel comme il alloit deuant son pere, il vit de loin descendre d'une coline, Rostan, au deuant duquel il fut, & luy dit qui estoit toute ceste troupe qu'il voyoit venir de loin, dequoy Rostan se trouua tout estonné, toutesfois estant allé au deuant baiser la main à Sphandiar, & comme cestui-cy luy eut déclaré la cause de sa venue, qui n'estoit autre que pour le faire venir à la Cour de son pere, l'autre luy respondit que son aage le deuoit maintenant dispenser de telles obligations, & qu'en cas de necessité on le trouueroit tousiours à propos. Sphandiar insistoit au contraire, si bien qu'en ces disputes ils en vindrent aux paroles plus aigres, & se desierent, mettant soudain la main aux armes : quant à Sphandiar, il estoit tenu pour vn des plus rudes & hardis Cheualiers de la Perse, aussi reduisit-il son aduersaire en tels termes, qu'il ne faisoit plus que parer aux coups, toutesfois comme l'extreme necessité fait renaistre souuent nouvelles forces, il fit vn si grand effort, qu'il blessa mortellement Sphandiar, lequel mourut incontinent de ceste blessure, recommandant son fils Bahaman à Rostan, auparauant que de rendre l'esprit & son corps à son frere Buchutan, qui le fit emporter en Perse, où on luy donna sepulture condigne à sa grandeur, son pere Gustasph en eut vn grand resentiment de douleur, ne tenant plus conte de rien entreprendre depuis ceste mort, toutesfois le Roy de Turquestan estant venu courir les terres de Perse, il fut contrainct de mettre sus vne nouvelle armee, avec laquelle il batit & vainquit son ennemy, se retirant aprez chez luy, où il vit venir son petit fils Bahaman, qui estoit lors à Siston, auquel il resigna son Royaume, & se retira en vn lieu nommé Ghozglinar, pour y passer le reste de ses iours en vie solitaire : ce lieu estoit vne maison de plaisance, laquelle pour sa belle Architecture, ceux du pais disoient estre vne œuvre de Soliman Bendaui, c'est à dire Salomon fils de Dauid, distante de Scyras de trente mille Gustasph fonda la Cité de Aluartah, qu'il surnomma Herbout, & ayant veicu quelques annees apres, il mourut ayant regné six vingts ans.

BAHAMAN DARAZDAST XVII. *Roy de Perse.*

Après la retraicte de Gustasph, Bahaman son petit fils luy succeda, qui fut surnommé Darazdast, c'est à dire à la longue main : on l'appelle aussi Ard'chir, qui est le plus commun qu'on luy donne aux Chroniques de Perse, qui luy fut donné pour vne telle occasion : comme sa mere estoit grosse de luy, vn Astrologue vint voir son ayeul Gustasph, & son pere Sphandiar, lequel apres les auoir saluez s'adressant à Sphandiar, & luy presentant vn petit panier, luy diét que c'estoit pour mettre le fils qui naistroit de luy, dans lequel ayant descouvert, n'y auoit autre chose dedans qu vn vaisseau plain de lait, & vn peu de farine, leur disant que son pouuoir ne s'estendoit pas à plus grand present : les Princes demeurèrent fort satisfaits du discours de ce Sage, prindrent si grand plaisir à son present, qu'ils donnerent vn nom à leurs fils des choses qu'il auoit offertes : car Ard en Langue Persienne est à dire farine, & chir c'est à dire lait, ces deux noms estans ioincts ensemble le nom a Ardchir, qui est le mesme que les Grecs & Latins disent Artaxerxes, & de luy plusieurs de ses successeurs ont voulu estre nommez Ardchir.

Ce Prince fut de fort bonne & saine composition, ayant le bras & la main droicte remarquablement plus longue que l'autre, il fut doué de toutes les parties qui se peuuent desirer en vn Prince, & entr'autres si ialoux du bien public, que lors qu'il enuoyoit de ses Officiers, pour visiter son Royaume, il mesloit quelques-vns parmy eux, auxquels il auoit de la confiance pour seruir de tesmoins à ce qu'ils leur verroient faire, afin qu'il recompensast & accreust les dignitez de ceux qui auroient bien versé en leurs charges, & au contraire chastiaist ceux qui s'y seroient conduits mal à propos : vn an apres qu'il fut Roy, il tint les Estats, auxquels il declara particulierement ses intentions, les priant de luy dire publiquement & sans crainte ce qu'il y auoit de defauts en luy, afin de les pouuoir esuiter, & que s'il faisoit quelque chose indigne d'un Roy, qu'ils le deposassent, luy estant bien plus agreable d'obeir, & qu'en ce faisant il en arriuaist bien au public, que de gouverner sans ordre au dommage du Royaume, tous louerent fort son zele, & avec grands cris prierent les Dieux qu'ils luy donnassent bonne vie & longue, apres leur auoir accordé quelque chose necessaire pour leur particulier, il les licentia.

Ardchir fit reedifier plusieurs edifices qui estoient ruinez, & donna ordre pour l'administration du Royaume : cela estant fait, il pensa comment il prendroit la raison de la mort de Sphandiar

Sphandiar son pere, & cela luy fit assembler vne puissante armee, à laquelle il leur fit prendre le chemin de Siston : mais comme il estoit au milieu du chemin, on le vint aduertir que Rostan estoit mort, & que Framatz son fils venoit en sa place à l'encontre de luy, avec bon nombre de gens qui luy presenterent la bataille, laquelle fut fort sanglante: la victoire toutesfois fut du costé d'Ardechir, qui luy cousta la vie de plusieurs des siens: mais Framatz fils de Rostan y fut tué, & Zal son ayeul qui estoit encore pour lors en vie, fut prisonnier, apres laquelle bataille Ardechir s'en retourna victorieux en Perse, mettant Siston & Kabul sous son obeissance; il fit la guerre par ses Capitaines en toute la Syrie & Paelline, rangeant plusieurs peuples sous son Empire, & emmenant plusieurs Juifs en captiuité en Perse, il auoit vn fils qu'on appelloit Sara, qui estoit grand Philosophe & Astrologue, lequel pour vacquer plus librement à l'estude, quitta la Cour, & toutes les grandeurs où il estoit appelé, meisme ne pretendist point au Royaume apres la mort de son pere, laquelle aduint avec vn regret, & vne douleur generale de tous les sujets: laissant sa femme Homay grosse d'un fils qu'elle enfanta apres sa mort. De son temps florissoit Hypocrates, que les Perles appellent Bo Korat, & Democrite desquels ils ont les escrits par deuers eux, avec les ceuures de Platon qu'ils appellent Aphlatum, de Socrates qu'ils appellent Sokorat, & d'Aristote qu'ils nomment Arasto, Arastalis, ceux aussi de Galien: ils font grand cas de plusieurs autres auteurs Grecs, & cela est en vsage entre les Perles d'estimer les gens de lettres; desquels ils recherchent la conuersation, se seruant de leurs autoritez, conceptions & sentences, le roy Ardechir souloit dire, que la maison du Prince ne deuoit iamais tenir sa porte fermee.

Mais d'autant que Rostan a esté vne personne fort signalee en ceste Histoire, il est bien à propos aussi de sçauoir la cause de sa mort, laquelle arriua en ceste maniere: Rostan auoit vn frere nommé Chagad, auquel il auoit donné charge de visiter les Prouinces, & recueillir ses tentes & tributs qui luy estoient deus, cestuy-cy estant allé à Kabul pour cet effect deuint amoureux de la fille du Gouverneur de ce pais-là qui estoit fort belle, & la demanda au pere, lequel voyant le frere de Rostan et pris de l'amour de la fille la luy refusa, & d'autant plus que l'autre en faisoit vne plus grande poursuite, iusqu'à ce qu'il vint à luy promettre à condition qu'il le deliureroit de la subiection de Rostan son frere le faisant mourir: cecy estant accordé Chagad s'en retourna à Siston, où discourant avec son frere, il luy fist plusieurs plaintes du Gouverneur de Kabul, qui l'auoit mesprisé, & fort mal traité. Rostan tout en cholere, reprit son frere de son peu de courage, & fit assembler gens de guerre de toutes parts pour chasser ce Gouverneur, Chagad l'en empescha tant qu'il peult, luy disant que sa presence estoit suffisante pour en tirer la raison, ce conseil pleust à Rostan, & partit avec son frere, & vn sien autre sujet nommé Zanada, & quelque peu de ses seruiteurs pour s'en aller à Kabul, dequoy Chagad aduisa secrettement en diligence son beau-pere. Celuy de Kabul sortit au deuant comme pour le receuoir, ayant mis plusieurs de ses gens en embusche, ayant abordé Rostan il luy demanda pardon, comme homme qui se repentoit de ses fautes qu'il auoit commises, & Rostan luy ayant pardonné, celuy de Kabul le pria de se venir reposer en vne sienne maison de plaisir, le guidant, de sorte qu'ils arriuerent à des fosses qu'ils auoient faites à ce dessein couuertes de ramee, dans l'une desquels tomba Rostan avec son cheual fort empestrez, lequel voyant apertement qu'il estoit trompé par la meschanceté de ses conducteurs, & que son mal estoit sans remede ny esperance, apres leur auoir dit mille iniures, il les pria de luy donner vn arc & des fleches pour se deffendre des bestes farouches, afin qu'elles ne le missent point en pieces de son viuant. Ceux-cy approuuerent son dire: mais aussi tost que Rostan les eut en main, il encocha deux fleches sur son arc, les tirant avec vne telle force, qu'encor que son frere & son beau-pere eussent mis au deuant d'eux le tronc d'un arbre qui leur estoit voisin, les perça toutesfois d'outre en outre, & les tua: Or tirer deux ou trois fleches en vn coup, cela est commun entre les Perles, c'est ce qui rend le coup de Rostan moins estrange, & en ceste façon moururent avec luy ceux qui auoient machiné sa mort: car luy y demeura aussi avec les autres, toutesfois l'Histoire se fait comme cela aduint. Quant à Kabul, duquel il a esté fait souuent mention, afin d'en informer particulièrement le Lecteur, c'est vn Royaume qui fut autresfois sujet à la Perse, & qui est sur les confins de l'Inde; & falloit anciennement pour aller de Kabul à Lahor, qui est auioird'huy la Cour du grand Roy de Mogol, & le centre de tout ce qui s'appelle Inde, estre trois mois entiers au lieu qu'on n'y est auioird'huy que vingt ou vingt cinq iours, la cause de cela en partie, c'estoit qu'il falloit faire vn grand circuit, à cause de la grande quantité des voleurs.

HOMAY Roynne de Perse, & mise au rang des Roys la 38.

Pour retourner maintenant à l'Histoire, apres la mort de Ardechir, le Gouvernement du Royaume demeura à Homay, sa femme, qui comme il a esté dit, estoit grosse, & au bout de cinq mois elle enfanta vn fils d'une rare beauté, aussi tost on appella selo la coustume les Astrologues pour sçauoir son horoscope, & ce qui deuoit arriuer à cet enfant Royal: ceux-cy responderent qu'il deuoit estre cause de grands maux au Royaume, si bien que plusieurs furent d'aduis de

le faire mourir: la tendre affection de la mere ne peut consentir à la mort de son enfant, ains le fit mettre dans vn petit berceau, puis enclorre en vn coffre de bois, dans lequel elle mit plusieurs pierreries de grande valeur, afin que si quelque pauvre homme le trouuoit, cela luy aidast à le nourrir & eleuer, & avec tout cela le fit mettre sur le fleuve de l'ehun, le courant duquel l'eut bien tost enleué fort loing de là: & comme il arriuoit au bord, il le rencontra là vn pauvre homme qui lauoit du linge, tant à luy qu'à autrui, les Orientaux appellent ces hommes-là Maynotes, cestui-cy voyant voguer sur l'eau ce coffret, espouuanté de la nouveauté de la chose, & ouurant le coffret pour voir ce qui estoit dedans, il y trouua vn petit enfant, de la beauté duquel estant tout esmeu, il le fut encore beaucoup d'auantage quand il vit les richesses qui estoient dedans, ce qui fit croire au laundier qu'il venoit de quelque Illustre maison: l'enleuant donc de là avec tout ce qu'il auoit quant & soy, il le porta à sa femme, laquelle le nourrit & eleua avec vn grand soin, & l'appella Darab, formant son nom de la cassette où il auoit esté enclos, & de l'eau sur laquelle il auoit esté expoté: car Dar en langue Persienne signifie quelque table ou bois, & Ab signifie eau: à quelques ans de là, Darab estant assez grand pour apprendre quelque chose, le laundier qui le vouloit dresser selon l'estat où il le trouuoit pour lors, luy voulut faire apprendre quelque mestier: mais l'inclination de Darab y estoit tout contraire, l'estat de sa fortune ne luy ayant peu faire perdre le ressentiment de son extraction, il tesmoigna assez à son pere putatif, qu'il s'occupoit à ces choses là avec grand regret, & qu'il estoit plus porté aux armes qu'à toute autre vacation: cela fut cause que le laundier cognoissant son humeur luy achepta des armes, & le mit en equipage le mieux qu'il peut, luy donnant vne petite prouision pour sa vie, & l'enuoya chercher quelque place aux compagnies. Alors la Royne Homay estoit en guerre contre la nation de Rumestan, contre laquelle elle vouloit enuoyer vne puissante armee: ce fut là où Darab s'enrolla, & fit son premier apprentissage, les Perles de ceste armee eurent iournee avec leurs ennemis, en laquelle il fit de si estranges faicts d'armes, qu'il remplit d'estonnement tous les compagnons, lesquels ne parloient plus que de ses faicts. Les affaires de Rumestan estant pacifiees, le Capitaine general vint rendre compte de ce qui s'estoit passé à Homay, & entr'autres d'vn ieune soldat tout de nouveau venu aux armees, lequel il ne se pouuoit lasser de louer, ce qui fut cause que la Royne voulut qu'il fut emmené deuant elle, où estant, elle s'enquit de luy comme il auoit nom, & de qui il estoit fils: il luy respondit que son nom estoit Darab, & que pour pere & mere, il ne cognoissoit qu'vn laundier & sa femme, raconta la cause de son nom, & comment il auoit esté trouué, ainsi qu'il l'auoit entendu d'eux: par ce discours la Royne vint à recognoistre que cestui-cy estoit son fils, & en estant asseuree luy remit entre les mains le Royaume, duquel elle auoit iouy trente deux ans: elle fonda la ville de Gerbatkon, & fit eleuer par la Perse iusqu'à mille Pyramides d'vne estrange Architecture, lesquelles Alexandre fit toutes abattre par apres.

DARAB KEBAR XIX. Roy de Perse.

Darab fils de Hormay paruenue ainsi à la Couronne de Perse, entra au Gouvernement avec le contentement & resiouissance de tous ceux du Royaume, pour la grande opinion qu'on auoit de luy, laquelle ne fut point vaine: car en bonté & en sagesse il deuança ses ancestres, mesme ceux qui auoient esté tenus pour bons Princes, si qu'il fut aimé, non seulement des siens, mais encore des Roys ses voisins, excepté de Phaylacus Roy de Yunon (c'est celuy que nous nommerons Philippe de Macedoine, & pere du grand Alexandre) lequel enorgueilluy, pour les victoires qu'il auoit obtenues en la Grece, refusa le tribut que ses predecesseurs souloient payer long temps auparauant aux Roys de Perse, ce qui fut cause qu'il print les armes contre Darab, lequel luy fit la guerre, premierement par ses Capitaines, & depuis en propre personne, en laquelle Phaylacus fut vaincu, & contraint de se retirer en vne forteresse, où Darab l'assiegea: La paix toutesfois fut conclud'entr'eux moyennant quarante mille pesant d'or, que Phaylacus & les siens payeroient chacun an à Darab, & à ses successeurs: & afin que ce traité fut plus inuiolable, Darab demanda à Phaylacus vne sienne fille tenue pour vne des plus belles Princesses de son temps, ce qui fut fait: mais elle fut fort peu avec Darab qui la repudia, à cause qu'elle auoit l'halaine mauuaise. Ce fut en ce temps que Karimath femme de Phaylacus deuint grosse (non de son mary, comme disent quelques vns) & accoucha en son temps d'vn fils nommé Ascandar, ou Alexandre. Darab apres ceste guerre s'en retourna en Perse, & mourut bien tost apres, laissant son Royaume à son fils Darab, apres auoir regné quatre ans.

DARAB SEGVK, ou KVCHER XX. Roy de Perse.

Darab surnommé le petit, second du nom, & fils du premier Darab, apres la mort de son pere paruint au Royaume, il auoit vne mauuaise inclination, sans courtoisie, desloyal, d'vn regard farouche: si que pour toutes ses mauuaises conditions, il fut autant hay des estrangers & des siens, que son pere en auoit esté aimé, & s'acquitt tellement la disgrâce de tes successeurs, qu'ils cōspirerent contre luy, & resolerent de se mettre entre les mains d'Ascandar, ou Alexandre
fils de

filz de Philippe, auquel tous les Vnasis ou Seigneurs escriuirent d'un commun consentement qu'il vint en diligence en Perse, avec le plus grand nombre d'hommes qu'il luy seroit possible, luy promettant toute assistance, & donnans conseil pour commencer la guerre avec quelque apparence de refuser le tribut de quarante mille pesans d'or auquel son pere l'auoit obligé.

Ascandar qui naturellement estoit belliqueux, voyant vne offre si conforme à ce qu'il desiroit le plus, ne perdit pas l'occasion, ains suiuit le conseil qu'on luy donnoit, & refusa le tribut. Darab qui vid son subiect vouloir secoüer le ioug, le luy enuoya demander par vn Ambassadeur, auquel Alexandre respondit que ceux qui payoient les tributs estoient morts. Darab luy enuoya apres vne seconde Ambassade, de par laquelle il enuoya vne petite cachuette, vne bouteille, vn sac plein de pierres, & vn buffet de deniers: Il y a plusieurs opinions entre les Historiens de Perse, de ce que vouloient signifier ces choses: mais la plus commune, c'est que par la premiere, il vouloit dire qu'il estoit encore vn ieune garçon sans iugement ny consideration: par la seconde, il signifioit le grand nombre de peuple qui estoit en ses Royaumes: & par la derniere, la grande abondance d'or & d'argent qu'il possedoit, le tout voulant dire que c'estoit vne grande temerité à luy si petit compagnon de s'adresser à vn si riche & puissant Monarque: (car c'est la coustume entre les Orientaux de se faire entendre plustost par figures & comparaisons, que par plus longs discours.)

Ascandar receut ceste Ambassade comme il estoit desia en campagne avec vne armee non grande en nombre, mais toute de gens dellite & de grande experience à la guerre, & faisant vne allusion de tout ce que luy enuoyoit Darab, il conuertit le tout à l'aduantage d'un heureux succez pour ses desseins, & poursuiuant son chemin entra dans l'Asie sans aucune notable resistance. Il fonda en Egypte en vn port fort commode pour ses affaires vne ville qu'il nomma de son nom Alexandrie. Ceste ville de qui la renommee s'est espandue par tout le monde: Il prit aussi Maceré qui est le grand Caire, laquelle a tousiours esté la premiere & la principale de toute l'Egypte, comme les Autheurs l'ont laissé par tradition, c'est celle que les Latins appellent Memphis, Mesrahen des Hebreux, & depuis les Arabes, Perses & Turcs par corruption de langage l'appellent Messeré, qui n'est distant que d'un mil de sa premiere situation, ce fut là qu'arriua la fortune du chaste Ioseph, là aussi où naquit le prophete Moÿse, & là où il fut exposé sur le Nil, lequel baigne les murs de la ville, & quant au nom de Caire, qui est celuy que nous luy donnons à present: Mircond en la quatriesme partie de son Histoire au rapport de Techire en la religion qu'il fait des Califes du Caire, apres plusieurs & diuers succez, il dit que Messeré ainsi s'appelloit elle alors vint au pouuoir d'un Roy nommé Mobeze, lequel enuoya de Damas vn sien esclaue grand Capitaine & conquerant nommé Iauar Kaden, pour gouverner ceste cité qui estoit lors sous sa puissance, pour la seurété de laquelle cestuy-cy fit bastir vne forteresse proche d'icelle qu'il nomma Kayrch en l'honneur d'une des femmes de son Seigneur qui estoit ainsi nommée, & à la suite du temps ce nouveau bastiment creut de telle sorte qu'on mit quasi en oubly le nom de Messeré, si qu'on ne la recognoist plus en l'Europe que par le nom de Kayrch ou Caire peu de lettre changée.

Alexandre passe de là en Armenie, où estant il receut vne lettre de Darab, par laquelle il l'exhortoit à ne se pas hazarder en bataille, tantost luy voulant persuader, comme s'il eust esté curieux de son bien, tantost vsant de menaces. Alexandre luy respondit que les Royaumes & les Empires n'estoient tenus d'autre que de Dieu, qui les donnoit & estoit ainsi qu'il luy plaisoit & comme il estoit seruy, ses Ambassadeurs expediez il continua son chemin en la prouince de Adarbaion, où il combatit vn Capitaine de Darab qui la gardoit & le vainquit; & de là entra en la prouince de Gueylon.

Ce Gueylon fut autresfois vn grand Royaume, maintenant reduit en prouince, & diuisee en cinq gouvernemens: les Perses l'appellent Gueylon ou Guylon, mais les naturels le nomment Endsafet, c'est à dire Inde Blanche pour estre forte guaye & plaisante à comparaison de la vraye Inde: elle tient les ports & l'entree de plusieurs Royaumes, & en laquelle il se fait vñ fort grand trafic, telle comme est Kefahport, en ceste cité principale des Tarrars, & le fleuve de Astrakam, peuple de Moscouie qui a plusieurs autres riuieres marchandes qui ont leur confluent en iceluy.

Mais pour retourner maintenant à Alexandre, laissant les terres de Gueylon, il s'en alla en la contree de Nacudunya, & s'adressant à la ville principale du lieu, il la fit brusler iusques aux fondemens: de là il entra en la Perse, où Darab luy vint à l'encontre avec vne armee innombrable, où il se donna vne grande & sanglante bataille, de laquelle Ascandar eut la victoire, & Darab s'enfuit du camp, laissant en iceluy la meilleure partie des siens sur la place, & tous ses thresors, ses femmes & ses filles captiues, & au pouuoir d'Alexandre. Plusieurs des soldats de Darab le suivirent en sa fuite, bon nombre desquels se noya au passage d'une riuere, à cause qu'estant glaciee, plusieurs estoient passez deuant pour sonder le gué, & l'ayans trouué à pro-

pos, Darab passa, puis apres tout le reste de ses gens, desquels plusieurs se noyerent.

Après que Darab fut en lieu de seureté, il enuoya des Ambassadeurs à Ascandar, luy promettant que s'il vouloit rendre ses femmes & ses filles, & s'en retourner en la Grece, qui le deschargeroit du tribut qu'il luy deuoit pour ses terres, & mesmes le tiendrait quitte des années qui luy estoient deuës: Et cependant que se traitté se negotioit, il enuoya d'autres Ambassadeurs aux Roys de Macharek, & de l'Inde ses vassaux & amis, lesquels sçachans l'estat de ses affaires le secoururent: de sorte qu'il mit sus vne armee plus puissante que la premiere.

Quant à Alexandre il se moqua des conditions de Darab, & luy presenta derechef le combat, duquel il demeura victorieux, contraignant Darab de se retirer en vne forteresse, où quelques-uns de ses subiects luy donnerent plusieurs coups de poignards & le laissant pour mort, se retirerent au camp d'Alexandre, lequel ayant eu aduis de leur trahison, alla en grand hasté où estoit pour lors Darab, & l'ayant trouue prest de rendre les derniers souspirs avec vn regret extreme de l'estat où il le voyoit, il respendit beaucoup de larmes, leuant les yeux au Ciel qu'il prenoit pour tesmoin de son innocence, en ceste action-là Darab luy respondit avec paroles de remerciement, qu'il le croyoit, le priant de prendre le chastiment, & le venger de ses traistres, d'espouser sa fille Ruchanch, & de ne permettre point que ses Royaumes vinsent en main estrangere, Alexandre luy promit d'accomplir le tout: puis ayant fait plusieurs plaintes fort lamentables sur la misere de la vie humaine, & l'inconstance des biens temporels, (que Mircond escrit fort amplement) il rendit l'esprit ayant regné quatorze ans.

MONARCHIE DES MACEDONIENS,

ASCANDAR OU ALEXANDRE XII. Roy de Perse.

ASCANDAR ou Sacandar, ainsi appellé des Perses, Arabes & Turcs, & par vn autre nom Zulkarnheh, qui est le mesme que nous disons Alexandre, paruint non seulement à l'Empire de Perse, mais encore à celuy de la Grece, Inde, Tartarie, & d'une bonne partie du monde.

Les Arabes parlant de la Perse, la diuisent en deux prouinces, qu'ils appellent toutes deux Hierakhen, l'une qui a pour cité metropolitaine Isphaon, & cette-cy s'appelle Hierakagemy, qui est le Hierak de la Perse; l'autre de Babylone où Bagadet, qui fait vne partie de l'Arabie, & contient l'Egypte & autres prouinces: cette-cy s'appelle Hierakaraby, mais quand ils disent Hierakhen, c'est à dire, des deux prouinces ensemble.

Tous les auteurs Persiens disent qu'Alexandre ne fut point fils de Faylakus ou Philippes, mais disent qu'un sien vassal nommé Kolus deuint amoureux de la Roynne sa femme, lequel creut que le moyen de iouyr d'elle avec plus de liberté, estoit de faire mourir le Roy Philippes, ce qu'il mit à execution quelque temps apres: ce que sçachant Alexandre accompagné d'un nommé Barackus son principal Capitaine: & allant trouuer le traistre Kolus le tua de sa main, ce qu'ayant fait il s'en alla trouuer Philippes quasi expirant: & apres plusieurs plaines, Philippes cognoissant sa mort print Alexandre, & le mit au milieu de tous les Grands qui estoient là presens, les requerant qu'ils le receussent pour Roy, & luy rendissent obeysance: apres cela il le mit entre les mains d'Aristote pour estre d'oresnauant son maistre, comme il fut avec vn fort grand soing: il luy enseigna aussi ce qu'il deuoit faire, pour bien & equitablement regir ses subiects, puis il mourut.

Alexandre donc ayant conquis la Perse, apres la mort de Darab, espousa sa fille Ruchank, lequel nom signifie lumiere, telle que peut faire vne chandelle allumee. Il mit aussi le Royaume de Perse entre les mains d'un parent de Darab, & diuisa toute ceste Monarchie en nonante gouuernemens qu'il donna à autant de ses Capitaines.

Il fit traduire de langue Persienne en la Grecque trois liures, l'un nommé Teb qui traitoit de la Medecine, l'autre Noiun de l'Astrologie & Mathematique, (Noiun est le mesme qu'estoilles en langue Persienne,) & l'autre de Philosophie. Il fonda sur le fleuve Ichun vne ville appelée Maruvoh ou Karacon, autrement Herat, & celle de Samarkand en Vsbek. Puis ayant donné ordre aux affaires de la Perse, il s'en alla conquerir l'Orient: & ayant passé plusieurs apres & dangereux chemins arriua en l'Inde. Mais tout cecy a esté fort particulièrement escrit par plusieurs Auteurs, qui empeschera d'en deduire l'Histoire plus particulièrement. Et apres toutes ses grandes conquestes, il vint en fin mourir en Babylone en l'age de trente six ans, en ayant regné dix-sept.

Il commanda durant sa vie sur vingt-deux grandes prouinces aux trois parties du monde, de treize desquelles les Roys l'accompagnerent tousiours.

Les Perses tiennent la vie de ce Prince pour merueilleuse, & ont escrit plusieurs liures de ses beaux faicts,

tant en prose qu'en rime, pleins d'excellentes conceptions & sentences; que Mircond deduit fort amplement.

ENTRE-REGNE DE PERSE.

APRES la mort d'Alexandre les affaires vindrent en trouble & en confusion touchant le gouvernement: si bien que la Perse eut un entre-regne qui dura soixante & douze ans, durans lesquels elle fut gouvernée par Vauxers & Sarrapes iusques à ce qu'en fin le Royaume retourna en la puissance des descendants des autres Roys precedens, qui continuerent de puis comme il s'ensuit.

Les Perses sont derechef commandez par ceux de leur país.

CHAPVR XXII. Roy de Perse.

Les soixante & douze ans de l'entre-regne estans passez depuis la mort d'Alexandre, les Perses firent vn Roy sur eux nommé Chapur parent de Darab, que Mircond appelle son frere, selon la commune maniere de parler des Perses & Arabes, qui appellent tous leurs parens, freres, coustume qui s'observe encore en l'Escripture sainte. Durant le temps de Chapur il ne se passa aucune chose notable de laquelle on aye escrit ny fait aucune mention, bien qu'il aye regné comme on dit 60. ans.

ARDECHIR-BABAKON XXIII. Roy de Perse.

Au Roy de Chapur succeda Ardechir-Babakon, qui est en langue Persienne le mesme qu'Abumalek, c'est à dire, pere & seigneur, ou pere Roy: cestuy-cy fut fort bon Prince, & gouverna son pays au grand contentement d'un chacun, selon la computation des Perses. Ce Roy re-
gnoit lors que nostre Seigneur Iesus estoit sur terre: à quoy on pourroit faire quelques objections qui seroient trop longues pour ce petit sommaire: on ne trouue point que durant le temps d'Ardechir il se soit fait aucune guerre, ce Roy passant tousiours en paix les cinquante ans qu'il regna.

CHAPVR, ZABEL-KETAF XXIV. Roy de Perse.

Ardechir laissa pour successeurs au Royaume de Perse deux enfans, à sçauoir Chapur, & vn autre plus ieune que luy: & d'autant qu'ils estoient en trop bas aage furent mis en la garde & tutelle d'un de leurs oncles nommé Ardechir fils d'Hormos, lequel plusieurs des principaux du Royaume voulurent recognoistre pour Roy, & plusieurs des Historiens Persiens le mettent en ce nombre & en ce rang, toutesfois Mircond dict qu'il le refusa, & qu'il gouverna le pays avec vne fort grande prudence au milieu de plusieurs menees & cōspirations, puis ayant gouverné quelques annees, lors qu'il le iugea à propos, il fit venir Chapur, Zabel-Ketaf, lequel gouverna le temps qu'il vescu avec vne grande satisfaction de tous pour estre doué de prudence & vertu, laquelle comme elle ne manque iamais d'enuieux comme Chapur dormoit vne nuit en campagne, où il auoit fait tendre ses pavillons, on ne sçautoit dire qui entra dans sa tente & qu'il l'estrangla: mais tant y a que ceux cy estans sortis dehors ils couperent les cordes qui la soustenoient, & la laisserent ainsi tomber, de fortune ceste nuit estoit fort pluvieuse & venteuse, que ceux cy auoient ainsi choisie, afin qu'on peut dire qu'un tourbillon de vent l'auoit emportee, & fait mourir le Roy, lequel mourut en ceste sorte, sans qu'on ayt peu descou-
urir la conspiration: toute la Perse pleura la mort de ce Prince à cause de sa bonté: il regna soixante ans.

BAHARON KERMONCHA XXV. Roy de Perse.

Il a esté parlé cy deuant d'un ieune frere qu'auoit Chapur, Zabel-Ketaf, cestuy-cy s'appelloit Baharon, lequel son frere auoit fait gouverneur de Kermon, d'où luy vint le surnom de Kermoncha, comme si on disoit Roy de Chermon, qui est vne grande prouince & des principales en la Perse: en elle est la contree de Karashon celebre en l'Orient pour les choses qui se tirent d'elle.

Or parlant de Chiraz il a esté remarqué qu'il se tiroit de là vne grande quantité d'eau rose, comme on fait encore à Yazd, laquelle ils font par infusion & decoction: le mesme se fait en Kermon & Dusgon, l'eau rose s'appelle de deux noms en langage Persien, les vns disent *Gulap*, & les autres *Arckas-Gul*, qui veut dire sueur de rose, noms tres propre pour monstrier qu'elle se fait par distillation, desquelles il se tire fort grande quantité de Kermon tous les ans, qui se transporte apres par tout l'Orient.

En trois parties de la Perse il se fait des tapis qu'on appelle du nom du pays Persiens, & en Perse on les appelle *Kalichey*, les plus riches desquels, & qui sont les plus estimez, se font en la contree de Yazd de telle excellence, qu'il y en a tel qui vaut plus de mille ducats: les seconds en bonté sont ceux du Royaume de Kermon, les troisiemes ceux de Karason. En Kermon se trouue aussi la Tutie qui se trouue seulement en ce lieu, laquelle en propre langue Persienne s'appelle *Tutyah*, en vn canton de ceste Prouince distant de la ville de douze farsanghes, qui

font trente six milles, & de là se transporte en grande quantité par tout le monde, laquelle ils font en ceste maniere. Ils prennent de la terre de ceste contree & l'amassent avec de l'eau pure, puis prenans de certains gazons de terre glaife, ils la mettent cuire apres dans des fours comme des pots, & apres estre bien cuite, la polissent & esclaireissent iutques à ce qu'elle vienne en la forme de Tutie, puis ils la mettent dans les quesses, & l'enuoyent vendre à Ormus. C'est en quoy le Docteur Garcia a esté mal informé, lequel en ses Dialogues qu'il a fait des simples de l'Inde, dit que la Tutie se fait des cendres d'un certain arbre nommé Guné. Il est bien vray qu'en la Perse il se trouue vn fruit qu'ils appellent Gaon, de la forme & grandeur d'un noyau de cerise, couuert d'une petite peau verte & iaune, de laquelle les Naturalistes vsent en plusieurs choses semblables à ce que nous faisons du pignon: car cecy fait bien vn contraire effect à la Tutie qui se fait en Kermou, auquel lieu on trouue encore vne chose non moins profitable que la precedente, à sçauoir de Lauronne ou Garderobbe, propre contre les vers qu'ils appellent en la langue Persienne Dramch Kermouy, & ce nom que nous disons de Kermeze, est esquivoque de celui de Kermou: car Kermeze est vn singulier, Kermou vn pluriel, & de ce Kermeze, c'est à dire, de la graine, se font des vers d'un mesme nom. C'est de Kermeze que les Medecins font leur confectiion, qu'ils appellent encores de ce nom.

Mais pour reuenir à Baharon, il estoit d'une fort saine composition, d'un grand iugement & d'une grande prudence, qui le fit regner avec vn contentement vniuersel de tous ses subiects, lesquels il gouuerna l'espace de douze ans, au bout desquels vne grande sedition s'esmeut en sa Cour, de telle importance, que Baharon fut contraint d'aller en personne l'appaiser. Et comme toutes choses estoient desia pacifiees, vn sien subiect qui ne desiroit que cette occasion pour luy faire desplaisir, du milieu de la presse il tira vne fleche si seurement, qu'il le perça de part en part, & demeura mort sur la place, avec vn regret extremé de tous les subiects de ses Royaumes, qui viuoient en repos sous sa domination.

YARZD GERD XXVI. *Roy de Perse.*

Les Perses ayans assez regretté la mort de Baharon, eleurent en sa place Yarz. Gerd son fils. Cestuy-cy auparauant que de prendre le gouuernement estoit fort aymé & respecté de tous, prenans plaisir à se rendre affable, & courtois enuers vn chacun. Mais si tost qu'il se vid Roy, il changea ses bonnes habitudes en arrogance, cruauté, & auarice, se monstrant d'autant plus implacable, qu'il estoit prié de quelqu'un avec larmes & humilité de luy faire misericorde. Il souloit dire aussi qu'on ne deuoit point esperer de compassion en trois choses, au feu, en la mer, & en vn Roy irrité. Il estoit marié, mais il viuoit en vn fort grand diuorce avec sa femme, d'autant qu'ayant eu plusieurs enfans elle n'en auoit sçu eleuer pas vn: mais parmy ses mescontentemens elle deuint grosse, & enfanta vn fils qu'on appella Baharon, lequel ayant veu viure plus que les autres qui n'auoient pas duré chacun plus d'un mois, par le Conseil des Medecins il l'enuoya hors de sa Cour en vne certaine contree de l'Arabie, & le mit entre les mains d'un Roy sien vassal nommé Neamanben-Amarahulkeis personne de fort grande confiance, lequel elleua le petit en ce bon air, luy faisant apprendre la doctrine conuenable à la religion de laquelle il faisoit profession: & estant arriué à l'age de discretion, Neaman mourut, laissant en sa place vn fils nommé Manzar, de telle valeur & fidelité que son pere, lequel auoit regné quinze ans. Or cependant que les choses se passoient ainsi, Yarz. Gerd gouuernoit son Royaume avec la disgrâce & vniuersel mescontentement de tous, pour ses tyrannies & cruauttez, esquelles il perseuera iusqu'à la fin qui fut telle que sa vie: car vn iour qu'il regardoit vn cheual de grand prix, & qu'il luy plaisoit fort, la beste sans aucune apparente occasion luy tira deux grands coups de pied, desquels il mourut sur le champ sans proferer aucune parole, ayant regné vingt deux ans & cinq mois. Sa mort bien qu'elle ne fut point regrettée, causa neantmoins de grandes dissensions entre les grands, les vns en voulant eslire vn à leur fantaisie, & les autres desirans que la coustume du Royaume fut entretenue, mais ils craignoient que Baharon imitast son pere en les mauvaises mœurs, disans que l'on deuoit donner le Royaume à quelqu'un qui le meritaist par sa vertu. Si bien que ceux de ce party-là estans les plus forts, preualurent contre ceux qui vouloient eslire le fils du deffunct Roy, & donnerent le Royaume à vn nommé Kezeré-Khozrrao son parent fort proche, qui outre les bonnes parties qu'il auoit en luy, s'estoit encores acquis ce Royaume à force de belles promesses.

Baharon qui estoit en Arabie, ayant eu aduis de la mort de son pere, & pareillement des nouveutez qui se passoient aux pays, il communiqua à Manzar fils de Neaman, le priant de luy ayder, & le favoriser à recouurer vn Royaume qui de droit luy appartenoit, & lequel Kezeré-Khozrrao luy vsurpoit iniustement. Manzar inclina fauorablement à sa priere, & luy donna dix mille hommes de cheual, avec lesquels il se mit en chemin, les suiuant de loing avec autres trente mille hommes, qui tous ensemble faisoient le nombre de quarante mille, laquelle armee donna assez de quoy penser aux Perses: si que beaucoup des principaux s'allerent joindre à luy:

dre à luy : toutesfois Kezeré-Khoztrao luy fut au deuant avec vne puissante armee. Plusieurs cependant auoient grand regret de ceste guerre ciuile, si bien que deuant que de venir aux mains, ils tascherent de composer leurs differents traictans cela, de sorte que Baharon fut receu, & obey pour Roy. Et le premier qui le recogneut, & luy obeyt, fut le mesme Kezeré-Khoztrao, lequel plusieurs des Historiens Perfes mettent au nombre de leurs Roys.

BAHARON GUR XXVI. Roy de Perse.

Baharon estant mis ainsi en possession du Royaume, la premiere chose qu'il fit à l'instance de Manzar, fut de pardonner à tous en general, ce qui s'estoit passé durant les dissensions ciuiles, & ce que l'on auoit entrepris contre luy. Apres cela, il se mit à reformer la iustice, & la police, embellissant son Royaume d'edifices publics, reparant les anciens qui estoient allez en decadence durant les guerres & en bastissant de nouveaux. Et quant à Manzar qui l'auoit esleué, & qui auoit esté cause qu'il auoit recouuert son Royaume, il luy enuoya plusieurs beaux & riches presents, avecques de grands & affectionnez remerciements, faisant demeurer en sa Cour vn sien fils iusques à ce qu'il fut grand.

Ce Prince se comporta avec les siens, avec telle sagesse & prudence, & son humaine conuersation accompagnée de liberalité le rendit si chery, & estimé de tous, qu'ils benissoient le ciel de leur auoir fait la grace d'estre venus au monde sous vn si bon Prince, & en vn temps si comblé de felicité : car il auoit donné vn tel ordre à toutes choses, & auoit tellement pourueu ses frontieres des fortes garnisons, & Gouverneurs sages & aduisez, qu'il iouyt longuement d'vne bien-heureuse paix, durant laquelle les Perfes ne pensoient qu'à le donner toutes sortes de plaisirs auxquels ils prirent vne telle habitude, principalement le vulgaire, que chacún croyoit que les armes leur deuoient estre d'ores-en-uant inutiles, pour la continuation de ce profond repos.

Quant au milieu de ce calme, & lors qu'ils pensoient iouyr en plus grande assurance de leur tranquillité, il leur vint nouuelles que *Akhon Chini*, Roy des Tartares, voyant l'oyliuété en laquelle les Perfes auoient desia pris de l'habitude, s'assurant qu'il les surprendroit au milieu de leurs esbatemens, il leua vne armee de deux cents cinquante milles hommes, & entra dans les provinces de la Perse qui luy estoient voisines, où il fit de grands rauages. Cela donna vne estrange espouuante à tous les Barons & principaux Seigneurs du pays, ne se voyans aucunes forces prestes pour s'opposer à la violence d'vn si puissant aduersaire : & s'en vindrent tous trouuer Baharon leur Roy, luy representant la presente necessité, lequel leur respondit fort froidement comme s'il n'eut pas fait grand compte de ce qu'ils luy disoient. Et sur cela il commanda qu'on apprestast tout l'equipage necessaire pour la chasse. Il auoit d'ordinaire en sa Cour sept Roys ses vassaux, auxquels il fit sçauoir qu'il vouloit qu'ils l'accompagnassent à la chasse. Ceux-cy se tindrent prests avec vne suite mediocre, & luy mesme ne print que trois cents hommes de ses gardes : mais les meilleurs qu'il eut. Et ainsi tous ensemble sortirent en la campagne avec faucons, leuriers, & toute sorte d'instrumens de chasse pour faire quelque bonne prise.

Les Roys & principaux Seigneurs entre les Perfes, sont de tout temps forts addonnez à la chasse, pour lequel exercice ils font tous de fort grandes despences, tenans cela pour vne marque de grandeur. Ce fut à cause d'iceluy que Baharon fut surnommé Gur : car ce mot est equivoque, & veut dire en cet endroit Ainc sauage. Ses subiects l'ayans ainsi surnommé, à cause que ce Prince estoit fort addonné à la chasse de cet animal. Il signifie aussi la fosse où l'on doit enterrer vn corps mort. De sorte qu'apres la mort de Baharon, les Poëtes qui chanterent ses louanges apres sa mort, dirent qu'il ayroit fort ceste sorte de chasse. Et quant à ce que Gur signifie fosse, cela conuient fort bien à la maniere que l'on chasse ordinairement en Perse. Ils dressent aussi leurs faucons & autres oyseaux de proye : de sorte qu'ils se rendent maistres de ce grâd & furieux animal. Car l'oyseau venant fondre entre les cornes de la beste, il luy piquotte tellement les yeux, & luy donnét tant d'inquietudes, qu'ils le forcét de s'arrester, & cependant les chasseurs arriuent, qui le tuënt. Ils chassent aussi outre les leuriers, & autres chiens qu'ils ont, tres-bons, & tres-vistes en tout l'Orient avec des Onces, & Leopards domestiques, lesquels ils font traîner quant & eux dans des charettes, & les particuliers les portent sur la croupe de leurs chenuaux qu'ils arment de lames de fer, de crainte que les ongles de ces bestes ne les déchirent. La sorte de chasse qu'ils estiment le plus entre eux, c'est celle d'vn animal qu'ils appellent Gazal, qui a le cortage à peu pres comme en nos contrees le cheureul, ayant les cornes aigues, droites & retortillees, les yeux grands, & qui est d'vne extreme vitesse. Ils ont aussi vne sorte de belliers sauages.

En l'Inde ils font bien souvent leurs chasses de bestes sauages contre d'autres, car ils en ont en leurs maisons vne quantité de domestiques qu'ils ont dressées à ceste exercice, lesquels ils mettent en lessé comme des leuriers, & les meinent en pays de chasse, où il les lâchent con-

tre d'autres de pareille espece dont le pays est fort peuplé. Mais voicy la ruse, c'est que les domestiques allans requester dans les prez, & rencontrans de la venaison, elles touchent de leurs cornes à celles des autres en signe d'amitié: mais à ceste corne il y a vne corde accommodée, de sorte que lors que celles-cy se retirent, les autres demeurent prises dans ces lacs. Mais en la prouince de Zeilan ils ont vne estrange inuention pour prendre l'Elephant, voicy ce qu'ils font: ils enuoyent aux forests vne femme qu'ils appellent entre eux Aleah, avec vn Cornaca, qui est vn Indien qui sçait parler, & gouverner l'Elephant, lequel il attache industrieusement au ventre de la Aleah, puis se mettant entre eux, il luy dit en sa langue les caresses & mignardises qu'elle luy doit faire pour le provoquer, & quand l'Indien sent qu'il est assez esmeu, alors il dit à la femme qu'elle s'en retourne: & alors l'Elephant la suit en la caressant, iusques à entrer avec elle, & de là en auant il s'appriuoise du tout.

Quant à la chasse des Tygres, desquels il y a fort grand nombre par tout l'Orient, ceux de l'Isle de Zeylan les chassent en ceste maniere: Vn homme s'arme le bras gauche iusques au coude avec vn gantelet de lames bien fortes & acérées, & tient en la main droite vn poignard fort poinctu, puis faisant vn sault se lance contre l'animal auquel il donne plusieurs coups dans le ventre, & le tue. En quoy il y a des hommes si adroits, qu'ils en viennent heureusement à bout: mais il y en a d'autres aussi à qui il en a cousté la vie: car tous les Tygres de l'Orient sont fort grands, & fort cruels. Les Nayres de ceste terre qui sont les Payens de Malauar en l'Inde, tiennent à grand honneur de tuer des Tygres. Teixieres qui a fait ceste recherche, & voyagé par tout l'Orient, tient que cet animal au respect des autres est fort tardif, bien qu'il le tienne extrêmement cruel: mais il dit que l'experience apprend tous les iours que quelque animal que ce soit qu'il a le sentiment de luy, se sauue tousiours à la fuite, sans que l'autre le puisse atteindre. De sorte que sa chasse est ordinairement contre les hommes, à cause qu'ils peuuent moins courir que les autres animaux, & se sauuer quand ils sont pouruiuis: qui est la vraye raison pourquoy ils s'adressent plustost à eux, & non pour desirer leur sang, ny à cause que leur chair est plus delicate, dit Teixieres, encore que cecy les y pourroit bien rendre plus aspres, apres qu'ils en ont desia deuoré.

Mais à propos de Tygre, le mesme Autheur raconte qu'en Malaca sur le fleuve de Paranaque, en l'an 1600. vn Tygre combattit vn Crocodile, & que le mesme estoit aduenue sur le fleuve de Cuama.

Et afin de ne rien laisser passer des choses dignes de remarque, qui ont esté curieusement recherchées par cet Autheur, ioint que cela est en quelque façon des dependances de la chasse. Il dit qu'au Royaume de Campa, qui est entre Comboya, & Cochinchina sur la mer de Sur de l'Inde, par toute la coste de Mardel, il vient de certains passereaux ressemblans à peu pres aux arondelles, qui en certain temps de l'an entrent en chaleur, & cependant que cela leur dure, il sort de leur bec vne certaine baue & humeur gloante, avec laquelle (enseigné qu'ils font par la prouidence de nature) ils vont par les rochers, & precipices faisant leurs nids avec vn merueilleux artifice, en faisant vn sur vn autre, tant qu'ils soient arriuez en lieu fort sec, faisant vn nid en forme d'une cueiller, avec les bords vn peu plus esleuez: sortans de chaleur; & acheuans leur nid presque en vn mesme temps, dans lequel ils mettent leurs œufs, & y vont esclorre leurs petits. Ces nids fabriquez en ceste sorte, on les assemble en vn, desquels on fait plusieurs quintaux que l'on enleue de là pour vendre & trafiquer, desquels les Chinois achèptent chaque quintal cinquante Tahes, qui sont environ cinq cents ducats, lesquels ils mangent, d'autant qu'ils disent qu'ils sont fort profitables pour le cerveau & l'estomach: quelques Portugais qui en ont mangé, qui disent s'en estre bien trouuez. Mais ceste digression a esté iusqu'icy assez longue pour ces petits sommaires, laquelle toutesfois j'ay iugé ne deuoir point passer sous silence, comme choses assez curieuses pour contenter le Lecteur.

Pour retourner maintenant à Baharon, s'estant accompagné, comme nous auons dit, il se mit à chasser par les chemins, en tenant vn tout contraire à Karason où estoit son ennemy, ayant laissé pour gouverneur en sa place vn sien parent appelé Narfy, que quelques-vns d'entre les Perses mettent au rang des Roys, lequel avec les grands du Royaume s'estant persuadé que Baharon s'en estoit enfuy: ils enuoyerent des Ambassadeurs à Hhak hon Chiny pour traiter de paix avec luy, pour se liberer en quelque maniere des dangers où ils se retrouuoient pour lors. Hhak hon ne refusa point l'offre, laquelle il accepta, & asséura qu'il fut de la fuite de Baharon, il relascha sa premiere impetuosité, & se tint moins sur ses gardes, son armee fit aussi le semblable. Cependant Baharon s'elloignant de la cité, print le chemin le plus approchant d'Aderbajon, & de l'Armenie, ayant seulement avec luy ses gardes, & deux mille hommes de cheual qu'il auoit remarqués pour gens de valeur: & avec ce peu de force, il s'en alla par chemins deltournez, & le plus secretement qu'il luy fut possible, s'enquerant tousiours de son ennemy: puis comme il sçeut qu'il estoit fort proche de luy, il enuoya par trois diuers endroits

trois espions,

trois espions pour remarquer particulièrement l'assiette de leur camp, & leur nombre. Et ceux-cy estans retournez : & l'ayant assuré de tout, mesmes que ceux-cy vivoient en toute assurance sans se tenir sur leurs gardes. Desirant ne point perdre de temps, il diuisa sa petite troupe qui n'estoit que de quatre mille hommes (mais tous gens de main) en quatre compagnies, & prenant l'occasion d'une nuit fort obscure, au son de leurs trompettes & Atabales, ils allerent charger par quatre endroits leurs ennemis, avec une telle furie, qu'eux estans tous diuisez sans se pouoir rassembler, en un si grand embarrasement, & parmy l'obscurité, se debbanderent, & se mirent bien tost en fuite. Quant à Baharon il s'en alla au pavillon de Hhakhon qui comméçoit de s'armer : mais sans luy donner d'auantage de temps, il entra en iceluy, & luy trancha la teste, puis suivant la trace de ceux qui fuyoient, il les courut iusques au fleuve de lehun, en faisant mourir grand nombre d'iceux. Quelques uns escriuent cecy diuèremment, mais on tient ce que nous en venons de dire pour le plus véritable. Voila comment se termina la guerre contre Hhakhon Chiny Roy des Tartares, & comme se pacifierent les affaires de ces quartiers-là. Baharon s'en retournant en Perse plein d'honneur & de richesses, avec grande admiration de tous ses subiects, qui le receurent avec un grand & vniuersel contentement de tous. Baharon eut par apres desir de voir le pays de l'Inde : ce qu'il fit accompagné de peu de ses subiects, laissant le nouveau gouvernement à Narfy (lequel est encores compté par quelques uns pour Roy de Perse) allant ainsi par pays, il se disoit estre un Vafir du Roy de Perse, lequel pour quelque mescontentement s'en estoit retiré. Estant là il se mit au service du plus grand Roy de ces quartiers-là, pour lequel il fit plusieurs belles & grandes choses, & par ce moyen ce Roy obtint de grandes victoires contre ses ennemis, de sorte que se tenant fort son obligé, pour recognoître les grands services, il luy donna une fille unique qu'il auoit pour femme. Baharon estant marié, & voyant qu'il n'auoit plus que craindre, se declara à son beau-pere, auquel ceste nouvelle ne fut guere agreable. Craignant à ceste occasion qu'il arriuaist quelque nouveauté en son pays : car Baharon ayant delia acquis une grande reputation pour sa valeur, il craignoit qu'estant recogneu, ses subiects le cherussent encores d'auantage. Mais son dessein estoit tout autre, & pour l'en assurer d'auantage, il prit sa femme, & luy offrit quelques terres de la Perse confines aux siennes, puis s'en retourna en son Royaume, & s'estant reposé quelques iours, il enuoya un sien Capitaine avec une belle armee courir les terres du Rumestan, c'est à dire, des terres de l'Empire Romain, desquelles plusieurs se rendirent sans aucune resistance. Le mesme Baharon avec une autre armee passa en Arabie, & courut sur les terres subiectes au Royaume de Hamon, & y a difference entre Hyaman & Hamon, qui sont Royaumes en Arabie, voisines du Royaume de Sabath, d'où estoit Dame ceste Royne qui fut trouuer Salomon en Ierusalem, qui sont terres voisines, & le chemin court & fréquenté : car elle n'estoit point du Royaume des Abyssins ou de l'Ethiopie comme quelques-uns ont estimé, qui sont terres fort elloignées. Baharon ayant obtenu en sa conquête plusieurs grandes victoires, une nuit qu'il suiuoit la trace des ennemis qu'il auoit vaincus, il donna sans y penser dans un certain estang ou paluz, où il fut suffoqué & disparut. Ce qui fut ignoré de ses subiects, d'autant que c'estoit de nuit : mais le matin en estans aduertis, ils l'allerent chercher en grande diligence, mais il n'estoit plus temps. Telle fut la fin de Baharon-Gur, apres auoir regné vingt trois ans, laissant pour successeur un fils nommé Yazd-Gerd.

YAZD - GERD XXVII. Roy de Perse.

Après la mort de Baharon-Gur, Yazd-Gerd estant paruenue à la Couronne, lequel fit Narfy son parent Gouverneur du Royaume, comme son pere auoit fait : si qu'il fut Gouverneur pour la troisieme fois du Royaume, & est encores compté entre les Roys de Perse. Cest Yazd-Gerd aymoit fort la iustice, en laquelle il fut si entier, que pour aucun respect il ne laissoit point de l'exécuter. A cause dequoy il fut fort aymé de ses subiects tant qu'il vécut. Au quatorzieme de son regne, il leua une armee contre le Roy de Rumestan : mais il ne se battirent point pour l'accord qui interuint entre eux incontinent apres, avec certaines conditions.

Yard-Gerd eut deux fils l'aîné appelé Pheruz, & le plus ieune Homoz, lequel le pere aymoit d'auantage que l'autre, & desiroit de luy laisser le Royaume apres sa mort. Cela fut cause qu'il enuoya Pheruz gouverner la Prouince de Nimrus, afin que par son absence la succession ne fust point disputée avec l'autre, & le peuple s'affectionnast à luy, puis ayant regné dix-huit ans, il mourut laissant Hormoz pour Roy. On le surnomma Yard-Gerd Sepapndux, c'est à dire, amy des soldats.

HORMOZ XXVIII. Roy de Perse.

Hormoz fut receu pour Roy apres la mort de son pere, avec unanime consentement de tout le peuple. Dequoy il se repenut bien tost apres : car Hormoz estant naturellement mes-

chant, il avoit dissimulé son mauvais naturel, iusqu'à ce qu'il fut parvenu à la Royauté : de sorte que l'amour premier de ses subiects se convertit en haine. Ce que sçachant Pheruz son frere aîné, duquel le pere avoit iniustement osté le Royaume, ne mesprisa pas l'occasion, mais se servit d'icelle, & de la faueur de ses amis, entre autres du Roy de Abtelah, auquel Pheruz s'obligea, à quitter les terres de Termerd, qui sont à l'entrée de celles de Karason, entre les siennes, & Nimrus, à condition qu'il l'assisteroit de trente mille hommes de cheval : ce que l'autre fist. Si bien que Pheruz avec d'autres troupes qu'il amassa d'ailleurs, entra en la Perse, de l'arriuee duquel Hormoz estant aduerty, luy vint à l'encontre, & luy presenta le combat : mais son armee fut deffaicte, luy mis en route, & pris prisonnier. Et quelques iours apres Pheruz le fit mourir, comme il sera dict cy apres, n'ayant esté Roy qu'un an. Il fut surnommé Farzande, c'est à dire, fils.

PHERUZ XXIX. Roy de Perse.

Pheruz s'estant ainsi emparé du Royaume, comme il s'estudioit à pourvoir à ce qui estoit necessaire pour un bon gouvernement, il eust quelque ombrage que son frere Hormoz, lequel vivoit encores, fist quelques menées avec ses subiects, principalement avec trois de ses familiers, & s'en estant aucunement esclairey, il leur fist à tous trancher la teste. Le commencement du regne de ce Prince a esté fort remarquable, à cause d'une tres-grande seicheresse qui fut par toute la Perse sept années consecutives, si estrange, que tous les fontaines seicherent, & le mesme s'assure encores des fameux fleuves de Ichun, & de Degilah, qui est Tigris : de sorte que grande quantité de peuple, & de bestial moururent de faim & de melaise : les châps estoient couverts d'oyseaux qui tomboient de l'air faute d'eau, & la terre estoit entierement sterile, sans rapporter aucune chose. Pheruz eust un grand ressentiment de ceste uniuerselle calamité, & fist ce qui luy fut possible pour y remedier. Mais le mal estoit si grand, que son travail, ny sa liberalité ne furent pas bastans pour y remedier. Et voyant que toute sa pieuoyance luy estoit inutile, il assemblea une grande multitude de peuple de tout sexe & aage, avec lequel il sortit aux champs faisant penitence, & implorant la misericorde diuine, En quoy ils persevererent plusieurs iours, iusques à ce qu'il pleut : de sorte que la terre commença à fructifier, & les animaux à profiter & multiplier.

Après cela quelques peuples se vindrent plaindre à Pheruz que le Roy de Abtelah couroit, & rauageoit leurs terres. Ce Roy estoit celuy auquel Pheruz auoit rendu les terres de Mermerd pour le secours de trente mille hommes, desquels il l'auoit secouru pour le recouremēt de la Perse. De ce Roy d'Abtelah les Historiens Athio & Tournamire escriuent qu'il s'appelloit Euthalitas, & que c'est celuy dans les fosses duquel mourut Pheruz, qu'ils nomment Peruzas : ce qui ne doit point sembler estrange pour la proximité qu'il y a en l'escriture Arabesque & Persienne, entre les lettres P. & F. & mesmes en la prononciation : & quant à ce mot Euthalitas, c'est le mesme que les Perses appellent Abtelah, l'un & l'autre signifiant *Ecaudor*, une nation qui est septentrionale : en la Perse Pheruz ayant donc eu aduis de ces rages, se prepara pour luy faire la guerre : ce que sçeut aussi tost Gox Nauuaz (ainsi s'appelloit ce Roy d'Abtelah) c'est à dire, bon ioüeur d'instruments, qui fut fort estonné, & confus : car il n'estoit pas ignorant de la puissance du Roy de Perse, ny du grand courage de Pheruz. Mais un sien Vvasir recognoissant en quelle perplexité son prince estoit reduit pour lors, il s'offrit à le tirer de ceste peine, pourueu qu'il se souuint apres sa mort du seruice qu'il luy rendoit, & favorisast sa femme, & ses enfans. Ce que luy ayant esté promis avecques toutes les assurances que peut donner la parole d'un prince reduit en ceste extremité. Le Vvasir se separa de luy, & s'estant fait couper les mains, les pieds, & le nez, ainsi mutilé, il se fist porter en une certaine retraicte par où il sçauoir qu'il falloit de necessité que Pheruz & son armee vinssent passer. Aussi fust-il trouué des avant-coureurs de ceste armee, lesquels l'enleuerent de là, & le porterent au camp de Pheruz, lequel espouuanté de ceste cruauté, luy demanda qu'il estoit, & qui l'auoit ainsi mal traité. Et l'autre luy respondit avec paroles dignes de compassion, qu'il estoit le Vvasir de Gox Nauuaz Roy de Abtelah, lequel faisant ses apprests en intention de faire la guerre au Roy de Perse, & voulant selon le deuoir de sa charge en quel danger il se precipitoit, le destourner par ses raisons de son entreprise qui luy sembloit trop difficile pour en venir heureusement à chef : qu'il auoit pris la sincere affection & fidelité de si mauuaise part, qu'au lieu de recognoistre qu'il luy disoit la verité, qu'il l'auoit fait tronçonner comme il pouuoit voir, & l'auoit fait apres jeter dans ces bois, afin que n'ayants ny pieds, ny mains, il fust hors son pouuoir de se defendre contre les bestes farouches qui l'acheueroient de mettre en pieces. Pheruz ayant en horreur la cruauté de ce Prince, tenant ce que cestuy-cy luy racontoit pour tout veritable, le consola en luy donnant esperance que dans peu de temps il le vengeroit d'une si meschante acte, & de toutes les autres meschancetez que ce Prince auoit commises. Et comme apres les remerciemens & louanges que l'autre luy eult rendues, Pheruz

voulut

voulut poursuiure son chemin, le Vvasir feignant d'estre poussé d'un grand desir de vengeance, il luy dit que s'il le vouloit suiure, qu'il le conduiroit par un chemin bien plus court sans pouuoir estre descouvert de l'ennemy. Pheruz comanda aussi tost qu'on le mir à la teste de l'armée, & qu'on le suiuit. Et cestuy-cy les sceut conduire si dextrement, qu'en fin la meilleure partie d'entre eux perit de soif, sans qu'ils s'en peussent iamais garantir, & le reste avec Pheruz qui eschaperent de ce mauuais pas, qui estoit fort peu de reste, ils vindrent au pouuoir de Gox Nauuaz, lequel vsant enuers tous d'une grande clemence, les mit en liberté avec de certaines conditions, l'une desquelles fut que Pheruz s'obligeoit à ne luy faire iamais la guerre par soy, ny par autres, ce que l'autre luy accorda pour demeurer libre.

Mais il ne fut pas plustost retourné en Perse, qu'il fit une grande leuee de gens de toutes parts, pour retourner contre Gox Nauuaz, encore que tous ses subiets l'en destournassent autant qu'il leur estoit possible: mais leurs prieres. & leurs raisons furent inutiles: si bien qu'il enuoya querir un sien parent, qui estoit Gouverneur de Sistom, appelé Sufarah, & que quelques uns mettent au rang des Roys de Perse par deux fois: l'une en ce lieu cy, & l'autre auparauant: & luy donna le gouuernement de son Royaume, & de deux fils qu'il auoit, l'un appelé Belax, & l'autre Kobad, avec ordre de ce qu'il deuoit faire pour le gouuernement: iceluy emmenant avec soy une sienne fille d'une fort rare & excellente beauté, arriué qu'il fut vers Abrelah, Gox Nauuaz luy vint au deuant pour luy empescher de passer outre, l'enuoyant neantmoins requerr de garder ce qui auoit esté accordé entre eux: à quoy Pheruz fit la sourde oreille. Or Gox Nauuaz auoit fait faire par les chemins plusieurs grandes fosses pleines d'eau, couuertes avec tel artifice, que personne n'eust iamais iugé qu'il y en eut eu, & voyant que Pheruz s'oppinia-stroit à la guerre, il feignit de s'enfuir, ce qui donna plus de hardiesse aux soldats de Pheruz de le pouruiure, lesquels comme asseurez de tout danger, sans faire visiter les lieux par ou ils deuoient passer, s'allerent precipiter dans ses fosses où ils se noyerent tous avec Pheruz, ayant regné vingt six ans.

Sufarah qui estoit demeuré en la Perse pour Gouverneur étant asseuré de ceste perte, assembla à grande haste une puissante armee, & se mit en chemin avec icelle, prenant la volte de Abrelah, contraignant le Roy de demander la paix, à condition encore de rendre les captifs, les despouilles & la fille de Pheruz, laquelle Gox Nauuaz rendit avec grand regret, d'autant qu'il luy estoit fort affectionné, ce qu'estant fait, Sufarah s'en retourna en Perse, de laquelle il fit Roy Belax fils aîné de Pheruz. Quant à Kobad le plus ieune qui y pretendoit se sentant moqué & iniurié de Sufarah, il s'en alla seruir le Roy de Turquestan.

B E L A X X X X. Roy de Perse.

Ce fut ainsi que Belax demeura pour lors paisible possesseur de la couronne de Perse: & quant à Kobad sçachant le plus secret de ses intentions, il continua son chemin du Turquestan accompagné de Bezarmeher fils de Sufarah son grand amy, qui estoit marié, & auoit sa maison & famille en Nichabur. Cestuy-cy pria Kobad de luy vouloir faire tant d'honneur de prendre son chemin de ce costé là, afin qu'il le peust receuoir en sa maison, & luy donner quelque contentement parmy ses tristesses: cestuy cy fit en sorte qu'il luy emmena.

Or ce Bezarmeher auoit une fille nommée Zarmeher, d'une forte grande beauté, laquelle Kobad ayant veüe il en deuint extrêmement passionné: ce que voyant Bezarmeher qui estoit la chose qu'il desiroit le plus, il la luy offrit, dequoy le Prince demeura extrêmement content, & la print à femme, de laquelle avec le temps il eut un fils, que les uns nomment Anuchiron, & les autres Nauchiruan.

Kobad ayant ainsi demeuré quelques iours apres ces nopces, il laissa sa femme en la maison de son pere, & luy continua son chemin du Turquestan, où arriué il se mit tout aussi tost au seruire de Hhakhon Chiny, qui pour lors gouuernoit ce Royaume, avec lequel il demeura quatre ans, au bout desquels il demanda à Hhakhon une bonne armee pour recompence de ses seruices: ce qu'il fit, & avec laquelle Kobad s'en alla en Perse contre son frere Belax Roy d'icelle, qui la gouuernoit avec un grand contentement d'un chacun. Kobad fut voir sa femme en Nichabur, & s'estant resiouy quelques iours avec elle, & avec son fils qu'il n'auoit point encore veu: comme il s'estoit mis en chemin pour continuer son voyage, il eut nouuelle que son frere Belax estoit mort n'ayant regné que cinq ans.

Quant à Nichabur c'estoit une province sujete au Roy de Perse, située entre Karazon, Vsbek & Tartar, terre fort grande & pleine de deserts & sablons, lesquels on tient pour chose veritable qu'ils bouillōnent continuellement. Ce fut en ceste province qu'on dit que Tammerlan ou Teymurlan fit mourir en un iour (selon que le racōtent les Histoires de Perse) 400000. personnes. C'est à Nichabur que croissent les pierres qu'on appelle Turquoises, nommées ainsi à cause que ceste province est limitrophe du Turquestan, & ne se trouue en Perse aucune pierre precieuse qu'en ce lieu, excepté les Bezoars les plus parfaits, lesquels croissent en Perse, ce nom de

pierre se dict en langage Persian Sengh, & en Arab Aher : mais quant à celle de Bezoar ou Bezar, les Perſes l'appellent par excellence Pazahar, c'eſt à dire Antidote, ou remede contre le poiſon : car Zahar eſt vn nom general, qui veut dire poiſon. En vn certain deſtroit de la Perſe nommé Sthabanom d'vne cité qui porte le meſme nom, il y a vne ville nommée Lara, à trois iournees de ce chemin, aux campagnes de laquelle il y a grande quantité d'vne plante fort ſemblable à celle du ſafran, laquelle paſſent les moutons de ce quartier là : dans l'eſtomach deſquels s'engendre vne certaine pierre qui en bonté & vertu eſt preferée à toute autre, de ſorte que Scach Abas à preſent Roy de Perſe les tient ſi cheres, que celles qui paſſent vn certain poids luy appartiennent. La cauſe naturelle de cet eſſet vient de la nourriture, car les moutons tranſportez en vne autre terre ne produiſent plus ces pierres là : les habitans de ceſte Prouince n'ont point de poil à la teſte : ce qu'ayant remarqué vn ſeruiteur de Scach Abas, il luy demanda en ſatisfaction de ſes ſervices, que chaque chauue de ſon Royaume euſt à luy payer vn Cherahin, qui eſt vne piece de monnoye de la valeur d'vn ducat, laquelle demande n'ayant eſté tenuë pour ridicule, il luy accorda. Ceſtuy-cy qui ſçauoit bien le ſecret la mit en pratique, & deuint fort riche en peu de temps. Quant aux Bezoars de l'Amorique ils ſont de nulle valeur.

K O B A D X X X I. *Roy de Perſe.*

La nouuelle de la mort de Belax fut cauſe que Kobad entra en la iouyſſance du Royaume de Perſe plus paiſiblement qu'il n'eſperoit, ſon frere n'ayant laiſſé aucun ſils pour luy ſucceder : de ſorte que pluſieurs furent au deuant de luy pour le receuoir avec toute la demonſtration de bien veillance qu'il eut ſçeu deſirer en ſes ſubiectſ. Le Royaume eſtoit cependant gouverné par Sufarax, lequel pour ſa grande bonté & preud'hômie eſtoit vniuerſellement bien voulu de tous, excepté de Kobad, lequel le voyoit en ceſte autorité avec grand regret, deſirant infiniment de l'abaiſſer & de ſ'en deffaire, ce qu'il delibera d'executer par le moyen d'vn hardy & vaillant Capitaine qui eſtoit à la ſuite de ſa Cour, auquel ayant deſcouuert ſon intention, il le fit conſentir à la mort de Sufarax, lequel à quelques iours de là ceſtuy-cy alla viſiter. & de propos en autre diſcourant de diuerſes affaires, ils entrerent en different l'vn contre l'autre, de ſorte qu'ils mirent la main aux armes, & Xamo le tua.

Enuiron le dixieſme du regne de Kobad, il s'eſleua en Perſe vn homme nommé Mezdahk, qui eſtoit venu de la contree de Stahal, lequel s'eſſorçoit de faire vne nouuelle ſecte touchant la veneration du feu, y trouuant de nouuelles folies & ſuperſtitions. On l'appelloit Prophete, & feignoit que le feu parloit à luy, & luy reueloit pluſieurs hautes & grandes choſes, leſquelles il faiſoit croire au vulgaire, avec quelques autres intentions deſquelles il vſoit. Il permettoit vne communauté en toutes choſes, en biens, femmes & enfans, & en tout le reſte il deffendoit de tuer aucune choſe viuante, & auoit encore pluſieurs autres choſes abſurdes qu'il donnoit à entendre au peuple : pluſieurs qui n'auoient point encore reconnu la fauſſeté de ſa doctrine le ſuiuient pour viure diſſolument & en liberté, entre leſquels fut le Roy Kobad, lequel le louoit beaucoup, & ceux qui eſtoient de ſes ſectateurs, & qui le ſuiuoient l'honoroiſent grandement, en faiſant conte comme d'vn ſainct homme. Les grands & ſages du Royaume qui conſideroiſent le danger que cela traſnoit après ſoy, & combien le Roy eſtoit trompé, le prierent de ſ'en deffaire, & de le faire mourir, ou de le bannir, & de l'enuoyer à Mezdahk : de quoy l'ayant prié pluſieurs fois, & voyant qu'il ne vouloit point entendre à leur requête, tous d'vn commun conſentement le depoſerent du Royaume, & le mirent en priſon bien fermee, donnans l'ineſtiture du Royaume à Iamaſp vn ſien proche parent, lequel toutesſois eſt conté de quelques-vns pour Roy de Perſe. Kobad eſtant pris, les Perſes taſcherent de ſe deffaire de Mezdahk, & de le faire mourir, mais ils n'en peurent venir à bout pour la grande multitude qui le ſuiuoit, & qu'il ſe tenoit fort bien ſur ſes gardes : toutesſois il y demeura à la fin comme il ſera dict cy apres. Or Kobad auoit vne ſœur d'vne excellente beauté, de laquelle eſtant deuenu extremement amoureux, il ſe maria avec elle ayant eu la diſpenſe de Mezdahk, qui n'eſtoit pas homme fort ſcrupuleux. Ceſte-cy voyant ſon frere & ſon mary priſonnier, obligee par des liens ſi eſtroicts à l'affectionner plus que l'ordinaire, elle recherchoit les moyens autant qu'il luy eſtoit poſſible de le deliurer : en fin elle ſ'en aduiſa d'vn qu'il luy ſembla qu'elle pourroit venir à chef de ſon entrepriſe, elle ſe veſtit donc de ſes robbes & ioyaux plus precieus pour donner encore plus d'eſclat à ſa naturelle beauté, puis ſ'en alla à la priſon où eſtoit Kobad, avec preſens & promeſſes qui n'eſtoient gueres licites, elle eut tant de pouuoir à l'endroit de ceux qui le gardoient, qu'ils luy permirent de dormir ceſte nuit là avec luy, laquelle eſtant paſſee elle fit tirer ſon liêt, & le fit enuelopper en iceluy, & en ceſte façon emporter en ſa maiſon. Elle cependant entretenoit les gardes, afin de donner temps à Kobad de ſe retirer à ſaueté : ce qu'il fit ſi ſecrettement, & avec telle viteſſe, qu'il ne s'apperceurent qu'alors qu'il eſtoit en lieu de ſeureté. Eſtant ainſi ſorty des terres de Perſe il ſ'en alla au Royaume de Abtelah, avec eſperance de tirer quelque ſecours du Roy, lequel
le reçut

le reçut fort humainement, encore qu'il ne le secourut pas sur le champ: il le fit toutesfois quelques années après luy donnant trente mille hommes de cheual, avec lesquels & autres qu'il peut recourir, lesquels se joignirent à luy, entra en la Perse: ce qui apporta vne grande combustion entre tous ceux du pays, à sçavoir s'ils le denoient recevoir: les vns voulans que ce fut comme ennemy, & les autres pacifiquement. A la fin ils conclurent de le recevoir avec toute submission, & le premier qui le recogneut, & qui se mit sous sa puissance fut Iamasp, auquel on auoit commis le gouvernement: ce qui fut cause que Kobad recompensa ceste obeyssance par vn pardon general de toutes ses offences passées qu'il mit en oubly. Il employa le reste de son regne à reformer son Royaume. Il fut fort curieux de bastir, & fonda les citez de Bardah & Guania, & en peupla plusieurs autres. Il mourut en fin de maladie, ayant regné quarante trois ans.

KEZERÉ ANUXIRON XXXI. Roy de Perse.

Kezeré Anuxiron ou Nauchiruan, car on le nomme de l'un & l'autre nom, fils de Kobad & de Zarmecher sa femme luy succeda au Royaume: cestuy-cy fut doué de plusieurs grandes vertus qui le rendirent chery & honoré tant des siens que des estrangers, après auoir donné l'ordre & la reformation necessaire à ses Estats, la premiere chose qu'il fit, fut de condamner à mort Mezdahk & tous ses sectateurs: ce qui fut executé avec tant de rigueur, qu'en peu de tēps ils furent du tout esteints, encore que le nombre en fut presque innumerable, deliurant ainsi la Perse de ceste perniciense secte: & afin qu'il peust gouverner doresnauant ses Royaumes, sans vn si grand trauail de sa personne, il les diuisa tous en quatre Vuazilas ou Vuizirs, c'est à dire Gouverneurs, qu'il mit entre les mains de personnes en qui il auoit de la confiance & fidelité, & qui estoient alliez à sa Maisté. Le premier des Gouverneurs auoit les provinces de Karaton, Sagistam, Kermon, Maurenahar: le second, Isphaon, Kom, Aderbaion, & Armenie: le troisieme auoit Farc ou Parc, qui est la Perle, & Ahuua: le quatrieme, Hierak, ce qui est à l'entour de Babylone, & des terres de Rumestan, qui est la Grece. Ayant ainsi ordonné ordre à toutes choses, il leua vne grande armee, avec laquelle il conquist Tachastar, Zabulstam, Kabulstan, Iugonyan, Abtelah: mais comme il estoit en ceste entreprise, Hhakhon Chincey Roy des Tartares entra dans ses terres, & luy prit Berchach, Ferna, Kaich, Nefaf, Samarkand, Bockarra. Ceste Samarkand est vne ville fort puissante en la contree de Morenahar, de laquelle nasquit Tamorlam ou Tamborlan, Prince si fameux & renommé par l'vniuers, lequel nasquit de parens nobles, n'estant point descendu ny d'un Patre, ny d'un bandoulier, ou autre semblable origine, comme on luy attribue, ains du sang de Chinguis Kam Roy des Tartares, duquel il sera parlé cy apres: estât paruenue au Royaume non pour sa beauté, car il estoit manchot, boiteux, & borgne: mais pour sa grande valeur & dexterité aux armes, il se rendit le maistre d'une grande partie de la terre habitable, se rendant humain & gracieux à ceux qui se rendoient à luy, & tres-cruel à ceux qui luy faisoient resistance: on l'appelloit en son propre nom Teimur, & fut surnommé Langh, c'est à dire boiteux: de là est venu la corruption du nom que nous luy donnons de Tamberlan: les Perles l'appellent ordinairement Sahaybkharon, c'est à dire dominateur de la fortune. Il y a vn liure particulier de sa vie en langue Perlienne d'un stile fort elegant.

Il laissa après sa mort plusieurs fils qui partagerent ses terres, & encore à present le grād Roy de Mogol est vn de ceux que les Perles tiennent des plus grands & puissants Monarques du monde nommé Geladinaxbar est le huitiesme descendu d'iceluy en ligne directe. Les noms de ces grands Monarques que tiennent les Perles sont ceux-cy, celui des Turcs, des Perles, des Tartares, de la Chine, & de Mogol, la puissance duquel s'estant depuis le fleuve du Gange iusques au Royaume de Makron, au Sein Persique: entre lequel espace sont cōtenus plusieurs grands Royaumes & riches Prouinces, il est Payen, mais tout differend des autres, parce qu'il ne suit aucune secte, pretendant en auoir vne particuliere: il se fait honorer des siens comme chose diuine, & tient tousiours auprès de soy des Escriuains qui ne font autre chose que remarquer & eleuier tout ce qu'il dit & fait: les gardes ordinaires de son corps sont six Roys ses vassaux qui sont continuellement à la Cour. Il y a plusieurs choses dignes de remarque en ceste prouince qui seroient trop longues à raconter.

Quand à Bokara, c'est vne ville en la prouince de Vsbek, de laquelle nasquit Auicenne, que les Perles appellent par nom propre Boaly fort sçauant & expérimenté en la Medecine, & des escrits duquel ils font vn grand cas, & le nomment ordinairement Chequeris, Boaly Sina, ou Eben Sina, c'est à dire le Seigneur de Boaly fils de Sina: il estoit noble, mais non pas Prince d'Vsbek, ny Cordouan, ny l'Espagnol, il escriuit plusieurs choses qui se voyent encore à present, & particulièrement en vn volume contenant vingt liures de Medecine, & composa toutes ses œuures en langue Arabesque plustost qu'en la Perlienne, d'autant que la langue est plus vniuerselle & eloquente, on tient qu'il sentoit mal de la loy Mahometane, & à pro-

pos des Medecins, cecy est à remarquer que en Perse, tous les Medecins tiennent boutique, donnant les drogues & medecines à ceux qui ont affaire d'eux, ils les appellent Mulah, c'est dire Maistre : mais pour retourner à Kezeré Anukiron, sçachant l'entrée de Hhakhonchiny en ses terres, il enuoya contre luy son Hormoz, avec plus grand nombre de gens de guerre qu'il peust, cestuy-cy fit telle diligence qu'il approcha bien tost de son ennemy, auquel il donna tant d'assauts & d'escarmouches, & vint de tant de stratagemes, qu'ayant receu vn tres-grand dommage, remply de crainte & de frayeur, il se retira en son pays, abandonnant tout ce qu'il auoit conquis: si bien que Hormoz s'en retourna en la Perse avec beaucoup de gloire & d'honneur. Cette guerre du Tartare ayant ainsi pris fin, Kezeré eut aussi tost aduis que Kaled, Benjulas, Guafanij Capitaine du Roy de Rumestan estoit entré dans les terres de Manzar Roy d'Arabie son vassal, auquel il fit vn estrange rauage, & mit à mort plusieurs de ses subiects, de quoy Kezeré enuoya se plaindre par vn sien Ambassadeur au Roy de Rumestan, demandant que le tout luy fut restitué & Kaled chastié, de laquelle Ambassade l'Empereur Grec (qui est le mesme que Rumestan) fit fort peu de cas, ce qu'ayant entendu Kezeré, il leua vne grande armee, & entra dans les terres de celuy de Rumestan par la Mesopotamie qu'ils appellent Zazirat, & print Dara Mediney raha Kanferin, de là passant en Surie luy osta Antioche & autres, de sorte qu'il contraignit l'Empereur Grec à luy demander la paix, ce qu'il luy accorda, en luy payant chacun an vn gros tribut, moyennant lequel il luy rēdit les terres de Chan, Iazirat, Heyaz, Hzman, Thaez, Bargré, Homan, toutes terres de l'Empire, lesquelles il auoit occupees en ceste guerre. Kezeré s'estoit marié quelques ans auparauant à vne femme Chrestienne pour sa grande beauté, laquelle fut fort persecutée par ce Roy, qui estoit Payen, la voulant contraindre à renoncer sa Religion, en laquelle elle perseuera constamment: de ceste-cy Kezeré Anuchiron eut vn fils nommé Nuchzad, lequel ayant succé avec le lait, la Religion de sa mere, quelques menaces que luy peust faire son pere, il ne la voulut iamais quitter, de quoy le Roy grandement irrité contre luy, le fit mettre en vne estroite & obscure prison, où il le faisoit traiter comme le plus vil de la Populace, sans que la constante patience, ny la perseuerance de ce ieune Prince le peust esmouuoir à pitié. En ce temps les peuples de la terre de Chan, qui est la Surie, se reuolterent contre Anuchiron: de sorte qu'il fut contrainct d'y aller en personne, où il tomba malade d'une grande maladie, de laquelle on ne croyoit pas en Perse qu'il deust rechapper, ce qu'ayant entendu Nuchzad, qui estoit encore prisonnier, trouua moyen de se sauuer de la prison, & ayant ramassé tous les Chrestiens qui estoient au Royaume, lesquels n'estoient pas en petit nombre, ayant encor attiré de son parry grand nombre de soldats, mais ce qui estoit de plus important, c'est qu'il s'estoit saisi des tresors de son pere, lesquels il departit fort liberalement aux siens, mettant de nouveaux Capitaines aux frontieres & places fortes du Royaume, & disposant ceux que son pere y auoit laissez, lequel ayant aussi tost aduis de toutes ces nouveutez, enuoya à Rambarzin fort nommé Capitaine qu'il auoit laissez à Hierak, à ce que en la plus grande diligence qui luy seroit possible, il fit vne leuee de gens de toutes parts, & empeschast les desseins de Nuchzad, luy commandant toutesfois de faire en sorte qu'il ne mourut pas: mais qu'on s'efforçast de le prendre vif, & de le mettre apres en lieu seur, digne toutesfois de sa qualité.

Nuchzad auoit pour Capitaine vn nommé Chamas Rummy, cestuy-cy presenta la bataille à Rambarzin, & sembloit du commencement que la victoire panchast de son costé: mais la valeur de Rambarzin qui se mit au milieu des siens, combattant plus courageusement que pas vn autre, fit en sorte que par son exemple il renouella le combat plus fort que deuant, & fit tourner la chance du costé de son ennemy, lequel il mit en fuite, en laquelle Nuchzad fut blessé d'une fleche en l'estomach, son armeure n'estant pas assez forte pour y resister, si qu'à peu de iours de là il en mourut, sans qu'il peust estre secouru, au grand regret de Rambarzin, lequel le fit enterrer avec la pompe & ceremonie qu'on a accoustumé d'vser entre les Chrestiens, cependant Kezeré estant retourné en conualescence, & pacifié les remuemens de Cham, il s'en retourna en Perse, où il assoupit plusieurs menées qui se practiquoient en son Estat, puis alla faire la guerre en Inde, en Selandyque, ou Seylan, qui est ce que nous disons la Taprobane, & fut en paix avec le Roy de ceste Isle, en luy payant certain tribut: de sorte que ce Roy Anuchiron commandoit sur les Prouinces de Maurenahar Karazon, Darband, Hheztran, Hyamama, Tarbastan, Gerion, partie de l'Inde Kermon, Parfi, qui est la Perse, Aderbaion, Hieraken: Iazrat, Homan, iusques à Hyaman en Arabie, & plusieurs autres terres, iusques à Magaceb en Rumestan.

Du temps de ce Roy, fut apporté de l'Inde en Perse deux liures de Philosophie, fort celebres, l'un nommé Kelilah, & l'autre Vuademana, & vn jeu d'eschers que les Indiens enuoyent aux Perses, leur voulant représenter l'inconstance, mutabilité des choses humaines, & de la vie qui

Vie, qui est en vne continuelle guerre, qu'ils eussent donc à se gouverner avec prudence. Mir-kond, dict que pour responce, les Perles leur enuoyerent vn jeu de Damier, leur mandant qu'encores que la prudence fust tres-necessaire en la vie, toutesfois qu'il falloit y estre vn peu aydé du hazard, comme ils pourroient voir par ce jeu. Les vns & les autres de ces deux peuples, sont fort addonnez à ces deux jeux, & sont fort excellents en iceux, & principalement au jeu des Eschets : mais qui est de plus remarquable, c'est qu'ils ont non seulement les mesmes noms : car ils appellent le Scha, qui est la mesme signification que Roy, & la Dame Vazir, qui est celuy qui a la supreme dignité, celuy que les Espagnols appellent Delfils, ils l'appellent Fil, c'est à dire vn Elephant qui sert aux guerrés que se font les Orientaux, le cheval Asp, ou farats, qui est la mesme chose, le pion peada, qui est à dire soldat à pied, & ce que nous disons donner Eschec, eux disent Scha, qui est à dire aduiser le Roy, & au lieu que nous disons Ouar, eux disent Schamate, qui en la mesme langue signifie le Roy est mort, & quant au nom des Eschets, eux disent Schatrak, comme si on disoit vn jeu, & entretenement de Roy, on tient que ce jeu fut inuenté en Babylone. Quant à Kezeré Anuchiron il fut fort sage, & fauorisoit en toutes choses, ceux qu'il recognoissoit tels en ses pais : il auoit plusieurs fils, mais celuy qui estoit le mieux né d'entre tous estoit Hormoz, aussi son pere l'affectionnoit-il plus que tous les autres, & fit en sorte qu'il le fist declarer son successeur avant sa mort, qui aduint le quarante-huictiesme an de son regne, luy recommandant fort, auant que mourir, la paix, la contorde, & l'amour de ses sujets. Mirconda décrit particulièrement les vertus & grandeur d'esprit & de courage de ce Roy, adioustant que la Perse florist de son temps, avec toute sorte de prosperité, il fut surnommé Adel, c'est à dire le Iusticier, à cause de sa grande integrité en l'administration d'icelle.

HORMOZ XXXIII. Roy de Perse.

Les choses les plus desirées ne sont pas tousiours les meilleures, ny les plus vtilles. Hormoz, comme vous auez peu voir cy-dessus, estoit tenu pour bon Prince, changeant bien tost lors qu'il eust en main, les resnes de la domination : cestui-cy estoit yssu d'une fille du Roy de Tartar, ou Tartarie, lequel aussi tost qu'il se veid en possession paisible de son Royaume, il se fit cognoistre pour vn Prince fort cruel, vitieux & tyran, & afin de n'auoir personne qui luy contredit en ses vitieuses manieres de viure, il fit mourir tous les plus grands de ses Royaumes, priuant de leurs charges tous les Officiers de la Iustice, iugeant pour vne chose indecente & mal conuenable, qu'il y eust en son Royaume vn autre Iuge que luy, & se gouerna si cruellement enuers tous, qu'on ose asseurer qu'il fit mourir les douze premieres annes de son regne, par toutes ses terres, iusques à treize mille personnes illustres, sans vn autre grand nombre de ceux dont on ne fait point d'estat, si que plusieurs pour fuir ceste pestilence s'exilerent volontairement de leur pais.

L'Empereur de Constantinople aduertý de tous les deportements de ce Prince, & comme les choses se passoient en la Perse : ne voulut pas laisser escouler vne si belle occasion, voulant s'efforcer de recouurer les terres que les predecesseurs de Hormoz auoient vsurpees sur l'Empire Romain, & print les armes, surprenant les Perles, de sorte qu'il estoit desia entré dans la contree de Naciben, sans en estre apperceu. Ce Naciben, selon la tradition des Perles est Ninive, que eux & les Arabes appellent auourd'huy Mosul en Diarbek, ou Karamite, & tiennent cecy pour veritable, disant que ce fut là où prescha le Pehhanber, ainsi appellent-ils celuy que les Arabes appellent Naby, & nous autres Prophete, & disent que c'est celuy qui fut englouty de la Balene, que s'il est ainsi Ninive ne fut iamais entierement destruite, puis qu'elle florit encore à present. L'Empereur Chrestien estant donc entré en la contree de Naciben, enuoya dire à Hormoz, que s'il luy vouloit rendre ce qui appartenoit à l'Empire Romain, qu'il se retireroit sans faire aucun dommage : mais le Perlien ne luy ayant pas fait responce à son gré, il passa outre, destruisant toute l'Armenie & Aderbaion, enuoya deux Capitaines pour faire le degast au pais de Babylone, l'vn nommé Abas Auual, l'autre Homer Azarek avec vn nombre de gens de guerre, lesquels rauagerent de toutes parts ceste contree. Alors estoit Roy de Tartar, ou Tartarie, vn oncle de Hormoz nommé Chabacha Hhakhon Chiný frere de sa mere, lequel voyant la peine en laquelle estoit son neveu, leua vne grande armee, qu'on dit auoir esté de quatre cents mille hommes, non pour secourir son neveu, mais pour s'emparer de ses terres, comme il fit, & passant le fleuve de Ichun, il vint en la contree de Karazon, ce fut lors que Hormoz recogneut la faute qu'il auoit faite de faire mourir les principaux hommes de son pais, n'ayant presque maintenant personne pour opposer à ses ennemis, & en ceste confusion d'esprit ayant appellé ceux de son Conseil, il fut resolu qu'on quitteroit à l'Empereur de Rumestan les terres qu'il demandoit, afin qu'ayant quelque asseurance de ce costé là, ils conuertissent toutes leurs forces contre les Tartares, comme ils firent : car le Roy Hormoz ayant assemblé ses forces de toutes parts, il en donna la charge à vn Capitaine Perlien, le plus courageux qui fust pour lors

en toutes les contrees de l'Orient, nommé Baharon Chuby, qui estoit Gouverneur des frontieres de l'Armenie, lequel arriué à la Cour, & receu le commandement de son Prince, sans perdre temps, il fit aduancer son armee contre les Tartares, n'ayant toutesfois avec soy que douze mille soldats, vieux routiers toutesfois, & fort experimentez, avec lesquels il eut bien l'assurance d'attaquer vne si puissante armee que celle de Chabacha, avec vn si heureux succez, que le Roy Tartare y fut tué avec la meilleure partie de ses gens, & grand nombre de prisonniers. Chabacha estant mort, les Tartares mirent son fils en sa place, lequel continua la guerre avec la mesme disgrace qu'auoit faict son pere: car les Perses demeurent tousiours les vainqueurs, & principalement en vne grande bataille, où les Tartares furent entierement defaits, faisant vn tel butin, que Baharon Chuby enuoya presenter par vn sien fils au Roy Hormoz, douze cents cinquante chameaux chargez d'or & d'argent monnoyé, & non monnoyé, avec plusieurs autres riches meubles: mais tous les beaux faicts de ce vaillant homme furent fort mal recompensez: car ceux qui estoient en la Cour du Prince, ennuyez de sa gloire & de sa prosperité, le calomnierent de sorte vers Hormoz, qu'entrant en apprehension que cestuy cy eut quelques entreprises contre son Estat: à son arriuée on luy donna pour sa bien-venue vne prison, dequoy Baharon se ressentit tellement de ceste ingratitude, qu'ayant trouué le moyen d'eschaper, il pratiqua Kozrrao Paruez, fils aîné de Hormoz, luy donna les moyens de se rebeller contre son pere, lequel aussi tost fit battre monnoye en son nom, & marquer du coing de ses armes, se faisant appeller Roy de Perse. Or auoit-il deux oncles de sa mere qui luy seruoient d'appuy, l'vn nommé Banduhyé, & l'autre Bostan. Le Roy Hormoz ayant sceu toutes ses conspirations, s'efforça d'y donner ordre, & d'en empescher le cours, ce que les autres ayans entendu, & ne se iugeans pas assez forts pour y resister, ils se mirent en fuite. Kozrrao se retirant en Armenie, & de là en Aderbaion, quant aux deux beaux freres de Hormoz, ils furent pris prisonniers: mais ayant brisé les prisons ils amasserent de nouvelles forces, & vindrent surprendre Hormoz, lors qu'il y pensoit le moins, si bien qu'il tomba en leur puissance à son tour: mais ils ne luy firent pas pareil traitement qu'ils auoient receu de luy: car ils luy firent creuer les yeux. Kozrrao cependant aduertý de tous ces troubles, s'en retourna en Perse, où il fut recogneu pour Roy, & se voyant paisible en son Estat, il alla demander pardon à son pere, ce qu'il luy accorda, pourueu qu'il le vengeast de ses deux oncles qui luy auoient faict perdre la veüe.

La Perse estant ainsi tout en trouble de toutes parts, Baharon Chuby qui auoit pour se venger de l'iniure receüe, conuertý sa vengeance en ambition, aspirant au Royaume de Perse, si bien qu'avec vne puissante armee, qu'il auoit courut toute la Perse, & y fist vn fort grand degast, contre lequel Kozrrao Paruez, estant venu au combat, le Roy fut vaincu & contraint de s'enfuir à Constantinople, avec ses deux oncles qui l'accompagnerent, lesquels luy conseillerent pour oster tout pretexte à ses ennemis de faire mourir son pere: car en ce faisant il n'auroit plus que craindre: mais ceux cy voyant que l'amour paternel auoit plus de pouuoir sur ce Prince, que le desir de regner, ils feignirent vne occasion pour se retirer, & laissant la Paruez, il s'en allerent au lieu où estoit Hormoz, lequel ils estranglerent avec la corde d'vn arc, telle fut la fin digne de la vie, & de la cruauté de ce Prince. Quant à Kozrrao Paruez, que comme nous auons dit s'estoit retiré à sauueté vers les Grecs, il espousa la fille de l'Empereur, lequel luy donna pour luy ayder à recouurer ses terres, cent mille hommes enuoyant avec luy vn sien fils nommé Ben Athus, en recompence dequoy Kozrrao Paruez luy donna vn grand morceau de bois de la tres-sainte Croix que son pere Hormoz auoit. Kozrrao s'estant donc mis en chemin avec vne si belle armee, rencontra en la Perse son ennemy Baharon, lequel selon plusieurs est mis au nombre des Roys, & comme les armees estoient plantées l'vne deuant l'autre, il sortit de celle de Baharon, trois Capitaines lesquels deherent les plus vaillants du party contraire, Kozrrao voyant la brauade de ceux cy se fit armer sur le champ, & sortit de son camp pour les aller combattre contre la volonté de son beau-frere qui l'en dissuadoit, auquel combat il se comporta avec tant de valleur, qu'il les vainquit tous trois l'vn apres l'autre, ce qu'admirant les soldats de Baharon, ils abandonnerent leur Capitaine, & se rangerent du party de Kozrrao, si bien que Baharon fut contraint de s'enfuir au Turquestan, & abandonner la Perse, il se mit depuis au seruice de Hhakhon Chiny, où il mourut quelque temps apres.

K O Z R R A O, P A R V E Z X X X I V. *Roy de Perse.*

Kozrrao Paruez ainsi deliuré de tous ses embarrasemens, & rendu Roy pacifique de la Perse, accomplit lors ce qu'il auoit promis à son pere, & fit mettre en prison ses oncles Bostan & Banduhye qui l'auoient faict mourir, lesquels il fit fort seuerement chastier. Au quatorzieme an du Gouvernement de ce Prince, les Grecs se reuolterent contre leur Empereur qu'ils tuerent, & son fils Benathus qui auoit accompagné comme il a esté dit, Kozrrao au recouurement de la Perse, & à peine se peust eschapper son plus ieune frere, lequel se retira vers Paruez, qui le receut
& traitta

& traita avec beaucoup d'honneur, luy donnant de belles troupes conduites par de fort bons Capitaines, pour le recouurement de son Estat, lesquels au sortir de la Perse, entrerent en la Surie, & Palestine, prenant la volte de Constantinople, faisant de grands degasts, & emmenant quant & eux vn nombre innumerable de captifs. Les Grecs apres la mort de leur Empereur auoient esleu en sa place vn nommé Arcol, ou Heraclius, homme de grande prudence, & fort belliqueux, lequel sçachant l'arriuee des Perles, marcha alencontre d'eux, les combatit & vainquit, & demeura en ceste deffaitte seize mille Perles sur la place, la meilleure partie d'entre-eux tournant les espaules, & fuyant iusques à ce qu'ils fussent en leur pais.

Enuiron la trentiesme annee du regne de Kozrrao, s'eleua à Medine en Arabie le faux & pernicieux Prophete Mahomet, lequel escriuit à plusieurs Princes & Seigneurs de ces contrées-là, les priants, comme de la part de Dieu, de l'ouïr & suivre sa doctrine: entre les autres, il escriuit à Kozrrao, lequel tant s'en faut qu'il le voulut escouter, qu'il luy donna mille maledictions: mais sa mal'heureuse secte ne laissa pas de pululer en Arabie, & autres provinces circonuoisines. Pour retourner maintenant à Kozrrao, la guerre des Grecs appaisée, il viuoit en paix en son pais, & comme il estoit en sa ville de Madahem, il songea vne nuit qu'il estoit en vne ville enuironnée de fortes murailles avec vnze tours, lesquelles toutes se ruinoient iusques au fondemens successiuellement l'une apres l'autre, iusques à ce que la Cité demeura sans fortifications, à son resueil tout estonné & confus en soy-mesme de ce songe, il enuoya querir les deuins & Astrologues, leur demandant la signification d'iceluy: vn entre autres luy répondit, que les vnze tours signifioient vnze Roys, qui deuoient encore gouverner la Perse, apres lesquels ceste Monarchie prendroit fin. Kozrrao pour empescher, ce luy sembloit, ceste predication, & couter ceste ruine, il creut que ce qui pourroit estre la cause de ce changement seroit la discorde de ses enfans, c'est pourquoy il les fit prendre tous, deffendant à chacun d'iceux de frequenter ny parler à perlonne, & mesmes de ne communiquer pas avec leurs propres femmes: Entre ses enfans, il y en auoit vn nommé Charear, lequel aymoït sur toutes ses femmes vne appelée Cherin pour sa singuliere beauté, ce mot Cherin en langue Persienne signifie doux, & se trouue vn liure en ceste langue, intitulé Kozrrao Cherin, qu'un Prince du pais (non celuy de qui nous escriuons la vie, mais vn de moindre qualité) a composé en vers fort mignards & elegans, & desquels les Perles font vn fort grand cas, comme estant pleins de plusieurs belles conceptions & inuentions, auxquelles ils sont grands Maistres. Charear donc se souuenant de sa Cherin, & souffrant des inquietudes nonpareilles pour se voir priué de sa chere veuë, comme l'amour ne manque iamais d'inuention, il trouua vn moyen pour remedier à sa peine, feignant d'estre malade, & qu'il auoit besoin d'estre seigné, & selon l'aduis qu'il auoit donné à Cherin, elle se desguisa en barbier, & vint le trouuer en la prison, où ayant esté quelque temps avec son mary, elle se retira: mais enceinte d'un fils, qu'elle nomma Yasdegerit, lequel fut eleué en la maison du Roy Kozrrao son ayeul, iusques à l'age de cinq ans, sans qu'il ne sceut rien: mais en ayant esté aduertty, il commanda qu'on le mit à mort, en quoy il se monstra fort entier, sans vouloir changer d'opinion: ce que la mere ayant sceu, elle le vint trouuer, où elle fit tant par ses prieres & ses larmes, qu'elle gagna sur luy qu'on ne le mit point à mort: mais qu'il fut porté en quelque bocage ou bruyeres, à la mercy des bestes sauuages (ce qui est rapporté en ce lieu, pour l'intelligence de ce qui se dira cy-apres) si bien que la croyance que Kozrrao adiousta à ce deuin le rendit soupçonneux, timide, auare & superbe, mal-voulu, & hay des siens, desquels il faisoit mourir plusieurs sans autre raison que sa fantasie, entre lesquels fut vn nommé Neaman nepueu de Manzar, qui luy auoit rendu de fort grands services.

Il y auoit desia trente-huict ans que Kozrrao Prauez regnoit en Perse, quand ses sujets ne pouuans plus supporter sa cruauté, & ses tyrannies d'un commun consentement, ils le deposerent de la Royauté, le mettant entre les mains d'un Capitaine, auquel ils auoient fort grande confiance, & establirent au siege Royal son fils Kobad Chiruyhé qui luy succeda, cecy aduint la neuuesme annee de l'Egire, selon le compte des Mahometans, & l'an six cents trente-vn de nostre salut, peu plus ou moins, ce Kozrrao Prauez, & celuy que nous appellons Koldroez.

KOBAD CHIRUYHE XXXV. Roy de Perse.

Les Perles pensans par ce changement auoir aucunement adoucy leur misere, & qu'ils receuroient de ce Prince tout bon traitement, eurent bien tost sujet de se repentir, d'autant que cestui-cy se voyant confirmé en la Royauté, la premiere chose qu'il fit, fut de faire tuer son pere qui estoit prisonnier, ce qui luy acquit tout d'un coup, la haine vniuerselle de ses sujets, car encore que ce Prince fut hay par les mauuaises conditions: toutesfois pas vn d'entr'eux n'auoit voulu souiller ses mains du sang Royal: mais bien peu de iours s'estans passez depuis son Election, vn Merche Hormoz fils d'un Mordomcha, que Paruez auoit commandé de tuer, s'offrit à Kobad de faire ce parricide: entrant donc dans la prison où estoit Kozrrao, sans autre

respect ny compliment, il luy dit ces paroles. Il est iuste de tuer celuy qui a tué mon pere: & en disant cela luy trancha la teste, lequel estant retourné vers Kobad, qui estoit fort content du fait, il demanda à cestui-cy, comment il auoit procedé en ceste action, lequel pensant en auoir vne bonne recompence, luy dit les mesmes paroles qu'il auoit proférées en tranchant la teste à son pere, & lors Kobad, sans s'estonner autrement luy dit tout de mesme, Il est raisonnable de tuer celuy qui a tué mon pere, & le fit mourir sur le champ: & non content de s'estre ainsi defait de celuy qui luy auoit donné la vie, il fit tant enuers ses Vuazirs, & Gouverneurs, qu'il fit mourir quinze freres qu'il auoit: ce qui s'executa fort promptement. Sur cecy, il survint en la Perse vne grande pestilence, de laquelle elle fut fort affligee, & sur le sujet de ses calamitez, les deux sœurs de Kobad, l'aînée desquelles s'appelloit Turon Dokt, & la plus ieune Azarmydoks, prindrent occasion de luy faire vne grande reprimande, luy disans que ses pechez & melchancetez, & son impieté d'auoir fait mourir son pere & ses freres, estoient cause de tous ces malheurs, que les Dieux leur enuoyoient, le menassans encore de plus grands, & partant qu'il se repentist des maux qu'il auoit commis, & amendast à l'aduenir la vie, tant pour la crainte qu'il deuoit auoir de Dieu, que pour la honte des hommes. Telles & semblables paroles luy dirent ses sœurs, ce qui luy fit auoir vn tel relentiment de tant de maux qu'il auoit commis, que la violence de la tristesse le fit tomber en vne grande maladie, de laquelle il mourut en peu de iours, ayant regné seulement huit mois, il laissa vn fils qui luy succeda au Royaume.

ARDCHIR CHYRUYHE XXXIX. *Roy de Perse.*

Après la mort de Kobad, les Perles assirent aussi tost sur le throsne Royal son fils unique Ardchir Chyruyhe, bien qu'il fut fort ieune, & qu'il n'eust pas plus de sept ans. Mais vn sien parent nommé Charear, autrement Gheikham, qui estoit lors Gouverneur de la Prouince d'Agén, ayant entendu la mort de Kobad, & sachant le bas aage de son successeur, l'occasion luy semblant tres-propre pour bien faire les affaires, il assembla le plus grand nombre de gens de guerre qu'il peust, & s'en vint à la Cour, où il tua le petit avec plusieurs de ceux qui le voulurent deffendre, & puis estant fauorisé de la Milice, principalement de celle qu'il auoit emmenée quant & luy, il se declara Roy de Perse, le ieune Ardchir n'ayant porté le nom de Roy que cinquante iours.

CHAREAR TYRAN XL. *Roy de Perse.*

Charear s'estant ainsi remparé de la Perse, par la mort de Ardchir, & de ceux qu'il en vouloit empescher. Il fit ce qu'il peut pour gagner les cœurs des grands du Royaume, les tentans par tous les moyens qu'il luy fut possible, mais il ne les peut gagner. Il y auoit lors en la Cour trois freres fort nobles, & de grande valeur, qui voyoient regner cestui-cy avec vn fort grand regret, ne pouuant souffrir qu'un Tyran leur commandast: estans donc tous trois conformes en mesme ressentiment, ils resolurent de le faire mourir, ce qu'ils firent: car vn iour qu'il montoit à cheual, à la porte de son Palais, ils se ruèrent sur luy, & le ietterent par terre, le faisant mourir à coups de poignard, fauorisez qu'ils estoient du peuple qui desiroit fort ceste mort, n'ayant regné qu'un an, d'autres disent seulement quarante iours.

IOON CHIR XLI. *Roy de Perse.*

Les Perles ainsi deliurez de la Tyrannie de Charear, donnerent le Royaume à Ioon Chir (ce mot signifie beau Lyon, ou ieune Lyon) parent des Roys defuncts, il estoit cousin de Baharon Chuby, qui fit la guerre à Kozrrao Paruez: Il donnoit de grandes esperances d'estre vn genereux Prince, si la mort n'eust preuenue ses intentions, le priuant en mesme temps de la vie & du Royaume, duquel il ne iouit qu'un an.

TURON DOKT XLII. *Roynede Perse.*

A Ioon Chir succeda au Royaume de Perse, Turon Dokt fille de Kozrrao Paruez, l'aînée des deux qui auoient fait vne si grande reprimande à Kobad leur frere: ce nom de Turon est vn nom propre de femme, & Dokt, c'est à dire Damoiselle, ou Vierge: ceste-cy fut vne femme fort prudente & de bon gouuernement, mettant ses Royaumes en repos & tranquillité, chastiant seuerement les seditieux, & qui y apportoit quelque trouble, reforma la iustice, redifia plusieurs edifices publics, qui auoient esté ruinez par l'iniure du temps: elle fit supreme Vuazir de tous les Royaumes, vn des trois freres qui auoit fait mourir le Tyran Charear, & contracta vne estroite amitié avec le Roy de Rumuz, c'est à dire l'Empereur de Constantinople: mais lors que ses sujets commençoient à tirer vne grande vtilité & contentement de sa conduite, la mort leur enleua, n'ayant gouuerné que six mois & six iours.

IASANCEDAH XLIII. *Roy de Perse.*

Après la mort de Turon Dokt, les Perles eleurent Iasancedah, à l'eslection duquel il y eut de fort

de fort grandes disputes, mais en fin il fut admis : on dist que lors qu'on luy mit le Tagé sur la teste, qui est ce que nous appellons Couronne : il dit que cela le chargeoit trop, & qu'il n'en vouloit point : quelques-vns disent que c'estoit pour monstret la charge, & le poids des Gouvernemens : autres que c'estoit par pure ignorance, comme c'est la plus probable opinion : de sorte que les Perses estans fort mal satisfaits de sa personne, ils le deposederent aussi ignominieusement qu'ils l'auoient promptement esleu, n'ayant regne que six iours.

AZARMY DOKT XLIV. Royne de Perse.

Iasancedah ainsi depossédé du Royaume, les Perses en donnerent le Gouvernement à Azarmy Dokt, seconde fille du Roy Kozrrao Paruez, & ieune seur de Turon Dokt, deuee d'une rare beauté, & d'un grand entendement. Alors estoit Gouverneur de la Prouince de Karason, & dès le temps mesmes de Paruez vn fameux & renommé Capitaine nommé Ferrok Hormoz, lequel luerte par la renommée de la beauté de Azarmy Dokt, comme il eust esté contrainct par la disposition des affaires du Royaume de quitter sa prouince, s'en vint à la Cour, laissant vn sien fils en sa place pour gouverner, en intention de rechercher la Royne, & de luy faire l'amour, ce qu'il fit avec tant d'importunité & d'incivilité, qu'elle fut forcee pour son honneur de se deffaire de luy, & le faire mourir : ce qu'ayant sceu son fils, nommé Iuego, qui estoit en Karason, se mit en vne telle furie, qu'ayant assemblé promptement vne armee, entra inopinément à la Cour, où il fit cruellement mourir la Royne, sans auoir aucun esgard aux prieres ny aux plainctes qu'elle luy fit, n'ayant regné que six mois.

KESEK fils de Iasancedah XLV. Roy de Perse.

A Azarmy Dokt succeda au Royaume Kekeré fils de Iasancedah, lequel nous auons dit cy-dessus auoir esté depose du Royaume pour son incapacité : mais cestui-cy n'estant, ny plus capable, ny de meilleure vie & gouvernement que son pere, il donna occasion à ses sujets, pour ses imprudences, de le faire mourir, n'ayant regné qu'un an.

FERROGZAD XLVI. Roy de Perse.

En parlant du regne de Kobad Kyruihe, il a esté dit qu'il fit tuer quinze freres qu'il auoit, ce qui donna vne telle crainte à tout le reste de ses parens, que chacun desirant d'euitter la furie de ce Prince, se sauuoit où il pouoit : mais apres sa mort quelques-vns retournerent en Perse entre lesquels fut Ferrogzad fils de Kozrrao, & nepueu de Kozrrao Paruez, lequel estant recogneu pour ce qu'il estoit, fut fait Roy, donnant grande esperance d'estre fort bon Prince, s'il eust vescu plus longuement qu'un mois, au bout duquel il mourut empoisonné par vn sien esclaue.

IAZDGERD XLVII. Le dernier Roy de Perse de ceux de leur nation.

En la vie de Kozrrao Paruez, il a esté remarqué que du temps du Charrear, son fils estoit prisonnier, voulant empescher l'effect de la perfection de son songe, que cestui-cy eust de sa femme Cherin, vn fils nommé Yazdgerd, lequel estant apres recogneu par son ayeul, il l'auoit fait exposer aux bestes farouches dans vne forest, où ayant esté quelque temps, quelques Pastres passans par là l'enleuerent, & par compassion l'esleuerent, sans sçauoir qui il estoit : mais comme tout le sçait avec le temps, ce ieune enfant venu en aage, fit en sorte qu'il descouurit son origine, par laquelle cognoissance estant porté à plus hautes & grandes choses que ne portoit le lieu où il auoit esté nourry, partit de là, & s'en vint à la Cour du Roy de Perse, se conduisant si dextrement, qu'en fin il fut recogneu pour ce qu'il estoit : de sorte qu'on le fit en fin Roy de Perse, lequel l'ayant assez bien gouverné l'espace de dixneuf ans, vne grande multitude de Turcs vindrent en Turquestan, entrant en la Perse par Nahaoand, faisant vn fort grand rauage par tout où ils passerent : si bien qu'ils obligerent Yazdgerd d'aller au deuant d'eux, & de se retirer en fin en la contree de Karason, où estant, il eust aduis que les Arabes, Capitaines de Mahomet, estoient entrez en ses terres par vn autre costé, & comme il s'apprestoit à marcher contre eux, il sçeut qu'ils estoient proches de luy, & le venoient trouuer : ce que sçachant il s'en retourna à Karason, où il mourut subitement, ayant regné vingt ans : Il fut le dernier des Perses descendant de Kayumarras, & auquel finit la Monarchie Persienne, & passa aux Califes, successeurs de Mahomet, qui mirent leur siege premierement en Kufa, & depuis en Bagader, comme il se dira cy apres.

ROYS DE PERSE DEVISQVE LES ARABES ONT COMMENCÉ D'Y COMMANDER iusques a nos iours, selon l'Historiographie Persien Mircond.

TOUTES choses se retrouuent si confuses à ce nouveau changement de Seigneurs en Perse, qu'à peine sçaurroit-on donner aucun commencement à vne bonne & veritable narration : toutesfois l'Historiographie Mircond en ayant aucunement éclaircy la Chronologie,

le Lecteur ne lairra pas de trouver vne suite de Roys aussi continuee en ceste famille des Califes, & autres Princes Arabes qui ont gouverné la Perse, comme il a fait en celle de gayumarraz.

Il dit donc que Mahomet le faux Prophete, ayant commandé à plusieurs nations l'espace de dix ans, laissa par sa mort son Estat fort embrouillé pour les diuisions qui naquirent entre ses principaux Capitaines : mais qu'apres plusieurs grandes disputes, la souveraineté tomba entre les mains de Aububakar, lequel fut le premier qui se fist appeller le Calife, titre, lequel ses successeurs voulurent auoir depuis : car comme ces tyrans vouloient fonder leur Empire sur vne apparence de Religion, ils couurirent leur ambition & avarice par des noms specieux de sainteté & de pieté, comme cestui-cy entre autres qui signifie Dieu, donné par vne rencontre toutefois toute contraire à leur intention : car ils vouloient dire qu'ils estoient donnez de Dieu pour le salut des peuples, & ils estoient enuoyez de luy comme vn fleau, pour punition & chastiment. Cét Abubakar continua les conquestes de son predecesseur, mais ce fut fort peu de temps, car il ne gouverna que deux ans & demy.

HOMAR II. Calife, & premier Roy de Perse, depuis que les Arabes l'eurent conquis.

Après la mort d'Abubakar, le Sceptre Mahometan vint entre les mains de Homar, lequel ayant delà tenu dix ans & demy, voyant les entreprises luy succeder en toutes choses, aduertty qu'il fut combien la Perse estoit delà tourmentee par les Turcs, il pensa qu'il donneroit vn grand accroissement à sa domination, s'il se venoit ietter à la trauesse, comme il fit du temps de Iazdgerd, comme il a esté dit cy-dessus, ce qui luy réussit si honteusement par la mort subite du Roy de Perse, qu'il se rendit Seigneur souverain de cette prouince, avec plus de promptitude & facilité qu'il ne se l'eust osé persuader, établissant par luy & ses successeurs Califes, son siege Royal à Bagadet, & mourut vn an apres, enuiron l'an de nostre salut 635. & de l'Egire, ou des ans de Mahomet 33.

OSMAN, ou OTMAN V.

A Homar succeda Otman, duquel nostre Historien ne dit autre chose, sinon qu'il regna vnze ans & demy, comme aussi les guerres des Mahometans, & la pointe de leurs armes se tournoit plustost contre l'Europe, que contre l'Asie, qui estoit presque toute à leur deuotion.

ALY IV. Calife.

Mahomet le faux Prophete, apres sa mort laissa vn sien cousin germain, qui estoit aussi son gendre nommé Aly, & des Perfes Morts Aly, lequel vint à la Couronne Mahometane apres Otman, les sectateurs duquel content de grandes conquestes qu'il fit, & disent des merueilles de sa valeur, plustost dignes de rusee que de verité. Ce fut cestui-cy qui apporta le premier divorce en la secte Mahometane, qui par succession de temps a duré iusques aux Sophians, qui s'en disent descendus, aussi ont-ils esté de tout temps ennemis des Eunis, qui sont ceux qui tiennent la mesme croyance que font les Turcs. Cestui-cy ne regna que quatre ans & demy, ayant esté tué en trahison par vn sien sectateur, estant en la Cité de Cula en l'Arabie : ceux de la secte disent que les siens l'ayans trouué mort lauerent le corps, & l'embauserent selon leur coustume, puis le mirent sur vn chameau (car on dit qu'il l'auoit ainsi ordonné deuant que mourir) lequel ils laisserent aller à sa volonté, le suiuant tousiours, iusques à ce qu'apres plusieurs destours il vint s'arrester en vn desert d'Arabie, proche de Cusa, ou ils luy erigerent vne fort riche sepulture, à laquelle, comme avec le temps on eut apporté plusieurs dons & offrandes par la deuotion des sectateurs qui y venoient comme en pelerinage, on y bastit vne fort somptueuse Mosquee, & d'vne Architecture fort curieuse : mais comme avec le temps la deuotion s'est refroidie, & que les presens & offrandes ont manqué : l'edifice a aussi beaucoup perdu de son lustre, vne bonne partie tombant en ruine.

ACEM V. Calife.

La mort de Aly apporta de grandes dissensions entre les Arabes sur la succession du Califat, d'autant que les vns vouloient que Acem fils du deffunct Aly succedast à son pere : les autres vouloient que ce fut Mauuya fils de Sasion, fils de Harab de la race de Benhumia, toutesfois apres plusieurs desbats ils eleurent pour Calife Acem, duquel il ne iouit que six iours.

MAUYA VI. Calife.

Mauuya vint en fin à la iouissance du Califat apres la mort de son competitor, l'an de nostre salut six cents soixante & deux, & de l'Egire quarante & vn, duquel il iouit l'espace de vingt anneés, sans toutesfois auoir fait aucune chose pour la Perse digne de memoire. Du temps de ses differents contre son predecesseur, il auoit esté fort bien seruy & secouru par vn grand & renommé Capitaine Abdalzyad, auquel pour recompense Mauuya donna la Cité de Bafora, qui est proche de deux fleuves, Tigris & Euphrates, enuiron le lieu où ils confluent ensemble, & se viennent engoulpher dans le sein Persique. Mauuya mourut l'an de nostre salut six cents octante & deux, & de l'Egire soixante & vn.

Y H B Z I D.

YHEZID VII. Calife.

Yhezid fils de Mauuia succeda à son pere au Califat, & à la Seigneurie de Perse, en la iouissance de laquelle il ne fut pas plustost entré que Ocem fils de Aly neveu de Mahomet, & frere de Acem luy fist la guerre, & se liurerent bataille en la campagne de Kabelah, où il y a auourd'huy vne ville appelée Mechet Ocem fondée en ce desert pour la deuotion de sa sepulture. Sur le sujet de la mort de Ocem vn Capitaine Arabe nommé Abdalazuber print les armes contre Yhezid, comme pour venger la mort de Ocem : & luy fit vne cruelle guerre l'espace de trois ans qu'il gouuerna, & apres sa mort il entra dans toutes les Prouinces de son Empire, ravageant l'Arabie, la Perse, Aderbajon, Karason, & autres : puis s'estant ietté sur l'Egypte, il print son chemin par la Mecque Cité d'Arabie, où il y a vn port des plus remarquables de la mer rouge, & mourut Yhezid en l'an de salut six cents ostante & cinq, & de l'Egire soixante & quatre.

MAUVYA II. du nom, VIII. Calife.

Mauuya second du nom, neveu du premier Mauuia, & fils du defunct Yhezid fut installé au throsne de son pere incontinent apres sa mort : mais sa grande lascheté, & son incapacité, luy en osterent la iouissance presque aussi tost qu'il l'eut receüe, ayant esté déposé le quarante & vnième iour de son regne, laquelle deposition apporta vn grand remuement à tout cét Estat, chacun des plus grands Seigneurs aspirant à la principauté : mais en fin le party de Maruuan fils de Akam Ebenhumya parent du Calife, qui auoit esté déposé preualut contre tous les autres, moyennant le support & la faueur que luy fit Abdelaziad, auquel nous auons dit que Mauuya premier du nom auoit donné la Cité de Basora.

MARUVAN IX. Calife.

Maruuan parent de Mauuya, & de la mesme race paruint au Califat en l'age de quatre-vingts ans, où il ne fut pas si paisiblement receu, qu'il ne fust forcé de leuer vne grande armee pour empescher les Arabes de la Mecque (qui ne l'auoient point voulu recognoistre pour Seigneur) de passer outre, lesquels vouloient establir en l'Empire les descendants de Aly : car ils tenoient pour tyrans ceux qui n'estoient point de sa race : pour cét effect ils s'estoient assemblez de toutes parts, ayans eleu sur eux vn chef nommé Soleymon Ben Moncaeb, & vindrent attaquer la Cité de Cufa, pour lors fort renommee en l'Arabie, & la principale de l'Empire des Califes, auourd'huy totalement ruinee : aussi fut-elle destruite de ce temps-là par ceux-cy qui firent vn grand massacre de tout ce qu'ils trouuerent de la lignee de Benhumya, de laquelle estoit Maruuan, lequel aduertty du chemin, & du dessein de ses ennemis, leur vint au deuant iusques à la ville de Orfa en la Mesopotamie, ainsi appelée à present, & par vn autre nom Raha, c'estoit anciennement la ville de Vr, où les Chaldecens voulurent brusler le Patriarche Abraham, pour l'adoration du vray Dieu, ceux-cy estans idolatres. Ce fut en ce mesme lieu là où Maruuan donna la bataille à ses ennemis, de laquelle il demeura victorieux, avec la mort de Soleymon leur general.

Après ceste grande victoire, Maruuan s'en retourna tout triomphant à la maison, mais elle luy cousta bien cher : car sa femme qui estoit parante de ce Soleymon, desirant de vanger sa mort, & celle de ses autres parens & amis qui estoient demeurez en ceste bataille, l'estrangla la nuict comme il dormoit, mourant ainsi en l'age de quatre-vingts & vn an, en l'an 686. de nostre salut, & de l'Egire 65. & ayant regné vn an.

ADELMALEK X. Calife.

La victoire obtenue par Maruuan donna vne facile entree au throsne Royal à son fils Abdelmaleck, où il ne demeura pas long temps en repos : car vn Capitaine des Chihahis qui sont ceux qui tiennent le party de Ally appelé Moktar. Eben Ebiabeb Kakasy accompagné d'un autre nommé Ebrahim Achtar, mirent ensemble fort grand nombre de soldats en campagne, & s'en vindrent ravager les Prouinces de Aderbajon, Diarbek, Auas, & autres Prouinces de la Perse, & Mesopotamie, faisant vne si cruelle guerre par tout où ils passoient, qu'ils ne laissoient pas vn de ceux du party contraire, qu'ils ne taillassent en pieces. Contre ceux-cy Abdelmalek leua vne armee de septante mille hommes de guerre, & s'en alla premierement attaquer Abdalahziad, contre lequel il combattit, & luy fit perdre la bataille & la vie, apres auoir esté Seigneur de Basora 41. an : puis il donna le Gouuernement des Terres de Iazirey, qui est la Mesopotamie à Abraham Malek, & mit pour Gouuerneur à Basora Mazaeb Bézober frere de Abdela Zober, il fit apres la guerre à Mokta, & le défit & tua en vne rencontre qu'il firent ensemble. A quelque temps de là le Calife Abdelmalek leua encore vne puissante armee contre Mazaebzober, qu'il combattit & vainquit, recourant les terres que cestui-cy possedoit en Perse. De là il s'en alla à Damas, d'où il despeicha Osiagé, ou Asiagé contre Abdalazobert qui s'estoit reuolté, & se tenoit fort dans la Mecque, lequel fut semblablement vaincu, & mis à mort comme les autres rebelles, apres laquelle mort Abdelmalek iouit en paix de ses Estats, donnant à

Osiagé pour recompense de ses services, le Gouvernement de Ayerakhen, & de Karason. Abdelmalek fonda apres vne grande & populeuse Cité nommee Vvacet, c'est-à dire milieu, d'autant qu'elle est située entre deux fleuves, & au milieu de la Mesopotamie, de laquelle il ne reste plus que les ruines. Puis ayant Abdelmalek regné vingt & vn an & vn mois: il mourut l'an de nostre salut 706. & de l'Egire 86. laissant quatre fils, Oelid, Soleyman, Yhezid, & Ochon.

O E L I D II. *Calife.*

Après la mort de Abdelmalek Oelid succeda à la Principauté. Cestui-cy surpassa ses devanciers en pouuoir & richesses, dilatant son Empire par le moyen de ses Capitaines, entre lesquels vn nommé Koteybah Eben Mosolem mourut, & conquist le Karason iusques au Turquestan, conquistant toutes les terres de Maurenahar, & de Koarrzim. D'autre costé Meseleima Ben Abdel Malek entra avec vne puissante armee sur les terres de l'Empereur Grec, vers le costé de Constantinople, conquerant plusieurs d'icelles, & obligeant l'Empereur à luy payer certain tribut. Or si Oelid se rendit redoutable, & quasi invincible pour son grand travail au faict des armes: il ne prit pas moins de contentement à bastir, & construire plusieurs edifices publics en diuers lieux, & sur tout le plus fameux fut la Mosquee de Damas, laquelle il fit edifier avec vn Architecture, & artifice admirable, outre la richesse & somptuosité d'icelle.

Environ ce temps mourut Osiagé en Karason, celuy que Oelid avoit enuoyé pour gouverner ces terres-là, aagé seulement de quarante-cinq ans, lequel on assure avoir esté si cruel, qu'il fit mourir en ceste estendue de pais durant le temps de son Gouvernement, plus de cent mille hommes, sans vn nombre infiny de ceux qu'il fit mourir durant les guerres qu'il eust, & les batailles qu'il donna. Il laissa trente mille esclaves captifs de diverses nations, qui est bien vne marque de son grand pouuoir. A la fin de la mesme année, qui fut celle de nostre salut 715. & de l'Egire 95. mourut Oelid aagé de melme son Capitaine de 45. ans, ayant regné neuf ans & huit mois.

S O L E Y M A N XII. *Calife.*

Soleyman fils de Abdel Malek, & frere de Oelid, luy succeda au Califat. Or comme la Perse n'estoit pas encores toute reduite à l'obeissance des Califes, aussi y avoit-il tousiours quelque nouveauté, & quelque sujet de guerre, soit en vne Prouince, soit en vne autre. Entre les autres il y en avoit deux qui ne s'estoient point encore réduës, Oerion, & Tarboham, contre lesquelles il enuoya Yezid Eben Mahalep fort bon Capitaine, avec vne bastante armee pour les conquerir, lequel fit si bien qu'il les assujettit du temps de Soleyman, par le conseil de Isafar Barmaki son Vvasir, on fit vn reglement sur la valeur des monnoyes, qui iusques alors avoit eu cours avec vne grande confusion, & grand interest des peuples: & peu apres il mourut à Damas d'une grande douleur de costé, ayant regné deux ans & demy.

H O M A R XIII. *Calife.*

A Soleyman succeda Hamar, ou Homar, fils de Abdala Azis, fils de Maruuan, frere aîné du defunct Calife: les vns disent volontairement, & les autres que ce fut par force, nonobstant les empeschemens que luy voulurent donner ses autres freres. Encore en y a-il qui disent que Soleyman devant que de mourir l'introduisit à l'Empire: mais en quelque façon que cela se soit passé, il est bien certain qu'il luy succeda. Ce More estoit fort jaloux, & superstitieux de sa secte. On estoit lors en l'an 98. de l'Egire, & de salut 717. & quand les descendants de Abas oncle de Mahomet, s'eleuerent contre Homar, & luy firent la guerre, pretendans que le Califat leur appartenoit de droict, principalement vn Aly Eben Abas, lequel enuoya plusieurs Ambassades à diuers Princes, les persuadans & sollicitans de secouer le joug de Homar, & qu'ils le recogneussent pour Seigneur, ayant esgard à la Iustice de son droict, qui luy donnoit legitimelement l'Empire. Mais durant ces traictés, Ochon fils de Abdel Malek, & frere de Soleyman, empoisonna Homar, de sorte qu'il mourut en l'age de quarante ans, ayant regné deux ans & cinq mois. Ce qui aduint en l'an de nostre salut 720. & de l'Egire 101.

Y E Z I D II. *du nom, XIV. Calife.*

La mort de Homar donna l'Empire à Yzeid troisieme fils de Abdel Malek. Tout au commencement de son regnee vn Abu Moelem Karason se reuolta à la persuasion de Aly Ben Abas, & firent ensemblement la guerre contre Yezid deux ans continuels, à la fin desquels ce Calife mourut, sans avoir faict aucune chose digne de memoire, l'an de salut 724. & de l'Egire 105. ayant regné quatre ans & huit mois.

O C H O N II. *du nom, XV. Calife.*

Ochon celuy qui avoit donné la prison à Homar, & frere du defunct Yezid parvint à son tour au Califat, durant le temps duquel il y eut quelques remuemens en la Perse, auxquels Nacer Sayar, & Yucef Eben Homar el Sacafy deux Capitaines de fort grande reputation, luy firent

furent de notables services : Aussi les recompensa-il de bons Gouvernemens, donnant à Sayar les terres de Karason, & à Yucefben Homar celles de Hierakhen. Le reste du regne de ce Calife, qui fut dixneuf ans & huit mois, la Perse fut tousiours paisible, iusques à sa mort, qui aduint l'an de salut sept cents quarante & trois, & de l'Egire 224.

O L I I I. II. *du nom*, XVI. *Calife*.

Après la mort de Ochon, Oelid fils de Yezeid fut esleu Calife : Cestui-cy eut de grandes guerres contre ceux de la famille de Abas, d'entre lesquels mourut vn Abdalah Ben Abas, vn des principaux pretendans au Califat, par la mort duquel il croyoit qu'il deuoit estre beaucoup fortifié en son Empire. Et pour s'y asseurer dauantage, il fit aduouer pour Princes successeurs en ce Gouvernement deux fils du deffunct Abdalah, pensant par ce moyen appaiser les courages de ceux de ceste famille, l'un desquels s'appelloit Ebrahim el Safa : mais toute sa preuoyance luy fut de peu de profit, par ce qu'il estoit si terrible, & d'un si mauuais naturel, qu'il s'acquit vne haine vniuerselle de tous ses sujets, & principalement de gens de guerre qui le tuerent, n'ayant iouy de sa domination que quatorze mois.

Y E Z E I D III. *du nom*, XVII. *Calife*.

Yezeid fils de Oelid, appelé communement Yhezide Nokhes, comme si l'on disoit l'Amoindry, pour auoir retiré ce que ses ancestres auoient donné, succeda au Royaume en l'age de quarante ans, duquel il ne iouit que six mois au bout, desquels il mourut en Damas.

E B R A H E M XVIII. *Calife*.

A Yezeid succeda à son frere Ebrahim, lequel n'ayât encores tenu le sceptre que deux mois, les plus grands de ses sujets voyant son peu d'industrie, se comporterent fort audacieusement en son endroict, & entre autres vn Mar Vvan, qui estoit mesme de sa famille, lequel se reuolta contre luy, & le print, puis le mist en prison, où il le tint trois mois, au bout desquels il le fit mourir.

M A R V V A N. II. *du nom*, XIX. *Calife*.

Mar Vuan s'estant emparé violement du Royaume, les affaires furent en fort grand trouble, les Mores ne se pouuans guieres bien accorder entr'eux. La Prouince de Karason estoit alors gouvernee par Nacer Sayar, lequel ayant pris les armes contre Malab, qui auoit le Gouvernement du Royaume de Kermon. Ceste guerre fut fort sanglante & cruelle. D'ailleurs en Mar Vuo, ceux de la famille de Abas se souleuerent, contre lesquels ceux de Karason & de Kermon s'unirent entr'eux pour s'opposer à leur fureur, & firent en sorte qu'ils vindrent aux mains : mais ceux de Abas les vainquirent, & y demeura de ceux de Kermon plus de cent mil hommes, principalement de ceux de Benhumia. Quant à ceux de Karason, ceux qui resterent de ce conflict s'enfuirent à Sauua. Ils auoient pris pour Capitaine vn nommé Abu Moelem, lequel prenant occasion sur ce divorce, & non content de la charge qu'il auoit aspirant à choses plus grandes, il enuoya Katabeyeben Echabib avec vne puissante armee, pour s'emparer de la contree de Hierak, comme il fit : & de là s'en alla à Cufa en Arabie, où il rencontra Maruuan, qui estoit party de Vuacet pour luy aller en rencontre. Ce qu'il fist : mais ce fut sur la nuit, tout ioignant le fleuve Eufrates, où sans attendre dauantage ils combattirent, en laquelle rencontre ceux de Maruuan assaillirent leurs aduersaires avec vne telle impetuosité, qu'ils les contrainquirent de se retirer vers le fleuve pour se sauuer à nage, dans lequel Katabey s'abisma sans que cela fut recogneu des siens, lesquels reprenans courage, & pensans auoir leur Capitaine au milieu d'eux, retournerent à la charge contre ceux de Maruuan, avec tant de courage qu'ils les vainquirent. Cela arriua enuiron le point du iour, lequel, comme il fut vn peu plus clair, les vainqueurs recognoissans que leur Capitaine leur defailloit, esleurent aussi tost en sa place Acem son fils, lequel sans autre delay poursuivit ses ennemis, qui fuyoient à Cufa, & trouuans de rencontre en leur chemin Safa, qui estoit de la famille d'Abas, vn des deux que Oelid auoit fait recognoistre pour Prince, comme il a esté dit cy-deuant, ils le declarerent Calife contre sa volonté : neantmoins cestui-cy se voyant le commandement entre les mains, enuoya trois de ses oncles Safa, Abdula & Abdamer, avec de grandes forces contre le fils de Maruuan, lequel ayant rassemblée ses troupes, s'en reuint vne autrefois pres le fleuve d'Eufrates, où de rechef il leur donna la bataille en laquelle il fut vaincu, & contrainct de s'enfuir à Mecere en Egypte, qui est le Caire où il fut pris, & fait mourir l'an de nostre salut 551. & de l'Egire 132. après auoir regné cinq ans, avecques lequel moururent plus de quatre-vingts personnes de la lignee de Benhumia : & à ceux qui estoient desia morts, ils rompirent leurs sepultures, & en brulerent les os, sans pardonner à qui que ce fust de ceste lignee, excepté à vn nommé Hamarben Abdala Azis, auquel pour sa grande bonté tous ses ennemis donnerent d'un commun consentement la vie, & la liberté, tant la vertu a de force, mesmes entre les plus mortels aduersaires. C'est ainsi que l'Empire de ceux de la lignee de Benhumia finit au fils de Maruuan, pour passer en celle de Eben Abas, qui tindrent fort longuement l'Empire, comme il se dua cy-après.

faisant la plus grande diligence qu'il luy fut possible, arriva à Karon. Ce que sçachant les parents, & les plus proches partisans de Akem, voyans leurs forces trop debiles pour resister à vne telle puissance, pour sauuer leur vie, ils empoisonnerent Akem, croyans par sa mort tirer vne meilleure condition du Capitaine Persien, publiant par tout qu'il estoit monté aux cieux: toutesfois Monfaeb apres auoir subiugué toutes ces terres là, voyant qu'il ne pouuoit auoir son ennemy, ny mort, ny vif, il print vne seuerie punition de ses parens, & de ses partisans, en faisant bruler autant qu'il en pouuoit auoir, qui ne furent pas en petit nombre. Tout cecy arriva en l'an de nostre salut 786. & de l'Egire 169. en laquelle année mourut Machadi Bila en l'aage de 43. ans, ayant esté Calife dix ans & vn mois.

ELADYBILA MUSÀ XXIII. *Calife.*

A Mahady succeda son fils Elady Bila Musa, mais ce fut pour peu de temps, au grand regret de tous les siens, pour estre vn Prince fort affable, de bon naturel: mais toute sa gaye humeur, ny la belle disposition qu'on disoit qu'il auoit, ne le peurent garantir qu'il ne mourut, n'ayant regné qu'un an & trois mois, l'an 787. & le 170 de l'Egire.

ARRACHID BILA HARUM XXIV. *Calife.*

Arrachid second fils de Mahaby, par la mort de son frere succeda à l'Empire. Il eut pour Vazir Hyahya Kaled Bermaky, homme de grande prudence en affaires de Gouvernement. Ce Prince en l'an de salut huit cents quatre, & de l'Egire cent octante & sept, enuoya massacrer les Berameques, qui estoient de fort noble famille, & ses Vaziris, pour le soupçon qu'il auoit, que ceux-cy voulussent attenter quelque chose contre luy, & trois ans apres les Grecs luy firent la guerre: mais enuoyant vne armee contr'eux, il en sceut prendre telle raison, qu'il contraignit l'Empereur à le rechercher de paix, & de l'achepter avec grande somme de deniers. Ceste guerre acheuee, il en eust vne autre en Maurenahar, d'où s'estoit fait nommer Roy vn nommé Rakh Eben Nacer de Samarkan, contre lequel Arrachid voulut aller en personne: mais la mort le surprit en chemin, qui luy fist perdre la vie à Thus, ville capitale du Royaume, & de la prouince du mesme nom, ayant tenu l'Empire vingt cinq ans. Cecy aduint l'an de salut 810. & de l'Egire 193. Ce Prince eust quatre fils, à sçauoir Mamed Hammi, auquel il donna tout ce qu'il possedoit en Alep, & aux enuironns vers le Couchant. Mahamum, auquel il donna la Perse, Karason, & toutes les terres dependantes d'icelles, & au troisieme nommé Kacem, il donna le Gouvernement des Prouinces de Aderbajon, & de Diarbek. Quant au quatrieme nommé Matacon, d'autant qu'il ne l'aymoit point, aussi ne luy fist-il part de rien, mais toutesfois la sienne ne fut pas en fin la pire.

MAHAMED AMIN XXV. *Calife.*

Arrachid Harum auoit nommé pour successeur au Califat Mahamed Amin son fils, auquel estant installé, il luy faisoit fort de voir son Empire si diuisé, & d'en auoir si petite part, si qu'avec ceste pensee, la premiere chose notable qu'il fist, fut de penser aux moyens qu'il auroit pour deposseder quelqu'un des siens: & sur cela il assembla vne puissante armee, commandant aux chefs d'icelle d'entrer dans la Perse. Mahamum, à qui nous auons dit que le Pere auoit donné ceste contree, ne se tenant pour assuré du remuement de son frere Amin, se tenoit sur ses gardes, & voyant que l'orage estoit prest de tomber sur luy, il leua vne puissante armee, de laquelle il donna la charge à vn sien Vazir nommé Taher Ben Ocem, lequel alla aussi tost attaquer ses ennemis, leur liura la bataille, & les vainquit, les poursuivant iusques à Bagar, dans laquelle il entra par force, & print le Calife Mahamed Amin, lequel il emmena quant & soy, & le fit mourir par le chemin, apres auoir tenu l'Empire quatre ans & sept mois, l'an de salut 814. & 198. de l'Egire.

MAHAMUM BEN HARUM XXVI. *Calife.*

Mahamum Ben Arum frere du defunct, que le Vazir Taher auoit fait mourir luy succeda au Califat. Il fit lors son principal Vazir Fazele Ben Saleh, homme prudent, & fort entendu au Gouvernement: & comme les affaires de son Empire estoient lors paisibles, il fist vne grande despence pour faire traduire de la langue Grecque, & Surienne, en Arabesque, tous les liures qu'il peust recouurer de Philosophie, Mathematique, Astrologie, & Medecine: mais ceste paix ne dura pas long temps en Perse: car vn nommé Babek Coraïndin, se reuolta en Aderbajon, contre lequel il enuoya quelques troupes. Mais la guerre ne laissa pas de durer quelque temps, à la fin toutesfois ils s'accorderent, l'an de salut huit cents vingt & vn, & de l'Egire 205. Ce fut en ceste année que Mahamum enuoya Taher Zulemin pour gouverner les terres des Karason: mais Mahamum s'en repentit bien tost, car il sceut que cestui-cy aspirait à plus grande chose que le Gouvernement, & brasloit quelque nouveauté. Cela fut cause qu'il fit apprestier Hamed Abichaled, pour s'opposer aux entreprises de cestui-cy: mais cela fut incontinent apaisé par la mort de Taher.

Le Calife toutesfois, nonobstant les menées du defunct, ne laissa pas de donner le Gouver-

nement à vn sien fils nommé Talahe Ben Taher : mais le deffant Taher auoit vn autre fils nommé Abdula, lequel le pere auoit enuoyé faire la guerre aux Vsbekes, d'autant qu'ils ne vouloient pas recevoir sa secte, & estant retourné victorieux de ceste iournée, il trouua son pere mort, & son frere en possession du Gouvernement. Ce qui luy fut vne chose fort fascheuse à souffrir : mais son frere avec le consentement du Calife, le print pour compagnon au Gouvernement, & ainsi toutes choses demeurerent paisibles, en laquelle paix elles continuèrent le reste de la vie de Mahamun, qui mourut l'an de salut 826. & de l'Egire 210. ayant regné douze ans & sept mois.

ABVEZACH MATACON XXVII. Calife.

Après la mort de ces deux, cestui-cy paruint en fin à l'Empire, lequel le pere auoit autrefois tant mesprisé, que de ne luy point faire de partage en son heritage : car il estoit fils de Harun, & frere des deffunts. Cestui-cy à son aduenement à la Couronne fonda vne ville à costé de Bagadet vers le Septentrion, distante de celle-cy d'environ trois milles, sur le fleuve de Tigris, qu'il nomma Samarra, laquelle fut quelque temps florissante : mais elle vint depuis en telle decadance, qu'il n'en reste aujourd'huy que les ruines. A la mort de Mahamun-Babek Coram, qui auoit le Gouvernement de Aderbaion, s'estoit reuolté par deux fois : mais à la dernière Matacon y enuoya vne si puissante armee contre luy, qu'il fut deffait & prins prisonnier, auquel ce Prince fist couper les pieds & les mains, puis le fist pendre & estrangler. Il y eust toutesfois encores quelques remuemens en la Prouince de Karason, à cause de la Prouince de Siston, qui est au pais bas de Karason & Kermon, vers le costé du sein Persique, & est contiguë d'un costé à la Perse, au Gouvernement de laquelle Siston est suëtte, & d'un autre costé au Royaume de Macron, voisin des terres de l'Inde. Car il s'eleua en ce temps vn homme en ceste prouince de Siston, qui accompagné de tous ceux qui le vouloient suiure, occupa à force d'armes la meilleure partie d'icelle. Et comme cela dequoy s'estoit emparé ressortist à la Iurisdiction de Karason, Talahe qui y commandoit pour lors, arma en diligence, & alla au deuant de Amzah, ainsi s'appelloit le rebelle qui continuoit ses conquestes, le combatit, & emporta victoire, & de là s'en retourna à Karason, où il tomba malade incontinent apres, & mourut en l'an de salut 829. & de l'Egire 213. laissant en son lieu Aly Ben Talahe son fils, contre lequel les Princes ses voisins firent vne longue & fascheuse guerre, iusqu'à ce qu'en fin Aly fut tué en vne rencontre qu'il eut avec eux. Mais la guerre ne cessa pas toutefois, au contraire il sembla que ceste mort ne l'auoit fait qu'enflammer dauantage. Durant que tous ces remuemens se faisoient en Karason, Matacon faisoit la guerre à l'Empereur Grec, sur lequel il emporta plusieurs victoires, puis mourut en l'age de quarante-huict ans, l'an de salut 833. & de l'Egire 217. ayant regné huict ans. Il laissa apres sa mort huict fils & huict filles, huict mille esclaves, print huict Citez capitales de huict Royaumes, desquels il fit mourir huict Roys. On trouua aussi huict millions d'or en son thresor, tous lesquels octonaires sont fort remarquables. C'estoit vn fort grand guerrier, affable neantmoins, & liberal, aymé de tous, mais principalement des gens de guerre.

VVACEK XXVIII. Calife.

Vvacek succeda à son pere Maracem, duquel Calife il ne se trouue rien de notable. Voicy seulement ce qui aduint en Karason, c'est que par la mort de Aly Ben Talahe son oncle, Abdula Ben Taher luy succeda au Gouvernement du Royaume de Karason, du temps duquel encores que les terres de ceste contree sont tres-fertiles & abondantes, il arriva vne terrible & vniuerselle famine, causee d'une fort grande secheresse, qui dura quasi trois ans en toute ceste contree, qui la rendit presque toute despeuplee. Mais il vint apres de grandes pluyes, qui la rendirent fertile comme auparauant, si que les peuples retournerent chacun chez soy. Or en ceste reünion, les Perses & les Mores s'assemblerent pour faire la guerre aux Gentils, qui estoient encor pour lors en ceste terre, & de la mesme nation qu'ils appellent toutesfois vulgairement Mayusi, qui sont ceux qui reuerent le feu, desquels il y a encore aujourd'huy grand nombre en la Perse : mais ceux-cy en firent toutesfois alors vn grand massacre, & alors mourut Abdula Taher en Karason, auquel succeda son fils Taher Ben Abdula, y estant confirmé par le Calife Vvacek, lequel mourut aussi à deux ans de là, ayant commandé cinq ans & neuf mois, en l'an de salut 838. & de l'Egire 222. laissant le Califat à son frere Isafar.

ALMOTO VVAKEL, BITA ISAFAR XXIX. Calife.

Almoto Vvakel, Bita Isafar succeda à son frere Vvacek, du regne duquel les descendants de Aly s'eleuerent, auxquels il empescha de tout son pouuoir leurs pelerinages à sa sepulture, qui est en Meschat Ocem, aux deserts de Kalbelah, comme il a esté dict cy-dessus. Et afin que cela luy peust reüssir plus heureusement, il fit rompre les chaussees de l'Euphrate en plusieurs endroits, afin que noyant les champs de toutes parts, il leur empeschast ainsi sans grand travail le passage de toutes parts, pour la grande plaine de ce desert.

Du temps

Du temps de ce Calife, Taherban Abdule mourut en Karason, laissant son gouvernement à son fils Mahamed, lequel donna à vn sien oncle frere de son pere, les terres de Tabarstan pour viure & demeurer en icelles, desquelles toutesfois il iouyt peu de temps, comme il sera dict en son lieu.

Quant au Calife Vvakel, il auoit vn fils nommé Montacer, desireux infiniment de regner, si bien que son ambition le porta à vne si grande meschâceté, qu'il fit tuer son pere par les mains de ses esclaves, ayant regné douze ans, l'an de salut 850. & de l'Egire 234.

MONTACER BILA XXX. Roy de Perse.

Cet execrable parricide paruint ainsi à l'Empire: mais ce luy fut vne courte ioye, car au bout de six mois vne grande maladie le priua de la vie, & de ce qui l'auoit tant désiré.

ABUL ABAS HAMED XXXI. Calife.

Abul Abas Hamed fils de Mahamed, fils de Matacon, comme plus proche parent du defunct luy succeda au Califat: mais y ayant commandé cinq ans & neuf mois avec fort peu de satisfaction des siens, ses soldats le prindrent, & le jeterent en vne fort estroicte prison, où ils le laisserent mourir de faim. A l'heure les affaires de Perse estoient vn peu confuses, parce qu'en la Prouince de Tabarstan, que nous auons dit cy dessus auoir esté baillée par Taber à son oncle Soleymon, se souleua vn nommé Acemben Zeyd Alauuy, c'est à dire, enuoyé de Dieu, lequel s'empara de la contree de Tabarstan, contraignant Soleymon de s'enfuir à Bagader, où il fut benignement recueilly par le Calife qui regnoit lors, qu'on appelloit Mostahhin, lequel luy fit beaucoup d'honneur. Cependant Acembenzeyd ayant mis de bonnes garnisons par toute la Prouince qu'il auoit conquise, il entra dans la Perse, où il fit de grands rauages, prenant Deylon, Gueylon, Habar, Zenion & Casuin, ce qui aduint en l'an huit cens cinquante six, & de l'Egire 240.

MOSTAHHIN XXXII. Calife.

Les soldats ayans ainsi fait mourir de faim leur Roy, il y eut de grands differends entre les Mores sur la creation d'vn autre, mais en fin il s'accorderent tous à l'eslection de Mostahhin parent du defunct Calife, & l'instalerent sur le throsne Royal, duquel il iouit fort peu de temps, car au bout de seize mois, estant tombé malade il mourut l'an de salut huit cens cinquante huit, & de l'Egire 242.

ALMATEZ BILA XXXIII. Calife.

Aussi tost qu'Almatez Bila fut paruenue à l'Empire, il enuoya vne fort puissante armee contre Acemben Zeid, sous la conduite d'vn Capitaine nommé Muça Ben Buka, lequel entrant en la Perse combatit contre ses ennemis, eut victoire d'eux, recourât par ce moyen la Royale cité de Charear, Casuin, Hebar, Zenon, & contraignit Dahe Alauuy frere de Acemben Zeid à Tabarstan où il mourut: si que Acen fut contraint d'enuoyer vn sien autre frere en sa place nommé Mahamed Eben Zeld. Tandis que ces choses se passoient ainsi en Perse, les soldats du Calife Almatez tous mal contents & ennuyez de luy le firent mourir en ceste maniere: ils entrerent dans vne estuue où il estoit au bain, & le forcerent de boire plain vn bogal d'eau fort froide qui le fit mourir fort promptement, ayant regné trois ans & demy, l'an de salut 862. & de l'Egire 246.

MOTADY BILA XXXIIII. Calife.

Après la mort de Almatez, on eueut pour Calife Motady Bila, mais il ne iouit de sa Principauté que vnze mois, au bout desquels les soldats le firent mourir, l'an huit cens soixante trois, & de l'Egire 247.

ALMAT HAMED BILA XXXV. Calife.

Almat Hamed Bila Hamed Eben Emoto Vuakel par la mort de Motady fut fait Calife, lequel pour s'asseurer de ses parents & amis, desquels il falloit pour lors se tenir plus en garde que des autres: il trouua moyen de leur donner à tous de diuerses charges, & de les enuoyer par la contree de Hyaman & de Medine en l'Arabie, & d'autant que par toute ceste Histoire on parle souuent du nom de Medine, il sera ce semble bien à propos de donner aduis que ce mot est vn nom commun, qui signifie quelque peuple. Voila pourquoy on a accoustumé d'y en adiouter vn autre, ainsi qu'en Espagne on dit Medina Celi, Medina Cidony, ou Medina del Campo, qui sont mots qui viennent des Mores: aussi par excelléce les Perses & Arabes appellent la ville de la sepulture du faux Prophete Mahomet, Medina el Nabi: c'est à dire, peuple du Prophete. Et quand ils vont en pelerinage à sa sepulture, bien qu'ils disent qu'ils aillent à la Mecque, toutesfois c'est à Medina el Naby, car ce n'est pas mesme chose, que ces deux villes estans bien esloignées l'vne de l'autre: Medina estant mediterrannée & distâte de l'autre de quatre iournees, & la Mecque ou Mokah est vne ville maritime située sur le riuage de la mer rouge: & le principal abord des vaisseaux des Mores qui naugent de ceste mer en l'Orient: mais d'autant que ceux qui viennent des parties Orientales à Medine se desembarquent à la Mecque,

Ils disent qu'ils viennent de la Mecque, & le mesme disent ceux qui viennent des parties Occidentales, d'autant qu'ayant accompli leurs vœux & pelerinages à Medine, ils passent à la Mecque pour faire leur empoitte de diuerses marchandises qui arriuent là, de l'Orient: & d'autant que ceste ville est sur le riuage de la mer rouge, comme il a esté dit, & qu'elle est la plus frequentee de toutes celles de ceste coste là, les Portugais l'appellerent le destroit de la Mecque, & de ceste façon se peut entendre que c'est que Medine ou Mecque qui est en ceste mer là, & non sur le Sein Persique, comme quelques vns ont voulu dire.

Reuenant maintenant aux affaires de Perse qui furent en grande confusion toutes ces années, il aduint qu'un nouveau Capitaine nommé Yacub Leys se reuolta en la contree de Siston, lequel du commencement n'eut pas beaucoup de gens de party, mais le bon-heur luy voulut tant qu'avec les petites troupes il print la ville capitale de la Prouince, & d'un mesme nom, & de là entra dans les terres de Karason avec un fort heureux succez iusqu'à Harat, terre de Maurenahar, où Mahamed Ben Taher auoit des garnisons, avec lesquelles Yacub Leys combatit & gagna la ville, ce qui luy donna l'assurance d'aller attaquer Mahamed Ben Taher qui estoit Gouverneur de Karason, lequel ayant eu aduis de sa venue abandonnant ses terres s'enfuit à Nichabur. D'autre costé Acen Ben Zeid Alauny continuoit tousiours ses conquestes, & occupoit les terres de Gerion, par laquelle Mahamed fut arresté, cestuy-cy luy empeschant le passage: de sorte que se voyant sans esperance d'aucun remede, assemblant au tour de luy le plus de forces qu'il peust se resolut de se deffendre contre Yacub Leys, & de le combattre comme il fit, mais il fut vaincu, & luy laissant un fort riche butin avec les terres de Siston & de Karason, & à Acen Ben Zeid Alauny celles de Gerion iusques à Rey Charear, il s'enfuit estant accompagné de peu de gens à Nichabur, où il fut poursuivy par Yacub Leys, lequel vint à rencontrer Abdula Saleh Vazir de Taher, & s'estans embouchez ensemble, cestuy-cy luy demanda avec quelle autorité il faisoit ceste guerre: d'autant que si c'estoit de la part du Calife, qu'on ne luy feroit aucune resistance, mais Yacub respondit tirant son espee de la gaine, que c'estoit celle là qui luy donnoit son droit & autorité: & comme Taher eut tasché de le faire venir vers luy avec bonne seurété, & que Yacub n'y eust point voulu entendre: ils combattirent encore vne autresfois, en laquelle Taher demeura au pouuoir de Yacub, qui le fit mourir, estant le dernier de ceux qui ayent tenu ce gouvernement. Il estoit d'une plus Royale nature, & de plus grande vertu que tous ses ancestres, mais d'autant que les faicts de Leys sont dignes d'admiration, & qu'il se void plusieurs rencontres & accidents fort notables en la vie de ce personnage, il sera peut estre bien à propos de la desduire plus au long, veu que la cognoissance d'icelle sert de beaucoup à l'Histoire.

En la Prouince de Siston viuoit un officier du Roy, qui est comme nous dirions entre nous un chaudronnier appelé Leys, lequel eut trois fils, Yacub, Hamer, & Aly, d'entre lesquels Yacub aprit l'art de son pere: & estant un ieune compagnon qui alloit pour gagner de çà & de là quelque pauvre iournee pour nourrir son pere & luy, il reseruoit tousiours quelque chose pour pouuoir despandre avec ses compagnons & amis, & soit à faire bonne chere ou à passer le temps à diuerses sortes de jeux, dissipant ainsi ce qu'il pouuoit auoir de rescrue, & continua ceste vie iusqu'à ce qu'il fut en aage de discretion, auquel ses compagnons qui estoient d'une mesme aage paruiendrent aussi tost que luy, & ce fut lors que des jeux puerils & feints, ils vindrent aux veritables. De sorte que Yacub ayant oublié ceux-cy par la liberté, qui a tousiours accoustumé d'esmouoir les plus refroidis, il les trouua bien disposez à le suivre, lesquels il arma de telles quelles armes qu'il peut recouurer, & commença d'espier les chemins, vsant tousiours de sa naturelle liberalité enuers ses compagnons, desquels il fut appelé Capitaine, ayant parmy cela cōpassion des miserables qui tomboient entre ses mains, leur ostant seulement vne partie de ce qu'ils auoient. Alors gouuernoit à Karason Taher Ben Abdula, duquel il a esté parlé cy dessus, auquel s'adresserent ceux qui auoient esté ainsi destrouffez, luy disant qu'un certain Salekh Ben Alar auoir attiré en sa compagnie Yacub Leys avec les siens, & qui luy auoit donné qualité de Capitaine, & l'auoit pris à solde: que cestuy-cy estant entré en la contree de Siston auoit pris la ville, & l'auoir pillée. Cela fut cause que Taher Ben Abdula enuoya ses forces contre ceux-cy, qui le firent sortir de Siston. A peu de temps de là mourut Taher Abdula, laissant à sa place son fils Mahamed Ben Taher: & aussi tost que cestuy-cy entra en possession du gouvernement un autre Capitaine appelé Dram Ben Nacer, attirant aussi Leys de son party, il fit encore un autre rauage aux mesmes terres, & s'empara d'icelles: & Dram desirant pour suivre son entreprisse, laissa le gouvernement de Siston à Leys. Taher ayant sceu toutes ces intelligences, contraignit Dram Ben Nacer de venir aux mains, où il eut un tel aduantage qu'il prit l'autre, & l'enuoya prisonnier à Bagadet, où le Calife le fit mettre en vne fort estroite prison, en laquelle il fut fort long temps.

Ce pendant Yacub Leys ne perdant aucune occasion, se voyant deschargé de l'obligation qu'il auoit

qu'il auoit à Dram, se fit Seigneur de Siston, se gouvornant cependant en sorte que iout à autre l'amour des siens croissoit tousiours en son endroit: si bien qu'il fortifia la ville, & mit en icelle, & par toute la Prouince les garnisons necessaires pour la bien deffendre, puis il commença de courir sur ses terres de Karafon, en l'an de nostre salut 863. & de l'Egire 253. avec vn fort puissant exercite, assujettissant tout à son pouuoir par où il passoit. De là il prit Herat & Fuchanh, & descendant à Kermou il le prit chassant les garnisons de ceste Prouince qu'y auoit mises le Gouverneur de Sciras, laquelle ville il assiegea, & ne pouuant se deffendre contre ses forces elle se rendit, où les soldats firent vn tres-grand butin, de tout lequel il ne voulut que vingt faucons qui auoient esté au Seigneur de Sciras, dix blancs & dix de diuerses couleurs, & deux cents mains de musc tres-pur, qui sont quelques 4500. livres, lesquelles choses il enuoya au Calife de Bagader, s'offrant à son seruice avec tout ce qu'il possedoit.

De là ayant ordonné toutes choses comme il iugeoit à propos, il s'en retourna à Siston. Mais en l'an de salut 872. & de l'Egire 257. ayant entendu qu'il se faisoit quelque remuement à Sciras, il y retourna pour remettre toutes choses en bon ordre. Or le Calife Yacub Leys goustoit fort mal tous les progres de cestuy-cy: de sorte que nonobstant toutes les offres qu'il luy auoit faict faire, il luy enuoya dire qu'il sortit promptement de Sciras, & des terres de la Perse, & qu'il n'eut iamais la hardiesse d'entrer en icelles, se contentant de ce qu'il auoit tyranniquement acquis. Leys qui ne se trouuoit pas en estat de resister à vne si grande puissance que celle du Calife, ne respondit autre chose, sinon de luy obeyr, & sortit de Perse, s'en allant de là à Balte en Maurenahur, & de là il passa à Cabul vne contree qui est entre Karafon & l'Inde, laquelle il subiuga, puis il print son chemin par Harat, & descendit à Nichabur, où il combatit Mahabed Ben Taher, comme il a esté dit, & puis s'en allant à Karafon, il passa par Taberstan, & s'arresta à Sary ou Acem Ben Zeid Alaouy, duquel il a esté desia fait mention vint rencontrer Leys avec vne tres-belle armee, & le combatit, mais il fut vaincu & contraint de s'enfuir à Delmon, Delimon, ou Delon, car on appelle ceste ville là de tous ces noms là & est située en la Prouince de Gueylon. Leys s'estant osté ceste espine du pied pourfuist son ennemy iusques à Amal: on estoit alors entre desia bien auant en l'hyuer, & ces contrées sont ordinairement fort froides, outre cela il survint tant de neiges, & de tempestes si terribles, qu'elle le forcerent pour l'heure de quitter son chemin, avec la perte de quatre mille combattans qui perirent par l'inclemence de l'air.

Le Calife ayant sçeu ceste desconuenië, & se voulant seruir de l'occasion propre, ce luy sembloit, pour diminuer les forces de Leys, despecha en diligence des courtiers par toutes les terres subiectes à Leys, persuadant à ceux qui gouvornoient pour luy de se reuolter, & de ne luy plus obeyr: mais il succeda tout au contraire de ce que le Calife pretendoit, par ce que Magamed Ben Vuacel Tamimy Capitaine Arabe de ceux qui estoient pour lors en bon nombre en la Perse, fit vne entreprise contre les garnisons que le Calife auoit pour lors par les citez & forteresses, desquelles il tua vne partie & fit reuolter le reste. Cependant vn nommé Muça Ben Bagan Seigneur de Becora, de Hauuas & de Hyamama terres de l'Arabie, & voisines de la Perse, ayant aduis de tous ces remuemens, assembla vne belle armee, & la mit entre les mains de Abderramonben Mossch, lequel marcha incontinent contre Mahamed Ben Vuacel Tamimy, avec lequel il vint aux mains, mais il fut vaincu & pris de l'autre.

Leys cependant ne dormoit pas, ains durant toutes ces reuoltes se tenoit en garde tout prest à faire quelque bon effect quand il verroit les choses proposees, & prenant son temps entra dans la Perse si à propos, qu'il s'en rendit le Souuerain, faisant mourir tous ceux qui y pouuoient pretendre quelque chose, & se recognoissant assez puissant pour pouuoir passer plus outre, il tira à Bagader.

Le Calife eut aussi tost aduis du dessein de Leys, & pour l'en destourner il luy escriuit, le priant de ne passer point plus outre, luy oütroiant librement & volontairement tout ce qu'il auoit occupé: il luy fit response que le desir de le voir le faisoit venir à Bagader, & qu'il ne se desisteroit point de son dessein en façon du monde. Le Calife voyant sa resolution, assembla à grand haste vne armee, la conduite de laquelle il donna à vn sien frere, lequel marcha contre Leys en intention de le combattre: mais cestuy-cy auoit bien vn autre intention, car il descampa vne nuict, & par chemins destournez & peu frequentez, print celui de Bagader: laissant le frere du Calife confus & embarrassé, ne sçachant quel costé il deuoit tenir pour le suivre, mais Yacub Leys sans s'arrester cheminoit tant qu'il pouuoit, renforçant son armee par tout où il passoit: il estoit desia arriué au milieu du chemin, comme il luy survint vne colique passion, qui luy causa de grandes douleurs, surquoy les Medecins ayant esté assemblez, ils furent tous d'aduis qu'il deuoit prendre vn clistere, ce qu'il ne voulut iamais faire, disant qu'il luy estoit plus facile de mourir, que de le prendre: Et comme au plus fort de ses douleurs luy fut venu vn Ambassadeur du Calife, le persuadant de ne passer point plus outre, il s'assit le mieux qu'il peut, &

prenant en sa main droite vne espee nuë, & en la gauche vne sorte de pain que les Perles appellent Gerda ou Apa, & de l'ail : il respondit aux Ambassadeurs : Dites au Calife vostre maître que si ie meurs de cet accident, la mort mettra fin à nos contentions, & si ie vy, que ceste espee pacifiera le tout, que si ie perds le jeu sans auoir plus de prentention aux Royaumes, ie me contenteray d'estre en vn lieu fort elloigné avec ce pain & cet ail, & avec ceste responce il les congedia, mais ils ne furent pas plustost arriuez à Bagadet, qu'ils eurent nouuelles qu'il estoit mort de ceste maladie, en l'an de nostre salut 888. & de l'Egire 268. ayant delia commandé vnz ans à la Perse, ce fut vn fort excellent & vaillant Capitaine, prudent, liberal & affable, & grand iusticier, on tuoit d'ordinaire chacun iour en sa cuisine vingt moutons, cinq bœufs, & plusieurs oyseaux, toutes lesquelles choses apres son repas qui estoit fort sobre, il faisoit donner aux pauvres necessiteux. On ne trouua apres sa mort aucune chose de valeur en sa tente que les armes desquelles il se seruoit, vn tapis Persien, & vn oreiller sur lequel il s'appuyoit, il ne laissa point d'enfans, qui fut cause que son frere luy succeda.

Yacub Leys estant mort, & son frere Hamer Ben Leys ayant herité de ses conquestes, il creut que c'estoit le plus propre pour luy d'estre en bon meünage avec le Calife, c'est pourquoy il enuoya aussi tost par deuers luy pour luy rendre obeysance, & le prier de le receuoir en sa grace, ce que le Calife estima tant que non seulement il le confirma en la possession de la Perse, du Karason, & de toutes les terres que son frere auoit conquises : mais il luy donna encore de nouveau l'investiture de Hierak, le chef de laquelle est Hisphaon, le faisant encore Chena de Bagadet, qui est le souverain de la iustice apres le Calife, laquelle charge toutesfois, il donna avec sa permission à Abdula Ben Taher, & de là il passa avec son armee à Casuin, puis à la cité de Rey, laissant pour gouverneur à Sciras vn Mahamed Ben Leys son parent, lequel voyant l'autre absent se declara Roy, mais Hamer Ben Leys retourna incontinent contre luy, ce que sçachant Mahamed, il s'enfuit laissant vne riche despouille, laquelle Hamer enuoya depuis comme vn present precieux au Calife, auquel plusieurs peuples se vindrent plaindre des grandes insolences & tyrannies desquelles vsoit Hamer Ben Leys, ce qui fut cause que par vn Edict public il le priua des terres qu'il luy auoit donnees, & assemblant ses forces de toutes parts, il en donna la charge à Sayd Ben Mochaled qui le combattit, & vainquit. Hamer auoir en sa compagnie vn nommé Dam, lequel auoit esté long temps prisonnier à Bagadet, lequel voyant vn si mauuais succez s'enfuit du camp : Hamer fit apres le semblable, avec fort peu de gens. Depuis ayant recouuert nouuelles forces, & rassemblé les restes de son armee decoste, il tenta vne autresfois de rentrer dans Sciras : mais Monfek frere du Calife ayant esté aduertiy de son dessein, s'alla ietter à grand' haste dans la ville, ce que sçachant Hamer, estant desesperé de la recouurer, il s'en retourna à Kermou visiter les terres de Siston, & de là passa à Karason. Ce fut en ce pays que mourut le Calife, Almat. Hamed Bila ayant regné 23. ans, l'an de salut 893. & le 279. del'Egire.

MATAZED BILA HAMED XXXVI. Calife.

Matazed Bila Hamed succeda au Califat à son pere Almat Hamed, cestuy cy fut fort prudent & courageux, & neantmoins fort sensuel. Or comme il a esté dit Hamer Leys ayant perdu l'esperance de recouurer Sciras passa à Karason, où vn des Gouverneurs de ceste Prouince appellé Rafeahy Ben Arfuma, s'estant rebellé contre le Calife, print le party de Mahamet Ben Zeyd Alamy, contre lequel Hamer Ben Leys, avec la permission du Calife, fit marcher son armee, le vainquit & le print captif, & l'ayant fait mourir, il en enuoya la teste au Calife, qui estima beaucoup ce seruice, d'autant que Rafeahy auoit fort troublé ces Prouinces : de sorte que pour recompenser Hamer, il luy fist vn nouveau don de Karason, Maurenahar, Parcy, Kermou & Siston, voulant que son nom fut escrit aux bannieres publiques, afin que son obeysance & fidelité fut recogneuë de tous, ce qui se passa l'an de salut 898. & de l'Egire 284. & d'ailleurs Hamer Ben Leys en recognoissance de tous ces biens faits il enuoya pour present au Calife vne grande quantité d'argent monnoyé, plusieurs vases d'or & d'argent, quantité d'ambre, musc & cyuette, & plus robbes de fort riches brocardors.

Il y auoit long temps que les terres de Maurenahar estoient paisibles, & qui auoient quasi secouë le ioug de la Seigneurie de la Perse, vn Ismaël Ben Hamed les tenoit pour lors, contre lequel Hamer Ben Leys fit vne leuee de gens de guerre, & marcha contre luy lequel l'attendoit pres le fleuve de Ichun qui separe les terres de Maurenahar, de celles de Karason, où apres plusieurs & diuerses rencontres, Hamer fut vaincu & pris d'Ismaël : on dist que cestuy cy estoit assisté de l'argent du Calife qui estoit bien ayse de se deffaire de Hamer, toutesfois cestuy cy le traicta fort bien, apres qu'il eut iuré qu'il maintiendrait la paix & l'amitié entre eux, & qu'il ne feroit iamais la guerre, ny par soy, ny par autrui, & l'emmena quant & soy à Maurenahar, dequoy il aduertit le Calife, & de tout le succez de ceste affaire, lequel il luy escriuit qu'il le luy enuoyast à Bagadet, ce que fist Ismael : mais quant il y fut, le Calife le fist tuer y ayant vingt

de salut

trois ans qu'il estoit Roy, il estoit borgne & fort colere: auparavant cela, Ismael en l'an de salut huit cens nonante quatre, & de l'Egire 280. estoit passé de Maurenahar au Turquestan, où apres avoir eu plusieurs victoires sur les Turcs: en fin il print en vne bataille le Roy de Turquestan, son pere & sa femme, & dix mille hommes, & dit-on que la prise & le butin fut tel de ceste victoire, que chacun des soldats d'Ismael eut bien pour sa part mil deniers d'or, qui sont environ mil cinq cens ducats. Ayant obtenu ceste victoire, il s'en vint à Samarkand, & de là il vint combattre contre Hamer Leys avec vne armee de soixante & dix mille combattans, lequel il vainquit comme il a esté dit, & pour ceste cause le Calife Marazed luy donna le tiltre de Maurenahar Karason, Sciras, Siston, & Kermon.

Cela estant ainsi passé, Ismael sceut que Mahamed Ben Zeyd Alauy, couroit & ratiageoit les terres de Tabarstan, cela luy fit escrire qu'il eust à s'en desister: cependant prepara vne puissante armee qu'il envoya contre luy sous la conduite de Mahamed Ben Aron Somony, lequel le vainquit, si bien qu'il adiousta encore à la domination d'Ismael les terres de Gerion & de Tabarstan, desquelles Prouinces il eust le gouvernement sous l'autorité de Ismael: cecy arriua en l'an de salut 901. & de l'Egire 287. & le Calife Matazed Bila mourut deux ans apres, à sçauoir en l'an 903. & de l'Egire 289. ayant regné neuf ans & neuf mois.

MOKTAFY BILA XXXVII. Calife.

Moktafy Bila fils de Matazed succeda à son pere, du temps duquel plusieurs compagnies d'Arabes s'esleuerent, & se meirent à courir par l'Arabie, destroussans les passans: & empêchans le pelerinage de la Mecque, & en la Perse. Taher Ben Hamed Ben Hamer Leys, qui au lieu de son ayeul auoit esté fait Roy de Siston entra au mesme temps en la Perse avec vne puissante armee, en intention de s'en rendre le maistre, apres avoir deffait les garnisons du Calife comme il fit, & la reduit toute sous son obeyssance, passant apres à Auas, le Gouverneur de laquelle Prouince s'appelloit Abdula, lequel demanda aussi tost secours à Ismael Roy de Maurenahar qu'il escriuit à Taher Leys, le priant de se desister en son entreprise, ce que cestuy-cy soit par amour ou par crainte fut d'accord de faire, pourueu qu'Ismael obtint du Calife qu'il possedast les terres que son pere & luy auoient conquises, & qu'il luy en confirma la possession, le Calife ne trouua point le party mauuais, & le fit pour l'amour d'Ismael, & Taher ayant ceste nouvelle donation s'en retourna à Sciras, ce qui aduint l'an de salut 907. & de l'Egire 293. & en la mesme annee mourut le Calife Moktafy de debilité pour les excez qu'il auoit faits, ayant regné quatre ans.

MOKTADER BILA XXXVIII.

Moktafy n'ayant point laissé d'enfans, on donna le Califat à son frere Moktader, sous le regne duquel Mahamed Ben Arun Somony, qui comme il a esté dit, vainquit & fit mourir Ben Zeyd Alauy, & ayant recouuert les terres de Gerion & de Tabarstan qu'Ismael luy en auoit donné le gouvernement, se rebella, & ayant leué vne armee par le moyen des intelligences qu'il auoit avec les habitans de la ville de Rey, il s'empara d'icelle, ce qu'ayant sçeu Ismael luy alla à l'encontre: mais l'autre s'enfuit de bonne heure, toutesfois il le poursuivit à Caluin, Zenian Tabarstan, lesquelles Prouinces il reduisit sous son obeyssance, mais il ne peut attraper Ben Arun, si bien qu'ayant mis des garnisons necessaires pour la deffence du pays: il passa pour la seconde fois au Turquestan y conquerant de nouvelles terres & nouveaux Royaumes, où il fit vn butin inestimable, avec lequel il s'en retourna à Maurenahar, en l'an de salut 909. & de l'Egire 295. laissant au Royaume son fils Hamed, auquel le Calife confirma ses gouvernemens, avec plusieurs aduantages: car d'autant que les Califes estoient tenus pour souverains tant au spirituel qu'au temporel, ceux là estoient tenus ne posseder pas leur Seigneurie à bon tiltre, qu'ils tenoient sans leur confirmation. Ce pendant Taher iouissoit de Sciras, & des autres terres que le Calife luy auoit accordees, & s'en estant allé à la chasse en la contree de Siston, Sanghery vn esclaue de Leys fils d'Ally son oncle, s'empara à l'impourueu de Sciras & Taher estât venu pour luy faire lascher prise, cestuy-cy, à sçauoir Sanghery eut l'assurance de luy liurer la bataille, en laquelle Taher fut vaincu & prisonnier avec vn sien frere, & enuoyez à Bagadet apres avoir regné six ans, & pour iouir de sa conqueste avec plus d'assurance, il print encore le fils de Leys nommé Ally, & vn autre sien frere appellé Maded, & les envoya à Bagadet, ce qui aduint en l'an de salut 914. & de l'Egire 300.

Cependant Hamer fils de Yacub petit nepueu de Leys, voyant la contree de Siston reuoltée & tout en trouble, entra à main armee en icelle, & la subiugua en neuf mois, faisant mourir plusieurs seditieux, mais il mourut à peu de temps de là, laissant en sa place Kaleb-ben Hamad son frere aîné, cestuy-cy voulant aller en pelerinage à la Mecque, laissa pour gouverner en sa place, vn sien parent nommé Taher Benocem, lequel le voyant absent se reuolta aussi tost contre luy, & s'empara de son pais, si bien que l'autre estant retourné de son pelerinage, il trouua les portes closes pour luy, de sorte qu'il fut contraint de s'en aller à Bokara en Maurenahar de-

seus par le chemin que Mansur estoit mort. Ocem-Ben-Aly cōtinua toutesfois la guerre, mais elle ne fut pas de longue duree, d'autant qu'en la premiere bataille il fut deffait, pris prisonnier & enuoyé à Bokara. Au mesme temps que cecy passoit, Nacere auoit enuoyé vn Gouverneur à Karason nommé Hamet-Ben-Sal, lequel s'estant reuolté avec la prouince, leua des troupes, & s'empara de Gerion & Maruuo. Hamuyhé fut aussi combattre cestuy-cy, le vainquit, & l'enuoya à Bokara, où il mourut en prison, ce qui aduint en l'an de salut neuf cens quatorze, & de l'Egire trois cens vn, auquel temps mourut le Calife Mauktader apres auoir tenu l'Empire sept ans.

I A F A R B E N M A T A Z E D X X X I X. Calife.

Après la mort de Mauktader, on donna le Califat à Iasar Ben Matazed son frere, lequel ne iouyt pas des plus grandes paix que ses deuanciers: Car en la Prouince de Tebarstam il s'esleua vn nommé Leylahé Ben Neaman, lequel fit quelque rauage aux Prouinces voisines, avec heureux succez. Nacere fut contrainct d'enuoyer vne armee contre luy, & luy liurer vne bataille, en laquelle Leylahé fut vaincu, apres laquelle victoire ses soldats se voyans malheureux aux armes, se mirent à espier les chemins, & à voler les passants: Ce que voyants les sujets de Nacere, s'assemblerent de toutes parts, & firent en sorte qu'ils firent perdre à ceux-cy, & la vie, & ce qu'ils auoient desrobé, prenans mesme Leylahé, auquel ils trancherent la teste. En ce mesme temps, il y eut vn autre rebelle en la ville de Rey, contre lequel fut Nacere qui reprit la ville, & y laissa vn Capitaine nommé Singur, avec vne puissante garnison: puis s'en alla à Maurenahar, on estoit lors en l'annee neuf cens vingt six, & de l'Egire trois cens treize, quand vn nommé Azfar Ben Scyruihé fit vn nouveau remuement en la Perse pour telle occasion.

Vn homme de Perse nommé Abusua fort pauvre, mais de grande & illustre maison: comme celuy qui estoit descendu des anciens Roys de Perse, eut trois fils, l'vn nommé Emandu-Daulé Aly, Acem & Akmet, cestuy-cy songea vne fois, que de sa partie virille, il luy sortoit vn feu qui embrasoit vne grande partie de la terre, puis qu'il diuisoit en trois, & se conseruoit fort long temps. A lors plein d'estonnement, il alla communiquer son songe à vn Astrologue, lequel luy dict, que cela signifioit qu'il commanderoit à de grandes Prouinces, auxquelles luy succederoient apres ses trois fils. Alors estoit Seigneur de Tabarstan vn Makon-Ben-Kaby, au service de qui se mit Abusua avec ses trois fils, sous la conduite d'Azfar-Ben Scyruihé, & Mardauage-Benzad, & Vuelsmaguir son frere. Or il aduint qu'Azfar se rebella contre Makon, auquel il fit la guerre vn an entier, au bout duquel mourut Makon, apres sa mort Azphar s'empara de Rostandade, Rey, Casuin, Habar, Zenian, Taromin & Amedon: par toutes lesquelles terres il fit vn estrange degast, de sorte que Nacere fut contrainct de marcher contre luy avec vne grosse armee, & apres plusieurs & diuerses rencontres, ils s'accorderent en fin, à condition qu'une bonne partie de ce qu'Azfar auoir conquis luy demeureroit: durant l'absence de Nacere, il s'estoit fait quelques remuements en ses terres: mais tout fut appaisé par sa presence, toutesfois il y eut tousiours guerre en quelques vnes de ces prouinces durant son regne.

Durant que ces choses passaient en la Perse, de grandes troupes d'Arabes s'esleuerent en l'Arabie, lesquels entrerent en la Mecque Medine, qu'ils pillerent & despouillerent de plusieurs grandes richesses, que la superstitieuse deuotion des Mores auoir offerte en ce lieu: ostans mesmes vne pierre qui estoit tenue de tous en grande reuerence, & l'emporterent à Cufa, de laquelle pierre les Mores content vne infinité de fables, entre autres qu'Adam l'auoit emportée du Paradis terrestre quand il fut chassé d'iceluy: & que depuis elle vint au pouuoir d'Imael premier fils d'Abraham, & qu'avec le temps on l'apporta à la Mecque ou Medine: ils disent aussi que de son naturel elle est tres-blanche, mais que si elle est maniee par les pecheurs qu'elle devient fort noire, de sorte que c'estoit comme vne pierre de touche aux pechez: mais tout cela estant digne de risée, nous retournerons au Calife Iasar, lequel apres auoir regné vingt ans, mourut l'an de salut neuf cens trente trois, & de l'Egire trois cens vingt, ayant esté durant son regne fort aymé de ses soldats.

K A H E R B I L A M A H A M E T X L. Calife.

Iasar étant mort, les soldats donnerent l'Empire à son frere Kaherbila Mahamet Ben Matazed, mais ils ne le laisserent pas longuement iouyr de son Califat, car au bout d'un an & de my ils luy creuerent les yeux, l'an de salut neuf cens trente cinq, & de l'Egire trois cens vingt-deux, donnant le gouvernement à Razy Bila.

R A Z Y B I L A M A H A M E D X L I. Calife.

Les soldats ayant ainsi esleu Razy Bila Mahamed fils du Calife Mauktader, fit son Vvazir Eben Mokale, auquel peu de mois apres il fit couper la main droite, & pendre au gibet, pour auoir escrit en son nom vne lettre de peu d'importance, sans la luy auoir communiquée.

C'estoit la coustume en ce temps là, que les Califes preschassent eux mesmes la loy au peuple: mais cestuy-cy ordonna que se seroient dorenavant les Vvazirs. Razibila regna quarante ans, & mourut l'an de salut 939. & de l'Egire 326.

MAUKTAFY BILA EBRAHEM XLII. *Calife.*

Mauktafy Bila Ebrahim fils de Mauktader, fut créé Calife apres la mort de son frere Razy, du temps duquel il y eut vne fort grande famine en Bagader, qui fut suivie d'une si grande pestilence, qu'elle depeupla vne grande partie de ceste contree, & quant à Mauktafy, les soldats luy creuerent les yeux, l'an de salut 943. & de l'Egire 330. n'ayant regné que quatre ans, il ne laissa pas de viure encore vingt quatre ans apres auoir eu les yeux creuez, sans toutesfois iouyr de l'Empire, car on auoit mis son fils en son lieu.

MAUKTAFY ABDELA XLII. *Roy de Perse. & XLIII. Calife.*

Au lieu de Mauktafy Bila, les soldats esleurent son fils Mauktafy Abdela, sous le regne duquel Nacere ayant accordé avec Azfar, il tomba malade de Phtisie, que les Perles appellent Cel. Ce Prince eut comme il a esté dict plusieurs guerres durant le temps de son regne, qui fut de 38. ans, & mourut l'an de salut 944. & de l'Egire 331. il fut Prince fort affable & liberal durant sa vie, il auoit fait declarer pour Prince & son heritier presomptif son fils aîné nommé Ismaël, mais cestuy-cy estant mort deuant son pere, son plus ieune frere nommé Nué Ben succeda à sa place.

Quant à Vbusuia & ses fils qui combattoient pour Azfar, voicy comme il alla de leur affaire, Azfar apres s'estre accordé avec Nacere, enuoya Emandu Daulé Aly le plus grand des trois fils d'Abusuia avec ses deux autres freres, & grand nombre de gens de guerre pour aller contre Hisphaon capitale de Hierax, laquelle gouernoit pour lors le Calife nommé Mosafar-bon Yacut, lequel ne se cognoissant point à combattre contre ceux-cy, leur quitta la terre, s'enfuit à Sciras, vers son pere Yacut qui en estoit Gouverneur, & alors eux deux ioints ensemble allerent combattre contre leur ennemy, & rencontrant Mardauuege combattirent contre luy, & le vainquirent: de sorte qu'il fut contraint de s'enfuir, & d'appeler à son secours Emandu Daulé Aly & ses deux freres à Lorestan, contre lesquels Yacut marcha avec son armee, faisant marcher deuant son infanterie avec cest stratageme, il leur auoit baillé vne sorte de pots ou bouteilles comme grenade à ietter du feu d'artifice, lesquelles il emplit de Bitume & de Naph, avec des mesches allumées en icelles pour les ietter contre leurs ennemis, comme ils firent: mais le vent leur estant contraire, non seulement ces feux ne firent aucun mal à leurs ennemis, mais ils en furent eux mesmes bruslez, & la caualerie de Yacut suruenant là dessus: cela espouuanta tellement les cheuaux, que prenant les mors aux dents, ils se mirent à courir à toute bride. Emandu Daulé les poursuivit, & eut de ceste route plusieurs riches despouilles, & quantité d'or & d'argent, ce qui fit croistre le pouuoir & le courage d'Aly & des siens, accompagné desquels, & entre autres de ses freres, il entra en la Perse, laquelle il s'assubiettit sans grande effusion de sang, allant apres mettre son siege deuant Sciras chef d'icelle, le sac de laquelle à cause de la noblesse & reputation de ceste ville, il racheta des soldats avec ses propres deniers.

Emandu Daulé s'estant quelques temps reposé en la maison de Yacut, il commença d'entrer en soucy pour la paye des soldats, n'ayant point d'argent pour ce faire, & voyant desja l'insolence d'iceux, & qu'ils començoient à murmurer si on retardoit d'auantage, tout triste donc & ennuyé qu'il estoit, il se coucha en vne chambre sur vn list, où pensant profondement à ce qu'il auoir affaire, & levant les yeux en haut, il veid en vn trou vne couleure espouuanteable, & qui monstroit par fois la teste, puis la referroit. Aly effrayé de cela, commanda que tout à l'heure on eust à rompre le toict de ceste maison qui estoit en plate forme, comme sont tous ceux de la Perse, & qu'ils tuassent ceste couleure: à peine l'eut il dict que ce fut fait, & la couleure tuee avec quelques autres qui y estoient avec elle: mais en ce faisant ils descouurirent vn grand thresor que Yacut auoit caché là, lequel fut suffisant pour payer les soldats. A quelque temps de là, il arriua encore à Emandu Daulé vn accident plaisant & vtile tout ensemble, c'est que voulant vn iour faire faire quelque habillements pour sa personne, il se fit amener vn tailleur d'habits, lequel estant deuant luy, au lieu de demander vne mesure, il demanda vn baston, le tailleur qui auoit esté celuy de Yacut, pensant que ce fut pour luy donner des bastonnades, le supplie de luy pardonner, & que sans cela il luy confelleroit la verité, qui estoit telle, qu'il auoit en sa maison dix-sept coffres que Yacut luy auoit baillé à garder. Aly fit vn fort grand cas de ceste bonne rencontre, & ayant enuoyé querir les coffres, ils furent trouuez pleins de brocardors, & toutes sortes d'estoffes de soye de fort grande valeur, desquelles le tailleur eust aussi sa part.

Cependant que cecy se passoit en la Perse, Nué fils de Nacere, par la mort de son pere auoit succédé au gouvernement de Maurenahar, Karason, Nichabur, & autres terres voisines.

voisines. Or Hamuyhé ce fameux Capitaine, duquel il a esté fait mention cy dessus, auoit eu quelques mescontentemens de Nué, & le voyant maintenant assis sur le throsne Royal, & voulant tascher de se vanger de l'injure receüe, il s'estoit retiré secrettement de ses terres: mais Nué luy escriuit de si gracieuses lettres, & luy donna tant d'assurance, que Hamuyhé retourna, auquel Nué donna le Gouvernement de Samarkand. Nué fit apres cela la guerre en plusieurs endroits par ses Capitaines: mais presque tousiours avec vn succez infortuné: mais la fortune voulut esprouuer luy mesme: car ayant fait Gouverneur de la ville de Rey, vn nommé Aboaly, & ayant quelque subiect de mescontentement de cestuy-cy, il luy enuoya pour successeur Ebrahim, Ben, Siniur. Dequoy Aboaly estant mal content, il se rebella contre Nué, lequel vint en personne contre luy: mais il fut vaincu deux fois, & l'autre s'en vint à Bakara, dans laquelle il entra, & la vouloit brusler & razer rez pieds, rez terre, sans les prieres qu'on luy fist de pardonner à ceste pauvre ville. Mais Nué ayant depuis recouuert ce qu'il auoit perdu, fit vn cruel & exemplaire chastiment à l'endroit de ceux qui s'estoient reuoltez: qui fut cause que plusieurs le laisserent, & se rangerent du party de son ennemy. Emandu Daulé estoit alors en la ville de Scyras, auquel vindrent nouuelles que Mardauuege, au seruice duquel il estoit, auoit esté tué par ses esclaves estant au bain. Sur cet aduis il despecha en diligence son frere Rokna Daulé Acem pour Hierach & Rey, desquels il s'empara, & conserant avec Aboaly qui estoit mal avec Nué: cestuy-cy impetra du Calife l'investiture de Karason, ce que le Calife ayant accordé, Aboaly s'en alla pour prendre possession. A peu de iours de la Nue mourut de grande tristesse, comme on dit, laissant vn fils en son lieu nommé Abdul Malek.

Après qu'Emandu Daulé eut enuoyé son frere Rokna Daulé Acem, comme il a esté dict, pour la conqueste de Hierach, il enuoya aussi son autre frere Mohayzedu Daulé Achmet contre Kermion qu'il conquist, & y ayant mis de bonnes garnisons, il s'en alla contre Bagadet, laquelle se rendit par force, & dans laquelle il print le Calife Mostachfy Abdula, auquel il fit arracher les yeux, & ayant regné quatre ans & quatre mois, ce qui aduint l'an de salut 447. & de l'Egire 334.

MOTYAH BILA FAZELE XLIV. Calife.

Mohayzedu Daulé Achmet ayant ainsi fait creuer les yeux au Calife Mostachfy, il mit en sa place Motyah Bila Fazele fils de Moktader: En ce temps on recouura ceste pierre, de laquelle il a esté parlé cy dessus, & que les Arabes auoient emportee à Cusa, mais elle fut encore vne autre fois apportee à la Mecque, donnant pour icelle autant d'or qu'elle estoit pesante: on estoit lors en l'an de salut 949. & de l'Egire 337.

Quand Emandu Daulé Ally tomba malade, & se sentant proche de la mort, il fit venir Azudu Daulé son nepueu fils de son frere Rokna Daulé Acem, lequel il laissa en son lieu, car il mourut incontinent apres.

Au mesme temps moururent aussi plusieurs Princes, comme Vuax Maguir allant à la chafse, car vn sanglier s'estant mis entre les iambes de son cheual, & l'ayant fait tomber se rua sur luy, & le tua. Moezedu Daulé Achmet mourut aussi en Bagadet. Acem Ben Feruzan en Tabaristam, Kasur Hachidy au Caire, & l'Empereur de Constantinople Aboaly Ben Mahamed Ally en Bokara, & en Damas Seyf Daulé l'an neuf cens cinquante & sept, & de l'Egire trois cens quarante cinq. Il y eut par tout le Karason Koestam, & plusieurs autres terres de la Perie vne grande & vniuerselle pestilence: & outre ce il y auoit la plus grande confusion qui se soit peut estre iamais veüe iusques alors, parce que tous s'offencerent, & tous craignoient, & personne n'estoit en seureté durant ce trouble vniuersel qui dura quelques annes. En l'an neuf cens soixante & deux, & de l'Egire trois cens cinquante. Abdul Malek fils de Nué ioustant à cheual (car les Perles s'exercent fort souuent à la iouste) il tomba de son cheual & mourut, ayant regné sept ans & six mois, en la place duquel succeda Mansur son frere, lequel auoit de son viuant pour Vvizir vn nommé Albataquin, lequel s'oposa à l'election de Mansur autant qu'il luy fut possible, mais le party de Mansur preualut, & Albataquin estant accompagné de trois mille soldats, qui combattirent contre luy sur les confins de Balx, & furent deffaits, il y enuoya encore pour la seconde fois: Mais ceux cy ne furent pas mieux fortunez que les autres: de sorte que Mansur voyant le bon succez de cestuy-cy tourna les armes contre Hierach & la ville de Rey: Rokna Daulé Acem qui la possedoit, se mit aussi tost en campagne, enuoyant cependant son fils avec de belles troupes faire des courses en la Prouince de Karason, pour diuertir Mansur le Capitaine general de l'armee. Rokna Daulé Acem s'appelloit Chamguir, lequel estant mort de maladie, on donna sa charge à Abul Ocen. Cestuy-cy voyant tant l'un que l'autre Prince disposé à la paix, on comença d'en traiter: & en fin fut conclud a condition que Rokna Daulé payeroit de tribut par chascun an cinquante mille deniers d'or qui sont 220000. deniers: & pour plus grande asseurance de cet accord Mansur print pour femme vne niece de Rokna Daulé fille d'un sien frere: ce qui aduint l'an de salut neuf cens septante cinq, & de l'E-

gire trois cens soixante trois , auquel mourut le Calife Motyah-Bila d'une grande paralysie, ayant regné vingt neuf ans , & ayant laissé auparavant le gouvernement à un sien fils nommé Tayaha Abdel Carim. Il mourut à dix mois de là. Et quant à Mansur il mourut deux ans apres, à sçavoir l'an de salut neuf cens septante sept, & de l'Égire trois cens soixante cinq, ayant regné quinze ans, laissant pour successeur son fils Nué.

TAYAHA ABDEL CARIM XLV. Calife.

Tayaha Abdel Carim fils de Motyah parvint ainsi au Califat par la mort de son pere, comme il a esté dit , durant le regne duquel ou plustost l'ombre de la Royauté d'iceluy , car les Califes commencerent à n'estre plus Seigneurs que de nom, plusieurs choses notables advindrent en la Perse. Deux ans apres qu'il fut Calife mourut Rokma-Daulé, qui declara son fils Azudu-Daulé pour Roy de Hierak, lequel accreut grandement son Royaume.

Quant à Nué Ben Mansur qui avoit succédé à son pere à celui de Maurenahar: il trouva assez de quoy s'exercer, d'autant qu'encore qu'Abataquin, lequel il avoit subiect de craindre, fut mort, Kabus fils de Chamguir Capitaine de son pere Mansur se revolta, & prit les provinces de Gerion, & de Tabarstam.

Au mesme temps aussi il y eut de grands differends, Azudu-Daulé, & Fakoro-Daulé son frere, contre lequel Azudu-Daulé leva une armee, & contraignit Fakoro de s'enfuir en la Province de Kabus, qui le receut & traitta avec beaucoup de courtoisie & de respect, luy offrant sa personne & tout ce qu'il avoit pour son service. Azudu-Daulé marry de cette accointance marcha contre eux, les vainquit, & recouvra Gerion & Tabarstam: de sorte que Kabus & Fakoro-Daulé furent contraints d'avoir recours à Nué Ben Mansur, lequel leur donnant du secours, ils retournerent contre Azudu-Daulé, & recourant Gerion le forcerent de se retirer dans une forteresse, laquelle ils assiegerent, mais comme ce siege eut desjà duré deux mois, les assiegez sentans leurs munitions leur deffaillir, prindrent intelligence avec un des Capitaines de ceux de dehors, auquel ils donnerent bonne somme de deniers, pourveu qu'il voulut estre à leur deuotion, & s'estans accordez entre eux de ce qu'ils avoient à faire, ils prindrent le temps que les assiegeans y pensoient le moins, & firent une sortie sur eux du costé où estoit ce Capitaine qu'ils avoient corrompu, lequel commença aussi tost à fuyr avec ce qu'il avoit de troupes sous son commandement, ce qui donna l'espouvante à tout le reste qui se mit en fuite, & la place delivree par ce moyen du siege: ce que sçachant Nué qui estoit lors en Nichabur, ayant sçeu la disgrâce de ses allies, il commanda à Abul Ocem son Vvazir de lever un bon nombre de gens de guerre pour marcher contre Azudu-Daulé: mais cestuy-cy se sentant le plus foible, il evita le combat. Fakoro Daulé mourant depuis, son frere vint à estre Seigneur de toutes ses terres.

En ce temps mourut aussi Abu Ocem Vvazir de Nué, la mort duquel est remarquable.

C'est que cestuy-cy voulant avoir la compagnie d'une sienne esclave qu'il aymeroit extrêmement comme il estoit avec elle il mourut subitement: ce qui donna de l'espouvante à tous pour la nouveauté du cas. Il laissa deux fils, l'un nommé Boaly qui luy succeda en la charge & gouvernement de Karason & Nichabur: l'autre appellé Faech, à qui Nué donna le Vvazirat de Hierak, lesquels par envie & jalousie des uns des autres s'armerent tous deux, & se firent la guerre.

Mais Boaly ayant esté plus diligent que son frere marcha aussi le premier contre luy à Bokarra, lequel s'enfuit à Maruuo, où il assembla ses forces de toutes parts: ce que sçachant Nué il envoya contre eux Innahak & Bakturun deux de ses Capitaines pour faire venir Boaly à la raison. Ceux-cy suivant ce commandement, le poursuivirent & le desfirent, le contraignant de s'enfuir à Balk, & de là à Tremed, d'où il escriut à Bokrakham Roy de Turquestan, l'incitant à la guerre contre Nué.

Durant toutes ces dissensions, Aboaly Ben Ocem escriut à Nué, luy demandant pour la recompence des services signalez que luy & les siens luy avoient faits à luy & à ses ancestres, le gouvernement supreme sur toutes les terres de Karason & Maurenahar: ce que Nué luy accorda sans grande difficulté, à condition de les tenir comme son vassal.

Mais Aboaly le voyant en possession de ces terres, se comporta par apres en Tyran: de quoy ayant esté plusieurs fois excité à desister, & à se moderer: il ne fist non seulement aucune réponse à ce qu'on luy mandoit, mais se preparant secrettement à la rebellion, il escriut à Bokrakham Roy de Turquestan, luy persuadant qu'eux deux ensemble vinssent courir sur les terres de Nué, & qu'ils partageassent apres entre eux ce qu'ils auroient conquis.

Le Turquestan trouva ceste proposition si à propos, qu'il mit incontinent une armee en campagne. & aussi fit Aboaly, & ainsi commencerent tous deux à faire de grands ravages aux terres de Nué, lequel avoit aussi armé de son costé, donnant la charge de son armee à Innabak, qui avoit vaincu Faech, lequel presenta le combat aux autres, auquel il fut vaincu & envoyé prisonnier au Turquestan.

Nué sçachant

Nué sçachant ceste perte, & se voyant réduit à l'extremité, taschant de faire ses amis de ses ennemis, se reconcilia à Faech, & avec toutes les caresses & compliments qu'il peult, l'auoit rangé, ce luy sembloit à sa deuotion: de sorte qu'il l'enuoya à la deffence ne Samarkand, où estant arriué il sçeut que Boktakham venoit contre luy, il ne se voulut point deffendre, ains abandonna la terre, & s'en alla à Bokara en despit de Nué, lequel il publioit l'auoir beaucoup offensé.

Ceste trahison fit perdre courage à Nué, lequel ne voyant aucun moyen de pouuoir s'opposer à la puissance de son ennemy, luy abandonna son Royaume, & sortit d'iceluy. Boktakham ce pendant se saisit de Samarkand, & de là passa à Bokara, où Faech se ioinit à luy, & Boktakham l'enuoya avec vne armee contre Balk, & terres dependantes d'icelle. Nué cependant le plus secrettement qu'il peult passa le fleuve de Gehun, & se mist aux environs de Hamulcher, où plusieurs de ses subiects lesquels le cherchoient arriuerent autour de luy par diuers chemins, si que le nombre croissant de iour à autre commençoit desia à faire vn corps d'armee: dequoy Nué commença d'auoir quelque esperance d'vn meilleur succez, & pour esprouuer toutes choses il escriuit à Aboaly, luy representant les biens & les aduantages qu'il auoit receus de luy, luy en promettant encore de plus grands s'il se vouloit conuertir & retourner à son seruice. Mais Aboaly ne luy respondit qu'avec des esperances feintes & dissimulees, cherchant cependant moyens comment il le pourroit tuer.

Durant ce temps Baktakhon devint malade, & ayant esté pensé sans qu'on y veist aucun amandement, par le conseil des Medecins il s'en retourna au Turquestan, esperant de pouuoir mieux recouurer sa santé en sa patrie, mais le mal croissant de iour en iour, il mourut par le chemin: ce que ceux de Bokara ayans sçeu, ils sortirent sur son armee, laquelle estant sans chef fut desconfite, & firent de leurs ennemis vn merueilleux carnage, & vn tres-grand & riche butin qu'ils eurent de leurs despouilles. Alors Nué se seruant d'vne si bonne occasion, s'en retourna en son Royaume, auquel il fut receu avec vn vniuersel contentement.

Aboaly voyant la mort du Roy de Turquestan, delibera de se vanger sous la puissance de Nué, ce qu'ayant entendu Faech son frere, bien qu'il fut son capital ennemy, il tascha de le diuertir de ceste deliberation, comme il fit s'accordans eux deux de faire la guerre ensemble à Nué, lequel auparauant tous ces souleuements auoit enuoyé en l'Inde, pour faire nouvelle conqueste, vn sien Capitaine nommé Sabutaquin, lequel estoit à l'heure de retour, riche & victorieux, ayant acquis la reputation d'vn homme rare & tres-experimenté aux armes. A cestui-cy Nué donna la charge de ceste guerre, & ayant fait la plus grande leuee des soldats qui luy fut possible, avec ceux que l'autre auoit desia, il l'enuoya à Gaznehen contree celebre en Karafon.

Aboaly sçachant les preparatifs qu'on faisoit contre luy, & desirant preuenir ses ennemis par quelque heureux succez, rechercha l'amitié de Fakoro Daulé qu'il gagna par le moyen des riches & precieux presents qu'il luy fit. Cependant Nué & Sabutaquin sortirent de Nichabur, cherchans Aboaly, accompagnés encore des Gouverneurs de Balk, Gerion & Gergestam.

Quant à Aboaly il auoit receu quelques compagnies de vieux soldats, que luy auoit enuoyées Fakoro Daulé que Darab Kabus auoit ioints avec vne puissante armee, & ainsi sortans de Hierak, les deux armées se cāperent vis à vis l'vne de l'autre, où ils ne furent pas long temps qu'ils ne vinssent à la bataille.

Aboaly disposa ainsi la sienne, il donna l'aile droite à Faech, & à vn sien autre frere appelé Abalcacem Ben Samur la gauche: quant à luy il se mit au milieu.

Quant à celle de Nué, les pointes de sa bataille furent données à ses meilleurs Capitaines, mais Amir Sabutaquin & Seyfa Daulé se mirent au milieu: les deux armées s'estans ainsi affrontées, chacun fit merueille de bien combattre de son costé, mais ceux de Nué firent vn tel deuoir, qu'ils forcerēt les ailes de la bataille de Aboaly de tourner le dos, ce qui augmenta tellement le courage à leurs ennemis, qu'avec tout le gros de leur armee ils donnerent dedans le reste, avec telle impetuosité qu'ils leur firent perdre leurs rangs, & en fin prendre la fuite.

En ce meſlange Darab Kabus quittant le party de Aboaly le rangea de celuy de Nué: ce qui ayda bien encores à acheuer de desfaire ceste armee, laquelle taillee en pieces en partie, le reste fort mal mené, se retira comme il peult à Nichabur.

La victoire ainsi acquise, & les despouilles qui furent fort grandes partagees, Nué fit son Capitaine general Mahumud, fils de Amir Sabutaquin, à la requeste mesme de son pere. Et quant à Nué, il s'en alla à Bokara, Sabutaquin à Gaznehem, Mahamund à Nichabur, & quant aux freres de Aboaly & Faech, ils s'en allerent à Gerion de la domination de Fakoro Daulé, qui les receut, & traita avec beaucoup de bien veillance: toutesfois ils se comporterent si mal en toutes choses, qu'ils ne demeurèrent pas long temps en sa grace, dequoy s'apperceuant

Aboaly, ingrat & mescognoissant qu'il estoit des biens faicts qu'il auoit receus de Fakoro, il rechercha les moyens de le tuer. A quoy ne voulut point consentir Faech, au contraire il le diuertit autant qu'il peust de ce dessein, luy conseillant de se ruer plustost sur celuy de Nichabur, & le surprendre auparauant que l'autre eust recogneu leur dessein, duquel toutesfois se desfiant, il enuoya demander secours au Roy, & à son pere: mais auparauant qu'il fut arrivé, ces deux cy auoient desia combattu contre luy, l'auoient vaincu, & chassé de la Prouince. Ce que ayant sçeu Sabutaquin, leua des troupes avec la plus grande diligence qui luy fust possible, & partit de Siston pour s'en venir à Nichabur, & rencontrant Aboaly à Thus, il le combattit, mais comme ils estoient au plus fort du combat, Mahamud survint avec vne nouvelle armee qu'il auoit assemblee, & donnant à dos de ses ennemis, en fit vn terrible massacre, prenant captifs presque tous ceux qui resterent en vie. Et quant aux deux freres, ils se mirent avec grande difficulté dans Calat, place merueilleusement forte, & de là accompagnez de quelques vns des restes de leur desfaiete, ils passerent à Marvvo, où estans ils s'efforcerent d'obtenir pardon de Nué, lequel accorda à Aboaly, sous condition qu'il ne sortiroit point de Gerinia, sans son expresse permission: à quoy il s'accorda contre la volonté de Faech, lequel se retira vers Ilechkan Roy de Turquestan, qui auoit succédé à Bokrakan.

Or il y auoit vn Abu Abdula Gouverneur de Korrazm, qui estoit ennemy de Aboaly. Cestui-cy donnant vn assaut à l'improuiste à Geriania, l'emmena prisonnier. Le Gouverneur de Geriania qui l'auoit en garde par le commandement du Roy Nué, assemblea ses forces, & s'en alla à Kat où estoit celuy de Korrazm, le print prisonnier, & deliura Aboaly, & retourné qu'il fut en sa Prouince, il mit le Gouverneur de Korrazm en prison. Et quant à Aboaly, il le traita fort humainement, banquetant tous les iours avec luy. Et vn iour entreautres comme ils auoient desia biē beu, Mahamum qui estoit Gouverneur de Geriania, fit tirer de prison le Gouverneur de Korrazm, & luy fit trancher la teste. Cela estant ainsi passé, il escriuit le tout à Nué, luy demandant pardon pour Aboaly, lequel respondit qu'il y auoit desia long temps qu'il luy auoit pardonné, luy enchargeant de le luy enuoyer, d'autant qu'il auoit quelques affaires d'importance à luy communiquer: Mahamum l'enuoya, mais aussi tost qu'il fut à Bokara, Nué le fit mettre en vne estroiete prison, où il mourut. Quant à Faech son frere, qui s'estoit retiré vers Ilechkan, il le persuada de faire la guerre à Nué, lequel ayant eu aduis de tous leurs desseins, manda à Sabutaquin qu'avec les compagnies d'ordonnances qu'il auoit, qu'il les deuantast entre Kehx & Necaf, enioignant aussi à son fils Mahamum qui estoit à Nichabur, d'aller trouuer son pere avec le plus de forces qu'il pourroit, enuoyant à ces deux cy encores de belles troupes, si que le tout estant assemblé en vn, ils auoient lors vne puissante armee. Ce que sçachant le Roy Turquestan, voyant qu'il n'y faisoit pas bon pour luy, traita d'accord, lequel Nué ne refusa point, pour le moyen duquel on donna le gouuernement de Samatkand à Faech. Ce fut par le moyen de ceste paix que tous ces troubles furent appeisiez, en l'an de salut 996. & de l'Egire 385. Nué demeura paisible iusques à sa mort, qui aduint deux ans apres, sçauoir l'an de salut 998. & de l'Egire 387. ayant regné vingt deux ans, & laissant pour successeur son fils Abul Hares Mansur.

Tandis que ces choses se passioient ainsi à Vsbek, Maurenahar & Karason, le bas pais de la Perse, ne demeuroit pas oysif, d'autant que les Daules, desquels il a esté parlé cy dessus, (qu'on a laissé de propos deliberé en arriere, pour ne s'embroüiller point dans ceste multiplicité d'affaires, & donner plus d'esclaircissement à ceste narration) continuans leurs remuemens, la travaillerent fort, par ce que Azudu Daulé, auquel estoit arriué ce que nous auons dict, succedant au Royaume enuoya Abul Fauares son fils à Karason, pour tenir en son deuoir vn sien Gouverneur qui s'estoit reuolté, duquel il demeura victorieux. En ceste saison mourut Moeze du Daulé Roy de Bagader, frere de Azudu, en la place duquel fut mis Naktear son fils, auquel le pere enchargea deuant que de mourir, qu'il luiuir en toute chose le conseil de son oncle, & des prudens Vvazirs qu'il luy laissoit. Mais cestui-cy fit tout autrement qu'on ne luy auoit enchargé, car il donna subiect à Subataquin, & depuis à Albataquin, d'entrer dans ses terres avec grande compagnie de Turcs, lesquels estant arriuez à Vvacet, le mirent en grande destresse. Baktear demanda secours à Azudu, lequel y vint en grande diligence, combattirent les Turcs & les mirent en route, les poursuiuans iusques à Bagader, où ils furent assiegez par Baktear. Et apres auoir faict choses merueilleuses pour la desfence, forcez de la necessité, ils laisserent la cité, & s'en allerent avec le Calife à Tecrit peuple de Diarbox sur le riuage du fleuve Tygris: si que la ville vint en la puissance de Baktear qui fit retourner le Calife, & luy consigna. Azudu Daulé eut beaucoup d'ennuy de tout cecy, de sorte qu'il se laisit en fin de la personne de son nepueu, le mit en prison, de laquelle il le deliura toutesfois incontinent apres.

Ces affaires ainsi mis à fin, Azudu Daulé fit marcher son armee entre Hierax d'Arabie, & Baktear le voyant absent, entra aussi tost en ses terres où il fit vn fort grand ravage, ce que son

oncle ayant

oncle ayant sçeu à son retour, Baktear fut contrainct de se retirer à Mosul grande Cité en Diar-bek (que plusieurs tiennent estre Niniue) elle estoit lors gouvernee par vn nommé Abusaleb, lequel avec vne armee de vingt mille combatans se vint ioincre à Baktear, & rencontrèrent Azudu Daulé à Tecrit qui les vainquit. Abusaleb s'enfuit, & Baktear fut prins, auquel son oncle fit trancher la teste, aagé de 63. ans, & ayant tenu le Royaume vnze ans, & quelques mois. Apres cela la contree de Mosul semblant fort bonne (comme elle est) à Azudu Daulé, il s'arresta en icelles, auxquelles il en adiouta plusieurs autres, l'an de salut 980. & de l'Egire 368. & ennoya r'edifier Bagadet, qui estoit quasi ruinee des guerres passees, deschargea les peuples de plusieurs tributs qu'ils souloient payer, fit ouurir plusieurs puits par les chemins, se monstra favorable aux Sages de sa secte, aux Philosophes, Medecins & Poëtes qu'il recogneut exceller les autres, donnant permission aux Chrestiens qui estoient en ses terres, qu'ils edifiassent des Eglises, leur aydant à vne partie des frais à ses despens. En l'an de salut 982. & de l'Egire 371. il fit bastir vn fort bel Hospital à Bagadet, qu'il dota d'une grosse rente : & à Scyras vn autre non moindre que cestui-cy, puis ayant faict plusieurs autres choses dignes de memoire, & d'un bon Prince, il tomba malade d'un mal qu'ils appellent Sara, qui est vn espece de manie, & mourut l'an de salut 983. & de l'Egire 372. ayant regné 34. ans, laissant trois fils, Scerfa Daulé, Scams Daulé, & autrement Abulganiar Marsabane, & le troisieme Bahao Daulé. Les deux premiers diuiserent entre eux les terres, sans demeurer toutesfois contents. Scerfa Daulé s'en alla en la Perse, & Scams Daulé à Bagadet, lequel prit Scerfa en vne entreueuë qu'ils eurent ensemble: mais il mourut bien tost apres, l'an de salut 990. & de l'Egire 379. Cela fut cause qu'on tira de prison son frere Scams Daulé, ou Abul Ganiar Marsabane, & fut mis en sa place : Cestui-cy s'associa au Gouvernement de son ieune frere Bahao Daulé : mais ayant eu quelque different ensemble, ils en vindrent en fin aux mains, & Scams Daulé luy fit la guerre avec vn Boaly Ben Hostad Hormoz qui le poursuiuit en toute rigueur : mais lors qu'il auoit le moins d'esperance d'aucun secours, il luy vint nouvelles que les soldats ayant demandé vne paye à Scams Daulé, & luy leur ayant refusee, se mutinerent, si qu'ayans pris par escalade vne forteresse, où il y auoit dedans quatre fils, & quelques parents de Baktear, ils les tirerent de là, & s'estans ioincts à eux quelques autres troupes, ils donnerent vn assaut à Scyras, où estoit Scams Daulé, qui print aussitost la fuite : mais ils le suivirent, & fut pris à Dudmon, à deux farsanges, ou lieues de la Cité, en laquelle on le ramena, & le firent mourir avec sa mere, apres auoir esté Roy neuf ans & huit mois, l'an de salut 991. de l'Egire 380. auquel Bahao Daulé succeda sans aucune controuerse. Alors estoit Roy de Gerion, comme il a esté dit, Fakoro Daulé, qui fit la guerre contre vn nommé Sahay d'Hebad, plus riche d'argent que d'hommes, lequel il vainquit, & fut Seigneur de son thresor, puis ayant terminé ceste guerre, & plusieurs autres qui ne furent pas de petite duree. S'en estant allé en l'an de salut neuf cents ostante-neuf, & de l'Egire trois cents septante-huit, en Tabarak vne sienne forteresse, estant vn iour à table il mangea avec tel excez d'une vache salee qu'on luy auoit serui, & sur le champ vne si grande quantité de raisins, que cela luy causa vne telle douleur d'estomac, qu'il en mourut dans peu d'heures, estant fort peu regretté à cause des tyrannies qu'il auoit exercees en sa vie.

Aux nouuelles de ceste mort, il y eut vne telle confusion & reuolte en la ville, qu'on n'eust pas seulement le temps de l'enseuelir, iusques à ce que l'excessiue puanteur de ce corps mort les forcerent de les mettre en terre. Il eut trois fils, l'aîné desquels, & de sa mere Suyda, il sera parlé en son lieu, Bahao Daulé ayant dōc succédé au Royaume, print pour principal Capitaine & conducteur de ses armées Boaly : ce Capitaine qui faisoit la guerre pour son frere, auquel il donna la charge de le faire sortir de Perse, les fils de Baktear, desquels le plus grand appellé Abu Nacere, s'en alla à Kermou avec quelques troupes qu'il auoit, surprenant de sorte le Gouverneur de ceste contree, qu'il le contrainct de l'abandonner, & s'empara de ses terres là. Bahao Daulé enuoya contre luy Moufek, qui le combattit, & desconfit : & comme il s'enfuyoit, vn sien seruiteur se mit au deuant de luy, qui luy passa l'espee au trauers du corps, laquelle mort luy auoit esté prognostiquee long temps auparauant : Moufek mit par tout des Gouverneurs, auxquels on pouuoit auoir de la confidence, & content de sa victoire, il s'en retourna vers le Roy, qui le receut avec beaucoup d'honneur: mais estant calomnié par ses ennemis, il fut pris le mesme iour, & peu de temps apres on le fit mourir, Bahao Daulé le premier an de son regne deposa le Calife Tayha Abdelcarim Ben Muria, ayant iouy de son Califat dixsept ans & deux mois. En telle maniere estoit lors reduict l'Estat de ceste Principauté, que luy qui souloit commander aux autres, estoit lors commandé de tous. Boaly mourut aussi à Bagadet, l'an de salut 1012. & de l'Egire 401. Bahao Daulé mourut vn an apres, ayant vescu quarante deux ans & neuf mois, & regné vingt quatre.

K A D E R B I L A H A M E D. X L V I. Calife.

Encores que les affaires du Califat fussent d'ores-en-avant reduites à tel estat, que ces Prin-

ces n'avoient plus que le nom, & que leur commandement fut plustost à leur maniere pour les choses spirituelles, n'ayans autorité que celle que les Princes qui regnoient alors leur donnoient, ayans mesme perdu cet ombre de puissance temporelle, qu'ils s'estoient conseruee iusques à ces Daules, desquels nous auons fait mention cy-dessus : toutesfois d'autant que tout commençoit par eux, & que Mikond mesme, & Teixiere les mettent tousiours au rang des Princes, ceste succession personnelle seruant tousiours d'une regle plus asseuree, qui oste toute confusion : Nous auons suiuy le mesme ordre, ioinct les grandes confusions & remuemens qui regnerent en la Perse durant ce siecle, qui font perdre bien souuent la trace de leur Chronologie, & au moins en ces Califes trouue tousiours le nom. Bakao Daule ayant donc depose le Calife Tayha Abdelcarin, il donna sa place à Kader Bila Hamed, fils de Ezach, fils de Moktader. Sous le nom de cestuy-cy, voicy comme les choses se passerent.

Fakorodaule Roy de Gerion estant mort, comme vous auez peu voir par l'excez qu'il auoit fait, son fils Maiududaule luy succeda, lequel bien qu'il n'eut que trois ans, fut proclamé Roy. Sa mere Sayda gouerna pour luy, qui estoit femme d'un fort grand entendement, & qui luy seruit beaucoup, pour maintenir ce Royaume en paix & en prosperité durant le bas aage de son fils. Mais comme il fut deuenu grand, il voulut disposer du Royaume à sa fantaisie, & mettre des Gouverneurs de sa main, tels qu'il luy plaisoit, sans l'aduis, ny le conseil de sa mere : dequoy elle estant mal contente, se retira en la forteresse de Tabarak. Or son fils auoit fait un Aboaly son Vazir contre la volonté d'elle. Cestuy-cy craignant donc qu'elle sortit du Royaume, fut cause de troubler tout, ayant mis des gardes par les chemins pour la retenir. Mais cela ne peust pas empescher ceste Princesse de sortir d'iceluy, & de s'en aller à Kufestam, de laquelle estoit Gouverneur Babre Acem Nuyhe, qui la voyant, & s'estant informé comme les choses s'estoient passees avec son fils, leua de grandes forces qu'ils conduisirent eux deux, & allerent de compagnie trouuer Maiududaule, ainli s'appelloit le fils de Sayda, & son Vazir Aboaly, les vainquirent, & les prindrent captifs, Maiududaule estant en la ville de Rey, si bien que le Royaume vint une autresfois au pouuoir de Sayda, qui le gouerna avec une grande prudence & conseil.

En ce tēps regnoit en Karason & Maurenahar Mamud Gasney, cōme il se dira en son lieu, lequel ayant fait sentir ses armes victorieuses par tous les Royaumes circonuoisins, enuoya des Ambassadeurs à Sayda, luy demandant qu'en son Royaume il ne courut autre monnoye que la sienne, & que celle qui s'y forgeroit fut faite en son nom, & marquee de ses armes, luy donnant à entendre, que faisant autrement, il auroit sujet de se mescontenter. Elle avec une assurance virile, luy fit responce que si son mary viuoit, qu'elle craindroit grandement ses menasses, à cause qu'estant hommes tous deux, ils se pourroient rencontrer, mais qu'estant maintenant veufue, qu'elle estoit certaine & asseuree, qu'il ne voudroit point tant abaisser son genereux courage que de l'offencer. Ce qui eut le pouuoir pour lors de l'appaiser. A quelques iours de là elle pardonna à son fils Maiudu Daule : mais elle ne luy donna pas l'entier Gouvernement du Royaume, donnant au second nommé Scams Daulé le Gouvernement de Amadon, & le troisieme qui auoit le nom Abuiasar, elle le mit en Hisphaon, si bien que ceste Royne conserua son Royaume en paix & tranquillité iusques à sa mort, qui aduint en l'an de salut 1030. & de l'Egire quatre cents & vingt, laquelle y apporta bien tost un grand trouble, par ce que le Sultan Mamud Gazney fit marcher son armee contre Hierak, & estant arriué à Mazandaron Manucher fils de Kabus, neveu de Vvax Manguir, duquel il a esté fait mention ailleurs, tenant son Estat pour asseuré pendant qu'il seroit en ceste compagnie, s'en retourna en ses terres, sortant du camp sans la licence de Mamud : mais craignant que l'autre en fut offensé, il tâcha de l'appaiser avec plusieurs grands & riches presens, qu'il luy enuoya, plusieurs vestemens pour les soldats, & quatre cents mille deniers d'or monnoyez, qui font enuiron six cents mille ducats. Mais d'autant qu'il y a long temps que nous n'auons rien dict de Karason, il sera bien à propos de reprendre le fil de celle narration, & voir ce que l'on faisoit, cependant que ces choses se faisoient ailleurs.

Comme donc il a esté dit par la mort de Nué, son fils Abul Hares Mansur luy succeda au Royaume. Cestuy-cy eut pour Capitaine General Bakturun, contre lequel Abul Ilec Kan Roy de Turquestan luy fit la guerre, comme il auoit faite au pere, & arriué à Samar Kand, Faech qui estoit Gouverneur se submit à luy, lequel avec des forces suffisantes pour l'execution de son dessein, s'en alla contre Bazara, où estoit Mansur, qui abandonnant la Cité s'enfuyt, & passa de l'autre costé du fleuve Amuye. Faech entra dans la ville, asseurant les habitans qu'il ne venoit pour offencer le Roy : mais pour luy faire seruice, & le secourir : si qu'il le fit retourner une autre fois, & estant bien asseuré que telle estoit l'intention de Faech, il luy donna la charge de Baktusun, & à Baktusun le Gouvernement de Karason.

En ce

En ce temps mourut Sabutaquin, qui fut encores vn sujet de nouueaux troubles entre ses enfans Mamud, & Ismaël : si bien qu'Ismaël fut contrainct de s'enfuyr. Apres cela Mamud s'empara de Karason, d'où il estoit Gouverneur, l'ayant vsurpé sur Baktuzun à qui le Roy l'auoit donné : dequoy il se plaignit à son Prince par lettres, le suppliant par son autorité de le remettre en son Gouvernement. Ce qui fut fait, & on donna pour recompence à Mamud le Gouvernement de Balk, Tremed, & Herat : dequoy Mamud n'estant point content, il fit vne leuee de gens qu'il fit marcher contre Nikabur, où le Roy estoit, qui ne se tenant point sur ses gardes, fut contrainct de s'enfuyr, ne se tenant point assleuré dans ceste closture. Toutesfois Mamud craignant le nom de rebelle, ne passa point plus outre sur ce nouueau remuement. Il estoit venu vn des sujets du Roy Mansur, nommé Maktuzun, si bien que ce Prince se voyant appuyé s'en retourna de sa fuite. Or cestui-cy se plaignit à Faech, que le Roy ne l'auoit point traité avec l'honneur qu'il esperoit, Faech prenant occasion de luy ouurir son cœur, luy decouurit de quel pied il marchoit avec Mansur, & sa mauuaise volonté en son endroict : si bien que ces deux-cy s'accordans ensemble conspirerent contre leur Roy, & donnerent si bon ordre à leur entreprise, qu'en vn banquet ils luy creuerent les yeux, mettant pour Roy en sa place vn sien ieune frere nommé Abdel Malk, n'ayant regné qu'vn an & sept mois : Mamud d'ailleurs sçachant cét accident, leua des forces de toutes parts, pour aller contre les traistres, lesquels estans surpris furent contraincts de se sauuer Baktusun, à sçauoir à Nichabur, le Roy avec Faech vers Bokara, & Abul Kacem Siniur à Koestam, si qu'en ce faisant Mamud demeura seul Seigneur de Karason, contre lequel les autres s'armerent, & s'estans vnis ensemble estoient prests de se donner iournee pour combattre : mais la mort de Faech qui survint là dessus, en empêcha l'euement. Illech Kan Roy de Turon, ou Turquestam aduertty de tous ces remuemens, leua vne puissante armee qu'il fit aduancer à Bokara, d'où il fit entendre au Roy Abdel Malek qu'il desiroit le secourir, & qu'il estoit venu là pour cét effect : ce que le pauvre ieune Prince croyant legerement, luy enuoya les meilleurs de ses Capitaines pour le remercier, lesquels Illech fit prendre aussi tost prisonniers, ce qui estonna tellement Abdel Malek, qui ne cherchoit que quelque lieu pour faire vne retraicte, & ce pendant il se cacha le plus secrettement qu'il peust. Mais Illech estant entré dans la ville, mit des gardes sur tous les chemins, aux portes, & aux murs, puis fit faire vne recherche par la ville, en laquelle on trouua Abdel Malek, lequel fut enleué de là, & enuoyé à Vskand, où il mourut en prison : ses sujets mirent en la place vn sien ieune frere, lequel regna fort peu de temps. Cecy aduint l'an 1000. de nostre salut, & 389. de l'Egyre, Illech Kan le voyant en possession de Bokara, prit le Roy Abul Hares Mansur, luy fit creuer les yeux, à ses deux freres Abu Ebrahim Montecer, & Abu Yacub, tous deux fils de Nué, à ses deux oncles encores, à sçauoir Abu Zacharie, & Abu Salechk, & autres de la maison Royale, les mettans tous en prisons separees des vnes des autres, où il y auoit des esclaves du meisme Illech qui les seruoient, entre lesquelles il y en eust vne qui s'affectionna à Abu Ebrahim Montecer, & desirant le deliurer, elle le courut vn iour avec son Chaudel (vn certain vestement, duquel les femmes vsent pour se couurir, comme ce que nous disons vne mante) & ainsi desguisé qu'il estoit, elle le tira de là, & le fit aller en la maison d'vne sienne amie, où il fut caché quelque temps, iusques à ce qu'en fin elles le laisserent aller, puis se retirant apres de Bokara, passa à Koarrazim, où il eust bien tost fait vne leuee de gens qu'il enuoya contre Bokara, sous la conduite d'vn Capitaine nommé Arsalon Balu, qui combatant contre Taquin Capitaine de Illech Kan, le vainquit, & prit prisonnier avec plusieurs Caualliers de sa compagnie.

Et quant à Arsalon Balu, il destruisit toute la contree iusques au petit Cantarey, à l'encontre duquel vint Taquin Kham, Gouverneur de Samarkand pour Illech Kan, qui fut desconfit aussi bien que l'autre. Apres cela Montecer se retira à Bokara, où il fut fort bien receu de tous, & s'estant ioinct à Arsalon Balu, ils passerent ensemble le fleuve de Gehun, & arriuerent à Nichabur.

Amir Nacer fils de Mamud qui en estoit Gouverneur, abandonnant le païs, s'en alla à Herat où son pere residoit, lequel sçachant que ceux cy estoient dans ses terres, mit ses gens en campagne contre Montecer qui n'ayant pas l'assurance de l'attendre, se retira à Esferahen en la contree de Kabus, lequel luy enuoya au deuant des pretens presque inestimables, si l'on doit adiouster foy à Milkon : car il diét qu'il enuoya dix cheuaux avec leurs enharnachements d'or, trente avec leurs enharnachements d'argent, trente autres qui n'estoient que de soye, trente chameaux chargez de fins tapis Persiens, & plusieurs autres pieces de grands prix, plusieurs robes de riches brocardors, & vne grande somme de deniers, enuoyant encores quelques dons particuliers à tous ses Capitaines : Kabus auoit desiré qu'il luy aydast comme il seroit arriué en la ville de Rey, où il luy enuoyeroit vn bon secours, avecques ses deux fils Darab & Manucher pour luy ayder à le prendre. Toutesfois ayant depuis changé d'aduis, & estant passé de Rey à

Damion, Darab & Manucher s'en retournerent vers leur pere Kabus. Cecy aduint l'an de salut 1002. & de l'Egire trois cents nonante & vn.

En ce temps-là mesme Mamud enuoya avec Amir Nacer son fils, vn Capitaine appellé Altuntax pour recouurer Nicabur, & Montecer enuoya à l'encontre Abul Kacem, & Arsalon Babu qui perdirent la bataille. Nacer fut à Nichabur, & Montecer s'enfuit à Ibud, où Nacer le suiuit : mais Montecer print la volte de Gerion. Ce qu'ayant entendu Kabus, marry du mauvais proceder, dont Montecer auoit vsé en son endroict, mit deux mille hommes au passage pour luy empescher l'entree de ses terres : si que Montecer fut contrainct de prendre vn autre chemin, sur lequel pour vn fort leger sujet il fist tuer Arsalon Balu : ce qui luy fut cause d'acquiescer la haine de tous les siens. Depuis la guerre continua entre Nacer & luy, avecques diuers succez, iusques à ce que Montecer fust entierement deffaiect en vne bataille, de laquelle Nacer obtint la victoire, & où cestui-là perdit la meilleure partie de ses gens : puis avecques vn bien petit nombre qui l'accompagnoit, comme il s'enfuyoit, il tomba entre les mains des Turcomans : ce sont pastres qui vont paisans leurs troupeaux en diuerses campagnes, & font leurs retraictes dans des cabanes, lesquels l'ayant recogneu, le traicterent avecques beaucoup de courtoisie pour l'amitié qu'ils auoient eue avec son pere. De ceux-cy il s'assembla incontinent autour de luy vn fort grand nombre, avec lesquels il passa à Maurenahar. Illech Kam luy fut à l'encontre : mais les Turcomans l'ayant surpris vne nuit à l'improuiste, firent mourir grand nombre de soldats, & le mirent en fuite, & prindrent la meilleure partie du butin. Ils s'en retournerent en leurs cabanes, & Montecer passa le fleuve de Ichun : mais d'autant que c'estoit en l'Hyuer, & de nuit, qui sont tres-froides en celle contree, il estoit impossible de le passer sans barque, ny pont. Les Turcomans qui luy auoient aydé, ayans regret aux despoüilles qu'ils luy auoient laissees, ils se preparerent pour luy courir sus, & le prendre : mais estant arriué au fleuve qu'il estoit desia iour, ils le trouuerent degelé, de sorte qu'ils ne peurent suivre Montecer, & luy trouua moyen de se retirer de là sans estre offensé d'eux : Tout cecy aduint l'an de salut 1004. & de l'Egire 364.

Il y auoit en ce temps vn nommé Abuiafar, homme de basse condition, lequel de guetteur de chemins estoit paruenü à telle puissance, qu'il commandoit à toute ceste contree. Montecer luy demanda quelque secours : mais cestui-cy au lieu de le gratifier, s'opposa tant qu'il peust au progres de l'autre, de sorte qu'ils furent contraincts de venir aux mains : mais Montecer le vainquit, & prenant de là la route de Ibud, il trouua vne autre rencontre avec Abu Nacer Gouverneur de la prouince, qui fut fort sanglante & cruelle, d'autant que ce fut de nuit, & Abu Nacer fut tué durant le combat. Ce pendant Montecer n'auoit aucun lieu de refuge, & allant le long du fleuve pour tascher de le passer, il se rencontra avec le Xena, ou Gouverneur de Bokara, & perdit la meilleure partie de ses gens : si qu'avec ceux qui le peurent suivre il se retira à Darband, où aydé du Gouverneur de Samarkand, & des nobles Turcs, qui demurerent en la mesme Cité, & de quelques troupes dont il fit le choix, il alla donner vn assaut à Bokara, & la print. Ce qu'ayant sceu Illech Kan, luy alla au deuant, & le combattit : mais il fut vaincu, de la despoüille duquel les soldats de Montecer deuindrent riches. Ce qui aduint l'an de salut 1005. & de l'Egire 394. Illech Kan ayant refaiect son atmee, vint de rechef attaquer Montecer, prenant le temps que les soldats qui l'assisterent auoient faict retraicte : mais entre autre contre vn sien Capitaine, lequel avec cinq mille hommes estoit passé du costé d'Illech Kan. Cela fut cause de sa desroute : car n'ayant pas la puissance de resister à son ennemy, il se mit en fuite, & arriua au fleuve Gehun, lequel ne pouuant gagner, & à faute d'autre commodité il fut contrainct de passer là la nuit, & luy & les siens, de se contenter de la chair des animaux qui estoient desia morts : Apres cela il tint les plus courts chemins destournez pour euitier la rencontre de son ennemy, & s'en alla à Koestan, où estant pouruiuy, & hay de tous pour les diuers changemens, & reuers de fortune qu'il auoit soufferts : il arriua presque seul à Bokara, d'autant que ceux d'entre les siens qui estoient les plus mal contens, estoient passez du costé de Soleymon, & Safy Capitaine de Illech Kan. Le Gouverneur de Boara luy promit de l'assister : mais scachant que ces deux-cy estoient en embusche, il le fit sortir de la ville. Mamud qui estoit pour lors Seigneur de Karason, auoit donné à cens de certaines terres à vn nommé Ebenbayg Capitaine Arabe, en la Iurisdiction duquel se retira Montecer, & se cacha en vne pauvre maison : mais vn autre nommé Marnyh l'ayant sceu, vne nuit accompagné de quelques Arabes l'alla chercher, & le fit mourir. C'est ainsi que Montecer acheua son ennuieuse & laborieuse vie, l'an de salut 1006. & de l'Egire 395. de la mort duquel Mahamud, bien qu'il fust son ennemy, receut beaucoup d'ennuy, & fit mourir Marnyh qui l'auoit tué avec de fort cruels tourments.

Il y auoit dixhuiet ans que Kabus Ben Vvaxmaguir possedoit paisiblement quelques terres en la contree de Karason. Cestui-cy estoit des descendants des anciens Roys de Perse, & le
seul

seul qui ne s'estoit point meslé parmy tant de confusions que vous avez entenduës : car estant fort prudent, & fort riche, il sçauoit se conduire si dextrement, qu'il s'obligeoit ceux, qui par leur ambition, & par leurs armes ne pardonnerent à personne. Quant à Amir Sabutaquin ayant obtenu la victoire de Aboaly en Karason, vint à Bokara, où il eust vne estroicte amitié avec Kabus, & desiroit luy faire quelque seruice. Alors estoit Seigneur de Gerion, comme il a esté dit Fakoro Daulé, Sabutaquin taschoit de l'opprimer, afin d'introduire Kabus en ce Gouvernement : pour ce faire il demanda dix mille soldats à Illech Kan, lesquels ioincts avec les troupes qu'il auoit, firent vn puissant exercite, le rendez-vous duquel estoit à Balk, ou tandis que Sabutaquin attendoit ses troupes, la mort le surprint : Aussi fit-elle Fakoro Daulé en la place duquel succeda Maiudu Daulé son fils, sous la tutelle de Saida sa mere, comme nous auons dict. Abul Kacem residoit en Kumes, comme nous auons dict, qui apres la mort de Sabutaquin s'adressa à Kabus, avec lequel il accorda qu'ils occuperoient les terres du defunct Fakoro Daulé, & en iouiroient entre eux, & ainsi mirent leurs armées en campagne, entrant en ce pais par diuers endroiets : Kabus se mist en Nichabur, d'où il despescha vn Siabed Charear sien Capitaine : lequel estant rencontré par Mazabah, oncle du defunct, & qui estoit avec vne armee dans la prouince de Gerion, pour la deffence d'icelle, il le combatit, & le rompit, ayant eu de ceste victoire vne fort bonne prise, mit vne grande partie de ceste prouince sous l'obeïssance de Kabus, & en celle de Tabaristam : ils occuperent Amal, place d'importance, au secours de laquelle, comme Acem Feruzan fut venu avec vne bonne armee, ceux de dedans allerent à l'encontre avec Siabed Charear, & luy donnerent bataille, laquelle il perdit, demeurant prisonnier avec plus de vingt Capitaines des siens.

Ces succez donnerent tousiours plus grande esperance à Kabus, qui luy firent aspirer à plus grandes choses : & pour ne point perdre le temps, & sans donner aucune relasche il vint à Gerion, où il fut proclamé Roy en l'annee 1001. & de l'Egire 400. Il eut encores depuis quelque rencontres avec ses ennemis, mais le tout luy succeda tousiours fort heureusement : de sorte qu'il commanda en fin par tout le Gueylon, qui sont prouinces de fort grande estendue, au Gouvernement desquelles il mit son fils Manucher, enuoyant de grands presens à Mamud, afin de se fortifier par ceste recognoissance en son nouuel Estat.

Or Kabus faisoit si grand cas de la Iustice, & l'administroit avec tant de rigueur, qu'il n'y eut lieu qu'il estoit fort aimé des siens auparauant, il fut en horreur à tous, rapportans cela à la crainte : si que ne le pouuans plus souffrir, comme il estoit vn iour en son camp ils entrerent en sa tente pour le faire mourir : il eschappa toutesfois de leurs mains : mais ce ne fut pas sans vne tres-grande difficulté, & se sauua à Bostam : mais ceux-cy conuertissans leur rage contre sa tente, ils mirent à sac tout ce qu'y estoit, qui n'estoit pas peu, ny de peu de valeur : voulans mettre en son lieu Manucher son fils, qui gouernoit à Gueylon, à condition qu'il ne se vangeroit point de ce qu'ils luy auoient fait, & ne donneroit point aide à son pere contr'eux : mais il refusa le Royaume, si son pere n'en estoit consentant, preferant le respect paternel à la Couronne Royale : si que quelques-vns d'entr'eux furent trouuer le pere, lequel estimant beaucoup l'obeïssance de son fils, il ne voulut pas qu'il demeurat à son seruice comme il desiroit : mais le fit retourner, luy donnant liberalement le Royaume, & tout ce qui leur appartenoit, de quoy Manucher print la possession avec vn applaudissement vniuersel de tous : & Kabus se retira pour passer le reste de ses iours en la forteresse de Kakek, ou ceux de Gerion, craignans que tant qu'il viuroit qu'il leur fit du mal, ils trouuerent moyen de le faire tuer, sans que Manucher sceut pour lors qui auoient esté les aggresseurs : mais quand il les sceut il print d'eux vn seuer chastiment.

Manucher fils de Kabus, appelé autrement Malech Amali, se voyant Roy de ces terres que le pere auoit acquises en celles de Gerion & Gueylon (dans lesquelles Maiudu Daulé en tenoit vne bonne partie) enuoya ses Ambassadeurs à Sultan Mamud, pour se declarer son vassal, & luy offrit de tribut cinquante mille deniers d'or par an, qui sont enuiron soixante mille ducats, & Mamud luy donna pour femme vne sienne fille : mais quelques iours apres qu'ils furent espousez, Manucher mourut, demeurant en sa place Darab son frere.

Darab fils de Kabus, & frere de Manucher se meilla fort, comme il a esté dit parmy les differents de Nué & Boaly, le party duquel il suiuit, & par apres celui de Nué, par la mort duquel son pere occupant le Royaume de Gerion, il le fut seruir, lequel l'enuoya avec troupes à Tabaristam, pour la garde des terres qu'il possedoit en ceste prouince : mais ayant esté accusé de quelques crimes en son Gouvernement, il s'en purgea deuant son pere : ceste accusation luy apportant toutesfois vn tel mescontentement, qu'il se resolut de se retirer vers Mamud, lequel il receut avec honneur, toutesfois par la mauuaise conduite il tomba en fin en sa disgrâce, ce que recognoissant il l'abandonna, & se retira deuers Schachar Roy de Gurgestam, qui sur la priere de Mamud le fit retirer d'aupres de luy : en fin il succeda à son frere, où il demeura peu de temps.

Mirkond recite en cét endroit les prouesses de Sabutaquin en l'Inde, qui seroient trop longues à reciter, ioinct que cela seroit hors des termes de la briuecté qu'on s'est prescrite en ses sommaires. Or comme il a esté dit cy-dessus, il y auoit plusieurs differents entre Mumud & Ismaël son frere apres la mort de leur pere, lesquels estoient terminez par les armes, au desauantage de Ismaël, qui auoit esté contrainct de s'enfuir : & Mamud se voyant en repos de ce costé-là auoit fait paix, & contracté amitié avec Illech Kan, pour le desir qu'il auoit d'aller comme auoit fait son pere à la conqueste de l'Inde, où il obtint de grandes & signalees victoires, & emporta de tres-riches despoüilles. Parquoy Illech Kan enuieux de son bon-heur, & sans auoir aucun respect à la foy qu'il auoit donnée, voyant cestui-cy absent entra dans ses terres, & enuoya Isfar Taquin son parent contre Balk.

Arsalon Balu tenoit lors le Gouvernement de Herat, & de tout le Gaznehen iusques à Bafion (qui sont Prouinces fort grandes) pour Mamud : cestui-cy s'opposa avec les garnisons de la Prouince contre les efforts d'Illech Kan, & Isfar Taquin.

Mamud eut aussi tost aduis de la perfidie de son allié, si que laissant là ses conquestes de l'Inde, il retourna en diligence pour la defence de son païs, donnant tel ordre à ses affaires par le moyen d'Arsalon Balu, Capitaine fort expérimenté, qu'il desit premierement Abu Abdula Capitaine Arabe, qui conduisoit l'armée de Taquin, laquelle fut inuallement mise entierement en route, le mit en fuite & tailla en pieces la meilleure partie de ses gens, le reste se sauuant à la faueur du fleuve Gehun, qu'ils passerent avec leur General, lequel perdit de ceste iournee plusieurs de ses parens, & laissa vn sien frere prisonnier.

Ceste defaite toucha de bien pres Illech Kan: car il voyoit bien qui luy estoit du toutim possible de resister à la force, & au bon-heur de son ennemy : cela fut cause qu'il fit alliance avec Kaderkhan Roy de Ketao Kotan, que nous disons Catay, afin qu'il le secourut en ceste guerre, & empeschassent le cours des victoires de Mamud, lequel fit vne grande leuee, tant au Catay, qu'au Turquestan & Maurenahar, & se ioignirent aux forces de Illech Kan, ils passerent de compagnie le fleuve de Gehum.

La nouvelle de ce grand appareil fut bien-tost apportee à Mamud, qui estoit lors à Tabarstan, lequel s'en alla en diligence à Balk, où il assembla vne fort belle armee de Turcs : Calanges, Gazneys, & Aueganys allant au deuant de ses ennemys leur liura la bataille, en laquelle ceux de Illech Kan eurent du commencement de l'aduantage, ce que voyant Mamud, quasi desesperé de la victoire, il monta sur vn Elephant, qu'il poussa avec grande fureur au milieu de ses ennemis, desquels il fit vn grand abatis, quelque effort que fissent ceux d'Illech, à cause que l'Elephant s'estoit mis en cholere, ce qui redonna nouveau courage à ceux de Mamud : car voyans ainsi leur Prince en tel danger, firent tous leurs efforts pour l'en tirer, & ainsi obtindrent la victoire, metans leurs ennemys en fuite.

On tient que ceste bataille a esté des plus sanglantes qui ayent esté donnees en ce siecle-là. Cecy aduint l'and de salut 1008. de l'Egire 397.

Ceste victoire rendit tellement paisible Mamud, que nul ne luy peut empescher son dessein, qui estoit faire tous les ans, luy ou ses Capitaines vn voyage aux Indes pour conuertir ces peuples-là à sa secte, ce que voyans les Roys du païs : mais principalement vn nommé Bal, il trouua moyen, tant par ses propres forces, que par celles de ses alliez, de leuer vne tres-grande & puissante armee, & vint au deuant de Mamud, contre lequel il combattit tout vn iour; mais Mamud obtint la victoire des Indiens, où il fit vn tres grand & riche butin, & y gagna quarante Elephans de guerre, le reste se retira apres en vne forteresse tenuë pour imprenable, pour estre situee au milieu d'vn grand estang, en laquelle ils auoient amassé tout leur thresor, & les richesses de leurs Pagodes ou maisons de leurs Idoles, qui estoit inestimable. Mais le bastiment estant foible, Mamud trouua le moyen d'y entrer.

Il y auoit dans ceste forteresse (selon Mirkon) sept millions de dragmes d'or, sept cents lingots d'or pesans deux mille huit cents marcs, avec grande quantité de perles & de pierres pretieuses, & plusieurs autres riches pieces de grande valeur, mettant le tout en vne maison qui seruoit de depositaire à ce thresor.

Mamud ayant fait vne si belle prise, il s'en retourna à Gaznehen, laissant ce qu'il auoit conquis à personnes de confiance: Cecy aduint l'an mil vnze, & de l'Egire quatre cents.

Il eust encore vne autre iournee contre les Goares, qui sont ceux de Guzarare, & comme vn nommé Mahamed Ben Sury Capitaine des Vaneanes eut voulu prendre leur defence en main, il fut deffait, & vn sien fils pris prisonnier, lequel mourut en chemin, s'estant luy-mesme empoisonné avec du poison, qu'il portoit en vne petite malle.

Il y eut en ce temps vne grande famine en la contree de Karason : de sorte que les hommes & les femmes se mangeoient les vns les autres, sans aucun respect de sexe, aage, ny condition.

Après

Après ceste grande bataille susdite, Illech Kan s'estoit retiré à Maurenahar, & ayant entendu que Togam Kam son frere, qui auoit esté des siens en icelle se vouloit separer de Mamud, il print les armes contre luy : mais Mamud suruenant la dessus, ils s'accorderent.

Ces troubles ainsi apaisez, Mamud s'en alla contre Bagadet qu'il assiegea, de sorte que le Calife Kader Bila qui estoit dedans fut contrainct de se rendre, & de le contenter avec cinq millions de dragmes, chaque dragme valant vne reale d'argent, moyennant laquelle somme il le laissa en paix, & se retira en la Perse.

Du temps de Nué fils de Mansur, Chachar Abu Nacer fils de Abu Mehamed auoit le Gouvernement de son pere, lequel luy auoit donné lors qu'il fut en aage, & s'estoit retiré pour viure d'une vie priuée, quand Aboaly rebelle de Nué arma contre Chachar, & le depoussa de ses terres, lequel ainsi Sabutaquin pere de Mamud receut en son seruice, & ses terres venant par apres en son pouuoir, il les luy rendit.

Abu Nacer se mit par apres au seruice de Mamud, lequel le recompensa de la confirmation du Royaume, & d'autres grands presents : Mamud toutesfois desirant retourner en l'Inde, & le voulant mener avec soy, il s'excusa de ceste coruée : ce que Mamud dissimula pour lors : mais estant de retour il enuoya contre luy Altuntax, & Abu Mahamed le pere de cestui-cy, il l'enuoya en Bagadet : mais il priua le fils du Royaume, lequel s'estant sauué en vne forteresse, il fut pris & mis à la question, pour luy faire confesser où il auoit mis vn grand thresor, qu'on disoit qu'il auoit : & depuis estant emmené deuant Mamud, il le fit encore fouetter cruellement, & le mit en vne estroite prison : puis ayant fait venir le pere de Bagadet, il luy donna le prix de tout ce qu'il possedoit au Gurgestam, & au Gaznehen, & luy fit plusieurs autres aduantages, afin qu'il eut moyen de viure honorablement près de luy, iusques en l'année 1061. & de l'Egire 406. qu'il mourut.

Ces choses ainsi pacifées, Mamud retourna de rechef en l'Inde, où il gagna encore plusieurs batailles, & en rapporta de tres-belles & riches despoüilles.

Alors gouuernoit le pais de Koarrzm Mamun, qui mourut bien tost apres, & laissa pour successeur son fils Aboaly, cestui-cy espousa vne sœur de Mamud qui luy porta beaucoup d'affection : de sorte qu'il passa en paix le peu de temps qu'il vescu, par la mort duquel vint à la succession du Royaume vn sien frere nommé Mamun Ben Mamun, lequel mourut à peu de iours de là subitement, non sans soupçon de poison, qu'on auoit opinion luy auoir esté donnée par vn nommé Nealataquin vn sien Capitaine. Vn de ses fils fut mis en sa place.

Mais Mamud fort fasché de la mort de Mamun, delibera de s'en venger, pour ce faire il leua vne armee qui fit marcher à Koarrzm. Mais Nealataquin l'assailit vne matinee au despourueu, & apporta vne grande espouuante à toute son armee : si que la victoire fut fort en branle, elle se tourna toutesfois du costé de Mamud. Nealataquin estant contrainct de s'enfuir, & comme il vouloit passer vne riuere, il print querelle avec vn bastelier, lequel l'ayant recogneu le dissimula, iusques à ce qu'ayant donné le mot du guet à ses compagnons, ils luy lierent les mains, & le menerent à Mamud, lequel auoit du commencement intention de luy pardonner : mais il parla à luy avec vne telle hardiesse, & si peu de respect, qu'il le fit pendre, & donnant le Gouvernement de Koarrzm à l'Altuntax.

Mamud passa encore vne autre fois en l'Inde, où il eut vne fort signalée victoire contre Gulkand Roy payen, qui se voyant vaincu avec la perte de cinquante mille hommes, de crainte qu'une femme qu'il auoit, & qu'il aymoit infiniment pour son extrême beauté, ne vint en la puissance de ses ennemis, il la tua, s'en faisant à luy-mesme autant sur le champ.

Mamud alla plusieurs fois en l'Inde, où il vainquit les Roys Gopal, & Iandebal, d'où il remporta la encore de riches despoüilles, puis estant retourné à Gaznehen, il y fit faire vne fort superbe Mosquee en action de graces de ses victoires : de là il entra en Perse, où il print la ville de Rey, & celle de Hisphaon en Hierak, qui appartenoit à Magidu Daulé, le Gouvernement desquelles il donna à Masud, son fils, puis ayant esté deux ans malade, il mourut en l'an 1031. & de l'Egire 421. Deux iours auparauant que de mourir, il fit apporter deuant soy tout le meilleur & plus precieux de ses thresors comme il les veit, il respâdit beaucoup de larmes sans dire mot, de sorte qu'on ne sçait sur quelle consideration : mais d'autant qu'il commanda qu'on les gardast soigneusement, on iugea que sa tristesse procedoit de ce qu'il n'en pouuoit pas iouir longuement. Quant il voulut mourir, il fit venir le plus ieune de ses fils, qu'il croyoit deuoit estre fort remuant, lequel il pria de luy donner parole, qu'apres sa mort il viuroit doucement avec ses freres, & qu'il respecteroit & obeiroit à l'aîné, comme la raison le vouloit : l'autre luy respondit qu'il ne se mist point en peine de cela, & qu'il se gouuernerait avec eux comme il auoit fait avec le sien.

Tandis que ces choses se passojent ainsi à Karason, Maurenahar, Vsbek, les affaires de la Perse n'estoient pas moins troubles ny confuses : car Magidu Daulé estant Roy de Gerion

se gouvernoit fort nonchalamment, & avec beaucoup d'imprudence : Mamud Prince très-ambitieux, ne voulant pas perdre vne si belle occasion, enuoya contre luy vne puissante armee conduite par vn de ses plus experimentez Capitaines, auquel Magidu Daulé se rendit sans coup ferir, se fiant sur ce que n'ayant point offensé Mamud, il ne le priueroit point de son Royaume, mais il se trompa : car estant prisonnier, & vn sien fils nommé Abuzeyf : à peine le sceut Mamud, qui estoit lors en la ville de Rey qu'il se fit apporter le thresor de Magidu, où il y auoit vn million de deniers d'or, ou monnoye, qui est quasi vn million & demy de la nostre, quinze mille deniers d'or en joyaux, & grand nombre de vases d'or & d'argent, & autres pieces de grand prix, puis il fit emmener deuant soy Magidu Daulé, il luy demanda s'il auoit iamais leu Chanoma, qui est la Chronique de leurs Roys, auquel il respondit qu'ouy, puis il luy demanda s'il scauoit jouer aux eschets, l'autre dit qu'ouy. Auez-vous iamais leu, dit lors Mamud, que deux Roys possédassent ensemblement vn mesme Royaume : où auez-vous veu en ce jeu des eschets, que deux Roys fussent en vne mesme place : à quoy Magidu Daulé disant que non : Mamud luy fit lors vne grande reprimende de ses ignorances, & nonchalances, puis l'enuoya avec son fils, & vn Vvazir, à Gaznehen où Mamud auoit vne fort belle librairie, laquelle il fit apporter à Karason, où il auoit laissé pour Roy son fils Masud.

Il se fit encor plusieurs remuëmens entre les Daules, tant en Perse comme en Kermon, entre principalement Albufauares, & Gelala freres de Tom-Daulé, qui auoit succédé à son pere Boadaulé : mais en fin ils s'accorderent en l'an mil dix-neuf, & de l'Egire quatre cents neuf. En Diarbek il y auoit Acem Ben Boadaule, autrement nommé Mocharaf Daulé, qui eut intelligence avec vn des principaux Capitaines de Sulton Daulé, laquelle estant descouverte, il fut mal-aysé d'y remedier sans venir aux armes : & apres plusieurs rencontres, ils s'accorderent à la charge que Mocharaf Daulé gouverneroit la prouince de Hierak d'Arabie, & Sulton Daulé auroit Aunaz, & la Perse : mais Sulton Daulé estant retourné à la maison, assembla vne plus puissante armee qu'auparauant, sous la cōduite de Eben Salax, qui l'enuoya contre Mocharaf : mais cestui-cy fut vaincu & assiegé dans vne forteresse, où il s'estoit retiré, & en fin contrainct par la necessité de se rendre à son ennemy la vie sauue, ce qui esleua tellement Mocharaf, qu'il s'en fit apres appeler le Roy des Roys : ce qui aduint l'an mille vingt & vn, & de l'Egire quatre cents vnze, l'annee d'apres il fist creuer les yeux à Eben Salah. En ceste mesme annee Gela-Daule fut fait Roy de Bagadet, qui eut pour Vvazir Abugaleb, lequel & les soldats massacrerent, d'autant qu'il estoit vn donneur de cassades. Il se fit apres vn nouuel accord entre Moncharaf Daulé, & Sulton Daulé par le moyen du fils du Sulton, à condition que Hierak d'Arabie demeurerait à Moncharaf, & la Perse, & Kermon à Sulton, lequel mourut deux ans apres, à scauoir l'an mille vingt-trois, & quatre cents treize de l'Egire. Apres la mort Abu Mokarran vn de ses premiers Capitaines enuoya avec forces son fils Abul Ganiar à Auas : mais les Turcs ou Turcomans qui residioient en la Perse appellerent Abulfauares frere de Sulton, qui estoit en Kermon, & l'introduisirent en Scyras auparauant qu'il se fust mis en chemin : ce que sachant Abul Ganiar leua vne nouvelle armee qu'il enuoya contre Scyras, ce qui fut cause que son competeur fut contrainct de se retirer à Kermon : mais cela ne mist pas dauantage le pais en repos, d'autant que les vns demandoient la paix, les autres voulant qu'on fist la guerre à Abulfauares, & le Roy n'ayant point d'argent fut contrainct de s'en aller à Noababandian, la grande ieunesse ne luy ayant pas encore donné assez d'experience pour remedier à tant de trauerses, cela fut cause que les partisans d'Abulfauares le firent retourner à Scyras, & le declarerent Roy, comme ceux aussi du party d'Abul Ganiar, luy mirent tellement le cœur au ventre, qu'il arma contre son oncle, & apres plusieurs bons & mauuais succez, en fin il contraignit de rechef d'abandonner Scyras, ou l'autre entra, & fut de nouveau déclaré Roy.

L'an mille vingt-six, & de l'Egire quatre cents seize, Mocharaf Daulé mourut à Bagadet en l'age de vingt-trois ans & trois mois, ayant regné cinq ans & vingt-cinq iours, la mort fut cause qu'on manda de Basora Gelala Daulé pour luy succeder, lequel n'estant pas venu avec la diligence requise en telles affaires, on donna le Gouvernement à vn autre : dequoy se voulant venger Gelala, il vint contre Bagadet, le Calife Kadar tascha de l'appaiser avec raisons & prieres : mais tout tout cela ne les peust empescher de venir aux mains au desauantage de Gelala, qui fut deffait & contrainct de s'enfuir à Basora, ayant perdu la meilleure partie de ses gens, & vn tres-bon butin. L'annee suiuiante, les Turcs vindrent à grandes troupes à Bagadet, qu'ils prindrent, saccagerent, & y mirent le feu : ce qu'ils firent pour s'asseurer contre les Arabes qui demeuroient en ce pais-là : cela fut cause que les habitans appellerent Gelala à leurs secours, & le declarerent Roy de Bagadet, dans laquelle entrant, il alla en la maison du Calife pour luy baiser le pied, lequel le receut benignement, cela aduint en l'an mil vingt-neuf, & de l'Egire quatre cents dix-neuf : mais en ces entrefaites les Turcs qu'il auoit amenez quant

quant & luy, demandoient leur paye, & comme Gelala n'avoit point d'argent, ils firent de grandes insolences, principalement en la maison de Aboaly Ben Makula Vuasir de Gelaia, qu'ils saccagerent & emporterent tout ce qui estoit dedans, qui n'estoit pas peu, & renfermerent le mesme Gelala dans vne maison, d'où ils ne le voulurent point laisser sortir qu'ils n'eussent eu le Calife pour respondant qu'on les payeroit, comme il fit aussi, vendant pour ce faire plusieurs pieces de grande valeur. C'estoit en ce temps que Mamud Gaznehy taschoit des'emparer de la Perse, ce qu'Abul Ganiar fit entendre à son oncle Gelala Daulé, afin de s'vnr ensemble, & resister à leur commun ennemy : mais l'autre au lieu de marcher contre Mamud, il alla saccager Avvas, qui estoit des terres de son cousin, de laquelle il tira grande somme de deniers.

Les dissensions n'estoient pas moindres en Basora, entre les Turcs & ceux de Dialema, les vns favorisans Malek Azis, fils de Abu Mansur, & neveu de Gelala-Daulé, duquel ne vouloient point ceux de Dialema, ne durant leurs discordes. Abul Ganiar prenant son temps les print à son aduantage, & s'empara de Basora, & de là passa à Vvacet, si que tous les biens de ses parens vindrent en sa puissance, à quoy Gelala vouloit donner tout l'empeschement à luy possible: mais les soldats ne voulurent iamais marcher pour luy, qu'ils n'eussent receu vne paye, & à faute d'argent il en demanda par maniere d'emprunt aux plus riches de Bagader, ce qui luy acquit l'inimitié de tous. Cependant Abulfauares qui regnoit en Kermou, voyant ainsi les affaires troubles en Perse, leua vne armee pour tascher d'y faire ses affaires, mais il mourut en chemin, ce qui fut cause que tous les grands de Kermou d'un commun accord appellerent Abul Ganiar, auquel ils donnerent le gouvernement, & ainsi fut déclaré Roy de Perse, & de Kermou, puis sans perdre le temps, il vint avec vne bonne armee contre Bagader : mais Gelala-Daulé estant venu au deuant luy liura la bataille, laquelle Abul-Ganiar perdit, & fut contraint de se retirer à Avvas, & Gelala laissant à Vvacet des garnisons suffisantes pour la garder, il s'en retourna à Bagader en l'an mille trente-deux, & de l'Egire quatre cents vingt-deux, en laquelle année Kadar Calife mourut, ayant tenu le siege quarante & vn an & quatre mois, en la place duquel on mit Kahem, ou Alkahem Beamaryla Abuiafar Abdula son fils.

KAHEM OV ALKAHEM BEAMARYLA ABVIAFAR.

ABDULA XLVII. Calife.

LE temps de Kahem, ou Alkahem Beamaryla Abuiafar Abdula fils de Kadar, ne fut pas plus paisible que celui des autres, & commençant par le Karason, a esté parlé cy-deuant de la mort de Mamud, en la place duquel on mit Mahamet son fils. Or cestui-cy auoit vn frere auquel le pere dès son vivant auoit donné le Gouvernement d'Hisphaon, lequel aussi tost qu'il sceut la mort de son pere arma contre son frere : mais cestui-cy commandoit à ses sujets avec tant de rigueur, que l'ayant tous en horreur, le voyant absent, ils se reuolterent: mais Mamud retourna promptement entourer la ville, qu'il print & chastia les rebelles, puis continua son entreprise contre Karason auparavant que d'y arriuer: il escriuit à son frere Mahamed, l'assurant que sa venue n'estoit que pour le seruir, par ce que les terres qu'il possedoit estoient plus que suffisantes pour luy faire passer ioyeusement sa vie. Mahamed qui ne desiroit point cette visite, luy fit dire qu'il le prioit de l'en excuser, & qu'il s'en retournaist, ce qui offensa fort Masud : de sorte qu'il se declara tout apparamment ennemy de Mahamed, auquel on conseilla fort de se reconcilier : mais il y fit la sourde oreille, & enuoya contre son frere vn Capitaine nommé Issuf Sabutaquin, & luy-mesme le suivit avec le plus grand nombre de gens qu'il luy fut possible : mais il s'arresta vn mois à Tanganabat, où il fit le Ramedon, ou Carême Mahometan : en fin Masud l'environna, & par la trahison d'Issuf, & la meschanceté d'un Amir Aly vn des principaux hommes de Mahamed : il fut pris & liuré à Masud, lequel recompensa les traistres comme ils auoient mérité : car il fit mettre Issuf chargé de fers en vne basse fosse, & fit pendre Amir Aly, & quant à son frere Mahamed il luy fit creuer les yeux, demeurant ainsi maistre des Royaumes de Karason, & de Gaznehen, outre la Prouince de Hierak, que son pere luy auoit donnée, ce qui aduint l'an mil trente-deux, & de l'Egire quatre cents vingt-deux : apres cela il enuoya Altuntax Gouverneur de Koarrazin contre Aly Taquin, qui tenoit Samarkand & Bokara, & y eut bataille entr'eux, en laquelle Altuntax eut du pire du commencement à cause du stratageme, dont se seruit Taquin : toutesfois la victoire demeura en fin à l'autre, mais elle luy cousta bien cher : car il y perdit beaucoup de ses gens, & laissa la vie; à la fin de laquelle se sentant approcher, il fit accorder les siens avec l'ennemy, de crainte qu'ils n'encourussent quelque danger, quand ils seroient sans chef.

En l'an mil trente-quatre, & de l'Egire quatre cents vingt-six, la contree de Gibal, & la ville

de Rey se reuolterent contre Masud, comme firent encores les garnisons que son pere auoit laïssées en l'Inde, mais en recompence il subiugua Gerion, & Tabarstan: & comme durant son absence deux Capitaines Turcs se fussent souleuez contre luy, l'un nommé Togorel ou Togozelbek, & Iakarbek Salinquey, il les subiugua à son retour, de là il fit vn voyage en Inde: mais les Turcs ne s'estans qu'escartez sans auoir esté rompus, se rassemblerent, & à la faueur de son absence subiugerent plusieurs villes en Karason, & contraignirent Alao Daulé Ben Kakuyha, & Abulale de sortir hors de leurs gouuernemens, ce qui fut cause que Masud vint aussitost à Gerion, & comme en poursuyuant son chemin, il eust sçeu qu'un guetteur de chemins s'estoit retiré en vne forteresse avec cent de ses compagnons, il les fit venir sous son sauf-conduit & assurance: mais quand ils furent venus deuant luy, il les enuoya pendre, disant que telles manieres de gens deuoient estre chastiez en quelque maniere que ce fust: & continuant son chemin, on luy fist plusieurs plainctes des tyrannies de Nur Taquin Gouverneur de Balk: mais il estoit bien mal aysé de satisfaire à leur demande, à cause que c'estoit l'Hyuer, & qu'il faisoit de grandes pluyes: toutesfois poursuiuant son chemin, il eut nouuelles que Daud Capitaine Turc amenoit de grandes forces pour le secours de Balk, en faueur de Nur Taquin: de sorte que Masud craignant d'estre enclos, alla au deuant de Daud, ce que sçachant Nur Taquin, il le poursuiuit, & luy donna sur la queue, où il fit mourir grand nombre de ses gens, & emporta vn fort bon butin. Masud ainsi mal-traitté, ne laissa pas de poursuiure son chemin contre Daud, lequel le vainquit, & le contraignit de s'enfuyr à Gaznekhen, où il fit mourir plusieurs Turcs qui estoient de ses soldats, d'autant qu'ils auoient trop laschement combattu en la bataille, qu'ils auoient eue avec Daud Saliquey: puis ayant enuoyé son fils Maodud à Balk, accompagné du Nacer Hamed son Vvazir, & de bon nombre de gens de guerre, emmena avec soy son frere qui estoit auetugle, & ses fils, & s'en allant à l'Inde, & arriué qu'il fust à vn passage du fleue de Send, que les Perles appellent Pang, & qui n'est autre que l'Indus: il passa luy & les siens de l'autre costé, demeurans sur l'autre riuie son frere auetugle avec ses thresors, en la garde d'un Capitaine appellé Nustarquin, lequel se seruant de ceste occasion, il departit aux soldats les thresors, & saluerent l'auetugle Roy, lequel le refusoit: mais en fin il l'accepta pour la crainte qu'il auoit de la mort, de laquelle ils le menaçoient, s'il ny consentoit, puis passerent le fleue avec luy, & se ruèrent sur les gens de Masud, qui ne firent pas grande resistance, ne s'attendants pas à ceste secousse: de sorte que Masud fut pris, toutesfois il ne luy demanderent point d'autre satisfaction, sinon qu'il se contenteroit de viure en paix en quelque lieu, ce qu'il accepta & demanda la forteresse de Kobrakibir, laquelle luy fut accordée avec bonne garde: au departir Masud pria son frere de luy enuoyer quelque argent pour faire son voyage: Mais Mahamed qui estoit fort auare, dict qu'on luy donna cinq cents dragmes, qui sont enuiron cinq cents reales, ce que Masud souffrit avec vn grand ressentiment: mais celuy qui luy portoit l'argent luy en donna encore du sien mil cinq cents deniers d'or, qui sont enuiron deux mille ducats, lesquels luy furent apres bien payez.

Quant au Roy auetugle, se voyant mal propre au gouuernement, à cause de son auetuglement, il resigna son Royaume à son fils Hamed, lequel par le conseil d'un fils de Issuf Taquin, & de Amir Aly Kachaoand, les peres desquels Masud auoit fait mourir en vengeance aussi bien qu'il auoit fait au Roy auetugle, ils allerent secrettement à Kobrakibir, & tuèrent Masud ayant esté Roy dix ans: il estoit fort courageux & liberal, & comme il a esté dict, il auoit enuoyé son fils Maodud à Balk, où ayant entendu l'aduenture de son pere, & le retour de Mahamed de l'Inde, il les fut attendre au passage à Gaznekhen, où il les prit si mal à propos, qu'il les combatit les vainquant, & print prisonniers Mahamed, son fils Hamed, & d'autres encores qui y estoient, Nustarquin, & les deux conseillers de la mort de Masud avec vn bon nombre de ceux de la maison Royale qu'il fit tous mourir, excepté vn Abderrhain, fils de l'auetugle, auquel il sauua la vie pour vne telle occasion, c'est que Masud estant prisonnier, vn sien frere Abderramon le trouuant avec la Tige ou Couronne sur la teste, laquelle Abderramon ayant ietté par grand mespris en terre Abderrhain trouuant ce fait fort estrange, & la leuant du lieu où ceste Tige auoir esté iettée, il la mit sur la teste de son oncle, avec paroles de grande consolation: & cet acte de pieté estans venu à la cognoissance de Maodud, il suruint en ceste occasion, & le recompensa de la vie.

Maodud ayant obtenu ceste victoire, il fit bastir vn fort somptueux edifice, qu'ils appellent Fal Habad, & selon le langage de Karason le lieu de Adogagé. La mort de Masud apporta encores plusieurs remuëmens en la Perse, & en l'Inde, d'où Maodud craignoit fort que son frere Maodud reuint, & qu'il luy fit quelque trouble: mais cestuy-cy mourut en chemin, si bien que Maurenahar, & les terres de l'Inde vindrent en la puissance de Maodud. Toutesfois les Turcs Saliqueys qui estoient lors à Maurenahar, & Karason ne le recognoissoient point, contre

contre lesquels il envoya son armee, l'an mille quarante-cinq, & de l'Egire quatre cents trente-cinq, à laquelle s'opposant Olob Arsalon fils de Iakarbeck avec de fort belles troupes, combattit l'armee de Maodud, remporta la victoire. D'autre costé les Turcs ayans sorty de Turgestan à grande multitude, pillans & rauageans les contrées de Garineer & Kandachar: mais les garnisons de Maoul les attendirent au passage, & en firent vn grand carnage. En ce temps les Roys de l'Inde, qui estoient vassaux de Maodud se rebellerent contre luy, & ayans fait alliance entre eux, vindrent assieger Lahor, que Maodud envoya secourir en grande diligence: mais les dissensions que ces Roys eurent entre eux, furent cause que Maodud pacifia le tout plus facilement, & fit retourner les autres en leur precedente obeissance, & comme il eust terminé ce different, il fit marcher son armee contre les Turcs. Saliuquis qui occupoit le Karaton, il mourut en chemin d'une colique, l'an mille cinquante, & de l'Egire 441. Or encore qu'il eut deux fils, les soldats voulurent toutesfois qu'Alyben-Masud son frere luy succedast, mais cestui-cy ne iouit pas long temps de la Royauté: car vn Vuazir de Maodud mit en liberté Abd Rachid, & le declara Roy, le portant, de sorte que l'autre fut contrainct de luy quitter la place.

Quant à Bagadet, les choses estoient tousiours en confusion: car le peuple se reuolta encore vne autre fois contre Gelala Daulé, en mespris duquel ils proclamerent Roy de Bagadet Abulganir, & l'envoyerent querir, mais il s'en excusa, & bien pour luy: car les Turcs s'accorderent bien-tost apres avec Gelala Daulé: toutesfois ceste reconciliation ne fut pas de longue durée: car ils firent vn nouveau rauage dans la ville, où ils mirent le feu pour auoir plus d'occasion de la piller, & vouloient faire sortir Gelala, si bien que tous ces remuemens durerent tout l'an mil trente-sept, & de l'Egire quatre cents vingt-sept, & le suiuant encore, auquel il fit vn si grand froid, que le fleuve Degile, qui est le Tygris, fut gelé douze iours continuels, & tombant de neiges aux environs de Bagadet, que toute la terre en estoit couverte à la hauteur de trois palmes, ce qui est assez digne d'admiration, veu la situation de la terre. Gelala fut quelque temps d'accord avec les Turcs. Mais l'an mille quarante-quatre, & de l'Egire quatre cents trente quatre, vn de leurs Capitaines Ebrahim Nealy Saliuquy entra en la Perse, en la Prouince de Hierak, & print Amedon. Tokzelbek autre Capitaine print aussi la ville de Rey, & sur ces entrefaites mourut Gelala Daulé, ayant regné dix-sept ans, son fils Abu Mansur estoit à Vvacer que l'on manda: mais les troubles estoient si grandes de toutes parts, qu'il n'osa abandonner le pais, de sorte qu'on donna le gouvernement à Abul Ganiar. Tokzelbek cependant avec vne armee victorieuse rauageoit toute la Perse, cela fut cause qu'Abul Ganiar voulut faire alliance avec luy: & maria son fils avec vne fille de Daud Saliuquy cousine de Tokzelbek, & l'an suiuant, qui fut l'annee mille quarante-neuf, & de l'Egire quatre cents quarante: il mourut en Kermon, laissant cinq enfans, Abu Mansur Fulad Sotun, Kozrrao Feruz Abu Taher Aabucayd Aboaly Kaykorrao. Sotun, comme l'ainé pensoit succeder: mais Kozrrao Feruz s'empara du Royaume, & changeant de nom se nomma Malek Rhaym: si qu'il y eut de grandes guerres entre tous ces freres, avec diuers succez: en fin Rhaym à l'ayde de Tokzelbek print Scyras, & la meilleure partie de la Perse, tout y estant en confusion, & puis s'en retourna à Vvacer.

Les troubles continuoient aussi à Bagadet, qui auoient esté continuez depuis la mort de Gelala, par le moyen du Calife de Damas qui estoit de la famille de ceux d'Ismaël qui vouloit faire chasser de Bagadet, le Calife Kahem, ou Alkahem, comme de fait il fut contrainct de quitter le siege, & s'en aller se refugier à Tokzelbek, avec lequel il auoit quelque amitié, cestui-cy entra en Bagadet, laquelle il mit à feu & à sang, sans pardonner, ny aux viuans ny aux morts, faisant ouurer iusques aux sepulchres, pour voir s'il n'y auoit point quelqu'un de caché, & le remit ainsi en son Califat. En ces entrefaites arriua à Bagadet Malek Rhaym, lequel nonobstant toutes ses allegations, & bien qu'il se fut retiré en la maison du Calife, il ne peut empêcher qu'il ne vint en la puissance de Tokzelbek qui le mit en prison, en laquelle il mourut: mais ceste mort n'apporta pas plus de concorde entre ses autres freres, Mansur & Abusayd, de sorte qu'en fin ce dernier, apres plusieurs diuers euenemens, fut pris prisonnier par Mansur qui le fit mourir: il fit le mesme apres à vn sien Vvazir, qui l'auoit esté aussi à son pere, & mit en sa place Fazel Ben Acen, lequel se voyant bien estably en sa charge, pour recompense il print son Roy Mansur, & le mit prisonnier en vne tour, où il mourut.

Il y auoit en Kermon vn Capitaine Turc, nommé Saliuquy, autrement Malek Kaoerde, qui ayant entendu ce que Fazel auoit fait contre Mansur, leua vne grande armee contre luy: de sorte que l'autre fut contrainct de s'enfuir, & de se retirer vers Olob Arsalom, avec lequel il acquit de grandes richesses, toutesfois ce ne fut pas avec tant de seureté pour luy, qu'il ne fut pris prisonnier avec vn sien fils à Nazō de Molk, & mis prisonniers en la forteresse de Stahhar,

où ils moururent en l'an mille cinquante-sept, & de l'Egire quatre cents quarante-huit, quant à Aboaly Kay Kozrrao fils d'Abui Ganiat, auquel avoit esté laissé le Gouvernement du pere, il s'en desmit volontairement entre les mains d'Olob Arsalon, qui luy donna les terres de Naoband Ian & Aktak où il passa le reste de ses iours. Arsalon le traitant tousiours avec beaucoup de courtoisie, il vescu encore quarante ans apres ses freres, & mourut en l'an mil nonante cinq, & de l'Egire 487. qui fut la fin du gouvernement des Daules en la Perse.

Quant à Togorel, ou Tokzelbek, il poursuivit Abd Rachid, lequel s'estoit retiré en vne forteresse si forte, que voyant qu'il ne gaignoit rien deuant, il fit en sorte par presens qu'il corrompit les gardes sans ceux qui estoient dedans. Si que Abd Rachid luy fut liuré avec plusieurs autres de ses parens, lesquels il fit massacrer, & puis le declara Roy, espousant vne sœur du defunct : mais à peu de iours de-là estant en la place publique pour y recevoir la salutation qu'on a accoustumé de faire en ces quartiers-là, dix des principaux hommes du pais bien vnis ensemble, vindrent pour la luy donner, & s'estans mis en rond à l'entour de luy, mirent tous la main à l'espee, & le massacrerent: Bien peu de temps apres Charkir, vn Capitaine qui venoit des Indes, fit sortir de prison Ferrogosad, fils de Massud, & frere d'Abd Rachid, & le fit Roy, David Saliuquy, de qui Ferrogosad avoit eu la victoire, leua vne armee pour aller contre Karason, contre lequel Saliuquy Roy de Turquestan enuoya plusieurs de ses Capitaines, lesquels furent vaincus: en fin Olob Arsalon combattit & le vainquit, prenant plusieurs Garneys prisonniers, lesquels s'en reuancherent apres sur les Turcs, qui estoient captifs en Gaznchen, Ferrogosad ayant gouverné six ans mourut, laissant pour successeur son frere Hebrahem Ben Masud. En ce temps mesme mourut, Kalem, ou Alkahem Calife, l'an mil septante-quatre, & de l'Egire 467. ayant tenu le Califat quarante-quatre ans & quatre mois.

ALMOKTADY BILA XLVIII. Calife.

Après la mort de Kalem, Almoktady Bila fut mis en sa place, au temps duquel il se fit plusieurs remuemens en la Perse: mais de peu d'importance, & quant au Karason & terres de Maurenahar, Hebrahem, frere de Ferrogosad, qui par sa mort luy avoit succédé, s'accorda avec les Turcs, & ayant mis son Royaume en paix, fit vn voyage en l'Inde, où il fit de grandes conquestes, & gagna de tres-riches despoüilles: mais Malekcha Roy de Turquestan voyant la Perse iouir d'une profonde paix, pensa que le temps estoit propre pour y bien faire ses affaires, & leua pour cet effect vne grande armee, dequoy ayant eu aduis, Ebrahem luy enuoya des Ambassadeurs, qui firent en sorte qu'ils le destournerent de son dessein: & pour plus grande assurance de leur amitié, Ebrahem maria son fils Masud avec la fille de Malekcha, ce qu'estant fait Ebrahem, mourut l'an de salut mille octante-neuf, & de l'Egire quatre cents quatre-vingt & vn, & sixans apres, à sçavoir l'annee 1095. & de l'Egire 487. mourut le Calife Almoktady Bila, ayant gouverné dixneuf ans cinq mois.

ALMOSTAZER BILA XLV. Calife.

Almostazer fils de Almoktady succeda à son pere au Califat du temps de cestuy cy, Bagader ayant esté ruinee par les desbordemens du fleuve de Tygris fut changee de situation, & bastie de l'autre partie du fleuve, vers l'Orient, où elle est maintenant assise en vne assiette plus commode que la premiere, ayant eu vingt-cinq Califes, depuis la premiere fondation faite par Abuiasfar, sans que pas vn soit mort en icelle, ce qui est digne d'estre considéré. Quant à Almostazer Bila, eut quasi la paix tout le temps de son gouvernement, qui fut de vingt-cinq ans & six mois, à la fin desquels il mourut, l'an de salut 1129. & de l'Egire 512.

ALMOSTARCHED BILA FAZEL L. Calife.

A ce Calife tout pacifique succeda son fils Almostarched, fort courageux & enclin à la guerre, laquelle il fit à quelques Princes de Perse, & ayant occupé quelques Prouinces de Masud Saliuquy Roy de Karason, ils combattirent ensemble avec diuers succez, mais la victoire demeura en fin à Masud, pres de Tabris, où Almostarched fut vaincu, & se sauua à la fuite: il fut toutesfois pris incontinent apres, & présenté à Masud qui le fit tuer, l'an de salut 1136. & de l'Egire 529. ayant gouverné dixsept ans & deux mois.

RACHED BILA LI. Calife.

Rached Bila fils de Almostarched, parvint au Califat apres la mort de son pere, de laquelle voulant prendre vengeance, il arma le plus de gens qu'il peust, & s'en alla contre Masud en Perse, de laquelle il conquist vne grande partie: mais s'estant rencontré avec son ennemy qui luy liura la bataille, il fut vaincu, & s'enfuyt à Isfaon Chef de Hierak en la Perse, où Masud le fit tuer en l'an 1139. & de l'Egire 532. apres la mort duquel, Masud vint en Bagader, où il entra sans aucune resistance.

ALMOKTASY BILA LII. Calife.

Masud s'estant rendu le maistre de Bagader, mit en la place de Rached Almoktasy Bila oncle du defunct, & bien peu apres Masud mourut là en Perse, chacun de ses Capitaines se contentant

contentant de ce qu'il auoit en gouvernement: ce qui donna l'assurance à Almokrasfy d'assembler vne belle armee, & s'en alla en la Perse où il recouura sans grande resistance, ce que Masud y auoit vsurpé, laquelle ayant possedee l'espace de 24. ans sans aucune notable nouveauté, il mourut en l'an 1161. & de l'Egire 555.

ALMOSTANGET BILA ISSUF LIII. Calife.

Au Calife Almokrasfy succeda son fils Almostanget Bila Issuf, & comme du viuant de son pere Masud fut mort en la Perse, comme il a esté dict, Arsaloncha son fils aîné luy auoit succédé en Gaznehen, lequel à peine fut il paruenü à la Couronne qu'il fit prendre tous ses freres, qui estoient en grand nombre, vn seul excepté nommé Baharoncha qui eschappa. Or ceux-cy auoient deux parents, l'vn Gouverneur de Karason appellé Saniar, & l'autre de Hierak de Perse qui s'appelloit Mahamed. Ces deux-cy estoient freres: Baharoncha se retira vers Saniar, lequel tascha de l'accorder avec Arsalon, lequel n'y ayant voulu entendre, Saniar luy fit la guerre, & entra dans Gaznehen: de sorte que Arsalon fut en fin vaincu. Vne sienne tante tascha de les accorder, mais Saniar à la persuasion de Baharoncha retourna aux armes, & ayant eu vne seconde victoire de Arsaloncha, il entra de rechef au Gaznehen, où il fit vn tres-riche butin: puis ayant mis Baharon en possession de ceste contree, il s'en retourna chez soy. Arsalon le voyant absent retourna de rechef au Gaznehen, contraignant Baharon de s'enfuir, que Saniar restablit apres: & Arsalon s'enfuyant, il fut pris & emmené à son frere, qui le fit tuer, ayant regné trois ans. En l'an 1119. & de l'Egire 512. Baharon demeurant ainsi paisible possesseur, il fut fort bon Prince, gracieux & liberal, qui aymoît les gens de lettre, & luy mesmes estoit fort sçauant, de sorte qu'il escriuit quelques ceuures en Philosophie, l'estude ne luy fit pas perdre toutesfois son courage guerrier, de sorte qu'il fit quelques entreprises en l'Inde & en la Perse, où il mourut l'an 1153. & de l'Egire 547. ayant regné trente cinq ans.

Kozrrao son fils luy succeda, mais étant arriué quelques remuemens à ce nouveau regne, & ne se tenant point assuré en son pays, il s'en alla en Inde en la Prouince de Lahor, il retourna depuis à Gaznehen: mais trouuant son Royaume occupé par Saniar Roy de Karason, & qu'il n'estoit pas assez fort pour s'opposer à sa puissance, il s'en retourna à Lahor où il mourut l'an 1161. & de l'Egire 555. ayant regné neuf ans. Son fils Kozrrao Malek succeda à Lahor chef du Royaume de Multon en l'Inde, car pour la Perse tous les Royaumes estoient occupez, & pour les r'auoir, il falloit vn esprit plus belliqueux & moins vitieux que le sien, qui fut cause de le faire hayr de tous, & principalement des gens de guerre. Vne partie des terres de Gaznehen estoient possedees par vn Sultan Guaya Cadin Mahamed Gaury: cestuy-cy fit quelques courses en l'Inde vers Lahor, laquelle il prit: de sorte que Kozrrao Malek retourna au Gaznehen, où il mourut l'an 1169. & de l'Egire 563. & en luy prindrent fin les Sabutaquys: trois ans apres mourut le Calife Almostanget, à sçauoir l'an 1172. & de l'Egire 566. ayant gouverné vnze ans.

ALMOSTANZY BENUR ELAH ACEN LIV. Calife.

Almostanzy Benur Elah eut le Califat par la mort de son pere, il fut bon Prince, liberal, & aymé des siens, il gouverna neuf ans & huit mois, & mourut l'an 1180. & de l'Egire 575. sans que durant ce temps il soit arriué chose digne de remarque.

NACER OU NACERE LADIN LV. Calife.

Almostanzy étant mort, son fils Nacer ou Nacere Ladin vint au Califat, lequel il tint 47. ans, sous lequel Bagadet florit grandement. Durant le gouvernement d'iceluy ceux de Koarrzm vindrent contre les Saliuquys, les vainquirent & assubiegtirent, & les Tartares, sous la conduite de Chinguiskam s'emparerent des contrees de Turon & Agem, les mettans à feu & à sang, auquel temps mourut le Calife Nacer, à sçauoir l'an mil deux cens vingt six, & de l'Egire, six cens vingt-deux.

ALZAHER OU ALTAHER BILA MAHAMED LVI. Calife.

Le fils de Nacer nommé Alzaher ou Altaher Bila Mahamed fut fait Calife au lieu de son pere, mais ce ne fut que pour neuf mois, car il mourut en l'an de salut deux cens vingt sept, & de l'Egire six cens vingt trois.

ALMONSTANCER BILA LVII. Calife.

Almonstancer Bila Mansur succeda à son pere Alzaher: cestuy-cy fit tant de cas de la liberalité, qu'ayant donné en prodigue, il deuint pauvre. Du temps de cestuy-cy la Perse iouyssoit d'une grande paix, mais les Mogoles ou Tartares y ayans fait la premiere entree, se rendirent les maîtres de quelques Prouinces d'icelle, ausquels s'opposa le Calife Almonstancer, les cōtrainquant de quitter la meilleure partie de ce qu'ils auoient acquis, & les ayant battus par plusieurs & diuerses fois, il mourut le 17. an de son gouvernement l'an de salut 1244. de l'Egire 640.

ALMOSTACEM BILA ABDULA LVIII. & dernier Calife de ceux de Bagadet.

Les Tartares ayans esté vaincus, comme vous auez entendu, par Almonstancer Bila, il en eurent leur raison sous le gouvernement de son fils Almostacem: car Olakukan Tartare les

vainquit & le fit mourir, & apres auoir tenu le Califat 15. ans & six mois: ainsi finirent en luy les Califes de Bagadet, que nous disons Babylone ou Baldak, les Tartares s'emparans d'icelle & de toute la Perse, ayant esté 37. de ceste famille, & commandé 523. ans peu plus, peu moins, desquels on a traité particulièrement, d'autant qu'ils sont comprez en la Chronique de Perse pour Roys d'icelle, tant par Tauarik que Mirkond. Amostacem mourut l'an de salut 1258. & l'an 655. del'Egire.

DES MOGOLES OV TARTARES QVI ONT COMMANDE EN LA PERSE.

CHINGVISKAN premier Roy de Perse des Tartares.

CHinguiskan qui fut le premier des Tartares qui fit voir ses armes en la Perse, estoit fils de **Suxvh Badu**, c'est à dire le vaillant, duquel voicy la genealogie: **Bador** estoit fils de **Partant Badur**, fils de **Filkan**, fils de **Tomanahkan**, fils de **Bayfangorkan**, fils de **Kaydukhan**, fils de **Tominkan**, fils de **Bukahkan**, fils de **Buzaniar**, qui estoit en ce faisant le huiëtiesme ayeul de **Chinguiskan**, lequel naquit en l'an de salut 1152. & del'Egire 546. cestuy cy perdit son pere n'ayant encor que treize ans, & comme on le vid si petit, on fit aussi plusieurs entreprises & remuemens qui s'esmeurent, de sorte qu'ils ne finirent que iusques en l'an 1166. & del'Egire 599. en laquelle armee **Chinguiskan** vainquit tous ses empeschemens, & ceux qui luy dispuoient le Royaume, iouyssant en fin de tout ce que son pere & ses ancestres auoient possédé. On l'appelloit auparavant **Tamachin**, mais quand il fut estably au Royaume, qui fut l'an de salut 1207. & del'Egire 602. il se fit nommer **Chinguiskan**, c'est à dire en leur langue Roy des Roys: cestuy cy fut vn tres-puissant Prince, reduisant sous son Empire & obeissance toutes les Hordes ou familles des Tartares, avec les Royaumes de **Kerao Kotan**, **Helan**, **Tangar** & autres, lesquels ayas subiugez en l'an que l'on comptoit 1219. & del'Egire 915. il sortit de ses confins avec vne armee presque innumerable, se vint ruer sur les terres de **Maurenahar**: à laquelle puissance s'estant opposé **Mahomet Koarrazemcha**, & voyant combien ses efforts estoient de peu d'effect contre vn si terrible ennemy, il luy abandonna la terre, & s'enfuit en **Karason**.

Chinguiskan entra en **Maurenahar** l'an 1224. & del'Egire 920. mettant au fil de l'espee tout ce qu'il trouua de viuant en ceste contree là, & fit le mesme à **Balk**, d'où il enuoya 30000. hommes à la poursuite de **Mahomet Koarrazemcha**, qui fuyoit tousiours deuant luy, mais en fin il fut r'atteint à **Abiskon** en **Gueylon**, où ils le massacrerent, mettant toutes ses terres à feu & à sang: de là il s'en alla contre la ville de **Rey**, en laquelle & aux environs on tient que les **Mogoles** ou **Tartares** firent mourir 600000. personnes, & aux Prouinces de **Nichabur**, sans les femmes & petits enfans 1150000. hommes, encor y en a il qui disent 1600000. faisant le mesme rauage vn an durant par toutes les contrees de la Perse. **Almonslancer Bila Mansur Ben Alzaher**, Calife pour lors de **Bagadet**, assembla le plus de forces qu'il peut, pour s'opposer à cet orage, & empescher qu'il ne vint fondre sur ses terres: & defaict ceux cy estans tous diuisez & separez en diuerses contrees, il les prit si à propos qu'il les contraignit de sortir quasi de toute la Perse, & se retirer à **Maurenahar** en l'an 1227. & del'Egire 623.

Par la mort de **Mamahet Roy de Koarrzm**, son fils se voyant n'estre pas bastant pour resister aux **Tartares**, s'enfuit en l'Inde: cestuy cy s'appelloit **Sultan Gelaladin**, lequel les **Mogoles** suivirent à la trace, & l'ayant trouué pres le fleuve **Induz**, luy donnerent bataille, en laquelle il fut vaincu & contrainct de se retirer à **Multon**, vn Royaume situé en la plus interieure partie de l'Inde: quant à **Chinguiskan** apres auoir ainsi frayé le chemin aux siens, & donné le premier l'entree en la Perse, il s'en retourna à **Kerao Kotan** où il mourut, en l'an de salut 1228. & del'Egire 624. de son aage le 78. & depuis qu'il fut paisible possesseur de ses Royaumes le 25. il eust cinq fils, l'aîné desquels s'appelloit **Tuchkhon**, auquel le pere donna le gouvernement des Royaumes de **Dalt**, **Kapechah Ross**, **Albugar**, qui mourut six mois deuant son pere **Chagataykon**, qui eut le gouvernement des Royaumes de **Maurenahar**, **Aygort** & **Koarrzm**, ayant possédé ses Royaumes iusques en l'an 1241. & del'Egire 638. le quatriesme **Oxtaykaron**, lequel succeda à son pere: & le cinquiesme fut **Tulixan**, auquel le pere donna quelques Prouinces avec tous ses thresors, cestuy cy mourut aussi l'an 1232. & del'Egire 628. de sorte que des cinq fils de **Chinguiskan**, **Oxtaykaron** demeura seul en vie pour embrasser ceste grande succession: les autres toutesfois eurent quelques enfans, la succession desquels sera declaree cy apres. Ce que rapporte **Micond** ne doit pas estre aussi passé sous silence, c'est que l'on tient pour chose asseuree que lors que **Chinguiskan** naquit au monde, il auoit les deux mains ouuertes, & en chacune d'icelles vn peu de sang, pronostic certain de sa tres-grande cruauté.

OXTAYKARON

OKTAYKAHON II. *Roy de Perse des Mologes ou Tartares.*

Okstaykahan quatriesme fils de Chinguyskan luy succeda à l'Empire en l'an mil deux cens trente, & de l'Egire six cens vingt six: cestuy-cy fut aussi bon que son pere auoit esté mauuais, & entre autres belles & grandes parties quil auoit en luy, la liberalité luy fut fort recomman-dable: de sorte que Mircond tient qu'en dons & recompences extraordinaires durant sa vie, il despendit 666. bolses (maniere de parler des Perles) de mille romans, valent chacun to-man seize ducats, qui reuiendroient le tout à la somme de dix millions six cens cinquante six mille ducats. Il eut pour Vvazir nommé Gerbahhon Noyn, vn grand guerrier & fort prudent, lequel il enuoya contre Galaladin qui s'estoit retiré à Multon, lequel ayant as-semblé ses forces alla au deuant de cestuy-cy pour le combattre, mais il fut vaincu, & mou-rut au combat, la famille de ceux de Korrazm Cha finissant ainsi en luy, apres il conuertit ses ar-mes contre la Perse, & la reduisit toute sous son obeissance, excepté Bagadet, puis ayant regné 23. ans, il mourut tout bruslé au dedans, pour l'usage immodéré du vin qu'il beuuoit, l'an de sa-lut 1242. & de l'Egire 649. il laissa vn fils nommé Gayukkan, lequel à cause de son bas aage fut mis sous la tutelle de sa mere, qui gouerna cet Empire quatre ans.

GAYVKKHAN III. *Roy de Perse des Tartares.*

Gayukkan fils de Oktaykhan commença à regner en l'an mil deux cens quarante six, & de l'Egire six cents quarante trois: il donna de grandes esperances qu'il seroit bon Prince, estant fort amy de la Iustice, liberal, & à qui les Chrestiens n'estoient point desagreables, les-quelles choses le firent aymer de tous, mais il ne regna qu'vn an, à la fin duquel il mourut, de l'Egire 644. & de salut 1247.

MANCHUKAHNON IIII. *Roy de Perse des Tartares.*

Manchukahnon fils aîné de Tuly Khan cinquieme fils de Chinguyskan vint à la Cou-ronne, son cousin n'ayant laissé aucuns enfans: il fut bon Prince courageux, liberal & benin. Il fauorisoit fort les Mores, & n'estoit pas toutesfois contraire aux Chrestiens, mais il auoit les Juifs en horreur, & les persecutoit. Il donna à Kablay Kabon son frere les terres de Ketao Ko-tan, qui les accreut beaucoup. Ce prince fonda la fameuse ville de Cambalu, aujourdhuy la Cour du grand Tartare, & à son autre frere Vlah Kukan: il donna les terres de la Perse, puis ayant regné treize ans, il mourut l'an 1260. & de l'Egire 657.

VLAH KUKAN V. *Roy de Perse des Tartares.*

Vlah Kukan ayant eu, comme il a esté dict, les Prouinces de Perse en gouvernement dès le viuant de son frere, & ce dès l'an mil deux cens cinquante six, & de l'Egire six cens cinquante trois, où il mit aussi tost la main à l'œuvre, & attaqua Ismaelya place d'importance qu'il em-porta, ne donnant la vie à personne de tant d'ames qui se retrouuerent en icelle. Il passa de-puis à Hierark, qu'il subiuga, & l'année suivante mena son armee contre Bagadet, à l'encontre duquel saillit Almoitacem Calife qui fut vaincu & massacré avec ses quatre fils, taillant en pie-ces tout ce qu'il se trouua, tant à Bagadet qu'aux environs, si qu'on dict qu'il ne fit pas mourir moins d'vn million six cens milles personnes, puis en l'année mil deux cens soixante vn, & de l'Egire six cens cinquante huit il alla assieger Alep & Damas qu'il subiugua, laissant pour gou-uerneur en ces parties du Sury Kaptukabon, puis s'en retourna en la Perse en la Prouince de Aderbaion, en vn lieu appellé Mergah, aux enuiron de Tambriz, où il mourut l'an mil deux cens soixante six, & de l'Egire six cens soixante trois. Deuant que de mourir il dispartit ses ter-res à trois fils qu'il auoit, à l'aîné nommé Habkaikahon il donna les Royaumes de Hyerrak, Mazandaron, & Karason: au second nommé Hyachemet il donna Aron, qui est l'Armenie, & Aderbaion. A Taudun qui estoit le troisieme, il laissa les terres de Diarbex, & Rabyah qui est la Mesopotamie: de plus il donna à Atalmoklavvini vn de ses Vvazirs Bagadet, pour le re-parer comme il fit, & à vn autre appellé Mahynedin Paroaney, quelques terres en Rumestam. Il florissoit alors en la Perse vn fort excellent Astrologue appellé Nacyradin Tuffy, qui a com-posé vn liure intitulé Zichel Kony, des iugemens & figures fort celebres entre les Perles.

Outre ces trois fils cy dessus nommez, Vlah Kukan en auoit encore deux autres, l'vn nommé Nicudar Oglan, l'autre Targahexhan, auxquels le pere n'auoit point fait de part, comme estans les plus ieunes, mais il ne laissa pas de l'auoir, & les enfans de l'autre en eurent aussi leur part.

HAYBKAYKHAN VI. *Roy de Perse des Tartares.*

Haybkaykhan fils de Vlah Kukan, succeda à son pere en la seigneurie de Perse. Cestuy-cy eut guerre avec Borakhan, qui tira vne grande armee du Chagatay, l'an de salut deux cens septante & vn, & de l'Egire six cens soixante & huit, contre lequel Haybkaykhan combattit, & le vainquit, & le faisant retirer iusques à Maurenahar. Il fut Roy dix-sept ans, à la fin desquels il mourut en Amadon, l'an de salut 1282. & de l'Egire 688. & d'autant qu'il n'auoit point d'en-fans, on mit en sa place son frere Nicudar Oglan, qui se fit appeller Hamedkhan.

HAMEDKHAN auparavant *Nicudar Oglan*, septiesme Roy de Perse des Tartares.

Hamedkhan, qui s'appelloit auparavant *Nicudar Oglan*, se fit More, & changea son premier nom, & regna seulement deux ans & deux mois, à la fin desquels il mourut, l'an de salut 1283. de l'Egire 683. de sorte que le Royaume retourna aux enfans de Haybkaykham.

ARGONKHON VIII. Roy de Perse des Tartares.

Argonkhon fils de Haybkaykham l'aîné des enfans de Haybkaykham, parvint au Royaume par la mort de son oncle, duquel il iouyt sept ans. puis mourut en l'an de salut 1192. & de l'Egire 690. laissant le gouvernement à son frere Ganiatukhon.

GANIATUKHON IX. Roy de Perse des Tartares.

Cinq mois apres la mort de Argon, Ganiatukhon son frere fut introduit au Royaume. Ce Prince fut fort liberal, & auoit plusieurs belles parties, lesquelles furent toutes obscurcies par sa sensualité. Estant fort necessiteux, il voulut introduire en la Perse l'usage de la monnoye de carte ou de papier, comme aux Prouinces de Ketao Keotan, mais personne ny voulut consentir: & celuy qui fut plus contraire, fut vn sien oncle nommé Baydukou, qui sur ce subiect luy fit la guerre, & le tua en vne bataille apres auoir esté Roy trois ans, l'an de salut 1295. & de l'Egire 693.

BADUKHAN X. Roy de Perse des Tartares.

Badu Khan fils de Turgahé, fils de Vlahkukham, oncle du dernier Roy, s'estant introduit ainsi au Royaume avec la violence, Gazun fils de Arghon Khon vint contre luy avec vne belle armee, toute composee de Mores, & se rencontrerent à Badukhem & Nakhoan, où il fut vaincu, & contrainct de s'enfuyr: mais il fut pris par vn Vvazir de Gazun, qui l'emmena à Tabriz, où il le fit mourir, l'an de salut 1296. & de l'Egire 694. n'ayant possédé le Royaume qu'un an.

GAZUN XI. Roy de Perse des Tartares.

Gazun fils de Aragon, fils de Habakykhan, fils de Vlahkukhan, se fit Roy de Perse par la mort de Bayde: il fut fort grand iusticier. En l'an 1278. & de l'Egire 696. ceux de Damas, & de quelques autres terres de Surie, faisans alliance avec Bendokdar Roy d'Egypte, se reuolterent contre luy: mais ayant mené vne armee contre eux, il les vainquit & les reduisit à son obeissance, retournant ainsi victorieux en la Perse à Kasuin, qui fut apres la Cour des Roys, où il mourut, l'an de salut 1305. & de l'Egire 703. ayant regné seulement huit, ou neuf mois. Il fut enseuely à Tabriz à Zambgazeum, en vne somptueuse mosquee qu'il auoit fait faire durant sa vie: & de tous de ceste lignee, il n'y a que ceste sepulture là qui soit auourd'huy debout, & qui se soit conseruee de l'iniure du temps.

ALYAPTU XII. Roy de Perse des Tartares.

Le gouvernement du Royaume tomba entre les mains de Alyaptu frere du Roy defunct, lequel s'estant fait More, se fit nommer Sulton Mahamed Ben Argou: il n'auoit que vingt ans quand il commença à gouverner, & tint sa Cour à Tabriz: il fut fort seuer en l'exécution de la iustice, par le moyen de laquelle il tint ses peuples en repos & contens, ce fut le premier qui introduisit la coustume de prendre vn tribut sur les enfans des Chrestiens & des Iuifs, pour les former à sa mode & s'en seruir: en l'an de salut 1306. & de l'Egire 705. il fonda la ville de Sultanie, & en l'an suiuant il s'empara de Gueylon & Racht, ils s'arma encorés contre Cham ou Damas, qui estoit reuolté pour la seconde fois, en l'an de salut 1313. & de l'Egire 711. mais les ayant fait retourner à la raison, il s'en retourna en la Perse, & mourut en la ville de Sultanie, l'an de salut 1317. & de l'Egire 716. ayant esté Roy douze ans & neuf mois.

ABUSAYD BAHEDERKHON XIII. Roy de Perse des Tartares.

Sultan Abusayd Bahederkhon, fils de Alyaptu, herita du Royaume de son pere en l'age de douze ans, il eut pour Vvazir vn nommé Amir Chupon lequel auoit vne fille d'vnerare beauté qui estoit mariee, de laquelle le Roy deuint passionnément amoureux: de sorte qu'il la demanda à son pere, lequel s'en excusa, & la luy voulut point bailler, disant qu'elle estoit mariee, & qu'il n'y auoit que son mary qui eut pouuoir sur elle: mais Abusayd plein de cholere & transporté d'affection, l'enleua de force, faisant mourir le pere & le mary, estans ceux qui s'efforçoient de l'en empescher, & luy donna le nom de Kondekar, qui est vn tiltre Royal, laquelle s'acquit vne telle puissance sur luy, qu'en peu de temps de là il luy mit en main tout le gouvernement du Royaume, où elle se comporta prudemment & sagement, & luy cependant menoit vne vie vertueuse, s'adonnant à la lecture des liures, auxquels il estoit fort affectionné. Il estoit de gentille disposition, & de bon entendement, il passoit ordinairement les Estez en Sultanie, & les Hyuers en Bagader, & ayant regné dix neuf ans, il mourut l'an de salut 1337. & de l'Egire 737. Par sa mort le pouuoir des Tartares se diuisa en la Perse, chacun se disant Roy de ce qu'il auoit en son gouvernement, & demeura ainsi iusques à l'arriuee de Teimurlang, qui fut environ soixante & trois ans,

TARTARES

TARTARES QVI COMMANDERENT A LA PERSE
DES DESCENDANS DE TEYMURLANG.

TEYMURLANG premier Roy de Perse de ceste lignee.

Teymurlang qu'on appelle vulgairement Tamberlan, c'est à dire, Teymur le boiteux, fut fils de Baiankan, & le quatorzième successeur de Chinguiskan, du sang duquel il descendit : car il n'estoit point comme l'on a voulu dire, vn voleur, ny vn mulier, ny vn pastre, mais vn homme de guerre & d'un tres-grand courage, comme ses actions l'ont fait assez paroistre. Il naquit en Samarcand, & suivit les armes comme les majeurs, & son cinquiesme ayeul nommé Carachear Nuyon, partit de la Tartarie avec Chinguiskan au temps que le mesme Roy enuoya Chagaraykhon son second fils, pour gouverner les Royaumes de Maurenahar, Argor & Koarrasm, où il fut fait premier Vvazir, en laquelle dignité, luy & les siens continuerent iusques à Teymur, avec d'autres charges conuenables à sa qualité & à son illustre origine. Or du temps de Teymur regnoit en Chagaray Soyorgat Mechxon, au seruice duquel fut Teymur, avec qualité de Vvazir & grand Capitaine, & estant arriuee la mort de Soyorgat en l'an de salut 1370. & de l'Egire 771. Teymurlang fut proclamé Roy avec l'unanime consentement de tous : puis se voyant estably au Royaume, il sortit d'iceluy avec vne armee innumerable, n'entreprenant rien qu'il ne luy reüssit heureusement : de sorte qu'en l'espace de trente six ans qu'il regna, outre les Royaumes qu'il possedoit, il conquist encor ceux de Maurenahar, Turquestan, Koarrasm, Karason, Sistam, Industam, Hyerakhen, Parc, Kermon, Mazandaron, Aderbaion, Kufistam, tous lesquels & autres encor les enfans & ses Capitaines diuiserent entre eux apres sa mort. On contoit 1388. de l'an de salut, & 789. de l'Egire, quand Teymur aduerty de certaine rebellion qui s'estoit faite à Hisphaon chef de la Prouince de Hierax en la Perse, s'en alla en personne pour y remedier, comme de fait il mit au fil de l'espee iusques à soixante mille personnes. Tokramechxon estoit Roy de Kapechak par la grace de Teymur, qui se voulut rebeller comme les autres, mais il n'y gagna que des coups, car Teymur enuoya contre luy vne armee, laquelle le contraignit d'abandonner son Royaume, & de s'enfuir en Gugestam. En l'an de salut 1402. & de l'Egire 803. Teymur mena vne puissante armee en Suty, & destruisit Aled & Damas, rompit en bataille Sultan Farache Roy d'Egypte, de là il retourna contre Bagadet, qu'il prit aussi, puis s'en alla à Kabra aux enuirs de Tabriz, où il hyerna, & l'an suivant ayant assemblé vne plus puissante armee qu'auparauant, il s'en alla en la plaine d'Angory contre le grand Turc Baiazet, lequel il combatit, & vainquit, l'emmenant prisonnier, conquistant & destruisant plusieurs de ses terres : quand à Baiazet, il mourut prisonnier l'annee d'apres. Tandis que Teymur estoit ainsi occupé contre les Turcs, vn nommé Kara Issuf donna à l'improuiste vn assaut à Bagadet, en fit sortir Vveishelkony, auquel Teymur l'auoit donnee : mais comme il fut de retour de Rumeistan, il enuoya contre Kara Issuf son neveu nommé Abubakar, qui recouura la cité, & la rendit à Sulton Vveis, comme il se dira cy apres. Teymur passa apres à Ardiuil, où il demeura quelques iours, & fit grace à Cheque Saffi d'un grand nombre de captifs, comme il se dira en son lieu : puis laissant la Perse, il s'en retourna en Karason, d'où il s'achemina puis apres à Samarand sa patrie, où il fut quelques mois en festes & grande resiouissance, faisant contracter plusieurs mariages entre ses citoyens. Finalement il s'en alla à Anzar vne contree qui despend du Catay, où il mourut l'an de salut 1405. & de l'Egire 807.

Teymburlang eut quatre fils, l'aîné desquels s'appelloit Ioon Guir, qui mourut vn an deuant son pere, laissant deux enfans, Mahamed Sultom, & Pir Mahamed, lequel Teymur ordonna par son testamēt qu'il luy succedast en ses Royaumes de Gaznehen & de l'Inde, mais Pir Aly le fit mourir. Le second fils de Teymur appellé Hamar Cheque, estoit du viuant du pere Gouverneur de la Perse, mais il mourut en la forteresse de Hormatu, qu'on appelle Kormavvat en Lorestan : & le troisieme nommé Miruncha, succeda au gouvernement des terres que tenoit Vlahkukhan en Hyeracian, Aderbaion, & iusques à Damas. Il mourut l'an de salut 1408. & de l'Egire 810. par la main de Kara Issuf Turcoman. Le quatriesme fils de Teymur nommé Mirzachcharok, qui auoit tousiours accompagné le pere, luy succeda aussi à l'Empire.

MIRZACHCHAROK II. Roy des descendans de Teymurlang.

Mirzachcharok le plus ieune des quatre fils de Teymurlang, estoit en Karason quand son pere mourut à Anzar : luy estant donc paruenu à l'Empire, il ne trouua pas son Royaume paisible comme il esperoit : car ceux de Hyron & Tyron ne le voulurent pas recognoistre pour Roy, puis ayant appaisé tous ces remuemens, il mena son armee contre Kara Issuf en Aderbaion, lequel s'estant armé en intention de se bien deffendre, il mourut en chemin laissant deux

filz, l'un nommé Myrzah Scandar, & l'autre Myrzah Iooncha, qui vindrent combattre Charok, mais ils furent vaincus, il receut depuis neantmoins en son service Mirzah Iooncha, & le remit en possession du Royaume de Aderbajon. Charok fonda apres en Maurenahar une ville qu'on appella de son nom Charokia, puis ayant regné quarante trois ans, il mourut l'an de salut 1447. & de l'Egire 850. Il eut cinq filz, à l'aîné desquels nommé Mirzah Ologhbeke, il donna les terres de Turquestan & Maurenahar: le second Ebrahim Sultan, mourut devant le pere ayant gouverné la Perse vingt ans, l'an de salut 1435. & de l'Egire 838. ayant fait bastir plusieurs edifices dignes de memoire. Un an auparavant la mort de cestuy cy mourut son troisieme filz nommé Baesfangor: le quatrieme nommé Mirzah Soyorgat Mechkhon, qui gouvernoit les Prouinces de Gazna ou Gaznehen & de l'Inde, mourut du vivant du pere & le cinquieme nommé Mirzad Mahamed Juguy, mourut aussi du vivant de Charok.

Lors que Teymurlang mourut, ceux de Samarkan auoient salué pour Roy un sien parent nommé Sultonkalil, contre lequel se reuolta un sien vassal nommé Kodahdah Hosceeny, & le print, puis appella à son secours Chama Ioon, Roy de Malgostan ou Tartarie, & luy donna entree en ceste Prouince: mais cestuy cy en estant en possession, il fit mourir Kodahdah Hosceeny, le payant ainsi de sa trahison, & donna un autre Royaume à Kalil au lieu du sien, où il vescu content le reste de ses iours.

MIRZAH OLOGHBEKE III. Roy des descendants de Teymurlang.

Ologhbeke, qui du vivant de son pere Charok estoit Gouverneur du pais Turquestan & Maurenahar, vint à Balk en l'an de salut 1448. & de l'Egire 851. où il eut aduis qu'en Herak & Karafon Mirzah Alahdalet son parent se faisoit appeller Roy, s'arma contre luy, & le fut rencontrer à Morgab, où il le combatit & vainquit: l'autre estant contrainct de s'enfuir vers un sien frere nommé Mirzah Babor, en la compagnie duquel il s'en retourna contre Ologhbeke, qui laissant Herak alla pour rassembler ses forces à Balk: mais il trouua qu'un sien filz nommé Mirzah Abdelaïse s'estoit reuolté contre luy: de sorte qu'il fut contrainct de luy donner une bataille, laquelle Ologhbeke perdit avec la vie, & celle d'un sien filz qui estoit quant & luy nommé Mirzah Abd Razis, ayant commandé quarante & un an en ces contrees là, & deux ans seulement depuis la mort de son pere, & qu'il auoit embrassé toute la succession, l'an de salut 1450. & de l'Egire 853.

MIRZACH ABDELATIFFE IIII. Roy des descendants de Teymurlang.

Mirzach Abdelatiffes'estant ainsi desfaiët de son pere & de son frere, il demeura paisible possesseur du Royaume: mais ce ne fut pas pour long temps, car au bout de six mois ses soldats le tuerent à coups de fleches.

MIRZACH ABDULA V. Roy des descendants de Teymurlang.

Abdelatiffes ainsi iustement payé de son parricide, son frere Mirzach Abdula eut le Royaume par la mort d'iceluy, duquel ayant iouy un an, Mirzach Sulton Abufayd Roy de Karafon vint rauager ses terres, au deuant duquel fut Abdula, mais il perdit la bataille & la vie, l'an de salut 452. & de l'Egire 855.

MIRZACH SULTON ABUSAYD VI. Roy des descendants de Teymurlang.

Mirzach Sulton Abufayd filz de Mahamed, filz de Miromcha, filz de Teymur, ayant ainsi mis à mort Abdula, s'empara du Royaume. Or nouvelles guerres s'esmeurent entre Mirzach Ebrahim, & Mirzahcha Mahumud, contre lesquels fut Mirzah Iooncha, duquel ces deux cy s'enfuirent, & prit leurs terres, que les autres armerent contre luy, mais il n'en vindrent pas iusques aux coups, car ils s'accorderent en faisans des departemens de leurs gouuernemens. A peine cet accord estoit il fait, quand Mirzach Saniar accompagné de Mirzach Aladalet, son filz Mirzach Ebrahim Princes particuliers vindrent combattre Abufayd à Saran, mais il le vainquit, Saniar y demeurant pour les gages: les deux autres se mirent en fuite, Abufayd possedoit lors les Royaumes de Badachon, Gaznehen, Kabud, Sistom & Koarrazm. En l'an de salut 1468. & de l'Egire 871. Mirzach Açembec Ben Alibek Ben Kara Otman, tua Mirzah Iooncha: à l'occasion de laquelle mort on appella Abufayd au gouuernement de Kermou, Hie-rak & Aderbaïon, Açembec s'estant tenu caché le fit requerir de paix par un Ambassadeur, lequel n'y voulut point entendre. Cela fut cause que Açembec se retira à Karabag, (ce sont des montagnes aux enuiron de Tabriz, & sur le chemin) où il se saisit de tous les passages, mettant Abufayd en telle necessité de viures, que desesperé de tout secours il se mit en fuite: mais il fut pris & mené à Mirzach Yadigar Mahamed, qui alloit en la compagnie de Açembec, lequel le tua, l'an de salut 1469. & de l'Egire 873.

MIRZACH SULTON HAMED VII. Roy des descendants de Teymurlang.

Abufayd ayant esté ainsi mis à mort, Mirzach Sulton Hamed son filz luy succeda au Royaume de Maurenahar, duquel il iouit l'espace de vingt-huit ans, à la fin desquels il mourut, l'an de salut 1495. & de l'Egire 899.

MIRZACH BACOR

MIRZACH BABOR VIII. *Roy des descendants de Teymurlang.*

Mirzach Babor coulin de Hamed, & nepveu de Abufayd, succeda au Royaume de Maurenahar par la mort de son oncle, en l'an de salut 1500. & de l'Egire 904. mais Ichaybegan vint d'Vsbeke qui le depoussa de son Royaume, auquel n'y eut plus de Roy du sang de Teymurlang. Mirzach Babor ainsi eschappé de Maurenahar, passe en Gaznehen, & de là en l'Inde, où il fit sa demeure, & ayant regné en l'un & en l'autre pais 38. ans, il mourut l'an de salut 1532. & de l'Egire 937. laissant deux fils, Homayon Mirzach, & Kamoran Mirzach, qui furent Roys apres le pere: Homayon eut les meilleures Prouinces de l'Inde. Il auoit vn Vvazir appellé Chyrkan, qui se reuolta contre luy, & luy fit la guerre, le contraignant de luy quitter ses Royaumes, & de s'enfuir en la Perse, où regnoit lors Chatamas, lequel luy ayda de douze milles hommes choisis sous la conduite d'un sien Capitaine nommé Beyramkan, lequel emmenât avec luy à Homayon le remit en ses Royaumes les reduisant tous à son obeissance, avec la mort du rebelle Chirkanham & de ce Homayon est fils Gelaladin Akbar qui est le grand Mogol, qui viuoit l'an 1609.

MIRZAN HYADIGAR IX. *Roy des descendants de Teymurlang.*

Mirzan Hyadigar fils de Mirzah, Sulton Mahamed fils de Mirzach, Baesfangor, ou Bayfangor fils de Mirzah Charrok, fils de Teymurlang. Apres qu'en l'an de l'Egire huit cens septante trois, estant accompagné d'Acembek, il eut tué Abufayd, comme il a esté dict, cestuy-là le secourut d'une armee avec laquelle il s'achemina contre Strabat. Alors estoit Roy en Karason Ocem Mirzah fils de Mâsur, fils de Bahekata, fils de HamarCheque qui estoit fils de Teymur, lequel entendant le dessein de Hyadigar, vint à grande haste au secours de Strabat, & le combatit & vainquit, l'an de grace mil quatre cens septante, & de l'Egire huit cens septante quatre, lequel ainsi desconfit, s'en retourna à Tabris vers Acembek, qui le secourut une autrefois d'une plus grande armee que la premiere, avec laquelle il alla attaquer Ocem Mirzah, duquel il remporta la victoire, & la mit en fuite, le faisant sortir du Royaume, & prendre la route de Fariab & Mayman du costé de Belk: Hyadigar ainsi introduit au gouuernement du pays, se donna tant de bon temps, s'addonnant à toute sorte de vice, que ceste nonchalance & oyfueté donna courage à Ocem de le venir attaquer une nuit, accompagné seulement de mil bon soldats, avec lesquels il conduisit si dextrement son entreprise, qu'il se saisit de la personne de son ennemy, lequel ayant entre ses mains il fit mourir, & en ceste façon s'entra de rechef en la possession du Royaume. Cecy aduint l'an de salut mil quatre cens septante & un, & de l'Egire huit cens septante cinq. En Hyadigar finit la race de Mircharrok, & d'autant que cy deuant nous auons desia compté l'annee 1532. & que neantmoins les choses qui arriuent sous ce Prince furent executees en l'an mil quatre cens septante & un, comme il a esté dict, bien que nous ayons mis Hyadigar apres Mirzach Babor, le Lecteur sera aduertty que les Prouinces de la Perse estoient pour lors diuisees, & commandees par plusieurs Roys en un mesme temps. Et d'autant qu'ils ont quelquesfois chacun à leur tour commandé au total du Royaume, ils sont aussi tous comptez pour Roys, sinon de toute la Perse, au moins des Prouinces qui en dependent, l'un apres l'autre, sans que pour cela il y ait de la confusion en la Chronologie, comme l'on pourra assez facilement remarquer.

MIRZACH SULTAM OCEN X. *Roy des descendants de Teymurlang.*

Mirzach Sultam Ocem fils de Mansur, de Bahekara fils de Hamer, Cheque fils de Teymur, ayant ainsi recouuert le Royaume que Hyadigar luy auoit osté, gouuerna son peuple long temps en paix, laquelle luy fut autant recommandable comme il estoit zelateur de la iustice. Il orna son Royaume de plusieurs superbes ediffices, entre lesquels & les plus fameux fut une Madrese ou Hospital, pour y receuoir les pauvres pelerins estrangers, oeuvre digne d'un grand Prince.

En son temps les Vsbekes vindrent en Maurenahar, où ils prindrent quelques terres, & les osterent du pouuoir des descendants de Teymurlang, qui iusques alors les auoient possedees, auxquels se voulant opposer Ocem, il leua une armee pour marcher contre eux, & s'estant mis en chemin, il mourut à Vuadereis, l'an de salut mil cinq cens six, & de l'Egire neuf cens vnze, ayant regné trente quatre ans, & quatre mois de tout le Karason, il vescu septante ans, vingt desquels il fut tousiours malade de paralysie, sans qu'il peust monter à cheual. Il eut quatorze fils, deux desquels luy succederent.

BAHADY OU PEDY AMAZON, MUSAFAR MIRZACH II.

Roy des descendants de Teymurlang.

Bahady ou Pedy Amazon, & Musafar Mirzach, freres, & fils du deffunct Ocem, regnerent apres leur pere ensemblement, contre lesquels vint Chaibek Vsbeke: mais eux ne se tenant pas assez puissans pour luy resister abandonnerent la terre & sortirent d'icelle: Bahady Amazon s'en alla à Truchis, où ayant assemblé quelques armees, il vint contre Vsbeke, duquel il fut vaincu, & contrainct de s'enfuir en la Perse vers Chia Ismael qui regnoit pour lors, lequel lere-

cueillir, & traita humainement, & luy donna les terres de Chambé Gazon en Tabris, desquelles il vescu, & outre dix Serafs d'or par chacun iour pour son plat: chacun Seraf d'or de Perse vaut huit larines, & chaque larin vaut deux reales d'argent, peu moins. Bahady fut en Tabris sept ans, iusques en l'annee 1515. & del'Egire 920. que Selim Empereur Turc print la ville de Tabris, & l'emmena avec luy à Constantinople où il mourut de peste l'an de salut 1518. & de l'Egire 923.

MIRZACH HOMAR XII. *Roy des descendants de Teymurlang.*

Miromcha troisieme fils de Teymurlang eut deux fils, l'un nommé Mirzach Homar, qui luy succeda au gouvernement de Aderbaion, & Abudabar en Bagadet: apres la mort de Teymur Homar se declara Roy, & s'emparant des terres de son frere, il le print en la ville de Sultanie, mais le Prince prisonnier ayant trouué moyen de corrompre quelques vnes de ses gardes, il massacra le demeurant qui luy vouloit empescher de sortir de la prison, puis se mit à ravager la Perse d'où il tira bon nombre de gens, avec lesquels il vint attaquer son frere, lequel il vainquit, & contraignit de s'enfuir en Karasou, vers son oncle Mirzah Carrok, qui luy donna Strabat & Masandaron, desquels il vescu, mais ne pouvant demeurer en repos, il fit la guerre au mesme Carrok, lequel le vainquit: si que l'autre ne sçachant plus où auoir de retraicte, s'enfuit à Morgab, & de là se voulant retirer à Samar Kand, il mourut par le chemin, l'an 1406. & de l'Egire 809.

MIRZACH ABUBAKAR XIII. *Roy des descendants de Teymurlang.*

Mirzach Abubakar frere de Homar, fils de Mironcha & petit fils de Teymur, demeura par la mort de son frere pacifique en Tabris. Cestui-cy fut vn fort grand & courageux Capitaine, mais mal fortuné, car Kara Yssuf Tur Kimon qui s'en estoit fuy dans Mecere en Egypte, le combattit deux fois pres le fleuve d'Euphrates, en la premiere desquelles son frere y demeura. Abubakar ainsi desconfit, en l'an de salut mil quatre cens & sept, & de l'Egire huit cens dix, s'en alla à Kermou, & de là à Siston, & l'annee suiuite voulant retourner contre son ennemy avec vne puissante armee, il mourut en chemin, & en luy finit la race & les successeurs de Chinguis Chan & de Teymur Tartares, qui commanderent à la Perse, de laquelle l'on parlera cy apres plus particulierement.

DES DESCENDANS DE KARAKVYONLU, C'EST A DIRE MOUTON NOIR, QUI COMMANDERENT en la Perse.

KARAYSSUF *le premier Roy de ceste famille.*

Karayssuf Ben Kara Mahamet Turkimon alla au seruice de Vveys Helkony Sultan de Bagadet, lequel pour les bons seruices qu'il luy auoit faicts, le fit Capitaine des Turximans de la bande de ceux qu'on appelloit Karakionlu, comme si l'on disoit les moutons noirs, à la difference des autres qu'on appelloit les moutons blancs, comme il se dira en son lieu. Et cecy est à remarquer, qu'il y auoit en ce mesme temps en Italie les partialitez de blancs & des noirs, lesquels comme ils estoient semblables de nom, firent aussi les mesmes effects que ces autres là en la Perse. Kara Mahamet pere de Karayssuf, auoit esté Capitaine de ce party tant qu'il y auoit vescu: & ceste charge, comme vous auez entendu, estoit demeuree à son fils apres la mort, lequel pour recompence des biens faits que luy auoit faicts Sulton Vveys, il donna vn assaut à sa ville de Bagadet, & la luy osta, laquelle auoit esté donnée à Vveys par Teymur, lequel, comme il a esté dit cy dessus, estoit pour lors en Rumestan contre Baiazet: mais estant retourné de ceste expedition, voyant la trahison de Karayssuf, enuoya son nepueu Abubakar, qui recōquit ce que cestui-cy auoit pris, & remit dans le Bagadet Sultron Vveys Helkony. Toutesfois il en iouit peu de temps: car Mironcha la luy fit quitter par force, y mettant dedans le mesme Abubakar son fils.

Karayssuf ainsi desconfit, & ne sçachant où faire vne retraicte asseuree, s'en fuit en Egypte, où le Roy d'icelle le fit prendre & mettre en prison; où il fut iusques à ce qu'il vint nouvelle de la mort de Teymur, de laquelle Karayssuf ayant eu aduis, chercha les moyens de se sauuer, comme il fit, prenant le chemin de la Perse, il fit tant par son industrie qu'il assembla vne armee avec laquelle il eut bien l'assurance de combattre Abubakar. Helkony cependant qui auoit esté depossédé de Bagadet, & qui estoit aux espies pour rencontrer quelque bonne occasion, ne laissa pas perdre ceste cy, car cependant qu'Abubakar alloit contre Karayssuf, il s'empara de Bagadet, au mesme temps que Karayssuf & Abubakar se rencontrerent à Nakchoan, où cestuy-cy fut vaincu: si que Tabris vint au pouuoir de Karayssuf, lequel laissant pourueu de ce qui luy estoit necessaire pour sa desfence fut contre Cara Osmon Bayandury qui possedoit

qui possédoit la contree de Diarbek, lequel les luy quitta & s'enfuit. Issuf y mit de bonnes garnisons, & s'en retourna à Tabris, & levant vne nouvelle armee marcha contre Herkony, qu'il vainquit en vne bataille, & l'ayant fait mourir s'empara de la cité, en l'an de salut 1413. & de l'Egire 185. De là il passa en Scyruan ou Seruan, y entrant par la contree du Guigestam. Il tua en bataille le Roy d'icelle appelé Constantin, prenant Cheque Ebrahim Roy de Scyruan, qu'il emmena à Tabris prisonnier, lequel se racheta depuis moyennant grande somme de deniers. Kara Issuf gagna encores les villes de Sultanie, Kazuin & Taron, & en l'an 1420. & de l'Egire 822. il s'en alla contre Anteb cité de la Surye proche d'Alep: mais Myrzach Charrok suruenant de Karason, il se desista de l'entreprise, & alla au deuant de son ennemy, auparauant qu'ils se fussent rencontrez. Kara Issuf mourut en Oion aux enuirs de Tabris, & n'ayant avec luy ny fils, ny parent, ny aucun vray amy (car iamais les tyrans n'en ont) les soldats ayant saccagé sa tente le laisserent sans sepulture, luy ayans osté sa chemise, & coupé les oreilles pour auoir quelques ioyaux qui y estoient pendus, & demeura ainsi en ceste façon quelques iours en la campagne iusques à ce qu'estant trouué par personnes qui le cognoissoient, ayant pitié de sa misere l'enleuerent de là, & l'enseuelirent à Egirs, ayant regné quatorze ans: il mourut l'an de salut 1423. & de l'Egire 823. il eut six fils, l'aîné desquels s'appelloit Pyr Budahkham, qui mourut deuant le pere, le second Amir Scandar, le troisieme Mirzah Iooncha, le quatrieme Cha Mahamed, qui eut le gouvernement de Parç, & le tint vingt trois ans iusques en l'annee 1431. & de l'Egire 833. que Hamed Hamodony le fit mourir, le cinquiesme Amir Apfal qui mourut du viuant du pere, le sixiesme Abnzayd qui fit mourir son frere Amir Scandar, comme il se dira incontinent apres.

AMIR SCANDAR fils de Kara Issuf.

Amir Scandar second fils de Kara Issuf succeda à son pere l'an de salut 1411. & de l'Egire 822, lequel si tost qu'il fut paruenue à la couronne continua la guerre contre Mirzah Charrok, duquel il fut vaincu en la Mesopotamie, si qu'il fut contraint de se retirer vers le fleuve Euphrates, & Charrok print le chemin de Tabris, où on ne le voulut point receuoir pour l'amour & la reuerence qu'ils portoient à Scandar: de sorte que Charrok iugeant sa demeure inutile en ce lieu s'en retourna à Karason, & Scandar à Tabris en l'an 1429. & de l'Egire 828. où estant il priua de la vie & du Royaume Amir Chamçadin Roy de Kala l'an 1428 & de l'Egire 830. il fit le mesme à Sultan Hamed Curd Gouverneur de la Prouince de Curdestam. En l'an 1430. & de l'Egire 832. il gagna Sultanie, chassant les garnisons de Mirzah Charrok, lequel ayant entendu ceste mauuaise nouvelle vint avec son armee contre Scandar & Iooncha son frere, lesquels le rencontrerent à Salmas assez pres de Tabris, où Scandar perdit la bataille, & se retira au Rume-stam, toutesfois Tabris ne vint point encore pour ceste fois en la puissance de Carrok, lequel estant retourné à Karason, & refaisit vn peu son armee, il la fit marcher contre la ville de Rey, laquelle il print, puis s'estant reconcilié avec Iooncha frere de Scandar, il luy donna Tabris: cestuy cy en vertu de ceste donation (d'vne chose que l'autre ne possédoit point) prit les armes contre son frere, le combatit, & en obtint la victoire, contraignant Scandar de se retirer en Kala Aleniak, Iooncha le poursuivit & raschoit de l'environner: mais vn propre fils de Scandar nommé Cha Kobat, qui estoit pour lors en la disgrace de son pere le tua, l'an de salut 1438. & de l'Egire 841. Scandar quelque temps deuant la mort auoit fait mourir son frere Abusayd, pour quelques soupçons qu'il auoit de luy.

IOONCHA le troisieme de ceux de Kara Kyonlu qui ont commandé à la Perse.

Le frere de Iooncha estant mort comme vous auez entendu, cestuy cy s'empara aussi tost du Royaume, auquel se voyant establi il leua vne armee pour aller contre celuy de Gurge-stam, il luy osta ceste Prouince, puis faisant plusieurs entreprises sur les terres de la Perse il les reduit toutes à son obeissance, chassant d'aucunes les garnisons que Mirzah Mamud fils de Baifangor y auoit mises, qui estoit mort pour lors, ce qui aduint l'an 1453. & de l'Egire 756. & en l'an 1458. & de l'Egire 861. il mena son armee à Karason pour faire la guerre à Mirzah Ebrahim fils de Aladolet, qu'il vainquit, & mourut en ce combat Amir Zudala Zagatay. Sultan Abucayd regnoit pour lors à Balk qui alla contre Iooncha, lequel s'accorda bien tost avec cestuy cy, d'autant qu'il eut aduis qu'un sien fils s'estoit reuolté contre luy à Tabris, où il retourna incontinent & le print, le faisant mettre en vne estroite prison. A peine ce trouble estoit il passé qu'on l'aduertit qu'un autre fils qu'il auoit nommé Pyr Budah, & qui gouernoit Bagadet se reuolta: de sorte que Iooncha fut contraint de tourner la pointe de ses armes contre cestuy cy qu'il tint assiégué dans Bagadet vn an entier, qui fut l'an de grace 1466. & de l'Egire 869. toutesfois par le moyen de plusieurs personnes qui s'entremirent, ils s'accorderent entre eux, & comme ceste affaire desia concludue vn frere du rebelle nommé Mahademy le tue au desceu de son pere, lequel s'en retourna à Tabris, en laquelle il commanda souuerainement, & à tout l'Aderbaion, Hyerakhen de Parç, Kermou & grande partie de Surie.

Or en l'an mil quatre cens soixante huit, & de l'Egire 872. il voulut aller contre le Gouverneur de Diarbak nommé Ozun Acembek, & de fait il avoit desjà tiré son armée hors du logis, mais la rigueur de l'hyver qui fit alors le contraignit de s'en retourner, & surseoir ceste expedition iusques au Printemps, auquel il mit son armée en campagne.

C'estoit la coustume de Iooncha, soit pour le faire dormir, ou le divertir d'autres penſees, ou bien qu'il fut addonné au vin, de s'enyurer toutes les nuits, & dormir apres iusques au grand iour: & comme on ſçauoit ſa coustume l'armée ne laiſſoit pas de marcher, & luy la ſuiuoit apres accompagné de mille hommes de cheual de ſa garde. Cecy vint à la cognoiſſance de Ozun Acembek, lequel prenant avec luy cinq mille ſoldats d'élite. Il print ſi bien ſon temps qu'il l'attailla lors qu'il ne pouvoit eſtre ſecouru: de ſorte que ſes gens taillez en pieces, il demeura luy meſme ſur la place, & deux de ſes fils pris priſonniers, l'aîné nommé Mahamed Mirzad, lequel Ozun fit massacrer, & à l'autre nommé Iſſuf Mirzah il fit crever les yeux. Ainſi mourut Iooncha, ayant regné trente trois ans, & veſcu ſeptante. Ce fut vn mauuais Prince, & le plus voluptueux de tous ceux qui regnerent en ces contrées là de ſon temps.

ACEN HALI le quatrieſme de ceux de Karakuyonlu qui commanderent à la Perſe.

Acen Haly fils de Iooncha herita par le mort de ſon pere de ſon Royaume, & de ſes threſors qui vindrent tous en ſa puiſſance, & comme ils eſtoient fort grands & luy fort imprudent, il fit vne leuee de deux cens mille hommes tant de pied que de cheual, auxquels il aduança vne année de leur paye, laquelle ayant receüe, la meilleure partie s'en alla vers Abufayd Roy de Karaſon, qui marcha auſſi toſt contre luy: de ſorte qu'il le mit en fuite, & ſon malheur voulut encore qu'il tomba entre les mains de Ozun Acembek, contre lequel il combattit: mais il fut vaincu & mis à mort: finiſſant ainſi en luy la lignee de ceux de Karakuyonlu, qui auoient commandé à la Perſe, ce qui aduint l'an 1469. & de l'Egire 875.

FAMILLE DE AKUYONLU OV MOVTONS BLANCS

AUTREMENT NOMMEZ BAYONDVRYAH QUI ONT COMMANDE
à la Perſe, Ozun Acembek le premier de la lignee des Akuyonlu.

LE party de Karakuyonlu ayant pris fin par la mort de Acen Hali, le party des Akuyonlu monta auſſi toſt à la Royauté par le moyen de Ozun Acembek: ceſtuy cy eſtoit fils de Oſmonbek fils de Catoluk Bek, il eſtoit Turkoman, & ſi vaillant & genereux à la guerre qu'il conquist la meilleure partie de la Perſe: l'on l'appelle communement Vſum-Caçam Oſmon ou Oſmonbek ayeul de Acembek qui poſſedoit comme il a eſté dit, les terres de Diarbak, lesquelles Karaffuf luy auoit quittees par ſa mort, duquel apres la ſeconde ſucceſſion vint en Perſe du temps de Iooncha, lequel ayant faiſt mourir, comme il a eſté diſt, il reconquit ſes terres, & s'empara encore de Tabris & Aderbaion, tua Mirzah Sulton Abuzaid, qui eſtoit party de Karaſon pour venir le combattre. Or comme nous auons dit, Iooncha ayant laiſſé deux fils, Acembek en fit mourir l'un, & creua les yeux à l'autre, lequel ſe retira à Scyras, où il fut reconnu de tous pour Roy & ſouuerain Seigneur: mais Acembek ayant mené ſon armée contre la ville la prit par force, faiſant mourir la veſue Yſſuf, & de là paſſa à Kermou qu'il cōquit comme fit le meſme de Bagadet, & ayant reduit ſous ſon obeyſſance Yeraxhen, Aderbaion, Parç, Kermou, & autres prouinces de la Perſe en l'an 1472. & de l'Egire 896. il fut combattre Sultan Mahamed Roy de Rumes ou des Turcs, par lequel Ozun Acembek fut deſconfit en Arzeniô avec la mort de Zeynel Bek ſon fils qui eſtoit gouverneur de Kaſuin. Acembek vaincu s'enfuit à Tabris, & les Turcs s'en retournerent à Conſtantinople. Peu de temps apres mourut Ozun Acembek, à ſçauoir l'an 1478. & de l'Egire 882. & au meſme temps mourut Ogorlu Mahamed ſon fils aîné de ſept qu'il auoit, deſquels le ſecond fut Sultan Calil, le troiſieſme Yacub Mirzah, le quatrieſme Maçiah Mirzah, le cinquieſme Iſſuf Mirzah, le ſixieſme Makſud Bek, qui tua Sultan Cali ſon frere, & le ſeptieſme Zeynel Bek mourut à la guerre contre les Turcs.

SULTAN CALIL OU HHALIL II. Roy de Perſe de la famille de Akuyonlu.

Sultan Calil ou Hhalil par la mort de Acembek ſon pere demeura poſſeſſeur du Royaume, il enuoya ſon frere Yacub Bek gouverner les terres de Diarbak, & print les armes contre Calil ou Morad Bek contre lequel il cōbatit, & le mit en fuite, le contraignant de ſe retirer en la fortereſſe de Feruz Kuh, dans laquelle il y auoit vn Capitaine d'Ocembek appellé Geloy, lequel ayant receu Ocembek amiablement dans ſa fortereſſe l'enuoya apres priſonnier à Calil, qui le fit tuer à Karaſon où il eſtoit pour lors. En ce temps ſe reuolta Yacub Bek frere de Calil, & gouverneur de Diarbak, menant vne armée contre Tabris accompagné de Makſud Bek ſon frere, lesquelſ prenant Calil au deſpourueu le deſconfirent, & Makſud le mit à mort de ſes propres mains n'ayans regné que ſix mois.

YACUB BEK

YACUB BEX II. *Roy de Perse de la famille des Akyonlu.*

Yacub Bex fils de Ozun Acembek, ayant depossédé & fait mourir son frere parvint à la Couronne: mais en l'an 1482. & de l'Egire 886. vn sien Capitaine nommé Bayandur Bex luy fit la guerre, lequel Yacub Bex vainquit, & fit mourir en Sauah aux environs de Kom. En ceste mesme année mourut à Constantinople Sultan Mahomet fils de Sultan Murat, & luy succeda en l'Empire Sultan Baiazet son fils. En ce temps aussi Sultan Aydar de Ardauel faisoit la guerre à ceux de Gurgestam, & prenant le chemin Scyruan en intention d'occuper ce Royaume, Farrok Yacat Roy du mesme Scyruan le preuint, se fortifiant de Yacub Bex, luy demandant secours, lequel luy enuoya bon nombre de gens sous la conduite de Soleymon Bex Bigen fort bon Capitaine, lequel rencontrant Aydar en Tabasaron, le vainquit & fit mourir sur le champ, prenant deux de ces fils qui estoient encore fort ieunes, l'ainé desquels s'appelloit Aly Mirzah, & le second Cha Ismael, lesquels furent mis en la forteresse de Sterksaf, desquels il se parlera cy apres. Quand à Yacub Bex ayant regné douze ans, il mourut en Karabagé aux environs de Tabriz, l'an 1492. de l'Egire 896.

BAYSANGOR MIRZAH III. *Roy de Perse de la famille des Akyonlu.*

Bayfangor Mirzah fils de Yacub Bex parvint au Royaume par la mort de son pere, mais d'autant qu'il estoit encore en bas aage, on luy donna pour Gouverneur vn sien Capitaine nommé Zusy Kalil Musulu: à son aduenement au Royaume il survint de grandes partialitez, d'autant que ceux du party de Bayondurayh pretendoient de faire Roy Maçiah Mirzah oncle du ieune frere de son pere, & se mettant du costé de cestuy-cy firent la guerre à Sufy Calil, qui s'estant mis en campagne gagna vne bataille sur eux, en laquelle demeura Maçiah sur la place, & son nepveu Rostan Bex fils de Maksud son frere fut pris prisonnier, & emmené en la forteresse de Aleniak.

En ce temps vint Diarbek contre Calil Soleymon Bigen, que nous auons dit auoir vaincu, & fait mourir Cheque ou Sultan Aydar en faueur de Farrokyacar Roy de Scyruan, duquel Calil eut la victoire, & le fit mourir à Vvoam.

Tandis que les choses se passoient ainsi, Sultan Bayondur prenant quelques compagnies avec luy donna vn assaut à Aleniak, où Rostambek estoit prisonnier, & le mettant en liberté, le proclamerent Roy: ceux-cy avec d'autres qui se reuolterent quant & eux, prindrent aussi tost le chemin de Tabriz pour surprendre Bayfangor, lequel fut contrainct d'abandonner le pays avec Calil, & s'en aller à Diarbek, où ils furent pourluiuys par Rostam, lequel enuoya son armee contre Calil, qui fut deffait & tué. Et quand à Bayfangor il eschappa pour lors la possession du Royaume, demeurant à Rostambek. Cecy aduint l'année mil quatre cens soixante & trois, & de l'Egire 897.

ROSTAMBEC III. *Roy de Perse de la famille des Akyonlu.*

Bayfangor ainsi mis en fuite, Rostambek fils de Maksud commença de iouir du Royaume, lequel aussi tost qu'il fut mené en Tabriz fit sortir du lieu où estoient prisonniers Aly Mirzah ou Aly Parcha, & Cha Ismael les fils d'Aidar, & Bayfangor qui vint au deuant d'eux en Guania & Bardah, où il leur liura la bataille, en laquelle il fut vaincu, & mourut au combat.

Après ceste victoire, Rostam s'en retourna en Tabriz, & Aly Mirzah avec sa permission se retira à Ardauel sa patrie, & l'ancienne demeure de son pere. Rostambek se repentit bien tost apres de l'auoir laissé aller, craignant que sa presence & la memoire de feu son pere fut cause de quelque grand remuement au pays: de sorte que sans y penser d'auantage il le fit suivre, & comme celuy qui ne se tenoit point sur ses gardes, fut aysement attrapé & massacré, son frere Cha Ismael eschappa comme il peust, & se sauua en Guillon, où regnoit pour lors Kar Kia Mirzah Aly, auquel Rostambek enuoya ses Ambassadeurs pour le prier de luy remettre Ismael entre les mains: mais l'autre n'en voulut rien faire, nous estions lors en l'an de salut 1478. & de l'Egire 902. quant Hagmet Bex fils de d Ogorlu Mahamet & petit fils de Ozun Acembek vint avec vne belle armee, qu'il leua en Diarbek pour venir combattre Rostam, comme de fait ils se donnerent bataille pres de Tabriz, de laquelle Hagmet Bex eut la victoire, contrainant Rostam de s'enfuir en Gurgestam, où il mourut en la mesme année, ayant regné cinq ans six mois.

HAGMET BEX V. *Roy de Perse de la famille des Akyonlu.*

La mort de Rostambek rendit le Royaume paisible à Hagmet Bex petit fils, comme il a esté dit de Ozun Acembek, il fit gouverneur du Royaume de Kermou, Haybé Sulton, & à Kacem Bex Pernaque, il donna le gouvernement de la Perse: ces deux cy contirerent contre luy, & luy firent la guerre, & apres quelques rencontres, il perdit vne bataille aux environs de Hisfaon en Hierak en laquelle il mourut, de sorte qu'il ne restoit plus de la maison de Ozun Acembek que trois ieunes petits fils, à sçauoir Sultan Morat fils de Yacub qui estoit en Scyruan, Alven Bex fils de Vusuf Bex en Aderbaion, & vn frere de Mahamed Mizach en Yazd, ces trois cy partagerent toutes les terres que ceux d'Akyonlu possedoient en la Perse.

ALVVAN BEK VI. *Roy de Perse de la famille de Akyonlu.*

Pernarque ayant ainsi depossédé son bien-facteur, fit declarer Roy Aluuan Bek fils de Isuf Bek, & petit fils de Ozan Acem Bek, lequel à l'ayde de Geybek Bayondur, & autres siens Capitaines & parens, vint à Tabriz se joindre à Haybé Sulton, Mahamed Muzad frere de Alvvan qui estoit en Yarz d s'appelloit Roy d'Isfaon ou Hierak, contre cestuy-cy Alvvan fit marcher son armee, lequel sans l'attendre se retira en la forteresse de Scha, de laquelle estoit Capitaine Ocem Quiah Gelohi, lequel joint avec Mahamed, furent contre Alvvan, qui s'en estoit desia retourné, & se rencontrans, il se donnerent vne cruelle bataille: laquelle Alvvan perdit & se retira à Tabriz, où Mahamed le suiuit: Alvvan sortit vne autre fois contre luy, mais il fut derechef mis en route. En ceste bataille mourut Haybé Sulton, & quand à Alvvan il s'enfuit à Diarbek: durant toutes ces renoltes, deux freres de Haybé Sulton s'eueuerent contre le Roy de Hierak Sulton Morad, qui estoit en Scyrvan, & y ayant mené de grandes compagnies de gens de guerre, allerent contre Mahamed Mirzach, le rencontrerent pres de Isfaon, où ils se donnerent vne bataille, laquelle Mahamed perdit avec la vie, l'an 1500. & de l'Egire 905. n'ayant regné qu'un an.

SULTAN MORAT VII. *Roy de Perse de la famille de Akyonlu.*

Sultan Morat fils de Yacub Bek, eut par la mort de Mahamed Mirzach, les Royaumes de Persie & Hierak, & Alvvan demeura avec la Seigneurie de Tabriz & Arbaion: mais en l'an mil cinq cens & vn, & de l'Egire neuf cens six, tous deux firent vne leuee de gens de guerre, pour vsurper le bien de son compagnon, de sorte que mettant leurs gens en campagne, il se rencontrerent à Kazuin, ils ne combattirent point toutesfois par l'entremise de quelques personnes qui les firent accorder, à condition que chacun se tiendrait à ce qu'il auoit: En ce tēps, la Perse estoit pleine de volerie, de violence, de faim, de cherté & de mortalité, avec vn trouble vniuersel: on comptoit l'an 1502. & de l'Egire 907. quand Cha Ismael fils de Cheque Aydat sortant de Nakchoan leua vne armee, & s'en vint contre Tabris où estoit Alvvan, lequel quitta bien tost le pays & s'enfuit à Bagadet, & de là passa à Diarbek où il mourut bien tost apres, l'an de salut 1505. & de l'Egire 919. de sorte que Tabris vint au pouuoit de Cha Ismael, lequel en l'annee 1503. & de l'Egire 908. print les armes contre Sulton Morad, qui sortit de Scyras, & vint le combattre en Amadon: mais Morad perdit la bataille & se retira à Scyras, & de là à Bagadet, de laquelle Bathick estoit Gouverneur qu'il le recueillit & le prit en sa protection, puis l'annee suiuite, à sçauoir 1504. & de l'Egire 909. Ismael vint contre eux, lesquels furent contraints de luy quitter le pays, & se retirerent en Karamanie: de là Morad s'en retourna à Diarbek, où les Kazelbac ou Casselbas le tuerent, l'an de salut 1515. & de l'Egire 920. de sorte qu'en cestuy-cy finit le gouuernement de ceux des Akyonlu sur la Perse.

DES DESCENDANS DE CHINGVYSKAN QVI COMMANDERENT EN VSBK ET MORENAHAR.

ЧАЛЫБЕК КХОН *Roy de Morenabar.*

Cependant que les choses passaient en la Perse, comme il a esté dict, les descendans de Tuchykon fils de Chinguyskan commandoient en Vsbek, & tenoient toutes ces terres là qui sont de fort grande estendue. Or l'an de salut 1496. & de l'Egire 900. Chaybekon fils de Budak Sulton partit de Vsbek avec de grandes forces, & s'en vint courir & rauager les terres de Maurenahar & de Karason, lesquelles en l'espace de quatre ans, il occupa toutes iusques à l'annee 1500. & de l'Egire 904. qu'il fut contraint de les quitter aux descendans de Teymurlang, & en l'an 1508. & de l'Egire 913. Sultan Ocem Mirrh s'estant rencontré avec Chaybekhon Herak en Maurenahar où il regnoit, & étant mort sur le champ, il donna sa place à son fils Pady Azamon Mirzach, lequel n'estant pas bastant pour luy resister, s'enfuit à Kandar où ayant recouuert quelques gens, il vint combattre Chaybek, lequel eut la victoire, forçant Pady de s'enfuir en la Perse, & de se preualoir de la faueur de Cha Ismael Sufy qui le traita avec honneur, puis en l'annee mil cinq cens vnze, & de l'Egire neuf cens seize, Cha Ismael fut contre Chaybek & se rencontrerent tous deux à Marvvo, où ils combattirent: mais Kabekhon fut vaincu & mourut au combat, ayant tenu sa seigneurie douze ans.

КУЧЕНГУ КХОН *Roy de Maurenahar des descendans de Chinguyskan.*

Kuchengy Khon demeura à Maurenahar au lieu de Chaybek en l'annee 1513. & de l'Egire 918. Cha Ismael enuoye vne puissante armee à Maurenahar sous la conduite de Nagemy Sony, lequel se vint joindre à Babor Roy de l'Inde, lesquels vnis ensemble, vindrent pour combattre les Vsbeques en Gagydaon: mais ceux-cy les vainquirent, Nagemy Sony demeurant sur la place, & quant à Babor tout desconfit fut contraint de se retirer en l'Inde: Kuchengy Khon voulant apres

lant apres en auoir la reuanche, l'annee 1530. de l'Egire 935. entra avec son armee dans la Perse, en laquelle estoit pour lors Cha Thamas, fils de Cha Ismaël, lequel s'opposa à ses forces, le combattit & obtint la victoire, si que celui d'Vzbek se retira vaincu en Maurenahar, d'où il vint encore vne autre fois en Marvvo, en intention d'entrer en la Perse : mais la paix se conclut entr'eux, qui empescha Kuchengy de passer outre, & le fit retourner en Maurenahar, où il mourut le mesme an, ayant regné vingt ans.

ABUZAY KHON Roy de Morenabar, des descendants de Chinguis Khan.

Abuzay Khon fils de Kuchangy, par la mort de son pere paruint à la Couronne, laquelle il posseda quatre ans, à la fin desquels il mourut sans auoir faict choses digne de memoire, l'an de salut 1333. & de l'Egire 939.

OBEYD KHON Roy de Morenabar, Roy des descendants de Chinguis Khan.

Obeyd Khon frere aîné du defunct Abusayd fils de Mahamud Khon, frere de Chaybek aussi tost qu'il fut déclaré Roy fit passer vne puissante armee en Karason, en intention de la faire entrer en la Perse : mais il fut empesché par Cha Tamas, qui le força de quitter les terres de Karason, & Cha Tamas s'estant retiré il reuint pour la seconde fois, & les rauagea avec son armee desia fort harassée, iusques en l'an 1540. & de l'Egire 946. auquel il mourut, ayant regné six ans.

ABDULA KHON Roy de Maurenabar, des descendants de Chinguis Kan.

Abdula Khon fils de Kuchengy Kohn eut le Royaume de Maurenabar par la mort de Obeyd Khon, auquel toutesfois il ne fut que six mois, au bout desquels il mourut l'an 1541. & de l'Egire 947.

ABDELATIFE KHON Roy de Maurenabar, des descendants de Chinguis Kan.

Abdelatife Khon fils de Abdula Khon succeda au Royaume, lequel il tint iusqu'à l'annee 1542. & de l'Egire 940. en laquelle il mourut, finissant en luy le Gouvernement de Chinguis Kan en Morenabar.

ORIGINE DE SCACHISMAEL SOFY, ET DE CEUX qui sont descendus de luy, & ont commandé à la Perse iusques en ce temps.

POURSUIVANT maintenant la suite des Roys de Perse, il sera bien à propos auparavant que de parler des actions d'Ismaël Sophy, de traiter de son origine le plus briefuement toutes fois qu'il se pourra : cestuy-cy donc fut fils de Cheque Aydar, fils de Sultan Iuney, fils de Cheque Ebrahim, fils de Cheque Aly, fils de Cheque Mucha, fils de Cheque Safy, & en fin le treiziesme petit fils des descendants de Morts Aly, cousin & gendre de Mahamed. Quant Teymurlang retourna en la Perse apres la deffaitte de Bajazette, il emmena avec luy vne grande multitude d'esclaves, tant de la Caramanie que d'autres nations, lesquels il auoit deliberé de faire tous mourir : & avec ceste resolution il entra en Ardeuel, où il s'arresta quelques iours : il y auoit en ceste ville vn Cheque Safy, qui estoit tenu de tous ceux, non seulement de la ville, mais encores des enuirs, pour vn saint homme, si qu'il estoit honoré & respecté de tous : la renommee de la vertu, & de la bonne vie de cestuy-cy paruint iusqu'à Teymurlang, qui en voulut auoir la cognoissance, & procurer son amitié : de sorte que luy-mesme l'alla visiter chez luy plusieurs fois, & s'en voulant aller d'Ardauel, il s'offrit à luy accorder ce qu'il luy demanderoit. Cheque Safy qui scauoit l'intention de Teymur pour le regard des prisonniers, prenant son temps sur l'offre que ce Prince luy faisoit, le pria de leur pardonner. Teymur qui desiroit luy complaire, non seulement leur pardonna, mais les luy remit tous entre les mains pour en disposer à sa volonté. Cheque Safy les receut, & leur pourueut à tous le mieux qu'il peut de robes & autres choses necessaires, les renuoyant libres chacun en sa maison, dequoy non seulement les captifs : mais ceux encores des nations desquelles ceux-cy estoient, se sentirent tellement obligez au Safy, qu'en signe de recognoissance d'un grand bien-faict : il ne se passoit guieres de iour qu'il ne fut visité de plusieurs avec dons & presens, continuans tousiours ceste recognoissance aux descendants mesmes du Safy, & iusques à Sultan Iuncy son treiziesme neveu, ou fils de ses fils, qui viuoient du temps de Iooncha fils de Chara Isuf, duquel il a esté parlé cy-deuant : car ce Prince là voyant les visites continuelles qu'on faisoit à Iuncy, & le grand nombre de gens, tant de pied que de cheual, qui estoit d'ordinaire à sa porte, la grande autorité encores qu'il auoit : toutes ces choses ensemble luy donnerent sujet d'auoir quelque soupçon de luy, de sorte qu'il luy dit, qu'il ne vouloit plus qu'il fust si visité de tant de gens : dequoy Iuncid se sentant grandement offensé, sans y penser dauantage, sortit aussi tost de Ardauel accompagné de ses deuots, & prit le chemin de Diarbek : Osun Acembek, qui estoit alors Roy de ceste Prouince, le receut benignement, luy donnant pour femme vne sienne seur nommée Kadija Katum, de laquelle il eut vn fils nommé Aydar, ce Iuncid auoit ordinairement autour

de luy de certains coureurs qui infectoient tout le Gurgestan sous le tiltre de Zelos de sa secte, forçant ceux qu'ils prenoient captifs de la recevoir, & en continuant ses courtes, il arriva qu'une fois estant entrez dans le Royaume de Trabizonda, ils tuerent le Roy, & s'en emparant, mettant en icelle Aydar son fils qui estoit avec luy : il arriva depuis que Acembek fit mourir Ioncha, comme il a esté dit celà fut cause qu'Aydar passa en Ardaue, où il se maria avec vne fille de Acembek, nommé Alemcha, laquelle luy enfanta Aly Patcha, & Cha Ismaël, qui nasquit en l'an 1488. & de l'Egire 892. qui s'appella Sophy, pour la cause que a desia esté dite ailleurs.

L'an ensuiuant, Aydar estant entré au Royaume de Sciruan, Ferrok Yassut Roy de ceste prouince, avec l'ayde de Yacub Bek deffit son armee, Aydar demeurant mort sur la place, & ces deux fils, Aly Patcha, & Ismaël pris prisonniers, lesquels Sulton Rostan Bek mit depuis en liberté : toutesfois ayant apres faict tuer Aly Patcha, qui estoit l'aîné, Cha Ismaël se retira à Guyelon, où il fut six ans, à la fin desquels la Perse estant toute en confusion pour les reuoltes de Akyonlu, il s'en alla à Arzenion, où ayant assemblé iusques à sept mille hommes Caramenes, tous Sophiens, des familles de Estayalu, Kanlu, Takaluh, Versatlu, Romlu, Zulkaderlu Auchar Kayar Sufiaphyaradak, & plusieurs autres qui le suiurent, l'an de salut mil cinq cents vn, & de l'Egire neuf cents soixante six, n'ayant encore que l'aage de quatorze ans, il vint en Scyruan, où il combattit contre Farrok Yassa qui auoit faict mourir son pere, obtint la victoire de luy, & luy fit perdre la vie, si bien qu'il se mit en possession de ce Royaume, & l'an ensuiuant il fit la guerre à Alvvan en Nachoan, & le contraignant de s'enfuir, Ismaël print Tabris, ayant obtenu ceste victoire, il institua la Tache qui est vn Turban ou Chaperon rouge, avec douze bandes à l'entour, qu'il fit porter aux siens en memoire des douze fils de Ocem, fils de Aly tenus entr'eux pour saints, & desquels il se vantoit estre descendu, appellans ceste nouvelle Milice les Cazel Bak : comme si on disoit teste rouge. Celà estant faict il passa à Arzenion, où il assembla son armee pour conquerir le Royaume de Zulkader : mais en son absence Alvvan reuint contre Tabris, au secours de laquelle Ismaël accourut incontinent, & contraignit l'autre de s'enfuir à Bagadet, & de là en Diarbek, où il mourut deux ans apres : il mourut en l'an mille cinq cents-trois, & de l'Egire neuf cents huit. Apres laquelle mort Ismaël s'estant vn peu reposé à Tabriz, mena son armee en la Perse contre Moral Bek, qui fut par luy desconfit, avec la perte de dix mille soldats, en l'an mil cinq cents quatre, & de l'Egire neuf cents-neuf, & luy abandonna la Perse & le Kermon, qui vindrent au pouuoir d'Ismaël, lequel alla passer son Hyuer à Kom, d'où il depescha Elhasbek avec vne armee contre la ville de Rey, lequel Ocember Gelohay Capitaine de Kaat : Ferus Kuh s'estant mis en embuscade sur les aduenuës des chemins, luy presenta vne bataille que l'autre perdit avec la vie : Ismaël sçachant ceste route s'en alla contre Ocember Gelohay, qui se retira à Ferus Kuh, lieu tres-fort, tant par nature que par art : ce que sçachant Ismaël, & ne voyant point de moyen d'en auoir la raison, luy retrancha l'eau qui entroit là dedans, de sorte que les soldats furent contraincts de se rendre vn mois apres le siege : mais encores qu'il ne fut pas long, cela n'empescha pas qu'il ne mourut en ceste guerre plus de trente mille hommes. Cecy estant appaisé, Ismaël print le chemin de Karason : mais si tost qu'il fut party, vn Roy nommé Mahamed Karahy, ayant avec soy quelques troupes, s'en partit en la contree de Yazd, & s'en rendit le maistre : Ismaël vint contre cestui-cy, lequel se deffendit courageusement : en fin toutesfois il entra dans la ville, & print Karahy lequel Ismaël fit bruler l'an mille cinq cents six, & de l'Egire neuf cents vnze.

De là Ismaël se retira à Scyraz, où il fit vn Edict en forme de prescription, par lequel il commande que tous ceux qui auoient porté les armes en la bataille où estoit mort son pere Aydar eussent à mourir, de sorte que cela fait mourir plus de trente ou quarante mille hommes. Et comme il hyvernoit à Taron, il sceut que Sulton Ocem Mirzad Roy de Karason estoit mort, des terres duquel s'empara Ghoybekkon Vsbek, & les fils du defunct Roy se retireerent vers Ismaël, lequel partit aussi tost avec son armee, & s'en vint courir sur les terres de Rumestan, ou des Turcs, ayant donné le Gouuernement du Diarbek à Mahamed Khon Estayalu, & l'an mille cinq cents vnze, & de l'Egire neuf cents seize, il fut contre Bagadet que Barhick gouuernoit pour lors, lequel fut contrainct de s'enfuir, & de se retirer vers les Turcs : ce fut lors qu'il perdit vn fort grand nombre de soldats au passage du fleuve Tigris, qu'il ne peut guayer : il conquist apres le Kufistan, qui est le mesme que le pais de Suse, où estoit iadis Assuerus & Ester, & au plus fort de l'Hyuer il mena ses gens contre Scyruan Baku & Darband, qu'il conquist en l'an mille cinq cents douze, & de l'Egire neuf cents dix-sept : il alla en Karason contre Chaybekkon, lequel sçachant sa venue se retira à Marvvo : mais Ismaël fit tant qu'il l'attira en la campagne, où il luy donna la bataille, laquelle Chaybekkon perdit avec la vie, & par ce moyen le Karason vint au pouuoir d'Ismaël.

En ce

En ceste année mourut Bajazeth Roy de Rume, ou Turc, & luy succeda à l'Empire Sultan son fils, & en l'an mille cinq cents quatorze naquit Cha Thamas le fils d'Ismaël Sophy l'année suivante, à sçavoir de salut, mil cinq cents quinze, & de l'Egire neuf cents vingt. Selim vint avec vne puissante armée à Arzenion, & fit partir Ismaël de Hisphaon, & vint rencontrer son ennemy à Chalderon, où il se donna vne grande bataille, laquelle Ismaël perdit, & se retira à Tabriz, & de là à Gazin. Sulton Selim entra dans Tabriz, où il fut quinze iours, lesquels passez il se retira en Amasiah. Ceste année les Caselbas firent mourir en Diarbex Sulton Morad, & en enuoyerent le reste au Sophy, & l'an suivant Selim print Kemack, place fort importante en Saladulie, & Zulkadel, & Alep en Surie, puis en l'an mil cinq cents dix-sept, & de l'Egire neuf cents vingt deux, subiuga Damas & l'Egypte : & l'année d'après Diarbek, & la Mesopotamie, où il mourut finalement en l'an mil cinq cents vingt & vn, & de l'Egire neuf cents vingt-six, auquel succeda son fils Soleymon. Quant à Ismaël Sophy, ayant commandé sur toute la Perse l'espace de vingt ans, il mourut l'an mil cinq cents vingt-cinq, & de l'Egire neuf cents trente, en l'âge de trente-huit ans : il fut terrible à la guerre, resolu, sans crainte, plus cruel & seuer que doux & humain : il souloit dire, que comme il n'y auoit qu'un Dieu au Ciel, qu'il falloit aussi qu'il n'y eut qu'un Roy en la terre, c'est à quoy aspiroit son insatiable ambition. Il fut tant estimé & respecté des siens, qu'ils le tenoient pour un homme Religieux & Saint, & quelquefois il y eut quelques-uns de ceux qui le suiuoient, qui luy attribuerent l'honneur deu à la diuinité, ce qu'il faisoit semblant de rejeter, mais ce n'estoit qu'en mine : car vne fois entr'autres, apres auoir obtenu vne grande & signalée victoire, & de tres-grande importance, comme les uns l'appelloient Prophete, les autres Ange, & les autres Dieu, tant s'en faut qu'il les dissuadat, qu'ayant fait creuser vne grande & profonde fosse, il ietta dedans son soulier, disant, que celuy qu'il aymeroit le mieux l'allast requerir : A peine eust-il dict la parole, que plusieurs milliers se ietterent dedans, où ils ne furent pas si tost, que la terre qui auoit esté tirée de ceste fosse, se bouleuerla sur eux, & les enterra tous vifs, payans ainsi la peine qu'auoit meritée leur impieté. Il eut quatre fils, sçavoir Cha Thamas Alcas, ou Elias Mizah, le troisieme Son Mirzah, & le quatrieme Barhon Mirzah.

CHA THAMAS II. Roy de Perse, de la race des Sophiens.

Cha Thamas succeda à Ismaël Sophy son pere, il eust plusieurs guerres durant son regne, qui dura cinquante trois ans, les plus importantes desquelles furent contre les Turcs : il mourut l'an mil cinq cents septante-six, & de l'Egire neuf cents octante-trois, laissant deux fils Cha Ismaël, & Mahamed l'Aueugle.

CHA ISMAËL III. Roy de Perse, de la race des Sophiens.

Cha Ismaël fils aîné de Cha Thamas, ne fut qu'un an & dix mois Roy de Perse, à la fin desquels il mourut, laissant le Royaume à son frere Mahamed l'aueugle, l'an mil cinq cents septante-huit, & de l'Egire neuf cents octante cinq.

CHA MAHAMED IV. Roy de Perse, de la race des Sophiens.

Ismaël n'ayant laissé aucuns enfans, son frere Mahamed second fils de Cha Thamas luy succeda : lequel encor qu'il fut aueugle, il ne laissa pas de gouverner sept ans, à la fin desquels il mourut, l'an de salut mil cinq cents octante cinq, & de l'Egire neuf cents nonante-deux, laissant Cha Abas son fils pour successeur.

CHA ABAS V. Roy de Perse, de la race des Sophiens.

Par la mort de l'aueugle Mahamed, son fils Cha Abas entra en possession du Royaume de Perse, lequel il possède encore à présent durant son regne, il a eu plusieurs guerres, auxquelles il a donné plusieurs batailles, les plus signalées desquelles furent celles de Gueylon qui s'estoit rebellé, lequel il reduit à son obeïssance, non sans vn manifeste danger de luy & des siens : il fut assieger Balk en Vsbek, & tint le siege quelque mois deuant qu'il fust contrainct le leuer, destruisit le Royaume de Lar, ou Lara en la Perse, & print le Roy d'icelle qu'il fit mourir, à cause des larcins & violences qu'il faisoit aux Karauances des marchands qui passaient par là : il quitta Tabris aux Turcs, laquelle ils possedoient dès le temps de Cha Thamas son ayeul. Plusieurs choses memorables se sont passées durant le temps de ce Prince, & principalement contre les Turcs, lesquels ont depuis perdu Tauris, & la meilleure partie des places qu'ils tenoient sur le Perlien : mais la brièveté de cet Abregé ne permet pas d'en discourir plus amplement : ioinct que les choses qui se passent en pais si esloigné, ne se peuuent découvrir que avec le temps, qui seul peut faire paroître la verité.

Rois qui ont commandé à la Perse infques à ce que les Arrabes entrevnt en icelle selon Mir Kond : La supputation generale est en la marge ; eux à qui la lettre x est adiouste, c'est à dire qu'ils ont esté Gouverneurs, & que neantmoins quelques-uns les mettent au nombre des Roys : la marque { enferme le Roy, sous lequel ceux-cy ont gouverné. Ceux qui n'ont point de nombre, c'est d'autant qu'on est en doute du temps de leur regne : on a mis à costé les ans de salut, & ceux de l'Egire, ausquels ils ont gouverné, quand ils ont esté remarquez par l'Histoire.

Ans de Salut.	Ans de l'Egire.		Ans.	Mois.	Jours.
		K Ayumeras,			
		Syamek,	40.		
		Ouchang,		0.	0.
		Thamures Diuband,	50.	0.	0.
		Iambched.	30.	0.	0.
		Zoagk		0.	0.
		Fraydhun,	0.	0.	0.
		Manucher	0.	0.	0.
		Nauder	120.	0.	0.
		Afraciab,	7.	0.	0.
		Ziab, ou Bazad	12.	0.	0.
		Kay Kobad	5.	0.	0.
		Kay Kaus	100.	0.	0.
		Kay Kozrrao	150.	0.	0.
		Lorasph, ou Loraseph,	60.	0.	0.
		Gustasph, ou Gustaseph	120.	0.	0.
		Bahamandaras dast, ou		0.	0.
		Ardchir.	120.	0.	0.
		Homay Royne	112.	0.	0.
		Darab	30.	0.	0.
		Darab	12.	0.	0.
		Scander, ou Ascander	14.	0.	0.
				0.	0.
		EN TRE REGNE.	72.	0.	0.
		Chapur	60.	0.	0.
		Ardchir Babakon	50.	0.	0.
		Chapur Zabel Ketaf G.	0.	0.	0.
		Archir Frazand Hormzo	0.	0.	0.
		Chapur	60.	0.	0.
		Baharon Kemon Cha	15.	0.	0.
		Yazd Gerd.	22.	0.	0.
		Keseré Khozrrao	0.	0.	0.
		Baharon Gur.	0.	0.	0.
		Narsy, O. Narsa G.	0.	0.	0.
		Baharon Gur,	0.	0.	0.
		Narsy, O Narsa G.	0.	0.	0.
		Baharon Gur.	23	0.	0.
		Yazd Gerd	0.	0.	0.
		Narsy G.	0.	0.	0.
		Yazd Gerd,	0.	0.	0.
		Yard Gerd,	0.	0.	0.
		Homoz, Farzand,	1.	0.	0.
		{ Feruz,	0.	0.	0.
		{ Sufara G.	0.	0.	0.
		{ Feruz,	0.	0.	0.
		Sufara G.	0.	0.	0.
		Feruz,	26.	0.	0.
		Belax,	5.	0.	0.
		{ Iamasph, G.	0.	0.	0.
		{ Kobad,	43.	0.	0.
		Keseré Anuchiron,		0.	0.
		O. Nauchiruan.	48	0.	0.

Hormoz,

<i>Ans de Salut.</i>	<i>Ans de l'Egire.</i>		<i>Ans.</i>	<i>Mois.</i>	<i>Jours.</i>
		Hormoz,	12.	0.	0.
		Baharon Chuby,		0.	0.
		Khozrrao Paruez.	38.	0.	0.
		Kobad Chyruyhe,	0.	0.	0.
		Ardchir Chyruyhe,	0.	0.	0.
		Charear	1.	0.	0.
		Ioon Chir,	1.	0.	0.
		Turon dok Royne,	1.	0.	0.
		Iaçançeda,	0.	0.	0.
		Azarmy Dok Royne,	0.	0.	0.
		keferé,	1.	0.	0.
		Ferroghzed.	0.	0.	0.
		Yad Gerd.	20.	0.	0.

CALIFES DE BAGADET QVI COMMANDERENT A LA
Perse , depuis que les Arabes entrèrent en icelle.

623.	2.	Abubakar,	2.	0.	0.
643.	22.	Homar.	1.	0.	0.
644.	23.	Osman, ou Orman,	11.	6.	0.
655.	35.	Morts Aly.	4.	6.	0.
661.	40.	Acem.	0.	6.	0.

DE LA FAMILLE DE BEN HVMYA.

662.	41.	Mavvya.	20.	0.	0.
682.	61.	Yezid.	3.	0.	0.
685.	64.	Mavvya. 2.		1.	0.
687.	66.	Marvvan.	1.	0.	0.
688.	67.	Abdel Malex.	21.	1.	0.
706.	86.	Oelid.	9.	8.	0.
716.	96.	Soleyman.	2.	6.	0.
718.	98.	Hamar, ou Homer.	2.	3.	0.
720.	100.	Yezid. 2.	4.	8.	0.
724.	105.	Ochon.	19.	8.	0.
743.	124.	Oelcyd 2.	2.	1.	0.
744.	125.	Yezid 3.	0.	6.	0.
745.	125.	Ebrahim.	0.	2.	0.
748.	128.	Marvvan 2.	5.	5.	0.

DE LA FAMILLE DE EBEN ABAS.

751.	132.	Safa.	4.	0.	0.
754.	136.	Abu Isfar.	23.	0.	0.
777.	159.	Mahady Bila.	10.	0.	0.
786.	196.	Eladi Bila Musa.	1.	3.	0.
787.	170.	Arachid Bila Harum.	13.	0.	4.
810.	193.	Mohamed Amin.	4.	7.	0.
815.	198.	Mahamum.	12.	7.	0.
816.	210.	Abu Ezach Mataçon.	8.	0.	0.
833.	217.	Yvacek.	5.	0.	0.
838.	222.	Almotorvva Kal Bila Isfar.	12.	6.	0.
850.	234.	Montacer.	0.	6.	0.
851.	235.	Abul Abas Hamed.	3.	0.	0.

Vacance du Califat.

860.	243.	Mostahhin.	1.	4.	0.
------	------	------------	----	----	----

<i>Ans de Salut.</i>	<i>Ans de l'Egire.</i>		<i>Ans.</i>	<i>Mois</i>	<i>Jours.</i>
262.	247.	Almatez Bila.	3.	0.	0.
855.	250.	Motady Bila.	0.	12.	0.
866.	251.	Almat Hamet Bila Hamed.	23.	0.	0.
893.	279.	Matazed Bila Hamed.	9.	9.	0.
903.	289.	Mokafy Bila.	4.	0.	0.
907.	293.	Moktadet Bila.	7.	0.	0.
914.	301.	Iasar.	20.	0.	0.
933.	320.	Kaher Bila Mahamed.	1.	6.	0.
935.	322.	Razi Bila Mahamed.	4.	0.	0.
939.	329.	Moktasy Bila Ebrahim 1.	4.	0.	0.
943.	330.	Mostachfy Abdala.	4.	4.	0.
947.	334.	Mutya Bila Fazele.	29.	6.	0.
977.	365.	Tahia Abel Karim.	17.	2.	0.
1013.	403.	Kader Bila Hamed.	21.	4.	0.
932.	422.	Mahé, ou Alkahé Beamaryla.			
		Abu Iasar Abdula.	44.	4.	0.
1074.	467.	Almoktady Bila.	19.	5.	0.
1095.	487.	Almostazer Bila.	25.	6.	0.
1119.	512.	Almostacher Bila Fazele.	17.	2.	0.
1136.	529.	Racher Bila.	2.	0.	0.
1139.	531.	Almoktasy Bila 3.	24.	0.	0.
1161.	555.	Almonstanger Bila Issuf.	11.	0.	0.
1177.	566.	Almostazy benur Elach acé.	9.	8.	0.
1180.	575.	Nazer, ou Nacereladinla.	47.	0.	0.
1226.	621.	Alhazer, ou Altaher Bila Mahamed.	0.	9.	0.
1227.	623.	Almostanzer Bila Mansur.	7.	0.	0.
		Almonstancem Bila.			
1244.	640.	Abdula.	15.	17.	0.

LES MOGOLES OV TARTARES DES DESCENDANS
de Chinguiskan, qui commanderent à la Perse.

1207.	601.	Chinguiskan.	1.	0.	0.
1230.	626.	Orkay Khaon.	13.	0.	0.
1246.	643.	Gayuk Khaon.	1.	0.	0.
1247.	644.	Manchu Khaon.	13.	0.	0.
1260.	657.	Vlaku Khaon.	6.	0.	0.
1266.	663.	Haxbay Khaon.	17.	0.	0.
1282.	680.	Hamed Khan, ou Nicudar Oglan.	2.	2.	0.
1283.	680.	Argon Khon.	7.	0.	0.
1291.	690.	Goniaru Khon.	2.	0.	0.
1295.	693.	Bulkhan.	1.	0.	0.
1296.	694.	Gazun Khan.	8.	0.	0.
1305.	703.	Aluaptukan, qui apres s'appella Sultan Hamed.	12.	9.	0.
1317.	716.	Sultô Abzay Bahader Khan.	19.	0.	0.

MOGOLES OV TARTARES DESCENDANS
de Teymurlang, qui commanderent à la Perse.

1388.	789.	Teymurlang.	36.	0.	0.
1405.	807.	Mirzach Karroz.	43.	0.	0.
1447.	850.	Ologhberk.	2.	0.	0.
1450.	853.	Mirzah Abdelarife.	0.	6.	0.
1454.	854.	Mirzah Abdula.	1.	0.	0.

En Man.

<i>Ans de Salut.</i>	<i>Ans de l'Egire.</i>		<i>Ans.</i>	<i>Mois</i>	<i>Jours.</i>
<i>En Maurenahar.</i>					
1452.	854.	Mirzakh Sulton Abufayd.	518.	0.	0.
1469.	873.	Mirzakh Sulton Hamed.	28.	0.	0.
1532.	937.	Mirzakh Babor.	28.	0.	0.
<i>En Karafon.</i>					
1469.	873.	Mirzakh Hyadigar.	2.	0.	0.
1471.	875.	Mirzakh Sulton Ocen.	38.	4.	0.
1556.	116.	Bahady, ou pedy Azamon, & Muzafa Mirzakh freres ensemblement.	1	0.	0.
<i>En Aderbajon.</i>					
3406.	809.	Mironcha.		0.	0.
1407.	810.	Mirzakh Abubakar.		0.	0.

TVRKOMANS DE LA FAMILLE DE KARAKVYONLYV,
qui commanderent à Perse.

1431.	815.	Kara Issuf,	14.	0.	0.
1421.	823.	Amir Scandar.	16.	0.	0.
1431.	841.	Iooucha.	32.	0.	0.
1468.	872.	Acen Aly.	1.	0.	0.

TVRKOMANS DE LA FAMILLE DES AKVYONLYV,
qui commanderent à la Perse.

1471.	876.	Ozun Acenbek.	11.	0.	0.
1478.	882.	Sulton Kahil.	0.	6.	0.
1482.	886.	Yasub Bek Bayfangor.	12.	10.	0.
1492.	896.	Mirzakh.	1.	6.	0.
1493.	897.	Rostambek.	5.	0.	0.
1498.	902.	Hagmet Bek	1.	0.	0.
1499.	903.	Alvvan Bek.	1.	0.	0.
1500.	905.	Morad Bek.	1.	0.	0.

LIGNEE DES SOPHIANS DES DESCENDANS D'ISMAEL

Sophy, qui commanderent à la Perse.

1501.	906.	Cha Ismaël Sophy.	20.	0.	0.
1525.	930.	Cha Tamas.	53.	0.	0.
1576.	983.	Cha Ismaël.	1.	10.	0.
1578.	985.	Cha Mahamed l'Aueugle.	7.	0.	0.
1585.	992.	Cha Abas.	33.	0.	0.

**DISCOVRS DE L'ESTAT DV GRAND
DVC, OV EMPEREVR DE MOSCOVIE.**

SOMMAIRE.

- C**IRCVIT & limites du pays de Moscouie.
- En quel parallele & climat est assis cet Empire.
- Description de ses Provinces, & de Moskoua en Moske, ville capitale de l'Empire.
- De la Duché de Voldimer.
- De la Duché de la basse Nouograd.
- De la province de Rbezam, & ses villes.
- De la province & ville de Smolenske.
- Du pays de Moskiski, sa longueur & largeur, & par qui conquis sur la Pologne.
- De la Duché de Roschoue.
- Du pays de Tauer, & de la renommee ville de Tauerde.
- De la province de Pleschonie, son estendue, & ville capitale de Pleschoua.
- De Nouograde la grande.
- Du pays de Volsche, & sa situation.
- De la province de Biolysero, Velokde, Iaroslanch.
- De la province de Dnuine.
- De Sosdsli & Viaska province prise sur le Tartare.
- De Permie, Petzore, Iugatie, Obdore, & autres pays sujets aux Moscouites.
- Sterilité du terroir compensée du grand nombre.

- d'animaux, eslans, bœufs, ours, cerfs, loups, lievres, mouches à miel, abondance de lins & chanvres, & bonté de l'air.
- 19 Description des plus celebres rivières, & lacs de Moscouie, & de l'origine & source du Boristhene reconnue de nostre temps, & ignorée des anciens.
- 20 Particuliere remarque de la fertilité ou infertilité de chaque province, & des rochers Riphees, ou Hiperborées d'admirable hauteur.
- 21 Coustume estrange des anciens Moscouites en l'election de leur Prince, & au traitement de leurs femmes.
- 22 Leur robuste complexion de corps, leur sages, & autres façons d'habillemens, leurs armes & maniere de combattre en fuyant, leurs viandes & breuvages ordinaires, leur naturel barbare, perfide, ruzé, paillard, & leur iustice venale.
- 23 Description plus particuliere des mœurs & costumes de chaque pays.
- 24 Leurs richesses en peaux d'elans, de cerfs, ours, loups, martes, en lins, chanvres, miel & cire.
- 25 Richesses du Roy, & quels sont ses revenus.
- 26 Relation notable du magnifique traitement fait à Parmisten Ambassadeur de l'Empereur par le Moscouite.
- 27 Forteresses du pays Moscouite en marescages & rivières, en l'espaisseur des boues servans de rempars, & le rendans de difficile acces, & en la grande canalerie.
- 28 Du grand nombre de cavalerie de ce Royaume, & sçavoir s'il peut mestro en campagne trois cents mille cheuaux.
- 29 Des puissans ennemis voisins, & qui confinent avec cét Estat, & premierement du Precop Prince des Tartares.
- 30 De deux autres voisins ennemis des Roys de Suede & Pologne.
- 31 De la souveraine autorité du grand Duc en son Estat, & les moyens qu'il tient pour le maintenir.
- 32 En quel temps la Religion Chrestienne y fut introduicte, & quelles sont leurs ceremonies en la celebration de la Messe.
- 33 De la Circoncision & Religion des Morduois, vivans selon la loy de nature.



Or s que nous faisons en nos communs discours mention de quelque Duc, il semble que ses Estats soient de fort petite estendue, pource que nous voyons ordinairement que ceux qui possèdent aujourdhuy ce titre, soit parmy nous, soit parmy nos voisins, ne jouissent que de petites provinces, & trouvent aussi tost de tous costez les bornes de leur domination & Seigneurie. Mais celuy de qui nous voulons parler maintenant est bien Duc à meilleures entrees que tous les autres que nous cognoissons en nostre Europe. Car non seulement ses pais sont esgaulx en grandeur à ceux de plusieurs grands Roys : mais les surpassent encore en telle sorte, que celuy qui voudra conferer les principautez avec celle-cy, trouvera qu'ils ne font la loy qu'en vn bien petit espace de terre, au regard de celuy qui recognoist le grand Duc, ou Knez de Moscouie. Aussi les siens suffisamment informez de la la grandeur des Pais qui luy rendent obéissance le nomment Cesar, ou Empereur, & luy portent autant d'honneur que jamais on en ait veu rendre à Prince du monde. Et veritablement, si l'on prend la peine de considerer ce que son Empire embrasse, on remarquera qu'il merite vne plus haute qualité que celle qu'on luy donne ordinairement, à faute du nom de Roy qu'on a sceu estre extremement odieux aux Moscouites.

- 1 Voyons maintenant à fonds iusques où s'estendent ses limites, & s'il est si puissant que nous auons dict à l'entree de ce discours. Le dy donc que tout l'Empire du Moscouite occupe à present toute la Russie, en exceptant toutesfois la Pologne, & la Lithuanie, qui sont aussi comprises sous ce mesme nom de Russie.

Or ces Estats sont partie en Europe, partie en Asie, & ceste separation est faite par la riviere de Tanais, autrement le Don, qui est la commune borne de l'Asie, & de l'Europe. Ils sont encore confinez du costé du Nort de la mer glaccée, comme ils sont aussi au Leuant, en reflechissant vers le Midy, des Tartares, & du costé du Midy de la Lithuanie, de mesme qu'ils ont pour leur plus proches voisins du costé d'Ouest, ou d'Occident, ceux de Lissland, ou Liuonie, & pareillement la Finlande, pais diuisé par la riviere de Polne, & appartenant au Roy de Suede. Tous ces Estats tirent leur nom general d'un pais assis au milieu de la Russie blanche, qui s'estend vers le Septentrion & l'Orient, & qui s'appelle particulièrement Moscouie.

- 2 Or il est à considerer que la partie de la Russie qui obeit au grand Knez, se nomme Blanche Russie, & celle qui recognoist le Roy de Pologne, Noire Russie, combien que le Roy de Pologne possede aussi vn peu de la Blanche.

Cét Empire est assis entre le dixneuuesme parallele à cinquante-deux degrez de latitude, ou d'elevation de pole, & le quarante-troiesme parallele, qui est a soixante-six degrez de l'Equateur, ou bien en l'expliquant d'autre sorte, il est entre le milieu du huitiesme climat, & le milieu du vingtiesme, & est compris entre le Tropique de l'Etrenuise, & le Cercle Arctique. Tellement qu'on y remarque vn tres-grand changement en la quantité du plus long iour d'Esté. Car au parallele plus Meridional de Moscouie, le plus long iour n'est que de seize

de seize heures & demie, au lieu qu'au parallele plus Septentrional de ce mesme Empire, le plus grand iour est de vingt-deux heures & demie, ce qui montre assez la grande distance qu'il y a de l'une à l'autre frontiere : car à prendre chaque degré pour trente lieues de France, comme on fait ordinairement, on trouuera qu'il contient de largeur seulement en tirant de la partie qui approche plus du Midy à celle qui est plus voisine du Nord, 420. lieues, & en longueur la moitié autant, voire d'avantage, ou pour parler selon quelques Italiens, ces Estats ont de longueur trois mille milles, & de largeur quinze cents.

La seule Prouince particuliere de Moscouie contient de l'Est à l'Ouest, ou du Levant au Ponant, environ six cents lieues, & c'est en ceste Prouince qu'est la ville capitale de l'Empire, qu'on nomme Moskuua, ou Moskel, du nom d'une riuere qui coule aupres. Le chasteau du grand Knez est au milieu de la ville entre les riuieres de Moske, & d'Heglime, qui vient à se joindre avec le Moske au dessous de ce chasteau, qui est si grand, qu'on le prendroit pour une grande ville : il est garny de dixsept tours, & trois bastions : & c'est là que le grand Duc se tient d'ordinaire, accompagné d'environ vingt-cinq mille hommes. La ville n'a ny bon fossé, ny muraille, ny rempart qui la puisse deffendre, & les maisons y sont presque toutes de bois : elle est grande & fort boueuse. Il y peut auoir environ 41500. maisons, & l'on y void beaucoup de places, mais dispersées & fort escartées, & au milieu des grandes campagnes. Le plus long iour d'Esté en la ville de Moske est de pres de dixhuiet heures.

Les autres Prouinces sont la Duché de Voloidmer, où l'on void une grande ville de mesme nom, avec un chasteau basti de bois. Elle est esloignée de la ville de Moske du costé du Levant, d'environ trente-six lieues de Pologne. Il y a de plus la Duché de la basse Nouograde, où l'on void pareillement une ville portant mesme nom, bastie de bois, & esloignée de Moske d'environ cent lieues de Pologne.

D'avantage, la Prouince de Rezan est assise entre les riuieres d'Oque, & de Don, de laquelle le grand Duc porte le tiltre, & outre ce on y void la Duché de Vorotine, comme aussi la Prouince de Seuerie, qui est fort grande : elle contient plusieurs villes, entre lesquelles on compte pour les plus fameuses celles de Starodub, Petiuule, & Czernigouu.

La Prouince de Smolenke est assise sur la riuere de Neper, ou Deneper, nommée Boristene par Ptolemee. Ce pais fut pris par Basile Duc des Moscouites sur le Roy de Pologne, qui en estoit Protecteur. Sa principale ville se nomme aussi Smolenke, qui est assez grande, & esloignée de Moske environ octante lieues de Pologne.

Le pais de Mosaiski a de longueur environ trois cents cinquante milles d'Italie, & autant de largeur. Il fut emporté par Iean Duc de Moscouie, predecesseur de Basile, sur Alexandre Roy de Pologne. Biele, ou Bielski est semblablement une Principauté, ou Prouince de Russie, ayant une ville, & un chasteau de mesme nom sur la riuere d'Opske : ce lieu est de soixante lieues d'Allemagne, loin de Moske, & trente-six de Smolenke.

La Duché de Roscoue a une ville de mesme nom, avec un chasteau de bois, & est loing de Moske, tirant vers le Ponant d'environ vingt-trois lieues. La ville est assise sur la renommée riuere de Volgue.

Le pais de Tuuer, ou bien Otuer, l'un des plus grands de Russie, a une nommée Tuuerde, qui est plus grande, & plus magnifique, que celle de Moske, de laquelle elle est esloignée de la distance de trente-six lieues.

La Prouince de Pleskouie, ou Pleskonie, a d'estenduë trois cents mille d'Italie, & est d'un tiers plus longue que large : sa ville capitale est Pleskouu, grande, & puissante, & ceinte de murailles, qui manquent à toutes les autres villes de Moscouie.

Nouograde la grande est la plus grande Duché de toute la Russie, & prend son nom de la grande & riche ville de Nouogrod, qui surpasse toutes celles qui sont assises du costé du Nord, combien qu'elle ait la plus grande partie de ses maisons faites de bois : ceste ville est à deux cents mille, ou environ, de la mer Baltique, à cent vingt de Moske, en tirant vers le Sudouest, à trente-six de Pleskouu, & à quarante de Iuanouougrod.

Le Pais de Volske, ou Votzke, est assis entre l'Occident, & le Septentrion, & a à main gauche le chasteau de Iuanouougrod : & la Prouince de Carelle est esloignée de Nouogrod de soixante lieues de Pologne du costé du Nord : elle s'estend iusques à la mer glaciee, & son plus long iour d'Esté est de vingt heures & demie, durant lesquelles le Soleil y luit : tellement que l'on n'y void point alors de nuit bien obscure.

La Prouince de Bieleiczioro, ou Biolysero, ayant une ville appelée de mesme, tire son nom du lac blanc, pres duquel elle est assise, & dans lequel on void une forteresse que l'on tient imprenable, où le grand Duc met ordinairement son tresor, & où il se retire en temps de necessité, quand les ennemis les pressent. Ce Pais est esloigné de cent lieues, tant de Moske que de Nouogrod la grande. Volokde est aussi une Prouince, en laquelle on trouue une place extre-

mement forte : où le grand Knez retire aussi quelquesfois vne partie de ses thresors. Là Duché de Iorosslaue avec vne ville & vn chasteau de mesme nom sur la riuere de Volgue, est à quarante-six lieues loin de Mosque. On met aussi la principauté de Rostoun apres Nouogrod la grande.

15 La Prouince de la Duuine tirant le nom de la riuere qui l'arrouse, estoit autresfois du ressort de Nouogrod : & la riuere a receu son nom du concours des riuieres de Iuch, & de Suchaue, veu que Duuine en langue Ruthenique signifie deux. Or encor que ce pais ayt cent lieues de largeur : toutesfois il n'a autres places que le chasteau de Comogor, celuy de Pinegue, & la ville de Duuine assise au milieu de la Prouince. Il y a toutesfois assez grand nombre de villages, mais fort esloignez l'un de l'autre, à cause de la sterilité du Pais. Le Soleil y luit au solstice d'Esté, lors qu'il est paruenue au tropique de l'Escreuice, vingt & vne heure & demie : tellement que la nuit y ressemble lors à l'aube : mais lors que le Soleil est au solstice d'Hyuer, il ne demeure sur ce pais que deux heures & demie.

16 On loge la Prouince de Sufdali, avec vne ville & vn chasteau de mesme nom entre Rostoun & Volodimer. La ville de Sufdali a vn siege Episcopal, & estoit autresfois belle & peuplee, c'est à sçauoir lors que les Ducs de Moscouie le tenoient à Volodimer : mais à ceste heure elle est presque deserte, à cause des continuelles courses des Tartares. La Prouince de Vuiathke, au delà de la riuere de Kamme, est esloignee d'environ cinquante lieues de Mosque : elle obeissoit iadis aux Tartares, mais elle fut prise sur eux par Basile le grand, Duc de Moscouie.

17 Permie est vne fort grande Prouince, esloignée de deux cents cinquante lieues de Mosque, & a vne ville de mesme nom sur la riuere de Vischore, ou Vistoroie. Le plus grand iour d'Esté y est de dixhuit hersies. Le pais de Iugre, ou Iuhre, ou Iugarie, est assis du costé de la mer du Nord, & c'est de là que les Hongrois estants autresfois sortis, se saisirent de la Pannonie, qu'ils appellerent de leur nom Iugarie, Hongrie.

La Prouince de Petzore a son estenduë qui est fort longue, en tirant vers le Levant & le Nord, iusques à la mer glacee. Les habitans de ceste Prouince ont leur plus grand iour de 22. heures.

Le Moscouite a encores sous son Empire les Czeremisses qui sont au dessous de Nouogrod, de mesme que les Mordues pres de la Volgue au dessous de la basse Nouograde. Il y a encore d'autres Pais assis du costé du Nord, qui recognoissent le grand Knez, comme celuy d'Obdore, Condore, Culomorie, Lappie, & pareillement quelques Hordes de Tartares, comme la Horde de de Casan, la ville d'Astracan, ou Citracan, les Hordes de Nahaicois, & quelques autres.

QUALITE' DV PAYS.

18 **P** O v a discourir en general de tout ce Pais, il est plein de marescages, boïeux, humide, & peu fertile, à cause que l'air y est rude, & peu temperé, & que les champs y sont pleins de sable, & la terre n'y est guere bonne : de sorte que les grains n'y meurent guere souvent, à raison de la violence du froid d'un long Hyuer, c'est pourquoy ils font seicher les herbes dans leurs poisses. Ils ont toutesfois assez grande quantité de froment, & d'herbes. La terre n'y porte, ny vigne, ny oliuier, non plus que des cerises, & des noix : elle produit des noysettes, & quelques autres sortes de fruiets, mais ils ne sont gueres d'un goust agreable. Le haut Pais est plein de bois, & de grandes forests, où les arbres sont hauts & espais, & ces bois sont quelques parties de la forest Hercinie. Au reste on y trouue grand nombre d'Elans, de beuffles, d'ours, de cerfs, de loups, & principalement des lieures. Les brebis y sont beaucoup plus petites que les nostres. Il y a grande quantité de mouches à miel, qui non seulement se tiennent dans les ruches qu'on leur a expressément dressees : mais encore remplissent de miel les creux de quelques arbres qui sont dans les forests, voire en telle sorte, qu'un Moscouite nommé Demetrius, enuoyé à Rome en Ambassade, racompta vn iour qu'un villageois de sa cognoissance, & son voisin s'estoit laissé couler du haut d'un fort grand arbre creux, pour chercher du miel, & qu'estant en bas il se trouua dans le miel iusques à la poitrine, & demeura deux iours en cet estat, ne vivant d'autre chose que de miel, iusqu'à ce qu'ayant apperceu vne Ourse qui estoit là venue pour manger de ce miel, & s'estoit baissée à la façon des hommes, il empoigna de ses bras, & l'effroya à grands cris, tellement qu'il l'esmeut à sortir de là, s'estant attaché à elle, se retira par son moyen de ceste fondriere. Les bestes à corne y sont pour la plus grande partie escornees. La terre y produit grande abondance de lin, & aussi du chanvre, que l'on porte en beaucoup de lieux d'Europe pour faire des cordes. On ne trouue en ces Pais aucune veine d'or, d'argent, ou d'autre metal, excepté de fer. Il y a forces pasturages, & par consequent grande abondance de bestail, & de chair.

Au reste la Moscouie iouit d'un si bon air, que ce seroit vne merueille d'y voir la peste : toutesfois,

toutesfois ils y ont vn mal chaud qui les tourmente si fort, s'attaquant principalement à la teste & aux intestins, qu'ils meurent en peu de iours. La terre s'y ouure, & deuiet beante pour le grand froid, comme elle faict en nos contrees pour l'excez d'une trop longue chaleur. Ce n'est pas qu'il n'y face quelquefois bien chaud, veu que l'annee 1527. l'ardeur de l'Esté s'y trouua si violente, que les froments & les forests mesmes y brullerent, ainsi qu'escriit Sigismond.

Il y a grand nombre de belles riuieres, entre lesquelles il y en a plusieurs fort renommées, tant à cause de la nauigation, que pour leur grandeur, & pour l'abondance des poissons qu'on y trouue. Les principales qui naissent, & ont leur source dans le pais mesme, ou bien qui l'arrosent, sont le Borystene, vulgairement Dnieper, Deneper, ou Neper, & Nester, ou Dnester, dont la source a esté ignorée d'Herodote: mais reconnue de nostre temps pres de Dnieperke, village de Moscovie, en la forest de Voulkonzki. Ceste riuere coulant vers le Midy, & mouillant premierement la ville de Smolenske, puis Kiouic, & quelques autres villes, estant grossie de plusieurs autres eaux, se va desgorger dans le Pont Euxin, ou la mer Maiour. Le Turunte, maintenant la Duine, & selon Harbesten Rubo, part du lac de Duine, allez pres de la source du Neper en la mesme forest. Le Rha maintenant, la Volgue & l'Edil, est encore vne autre riuere de Moscovie, qui tire son nom d'un lac appelé de mesme, qui est elloigné de vingt-cinq lieues de Mosque, en tirant vers la Lithuanie. La riuere de Tanais, ou de Don, ne vient pas des monts Riphees, comme quelques-vns ont creu: mais d'un fort grand lac qui est dans vne forest, assez pres de la riuere de Tulle.

Doncques la riuere de Don venant de Moscovie, apres auoir fait vn long chemin, rebrousse vers le Midy, & faict les marais qu'on nommoit Meotides, & qui sont auourd'huy appelez de Temerinde. Ce fleuve porte force poissons, & a de beaux riuages couverts d'herbes, & d'arbres fructiers: & c'est aussi là qu'on trouue des racines d'un goust agreable. Herbesten dict que ce fleuve croist tellement en Automne, qu'il est capable de porter de grands nauires marchands bien chargez.

La riuere d'Ocque prend sa source en la Prouince de Miscenck, & rend fertiles toutes terres qu'elle arrose, elle abonde en poissons, qu'on estime plus que tous les autres de Moscovie. Il y a d'auantage beaucoup de lacs, dont quelques-vns sont grands au possible: car outre le lac de Volgue, de Duine, & autres, d'où les riuieres de Moscovie prennent leur source: on y void le lac d'Ilmen, que les Rutheniens nomment Ilmen, au dessus de Nouograde, ou Nouogrod la grande, qui a douze lieues d'Allemagne de long, & huit de large.

Mais afin de particulariser encore mieux la qualité de ces pais: c'est chose asseurée, qu'en la Prouince de Volodimer la terre est si bonne & si fertile, qu'une mesure de bled semée, y rapporte bien souuent vingt, voire mesme quelquesfois vingt-cinq mesures.

Il est vray que celle de Rhezan est beaucoup plus fertile, & de plus grand rapport que toutes les autres qui sont sous le Moscouite, veu qu'on dict que bien souuent vn grain de bled produit deux espies, voire d'auantage, & les tuyaux y croissent si espais, que les cheuaux n'y peuvent aisément passer, ny les cailles s'en voler, & s'en retirer qu'avec beaucoup de difficulté. Il y a en ceste Prouince grande abondance de miel, de poissons, & d'oyseaux, & semblablement grande quantité d'hermines, & de castors, & les fructs des arbres y sont meilleurs qu'en nul autre pais de Moscovie: c'est en ce Pais qu'on trouue la source de la riuere de Don.

Quant au Pais de Seuerie, il abonde en toute chose, combien qu'il y ait force grandes campagnes desertes, & pres de Branki vn bois de fort longue estendue. Les forests y sont pleines d'hermines, & de martes zebelines. Pour le regard de la Duché de Smolenske, il y a grand nombre de forests fort espaises, d'où l'on emporte vne grande quantité de diuerses peaux. Mais si nous considerons la Prouince de Volsque, nous y trouuerons vne chose merueilleuse, veu qu'on tient pour chose certaine, que les animaux qu'on y porte, de quelque poil, où couleur qu'ils soient, y deuiennent tous blancs apres qu'ils y ont faict quelque demeure. Quant à la Prouince Bieleieziore, elle est presque toute pleine de bois, & de marecages. Pour le regard de celle d'Vstyng, il n'y a guiere de bled, mais force chair, & poisson. Il y a grand nombre d'animaux de toutes sortes, & par consequent force belles peaux, excepté de martes qui n'y sont, ny belles, ny en grande quantité. Le Pais de Rostoua a ses terres assez fertiles, & abonde en sel, & en poisson.

La Prouince de Duine est assez sterile: mais elle est pourueüe de force poissons, & d'un grand nombre d'animaux terrestres. Aux lieux maritimes de ce Pais, il y a grande quantité d'Ours blancs, qui se tiennent le plus souuent dans la mer, à ce que ceux du pais rapportent. Celle de Viuatke est sterile, & marecageuse: mais il y a grande quantité de miel, de poissons, & de bestes sauages. En la Prouince de Permie il n'y a nul grain: mais en recompense ils ont grand nombre de Cerfs, & d'autres animaux.

Au païs de Petzore on void de grandes montagnes, & des rochers merueilleusement esleuez, auxquels les anciens ont donné le nom de Riphees, ou d'Hyperborees, où l'on void tousiours forces neiges. Ils sont de telle hauteur, qu'il y en a qui ont mis dixsept iours à y monter, & n'ont peu paruenir iusques au sommet. Il n'y a aucun bled en ce païs-là : mais on y void force bestes sauages.

MOEVRS ANCIENNES DES HABITANS.

- 21 **C**eux qui se tenoient iadis dans la ville de Mosque, auoient vne coustume que la succession des grands Ducs a du tout abolie. Il y auoit vne pierre carree au milieu du marché, & si quelqu'un pouuoit monter dessus sans estre abbatu, il obtenoit la Principauté de la ville. Les habitans combattoient avec grande ardeur l'un contre l'autre pour monter sur ceste pierre, & pour empescher d'y monter ceux qui s'essayoient de le faire. Plusieurs ont rapporté que les femmes des Moscouites pleuroiēt autresfois, & se pleignoient à bon escient de leurs maris, s'ils ne les battoient souuent, croyans qu'ils manquoient d'amour en leur endroict, pour ce qu'elles ne leur voyoient produire nuls effets de jalousie : tellement que ceux-là mesmes qui estoient plus passionnez de leurs femmes, estoient contraincts de les battre vne ou deux fois la semaine pour les rendre contentes, & leur donner quelque assurance de l'affection qu'ils leur portoient, & par ce moyen toutes noïses estoient assoupies.

MOEVRS DE CE TEMPS.

- 22 **L**es Moscouites sont pour la plus grande partie robustes, & vistes. Ils sont de moyenne taille, mais quarez d'espaules, & renfoncez : ils portent volontiers la barbe longue, & des sayes fort longs sans plis, qui leur battent iusques aux talons, avec les manches fort estroites à la façon des Hongrois, & leurs habits sont volontiers, ou blancs, ou de couleur d'azur : ils portent des bottines qui sont pour la plus part rouges, & qui ne vont pas iusques aux genoux : mais la semelle est peu releuee sur le bout, & garnie de petis cloux de fer. Ils ont cela de bon maintenant, que chacun porte des habits selon sa condition, & suiuant les Ordonnances du grand Duc, qui a limité à chacun ce dequoy il peut aller vestu. Ils ont pour leurs armes la trouffe pleine de fleches, l'arc, la hache, l'espieu, de longs cousteaux, & des gands de plusieurs doubles garnis de plomb, dont l'on vsoit autresfois en Grece. Les gens de pied mesme portent des lances : ils sont armez de longues cuirasses, & portent aussi des salades, & morions : ils vsent de cheuaux ongres, & chastrez, qui sont petis, & harnachez fort legèrement. Ils cheuauchent à la genette, & tirent leurs coups de trait mesme en fuyant, avec vne merueilleuse adresse. Si tost qu'ils commencent de fuyr, ils n'ont plus aucun espoir qu'en leur fuite, & lors que leurs ennemis les ont atteints, ils ne se deffendent nullement, & estans pris, on ne les void iamais demander la vie, ou quelque bon traitement, ny vser d'aucune sorte de priere. Dauantage, ils vivent assez miserablement, n'ayans pour breuuage que de l'eau, & de la biere, ou du medion, ne leur estant permis de boire de quelque liqueur qui enyure, excepté deux ou trois fois de l'annee : ils sont outre cela accablez d'une rude & insupportable tyrannie, veu que les nobles & les plus grands sont asserruis au grand Duc, qui en dispose comme de ses serfs, & le peuple est tyrannisé par les grands & les nobles. Ils ont ie ne sçay quelle naturelle inclination qui les pousse à dire des outrages, & s'entrepoüiller les vns les autres, sans s'espargner en aucune sorte, & pareillement de s'accuser, soit avec raison, soit à tort, & sans cause. Ils ont mesme ceste ruse, ou melchanceté, de transporter aux maisons d'autrui à la destrobée, & en cachette, ce qui leur appartient, afin qu'en faisant la recherche, on condamne ceux, aux logis desquels les choses perduës se retrouuent. Ils sont tellemēt barbares & perfides, qu'on ne trouue parmy eux aucune franchise ou sincerité : & leur naturel est si mauuais, qu'on ne void iamais qu'ils s'entreportent vne amitié bien ferme, & bien asseuree, & mesme on ne void point qu'ils gardent la foy à ceux à qui ils la promettent, où qu'ils ayent quelque esgard au parentage, & à l'alliance. Ils sont aussi rusez & trompeurs tout ce qui se peut, & mesme en toutes leurs paches ils ont quelque arriere boutique, & quelque double entente, avec laquelle ils taschent de s'abuser les vns les autres, & de trouuer moyen de rompre leurs contrats, ou de les interpreter à leur fantaisie : & c'est chose tellement commune parmy eux, & si bien publiee & recogneüe, qu'eux-mesmes se sentans atteints de ce vice, feignent de n'estre pas Moscouites lors qu'ils ont affaire avec quelques estrangers, & qu'ils veulent pastiser & trafiquer avec eux. La Iustice, par maniere de dire, s'y vend à l'encant, au plus offrant, & dernier encherisseur : & ceste melchanceté se pratique presque publiquement, & les pauures n'ont aucunement accez pres du Prince, mais seulement pres de ses Conseillers, mesme avec vne extreme difficulté, & qui est encore

encore plus estrange, les pauvres & les hommes incogneus ne peuvent que malaisément aborder les Gentils-hommes communs, & qui ne sont des plus releuez dans vne Prouince: & les Gentils-hommes paroissent fort peu souuent, afin d'acquies plus d'autorité, & d'estre plus respectez, en se laissant voir rarement au peuple.

Les femmes y portent ordinairement quantité de perles, & de pierres precieuses, & ne manquent sur tout d'en pendre à leurs oreilles. Celle qui est mariee pour la seconde fois, sera reputée pour assez chaste: mais celle qui viendra iusques aux troisiemes nopces, est tenue pour impudique, ils ont mesme opinion des hommes: le peuple y est pour la plus grande partie extremement addonné à la paillardise, & à l'yrongnerie: ils sont fort soigneux des malades: ils labourent avec cheuaux: au lieu qu'autresfois ils n'auoient aucune sorte de monnoye marquée, ils en vsent maintenant: le Langage qu'ils ont est Sclauon, mais tellement mêlé d'autres langues, & si corrompu, que les Sclauons & Moscouites ne se peuuent entendre les vns les autres.

Le grand Duc ne permet à ses subiets de sortir de ses Estats, & c'est ce qui fait que les Moscouites ne cognoissant autre monde que leur pays, & ne croyans qu'il y aye aucun autre Prince qui soit si puissant que le leur, ils sont extremement fiers, & pleins d'un orgueil insupportable: ils n'ont parmy eux ny Medecins, ny Apoticaire.

Mais pour dire quelque chose en particulier de certaines Prouinces de Moscouie, ceux du pays de Rhezan sont estimez courageux, & nez à la guerre, & ceux de Seuer combattent aussi avec un grand courage, à cause des continuelles guerres qu'ils ont avec les Tartares. Ceux de la grande Nouograde estoient autresfois courtois & gracieux au possible, mais ils sont maintenant fort corrompus, & ont perdu leur bon naturel par la frequentation qu'ils ont eue avec les Moscouites. Ceux de Volsque ont un langage particulier, qui n'est guieres different de celui des Prussiens. Les habitans du pays de Permie n'vsent nullement de pain, mais vivent de chair de cerfs, & d'autres animaux. Ils ont un langage particulier, & des caracteres pareillement, qui different de ceux de Russie. Ils vsent de chiens, & de cerfs grands & forts, au lieu de cheuaux, pour charier & porter quelque chose. Ceux de Iugre ou Iugarie, parlent Hongrois, & ceux qui demeurent en la Prouince de Petzore, sont hommes du tout simples, qui ont un langage particulier, & ne mangent iamais pain. Les Czeremissois se tiennent dans de grandes forests, & n'y ont aucunes maisons basties: ils vsent d'un langage different des autres, sont grands coureurs, & archers fort asseurez: ils portent continuellement leurs arcs en main, & l'ayment en telle sorte, qu'ils ne donnent iamais à manger à leurs enfans qui sont un peu grâds, iusques à ce qu'ils ayent frappé un blanc qu'ils leur proposent: ils vivent pour la pluspart de miel, & de chair de bestes sauages, mangent rarement du pain, & sont habillez de peau. Les Morduois sont semblables en toutes choses aux Czeremissois, excepté qu'ils se tiennent presque tous dans des maisons, & ont un langage particulier.

RICHESSES.

Les Moscouites ont grande quantité de peaux d'essans, de cerfs, d'ours, de loups, & de martres, qu'ils vendent cherement aux marchands d'Europe, de mesme que du lin & du chanvre, que l'on estime bon au possible. Ils vendent aussi aux estrangers vne grande quantité de miel, & de cire. Ils ont un port appellé de saint Nicolas, qui est d'assez grand trafic: Les Anglois y viennent traffiquer, & il y a quelques annees que ceux de Londres y firent vne grosse compagnie, pour tascher d'y faire quelque grand profit: mais apres qu'ils y eurent fait un ou deux voyages, le grand Duc rompit le traité qu'il auoit fait avec eux, & ne voulant tenir ce qu'il leur auoit promis, leur fist ie ne sçay quel tort: tellement qu'ils abandonnerent l'entreprise d'y entretenir le commerce.

Mais pour tout ce que dessus, il ne faut pas estimer que ce pays soit beaucoup marchand, tant pour ce que les habitans ne sont guieres industrieux, & que le pays où les arts, les mestiers, & les ouvrages ne florissent, ne sçauoit guieres estre marchand, ny recherché des estrangers: que aussi pource qu'il n'est nullement permis aux Moscouites de sortir des Estats de leur Prince: à raison dequoy ils ne sçauent que c'est des choses maritimes. Ils changent seulement ce que le pays produit, à sçauoir de la poix, du miel, de la cire, & des peaux, à des draps, & choses semblables, que les Armeniens conduisent à Astracan sur la mer Caspie, ou de Bachu, & les Anglois à saint Nicolas, sur le golfe de Gramic.

Quant aux richesses du Roy, on peut assez iuger combien elles doiuent estre grandes, puis qu'estant Seigneur & Maistre absolu de toutes choses, il se sert du travail de ses subiects, & de telle partie de leurs biens que bon luy semble. Il prend pour luy les plus cheres & plus precieuses peaux qui se trouuent en ses pays, & en fait la portion à sa volonté. Il en use de mesme des

poissons de toute sorte. Il vend les peaux, ou les donne, & quant aux poissons, on les met seicher au vent, & on les garde pour la prouision des forteresses. Il n'y a personne qui puisse rien vendre aux places, auant que l'on ait acheté ce que le Prince y enuoye. Les lieux les plus marchands d'où il tire la plus grande partie de ses reuenus, sont Astracan, qui est sur la mer Caspie, où l'on void arriuer les marchandises de Perse & d'Armenie, saint Nicolas sur le golfe de Gramic, où l'on void les nauires d'Angleterre & de Hollande chargees de cuivre, & d'autres marchandises que l'on meine de là à Vologde.

Lors que les Ambassadeurs du grand Knez retournent en Moscouie, il leur oste les presens qu'ils ont receus des Princes, leur donnant quelques choses de peu de valeur en contr'eschange, quelquesfois rien du tout. Pour conclusion, il tire à luy tout ce qu'il trouue de bon & de beau dans ses Estats. A raison dequoy l'on tient qu'il a quelque thresor aux forteresses de Mosque, de Iaroslau, & du Lac blanc. Et c'est chose qui a quelque apparence de verité: car le grand Duc Iean emporta presque tous les calices, les reliquaires, toutes les croix, & tout l'argent de Liuonie; & il n'est permis de sortir aucun argent de ses Estats, si ce n'est pour racheter les esclaves, & aussi pour payer la rançon de ceux qui sont pris des ennemis en quelque guerre. Il est vray que par la perte de la Liuonie cedee par le grand Duc à Estienne Roy de Pologne, l'an 1582, il a esté priué de la plus riche partie du trafic de la mer Baltique, & du meilleur pays qu'il eust. Les grands Ducs ne laissent toutesfois d'estre fort riches, tant pour ce que j'ay dit cy dessus, qu'à raison de quelques autres profits qui leur arriuent: car ils ont quelques magazins à sel en tirant vers la Liuonie, qui leur portent vn million d'or toutes les annees, & vn preiudice à la France, qui a debité longuement ses sels en ces pays-là. Ils enuoyent aussi grande quantité de bleds en Suede, Dannemarc, & pays circonuoilins, & pareillement vers la mer Caspie, & la mer Majour. Ils enuoyent encor ausdits pays du fer, du suif, du bois, des cendres, des chanvres, & toute sorte de peaux, & tire de tout ce que dessus de grandes sommes d'argent.

- 26 Mais afin de vous représenter en quelque sorte la grandeur & richesse de ce Prince, ie croy qu'il sera fort à propos de mettre icy en peu de mots ce que Philippes Pernisten Ambassadeur de l'Empereur pres du grand Duc de Moscouie, rapporte du traitement qu'il receut de luy, & de sa magnificence. Il dit que le grand Duc portoit vne couronne, qui surpassoit en valeur celle du Pape, du Roy de France, du Roy d'Espagne, & celle de l'Empereur, & qu'elle estoit d'une valeur inestimable: sa robbe estoit toute semée de diamans, rubis, esmeraudes, & autres pierres grandes comme des noisettes: de sorte que Pernisten s'estonnoit comme il pouuoit porter vn si grand fardeau: son fils aîné estoit vestu de mesme que luy. Ils furent seruis à leur repas par cent Gentils-hommes ou enuiron, qui portoient tousiours autant de plats d'or sur la table, mettans ceux qu'ils leuoient, sur vn certain buffet fort grand, l'un sur l'autre, sans se soucier des viandes qui estoient dedans. Il enuoya à Pernisten, lors qu'il partit de la Cour, huit & quarantaines de zoboles, & de martes zibelines, dont chacune fut estimée à Vienne en Autriche, deux cens liures, & l'entretint durant tout le temps qu'il demeura dans ses Estats, sans qu'il desbourçast vn denier. Il dict aussi que lors que le grand Knez le traitta, il y auoit en l'antipoi-le vne grande quantité de plats ronds, casses, & semblables vaisseaux d'or & d'argent, si grand que trente chariots n'eussent peu porter toute ceste vaisselle, & toutesfois ce n'estoit pas la sienne principale, ains seulement celle du Chasteau où il diûna. Il doit auoir vne grande quantité d'argent, veu qu'un de ces Ducs, apres la prise & le sac de Horcograde, emmena trois cens chariots chargez d'argent monnoyé, avec vne quantité infinie d'autre or & argent. Il a infinis moyens de tirer de l'argent, veu qu'il manie seul toute sorte de marchandises de tout le Royaume, comme nous auons ja dict, sans despenser vn seul denier en aucune occasion, & tous ceux qu'il mande aux enuiron de ses Estats, se desfrayent eux mesmes. Il ne donne semblablement aucune chose aux soldats, ains en allant à la guerre, & en retournant, ils leur paye chaque fois enuiron six blancs pour homme. Voila ce qu'on peut dire briuevement des richesses de ce grand Prince: venons maintenant à ses forces.

F O R C E S.

- 27 C'est chose asseurée que les courses des Tartares Precopites & des Norgays, qui ne demeurent iamais en repos, & n'y peuuent laisser leurs voisins, ains emmenent les peuples entiers, qu'ils vendent apres aux Turcs, & à quelques autres, sont cause que la Moscouie est fort dépeuplee. D'ailleurs les entreprises faictes par les grands Ducs aux pays loingtains, ont grandement diminué le nombre du peuple en Moscouie. Il n'y a rien qui face mieux remarquer la prudence d'un Prince, que la discretion qu'il a de cognoistre quelle entreprise est vtile à ses Estats, & quel dessein leur est dommageable, & son iugement à ne se laisser pas esbranler à ie ne sçay quelles apparences de grandeur, qui le mettent hors des bornes de la seureté, & le reduisent à des

duisent à des extremités dangereuses. Car celuy qui affoiblit ses Estats de gens, ou de moyens, sous espoir de s'aggrandir, est semblable à celuy qui ruinerait le fondement de sa maison, pour leuer les murailles, ou pour faire le couvert : & l'on sçait assez que le premier chef d'Etat est de se conseruer : & les conquestes que l'on fait avec diminution de ses forces, sont contraires à ceste maxime, qui doit estre soigneusement obseruee.

Les conquestes sont comme des entes, qui doiuent meillurer la condition de quelque Seigneurie, & non l'empirer : car de mesme que l'on fait les entes, ou pour rendre plus beau quelque arbre sauage, ou pour faire porter du fruit à quelque plante qui n'en produit aucun : aussi les entreprises doiuent estre de telle sorte, qu'elles portent de la commodité, ou de la richesse, autrement elles ne seruent que de charge & d'ennuy, & sont plus propres pour consumer & perdre, que pour aggrandir, & pour asseurer vn Estat.

Telles sont ordinairement les guerres qui se font pour conquerir des pays, qui n'ont nulle sorte de communication avec les nostres, qui sont esloignez, ou qui ont besoin de plus grandes forces que les nostres, pour estre conseruez : car c'est chose trop certaine que toutes les entreprises doiuent estre fondees sur trois chefs, dont l'un est le droit qu'on a sur ce qu'on pretend de conquerir ; l'autre la facilité de vaincre : & le tiers, le fruit de la victoire ; tellement que les guerres qu'on entreprend sans esperance de fruit, ne sont que pures folies.

Les grands Ducs de Moscovie ont veritablement estendu les bornes de leur domination bien auant, mais pour tout cela ils n'ont nullement augmenté leurs forces. Et l'on peut dire qu'aucun d'eux n'a entrepris plus loin, ny fait plus de despence que le grand Duc Iean, qui prit les Royaumes de Casan sur la Volgue, & d'Astracan sur la mer Caspie, & subiugua vne bonne partie de la Liuonie, mais il fit perir beaucoup de ses gens aux voyages, aux batailles & aux assauts, ou par les mains des ennemis, ou de maladie, ou de faim, ou de travail : & depuis la conqueste, il fallut entretenir de grosses garnisons dans des forteresses, ou y mener des colonies. A raison dequoy les hommes estants employez loin de leurs maisons, ou pour acquerir, ou pour conseruer ce qui estoit acquis, les femmes demeuroient au logis comme veufues, sans esperance de lignee. Ainsi le cœur demouroit despourueu de sang, qui s'espandoit aux extremités : de sorte qu'estant par apres assailly par Estienne Roy de Pologne, il n'eut pas assez de forces pour deffendre l'Estat de Liuonie, & tant d'autres places importantes qui luy furent ostées : si bien qu'il fut contrainct de quitter toute la Liuonie aux Polonois.

La plus grande partie des bastimens des Moscouites sont de soliués iointes ensemble, avec de la terre au milieu : ils sont aussi pour la pluspart des tours de soliués, qui sont si fortes, qu'elles soustiennent, & portent toutes pieces d'artillerie, pour grosses & pesantes qu'elles soient. Quelques - vns disputent quelles forteresses sont les meilleures, ou celles qui sont basties de pierre & de chaux, ou celles qui sont seulement de bois, & de terre : & les vns alleguent en faueur des dernieres, qu'elles se font plus promptement, & avec moins de despence, & seruent mieux contre les batteries, & que si elles sont aisément deffaites, on les refait aussi en fort peu de temps, & qu'on les peut accommoder avec peu de facilité, à diuerses manieres de deffense. Toutesfois c'est chose asseurée que les fortifications faites de pierre doiuent estre preferees, pource qu'y ayant plusieurs moyens d'offencer vne forteresse, c'est à sçauoir, avec le canon, la mine, la sappe & le feu, possible que la muraille dure moins en cedant au canon, que la terre en luy resistant, mais elle est beaucoup meilleure que la terre contre le reste.

La forteresse du pays consiste partie en la multitude des marefcages & des riuieres, partie en l'espaisseur des bois qu'on y trouue. Et les Moscouites ont accoustumé de laisser entierelement deserts les pays voisins des ennemis, afin qu'il y croisse de grands bois (ce qui arriue infalliblement, à cause de l'humidité de la terre) & que cela serue comme d'un rampart aux villes. Aussi c'est chose qui a donné beaucoup de peine aux Polonois, d'autant que pour se faire voye iusques aux terres de leurs ennemis, ils furent contraincts de couper force bois, & d'y perdre beaucoup de temps.

Il y a aussi quelques forteresses basties en partie de pierre, en partie de gazons de terre, mais sans aucuns flancs, & sans aucun ait de fortification, comme sont celles de Mosque, de Nouogrod, de Plescouie, de Porcouie, de Staricie, de Slobode d'Alexandre, & de Smolenque : mais les murs des places fortes sont ordinairement faits de grosses poutres, lesquelles on range en telle sorte, qu'on y laisse au milieu vne espace, pour y mettre de la terre qu'on y asseure & affermit le mieux qu'il est possible, y laissant quelques trous, ou canonnières pour les arquebusiers, & ceste sorte de deffence est assez bonne pour l'artillerie, mais ne résiste pas au feu, comme nous auons ja dict.

Les subiects du grand Knez seruent leur Prince en la guerre en telle sorte, qu'ils monstrent plustost d'auoir peur d'estre punis, s'ils ne font bien, que d'auoir quelque valeur & courage.

Ils obeissent promptement à leurs Capitaines, voire au moindre clin d'œil, supportent pa-

tiemment toute forte d'incommoditez, ne se souciēt ny de froid, ny de pluye, endurent la faim plus que gens du monde, & se contentent de peu. C'est pourquoy l'on tient qu'ils sont propres pour deffendre les forteresses, que pour combattre en campagne, d'autant que la patience est requise au premier: mais il faut du courage, & de la hardiesse pour l'autre. Au contraire les Polonois sont beaucoup plus propres pour combattre l'ennemy en rase campagne que pour deffendre quelque place.

Le grand Duc Iean cognoissant par experience la grande lascheté des siens aux escarmouches & bataille, & au contraire la hardiesse des Polonois, disoit que les siens auoient besoin d'esperon pour aller contre les ennemis, & les Polonois de bride.

- 28 Les principales & plus importantes forces de ce Prince consistent en la cavalerie: mais il est malaisé de sçauoir au vray, combien il peut faire d'hommes de cheual. Toutesfois ie ne croy pas qu'il en puisse mettre en campagne trois cens mille, comme quelques vns ont dict, pource que son pays est desert, & non cultiué en beaucoup d'endroits: car on ne treuve presque vn seul village de Casan à Astracan, combien qu'il y ayt deux iournees de l'vn à l'autre: Et en la guerre que le Roy Estienne de Pologne fist aux Moscouites, encores qu'il n'eust pas d'auantage que le nombre de soixante mille hommes de pied, ou de cheual, le grand Duc ne peult iamais mettre tant de gens ensemble, qu'il eust le pouuoir de s'opposer à luy en campagne, ny d'empescher la prise de Polesque, de Vilchilouque, & de quelques autres places, ou de le diuertir du siege de Plescouie.

En l'an mil cinq cens soixante, le Prince des Tartares passa avec quatre vingt mille cheuaux iusques au cœur de l'Empire du Moscouite, & brusla la ville de Mosque, demeure ordinaire des grands Ducs. Mais ceux qui disent que le grand Duc de Moscouie peut faire trois cens mille cheuaux, & le Roy de Pologne deux cens mille, sont plustost compte des cheuaux, que des hommes. Que s'il y a grand nombre de cheuaux en Moscouie, l'on sçait assez que tout ne sont bons, ny propres pour la guerre, que chacun n'a pas moyen de se monter & de s'armer, & que les vns manquent d'argent, les autres de force, & les autres de courage. Et combien qu'il y eust en Moscouie tant de milliers de cheuaux & d'hommes, il n'est pas possible de les mettre tous ensemble en vn lieu, ou pource que le Prince n'a pas assez d'argent pour ce faire, ou pour ce qu'il ne faut faire si grande provision de viures necessaires, d'autant qu'il faut trois cens mille cheuaux de charge & de bagage, à deux cents mille cheuaux de guerre en Moscouie, & apres ceux-cy tant de viuandiers, de marchands, d'artisans, & de goujats, ou garçons de bagage, que pour les entretenir il faudroit reduire toute la Moscouie en vn lieu: & si tout cela faisoit vn voyage, on verroit manquer depuis vn bout iusques à l'autre, la plus grande partie des bestes & des hommes. Mais encores qu'il fust possible d'vnir & de ioindre tout cela, ce n'est pas chose qui se doie faire, si l'on a esgard au bien de cet Estat, pource qu'il faudroit par ce moyen desgarnir les frontieres de leurs garnisons, & les Prouinces de leur nerf & de leur soustien, de mesme que les villes des Magistrats, & les champs des laboureurs. Tellement qu'on void assez qu'un Prince qui peut faire en ses Estats cent cinquante mille cheuaux, fait assez d'en mettre sur pied vn tiers, lors qu'il luy arriue quelque grande guerre. Quelques vns plus retenus escriuent que le Moscouite peut mettre ensemble cent cinquante mille cheuaux, lors qu'il a besoin de le deffendre contre quelqu'un qui l'attaque, & que Iean troisieme grand Duc de Moscouie, mena à l'entreprise d'Astracan six vingt mille cheuaux, & vingt mille hommes de pied. Le mesme assaillit la Liuonie aux temps d'Alexandre Roy de Pologne, avec trois grosses armées, & en retint vne autre sur la frontiere.

Le grand Duc Iean adiousta à la cavalerie quelques milliers d'arquebusiers, entre lesquels il y auoit beaucoup de soldats estrangers, qui luy firent de signalez services en la deffence de ses terres. Ce Prince fait faire de deux en deux ans par toutes les Prouinces, le denombrement de ceux qui sont propres pour la guerre, & l'on y met les fils des Gentils hommes, avec le nombre des seruiteurs, & des cheuaux qu'ils peuuent mener.

Les gens de cheual, principalement les riches, vsent de cuirasses & de salades faictes de lames fines & deliees, qui viennent de Perse, & se seruent aussi de la lance. Les autres portent des casques de cotton, qui sont tellement cousus & doubles, qu'elles resistent aux coups de traits, & quelques vns de ceuxcy portent l'arc, & les autres l'arquebouze, & tous l'espee & le poignard. Ce Prince se sert aussi des Allemands pour la guerre, & des Italiens pour les fortifications.

- 29 Il confine avec le Procop Prince des Tartares de la Chersonese Taurique, avec les Circassiens de cinq montagnes (ceux-cy habitent vn pays qui a huit iournees d'estendue, & sont gouuernez par sept Chefs, à la maniere des Suisses) avec les Tartares Nogayers, avec le Roy de Suede, & les Polonois. Il reçoit beaucoup de donmage du Precop, sans aucun espoir d'en pouuoir tirer quelque reuanche, pource que le Precop s'est allié du Turc, qui le pouruoit d'arquebues, &

quebuses, & d'artillerie : & d'ailleurs il a en son Estat assez bon nombre de places fortes , avec bonnes garnisons de Turcs : de sorte que c'est vne forte entreprise que de se resoudre à l'attaquer. Et d'ailleurs, c'est vne chose aysee au Precop de faire des courses dans les terres du grand Duc, comme il a fait bien souuent, & de mesme qu'il faict en celles du Roy de Pologne, & de ravager tout ce qui se rencontre deuant luy.

Que si le grand Duc a subiugué les Tartares de Casan & d'Astracan, ç'a esté par le moyen de l'artillerie qui manquoit à tous ces peuples. Il mena entre autres choses, contre ceux de Casan, quelques machines faites comme s'ensuit. Il attachoit aux timons de quelques chars, vne grosse & large table, avec plusieurs trous, par lesquels les soldats tiroient leurs arquebuses & mousquets; & de ceste sorte bleissoient les ennemis, qui n'vsoient que des flesches, sans en recevoir aucun dommage, ce fut chose assez aysee au grand Duc de vaincre ces Tartares, & les asservir. Mais le Precop a l'usage des arquebuses, & de plus l'amitié & la protection du Turc, qui pour s'ouvrir le chemin en Moscouie, ou en la mer Caspie, s'est essayé depuis quelques années, de tirer vn canal depuis la riuere de Don, iusques à la Volgue, chose qui monstroir plus de iugement & de courage, qu'on n'en recognoist ordinairement aux Turcs : mais les gens furent desfaits par les Moscouites, assistez en cela des Tartares, qui craignoient par ce moyen de tomber entierement sous la domination du Turc, si ceste entreprise réussissoit, & non seulement ils desfirent l'armee qui estoit sur le Don, & prirent vne bonne partie de ceux qui s'y trouuerent, mais encores mirent en route celle de terre, en laquelle l'on comptoit quatre vingt mille Tartares, vingt mille Turcs, & entre eux trois mille Janissaires. Les Circassiens vivent, comme nous auons jadis dit, à la façon des Suisses, ne se soucient de faire des conquestes : mais seruent moyennant la solde, tantost le Turc, tantost le Sophy, & tantost le Moscouite, & sont tellement elloignez, qu'ils n'ont pas subiect de craindre ses forces.

Les Tartares Nogayers sont plus redoutables, à cause de la promptitude de leurs courses furieuses, que pour aucun moyen qu'ils ayent d'assembler des forces. pour faire de grandes entreprises, & il y a quelques années, que s'estans aduancez sur le pays des Moscouites, ils furent appaiez, & s'en retournerent par le moyen des presents qui leur furent faits. Et de faict ces Tartares estans de mesme que les Arabes, addonnez à voler & assassiner, il est plus ayse de les arrester en leur donnant quelque chose, qu'en les combatans.

Dauantage on entretiendroit en despence, sans espoir d'aucun gain, si l'on entreprenoit de leur faire la guerre, pource qu'ils n'ont ny ville, ny place forte, par la prise & possession de laquelle on les puisse tenir en bride. Le grand Duc entretient pour les arrester, vn bon nombre de caualerie à Citracan, à Cassan, & à Viatique, de mesme qu'il fait aussi à Gulugan pres du Don, pour faire teste aux Precopites.

Le Moscouite confine avec le Roy de Suede, du costé de Finlande : le Suedois, contre lequel les Moscouites ont longuement fait la guerre, a perdu les forteresses de Serenesque, & de la grande & petite Pernaie en Liuonie, & quelques autres places, tandis qu'Estienne Roy de Pologne le travailloit. Le Roy de Suede tient au bout du golfe de Finlande la forteresse de Vibourg, avec grosse garnison, pour faire teste aux Moscouites.

Il tient encores en ceste mer, & aux ports voisins, vne partie de ses nauires de guerre, tant pour trauerser tous les desseins du grand Duc, que pour empescher qu'on ne luy puisse mener ny armes, ny munitions d'Allemagne. L'aduantage de ceste armee de mer a rendu le Roy de Suede plus fort que les Moscouites, aux lieux desquels ces forces maritimes peuuent s'approcher. Et par ce moyen il a osté beaucoup de places à son ennemy sur la coste de Liuonie, & aux lieux voisins : mais il semble que le grand Duc a tousiours eu de l'aduantage aux endroits où la caualerie se peut manier à l'ayse, & où l'on peut faire combattre vn bon nombre d'hommes, c'est à sçauoir, aux grandes campagnes. Toutesfois ils se peuuent faire fort peu de dommage l'vn à l'autre, à cause de l'aspreté des montagnes, du froid, de la glace, & de la neige.

Il reste maintenant de parler du Roy de Pologne, qui a vn pays mieux habité, & plus civilisé que le grand Duc, mais non de si grande estendue. Il y a aussi ceste difference entre ces deux Princes. que les Moscouites sont plus obeyssans à leur Duc, & les Polonois plus hardis, & plus courageux. Les premiers sont plus propres à resister, les seconds à assaillir : ceux là semblent nez à deffendre les forteresses, & ceux cy à combattre en pleine campagne : ceux là sont plus vnis, & ceux cy plus reiolus aux factions, & aux entreprises : ceux-là craignent moins la faim & l'incommodité, ceux cy redoutent moins le fer & la mort : mais les vns & les autres valent autant que le courage, & la conduite de leur Prince les fait valoir. Car nous sçauons assez que le grand Duc Basile prit la Duché de Smolenque & de Polosque, & conquist vn fort grand pays en Livonie. Et au contraire Estienne Roy de Pologne prit sur le grand Duc Iean, fils de Basile, Polosque, avec plusieurs autres places d'importance.

31 **I**L est tres-certain que le grand Duc de Moscouie dispose autant absolument de ses subiects, que Prince du monde, commel'on a desia peu voir en quelques endroiets de ce discours; veu qu'il a toute puissance sur leur vie, & sur leurs biens, & est tellement redouté, que lors qu'il a commandé quelque chose, on ne peut aller au contraire, & n'y a personne qui en ose former quelque plainte. C'est pourquoy Mehemet Vvisir du grand Seigneur, disoit que le Moscouite & le Turc, estoient seuls entre toutes les Prouinces, maistres absolus de leurs biens: à raison dequoy il tenoit pour malaisée l'entreprise au Roy Estienne de Pologne. Or le grand Duc use d'un merueilleux soin, & d'un art incroyable, pour se maintenir en ceste autorité: car en premier lieu il n'est permis à aucun de ses subiects de sortir de ses Estats sans permission, sur peine de la vie. Et pour ceste cause il ne se trouue personne des siens qui voyage sur mer, & mesme ils n'osent, & ne peuuent en aucune façon parler à un Ambassadeur, ny se seruir d'un Medecin estranger en leurs maladies, sans auoir eu premierement congé de ce faire. Il tasche aussi de se rendre plein de maiesté, par la pompe & magnificence de ses habits, veu que ioignant presque la grauité de Pontife avec la Royale, il porte en teste vne mitre garnie de fort belles & fines perles, & de riches pierreries, & s'il ne la porte, il la tient deuant soy en son throsne, & en change bien souuent pour monstrier sa grandeur, & sa richesse. Il tient en la main gauche vne espee de crosse fort riche, il porte vne robe longue semblable à celle du Pape, lors qu'il va à la chapelle pontificale, avec les mains pleines de bagues de grand prix: il tient à sa main droiète l'image de Iesus Christ, & au haut de sa chaire celle de la Vierge Marie. On void en sa chambre, & en son antichambre des hommes tous vestus & couuerts d'or iusques aux pieds. Afin qu'aucun ne puisse scauoir plus que luy, il n'y a point d'escholes que pour apprendre à lire & à escrire, & l'on n'y lit que les Euangiles, & la vie de quelque Sainct, ou quelques Homelie de saint Iean Chrysostome, ou de quelque autre. Que si quelqu'un faisoit semblant de vouloir passer plus outre aux sciences, on le soupçonneroit aussi tost de quelque mauuais dessein, & son entreprise ne demeureroit sans punition: ce que le grand Duc fait obseruer, afin qu'aucun des siens ne soit plus scauant, ou mesme ne sache pas tant que luy. De là vient que les Secretaires, & le grand Chancelier, n'escriuent, & ne respondent ordinairement aux Ambassadeurs des Princes estrangers, que ce que le grand Duc leur dicte. On ne nomme iamais le grand Knez aux affaires qu'on traite, que tous ne se leuent avec grand honneur & reuerence. Le mesme se fait à table lors qu'il conuie quelqu'un à boire, on luy fait part de son plat, & en plusieurs autres semblables occasions. On leur apprend aussi dès leur enfance à parler, & faire estat de leur Prince comme d'un Dieu. Dieu seul (disent ils) & le grand Seigneur sçait cecy. Nostre grand Seigneur sçait tout, toute la santé, & toutes les commoditez que nous auons procedent du grand Seigneur. Ainsi les subiects instruits à cet honneur, & voyans tant de grandeur, & de maiesté en leur Prouince, & n'en cognoissans nul autre, le reuerent & luy obeyssent, non cōme subiects, mais comme esclaves, en faisant estat, non comme de leur Prince, mais comme d'un Dieu. Il n'y a en Moscouie nuls Seigneurs de titre, comme nous voyons parmy nous des Ducs & des Barons, & s'il oütroie à quelqu'un la possession de quelque lieu, cela ne passe point à ses successeurs, s'il ne le confirme: & quoy qu'il ayt donné ceste Seigneurie, les paysans & villageois ne laissent de luy payer partie des fruiets, & de luy deuoir des coruees. En fin tout despend de la volonté du grand Duc, & tant plus un homme est riche, tant plus il luy est obligé. Pour le regard des coniurations, afin d'empescher qu'on n'en face aucune en ses Estats, il transporte les familles entieres d'un lieu en l'autre, & enuoye les vns & les autres aux garnisons, loing de leurs maisons, & comme en exil.

R E L I G I O N.

32 **L**Es Russiens & Moscouites receurent la Religion Chrestienne des Grecs, l'an de salut 987. Ou comme quelques vns disent, l'an 942. Ils estoient auparauant addonnez à l'adoration des faux Dieux, lesquels ils laissent lors avec tant de resolution, qu'ils ont tousiours persisté depuis en la Religion qu'ils auoient receüe, combien toutesfois qu'ils y ayent adiousté beaucoup de superstitions par succession de temps. Ils disent qu'eux, & les Grecs, sont seuls vrayes Chrestiens, & que les Romains, & les autres Chrestiens, sont des deserteurs de la primitive Eglise, & ne se tiennent pas aux sept sacrez Synodes. Ils vsent de la langue Sclauone, de mesmes que les Polonois & Lithuaniens, & celebrent leur Messé, & leurs ceremonies au mesme langage, en y mellant quelquesfois des chansons, & l'Euangile, & l'Epistre en Grec. Ils hayssent les Iuifs au possible, & ne leur permettent aucunement de demeurer parmy eux. Ils tiennent pour

tiennent pour grand meffait de tuer vn veau, & de manger de la chair. Pernisten rapporte que lors qu'il y fut Ambassadeur pour l'Empereur, tous les Moscouites monstroient vn grand desir de voir Rome, & de visiter les lieux où ils entendoient que tant de Saints auoient esté martyrisés & enseuélis : & principalement ils tesmoignoient d'auoir vn extreme desir de voir nostre Dame de Lorette. Ils portent grand honneur à saint Nicolas, duquel ils gardent le corps fort soigneusement, & avec vne extreme reuerence. Ils sont beaucoup plus ceremonieux que nous aux choses de la Religion : veu qu'ils ne passent iamais deuant vn Monastere, vne Eglise, ou deuant quelques Croix, dont toutes les rues sont pleines aussibien que les carrefours, sans mettre pied à terre, s'ils se trouuoient à cheual, puis s'agenouiller de mesmes que les gens de pied, en faisant le signe de la Croix, & disant les paroles qui suivent, *Miloy Hospodi, Miloy Hospodi, Miloy Hospodi*, c'est à dire, *Kyrie eleison, Kyrie eleison, Kyrie eleison*. Seigneur ayez pitié de nous. Le mesme Pernisten dit, que lors que ceux qu'on luy auoit baillez pour luy tenir compagnie approchoient de quelque Eglise, où l'on disoit la Messe, il n'y auoit moyen de les faire passer plus auant sans l'auoir ouye, & en se iettant à deux genoux, & frappant plusieurs fois la terre, où le lieu voisin avec le front, principalement lors qu'on leuoit, & portoit l'Eucharistie. Ils n'osent entrer aux Eglises, ains demeurent dehors, lors qu'ils ont esté avec les femmes, iusques à ce qu'ils se soient baignez, & lauez. Quant ils celebrent, ils sont vestus comme nos Prestres : mais vne de leurs Messes dure autant que deux des nostres, & ils la disent en langue vulgaire. Il y a tousiours deux ou trois Diacres presents, qui chantent continuellement *Miloy Hospodi*, & *Alleluya*, & tous les assistans chantent avec eux, faisant bien souuent le signe de la Croix. Ils vsent de chandelles de cire, d'images, & autres choses de mesme que nous, & specialement de l'eau beniste, & du sel benist.

A la fin de la Messe le Prestre diuise certains petits pains benits, & les distribuë au peuple, & tous les ayans receus & portez avec grand reuerence chez eux, taschent d'en donner au moins vne petite parcelle à chacun de leur maison.

Aux Monasteres on dit tousiours à l'aube du iour vne Messe, à laquelle assistent les hommes seuls, & plusieurs par grande ferueur & deuotion, demeurant toute la nuit dans l'Eglise, avec les Religieux, qui successiuellement sans iamais finir, psalmodient, & louent Dieu.

Ils sont semblablement forts deuots en leurs affaires : veu qu'ils ne sortent iamais du logis, & n'y entrent iamais aussi sans s'encliner par trois fois deuant vne image du Crucifix, ou de la Vierge Marie, qu'ils tiennent avec quelque lumiere en tous leurs poiles, ou en leurs chambres, & font le signe de la Croix, en disant trois fois ces paroles, *Miloy Hospodi*.

Ceste ceremonie estant faicte, ils commencent de parler à ceux qui se trouuent pres d'eux, ou bien ils prennent congé. Ils font de mesme à la table, lors qu'ils veulent prendre leurs repas.

Les processions y sont aussi fort frequentes, & quoy qu'il face fort froid, elles ne laissent d'aller bien loing. Le Baptisme est estimé, & administré par eux comme par nous, excepté qu'ils disent, *Que l'enfant soit baptisé en ceste fontaine, au nom du Pere, &c.* Le Sacrement de Penitence est pratiqué de mesme par le Confesseur, & le Penitent demeure debout au milieu de l'Eglise sans s'asseoir iamais. La satisfaction est fort frequente, & rigoureuse entre eux, aussi bien qu'en la primitive Eglise.

Ils se communient, & vont tous les ans recevoir le saint Sacrement, qui est consacré pour les malades seulement le leudy saint, & gardé dans l'Eglise avec fort grande reuerence sous la seule espee de pain, duquel ils rompent vne petite partie avec vne cuillier d'argent, & la mettent apres dans vn peu d'eau tiede, & la donnent au malade, l'adorent tousiours deuotement : de sorte qu'ils ne s'esloignent guiere de nous en cecy, sinon en ce qu'ils vsent de pain leué, selon la coustume des Grecs.

Ils honorent les Saints au possible, & les inuoquent afin qu'ils prient Dieu pour eux : & mesme ils portent vn honneur particulier à saint Nicolas leur patron, comme i'ay ja dit. Son image est en la ville de Massouie, & le Prince faict offrir tous les matins au lieu où elle est, grande quantité de pain, de chair, & d'autres choses, qui sont apres distribuées aux Ministres de l'Eglise, qui officient sans cesse, & y psalmodient, priant Dieu pour la prosperité de ce grand Prince, qui nourrit encor vn autre Monastere assez proche de celuy où est l'image de saint Nicolas, appelé sainte Trinité, où il y a continuellement deux cens Religieux, en l'Eglise desquels est enseuely saint Ignace, qui faict souuent des miracles, Dieu voulant rendre ce saint glorieux, & mesme entre les ennemis.

Les Religieux sont tous de l'ordre de S. Basile, & vivent fort exēplairement, de mesme aussi que les Hermites, & l'on ne scauroit faire deux ou trois lieues sans trouuer vn Monastere.

Il est permis aux Prestres de se marier vne seule fois, & lors que leur femme vient à mourir, il faut qu'ils demeurent en Celibat, sans pouuoir rechercher de secondes nopces. Ils nient le Purgatoire : & toutesfois en leurs Messes & oraisons, ils prient Dieu pour les fideles trespassés.

sez, c'est à sçavoir que la divine Majesté leur vueille pardonner les peines qu'ils ont meritees, & les vueille recevoir en la patrie celeste.

Leur plus grande erreur à mon iugement est, qu'ils assurent qu'il n'est permis à aucun de celebrer d'autres Conciles que les sept premiers : & de mesme qu'ils embrassent entierement ceux-cy, aussi ils refusent tous les autres suiivans, & c'est de là que vient leur discord avec le S. Siege de Rome.

Ils ont leur Metropolitan, de qui le Clergé & tous les Euesques despendent. Ils deferent à cestui-cy autant que nous faisons pardeça au Pape.

Ce Metropolitan devoit despendre selon eux du Patriarche de Constantinople, mais il est tres-vray qu'il y a fort peu d'intelligence entre eux, à cause que le Patriarche est au pays du Turc, & l'autre en celuy des Moscovites qui sont naturellement fort grands ennemis. Ce Metropolitan celebre tous les ans vn Synode, auquel se trouvent tous les Euesques & autres Prelats, qui font porter deuant eux leur baston pastoral, comme les Legats du Pape ont accoustumé de faire porter la Croix, & chacun est accompagné de quelques Religieux, & seruiteurs.

On ne fait aucun Euesque qui ne soit Religieux, tellement que ceux qui sont dans les Monasteres taschent d'y bien viure pour obtenir ceste dignité. Le grand Prince ne resout, ny determine aucune chose d'importance sans l'aduis du Metropolitan.

Ils ieusnent le Carême fort estroitement, ne mangeants aucune chose cuite, sinon qu'ils soient contrainct de le faire, à cause de leur foiblesse, & le ieusne dure vne sepmaine plus que le nostre. Durant tout le temps de l'Aduent ils font le mesme, appellant cela le ieusne de saint Philippe.

Quant au Prince, il observe soigneusement & estroitement toutes les ceremonies appartenantes à la religion, & tout ce qu'elle commande: veu qu'estant à table, toutes les fois qu'on luy change de plat, ou qu'il veut boire, il fait plusieurs signes de Croix. Il ne manque à aucun ieusne, & frappe la terre avec le front par deuotion comme les autres.


Les Morduois qui se tiennent sur les frontieres de la Moscouie, vsent de la Circoncision, de mesme que les Turcs, & les Juifs. Ils n'adorent pas les idoles comme les Payens, & ne se font aussi baptizer comme les Chrestiens. Ils vivent selon la loy naturelle. Il adorent vn seul Dieu createur de l'Vniuers. Ils sortent & vont peu souuent en campagne, & lors qu'ils y sont ils boient & mangent ensemble, & offrent à Dieu les premices de tout ce qu'ils doiuent manger ou boire, en les iettant contre le ciel. Ils font le mesme de tout ce qu'ils recueillent.

DISCOURS DE L'EMPIRE DV GRAND CHAM DE TARTARE.

SOMMAIRE.

1. **Q**UEL est le contenu & estendue des terres de l'Empire du grand Cham de Tartarie, ses bornes & son climat.
2. Situation & circuit de Cambalusa capitale ville.
3. Quelle est la constitution de l'air de ce pays leur abondance en ris, froment, en soye, rhubarbe, musc, en chameaux, & cheneaux, en pierres qui brulent comme bois, en faizans & autres oyseaux.
4. Des terribles foudres & vents dont ces contrées sont infectées.
5. Description du lac de Caniclu plein de perles, & autres riuieres de cet Empire.
6. Vaillance & façon de viure des Scythes ancestres des Tartares: leur barbare costume de boire dans le test, & se revestir de la peau de leurs ennemis escorchez.
7. Quelles estoient leurs principales Deitez, leurs sacrifices, leurs sanguinaires ceremonies en contrainct alliance, & aux funerailles & sepultures de leurs Roys, sur lesquelles ils esgorgeoient & immoloient les seruiteurs & Officiers de la Couronne.
8. Autre ceremonie observée aux sepultures des personnes priuees.
9. Du fard dont vsent les femmes Scythiennes, du serment des Scythes & leurs loix.
10. De l'origine de l'Empire des Tartares, & comme ils furent deliurez de la domination de leurs voisins par vn mareschal nommé Canguiste.

- 11 *Prosopographie & descriptiō du naturel, mœurs, constances, loix, viandes & breuvages, forme d'habillemens, exercice & maniere de vivre des Tartares, leurs armes & façon de combattre en guerre: leurs ceremonies & funeraillies & sepultures de leurs Roys.*
- 12 *Leurs richesses en trafic de riz, laine, soye, chanvre, labarbe, musc, camelots de poils de chameaux, gingembre, canelle, girofle, sable d'or de rivières, corail, mines d'or & d'azur.*
- 13 *Leur monnoye faite de peau d'escorce d'arbres & de coquilles de mer.*
- 14 *Leurs forces consistans en la forte assiette & grandeur des provinces, & des villes & gens de guerre campans hors des villes.*
- 15 *Noms des Empereurs de Tartarie gravez en lettres d'or, & mis sur le temple des principales villes. Leur puissance absolue de vie & de mort sur leurs subiects.*
- 16 *Loix & ordre militaire estably par Canguiste leur premier Empereur.*
- 17 *Ceremonies obseruees au couronnement du nouveau Prince.*
- 18 *Du sceau dont use le grand Cham en ses Patentes, & de sa rigoureuse iustice.*
- 19 *Des deux Conseils de guerre & d'Estat, de leur iurisdiction, & de la puissance & autorité des Astrologues en ce pays.*
- 20 *De la punition & supplices des larrons & criminels.*
- 21 *Explication du mot Herodes.*
- 22 *De la religion des Tartares composee du Mahometisme, du Paganisme, & du Christianisme, leurs Dieux, la forme de leurs prieres, & leur creance touchant l'immortalité des ames.*
- 23 *L'origine & descende des Tartares Juifs.*
- 24 *Del'erreur des Chrestiens Tartares suiuant l'heresie de Nestorius.*
- 25 *Genealogie des Empereurs Tartares.*



En x qui ont soigneusement consideré & calculé és bons Geographes le contenu de l'Empire de ce grand Prince qui ne cede à nul autre en estendue de pays, fors au Roy d'Espagne, lequel il surpassé d'ailleurs, en ce que ses terres sont vnies, & ont toutes quelque lieu qui les ioint ensemble, au lieu que celles de l'Espagnol sont esparfes & diuisees au possible: ceux dis-je qui ont pris la peine de vouloir iuger à peu pres du vray le contenu des pays que ce Monarque possède, ont recogneu qu'il estoit de pres de deux millions deux cens mille milles carrez d'Italie.

Or ce grand Empire nommé des habitans Mongul, qui tire le nom de Tartarie de la riuere de Tartar, qui en atrose vne grande partie, a pour les bornes du costé du Leuant, le grand Royaume de la Chine, la mer de Cin, & le destroit d'Anian: du Couchant, le mont Imaus, qui le rend clos de ce costé là, si l'on en excepte quelques Hordes de Tartares qui sont encor au deçà de ce mont, & qui recognoissent le grand Cham: du Midy, l'Indostan, la riuere de Gange, & celle d'Oxe, maintenant dicté Abiam, & mesme en la plus haute partie, le Royaume de la Chine: & du Septentrion, la mer glacee, quia ses riuages si froids, à cause de sa proximité du Pole, que tout ce pays est incogneu, & tenu de nous pour desert & inhabité. Bref, ce Prince commande à tout le pays nommé par les anciens, la Scythie par de là le mont Imaus, qu'on appelle maintenant *Alay*, & la religion des Seres, qui a pour le iourd'huy le nom de Catay, ou selon quelques vns qui semblent plus entendus, son Empire s'estend depuis le desert du Lop d'un costé, & le lac de Kytay de l'autre, iusques à la muraille tiree entre le quarante trois & quarante cinquiesme degré, depuis la ville d'Ochioy assise entre deux monts, iusques à vne autre montagne qui aboutit à la mer, diuise les Tartares des Chinois, & depuis l'Ocean Scythique, iusques aux frontieres de Tipure, & des pays voisins. Cet espace comprend beaucoup de grands Royaumes, & des Prouinces de longue estendue, embellies d'un grand nombre de bonnes villes.

La capitale ville de cet Empire se nomme Cambalu, que quelques vns veulent auoir esté nommee autresfois *Issedon Serica*, bastie en forme caree, assise sur la riuere de Polfangi, & ayant de tout enuiron vingt quatre milles d'Italie, avec douze portes, chacune desquelles est accompagnée d'un faux bourg, où les estrangers, & les marchands demeurent. Ceste ville est au milieu de la Prouince de Catay, & comme le centre de tous les pays d'alentour.

Outre le grand, & riche Royaume de Catay, il y a plusieurs autres beaux & grands Royaumes, comme ceux de Tangut, de Camul, de Tenduc, de Tainfur, de Thebet, & de la ville & Prouince de Caïndo, de tous lesquels pays on ne peut faire vne guiere curieuse description, pource qu'il ne se trouue personne qui en ayt eu entiere cognoissance, ou qui l'ayt donné aux autres.

QUALITE.

- 3 **O**N tient que le pays de Catay abonde en riz, en froment, & autres choses semblables, combien que l'air y soit froid. Il a aussi quantité d'argent & d'or, de soye, de rhubarbe, & de musc, & grand nombre d'animaux, & pour acheuer en vn mot, on y trouue tout ce qui est necessaire, non seulement pour viure, mais encor pour s'entretenir delicieusement. On y void vn fort grand nombre de chameaux, de mesme qu'on y trouue aussi des cheuaux en telle abondance, que quelques vns ont escrit que le grand Cham nourrissoit dix mille cauales blanches, desquels il beuvoit le lait. On n'escrit point qu'il s'y recueille beaucoup de vin, & mesme c'est chose assuree que la Prouince de Catay n'en produict nullement. On y trouue aussi des pierres qui brulent, dont on fait feu de mesme que de tourbes au pays bas, & d'ouïlles au Liege. L'air n'y est guiere temperé, les tonnerres & les foudres y sont si terribles & estranges en Esté, que les hommes meurent presque de peur en les oyant. Il y fait tantost extremement chaud, & bien tost apres il fait du tout froid, & l'on y void tomber grande quantité de neige. Les vents y sont quelquesfois si rudes & si vehemens, qu'ils arrestent ceux qui vont à cheual, ou bien les iettent par terre, renuersent les arbres, & les arrachent mesme iusques aux racines, & en vn mot ils y portent beaucoup de dommages. Il n'y pleut iamais en hyuer, & l'on y void tomber peu souvent la pluye en Esté, & l'eau qui tombe est si menuë, qu'elle ne mouille point presque la terre. Il y a en ce pays grand nombre d'oyseaux, principalement de faizans, & autres semblables. Il y a beaucoup de lacs, dont le denombrement en seroit ennuyeux, toutesfois ie mettray icy les noms de quelques vns pour le contentement des Lecteurs. En la prouince de Caniclu il y a vn lac où l'on trouue tant de perles, qu'elles seroient incontinent à vil prix, s'il estoit permis à chacun d'en emporter autant qu'il voudroit: mais il est deffendu de pecher des perles en ce lac sans la permission du grand Cham. On trouue en ce mesme lac grande quantité de poissons. Il y en a vn aussi abondant en poissons, ayant cēt milles de tour en la prouince de Cairaim. Ces pays sont arrouiez de plusieurs riuieres, entre lesquelles celle de Polifane est fort renommee. Elle se descharge dans la mer, & c'est par elle qu'on void monter plusieurs vaisseaux chargez de marchandise. Il y a aussi le fleuve de Coromoran qui se desgorge dans la mer, & est si haut & si large, qu'il n'y a point de pont qui le trauese. La riuere de Quianfu large de demy mille, est aussi fort profonde, & abondante en poisson. On y void aussi celle de Quiam, que Paul Venitien estime la plus grande du monde: car il escrit qu'en quelques endroits elle est large de dix milles, en d'autres de huit, & en quelques autres de six. Sa longueur est de cent iournees de chemin. Mais afin de specifier quelque chose, il faut dire ce qu'on a peu scauoir des particularitez de quelques prouinces.

Il vient au Royaume de Tangut force rhubarbe, qui est transportee par tout le monde. En la prouince de Tenduc, on trouue de fort riches mines d'or, & d'azur. Le Royaume de Tainfur est des mieux cultiuez, & abonde en vigne. Le pays de Thebet est marecageux, plein de forests, & bestes sauages, & abonde en coral. On y trouue aussi grande quantité de musc, de canelle, & d'autre espicerie.

Voila ce qu'on peut dire de la qualité de ces pays, tant en general qu'en particulier: voyons maintenant les façons de viure anciennes de leurs habitans, pour venir apres à celles qui se pratiquent entre eux, & aux qualitez & humeurs qu'ils ont de nostre aage.

MOEVRS ANCIENNES.

- 6 **C**Eux que nous appellons aujourdhuy Tartares estoient tous compris sous le nom de Scythes, dont les vns se tenoient au de çà, les autres au de là du Mont Imaus. Les Scythes n'auoient au commencement guieres grande estendue de pays, mais par succession de temps, & par leur grande vaillance, ils s'acreurent tellement, qu'ayans assuietty plusieurs prouinces, & vaincu diuerses nations, ils firent vn fort grand Empire, & se rendirent illustres & renommez par tout le monde. Iamais ils n'ont esté domptez, & peu souuent on les a veu assailis pour estre soumis à l'Empire de quelqu'un. Il contraignirent Daire de s'enfuir avec grande perte de ses gens, & deffirent Cyre avec toute son armee estans conduits par vne femme. Alexandre le Grand y perdit le chef, & les soldats qu'il y auoit enuoyez, & n'en eut pas meilleur marché que les autres. Les Scythes ouyrent bien parler du nom des Romains, mais iamais ils n'esprouuerent leur force, ny ne ployerent le col sous le ioug de leur domination. Ce peuple viuoit selon la nature, & n'vsoit d'aucune loy. Ils detestoient le larcin, comme ceux qui n'enfermoient point leurs troupeaux dans des clos & palissades, ou dans des loges bien murees, ains les tenoient en belle campagne. Ils n'auoient aucun vsage d'or, ny d'argent: le lait, & le miel leur seruoient de nourriture. Ils s'armoient contre le froid de peaux de bestes sauages, ne sachans que c'estoit de faire des accoustremens de laine. Si tost que les

Scythes anciens

Scythes anciens auoit prins vn homme en guerre, ils en humoient le sang, & estoient obligez de porter à leur Roy les testes de tous ceux qu'ils auoient mis à mort, s'ils vouloient auoir part au butin, autrement ils n'y pouuoient rien demander. Ils vsoient de ceste sorte en coupant la teste à leurs ennemis. Ils l'incisoient en rond tout autour des oreilles, & en ayant tiré le test, secoüoient ce qui estoit dedans, en ostant la peau par mesme moyen, ainsi qu'ils faisoient le reste du cuir de tout le corps, & le tannoient comme celuy d'un bœuf, s'en habilloient, & en faisoient des resnes pour les brides de leurs chevaux, ou bien en vsoient comme de seruiettes prenant leurs repas, & tant plus vn homme auoit de tels seruices, tant plus il estoit illustre parmy eux. Quelques vns coupoient encores les mains droictes de leurs ennemis, & les escorchant à belles ongles en paroient la couuerture de leurs trousses: les autres ayans escorché l'homme tout entier estendoient le cuir sur des aiz, & le portoient pour parade sur leurs chevaux.

Quant aux testes dont j'ay fait mention, apres les auoir escorchees, & couuertes de cuir de bœuf par le dehors, ils les doroiert au dedans s'ils estoient riches, en faisoient des tasses pour boire, & les donnoient aux hommes de marques estrangers, qui les venoient voir, leur faisant recit de leurs prouesses.

Chacun de leurs Princes donnoit du vin vne fois l'annee à ceux de leurs soldats qui auoient tué quelques vns des ennemis, & ceux qui n'en auoient mis à mort aucun, & n'auoient rien fait de signalé, estoient mis à part sans aucun honneur, qui estoit vne infamie insupportable parmy eux: au lieu que celuy qui en auoit fait mourir plusieurs, estoit estrené de deux tasses de vin: car ils portoient autant de gobelets pour parade.

Leurs principales deitez estoient la Deesse Veste, qui presidoit sur tout, & apres Iupiter, & Tellus ou la Terre, qu'ils renoient pour espouse de Iupiter, & c'estoient là les Dieux qu'ils honoroient, & taschoient de se rendre propices. Ils adoroient, outre ceux-cy, Apollon & Venus celeste, Mars & Hercule, sans toutesfois qu'ils dressassent nul temple, ou autel à aucun d'eux, excepté à Mars, à qui ils sacrifioient le centiesme de tous ceux qu'ils prenoient en guerre. Ils sacrifioient aux autres des bestes, & principalement des chevaux. Pour le regard des pourceaux, ils en faisoient si peu de compte, qu'ils ne vouloient qu'on en nourrist vn seul parmy leurs trouppeaux.

Quand le Roy condamnoit quelqu'un à la mort, ce n'estoit sur luy seul que la peine s'estendoit, veu qu'elle tomboit aussi sur tous ses enfans males.

Quand les Scythes faisoient alliance avec quelqu'un, ils prenoient vn grand hanap de terre, & y versant du vin, y melloient aussi du sang de toutes les deux parties, puis ils arrosoient la pointe de leurs espees de ce vin, & faisoient le mesme de leurs haches, fleches & dards: puis ayants fait vn grand serment avec de longues & terribles imprecations contre ceux qui romproient l'alliance, il falloit que tous beussent du vin de ce hanap, non seulement les parties principales, mais encores tous les plus grands qui assistoient comme compagnons de ceux qui faisoient la ligue.

Quand leur Roy venoit à mourir, ils faisoient vne fosse fort profonde en figure quarree, puis prenans le corps ils en tiroient les entrailles, & au lieu de ce qui auoit esté osté du ventre ils mettoient des poudres odoriferantes, de la semence d'hache, & d'anis, cela fait, ils le cousoient, & mettoient sur vn chariot, le renuoyant d'une nation à l'autre, chacune luy faisant semblable seruice: & cependant les courtisans & gens de la maison du Roy, se fendoient les oreilles, & coupoient les cheveux en signe de tristesse, se decoupoient les bras & pinsetoient le nez iusqu'à effusion de sang, & se perçoient la main gauche d'une fleche: & apres que le corps auoit passé par tous les pays de la iurisdiction du defunct, ils le laissoient en la Prouince la plus esloignée de son Empire. C'estoit là que le sepulchre estant dressé, & le corps estant mis en vn cercueil, & descendu dans la fosse, l'on plantoit des lances & autres longs bastons à l'entour, avec des verges par dessus, & pareillement quelques habits, & outre ce, l'on mettoit en l'espace vuide du cercueil, vne des concubines du Roy, qui auoit esté mieux aymée de luy tandis qu'il estoit en vie. Il falloit aussi qu'il eust des Officiers qui l'accompagnaissent pour l'aller seruir en l'autre monde, & pour cet effect ils estrangloient pres du tombeau vn Chambellan, vn cuisinier, vn sommelier, vn courtier ou sergent, & vn muletier, qui n'auoient tous ensemble, pour porter leurs hardes & bagage, qu'un cheval, qui estoit massacré avec eux, & en mesme temps ils estoient enterrez avec leur Prince, & avec sa vaisselle, & ses meubles plus precieux.

Ils auoient ceste coustume, qu'ils luy faisoient encores au bout de l'an vn pareil seruice, aux despens encores de la vie de ses meilleurs seruiteurs, & officiers qui estoient tous Scythes naturels, & de franche & noble race, & tels qu'il plaisoit au Roy de les choisir, d'autant que nul esclau n'estoit receu à son seruice. Ils estoient encores cinquante de ces derniers, avec

pareil nombre de chevaux, qu'ils estrangloient, leur ostant les entrailles, & leur coufant apres la ventre, puis ils les couvroient de leurs manteaux, & les attachoient autour du tombeau fait & couuert d'une voute, & eux estans à cheval, & posez de telle sorte, qu'on les pouvoit voir de loing en cet equipage, comme si c'eust esté une troupe de cavalerie ordonnée pour la garde du Roy decedé. Telles estoient les ceremonies & funerailles des Roys lors qu'on les mettoit en terre.

Il y avoit encores une façon particuliere de sepulture pour les personnes privées, veu que quelqu'un estant trespasé, les siens le mettoient sur un char, & le portoient vers ses parens & amis, chacun desquels dressoit un banquet au lieu de sa demeure, à tous les parens du mort, & aux autres qui accompagnoient le corps. Ils le pourmenaient ainsi l'espace de quarante iours, au bout desquels ils mettoient trois pieces de bois ensemble qui se baissent esgalement, & posoient dessus des tentes de laine le plus gentiment qu'il leur estoit possible, puis jectent dans un vaisseau fait comme une barque, & mis sur le tombeau, entre les voiles & le bois, les pierres plus luyfantes qu'ils pouvoient choisir. Voila ce qu'on peut dire de la façon qu'ils observent à l'enterrement de leurs morts : passons maintenant aux autres qu'ils ont pratiquées.

Les hommes ne se lauoient point, mais leurs femmes frottoient leurs corps nus contre quelque pierre aspre & raboteuse, apres y avoir espandu de l'eau par dessus, & leur chair s'estant enflée par ce moyen, elles se frottoient encore de bois de cypre, de cendre & d'encens, & employoient aussi pour la face certains medicamens composez de semblables drogues, au moyen dequoy elles sentoient bon, pour le iour suivant ayans osté ces emplastres & drogueries, elles paroissent plus belles, & avoient le teint plus agreable. Ce peuple ne iuroit que par le throsne Royal, & si quelqu'un venoit à se parjurer, ou à faire un faux serment, s'il estoit convaincu par les enchanteurs qui faisoient la preuve avec des verges de saule, il perdoit aussi tost la teste, & ses biens estoient confisquez à ceux qui avoient prouvé son crime & son parjurement.

Ceux de Catay, que l'on nommoit les Seres, vivoient debonnairement, & paisiblement ensemble, & nonobstant ceste douceur, ils fuyoient la conversation & hantise de tous autres hommes: tellement qu'ils ne vouloient trafiquer par parole avec aucun estrangier. Mais s'ils vouloient faire quelque pache, & vendre leurs denrees, ou en acheter d'autres, l'estranger estoit contraint de passer la riviere, sur le bord de laquelle chacun mettoit sa marchandise, & lors les Seres donnoient le prix à toutes choses en les regardant, & l'estranger estoit contraint de les payer à la discretion du Sere, sans marchander nullement.

La femme paillarde, l'adultere, le larron, n'estoient point appelez entre eux en jugement, & l'on ne dict jamais anciennement qu'un seul meurtre y eust esté commis, veu qu'ils avoient plus de crainte d'estre venus desobeissans à leurs loix, que de la menace des constellations, ny des predictions de ceux qui dressoient leurs natiuitez, & leur annonçoient leur fortune.

Nul d'entre eux n'accostoit sa femme tandis qu'elle estoit enceinte, ny lors qu'elle avoit le flux de ses mois. Il n'y a personne entre eux qui mangeast beste qui fust souillée. Ils ne faisoient non plus aucun sacrifice, & chacun estoit iuge de soy-mesme, ensuiuant naturellement ce qui estoit raisonnable.

Or les peuples de Tartarie, qui recognoissent aujourdhuy le grand Cham, furent anciennement subiects à leurs voisins, & leur payoient tribut, tant ils estoient lasches & abbatus, quoy qu'ils fussent gouvernez par des Seigneurs & Capitaines, qui avoient la souveraineté du maniement des affaires. Mais en fin ils secoient ce ioug par le moyen d'un veillard, mareschal de son estat, qui dist avoir eu certaine vision d'un Chevalier armé à blanc, & monté sur un cheval de pareille couleur, qui l'ayant appelé par son nom, luy dist ces paroles: Canguiste (car tel estoit le nom de ce mareschal) la volonté de Dieu immortel est, que tu delivre ce peuple de la subiection de ses voisins, & que tu sois Gouverneur & Roy des Tartares, qui assubjettiront les autres, ainsi qu'ils sont à present tributaires de leurs voisins. Cela fut cause que les Tartares desirieux de se voir libres, & de commander aux autres, esleurent pour Roy ce Canguiste, qui fut le premier Prince de ce peuple. Cecy advint l'an de nostre Seigneur 1187. Ce Canguiste, nommé Chinghie par quelques autres, estoit homme sage, accord, & de bonne vie, & fut le premier qui tascha d'oster l'idolatrie d'entre les Tartares, deffendant par Edict dès qu'il fut Roy, l'adoration des idoles, enioignant qu'on adorast un seul Dieu, par le moyen duquel il estimoit avoir acquis une si grande dignité. En fin Canguiste se voyant fort, ne manqua de se ruer soudain sur les Scythes ses voisins, tant de çà que de là le mont Imae, & les fist les subiets & tributaires, & rendit les Tartares plus hardis, & plus redoutables, au lieu qu'ils ne se mesloient auparavant que d'estre pasteurs.

MOEVRS DES TARTARES DE CE TEMPS.

LEs Tartares sont de moyenne taille, ont la poitrine & les espaules fort larges, les yeux ¹⁰ gros, & hors de la teste, couverts de paupieres grosses, & espaisés: ils ont la face large, & peu de barbe, sinon qu'ils ont de grandes moustaches sur les levres: ils font faire communément leurs cheveux derriere la teste, & de l'autre part les laissent, & font venir longs, puis en font deux cordons, & les font tenir derriere l'oreille. Et non seulement les Tartares sont tonsus en ceste sorte, mais encores tous ceux qui vont en leur pais pour y faire leur demeure. Ils sont adroits à cheual, & fort legers & dispos, mais mauvais pictons. Nul d'eux ne va à pied, mais tous sont montez sur des chevaux ou des bœufs, quand ils vont par pais, pour petits qu'ils puissent estre. Ils tiennent pour chose fort honorable, quand leurs chevaux portent de petites clochettes pendues au col, & qui sonent clair. Ils sont grands criers, voire mesme quand ils parlent familièrement entre eux, & quand ils chantent on diroit que ce sont des loups qui hurlent, & tout en chantant ils secouent & branlent la teste. Quand ils boient, ils ne cessent jamais iusques à tant qu'ils se soient enyurez, & font gloire de ceste vilainie. Il y en a beaucoup parmy eux, qui n'ont ny villes ny villages pour leur ordinaire séjour, mais vivent emmy les champs sous des tentes. En Hyuer ils ont accoustumé de demeurer en la plaine: mais en esté ils habitent aux montagnes, cherchans les bons pasturages. Ils n'ont pour la pluspart aucun pain, ne paistrissent point, & n'ont ny nappes ny seruiettes. Ce peuple mesprise tout le reste du monde, en sorte qu'il croit qu'il n'y en a pas vn plus digne d'honneur que son Prince, & ne souffre point que l'on inuoke le nom d'un autre. Ils appellent tous les Chrestiens chiens, & idolatres. Ils vsent d'arts magiques, & s'amusent à interpreter les songes, & ont des Magiciens qui sont truchemens de leurs resueries, & qui s'adressent aux idoles pour ouïr leurs oracles, & explications. Ils sont tellement conuoiteux de biens, que quand quelqu'un a veu quelque chose qu'il desire auoir, il la rait par force, s'il n'en peut iouir du consentement de celui à qui elle appartient, pourueu qu'elle ne soit pas à vn Tartare, & chacun d'eux croit que cela luy est permis par les Ordonnances de leurs Roys. Quand les Tartares trouuent par les chemins vn homme qui ne porte point de lettres, ou de sauf-conduit du Roy: ils s'en saisissent, & se l'approprient, & depuis en vsent comme de leur esclave. Ils prestent de l'argent à ceux qui en ont besoin, mais c'est avec grande vsure. Ils ne donnent jamais l'aumosne aux mendiants: mais ils ont cela de louable, que si quelqu'un arriue sur leur disner, ou soupper, il peut manger & boire avec eux, veu qu'au lieu de le congedier, ils le conuient courtoisement, & luy donnent de bon cœur ce qu'ils ont. Ils sont du tout sales en leur boire & manger, veu qu'outre qu'ils n'ont nappes ny seruiettes, ils ne lauent jamais leurs mains. Ils n'vsent, ny d'herbes, ny de pois, ny de febues: mais ont pour toutes viandes les chairs de toute sorte de bestes, mesme de chiens, de chats, & de gros rats. Quelques-uns d'entre eux ont de coustume, lors qu'ils ont pris quelqu'un de leurs ennemis, de le faire rostir, pour monstrier le desir qu'ils ont de se venger, & cela fait, ils s'assemblent ordinairement en grand nombre, & mangent, & deuorent ce corps comme loups affamez: mais auant que de le faire rostir, ils recoient le sang, & le mettent dans des tasses, ou gobelets, & le boient. Ils vsent pour leur breuvage ordinaire de lait de iument. Ils tiennent pour grand peché de laisser perdre quelque chose de leur viande, ou breuvage, & pour ceste cause ils ne iettent point les os aux chiens, ou aux chats, sans auoir premierement tiré la moëlle de dedans. Dauantage, ils sont si chiches & vilains, qu'ils ne mangeront jamais vne beste entiere, & saine: mais attendront qu'elle soit boiteuse, ou autrement mal atournee, ou malade, ou bien si vieille, qu'elle ne face plus que languir. Ils se contentent de bien peu de chose, ils boient le matin deux ou trois gobelets de lait, & apres cela, ils sont quelquefois tout le iour sans boire, ny manger. Chacun d'eux, soit homme, ou femme, n'a presque qu'un habillement. Les hommes au lieu de bonnets, portent des mitres qui ne sont guieres profondes, plates par deuant, & ayans par derriere vne longue queue: & afin de les faire tenir, & d'empescher qu'elles ne tombent, & que le vent ne les abbatte, ils les attachent avec de petites bandes cousues pres des oreilles, & liees sous le menton. Les femmes mariees vsent d'un habillement de teste fait en forme d'un panier rond d'osier, long d'un pied & demy, enrichy de belle soye, & de plume de paon, & avec cela elles portent des perles, des pierreries, & beaucoup de dorures: & quant au reste du corps, elles sont accoustrees selon leurs moyens, & les plus riches y sont veltues de soye, ou d'escarlante. Leurs robes sont faites en ceste sorte: la fente est au costé gauche: & c'est par là qu'elles s'habillent, & se despoüillent, & y ont quatre ou cinq boutons qui les ferment. Les habillemens qu'elles portent en Esté sont coustumierement noirs, & ceux qu'elles portēt en Hiuer, ou en temps de pluye sont blancs, & ne passent point les genoux. Les Tartares portent les fourrures & vestemens de peaux, dont ils vsent d'ordinaire,

au contraire des autres, veu que pour faire parade de la beauté du poil, ils le mettent par dehors, & la peau contre la chair. Ils sont fort bons Archers, bien adroits à cheual, bien exercez à la guerre, & y sçauent bien faire leurs besongnes : ils meinent leurs femmes & leurs enfans avec eux, & mettent quelquefois des images d'hommes sur leurs cheuaux, afin qu'il semble aux ennemis que leur armee est plus grande, & que par ce moyen ils les estonnent dauantage. Ils n'ont honte de fuir, lors qu'il en est necessaire, & qu'il y a apparence d'estre battu en résistant. Ils combattent par troupes, & fuyent aussi par bandes, ou troupes, & quand les ennemis les poursuient, ils ont encores des fleches toutes prestes pour leur tirer : mais s'ils se voyent suiuis de bien peu de gens, ils se remettent en ordre, recommencent le combat, & se font faire place à grands coups de traits, blessans leurs ennemis, & leurs cheuaux de toutes parts, & finalement ils obtiennent la victoire lors que l'on iuge qu'ils sont vaincus. Quand ils veulent attaquer quelque pais, ils diuisent leur armee, & l'assailent de tous costez, afin que l'on ne puisse venir au deuant d'eux, & que nul des habitans ne puisse eschapper, & par ce moyen ils demeurent ordinairement victorieux. Ils vsent de la victoire avec insolence, veu qu'ils n'espargnent aucun de tous ceux qu'ils ont pris, ny femmes, ny enfans, ny vieux, ny ieunes, & les tüent tous indifferement, exceptez les ouuriers, lesquels ils gardent pour faire leurs ouurages. Quand ils les veulent tuer, ils les distribuent aux Capitaines, qui en assignent dix, ou dauantage, à chaque seruiteur pour les tuer, selon que le nombre est grand, & tous sont soudain tuez, comme bestes avec vne hache, ou coignée, afin que les autres soient estonnez & intimidéz par cét exemple. Ils en prennent de mille vn; & le pendent à vne perche la teste contre bas au milieu des autres qui ont esté mis à mort, en sorte qu'il semble qu'il admoneste, & qu'il escoute parler ses compagnons. Il y en a plusieurs d'entre les Tartares, qui s'approchent des corps morts gifans par terre, & hument le sang sortant des playes encores toutes fraisches. Ils ne gardent nullement la foy promise, quelque parole qu'ils ayent passée, & qui pis est, ils exercent par ce moyen beaucoup plus grande cruauté à l'endroit de ceux qui se sont rendus à eux. Ce sont les hommes du monde les plus addonnez à la paillardise, veu qu'encores qu'ils ayent autant de femmes qu'ils en peuuent nourrir, & que nul degré d'affinité & de parentage ne les empesche de se marier ensemble, si ce n'est avec la mere, la fille, ou la seur, nonobstant ils sont execrablement addonnez à l'horrible peché de Sodome. Ils ne tiennent pour leur femme celle qu'ils prennent, iusques à ce qu'elle leur a faict des enfans, & n'en recoiuent aussi nul douaire que cela ne soit, & par ce mesme moyen ils peuuent repudier celle qui se trouue sterile, en prendre vne autre en sa place. Si quelqu'un est surpris en adultere, il est puny par la loy, soit homme, ou femme. Chaque femme a son logis, son mesnage, & sa famille à part, & toutes vivent chastement au possible. Apres que les hommes sont de retour de la guerre, ils meinent les bestes aux champs, les gardent, s'amusent à chasser, & s'exercent à la luitte : les femmes ont charge de tout le reste, & soin des choses qui concernent le boire, le manger, & les vestemens. Ce peuple est addonné à beaucoup de superstitions. Il n'est loisible à personne de pisser aux lieux publics, & s'il arriuoit que quelqu'un se voulust opiniastrer au contraire, il seroit tué sans remission : mais si la necessité contrainct, il y a là vn pavillon, auquel si quelqu'un a pissé, ils le purgent, & tout ce qui est dedans, en ceste maniere : Ils font deux feux, dans lesquels ils fichent deux picques, & attachent vne corde qui tient par l'un des bouts à l'un, & par l'autre à l'autre. & font passer par le milieu des picques, comme par vne porte, les choses qu'ils veulent purifier. Il y a là mesme deux femmes, l'une d'un costé, & l'autre de l'autre, qui respandent de l'eau dessus, marmottans quelques charmes & sorcelleries. Nul estranger n'est admis deuant la face du Roy, quelque dignité qu'il ayt, & quelque affaire d'importance qu'il puisse auoir, s'il n'est premierement purgé. Celuy qui marche sur l'entree du pavillon, où le Roy, ou quelque Prince, ou grand Seigneur faict sa demeure ordinaire, il est mis à mort sur le champ. Il y a plusieurs autres choses qu'ils tiennent pour fautes irremissibles : mais s'il est question de tuer, ou blesser vn homme, d'enuahir les terres des autres, de rauer contre tout droit les biens d'autrui, & mespriser les commandemens de Dieu, ils le tiennent pour chose de neant, & le font sans aucun scrupule.

- II Quand quelqu'un est deuenu malade, & approche de la mort, ils fichent vne picque, ou ha-lebarde, avec vn penonceau noir, aupres du lieu où il gist malade, afin que ceux qui passent par là n'y entrent point. Apres qu'il est trespasé, toute sa famille s'assemble, & l'on porte son corps hors du pavillon, en vn lieu qu'il auoit choisi auparauant, puis apres luy auoir faict vne fosse large & profonde, ils y drescent vne petite tente, y mettant vne table chargee de viandes, & iettent-là le corps du trespasé, reuestu des plus precieux habits qu'il eust, & tous ensemble le couurent de terre. On enterre aussi avec luy vne iument, & vn cheual caparassonné. Les plus riches eslisent durant leur vie vn de leurs esclaves, le marquent d'un fer chaud, & le font enter-rer avec eux, afin de s'en seruir en l'autre monde. Apres cela, les amis du trespasé prennent
vn autre

vn autre cheual, & le tuent, puis le mangent. Les femmes du defunct brulent ses os pour la purgation de son ame.

Pour conclusion de leurs manieres de viures, ie diray que leurs meilleurs breuuages sont de riz, & d'espines, qui enyurent encores mieux que le vin : ils ayment aussi le laiët aigre de mesme que les Arabes, & le laiët distillé, & passé par l'alambic, qui a grande force à enyurer, & mesme ils accommodent en telle sorte le laiët de leurs iuments, qui semble du vin blanc, & est assez agreable à boire. Ils s'abstiennent entierement de la chair de pourceau. Et pour ce qu'ils sont vagabonds, & n'arrestent guieres en vn lieu, ils se conduisent en leurs voyages par l'Estroille du Nord, & comme ceux qui tiennent ordinairement la campagne, il ont grande connoissance des Astres. Il n'y a que bien peu d'artisans parmy eux, & mesme il n'y a aucun vsage d'argent monnoyé, qu'entre les marchands, veu que le reste eschange vne chose à quelque autre. Leurs cheuaux sont volontiers chastrez, & petits, mais forts. Ils les nomment Bachmat, & les harnachent de selles, avec des estriers de bois, & de brides fort legeres. Ils vsent de fouets au lieu d'esperons : que s'il aduient qu'ils soient portez par terre, & desarmez, & mesme griefuement blesez, ils ont accoustumé de se deffendre des pieds & des mains, voire à belles dents, iusques au dernier soupir. Ils supportent aisément le trauail, & le defaut de viure, & ne sont que fort peu addonnez à la moleste, & aux delices. Leurs Roys sont enterrez au mont Alray, nommé par Hayton Armenien, la montagne de Belgian, & lors qu'on porte le corps pour le mettre en terre, ceux qui l'accompagnent tuent tous ceux qu'ils rencontrent par le chemin, disans, Allez, & seruez nostre Roy en l'autre vie. Et pour preuue de cela, Marc Pol rapporte, que lors que Mongu-Cham fut porté en terre, qui fut du temps que Pol se trouua en Tartarie, les soldats qui accompagnoient le corps, tuèrent pour ceste cause plus de dix mille hommes qui passoient par le mesme chemin. Les habitans de la prouince de Camul s'addonnent aux jeux & aux dances, & reçoient courtoisement les estrangers, iusques à leur proflituer leurs propres femmes.

RICHESSES.

CE seroit estre despourueu de iugement, de croire que les Tartares qui ont fait tant de courses en Europe, & en Asie, qui ont rapporté de si grands butins de Moscouie, & d'autres endroits, & principalement de la Chine, qu'ils ont possedee assez longuement, ce seroit, dis-je vne grande folie de croire qu'ils ne sont pour le iourd'huy guieres riches, puis que l'on sçait assez que ces peuples ayans emporté de tant de prises de Prouinces, les choses plus precieuses qu'ils y ont trouuees, se sont depuis si bien maintenus en leur Pais, qu'aucun ne leur a arraché ce dont ils s'estoient rendus maistres : de sorte que toutes choses leur sont demeurees. Voila ce qui peut persuader facilement à chacun, que les Tartares iouissent de grandes richesses. Et ce qui les conserue encores en cét Estat, c'est l'affiette de leur Pais extremement propre à la communication, & au commerce & traffic d'une ville avec l'autre. Ce qui procede en partie de ce que le Pais est plein, en partie de la grandeur des lacs (entre lesquels l'on void celuy de Cazaye avec son eau salee, celuy de Gujam, celuy de Dangu, & ceux de Xandu, & de Caracora) & en partie aussi de la grandeur des riuieres qui trauerlent ces Estats avec vn long cours. Ce qui les rend pareillement riches, c'est la diuersté des marchandises qui y naissent, veu que ce Pais abonde vniuersellement en riz, laine, soye, chanvre, rhubarbe, muic, & camelots excellents de poil de chameau. Marc Pol escrit, que le Pais de Chaindu produit aussi du gingembre, de la canelle, & du girofle, combien que ce soit chose assez mal-aisée à croire. Il y a aussi quelques riuieres, qui font rouler l'or parmy leurs sablons.

Or d'autant que la monnoye, dont l'on y vse, n'est pas d'une sorte, d'autant qu'en Catay on employe certaine sorte de monnoye noire, qui se fait de ceste petite peau deliée qu'on trouue entre l'escorce, & le tronc des arbres, & qui estant apres pilee & accommodée avec certaine colle, est marquée du seau du grand Cham : & aux Royaumes de Gajacan, & de Corazan, on vse de certaines coquilles de mer. Le Prince tire à luy tout l'or & l'argent du Pais, & le faisant fondre, le conserue en des lieux forts & assurez, sans le tirer iamais hors de la : tellement qu'on croit que cét Empereur possede des thresors inestimables. C'est avec semblable artifice que le Prete-Ian, qui fait courir pour monnoye des grains de sol, ou de poivre, a de fort grandes richesses. Or d'autant que la ville de Chambalu est au milieu de la grande Prouince de Catay : on y porte de toutes les Indes Orientales, de la Chine, & d'autres Pais, beaucoup de belles marchandises : & entr'autres des pierreries, des perles, de la soye, des espicerics, & choses semblables. Quant au rhubarbe qui est consumé par toute la terre, on le tire du Royaume de Tangut, qui est sous la domination du grand Cham. Il y a en la Prouince de Tenduc de tres-riches mines d'or, & d'azur, dont les habitans tirent de fort grands deniers, de mesme que

ceux du Pais de Thebet s'enrichissent par le moyen du corail dont il abonde, comme aussi du musc, de la canelle, & autres especes, qui luy portent vn grand profit. Bref, on ne scauroit trouuer guieres de Principautez, qui puissent faire plus grand amas d'argent, & toute l'incommodité qui est en ce grand Empire, tombe sur ceux qui approchent plus du Nord, qui ont faute d'une infinité de choses, mesmes necessaires à la vie, que leurs voisins sujets d'un mesme Prince, ont en abondance.

F O R C E S.

14 **C**eux qui considereront attentiuement les forces de ce grand Empereur, pourront iuger aysement qu'elles consistent premierement en l'assiette de ses pais, que nous auons cy-deuant monstree estre forte au possible en la grandeur & estendue de ses Estats, en la grandeur des villes, comme de Sucuir, & de Campion, basties & fortifiees à nostre mode, d'Ergimul, de Cerazam, de Thebet & de Caidu, toutes capitales d'autant de Royaumes, & pareillement en l'abondance des viures qui s'y trouuent, & en la grandeur de ses ennemis : veu qu'entre autres choses, il tire la dixme des laines, des soyes, des chanvres, des grains, & du bestail, & il est Seigneur absolu de tout ce que les Tartares possèdent : mais le nerf de ses forces consiste en ses gens de guerre, qu'il tient continuellement sur pied, & en armes. Ceux-cy demeurent en la campagne, à plus de quatre mille loing de toutes villes : & outre la solde qu'ils tirent du Prince, ils reçoient encores vn grand profit d'un gros nombre de bestail qui leur appartient, & de leur lait, & de leur laine. Que s'il aduient que le grand Cham ayt besoin de leuer vne grande armee : il prend le nombre qui luy est necessaire de tous ces hommes espars, à la façon des Legions Romaines par les Prouinces. Les Tartares ne combattent point ordinairement à pied, excepté les Vachens, qui ne sont pas sous l'Empire du grand Cham. Leurs principales armes sont l'arc, & la fleche, dont ils se seruent, ainsi que nous auons desia dict, autant en fuyant, qu'en attaquant. Ils ne se chargent de guieres de choses, lors qu'ils s'en vont à la guerre : veu que leur principal bagage consiste en des tentes de feutres, sous lesquelles ils se retirent quand la pluye arriue. Ils vivent pour la plus grande part, de lait, qu'ils seichent au Soleil, apres en auoir tiré premierement le beurre : & lors que la necessité les presse, ils viuent du sang qu'ils tirent de leurs chevaux. Ils ne viennent que bien rarement aux mains avec les ennemis, les combattent tantost de front, tantost ils les attaquent par les flancs, avec vn perpetuel descochement de traicts, à la façon des Parthes. Ceux qui se portent vaillamment ont de fort belles recompences, sont esleuez à de plus hautes charges, & honorez de presents exquis, & de fort beaux priuileges.

Cet Empereur tient ordinairement pour la garde de sa personne douze mille hommes de cheual, & l'on estime qu'il peut mettre ensemble vn plus grand nombre de cavalerie, que tout autre Prince que l'on cognoisse. De sorte que ses forces ont deux qualitez du tout remarquables : l'une est, qu'il a force gens, comme on peut comprendre par la grandeur de ses Estats, qui ne peuvent estre que bien habitez, puis qu'en la plus grande part l'on y trouue toutes choses necessaires en abondance : l'autre est, qu'il a tous ses gens de guerre en point, & en tel estat, que chacun se trouue prest à marcher au premier mandement qu'il reçoit, d'autant que tous sont continuellement bien payez, chose qui est de grande importance. Car de mesme qu'on fait plus d'estat de la disposition & agilité d'un soldat, que de sa force : aussi l'on estime beaucoup plus les armées qui sont promptes & prestes à marcher où l'on veut, & qui n'ont guieres de bagages qui les empesche, que celles qui sont grandes, & nombreuses : mais les Princes qui les ont & grosses & prestes à mettre en campagne, doiuent estre tenus pour puissants, & forts au possible : car ceux-cy sont comme des Aigles, des Tigres, ou des Lions, que l'on tient pour Princes des autres animaux, seulement pour ce qu'ils ont la disposition & agilité ioincte à la force du corps, si bien qu'avec ces deux parties ils obtiennent victoire sur les autres.

On dict que les Tartares ne se scauent ayder de bouclier, ny de rondache, & qu'il y en a bien peu qui vsent de lances, ou de longues espees : celles qu'ils portent sont faites en façon de scimeterres Turquesques, pointus, & tranchans d'un costé, & de la longueur du bras, afin d'en frapper ceux qui les accostent de trop près. Celuy d'entr'eux est estimé le plus vaillant, qui scaix mieux obeir à son Capitaine.

G O V V E R N E M E N T.

15 **C**et Empereur que les Turcs nomment Vlucam, c'est à dire grand Prince, & les Moscovites Czar Cataiski, c'est à dire Cesar de Catay, le nom duquel ils mettent en vne table rouge en lettres d'or sur les Temples de leurs principales villes, l'appellants Fils de Dieu, ombre de Dieu,

bre de Dieu, & à l'âme de Dieu : est tellement obey en toutes les Prouinces qui luy sont sujettes, qu'on reçoit pour rigoureuses, & inuiolables loix toutes ses paroles. Ceste puissance absolue est venue de Canguiste, qui étant esleu Empereur des Tartares, & voulant essayer s'ils seroient prompts à executer ses volontez, commande à sept Princes, qui gouvernoient auparavant tous ces peuples, de tuer leurs enfans de leurs propres mains : & combien que les peres trouuassent ce commandement fort rude, & fascheux au possible : toutesfois, soit qu'ils redoutassent la fureur du peuple, qui tenoit ce Roy comme chose diuine, soit que la Religion les esmeut, pour ce qu'ils croyoient que Dieu auoit donné commencement à cet Empire, & que ce seroit mépriser Dieu de desobeir aux commandemens du Roy, ils mirent la main à l'œuvre, & esgorgerent eux-mesmes leurs propres enfans. De sorte que depuis ce temps, la vie & la mort des Tartares dependent de la volonté & parole du Roy, & ne font chose qui puisse contrarier à son intention, tant ils le reuerent.

Ce Canguiste, ou Chingis, ordonna que ceux à qui l'aage permettoit de porter armes, eussent à se trouver à certain iour au lieu où il leur plairoit leur commander, & là il distribua l'ordre de sa gendarmerie en ceste sorte, que les dizeniens obeiroient aux centeniers, & ceux-cy aux Chefs qui commandoient à mille hommes, & que ces derniers presteroient encore obeissance aux Colonels de chaque regiment. Le mesme ordonna, que quiconque des Tartares, ou de leurs esclaves trouueroit vn homme, vne femme, vn cheual, ou quelque autre chose, sans passer port du Prince, s'en pourroit saisir, & en iouïroit tousiours comme de chose sienne, & par luy iustement acquise. Les impositions, exactions & gabelles y sont si grandes, qu'on ne lit point qu'aucune autre nation ayt iamais esté tant trauaillée de semblables charges.

Quant au couronnement de leurs Roys, soit qu'ils regnent par succession hereditaire, comme font les fils aînez des Empereurs, soit qu'ils parviennent à ceste dignité par faute d'hoirs capables de gouverner cet Empire, quelques-uns ont dict, que les Princes de leurs sept Tribus, ou generations, vestus de blanc, qui est la couleur dont ils vsent aussi en portant le deuil (comme font aussi les Japonois) font asseoir le Prince nouveau sur vn feutre noir, estendu par terre, luy disant qu'il regarde le Soleil, & reconnoisse Dieu immortel, & que s'il le fait, il recevra de luy au Ciel vne recompense beaucoup plus grande que sur la terre, autrement il ne luy restera que ce feutre noir pour se reposer dessus aux champs, encore ce sera avec beaucoup de peine qu'il aura cela de reste, & qu'il passera sa vie avec mille incommoditez & miseres. Ceux-là mesme rapportent qu'apres cecy on le couronne, & que les grands luy viennent baiser les pieds, & iurer fidelité, luy faisaus vne infinité de riches presens : & cela fait qu'on escrit son nom en lettre d'or, & qu'on le met aux Temples des villes capitales de l'Empire. Les autres disent, que lors qu'il est question de couronner vn nouveau Empereur, les Princes & Seigneurs Tartares suyuis du peuple, qui accourt de tous costez de l'Empire, s'assemblent en vne campagne à ce destinée, & où telle ceremonie se fait coustumierement. En ce lieu, celuy à qui l'Empire vient à escheoir, est assis sur vn throsne d'or, devant lequel tous, tant petits que grands, se prosternent, & d'une voix luy disent tout haut ces paroles : Nous te prions, & le voulons, & le commandons, que tu ayes puissance sur nous. A quoy le nouveau Prince respond. Si vous voulez que ie vous obeisse en cecy, il faut que ie le face. Cependant appeuillez-vous à faire tout ce que ie commanderay, de venir quand ie vous appelleray, & d'aller où il me plaira de vous enuoyer, & de laisser entre mes mains tout l'Estat de l'Empire, pour en disposer à ma fantaisie. Les Tartares ayans consenty à ce que dessus, l'Empereur le dict encore : Doncques la parole de ma bouche vous seruira désormais de glaive, & fera vengeance des rebelles. Le peuple applaudit des mains à ces propos, signifiant par là qu'il accepte ceste condition : Et cela fait, les Princes le tirans de son throsne Royal, le mettant à terre sur vn feutre, luy disent, comme nous auons dict cy-dessus : Regarde en haut, & reconnois Dieu, ensemble voids le lieu où tu es à present assis : Si tu gouvernes bien ton Estat, toutes choses te succederont à souhait : mais si tu ne conduits ton peuple, comme il est raisonnable, assure toy que tu seras tellement aneanty, abbatu, & desnué de grandeurs, & de richesses, que ce feutre qui te sert maintenant de siege, ne te sera peut-estre laissé pour ton seruice. Cela dict, ils luy donnent celle de ses femmes qu'il aime le mieux, & les haussants toutes deux avec le feutre, le proclament Empereur, & Imperatrice des Tartares, & sur l'heure les grands de l'Empire, & les Deputez des Prouinces, sur lesquelles il a commandement, luy portent des pretens en signe de reconnoissance. On porte aussi au mesme lieu les meubles précieux laissez par le Roy deffunt, dont le nouveau Prince en distribue partie aux grands Seigneurs du Pais, & fait garder le reste pour s'en seruir, & toutes les ceremonies estans paracheuees, chacun se retire en sa Prouince.

Cet Empereur tient tout sous sa main, & n'y a homme de ses sujets qui ose, où puissent dire qu'il a la propriété de quelque chose. Il n'est permis à personne d'habiter en autre terre qu'en

celle qui luy a esté assignée par l'Empereur, qui choisit aussi les Gouverneurs, les Generaux d'armes, & les Colonels, & ceux-cy élisent les Capitaines, & les Capitaines font choix de membres de leurs compagnies, & ceux-cy du reste qui est nécessaire pour parfaire leurs troupes. Le seau dont le grand Cham use en ses patentes, porte ces paroles : Dieu au Ciel, Chui-chuch Cham en terre : l'Empereur est la force de Dieu & des hommes. Ce Prince ne parle jamais aux Ambassadeurs estrangers, & ne souffre pas mesme qu'ils luy soient presentez, si eux & leurs presents (car c'est forfait de venir devant ce grand Seigneur les mains vuides) ne sont purifiez par des femmes deputees à cet effect. Lors il leur respond par truchement : Et tandis que ces personnes tierces & interposees parlent : il faut que les estrangers de quelque condition qu'ils soient demeurent tousiours à genoux, & soient si attentifs, que leur truchement ne laisse eschapper vne seule des paroles que le Prince profere. Car il n'est permis à personne de changer vne seule des paroles de cet Empereur, ou de manquer à executer, quoy qu'il ordonne. Ce Prince maintient la iustice avec vne extreme rigueur, veu que les criminels ayans esté fouettez la premiere fois qu'ils ont commis quelque faute, sont sciez la seconde fois par le milieu pour quelque crime que ce soit.

- 19 En quoy il semble qu'ils suyuent les opinions que les Stoïques auoient de l'egalité des pechez. Il a deux Conseils, l'un de guerre, de deux hommes sages & experimentez : l'autre d'Estat, d'autant de gens de grand iugement, & pleins de cognoissance des affaires. Ceux-cy manient tout le Gouvernement, & ont soing de punir les melchans, & de recompenser les personnes de merite : & ceux-cy n'usent pas de moindre diligence à recognoistre les faicts signalez, & les seruites faicts à l'Empereur, tant en temps de paix que de guerre, qu'à chastier ceux qui font mal, ou qui se sont portez laschement en quelque occasion. Et certainement la bonne conduite d'un Estat consiste tellement en ces deux choses, c'est à sçauoir en la punition & recompence, qu'on peut dire que c'est par leur seul moyen, que la plus grande partie des Princes barbares maintient sa grandeur. Et de faict, le Turc, le Setif, le Mogor, & le Sophy se conduisent-ils d'autre sorte ? Ils n'usent de cecy qu'en guerre, pour ce qu'ils ne fondent leur domination que sur la force des armes, & ne se soucient de la paix ny du repos, mais seulement de la victoire, & de la grandeur : si bien qu'ayants ce seul but, ils n'usent d'aucune moderation, ny en la punition des couards, & des lasches, ny en la cognoissance des vaillans, & des courageux. Et iamais il n'y eut Republique, où l'on proposast tant de belles recompenses aux hommes hardis, qu'on faict entre ces barbares. Mais on en propose beaucoup plus parmy les Turcs qu'ailleurs : pour ce que les Tartares, les Arabes, & les Persans font quelque estat de la noblesse : mais les Turcs abbattent & destruisent par tout les familles nobles, & n'estiment rien que la valeur & la hardiesse, & mettent tout leur Empire entre les mains de gens yssus de bas lieu, pourueu qu'ils se soient faicts cognoistre capables de quelque grande fortune. Ce qui se practiquoit aussi parmy les Mamelus. Mais pour retourner au Gouvernement des Tartares, il semble qu'on face parmy eux grand estat des Astrologues, & qu'ils conduisent en ce Pais-là presque toutes choses. Paul escrit qu'il y en auoit de son temps en la ville de Cambalu enuiron cinq mille, & que Cublai Cam ayant appris d'eux que ceste ville se deuoit vn iour reuolter, en fit faire vne autre nommée Taidu, qui en est fort proche.

- 20 Aureste, si quelqu'un a desrobé vne chose de peu de prix, pour laquelle il ne merite pas de perdre la vie, il est battu par sept fois à coups de baston, & reçoit dix-sept ou vingt-sept playes, selon la grandeur du meffait : & en ceste punition l'on peut donner iusqu'à cent coups, en adioustant tousiours dix. Il y en a quelques-vns qui meurent estans battus de ceste sorte. Que si quelqu'un a desrobé vn cheual, ou quelque chose de prix, pour laquelle il semble meriter la mort, on le tue d'un coup d'espee, & s'il veut racheter sa vie, il le peut en payant neuf fois autant que la chose desrobée est estimée. Mais auant que de quitter ce discours du Gouvernement, pour ce que ie vous ay parlé de quelques Hordes qui obeissent au grand Cham : i'estime qu'il sera fort à propos d'expliquer ce mot, qui pourroit arrester les Lecteurs moins entendus, & estant entendu, pourra contenter ceux qui sont plus curieux.

- 21 Horde est vne assemblée de plusieurs hommes rangez en façon de Republique, mais distribuez en telle sorte, qu'en cas de guerre il y a des Dizeniers qui obeissent aux Centeniers, ceux-cy commandent à mille hommes, ces derniers à ceux qui ont commandement sur dix mille, & ainsi de suite. Entre ces Hordes il y en a quelques vnes qui recognoissent des Ducs particuliers : d'autres qui obeissent au Moscouite, & qui sont ses tributaires : d'autres qui sont sujettes à l'Empereur, dont nous faisons mention à ceste heure.

RELIGION.

- 22 Les Tartares qui obeissent au grand Cham ne sont pas tous de mesme Religion, ains sont differens en creance, veu que quelques-vns suiuent la fausse doctrine de Mahomet, qui fut receüe en ces Pais-là enuiron l'an 1246. Ils obeissent au Pentateuque de Moyse, & obieruent

obseruent les choses cōmandees par la loy ancienne, & crient tous les iours Iahi Illo Illo Iorh; il n'y a qu'un Dieu. Parmy ceux de Catay il y a quelques Mahomerās, mais beaucoup plus d'idolâtres, dont la creance est telle. Ils tiennēt qu'il y a deux Dieux, l'un du Ciel, l'autre de la terre. Ils ne demandent au premier, lequel ils encensent chaque iour, que la santé & bon entendement: & à l'autre qu'abondance de fruiſts, grand nombre de bestail, & choses semblables. Ils disent aussi que ce dernier a femme & enfans, & soin du bestail, des semēces, & de leurs affaires: & toutes & quantes fois qu'ils mangent, ils frottent avec la plus grasse chair la bouche de l'idole de la femme, & des enfans, veu qu'ils en ont force petites effigies en leurs maisons, & iettēt apres du bouillon de la chair aux esprits hors de la maison. Ils tiennent leur Dieu du Ciel en lieu fort haut, & celuy de la terre en bas. Ils croyent que nos ames sont immortelles, mais qu'elles passent d'un corps en autre, & sont logees mieux ou plus mal, selon leurs actions precedentes: en quoy ils suyuent le Metempsychose de Pythagore. Ils honorent encor le Soleil, la Lune, & les quatre Elemens, & leurs font des sacrifices. Ils appellent le Pape, & tous les Chrestiens Dzinthis, qui signifie Payens, & Chaur, c'est à dire infideles, chiens & idolâtres. Ce qui est arriué depuis, qu'ayans esté conuiez par le Pape Innocent IV. à recevoir la foy Chrestienne, ils furent incitez par les Mahometans à suyure la Religion de l'Alcoran, comme la plus pure, disans qu'elle n'enseignoit que l'adoration d'un seul Dieu, au lieu que celle des Chrestiens estoit farcie d'idolâtres: & d'ailleurs que la leur estoit gaillarde, & permettoit tout à l'homme libre, luy mettant les armes aux mains, au lieu que celle de Christ n'estoit bonne que pour les effeminez, & pour ceux qui demandent le repos. Ils font leurs idoles de feutre, ou de drap de soye, leur portent grande reuerence. Ils ne choment ny solemnisent un iour plus que l'autre, & ne ieusnent ny ne s'abstiennent en vne saison plus qu'en l'autre, comme font les Mahometans, ains les iours & les saisons coulent chez eux d'une mesme sorte.

Quant aux Tartares Iuifs, ils sont descendus des dix Tributs d'Israël, transportees par le commandement de Salmanazar Roy d'Assirie au Pais d'Arſareth, du temps du Roy Osee. Les escriuains sont en different touchant ce pais d'Arſareth, & en parlent diuerſemēt. Quelques-uns veulent que ce soit le Pais de Colchos, appellé pour le iourd'huy Mingrelie, pour ce que Herodote escrit que les Colchois vſoient de la Circoncision. Mais la plus grande partie estime qu'Arſareth est la Prouince de Belgian, d'où les Iuifs sortirent sous le nom des Tartares, l'an 1200. sous le grand Chingis fondateur de l'Empire de Catay, & pour ce qu'ils auoient retenu la Circoncision, & quelque autre chose de la Loy Mosaique, ils deuindrent ayſément Mahometans. Toutesfois ils sont presque tous idolâtres encor en Catay, horsmis qu'outre les Mahometans, dont nous auons parlé, il y a encor quelques Iuifs & Chrestiens; mais en petit nombre.

Et quant aux Chrestiens, leur Religion est fort alteree & corrompue, comme l'effect le declare, veu que voyans leurs parents ja vieux, afin d'en despescher le monde, ils les nourrissent de graisse plus que de raison, si bien qu'ils s'en vont languissans depuis cela, & si tost qu'ils sont morts, ils bruslent leurs corps, en recueillant fort soigneusement les cendres qu'ils gardent comme chose precieuse, en mettant sur leurs viandes lors qu'ils prennent leur refection. D'ailleurs ils ont suiuy l'heresie de Nestorius, qui s'est estendue iusqu'à la ville de Campion, & regne encor en quelques-uns qui demeurent à Tangui, à Sucuir, à Cambalu, & en d'autres villes de cēt Empire. Ces Nestoriens, quoy qu'ils parlent plusieurs langages, selon les Pais où ils se trouvent, celebrent toutesfois seulement leur Office en Caldaic. Leurs erreurs sont, qu'ils tiennent que la nature humaine en Iesus-Christ, est sans personne semblablement humaine defectueuse: & pour ceste cause ils mettent en Christ deux personnes. Ils n'appellent pas la Vierge Marie Mere de Dieu, pour ce qu'ils disent que le nom de Dieu comprenant le Pere, le Fils, & le S. Esprit, il s'ensuiuroit qu'elle seroit Mere de toutes les trois personnes Diuines: toutefois ils confessent à present qu'elle est Mere de Dieu le Fils. Ils tiennent pour saints Nestorius, Theodore de Mafſuestie, Diodore de Tarſe, & Paul de Samosate, & condamnent S. Cyrile Alexandrin. Ils disent que c'est autre chose d'estre Dieu le Verbe, autre chose d'estre Christ. Ils n'ont pas le premier Concile d'Ephese, ny les suiuan. Leurs Patriarches ne sont pas eleus, mais viennent par succession de pere en fils. Ils les creent pemierement grand Archeuesque, puis sans autre ceremonie il succede au Patriarche qui vient à mourir. L'an 1119. le Prestre-Ian qui commandoit en la Prouince de Hatay, ou comme quelques autres disent, en celle de Tenduc (les habitans du Pais le nommoient Ioane) receut ceste heresie Nestorienne: mais il fut ruiné par le grand Chingis, ou Canguiste Roy des Tartares, l'an 1162. & 40. ans apres qu'il eut receu cēt erreur. Toutefois il resta un Seigneur d'un petit Estat, qui fut recommandé par certains Religieux de S. Dominique au grand Cham, par le commandement d'Innocent IV. Et l'on trouue encor au iourd'huy par les Estats qui sont sujets à cēt Empereur, beaucoup de Chrestiens qui liuent toutefois ceste secte condamnée. Et mesmes quelques Anglois qui ont esté en ces pais là, rapportent que l'Archeuesque de Cambalu couronne le grand Cham lors qu'il vient à succeder à l'Empire.

GENEALOGIE DES EMPEREURS TARTARES.


IL faudroit auoir d'autres relations que celles qui nous sont tombees entre les mains, ou bien estre plus proches du pais dont nous parlerons pour faire le denombrement des Empereurs qui y ont regné iusqu'à ce iour, & les specifier tous l'un apres l'autre. Mais pour ce que nous n'en pouuons auoir vne si parfaite & entiere cognoissance, il se faut contenter seulement de ce qu'on a peu apprendre de ceux qui sont aduancez plus que les autres, à discourir de la succession de ces Princes. Paul Venitien tient cet ordre en nommant les Empereurs qui ont dominé en Catay. Il met premier Canguiste, ou Chingis, ou Cinchins, puis loge au second rang Chny: au troisieme Barchim, au quatriesme Allau, puis Mongu, & nomme apres Cublay, en la Cour duquel Paul demeura quelque temps. Mais Hayton Armenien leur a baillé les noms qui s'ensuiuent. Il nomme premier Changy Cam, puis Hoccora Cam, & apres Gino Cam, & met apres ceux-cy Mange Cam, puis Cobilla Cam, qui bastit la ville de Ions en Catay, qu'on tient estre la mesme que Cambalu. Il fait suiure en ceste liste d'Empereurs Tamor Cam, qui regnoit en Catay du temps de Hoyton en l'an 1308. Entre les autres Hoccora Cama eut beaucoup d'enfans, le plus vieil desquels estoit nommé Gino Cam, qui succeda à son pere à l'Empire de Catay, & lochy son frere vint aux parties Occidentales, & s'empara du Pais de Perse, de Turquestan, & de quelques autres Prouinces, & vn autre frere nommé Baydo conquist les pais Septentrionaux, & prenant le chemin d'Europe vint en Hongrie, & engendra Tamerlan, celui qui fit tant de maux aux Prouinces Occidentales d'Asie, & à quelques vnes d'Europe. Or Gino Cam mourut ieune en Orient, & le plus proche apres luy nommé Mango fut fait Empereur. Cestui-cy assaillit certaine Isle Orientale, dont les habitans estoient rebelles. Mais les assaillis se plongerent secrettement dans l'eau, & percerent le nauire où estoit Mango, de sorte qu'il perist avec tous ceux qui estoient dedans. Lors son frere Cobila nommé Cublay par Paul, fut créé Empereur, & fit profession de la Religion Chrestienne, que les successeurs n'ont toutes-fois maintenüe. Celuy qui a fait l'abregé de l'Atlas de Gerard Mercator décrit encore ceste Genealogie d'autre. Il s'accorde avec tous les autres touchant le premier, & le nomme Changy Cau, ou Cam, disant que c'est celui-là mesme que Paul Venitien nomme Chinchis, qui viuoit enuiron l'an de grace 122. Les Tartares viuoient auant sa domination brutalement, sans loix & sans ciuilité, n'auoient aucune reputation parmy les Scythes, ny les autres nations, & payoient tribut à leurs voisins du bestail qu'ils auoient. Ce Changy estendit son Empire depuis la Chine iusqu'à la mer Caspie en bien peu de temps. Il eut pour fils Iochucham, qui engendra Zam Cam troisieme Empereur, nommé Bathy par quelques autres. Ce fut cestui-cy qui rauagea la Russie, la Pologne, la Silesie, la Morauie, & la Hongrie. Le quatriesme Empereur fils de Bathy fut Temir Cutlu, que nos Histoires nomment Tamerlan, qui courut toute l'Asie, passa iusques en Egypte, prit Bajazet Empereur des Turcs, & mena lié de chaines d'or par toute l'Asie. Le cinquiesme Empereur, fils de Temir Cutlu, fut Temir Gzar, qu'on disoit auoir esté tué en combattant vaillamment contre les Cheualiers Porte-croix de Prusse. Le sixiesme sorty de Temir Gzar fut Macmetczar, qui eust pour successeur Armetczar, & celui-cy engendra Sziachmet huietieme Empereur des Tartares.

DISCOURS
DE L'ESTAT DV ROY DE
LA CHINE.

SOMMAIRE.

- | | |
|--------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|-------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| <p>1 D IVERS appellations du Royaume de la Chine, tant anciennes que modernes.</p> <p>2 Son circuit, & combien il contient de lieues.</p> <p>3 Partition de ce Royaume en quinze Prouinces. Le nombre des villes & Citez qui sont en chacune Prouince. Leur situation & forme de bastimens, & grands chemins panez, vnus iusques aux montagnes, & tailléz à coups de marteaux.</p> <p>4 Description de la muraille qui separe les Chinois</p> | <p>d'avec les Tartares, contenant cinq cents lieues.</p> <p>5 Du Palais & demeure Royale des Monarques de la Chine.</p> <p>6 De la couleur & composition d'humeur des Chinois. Fertilité incomparable des terres du Pays, qui portent trois & quatre fois l'année. Fruicts de diuerses sortes qu'il produict, miel, sucre, melons, prunes, oranges de trois sortes. Abondance de soye, lins, chanvres, cotons, bleds, minieres, arbres, musc, bestiaux,</p> |
|--------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|-------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|

- bestiaux & poissons de toutes sortes, herbes medicinales, mines d'or, argent, & autres metaux, & perles precieuses.
- 7 Chinou industrieux, disposés, laborieux, & naturellement enclins à faire bonne chere, & estre bien vestus, la forme de leur visage & hauteur de corps.
 - 8 Façon de faire le musc en la Chine.
 - 9 Forme & couleur des habits & vestemens des Nobles, & du Peuple, des hommes & des femmes, la façon de leurs cheveux & sard.
 - 10 Coutume des Chinoises de porter petits souliers, & les pieds serrez de bandes, & pourquoy.
 - 11 Industrie grande des Chinois en l'Art de sculpture, & peinture, & à faire chariots à vents & à voiles.
 - 12 Quelles sont les marchandises que les marchands vendent communément aux estrangers.
 - 13 Comment se fait la vaisselle de Porcelaine en ce Pays.
 - 14 Du dot, mariage, festins nuptiaux, & polygamie des peuples de la Chine, & leurs loix touchant les successions & heredités.
 - 15 Leur coustume estrange, par laquelle ils sont contraincts dans certains temps, se marier, ou d'entrer en Religion.
 - 16 Du Mariage des Roys, & de leurs enfans, & les festins solennels qu'on y celebre.
 - 17 Ceremonies pratiques es funerailles & obseques, festins funeraux, & deuil des Chinois.
 - 18 Leur breuvage fait d'el herbe Chia, au lieu de vin. Et de quelles viandes sont apprestez leurs festins & banquets solennels.
 - 19 De l'inuention de leur artillerie : & de leurs caracteres, ou lettres hieroglyphiques, & façon estrange d'escrire & tirer leurs lignes du haut de la page en bas.
 - 20 Quelles sont leurs montures & carrosses en leurs voyages, & quels leurs vaisseaux & equipage de marine.
 - 21 De la pesche qui se fait par l'industrie des Corbeaux marins, ou plongeurs.
 - 22 Des respectueuses requestes presentees au Loysia : & des façons de faire estranges en leurs visites, & conuersations des compaignies.
 - 23 Richesses de la Chine en mine d'or, d'argent, & autres metaux, Perles, Vases de Porcelaine, sonrures precieuses, de lin, de laine, coton, soye, sucre, miel, rhubarbe, camfre, vermillon, pastel, musc.
 - 24 Reuenus du Roy à quoy se montent, & quel tribut il leue sur chacune sorte de marchandise.
 - 25 Quelles sont ses forces, ses gens de guerre, & l'ordre qu'il y tient, & premierement du Conseil de guerre establi en chaque Prouince.
 - 26 De l'Infanterie & Canallerie Chinoise, leurs appareils de guerre, leurs armes & façon de combattre.
 - 27 Des forces Navales.
 - 28 Particuliere relation des gens de guerre, entretenus & soudoyez en chaque prouince.
 - 29 Des Academies de la Chine : des Visiteurs establis sur icelles par le Roy : & des Promotions solennelles qui s'y font de trois ans au garde de Loysias.
 - 30 Serment que prestent par deuant les Visiteurs, ceux qui doiuent recevoir le degré de Loysias.
 - 31 Du Conseil des douze Auditeurs, erigé en la ville de Thebain.
 - 32 Des Vice-Roys & Gouverneurs des Prouinces appelees Comon, Insuanto.
 - 33 Des autres Officiers particuliers, comme le Tompe, Quinquay, & autres Juges, & leur forme de proceder en l'administration de la Justice.
 - 34 Des supplices dont ils vsent contre les criminels.
 - 35 Leurs loix touchant les Voyageurs & Mendians.
 - 36 De l'idolatrie des Chinois, & quels Idoles ils adorent, leurs sacrifices au Diable, & leur croyance touchant le Ciel, & choses celestes.
 - 37 Description de plusieurs manieres de sort, dont ils vsent.
 - 38 Leur opinion touchant la creation du Monde, qu'ils disent auoir esté basti par leur Tain. Deité logee au Ciel.
 - 39 Leur croyance touchant l'estat des ames separees du corps. Et la forme de leurs prieres pour les Trespassez.
 - 40 De leurs Monasteres, & des quatre Ordres de Religio, qui ont chacun leur General appellé Tricon.
 - 41 Genealogie des Roys de la Chine.



LE GRAND Royaume des Chinois, dont Ptolomee a cogneu le nom, & ignoré la puissance. est celuy mesme que Marc Paul nomme la Prouince de Mangi. & que nous appellons ordinairement la Chine, sans qu'on puisse scauoir quel fondement on a eu qui peust conuier les premiers Autheurs de ce nom à l'imposer en ceste sorte, si ce n'est que la chose soit arriuee par corruption du mot, & que de la Sine on ayt fait la Chine changeant vne lettre en deux, & que la coustume, & la continuation ayt eu cet aduantage sur l'antiquité, de le faire passer ainsi alteré iusques à nostre siecle.

La Chine est située sur le tropique de Cancer, & toute sa coste s'estend au Nord-Est, & au Sud Est la longueur de 400. lieues, au costé du Midy il a le Royaume de Cochinchina; au Nord & au couchant, la Tartarie & le Cathay, où on dit que le peuple est blanc, & y a beaucoup de Chrestiens, auquel Pais le Royaume de Perie est limitrophe.

Anciennement les Tartares ont possédé ce Royaume, selon que les Annales mesmes du pais enseignent : mais ils en ont esté chassés par les naturels, lesquels voulans pourvoir à l'assurance de leur pais pour l'aduenir, ont dressé vn mur, afin d'empescher les courtes & pilleries de ces peuples coureurs, & depuis le sont trouuez assurez.

cc ij

Ceux qui sont voisins de cét Estat luy donnent ordinairement le nom de Sangley : mais les Chinois, selon Magin, & Mercator, luy baillent celui de Tame, ou bien selon l'Authent de l'Histoire generale de la Chine, celui de Taybinco, qui ne signifie autre chose que Royaume, & les habitans se nomment eux-mêmes Tangis. C'est le Pais le plus Oriental de toute l'Asie, ayant pour voisin du costé d'Orient la mer Oceane, & vn peu plus auant l'Isle de Coree, & puis les Isles du Japon, du Midy, en partie la mer Occane, & en partie le Royaume de Cochinchine, du Couchant les Bramas ou Brachmanes, & vne partie de Tartarie, & du Nort, la seule Tartarie, de laquelle ce Royaume est separé par des montagnes, & à leur defaut par des murailles. Il s'estend presque depuis le Tropique del Escreuissie iusques au cinquante-troisiesme degré de latitude, & contient en sa longueur tous les Meridiens compris entre le cent trente, & le cent soixantième degré. Mais afin de sçauoir plus exactement son estêdue, & sa grandeur, nous rapporterôs icy ce que les Chinois mesmes en ont escrit, & qu'on a trouué dans leurs liures.

- 2 Ce Royaume contient donc en circuit, selon eux, soixante-neuf mille cinq cents seize diez, qui est vne mesure dont ils vsent, & ces diez reduits à la façon de compter d'Espagne, sont presque trois mille lieües de tour, & mille huit cents lieües de long.

On a trouué dans le mesme liure, d'où ce calcul a esté tiré, que les Chinois ont seulement trois mesures pour arpenter, qu'ils appellent en leur langue Lij, Pu, & Icham, qui est autant presque, que si nous disions stade, qui estoit de 125. pas, lieües, iournee. La mesure qu'ils nomment Lij, comprend autant d'espace, que l'on en peut assigner à la voix qu'un homme pousse de toute sa force en vn temps coy, & en vne belle plaine. Dix de ces Lijs font vn Pu, qui est vne grande lieüe Espagnole, & dix Pus font vne iournee entiere, par eux appellee Icham, qui reuiert à douze grandes lieües. Suiuant ce compte, l'on trouue que ce Royaume contient les lieües susmentionnees. Il est vray que par le calcul de quelques autres liures, l'on a trouue plus de lieües : mais le Pere Martin de Herrade Provincial des Augustins aux Philippines, & tres-excellent Geometrien & Cosmographe, a veu & cogneu que ceux que nous auons suiuis, estoient veritables, & que ce pais auoit trois mille lieües de tour, & mille huit cents de long, commençant à la Prouince d'Olam, qui tire plus vers le midy, & est plus proche de Malaca.

- 3 Ce Royaume est diuisé en quinze Prouinces, y comprise l'Isle d'Anayo, & chacune a sa ville capitale, & a plus d'estendue que le plus grand Royaume dont nous ayons cognoissance en Europe. Quelques-vnes de ces Prouinces portent le nom de la ville capitale où se tiennent les Gouverneurs, Presidens, & Viceroyes de ces quinze Prouinces : il n'y en a nulle qui n'egale en grandeur quelqu'un des plus grands Royaumes d'Europe.

Entre ces Prouinces il y en a deux, Paguia, & Tolanchia, qui sont gouvernees par le Roy en personne, & par son Conseil, à cause que ce Prince reside tousiours en l'une de ces deux, qui sont les plus grandes de tout son Estat, & les mieux peuplées. Ce n'est pas toutesfois que ce seul sujet le conuie à s'y tenir ordinairement, veu qu'il le fait pluslost à cause du voisinage des Tartares, avec lesquels les Chinois sont continuellement en guerre.

Et afin que le Roy de la Chine peust plus aisément remedier aux troubles & inconueniens qui pourroient suruenir de ce costé-là, & par mesme moyen offencer son ennemy avec plus de commodité, il y a logé sa Cour, & establi sa demeure.

Au milieu de ce Royaume il y a vn fort grand Lac, duquel sourdent plusieurs riuieres & torrens, avec telle abondance d'eaux, qu'on y peut nauiger aisément par tout avec barques & brigantins de ceste multitude d'eaux procede l'abondance & la fertilité de toutes choses au Pais, le long de ces riuieres d'un costé & d'autre se voyent diuerses villes, qui apportent de grandes commoditez à vn chacun.

Leurs Annales & Histoires font mention, qu'en ces 15. Prouinces il y a 151. Citez, & quinze cents nonante & trois villes, sans conter diuerses bourgades, dôt le circuit est aussi grand que beaucoup de villes.

La ville Royale & capitale du Royaume s'appelle Xuntien ou Tabijn, & d'aucuns Quinzay, le nom de Xuntien en langage Chinois signifie Cité du Ciel : sa grandeur est telle, que c'est ce que peut faire vn homme de cheual de la trauerser en vn iour.

Les quinze Prouinces s'appellent Pasquia, Canton, Foquien, Olam, Cincay, Susnam, Tolanchia, Canlay, Oquiam, Auchco, Honam, Xanton, Quicheu, Chequeam, & Saxij, ou Sancij. Toutes, mais principalement les dix qui sont maritimes, & assises pres des costes de la mer, sont presque de tous costez separees par de belles riuieres d'eau douce, profondes, & nauigables, & bordees de part & d'autre, de grands riuages, & de beaucoup de bonnes villes, qu'on peut non seulement nombrer, mais nommer, à cause que les Chinois sont si curieux, qu'ils mettent en leurs liures iusqu'aux noms des maisons de plaisir, que les Seigneurs & Loytias y possèdent. Mais il me suffira de mettre le nôbre des villes & Citez qui sont en chaque Prouince, & d'estre brief en çecy, pour n'ennuyer pas mon Lecteur.

La Pro-

La Prouince de Paquia, où le Roy & son Conseil demeurent ordinairement, contient quarante-sept Citez, & cent cinquante villes.

La Prouince de Canton contient trente-six Citez, & cent quatre-vingts dix villes.

Celle de Foquiem trente-trois Citez, & cent quatre-vingts dix villes.

Celle d'Olam nonante Citez, & cent trente villes.

Celle de Cinsay trente-huit Citez, & cent vingt-quatre villes.

Susnan quarante-quatre Citez, & cent cinquante villes.

Tolanchia cinquante-vne Citez, & six-vingts trois villes.

Canlay vingt-quatre Citez, & cent douze villes.

Oquiam dix-neuf Citez, & soixante & quatorze villes.

Ancheo vingt-cinq Citez, & vingt-neuf villes.

Honam vingt Citez, & cent deux villes.

Xanton trente-sept Citez & soixante & dix-huit villes.

Quicheu quarante-cinq Citez, & cent treize villes.

Chequeam trente-neuf Citez, & quatre-vingts quinze villes.

Saxij, ou Sancij quarante-deux Citez, & cent cinq villes. Or les Chinois ont coustume de terminer le nom des Citez par ceste syllabe Fu, qui vaut autant à dire que Cité, comme Taybinfu, Cantonfu, & le nom des villes par ceste syllabe Cheu.

En la seule riuere de Canton, il y a plus de barques & fregattes qu'il ny a en toute l'Espagne: l'air y est doux, la terre tres-fertile, & abondante en froment, riz & legumes, & n'y a nulle saison de l'annee qui ne soit propre pour y semer, ou moissonner.

En chacune des villes principales, où les Gouverneurs & Viceroyes commandent est esleué le portraict du Roy voilé d'un riche tapis: auquel portraict tous Officiers, Loitiers, & Mandarins, font honneur avec telle reuerence, comme si le Roy meime estoit present: Le tiltre qu'on luy donne, *Le Roy & Seigneur du monde, & fils du Ciel.*

Nul ne peut porter en la Chine, ny auoir dard en sa maison, sinon ceux qui ont cet honneur d'estre aux gages du Roy, les fils desquels aussi reçoient ce droit de porter armes, comme hereditaires.

Entre ce grand nombre de villes & de Citez, il y en a près de deux cents de marque, qui sont pour la pluspart basties sur des riuieres qui portent batteaux, & ceintes de fossez larges & profonds, closes de murailles de pierre de taille, depuis le bas iusqu'au haut, & sur le haut il y a de la brique faite de mesme matiere que la vaisselle de porcelaine, & si proprement cimentee, que en peu de temps elle durcit en telle sorte, que l'on ne peut mesme en desioindre les carreaux à coups de pics & de marteaux. Les murailles sont si espais, que quatre hommes pour le moins y peuuent marcher de front, voire six en quelques endroits, outre les guerres, galeries, & promenoirs cachez, où les Gouverneurs vont à plaisir: le parapet, dedans & dehors, estant si spacieux & libre, que six hommes de cheual y peuuent marcher ensemble tout de front. Pour la commodité des batteries & defences, il y a des tours & des bouleuars proches les vns des autres, qui ont leurs sentinelles commodément disposees, & leurs casemates propres. On trouue que quelques-vnes de ces murailles sont debout depuis plus de deux mille ans, sans qu'il y paroisse nulle creuasse, ou ouuerture, tant les Voyers & Contreroolleurs des bastimens publics, prennent garde à ce qu'il ne s'y face aucune fente, ou ouuerture.

Chaque ville de marque est bastie comme s'ensuit. Il y a deux grandes & larges rues, droictes, my-parties en croix, & longues, autant que la portee de l'œil le plus vif se peut estendre, qui aboutissent à quatre portes, également distantes, toutes garnies de fer, & magnifiquement basties, & dont la veüe est merueilleusement agreable. Ces deux rues croisees sont entrecoupees d'autres rues, & ruelles, & enrichies de bastimens publics & particuliers, qui seruent à la remarque des places & des destours diuers. On voit aux deux costez des rues des portiques qui s'aduancent, & seruent à contregarder les allans & les venans, outre ce, les boutiques des artisans les garantissent des pluyes, & autres incommoditez de l'air.

Dauantage, on y voit de grandes & belles arcades de pierres polies, magnifiquement dressées, que les Gouverneurs font faire avec diuerses inscriptions, auant que de se retirer des villes, apres y auoir seruy le temps que le Roy leur a prescrit.

Aux plus commodés & frequens endroits de chaque ville, l'on void les superbes bastimens & logis des Gouverneurs, avec leurs beaux iardins, vergers, fontaines d'eaux viues, & ruisseaux, qui arrosent artificiellement les parterres, pour le plaisir de ces Seigneurs, qui ont aussi leurs volieres, parcs, garennes, & bocages: tellement qu'il n'y a Palais de Gouverneur qu'on ne puisse comparer à vne ville. Les maisons des particuliers aupres de la mer, sont basses, & en terre ferme: elles ont diuers estages, & sont peintes par dehors, ou enduites d'un blanc clair, & net au possible.

On void à l'entree vn porche spacieux, & ouuert, garny d'armoiries proprement ageancees, qu'ils remplissent d'idoles : & apres l'on void des viuiers pleins de poissons, & des iardins au haut des maisons. Les pierres des bastimens sont soigneusement polies, & tellement enduites, qu'on diroit qu'elles sont dorees. Le couuert est poly de mesme & cimenté si proprement, que les pluyes ne luy peuvent nuire, & ces toits là durent plus de cent ans, les gouttieres estans faites de marbres ingenieusement mis en œuvre. On void au deuant des portes des maisons, des arbres touffus & verds, arrangez par ordre, & par compas, si plaisans à voir, que les yeux plus las & plus foibles en sont aussi tost recreez. Or, outre que plusieurs de ces villes sont trauesees de grands fleuves : il y en a aussi quelques-vnes accommodees de canaux, pour donner entree aux vaisseaux marchands, qui y chargent & deschargent force biens, de mesme qu'on void à Vtrecht, & autres villes du Pais bas : & il y a des leues propres pour aller aussi par terre, outre les ponts de pierres qui sont, tant aux villes qu'en plusieurs endroits de la campagne.

Quant aux riuieres qui s'enflent & haussent tellement, qu'on ne peut y planter des paux, ou bastir des arches, on dresse dessus des ponts de batteaux. Hors des villes, sur tout maritimes, l'on void des faux-bourgs superbemens bastis, avec de belles grandes rues, où sont les tavernees & hostelleries pour les marchands estrangers, & l'on trouue en ces lieux-là, outre les boissons delicieuses, selon la coustume du Pais, toutes sortes de viandes, cuites & crues.

Pour le regard des petites villes & bourgades, dont quelques-vnes sont composees de trois mille feux, y compris les villages fort proches les vns des autres, il y en a tant, qu'on n'en sçait pas le compte. Elles sont pour la plupart en fort belle assiette, bien fournies d'eau & de bois, & l'on ne void presque autre chose par les campagnes, que des maisons des riches laboureurs qui sont fort hautes.

Toutes les maisons ont ordinairement trois portes, celle du milieu qui est grande, & celles des deux costez plus petites, & faites à proportion, selon leur mode de bastir.

Il faut aduoüer qu'il y a d'excellens Architectes en ce Royaume, & si les ouuriers y sont bons, les materiaux pour bastir y sont les meilleurs du monde, pour ce que comme j'ay desia dict, il y a vne terre blanche, dont l'on fait des carreaux, qui sont si forts, qu'il faut auoir de bons marteaux, & vne grande force pour les rompre. En toutes les Citez capitales on voit le logis du Roy, demeure du Gouvernement, qui est tousiours magnifique. Les chemins y sont les meilleurs, & les mieux pavez de toutes les terres decouuertes, & si plains, & vnis par tout, que iusques aux montagnes, il y a de grands chemins taillez à coups de marteau, & pavez de pierre & de quareau : de sorte qu'au dire de ceux qui l'ont veu, c'est vn des plus remarquables ouurages, & des plus commodes qu'il y en aye en tout les Royaumes. L'on void en la ville de Fucheo vne tour deuant le logis du Thresorier General du Roy, qui surpasse, selon le tesmoignage de ceux qui l'ont veu, tous les edifices Romains, estant fondee sur quarante colonnes, dont chacune est bastie d'une seule pierre, qui est si grande, & si grosse, qu'elle estonne ceux qui la considerent.

4 Mais, pour ce que nous auons cy deuant parlé de la muraille qui separe les Chinois d'avec les Tartares, il me semble qu'il est à propos d'en discourir icy plus particulièrement, pour satisfaire au desir de ceux qui desirent en estre formez au long.

Ceste muraille, ou enceinte, qui a cinq cents lieues de long, & commence depuis la ville d'Ochioy, qui est entre deux montagnes fort hautes, & s'estend du Ponant au Leuant, fut faite par vn Roy nommé Tzinizon, à celle fin de deffendre la Chine des Tartares.

Toutesfois il faut entendre, que de ces cinq cents lieues que contient ceste muraille, il y en a quatre qui sont fermees de fort hautes montagnes. pour le regard des cent autres qui estoient pour clorre la distance qu'il y auoit entre ces montagnes, ce Roy fist faire ceste muraille de pierre de taille tres-forte, qui a sept brasses de large par bas, & autant par haut. Elle commence du costé de la mer, en la Prouince de Canton, & va par celle de Pasquia, & de Canlay, & finit à celle de Susan.

Ce Roy voulant faire cét œuvre admirable, prit la troisieme partie des habitans de son Royaume, qui moururent presque tous en ceste belongne, ou à caue du chemin, ou pour le changement d'air, combien que chaque Prouince aboult à la partie la plus voisine. Aussi cét ouurage si superbe, fut cause que tout le Royaume se reuolta, & qu'on tua le Roy, apres qu'il eut regné quarante ans, & vn sien fils nommé Agnitzi autant que luy.

5 Venons maintenant à la demeure du Roy, pour acheuer entierement la description de ce que l'on voit de plus beau, & de plus remarquable en ce Royaume. Il la tient ordinairement en la Prouince de Pasquia, en la ville de Thaybin, ou Suntien, ou comme nous auons desia dit, à caue des Tartares, dont elle est voisine, ou peut estre plustost à caue de l'air du Pais, qui est plus sain & plus doux en ceste Prouince qu'aux autres, comme il est facile de cognoistre par le

par le mot de Suntien, qui vaut autant à dire en leur langue, que ville celeste. Ceste ville est si grande, que pour la trauffer de porte en porte, il faut qu'un homme marche toute vne iournee sur vn bon cheual, & en diligence, encores n'y comprend on pas les faux-bourgs, qui ont autant de tour, ou peut s'en faut, que la ville.

Il y a si grand nombre de peuple dedans, que les Chinois assurent que s'il estoit besoin de faire leuee de gens pour quelque pressante occasion, on pourroit assembler deux cents mille hommes armez, dont les cent mille seroient gens de cheual.

On voit à l'entree de la ville vers le Leuant le grand & superbe Palais du Roy, où il demeure d'ordinaire, combien qu'il en ayt deux autres, l'un au milieu de la ville, l'autre au bout deuers l'Occident. Ce premier Palais est si grand, & plein de tant de singularitez, qu'il faut quatre iours entiers pour bien voir à loisir, ainsi qu'on rapporte.

Premierement, il est entouré de sept murailles rangees en telle sorte, que en l'espace qu'il y a d'une muraille à l'autre, l'on peut aysement faire tenir dix mille soldats, qui sont en garde ordinairement au logis du Roy.

Il y a au dedans soixante & dix neuf salles magnifiques, & d'un artifice admirable, où l'on void vn grand nombre de femmes qui seruent le Roy, en lieu de pages & de Gentils-hommes. Mais les principales pieces de ce Palais sont quatre belles salles, où le Roy donne audience aux Ambassadeurs, qui viennent des pays & Royaumes estrangers, & pareillement aux Seigneurs & principaux de ses Estats, lors qu'il tient sa Cour: ce qui n'arriue guiere souvent, pource qu'il ne se laisse guieres voir au peuple hors de son logis, & presque tousiours il ne paroist qu'à trauers vne verriere.

La premiere de ses salles est faite de fonte avecques grande curiosité, & grand nombre de belles figures. La seconde, a le plancher de l'air fait de maçonnerie d'argent de grande valeur. La troisieme, est de fin or parfaitement esmaillé. La quatrieme, est de si grand prix, & l'on y void tant de richesses, qu'elle surpasse de beaucoup les trois autres precedentes, d'autant qu'elle represente la puissance, & les moyens de ce grand Roy, & pour ceste cause, ils l'appellent en leur langue, la salle du thresor du Roy, assurant qu'elle est bien digne de ce nom, attendu qu'elle contient le plus grand thresor qu'aucun Roy puisse auoir.

Encores outre le thresor, il y a grande quantité de ioyaux de valeur inestimable, & vne chaire où ce Prince s'assied en maiesté, faite de marbre, dans lequel on void plusieurs pierreries precieuses enchassées, & des escarboucles si riches, qu'en la plus grande obscurité de la nuit, elles rendent la salle aussi claire que s'il y auoit beaucoup de chandelles allumées.

Les parois de ceste sale sont de diuerses pierres de grande valeur, mises en œuvre avec beaucoup d'industrie, & pour comprendre en vn mot tout ce qui se dit de ceste sale, il suffit de sçauoir que c'est la plus belle piece qui se puisse voir en tout le Royaume, & qu'elle contient tout ce qui est de meilleur, & de plus riche.

Q V A L I T E.

NOus auons veu l'estendue de ce grand Royaume, nous auons fait le denombrement de ses villes, & remarqué la magnificence de ses bastimens: voyons maintenant si le pays merite de telles despences, & s'il est capable de fournir aux frais excessifs de ces edifices. Pour commencer donc, il faut sçauoir que le temperament des Estats subiects à ce puissant Monarque, est fort diuers, à cause qu'ils sont presque tout assis en tirant au Midy au Septentrion, & ont vne si grande estendue de pays, qu'encores que l'ile d'Aynan qui est proche de ce Royaume soit à dix neuf degrez de hauteur, ou latitude, on a toutesfois cognoissance de quelques Prouinces esloignées de l'Equateur de plus de cinquante degrez, ainsi que nous auons desjà dit en descriuant ce Royaume.

Or l'on peut assez cognoistre la distance qu'il y a d'une extremité du Royaume à l'autre, par la grande difference des couleurs qu'il y a entre ces habitans: car les Portugais qui ont traffiqué ordinairement à Canton avec les Chinois, pource que ceste ville est assez pres de Macao, où lesdits Portugais se sont habitez des longs temps, rapportent qu'on void en ceux qui traffiquent des visages de couleurs fort differentes, & en tout dissemblables.

Ceux qui naissent en la Prouince de Canton, & en toute ceste coste sont noirs, comme ceux de Fez en Afrique, pource que ce pays est en mesme paralelle que la Barbarie: mais ceux des autres prouinces en dedans sont blancs la plupart, les vns toutesfois plus que les autres, selon qu'ils sont plus aduancez dans le pays froid: veu qu'il y en a quelques vns qui retirent aux Espagnols, & d'autres qui sont plus blonds, qui ressemblent à peu pres à des Allemands, estans blonds & rougés. Bien, on ne peut dire en general de ce grand Royaume qu'il soit chaud ou froid, d'autant qu'il est enclos dans la Zone, ou ceinture, que les Geographes appellent

Temperée, & aussi pource qu'il s'estend vers vn mesme climat que l'Italie. Et par là l'on peut assez entendre la fertilité, qui est sans doute la plus grande qui soit au monde, encores qu'on luy veuille comparer le Perou, & la nouvelle Espagne.

Car c'est chose asseurée que la terre y porte trois & quatre fois l'année, ce qui fait encores cognoistre la bonté de l'air, c'est que le pays y fourmille d'enfans, qui sont beaux à merueilles en leur petitesse. Mais afin de specifier quelque chose, ce pays produit toutes sortes de verdure, & vne grande quantité de diuers fruits pareils à ceux qui viennent en Espagne, outre beaucoup d'autres que l'on ne cognoist point par deçà, pource qu'ils sont different des nostres, & tous ces fruiets sont bons, comme l'on dit, par excellence. Il y a trois sortes d'oranges, les vnes si douces, qu'elles surpassent le sucre en douceur, les autres vn peu moins, & les autres qui ont vne petite pointe d'aigreur fort plaisante au goust.

Il y a aussi vne sorte de prunes, qu'ils appellent Lechias, qui sont d'un goust extremement agreable, & ont outre ce telle propriété, qu'elles ne saoulent iamais, & ne font point de mal à l'estomach, combien que l'on en mange beaucoup. Il produit des melons en abondance, qui sont fort gros, & excellemment sauoureux, & vne sorte de pommes de couleur brune, qui sont grosses, & de tres-bon goust. Il y a vne quantité de sucre par tout ce Royaume, qui est cause qu'il est à si bon marché que cent liures de plus fin, & du plus blanc, mesme lors qu'il est plus cher, ne vaut pas plus de six reales.

Il y a semblablement du miel en grande abondance, tellement qu'il y est à fort bon prix, de mesme que la cire, dont l'on peut charger des nauires entieres, & des flottes mesmes. Ils ont beaucoup de soye, & parfaitement bonne. Il y vient beaucoup de lin, dont le commun peuple s'habille ordinairement, & du chanvre aussi, duquel ils se seruent à calfeutrer les nauires, & à faire des cordes, & des chables. Aux terres dures & seiches, encores qu'elles soient pierreuses, ils recueillent beaucoup de cotton, & y sement du bled, de l'orge, du seigle, de l'auoine, & plusieurs autres sortes de grains, qui rapportent beaucoup, & autant les vns que les autres. Aux terroirs humides & aquatiques qui y sont en grand nombre, à cause de l'abondance des belles riuieres qui sont en ce Royaume, ils y sement du riz, qui est la commune viande de ceste nation, & en recueillent en telle quantité, qu'au temps qu'il est plus cher, vne haneque, mesure d'Espagne assez grande, ne vient à valoir qu'une reale, & la terre porte ordinairement de ce grain, & de tous les autres, trois & quatre fois l'année, comme nous auons ja dict. Aux hauts pays, qui ne sont pas propres pour semer, ils ont de belles rangees de pains, qui portēt de gros pignons fort sauoureux, & des chastagniers aussi, & outre ces arbres, ils y sement du maiz, qui est le mager & pain ordinaire des Indiens de Mexique, & du Perou, avec beaucoup de paniz, pour ne perdre vn eipan de terre. Toute la plaine campagne est tres-agreable à voir, l'on y sent beaucoup de diuerses fleurs odoriferantes de toutes sortes qu'elle produit. Dauantage, elle est embellie de belles rangees d'arbres, qui bordent communement les riuieres, & aussi les ruisseaux.

Les Loyrias ont coustume de planter de grandes forests fort espaisées, où ils nourrissent force sangliers, daims, connils, lievres, & autres bestes diuerses, des peaux desquelles ils font de tres-bonnes fourrures, & specialement de martes zibelines, qui y sont en grand nombre. Il y a du mutic en grande abondance, qui vient d'une espece de petites bestes, qui ne mangent autre chose qu'une racine odoriferante, nommée Camaruë, qui est de la grosseur d'un doigt. Outre ce, il y a grande quantité de bœufs & de vaches, qui valent si peu, qu'on en a vne bonne pour moins d'un escu & demy, & aussi des beufles, qui valent la moitié moins, & des pieces de venaison que l'on trouue entieres pour dix sols ou environ, & beaucoup de porceaux, qui ont la chair aussi bonne, & aussi saine que le mouton en France, ou en Espagne. Il y a grande abondance de chevres, & si grand nombre d'oyseaux qui se nourrissent aux lacs & riuieres, qu'il s'en consume chaque iour aux moyennes villes du Royaume, beaucoup de milliers, combien que ce soient canards pour la pluspart. Et on a remarqué particulierement qu'à Canton, qui n'est pas des plus grandes villes, on en mange tous les iours douze mille. Il y a force poules & chapons, de sorte que deux liures de ceste chair sans plume, & toute habillée, ne valent ordinairement que deux fois, qui est vne espece de monnoye valant environ deux doubles tournois, & ainsi des autres. Il y a aussi beaucoup d'herbes propres pour la medecine, & de rhubarbe tres-fin, & en fort grande quantité, & de la ratine nommée Chine, du nom du Royaume, & des muscades en telle abondance, qu'on en peut charger de grandes flotes, & toutes à si bon marché, que quatre cents ne valent qu'une reale, & six liures de girofle demie reale. C'est vne merueille de voir le poisson, qui y est de toutes sortes, non seulement aux costes de la mer, mais aussi aux dernieres Prouinces du Royaume, & qui en sont plus elloignees, à cause des belles grandes riuieres qui se trouuent par tout ce Pais.

Outre cela, il y a force mines d'or, d'argent, & autres metaux, auxquelles il est deffendu par

Ordonnance

Ordonnance du Roy de foliiller, au moyen dequoy tels métaux y sont apportez d'ailleurs: mais leurs maisons ne laissent d'estre garnies de meubles d'or & d'argent, & autres richesses: & est vray que l'argent y est en plus grand estime que l'or, & pourtant y est plus cher à cause que l'or a diuers prix & taxes: mais l'argent n'est que d'un certain prix. Les Perles y abondent, & l'Alioffar qui se trouue en l'Isle & Prouince d'Aynao. Ce meisme Pais produict du vif argent, de l'airain, du fer, de l'acier, de l'estaing, du plomb, du soufre, de l'ambre gris, & autres métaux. Il se trouue aussi vne infinité de perles par tout ce Royaume, toutesfois elles ne sont guieres rondes. Venons maintenant à esplucher les mœurs & les humeurs de ces gens, qui iouissent de toutes ces commoditez & delices, & n'ont pour contrepoids que de grands tremblemens de terre, qui ruinent quelquesfois des villes entieres.

M O E V R S.

C'EST chose estrange, qu'au lieu de voir en ce grand Royaume force gens oyssifs, qui se contentent de ce que la terre y produict, on n'y apperçoit que force bons mehnages, qui aydent à la fertilité du Pais par leur peine & industrie, veritablement telle, qu'ils ne pardonnent à mntagnes, valles, bords, & riuages quelconques, tellement qu'ils y sement & plantent tout ce qu'ils croient que le terroir peut porter. Ils supportent plus facilement ce travail, pour ce que chacun iouit paisiblement de son bien, & que l'on n'y souffre aussi nuls faigneans, ny vagabonds, ains telles personnes sont reputées infames, & rigoureusement punies.

Dauantage, ils sont conuiez à ce labeir par la defence qui leur est faite de sortir hors du Royaume, lequel il faut par consequent qu'ils cultiuent, s'ils y veulent bien viure. Et d'ailleurs, les Chinois estans naturellement enclins à faire bonne chere, & à estre tousiours bien vestus, & auoir leurs maisons bien accommodees, cela les pousse à bien mehnager, & travailler en ce qu'ils possèdent. Ils ne mesurent nulle sorte de marchandise, encotes que ce soit meisme du linge: mais vendent toutes choses aux poids, pour ce qu'il n'y peut pas auoir tant de tromperie. Ils ne laissent pourtant de tromper quelquesfois les estrangers qui trafiquent avec eux, & principalement au musc, qui se fait en ceste sorte.

Ils battent les muscs, qui sont de petites bestes, comme nous auons dit, & les meurtrissent à force de coups, tellement qu'ils les tuent, puis les mettent en vn lieu, où elles se corrompent plus facilement, leur liant premierement bien fort les parties par où le sang peut sortir, & laissant tremper en iceluy les os, qui sont cassez bien menu, & apres que tout leur semble estre assez pourry, ils les coupent par pieces avec leur peau, & en font des petits sachets, que les Portugais qui les achètent, appellent Papos: & ce musc est le meilleur, & le plus fin qu'on apporte des Indes, mais suiet à tromperie, d'autant qu'ils ont accoustumé d'y mettre, & cacher de petits morceaux de plomb, & autres choses pour les faire peser dauantage.

Les habitans de la Chine sont tous de bonne disposition de corps, disposés, & gaillards de leurs personnes, mais vn peu plus grands que petits. Ils ont tous communément le visage large, de petits yeux, le nez plat & camus, & n'ont point de barbe, mais vn peu de poil seulement aux deux costez du menton. Il est vray qu'il y en a quelques-vns qui ont les yeux grands, la barbe bien faite, & les traits de visage bien beaux: mais le nombre de ceux-là est petit au regard des autres, & l'on croit meisme qu'ils sont venus d'une nation estrangere, qui s'est meslee anciennement avec les Chinois, lors qu'il estoit permis de sortir du Royaume. Ils laissent tous venir leurs ongles de la main gauche fort grands, & portent courts ceux de la droite. Ils ont aussi les cheveux longs, & en sont tous fort curieux, & ceste mode de porter de longs cheveux, & de grands ongles, n'est sans superstition, veu qu'ils disent qu'ils seront enleuez au Ciel par ces longs cheveux, & ces grands ongles. Ils les entortillent sur la teste avec vn reseuil d'or bien mignonnement accommodé, ou bien avec des espingles qui sont aussi d'or.

Les habits, dont les Nobles & les principaux vsent, sont de soye de diuerses couleurs, qui est tres belle en ce Pais-là, & de haut lustre. Le commun peuple, & les pauvres gens s'habillent d'autre soye, qui est moindre, ou bien de lin, ou de sarge, ou de coton. Cét habit est leger & propre, selon la qualité du Pais, qui est temperé pour la pluspart, & ils ne peuvent porter des estoifes plus peiantes, veu que quant au drap, il ne s'en fait point en tout le Royaume. Ils vsent de sayes faités à la mode du temps passé, qui sont à grands quartiers plissez bien menu, où il y a vne pochette qui ferme sur le costé gauche, & leurs manches sont grandes & grosses. Sur ces sayes ils portent de grandes robes, qui sont faites à nostre mode, hormis qu'elles ont les manches plus larges.

Les Princes du sang Royal, ou ceux qui sont establis en dignité sont differents en habits des

Chevaliers ordinaires, en ce que les Princes portent le saye brodé d'or & d'argent par le milieu de la ceinture, & les autres ne l'ont que garny d'or par les bords. Ils vsent de chausses fort bien faictes avec l'arriere point, & portent des botines & des souliers de velours fort mignards. Ils portent durant l'hyuer, combien qu'il n'y face pas grand froid, leurs sayes & leurs robes fourrees de peaux de bestes, principalement de martres, zibelines, & en portent tousiours autour du col. Ceux aussi qui ne sont pas mariez sont differents de ceux qui le sont, en ce qu'ils portent les cheveux dessus le front, & vsent de plus hauts bonnets.

Les femmes se parent fort curieusement, & s'habillent d'une façon qui retire fort à l'Espagnole. Elles portent beaucoup de bagues, & de ioyaux d'or & pierreries, & vsent de demy sayes à manches larges qui ne leur viennent que iusqu'au dessous des mammelles. Elles s'habillent de brocats ou toiles simples, ou soyes, & les plus pauvres portent du veloux ras & de la sarge. Leurs cheveux sont beaux, & elles en sont fort curieuses, & les portent cordonnez & entortillez autour de la teste, avec vn large ruban de soye garny de perles & de pierreries. Elles vsent de fard, & tiennent pour grande gentillesse d'auoir les pieds petits, & pour ceste cause dès leur enfance on les leur lie bien serré avec de petites bandes qu'elles endurent patiemment, pource
 10 que celles qui les ont plus petits sont estimees plus gentilles. Mais ceste coustume n'est seulement venue de leur curiosité, mais encor de la ialousie des hommes qui l'ont introduite, afin qu'elles ne puissent presque marcher, & que ne pouuants aller que pelamment & de mauuaise grace, elles ne sortent guieres de la maison. Et ceste coustume est tellement ancienne, & receüe en ce pays, qu'elle est comme passée en forme de loy, de sorte que la femme qui l'enfraindroit avec ses filles encourroit note d'infamie, & seroit punie. Au surplus elles sont fort honnestes: & referrees, de sorte qu'on n'en void iamais vne à la fenestre, ny à la porte, & si les maris inuitent quelques vns à dîner, elles ne se monstrent point, & ne s'assient iamais à table, si cèluy qui est conuié n'est parent ou grand amy. Quand quelqu'une va voir son pere, sa mere, ou quel-
 11 qu'une de ses parentes, elle va tousiours dans vne chaire à bras portee par quatre hommes, & toute entourée de cages & de ialousies de fil d'or & d'argent, ou de soye pres à pres, de peur qu'on les voye, nonobstant qu'elles puissent voir tous ceux qui vont par la rue, & outre ce, elles sont accompagnées d'un grand nombre de seruiteurs. Ainsi l'on trouue peu souuent par les rues vne femme de marque, & semble qu'il n'y en ait presque aucune en toutes les villes.

Ils sont ingenieux au possible, vsent de sculpture, & sont de grands peintres de feuillages, d'oiseaux, & de chasse, comme on peut voir par les listes & tables qu'on apporte de ce Royaume. Ils vsent au plat pays d'une espece de chariots à vent & à voile. Les Hollandois en ont voulu faire vn de mesme pour plaisir, mais il n'a guieres duré, & avec cela il ne faisoit pas grand chemin comme les autres. Ils sont fins & bien entendus à vendre & à acheter, de sorte qu'en fait de trafic, ils partiroient vn petit cheveu.

12 Les marchands qui sont en grand nombre en chaque ville, estallent à leur huys vne table, où toutes les marchandises qu'ils ont à vendre sont escrites: & celles qu'ils vendent communement sont brocatels & toiles d'or, & diuerses pieces de soye de tres-belles couleurs. Les autres qui ne sont pas si riches vendent des sarges, des pieces de cotton, de la toile, & de la fustaine de toutes couleurs. Ceux qui tiennent des drogues font pareille monstre de tout ce qu'ils ont. Il y a d'autres boutiques de porcelaines de diuerses sortes, à sçauoir de rouges, de verdes, de dorees, & de pailles, qui sont à si bon marché, qu'on en a cinquante pieces pour quatre reales. Elles se font d'une terre forte qu'ils deffont & destrempent, & versent dans les estangs garnis autour & puez de pierre de taille: & apres l'auoir bien maniee dans l'eau, ils font les plus fines du plus gras qui nage par dessus: & quant au reste plus il va au fond, & qu'il y est grossier & espais, ils leur donnent la forme qu'ils veulent & les dorent apres, & leur donnent la couleur que bon leur semble, qui ne se perd iamais, puis les font cuire dans vn four.

13 Quelques vns tiennent que la vaisselle de porcelaine se faict de coques d'œufs cassées, & gardées en terre l'espace de cent ans, ou bien d'escargots de mer qu'ils destrempent & mettent sous terre pour s'affiner par mesme espace de temps, ainsi qu'un certain Edouard Barbose a escrit. Mais si cela estoit, il n'y auroit pas si grande quantité de porcelaines en la Chine, & l'on n'en porteroit aussi tant en Portugal, au Perou, en la nouvelle Espagne, & en d'autres parties du monde, la plus fine se faict en la province de Saxij, & ne sort iamais du Royaume, pour ce qu'elle est toute employee au seruice du Roy & des Gouverneurs, & est si belle à voir qu'il semble que ce soit du crystal.

Les artisans & gens de mestier demeurent en certaines rues, où l'on ne void habiter aucun qui ne soit de leur estat, de sorte que voyant de quel estat se mesle le premier de la rue, on peut cognoistre aussi tost que toute ceste rue est pleine de gens de ce mesme estat. Ceux qui tiennent boutique affichent vne tablette en laquelle est contenu le roolle des marchandises qu'ils ont à vendre.

Ceux de

Ceux de ce Royaume sont soigneux sur toute chose de donner de bonne heure vn Estat à leurs enfans avant qu'ils se desbauchent & se puissent corrompre : & ce soing est cause qu'il y a moins de vice en ce Royaume qu'en beaucoup d'autres. Or ils vsent en ce fait de si grande diligence qu'il aduient souuent que les enfans estans encore tous petits, & mesme avant qu'ils soient nez, les peres se sont desia accordez de les marier, & mettent par escrit leurs conuentions & contrats de mariage. La coustume du pays porte que le mary dote la femme qu'il veut espouser. Quand le temps de la consommation du mariage est venu, le pere de la fille fait vn grand festin en sa maison, conuiant les pere & mere, & les parens & amis du gendre, & le iour d'apres le pere de l'espoux ou le plus proche parent en fait de mesme. Apres le festin le mary donne la dot à la femme en presence de tous, & elle la donne à son pere ou à sa mere, s'ils sont viuans, pour la peine qu'ils ont eue à l'esleuer. De là vient qu'en ce Royaume ce luy qui a plus de filles est tenu pour le plus riche. Et quant à ce qui est donné aux filles, les peres s'en peuvent seruir s'ils en ont besoing, & lors qu'ils meurent tout demeure à la fille, afin de le laisser à ses enfans, ou en disposer autrement à sa volonté. Les hommes peuvent prendre autant de femmes qu'ils peuvent entretenir, pourueu que ce ne soient leurs sœurs, ou leurs cousines germaines, & si quelqu'un se marie en ces deux degrez de parentage, il est grieuement puny. Ils tiennent la premiere de ces femmes pour leur legitime espouse, & les autres pour amies. Ils vivent & demeurent avec la premiere, & quant aux autres, ou ils les tiennent en diuers logis, ou bien ils les departent çà & là, si ce ne sont marchands & gens de traffic, par les lieux où ils font leurs commerces, & telles femmes sont comme seruantes au regard de la premiere. Le pere venant à mourir, le fils aisné succede en la plus grande part du bien de la premiere femme, & les autres freres d'apres succedent entre eux par esgales portions, soit qu'ils se trouuent fils de la premiere femme, ou des autres. Au defect du fils de la premiere, le premier qui vient à naistre de quelqu'une des autres, emporte la plus grande part de la succession, & par ce moyen ils meurent bien peu souuent sans laisser des successeurs de leur legitime espouse, ou des autres femmes.

On dict qu'aux Prouinces proches de la Tartarie, il y a vne certaine coustume fort estrange, qui est que les Vice-Roys, ou Gouverneurs limitent aux hommes, & aux femmes certain temps dans lequel ils sont obligez se mettre en Religion, ou bien de se marier. Ce temps estant venu, tous ceux qui se veulent marier, viennent à certains iours en vne ville destinee pour cet effect en chaque Prouince. Lors qu'ils y sont arriuez, ils se vont presenter deuant douze hommes des plus principaux & anciens que le Roy a nommez pour ce fait, qui prennent par memoire le nom de hommes, & femmes, & leurs qualitez, & s'informent en mesme temps du bien que les hommes ont pour doter les femmes qu'ils veulent prendre. Apres cela ils regardent la liste des hommes, & des femmes qui se presentent, & s'ils trouuent plus d'hommes que de femmes, ou au contraire, il iettent le sort, & laissent ceux qui restent pour estre mariez les premiers l'annee apres. Les six de ces douze susmentionnez font trois bandes des hommes, mettant en la premiere les riches, sans auoir esgard à gentillesse, ny à beauté : en la seconde, ceux qui sont moyennement riches ; en la derniere, les pauvres. Cependant que ces six font le departement des hommes, les autres six font teluy des femmes en trois autres bandes, mettant en l'une les plus belles, en l'autre celles qui ne le sont pas tant, & en la troisieme les laides. Cela fait, ils donnent les belles aux riches, qui baillent certaine somme, à laquelle ils sont taxez par les Iuges, puis on donne à ceux qui ne sont pas si riches, celles qui ne sont pas si belles, sans qu'ils baillent aucune chose pour elles : & apres ils donnent aux pauvres les laides avec tout ce que les riches ont donné pour les belles, qui est partagé esgalement entre eux. Les mariages estans acheuez, on fait de grandes festes aux maisons que le Roy a en chaque ville, qui sont garnies pour cet effect de grand nombre de lits, de buffets, & autres choses necessaires à vn mesnage, afin que les mariez prennent ce qui leur est necessaire pendant que la feste dure, & apres cinquante iours chacun des nouveaux mariez s'en retourne en sa maison. Ce que dessus doit estre entendu du peuple, & non des Seigneurs, & gens de qualite, qui ne sont obligez d'obeir à ceste ordonnance, ains se marient à leur volonté.

Pour le regard du Roy de la Chine, apres qu'il est marié il choisit trente concubines, les premieres de tout le Royaume, qui demeurent dans son palais tout le temps qu'il vit, & lors qu'il est mort, & qu'on a fait les obseques, le successeur du Royaume habille ces trente femmes somptueusement, puis les fait mettre sur vn magnifique lieu dressé en l'une des belles salles dont nous auons parlé, & estants là, elles ont le visage couuert, de sorte qu'elles ne scauroient estre cogneues. Apres qu'elles sont placees, on void venir trente Cheualiers des principaux du Royaume, que le Roy defunct a nommez en son testament, qui vont selon leur ordre d'ancienneté, ou selon la nomination que le Roy en a faite, & lors chacun d'eux prend l'une de ces femmes par la main, & l'emmeine couuerte comme il l'a trouuee, iusques à ce

qu'il soit en sa maison, où il la tient de là en avant pour sa femme; au moyen dequoy on luy fait de grands dons tous les ans pour ayder à sa despence.

Anciennement quand les Roys de la Chine marioient leurs enfans, ou leurs parents, ils faisoient vn festin solemnel en leur palais, auquel ils conuoient tous les Cheualiers, & les plus grands Seigneurs de la Cour, leur mandât qu'ils menassent avec eux tous leurs enfans, ce qu'ils faisoient volontiers, voire tellement, que chacun taschoit de faire que les siens fussent plus richement vestus que les autres. Le festin estant acheué, chacun des Princes alloit au lieu où les Dames estoient assises de rang selô leur aage, & choisissoit pour femme celle qui luy estoit plus agreable: & les Princesses faisoient le meisme des Cheualiers du Royaume: mais telle coustume n'a maintenant plus de lieu, pource que tant les Princes, que les Cheualiers se marient tous à leurs parentes, horsmis au premier, ou second degré, & mesmes quelquefois ils ne font difficulté du second.

- 17 Quant aux funerailles & ceremonies qui concernent les morts, elles se practiquent en ceste sorte. Lors que quelqu'un meurt, ils luy lauent à l'instant tout le corps, & l'habillent des meilleurs accoustremens qu'il ayt eu durant sa vie, qui sont parfumez, & sentent fort bon. Apres l'auoir ainsi vestu, ils l'assient sur la plus belle chaire qu'il eust, & lors les enfans, & la femme, ou bien son pere, sa mere & ses freres viennent pres du mort, & apres s'estre mis à genoux deuant luy, se retirent chacun à part tous espleurez. Apres on void venir selon leur ordre, tous les parents & amis du trespassé, & finalement ses seruiteurs, si le deffunct en auoit. Ceste ceremonie estant faite, ils le mettent dans vn cercueil fait de quelque bois odoriferant, & aromatique, qui est bien clos & fermé de peur de quelque mauuaise odeur, & soudainement ils le posent sur deux bancs, ou sur vne table, dans vne chambre parée des plus beaux draps, & tapis qu'ils peuvent auoir, puis le couurent d'un linceul bien blanc, qui va traînant iusques à terre, sur lequel l'on void l'effigie du mort tiree au plus pres du naturel qu'il est possible. En la chambre qui est deuant celle où le mort repose, ou bien à l'entree de la porte, ils dressent vne table avec des chandelles ardantes, qui est toute couuerte de pain, & de plusieurs sortes de fruiets, & le tiennent en ceste façon plus de quinze iours, durant lesquels on void arriuer chaque nuit leurs Prestres & Religieux, qui chantent des prieres, offrent des sacrifices, & font d'autres ceremonies payennes: car ils portent beaucoup de papiers peints, & les bruslent en la presence du mort, & en mettant deuant luy beaucoup d'autres pendus à des petites cordes, qui sont mises ja pour cet effect, & remuent ces papiers par plusieurs fois, & font de grands cris par le moyen desquels ils disent qu'ils enuoyent au ciel l'ame du deffunct. Apres les quinze iours, durant lesquels les tables sont tousiours dressées avec beaucoup de viandes, pour faire boire & manger leurs Prestres, & les parents & amis, qui viennent visiter le mort, ils prennent le cercueil où est le corps, & le portent aux champs, & lors tous ses parents & amis vont à son conuoy, avecques vn grand nombre de Prestres, & forces chandelles ardantes. Ils l'enterrent ordinairement sur vn petit tertre, & dans des sepultures qui leur appartiennent, & leur sont particulièrement dediees pour cet effect, & qui sont toutes faictes de pierre de taille. Ils dressent sur le champ pres de la sepulture vn pin, lequel ils ne couppent iamais: & s'il arriue qu'il tombe, ils le laissent là iusqu'à ce qu'il se consume par long trait de temps, & le tiennent pour chose sacree. Ceux qui iuiuent le conuoy vont par ordre, & en forme de procession, menans avec eux des musiciens, & ioüeurs d'instruments, qui chantent, & ioüent tousiours, iusques à ce qu'ils ayent laissé le corps dans le tombeau, & l'on tient pour plus honorable l'enterrement auquel l'on void plus de Prestres, & de menestriers. Ils chantent au son de leurs instruments beaucoup de prieres, qu'ils font à leurs idoles: en dernier bruslent sur la sepulture plusieurs papiers, où l'on void en peinture des esclaves, des cheuaux, de l'or, de l'argent, de la soye, & beaucoup d'autres choses, qu'ils disent que le mort possedera en l'autre vie. Ils se resioüissent grandement, & font des festins en le mettant au sepulchre, tenants pour certain que les Anges, & les Saints qui sont au ciel, font la mesme feste au deffunct. Les parents sont tous en ce temps-là couuerts de deuil, qui est de sayes de grosse laine, poissez contre la chair, & sanglez de cordes. Ils ont encore pour lors sur la teste de grands bonnets de mesme laine, faicts à grands bords comme vn chapeau, qui leurs viennent iusques sur les yeux. Ils portent ce deuil pour leur pere, ou leur mere, vn an ou deux, & si le fils est Gouverneur, il se retire le plus souuent avec congé du Roy, laissant la charge qu'il a. Ceux qui ne sont pas si proches parents, s'habillent l'espace de quelques mois de linge creu teinct, & pareillement les autres parents, & amis, mais c'est seulement iusques à ce que le deffunct soit enterré. Voila ce qui se peut dire touchant leurs enterremens.

- 18 Encores que les costaux abondent en vignes, l'on n'y faict toutesfois point de vin de raisins, comme par deçà: mais ils ont accoustumé de confire les grappes, & en faire reserue pour l'hyuer. En eschange ils tirent vn suc de fort bon goust d'une herbe nommee Chia, qu'ils boient chaud,

uent chaud, comme sont le Japonois. Ce breuvage les purge de phlegme, de pesanteur de teste, de chassie, & de mal d'yeux; & de ceste sorte ils vivent longuement, sans estre jamais presque malades.

Pour remedier en quelque sorte aux vehementes chaleurs de l'Esté, ils s'aident du moyen qui s'ensuit: ils creusent assez avant en terre quelques caveaux, d'où ils donnent air en tous les endroits de leurs maisons, fort, ou foible, comme bon leur semble, avec vn merueilleux artifice.

Ils comptent leurs annees par douze lunes, de sorte que de trois en trois ans ils adioustent vn mois lunaire à leur annee, & commencent l'an à la nouvelle lune de Mars. Ils font lors vne solennelle resiouissance, comme aussi le iour de la natiuité, qu'ils celebrent aux maisons, s'en-uoiant les vns aux autres des presents magnifiques. Ils font des festins somptueux, & representent la nuit des comedies & tragedies, où rien n'est esparné. Ce sont poësies composees à plaisir, ou histoires anciennes. Apres il font venir des fauteurs, des basteleurs, des ioueurs de farces, & des faiseurs de tour de souplesse. Les murailles des maisons, & les portes, sont couuertes de verdures, de roses, & de tapis de prix, les rues sont parfumees, & couuertes de fleurs odoriferantes.

On ne void alors que falots, & flambeaux: les arbres, les treilles, & les fenestres sont comme en feu: toutes les rues retentissent au bruit des instruments de musique, des flustes, & des voix entremelees. L'ordre de leurs festins est tel: Chacun des conuiez a sa table, & si l'on met deux personnes à vne table, c'est le plus. Ceste table est de bois luyfant comme ebeine, marbré, de figures de bestes sauvages, avec de certains filets d'or ou d'argent entrelassez fort dextrement, ouurage particulier aux Chinois.

Cette belle marqueterie sert de nappe, & la table est garnie de parements de soye pendants jusqu'à terre. Les conuiez sont assis en des chaires à dos, garnies de coussins propres à reposer aysément. Ainsi qu'ils sont en cet estat, l'on apporte premierement des corbeilles couronnees de chapeaux de fleurs, & chargees de fruit le long des bords. Les viandes sont au dedans. Or cōbien que les Chinois ayent grande abondance de volailles, de venaison, & de poisson de coquille, & d'escaille, voire de toutes viandes exquisés; si est-ce que la viande la plus estimée entre eux, c'est la chair de pourceau. Ce sont gens si delicats, qu'ils nomment lourdités de porter la viande à la bouche avec les doigts. Ils s'aident de poinçons, ou de fourchettes d'or, & d'argent, pour prendre les morceaux coupez menus, & les mettre en la bouche sans y toucher des mains. Ils boient à diuerses reprises en de petits gobelets, pour appaiser la soif: & conuient avec beaucoup de ceremonie ceux qui mangent avec eux à leur faire raison. Cependant les valers seruent & desseruent en grand silence, & bon ordre. Les hommes mangent à part, & les femmes, dont les maris sont extremement jaloux, en quelque chambre particuliere, & escartee. Quant aux salutations, le menu peuple y procede ainsi: ils serment la main gauche, & la couure de la droiète, puis portent plusieurs fois la main à la poitrine, accommodant les paroles à la contenance, monstrent qu'ils ayment passionnément l'amy qu'ils saluent. Les riches & principaux font vne profonde reuerence, estendans & courbans leurs bras en forme d'arc, puis en trauersans les doigts des mains les vns entre les autres, & avec beaucoup de paroles de compliment s'efforcent de surmonter en courtoisie. Ils ont esté si industrieux, qu'ils ont fait que les fourneaux de leurs forges n'ont besoin d'homme qui hausse & baisse les soufflets: veu qu'ils ont inuenté certaine sorte de tuyaux si bien agenceez, & receuans l'air de quelque creux par tels contrepoids que iamais ils n'ont faute de vent.

L'imprimerie, l'artillerie, la poudre à canon & autres choses appartenantes aux ceuures, ont esté en v'sage en la Chine il y a ja quelques siecles, tellement que l'origine surpasse toute memoire d'homme. Leurs Annales racontent que le premier Roy du pays estant grand Magicien, a esté inuenteur de l'artillerie, & autres instruments de guerre.

Ils ont vne inuention en fait d'artillerie, d'en fondre certaines qui se desmontent par pieces, qui sont aysément portees par des bestes de voiture, ou des porte-faix, au lieu que l'on desire. Ils s'aydent de longues feuilles de papier fin au possible, tirant les lignes, non de la gauche à la droiète comme les Grecs, Latins, & autres peuples de l'Europe, ny de la droiète à la gauche, comme les Hebreux, Turcs, Arabes, & autres: mais du haut de la page en bas. Leurs lettres ressembtent aux hieroglyphiques des Egyptiens: chacune signifie vn mot, & par fois les periodes, voire les sentences entieres. De là vient que les Chinois, qui pour estre esloignez les vns des autres, à cause de la grande estendue de tant de Prouinces: ont diuers langages, entendent bien toutesfois ce qui est contenu dans les liures imprimez. Outre le langage commun au peuple, & particulier en chaque Prouince, les hommes sçauans en ont vn qui leur est propre, ils l'appellent le Mandarin, qui est familier aux courtisans, aux Secretaires, aux Iuriconsultes, aux Iuges, & aux Magistrats.

En leurs voyages, outre les montures de diuerses façons, ils se seruent de litieres & carrosses traînées par des chevaux attelés, ou bien de chariots à vent dont nous auons parlé cy-dessus. Ils nourrissent soigneusement des oyseaux, auxquels ils apprennent à parler, & à sauter en diuerses sortes, & les parent, & habillent fantasquement, outre leurs couleurs naturelles. Leurs equipages de marine sont presque incroyables: ils ont leurs grands vaisseaux appelez Longs, qui ne vont qu'à la voile. Aucuns d'iceux sont equipés pour la guerre, ayans en poupe & en proue des hauts chastelets: les autres sont plus bas, & leur seruent à porter les marchandises, & matieres pesantes. Ils ont encores d'autres vaisseaux nommez Lantes, Bancons, & Longs. Chaque Lante vogue à douze grandes rames, six d'un costé, & six de l'autre, & en chaque banc il y a quatre, ou six hommes pour tirer à la rame. Le bancon n'en a que la moitié autant. Quant aux Longs, ils ont quelque rapport avec nos galeres, mais ils ne sont propres que pour aller sur les riuieres. On void d'autres vaisseaux qui ne seruent presque qu'à l'esbatement des riches au long des riuages, ayans les pouppes, les chambrettes, & les fenestres treillissées, & les portiques tous garnis, & couverts d'or & d'argent, puis des iardins de plaisance au haut des vaisseaux, presque en despit de la mer.

Ils godronnent leurs nauires de certaine matiere fort propre à empescher la vermoulure, & à tuer les animaux qui percent le bois. Pour espuiser vn Long, ils y appliquent en dedans pres du tillac vne pompe garnie de plusieurs petits vaisseaux avec tel artifice, que le premier qui se trouue là, remuant doucement ses pieds l'un apres l'autre, met en peu d'heures la sentine à sec. Il demeure sur les riuieres, & dans des batteaux plusieurs familles entieres: les vns y trafiquent, les autres y cuisinent, & nourrissent les passants, les autres y exercent diuers mestiers, & pour conclusion rien ne defaut à la vie humaine en ces maisons flottantes; tellement qu'on y trouue autant de commoditez qu'aux villes assises en terre ferme. On trouue dans ces batteaux des gens qui nourrissent force volaille, sur tout des canards à grandes troupes, ce qui leur est aysé, d'autant qu'au lieu de bailler les œufs à couuer à la femelle, ils les accommodent proprement en des lieux chauds, qu'ils font esclorre autant de petits que bon leur semble. La nuit venue, ils serrent toute leur volaille dans les batteaux, & dès le point du iour ils les laschèt pour aller paistre aux campagnes pleines de riz; & lors pour le grand soulagement des paisans, ces bestes se nourrissent des herbes qui nuisent au riz semé. Sur le soir au son d'une cloche, ou d'un rambour, ils retournent en volant dans leurs batteaux. Les barquettes & nasselles fournissent à ceux qui habitent en terre ferme force poisson d'eau douce, & de mer aussi, en ceste sorte: Au Printemps lors que les neiges & les pluyes font enfler les riuieres, & que les poissons de mer accourent par troupes aux embouchures d'eau douce pour frayer plus à l'ayse, on void venir des contrees voisines force gens allechez du guain qui se presentent en la pesche qu'ils font avec les filets. Les pescheurs d'eau douce acheptent lors à vil prix force bons poissons des mariniers, puis enferment leurs empoilles dans des nasses proprement couuertes & empaquetées de parchemin poissé, & changeant souuent d'eau, & baillant souuent quelque chose à manger à leurs poissons, les transportent auant en terre ferme, où ils les deschargent en des reservoirs, viuiers & larges fossez des villes, où l'on les pesche pour fournir durant toute l'annee les tables des riches. Pour les prendre ils ont vne adresse bien gentille entre les autres, ils nourrissent des corbeaux marins, ou plongeurs priuez, fort grands & accoustumés à viure de poisson, lesquels ils serrent par le col d'un laz courant vn peu lasche, tellement qu'ils peuuent engloutir vn poisson, mais non l'aualler. Lors qu'on lasche ces corbeaux ainsi equipés, on les voit plonger avec vne adresse merueilleuse au fond de ces viuiers & fossez, où ils prennent les poissons, puis s'en retournent d'où ils ont esté laschez, & lors on leur peut oster la proye. C'est à quoy les Magistrats passent volontiers vne partie du temps. On a peu voir ces anneés passées à Fontaine-bleau faire le mesme à des Cormorans gouuernés par des Anglois, à quoy toute la Cour prenoit grand plaisir.

Il se trouue beaucoup de Chinois qui s'addonnent fort à l'estude: mais peu se rangent à la Medecine, à la Philosophie & à l'Astrologie. Ils se tiennent promesse autant que la necessité de commerce, & l'opinion qu'ils ont de s'enrichir au desauantage d'autrui, le peut porter. L'estranger leur est suspect & odieux, & ne le veulent ny loger, ny frequenter: S'ils sont pressés de debtes, ils vendent leurs enfans pour se desgager, ou bien en font vn courtage infame & detestable. Au reste ils ne prient rien que leurs inuentions, dont ils se vantent avec beaucoup de babillage, disans qu'ils ont deux yeux, & que ceux d'Europe en ont vn, & tous les autres sont aueugles.

- 22 Quant quelqu'un de basse condition va parler à vn Loytia, il se met à genoux dès qu'il entre en la sale où est le Loytia, en baissant la teste & les yeux contre terre, & va tousiours à genoux de ceste sorte, iusques au milieu de la sale, où il s'arreste & fait sa requeste avec vne voix fort humble, ou la donne par escrit, puis ayant receu la responce, il s'en retourne à reculons tousiours à genoux, iusques à tant qu'il soit dehors, sans tourner iamais le dos au Loytia. Et si quelques-uns du peuple trouuent par la rue quelqu'un des principaux du pays, ou qui est en dignité, ou

dignité, ou noble, ils s'arrestent incontinent de pied ferme, & s'attendent en mesme lieu en baissant la teste, & avec vn grand silence, iusques à tant qu'il soit passé: & s'ils y manquoient, ils seroient sur le champ fustigez bien asprement. Quand l'un va visiter l'autre, celuy qui est visité sort iusques à la rue accompagnant celuy qui l'est venu voir. Ils vsent aussi d'une façon de faire fort estrange, qui est que si par fortune quelqu'un de dehors, ou bien de la ville les vient voir, & si lors que l'on appelle à leur porte, ou que l'on trouve parmy la rue ceux que l'on va visiter, ne sont pas bien en ordre, encores que celuy qui les vient voir parle à eux, & soit leur plus proche parent, ou cogneu de longue main, toutesfois ils ne respondent vn seul mot, & ne font semblant de le voir, ny cognoistre, ains luy tournent le dos, & s'en vont de ce pas chez eux, où ils prennent promptement leurs plus beaux habits: puis ils sortent dehors pour recevoir celuy qui les vient voir, avec aussi bonne mine, que s'ils ne l'auoient veu auparauant, ny faict tout ce badinage. Ils font grande caresse à leurs hostes, en leur donnant aussi tost la collation avec force fruiets & confitures, & leur faisant boire d'une sorte de breuage dont ils vsent generalement par tout le Royaume, qui est faict de certaines herbes medecinales, propres pour conforter le cœur. Ceste ceremonie se pratique aussi entre les voisins quand ils se visitent. Mais quand il aduient que quelqu'un d'un lieu rencontre vn autre dehors lequel il cognoist, ou vn qui est du mesme lieu, mais qu'il n'aura pas veu depuis quelque temps, incontinent il luy demande s'il a beu & mangé, & s'il luy dit que non, il le meine de ce pas à la plus prochaine tauerne, où il le traite magnifiquement: car en tout ce pays il y a bon moyen de ce faire, à cause qu'aux places, & aux rues des villes, & aux faux-bourgs mesmes, il y a beaucoup de tauerne où l'on faict grande chere, & à peu de frais, à raison des viures qui y abordent, & sont à fort bon marché. Que si celuy de dehors respõd à l'autre qu'il a desia beu & mangé, il le meine en certaine boutique où il y a tout plein de confitures, & telles autres friandises, & luy donne en ce lieu la collation fort liberallement. Ils vsent aussi d'un fort grand respect à l'endroict des femmes tant estrangeres, que du pays, de quelque qualité & condition qu'elles soient, spécialement à l'endroict des mariees; tenant pour chose du tout blasmable de leur dire des paroles deshonestes, & de ne les saluer, ny leur faire place quand elles passent par la rue.

Il y a vne inimitié extreme entre les Iaponois & les Chinois, dont la source est telle.

Il y a longues annees qu'un Roy de la Chine ayant descouvert quelque coniuration de ses amis, se resolut d'en prendre vne rude vengeance, & en auoit fait mettre desia à mort plusieurs des principaux, avec resolution d'en faire autant de tous les autres complices, Mais les Gouverneurs & Magistrats, amis & parents des Coniurateurs interuindrent, & aller trouver le Roy, & le supplierent de vouloir changer le supplice de la mort en autre peine, remonstrant qu'il y auoit des Isles incogneuës, esquelles si on les releguoit, cet exil leur seroit autant ou plus dur que la mort, & par ce moyen le Roy moderant sa iustice avec clemence, feroit grand plaisir & faueur aux innocens qui estoient en peine pour leurs parents coupables: à quoy acquiescant le Roy, il enuoya le reste desdits Conspirateurs au Iapon, où là semence de leur haine, ainsi que de leur race n'a peu estre estouffée: car encore auourd'huy les Iaponois font des courtes en la Chine, où ils pillent & rauagent tout ce qu'ils y trouuent, & n'ont aucun commerce avec les Chinois, sinon par l'entremise des Portugais.

Pour plus grande inimitié, est à remarquer la diuersité de leurs humeurs, entierement contraires aux manieres de viure des Chinois; j'ennuyrois le Lecteur si ie voulois dire tout ce qui en est, l'en diray seulement quelque chose.

Au lieu que les Chinois baissent la teste, & ioignent les mains en saluant ceux qu'ils rencontrent: les Iaponois au contraire deschaussent leurs souliers en signe d'honneur.

Au lieu que les Chinois receuans leurs hostes se tiennent debout, les Iaponois les recoiuent assis, & reputent à grande inciuilité se tenir debout quand on faict accueil à quelqu'un.

Au sortir de la maison, au lieu que nous prenons nostre manteau, eux le mettent bas, s'accoustrans de chausses fort larges, & flottantes.

Ils s'estudient à noircir leurs dents, tenans pour laides les blanches & les cheveux blonds, au contraire des autres nations: la couleur blanche leur est couleur de deuil, & la noire de ioye: la mesme contrariété se void aux femmes, quand elles cheminent elles font aller les vallers derriere, & les seruantes deuant elles au rebours de nous.

Lors quelles sont enceintes, elles se ceignent fort estroictement, n'estant le reste du temps guerre serrees, & treuuent par experience qu'elles en ont vn travail plus doux.

Après l'enfantement, elles lauent incontinent l'enfant d'eau froide, & ne nourrissent la mere que bien petitement, & legement, au lieu que la coustume de nos accouchees est de se traiter largement, & delicieusement.

La maniere de leur repas est telle, chacun a sa table à part, sans nappe ny seruiette, ils prennent leurs viandes avec deux pieces de bois comme les Chinois, ils boient leur vin fait de riz

d d ij

iufques à s'enuyter. Apres difner on leur met vn pot plein d'eau chaude, laquelle ils boient toute bouillante tant en Efté qu'en Hyuer.

Les Turcs tiennent prefque vne mefme maniere au breuuage de Chaone, lequel ils font de certains fruitz femblables à la graine de laurier, lequel breuuage eft par les Egyptiens appellé Bon ou Ban, defquels fruitz ils prennent vne liure & demie, & eftant quelque peu fecs, les font moyennement bouillir en eau du poids de 20. liures, ils prennent tous les matins en leurs leuans ce breuuage tout chaud en pots de terre, de mefme maniere que nous beuons l'eau de vie au matin, & tiennent qu'il fert à conforter l'eftomach & l'efchauffer, à en chaffer les vents, & faire ouuerture aux obftructions.

R I C H E S S E S.

- 23 **O**N peut affeurer que ce pays eft vn des plus riches, ou pour mieux dire, eft le plus riche qui foit au monde, veu que toutes chofes y abordent en telle forte, qu'outre la prouifion des Chinois, ils ont encor dequoy fournir les terres voisines & eiloignees. La cofte de la mer, qui eft de grande eftenduë, a beaucoup de ports, & de havres fort commodes pour y receuoir, & en enuoyer hors toutes fortes de marchandifes. Les habitants amaffent de plufieurs mines grande quantité d'or, d'argent, & d'autres metaux. On tire de la Chine vne grande quantité de perles, de vafes de porcelaine, de fourrures precieufes, de lin, de laine, de coton, de foye, & de toutes fortes d'eftoffes: comme auffi force fucré, miel, cire, rhubarbe, camphre, vermillon, & pastel pour les teinctures, comme auffi du mufc, qu'ils ont en abondance. Quant aux reuenus du Roy de la Chine, on tient qu'ils montent à fix vingts millions d'or toutes les annees, qui eft bien vne fi grande fomme, que ce grand & chiche Empereur Vefpafien n'en amaffa iamais tant
- 24 en toute fa vie. Je fçay bien qu'il y a beaucoup qui en doutent, mais c'eft chofe bien aueree, que du feul port de Canton, qui n'eft pas des plus riches & renommez de la cofte maritime, le Roy tire par an cent quatre vingts mille efcus de la gabelle du fel, & en vne autre petite proche, plus de cent mille efcus de difmes feulemēt. Ainfi il ne faut douter qu'il n'entre annuellement aux coffres du Roy des monceaux merueilleux d'or & d'argent, fi l'on confidere l'eftenduë de tant de Prouinces, le grand nombre du peuple, les contributions pour chaque teſte & porte, les peages des marchandifes, les difmes de toutes fortes de fruits, le reuenu des mines, & les autres aydes, tailles, impofts, & ſubuentions. Mais afin d'informer le Lecteur, il ſera fort à propos de ſpecifier, & declarer mieux par le menu toutes chofes.

Pour venir à noſtre but, il faut voir le nombre des tributaires qu'il y a en chaque Prouince, & dont les Officiers du Roy tiennent registre par deuers eux, afin de leuer les tailles & impoſitions; & avec cela il faut remarquer qu'il y a autant de gens qui ne payent rien, qu'il y en a qui payent, d'autant que nul des Loytias, & des officiers de iuſtice n'y eft taxé, non plus que les ſoldats, tant de mer que de terre, qui en ſont tous exempts.

Venant donc à noſtre point, ie dis avec ceux qui ſe ſont meſlez d'en eſcrire, & l'ont ſceu ſur le pays, ou appris de quelques relatiōs aſſeurees, qu'en la Prouince de Pagua le Roy a deux millions ſept cens quatre mille hommes qui luy payent tribut: la Prouince de Canton trois millions ſix cens mille: celle de Foquien, deux millions quatre cens ſept mille: celle d'Olam, deux millions deux cens quarante mille: celle de Cinſay, trois millions treize cens quatre vingts mille: celle du Suſuan, deux millions cinquante mille: celle de Tolancia, qui eft la Prouince où le Roy demeure, ſix millions quatre vingts dix mille: celle de Canſay, deux millions treize cens cinq mille: celle d'Oquiam, trois millions huit cens mille: celle d'Aucheo, deux millions huit cens quarante mille: celle d'Honan, vn million deux cens mille: celle de Xanton, vn million neuf cens quarante quatre mille: celle de Quicheu deux millions trente quatre mille: celle de Chequeam, deux millions deux cens quarante quatre mille: & celle de Sancij, qui eft la plus petite des quinze Prouinces, vn million ſix cens ſoixante douze mille & cinq cens. Outre leſquelles richesses & reuenus dont le Roy de la Chine eft en poſſeſſion, il tient en chaque ville capitale du pays ſes threſors cachez, & amaffez de long temps.

Or le tribut ordinaire qui eft deu par chacun d'eux qui a feu, & lieu, & de deux maſes l'annee, qui eft vne eſpece de monnoye vallant autant que deux reales d'Eſpagne. Et quoy que ce tribut ſoit ſi petit, & que les Loytias qui ſont vne bonne partie du Royaume, ny les Gouverneurs & Officiers, ny pareillement les Capitaines & ſoldats, n'en payent aucune chofe: toutesfois la multitude du peuple y eft ſi grande, que ſeulement ce qu'il donne pour la deſpence de la perſonne du Roy, & de ſon Palais, avec ce que valent les droits des doüanes, ports, & autres rentes, en ne comptant point ce qui ſe paye aux morte-payes, gens de garniſon, & autres ſoldats du Royaume, ny auffi ce qui ſ'employe à la reparation des murailles des villes, enſemble les fraix de toutes les armées de mer, & de terre, avec les gages des Gouverneurs & Officiers de iuſtice, qui n'entrent point en ce compte: il demeure au Roy de reuenu ordinaire

ce que

ce que ie mettray en ce lieu, qui a esté tiré du liure & registre de ses comptes. Encore les Chinois disent que c'est beaucoup moins que ce qu'on luy paye auourd'huy, & que ce compte est du plus vieil temps.

En fin or de 17. à 22. carats, on luy donne 4. millions deux cens cinquante six mille, neuf cens Tahes, dont la chacune vaut dix reales, & vingt quatre maravedis de Castille, le maravedis valant environ vn double tournois de France. En argent fin trois millions cent cinquante trois mille deux cens dix neuf Tahes. Les perles qui sont en grande abondance par tout, combien qu'elles ne soient guieres rondes, luy valent ordinairement deux millions six cens trente mille Tahes. En pierreries de toutes sortes, & traictes des mines, vn million quatre cens soixante & dix mille Tahes. En musc & ambre, vn million & trente cinq mille Tahes : & en porcelaine quatre vingts dix mille Tahes. Outre ce, le Roy a par tout son Royaume beaucoup de terres qu'il a donnees à ses suiets, à la charge de luy bailler vne partie de ce qu'ils y recueillent, ou qui y croist, & pour ceste cause ils luy payent ce qui s'ensuit.

En riz, qui est la viande & nourriture du Royaume, & des circonuoisins, 60. millions cent soixante & onze mille huit cens 32. mesures. En orge 29. millions trois cens nonante & vn mille neuf cens quatre vingts & deux mesures. En froment 33. millions six vingts mille deux cens mesures. En sel 25. millions trois cens quarante mille quatre cens mesures, qu'il recueille en ses salines, & dont il reçoit vn tres grand reuenu tous les ans. En bled appellé maix, 20. millions deux cens cinquante mille mesures. En millet 24. millions de mesures. En paniz 14. millions, & deux cens mille mesures. Puis en autres grains, & diuers legumes 40. millions, & deux cens mille mesures.

En pieces de soye de 14. aulnes de long, deux cens cinq mille cinq cens quatre vingts & dix pieces. En soye en masse cinq cens quarante mille liures. En cotton 300. mille liures: couuertes faites & ouures de couleurs 800. mille quatre cens. Chimantes de soye crüe du poids de 12. liures & demie, trois cens quatre vingts. Couuertes de cotton de 14. aulnes chacune, six cens soixante dix-huit mille huit cens soixante & dix. Chimantes de cotton trois cens quatre mille six cens quarante huit. Toutes ces choses se leuent par le Roy de la Chine, qui se sert d'une partie pour aider à la despence de sa maison, qui est tres-grande, & de l'autre pour garder & reseruer au thresor de son espargne, dans lequel on assure qu'il a beaucoup de millions: ce qui ne peut estre autrement, eu esgard à vn si grand reuenu.

F O R C E S.

Celuy qui ne iugeroit des forces du Roy de la Chine par le grand nombre d'hommes qui sont en tous ses Estats, seroit despourueu d'entendement, pource qu'on sçait assez que ceste force contient en elle toutes les autres. Mais pour en dire quelque chose en particulier, les forces du Roy de la Chine sont plus propres pour conseruer que pour accroistre. On peut voir aussi que son dessein est de maintenir & deffendre ce qu'il a, sans chercher de s'estendre plus auant: de quoy la muraille faite sur les frontieres de la Tartarie est vn suffisant tesmoignage. Et veritablement il a raison de se contenter de ce qu'il possede, puis que les plus grands Princes de la terre ont subiect de luy porter enuie. D'ailleurs s'il entreprenoit quelque conqueste elle ne luy réussiroit pas, pour ce qu'encor qu'il ait vn grand nombre d'hommes, ils sont pour la plus grande part lasches & couards, tant à cause des delices parmy lesquelles ils viuent, qu'à cause de la subiection en laquelle ils viuent, & de la forme du gouuernement qui les rend timides au possible. Or afin que nous puissions voir plus par le menu de quelle sorte ce Roy se conserue, il sera bon de considerer ses appareils & les gens de guerre, & l'ordre qu'il tient en ses Estats pour empescher qu'aucun inconuenient ne luy arriue. Car encor qu'à present, & depuis quelque temps en ça le Roy de la Chine se voye en paix & sans guerre, au moins qui soit d'importance, il est toutesfois aussi soigneux de pouruoit à tout que s'il auoit plusieurs guerres sur les bras, & de grands ennemis qui l'attaquassent.

Outre ce qu'il a en chaque Prouince vn Conseil de guerre, & pareillement vn Capitaine general, & force gens entretenus, tellement qu'il peut leuer incontinent de grandes armées de mer & de terre selon les occasions qui se peuuent presenter. Il tient encore en chaque ville des Capitaines & soldats pour la deffendre, & qui font le guet & la ronde, & posent les sentinelles de nuit, comme s'ils auoient les ennemis à leur porte. Ils tiennent aux portes des villes leurs compagnies de gens de guerre qui ne laissent entrer ny sortir personne sans permission du Iuge de la ville, & les portes s'ouurent & se ferment par l'ordonnance de ces Capitaines, qui l'enuoyent tous les iours, mise par escript sur vn aiz blanchy de plastre, & paraphec de leur main. Ils tiennent en ces parties toute la force & defence des villes, & y logent leur artillerie. Quand ils les ferment au soir ils mettent vn papier collé sur les jointures d'icelles, puis seellent & cachettent

ce papier avec le cachet que le Gouverneur ou le Juge de la ville porte en son doigt, & pour cet effect il y va en personne, ou bien il y enuoye quelqu'un qui luy est fort affidé: & l'on ne les peut ouvrir le matin iusqu'à ce qu'on ait recogneu le mesme cachet, & qu'on soit bien assuré qu'il est en mesme estat qu'on l'auoit laissé le soir. De sorte que si quelqu'un veut aller hors la ville, ou faire quelque voyage en diligence, il sort le soir auant qu'on ferme les portes, & va loger aux faux-bourgs: autrement il luy est impossible de partir de bon matin, pource qu'elles ne s'ouurent qu'apres le soleil leué.

Ils posent de nuit les sentinelles, & les changent à leurs heures, il y a tousiours des gens qui vont faire les rondes, avec vn bon nombre de soldats. Et afin de tenir les villes en plus grand repos, il n'est permis à aucun de porter armes offensives ou defensives, si ce n'est aux gens de guerre que le Roy entretient, & ne leur est permis d'en auoir en leurs maisons, n'y d'en porter sur les champs. Outre tout cela le Roy tient en la ville de Tabin, autrement Suntien, & pareillement aux villes circonuoisines, vne grande armee de gens de pied & de cheual, dont il se sert pour suruenir aux necessitez qui pourroient arriuer en ces lieux, & aussi pour la garde, seureté & majesté de sa personne.

- 26 Les soldats de ce Royaume sont de deux sortes: les vns sont natifs des villes, à la garde desquelles ils sont establis, & ceux-là s'appellent *Com* en leur langue. Ils succedent à ces places de soldats de pere en fils, & si quelques-uns viennent à mourir sans heritiers, le Roy en met d'autres en leur lieu. Chacun d'eux a son nom escrit en vn creneau des murailles, où il est obligé d'aller s'il vient des ennemis contre la ville. Les autres soldats sont estrangers, & ordonnez par mois, ou par annees, & ce sont eux qui sont ordinairement les sentinelles, & qui reçoient & accompagnent les Capitaines, & outre ce sont subiets d'aller par tout où l'on leur commande, & ceux cy s'appellent *Pon* en leur langue.

Chaque compagnie de mille hommes a vn Capitaine & vn Porte enseigne, & chaque centaine de soldat semblablement vn Capitaine, & vn Porte enseigne qui dependent des autres: & partant pour sçauoir le nombre des gens qui sont en vne grande armee, il ne faut que regarder & conter les enseignes de mille hommes qui sont fort cogneuës. Chaque Capitaine tant de cent que de mille hommes, a vne maison bastie sur la muraille, & son nom y est escrit, & c'est en ce lieu qu'ils doiuent demeurer tandis que la guerre dure. Les Capitaines font faire tous les mois l'exercice aux soldats, tant en temps de paix que de guerre, & leur font apprendre à seruir promptement, & avec adresse des armes dont ils vsent, qui sont ordinairement arquebuses, piques, rondelles, coutelas, baguettes ferrees, & d'autres faites en demie lunes, haches d'armes, dagues & cuirassies.

Les gens de cheual ont quatre espees penduës aux arçons, & cōbattent de deux à la fois avec grande dexterité. Ils ont de coustume d'entrer en bataille estans entourrez de beaucoup de seruiteurs & domestiques à pied bien armez, & equipez le mieux qu'il leur est possible. Ces gens de cheual sont rusez & experts au fait de la guerre aussi bien que les gens de pied, & sçauent vser de beaucoup de stratagemes, & se seruent de grands engins à feu, & principalement de certaines bouettes de feu pleines d'aiguillettes de fer, & de longues fleches faites de poudre à canon, avec quoy ils font vn grand dommage à leurs ennemis.

Les gens de cheual combattent avec des arcs, des fleches, & des lances, & avec les deux espees que nous auons diët, & quelques-uns portent encor des arquebuses. Ils ne font pas bien manier leurs chevaux, à cause qu'ils ne leur mettēt en la bouche qu'un fer qui leur sert de mors, & pour les faire arrester ils les tirent avec vne resne, en vsant de cris & de fouëtis qu'ils portent. Leurs selles ne sont pas bien faites, & presque tous sont armez à la legere, & mauuais hommes de cheual.

- 27 Quant à la mer, le Roy y vse de mesme soin qu'il fait sur la terre, & y tient ordinairement vn grand nombre de flottes avec leurs Generaux & Capitaines qui gardent soigneusement les costes de tout le Royaume. Ils payent fort bien leur gendarmerie, tant de mer que de terre, & ceux qui se portent vaillamment sont recompencez selon leur merite. Quand les Chinois prennent quelque prisonnier en guerre, ils n'ont accoustumé de le tuer, ains le font seulement seruir de morte paye aux frontieres qui sont loing de son pays, auquel lieu il est soldoyé du Roy comme les autres. Ces soldats portent tous des bonnets rouges, pour estre distinguez des autres: & quant au reste de l'habillement, ils ne different point des Chinois, & ceux qui sont aussi condânez pour quelques crimes à seruir sur les frontieres, portent semblables bonnets rouges.

- 28 Il reste maintenant de traiter en particulier des gens de guerre que tout le Royaume en general, & chaque Prouince entretient riere-soy. Il va, comme i'ay ja diët, en la ville capitale de chaque Prouince vn conseil de guerre composé de quatre Conseillers & vn President, qui sont ceux qui doiuent auoir soin de la conseruation & defense de telle Prouince. Ils sont appelez entr'eux Capitaines, & pouruoient de tous officiers, & de toutes munitions de guerre qu'ils enuoyent

qu'ils enuoyent aux lieux qui en ont besoin. Et afin que rien ne manque en ce fait, ceux du Conseil des finances ont charge de leur bailler tout ce qu'ils demanderont sans aucun delay. Le nombre des gens de guerre qu'il y auoit en chaque Prouince l'année mille cinq cents septante-sept, lors que le P. Martin Herrade fut en ce Royaume, qui fut en temps de Paix, estoit tel que s'ensuit.

En la Prouince de Pagua, où le Roy se tient ordinairement, il y auoit deux millions cent cinquante mille hommes de pied, & quatre cents mille hommes de cheual. En celle de Canton six vingts mille hommes de pied, & quarante mille de cheual. En celle de Foquien cinquante huit mille, & neuf cents hommes de pied, & deux mille quatre cents de cheual. En celle d'O-lan soixante seize mille hommes de pied, & vingt-cinq mille cinq cents de cheual. En celle de Cinsay quatre vingts mille trois cents hommes de pied, & bien peu ou point de gens de cheual, à cause qu'elle est toute pleine de montagnes. En celle d'Oquian six vingts mille six cents hommes de pied, & mil hommes de cheual, non plus qu'en d'autres pour la mesme raison. En celle de Sufan quatre vingts six mille hommes de pied, & trente quatre mille cinq cents de cheual. En celle de Tolanchia qui confine avec les Tartares deux millions huit cents mille hommes de pied, & deux cents quatre-vingts mille hommes de cheual, qui sont les meilleurs de tout le Royaume, & les plus renommez, pour ce qu'ils sont nez & nourris parmy les armes, qu'ils ont maintes fois maniees, lors qu'ils auoient guerre ordinaire contre les Tartares. En celle de Canfay cinquante mille hommes de pied, & vingt mille deux cents cinquante de cheual. En celle de Honan quarante quatre mille hommes de pied, & dix-huit mille neuf cents de cheual. En celle de Quichou cinquante huit mille sept cents hommes de pied, & quinze mille trois cents de cheual. En celle de Chequeam trente quatre mille hommes de pied, & treize mille de cheual. En celle de Sancier quarante mille hommes de pied, & six mille hommes de cheual seulement. Suiuant ce compte, on void que ces quinze Prouinces contiennent cinq millions huit cents quarante six mille & cinq cents hommes de pied, & neuf cents quarante huit mille, & trois cents cinquante de cheual. Leurs cheuaux sont propres pour faire beaucoup de chemin, mais petits pour la pluspart: toutesfois on dict qu'au dedans du Royaume il y en a de grands qui sont fort bons.

Sur les frontieres du Royaume on voit grand nombre de petites forteresses: mais du costé des Tartares ils ont leur muraille, dont nous auons desia parlé, qui est vn rempart fort assés pour tout le Royaume. S'il y a quelque bruit de guerre de ce costé, les Gardes n'ont pas plus tost donné le signal, que des Chasteaux & Bourgs d'alentour, on accourt aux forteresses iusques à ce que les Generaux & Capitaines soient arriuez avec leur armee. Bref ce Royaume est bien gardé de tous costez, tant par mer que par terre: & quiconque feroit dessein de l'assailir, entreprendroit vne affaire qui ne scauroit que reüssir à son mescontentement selon les apparences humaines. Il faut que nous voyons maintenant les voisins du Roy de la Chine, afin de recognoistre mieux ce qui luy peut nuire. Il n'a par terre aucun Prince dont il doie craindre la puissance, excepté le grand Cham de Tartarie: mais par mer il confine avec les Iaponois & les Espagnols. Quant au Iapon il est diuersement distant de la Chine. On compte soixante lieues depuis Goté, Ile du Iapon, iusques à la ville de Liampo, & deux cents quatre vingts dix-sept iusques à la ville de Canton. Les Iaponois travaillent ordinairement ceux de la Chine, courans toutes leurs costes, & rauageans mesmes quelques fois la terre où ils descendent: Et pour conclusion ils donnent plus de peine aux Chinois par courtes, voleries & assassinats, que par vne guerre ouuerte, pour ce que le Iapon estant diuisé en plusieurs Isles & Principautez, qui sont presque toutes de mauvais accord, ils ne peuuent aller contre les Chinois qu'en petit nombre. Toutesfois ils sont plus courageux & mieux aguerris que ceux de la Chine. D'autre-part ce Royaume confine avec les Philippines possédez par les Espagnols, qui sont suspects en ce Pais-là, & non sans raison, veu que les Philippines sont assises en telle sorte, qu'elles sont capables de donner beaucoup de peine aux Chinois. Ils ont aussi en mesme consideration les Portugais, qui sont pareillement sujets au Roy d'Espagne. Toutesfois le Roy de la Chine leur a permis de s'arrester pour raison du trafic en la petite Ile de Macao, où ils ont fondé vne colonie: mais fort foible, pour ce qu'ils sont entierement sujets à la volonté des Chinois, qui se deslians d'eux, pour l'amitié & intelligence qu'ils ont avec les Espagnols des Philippines, leur restreignent tous les iours la liberté du trafic, & taschent de faire que de leur bon gré ils se retirent aux Indes.

G O V V E R N E M E N T.

LA grande estenduë de toutes ces Prouinces que nous auons descrites cy-dessus, est sous la domination d'un seul Roy, & les Chinois ne scauent que c'est de ces noms de Comte, Marquis, ou Duc, n'y ayant personne autre à qui l'on paye impost ny gage. Le Roy donne

tous les Offices, & la Noblesse mesme, & il est non seulement reueré comme Roy, mais adoré presque comme Dieu. Cccy se void en ce qu'en chaque Prouince il y a vn portraict du Roy qui est d'or, & tousiours couuert d'un voile, sinon qu'aux nouvelles Lunes, auquel temps les Magistrats se vont mettre à genoux deuant luy comme deuant le Roy mesme. Ce qui abat extremement le courage des peuples, & les rend plustost esclaves que luyets de leur Prince.

- 22 Ils ont des loix escrites depuis plus de deux mille ans, qui sont demeurees en mesme estat qu'au commencement, ainsi que les Chinois le maintiennent. Et pour ce que telle iurisprudence est la porte pour entrer aux honneurs & charges publiques, plusieurs y estudient à bon escient, & ne font que disputer entr'eux d'affaires politiques, & des moyens de bien gouverner l'Estat : & quand l'occasion s'en presente, ils s'en enquierent soigneusement des estrangers qui arriuent en leurs ports. Le Roy entretient des Professeurs presque en toutes les villes.
- 23 On choisit aux petites escoles les enfans, & ieunes hommes bien aduancez, qu'on enuoye aux Academies, où il y a des gens qui prennent soigneusement garde à eux : & s'ils descouurent quelques escoliers desbauchez, ou paresseux, ils se contentent pour la premiere fois d'vser de remonstrances, & reprimendes : les chastient à la seconde, & à la troisieme les chassent ignominieusement : & d'autre part louent, & encouragent ceux qui font bien leur deuoir. D'auantage, les Visiteurs ordonnez par le Roy, font de trois en trois ans la publique visite des Academies, où ils font des promotions solemnelles.
- 24 Lors que quelque Visiteur a acheué la visite de la Prouince, il fait faire vn cry public, par lequel il ordonne que tous les Escoliers qui veulent prendre le degré de Loytia, qui est autant que celui de Docteur entre nous, combien que le mot de Loytia signifie en leur langue vn Cheualier, ayent à se trouuer en la ville capitale. Tous estans donc assemblez au iour assigné, & se presentans deuant le Visiteur, il fait vne liste de tous, & determine à quel iour se doit faire leur examen. Ce iour estant venu, le Visiteur inuite tous les Loytias de lettres qui sont en la ville, & apres le festin, ils font ensemble l'examen à toute rigueur, interrogeant les Escoliers sur toutes choses, & specialement sur les Loix & Ordonnances du Royaume, selon lesquelles ils doiuent iuger, & gouverner. S'il en trouue quelques-vns sçauans, & outre cela s'il sçait qu'ils sont vertueux, il les met par liste, & leur assigne le iour auquel il leur doit donner le degre, ce qui a coustume de se faire avec grandes ceremonies, & deuant plusieurs personnes, en presence desquelles le Visiteur leur donne au nom du Roy les marques & enseignes de ce degré, ensemble le nom & tiltre de Loytia : & ces marques sont vne ceinture garnie d'or, ou d'argent, & vn chapeau qui a deux fanons pendans par derriere. Et combien que les Loytias, autant ceux qui le sont par le moyen des lettres, que ceux qui le sont par la voye des armes, ou de grace du Roy, ayent tous le mesme nom & tiltre de Loytia, si ne sont-ils en pareille estime & autorité : Car ceux du Conseil du Roy, ensemble les Gouverneurs, Vice-Roys, & Visiteurs, sont Loytias par examen, & les Capitaines generaux, & Thresoriers, le sont de grace du Roy en recompense de quelques seruices. Ces derniers ne iouissent pas de plus grande franchise, ou noblesse, & n'ont point plus d'honneur que les autres Loytias, & d'iceux il y en a grand nombre en chaque ville.
- Il y en a encore d'autres de grande estime qui sont mis au second degré, & ce sont ceux qui paruiennent à telle dignité par la discipline militaire, estans faits tels par les Generaux, qui en ont le pouuoir du Roy apres qu'ils ont fait preuve de leurs personnes en presence des temoings dignes de foy. On donne à ceux-cy outre le tiltre, des moyens pour s'entretenir honorablement, & avec profit : & cela fait, que tous les soldats s'efforcent de bien faire pour receuoir ceste recompense. Quant à leur maniere de pourmener le gradué par la ville elle est telle.
- 25 Au iour assigné pour donner le degré, tous les Loytias s'assemblent de rechef avec le Visiteur en la maison, & sale Royale, où ils ont fait l'examen estans tous bien en ordre, & vestus de leurs plus beaux accoultremens, & comme ils sont ainsi assemblez, on voit entrer ceux qui doiuent receuoir le degré, qui sont en chausses, & en pourpoint, ayant chacun deuant eux vn parrain, avec les marques qu'on doit donner au filleul, lesquelles marques chacun d'eux demande aux Visiteurs avec grande humilité en se mettant à genoux. Surquoy le Visiteur leur fait faire le serment en ceste sorte : Qu'aux Estats & Offices qui leur seront conferez, ils se porteront en gens de bien, faisant iustice esgalement à toutes personnes, & ne receuans aucun present : & qu'ils seront fideles au Roy, sans consentir iamais à aucune trahison contre luy, & plusieurs autres choses, auxquelles ils s'arrestent assez long temps. Le serment estant presté, le Visiteur parlant à eux en la personne du Roy, leur met les marques & enseignes susdites : & en mesme temps les embrasse, estant suiuy en cela des autres Loytias qui sont presens. Apres cela ils sortent

ils sortent de la sale en bon ordre, & lors on sonne les cloches de la ville, qui sont bonnes & en grand nombre par tout le Royaume, & en mesme instant on tire beaucoup de pieces d'artillerie : quoy fait ils meinent promener les nouveaux graduez par toute la ville avec bonne compagnie, & comme ie diray presentement. En premier lieu l'on voit marcher deuant vn bon nombre de soldats avec des tambours, des trompettes, & autres instrumens de musique, & & apres eux force massiers : puis les Loytias à cheual, ou dans des chaires couuertes, tous en rang. Apres on voit marcher les parrains, & derriere eux les nouveaux Graduez en chausse & pourpoint, montez sur de beaux cheuaux blancs tous couuerts de riches houffes de toille d'or, chacun d'eux portant vne liuree de taffetas sur l'espaule, & sur la teste vn chapeau, qui a deux fanons pendans par derriere, comme ceux qui sont aux mitres des Euesques. Sur ce chapeau il y a deux bouquets qui sont d'or, ou d'argent doré, faits en façon d'vne branche de palme. Deuant chacun d'eux on porte six enchasseures de bois, chacune portee par quatre hommes, & là dedans est tendue vne piece de satin, où est escript en lettres d'or l'examen fait au Gradué, ensemble le tiltre qu'on luy a donné pour ceste cause, & ses armoiries y sont aussi, avec plusieurs autres choses que ie laisse pour n'estre aussi long que leur pourmenade qui dure huit heures entieres. Depuis ce iour les nouveaux Loytias deuiennent capables de tenir tout Office, & d'auoir quelque Gouvernement que ce soit, & pour ceste cause il s'en va incontinent en Cour pour y paruenir, & y allant il est honoré de tous, & receu & logé aux maisons du Roy qui sont en chaque lieu pour ceux de sa qualité. Estant arriué à la Cour, il va rendre l'honneur qu'il doit au President, & Auditeurs du Conseil du Roy, dont chacun luy promet de le pourvoir quand l'occasion s'en presentera, & deslors il est couché sur le registre du Conseil, & se met de là en auant à faire la Cour aux Auditeurs, pour estre pourueu de quelque charge.

Le Roy a en la ville de Taybin vn Conseil composé de douze Auditeurs, ou Conseillers, & vn President, hommes choisis, & experimentez aux affaires. Pour estre de ce Conseil, outre qu'ils doient estre tres-sçauans en la Philosophie morale, & naturelle, & bien versez aux loix du Royaume, il est requis encores qu'ils soient Astrologues, & Iudiciaires, pour ce qu'ils disent, que quiconque doit estre de ce Conseil souuerain, par lequel toutes les quinze Prouinces sont gouvernees, il faut qu'il s'entende à prognostiquer les temps, & les choses futures, afin de pourvoir aux necessitez aduenir du Royaume. Ces douze Auditeurs tiennent le Conseil d'ordinaire du Palais du Roy, où il y a vne sale richement accoustree, avec treize sieges : c'est à sçauoir six d'or, & six d'argent : mais le treiziesme est plus riche que les autres, pour ce qu'il est enrichy de beaucoup de pierres precieuses de grande valeur. Ce siege est au milieu des douze sous vn daiz de toille d'or, auquel sont brodees les armoiries du Roy, qui sont des serpens tiffus avec vn fil d'or. C'est là que le President est assis, si le Roy ne se trouue pas au Conseil, & s'il s'y trouue, ce qui aduient rarement, le President s'assied au premier siege de la main droicte, où sont les six sieges d'or. Chacun a son rang d'ancienneté, suivant lequel ils succedent en ces sieges les vns aux autres. Quant vn siege vient à vaquer, les Auditeurs, & le President y vont par election, & si celuy qui a plus de voix est absent, & gouverne quelque Prouince, on l'enuoye querir, & s'il est au lieu mesme, ils le menent deuant le Roy, à qui ils rendent raison de l'election qu'ils ont faite, & lors il la peut confirmer s'il en a la volonté, où bien la desaduoue. S'il est confirmé par le Roy, il preste entre ses mains vn serment presque semblable à celuy que nous auons mis cy-dessus. Ce serment estant fait ils le meinent au siege vacquant, de la main gauche, & le mettent en possession avec grande solemnité.

Il n'y a que le President de ce Conseil qui parle au Roy quand il en est besoin, où s'il vient à estre malade, c'est le plus ancien Auditeur des sieges d'or. Ils sçauent en ce Conseil chaque mois tout ce qui se passe au Royaume digne d'estre sçeu, à quoy l'on ne manque iamais, d'autant que les Gouverneurs des Prouinces ont commandement expres de mander par escript tout ce qui suruient en chaque Prouince, soit affaire de guerre, d'estat, de finance, ou autre chose : ce qu'ils effectuent si soigneusement, qu'encor qu'vne Prouince soit distante de cinq cents lieues de la Cour, toutesfois le Courrier ne manque pas de s'y rendre au iour limité, pour ce que ceux qui arriuent les premiers attendent les derniers iusques au iour assigné pour donner les aduertissemens, & ceux qui sont loing, voulans faire arriuer leurs Courriers aussi à point que ceux qui sont pres, les enuoyent si dru, & leur enioignent de faire telle diligence qu'ils se rencontrent les vns les autres. Les aduertissemens estans veus par le Conseil, & le discours sommaire de tout estant pris par le President, il en fait le rapport au Roy, s'il y a quelque chose à laquelle il faille remedier, luy & son Conseil y pouruoient incontinent, & si quelque Iuge doit aller en commission, pour ce fait il y va si secrettement, qu'il est sur les lieux à faire l'enqueste, sans que peronne sçache aucune chose de l'affaire, ny de la ville où elle se fait.

Or, quoy que ces Officiers ayent grande autorité, & que ce Royaume soit de si grande

estenduë, toutesfois il n'y a Vice-Roy, Gouverneur, ou Juge quelconque, qui puisse faire mourir quelqu'un par iustice, si le Roy ne confirme la sentence avec son Conseil, excepté lors qu'il y a guerre, auquel temps il est permis au General d'armee, ou à son Lieutenant, de faire executer le soldat qui aura commis quelque crime, sans en aduertir le Roy ny son Conseil, en prenant seulement l'aduis du Thresorier du Roy, & du Maistre de Camp, qui sont deux hommes de grande autorité, qui doiuent estre tous deux conformes en opinion, autrement on n'en peut faire aucune iustice.

Les Prouinces de Paquia, & de Tolanchia, sont gouuernees par le grand Conseil du Roy, par le moyen des Officiers qu'on y enuoye, & les treize autres Prouinces ont là chacune vn Vice-Roy, ou Gouverneur, qu'ils appellent Insuanto, qui fait tousiours sa demeure en la ville capitale. Et combien que les Officiers, & gens de iustice du Royaume, s'appellent tous generalement Loytias, si est-ce que chacun d'eux a vn nom particulier, selon l'Office qu'il exerce.

31 Le Vice-Roy, qui est le souverain Magistrat en chaque Prouince, & qui represente la personne du Roy, le nomme Comon. Le deuxiesme en dignité, qui est le Gouverneur de toute la Prouince, s'appelle Insuanto. Le Correcteur qui demeure en chaque ville, où il n'y a ny Vice-Roy, ny Gouverneur, s'appelle Tutan, & ce Correcteur va traicter des affaires d'importance de chaque ville, avec l'Insuanto, & cestuy-cy en va conferer avec le Comon, qui a charge d'enuoyer au Roy, & à son Conseil, le courrier dont nous auons parlé cy-dessus. Le troisieme s'appelle Ponchasi, & est comme le President du Conseil des Finances, ayant des Auditeurs, ou Conseillers, & beaucoup d'Officiers sous luy, comme des sergens qui seruent à leuer le reuenu du Roy en chaque Prouince, lequel reuenu est porté par le Ponchasi au Tutan, apres qu'il a payé les gages, & frais ordinaires & extraordinaires des Officiers Royaux qui sont en la Prouince. Le cinquiesme est l'Anchasi, qui est le President de la iustice civile & criminelle, qui decide avec ses Auditeurs de tous procez & differends qui viennent à luy par appel des autres Juges de la Prouince. Le sixiesme est l'Aytao, qui est le Pouruoyeur general, & President du Conseil de guerre, qui a charge de leuer des gens quand il est necessaire, & d'apprester des vaisseaux & des munitions pour les armées de mer, & de terre, & pour les garnisons ordinaires des villes, & places frontieres. C'est luy qui a charge d'interroger les estrangers qui viennent en sa Prouince, & de sçauoir d'eux d'où ils sont, & pourquoy ils viennent, & choses semblables, pour donner aduis de tout au Vice-Roy. Chacun de ces six a en son Conseil dix Auditeurs tous gens d'élite, qui l'assistent en l'expedition des affaires.

Quand ils sont en la sale, où ils tiennent le Conseil (ce qui se fait au logis du Vice-Roy) dans lequel il y a aussi pour chaque Conseil vne sale particuliere, cinq d'iceux s'assieent au costé droit du President, & les cinq autres au costé gauche. Ceux du costé droit sont plus anciens, & en outre different des autres, en ce qu'ils portent des riches ceintures garnies d'or, & des chapeaux de couleur passe, au lieu que les autres ont des ceintures d'argent & des chapeaux bleuz. Or tant les Auditeurs que les Presidents portent sur la poitrine, & sur les espauls, les armoiries du Roy brodees d'or en leurs robbes, & ne peuvent sans cela faire aucun acte public, & s'ils le vouloient attenter, outre qu'ils ne seroient pas obeïs, ils seroient encor rigoureusement punis au temps de la visite generale.

Outre ces six Juges susnommez, il y en a d'autres inferieurs, & subalternes, qui sont le Cantoc, qui est le grand Gonfalonnier, & Porte-enseigne; le Pochin, qui est le second Thresorier, le Pochinsi, qui tient le sceau du Roy, l'Autzatzi, qui est comme le Maire, ou Preuost de la ville. Il y en a aussi trois qui sont comme les Alcades, Preuost ou Juges de Cour en Espagne, nommez en leur langue Huitay, Tzia, & Tontay, qui donnent audience en leurs maisons vne fois la semaine, & quand il est temps d'ouurir les portes ils font lascher quatre petites pieces de canon, pour faire sçauoir à tous qu'ils se vont mettre en leurs sieges, où ils escoutent tous ceux qui leur vont demander iustice. Et s'ils trouuent quelcun qui ait failly, ils l'enuoyent avec vn Sergent (car chacun de ces Juges en a dix ou douze) par deuers les Juges ordinaires de la ville, qui se nomment Zonpau, & sont departis & ordonnez par chaque quartier, avec vn escrit, où est marquee la punition qu'on doit faire de celuy qui a fait faute. Chacun de ces Juges ordinaires a mille habitans sous sa charge, & leur iurisdiction ne s'estend hors de leur quartier, & n'y a aucun qui puisse estre Juge du quartier, où sa maison est assise. Chacun d'eux va de nuit faire le tour par son quartier, & met ordre que chacun se tienne coy en sa maison, & qu'on esteigne les lumieres de bonne heure, pour euitier le danger du feu, qui s'y est mis souuent, à cause des maisons qui sont serrees, & proches les vnes des autres, ayans toutes le haut fait de bois, à la mode de celle de Biscaye. Celuy qu'ils trouuent à heure indeuë avec de la lumiere, est puny rigoureusement. Il y a appel de ceux-cy au Preuost, ou Juges de la Cour, mais non des autres, & cet appel va iusqu'au Visiteur general, qui repare les griefs commis par eux

par eux tous, & pour ceste cause il s'appelle en leur langue Hondin, c'est dire à Repareteur du mal.

Outre les susdits, il y a encore d'autres Officiers particuliers, comme le Tompo, qui pouruoit aux viures, & y met les taux: le Tribuc qui apprehende & punit les faineans & vagabons: le Quinche, qui est comme le Grand Preuost, & le Chomcan, qui est l'intendant de la prison, qui est vn Officier dont ils font grand cas, à cause de la prerogative qu'il a de parler debout aux Iuges, apres s'estre mis à genoux deuant eux en entrant: car tous les autres parlent à eux à genoux.

Par dessus tous ces Officiers, il y en a vn qui s'appelle Quinchay, c'est à dire en leur langue, Seel d'o, qui ne part iamais de la Cour, que pour quelque grande affaire, & bien importante, concernant la paix & tranquillité de tout le Royaume.

Ils regardent principalement que le Vice-Roy, Gouverneur, ou Auditeur, ne soit pas natif du lieu où il va, pourueu de quelqu'une de ces charges, afin d'euitier les dangers & inconueniens, qui pourroient arriuer par le moyen de l'amitié des parens, ou mal-vueillance des ennemis, qui empescheroient le cours de la Iustice.

Le Roy leur donne à tous des gages suffisans, pour ce qu'il est defendu sur grandes peines à tous ceux qui plaident de ne donner aucuns presens à leurs Iuges, & de mesme aux Iuges de ne prendre aucune chose. Et quand le grand Conseil les enuoye, il leur ordonne de ne permettre à aucun plaideur, ou sollicitateur de les aller trouver en leur logis, de ne prononcer aucun acte iudiciaire qu'en pleine audience, & leurs Officiers, & cela se fait en cette sorte.

Le Iuge s'estant mis au siege, les Huissiers s'en vont à l'entree de la sale, & nomment à haute voix la personne qui vient pour auoir iustice, & disent aussi ce qu'elle demande. Le suppliant entre, & se met incontinent à genoux vn peu loin du Iuge, puis au mesme lieu propose ce qu'il demande à haute voix comme les Huissiers, ou bien par escrit. Si la demande est par escrit vn des Greffiers la prend, & la lit deuant le Iuge, qui l'ayant ouye ordonne sur le champ ce qui luy semble estre de iustice, en marquant la demande de sa propre main avec de l'encre rouge, & mandant ce qu'il veut, & entend estre fait.

Les Iuges sont obligez par expres commandement du Roy d'aller tenir l'audience à jeun, & c'est vne coustume tellement inuiolable entr'eux, que celuy qui y contrenuendrait seroit puny. Au moyen de ces façons de faire qui se gardent ainsi rigoureusement en public, il est impossible à vn Officier de se laisser corrompre, sans que quelqu'un de ses compagnons d'Office le sçache.

Si quelqu'un manque en ce qui est de sa charge, on luy met soudain vne petite banderolle en la main, & l'on le fait tenir à genoux avec ceste marque, iusqu'à tant que l'audience se leue: & lors le Iuge commande aux bourreaux qui sont là presens, de fustiger celuy qui a failly, & luy fait donner autant de coups que la faute semble meriter, & cecy n'est pas autrement ignominieux entr'eux, pour ce que c'est chose ordinaire.

En tous procéz, tant ciuils que criminels, les Iuges procedent tousiours par escrit, & font leurs actes, & examinent les tesmoins publiquement en presence des Officiers, de peur qu'ils n'usent en leur endroiect de quelque ruse ou fausseté, en les interrogeant sur ce qu'il n'est pas besoin de leur demander, ou en escriuant ce qu'ils ne disposent pas. Ils examinent particulièrement chaque tesmoing, & s'ils sont contraires en leurs depositions, ils les recollent & confrontent tous, & les interrogent iusques à ce qu'ils viennent à debattre ensemble, afin que par les raisons qu'ils alleguent, la verité soit mieux cogneüe: & quand ils ne la peuuent tirer clairement par ce moyen, ils leur baillent la gesne pour leur faire dire vray, excepté aux personnes de qualité qu'ils tiennent pour veritables, adioustans foy à leurs propos, sans gesne quelconque. Aux affaires de grande importance, & qui touchent de grands personages, les Iuges ne se fient pas aux Greffiers pour escrire les informations, mais eux-mesmes escriuent de leur propre main tous les actes, & leur diligence est cause qu'il y en a bien peu souuent qui se plaignent d'auoir receu quelque grief de leurs Iuges. Les Iuges comptent par tous les endroiects de leur Iurisdiction, les mailons qui y sont, & les mettent dix à dix en des tableaux qui sont pendus à chaque maison, qui fait la derniere de sa dizaine, & là sont mis les noms des dix maistres des mailons avec vne Ordonnance, par laquelle il est dict & enioinct à tous, qu'aussi tost qu'ils entendront que quelqu'un d'eux aura fait quelque chose au preiudice de la Republique, ou du voisinage, ils l'alleront incontinent denoncer à la Iustice, afin que la punition de celuy qui a failly luy serue d'amendement, & d'exemple aux autres, & quiconque manquera d'aller faire ceste declaration, sera contrainct de subir la peine que l'autre auoit meritee.

Quand l'un de ces dix veut changer de rue, ou aller demeurer en vne autre ville, ou faire

quelque long voyage, il est obligé de sonner vne clochette, ou bien vn bassin de cuyure par toute sa dizaine, & son quartier, dix iours deuant qu'il s'en aille, & d'aduertir tous les voisins de son dessein, & de l'endroit où il va, afin que s'il doit de l'argent, où si on luy a presté quelque chose, on le luy puisse demander auant son depart. Et si quelqu'un s'en va sans auoir vſé de ceste diligence, les Iuges contraignent les autres de la dizaine nommez au tableau, d'y payer pour luy ce qu'il doit, à faute d'auoir fait ſçauoir son deslogement, & d'auoir aduerty les creanciers, & la Iustice.

Quant à ceux qui doiuent, & ne veulent pas payer, la dette estant verifiée, on les execute en leurs biens, & s'ils n'en n'ont point on les fait mettre en prison, leur donnant vn certain terme dans lequel ils doiuent payer, & si dans le terme ils n'ont payé, ou contenté leur creancier, ils sont fouettez moderément pour la premiere fois, & l'on leur limite vn second terme, dans lequel s'ils ne satisfont ils sont fustigez pour la seconde fois plus asprement que la premiere, & par mesme moyen on leur donne vn troisieme terme, dans lequel s'ils ne payent, ils sont battus cruellement au possible. Cela cause que chacun d'eux est soigneux de payer ce qu'il doit, ou recherche ses parens pour luy ayder à s'aquiter, où se donne pour esclaue au creancier de peur de souffrir tel tourment. Ces mesmes Iuges vſent de deux sortes de gesne. Ils en donnent l'vne aux pieds, & l'autre aux mains, & l'vne ny l'autre ne se donne iamais qu'il n'y aye tant d'indices, que cela serue de preuue suffisante. Les Iuges souuerains assistent lors qu'on donne ces deux sortes de gesne, dont on vſe peu souuent, pour ce que les criminels confessent la verité deuant que de s'y voir exposez. Quant aux prisons, elles y sont du tout facheuses & cruelles.

Or quoy que chacun de ces Iuges ne soit que trois ans en charge, & qu'il doie rendre compte de tout ce qu'il aura fait durant ce temps par deuant les Iuges à ce deputez, qu'on nomme esclaues : toutesfois le Prince depesche tous les ans en chaque Prouince d'autres Visiteurs nommez Leuchiz, qui sont gens recogneus pour grands Iusticiers, & de bonne vie. Ces Visiteurs s'enquierent de lieu en lieu sans se donner à cognoistre, & s'informent secrettement des torts, & griefs que font les Iuges de la Prouince, & si ceux-cy trouvent les Iuges en faute ils les peuuent prendre & punir, ou les suspendre pour vn temps, ou les priver entierement de leurs charges, & en somme faire tout ce que bon leur semblera, pourueu qu'ils ne s'aduancent point à donner sentence de mort contre personne, veu que nul Magistrat ne le peut faire sans demander premierement aduis au Roy. Ces Visiteurs ont aussi pouuoir quelquesfois de recompenser ceux qu'ils trouvent auoir bien exercé leurs charges, voire mesmes iusques à leur donner des places, & charges plus honorables. De sorte que la recompense, & la punition estans si assurees, chacun s'effaye de bien faire, & la mesme chose fait que ce Royaume est vn des mieux ordonnez qui soient au monde.

34 Les sortes de supplices, dont ils vſent, sont de pendre, brulſer, & empaler, & la peine du feu est seulement ordonnee à ceux qui ont esté traitres au Roy. Les adulteres y sont tous condannez à la mort, & ceux qui les souffrent, & y consentent sont aussi chastiez exemplairement avec des peines inuentees pour cet effect.

35 Il est defendu qu'aucun, sur peine de la vie, ne commence, ny face la guerre en aucun lieu, sans expres congé du Roy, & de son Conseil, & pareillement qu'aucun ne voyage par mer sans mesme congé, & il y a aussi vne Ordonnance, qui porte qu'aucun n'aille trafiquer qu'en baillant caution de reuenir dans le terme qui luy sera limité, sur peine d'estre banny, & desnaturalisé, & pareillement qu'aucun estrangier n'entre par terre, ny par mer au Royaume sans expresse permission du Roy, ou des Gouverneurs des ports, & autres lieux, où il arriuera, & que les Gouverneurs ne le permettent sans grande consideration, & sans en aduertir premierement le Roy.

Auiourd'huy les Gouverneurs des ports dispensent quelquesfois de sortir, nonobstant ceste loy, & ce par le moyen de quelques presens que leur font les marchands, auxquels ils donnent congé secrettement d'aller trafiquer aux Prouinces & Isles circonuolines, comme aux Philippines, & ailleurs, & mesme il y eut trois marchands Chinois qui allerent iusques à Mexique, l'an 1585.

Toutesfois, ils n'ont iamais ce congé sans auoir auparauant baillé caution de retourner au Pais dans vn an.

Les Iuges & Gouverneurs permettent pareillement aux estrangiers, moyennant quelques presens, d'entrer aux ports, & y vendre, & acheter quelques marchandises, leur donnant toutesfois ce congé, à condition qu'ils n'iront point par les villes, n'y seiourneront pour voir les choses secretes. On baille ce congé par escrit sur vn aiz plattré, que les estrangiers esleuent en la proué de leurs vaisseaux quand ils vont surgir en quelque port, afin que les gardes du lieu ne leurs fassent point d'ennuy, & les laissent vendre & acheter en payant les droicts ordinaires du Roy.

du Roy. En chaque porte y a vn Greflier commis de la part des Gouverneurs, qui met par memoire l'heure & le iour que chaque navire est entré, avec reiglement à chacun comme il doit charger selon leur entree au port. Ce qui faict qu'encor qu'on voye souvent en vn port deux mille vaisseaux, tant grands que petits, toutesfois on les charge ou despesche avec aussi peu de brui&, que s'il n'y en avoit qu'un seul.

Les pauvres n'y vont point demandant par les rues, ny par les Temples, où ils font priere à leurs idoles, & il y a vne Ordonnance, par laquelle il leur est deffendu d'aller mendiant, & commandé aux autres de ne rien donner à ceux qui demandent, mais de les denoncer aussi tost au Juge des pauvres, qui est tousiours vn des principaux de chaque lieu, & n'a point d'autre soin que de pourvoir aux necessitez des pauvres, sans contrevénir à la Loy. Ce Juge faict crier par tout le premier iour qu'il commence à executer son office, que tout homme, ou femme qui aura vn enfant tellement gâté, qu'il ne puisse pas travailler, aye à le luy venir declarer, afin qu'il pourvoye à ce qui sera necessaire, suivant l'Ordonnance du Roy, qui porte que l'enfant estant apporté apres avoir veu le defaut qu'il a, s'il est iugé capable de pouvoit exercer quelque art, & office, on limite au pere vn terme, dans lequel il est obligé de le mettre à mestier, & de luy faire apprendre ce à quoy le Juge aura cogneu qu'il est propre. Que si l'enfant est si mal qu'il ne puisse exercer aucun estat, le Juge mande au pere qu'il ayt à le nourrir en sa maison toute sa vie, s'il a de quoy, & s'il n'a pas le moyen, où s'il n'a point de pere, il s'adresse au plus proche, & plus riche parent, & à faute de ce, enjoin& à tous les parens de contribuer à sa nourriture, & de bailler quelque chose pour leur part à celuy qui tient l'enfant chez luy. Et s'il n'a point de parens, où s'ils sont si pauvres qu'ils ne puissent pas entretenir cét enfant, le Roy le nourrit entierement à ses despens, & le tient en ses Hospitiaux Royaux qui sont en chacune ville de son Royaume, où l'on met pareillement tous les hommes vieux & necessiteux, qui ont v&é leur jeunesse en la guerre au service du Roy, & du Pais. Aucun pauvre ne peut sortir hors l'enclos de l'Hospital sans la permission du Juge, ou du Maistre administrateur qui est sous luy: & ce congé ne leur est iamais octroyé que pour quelque voyage qu'ils veulent faire, & qu'il leur est necessaire. Ces mesmes pauvres, & vieux hommes nourrissent là dedans des pouilles, des cochons, & plusieurs autres bestes, dont ils se peuvent servir, tant pour leur recreation, que pour leur profit. Le Juge visite fort souvent l'Administrateur, & est aussi visité par vn autre qui part de la Cour expressement pour visiter les Hospitiaux de la Prouince. Les aveugles du Royaume ne sont point tenus pour gens, que le Roy ou leurs parens doivent nourrir, pour ce qu'ils les font travailler, ou à moudre aux moulins de froment, & de riz, où à remuer les soufflets aux forges des Marechaux, ou à choses semblables, ou la veuë n'est nullement requise. Et si c'est vne fille aveugle, quand elle est devenue grande, elle fait le mestier des filles de ioye, & ces filles ont vne mere entr'elles qui les pare & accommode, & est du nombre de celles qui ont quitté le mestier pour estre vieilles, & inutiles. Or toutes ces femmes d'amour logent aux faubours, & hors des villes, & il leur est enjoind& estroitement de se tenir en ce lieu, sans pouvoit mettre le pied hors de la porte iadis quelles font ce mestier. Les pauvres veufes qui sont en necessité peuvent vendre leurs enfans pour se secourir: & pource il y a tout plein de riches marchands qui sont gros trafic en cecy, achetans de petites filles qu'ils nourrissent fort soigneusement, leur apprenant à chanter, à jouer des instrumens, & choses semblables: puis quand elles sont grandes, ils les meinent aux maisons assignees aux femmes publiques. Le premier iour qu'ils mettent vne fille à ce mestier, avant que de la prostituer au lieu public, ils la meinent devant vn Juge, que le Roy entretient en chaque ville, pour prendre garde à telles femmes. Ce Juge la recoit, & l'instale de sa main en ce lieu public, & depuis ce iour-là le nourricier n'a plus de iurisdiction sur elle: mais vient seulement chaque mois trouver le Juge, pour recevoir ce qui luy a desia esté taxé par le mesme Juge: & outre ce il est payé de tout le temps qu'il l'a nourrie, & remboursé de l'argent qu'il a donné en l'acheptant, & de ce que l'apprentissage de toutes ces gentilleses luy a coûté. Il y en a donc entr'elles d'aveugles, & d'autres qui baillent tout ce qui leur reste apres que le nourricier est payé à leur Juge, qui le leur garde fidelement, & en rend compte tous les ans aux Visiteurs, puis quand elles sont vieilles, le leur baille & distribue de sa main, aduisant à le leur mesurer si bien, qu'elles n'en ayent pas necessité: & si cela aduient on leur donne gages pour se nourrir, afin qu'elles parent les femmes aveugles, ou bien on les met à l'Hospital, que le Roy tient pour ceux qui n'ont pas moyen de vivre.

Quant aux petits garçons que les meres vendent aussi par necessité, on les met à mestier, & quand ils ont appris, ils doivent servir leur nourricier iulqu'à certain temps, apres lequel les nourriciers sont tenus de leur donner liberté, & outre ce de leur chercher femme, & les marier, & les mettre en quelque lieu & train où ils puissent gagner leur vie: à quoy faire ils sont contrains par toutes voyes de Iustice, au cas qu'ils ne le vueillent faire de leur bon gré. D'autre costé, les ieunes hommes sont obligez, en signe de recognoissance du bien fait receu, d'aller

cc

chez leurs nourriciers tous les premiers iours de l'année, & certains autres iours, avec quelques presents.

En l'achat des marchandises ils ne s'aydent de piece de monnoye marquée : mais pour empêcher toute tromperie, ils vendent & achètent à poids d'argent cizailé, portans pour cet effect en leur sein des cizeaux propres, & vn trebuchet bien adoulié dans vn estuy de bois. S'il est question d'un poids pesant, ils ont en leurs maisons des balances, & des poids avec la marque Royale, & ne battent monnoye que de pieces de cuiure de la valeur d'un liard, percées & enfilées ensemble, qui seruent au supplément de l'argent pesé, ou pour acheter des menues denrées. Les vsuriers, peste de l'Estat public, surpris en leur meschanceté, sont entr'autres punitions, condamnés à de grandes amendes. Il est seulement permis aux estropiez, impotens, & aveugles d'entre le menu peuple, de prester quelque argent à interests pour se secourir.

RELIGION.

Ils sont tous idolatres en la Chine, excepté quelques-uns que les Iesuites y ont conuertis, & ceux-cy sont en bien petit nombre. Or pour descrire les idoles qu'ils adorent, ils en ont vne d'estrange figure, à laquelle ils portent fort grand honneur. Ils la depeignent avec vn corps, des espaules duquel sortent trois testes qui se regardent l'une l'autre, qui signifient, disent-ils, que toutes trois ont mesme vouloir, ce qui faict croire qu'ils ont eu iadis quelque connoissance de la Religion Chrestienne. Il y a aussi, à ce qu'ils disent, quelques peintures à la façon, & avec les marques des douze Apostres. Mais quand on demande à ceux du Pais quels hommes ont esté ces douze Apostres, ils respondent que c'estoient de grands Philosophes qui ont vescu vertueusement, à raison dequoy ils ont esté faits Anges des Cieux. Ils ont aussi la peinture d'une femme belle à merueilles, tenans vn enfant entre les bras, laquelle ils disent auoir enfanté estant Vierge, & auoir esté fille d'un grand Roy.

Ils croient que le Ciel est Createur de toutes choses visibles & invisibles, & le marquent par le premier caractere de leur Alphabet, & disent que ce Ciel a vn Gouverneur pour les choses de là haut, qui s'appelle Lacon Tzautey, c'est à dire en leur langue Gouverneur du grand Dieu, & ils adorent cestui-cy, comme le plus grand apres le Soleil. Ils disent que ce Gouverneur n'a point esté créé ; mais a esté de tout temps, qu'il n'a point de corps, mais qu'il est esprit. Ils disent encor qu'il y en a vn autre de mesme nature, qui s'appelle Canlay, qui est aussi esprit, & qu'il a baillé à ce second la charge des choses de ça bas, & que la vie & la mort des hommes est en sa main. Ce Canlay a trois sujets sous luy, qui sont pareillement esprits, & qui luy aydent au Gouvernement. Leurs noms sont Tanquam, Teiquam, & Tzuquam, & chacun d'eux a vne puissance distincte. Tanquam a la charge des pluyes, & de pourvoir d'eau à la terre. Teiquam est celuy par qui les hommes naissent, & qui a la charge des guerres, des semences, & des fruiets. Tzuquam a le Gouvernement de la mer, & de ceux qui y voyagent. Ils leur font des sacrifices & leur demandent les choses qu'ils ont en leur puissance. Ils leurs font aussi plusieurs vœux, & leur promettent des jeux, & des farces, qu'ils representent deuant les memes idoles.

Ils tiennent encor pour saints vn grand nombre d'hommes qui ont surpassé les autres en valeur, ou en sçauoir, ou en industrie, ou à mener vne vie austere, & pareillement ceux qui ont vescu sans faire tort à personne, lesquels ils appellent en leur langue Pausaos, qui veut dire bienheureux. Ils sacrifient aussi au diable, quoy qu'ils sçachent qu'il est meschant & reprouvé, afin, disent-ils, qu'il ne leur face nul mal en leurs personnes, ou en leurs biens. Il ont semblablement plusieurs idoles, qui sont en si grand nombre, que pour n'estre trop loing j'en choisiray seulement trois principales, qu'ils honorent au possible.

Le premier saint de ceux-cy s'appelloit Sichia, qui vint du Royaume de Trantheyco, qui est deuers l'Occident. Cestui-cy fut l'inventeur de la forme de viure des Religieux, & des Religieuses qui sont au Royaume, qui demeurent en Communauté sans se marier, & demeurent perpetuellement reclus. Et pour ce que Sichia ne portoit nuls cheueux, ceux qui l'entuiuent n'en ont point aussi.

Ils ont dauantage vne Deesse, ou sainte, nommée Quanina, qui fut fille du Roy Tzonton, qui eut trois filles, dont il en maria deux, & voulant aussi marier Quanina, elle ne voulut iamais, luy disant qu'elle auoit fait vœu au Ciel de viure tousiours en chasteré. Le pere en fut fâché, & par despit la mit en vn lieu en façon de Monastere, luy faisant porter de l'eau & du bois, & nettoyer vn grand iardin qu'il y auoit. Les Chinois racontent d'elle, que les Singes la venoient trouver, & luy aidoyent, que les Saints du Ciel luy tiroient de l'eau, que les oyseaux luy balloyent le iardin avec le bec, & que de grandes bestes descendoient de la montagne pour luy porter du bois, & que le Roy son pere le sçachant, & s'imaginant qu'elle le faisoit par enchantement, fit mettre le feu où elle estoit. Elle voyant qu'on brulloit ce lieu à son occasion, se voulut
mettre

mettre dans la bouche vne grande espingle d'argent, qu'elle portoit pour faire tenir ses cheveux : mais à l'instant survint vne grande ruine d'eau qui esteignoit tout le feu. Lors elle s'enfuit, & s'alla cacher en vne montagne, où elle fit grande penitence, & vescu fort saintement; & le pere fut mangé de lepre, & des vers, sans que les Medecins y peussent donner remede, à cause du peché qu'il auoit commis. La fille ayant sceu sa maladie par esprit de diuination, vint à luy pour le guerir, & soudain qu'il l'eut recogneüe, il luy donna pardon, & l'adora. Au mesme instant la fille voyant que son pere la vouloit encore adorer, l'en voulut empescher, & ne le pouuant faire, vn saint se mit au deuant, pour donner à entendre que l'adoration se faisoit à luy, & non à elle : & soudain sans s'arrester elle retourna en sa solitude, où elle mourut religieusement. Ils la tiennent pour vne grande sainte, & la prient d'obtenir pardon du Ciel, où ils croient qu'elle est.

Ils tiennent encore pour sainte vne appelée Neoma, natie de Cochi, en la Prouince d'Oquiam. Ils disent qu'elle estoit fille d'un des principaux du Pais, & qu'en ne voulant point estre mariee elle s'enfuit à vne petite Ile, qui est vis à vis d'Ingoa, où elle mourut menant vne vie fort austere, & faisant beaucoup de faux miracles. Ceux qui voyagent sur mer prient son idole sur la poupe de leurs vaisseaux, & l'inuoquent ordinairement en luy offrant des sacrifices.

Ils vsent d'une certaine sorte de sort, telle que ie la vay d'escire lors qu'ils entreprennent quelque chose. Ils ont deux petites pieces de bois faites comme deux moities de noix, rondes d'un costé, & plates de l'autre, & liees ensemble avec vn fil. Ils les iettent deuant leurs idoles, & deuant que les ietter parlent à leurs faux Dieux avec de grandes ceremonies, & des paroles fort douces, les prians de leur vouloir donner le bon sort, & promettant que s'il leur vient ils leur offriront, ou de la viande, ou vn beau parement, ou quelque autre chose de valeur. Cela fait, ils iettent les deux morceaux de bois, & si par cas fortuit ils tombent tous deux, tellement que le plat soit dessus, ou que l'un soit de plat, & l'autre de rond, ils tiennent cela pour vn mauvais signe, & s'en prennent aux idoles, leur disant force paroles iniurieuses, & les appellant chiens, vilains, infames, & choses semblables. Apres les auoir ainsi outragez ils se remettent à les flatter, en leur demandant pardon du passé, & leur promettant plus de presens si le sort leur reüssit bien. Et lors ils procedent de mesme sorte qu'auparauant. Quand la chose qu'ils demandent est importante, & que le bon sort demeure trop à venir, ils vont à leurs idoles, les iettent par terre, & les foulent aux pieds, ou bien les plongent dans la mer, ou les approchent du feu, les laissant vn peu bruller, & quelquefois les battent & fouettent, iusqu'à ce que les deux morceaux de bois viennent à tomber comme ils desirent, c'est à sçauoir le rond dessus. Ce sort venant ainsi à leur souhait, ils font grande feste à leurs idoles, avec quelques chansons & louanges, & leur offrent vne teste de pourceau cuite, qui est la viande qu'ils estiment la plus exquise de toutes. De tout ce qu'ils leur offrent, ils ostent tousiours la pointe du bec, & les serres des oyseaux, & le groin du pourceau, & quelques grains de riz, & en arrosant leur offrande de quelques gouttes de vin, la posent dans vn plat dessus l'autel, & quant à eux ils mangent le reste au mesme lieu en presence de leurs idoles.

Ils vsent aussi d'une autre sorte de sort, en iettant plusieurs buchettes dans vn vase, en chacune desquelles y a vne lettre escrite, & apres auoir bien remué ces buchettes, vn enfant met la main dans le vase, & en tire vne, & voyant quelle lettre il y a, ils cherchent en vn liure le fuciller, qui commence par ceste lettre, & interpretent ce qu'ils trouuent en ce fuciller, pour la chose qui les a conuiez à faire le sort.

Ils ont tous ceste coustume de recourir au diable quand quelque affliction leur arriue. L'ordre qu'ils tiennent à l'inuoquer est, qu'un homme s'estend tout de son long la bouche contre terre, & vn autre commence à lire chantant en vn liure, & vne partie des assistans se met à respondre, & les autres font du bruiet avec des clochettes & tambours, & vn peu apres cet homme estendu commence à faire de grandes grimaces, & des gestes horribles, qui signifie que le diable est delia entré dans son corps. Lors ils luy demandent ce qu'ils desirent sçauoir, & celuy qui est possédé respond le plus souuent en sens douteux, & quand le diable ne veut respondre de parole, ils tirent de luy response par lettres en ceste maniere. Ils estendent vne mante rouge par terre, & mettent dessus certaine quantité de riz espars esgalement par la mante, puis à l'instant y posent vn homme qui ne sçait pas escire, avec vn baston en main, & les assistans commencent à chanter & à sonner, comme en l'autre inuocation dont nous venons de parler. Vn peu apres le diable entre dans le corps de celuy qui tient le baston, & le demoniaque commence à escire avec ce baston sur le riz, & les assistans comptent les lettres qu'il forme, puis en les assemblant toutes ils trouuent la response de ce qu'ils demandent: mais le plus souuent avec menagerie.

Ils tiennent que le Ciel, la Terre, & l'Eau, estoient ioincts ensemble de tout temps, & qu'un certain qui est au Ciel, nommé Tain, par le grád sçauoir qu'il eut separa la Terre d'avec le Ciel, 38

& le Ciel demeura en la partie superieure, la Terre descendant en bas suivant son inclination naturelle. Ce Tayn crea de rien vn homme qu'ils nomment Panfon, & vne femme qu'ils appellent Panfonce. Ce Panfon par le pouuoir que luy donna le Tayn, crea aussi de rien vn autre homme, qui fut nommé Tanhom, avec treize autres, tous freres. Tanhom fut homme de grand sçauoir, tellement qu'il imposa le nom à toutes choses créées, & cogneut par la doctrine du Tayn la vertu de toutes, & la maniere de les appliquer au corps pour guerir toutes sortes de maladies. Ce Tanhom & ses freres eurent beaucoup d'enfans, & principalement le plus grand appelé Teyencom en eut douze, & l'aisné de tous nommé Tuhucom en eut neuf, & les autres aussi en eurent grand nombre. Ils croyent que les lignees de ceux-cy ont duré quatre vingts & dix mille ans, & qu'au bout de ce temps tous les hommes finirent, pour ce que Tayn se voulut vanger de quelque iniure qu'ils luy firent, & aussi d'enuie qu'il eut de ce qu'outre ce qu'il leur auoit enseigné, ils sçauoient desia presque autant que luy, & ne le recognoissoient point pour superieur, comme il leur auoient promis, lors qu'il leur influa sa science. Apres cela il aduint que le Ciel tomba, & soudain Tayn vint à le releuer, & crea vn autre homme sur terre nommé Lotzizam avec deux cornes, d'où sortoit vne odeur souefue, de laquelle venoient à naistre plusieurs hommes & femmes. En fin ce Lotzizam disparut, laissant desia beaucoup d'hommes & de femmes au monde, d'où sont venus tous ceux qu'on y voit aujourd'huy. Ils disent que le premier qui naquît de ce Lotzizam se nommoit Azalam, qui vescu 900. ans. Aussi tost apres sa mort, le Ciel crea vn homme nommé Atzion, rendant grosse sa mere nommee Lutin, avec vne teste de Lyon qui estoit au Ciel. Il naquît en la ville de Truchin en la Prouince de Canton, & vescu 800. ans. Depuis vint à naistre Vsao, & lors il y auoit desia beaucoup de gens au monde, qui ne mangeoient que des choses cruës. Cét Vsao leur donna industrie de faire de petites cahuettes avec des arbres, pour se garder & desfendre des bestes farouches qui leur faisoient beaucoup de dommage, & il leur monstra aussi la maniere de faire des habillemens.

Apres cela vint vn nommé Huntzuy, qui fut l'inuenteur du feu, & qui enseigna comme il falloit frire, & comme il falloit rostir, & cuire les viandes, & la maniere de vendre & troquer vne chose avec l'autre. Ils disent qu'apres cela, vne certaine femme nommee Hautzibon eut vn enfant, qui fut appelé Ocheutey, qui inuenta maintes choses, & ordonna les mariages. Ils alleurent qu'il vint miraculeusement du Ciel pour le bien de la terre, d'autant que sa mere allant par vn chemin rencontra vne trace d'homme, & posant son pied dessus fut environnée d'vn eclat qui vint du Ciel, & demeura sur le châp grosse de luy. Cét Ocheutey eut vn fils appelé Ezomlon, qui fut inuenteur de la Medecine, de l'Astrologie, & de la Iudiciaire, & monstra à labourer la terre. Ils racomptent de cestui-cy qu'il mangeoit de sept sortes d'herbes venimeuses & mortelles, sans qu'elles luy fissent aucun mal, & qu'il vescu 400. ans. Il eut vn fils nommé Vitey, qui reduisit la Chine en Royaume. Voila ce qu'ils croient de la creation, & du progres du monde.

39 Ils croient tous l'immortalité de l'ame, & pareillement la recompense, ou punition qu'elle doit auoir en l'autre vie, selon les œuvres qu'elle aura faites en la compagnie du corps. Ils tiennent aussi que l'Ame a eu son commencement du Ciel, qui luy a donné vn estre immortel, & que celle qui aura tousiours vescu selon les Loix du Pais, estant dans le corps, & n'aura point fait de mal, ny de tort à personne, sera enleuée au Ciel, où elle viura eternellement en grande ioye, deuenant Ange; & celle qui aura mal vescu, ira en la compagnie des diables, dans des prisons obscures, où elle souffrira des tourmens, qui ne finiront iamais.

Ils confessent qu'il y a vn lieu, où les Ames qui doiuent deuenir Anges se purgent de tout le mal qui les a souillees tandis qu'elles estoient dans le corps, & que le bien que les parents & amis font, sert beaucoup à faire aduancer ceste purgation.

Quand ils veulent prier pour les trespassez, l'vn d'eux, qui est comme le Prestre & Sacrificateur, porte vn petit tambour, & l'vn des nouices a vne espee de cliquettes, & l'autre vne clochette, & ils font vn autel, où ils posent ceux qu'ils tiennent pour Saints & Aduocats des defuncts, & à l'instant les parfument de storax, d'encens, & d'autres bonnes odeurs. Apres cela ils dressent cinq ou six tables couuertes de beaucoup de viandes pour les morts, & pour les Saints, & incontinent au son du tambour, & des cliquettes, & de la clochette, ils commencent à chanter certains Cantiques, & les disent à tour de cœur: & de temps à autres les petits nouices vont à l'autel offrir certaines Oraisons escrites sur le papier. Ils passent presque toute la nuit avec ces ceremonies, & plusieurs autres: & apres, tous commencent à manger des viandes qui sont sur les tables que nous auons dictes.

Quant au menu peuple, il croit que les Ames qui vivent mal, auant que d'aller en Enfer (qui est vn lieu qu'ils pensent ne deuoir point estre restably que le monde n'ait pris fin) sont enuoyees pour leurs meffaits dans des corps de beufles, & d'autres bestes, & celles qui ont bien vescu dans des corps de Roys, & Seigneurs, où elles sont en grande ioye.

Il se

Il se trouue entr'eux beaucoup de lieux faicts, comme des Monasteres par toutes les villes & bourgades, & mesme parmy les champs, où il y a beaucoup d'hommes & de femmes qui viuent en communauté, & en cloistre, à la mode de nos Religieux.

Il y a seulement quatre sortes de Religions, dont chacun a son General, qui demeure ordinairement en la ville de Suntien : ce General s'appelle Tricon en leur langue, & pouruoit en chaque Prouince d'un Prouincial, qui visite tous les Conuents, corrigeant ceux qu'il trouue auoir failly en leur regle, & maniere de viure. Ce Prouincial pouruoit aussi d'un homme en chaque Conuent, qui est comme Prieur, ou Gardien, auquel tous ceux qui s'y tiennent doiuent obeir. Ce General exerce toute sa vie la charge qui luy est donnee, sinon que l'on trouue qu'il ait commis quelques fautes, pour lesquelles il merite d'estre priué. Ce ne sont pas les Religieux qui l'ellisent en leurs Chapitres : mais le Roy, ou son Conseil le nomme. Cestui-cy va vestu de soye de la couleur de sa Religion, à sçauoir, de noir, ou de passe, ou de blanc, ou de brun, qui sont les quatre couleurs de ces Religions : & le mesme ne sort iamais de son logis que dans vne chaire de marbre, ou d'or, qui est portee par quatre ou six hommes vestus de mesme habit. Les Religieux font la queste parmy les rues, chantans & faisans sonner de petites cliquettes, & certains autres instruments. Ils ont tous la barbe, & la teste rase, mangeant en commun, & leur habit ordinaire est de sarge. En priant ils parlent au Ciel, qui tiennent & reputent pour Dieu, & à un Siquian, qu'ils disent auoir inuenté ceste maniere de viure, & qu'ils tiennent pour Saint : Par les loix du Royaume, le fils aîné d'une maison ne se peut mettre en Religion, & la cause de cela est, que tout fils aîné est obligé de nourrir ses pere & mere en leur vieil aage. Ils offrent au matin, & au soir à leurs Idoles de l'encens, du benjoin, du bois d'aloës, & du cayolac qui sent fort bon, & quelques sortes de pastes de tres-bon odeur. Quand on met quelques vaisseaux sur l'eau, ces Religieux s'y en vont pour faire leurs sacrifices en la poupe, où les Chinois ont leurs oratoires, & là ils presentent du papier peinct de diuerses figures, lequel ils mettent en pieces devant leurs Idoles avec des Cantiques, & en sonnant de petites clochettes, & lors ils font la reuerence au diable, & le tiennent peinct en leurs vaisseaux, afin qu'il ne leur face aucun mal. Cela faict, ils mangent, & boient au mesme lieu tout leur saoul, & par ce moyen il leur est aduis que le vaisseau demeure sanctifié, & que tous ceux qui iront dessus auront bonne fortune.

Pour les Academies, elles sont en splendeur par tout le Royaume : Les estudes de Philosophie & de Loix du Pais y florissent, sans aucune preference de personnes, quant aux honneurs, n'ayans esgard sinon à la doctrine & erudition : De là vient que les Magistratures & Offices sont ouuerts aux hommes doctes, & leur sont deferez en grande solemnité. Toute leur vie est plaisante, douce & magnifique. Ceux qu'on porte & eleue aux sieges avec voiles de soye couverts d'or & d'argent, sont appelez Loitias & Mandarius, lesquels se plaisent à se donner du bon temps, & à faire bonne chere.

GENEALOGIE DES ROYS DE LA CHINE.

POUR ce que Vitey fut celuy, qui, comme nous auons dict, reduisit la Chine en Royaume, nous commencerons par luy, & viendrons iusqu'au Roy qui regne à present, en disant quelque chose des faits & choses remarquables de ce Prince.

Vitey fut donc le premier Roy de la Chine : & l'on raconte de luy entr'autres choses, qu'il estoit aussi haut que sept mesures de la Chine, chacune desquelles fait autant que deux tiers d'Espagne ; de sorte qu'il auoit enuiron quatre aulnes & deux tiers de haut. Dauantage ils disent qu'entre deux espauls il auoit six espans de large, & qu'il fut aussi vaillant, que grand le corps. Il eut un Capitaine nommé Lincheon, qui outre la valeur, & la force, auoit encore vne fort grand prudence : de sorte qu'il assujettit au Roy Vitey toute ceste grande estendue de Pais, & le rendit redoutable à tout le monde. Ils tiennent que ce Roy inuenta la façon des robes, les teintures, & les nauires, & pareillement la scie pour couper le bois. Sur tout ils disent qu'il estoit grand Architecte, qu'il fit un grand nombre de bastimens magnifiques. Il inuenta encores le touret de soye, dont ils vsent audit Royaume, & fut le premier qui amena en ce Pais-là l'vsage de porter de l'or, des perles, des pierreries, & des habits de toille d'or, d'argent & de soye. Il departit tous les habitans de son Royaume en Citez, villes, & villages, & ordonna tous les mestiers & Offices, commandant qu'aucun n'eust à se mesler d'autre estat que de celuy de son pere, sans permission speciale du Roy, ou des Gouverneurs du Royaume. Il mit tous ceux d'un mesme estat en des rues particulieres, & ordonna aussi qu'aucune femme ne demeurast sans travailler, ou à l'estat de son mary, ou du moins à filer ou à ouurer de l'aiguille : & ceste Loy fut si generale, qu'elle fut gardee par la femme mesme.

Ce Roy eut quatre femmes, & vingt-cinq enfans d'elles, & regna cent ans, & y eut depuis

luy iusques à celuy qui fist la grande muraille, cent seize Roys, tous de la lignee de ce Vitey, qui regnerent deux mille deux cents cinquante & sept ans. Je ne les nommeray point icy de peur d'estre trop long : mais ie me contenteray d'y mettre seulement ceux qui me semblent necessaires pour declarer la succession de la Couronne, depuis les cent seize Roys dont nous auons fait mention, iusques à celuy qui regne à present.

Le dernier Roy de la lignee de Vitey s'appelloit Tzinzon, & ce fut luy qui fit ceste grande enceinte, se voyant assailly des Tartares par beaucoup d'endroits. En fin, pource qu'en la faisant il mourut vn grand nombre d'hommes, il vint à estre hay de tous, tellement qu'ils conspirerent ensemble pour le tuer, comme ils firent apres qu'il eust regné quarante ans, & vn sien fils heritier du Royaume, nommé Agntzi avec luy. Ce Tzintzon estant mort, & son fils aussi, ils prindrent pour leur Roy vn qui se nommoit Anchosau, homme de grand esprit, & plein de valeur, qui regna douze ans.

A cestui-cy succeda vn sien fils appellé Futey, qui regna sept ans, & mourut ieune.

Par le trespas de cestui-cy, sa mere qui estoit de sang Royal, vint à regner, & gouuerna le Royaume au grand contentement de tous, l'espace de dix-huict ans, & d'autant qu'elle ne laissa iamais hoirs malles, vn fils que son mary Anchosau auoit eu d'une autre femme, luy succeda. Cestui-cy regna vingt-trois ans, & eut pour successeur,

Cuntey son fils, qui regna seize ans huict mois.

Huntey fils de Cuntey, regna apres luy cinquante-quatre ans, & laissa pour successeur,

Chantey son fils, qui regna treize ans.

Chantey son fils luy succeda, & regna vingt-cinq ans trois mois.

Cantey fils d'Ochantey, regna seize ans deux mois.

Tzentzey son fils, regna vingt-six ans quatre mois.

Authey fils de Tzentzey, regna seulement six ans.

Pintarey fils d'Authey, regna cinq ans.

Tzintzomy frere de Pintarey, succeda à son frere, pour-ce qu'il n'estoit pas encores marié quand il mourut, & cestui-cy regna seulement trois ans sept mois.

Huyhannon, encores freres de Tzintzomy & de Pintarey leur succeda, & regna six ans.

Cubum fils de Huyhannon, regna trente-deux ans.

Benthey fils de Cubum, regna vingt-huict ans.

Vnthey son fils, regna treize ans.

Othey luy succeda, & regna dix sept ans cinq mois.

Yanthey fils d'Othey, regna seulement huict mois.

Antey son fils, regna dix-neuf ans.

Tantey son fils mourut aussi tost presque apres son pere, n'ayant regné que trois mois.

Chitey son fils regna vn an seulement.

Quantey frere de Tantey, & de Chitey, leur succeda, & regna vingt & vn an.

Linthey son fils regna vingt-deux ans.

Yanthey fils de Linthey, regna trente & vn an. Cestui-cy auoit peu d'entendement : si bien que ceux du Royaume le haïssoient, & en fin vn sien nepueu nommé Laupy se reuolta contre luy, estant assisté de deux Cheualiers, freres, qui estoient lors à la Cour, vaillans hommes, dont l'un estoit appellé Quathey, & l'autre Trunthey, qui pourchasserent de faire Roy Laupy. L'oncle le sceut, & fut si lasche, & si mal assisté, qu'il n'eut pas la hardiesse ny le moyen d'y remedier : qui fut cause que plusieurs partis s'esleuerent par le Royaume, & specialement quatre Tyrans, dont les noms estoient Cincoam, Sosoc, Guanfan, & Guanfer. Laupy leur fit la guerre, sous couleur de fauoriser & assister son oncle : & apres auoir fait durer la guerre quelque temps, fit paix avec Cincoam, prenant vne sienne fille en mariage, & fit aussi tost la guerre aux trois autres Tyrans, avec la faueur de son beau pere.

Lors ce Royaume fut diuisé en trois parties, dont l'une, & la principale, suiuit Laupy apres la mort de son oncle, l'autre Sosoc, & l'autre Cincoam, beau pere de Laupy.

Le Royaume demeura ainsi quelque temps, iusques à ce que Cuithey fils de Laupy, vint à regner apres son pere. Vn tyran nommé Ciambutey s'esleua contre luy : mais il le tua, & fut si vaillant qu'il reünit tout le Royaume, qui auoit esté diuisé l'espace de quarante & vn an, regnant depuis tout seul vingt-cinq ans.

Fontey son fils, regna apres luy dixsept ans.

Pour abreger, il y eut de ceste lignee quinze Roys, qui regnerent cent septante six ans.

Le dernier de ces Roys fut Quiontey, contre qui s'esleua le Tyran Tzobu. Il y eut du sang de cestui-cy huict Roys, qui regnerent soixante deux ans. Contre le dernier nommé Sitey, s'esleua vn nommé Cotey, de la lignee duquel il y eut cinq Roys, qui regnerent 24. ans.

Le dernier nommé Othey, fut tué par vn appellé Dian, & il y eut de sa lignee cinq Roys, qui regnerent

qui régnerent trente & vn an. Contre le dernier de ceste maison s'esleua vn certain Tzuy, & y eut de sa lignee trois Roys, qui regnerent trente & sept ans.

Contre le dernier s'esleua Tonco, qui gouuerna fort bien le Royaume, & eut pour successeurs vingt & vn Roys de sa lignee, qui regnerent deux cents nonante quatre ans.

Le dernier appelé Troncon, se maria à vne qui auoit esté femme de son pere, & s'appelloit Bausa, belle à merueilles, & pour l'espouser il la tira d'un Monastere, où elle s'estoit mise Religieuse. En fin ceste femme le fit tuer, & gouuerna le Royaume toute seule l'espace de quarante ans. Leurs Histoires disent que ceste femme fut fort desbordee, qui s'estant abandonnee aux grands Seigneurs du Royaume, elle épousa vn homme de basse estoffe, afin d'auoir moyen de suiure ses volontez : mais auant de se remarier, elle fit mourir les enfans masles qu'elle auoit eu de son premier mary, afin qu'un sien nepueu succedast à la Couronne.

Ceux du Royaume ayans sceu son intention, & indignez de sa façon de viure, enuoyerent chercher vn fils de son mary, quoy qu'il fust bastart, & d'un commun consentement l'esleurent Roy : cestui-cy se nommoit Taurzon, qui fit faire rigoureuse iustice de ceste meschante femme. Il y eut de sa lignee sept Roys, qui regnerent six-vingt ans.

Le dernier fut Coucham, contre qui s'esleua vn nommé Dian, qui se saisit du Royaume, & il y eut deux Roys de sa lignee, qui regnerent dix-huict ans.

Outon s'esleua contre le dernier de ceux-cy, & il y eut de sa lignee trois Roys, qui ne regnerent que quinze ans.

Outzin s'esleua contre le dernier de ces trois, & laissa apres luy deux successeurs de sa lignee, qui regnerent neuf ans trois mois.

Tozo s'esleua contre le dernier, & luy, & vn sien fils, regnerent seulement quatre ans.

Anchiu eut guerre contre le fils de Tozo, & le tua, & luy succeda au Royaume, luy, & deux autres de sa lignee de Vitey premier Roy, s'esleua contre le dernier de la race d'Auchiu, & le tua. Il y eut de la lignee de ce Zaitzon dixsept Roys, qui regnerent tous en paix l'espace de trois cents ans.

Le dernier de ceste lignee s'appelloit Tepim, contre lequel vint le grand Cham de Tartarie nommé Vzou, qui entra dans la Chine, & s'en rendit maistre, tellement que neuf Roys Tartares y regnerent l'espace de quatre-vingts & treize ans.

Tzintzoum le dernier des neuf fut si meschant, qu'il fut cause que le Royaume se des-vnit, & que tous esleurent secrettement pour leur Roy vn nommé Hombou, homme de grande valeur de la lignee des anciens Roys, qui assemblant beaucoup de gens fit tant qu'il chassa les Tartares hors de tout le Royaume.

Il y a eu douze Roys de la lignee de ce Hombou, en comptant celuy qui regne à present : les vnze precedents ont regné l'espace de deux cents ans. Celuy du iourd'huy se nomme Bonog, & a succédé au Royaume par la mort de son frere aîné, qui mourut d'une cheute de cheual. On le tient pour gentil, plein d'entendement, & grand iusticier. Il est marié à vne sienne cousine, & en a vn fils.

DISCOUERS DV ROY DV IAPON.

SOMMAIRE.

1 **L'** longueur, largeur, estendue, & confins du Iapon, diuise en trois membres. Et combien chacun d'iceux contient de Royaumes, ou Seigneuries.

2 Description de l'estat ancien de ce Pays, gouuerné lors par vn seul Prince appelé Vo, ou Dair.

3 De Meaco principale ville du Iapon : Offacaye, Bunquo, & autres celebres Citez : leur situation & grandeur.

4 Bonté de l'air de ce Royaume, abondance en riz, metaux, & or, hauts cedres, & d'estrange gros-

seur, en animaux terrestres & volatiles. De deux admirables montaignes, dont l'une passe les nuées en hauteur, & l'autre brusle tousiours, & vomit flammes.

5 De la subelité d'esprit, & disposition de corps des Iaponois : la façon de leur cheuelure, de leur breuillage, manger, & dormir : la couleur de leur visage, leur langage, & lettres dont ils dressent leur escriture : leurs armes, & leur Academie pour instruire la ieunesse.

6 Leur richesse au trafic de riz, perles, or, pierres precieuses.

ce iiii

7 Du reueu de leur Roy.

8 Des forces maritimes, & gouvernement de cét Estat, & premierement du frequent changement des Princes Gouverneurs des Prouinces.

9 Des trois principaux Magistrats Zaco, Vco, Cubacama, & des cinq Ordres, esquels le peuple est diuise.

10 Des supplices des criminels.

11 De l'impieté des Iaponois, nians la providence de Dieu, & l'immortalité des ames: & de leurs Prestres appelez Bonzes, diuisez en vnze sectes différentes, & contraires.

12 De leurs Temples, & Dieux Fotoques, & Cammes, & de la frequente apparition des Demons & diables en diuerses formes: la ruse, & force dont ils vsent pour se faire adorer.

13 Ceremonies es pompes funebres, & obseques des Iaponois.

14 Des Iesuites du Iapon, & l'admirable conuersion des peuples au Christianisme, par la Predication du Pere Xanier, & autres de ceste Compagnie.



LE IAPON, ou Iapan, anciennement nommé Chryse, & selon Marc Paul, Zipangry est vn cors & amas de plusieurs Illes, separees par des petits Golfes, destroits, & tournoyements de mer, & cét amas s'estend depuis le 31. degré de hauteur, iusques au 39. On ne scait bonnement quelle est sa grandeur: sa largeur n'est pas esgale, veu qu'en quelques endroits elle n'est que de dix lieues, & pour le plus de trente. Ses Illes regardent du Leuant la nouuelle Espagne, du Nord les Tartares, & autres peuples incogneus, & sauvages: du Couchant la Chine, & du Sud les terres incogneuës, avec vn grand espace de mer au milieu. Elles contiennent 66. petits Royaumes, & sont diuisees en trois membres principaux, dont le premier & principal nommé Iapan, contient 53. Seigneuries, ou Royaumes, dont les plus puissants sont ceux de Machau, où les Portugais negotient, & d'Amagunce. Le Roy de Machau a sous luy 24. ou 26. Royaumes, & celuy d'Amagunce 12. ou 13. Le deuxiesme membre est appellé Ximo, & comprend neuf Royaumes, dont les principaux sont ceux de Bungo, & de Figen. Le troisieme membre est celuy de Xicoum, qui contient quatre Royaumes, ou Seigneuries.

2 Les plus Illustres de toutes ces Principautez sont celles de Coquinay, où est la renommee ville de Machau. Autresfois tout le Iapon a obey à vn seul Prince, qu'on appelloit Vau, ou Dair, iusqu'à ce qu'un de ces Monarques s'estant trop plongé dans les delices, fut mesprisé des Gouverneurs de ses Prouinces, & principalement des Cubes, qui estoient les deux principaux (dont l'un ruina apres la puissance de l'autre) tellement que ces deux s'emparerent de tout ce qu'ils peurent, & en despouillerent le Dair. L'ambition creust de main en main, & tantost l'un, tantost l'autre se reuoltant, les vns se saisirent d'une partie, les autres d'une autre, sous le nom de Iacatis, qui veut dire Roys. Toutesfois ils laisserent au Dair le nom de Seigneur vniuersel de Iapon, mais sans aucune iurisdiction ou puissance, & seigneurie: & c'est à grand peine que les Princes qui ont leurs Estats voisins de Machau, luy fournissent les viures, & des vestemens, tellement que ce Dair n'est plus que comme l'ombre de l'ancien Monarque du Iapon. Mais au lieu du Dair, depuis cinq cents ans en ça, celuy qui se fait Seigneur de Coquinay, & s'appelle Prince de la Tenze, où sont les cinq Royaumes d'autour de la ville de Machau, se dit souverain Monarque du Iapon, tel qu'a esté Nobunanga, & apres luy Faxiba, l'un de ses principaux Capitaines, qui subiugua du moins cinquante Royaumes, & tel qu'est à present Taicotama, ou Taico.

3 La principale ville du Iapon c'est Machau, qui a eu de tour vingt & vn mille: mais est maintenant moindre d'un tiers par le moyen des guerres ciuiles des Iaponois. C'est là que se tient le souverain Magistrat du Iapon, composé de trois hommes. Il y a apres la ville d'Ofiacaye, qui est grande & puissante, & comme on tient, la plus riche du Leuant. Il demeure en ceste ville beaucoup de marchands, dont ceux qui ont moyennement dequoy, sont du moins riches de trente mille escus: & ceux qui sont plus riches, possèdent des sommes incroyables. Bungo est la principale ville de sa contree en vne assiette fort commode. Coye est vne ville dediee à certain Bonze, qu'ils appellent Combodassi. Tous les Princes sont enterrez en ceste ville, ou si on loge leurs corps ailleurs, on y enuoye pour le moins vne de leurs dents.

On compte encores en ces Illes la ville de Piongo, elloignee de Machau dixhuit lieues. Ceste ville fut ruinee pour la plus grande partie du temps de Nobunanga: & vn tremblement de terre l'esbranla tellement l'an 1596. qu'une grande partie est allee par terre, & peu apres la plus grande partie, comme on tient, a esté brullee. On y loge aussi Nangasche, où les Portugais vont traffiquer au havre, ville assez belle, à cinq lieues loing de la mer, & oppoïee à Sacai, & pareillement celles de Vosuquin, Funay, Tosam, & plusieurs autres.

QUALITE.

QUALITE.

L'AIR de ce Pais est fort sain, combien qu'il soit fort sujet au froid, & aux neiges, & morte, à cause des pluyes frequentes, de mesme que montueux, & sterile. Ils recueillent le riz au mois de Septembre, & en quelques lieux le froment au mois de May. Les habitans tirent de la terre diuers metaux : & Marc Paul Venitien, diët qu'en ce Pais il se trouue si grande quantité d'or, que de son temps le Palais du Roy estoit couuert de lames d'or, de mesme qu'on void les Eglises en France couuertes de plomb. Il y a force arbres qui sont semblables aux nostres, & l'on voit en diuers endroits des cedres si hauts, & si gros, que les charpentiers en font des piliers de leurs Temples, & des masts de quelque nauire que ce soit. On y void par les prez & par les champs, force troupeaux de bœufs & de chevaux, & par les forests des loups, lievres, sangliers, & cerfs : il y a aussi force phaisans, canards de riuere, tourterelles, cailles, & gelinottes : ils n'ont ny beurre, ny huyle d'olive, mais seulement de l'huyle tiree des baleines. Les animaux domestiques que nous auons en ce Pais, sont au leur. Entre les montagnes qui sont en toutes ces Illes, il y en a deux principales, dont l'une est si haute, qu'elle surpasse de beaucoup les nues, & est appelée Figenoïama : l'autre brulle continuellement, & iette force flammes. Le peuple vit vne bonne partie de la chasse des bestes sauages.

MOEURS.

Les Japonois sont pour la plus part subtils, aduisez, fins, & de bon entendement, dociles, & de bonne memoire. On n'y reproche à aucun la pauureté, & l'on y fuit & deteste la medifance, le larcin, la coustume de iurer, & toute sorte de ieux de hazard. Ils se tiennent glorieux d'estre de belle taille. Ils sont pour la plus part vigoureux, & l'age de porter les armes s'estend iusques à soixante ans. Ils ont peu de barbe, & pour le regard des cheueux, les vns tirent ceux de deuant, les autres ceux de derriere, & les paisans ont la moitié de la teste pelee, aussi bien que le menu peuple. Les nobles ne se laissent que fort peu de cheueux derriere : & si quelqu'un touchoit à ce qui reste, ils le prendroient pour vne grande offence. Ils couurent le bas plancher de leurs chambres de nattes, enfilees en façon de coete, & fort nettes. Ils n'ont moins de soin de la propriété que les Chinois. Ils vsent en mangeant de deux petis bastons si proprement, qu'ils ne laissent tomber aucune chose, & ils n'ont nul besoin de se torcher les doigts, & les essuyer à quelque seruiette.

Ils prennent leur repas sur ces nattes, dont j'ay parlé, & dorment aussi dessus. Ils se deschaussent allans prendre leur repas, afin de ne salir la natte avec leurs souliers. Les pauvres, principalement du long de la mer, viuent d'herbes, de riz, & de poisson, mais les riches y font grande chere, & si traittent magnifiquement & delicatement : & à chaque mets, lors qu'ils festinent, on change aux conuiez la table sans nappe qu'ils ont deuant eux, qui est de cedre, ou de pin, de la hauteur d'un pied, ou enuiron. Les confitures y sont faites en forme de pyramide, & sont couuertes d'or, & ont de petites branches de Cyprez, qui s'aduancent dehors pour leur donner grace. Bien souuent on porte la volaille avec le bec & les pieds dorez. Ils sont plustost oliuastres que blancs, supportent patiemment la peine, sont desirieux de gloire, ne peuuent souffrir les offences, mais sçauent bien dissimuler le desir de vengeance ; c'est pourquoy l'on les tient pour traistres. Il y en a parmy eux qui estouffent leurs enfans à mesure qu'ils naissent, afin d'eiter la peine de les nourrir. Ils n'ont qu'un langage : mais tellement meslé de diuers mots, qu'il semble que ce soient plustost plusieurs langues qu'une seule. Leurs caracteres ne signifient pas simplement des lettres, mais des mots entiers. Leurs armes sont des arquebuses, coutelas, poignards, & autres armes aduantageuses qui sont fort legeres. Ils ont le plus souuent la teste nue, & quand ils portent le deuil ils s'habillent de blanc. Ils ont pour un breuuage delicieux de l'eau, où ils mellent certaine poudre precieuse, qu'ils nomment Chie. Quelques-uns boient aussi du vin, qu'ils achètent des estrangers. Ils ayment beaucoup plus la venaison, que la chair des animaux domestiques. Ils ont vne Eschole ou Academie en la ville de Banoum, où les Bonzes enseignent. Il y a aussi entr'autres un Seminaire de Iesuites à Bungo, où les Japonois apprennent le Portugais, & ceux d'Europe le Japonois. Ceux du Japon vient de l'imprimerie de mesme que nous.

Si quelque noble a commis quelque crime, il est assiegé à grandes troupes en sa maison, où on luy commande de se faire mourir luy-mesme : que s'il est trop à ce faire, ils entrent dedans, & le tuent, avec tous ceux qu'ils y trouvent, pour laquelle violence eiter les maistres implorent souuent la main de leurs seruiteurs, les requerans de se fendre le ventre par le milieu, lequel genre de mort, assez commun entr'eux les seruiteurs sont contans de subir, pour tesmoignage de leur fidelité enuers leurs maistres.

Ils n'ont point de prison, mais chastient les criminels sur le champ, ou les bannissent. Toute capture s'y doit faire par surprise, autrement le coupable se deffenderoit furieusement.

RICHESSES.

IL y a fort grand trafic de plusieurs choses au Japon, veu qu'outre le riz que l'on y vend aux Estrangers, & dont on charge force nauires: on y trouue aussi des perles en grande quantité, qui sont rondes & grosses, mais rouges, & toutesfois autant ou plus estimees que les blanches. Il y a aussi force pierres precieuses, & force or aussi: tellement que ces deux choses rendent ce Royaume fort riche.

Quant au Roy, outre l'obligation que les autres Roys ont de luy faire des presens, & de le servir en temps de paix & de guerre, il y a deux millions d'or de rente de riz qui se recueille aux possessions qu'il s'est reserué, & l'on peut iuger par là à combien se monte le reste de ses reuenus, dont le calcul n'a esté fait par aucun que ie sçache.

FORCES ET GOUVERNEMENT.

ON peut assez cognoistre quelles sont les forces de ce Prince, puis que Raxiba, qui dominoit avant celuy qui regne à present, auoit dessein, apres qu'il se fut rendu maistre de tout le Japon, où il conquist cinquante Royaumes, & où il auoit vne grande armee, de passer à la conquête de la Chine, & pour cet effect auoit faict couper du bois pour deux mille vaisseaux pour passer dessus son armee. D'ailleurs les Japonois sont vaillans au possible, tellement qu'un petit nombre de ces gens en defaira vn bien grand des Chinois.

Or le gouuernement du Japon est fort different des façons de gouuerner que nous cognoissons en Europe, veu que la puissance & la grandeur de ce Prince ne consiste point en ses reuenus ordinaires, ou en l'amitié des peuples, mais en l'autorité & en l'Empire, veu qu'aussi tost qu'il a acquis quelques Estats, il les diuise à ses amis & à ses affectez, à la charge qu'ils le seruiron à leurs despens, tant en temps de paix qu'en guerre, avec certain nombre de gens. Ceux cy partagent encor leurs Estats à leurs confidents, pour les auoir plus prompts à leur service. Tellement que tous les biens du Japon, tant publics que particuliers, dependent de peu de gens, & ce peu d'un seul, qui est le Seigneur de la Tenze, qui donne & oste en vn moment ce qu'il veut: hausse & baisse, enrichit & appauurit les Princes: & lors qu'il oste quelque estat à l'un ou change tous les nobles, & les soldats de ce pays là, où il ne demeure que les artisans & les laboureurs. Ceste forme de gouuernement engendre de perpetuelles reuolutions: premiere-ment, pour ce que le Dair (qui combien qu'il n'ait aucune puissance ny seigneurie, est toutes-fois en grande estime parmy les peuples) faict que les Seigneurs de Tenze, & les autres Princes, semblent tous tyrans, vsurpateurs du bien d'autrui, destructeurs de la Monarchie, ennemis de la grandeur du Japon: ce qui leur oste la reputation & bien-vueillance des peuples. De là vient qu'ils prennent aysément les armes, & que l'un espere de s'eleuer facilement en abaissant son compaignon.

Dauantage, d'autant que les Princes se changent tous les iours, ils ne peuvent estre aymez des peuples, comme Seigneurs naturels, & ces Princes n'estans assurez de la continuation de leur autorité, ne s'affectionnent pas plus à vn estat qu'à l'autre: ains esperant qu'avec la mesme facilité qu'ils ont en l'un, ils en acquerront vn meilleur, ils mettent celuy là au hazard pour cestui-cy: & maintenant tous seuls, maintenant avec quelques autres, poursuient diuerses entreprises, & tiennent par ce moyen ces Isles en guerre perpetuelle.

Or Faxiba, pour demeurer plus absolu, auoit de coustume de transporter souuent les Princes d'un pays à l'autre, afin que les Seigneurs estans chassez des seigneuries, & mis parmy des sujets estrangers, demeurassent foibles & sans moyen de se reuolter contre luy: & afin qu'ils le peussent encore moins, il diuisoit les Royaumes & les Estats. Tellement que chaque Seigneur n'auoit pas vn grand Estat, & à cause que leur pays estoit estroit, il ne manquoient iamais de subiet de discordes & de guerres.

Outre ce il voulut qu'en tous ces changemens, tant ceux qu'il logeoit mieux, que ceux qu'il partageoit plus mal luy allassent faire la reuerence, prester hommage, & faire de riches presens toutes les annees: au moyen dequoy il tiroit à luy la plus grande partie des richesses du Japon. D'ailleurs il entretenoit les peuples au bastiment de diuers Palais merueilleux, de Temples magnifiques, de bonnes forteresses, & de belles villes, & auoit aux despens de ses subiects plus de cent mille ouuiers tous les iours, qui travailloient à toutes ces choses. Il entreprit de faire vn Temple, où il fit dessein d'employer tout le fer du Japon, veu qu'il commanda que tous les marchands & le menu peuple portassent leurs armes en vn certain lieu, pour ayder au basti-
ment de ce

ment de ce Temple: si bien qu'en mesme temps il desarmoit le peuple, & faisoit des ouvrages qui estoient admirables.

Quittant ces discours, ie desire faire cognoistre par quelles gens ce Royaume est gouverné. Premièrement il y a à Machau trois hommes, qui sont les principaux Magistrats de tout cet Estat, qui ont souveraine autorité, & disposent de toutes choses. Le premier, qui est comme le Pontife, & est nommé Zazo, est estably sur les choses sacrees selon eux. Le second, appelé Vco, sur les dignitez & honneurs. Le troisieme, qui a nom Cubacama, dispose de la paix & de la guerre.

Ce peuple est divisé en cinq ordres, dont le premier est de ceux qui ont quelque autorité & domination: & ceux cy sont tous appelez Tones d'un nom commun, combien qu'entre eux il y ayt d'autres degrez de dignité, cōme parmy nous ceux des Roys, Ducs, Marquis, & Comtes. L'autre ordre est de ceux qui ont la charge des sacrifices, & du service divin, & ceux cy ont la teste & le menton raz, font profession de viure sans femme, & sont divisez en beaucoup de sectes: mais ils sont tous appelez d'un nom commun Bonzes. Le troisieme est des bourgeois, & du reste de la noblesse. Le quatrieme comprend les gens de mestier, & de marine: & le dernier est des laboureurs.

Tous criminels sont punis de mort, ou du moins sont bānis pour favorables que leur soient les Juges. On les fait presque tous mourir à coups d'espee: il est vray qu'en quelques lieux on a de coustume de mener les larrons qui sont attrapez, sur un chariot, afin que tout le monde les voye, & puis de les pendre.

R E L I G I O N.

Les Japonois en Religion sont semblables aux Chinois, ils sont plongez en toutes sortes d'impietez, & ont des opinions si estranges, qu'il n'y a homme de jugement qui ne s'en estonne. Ils ont pour Prestres, & pour Docteurs de leur loy les Bonzes qui sont divisez en vnz sectes differentes & contraires, toutesfois elles s'accordent toutes à nier la providence de Dieu, & l'immortalité des ames. Mais ils ne communiquent ces secrets de leur impieté qu'aux nobles, veu qu'ils traictent avec le peuple des peines d'enfer, & de l'autre vie. Ils ont des logis magnifiques, & vivent pour la plus part en commun. Ils ne peuvent se marier non plus que les Bonzes Religieuses, qui vont veltues diuërsément. Ils ont diuërses Academies, dont la plus fameuse est celle de Frenojama à neuf milles de la ville de Machau. Il y a environ 800. ans qu'un Roy du Japon bastit en ce lieu 3800. Temples, avec leurs conuents de Bonzes espars en diuërses vallees, & afin qu'ils peussent vaquer à l'estude plus aytément, il bastit au pied de la montagne de Frenojama deux villages, qui les denoient pourvoir de toutes choses. Ceste Academie monta à telle reputation, qu'on n'en donnoit la principauté & conduite qu'aux fils, ou aux parents fort proches du Roy, d'autant que les Bonzes de ce lieu iouïssent presque d'un tiers du reuenu du Royaume de Voine, & gouvernoient avec autorité celuy de Machau. Apres cela les choses venans au declin, tous ces Temples furent reduits à 800, & les Bonzes laisserent l'estude pour suiure les armes: tellement que l'an 1535. apres plusieurs assassinats & voleries, ils entrerent en la ville de Machau, & en brulerent la plus grande partie. Depuis ces Bonzes ayans fait quelque desplaisir à Nobunanga, l'an 1551. il assailit leur montagne, & en fit mourir plusieurs, & ruina quarante Temples.

Les Dieux plus estimez du Japon sont les Fotoques & les Cames, dont les premiers furent mis au nombre des Dieux, à cause de leur grande doctrine, & austerité de vie: les seconds pour leurs beaux faits, & leurs inuentions singulieres. Ceux là furent pour la plus part Prestres & Bonzes, ceux cy Princes, & grands Personnages: à raison dequoy ils demandent aux Fotoques des biens de l'autre monde, & aux Cames des biens terriens. Mais l'idolatrie des Japonois ne s'arreste pas là, veu que quelques vns adorent le Soleil & les Estoiles, les autres n'adorent que le Ciel, & quelques autres donnent de la diuinité aux cerfs, & autres bestes sauvages. Pres de Machau on void un Temple dedié à un qu'ils estiment Dieu des lettres & sciences. Le Diable vie d'un grand artifice, & metme de force pour se faire adorer à ces miserables en forme de diuërses bestes. Il entre dans le corps de ces infideles, & les travaille cruellement, & lors qu'on luy demande qu'il est, il respond par exemple qu'il est Roy des bœufs, & les menace qu'il ne partira de là qu'on ne luy batisse un Temple, & si l'on ne luy tient parole, il retourne & travaille le patient iusqu'à ce que tout soit accompli. On y void encore le Dieu d'enfer avec un regard espouventable, ayant pres de luy deux demons, l'un desquels escrit le peché des hommes, & l'autre les lit. Les murailles du Temple sont toutes couuertes de figures des peines que les diables donnent aux damnez. Le diable se monstre à ces gens en plusieurs manieres, & l'on leur donne à entendre que les bons ou mauuais succez dependent de luy, selon l'honneur qu'on

luy porte. Il auoit de coustume de se presenter en vn lieu en telle sorte. Celuy qui brusloit de desir du bon-heur de l'autre vie, montoit sur vn mont où il attendoit que le diable se laissât voir à luy. On voyoit apres le fantôme qui luy apparoissoit en certains lieux solitaires, iusques à tant qu'il le precipitoit en quelque lieu où il mourroit. Ceste tromperie fut descouuerte par vn ieune homme en ceste sorte. Vn ieune homme n'ayant peu retirer son pere de telle superstition, se resolut d'aller secrettement apres luy avec l'arc en main, pour en voir le succez. Le diable vint en vne certaine semblance lumineuse, & tandis que le vieillard prosterné en terre l'adore, le fils tend son arc soudainement, & tranſperce de la fleche vn renard en lieu du diable. Apres cela suiuant la trace & le sang de ce renard, il arriua à ce precipice que i'ay dict, où il trouua plusieurs ossements de morts. Par ce moyen il deliura son pere de mort, & les autres de tromperie. Il faut adiouter à ceste folie celles des obseques des morts, qu'on fait avec vne grande pompe & ceremonie. Car les Iaponois, qui sont desireux d'honneur, font vne infinité de fraiz aux funerailles de leurs trespassez, & les Bonzes amassent force argent par ceste voye. 13 Ceux dont les heritiers ne peuvent porter ceste despence sont enterrez de nuit secrettement, ou bien iettez aux voiries. Ceux qui sont plus deuots à Amide, qui est vn de leurs principaux Dieux, lors qu'ils sont saouls & fachez de viure, se mettent dans vne grotte tellement fermee de tous costez, qu'il ne leur reste autre souſpiral, que d'vne petite canne percee. Il demeure là sans manger, inuoquans Amide iusques à la mort. Aux lieux maritimes, ils vont d'eux memes à la mort en telle sorte. Ils amassent premierement force argent d'aumosne, & l'ayant mis dans leurs besaces, preschent publiquement au peuple, & declarent l'intention qu'ils ont de passer à l'autre vie pour voir Amide: ce qui est loué de tous, qui s'estonnent d'vne si grande deuotion. Ils se pouruoient apres de faulx pour couper les ronces & buissons qu'ils trouuent par chemin, & montent sur vne barque neufue, ayans le col, les bras, le dos, les cuisses, & les pieds chargez de cailloux: puis ainsi qu'ils sont en pleine mer, ils se lancent dans l'eau où ils se noyent. Ils adorent outre les Fotoques, les Cames, & Amide, le Dieu Xaque, qui est vne des principales deitez qu'ils ayent. On y void la secte des Iansuans, qui ne croient que ce qu'ils voyent ou touchent.

Il y a patinny tous ces idolatres vn assez bon nombre de Chrestiens, qui sont plus pleins de zele & d'ardeur que nous, tellement qu'encor que les Roys de la Zense en ayent fait executer plusieurs, & que les Chrestiens y ayent enduré de fort grands tourmens & ennuis, il y en a toutesfois encor beaucoup qui n'ont iamais quitté la Religion qu'ils auoient embrassée. Les Peres Xavier, & Turian Iesuites, y ont longuement trauaillé, & conuertty beaucoup d'ames, veu qu'en Amanguce on compta deux mille Chrestiens, l'an mil cinq cens cinquante six, & en Funie autant, l'an mil cinq cens cinquante neuf, le nombre des Neophites, ou nouuellement conuertis, estoit de mil trois cens, à Firande l'an mil cinq cens soixante deux, deux beaux freres du Roy de Cangoxima furent baptisez avec leurs femmes, l'an 1563. Sumitancle Roy d'Omure se fit Chrestien, & fut appellé Barthelemy, puis le Prince Simabara fit de mesme, & au pays d'Imory on baptiza cinq mille personnes, en l'espace de cinquante milles autour de Machau on bastit cinquante Eglises, dont les principales estoient à Imory, Aye, Tochy, Saue & Cabinoqui, terre du Royaume d'Arime, où les Iesuites auoient maison, & 450. Neophites l'an 1563. La foy s'estendoit cependant en la petite Ile d'Amacuse, en Fondo, & à Xiqui chasteau voisin d'Amacuse. L'an 1569. le Roy de Bungo se fit Chrestien, & fut nommé François, & le Roy d'Arime fut baptisé, & appellé Prothaise: de sorte qu'en ce temps il y auoit en ces pays equiron 140. mille Chrestiens, & plus de 200. Eglises. Il y auoit 113. Iesuites, dont il y en auoit quarante Prestres & septante trois laiz, & de ceux cy les quarante sept estoient du Japon, les autres d'Europe. On y vit encore conuertir apres quarante mille subiets de Iust, de Vacondono. L'an 1587. il s'y conuertit enuiron six mille personnes, & l'annee d'apres presque autant. Le Roy du Bugen, & le successeur des Royaumes de Cicungo, & de Cicuge, & les Seigneurs des Illes d'Oian, de Gomette, de Gensure, & de Xiqui, qui est vne partie de l'Ile d'Amacuse, firent de mesme. Voyla l'estat de la Religion Chrestienne au Japon, iusques à l'an 1590. Depuis il y a eu de grandes guerres au Japon, & de grandes persecutions contre les Chrestiens, mesme sous Taicolama regnant à present. Toutesfois la foy ne cesse d'y florir, & de s'estendre en beaucoup d'endroits.

DISCOURS
DE L'ESTAT DV ROY
DE BRAME, OV DE PEGU,

SOMMAIRE.

- 1 **C**ONQUESTES notables d'un Lieutenant du Pegu, s'estant reuolté contre son Roy.
- 2 D'où vient qu'on leue facilement en ces pays d'Afrique, & au leuant de si grosses & si nombreuses armées : & quels sont le moyen de les entretenir.
- 3 Armée de douze cens mille Echiopiens mise en route par Paul Dias Capitaine Portugais.
- 4 Quels Royaumes possede aujourdhuy le Roy de Pegu. Situation & estendue de cet Estat, & ses ports principaux.
- 5 Description du Royaume de Siam, sa situation & circuit, ses provinces, & villes principales.
- 6 Muantay.
- 7 De Camboye.
- 8 De Campae, Symcapure, Quedoe, Aue, Verme.
- 9 Pegu abondant en ris, petits cheuaux, elephans, perroquets, cinettes, cannes de la grosseur d'un tonneau, rubis, laques, ou gommies, poyure, benioin, musc, aloex, or, tygres, lions.
- 10 Naturel de ceux de Pegu, addonnez aux femmes & delices, à la musique, & aux sciences.
- 11 Barbares mœurs des habitans de Camboye, où les femmes se iettent dans le feu, & bucher funebre de leurs maris, & les Nobles dans celui de leur Prince.
- 12 Habillemens cotonnez seruans d'armes à ceux de Tarmassery, leurs boucliers d'escorces d'arbres, leur breuuage d'eau sucrée, & leurs lits de coton.
- 13 Funerailles solennelles des sacrificateurs, & leurs ceremonies.
- 14 Leurs richesses au trafic de leurs ris, cheuaux, elephans, or, argent, lacque, benioin, musc, pierres, beurre, huile, & poyure.
- 15 De la garde du Roy composee de six mille hommes, & trente mille elephans. Des Timars, & le grand nombre de gens de guerre qui se trouue par tout le Royaume de Pegu.
- 16 Des terres du Royaume tenues toutes en fief du Roy à vie, & non à perpetuité. Et des supplices & peines ordonnees contre les homicides & les debiteurs.
- 17 De la religion de ce pays, & quelle est leur croyance de la Diuinité de deux esprits qu'ils attribuent à l'homme : De la statue du Pere des hommes, longue de cinquante pas, entr'autres dressée dans leurs Temples. Leurs Prestres & sacrifices.
- 18 Quelles opinions ils ont de la creation, & durée du monde. Quels sont les dieux qu'ils adorent, & de la condition, & lieu des ames apres qu'elles sont separees des corps.
- 19 Des conuents de leurs Prestres portans teste & barbe raze, partie rentez, partie viuans d'aumosne.



A VANT que passer plus outre en ce discours, il faut scauoir que quelques Royaumes des Brames, ou Bracmanes, obeyssioient iadis au Roy de Pegu, le long de la riuere, & vers le lac de Chyanay, où il tenoit ses Lieutenans. Or il y a enuiron soixante & tant d'annees, qu'un Lieutenant qu'il auoit au Royaume de Tangut, se confiant aux gens qui le suiuiroient, & en l'autorité qu'il s'estoit acquise par ses faits d'armes, se reuolta contre ce Roy, & luy osta ce Royaume, en tuant tous les principaux, & prit encores les villes, & Royaumes de Prom, Melintay, Calam, Bacam, Mirandu, & Aue, pays habitez des Brames, qui tendent vers Septentrion, & ont de l'ogueur plus de cent cinquantes lieues.

Il entreprit encore de se rendre maistre de Siam, & vint iusques à la veüe d'Odie, capitale du Royaume de Muantay : mais il n'y peust aduancer aucune chose. Il se mit à ceste entreprise avec trois cent mille personnes, employa trois mois à se faire chemin par des montagnes fort aspres, par de grandes forests, & par des lieux inaccessibles, où il perdit six vingts mille hommes, & emmena deux cens mille Siamois prisonniers. Estans apres de retour en son premier estat, il assaillit le Royaume mesme de Pegu, & le conquist, puis l'an 1567. retourna à l'entreprise de Siam, & en vainquit le Roy, qui se fit mourir par poison, mais les enfans demeurèrent prisonniers, de sorte qu'il conquist vne bonne partie de ce Royaume. Cestui-cy avec ses successeurs, est nommé par les historiens modernes Roy de Brame, ou selon quelques autres, de Berme pour ce que sa grandeur commença par la conqueste des Royaumes des Brames. Mais les Portugais luy donnant le nom de la plus noble, & plus cogneüe partie de ses conqu-

stes, l'appellent Roy de Pegu. Il a essayé depuis bien souvent de se rendre maistre de la ville de Odie, & est venu à ceste entreprise avec vn million de personnes. Et afin que cela ne semble chose fabuleuse (pource que nous auons dit ailleurs choses semblables) il ne sera pas hors de propos de monstrier icy d'où vient qu'en ces quartiers-là, & en quelques autres, on met en campagne de si grandes armées.

- 2 Le dy donc premierement, que les guerres se font, ou sur les frontieres, ou en pays esloignez, & que celuy qui n'a force reuenus, & grande quantité d'argent en main, ne peut faire la guerre longuement, ny avec de grandes armées. Car de mesme que les membres de nostre corps ne se peuvent mouoir, ny continuer leur mouuement sans nerfs: ainsi les armées ne se peuvent dresser, ny pousser où il est besoin, ny se maintenir vnies aux entreprises sans argent comptant, qui les entretienne, & les rafraichisse par maniere de dire en son temps, & qui face venir apres elles des armes, des munitions, des viures, & autres choses necessaires à l'usage de la vie, & au maniement des armes. Et pource que les reuenus des Princes (de mesme que les moyens des subiects d'où ils se tirent) sont limitez, & que s'il tire durant vn ou deux ans force deniers hors de son pays, il s'appauurira soudain, & demeurera bien tost espuisé d'or & d'argent: de là vient que les guerres esloignées ne se peuvent entreprendre, & se peuvent encore moins continuer, si ce n'est par les Princes qui ont de grands thresors assemblez de longue main, ou pour le moins des mines qui ne peuvent faillir, veu qu'il est certain que les thresors pour grands qu'ils soient prendront fin en peu de temps, d'autant que ce qui s'amasse peu à peu, & par le menu en temps de paix, se despence en gros en temps de guerre: de sorte qu'une annee en consomme beaucoup d'autres. C'est pourquoy vn Capitaine dict avec raison à Dom Sebastien Roy de Portugal, lors qu'il consultoit l'entreprise de Barbarie, qu'on auoit besoin de trois torrens pour ceste guerre, l'un de viures, l'autre d'hommes, & l'autre d'argent: & vn autre disoit à bon droit, que pour faire la guerre, il failloit de l'argent sans fin. Mais si toutes les guerres requierent vne grande despence, celle qui se fait au loin la demande comme infinie.

Le grand Turc a esprouué cecy en la guerre de Perse, où vn Prince si puissant a consommé ses thresors de telle sorte, qu'il fut contrainct d'abbaisser l'alloy de l'or & de l'argent, & d'en hausser le prix au double, & de souffrir la fausseté des monnoyes, & milles choses semblables, pour lesquelles les lanissaires se sont souvent mutinez, & ont couru furieusement la ville de Constantinople, en brulant & saccageant vne grande partie. Et certainement l'argent est vne chose si necessaire à vn Prince qui entreprend quelque guerre, que Iean Iacques Triuulce, Capitaine fort renommé, lors qu'on luy demanda quelles choses estoient necessaires à la guerre, dict qu'il en falloit auoir trois tousiours prestes, c'est à sçauoir, de l'argent, puis de l'argent, & encore apres de l'argent. Ce que ie dy se doit entendre, lors qu'un Prince tire de ses Estats la despence de la guerre, pource qu'il aduient quelquesfois qu'une armée s'entretient d'elle mesme en faisant chemin, & de sa propre conqueste, & que la poursuite d'une entreprise donne mesme des forces pour la continuer. Ainsi les Huns, les Vandales, les Gots, & les Arabes, Alexandre le Grand, & du temps de nos ayeuls le grand Tamberlan, entreindrent de fort grandes armées hors de leurs pays bien longuement, pource que ceux-cy entras dans des Provinces sans trouuer presque aucun qui s'appoyast à eux, saccageoient les villes, & les pays, & s'entretenoient de ce degast. Le mesme est aduenu aux Portugais, aux Indes Orientales, & aux Castillans, aux Occidentales, & plus à ceux cy qu'à ceux là, veu qu'il n'y eut iamais peuple, qui sans despencer aucune chose du sien fit de si grandes conquestes, que les Espagnols en ont fait de nostre temps en la nouuelle Espagne, & au Peru. Mais cecy n'est pas si ayé à present qu'au temps passé, & se peut practiquer encore moins en Europe qu'en Asie, ou en Afrique, à cause du grand nombre des forteresses, capables d'arrester l'espace de plusieurs mois, voire de plusieurs annees de fort puissans ennemis, & de les laisser, ainsi que les Turcs esprouuerent à Zighet petit chasteau de Hongrie: veu que Soliman l'estant venu assieger l'an 1566. avec trois cens cinquante mille hommes, il le prit finalement, mais avec vne si grande perte des siens, que d'une si grande armée il n'en ramena pas vn tiers: & les Portugais, qui au commencement de l'entreprise des Indes firent avec peu de gens, & en peu de temps des conquestes signalées, n'ont pas passé outre depuis que ces peuples ont esté pourueus d'artillerie, & d'ingenieurs, & qu'ils ont basti des forteresses. Le mesme est aduenu aux Espagnols au nouveau monde, veu que depuis leurs premieres victoires. ils ont trouué en la nouuelle Espagne les Chichimeques, & au Perou les Pilcossons, Cirguans, & Cuques, & il y a desia beaucoup d'annees qu'ils n'ont peu gagner vn poulce de terre en la vallee d'Araucque, & de Tucapel au pays de Chilces, où ces gens ayans veu que les Espagnols mouroient à coups de fleches, & d'autres armes, & ne les ont estimez comme auparauant immortels, & enfans du Ciel, & avec l'experience, & la pratique, ne craignent plus ny les cheuaux, ny les arquebuses.

Mais si l'on

Mais si l'on ne fait la guerre loing du pays, ce n'est chose malaisée de mettre sur pied dans peu de temps de grosses armées, & pour n'amener des exemples anciens, nous lisons que les Gantois en Flandres se sont quelquesfois opposez à la puissance du Roy de France avec quatre vingts mille combatans, d'autant que leur pays estoit bon & bien peuplé, & que la guerre se faisant sur leurs frontieres, ou dans leur Prouince, chacun couroit à la guerre avec de la provision pour se nourrir quelques iours. Mais ils ne pouvoient continuer longuement en cet estat, pource que la provision, & l'argent leur manquoit, & ils estoient contrains de s'en retourner, les vns au labourage, les autres aux boutiques, d'où ils tiroient leur entretien. Ainsi les Escossois qui par faute d'argent n'ont iamais fait entreprise d'importance hors de l'Isle, aux necessitez de leur patrie, ont bien souuent mis ensemble vn grand nombre d'hommes en vn instant, & ont avec cela assailly leurs ennemis, ou deffendu leurs frontieres, ainsi que faisoient les Romains, qui durant quelques annees tandis qu'ils combattoient contre les peuples voisins de Rome, faisoient la guerre à leurs despens. Car ils sortoient pourueus de viures pour vn ou deux iours, & finissoient la guerre par vn combat en peu d'heure: mais la longueur de l'entreprise des Vèges, força le Senat de soudoyer les gens de guerre. Mais il est beaucoup plus aisé en Afrique & Leuant qu'en Europe de leuer des armées pour les entreprises voisines, sans grande despence, pour beaucoup de raisons. Premièrement, pource que les pays sont vniuersellemēt plus abondans en choses necessaires à la vie humaine. Apres cela les peuples Meridionaux, & ceux du Leuant se contentent pour la plus part de moins que nous. Ils sont chiches en leur manger, & en leur boire, & plus simples que nous: veu que ceux d'Europe consomment à manger, & à boire, non seulement ce qui leur suffiroit pour les nourrir, mais encor pour les armer contre le froid; au lieu que les autres ne recherchent de leurs viandes que le moyen de se nourrir sans delicatesse. Le vin qui est parmy nous de plus grande despence que le pain, n'est pas en vñage parmy eux, & leurs eaux sont beaucoup meilleures que les nostres. L'art de cuisiniers n'y est pas si subtilisé que parmy nous, & l'on ne s'y amuse à donner vn goust si delicat aux viandes.

Les Turcs finissent leurs festins par le riz & le mouton, & les vestemens des Orientaux sont de beaucoup de moindre despence que les nostres. Ils vont my nuds à la guerre, & ne courent autre chose que leurs parties honteuses, d'où vient qu'il n'y a parmy eux tant d'artisans & d'ouuriers que parmy nous: Et tout leur despence se resout pour la plus grande partie, en vne piece de bombasin, qui les couvre depuis le nombril, iusques aux genoux.

Doncques pour toutes ces raisons, on entretiendra plustost là quarante mille soldats, que dix mille parmy nous. Il faut adiouter à cela que l'attirail, & la conduite de l'artillerie, & des munitions, & tout ce qui est requis pour ce regard, est d'ineffimable despence, de laquelle la plus part des peuples du Leuant sont exempts, principalement ceux qui n'ont pratiqué les Arabes, ny les Portugais, & qui se tiennent loin de la mer, & auant dans les pays. Ce n'est pas aussi chose peu considerable, que ces peuples vont à la guerre sans armes defensives, sans cuirasses, sans morion, sans maille, & sans plastron, en quoy nous despensons beaucoup, & outre ce nous les charriens d'un lieu à l'autre sans vne autre despence, estans en cela fort differens des Romains, qui portoient sur eux les armes offensives & defensives, lors qu'ils alloient à la guerre, & bien souuent encor leurs viures pour dix ou douze iours.

Or ces peuples ayans ces aduantages de la bonté du pays, de la facilité de se nourrir, de se vestir, & de s'armer, il leur est aisé de mettre en vn besoin de beaucoup plus grandes armées, qu'à nous, à qui il faut beaucoup de choses, dont ils n'ont pas cognoissance. Ainsi nous lisons de fort grands effectz des armées des Assyriens, & des Ethiopiens, de Belus, de Nine, de Semiramis, de Cambyle, de Cyre, de Daire, de Sesostris: & aux temps moins anciens, des Arabes, des Tartares, & des Mogores: & pour n'alleguer pas des exemples si elloignez, voire mesme pour acquerir de la creance aux choses passées par les succez presens, celle qui aduint en Angole l'an mil cinq cens octante quatre, est fort signalee.

Angole est vne riche Prouince de l'Ethiopie Occidentale, voisine du Royaume de Congo. Paul Diaz, Capitaine Portugais, rencontra en ce pais le 2. iour de Feurier vne armée de douze cent mille Ethiopiens, que le Roy d'Angole luy opposa, qui fut toutesfois rompuë & mise en fuite. Il est vray que les grandes armées durent peu, & sont plus semblables aux torrens qu'aux riuieres: veu qu'on les peut bien mettre ensemble, mais non les entretenir, sinon autant que ce qu'ils portent avec eux dure. De là vient qu'elles sont dissipées en peu de iours, & abandonnent bien tost l'entreprise: d'autant qu'ils ne meinent rien qui puisse tirer apres eux les marchands, & les viuandiers avec les choses necessaires pour le sousten de la vie, pour l'usage de la guerre, outre que pour pouruoir vn million de soldats de ce qui leur est necessaire, il faudroit vn autre million d'hommes, de charrettes, de bestes de charge, & de goujats, de marchands, & de viuandiers qui les suiussent, & les riuieres ne pourroient presque pouruoir vne telle multitude d'eau, ny les cāpagnes de bleds: à raison dequoy il faudroit qu'elle se ruinaist, &

s'aneantist d'elle mesme. Ces Roys de Leuant qui mirent sur pied des armées extraordinaires & les menerent à la guerre en pays loingrains, & cognoissans bien ce que nous venons de dire, firent premierement grande provision d'argent, & de viures, de munitions, & de toutes autres choses necessaires. Entre les autres Xerxe, qui mit en campagne la plus grande armee dont on aye iamais ouy parler, dressa tout son appareil l'espace de sept annees.

Mais pour retourner au Roy de Brame, il prit ces annees dernieres les ports de Martabane, & de Tarnasser, puis tournant ses armes tantost du costé du Nord, tantost du Ponant, il travailla les Princes de Caor, & de Tipure, & se rendit maistre du Royaume de Macin & Aracan, ayant mené à ceste entreprise trois cens mille hommes, & quarante mille elephans.

Ce Roy possede aujourd'huy les Royaumes de Pegu, de Tangu, de Prom, Melintay, Calem, Bacam, Mirandu, Aue, & Brame, qui sont expotez au Nord, puis le Royaume de Siam, & les ports de Martabane, & de Tarnasser, & encor les Royaumes d'Aracan, & de Marcin.

Le Royaume de Pegu est assis en forme de demie lune, entre les montagnes habitees des Brame, & des Iangomes, & s'estend le long de la mer depuis la ville de Rei, posée sur la coste au quatorzième degré & vn tiers, iusques à Sedoc, qui est au dix-septième degré pareillement sur la coste, l'espace de nonante lieues, & comprend bien environ autant en largeur dans le pays. Les autres disent que le Royaume de Pegu occupe de costé de mer pres le riuage Occidental du Golphe de Bengale trois cens milles, & prennent cet espace depuis la ville de Tauay iusques au cap de Nigraes. Il est trauersé par le milieu de la riuere de Pegu, qui donne son nom à tout le Royaume. Ses ports principaux sont Pegu, sur la riuere du mesme nom, Tauay, Martabane, & Losmin.

5 Le Royaume de Siam, qu'on nomme aussi de Sorneo, est tres-grand, & s'estend tant du costé d'Est, que d'Ouest iusques à la mer. Il est assis entre le pays de Cauchinchine, & le Royaume de Terme pour le regard de ce qui est auant en terre: & pour le regard de la coste, il s'ested depuis la ville de Campaë iusques à celle de Tauay, & cet espace fait environ trois cens lieues. Il est vray que les Mores & Arabes en ont vsurpé pres de deux cens, & tiennent les villes de Patane, de Paam, d'Ior, & de Pere, & les Portugais se sont saisis de la ville de Malaque. Or ce Royaume en comprend quelques particuliers, c'est à sçauoir celuy de Siam ou Chaumua premierement, puis celuy de Muantay, où est la ville d'Odia, & celle de Brame, Caipumo, Cheneram, Camboye, & Campaë, & outre ce Iangome, Cucray, & Lancaam, lesquels trois Royaumes s'ont habitez des Layes. Les principales villes de tout ce Royaume sont Siam, Odie, Cambaye, Campaë, Sincapure, Malaque, & Quedoc.

6 Siam est vne fort grande ville, & propre au commerce, veu qu'elle est assise sur le bord de la large & profonde riuere de Menam, il y a grand nombre d'habitans, veu qu'outre les naturels, on y compte pres de trente mille familles de marchands Mores. Odie capitale du Royaume de Muantay, est plus grande que Siam, veu qu'on y compte pres de 400. mille maisons.

7 Ceste ville est bastie à la façon de Venise, tellement qu'on se peut pourmener par tout sur des bateaux, & l'on dit qu'on y en trouue bien deux cens mille.

8 Camboye est assise sur le bord de la riuere de Menon, qui venant de la Chine, auant que se descharger dans la mer des Indes, reçoit beaucoup de riuieres, & pres de son embouscheure forme vn lac qui a de tour enuiron 200. milles. Ceste ville est capitale du royaume de Camboye.

Campaë est vne ville maritime, qui cōmunique son nom à tout le Royaume. Celle de Sincapure est assise en l'extremité Meridionale de ce pays sur vn Cap, que quelques vns prennent pour le grand Promontoire, où Ptolemee met la ville de Zabe: mais Magin estime que c'est plustost Palure de Ptolemee, d'où partent ceux qui veulent aller par mer en Chryse, ou au Japon. Quant à la ville de Malaque ie l'ay descrite au discours du Roy d'Espagne. Quedoc est vne ville renommee, à cause du poyvre qui naist en son terroir.

Aue estoit riche Royaume des Brame, ou Bracmanes, auant que le Roy de Brame s'en emparast. Sa ville capitale est Aue, assise sur vne riuere de mesme nom.

Le petit Royaume de Verme est voisin de celuy de Bengale, & n'a aucun port de mer. Quant à celuy d'Aracham il est assis au bord du royaume de Bengale pres la riuere de Chaberry. La ville capitale qui donne son nom à ce royaume est assise sur ce fleuve, & à 45. milles loing de la mer.

Q V A L I T E.

9 **L**E terroir du royaume de Pegu est extremement fertile, & propre à porter du froment. On recueille ordinairement vne incroyable quantité de riz, à cause de la riuere de Pegu, qui courant par tout le royaume, s'enfle quelquesfois si fort, qu'elle inonde vne grande espace de terre. Ce pays nourrit aussi force animaux, entre lesquels il y a vn nombre presque infiny de petits cheuaux, qui sont toutesfois bons, propres à porter, & force elephans qu'on prend en certaines

certaines montagnes fort hautes, & qu'on garde pour l'usage de la guerre.

Il y a pareillement des Perroquets qui ont la voix meilleure, & sont plus beaux qu'aucunes autres qu'on voye ailleurs. On y trouve aussi grand nombre de ciuettes, il y croist des cannes de la grosseur d'un tonneau. On y void aussi force rubis qui y naissent. Il y vient aussi force laque, que quelques-uns disent estre la gomme de quelques arbres, les autres disent qu'on l'amasse sur les feuilles comme la manne.

Le pays de Siam est plain, mais entouré de montagnes, fort herbu, plaisant, gras & fertile, & abondant en riz, en bled, & en autres choses necessaires à la vie.

Il porte quantité de poyure, de benjoin, d'or, d'argent, d'estain, & d'autres metaux. Il s'y trouve aussi force musc, & grand nombre de chevaux & d'elephans. On voit en ce pays le lac de Chianeay, duquel sortent les rivières d'Aue, Caipuno, Menam, Menon, & autres, qui arrosent plusieurs Prouinces, & rendent leurs terres grasses, ainsi que le Nil fait en Egypte. Il y a du costé du Levant sur la frontiere de Chanchinchine de grandes forests, où se nourrissent force tygres, lions, & autres bestes sauvages.

Le pays de Cambaye est abondant en riz, en chair, & en poisson, de mesme qu'en chevaux & en elephans, & produit aussi quelque peu d'or.

Le Royaume de Campaë abonde en or, & en toutes choses necessaires à la vie. Il produit de meilleur aloës qu'on puisse voir, & qui naissant aux montagnes n'est moins estimé de tous les peuples d'Orient, que l'argent.

Le Royaume d'Aue porte force spinelles, & rubis qu'on amasse en ses montagnes. Il nourrit aussi des animaux qui portent le musc, & semblablement grand nombre d'elephans & de chevaux, & la terre abonde en toutes choses necessaires à la vie.

MOEVRS ANCIENNES.

AFIN de n'ennuyer le Lecteur par des redites importunes, ie le remets pour ce chef au discours du Royaume de Narlinge, où il pourra voir premierement en general les mœurs anciennes des Indiens, & en particulier celles de quelques pays qui sont à present subjects au Roy de Brame.

MOEVRS DE CE TEMPS.

Ceux du Royaume de Pegu sont de moyenne taille, & plustost gros que deliez. Ils sont agiles & robustes, & toutesfois peu propres à la guerre. Ils vont tous nus, excepté qu'ils couvrent leurs parties honteuses. Ils couvrent leur teste d'un drap blanc, qui est accommodé en façon de mitre. Ils sont extrêmement addonnez à l'amour des femmes, & portent pour l'amour d'elles des clochettes d'or ou d'argent pendues à leur membre, afin qu'elles sonnent lors qu'ils vont par la ville. Quelques Juifs tiennent que les mines d'Ofir, renommées en l'Ecriture, estoient en Sumatre, & quelques autres en ce Royaume, & que ceux du Pegu ont tiré leur origine de quelques Juifs qui y furent confinez par Salomon. Mais les sots Peguins disent qu'ils sont sortis d'un chien & d'une femme Chinoise, qui resta en ce pays du bois d'un navire. Ils sont du tout addonnez à toutes sortes de plaisirs, & à mille superstitions estranges & ridicules.

Ceux du Royaume de Siam se plongent en toutes sortes de delices, aiment passionnément les femmes, & sont subiects à gourmander au possible. Ils affectionnent la musique, & s'y plaisent tout ce qui se peut. Ils n'exercent point d'arts mechaniques, mais ont grand nombre d'esclaves dont ils se servent pour cet effect, toutesfois ils vaquent au labourage. Ils ont des écoles publiques où ils enseignent leurs loix & leur religion en langue vulgaire: & quant aux sciences, ils les enseignent en une autre langue fort differente de la commune. Ils s'estiment des plus nobles, & font profession de l'honneur. Ils sont magnifiques en leurs habits. Les Roys de Siam estoient iadis obligez à leur aduenement à la couronne, de commencer quelque temple, lequel ils ornoient de fort hautes pyramides, & d'une infinité d'idoles.

Les habitans du Royaume de Cambaye sont vaillans au possible, & s'adonnent à la navigation, & au trafic: toutesfois leurs mœurs sont fort barbares, veu qu'ils pensent que les hommes & les bestes sont de mesme condition. Leurs femmes se jettent dans le feu, où elles brulent apres la mort de leurs marys: & apres la mort de leurs Roys, non seulement leurs femmes, mais encor quelques nobles se precipitoient volontairement dans le feu où brusloient les corps de leurs Princes.

Ceux de Campaë usent fort du bois d'aloës, tant en leurs bains, qu'aux funerailles des principaux de la Prouince.

Ceux de Tarnessey s'arment d'habillemens fort cotonneux, d'espees courtes, & de boucliers ronds faicts d'escorces d'arbres, vivans de toute sorte d'animaux, excepté de vaches. Ils

mangent à terre sans nappe, ny seruiette, & ont pour leur breuvage de l'eau sucrée. Leurs lits sont hauts esleuez, & faits de coton, & leurs habits sont aussi de coton, ou de soye. Ils cultiuent les terres de mesme sorte que nous, & vivent presque de mesme façon. Mais ils ont de coustume de ne depuceler point leurs femmes, ny les toucher, que quelque blanc, soit Chrestien ou Mahometan, n'y ait donné la premiere attainte: & de là en auant, si les marys les trouuent en faute, il leur est permis de les tuer. Lors que les Sacrificateurs viennent à mourir, ils brulent leur corps, & font vn sacrifice solemnel au diable, & les cendres estans recueillies, ils les mettent dans les vrnes, ou pour mieux s'expliquer, dans de grâds vases bien clos & boucheez, qu'ils enfouissent sous terre, & tandis que le corps brulle, ils y iettent force aloës, myrrhe, benjoin, corail, encens, sandal, & autres odeurs soüefues, & aromatiques, & cependant les trompettes & les flutes sonnent.

Durant ceste solemnité il y a vingts ou trentes hommes desguisez en diables, ainsi qu'ils les peignent, qui vont autour du bucher sautelant, & trepignant de ioye, & comme assurant le monde du repos du defunct, de qui la femme est toute seule pres du lieu battant sa poitrine, pleurant & gemissant, & s'escriant avec vn grand tesmoignage de tristesse, & tout cela se fait enuiron la minuit. Quinze iours apres cecy la femme du defunct conuie tous ses parens, & les plus proches du trespaslé, & leur fait vn grand festin au lieu mesme où son mary a esté brulé, où elle se trouue parée de ses robes & ioyaux que ses parens y portent, & faisant vne fosse profonde, ou bien vn puits, ils l'emplissent de bois sec & aromatique, l'entourent de roseaux comme vne haye ou closture, & couurent ce lieu d'un drap de soye, afin que le puits ne soit apperceu. Apres le festin plusieurs menestriers iouent de leurs instrumens autour de ceste fosse, & cela fait on sacrifice au diable: & soudain que le sacrifice est finy, la femme vient comme toute forcenee, dansant & sautant en tirant vers ce puits qui est tout en feu, & qui vomit force flammes, se recommande aux prieres de ceux qui sont déguisez en diables, afin que Satan la recoiue en sa cōpagnie, & luy rende le voyage seur & aisé. Ces propos acheuez elle court vers le puits, s'envelopant de son drap de soye, & se lance toute viue dans la flamme, & soudain ses parens la chargent de bois, & de poix resine, afin que ces matieres ainsi combustibles la facent plustost mourir. Que si la femme oublioit ce deuoir à l'endroit de son mary, elle seroit des-honoree à iamais. Il faut toutesfois noter que ceste coustume est seulement obseruee par les grandes Dames, & que les plus grands du pays assistent ordinairement à ceste ceremonie.

Les habitans de Verme sont noirs, & vont tous nus, excepté qu'ils couurent de toile de coton leurs parties honteuses.

R I C H E S S E S.

- 14 **L**A richesse de ces Royaumes peut estre comprise par leur fertilité: car le pays estant plein & arrosé de plusieurs belles & grandes riuieres qui engraisent les terres, ainsi que le Nil fait en Egypte, on ne scauroit dire combien toutes choses y abondent. Ils tirent beaucoup de leur riz, cheuaux, & elephans, de leur or, argent, & estain. Les marchands y abordent de tous costez, emportent du Pegu force riz, comme i'ay ja dit, de la lacque, du benjoin, du musc, des pierreries, de l'argent, du beurre, de l'huile, du sel, des oignons, & choses semblables propres à manger. On tire de ses ports quarante vaisseaux, voire dauantage, chargez de riz pour Sumatte.

Le Royaume de Siam enuoye dehors du poyvre, du musc, du benjoin, de l'or, de l'argent, & de l'estain, & vn nombre presque infiny de cheuaux & d'elephans. Celuy de Camboye porte quelque peu d'or, & pouruoit les estrangers de force cheuaux & elephans. Celuy de Campaë ne tire peu de profit de son bois d'aloës.

Quedoë est renommee à cause de son poyvre qui est fort bon, & pour ceste cause est recherché des marchands estrangers qui abordent les pays de par de là.

Il y a au Royaume d'Aue grand nombre de marchands de pierreries, principalement de rubis & de spinelles. Ils vendent aussi quantité de musc, & force cheuaux & elephans.

Par ce que dessus on peut iuger si le Roy de Brame, qui est des pays fournis de tant de choses qui sont recherchees de toutes parts, doit auoir de grandes richesses.

F O R C E S.

- 15 **O**N ne peut douter que le Roy de Brame ne soit vn puissant Monarque, puis que le Roy de Siam, qu'il a despoillé de son Royaume, qui n'est presque qu'une quatriesme ou cinquieme partie de ses Estats, auoit ordinairement six mille hommes de garde, & trente mille elephans, dōt il en y auoit trois mille propres pour la guerre: ce qui doit estre beaucoup estimé, à cause de

à cause de la grande despence de ces animaux. Il avoit comme de Timars par son Royaume, & par ce moyen vingt mille chevaux, & deux cents cinquante mille hommes de pied tous prests à le suiure à la guerre, sans charger autrement le Royaume : & s'il eust voulu mettre sur pied de plus grandes forces, elles se fussent montees à vn million d'hommes, pour ce que le Royaume est fort grand, & les villes & Prouinces y sont du tout pleines, & peuplées : car la seule ville d'Vdie, capitale du Royaume de Siam, peut enuoyer dehors cinquante mille hommes. On peut comprendre par ce que dessus, combien ce Prince est puissant, puis qu'il abonde, non seulement en viures, & en toutes sortes de richesses, mais encore en hommes.

G O V V E R N E M E N T.

LE Roy de ces Pais est Seigneur absolu de toutes les terres de ses Estats, & les baille à re- 26
nir à des laboureurs pour certaines sommes, ou bien il les donne aux grands de son Royaume pour leur entretenement, & pour quelque temps, ou bien pour leur vie: mais non iamais à perpetuité pour en disposer, & les laisser aux leurs comme vn droit hereditaire. Il donne encore aux principaux des villes & des terres avec Jurisdiction, pour quelque temps, ou pour leur vie, à condition qu'ils le viendront seruir aux occasions de guerre, avec tant de gens de pied, de chevaux, ou d'Elephans. Le Roy de Pegu souloit auoir autresfois entr'autres soldats de sa garde, mille Chrestiens, auxquels il se fioit, & qui manioient toutes les affaires de sa Cour. On tient que ce Prince les chargea d'estranges impôts.

Entre ceux de Tarnasser, l'homicide est puny de mort, sans qu'aucune grace luy soit faite. Les debtors sont condamnez à satisfaire, si le creancier montre la cedula, veu qu'ils escriuent en du parchemin, presque semblable au nostre, au lieu que ceux de Calicut escriuent en des escorces & tablettes de bois. Si vn estrangier y decede sans hoir, le Roy succede à son heritage, d'autant qu'aucun n'y peut rester, le Roy se disant Seigneur de tout.

R E L I G I O N.

CE v x de Siam, qui son estimez auteurs de presque routes les superstitions des contrees 27
de par de là, tiennent Dieu pour Createur du Ciel & de la Terre, & pour celuy qui doit recompenser les bons, & punir les meschans. Ils croient que l'homme a deux esprits autour de luy, dont l'un le guide au bien, & le garde, & l'autre le tente & le travaille. Ils baissent plusieurs Temples somptueux, & y dressent beaucoup de statues d'hommes qu'ils estiment estre montez au Ciel pour leur bonne vie. Entre les autres statues on en void vne du pere des hommes, comme ils disent, qui est longue de trente pas. Ils ont opinion que cestuy cy fut enuoyé du Ciel, & que de luy nasquirent certains personnages qui endurerent de grieux & faicheux tourments pour l'amour de Dieu.

Les Prestres qui sont fort honorez en ce Pais, vont vestus de drap iaune (veu que tout ce qui est iaune pour la ressemblance qu'il a avec le Soleil & l'or, est là dedié à Dieu) & les femmes n'entrent nullement en leurs maisons, où ces Prestres ne nourrissent point de poules, pour ce qu'elles sont femelles. C'est vn si grand forfait parmy eux de boire du vin, qu'on lapide les Prestres qui sont conuaincus d'en auoir beu. Ils ieusent souuent: mais principalement en vn temps, auquel tout le peuple court aux Temples, & aux Predications qu'ils font. Ils disent leurs 28
Offices à heures determinees, partie de iour, partie de nuict. Ils tiennent que le monde a eu commencement, & doit durer huit mille ans. & qu'ils en ont desia passé six mille. Ils tiennent aussi que le monde finira par feu, & que lors on verra ouürir au Ciel sept yeux au Soleil, qui secheront les riuieres, & la mer, & brusleront la terre, & qu'il restera parmy les cendres deux ceufs, d'où sortiront vn homme & vne femme qui renouelleront le monde, & lors il n'y aura plus de mer qui ait son eau salee, mais de plaisans lacs, estangs, ruisseaux, & fleuves, qui arroieront la terre de toutes parts, en telle sorte qu'elle abondera en tous biens sans travail d'homme.

Ils ont infinité d'idoles, & adorent entr'autres choses les quatre Elemens, & chacun eslit en sa mort la façon de ses funerailles, selon l'Element qu'il a adoré. Ceux qui ont adoré la terre sont enterrez, & ceux qui ont porté honneur au feu sont bruslez, ceux qui ont reueré l'air sont pendus, afin d'estre deuorez des oyseaux, & ceux qui ont eu l'eau en particuliere veneration sont noyez.

Au Pegu, les plus sages mettent des mondes innombrables, successiuent l'un apres l'autre, & vne infinité de dieux, mais non tous ensemble, ains plus & moins à chaque monde. Ils en donnent cinq à celuy auquel nous sommes, & dient qu'il en a desia passé quatre. Ils croient que le monde finira par feu, & qu'il se renouelle continuellement avec ses propres Dieux. Ils

344 Del'Estat du Roy de Brame, ou du Pegu.

mettent encor au nombre des Dieux quelques hommes : mais avec condition qu'ils soient auparavant passez en des poissons, des animaux terrestres, & des oyseaux de toute sorte. Ils tiennent qu'il y a trois lieux establis apres ceste vie, c'est à sçavoir vn de tourmens, l'autre de delices, & le troisieme d'aneantissement, qu'ils appellent Miba. Ils dient que les ames demeurent tant aux deux premiers lieux, & en sortent, retournans en ce monde tant de fois, qu'elles sont en fin dignes d'estre admises au Miba. De ces principes naissent tant de vanitez, & de superfluitez, & tant de folles ceremonies & opinions, que tout homme de iugement les pourra mieux imaginer qu'on ne les sçauoit exprimer. Ils adorent aussi certaines masses de terre & de chaux, dorees de feuilles faites à la façon des Pyramides d'Egypte, lesquels ils nomment Vareles, qui sont de telle hauteur, que le moindre est de la hauteur de quarante brasses. La plus grande est en la ville de Degum, de telle hauteur, qu'on en descouvre la plus grande partie du Royaume. Il y a au faitte quelques masses de fer, avec vne pomme, & vn chapeau de bronze, entouré de clochettes, où ils pendent les ioyaux, & toutes les autres choses qu'ils leur offrent, ils adorent ces Vareles comme leurs Dieux, & les font hautes pour signifier leur grandeur, ainsi qu'ils dient. Ils ont aussi des Conuents de Prestres, voisins des Temples de leurs Idoles, en nombre de plus de trois cents pour chacun lieu. Ceux-cy ont la teste rase, & le menton sans barbe, & vsent de robes longues, avec la manche qui va iusqu'aux pieds. Ils ne frequentent nullement les femmes, & pratiquent peu avec les hommes : toutesfois ils reçoient fort courtoisement les estrangers. Quelques-vns de ces Conuents vivent de leurs reuenus, les autres d'aumosnes. Il y a pareillement des maisons destinees pour les femmes qui se veulent retirer. Ils ont quelques logis qui ne seruent que comme d'armoires d'Idoles, qu'ils y mettent & gardent par deuotion, & il y en a vn où l'on tient qu'il y en a plus de six vingts mille. Ils ieusent ²⁹ trente iours l'annee, & ne mangent rien iusques au soir. Ils croyent qu'en l'autre vie le larron sera esclau de la personne à qui il a desrobé quelque chose, & croyent que c'est peché de tuer quelque chose que ce soit qui ait vie : à raison dequoy le Roy commande souuent par deuotion qu'on ne peche point, & qu'on ne face mourir aucune chose qui viue : mais cela est peu obserué, à cause de l'auarice des Officiers qui se laissent aisément corrompre avec de l'argent.

DISCOVRS DV GRAND MOGOR.

SOMMAIRE.

- 1 **D**E la grande estendue de l'Empire du Grand Mogor, qui contient quarante-sept Royaumes : & de l'establissement des deux nouveaux Princes en cet Estat.
- 2 Description des Royaumes qu'il possède, & en premier lieu de celui de Cambaye : sa longueur, ses bornes, & ses places plus fameuses & remarquables.
- 3 Du Royaume de Bengale.
- 4 De Sanque.
- 5 Dely.
- 6 De l'origine & source d'Inder, principale riuere du Royaume de Cambaye : & de l'abondance du Pays en froment, riz, cire, sucre, encens, fruits, espiceries, cotton, soye, elephans, dromadaires, cheuaux, pierres, grosses cannes.
- 7 Des riches armes des anciens habitans, leur libre conuention, & estontee accointance des femmes en public, & la cruelle coustume de massacrer leurs parents deuenus vieux, & sur l'age.
- 8 De la barbarie de ceste nation mangeant les corps de leurs parents trespassés.
- 9 Quels estoient leurs Dieux, & sacrifices.
- 10 Du naturel de ce peuple, leur couleur, & constitution de corps, leurs vestemens, mariages, & sorcelleries.
- 11 Leurs richesses au trafic du cotton, soye, espiceries, & pierres, thresors d'or & d'argent du Roy.
- 12 Leurs forces au grand nombre de Caualerie, canons de bronze, elephans de charges, & armes.
- 13 Nombre de Caualerie, Infanterie, & elephans qu'en vn besoin le grand Mogor peut mettre en campagne.
- 14 Discours des empeschemens du progrès & accroissement de cet Empire.
- 15 De trois sectes de Religion de ce peuple, Paganisme, Mahometisme, & Indayme.

L'EMPIRE



L'EMPIRE de ce Prince embrasse la plus grande partie de ce qui est contenu entre le mont Caucaſe, aujourdhuy Dalanguer, ou Naugrocot, & la mer, & entre le Gange, & la riuere d'Inde, ou Inder. Il poſſede force Royaumes, veu que quelques-vns en mettent iuſqu'à quarante-ſept. Toutesfois le Nizzamaluc, & l'Idelcan, qui ſont deux grands Princes preſque nouuellement eſtablis, en tiennent en ce Pais vn fort grand, qui ſe nomme Decan, qui a de longueur de coſte de mer ſeulement deux cents cinquante milles. L'vn de ces Princes, c'eſt à ſçauoir le Nizzamaluc ſe tient en la ville de Danager, & l'Idelcan en celle de Viſapore, combien que la principale ville du Royaume ſoit Bider, apres laquelle on met celle de Decan, qui a donné ſon nom à toute la con-

tree. J'ay dit cecy, afin qu'on euſt quelque cognoiſſance de ces deux grands Princes proches du Mogor, puis que nous ne la pouuons auoir entiere, & qu'on ne leur peut donner vn diſcours particulier. Mais pour reuenir au grand Mogor, les principaux Royaumes qu'il tient, ſont ceux de Cambaye, Dely, Sanque, Mandro, Bengale, outre pluſieurs autres, & la ville de ſa demeure s'appelle Delly, de laquelle tout vn Royaume prend ſon nom.

Le Royaume de Cambaye, qui ſe nomme auſſi Guzarate, a de longueur de coſte de mer cinq cents milles, depuis la riuere de Bate, qui ſe deſcharge dans la mer, pres de la ville de Caul, iuſques au Pais de Circam, de Perſe, & des autres coſtez il ioinct aux Royaumes de Dulcinde, & de Mandaco. Tellement qu'il a pour ſes bornes du Leuant le Pais de Mandaco, du Ponant les Nautaces, ou Gedroſiens: du Nord les Royaumes de Sangue, & de Dulcinde, & du Midy la mer Oceane, & les frontieres du Royaume de Decan. Ce Royaume donc eſt de fort grande eſtendue, & plein de villes, bourgs, villages, & d'habitans, tellement qu'on y compte ſoixante mille lieux peuplez. Les places plus fameuſes & remarquables de ce Pais du long de la coſte, ſont la ville de Daman, Bandore, Curat, Ravel, & Bazuin, dont les deux premieres ont eſté quelquesfois ruinees par les Portugais. Mais au milieu du Pais on trouue Madabar, ou Amodabar, Cambaye, qui a communiqué ſon nom à tout le Royaume, & qui contient cent trente familles, & eſt la plus belle ville de ces quartiers-là, à raiſon de quoy on la nomme le Caire des Indes: Campanel, qui eſt l'ancienne demeure des Roys du Pais, aſſiſe au ſommet d'une montagne, & ayant ſept enceintes de muraille, puis la ville de Tanaé, & quelques autres entre leſquelles eſt Diu, poſſedee par les Portugais, de meſmes que Daman, dont nous auons deſſia fait mention.

Le Royaume de Bengale eſt auſſi tres-grand, & contient pluſieurs villes, tant maritimes qu'autres, & a de longueur de coſte cent vingt lieux, & autant dans le Pais. Le grand Mogor ſ'eſt rendu maĩſtre de ce grand Royaume depuis peu de temps. La ville de Gouro eſtoit la demeure des Roys du Pais, & celle de Bengale, qui donne ſon nom à toute la Prouince, eſt miſe entre les plus belles, & plus grandes de toutes les Indes.

Le Royaume de Sanque, nommé par quelques autres de Citor, a pour ſa ville capitale Citor, qui (ſelon Maſſee) eſt aſſiſe en lieu aduantageux, a douze mille de circuit, & force belles maiſons, tant publiques, que particulieres, & eſt fortiſſee de baſtions beaux & bons par excellence, & ceinte de bonnes murailles. Ce Pais a eſté preſque de noſtre temps ſuſſe à vne femme nommee Crementine, autant courageuſe que belle, qui s'eſtant reuoltée contre le Roy Badurie, à qui elle payoit auparauant quelque tribut, fut deſpouillée de la ville de Citor, où elle s'eſtoit fortiſſee avec trente mille hommes de pied, & deux mille chevaux, & depuis le Grand Mogor ſ'eſt rendu maĩſtre de la plus grande partie.

Le Royaume de Delly eſt aſſis entre les Royaumes de Decan, de Naiſingue, d'Orixe, & de Cambaye: mais il eſt ſeparé de celui de Cambaye par des montagnes. Il fut iadis habitée de vaillantes femmes, ou Amazones, dont il en reſte encore quelques-vnes qui vont à cheual comme des hommes. Il y auoit vn Roy Mahometan qui regnoit n'agueres en ce Pais, & de qui la femme marchoit ordinairement accompagnée de deux mille femmes à cheual: mais en fin ce Royaume eſt tombé entre les mains du Grand Mogor, qui en eſt à preſent maĩſtre. Ce grand Prince ſe tient en la ville de Delly, capitale du Royaume.

QUALITE.

LE Royaume de Cambaye eſt arroſé de pluſieurs riuieres, dont la principale eſt celle d'Inder qui paſſe au milieu. Ceſte riuere vient du mont Caucaſe, aujourdhuy Naugrocot, & apres vn long cours d'environ neuf cents mille, ſe va rendre dans la mer Oceane, par deux

emboufcheures fort grandes. Le Pais abonde en froment, riz, cire, sucre, encens, fruiçts de toutes sortes, & espiceries, & il y a si grande quantité de coton, & de soye, qu'on en charge quelquefois quarante, voire cinquante navires, pour les porter ailleurs. On y trouve pareillement grand nombre de chevaux, & d'elephans, d'Abades, qui sont deux fois aussi grands que des taureaux, ayans sur leur mufle vne petite corne, & ont la peau si dure, qu'il n'y a homme qui la puisse percer d'un coup d'estoc : & dans les montagnes la pierre d'Onix, vulgairement Cornaline, & force Diamants, & Calcedoines : & ce Pais abonde encore grandement en storax liquide.

Le Royaume de Bengale est arrosé de la riviere de Chaberis, à qui quelques-uns donnent aujourdhuy le nom de Guenge, pensans que ce soit le Gange des anciens, combien qu'ils mettent un autre fleuve assez pres de cestuy-cy, qui partant du mont de Gate se descharge dans le Golphe de Bengale, assez pres de l'emboucheure du Chaberis. Ce Pais produit abondamment toute sorte de choses necessaires à la vie humaine, veu qu'il porte grande quantité de riz, & de froment, de sucre, de tres-bon gingembre, & de poyure long. Davantage, il n'y a Pais où l'on trouve plus de coton, & de soye : & quant à la chair, & au poisson, il est impossible d'en rencontrer davantage en aucune autre contree : & le meilleur est, que tout ce Pais iouyr d'un air doux, & temperé, qui fait que de tous costez beaucoup de gens y abordent : Il y a des arbres nommez Mofes, qui portent un fruiçt si doux, & si delicieux, que les Juifs, & les Mahometans qui s'y tiennent, croient que c'est le fruiçt qui fit pecher Adam. Il y a aussi de si grosses cannes, qu'elles seruent de barils, & semblables vaisseaux, & à grande peine un homme en peut embrasser vne seule.

Le Pais de Delly, outre les choses que nous avons trouuees aux autres Royaumes, abonde en chevaux, en elephans, & en dromadaires.

MOEVRS ANCIENNES.

7 **P**OVR ce que le grand Mogor, & ceux qui avec luy se sont emparez de ceste partie des Indes, sont venus du Zaghetay, à raison dequoy ce Prince se vante d'estre yssu de la race de Tamerlan, & que les Massageres ont esté habitans de ceste contree : il ne sera mal à propos de dire quelque chose des anciennes mœurs de ce peuple.

Ils enrichissoient d'or leurs baudriers, morions, & salades, & les espaulieres de leurs harnois, & outre ce les poitrails de leurs chevaux estoient couverts de fin or, duquel ils faisoient aussi les mors des brides, selon Strabon, & les bardes, & les chanfrains. Le bout de leurs lances estoit d'airain, dont ils garnissoient aussi leurs carquois, n'ayans aucun usage de fer, ny d'argent. Chacun d'eux prenoit vne femme, quoy que tous les accointassent en public, & sans aucune honte. Si quelqu'un d'entr'eux desiroit d'avoir affaire à sa femme, il ne faisoit que pendre son carquois à son chariot, & empoignoit sa femme, sans se soucier nullement de tous ceux qui le pouvoient regarder.

8 Ce peuple avoit ceste coustume, qu'aussi tost que quelqu'un estoit devenu fort vieil, ses parens & alliez s'assembloient, & massacroient avec luy quelques brebis pour luy faire compagnie, & faisoient cuire ensemble indifferément la chair de l'homme, & celle de brebis, en dressoient leur festin, & tenoient ceste mort pour la plus heureuse qui leur eust sceu arriuer. Ils ne mangeoient point ceux qui mouroient de langueur, & de maladie, mais les enterroient, desplorans leur fortune, pour n'avoir eu ce bon-heur d'estre mangez par leurs parens & amis. Ils ne semoient chose quelconque pour pourvoir à leur vie, d'autant qu'ils se contentoient de leurs troupeaux, & du poisson que leurs rivieres leurs fournissoient, & vsoient de lait pour breuvage.

9 Entre les Dieux, ils honoroient sur tout le Soleil, à l'honneur duquel ils immoloient le cheval, comme s'ils eussent eu esgard de sacrifier au plus bel Astre, le plus courageux de tous les animaux.

MOEVRS DE CE TEMPS.

10 **L**es habitans de Cambaye s'addonnoient pour la plus grande partie à la marchandise, & sont inviles à la guerre, ils sont de couleur olivastre, & vont tous nuds, excepté qu'ils couvrent leurs parties honteuses. Quant à leur teste, ils portent dessus vne mante, & comme un chapeau de couleur de pourpre, & n'ont la plus part du temps qu'une chemise. Ils ne mangent point de chair, ains vivent seulement de lait, de riz, d'orge, & d'autres choses inanimées. Ils peignent mignonnement leur barbe, & aillent leurs cheveux à l'imitation des femmes, faisoient comme vne chaine de leur poil entortillé. Les femmes ne se marient jamais qu'à un seul homme,

seul homme, & les hommes de mesme, & vivent fort chastement estans en viduité. Ils sont grands forciers, & se meslent de predire les choses à venir. Ils auoient accoustumé lors qu'ils auoient vn Prince particulier, de venir les vns à cheual, les autres sur des elephans, le matin deuant le Palais de leur Roy, pour le saluer, donnans plusieurs chamades avec des trompettes, & des cors, & ysoient de mesme ceremonies, lors que le Roy se vouloit mettre à la table.

Le Royaume de Bengale est habité de plusieurs sortes de nations, à cause de la bonté & temperature de l'air, & de la richesse du pais. Les originaires sont pour la pluspart blancs, de subtil esprit, d'un doux & courtois naturel, & bien entendus aux choses dont ils se meslent, il est vray qu'ils sont quelque peu trompeurs. Ils sont adonnez au trafic, & sçauent bien le train de la marchandise. Ils ne vont pas nuds, comme sont presque tous les autres Indiens, ains se couurent d'une chemise assez blanche, qui leur va iusques aux pieds, & ont encores par dessus d'autres habits de soye. Ils portent des turbans à la façon des Turcs. Leur Roy d'aparauant estoit ordinairement esleu d'entre les esclaves Abyssins, dont toute la Cour estoit presque remplie. Ils sont delicats, & magnifiques, tant en leur viure, qu'en leurs vestemens. Ils sont ignorans pour le regard des sciences, de mesme que ceux de Cambaye: il est vray que quelques vns ont voulu dire qu'il y en a parmy eux qui sont quelque peu sçauants en Philosophie, Astrologie, & Medecine. On dit que les habitans du pais portent grand honneur au Gange, & ne se mettent iamais dessus qu'avec grand respect, croyans fermement que quand ils se lauent dedans, son eau emporte tous les pechez, dont ils se sont souilleez. Mais l'auarice de leurs Princes a esté si grande, qu'ils ne peuuent s'aller baigner dans ceste riuere, sans payer certaine somme à leur Roy.

RICHESSES.

OUTRE ce que j'ay dit du coton & de la soye, qui sont en si grande abondance en ce pais, 11 qu'on en charge bien souuent à la fois quarante, voire cinquante vaisseaux, pour conduire ceste marchandise en des pais extremement elloignez, outre l'espicerie, & les pierreries que les habitans vendent aux estrangers, & par lesquelles on peut cognoistre la richesse de ce Royaume, ie diray seulement ce mot, que pour estre mieux asseuré du grand thesor qu'il y peut auoir en ces contrees, & principalement de celui que le Roy possede: il faut considerer sans plus ce que Maffee rapporte de Badurie, qui ne possedoit que le Royaume de Cambaye. Il dit donc entr'autres choses, que lors qu'il se mit en campagne l'an 1336. pour combattre contre le Grand Mogor, qui estoit venu au secours du Roy de Mandaï, il faisoit mener cinq cents tonneaux pleins d'or & d'argent pour payer son armee: & apres auoir esté defaict par deux fois, & auoir perdu tout ce qui estoit en son camp, il enuoya à Solymam Empereur des Turcs vn present, qui fut estimé six cents mille elcus, en luy demandant secours: puis se repentant de s'estre adressé à vn Prince qui ne le pourroit si tost assister, il s'essaya de gagner l'amitié des Portugais ses voisins, non seulement en leur laissant dresser vn fort en l'Isle de Diu, mais encore avec des presents exquis. On peut comprendre par là quelles sont les richesses du grand Mogor, puis qu'il possede non seulement la plus grande partie du pais que tenoit Badurie, mais encores vn grand nombre d'autres Prouinces, dont la plus part ne cede nullement à celle de Cambaye.

FORCES.

APRÈS auoir montré quelle peut estre la richesse de ce Prince, il faut venir à ses forces, 12 & considerer de mesme l'armee de Badurie, qui estoit composée d'un nombre presque infiny de soldats, veu qu'on y comptoit cent cinquante mille cheuaux, dont il y en auoit trente cinq mille bardez, & outre ce il y auoit cinq cents mille hommes de pied: dauantage, il y auoit vn si grand esquipage, & tant de munitions, que le rapport de Maffee semble vne chose incroyable, si l'on veut conferer ces forces avec celles des Roys d'Europe. Il auoit avec cela deux mille canons de bronze, & entre ces pieces quatre basilics tirez par autant de centaines de bœufs, cinq cents charettes chargees de poudre, & de bales, & deux cents elephans armez. De sorte que prenant vne semblable conclusion à celle que nous auons faite pour le regard des richesses, il faut dire, que puis que le grand Mogor possede tant d'autres pais outre ceux de Badurie, qu'il peut dresser des armees, dont le seul nombre seroit capable de donner de la terreur à tous ses voisins, s'ils ne se trouuoient pourueus de beaucoup d'hommes de mesme que luy, à proportion des terres qu'ils tiennent. Et certainement ce ne leur est pas chose mal-aisée de mettre tant d'hommes sur pied, pour le peu qui leur fait besoin, soit à les nourrir, soit à les armer, & de mesme ils peuuent assembler vne inestimable quantité de munitions, & de machines de guerre, pour ce qu'ils ne meinent autre chose que ce qui est necessaire à la guerre.

L'abondance du vin, la diuersité, des viandes, & choses semblables, qu'on ne peut mener sans vne fort grande despence, & sans vn grand embarrasement & destourbier, n'ont point de lieu parmy eux: toute chose y est ordonnée pour la guerre, le cuyure, le fer, l'acier, l'estain pour faire les pieces, & autres machines de guerre: le fer, & le plomb pour faire des bales, & le fer & l'acier pour faire des espees: & les bœufs, & les elephans pour les tirer. Or tous ces Princes sont tyrans, si bien que pour asséurer, & accroistre leur Estat, ils foulent les peuples, & mettent tout entre les mains des soldats, afin qu'ils leur soient plus fideles. Mesmes les Princes Mahometans ne fient, ny leurs places, ny leurs entreprises d'importance qu'à leurs esclaves, qui se reuolent bien souuent, & s'emparent des Estats de leurs maistres, & pour se maintenir en possession mettent les peuples en proye: car il faut necessairement que la puissance d'un Prince s'appuye sur l'amitié de ses sujets, ou de quelques autres, pour ce que celuy qui est craint de tous, ne se peut maintenir long temps en estat. Or d'autant que les tyrans ne se peuent promettre la bien-veillance des peuples, qu'ils traitent, non comme sujets, mais comme esclaves: il est force qu'ils s'appuyent sur les soldats, & qu'ils les gagnent, en leur permettant toute chose. Ainsi le Turc s'appuye sur les Janissaires, qui ne recognoissent non seulement point d'autre maistre, mais point d'autre pere: & pour estre aymé, & s'entretenir d'eux, il leur donne permission, & liberté de tout faire. Ainsi plusieurs Princes de Malabar tiennent leurs peuples comme des bestes, & fondent leur puissance sur les Naires. Les Roys d'Ormus, de Cambaye, de Decan, & d'Acen, font estat des esclaves. Or pour ce qu'ils logent le fondement de leur grandeur en leurs soldats libres, ou esclaves, naturels, ou estrangers: il est force que la guerre soit entre eux le but de toute chose, & qu'ils n'espargnent rien pour se maintenir, pourueus de soldats, & de munitions.

13 Pour reuenir à nostre grand Mogor, on tient qu'il peut mettre en campagne, par maniere de dire, dans vn moment, trois cents mille cheuaux, cinquante mille elephans, & vn nombre presque infiny de gens de pied.

14 Mais dira quelqu'un, d'où vient que ce Prince estant si puissant, il ne se rend maistre du reste des Indes, & du Leuant? A quoy ie responds qu'il y a beaucoup de choses qui l'en empeschent: L'une est, que comme l'esprit, & l'art de l'homme ne peut produire vn mouuement perpetuel, effect propre de la nature, & de Dieu: aussi l'on ne peut donner vn cours continuel aux entreprises humaines: car encores que les grands Empires ne soient trauallez des forces estrange-res, ils tombent sous leur propre pesanteur, & s'accablent eux-mesmes. Dauantage, lors que la puissance croist, l'egalité manque, & quoy que les forces soient plus grandes, elles sont toutesfois peu propres, ie ne diray pas à faire des courses, mais à se mouuoir. Ces forces donc ne se meuuent que fort lentement, & l'on sçait assez combien la promptitude est importante en la guerre. La grandeur des conquestes porte avec elle le soing de les maintenir, & asséurer, & pour se faire il faut du temps. Cependant les voisins se fortifient, & pouruoient à leur seureté, & la facilité de vaincre s'enfuit avec l'occasion.

Dauantage, celuy qui a vaincu ses ennemis, craint ordinairement ses compagnons, & ceux qui ont participé à la victoire: & pour s'asséurer d'eux, il faut interrompre les entreprises, & faire retraite plustost que l'on ne desireroit, & deuroit. Outre ce les victoires rendent les Capitaines insolens, & les soldats peu obeissans, & si ceux-là veulent aller plus auant, ceux-cy ne veulent pas suiure, comme il aduint à Alexandre, & à Luculle. Il ne faut aussi passer sous silence, que les grandes entreprises qui réussissent, enrichissent les particuliers: mais le plus souuent laissent le Prince sans argent, qui est la chose qui rend les armées mieux vnies, plus promptes aux factions. Il faut dire encores qu'une grande armée, telle que fut celle de Badurie, par le moyen de la ruine des païs, par lesquels elle passa, & s'arresta, se priua elle-mesme du moyen de s'entretenir. C'est pourquoy, encores que les ennemis ne la deffacent, elle est consumée par la faim, qui est ordinairement accompagnée de la peste. Et pour ceste cause on ne sçauoit prendre vne meilleure resolution contre ces grosses armées, que de temporiser & demeurer sur la deffence, pour ce que c'est chose certaine qu'elles ne peuent demeurer long temps en cet estat, & qu'il faut que par faute d'argent, ou de viures, ou par le moyen de l'infection de l'air, ou par maladie, elles se dissipent.

Ce qui resiste encore au progres du Mogor, c'est la nature des lieux: car le Caucaze s'espand par ces contrees là avec mille branches, dont quelques-vnes bornent les autres Royaumes: les autres, non contentes de les border, les ceignent de toutes parts, & leur seruent de murailles: les autres bouchent entierement les passages, les autres les rendent fort mal-aysez: & ces difficultez sont plus grandes au Mogor, qu'elles ne seroient à d'autres, pour ce que la force des gens de guerre consiste en la caualerie: de sorte qu'ainsi qu'il est puissant en raze campagne, il ne peut guerres aduancer aux païs montueux: ce qu'on peut assez iuger par les Resbutes, qui s'estans rendus forts aux montagnes de Cambaye, n'ont aucune peur de ce Prince. Ces

Resbutes

Resbutes sont les restes de la noblesse idolatre de ce pais, qui la premiere fois que les Mahometans s'en faisirent se retirerent aux montagnes, qui sont entre la ville de Cambaye & Diu, & maintenant en ce lieu leur liberté avec les armes en main, faisans bien souuent de grands ravages en la plaine. Il y a apres des pais steriles, voire qui ont faute d'eau, comme est celuy de Dulcinde, aux frontieres de Cambaye; tellement qu'il n'est possible d'y conduire des armées.

Il faut adiouster à cela la grande perte de temps; que les Princes qui ont de grands Estats, font en leurs voyages, pour ce que l'Esté passe le plus souuent qu'on arrive au lieu destiné, & quand l'on y est avec les chevaux demy-morts, & les soldats diminuez de nombre, & affoiblis, on void survenir l'Hyuer contraire à celuy qui attaque, & favorable aux ennemis, pour ce qu'il faut que l'assaillant tienne la campagne parmy la bouë, ou la glace: & les autres sont ce pendant à couvert, & avec toute sorte de commoditez. De là vient que tous les Princes qui ont proiecté d'executer de grandes entreprises, à cause des difficultez qui se trouuent à mener de grandes armées d'un pais à l'autre, ont esté contraincts de mettre leurs gens, ou sur la mer, ou sur des rivières, comme fit Germanique en la guerre d'Allemagne.

Or le Mogor n'a nulle sorte de forces nauales, tant à cause qu'il manque de ports, qu'à raison qu'il a pour voisins les Portugais, qui ferment tout le Golphe de Cambaye, avec deux forteresses importantes, qui sont celles de Daman, & de Diu.

La dernière chose qui arreste les Mogors, ça esté la puissance de ceux avec lesquels il confine, qui l'empeschent de s'estendre du costé du Levant: car il a pour voisin le Roy de Brame, qui ne luy cede nullement en puissance, & en forces, veu qu'il possède tant de Royaumes, & d'Estats, & a sous luy tant de nations guerrieres, & en met un si grand nombre en campagne, qu'il ne redoute aucune puissance contraire. Que si le Mogor a estendu son Empire entre le Gange & l'Inde, cestuy-cy ne l'a pas moins accru entre le Gange & le Royaume de Siam. Et finalement la fortification est aujourdhuy en tels termes, qu'une petite place de guerre est capable de lasser, & d'affoiblir la puissance d'un grand Empire: tellement que par cet art peu de gens résistent à plusieurs, & consomment les forces & les thresors de ceux qui les attaquent.

RELIGION.

LA mal-heureuse secte de Mahomet s'est tellement espandue en Europe, en Afrique, 15 & en Asie, que les plus grands Royaumes de ces deux dernières parties du monde sont infectez de cet erreur. Or entre les autres, l'Empire du Mogor qui suit la loy de ce faux Prophete, est pour la plus grande partie Mahometan. Il y a encore force Idolatres, dont nous parlerons au discours du Roy de Narlinge, auquel ie remets ce propos pour n'estre contrainct de dire deux fois une même chose. Il y a pareillement assez bon nombre de Juifs, qui s'adonnent à la marchandise sur toute chose, & pareillement quelques Chrestiens Abyssins, que le traffic, & le desir de gagner attirez en ceste contree.

DISCOVRS DV ROY DE CALICVT.

SOMMAIRE.

- | | |
|-------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|-------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| <p>1 LONGVEUR & largeur du Royaume de Calicut, & description de sa principale ville, & la forme de ses bastiments, & maisons.</p> <p>2 Son terroir abundant en poivre, & qu'elle sorte d'arbrisseau porte ceste espicerie, le temps & la façon de le cultiver & cueillir.</p> <p>3 Du gingembre, aloës, & autres fruiçts que</p> | <p>produit ce pays, avec la maniere de le cueillir.</p> <p>4 Description des animaux & oyseaux que ceste contree nourrit, entre autres le Sarau chantant plus doucement que le Perroquet.</p> <p>5 Des Singes & Guenons, & d'un merueilleux arbre qui porte datte ou noix, & duquel on tire & fait des cordages, des draps semblables au satin,</p> |
|-------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|-------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|

- vin, sucre & huile.
- 6 De deux sortes de serpens de ce pays, dont l'un ne porte venin.
- 7 Du mariage des Roys de Calicut, qui n'espousent femme qu'elle n'ait esté depucelée par le plus honorable de leurs Prestres.
- 8 Des cinq Ordres du Royaume, & la maniere de vivre de chacun estat : notamment des nobles & marchands.
- 9 Leur façon d'escrire sur feuilles de palmier, avec plumes de fer.
- 10 Leur richesse au trafic du poivre, gingembre, canelle, cloux de girofle, noix muscades, macis, musc, perles, pousses de nard & mirabolans, encens, aloës, camphre, casse.
- 11 Leurs forces en l'Infanterie & armes de mer.
- 12 Quelles forces le Roy peut mettre, tant en campagne que sur mer.
- 13 Succession de la Couronne de Calicut deservée aux enfans de la sœur du Roy deffunct, & pourquoy. Et comme le creancier poursuit en ce pays le débiteur.
- 14 De l'idolatrie abominable des Calicutains adorans le diable mitré en un Oratoire plein de figures de diables.
- 15 Des sacrifices que font au diable les Sacrificateurs Bramins.
- 16 Pardon general célébré tous les ans par les Bramins, & octroyé à ce peuple en un certain Temple de la Prouince.



LE PRINCIPAL des Royaumes de la Prouince de Malabar est celuy de Calicut, combien qu'il aye seulement vingt-cinq lieues de coste de mer. Le Roy de ce Pais est puissant & renommé, surpasse au moins en dignité tous ceux de ces contrees, & est appelé Zamorin, qui veut dire Empereur, suiuant le commandement de Pereymal Roy de tout le Malabar, qui ayant diuisé son Estat en plusieurs parties, lors qu'il voulut aller à la Meque pour y finir ses iours, voulut laisser le nom de Zamorin à ce Roy de Calicut. Ce Royaume a donc vingt-cinq lieues de longueur, & sa largeur n'en passe pas dix. La ville capitale qui communique son nom à tout le Royaume est assise sur le bord de la mer, & a trois milles d'estenduë. Elle n'est point ceinte de murailles, & contient environ six mille maisons, separees d'un assez grand espace l'un de l'autre. A un mille loing de là, elle a son port, qui est nommé Capocate. Les maisons de ceste ville sont basses, & de peu de prix, pour ce que l'on trouue l'eau si tost qu'on a fouy cinq pieds avant en terre : de sorte qu'on ne scauroit jetter des fondemens gueres profonds. Les maisons des marchands y sont estimees environ vingt escus : mais celles des autres ne se vendent au plus que deux escus. La hauteur de ces maisons est esgalle à celle d'un homme qui est à cheual.

QUALITE.

LE terroir de Calicut produict du poivre, & l'on en cueille aussi quelque peu dans la ville. La tige du poivre est foible, & ne se peut tenir droicte, ains elle a besoin d'eschallas comme la vigne. Il ressemble en cela au lierre, qui s'aduance en croissant, & si tost qu'il se peut ioindre à un arbre voisin, il l'embrasse & se lie avec luy. Cét arbre, ou plustost arbrisseau, a plusieurs rameaux long de deux ou trois espans. Ses feuilles sont comme celles d'un pommier d'Assyrie, sinon que celles-cy sont un peu plus espaisées & plus grosses, & ont de petites veines à trauers. En chaque plante on void six grappes pendantes, longues d'un pied : & ces grappes ont la couleur semblable à des raisins qui ne sont pas meurs. On les cueille au mois d'Octobre & de Novembre, lors qu'ils tirent encore sur le verd, & on les met seicher au Soleil sur des nattes, ou couuertes de ioncs, & en trois iours le grain deuient noir ainsi qu'on l'apporte par deçà. Au reste on ne le taille point, & l'on n'a nul besoin de le cultiuer, d'autant que la terre le produict sans y mettre la main. Plin dit que les arbrisseaux du poivre sont semblables aux geneuriens que nous auons par deçà, & quelques-uns de son temps ont dit qu'ils ne croissoient qu'en l'endroit du mont Caucaze, qui est droictement exposé au Soleil. Mais nous auons aujourd'huy appris le contraire par les nauigations des Portugais.

3 Le Pais de Calicut porte aussi du gingembre, qui est vne racine, qui n'est profonde pour le plus que de trois ou quatre espans en façon de roseaux. Quand on arrache le gingembre, on laisse un entre-deux de neuds dedans la fosse, dont on l'a arraché, & l'on couure de terre la racine, ou la semence, & l'annee d'apres on en cueille le fruit, c'est à sçauoir du gingembre. On en trouue aux lieux

aux lieux plains qui est semblable au mirabolan : mais aux terres rouges il s'en cueille de toutes sortes. On y trouve aussi quelques autres fruits & arbrisseaux, comme des jacers, l'ambe corocapel, comolangue, & beaucoup d'autres qui nous sont incognus, entre lesquels quelques-uns ont le goust de l'auberge, les autres de la prune de Damas, les autres de la figue, & quelques autres du melon. Il y croist aussi de l'aloës, qui est vne gomme qu'on cueille sur vn arbrisseau, qui n'a qu'une racine, comme vn baston fiché en terre. Il a le tronc tendre & rouge, la senteur forte, & le goust amer.

On trouve en Calicut plusieurs sortes de bestes, comme lions, sangliers, cerfs, chevreux, bœufs, bœufs, beufles, elephans, & autres : toutesfois on dit qui n'y a pas vne des bestes qui y naissent, & qu'on les y meine d'ailleurs.

Quant aux oyseaux il y a des perroquets verts, d'autres qui sont rouges, & d'autres de diverses couleurs. Il y en a si grande quantité, qu'on met expressément des hommes aux champs pour garder le riz, de peur que les perroquets ne le mangent. Ils gazouillent merueilleusement, & ne coustent pas beaucoup. Il y a aussi vne sorte d'oyseaux nommez Sarau, qui sont vn peu plus petits que les perroquets, mais chantent plus doucement. Les fleurs y sont tousiours en vigueur, & les arbres verts tout le long de l'année, à cause que l'air est doux & temperé, & qu'il semble qu'on y soit tousiours au Prin-temps.

Ce Pais produit aussi des singes & des guenons, qui font beaucoup d'ennuis aux laboureurs, principalement à ceux qui sont pauvres, pour ce qu'ils montent sur les arbres, qui sont comme noyers, & respandent la liqueur, dont les Indiens font leur breuvage, & renversent les vaisseaux, dans lesquels on le reçoit : Car ils ont vne sorte d'arbre, qui surmonte en bonté tous les autres. Il porte des dattes comme le palmier : on en fait du bois pour se chauffer, on en cueille des noix qui sont de bon goust, on en fait des cordages, on en tire des petits draps de lin, du vin, du sucre, & de l'huyle, & les premiers fruits que cet arbre porte sont des noix semblables aux dates. Ils leur ostent la premiere pelure, & la mettent au feu. Il y a vn autre arbre qui n'est guere different de celui-là qui porte le coton & crespé. De ses feuilles on en fait du drap presque semblable au satin, ou taffetas, puis on file la coste, & l'on en fait des cordons. Sous la derniere escorce il y a vne noix grosse comme le petit doigt. Au reste il s'engendre de l'eau avec la noix, & selon que la noix croist ceste eau croist aussi, voire en telle sorte, que quand la noix est venue à la perfection, le dedans de la noix est pleine d'eau, qui est fort claire, & non guere differente de l'eau rose, & de ceste eau ils font de l'huyle fort grasse. Ils font aussi le matin, & le soir vne incision au tronc, & en tirent vne liqueur fort excellente, qui leur tient lieu de vin doux.

Les serpens de ce pais sont fort hauts pour la plus grande partie, & presque aussi grands que des pourceaux. Ils ont la teste beaucoup plus large & grosse que des sangliers, quatre pieds longs de quatre coudees, & naissent, & se tiennent en des lieux marécageux. Les habitans disent que ces serpens n'ont point de venin. Il y en a d'autres qui ont vn venin si mortel, que s'ils ont vne fois succé tant soit peu du sang d'un homme, il mourra soudainement. Il y en a d'autres grands comme aspics, & d'autres beaucoup plus grands, qui tuent vn homme d'une seule morsure, & ceux-cy sont en fort grand nombre.

M O E V R S.

QUAND le Roy veut prendre femme il n'a point de coustume de coucher avec elle, qu'après qu'elle a esté depucelée par le plus honorable de tous les Prestres, & le Roy donne pour ce beau coup qu'il fait cinq cents escus. Quand le Roy veut prendre sa refection il se couche par terre, sans couverture ny tapis : & autour de luy des Prestres qui assistent à son dîner ou souper, & n'approchent de luy que de quatre pas, escoutans avec reuerence les paroles du Roy. Après le Roy, les plus honorables sont les Prestres, & après eux les Naires, qui sont en meisme estime par delà, que les Gentils-hommes en ces contrees. Ceux-cy peuvent porter l'espee, le bouclier, la pique, ou halebardé quand ils sortent dehors. Le tiers ordre est des artisans & gens de mestier. Le quatriesme est des pescheurs. Le cinquiesme de ceux qui recueillent le poivre, le vin & les noix : & le dernier est de ceux qui sement & recueillent le riz, & ceux-cy ne sont pas beaucoup estimez des Gentils-hommes & des Prestres. Le Roy & la Roynne ne portent des habits gueres magnifiques, & les habitans de la ville sont presque tous nus, n'ayans qu'un petit tilsu de coton devant leurs parties honteuses. Quand le Roy va dehors, pour chasser, ou pour autre chose, les Prestres gardent la Roynne en la maison. Les Gentils-hommes, & marchands vivent à la façon qui s'ensuit : S'il y a quelques amis qui soient mariez, il arrive souuent qu'ils changent de femmes, pour rendre leur amitié plus ferme : & quant aux enfans ils demeurent à celuy qui en est le pere. Il y en a quelques autres qui ont bien d'autres

façons de faire, veu qu'une femme espouse sept maris qui couchent l'une apres l'autre avec elle, & s'il aduient qu'elle soit grosse, elle baille l'enfant à l'un des sept tel que bon luy semble, & cestui-là ne le peut refuser. Ils se couchent par terre quand ils veulent prendre leur repas, & en lieu de cuilliers ont des feuilles d'arbres. Ceux qui suivent le Roy portent en leur teste des bandes de soye teintes en escarlate. Tous y laissent merueilleusement croistre leurs cheveux. Apres le trespas du Roy, tous ses sujets se font couper les cheveux & la barbe en signe de tristesse, les uns d'une sorte, les autres de l'autre.

- 9 Les femmes ne s'addonnent à faire chose que ce soit, fors à se parer & se rendre le plus qu'elles peuuent agreables: tellement que lors qu'elles sortent en la rue, quoy que nuës, elles sont chargees d'or, & de pierreries, veu qu'elles en ont aux oreilles, au col, aux bras, & aux iambes, & encor qui leur pendent sur la poitrine. Ils escriuent sur des feuilles de palmier avec des plumes de fer, sans aucune ancre.

RICHESSES.

- 10 **L**E grand trafic qui se fait en Calicut rend le Pais extremement riche, veu que non seulement ils vendent leur poivre & leur gingembre aux marchands estrangers: mais ils leur font encor changer de l'espicerie, qu'on apporte d'ailleurs en ce Pais-là. Car on y conduit de la canelle qui vient d'une Ile nommee Zeylon à cinquante lieux d'Allemagne par de là Calicut, en tirant vers le Levant, de mesme que du poivre de Commucol qui est douze lieux par de là Calicut; des cloux de girofle de Meleuze, qui est distant de Calicut de quelques lieux, des noix muscades, & du maciz des Moluques, du musc du Pegu, des perles de l'Ile d'Ormus, des gouffes de Nard, & des mirabolans de Chambaye, de l'encens d'Arabie, de l'aloës, & de camphre de Lyui, ou China, distant de Calicut 50. lieux, du poivre long de Sumatre, & du bresil de Darnasser, ou Tarnasser. Calicut enuoye aussi dehors la casse qui croist en son terroir. Toutes ces marchandises qu'on emporte de ceste ville, qui est presque le commun abord des marchands Arabes qui traffiquent en Levant, est cause qu'elle est une des plus riches des Indes, & l'on peut aussi cognoistre par là les richesses de son Prince, des reuenus duquel nous n'auons aucun rapport asseuré.

On peut dire seulement que le trafic de l'espicerie qui s'y fait, est de telle consequence, que non seulement il rend les Princes riches par le moyen des gabelles & des daces: mais encore enrichit les marchands en telle sorte, que quelques-uns d'entr'eux se peuuent esgaller en moyens à des Ducs d'Europe, & des Roys d'Afrique.

FORCES.

- 11 **E**N la Prouince de Malabar, on ne fait pas la guerre continuellement à cheval, non tant pour ce que le Pais n'engendre nuls chevaux (veu qu'il y en vient un grand nombre de Perse, & d'Arabie) que pour ce que le Pais ne le porte pas. Car de mesme qu'en Suede les gens de pied n'vsent point de piques, ny ceux de cheval de lances, à cause des bois qui les empeschent de les manier: ainsi en Malabar on n'vs pas ordinairement de chevaux, à cause que le Pais est estroit, & trauersé en une infinité d'endroits, de riuieres, de bras de mer, & de marrescages. Il faut donc que leurs forces consistent en l'Infanterie, & aux armées de mer. L'Infanterie de ce Pais est aussi bien ordonnee qu'il est possible.

- 12 Premièrement, les soldats sont tous nobles, & s'appellent Naires. Ceux-cy estans aagez de sept ans, sont mis comme à l'escole de la guerre, où l'on leur estend par le moyen de quelques hommes excellens en cela, les nerfs, & les ioinctures, lesquelles ils oignent bien souuent d'huyle de Sefame, & par ce moyen ils acquierent une disposition presque incroyable, veu qu'ils tournent & ployent leurs membres aysement de tous costez, comme s'ils n'auoient point d'os. Apres cela ils s'exercent sans cesse au maniement des armes, & estimans que nul ne peut deuenir excellent en plusieurs choses, ne s'addonnent qu'à une sorte d'armes, selon qu'ils se sentent plus disposez. Leurs armes estoient autresfois la pique, l'arc, l'espee, & le bouclier: mais depuis que les Portugais arriuerent en ces contrees, ils ont appris l'art de fonder l'artillerie, & de faire les arquebuses, & les manier, & mesme de faire tout ce qui est necessaire pour s'en seruir: tellement que leur poudre est beaucoup meilleure que la nostre. Ils vont à la guerre tous nuds, excepté le nombril, n'vsent ny de morion, ny de corselet.

De là vient qu'ils sont fort dispos au combat, & en toutes factions militaires. Ils se presentent à l'ennemy à l'impourueu, & s'en elloignent en un instant comme des faucons. Quand on croit qu'ils sont plus elloignez, ils sont au dos de leurs ennemis: tellement qu'il est mal-aysé de les fuir, & de les suivre, veu qu'ils ne sont moins legers à pied, que les Parthes l'estoient à cheval.

cheval. S'il est besoin de venir aux mains (ce qu'ils ne font que par nécessité, ou par occasion) ils frappent le plus souvent de pointe. Ils portent certaines lames d'airain ou d'argent, attachées à la poignée de leur espee, & le son de ces lames leur sert de trompette, ou de tambour pour les animer au combat.

Il y a parmy les Naires vn rang de soldats, qu'on nomme Amoques, qui auec de grandes exécutions, auxquelles ils se soumettent avec leur famille & posterité, font profession de venger les offences faites à leurs compagnons: Mais si l'on tue le Roy, ils courent avec tant de fureur à la vengeance, que les plus grands dangers ne les peuuent arrester. A raison dequoy, selon que le nombre des Amoques est grand, ou petit, les Roys des Indes sont estimez plus, ou moins puissans. Ce qui augmente la hardiesse des Naires, & le peu d'estat qu'ils font des dangers, c'est qu'ils n'ont point de femme particuliere. Car il y a beaucoup de siecles qu'un Prince de ces Pais y introduisit la communauté des femmes. Il faut adiouster à cela la grande licence, ou plustost arrogance de ces Naires, veu qu'il n'est permis au peuple de s'approcher d'eux, autrement ceux qui s'en approchent sont mal traitez. Ces Naires enuoyent deuant leurs seruiteurs aux destours des rues pour aduertir le monde de leur venue, & faire que le menu peuple se retire & s'escarte. Que s'il est vray que les Janissaires deuiennent courageux à la guerre pour la liberté qu'on leur donne durant la paix, les Naires qui ne se laissent seulement regarder aux hommes de basse condition, deuront bien estre plus courageux. C'est ce qui fait qu'ordinairement ils ne se tiennent dans les villes, mais dehors, ayans leurs maisons entourées de fossez, & de terres, les hayes fort espais, & de bocages, avec les chemins tellement embrouillez l'un dans l'autre, qu'ils semblent des labyrinthes.

Or si l'on desire sçauoir quelles forces le Roy de Calicut peut mettre en campagne, on le peut cognoistre par les entreprises qu'il a faites contre les Portugais, veu que l'an 1503. il mit ensemble soixante mille combatans contre Edouard Pachete, Capitaine d'Emanuel Roy de Portugal, qui deffendoit alors le Roy, & le Royaume de Cochin, & deux cents vaisseaux de guerre, & persenera en ceste entreprise l'espace de cinq mois. L'an 1529. il assiegea la forteresse que les Portugais auoient faite à Calicut avec cent mille hommes, & continua la guerre durant tout l'Hyuer. Et bien que les Portugais montraissent vne grande valeur en la deffence de ceste place, toutesfois ils la ruinerent eux-mesmes, considerans la puissance de ce Roy. Le mesme avec nonante mille hommes assiegea l'an 1560. la forteresse de Chiael qu'il emporta, contrainquant le Capitaine Portugais qui estoit dedans de se rendre.

Quant aux forces maritimes, il a aussi monstre sa puissance plus d'une fois: veu qu'estant maître de beaucoup de ports, où il y a grand abord, il arme toutes les fois qu'il luy plaist vn grand nombre de vaisseaux. Il est vray qu'aujourd'huy toutes les forces maritimes des Indes cedent de beaucoup, tant pour le regard des vaisseaux, que des soldats, à celle des Portugais, à qui l'usage des armes deffensives donne vn grand avantage, tant sur mer que sur terre. Car certainement il est mal-aysé qu'un homme nud ne craigne le fer, & qu'un homme couuert de bonnes armes, ne soit plus hardy qu'un qui est defarmé. C'est pourquoy nous voyons que les peuples qui n'vsent en guerre d'armes deffensives, font plustost profession d'agilité que de force, & de combattre en fuyant, que de pied ferme, & se fient plus au grand nombre qu'en la valeur.

GOVERNEMENT.

QUAND le Roy est mort, ses enfans ne luy succedent pas, ains le fils de la sœur du defunct demeure Prince de Calicut, à cause, comme ils disent, que c'est le Bramin, & non le Roy qui a depucelé la Roynne, ioinct qu'il y a tousiours quelqu'un de ces Prestres avec la Roynne, pour luy tenir compagnie: ils vsent de telle iustice, que si quelqu'un a tué vn homme il est empalé tout vif, & apres pendu, mais s'il ne la que blessé, il en est quitte en payant l'amende au Prince.

Quant aux debtes, le creancier voyant que celuy à qui il a presté luy satisfait seulement de parole, retire le contract, & prenant vne escorce verte de quelque arbre s'en va poursuivre le debteur, & l'ayant atteint, le lie avec ceste escorce, le conjurant de la part de Bramins, & du Roy, de ne bouger de la place iusques à ce qu'il ayt satisfait. Celuy qui est ainsi adiuré ne bouge de ce lieu qu'il n'ait payé: car s'il faisoit semblant de vouloir fuyr, il seroit mis à mort sans remission.

RELIGION.

Ceux de Calicut croyent vn Dieu, Createur du Ciel & de la terre, & la cause premiere de tout ce qui est en l'Vniuers: mais ils le font oyssif, & disent que pour se reposer, il a donné le Gouvernement du monde au diable, qu'ils disent estre celeste, afin qu'il soit iuge de

la terre, & qu'il punisse, ou recompense les hommes selon leurs actions & merites, ils appellent ce diable Deume, & Dieu Tamerain.

Or le Roy de Calicut a vn Oratoire en son Palais, tout semé de figures de diables, aussi effroyables qu'on nous les peint par deça, & non gueres plus grandes que des medailles: mais au milieu de ceste chappelle, il y a vn throsne d'airain, où l'on void assis vn diable de mesme maniere, ayant sur la teste vne tyare ou mitre pareille à celle de nos Papes. Il y a trois grandes cornes sur ceste tyare, & le front de l'Idole en porte quatre. Il a la gueule beante, avec quatre grosses & longues dents fort aiguës de chaque costé, & le nez difforme, & fait comme le bec d'un oyseau, les yeux estincelans, & hydeux, la face furieuse, & espouuenable, les doigts faits en hatieffon, & les pieds tout ainsi que les ergots d'un coq. Ce diable tient encoir en sa gueule l'Amé d'un homme, & l'autre en la main, prest à en faire de mesme.

Les Sacrificateurs qu'ils nomment Bramins sont obligez de lauer tous les matins d'eau rose, & d'autres liqueurs odeuses ce monstre, espandant deuant luy force odeurs aromatiques. Lors qu'ils l'encensent ils se prosternent, & sacrifient quelquesfois sur la semaine à cét Idole. Leur sacrifice se fait en ceste maniere: ils ont vn comptoir fait comme vn autel, ayant vn pied & demy de hauteur, deux pieds de largeur, & pres de trois de longueur, & espandent dessus toute sorte de fleurs, & de poudres de senteur. Apres cela ils ont vn vase d'argent plein de sang de coq, qu'ils mettent sur les charbons ardans, avec vne infinité de choses aromatiques pour encenser, & prenans l'encensoir, ils enuironnent l'autel, en le parfumant, & tandis que cela se fait, il y a vne clochette d'argent qui ne cesse de sonner. Ils coupent la gorge au coq, destiné pour le sacrifice avec vn cousteau d'argent, avec lequel ils s'escriement quelque temps.

Cependant que le Prestre fait ce sacrifice, il a les pieds & les bras enrichis de pieces d'argent, qui rendent vn son pareil à celuy des sonnettes, & avec ce il a vne bague qui luy pend au col sur l'estomac, & c'est la marque qui fait recognoistre les Bramins d'entre le reste du peuple. Le sacrifice estant finy, il prend du froment en chacune de ses mains, & sort du Temple à reculons, tenant tousiours les yeux arrestez sur l'Idole, iusques à ce qu'il est pres d'un arbre qui est hors du pourpris, & lors il espend le grain qu'il auoit entre les mains, lesquelles il met sur sa teste, & rentrant dans l'Oratoire oste l'ornement de l'autel. Le Roy ne prend iamais son repas qu'un de ces Bramins n'aille auparauant offrir quelques viandes au diable, & soudain qu'il a disné, ces Prestres recueillent les restes, & les vont donner aux corneilles.

Le Roy, ny les principaux de la ville n'oseroient manger de la chair, sans la permission des Bramins, au lieu que les autres en vsent indifferemment, excepté que nul ne touche aux vases.

Je ne veux oublier vn pardon general qu'ils ont tous les ans au mois de Decembre, qui fait que le peuple vient de toutes les contrees, & Prouinces voisines visiter vn Temple de leur idole, qui est basti au milieu d'un lac, & où l'on voit deux beaux rangs de colonnes, & vne grande lampe faite comme vn nauire, pleine d'huyle pour esclairer tout autour. Ce Temple est grand, & enuironné d'arbres de toutes parts, & nul n'entre dans le Temple sans se lauer dans l'estang, & lors que quelques-uns entrent en ce lieu, les Bramins les arrosent de l'huyle de la lampe, puis il se vont presenter au sacrifice: & ayans adoré & prié le diable, chacun se retire. Ce pendant les Bramins leur promettent pardon general de leurs fautes, & l'espace de trois iours, ce lieu est comme vn azile, & retraicte de franchise à chacun, tellement qu'on n'y oseroit meffaire à personne, ny se venger de son ennemy, non pas mesme pour suivre vn criminel par iustice.

DISCOVRS DV ROY DE NARSINGE.

SOMMAIRE.


- 1 **S**ITUATION du Pays de Narsinge, sa longueur & villes principales, Narsinge & Bifnagar.
- 2 De la Prouince de Canaris, ou Concan, & ses principales villes maritimes.
- 3 De la fertilité de ce Pays abondant en bleds, sucre,

gingembre, & autre espicerie, soye, coton, figues, noix.

- 4 Mœurs & façon de faire de ce peuple, & generally de tous les Indiens diuisez en Brachmanes, descendus d'Abraham, & Germains, selon la partition d'Onesirite & Strabo.

5 Des

- 5 Des Hioboles, ou Gymnosophistes portans habits
faicts d'escorce d'arbre ou de lin incombustibles
leur austerité de vie, & abstinence du vin, &
de l'aëte venerien: leurs exercices pour conseruer
les forces du corps & de l'esprit, leur doctrine,
philosophie & subtiles discours avec les Roys, des
choses diuines & humaines, du mouuement des
cieux & secret de Nature.
- 6 Des Germains addonnez à la speculation du corps
humain, à la cure des maladies, & aux deuina-
tions & necromancie.
- 7 Des autres Ordres & Estats dont estoit composé
ce peuple Indien: scauoir est, Laboureurs exempts
d'aller en guerre. Pasteurs demeurans aux champs
en des tentes hors les villes & villages. Artisans
faisans les instruments de guerre & du labourage:
- le cinquiesme ordre de Soldats: le sixiesme de Ma-
gistras: le septiesme de Conseillers.
- 8 Vestemens des modernes Indiens: & quels habits
le Roy porte allant en guerre.
- 9 Des grands reuenus du Roy montans à douze
million d'or par an.
- 10 En quoy consiste ses forces. Quelle est son infan-
terie, canallerie, ses armes, & ses munitions
de guerre.
- 11 De l'idolatrie de ceux de Narfinge adorans le
Diable, & luy dressés des Temples.
- 12 De deux sortes de sectes gournans la religion
de ce peuple appellez Bancane & Bramins: leur
doctrine & maniere de viure austere: & les Dei-
tez qu'ils adorent.



Le Prince est vn des plus puissans Monarques qui soient entre
la riuiera d'Inder & du Gange, veu qu'il est maistre d'en grand pais,
assis entre le Cap de Comorin, & celuy de Guadauerin, & entre les
montagnes de Gate, & le Golphe de Bengale, & sa longueur est
de 200. lieues ou 600. milles. Quelques vns disent que ce Royau-
ne tient autant de pays qu'on pourroit faire de chemin en vn voya-
ge de six mois. Il y a deux villes royales, c'est à scauoir Narfinge, &
Bisnagar nommee Besenagal par quelques vns, qui a trois encein-
tes, & renommee pour le commerce. A cause de ces deux grandes
villes on appelle ce Prince tantost Roy de Narfinge, & tantost de

Bisnagar. La ville de Tarnasser appartient à ce Royaume, comme quelques vns disent, mais
elle a esté occupée par le Roy de Brame. Il y a en ce Royaume deux villes maritimes habitees
des Chrestiens, c'est à scauoir Coromandel ou Colmander, & Malipur, ou les Portugais se
tiennent.

Le Roy de Narfinge possede aussi la Prouince de Canara, autrement Concan, qui est en
quelque façon vne partie du Royaume de Decan. Les principales villes maritimes de ceste
prouince sont Onor, Batticale, Magindre & Mangalor. Mais les Portugais se sont saisis de
la ville d'Onor, & celle de Batticale leur est tributaire. Le Roy de Trauancor qui est en la Pro-
uince de Malabar est pareillement subiect au Roy de Narfinge.

Q V A L I T E.

CE Royaume abonde en toutes choses, tellement qu'on y peut trouuer tout ce qui est ne-
cessaire à la vie humaine. Car il y a grande quantité de bled, de sucre, de gingembre, &
d'autre espiceries, & l'on ne scauroit trouuer au monde vn pays plus abondant en soye & en
coton. Le terroir de Bisnagar est de grand rapport, & il y a aupres des forests fort agreables.
La prouince de Canara produit du ris, du sucre, des figues & des noix, mais elle ne porte
ny froment, ny del'orge, ny de legumes. Le terroir de Trauancor est maigre & peu propre à
porter du bled, ou des fruiets.

M O E V R S A N C I E N N E S.

POurce que beaucoup de mœurs anciennes de ceux de Narfinge se peuuent rapporter aux
autres Indiens, j'ay reserué ce lieu - cy pour en faire le discours entier, qui donne à co-
gnoistre en general leurs façons de faire. Les Indiens donc fuyoient le larcin sur toutes choses
& auoient les loix non ecrites, veu qu'ils n'auoient aucun vsage de lettres, ains apprenoient par
cœur les vns des autres. Ils beuuient du vin seulement lors qu'ils faisoient quelque sacrifice,
& leur breuuage ordinaire estoit composé d'orge, & de ris, dont ils faisoient aussi potages. Ils ne
plaidoient point ensemble, & n'y auoit aucune loy parmy eux qui fit mention de la garde de
chose qui fut, & n'auoient besoin de tesmoins, ny de cedulaes, de seaux ou escritures, d'autant
que chacun croyoit à la simple parole de l'autre. Ils laissoient aussi leurs maisons seules, & sans
garde, qui estoient tous signes d'une grande bonté, & innocence de ce peuple. D'auantage ils
viuoient tous seuls, & n'auoient point d'heure determinee pour leur repas, lequel ils prenoient

à mesure qu'ils entroient en appetit, ou qu'ils en auoient fantasie. Ils se faisoient souvent frotter le corps, lequel ils se polissoient aussi avec de l'ebene. Ils estoient peu magnifiques à dresser les tombeaux & sepulchres des trespassez, & au contraire, ils se monstroient superflus en leurs habillemens, veu qu'ils portoient sur eux beaucoup d'or & de pierreries. Ils auoient aussi pour ornement vn linge fort delié, duquel ils se couuroient le visage de peur de halle, faisant tout ce qu'ils pouuoient pour se maintenir, ou se rendre beaux. La verité estoit tenuë entr'eux pour grande vertu, & les vieillards n'estoient nullement estimez s'ils n'estoient prudens. Ils pouuoient auoir plusieurs femmes, & les achetoient en donnant à leurs parens vne paire de bœufs. Ils choissoient les vnes pour leur seruice, les autres pour auoir des enfans, & les autres pour leur passe-temps, & ne le contraignoient de viure chastement, ains il leur estoit permis de pailarder à leur ayse. Ils ne sacrifioient, ny encensoient les autels ayans des chapeaux de fleurs sur la teste, ains que plusieurs autres nations, & ne massacroient ny esgorgeoient les bestes du sacrifice, ains les estouffoient en leur sang. On couppoit aux faux telmoins le bout des doigts, & celuy qui auoit coupé ou estropié quelque membre à vn autre, non seulement enduroit pareille peine, mais perdoit encore la main qui auoit fait la faute : mais qui creuoit l'œil ou coupoit la main à vn artisan perdoit la teste sans remission.

C'estoit aux femmes esclaves à garder & seruir le Roy : & l'armee se tenoit hors des villes sous des tentes. Si vne femme tuoit le Roy en le voyant yvre, elle espousoit son successeur, & les enfans succedoient legitiment au pere. Il n'estoit permis au Roy de dormir sur le iour, & durant la nuit il changeoit à toute heure de giste, craignant les surprises. Lors qu'il n'estoit point en guerre, il sortoit souuent hors de sa maison, meisme afin d'ouyr les parties, & leur faire iustice, & si durant le temps qu'il se faisoit frotter il luy falloit ouyr quelqu'un, il ne laissoit d'entendre les parties & de leur respōdre. Il sortoit encore pour sacrifier & pour aller à la chasse, où vne grande troupe de soldats couroit apres la beste. Le lieu où le Roy prenoit ce plaisir estoit enceint de cordages, & les gardes de son corps se tenoient hors de l'enceinte, & si quelqu'un entroit cependant dans les tentes du Roy pour se iouer avec quelqu'une des Dames de la suite, il perdoit la vie.

Lors que le Roy marchoit par pays, il y auoit des clochettes & des tambours qui alloient deuant luy, & s'il entroit dans quelque parclos pour y chasser, il auoit tousiours pres de sa personne trois ou quatre femmes armées : mais s'il couroit en plaine campagne, il estoit monté sur vn elephant, & auoit autour de luy forces femmes, les vnes sur des chariots, d'autres sur des elephans, ou des chevaux, & ces femmes manioient dextrement toutes sortes d'armes.

Les Indiens adoroient Iupiter le pluieux, & leur riuere de Gange, & les Genies, & ceux qu'ils nommoient Dieux de chaque pays. Lors que les Roys faisoient lauer leurs cheueux, chacun solempnoit ce iour comme vne grande feste, & les vns faisoient de grandes & riches presens aux autres. Ce peuple fut iadis diuisé en sept ordres & estats, dont le premier estoit celuy des sages, ou Philosophes, Gymnosophistes, & Brachmanes, qui estoient honorez plus que tous les autres. Ceux-cy estoient francs de tout labour, & ne seruoient à personne, non plus qu'ils ne commandoient à aucun, & receuoient seulement de chacun en particulier ce qui seruoit pour les sacrifices des Dieux. Ils auoient le soin des trespassez, comme estans tenus pour bien aymez des Dieux, & qui sçauoient les choses qui se faisoient aux enfers. Ces Sages leurs predisoient dès le commencement de l'annee les secheresses, vents, pluyes, maladies, & autres telles choses qui deuoient aduenir, & dont la cognoissance leur estoit profitable, d'autant que le Roy & le peuple taschoient d'euiter le malheur dont ils estoient menacez. Mais si quelqu'un de ces Philosophes predisoit quelque chose fausse, il luy estoit enjoint pour peine de garder perpetuel silence. Les Gymnosophistes alloient tous nuds ains que leur nom le marque, & se tenoient en des lieux deserts & escartez, où ils disputoient des causes naturelles, & estoient retenus dès le matin iusques au soir à regarder le Soleil, sans remuer presque l'œil. Ces hommes estoient si patiens qu'ils souffroient de tenir tout le long du iour les pieds nuds dans le sable ardent. Entre ces Sages estoient encor les Brachmanes, qui ne desiroient que ce que la nature requeroit, & ne viuoient que de ce que la terre produit de son bon gré. On tient que ceux-cy sortirent des enfans des concubines d'Abraham, qui les enuoya en Leuant, ains que nous lisons aux saintes lettres, où il est dit qu'ils emporterent de luy quelques dons. Or ces dons d'Abraham, outre l'or & les habillemens, sont les arts & les sciences, principalement l'Astrologie, & la Magie naturelle, ausquels non seulement ils ont excellé, mais sont encore parfaitement sçauans, si nous voulons croire les Portugais, qui en parlent comme l'ayans veu. Strabo, suivant Onesirte les diuise en Brachmanes, & Germains. Les Brachmanes mettoient en vsage la science qu'ils auoient receüe de leurs ancestres, & receuoient à l'estude de la Philosophie les Germains qui estoient estrangers, & qui n'estoient de la race des Sages.

Les plus honorez de tous estoient les Hyoboles ou Gymnosophistes, qui n'estoient cou-

ueris que

uerts que d'escorce d'arbre, ou d'un lin fort delié qu'on ne lauoit pas avec de l'eau, mais qu'on mettoit dans le feu pour le nettoyer lors qu'il estoit sale, sans qu'il receust aucun dommage. Ils ne beuuoient du vin, & ne se marioient, ny auoient cognoissance des femmes, qu'après auoir mené ceste vie l'espace de sept ans. Ils discouroient subtilement avec les Roys de la Republique, des choses diuines & humaines, du cours & mouuement des cieux, & des secrets de nature. Ils fortifioient leurs corps avec un si grand exercice, & par mesme moyen ils donoient aussi de la force à leurs esprits, & les rendoient immuables en leurs consultations & iugemens. Toute leur Philosophie tendoit à faire qu'une bonne mort terminast une bonne vie. Apollonius de Thiane alla trouuer ceux-cy avec beaucoup de peine, afin d'ouyr discourir l'arque leur Prince de la nature, du mouuement des cieux, & du changement des iours.

Ils reprindrent Alexandre victorieux de ce que n'estant pas content de son Royaume, il molestoit avec son armee tout le Leuant. Voila tout ce qu'en dit Strabon, qui est suiuy de Plin en son Histoire naturelle. Ils ont grandement enrichy la science morale, comme on peut voir par ces paroles d'Apulee. J'admire ceux-cy qui scauent non pas prouigner la vigne, ou labourer la terre, ou enter une greffe, ou dompter un cheual, ou un toureau, ou tondre, ou paistre une chevre, ou une brebis, mais qui s'addonnent à la sapience, & encor ie ne loue rien tant de ce qu'ils font que la hayne qu'ils monstrent porter à l'oisiueté. Car lors que la table est mise, auant qu'on porte la viande, tous les ieunes hommes s'assemblent & arriuent là de diuers lieux & offices. Les maistres demandent ce qu'ils ont fait de bon, depuis la pointe du iour, iusques à ceste heure là, & lors l'un d'eux dict, qu'il a esté esleu arbitre pour mettre deux hommes d'accord, & qu'il les a rendus bons amis : l'autre qu'il a obey à ses parents qui luy ont commandé quelque chose, l'autre qu'il a trouué quelque chose de luy mesme, ou qu'il l'a apprise d'autrui, & choses semblables. Celuy qui ne s'est employé à chose du monde, & qui ne peut monstrier ce qu'il a fait, est renuoyé dehors sans dîner.

Or les Germains s'arrestoient à cognoistre le corps humain, se tenoient à couuert, viuoient deriz & de farine, & remediand aux maux loüoient entre les medicaments principalement les onctions, & les cataplasmes. Quelques uns d'entre eux estoient adonnez aux diuinations & enchantements, exerçoient la Necromancie, & alloient vagabondant de ville en ville, & de lieu en autre.

Les premiers estoient ennemis de tous ceux-cy, & ne se plaisoient qu'à reprendre les autres, & ces premiers estoient diuisez en Montagnats, Gymnetes, Ciuils.

Le second rang fut des laboureurs, qui surmontant tout le reste en nombre estoient exceptés d'aller à la guerre. L'ennemy ne leur faisoit iamais ennuy, ains chacun les laissoit viure paisiblement, comme les estimans nez pour le bien & profit de tout le monde. Par ce moyen on voyoit abondance de toutes choses en ce pays, & ces hommes viuoient aux champs avec leurs femmes & enfans, payans au Roy son tribut.

Le tiers ordre estoit de toute sorte de Pasteurs, qui ne demeuroient aux villes ny aux bourgades, mais aux champs en des tentes, où ils viuoient de la chasse, & dressoient des pieges aux bestes, & par ce moyen ils assureoient les semences des bestes, qui fourmillent en ce pays, & endommagent grandement les fruits, & les semences.

Les artisans tenoient le quatriesme rang, & les uns faisoient les harnois, & les instrumens de guerre, les autres les outils du labourage & autres instrumens profitables & necessaires, dont on se deuoit seruir. Ceux-cy n'estoient pas seulement exempts de tributs & de subsides, mais encor on leur distribuoit du bled des greniers du Roy.

Le cinquiesme ordre estoit des soldats, qui estoient toutesfois le second en nombre. Ceux-cy se rendoient par un exercice ordinaire adroits à la guerre, & quelque grand nombre qu'il y en eust, leurs cheuaux & elephans propre pour la guerre estoient nourris aux despens du Prince.

Le sixiesme rang estoit celuy des Magistrats, qui prenans garde à tout ce qui se passoit en aduertissoient le Roy, afin qu'il y remediast.

Le septiesme & dernier ordre contenoit ceux qui presidoient aux Conseils publics, qui estoient en fort petit nombre, mais signalez en prouidence & en noblesse. C'estoit de ce nombre qu'on choissoit les Conseillers des Roys, & ceux qui auoient le maniment des grandes affaires, & quiugeoient de tous differents. On elisoit encor d'entre ceux-cy les Capitaines & Gouverneurs des Prouinces.

Il y auoit aussi des Seigneurs deputez pour empescher qu'on ne fist aucun tort aux estrangers, & quand quelqu'un d'eux tomboit malade on auoit soing de le secourir, & s'il mouroit ils le faisoient enterrer, rendant ion argent & sa marchandise à ceux qui se disoient ses plus proches parens. Les Iuges de chaque lieu auoient puissance de punir ceux qui estoient atteints de quelque crime.

Vers la mer de Sur & de Malacca il y auoit des Pasteurs qui viuoient de chair crüe, qui s'appelloient Pades, dont les façons estoient telles. Quand quelqu'un de leurs, fust homme ou femme, estoit malade, ceux qui se touchoient de plus pres, ne manquoient à le ruer, dilans que s'il languissoit longuement ainsi, il causeroit la corruption de leur chair par sa maladie, & apres qu'ils l'auoient tué ils le mangeoient, & ils traitoient de mesmes les vieilles gens.

En d'autres endroits il y en auoit qui ne faisoient mourir ny homme, ny beste, voire mesme ne semoient, ny bastissoient, & ne se tenoient en aucune maison, viuans seulement d'herbes, & d'autant qu'ils auoient certain grain semblable au millet qui naissoit de son bon gré, & sans aucune industrie, ils le cueilloient, & le cuisant s'en aydoient pour leur viure. Dès que quelqu'un d'entre eux tomboit malade, il se retiroit aux deserts, & soit qu'il y vescu, soit qu'il y mourut, on n'auoit soucy de le penser, ny de sa sepulture.

MOEVRS DE CE TEMPS.

8 Les plus riches de ce pays portent vn saye, ou hocqueton assez court, & portent sur leur teste des turbans de diuerses couleurs à la façon des Turcs. Le menu peuple pour tout habillement couure ses parties honteuses, & le reste du corps est nud. Quant le Roy veut aller en guerre il prend vne robe de coton, & sur ceste robe il porte vn manteau couuert & enrichy de petites fucilles d'or. En lieu de broderie il y a tout autour de riches pierreries de toutes sortes. Son cheual est estimé d'un prix excessif à cause du harnois qui est tout couuert de pierreries. Les habitans de ce Royaume ne mangent point de pain, viuent de riz, de chair de poisson, & des noix que ce pays produit.

Quant à ceux de Coromandel, s'il aduient que quelque annee passe sans qu'il y pleuue, ils tombent en telle extremité, qu'ils sont contraincts de vendre leurs enfans pour vn real: toutes-fois cela arriue presque en toutes les Indes, veu que les peres y vendent leurs enfans à fort vil prix, & plusieurs se vendent eux mesmes. Les Princes font beaucoup d'estat d'auoir des esclaves nobles, qui demeurent souuent maris des filles, & heritiers des biens de leurs maistres.

RICHESSES.

9 On tient pour chose certaine que le Roy de Narsinge a douze millions d'or de rente, & qu'il en espargne trois ou deux & demy toutes les annees: Il employe le reste à l'entretien de sa maison, ou des gens de guerre. Outre ce il a deux cens Capitaines, ausquels il distribue des terres de son Estat, à la charge qu'ils entretiendront tant de cheuaux, d'elephans, & de gens de pied: & ces reuenus sont si grands, qu'il y a des Capitaines qui ont vn million d'or de reuenu toutes les annees. Ce qui ne doit pas sembler incroyable, veu qu'en ce pays comme en la plus grande partie du Leuant, toutes les terres, les mines, les forests, & mesme les eaux de quelques riuieres sont des Princes: tellement qu'aucun ne se peut lauer de l'eau de Gange qui court par le Royaume de Bengale, ou de celle de la Gangue qui coule par le Royaume d'Oryxe, sans payer certaine somme aux Roys de ces deux pays, & le mesme de Narsinge achepre l'eau de ces fleuue, & se la fait porter de loin pour se baigner, & s'en purger superstitieusement.

Le Roy estant donc maistre des fontaines de son Estat, il ne reste au peuple que les bras & le travail, & c'est chose vray semblable, que puis que le Roy partage toutes les terres entre luy & ses Capitaines, il en tire vn tiers pour luy, & ses Capitaines ont les deux tiers, il faut que quelques vns d'entre eux tirent de grosses sommes,

FORCES.

10 On tient que le Roy de Narsinge entretient ordinairement quarante mille Naires qui sont comme Gentils-hommes destinez à la guerre, & payez en tout temps, & outre ce vingt mille cheuaux, qu'il reçoit, partie de Perse, & partie des Arabes, & deux cens Elephans. Mais lors qu'il est besoin d'aller à la guerre il met en campagne vn beaucoup plus grand nombre d'hommes, & d'elephans, veu que quelques vns ont escrit que son armee occupe quelque-fois l'espace de trente milles. Iean de Bartos nous monstre assez quelles forces se peuuent tirer de ce Royaume, lors qu'il d'escrit l'armee que Chesnate Roy de Narsinge, mena contre l'Idalcane en l'entreprise de Rachio. Il dist donc que l'armee estoit diuisee en plusieurs membres qui estoient sous leurs Capitaines. On voyoit marcher en l'auant-garde de Camaraïque avec mille cheuaux, dix-sept elephans, & trente mille hommes de pied. Tierrabitara avec deux mil cheuaux, vingt elephans, & cinquante mille tantassins: & apres Timanapaïque avec trois mil-

le cinq cens

le cinq cens chevaux, trente elephans, & soixante mille soldats à pied. Hadapanaïque venoit apres, & menoit cinq mille chevaux, cinquante elephans, & cent mille hommes de pied. Con-domare auoit six mille chevaux, soixante elephans, & 120. mille hommes de pied. Comore conduisoit deux mille cinq cens chevaux, quarante elephans, & quatre vingts mille hommes de pied. Gendraye mille chevaux, & dix elephans, trente mille hommes de pied. Apres cestuy cy marchaient des Eunuques de la maison du Roy, avec mille chevaux, quinze elephans, & quarante mille hommes de pied. Le Page du Betel menoit deux cens chevaux, vingt elephans, & quinze mille soldats. Comarbeque conduisoit quatre cens chevaux, vingt elephans, & huit milles hommes de pied. Le Roy venoit apres avec les gens de la garde, c'est à sçauoir six mille chevaux, trois cens elephans, & quarante mille hommes de pied, & à ses costez on voyoit marcher le Gouverneur de la ville de Bengapor, avec diuers Capitaines, sous les enseignes desquels il y auoit quatre mille deux cens chevaux, vingt cinq elephans, & soixante mille hommes de pied. Outre ces gens cy il auoit deux mille chevaux, & cent mille hommes de pied diuisez en petites compagnies, qui en forme de coureurs descouuroient le pays par les costez, par derriere, & par deuant, avec tel ordre qu'on sçauoit en vn instant la moindre chose qui suruenoit. On voyoit aller avec ceux cy douze mille porteurs d'eau, vingt mille putains, & des goujats, marchands, artisans, & blanchisseurs, qu'ils nomment Mainates, bœufs & beuffles de charge sans nombre. On cogneut la multitude de ses gens au passage d'une riuere, pour ce que l'eau qui venoit iusqu'amy cuisse aux premiers, ne pouuoit presque suffire pour abbreuer les derniers. Le Roy auant qu'aller à ceste entreprise sacrifia en neuf iours vingt mille sept cens trente six animaux, la chair desquels on donnoit aux pauvres à l'honneur de l'idole à qui l'on sacrifioit. Ces gens estoient vestus d'habits de coton si fermes & forts, qu'ils resistoient à quelque coup de lance qu'on peust donner, aussi bien que si c'eussent esté des plastrons de fer, & les chevaux, & les elephans estoient couverts de coton façonné de mesme. Chaque elephant auoit son chasteau, avec quatre hommes armez au dedans. Ils portoient avec cela entre les dents certains coutelas, qui coupoient tout ce qui se trouuoit deuant eux.

L'infanterie estoit diuisee en archers, piquiers, & gens qui portoient l'espee, & la targue, & pource que ces derniers portent de si grandes targues, que toute la personne en est aisément couverte, ils ne portent autre arme deffensue. Je ne veux taire qu'en ceste guerre l'Ildacan ayant fait vne grande desroute en l'armee du Roy de Narfinge avec son artillerie, ce Prince s'encourageant luy mesme dict des paroles veritablement dignes d'un grand Prince, c'est à sçauoir qu'il vouloit plustost que l'Ildacan se vantaist de l'auoir tué, que vaincu : & ayant dict ces mots il s'aduança, & donna courage aux siens, & deñt son ennemy. Entre autres choses on prit en ceste deffaitte quatre mille chevaux Arabes, cent elephans, quatre cens gros canons, outre les petites pieces, & vn nombre infiny de bœufs, de beuffles, de tentes, & de prisonniers. Il y auoit en ceste guerre quarante Portugais avec l'Ildacan, & vint avec le Roy de Narfinge. De nostre temps il y a deux Capitaines qui se sont reuoltez contre ce Roy, dont l'un qui se nomme Virapanay demeure à Nagapatan, & l'autre qui s'appelle Vengapatir, s'est rendu maistre des lieux voisins de Malipur.

Le Roy de Narfinge pour tenir ses Capitaines plus prests à toutes occurrences, fait faire tous les ans certaines monstres, où tous doiuent comparoistre. Il priue là de leurs charges ceux qui meinent moins de gens qu'ils ne doiuent, ou qui ne sont bien en point.

R E L I G I O N.

Les peuples de Narfinge croyent premierement en vn Dieu, Seigneur de tout l'vniuers, puis aux diables auteurs de tout mal, lesquels ils honorent plus que le Createur de toutes choses, leur bastissant beaucoup de magnifiques Temples, ou Pagodes bien rentez. Il se tient en quelques vns de ces Temples des hommes qui ont charge du seruice de l'idole, & en quelques autres des femmes d'amour, qui gagnent avec le corps quelque chose pour entretenir ce seruice, & nourrissent plusieurs petites filles pour le mesme mestier.

Or il y a tant en ce pays, que presque en toutes les Indes, deux sortes de gens qui gouvernent les ceremonies de leur detestable religion, & manient la simple conscience de ce pauvre peuple. Ce sont les Baneans, & les Bramanes, ou Bramins. Quant aux Baneans, qui sont en grand nombre en ce pays, combien qu'ils different en sectes, s'accordent toutesfois tous à ne faire mourir aucune chose viuante, & ne manger de celle qui a esté tuée. Ils gardent cecy si estroitement qu'ils rachèptent les oyseaux qu'on a pris, & les remettent en liberré. Ils ne mangent ny naueaux, ny aulx, & n'vsent ny de vin, ny de vin aigre, ny pareillement de nympe, ny d'ortaque, sortes de breuuage des Indes. Ils se mattennt par de grands ieusnes, prenans seulement le soir vn peu de sucre avec du lait, & les plus superstitieux d'entre eux demeurent quel-

ques-fois vingt iours sans manger chose que ce soit. Ils donnent à boire de l'eau sucrée aux oiseaux & aux formiz : & même en Cambaye ils ont dressé vn hospital où l'on a soin de guerir les oiseaux malades. Il y en a quelques-vns d'entre eux qui se voyans proches de la mort, ont de coustume de leguer à d'autres, certaine partie de leurs biens, afin qu'ils aillent par les deserts & lieux du tout escartez, presenter de l'eau aux passans & voyageurs pour appaiser leur soif. Ils portent au col vn caillou de la grosseur d'un œuf, avec certaines lignes qui sont tirées par le milieu pour leur Dieu. Ils tiennent les chandelles allumées dans les lanternes, afin que les papillons ne s'y brûlent. Ils appellent bien souuent certains autres de leur secte, mais plus austères qu'eux, afin qu'il leur tirent du dos les poux qu'ils ont, & les prennent pour les nourrir.


Ils se marient seulement vne fois, & quand ils meurent, leurs femmes sont enterrees avec eux. On n'enterre pas les autres hommes, mais on les brûle, de même que les femmes. Les veufues qui ne se veulent pas ietter dans le feu, demeurent infames, comme si elles estoient conuaincues d'adultere. Les Baneanes vsent de mêmes habits que les anciens Brachmanes, & croient la metempsychose, & que les ames passent d'un corps en un autre. Pour le regard des Bramans, ou Bramins, ils sont beaucoup plus estimez que les Baneanes, & sont diuisez en deux sectes; veu que quelques vns se marient, & demeurent dans les villes, & ceux-cy retiennent le nom de Bramans: les autres ne se marient iamais, & s'appellent Ioques. Ceux-cy n'ont aucunes rentes, se maintiennent en fort grande austerité, vivent d'aumones, voyagent en façon de pelerins par les Indes, & s'abstiennent de tous plaisirs charnels iusqu'à certain temps, apres lequel ils deviennent Abduts; c'est à dire, exempts de toutes loix, & comme incapables de peché. Lors ils se plongent en toute saleté, & vilainie, & prennent tous les plaisirs dont ils se peuuent aduifer. Ils ont vn chef qui dispose d'un grand reuenu, & le distribue, & enuoye en certain temps plusieurs Ioques pour prescher deçà de là leurs folies. Or les Bramains adorent vn certain Parabramme, & trois siens fils, en l'honneur desquels ils portent trois cordons attachez au col.

Ils rangent entre les Dieux non seulement les hommes qui ont fait quelque grande prouesse, mais encore les bestes, & leur bastissent des Temples magnifiques, & à tres-grands frais. Ils adorent les singes, & les elephans, mais encore plus les bœufs, & les vaches. Tellement que quand le Roy a créé les Naires, qui sont comme cheualiers, il leur recommande de garder les Bramains, & les vaches. Le subiect pour lequel ils font tant d'estat des vaches, des bœufs, c'est pource qu'ils estiment que les ames des morts passent en ces animaux plustost qu'aux autres. Ceux d'entre les Bramains qui se tiennent aux lieux maritimes, appelez Cuncamme, mangent de toute sorte d'animaux, excepté la chair de bœuf, & de pourceau. Ils ont certains liures, de Prophetes, par le moyen desquels ils establisent leur superstition. Ils tiennent que Dieu est noir, estimans ceste couleur la plus belle de toutes, à raison dequoy les idoles sont noires, & tous huylez, & si villains, qu'ils font horreur à ceux qui les regardent. Ils persuadent au peuple que leurs Dieux sont fort grands mangeurs, & pour ceste cause qu'il leur faut porter force argent, & diuerfes viandes, & parce mensonge ils acquierent dequoy faire bonne chere, à cause que le peuple credule fait deux fois le iour des offrandes aux idoles, & ces Bramains les mangent. Il y en a quelques-vns parmy eux qui sont sçauants en Astrologie, mais presque tous ont plus de malice, que de doctrine. Ils tiennent ordinairement plusieurs femmes, & sçauent les dix commandemens de la Loy, & leur explication. Ils contraignent ceux qu'ils reçoient en leur discipline, de iurer qu'ils ne reueleront à personne du monde les mysteres qu'ils entendront. La premiere chose qu'on leur enioint, c'est de ne publier iamais qu'il faille adorer vn Dieu, Createur du ciel & de la terre. Ils ont certaine langue estrangere, comme nous auons la Latine, & enseignent en leurs escholes la Magie, les enchantemens. Leurs Docteurs vaquent le Dimanche au seruice diuin, prians Dieu Createur du ciel & de la terre, & redisans souuent ces paroles: Je t'adore, ô Dieu, avec ta grace, & ton secours eternellement. Ils laissent croistre leurs cheveux presque dès leur enfance, & iugent que c'est vn sacrilege de prendre leur viande de la main des Chrestiens.

DISCOVRS DE L'EMPIRE DV PRETE-IAN.

SOMMAIRE.

- 1 **O** Pinions diuerses des Geographes touchant l'estendue en longueur & largeur, & limites de l'Empire du Prete-Ian.
- 2 Titres & qualitez que ce Prince se donne.
- 3 Description des prouinces subiettes au Prete-Ian, & premierement de Barnagas, l'estendue, limites de ce pays, & situation de sa principale ville appelée Beroe ou Barue, & autres citez, isles, lacs, ports & caps celebres.
- 4 Autre description des pays qu'il possede en terre ferme, & de sa demeure principale, & cite de Beimalachi où il tient sa Cour.
- 5 Fertilite de ce pays abondant en orge, millet, poids chiches, febves, & autres legumes incognus: Sucre, vin, oranges, citrons, limons, huile de Coute, miel, cire, lin, coton, bestes à quatre pieds, & oyseaux de toute sorte, chameaux, elephans, lions, tygres, (excepté les ours, conils & chardonnerets) singes, perdrix, oyes, lievres, mines d'or, argent, fer, airain. Ce pays est encor remarquable pour y auoir deux Hyuers, & deux Estes l'annee.
- 6 Origine de ces Ethiopiens, inuenteurs des ceremonies de sacrifices, & des lettres hieroglyphiques: Idolatres de leurs Roys, faisans peu d'estime de l'or au prix du cui vre: adorans le Soleil leuant, & maudissant le couchant: mettans leurs trespasses dans des vases de verre, & croyans deux Deitez: l'une, immortelle, l'autre mortelle.
- 7 Description de la Cour du Prete-Ian, son logement ordinaire sous des tentes, ses vestemens, & bagages lors qu'il voyage.
- 8 Du naturel, couleur d'habits, forme d'edifices, des modernes habitans de cet Empire, leur viande ordinaire, & leur coustume de banqueter, sur tapis sans nappe en terre. Leur breuuage compose du fruit des Tamarins. Leur langage, caracteres, & lettres. Leurs ceremonies au ducil. Leurs navigations.
- 9 Leurs richesses procedans des mines d'or, argent, cui vre, & fer: sucre, coton, &c. Et quel est le reuenue du Prete-Ian.
- 10 Quelles sont les forces de cet Empereur, le nombre d'hommes qu'il peut armer, & avec quels Princes il confine, ses allies & ses ennemis voisins.
- 11 Rigoureuse & imperieuse façon de commander du Prete-Ian, auquel ses suiets portent pareil honneur & respect qu'à Dieu. Son origine & extraction d'un fils de Salmon, & de la Royne de Saba. De la succession à la couronne. Des benefices Ecclesiastiques, administration des sacremens. Des femmes d'amour, filles de ioye. Du grand nombre d'officiers de la couronne diuisez en trois rangs. De la punition des femmes adulteres.
- 12 Les deux sortes de religion introduictes en l'Empire du Prete-Ian: sçauoir est le Christianisme & le Mahometisme, & de quelle sorte la foy Chrestienne s'est glissée en ces contrees.
- 13 De l'erreur & fausse creance des Abyssins retenant la Circoncision. Leurs paroissses jaictes en façon de Couuens. Forme de leurs Eglises, dans lesquelles n'est permis d'entrer chaussé, ny cra. her. De leurs cimtieres: de leurs baptesmes, confessions sacramentales, espousailles & mariages. Des penitences austeres des Religieux de l'ordre de saint Anthoine, & d'un autre ordre appelée Cestifanes, & leurs ceremonies en la celebration de la semaine Sainte, & de deux notables Propheties portant, que les Francs se doiuent ioindre avec eux.
- 14 Ambassades pour la reconciliation des Abyssins & du Prete-Ian avec l'Eglise Romaine.



P R E S Q U E tous ceux qui ont fait quelque mention par cy-deuant de ce que ce Monarque possedoit: en ont veritablement parle selon l'ancienne grandeur de ses predecesseurs: mais non selon l'estendue de l'estat de celuy qui regne de nostre temps, à l'empire duquel les vns & les autres assignent diuerses bornes. Quelques-uns font aller son empire de l'un à l'autre Tropique, luy donnent pres de cinquante degrez, ou du moins quarante-sept de latitude, qui reuiendroient à 1400. lieues de France, qui seroient sa longueur: & d'autre part ils veulent que sa largeur aille du Levant au Ponant, à sçauoir de la mer Rouge iusqu'à l'Ocean Ethiopique.

Et suivant ceux-cy pour donner à entendre plus clairement ses limites, ils disent, que cet empire confine du Nort avec l'egypte, qui l'auoisine vers la Nubie: du Levant la mer Rouge, & partie de celles des Indes, & du Sein nommé Barbarique iusqu'au Pais de Melinde: du Midy les monts de la Lune, qui luy font seruir de muraille naturelle, & du Ponant le fleuve Niger, ou Senega, & les

h h

Royaumes de Nubie, de Manicongo, & la rivièrè du Nil qui l'arrose. Et ce sont les limites que Belle-forest & Mercator luy ont establies apres d'autres Geographes. Les autres le confinent presque de mesme, luy donnant pour ses bornes du Nort la Nubie, & la Bugie, qui sont proches de l'Egypte, du Midy les montagnes de la Lune, du Leuant la mer Rouge, & le Golphe Barbarique, & les pays d'Ajane & de Dancale, qui appartiennent à l'Ethiopie exterieure, & du Ponant les Royaumes de Manicongo, & de Nubie, & les rivières du Nil, & de Senega. Et voila que ce Magin en tient avec quelques autres, Hugues de Linscot en ses navigations dict, que cet Empire s'estend depuis l'entree de la mer Rouge iusqu'à l'Isle de Siene sous le Tropique de Cancer ou de l'Escrèuiffe, excepté la coste de ce Golphe que le Turc a occupee depuis environ septante années : tellement qu'à son dire le Prete-Ian auroit du Leuant la mer Rouge, du Nort l'Egypte, & les deserts de Nubie, & du Su le Royaume de Monoemugi: de sorte que cet Empereur auroit environ quatre cens mil d'Italie sous sa puissance.

Mais Iean de Baros suiuy par Botere dit, qu'aujourdhuy le lac de Barcene est le centre de son Estat, qui s'estend du Leuant du costé de la mer Rouge, iusques à Suaquen par l'espace de cent vingt & deux lieues: mais entre la mer, & ses Estats il y a vn rang de montagnes habitees par les Mores, qui dominant aussi la marine, horsmis le port d'Ercoco qui appartient au Prete-Ian. Du costé de l'Oüest il y a vn autre rang de montagnes le long du cours du Nil, habitees par des idolatres qui luy payent tribut. On doit faire la borne de cet Empire du Nort avec vne ligne imaginaire tiree de Suaquen, iusques au commencement de l'Isle de Meroë, appellee de nostre temps Nobe, qui s'estendra l'espace de 125. lieues. De là il faut faire vn arc, non guiere courbé vers le Midy, iusques au Royaume d'Adæa (au montagnes duquel naist la rivièrè que Ptolomee appelle Ratto, qui se rend dans la mer au dessouz de Melinde) par l'espace de 259. lieues, bornes de certains peuples idolatres noirs, ayans les cheveux crespez. De là il tourne & finit au Royaume d'Adel, dont la ville capitale est Alar, qui a neuf degrez de hauteur. De sorte que tout cet Empire n'auroit de tour qu'environ 672. lieues.

Ce Prince, qui se dit estre yssu de David, se donne les tiltres d'Empereur de la haute & basse Ethiopie. Roy de Goa, des Caffotes, de Fatagar, d'Angole, de Barn, de Baliguaze, d'Adæe, de Vangue, de Goyame, où est la source du Nil, d'Aumare, de Bagamodri, d'Ambee, de Vanguci, de Tigremahon, de Sabaim, pays de la Roynie de Saba, de Barnagas, & Seigneur iusques en Nubie, qui s'estend vers l'Egypte.

Mais en prenant son Empire ainsi qu'il est aujourdhuy, nous en descrivons les Prouinces avec le plus de briefuete, & le mieux qu'il nous sera possible.

Or entre les Prouinces subietes au Prete-Ian, il n'y en a aucune que nous cognoissions davantage que celle qu'on nomme Barnagas, à cause du voisinage de la mer rouge, vis à vis de laquelle elle s'estend depuis Suaquen, presque iusques à l'entree du destroit. Toutesfois elle n'a sur la mer autre port que celui d'Ercoco.

La ville capitale du pays s'appelle Beroc, où Barue, & est assise sur vne rivièrè fort agreable. Il n'y a guieres d'années que les Turcs firent vn grand ravage en ce pays, ruinant beaucoup de places, & emmenant vn grand nombre de personnes, & finalement on s'est accordé avec le Bassa (qu'on nomme d'Abassie, qui fait sa demeure à Suaquen) en luy payant mil once d'or.

En la partie plus Occidentale de la prouince de Barnagas on void vne montagne, qui estant assez spacieuse au commencement, se va retrecissant peu à peu, puis s'ellargir de nouveau, en forme de champignon, & a environ vne lieue de tour.

On void au dessus des bastimens royaux, vne Eglise, & vn Monastere, & deux fort grandes cisternes, & vne espace de terre, qui peut entretenir aisément cinq cens hommes. On n'y peut aller que par vn endroit, & encores iusques à certaine marque seulement, au delà de laquelle on ne peut monter qu'avec des cordes, & des paniers: & pour conclusion ce lieu est de telle sorte, qu'il ne peut estre prins par force à cause de sa hauteur, ny par famine, à cause que les viures y croissent.

Sortant du Barnagas, on rencontre entre le Leuant & le Midy les montagnes de Mandaf, d'Ofale, & de Grare, qui separent l'Estat du Prete-Ian du royaume d'Adel.

En la Prouince de Dabila, qui est subiecte au royaume de Barnagas, outre la ville d'Ercoco, dont nous auons fait mention, on compte encores celles de Santar, Giabel, Laccari, Abarach. Apres cela le Golphe d'Ercoco va en se courbant au lieu qui est appelé par les anciens Adulite, qui est sans doute la pointe d'Ercoco, qui s'estend iusques à Bebul en reflexissement que la mer fait vers l'Arabie, & sur le commencement du destroit par lequel on sort hors du Golphe Arabique, ou de la mer rouge, qui est en ce lieu fort estroite, & son eau basse & chargée d'Isles.

Après auoir passé la ville d'Ercoco, qui a pour son obiet l'Isle de Mensuria, vous venez à Zanagui & à Zama, qui sont de la Prouince de Laccæ: puis au port de Velle, iadis Antiphile, ayant passé

ayant passé la pointe d'Ercoco vous trouvez deux lacs qui nourrissent des crocodiles comme le Nil, & de là vous venez au port & promontoire nommé iadis Masylon, & maintenant le Cap de Docono, qui est au Royaume & pays de Dangali. En ce lieu de Dangali & de Docono, la mer fait vn petit golphe, & vient soudain à se retrecir, tellement que le canal ne scauroit auoir plus haut de dix ou douze bonnes lieues de large, & sur ce canal on void cinq ou six Isles qui empêchent le passage tellement qu'il faut que les voyageurs soient bien experimentez pour se garantir des rochers voisins de ces Isles.

Après le pays de Dangali on vient au port de Zeiloi ou Zeila, on vient à Daphné port ancien, où est la ville de Barbara, pres du mont Fellez, puis le Cap de Guardafuni où est la ville de Matté, autrefois Accané, c'est icy où l'on double le Cap, & du Leuant on tourne selon la coste vers le Midy, & vers l'Ethiopie interieure. En ceste coste on trouue premierement Carfur, iadis Opené, le Cap de Zingi, & courant ce golphe on void vn recourbement de la mer tirant vers Azun & Zazelle, iadis Ellina, & Tonica, puis on trouue Magadazo, où les Portugais traffiquent, & après la dernière prouince maritime, qui est Barris, comprise dans les tiltres du Prete-Ian, ayant sur mer les deux villes de Paté & de Braue, les terres desquelles separent les terres du Roy de la grande Ethiopie, & du Roy de Melinde. Mais ayant ainsi rasé la coste, & peut estre considéré plus des lieux qu'il n'estoit besoing pour la description de l'Empire du Prete-Ian voyons vn peu ce qu'il possède en terre ferme.

Le Royaume de Tigremaon est assis entre la riuere de Marabo, le Nil, la Mer rouge, & le Royaume d'Angote. L'on met ce Royaume entre les pays subiects au Prete-Ian, pource que le Roy de ce pays est son tributaire. Le Royaume de Trigay a la bonne ville de Caxumo, qu'on dit auoir iadis esté la demeure de la Roynie de Saba, laquelle on dit auoir eu le nom de Maqueda, qui eut de Salomon, selon les Ethiopiens, vn fils nommé Meilec. Ceste ville seruit aussi de demeure à la Roynie Candace. Ce Royaume a esté enuahy par le Turc, comme aussi vne grande partie de celui de Barnagas iusques à Suachen.

Le Royaume d'Angote est mis entre les Royaumes de Tigremaon, & d'Amaran. Les prouinces d'Abugane, de Iannamore, & autres, sont sous ce Royaume. En ce Royaume on void sur la riuere de Sabellette les villes d'Angorinie, Bachle, Corcore, & Betmarie, & sur la riuere d'Ancone est la ville capitale d'Angote, assez pres de laquelle on void vne autre ville qui porte le nom de saint Pierre.

Le Royaume d'Amara a pour ses bornes du Nort le Royaume d'Angote, du Leuant celui de Xoa, du Midy celui de Damut, & du Ponant il s'estend presque iusques à la riuere du Nil.

Le Royaume de Xoa est entre les Royaumes d'Amara, de Damur, & de Fatigar.

Le Royaume de Sagamedre est plus grand qu'aucun autre de ceste Ethiopie, veu que selon la riuere du Nil, il s'estend depuis le Royaume de Gayame iusques par de là l'Isle de Gueguerre, iadis Meroé, & cet espace ne contient pas moins d'environ six cens milles.

L'Isle de Meroé, ou de Gueguerre, n'est pas subiecte au Prete-Ian, comme quelques-vns estiment, ains elle est habitée des Mahometans, qui sont ennemis iurez de l'Empereur des Abyssins.

Le Royaume de Fatigar est assis entre les Royaumes d'Adel, & de Xoa, & celui de Damut est voisin de celui de Xoa, & enclos entre le lac de Barcene, & le pays de Zanguabara. Quelques autres mettent le Royaume de Damut au de là des Royaumes de Vangue, & de Goyame vers l'Occident, ce que ie trouue plus à propos.

Voilà tout ce que l'on peut dire de cet Empire, en la description duquel la plus grande partie des Cosmographes ne font que begayer, veu que les rapports qui leur ont esté faits par les Abyssins despaisez, sont pleins d'ignorance ou si mal rangez que le plus patient n'en peut trouuer la longueur guieres agreable. Au reste ceux qui ont establi la principale demeure de cet Empereur en la ville de Gazumo, se sont abusez, veu que c'est chose asseuree, selon le recit mesme de ceux du pays, qu'il fait le plus souuent, & plus continuellement son seiour en la ville de Beimalechi, qu'en aucune autre, ainsi que Hugues de Linscor qui a rasé toute la coste d'Ethiopie, & qui n'a peu estre trompé en cecy par les Abyssins, nous rapporte.

Ce ne seroit qu'enfler le liure, & peut estre des mensonges, de descrire plus amplement cet Empire. Il suffit que nous en ayons veu les principales pieces, car il y a fort peu de villes, & le reste ne merite pas qu'on en parle.

QUALITE

TOVR l'Estat de ce grand Monarque, à parler generally, est très-fertil: car encor qu'il produise peu de froment, toutesfois il porte grande quantité d'orge, de millet, de poidr

h b ij

chiches, de febves, & d'autres legumes, dont quelques - vns nous sont incogneus. Il produit aussi grande abondance de sucre: mais les Abissins ne sçauent pas la façon de le faire cuire, & de l'affiner. Il y a aussi beaucoup de vignes. Il y croist vn si grand nombre d'oranges, de citrons, & de limons, que c'est chose qui surpasse presque la créace: mais ils ne porte ne melons, ny raues, ny oliues, toutefois l'on y fait de l'huyle de certain fruit que les habitans appellent Goue. Au reste on y trouue du miel en grande abondance, veu que les mouches à miel sont entretenues mesmes dans les lieux où les hōmes font leur demeure ordinaire: à raison dequoy il y a tant de cire, que ceux du pays en ont assez pour faire des chandelles, sans employer le suif à cet vsage. Ce pays porte aussi du lin, mais les habitans ignorent l'art de faire de la toile, & en font le plus souuent de coton, duquel ils ont grande quantité.

D'auantage, ce pays a presque de toute sorte de bestes à quatre pieds, & aussi tous les oyseaux que nous voyons en Europe, & ailleurs, comme des bœufs, des brebis, des ânes, des cheuaux & des chameaux, & outre ce des elephans, des lyons, des tygres, des onces, & des cerfs: mais il manque d'ours, de conils, & de chardonnerets. Ces pays ont ce mal, que les sauterelles y viennent quelquefois en si grand nombre, qu'elles obscurcissent l'air par leur multitude, & ravagent tantost vne prouince, tantost l'autre, mangeans toute la moisson, & rongans les feuilles, & les escorces des arbres.

Les cheuaux du pays sont petits, mais ils ont force race de cheuaux d'Arabie, & d'Egypte, dont ils font allaiter les poulains aux vaches, trois ou quatre iours apres leur naissance: il y a de grands singes qui sont furieux, & farouches au possible.

Ces pays ne manquent pas aussi de mines d'or, & d'argent, de fer, & d'airain, mais les habitans ne le sçauent pas tirer. Au Royaume de Zagamedre on trouue des mines de tres-bon argent, lequel ils ne sçauent tirer qu'avec le feu, qu'ils alongent en verges. Royaume abonde en or, & au Royaume de Damur on le tire, & l'affine quelque peu mieux.

Les campagnes y sont toutes plaines de perdrix, d'oyes, & de lievres, pource que les Abissins ne vont iamais à la chasse. En fin il n'y a pays plus propre à la generation des animaux, & des plantes, que cestuy-cy: mais les habitans ne se sçauent guieres bien servir de ce bon-heur, & de la bonté de leur pays, qui les pourroit rendre aussi accommodez que gens de la terre.

Les habitans de ce pays ont deux Estez, & deux Hyuers, que l'on ne distingue pas par la chaleur, ou la froidure, mais par les longues pluyes, & par le beau temps, & l'air serain.

MOEVRS ANCIENNES.

6 **L**es anciens ont creu que les Ethiopiens n'estoient point venus d'ailleurs au pays où ils habitent, & qu'ils furent les premiers qui instituerent le seruice des Dieux, & les ceremonies des sacrifices. Ils vsoient des deux sortes de lettres, dont les vnes qu'ils nōmoient sacrees, estoient incogneues à toute sorte de gens, fors qu'aux Prestres, & les autres estoient communes à tout le peuple. Toutefois les figures de leurs lettres ne furent pas telles qu'il s'en format des syllabes, ains fort semblables, & rapportantes aux figures de quelques animaux, des extremités du corps humain, & de plusieurs iustruments des artisans, & chaque figure auoit sa signification, comme l'espreuier signifioit la vitesse, le crocodile du mal, l'œil vne soigneuse garde, & ainsi des autres.

Ils estimoient le plus saint d'entre leurs Prestres celuy qui couroit comme s'il eust esté maniaque: & lors qu'il auoit esté créé Roy, comme s'il eut eu quelque diuinité en luy, ou du moins qu'il leur eut esté donné par la prouidence diuine, ils l'adoroient, & celuy qui estoit estably en ceste dignité, il deuoit viure selon les loix, & faire toutes choses selon la coustume du pays. Il ne pouuoit recompēser, ny punir aucun de ceux qui estoient sous sa puissance. Mais lors qu'il desiroit que quelqu'un fut puny de quelque meffect, il luy enuoyoit vn Sergent qui portoit vne marque de mort, & soudain celuy à qui elle auoit esté portee, ne manquoit apres l'auoir veue de se faire mourir.

Ils honoroient tellement leur Roy, que s'il arriuoit par fortune qu'il fut ou borgne, ou boiteux, ou semblable chose, tous se priuoient d'un œil, ou s'estropioient d'une iambe, ou de quelque autre partie du corps, estimans qu'ils feroient mal leur deuoir s'ils demeueroient en bon estat lors que leur Roy estoit incommodé en quelque membre ou partie. On tient aussi que ceux qui estoient aymez du Roy, se priuoient de vie lors qu'il venoit à mourir croyans que ce tres-pas leur aporloit de la gloire, & estoit vn assuré tesmoignage d'une veritable amitié.

Iadis l'île de Meroe estoit la demeure des Roys d'Ethiopie, & c'este île auoit pour ses habitans des pasteurs, qui s'addonnoient à la chasse, & des laboureurs qui vaquoient à l'agriculture. Herodote dict que les Ethiopiens Macrouies estimoient plus l'airain que l'or, qui estoit tenu si vil parmy eux. Les Ambassadeurs de Cambyse estans allez en ce pays-là, y virent des fontaines

des fontaines toutes environnées, & comme liées de chaines d'or, les autres disent que c'estoit du Lot. Les femmes s'exerçoient à la guerre, & se perçans les leures passoient d'as le trou qu'elles auoient fait, vn cercle d'airain.

Quelques-vns adoroient le Soleil leuant, & maudissoient avecques mille imprecations le couchant. Les vns iettoient les trespassez dans les riuieres: les autres les mettoient dans des vaisseaux de terre, & quelques autres encore les logeoient dans du verre, où ils les gardoient en leurs maisons vne année, & les adoroient avec grande deuotion, leurs offrans mesmes des premices. Il y en a qui tiennent quel'on declaroit Roy principalement celuy qui surpassoit les autres en beauté, & à sçauoir bien nourrir le bestial, & qui estoit plus fort & plus riche. On dit aussi qu'ils croioient vn Dieu immortel. Createur de toutes choses, & Roy de l'Vniuers, & vn autre mortel, & incertain: Celuy qui estoit leur Roy, estoit honoré d'eux comme vn Dieu, de mesme que celuy qui apres le Roy estoit cognu plus plein de merite.

MOEVRS DE CE TEMPS.

L'EMPEREUR des Abyssins, que les Arabes appellent Anticlabassa, ou Aticlabassi, & 7. quelques-vns des siens, Bel ou Belul Gian, qui veut dire puissance de Prince (& de la par corruption de langage nous luy auons donné le nom de Prete-Ian) & les autres Aceguec, qui signifie Empereur, au Neguz, qui veut dire Roy, suivant vne ancienne coustume, n'a point de demeure assisee & ordinaire: ains se tient tantost en vn lieu, tantost en vn autre, & demeure la plus grande partie du temps sous des tentes qu'on porte avec luy iusques au nombre de six mille, a raison de quoy la Cour occupe presque dix, ou douze milles, lors que chacun est logé en pleine campagne.

Il a vne grande quantité de vaisselle d'or, & d'argent, & d'autre meubles fort precieux. On dit qu'il n'est pas noir, comme les autres Ethiopiens, ains qu'il tire sur le blanc.

Ses iournees ordinaires lors qu'il voyage, comme aussi celles de ses subiets, son de douze milles, ou de six lieues de France.

Quand il va par pays, il est environné de certains rideaux rouges, hauts, & longs, par derriere, & aux costez, il porte en la teste vne couronne moitié d'or & moitié d'argent, & en la main vne Croix d'argent. Son visage est couuert d'une piece de tafetas bleu, qu'il hausse & baisse plus & moins, selon qu'il veut fauoriser ceux qui ont affaire à luy.

Les habitans de ce pays sont noirs, & du tout ignorans, & despourueuz de toute cognoissance de doctrine, selon quelques-vns, combien que ce grand homme de l'Escale, qui hors sa Religion, nous a laissé beaucoup de subiet de le louer, nous tesmoigne en son liure de la Correction des temps, qu'ils n'ont pas tant d'ignorance qu'on leur donne. Ils n'ont nul vñage de la medecine. Leurs habillemens communs sont de peaux de beste, ou de draps de cotton: mais les grands & plus riches portēt des peaux de mouton, & les plus releuez, de Lion, de tigre, ou d'once.

Leurs maisons sont basses, & de peu de valeur, veu qu'elles sont basties de craye, & de chaume: & ils ne demeurent qu'au plus bas estage. Ils tiennent touiours leurs portes ouuertes, mais il n'y a aucun qui entre dans la maison d'un autre. Ils n'vsent ny de tables, ny de nappes, & quand ils prennent leur repas, ils sont assis en terre sur des tapis, ou sur d'autres draps. Il y en a beaucoup parmy eux qui mangēt la chair de bœuf fraische toute creuë. Ils n'vsent point de monoye, mais en son lieu ils donnent de l'or au poids. Ils vsent de trocqs presque en toutes choses, & ce de quoy l'on se sert le plus en cela, c'est le sel & le poivre. Ils ne s'addonnent guieres à la chasse, ny à pescher, & y a fort peu d'artisans entre eux. Ils appellent Francs tous les peuples d'Europe, à cause des François qui ont fait autrefois bruire leur nom parmy le monde, principalement en la conqueste de la Terre Sainte. Mais ils nomment Ghliberes tous les autres peuples qui sont blancs. Encore qu'ils ayent des vignes, toutefois il ne se fait du vin qu'en la maison du Roy, & du Patriarche, qu'ils nomment Abuna: mais en lieu de vin, ils font certain breuuage du fruit des Tamarins, qui est vn peu aspre.

Ils sont pour la pluspart d'un esprit lent, & tardif au possible: veu qu'ils ont du lin, & n'en sçauent faire de la toille: ils ont des cannes de sucre, & ne le sçauent pas tirer: du fer, & n'ont pas l'esprit de le mettre en œuvre, & mesme ils estiment les forgerōs sorciers, & melchans homes.

Les grands y traitent fort rudement le pauvre peuple, de sorte qu'il ne seme iustement que ce qui luy est necessaire, pource que les plus puissans luy rauissent tout. Leur parler est sans regle, & pour escrire vne lettre il leur faut beaucoup de iours. Ils ont toutefois de beaux caracteres, plus agreables de beaucoup que les Arabiques ou Turquesques, ainsi que l'on peut voir au liure de la Correction des temps de Iosephe de l'Escale, & en l'Onomastique de Tuncere. Les nobles, les bourgeois & le peuple, ont leurs habitations separees, & les derniers peuuent acquerir la noblesse en se signalant par quelque beau fait.

Il n'y a point de lieu peuplé en tout le pays des Abyssins, qui ayt plus de deux mille feux,

& mesme on y void fort peu de sorte. Ils demeurent pour la plus part espars çà & là, par des hameaux. On y dōne le sel au poids de l'or. Les peuples ne iurent iamais que par la vie du Roy, enquoy les Espagnols les imitent, ils se seruent de mulets pour porter les charges, & pour voyager, & des cheuaux pour combattre. Ils ne sont iamais vestus de noir que lors qu'ils portent le deuil, d'autant qu'ils tiennent ceste couleur pour vne vraye marque de tristesse. Ils pleurent leurs morts par l'espace de quarante iours. Lors qu'ils font quelque grand, & magnifique festin, le second seruice est de chair crüe, qu'ils mangent fort espicee, & trouuent que c'est vne de leurs plus delicates viandes.

Ils s'addonnent fort à la nauigation, & de fait presque tous ceux qui sont de libre condition aux Indes Orientales, se mettent d'estre mariniers, & sont bien entendus en ce mestier: si bien qu'ils sont distribuez par les nauires marchands de Goa, de la Chine, de Bengale, & d'autres lieux. Ils seruent à ce mestier à bien petit prix, & sont prompts à toute sorte de seruice, endurant fort patiemment des coups de fouet, & d'autre chose, n'estans guieres differents des esclaves. Ils ont presque toute leur famille en ces vaisseaux, & semblent proprement nez pour estre serfs. Si quelqu'un laisse tomber dans la mer ce qu'il porte sur la teste, ou quelque autre chose de moindre prix, mesmes lors que les vaisseaux marchent, il y en a vn d'entr'eux qui se iette dans la mer, & en nageant recouure la chose perduë. Ils chantent presque tousiours en travaillant, & qu'and ils n'ont rien à faire principalement aux vaisseaux des Portugais, ils ne font qu'yurongner avec leurs femmes, & leurs enfans, disans mille chansons au milieu de ces desbauches. Leurs femmes portent aussi de longues chausses à la Matelote aux Indes Orientales, à la façon des Arabes, & Mahometans.

R I C H E S S E.

L'OR & argent qui se trouue en ce pays, feront tousiours aduoier qu'il y a de grandes richesses, outre l'airain, & le fer, & principalement le sucre, dont il y a grande abondance, & qui luy pourroient apporter beaucoup d'argent, si les habitans auoient aussi bien l'esprit, & la curiosité de l'affiner, que le bonheur de recueillir en si grande quantité.

Ce Prince a trois sortes de reuenus, veu qu'il y en a qui consistent aux fruiſts de ses fonds, & de son domaine, qu'il faict labourer par des bœufs, & par les esclaves, qui multiplient continuellement, pource qu'ils se marient entr'eux, & les enfans demeurent en la condition de leurs peres. Les autres reuenus luy viennent des peuples qui luy payent tant pour feu, & la dixiesme partie de tous les mineraux qui sont tirez par autre que par luy des deniers luy viennent des Princes ses subiets, dont les vns luy donnent des cheuaux, les autres des bœufs, les autres du coton, & les autres d'autres choses: & ceux-cy luy donnent le reuenue d'une de leurs villes, pourueu que ce soit celle où ils font leur demeure ordinaire.

On tient qu'il a de grands thresors, tant de draps, & de pierreries, que d'or, & qu'il en a de grands lieux tous pleins. Ce que l'on peut assez coniecturer par vne lettre escrite au Roy de Portugal, par laquelle il offroit de dōner pour la guerre cōtre les infidelles cent mille drachmes d'or, & vne infinité de gens, & de viures. On tient qu'il met ordinairement toutes les annees trois millions d'or au chasteau d'Amara. Il est vray qu'auant le Roy Alexandre il n'y mettoyt pas tant d'or, pource qu'il ne le scauoient pas r'affiner, ny nettoyer, mais en recompense ils y mettoient force pierreries, & des pieces d'or. Le Vice-Roy de Barnagas donne tous les ans au Prete-Ian cent cinquante bons cheuaux, & grande quantité de draps de soye. Le Roy de Tigremaon luy baille aussi toutes les annees deux cens cheuaux d'Arabie, beaucoup de draps de soye, force coton, & vne grande quantité d'or: & les autres luy enuoyent les choses où qu'ils ont en abondance, ou qu'ils peuuent recouurer bien ayſement.

F O R C E.

10 **L**Es peuples subiects à ce Monarque ne sont guiere vaillans, tant pource qu'il les tient comme des esclaves, à raison dequoy ils manquent de ceste generosité de courage, qui rend les hommes prompts aux armes, & hardis aux dangers, si bien qu'il leur semble qu'ils ont continuellement les mains liees par le respect qu'ils portent à leur Prince, & par la crainte qu'ils ont de luy: qu'aussi pour ce qu'ils n'ont nulles armes deffensives, excepté quelque meichante salade, quelque morion, & quelque maille dont les Portugais les ont accommodez, il faut adiouter à cecy le deffaut des forteresses, veu que ces peuples n'ayans ny des places fortes pour se retirer, ny des armes pour se deffendre, demeurent avec leurs biens en proye à leurs ennemis. Leurs armes offensives sont des fleches non empennees, & la zagaye, ou lance gaye. Dauantage ils font vn Careſme de cinquante iours, qui les extenue, & effoiblit en telle sorte, à

sorte, à cause de la grande abstinence avec laquelle ils passent ces iours-là, qu'ils n'ont pas la force de se mouvoir, ny durant ce temps, ny plusieurs iours apres. Aussi c'est ce qui fait que les Mores attendent ceste occasion, & les attaquent avec vn grand aduantage. Et pour ce que l'on ne trouue, ainsi que nous auons dit, au Pais du Prete-Ian aucune place considerable pour le regard de la forteresse, ny autrement, les Portugais ont quelquefois montré aux Abyssins en discourant avec eux, combien il seroit meilleur pour euer les grands rauages que les Mahometans, & les Idolatres font continuellement en ce Pais, emmenant, & les biens, & les personnes : que leur Prince fist bastir des Villes & des Chasteaux, & les fortifiast avec des fosses, murailles, & autres choses necessaires pour mettre vne place en estat de defence. A quoy ils ont respondu que la puissance de leurs Neguz ne consiste pas en des murailles de pierre, mais au bras de son peuple François. Aluarez escrit que ce Monarque peut mettre ensemble plusieurs centaines de milliers d'hommes : toutesfois l'on a bien veu qu'au besoin il n'en a pas mis sur pied vn si grand nombre. Il y a vne Religion militaire sous la protection de S. Anthoine, à laquelle chaque pere de famille noble doit destiner de trois de ses fils vn, non pas toutefois l'aîné, & de ceux-cy on tire douze mille hommes de cheual pour la garde du Roy. Le but de ceste Religion est de dessendre les frontieres de cét Empire, & de faire teste aux ennemis de sa foy. Au reste le Prete-Ian confine avec trois puissans Princes, dont l'vn est le Roy de Burne, l'autre le Turc, & le troisieme le Roy d'Adel. Le Roy de Burne commande au Pais qui s'estend de Guangale vers le Leuant environ cinquante mille, entre les deserts de Ser & de Barca, & ce Pais est assez inegal, d'autant qu'il contient en partie des plaines, & en partie des montagnes : Le Roy de Becurno a force gens, qu'il ne charge d'autre imposition que de la dixme des fruits. Leur mestier est de voler, & d'assassiner leurs voisins, & de les rendre esclaves, puis de recevoir en eschange des cheuaux des marchands de Barbarie. Il a sous luy plusieurs Royaumes, & travaillent grandement les Abyssins, prenant ce qui se trouue en leurs mines, & emmenant les hommes captifs. Ces peuples combattent à cheual à la genette, vsent de lances à deux pointes, de zagayes, & de fleches, & entrent dans le Pais, tantost d'vn costé, tantost d'autre à l'improuuë : mais ceux-cy peuuent plustost estre nommez assassins & voleurs, que iustes ennemis.

Le Turc qui confine avec les Abyssins du Leuant, & le Roy d'Adel qui ceint leur Pais entre le Leuant & le Midy, travaillent grandement le Prete-Ian, & ont restrainct les limites de son Empire, & reduict son pais à vne grande misere : car outre que les Turcs ont saccagé vne partie du Barnagaz, où ils entrerent l'an 1558. & combien qu'ils fussent repoussez, ils ont encor osté au Prete-Ian tout ce qu'il tenoit le long de la coste, & principalement les ports de Suaquen & d'Ercoco, auxquels deux lieux les montagnes qui sont entre le Pais des Abyssins, & la mer Rouge, s'ouurent pour faire passage au traic, entre les Abyssins, & les Arabes : & il n'y a pas long temps que le Barnagaz a esté contrainct de s'accommoder avec le Turc, & accepter la paix de luy avec vn tribut de mille onces d'or toutes les annees. Mais il ne reçoit pas moins de dommage du Roy d'Adel, qui confine avec le Royaume Farigar, & domine iusqu'à la mer Rouge, où il y a Assam, Salir, Mer, Barbore, Bidar & Zelle. Il arrive à Barbore beaucoup de vaisseaux d'Aden, & de Cambaye, avec leurs marchandises à changer, & ils reçoient force chair, & quantité de viures, de miel, & de cire, pour Aden : quantité d'or, d'yuoire, & d'autres choses pour Cambaye, & l'on tire encores plus de viures de Zeila, pour ce qu'il y a du miel, & de la cire en abondance, & force grains, & fruits diuers, que l'on charge pour porter à Aden, & en d'autres lieux d'Arabie, puis du bestail, & particulièrement certains moutons, dont la queue pese vingt-cinq liures, voire d'auantage avec la teste & le col noir, & tout le reste blanc, & certains autres tous blancs, avec la queue longue d'vne brassée, & tortuë comme vn cep de vigne, avec l'encoulure pendante comme celle des taureaux. Il y a certaines vaches qui ont des andouilles comme le cerf : Il y en a qui sont noires, & d'autres rouges, avec vne seule corne au front, longue d'vn pied & demy, courbee en arriere. La capitale ville de ce Royaume c'est Arat, a trente-huict lieues de Zeila contre le Sudest. Le Roy de ce Pais, qui est Mahometan, avec vne perpetuelle profession qu'il fait de faire la guerre aux Chrestiens du Pais du Prete-Ian, s'est acquis le nom de saint entre ses Barbares. Il attend que les Abyssins se soient affoiblis, & consume par ce long & rude ieusne de cinquante iours : lors qu'il ne se peuuent presque remuer pour faire ce qu'il faut en leurs mailons : & lors il entre au Pais, saccage les villages, meine en captiuité force personnes, & fait mille maux aux Abyssins.

Les esclaves Abyssins ont de grand profit hors de leurs Pais : c'est pourquoy les Princes en font grande estime, & plusieurs d'entre ces esclaves sont deuenus par le moyen de leur industrie à seruir, libres, & riches en Arabie, en Cambie, en Bengale, & en Sumatre : pour ce que les Princes Mahometans d'Orient estans tous Tyrans des Royaumes vsurpez sur les Idolatres, ne se peuuent fier à leurs sujets lors qu'ils veulent assseurer leurs Estats : ains se font forts

d'une multitude d'esclaves estrangers, auxquels ils fient leurs personnes, & commettent le Gouvernement du Royaume.

Or entre tous les esclaves on fait plus d'estat des Abyssins, à cause de leur grande fidelité, & de leur bonne complexion. Et pour ce que le Roy d'Adel avec le grand nombre de prisonniers qu'il fait sur les terres du Prete-Ian remplit l'Egypte & l'Arabie d'esclaves de ceste nation, en eschange desquels il reçoit des armes, des munitions, & des soldats du Turc, & des Princes d'Arabie.

Claude Roy des Abyssins se trouvant pressé l'an 1550. par Gradamel Roy d'Adel, qui l'avoit desia fort trauaillé durant quatorze ans, avec des courses perpetuelles, & se voyant contrainct d'abandonner la frontiere, & se retirer au cœur de ses Estats, demanda secours à Estienne de Gamma, Lieutenant de Iean troisieme Roy de Portugal aux Indes, qui se trouuoit lors sur la mer Rouge avec vne bonne armee. Gamma luy enuoya Christofle son frere avec quatre cents Portugais, & vn bon nombre d'arquebuses, & autres armes. Il deffit deux fois avec ceux cy son ennemy, à cause de l'aduantage des arquebuses, mais en la troisieme bataille le Roy d'Adel ayant eu mille arquebusiers Turcs du Gouverneur de Zebir, avec dix pieces d'artillerie, les Abyssins furent mis en route, & beaucoup de Portugais demeurèrent morts sur le champ. Mais le Roy d'Adel ayant apres renuoyé les Turcs, fut assailly à l'impourueuë pres de la riuere de Zeila, & au mont Sanal par le Roy Claude avec soixante mille homme de pied, cinq cents chevaux Abyssins, les Portugais qui estoient restez de la derniere deffaite, l'vn desquels blessa griefuement Gradaamed. Mais l'an 1559. le Roy Claude estant venu au combat avec les Mores, demeura mort sur le champ, le Roy des ennemis en triompha sur vn asne : il eut pour successeur Adamas son frere (contre lequel : pour ce qu'il estoit demy Mahomeran) vne bonne partie de la noblesse Abyssine se reuolta, si bien que le Vice-Roy de Barnagas le deffit l'an 1562. Mais les affaires d'Ethiopie ayans ainsi flotté quelque temps, se mirent apres quelque peu sous Alexandre, avec l'aide des Portugais, qui y porterent des armes offensives & defensives, & esueillèrent les courages, & les esprits des Abyssins par leur exemple en la guerre : car tous ceux qui resterent de la route de Christofle de Gamma, & plusieurs autres qui y sont arriuez depuis, s'y sont retirez, & mariez : si bien qu'ils y ont introduict nostre façon de faire la guerre, l'usage des armes, & la maniere de fortifier le Pais, & les lieux d'importance. Quelques Florentins sont aussi allez en ce Pais, en partie par curiosité, en partie pour y trafiquer.

Or l'Empereur des Abyssins a accoustumé de carresser, & donner entretènement aux Francs (il nomme ainsi les peuples d'Europe) & leur permet bien mal-aysément de sortir hors de son Royaume depuis qu'ils y sont vne fois. Or le Prete-Ian a beaucoup d'ennemis, outre ceux que nous auons dit, comme le Roy de Dancali, à qui appartient la place, & le port de Sue-la sur la mer Rouge. D'ailleurs les Mores qui sont en la Prouince de Dobe diuisee en quatorze Seigneuries, luy donnent beaucoup de peine : veu qu'encores qu'ils demeurent dans les confins de l'Empire du Prete-Ian, ils ne laissent de se reuolter la plupart du temps. Il y a vne loy parmy eux qu'aucun ne se peut marier, s'il n'a premierement fait mourir douze Chrétiens.

De nostre temps ce grand Prince prit en vne bataille le Roy de Monzambique, mit en route la Roynie de Berfaga au Cap de bonne esperance, deffit Termide Prince des Negres du costé d'Occident, vainquit le Roy de Manicongo, qui est vis à vis de l'Isle S. Thomas, sous la ligne Equinoctiale, & apres vn de ses Capitaines mit trois fois en route Azamur, Bassa du grand Turc à Suaquen, & à la troisieme il prit son fils, & luy fit couper la teste, luy ostant plusieurs pieces d'artillerie.

Il tient l'Egypte en grande crainte, & beaucoup de Seigneurs Arabes, à cause de l'eau qu'il leur peut oster, pour laquelle ils luy payent tribut. Il peut assaier l'Egypte, & l'inonder, comme le Pape Pie II. & plusieurs autres auteurs escriuent en luy ostant l'eau du Nil. Ce que les Abyssins scauent assez : mais ils disent qu'ils ne le font pas : afin que les Turcs ne destruisent le saint Sepulchre de nostre Seigneur.

En fin il ne faut nullement douter, que si le Prete-Ian avoit des hommes d'Europe, qui sceussent fortifier ses Pais en beaucoup d'endroits, le remplir d'armes selon nostre usage, & instruire les Abyssins, & les exercer à nostre façon de combattre, il seroit capable non seulement de chasser le Turc de tous les Pais que ses predecesseurs tenoient anciennement : mais encores de faire la loy à tous ses voisins qui l'attaquent, veu la grande quantité d'or & d'argent qu'il a, & le grand nombre de gens de tous ses Royaumes.

G O V E R N E M E N T.

CE Monarque tient ses sujets bas le plus qu'il luy est possible, & non moins les grands que les petits, & les traite plustost comme esclaves que comme sujets, & pour les entretenir encore

nir encore mieux en cét Estat, il se maintient pres d'eux en telle reputation qu'il semble que ce soit vne personne comme sacree & diuine. Tous se baissent en voyant le nom du Prince, & touchent la terre avec la main, font reuerence à sa tente, mesme quand il n'y est pas. Les Roys des Abissins auoient accoustumé de se monstrier au peuple vne seule fois l'annee, puis ils parurent trois fois, c'est à sçauoir aux iours de Noël, de Pasques, & de la sainte Croix de Septembre, & depuis ils sont deuenus vn peu plus familiers.

Le Roy oste & donne les Seigneuries à qui bon luy semble, & il n'est permis à celuy qui en est priué de monstrier qu'il en est mal content. De la collation des saints Ordres, & de l'administration des Sacremens en bas, il dispose tant des Religieux que des laiz, & de leurs biens. Il n'y a aucun qui ait des vassaux que le Roy, auquel les Roys ses sujets viennent tous les ans prester hommage, & promettre obeissance.

Ce Prince est Chrestien, & a sous luy 62. Roys Chrestiens, outre quelques Roys Gentils, & Mores tributaires: il descend, comme i'ay ja dit, d'un fils de Salomon, & de la Roynne de Saba nommee Meillech, & ces peuples reçurent la foy Chrestienne sous la Roynne Candace, au temps de laquelle la maison de Gaspar commença de regner en Ethiopie, & ce fut de luy que descendirent apres treize generations. Iean le Saint, qui enuiron le temps de l'Empereur Constans, n'ayant point d'enfans l'aisla l'Empire au fils aîné de Caie son frere, & inuestit du Royaume de Fatigar, Balthazar, & Melchior, du Royaume de Goïame. A raison dequoy le sang Royal demeura diuisé en trois familles, de Gaspare, de Melchior, & de Balthazar. Cestuy-cy ordonna que l'Empire fut donné par eslection à vne des susdites trois familles, encore que ce ne fut pas l'aîné, pour ce que les Royaumes particuliers demeuroient aux aînez. Et pour euitier tous troubles, il ordonna que les freres de l'Empereur, & ses plus proches parens seroient enfermez au Chasteau du mont Amare, & gardez soigneusement, & il voulut encor qu'on y mit les fils de l'Empereur, horsmis celuy qui est aîné, au lieu duquel si il vient à mourir, ils tirent tousiours le plus proche.

Ce Monarque donne & oste les benefices à qui bon luy semble, & ne faiet nulle difference entre les Clercs, & les Laiz: mais l'administration des Sacremens appartient à l'Abuna, qui est leur Patriarche. Les femmes d'amour, ou filles de ioye demeurent hors des bourgs & des villes, & sont payees par les Communautéz. Il ne leur est nullement permis d'entrer dans les villes, & faut qu'elles soient par necessité vestuës de jaune.

Les aînez succedent aux biens de leurs peres, selon les loix du País. Il est ordonné par vne loy ancienne, que le Roy ne se tiendra point enfermé plus de deux iours, à cause que si le Roy s'arrestoit longuement en vn lieu, il y souffriroit de grandes incommoditez de viures, veu le nombre infiny des Seigneurs, d'Officiers, & d'autres gens qui sont à la suite de la Cour.

Le premier rang de dignité, & le plus haut est celuy des Euesques & du Clergé, le second est celuy des Sages & sçauants, qu'ils nomment Balsamates & Tenquares: & la noblesse tient le troisieme. Les derniers sont ceux qui reçoient solde en quelque estat qu'ils soient appelez.

Encor que les Iuges cognoissent des crimes dignes de mort, si est-ce qu'ils sont obligez de faire leur rapport aux Gouverneurs du lieu où ils demeurent, qui est celuy qui porte le tiltre & l'effect de Lieutenant du Roy, & qui represente sa personne. Ils n'ont aucune loy par escrit, tout y est vuidé selon la raison naturelle.

Si vne femme est accusée d'adultere, la punition en appartient à ceux à qui le faiet touche, qui s'en ressentent comme offence en leur honneur.

Le Vice-Roy de Barnagas demeure dans la ville de Barue, a sous luy les Gouvernemens de Danfile, & de Canfile, qui sont sur les frontieres d'Egypte.

Le Roy du Prete-Ian est le premier Roy, & la premiere nation des Gentils, suiuant le rapport d'Eusebe, qui se consacra à Dieu, comme premices des Gentils, & qui reçut le saint Baptisme, qui fut donné par l'Apostre saint Philippe à l'Eunuque de la Roynne Candace, & puis saint Mathieu qui conuertit Iphigenie Vierge, de grande maison, & l'Apostre apparoisant en vision au peuple, l'exhorta à faire Roy le frere d'Iphigenie qui estoit Chrestien, au lieu du Roy qui mourut de la lepre, pour auoir faiet mourir l'Apostre saint Mathieu.

RELIGION.

Les sujets du Prete-Ian sont Chrestiens pour la plus grande partie, qui demeurent obeissans, & affectionnez à leur Prince tout ce qu'il se peut. Il y a d'ailleurs quelques-uns de ses tributaires qui sont Mahometans, mais ceux-la ne cherchent à tous propos que des occasions de reuolte.

Or pour parler de ceux qui suivent la Religion Chrestienne, & discourir de leur creance, qui differe aucunement de la nostre, combien que nous recognoissions tous vn mesme Sauveur, il est à propos, ce me semble de prendre le faict de plus haut, & de rapporter icy de quelle sorte la foy se glissa en ces contrees.

Les Abyssins receurent au commencement le Iudaïsme, qui s'estendit aux Pais voisins par le moyen de Meilech fils de Salomon, de la Royne Marqueda sa mere, & des Iuifs qui l'accompagnerent. Pour le moins les Abyssins disent que tout cecy se trouue en vne ancienne Chronique qu'on garde avec beaucoup d'autres liures en la ville de Cazume. Ils receurent la foy Chrestienne par le moyen de l'Eunuque de la Royne Candace, qui fut baptisé par saint Philippe, comme nous lisons aux Actes des Apostres. Le premier lieu qui se conuertit à la foy fut celuy de Tigie, & l'on faict auourd'huy toutes les escriptures publiques en la langue de Tigie. Ils tomberent apres avec les Cofites d'Egypte en l'erreur d'Eutiches, pour ce qu'ils dependent du Patriarche d'Alexandrie, qu'ils recognoissent pour Chef, & duquel ils reçoivent leur Abune, ou Patriarche. Car ce peuple, suivant l'autorité de ce Patriarche d'Alexandrie, & sa doctrine, vint à se corrompre, veu qu'il falloit bien que le ruisseau teint en cecy de sa source: principalement à cause que les Abyssins ne pouuoient pratiquer avec ceux de Rome, si ce n'estoit par le moyen d'Alexandrie, & de l'Egypte.

Mais pour ce que le mal va tousiours croissant, les Abyssins tiennent avec les erreurs des Cofites plusieurs autres impertinences. Leur ignorance & leur erreur s'augmentent par le moyen du commerce, & de la conuersation des Idolatres, & des Mahometans, dont ils sont enuironnez de tous costez, & mesme plusieurs Idoles demeurerent au milieu des Abyssins, comme aux Royaumes de Damur, de Corague, & Agaos.

Or afin de vous faire entendre leur creance, vous deuez sçauoir que le Roy d'Ethiopie est
 13 Schismatique, & suit les ceremonies & la croyance du Patriarche d'Alexandrie, par lequel il est confirmé en ses erreurs contre plusieurs abus auxquels il s'opiniastre. Les Abyssins retiennent opiniatremment la Circoncision, & non seulement on y circonceit les hommes, mais aussi les femmes en ie ne sçay de quelle sorte: ce que toutesfois les Iuifs ne faisoient pas.

D'auantage, suivant la Loy de Moyse, ils ne mangent aucun animal qui ait le pied fendu, & pour ceste cause ils abhorrent le lievre, l'oye & le canard.

Ils portent plus de reuerence au Samedy qu'au Dimanche, suivant en cela la façon des Iuifs, qui estoient si Religieux, & si affectionnez à garder le iour du Sabbat.

Les laiz nourrissent de longs cheueux, & se font raire le menton, & le dessus des levres, & portent vne petite croix au col. Au contraire les Prestres se font razer la teste, & portent la barbe longue, & la croix en la main: (ce qui n'est permis entre les laiz qu'aux seuls Seigneurs) & vn vase d'eau benite, pour en donner à ceux qui en demandent, avec la benediction, & ils ont accoustumé de ietter de ceste eau benite dans les viandes qu'ils mangent, & dans ce qu'ils boient.

Le Roy Iean ordonna qu'il n'y eut plus de quatre paroisses en chaque ville. Ces paroisses sont faites en façon de Conuents, & en chacune il y a treize Prestres pour dire la Messe: ceux-cy iugent les causes ciuilles, de mesme que les Iuges les criminelles au nom du Roy: De tout le nombre des Prestres on eslit douze Chanoines, qui assistent continuellement l'Euesque qui est choisi entre ces douzes, de mesme qu'on tire l'Archeuesque du nombre des Euesques, & le plus ancien Euesque est faict Archeuesque.

Les Moines portent vn habillement long trainant iusques à terre, qui sont ieunes pour la plupart, avec vne longue cheueure. Les Religieuses vsent d'une courroye. Elles ne sont pas renfermees dans les monasteres, mais en certains villages, sous l'obeissance du plus proche Conuent.

Les Eglises ont deux courtines, l'une pres de l'Autel, avec certaines petites clochettes, & il n'entre en celieu que des Prestres, l'autre au milieu où sont les Clercs, au moins ceux qui ont les moindres ordres. C'est pourquoy plusieurs pour y auoir accez pourchassent de les recevoir.

Chaque Eglise n'a plus d'un Autel, & l'on ne dit plus d'une Messe par iour en chacune. Les murailles de ces Eglises sont couuertes d'Images de nostre Dame, & des Saints, & particulièrement de S. George à cheual. Ils n'ont point d'Image releuee en bosse, & l'on estime que ce n'est point autre sujet, que pour ce qu'ils n'ont point l'esprit d'en faire. Ils ne veulent pas qu'on peigne Iesus-Christ crucifié, disans qu'ils ne sont pas dignes de le voir en ceste passion, & en ce tourment.

Ils font le pain & le vin que les Prestres consacrent apres la Messe, avec vn soing & vne ceremonie incroyable. Ils n'entrent point aux Eglises qu'ils n'ayent quitté leurs souliers.

Ils n'y

Ils n'y crachent point, & n'y laissent jamais entrer aucun animal : Et si quelqu'un passe à cheval devant les Eglises, il descend, pour tesmoigner l'honneur qu'il leur porte.

Leurs cimetières sont ceints de bonnes & hautes murailles, afin que les bestes n'y puissent entrer. Ils ont des cloches de pierre, longues, & deliées, & les battent avec un baston. Ils en ont aussi de fer avec le batail de mesme, & ils ont ceste coustume, qu'ils en portent quelques-unes aux processions, & les sonnent.

Jean Hugue de Linschot Hollandois, au chapitre 40. de ses navigations, dit que les Abyssins Chrestiens par un estrange baptême, se brûlent le visage de quatre marques en forme de croix : la premiere est au dessus du nez, iusques à la moitié du front : la seconde & troisieme à costé des yeux, presques iusques aux oreilles : la quatrieme depuis la levre d'embas iusques au menton. Ces marques leur seruent de Baptême, usant du feu au lieu de l'eau.

Ils ne baptisent point les enfans masles que quarante iours apres leur naissance, & les filles qu'apres soixante, & s'ils meurent cependant sans baptême, ils disent que la communion de la mere au temps de la grossesse suffit, & ils ne baptisent que le Samedi, ou le Dimanche, & donnent soudain l'Eucharistie à ceux qui sont baptisez en memoire du Baptême de nostre Seigneur, ils se font baptiser tous les ans le iour de l'Epiphanie, ou des trois Roys, & pour cet effect il y a des estangs, & de petits lacs où ils se transportent.

Ils se confessent estans tous droicts, & l'on ne garde point aux confessions beaucoup de secret. Ils communient sous toutes les deux especes, & consacrent du pain sans levain. Ils vont à la Communion avec les mains ouvertes & leuees devant les espauls, & la reçoivent estans debout. On ne dit jamais Messe sans encens, n'y sans qu'il interuienne trois personnes, qui sont le Prestre, & le Diacre, & le Sous-diacre.

Les espousailles se font par le moyen des Prestres, mais les mariages n'y sont pas stables & fermes. Les Prestres se peuvent marier, mais non auoir plus d'une femme, si elle meurt ils ne se marient plus, où s'ils le font ils deuiennent laiz (ce que les Moscouites font aussi) de mesme que s'il couchent avec une autre femme.

Les Religieux sont tous de l'Ordre de S. Anthoine, qui est enterré sur les frontieres d'Egypte. Il est vray que de cestui-cy, il en est venu un autre appelé Cestifanez, qui est plustost tenu pour Iuif, que pour Chrestien.

Il regne en cet Empire une heresie, qui tient qu'on ne doit adorer autre croix que celle où Iesus-Christ endura pour nous. Ils n'ont point de figure de nostre Seigneur Iesus-Christ en croix, disans qu'ils ne sont pas dignes de le voir en ceste passion. Ils ne donnent pas l'extreme Oction à ceux qui sont proches de la mort : mais ils encensent les morts, les lauent, les enveloppent, disent l'Office pour eux, & les portent en terre avec la croix, l'encensoir, & l'eau benite. Ils gardent le Carême estroictement, & le passent avec une grande abstinence. Leurs meilleures viandes d'alors, sont des herbes, des raisins confits, & quelque poisson : toutesfois l'on en vie en bien peu de lieux. Mais plusieurs Prestres, Religieux & Religieuses, ne mangent que des herbes, ou durant tout le Carême, ou bien de deux en deux iours. Toutesfois au Royaume de Barnagas, & de Tigremaon, ils mangent de la chair le Samedi & le Dimanche.

Les Religieux & Religieuses font diuerses penitences fort rudes, comme de porter la ceinture de fer sur la chair, passer tout le Carême sans s'asseoir jamais, demeurer au gros froid dans l'eau iusques au col, ou bien dans les bois, dans les vales, & des cavernes loing de toute conuersation. Tous les Clercs ieunent depuis la Pentecoste iusques à Noël, horsmis le Samedi & le Dimanche, & les Secliers depuis la Feste de la Trinité iusques à l'Aduent, le Mercredy & le Vendredy.

Les Prestres ne peuvent se marier depuis qu'ils ont pris les Ordres, mais ils les peuvent bien recevoir estans mariez, pourueu qu'ils ne soient pas bigames.

La semaine Sainte on ne dit Messe que le Ieudy & le Samedi, & durant toute ceste semaine les Abyssins ne se lauent pas l'un l'autre, & s'ils se rencontrent ils passent sans leuer les yeux : & les hommes de qualité vont entierement vestus de noir, ou de bleu, & l'on n'allume point la chandelle aux Eglises. Le Ieudy Absolu ils font la ceremonie de lauer les pieds aux pauvres. Le Vendredy Saint ils font des actes aussi pleins de pieté, & donnent tant de tesmoignages d'une grande douleur, que c'est chose presque incroyable. Ils se frappent les uns les autres avec les poings, & des verges. Ils reçoivent mesme des Prestres fort volontiers, tant de coups, que le sang coule à plusieurs en bas par tout le corps.

Tandis qu'on tient le Corps de nostre Seigneur au Sepulchre, ils s'habillent de deuil, ne mangent aucune chose, ny ne sortent jamais de l'Eglise.

Ils tiennent sept Eglises pour les plus anciennes, pour ce disent-ils, qu'elles furent basties

au mesme temps qu'ils receurent l'Evangile. Ils veulent que celle de Caxumo, sous le nom de sainte Marie de Sion soit la premiere, pour ce que la premiere pierre de l'Autel y fut enuoyee de ceste montagne: Il y a 150. Chanoines, & autant de Religieux.

Les femmes n'entrent point dans les Eglises, si ce n'est à Bazua, où l'on en void deux, l'une pour les hommes sous le nom de S. Michel, & l'autre pour les femmes, sous le tiltre de S. Pierre & de S. Paul. On ne scauroit dire le nombre des Monasteres: A douze mille de Caxumo on en void vn entre les autres qu'on nomme Alleluia, pour ce qu'un Religieux attentif à ses prieres ordinaires, ouyt chanter aux Anges en ce lieu Alleluia.

Les Moines ne se peuuent marier: aux Couvents des hommes il n'entre nulles femmes, ny pareillement aucun animal du mesme sexe.

On en void beaucoup parmy ce peuple qui espousent deux femmes, voire d'avantage tout à la fois, sans toutefois qu'ils en soient nullement punis. Toutefois il ne leur est pas permis d'entrer en l'Eglise, mais ils peuvent faire diorce.

Ils craignent extremement l'excommunication. Ils sont si deuots, qu'on en void venir au saint Sepulchre toutes les annees.

Ils confessent, & tiennent l'Eglise Romaine pour la premiere du monde, & le Pape pour le plus grand homme qui soit, & pour Vicaire de Iesus-Christ, & successeur de S. Pierre, & leur siege qu'ils appellent de David, duquel ils se disent yssus, le second.

Ils ont des Propheties, qui portent qu'ils ne doivent avoir plus de cent Abunes, c'est à dire Patriarches de l'Eglise d'Alexandrie, & celuy qu'ils auoient en l'an 1520. estoit le dernier, apres lesquels ils attendent vn nouveau Recteur, & Chef de l'Eglise Romaine.

Ils ont des Propheties de deux saints Hermites, qui portent, que les Francs se doivent ioindre avec eux, & destruire le Turc, Ziden, & la Mecque, & prendre l'Egypte, & qu'alors le chemin pour s'vnir avec les Chrestiens de par deça sera ouvert, & les Mores ont vne Prophetie, qui dit que la Mecque, où Mahomet a son sepulcre, sera destruite par les Ethiopiens. Ils n'ont pas l'heresie des Monothelites, ains ils tiennent deux natures en Christ comme nous: ce qui se void en leur Messe Ethiopique traduite en Latin.

Le Prete-Jan dit à vne lettre enuoyee au Pape, qu'il est escrit en la vie de S. Victor, & aux liures des Saints Peres, qu'un grand Seigneur Chrestien se doit ioindre estroitement avec le Roy d'Ethiopie.

Maintenant que nous auons exposé l'Estat des Abyssins touchant les choses spirituelles, il sera fort à propos de dire ce qui c'est fait de nostre temps pour leur reconciliation avec l'Eglise Romaine, & nous commencerons par vne fort celebre Ambassade.

Vn peu avant nostre siecle, David Roy des Abyssins, combien que ieune, & encore sous la tutelle d'Helene son ayeule, meue de la renommee des heureux succez des Portugais aux Indes, enuoya vn nommé Mathieu, Armenien de nation, avec vn Seigneur Abyssin à Alfonso d'Albuquerque, Vice-Roy des Indes, pour faire amitié avec le Roy Dom Emanuel, auquel ils porterent lettres de leur Prince en vn petit canon ou tuyau d'or, & luy presenterent entr'autres choses vne piece de la Croix de Iesus-Christ, en vne boete d'or.

Ceux-cy estans apres retournez de Portugal aux Indes, furent dix ans apres leur partement conduits à Ercoco par Sequeira General des Portugais, & la par le moyen de l'accueil, & des carresses qu'on fit à Mathieu, & de l'allegresse que les Abyssins monstrent à son retour: les Portugais asseurerent de ce dont il auoient douté, à scauoir, qu'il estoit Ambassadeur du grand Neguz.

Avec ceste occasion, Sequeira fit amitié & paix perpetuelle au nom de son Roy avec ce Monarque, au nom duquel le Vice-Roy de Barnagas iura l'alliance. Sequeira en mesme temps enuoya à la Cour de ce Prince Roderic de Lima Ambassadeur, avec lequel alla François Alvarez, qui escriuit apres toute ceste Histoire. Il retourna de son Ambassade six ans apres son partement, c'est à scauoir l'an 1526. ramenant avec luy Zagazabe, Ambassadeur renuoyé par le Prete-Jan au Roy de Portugal, & François Alvarez avec les presens, & des lettres qu'il enuoyoit au Pape. Les lettres furent presentees à Bologne à Clement VII. au couronnement de l'Empereur Charles V. L'Empereur des Abyssins faisoit mention dans ses lettres du Pape Eugene IV. qui auoit enuoyé à ses predecesseurs le Concile de Florence: & ramentuoit l'union de l'Eglise d'Orient avec la Romaine.

L'an 1553. Jean III. Roy de Portugal fit dessein d'essayer tous les moyens qu'il pourroit penser pour reconcilier entierement le Prete-Jan avec l'Eglise Romaine. Car encor que l'Ambassadeur de David eust presté obeissance à Clement VII. au nom de son Roy: toutefois on doutoit (comme il y auoit apparence) que par faute de secours spirituel, cela seroit inutile: puis qu'ils suiuiuent tousiours les heresies d'Eutiches & de Dioscore, & descendoient de l'autorité du Patriarche d'Alexandrie, & receuoient de luy l'Abuna, qui estoit Arbitre des choses Ecclesiastiques,

Ecclesiastiques, & administrateur des Sacremens, qui donnoit les Ordres par toute l'Éthiopie, & estoit maistre des ceremonies, & Docteur de la foy. A raison dequoy il ne sembloit pas qu'on peust faire chose plus utile ny plus necessaire, que luy enuoyer vn Patriarche legitime de Rome, pour gouverner ces ames, & avec luy quelques Prestres de bonne vie, & de grande doctrine, qui conuertissent & maintinssent en la vraye foy ces peuples avec disputes, Predications, & discours publics & particuliers.

Il sembloit qu'il y eust vne grande ouverture pour cet effect, pour ce que Claude Roy des Abyssins auoit receu quelques annees auparauant du secours d'importance des Portugais contre Gradaamet Roy d'Adel, qui l'auoit reduit à l'extremite: & en vne lettre escrete à Estienne Gama, Gouverneur des Indes, il auoit appelle martyr Christofle Gama son frere qui mourut en ceste guerre. Ayant donc communiqué ce dessein premierement au Pape Iule III. & puis au Pape Paul IV. ils conclurent qu'on enuoyeroit en Éthiopie treize Prestres de la compagnie de Iesus, tous pleins de pieté & doctrine: Iean Nugnez Barette fut fait Patriarche, & l'on luy donna deux Euesques coadiuteurs: c'est à sçauoir Melchior Carnee, & André Oniede, sous le tiltre d'Euesques de Nicee, & de Hierapoli. Le Roy Iean assortit ceste Ambassade, non veritablement de ce qui estoit requis pour le voyage, mais de tout ce qu'on pourroit desirer, pour ce qui concernoit les choses sacrees, & de riches presens pour le Prete-Ian.

Toutefois, pour rendre la chose encore plus aysee, on enuoya deuant par le commandement du Roy de Portugal de la ville de Goa, Iacques Diaz, & avec luy Consalue Roderic en Éthiopie, pour recognoistre le courage du grand Neguz, & la disposition de ces peuples. Ceux-cy ayans eu aduis de ce Prince, luy remonstrerent la lettre du Roy Iean, par laquelle il se resioüissoit avec luy au nom de tous les Chrestiens, de ce que suivant l'exemple de son ayeul, & de son pere, il auoit embrassé la foy, & l'union Catholique. Dequoy ce Monarque demeura du tout estonné, comme de chose non pensée, & ayant recherché pourquoy le Roy de Portugal luy auoit escrete ces paroles, s'excusa sur le Secretaire, où l'interprete de la lettre, adioustant, qu'encor qu'il fit estat de ce Roy, comme son bon frere, toutesfois il n'auoit iamais eu dessein de s'elloigner tant soit peu de la foy de ses ancestres: Roderic ne perdit pas courage, ains fit premierement tout ce qu'il peust pour reduire Claude à la verité, & la plus grande difficulté qu'il trouua en cela, fut l'ignorance des Conciles, & de toutes Histoires Ecclesiastiques, qui se rencontra au Roy, & en tous les Princes d'Éthiopie.

Voyant donc que le grand Neguz ne luy donnoit pas volontiers audience, il composa & publia vn liure en langue Chaldaïque, auquel refutant clairement les erreurs des Abyssins, il monstroit la souveraine autorité de l'Eglise Romaine: & cecy causa vne grande rumeur, tellement qu'il fut besoin que le Roy le fit dextrement supprimer pour sortir de peine.

Iacques Diaz, voyant qu'il perdoit le temps, & que le terme de son retour approchoit, prit congé du Prete-Ian, & ayant apres déclaré à Goa en quel estat il auoit laissé la chose, il fut resolu qu'il n'estoit pas à propos que le Patriarche mit en compromis avec sa personne, la reputation du saint Siege. Mais on aduisa, que pour n'abandonner pas entierement vne si belle entreprise, il falloit enuoyer l'Euesque de Hierapoli, avec deux ou trois de ces compagnons, pour traicter avec plus d'autorité, ce que le Pere Roderic auoit desia traité avec vn si peu de fruit.


Cét Euesque ayant embrassé avec beaucoup de contentement ceste entreprise, se mit en chemin avec le Pere Emanuel Fernandez, & quelques autres, qui estoient en petit nombre. Estant arriué au Pais des Abyssins, il eut plus de sujet de souffrir que disputer, pour ce que le Roy Claude ayant esté vaincu, & tué, il eut pour successeur Adamas son frere, ennemy juré du saint Siege.

Cestui-cy traina avec luy en la guerre cet Euesque, & ses compagnons, & les traicta du tout cruellement, & n'usa de moindre rudesse à l'endroit des Abyssins qui estoient conuertis. Il fut apres deffait en vne bataille par les Turcs, qui osterent aussi toutes choses à l'Euesque, & à ses compagnons: de sorte qu'ils tomberent en vne si grande misere & pauvreté, que tout secours leur manquant, ils furent contraincts de pourchasser leur vie en labourant la terre, iusques à tant qu'ils y moururent tous, horsmis vn, qui gouerna là enuiron cinq cents Catholiques, partie Portugais, partie Abyssins conuertis, avec vne merueilleuse patience.

DISCOVRS DV ROYAVME DE MONOMOTAPA.

SOMMAIRE.

- 1 **D**ESCRPTION de la situation, figure & circuit du Royaume de Benomotane, ou Monomotapa, & sa principale ville Benomotaxe.
- 2 Temperature de l'air de ce Pays abondant en rivières, portant l'or en leur sable, en forests, en grains, en Elephans, en pasturages, & en mines d'or.
- 3 Complexion & bonne disposition des corps de ce peuple, de moyenne taille, & teint noir, ses habits & draps de coton, leur façon de viure, de chair, & de riz, poisson, millet, huyle de Sufyman, la maniere de servir à genoux leur Roy, ses gardes & ses armes. La generosité des femmes qui vont à la guerre comme Amazones.
- 4 En quoy consiste le reueu du Prince.
- 5 Police de ceste nation, & la prompte expedition de iustice, qui decide sur le champ les causes par resmoings, & sans prisons, & punit severement trois crimes, sorcelerie, le larcin, & l'adultere.
- 6 Apostasie de ce peuple, qui avoit esté converty par le Pere Consalve de Sylve Iesuite, lequel ils firent apres mourir à la persuasion de certains Mahometans. Et comment sa mort fut vengée par les Portugais.



Bien que nous n'ayons guiere de cognoissance de cét Estat, toutes-fois il en faut dire deux paroles, selon le petit rapport qu'on nous en a fait : par ce moyen on pourra faire iugement de diuers Princes voisins, comme des Roys d'Abdel, de Monocmugie, de Matame & d'Anglois, qui sont vn peu moindres, & moins puillants que celui, dont nous entreprenons de parler.

Doncques le Royaume de Benomotane, Benomotaxe, ou Monomotapa, est de fort grande estendue, & obeyt à vn Prince qui porte le nom de Monomotapa, qui veut dire Empire en la langue de ce Pais. Cét Estat est assis en façon d'Isle entre deux branches d'une grande riviere, qui coule du lac de Zembre vers le Midy, & c'est de ce lac que le Nil prend sa source vers le Levant, & le Nord, & le Zaire vers le Ponant. La branche de ceste riviere, qui enferme le costé Septentrional de ceste Isle se nomme Cuama : & l'autre qui borne ceste Isle du Couchant & du Midy porte le nom du saint Esprit, puis du costé du Levant elle est bordée de la mer : On tient que ceste Isle a de circuit sept cents cinquante lieues, ou trois milles.

La principale ville du Pais s'appelle Benomotaxe, où le Roy fait presque ordinairement sa demeure : & il y en a vne autre nommée Simbas. Outre ceste Isle, ce Roy commande encor à d'autres lieux, veu que son Empire s'estend bien loing, tant avant en terre, que loing du riuage iusques aux Caps de Mozambique, & de bonne Esperance : plusieurs Roys voisins sont ses tributaires. Entre les autres Royaumes on compte celui de Torre, ou de Butué, qui s'estend depuis la riviere du saint Esprit, iusques au Cap des Courantes, & encore bien avant en terre. On void en ce Royaume le fameux edifice de Simbaoc, basti iadis de pierres carrees, dures au possible, & d'une grandeur merueilleuse : & l'on croit qu'on doit loger en ce lieu le Pais d'Agyslimbe de Ptolomee, tant à cause de l'assiette, que de l'approche des noms.

QUALITE.

- 2 **C**E Royaume est arrosé de plusieurs rivières, comme de Panami, Luanga, Arruya, Mangion, & autres qui portent de l'or avec elles. L'air y est temperé, & le Pais du tout bon & agreable, toutesfois plein de forests. Il est abondant en grains, & en diuers animaux, principalement en Elephans, dont il y a fort grand nombre, tellement qu'à voir les dents d'Elephant qu'on tire de ce Pais, on iuge qu'il y en meurt environ cinq mille toutes les années, & ces animaux y sont fort grands & gros. Mais pour en particulariser quelque chose, la partie de ceste Isle, qui s'estend de la riviere de Cuama au Cap des Courantes, iusqu'au S. Esprit, on voit des campagnes pleines d'animaux, gros & menus : mais froides, à cause des vents qui viennent de la mer, & ces campagnes ont faute de bois. Le long de la riviere de Cuama, il y a beaucoup de montagnes couuertes d'arbres, des collines & des vallées arrosées de fleuves, & des lieux fort peuplez & agreables, & c'est en ces lieux qu'on trouue force Elephans. On trouue par tout cét Estat force or,

force or, tant aux mines, qu'aux pierres & aux rivières. Quant au Royaume de Butuë, il y a de fort riches mines d'or : & outre ce de fort bons pasturages : mais il manque de bois, & il y fait fort froid à cause des vents qui y viennent du costé du Pole Antarctique.

M O E V R S.

Ces peuples sont de moyenne taille, noirs, de bonne complexion, & disposés. Ils sont 3
vestus de drap de coton qu'ils font, ou qu'on leur porte d'ailleurs : mais le Roy ne peut porter du drap venant de quelque autre Pais, de peur de poison, ou de chose semblable, & les gens de basse condition sont couverts de peaux de bestes. Les plus guerrieres gens que ce Prince ait, ainsi qu'on nous veut faire croire, sont des femmes, qui se conduisent à la façon des anciennes Amazones. Elles se servent de l'arc des mieux, enuoyent les fils à leurs peres hors de la Prouince, & retiennent les filles pour elles, qui demeurent du costé du Ponant, assez prez du Nil.

Le Prince n'est seruy qu'à genoux, & c'est mesme chose de s'asseoir deuant luy que de demeurer debout entre nous, & cecy n'est permis qu'aux grands personages. On luy fait la creance de ce qu'on luy met deuant apres qu'il a beu & mangé. Il a pour les armes vn hoyau, & deux dards. Il meine pour sa garde deux cents chiens.

Les habitans de ce Pais viuent de chair, de riz, de poisson, millet, & de certaine huile de Summan. Ils sont assez courageux, & surmontent les cheuaux à la course. Ils espousent autant de femmes que bon leur semble. En quelques endroicts de ceste Monarchie, principalement le Royaume de Butuë, ils bruslent le fient en lieu de bois.

RICHESES ET FORCES.

C'est chose toute claire, que puis qu'ils ont si grande quantité de ce metal qui est tant 4
conuoité d'un chacun, ils ne peuvent manquer d'estre fort riches.

Le Roy ne tire autre tribut de ses sujets que quelques iours de seruite, & de coruee, & force presens, sans lesquels on ne peut comparoistre deuant ce Prince. Pour ce qui est des forces, il y a grand nombre d'hommes en ces Pais, qui se passent de peu, & sont courageux : mais le malheur pour eux, est qu'ils sont mal-armez.

G O V E R N E M E N T.

Ce Monarque tient avec luy les heritiers des Princes ses vassaux, pour s'asseurer d'eux. Il 5
n'a aucunes prisons : pour ce que les causes s'y decident, en mesme temps que le crime se commet avec des tesmoins, & l'on ny punit nul crime si seuerement, que la sorcelerie, le larcin, & l'adultere. Combien qu'ils espousent autant de femmes qu'ils veulent : toutesfois la premiere a de l'aduantage sur le reste, tellement que ses enfans sont heritiers du mary, & les autres femmes luy obeissent, & la seruent.

R E L I G I O N.

Les sujets du Roy Monomotapa ne sont Idolatres, mais adorent vn seul Dieu, qu'ils 6
nomment Mozimo. Du temps de Sebastien Roy de Portugal, le Roy d'Inanior, vassal du Monomotapa, fut conuertty par le Pere Consalue de Silue Iesuite, qui baptisa quelque temps apres le Prince de Monomotapa, & sa femme : & le Roy fut nommé Sebastien, & la Royne Marie, & depuis trois cents des principaux furent baptizez.

Mais il aduint que quatre Mahometans, aymez & cheries du Roy, luy donnerent à entendre que Consalue estoit Magicien, & qu'il renuerloit les Royaumes avec ses enchantemens, & qu'il estoit venu la pour espier son Estat, & faire reuolter le peuple : tellement que le Roy qui estoit ieune, persuadé par ces meschans, se resolut de faire mourir le Pere Consalue, qui fut tué par huit seruiteurs du Roy, tandis qu'il reposoit apres vne longue priere, & son corps fut jetté dans la riuere de Mensigine, & pres de là on tua aussi avec la mesme furie cinquante personnes qui s'estoient fraichement conuertis. Ceste furie estant passée, apres que les principaux du Royaume, & quelques Portugais eurent remonstré au Roy la faute qu'il auoit faite, il s'excusa le mieux qu'il luy fut possible, fit tuer ces Mahometans qui l'auoient seduit, & fit chercher les autres qui s'estoient cachez, afin de les faire mourir : tellement qu'il sembloit que la foy se deust aduancer plus que iamais en ce Royaume. Mais les Portugais, au lieu d'enuoyer en ce pais-là de nouveaux Predicateurs, pour conseruer ce que Iesus-Christ

y auoit acquis, & y faire de nouvelles conquestes, resolurent de se venger avec les armes. Il partit donc de Portugal vne armee de mer, avec vn bon nombre de gentils-hommes Portugais conduits par François Barret.

Le Monomotapa plein d'effroy, au bruiet de ceste guerre qu'on luy venoit faire, enuoya demander la paix à Barret. Mais ce General aspirant à l'or de ce Royaume, mesprisa toutes les conditions qui luy furent offertes. L'ysuë de l'entreprise fut, que ceste armee redoutable a vn si puissant Monarque, fut consumee par la malice de l'air qui est insupportable à ceux d'Europe.

Depuis quelques Chrestiens y sont restez : mais en petit nombre, & le demeurant est encore pour le present en tenebres.

DISCOVRS DV ROYAVME DE CONGO.

SOMMAIRE.

- 1 **L'**ESTENDUE & bornes du Royaume de CONGO, & sa diuision en six Prouinces descriptes chacune en particulier, avec leurs villes capitales.
- 2 Temperature de l'air de ces contrees estimees inhabitables par les Anciens : l'egalité des iours & nuicts en toute l'annee, & pluies continuelles durant l'Hyuer (qui est l'Esté de nostre horison.)
- 3 Description des principales riuieres de ce Pays, desquelles les plus celebres sont la Zaire, & la Lelonde, qui engendre des Crocodiles, & les Hippopotames.
- 4 Special denombrement des singularitez qui se trouuent en chaque Prouince. Les Elephans & les Tigres en celle de Bamba, la Zebre animal semblable au Mulet, Empalanges, Bufles sauvages, Ciuettes, serpens longs de vingt-cinq pieds, qui seruent de viandes aux habitans de ce Pays, Beliers aïflez, Cameleons, Perroquets, Pellicans. En la Prouince de Congo, les Elephans, Singes, Christal. Au Pays de Pemba le Luco espece de grain, ce millet blanc, figues d'Inde, ou Barnanes, & vne espece de grain. Ce millet blanc, figues d'Inde, ou Barnanes, & vne espece de Palmiers, d'où l'on tire de l'huile, vin, vinaigre, fruitz & pain : montagnes de l'aspe & de Porphyre. En l'Isle de Loande les Coquilles grises & fort luisantes : & le merueilleux arbre Enlanda, qui porte certaine effece de toille qui sert pour faire habillemens au peuple : Balaines noires, & Sardines.
- 5 Quelle est la couleur, disposition de corps, & forme des habitans de ce pays, la forme de leurs maisons & edifice : leur monnoye pour le trafic, & leurs bateaux de guerre sur lesquels ils bataillent. De la pesche de leurs coquilles : Et de leurs coustumes & mœurs semblables à celles des autres Nigris : La façon de leurs salutations au matin : de leurs habits de nattes, ou escorces d'arbres, de leur boire, manger & maniere de coucher, & de se medeciner eux-mesmes par la vertu des simples herbes, dont ils cognoissent la vertu, & le respect qu'ils portent à leur Roy.
- 6 Leurs richesses consistans en trafic de metaux, Elephans, Ciuettes, pesche de Coquilles, Toilles de Congo, qui se tirent des Palmiers, & du Chrystal.
- 7 Force de ce Royaume, leurs armes, & combien de milliers d'hommes on peut armer.
- 8 Quel ordre tient le Roy à polir son Royaume, & ses loix, & les Gouverneurs qu'il comiet en chaque prouince pour y redre la iustice. Et quelle est la discipline militaire, en quelle ordre marche leur armee, & les trois instruments dont le General de l'armee use, comme de signals pour la faire marcher, ou arrester & faire entendre sa volonte par tous les Escadres.
- 9 De l'Idolatrie des habitans du Royaume de Congo : en quel temps, & par qui la foy Chrestienne a esté annoncee, & comme elle y est auourd'huy receuë par le moyen des Iesuites qui s'y sont establis.



Nous que nous n'ayons pas vne assez grande cognoissance de cét Estat, & qu'il soit impossible d'en parler comme des autres, comme nous auons traitté : toutesfois nous estimerons auoir satisfait en partie à ce qui est deu au Lecteur, si nous luy rapportons ce que nous auons peu apprendre de cét Estat, qui est veritablement de grande estendue.

Il s'estend depuis le Cap de sainte Catherine, qui est à deux degrez & demy loing de l'Equinoctial, en tirant vers le Midy, iusques au Cap de Ledo. Il a pour ses bornes du costé d'Occident la mer Ethiopique : du Midy les montagnes de la Lune, & le Cafres : du Leuant la montagne, d'où sortent les Fleuves qui coulent aux sources du Nil, & du Nord le Royaume de Benin. Et ce Royaume qui comprend depuis la moitié du troisieme degre du costé du Midy iusques au treizieme degre de hauteur, contient par ce moyen six cents soixante mille d'Italie, ou enuiron.

Le Roy

Le Roy de Congo commande encore à l'Isle de Loande; qui est entre vne branche de la riuere de Dande nommée Ilengo, & la riuere de Coanze. Il y a encor quelques Isles sur la riuere de Zaire, dont les habitans sont feudataires, du Roy de Congo. Or ce Royaume est diuisé en six fameuses Prouinces, qui sont Bamba, Songo: Sunde, Pango, Batta, & Bemba.

La Prouince de Bamba est du long du riuage de la mer, depuis le fleuve de Ambrisi iusques à la riuere de Coanze, & ce Pais contient beaucoup de Seigneuries. La plus renommee ville de ceste Prouince se nomme Bamba, veu que les villes capitales donnent leur nom à tout le reste du Pais. Elle est entre les riuieres de Lofe, & d'Ambrisi, & est esloignée de la mer environ cent mille d'Italie.

La seconde Prouince du Royaume de Congo se nomme Songo, & est assise autour des riuieres de Zaire, & de Loango, & s'estend iusques au fleuve d'Ambrisi du costé du Nord au septiesme degré & demy, & prend fin pres des rochers Rouges de la frontiere du Royaume de Loango. La ville capitale de ceste Prouince s'appelle Songo, dont tout le Pais prend le nom.

La Prouince de Sunde est assise autour de la ville de Congo, à laquelle les Portugais ont donné le nom de saint Sauueur, & de la s'estend par l'espace de quarante mille d'Italie, ou de huit lieux d'Allemagne, à prendre cinq mille pour chaque lieu, iusques à la riuere de Zaire. Sa principale ville se nomme aussi Sunde.

La Prouince de Pango a esté autrefois vn Royaume à part, & n'estoit subiecte au Roy de Congo. Elle confine du Nord avec la Prouince de Sunde, du Midy avec celle de Batta, du Couchant avec celle de Congo, & du Leuant avec les montagnes du Soleil. La ville capitale du Pais se nomme aussi de Pango, & est assise vers la partie Occidentale de la riuere de Barbele, qui vient du lac où le Nil prend sa source.

La Prouince de Batta confine du Nord avec celle de Pango, & du Leuant avec la riuere de Barbele, & s'estend iusques aux montagnes du Soleil, & au pied des montagnes d'Aphronite, du costé du Midy de ces montagnes elle se ioint à la Barbele, iusques à la montagne bruslée. La principale ville se nomme Batta, & donne son nom à toute la Prouince ainsi que les autres.

En la Prouince de Pemba l'on void la ville de Congo, nommée autrefois Banze, c'est à dire Cour, & maintenant saint Sauueur. Elle est assise en vne montagne, & esloignée de la mer environ cent cinquante mille d'Italie. Il y a là vne montagne assez haute, qui comprend environ deux lieux d'Allemagne. Elle est toute couuerte de bourgs, de villages, & des maisons; & il s'y tient plus de cent mille personnes.

Q V A L I T E.

S E L O N l'opinion des anciens, ceste contree estoit inhabitable, veu qu'ils estimoient que tout ce qui estoit sous la Zone torride, où ils la logeoient estoit tellement brûlé, qu'il ny auoit moyen d'y demeurer en aucune sorte. Mais ils en ont parlé autrement que la verité ne porte, veu le tesmoignage d'Edouard Loup Portugay, qui a demeuré en ces quartiers-là assez long temps avec beaucoup d'autres Portugais.

Cét auteur rapporte que l'air y est tellement temperé, que l'Hyuer est semblable à l'Automne de Rome, si bien qu'ils ne changent point d'habillement, & ne cherchent point de feu en ceste saison. Les sommets des montagnes mesmes sont exempts d'une fascheuse froidure, & mesmes generalement en Hyuer la chaleur y est plus grande qu'en Esté, à cause de la pluye qui y tombe sans cesse, principalement par l'espace de deux heures auant Midy, & apres. Et c'est ceste chaleur, qui est principalement insupportable aux hommes d'Europe qui s'y trouuent.

La nuit y est presque esgale au iour, & en toute l'annee on n'y remarque que bien peu de difference. Ils ont leur Hyuer lors que nous auons le Printemps. Il commence le quinzième de Mars, de mesme que l'Esté sur le milieu du mois de Septembre. Les pluies y continuent l'espace de cinq mois, à sçauoir, d'Auril, May, Iuin, Iuillet, & Aoust. On ne void guiere en tout ce temps là des iours clairs & serains, & les pluies tombent à si grosses gouttes, que c'est presque merueille, toute l'humeur estant consumée & digeree par les porres de la terre seiche & aride. L'Esté y est au contraire extremement sec, & il attriue bien peu souuent durant ceste saison qu'il y pleuue. De là vient que les riuieres se remplissent d'une eau épaisse & bourbeuse, & s'estendant sur la terre luy communiquent ceste humeur grasse.

Il a en Esté les vents que Iules Cesar, & Hippocrates auant luy nommerent Etesies. Les Portugais nommēt ce vent Maestro, ou General, comme celuy qui est ordinaire à ce Pais. Le mesme vent cause les pluies par vne agitation des brouillards vers les sommets des montagnes,

veu que venans à estre choquez ils se resoudent en pluyes, & tomberent en terre. Et l'on void les brouillards ordinairement sur les hautes montagnes quand la pluye s'approche. Ces pluyes continuelles causent la creuë des riuieres, c'est à sçauoir du Nil & du Niger, ou de Senega, & autres de ceste contree, qui se vont rendre dans la mer Oceane, ou Mediteranee, & humectent & engraisent les terres des Pais qu'elles arrosent.

Donc pour ce qu'il tombe de si grandes pluyes durant leur Hyuer, qui est nostre Esté, tant au Royaume de Congo, qu'au Pais du Prete-Ian, il ne se faut nullement s'estonner de la creuë & inondation des riuieres, combien qu'en Egypte, & aux plus arides, qui ne sont iamais arrosez d'aucune pluye, excepté au Pais qui est aux enuiron d'Alexandrie, ils tiennent pour merueilleuses les creuës du Nil, qui ne manque toutes les annees en certain temps de venir engraisser avec son eau grasse & bourbeuse les terres des Egyptiens, qui ne rapporteroient nulle chose, si elles n'estoient abreuees en ceste sorte. A raison dequoy l'on sacrifioit autrefois au Nil, en luy donnant le nom de bon Genie, resmoing Ptolomee, & mesmes les Chrestiens de ces Pais-là tiennent encor auourd'huy pour chose miraculeuse l'inondation du Nil, sans laquelle on mourroit de faim en Egypte. Doncques l'Ouest Nortouest qui souffle par deça en temps d'Esté, durant lequel il ont leur Hyuer, assemble les brouillards, & les vapeurs autour des sommets des montagnes, & appellent les pluyes qui temperent là l'Hyuer, à cause de leurs chaudes vapeurs. Ce sont doncques ces pluyes qui causent ordinairement le desbordement du Nil, & des autres riuieres de ces contrees.

Mais lors que ces peuples ont l'Esté, leurs vents sont contraires, veu que c'est lors que le Sud est, & le Nordest, qui sont vents froids, vregnent, & rafraischissent la terre, ainsi que nos vents font en nos Pais : car ils rendent leur air tout serain, au lieu qu'ils rendent le nostre couuert de brouillards, avec menace de pluye, par vne naturelle disposition de l'air, de la terre, & climats. Et certainement si ce vent ne rafraichissoit le Pais de Congo, & d'Ethiopie, sans doute la chaleur y seroit entierement insupportable.

Les habitans de Grece, de Candie, de Cypre, de Natolie, de Syrie, & d'Egypte, iouissent du mesme vent.

Or il faut noter que la neige ne tombe iamais sur les montagnes d'Ethiopie, de Congo, ou des Pais voisins : sinon qu'on regarde celles qui sont portees vers le cap de Bonne esperance, ou bien celles qui sont aux lieux que les Portugais nomment les montagnes de Neige.

Si le Royaume de Congo auoit de la neige ou de la glace, sans doute l'vne de ces deux seroit beaucoup plus estimee que l'or, pour ce qu'on pourroit par ce moyen rafraichir la boisson. Tellement qu'il faut dire pour conclusion, que c'est beaucoup estre esloigné de la verité, d'asseurer que les riuieres croissent quand la neige vient à se fondre, veu que les grandes pluyes qui durent cinq mois en sont cause.

La principale riuere de ces Pais, c'est celle de Zaire, qui vient du second Lac du Nil, & est fort grande entre toutes celles d'Afrique. Son emboucheure à vingt-huict mille de largeur. Elle fait plusieurs grandes Iles durant son cours, & reçoit entre les autres riuieres la Vambe, & la Barbelle, qui viennent du premier lac : & encore plusieurs autres qui prennent leur source au lac d'Aquelonde. Les principales sont la Coanze, qui borne les Royaumes de Congo, & d'Angola, & la Lelonde, qui engendre des Crocodiles, des Hippopotames, desquels l'ile des Cheuaux a tiré son nom. Elle engendre encor le poisson qu'on nomme Pourceau, qui est si gras & si grand, qu'il y en a du poids de cinq cents liures, voire dauantage.

L'Hippopotame, ou cheual de riuere est tanné, a peu de poil, saute en terre pour y paistre, retourne le iour dans l'eau. Les Africains en appruiuent quelques-vns qui sont vistes au possible : mais il se faut bien garder de passer sur eaux de riuieres profondes, veu qu'il s'y plongent aussi tost. Il s'engendre encor en ces riuieres quelques bœufs d'eau, qui vivent durant quelques iours en terre.

L'abondance de l'eau iointe avec la chaleur causee par le voisinage du Soleil, rend le Pais fertile au possible, & le fait abonder en plantes, herbes, fruiçts, & grains, il en porteroit encore plus, si l'industrie des habitans aydoit à la nature.

Mais venons vn peu aux particularitez des Prouinces que nous auons descrites en premier lieu, puis que nous auons assez discouru en general de toutes ces contrees.

En la Prouince de Pamba, il y a vne montagne où l'on trouue plusieurs mines d'argent, & d'autres metaux. On trouue aussi en ce Pais plusieurs Elephans, à cause de la grande quantité de Forests & de riuieres, dont il est plein. Ces Elephans sont grands au possible, veu qu'ils croissent iusques à la moitié de leur aage, & ils vivent ordinairement cent cinquante ans. Ceux qui ont esté veus en Portugal, & ailleurs en nostre Europe, estoient plus petits, pour ce que on les auoit emmenez encor trop ieunes. La grandeur de ces bestes peut estre cogneuë par leurs dents qu'on

dents qu'on a ramassés, dont quelques vnes ont esté trouuées du poids de deux cents lires. Au langage de Congo, la dent de l'Elephant est appelée Mene Manzao. Les ieunes Elephans sont nommez Moana Manzo. Ils n'ont pas les oreilles moins grandes que les plus grandes targues des Turcs, les plus grands les ont longues de six pieds en forme d'œuf, & elles vont en s'appointant vers l'espaule. Avec le mouuement de leurs oreilles, & de leur queue ils chassent les mouches de mesme qu'ils les tuent, ainsi qu'elles se reposent sur eux, en ridant, & ramassant leur peau. Ils ont les poils de la queue fort espais, semblables à de petits lances noirs & luisans, & ceux des ieunes sont plus beaux & plus forts, & de plus grand prix.

Veritablement les anciens n'ont pas cogneu la nature des Elephans, lors qu'ils ont dit qu'ils ne pouuoient plier le jarret, & que pour ceste cause ils s'alloient appuyer contre quelques arbres pour dormir, & par ce moyen se rendoient de facile prise. Car les Portugais & les Flamens ont veu que la chose alloit autrement, veu qu'ils montent mesmes sur les arbres en leuant les deux cuisses pour prendre des feuilles, ou des branches, ou bien ils se baissent aisément lors qu'ils veulent boire en quelque lieu qui est bas: ce qu'ils ne pourroient faire s'ils estoient priuez de ioinctures.

Ceste Prouince a aussi des Tygres, de la mesme forme que nous les voyons peintes en ces quartiers. Ces bestes, selon le tesmoignage d'Edouard, n'attaquent iamais les hommes blancs, mais elles se ruent souuent sur les noirs: tellement que quelquesfois trouuant deux hommes, l'un blanc & l'autre noir, qui dormoient l'un pres de l'autre, ces animaux alloient de furie contre le noir, sans offencer le blanc en aucune sorte. Lors que la faim les presse ils attaquent les bestes domestiques, quand ils n'en trouuent aucune par la campagne. Ceux de Congo les appellent Engoi. Ils tiennent que les aisselles de cet animal sont venimeuses, & que si l'on en mange on en meurt tout furieux.

La mesme Prouince produit vn animal nommé Zebre par les habitans, qui est du tout semblable à vn mulet, excepté qu'il engendre. Au reste, la disposition de son poil est merueilleuse: Car depuis l'épine du dos iusques au ventre il a des lignes de trois couleurs: c'est à sçauoir blanches, noires, & jaunes, le tout estant disposé avec vne iuste proportion, & chaque bande estant de la largeur de trois droicts. Ces animaux se multiplient à bon escient, pour ce qu'ils font des faons toutes les années. Ils sont tous sauages, & vistes tout ce qui se peut, de sorte que les Portugais ont entre leurs Prouerbes celuy de la vitesse de la Zebre. Ceste beste estant appruiuisee pourroit seruir au lieu du cheual aux guerres, portant & tirant les hommes, & les charges, afin que l'on voye comme Dieu a pourueu en choses necessaires.

Mais d'autant que ce Pais manque de cheuaux, & que les habitans ignorent l'art d'adomestiquer la Zebre, & ne sçauent se seruir des bœufs, combien qu'il y en ayt beaucoup en ces contrées, les hommes font l'office des bestes, veu qu'estans disposez aux coings derrières, ou des chemins, ils portent les litteres ou les chaires. A raison dequoy ceux qui ont besoin de faire diligence en quelque voyage, changent souuent de gens, qui les portent, & par ce moyen ont despeché le chemin qu'ils ont à faire.

On y trouue encores d'autres bestes, dont les vnes sont de la grandeur d'un bœuf: les autres plus petites qu'ils nomment Empalanges, puis des Beuffles sauages, des loups qui sentent de fort loing, & qui ayment extremement certaine huyle que l'on tite des palmiers. On y trouue aussi des renards, des cerfs, de chevreux, des conils, & lievres en grand nombre, pour ce qu'on ne les poursuit pas iusqu'à la mort en chassant comme en Europe.

Ils ont aussi vn grand nombre de ciuettes, qu'ils appruiuisent pour amasser la bonne odeur qui sort de ceste beste, qui leur est merueilleusement agreable.

Il y a diuerses sortes de serpens & de viperes, qui ont quelquefois vingt cinq pieds de longueur, & cinq de largeur, & ont le ventre fort large, de mesme que l'ouuerture de la gueule, qui est telle, qu'ils deuorent vn cerf ou vn autre animal de pareille grandeur. Ils viuent aussi bien sur la terre que dans l'eau. Lors qu'ils sont bien saouls il s'endorment aisément, & lors les habitans les tuent, & se nourrissent de leurs chair, qu'ils trouuent meilleure que celle de la volaille.

Au reste, il y a des viperes qui ont vn venin si puissant, qu'ainsi qu'elles ont mordu quelqu'un il meurt dans vingt-cinq heures.

On y void encores des animaux de la hauteur d'un Belier, qui sont aislez comme des dragons, ont vne queue, vn long bec, & plusieurs rangs de dents. Ils viuent de chair creüe, n'ont que deux pieds, & ont la peau rousse, & bigarree de verd & de bleu. La mesme Prouince a des Chameleons.

Dauantage, ils ont grande quantité de poulles & coqs d'Indes, de Paons, d'Oyes, Canards, de Perdrix priuees, & sauages, de Faizans, Pigeons, Tourtres, Aigles, Faucons, Esperuiers, & Pellicans. Ce Pais abonde encores en Perroquets, verds & gris: & il y a aussi vn grand

nombre d'oyseaux rouges, qui sont fort beaux, qui ne sont guieres differents des Phenicopteres, ou Flambards. On y void aussi force espee de petits oyseaux, qui chantent comme ceux de Canarie.

La Prouince de Congo nourrit beaucoup d'Elephans, & il y a aussi beaucoup de sortes de Singes, dont quelques-uns font mille badineries & batelages, voulans imiter les personnes qu'ils voyent.

Il y a pareillement plusieurs Vaches, & beaucoup de ces autres animaux que j'ay nommez cy-dessus. Outre ces choses il y naist grande quantité de crystal, & d'autres metaux, entre lesquels les habitans donnent le premier rang au fer.

Aux Pais de Pemba, l'on trouue du fer en ceste grande montagne, dont nous auons desia parlé en la description des Prouinces. La terre de ceste montagne est de grand rapport, à cause de la bonté de l'air. Il y a de fort bonne eau, qui ne fait iamais mal aux hommes qui en boient. Il y a force herbe, & grande quantité de bestail, & d'arbres fructiers, qui sont continuellement verds. Ceterroir porte toute sorte de grains qui sont ordinaires en ces contrees, principalement celuy qu'ils appellent Luco, lequel ils estiment autant, que nous nostre meilleur bled. Il ressemble au grain de la moutarde, sinon qu'il est tant soit peu plus grand.

Ils viennent à le moudre dans vne meule qu'ils tournent à belles mains, & il en vient vne fort bonne farine, de bon goust, & du tout agreable. Le pain qui en est fait ne cede guieres en bonté au nostre. Il y a grande abondance de ce grain en Congo, où il a esté porté depuis quelques annees seulement du Pais, où le Nil prend sa source, principalement de celuy ou le Nil remplit le second lac.

Ce Pais porte encor du millet blanc en abondance, qui est appellé Mazze, c'est à dire, grain de Congo. Il produit aussi du maiz, ou bled de Turquie, qu'on estime toutesfois fort peu, & que les habitans nomment Mazza Mamprito, c'est à dire, bled de Portugal. Il y a aussi force riz, mais on n'en fait nulle estime. La mesme Prouince porte diuers arbres fructiers, dont le menu peuple se nourrit & substante, comme des citroniers, des limonniers, qui portent des fructs d'un goust merueilleusement agreable. Il y vient aussi des Bananes, que quelques-uns tiennent estre ceux-là mesmes, que les Egyptiens & Syriens nomment Muse, & qu'on nomme autrement figues d'Inde. Leur goust est fort bon, & agreable, ayant la douceur melée avec l'aigreur, & c'est vn bon aliment, qui n'a rien qui nuise.

Les campagnes y portent aussi beaucoup de sorte de palmiers, dont les uns portent des dattes, & les autres des noix d'Inde. Il y vient encores vn autre espee de palmiers semblables aux deux autres, d'où l'on tire de l'huyle, du vinaigre, des fructs, & du pain. Ils tirent de l'huyle du dedans des fructs, comme des oliues, & ceste huyle a la couleur, & la substance de nostre beurre, toutesfois il est vn peu plus verd tendant sur le iaune. Ils vsent de cecy au lieu d'huyle & de beurre, & en mettent dans leurs lampes, & s'en frottent le corps afin de courir plus legèrement. Pour conclusion elle sert fort en temps de necessité, veu que ceux de ce Pais-cy qui ont voyagé par delà, fussent morts de faim sans ceste huyle. Ils tirent le vin des sommets des arbres qu'ils percent, & lors il en coule vne liqueur blanche, claire & fraische. Elle est premierement douce, puis elle s'aigrit, tellement qu'on en peut mettre sur les laictuës au lieu de vinaigre. Ceste liqueur estant prise fraichement, excite l'vrine, qui est cause qu'on void bien peu de personnes en ces contrees qui soient sujets à la pierre, ou à la grauelle. D'auantage lors qu'on en boit iusqu'à l'excez, elle enyure & nourrit au possible. Ils font du pain de noyaux de ces fructs, & ces noyaux sont de la forme des amandes, mais vn peu plus durs. Ce qui est dedans est de fort bon goust, & tout ce fruct est verd dehors & dedans, & est bon crud & cuit. Il y a d'autres arbres qui produisent des fructs nommez Cola, grands comme vne pomme de pin: mais ayant d'autres fructs semblables aux chastagnes, dans lesquels il y a quatre noyaux rouges, ou incarnats, qu'ils cassent avec les dents, & les roulent dans la bouche afin de se desalterer. Ces fructs estans iettez dans l'eau se font aigrit, & la rendent agreable au Palais, fortifient l'estomac, & corrigent la corruption du foye. On y trouue encor d'autres sortes de palmiers sauvages, qui portent grande quantité de fructs bons à manger, & dont les feuilles seruent à couvrir leurs cachuettes, & à faire des paniers, & autres choses propres à la maison, & au mefnage. Il y a encores d'autres arbres nommez Ogegues, qui portent des fructs semblables aux prunes iaunes, & qui sont d'une odeur & d'un goust fort agreable. Ils ont outre ces fructs d'autres qui peuuent grandement seruir en medecine, & qui sont aussi de fort bon goust, comme les Tamarindes qui sont aigres, doux & bons contre les fiebres chaudes. Les Mores & les Turcs voyageans par terre prennent la poulpe de Tamarinde, & le meslent avec de l'eau, laquelle ils boient apres pour rafraischir le foye, les reins, & les parties interieures, comme aussi pour lascher le ventre, vsans aussi de la casse pour le mesme effect. La mesme Prouince a des melons,

a des melons, des comcombres, & choses semblables en grande abondance.

Il y a aussi grande quantité de pierres, & des montagnes d'aussi beau marbre qu'on en puisse voir, tellement qu'on en pourroit bastir tout vn Temple. On y void outre cela des montagnes de iaspe, & de porphyre, comme aussi de marbre blanc, & de plusieurs autres couleurs, & c'est ce marbre qu'on appelle à Rome de Numidie, & d'Afrique.

Au reste il naist en quelques pierres des Hyacintes, qu'on pourroit aisément separer du reste. On pourroit faire de mesmes des colonnes entieres, des obelisques, & autres ourages, qui seroient beaux, ou plustost merueilleux, par le moyen de ces Hyacintes qui y sont meslees. Il y a encores d'autres rochers, où l'on trouue des metaux, à sçauoir de l'airain qui est verd & iaune, & l'on en pourroit faire de fort belles statues, & diuerses autres choses.

Mais ie suis d'aduis de dire encores pour conclusion de cecy, quelque chose de la riuere de Zaire, qui est la grande riuere du Royaume de Congo, qui sort en partie du mesme lac, duquel le Nil prend sa source. Ce fleuve a de l'eau en telle abondance, que c'est presque chose incroyable, veu qu'il a de largeur cinq mille & demy avant qu'il s'aille rendre dans la mer, & lors qu'il y est entré son eau coule parmy la salee sans perdre sa douceur, l'espace de huit, & de dix, voire mesme de seize lieues. Ce qui faict que les mariniers considerent aisément en quels lieux ils sont. On peut aller avec de grands batteaux, contremont la riuere l'espace de cinq lieues en toute assurance : mais l'on trouue apres des eaux rapides, & impetueuses, à cause que la riuere tombe en cet endroict d'un precipice, avec vn grand bruiet semblable à celui, que le Nil & le Danube font en quelques lieux.

Quant à la riuere de Lelonde, qui coule au pied de la montagne, où la ville Royale de Congo est bastie, lors que les pluyes ont cessé, elle est du tout tarie & guayable.

On trouue sur le riuage de l'Isle de Loandre certaines coquilles grises, & fort luisantes : & combien qu'il y en ayt aux autres riuages du Royaume de Congo : toutesfois celles de Loandre sont plus estimees. Il croist aussi vn merueilleux arbre nommé Ensanda, qui est tousiours verd, & a force vertus. Ses branches deuiennent fort hautes, & il en descend de certains filets fort deliez, qui venans à toucher la terre, prennent racine, tellement que ces arbres se multiplient au possible. Sur la premiere ecorce de cet arbre il vient certaine espee de toille, qui estant nettooyee sert pour faire des habits au menu peuple.

En la partie qui est plus proche de la terre ferme il croist certains arbres, au pied desquels l'eau de la mer vient. On trouue là des huitres de la grandeur de la main, & de fort bon goust, & qui sont assez cogneües des habitans, qui les nomment Ambiximitare, comme qui diroit poisson de pierre.

Pres de ceste Isle, autour de la partie exterieure on void beaucoup de balcines noires, qui s'entrefont ordinairement la guerre, tellement qu'il en meurt plusieurs, que les habitans pescient, & les ayant prises leur ostent la gresse, de laquelle, meslee avec de la poix, ils goudronnent leurs vaisseaux.

En cet endroict on trouue aussi force sardines, & grande quantité de soles, d'estourgeons, de mulets, d'escreuisses de mer, qui sont grandes.

M O E V R S.

Les habitans de ce Pais sont noirs, combien que quelques femmes tirent sur le iaune. Elles ont pour la pluspart des cheveux noirs, ou roux, mais roux tendant sur le rouge. Les hommes sont de moyenne taille, & presque semblables en cela aux Portugais. Tous y ont en la prune de l'œil de diuerses couleurs, noires, & de la couleur de l'eau de la mer. Leurs levres sont grosses : mais non tant que celles des habitans de Nubie, & des autres Negres. Leurs visages aussi sont differents, veu qu'il y en a qui sont maigres, d'autres qui sont gras, & d'autres qui sont entre deux comme ceux des Portugais, & ils different aucunement des autres Negres, qui sont du tout laids, & desagreaables.

Ceux de la Prouince de Pamba sont si forts, qu'ils couperont vn esclau par le milieu : & trancheront la teste toute nette à vn boeuf d'un seul coup.

Ceux de la Prouince de Congo sont continuellement en guerre avec les Anzicains leurs voisins : & quant à ceux de la Prouince de Sunct, ils estiment plus le fer que tous les autres metaux, ainsi que nous auons ia dit, pour ce que l'on en faict des espees, des cousteaux, & d'autres choses, qui sont fort vtils, au lieu qu'on ne se sert pas des autres à vsages si necessaires.

En la Prouince de Pemba, qui est celle où est la ville de Congo, les habitans decoupent les branches des arbres appelez Ogegues, & en font des hayes, & pareillement des allees, & des tonnes pour estre à couuert du Soleil. Ils portent aussi de la Tamardine en la bouche pour se garder d'alteration.

Les maisons des habitans du Royaume de Congo sont basses, & sont estroictes, & non par faute de matieres, ainsi que nous auons desia monsté parlant des pierres, & des marbres qui y sont, outre lesquelles ils ont aussi de la chaux & du bois en grande quantité : mais à cause du peu d'industrie des habitans, qui ne sçauent nullement bastir, n'y ayant entre eux, ny charpentiers, ny maçons, qui leur sçauent dresser des maisons telles qu'ils en pourroient faire.

Ceux de Congo vsent de coquilles au lieu d'or, & de monnoye, & font avec cela tous leurs trafics.

Les Insulaires de la riuere de Zairé, ont autresfois eu de grosses guerres contre eux, & combattoient sur des bateaux qu'ils font du tronc d'un arbre creusé. Cét arbre est nommé Liconde, & est quelquefois si gros, que deux ou trois hommes, voire d'avantage, ne le peuuent embrasser, tellement que bien souuent vn bateau faict des plus grands & gros, sera capable de contenir deux cents hommes.

Ils font aller ces bateaux avec vne grande roideur, chacun tient l'aviron, & l'arc, & lors qu'il est question de combattre, ils laissent l'aviron, & se seruent de leurs arcs contre leurs ennemis.

Quant à ceux de l'Isle de Loande, ils font la pesche de leurs coquilles en telle sorte. Quelques femmes descendent du riuage quelque peu dans la mer, & en tirent certains paniers pleins de sable, & les mettent en terre, & ostent le sable des coquilles qui sont fort menuës, & de diuerses façons : car il y en a de masses, & pareillement il y en a de femelles, qui sont de plus belle couleur, plus agreable à la veüe. Toutes choses s'achèptent avec ces coquilles, mesme l'or, l'argent, & les viures. Au reste non seulement on oste l'usage de la monnoye d'or, ou de quelque autre metal en ce Royaume (car on en vse de mesme, comme j'ay dit en tous les Estats du Roy de Congo) mais encores en d'autres endroits d'Afrique, & au Royaume de la Chine, & en quelques lieux des Indes : car en Ethiopie l'on donne du poivre au lieu de l'or, ou de l'argent monnoyé, & au Royaume de Tombude pres la riuere de Senega, on donne des coquilles de la mer.

Ces Insulaires ont des vaisseaux faits de palmier, ou de noyer d'Inde, qui vont à voyles, & à rames. Ils sont tellement experts à bien nager, que le plus souuent ils passent tout le destroit à la nage, pour aller en terre ferme.

Mais pour parler à ceste heure generally des mœurs de tous les Congeois, ils tiennent beaucoup de celles des autres Negres, au moins de ceux qui sont leurs voisins. Ils versent tousjours quelque goutte du pot auant qu'ils se mettent à boire. Ils ne boient iamais en disant : mais apres le repas ils se desalterent à bon escient avec de l'eau, ou du vin de pommier, ou de l'eau melée de miel.

Lors qu'ils se rencontrent le matin, ou sur le iour, ils se saluent, & quand ils trouuent quelqu'un qui tient rang entr'eux, ils en font de mesme. Et quant ils veulent honorer quelqu'un, il se mettent à genoux, & battent des mains demeurans en cet estat, iusqu'à ce que l'autre rende la salutation avec ces paroles, *Fuio, Fuio, Fuio*, avec lesquelles ils se souhaitent du bon heur.

Ils desrobent volontiers aux estrangers : mais ils n'vsent guieres de larcin parmy eux. Les femmes y sont du tout addonnees à faire l'amour, principalement avec les estrangers, sans se soucier nullement de leur reputation, pourueu qu'elles satisfacent à leur desir.

Les femmes, & les hommes y vont esgalement à teste nuë, ayans les cheveux gentiment liez, & toutesfois courts. Quelques-uns portent des chapeaux d'escorce d'arbre, ou bien faits de nois d'Inde. Quelques-uns portent aussi de gros trouffaux de plumes attachez à leurs cheveux avec des fils de fer. Il y a beaucoup aussi, tant hommes que femmes, qui portent des pendans d'oreille fort pesans.

Leurs habits sont presque tous de natte, faite de l'escorce des arbres, & rouge. Ils mettent sur ces nattes des peaux de singes, & d'autres animaux. Plusieurs portent des ceintures de cuir de bue, & quelques vnes de ces ceintures sont larges de deux ou trois pieds, voire d'avantage. Beaucoup de ses femmes ceignent leurs cuisses de grands anneaux de fer, de cuiure, ou d'estain, & les bouts sont tellement vnus ensemble, que l'on ne sçauoit presque dire comment elles les ont peu mettre en ceste sorte. Il y a mesme quelques hommes qui se plaisent à aller de mesme elles.

Ils couchent sur des nattes à terre, & mangent diuers fruidts, & pareillement du poisson, & de la chair, sans mettre ces choses separément, veu qu'ils les jettent toutes dans vn mesme plat. Les principaux d'entre eux mangent presque ordinairement seuls, estendus sur la natte. Ils ne font iamais leurs affaires contre la terre, estimant que ce seroit pecher : mais pour cet effect ils creusent

creusent des trous qui sont fort larges. Ils vsent de tambour estroicts par le bas, & larges en haut, & flustes de dent d'Elephant.

Cecy se pratique volontiers pour la plus part entre ceux qui demeurent aux champs, combien qu'il y ait des choses, dont on vse dans les villes, où l'on vit toutefois avec plus de civilité, de delicateffe, & de delices.

Les habitans de Congo font honneur à leurs Roys en balayant soigneusement tous les chemins par lesquels ils doivent passer. J'ay dict que les hommes alloient vestus de natte. Mais maintenant ils imitent fort les habitans des Portugais. Et quant aux femmes elles ont trois iuppes l'une sur l'autre, dont elles couvrent la partie d'enbas de leurs corps. Chaque iuppe a sa ceinture, & la plus basse bat iusques aux talons, la seconde iusques aux genoux, & la troisieme iusques aux cuisses : & par tout au lieu de bords il y a des houppes de diuerses couleurs. Elles se couvrent par devant iusques à la ceinture d'un voile, par derriere d'un petit manteau, & le tout est fait de feuilles de Palmier. Elles couvrent leur teste de quelque bonnet à la façon des hommes, & ont le visage decouvert. Il est vray que les femmes de basse qualité, & les esclaves n'ont rien decouvert que le bas. Mais il faut sçavoir que les femmes tâchent de s'habiller aussi à la Portugaise, portant sur la teste des bonnets de velours avec de la pierrerie, & des chaines d'or. Il est vray qu'il n'y a que les femmes de condition plus releuee qui soient vestuës de ceste sorte, veu que les autres suivent l'ancienne custume.

Le Roy mange à la Portugaise, rend la iustice en public, sans grande formalité de procez: veu que toutes choses sont debatues devant luy en peu de paroles.

Les Courtisans vsent de flustes, au son desquelles ils dansent la Moresque avec gravité, & cadence, d'une gentille disposition, & d'une façon agreable.

Tous sçavent les vertus de plusieurs herbes : tellement que chacun est son Medecin, & son Chirurgien. Ils guerissent la fièvre avec du bois de sandal pulverisé, & le mal de teste en s'ouvrant la veine. Ils se purgent par le moyen de certaine poudre faite de l'escorce de quelques arbres.

R I C H E S S E S.

ON ne peut assez estimer combien ceux du Royaume de Congo sont riches, puis qu'ils ont si grande abondance de metaux qu'ils peuvent communiquer à leurs voisins, en retenant encore pour eux une quantité incroyable. Et si l'on veut aussi considerer leurs Elephans, on iugera bien aisément qu'ils recoivent en eschange de leurs dents, dont ils ont grand nombre des choses qui ne sont de petit prix. Et si l'on iette aussi les yeux sur les Ciuettes, dont ils abondent, on verra bien tost combien elles doivent estre recherchees des marchands estrangers qui trafiquent en ces contrees. Que si passant plus outre on monte iusques à leur Roy, on ne doutera nullement que celui qui a tous ces Pais sous son obeissance doit estre grandement riche. Il est impossible de dire ce qu'il tire de ses Estats pour ce qu'il n'a pas les revenus en argent monnoyé comme nos Princes : mais on peut bien asseurer avec raison que ce Roy reçoit de grandes richesses de tous costez, veu que si ses sujets sont fort riches par le moyen du grand commerce qui s'y fait, on doit estimer leur Roy puissant, extrêmement riche, & aussi fourny de toutes choses que Monarque qui soit en Afrique.

La pesche des coquilles de mer de l'Isle de Loande est de fort grand rapport à ce Prince. Aussi tient-il ordinairement un Gouverneur en ceste Isle, qui a soin de ceste pesche.

Il tire beaucoup de la Prouince de Pamba, qui est estimée fort riche à cause de ses mines d'argent, & d'autres metaux : & à raison aussi des coquilles de mer qu'on y trouve le long du riuage, qui seruent en ces Pais au lieu d'argent monnoyé. On y fait aussi grand trafic d'esclaves, dont les Portugais achèptent un grand nombre, les enuoyant vendre en d'autres Prouinces.

Après cela, les toilles de la Prouince de Congo, qui se font des Palmiers d'Inde sont fort recherchees de tous costez, & l'on en fait un grand trafic en ces contrees, de mesme qu'on les va chercher aussi en la Prouince de Sundi, & les Portugais s'en chargent aussi fort volontiers.

Le cristall aussi qui vient en ceste Prouince n'est pas peu estimé, si bien que les habitans en recoivent quelques commoditez : mais non comme de tout le reste, dont j'ay delà fait mention.

Ce Roy reçoit aussi du Roy Angole de grands presents, qui tiennent lieu de tribut.

5 **C**E Monarque a tant de gens au Pais de sa domination, & ceux qui s'y trouvent sont tellement nez, & propres aux armes, qu'il donnera tousiours beaucoup de peine à ceux qui voudront entreprendre sur ses Estats. Toutefois il manque de villes, & places fortes, & n'a rien sur les frontieres qui soit en deffence. Ses gens ne sçavent pas aussi bien armer, qui seroit cause que ceux d'Europe les travailleroient grandement, s'ils entroient dans ce Pais en bon nombre : Mais quant à leurs voisins, ils sont assez capables de leur faire la loy, & de les tenir tousiours en bride, ou mesme de les emporter en les attaquant.

Mais afin d'en particulariser quelque chose, Pamba est le boulevart de tout le Royaume de Congo. C'est de la qu'on va faire la guerre à tous les rebelles, à cause que les habitans de ceste contree sont extremement courageux, & accoustumés à la guerre : tellement que lors qu'une necessité arrive, le Roy en tire aisément quatre cents mille hommes, armez à la façon du Pais.

Ces hommes qui sont forts au possible, ainsi que j'ay dict ailleurs, portent des espees longues, & larges, semblables à celles des Suisses, & ce sont les Portugais qui les leur fournissent. Outre ces espees, ils se servent fort bien de leurs arcs, & n'usent pas moins adroitement de leurs escus, qui sont faicts d'escorce d'arbres.

Le Gouverneur de Baïta a des arquebusiers, à cause que du costé des montagnes du Soleil, & d'Aphronire, vers la contree Orientale & Occidentale du Nil, il y a certains hommes nommez Giaquas parmy ceux de Congo, & en leur propre langue Agag, qui sont furieux, & attentifs à faire ordinairement quelque butin, tellement qu'ils font continuellement des courtes dans les Prouinces qui leur sont voisines, en particulier dans celles de Baïta, à raison dequoy ses habitans sont tousiours soigneux de se tenir prests, pour se mettre en armes au moindre bruit de leur venuë.

Ceste Prouince peut enuoyer à la guerre septante ou octante mille bons hommes de guerre bien armez, & propres à faire quelque bon effect. On peut iuger par ces deux Prouinces, dont nous auons faict mention, ce qui est des autres.

G O V E R N E M E N T.

6 **L**E Roy tient en chaque Prouince vn Gouverneur, qui faict sa demeure ordinaire en la capitale ville du Pais qu'il gouverne. Il y a beaucoup de Seigneurs en ces Estats : mais tous recognoissent le Roy pour Seigneur absolu de tout ce qu'ils possèdent. Ces Seigneurs sont nommez Mani, comme Mani Loanda, Mani Coanza, &c. Seigneurs de Loande, Seigneur de Coanze. Le Roy est extremement honoré des siens : aussi tient-il tousiours vn bon ordre en tout son Royaume par le moyen de ses Gouverneurs. Les Loix & Ordonnances n'y sont pas escrites, ains seulement l'on y iuge selon les anciennes coustumes, & les apparences de plus de droit en l'un qu'en l'autre. Il y a vne Loy entre autres, qui porte, que l'on ne peut vendre la peau de la Zebre, sans vendre par mesme moyen ce qu'elle a sous ses aisselles (qui est venimeux, ainsi que j'ay desia dit) afin que l'on oste tout sujet & moyen de mal faire. Et quant au pourceau marin, les pescheurs sont obligez si tost qu'ils l'ont pris de le porter au Roy, & sur peine de la vie.

Les façons de ceux de Congo en temps de guerre sont telles. Ils sont tous gens de pied, & s'espandent, où se resserrent selon la commodité du lieu, où se diuisent en plusieurs parties. L'armee marche, & est gouvernee selon les signals, & le cry qui vient du General estant au milieu : car soit qu'il vueille que l'on cōmence de cōbattre, où que l'armee tourne main droite, ou à main gauche, ou qu'elle aduāce, ou recule, ou face quelque autre chose : il y a ses signals particuliers, & certains cris, qui declarent sa volonte, & ce qu'il faut dire. Il y a trois principaux instruments dont on use, pour donner quelque signal que ce soit : car ils vident en premier lieu de certains instrumens de bois qui font vn horrible bruit lors qu'on les entonne, ou bien des tambours, auxquels ils mettent vne peau sur l'escorce d'un arbre creusé, & les battent avec des bastons d'uyoire. Ils ont encor vn instrument triangulaire faict en forme de pyramide renuëe, qui estant composé de lames de fer bien iointes, est battu avec des bastons de bois. Ils usent en troisieme lieu des dents d'Elephant creuses, lesquelles ils percent à costé comme le fifre, & leur font rendre vn son guerrier, qui reueille le courage, & le pousse à mespriser tous dangers.

Le General de l'armee est contrainct de porter vne grande quantité de ces trois sortes d'instrumens, tant grands que petits : car lors qu'il faut donner le signal à toute l'armee, il faut user

il faut vser de grand instrument : s'il ne faut le donner qu'à vne partie, on vse l'vn qui est moindre, selon le nombre de ceste partie : tellement que chaque troupe a son signal particulier qu'elle entend. Les soldats mesmes ont leur signal entr'eux : car les premiers sont ordinairement hommes disposés, qui au milieu du combat donnent courage aux autres avec leurs clochettes, & aduertissent de quelle sorte il faut euitier les dangers.

Lors qu'ils entrent au combat, ils s'elargissent, afin de pouuoir plus aisément lancer leurs dards, & euitier les coups des ennemis par leur disposition : & lors que les premiers semblent lassez, on sonne la retraicte : & soudain ceux qui combattent reculent peu à peu, pour faire place à ceux qui sont fraits, & cecy se fait quelquesfois, iusqu'à ce que toutes les deux armées viennent à se joindre.

Il n'y a personne au Royaume de Congo qui ait rien de propre, ny qui puisse disposer d'aucune chose en faueur des siens, d'autant que tout appartient au Roy, qui oste & donne comme bon luy semble. Les enfans des Roys sont mesme sujects à ceste loy : tellement que s'ils ne donnent au Roy ce qu'ils luy doiuent payer chaque année, ils sont priuez de ce qu'ils possèdent.

Le Gouverneur de la Prouince de Batte, qui est de la race Royale, s'assied tousiours le plus pres du Roy, & a telle autorité aux consultations qu'on ne luy ose contredire. Il mange quelquesfois à la table du Roy : mais debout, & personne autre ne reçoit cet honneur, non pas les enfans du Roy mesme. Il mene aussi des fluteurs, & autres jouëurs d'instruments ; qu'il mene avec luy de mesme que le Roy, & il a priuilege qu'il a des arquebusiers qui sont de son Gouvernement, chose qui n'est pas octroyee aux enfans des Roys, auxquels on donne, s'il est besoin, des arquebusiers estrangers.

On n'y faict guiere souuent perdre la vie aux criminels, & si quelque Congeois a procez avec vn Portugay, on le iuge selon les loix des Portugais.

R E L I G I O N.

EN COR que la Foy & Religion Chrestienne se soit glissée en ce Royaume, toutes-
9 fois il est plein d'habitans Idolatres, dont les vns adorent le Soleil, comme mary de la Lune, & le tiennent pour souverain Dieu, & portent honneur aussi à la Lune, comme à la femme la tenant au second rang. Quelques autres adorent ces animaux qui ont forme de dragons, dont nous auons faict mention, traitant de la qualité du Pais. Les autres adorent la terre, comme nourrisse & mere de toutes choses. Bref ils sont pleins de tant de folles erreurs, qu'on peut dire iustement, que parmy toute leur creance qu'ils ne sçauent ce qu'ils croient.

Mais il sera fort à propos de faire voir icy au Lecteur, comme on a faict entendre le nom de Christ en ces contrees, & en quel estime & quel honneur il y est pour le present.

Le Royaume de Congo se conuertit à la Foy Chrestienne, par le moyen de Dom Jean II. Roy de Portugal en ceste sorte : Jacques Cans, Capitaine de ce Roy, costoyant par son commandement l'Afrique, paruint apres vne longue nauigation au grand fleuve de Zaire, & continuant sa nauigation decouurit le long de son riuage plusieurs terres, où il trouua les habitans beaucoup plus agreables que ceux des autres Pais, qui auoient esté decouverts iusques alors. Et pour en pouuoir rendre raison plus particulierement à son Roy, il se resolut d'aller à la Cour de ce Royaume, où estant arrivé, & receu courtoisement, il se mit à remonstrer la vanité de l'Idolatrie, & la grandeur de la Foy Chrestienne, & trouua ce Prince si bien disposé, que retournant en Portugal, mena outre vn Ambassadeur, quelques enfans nobles, afin qu'ils apprissent la doctrine Chrestienne, & fussent bien instruits : puis ayans receu le Baptisme, renuoyez en leurs maisons avec quelques Prestres Portugais propres à precher l'Euangile, & à planter la Foy en ce Royaume.

Ces enfans demurerent deux ans en Portugal, & y furent du tout bien entretenus, soigneusement instruits en la doctrine Chrestienne, & baptisez avec grande solennité. Lors qu'ils furent donc bien confirmez en la Foy, le Roy Jean les renuoya en leur pais avec vne Ambassade fort honorable, enuoyant avec cela trois Peres de l'Ordre de saint Dominique pleins de vertu, & d'une singuliere doctrine, afin d'instruire tout ce peuple.

Ceux-cy estans arrivez à Congo, conuertirent premierement l'oncle du Roy avec vn sien fils. Le Roy & la Royne furent apres baptisez, & ce Prince fit bastir en peu de temps vne belle Eglise, sous le nom de sainte Croix. On brussa ce pendant vne infinité d'Idoles.

Le Roy receut au Baptisme le nom de Jean, sa femme celuy d'Eleonor, & leur fils aisné celuy d'Alfonce. Cestuy-cy fut excellent en bonté, & non content de sa conuersion, s'employa encor avec vn zele extreme à la conuersion des luieuts. Mais il ne faut estimer qu'on

kk

puisse semer la parole de Dieu, ou planter sa croix sans beaucoup de peine.

Ces Peres de saint Dominique, outre la malignité de l'air, & les chaleurs insupportables, qui les consumoient furent encor mal-traités par les Congeois mesmes. Car encor que lors que l'on parla des ceremonies sacrees, & des diuins mysteres, ils se montraient assez dociles & traitables, pour ce qu'il leur sembloit que les choses qui estoient au dessus de la capacité humaine, estoient plus conuenables à la Majesté de Dieu : toutesfois quand on commença de parler à bon escient de la temperance, continence, restitution du bien d'autrui, du pardon des offences receuës, & des autres articles de la perfection Chrestienne, on descouurit non seulement de la difficulté : mais encor de la contrariété & resistance. Le Roy mesme, qui du commencement auoit montré tant d'ardeur se refroidit entierement, & pour ne quitter les augures & les sortileges : & sur tout la multitude des femmes (qui est vne difficulté vniuerselle entre les Barbares) ne prestoit aucunement l'oreille aux Predicateurs, & les femmes ne pouuans souffrir d'estre chassées ou confinées en quelque lieu par leurs maris, ou d'estre postposées les vnes aux autres, mirent en trouble toute la Cour, & la ville où le Roy faisoit sa demeure.

Ceste troupe estoit poussee à tout ce bruiet, encor plus par Panse Aquitime second fils du Roy, qui n'auoit voulu receuoir le Baptisme, à cause dequoy il naquit de grandes inimitiez entre luy & son frere aîné, qui estoit affectionné à la Religion Chrestienne, & qui soustenoit la cause de Christ autant qu'il luy estoit possible.

Sur ces contrariétés le Roy mourut, & les freres vindrent aux mains. L'issue fut telle, qu'Alfonse avec trente-six soldats, inuoquant le nom de Iesus-Christ, & celui de saint Jacques à la Portugaise, deffit son ennemy, qui fut mesme pris, & mourut prisonnier en son opinion detestable.

Veritablement Dieu fauorisa Alfonso en ceste guerre avec des miracles tres-euidens. Car on dit qu'ainsi qu'il estoit sur le point d'entrer au combat, il vid vne si grande clarté, que ses compagnons & luy l'apperceuant, demurerent esblouis durant quelque temps, & avec vne telle esperance d'obtenir la victoire, & vne si grande allairesse de courage, qu'il seroit malaisé de l'exprimer.

Mais leuant apres les yeux au Ciel, ils virent cinq espees fort luyfante, que le Roy print lors pour ses armes, & que ses successeurs gardent encor auourd'huy. Les ennemis mesmes confesserent qu'ils auoient esté vaincus, non par le Roy, ou par ses soldats : mais par vne femme merueilleusement blanche, qui leur esblouissoit les yeux avec vne splendeur insupportable, & par vn Cheualier, qui avec vne croix de pourpre sur la poitrine, monté sur vn cheval bay les frappoit, & portoit par terre.

Après la victoire obtenue, il fit assembler tous les Seigneurs de son Royaume, & leur commanda de faire porter en certain lieu tous les Idoles, puis les fit brusler sur vne haute montagne. Il regna paisiblement l'espace de cinquante ans, durant lesquels il aduança merueilleusement la Foy Chrestienne par son autorité, & par son exemple, & mesme avec la Predication.

Le Roy Dom Emanuel n'abandonna pas l'entreprise, veu qu'il enuoya de Portugal en Congo douze Peres, de ceux que les Portugais nomment Bleuz, dont le Pere Jean Marie en estoit Chef, avec les Architectes, & des charpentiers & maçons pour bastir des Eglises, & avec vn riche appareil sacré, & le Roy Alfonso enuoya son fils Henry, & plusieurs Princes de son Royaume à Rome, où ils furent receus avec beaucoup de courtoisie. Le Roy Alfonso eut pour successeur son fils Pierre, au temps duquel on mit vn Eunuque en l'Isle de saint Thomas, qui eut aussi soing de Congo, où l'on establit en la ville de saint Sauueur vn College de vingthuit Chanoines en l'Eglise sainte Croix.

Le second Eueque fut de la Maison Royale de Congo, qui alla à Rome, & mourut à son retour.

Pierre eut pour successeur au Royaume, François, qui regna toutesfois fort peu de temps, & François étant mort, Diego qui estoit son parent luy succedda, & ce fut au temps de cestuicy, que Jean troisieme Roy de Portugal, entendant que le Roy ne se soucioit beaucoup de la Religion, & que les marchands, & les Prestres d'Europe, n'aydoient pas beaucoup à l'aduançer, ains scandalisoient avec leur mauuaise vie les nouveaux Chrestiens, y enuoya quatre Iesuites, pour remettre & dresser toutes choses. Ces Religieux estans arriuez premierement à saint Thomas, & puis à Congo, furent receuz du Roy assez courtoisement, & s'estans tout aussi tost employez au dessein, pour lequel ils auoient fait le voyage : l'vn d'eux se mit à enseigner la doctrine Chrestienne, & les lettres à six cents enfans, & les autres allerent prescher par le Pais avec vn fruit inestimable, veu qu'en cinq mois ils conuertirent plus de cinq mille personnes, & bastirent trois Eglises. Mais estans depuis tombez l'vn apres l'autre en de
longues &

longues & fascheuses maladies, ils furent contraincts de s'en retourner en Europe.

On fit en ce Temple le troisieme Euesque Portugais de nation, qui eut beaucoup de peine, à cause de la contumace des Chanoines, & du Clergé.

Ce pendant le Roy Diego mourut, & apres son decez il nasquit de grands debats sur la succession du Royaume, parmy lesquels presque tous les Portugais qui estoient à saint Sauueur furent tuez, excepté les Prestres. Finalement Henry frere de Diego, obtint la Couronne, & apres luy, qui mourut bien tost apres en vne bataille contre les Anziques. Aluare son fils regna. Cestui-cy, pour se reconcilier les Portugais, fit assembler tous ceux qui se trouuerent espars de tous costez par le Royaume, tant Religieux que laiz, & escriuit pour sa delcharge au Roy, & à l'Euesque de saint Thomas.

L'Euesque ayant veu les lettres passa au Royaume de Congo, & apres avoir donné quelque ordre à la discipline du Clergé, s'en retourna à saint Thomas, où il finit les iours.

Il aduint en partie pour l'absence, & en partie pour le defect des Euesques que l'aduancement de la Religion fut beaucoup retardé, & mesme elle fut en grand danger de s'amoindrir en toutes ces contrees, pour ce qu'un nommé François, homme de grande autorité, tant à cause de sa maison, que de ses richesses, commença à dire librement, que c'estoit chose vaine de tenir vne seule femme, & en fin abandonna la Foy Chrestienne, & fut cause que le Roy perdit beaucoup de sa premiere ardeur.

On dit que ce François estant mort, & enterré en l'Eglise sainte Croix, les diables descouurirent vne partie du Conuent de l'Eglise, & avec vn bruit espouventable le tirerent hors du tombeau, & l'emporterent: chose qui donna beaucoup à penser au Roy: mais il fut encor plus esmeu par vn accident qui suruint apres. Car les Giaquas estans partis de leur Pais entrerent en grand nombre dans le Royaume de Congo, & venus au combat avec le Roy le mirent en fuite, & l'effroyerent tellement, que ne se sentant pas asseuré dans sa ville capitale, il abandonna le Royaume, & se retira en vne Ile du Zaire, appelée du Cheual, avec les Prestres Portugais, & les Princes de son Royaume. Se voyant là reduit à l'extremité pour ce qu'ouit la perte de ses Pais, ses gens mouraient de faim, & se vendoient, pour viure l'un à l'autre à fort vil prix: Il eut recours à Dom Sebastien Roy de Portugal, & en obtint six cents soldats, avec la valeur desquels il chassa les ennemis du Royaume, & fut remis en son premier estat dans vne annee & demie. De son temps l'Euesché de saint Thomas fut donné à Anthoine de Glioue Castillan, qui apres plusieurs difficultez que le Gouverneur de ceste Ile luy mit en auant, fut en fin conduit à Congo, avec deux Religieux & quatre Prestres, & maintint quelque temps les choses en estat.

Cependant le Roy Aluare mourut, & eut pour successeur son fils portant mesme nom, qui ne manqua de solliciter Dom Sebastien, & Dom Henry Roys de Portugal, & puis le Roy Catholique, afin qu'ils luy enuoyassent des Predicateurs, & d'autres gens d'Eglise, pour maintenir & augmenter la Foy en son Royaume. Et sur ces beaux desseins il vint à mourir, laissant pour successeur vn sien fils, portant le mesme nom d'Aluare.

Au milieu de ces troubles, quelques Iesuites passerent en Congo, & se mirent à prescher ce peuple. Ces Religieux ont basti en l'Ile de Loande vne maison, où il demeure six ou sept Prestres, qui vont ça & là, où le besoin les appelle. Car le nombre des baptisez estant fort grand, il y a si peu de gens pour les entretenir en deuotion, que le mauuais grain surpasse de beaucoup le bon.

L'an mille cinq cents octante sept, le Roy Aluare, qui pour n'estre pas né de legitime mariage, estoit peu estimé de la plus grande partie des siens, voulut pres de la personne vn de ces Peres, par l'employ, & l'autorité duquel il se mit en reputation, & vint à estre honoré. Et Dieu favorisa sa bonne intention, pour ce qu'ayant contre luy vne sienne seur du costé du pere, & vn frere de ceste seur: il donna bataille à ses gens avec vne grosse armee, & se porta si vaillamment au combat, que non seulement il deffit l'armee, mais encor en mit à mort le General. Et apres il ordonna, qu'au lieu où il estoit mort on y bastiroit vne Eglise à l'honneur de nostre Dame: Et pour inciter les autres par son exemple, il fut des premiers à mettre la main à l'œuvre, & avec ses Edicts fort fauorables il aduança la Predication de l'Euangile, & l'entreprise de ces Religieux.

DE L'ESTAT DE L'EMPEREUR DE MARROC.

SOMMAIRE.

- 1 **S'**ENSVIT le discours d'un estat qui comprend deux fameux Royaumes. En premier lieu se presente la SITUATION du Royaume de Marroc: & sa diuision en sept Prouinces, desquelles est faite vne particuliere description. Et premierement de la Prouince d'Hee, son estenduë, ses bornes, villes principales.
- 2 Description de la prouince de Sus, sa situation, ses limites, & ses villes.
- 3 De Marroc.
- 4 De Guzale.
- 5 Ducale.
- 6 Hascora.
- 7 Teldé.
- 8 Partition du Royaume de Fez en sept prouinces, ses bornes, & son estenduë en general.
- 9 De Tencsmé premiere Prouince du Royaume de Fez, & ses principales villes.
- 10 De la prouince de Fez, sa longueur & largeur, & ses villes, & avec vne ample relation de la grande & superbe ville de Fez, ses Mosques & Temples magnifiques au nombre de sept cents Hospitaux, Estuues, Colleges, Hostelleries basties en forme de Palais, autres infinis edifices somptueux.
- 11 De la prouince d'Algar, ses bornes, ses villes & fortes places.
- 12 D'Elhabet, ou Ellabat, & ses villes.
- 13 D'Erris.
- 14 Garet.
- 15 Chaux.
- 16 De la qualité de l'air de ces prouinces, & de leur terroir abondant en huiles, miel, cire, sucre, coton, laines de Chevre, dont on fait camelots, peaux de Chevre, dont se fait le marroquin: mines d'or. Et quelles maladies regnent en ces contrées.
- 17 Dineres opinions de l'origine & descende de ces Barbares recommandez de toute ancienneté, pour la subtilité de leur esprit, & grande doctrine & science de la Medecine, excellens en l'art de cheuaucher à la genette, & ieux de Canes, viuans iadis de chair de singe, & s'habillans de peaux de chèvres, adorans le Soleil & la Lune comme Deytez. Et leur abominable sacrifice nocturne, auquel les lumieres esteinctes, ils paillardoiens avec la premiere femme qui leur venoit en main.
- 18 Quel est le naturel des habitans de Fez & Marroc, & comme ils sont ambitieux, infideles, coleres, vanteurs, soupconneux, disposés: mais non de grand travail.
- 19 De la demeure des Arabes aux deserts de ses contrées, viuans sous des tentes & pavillons, addonnez aux labourages, à la chasse, à la Poësie. Des habillemens de leurs femmes, & leurs fards & peintures, dont elles ornent leur visage.
- 20 Mœurs & façons de viure des Prouinces du Royaume de Marroc, & premierement de quelles viandes vsent ceux d'Hee, leurs vestemens & façon de liets, &c.
- 21 Mœurs & maniere de viure des habitans du Royaume de Fez. & spécialement la ciuilité de ceux de la ville de Fez, leurs belles Estuues, Hostelleries, trafic de moulins, habitations distinctes des Arabes mechaniques, & places où se fait le trafic de chaque sorte de marchandise. Les ceremonies du mariage, festins de nopces, la façon de leurs habits, & de leur boire & manger, leurs dances & bals. Leurs festes solempnelles, la façon de leur dueil à la mort de leurs parens. Leurs ieux & exercices ordinaires. La discipline & nourriture de la ieunesse.
- 22 Des troufortes de Deuins, Philosophes, Chimistes, Charmeurs & Enchanteurs de ce Royaume.
- 23 Ses richesses procedans de la fertilité du pays, abondant en bleds, & fruiets, citrons, oranges, sucre, olives, camelots, marroquins, toilles de coton: & grand reuenue de leur Prince, qui consiste en dîmes & premices des fruiets, & du bestail: en tailles qu'il exige de chaque arpêt de terre, & de personnes qui ont attein l'age de puberté, soit masculin ou femelle: en douanne & gabelles de Fez, & des autres villes: en succession de biens laissez par les Gouverneurs de ses prouinces, qu'il prend apres leur mort.
- 24 Ses forces consistans en gens de guerre & cavalerie, & sa vendarmerie de plusieurs sortes, composee de plusieurs, par la consideration desquelles on peut facilement iuger quel nombre de gens ce Monarque peut mettre en campagne.
- 25 Quelle est la famille qui commande maintenant aux Royaumes de Marroc & de Fez: & par quels moyens elle est paruenue à cet Empire.
- 26 Conseil du Roy, & Chambre de Iustice establee dans Marroc.
- 27 De la Creation, & cour des Roys de Fez, les Officiers, Capitaines, & Canaliers, Gouverneurs establis en chaque ville, Commissaires ordonnez sur les peuples pour la Iustice, Barons, gardiens, Pouruoyeurs, Maistre d'Escurie, Trompettes, Maistre de Ceremonies, &c. Et quel ordre ils tiennent, le Roy marchant en campagne.
- 28 Du Gouverneur, Iuges, Gabelleurs, Apoticaire, & Police de la ville de Fez.
- 29 Du Mahometisme diuisé en plusieurs sectes: & qui fut celui qui introduisit la loy de mahomet en Barbarie.
- 30 De l'introduction & establissement des Iuifs aux Royaumes de Fez & de Marroc: Et le miserable estat des esclaves Chrestiens de ce pays.

LE VIENS



LE VINS maintenant à faire le discours d'un Estat, qui ne peut demeurer en un estre, & qui a souffert & esprouvé tant de changemens, depuis peu d'années, que la chose sembleroit incroyable à celui qui n'en seroit assuré par une infinité de bons tesmoignages. Ce n'est pas que les estrangers courent tous les iours à la ruine. Ce sont les Princes d'une maison parvenue à la domination par mille actes meschans & indignes, qui combattent l'un contre l'autre, & se chassent à leur tour. Car Muley Cidan, qui est aujourdhuy Empereur de Marroc en auoit esté mis dehors il y a quelques années, & maintenant Muley Cheq qui s'en estoit emparé avec son fils Abdalla est réfugié en Algarbe, en Portugal, avec quelque nombre de Mores, & son fils Abdalla est maintenant aux montagnes à faire amas d'Arabes, pour venir fondre sur Muley Cidan, & luy faire le mesme tour qu'il a receu. Mais pour ce que la chose est trop connue, & qu'il s'appreste encor un remuement en ces Pais là, où les affaires seront en perpetuelle incertitude, tandis que le Muley Cheq, Muley Abdalla, & Muley Boufers seront en vie: ie quitteray ce discours pour venir au denombrement, & à la description des Estats qui sont possédez par ce Prince.

L'Estat du Serrif, qui comprend toute la partie de la Mauritanie, que les Romains nommoient Tingitanie, s'estend depuis le Cap Baiador iusques à Tanger, & depuis la mer Atlantique iusques à la riuere de Muluie, & encor plus outre, & dans cet espace sont les deux fameux Royaumes de Fez, & de Marroc.

Or pour venir à la description du Royaume de Marroc, il est assis entre le mont Atlas, & la mer Atlantique, & tire son nom de la principale ville, qui est ainsi appelée. Ce Royaume est diuisé en sept grandes Prouinces, qui sont Hee, Suz, Guzule, Marroc, Ducale, Hascore, & Tedlete.

La Prouince d'Hee a pour ses bornes du Ponent, & de la Tramontane la mer Oceane, du Midy le mont Atlas, & du Levant la riuere d'Estiuale.

L'une des villes de Hee, & des plus anciennes, est celle qui se nomme Tednest, qui est assise en une large plaine, & belle campagne, & fut iadis appelée Tamusis, & posée sur le fleuve Tensist. Elle est bien peu habitée, ou pour mieux dire abandonnée entièrement, pour ce que ses habitans aduertis que les Arabes pratiquoient de vendre la ville aux Portugais voulurent s'enfuir: mais ne le peurent iamais faire, tous ayans une bonne partie passé par le fil de l'espee, environ l'an mille cinq cents quatorze, & Teculer receut pareil traitement, qui estoit une ville belle & riche, ayant un bon port de mer, & meilleur trafic que Tednest. Hadecehis est aussi maintenant presque du tout ruiné. Le fort d'Ileusugaguen a échappé cet orage: mais celui de Tenent ne se peut garantir de tomber entre les mains des Portugais.

Outre ces places, vous voyez Tefelgdet, Tagresse, & Denet, & Culeihat Elmuridin, qui signifie la forteresse des Disciples, à cause qu'un certain heretique en la Loy de Mahomet s'y tenoit avec ses disciples, y preschoit sa doctrine, & tenoit bon contre le Roy de Marroc. On void aussi en la Prouince d'Hee la ville d'Iguilinguil assise sur la croupe d'une montagne, où les habitans naturels d'Afrique se fortifient contre les Arabes, avec lesquels ils sont perpetuellement en guerre. En ceste mesme Prouince on void sur la mer la ville de Tefethné, qui est un bon port de mer, non toutesfois capable de grands vaisseaux.

La Principauté de Suz est maintenant erigée en Royaume, au lieu qu' auparauant que le Serrif se fit Roy de Marroc, c'estoit une particuliere Seigneurie. Elle est outre le mont Atlas, tirant vers la terre des Negres, c'est à sçauoir sur l'extremité de ce qui est proprement Afrique. Elle commence à l'Ocean du costé du Ponent, & au Midy les sablons des deserts de Lybie, au Levant la grande riuere de Suz, & le mont Atlas luy est au Nort, c'est à sçauoir du costé d'Hee.

La premiere de ses villes, c'est Messe, ou Masse, posée sur un Cap, que les Modernes appellent Cap de Gilon, & c'est un amas de trois villes assis sur la poincte de ce Captenre, par lesquelles passe ladite riuere de Suz. Ceste ville est peu de chose, à raison du mauvais Pais où elle est assise. Outre Messe, vous auez la ville de Teijent assise en une belle & large campagne, & diuisée en trois parties, comme faite en triangle, ces parties estans separees l'une de l'autre. Tarudant est aussi une ville de Suz, où le Lieutenant du Roy de Fez se tenoit, lors que ceux de Fez commandoient à la Mauritanie. On void encor au Royaume de Suz la ville de Tersi, assise entre la mer Oceane, & le mont Atlas, & la derniere des places de ce Royaume: c'est Tagauoit, qui est la plus grande des villes de Suz, assise en la campagne, & ayant un peuple fort riche.

kk iij

- 3 La Prouince de Marroc a pour ses bornes du Ponant la montagne de Nefise, qui s'estend vers l'Orient iusqu'au mont Hadimeï, & descend vers le Nort, iusqu'à la riuere de Tensit, iusqu'à ce qu'elle se ioinct à celle d'Asfinuard, qui la separe du Pais de Hee, & est faite en forme triangulaire.

Outre Marroc, elle contient la ville de Tenezze, puis d'Elgumuba, qui est vne forte place bastie sur vne fort haute montagne, & enclose de plusieurs autres monts, & au bas de ce lieu on trouue la source de la riuere d'Asfinal. On void encore la ville d'Imizmisi assise sur vn roc du mont Atlas. Elle est assez grande, & aupres d'elle vn passage estroit du mont Atlas appellé Burris, par lequel celuy qui veut aller en Guzule est necessairement contrainct de passer. Mais ceste ville se despeuple tous les iours, & n'est plus si florissante qu'elle a esté.

On trouue en la campagne voisine de ceste ville trois chasteaux nommez Tumeglasi. Il y a aussi la ville de Tefrasi, qui est à sept petites lieues de Marroc. Quant à la ville de Marroc, elle n'est plus si belle qu'elle a esté iadis. Et ce qu'on y void encor de beau, c'est le chasteau, & Palais Royal, que Mansor, ou Almanzor, le plus puissant Roy de toute la Barbarie, y fit bastir aussi grand qu'une assez belle ville. Pres de Marroc on trouue Agmet bastie sur vn coustau au mont Atlas, & assise pres du fleuve Tensect. Elle est ruinee, excepté le fort où il se tient bien peu de personnes.

- 4 Guzule confine avec la Prouince de Suz, & a pour sa borne du Couchant le mont d'Ilde, du Nort le mont Atlas, du Leuant la Prouince d'Hee, & du Midy la Lybie, & en tout ce Pais, il n'y a ville, ny cité, ny chasteau, non seulement quelques villages & hameaux.

- 5 Quant à Ducalia, c'est vne Prouince voisine de l'Ocean, du costé du Ponant, & au Cap, dit Vlagium par les anciens, & par d'autres monts du Soleil : mais les modernes Europeens l'appellent Cap de Cantin, les Mores Gebelehudic. Elle a au Midy le fleuve de Habid, au Leuant le Pais de Tedlé, & au Nort celuy de Tenesme. Il y a peu de villes closes, & celles qui y sont, sont presque toutes tenues par les Portugais, qui prindrent de nostre siecle la ville d'Azasi, sous pretexte de faire vn magazin pour leur marchandise. Vous avez encor Tit, qui se rendit presque en mesme temps aux Portugais. Elmedine fut abandonnee de ses habitans, de peur qu'ils eurent des Chrestiens, de mesme que les villes de Centpuis, Subeit, Temetracost, Terga, & Bullahuan, toutes lesquelles furent saccagees & ruinees, quand les Portugais prindrent la ville d'Azamor, assise sur l'emboucheure du fleuve Ommirabili, ce qui aduint l'an mille cinq cents treize au mois de Septembre, sous le regne de Dom Emanuel de Portugal.

- 6 La Prouince de Hascora commence aux montagnes de Ducale, vers le Septentrion, confine avec l'Ocean du Ponant, avec Tedle du Leuant, & avec Marroc du Midy. Les villes de ceste contree sont Alemdim, Tagodast, Eluimua, ville moderne, & Bzo ancienne, assise sur vne haute montagne.

- 7 Tedlé est la derniere des Prouinces de Marroc, & a pour ses bornes du costé d'Occident la riuere Quadelhabid, qui signifie riuere des esclaves, celle d'Ommirabili du Leuant, le mont Atlas du Midy, & le Pais de Tenesme du Septentrion. Ceste contree a la figure comme en triangle, faisant la pointe vers le Midy, & s'elargissant du costé du Nort. La principale ville de ceste Prouince le Tesza, ville ancienne, & qui prend son nom de certaines pierres, ainsi nommees, dont toute la ville est bastie. Elle est bastie sur la riuere de Deymé. Pres de ceste ville on void celle d'Elfza, bastie sur le fleuve Ommirabili, dans lequel entre celuy de Deymé, & tous deux sortent du mont Atlas.

Ceste ville est sous la Iurisdiction de la precedente. On void apres Chithite, qui a long temps soustenu la guerre contre le Roy de Fez, & la derniere place est nommee Eytluad abondante en toutes sortes de viures.

- 8 Pour le regard du Royaume de Fez, il est diuisé en sept Prouinces, qui sont Tenesme, Fez, Azaghar, Elhabet, Errif, Garer, Elchaus, chacune desquelles fit au temps passé vne Seigneurie particuliere, comme aussi Fez estoit vne simple Iurisdiction, iusqu'à tant qu'un certain Marin l'erigea en Royaume.

Tout ce Royaume a pour ses bornes du Couchant la mer Atlantique, & de ce costé il s'estend du fleuve Ommirabili, & de la ville d'Azamor iusqu'à la ville de Zadger, du Nort le destroit de Gibraltar, & la mer Mediterranee, & en partie aussi d'Atlantique, du Couchant la riuere de Muluie, & du Midy le Royaume de Marroc.

- 9 La Prouince de Tenesme commence sur l'Ocean Atlantique du costé d'Occident, & ses habitans sont ceux que Ptolomee nomme Cauues. Ses autres bornes sont du costé d'Orient le fleuve Buragrag, & du Nort l'Ocean, de mesme que l'Ouest, ou du Ponant, ainsi que nous auons deia dit. Ce Pais est plus long que large, veu qu'il a quarante lieues de long, & del'Atlas à l'Ocean seulement. Ce fut iadis la fleur de toute la Mauritanie, Tingitanie, veu qu'elle contenoit

contenoit plus de quarante villes, & plus de trois cents chasteaux & villages.

La premiere ville de ceste Prouince est Amfa, que les Romains ont iadis bastie sur le bord de la mer Oceane. Elle est à trente lieues du mont Atlas, & à presque entieremēt esté ruinée par les Portugais : & assez pres de là on void la ville de Mansor, qui a esté traitée comme la precedent.

On void aussi assez pres d'un petit fleuve nommé Guirla, la ville d'Adendum, le long des murs de laquelle passe vne grande source d'eau comme vn estang. La ville est ruinee comme le reste de celles de Mauritanie, qui essayèrent la fureur de la guerre, lors que les Mahometans se battirent sur les differents des Docteurs de leur fausse loy.

On trouue sur ce costé la ville de Tegeyer, habitée seulement d'un pauvre peuple, & de quelques mareschaux, que les Arabes contraignent de s'y tenir, afin de travailler pour les laboureurs qui cultiuent la terre. Car les Arabes en sont maistres, ou pour mieux dire les plus forts y commandent, & ce Pais est comme terre de conqueste. On void encor sur le riuage de la mer la grande ville de Rabat, ou Rubut, dont le Roy Mansor, ou Almanzor fut fondateur. Elle est assise sur l'emboucheure du fleuve Burugrug, & n'est plus rien au regard du passé, veu qu'il n'y a pas cinq cents maisons peuplées, au lieu que du temps de Mansor elle estoit des plus peuplées d'Afrique. Il n'y a maintenant en son enclos que des iardins, vignes & prairies.

En tirant tousiours vers le destroit de Gibraltar on trouue Salan, qui porte le nom ancien, quoy que les Barbares l'appellent Zalé. Il y a vn Palais, qui seruoit pour la sepulture des Roys du Pais, & des Princes de leur sang. Apres Zalé vous voyez les ruynes de Fanzara, bastie sur le fleuve Subu, qui retient encor son ancien nom. Assez pres de Fanzara on void Mahmore, ou Marmora, enuiron à demie lieue de la mer, deuant laquelle fut defaite l'armée des Portugais par le Roy de Fez, quoy que les Chrestiens tinssent la place, laquelle ils furent contraincts de quitter par le peu d'intelligence, qui estoit entre les Generaux des armées des Roys de Portugal & de Castille.

Vous auez le long de ceste riuere la ville de Mecnasé fort peuplée, & assise en belle campagne, loing du mont Atlas, enuiron six ou sept lieues, & de Zalé enuiron vingt cinq, & quinze ou seize de Fez. Elle est assez grande & forte, & a ses rues larges, & de l'eau en abondance par le moyen d'un Aqueduc, qui monstre assez qu'elle se ressent de l'ancienne diligence des Romains. Il y a encor les villes de Gemiha Elchman, Camis Mergara, & Bambasil, qui sont ruinees, & la derniere appartient aux Prestres Mahometans. Mais on trouue encor la ville de Tefelselt bastie sur la campagne sablonneuse, entre les riuieres d'Odet, & de Bat, & à cinq petites lieues de la mer.

La Prouince de Fez s'estend vers le Leuant, depuis la riuere de Buragraga, iusques à celle d'Inaue, qui est enuiron l'espace de cent milles, du Nort la riuere de Subu, du Midy le mont Atlas. Là est la grande & superbe ville de Fez, nommée Sylde par Ptolomee. Elle fut premierement diuisée en deux, y en ayant vne partie de chaque costé du fleuve, & chacune ayant son Seigneur, & Mosly de la secte de Mahomet. Mais le Roy de Luntana l'accagea ces deux villes, mettant à mort les Mosfiz, & des deux n'en fit qu'une seule ville.

Or pour en faire la description. Fez est vne fort grande ville, & à present la plus grande de toute la Mauritanie. Elle est assise presque de tous costez sur des montagnes & collines, de sorte qu'il n'y a que le cœur, & le milieu de la ville qui soit en plaine. L'eau y entre de deux costez, à cause que la riuere se diuise en deux canaux, l'un desquels vers le Midy arrose les murs de la nouvelle ville de Fez, & l'autre qui est vers le Ponant laue les rues de la ville. Puis l'eau estans dans la ville, il y a plusieurs canaux pour la conduire par les maisons du Roy, des Seigneurs, & des Citoyens, & pour le seruice des Mosques, & Hospitaux, dont il y a vn fort grand nombre, & pres desquels il y a des lieux qui seruent à retenir l'eau, afin que les rues estans sales on déboude les canaux de ces reseruoirs, & que par l'impetuosité de l'eau les ordures en soient emportées. Toutes les maisons de Fez sont presque basties de brique, & richement peintes d'azur, & d'autres couleurs, en feuillages & arbrisseaux.

Il n'y a logis qui n'ait sa cour, autour de laquelle ils bastissent, faisant des galeries pour aller d'un corps de logis à l'autre, & n'y a maison qui n'aye vne tour bien haute, & dedans plusieurs petites chambres bien aérées, où les femmes se vont promener estant lassées de la besongne.

Il y a enuiron sept cents Temples, ou Oratoires, entre lesquels on en compte cinquante magnifiques, & superbemens bastis. Il n'y a Mosquee, ny Chappelle qui n'aye la fontaine, & vne tour pour crier Ala. La principale Mosquee de Fez se nomme Carruen, qui est merueilleusement grande, veu qu'elle a enuiron vn mille & demy de tour, & trente & vne porte pour

y entrer. Il y a trente-huict arcs en sa voute en longueur, & quelques vingt en largeur, & tout autour on void plusieurs portiques, qui seruent comme de magazins pour y garder l'huyle, les lampes, & autres choses necessaires à la Mosquee, veu qu'il n'y a arc où l'on ne voye vne lampe allumee, & l'on fait estat que toutes les nuits il y en a neuf cents qui esclairent. Au cœur de ce Temple il y a de grands vases de bronze, où ils tiennent vn nombre infiny de lampes allumees. Ceste Mosquee a deux cens escus de reuenu tous les iours. Il y a d'auantage dans Fez deux fort beaux Colleges, outre beaucoup d'autres, qui sont tels, qu'on diët que le Roy Habu Henon despença quatre cents quatre-vingts mille escus à en bastir vn seul. Il y a aussi force Hospitaux, & estuues, qui ne cedent nullement en beauté aux Colleges. Il y a aussi plus de deux cents hostelleries à Fez, qui ressemblent à des Palais, ou logis de quelques Princes.

On y void aussi plus de quatre cents moulins, qui appartiennent pour la pluspart aux Colleges, & aux Mosques : & la place des marchands est close de tous costez comme vne ville.

Pour le regard de la nouvelle ville de Fez, elle est toute ceinte de belles, fortes, & hautes murailles, & est bastie en vne assez grande pleine, pres de la riuere, & loin de l'ancienne ville environ demie lieuë, entre le Ponant & le Midy. Il passe entre les deux murailles vne partie de la riuere, à sçauoir du costé du Septentrion, où sont les moulins, & l'autre partie se fend encor en deux bras & canaux, l'un desquels passe entre les deux villes, du costé de la forteresse, & l'autre le long de quelques vallons, & iardins qui sont pres de l'ancienne ville. Jacob fils d'Abdulah, premier Roy de la famille de Marin, diuise ceste ville en trois, mettant en la premiere partie son Palais, & celuy de ses enfans & freres. En la seconde on ne void guiere que les Escuyers du Roy, & plusieurs hostels & maisons pour les Capitaines, & autres de sa suite, & entre ces deux murs fut dressé le corps de garde des soldats destinez pour la suite de la Cour, & defence de la personne du Roy, comme aussi la mesme il y a vn logis pour le Gouverneur de la ville. La troisieme seruoit encor à la garde du corps du Roy, & pres de là est le lieu où l'on bat la monnoye, & où l'on marque tout l'or & l'argent qui est mis en œuvre.

Quant aux villes de ceste Prouince, on y void Macarmeda assise sur le fleue Iuaucn en vne belle campagne : mais elle est toute presque ruynee, horsmis les murailles. A trois lieuës de Fez est Baue sur la mesme riuierie : mais les guerres ciuiles l'ont ruynee. Sur le mont Zaton on void la ville de Gualili, qui fut ruynee par les Afriquains, & rebastie par Idris, qui y est enterré & honoré comme quelque saint homme. On void assez pres de là vne autre ancienne ville nommee le Palais de Pharaon, combien que les Egyptiens n'ayent iamais eu commandement sur ceste Prouince. On trouue apres Maquille, ancienne place, puis les villages de Benignariben & Afeis.

- 11 La Prouince d'Argar a pour ses bornes du costé du Nord l'Ocean, du Couchant la riuere de Buragrag, nommee Lix par les anciens, du Leuant les monts de Cumere, & vne partie Zarbon & zelag, qui la separent du Pais de Fez, & du Midy la riuere de Bunazar. Elle a quarante lieuës d'estenduë en longueur, & environ trente en largeur.

Les villes & places de ceste Prouince sont Giumba, qui fut fondee par les anciens Africains, & n'est rien à present, veu qu'il n'en paroist autre chose que les fossiez. Sur la mer on voit Larache, ou Lara, bastie sur la riuere de Luccus, dont le port est bon, bien que son entree soit fort difficile. On trouue apres la ville bastie par Mansor Roy de Marroc, nommee Cesar Elcabie, qui signifie grand Palais de la fondation.

- 12 La Prouince d'Elhabat, ou Ellabat, ou Habat, a pour ses bornes du Nort l'Ocean, du Midy la riuere de Guarga, du Leuant les montagnes voisines du Destroiët de Gibraltar, & du Couchant les marécages d'Asgar. Ce Pais est de plus grande estenduë que celui d'Asgar. Ses villes sont Exagen, assise sur la croupe d'une montagne voisine du fleue Guarga, ou Zuerga, & loing de Fez trente-cinq lieuës. Les Portugais vont faire leurs courses iusques là, & pour ceste cause les habitans y tiennent ordinairement quatre cents cheuaux en garnison. Sur la mesme riuere on void la ville de Banitendé, qui est peu habitee, & assez prez de la Mergo : puis Tansor, Agla, & Narangia : & apres Basra, qui n'est maintenant qu'un desert, bien que ses murailles ne soient ruynees. Il y apres Homar, autresfois bien peuplee, mais deshabitee depuis que les Portugais tiennent ceste coste.

- 13 Le Pais d'Errif commence du coing du Destroiët de Gibraltar vers le Ponant, & va tirant au Leuant iusqu'au fleue Nochor, nommé Molochat par Ptolomee, qui est l'espace de plus de soixante & dix lieuës. Il a pour borne du Midy le mont Atlas vers la riuere de Guarga, qui est le terroir du Pais proprement appellé Fez, & du Nord il a la mer Mediterranee. Il y a peu de villes, mais vn fort grand nombre de villages. La premiere ville est Terga, puis Belis assise entre deux

entre deux montagnes, qui a vn bon port. Pres là on void les Isles de Tegassa, Gebba, & Mezemme assise sur vne montagne.

La Prouince de Garet confine du Levant avec la riuere de Muluie, & partie du Pais de 14
Chauz, du Ponant avec la riuere de Nocor, & partie de la contree d'Errif, du Midy avec les monts voisins des deserts de Numidie, ou Bile dulgerid, & du Nord avec la mer Mediterranee, duquel costé elle regarde l'Isle Formentiere, & l'ancien Royaume de Valence. Elle a environ vingt-cinq lieues de long, & vingt de large. Les villes & places plus considerables sont Tezzota, assise sur vn costau, vers lequel il n'y a accez que d'vn costé, puis la ville de Migeo, & encor sur la mer vne autre place nommee Iassarain, place moderne, & fondee par les Mahometans sortis de la race de Marin. Et tout ceste Prouince de Garet est diuisee en trois parties: en l'vne desquelles on void les villes, en l'autre des montagnes, & en la troisieme le desert qui s'estend depuis la mer Mediterranee iusques au desert de Chauz.

Chauz, derniere Prouince du Royaume de Fez en contient presque la troisieme partie, 15
veu qu'elle a de long 190. mille, c'est à sçauoir, depuis la riuere de Zha du costé du Levant, iusques à celle de Gurguigara du couchant, & sa largeur est de 170. mille. Car elle comprend toute la partie du mont Atlas, qui regarde la Mauritanie, & vne bonne partie de la plaine, & des montagnes limitrophes de la Lybie.

On met entre les villes Theurerte assise sur vne colline qui se trouue en vne large campagne. Elle est toute environnee de deserts. On void encor les murailles d'Hadaggia, qui est comme vne Isle entre les riuieres de Mululo, & de Muluie. On y voit aussi la ville de Dubdu, qui porte le nom ancien de sa montagne. On trouue apres la ville de Teza, forte & riche, assise en la campagne au bas de la montagne de Dubdu, sur la riuere de Mululo. C'est comme l'vniuersité des Pais voisins, & il y a des Colleges comme à Fez. On y void encor entre les montagnes deux villes, dont l'vne est nommee Sofroy à demy ruinee, & l'autre Mezedaga. Pres du mont de Cunaigel Gherben, qui signifie passage des corbeaux, on void là la petite ville de Tenzergue sujete aux Arabes qui en ont ruiné vne autre aupres, qui se nommoit Vmen lunaibé.

Q V A L I T E'.

PARLANT generalement du Royaume de Marroc, il abonde en bleds, fruits, huiles, 16
miel, cire, & sucre, & laine de chevres, de laquelle on fait des camelots, de mesme que des peaux de chevres on fait des marroquins, qui prennent le nom du Royaume, où ils se font. Il est arrousé de riuieres de Tensist, & Ommirabili, qui viennent du mont Atlas: mais celle de Tensist sort au territoire de Marroc, & reçoit les riuieres de Sifelmel, & Nassi. Et quant à Ommirabili il prend sa source des montagnes fort hautes, du costé que la Prouince de Tedles confine avec le Royaume de Fez.

Mais afin de dire en particulier la qualité de ce Pais, comme n'estant par tout de mesme forte, il vous faut sçauoir que la Prouince d'Hee a vn Pais aspre, pierreux, plein de hautes montagnes, & de force bois, & toutesfois qu'il a beaucoup de vallons, & de petites riuieres. Il abonde en orge, millet, & miel, dont les habitans se nourrissent, sans faire estat de la cire: mais il ny faut parler de froment. Il y a d'vne sorte de fruit qu'ils nomment Arga, qui ressemble aux olives: mais son arbre est espineux, & de ce fruit ils font de l'huile de peu de valeur, duquel ils se seruent à apprestier leurs viandes, & ils en mettent aussi aux lampes. Il y a force venaison, comme cerfs, chevres, & ils manquent aussi de lievres. En la montagne Demenser, à qui est vne partie du mont Atlas, il y a force fer. Les lentiques & les buis croissent fort grands, & viennent en grand nombre en ces montagnes.

En la contree de Suz, & le long de sa coste on trouue grande quantité d'ambre fin, & le terroir de la ville de Tejeut est gras, fertile, & abondant en orges, fromens, & autres grains. Il y croist aussi assez grande quantité de sucre, que les habitans ne sçauent pas bien cuire, ny affiner, qui est cause qu'il est noir. Il y a aussi de l'or, & vn peu d'argent, & c'est là qu'on accoustre les marroquins. Pres de Tarodant, les Arabes ont leurs pastis pour la nourriture de leurs bestes. Le terroir de la ville de Teldhi est fertile en grains, en sucre, & en pastel. Il vient aussi de fort belles figues au Pais de Suz, de mesme que des pesches, & des dattes, veu qu'il y a en beaucoup de lieux vn grand nombre de palmiers: mais les dattes n'en valent guiere.

Il y a des mines d'or en la montagne de Halem, à raison dequoy les habitans sont continuellement en debat & guerre.

La Prouince de Marroc abonde en toute sorte de grains, en bestail, fruits, & bonnes eaux. Mais les montagnes qui sont froides y sont aussi steriles, & il n'y croist guiere autre chose que de l'orge. Il est vray qu'il y en a peu, & toute ceste Prouince est presque vne plaine continue, selon le tesmoignage de Leon d'Afrique,

Guzule produi& grande quantité d'orge, & nourrit force bestail. Il y a pareillement des mines de fer, & d'airain.

Quant à Ducale, il y a quelque bon Pais : mais c'est tout ce qu'il peut faire que d'entretenir ses habitans de ce qu'il y produi&. Il y a vn lac pres de Mont verd, qui nourrit de poisson toute la contree.

Hascore abonde merueilleusement en huile & en chevres, du poil desquelles on fai& les camelots, ainsi que des peaux de marroquins.

Les champs y sont de fort grand rapport, & l'on y trouue vn grand nombre de vergers pleins de toute sorte de frui&. Les oranges y croissent extremement, & les vignes y portent des raisins rouges, dont les grains sont aussi gros que des noix. Il y a icy semblablement grande quantité de miel, & force belles & bonnes figues. Il y a aussi quelques lieux de mines de fer.

Quant au Pais de Ted'es, sa campagne porte toutes sortes de biens necessaires à la vie, & ses costaux abondent en orge, & nourrissent grand nombre de chevres.

Quant au Royaume de Fez, l'air y est en quelques lieux bien temperé, & en d'autres vn peu facheux. Et combien que le Pais soit entierement aspre en beaucoup d'endroi&, & qu'il y ait des tres-froides montagnes, & quelques deserts, toutesfois à le considerer generalement il est fort fertile : mais en vn lieu plus, & en l'autre moins. Car il abonde tellement en grains & en frui&, qu'il cede pour ce regard à bien peu d'autres. Il y a aussi beaucoup de vignes & d'oluiers, & grande quantité de figues, & d'amandes, de mesme que de cotton. Il nourrit aussi force bestail, tant à corne qu'autre. Il y a force cheuaux, & vn grand nombre de chameaux, de cheureux, & de lievres. Mais venons à considerer particulièrement toutes les Prouinces.

La Prouince de Fez est entierement pleine, & l'air y est fort temperé. Il y a grande quantité de cheuaux, vn si grand nombre de moutons, brebis, & semblables animaux, que non seulement elle en a pour sa prouision, mais encor en fournit toutes les montagnes de Gumer. Il y a fort peu de forest, & nonobstant cela on y void grand nombre de chevreux, & de lievres, il y vient aussi grande quantité de cotton.

En la Prouince de Tedesme qui est presque toute pleine, & d'assez bon rapport, il y a le long de la riuere Odet de grandes & espais& forests pleines de lyons, les plus farouches presque de toute l'Afrique, tellement que ceux de Tefeselt n'osent sortir qu'à grosses troupes, & les voyageurs estans contrain& de demeurer quelquefois en la campagne la nuit, se retranchant, & font le guet par necessité, s'ils ne veulent seruir de pasturage à ces bestes.

La Prouince d'Azgar est grosse & fertile, assise en vne pleine & large campagne : C'est de ceste Region que ceux de Gumer tirent des viures. Le Pais est fort agreable, & l'air des plus sains. Il y croist grande quantité de cotton, & l'on y void mesmes choses qu'en la Prouince de Fez.

Quant aux Pais d'Elhabat il est merueilleusement fertile, & produi& toute sorte de frui&. Toutesfois le terroir de Tanger n'est guiere bon, si ce n'est en certains lieux, où il se trouue quelques fontaines, où l'on a dressé des iardinages, & le reste n'est rien que sable.

Il y a forces montagnes, & entre les autres huit, c'est à sçauoir Rabona, Bemifenscaré, Beniharos, Chebib, Benichessent, Angera, Quadez, & Beniguedafeth, qui sont toutes extremement fertiles, & entre les montagnes de ce Pais il s'en trouue de merueilleusement hautes, & de fort difficile accez.

Le Pais d'Errif est entierement aspre, & plein de montagnes fort froides, où il y a de grandes solitudes, garnies d'arbres fort espais, qui sont beaux & droi& au possible. Il ne produi& poin& de froment : mais il a grande abondance de vignes, figues, oliues, amandes. Il y a fort peu de boeufs, & de brebis : mais on y void vn grand nombre de chevres, d'asnes, & de singes.

Le Pais de Garet est sec, sablonneux, & desagreable, & presque semblable aux deserts de Numidie, & ces deserts sont entierement sans eau. Il s'y trouue force bestes farouches de diuerses sortes, qui causent que ceux qui doiuent passer par là n'oteroient le faire, qu'ils ne soient en grosse compagnie. La montagne de Sahir qui y est abonde en fer, & en orge, & au mont de Guardan il y a force cheuaux.

Pour le regard de Chaulez, c'est vn Pais aspre & raboteux pour la plus grande partie, & il y a aussi force deserts.

La montagne de Dubdu est fertile à merueilles, à cause du grand nombre de fontaines qui en coulent. Mais ceste fertilité n'est que pour le fai& des iardinages, veu qu'il faut que ceux de Dubdu aillent

Dubdu allent querir les autres viures au terroir de Tezze, où l'on trouue de fort bons vins, & abondance de toutes choses necessaires.

Au mont de Magara, qui est pres de Tezze, il y a force bocages, & vn bon terroir, où l'on trouue assez de grain & de lin, comme aussi de l'huyle, & des troupeaux, principalement de chevres. Au mont de Gauara on trouue grand nombre de Leopards & de Singes dans le bois, & ailleurs, des lins & des orges en abondance. Au mont Baronis il croist des raisins : mais les habitans qui ne boient point de vin ne prennent pas peine à y multiplier la vigne. Le mont de Guertenagé est haut & difficile : mais abondant en grain, lin, huyle, citrons & coings. On void au mont de Gueblen des neiges tout le long de l'année. Celuy de Iefferen a grand nombre de mines de fer, mais il n'y croist chose aucune pour la nourriture des hommes. Le mont de Seclgo est garny des pins, & de fontaines, & plein de Lyons, de Leopards, & de Singes. Au mont Beni Merafen, il y a force ânes, & force cheuaux, & de là vient qu'on y void vn grand nombre de mulets.

Mais afin de conclure ceste partie, & de dire tout ce qui est de la qualité de ces deux Royaumes, apres les auoir considerez l'vn apres l'autre, il sera bon de dire maintenant en gros, tout ce qui est necessaire pour auoir vne cognoissance generale des deux tout ensemble.

Le dy donc que tout le País qui est entouré du mont Atlas participe plus du froid que du chaud, & qu'il y a assez de fruits & de grains, excepté du froment : mais on n'y trouue guieres de bonnes eaux. Le mont Atlas est froid, & tousiours chargé de neige, & les valons qui en sont voisins sont fertiles : mais plus du costé de l'Océan que de la mer Mediterranee. Le froid commence en ces País en Octobre : mais plus avec pluyes que quelecs, & l'on n'y a froid que le matin.

Le temps y est inconstant en Feurier, les vents y sont vehemens au mois de Mars : & toutefois du tout necessaires pour les grains, & aussi pour les arbres. Mais en Avril tout se va aduancant : de sorte qu'à la my May on y mange des figues meures, & en Iuin des raisins, & entre Iuin & Iuillet les pommes, poires, prunes, & autres fruits semblables sont en leur saison & maturité. En Octobre on recueille les coings, grenades, & certaines pommes, & en Novembre les oliues. Depuis la fin de Feurier iusques en May, il y fait le plus beau temps qu'on puisse voir : toutefois s'il ne pleut depuis le vingtcinquième d'Avril iusques au cinquiesme May, l'on n'espere point de bonne année, & les habitans appellent ceste pluye Nasan, comme qui diroit eau benite. L'Esté y est fort chaud au possible, le temps estant tousiours serain, & s'il y pleut ceste eau n'est nullement saine, & cause d'horribles fieures, qui font mourir beaucoup de personnes. Les maladies qui regnent ordinairement en ces contrees, sont des douleurs de teste, mal aux dents, & à l'estomac, la teigne aux enfans, de grandes colliques ordinaires, des sciaticques, & la goutte, & encor tous sont sujets à estre galeux : & le pis est, que la grosse verole y est ordinaire, & s'attache tellement par tout, qu'il n'y a ville en Barbarie, où la plus grande partie des habitans n'en ayt esté atteinte.

MOEVRS ANCIENNES.

LE País de Barbarie a esté desnüé d'habitans durant plusieurs siècles, de mesme que la Numidie. A raison dequoy quelques vnes disent, que le peuple de ces contrees a tiré son origine de ceux de Palestine, qui y firent leur retraite, estans chassés par les Assyriens. Quelques autres disent que ces Barbares sont descendus des Sabeens, peuples de l'Arabie heureuse, auant qu'ils fussent chassés par les Assyriens, ou par ceux d'Ethiopie. Les autres ont opinion, qu'ils sont sortis de quelques habitans d'Asie, qui s'enfuirent premierement en Grece, estans chassés par leurs ennemis de leur patrie, puis estans encor poursuivis par les mesmes au lieu où ils s'estoient retirez vindrent en Barbarie, & s'y arresterent, laissant leurs ennemis en Grece. Il y a eu autresfois de tres-excellens personages, & fort doctes en ces contrees, & ce peuple estoit extremement civilisé. Car entre les Mahometans on ne scauroit assez louer les Roys Almanfur, ou Mansor, Marin, & Huceph, hommes excellens en leur superstition, du regne desquels ont flory les plus fameux Medecins & Philosophes d'entre les Arabes : comme Aui-cenne, Rasis, Albulmazar, & Auerroës, & autres en grand nombre tous nourris par les Roys de Marroc, qui tenoient la Barbarie, & vne partie des Espagnes, les Colleges qui sont encor en quelques villes, montrent assez combien d'Estat ils ont fait de la doctrine. Au reste, il n'y auoit nation qui fust autrefois plus gentile, pour inuenter mille galanteries pour les tournois, & choses semblables. Ce furent eux qui les porterent en Espagne, & qui les pratiquerent avec tant d'esprit & de gentillesse, que les Romains sont demeurez tous pleins de semblables choses. Ils y porterent la façon de cheuaucher à la genette, & du jeu des cannes, auquel ils excellent

encore. Ils se rendirent redoutables à tous leurs voisins, & monstrent en tous lieux combien ils estoient pleins de courage. Quelques anciens Auteurs ont dit à bon droit qu'ils aimoient les changemens & choses nouvelles. Ils se nourrissoient autrefois des Singes, qui se trouvent en leurs montagnes, & ne portoient autres habits que de peaux de Chevres. Ils immoloient au Soleil & à la Lune, & enterroient leurs morts.

A Han Lisnan, qui est au Pais de Chauz, ils s'assembloient en certain temps de l'année au commencement de la nuit, & ayans fait leur sacrifice, ils esteignoient les luminaires, & chacun empoignoit la premiere femme qu'il rencontroit, & en prenoit son plaisir : & il estoit defendu à celles qui se trouvoient à telle feste, de coucher d'un an avec leurs maris : & ce qui sortoit de cet accouplement estoit nourry par les Prestres du Temple.

MOEURS DE CE TEMPS.

9 **A**VANT que de considerer particulièrement les mœurs de chacun de ces peuples, il sera bon de parler de tous en general, & de discourir aussi des Arabes qui se tiennent en vne bonne partie de ces Prouinces.

Les habitans de Fez & de Marroc sont vn peu bazanez, mais les vns plus que les autres. Ces peuples ont presque mesmes mœurs que les Arabes, toutesfois ils sont vn peu plus civils. Ils sont conuoiteux d'honneur, autant que gens qui soient au monde. On ne scauroit voir vn peuple plus inconstant, ny pareillement plus rusé. L'infidelité y est practiquee autant qu'en lieu de la terre. Il n'y a rien de plus cholere que les habitans de ce Pais, qui sont aussi grands vanteurs, pleins de soupçon, & jaloux tout ce qui se peut. Davantage, ils sont merueilleusement agiles & disposés, principalement aux combats qui se font à cheval, où ils se monstrent aussi prompts que l'on en puisse voir : mais ils ne peuvent supporter guiere long temps le travail, & leur naturel est d'acheuer promptement, ou de quitter tost vne besongne.

Voilà les mœurs generales esbauchées, & avant que de venir aux particulieres : ie vay dire quelque chose des Arabes qui vivent, & demeurent parmy ces peuples.

Ces gens se tiennent communément aux deserts, nourrissans leurs chevaux, Chameaux, & grand nombre de bestail, duquel il fournissent les terres voisines. Ils sont fort puissans, tant à cause de leur valeur & adresse, que de leur nombre, mais ils sont fort mal armez.

Ceux qui demeurent pres du mont Atlas, & entre iceluy, & la mer Mediterranee, sont les plus aysez, & plus riches de tous, s'habillent proprement, sont bien montez ont de plus beaux & plus grands pavillons que les autres (car ils vivent sous des tentes) & ont des chevaux plus gras & plus polis, mais non si polis que ceux des deserts de Numidie.

Ces Arabes sont addonnez au labourage, & habitent en vn Pais fertile, & cueillent abondance de grains, & ont vne infinité de troupeaux, & des bœufs sans nombre, & pour ceste cause il faut que de iour à autre ils changent de place, & remuent leurs pavillons pour chercher nouveau pasturage, & ceux-cy vsent d'une assez grande liberalité, & courtoisie à l'endroit des estrangers qui passent par leur contrée, au lieu que les autres Arabes leur sont fort cruels.

Quelques-vns de ceux-cy payent tribut à l'Empereur de Marroc : les autres ont esté long temps sans recognoistre aucun Seigneur, & sans payer aucun tribut : mais depuis que les Portugais ont tenu Azamor, & Alaphy, ils sont contraincts de recevoir loix d'eux.

Au reste ils sont fort addonnez à la chasse, si bien qu'ils nourrissent force chiens, & bien qu'ils logent courtoisement les passans, si sont-ils si accoustumés au larcin, qu'on ne se peut presque garder de perdre quelque chose : mais il ne s'y parle aucunement de toucher aux personnes. Ils sont fort addonnez à la Poësie en leur langue, qui n'a plus son ancienne naïfueté, & toutesfois ils ont vne grace singuliere en leurs vers, & ceux qui les sçavent mieux faire, sont veus de bon œil de leurs chefs, recogneus & recompensez de leur gentillesse. Quant aux femmes des Arabes, elles sont assez bien vestuës à la mode du Pais, ayans pour habit des chemises noires à grandes & larges manches, sur lesquelles elles portent comme vn drap de mesme couleur, ou de bleu Turquin, & elles s'envelopent si gentiment de cecy, le mettant en plusieurs plis, qu'elles viennent à le joindre sur les épaules, & à l'attacher avec des agraffes d'argent faites fort proprement. Elles ont aux oreilles des bagues d'argent, de mesme qu'aux doigts, & se ceignent les iambes de petits cercles de mesme étoffe, comme font les autres femmes d'Afrique. Elles portent encores de petits masques de toile, où il n'y a ouverture que pour les yeux, de

yeux, de peur de tenter les hommes, tant elles ayment à viure honnestement : & si tost que ces femmes voyent quelou'vn qui n'est de leurs parents, elles se couurent le visage, & ne le veulent entretenir en aucune sorte : mais devant leurs parents, ou leurs maris elles tiennent la face decouuerte. Les Arabes allans d'un lieu en l'autre, meinent leurs femmes sur des chameaux, & en certaines selles couuertes de quelques tapis, afin que le chaud ne les offence : & ces selles sont faites en telle sorte, qu'il n'y peut demeurer qu'une femme seule, & lors mesmes qu'ils vont à la guerre, ou le propre iour de la bataille ils ont avec eux leurs femmes pour les encourager au combat. Ces femmes avant que d'aller vers leurs maris, soit le iour de leurs nopces, soit en autre temps pour coucher avec eux, se peignent le visage, le sein, & les bras, & les mains avec certaine couleur azuree, leur estant aduis qu'elles sont fort gentilles en ceste sorte, & elles tiennent ceste coustume des premiers Arabes, qui entrerent iadis en Afrique, & ceux-cy l'apprirent des Africains, bien qu'à present es villes de Barbarie qui sont naturels du Pais n'imitent ceste façon de faire, ains leurs femmes ayment à se maintenir en leur couleur naturelle. Il est vray que quelquesfois elles ont certaine peinture noire faite de fumee de noiz de gale, & de l'asfran, avec laquelle elles se peignent les jouës en rond, & les sourcils en forme de triangle : & se mettent sur le menton quelque chose qui ressemble vne feuille d'olivier : & cecy estant loué par les Poëtes Arabes en leurs chansons amoureuses, il n'y a grand personnage Africain qui n'en veuille porter par gallanterie. Mais il faut sçauoir que les femmes n'oseroient porter ce fard que deux ou trois iours, ny paroistre devant leurs parents en cét equipage, à cause que cela sent la courtisane. Elles en donnent seulement la veüe & le plaisir à leurs maris, pour les inciter à l'amour, d'autant que ces femmes en ayment fort le deduct, & il leur semble que leur beauté reçoit un grand esclat de ce fard. Mais c'est assez parlé des Arabes, venons maintenant aux mœurs des Prouinces des Royaumes de Marroc.

Ceux de la Prouince d'Heez mangent du pain d'orge fait sans levain, comme des gâteaux, & le cuisent en des pailles de tetres, pareilles à celles où les Italiens font cuire leurs tourtes sur l'atre eschauffé : car il s'en trouue bien peu qui cuisent leur pain au four comme par deçà. Ils viuent encores de farine d'orge trempée, remuée dans l'eau chaude, comme qui seroit de la bottillie, ny mettant de l'huyle, sinon en Esté, & au Printemps, qu'ils la font cuire dans du lait, y mettant aussi du beurre en lieu d'huyle. Ils n'ont ny nappes ny seruiettes, & se seruent en leur lieu de quelques nattes qu'ils estendent par terre, & mangent en s'asseyant dessus. Ils sont vestus d'un certain drap de laine, fait comme les couuertures communes que l'on met sur les lits. Ils ageacent ce drap sur leurs corps, & le ceignent contre les fesses, & couurent leurs parties honteuses de ie ne sçay quel drap fait aussi de laine. Ils ont sur la teste des bandes de la mesme laine, longues de cinq pieds, & l'arge d'un pied, lesquelles ils teignent en noir, & les entortillent tellement autour de la teste, que le haut leur demeure tousiours decouvert, & n'y a personne qui porte bonnet que les vieillards, ou les gens de sçaubir, s'il y en a, & ces bonnets sont ronds & doubles, comme les gens d'Eglise les portoient iadis en France. Leurs lits sont des couuertures semblables à celles que nous appellons de Cataloigne, dont l'une leur sert de matelaz, & l'autre de drap & de couuerture, leurs cheuers, & oreillers sont des sacs de laine, aspres & rudes. Ceux qui sont à marier n'oseroient porter barbe : mais aussi tost qu'ils ont pris femme, ils la laissent croistre. Ils ont force venaison, mais ils ne se soucient nullement d'aller à la chasse. Ils ont force riuieres, & toutesfois ils n'vsent aucunement de moulins, & c'est aux femmes à faire la farine. Il n'y a presque aucun qui sçache lire, ou escrire. Il ne s'y trouue Medecin, Chirurgien, ny Apoticaire, leur ordinaire est de s'ayder du feu pour tout remede. Bref la vertu de ce peuple consiste en la guerre, durant laquelle ils ne font iamais tort aux estrangers, ains leurs donnent sauf-conduit. Le peuple d'Ilenfugeghen est le plus farouche, & le plus cruel de tous les Royaumes.

Les habitans de Tefetné sont plus blancs que leurs voisins, & fort courtois à l'endroit des estrangers, pour lesquels ils ont un Hospital, & encores ils logent en leurs propres maisons : chose qui n'est guiere ordinaire en Afrique. Les habitans du mont d'Ideuacal sont grossiers, mais fort vaillans.

Au Pais de Suz, & pres de la ville de Testent, l'on n'vsé d'autre monnoye que de l'or, ainsi qu'il est tiré de la terre, & pour petite monnoye, ils vsent de certaines pieces de fer du pois d'une once.

Les habitans ont ceste industrie de sçauoir accoustre des marroquins, desquels l'on fait tant d'estime, & pour abreger le Pais de Suz, est peuplé d'hommes qui sont courageux au possible.

Le peuple de la Prouince de Marroc est courtois & liberal. On lit la loy de Mahomet dans la principale ville, & il y a des Colleges rentez pour cét effect, & des Hospitiaux pour les païsans, qui sont de leur secte. Ceux qui se trouuent au plat Pais sont si bestiaux, que n'ayans

hommes suffisans entr'eux pour vuidier leurs differents, ils ont accoustumé de retenir les estrangers qui passent, afin qu'ils donnent leur sentence sur le fait duquel il s'agit, & faut que cet arbitre seue de Greffier, & de Juge tout ensemble. La nourriture de ce peuple n'est guiere delicate, veu qu'il vit de farine d'orge destrempee en l'eau bouillante, & cuite avec de la chair du plus viel bouc qu'ils ayent.

Quand à ceux de Gizule, ils sont extremement brutaux, & toutesfois ils font du fer de leurs mines d'assez gentils vases, qu'ils troquent à des draps, des chevaux, & des especes, & autres choses qui leur sont necessaires, aux foires & marchez des Pais voisins, où ils vont ordinairement. Presque par tout ce Pais ils ne recognoissent aucun pour superieur, à raison dequoy ils sont en continuelle guerre : tellement que leurs trefues ne durent iamais plus haut de trois iours de la sepmaine, à quoy ils sont contraincts à cause du trafic. Mais lors qu'ils se rencontrent, les trefues estans expirees, ils se massacrent sans aucun respect d'age, ny de sexe.

Ils ont pour tous vestemens des chemises de laine, sans manches, & assez estroictes par le collet : sur la teste ils portent des chapeaux faits de fueilles de palmiers.

Les iours des foires, & les marchez sont si estroitement, & solennellement gardez, qu'il n'y a homme si hardy qui olast offencer vn autre, tant fut-il son ennemy, pour ce qu'ils ont vn Capitaine esleu par toutes les parties, qui cognoit des crimes communs durant le trafic.

Les larcins y sont punis de mort sans autre forme de procez, & l'on y fait mourir le larron avec certaine espee de pertuisane, puis on laisse le corps mort pour exemple, & pour seruir de pasture aux bestes, & aux oyseaux de proye.

Le Pais de Ducale a des habitans rudes, nullement civilisez, & entierement despourueuz de courtoisie. Et quant à celuy de Hascora, il y a force Tanneurs de cuirs qui font les marroquins d'Afrique.

Les femmes y sont belles, & blanches, & se plaisent fort avec les estrangers : mais les Africains sont jaloux au possible.

Au Pais de Teldé, il y a dans les villes beaucoup de riches marchands, & des Citoyens extremement courtois. Les femmes y filent des mieux la laine, & excellent à en faire de beaux ouvrages. Elles sont blanches en quelques lieux de ceste Prouince, & portent beaucoup d'argent sur elles.

Mais si nous considerons les habitans du Mont de Dez au mesme Pais, nous trouuerons qu'ils n'ont, ny villes, ny villages, ains se tiennent en des maisons esparées ça & là, & la pluspart demeurent dans des cauernes, & sont larrons, traistres, & si meschans, que pour peu de chose ils tuent vn homme. Et quant à leurs femmes, ce sont les plus laides, & plus sales presque de toute l'Afrique.

21 Quant au Royaume de Fez, les habitans de la Prouince d'Argar sont presque tous Arabes, riches, & pompeusement vestus : mais vaillans au possible, & pour ceste cause, le Roy de Maroc s'en sert ordinairement en ses guerres.

Le peuple du Pais d'Elhabat est fort vaillant, & hardy, & le Roy de Maroc s'en assure extremement, & en tire de grands seruices pour les courses que ces gens font dans les terres des Chrestiens.

Les habitans d'Artif sont fort peu ciuils : mais ils sont courageux, & robustes. Ils vont du tout mal vestus, & s'addonnent volontiers à l'yurongnerie. Ceux des montagnes y ont des loupes de chair semblables à celles des Sauoyars voisins des Alpes. Les habitans de Bellis de Gomere sont grands corsaires, & font de grands maux aux Chrestiens le long de la coste d'Espagne.

Au Pais de Garet les habitans du mont Sahid ne payent aucun tribut, & sont tous forgerons, qui s'addonnent à polir le fer, qui est porté à Fez en balles, & pieces rondes, d'autant qu'ils ne le scauent accoustre en barres, ainsi que l'on fait en Europe.

Les montagnes de Teza, & du Pais de Ghauz, ne craignent nullement leurs Roys, contre lesquels ils ont souuent combattu, d'autant qu'ils sont forts d'assiettes, d'hommes, & de viures.

Ceux de la montagne de Gauata sont tous tisserans, & de mauuais courage, & n'osent aller au bas de leur montagne, pour ce qu'ils ne veulent payer la pluspart du temps aucun tribut à leur Roy, & l'on ne les peut forcer en leur montagne, qui est fournie de tout ce qui est necessaire à l'homme.

Le peuple du mont Baronois est assez blanc : les femmes y sont belles, & en bon point, mais les hommes y sont jaloux au possible. Les habitans du mont de Lesseren sont pauvres, miserables, des plus lourdaux qui soient en Afrique. Et les peuples pres des monts Ziz, Mezettaza,

Mezettaza, & Beni Merazen, qu'on appelle Zanagas, sont vaillans & farouches, & les plus grands voleurs qui soient en Afrique, ayans pour armes chacun trois Zagayes ou lances gayes, qu'ils dardent avec tant d'adresse, qu'ils ne faillent guiere jamais leur coup, & avec cela ils ont l'espee & poignard, & ont intelligence avec les Arabes.

Je viens maintenant aux mœurs de ceux de la ville de Fez, qui ont à mon aduis, surpassé en poliffure tous les autres habitans de ce Royaume. Je dis donc en premier lieu qu'ils ont grande quantité de belles estuues, où l'on garde vn fort bel ordre. Il y a hors des salles certaines loges, où les hommes se despoüillent, & laissent leurs habillemens. Or ainsi que l'homme veut aller en vne de ces estuues, apres qu'il a passé la premiere porte, il passe en vne chambre qui est froide, & l'on y tient de l'eau pour rafraichir l'autre quand elle est trop chaude. De là l'on va par vne autre porte à la seconde chambre, qui est vn peu plus chaude, & là on laue, & nettoye la personne qui se veut estuer. Apres cet homme passe à la troisieme qui est fort chaude, & là il suë quelque temps. On chauffe l'eau avec du fient, à cause que les maîtres des estuues tiennent des gens qui vont chercher tout le fient des Escuries, & le portent hors la ville, en font comme vne petite montagne, & le laissent seicher ainsi deux ou trois mois. Apres cela, pour chauffer les estuues, & ladite eau, ils le brulent au lieu de bois. Les femmes ont aussi leurs estuues, & il y en a qui sont communes aux hommes, & aux femmes : mais les hommes ont leurs heures limitees, selon la qualité des iours, & le reste de la iournee est pour les femmes, & lors qu'elles entrent aux estuues, l'on traaverse vne corde à l'entree de l'estuue, afin que nul homme n'y aille : & si quelqu'un vouloit parler à sa femme, il ne luy est point permis, ains il faut qu'il luy face dire ce qu'il veut par vne de ses chambrières. Les hommes, & les femmes de la ville mangent aussi souuent aux estuues, & le plus souuent les vns & les autres y passent le temps en diuerses sortes, & y chantent à haute voix. Tous les ieunes hommes entrent tous nus dans les estuues, sans auoir honte l'un de l'autre : mais ceux qui sont de quelque condition releuee par dessus le commun, y entrent avec certains linges autour du corps, & ne s'assient pas en des lieux communs, mais s'accommodent en certaines petites chambres qui sont tousiours prestes, & separees à leur mode pour les hommes de qualité. Mais il faut sçauoir, que quand ceux qui seruent aux estuues lauent quelqu'un, ils le font coucher, puis le frottent quelques-fois avec des onguents restauratifs, & quelquesfois avec des instruments qui ostent toute l'ordure qui peut estre sur le corps. Mais quand ils lauent quelques Dames, ils les font coucher sur des draps de feutre, & leur font appuyer la teste sur des oreillers couverts de feutre.

Il y a encores pour chaque estuue beaucoup de barbiers, qui payent certaines sommes au maître des estuues pour y pouoir tenir leurs instruments, & y travailler de leur art. Et la plus grande partie de ces estuues appartient aux Mosques, & aux Colleges, les vnes leur rendant cent ducats, les autres cinquante, qui plus qui moins selon la grandeur des lieux.

Les garçons qui seruent à ces estuues, ont accoustumé de faire certaines festes toutes les annees en ceste sorte. Ils conuient tous leurs amis, & vont avecques des trompettes & des fifres hors de la ville. Apres ils prennent vn oignon, & le mettent en vn beau vase de leton, puis l'ayans couuert avecques quelques linge blanc, ils retournent à la ville, sonnans iusques à la porte des estuues. Alors ils mettent l'oignon en vne corbeille, & la pendent à la porte de l'estuue, disants que cela sera cause du profit de ceste estuue, & que plusieurs y iront.

Il y a dans la mesme ville des hostelleries, & grandes, & mais sans aucun liêt, veu que l'on ne vous y donne pour dormir qu'une piece de natte, & vne couverture. Que si quelqu'un veut manger, il faut qu'il achete la viande, & apres qu'il la baille à cuire. Les pauvres veufues, qui n'ont ny maisons, ny parent pour le loger, se retirent encores en ces hostelleries, où l'on leur donne vne chambre, & quelquesfois on en mettra deux ensemble : & ces femmes ont soing du liêt, & de la cuisine.

Quant aux hostes, ils sont d'une race nommee Elcheua, & portent des habits de femmes, meisme au parler. Chacun deses hommes à quelque garçon qui couche avec luy, & vit avec ce luy-cy comme vn mary avec sa femme. Ils y tiennent aussi des femmes qui gardent les coutumes de celles qui sont aux bords d'Europe. Ceux-cy ont le pouoir de vendre, & d'acheter du vin, sans que les Officiers du Roy leur donnent aucun empeschement, & les hommes de mauuaise vie frequentent ordinairement ces lieux, les vns pour s'enivrer, les autres pour passer leurs fougues amoureuses, & choses semblables. Ces hostes ont vn Consul, & payent certain tribut au Gouverneur de la ville. Outre cela ils sont obligez, quand il est besoing, de donner à l'armee du Roy, ou des Princes, vn grand nombre de leurs gens, pour apprestier la viande des soldats, pour ce qu'il y en a peu d'autres qui entendent ce mestier.

Mais il faut remarquer qu'il n'y a homme de lettres, ny marchand, ny artisan homme de bien, qui veuille seulement parler avec eux : & il leur est aussi deffendu d'entrer dans les Mosquées, non plus qu'aux places des marchands, aux estuues, & en leurs maisons. Ils ne peuvent aussi tenir les hostelleries qui sont proches du Temple, où logent les riches marchands. Le peuple les hait au possible : mais les Seigneurs qui s'en seruent, comme j'ay dict, aux anneés, leur laissent mener ceste vie deshonneste.

Il y a certains marchands qui tiennent les moulins à loüage, & achèptent le grain, & le font moudre. Apres cela ils vendent la farine aux boutiques, & par ce moyen en tirent vn grand profit, pour ce que les artisans qui n'ont pas tant de moyens qu'ils puissent faire prouision de ce grain, achèptent ceste farine, & font faire ce pain chez eux : mais les hommes de qualité achèptent le grain, & le font moudre en certains moulins, destinez pour les Citoyens. La plus grande partie de ces moulins appartient aussi aux Temples, & aux Colieges, & on leur paye deux cteus pour chaque meule.

Les arts de ceste ville sont separez l'un de l'autre, & les plus nobles sont autour de la grande Mosquée, comme les Notaires, dont il y a enuiron octante boutiques, vne partie desquelles est ioincte avecques les murs du Temple, & l'autre costé est vis à vis, & en chaque boutique il y a deux Notaires. Vn peu plus outre, en tirant vers le Ponent, on void trente boutiques de Libraires, & du costé du Sud enuiron cinquante boutiques de marchands de souliers, qui achèptent vn grand nombre de souliers, & de brodequins des cordonniers, puis les vendent en menu. Pres delà l'on void les cordonniers qui font des souliers pour les enfans, & du costé du Levant l'on void ceux qui vendent les choses faictes de cuire, & de leton.

Vis à vis de la grande porte l'on void ceux qui vendent des fruiets, & apres ceux qui vendent des ouvrages de cire, qui sont des plus beaux que l'on puisse veoir. On void apres ceux qui vendent des fleurs, & des citrons, & ceux cy trouuent assez d'achèpteurs, pour ce que ceux qui sont accoustumez à boire du vin, veulent auoir tousiours des fleurs avecques eux. On trouue apres les vendeurs de lait, qui en achèptent de certains vachers tous les matins, & de ce qui n'a pas esté vendu il font du beure, lequel ils vendent au peuple. Outre cel on y void force marchands de coton & de chanvre, dont les derniers vendent des cordes, & des licols de chevaux. Outre ceux cy, il y a des faiseurs de licols qui sont de cuir, ouvrez de soye. Il y a apres les vendeurs de mords, de brides de chevaux, de poitraux, selles, & estriers.

On y void apres des crocheteurs, ou porteurs de charges, qui s'ayment comme freres, veu que quand quelqu'un d'entr'eux vient à mourir, & laisse quelque petit enfant, ils entretiennent en commun la femme, iusques à ce qu'ils soient en aage pour leur faire apprendre quelque art.

Quand quelqu'un se marie, qui a quelques enfans de nouveau, il faict vn festin à toute la compagnie, & chacun en reuanche luy faict vn present, & nul ne peut estre de leur troupe, sans auoir premierement testiné les autres : & s'il y entre autrement, il ne peut auoir en trouuillant que la moitié du gain que font les autres.

Quant ils travaillent ils ont certain habillement court, qu'ils portent tous de mesme couleur : mais lors qu'ils ne font rien, ils vont vestus comme ils veulent. Il y a vne place où l'on vend des carottes & des naueaux, dont l'on faict tant d'estime, qu'il n'y a perionne qui les puisse achèpter, que quelques vns qui en payent certaine somme à ceux qui tiennent la Douane, & tous les iours l'on vend cinquante charges, voire quelquefois d'auantage.

On vend ailleurs de petites boules de chair pilee, & frite à l'huyle, avecques beaucoup d'es-pice, & chaque piece est grosse comme vne figue commune.

On y vend aussi certains pains fris à l'huyle, semblables au pain miellé qui se vend à Rome, & ceux de la ville mangent souuent de ce pain à desieuner, principalement les festes, & auant les iours du ieusne, & ils en mangent avecques de la chair rostie, ou avec du miel, ou avec certaine chair pilee, qu'ils pilent pour la seconde fois apres qu'elle est cuite, en faisant apres du brouet, lequel ils teignent avec de la terre rouge. Ils ne rostissent pas la chair avecques la broche, mais ils ont deux fours l'un sur l'autre, & mettent le feu en celuy de dessouz : & lors que celuy d'en haut est bien chaud, ils y mettent des moutons entiers par vn trou qui est au dessus, afin que le feu ne leur brusle pas les mains. La chair se cuit fort bien en ceste sorte, & a vn goust delicat, à cause qu'elle ne sent point la fumee, ny vn trop grand feu : mais est cuite avecques vne chaleur temperee l'espace de toute la nuit, & le matin ils commencent à la vendre.

On y vend encor certaine chair fricassée, & du poisson de mesme, & vne autre sorte de pain delié qu'ils mangent avec du beure & du miel. Les bouchers y petent la chair, & la vendent à la liure, & l'on ne tue pas les bestes en la boucherie, mais en lieu à part pres de la riuere, où ils les

où ils les escorchent. Quant aux draps, si quelqu'un en veut vendre, il faut qu'il les donne a des Crieurs, qui les chargent sur leurs espaules, & vont criant le prix, & l'on fait ces cris depuis Midy iusques au soir. Il y en a plusieurs qui font des cages de Cannes pour y tenir la volaille, pour ce que chaque Citoyen en tient un grand nombre qu'il engraisse, & afin de tenir les maisons nettes, on tient toute la volaille dans ces cages. Il y a aussi des gens qui vendent du grain, & des legumes pour semer, & l'on voit en une place force porteurs de ce grain avec leurs mulets & leurs chevaux. En la place où l'on vend les toiles, on trouve quelquefois un nombre infiny de femmes, qui viennent souvent aux paroles, & des paroles aux mains, en se disant les plus grands outrages du monde, & donnans du plaisir à ceux qui les oyent.

Il y a des gens qui font des elcus, & des targes de cuir, selon la coustume d'Afrique. On y voit force blanchisseurs, hommes de basse condition, qui lauent le linge des mieux, & le font seicher en l'estendant sur des cordes, ainsi que l'on fait par deça, & le plient aussi proprement que gens du monde. Ils mettent sur la selle trois fausses housses, l'une plus belle que l'autre. Il y a des cordonniers qui font des souliers pour les Gentils-hommes, & ny les artisans, ny les soldats, ny les autres courtisans n'en peuvent porter de ceste sorte. Il y a mesme une rue de certains artisans qui font des tresses au bout des draps que les habitans de Fez mettent sur leur teste. Les Apotiquaires n'y sçavent faire, ny iuleps, ny syrops, ny electueries, d'autant que les Medecins font toutes ces choses chez eux, puis ils les renuoyent en leurs boutiques, où ils tiennent des garçons qui les distribuent selon les Ordonnances des Medecins. Mais la plus grande partie du peuple ne cognoist, ny Medecin, ny Medecine. Il y a quelques boutiques de ceux qui vendent des oyseaux, tant pour manger que pour resjouir avec leur chant. On y trouve aussi des gens qui font certaines mules, que les Gentils hommes portent quand il fait croité, & ces mules sont faites fort gentiment avec quelques ourages, & sont bien ferrees, avecques certaines couvertures de cuir cousues avecques de la soye. On y fait des balais de certaines palmes sauvages, comme sont celles que l'on deportte de Sicile à Rome. Ces gens icy portent leurs balais par la ville, & les troquent avecques de la cendre, & de vieux souliers. Ils vendent la cendre aux blanchisseurs, & les souliers rompus aux sauetiers.

Il y a aussi des vendeurs de laine, qui achètent les peaux des bouchers, tenans des garçons qui les lauent. Ils en tirent la laine, & accoustrent les peaux, mais non d'autres bestes que des moutons : car il y en a d'autres qui habillent celles des bœufs. On y trouve aussi des gens qui font certains liens, avecques lesquels on attache les chevaux par les pieds. Il y a par la ville plusieurs lieux, où l'on scie du bois de diuerses sortes, les Chrestiens esclaves sont employez à cela, & leurs maistres les nourrissent d'une partie de l'argent qu'ils tirent de leur travail, & jamais ils ne les laissent en repos que le Vendredy, depuis Midy iusques au soir, & environ huit iours en diuers temps de l'annee, lors que les Mores ont leurs festes.

Il y a aussi des bordaux publics, où les filles d'amour donnent du plaisir pour petit prix, & celles-cy sont favorisees, ou du Capitaine du Guer, ou du Gouverneur de la ville.

Il y a certains hommes qui tiennent du vin, & des femmes en leur maison, & pour de l'argent on y a ces deux chotes.

Ils gardent leurs grains en certaines fosses fort profondes, qui tiennent quelquefois plus de deux cents muids de bled, & les habitans du lieu où sont ces fosses, qui sont communément des hommes du menu peuple, vivent du profit qu'ils tirent du loüage desdites fosses, qui est un muid pour cent toutes les annees.

Les habitans de la ville sont veritablement civils, ils portent en Hiver du drap de laine fait hors du Pais. Leur habit est une iuppe sur la chemise, avec certaines manches fort estroictes, & là dessus ils portent quelque robe large cousue par deuant, & par dessus encores leurs manteaux à la Moresque, qu'ils nomment Alborno. Ils portent sur la teste des simples bonnets faits, comme quelques-uns qu'on porte la nuit en Italie, mais sans oreilles. Ils mettent dessus certaines bandes de toille entortillees sur la teste, & ne portent pour chausses que des marones de toille faites à la matelote, excepté en Hyuer, auquel temps voulans aller à cheval ils prennent des brodequins.

Le peuple porte des sayes & des manteaux sous la robe, dont nous avons fait mention, & n'ont sur la teste autre chose que des bonnets de peu de valeur.

Les Docteurs & Gentils-hommes portent des robes avec les manches larges, comme les Gentils-hommes de Venise, qui ont quelque charge honorable. En fin ceux qui sont du tout de basse condition, portent quelques draps blancs grossiers, faits de la laine du Pais, & leurs manteaux sont de mesme estoffe.

Les femmes y sont assez bien vestues : mais en esté elles portent seulement la chemise, & ceignent leur front avec certaines bandes qui ne sont guiere agreables. En Hyuer elles vident de certaines robes à larges manches, cousues deuant comme celles des hommes.

Mais quant elles sortent du logis, elles portent des chausses à la matelotte qui leur couvrent toutes les jambes, & vn voile qui leur couvre la teste, & tout le corps. Elle couvrent pareillement leur visage avec vn drap de lin fort fin, & delié, tellement qu'elles ne laissent rien paroistre que les yeux. Elles portent aussi aux oreilles certaines grandes bagues d'or avec de fort beaux ioyaux, & celles qui ne sont pas de qualité en portent d'argent sans pierretie. Elles portent aussi des bracelets d'or, dont les deux peuuent peser enuiron cent ducats. Les autres en portent d'argent, & beaucoup de ces femmes d'une & d'autre condition en portent de mesme aux jambes.

Quant à leur manger, le peuple a accoustumé de prendre de la chair fraîche deux iours de la semaine : mais les Gentils-hommes en mangent tous les iours selon leur appetit, & font trois repas le iour. Ils prennent celuy du matin fort legerement, veu qu'ils mangent du pain & du fruit, & certains potages faicts de farine, & de froment, qui sont plus liquides qu'autres, en Hyuer, au lieu de ce brouet ils prennent de la farine liquide avec de la chair salée. A Midy ils mangent quelque chose legere, comme de la chair salée, & des oliues : mais en esté ce second repas est fort bon, & à plein ventre. La nuict ils en font vn autre qui est plus leger, veu qu'ils mangent du pain avec des melons, des raisins, ou du lait. Mais en Hyuer mangent de la chair bouillie, avec du Cuscusu, qui est faict comme nos tartes de paste, qu'ils mettent en vn vase percé à petits trous, pour receuoir la fumee des autres pots, sur lesquels ils le mettent, & apres ils meslent dedans du beurre, & l'arrosent du bouillon, & ils n'ont pas accoustumé de manger du rost. Voila de quelle sorte viuent les artisans, & les pauvres. Les hommes de qualité viuent beaucoup mieux, & plus delicatement. Mais au regard de nostre façon de viure, la leur est du tout mesquine, & miserable, non pour la petite quantité des viandes : mais à cause de la sale façon dont ils vsent en leur manger, veu qu'ils prennent leur repas en terre sur certaines tables basses, sans nappe, ny seruiette, & l'on n'y vsé d'autre instrument que des mains. Quant ils mangent le Cuscusu, tous se seruent d'un seul plat, & mangent tous sans culiere. Ils mettent pelle meile en vn plat la chair & le brouet, & chacun prend autant de chair qu'il luy plaist, & la met deuant luy, sans auoir, pour cet effect aucune assiete : & lors sans vser de cousteau il la prend à belles dents, & en prend tant qu'il peut, & le reste luy demeure aux mains. Ils mangent fort viste, & nul ne boit que lors qu'il est bien saoul de manger. Lors chacun boit vne grande coupe d'eau, & voila comme ils en vsent communément. Il est vray qu'il y a quelques Docteurs qui viuent mieux, & plus proprement : Mais pour conclurre, le plus pauvre Gentil-homme de France vit plus magnifiquement que les plus grands Seigneurs d'Afrique.

Pour le regard des mariages, quand quelqu'un veut prendre femme, si tost que le pere luy a promise sa fille, si tant est qu'elle ait vn pere, il assemble ses amis, & les prie de venir à la Mosquee, & meine avec luy deux Notaires, qui escriuent les paches & conditions du mariage, le mary & la femme y estans presens. Ceux de moyenne qualité ont accoustumé de donner trente ducats en argent comptant, vn esclaue Negre du prix de quinze ducats, vne piece de certain drap, faict de soye & de lin de diuerses couleurs, en façon d'esquiquier, & certaines autres petites estoifes de soye, que les femmes portent en la teste. On a accoustumé aussi de leur donner vne paire de souliers bien faicts, & deux peres de brodequins gentiment ouurez, plusieurs ourages d'argent, & beaucoup d'autres petites besongnes : comme des pignes, des parfums, & de fort beaux esuentaux. Apres que le contract est passé, & que les deux parties sont contentes, l'espoux meine disner avec luy tous ceux qui ont assisté à son mariage, & leur donne de ceste chair fricassée, dont nous auons parlé, avec du rost & du miel. Le pere de l'espousee faict semblablement son festin, & y conuie ses amis. Que si le pere veut parer sa fille il le peut faire, mais cela vient de sa liberalité, d'autant qu'il n'est tenu de donner autre chose que de l'argent. Toutesfois celuy est vne honte, s'il ne baille rien d'auantage. Et aujourd'huy, outre les trente ducats, le pere, ou celuy qui a soing de faire le mariage, a accoustumé de despenser deux ou trois cents ducats à fournir la nouvelle mariee, tant de robbes que de meubles : mais la coustume est de ne donner aucun fond. L'ordinaire est de donner aux espousees trois robbes de fin drap, & trois de raffetas, satin, ou damas, plusieurs chemises, & beaucoup de draps de lin bien ouurez, avec certaines bandes de soye de chaque costé, & outre ce des cheuets & des oreillers ouurez richement. Ils donnent aussi huit matelas, dont elles en tiennent quatre pour parade sur les buffets qui sont aux chambres, en mettent en leur list deux qui sont de laine grossiere, & elles en ont encore deux autres faicts de peau pour parer leurs chambres.

Les peres leurs donnent aussi vn tapis velu d'environ dix aulnes, & trois couuertes, couuertes d'un costé de draps de toille, & de l'autre de laine. Elles couvrent le list d'une de ces couuertes, en mettant vne partie dessus, & l'autre dessous, pour ce qu'elles sont longues d'environ

d'environ quatre aulnes. Ils leurs en donnent encor trois de foye, qui ont de beaux ourages d'un costé, & de la toile de l'autre : & ces couuertes sont pleines de coton. Ce sont proprement les loudiers, dont nous vsons en France. Ils donnent encor vn aurre loudier fort leger pour l'Esté, puis vn petit drap de laine fine diuisé en petites parties en façon de flammes, & plein d'autres beaux ourages, bordé de certain cuir doré crenclé, sur lequel on void pendre des houppes de foye de diuerses couleurs, & sur chaque houppe il y a vn bouton de foye pour attacher ce drap contre la muraille.

Voila ce que le pere adioust à la dot, voire quelquesfois dauantage : si bien que plusieurs Gentils-hommes sont souuent deuenus pauvres, pour auoir donné trop de ces besongnes à leurs filles.

Quelques-vns estiment qu'en Afrique, les hommes donnent certain dot aux femmes, mais ils s'abusent. Or quand l'espoux doit mener sa femme chez luy, il la fait premierement entrer en vne loge de bois faite à huit faces, & couuerte de beaux draps de foye, & meisme de toile d'or, & des porte-faits la portent sur la teste, accompagnez de ses amis, & de son pere, si elle en a, & de son mary, avec des fifsies, & plusieurs trompettes, tambours, & flambeaux, & les amis du mary vont deuant elle avec ces flambeaux, & ceux du pere la suivent : & toute ceste troupe tient ordinairement le chemin de la grande place, proche de la Mosquee. Lors qu'ils sont arriuez en la place, l'espoux saluë le pere, & les parens de la nouvelle espouse, sans guieres arrester il s'en va en son logis, & l'attend dans la chambre. Le pere, le frere, l'oncle, l'accompagnent iusques à la porte de ladite chambre, & tous ensemble la mettent entre les mains de la mere du mary, si tost qu'elle est entree dans ceste chambre le mary met son pied sur celuy de sa femme, & cela fait ils s'enferment tous deux aussi tost dedans. Cependant ceux de la maison apprestent le festin, & il demeure vne femme derriere la porte, iusqu'à ce que le mary a despuccelé sa femme : & lors celle-cy luy presente vn drap ensanglanté, avec lequel elle va parmy les conuiez, criant à haute voix que l'espouse estoit pucelle. Les parens du mary donnent lors à manger à ceste femme, & apres elle va avec quelques autres au logis de la mere de l'espousee, qui luy fait pareillement forces caresses, & bonne chere. Que si par fortune la nouvelle mariee ne se trouue vierge, le mary la rend à les parens, & ce leur est vne fort grand' honte, outre que les conuiez s'en vont tous sans y festiner. On fait trois festins, le premier, la nuit qu'on mène l'espouse, le second le soir d'apres qu'on la mène, & en cestui-cy on ne conuie que des femmes, & le troisieme se fait le septiesme iour apres les nopces. Le pere enuoye ordinairement ce iour là de beaux presens au logis de l'espoux, qui sont pour la pluspart des confitures, & des moutons entiers. Et si tost que le mary sort de son logis, qui est au bout de sept iours, il achepete certaine quantité de poisson, & le porte chez luy. Ils tiennent cela pour bonne augure, & c'est vne ancienne coustume. On fait encore deux banquets chez le pere, l'un le iour auant le mariage de sa fille, auquel conuiant tous ses amis, il les traite le mieux qu'il peut, & les entretient en passetemps, & à dancer vne partie de la nuit. Le iour d'apres les femmes qui ont accoustumé d'habiller les espousees viennent, & luy agencent les cheveux, luy mettent du vermillon aux jouës, & certaine tainture noire aux mains & aux pieds : mais ceste teinture dure peu, & le second festin se fait ce iour-là, & l'on met la fille sur vn eschaffaut, afin que chacun la voye. Lors on traite celles qui l'ont habillée, & quand la femme est arriuee au logis, tous les plus particuliers amis de son mary, luy enuoyent certains grands vases, lesquels sont plains de pain frit à l'huyle, & d'autre qui est miellé, & encore des moutons rostis tous entiers, & l'espoux conuiant plusieurs personnes partage ces presens à la compagnie. En leurs bals, qui durent toute la nuit, ils ont des joueurs d'instruments, & des chantres, qui rendent vne assez agreable concert. Il ne dance qu'une personne à la fois, & ainsi que quelqu'un a acheué de dancer, il tire de sa bourse vne piece de monnoye, & la iette sur le tapis des chantres & joueurs d'instruments, & si quelque amy veut faire honneur à celuy qui dance, il le fait arrester à genoux, puis il couure tout son visage de monnoye, que les chantres luy ostent soudainement.

Les femmes dancent à part, & ont à leurs bals des joueuses d'instruments, & des chanteresses. On garde ceste façon de faire quand la fille se marie avec sa virginité. Mais si quelqu'une a esté mariee auparauant, on fait les nopces avec moins de bruiet, & l'on donne à manger de la chair de bœuf, du mouton, & de la volaille bouillie : Mais on y mesle diuerses saulses, & l'on met deuant les conuiez douze grandes escuelles en vne jade de bois ronde, & l'on fait le festin pour dix ou douze. C'est la façon dont les Gentils hommes, & les marchands vsent. Mais le menu peuple vsé de certain potage fait de pain deslié, qu'on mouille avec du bouillon de chair coupee par grandes tranches sur vn grand vase, auquel est le potage, & ces gens le mangent sans culiers avec la main, & sont dix autour d'un seul pot.

On fait aussi festin le iour de la circoncision d'un enfant masle, qui est le septiesme iour apres sa naissance, auquel le pere ayant appelle le barbier, & conuie ses amis leur donne à soupper, apres lequel chacun des conuiez fait vn present à ce barbier luy donnant vn ducat, l'autre deux, qui plus qui moins, selon la qualité de chacun, & chacun l'un apres l'autre met cet argent sur le visage de l'enfant du barbier, & le mesme enfant nomme celuy qui l'a mis, & le remercie. Apres cecy le barbier circonceit l'enfant, & lors on danse, & l'on passe le temps, comme il a esté dict. Mais il n'y a pas si grande resiouissance pour vne fille.

Il est demeuré encor à Fez quelques restes de certaines festes laissées par les Chrestiens. Ils ont accoustumé le propre iour de la Natiuité de nostre Seigneur, de manger d'un certain potage fait de sept diuerses sortes d'herbes, & ils cuient aussi de toute sorte de legumes entieres, comme de febues, des poix chiches, & choses semblables, & les mangent celle nuit là au lieu de quelque viande delicate: Et le premier iour de l'an les enfans vont masquez aux maisons des Gentils-hommes, chantans certaines chansons enfantines. Le iour de S. Iean ils font aussi par toutes les rues de grands feux de paille.

Lors que les dents commencent à pousser à vn enfant, ses parens font vn festin aux autres enfans. Ils ont beaucoup d'autres coustumes, & des moyens de prendre leurs augures qui s'observent encores en quelques lieux d'Italie.

Quand le mary, le pere, la mere, ou le frere de quelque femme vient à mourir, lors les femmes s'assemblent, & quittans leurs habillemens ordinaires se couurent de sacs grossiers & rudes, puis elles prennent la saleté de leurs pots, & s'en frottent le visage, & font venir deuant elles ces meschans hommes, qui vont habillez en femmes, qui portent certains tambours carrez, & en les faisans sonner chantent soudainement des vers tristes & pitoyables à la louange du mort, & à la fin de chaque vers les femmes crient à haute voix, & se battent la poitrine & les joues, de sorte qu'il en sort du sang en grande abondance, & elles s'arrachent aussi les cheveux, criant tousiours, & pleurant tant qu'elles peuvent. Cecy dure l'espace de sept iours, apres lesquels celles demeurent en repos durant quarante iours, lesquels estans finis elles renouellent leurs pleurs & leurs plaintes, qui durent encor trois iours de suite. Voila comme le peuple en use. Mais les Gentils-hommes se plaignent bien plus honnestement sans se frapper, ny se battre en aucune sorte. Les vieillards les viennent consoler, & tous leurs plus proches parents leur enuoyent des presents de quelque chose bonne à manger, pour ce qu'on n'a pas coustume de cuisiner dans la maison d'un mort tandis que le corps y est, & les femmes n'accompagnent point les morts, combien que ce soient leurs peres ou freres.

Il y a beaucoup d'hommes à Fez, qui prennent plaisir à nourrir des pigeons, & en ont plusieurs beaux, & de diuerses couleurs. Ils les tiennent sur les couuerts des maisons en certaines cages faites, comme les armoires dont les Apoticares vsent, & ils les ouurent deux fois le iour, c'est à sçauoir vne fois le matin, & vne fois le soir, prenant grand plaisir à les voir voler, & celuy qui vole d'auantage est de plus grand prix. Et pour ce que le plus souuent les pigeons de l'un se meslent avec ceux de l'autre, ils viennent souuent ensemble aux mains. Il y en a tel, qui avec certain petit fié en sa main, ageancé au bout de quelques cannes longues, estant sur le toit prend autant de pigeons qu'il en passe.

Quant au jeu, les hommes de qualiré n'en vsent de nul autre que de celuy des eschers. Ils ont bien des jeux d'autre sorte, mais ils sont grossiers, & il n'y a que le menu peuple qui y joue. En certain temps de l'annee les ieunes hommes s'assemblent, & ceux du quartier combattent avec certains bastons contre ceux d'un autre: & quelques fois les deux parties s'echauffent tellement qu'ils viennent en fin aux armes, il en demeure beaucoup sur la place, principalement les festes, auxquelles ces ieunes gens s'assemblent hors la ville, & lors que la meslee est finie ils viennent à ruer des pierres les vns contre les autres: tellement que le Capitaine du guet ne les peut quelques fois retirer du combat, ains est contrainct d'en prendre quelques vns qui sont mis en prison, puis fouettez par la ville. La nuit plusieurs mauvais garnimens vont ensemble hors de la ville tous armez, & courent par les iardins, & par les campagnes & s'ils rencontrent les mauvais garçons du quartier ennemy, ils commencent ensemble vn cruel combat: mais souuent ils en sont rigoureusement punis.

Il y a aussi grand nombre de Poëtes qui font des Vers en leur langue vulgaire sur diuers subjects, mais principalement d'amour: & quelques vns d'escriuent l'amour qu'ils portent aux femmes, d'autres celuy qu'ils portent aux enfans, & mesme ils nomment bien souuent sans aucune honte ceux qu'ils ayment. Ces Poëtes font toutes les anneés des Vers à la louange de Mahomet au iour de sa naissance, & s'assemblant le matin en vne place, montent en chaire, & chacun par ordre l'un apres l'autre recite sa chanson en presence de force peuple. Lors celuy qu'on iuge auoir fait mieux, & recité des Vers, est publié & tenu pour Prince des Poëtes toute l'annee,

l'annee. Mais au temps des Roys de la maison de Martin, le Roy conuioit en son Palais tous les hommes sçauans de la ville, & faisant vn festin solemnel à tous les bons Poëtes, ordonnoit que chacun recitast sa chāson à la louange de Mahomet en sa presence, & de toute la Cour, ce qu'ils faisoient sur vn haut eschafaut, & selon le iugement de quelques hommes entendus en ce faict, le Roy donnoit à celuy qui estoit tenu pour le meilleur, cent ducats, vn cheval, & vne femme esclau, & le manteau qu'il se trouuoit alors sur luy. Et quant aux autres il faisoit donner à chacun cinquante ducats, tellement que tous s'en alloient avec quelque recompense.

Mais pour ce qui est des enfans, ils ont des maistres qui leur apprennent à ecrire, & à lire, non pas en quelque liure, mais en de grandes tables. La leçon qu'ils apprennent c'est tous les iours vn article de l'Alcoran, qui estant acheué dans deux ou trois ans, ils recommencent encor, voire tant de fois, que l'enfant l'apprend tout par cœur, & le plus souuent ils mettent sept ans à cét estude. Apres cela les maistres leur montrent vn peu d'ortographe, qu'on enseigne par ordre avec la Grammaire aux Collegues, de mesmes que les autres sciences, & ces Maistres ont vn bien petit salaire. Mais lors qu'un enfant est paruenü à certains endroits de l'Alcorā, le pere est obligé de luy faire ie ne sçay quel present. Et ainsi qu'il a appris tout l'Alcoran son pere faict vn grand festin à tous les Escoliers, & le fils est habillé, comme s'il appartenoit à quelque grand Seigneur: & premierement il est monté sur vn beau cheval, de fort grand prix, que le Gouverneur de la ville est obligé de luy prêter avec l'accoustrement.

Les autres Escoliers l'accompagnent, aussi bien montez iusqu'au logis, auquel ils entrent, disant plusieurs chansons à la louange de Mahomet, & apres on festine ces enfans, & tous les amis du pere, chacun desquels donne quelque chose au maistre, & l'enfant luy donne vn accoustrement neuf. Ces enfans font aussi vne feste à la naissance de Mahomet, & les peres sont tenus d'enuoyer vn flambeau au College: si bien que chaque Escolier y porte le sien, & y en a tel qui pese trente liures. Ces flambeaux sont beaux, bien faicts, & tous entourez de plusieurs fruiets faicts de cire.

Ils brulent depuis la poincte du iour iusqu'à ce que le Soleil se leue. Le maistre a accoustumé d'y mener quelques Chantres, qui chantent les loüanges de Mahomet, & si tost que le Soleil est leué la feste est finie. C'est le plus grand profit que les maistres ayent, pour ce qu'ils vendent quelquefois de la cire pour plus de cent ducats, & il n'y a aucun qui ne paye louange, pour ce que les Colleges sont faicts des aumosnes laissées par diuerses personnes pour leurs ames.

Les fruiets & les fleurs des flambeaux, sont les presens qu'on faict aux Chantres & aux enfans. Mais les Escolliers des Colleges ont deux iours de vacations la semaine.

Il y a trois sortes de deuins: la premiere est de certains hommes qui deuinent par l'art de 22 Geomance, faisant leurs figures. La seconde est de quelques autres, qui mettant de l'eau dans vn plat de verre, & y iettant vne goutte d'huyle, qui devient claire & transparente comme vn miroir, disent qu'ils voyent les diables en grandes troupes, qui semblent à vne grosse armee qui veut camper, & que de ceux-cy il y en a quelques-vns qui vont par eau, les autres par terre.

Et lors que le deuin les void coys, il leur demande les choses qu'il desire sçauoir, & les diables luy respondent avec des signes de la main, ou de l'œil. Quelquefois ils mettent le plat entre les mains de quelque enfant de huit ou neuf ans, & luy demandent s'il a veu tel & tel diable, & cét enfant qui est niaiz respond qu'oy, & plusieurs fois adioustent tant de foy à ces abuseurs, qu'ils despensent en cecy de grandes sommes. La troisieme sorte est des femmes qui font croire au peuple qu'elles ont amitié avec certains Demons de diuerses sortes, pour ce que quelques-vns sont nommez diables Rouges, quelques autres Blancs, & d'autres Noirs: & lors qu'elles veulent deuiner à la requeste de qui que ce soit, elles se parfument avec certaines odeurs, & lors, ainsi qu'elles disent, le diable qu'elles appellent, entre dedans elles, à raison dequoy elles changent aussi tost de ton, de voix, feignant que c'est l'esprit qui parle par leur langue. La personne qui est venue pour quelque chose qu'elle desire, sçauoir demander à l'esprit ce qu'elle veut avec grande reuerence & humilité, & ayant eu response laisse vn pretent pour ce diable, & s'en va. Mais les hommes qui ont le sçauoir, & l'experience des choses, nomment ces femmes Sahacut, qui veut dire Froteuses. Et certes ont ceste mal'heureuse coustume de se frotter l'un avec l'autre comme les Tribades, & lors qu'il se trouue quelque belle femme entre celles qui les vont trouuer, elles en deviennent amoureuses, comme vn ieune homme devient amoureux d'une fille, & leur demande pour payement de coucher avec elle, en quoy elles sont si rusées, que beaucoup de pauures tottes croyant deuoir complaire à l'esprit y consentent bien souuent.

Il y en a aussi plusieurs, qui prenant plaisir à ce jeu se mettent de leur compagnie. Tellement que feignant d'estre malades, elles mandent querir vne de ces femmes, & souuent le

son mary en fait le message. Elles descouvrent soudain leurs desirs à ces devines, qui disent apres au mary qu'un Demon est entré dans le corps de sa femme, & luy remonstrent que s'il ayme sa santé, il faut qu'il luy permette d'estre du nombre des devines, & de pratiquer secretement avec elles.

Le mary croit à ce qu'on luy dit, & faisant un magnifique festin, fait dancer apres le repas, la laisse aller où bon luy semble. Mais il y en a tel qui fait sortir l'esprit du corps de sa femme avec le son des coups de baston. Quelques autres feignans d'estre possédez abusent les devineresses de la mesme sorte que elles ont trompé leurs femmes.

Il y a une autre sorte de devins qu'on nomme Muhahazzimin, c'est à dire enchanteurs. Ceux-cy sont estimez puissans pour delivrer un qui est possédé, non pour autre sujet, que pour ce que le fait leur reussit quelquefois, & s'il advient qu'il ne reussisse pas, ils disent que ce Demon est infidelle, où que c'est quelque esprit celeste. Leur façon de conjurer est telle, qu'ils escriuent certains caracteres, & font des cercles, puis quelques marques sur la main, ou sur le front du possédé, & le parfument avec certains parfums. Apres ils font le charme, & demandant à l'esprit comme il est entré dans ce corps, & de la par de qui, & comme il a nom, & en fin ils luy commandent qu'il delloge. Il y en a d'autres qui operent par une regle nommée Zairagia, c'est à dire capable. Mais ils ne tirent pas leurs operations de l'Ecriture, veu que leur science est tenue pour naturelle.

Et veritablement ceux-cy sçavent donner une response infailible des choses qu'on leur demande. Mais ceste regle est extremement difficile, pour ce que celuy qui s'en veut servir doit estre parfait Arithmeticien, & Astrologue. Ils font plusieurs cercles l'un dans l'autre. Au premier ils forment une croix, aux extremités de laquelle ils marquent les quatre parties du monde. Dans la croix, c'est à sçavoir où les deux pieces de bois se rencontrent, ils marquent les deux Poles, & hors du premier cercle les quatre elements.

Apres ils diuisent ce cercle en quatre parties, & le cercle suivant en autant, & apres ils diuisent chaque partie en sept, & marquent en chacune certains grands caracteres Arabiques, au nombre de vingt-sept, ou vingt-huit pour chaque element. En l'autre cercle ils marquent les sept planettes, en l'autre les douze mois de l'annee, en l'autre les 28. maisons, ou demeures de la Lune, en l'autre les 365. iours de l'annee, & hors de celuy-là les quatre vents principaux. Ils prennent apres seulement une lettre de la chose demandee, & vont multipliant avec toutes les choses cy-dessus dittes, iusqu'à ce qu'ils sçavent le nombre que le caractere porte. Apres ils la diuisent en certaine façon, puis ils la mettent en quelques parties, selon que le caractere est, & selon son element, iusqu'à ce qu'apres la multiplication & diuision, ils voyent quel caractere conuient à ce nombre qui est resté: & ils font du caractere trouué ce qu'ils ont fait du premier, & ainsi de suite, iusques à ce qu'ils font naistre 28. caracteres. Lors ils en composent un mot, & de ce mot une sentence, qui est la response de la demande qui a tousiours le nombre de la premiere sorte des Vers Arabics, que on nomme Ethaïla. Ce Vers qui naist des susdits caracteres porte donc la vraie response: & premierement il en sort la chose demandee, puis la response de ceste demande. Ceux-cy ne s'abusent iamais, & leur cabale est une chose merueilleuse.

Il y a encor plusieurs sçavans hommes, qui prennent le surnom de sages, & de Philosophes moraux, gardent quelques loix outre celles que Mahomet a faites, ceux-cy sont tenus par quelques-uns pour vrais observateurs de la loy, & par d'autres au contraire. Mais le peuple les tient pour saints, combien qu'ils veulent que plusieurs choses defendues par la loy de Mahomet soient permises. Il est deffendu par ceste loy de chanter aucune chanson d'amour par regle de musique, & ils disent que cela se peut faire. Mais nous parlerons plus amplement de cecy, lors que nous ferons mention de la Religion.

Il se trouue à Fez quelques hommes, nommez Elcanesin, qui s'amusent à chercher des thresors, qu'ils croient estre enterrez dans les fondemens des anciennes ruines. Ces sortes gens vont hors de la ville, & entrent en plusieurs grottes, & lieux qui sont bien auant dans terre pour trouver ces thresors, ayans ferme opinion, que quand les Romains perdirent la domination de l'Afrique, & s'enfuyrent en Espagne en la Prouince Betique, ils enterrerent autour de ce lieu plusieurs choses precieuses qu'ils ne peurent emporter avec eux, & qu'ils firent des enchantemens, à raison dequoy ces enchanteurs taschent d'auoir ces thresors. Il y en a mesmes qui disent qu'ils ont veu en tel lieu de l'or, ou de l'argent, mais qu'ils ne l'ont peu tirer, à cause qu'ils n'auoient pas les enchantemens & les parfums propres, si bien que creusant la terre sur ceste vaine creance, ils ruynent bien souuent les maisons & les sepultures, & quelquefois on les mene à dix ou douze iournees, bien loing de Fez, & la chose est allée si auant, qu'ayant des liures qui font mention de quelques montagnes, & lieux, où il y a des thresors, ils les gardent comme des Oracles.

Fez ne manque non plus de Chimistes, qui sont les plus sales hommes de toute la ville, & qui peuuent

qui puent le plus du monde, à cause du soufre, & autres meschantes odeurs, parmy lesquelles ils sont ordinairement. Le plus souvent ils s'assemblent le soir en bon nombre dans le grand Temple, disputent de leurs imaginations fantastiques. Ils ont beaucoup de livres de cet art, composez par des hommes eloquents, dont le premier est Geber, que nous avons en Latin, qui fut cent ans apres Mahomet, & l'on dit que ce fut vn Grec renié. Ils ont encor vn autre Auteur nommé Attrogrei Secretaire du Soudan de Bagadet, qui a fait vne autre grande oeuvre : & il y en a encor vn autre composé par Cantiques, contenant tous les articles de cet art, & l'Auteur se nommoit Muguariti, natif de Grenade, & son liure fut commencé par vn Mamelu de Damas, homme fort sçauant en cet art : mais le commentaire est plus malaisé à entendre que le texte. Il y a deux sortes d'Alchimistes : veu que les vns cherchent l'Elixir, c'est à dire la matiere qui teind tous metaux, & les autres s'addonnent à chercher la multiplication de la quantité des metaux, où les mellant l'un avec l'autre.

Il y a encor force charmeurs qui chantent par les places, iouant de certains tambours, violons, harpes, & autres instruments, & ceux cy vendent au peuple ignorans certains brefs qui sont bons contre diuers maux, comme ils dient. On y voit encor vne autre sorte d'hommes fort vils, qui sont tous d'une famille, & vont par la ville faisant dancer des singes, portant autour du col & aux mains plusieurs serpens. Ils font encor quelques figures de geomancie, & predissent leur fortune aux femmes. Ils menent aussi avec eux des estalons, & rendent pleines les cauales de ceux qui les en requierent.

Or les hommes de la ville sont superbes, & n'ayment guieres les estrangers. Mais les Seigneurs sont les plus arrogans, & plus insupportables hommes du monde, tellement que peu de gens les hantent : & il en est de mesme des Docteurs & des Iuges, qui pour garder leur reputation ne veulent pratiquer beaucoup de personnes,

RICHESSES.

Ceux qui demeurent en ces Royaumes ont tellement tout ce qui leur est necessaire, ²³ d'autant que ce qui deffaut en vn Pais abonde en l'autre, qu'ils se peuuent passer des estrangers, & si la paix y estoit aussi bien establie, comme la guerre s'y rencontre à tout propos, c'est chose assuree que cet Empire seroit heureux, & n'enuiroit les commoditez des autres. Presque en toutes ses montagnes il se fait grande nourriture de bestial, elles rapportent aussi beaucoup de grain, au moins pour la plus grande partie. Ses plaines produisent tant de bleds & tant de fruiets, qu'on porte mesmes de ce qui y vient aux Prouinces estrangeres, nommément des citrons, des oranges, du sucre & des oliues. Outre ce, l'on porte de tous costez leurs camelots, dont on tire beaucoup d'argent, & leurs marroquins sont chez de toutes parts, puis leurs toilles de cotton, qui sont du tout propres & agieables, ne leur rendent pas peu de profit, & celuy qu'ils tirent des sucres n'est pas moindre que les autres.

Mais pour parler des reuenus & de la richesse de l'Empereur de Marroc, il est maistre de tous les biens de ses sujets, & des sujets mesmes, veu que quelques charges & impositions qu'il leur mette sus, ils n'oseroient en ouuir la bouche.

Toutesfois l'vsurpation de l'Empire, la crainte d'un accident semblable à celuy de Muley Cheq, & le branle perpetuel des affaires, font que cestuy cy tasche d'entretenir ses sujets doucement, & de leur faire glisser dans l'ame vn delir de demeurer tousiours sous sa domination.

Il tire de ses sujets taillables la disme, & les premices des fruiets, & du bestial. Il est vray que quant aux premiers il ne prend pas plus d'un pour vingt, & de vingt en Suz, quand il y en auroit bien cent & d'auantage, il ne prend iamais plus de deux.

Il tire de chaque arpent de terre cinq quarts de ducat, & autres cinq de chaque feu, autant encor de tous ceux qui ont passé l'age de quinze ans, soient masles ou femelles, & au besoin il en tire plus grande somme. Et afin que les peuples payent plus allegrement ce qui leur est imposé, il demande tousiours la moitié plus qu'on ne doit exiger, pour ce que par ce moyen il semble à ses sujets qu'on leur face grace de ce qu'on ne leur fait pas payer.

Il est vray qu'aux montagnes il demeure des peuples indomptez, qu'on ne peut forcer au payement d'aucune chose à cause des lieux où ils se tiennent, & de leur forte assiette, & l'on n'en tire pour tout que la disme de la recolte, mesme ils payent cecy afin d'auoir permission de descendre aux plaines. Outre ces reuenus, ce Monarque a toutes les Douanes, & les Gabelles de Fez, & des autres villes, veu que les Citoyens de Fez payent deux pour cent, pour tout ce qui entre, & les estrangers dix.

D'auantage il y a les reuenus des moulins, & de plusieurs autres choses qui montent à vne grande somme. Car pour le regard des moulins, il tire bien pres de demy real, pour chaque grand boisseau de bled, qui se moult à Fez, où il y a quatre cents moulins, voire d'auantage.

La Mosquee du Caruuen auoit quatre-vingts mille escus de reuenu, & les Colleges & les Hospitaux de Fez estoient aussi rentez de beaucoup de milliers d'escus, que le Roy tire tout aujourd'huy : & outre il est heritier de tous les Gouverneurs, & de tous ceux à qui il donne pension, & lors qu'ils meurent il entre en possession de leurs chevaux, armes, habillemens, & pour le dire en vn mot de tous leurs biens. Il est vray, que si l'vn de ceux-cy laisse des fils propres à seruir le Roy à la guerre, il leur donne la mesme pension qu'il donnoit au pere. Mais si les enfans sont petits, il entretient les masses iusqu'à ce qu'ils ont atteint l'age de porter les armes, & les filles, iusqu'à ce qu'elles trouvent mary, & pour pouuoir auoir le bien des personnes riches, il leur donne quelque Gouvernement, ou quelque charge, avec pension. A raison de quoy chacun tasche de cacher ses richesses en mourant, afin que le Roy ne s'en saisisse, ou de s'esloigner de la Cour, & des yeux du Roy.

F O R C E S.

L'EMPEREUR de Marroc n'a point de forteresses de grande importance, si ce n'est sur le
24 rivage de la mer, où il y a le Cap d'Aqueto, Larache, & Teruan : Car il loge la force de son Estat, de mesme que le Turc & le Persan en ses gens de guerre, & principalement en sa Cavalerie. C'est le sujet aussi pour lequel il n'est guiere bien pourueu d'artillerie, combien qu'il y en ait vne assez bonne quantité que ces predecesseurs ont prise sur les Portugais, & autres à Fez, Marroc, à Tarudant, & aux ports susdits, & chaque Empereur en fait fondre quand il est besoin, & pour cet effect il ne manque pas de bons maistres. Il y a vn Arsenal plein de munitions à Marroc, où l'on fait ordinairement tous les mois quarante-six quintaux de poudre, avec plusieurs arquebuses.

L'an mil cinq cents soixante-neuf, le feu se mit en cet Arsenal, avec tant de furie, qu'une partie de la ville en demeura ruinee. Mais quant à la gendarmerie de ce Monarque elle est de plusieurs sortes.

La premiere est de deux mille & sept cents chevaux, & deux mille arquebusiers qu'il tient, partie à Fez, & partie à Marroc : mais bien plus au dernier lieu, où il fait sa demeure ordinaire, & ceux-cy sont presque pour la garde.

La seconde est d'un bataillon de six mille hommes de cheual, tous Gentils-hommes, & gens de marque. Ceux-cy paroissent bien montez sur des chevaux superbement enharnachez avec leurs armes, & il les fait extremement bon voir, tant pour la diuersité des couleurs de leurs habits & harnois, que pour leur richesse. Car on y voit luire force or, argent, & grande quantité de perles, & de pierrerie, & tout ce qui peut contenter les yeux, & plaire à la curiosité de ceux qui les regardent. Ceux cy tirent, outre la prouision de bled, d'auoine, d'huile, de beurre, & de chair, tant pour eux, que pour leurs femmes & enfans, de septante à cent once d'argent.

La troisieme sorte de gendarmerie est des Timariots, & pour ce que l'Empereur de Marroc a accoustumé de donner à tous ses fils, ses freres, & autres personnes de marque, & d'autorité qui sont parmy les peuples d'Afrique, comme aussi aux Princes des Arabes, & aux plus grands d'entr'eux l'usufruit des terres. Ceux-cy sont labourer les champs, & recueillent apres les froments des terres qu'ils tiennent pour l'entretien de la cavalerie, & les Gouverneurs tirent du ris, de l'auoine, de l'huile, du beurre, des moutons, de la volaille, & de l'argent, & distribuent aux soldats toutes ces choses de mois en mois, selon la qualité des personnes. On leur donne encor du drap, de la toille, de la soye pour s'habiller, des armes offensives & defensives, & des chevaux avec lesquels ils seruent à la guerre, & s'ils meurent en quelque combat, on leur en donne d'autres. Chacun de ces chefs tasche de mener les gens bien armez, vestus, & montez, & outre cela, ceux-cy tirent de vingt-quatre à trente onces d'argent toutes les annees.

La quatrieme sorte de la gendarmerie est d'Arabes, qui vivent continuellement en leurs Auars (ils nomment ainsi leurs peuplades, dont la chacune est composee de cent ou deux cents tentes) distribuez sous diuers Gouverneurs, afin qu'ils soient prests aux necessitez qui s'offrent. Ceux-cy seruent à cheual : mais ils tiennent plus du voleur que du soldat.

La cinquiesme sorte de gendarmerie est semblable aux leuees que font les Princes Chrestiens, & c'est en celle-cy que sont enroollez les habitans des villes ou villages de l'Empire. Il est vray que les Roys font peu d'estat de ceux-cy, & ne leur mettent pas volontiers les armes en la main, de peur des reuoltes, sinon aux guerres contre les Chrestiens : pour ce qu'alors ils ne les en peuuent mesme empescher. Car d'autant qu'ils ont en leur loy, que si vn Mahometan tue vn Chrestien, ou meurt de sa main, il s'en va droit en Paradis, les hommes, & les femmes de tout aage, & de toute qualité courent à la guerre, afin d'y mourir pour le moins, & par ce moyen

se moyen d'acquiescer le Ciel, selon leur folle opinion. Et l'on ne void pas moins d'ardeur à nostre grand dommage, aux Turcs principalement, pour la deffence de leur secte. Il semble qu'ils vont à nopces, & non à la guerre, & ils ne peuvent presque attendre le jour qu'on leur a prescrit. Ils tiennent saints, & pour bien-heureux ceux qui meurent avec les armes en la main contre les ennemis, & pour mal-heureux & lasches ceux qui meurent en leurs maisons entre les pleurs des enfans, & les cris des femmes.

On peut comprendre aisément des choses susdites, quel nombre de gens ce Prince peut mettre en campagne: mais on le jugera encor mieux par l'experience, Car Mulay Abdala l'an 1562. assiegea Magazan avec deux cents mille personnes, combla le fossé avec vne montagne de terre, & esplana les murailles avec son artillerie: mais avec tout cela, il fut forcé d'abandonner l'entreprise par la valeur des Portugais, & pour le dommage qu'il receut des mines. D'avantage ce Prince a ceste incommodité, qu'il ne peut continuer plus de deux ou trois mois vne grosse guerre: à cause que ses gens ne vivent que de la provision de viures qu'ils tirent de jour en jour, & ceste provision ne peut estre conduite, où il seroit besoin pour bien faire la guerre: tellement qu'ils sont contraincts de retourner en leurs maisons pour viure: & c'est chose claire, que celuy qui n'est riche d'argent ne peut faire la guerre long temps. Le Moluque qui deffit Dom Sebastien Roy de Portugal, avoit quarante mille chevaux, & quatre-vingts mille hommes de pied, outre les Arabes, & les volontaires: mais on tient qu'il eut peu mettre ensemble soixante & dix mille chevaux, & plus d'Infanterie qu'il n'en mit sur pieds pour ceste fois.

G O U V E R N E M E N T.

C O M M E N T que ce soit chose difficile de discourir du Gouvernement d'un Estat qui est toujours en trouble, & sujet à des changements perpetuels, & qu'aujourd'huy la force l'acquiert à l'un, demain à l'autre, & que par ce moyen il n'y puisse avoir que du desordre: toutesfois ie m'essayeray d'en dire ce que j'en ay peu apprendre, & pour faire comprendre la façon du Gouvernement de tous ces Pais, ie viendray à celuy de Fez lors qu'il estoit en la fleur, & comme il est encor pour la plus grande partie, priant le Lecteur de considerer, que parmy tant de confusions, il est impossible de remarquer comme il faut vne police.

G O U V E R N E M E N T.

P O U R ce qu'il semble que le Lecteur n'est guiere satisfait lors qu'on luy parle d'un Estat, où quelqu'un domine, si au même temps on ne luy fait entendre qui est celuy qui le gouverne: j'ay creu que ie donneroie du contentement à ceux qui seroient sur ceste attente, si ie leur faisois entendre quelle est la famille qui commande maintenant aux Royaumes de Marroc, & de Fez, & par quels moyens elle est parvenue à cet Empire. Il y avoit un Alfaqui, ou Pontife de la loy Mahometane, natif de Tigumedet, lieu de Dara, homme ruzé, & non moins ambitieux, que bien instruit aux sciences, auxquelles les Mahometans s'addonnent. Cestuy-cy qu'on nommoit Mahomet, Benamet, & qui se faisoit aussi nommer Xerif, que nous dirions Cherif en nostre langue, commença d'estre en quelque reputation environ l'an 1508. Il se disoit estre yssu de la race de Mahomet, & proposa dans son esprit, voyant la division des Estats d'Afrique (où les Portugais estoient alors fort puissans) de s'emparer, & de se rendre maistre de la Mauritanie, Tingitanie. Pour cet effect il envoya premierement ses trois fils, Abdala, Hamet, & Mahomet, en pelerinage à la Mecque, & à Medine, pour visiter & honorer le sepulchre de Mahomet leur faux Prophete.

Ces ieunes gens firent le voyage avec tant de reputation, de sainteté & de religion, qu'à leur retour les gens leur alloient au devant, baisoient leurs habillemens, & les honoroient comme des saints hommes. Ces abuseurs feignans d'estre elevez à quelque fort haute contemplation, marchaient par le Pais, soupirans & appellans Ala, ou Dieu, avec des cris interrompus de soupirs, & de gémissements, & ne vivoient que d'aumônes. Le pere les ayans receus en sa maison avec vne allegresse nonpareille: mais ne voulant pas laisser refroidir l'applaudissement, & la creance que ses fils venoient d'acquiescer par un tel pelerinage, en envoya deux, qui furent Hamet, & Mahomet à Fez: où ayans esté receus fort courtoisement du Roy, l'un d'eux devint Lecteur de l'Amorodache, College fort renommé de ceste ville-là, & le plus ieune Precepteur des enfans du Roy. Et lors qu'ils se virent fort aux bonnes graces du Roy, & en bonne opinion parmy le peuple, estans poussez par leur pere, prenant leur suiet sur les dommages, que les Arabes & les Mores faisoient à ceux de leur loy, sous les Enseignes des Portugais, à la solde desquels ils combattoient: ils demanderent au Roy permission de deployer un Estendart contre les Chrestiens, luy promettant, comme il aduint en effect, qu'ils tireroient aisément à eux les Mores qui suivoient les Portugais, & par ce moyen assailleroient les Provinces de Suz, Hee, Ducale, Marroc, & autres qui estoient mal-menees, & travaillées continuellement par les Portugais.

Muley Nazzar frere du Roy, contredisoit à ceste proposition & demande, disant que si

m m

ses freres, sous pretexte de Religion & de sainteté faisoient quelque progres avec les armes en la main, il seroit impossible de les arrester apres, & de les mettre bas comme auparavant, pour ce que les armes rendent les hommes hardis, & les victoires les font insolents, & la fuite des peuples les rend desirieux de choses nouvelles. Mais le Roy qui auoit grand' opinion de leur sainteté, faisant peu d'estat des raisons que son frere luy alleguoit, leur donna vn estendard, vn tambour d'airain, & outre ce vingt chevaux pour les accompagner, & des lettres de recommandation aux Arabes, & aux Seigneurs, & villes de Barbarie.

Avec ces commencements, beaucoup de monde estant accouru au bruit de leur voyage, il courent le Pais de Ducale, & passerent iusques au Cap d'Agueron, qui estoit alors tenu par les Portugais, & se voyans bien suivis, & en bonne estime, ils demanderent aux peuples (qui viuoient alors en liberté pour la plus grãde partie, & se ioignoient à celuy que bon leur sembloit) que puis qu'ils faisoient la guerre pour la loy de Mahomet contre les Chrestiens, il les assistassent, en leur donnant les decimes deuës à Dieu : ce qui leur fut soudain accordé par les peuples de Dare, & par ce moyen ils s'emparerent peu à peu de Tarudant (dont leur pere fut fait Gouverneur) & de Suz, Hee, Ducale, & de leurs voisins.

Ils s'arresterent premierement à Tednest, puis à Tefarote, & deffirent en vn combat Lope Barriga, Capitaine fort renommé des Portugais, mais ils y perdirent leur frere aîné : puis estans entrez avec force belles paroles dans la ville de Marroc, ils y empoisonnerent le Roy, & Hamed Xerif se fit appeller Roy de Marroc en son lieu.

Cependant les Arabes de Ducale, & de Xarquit vindrent aux mains avec ceux de Garbie, chacun des partis s'assurant de la faueur des Xerifs : mais ceux cy voyans qu'il en tomboit beaucoup d'un costé & d'autre, tournerent les armes contre ces deux ennemis, & s'enrichirent de leurs despoüilles. Ils auoient auparavant enuoyé au Roy de Fez la cinquieme partie de tout leur butin : mais apres ceste victoire, n'en faisant plus d'estime, il luy enuoyerent seulement six chevaux, & six chameaux fort foibles. Dequoy le Roy estant piqué leur enuoya demander la cinquieme partie du butin, & le tribut que le Roy de Marroc luy payoit, les menaçant de leur faire la guerre, au cas qu'ils y contredissent.

Mais ce Roy estant mort en ces entrefaites, Hamed son fils qui auoit esté disciple du ieune Xerif, non seulement s'appaisa : mais encor confirma Hamed Xerif au Royaume de Marroc, pourueu qu'il recogneust de quelques choses les Roys de Fez comme Princes souuerains.

Mais d'autre costé les Xerifs, dont la puissance & la reputation croissoit continuellement, lors que le temps de payer le tribut fut arriué, manderent dire au Roy, qu'estans legitimes successeurs de Mahomet, ils n'estoient obligez de donner aucun tribut à qui que ce fut, & qu'ils auoient plus de droit en l'Afrique que luy : que s'il les vouloit pour amis ils le feroient : mais que s'il les destournoit de la guerre contre les Chrestiens, ils ne manqueroient de courage, ny de pouuoir de se deffendre.

Le Roy irrité de ceste responce leur declara aussi tost la guerre, & se transporta en personne au siege de Marroc. Mais il fut la premiere fois contrainct de desloger & leuer le siege : puis y estant retourné avec dix-huict mille chevaux, entre lesquels y auoit deux mille arquebusiers & arbalestriers, il fut vaincu par les Xerifs qui n'auoient plus de sept mille chevaux, & mille deux cents arquebusiers, ainsi qu'il vouloit passer vne riuere.

Par le moyen de ceste victoire, les Xerifs exigerent tribut de ce Pais, & passans l'Atlas prirent Tafilet, ville importante, & partie par amour, partie par force rangerent à leur obeissance diuers peuples de Numie, & des montagnes.

- 22 L'an 5, 6. le ieune Xerif, qui se nommoit desia Roy de Suz, ayant leué vne puissante armee, & mis en campagne vn grand nombre de canons, en partie pris au Roy de Fez, & en partie faits par des Chrestiens reniez, alla à l'entreprise du Cap d'Aguero, place de grande importance tenue alors par les Portugais, qui l'auoient beaucoup fortifiée, premierement aux despens de Lopez Sequere, puis lors qu'ils eurent cogneu la commodité de son assiette, à ceux du Roy Emanuel de Portugal, & l'on combattit vaillamment d'un costé & d'autre. En fin le feu s'estant mis aux munitions de guerre, & les soldats qui deffendoient ceste place estans espouventez de cét accident, le Xerif entre dedans, & prit la plus grãde partie de ceux qui y estoient en garnison. Avec ceste victoire toute la montagne d'Atlas, le Royaume de Marroc, & les Arabes, qui s'estoient rangez avec les Portugais, presterent obeissance aux Xerifs, à raison dequoy le Roy Jean III. de Portugal, voyant que la despence surpassoit de beaucoup le profit, abandonna volontairement les places de Safin, Azamor, Arzille, & Alcaçar, qu'il possédoit en la coste de Barbarie.

Ces prosperitez furent cause d'une fort grande discorde entre les freres, & l'issüe en fut telle, que le plus ieune ayant obtenu la victoire en deux batailles qu'il eut contre son aîné, & l'ayant fait prisonnier le confina à Tafilet, puis tournant ses armes contre le Roy de Fez, apres l'auoir pris vne fois, & puis deliuré, il l'eut pour la seconde fois entre ses mains (pour ce qu'il auoit manqué

auoit manqué de parole) & en mesme temps il se rendit maistre de son Estat, & le fit en fin mourir avec ses enfans.

Voila comme cét Empire est parvenu entre les mains de ceux de ceste famille, qui y commande encores : mais avec tant de diuisions & de changemens de fortune, que c'est chose estrange comme tant de remuëments ne les ont lassez, ou comme tant de changement ne les ont perdus : Voyons maintenant comme on se gouuerne en ces Royaumes.

Premierement on ne sçait que c'est de faire iustice au Pais d'Hee, & principalement aux montagnes, & les Gentils-hommes peuuent à peine tenir quelque police aux villes.

Au Pais de Suz, le peuple de la ville de Telfy viuoit en liberté autrefois, & se gouernoit comme par forme de Republique : mais maintenant l'Empereur de Marroc tient la Chancellerie. Il faut remarquer qu'aux montagnes de la Prouince de Marroc, & au Pais de Guzule, il n'aduient guiere souuent que les habitans rendent franchement obeissance à leur Prince, & de mesme est-il de beaucoup d'autres endroits. Le Roy a son Conseil dans Marroc, & vne Chambre de Iustice, & tient en toutes les Prouinces, & mesmes en toutes les bonnes villes des Gouverneurs, qui sont traictez, comme i'ay dit par cy-deuant. Et pour ce que c'est peu de chose que le discours du Gouuernement de tout le reste, ie viendray à celuy de Fez à la suite qu'auoit son Roy, & à tout ce qu'on y a remarqué de plus considerable, qui fera assez iuger de l'ordre qu'on tient en tous ces Pais, & en la Cour de ce Prince.

Entre tous les Seigneurs de l'Afrique, on ne trouue pas qu'aucun ayt iamais esté cree Roy ou Prince par election du peuple, & en la loy de Mahomet il n'y a Seigneur temporel qui se puisse dire legitime, excepté les Pontifes. Mais depuis que l'autorité des Pontifes fut diminuée, tous les Chefs des peuples qui estoient dans les deserts, commencerent à s'approcher des Pais habitez, & par force d'armes estabirent diuers Seigneurs contre la loy de Mahomet, & contre leurs Pontifes, comme il est arriué au Leuant, où les Turcs, les Tartares, & autres venans de mesmes contrees, s'emparerent des terres de ceux qui se trouuerent plus foibles.

Ainsi les familles de Lontuna, & de Marin regnerent en Afrique. Il est vray que les gens de Lontuna vindrent au secours des peuples de l'Occident. Doncques pour celle cause on ny faict les Seigneurs par vraye succession, ny par election du peuple, des plus grands, & du General de l'armee : mais chaque Prince avant sa mort faict promettre aux plus grands, & plus puissans de la Cour, qu'il creeront pour leur chef apres sa mort son fils ou son frere. Mais cela n'empesche pas que plusieurs ne faussent souuent leur serment, pour ce qu'il arriue presque tousiours qu'ils eslisent pour Seigneur celuy qui leur est plus agreable.

C'est en ceste sorte que se faisoit ordinairement la creation du Roy de Fez, qui n'estoit plustost cree tel, qu'il faisoit vn des plus nobles de son Royaume son grand Conseiller, & luy assignoit aussi vn tiers du reuenu de son Royaume.

Après il ellisoit vn Secretaire, qui luy seruoit aussi de Thesorier, & de grand Maistre de son Hostel.

Il creoit apres les Capitaines de la Caualerie, qui estoit destinee à la garde du Royaume, & ceux-cy demeuroient le plus souuent en campagne. Il establissoit aussi en chaque ville vn Gouverneur, qui iouissoit des reuenus de la ville, & estoit obligé de tenir à ses despens vn certain nombre de cheuaux, qui deuoient estre prests au besoin, & toutes & quantes fois qu'il falloit faire vne armee. Il ordonnoit encor certains Commissaires sur les peuples qui demeuroient aux montagnes, & encor sur les Arabes qui luy estoient sujets.

Les Commissaires administroient la Iustice selon la diuersité des loix de ces peuples. Ils auoient aussi charge d'exiger les rentes, & de tenir compte des payemens ordinaires & extraordinaires. Apres il ordonnoit certains Barons, qu'on appelle au langage de Fez par vn mot qui signifie autant que Gardiens, dont chachun auoit vn chasteau, ou vn ou deux villages, & dont il tiroit certain reuenu pour viure, & maintenir sa qualité, & pour pouuoir accompagner le Roy en ses armes, il tenoit aussi des cheuaux legers à ses despens, quand le Roy se tenoit à la campagne : mais en temps de paix il leur donnoit du bled, du beurre, & de la chair à saler pour toute l'annee, mais fort peu d'argent. Il est vray qu'il leur donnoit vn habillement toutes les annees : & ceux-cy n'auoient nul soing de leurs cheuaux, ny dedans la ville, ny dehors, pour ce que le Roy leur fournissoit toutes choses, & tous les valets d'estable estoient esclaves Chrestiens, & portoient de pelans fers aux pieds : mais quand l'armee se mettoit en campagne, on les faisoit monter sur des chameaux de bagage. Il auoit encor vn autre Commissaire sur les chameaux, qui distribuait les campagnes entre les Pasteurs, & faisoit provision des chameaux dont le Roy auoit besoin, & chaque Chamelier tenoit deux chameaux tous prests, pour charger aussi tost qu'il en receuroit le commandement.

Il auoit apres vn Pouruoyeur qui auoit charge de fournir, garder, & distribuer les viures, tant pour le Roy, que pour son armee : & cestui cy auoit dix ou douze grands paillons,

m m ij

où il mettoit lesdits viures, changeant de chameaux continuellement à en faire porter de nouveaux, afin que l'armée n'en eust faute. Sous ceux-cy estoient les officiers de cuisine. Il auoit apres vn maistre d'Ecurie, qui auoit charge de tous les chevaux, mulers, & chameaux du Roy, & le Pouruoyeur luy fournissoit tout ce qui luy faisoit besoin. Il auoit aussi vn Commissaire estably sur les bleds, qui auoit charge de faire porter l'orge, & ce qui estoit necessaire pour l'entretien desdites bestes : & ce Commissaire auoit des Notaires pour escrire tout le bled qui se distribuoit, & en rendre compte au grand maistre. Il auoit encor vn Capitaine de cinquante chevaux, qui estoient comme coureurs, & faisoient les impositions de la part du Secretaire du Roy, au nom dudit Roy. Il auoit encor vn autre Capitaine, qui estoit comme chef d'une garde secrette, & auoit autorité de commander de la part du Roy aux officiers qui faisoient les executions, & les confiscations. Il pouuoit prendre les plus grands, & les mettre en prison, & user en leur endroict de la rigueur de la iustice, si le Roy le luy commandoit.

Il auoit aussi pres de luy vn Chancelier qui gardoit ses seaux, & escriuoit les lettres qu'il faisoit, & les sceelloit par mesme moyen. Il auoit vn fort grand nombre d'estaffiers, qui auoient vn Capitaine qui les receuoit, les chassoit, & leur donnoit peu ou moins de gages selon leur suffisance. Et quand le Roy donnoit Audience, ce Capitaine estoit tousiours present. Il auoit encor vn Capitaine du bagage, & de qui l'Office estoit de faire porter les tentes, où logeoient les chevaux legers du Roy : & il faut sçauoir que les tentes du Roy estoient portees par des mulers, & celles des soldats par des chameaux. Il auoit vne troupe de gens qui portoient en marchant les estendarts ployez : mais il y en auoit vn qui marchoit tousiours deuant l'armée, & auoit vne enseigne haute & desployee. Tous ceux-cy seruoient de guide, & sçauoient les chemins, & les passages des bois, & des riuieres. Il auoit aussi vn grand nombre de sonneurs de tambour, qui auoient de grands tambours d'airain en façon d'un grand plat, larges en haut, & estroicts par le bas, couverts de peaux, & les portoient sur des chevaux baltez : mais ils auoient vis à vis des tambours, certains contrepoids, pour ce qu'ils sont fort pesants, & ces chevaux sont des meilleurs, & des plus vistes que l'on puisse voir, pour ce que c'est vne grande honte parmy eux de perdre le tambour : & lesdits tambours sonnent si haut, qu'on les oyt de bien loing, & on les bat avec des nerfs de taureau. Le Roy ne tenoit pas à ses despens les trompettes, ains ceux de Fez estoient obligez de luy en deffrayer vn certain nombre, & ceux-cy estoient aussi bien employez aux trespas des Roys qu'aux armées.

Il y auoit vn Maistre des Ceremonies, qui estoit tousiours aux pieds du Roy, lors qu'il assembloit son Conseil, on donnoit Audience, ordonnant les places, & faisant parler les vns apres les autres, selon leurs rangs & dignitez.

La Maison du Roy estoit toute pleine d'esclaves noires, qui seruoient à la Chambre de la Roynne.

Il auoit encores quelques esclaves Chrestiennes, qui estoient pour la plus grande partie Espagnolles, ou Portugaises, & toutes ces femmes estoient sous la garde de certains Eunuques, qui estoient esclaves noirs.

Quand le Roy vouloit aller en quelque lieu, le Maistre des Ceremonies le faisoit premierement entendre aux coureurs, & ceux-cy le faisoient sçauoir aux parents du Roy, aux Capitaines, aux gardes, & aux autres hommes de cheual, qui s'assembloient tous en la place qui est hors du Palais, & par toutes les rues qui en estoient proches. Et ainsi que le Roy venoit à sortir du Palais, lesdits coureurs ordonnoient la façon que l'on deuoit garder à marcher. Ceux qui portoient les enseignes alloient les premiers, puis les tambours suiuoient, & apres le Maistre d'Ecurie avecques ses officiers, & sa maison, puis apres le Pouruoyeur avecques les siens, puis les gardes, le Maistre des Ceremonies, les Secretaires du Roy, le Thresorier, le Iuge, & le Capitaine de l'armée. Le Roy marchoit apres avecques le grand Conseiller, & quelque Prince, & il y auoit tousiours quelques Officiers du Roy qui marchoient deuant sa personne, & l'un portoit son espee, l'autre son escu, & vn autre son arc. Ses estaffiers alloient autour de luy, dont l'un portoit la pertuisane du Roy, l'autre la couuerture de la selle de son cheual avecques le licol, & quand le Roy mettoit pied à terre, on couuroit ceste selle avecques ceste housse, & le licol sur la bride du cheual afin de le tenir.

Le Roy estoit suiuy du Chef & de ses estaffiers, puis des Eunuques, puis de sa maison, puis des chevaux legers, & finalement des arbalestriers, & arquebusiers.

Quand le Roy se tenoit en campagne, l'on dressoit premierement au milieu de tous vne grande tente pour luy, qui estoit faite comme les murailles de quelque chasteau avec ses creneaux, ainsi que j'ay veu à quelques grands Seigneurs aux armées estrangeres, & quarrees de tous costez.

Ceste tente auoit quatre portes, à chacune desquelles on voyoit la garde des Eunuques. Autour de la tente estoient les logemens de ses Officiers, & des Courtisans plus fauoris, & autour de ceux-cy

de ceux-cy les tentes des gardes, faites de peaux de chevre, ainsi que celles des Arabes.

Presque au milieu l'on voyoit la despence, la cuisine, & la sommelierie du Roy, & assez pres de la l'on voyoit les pavillons où logeoient les chevaux legers, qui mangeoient tous en la sommelierie du Roy.

On voyoit assez prez de là l'escurie, c'est à dire quelques lieux couverts, où sont logez les chevaux, & hors de là on voyoit les muletiers du bagage du Roy, & là mesme les boutiques des bouchers. Les marchands & les artisans, qui venoient en l'armee, se logeoient à costé de ces muletiers, tellement que ce tout venoit à estre comme vne ville, pour ce que les tentes des gardes seruoient de murailles, d'autant qu'elles estoient tellement dressées l'une pres de l'autre, que l'on ne pouuoit entrer en ces logemens, que par des lieux ordonnez : & on faisoit bonne garde toute la nuit autour de la tente du Roy : mais toutes gardes estoient personnes viles, & qui ne portoient iamais armes. Il y en auoit de mesme sorte autour de l'escurie : mais bien souuent à cause de la feneantise, & lascheté de ces gardes, non seulement l'on desroboit des chevaux : mais encores l'on trouuoit dans la tente du Roy des ennemis qui venoient là pour le mettre à mort.

Le Roy estoit presque toute l'annee en campagne, tant pour garder son Royaume, que pour maintenir en paix, & en amitié les Arabes ses sujets. Nous auons assez parlé du Roy de Fez, & de toute sa Cour, voyons vn peu maintenant comme il conduisoit tout le reste.

En premier lieu, dans Fez il auoit des gabelles establies, pour ce que les draps se vendoient en façon d'encans, & ceux qui en auoient la charge, les portoient premierement à ces gabelleurs pour les sceller, puis les alloient crians parmy les marchands, & il y auoit enuiron soixante Crieurs de ceste sorte.

Les Apoticaire auoient vn quartier qui se fermoit de deux costez avec deux belles portes, & tenoient à leurs despens des gardes qui alloient la nuit tout à l'entour avec des lanternes, des chiens, & des armes. Il y auoit des gens qui faisoient les mesures du bled, que le Consul adioustoit, prenant vn double de chacun pour ce faire. Dans la ville il y a seulement quelques petits officiers, & Magistrats qui ont charge de rendre le droit à vn chacun. Il y auoit le Gouverneur qui estoit sur les causes ciuiles, & criminelles, vn Iuge, qui prenoit cognoissance de ce qui concernoit les loix des liures de Mahomet, & vn autre Iuge qui estoit comme Lieutenant du premier, & cognoissoit des choses appartenantes au mariage, auoit autorité d'examiner les testmoins, & mesmes rendoit iustice vniuersellement. Il y auoit vn Aduocat, lequel on consultoit sur la loy, & par deuant que l'on appelloit des sentences des Iuges, ou quand ils s'estoient abusez, ou quand ils auoient iugé par l'autorité de quelque Docteur moins excellent. Le Gouverneur tiroit de grandes sommes des condamnations qui se faisoient en diuers temps, & presque toute la punition d'un criminel n'estoit que d'auoir le fouet en presence du Gouverneur, & on luy donnoit cent, ou deux cents coups. Apres cela le bourreau mettoit vne chaisneau col du criminel, & le menoit en cet estat par toute la ville tout nud, excepté les parties honteuses, criant, & publiant le mal qu'il auoit fait : & bien souuent l'on en menoit plusieurs enchainez ensemble. Le Gouverneur auoit de chaque criminel vn ducat & vn quart, comme aussi de tous ceux qui entroient dans la prison, il auoit certaine chose qui luy estoit donnee par certains marchands, & artisans destinez à telle chose. Les Iuges du droit Canon, ou de la loy de Mahomet, n'auoient nuls gages, pour ce qu'il est deffendu par la loy de Mahomet de donner rien du monde à vn Iuge pour telle chose. Mais ils viuent d'autres gages, ou recompenses, comme des Lectures, ou de la Prestise de quelque Mosquee. Semblablement les Procureurs, & les Aduocats sont pour la pluspart pleins d'ignorance. Les Iuges auoient vn certain lieu, où ils font emprisonner les debtors, & autres pour choses legeres, & de peu d'importance. Dans la ville il y auoit quatre Capitaines du Guet, qui alloient par la ville depuis la nuit venue iusques à deux heures apres, & ceux-cy n'auoient autres gages que certaine chose de ceux qu'ils prenoient, qui estoit prise sur l'amende à laquelle ils estoient condamnez. Mais estoit permis à chacun de tenir tauerne, & d'estre macquereau. Le Gouverneur de la ville n'auoit ny Iuge ny Notaire : mais donnoit sentence à sa volonté, & comme bon luy sembloit. Il n'y auoit aussi qu'un homme qui afferma la Douane, & la gabelle, qui payoit tous les iours à la Chambre du Roy trente ducats, & auoit en chaque porte des gardes, & des Notaires, & toutes choses de petit prix payoient leur droit à la porte. Les autres estoient conduictes à la Douane, & accompagnées depuis la porte par vn des gardes, & il y auoit certain argent destiné pour les Notaires, & pour ces gardes, selon la quantité des choses qui entroient, & quelquesfois ces gardes alloient hors de la ville pour rencontrer les muletiers, afin qu'ils ne peussent cacher aucune chose, & s'ils en cachaient quelqu'une, ils payoient apres double gabelle, & l'on payoit ordinairement deux ducats pour cent. Toutesfois l'on ne payoit rien du bled, du bois, des boeufs, & de la volaille qu'on y menoit, & l'on n'auoit pas accoustumé de payer à la porte la gabelle des moutons, ains seulement en la boucherie.

Le Gouverneur chef des Consuls, avoit ordinairement douze Sergents, & alloit souvent à cheual par la ville pour voir le pain, & essayer les poids des bouchers, & considerer ce que l'on y vendoit.

C'estoit luy qui faisoit peser le pain, & s'il n'y trouvoit le poids ordonné, il le faisoit mettre en plusieurs pieces, donnoit à celuy qui le vendoit tant de coups de poing sur le col, qu'il le laissoit tout brisé, & mesmes il le faisoit quelquesfois fouëter s'il le trouvoit trop leger.

Le Roy donnoit cét Office il y a cent ans, aux Gentils-hommes qui le luy demandoient: mais auparavant l'on ne le donnoit qu'à des hommes sçavants, & qui avoient vne grande reputation de preud'homme. Il y avoit plusieurs lieux où le Gouverneur avoit accoustumé de donner audience, & de rendre iustice. Il y a aussi dans Fez vne prison, qui est si longue & large, qu'il y peut demeurer trois mille personnes, & il n'y en a point de separee, pour ce que ce n'est pas la coustume à Fez de mettre quelqu'un en vne prison secrette, & particuliere. Voyla à peu pres tout ce que j'ay peu apprendre touchant les Gouvernemens des Royaumes de Fez, & de Marroc.

Et quand à ce que j'ay dict de ce qui se pratiquoit à Fez, c'est chose asseuree que l'Empereur de Marroc garde presque maintenant les mesmes façons de faire, tant en sa Cour qu'ailleurs, & il y a bien peu de choses changees.

R E L I G I O N.

TOUS les habitans de ce Royaume sont Mahometans, excepté les esclaves, dont nous parlerons à la fin de ce discours.

Or est-il qu'il y a en la Loy de Mahomet beaucoup de sectes, qui ont leurs Chefs, & leurs Docteurs qui les deffendent: car il s'en trouue beaucoup qui ont commencé l'Alcoran, & qui ne s'arreste pas formellement à ce qu'il porte, ains passent dessus, contredisent à beaucoup de choses qui s'y trouuent.

Entre autres il y en a vne qui commença environ quatre-vingts ans apres Mahomet, & son premier, & plus fameux autheur se nommoit Elhesembnu Abilhasen, de la ville de Basra, qui donna certaines regles à ses disciples: mais ne laissa rien par escrit.

Cent ans apres il y eut vn autre homme fort habile en ceste matiere, nommé Elharit Ibnu Esed, de la ville de Bagadet, qui escriuit vne belle œuvre vniuersellement à tous ses disciples. Apres ceste secte fut trouuee mauuaise par les Pontifes de la loy, & tous ceux qui obseruoient les regles de ce Docteur, & s'arrestoient à ses maximes, furent declarez heretiques en la loy de Mahomet.

La mesme secte fut remise sus de là à quatre vingt ans, par vn autre fort habile homme, qui fut suiuy de plusieurs disciples, & prescha publiquement sa doctrine, de sorte que tous les Legistes, & leurs Pontifes condamnerent cestui-cy à la mort avecques tous ses disciples, & conclurent qu'il falloit trancher la teste à tous. Ce que ce Docteur ayant entendu, il escriuit aussi tost vne lettre aux Pontifes, les priant de luy faire tant de faueur, que de luy permettre de disputer contre leurs Legistes, s'offrant à mourir au cas qu'il le surmontassent, & requerant au contraire, s'il leur monstroient que sa doctrine estoit meilleure que la leur, que tant de pauures innocens ne perissent pas par vne fausse calomnie. Les Pontifes trouuerent ceste requeste fort iuste, & luy accorderent ce qu'il demandoit.

Cét homme docte estant doncques venu à la dispute, vainquit aysément tous les Legistes: de sorte que le grand Mofly pleurant, se rangea à ceste secte, & la favorisa tousiours tandis qu'il vescut, faisant bastir des Colleges, & autre demeures pour ceux qui estoient de la mesme opinion.

Ceste secte dura environ autres cent ans, iusques à ce que l'on vit venir d'Asie Malicsach Empereur de la race des Turcs, qui persecuta ceste secte: si bien que quelques-uns s'enfuyèrent au Caire, & les autres en Arabie, & demurerent l'espace de vingt ans en cet estat, iusques au regne de Caselhah nepueu de Malicsach, le Conseiller duquel nommé Nicam Elmule, homme de grand esprit, qui estoit de ceste secte, la remit sur pied, & l'affermist tellement, que par le moyen d'un fort sçauant homme, nommé Elgazzuli, qui en composa vn gros volume, diuisé en sept liures, il accorda les Legistes avecques ces Sectaires, en telle sorte, que les Legistes eurent tiltre de Docteurs, & de Conseruateurs de la loy du Prophete, & ceux-cy furent nommez Reformateurs de la mesme loy.

Ceste vnion dura iusques à ce que Bagadet fut ruinee par les Tartares, ce qui aduint l'an 656. de l'Egire, ou Ère de Mahomet. Mais la diuision ne luy nuisit en aucune façon, pour ce que l'Afrique, & l'Asie estoient desia toutes plaines de gens qui suiuiot ceste doctrine.

On ne receuoit alors en ceste secte que des hommes versez en toutes sciences, & sur tout qui entendoient bien la loy, pour la pouuoir bien deffendre, & rembarrer le party contraire.

Mais depuis quelques centaines d'annees les ignorans y veulent entrer, disans qu'il n'est ja besoin de doctrine, pour ce que le S. Esprit donne cognoissance de la verité à ceux qui ont le cœur pur, & net: & amènent en leur faueur quelques foibles raisons.

De là

De là vient que laissant les commandements tant superflus que nécessaires de la regle, ils gardent seulement même chose que les Legistes, quant aux offices : mais ils prennent d'ailleurs tous les plaisirs qu'ils croient estre permis en ceste secte, veu qu'ils font beaucoup de festins, chantent toutes sortes de chansons amoureuses, & dancent le plus souvent.

Quelquesfois il y en a parmy eux, qui deschirans leurs habits, selon le sujet des Vers qu'ils chantent, & selon la fantaisie qui leur vient en la teste, disent qu'ils sont alors eschauffez des flammes de l'amour diuin, au lieu qu'ils le sont veritablement d'une trop grande quantité de viandes, veu que chacun d'eux mange plus de viande qu'il n'en seroit besoin à trois hommes, ou bien ils iettent ces cris meslez de pleurs pour l'amour qu'ils portent à certains ieunes hommes qui n'ont point de barbe : car il arrive bien souvent, que quelque Gentil-homme conuie à ses nopces vn des principaux de ces maîtres avecques ses disciples, qui disent des prieres, & des chansons diuines au commencement du repas, & à la fin d'iceluy les plus aagez commencent à deschirer leurs habits, & s'il arrive que quelqu'un de ceux-cy vient à tomber en dancant apres auoir fait bonne chere, il est tout aussi tost releué par vn de ses ieunes disciples, qu'il baise bien souvent lasciuement, ainsi qui luy rend cet office.

Pour ceste cause l'on dit à Fez en commun prouerbe de ce vice, Que c'est le festin des Pelerins, voulant signifier par là, qu'apres le banquet chacun de ces enfans deuiant espoux de son maître, & ceux-cy que l'on nomme Pelerins, ne se peuuent marier.

Parmy ces sectes il y a quelques reigles que les Docteurs de toute les deux opinions tiennent pour heretiques, pour ce que non seulement elles different des autres en la loy, mais encores en la foy.

Il y en a certainement quelques-uns qui tiennent pour chose asseuree, & veritable, que l'homme peut acquerir vne nature toute Diuine & Angelique par le moyen de ses bonnes œuvres, de ses ieusnes, & abstinences : pour ce qu'ils disent que le ieusne espure le cœur, & l'entendement de l'homme, de sorte qu'il ne peut pecher, encores qu'il en eut quelque voienté : mais qu'il est besoin qu'il passe auparauant par cinquante degrez de discipline, & combien qu'il peche auparauant qu'il ait passé les cinquante. Dieu toutesfois ne luy impute plus le peché.

Ceux-cy sont veritablement de grandes & estranges abstinences au commencement, & apres ils prennent tous les plaisirs du monde.

Ils ont aussi vne regle estroite faite par vn homme docte, & eloquent, nommé Essehruard, qui est vne ville en Corasan.

Il y a vn autre auteur nommé Ibnud Farid, qui mit toute sa doctrine en fort beaux Vers, qui sont toutesfois pleins d'Allegories, & il semble qu'ils ne traitent d'autres choses que d'amour.

Pour ceste cause vn certain nommé Elfargani, commença son œuvre, & en tira la regle, & les degrez que l'on doit passer. Cestui-cy fut si bon Poëte, que ceux de ceste secte ne chantent en leurs festins autre chose que ses Vers, pour ce qu'il n'y a personne qui ait si bien parlé que luy, depuis pres de quatre cents ans en ça.

Ces gens icy tiennent que les planettes & le firmament, les elements, & toutes les estoilles sont vn Dieu, & qu'aucune foy, ny loy ne peut aucunement errer, pour ce que tous les hommes pensent en leur ame, & tiennent pour tout asseuré qu'ils adorent celuy qui merite d'estre adoré, & croient que la science de Dieu est contenue en vn homme qui se nomme Elcob, esleu, & participant de Dieu, & semblable à Dieu quant au sçauoir.

Il y a quarante autres hommes parmy eux qui sont appelez Elauted, c'est à dire les Troncs, pour ce qu'ils sont de plus bas degré, & de moindre sçauoir. Quand l'Ercob vient à mourir, l'on en cree vn autre du nombre de ces quarante, & cestui-cy est esleu au sort parmy vn nombre de septante. Il y en a encores autres 765. du nombre desquels l'on en prend vn pour le ranger parmy les septante, lors que quelqu'un de ceste troupe vient à mourir.

Leur loy veut & commande qu'ils aillent incogneus par le monde, ou en façon de fols, ou de grands pecheurs, ou des plus vils hommes qui soient sur la terre.

C'est le seul sujet pour lequel beaucoup de meschans vont par l'Afrique, tous nuds, montrans leurs parties honteuses : & sont si desbordez, & pleins d'effronterie, que quelque fois ils se meslent avecques les femmes publiquement, & en plaine place, ainsi que les bestes, & toutesfois sont tenus du vulgaire pour saints personages.

Or maintenant il nous faut voir qui fut celuy qui introduisit l'impieté de Mahomet en Barbarie. Ceste meschante & mal-heureuse doctrine entra en Egypte l'an 637. par le moyen des conquestes d'Omar, & vn Capitaine d'Odman passa premier en Afrique l'an 650. avecques quatre vingts mille hommes, & deffit Gregoire Patrice. Mais ils challerent d'Afrique à perpetuer les Romains, & les gens d'Absimaque, & de Leon Empereur, l'an 699. & se rendirent entierement maîtres & possesseurs de la Barbarie.

Mais les Arabes augmentèrent encores dauantage ce malheur, premierement à force d'ar-

mes, & au lieu où les armes ne peuvent atteindre, ils s'y poufferent avecques la predication, & le trafic.

L'heresie d'Arrius, de laquelle les Vandales, & les Gots habitans d'Afrique estoient infectez, favorisa grandement leur entreprise. Ils introduisirent, pour faciliter leur dessein, la langue, & les lettres Arabiques : ils fonderent des Vniuersitez, & des estudes, & ioignirent de grands reuenus aux superbes bastimens qu'ils firent pour cét effect à Marroc, & à Fez. Mais il n'y a chose qui ayt plus aduancé la secte de Mahomet, que les victoires de Miramamolins d'Afrique, & depuis ceste peste y est tousiours demeurée.

30 Il y a encores en cét Empire des Iuifs, qui s'estans multipliez à bon escient en Espagne, passerent peu à peu en Barbarie, principalement ceux qui estoient Orseurs : car cét art estant défendu à ceux de la loy de Mahomet, & exercé de tous costez entre eux par les Iuifs, de mesme que plusieurs autres, principalement celuy de mareschal, comme l'on void en la montagne de Sessaue, en la Province de Marroc. On dit qu'Edeuet, lieu du Royaume de Marroc, estoit habité par des Iuifs de la race de David (comme ils asseuroient) qui sont toutesfois deuenus peu à peu Mahometans.

Les Iuifs s'augmenterent apres en Afrique, quand Ferdinand Roy d'Espagne, surnommé Catholique, & Emanuel Roy de Portugal, les chasserent de leurs Royaumes : car il en passa beaucoup alors aux Royaumes de Fez, & de Marroc, & y introduisirent les arts, & les exercices d'Europe, qui estoient auparauant incogneus à ces Barbares.

On en void encores pour le present les ruës pleines à Belis, à Teze, à Elmedine, à Tezze, & à Semegesse.

Quant aux Chrestiens qui sont aux Royaumes de Fez & de Marroc, horsmis ceux qui se tiennent dans les places occupees par les Portugais, il n'y en a guieres qui ne soient esclaves, & le nombre de ceux-cy est fort grand, voire plus que l'on ne se peut imaginer. L'estat auquel sont ceux-cy, est veritablement digne de compassion & de pitié, non seulement pour la misere en laquelle ils passent leur vie, que pour le danger de leur ame, qui court tous les iours fortune de se perdre.

Ils passent les iours en perpetuel travail, & sont sans repos la plus grande partie de la nuit, endurans force coups, & portans des charges insupportables.

Somme, ils endurent plus de peine entre ces Barbares, que les bestes mesmes ne font parmy nous : on les charge de grosses chaines de fer, on les bat avec des nerfs de bœuf fort endurcis, & avec des cercles de tonneaux, on les surfond avec de l'huyle ardente, & de lard. Mais si la peine du corps est grande, celle de l'esprit n'est pas moindre, pour ce qu'outre ce que ces miserables n'ont aucun qui leur presche, & annonce la parole de Dieu, & qui leur ayde à bien viure, & à bien mourir avec les Sacrements, on ne scauroit s'imaginer, encores moins exprimer combien ils souffrent de tentations pour le regard de la foy, veu que non seulement le desir de s'affranchir de ceste misere les tente : mais encor l'ayse, & les delices, où ils voyent ceux qui ont du tout abandonné la foy.

Or ils ont deux petites consolations au milieu de tant de miseres, dont l'une est des Prestres qui ont esté reduits en seruitude avecques eux, d'autant que ceux-cy leur administrent tantost les Sacrements, & tantost leur preschent la parole de Dieu le mieux qu'ils peuvent : à raison dequoy ils sont grandement honorez, & respectez des autres. L'autre consolation leur vient des Religieux qui s'employent pour leur deliurance. En quoy l'Espagne merite vne fort grande louange, pour ce qu'il y a deux Religions, qui ont pour leur exercice le rachapt de ces malheureux : vne de ces Religions se nomme vulgairement de la Merced, qui est en Aragon : l'autre qui est beaucoup plus grande s'appelle du Rachapt, ou de la Redemption des Captifs. Ces deux Religions assemblent tous les ans de fort grosses sommes d'argent, avec lesquelles elles deliurent vn tres-grand nombre d'esclaves. Elles enuoyent des hommes, à Fez & à Marroc, de mesme aussi qu'en Alger, qui manient cét affaire avec autant de diligence, que de fidelité, & racheptent premierement tous les Religieux, & les Prestres, puis les plus ieunes, commençans par les sujets du Roy d'Espagne, & apres les autres.

Il y a tousiours vn Religieux à Fez, qui s'informe de la qualité, necessité des esclaves, pour faciliter l'annee d'apres leur deliurance.

Mais l'Espagne y a interest plus que nul autre Païs, d'autant que la plus grande partie de ceux qui sont esclaves en cét Empire, est des sujets du Roy d'Espagne.

Je diray pour conclusion, que les Mores des Royaumes de Fez & de Marroc different en plusieurs poincts des Turcs, touchant la fausse loy & religion de Mahomet, & entre autres choses s'assujettissent au Calife de Bagadet, laissant celuy du grand Caire, auquel les Turcs rendent obeissance.



DISCOVRS DE L'ESTAT DES CHEVA- LIERS DE MALTE.

SOMMAIRE.

1. **D**IVERSES demeures des Cheualiers de l'Ordre de saint Iean de Hierusalem, auant que s'estre establis à Malte, qu'ils ont eu par donation de l'Empereur Charles. Quint.
2. Description de l'Isle de Malte, iadis appellee Melite, combien de lieues elle a de tour, sa longueur, & sa largeur, situation, climat, Parallele, & ses ports.
3. Description de l'Isle de Goze voisine de Malte.
4. Terroir de Malte pierreux, & neanmoins portant arbres fructiers, comme figuiers, pommiers, amandiers, vignes, palmiers, coton, roses, thym, fenouil: elle nourrit brebis, cheures, bœufs, asnes, mulets, conils, perdrix, l'on y fait le sel & le miel: elle manque d'eau douce: estimée autrefois pour les petits chiens propres aux Damoselles: elle est exempte de serpens depuis la venue de saint Paul en cette Isle: & se tire de la grotte où cet Apostre fut prisonnier, des pierres fort souveraines contre le venin & morsures des serpens & scorpions.
5. Quelles ont esté les mœurs des anciens habitans de cette Isle, & de leurs Temples dediez à Hercules & à la Deesse Innon.
6. Naturel des Maltois modernes, pareil à ceux d'Afrique: façons d'habits & humeurs des femmes de ce pays, leur passe-temps au Carnaval, leur deuotion & ceremonies pieuses au temps de Carême.
7. Quel est le reuenue du grand Maistre de ceste Isle: & des richesses de l'Ordre, consistant au tresor & Commanderies esparces par toute la Chrestienté.
8. Ses forces, consistans en places fortes & valeur des Cheualiers.
9. Description & diuision de l'Ordre des Cheualiers en trois rangs; quelles sont les ordonnances de la reception en cet Ordre, & les ceremonies que l'on pratique en la reception des Cheualiers.
10. En quelle sorte se fait la primation de l'habit, quand quelqu'un a commis crime ou fait faute notable, & les ceremonies avec lesquelles on rend l'habit au Criminel, qui a eu sa grace.
11. Du grand manteau de l'Ordre & à quels iours les Cheualiers le doivent porter.
12. De l'infirmerie & du commandeur de la petite infirmerie, Medecins & autres personnes gagées pour traiter & pesser les malades. De leurs sepultures & funerailles.
13. Des receueurs & Procureurs des deniers, conservateurs du tresor, Auditeurs des Comptes, leur puissance & Office.
14. Du Chapitre general, à qui appartient de l'assembler, quelles en sont les ceremonies, & quelles choses se traittent en iceux.
15. Des Chapitres Proninciaux, qui se tiennent tous les ans, & comme on y procede.
16. L'Ordre de iustice & iugemens, & des deux sortes de conseil, & des iuges qui y president & assistent; Des ballottes, audience publique, & de la forme du iugement nommé Esgard.
17. De l'obeyssance que tous ceux de l'ordre prestent au grand Maistre: sa dignité, grandeur, & puissance, ses droictz & priuileges, & quelles sont les commanderies destinees pour son entretien, & desquelles il peut disposer & conferer à qui bon luy semble.
18. De l'Office des Baillifs, Drappiers, grand conservateur, grand Mareschal, grand Prieur de l'Eglise de Malte, leurs gages & à quelle fin instituez.
19. De l'election du grand Maistre & ceremonies observees en tel acte.
20. De la capacité ou incapacité de renir commanderies, & à qui appartiennent les acquisitions faites par les commandeurs.
21. De la visite de cinq en cinq ans qui se fait des commanderies.

22. *Trafic de marchandise, Testaments & Donations interdites aux Cheualiers, & de plusieurs autres choses qui leur sont defendues.*
 23. *Quels sont les crimes pour lesquels on peut oster l'habit à vn Cheualier.*
 24. *De l'Escue de Malte subiect à l'Archues-*

que de Palerem: du seruice diuin & des ieunes & abstinences auxquelles les Cheualiers de Malte & freres de l'Ordre sont obligés.

25. *Des grands Maistres de Malte avec l'abregé de ce qui s'est passé sous le gouuernement d'un chacun.*



Es Cheualiers de l'Ordre de saint Jean de Ierusalem ayans esté mis hors de Rhodes par les Turcs l'an 1522. la propre vigile de Noël, apres auoir tenu ceste Isle de deux cens & douze ans, vindrent premierement en Candie, où ils demurerent quelque temps, puis se retirerent partie à Venise, & partie en d'autres lieux d'Italie.

Or apres qu'ils eurent fait quelque sejour à Venise, & aux autres lieux d'Italie, ils obtindrent du Duc de Sauoye permission de se pouuoir retirer à Nisse, & d'y establir sejour & siege de leur Ordre, & ce d'autant plus facilement que les Turcs & Mores d'Afrique, & de Barbarie rauageoient toutes les costes de mer des Chrestiens, & attaquoient toutes leurs villes maritimes.

Ils resolurent apres de s'aller tenir à Sarragosse en Sicile, comme en vn lieu plus proche de la Grece, à cause que le bruit couroit que le Turc deuoit venir attaquer l'Italie, & principalement l'Isle de Sicile, & le Royaume de Naples. En fin l'Empereur Charles Quint leur donna l'Isle de Malte, pour y demeurer, comme en vn lieu commode pour empêcher que le Turc gaignast pays par deçà, & fit reüssir ses entreprises.

Or auant que de m'engager plus outre en ce discours, il faut sçauoir qu'il y a eu iadis trois lieux qui ont eu ce nom de Malte, ou Melite, veu qu'il y en auoit vn en Grece pres de Marathon, & vn autre en Cappadoce, non loin de la riuere d'Euphrate, & cestuy-cy duquel nous parlerons à ceste heure.

11. L'Isle de Malte est esloignée de la Sicile d'environ soixante milles du costé du Cap Passaro, & d'Afrique plus de soixante bonnes lieues de mer chose, qui a donné suiet à plusieurs de la mettre entre les Isles de l'Europe.

Elle a de tour environ trente petites lieues, & sa plus grande longueur est de vingt-milles, & sa largeur de douze.

Elle est assise en la mer d'Afrique, ayant au Nort le Cap Passaro de Sicile, au Midy, d'Afrique, & la ville de Tripoly en Barbarie, du costé du Ponent l'Isle de Lampadouze, & du Leuant la Mer Mediterranee. Elle prend sa longueur, & estendue vers la Moree, & est posée au commencement du cinquiesme climat & huietieme parallele, à environ trente & trois degrez de la ligne.

Elle a beaucoup de ports, mais entre autres deux capables de plusieurs vaisseaux, dont l'un se nomme Marzamusetto, l'autre Marzafirocco. Ces ports sont faicts par des golphes qui s'aduancent en l'Isle, qui sont premierement estroicts, puis s'elargissent ayant passé l'emboucheure, & sont des presqu'Isles de quelques parties de l'Isle, qui s'estendant auant en mer sont ioinctes à l'Isle par vne petite espace de terre.

Elle a encore les ports de Saint George, de Benarat, de Saint Paul, d'Antofegue, de Muggiar, & celuy de Marzascala, qui sont assurez.

La en vne pointe de terre, qui s'estend entre deux petits golphes (qui en font diuers autres plus petits, principalement le droict) les Cheualiers ont basti depuis n'aguere vne nouvelle ville au lieu où estoit Saint Elme, ou Herme, & luy ont donné le nom de Grand-Maitre la Valette, qui deffendit ce lieu fort vaillamment contre les Turcs.

On void sur vne autre pointe saint Michel, & le Bourg. Au milieu de l'Isle presque, & entre ces petites presqu'Isles la vieille Cité, que Diodore escrit auoir esté bastie par les Carthaginois, & qui a esté iadis fort renommee pour les fins draps qui s'y faisoient.

L'Isle de Goze est celle la mesme que quelques anciens ont nommee Glocos, & d'autres, comme Strabon, Gaudos. Son port est posé entre l'Occident & le Midy, & est à vne lieue ou environ de Malte.

Elle a de tour environ vingt mille: & il y a vn chasteau appartenant aux Cheualiers de Malte. Les Turcs emmenerent de ceste Isle trois milles hommes, l'an mil cinq cens cinquante & vn.

QUALITE.

Cette Isle a son terroir presque par tout pierreux ; mais la pierre est tendre, & aisée à estre mise en œuvre. La terre est deux & quatre pieds par dessus la pierre. Il porte toutesfois des figuiers, des pommiers, des amandiers ; vignes, & d'autres arbres ; nommement des palmiers, mais il y a fort peu de vignes : & quant aux palmiers ils sont steriles ; mais quant au froment, & au bois, il vient de l'Isle & de Sicile.

Or les choses qu'elle produit y viennent en toute excellence : comme le coton, les fruiçts, & les fleurs, principalement les roses, le thym, le fenouil, & certains chardons sauvages, qui sont bons, & encor ils ont ceste propriété que les habitans les brulent au lieu de bois.

Il y naist aussi force brebis ; cheures, bœufs, asnes, mulets, conils, & perdrix. On y fait aussi du sel en vn lieu qui se nomme les salins.

Il s'y fait aussi du meilleur miel qu'on puisse manger, & quant à son coton il est mol, delié & blanc au possible.

On y fait souvent la recolte deux fois ; principalement d'orge, & de coton,

Elle a faute d'eau douce, tant celle qui vient de l'air, que de la terre, & celle qu'ils ont vient presque toute des pluyes de l'hyuer.

Car les eaux sont demy salees, & se seichent avec la grande ardeur de l'Esté ; qui rend aussi les habitans halez, & noirs en telle sorte qu'ils sont presque de la couleur des Mores d'Afrique.

C'est pourquoy en Hyuer, & en Automne tout ce qui naist vient avec vne couleur plus gaye, & plus proprement qu'en Esté.

Elle a aussi esté autrefois fort estimée pour les petits chiens qui s'y trouuoient, qui estoient propres pour les Dames.

Elle est exposée aux vents au possible de mesme qu'à la chaleur, ainsi que nous auons dit.

Elle a ceste particularité que depuis que saint Paul y fut on n'y a veu nulle sorte de serpens, bien qu'auparauant il y en eust, ainsi qu'on peut recueillir des Actes des Apostres, & les Scorpions qui sont ailleurs fort nuisibles, & le deuroient estre en ceste Isle autant ou plus qu'en nul autre lieu, à cause des chaleurs excessiues, ne font nulle sorte de mal à ceux qui les manient. Et outre ce Dieu a voulu donner force & vertu aux choses insensibles qui ont en l'heur de loger des Saints. Car les pierres tirées de la grotte, où saint Paul fut prisonnier, sont portées par l'Europe, & ont vne grande vertu contre les Serpens & leur morsure, & principalement contre le venin des Scorpions & des viperes, & ces morceaux de rocher sont appellez la Grace saint Paul.

MOEURS ANCIENNES.

Lors que les Romains conquièrent ceste Isle sur les Cartaginois, on estoit les Maltois du tout heureux, à cause du commerce de diuerses nations, & d'un grand nombre d'arts qui se pratiquoient en ceste Isle, & l'on faisoit beaucoup d'estat du drap de coton qui se faisoit à Malte, tellement que Cicéron n'objecta jamais à Verres le luxe, & la délicatesse de Malte qu'à cause des habits qu'il portoit. Et c'est bien aussi la verité que les Maltois estoient extrêmement delicats & délicieux, & leurs femmes pleines de mollesse, & addonnées à la volupté. Ce fut en ceste Isle que le Roy Batte recueillit Didon & Anne sa sœur, & Phalaris tyran d'Agrigente en Sicile estoit grand amy des Maltois, & les alloit voir souvent.

Appian Alexandrin dit que les Maltois s'estans reuoltez, Cesar les vainquit avec vne grande & fâcheuse guerre, à cause qu'ils tenoient la mer, & faisoient des courses par tout, tuans les petits enfans, & exposans le reste en vente. Et puis qu'il eut tant de peine à les dompter, il faut croire que les Maltois estoient riches & puissans, & qu'encor qu'ils eussent esté subieuguez lors que les Romains vainquirent les Carthaginois, ils auoient toutesfois repris cœur, & se sentans forts rejettoient la seruitude Romaine.

Ils adoroient la Deesse Iunon, & il y auoit vn Temple fort ancien, où tous les peuples voisins portoient des dons de grand prix. Ils auoient encor vn Temple d'Hercule, dont les ruines paroissent encor. Il est aussi certain que ceux de ceste Isle estoient ordinairement amis des Siciliens.

MOEURS DE CE TEMPS.

Le peuple y est assez farouche, & se sent des façons de faire d'Afrique. Toutesfois il est fort affectionné à la religion Catholique, & a fait tout deuoir contre les Turcs pour la defense de son pays. Il vit fort mesquinement à cause du peu de rapport de l'Isle. Tout le monde y a vne particuliere deuotion à saint Paul.

Les femmes y sont belles & gracieuses, & demeurent enfermées dans leurs logis, selon l'ancienne

coustume du pays, ioint que les hommes y sont jaloux, & soupçonneux au possible. Elles ne marchent jamais sans estre voilees, & le plus souuent, il y en a vn grand nombre de fort deuotes, veu qu'elles sont d'un naturel d'estre extremes en toutes leurs actions, de sorte que si elles s'addonnent au mal il ny a rien qu'elles n'entreprennent, & ne fassent pour satisfaire leur mauuais desir.

La langue de Malte est semblable a l'Africaine, au moins il y a fort peu de difference, & tous deux ne sont autre chose qu'un Arabe corrompu, ou Arabe vulgaire, qui est du tout different de celuy des liures, lequel on parle seulement autour de la Mecque.

Il y a force esclaves Mahometans qui sont traittez assez rudement, mais non a l'esgal de ce que ceux de leur secte font souffrir aux Chrestiens qui sont sous leur puissance.

Les Cheualiers qui sont de diuerses nations ont aussi des mœurs diuerses, & il me suffit de dire qu'ils sont fort absolus, & qu'ils disposent fort librement de tout ce qui est en l'Isle, principalement ceux qui ont quelque authorité, qu'ils se donnent du contentement, sans trouuer grande resistance lors qu'ils en desirent. Je diray ce mot encor, qu'au temps du Carneual ils inuentent mille passe-temps honnestes. Les vns font les ballets, les autres font des parties pour courre la bague, ou pour combattre a la barriere, les autres dressent des forteresses, & y ont des gens qui les deffendent, & d'autres qui les assailent. Mais le Careme estant venu on ne peut voir rien de plus deuot que toute cette compagnie.

Et le leudy de la sepmaine Sainte, le grand Maistre laue les pieds a plusieurs pauvres, & apres les auoir fait mettre a table, & leur auoir fait apporter plusieurs viures en dix-huit seruices tous de diuers mets, & sans compter le dernier, qui est de quelque quantité de pieces d'argent, ou d'or, qu'il leur donne, tellement qu'ils en ont plus qu'ils n'en scauroient despenser en toute l'annee, & apres auoir seruy ces pauvres de sa propre main, les Grands Croix luy ayant apporté le seruire, il va visiter l'Hospital, & porter a manger luy mesme aux malades qui sont tous seruis en vaisselle d'argent.

RICHESSES.

7. **S**I ceste Isle tire quelque chose de son cotton, & choses semblables, elle le desbourse aussi en ce qu'on luy porte de dehors. Toutesfois le grand Maistre, qui iouyt du reuenue de ceste Isle, en tire tous les ans dix mille ducats, & encor afin qu'il se puisse monstrier liberal a l'endroit de chacun, on luy donne du thresor de l'Ordre, ie ne scay combien de milliers d'escus, & outre ce il a en chaque nation vne bonne Commanderie, qui est de grand reuenue.

Dauantage, si les Cheualiers gagnent quelque chose sur les ennemis, il a tousiours la dixiesme partie du butin, & l'on sçait assez que leurs prises se trouuent fort grandes a la fin de chaque annee.

Quant a l'Ordre il est extremement riche, veu le grand nombre des bonnes Commanderies qu'il possede par toute la Chrestienté.

Et certainement le thresor de l'Ordre grossit fort de tout ce qui luy vient de là, & pareillement des butins que les Cheualiers font en leurs courses.

Aussi puis qu'il faut qu'ils soustiennent en tout temps la guerre, il faut aussi qu'ils iouyssent d'un beau reuenue qui leur est escheu par la liberalité des Princes.

C'est la cause pour laquelle tous les ans il faut que tous les Baillifs, Prieurs, & Commandeurs donnent le nombrement de leurs biens & reuenus au Chapitre Prouincial, & payent les charges auxquelles ils sont obligez au thresor public de la Religion selon la valeur de la Commanderie, & sur ce il y a vn Receueur Cheualier deputé par l'Ordre, auquel il faut que ces deniers soient payez tous les ans a la saint Jean Baptiste.

Il faut encor sçauoir que nul n'est receu a la Profession de cet Ordre qu'il ne paye le droit qu'ils appellent le passage au thresor public, qui vient a la valeur & concurrence de cent cinquante escus pour les Cheualiers, & de cent pour les freres seruans, si apres le passage ils ne les ont baillez, il faut que celuy qui les recoit pour l'ordre en face la maille bonne, quelque dispense qu'il puisse monstrier, & lors que quelqu'un a satisfait a ce deuoir on ne luy peut empescher le droit d'ancienneté. Les despoüilles des Cheualiers morts viennent aussi au thresor public, sauf s'ils auoient parmy leurs meubles des vases d'or ou d'argent qui fussent propres au seruire de l'Eglise, veu que ces choses sont destinees a l'Eglise, suivant l'Ordonnance du grand Maistre Deodat de Gozon. Mais quand les Officiers qui sont a la suite du grand Maistre comme le Seneschal, le Chastelain, & autres Cheualiers qui sont a son seruire viennent a mourir, leurs biens & despoüilles ne sont point au thresor, ains viennent seulement au grand Maistre.

L'Isle de Malte a toutes ses aduentures si bien en defense, & toutes les places fortifiees en telle sorte, qu'il est non seulement difficile, mais presque impossible mesme d'y faire quelque descente, ou l'y ayant faicte d'y pouuoir aduancer, ou gagner quelque chose. Mais i'estime plus que toutes ces forteresses la valeur des Cheualiers qui s'y tiennent, & leur resolution ordinaire de mesme que celle des freres seruans, & des soldats qui y demeurent, veu qu'elle est veritablement telle que leur petit nombre est capable de deffaire vne grosse armee, ainsi qu'ils ont tesmoigné iadis lors qu'ils ont fait mourir vn si grand nombre de Turcs deuant le chasteau saint Elme, combien qu'ils ne fussent qu'une poignée.

Au reste tant s'en faut qu'on les vienne maintenant attaquer en leur Isle, qu'au contraire ils font tous les iours des courses en Grece vers Rhodes, & en barbarie, & melmes vont souvent iusques bien pres de Constantinople. Ils ont ordinairement beaucoup de galeres capables de tenir chacune quatre ou cinq cens soldats, & seize bons canons, dont ils les garnissent: tellement qu'il n'y a munition de guerre qui y manque. Bref ils se sont rendus si redoutables qu'on les laisse paisibles en leur Isle depuis vn long temps.

GOVERNEMENT.

IL y a trois rangs de ceux qui font profession de ceste regle, veu que les vns sont Cheualiers, qui doiuent estre de noble race, les autres sont Prestres & les autres sont nommez freres seruans.

Après cela les Prestres Croysez sont diuisez en ceux qu'on nomme Conuentuels, & ceux qui sont appelez de l'obedience: & quant aux freres seruans, il y a les seruans d'armes, & les seruans d'office, dont les derniers ne peuvent venir au degré d'honneur des armes tels que les premiers.

Car les freres seruans d'armes prennent l'habit, & font profession de mesme que les Cheualiers, prestant vn serment semblable au leur, & il n'y a difference de ceux-cy aux Cheualiers, que pour le regard de la Noblesse, pource que n'estans pas Nobles ils ne sont aussi receus aux Grands Croix, grand Prieure, Baillies, ou autres grandes charges de l'Ordre.

Quant aux Comanderies ils en ont, & peuvent estre faits gouverneurs des places de la Religion, & appelez au maniment des deniers, & à la visitation des lieux qui appartiennent à l'Ordre, au lieu que les autres seruans ne peuvent estre receus à l'Ordre de Cheualerie, non plus que les Prestres, soient Conuentuels ou d'Obedience. Les ordonnances de la reception sont celles qui suivent.

Selon les Ordonnances d'Hugues Reuel grand Maistre. Nuls bastards ne doiuent estre receus en cet Ordre sans le consentement du Chapitre general, ou sans estre sortis de quelque grande maison: & dauantage entre les legitimes & nobles nul homme sorty d'un Iuis, d'un Marran, ou d'un Mahometan, fust il fils d'un Prince, ne doit estre admis en ceste compagnie: si celuy qui voudroit entrer en cet Ordre auoit fait profession d'un autre, les Ordonnances portent aussi qu'il n'y soit pas receu.

Toutefois cecy n'a pas esté tousiours obserué, veu qu'on a veu que les Chanoines du saint Sepulchre ont esté joints à cet Ordre par l'autorité du Pape, combien qu'ils eussent fait profession sous autre que sous le grand Maistre. Dauantage vn homme trop endebté ne peut estre receu, non plus qu'un qui est marié.

Outre ce l'on n'y peut receuoir vn homme qui a commis quelque meurtre, ou quelque crime infame. Il n'est permis de donner l'habit à chacun qui n'ait atteint pour le moins l'age de dix-huit ans: toutefois le grand Maistre peut choisir six enfans de quelque nation que ce soit, & les faire Cheualiers, pourueu qu'ils soient Nobles, & s'il sont autres les faire freres seruans, pour l'exercice des armes, & les dispenser de tout service, mais il faut qu'ils ayent au moins quatorze ans, & l'on peut oster à ceux-cy le droit d'ancienneté au rang des Comanderies.

Il faut que celuy qui veut estre receu soit sain, & bien composé de ses membres, & propre au travail, & celuy qui veut entrer prouue auparauant qu'il est gentil-homme de nom & d'armes, de la ligue, & du Prieuré, dans l'Auberge duquel il veut faire son entrée. Auberge signifie autant que maisō, ou domicile, & c'est vn lieu où chaque langue s'asemble à Malte pour y māger & tenir langue, c'est à dire, cōsulter des affaires de la maisō. Après dōc que quelqu'un a fait les preuues deuant ceux qui ont esté deputez par le grand Prieur, & par l'assemblée

de la Prouince en la langue de laquelle il entre, lors il est solennellement receu: mais quant à l'habit il faut qu'il le recoiue par la seule autorité du grand Maistre. Il faut que l'habit des Cheualiers soit vn manteau noir, & vne Croix blanche, selon l'ancien statut du grand Maistre Raymond du Poy: toutefois il adiourste que selon le temps ou les lieux, on les dispense touchant la couleur, pourueu que la Croix soit suivant l'Ordonnance: mais il faut entendre cecy des Religieux qui portent les armes, & non des autres. Celuy qui veut estre receu Profez en ceste Religion doit se confesser auant toute chose, puis avec la robe longue & seculiere sans ceinture, se presenter deuant l'Autel à genoux, tenant vn cierge ardent en sa main, ouyr la Messe & receuoir son Createur: puis s'estant presenté deuant le frere qui le doit recevoir avec ceste reuerence, luy doit demander humblement qu'il luy plaise l'admettre en la compagnie des freres, & de la sainte Religion del'Hospital de Ierusalem. On luy fait quelque discours de ce qu'il doit faire estant receu, puis lors qu'on luy a demandé s'il est en volonté d'accomplir toutes ces choses, il respond ouy, puis celuy qui le reçoit passe outre, & s'enquiert s'il a fait quelque autre vœu, s'il a promis mariage à quelqu'une, ou s'il est en seruitude de quelqu'un. Car s'il est atteint del'une de ces choses, on le reiette. Mais s'il en est franc celuy qui le reçoit ouure le Missel qu'on luy offre, & prenant les deux mains de celuy qui fait profession, les luy met sur les saintes lettres, luy faisant prononcer en mesme temps ces paroles: le vouë, & promets à Dieu, à la bien-heureuse Vierge Marie, & à saint Iean Baptiste, qu'avec la grace & secours de Dieu, ie seray tousiours obeyssant aux superieurs que Dieu & la Religion me donneront, & que desormais ie viuray chastement, & sans posseder rien de propre. Apres ce il est receu, baise le Missel, & le prenant le rapporte sur l'Autel, lequel il baise, puis reprend le liure, & l'apporte encor en signe d'obedience à celuy qui le reçoit, qui prenant le manteau noir monstre la Croix blanche au Profez, luy disant, s'il ne croit pas que c'est le signe de la Croix, où nostre Seigneur Iesus-Christ fut attaché pour nos pechez.

Il le confesse, & baise la Croix, & lors celuy qui le reçoit prend le manteau, & luy met la Croix sur l'estomac au costé gauche, & le baise, luy disant: Reçoy ce signe au nom de la sainte Trinité, de la bien-heureuse Vierge Marie mere de Dieu, & de saint Iean Baptiste, pour l'augmentatiō de la foy, defense du nom Chrestien, & seruice des pauvres: aussi nous remettons la Croix de ce costé, afin que tu l'aimes de tout ton cœur, & qu'avec la main droicte tu la defende, & l'ayant defendue tu la conserue entiere.

Car si combatant contre les ennemis de Iesus-Christ tu t'enfuis & laisse la Croix, & sa sainte enseigne, tu seras aussi à bon droit priuē de ce sacré signe, & comme vn membre pourri chassé de nostre compagnie.

Apres cela il luy lie le cordon du manteau, disant Reçoy le ioug de nostre Seigneur qui est doux & leger, & tu y trouueras le repos de ton ame.

Cela fait il le baise, comme font aussi tous les autres Cheualiers qui y assistent, & l'on dit plusieurs oraisons, selon qu'il est contenu aux liures de leurs ordonnances, par lesquelles il est porté que si quelqu'un est receu contre la forme ordonnee, s'il est Cheualier, il sera frere seruant, si seruant d'armes il le sera d'office, & s'il est Chapelain il sera frere d'obedience, sans qu'il puisse iamais tenir Commanderie, ny paruenir à aucune dignité de l'ordre, ou au maniment des biens de la Religion.

Quant aux Prestres & Chapelains, nul n'y est receu s'il n'a premierement seruy l'espace d'un an entier, afin qu'on puisse cognoistre sa vie, & sa suffisance, & durant ce temps il est nourri aux despens du thresor de l'Ordre.

Il n'est permis aux Cheualiers de recevoir de leur propre autorité autre frere que les Chapelains lors qu'il y en a faute en leurs Eglises ou Chapelles, & aussi des seruans d'office pour le seruice de leurs Commanderies, & mesmes il faut que ceux-cy soient approuuez, & confirmez par le Chapitre Prouincial auquel ils deuoient estre presentez, avec l'assignatiō qu'on leur donne pour leur viure & leur vestement.

Il y a encor des Confreres & Donnez en l'Ordre qui ne voient pas les mesmes choses que les freres, ains seulement ils promettent d'aimer l'Ordre, & ce qui en depend, & defendre le bien de la Religion de toute leur puissance, & descouurir aux Superieurs ceux qui les trahissent, & leur nuisent, autant qu'ils en pourront auoir cognoissance. Ceux-cy contribuent à l'ordre selon leur deuotion, comme les Confreres font en vne Confrairie pour participer aux biens qui s'y font.

Et toutesfois il n'est permis aux Prieurs, Chastellains, & Baillifs, ou autres d'entre les Commandeurs & Cheualiers, de recevoir aucun de ces Confreres sans le commandement du grand Maistre: & si quelqu'un le fait il doit estre priuē de son habit, & les reçeus ne seront enrollez entre les Confreres, ny iouyront d'aucun priuilege dont les Donnez iouissent ordinairement.

Les donnez ne portent pas la Croix entiere, ainsi que font tous ceux qui sont receus à profession, ains elle a simplement trois branches, comme on void aux habits des Religieux de S. Anthoine, où la partie de dessus la Croix est ostee: & s'ils font autrement ils perdent la iouissance de leurs priuileges.

Quant à la priuation de l'habit elle se fait en ceste sorte.

Le grand Maistre ou son Lieutenant s'enquiert soigneusement du crime dont on accuse quelqu'un, & en ayant tiré la preuue, & veu qu'il faut proceder aux extremités, on forme la plainte deuant l'assemblée qui vient là au son de la cloche, & propose le crime en presence du criminel, qui y est conduit par le grand Escuyer.

La plainte proposée, le grand Maistre presidant au Conseil, donne charge aux Baillifs d'auoir esgard (car c'est ainsi qu'on nomme les iugemens donnez en cet Ordre) contre le criminel, & d'y proceder selon Dieu & raison, & selon les louables & anciennes coustumes de la Religion.

Après cela le grand Maistre destine vn chef de l'Esgard, & vn homme de bien qui soit son Procureur Fiscal qui plaide la cause deuant celuy à qui l'Esgard est donné en main, & le prisonnier a puissance de respondre, & de se deffendre, & confesse alors, ou nie le crime.

S'il le confesse, il demande aussi qu'on luy fasse grace, & lors l'Esgard ou le Iuge fait son rapport au grand Maistre, & à l'assemblée, & demande trois fois grace pour le criminel, & si le grand Maistre ne veut entendre à la rigueur des Ordonnances, on ne passe point outre, mais s'il continuë à demander iustice, lors l'Esgard s'en va en lieu separé pour consulter encor la matiere, & executer ce qui est contenu aux Ordonnances.

Mais si le criminel nie le fait, on vient aux tesmoins, aux preuues, & aux informations sur ce faites, si bien qu'estant conuaincu, ou par sa propre confession, ou par les preuues, il est condamné au Conseil de perdre l'habit.

Cela fait on mande le Procureur Fiscal, auquel on declare ce qui est ordonné. & cestuy cy exhorte le criminel à suiure l'Esgard qui va comparoistre deuant le grand Maistre, en l'assemblée, où l'accusé vient tout espleuré, suppliant qu'on luy fasse grace, comme aussi l'Esgard en prie le grand Maistre, & tous les Cheualiers qui y assistent.

Que s'ils n'y veulent entendre, ains insistent à la prononciation de la sentence, après qu'il a reiteré par trois fois mandement de iuger selon la loy au Chef, & Baillif de l'Esgard, il prononce la sentence de ceste degradation en presence du criminel, & condamne celuy qui a esté conuaincu du crime, duquel on l'auoit accusé.

Le condamné pour tirer quelque grace, & esmonvoir à pitié se iette à genoux deuant le grand Maistre, pres duquel est l'Escuyer, qui ne fait qu'attendre son commandement, ou celuy du Lieutenant, & l'un d'eux parle ainsi au criminel: Pource que par tes actions tu t'es rendu indigne du signe de la Croix, & de nostre Ordre, auquel pour tes premieres vertus nous t'auons receu, suiuant nos statuts & ordonnances, pour la louange des bons, l'effroy des meschans, l'exemple de chacun, nous te priuons de nostre habit, & te declarons indigne de la compagnie de nos freres, de laquelle nous te chassons comme vn membre pourry, corrompu & contagieux.

Lors l'Escuyer assistant au grand Maistre oste l'habit au criminel en ceste sorte. A la premiere iussion il ne fait que mettre la main sur le manteau de l'accusé, à la seconde il desnouë le cordon, & ouure le manteau par deuant, & à la troisieme il l'oste du tout, disant: Vlant de l'autorité que me donne le superieur, ie delie ce nœud, & t'oste le ioug agreable du Seigneur, duquel tu t'es rendu indigne.

Cela fait selon que le grand Maistre l'ordonne, il mene le criminel en prison, qui luy est perpetuelle depuis qu'il a esté ainsi degradé.

On use presque de pareilles ceremonies contre vn absent, qui aura refusé de comparoistre.

Il est vray qu'on n'y procede que fort meurement, & avec des preuues tres-euidentes. Mais les punitions n'y sont pas telles, que si l'on cognoist que veritablement quelqu'un est repentant de ses fautes, on ne vienne à luy pardonner.

De sorte que le criminel ayant esté long temps en prison, & estant cogneu plein de desir d'amender sa vie, on luy fait grace, & l'on luy rend son habit avec ceste ceremonie.

Le grand Maistre, ou le Lieutenant fait sonner la cloche pour l'assemblée, où le grand Maistre, les Baillifs, & autres estans assis, chacun selon son rang, le grand Maistre, ou Lieutenant commandent qu'on face venir le prisonnier, qui est conduit en habit Seculier par l'Escuyer qui luy auoit osté son habit, & quelquefois tout en chemise, la corde au col, selon la grandeur du crime, & ayant les mains liees, il tient vn cierge allumé, & en cet estat s'agenouille deuant le grand Maistre, & le supplie humblement qu'il luy plaise luy rendre l'habit,

& le remettre en l'Ordre, & en la compagnie des freres, proteste de vivre en homme de bien, & de ne faire jamais chose contraire à la reigle, de laquelle il a fait profession.

Lors le grand Maistre luy respond. Encore que tes fautes nous ayent autrefois contrains à t'oster l'abit, si est ce que sur l'esperoir que nous auons de ton amendement, nous te rendons ton habit, te pardonnons ton crime, & te remettons en la compagnie de nos freres. Pour ce fois homme de bien, & fais que par cy apres nous n'ayons sujet d'vler contre toy en toute extremité, de la rigueur de nostre iustice.

Lors le Maistre Escuyer luy remet le manteau avec pareille ceremonie qu'il luy auoit oste auparauant: mais estant ainsi remis, il ne iouit pas du droit de son ancienneté, ny de sa residence, suivant vne loy faite par le grand Maistre de la Sangle.

Lors qu'ils vont en cour se il faut qu'ils facent declaration de tous leurs biens comme si desia ils s'en despoüilloient, & appellent cecy d'un mot propre Despropriement, comme qui diroit renoncement de son propre.

Ils baillent le tout scellé, & signé au Prieur de l'Eglise, sur peine de ieusner quatre iours: d'auoir la discipline au Chapitre, & de perdre pour vn an leur reuenu, qui est appliqué au profit du thresor à ceux qui sont Commandeurs.

Les Cheualiers ne portent pas tous les iours le grand manteau de l'Ordre qu'ils prennent lors qu'ils font profession, ains il suffit qu'aux cappes, & manteaux communs la Croix soit cousue au coste gauche comme en leurs saques & cottes d'armes, lors qu'ils vont à la guerre. Mais il y a des iours auxquels ils sont obligez de les porter, comme la veille de Noël à Vespres, le iour de Noël à la Messe & à Vespres, le iour de saint Iean à la Messe, le iour de la Circoncision à la Messe, & pour abreger aux festes principales de nostre Seigneur, de la sacree Vierge Marie, de saint Iean Baptiste, & des bien heureux Apostres, lors qu'ils doiuent communier, aux Chapitres generaux & assemblees, & en l'election du grand Maistre, il faut que les Prieurs, Baillifs, & Electeurs portent le grand manteau, à peine de subir le iugement de la quarantaine.

12. Il y a vn Commandeur de la petite enfermerie, & le Greffier avec deux hommes de bien choisis pour la visite des malades, & pour les faire pouruoir de toute chose necessaire, & ceux cy font serment d'vser fidellement de leur charge & de ne rien distribuer aux malades que par l'ordonnance du Medecin.

C'est à eux à faire tous les ans inuentaire de ce qui est en l'Enfermerie, soit or, ou argent, ou autres meubles, ils signent cét inuentaire, & font iurer à l'Enfermier qu'il ne souffrira qu'aucun de ces meubles s'esgare, & qu'il ne les employera à autre vsage qu'au seruice des malades: ioint qu'il faut que la boutique del' Apoticaire soit visitée tous les ans, afin que les malades ne soyent offenze par la vieillesse, & corruption des drogues.

Il y a des Medecins, & Chirurgiens gagez de l'Ordre, pour les freres, tant Cheualiers, Clercs, que seruans, & s'ils meurent ils sont enterrez comme il leur appartient avec leur habit, & Croix blanche, & il y en quatre vestus de deuil, qui les portent en terre, sans qu'il soit permis à nul autre de porter le deuil, non pas mesme au trepas du grand Maistre, suivant l'Ordonnance de Claude de la Sangle.

En quoy il a voulu monstrier que c'est vanité de s'attrister de la mort de ceux qu'on tient bien-heureux, ou bien que la pompe du deuil n'est bien seante à ceux qui font profession de pauvreté.

L'Enfermerie de cét Ordre sert de franchise: de sorte qu'il n'est loisible d'en tirer les criminels qui s'y retirent. Il est vray qu'on n'en iouyt pas en tout cas, tellement qu'on regarde si le fait merite ou non ceste franchise.

S'il la merite, on enuoye le criminel avec le premier vaisseau qui vient hors de l'Isle sans qu'il luy soit plus permis de retourner dans les pays qui sont de la iurisdiction de l'Ordre: Mais ce privilege ne sert de rien aux voleurs, ny à ceux qui gastent de nuit le plat pays, ny aux boute-feux, aux Sodomites, larrons, ny conspirateurs, ny à ceux qui de propos delibéré font mourir par poison, ou autrement vn homme, ny aux domestiques des Cheualiers qui commettent quelque crime.

Ceux qui frappent, ou blessent quelqu'un de l'Ordre ou quel que ce soit de ces luges & officiers, ne iouissent de ce privilege, nō plus que ceux qui sont endebtez, ny les faux temoins, & faussaires, ny les sacrileges, ou ceux qui ont commis le crime dans la mesme Enfermerie.

13. Pour le regard des Receneurs, & Procureurs des deniers, il faut qu'ils iurent entre les mains du Grand Maistre ou Prieur, ou Baillif Conuentuel, qu'ils feront leur deuoir en la Recepte, & sont tenus tous les ans de porter leurs comptes au Chapitre Prouincial, & les noms de ceux qui ont payé, ou qui doiuent encore.

Afin.

Afin d'ouyr les comptes, & prendre garde au thresor, il y en a vn qu'on nomme le grand Commandeur, & deux Procureurs choisis d'entre les plus sages de tous les Cheualiers; qui portent chacun vne clef du thresor, pareillement tous les magasins; soyent d'armes, soyent de munitions, ou autres choses sont sous leur garde.

Mais ce grand Commandeur ne doit bouger du Conuent tandis qu'il est en charge, non plus que les Procureurs qui l'assistent & le seruent l'espace de deux ans, ne s'en peuuent aller, ou laisser tous ensemble leur office, ains aux changemens on y laisse tousiours vn des anciens, afin qu'il y en ayt tousiours quelqu'un qui entende le manient des affaires.

Dauantage, ils ont vn Conseruateur du thresor, qui a la charge de distribuer les deniers suivant la volonte du grand Maistre & avec la licence du grand Commandeur; & ce Conseruateur n'est qu'un an en charge, & est change au chapitre toutes les annees, & choisi de quelque langue que ce soit. Mais on a ceste maxime lors que quelqu'un sort de charge de n'y en mettre de dix ans aucun qui soit de ceste mesme langue.

Il y a encor huit Cheualiers, vn de chaque langue, qui sont comme Auditeurs des Comptes, & ont toutes les semaines vn iour destine pour cet effect.

Leur puissance consiste a recognoistre, & voir comment les affaires se manient, & lors qu'ils voyent quelque faute ou il est besoin d'vser de reformation, ils en font le rapport au grand Maistre, & au Conseil ordinaire.

Ceux cy sont en charge deux ans, & l'on ne doit faire aucun payement des deniers du thresor commun sans leur assistance, afin que tant de tesmoins empeschent qu'il arriue de la faute en ce manient.

On donne au Conseruateur vn adioint appelle Preud'homme, choisi d'entre les plus experts de l'Ordre, & qui s'entende mieux au fait des comptes & finances, & cestuy cy assiste a toutes les receptes du Conseruateur general, de mesme qu'a la reddition de ses comptes, & de deux liures qu'il y a de la recepte.

Le Conseruateur en tien vñ, & cestuy cy l'autre y escriuant ce qui a este receu, afin qu'on en ait parfaite cognoissance, cestuy cy en est charge autant de temps qu'il plaist au grand Maistre, & au Conseil ordinaire.

Or pour le regard du chapitre general de cet Ordre, c'est au grand Maistre a l'ordonner, & a prescrire le temps & le iour qu'il se doit tenir.

Le iour estant venu, & tous estans assemblez, avant que parler d'aucunes affaires, on va des le point du iour a l'Eglise ou la Messe est chatee par le Prieur Couentuel, & apres le grand Maistre avec toute l'assemblee des Croyse, & le Clerge va en procession au lieu ou le Chapitre se doit tenir, ou l'on chante l'Hymne du saint Esprit.

Cela fait le grand Maistre, les Baillifs, Prieurs, & autres ayans voix au Chapitre, s'assient selon son rang, & puis on fait vn sermon, a la fin duquel on fait sortir ceux qui ne doiuent pas assister au Chapitre, tels que sont les Chapelains, & au premier tout on a esgard a eux qui sont absens, & l'on considere si leurs excuses que leurs Procureurs alleguent deuant l'assemblee sont legitimes ou autres.

Après cela les Baillifs, Prieurs, & le Chastelain qu'ils nomment d'Emposte, & autres Commandeurs, portent vne bourse ou il y a cinq pieces d'argent en signe de depriement, & vn rollet autour, qui contient les noms, & la valeur de leurs estats, & offices, & pareillement leur aduis sur ce qui est a faire pour le profit public, & leur cachet y estant mis chacun d'eux va presenter sa bourse selon son rang au grand Maistre, en baissant la main, & luy faisant la reuerence.

Cela fait, le grand Mareschal del'Ordre vient a son rang presenter l'estendart de la religion au grand Maistre, & les billets ou rolets presentez sont leuz par le Vice-Chancelier a haute voix, puis on procede a l'eslection des seize Capitaines, auxquels on doit donner la charge de vider ce qui doit estre debatue & allegue au Chapitre.

Ils sont esleuz par les langues a part, & chacune en choisit deux, qui scauent bien la langue, & les affaires de leur nation, & lors qu'il n'y en a de suffisans en quelque autre langue de ceux qui sont du corps du Chapitre, ils en prennent d'une autre.

Ceux cy prestent serment au Grand Maistre, & a toute l'assemblee de iuger sincerement, & sans se laisser emporter a leur passion particuliere, tout ce qui sera a l'honneur, & au profit del'Ordre & le Grand Maistre, & autres, promettent de tenir pour bon & valable tout ce qu'ils ordonneront.

Lors ils entrent en vn lieu secret, & avec eux le Procureur general du grand Maistre qui y a voix deliberative, mais il ny peut definir ny iuger aucune chose.

Ils decident la ce qui touche les impôts sur les Commanderies, pour la subuention de l'ordre, du gouvernement du Thresor public, de la reformation des moeurs, & constitution

des loix, & en cômme de tous les affaires qui suruiennent, & qui concernent le bien public. Cela fait ils sortent, & en presence de tous, tant Chapelains qu'autres, on publie par la bouche du Vice-Chancelier les choses que ceux-cy ont aduisees, & lors les bourses sont rendues, de meisme que les seaux & l'estendart aux Baillifs, Marechal, & Commandeurs qui les auoient mis entre les mains du Grand Maistre, & le Chapitre prend fin en ceste sorte. Lors ils s'en vont en procession à l'Eglise.

Mais il faut remarquer que si l'un des seize Capitulans void qu'il y ayt quelque cas ou debat qui le touche particulierement, il ne doit estre present lors qu'on decidera, de meisme qu'il n'est permis à aucun de protester contre eux, ou d'appeller de leur sentence.

Pour le regard des Chapitres Prouvinciaux, c'est aux Baillifs, & aux grands Prieurs à les faire tenir tous les ans en leurs Prouinces, qui sont, France avec quarante cinq Commãderies: Aquitaine ayant 65. Commandeurs en son gouuernement, Châpaigne vingt quatre: Auvergne 77. S. Gilles 54. Tolozé 35. Rome 19. Pile 26. Venise 27. Lombardie 45. Barlette & Capoue 25. Messine 12. Basse Allemagne 40. Haute Allemagne 27. Leon, Castille 27. Chastelain d'Emposte 29. Cataloigne 28. Nauarre 27. & Portugal trente & vne. Il y en auoit iadis trête & deux, mais les Cheualiers n'en tirent plus aucune chose depuis que la Religion Catholique y est esteinte.

En ces Chapitres Prouvinciaux, il est deffendu aux Baillifs, ou Grãds Prieurs, de ne rien faire ny dire au desaduantage d'aucun des Cheualiers, & de troubler le repôs ou le droit d'aucun de leur Prouinee.

On y procede presque comme au General quant aux prieres, puis on lit la regle à haute voix, afin d'aduertir chacun de la garder, & l'o y parle des obseruateurs, ou les infracteurs, de la iurisdiction des Prouinces, des Commanderies, & Commandeurs, des visites, & autres affaires qui concernent le profit des maisons de la Prouinee.

Mais pource qu'il est impossible que parmy vne si grande trouppé, de differentes humeurs, de façons de faire, & de langage, il n'arriue des debats, & des noises, on y a aussi sagement pourueu pour le fait des iugemens, veu que pour ne rendre des procez immortels, ils ont ordonné qu'on ne mettroit par escrit les differens qui arriueront entre les freres, voire qu'il n'y auroit point d'autres Aduocats ou Procureurs que les parties, qui doiuent deduire leur fait de leur propre bouche deuant ceux qui sont deputez pour cognoistre de leur cause.

Il est vray qu'il y a des matieres, comme celle des debtes, où les escritures sont necessaires, & où il faut des telmoins propres pour la preuue: & il faut que les cedulaes & les depositions soyent couchees par escrit, & que les Iuges se rapportent aux escritures qu'ils voyent. Mais afin d'entendre qui sont ceux qu'on commet pour ces iugemẽs, ie le deduiray le mieux qu'il me sera possible.

Les Maltois ont deux sortes de conseil, l'ordinaire, & celuy qu'ils nomment accompli, ou parfait.

En l'ordinaire assistent le grand Maistre, son Lieutenant, s'il y en a, l'Euesque de Malte, le Prieur de l'Eglise des Croilez, esgal à l'Euesque en ce qui est du rang, & les huit Baillifs Conuentuels, ou leurs Lieutenans, les Grands Prieurs des Prouinces qui sont au Conuent, le grand Thresorier ou son Commis, & le Seneschal du Grand Maistre, mais ce dernier n'a point de voix au iugement.

Au iugement accompli, outre les sus-nommez il y a deux Cheualiers de chaque langue, & il faut que le Vice-Chancelier soit appellé par tout: mais il n'y a nuls autres qui soyent necessairement obligez d'y assister, que les Baillifs Conuentuels, sans lesquels on ne peut tenir l'assemblée, & ny ceux-cy, ny aucuns autres, ne peuvent tenir Cour, sans auoir la permission du Grand Maistre.

Les parties intereliees, ou qui craignent la faueur de leurs aduerses parties, peuvent refuser quelque Iuge que ce soit, voire le Grand Maistre, en donnant iuste cause de recusation, suivant l'ordonnance de Baptiste des Vrsins.

Il faut que les parties auant qu'aller au Conseil, aillent à la Chancellerie donner leur nõ par escrit, & le subiect pour lequel elles sont en procez, & enregistrez au roolle, puis chacun est appellé en son rang & ordre par le Vice-Chancelier.

Et d'autant qu'on iuge diffinitiuement en cet Ordre, il n'est aussi permis qu'autres que ceux qui en sont s'entremettent de vider, & iuger les causes de ces Religieux. Il est vray que les Seculiers qui ont affaire avec ces Cheualiers, peuvent auoir des Procureurs & Aduocats, pour les deffendre où il pourra arriuer quelque different, & aux Chapitres Prouvinciaux, & aux assemblees.

Ils ont aussi vn bon ordre de baloter lors qu'il y en a deux qui pretēdēt vn meisme office, où

où l'on a esgard à l'ancienneté, sinon que ce fut vn de ceux de la grand' Croix, veu qu'on le prefere toujours, & l'on procede au balotement en ceste sorte.

Après le serment presté par les competeurs, on balote pour celuy qui debat plustost que pour celuy contre qui l'on intente procez : & le Vice-Chancelier met deux vases en ses mains: l'un blanc, & l'autre noir, & s'adresse premierement au grand Maistre, puis à chacun des Conseillers, selon l'ordre de leur séance, leur offrant ces vases, afin qu'ils mettent leurs balottes en celuy que bon leur semblera.

Car s'ils veulent fauoriser celuy qui amene le procez ils les mettront dans le blanc, & au contraire dans le noir.

Cela fait on compte les balottes publiquement, & le Vice-Chancelier met les blanches par escrit, & vse de mesme façon de faire s'il y a deux ou trois competeurs, puis il vient à compter toutes les balottes, & celuy qui en a le plus est sans aucun contredit appellé à la dignité qu'il a poursuie.

Que s'il y a autant de balottes d'un costé que d'autre, le plus ancien l'emportera, où le tout sera remis à la discretion du Conseil: qui est iuge aussi à tous les autres débats où les balottes se trouvent égales.

Les Cheualiers vsent aussi de ce balotement chacun en leur langue, lors qu'il est question de graces, ou de nominations, & eslections des Bailliages, & dignitez: pource qu'il n'est permis de faire grace: c'est à dire d'octroyer quelque dignité à quelqu'un des freres auât son rang, sans le consentement de tous les Cheualiers.

Il est vray qu'il n'est point permis aux Cheualiers de deliberer en leurs Auberges ou Conseil des langues, d'autre chose que des possessions, vignes, maisons & autres choses qui appartiennent à leur langue, sans passer plus outre, sans disputer des affaires publics de la Religion.

Ils ont vne Audience publique qui se tient tous les Vendredis à Malte, où assistent ceux qui sont du Conseil ordinaire, & pareillement les Iuges des appeaux, ou appellations, & l'ordinaire, & le Vice-Chancelier, comme aussi le Capitaine de l'Isle de Malte, & encore le Iuge de la ville.

On fait là raison aux habitans de l'Isle, & à tous autres Seculiers, qui sont sujets des Seigneurs de ceste Religion, ou qui ont affaire avec eux.

Vn cheualier ne peut faire conuenir vn autre pardeuant autre Iuge que celuy de son Ordre, pour quelque cause que ce soit, & quiconque fait le contraire perd son droit d'ancienneté, est priué l'espace de cinq ans de toute administration en cet Ordre, perd sa cause, & ne peut iouyr de ce qu'il pretendoit, bien qu'il l'eust obtenu par sentence.

Et veritablement ils ont raison, pource que telles appellations derogent grandement au droit de souveraineté, & s'ils laissoient passer par conuenance ces appellations, ou sentences deuant d'autres Iuges, on les priueroit à la longue de leur ancienne autorité, comme quelques autres qui n'ont pas bien sçeu conseruer ce qui leur estoit acquis.

Ces Cheualiers ont encor vne autre forme de iugement qu'ils nomment Esgard, qui est propre pour vider bien tost les differents de ceux qui n'ont loisir de s'amuser à demesler des procez.

On choisit vn Cheualier de chaque langue & Auberge, & l'on en adiouste vn neufiesme à ce nombre de quelque langue qu'il puisse estre.

Cestui-cy est fait President de l'Esgard par le grand Maistre, ou par le Marechal de l'Ordre, lors que les freres sont de sa iurisdiction, & les autres huit sont nommez par les huit Baillifs Conuentuels, auxquels l'Escuyer en porte la parole, mais avec telle condition, que les Baillifs des langues n'en peuuent nommer d'autres que ceux que les parties reçoient d'un accord pour Iuges.

De cet esgard on a recours au Renfort d'Esgard, où le nombre des Iuges est doublé, & encor au Renfort des Renforts, où l'on en prend trois de chaque langue au lieu d'un: sans auoir toutefois autre President que celuy qui a esté esleu la premiere fois.

Mais lors que l'affaire ne se peut vider de la façon, le grand Maistre y adiouste l'Esgard des Baillifs Conuentuels, ou de leurs vis-Baillifs: & s'il aduenoit que le President fut Baillif, il est demis, & vn autre des plus anciens d'entre les Cheualiers est mis en sa place, & tous n'ont qu'une voix, excepté le President qui en a deux.

Ce President demande aux parties si elles ont quelqu'un des Iuges pour suspect.

Lors chacun deduisant son fait veritablement on leur fait sommairement iustice, suivant l'orde des balottes.

Quant au grand Maistre, tous ceux de l'ordre, tant clerics, que laiz sont tenus de luy ¹⁷.

prester toute obeyssance, & nul ne peut paruenir à ceste dignité que celui qui est Cheualier, & par conséquent de noble race, & né de legitime mariage.

Mais bien que le grãd Maistre soit chef & souuerain de cët Ordre, toutefois toutes choses ne luy sont permises, veu qu'estant esleu & faisant son voyage (si par fortune il ne se trouuoit à Maistre au temps de son eslection) il ne peut prendre plus d'argent que le Conseil en aura ordonné aux Receueurs qui luy en donnent, & s'il en veut despenfer dauantage, il faut qu'il le prenne en sa bourse, Au reste ses Estats, Dignitez & Commanderies vacquent dès le iour de son eslection, & la collation en est deuë au grand Maistre, au Conuent, & à l'assemblée: & mesme il ne peut rien resigner, ains il faut que la distribution de toutes ces choses passe par le Conseil, bien qu'il ait sa part de puissance à les conferer, puis qu'il est desia grand Maistre.

Quant à la despoüille de son predecesseur il en peut seulement pretendre la quantité de bled & de vin qui luy sera besoin depuis le iour qu'il aura esté esleu iusques à la prochaine feste de Noël, & le reste vient au Thresor de l'Ordre.

Pour le regard de la vaisselle d'argët il en aura iusques à la concurrence de six cës marcs, sans passer plus outre, & vne coupe & aiguiere d'or s'il y en a, & le surplus est mis au Thresor public.

On a de tout temps destiné à la chambre du grand Maistre vn bon nombre de Commanderies, tellement incorporees à sa dignité qu'il est impossible de les en demembrer, & cela se fait afin qu'il puisse plus honnestement entretenir son train & sa suite.

Mais il a pouuoir de les donner pour vn temps à qui bon luy semble des Cheualiers, ou de leur ordonner là dessus quelque pension. Ces Commanderies sont celles qui suyuent.

Au grand Prieuré de saint Gilles, la commanderie de Pesenas luy est affectée, en celuy de Toloze celle de Poysubran: en celuy d'Auuergne la Commanderie de Salins, en celuy de France celle de Haynaut: en celuy d'Aquitaine la Commanderie du Temple de la Rochelle: au Prieuré de Champagne celle de Mets: au Prieuré de Lombardie d'Inuermoy: au Prieuré de Rome la Commanderie de Mugnan: en celuy de Venise celle de Treuise: en celuy de Pise celle de Frat: en celuy de Capouë celle de Sician: en celuy de Barri celle de Brindes: en celuy de Messine en Sicile celuy de Polizi: en celuy de Catalogne celle de Masdee: en celuy de Nauarre celle de Calzetes: en la Chastellenie d'Emposte la Commanderie d'Aliaga: au Prieuré de Castille celle d'Olmos: en celuy de Portugal celle de la Coüe: au grand Prieuré d'Alemagne celle de Buces: & en Boëme la Commanderie d'Vvladislaue. Somme qu'il n'y a grand Prieuré en la Chrestienté où le grand Maistre n'ait quelque piece.

Le grand Maistre eslit vn Lieutenant tel que bon luy semble, & c'est luy qui donne permission à tous les freres de ce qu'ils demandent, veu que comme nous auons ja dit, ils renoucent à leur volonté en entrant dans l'Ordre.

Mais il faut remarquer qu'auant qu'un frere accusé soit condamné, le Grand Maistre ne luy scauroit donner grace de son crime, ny à ceux qui sont priuez de leur habit à perpetuité sans le consentement du Chapitre general.

Toutefois il peut commuer la peine en vne autre plus legerë: mais il faut que les Baillifs l'en ayent prié auparauant.

Et cecy se fait lors qu'un frere a blessé l'autre, veu que l'ancienneté est ostée à celui qui a le tort, & donnée aux nouueaux venus, qu'ils appellent Freres Arnauds, sinon que la mort s'ensuiuit, ou quelque mutilation de membres, veu qu'en ce cas il faut suivre la loy selon sa rigueur.

Le Grand Maistre ne peut aussi faire aucun don sur les droicts, prerogatiues, & reuenus de la maistrise, qui puisse prejudicier à son successeur, & s'il le fait, la chose est de nulle valeur, & ne peut demeurer en ceste sorte.

Quant aux Baillifs, ils furent iadis instituez pour assister au Grand Maistre, comme Conseillers, & Senateurs. Ceux cy s'appellent Prieurs Conuentuels, & ont encores les tiltres de Grand Commandeur, duquel nous auons parlé, de Marechal, duquel nous auons fait mention, d'Hospitalier ancien tiltre du Chef de l'Ordre, d'Almiral, qui a la charge des galeres & autres affaires de la marine.

Il est vray que le Marechal estant en vne armee, il y commande, comme estant General sur tous les Cheualiers, & Freres seruans qui portent les armes. Toutefois il n'a pouuoir sur les Baillifs tant Conuentuels, que Capitulaires, ny sur les Prieurs, & Chastelains, qui sont considerez comme compagnons du Grand Maistre.

Il y a encores celui qu'ils nommoient Drappier, qui est celui des Baillifs que l'on nomme à present grand Conseruateur, & aussi celui qu'ils nommoient Turcopolier, qui signifie Capitaine

Capitaine de cheuaux legers, des temps de la guerre sainte, & cet office estoit propre à la nation Angloise.

C'est au Mareschal à faire commander les assemblees; où le Grand Prieur Ecclesiastique est obligé de se trouuer.

C'est encores au mesmes à faire Gonfalonnier, ou porteur du grand estendard de l'Ordre, celuy que bon luy semblera, mais non toutesfois sans le Conseil, & consentement du Grand Maistre, ou de son Lieutenant.

Mais ny le Mareschal, ny l'Admiral, ny aucuns Baillifs ne peuuent oster de leurs offices ceux qu'ils y auront mis, ains cet honneur est deu au grand Maistre, & au Conseil ordinaire qui iugeront des crimes pour lesquels on les veut demettre de leurs charges.

Les viures sont sous la charge du Grand Commandeur, qui est aussi, comme nous auons ja dit, Surintendant des finances.

Le Grand Baillif d'Allemagne auoit iadis charge du Chasteau saint Pierre, qui se trouue assis où la ville d'Halycarnalle estoit autrefois: ceste charge se perdit lors que les Turcs prirent Rhodes.

Le Mareschal a charge de la Tour où l'on met les prisonniers, sans qu'il en puisse toutesfois deliurer aucun que par le consentement du Conseil. C'est à luy aussi à regarder si l'Escuyer fait son deuoir, & à remedier à ses deffauts.

Quant à l'Hospitalier, il a charge de l'Enfermerie, & d'y mettre vn Enfermier, qui doit estre de la langue de France, s'il y en a de suffisant, que si cela n'est, il en choisit des autres à sa volonté: & cet office d'Enfermier dure seulement deux ans.

Le Drappier a soin des habits des Croisez, qui ne peuuent faire faire aucun habillement sans qu'il le permette.

Les Baillifs ont soixante escus de gages seulement toutes les annees, lors qu'ils demeurent au Conuent: mais lors qu'ils en sont absens, ils perdent leurs gages. Quant à leurs Lieutenans, ils en ont 40. pour supporter la charge des Auberges: le Prieur d'Eglise 48. & le Thresorier pareille somme.

Le thresorier ne peut estre choisi d'autre langue que de celle de France, & il est mis entre les Baillifs Capitulaires, ayant en sa garde la Bulle ferrée de l'Ordre, sous les seaux du Grand Maistre, & des Baillifs.

Il assiste aux Conseils, & à la reddition des comptes, & est choisi tant des Cheualiers que des seruans d'armes & Chappelains.

Il est vray que ses gages sont plus grands s'il est Cheualier que s'il se trouue de moindre qualite.

On y void apres le Chancelier qui fait le huitiesme Baillif, qui doit tousiours estre de la langue d'Espagne, & a sous luy vn Vice-Chancelier, qui fait les depesches en son absence, & lecelle gratuitement les patentes, sauf le droit que le Seneschal du grand Maistre a sur telles depesches.

Tous les Baillifs sont de la grand Croix, laquelle toutesfois ils ne peuuent prendre iusques à ce qu'ils arriuent en l'assemblee Conuentuelle de Malte.

Et puis que nous auons si souuent parle des Baillifs, il sera fort à propos d'en faire le denombrement, qui est tel. Les Baillifs de la langue de Prouence sont le grand Commandeur, le Prieur de saint Gilles, le Prieur de Thoulouse, le Baillif Capitulaire de Monosque.

Ceux de la langue d'Auvergne sont le Mareschal, le grand Prieur d'Auvergne, le Baillif de Lyon, qu'on nommoit anciennement le Lureoil. Ceux de la langue de France sont le grand Hospitalier, les grands Prieurs de France, d'Aquitaine, & de Champagne, le Baillif Capitulaire de la Moree, & le Thresorier general. Ceux de la langue d'Italie sont l'Admiral, les grands Prieurs de Rome, Lombardie, Venise, Pise, Barri, Messine, Capoue, le Baillif Capitulaire de sainte Eufemie, de saint Estienne proche de Monopoli, de la Trinite, de Venoule, & de saint Jean, de Naples.

Ceux des langues d'Aragon, Cataloigne, & Nauarre, sont le grand Conseruateur, iadis appelle Drappier, le Chastelain d'Emposte, les grands Prieurs de Cataloigne, & de Nauarre, & les Baillifs Capitulaires de Maiorque.

Ceux de la langue Angloise estoient iadis le Turcopolier, les grands prieurs d'Angleterre, & d'Irlande, le Baillif Capitulaire de l'Aigle.

Ceux des langues de Castille, Leon, & Portugal sont le Chancelier, les grands Prieurs de Castille, de Leon & de Portugal, & le Baillif Capitulaire de la Bouede.

Au reste les Baillifs Capitulaires, le grand Prieur de l'Eglise de l'Ordre & les Comandeurs de Chipre, & de Lãgõ, sont comis à toutes langues, au lieu que celuy de Negrepont n'est comis

qu'aux langues d'Arragon, & de Castille, & tous les susdicts sont de la grand Croix, & du Conseil accompli.

Le grand Prieur de l'Eglise de Malte a puissance sur tous les Chappellains, & autres qui sont du corps du Clergé, sauf ceux qui seruent à la Chappelle du grand Maistre, j'entends sur les Chappellains qui font leur demeure à Malte, ven que les autres sont sous l'Obeysance des grands Prieurs & Commanderies desquels ils se tiennent.

Or pour ce que nous auons ailez parlé du Grand Maistre, & de sa dignité, grandeur & puissance, il est à propos de dire maintenant quelque chose de son eslection, & de ce que fait celuy qui se trouue en charge lors qu'il se void accablé de maladie: ainsi donc que le Grand Maistre se sent fort malade, il faict cacher en vn lieu secret les Bulles d'argent, & de fer, & seel secret, afin que personne n'en puisse abuser, & s'il ne le peut faire, que le Seneschal en prenne la charge: & si tost qu'il est mort, il est obligé de les porter au Conseil ordinaire, où le tout est rompu, afin que l'on ne s'en puisse iamais plus seruir.

Après cela l'on faict enterrer le corps le plus honnorablement qu'il est possible, & toutesfois sans aucune superfluité.

Après qu'il est enterré, l'on eslit vn Lieutenant du deffunt, la dignité duquel dure iusques à tant que l'on ayt nommé le Commandeur qu'ils appellent de l'Eslection.

Cependant, l'on prend garde aux biens qui se trouuent en la maison du Grand Maistre decede, puis on se prepare pour en eslire vn autre, & l'on alligne vn iour pour l'eslection.

Le iour venu, l'on s'assemble à l'Eglise, où la Messe ouye, l'on va au lieu public où les assemblees se tiennent ordinairement.

Le Lieutenant propose les causes pour lesquelles l'on est en ce lieu, & commande que les Cheualiers & autres freres de chasque nation aillent tenir langue chacun à part, & ceux-cy doiuent iurer qu'ils procederont en toute sincerité à l'eslection d'un President, & de trois Eslecteurs du Grand Maistre, à sçauoir d'un Cheualier, d'un frere seruant, & d'un Chappelain.

Huict de ces Freres choisis des langues, vont encores faire le serment pour le choix du Cheualier President de l'eslection, & ce dernier estant esleu, il faut que le Lieutenant se deposite de sa charge.

Ce President de l'eslection estant en son siege, les huict susnommez des langues viennent deuant luy, & prestent serment de donner les trois Eslecteurs sans faueur aucune: & il faut que ceux-là eslisent ceux auxquels doit toucher l'eslection du Grand Maistre.

Cela faict, ils entrent au Conclau, & nomment là secrettement entre eux ces trois Eslecteurs, puis les nomment à l'assemblée, & soudain se demettent de leurs charges.

Les trois derniers viennent lors prester le serment entre les mains du President de l'eslection, qu'ils nommeront vn quatriesme qui ne sera point de leur langue, & cestuy-cy estant receu ils iurent d'eslire de mesme le cinquiesme, & ainsi des autres, iusques à tant qu'ils viennent au nombre de huict, & de ces huict iusques à seize, tellement qu'il y ait de chaque langue deux freres, entre lesquels, on peut mettre deux Chappellains, & trois seruans d'armes seulement veu qu'il faut que les autres soyent Cheualiers.

Ceux-cy esleus, & s'estans confessez, & communiez, se vont presenter deuant le Iuge de l'Eslection, où la teste nuë, & les genoux à terre, ils iurent l'un apres l'autre à haute voix, qu'ils esliront legitiment, & suiuant les anciens statuts de leur Ordre, vn chef, & Prince homme de bien, & profitable à la Religion.

Après ce serment faict, le Commandeur de l'eslection, & tous les assistans iurent aussi qu'ils tiendront pour ferme & stable ce que ceux-cy feront pour ce regard, & d'obeyr au grand Maistre qui sera esleu par eux.

Orestans ainsi entrez au Conclau, ils commencent à dire librement leur aduis sur la vie, & les mœurs de ceux que l'on propose, & pour lesquels quelques vns parlent.

Après qu'ils ont diligemment espluché la vie de chacun de ces anciens, ils mettent des balottes dans des vases, & ainsi les plus de voix l'emporte.

De sorte que le Commandeur de l'eslection n'oseroit en nommer vn autre que celuy qui sera choisi par ces seize Eslecteurs, à cause du serment qu'ils ont faict.

Ceste eslection finie, ils viennent deuant le President de l'assemblée, demandant trois fois à tous s'ils trouueront bonne leur ordonnance, & s'ils la ratifieront, & chacun ayant dit ouy.

Le Cheualier de l'eslection, qui est l'un des trois premiers nommez, tous les autres estans assis, nomme à haute voix celuy qui a esté esleu Grand Maistre, qui estant present, est conduit au grand Autel, pour y faire serment de garder les droicts d:

la religion, de maintenir les priuileges, & de ne rien faire sans le consentement du Conseil: & s'il est absent, l'on entre encores en Chapitre pour eslire vn Lieutenant iusques à sa venue au lieu que s'il est present, il choisit vn Lieutenant à sa volonté.

Durant le temps de l'eslection, il n'est permis à aucun Cheualier de porter les armes au lieu où elle se fait, veu qu'il perderoit le droit de son balotage, & si quelqu'un en formoit plainte, on luy osteroit l'habit.

Quant aux Baillifs, & Prieurs Conuentuels, l'eslection s'en fait deuant le Grand Maistre, qui en dispose, ayant avec luy le Conseil ordinaire, ce qui est aussi obserué en l'eslection du Prieur de l'Eglise de Malte.

Les Croisez de Malte ont ordinairement vn Procureur, ou Agent en Cour de Rome, qui est crée aux Chapitres generaux, & bien souuent le Grand Maistre, & le Conseil le peut casser, & en mettre vn autre en sa place pour certaines raisons: & selon qu'ils font cognoistre son insuffisance.

C'est luy qui doit deffendre les graces, priuileges, & libertez de l'Ordre, & tenir la main aux octrois de nation & prouisions accordees, tant par le Grand Maistre que par le Conuēt: & c'est encores luy qui doit s'opposer à ceux d'être les Freres qui vsent de rebelliō, & de desobeysance, & les doit rancer, & poursuiure avec toute rigueur, & donner aduis au Grand Maistre des affaires qui touchent la Religion, sans qu'il puisse prendre autre chose que les gages ordinaires qu'il a du thresor.

Somme, il n'y a office qui ne soit electif en cēt Ordre, de sorte qu'estant question de la guerre, & d'eslire vn General par terre, il le faut prendre de la langue d'Auuergne, s'il y en a quelqu'un qui soit capable, & digne de ceste charge: & s'il faut auoir vn Chef pour la mer, ils le prennent de la langue d'Italie.

Et lors qu'il n'y en a point de suffisans, on en prend d'ailleurs sans preiudice toutesfois de la langue, ny de son ancienneté.

Pour le regard des Commanderies, il n'est permis à aucun Cheualier d'en tenir deux à la fois, ny aux Grands Prieurs, qu Chastelains d'en auoir ailleurs qu'en leur Prouince.

Il est vray que les Prieurs, & Baillifs legitimemēt pourueus peuvent auoir les chambres magistrales qui leur sont accordees, & les Commanderies qu'ils auront ostees aux seculiers qui les vlturpoient, ou celles dont la iouysance leur arrine de droit par la priuation de quelque frere criminel de leur Prouince.

Celuy qui auant que prendre l'habit, ayant esté marié, aura des enfans, ne peut auoir, ny obtenir aucune Commanderie tandis qu'ils viuent, de mesme que ne peut auoir vne Commanderie de grace, ou de Cabiment, c'est à dire, venant selon l'ordre de son ancienneté, s'il n'a seruy cinq ans pour le moins depuis la prise de l'habit, & mesme il ne peut iouyr d'aucune pension ou d'aucun membre, s'il n'a seruy trois ans.

Pour conclusion, on ne peut iouir d'vne Commanderie soit de grace, d'ordre, ou melioration, si l'on n'a esté au Conuēt, & si l'on n'a eu son ancienneté, ou expectatiue: & il faut que les lettres de ces expectatiues soient leuees dans l'annee de l'execution par les Commandeurs: & nul ne peut paruenir à la melioration de son benefice, s'il n'a seruy cinq ans, & ne s'est tenu vn an entier en sa Commanderie.

Toutes les acquisitions faictes par les Commandeurs sont de la Religion: si ce sont immeubles, ils sont à la Commanderie voisine des terres acquises, & si ce sont meubles, le tout viendra au Thresor public.

Aux lieux où il y a nominations de benefices, ou prouisions, ou presentations dependantes des siefs des Commanderies, le Commandeur en dispose, si la coustume, & les priuileges des lieux n'en ordonnent autrement: & lesdicts Prieurs, Baillifs & Commandeurs n'en peuvent aussi disposer si ces benefices vaquans par mort, ou autrement, escheoient tandis que le grand Maistre seroit au lieu où la vacance aduiendroit, veu qu'elle appartiendroit au grand Maistre, encores qu'on y deust venir par eslection, sinon que ces benefices fussent assignez pour le droit du Cabiment, ou ordre d'ancienneté de quelqu'un des Freres. Sur tout il est deffendu en cēt ordre, à tout homme qui en fait profession, de demander ny office, ny Commanderie; ny Benefice secrettement ny en autre forte, directement, ou indirectement, à quelque personne que ce soit, sinon au Grand Maistre, ou Conuēt, & Religieux de cēt ordre, à qui il appartient d'en disposer.

Et s'il aduenoit que quelqu'un en obtint par autre voye, il est ordonné qu'il quittera ce qu'il aura obtenu, entre les mains du grand Maistre, & s'il en faict refus, il sera priué de son habit, & mis en prison perpetuelle.

Les grands Prieurs, Baillifs, & Chastelains, sont obligez de visiter tous les cinq ans les Commanderies subiectes à leur iurisdiction, ou s'ils sont empeschez en d'autres affaires, ou malades, ils y doiuent enuoyer vn Cheualier Commandeur, & vn Chapelain, qui ait aussi vne Commanderie, pour faire ceste visite, & voir s'il y a rien qui soit malmenage, si les maisons vont en ruyne, & s'il y a quelque chose qui ayt besoin de reparation.

Il faut de mesme qu'un Cheualier, & un Chappelain visitent les Chambres, & Commanderies des grands Prieurs, & Baillifs pour semblable occasion.

Si les grands Prieurs mesprisent de faire leur deuoir en cecy, ils perdent aussi par la coustume leur rang, iurisdiction, & preeminence de priorité: & si les Visiteurs deputez par le Chapitre fauorisent ces infracteurs de loix, ils seront priuez pour leur faute du reuenu d'un an de leurs Commanderies.

Il n'est loisible aux Commandeurs d'exercer aucun trafic de marchandise, & moins de prester, ny receuoir de l'argent à interest, mesme qu'ils ne peuuent vendre, ny engager rien qui soit des biens de l'ordre, sans expresse permission du grand Maistre, & sans le contentement du Chapitre general: & mesme il est deffendu de traicter de telles alienations aux Chapitres Prouinciaux.

Et combien que les Cheualiers eussent acquis quelque chose, il ne leur est pas permis de l'aliener, sans congé du Maistre, & du Chapitre, veu qu'ils n'y ont que l'usufruit durant leur vie.

Il n'est non plus permis aux Receueurs de donner à rente, ou à ferme les Commanderies des freres decedez, si ce n'est au Chapitre Prouincial en la presence du grand Prieur, & de quatre Cheualiers des plus anciens.

Il n'est pareillement permis aux freres de cet Ordre de faire testament, ny donner chose quelconque, non pas mesmes à leurs seruiteurs, sinon leurs gages. Et quant au creancier, ils doiuent declarer leurs debtes.

En fin il faut qu'ils se soumettent en tout à la volonté du Superieur, qui ne leur donnera permission de tester que iusques à la concurrence de la sixiesme partie des meubles, & de l'argent monnoyé trouué au deffunt, on payera les debtes.

Le grand Maistre mesme ne peut disposer de ses biens meubles s'il n'a licence du Chapitre general, mesme il ne le peut qu'estant desja proche de la mort.

Et pource qu'il aduient souuent que les Cheualiers ont grand nombre d'esclaves, Mores, ou Turcs, par le moyen des courtes qu'ils font sur la mer, il leur est deffendu de les affranchir, & mettre en liberté sans la permission du Grand Maistre, & du Chapitre general.

Les sollicitations des crimes des seculiers, qui ont affaire aux iurdictions de cet ordre, sont deffendues aux Cheualiers, veu qu'il faut plustost que comme personnes Ecclesiastiques, ils en laissent faire au bras seculier, & pareillement aux causes ciuiles il leur est deffendu de solliciter ny en public, ny secrettement, D'auantage si quelqu'un des Cheualiers, ou autre des Croisez a commis quelque faute, il n'est permis à aucun de ses amis, & compagnons de prier pour luy, iusqu'à ce que la sentence soit pronôcée, veu qu'ils peuuent supplier alors le Grand Maistre de moderer sa peine.

Il est encor deffendu à vn chacun de ces freres de iurer foy ny hommage, ou de faire alliance ny confederation avec aucun Prince, sans le congé du Grand Maistre, ou de son Prieur, & semblablement de faire aucune assemblee, sans permission des mesmes: cecy se fait à cause des jalousies des Princes, des terres desquels ces freres s'ont veu que s'ils en suiuoient plustost l'un que l'autre, ce seroit retarder le profit de la religion. Il n'est permis aux Croisez d'estre vagabons, & de sortir hors des limites de leurs Prouinces & Commanderies, si ce n'est par expres congé de leur Superieur.

Que s'ils sont trouuez ainsi roulans, & sans auoir permission par escrit, il est enioint à tous Commandeurs de s'en saisir, & de les mettre en prison, puis d'en aduertir le Grand Prieur, afin qu'il en face iustice.

Or pour oster tout moyen de desrober le public, il est deffendu aux Cheualiers ou autres auans charge, estat, ou office en leur religion, d'armer aucune galere, ou autre vaisseau pour aller en course ouuertement, ou secrettement & par personnes interposées, ains il faut laisser cela aux particuliers, qui n'oseroient auoir intelligence avec les officiers, sans encourir la peine des pariures, & les Cheualiers ne peuuent aller en course, que du consentement du grand Maistre, & avec la permission du Conseil ordinaire.

Et mesme il faut auant ce congé qu'ils aient fait cinq ans de service, & qu'ils iurent de ne faire aucun dommage aux terres & hautes des Chrestiens: & tandis qu'ils sont en course ils iouissent du droit de leur ancienneté, comme s'ils estoient à Make.

Il n'est permis qu'au Grand Maistre, & au Conseil ordinaire de donner sauf-conduit aux Corsaires, & mesme il faut que ce soit pour vne extreme necessité, non plus qu'aux fugitifs, & aux marchands qui ont fait banqueroute.

Il n'y a aussi que le grand Maistre, & le Conseil accompli qui puisse faire trefue, ou accord avec les Turcs, les Mores, & autres infideles: & il est deffendu à vn chacun de tirer l'artillerie, les poudres, & autres munitions hors de l'Isle, & des Maisons de l'Ordre, sauf que le Grand Maistre, & le Conseil y peuuent pouruoir selon que la necessité le requiert.

Il est deffendu aux Cheualiers, & seruans d'armes de se mesler des guerres qui sont entre les Chrestiens, ny d'y prester serment, & receuoir solde, si ce n'est que le Prince du pays leur en fit expres commandement, veu qu'ils seront alors dispensez: mais ils iront sans porter les enseignes del'ordre, si ce n'est pour la deffence de la religion.

Il y a punition pour ceux qui ne portent la croix cousüe à leurs manteaux.

Les querelles leur sont deffenduës aux Auberges, & si quelques vns y vsent de voye de faict il y a des peines establies selon le cas, & suiuant les loix de l'Ordre.

Mais pour ce que nous auons parlé de la peine qu'on donne aux freres en leur ostant leur habit, j'estime que ie dois encor dire au Lecteur les subiects pour lesquels on leur faict ceste honte.

Ils recoiuent donc ceste infamie s'ils sont accusez, atteints, & conuaincus d'heresie, sodomie, larcin, volerie, ou de s'estre retirez pres des infideles, s'ils ont abandonné l'estendard de l'Ordre deployé en la guerre contre les ennemis de la Foy, si quelqu'un s'enfuit de la bataille, & laisse ses compagnons, s'il rend quelque forteresse aux ennemis, mais on procede en cecy avec vne inquisition fort diligente, afin de ne condamner pas vn homme sans ouyr ses iustifications.

Les faux tesmoins, les faussaires qui falsifient les lettres de la Religion, & ceux qui se pariurent, & qui s'amusent à piller estans à la guerre, en doiuent estre priuez pour vn an.

Ceux qui accusent les autres de ces crimes, & ne peuuent prouuer que leur accusation est veritable, sont subiects à receuoir la honte de la perte de l'habit, qu'ils pourchassoient aux autres.

Les concubinages, & toutes sortes de desbordemens, ont leus deffences particulieres dans les regles de cet Ordre: & pour conclure on ne peut rien voir de mieux policé, & si toutes choses n'y vont comme il faut, ce n'est pas le defect de l'institution & du reglement qui en est cause, mais celuy des esprits qui ne sont pas disposez à bien faire.

RELIGION.

ON sçait assez que les Cheualiers de ceste Isle sont les bouleuards de la Religion Catholique contre les Infideles. Il y a vn Euesque en l'Isle de Malte, qui est souz l'Arch euesque de Palerme en Sicile.

Au reste les freres de cet Ordre sont obligez par l'ancienne coustume, & par leur profession de dire tous les iours, ou à vne fois, ou à diuerses heures 150. Patenostres, au lieu des heures qu'on nomme Canoniales.

Mais les Prestres, Diacres, ou autres du Clergé sont tenus de dire le seruice tous les iours suiuant l'ordre & la coustume de l'Eglise de Ierusalem.

Tous sont obligez de ieusner le Carême entier, depuis le iour des Cendres iusques à Pâques, aux Rogations, à la S. Marc, à la Pentecoste, aux quatre-Temps, les vigiles des Apostres, & de S. Iean Baptiste de S. Laurens, de l'Assomption, Natiuité, Conception, Purification, & Annonciation de Nostre-Dame, de la feste de tous les Saints, & de la Natiuité de nostre Seigneur.

Ils sont pareillement obligez de communier à Noël, à Pâque, à la Pentecoste. Et lors qu'ils vont en course il faut aussi qu'ils se confessent, & ils ne se peuuent confesser qu'à leurs Prestres, sinon qu'ils n'en eussent point veu, alors avec la permission du Prieur, ou Souf-Prieur, en l'absence du chef, ils peuuent en telle necessité se confesser à vn autre.

Les Cheualiers sont tenus, estans au Conuent, d'assister aux diuins seruices & processions 24. chacun en son rang, & selon son ancienneté, sans qu'aucun soit si hardy de s'asseoir en la place des Prieurs, ou Baillifs Conuentuels, ny de leur Lieutenans, afin de garder l'honneur qui est deu aux Ecclesiastiques.

On dit pour chaque frere decedé trente Messes, à la premiere desquelles tous les freres qui y assistent vont offrir vn cierge, & vn denier, qui doit estre distribué aux pauvres.

Les Prestres doiuent au defunct chacū vne Messe, les Diacres, & Soufdiacres vn Pseautier, & les Seruans l'office des Morts, ou cent cinquante Patenostres.

Il est ordonné qu'il y aura vn homme docte gagé pour instruire les ieunes Clercs, & leur enseigner les lettres Latines, & vn autre pour leur apprendre à chanter, & que nul ne sera receu Soufdiacre qui n'ait dix-huict ans, ny Diacre sans en auoir vingt-deux, ny Prestre sans estre aagé de vingt six, & de plus il faut que tous ayent fait profession de leur Ordre.

ESTAT DES GRANDS MAISTRES DE MALTE qui ont gouverné iusques à present.



L'ORDRE & milice de saint Iean de Ierusalem a eu sa naissance & premiere origine en la Cité sainte de Ierusalem, & a passé en icelle les premieres années de son enfance, & vne grande partie de son adolescence. Lors que les Sarazins estoient maistres de la sainte Cité & du pays d'alentour le Temple du saint Sepulchre de nostre Seigneur fut ruyné enuiron l'an de Salut 1012. par le commandement d'Equen Caliphe des Sarrazins; & demeura ainsi en ruine 36. ans, iusques au temps de Constantin Monomaque Empereur de Constantinople, lequel à la priere des Chrestiens qui habitoient en Ierusalem, du consentement de Bomentor Elmoïn Stensab Calife ou Souidan d'Egypte, le fist rebastir à ses frais l'an mil quarante huit. Enuiron ce mesme temps aucuns Gentils-hommes & marchands Italiens de la Cité de Melphe souloient frequenter les ports & Citez maritimes de Syrie & d'Egypte, & par ce qu'ils portoiēt des marchandises en ce pays là, ils estoient aymez & bien vouldus, non seulement des gouverneurs des Villes, mais aussi du Calife d'Egypte: estans bons Chrestiens, souuent ils alloiēt en Ierusalem visiter les saints lieux, & n'ayans aucune retraicte en la Ville, ils obtindrent congé & permission du Caliphe d'y bastir vne Eglise & vn Palais pour leur vsage & habitation, & de ceux de leur nation au quartier de la ville où les Chrestiens habitoient proche du saint Sepulchre.

Ils y edifierent deux Monasteres, l'un en l'honneur de la glorieuse Vierge mere de Dieu nommé de sainte Marie de la Latine à la difference des Eglises Grecques qui estoient en Ierusalem, & y mirent vn Abbé du mont Cassin pour loger les pelerins Chrestiens, & l'autre en l'honneur de sainte Marie Magdelaine pour y retirer les femmes qui venoient en pelerinage, lequel estoit gouverné par des Religieuses, & puis apres ils firent bastir vn Hospital pour y loger tant les pelerins malades que ceux qui estoient en bonne disposition, & pareillement vne Eglise qui fut dédiée à saint Baptiste. Et ces Monasteres, Eglises, & Hospital furent long temps entretenus par le soin, & aux despens des Almaphitains qui les auoient fondez, & ce iusques au temps que la ville fut conquise par les Princes Chrestiens sur les infideles, & que Godefroy de Buillon en fut esleu Roy, qui fut en l'an de salut 1099.

1. Lors de la prise de la Ville, frere Gerard estoit Recteur ou Gouverneur de l'Hospital de saint Iean, lequel lors que la ville fut assiegee de Chrestiens, fut fort mal traité par les infidelles, & fut long temps par eux detenu captif & prisonnier, par ce qu'ils se desffioient qu'il auoit secrette intelligence avec les Chrestiens qui assiegeoient la ville.

Mais apres que les Chrestiens en furent maistres il fut deliuré de prison, & gouverna fort charitablement & soigneusement l'Hospital de saint Iean, persuadant & induisant les Roys & Princes Chrestiens de l'enrichir & doter, ce qu'ils firent liberalement, de sorte qu'en France, en Italie, en Espagne & autres Prouinces de la Chrestienté, l'Hospital de S. Iean eut en peu de temps de grands reuenus & possessions.

Dés l'an mil cent treize, le Pape Paschal second receut frere Gerard & les Cheualiers de saint Iean en la protection du saint Siege Apostolique, & leur octroya de grands Priuileges, & ordōna qu'apres le deceds de Gerard, l'on procederoit canoniquement à l'election d'un autre Recteur & Gouverneur, qui fut depuis appellé grand Maistre de l'Ordre ou milice de l'Hospital de saint Iean de Ierusalem, nom qui a duré iusques à present depuis cinq cens ans en ça.

1. L'an

2. L'An 1118. Frere Gerard passa de cette vie en l'autre sous le Pontificat du Pape Gelase 2. & lors que commença l'ordre des Templiers, apres son deceds luy succeda par election frere Raymond du Puy, qui estoit Cheualier protez de l'ordre, quoy qu'aucuns estiment que frere Rogier succeda à defunct Gerard, & qu'il gouuerna l'Hospital de saint Iean depuis l'an 1118. iusques au temps du deceds de Baudouyn 2. du nom Roy de Ierusalem, qui mourut l'an 1131. Frere Raymond en vn Chapitre general assemble en Ierusalem, avec l'aduis des Cheualiers fist des statuts de l'ordre, forma & institua la reigle de vie de laquelle les Cheualiers vseroient à l'aduenir, il fut appellé grand Maistre de l'ordre, & se qualifioit par ses tiltres seruiteur des pauvres de Iesus-Christ, & Gardien de l'Hospital de Ierusalem. Sa reigle fut approuuee & confirmee par Calixte 2. l'an 1120. & depuis par Honoré II. & Innocent II. & de main en main par leurs successeurs, lesquels ordonnerent que les Cheualiers Religieux viuroient selon la reigle de saint Augustin. Ce grand Maistre voyant que le reuenue de l'Hospital s'augmentoit de iour à autre, & qu'il ne le pouuoit mieux employer que contre les infidelles leur faisant la guerre, il s'offrit au Roy de Ierusalem avec toutes ses forces, & pouuoir, & de ses Religieux, lesquels portoient en leurs drapeaux & estendars la Croix d'argent en champ de gueulles par ordonnance du Pape Innocent II. l'an 1130.

Et de lors les freres & Religieux furent distinguez en trois degrez, car les vns furent Cheualiers, les autres Chapelains, & les autres Seruans, n'y ayant du commencement, autre difference entr'eux sinon que quelques vns d'iceux estoient Prestres & Clercs, & les autres Lais, & depuis ce temps là, il ne se fist aucune entreprise en la Palestine contre les infidelles, que le grand Maistre ne s'y trouuast en personne avec ses Cheualiers & Religieux, lesquels furent premierement appelez Cheualiers Hospitaliers, ou de l'Hospital de saint Iean de Ierusalem, puis Cheualiers de Rhodes, & à present Cheualiers de Malte.

Ils furent en si grand credit & reputation qu'ils estoient employez au maniment & conduite de grandes affaires & d'importance.

Entre autres frere Gerard Gebert Cheualier de cest ordre fut enuoyé par le Roy Foulques d'Anjou en Angleterre pour traicter le mariage de Constance Princesse d'Antioche, niepce de la Royne Melisende, & fille du Prince Boëmond avec Raymond fils du Comte de Poitiers qui estoit lors en la Cour de Henry Roy d'Angleterre, lequel mariage fut conclud par la dexterité de ce Cheualier: aussi en ce temps Raymond Berengier Comte de Barcelone & Prince de Catalogne, qui auoit conquis les Isles de Majorque & Minorque sur les Mores, & deffendu en duél la chasteté & l'honneur de Mahaud femme de l'Empereur Henry V. contre deux Cheualiers Allemands qui l'auoient faulxement accusée d'adultere, sur la fin de ses iours se resolut de prendre l'habit de cette sacree Religion, & en cette sacree profession il persueura sainctement le reste de ses iours en l'an 1131.

Et enuiron ce mesme temps on tient qu'en vn moment trois Cheualiers de ceste ordre qui estoient François natifs de Picardie que le Souldan d'Egypte retenoit captifs, furent miraculeusement deliurez & transportez d'Egypte avec Ismerie fille du Souldan au lieu où est à present l'Eglise dediee à nostre Dame de Liesse, ce qu'on dit estre aduenu l'an 1139.

En l'an 1139. le grand Maistre Raymond fist continuer le siege de la ville d'Ascalon que les infidelles auoient deffenduë contre les Chrestiens plus de 50. ans, & en fin s'en rendit maistre le 12. Aoust 1154. qui fut le 10. du regne de Baudouyn 3. & en recognoissance de ceste prise signalee vtile à toute la Chrestienté, le Pape Anastase 4. conceda & octroya de tres-grands priuileges à l'ordre de l'Hospital de saint Iean par sa Bulle du 1. Nouëbre en ladite annee, & les exempta de la iurisdiction & correction des Prelats Ecclesiastiques d'Orient.

Ce qui fut cause de grands troubles entre les Euesques de ce pays là, & les Cheualiers de cest ordre, lesquels Cheualiers furent tousiours supportez & soustenus fauorablement par le saint Siege & les Cardinaux.

Aucuns ont estimé que le grand Maistre Raymond estoit Florentin, mais la plus veritable opinion a esté qu'il estoit François natif du Dauphiné yssu d'une maison noble nommee du Puy: dont mesmes Jacques Bosius Italien qui a escrit amplement l'histoire de l'ordre ingenuement en demeure d'accord.

Il mourut l'an 1160. du temps d'Alexandre III. Pape, avec cette reputation qu'il auoit esté homme de bonne sainte vie, craignant Dieu, fort prudent & aduisé es affaires du monde, & tres-valeureux au faict des armes.

3. Apres que Raymond fut decedé luy succeda en la maistrise & gouuernement de l'ordre frere Auger de Balben, du temps duquel il ne se trouue aucune chose digne de memoire, sinon que de sō tēps mourut le Roy Baudouyn 3. qui fut grandement regretté des Chrestiens, mesmes des infideles, qui disoient que les Chrestiens pour la mort de Baudouyn auoient iuste occasion de se doloir, parce qu'ils auoient perdu vn Prince qui n'auoit son pareil en tout le

monde. Le grand Maistre Auger apres auoir gouuerné en paix & repos la Religion enuiron trois ans, mourut l'an 1163. &

4. Frere Arnould de Comps fut esleu grand Maistre en son lieu, qui fut homme de grande valeur & grand conseil, & peu de temps apres son eslection, il entra en Egypte avec le nouveau Roy de Ierusalem Amaury, lequel fist guerre au Caliphe d'Egypte, parce qu'il refusoit de payer & continuer le tribut annuel, qu'il s'estoit obligé à Baudouyn 3. de payer perpetuellement aux Roys de Ierusalem. Cest Arnould apres auoir avec grande prudence & valeur gouuerné l'Hospital de saint Iean enuiron quatre ans, mourut l'an 1167. & luy succeda,

5. Frere Gilbert d'Assaly ou de Sally, lequel estoit de grand cœur & si liberal qu'il panchoit à la prodigalité, spécialement à l'endroit des soldats, de sorte qu'il fit de grandes dépenses, & espuisà tout le tresor de la Religion, & fut contrainct d'emprunter argent à interest, à condition que s'il prenoit sur les infidelles la ville de Belbeis, anciennement appelée Pelusium, elle demeureroit acquise à la Religion, d'où il vint à chef heureusement le troisieme de Novembre 1168. en laquelle année il tint vn Chapitre general dans Ierusalem, & voyant qu'il s'estoit grandement endebté, & qu'il auoit chargé la Religion de plus de cent mil cécus de debtes, & ennuyé de ce que toutes ses entreprises ne réussissoient selon son desir, il delibera de renoncer à la grande Maistrise, ce qu'il fist en l'an 1169.

6. Et fut par la resignation ou plustost renonciation esleu grand Maistre vn autre Cheualier nomme frere Galte ou Calte, duquel il ne se trouue aucune chose qui soit à propos de ceste briefue histoire, & la briefueté du temps qu'il gouerna en fut cause, parce qu'il ne fut pas vn an entier en ceste charge, ains il mourut au mesme an de son eslection, & il eut,

7. Frere Ioubert homme tres-religieux pour successeur au mesme an 1169. lequel en l'an 1176. se ioignit avec le Comte de Flandres Philippe, qui estoit venu en Syrie au secours du Roy Baudouyn 4. contre Saladin, duquel vne puillante armée à merueilles fut deffaicte par les Chrestiens qui estoient en petit nombre au mois de Novembre 1177. lors que le Pape Alexandre troisieme & l'Empereur Federic Barberousse se recôcilierent ensemblement: enfin Saladin se retira du pays de Damas en l'an 1179. auquel mourut frere Ioubert Maistre des Hospitaliers fort charitable euers les pauvres malades, & on dit que l'ennuy qu'il print de voir aller manifestement en ruine les affaires de la Chrestienté en la Syrie, & de la honteuse & dommageable trefue faicte entre le Roy de Ierusalem, & le Comte de Tripoly à son exemple, & Saladin, fut cause de luy abbreger ses iours, ayant gouuerné l'ordre de saint Iean enuiron dix ans.

8. En son lieu fut esleu frere Roger de Moulins, homme de grande prudence & de grande valeur en ladite année 1179.

De son temps estant suruenue vne grande inimitié & dissention entre le Prince d'Antioche & le Patriarche dudit lieu, frere Roger fut choisi pour estre mediateur de paix & d'accord entr'eux: ce qui aduint en l'an 1181. auquel mourut le Pape Alexandre 3. & fut esleu en son lieu le Pape Lucius 3. Frere Roger fut avec Heracius Patriarche de Ierusalem, & frere Arnould de Troge Maistre des Templiers, enuoyé par le Roy de Ierusalem en Occident en qualité d'Ambassadeurs, afin de demâder secours aux Princes Chrestiens, & furent les Ambassadeurs bien receus du Pape, de l'Empereur, du Roy Philippe Auguste Dieu donné, surnommé le Conquerant, des Roys de Sicile, d'Angleterre & de Hongrie, & s'en retournerent en Syrie, fors le Maistre des Templiers, qui mourut en chemin.

En l'an 1178. le Comte de Tripoly s'estant ligué & confederé avec Saladin, il luy donna passage, & secourut de viures son armée, & Saladin ayant assiegé la ville de Ptolemaide, les Cheualiers de saint Iean & les Templiers mirent en desordre son armée, & frere Roger grand Maistre combatant valeureusement mourut, son cheual estant tombé sous luy, & fut accablé de la pesanteur de ses armes, & foulé aux pieds de la caualerie des ennemis, le corps duquel fut puis apres trouué entre les morts, & enseuely avec beaucoup de larnies & de tristesse: & nonobstant ceste grande perte du grand Maistre, les Cheualiers de saint Iean & les Templiers obtindrent le gain de la bataille contre les Turcs & Sarrazins, desquels en demoura sur la place iusques 15000. de morts le 1. iour de May l'an 1187.

De son temps frere Roger obtint du Pape Lucius 3. confirmation de la regle & des priuileges que les Papes & ses predecesseurs auoient concedé à la Religion de saint Iean, apres la mort duquel,

9. Frere Garnier de Naples, de Syrie, qui estoit l'antique ville de Sichem de Cananée, fut esleu grand Maistre: Du temps d'iceluy fut donnée vne bataille sanglante entre les Chrestiens & Infideles, en laquelle le Roy de Ierusalem Guy de Lusignan fut retenu prisonnier avec les principaux de son Royaume, la vraye Croix que les Chrestiens portoient en bataille fut

fut prise par les Infideles, quasi tous les Cheualiers de saint Iean & les Templiers furent tuez, partie en bataille, partie decapitez de sang froid, & frere Garner apres auoir combattu valeureusement & esté blessé mortellement en plusieurs endroits de son corps, se sauua par la bonté & vitesse de son cheual dans la ville d'Ascalonne, où dix iours apres il passa à vne meilleure vie le 14. Iuillet, n'ayant esté grand Maistre que deux mois six iours.

10. Le 20. iour du mesme mois de Iuillet 1187. les Cheualiers qui estoient en Ierusalem esleurent frere Ermengard d'Aps, le 2. Octobre de la mesme année, la ville de Ierusalem fut soumise à la puissance de Saladin 88. ans deux mois dix sept iours, apres qu'elle fut deliurée par Godefroy de Buillon de la main des Infideles, au 2. an du Pontificat du Pape Urbain 3. Frederic 1. surnommé Barberousse tenant l'Empire d'Occident, & Isaac l'Ange celui d'Orient à Constantinople, & regnant en France Philippe 2. appelé Auguste, Dieu donné & Conquerant, & furent chassés de Ierusalem les Cheualiers Hospitaliers, & les Templiers, & tous les Chrestiens Latins, desquels Chrestiens les Hospitaliers racheterent de la captivité des Barbares, iusques au nombre de mil de leurs deniers: Toutes les Eglises de la ville furent polluées & profanées fors le Temple de la Resurrection, qui fut racheté à grand prix d'argée par les Chrestiens Orientaux.

Après la perte de Ierusalem les Hospitaliers furent tousiours en armes assistants fidelement les Princes Chrestiens, qui s'estoient croisez pour le recouurement de la terre Sainte, & firent de grandes prouesses au siege de la ville de Ptolemaide, laquelle apres vn long siege de trois ans, fut reprise par les Chrestiens sur les infidelles, le 12. de Iuillet 1191. & en cette ville là les Cheualiers de saint Iean firent leur residence & demeure ordinaire, & en la mesme année les Chrestiens obtindrent vne signalée victoire contre les Barbares, & Saladin leur Chef, où ils furent grandement aydez par les Cheualiers Hospitaliers & Templiers. L'année suivante en Hyuer, qui fut l'an 1192. mourut le grand Maistre d'Aps en la ville de Ptolemaide, & là mesmes fut esleu grand Maistre en son lieu.

11. Frere Geoffroy de Duillon: De son temps il y eut trefue pour cinq ans entre les Chrestiens qui estoient en la terre sainte & Saladin, qui fut cause que plusieurs Seigneurs & Gentils-hommes de diuerses nations qui s'estoient croisez & auoient acquis de grands biens & possessions, s'en retournerent en leurs pays, & donnerent leurs biens à la Religion de saint Iean: ce qui augmenta grandement leur reuenu, & apres le decez de Henry Comte de Champagne, les Hospitaliers & les Templiers demeurerent gouuerneurs & administrateurs du Royaume de Ierusalem, quoy que soit, de la petite partie d'iceluy qui estoit restée aux Chrestiens, lesquels esleurent Amaury de Lusignan, qui auoit succédé au Royaume de Chypre, Roy de Ierusalem, avec le consentement du Patriarche, des Prelats & Barons du Royaume en l'an 1194: & peu apres mourut le grand Maistre de Duillon, & luy succéda par eslection.

12. Frere Alphonse de Portugal, Cheualier de l'ordre de saint Iean, Issu de la maison des Roys de Portugal, mais il n'est encore certain de quel Roy il estoit fils, il a fait des statuts fort dignes & louables, dont aucuns encores à present sont gardez inuiolablement en la Religion, & parce qu'il estoit de grand courage & trop rude & seuer, il encourut la haine de la plus grande partie des Cheualiers Hospitaliers, qui fut cause qu'il renonça au Magistère, & s'embarqua pour s'en retourner en Portugal au mesme an de son eslection, qui fut 1194. & y mourut l'an 1207. le premier iour de Mars.

13. Au mesme an qu'Alphonse renonça à la grande Maistrise, sçauoir l'an 1194. Geoffroy le Rat qui estoit grand Prieur de France fut esleu grand Maistre, & mourut Saladin, auquel succéda son fils Noradin Seigneur d'Alep: De son temps Simon Comte de Montfort fut enuoyé par le Roy Philippe Auguste avec vne armée en Syrie, où trouuant bien du desordre, il fit trefue pour dix ans avec les Infidelles l'an 1198. & pendant cest estat tranquille, il y eut vn grand differend entre les Hospitaliers & Templiers, fondé sur ce que les Hospitaliers se plaignoient que les Tēpliers auoient entrepris sur leur iurisdiction, & l'auoient mesprisee & violée, lequel differend apres plusieurs rencontres & furieuses escarmouches fut appaisé & accordé par l'entremise du Roy Amaury, des Patriarches d'Antioche & de Ierusalem, & d'autres Princes & Prelats Chrestiens qui les firent compromettre de leur differend en la personne du Pape Innocent 3.

Ce qui fut cause d'un grand bien, car apres Dieu l'unique esperance & soubstien des affaires de la terre Sainte, dependoit de l'amitié & concorde de ces deux Ordres & Religions militaires. & mesmes le Roy Amaury de Lusignan pria le mesme Pape de le recommander au grand Maistre & Cheualiers de saint Iean, & leur laissa le gouuernement de son Royaume de Chypre: l'an 1205. mourut le Roy Amaury, & pareillement la Roynne Isabelle, laquelle institua son heritiere sa fille Marié qu'elle auoit eue de Conrad de Montferrat, & luy

laissa pour tuteurs les Hospitaliers & Templiers, l'an 1260. passa de ceste vie en l'autre le grand Maistre le Rat, & luy succeda

14. Frere Guerin de Montagu de la langue d'Auvergne, lequel avec les Cheualiers de son ordre secourut Liou Roy d'Armenie, contre les Turcs & Barbares qui s'estoient jettez en son Royaume, & pour recompense il leur donna la ville de Salef avec les chasteaux de Camard & de Chateau-neuf, & leurs dependances, & se recommanda, ensemble son heritier & son Royaume aux Cheualiers de l'Hospital saint Jean, & ce don fut confirmé par le Pape le 5. d'Aoust l'an 13. du Pontificat d'Innocent 3. qui reuint à l'an de salut 1209. lors que Jean de Brienne & Marie sa femme, & heritiere du Royaume furent couronnez Roys de Jerusalem: le mesme Pape confirma aussi les statuts & priuileges de l'ordre des Hospitaliers, & les amplifia, il deceda l'an 1216. peu de temps apres le Concile general de Latran, & le Pape Honorius 3. luy ayant succedé il aduertit les Hospitaliers de son election, & le Roy de Hongrie, & l'Archiduc d'Autriche s'estans croisez à sa persuasion, furent par luy recommandez au grand Maistre Guerin & aux Cheualiers de saint Jean, pour les conduire & assister au recouurement de la terre Sainte: & de fait André Roy de Hongrie logea en leur Palais, & les pria de les receuoir au nombre des Confreres de leur Religion, & leur donna cinq cers mars d'argent de rente, qu'il leur assigna sur le reuenu des salines de son Royaume, & le don est datte de l'an 1217.

L'an 1222. le grand Maistre Guerin appaisa vne grande discorde qui s'estoit meüe entre la Royne de Chypre, Isabelle, & le Roy Henry son fils, & les Seigneurs & Barons du Royaume d'une part: & les Archeuesques, Euesques, Prelats, & le Clergé de ce Royaume là d'autre, pour raison de leurs decimes & possessions, & puis apres il vint à Rome au mandement du Pape, & estant retourné en la terre Sainte, il fut prié avec les Cheualiers de son ordre d'accepter sous la protection du saint siege, la defense du Roy, & le gouuernement du Royaume de Chypre: finalement en l'an 1230. le grand Maistre Guerin mourut en la ville de Ptolemaide, lequel fut pour sa prudence & grande valeur beaucoup chery & estimé des Princes Chrestiens, & grandement regretté des Cheualiers Religieux de son ordre, qui esleurent en son lieu frere Bertrand de Tegy, duquel le pourtrait ne se trouue.

Durant la grande Maistrise d'iceluy toutes les affaires des Chrestiens en la terre Sainte dependoient totalement de la Religion des Hospitaliers & de celle des Templiers, lesquels combien qu'ils eussent des differends & querelles entr'eux, toutesfois ils estoient bien d'accord en ce qui concernoit le bien & aduancement des Chrestiens contre les Infideles.

L'Empereur Federic 2. estant reconcilié avec le Pape Gregoire 9. il le supplia d'interposer son autorité vers le grand Maistre Bertrand & les Hospitaliers, à ce qu'ils prissent la protection de ses affaires en Syrie, ce que le Pape luy accorda, & en rescriuit en sa faueur au grand Maistre le 26. Iuillet l'an 1233.

En ce temps viuoit saint Hugues Cheualier de cest ordre, & Commandeur de Genes, qui fut canonisé par le mesme Pape Gregoire 9.

L'an 1240. frere Bertrand mourut en la ville de Ptolemaide, peu apres l'arriuee de Richard Comte de Cornouaille, frere de Henry Roy d'Angleterre en la Palestine, avec vne armée de quarante mille hommes, & luy succeda par election

15. Frere Guerin duquel l'on ne sçait le surnom, il donna au Comte de Cornouaille vne petite partie du sang tres-precieux de nostre Seigneur Iesus-Christ, qui estoit gardé en Jerusalem par le Maistre de l'Hospital de saint Jean, qu'il apporta en Angleterre.

L'an 1242. passa de ceste vie le bien-heureux frere Gerard Meccati, frere seruant l'ordre de saint Jean, natif de Villemagne, qui est vn village proche de quatre à cinq mil de Florence, lequel ayant pris l'habit du tiers ordre de saint François, vescu si religieusement qu'il estoit reputé vn autre saint Hilarien.

Le grand Maistre Guerin combattant valeureusement contre les Corasmins Infideles, fut retenu captif & prisonnier, & enuoyé au Souldan d'Egypte, où il mourut l'an 1244. & en sa place les Cheualiers de saint Jean esleurent en la ville de Ptolemaide pour grand Maistre

16. Frere Bertrand de Comps, du temps du Pape Innocent 4. qui conuoqua vn Concile general à Lyon 1245. & du Roy saint Louys, lequel grand Maistre se trouua en vne furieuse bataille, qui fut donnée contre les Turcomans, qui saccageoient le pays d'alentour Antioche au mois d'Aoust 1248. où ayant receu des blessures mortelles il finit ses iours, & en la ville de Ptolemaide fut esleu grand Maistre le 24. du mesme mois d'Aoust

17. Frere Pierre de Villebride. De son temps le Roy saint Louys se croisa contre les Infideles, avec plusieurs Princes & Prelats de France, & vint assieger Damiette, où il fut assisté des Cheualiers Hospitaliers & Templiers, & la ville fut bien-tost rendue au Roy saint Louys

Louys l'an 1250. le Souldan d'Egypte donna vne bataille aux Chrestiens, où le Roy saint Louys fut fait prisonnier avec les freres Charles & Alphonse, & le Roy de Chypre, comme aussi furent les grands Maistres des Hospitaliers & Templiers, avec la plus grande partie de leurs Cheualiers, laquelle prise fut cause d'un accord qui se fist entre le Roy saint Louys & le Souldan, & les Hospitaliers presterent de l'argent à saint Louys pour payer sa rançon.

L'an 1251. le grand Maistre de Villebride mourut en la ville de Prolemaide, & luy succeda par election

18. Frere Guillaume de Chasteau-neuf ou de Castelnou, de la langue d'Antuergne, lequel fut grand obseruateur de la Iustice, sous le Pontificat du Pape Alexandre 4. qui donna aux Hospitaliers le Chasteau & terroir de Bethanie en l'an 1256. De son temps les Chrestiens de la terre Sainte perdirent toute l'esperance qu'ils auoient d'estre secourus par les Princes de l'Europe.

L'an 1260. le grand Maistre de Castelnou mourut, & les Hospitaliers esleurent en son lieu

19. Frere Hugues Reuelle, ou Reuel, du temps duquel le Pape Urbain 4. donna aux Cheualiers de saint Iean le mont de Tabor, l'an 1261. & l'an 1262. ils achepterent le chasteau d'Assur, & les deux années suivantes ils prindrent sur les Sarrazins vn chasteau nommé Lilion, & desfirent & taillerent en pieces deux Emirs ou Capitaines & Colonels des Sarrazins, qui fut cause que le Souldan d'Egypte se delibera de ruiner les Hospitaliers; & de fait l'an 1265. il print de force sur eux le chasteau d'Assur, à la prise duquel il y eut de tuez iusques au nombre de 90. Cheualiers de saint Iean. Ce qui abbattist fort la Religion de saint Iean; & l'an 1267. les Hospitaliers & Templiers furent assaillis & rompus en bataille par les Sarrazins pres de la ville de Prolemaide, qui gasterent & saccagerent tout le pays d'alentour, & l'an 1270. les Hospitaliers perdirent le chasteau de Crac, qui fut pris d'assault par le Souldan, & tous les Cheualiers qui estoient dedans furent mis au fil de l'espée.

On tient que le grand Maistre Reuel assista le Roy saint Louys au voyage de Thunis, où ledit Roy mourut de fièvre: & en fin l'an 1278. le grand Maistre Reuel finit les iours, ayant tenu cinq Chapitres ou assemblées de la Religion de saint Iean, où furent faits plusieurs beaux statuts pour le gouuernement & reformation de la Religion.

20. Apres son decez fut esleu grand Maistre de l'ordre frere Nicolas Lorgue, lequel pour ne ceder en rien à son predecesseur, sçachant qu'il n'y auoit rien qui apportast plustost la ruine aux Republiques & Communautez que la discorde & dissention, il mist telle peine de reconcilier les Hospitaliers avec les Templiers qu'il les mist d'accord & rendit bons amis.

En l'an 1282. les Cheualiers de saint Iean obtindrent vne signalée victoire contre les Sarrazins qui estoient venus assieger le chasteau de Margat leur principale forteresse, cela donna occasion au Souldan d'assieger ceste forteresse; ce qu'il fist l'an 1285. laquelle fut valeureusement defendue par les Hospitaliers, & en fin quittée par composition par les Cheualiers qui se retirerent les enseignes desployées en la ville de Prolemaide.

L'an 1288. le grand Maistre Lorgue deceda de regret qu'il auoit de voir les affaires des Chrestiens en la terre Sainte aller tousiours en decadence, & de mal en pis, sans y pouoir apporter remede.

21. Au mesme an fut esleu grand Maistre frere Iean de Villiers de la langue de France. De son temps la ville de Tripoly fut prise sur les Chrestiens par les infidelles, comme aussi les villes de Sidonia & Barut en l'an 1289. lesquelles furent pillées, ruynées & bruslées, & la ville de Tyr fut reduite sous la main du Souldan, avec lequel les Chrestiens de la ville de Prolemaide firent trefue, & cependant le grand Maistre vint à Brindisi avec le grand Maistre des Templiers pour solliciter les Princes Chrestiens de se croiser.

En l'an 1291. le Souldan vint assieger la ville de Prolemaide, qui fut vertueusement defendue par les Cheualiers de l'Hospital & du Temple, qui firent plusieurs sorties sur les assiegeans, mesme le grand Maistre de Villiers, ayant esté blessé soutint long-temps toute la charge des Barbares infidelles, & les Cheualiers se barricaderent en vn quartier de la ville, laquelle en fin fut surprise le Védredy 18. May audit an 1291. & avec ceste perte furent les Chrestiens chassés de la terre Sainte 191. an dix mois trois iours apres que Godéfroy de Buillon l'eut conquise. Le grand Maistre avec le reste de ses Cheualiers se sauua par mer dans l'Isle de Chypre, où ils furent bien receus par le Roy de l'Isle, qui leur assigna & aux Templiers la ville de Limission, qui est vn port de mer pour s'y habiter, où le grand Maistre de Villiers assembla deux Chapitres generaux, l'un en l'année 1292. en Decembre, & l'autre en Octobre 1293. où il fist de nouueaux statuts de l'ordre: & en l'an 1294. il mourut à Limission, & luy succeda

22. Frere Odo des Pins de la langue de Prouence: Du temps du Pape Boniface 8. il encourut la haine & disgrâce des Cheualiers de son ordre, à cause de sa negligence & auarice, & y eut quelques propos tenus, de le priver de sa grande Maistrise, ce qui fut empêché par le Pape pour couter scandale, & en fin il fut cité à comparoistre à Rome en personne, pour respondre aux plaintes des Hospitaliers, où il s'achemina, mais avant qu'il peust voir l'Italie, il mourut en chemin l'an 1296. ayant es années precedentes tenu à Limisson deux Chapitres generaux, & vne Chronique manuscrite porte qu'ayant appelé de certaines lettres du Pape contenans excommunication, il releua & poursuivit son appel.

23. Les Cheualiers ayans sceu la mort du grand Maistre des Pins, esleurent à Limisson le 24. Mars 1296. frere Guillaume de Villaret pour luy succeder, lequel estoit de la mesme langue de Prouence, & Prieur de saint Gilles, où il estoit lors de son eslection, dont ayant eu aduis il s'achemina incontinent au Royaume de Chypre, & se gouverna en ceste charge fort prudemment.

De son temps Vssum Cassam Roy des Tartares se fist Chrestien, & recouura la ville de Ierusalem, où il mist en garnison les Hospitaliers & Templiers l'an 1300. comme aussi il prist la ville de Damas, mais elle fut bien-tost reprise par les Infideles, & les Hospitaliers & Templiers s'en retournerent en Chypre, & le grand Maistre passa de ceste vie en vne meilleure l'an 1308. ayant tenu à Limisson cinq Chapitres generaux, & veu la ruyne entiere des Cheualiers du Temple.

24. Le grand Maistre estant decedé fut esleu en son lieu frere Folquet de Villaret de la mesme langue de Prouence, qui estoit doué d'un esprit tres-vif, & d'un grand courage. Se voyant parvenu à ceste dignité souveraine, il se resolut de mettre à execution ce qui auoit esté par plusieurs fois traité du vivant de son predecesseur, mais n'auoit peu estre effectué, sçauoir de se retirer de l'Isle de Chypre, & s'habiter ailleurs, ce qu'il executa fort heureusement: car en la mesme année de son eslection qui fut 1308. il fist un voyage en Constantinople, & depuis en France, où le Pape luy fist don de l'Isle de Rhodes, laquelle avec ses Cheualiers il conquesta l'an 1309. & sept Isles proches d'icelle, & là fut transferée la residence de la Religion de saint Iean, tellement qu'ils furent puis apres surnommez Cheualiers de Rhodes. Incontinent apres le premier Empereur des Turcs Ottoman vint assieger Rhodes avec vne puissante armée, laquelle fut secourue par Amedée 4. Comte de Sauoye, & Ottoman fut contrainct de leuer le siege: Depuis ce temps les Comtes de Sauoye ont pris en leurs armoiries la Croix blanche en champ de gueules, en memoire du secours qu'ils donnerent à l'ordre de saint Iean. La Religion des Templiers ayant esté supprimée au Concile general de Vienne en Dauphiné, la plus part de leurs biens fut donnée à la Religion de saint Iean par le Pape Clement 5.

L'an 1312. & en l'an 1314. les Cheualiers de Rhodes conquerirent l'Isle de Lango & autres Isles de l'Archipelague, l'an 1317. le grand Maistre Folquet se complaisant en ses victoires & conquestes deuint glorieux & altier, ce qui le mist en la haine de la Religion, & de fait les Cheualiers de l'ordre se reuolterent contre luy, & s'il ne se fust sauué dans un chasteau, ils se fussent saisis de sa personne, mais ne l'ayant peu prendre ils le deposerent de la dignité de grand Maistre, & en sa place esleurent

25. Frere Maurice de Pagnac, le Pape Iean 22. en ayant eu aduis en fut fort esmeu, & deputa deux Prelats pour aller à Rhodes s'informer du fait, avec mandement de citer le grand Maistre de Villaret & de Pagnac à comparoir à Avignon en personne, à quoy ils obeyrent, & le Pape crea cependant frere Gerard des Peins, Vicaire ou Lieutenant general de la Religion de saint Iean, du temps duquel Orcanes Empereur des Turcs, s'appresta d'assieger l'Isle de Rhodes, sur lequel les Cheualiers de Rhodes obtindrent l'an 1321. vne esmerueillable victoire où il y eut dix mil Turcs taillez en pieces.

En ces entremises Maurice de Pagnac mourut à Montpellier l'an 1322. & Folquet de Villaret fut restably en sa dignité de grand Maistre, lequel voyant qu'il n'estoit bien voulu des Cheualiers, renonça à sa grande Maistrise en l'an 1323. & vescu comme un Cheualier priué iusques au premier iour de Septembre 1327. qu'il mourut, & fut enterré à Montpellier.

26. Au mesme an qu'il renonça à sa dignité qui fut 1323. les Cheualiers de Rhodes presenterent au Pape le frere Elion de Ville-neufue de la mesme langue de Prouence, & Prieur de saint Gilles pour grand Maistre, dont la Saincteté fut fort reiouye; & luy despescha des Bulles à ceste fin, au grand contentement de tous les Cardinaux & des Cheualiers de Rhodes, parce que c'estoit un Cheualier qui auoit la reputation d'estre tres-honorable, vertueux, & homme de bien.

Ce grand Maistre tint à Montpellier un Chapitre general en Octobre 1330. & s'acheminant pour prendre la route de Rhodes, il tomba en vne grande maladie en la ville de Marseille, & estant

estant venu à conualescence l'an 1332. il arriva finalement à Rhodes, & en la mesme année il y tint vn Chapitre general, où furent faictes de fort bonnes ordonnances, & sous le bō gouvernement du grand Maistre de Ville-neufue, la Religion ne s'acquitta pas seulement de ce qu'elle deuoit, mais en outre elle deuint tres-riche, de sorte que plusieurs luy porterent enuie, & proposerent au Pape en l'an 1342. de diuiser en deux les biens d'icelle, & d'en faire deux ordres militaires, ce qui ne sortit effect.

L'an 1343. il y eut ligue faicte entre la Seigneurie de Venise, le Roy de Chypre, & la Religion de saint Iean, & le grand Maistre en l'an 1346. ayant acquis le surnom de Gouverneur heureux, le 27. de May mourut à Rhodes, ayant de son viuant faict fermer de murailles & de tours le Palais du grand Maistre, & ordonné & diuisé les langues, bailliages & dignitez de la Religion.

27. Incontinent apres le trespas du grand Maistre de Ville-neufue, frere Deode ou Dieu donné de Gozon, Cheualier de la mesme langue de Prouence, fut esleu grand Maistre l'an 1346. environ quatre ans auparauant que d'estre promu à ceste dignité souveraine, il auoit combattu vn horrible & monstrueux dragon qui affligeoit l'Isle de Rhodes, & l'auoit mis à mort, d'où il fut tant honoré & estimé d'vn chacun que sa memoire en sera recommandable à iamais vers la posterité.

En l'an 1347. il secourut le Roy d'Armenie contre le Souldan d'Egypte : le Pape Clement 6. auoit les Cheualiers de Rhodes en telle estime que quasi toutes les forteresses que le saint Siege possedoient en Italie estoient gouvernées par l'vn d'iceux, & en l'an 1351. le mesme Pape recommanda avec beaucoup d'affection au grand Maistre du Conuent de Rhodes, Constance Roy d'Armenie, & en l'an 1353.

Le fils de l'Empereur de Constantinople Iean Catacuzen vint iusques à Rhodes demander secours au grand Maistre, lequel grand Maistre apres auoir gouverné la Religion de S. Iean sept ans six mois & dix iours, mourut le septiesme Decembre audit an 1353.

Et fut enterré dans l'Eglise de saint Iean de Rhodes, ayant faict bastir en la ville de Rhodes le Mole, & ceindre de murailles le bourg de Rhodes, le fermant du costé de la mer, & tenu deux Chapitres generaux, l'vn en Ianuier 1346. & l'autre en Mars 1352.

28. Succeda au grand Maistre par eslection frere Pierre de Cornilian Prieur de saint Gilles de la mesme langue de Prouence, au mesme an 1353. lequel ne fut grand Maistre qu'vn an 8. mois & 17. iours, car estant tombé en vne maladie en la ville de Rhodes, il mourut le 24. d'Aoust 1355. Il fut homme de vie fort exemplaire, & si seuer, qu'il fut surnommé le Correcteur des coustumes, il tint vn Chapitre general à Rhodes en l'an 1354. où furent faicts plusieurs bons & vtils statuts.

29. Apres que le grand Maistre fut decédé, selon la forme acoustumée fut esleu grand Maistre frere Roger des Pins de la mesme langue de Prouence en l'an 1355.

De son temps, le Pape persuada à la Religion de saint Iean d'achepter la principauté d'Achaïe de Iacques de Sauoye, Prince de Piedmont, & y eut vne assemblée generale des Cheualiers de Rhodes faite en la ville d'Avignon pour effectuer le traité de cest achapt de la principauté d'Achaïe, & pour reformer quelques abus qui estoient glissez entre les Religieux de l'ordre de saint Iean.

L'an 1357. les statuts de l'ordre furent traduits en langage Latin, & à tous les Prieurez fut enuoyé vn authentique volume d'iceux par ordonnance du grand Maistre l'an 1359.

Le grand Commandeur, & le Marechal de l'ordre furent enuoyez en France par le grand Maistre en qualité d'Ambassadeurs, visiteurs & reformateurs.

En l'an 1361. apres la mort du Pape Innocent sixiesme fut esleu Pape Urbain cinquiemes lequel escriuit au grand Maistre de Rhodes des lettres pour luy donner aduis du decez de son predecesseur & de son eslection.

Il y eut vne assemblée des Cheualiers conuquée par le Pape en la ville de Carpentras, mais elle ne fut tenue à cause du decez du grand Maistre, lequel mourut le 28. May 1365.

Et fut fort regretté des pauvres principalement, vers lesquels il estoit charitable & grand aumosnier.

30. Frere Remond Berenger de la mesme langue de Prouence fut esleu grand Maistre 1365.

Qui estoit auparauant Commandeur de Castel Sarrazin, & deputa incontinent ses

Ambassadeurs vers le Pape à Avignon, pour luy rendre obeyssance & iurer fidelité.

De son temps le Roy de Chypre, & la Religion de saint Iean firent vne ligue ensemble, & prindrent de force la ville d'Alexandrie d'Egypte, laquelle ils pillerent, saccagerent & bruslerent, & en l'an 1366. le Pape escriuit aux Roys & Princes Chrestiens, les exhortant & priant de vouloir secourir la Religion de saint Iean, & le Roy de Chypre, & donna de grandes Indulgences à ceux qui les secoureroient. Les Armeniens ayans esté chassés par les Sarrazins de leurs maisons, sont receus charitablement par ceux de la Religion dans l'Isle de Lango, & en mesme temps la ville de Tripoly de Syrie est prise, & saccagée par le Roy de Chypre & les Cheualiers de Rhodes.

En l'an 1371. le grand Maistre est esleu par le Pape, Nonce du saint Siege Apostolique, pour appaiser les rumeurs & diuisions qui estoient au Royaume de Chypre, où il alla en personne, & par son autorité & prudence il fist cesser toutes les dissensions & troubles qui y estoient.

En l'an 1373. le grand Maistre eut volonté de renoncer à la grande Maistrise, & enuoya pour cest effect vn Theologien son parent au Pape pour luy en demander permission: ce que le Pape Gregoire 11. ne voulut octroyer, ains luy commanda de demeurer en ceste charge pour le bien de la Chrestienté.

Et la mesme année fut tenuë à Avignon vne assemblée generale de ceux de la Religion, & peu de temps apres alla le grand Maistre de vie à trespas, ayant gouverné la Religion de son ordre enuiron dix-huict ans & demy, ayant tenu de son temps deux Chapitres generaux à Rhodes, l'vn en Mars 1366. & l'autre en Octobre 1370. où il fut fait plusieurs bonnes ordonnances selon la necessité du temps.

31. Au mesme an 1373 frere Robert de Iulliac on de Iuly grand Prieur de Frâce fut esleu grand Maistre, lequel estoit lors de son eslection au gouvernement de son Prieuré, & ayant receu la nouvelle de son eslection, il s'en alla incontinent à Avignon baiser les pieds de sa Sainteté, où il fut fort bien recueilly & grandement honoré, & là fut tenuë vne assemblée generale de la Religion, & le Pape bailla le gouvernement de la ville de Smyrne à la Religion de saint Iean, & commanda au grand Maistre de l'accepter sous peine d'excommunication, lequel en l'an 1374. s'embarqua pour aller à Rhodes, où il arriua heureusement, & par sa presence il appaisa toutes les rumeurs qui auoient couru du desordre, qui y estoient pendant son absence. Il se fit vne autre assemblée à Avignon l'an 1376. & en ce mesme temps le Pape alla tenir son siege à Rome, que luy & ses predecesseurs auoient tenu en Avignon par l'espace de 71. an, & en la mesme année le 29. Iuin, deceda le grand Maistre de Iulliac, & fut

32. En son lieu esleu frere Iean Fernandes d'Heredia, de la langue d'Arragon, natif de la ville de Valence, qui auoit esté Prieur de Catalogne, & Chastellain d'Emposta, & auoit esté marié deux fois, & estant veuf, il prist l'habit de la Religion, & fut fait Cheualier de Rhodes du temps du grand Maistre de Villeneuve, & estant simple Cheualier avec permission du grand Maistre, il alla visiter le saint Sepulchre & les autres lieux de la terre Sainte: il fut Ambassadeur du Pape Clement 6. vers les Roys de France Philippe 6. & Edoard 3. d'Angleterre, & fist vn bon seruice au Roy Philippe l'an 1346. Car estant demonté de son cheual en vne iournée de bataille contre les Anglois, il luy bailla sō cheual sur lequel le Roy se retira en lieu de sauueté, & pareillement il fortifia de bastions & nouvelles murailles la ville d'Avignon, de laquelle il estoit gouverneur de par le Pape, qui en recompense luy fist conferer le Prieuré de saint Gilles lors qu'il vint à vacquer. Estant grand Maistre il print la route de Rhodes l'an 1377. & estant requis par le General de l'armée des Venitiens de s'vnir avec luy, & d'aller en la Morée en l'an 1378. ils assiegerent la ville de Patras, & la prindrent avec le chasteau, & le grand Maistre combattant corps à corps avec le Gouverneur de Patras, il le tua: & depuis il fut en vne embuscade de Turcs pris prisonnier, & par eux recogneu, qui fut cause, que pour moyenner sa liberté on rendit aux Turcs Patras, & & les autres lieux qu'on auoit conquis sur eux, & toutes fois ils ne laisserent de l'emmener en Albanie, & le tindrent esclave par trois ans, iusques en l'an 1381. Durant sa prison le Pape Gregoire 11. mourut à Rome, & Urbain 6. fut esleu Pape par impression du peuple Romain, qui ne vouloit qu'aucun Cardinal François fut esleu Pape, & les Cardinaux estans en liberté en la ville de Fundy Clement 7. qu'on a tenu à Rome pour Antipape: ce qui causa vn lōg & pernicienx schisme en l'Eglise. Aussi en l'an 1380. durāt la captiuité du grand Maistre, fut tenu vn Chapitre general de la Religion à Rhodes, où presida frere Bertrand de la Flotte grand Commandeur.

En l'an 1381. le grand Maistre fut rachepté de sa prison, & retourna à Rhodes, où vindrent

drent des Ambassadeurs de Smyrne pour demander secours au grand Maistre.

En l'an 1382. vne autre assemblée generale fut tenuë à Rhodes, & y fut aduisé que le grand Maistre viendroit en France, & de faict il fut en la ville d'Avignon, où le Pape Clement 7. fut recogneu par luy & par la Religion de saint Iean pour vray Vicaire de nostre Seigneur Iesus, & fut tenu vn Chapitre general de l'ordre à Valence sur le Rhosne, qui fut cause que le Pape Urbain 6. le priua de sa dignité de grand Maistre, & en son lieu subrogea frere Richard Carraciolo Neapolitain en l'an 1383. mais la Religion ne l'a oncques voulu recognoistre pour grand Maistre, lequel du vivant d'Heredia mourut à Rome l'an 1395.

En l'an 1391. Bajazeth Empereur des Turcs fist quelques preparatifs pour assieger Rhodes, & à ceste cause frere Philebert de Naillac Prieur d'Aquitaine fut enuoyé du Conuent de Rhodes en Avignon au grand Maistre, avec lettres pour luy demander secours contre Bajazeth, & iceluy de Naillac retourna à Rhodes l'an 1396. auquel an mourut le grand Maistre Heredia, & fut enterré à Caspé.

33. La nouvelle du decez du grand Maistre Heredia estant venuë à Rhodes, fut en son lieu esleu grand Maistre frere Philibert de Naillac de la langue de France, grand Prieur d'Aquitaine en l'an 1396. au Printemps, lequel fut inuité par le Roy de Hongrie Sigismond d'aller à son secours contre Bajazeth, ce qu'il fist l'an 1397. en personne: il fut donnée vne bataille à Nicopoly, où Bajazeth eut la victoire, d'où le sauua le Roy de Hongrie, & avec le grand Maistre se retira à Rhodes, où l'Empereur de Constantinople enuoya ses ioyaux plus precieux en garde au grand Maistre, pour crainte qu'il auoit que Bajazeth print Constantinople, mais il en fut empesché par Tamberlan, lequel surmonta Bajazeth, & le retint captif en vne cage de fer tandis qu'il vescu, & apres le siege de Constantinople leuë, le grand Maistre enuoya les ioyaux à l'Empereur.

Après la deffaite de Bajazeth le grand Maistre de Naillac avec vne armée nauigea en Carie, & là fist bastir vne forteresse inexpugnable, qu'il nomma le Chasteau de saint Pierre en l'an 1399. sous le regne du Roy de France Charles 6.

En l'an 1403. il y eut guerre entre le Roy de Chypre & les Geneuois, laquelle fut pacifiée & appointée par l'autorité & prudence du grand Maistre de Naillac, vers lequel le Soudan d'Egypte enuoya vn Ambassadeur pour demander la paix, & l'an 1409. le grand Maistre assista en personne au Concile de Pise, assemblé pour esteindre le schisme qui estoit lors en l'Eglise, & la garde du Conclau fut commise au grand Maistre, & fut Alexandre 5. esleu Pape, lequel confirma l'eslection du grand Maistre de Naillac, & iceluy grand Maistre conuoqua vn Chapitre general en la ville de Nice en Prouence, qui fut depuis transferé en la ville d'Aix, & outre le mesme Pape confirma les priuileges de la Religion, & octroya des pardons à quiconque donneroit du secours ou presteroit de l'ayde à la Religion de saint Iean, & l'enuoya Ambassadeur en l'an 1410. vers les Roys de France & d'Angleterre.

Et ledit grand Maistre se trouua l'an 1414. au Concile general de Constance où trois Papes furent deposez, & Martin 5. y fut esleu Pape l'an 1417. la garde du Conclau ayant esté derechef baillée au grand Maistre, lequel s'achemina en France l'an 1418. où il se fist vne assemblée generale de la Religion en la ville d'Avignon, depuis à Florence, en fin à Ancone où il se fist vne autre assemblée, & de là il s'en retourna à Rhodes en l'an 1420. où il tint vn Chapitre general, & l'an 1421. au commencement de Iuin il mourut.

34. Et fut esleu grand Maistre au lieu du defunct, frere Antoine Fluuiano ou Riuiere, de la langue d'Arragon, au commencement de Iuillet l'an 1421.

De son temps commença le Concile general de Basle en l'an 1433. vn Chapitre general fut tenu à Rhodes, auquel furent deputez des Ambassadeurs de la Religion de saint Iean pour assister au Concile.

L'an 1435. le Souldan d'Egypte enflé de la victoire qu'il auoit obrenuë en Chypre, rompit la trefue, & fist de grands preparatifs d'armée en intention d'assieger Rhodes, mais ayant entendu que le grand Maistre auoit fait de bonnes prouisions pour se deffendre, il delassa ceste entreprise, & fut la Religion en paix de ce costé là.

L'an 1437. le grand Maistre fonda & dota vne Chappelle en la ville de Rhodes qu'il auoit fait bastir en l'Eglise du Conuent, & le 29. d'Octobre il mourut, apres auoir gouuerné la Religion avec beaucoup de prudence peu moins de seize ans & demy.

35. Le sixiesme Nouembre au mesme an 1437. fut esleu grand Maistre frere Iean de Lastic, de la langue d'Auuergne, lequel lors de son eslection estoit absent & residoit en Auuergne, dont il estoit Prieur, & auant que s'acheminer à Rhodes il tint vne assemblée à Valence, & au mois de Decembre 1438. il arriua à

Rhodes où en l'an 1439. il fist commencer à bastir la nouvelle Infirmerie que le precedent grand Maistre par testament auoit ordonné d'estre faicte à ses despens.

De son temps le Pape Eugene 4. fut deposé par le Concile de Basle, & Felix 5. créé en son lieu, qu'on a tenu à Rome pour Antipape, & l'an 1440. le Souldan d'Egypte s'estant avec vne armée approché du port de l'Isle de Castelrouge appartenant à la Religion, & de là ayant tourné vers Rhodes, il fut chassé par l'armée des Cheualiers qui n'auoient que huit galeres, & en l'armée du Souldan y en auoit dix-huit, & y furent tuez environ sept cents Sarrazins, outre ceux qui furent blesez en tres-grand nombre. Ce qui irrita en telle sorte le Souldan, qu'il se ligua avec Amurath Empereur des Turcs, en intention de se rendre Maistre de l'Isle de Rhodes, & d'en chasser la Religion.

Et de fait l'an 1444. il vint assieger Rhodes, laquelle fut vertueusement deffendue par les Cheualiers Rhodiens: & au mois de Septembre de la mesme année, il y eut vne assemblée generale tenuë à Rhodes, pour subuenir aux necessitez de la Religion.

L'an ensuiuant le grand Maistre reconcilia avec le Pape le Roy de Chypre, & fist paix avec Amurath, & tint vn Chapitre general à Rhodes en Iuillet, & en la mesme année ordonna qu'on tiendroient vn Chapitre general à Sienne, où le grand Maistre enuoya ses Lieutenans & Procureurs, & fut le Chapitre transferé à Rome, qui y fut tenu dans le Palais de saint Pierre, l'an 1446. auquel an la paix fut faicte entre la Religion & le Souldan.

L'an 1449. cella le schisme en l'Eglise par la renonciation que fist Felix 5. en faueur du Pape Nicolas 5. en laquelle année au mois de Septembre fut tenu vn Chapitre general à Rhodes, durant lequel le Duc de Cleues passa à Rhodes, retournant du voyage qu'il auoit fait en Ierusalem pour visiter le saint Sepulchre, & les autres lieux de deuotion de la terre Sainte.

L'an 1451. fut faicte vne assemblée generale à Rhodes, où l'administration & gouvernement du Thresor & du Conuent fut donné au grand Maistre, lequel en l'an 1452. apres la mort d'Amurath renouella la paix avec Mahomet 2. son fils entre luy & la Religion, & l'année suiuant Mahomet se ren. it Maistre de la ville de Constantinople le 29. iour de May, & estant enorgueilly de cest heureux succez, il manda au grand Maistre qu'il luy payast par an deux mil ducats de tribut, autrement qu'il n'entendoit plus entretenir la paix iurée; à quoy le grand Maistre fist vne responce courageuse, sçauoir que la Religion, l'Isle de Rhodes ny luy, n'estoient subjets à autre qu'au saint siege Apostolique, & qu'il ne luy payeroit iamais aucun tribut, estant resolu plustost de mourir, que d'endurer que de son temps la Religion fust serue & tributaire, qui auoit tousiours esté libre, & deputa des Ambassades vers le Pape & les Princes Chrestiens, pour auoir du secours contre le parjure Mahomet, & l'an 1454. le 19. May, il mourut, ayant valeureusement gouverné la Religion seize ans six mois & treize iours.

36. Frere Jacques de Milly de la langue d'Auuergne dont il estoit Prieur, succeda au grand Maistre de Lastic le premier de Iuin 1454. & estoit en son Prieuré lors qu'il fut esleu, & son nepueu frere George de Boifroid luy en apporta les premieres nouvelles, & incontinent il s'achemina à Rhodes où il tint vn Chapitre general au mois de Nouembre de la mesme année.

L'an 1456. l'Isle de Rhodes fut grandement affligée de peste & de famine, dont elle demeura demy deserte, & pour la repeupler furent publiées des citations generales à tous les Cheualiers des'y trouuer dans certain temps.

L'an 1457. Mahomet assiegea l'Isle de Lango, & le chasteau de l'Isle des Singes, mais il fut courageusement repoussé, & les Cheualiers en rapporterent vne signalée & heureuse victoire, & en la mesme année le Roy de France Charles 7. donna à la Religion en pur don seize mil escus.

L'an 1459. fut tenu à Rhodes vn Chapitre general en Octobre, & l'an 1460. fut faicte vne assemblée generale à Rhodes, où furent citez plusieurs Prieurs, Baillifs & Commandeurs de l'ordre, pour la deffense de la Religion, & en l'an 1461. le 17. Aoust, le grand Maistre mourut, ayant avec beaucoup de prudence gouverné la Religion en temps fascheux & difficile sept ans, deux mois seize iours, & fut grandement regretté, parce qu'il estoit fort benin, affable & humain, & desirieux de conseruer la paix & l'union entre ses Religieux.

37. Frere Pierre Raymond Zacoſta de la langue d'Arragon Chastelain d'Emposta, fut créé grand Maistre le 24. d'Aoust 1461. qui estoit lors absent en Espagne, d'où il partit en l'an 1462. & passant par Rome vint à Rhodes, où il tint vn Chapitre general durant lequel fut erigée la huitiesme langue de Castille & de Portugal en la Religion, ny ayant eu auparavant que sept langues, sçauoir trois de France, d'Auuergne & de Prouence, vne d'Italie, vne d'Arragon, vne d'Angleterre, & vne d'Allemagne.

L'an

L'an 1464. l'armée des Venitiens assiegea la ville de Rhodes, mais le siege fut bien tost leué, & les Venitiens s'en retournerent en leur pays, leur guerre estant appaisée par la prudence du grand Maistre, lequel fist bastir la Tour de saint Nicolas à la bouche du port de Rhodes, au lieu mesme où estoit anciennement ce grand Colosse du Soleil, nommé entre les sept merueilles du monde, & pour ayder à la bastir Philippe Duc de Bourgogne donna dix mil escus d'or.

En l'an 1465. le grand Turc enuoya des Ambassades à Rhodes, pour moyenner vne paix entre les Hospitaliers & luy: mais elle fut refusée par ceux de la Religion, au contraire en presence des Ambassadeurs ils denoncerent la guerre au Turc.

L'an 1466. le Pape transfera la celebration du Chapitre general de la Religion à Rome, où le grand Maistre vint en personne, & le Pape Paul 2. y voulut assister, & le 21. Feurier 1467. le grand Maistre mourut à Rome aagé de 74. ans, ayant tenu la grande Maistrise cinq ans, six mois & trois iours. Il fut inhumé dans l'Eglise de saint Pierre.

38. Frere Baptiste Orsino Prieur de Rome de la langue d'Italie, succeda au grand Maistre Zacoſta le 4. de Mars 1467. & fut pourueu par le Pape de ceste dignité, parce qu'elle auoit vacqué en Cour de Rome, mais ce fut par l'aduis de tous les Cheualiers & Religieux de l'ordre de saint Iean qui se trouuerent lors à Rome, & le grand Maistre presta incontinent apres le serment entre les mains du Pape: ce qu'estant sçeu à Rhodes, ceux de la Religion en firent faire les feux de ioye, & le grand Maistre y arriua bien tost apres, où en l'an 1469. ayant eu certain aduis que le grand Turc preparoit vne puissante armée pour assieger Rhodes ou Negrepont, il manda grand nombre de Cheualiers absens afin de venir à la deffense de l'Isle, & mesme il s'vnit & se ligua avec la Seigneurie de Venise contre le Turc, & de fait en l'année 1470. Mahomet prist de force la ville de Negrepont le penultiesme iour de Iuillet, & commist de grandes & horribles cruautéz, & fit tuer de sang froid tous les Latins qu'il y trouua, & publier la guerre à son de trompe contre la Religion, qui fut cause que le grand Maistre enuoya deuers le Pape demander secours, & les Rhodiens se meirent à ieusner, faire vœux, prieres & processions publiques, pour implorer le secours diuin, & firent tous les appareils qu'ils peurent pour se deffendre contre l'armée Turquesque, & l'an 1471. le grand Maistre tint vn Chapitre general à Rhodes, où il eut vn differend contre les Procureurs du Thresor, qui fut terminé par le Legat du Pape Sixte 4. venu à Rhodes pour cet effect.

L'an 1475. fut tenu vn second Chapitre general par le grand Maistre en la ville de Rhodes, & en ce Chapitre on commença à faire des ordonnances capitulaires outre les staturs, & en l'an 1476. le grand Maistre mourut le 8. Iuin d'vne longue & fascheuse maladie, qui l'affligea pres d'vn an entier, apres auoir gouuerné la Religion avec autorité, grauité & prudence l'espace de 9. ans, 3. mois, & trois iours.

39. Le 17. Iuin 1476. frere Pierre d'Aubusson de la langue & Prieur d'Auuergne, & Capitaine de la ville de Rhodes, fut esleu grand Maistre, lequel iura solennellement suiuant la coustume, de garder les staturs de l'ordre, & depescha vn Ambassadeur à Rome pour donner aduis au Pape de son eslection, & luy rendre l'obeyſſance deuë: & l'an 1477. il alla visiter toute l'Isle de Rhodes, & fist de grandes prouisions pour la deffendre contre l'armée du Turc, & cita grand nombre de Prieurs, Commandeurs & Cheualiers pour assister au Chapitre general & à la deffense de l'Isle de Rhodes, & il renouella la paix avec le Souldan d'Egypte.

En la mesme année le Roy Louys 11. obtint vn Iubilé en France, en faueur de la Religion & des Cheualiers de Rhodes, & vouloit que les deniers qui en prouiendroient fussent seulement employez pour leur deffense, & de ce Iubilé on tira de grands deniers qui furent employez aux fortifications des places & chasteaux de l'Isle de Rhodes, il fist trefue pour 30. ans entre ceux de la Religion de saint Iean & le Roy de Tunis: en l'an 1478. il tint vn Concile general, où l'administration du Thresor luy fut baillée, & la Religion du saint Sepulchre de Ierusalem fut vnie avec celle de saint Iean.

L'an 1479. il fut resolu au conseil de Mahomet 2. Empereur des Turcs, que Rhodes seroit assiegee, dont aduerty le grand Maistre en donna aduis incontinent au Pape, & luy demanda secours: & l'an 1480. le grand Turc assiegea la ville de Rhodes avec vne puissante armée: à ce siege furent faictes plusieurs sorties, & les Turcs furent tousiours repoussez & chassez, combien qu'ils fussent bien iusques à cent mille combattans, & que l'armée fust composée de 160. voiles, le grand Maistre fut secouru par Messire Antoine d'Aubusson Vicomte de Montelis son frere, qui estoit tres-grand guerrier, & tres-experimenté Capitaine, il fut esleu Capitaine general de l'armée des assiegez. En peu de iours les Turcs firent dōner 3700. coups de canon & d'artillerie contre les murailles de la ville, il y eut vn assaut merueilleux de 40000. Turcs, qui furent valeureusement repoussez, & le grand Maistre

y receut cinq playes, dont l'une fut iugée mortelle, & en fin on résista si bien aux assiegeans, qu'ils furent contraints de lever le siege, ayans perdu grand nombre de leurs soldats, & l'armée des Turcs avec grand dommage & honte s'en retourna à Constantinople, apres auoir assiege la ville en vain par l'espace de 89. iours, & en memoire de ceste victoire fut fondée & baillie vne Eglise dediee à nostre Dame de la Victoire dans la ville de Rhodes.

Après ce siege Mahomet 2. se resolut de venir en personne à Rhodes, & là fut faicte vne assemblée generale des Cheualiers, mais la mort de Mahomet empescha ce dessein, & ses enfans Bajazeth & Zizime se firent la guerre apres le decez de leur pere: ce qui donna du repos aux Cheualiers de Rhodes, mesmes Zizime eut recours à l'ayde du grand Maistre, & se retira en la ville de Rhodes en l'an 1482. où il fut receu avec tres-grand honneur, & de là conduit en Franc.

Du temps de ce grand Maistre d'Aubusson les statuts de la Religion furent reformez & redigez en vn volume, & la paix fut arrestee entre la Religion & le grand Turc Baiazeth, le Pape ayant donné pouuoir au grand Maistre d'y entendre. Il fut fait Cardinal Diacre par le Pape Innocent 8. le 9. de Mars 1468. qui luy enuoya le Chapeau de Cardinal & le fist son Legat en Asie, & l'an 1500. le Pape Alexandre 6. le fist Legat & general de l'armée de la ligue contre le Turc, finalement il mourut à Rhodes l'an 1503. le 3. de Iuillet plein d'honneur & de reputation, & fut enterré avec vne grande pompe funebre, il a vescu 80. ans 3. mois & 4. iours, & gouverné la Religion 27. ans, 16. iours, & de son temps il y a eu cinq Chapitres generaux tenus à Rhodes, esquels plusieurs statuts louables ont esté dressez.

40. Il y auoit 387. Cheualiers assemblez à Rhodes lors que le grand Maistre d'Aubusson deceda, lesquels eleurent pour successeur frere Emery d'Amboise frere de George d'Amboise Cardinal & Legat en France, Archeuesque de Rouen, le 10. Iuillet 1503. Il estoit de la langue de France & grand Prieur de France lors de son election, où il estoit residant quand il fut esleu. Frere Guy de Blanchefort vint en France pour accompagner le grand Maistre lors qu'il feroit le voyage de Rhodes.

L'an 1504. le grand Maistre fist son entree solennelle en la ville de Rhodes, & y fut receu avec beaucoup de resiouissance & d'applaudissement, veu mesmes que les Roys de France & d'Espagne auoient escrit des lettres de recommandation au Conuent de la Religion en sa faueur. Si tost qu'il fust arriué il tint vn Chapitre general, où il fut ordonné qu'on feroit vn somptueux Sepulchre de Bronze au defunct Cardinal grand Maistre, & l'an 1510. il tint vn autre Chapitre general, en laquelle année la Religion obtint vne signalee victoire nauale contre le Soldan d'Egypte par la conduite de frere Philippe de Villiers de l'Isle-Adam Cheualier François, qui depuis a esté grand Maistre, en fin l'an 1512. le grand Maistre mourut à Rhodes, le 13. Nouembre, ayant gouverné la Religion 9. ans, 4. mois & 3. iours, aagé de 78. ans, 4. mois & 6. iours.

41. Le 22. du mesme mois de Nouembre les Cheualiers de l'ordre assemblez iusques au nombre de 410. eleurent grand Maistre frere Guy de Blanchefort de la langue & Prieur d'Auvergne, nepueu du defunct grand Maistre d'Aubusson, il estoit residant sur son Prieuré lors de son election, au mesme an 1512. le Concile general de Latran fut tenu à Rome, où frere Fabrice de Carretto Admiral & Procureur de la Religion de Rhodes fut Capitaine de la garde du Concile, lequel fut assemblé par le Pape Iule 2. & continué par son successeur le Pape Leon X. en l'an 1513. auquel an le grand Maistre de Blanchefort s'estant embarqué à Nice en Prouence pour venir à Rhodes, il fut en chemin surpris d'une maladie, dont il mourut le 24. Nouembre, vn an & 2. iours apres son election,

42. En son lieu fut esleu grand Maistre frere Fabrice de Carretto Geneuois de la langue d'Italie le 15 Decembre 1513. en vne assemblée generale faite à Rhodes où se trouuerent 550. Cheualiers, où estoit present iceluy de Carretto, qui auparauant estoit Admiral de la Religion. Le corps du defunct grand Maistre de Blanchefort fut apporté à Rhodes & y fut enterre fort honorablement dans l'Eglise de saint Iean.

L'an 1514. vn Chapitre general fut tenu à Rhodes, & apres la celebration d'iceluy frere Philippe de Villiers de l'Isle-Adam Seneschal du grand Maistre fut enuoyé en France, avec souveraine autorité sur tous les Prieurez du Royaume, en qualité de visiteur, correcteur, Lieutenant & Ambassadeur du grand Maistre & du Conuent.

L'an 1516. la paix fut faite entre ceux de la Religion de saint Iean, & Tomombey Souldan d'Egypte successeur de Campson Gaury, lequel peu de temps auparauant auoit esté tué en guerre en vne bataille que gagna sur luy Selim Empereur des Turcs, mais Tomombey fut peu heureux: car l'an 1517. il fut pris & pendu & estragné à vne des portes de la ville du grand Caire, par l'ordonnance de Selim. Qui fut cause que le grand Maistre fortifia l'Isle de Rhodes à son pouuoir, & enuoya des Ambassadeurs au Pape & aux Princes Chrestiens, pour leur faire entendre

les victoires de Selim afin d'y donner ordre, & luy prestet secours, & l'an 1550. il tint vn autre Chapitre general, & au mesme an Selim mourut, & luy succeda son fils Sultan Soliman, & l'an 1521. le 10. Ianuier le grand Maistre de Carretto finit ses iours à Rhodes, ayant gouuerné 7. ans, 26. iours, & laillé à Rhodes de grandes prouisions & munitions de guerre, qui seruirent puis apres à son successeur.

43. Frere Philippe de Villiers del'Isle-Adam de la langue, & grand Prieur de France, où il estoit lors qu'il fut esleu, pendant son absence frere Gabriel de Pomereux grand Commandeur fut esleu Lieutenant du grand Maistre, auquel il fist sçauoir incontinent la mort du grand Maistre Carretto, & qu'il luy auoit succédé par eslection, & le pria de venir incontinent à Rhodes, où bien tost apres il arriua & y fist son entree solennelle, & iura l'obseruation des statuts de l'ordre.

En la mesme annee de son eslection qui fut fait l'an 1521. le 22. de Ianuier, Sultan Soliman prist resolution d'assiéger l'Isle de Rhodes, executant la derniere volonté de son pere Selim, dont ayant eu aduis le grand Maistre de Villiers, il fist tous les apprests à luy possibles pour se defendre contre l'entreprise du Turc, il fortifia & munit en diligence la ville de Rhodes, & enuoya au Pape Adrian 6. qui auoit succédé au Pape Leon X. vn Ambassadeur pour se resiouyr avec luy de son eslection & pour luy demander secours, ce qu'il ne peut obtenir à cause de la guerre qui estoit lors entre le Roy de France François I. & l'Empereur Charles le Quint: l'an 1522. au mois de Iuin cōmença le memorable siege de la ville de Rhodes, qui fut assiégée d'une armee de deux cens mil Turcs, & depuis l'armee s'accrut iusques à trois cens mil hommes, les assiégez se defendirent tres-courageusement, & y furent faits de grands exploits de guerre, & specialement par le grand Maistre, lequel durant le siege eut tousiours la cuirasse sur le dos, les assiégeans furent en plusieurs assauts repoussez, & en vn d'iceux il y eut 20. mille Turcs qui demurerent sur la place, & Soliman estoit resolu de leuer le siege, mais il y eut des traistres qui l'empescherent de cefaire, & ces traistres furent punis, & en fin le grand Maistre n'estant secouru, fut contrainct de rendre la ville à conuersion le 24. iour de Decembre 1522.

Les Turcs ayant perdu plus de cent mil hommes, Soliman voulut voir le grand Maistre, & le voyant les larmes luy sortirent des yeux par compassion, & le 1. iour de Ianuier 1523.

Le grand Maistre avec 50. voiles partit de Rhodes & prist la route de Candie, apres auoir l'Isle de Rhodes esté en la puissance des Cheualiers Hospitaliers par l'espace de 213. ans, sçauoir depuis l'an 1309 iusques à la fin de l'an 1522.

Après la perte de Rhodes le grand Maistre & ses Religieux n'eurent aucune demeure asseuree, iusques à ce que l'Isle de Malte leur fust donnée par l'Empereur Charles cinquieme. Car ils se retirerent premierement en Candie, de là ils vindrent en Sicile & Italie, où le Pape les accomoda de la Cité de Viterbe, où il fut tenu vn Chapitre general, depuis ils sejournerent quelque temps à Cornetto, & puis à Villefranche & à Nice.

Lors que la Religion residoit à Nice le grand Maistre fist vn voyage en Angleterre, & de là en France, & estant à Lyon il fut detenu d'une grande maladie, mais apres sa guerison il alla à Chamberry tenir sur les fonds Baptismaux le Prince Philebert Emanuel fils de Charles Duc de Sauoye, & de là il retourna à Nice, & y estant il s'achemina avec l'armee de la Religion & tout le Conuent pour venir à Malte, où il arriua le Mercredy matin 26. Octobre 1530. où il fist bastir vn Palais au Chasteau saint Ange pour sa demeure & de ses successeurs, & y ayant fait son entree solennelle, il fist aussi bastir vn autre Palais en la vieille Cité de Malte, & finalement apres auoir gouuerné la Religion 13. ans, 7. mois, aagé de 70. ans, il deceda le 21. Aoust 1534. à Malte, & y fut inhumé en vne Chappelle qu'il auoit fait construire au Chasteau S. Ange, & luy succeda par eslection

44. Frere Perrin du Pont natif d'Ast de la langue d'Italie le 26. Aoust l'an 1554. il estoit auparauant la prise de Rhodes gouuerneur de l'Isle de Lango, & apres la perte d'icelle, il en partit avec tous les Cheualiers de son gouuernement, & se vint ioindre en l'Isle de Lango, & apres la perte d'icelle, il en partit avec tous les Cheualiers de son gouuernement, & se vint ioindre en l'Isle de Candie à l'armee de la Religion, il fut fait Seneschal du grand Maistre & Bailly de Lango, & fut enuoyé en Ambassade vers le Seigneur de Lautrec, il fut esleu Bailly de sainte Eufemie du Conuent à Nice, où estant il fut créé grand Maistre apres le deceds de son predecesseur, lequel il regretta grandement au lieu de se resiouyr de son eslection, & s'estant embarqué à son Bailliage sur les galeres de la Religion, il arriua à Malte le 10. Nouembre au mesme an 1554. De son temps l'Empereur Charles 5. entreprint d'aller en personne au Royaume de Thunisen Afrique, où il fut assisté des galeres de la Religion, & les Cheualiers d'icelle y firent de grans exploits d'armes, & particulièrement à la prise de la Golette, qu'on estimoit estre vn fort inexpugnable.

Après ceste guerre finie le grand Maistre mourut aagé de 73. ans le 17. Novembre 1535. ayant gouverné seulement 14. mois & 22. iours, & fut enterre ioignant son predecesseur de Villiers.

45. Le 22. du mesme mois fut esleu grand Maistre frere Desiré ou Didier de sainte Iaille de Tolon de la langue de Prouence Prieur de Tholose, où il residoit lors de son eslection, de laquelle ayant entendu les nouuelles,

Le bon vieillard leuant les mains au Ciel, dist semblables paroles, mon Dieu si ie suis necessaire à vostre peuple, ie ne refuse ceste peine & fatigue, & quelque temps apres il s'achemina pour venir à Malte, mais estant fort vieil, arriué qu'il fut à Montpellier il tomba en vne grande maladie dont il deceda le 26. de Septembre 1536. & fut inhumé avec grand honneur en l'Eglise de la commanderie de saint Gilles hors les portes de la Ville de Montpellier, & delassa conformément à son nom, vn desir indicible de soy-mesme à la Religion, pour la grande opinion qu'on auoit conceüe de luy, de sa iustice, de sa bonté, & de son extreme valeur. La Religion ayant esté aduertie de son deceds le 18. Octobre, au meisme an 1536. on proceda le 20. dudit mois à l'eslection de

46. Frere Jean d'Homedes de la langue d'Arragon, lequel estoit lors en Espagne dont il partit sur la fin de l'an 1537. & arriua à Malte le Lundy 21. de Ianuier 1538. où il fut receu avec grande allegresse, quoy qu'il fust mal content de ce que l'on ne luy auoit enuoyé d'es galeres ny la Carraque de la Religio pour le conduire, & à cette occasion il fist desarmer & deffaire la grande Carraque, dont il y eut quelques plainctes faites contre luy. En l'an 1539. fut tenu à Malte vn Chapitre general & vn autre en l'an 1543. Volontiers il discourroit du siege de Rhodes pour donner à cognoistre à vn chacun qu'il y auoit perdu vn œil.

Il fit faire vn Parc d'animaux & vn beau iardin dans l'Isle de S. Michel, & là il passoit la plus grande partie du iour, ce qui donna suiet de murmurer contre luy, qu'il estoit lasche au gouvernement public, mesmes il fut taxé de negligence & de trop peu de soin à pouiruoir l'Isle de Malte contre l'armee Turquesque, par ce qu'il se confioit par trop en la forteresse du Castel S. Ange. De son temps la ville de Tripoli en Barbarie fut perduë pour ceux de la Religion & prise par le Turc, dont il demeura grandement estonné & estourdy. L'an 1552. le Prieur de Capouë frere Leon Strozzi fist vne entreprise sur l'Isle de Zoara laquelle reüssit mal, & y furent tuez plusieurs Cheualiers de la Religion, de toutes langues, & mesmes plusieurs François, Auvergnacs & Prouençaux, ce qu'estant rapporté au grand Maistre, il en eut vne tres-grande tristesse & vif ressentiment, disant qu'il n'estoit point aduenü d'une plus grande perte à la Religion que celle là depuis la prise de Rhodes. Il fist bastir les forteresses de S. Elme & de S. Michel, & aagé de 80. ans il mourut le 6. Septembre 1558. ayant gouverné 16. ans, 10. mois, 15. iours & fut enterré dans la Chappelle des grands Maistres.

47. Frere Jean de Vallette, dit Parisos, de la langue de Prouence, lequel fut esleu grand Maistre le 21. d'Aoust 1557. Ceste eslection fut vrayement tres-agreable à tout l'ordre de S. Jean, parce que le grand Maistre estoit generalement aymé de toutes les nations, & vniuersellement desiré comme tres-digne de ceste charge & grande dignité. En moins de deux ans il fut general des galeres, Bailly de Lango, grand Commandeur, Prieur de S. Gilles & Lieutenant du grand Maistre, & finalement il paruint à la grand Maistrise.

Si tost qu'il fut promu à ceste souueraine dignité, il se resolut de faire bastir à Malte vne ville-neufue sur la montagne de S. Elme, cognoissant que toutes les autres forteresses n'estoient assez munies, pour soustenir la batterie d'un puillant ennemy, mais ce dessein fut differé à vn autre temps.

Il fist fortifier le Chasteau de l'Isle de Goze, & laissant la demeure du chasteau S. Ange, vint habiter dans le bourg de Malte, qu'il deffendit tres-valeureusement contre le siege de l'Empereur Sultan Soliman, où il fut griefuement blessé en vne jambe en l'an 1565. mais le siege estant leué à la honte & confusion des Turcs, il fortifia grandement l'Isle de Malte, & commença à faire bastir la cité nouuelle, qui fut nommee de son surnom Vallette, dont la premiere pierre fut mise par luy solennellement le leudy 28. Mars 1566. En fin le 21. d'Aoust 1568. le grand Maistre mourut à pareil iour qu'il auoit esté esleu, ayant gouverné la Religio vnze ans entiers & accomplis, il fut merueilleusement regretté de tous les Religieux, & encores particulièrement du Pape, & de tous les Roys & Princes Chrestiens. De son temps furent tenus à Malte deux Chapitres generaux, esquels furent faicts plusieurs nouveaux statuts pour le reglement de la Religion.

48. Après les obseques du grand Maistre Vallette le 23. d'Aoust 1568. on proceda à l'eslection d'un successeur, qui fut frere Pierre de Monste de la lague d'Italie, qui estoit lors Prieur de Capouë, incontinent apres sa promotion à la grande Maistrise, il fist porter le corps de son predecesseur dans la ville-neufue, & inhumer honorablement dans la Chapelle de nostre

stre Dame de la victoire, lequel merita d'estre surnommé le pere des soldats, le bouclier & le defendeur de la foy Catholique, & le grand persecuteur & dompteur des Infideles. Le nouveau grand Maistre auparauant d'estre paruenü à ce souverain degre, auoit faict paroistre sa prudence & valeur en d'autres charges belles & honorables: car il auoit esté premierement Patron de la galere Capitainesse de la Religion, puis Lieutenant du Capitaine des galeres, Chastellain ou gouuerneur du chasteau S. Ange de Rome: Il fut Admiral, puis General des Galeres, Ambassadeur de l'ordre vers les Papes Pie 4. & Pie 5. De Rome estant arriué à Malte, il fut esleu peu de temps apres grand Maistre, & y estant il fist en sorte que la nouvelle cité fut paracheuée, où il delibera de transférer l'habitation du Conuent, car le bon vieillard estimoit acquerir autant de gloire en faisant habiter la ville neuue de Valette; que son predecesseur en auoit acquis en la faisant edifier, & de fait le Dimanche 18. Mars 1571. le grand Maistre y fist son entree solempnelle avec le Conuent, & les Cheualiers de la Religion.

De son temps la memorable bataille nauale de Lepante fut donnée, & la victoire obtenüe sur les Turcs, en laquelle les Cheualiers de la Religion firent de beaux exploits de guerre. Il deceda à Malte le 27. de Ianuier 1572. & le 30. du mesme mois fut esleu grand Maistre

49 Frere Iean l'Euesque de la Cassiere de la langue d'Auuergne, lequel auparauant son election fist paroistre sa valeur en plusieurs belles charges, car à l'entreprise de Zoara il fut Porte enseigne de la Religion, l'estendard de laquelle il defendit courageusement & le rapporta à Malte, s'estant jetté en mer avec iceluy, & sauué en vne galere de la Religion, apres auoir par long espace de temps cōbatu valeureusement contre les Infideles, puis apres il fut esleu Capitaine general de la caualerie, Commissaire des fortifications, & Marechal de la Religion, & finalement il paruint au degre souverain de grand Maistre, où il a vescu fort religieusement, ne se passant aucun iour qu'il n'assistast au seruice diuin, & qu'il ne repeust de ses mains propres treize pauures: De ses deniers il fist bastir la grāde Eglise dediee à saint Iean Baptiste, dans la nouvelle cité de Valette, & la dota de mil escus de reuenü, & fist edifier vn tres beau sepulchre, pour y mettre les corps des grands Maistres les predecesseurs. Sur la fin de ses iours il y arriua vn grandissime inconuenient, car ayant encouru la malveillance de plusieurs Cheualiers malcontents, il fut par leur menée suspendu de la charge de grand Maistre, & arresté au chasteau saint Ange avec gardes qui luy furent baillees le 6. Iuillet 1581. ce qu'il supporta fort patiemment & vertueusement, & s'en estant plaint au Pape Gregoire 13. & aux Roys & Princes Chrestiens, le Pape enuoya à Malte le Seigneur Gaspard Vicomte auditeur de Rote, & depuis Archeuesque de Milan, pour gouuerner la Religion en l'absence du grand Maistre, auquel il mandoit de venir à Rome, quoy que les Cheualiers eussent esleu pour Lieutenant du grand Maistre frere Mathurin de l'Escut, dit le Cheualier Romagas François, lequel s'exculā d'auoir pris & accepté ceste charge par force & contre son gré.

Le sieur Vicomte estant arriué à Malte, le grand Maistre s'embarqua dans les galeres de la Religion, accompagné de quatre Seigneurs de la grande Croix, & de deux cens Cheualiers, & entra dans Rome, où il fut receu avec grand honneur, & logé au Palais du Cardinal d'Est à Montecauil, & depuis il alla saluer le saint Pere & les Cardinaux, & il fut aussi visité d'eux reciproquement, en fin soit d'ennuy ou de lassitude d'un si grand voyage faict en son extreme vieillesse de 78. ans, il deuint malade dont il mourut le 21. Decembre 1581. ayant gouuerné pres de 10. ans la Religion. Son corps fut porté en depost en l'Eglise de S. Louys, où ses obseques furent faictes, & ce grand Orateur Marc Antoine Muret y prononça vne harangue funebre qui se trouue entre ses oraisons, son cœur fut enterré à S. Louys, & son corps porté à Malte, & inhumé au nouveau sepulchre des grands Maistres qu'il auoit faict bastir en la cité de Valette, en l'Eglise cathedrale de saint Iean Baptiste. Apres son deceds le Pape declara la suspension dudit grand Maistre nulle & iniuste par decret, qu'il ordonna estre enregistré dans les registres de la Religion.

50 Le 12. Ianuier 1582 frere Hugues de Loubeux Verdale de la langue de Prouence, fut esleu grand Maistre, lequel auoit conjoint les lettres & sciences avec les armes: il fut faict Cheualier fort ieune, & se trouua à l'entreprise de Zoara, & apres auoir vaillamment combattu il se sauua, ayant eu plusieurs charges honorables. Il fut député Ambassadeur de la Religion vers le Pape Gregoire 13. dont il s'aquitta fort dignement & agreea tellemēt aux Cheualiers ses Confreres, qu'ils l'esleurent grand Maistre vnanimement, apres qu'ils eurent eu certaines nouvelles du decez du grand Maistre de la Cassiere. Il appaisa en peu de temps les diuisions qui estoient entre les Cheualiers, & la Religion avec beaucoup de prudence. Le Pape Sixte 5. en l'an 1587. à la fin de Decembre le fist Cardinal Diacre, & estant retourné à

Malte il bastit vn Conuent de Capucins, il fortifia l'Isle, reforma les statuts de l'ordre, fist dresser l'histoire de la Religion par Jacques Bosius en langage Italien, & acquitta les debtes d'icelle qui montoient à plus de 200. elcus, il ne laissa pourtant d'estre accusé vers le Pape Clement 8. d'auoir mal administré le thresor, & afin de se purger de ceste accusation, il enuoya son nepueu à Rome, mais ce procez estant indecis, le grand Maistre & Cardinal Verdale deceda à Malte le iour de l'Ascension le 4. de May 1595. aagé de 64. ans, apres auoir gouuerné treize ans trois mois 21. iours, laissant au thresor vne grande quantité d'or monnoyé, & fut ensepulturé en l'Eglise cathedrale de saint Iean avec grand honneur & pompe funebre.

31. Frere Martin Garzes de la langue d'Arragon fut le 8. May 1595. esleu grand Maistre au lieu du deffunct, il estoit Cheualier de grande bonté & generalement aymé & reueré de tous, & combien qu'il eust passé 60. ans, il estoit d'une complexion assez forte & vigoureuse. Il pacifia incontinent le desordre suruenu entre les Cheualiers qui s'estoient bandez contre son predecesseur, il osta les gabelles qui auoient esté imposées, & interdit pour vn temps les Officiers de la Religion pour donner nouuelle forme à son gouvernement, & ce qui fut sur toutes choses tres-agreable aux Cheualiers, il deffendit expressement qu'aucun Cheualier, non pas mesmes le grand Maistre, peust auoir particulierement des vaisseaux sur mer pour y faire des courses à son profit, & en fin apres auoir gouuerné fort paisiblement la Religion 5. ans 9. mois, il mourut à Malte le 7. Feurier 1601. & y fut inhumé au sepulchre des grands Maistres.

Après le deceds du grand Maistre, les Cheualiers s'assemblerent pour en eslire vn nouveau, & le 10. de Feurier 1601. fut instalé en ceste souueraine dignité frere Aloph de Vignacourt de la langue de France, lequel en l'an 1566. le 25. Aoust estant venu à Malte avec beaucoup d'autres Gentilshommes François, sur le bruit qui couroit que l'Isle seroit en peu de temps derechef assiegee par l'armee Turquesque, il y auoit pris l'habit de la Religion sous le grand Maistre Valette, & depuis il y a eu de grandes charges où il a faict paroistre sa bonté, sa valeur, & sa prudence, & entr'autres ayant esté Capitaine de la ville de Valette, & peu apres grand Hospitalier de la Religion. Ses vertus iointes avec son bon-heur l'ont esleué à ce supreme degré de Principauté, où il continué la gloire & la reputation des autres grands Maistres François ses predecesseurs, desquels les plus memorables actions ont esté cy-dessus briuevement & sommairement descrites. Il mourut l'an 1623. & fut esleu en sa place le Seigneur Paula Grand Commandeur de Prouence qui commande auourd'huy.



ORIGINE



O R I G I N E

D E S O R D R E S M I L I T A I R E S

T A N T R E G V L I E R S Q V I O N T E S T E

approuuez par le sainct Siege sous quelque règle & discipline,
que des Seculiers, instituez par les Empereurs,
Roys, & Princes Chrestiens, avec leurs
blazons, & deuises.



A P R E S auoir fait voir par le traicté precedent combien le delectable ^{1.}
iardin de l'Eglise s'estoit embelly en tous siecles, & en tous aages, par la
diuersité des congregations qui ont espandu vne suauie odeur par l'Vni-
uers, d'autant plus qu'elles se sont renfermees dans leurs cloistres, ne
plus ne moins que de belles, & odorantes fleurs, lesquelles rendent d'a-
uantage d'odeur plus elles sont pressées: Il sera bien à propos maintenāt
de dire aussi quelque chose de celles qui comme le musc, & l'ambre ex-
hallent d'autant plus l'odeur, qu'elle sont exposees au public.

Je veux dire des Ordres de Cheualerie, lesquels à guise d'autres Machabees se sont effor-
tez de combatte les combats du Seigneur, & qui par vne vraye vaillance ont avec la force
de leur bras, & leur magnanime courage donné le plus souuent l'espouuente aux ennemis
de leur Redempteur, & de la sainte Religion, quelques puissants & redoutables qu'ils ayēt
esté, afin que si les autres combattoient en leur enclos les ennemis invisibles, ceux-cy défil-
sent, & taillaient en pieces les vñsibles en plain champ de bataille, tous deux tendans en vne
mesme fin, à sçauoir de donner la paix à l'Eglise, & faire que le Sauueur du Monde fust reco-
gneu pour Seigneur de l'Vniuers.

Celuy doncques auquel a esté donnee toute puissance au Ciel & en la terre, voulant fai-
re voir les effects de sa victoire triomphante, tant sur les choses spirituelles que corporelles,
incontinent apres la naissance de son Eglise, & que le sang des Martyrs en eust cimenté vne
bonne partie de l'edifice, fit que non seulement les esprits tranquilles, & pacifiques se vouie-
rent pour toute leur vie en sainteté, mais qu'encores les esprits les plus belliqueux consa-
crerent leur valeur & leurs armes, tant à l'accroissement, & augmentation de la Religion
Catholique, qu'à sa protection & deffense. Si bien que les Monarques, & plus puissants Po-
tentats du monde marcherent sous l'estendard d'iceluy auquel ils faisoient bien peu de réps
auparauant vne si sanglante & cruelle guerre: tesmoing le Grand Constantin, Valentinian,
les Theodôses, & autre grand nombre d'Empereurs, qui tous commencerent de porter la
Croix en leurs blazons & armoiries, toutes neantmoins de diuerses couleurs: les vns blan-
che, les autres verte, & les autres rouges, & d'autres couleurs en la forme presque qu'elle
apparut au Ciel au grand Constantin, ayant vn A au costé droit vn Ω au costé gauche, & vn
Labarum au milieu, à sçauoir vn X & vn P, entrelassez l'un dans l'autre, estans crenelez par
les quatre bouts. Et d'autant qu'il n'y a gueres eu de Royaumes, ny Republiques au monde,
qui n'ayēt eu quelque Ordre de Cheualerie, il estoit biē raisonnable qu'il se fist quelques
congregations qui prissent l'Ordre du Roy des Roys, & se voulassent particulièrement
à son service. Aussi tient-on que du temps mesme de Constantin le Grand, l'Ordre des
Cheualiers du S. Sepulchre de nostre Seigneur commença de s'establi: car sainte Heleine
sa mere estant allée en Hierusalem pour y chercher la sainte Croix, & le S. Sepulchre, & les
auant trouuez par vne diuine reuelation, elle y fit bastir en action de graces vn Temple fort
magnifique en l'honneur de la Resurrection glorieuse de Iesus Chr:st, lequel par le traict de
temps fut construit en vn Monastere de Chanoines reguliers de S. Augustin. Mais pour

lors la garde du S. Sepulchre fut commise à quelques Gentilshommes de sa suite, qui furent les premiers Cheualiers de cet Ordre, qui se continua en ce lieu-là & s'y establirent, de sorte que du temps mesme que les Sarrazins & les Turcs s'emparerent de tout l'Orient, & particulièrement de la Palestine, tyrannisans les Chrestiens de Hierusalem, enuers lesquels ils vsoient de toute sorte de cruauté, ceux-cy furent tolerez moyennant le tribut annuel qu'ils leur payerent, non sans communiquer neantmoins au cōmun malheur des fideles, ces barbares ne laissant pas de les trauerser en tout ce qu'ils pouuoient. Leur principale charge estoit de garder le saint Sepulchre, faire la guerre aux infidelles de toute leur puissance, racheter les esclaves, ouyr tous les iours la sainte Messe en ayant l'opportunité, reciter les heures de la Croix, & porter cinq croix rouges en contemplation des cinq playes de nostre Seigneur. Quelques-vns raportent leur origine & institution à l'Apostre S. Jacques Euesque de Hierusalem, qui endura la mort pour la foy l'an 63. Et semble qu'en consideration de cela les Cheualiers de cet Ordre sont sous l'obeyssance du Patriarche de ceste ville.

Institution des Cheualiers de l'Ordre de la Sainte Ampoule de l'Eglise de S. Remy de Reims en France.

1. **C**Louis premier de ce nom & premier Roy Chrestien en France, ayant esté conuertý à la foy Chrestienne à la sollicitation de Clotilde sa femme, fille du Roy de Bourgogne receut le Baptisme des mains de S. Remy en l'Eglise de Reims, & protesta de la Religion Chrestienne & Catholique deuant Dieu & les hommes auant que recevoir le S. Sacrement de Baptisme, au sujet duquel parut vn miracle euidant, qui fut que comme on ne trouua l'huile du Cresme dans le vase ordinaire pour oindre la personne de ce grand Roy, on vid vne Colombe blanche tenant vne phiole de cristal pleine de l'huile diuine & sacree enuoyee du ciel pour suppleer miraculeusement à ce deffaut, laquelle descendit entre les mains du tres-digne & S. Archeuesque S. Remy, dont il oignit le Roy, & fit cognoistre par là le soin visible que Dieu a tousiours eu de la prosperité & conseruation de la vie & personne de nos Roys, qui deslors commencerent à porter le nom de Tres-Chrestiens, & est encore en memoire de ce referue fort religieusement ledit vase plein de ladite huile sacree que l'on nomme sainte Ampoule, dont depuis ont esté oinets presque tous les Roys de France, dans l'Eglise Abbatiale de S. Remy audit Reims.

La pieté de ce grand Roy Clouis qui creut avec sa foy luy fit enrichir de grands dons, reuenus & priuileges, ladite Eglise de S. Remy en recognoissance de ce grand benefice qu'il auoit receu de Dieu, de l'auoir fait Chrestien par l'onction de l'huile qui luy fut enuoyee du Ciel. Aussi pour memoire de son zele & de son affectiō enuers ladite Eglise de S. Remy pour le sujet que dessus, il crea quatre Barons Gentilshommes tres nobles feudataires de ladite Eglise, pour estre Cheualiers de la sainte Ampoule, ordre qu'il institua pour honorer ce saint ornement & marque de la vraye Religion.

Ces Cheualiers de la sainte Ampoule ont de beaux & grands priuileges qui leur sont confirmez par les Roys de France aux iours de leur Sacre & Couronnement.

Esdits iours dudit sacre de nos Roys lesdits quatre Barons Cheualiers sont tenus & leurs appartient porter le Dais sous lequel est apportee processionnellement ladite sainte Ampoule par le grand Prieur de l'Abbaye, depuis ladite Eglise de Saint Remy iusques en celle de nostre Dame de Reims & la rapporter à l'issue de la ceremonie dudit sacre.

Les noms des Baronies desdits Barons Cheualiers de la sainte Ampoule, sont le Baron du Terrier, dont la terre mouuante de l'Archeuesché de Reims, & en plein fief à cause de ladite Abbaye de saint Remy a droit de se dire premier Vassal, Baron & Cheualier dudit sieur Archeuesque de Reims, & de porter le premier baston dextre du dais quand on porte la sainte Ampoule de S. Remy à nostre Dame.

Le 2. Baron Cheualier est celuy de la Baronnie de Neufuisi.

Le 3. Baron est celuy de la Baronnie de Louurecy.

On en met vn autre à la ceremonie pource que le 4. Baron qui deuroit estre Cheualier & tenir son rang, est de la Religion Pretendue Reformee.

L'Ordre des Cheualiers de saint Maurice, & de saint Lazare entre les Sauiyards.

3. **O**N tient que l'Ordre de S. Lazare a commencé du temps du grand saint Basile, au rapport de S. Gregoire Nazianzene, lequel S. Basile fonda vn Hospital sous le tiltre de S. Lazare, qui donna le nom depuis à cet ordre: de quoy tant de Lazareries esparées par toutes les parties de la Chrestienté semblent porter tesmoignage. Mais ceste premiere institution ayant esté comme estouffee en son berceau par les incursions des Barbares & autres inu

de ces premiers temps, elle sembla renaître & se reſtablir de nouveau en cét heureux ſiècle, auquel les Princes Chreſtiens vnis en vne ſaincteligue oſterent aux Sarrazins la ville de Hieruſalem, & les autres lieux de la Terre-ſaincte: les Cheualiers de cét Ordre receuans charitablement en leurs Hoſpitaux les fidelles qui accouroient de toutes les parties de l'Europe à vne ſi heureuſe conquête, voire meſme fourniffans aux frais de ceſte glorieuſe entrepriſe, lequel bon office fut cauſe que les Princes Chreſtiens leur donnerent pluſieurs maiſons & heritages l'an mil cent cinquante quatre, leſquelles donations leur furent ratifiees par les bulles des Papes Alexandre I V. Nicolas V. Clement I V. Iean X X I I. & Gregoire X.

Ils font profeſſion de la reigle de S. Auguſtin, & portent pour le blazon de leur Ordre vne croix verte qu'Emanuel Philbert Duc de Sauoye, apres auoir eſté eſtably leur grãd Maître par Gregoire X I I I. & conioint cét ordre avec celui de ſainct Maurice, le reueſtit au tour d'vne bordure blanche, au milieu de laquelle celle de ſainct Maurice ſeroit enclauée.

Quant à celui de ſainct Maurice, les anciens Annaliſtes de Sauoye diſent qu'il eut vne telle origine. Amedee Duc de Sauoye, lequel apres ſa promotion au ſouuerain Pontificat prit le nom de Felix V. ayant tout abandonné ſe confina à Ripaille pres du Lac Lemman, accompagné de dix Cheualiers d'illuſtre famille, où il embrassa la vie d'Hermitte en vn Monastere fondé par ſes anceſtres à la memoire & honneur de ſainct Maurice, s'eſtant veſtu d'vne longue robe de couleur cendree, qu'il ceignit d'vne ceinture recamee d'or, avec vn manteau par deſſus de meſme couleur que la robe, auquel eſtoit couſuë vne croix brochee d'or. François Modius en ſes Pandectes, aſſeure que ces Hermites, qu'il appelle Cheualiers de ſainct Maurice, aſſiſterent ainſi veſtus à la conſécration de Felix V. leur fondateur l'an 1440. monſtrant par là quelle auoit eſté la religion, & quels accouſtrements ordinaires ce nouveau Pontife auoit portez par le paſſé.

L'Ordre des Cheualiers du Chien & du Coq, en France.

Les Autheurs n'ont rien dit de certain touchant l'inſtitution de ces deux Ordres, on les attribue neantmoins à la maiſon de Montmorency. 4.

Le premier, d'autant que ceux de ceſte maiſon portent ſur la creſte de leur armet vn chien, joint que Philippe Moreus en ſes Tables des armoiries de France, eſcrit que Bouchard de Montmorency vint en la Cour du Roy de France Philippe premier du nom, ſuiuy de pluſieurs autres Cheualiers portans tous vn collier remply de teſtes de Cerfs, où pendoit l'eſfigie d'vn chien, & cela pour ſignifier la fidelité & affection ſincere qu'ils auoient & auroient touſiours au ſervice, protection, & deſſence de la republique Chreſtienne, & ſpecialement de la France, pour faire auſſi remarquer par là, leur ancienne nobleſſe, le chien en ayant eſté le ſymbole chez toutes les nations, comme l'a remarqué Lipſius, Epiſtre quarante quatrième de la premiere Centurie.

Quant à l'Ordre des Cheualiers du Coq, tout ce qu'on en peut dire, c'eſt que ceux qui ont eſcrit la genealogie de ceſte illuſtre maiſon, rapportent qu'vn certain Pierre de Montmorency en a eſté Cheualier: quoy que ce ſoit, il ya grande apparence que cét Ordre a pris pour blazon le Coq, d'autant qu'entre les volatils, il eſt le plus Martial, les anciens l'appelloient Poulcin de Mars, on l'a pris quelques fois auſſi pour le hieroglyphe de la victoire & de la vigilance, ces Cheualiers voulans dire qu'ils eſtoient belliqueux, vigilans, & victorieux.

L'Ordre des Cheualiers de la Genette en France.

Celui qui rendit l'vſage des anneaux le plus commun en France, fuſt Charles Martel, ce grand & magnanime Prince, qui releua de ſon temps le ſceptre languiffant de nos Roys, faiſant ſentir la redoutable valeur, & aux rebelles, & aux infideles.

Or comme ce Prince eſtoit naturellement enclin aux armes, il inſtitua auſſi vn Ordre de Cheualiers, qu'il nomma de la Genette, à cauſe de ſa femme, dict du Haillan, qui s'appelloit Ieanne, & luy l'appelloit communement lannette, voulant qu'ils portaſſent la figure de cét animal gravee en leurs armes: mais du Bellay eſt d'autre aduis, & tient que cét inuincible Prince ayant deſſait les Sarrazins en ceſte memorable bataille qu'il leur liura pres de la ville de Tours, l'ã 738. & pour en éterniſer la memoire, & faire veoir aux ſieges futurs la valeur de la Nobleſſe Françoisiſe, de laquelle il auoit eſté particulierement aſſiſté, & qu'il donna

à ceux de cét Ordre le nom de la Genette, d'autant qu'il auoit destruit ceste nation, qui habite ceste partie de l'Espagne, ainsi surnommée à cause qu'elle abonde en quantité de semblables animaux qui sont vne espèce de bellette, ou plustost de renarde, ayant sa peau mi-partie de blanc & de cendré, avec vn beau mélange de petites taches blanches & noires. Cét ordre s'est maintenu iusques au regne de S. Louys.

L'ordre des Cheualiers du Lys, au Royaume de Nauarre.

6. **D**V regne de Garcias VI. Roy de Nauarre surnommé Nugere, lieu memorable pour la naissance, la nourriture, séjour ordinaire, & sepulture de ce Prince. Les anciens Historiens d'Espagne disent, que l'Image de Nostre Dame qui est dans l'Eglise du Monastere Royal de ceste ville, fut miraculeusement trouuée, & qu'à l'honneur d'icelle ce bon Roy & Tiennette sa femme, yllué des maisons de Foix & de Candalle, fonderent ensemble vn Monastere de S. Benoit, mais que Garcias institua seul l'Ordre des Cheualiers du Lys, portant pour blazon vn pot de Lys, sur lequel estoit peinte l'image de Nostre Dame, voulant que les robes de ces Cheualiers fussent fort riches & fort artistement & magnifiquement enrichies, les enfans de la maison Royale entroient en ceste Caualerie, & plusieurs grands Seigneurs François, Nauarrois, & estrangers.

Les Cheualiers de cét Ordre, sont obligez par l'ordonnance de Garcias leur premier fondateur, de maintenir & defendre la foy contre tous les ennemis d'icelle, & l'amplifier à leur pouuoir. Ils doiuent reciter tous les iours certaines prieres, & certain nombre de *Pater noster* & d'*Aue Maria*. Ferdinand d'Arragon qui fut appelé l'Infante d'Antiquera l'an 1403. entra en ceste Cheualerie avec quelques autres, non tant recommandables pour leur noble extraction, que pour leur vertu, & en print l'Ordre solennellement dans l'Eglise de Nostre Dame ancienne de la ville de Metymne. Ceste deuisé estoit d'un pot de Lys & d'un Gryphon.

L'Ordre des Cheualiers de saint Iean de Hierusalem, dits de Malte.

7. **Q**uelques vns attribuent le commencement de cét Ordre à Iean Hircanus l'un des Machabees: d'autres à saint Iean l'Aumosnier, Patriarche d'Alexandrie, bien que les Cheualiers d'iceluy adressent leurs vœux à saint Iean Baptiste, & le tiennent pour patron. Mais il y en a d'autres qui tiennent que leur premiere institution vient d'un nommé Girard, lequel du temps de Godefroy de Buillon, estant venu visiter les lieux saints en Hierusalem, espris d'une deuotion extraordinaire, assisté de quelques autres Gentils-hommes qui eurent mesme dessein que luy, ils se mirent à bastir l'Hospital saint Iean de Hierusalem, donnans ainsi commencement à cét Ordre de Cheualiers, qui s'appelloit du nom de leur premiere demeure, à sçauoir, Hospitaliers.

Le Pape Gelase second du nom, approuua premierement cét institut: leurs vestemens furent vne robe où estoit attachée vne croix blanche en façon octogone, pour marque de leur pureté, & de huit beatitudes auxquelles ils aspiraient par la concession du Pape Honoré second.

Le deuoir de leur profession estoit de receuoir avec toute charité, ceux qui venoient de quelque quartier du monde que ce fust visiter les saints lieux, les assister par les chemins, & les leur rendre seurs contre les Arabes, & tous autres infidèles, contre lesquels mesmes, avec l'assistance & secours des Princes Chrestiens, ils ont dressé des armées entieres & les ont heureusement combattus.

Ils auoient conquis sur eux l'Isle & la ville de Rhodes, mais ils la prindrent quelques ans apres: Soliman 1. du nom Empereur des Turcs, s'emparât d'icelle, & durant ces temps qu'ils la possederent ils furent appelez Cheualiers de Rhodes. Depuis l'Empereur Charles Quint leur donna l'Isle de Malte, laquelle ils ont tousiours courageusement defendue, & principalement durant deux sieges que les Turcs ont mis deuant, l'un souz Soliman susdict, & l'autre souz Selim second du nom, tous deux Monarques des Turcs, que leurs ennemis ont esté contraincts de leuer avec beaucoup de perte & deshonneur. Du nom de ceste Isle on les appelle encores auourd'huy Cheualiers de Malte.

Aucun ne peut paruenir à ce degré s'il n'est de noble extraction.

Leur premier Grand Maistre fut Raymond de Podie, qui depuis composa & publia les constitutions selon lesquelles vivent encore à present ces Cheualiers.

Ils

Ils obseruent la regle de saint Augustin, & disent chacun certain nombre de *Pater noster*, au lieu des heures canoniales, & promettent foy, obedience, & chasteté. Ils portent les armes en l'honneur de Dieu & de saint Jean Baptiste (lequel comme nous auons dit, ils tiennent pour patron) pour la defence de la foy Chrestienne.

Oraufme temps que ces Cheualiers commencerent à s'establir en l'Hospital S. Iean de Hierusalem, il y eut aussi des femmes qui firent le meisme pour recueillir les femmes pelerines, ainsi que Gerard en auoit fait vn pour les hommes.

Celuy des femmes s'appelloit de sainte Marie Magdelaine, le tout souz la conduite d'une fort honneste Dame nommee Agnes, laquelle avec sa troupe prit l'habit, & vie reguliere, ainsi qu'auoit fait Gerard.

L'Ordre des Cheualiers nommez Templiers.

L'Expedition de la guerre sainte ayant esté autant heureusement achenée que religieusement entreprise sous la victorieuse conduite de Godefroy de Buillon, l'Ordre des Cheualiers du Temple, ou des Templiers, (duquel l'on rapporte l'institution du temps de Gelase second) fut estably par les Princes François, pour conseruer en la Terre-Sainte, ce qu'ils y auoient acquis sur les Sarrazins.

Les deux premiers Autheurs de cet institut furent Hugon de Payennes, & Godefroy de saint Aumard Cheualiers. Et d'autant que le Roy Baudouin leur destina certain lieu prez le Temple pour y demeurer, les Cheualiers de cet Ordre furent nommez les Freres de la milice du Temple, & plus communément Templiers.

Depuis le Roy avec les principaux du Royaume, & le Patriarche Grandmond, qui presidoit pour lors en l'Eglise de Hierusalem, leur assignerent quelques biens, & reuenus pour leur viure, & vesture.

Il leur fut enchargé par le Patriarche, & par les Euesques, que pour la remission de leurs pechez, ils eussent à maintenir de tout leur pouuoir ces chemins libres de voleurs, pour la seureté des pelerins, lesquels ils doiuent conduire, & remener en seureté.

Depuis leur institution ils demurerent l'espace de neuf ans en l'habit seculier, lequel leur estoitourny par le peuple par charité & aumosne.

Mais il y eut depuis vn Concile à Troyes en France, où leur fut donnee vne regle qu'on tient auoir esté dressée par saint Bernard, sansaucue Croix, par ordonnance du Pape Honoré, & d'Estienne Patriarche de Hierusalem. Ils demurerent encores quelques ans en cet habit: mais ils commencerent deslors à multiplier selon qu'ils enrichissoient.

Et au temps du Pape Eugene III. du nom, & par son autorité ils commencerent de coudre des Croix rouges sur leurs manteaux, afin d'estre par ceste difference remarquez entre les autres, & pour monstrier qu'ils auoient consacré leurs sang pour la protection, & defence de la Terre sainte, & des autres lieux de la Chrestienté, contre les infidelles. Ceste Croix estoit octogone, à l'instar de celle des Cheualiers de S. Iean: bien que Hierosme Romain Espagnol, maintienne qu'elle estoit double, & comme Patriarchale, telle que la portoient les Hongres en leurs armes.

Ceste Religion deuint en fin si puissante, qu'elle esgaloit en richesses les plus puissans Roys. Et comme l'an mil cent huitante sept Hierusalem eut esté prise par les Infidelles, les Cheualiers Templiers ne laisserent point de combattre tousiours vaillamment pour la Religion.

Toutefois l'an 1311. il pleut au Pape Clement V. d'abolir cet Ordre de Templiers, pour les enormes pechez, & grandes fautes qu'on disoit qu'ils auoient commises: leurs richesses furent distribuees à diuers Cheualiers, comme à ceux de Rhodes, de S. Iacques, de Calatrave, & d'Alcantara en Espagne. Il n'y en a plus maintenant sinon les Cheualiers de Malte, les grands Prieurs & Commandeurs qui portent simplement des Croix blanches sur leurs robes, soutanes & manteaux, comme aussi les Prestres qui celebrent le seruice diuin ausdits Prieurez & Commanderies dudit Ordre de S. Iean.

L'Ordre des Cheualiers Theutoniques de l'Hospital de sainte Marie en Hierusalem, ou autrement, Les Porte Croix, ou Marianes.

Enuiron ce meisme temps Frederic I. à l'instance du Pape Gregoire 7. ayant conduit vne grande armee en Syrie pour aduancer le progres de la guerre sainte, il fut cause d'instituer cet Ordre, & de les installer en l'Eglise, & Hospital de sainte Marie en Hierusalem, & fut approuué du Pape Celestin III. sous la reigle de S. Augustin.

Ceux-cy avec les Cheualiers du Temple & de saint Jean conspirerent à mesme fin & mesme intention, s'estans comme associez à vne mesme profession, n'en estans presque differens que de leurs Croix noires qu'ils portent cousûes sur leurs manteaux blancs. Henry Vualpot fut le premier grand Maistre : depuis ils adiousterent à leurs escussions le Rosaire, qui enuironnoit la Croix qui a esté dite cy dessus. Delà est venu qu'on les a appelez, Marianes, & Porte-Croix.

Et apres la prise de Hierusalem, s'estans retirez à Ptolemaïde, l'Empereur Frederic les transporta en Allemagne, & les mit en la Prouince de Prusse, ennemie pour lors de nostre Religion, afin de la conquerir, & l'assubietir au Christianisme, & ce sous l'auctorité de Gregoire IX. En fin l'an de nostre salut 1279. ceste Prouince ayant esté subiuguee, on les appella Teutonites, & Prussiens.

Ceste conquete se fit sous la conduite de Herman Salza, qui arbora le premier l'enseigne de la Croix en ceste Prouince. Ce qui leur concilia l'amitié & la bien-veillance de tous les Princes Chrestiens. Depuis ils ont eu de grandes guerres contre les Lithuaniens, Polonois & Tartares.

Les Prestres & les Cheualiers de cét Ordre portent en leurs manteaux ceste croix noire cousûe dessus en broderie d'argent.

Le serenissime Maximilian d'Austriche est maintenant leur grand Maistre, qui porte ses armes ny parties de la maison d'Aultriche, & de celles de l'Ordre.

Et bien que la Prusse soit maintenant subiecte au Roy de Pologne, toutesfois on ne laisse pas d'essire vn grand Maistre, qui iouyt avec les siens des biens qu'ils ont en Allemagne.

L'Ordre des Cheualiers de saint Jean d'Accon & de S. Thomas.

10. **A** L'imitation des Ordres des Cheualiers susdits, l'on en a institué plusieurs autres, entre lesquels fut celuy des Cheualiers d'Accon, & de saint Thomas, de l'origine & institution desquels, bien que l'on ne trouuera rien de certain, l'on trouue toutefois qu'au commencement d'icelle ils s'occupoient à assister charitablement ceux qui venoient visiter les lieux saints, de tout ce qu'ils auoient besoin; mais avec le temps ils y adiousterent les armes, à l'exemple des Cheualiers de saint Jean.

Ce qui a esté cause de les faire inferer entre les Ordres Militaires. Hierosme Romain dit qu'ils florissoient en Espagne, y regnant Alphonse surnommé le Sage, & que ce Roy leur legua par son testament tous ses meubles, avec quelque somme d'argent. Mais Tostat sur Iosue dit qu'il n'estoit presque plus aucune memoire d'eux. Quant à l'ordre de saint Thomas, qui militoit sous la reigle de S. Augustin, il fut conioinct avec le precedent par le Pape Alexandre IV.

La Palestine nous a donné encores quelques autres Ordres, comme celuy de S. Blaise, de sainte Marie, & celuy de la Penitence des Saints Martyrs. Hierosme Romain assure auoir veu les freres de ce dernier Ordre, qui portoient vne Croix rouge, & tenoient la reigle de S. Augustin.

L'Ordre des Cheualiers de saint Sauueur en Arragon.

11. **E** Nviron l'an mil cent dix-huit, Alphonse Roy d'Espagne, de Nauarre, d'Arragon, de Castille, & de Toledé, du costé de sa femme Verraca desirant d'extirper les Mores de Sarragosse & d'Arragon, & voyant combien les Prouinces voisines s'estoient bien trouuees des Ordres Militaires que chacun auoit estably chez soy, il institua en la ville de Montreal apres la prise de Calatraua, l'Ordre des Cheualiers de saint Sauueur, avec la promesse de fauoriser, & d'estre le support de ceux qui se porteroient le plus valeureusement à la guerre qu'il pretendoit faire contre les infidelles: ce qui luy réussit si heureusement, que l'an mil cent vingt, il les força de vider toutes ses contrees qu'ils auoient occupées, cela fut cause que ce Roy donna à cét Ordre de grands & riches reuenus.

L'Ordre

L'Ordre des Cheualiers de Mont-iøye en Syrie, qu'on appelle en Castille de Monfiac, & en Catalogne de Montgoia.

DV temps que les Princes Chrestiens conquererent la Syrie, l'Ordre des Cheualiers de ¹² Mont-iøye fust institué, lesques prindrent leur nom d'une montagne ainsi nommée, proche de la ville de Hierusalem, comme en fait foy la bulle de son approbation donnée par le Pape Alexandre III. l'an 1180. conférée aux Archiues de Calatraua.

Cet Ordre receut de grands biens des Princes Chrestiens, en consideration de l'assistance qu'ils leur auoient renduë pour recouurer la Terre Sainte.

Le mesme Hierosme Romain fait mention d'un autre Ordre de Cheualiers qu'il nomme de Truxillo, ayant pris ce nom-là de la ville où ils commencerent cet Ordre, qui fut enrichy de plusieurs grands dons par le Roy Alphonse, lequel leur donna encores sainte Croix; Zuhole, Cabime, Albate, & quelques autres, & ce l'an 1233.

L'Ordre des Cheualiers de Porte-glaive ou Gensdarmes de Christ en Liunie.

ENtre la Prusse, Lithuanie, Russie, & Moscouie, est située la Prouince de Liunie, les ¹³ Potentats de laquelle s'estans alliez des Cheualiers Teutoniques, desquels il a esté parlé cy-dessus, à leur imitation firent un Ordre de Cheualiers confirmé par Innocent III. prenans pour blazon deux espees de couleur rouge en forme de Croix S. André qu'ils faisoient coudre sur leurs manteaux. Leur premier grand Maistre s'appeloit Vnius, avec lequel ils firent de grands progres, & conquerirent plusieurs places en la Russie.

Depuis ils s'unirent avec les Teutoniques: mais ayans eu plusieurs differens ensemble, ils s'en separerent moyennant une bonne somme d'argent qu'ils payerent enuiron l'an 1348. En fin ceste Prouince ayant esté infectée de l'heresie de Luther, cet Ordre fut du tout esteint ayant floré l'espace de 357. ans.

L'Ordre des Cheualiers de S. Iacques en Espagne.

LA sepulture du glorieux Apostre S. Iacques ayant esté decouuerte en Espagne, & la renommée des miracles qui se faisoient iournellement en ce lieu, espandue de toutes parts, ¹⁴ causa une grande deuotion non seulement aux peuples de l'Espagne, mais à ceux encores des Prouinces plus esloignées.

Mais d'autant que le chemin, à cause des rochers & sterilité de la terre, estoit fort difficile, & que les Mores voloient & pilloient des Pelerins, la crainte du danger empeschoit plusieurs d'entreprendre le voyage.

Cela fut cause que les Chanoines reguliers de S. Eloy, qui auoient leur demeure nō guere loing de Compostelle, pour y donner quelque remede bastirent plusieurs logis sur le chemin qui vient de France, pour y loger les Pelerins, afin de les garantir du danger: leur principal & plus excellent desquels fut celui qui fut basti aux faubourgs de la ville de Leon, sous le nom & tiltre de S. Marc: qui leur acquit tellement la bien-veillance d'un chacun, que plusieurs Roys & Princes leur en firent de fort grands presens en recognoissance de ce bien-faict. Depuis à l'imitation de ces Chanoines plusieurs Gentil-hommes de Castille desirerēt de faire le mesme: & pour mieux paruenir à leur dessein firent de toutes leurs possessions & richesses une masse, afin de s'en seruir en commun.

Ces Gentils-hommes donc par la diligence du Cardinal Iacynthe, ayans prins resolution de se conioindre avec lesdits Chanoines, ils proposerent de dresser une maniere de viure telle qu'ils desiroient obseruer à l'aduenir, selon la regle de S. Augustin laquelle ces Chanoines obseruoient, & l'enuoyerent au saint Pere Alexandre 3. qui estoit pour lors souuerain Pontife, faisant le chef de cet Ambassade Pierre Fernandez du Pont Eucalate, lequel obtint du Pape une Bulle, & la maniere de viure qu'ils deuoient garder en date du 15. Iuillet 1175. Leur premier grand Maistre fut ce Fernandez, & pour demeure fut donnée à ces Cheualiers la maison de saint Marc à Leō: leur liuree ou marque honoraire est une Croix rouge en forme d'espee. Cecy est selon l'opinion de Iean Mariana, au liure 2. de son histoire d'Espagne. Mais d'autres tiennent cet Ordre plus ancien, ramenant son origine au temps du Roy Alphonse le Chaste: autres, à l'an 848. quand Dom Ramire Roy de Castille défit 60. mille Mores pres de Clauige, d'autant qu'en ceste bataille les soldats s'escrioient, Dieu nous ayde & S. Iacques, lequel on vid à cheual portant une banniere blanche marquée d'une Croix rouge.

Mais la Bulle sur laquelle on se fonde, qui a esté donnée aux Religieuses du Cloistre du S. Esprit en Salamanque, n'est pas authentique, comme l'a remarqué ledit Mariana, & François Rhados Dandrada qui a écrit en Espagnol la chronique des trois Ordres de saint Jacques, de Calatrava, & d'Alcantara, dit que cet Ordre fut institué l'an 1170. aux Royaumes de Leon & Galice par Dom Fernand Roy desdits Royaumes: & que long temps auparavant il y auoit vne compagnie ou confrairie des Cheualiers de S. Jacques, sans forme de Religion.

Il dit plus que cet ordre a esté introduit en Castille par le Roy Dom Alphonse 9. & approuué l'an 1175. de maniere que les fondateurs de cet Ordre militaire sont ce Roy Dñ Fernand, & Dom Pierre Fernandez premier grand Maistre.

Onufre Pauini en sa Chronique rapporte cet origine à l'an 1170. Les statuts de cet ordre sont nouvellement imprimez par Plantin à Anuers.

Cataua ayant esté emportée sur les Mores par le Roy Sancius 3. surnommé le Desiré l'an 1158. il fut mis entre les mains des Templiers, afin que par le moyen des fortifications qu'il y feroit ils la rendissent comme vn bouleuart contre les infidelles: Mais les Templiers ayans esté aduertis que ceux-là alloient fondre sur eux avec vn nombre presque infiny, ils remirent la place à la volonté du Roy, & en sortirent, ne la trouuans pas assez forte pour soustenir vn siege, & comme pas vn des Grands Seigneurs du Royaume ne voulut entreprendre de la garder, deux Moines de Cisteaux, faisans pour lors sejour à Toledé par occasion, l'vn nommé Raimond Filterius Abbé de Pisorie: & l'autre Didacus Velezens, tous deux fort valeureux aux armes, qu'ils auoient laissez neantmoins pour seruir à Dieu, se resolurent d'y entrer, & de la conseruer & deffendre de tout leur pouuoir: ce qu'ayant communiqué au Roy Sâcius il l'eut pour tres agreable, comme eut aussi Iean Archeuesque de Toledé, qui leur fournit des moyens & d'hommes selon sa puissance, persuadant par son autorité & par ses prieres, tant nobles qu'autres, d'entreprendre la deffence de ceste place avec ces deux Religieux pour le bien de la Religion Chrestienne: ce qui l'aduança de sorte que des hommes de toutes conditions venoient à troupes pour le secours de ces gens de bien: de maniere que la ville fut si bien munie, & fortifiée que l'ennemyn'osa iamais entreprendre de la venir attaquer.

Voila l'heureux commencement de ceste milice: si bien que le Roy donna ce lieu en recompence à ces Religieux & à leurs compagnons, aurnom de la Vierge Marie patronne de l'Ordre de Cisteaux.

L'Abbé donna à ses derniers compagnons la vesture & la reigle de Cisteaux. Les blazõs de cet Ordre furent au commencement vne croix rouge, & deux ceps au bas d'icelle, où furent adioustes par trait de temps quatre fleurs de Lys par Benoist 13. qu'ils porterent au lieu de scapulaire. Alexandre 3. l'an 1164. approuua depuis cet Institut par vne Bulle expresse, & le premier grand maistre s'appelloit Garfia.

Quand ces Cheualiers sont en quelque assemblée ils portent vne robe blanche, & sur icelle, comme aussi sur la poitrine, vne croix rouge de la forme que nous venons de dire. Le Pape l'an 1396. leur conceda de se marier vne fois, sans toutefois prendre vne seconde femme: car ils estoient iadis tenus de viure comme Religieux en chasteté perpetuelle: de sorte que comme vous pouuez voir, les premiers instituteurs de cet Ordre furent Sanche Roy de Castille, & Reymond Abbé de Fitere.

L'Ordre des gens-d'armes de Iesus Christ institué par S. Dominique par les Albigeois heretiques.

15. **L**Es Comtez de Tholose & de la Lombardie estans presque toutes infectées de l'erreur des Albigeois, S. Dominique prescha contr'eux avec vn tel profit, qu'on tient qu'il en conuertit iusques à cent mille, choisissant quelques deuotes personnes pour extirper par le glaue materiel ceux-là de ces heretiques, qui ne se laisseroient toucher du glaue spirituel de la parole de Dieu: à ceux-cy il ordonna vne certaine reigle de viure spirituellement par dessus le commun des Seculiers, & au dessous de celle que menent les Religieux. Ils furent appelez en ce temps-là les Freres de la milice de saint Dominique.

Or ces heretiques estans entierement extirpez, ceux qui s'estoient dediez pour cet effect ne laisserent pas de continuer ce genre de vie iusqu'à leur mort, & leurs femmes les suruiuãs, elles viuoient en continence, & les hommes faisoient le semblable s'ils suruiuoient les femmes. Quelque temps apres des personnes indifferemment mariez, & non mariez ont embrassé ceste milice, qu fut finalement nommée des Freres, ou des soeurs de la penitence de S. Dominique: Innocent sixiesme approuua leur reigle l'an 1360.

L'ordre des Cheualiers d'Alcantara au Royaume de Leon.

COmèsius Ferdinand, Cheualier, & grand Seigneur entre ceux du Royaume de Leon souz les auspices de Ferdinand Roy de ce Royaume, & de Galice, institua ceste Che-¹⁶ualerie contre les Mores, qui eut au commencement le nom de saint Iulian de Pirario, d'autant que la premiere maison qu'ils eurent, estoit en vn bourg ainsi nommé. Le Roy se declara protecteur de cet Ordre par lettres expresses, l'an 1176. Et le Pape Alexandre troisieme l'approuua.

Et l'an 1183. Le Pape Lucius troisieme le confirma, & l'exempra de la iurisdiction des diocesains. Leurs armes furent vn poirier vert en champ d'or, iusques au temps qu'Alphonse huictiesme donna aux Cheualiers de cet Ordre Alcantara, place situee au bord du fleuve Tagus (remarquable en l'ingenieuse structure de son pont) par l'incorporation qu'il en fit avec ceux del'Ordre de Calatraue, auquel ce lieu auoit esté premierement donné: mais par raison d'estat remis à ces derniers, avec conuention toutesfois, qu'ils seroient subjects à ceux-là, pour marque dequoy pat l'ordonnance de leur Grand Maistre furent adioustez deux ceps qui estoient en la deuse des autres, & furent appelez pat apres Cheualiers d'Alcantara.

Finalemēt l'an 1411. les Cheualiers de cet Ordre obtindrent du Pape Benoist treiziesme, qui se disoit Pape en Espagne, de porter sur la poitrine vers le costé gauche, la Croix verte, faicte en forme de lys.

Ils viuent souz la reigle de saint Benoist, & promettent en leur profession obeysance à leurs Superieurs, chasteté coniugale, & de viure le plus sainctement qu'il leur sera possible tous les iours de leur vie.

Le Pape Adrian sixiesme annexa depuis en faueur de Charles le Quint iadis son disciple, ces trois Ordres, de saint Iacques, Calatraue, & Alcantara, à la Couronne de Castille, & de Leon à perpetuité.

L'Ordre des Cheualiers de la Glorieuse Vierge Marie en Italie.

L'An mil deux cens trente-trois, Barthelemy de Viceney de l'Ordre des Freres Pres-¹⁷cheurs, fut auteur de ces Cheualiers, qu'il institua pour concilier la paix par les villes d'Irahe, & exterminer toute espee de discorde, & de diuision.

Le Pape Urbain IV. l'an mil deux cens soixante & deux, l'approuua: leur habit estoit vne robe blanche, & vne robe grise, & portoient pour leur deuse vne Croix pourpree en champ blanc, avec quelques Estoilles au dessus. Leur deuoir estoit de prendre en leur protection les veufues, & les orphelins, & de procurer la paix & concorde entre les autres. Ils ont esté appelez les Freres loyeux, d'autant qu'ils viuoient paisibles, & contents en leurs maisons, avec leurs femmes & enfans, ainsi que dit Sigonius, & autres.

L'Ordre des Cheualiers de Montese au Royaume de Valence.

LEs Cheualiers de Montese, furent ainsi appelez du lieu principal de leur residence, ayant esté institué au mesme temps que celuy des Templiers fut aboly; de sorte que¹⁸ tous les biens que ceux-cy possedoient au Royaume de Valence, furent congnez à ceux de Montese, à condition de defendre & garder les frontieres de Valence à l'encontre des Mores. Leur ordre fut approuué par Benoist XIIII. & Martin V. Ils portent l'habit blanc, & par dessus vne croix rouge toute simple.

L'Ordre des Cheualiers de Iesus Christ en Portugal.

DEnis, surnommé Perioca, Roy de Portugal, nepueu d'Alphonse X. Roy de Castille & de Leon, institua cet ordre appellé communément de Portugal, ou de Christ. Il¹⁹ ordonna que leurs blazons seroient vne robe noire, & vne croix noire couppee d'une autre branche y attachée.

Le Pape Iean XXII. l'an 1321. leur prescrivit de tenir la reigle de saint Benoist. Leur de-
voir est de faire la guerre aux Mores qui habitent la Betique. C'est par leur vertu que l'Em-
pire des Portugais s'est estendu iusques bien auant en l'Orient, & encores en Afrique, au
Brasil, & autres parties Occidentales.

L'Ordre des Cheualiers de la Bande, & de la Scama, entre les Espagnols, & de la Galza entre les Venitiens.

20. **L'**An 1332. Alphonse I^r. Roy de Castille, deuant qu'il fust paruenue à la Royauté institua en la ville de Victoria l'Ordre des Cheualiers de la Bande, ainsi appelez, d'autant que le iour qu'ils estoient ordonnez par le Roy, comme Grand Maistre de ceste Cheualerie, il leur pendoit vne bande rouge large de 4. doigts en escharpe, du dessus de l'espaule droicte au dessous du bras gauche.

Les entans des nobles y estoient admis apres auoir esté au moins dix ans aux armées, excepté les aînez. Il a esté fort estimé autrefois, mais en fin pour ne point démentir la vicissitude des choses humaines, il est descheu.

Quant à celuy de la Scama, Jean I^r. Roy de Castille en fut autheur, & fut en fort grand honneur de son regne, au rapport de Hierosme Romain, bien qu'il dise n'auoir peu apprendre que c'estoit que ce la Scama, quelque recherche qu'il en ait peu faire.

A l'imitation des Cheualiers de la Bande, les Venitiens instituerent au mesme temps ceux de la Galza, presque avec les mesmes loix. Aucun n'y pouuoit estre receu par le Duc, ny par le Senat, qui ne fust noble d'extraction.

Cet Ordre se renouuella l'an 1562. & fut fauorisé de nouvelles graces, & priuileges. André Etten, excellent en l'Anatomie de Medecine, & bien versé en routes sciences, ne trouue pas qu'ils ayent eu autres armes qu'un collier d'or, où pendoit l'image de S. Marc, ou d'un Lyon ailé, avec cet Eloge. *Pax tibi Marce*. Encor le dit il par coniecture, fondée sur ce que le Duc & le Senat de Venise, voulans dignement recompenser plusieurs grands personnages d'entr'eux, qui auoient obligé la Republique par quelques signalez seruices, ils les ordonnoient Cheualiers, & leur donnoient un colier d'or, avec ceste deuise.

L'Ordre des Cheualiers Auisiens, vulgairement appelez des Aduis en Portugal.

- L**es Chrestiens s'estans rendus les maistres de la ville d'Ebora, celebre en Portugal pour le séjour ordinaire qu'y faisoient les Roys, le Roy Alphonse recognoissant que son assistance & la force estoient tous propres à guerroyer les Mores, il y establir la principale demeure des Cheualiers, qui se nomment au Royaume de Castille de Calatraua, & en Portugal, des Auis, lesquels furent toutesfois appelez au commencement Eboreaces, du nom d'Ebora, ville qu'on tient leur auoir esté donnée par Ferdinand Monteyro, leur premier Grand Maistre en l'honneur de la Vierge Marie, Patrone de l'Ordre de Cisteaux, afin que par leurs continuelles courses sur les Barbares, ils les contraignissent en fin de vider le pays.

Or leur troisieme grand Maistre, qui s'appelloit Alphonse Auenfis, ayant conquis sur les infideles le Chasteau Auisin, il le donna à la compagnie, laquelle il transporta, afin d'estre plus près de leurs ennemis, & de les trauffer dauantage: depuis le nom de ce Chasteau leur est demeuré: cet Ordre fut confirmé par Innocent III. l'an 1204. Au reste Roderic Garzia huietieme grand Maistre de Calatraua, ayant enrichy de plusieurs grands reuenus ces Cheualiers Auisins, ils se soufirent aux loix & reformatons de son Ordre, souz le gouvernement duquel ils demurerent iusques au temps de Jean leur grand Maistre, qui fut fils naturel de Pierre VIII. Roy de Portugal, Car ce Roy à la sollicitation (comme il est croyable) de son fils, separa cet ordre des Auisiens d'avec celuy de Calatraua, leur ordonnant qu'ils portassent d'oresnauant vne croix verte sur un tronc aucunement long en leurs blazons, en ayant osté le poirier à la distinction des Cheualiers d'Alcantara, bien qu'ils la portassent rouge auparauant telle que la portoient les Cheualiers de Calatraua, ainsi qu'il se void en l'ancien seel de l'ordre, où estoient à la baze de la croix, ainsi que dict François Radosius, deux petits oyseaux.

Ils suivent la regle de Cisteaux: quoy que c'en soit, Radosius confond bien à propos ces deux Ordres des Auisiens, & de Calatraua: puis qu'en fin par trait de temps, des deux ne s'en est fait qu'un, & au contraire Volaterad s'est trompé, qu'il les joint avec ceux d'Alcantara, comme l'a remarqué Hierosme Romain, & Gonçalue Argotes de Malina au liure 1. chap. 32. de la Noblesse d'Espagne.

L'Ordre des Cheualiers de la Table Ronde.

22. **O**N dit qu'Artus Roy d'Angleterre, ayant choisi vingt-quatre Gentils-hommes les plus belliqueux, & les plus experimentez aux armes qu'il peut, il les ordonna Cheualiers, & comme estans esgaux en vertu, il les aymoît esgalement, pour leur oster tout sujet d'enuie,

d'enuie, & qu'il voulust en favoriser l'un plus que l'autre, il fit faire vne table ronde où ils prenoient ordinairement leur repas, en laquelle comme il n'y auoit ny haut ny bas bout, & en ce faisant nul ne se pouuoit dire ny premier ny dernier assis, ny plus ou moins honoré que son compagnon: & de là ils ont esté nommez Cheualiers de la Table Ronde.

Le menu peuple d'Angleterre, croit que ceste table est gardee au Chasteau de Vinton, & que dessus sont grauez les noms de ceux qui ont esté de ceste Cheualerie.

Guillaume Caimdene croit l'institution de cét Ordre plus recente, & la rapporte à la coustume qu'on auoit autrefois de faire des Tournois, où l'on s'exerçoit aux armes. Car afin que les premieres ou dernieres places ne donnaissent quelque subiect de querelles aux grands qui y assistoient, l'on n'vsoit que de tables rondes, où ils s'assoient indifféremment, sans prendre garde qui estoit le premier ou le dernier.

L'Ordre des Cheualiers de la Jartiere en Hierusalem.

LE Roy Edouard III. d'Angleterre, institua cét Ordre de la Jartiere l'an 1350. pour pur- 23.
ger le soupçon qu'aucuns auoient pris de la Comtesse de Salbery, qu'il aymoit sagement, de laquelle il auoit leuë la jartiere bleue qui luy estoit tombee en dansant, & adiuusta pour deuile *Honny soit qui mal y pense*, à cause que les Gentils-hommes qui estoient là presens s'estoient pris à rire, disant qu'il feroit en sorte que ceste jartiere luy rendroit tout honneur & reuerence: ce qui aduint par l'institution de cét Ordre de Cheualiers, auxquels il en donna le nom.

D'autres disent, que cét Ordre print son nom d'une bande qu'Edouard donna aux siens, pour memoire perpetuelle de la victoire que ce Roy auoit obtenue à Poitiers contre Jean Roy de France. Ils mettent ceste bande au dessous du genouil gauche, laquelle ils attachent avec vne boucle en signe de l'amour & concorde qui doit estre en ceste société, & sur leurs manteaux portent attachee la croix rouge de saint George dans vn escu.

Pour le grand collier de l'Ordre qu'ils ont de coustume de porter au iour de leur creation, il est autre que leur Jartiere reprise à plusieurs doubles, où sont entremeslees des roses blanches & noires, d'où estoit pendante l'image de saint George, lequel il voulut estre leur Patron, en l'honneur duquel il auoit fait baltir vne Eglise fort magnifique au Chasteau de Vuindesore quelque temps auparauant.

D'autres rappottent encore l'inuention de teste milice à Richard premier, & disent qu'Edouard ne la fit que renouueller, mais cela est trop incertain: quoy que ce soit les solemnitez de cét Ordre se celebrent tous les ans à iour prefix en ce Chasteau d'Vuindesore, le iour de la feste de saint George, le Roy y presidant.

L'Ordre des Cheualiers du Bain en Angleterre.

NOUS n'auons rien de certain de ces Cheualiers, sinon que Henry IV. Roy d'Angleterre, 24.
le iour qu'il fut sacré au Chasteau de Londres, il crea Cheualiers quarante six Escuyers qui auoient veillé la nuit precedente, & auoient vsé du bain, auxquels il donna à chacun des tuniques vertes à manchettes si longues qu'elles battoient les talons, avec des mantes peluës qu'ils portoient attachees à l'espaule gauche, avec vne cordelette de soye blanche double.

Le temps passé deux d'entre les nobles, qui n'auoient encore receu Cheualerie, estoient choisis pour estre admis à cét ordre avec beaucoup de ceremonie. Ce qui se faisoit le iour du sacre, ou des nopces des Roys, ou des Roynes, ou lors que quelques vns de leurs enfans estoient inuestis de quelque Duché, ou Comté: car le iour de deuant ils estoient vestus de robes grises, approchantes de celles des Hermites, avec le cuculle, le bonnet de lin, & estans bottez, & en cét accoustrement ils entendoient deuotement la sainte Messe: puis quand le soir estoit venu, ils alloient souper tous ensemble, deux escuyers seruans vn chacun d'eux avec vn laquais.

Après souper ils se retiroient en leur chambre, où l'on auoit dressé à chacun son lit avec des cortines rouges, où estoient attachees les armes de leurs maisons, & après estoit apresté vn vaisseau propre pour se baigner, couuert de linceuls, où après s'estre recommandez à Dieu, ils se baignoient, afin que d'oreinauât ils se souuinissent d'auoir tousiours le corps & l'esprit net. Le lendemain du grand matin ils estoient reueillez au son de plusieurs instrumens musicaux, & le vestoient de mesmes accoustremens que le iour precedent.

Lors le Connestable d'Angleterre, vn Marechal, & autres deputez par le Roy, les venoient trouuer, & les appellans par ordre chacun par leur nom, ils leur propoient le ser-

ment qu'ils deuoient faire, à ſçauoir de ſeruir Dieu ſur tout, de deffendre l'Egliſe, & d'honorer le Roy, & deffendre ſes Droicts, de prendre en leur protection les veuues, les vierges, & les pucelles, & les maintenir de tout leur pouuoir.

Après auoir iuré ſur les Euangiles tous ces articles, ils eſtoient conduits à Matines, les Muſiciens du Roy, & ſes Herauts marchans deuant. Les Matines dictes, ceux-là meſmes les ramenoient en leurs chambres, où ils ſe deueſtoient de leurs accouſtrements precedens, & prenoient vn manteau de veloux bleu-celeſte, pour repreſenter que leur ardeur Martiale eſtoit toute celeſte: & mettoient vn chapeau blanc, avec vn pannache de plumes blanches, & des gands qu'ils attachoient à leur manteau d'une petite corde blanche, puis ils montoient ſur des cheuaux ſellez & houſſez de cuir noir meſſangé de blanc, avec vne croix attachee ſur le front.

Leurs laquais marchaient deuant eux, portans leurs eſpees dorees, où pendoient leurs eſperons ſemblablement dorez, leurs eſcuyers eſtans à cheual à leurs coſtez, & en ceſte pompe ils venoient chez le Roy, les trompettes fanfarans au deuant.

Et eſſans ainſi arriuez en ſa preſence, ils ſont conduits par deux anciens Cheualiers, puis leurs laquais donnent leurs eſpees avec leurs pendans au grand Chambrier, lequel les preſente au Roy en grande reuerence, pour les ceindre aux nouueaux Cheualiers: ce qu'il faiſoit: puis il commandoit aux anciens Cheualiers de leur chauffer les eſperons: & ceux-cy ſouloient autresfois, en finiſſant ceſte ceremonie, leur baiſer les genoux en leur deſirant tout bien.

Or ces nouueaux Cheualiers ainſi ordonnez, auoient de couſtume anciennement de courir la table du Roy, puis y diſner tous enſemble, aſſis d'un meſme coſté. L'heure des Veſpres venue, ils alloient à la Chappelle, & là offroient leurs eſpees ſur l'Autel, lesquel-les ils rachetoient d'une certaine ſomme d'argent.

En retournant, le maiſtre cuſſinier du Roy leur venoit au rencontre, & leur preſentant ſon couſteau, les menaçoit de leur couper ignominieusement les eſperons, s'ils ne ſe monſtroient fidelles, & bons ſoldats. Au iour du couronnement des Roys ils les accompagnoient en pompe en leur rang, leurs eſpees ceintes, eſperonnez, & couuerts de leurs manteaux de couleur de bleu-celeſte, fermez deuant d'un ruban de ſoye blanche nouée en Croix avec le capuche pendant deuers l'eſpaule gauche. C'eſt ce qu'en dit particulièrement Guillaume Camdene.

Le blazon de cét Ordre eſt trois couronnes d'or dans vn cercle d'or avec ceſte deuſe, *Trium Vnum*, attachee à vne bande de lin teinte en eſcarlate.

L'Ordre des Cheualiers de l'Eſtoile en France.

25. **I**ean de Valois Roy de France, au mois d'Octobre l'an 1352. institua vn Ordre de Cheualiers, en memoire de l'Eſtoile qui conduſit les Roys en Bethleem pour y adorer le Sauueur du monde nouuellement né, qui furent appelez les Confreres de noſtre Dame de S. Audoem, pource que le lieu de leur reſidence ſ'appelloit ainſi, lequel eſtoit eſloigné de Paris environ plus ou moins vne lieue: autresfois on l'appelloit le Palais de Cheley, lequel leur fut donné avec l'Egliſe & toutes les appartenances & dependances, qu'il y auoit. Au commencement l'on n'admettoit en ceſte compagnie que les plus grands du Royaume: leur blazon eſtoit vne eſtoile pendue à vn collier d'or, ou attachee au capuche de leur robe, ou bien en quelque autre lieu plus apparent, avec ceſte deuſe, *Monſtrant Regibus Aſtra riam*. Mais comme pluſieurs perſonnes ignobles & roturiers ſe fuſſent introduits en ceſte ſocieté ſous des faux donnez à entendre, elle deſcheut bien toſt de ſon luſtre: de maniere que Charles fils de Iean ordonna que ſes Gardes en porteroient les enſeignes pour le rendre plus vil: Auourd'huy les Archers du Guet en la ville de Paris les portent ſur leurs caſaques.

L'Ordre des Cheualiers de l'Annonciade en Sauoye.

26. **A**medee ſixieſme Comte de Sauoye, ayant institué cét Ordre, il le rendit celebre par les grands & riches reuenus dont il le fonda de ſon propre bien. Il voulut que le collier de cét Ordre fuſt compoſé de quatre petites lames d'or attachees à des chainettes d'or ſe tenans les vnes aux autres avec des petits nœuds que l'on appelle lacs d'amour, & ſur chacune de ces plaques eſtoient eſcrites ces quatre lettres F E R T, l'image de la Vierge Marie, & l'hiſtoire de l'Annonciation pendante au milieu, de laquelle ceſte Cheualerie a pris ſon nō. Quant à ces quatre lettres, elles ſignifioient, *Fortitudo eius Rhodum tenuit*: Ce qui eſt dit à l'honneur d'Amedee, lequel comme diſent les Annales de Sauoye, oſta ceſte ville aux Turcs, & la

De l'Origine des Ordres Militaires. 47

la conquit à Iesus-Christ, ou plustost la deffendit & conserva contre leurs forces : de sorte que depuis ce temps là les Cheualiers de Rhodes prirent les armes de Sauoye, qui estoient meslees à celles des Ducs de Saxe, parce que les premiers Princes de ce Duché en sont descendus, qu'ils adiouterent à la Croix argentee de leur Ordre en vn escu de gueules, à scauoir quand l'Isle de Rhodes leur fut donnee par l'Empereur de Constantinople : & ceste deuise *F E R T* demeura à Amedee, & à ses successeurs, en memoire de sa valeur.

Les ceremonies de cét Ordre se reiterent tous les ans le iour de l'Annonciation de la Vierge, & y sont ordonnez Cheualiers ceux que le Prince choisit.

Quant au Comte Amedee, il ne se contenta pas d'instituer cét Ordre, mais il voulut luy meisme y estre enrollé, avec quatorze Seigneurs des plus apparens qui fussent en ce pais, avec lesquels il faisoit le nombre de quinze, en l'honneur des quinze mysteres de la tres-sacre Vierge Marie.

L'Ordre des Cheualiers de la Toison d'or chez les Bourguignons, & ceux de la maison d'Autriche.

Philippe, surnommé le Bon, Duc de Bourgogne, pour l'amour qu'il portoit à la Noblesse, l'an 1430. au mois de Ianuier, erigea cét ordre le iour de ses nopces avec Elizabeth fille de Iean Roy de Portugal, à la gloire de Dieu, de sa sainte Mere, & de saint André Apostre : & pour exciter dauantage les cœurs à l'exaltation de la S. foy, & les esmouuoir à la vertu, il donna à cét ordre le tiltre de la Toison d'or, faisant allusion ; à la toison de Geodeon qui fut trouuee en l'air d'un costé pleine de rosee, & de l'autre seiche, ainsi que l'on void dans des tapisseries de son temps, que l'on tend à la feste de saint André, iour dedié aux solemnitez de cét ordre. Il est vray que quelques-vns disent que ces Cheualiers ont eu leur commencement de la legion Thebeenne : mais cela est trop obscur pour y alleoir aucun fondement.

Le Duc Philippe ayant donc erigé cét ordre, il s'en declara le grand Maistre, & donna à ces nouueaux Cheualiers vne robbe de laine teinte en escarlate : que son fils Charles le Hardy changea en vne de soye au Chapitre de Valenciennes, & vn collier d'or où estoit enlaidé vn fusil qui sembloit faire sortir du feu d'un caillou, l'Embleme de feu son pere, & au bout de ce collier la toison d'or, le tout avec obligation de remettre cela en l'Ordre aduenant qu'ils mourussent, pour estre donné à ceux qui le meriteroient. Paradin en ses Symboles interprete ce blazon en sorte qu'au fusil il donne ceste deuise, *Ante ferit quam flamma misceat*. Et à la toison, *Pretium non vile laboris*.

Les premières charges de cét institut sont le Chancelier, le Thresorier, le Roy d'armes, & le Greffier, qui iugent sans appel de tous les debats qui interuiennent entr'eux, & des crimes s'il y eschet. Philippe n'en fit au commencement que vingt-cinq : mais trois ans apres il en adiouta encores six de sorte qu'ils estoient trente-vn.

Depuis Charles le Quint pour les diuerses Prouinces où il cōmandoit, en augmenta le nombre iusques à cinquante & vn, mais depuis le Chapitre tenu à Gand par l'autorité de Gregoire XIII. on accorda à Philippe II. Roy d'Espagne, confirmee encores à Philippe III. par Clement huictiesme, qu'ils pourroient créer des Cheualiers hors de Chapitre, quand il leur plairoit. Ces Cheualiers ne peuuent estre que des maisons qu'en Espagne ils appellent *Grandes*.

Richard de Vuassebourg en ses antiquitez Beligiques, fait mention des anciens Cheualiers du Cygne, instituez par Silius Brabon, duquel, selon aucuns, le Brabant a pris son nom, leur donnant cét oyseau pour hieroglyphe de la concorde qu'il vouloit estre en eux.

L'Ordre des Cheualiers du Porc-Epic en la Maison d'Orleans.

Charles Duc d'Orleans, qui fut apres Roy de France, & sixiesme du nom, à l'imitation de Philippes Duc de Bourgogne, erigea l'ordre des Cheualiers du Porc-Epic, portés en leurs bandidiers la figure de cét animal, avec ce Symbole ; *Cominus Eminus*, comme dit Paul Ioue.

Aucuns n'estoient enrollez en ceste compagnie, qu'ils ne fussent de grande noblesse, & de grande perfection aux armes. Depuis Louys douziesme Roy de France, & pourtant Duc d'Orleans, & Comte de Blois, comme son heritier, print la deuise d'un Porc-Epic couronné, avec ceste inscription, *Vltus anos Troia* : sur sa monoye mesme il en fit grauer la figure, laquelle avec celle du loup estoit anciennement les armes des Comtes de Blois.

Qui fut cause que Charles print ceste deuise, ce fut que le Porc-Epic se deffend de pres

& de loing contre les chiens, leur dardant à guise de fagettes ses picquerons: & Charles pour faire paroistre qu'il se tenoit assésuré contre tous reuers de fortune, & tousiours prest de se deffendre contre quiconque l'offenseroit, le donna pour blazon à ses Cheualiers.

L'Ordre des Cheualiers du Chardon de la Vierge Marie, en la maison de Bourbon.

Louys second Duc de Bourbon, surnommé le Bon, fils de Pierre premier, qui fut tué en la bataille de Poictiers que le Roy Jean eut contre l'Anglois, apres auoir seruy les Roys Charles cinquiesme, & Charles sixiesme, contre ces peuples leurs ennemis. Retourné qu'il fut d'Afrique où il auoit conduit vne armee contre les infidelles, lors que par les factions des mailons d'Orleans, & de Bourgongne, le Royaume sembloit estre arriué à sa derniere ruyne, le Bourguignon ayant institué l'ordre de la Toison, & l'Orleanois celuy du Porc-Epic, il institua l'ordre des Cheualiers du Chardon de la Vierge, pour authoriser davantage son pouuoir, qu'il employa entierement à l'assistance, & protection de Charles Duc d'Orleans, de l'Philippe Comte d'Eureux, & de Jean Comte d'Angoulesme, pupiles de Louys Duc d'Orleans son nepueu, contre le Bourguignon qui l'auoit miserablement occis. Le collier de cét ordre estoit d'ortillu de fleurs de lys, avec vn entrelacs en esgale distance de fueilles de chardon, d'où pendoit vne Croix, & autour ceste deuise *Esperance*.

Ce Prince honora de cét ordre les Gentils-hômes qui auoient rendu quelque seruice signalé à la maison de Bourbon: & quant à luy, il s'en declara le grand Maistre.

En signe dequoy il en adiousta à ses armes le collier, qui estoit tout parsemé de fleurs de lys, tout en champ d'argent, & de gueules sur vn escu de couleur bleue, avec ceste inscription, *Esperance*.

Quant à cét Embleme composé de lys, & de chardons, le Duc Louys a voulu signifier sa constance contre toutes les aduersitez qui luy pourroient arriuer, & mesmes qu'il auoit esperance de plus grandes prosperitez, le chardon par ses fueilles piquantes representant ce qui afflige, & le lys qui a tousiours ses feüilles vertes, l'espoir comme de tout temps il en a esté le hieroglyphe entre les anciens.

L'Ordre des Cheualiers de saint André du Chardon, & de la Rue au Royaume d'Ecosse.

30. **H**Vngues Roy des Escossois sur le point de donner la bataille à Althelstam Roy des Anglois, il luy apparut au ciel vne Croix fort lumineuse de la figure de celle sur laquelle saint André mourut martyr pour nostre Seigneur. Ce qu'ayant pris pour son augure, il choqua son ennemy, le vainquit, & mit à mort, & tailla en pieces toute son armee.

En memoire de laquelle victoire qu'il auoit obtenuë, comme il est croyable, par les merites de ce glorieux Apostre: ce Roy voulut que ceste Croix fust grauee sur ses armes, & peinte aux enseignes qu'on portoit en ses armées: ce qu'encor obseruent religieusement les Roys d'Ecosse.

De là a pris origine l'ordre des Cheualiers de saint André, celebre en ce Royaume, appelez communement les Cheualiers du Chardon.

Les armoiries & monnoye du Roy, sont enfermées dans le collier de cét ordre plein de chardons, avec cét eloge, *Nemo me impune lacessit*: d'autant qu'on ne peut manier le chardon sans se picquer.

La figure de ce collier est telle, c'est vn cordon d'or repris à plusieurs nœuds, dans lesquels sont entez des fleurs de chardons portans attachez en bas l'image de saint André, tenant deuant soy la Croix de son martyre.

Les armes reuestuës de ce collier sont vn Lyon rouge, aacië, & premier blazon du Roy Fergus, dans vne mante de bleu celeste frangée à ses bords de deux lignes tirees en rouge, avec deux rangs de lys enfilez vis à vis d'un filet d'or que Charlemagne ioignit aux armes d'icelle, en tesmoignage de l'alliance qu'il traicta avec les Escossois, & le Roy Achais, qui est encor auourd'huy en son entier, d'autant que si le Lyon est l'armoirie de ce Royaume, le Lys l'est de la France, de laquelle estoit Roy cét Empereur, lequel non content de cela pour cōfirmer dauantage ceste amitié iuree, il adiousta au cercle de la couronne d'Ecosse quatre lys d'or avec quatre croix de mesme esgalemēt distantes les vnes des autres, les lys toutesfois vn peu plus esleuez, afin qu'il parust à tout le mōde que lors ce peuple excelloit en l'obseruation de la Religio Chrestienne, & integrité de la foy. Quelques-vns rapportēt l'institution de ces Cheualiers à Charles sixiesme Roy de France, qui renouuella l'ancienne alliance des François avecques ceux d'Ecosse, & qu'en recognoissance du secours qu'ils luy auoient rendu en ses plus desesperees affaires, il accreut leurs armes de celles de France. La premiere opinion est plus certaine.

Entre

Entre les Escossois a encores fleury l'ordre des Cheualiers de la Ruë : Ses enseignes estoient vn collier fait de deux branches de rue , ou de chardon , où pendoit l'image de S. André avec sa croix. Il ne se trouue rien de son origine.

L'Ordre des Cheualiers de sainte Marie , ou de l'Elephant.

EN Dannemarc a fleury l'ordre que l'on dit auoir esté institué par le Pere de Christiene 31.
Roy de ce Royaume.

Ses blazons sont vn collier semé d'Elephans ayans leurs tours & Chasteaux sur le dos, avecque des esperons entrelassez, portans en bas l'Image de la Vierge Marie , ceinte de rayons, où tient vne petite medaille d'or, sur laquelle sont grauez trois cloux , representans ceux avec lesquels nostre Seigneur fut attaché à la Croix.

Les armoiries de ces Roys qui sont trois Lyons verds en champ d'or semez de larmes de sang , ou de cœurs d'hommes, se voyent enuironnez de ce collier.

Or les Roys de Dannemarc ont donné le tiltre d'Elephans à ceste Cheualerie , & en ont orné leurs armes , d'autant que ces animaux semblent approcher le plus de la nature de l'homme , & reluire , par maniere de dire en toutes vertus : comme de force militaire , de prouidence , de Religion , de pieté & de clemence Royale , afin que ceux qui en seroient honorez , se souuinssent de s'aduancer d'autant plus en la perfection de ces vertus sur ces animaux , que la nature de l'homme est plus excellente que la leur.

L'Ordre des Cheualiers de Cypre.

LA maison de Lusignan qui a donné tant de Roys , & de Princes à la Chrestienté , particulièrement au Royaume de Hierusalem , d'Armenie , & de Cypre , a donné commencement à ceste Cheualerie , encor qu'on ne sçache pas en quel temps. 32.

Ses enseignes estoient vn collier fait d'un cordon d'or , où estoient enlassez de grands caracteres , & au dessous pendoit vne espee ayant la lame d'argent , & la poignée d'or qu'entournoit ceste diuise Françoisé , *Pour loyauté Muintenir* , pour apprendre à ceux qui estoient de cet ordre qu'ils ne doiuent iamais laisser passer l'occasion de se monstrier genereux & d'un grand courage , ne portant l'espee que pour cela , & qu'ils deuoient conseruer entre eux la concorde & l'amitié pour la defense de la patrie , la terre Sainte denotant le silence entre les anciens Romains. Les armes de ceux de la maison de Lusignan sont ceintes de ce collier.

L'Ordre des Cheualiers de la Colombe , & de la Raison en Castille.

JEAN I. Roy de Castille , pour exciter ses courtisans & Gentils-hommes à entreprendre 33.
quelque chose de grand , & digne du rang qu'ils tenoient , inuenta cet ordre l'an 1300. leurs blazons estoient la figure d'une Colombe , où pendoit vn collier d'or entremeslé de rayons Solaires : desquels colliers estant à Segobie le iour qu'on celebrait la feste de saint Jacques , il en distribua dedans la grande Eglise vn grand nombre , les prenant sur l'Autel avec beaucoup de ceremonie & de solemnité , & les donnant à ceux qu'il vouloit faire de cet ordre , avec vn liure des constitutions qu'il desiroit qu'ils obseruassent.

Ce Roy institua vne autre Cheualerie qu'il nomma de la Raison , moins noble que le premier , à laquelle il admettoit les Gentils-hommes de moindre marque , mais neantmoins qui se portoient valeureusement aux exercices militaires , comme à courir la lance , & autres.

L'Ordre du Dragon entre les Allemands & les Hongres , de Tassin en Boheme , & des disciples en Autriche.

L'Empereur Sigismond a tesmoigné vn si grand zele à l'aduancement de la Religion Chrestienne , qu'il ne s'est contenté d'auoir liuré plusieurs combats aux Turcs , & d'en auoir 34.
remporté plusieurs grandes victoires : mais encore à la sollicitation ont esté tenus deux

Conciles generaux, l'un à Constance, & l'autre à Basle, pour l'extirpation des heresies & du schisme, qui trauailloit pour lors la Chrestienté, & specialement en Boheme & en Hongrie.

Et pour comble de ceste sienne deuotion il erigea l'ordre militaire du Dragon, ainsi nommé d'autant que les Cheualiers portoient pour deuise vn Dragon precipité, pour tesmoigner que par son moyen le schisme & l'heresie (dragons deuorans la Religion) auoient esté vaincus & supplantés.

Hierosme Romain dit, que du temps du Roy Iean & des Empereurs Sigismond & Albert, il y auoit en Allemagne trois Ordres illustres & insignes, & vn nommé Moyse Didaco de Valera Espagnol, pour sa force & valeur les obtint toutes trois, à scauoir d'Albert, de Draconique, comme Roy de Hongrie, du Tulin, comme Roy de Boheme, & du collier del'ordre des Disciplines enrichy d'une Aigle blanche (qui sont les armes des Roys de Pologne estant en champ de gueule) comme Duc d'Autriche.

Aux histoires de Hongrie est faite mention des Cheualiers Hongrois, desquels le blazon estoit vne Croix verte attachee à vn manteau d'escarlata.

Hierosme Megyferus Historiographe del'Archiduc d'Autriche, au traicté qu'il a fait des trois genres des Cheualiers, dit que cet ordre a esté institué il y a deux censans en Hongrie, pour s'opposer aux Turcs qui talchoient de l'occuper.

L'Ordre Militaire au Royaume de Suede.

35. **L**E soing qu'ont eu autrefois les Roys & Princes des Gots, de faire perpetuer aux siecles à venir l'honneur & la gloire qu'ils auoient acquise par les armes, se remarque en leurs armoiries, de drapeaux, blazons, & boucliers qu'ils ont laissez grauez en plusieurs lieux en la Flandre Australe, dans le magnifique port d'Angouë, ville où les Roys de Suede prenoient les resolutions de la paix ou de la guerre.

On void encore sur des rochers grauez par ordre Alphabetique les anciennes armoiries des excellens personages qui ont autrefois flory entre ces peuples-là.

Ces Roys auoient anciennement pour deuise deux Vierges couronnees, vestuës de drap d'or, s'embrassans mutuellement dans vne forest verdoyante, comme faisant gloire par là des belles Nymphes & Deesses qui frequentoient en ceste Prouince.

Après quelques siecles toutesfois les Princes de Suede prindrent pour leurs armes trois couronnes en champ d'azur à cause de la grande estenduë de leur domination, leurs magnifiques expeditions en guerre, & l'inespuisable abondance des metaux qui se trouuent en ce pays.

Depuis qu'ils se furent conuertis à la foy, ils instituerent des ordres militaires à l'imitation des autres Princes Chrestiens, desquels l'un auoit pour blazon vn carquan d'or fait de plusieurs Cherubins & Seraphins attachez les vns aux autres, & entremeslez de Croix Patriarchales, le tout enrichy del'image de nostre Seigneur.

L'Ordre des Cheualiers du Glaive & du Baudrier en Suede.

36. **I**L y a eu vn autre ordre en Suede appellé des Porte-espees, à cause que leur collier estoit estoffé d'espees d'or iointes les vnes aux autres par vn Baudrier, & lesquelles se sembloient choquer de leurs pointes ensanglantees, comme symbole de la Iustice, & des armes, les deux colonnes d'un estat: leur blazon estoit vn bouclier d'or, qui auoit la bosse rouge. Devant, où estoit peint vn Lyon jaune & rampant, à l'entour duquel il y auoit trois couronnes royales avec autant de clochettes rouges: dessus ce bouclier estoit vn heaume couronné d'une couronne murale argentee & couuerte d'un panache verd, de laquelle sortoient deux enseignes argentees, lesquelles portoient peints en leurs drapeaux des coqs rouges: depuis que ce pays a changé de Religion, cet ordre a esté entierement esteint.

L'Ordre des Cheualiers de l'Espic en Bretagne.

FRançois premier de ce nom, Duc de Bretagne, fils de Iean cinquieme, & nepueu de Iean quatrieme, surnommé le conquerant, qui transporta le premier ce Duché en la maison de Montfort descenduë de ce grand Euerard de Montmorency, institua l'an mil quatre cens cinquante, l'ordre de l'Espic, tant pour honorer la memoire de son ayeul, que pour decorer dauantage sa noblesse.

Il donna à ceux qu'il y admit vn collier d'or tressé d'espics de bled, & noiez en lacs d'amour, leurs queue's se iettans derriere, le tout reuenant presque à la forme d'une couronne de Cerez.

A ce collier pendoient à deux chainettes, vne Hermine dessus vne petite coline verte, avec ceste devise de Jean le Conquerant, *Amaire*, symbole d'une ame pure, & genereuse.

Cet animal selon Plin, estât si amoureux de pureté, que s'il est pouruiuy des chasseurs, se voulant sauuer dans son clapier, s'il en trouue l'entree sale; & vilaine, il ayme mieux se laisser prendre que d'y entrer, & se souiller en y entrant.

Anne fille de François second Duc de Bretagne, & de Marguerite de Foix, fille de Gaston de Foix, & de Eleonor Royn de Nauarre, print presque vne semblable devise, à sçauoir, *Plus tost mourir*, ainsi que l'on void encore aujourd' huy au Chasteau de Blois.

Cet ordre des Cheualiers del'Espic print fin lors que la Duché de Bretagne fut incorporée à la Couronne de France par le mariage de la seldite Anne avec Charles huictiesme, depuis le deceds de cestuy-cy à Louys douziésme Roy de France.

L'Ordre des Cheualiers du Croissant entre les Angevins & Siciliens.

REné Duc d'Anjou, & Roy de Sicile, de Naples & de Hierusalem, fonda cet ordre en l'Eglise de saint Maurice, Cathedrale de la ville d'Angers, & donna à ceux qu'il y ad- 38.
mit vn collier d'or où estoit attaché vn croissant avecques ceste devise, *Los en croissant*. Personne n'estoit receu en ceste Cheualerie, si premierement il n'auoit rendu quelque signalé tesmoignage de sa valeur: ce que l'on recognoissoit au nombre des combats auxquels il auoit assisté, par des petits bastons en fermez chacun avec vn anneau qui leur pendoit du col, avec vne petite bande.

Les premiers qui furent honorez de cet ordre furent Jean frere aîné du Roy seldit, qui estoit Duc de Lorraine, & de Calabre, le Viconte de Ballore, & Estagy, Bertrand Seigneur de Beauuais, & autres, les noms desquels sont en ceste Eglise de saint Maurice d'Angers.

Ces Cheualiers estans obligez de participer, & communiquer esgalement à la fortune, bonne ou mauuaise, des vns ou des autres, & de se prester charitablement ayde, & secours en toute necessité sans qu'aucun peut offencer l'autre par armes. La famille d'Anjou ayant esté esteinte par la mort de ce Roy, cet ordre print fin aussi.

L'Ordre des Cheualiers de la Nauire ou de la Coquille.

Les François estoient anciennement fort sçauants, & experimentez aux armes, selon que le rapporte Pacatus, Apollinaris, & saint René, s'addonnant à la marine avec 39.
vne telle affection, qu'ils arresterent, que si en quelquenation que ce fust, ils bastilloient vne ville pour y faire leur demeure, ses armoiries seroient vn nauire.

Ceux-cy disent qu'ils pouuoient bien auoir appris ceste experience des Gepides qui ont autresfois tenu tout l'Ocean Germanique: s'y eians en fin rendus si bons maîtres, qu'ils ont excellé tous les autres peuples par de si belles expeditions d'outre-mer.

En tesmoignage de quoy saint Louys fit marquer certaine monnoye d'un nauire, & de coquilles de mer: Et l'ordre d'une certaine Cheualerie en France, qui portoit pour devise deux nauires de couleur noire, dans vn escu en champ d'or fait de coquilles de mer, dans lesquelles estoient deux demies lunes de couleur rouge, pour memoire de tant de victoires que les Roys de France ont emportez sur les Barbares de l'Orient, & de leurs drapeaux qu'ils leur ont enleuez, marquez de la figure de cet astre nocturne, lequel est l'enseigne des Turcs, comme l'aigle l'estoit des Romains, l'ayant pris de l'ancienne Byzance qu'ils eurent pour ses blazons, ainsi que Lipsius dit l'auoir obserué dans Busbec, & de certaines medailles antiques, aux reuers desquelles estoit vne demie lune avecque ceste inscription. **BYZANTION.**

L'Ordre de saint Michel en France.

Louys vnziésme transporta des Romains aux François la coustume que les grands ont de porter vn collier d'or, lors dit Gaguin, que le premier d'Aoust l'an 1469. il institua à

Amboise l'ordre de saint Michel, qu'il augmenta de nouvelles constitutions au Plessis lez Tours, donnent pour devise à ceux qu'il admit à ceste Cheualerie le collier d'or tissu de coquilles attachees les vnes aux autres, à guise de celle que les Senateurs Romains portoient sur le bras vn peu esleuees en dehors, avec ceste devise: *Immensi tremor Oceani*, prouoque à cela par l'exemple de son pere Charles V II. qui auoit en ses enseignes l'image de cét Archange, lors qu'il fit son entree à Rouen, à cause que par vn miracle special il auoit esté veu sur les ponts d'Orleans, deffendant ceste ville-la contre les Anglois en vn assaut qu'ils luy huroiēt. Au commencement le nombre de ces Cheualiers n'estoit que de trente des plus grands & plus vertueux du Royaume desquels le Roy voulut estre le grand Maistre.

Or ceux qui sont admis à ceste cōpagnie s'obligent par promesse particuliere d'obeyr au Roy, & n'en peuvent estre cassez, si ce n'est pour crime d'herésie, ou de Leze Majesté, ou pour auoir quitté son rang en guerre, & s'en estre fuy par couardise.

Or lors que quelqu'un estoit mort il falloit en eslire quelqu'un en sa place, on ne le faisoit point par vœux & suffrages, mais avec des petits billets signez que les Venitiens appellent ballotes, qu'on mettoit en vn bassin, apres que le Chancelier les auoit comptez, celui qui en tiroit le plus estoit receu par le Prince en la place du decedé avec ces paroles: *l'ordre te tient pour frere & compagnon*. C'est pourquoy il te donne ce collier: plaise à Dieu que tu le portes long temps.

Après cela en signe d'amitié il baise chacun des Cheualiers. Cét ordre à son Chancelier, son Thresorier, son Porte-baïstou, nommé saint Michel, & son Greffier qui tient registre des noms & beaux exploits des Cheualiers.

Nos Roys honorent encores de cét ordre les Princes estrangers, en tesmoignage d'amitié, lesquels, s'ils se veulent declarer leurs ennemis, leur renuoyent l'ordre, pour estre liberez de leur serment.

L'Ordre des Cheualiers de saint George de Carinthie.

41. **R**odolphe d'Habsburg qui fut le premier de la maison d'Austriche, qui paruint à l'Empire pour deffendre la Hongrie, la Syrie, & la Carinthie, contre les armes des Turcs qui sembloient les menacer de ruine, institua l'ordre de saint Georges, & donna au Maistre General d'iceluy vne ville de Carinthie de fort belle assiette, pour y faire sa demeure ordinaire, & l'honora de la dignité de Prince. Il voulut encores que l'Euesque de la cité venu d'Austrie, dependist de luy pour le temporel, avec les Chanoines qui furent transportez à cause de cela en la forteresse, & porterent la Croix rouge de saint George dans les armoiries de leurs maisons. Et à ce que rien ne manquast à la splendeur de ce nouuel ordre, cét Empereur luy transfera les Chasteaux & domaines des Topars de Cranichbeg tout fraichement occis avec leurs familles, à sçauoir les terres de Trautmantdorf, Scharfenech, & de sainte Patonille.

Bernard de Luxembourg en son liure qu'il a fait des Ordres Militaires, diēt que celui de saint Georges fut institué du Pape Alexandre V I. & de Maximilian Empereur contre les Turcs, dont les blazons furent vne Croix d'or, avec vne couronne dans vn anneau d'or.

L'Ordre de la Croix de Bourgogne au Royaume de Thunis.

42. **C**harles le Quint Empereur & Roy des Espagnes apres auoir remis Muleassas Roy de Thunes en son Royaume, qui en auoit esté chassé par cét insigne Corsaire Barberousse, estant entré en pompe, comme victorieux, dans Thunes, portant vn manteau sur lequel il y auoit vne Croix de Bourgogne, laquelle il auoit accoustumé de porter en la guerre, comme il estoit d'un grand & magnanime courage, & qui desiroit se concilier la bien-veillance d'un chacun, desirant mesme recognoistre la valeur de ceux qui l'auoient assisté en ceste cōqueste, en memoire aussi de ceste signalee victoire, il institua l'ordre de la Croix de Bourgogne l'an 1535. le iour de Sainte Marie Magdeleine: à laquelle Croix il adiousta vn fusil qui tiroit des estincelles de feu d'un caillou, avec ceste inscription: *Barbaria*.

L'Ordre des Cheualiers de saint Estienne en la Toscane.

43. **C**osme de Medicis premier Duc de Florencel'an 1561. institua l'Ordre de S. Estienne Pasteur & Martyr, au iour duquel il auoit gagné la bataille de Marciano le 6. iour d'Aoust: & en la mesme année le Pape Pie I V. le confirma l'an 1561. le premier iour de Feurier, leur nōtroiāt tous les priuileges qu'ot ceux de Malte, sous la regle de S. Benoit, à condition que tous ceux qui voudroient estre de cet ordre feroient vœu de charité, chasteté cōiugale, & obe.

dièce, sans admettre personne s'il n'est noble, & né en legitime mariage, & nommément Catholique, & sans note d'infamie.

Ils portent vne robe de camelot blanc avec vne croix rouge sur le costé gauche, tant au manteau qu'à leur habit ordinaire, & sont tenus de porter les armes pour la defence de la foy Chrestienne tant par mer que par terre, & de rachepter les prisonniers Chrestiens, & subvenir aux pauvres, & de dire chacun iour cent *Pater noster*, & cent *Aue Maria* pour leur service ordinaire, & à certains iours solennels, ils sont tenus au double : & lors qu'il meurt quelqu'un de la compagnie, chacun doit dire en son intention cent *Pater noster*, & cent *Aue Maria*, ou bien l'office des Morts.

Leur grand Maistre est le Duc de Florence : la forme de leur croix est semblable à celle de Malte, ils ont aussi entr'eux des Prestres & des Freres Seruans.

L'Ordre des Cheualiers du Sainct Esprit en France.

Henry troisieme du nom, Roy de France, & de Pologne, pour marque d'une eternel- 44
le pieté, & de la recognoissance qu'il desiroit rendre à Dieu des bien-faits qu'il auoit receuz de sa Majesté le iour de la mission du saint Esprit, ayant esté en pareil iour esleu Roy de Pologne, succedé à la couronne de France par la mort du Roy Charles neuuesme son frere, & pris naissance en mesme iour.

Il institua l'ordre des Cheualiers du saint Esprit, l'an mil cinq cens septante-neuf, le premier iour de Ianuier, à Paris, en l'Eglise des Hermites de saint Augustin.

Cet ordre institué pour l'extirpation des heresies & pour l'augmentation de la Religion Catholique, Apostolique & Romaine.

Il voulut qu'aux ceremonies ces Cheualiers eussent chacun vn mâteau de velours noir, tous parsemez de lys, & de flammes en broderie d'or, & d'argent, avec vn grand colier d'or entrelassé de lys & de flammes, au bout duquel est vne croix de Malte, au milieu de laquelle est vne colombe. Il y a vn liure particulier de cet institut qui est assez vulgaire.

L'Ordre des Cheualiers du Sacré Sang de nostre Seigneur Iesus Christ, à Mantouë.

Vincent de Gonzague, quatrieme Duc de Mantouë, & second de Montferrat, insti- 45
tua cet ordre, l'an mil six cens huit, aux nopces de son fils François avec Marguerite de Sauoye, pour la deffence, & augmentation de la Region Chrestienne, en institua iusqu'au nombre de vingt Cheualiers : lequel ordre a esté confirmé par le Pape Paul cinquieme.

Or d'autant que ceux de l'Eglise saint André à Mantouë tiennent qu'ils ont vne partie de l'esponge de nostre Seigneur, & trois gouttes de sang que l'on dit auoir esté recueillies par S. Longis, Centenier, & Martyr, il erigea son ordre sur ce sujet, avec ceste inscription, *Nil ista triste recepro*. Et pour le colier il le fit faire de petites vergettes d'or liees ensemble, & du feu au dessus, entremeslees toutesfois d'autres pieces où ces mots sont écrits, *Domine probasti me*, voulât par ce symbole apprendre à ceux de son ordre, qu'au plus fort de leurs aduersitez ils se deuoient garder la foy, & viure ensemble en amitié, & concorde perpetuelle.

L'Ordre des Cheualiers de Nostre Dame du Mont Carmel, & de saint Lazare en France.

Av commencement de ce Traitté il a esté parlé de la reunion des deux ordres de saint 46
Maurice, & de saint Lazare en Sauoye : mais les Cheualiers de saint Jean auoient obtenu du Pape Innocent huitiesme aussi, qu'il fust reünny avec leur pour le regard de la France : ce qu'ils retindrent iusques à Amarus le Chaste. Cestuy-cy étant Cheualier de saint Jean, & grand Maistre de l'Ordre de saint Lazare, s'efforça de faire rendre à ses confreres les biens qui leur appartenoient.

Sa mort luy empescha de faire réussir son dessein : mais de nos iours Philbert de Nerestan, doué d'autant de pieté, & de courage, que de force, & de modestie, a repris les mesmes brisées de son predecesseur, bien qu'il ne fust Cheualier de saint Jean comme luy, & à cet effect s'en alla à Rome vers le Pape Paul cinquieme, où il optint ce qu'il desiroit, & de plus, que d'oresnauant les Cheualiers François de saint Lazare se nommeroient Cheualiers de nostre Dame du mont de Carmel, & de saint Lazare, & que pour leurs blazons ils porteroient au col vne croix violette, où seroit l'image de nostre Dame, & vne autre cousue sur l'un des costez de leur manteau, de mesme couleur & figure.

L'Ordre de la Cordeliere ou du Cordon institué par Anne de Bretagne, Royné de France.

47. **C**ommela Royné Anne de Bretagne, épouse du Roy Charles 8. estoit vne Princesse chaste & vertueuse, elle fit tousiours estat des Dames d'honneur & de vertu, lesquelles pour honorer dauantage & recognoistre leurs merites, elle institua l'Ordre de la Cordeliere, à l'imitation des Roys qui ont dressé plusieurs Ordres de Cheualerie, leur en faisant don, comme d'une escharpe ou collier de Cheualerie, les admonestant de viure chastement & sainctement, & auoir tousiours en memoire les cordes & les liens de Iesus-Christ, & elle mesme pour les esguillonner dauantage à la vertu & faire estat de ce Cordon ou Cordeliere, en couronna son Escusson my-party des lys de France & de l'Hermine de Bretagne, comme nos Roys bordent leurs Escussions des colliers de leurs Ordres du saint Esprit & de saint Michel.

Des Cheualiers instituez par les Papes.

Les souverains Pontifes ont institué plusieurs ordres de Cheualiers, qui sont les Cheualiers de Iesus-Christ, du saint Esprit, de saint Pierre, de saint Paul, de saint George, de Pape Pie, de Lorrette, de saint Antoine, de Iulius, & de Lys: Cheualiers dis-je, les vns Ecclesiastiques, les autres laïques, tous pensionnaires du Pape, distinguez les vns des autres par des croix de diuerses couleurs.


Les Cheualiers de Iesus Christ portent la Croix rouge enuiron telle que la portent les Cheualiers de mesme nom en Portugal, enfermée dans vne bordure d'or. Ils furent instituez par le Pape Iean vingt-deuxiesme, ainsi que disent François Tarase, & Iean Confetrus, dans le Recueil des priuileges des Mendians.

Les Cheualiers du saint Esprit, appelez à Rome les freres de l'Hospital du saint Esprit, portent la Croix blanche sur leur robbe, ou sur leurs manteaux. Eram Azore dit qu'en Saxe il y a vn ordre aussi de Cheualiers du saint Esprit.

Leon dixiesme fonda les Cheualiers de saint Pierre contre les Turcs, ainsi que dit Alphonse Ciaconius en l'histoire des Papes, & des Cardinaux, lequel Pape Paul troisieme confirma. Ceux de saint George par Alexandre quatriesme.

Le Pape Pie quatriesme l'an mil cinq cens soixante institua ceux qui portent son nom, lesquels il voulut qu'ils precedassent tous ceux des Empereurs, & autres Princes, & les Cheualiers de Malte mesmes, d'autant qu'ils estoient ses domestiques, ou commensaux. Sixte cinquiesme l'an mil cinq cens huitante six institua ceux de Lorrette.

C'est sommairement ce qui se peut dire des Ordres de Cheualerie qui ont eu quelque nom parmy les Chrestiens; Quant à leurs statuts, & constitutions particulieres le Lecteur s'en pourra instruire plus amplement dans les Autheurs.



INSTITUTION



I N S T I T U T I O N
DE L'ORDRE DES CHEVALIERS
DE LA MILICE CHRESTIENNE FAICTE PAR
Monsieur le Duc de Neuers, en l'annee 1620.



S'ENSVIVENT les statuts de l'Ordre des Cheualiers de la Milice Chrestienne, sous le tiltre de nostre Dame & de saint Michel, institué par Charles de Conzagues de Cleues, Duc de Niuernois & de Rethelois, Pair de France, &c. Et Adolphe Comte d'Altham, &c. En la ville d'Olmitz Capitale de Moraue, le Samedy dix-septiesme iour de Nouembre mil six cens dix-huict, & depuis receu & accepté à Vienne en Autriche, le Vendredy huictiesme iour de Mars mil six cēs dix neuf, par plusieurs Princes & Seigneurs de diuerses nations assemblez à cest effect.

I.

Cet Ordre de Cheualerie a pour fondement les deux principaux preceptes de la Loy Diuine, *Aimer Dieu de tout son cœur & de toute son ame, & son prochain comme soy mesme*, & pour but de procurer la paix & vnion, entre les Princes & peuples Chrestiens, & deliurer des mains infidelles ceux qui sont sous leur oppression.

II.

Tout Ecclesiastique & Laique de quelque nation qu'il soit, pourra estre receu audit ordre, pourueu qu'il soit trouué auoir les qualitez qui ensuiuent.

III.

La premiere, qu'il soit homme de bonne vie & mœurs, sans reproche, ny note d'infamie, ny chargé de debtes au delà de ses biens & facultez.

IV.

La seconde, qu'il soit nay en legitime Mariage, excepté les enfans naturels des Empe-reurs, Roys, & Princes Souuerains.

V.

La troisieme, qu'il preuue estre descendu de Noble race, iusques au quatriesme degré ou qu'il fasse apparoir que luy ou son Pere soyent paruenus à la charge de General d'armee, ou autre eminente dignité par leur merite & valeur.

VI.

La quatrieme, que pour estre admis en l'Ordre, il ayt douze ans accomplis, & pour entrer aux charges, qu'il en ait au moins dixhuict.

VII.

Cet Ordre sera composé d'un Chef, de douze grands Prieurs, septâte & deux grandes Croix, de Commandeurs, & Cheualiers.

VIII.

Et d'autant que le fondement & but dudit Ordre poutra donner desir à quelques personnes vertueuses, & de courage d'y entrer, qui pourtant auroient peine de faire preuue si exacte de leur noblesse, ils y seront receus pour freres d'armes, pourueu qu'ils ayent les autres qualitez requises, & n'ayent fait aucun acte derogeant audit Ordre, & pourront mesme par leurs merites & seruices rendus audit Ordre, paruenir de grace à plus haute dignité.

IX.

Seront establis en l'Ordre diuers offices, lesquels pourront estre possédez les vns par les Grands Croix, les autres par les Commandeurs & Cheualiers, & quelques vns aussi par les

• iij

Freres d'Armes, selon les dignitez desdits offices, ainsi qu'il sera plus particulierement determiné au premier Chapitre general, lequel ils seront obligez tenir dans trois ans, au lieu qui sera entr'eux conuenu & estimé le plus commode pour proceder à l'election dudit Chef & autres principaux Officiers de l'Ordre.

X.

Ceux qui se presenteront pour estre receus dans ledit Ordre, y entreront par la qualité de Cheualier, pour apres paruenir aux autres dignitez, & neantmoins iusques à ce que ce Chapitre general ait esté assemblé on pourra recevoir des Grands Prieurs, Grands Croix & Commandeurs, pour remplir l'Ordre de personnes capables d'y rendre presentement service, sans qu'apres ledit Chapitre general tenu, aucun de quelque eminente qualité qu'il soit y puisse estre receu & admis, que par les degrez susdits.

XI.

Celuy qui deura estre receu en l'Ordre estant confessé sera conduit en l'Eglise ou Chapelle par les deux plus anciens dudit Ordre qui s'y rencontreront, & par eux mesmes presenté à genouil sans espee ny manteau à celuy dell'Ordre qui aura pouuoir de le luy conferer, lequel ayant receu son serment en la forme qui se verra à la fin des presents Statuts, luy donnera l'habit cy deffous déclaré, l'espee & la Croix, & l'embrassant luy dira. *Nous vous remercions en l'Ordre des Cheualiers de la Sainte Chrestienne, sous le titre de nostre Dame & de S. Michel, que par leur intercession la Sainte Trinité vous confirme en la gloire de son nom, à la paix des Chrestiens & à la deliurance de ceux qui sont sous l'oppression des Infidelles. Amen.*

Cela fait le Cheualier se leuera, & embrassera les deux qui l'auront accompagné, & tous les autres dudit Ordre la presens, & sera par lesdits deux nommez conduit deuant l'Autel pour y ouyr la Messe deuotement, & icelle dicte Communier.

XII.

Cet Ordre aura pour marque deux Croix, l'une d'or esmaillee de bleu, en l'un des costez de laquelle sera l'Image de Nostre Dame tenant N. S. entre ses bras, & en l'autre costé celle de Saint Michel, & sera ceste Croix portee au col avec vn ruban de soye bleüe, & or, large de trois doigts, tant par lesdits Grands Croix, Commandeurs que Cheualiers. L'autre de velours bleu en broderie d'or, dans le milieu de laquelle sera l'Image de N. D. environnée de rayons d'or, couronnée de 12. estoilles. portant N. S. entre ses bras, vn sceptre en la main droite, ayant le Croissant sous les pieds, au tour de laquelle sera le Cordon de saint François, & sortiront des quatre angles de ladite Croix autant de flâmes d'or. Icele Croix sera portée sus le costé gauche du Manteau tant par les grands Croix, Commandeurs, que Cheualiers, sans y auoir difference des vnes aux autres, que de quelques rayons d'or.

XIII.

Aux iours de ceremonie les Grands Croix Commandeurs & Cheualiers, auront tous l'habit de deffous blâc avec l'espee argentee, le fourreau & la ceinture blanche, & les Grands Croix dessus ledit habit blanc vne Dalmatique de roile d'Or cramoisie à fleur couppee à demy bras & descendante iusques aux genouils, doublee de Taffetas blanc, & bordée de Galon d'Or. Sur laquelle Dalmatique, ils porteront le grand Manteau d'escarlata rouge, à queue trainante, doublee de satin blanc, bordé d'un tissu d'or ouuert du costé droit depuis le haut iusques au bas, & rattaché sur l'espaule d'un cordon rond, avec les houppes au bout de soye cramoisie & or. Et sera ledit Manteau relevé du costé gauche, en sorte que le bras & l'Espee demeurent libres: il sera aussi en haut couuert d'un Mantelet d'Hermine mouchetee, venant iusques au coude, sur lequel ils auront le grand Collier de l'Ordre, composé de quinze Cordelieres de saint François, & de quinze Estoilles faictes d'orseurerie, & sera au bas attachee avec trois chaisnons la susdicte Croix d'or, & au deuant dudit grand Manteau, celle de velours bleu en broderie d'or. Auront vn bonnet couuert d'hermine mouchetee, dont le bord d'escarlata rouge, sera large de demy pied, bordé d'un tissu d'or, couppe en quatre endroits avec égale distance, & retroussé de tous costez, porteront les brodequins de Marroquin rouge iusques à my-jambe fermés de boutons d'or par les costez.

XIV.

Les Commandeurs, dessus ledit habit blanc mettront vne Dalmatique de satin bleu, doublee de Taffetas blanc, bordée d'un galon bleu, & par dessus, le grand Manteau de Taffetas bleu ondé, doublé de Taffetas blanc, avec le Mantelet de satin blanc. Au dessous duquel sur le grand Manteau, sera attachee la Croix de velours bleu en broderie d'or, & seront les brodequins de Marroquin bleu, à boutons de soye bleüe, le tout de mesme façon que les habits des grands Croix. Porteront aussi vne Toque de velours noir plissé, avec vn cordon rond, de taffetas blanc.

XV.

XV.

Les Cheualiers, dessus ledit habit blanc, auront vne Dalmatique de Taffetas blanc, doublee de blanc, le grand manteau de Tabis blanc ondé, doublé de blanc, & le mantelet de satin bleu. Au dessous duquel fus le grand manteau, sera attachee la Croix de velours bleu, en broderie d'or, les brodequins bleus à boutés de soye bleuë, la Toque de velours noir, avec le cordon blanc, de mesme que les habits cy dessus.

XVI.

Les Freres d'Armes porteront au col ladicte Croix d'or emaillee, avec vn cordon rond de soye bleuë, & sus le costé gauche de leur manteau, vne Croix de velours bleu, comme celle des Cheualiers horsmis qu'il n'y aura filets ny broderie d'or.

XVII.

En chaque Prouince, où il y aura vn Grand Croix estably, & trois Commandeurs, serōt fondees trois Eglises ou Chappelles en trois lieux differens, dediees à nostre Dame, & à S. Michel, où trois Chapelains portans la Croix del'Ordre, seront obligez de celebrer la Messe, tous les iours de festes & Dimanches.

XVIII.

En ces mesmes Prouinces, y aura vne Maison, tant pour s'y assembler lors que les affaires del'Ordre le requerront, que pour y receuoir par hospitalité les personnes dudit Ordre.

XIX.

En chacun des douze Grands Prieurez, sera erigee vne Academie pour l'instruction de vingt cinq ieunes Cheualiers, tant aux bonnes mœurs, que sciences & exercices honestes, lesquels y ayans demeuré trois ans ou moins, seront obligez d'aller faire vn voyage, ou carauane sur les vaisseaux del'Ordre.

XX.

Aux susdictes Prouinces tous les ans, le iour du Ieudy Sainct, six pauvres seront habillez de bleu, au nom de Nostre Dame, trois de rouge au nom de S. Michel, trois de gris au nom de S. François, & en apres le Grand Croix, ou en son absence le plus ancien des Commandeurs, assisté des Cheualiers de la Prouince, mandez à cet effect, lauera les pieds ausdicts pauvres, leur donnera à disner, & les seruira à Table.

XXI.

Aux mesmes Prouinces, tous les ans le iour de l'Assumption de nostre Dame, de quinze pauvres & honestes filles choisies, trois seront tirees au sort, pour estre mariee & dottée chacune d'icelle, de la somme de cinquante liures.

XXII.

Seront obligez ceux de cet Ordre, se confesser & Communier tous les ans, aux iours & Festes de l'assumption nostre Dame, de S. Michel, ou de Sainct François, & d'entendre la Messe tous les Samedys, pendant laquelle ils reciteront deuotement les Litanies de nostre Dame, & en cas de legitime empeschement, donneront quelques aumosnes selon leur deuotion, s'abstiendront pareillement de manger de la chair toutes les veilles de Festes de nostre Dame.

XXIII.

Seront aussi obligez d'auoir en particuliere recommandation, les Vefues & Orphelins, & de visiter les Hospitiaux pour le moins aux quatre Festes annuelles, & à l'Assumption de nostre Dame, s'ils se treuent lors en lieu où ils puissent exercer cet œuure de charité.

XXIV.

Aduenant que quelqu'un d'eux, estant employé au service dudit Ordre, soit pris prisonnier, & detenu esclau, il sera racheté aux despens & frais communs.


XXV.

Et quand aucun dudit Ordre decedera, le Secretaire du grand Prieuré, dans l'estenduë duquel il sera decédé, en donnera aduis aux autres grands Prieurez, à ce que dans chacun d'iceux, les Prestres & Chapelains qui auront esté fondez dudit Ordre, ayent à dire chacun vne Messe, pour le salut de son ame. Mais s'il meurt en combattant, ou faisant quelque genereuse action, pour le service de Dieu, & del'Ordre, afin d'honorer dauantage sa memoire, sera de plus faicte vne ceremonie particuliere, & solennelle, par le cōuoy que les Grads Croix indiqueront à tous les Commandeurs, & Cheualiers de leur Prouince, auquel ils ne manqueront de se treuer, s'il ne leur arriue quelque legitime empeschement. Et si l'action, en laquelle il sera mort, est iugee digne d'une oraison funebre, sera inuitee quelque personne capable pour la faire.



FORME DV VOEV. ET SERMENT

QVI SE FERA SVR LES SAINCTS EVANGILES,
parceluy qui sera présenté pour estre receu Cheualier.



E N. Proteste deuant Dieu, & iure par ma Noblesse, d'observer inuiolablement les statuts de l'Ordre des Cheualiers, de la Milice Chrestienne, sous le tiltre de Nostre Dame, & de Saint Michel, & les articles suiuaus.

En premier lieu, de procurer par toutes voyes licites, & raisonnables, la paix entre les Princes & peuples Chrestiens, conioinctement avec ledit Ordre.

En second lieu, de trauailler à la deliurance des Chrestiens, detenus captifs, sous l'oppression des Infidelles.

En troisieme lieu, de tousiours garder fidelité à mon Roy, ou Prince Souuerain, à peine d'estre degradé dudit Ordre.

En quatriesme lieu, de tousiours porter la Croix, marque dudit Ordre.

En cinquiesme lieu, de rendre volontaire obeyssance aux Superieurs dudit Ordre, aux choses concernantes, le seruice & aduancement d'iceluy.

Ainsi ie le iure & promets.

Le serment ainsi presté, celuy qui aura auctorité de l'Ordre, de receuoir le susdict Cheualier, apres luy auoir baillé l'habit, l'Espee & la Croix, dira les mots rapportez, en l'article vnziemesme cy dessus.

Fait & arresté à Olmits, le Samedi 17. iour de Nouembre, 1618. Signé Charles Duc de Neuers, & Adolphe Comte d'Altham.

ACTE DE L'ACCEPTATION DES STATVTS CY dessus, par les premiers qui receurent l'Ordre à Vienne.

Nous soubsignez, ayans esté receus au susdit Ordre, auons accepté & acceptons les statuts cy dessus. Iceux auons promis & promerrons garder & entretenir, selon leur forme & teneur. En tesmoin de quoy nous auons signé le present acte. Et à iceluy fait apposer le seau de nos armes. A Vienne en Autriche, le Vendredy huictiesme iour de Mars, mil six cens dix. neuf, ainsi signé:

Radulio. Prince de Valaxie.

Iulius Henricus, Duc de Saxe.

Samuel. Duc de Corelki.

Albert Duc de Raziuil.

Georgius Comte Homanai Grand Chambelan du Royaume d'Hongrie.

Stanislaus. Labomierski Palatin de saint Domier.

Lucas Opalinski. Castelan de Panonie.

Ioannes Vincentius, Comte d'Arco.

Henricus du Val Comte de Dampierre.

Ioannes Christophorus, Comte de Bucham.

Emanuel de Sauoye, Marquis de Villars.

Louys de Got. Marquis de Rouillac.

Nicolaus

Nicolaus Petrasko, Vuaiuode en Valakie.

Abraham Marquis de Miroua.

Ioannes Comte de Conopaski.

Esme de saint Estienne.

Franciscus Tegnagel.



Stephanus Baron de Kendi.

Paulus Liesnevolski.

Fridericus de Geisberg.

Gustauus Baron de Sparre.

Marc Anthoine Scoto Comte Dagazan.

Petrus Tarnorrski.



Martinus, Baron de Strasoldo.

Petrus Braniski, Comte de Rusca.

Rudolphus Baron d'Oppersdor, ff.

Gaspard Neausero.

Paulus Baron de Spavur.

Burquardus à Zalderens.

Et quelques iours apres Ferdinand Duc de Mantouë, entrant dedans cét Ordre, accepta pareillement les susdits Statuts.

Cet ordre fut confirmé à Rome le 6. Feurier l'an 1624. par le Pape Urbain VIII. Le Duc de Nevers y estant portant l'habit & la Croix entre plusieurs autres desdits Cheualiers & Seigneurs, la ceremonie en fut faicte par le Cardinal de Sfortze fils du Roy de Fez, & furent admis & receus audit ordre par le Pape le Comte Marc Anthoine de Piasents, deux Comtes François, & vn Baron de Pologne.





DISCOVRS
DE L'ORIGINE DE TOVTES LES
RELIGIONS QUI IVSQVES A PRESENT ONT
esté au monde , auquel on deduit succinctement quels ont esté
les Autheurs d'icelles, en quelle Prouince, souz
quels Papes & Empereurs , & en quel
temps elles ont esté instituees.



E ne sera point hors de propos, si apres la suite des Royaumes & Monarchies de la terre, on comprend aussi en cerrecueil l'Origine & les degrez des Religions, qui comme vne Monarchie spirituelle, se sont establies par l'Vniuers chacun ordre & chacune maison particuliere, estant quasi autant d'Estats & de Republiques qui toutes s'aduancent, multiplient & combattent sous la conduite & protection de leur Chef souverain nostre Seigneur Iesus, leurs constitutions se rapportans fort bien aux loix & coustumes des peuples, lesquelles bien qu'elles semblent differentes entre elles, tendent neantmoins toutes à la gloire de Dieu, & à l'eternelle felicité, ne plus ne moins que les loix des Royaumes & des Republiques n'aspirent qu'à maintenir leur pays, en honneur & reputation, & leurs peuples en paix, & en tranquillité: Mais auparauant que d'entrer en ceste recherche,

Il sera bien à propos de faire voir au Lecteur, que nos Religieux n'ont point tiré leur origine du Paganisme: ains des Hebrieux le plus ancien de tous les peuples, qui peuuent plus asseurement conter leur genealogie depuis Adam le premier homme iusques à nostre Seigneur, & que les vrayx de Religion ont esté plus anciens, que toutes les sectes des Philosophes, voire mesme que les Chaldeens, Egyptiens, Brachmanes, & Gymnosophistes, puis que les Iuifs, & leurs ancestres ont tousiours adoré le vray Dieu, & que neantmoins il s'est tousiours trouué des Religions parmy eux.



RELIGIONS QUI ONT ESTE' PARMY LES HEBRIEVX, TANT EN LA Loy de Nature, qu'en la Loy écrite.

NOCH le septiesme homme apres Adam commença, dit l'Escripture d'inuoquer le nom de Dieu. Les Rabins tiennent que c'est à dire qu'il fut le premier qui assembla vne compagnie de gēs deuors & Religieux pour inuoquer le nom de Dieu, à de certaines heures: & de fait, il faut necessairement que ce soit l'interpretation de ce passage, d'autāt qu'Adam, Abel, & le reste iusques à luy, auoit inuoque & adoré Dieu, comme il est tout clair par le texte sacré, aussi tiennent les peres de nostre

Eglise, que ce qui est dit au sixiesme chap. du Genele. 1. *que les fils de Dieu voyant les filles des hommes, &c.* Les fils de Dieu ne sont autres que ceux qui s'estoient particulièrement deuouez au seruice de la Diuinité.

2. Abraham le premier de tous les Patriarches, n'a-il pas esté aussi le premier qui a donné la forme, & le commencement à la religion? Car ne fut-ce pas par le commandement de Dieu qu'il laissa la terre de sa naissance, & qu'il abandonna sa parenté, & maison paternelle pour se retirer au lieu que le Seigneur luy monstra?

3. En la loy Mosaique, les Nazareens tiennent le premier rang, la loy desquels est rapportée tout du long au 6. chapitre des Nombres, lesquels faisoient certains vœux, offroient certains sacrifices, & ne beuuoient point de vin, tel fut Samson, Elie le Prophete, saint Iean Baptiste, & nostre Seigneur meisme.

4. Elie le Prophete, l'Ordre duquel regne encores aujourdhuy, les Religieux Carmes tirans leur Origine de luy, auoient vne autre maniere de vie, & de vestement que le commun: l'un & l'autre remarqué en l'Escripture par sa solitude, & par sa ceinture de cuir.

5. Elisee & les enfans des Prophetes viuoient en commun: mais separez du commun, comme il se void au 3. & 4. liure des Rois.

6. Iudith, la sainte veufue, & qui a serui de Patron aux sages veufues qui sont venuës apres elle, se fit accommoder vn lieu secret, apres la mort de son mary, au haut de ses palais, où elle se retira avec ses seruantes: pour vacquer plus librement à l'Oraison: elle portoit la haine, & ieusnoit tous les iours hormis les festes de la solemnité de la maison d'Israel, Iudith. c. 8.

7. L'Ordre des Rhecabites au trente cinquiesme chapitre de Ieremie, sous l'Obedience de Ionadab, fils de Checab, lesquels ne beuuoient point de vin ny n'habitoient point en des maisons: ains seulement sous des tentes tous les iours de leur vie, sans semer du bled ny cultiuer des vignes dont vindrent

8. Les Scribes habituez en labez, qui chantoient & faisoient le seruice diuin. 1. Paral. 2.

9. Holda Prophetesse & comme vne Abbessse, qui residoit en la seconde closture de Hierusalem, que le Targum, ou paraphrase Chaldaïque tourne pour maison de doctrine, ainsi que pourroit estre quelque Monastere: il est parlé d'elle au quatriesme des Roys, chapitre vingt deuxiesme.

Samaias reclus en Nehemie 6.

Si bien qu'en tous ceux cy vous voyez vn Patron, sur lequel les Religieux du Christianisme ont fondé leurs instituts, car les Nazareens, & le Prophete Elie leur ont enseigné la pureté & l'austerité de vie ils ont la communauté avec les enfans des Prophetes, l'Obedience avec les Rhecabites, les Sacrifices & les chants avec les Scribes, les escholes cōme la maison de doctrine de Holda, & finalement la solitude avec Samaias. Outre ceux-cy il y eut encores depuis trois manieres des Religieux entre les Iuifs.

10. Les premiers les Pharisiens ainsi nommez, parce qu'ils estoient differends des autres d'habits, & façons de viure, taschans de se faire paroistre pour grâds obseruateurs de la loy, de la venoit qu'ils portoient ces filacteries rapportees par saint Mathieu chapitre 23. (comme si on disoit defences, & armes de salut) mais leurs hypocrisies & leurs melchancetez furent decouuertes par nostre Seigneur: ce qui fut cause de la grande enuie qu'ils eurent contre luy, & qu'ils conspirerent avec les Iuits pour le faire mourir: ils nioient la resurrection des morts, & rendoient grande obeissance à leurs superieurs.
11. Le second ordre estoit des Saduceens, ceux-cy nyoient la resurrection des morts, ne croyoient pas qu'il y eut des Anges, estimans que l'ame mouroit avec le corps.
12. Le troisieme fut des Esséens, c'est à dire Saints, lesquels menoient vne vie du tout austere, ennemis de la volupté, mesprisoient les richesses, grands hospitaliers, viuoient en très grand silence en leurs maisons, n'osoient rien donner à leurs parens sans permission, ennemis mortels du iurement, faisoient iurer à leurs profez la foy à Dieu, iustice aux hommes, obeissance aux Princes, & Magistrats, gardoient estroitement le Sabbat, viuoient en commun, ne demeuroient iamais aux villes: & bien qu'ils fussent plus de quatre mille en diuers lieux, leurs heritages, leur argent, leur prouision, & vestement, leur viande, leur table, & toutes autres choses appartenantes à la vie leur estoient communes: Leur principal Temple estoit assis sur vne colline aupres del'estang Marie, appelé aujourdh'uy le marais de Marie: ce marais est le grand desert où furent depuis les hermitages tant renommez des Scyhtes & de Nestrie & de Thebaïde.
13. On peut bien dire veritablement aussi que celuy qui est plus que Prophete, & le plus grand entre ceux qui sont nez de femme saint Jean Baptiste, a esté l'autheur de la vie Monastique: car il quitta parens & richesses, dès sa plus tendre ieunesse pour viure au desert. Il portoit vn vestement fait de peaux de chameaux, & vne courroye ou ceinture de peau sur ses reins: sa viande estoit de miel sauage & de locustes, & auoit avec luy plusieurs Disciples preschant la penitence à tout le peuple qui venoit l'escouter, & baptisant en eauë.
14. On peut dire encor que la Prophetesse Anne fille de Phanuel, a esté vraye & parfaicte Religieuse, parce que nous lisons d'elle qu'elle ne bougeoit du Temple à seruir Dieu iour & nuict, en ieusnes, & en continuelle priere & oraison. Voila comment, depuis Enoch iusques à nostre Seigneur Iesus Christ, il y a eu tousiours quelques Religieux entre les Iuifs.
15. Mais auparauant que de passer du vieil au nouveau testamēt, ne seroit ce pas vne espece de sacrilege de passer souz silence, la tres-sainte & tres-glorieuse mere de Dieu, veu qu'elle a vescu auparauant qu'elle eut conçu du saint Esprit, à sçauoir du temps de la loy Moysaique, d'vne vie tres-parfaicte, & Religieuse, & depuis la Natiuité de son cher fils nostre Seigneur, a continué iusques à la fin de ses iours, s'estant tousiours maintenuë en la plus grande pureté & sainteté, à laquelle la creature humaine puisse iamais atteindre: Car elle a non seulement esté le pourtraict & l'exemple de la vie Religieuse, ayant la premiere consacré à Dieu, sa virginité tres-pure & immaculee, & gardé parfaictement les vœux de chasteté, sans y auoir manqué, non pas mesmes la moindre pensee mondaine: de sorte qu'il ne s'est iamais trouué homme, tant desbordé fut-il, qui ait eu autre opinion d'elle que de bonté, pudicité, & honesteté: ses actions, & ses regards si pleins de modestie, & si chastes, qu'encor aujourdhuy ceux qui voyēt son pourtraict, bien qu'elle soit toute belle, n'en sçauoient pas auoir la moindre pensee impudique. Quant à la pauvreté elle estoit descendue de tres-illustres Patriarches, & de tres-puissans Roys, & neantmoins son cher fils n'auoit pas où pouuoir reposer sa teste, vivant quant & elle du labeur de ses mains. Et son obeyssance a esté telle, & avec vne si grande simplicité qu'apres celle de son fils, il n'y en a point qui ait iamais approché de la sienne. C'est pour ce qui regarde les Religions votiuës. Mais n'est elle pas aussi le modelle & la viue image de tous les fidelles qui se sont enroolez souz l'enseigne du crucifié, soit par son humilité, patience, prudence, constance & magnanimité, ayant esté vn rocher de foy, vne ancre d'esperance, vn thresor plein de charité, & tant d'autres vertus innumerables, & inenarrables, que tout ainsi qu'elle est pleine de grace, par dessus toute plenitude, apres celle de son fils, aussi faudroit-il vne plenitude de cognoissance & d'eloquence pour les pouuoir exprimer, Heureuses les congregations qui se conforment à son imitation, & tres-heureuses les ames qui la prendront pour miroir, & pour patrone, en leurs plus religieuses actiōs. O Roynie sacree, sainte, & beniste, belle & verdoyante Verge de Iessé, qui n'a courbé iamais sous le faiz du peché, fleur tres-odoriferante, qui fleuris avec autant de gloire, que de grace, en toute perfection, & dont la fragrante odeur embaume & remplit delicieusement le Ciel de nostre Eglise, puissions nous suivre la trace, & les vestiges de vos pas, afin d'estre agreables à ce bien-heureux fruiet de vostre ventre nostre Seigneur Iesus Christ.

LE premier fondateur de Religion, & vie Monastique a esté le mesme Seigneur, & tous ceux qui ont depuis fondé des Monasteres, ont tiré leurs reigles de luy, car ayant assemblé ses douze Apostres, il leur donna la reigle qu'ils doiuent garder, les aduertissant que qui conque voudroit estre son disciple deuoit estre resolu d'abandonner le monde, & tout ce qu'il auoit au monde, & qui estoit le plus important, falloit laisser sa propre volonté.

Il voulut aussi qu'ils s'entre-aimassent, disant qu'en cela cognoistroit-on qu'ils seroient ses vrayes disciples. Il leur monstra la forme de parfaite obedience, leur enseignant l'humilité, les exhortant à patience. Que pour estre son disciple, il falloit laisser tous les plaisirs du monde, & se preparer à endurer toutes sortes de mesaises, & de persecutions. Que les commandemens de Dieu doiuent estre obseruez d'un cœur pur & net, leur monstra la maniere; comme ils deuoient presenter leur priere à Dieu, il leur loua grandement les pauvres d'esprit, les debonnaires, les misericordieux, les amateurs de iustice, & de paix, ceux qui sont de cœur net, & ceux qui endurent pour la iustice, & pour le Royaume des Cieux. Il ne laissa rien à les instruire, & endoctriner en toutes les vertus, qui leur estoient necessaires pour les rendre parfaits & immortels, & finalement leur laissa son saint Euangile à garder, à scauoir les preceptes comme à ceux qui estoient Chrestiens, & les conseils comme à hommes parfaits. De ceste reigle tous les anciens Peres ont tiré celles dont ils ont commencé leurs Religions, leurs desseins, sur lesquels ils ont fondé leurs trois vœux. Car son saint College estoit un petit Cōuent, d'autant que depuis qu'il eut receu les Apostres en sa compagnie ils alloient avec luy, mangeoient avec luy, dormoient aupres de luy, l'appelloient Seigneur, & Maistre, & luy obeysoient en toutes sortes.

Institution du Sacerdoce en la loy nouvelle.

Outre ce il institua le Sacerdoce. Car comme il eut esleu les douze Apostres, à scauoir, douze Euesques, auxquels il donna le pouuoir de deslier & de cōsacrer, & sacrifier son precieux Corps, & son precieux Sang, il les enuoya prescher sa doctrine, à scauoir l'Euangile par tout le monde: puis il esleut encor soixante & douze disciples, lesquels ayant fait Prestres, il les enuoya aussi prescher, & ce comme dit Origene, afin qu'à la semblance des enfans d'Aaron, ils eussent le simple Sacerdoce, comme les Prestres que nous appellons auourd'huy. De ceux cy donc l'ordre des Prestres a eu son origine, ainsi que de ceux-là est venue la dignité des Euesques, parce qu'ils ont succédé en leur lieu. Quant aux Disciples ils furent instituez pour le secours, la moisson venant à s'augmenter, dit le Pape Anaclete, & nostre Seigneur ayant establi ces deux ordres, il esleut saint Pierre pour estre general, & souverain Pontife de toute l'Eglise.

Des Clercs de l'Eglise instituez par saint Pierre.

Au lieu de saint Pierre, les Papes ayans succédé, & voulans ensuiure les Hebreux, ils commencerent d'establi des Huilliers, & Lecteurs, Exorcistes, Acolites, Diacres, & Souz-diacres, tous ceux cy toutefois estoient ordinairement pres de ceux qu'on appelloit Clercs, Car le Prince des Apostres saint Pierre estant venu à Rome, apres auoir mis bon ordre pour le Ministère de la parole de Dieu, aux Eglises Orientales, il choisit de toute la multitude des fideles, & des meilleurs obseruateurs de nostre Religion (à l'exemple des Eglises de Hierusalem & d'Antioche) certains hommes meurs d'aage bien-aymez du peuple, & pleins du saint Esprit, de Sapience, de fidelité, & de bonté, lesquels selon Panuine Veronois furent appelez Clercs, lesquels il sacra avec l'imposition des mains, faisant vne partie d'iceux Prestres & les autres Diacres, afin que le Pōtife ou Euesque Romain se seruit d'eux pour instruire les Catholiques, qui lors croissoient & estoient en si grand nombre qu'il n'y pouoit pas satisfaire tout seul. Il donna la principale charge, à scauoir le soin des ames aux Prestres, afin qu'en administrant les Sacremens au peuple de Dieu ils peussent aussi avec l'Euesque vacquer aux prieres & predications: Aux Diacres, il commit la charge de subuenir aux veufues, aux orfelins, & autres pauvres fideles, & leur distribuer les aumosnes des gens de bien, qui leur estoient donnees à ceste intention, & outre leur ordonna de seruir aux Prestres cependant qu'ils sacrifioient: Les Papes, Cleme, Euariste les reduisirent apres à un nombre prefix car Cleme arresta le nombre des Prestres Romains à vingt-cinq.

Et Euariste conformement aux Apostres, augmenta les Diacres, iusques au nombre de sept, auquel outre les precedens, il donna la charge de prendre garde quand l'Euesque precheroit s'il varieroit point en la verité de la foy, quelques-uns ont dit que le Pape Gaius,

premier du nom, issu de la race de l'Empereur Diocletian, fut aussi le premier qui mit distinction aux ordres, afin que de degré en degré on parvint en l'estat de Prestre: d'autres disent que ce fut le Pape Iginus, cent quarante huit ans devant Gaye, mais c'est chose certaine que l'institution vient des Apostres qui ont ordonné sept Diacres, & que cela est continué de temps en temps.

Des Chanoines Reguliers de Latran & de la Frisonnaye.

4. **A** Pres avoir parlé du Sacerdoce, il semble bien à propos de dire vn mot des Chanoines reguliers, appelez la congregation de Latran, qu'on tient pour veritable avoir pris leur origine premierement des Apostres, & depuis reestablis par saint Marc d'Alexandrie, au port de Castrain, & comme le desreiglement s'y estoit glissé avec le temps, ils furent reformez par le Pere saint Augustin, selon Possidonius: il commença à florir en l'Eglise de Beauvais sous maistre Yves Preuost, qui fut depuis Euesque de Chartres.

Depuis en l'an 1396. vn venerable Ecclesiastique, nommé Barthelemy, citoyen Romain, excellent Predicateur, s'estant associé d'un nommé Jacques des Auogards, du pays de Bergame, remit sus cet ordre, qui s'en alloit en decadence, en vn pauvre Monastere qu'on nommoit Sainte Marie de la Frisonnaye, qui pour la pauvreté du lieu, furent secourus par les Peres Iesuites.

Et quant à l'Eglise saint Jean de Latran, le Pape Gelase Afriquain de nation, & disciple de saint Augustin, apres la mort de son maistre vint à Rome, s'arresta en ceste Eglise avec les compaignons, où ils vescuient selon la reigle donnee par ce saint Docteur, & ceux qui vindrent apres eux l'espace de huit cens ans, & iusques en l'an mil deux cens nonante huit que le Pape Boniface y mit des Chanoines seculiers. Gregoire XII. y remit apres des reguliers, & voulut que toute la congregation de Latran se nommast de saint Sauueur. Caliste III. y remit des seculiers, & le Pape Paul. II. du nom, y restitua les reguliers, mais en fin sous Sixte IV. les reguliers en perdirent la possession, ne leur restant rien que le tiltre, & les droicts & priuileges de l'Eglise de Latran.

La principale charge de ces Chanoines reguliers, au premier temps estoit de vacquer tous les iours principalement à l'administration des Sacremens, & aux prieres publiques, sans s'occuper à chanter, pour ce que le peuple faisoit alors cet office, châtât & psalmodiant: ce qui fut apres transféré aux Moines de l'ordre Saint Benoist, quand la ferueur de deuotion commença des'attiedir, l'Eglise de Latran n'estant plus frequentee: les Chanoines seculiers toutesfois psalmodierent quelque temps apres que le Monastere eut esté destruit par les Lombards.

La reigle de ces Chanoines, & ceux de la Frisonnaye, dont il a esté parlé cy dessus, consistoit principalement en trois poincts, à sçauoir de n'auoir rien de propre, d'estre chastes, & de garder le Cloistre. Les Chanoines seculiers sont demeurez à Latran iusques auourd'huy.

Des Chanoines de saint Marc de Mantoue.

5. **O** Vtre les Chanoines reguliers de Latran, il y a encor les Chanoines de saint Marc de Mantouë, lesquels se disent auoir esté fondez premierement en Alexandrie d'Egypte, par saint Marc Euangeliste, c'est pourquoy ils sont appelez Chanoines de S. Marc, non seulement du tiltre de son Eglise, mais encor du nom de leur Auteur. Quant à ce qu'ils ont eu saint Marc pour patron, l'histoire Ecclesiastique le tesmoigne, & le Pape Innocent III. du nom le confirme par vne bulle dattee de l'an 1250. Honorius III. adioutta à leur congregation, quatre Couuens. Plusieurs Papes leur ont confirmé leur reigle & leurs priuileges. Ils souloient prendre leur repos sur des paillasses, vsoient de linceuls de laine, ieusnoient depuis l'octaue de la Resurrection, iusques bien auant en Septembre, & l'Aduent, & tous les Vendredis de l'annee. Ils gardoient vn grand silence, & viuoient en commun sans auoir rien de propre, prenoient exercice deux heures le iour, faisoient leur profession au bout de l'an, n'admettoient aucun à l'habit qui n'eut dixsept ans, s'addonnoient à l'estude & aux Predications. Il y auoit aussi des Monasteres de Religieuses, de leur ordre. Ils n'ont à present autre monastere que celui de saint Marc de Mantouë, & vn nombre dependant d'iceluy à Neise, pres du Padoitan. En leurs maisons, ils sont habillez comme les Chanoines de Latran, avec le roquet, & la traaverse, mais quand ils vont par la ville, ils iettent vn froc blanc dessus, ils portent le bonnet quarré blanc. Quand ils vont au cheeur, ils ne portent pas le froc, mais le roquet, & mettent dessus vne mossiette blanche, comme sont les camails des Euesques. Ils portent encor l'aumusse fourree sur le bras, comme les Chanoines seculiers. Jean André sur la premiere Clementine dit que de son temps ils se velloient ainsi.

De

De la Religion solitaire de saint Paul premier Hermite.

ENcores que le bien heureux saint Paul, premier Hermite, n'ait fondé aucune Religion ^{6.} En son temps, neantmoins d'autant qu'il a esté selon saint Hierosime, le chef de la vie solitaire, & le Pere de tous les Hermites, il est bien raisonnable qu'on die quelque chose de luy. Ce saint homme florissoit l'an 150. sous l'Empire de Decius, & Valerian, lequel durant la persecution, que ces Empereurs faisoient aux Chrestiens, s'estant retiré à vne petite forme pres de Thebes, car il estoit de ceste ville-là: & sçachant que son beau frere le vouloit accuser, il s'en alla en vn desert où il trouua vne caverne, au dedans de laquelle: il y auoit vn fort beau Palmier, qui estendoit ses rameaux par vne ouuerture d'enhaut: ce Palmier estoit si grand, qu'il couuroit tout ce plaisant lieu, aupres duquel estoit vne claire fontaine: il y auoit là encores plusieurs cachettes, où l'on souloit battre secrettement de la monnoye du temps de Marc Antoine & de Cleopatre: ce fut la retraite de ce saint personnage, où il fut substanté par vn corbeau l'espace de septante ans, qui luy apportoit tous les iours vn demy pain à neuf heures du matin.

Il prenoit du fruit de ce Palmier, & se vestoit de ses feuilles, estant la pluspart du iour & de la nuit en contemplation. Il demeura en ce lieu cent & dix ans, & il y entra en l'age de seize, ayant mené vne vie angelique en terre.

De la Religion de S. Anthoine Hermite.

Quant à saint Anthoine, qui a esté le Pere des Moines d'Egypte, il se retira au desert ^{7.} En l'age de dix huit ans & demy, & y demeura 83. ans.

La coustume de ce temps estoit, que qui vouloit laisser le monde se retiroit en quelque lieu à l'escart, où estant separé du peuple, il faisoit telle penitence que bon luy sembloit, & chacun prenoit l'habit qu'il pensoit estre le plus honneste, mais c'estoit sans forme, ou regle de viure, & n'y auoit pareillement aucun qui s'obligeast par vœu: mais il estoit en liberte de toute personne de s'en aller où il luy plaisoit, & si quelqu'un changeant de volonté s'en alloit autre part, il n'estoit point noté de legereté, comme il se void auourd'huy.

Ce furent tous ceux cy que saint Antoine se mit à visiter, comme d'office, tous le recognoissoient pour Pere: aussi a il esté d'une si grande vertu, & tellement signalée par tout le monde, que les Empereurs, les Roys & les Princes luy escriuoient souuent pour auoir son conseil, & pour se recommander à ses prieres. Il mourut l'an de nostre salut 345. sous l'Empire de Constantin II. qui regna avec Constant & Constance ses freres, auquel temps l'ele second, saint personnage, tenoit le saint Siege Apostolique. Il a esté fort proprement appelé le Pere des Moines, si on a esgard que ç'a esté le plus vaillant Champion, voire le plus excellent Capitaine qui soit entré en lice contre le diable.

Toutesfois ce n'est pas à dire qu'il ayt esté l'Auteur de la vie Monastique: car le Grand saint Denys Arcopagite au liure de la Celeste Hierarchie, dict que cest ordre estoit le premier des trois qu'il met en auant, tesmoignant que les Apostres appelloient les Moines seruiteurs de Dieu: & Philon Iuis, qui viuoit du temps de l'Empereur Tibere Caligula, en son traicté qu'il a fait de la vie contemplative auquel il magnifie grandement les Chrestiens, lesquels il appelle seruiteurs du grand Dieu, le nom de Chrestien qui print son commencement en l'Eglise d'Antioche n'estant pas encore en vſage. Il dit qu'ils n'auoient rien de propre entr'eux, nul d'eux n'estoit riche, nul pauvre, ils vaquoient ordinairement à prier Dieu, & psalmodier, desireux de sçauoir, & viuans en grande continence.

Il dit aussi que leurs habitations s'appelloient *Monasteria*, c'est à dire solitudes. Saint Hierosime tient que saint Marc l'Euangeliste a esté chef, & fondateur de la vie Monastique, & que ce qu'a escrit Philon en la louange des Chrestiens, estoit à cause des louables deportemens qu'il voyoit de saint Marc, & de ses Moines en Alexandrie: ce qui est confirmé par Pierre Damian & Cassian, à sçauoir que l'Ordre monastique, estoit du temps des Apostres, ce n'est pas toutefois à dire que saint Anthoine n'ayt esté le Pere des Moines: car à son exemple, & la reputation de sa sainteté fut cause de remplir de Moines les deserts de l'Egypte: mais cela ne fait pas consequence qu'il n'y en eust auparauant, & non seulement en ces deserts-là, mais encores en ceux de la Thebaïde, Lybie, Palestine & Arabie.

Religion de S. Hilarion, & autres congregations d'Hermites & Religieux de la Thebaide d'Egypte.

LE bien heureux Hilarion fut chef d'une grande multitude de Moines en la Syrie. Saint Macaire disciple de saint Anthoine & du mesme temps qu'Hilarion fut le chef de ceux de Thebayde.

En la mesme Thebayde vn saint Abbé, nommé Apollonius, qui habitoit es confins de la cité d'Hermepol, en laquelle se retira la Vierge Marie, & le bien-heureux saint Ioseph avec le petit Iesus fuyant le cruel Herode, cestuy-cy au raport d'Heracleide, commandoit à cinq mille Moines.

Le mesme Auteur dit que l'Abbé Isidore fit bastir aussi en la Thebayde vn Monastere environné de murailles, où habitoient plus de mille Moines.

En la montagne de Nitrie selon le mesme Auteur, distincte d'Alexandrie de quarante milles, il y auoit plus de cinq cens Monasteres, l'un apres de l'autre, & vn seul Pere les gouuernoit tous ce qui semble du tout esmerueillable, encores adiouste il, qu'il trouua en ces Monasteres voisins d'Alexandrie plus de deux milles Moines, de tres-grande perfection, & plus de cinq mille en la montagne de Nitrie. S. Hierosme assure aussi qu'il trouua en vne ville de Thebayde plus de vingt mil. le Vierges, & plus de dix mille Moines, qui demouroient là.

Le mesme miroir de penitence, saint Hierosme escriuant à Eustachius dit qu'il y auoit en Egypte trois sortes de Moines, à sçauoir des Cenobites, que les Gentils appelloient Sacrez, la seconde des Anachorettes, lesquels demouroient par les deserts, les troisiemes les Remobors gens de peu d'estime, & de valeur qui n'estoient subiects à aucune obediencce: ne viuoient point seuls, ains deux à deux, trois à trois ou d'auantage selon qu'il leur venoit à la fantaisie. Ils traualloient de leurs mains & ce qu'ils gaignoient, ils le tenoient en propre, en conferant quelque partie pour viure en commun: ils auoient leur demeure le plus communement aux villes & aux Chasteaux, & comme si l'air estoit sain, & non la vie, ce qu'ils vendoient ils l'estimoient dauantage que le bien des autres. Il y auoit tousiours entre eux quelque murmure ou debat, pource que viuans du leur, ils ne vouloient endurer qu'autre leur commandast. Il auoient toutes choses excessiuement affectées, les manches de leurs vestemens larges, leur chausses enflées, la robe espaisse, les souspirs frequents qui alloient courans par les Monasteres des filles, medisans du Clergé, & les iours de festes il se saouloient iusqu'au vomir: c'est ainsi que parle S. Hierosme. Outre ces trois manieres, il y en auoit encores vne quatrieme que saint Benoist y adiousta, à sçauoir, les tournoyeurs & vagabonds ne demeurans iamais en certain lieu: mais allans de ville en ville, & s'arrageans aux portes des Eglises pour mandier de l'argent.

Ils logeoient aux Hospitaux, ou aux hostelleries, estans gourmands & addonnez à leur plaisir & sensualité.

Des Cenobites.

Quant aux Cenobites, le premier vœu qu'ils faisoient c'estoit d'obeyr à tout ce qui leur seroit commandé par leur Superieur. Ils estoient departis par dixaines & centaines, en sorte que le dixiesme auoit la charge des neuf, & le centenier commandoit aux dix dixaines, viuoient de pain, de legumes & quelques herbages, faisoient quelques œures manuelles, tout le reste du temps s'employant à l'oraison, ieusnant toute l'année, & le careme venu encores plus estroitement: Apres la Pentecoste ils changeoient le souper au dîner pour satisfaire aux traditions Apostoliques.

Les Anacorettes auant que d'entrer en solitude, quelques vns d'eux faisoient leur probation au Monastere.

Cela à quoy ils s'exercoient le plus c'estoit à quitter leur propre volonté, & s'exercoient en humilite & patience, puis quand ils se voyoient fortifiez en toute vertu, ils alloient en solitude faire penitence en des lieux quelquesfois si fort esloignez de ceux qui estoient habitez, que leurs proches voisins estoient plus de sept iours à les aller trouuer.

L'auteur de ceste vie fut ce Paul de Thebes, duquel il a esté parlé cy dessus: si mieux on n'ayme dire, que celuy qui l'a le premier mise en pratique, a esté S. Iean Baptiste.

Du Monastere de Laurebasty par Cariton.

Cariton natif d'Icome apres avoir beaucoup souffert sous l'Empereur Aurelian pour la foy de Iesus Christ, finalement ayant esté deliuré sous l'Empereur Tacite qui luy succeda comme il faisoit le voyage de la terre sainte, il fut pris par des voleurs qui luy lierent les mains & luy mirent le carquant au col, puis le menerent en vn lieu desert près de la mer morte, appelée les Marais Asphaltides & le lac de Sodome, & le laisserent là attaché: Mais rãdis qu'ils estoient allez chercher autre butin, vne vipere entra dans ceste cauerne qui beut dans le vaillean où estoit le vin de ces volleurs qu'elle empoisonna, de sorte que venans apres pour en boire ils moururent tous à l'instant, & les fers du saint homme Cariton s'estant à l'heure miraculeusement rompus il demeura maistre de tout ce butin qu'il distribua, vne portion aux pauvres Chrestiens qui s'estoient retirez aux deserts fuyans la persecution, & du reste il en fit bastir au lieu mesme le Monastere de Laure, lequel fut depuis vn des plus fameux de tout l'Orient.

L'Eglise fut consacrée par saint Macaire, qui fut vn des Peres qui se trouuerent au S. Concile de Nice: la multitude toutesfois du monde qui le venoit trouuer en ces lieux-là, le contraignit de se retirer plus auant dans le desert, où il fut avec le temps contrainct de bastir vn autre monastere qu'il abandonna encores.

Car il ay moit grandement la solitude, & s'en alla dans le desert de Tecory: où ayant cõuert plusieurs hommes à la foy Chrestienne, desquels vne bonne partie print l'habit de Religion, il bastit encores vn troisieme Monastere qui fut depuis appelé des Suriens, Surra, & par les Grecs, la vieille Laure: mais en fin il se retira en vne autre cauerne nommée Cotruaistris, c'est à dire pensible ou suspenduë: car il y fallut monter avec vne echelle, où ayant esté long temps il deuint malade, & fut rapporté au premier Monastere où il mourut du temps que Iules Romain tenoit le saint Siege sous l'Empereur Cõstantin second & Cõstantin son frere, qui estoit Arrien, qui persecuta grandement les Chrestiens, qui ne fauorisoient point son erreur.

Le saint Martyr Iulian, celui qui estoit de la ville d'Antioche de Surie, car il y en a eu vingt & trois de ce nom qui tous ont esté canonizez: cestuy-cy ayant fait vœu de virginité, fut par luy mis, encores malgré luy, au feu, par vne reuelation qu'il eut, luy ayant consenty la premiere nuit de ses nopces, il disposa tellement sa femme Basilisse, qui estoit fort belle & de fort bonne maison, qu'elle fit vœu de viure avec luy en perpetuelle continence au desceu de tout le monde: & leurs peres & leurs meres estants morts, quelques temps apres ils donnerent vne partie de leurs biens aux pauvres, & du reste ils en bastirent vn Monastere d'vne grandeur si incroyable qu'il pouuoit tenir dix mille Moines, comme aussi y en eut il autant sous le gouvernement de Iulian: ils en bastirent encor vn autre pour Basilisse qui fut mere de mille Religieuses: depuis du temps de la dixiesme persecution sous les Empereurs Diocletian & Maximian, apres avoir souffert plusieurs sortes de martyre par le commandement de Martial le President d'Antioche, finalement il en receut la couronne avec les compagnons, ce tyran les ayant faits massacrer à coups d'espée.

Ordre de saint Basile.

Cela permis, il est de besoin de sçauoir pour vne plus facile intelligence, qu'il y a quatre reigles qui sont approuuées de l'Eglise, à sçauoir celle de saint Basile, de saint Augustin, de saint Benoist & de saint François, sous lesquelles toutes les autres Religions sont comprises.

Quant à saint Basile, ce docte & sçauant personnage, qui par Oracle diuin fut surnommé le Grand, il florissoit l'an de nostre Seigneur trois cents, & naquit en la ville de Alaza ou Cesarée de Cappadoce, d'où il fut esleu Euesque.

Cest homme fut le premier qui obligea les Moines de faire vœu apres l'an de probation, de demeurer dans le Monastere iusques à la mort, promettre de rendre entiere obedience à ses Superieurs, & ne contreuenir aux ordonnances d'iceux, & outre cela de vouër continence & pauvreté: Ce qui fut accepté de tous ceux qui estoient alors, & approuué de ladite Eglise, comme chose bonne & sainte.

C'est pourquoy on dit que la reigle de saint Basile est la premiere reigle du monde, parce qu'il est le premier qui a restraint les Religieux à faire profession. Il edifia en Armenie vn Monastere si grand & si ample qu'il y demouroit plus de trois mille Moines, & finalement il reduisit tous les Religieux de l'Orient à tenir vne bonne forme de viure.

L'Ordre de ce saint homme florit encore en quelque partie de la Grece, & spécialement en ce qui est sous la domination de l'illustre seigneurie de Venise. Il y en aussi en Italie en quelques endroits, & principalement à Grottaferrata distant de douze mille de Rome: ils celebrent leur Office à l'usage de Rome, mais en langue Grecque & caracteres Grecs, aussi sont ils Grecs de nation: au Credo conformément à l'Eglise Latine, ils disent, *qui ex Patre Filioque procedit*: ce que ne font pas ceux du Levant. Les Ordres leur sont conferez par le Vicaire du Pape, ayans esté examinez par quelque docte personnage en la langue Grecque.

Ils font profession sous leur Archimandrite, qui signifie chef de Convent. Ils ne mangent point de chair ny aucune graisse, & avant que celebrer la Messe ils lavent premierement l'Autel & font de grandes abstinences: ils travaillent de leurs mains à l'imitation des Moines parfaits d'Egypte, & ce qu'ils gagnent à la peine de leurs corps, ils le rapportent en commun sans posseder aucune chose de propre.

Tous les autres Monasteres d'Italie qui sont de cest Ordre, recognoissent l'Abbaye de Crottaferrata pour leur mere: le fondateur de ce Monastere fut saint Nil natif de Calabre: tous perseverent en la regle qui leur fut donnee au Concile tenu à Florence, par le Pape Eugene I V. de ce nom.

Quant à saint Basile il mourut l'an 379. du temps que Damase, premier du nom, tenoit le Saint siege, & que l'Empereur Valens Arrien gouvernoit l'Empire.

Ordre de l'Abbé Pacome.

14. **A** Pres saint Basile, l'ordre des temps requiert qu'on parle du bon Abbé Pacome, lequel on tient avoir receu la loy, qu'il donna depuis à ses Religieux, écrite sur deux tables de metal, par le ministere d'un Ange, lequel l'ayant bien instruit en tout ce qui estoit necessaire pour la vie monastique, il disparut, luy laissant vne telle ferueur d'exercer sa commission, qu'en peu de iours il assembla plus de sept mille Moines, lesquels se logerent en divers Monasteres, qu'ils habiterent les vns aupres des autres. A l'entour du principal lieu, où se retiroit Pacome, que Gennadius au liure qu'il a fait des Consonances Ecclesiastiques, appelle homme doué de grace Apostolique, tant pour la façon d'enseigner, que pour les miracles qu'il faisoit, il en eut encore depuis mille cinq cens, outre les sept mille susdits, tous sous la discipline, & les diuisa en vingt-quatre ordres ou classes, selon la disposition des lettres Grecques, ainsi qu'il luy auoit esté enchargé par l'Ange, car par ce moyen il n'auoit qu'à enuoyer querir les chefs pour sçauoir tout l'estat de ses Religieux.

Tous ceux-cy travailloient chacun de leurs mains, ainsi qu'à tous les monasteres d'Egypte, & ne receuoient personne à leur profession, qu'il ne promit de travailler de son mestier, & quel qu'il fut, & ce qu'ils gaignoient se consignoient entre les mains du despencier, lequel par ordonnance de l'Abbé pouuoit à toutes leurs necessitez.

Ce saint homme mourut l'an 405. de son aage le cent dixiesme, l'aneufuiesme de l'Empire d'Arcadius & Honorius, & du temps que l'Eglise Romaine estoit gouvernee par Innocent premier du nom.

Abbaye de saint Symphorian & ses Religieux.

15. **E** Nuiro le mesme temps de Pacome, viuoit aussi le bon Abbé saint Symphorien, lequel fit bastir vn Monastere hors de la ville de Milan, où il se retira avec plusieurs Disciples, auxquels il donna vne regle, laquelle ne se trouue point, ny mesme comment ils estoient vestus, d'autant qu'incontinent apres l'ordre monastique a esté tout reduit en vn: combien que depuis saint Benoist il s'estoit diuisé en plusieurs membres. Il viuoit du temps de saint Ambroise, & ce fut à luy que ce saint Euesque enuoya saint Augustin apres son Baptisme, comme a vn homme plus signalé en pieté & doctrine que les autres.

Il estoit tresdocte, & conuersa familièrement avec Victorien excellent & fameux Orateur, duquel saint Hierosime se dit auoir esté disciple & auditeur.

Monastere de saint Martin de Tours.

16. **R** Este encore deux autres personnages qui ont fondé des Monasteres: le premier, saint Martin natif de Sabarie, Chasteau fameux en Hongrie, nourry à Paue, baptisé à Poitiers par saint Hilaire Euesque de ceste ville là: il fit bastir vn Monastere à Milan, & vn autre à Poitiers, où il s'arresta luy & ses Religieux viuans d'une si sainte vie, qu'on s'estimoit heureux, qui en pouoit auoir vn pour Euesque, & luy-mesme fut quelque temps apres esleu Euesque

Euesque de Tours où il fit bastir ce celebre monastere de Marmontier, à demie lieuë de ceste ville la, personnage au demeurant de grande sainteté, tant pour son obeyssance, patiëce & humilité que charité & pauvreté, faisant plusieurs grands miracles entr'eux: Il resuscita trois morts, il rendit la veüe a plusieurs aueugles, & guerit plusieurs malades de diuerses infirmités: il trespassa du temps des Empereurs Arcadius & Honorius, Syrice premier du nom seant au saint Siege.

Religion de saint Hierosme.

MAis qui pourroit passer souz silence, le grand saint Hierosme ce miroir de penitence, 17. qui a seruy de pere a tous les autres Docteurs, & duquel l'Eglise tire iournellement vn grand fruct des ses labours.

Ce grand personnage eut pour pere vn gentil-homme nommé Eusebe, Seigneur d'un Chasteau nommé Stridonie es confins de la Pannonie & de Dalmatie, lequel paruint a vne doctrine si releuee par dessus le commun, que saint Augustin dit de luy, que telle a esté sa cognoissance en toutes les sciences liberalles & aux langues, que iusques à son temps, il na cogneu aucun autheur qui se peut comparer a luy: Il fut sept ans entiers, sans faire autre chose que voyager avec grand'peine & difficulté, apres lesquels il s'en alla au plus aspres deserts del'Egypte, où il fit la demeure l'espace de quatre ans entiers, & qui vouldra scauoir ses ieunes, les peines, & ses austeritez, qu'il fit en cel lieu, lise la lettre qu'il escrit luy-mesme à Eustochius a la fin desquelles années il s'en alla en Bethleen cité de Iudee, hors les portes de laquelle du costé de l'Occident, non gueres loing du lieu où nasquit nostre Redempteur, par la permission de Cyrille Archeuesque de là.

Il edifia vn beau Monastere, dans lequel en peu de temps il assemble grand nombre de Disciples entre lesquels furent le saint personnage Eusebe de Cremone, qui a depuis escrit la vie de son maistre, & Symphronie qui a aussi escrit fort doctement. Saint Hierosme escriuit en ce lieu avec ses disciples, selon l'institution des Apostres, sans que par le grand travail auquel il s'exerçoit continuellement en la traduction des saintes Escritures, il relascha de sa penitence.

Son ordre s'appelle des Hierosmiens ou Hieronymites, qui sont encore aujourd'huy beaucoup en Espagne: ils se vestent par dessus d'une tunique blanche, & par dessus portent vn manteau de couleur tannée, plissé par en haut, comme on vse en la congregation des Iesuites.

Le principal Monastere de toute ceste congregation s'appelle Saint Barthelemy de Lupiëne, qui est assis a trois lieues pres de la ville de Gardayes, & sont de cet Ordre bien trente deux Monasteres en Espagne.

On les appelle vulgairement, les Moynes de saint Hierosme de Garde-Loup, ils font la profession de saint Augustin, & obseruent quelques constitutions d'iceluy: Il n'y a point de Religieux de ceste profession en Italie, sinon qu'ils entretiennent vn Procureur. Quant a saint Hierosme, il mourut le dernier iour de Septembre l'an 420. le douziésme de l'Empire d'Honorius, & du pontificat du Pape Boniface l'an premier.

Religion de saint Augustin.

LA premiere reigle approuuee de l'Eglise, apres celle de Basile le grand, a esté celle du 18. Docteur des Docteurs saint Augustin: Cét esprit si digne & si releué, & qui ne sera jamais honoré selon son merite, nasquit enuiron l'an 358. au Chasteau de Tegaft, & eut pour pere vn nommé Patrice, & sa mere Monique: en l'aage de dix-huict ans, la lecture d'un liure nommé Hortense, le rendit Manicheen, & comme il fut venu à Rome, il acquit vne telle reputation pour sa doctrine, que les Romains erigerent vne statuë en son honneur: Et de là s'en estant allé à Milan, les prieres de sa mere sainte Monique, & les doctes Sermons de saint Ambroise, le tirerent de l'erreur, où il auoit esté iusques au trentiésme an de son aage.

De là s'en retourna en son pays, & ayant obtenu de l'Euesque d'Hippone vn iardin hors la ville, il fit bastir vn Monastere auquel il viuoit du labour de ses mains, en toute integrité, selon l'institution de la primitive Eglise.

Lorsqu'il print l'habit de Religion, il auoit douze compagnons, desquels voicy les noms, Augustin, Nembride Enode, Alipe, Pontient, Dieu-donné, Simplician, Faustin-Grec, Hordule, Valere, Iustin, & Paul, lesquels se ceignirent tous d'une ceinture de cuir, au rapport du mesme saint Augustin, à la difference des Moines.

Après donc avoir esté quelque temps en ce Monastere, avec d'autres compagnons routes fois que ceux qui ont esté nommez cy-dessus, voyant l'affluence du peuple qui le venoit visiter, il se retira à deux mille de la ville, & ceux qui le voulurent suivre, bastissoient de petites logettes sur les costaux de la montagne.

De là vint l'origine des Hermites de saint Augustin, lesquels pour lors estoient bien iusques au nombre de six vingts, souz son obeyssance: nul d'eux beuvoit point de vin, sinon en cas de necessité.

Ce nombre par après multiplia, de sorte qu'en peu de temps on vid en Afrique plusieurs Monasteres de cet ordre: mais les persecutions des Goths & Vandales, les contraignirent de quitter le pays, & de s'en aller aux autres Provinces de Mesurestienne, ou cet ordre fut encore tellement persecuté par les heretiques & infidèles, qu'il fut presque du tout esteint, & ce iusques au temps de Guillaume Duc de Guienne, qui se rendit Hermite de cet ordre, la sainteté de vie duquel fut cause qu'il obtint des Papes Anastase & Adrian, tous deux I V. de leur nom, de pouoir laisser les Hermitages & se retirer luy & les freres de son Ordre dans les villes.

Et avec cette permission il fit bastir vn beau & grand Monastere à Paris qui fut le premier de cet ordre basti dans les villes, & ses Religieux à cause de leur restaurateur, s'appellerent Guillemins. cela aduint l'an 1157.

Depuis environ l'an 1200. cet ordre commença de florir en Italie par le moyen de saint Iean surnommé le bon, natif de Mantoue, qui se rendit Religieux de cet ordre, acquerant vne si grande reputation, tant pour sa sainteté que pour sa doctrine, qu'à son occasion on fit bastir plusieurs Monasteres de l'ordre de saint Augustin, tant en la Romagne, & Duché de Spolète, qu'en la marque d'Ancone & en la Lombardie, si qu'on le peut nommer le pere & reformateur de c'est ordre en Italie. Il mourut l'an 1222. son corps repose à Mantoue en l'Eglise saint Agnes, illustré de plusieurs miracles.

Quelques vns tiennent qu'il a esté precepteur de saint François d'Assise, & qu'il fit profession entre les mains dudit Iean.

Après sa mort l'ordre se multiplia grandement, mais les Religieux prindrent diuers habits, les vns se nommants de saint Augustin, les autres de saint Guillaume, d'autres de saint Iean le Bon, aucuns de la congregation de saint Fabien, autres de celles des Britins. Cela fut cause que l'an 1243.

Le Pape Innocent quatriesme du nom, ordonna que tous Hermites & autres Religieux de l'ordre saint Augustin, seroient appelez d'un seul nom, à sçavoir Augustins, ou Hermitains de saint Augustin, & combien qu'ils fissent leur residence dans les villes, qu'ils seroient neantmoins appelez Hermitains, & viuroient selon la profession & regle de saint Augustin, de maniere que ces diuerses sortes d'habits furent reduits en vn.

Ceste Religion de saint Augustin est diuisee en ceux qu'on appelle Conuentuels & ceux de l'Obseruance, laquelle Obseruance est derechef diuisee es onze congregations, lesquelles depuis ce Pape Innocent se sont reformees, à sçavoir, l'Obseruance Milerane, la Carbonienne, la Petusienne, celle de Lombardie, celle du mont Orthon. la 1. Baptistelle, la Pouilloise, Calabroise, Dalmatense, & celle de saint Paul, desquelles il sera parlé cy après chacune en leurs temps.

Ordre de saint Benoist.

19. **A** Pres avoir parlé des fondateurs & de l'Origine des Religions qui ont flory en Egypte, Syrie, Armenie & Afrique, il est bien à propos de voir ce qui se passoit en Occident ou de premier abord se presente le grand S. Benoist, le Patriarche des Moines de ceste contree: il naquit quarante ans après S. Augustin l'an 472. en la ville de Norsie, regions des Sabins autrement Ombrie, de la noble famille des Regards, lors puissante & illustre non seulement en Norsie, mais en tout le pays d'alentour.

Son Pere auoit nom Propre, & sa mere Abondance. Il fut enuoyé à Rome en l'aage de dix ans, pour y apprendre les sciences liberales, mais il quitta estudes & richesses & s'enfuit en vn Chasteau nommé Efidé, suivy seulement de sa nourrice, & de là en vn desert prochain de Subiac autres fois vne bonne ville des Latins à 40. milles de Rome: où il fut trois ans faisant vne fort austere penitence, n'estant cogneu que d'un Moine appellé Romain: Mais ayant esté decouvert par de certains Pasteurs, le peuple accourut le voir de toutes parts, à l'endroit duquel il eut vne telle force de persuader qu'il falloit abandonner le monde, qu'ils edifierent en peu de temps douze Monasteres, & leur ayant donné à tous de bons superieurs, il se retira quand à luy avec vn nombre de ses meilleurs Disciples, au lieu où est maintenant le

le Monastere du mont Cassin, où estoit anciennement la ville de Cassin, apres de celle d'Aquin en la Beasse, ayans auparauant ruiné tous les Temples des Idoles, & brisé leurs statues, desorte qu'il fut le premier qui annonça en ce lieu là le nom de Iesus-Christ: là il recueillit tous les Moines, & autres solitaires qui estoient escartez en diuers endroits, auxquels il donna par escrit la regle selon laquelle, eux & leurs successeurs auroient à se conduire, & ceste regle fut la troisieme, en contant celle de saint Basile acceptee par le saint Siege.

L'un des plus signalez Disciples de ce S. fut saint Maur, lequel par sa predication & bonne vie, reforma la vie Monastique en France, l'autre fut Placide qui fit le mesme en Sicile.

Cet arbre a produit depuis plusieurs Rameaux comme les ordres de Clugny, de Camalduly, du Val d'Ombre de Cîteaux, des Humiliez, Celestins, Oliuetains, & de ceux de sainte Iustice.

Comme toutes choses forlignent avec le temps, & se desuoient quasi insensiblement du droit chemin, l'ordre de saint Benoist ayant flory avec grande reputation, s'esloigna tellement de l'institution premiere de leur fondateur, que les Conciles tant generaux que particuliers auoient de-là fait plusieurs ordonnances pour les reformer, & les faire retourner à leur premier principe.

Mais ce que les decrets n'y l'autorité des saints Peres n'auoient peu executer, la sainteté d'un bon Abbé de Clugny, nommé Odo, le fit heureusement reussir, faisant resusciter presque de mort à vie l'Ordre Monastique, contraignant d'observer, & observant luy-mesme de point en point tout ce qui se practiquoit du temps de S. Benoist, de sorte que plusieurs autres Abbez attiréz par son bon exemple, reformerent aussi leurs Abbayes, ce qui se fit non seulement en France, mais en Espagne, en Allemagne, & en Italie.

Et d'autant que ceste reformation auoit eu son commencement à Clugny, l'union de tant d'Abbayes, qui estoient enuiron bien deux mille, fut appellé la congregation de Clugny, & tous les ans par la permission & souz l'autorité des Papes, tous les Abbez de ceste congregation s'assembloient en un certain lieu, & appelloient cela Chapitre general, où il se traictoit du reglement, façon de viure des Religieux, ostant & punissant ceux qui auoient failly.

Ce bon saint Odo viuoit l'an 913. & mourut souz l'Empire d'Henry second, durant le Pape lean X. natif de Raucenne.

Ordre de la congregation de Cumalduly.

Quant à la congregation de Cumalduly, elle eut pour fondateur S. Romoald natif de 10. Raucenne de la famille des Saxons, lors noble & illustre en ceste cité, lequel estant naturellement porté à la solitude, encores qu'il fust l'aîné & l'unique de sa maison, il quitta le monde en l'age de 20. ans, & se retira au Monastere des Chasses près de Cauerne, où il s'acquit par la bonne vie, infinies personnes à nostre Seigneur, de sorte que selon Pierre Damian non seulement en la marque Treuisane, Romagne, & Toscane, mais encores en la France & en la Syrie si grand nombre se conuertissoient que s'il n'y eust mis ordre, presque la meilleure partie du monde, par maniere de parler, se fut mise en Religion, plusieurs Comptes, Marquis, Ducs & autres personages illustres estans ordinairement ses disciples.

Il edifia plusieurs Abbayes en la Toscane, en la marque d'Auerne, en la Romagne & es parties d'Istere, lesquelles il remplit toutes de Moines, puis il bastit le fameux & celebre lieu de Camalduly en la Toscane pres d'Arezzo appellé ainsi d'un certain Maldo Gentil-homme Aretin, lequel cognoissant la sainteté de Romoald luy donna vne partie de l'Appennin, où est auourd'huy basty ce Monastere, lequel Romoald voulut qu'il fust ainsi nommé, en recognoissance de son bien-facteur.

Ce lieu se maintient encores en sa premiere vigueur gardant son obseruance iusques auourd'huy, ce qui le rend honorable & reueré entre tous.

Quand à saint Romoald il florissoit l'an de salut 1000. estant l'Empire des Grecs tenu par Basile & Constantin, & celuy des Allemans par Othon 3. du nom. Il mourut âgé de 120. ans, ayant esté 20. ans au monde, trois ans Moine, & 97. Hermite. Ceux de la congregation se vestent de blanc à la façon Monachale, & gardent le reste de la regle saint Benoist.

De l'ordre de Grand-mont.

L'Ordre de Grandmont fut institué à Grandmont en Lymosin sous la règle de saint Benoît l'an 1076. par Estienne, Gentil-homme d'Auvergne.

De l'ordre des Hospitaliers de saint Anthoine.

21. **L'**An 1095. fut institué l'Ordre de ceux qui seruent aux malades des Hospitaux de saint Anthoine, c'est à dire, ceux qui vont perdant leurs membres peu à peu consumez, comme on dit, par le feu sacré, & ce par ce Gentil-homme François, nommé Gaston avec Guerin son fils, estans compagnons, lesquels comme ils estoient las prindrent pour marque la lettre Tau.

Ordre du Val d'Ombre.

22. **C**elle du Val-d'Ombre a eu son Origine de Jean Gualbert, lequel estoit Seigneur de Petriuol & du Val de Presche: cestuy-cy ayant rencontré vn sien ennemy le iour du Vendredy saint, lequel l'ayant tué, son frere & l'autre se voyant serré de si près qu'il n'auoit aucun moyen d'eschapper, le pria de luy sauuer la vie, pour l'amour de celui qui ce iour là auoit voulu mourir en l'arbre de la Croix, pour le salut de tous, desquelles prieres Jean fut tellement esmeu, que non seulement il luy donna la vie, mais encores ayant mis pie à terre, l'embrassa tendrement, & luy promit à l'aduenir de le tenir au lieu de son frere qui estoit mort.

De là il s'en alla en l'Eglise de saint Miniat près de Florence, pour faire son Oraison, où s'estant mis à genoux deuant l'Image du Crucifix, qui estoit au milieu du Temple, inclina visiblement la teste deuers luy, avec vn croulement & fracasement du bois dont elle estoit presque toute, monstrant par là que Dieu auoit eu agreable l'œuvre qu'il auoit fait, & s'il faut ainsi parler, le remercioit de ce qu'il auoit pardonné à son ennemy pour l'amour de luy: Ce miracle l'induisit à s'aller rendre Religieux en ce Monastere saint Miniat, auquel ne pouuant demeurer pour de certaines causes raisonnables, il s'en alla sus vn bras de l'Apenin, distant de Florence vingt mille, & s'arresta en vn lieu nommé Val ombreux, où il ediffia vne simple & pauvre Abbaye, laquelle deuint riche & fameuse par apres: de ce lieu print le nom & l'origine la congregation du Valdombre. Il mourut l'an 1037. sous l'Empire d'Henry 3. estant Pape Gregoire septiesme, lequel le canoniza selon quelques vns, d'autres disent que ce fut Calixte.

Les Religieux de ce lieu se vestent d'habit claustral de couleur fumée ou perse, à la difference des Moines noirs, & obseruent la Règle de saint Benoît.

De l'ordre de saint Bruno, & des Chartreux.

23. **V**N autre miracle, mais fort espouuantable, quelque temps apres l'establissement de celui du Valdombre, fut cause de l'origine de celui des Chartreux, à sçauoir l'an 1080. de ce Docteur de Paris, homme sçauant & de reputation, lequel estant trespaslé & porté en l'Eglise, aux Vigiles qu'on chantoit sur son corps, à ceste leçon qui commence *Responde mihi* s'estant leué en son seant dans la biere, respondit le premier iour avec vne voix terrible, *Iusto Dei iudicio accusatus sum*, c'est à dire, par le iuste iugement de Dieu ie suis accusé: au second iour, car on differra pour lors la sepulture, comme on fut au mesme endroit des Vigiles, il se leua comme le iour de deuant, prononçant fort haut ces paroles, *Iusto Dei iudicio indicatus sum*, & comme on eut remis encores au lendemain de voir la fin de ceste merueille, la nouvelle de laquelle s'estoit espandue par toute la ville, le peuple estant accouru de toutes parts, & les Vigiles recommencées, comme on fut venu à la mesme leçon & qu'on eut dit ces mesmes paroles, *Responde mihi*, il se leua comme les iours de deuant en disant. *Iusto Dei iudicio condemnatus sum*, avec vne voix si estrange & espouuantable, qu'elle estonna, non seulement ceux qui estoient là presens, mais encores ceux qui en oïrent parler.

Or entre plusieurs Docteurs qui assisterent à ce conuoy, estoit vn nommé Bruno Aleman, natif de Colongne, de riche & noble maison, Chanoine en l'Eglise Cathedrale de Reims en Champagne, Docteur en Theologie & en Droit commun, lequel esmeu de ce spectacle, non iamais apparauant veu ny ouy, delibera de quitter le monde & se retirer en solitude, & ayant communiqué sa deliberation à six de ses compagnons, Louys Docteur Parisien,

Parisien, qui fut le premier Prieur de la Chartreuse apres Bruno, deux qui portoient le nom d'Estienne, & tous deux Chanoines, Hugues Prestre, & André & Guerin hommes laïcs, lesquels flescis par les remonstrances du saint homme, se resolurēt de se retirer en quelque desert, & s'en estans allez à Grenoble, cité de Dauphiné en France, ils allerent se presenter à Hugues, qui pour lors en estoit Euesque, afin d'obtenir de luy quelque lieu solitaire, pour y passer le reste de leurs iours.

Or arriué deuant l'Euesque ayant eu vne vision que Dieu estoit descendu, ce luy sembloit, au lieu où est à present la grande Chartreuse, & qu'il voyoit sept estoiles de couleur d'or, qui s'esleuoient de terre, differentes de celles du firmament: ce fut la nuit de deuant que le saint homme & sa troupe arriuerent, lesquels estans venus trouver l'Euesque Hugues, comme il les vid au nombre de sept: & qu'ils luy eurent déclaré leur dessein, il ne doura plus de l'interpretation de sa vision, de sorte qu'il leur donna en don perpetuel, vn lieu desert, distant de dix mille de la ville de Grenoble appellé la Chartreuse, lieu froid, comme estant entre deux tres-hautes & tres-steriles montagues, au demeurant plein d'arbres touffus, mais sans fruct, habité seulement des bestes.

Ceste donation confirmée par Hugues Archeuesque de Lyon, & par apres par Vrbain second: là ils commencerent à bastir des logettes, tellement separees qu'on ne nuisoit point à la solitude de son compagnon, edifiens vne Eglise au haut de la montagne, vacquans en ce lieu à Meditations, Oraisons, & à la lecture des Saintes lettres, à l'exemple des saints Peres d'Egypte, trauailloient de leurs mains, maceroient leur chair par ieune & discipline, & en fin se proposerent de s'abstenir tellement de manger chair toute leur vie, & de porter la haire sur le dos: ce qu'ils obseruent encor auourd'huy. Ils se vestirent tous de blanc, fors la cappe qu'ils portent noire, & outre ce qui a esté dit, ieunent souuent, gardent vn grand silence, mangent seuls chacun de substance, horsmis le Dimanche, & quelques certaines festes auxquelles ils mangent tous ensemble au refectoire, ont certains iours auxquels il leur est permis entre None & Vespree, de pouoir deuiser ensemble sans scrupule: leur office est fort long, en fin ils ne s'estudient qu'à la solitaire.

Ceste Congregation s'estend en diuerses parties de la Chrestienté, & est diuisee en dix sept Prouinces, auxquelles il y a nonante & trois Monasteres. Ils ont esté nommez Chartreux, du lieu où se retira premierement leur Predicateur, lequel ayant esté mandé à Rome par le Pape Vrbain qui auoit esté auparauant son disciple, il y fut, & luy seruit grandement pour appaiser les troubles qui estoient lors en l'Eglise: avec sa benediction il partit de Rome, & prenant son chemin par la Calabre, il arriua en vn desert appellé la Tour au Diocese de Squilace, où il s'arresta, faisant avec ses compagnons qu'il auoit avec soy, sa residence en certaines cauernes sous terre: ce que scachant Roger Prince de ceste contree, il alla visiter le saint homme Bruno: & luy donna & à ses confreres tout ce desert, où ils edifierent vne Eglise, en laquelle Bruno demouroit seul, puis ils edifierent encore vne autre non guiere loing d'icellé, avec vn Monastere aupres où estoient les freres: ce fut en ce lieu où il mourut l'an 1101. Paschal second seant au saint siege, & Henry quatriesme en l'Empire: il fut canonisé l'an 1520.

De l'ordre de Citeaux & de Cleraux.

EN suite de l'Ordre des Chartreux vient celui de Citeaux, fondé par Robert Abbé de 24. l'Abbaye de Molesme, ville du Duché de Bourgongne aux enuirs de Langres, lequel voyant qu'il ne pouoit reformer les Religieux de son Abbaye, les grandes richesses desquels les auoient rendus superbes & lascifs, print avec luy vingt & vn des plus gens de bien d'entr'eux, & partant de Chaalons, vne des principales villes de Bourgongne, alla faire sa demeure en vn lieu solitaire appellé Cisteaux, où par la permission de Gautier Euesque dudit lieu, & de Hugo Archeuesque de Laon avec ce que luy fit Odo Duc de Bourgongne, il donna commencement au Monastere de Cisteaux, duquel toute cette Congregation a pris son nom & son Origine, mais les Religieux de l'Abbaye de Molesme firent tant enuers l'Euesque qu'il retourna à Molesme, & vn d'entr'eux nommé Estienne, fut esleu en sa place.

Or quinze ans apres cette fondation Bernard, natif du Chasteau de Fontenay en Bourgongne, duquel son pere estoit Seigneur, avec trente de ses compagnons, entre lesquels il y auoit trois de ses freres, se rendit Religieux en ce Monastere, où il fit vn tel progres en la vie spirituelle, qu'il deuaça de bien loing tous les autres Religieux de son tēps, tant en sainteté de vie, que science infuse & acquise, ses doctes & diuins escrits tous repleis de la douceur & suauité diuine, sont foy du dernier, & sa charité, son humilité, sa patience, ses labeurs pour le

secours de l'Eglise, affligée pour lors en plusieurs endroits, & son austerité le rendront à jamais recommandable.

Ce grand saint fut enuoyé de son supérieur, pour fonder la grande & celebre Abbaye de Clairvaux, allée pres de la riuere d'Aulbeaux enuiron de Langres, qui s'appelloit auparavant le Val d'Absynthe, soit à cause de la quantité de ceste herbe qui y croissoit, ou pour la cruauté des habitans qui y faisoient leur retraite, ce qui aduint l'an mil nonante-huict, tenant l'Empire Henry I V. du nom, étant le Roy de France Philippe premier, & continuât depuis à bastir grand nombre d'Abbayes es Prouinces de la France, & ailleurs, il amplifia & enrichit tellement cet ordre qu'il sèble, & le pourroit-on bien dire avec raison, qu'il est le pere & restaurateur d'iceluy: car on trouue qu'il a de son tēps restably & edifié de nouveau cēt soixante Abbayes, étant de son viuant mesme tenu de tout le monde pour homme saint, docte, prudent, & de Conseil admirable.

Ceux de Cîteaux obseruent la reigle de saint Benoist, portent la tunique blanche, & se ceignent de cordon de laine, la celle, scapulaire, & la cappe sont de noir, ils n'auoient pas accoustumé de manger de chair, mais l'an 1560. ils obtindrent vn breuet d'en pouuoir manger certains iours de la sepmaine: On les appelle à Milan Religieux de saint Ambroise, à Rome de sainte Croix, & en Hierusalem ils se nomment du tiltre de l'Eglise.

De l'ordre des Humiliez.

25. **L'**Ordre du temps veut que nous parlions maintenant de l'ordre des Humiliez, lequel fut restably pour vne telle raison. L'Empereur Federic Barberousse, s'estant rendu le maistre de la ville de Milan, apres l'auoir toute destruite en despit des Milannois, afin qu'il ne restast aucune memoire d'eux, il y fit semer du sel, & confida plusieurs Nobles & Illustres personages, non seulement de Milan, mais aussi de toutes les citez voisines avec leurs femmes & enfans en exil en Allemagne, entre lesquels estoit Gualuagne Vicomte, & des-jà Duc de Milan, fils du grand André: tous lesquels apres plusieurs annees, ennuiez qu'ils estoient d'un si long exil, ils se vestirent tous de blanc, & s'estasietez plusieurs fois aux pieds de l'Empereur, ils obtindrent en fin de retourner en leur patrie, où avec cet habit mesme ils passerēt le reste de leur vie en grande chasteté & sainteté, gagnant leur vie à faire des ouurages de laine, & donnant aux pauures le gain qui en prouenoit, se nourrissant du demeurant fort sobremēt. Mais voyans qu'ils ne pouuoient pas viure ainsi longuement sans se mettre sous quelque reigle, par l'aduis d'un bon Prestre nommé Iean, qui estoit Gentil-hōme, & natif de la ville de Come au Duché de Milan, autres disent de Mede, vne terre de Come, esloignée d'environ douze milles, ils se mirent sous celle de S. Benoist: la reigle qu'il leur donna fut depuis approuuée par le Pape Innocent III. & par les autres Papes ses successeurs: de maniere qu'en plusieurs endroits d'Italie, il y a plusieurs Monasteres de ceste Congregation. Ils ont à Milan dix Preuostez ainsi les appellent ils, & trois Conuents de Religieuses, le plus renommé, desquels est celuy qu'on nomme le Cerueau, ils ont esté les premiers qui ont traduit à Florence l'art de besongne en laine, lors qu'ils y allerent habiter.

Ceste Cōgregation cōmença l'an 1180. du tēps du Pape Luce III. du nō, & de l'Empereur Federic: Ils sont vestus de blanc, portēt vne patience, avec vn petit capuchō cousu derriere, & mettent par dessus vne longue robe fendue par les costez, pour passer les bras dehors, sans laquelle ils portent encor vn grād capuchon, qui leur couuroit la pluspart des espaules, quasi à la maniere du Camail des Cardinaux: ils ont vn bōnet rond en la teste, & leurs Prelats pour estre remarquez les portent quarrez, cōme fōt les autres Prestres, neātmoins de couleur blanche, ils souloient viure en cōmun, mais leur reuenu étant tōbé entre les mains de leurs Prelats, ils se laisserēt aller à viure à leur licēce: mais l'an 1568. le S. & Illustrissime Cardinal Charles Borromees s'efforça de les remettre en l'estat premier auquel ils estoient iadis, à sçauoir de viure en commun & en Religieux, mais ce ne fut pas sans faire souffrir beaucoup à ce saint personnage, & sans qu'il aduint quelques grands scandales, plusieurs d'entr'eux ne s'y vouls pas reformer.

De l'ordre des Carmes.

Combien que l'ordre des Carmes ait tiré son cōmencement & son origine du Prophete Elie, duquel il a esté fait quelque mention cy-deuant, toutesfois l'ordre des tēps a fait qu'on a remis à en parler iusques à maintenant. Ce S. Prophete viuoit au monde de 915. ans deuant l'aduenement de nostre Seigneur, & fut emporté en vn chariot de feu en l'an de son âge. Son pere eut nom Sabata de la terre d'Arabin, & de la lignee d'Aaron. S. Hierosme tient qu'il fut le premier des hommes qui ne se maria jamais. Il donna commencement à son ordre, non au terroir de Carith, mais au mont de Carmel où il viuoit solitairement & religieusement, obseruant les trois poincts principaux de la Religion, à sçauoir pauvreté, obediēce, & chasteté.

Entre plusieurs Disciples qu'il eut, il s'en trouue quatre de fort signalez & tous Prophetes, le premier le Prophete Elisee, le second Ionas qui prophetisa en Ninive: le troisieme Michee de Lemba fils de Herelin qui prophetisa en Israël auparavant Helie, & depuis la disparition d'iceluy: Le quatrieme fut Abdias de la terre de Sichem & natif de Bethacoron.

Elisee fut celuy qui demetra au mont de Carmel avec plusieurs enfans des Prophetes qui s'en allerent au iardin couper des fascines, dequoy ils firent des logettes avec du mortier: Ionas s'habitua avec ses Disciples en Sarepte, Abdias en Samarie, quelques autres en Galgala, Iericho & Ephraïm.

C'est ce que dit le liure de la Concordance du vieil & du nouveau Testament, disant, la vie prophetique passa d'Elie en Elisee, lequel estant en sa plus grande vigueur, institua l'ordre des Conuents, & non seulement Elie garda chasteté, mais encor Elisee & ses Disciples. Voila le premier estat de cet ordre.

De l'ordre sacré & reformé de Citeaux, appelé l'Ordre des Fueillans.

LE reuerend pere Dom Jean de la Barriere, auteur de la reforme des Religieux de l'ordre Sacré de Cisteaux appelez Fueillans, a prins son origine en Quercy Province d'Aquitaine & Caul: Narbonoise.

La ville de saint Cyre le vit naistre de parens Nobles honorables & qui le destinerent dès sa jeunesse au seruice des Autels, & fut dès l'age de 21. an fait Abbé commendataire d'une Abbaye de l'ordre de saint Bernard nommée l'Abbaye de Fueillans, & demeura en cette condition l'espace de 11. ans, c'est à sçauoir depuis l'an 1562. iusques au 9. iour de May l'an 1573. qu'il fut inspiré de Dieu de mener vne vie fort estroicte & Religieuse, s'enroollant sous la reigle & l'habit de Cisteaux, puis apres auoir acheué l'année de probation il fit profession en l'Abbaye & Monastere d'Eunes.

Ayant fait les trois vœux de Religion, il se retira à Fueillans, dont il estoit Abbé, là comme Supérieur il assembla ses Moines & Religieux au Chapitre, pour les inuiter & exhorter à prendre l'obseruation de la reigle à laquelle plusieurs ne voulans se ranger, il fut contraint les enuoyer en d'autres Conuents & Monasteres de l'ordre, non sans grands contrastes & difficultez, car tousiours les bonnes intentions & saints desirs des seruiteurs de Dieu sont trauersés & contrariés en leurs commencemens, & est beaucoup plus difficile de reformer des familles & congregations Monastiques & Religieuses, qu'en instituer & fonder de nouvelles, & faut croire que ce ne fut pas sans grande peine & trauerses qu'il eust à souffrir & endurer tant de la part des hommes vicieux & indeuots, que de l'ennemy des humains: mais ce grand courage surmonta & vint à bout de toutes les oppositions & difficultez, s'estant mis sous la sauuegarde & protection des innocents: & sous le patronage de la Vierge Sacrée, & des glorieux saints Benoist, Robert & Bernard.

Mais comme il ny a de si grand orage, ny temps si pluuieux qui ne soit suiuy apres du calme & du beau temps, il receut de la consolation apres ses trauerses & tempestes, car les plus feruens & deuots Religieux de l'Abbaye de Fueillans, prirent resolution de suivre les traces, & menerent la vie tres austere qu'il leur monstra, imitans de près les vertus & perfections de ce tres bon Pere, lequel s'aduançoit de iour en iour en la vraye perfection Religieuse, & croissant sans fin de plus en plus en l'amour du Sauueur, ainsi que le deuot S. Bernard.

Ces bons Religieux menoient avec le Pere Jean vne vie plus Angelique qu'humaine, car ils s'abstenoient non seulement de chair, d'œufs, de poisson & de tout laictage, mais en outre d'huile, de sel & de vin, ne viuans que de pain, de legumes & d'eau.

Le Pape Gregoire 13. ayant ouy parler des vertus & de l'institut de l'Abbé des Fueillans, voulut fauoriser paternellement à vn si genereux progres & commencement, luy enuoyant vn bref de congratulation, & demanda deux de ses Religieux pour le venir trouuer à Rome, lesquels furent les fondateurs du deuot & celebre Monastere de saint Bernard es estuues de l'Empereur Diocletian. Sixte V. de l'ordre de S. François, successeur de Gregoire, ne le fauorisa pas moins, & ayant sceu la peine & difficulte que plusieurs auoient à viure selo cet institut, en modera les plus grâdes rigueurs & austeritez. Le Pape Clement 8. luy resmoigna & à ses Religieux vne affection vrayement paternelle, & leur donna plusieurs graces & priuileges.

Le Roy tres Chrestien Henry 3. informé de son merite & de sa bonne vie, le fit venir de son Abbaye près Thoulouse à Paris accompagné de 60. siens Religieux, & fut receu de sa Maïesté au bois de Vincennes, où il demeura depuis l'onzieme de Iuliet (auquel iour aucuns celebrent la translation de saint Benoist, & les autres pour le different qui en est, l'appellent veneration) iusques au 8. de Septembre, iour de la Natiuité de la tres sainte Vierge, que la Maïesté leur auoit fait bastir aux faux-Bourgs de saint Honoré les Paris, tout ioignant les Peres Capucins & le iardin Royal des Tuilleries.

L'Eglise de ce Monastere a esté bastie & ornee tres-somptueusement par les pieuses liberalitez de nos Roys Henry le Grand de glorieuse memoire & Louys XIII. auquel Dieu donne vntres long & tres-heureux regne.

La Royne Marie de Medicis, femme & mere desdits Monarques & plusieurs grands Princes & Seigneurs, Princesses & Dames, l'ont illustré de beaucoup de telles & riches Chappelles, ornemens & paremens magnifiques & est l'une des plus belles Eglises de cette grande ville de Paris.

Ledit pere Jean de la Barriere, apres auoir par la bonne odeur de sa feruente deuotion & pieté estendu sa congregation des Fueillants en diuers lieux de France, & de Sauoye & d'Italie (où aujourd'huy on void plusieurs grands Religieux versez en la science des saintes lettres, eminens pour leur grand sçauoir & bonne vie, dont le nombre n'est pas petit) il se retira au Monastere de saint Bernard à Rome, où estant paruenu à l'age de 56. ans, il deceda fort saintement le iour de saint Marc 25. d'Auril de l'an 1600. qui estoit l'annee du grand Iubilé.

Les peres Fueillans & les meres Fueillantines imitās ce saint Pere, ont edifié gradement tous les habitans des villes où ils sont habitez & tous ceux qui ont cogneu particulièrement ce R. P. Dom Jean de la Barriere, les honorent & reuerent grandement.

Le second commença en saint Jean Baptiste, & en ses Disciples qui frequentoient les lieux d'aupres le Iordain, & qui furent apres la mort de ce saint conuertis à la profession Evangelique, deffendans constamment l'Eglise avec les Apostres, lors qu'elle estoit encor naissante, & tenant tousiours l'institution du grand Elie. Ils bastirent vne Eglise au mont de Carmel à l'honneur de la Vierge Marie laquelle ils auoient ja eslee pour tutrice, & ceste Eglise fut la premiere dediee par les Chrestiens à la Vierge Marie, perséuerans en ceste maniere de viure l'espace de quatre cens ans.

Mais en l'an 412. ou enuiron Jean Docteur Grec, & quarante quatriesme Patriarche de Hierusalem qui auoit esté auparauant Superieur des Freres du mont de Carmel, à l'instance de Caprase son successeur en ceste charge, escriuit vne regle aux freres de cet ordre, laquelle il tira de l'institution du grand Elie, & de la regle de saint Basile. En ce temps les Carmes estoient appelez de diuers noms, les vns les nommans Religieux, les autres Hermites, nommez Carmes & freres de la Vierge Marie.

Or ceux qui tenoient Elie pour leur instituteur estoient de deux sortes, les vns voulans suiure la vie Monastique & Prophetique instituee par Elie, voulans estre proprement ses successeurs au mont Carmel sous la protection de la Vierge Marie: Les autres vouloient estre ses imitateurs en la vie solitaire, viuans autrement dans les deserts & lieux inhabitez.

Cela dura iusques en l'an 636. que Homar Prince des Sarasins avec vne grande multitude de des siens, ayant demantelé plusieurs places des Chrestiens en Asie, & fait mourir grand nombre de Religieux, parce qu'il trouuoit mauuais que les freres Carmes portassent l'habit blanc, d'autant que les plus grands Satrapes du pays portoient seulement ceste couleur, il contraignit ces pauures gens à laisser cet habit. Depuis en l'an 1099. les Chrestiens Latins s'estans rendus les maistres de la terre sainte, laquelle ils tindrent quatre-vingts quatre ans, les Carmes commencerent d'estre gouuernez par Prieurs Generaux Latins: de sorte que la reigle qui leur auoit esté donnee auparauant par Jean Patriarche, fut traduite de Grec en Latin par Alinime aussi Patriarche, & quatre-vingts ans apres Albert Patriarche de Hierusalem homme fort renommé, escriuit vne reigle tiree de la vie d'Helie, & du liure du susdit Patriarche Jean, & de la reigle de saint Basile le Grand, la donnant à garder par sa propre autorité à Brocard hōme de sainte vie & prieur du mont de Carmel & à les Hermites, & c'est ceste reigle d'Albert qu'ils ont tousiours obseruee depuis, laquelle fut toutesfois confirmee depuis par le Pape Honoré III. du nom: il apparoit par ceste reigle que les Carmes estoient Hermites, car ledit Patriarche Albert ordonne de dire vn nombre de *Pater noster*, à ceux qui ne sçauent pas lire, & d'autant que la sainte Vierge apparut à vn Pere de cet Ordre luy presentant vn Scapulaire, & luy disant, Reçoy mon bien-aymé, ce Scapulaire qui a esté donné par moy à ton ordre, en signe de ma confraternité, le Pape Honoré IV. du nom, leur permit de viue voix de pouoir porter les cappes blanches, l'an 1287. fut ordonné en vn Chapitre general à Montpellier, que tous ceux de ladite Congregation les porteroient, ce que Nicolas IV. approuua.

Or ne leur estoit-il pas permis de manger de la chair par la reigle du Patriarche Albert: mais les Papes Eugene IV. & Pie II. les en dispenserent, & outre ce leur octroyerent moderatiō de certains ieufnes fort estroicts, & auxquels il se estoient obligez, mais Maistre Ieā Soret hōme de grand sçauoir reforma cet ordre, & obtint du Pape Nicolas V. du nō que tous ceux qui

qui empescheroient ladite reformation seroient excommuniez, & que les freres reformez pourroient eslire vn Prieur & Vicaire general, de là se diuisa ceste Congregation en deux parties sous les noms de Conuentuels & de l'Obseruance.

Des Religieuses de Sainte Therese.

DEpuis ce temps encore la bien-heureuse Terefe d'Ahumade qui estoit de la ville d'Aui-^{27.} la en Espagne, & depuis la reformation qu'elle apporta en cet ordre surnommee Terefe de Iesus, remit encor l'ordre des Carmes en leur premiere splendeur, commençant premierement par les Monasteres des filles, dont elle fonda vne grande quantité, & par apres à ceux des hommes, lesquels on appelle encor auourd'huy les Carmes deschaulez, auxquels elle fit quelques constitutions qu'elle comprint en vne Bulle que pour ce faire elle obtint du Pape Pie I V. en datte du 17. Iuillet 1565. & depuis confirmees par autorité Apostolique en vn Chapitre general tenu à Alcade de Enares l'an 1581. & comme ceste reigle est du tout portee à l'oraison mentale, il y en a aussi vn article particulier où elle veut que les Religieux & Religieuses hors & dedans leurs cellules ou aupres d'icelles, meditent iour & nuict en la loy du Seigneur, & veillent en oraison s'ils ne sont employez à quelques iustes occupations: c'est ce qui se pouuoit dire pour le present touchant l'ordre des Carines.

Ordre de Sainte Croix.

Sont apres ceux-cy, les Religieux de sainte Croix, non qu'ils n'ayent commencé aupara-^{28.} uant, mais ils auoient esté fort trauersez.

Quelques vns leur donnent pour fondateur vn nommé Cyriaque Euesque de Hierusalē, mais les Bulles des Papes Alexandre III. Alexandre VIII. & Pie V. avec la Chronique Martimate & Sabellie, tiennent que Clere qui a succédé immediatement à saint Pierre en fut le fondateur: ayant esté admonesté par oracle diuin de pourueoir de logis aux pauvres pelerins Chrestiens qui venoient à Rome par deuotion, ce qu'il fit, donnant sa propre maison, qui estoit en la place des Patrices Romains, pour en faire vn Hospital public, qu'il garnit de tous vstenciles qu'il fit marquer d'un grand signe de la Croix, donnant la charge d'iceluy à quelques vns des plus signalez & deuots en la Religion Chrestienne: & afin qu'ils fussent mieux recogneus, il leur enioignit de porter en leur main vne Croix, en memoire de la Passiō de nostre Seigneur, en l'honneur duquel il faisoit ce saint Œuvre: en somme leur charge & office estoit de loger, accompagner & deffendre les pauvres pelerins Chrestiens qui venoient à Rome.

Après la mort de Clere les Chrestiens ayant esté grandement persecutez, en fin ils commencerent de respirer sous Constantin le grand, & la Roynie Helene sa mere, estant allée en Hierusalē où elle trouua la tres-sainte Croix, par le moyē des grandes promesses qu'elle fit à ceux qui la luy pourroient enseigner, cōme au contraire elle fit de grādes menacés à ceux qui voudroient dissimuler ce qu'ils en sçauoient. En fin vn Iuif nommé Iudas, luy en monstra le lieu, auquel estans arriuez, soudain il se fit vn grand treblement de terre, & sortit de cet endroit vne odeur si suauē, qu'il sembloit qu'on eut là espanché les parfums les plus odorans: ce qui fut cause de conuertir ce Iuif à la foy, & de luy faire crier tout haut, ô Christ, tu es le vray Sauueur du monde, & receuant le S. Baptesme se fit nommer Cyriaque, de là estant allé prescher les vertus & miracles de la sainte Croix avec plusieurs Disciples: il fut en fin Euesque en Hierusalē. Dequoy estans aduertis plusieurs des Disciples de Clere qui auoient continué iusques alors, mais secrettement, à executer l'hospitalité: ils se vindrēt descourir à Cyriaque, qui remit sus cet ordre, & luy donna vne nouvelle naissance l'an trois cens vingt cinq, lequel continua à se multiplier iusques en l'an trois cens soixante cinq, sous Iulian l'Apostat, lequel fit mourir Cyriaque en la mesme année, par la mort duquel cet ordre fut presque du tout esteint à cause de la grande persecution. Depuis il fut encor resuscité sous Vrbain II. lors que les Princes Chrestiens s'estans vnis allerent conquerir Aritulle, Hierusalē, & autres citez de l'Asie: le Pape Alexandre III. long tēps apres la persecution de Ieanne Barberousse dōna encor à cet ordre plusieurs grands priuileges. Apres vint l'erreur des Albigeois, qui porta vn si grād trouble en l'Eglise, que tous ceux de ceste Congregation qui estoient propres à porter armes, furent contraincts d'aller en personne cōbattre contre les heretiques. Et le Pape Innocēt III. au S. Concile de Latran le confirma, & luy octroya plusieurs priuileges à cause du grand dōmage que cet ordre auoit reçu. Depuis fut celebré vn autre Concile general en la ville de Mantoue, où il fut ordonné que les freres de cet ordre seroient vestus de bleu turquin, ayant esté iusques alors vestus de bureau. Le Concile se tint l'an mil quatre cens soixante, Clement VII. du nom, de la maison des Medicis, reforma encore ceste congregation: & l'an mil cinq cens soixante huit les Peres de ceste Religion tenans leur

Chapitre general en la ville de Boulongne, le Pape Pie V. leur enuoya vn visiteur, & depuis a approuue cet ordre, & augmenté d'indulgences & priuileges, le tout selon la reigle donner par Alexandre I I I. & selon l'institution de Clere.

De l'ordre de saint Dominique.

29. **Q**uant à la reigle des freres Prescheurs elle a pris son origine de saint Dominique Espagnol, comme chacun sçait, & natif d'une ville appelée Calogora au Diocese d'Osonne, où il fut Chanoine regulier, & depuis estant venu en Gascogne où il demeura l'espace de dix ans, & reduisit au bon chemin l'Euesque de Thoulouse: depuis il s'en alla à Rome au Concile de Latran sous Innocent I I I. comme il a esté dit cy-dessus, duquel il impetra de choisir à se mettre sous telle reigle approuuee en l'Eglise qu'il trouueroit bon, il esleut, & avec luy environ seize Disciples qu'il auoit, de se mettre sous celle de saint Augustin, & ayant ordonné quelques constitutions, elle fut confirmee par Honorius I I I. du nom, l'an de nostre salut 1206. l'an premier du Pontificat de ce Pontife, & l'an 6. del'Empire de Federic I I. du nom, puis estant allé à Thoulouse, il exhorta ses freres, & les enuoya prescher deux à deux, les incitans à estre Prescheurs de fait & de nom: car le Pape Innocent leur auoit desia permis de prendre le nom de Prescheurs.

Cet ordre ayant fait de grands fructs par tout le monde, & iusques aux extremités des Indes, il est diuisé en deux, à sçauoir ceux de l'Observance & les Conuentuels: en Italie ceux de l'Observance sont encore diuisez en deux sortes, les Lombards, & les Toscans, mais les Lombards tiennent le premier lieu: demeurēt à Rome à sainte Sabine, qui estoit anciennement le Palais des Papes, & fut ordonné par Honorius I I I. à saint Dominique, lequel fut canonisé par Gregoire I V. l'an 1221.

De l'ordre de saint François d'Assise.

30. **A**v mesme temps de saint Dominique, florissoit ce grand & admirable saint François natif de la ville d'Assise, au pays d'Ombre ou Duché de Spolette loin de Peruse environ huit mille, lequel s'estoit meslé de la marchandise iusques en l'aage de vingt & deux ans: mais vne forte maladie ayant esté cause de le faire transformer en vn autre homme, de superbe il deuint tres-humble, d'auare vn aumosnier, de riche, pauvre, d'amateur du monde, vn contempteur d'iceluy: & comme il passoit vn iour deuant l'Eglise saint Damian estant entré en icelle pour prier Dieu, on tient que l'image du Crucifix deuant laquelle il faisoit son oraison, parla à luy miraculeusement, & luy dit François, va t'en reparer ma maisō, laquelle, comme tu vois, tombe en ruine.

Deslors ayant conformé sa vie à la Passion de nostre Seigneur I E S V S, il mit vne haire sur sa chair nuë, & vn sac par dessus, & se seignit d'une corde, allant aussi sans chausses ny souliers pour se rendre plus contemptible: de sorte que sa renommee s'estant espandue par les contrées circonuoinnes, plusieurs personnes attirées par sa sainteté, abandonnerent le monde, & se rendirent de ses Disciples, faisant profession de pauvreté & de mendicité: ce qui fut cause qu'il escriuit vne reigle, tant pour ceux qui lors estoient vnis avec luy, que pour ceux qui viendroient par apres, laquelle il presenta à Innocent I I I. seant pour lors au saint Siege, qui la confirma l'an de salut mil deux cens douze.

Elle fut pareillement approuuee par Honorius I I I. du nom, successeur d'Innocent. Et depuis la confirmation d'icelle, il ordonna encor que ses freres s'appellassent Mineurs pour tesmoigner plus grande humilité.

Ce qui est remarquable en ceste reigle, c'est que iamais religion inuentee par homme ne fut plustost augmentee que celle-là: car en vn moment, par maniere de dire, elle remplit tout le monde, de sorte que chacun s'en esmeruilloit.

Quant au Seraphique saint François, il deceda le 4. Octobre 1226. & fut canonisé par Gregoire I X. l'an 1236. Outre les freres qu'il appella Mineurs, il establit encor vn second ordre de Religieuses sous la conduite de sainte Claire.

De l'ordre du Val des Escoliers.

31. **L'**Ordre du Val des Escoliers commença en Champagne Province de France par vn Docteur Theologien nommé Guillaume, natif d'Angleterre, lequel apres auoir esté long temps Escolier à Paris, depuis Professeur en ladite ville & en Bourgogne, à la fin il se retira en quelque Hermitage avec ses Disciples & Escoliers, & pourtant fut cet ordre nommé

nommé du Val des Escholiers, & fut approuvé par le Pape Honoré III. l'an 1118. Entre les premiers compagnons dudit Guillaume furent Richard, Euerard, & Manassés: ils tiennent la regle de S. Augustin, portent vn habit blanc, & puis vne cappe ou manteau noir. Ils ont des Conuents à Mons, en Haynaut, à Malines, à Leeuven, en Brabant, à Gerontsart, au quartier de Namur, au Liege & à Hofalize, à Paris, & à Orleans, où se tient ordinairement le General del'ordre.

Ordre des Religieux de la penitence de Iesus fondé par saint Louys.

LE grand saint Louys duquel la pieté ne scauroit estre assez recommandee à la posterité estât incité par la Roïne Blanche sa mere en l'an 1261. retira en vne grâde maison sise ^{33.} deuant le Palais, & de l'autre costé de la riuere de Seine qui passe par dessous le Pont saint Michel, des Religieux de la penitence de Iesus Christ, vulgairement dits en Latin *saccarij*, c'est à dire, saches ou freres des sacs, à cause qu'ils estoient vestus de sacs, leur en faisant dō pour y demeurer à perpetuité: mais ils n'y firent pas longue residence, car l'an 1293. le 14. d'Octobre ils le cederent & quitterent par contractés mains de frere Gilles de Rome, pour lors Prieur General de tout l'ordre des Hermites Augustins, alleguans que sans scrupule de conscience, ils ne pouuoient plus tenir ledit lieu, à cause de la pauureté, & que leur ordre diminuoit de iour à autre.

Il y auoit aussi des Religieuses de ceste Congregation qui auoient vn Conuent derriere S. André des Arts à Paris, lesquelles on appelloit Sachettes, mais elles en furent expulsées du temps du mesme Roy, & ont seulement laissé à la rue le nom des Sachettes: le meisme ordre parut en Angleterre en la ville de Londres l'an 1257. au rapport de Matthieu Paris lequel les appelle *Saccarij*.

De l'Ordre des seruiteurs de la Vierge.

INcontinent apres le deceds de saint François commença l'ordre des freres nommez Seruiteurs de la bien-heureuse Vierge Marie, qui print son origine de sept riches marchands de Florence, qui estans d'une confrairie nommée les louanges de la Benoiste Vierge, lesquels ^{34.} estans vn iour de l'Assomption en oraison, entendirent vne voix qui leur dit, qu'ils deuoient estre comme sept estoiles, & que dans peu de temps ils donneroient commencement à vne Religion portant le nom de la sainte Mere de Dieu, leur conseillant cependant ceste voix, de se separer de leurs parens, viure d'une vie plus estroite, & vacquer à oraison: ce qu'ils executerent, & prindrent la robe noire en memoire du dueil que la sainte Vierge auoit porté en la mort de son fils, & se retirerent en vne haute montagne nommee Senarie, ou le mont Atenay, à huit mille de Florence, estant située au milieu de six autres montagnes, où ils menerent vne vie tres-austere, employans tous leurs temps en oraison, pour les necessitez de l'Eglise.

Les noms de ces sept sont Bonfils, d'autres disent des Monaldy, Amedee, Bonajonta, Manetto d'Antelli, Alexis Fauconnier, Sostegno des Sostegni, Vgnecone de la famille des Vgneconi: & comme vn iour des Roys ils estoient venus à Florence demander l'aumosne, les petits enfans commencerent à crier comme inspirez diuinement. Donnez l'aumosne aux seruiteurs de la Vierge Marie, si que des lors cet ordre fut appelé de ce nom, & le Pape Innocent VIII. leur confirma.

Quant à la robe noire & le scapulaire qu'ils prindrent, & qu'ils se mirent sous la reigle de saint Augustin fut cause qu'il leur fut reuelé, ainsi comme on dit par la sainte Vierge, sept ans apres qu'ils s'estoient retirez en la montagne, si qu'ayans pris ceste regle, le premier chef de leur ordre fut le Pere Bonfils, puis ils edifierent l'Eglise & le Monastere de l'Annonciade celebré par toute l'Italie où se void le pourtraict du visage de la mere de Dieu, peint, comme on tient par les Anges.

Vingt ans apres leur fondation, vn nommé Philippe Binitij estant entré miraculeusement en leur ordre, il receut tant de graces de la sainte Vierge qu'il se rendit admirable tāt en France, qu'en Allemagne, conuertissant vn fort grand nombre de pecheurs, si bien que la renommee de sa sainteté, & celle de plusieurs autres de cet ordre, commença à s'estendre de toutes parts.

Le Pape Alexandre IV. l'an 1255. confirma & approuua ceste Religion, leur donnant pouuoir de creer vn General, comme les quatre mendiants, s'estant tellement augmentee, qu'elle est estendue par tout le monde.

L'an 1427. Nicolas Perusien leur General diuisa cest ordre en deux, & de là est venu

qu'on appelle les vns Freres seruants Conuentuels, les autres les Peres seruants de l'Obseruance.

Ceste Congregation commença l'an 1233. du temps de Gregoire IX. & que les Guelphes & Gibelins commencerent à faire leurs ravages en Italie, qui fut fort trauaillee encore de tremblements de terre, inondations & extremes froidures.

Ordre des Celestins.

34. **C**eluy qui fut chef de la Congregation des Celestins se nommoit premierement Pierre, & surnommé S. Moron natif de Heruia, terres des Samnites, aujourd'huy appellees Sergue en la lettre de Laben l'an 1215. son pere s'appelloit Angelier & sa mere Marie: homme porté du tout à l'austerité & à la solitude, dès la plus tendre enfance, & apres auoir esté l'espace de trois ans sur vne montagne à faire penitence, finalement il fut receu Moine au Monastere de Ieseli de l'ordre de saint Benoit, où ayant esté quelque temps il demanda permission à son Abbé de se retirer en vne cauerne deserte sur la mongne de Moron, de laquelle il prit son surnom: mais y estant recherché de trop de peuple qui y abordoit de toutes parts il s'en alla en la montagne de Salmonne appelée la Magelle, où finalement n'ayant peu estouffer l'odeur de sa sainteté plusieurs l'ayant fuiuy, il commença à fonder la Religion des Celestins, bastissant sur ceste montagne vne petite Eglise, qu'il nomma du saint Esprit.

Il portoit tousiours vne chaisne de fer sur sa chair nuë, & par dessus vne haire fort rude, vaquant en continuelle priere, & reformant la regle de saint Benoit qui en ce temps là s'estoit abatardie.

La renommee de sa sainteté decoree de plusieurs beaux miracles s'épandit tellement par toute l'Europe que le nombre des Celestins s'augnienta grandement, & le Concile se tenant pour lors à Lyon en France sous Gregoire X. de l'illustre maison des Visconti: Il obtint du saint Pere la confirmation de sa Religion, & de là s'en retournant en Italie, il y celebra le premier Chapitre general de la Congregation, finalement apres le deceds de Nicolas I V. l'Eglise Romaine ayant esté deux ans sans Pasteur, il fut esleu souuerain Pontife, l'an 1294. & de son age le 79. apres auoir fait ce qu'il auoit peu pour eüiter cestec charge, en laquelle toutefois il ne fut que six mois, car il s'en démit volontairement: d'autres disent par l'artifice de Boniface I I I. son successeur, lequel le condamna apres sans aucun subiect à tenir perpetuelle prison dans le Chasteau de saint Simon à present surnommé, où il fut dix mois: d'autres disent deux ans faisant des miracles, predisant les choses futures, & priant Dieu pour son successeur, en laquelle prison il mourut, disant ces mots du Psalmiste: *Tout esprit louë le Seigneur*, il fut depuis canonizé par Clement V. Ceste Religion est diuisee en 13. Provinces, par la France, Allemagne & Italie, & tient à present six vingts & quatre Monasteres.

Ordre de la Religion du Mont d'Oliuet.

35. **L'**An de nostre Seigneur 1319. seant à Rome Jean XXII. & en Allemagne Henry VII. commença la Religion du mont Oliuet par trois Gentilshommes Sienois, le premier nommé Bernard Tolomei, l'autre Ambroise Piccolomini, le troiesme Patrice de Patricij, lesquels à la persuation de Bernard se retirerent en vn mont appelé Oliuet, situé au Comté de Montalein, & s'arrestèrent là pour faire penitence, & ayans esté accusez enuers le Pape, comme auteurs de nouuelles superstitions, ils le furent trouuer, lequel ayant oüy leurs raisons, les enuoya par deuers Guido Pietramala Euesque & Seigneur d'Arrezze, sous le Diocese duquel estoit le susdit mont Oliuet, lequel auparauant qu'ils arriuaissent auoit eu vne vision en laquelle il vid la Vierge Marie, enuironnée d'une grande multitude d'Anges, laquelle luy tendoit vne robbe blanche, & des memoires de saint Benoit, lequel leur donna l'habit blanc, en l'Eglise de la Trinité, avec la reigle de saint Benoit, sous la protection de la Vierge Marie.

Après cela ils edifierent vn beau Monastere sur le mont Oliuet, appelé des Clostures, le chef de la congregation, laquelle ne s'estend point plus loing que l'Italie, & a iusques à soixante Monasteres, & plus. Ils portoient anciennement des sabots en leurs pieds, & n'y a pas long temps qu'ils les faisoient porter à leurs nouices au mont Oliuet, mais ils se sont depuis eslargis & licentiez.

De l'Ordre des Iesuaſtes de S. Hierosme.

Quant à l'Ordre des Iesuaſtes de ſainct Hierosme il a tiré ſon origine de ſainct Ieā Colō-
bin Gentilhomme Sienois, des plus illuſtres de ceſte ville, lequel l'an 1355. ſe conuertit 36.
à Dieu par le moyen de la lecture qu'il fit de la vie de ſaincte Marie Egyptienne, la maniere
de laquelle conuerſion ſeroit plus longue à reciter que ne porte l'eſtenduë des preſens ſom-
maires: mais ayant en fin tellement diſpoſé ſa femme qu'elle luy permit de viure en chaſte-
té, vn miracle d'un Ladre qu'il apporta chez luy, lequel il luy laiſſa en garde, fut cauſe qu'elle
fut contente elle meſme de faire vœu de chaſteté, & de donner tous leurs biens aux pau-
ures: Car au lieu de Ladre, elle ne trouua elle meſme dans la chambre où il auoit eſté laiſſé
qu'une tres-ſouueue odeur, de ſorte qu'ils creurent que ç'auoit eſté noſtre Seigneur Ieſus
Chriſt, qui ſous la figure d'un ladre ſ'eſtoit apparu à eux: & ſ'eſtant alſocié avec vn nommé
François Vincent des plus apparens de la meſme ville de Siene, ils furent deux ans à mener
vne vie fort auſtere & contemplatiue, ſi que pluſieurs ſe mirent de leur congregation iulques
au nombre de ſoixante & dix, la meilleure partie d'entr'eux eſtans lettrez: ce que voyant
Colombin il ſ'en alla trouuer le Pape cy-deſſus nommé à Viterbe l'an 1367. encores qu'il y
euſt deſ-jà veu en Toſcanelle: car il fut accuſé luy & les ſiens de tenir l'erreur des Fraticelles:
Mais ayant eſté examinez par l'Inquiſiteur en la preſence du Cardinal de Marſeille, & trou-
ué que ce n'eſtoit que calomnie, le ſainct Pere les receut, & voulut qu'ils fuſſent tous veſtus
de drap blanc, & les bailla tous à ſes deſpens, leur donnant apres l'habit de ſa propre main.
Il voulut qu'ils ſe retiraffent aux villes & bourgades, & eurent pour premier protecteur le
Cardinal d'Avignon frere du Pape.

Cecy aduint l'an 1367. le iour ſainct Iean Baptiſte. Quant au nom de Iesuaſtes, Paul
Maurice aſſeure qu'il ne leur a point eſté donné, d'autant qu'ils auoient ſouuent le nom de
Ieſus en la bouche, mais par vn eſprit prophetique les petits enfans crians dès qu'ils les voy-
oient.

Voyla les Iesuaſtes, & que meſme ſainct Ieā Colombin en eſprit prophetique dit vn iour
à ſes confreres, Nous auons beau faire, Ieſus-Chriſt par ſa puiſſance nous a donné ſon ſainct
nom.

Et d'autant que leur regle, qui ſous celle de ſainct Auguſtin, n'eſt pas commune, il ne
ſera point, peut eſtre, mal à propos de la rapporter icy particulierement, ainſi que l'a deduit
le meſme Paul Maurice.

Il eſt dit donc que par obligation, ils ne ſont tenus de dire que cent ſoixante & cinq
Pater noſter, & autant d'*Aue Maria*, vont trois fois à l'Oratoire, ayans à chacune fois vn cer-
tain nombre à dire, ſans que pas vn ſoit exempt de cela.

Entre le matin & le ſoir ils ſont en prieres l'eſpace d'environ cinq à ſix heures: les prieres
du matin eſtans finies, le Prieur leur fait tous les iours quelque leçon, puis vn petit ſermon,
lequel eſtant paracheué on demeure vn peu de temps à prier Dieu mentalement: outre cela
deux fois le iour ſans iamais y faillir, fors aux trois principales feſtes de l'annee, chacun ſe
discipline en ſon Oratoire, vne fois au point du iour, & l'autre à vne heure de nuit tous en
particulier: en quelque temps que ce ſoit ne faillent iamais d'aller deux fois à l'Egliſe,
& allumer vn cierge ſur l'Autel, puis ſont leur oraiſon à part pour la ſaincte Eglife, pour leurs
bien-faicteurs, & principalement pour les ames de ceux en recommandation deſquels leurs
ſont faictes plus d'aumosnes: joint & auſſi que tous les Lundys ſ'il n'y eſcheoit quelque feſte,
tous en commun, ſi toſt que la Meſſe eſt acheuee chantent au chœur certains Pſeaumes, &
autres Oraisons pour les ames deſtreſpassez: ſemblablement tous les Samedys au ſoir
apres ſ'eſtre tous accuſez de leurs fautes, ils ſont prieres pour toutes manieres de gens tant
fidelles qu'infidelles, ne plus ne moins que la ſaincte Eglife Romaine a accouſtumé de faire
le iour du Vendredy Sainct. Autant de fois qu'ils entrēt à leur Oratoire, ils diſent touſiours
cinq *Pater noſter*, & autant d'*Aue Maria*, en reuerence & commemoration de la Paſſion de
noſtre Seigneur: ils ne diſent point la Meſſe à l'imitation des anciens Moines.

Quant à l'Office de la Vierge, lequel neantmoins tous diſent quaſi vniuerſellement, ce-
luy des Morts, les ſept Pſeaumes penitentiels, & meſme tout l'autre Office diuin n'eſt point
d'obligation à ceſt Ordre, mais de deuotion ſeulement. S. Iean Colombin inſtitua auſſi
l'Ordre des Religieuſes Iesuaſtes, deſquelles la principale a eſté la bonne ſaincte Catherine
de Siene couſine d'iceluy Colombin: il y en a à Luques vn Monaſtere qu'on appelle les Ie-
ſuaſtes de ſainct Ioseph.

Quant à ce qu'ils ſont nommez les Iesuaſtes de ſainct Hierosme, cela vient, que dès le cō-
mencement de leur congregation, ils prindrent ce grand miroir de penitence, & lumiere

des Religieux pour leur particulier protecteur : joint que leur deuotiõ estoit telle enuers ce saint, qu'ils edifierent presque toutes leurs Eglises, & secrets Oratoires en son nom. Le Pape Alexandre VI. ordonna par vne bulle, qu'ils ne s'appelleroient plus simplement Iesuites: mais les Iesuites de S. Hierosme.

Des Chanoines Reguliers de S. Sauueur.

37. **L'**Ordre dès temps requiert apres les Iesuites, de parler des Chanoines reguliers de S. Sauueur, l'origine desquels est Helie.

A deux milles pres de Boulongne estoit autrefois vn college de Chanoines de l'ordre S. Augustin qu'on appelloit sainte Marie du Rhin, lequel ayant esté destruit par Jean Viscōti Duc & Archeuesque de Milan, lors qu'il print la ville de Boulongne, les Chanoines furent contrains de se retirer dans la ville au Monastere de saint Sauueur qui auoit esté basti long-temps auparauant, en memoire du grand miracle qui estoit aduenue en l'image du Crucifix en la cité de Baruc au pays de Syrie, viuant Athanasie Euesque d'Alexandrie l'an 785. le 9. iour de Novembre.

Durant ce temps, il y auoit vn nommé Estienne, de la ville de Siene de l'ordre des Hermitains de Licette, lieu distant de Siene enuiron trois milles: de la sainte vie duquel le Pape Gregoire XII. estant informé, & scachant la bonne volonté que cestuy-cy & ses compagnons auoient de mettre sus l'ordre canonique, il donna charge à trois Cardinaux de vestir Estienne, & vn nommé frere Iacques, de l'habit canonique: ce qui fut executé en la ville de Luques, le 24. Auiil 1408. & le mesme Estienne ayant par apres donné le mesme habit à plusieurs de ceux de Licette, ils prindrent lors l'habit de saint Sauueur, à cause que le lieu, où ils auoient fait profession de l'habit Hermitain, s'appelloit de ce nom: or en ce cloistre saint Sauueur, dont il a esté parlé cy dessus, estoit demeuré seul vn nommé Guillier, lequel entendant la renommee d'Estienne & de ses Chanoines, desirant de voir cet ordre Canonique remis sus, enuoya querir Estienne, & apres auoir conféré ensemble, ils enuoyerent vn Procureur au Pape Martin V. de la maison des Colonnes, qui auoit succédé à Gregoire, lequel ayant ouy leur demãde donna commission à Nicolas Dalbergati lors Euesque de Boulogne, & qui depuis fut fait Cardinal de sainte Croix par le Pape Eugene IV. de mettre ordre à ce qu'ils demandoient.

Et alors il vnit ensemble le Conuent de saint Ambroise de Gobre, & celui de sainte Marie du Rhin, avec la Chanoinerie de saint Sauueur de Boulogne, ce qui fut confirmé par autorité Apostolique, comme il est porté par vn breuet donné du 5. Iuillet 1518. & leur fut baillé permission de celebrer le Chapitre general, par vne bulle donnée à Mantouë le 10. Decembre, l'an 2. du Pontificat du Pape Martin V. du nom: depuis l'union de certains Conuents, cet ordre commença à prendre le nom de congregation, & s'appelloit Chanoinerie de saint Sauueur: ils ont toutefois esté appelez Scopettins par ceux de Florence, à cause de saint Donat de Scopette qui estoit de ceste congregation: mais c'estoit le quatriesme Conuent, au contraire l'autre fut le premier, aussi furent-ils appelez plus vulgairement Chanoines de saint Sauueur.

Ordre de S. Pierre de Pise.

38. **A**pres les Chanoines de saint Sauueur, suit en ordre la Congregation de saint Pierre de Pise, qui estoit de la famille des Iambes-Courtes, des plus illustres de ceste ville là.

Lequel ayant resolu d'imiter la vie de ce grand Docteur saint Hierosme, il se trouua incontinent suivi de plusieurs Disciples, avec lesquels il s'en alla au Combat d'Urbain en vne belle colline nommee Monte-bello, laquelle est enuironnee d'une fort agreable forest, il bastit vne petite Eglise, qu'il nomma la Trinite, avec quelque peu de logis, fait en façon d'un Monastere, gaignans leur vie au travail de leurs mains, & obseruans la communauté Euangelique, ne celebrans point de Messe: mais estant assiduellement en priere, & voulant ce bon Pere, que ceux de sa Congregation s'appellassent les Hermites de saint Hierosme, comme ils s'appellent encor auourd'huy, y adioustant seulement de la Congregation de S. Pierre de Pise, laquelle Congregation a si bien multiplié qu'elle a encor à present 37. Monasteres en Italie seulement: car hors d'icelles ils n'en ont point.

Ils sont vestus d'une tunique, & se ceignent d'une ceinture de cuir, portans par dessus vn manteau, sur lequel ils iettent leur scapulaire: mais quand ils vont par la ville, ils iettent par dessus ledit manteau, & tout leur habit est entierement de couleur de bure: le Pape Pie V.

V. voulant qu'ils fissent profession, car auparavant ils pouvoient sortir, & aller où bõ leur sembloit: ceste congregation commença l'an 1380.

L'Ordre de la Congregation de S. Hierosme de Fesole.

LA congregation de saint Hierosme de Fesole commença quelque temps apres, à sçavoir l'an 1406. du temps du Pape Innocent VII. par vn nommé Charles Comte de Gra- 39.
uelle Florentin, lequel estant inspiré de Dieu, s'en alla aux montagnes, où fut autrefois l'ancienne ville de Fesol, destruite par les Florentins: il prit l'habit d'Hermite, & avec luy Rhedon Grauelle & Gautier Marli, où ils ne furent pas long temps, que plusieurs s'assemblerent autour d'eux, auxquels ils donnerent vne regle, laquelle fut approuvée par le Pape Gregoire XII. pour lors seant au saint Siege, qui leur donna vn autre habit de couleur grize, le ceignans par dessus leur froc d'une ceinture de cuir, & dessous ils portent vn manteau plissé, & fendu pardeuant: ils portoient lors des sabots, mais depuis ils les ont laissez, & parce qu'ils auoient esté dits Autheurs du tiers ordre de saint François comme estiment aucuns, vn habit gris qu'ils portent encor pour le iourd'huy, leur fut donné.

Ils ne s'estendent point plus loing que l'Italie, où ils ont trente ou quarante Monasteres: ceux qui demeurent à Milan sont appelez les freres de sainte Anne.

Ordre de la Congregation de S. Gregoire.

L'An 1407. seant à Rome le Pape Gregoire XII. & en l'Empire Robert de Bauiere, cõ- 40.
mença la congregation dictée de S. George.

Dalegue surnommée Azzurine, laquelle eut pour auteur Anthoine Gorrare Gentil-homme Venitien, qui estoit de la compagnie des Clercs reguliers de lesuastes S. Hierosme, les freres de laquelle portoient des sabots, & mandioient leur vie: cestuy-cy leur donna quelques regles confirmées par Gregoire VII. lequel y en adiousta d'autres, mais principalement S. Laurens Iustinian premier Patriarche de Venise, lequel fut à ceste congregation, ce qu'a esté autrefois S. Bernard à celle de Cisteaux.

Ceux de ceste congregation se vestent par dessous d'un habillement de drap blanc, faict en maniere de soutane tout boutonné deuant, & portent dessus vne robe de pers ou de couleur d'azur, vn bonnet à la teste, & vn chapeau sur l'espaule de mesme couleur.

Ils vivent en commun, leurs Chefs s'appellent Prieurs, & créent vn General. Ils ne souloient pas faire profession, mais si quelqu'un d'entr'eux apres auoir esté vn tẽps en la Religion, changeoit de volonté, ils luy donnoient certaine somme d'argent, & le vestoient en Prestre seculier, puis le laissoient aller où sa fantaisie le portoit: mais le Pape Pie V. l'an 1570. ordonna qu'ils eussent tous à faire profession solemnelle, comme ils font, sans déroger neantmoins à leurs priuileges, ny à l'Ordre & preface des lieux aux processions publiques.

Toutefois il y en a encore quatre Monasteres de cet ordre, qui vivent à leur mode, tiennent leurs Chapitres, & créent leurs Prieurs, comme bon leur semble. Et combien qu'ils ne soyent de ceux-là que quatre Conuents, neantmoins ils ont vn General, & leur chef est le Monastere de Lo-Vieil.

Ordre de la Congregation de Sainte Iustine.

LA congregation du Mont-cassin, qui print son origine de Louys le Begue Gentil-hom- 41.
me Venitien, commença dans le Monastere de sainte Iustine, & de là fut appelée Congregation de sainte Iustine l'an de nostre salut 1410. sous le Pape Jean XXIII. & Sigismond estant Empereur en Allemagne où les Papes Martin V. & Eugene IV. voyans ceste compagnie augmenter de iour en iour en sainteté de vie, ils la gratifierent de plusieurs priuileges: ce qui fut cause de la remplir de plusieurs hommes de lettres.

Depuis avec le temps s'estant accruë de l'Abbaye du Mont-cassin, d'autant que c'estoit la premiere & la plus honorable de toutes celles de saint Benoist, elle print le nom d'icelle, & fut dite la congregation du Mont-cassin: Par ainsi tous ces Moynes noirs qui vivent sous l'Obseruance, sont les vrais & premiers Moynes de saint Benoist, lesquels ont esté par plusieurs fois destruits & reformez.

Ceste congregation de saint Benoist estoit venuë en telle grãdeur, non seulement de richesses, qui auoient esté la principale cause de sa ruine, mais encore du nombre d'hommes & de Monasteres, qu'elle se trouue auoir eu iusques à trẽte trois mille Abbayes, & quatorze

mille Preuostez & Prieurez: & lors que se fit la dernière reformation de sainte Justine, elle estoit tellement mise bas, que le nom des Moines de saint Benoist estoit presque du tout estint: mais depuis elle s'est tellement augmentée, qu'elle a plus de mille Abbayes, tant en Italie qu'en Espagne, qui vivent selonc ceste reformation: plusieurs desquels outre ce qu'ils vivent selonc la règle de S. Benoist, s'addonnent à l'estude, aux disputes publiques, & à la predication, ne plus ne moins que les Mandians, qui les font grandement respecter en ces contrées là.

Des Freres de saint Ambroise.

42. **I**L semblera de premier abord, qu'il eust esté plus à propos de mettre la congregation des freres de saint Ambroise au bois, avec les plus anciennes religions, que maintenant, mais c'est à cause qu'ils se sont plus dilatez, & ont paru davantage en leur forme, que leur origine, laquelle aduient en ceste maniere aux faux-bourgs de la porte de Come à Milan, où est maintenant l'Eglise de saint Ambroise aux bois, il y eut autrefois vn beau bois fort espais, au milieu duquel estoit vne petite chappelle, où estoit depeinte l'image de la Vierge Marie, & là auprès couloit vn ruisseau d'eau Claire, qui descendoit d'une belle fontaine, laquelle y est encor aujour d'huy tenuë en telle reuerence, que plusieurs boient de ceste eau par deuotion.

En ce bocage demouroient trois Gentils-hommes Milannois, qui viuoient comme Hermites, le premier desquels fut vn nommé Alexandre, de l'illustre famille de Criuelle: le second Albert Bozosse, & l'autre Anthoine Pierre sainte, d'où est venu que les pierres saintes iusques aujour d'huy ont certaine iurisdiction en vn Monastere de ceste religion nommé Casterne.

Or en mesme temps que ceux-cy viuoient en leur solitude, l'admirable S. Ambroise reuiuoit en la ville de Milan, lequel estant aduerty de la façon de viure de ces personnages, les alloit visiter souuent, & mesmes par fois demouroit avec eux vn iour ou deux prians Dieu, ou discourans des choses diuines.

Depuis estant mort, ils demurerent plusieurs années en ce lieu, & par succession de tēps, lequel on ne peut pas bien coter, ils adiouterent à l'habit d'Hermitte qu'ils portoient, la patience & la cappe, & prirent la règle & profession de saint Augustin: les Milannois leur firent apres bastir vn Monastere au mesme lieu, qu'ils fonderent à l'honneur de saint Ambroise, & le nommerent S. Ambroise au bois, à cause du saint qui frequentoit en ce lieu durant sa vie: ils se sont depuis augmentez en diuers lieux, mesmement au Duché de Milan.

Ils ont en general des Visiteurs & Prieurs, & tous les trois ans celebrent leur Chapitre general tousiours en ce lieu-là, d'où ils ont eu l'origine. Ils ont plusieurs lieux, où ils font le seruice selonc la règle de saint Ambroise.

Des Moines Hermites de S. Hierosme.

43. **L**E semblable peut-on dire de la congregation des Moines Hermitains de saint Hierosme, duquel il a esté dit quelque chose cy deuant: mais depuis il fut reformé par Loup Solmete Espagnol sçauant homme, lequel estant arriué à Rome obtint la permission de reformer cet ordre, impetrant de luy l'Eglise de saint Alexis de Rome, assise sur le mont Augustin, avec les environs & toutes les rētes & reuenus d'icelle, auxquels il donna la forme & règle de viure selonc l'ordonnance des Apostres, laquelle il auoit tirée des œuvres de S. Hierosme.

Aucuns disent qu'ils commencerent dès le temps d'Eusebe de Cremone, disciple de S. Hierosme, & que les Moines de Garde-Lou d'Espagne, suyuant leur règle, pourroit bien estre qu'ils auroient esté reformez par iceluy Loup, & que voyans depuis leur ordre s'en aller en dissolution, ils l'auroient de nouveau reformé, & que Loup auroit diuisé ceux-cy d'avec ceux-là, & en auroit fait vne nouvelle congregation. Ils se vestent d'une tunique blanche avec le scapulaire de couleur tannée. Quant ils vont par la ville ils portent vne cappe fermée deuant à la monachale, de mesme couleur que le scapulaire. Loup d'Oliuete mourut l'an 1433. l'an troisieme du Pape Eugene IV. Ceste congregation peut auoir en Italie environ 20. Monasteres. desquels le chef & principal, est l'hospital de Lodeiane en Lombardie. Ils auoient en Espagne six Monasteres, le chef desquels estoit saint Isidore, distant de la ville de Seuille d'une lieuë Ils font profession & obseruent la règle de saint Augustin.

De l'Ordre des Sabbitiers, institué par S. Bernardin.

L'An 1400. qui estoit le Jubilé à Rome, il regna vne grande peste à Siennne & autres lieux 44
prochains, de laquelle mourut vn grand nombre de gens, si bien qu'à Siennne, fut pour
le peu d'hommes qui restoiert, ou pour la crainte qu'ils auoient de laisser la vie, il ne se trou-
uoit personne qui voulust penser les pauures malades de l'Hospital.

Alors viuoit à Siennne saint Bernardin, le pere duquel s'appelloit Patrice, & sa mere No-
ne, laquelle estoit de noble extraction natifue de Masse de Maranne, ville prochaine, &
subiette de ladite ville de Siennne.

Ce saint personnage poussé d'une sainte & ardante charité s'en alla à l'Hospital; où il
se mit à panser les malades tous pestiferez qu'ils estoient, & n'en bougea que la pestilen-
ce ne fut cessée, n'estant lors age que de vingt ans, & de là il se retira en vn bois, où ayant
vescu quelque temps fort austierement, il se fit en fin Religieux de l'Ordre des Freres Mi-
neurs, où il ne porta rien avec soy qu'un simple habit, & vne corde pour se ceindre, & com-
me desia la Saincteté commençoit à se refroidir en ceste religion, il cōmença de mettre peine
quel'ordre de la bonne Obseruance fust maintenu & garde, ostant tous les abus qui s'estoient
introduits en iceluy, de maniere qu'il le reforma, & fit en sorte que les Freres furent reduits
à viure en commun, sans auoir rien de propre, suiuant simplement l'institution de leur Pere
saint François, en quoy il fut assisté de plusieurs qui suivirent sa nouuelle reforme, mais d'au-
tres aussi ne voulurent point quitter ce qu'ils auoient acquis avec peine & travail.

De là est venu, au moins y a-il grande apparence, que la congregation de S. François est
en deux sortes de Conuent, à sçauoir, & d'Obseruans, lesquels s'appellent les Sabbitiers: qui
s'augmenta tellement depuis qu'elle surpasse en nombre beaucoup d'autres religions. Ce-
cy aduint sous le Pape Eugene quatriesme du nom, & du temps de l'Empereur Federic III.
du nom.

De l'Ordre des Minimes.

Enuiron l'an 1450. l'Ordre des Minimes commença à florir par le moyen de saint Fran- 45
çois surnommé de Paule, à cause du chasteau de Paule, où il auoit pris sa naissance, le-
quel est situé au Royaume de Naples entre la Bresse & la Lucanie, auourd'huy appelée la
Principauté, voisins de la Calabre, & loing de la fameuse cité de Coscence enuiron trente
mille. Son pere s'appella Martetile, & sa mere Vienne, porté de sa plus tendre enfance à l'au-
sterité, & ayant sur tout la vie Religieuse: depuis estant paruenue en aage d'homme, il eut
en pensée de bastir vne Eglise avec quelques logettes pour habiter, & de fait, sous la permis-
sion de Pyrrhus lors Archeuesque de Coscence, avec l'aide de ses voisins, il mit en cet effect
ce qu'il auoit proposé, & ayant edifié ce Monastere n'y fut pas long-temps qu'il n'eust incō-
tinent vn grand nombre de Disciples, tant aux hommes que femmes. Parquoy il escriuit trois
regles, l'une aux Freres, l'autre aux Sœurs de son Ordre, chacune desquelles il distribua en
dix chapitres, & la troisieme ce fut pour les Profez ou Mantelez: voulant que les siens fus-
sēt appelez Minimes des Mineurs, & qu'entre autres choses ils obseruassent sur tout le ieusne
Quadragesimal, à sçauoir de ne manger point de chair, d'œufs, beures ny laitages tout le
temps de leur vie, qu'en cas de necessité: il voulut qu'ils fussent habillez d'un drap tanné ob-
scur, avec vn capuchon de mesme couleur qui leur pend iusques à la ceinture, & qu'ils fus-
sent ceints d'un cordon de la mesme couleur: Ceux qui sont Prestres le portent noué à cinq
nœuds simples: mais les clercs, nouices, & presentez à la difference des Prestres, ont leur ca-
puchon qui leur pend iusques au cordon, & le cordon noué seulement à trois nœuds.

Le Roy de France Louys onzieme du nom qui regnoit pour lors, enuoya prier le Pape
Sixte IV. de luy enuoyer ce saint personnage, ce qu'il fit, & vint trouuer le Roy à Tours, le-
quel luy fit bastir l'Eglise & le Monastere qui est encor auourd'huy pres de ladicte ville au
Plessis. Ceste congregation s'estend en France & en Espagne: en Lombardie, il n'y en a point
sinon à Milan.

De la congregation des Amedees, ou Amis de Dieu.

DV mesme temps de saint François de Paule, viuoit le saint homme Ami-Dieu, natif 46
de Portugal, lequel vint en habit d'Hermite en la Lombardie, où estant arriué, il s'ar-
resta en vn lieu appelé sainte Marie en Bresanois vers Cremone, des dependances du Du-
ché de Milan, où il donna commencement à sa congregation.

De là à quelquel temps il s'en alla à Rome, & demeura au mont d'or qu'on appelle au-
jourd'huy saint Pierre *In Montorio*, lieu où le Prince des Apostres fut crucifié la teste
contre-bas, où il y a maintenant vn fort beau Monastere de cet Ordre.

h

Il estoit fort contemplatif, & a en plusieurs voisins pleins de Prophetie, predisant les choses à venir.

De luy ceste congregation a pris son nom des Amis-Dieu, ou Amedees. Ils sont vestus de gris, & portent des labbots sans haut de chausses, se ceignans d'un cordon, comme font les sabbotiers : ils possèdent maintenant vingt & huit Conuents en Italie : car plus outre ils ne s'estendent point.

Leur congregation commença en l'an 1490. mais le Pape Pie V. l'vnt avec celle de Cleruaux, & des Sabbotiers, c'est à dire de l'Oblervance S. François.

Ordre des Apostolins ou Barnabites.

47. **Q**uant à la congregation des Apostolins, autrement dits freres des Apostres, elle eut son origine de S. Barnabé Apostre, lequel estant venu à Milan, il fut le premier qui celebra la Messe en ceste ville là.

En ce lieu il assembla un bon nombre de disciples qui viuoient selon la coustume de la primitive Eglise, qu'ils appellerent pendant qu'il vesquit, disciples Chrestiens, & apres sa mort Apostolins, maintenant freres des Apostres ou Barnabites. Ils ont esté long temps espars çà & là, & ne celebrent point la Messe, ains, vacquoient seulement à l'Oraison & à vie en commun comme on faisoit en la primitive Eglise. Mais l'an 1484. Innocent VIII. du nom, estant prié par eux, il leur permit de dire Messe, & leur donna l'habit, à sçavoir, le scapulaire & la patience cousus ensemble, & une ceinture de cuir, leur ordonnant de faire profession & leur donnant la regle de S. Augustin à observer.

Il leur octroya de jouir des mesmes privileges que les Augustins : ils se vestent d'un froc de drap tanné, avec la patience & scapulaire de même couleur, & en ceste sorte vont en public sans porter autre cap par dessus, sinon en hyuer qu'ils portent un manteau de la couleur même, à la mode des Sabbotiers de saint François. Ils tiennent Chapitres, & leur Chef est appelé Vicaire general.

Les premiers de cest Ordre qui dirent Messe, furent frere Simon de Morane, frere Jean Scarpe, & frere Nicolas Cestery Geneuois.

De l'Ordre des Capucins.

48. **L**e commencement de la congregation des Capucins vint pour une telle occasion : en la marque d'Ancone sous la seigneurie de Ferme est un chasteau appelé Môtfaucou, dans lequel les freres Iacobins ont un Monastere : là estoit un Religieux, nommé Mathieu Bascy, homme de bonne vie & grand observateur des saintes Instructions : Il aduint qu'un iour qu'il s'en alloit avec quelques uns de ses compagnons en un lieu là auprès pour assister à quelque office : comme il fut paracheué, & que tous s'en retournoient en un Monastere, luy estant demeuré un peu derriere, ses compagnons trouverent un pauvre homme qui estoit couché par terre quasi tout nud & tremblant de froid, pour autat que c'estoit en hyuer, & qu'il estoit force neiges, lequel leur ayant demandé l'aumosne d'un peu de drap pour se couvrir, il n'eut aucune réponse des autres, d'où survenant apres le susdit frere Mathieu, & voyant ce pauvre homme meü de compassion, & craignant qu'il ne mourust de froid, il print deux bonnes pieces de drap qu'il avoit sous ses habillemens selon la coustume de leur religion, & les donna à ce pauvre homme, & puis reprenant son chemin vers le Monastere, il fut esbahy que ce pauvre disparut incontinent & ne le veid plus.

Cela fit penser à ce bon Pere qu'il avoit fait profession de pauvreté, & que neantmoins il y en avoit de plus pauvres que luy : De sorte qu'il n'estoit pas vray imitateur de son Pere S. François : & encor moins observateur de ce qu'il avoit promis entrant en la regle d'iceluy, si bien qu'il ne cessa depuis de prier Dieu iour & nuict, à ce qu'il peüst accomplir le vœu qu'il avoit fait.

Doncques apres s'estre bien lamenté, il eut une inspiration qui luy dit, qu'il donnast de nouveau commencement à l'ancienne observance de ses Peres, lesquels suivirent premiere-ment l'institution de saint François, de maniere qu'il prit un froc le plus deschiré & rompu qu'il peut trouver, & y attacha un capuchon à la mode qu'ils en vsent aujourdhuy, puis sans en parler à personne, il s'en alla à Rome trouver le saint Pere Clement VII. luy demandant congé de porter l'habit tel que le portoit au commencement saint François & ses Religieux : ce qu'il obtint sans difficulté, luy disant par trois fois qu'il vouloit que ceste regle fust observée de point en point, & de mot à mot. Quelque temps apres, un nommé frere Louys, avec un sien frere, tous deux Iacobins de Fosse bonne, ville de la marque & du Duché d'Urbain, poussés du zele de l'observation de leur regle, sortirent de leur Religion, & s'unirent avec ledit Mathieu : mais afin que la chose fut plus permanente, & qu'il y eust moins de scrupule, Louys s'en alla au Pape, & obtint un breuet, non seulement de porter l'habit & observer

observer la regle, mais de la donner aussi à quiconque la demandoit : ce qui aduint l'an 1526. le 28. iour de May, & l'an troisieme du Pontificat de Clement VII. si qu'en peu de temps ils se virent douze freres : leur premier General fut Mathieu : le premier Monastere qu'ils eurent, fut en la ville de Cameria en la marque qui leur fut donnee par Catherine Cibo Duchesse de Cameria.

Ceste congregation multiplia tellement, qu'en l'espace de 41. ans elle s'accrut en sorte qu'elle auoit deux cens & vingt & deux Monasteres, diuisez en quinze Prouinces, & auoient 2240. Religieux.

Outre ceux-cy il y a encore des reformez de l'Ordre de saint François, comme les Clairins, Clarmeaux, Recolets, qui portent les zocques, mais il s'en pourra dire quelque chose cy-apres.

Des Ordres de l'Observance de S. Augustin.

OR combiert qu'on ayt cy-deuant discoursu de l'origine des Religions qui militent sous la regle de saint Augustin, il ne sera point mal à propos de dire quelque chose des congregations qui vivent selon ceste regle, sous le nom & le tiltre de l'Observance.

1. Ordre d'icelle Observance, Congregation de Lucette.

LA premiere est la congregation de Lucette. Ce lieu est distant de Siennne environ trois milles, & s'appelloit anciennement Lissiette Foltigan, fondé de S. Sauueur, & depuis S. Sauueur de Lucette au Bois lac. Cela a esté habité par les Hermites de S. Augustin dès l'an 1050. Ceste place s'estoit toujours conseruee en sa sainteté, pauvreté fort secrette & propre à la contemplation. Barthelemy Venitien y fit depuis de beaux reglemens l'an 1387. & depuis par vn maistre Nicolas Cassin, & Maistre Gerad de Rimini, tous deux Prieurs generaux de cet Ordre, lequel commença depuis à s'augmenter, de sorte qu'ils ont aujourd'huy vnze Conuens, tant au pays de Siennne, que Florentin, & n'y a celuy où il n'y ait pour le moins cent Religieux.

2. Congregation de la mesme. Celle de la Charbonniere.

LA seconde congregation de l'Observance des Hermitains, est celle de Charbonniere en la terre de Labeur qu'on appelle aujourd'huy Champagne, laquelle est encor à present nommee la congregation de saint Jean de Naples. Elle eut son commencement d'un frere Simon Cremonois grand Philosophe, & Theologien de son temps, qui estoit l'an 1399.

La Congregation Perusine.

LA congregation Perusine, autrement appelée de sainte Marie du Peuple, en la Prouince d'Ombrie, qui commença l'an 1424. & a environ 15. Monasteres. La congregation de Lombardie, ainsi nommee par ceux mesmes qui en sont : elle fut comencée l'an 1444. par vn bon Pere appelé Jean Roque de Pauie, & vn autre nommé frere Gregoire de Cremonne dedans le chasteau de Crane. Ceste congregation est la plus grande & la plus celebre de toutes celles de l'Observance des Hermitains, tant à cause du grand nombre d'hommes qu'ils ont, qu'à cause de ceux de cet Ordre, qui sont gens de sçauoir, & qui font grande profession de prescher. Il y a en ceste congregation 68. Monasteres qui sont assez bien rangez.

4. L'Ordre de sainte Marie de Mont-Orton.

LA congregation de sainte Marie de Mont-Orton, distante de la ville de Pudone environ cinq milles, instituee par vn docte personnage, nommé frere Simon, natif de Camerny, vne ville, en la marque Dauerne. Elle n'a pas plus de trois Conuens, & fut comencée l'an 1460.

5. Ordre des Baptistes.

LA congregation des Baptistes, ainsi appelée à cause du frere Baptiste qui en a esté l'auteur, commença l'an 1484. Ils portent des sabbots, & sont aussi appelez Geneuois, parce que leur fondateur estoit de Genes.

6. *L'Ordre de la Congregation des Hermites, appelée Pouilloise.*

LA congregation des Hermites, appelée Pouilloise, ou autrement la Doucette, qui print son commencement en la Pouille, par vn nommé Felix de ce pays-là, l'an 1492.

7. *L'Ordre de la Zumpame.*

LA Zumpame, laquelle fut instituee en Calabre l'an 1502. par vn nommé François Zumpama Calabrois, qui estoit en ce temps-là fort honoré pour ses bonnes qualitez.

8. *L'Ordre de S. Augustin de Dalmatie.*

LA mesme année commença la congregation, diste de saint Augustin de Dalmatie, pour auoir esté commencée en Esclauonie. Quatorze ans apres s'institua en Allemagne vne nouvelle congregation d'Hermites, qu'on appelle la congregation d'Andrea Proles de Germanie.

9. *Ordre de saint Paul premier Hermite.*

LA dernière congregation de cet Ordre fut celle de saint Paul premier Hermite de mesme habit que les autres, laquelle commença l'an 1550. Il y a des Monasteres de ceste congregation en Italie & en Espagne, toutesfois il n'y en a pas plus de quatre qui sont es environs de Rome. Or de ces congregations des Hermites de l'Observance, il y en a fort peu de cogneuës en Italie, fors celle de Lombardie, qui est la plus signalée de routes. Mais celle des Conuentuels est espandue, non seulement en France, Italie, Espagne, Flandres, & Germanie, mais aussi elle a penetré iusques au Monde nouueau.

Congregation de saint Paul premier Hermite en Hongrie.

LA congregation de saint Paul premier Hermite en Hongrie, fut commencée au Monastere de saint Jacques de Patach en Hongrie, par vn Strigonnois nommé Eusebe, lequel obseruoit avec ses compagnons vne certaine regle & maniere de viure, qui leur auoit esté baillée par Barthelemy Euesque de cinq Eglises, l'an de nostre Seigneur 1215.

Quelque temps apres estant desia ceste congregation en bon nombre, ils requierent au Pape Urbain I V. qu'il leur voulust donner la regle de saint Augustin, ce que toutesfois ils ne peurent obtenir de luy.

Quoy voyant Paul Euesque de Vesprin il leur donna la forme de viure qu'ils tiennent, l'an 1263. & lors cet Ordre commença de s'appeller la congregation de saint Paul premier Hermite, & depuis l'an 1300. ils firent leur premier Prieur general vn nommé frere Laurens Strigonnois.

Enuiron huit ans apres l'ordre fut confirmé par vn Cardinal que le Pape Clement V. auoit enuoyé Legat en Hongrie, qui s'appelloit frere Gentil de Mont-fleur, & auoit esté premierement frere Mineur, lequel donna à ceux de ladicte congregation la Regle de saint Augustin, & leur octroya permission de pouoir faire constitutions, & tenir Chapitre general, ce qui aduint le 6. Decembre 1308. au Monastere saint Laurens, pres la ville de Bade.

Depuis estant esleu au saint Siege lean X X I I. du nom, il confirma leur Ordre, & le receut sous la protection du saint Siege Apostolique, & des lors il commença de croistre merueilleusement, non seulement en nombre, mais en sainteté de vie, si bien qu'en Hongrie ils estoient estimez les meilleurs Religieux qui fussent en tout le Royaume.

Au temps de Nicolas V. du nom, l'Eglise de saint Estienne de la Rotonde à Rome, au mont Celie, leur fut donnée par le saint Siege avec tout le revenu d'icelle, & y ont esté plus de six vingts ans, sans auoir eu en Italie autre Conuent que celuy là, ausquels ils n'admettent que tous Hongres, & pas vn Italien. Ils se vestent tout de blanc, portent vn scapulaire grand & rond, qui leur couure plus que les espaules, & dessus cela vn manteau tel qu'on le porte ordinairement, sinon qu'il est de couleur blanche, & vn peu plus court.

2. *Ordre*

L'Ordre de sainte Brigide.

L'Ordre de sainte Brigide commença sous le Pape Gregoire XI. l'an 1376. lequel le confir-
ma à ceste sainte Dame Roïne de Suede, qui estoit allée à Rome: elle obtint de luy
que les Monasteres dudit Ordre seroient communs, tant aux hommes qu'aux femmes, &
toutefois qu'il y eust telle separation de murailles que l'un ne peüst aller vers l'autre sans ne-
cessité. Il voulut aussi qu'il n'y eust qu'une Eglise pour tous les deux, ains que les Religieux
cōme Ministres des choses sacrees seroient en bas, & les Religieuses en haut pour dire leur Offi-
ce & oraisons: neārmōins que l'Abbesse cōmanderoit aux vns & aux autres, combien que les
hommes auroient la charge de ce qui appartiendrait au diuin seruice & aux ornemens de
l'Eglise, & qu'il y en auroit un d'entr'eux qui seroit appellé Prieur ou Confesseur.

Fut aussi ordonné qu'ils auroient des biens, & possessions de quoy ils peussent viure, mais
que la superintendance de pouruoir à tout ce qui leur seroit besoin aux vns & aux autres, tāt
pour viure que pour le vestement, appartiendrait à l'Abbesse: qu'il leur seroit deffendu à
tous & à toutes de sortir de leur Monastere sans euidente necessité, & qu'en ce cas ils de-
manderoient congé à l'Abbesse. Ils tiennent la reigle de saint Augustin avec quelques arti-
cles adioustez par ceste illustre Roïne.

Aucuns sont d'opinion que ceste forme de religion auoit esté premierement inuentee en
la Grece, mais que les bons Peres auoient ordonné que les hommes demeureroient séparé-
ment des filles, de peur qu'elles ne donnassent occasion de mal parler, & que par tant sainte
Brigide voulant remettre sus ledit ordre, qui estoit presque allé tout en decadence, elle trou-
ua moyen, comme sans aucun soupçon l'Eglise & la maison seroit commune à tous les deux.
Elle ordonna qu'ils porteroient l'habit gris, & dessus un manteau du mesme, avec vne Croix
rouge sur l'estomac.

On voulut que les Religieuses ne fussent point plus de soixante; ny les Religieux plus de
vingt-cinq chaque Monastere, sçauoir treize Prestres, selon le nombre des treize Apostres,
y comprenant saint Paul: puis quatre Diacres, lesquels pouuoient aussi estre Prestres, & re-
presentoient les quatre Docteurs de l'Eglise, & huit Conuers qui se doiuent tenir prests
pour trauailler aux affaires de la maison: de maniere que tous ensemble les freres & les sœurs
fust le nombre de treize Apostres, & de septante & deux Disciples de nostre Seigneur, & afin
qu'on les peust entre-recognoistre les vns des autres, les Prestres portent la Croix rouge sur
le costé gauche de leur manteau, sous laquelle Croix ils mettent vne piece de drap blanc
aussi large qu'une petite Hostie pour la reuerence du saint Sacrement. Et les quatre Diacres
à la difference des Prestres, portent un rondeau de drap blanc, qui signifie, ainsi qu'ils disent, la
sapience des quatre Docteurs, lesquels ils representent, & mettent dessus quatre petites pieces
de couleur rouge faictes en forme de langues, pour monstrier que le saint Esprit enflame leur
langue à reciter les sacrez mysteres de la Diuinité: Mais les freres Conuers portent sur le mā-
teau vne Croix blanche qui denote l'innocence de leur vie, sur laquelle il y a cinq pieces rou-
ges, en commemoration des cinq playes de nostre Seigneur.

Ceste sainte Dame mourut à Rome, & sa fille Catherine Princesse de Nerice, fit apres
sa mort confirmer sa regle par le Pape Urbain V. Elle commença ses reuelations en l'an 1344.
& l'an 1346. elle fut à Rome aagée de 42. ans, où elle demeura 18. ans: elle fut canonisée l'an
1391.

De l'Ordre de Premonstré & de son Origine.

L'Origine de l'ordre de Premonstré est venuë d'un nommé Norbert natif de Cologne, sa-
& depuis esleu Archeuesque de Membourg, auquel la Vierge Marie estant un iour appa-
ruë, luy disant, Norbert prends la robe blanche, il quitta le monde, & avec quelques com-
pagnons qu'il auoit, il se retira en un lieu fort aspre & solitaire, nommé Premonstré pour fai-
re penitence, l'an 1120. ce qu'il fit sous la permission de l'Archeuesque de Lyon, à cause que ce
desert estoit en son Diocèse: Ainsi de ce lieu appelle Premonstré, la congregation a pris le
nom qu'elle porte encore au iourd'huy.

Depuis il fit confirmer sa regle par Calixte II. l'an 1122. & derechef par Honoré II. son
successeur, lequel leur donna la regle de saint Augustin, & les institua Chanoines reguliers,
laquelle ordonnance fut de nouveau approuuée par Innocent III. Ceste congregation s'est
tellement multipliée en France, Espagne & ailleurs, qu'elle est diuisée en trente Prouinces,
esquelles ils ont plus de mille trois cens Monasteres, & bien enuiron quatre cents Couuens
de filles.

Leurs Abbez sont perpetuels, & doiuent estre sacrez par Euesques.

Ils ont puissance de conferer à leurs Moines les Ordres mineurs, & benir tous les ornemens de l'Eglise, & faire toutes les ceremonies, sinon qu'en telle benediction il fallust faire la consecration, ils peuuent neantmoins celebrer les Messes solelnnelles & publiques avec la Mitre, la crosse, le bonnet, & autres ornemens qui appartiennent à la dignité Episcopale: ils font vn office different de celuy de Rome, & ont vn Breulaire conforme à leur Missel, & si obseruent par toute leur religion, vn chant qui leur est particulier: quant à leur accoustrement ils portent vn froc blanc, & vn rochet de fin lin, & par le dessus vne chappe blanche ouuerte deuant, comme celle des Carmes.

Cecy fut institué sous Henry I V. du nom, Empereur d'Allemagne, Guillaume de Tirdit qu'en son temps vn nommé Almeric Chanoine regulier de Premonstré, fut fait Eueque de Siene l'an 1180. Quant à leur fondateur, ayant fait plusieurs miracles, tant durant son viuant qu'apres sa mort il fut canonizé.

Religion de Font-auellane.

33. **L**E premier fondateur de la religion de Font-auellane, fut saint Lodolphe, lequel estant persecuté par vn Seigneur temporel, se retira entre deux des plus hautes montagnes de l'Apennin qui sont le mont Latria, & le Mont Coruo, celebres tous deux par le Poëte Dante, lesquels sont proches de la ville de Cailles enuiron de cinq milles, & Ducale d'Vrbini cité de vingt milles, & neantmoins sous le Diocèse d'Agobbie.

Ce bon homme s'estant retiré en ce lieu, où il vnoit comme vn Hermite, il acquit en peu de temps telle reputation de sainteté, que plusieurs s'en allerent rendre à luy, pour en suivre sa maniere de viure, partant il fit bastir vn Monastere, portant le titre de sainte Croix, de là vient qu'ils s'appellent encor auourd'huy par ceux des enuirs, le mont sainte Croix.

Mais apres sa mort, cét Ordre ayant commencé à se lascher, & n'estre plus ce qu'il souloit estre, Pierre Damian, qui estoit Religieux del'Abbaye de Clussi à Raouenne, del'Ordre de Camaldoli, grand personnage non seulement pour auoir esté Eueque & Cardinal, mais aussi pour sa grande sainteté, pour laquelle il a merité d'estre canonizé, remit de rechef ceste congregation à sa premiere regle & obseruance, leur faisant obseruer la regle de S. Benoist, & ayant fait bastir vn Cloistre, y mit des Hermites tels qu'il cognoissoit propres à tel manient.

Leur habit estoit vn froc blanc, le scapulaire de laine, le collet & le capuchon blanc: ils faisoient profession en la main d'vn Notaire: depuis ils se licentierent encor, si bien que l'Abbaye fut tenuë en commande, & depuis tout ordre & discipline monastique estant renuersé, le Pape Pie V. donna ceste Abbaye en commande perpetuelle au Cardinal de Rouere frere du Duc d'Vrbini, lequel l'an 1570. print des Peres de l'Ordre de Camaldoli, si que presque tous les Religieux qui estoient de dans, prirent l'habit & profession d'iceux, mais les ieunes ietterent bien tost le froc aux orties, les vieux demurerent avec les autres faisant le nombre de trente Religieux qui vesquirent depuis avec vne si religieuse obseruance, que ce Monastere s'est rendu recommandable iusques aux Prouinces plus esloignées.

Leur premier Abbé s'appelloit Pierre Baluoli & de Bagnacuali, & leur Prieur, Ambroise Cagnoli Gentilhomme de Sodesse. Le Poëte Dante a quelques fois seiourné en ce lieu, & y a composé vne partie de ses vers. Cét ordre fut commencé enuiron l'an 1050.

Congregation des Hermites appellez de Madame de Gonzague.

34. **L**A Congregation qu'on appelle des Hermites de Madame de Gonzague, aduint pour vne telle occasion. François de Gonzague quatriesme Marquis de Mantoue, qui s'est fait renommer entre les plus valeureux & signalez Capitaines de son temps, s'allant vn iour esbatre en vne sienne maison distante de Mantoue enuiron de douze mille, en passant aupres d'vn pan de muraille où estoit peinte l'image de la Vierge Marie, soudainement son cheual se dressa sur les pieds de derriere, si bien qu'il tomba à la renuersse, & luy dessous, estant tellement meurtry que tous ses Gentils hommes le tenoient pour mort.

Alors vn de la compagnie nommé Hierosime Regini du Chasteau Geoffroy, qui est situé au pays Mantouan, homme deuot & craignant Dieu, extremement fasché de la perte d'vn si grand Prince, porté d'vne grande foy seietta à deux genoux en terre de deuant ceste Image, & fit vœu à Lieu & à sa sainte Mere, que s'il luy plaisoit par sa misericorde, restaurer la vie au Marquis, il abandonneroit le monde, & se rendroit Hermite en ce lieu mesme, laquelle priere fut exaucée sur le champ, car le Marquis se leua sain & sauf.

Ce qu'ayant sceu apres, le Marquis fit bastir vn Monastere à Hierosme auquel il assigna vn bon reuenu, où cestuy-cy se retira, & fut cause que plusieurs s'y rendirent comme luy. Quelque temps apres, souz la faueur de l'Euesque de Rhege, ils esleuerēt vne regle & maniere de viure, laquelle ils disent encor garder à present, qui fut cōfirmee par le Pape Alexādre VI. Ils ne font point de profession, & ne s'obligent à aucun article sur peine de peché mortel: Ils ont quelques priuileges qui leur ont esté dōnez par le saint Siege: Ils creēt vn General, & ont aujourd'huy, de soixante à soixante & dix Monasteres, desquels le chef & principal est celuy de Gonzague, où il y a enuiron douze Hermites. Elle commença soubs le Pape Innocent VIII. & de l'Empire de Maximilian, premier du nom.

L'Ordre des dix vertus ou plaisirs de la Vierge, dir de l'Annonciade, institué par la Roynne Jeanne, espouse du Roy Louys 12.

LA Roynne Jeanne estant repudiée, le Roy Louys XII. luy donna le Duché de Berry, où elle se retira, ne faisant plus sa demeure à la Cour, ains en la ville de Bourges, capitale de Berry; là elle passa le reste de ses iours en deuotion & pieté, edifiant toute la France de sa bonne vie & sainteté, macerant mesme son corps tres-tendre & delicat par les haïres & cilices, portant ordinairement sur soy cinq cloux d'argent fort aigus, de deux doigts de longueur au costé de son cœur: son viure estoit de potage d'huile aux iours maigres, & ne mangeoit que des viandes les plus grossieres & rudes qu'elle pouuoit faire trouuer: eut vne grande compassion des pauures necessiteux & malades, auxquels elle faisoit de grands biens & grandes liberalitez, & sur tout elle tesmoigna sa charité & pieté enuers les infirmes & malades, lesquels elle faisoit assister par ses Medecins & Chirurgiens, & commanda à ses Apoticaïres de faire force onguents, qu'elle mesme faisoit appliquer en sa presence par ses Chirurgiens, & souuent les appliquoit elle mesme par le Conseil & aduis de ses Medecins, à raison que pour l'ordinaire les malades recouuroient leur guarison & santé, quand ils auoient esté touchez de ses mains vrayement royales.

Dés ses plus ieunes ans elle auoit vne particuliere deuotion enuers la tres-sainte & immaculee Vierge Marie, pieté qu'elle auoit apprise du Roy Louys XI. son Pere, qui fit bastir en l'honneur de cette Roynne des Anges l'Eglise de Clery, sa deuote maison, en laquelle il voulut par son Testament estre inhumé: estant seulement aagée de 5. ans ne respirant que de seruir Dieu dans quelque maison reguliere, preferant le voile sacré aux plus pretieuses Couronnes & diademes, elle sceut par reuelation qu'elle fonderoit & institueroit vn Ordre de la Vierge, ce qui aduint vn iour qu'elle estoit en prieres & Oraïson en l'Eglise, demandant à la sainte Vierge qu'il luy pleust luy manifester en quoy elle luy pourroit faire seruice plus agreable & honorable.

Cette reuelation luy fit entendre qu'elle fondaſt vne Religion à l'honneur de la Vierge, ce qui fut manifesté par vne voix speciale, ce qui luy demeura tellement graué en l'ame, que dès qu'elle fut vn peu plus aagée, elle medita toute sorte de moyēs necessaires pour instituer & fonder vn Ordre à la gloire de Dieu & de nostre Dame: mais par son mariage avec Louys d'Orleans Duc de Valois & de Milan, son dessein fut empesché, toutefois elle demanda au Roy son Pere pour Confesseur & Directeur en ses exercices de pieté le R. P. Ieā de la Fontaine, Religieux de l'ordre de saint François, & gardiē du Conuent des Peres Cordeliers d'Amboise, ce que le Roy son Pere luy octroya tres-facilement & le luy endoya dès lors qu'il eust receu sa demande & sceu sa volonté. Ce bon gardien prit pour compagnon avec soy le P. Nicolas Gilbert non moins deuot que docte & versé en la sciēce des saints qui fut depuis pere spirituel de cette sainte & vertueuse Princesse: elle porta tousiours l'hōneur & respect qu'elle debuoit au Roy son Pere & à la Roynne sa mere, Charlotte de Sauoye digne mere d'une telle fille: Il pleust à Dieu de retirer à soy le Roy son Pere sur la fin du mois d'Aoust de l'an 1483.

Quelques annees auparauant son deceds il fit appeller de Calabre saint François de Paule, auquel il recommanda qu'il assistast cette Princesse sa fille: ce qu'il fit avec toute zele & la charité qui luy fut possible.

Après qu'elle eust esté confirmée par luy en sa sainte resolution de fonder vne famille & congregation de filles en l'honneur de l'Annonciation de la Vierge Sacrée pour la deuotion qu'elle auoit eu dès ses ieunes ans à cette diuine mere de Dieu, elle se communiqua encore à son Confesseur & pere spirituel le P. Nicolas Gilbert, qui du commencement luy fut vn peu contraire, disant qu'elle auroit de grandes difficultez pour esblir vn nouvel Ordre en l'Eglise, & qu'il seroit plus expedient qu'elle fondaſt & fit bastir vn Monastere de filles de sainte Claire, ainsi que celuy de l'*Anc Maria*, à Paris, où la Roynne Charlotte de Sauoye sa mere

les auoit mises au lieu de Beguines qui y demeuroient auparauant, & l'auoit faict rebastir & augmenter pour loger ces bonnes Religieuses qui vinoient en grande obseruance & aueritute, gardans tres estroitement leurs reigles & statuts.

Nonobstant toutes les raisons qu'elle peust alleguer, ce bon pere ne luy fit aucune response, selon qu'elle desiroit, sinon qu'il iugeoit qu'il falloit implorer le secours & l'assistance diuine pour vne affaire de telle consequence, & qui meritoit d'estre pourpensée plus d'un iour, & comme elle estoit fort humble, elle acquiesça facilement & suivit le conseil de ce sien Pere spirituel, & fut l'espace de deux ans sans luy en parler, durant lesquels ce religieux dessein demeura en surseance, de maniere qu'il sembloit qu'il ne debuioit estre effectué.

Cette Princesse pendant ces deux années ne perdit point courage à ce qu'elle peust mettre ordre à cet affaire qui luy estoit si chere: & comme elle s'attristoit de ce retardement elle tomba malade durant quoy le Pere Gilbert fut appelé pour la visiter & consoler, auquel elle communiqua le sujet de sa grande maladie qui ne prouenoit d'ailleurs que des delais & difficultez qu'il faisoit pour empescher qu'elle ne fondast vn Ordre en l'honneur de la Roynne des Anges, l'assurant que dès le cinquiesme de son aage, assistant avec ferueur & deuotion au saint sacrifice de la Messe, elle auoit eu cette reuelation qu'elle feroit auant sa mort vne Religion de la Vierge, à laquelle elle n'auoit iamais resisté, ainseu tousiours la volonté de l'effectuer quand elle seroit en aage & en liberté de le pouuoir faire, & croyoit que toutes les disgraces qui luy estoient suruenues prouenoient de ce qu'elle n'auoit mis cette sainte inspiration à execution.

Le pere Gilbert voyant la constante resolution de cette Princesse luy demanda pardon d'auoir empesché iusques à cette heure son saint desir, & que si elle luy eust parlé plus clairement la premiere fois, il n'eust faict aucune difficulté à condescendre à sa volonté, & à l'assister pour seconder cette entreprise. Cette Princesse demeura tellement satisfaite de la response de ce sien pere spirituel qu'elle recourut peu de iours apres sa santé: elle le choisit & declara des lors premier instituteur de son Ordre, Pere Vigil sur toutes les filles qui s'enroolleroient sous les enseignes de la mere de Dieu en cette Religion, desirant qu'elles fussent gouuernées & conduites par luy & les Peres Mineurs Obseruans, pour la deuotion qu'elle auoit enuers le Pere Seraphique saint François, luy donna la charge de choisir celles qu'il iugeroit plus aptes & propres à seruir Iesus & sa Mere en la congregation qu'elle desiroit establir. Ce qu'il fit promptement, & amena vn nombre de filles de bonnes maisons de Bourges, lesquelles apprirent la pieté tant de cette bonne Princesse que du Pere Nicolas.

Deuant que commencer l'establissement de la nouuelle Religion de l'Annonciade, elle fit composer vne reigle, laquelle elle desiroit que les filles qui se consacreroient au service de Dieu en l'ordre de la Vierge, gardassent tres estroitement & religieusement, & ne fut si tost composée qu'elle l'enuoya à Rome pour estre approuuée du Pape: le R. Pere Morin grand Predicateur & fort deuot à la Vierge, fut depute pour porter cette regle à Rome & la presenter au Pape, qui estoit lors Alexandre 6. qui le receut fort humainement, & teimoigna qu'il desiroit approuuer ce nouuel ordre des vertus de la Vierge, tant pour l'honneur qu'il portoit à la mere de Dieu, que pour donner consolation à cette bonne Princesse, la pieté de laquelle estoit cogneuë par tout le monde: le Pape fut longuement auant que faire expedier cet affaire, & ne le voulut faire sans l'aduis du sacré College des Cardinaux: dont plusieurs refuserent de l'approuuer. Ce fut pourquoy le Pere Morin fut contraint de reuenir en France: Par apres la Princesse enuoya le Pere Nicolas Gilbert à Rome pour impetrer du Pape & des Cardinaux l'approbation de cette regle, il se ietta souvent aux pieds du Pape, le coniuuant au nom de Dieu ne rompre vn ceuvre si saint, auquel la Princesse n'estoit poussée que par le zele qu'elle auoit au service de Iesus & de sa mere: Alexandre esmeu par les prieres & par ses larmes fit assembler quelques Cardinaux afin d'opiner derechef sur cette approbation, mais apres plusieurs consultations les Papes & les Cardinaux se monstrerent encore plus difficiles que iamais à confirmer cette regle; le Pere Gilbert ne perdit courage, ains ayât recours au Ciel & à la faueur de la Vierge, le Cardinal Iean Baptiste Ferrier Euesque de Modene, homme de grande autorité à Rome, chery & honoré du Pape Alexandre, duquel il estoit dataire, l'enuoya querir pour l'aduertir qu'il desiroit prendre en main la cause, ayant eu pour ce sujet vne vision du glorieux Martyr saint Laurent & de saint François, qui luy auoient recommandé de faire confirmer la reigle, *des dix vertus ou plaisirs de la Vierge*, le Pape & tous les Cardinaux estonnez de la vision qu'eust ce Cardinal, approuua & confirma la regle qu'il demandoit.

Cette confirmation fut faite le 14. Feburier l'an 1501. datte remarquable parce qu'environ ce temps l'Heretique Luther porté non d'aucune deuotion, ains plustost transporté d'effroy

d'effroy à raison qu'un sien compagnon d'estude avec lequel il se pourmenoit aux champs avoit esté renversé roide mort sur la place du foudre, s'alla jeter dans le Monastere des Augustins de la ville d'Erfor, duquel il est depuis sorty faisant banqueroute à l'Eglise Catholique.

Cette sainte regle & institution n'a pas esté seulement approuvée du Pape Alexandre 6. mais aussi de Leon 10. le 25. Juillet de l'an 1517. & du depuis à l'exemple de ladite Princesse institutrice, plusieurs filles s'enroollans sous les bannieres de la glorieuse mere de Dieu, ont à l'exemple de cette vertueuse Princesse, fondé, basti & edifié des Chapelles, Oratoires, Eglises & Monasteres es villes principales de France & de la Flandre. Telle fut l'origine de cette sacrée Religion qui du commencement ne fut que de cinq filles, & portoient un scapulaire rouge en memoire de la passion de nostre Seigneur, & du depuis les novices en vlerent de blanc en memoire de l'innocence du Redempteur : plus portoient encore une corde où il y avoit 10. nœuds qui representoient les 10. plaisirs de la Vierge avec les trois cordons au bas pour symbole des foitets avec lesquels nostre Seigneur fut flagellé, attaché à la colonne chez Pilate. Durant qu'on estoit allé à Rome pour obtenir l'approbation de la susdite regle, la Princesse Madame Jeanne fondatrice d'icelle Religion, obtint du Roy permission de bastir en quelle ville elle voudroit du Royaume, des maisons & Monasteres de l'ordre qu'elle desiroit instituer & fonder en l'Eglise, mais avant que d'achepter la place de son premier Couvent, elle travailla à la reforme d'un Couvent de Religieuses de l'ordre de saint Benoist, qui ne vivoient pas selon la regle de ce grand Pere des Religieux, de laquelle elle vint à bout, nonobstant toutes les resistances, oppositions & contrarietez qui se presenterent, lesquelles elle surmonta avec un grand courage.

Cet Ordre commençant lors à fleurir, & ce Monastere estant remis en bone odeur par tout le pays l'an 1502. cette Princesse achepta des Chanoines de Mötermoyen, des iardins & maisonnettes où vivoient des filles perduës & abandonnées, pour là faire bastir & edifier le premier Couvent de son Ordre, & incontinent fit mettre la premiere pierre à l'Eglise, & benir la place par l'Archevesque de Bourges Messire Guillaume de Cambray : à laquelle benedictiō assisterent le R. P. Guy Juenal, Abbé de saint Sulpice, le Pere Gilbert Nicolas Prouvincial des Peres Cordeliers de la Prouince d'Aquitaine son Cōfesseur, & plusieurs autres Seigneurs & Dames de qualité qui l'accompagnoient, & donna charge de la fabrique & bastiment à s^r Escuyer Amé George pour tenir la main à l'œuvre.

Ordre des bons-hommes, de la Regle de saint Augustin en Angleterre.

Richard Comte de Cornuaille frere de Henry III. Roy d'Angleterre ayant demeuré quelque temps en Allemagne, & s'en retournant en son pays remporta avec soy une petite portion du sang de Iesus-Christ, & edifia un Monastere un peu au dessus de Biremistede, un village distant de Londres vingt cinq milles, où il mit ce precieux sang, introduisant ceste Religion, qu'on nomma des bons hommes, lesquels observent la regle de saint Augustin, & s'accoustrent d'un habillement de gris enfumé, presque semblable à celui des Hermites.

Leur Prieur ou Abbé s'appelle Recteur, & le principal & plus celebre Monastere de leur congregation est nommé Alleris : elle commença l'an 1257.

Congregation de la vie commune.

LA Congregation de la vie commune commença au temps du Pape Gregoire vnzième, par un nommé Girard, homme de grande sainteté, au Diocese de Tarante l'an 1373. Il estoit Allemand de nation, & a composé beaucoup de belles œuvres, dignes d'estre lues pour sa doctrine.

Congregation des pieds nuds en Espagne.

EN Espagne il y a une autre Congregation, nommée des deschaux ou pieds nuds, qui se vestent de gros drap, comme font les Capucins, mais ils portent le capuche rond : ils font une grande penitence, & gardent estroitement la regle de saint François. Ils ont plusieurs Monasteres, tous lesquels sont en lieux retirez du monde.

Congregation du saint Esprit à Venise.

A Venise, il y a aussi vn fort beau & honorable Monastere, qu'on appelle du saint Esprit qui est seul de la congregation, sinon vn membre qui en depend situé à Padoüe qu'on appelle saint Michel, ils s'habillent comme les Chanoines reguliers de Latran, vivent en commun, & obseruent la regle de saint Augustin : ils sont tous Venitiens, possèdent vn grand reuenue.

Ordre de nostre Dame de la Mercy de la Redemption des captifs d'entre les mains des Turcs.

L'An 1164. du temps de Clement IV. du nom commença la congregation de la rançon des captifs, la charge desquels est de rachepier les prisonniers qui estoient entre les mains des Turcs, a fin de les remettre apres en leur pleine liberté : ils se vestent tous de blanc, & portent vn manteau ouuert deuant, comme celuy des Carmes, sinon qu'il est blanc : ils ont sur leur estomach, du costé droict, vn escusson large d'vne pomme, où il y a depuis le milieu vers le haut vne croix blanche en champ rouge, & en l'autre partie les armoiries du Royaume d'Arragon. Il n'y a point de frere de ceste congregation en Italie excepté huit qui sont en l'Eglise de saint Quirie, pres de la tour de Comte à Rome, lesquels obtindrent cela du Pape, avec quelque reuenue, l'an 1564. ils obseruent la regle de saint Augustin. Il y en a à Paris, Thoulouze & Bourdeaux, & sont ceux qu'on appelle de la Mercy.

Ordre de la sainte Trinité aussi pour la Redemption des captifs.

L'Ordre de la sainte Trinité, fut institué pour deliurer les pauvres prisonniers des mains des Turcs.

Paul Morise tient que leur premier Monastere fut saint Thomas des Monts au mont Celie, & se fonde sur ce que dedans la petite Eglise (car la grande est route decouuerte & à demy demolie) on void à main droite en entrant vn arc ou sepulchre antique tout de marbre, dans lequel ces mots Latins sont grauez en ces termes, *Anno Domini & Incarnationis 1197. Pontificatus vero Domini Innocentii Pape III. anno primo 15. Calendis Ianuarij, institutus est noster Dei ordo sanctissime Trinitatis & captiuorum : à fratre Ioanne, sub propria regula sibi ab Apostolica sede concessa. Sepultus est idem frater Ioannes in loco, anno Domini 1213. mense Decembris 21.* Elle fut commencée lors que le Pape Innocent troisieme declara Othon cinquieme Empereur d'Occident, & le couronna, & au mesme temps que Constantinople fut prise par les François & Venitiens.

L'Ordre du saint Esprit en Saxe à Rome.

L'An de nostre Seigneur 1198. Innocent troisieme du nom, qui pour lors estoit au saint Siege, fit edifier à Rome le beau & celebre hospital du saint Esprit en Saxe (lequel lieu est ainsi appelé, d'autant que iadis les Saxons peuple de la Germanie y habitoient) & le dota de plusieurs belles possessions, pour subuenir aux pauvres malades & autres indigens : & à celle fin qu'on y fist le seruice diuin, il ordonna vne regle pour tous les freres & sœurs qui voudroient estre de cet Ordre, laquelle a esté depuis confirmée par le saint Siege Apostolique, neantmoins l'an 1564. le reuerend pere Bernardin Cyrilli de Aquila precepteur & Maître General dudit Ordre, y mit quelque reformation, ayant fait en telle sorte, que les malades y sont fort bien pensez, les aumosnes augmentées, grand nombre de filles mariees, le seruice diuin bien administré, le reuenue amplifié, & le lieu tres-bien entretenu de reparations.

Ceste regle commande que tous les freres & sœurs vivent en obedience, & chasteté, sans auoir rien de propre, & que sur tout ils soient soigneux des malades.

Et quand ils font leur promesse & veu, ils le font en ceste sorte, (en termes Latins toutesfois.) Je tel, me donne & presente à Dieu, à la Benoisie Vierge Marie, au saint Esprit, & à mes Seigneurs les pauvres malades, pour estre tous les iours de ma vie leur seruiteur. Je promets de garder chasteté moyennant la grace de Dieu, & viure sans rien posseder qui me soit propre, & à vous mon maître & general, & à tous vos successeurs, de vous porter toute obeyssance, & d'auoir fidel soin du bien des pauvres, ainsi Dieu me soit en ayde, les saintes Euangiles : ainsi se presente à l'Autel avec le liure des Euangiles. Alors le Precepteur, ou celuy

celuy qui est le plus ancien luy rend telle response : Pour la promesse que tu as faicte à Dieu & à la Vierge Marie, & à tous nos Seigneurs les pauvres malades, nous te receuons & les ames de tes pere & mere; pour participer aux Messes, Matines, leuines, Oraisons, Aumosnes, & tous autres biens, qui se font & feront en la maison du saint Esprit, Dieu t'en fasse telle part comme chacun de nous en attend auoir.

Au demeurant la maison du saint Esprit te promet pain & eau, & te donner vne robbe humble.

Cela dit, l'Ancien prend vn manteau, où il ya vne Croix, laquelle il luy monstre, en luy vestant sur les espaules, & dit ainsi.

En vertu de ce signe de la Croix, soit chassé de roy tout mauvais esprit, & Iesus. Christ te conduise au Royaume eternel : Ceste congregation a plusieurs Hospitaux en diuers lieux de la Chrestienté, desquels celuy de Rome est le chef.

Les Chapitres generaux s'y assemblent, & s'y rend compte de l'administration de tous les autres.

Si vn frere de cest Ordre, fust il Recteur du lieu ou General, est trouué ayant quelque chose de propre à sa mort, on ne l'enterre pas en lieu saint : ains il est tenu comme excommunié. Ils sont vestus d'habit noir sacerdotal, & doiuent porter vne Croix blanche à leur robbe, comme celle des Archeuesques sur le milieu de la poitrine, & au manteau sur le costé gauche : les enfans sont vestus de bleu.

Congregation des Prestres qui recueillent les orphelins.

L'Autheur de la congregation des Prestres qui recueillent les Orphelins, estoit vn Gentil-homme Venitien, appellé Hierosme Miani, lequel ayant desia intention de faire quelque œuvre qui fust agreable à Dieu, comme il persistoit en ceste sainte resolution l'an 1528. il aduint vne grãde cherté quasi generale à toute l'Italie, mais particulieremēt à Venise; où elle fut si grande que les pauvres y mouroient de faim par les ruës.

Ce que voyant cest homme de bien, esmeu de charité & de compassion de la calamité publique, alloit par les places publiques, les prenant par les ruës & places publiques, en menant les vns & portant les autres, iusques à vn certain lieu qu'il auoit preparé à cet effect, où de sa propre substance il les nourrissoit & preuoyoit à toutes leurs necessitez : & ne se contentant pas de ce qu'il auoit fait en sa ville, après auoir mis bon ordre à son Hospital, il s'en alla vers la Lombardie pour en recueillir d'autres, & vint en vne ville appelée Semasque, laquelle est aux confins du pays de Bergame, & du Milanois, où il trouua que des trois parties, les deux estoient mortes de pestilence qui estoit par toute ceste Prouince, & voyant ce bon personnage que les grains estoient prests de moissonner, il print avec soy quelque nombre de pauvres, ne laissant pour cela tous les iours à certaines heures de dire deuotement l'Office de la Vierge Marie, avec ceux qui estoient avec luy, se nourrissant de pain & d'eau seulement, sans se soucier d'auoir d'autres viandes.

Ce qu'estant diuulgué par tous les lieux d'alentour, plusieurs de ces peuples accouroiēt vers luy, & fut donné en ceste ville là vn logis, où luy & les siens viuoient en toute sainteté de vie : ce qui incita plusieurs à son exemple d'abandonner leur bien pour le suiure, & viure avec luy en pauureté.

S'estant ainsi estably en ce lieu, desirant de faire encore des fructs ailleurs, il s'en alla en la ville mesme de Bergame, où il fit en ce lieu trois Hospitaux, vn pour les pauvres Orphelins, l'autre pour les conuertis, & le troisieme pour les petites filles orphelines.

Cela fait il print son chemin vers Milan, où estant arriué il commença à rechercher & mettre ensemble les pauvres orphelins, & en assembla bien iusques à cinquante en l'Eglise du Crucifix, où il auoit pris son logis.

Il ne fut gueres en ce lieu que le bruit de sa sainteté ne paruint iusques aux oreilles du Duc, qui estoit lors François Sforce II. lequel luy ayda fort à continuer ceste sainte entreprise, luy donnant le lieu où ils logent maintenant, & s'obligea de payer le louage d'ice-luy au grand Hospital de Milan, parce qu'il estoit de ses appartenances, de maniere qu'encores auourd'huy la chambre Ducale paye ledit louage à cet Hospital.

Or apres que ce bon Gentil-homme se fut bien trauaillé en ceste sainte œuvre, allant par diuerses villes pour edifier les lieux propres à recevoir les pauvres orphelins : Il se retira à Somasque, où il estoit desia assez cognu, & y finit ses iours.

Après sa mort ceste congregation est tousiours allée en augmentant, si bien qu'elle s'est estendue en plusieurs villes d'Italie, & principalement en Lombardie.

Les Prestres de ceste compagnie tiennent tous les ans vne fois leur Chapitre & peuuent

confirmer leur General avec deux Conseillers pour trois ans, & demeure en la puissance de ce General d'assembler le Chapitre où bon luy semble, & là sont appelez par nom & par surnom tous ceux de la congregation, tant Conuers que Prestres, lesquels sont changez de lieu en autre, selon qu'il est de besoing, & mettent grande peine, à ce que les pauvres Orphelins soient bien gouvernez, tant pour la consideration de l'ame, que pour celle du corps: & pour le General est tenu de visiter par chacun an, du moins vne fois, tous les lieux qui s'ont destinez pour leur demeure & entretenelement.

Ils obseruent diligemment tous les poincts de leur institution, & ne font toutesfois point de profession solennelle: mais qui veut viure avec eux, faut qu'il promette d'estre obeyssant aux Superieurs: Au demeurant ils vivent en commun. Ceste congregation fut approuuee & confirmee par le Pape Paul Farnese III. du nom & depuis par Pie VI. lequel leur permit de continuer ainsi comme ils auoient commencé, & accepta sous la protection de l'Eglise non seulement tous les lieux & Conuents qu'ils se trouuerent auoir pour lors, mais aussi tous ceux qu'ils auroient à l'aduenir. Depuis qu'ils ont commencé à faire profession, laquelle leur a esté confirmee par le Pape Pie V. Elle commença l'an 1528. scant au saint Siege Clement VII. du nom, & en l'Empire Charles V.

Congregation des Prestres reguliers de saint Paul.

63. **L**ors que tous les Princes Chrestiens estoient en guerre les vns contre les autres, & que l'Italie se trouuoit extremement trauaillee, qui fut l'an 1526. François Sforce dernier Duc de ceste maison fut assiegé dans Milan, & s'estant retiré dans le Chasteau, fut contraint par faute de viures, de se rendre à Antoine Leuc, & au Marquis de Pescaire, laissant la ville & le Chasteau à l'Empereur Charles cinquieme. Outre cecy la ville de Milan fut tellement affligée de peste, qu'elle emporta pour le moins le tiers du peuple.

En ce temps dis-je trois Gentils-hommes, le premier nommé Jacques Antoine, de la maison des Moris, laquelle est tres ancienne, comme on peut voir par les deux Martyrs Nabor & Felix de ladite maison, lesquels receurent la couronne de martyre sous l'Empire de Maximian & Diocletian, qui fut enuiron 70. ans deuant saint Ambroise: le second estoit Cremonois nommé François Marie Zacharie, le troisieme estoit de Milan, & s'appelloit Barthelmy Ferrere, lesquels instituerent la congregation des Prestres reguliers de S. Paul des celle de Milan, se dedians à vne vie deuote & contemplatiue: & s'abstenans de plaisirs du monde, sans cesser d'exhorter les pecheurs à penitence, & lire publiquement les Epistres de saint Paul, ouyr vn chacun en confession, & administrer les Sacremens de la sainte Communion: Au demeurant ils viuoient en commun, & ne possedoient rien de propre: ils auoient de coustume se discipliner deuant vn chacun par les rues & places publiques, pour mespriser dauantage le monde: Apres leur mort ils ont esté tenus & reuerrez comme saints: ils ont quelque nombre de Monasteres, mais le chef de tous est celuy de Milan fondé de saint Barnabé.

Ordre des Prestres reguliers Theatins.

64. **L'**Ordre des Prestres reguliers Theatins a pris son origine de Iean Pierre Caraffe fils de Iean Antoine Caraffe, Baron illustre de la ville de Naples, lequel auant esté Euesque de Theade, & renoncé à son Euesché, pour viure solitairement en vn endroit du mont Piatto, en fin le iour de l'exaltation sainte Croix en l'annee 1528. du temps du Pape Clement cinquieme, & del'Empire de Charles V. accompagné du Seigneur Caietan Tienne de Vicenes & Protonotaire Apostolique, le Seigneur Boniface Colly Alexandrin, & le Seigneur Paul Romain, tous quatre concurrens en vne mesme deuotion s'en allerent ensemble en l'Eglise saint Pierre, si furent conduits par tout le Clergé en solennelle procession iusques au grand Autel où sont les saintes Reliques de saint Pierre & saint Paul: sur lequel Autel ils iurerent & promirent deuant tout le monde d'observer les trois vœux que les autres Religieux ont accoustumé de promettre en leur profession, à sçauoir pauvreté, chasteté & obeyssance. Ces quatre furent les premiers qui firent ainsi ce vœu: & tous les autres qui sont entrez depuis en ceste congregation ont fait le semblable: & pource que le chef de tous fut l'Euesque Theatin, de là est venu qu'on les appelle Theatins. Il est vray que cet Euesque apres auoir institué ceste congregation fut fait Cardinal par le Pape Paul, & depuis apres la mort de Marcel qui ne fut Pape que vingt & vn iour, il fut esleué au saint Siege, & appelé Paul quatrieme, dont plusieurs de cet ordre sont nommez Paulistes, mais plus communément Theatins.

L'Ordre

Ordre des Iesuites.

L'Ordre des Iesuites est maintenant si cogneu par le monde, que ce seroit quasi chose ^{65.} superflue d'en escrire plus particulièrement : il suffira seulement de remarquer que leur fondateur fut le bienheureux Ignace de la noble famille des Loyoles, qui sont aux confins de la ville d'Alpethia en la Prouince de Guipura en Espagne, lequel accompagné de Pierre le Febure, Alphonse Salmeron, François Xaues, Jacques Laynes, Nicolas Bauadille, Simon Rodrigas, Claude Iaye, Iean Cordure & Pasquis Broët fit vœu en la chapelle des Martyrs qui est sur le mont de Montmarthe proche la ville de Paris, où apres auoir demandé l'aide de la bien-heureuse Vierge, & de saint Denys Areopagite patron & protecteur de la ville de Paris, ils firent vœu à Dieu de renoncer du tout au monde, & de seruir en perpetuelle pauureté à la gloire de Dieu & au salut des ames, signamment à iour nommé de passer par mer à Hierusalem, en intention de s'employer de tout leur pouuoir à conuer tir les infidelles, & tascher par tous moyens d'acquérir la couronne de Martyre : que s'il aduenoit que leur resolution & dessein fut empesché par quoy que ce fust, que l'an expiré ils s'en iroient à Rome, & offriroient leur travail & seruice au saint Pere pour le salut & secours spirituel du prochain, purement & simplement, sans en pretendre aucune recompense, & sans exception de lieu, ny de temps : lequel vœu ils firent l'an 1538. le 15. iour d'Aoust que l'Eglise solemnise la feste de l'Assumption de la mere de Dieu : & depuis l'an 1540. le 28. Octobre la regle d'Ignace ayant esté confirmee par le saint Siege, le Vendredy plus prochain des Calendes de May ensuiuant, Ignace & ses compagnons firent à l'Eglise S. Paul à Rome vne nouuelle profession. Ceste regle fut confirmee & approuuee au Concile de Trête, comme il se void en la 25. session chap. 17. La vision que ce bien-heureux pere eut de nostre Seigneur qui luy promit de luy estre favorable à Rome, fut cause qu'il imposa le tressaint nō de Iesus à sa société. Entre les saints canonisez de cet ordre furent en l'an 1622. S. Ignace de Loyola & le Pere François Xauier, surnommé l'Apostre des Indes : où apres y auoir resuscité 30. morts, fait plusieurs miracles, il y a esté martyrisé, puis canonisé pour saint à Rome par le Pape Gregoire 15. aussi depuis quelques mois en çà, a esté aussi canonisé à Rome Louys de Gonsague de cette mesme compagnie, par le Pape Urbain 8. aujourdhuy seant : cette compagnie a fort pullulé parmy la Chrestienté, où elle a produit & fait encore à present de grands fructs, tant à l'instruction de la ieunesse qu'en la correction & conuersion des errans, au reste grands ennemis des heresies, & peux bien dire qu'ils en sont le vray poison & l'antidote veritable, ils aiment les consciences, mais ils arguent les vices & les erreurs, qu'ils ne peuent souffrir sans combat, d'où vient leur persecution en Angleterre & en Hollande pour la deffence de la foy Catholique & de la verité de l'Eglise pour laquelle ils souffrent le martyre, & exposent amoureusement leur vie.

Les lieux où cette compagnie florit, sont en Italie outre Florence, Sienné, Pise & Lorette, & en la Prouince de Romanie où ils ont quantité de Maisons Professes, Seminaires & Colleges, ils y ont plus de vingt belles maisons.

Au Royaume de Sicile ils y possèdent seize maisons.

Au Royaume de Naples ils ont treize maisons.

A la Traicte de Venise, treize maisons, Venise les ayans congediez lors du different qu'ils eurent avec le Pape Paul 5. & du depuis ne les ont voulu receuoir, quoy que Monsieur le Prince de Condé en son dernier voyage d'Italie en eust requis tres-instamment la Seigneurie estant à Venise.

En la Lombardie ils ont dix maisons.

En Suisse ils ont vne maison à Friburg, & vne autre à Lucerne cantons Catholiques.

En Sauoye ils y en ont trois à Chambery, Turin & Salusse.

En Allemagne sur le Rhin ils ont quinze demeures.

En la haute Allemagne quinze maisons.

Au pays d'Autriche treize demeures.

En Pologne dix-sept maisons.

En Transiluanie deux maisons, l'une à Adrianopolis, l'autre à Albe-Iulie.

En Hongrie deux maisons l'une à Presbourg, l'autre à Neuhenfol.

En Lorraine 3. maisons, au Pont à Monsson, à Nancy & Verdun.

Au pays Messin ont vne demeure à Mets par l'instance de Monsieur le Marquis de Verneuil Eueque dudit Mets, & de Monsieur le Duc d'Espèron gouverneur d'icelle.

En la Franche-Comté, quatre maisons, Dol, Besançon, Vesou & Salins.

En France outre la Prouince de Paris où ils ont dix à douze maisons, ils ont encore des demeures sur le Loire, Moulins, Nevers, Orleans, Blois, Tours, la Fleche, Rennes en Bretagne & Nantes.

En Normandie, Pontoise, Rouen, Cam, Alençon.
 En Picardie Amiens, Boulogne.
 En Champagne Reims.
 En Bourgogne Dijon.
 En Lionnois Lyon & Rion.
 En Aquitaine, Thoulouse, Bourdeaux, Auchs, Agen, Limoges, Perigueux, Bearn, Poitiers, Bourges & Cahors.
 En Prouence Aix, Arles, Auignon.
 En Languedoc Narbonne, Carcassonne, Aubenas, Rodés, le Puy.
 En Dauphiné Valence, Tournon.
 En Flandres ils ont 19. demeures.
 En Irlande vne maison celebre.
 En Angleterre est le tombeau de leurs martyrs, & leur emprisonnement.
 En Hollande leur expulsion & bannissement.
 En Portugal ils ont 15. maisons, vne au Royaume d'Angola.
 En Espagne en la Prouince de Toledé 17. maisons.
 En Castille 21. maisons.
 En Aragon 13. maisons.
 En Catalogne seize maisons.
 En Sardaigne 5. maisons.

Aux Indes Occidentales.

Dans le Peru ils ont onze demeures.
 Dans le Mexico onze demeures.
 Dans le Bresil 20. demeures: les heretiques Hollandois ont ruiné la maison des Peres Iesuites en la ville de S. Saluador lors qu'ils l'ont saccagée au mois de Ianuier 1624. & ont emmené en Hollande le Prouincial d'icelle maison & quelques Religieux de sa compagnie.
 Aux Philippines ils ont 9. maisons.
 Au Iapon ils en ont douze.
 Au Royaume de la Chine ils ont vne residence en la ville Royale.
 En la Chersonese, deux à Malaca ils y ont vn College.
 A Amboin vn autre.
 A Cochin vn autre.
 A Cambaye vn autre.
 A Calecut vn autre.
 A Meliampore vn autre.
 A Bengala vn autre.
 & plusieurs autres aux Royaumes maritimes des Indes au de là du fleuve du Gange; & à Goa il y a vn celebre College où est le seminaire de toutes les sortes de langues & de sciences.
 En Ethiopie vn College.
 Au Royaume de Maroc vn College.
 A Congo vn College.
 Autre à Angola.
 D'autres au mont Liban.
 Vne maison à Pera, fauxbourg de Constantinople.

Congregation des Peres de l'Oratoire.

Il y a encor des Prestres de l'Oratoire, desquels le bien-heureux Philippe Nerio Florentin fut fondateur en l'an 1564. Ses trois premiers nourrissons furent ces celebres & tant renommez personages Cesar Baronius, le second Iean François Bourdin depuis Archeuesque d'Auignon, & le troisieme Alexandre Fidelle. Ils commencerent leur congregation à Rome en l'Eglise de S. Hierosme, ou apres que leur nombre fut plus grand, ils esleurent par iour quatre d'entr'eux pour prescher au peuple. Il n'y auoit que le Samedy excepté: son intention principale estoit de ramener l'ordre de prestrie en son ancienne splendeur. Ceste année dernière Pierre de Berule François, natif de Paris de bonne & noble famille, & duquel la pieté & saincteté ne scauroit estre trop recommandee ny son zele ardent encor qu'il a à la gloire de Dieu & au salut des ames, ayant infiniment trauaillé pour la conuersion de ceux qui sont deuoyez de la vraye Religion: a institué vn ordre de l'Oratoire, lequel est en plusieurs choses different du premier, approuué toutesfois par le sainct Pere Paul V. du nom à present seant au sainct Siege, desquels on attend de grands fruiçts pour les beaux reglemens & reformations qu'on espere qu'ils apporteront en plusieurs choses.

Du Couuent des Vrsulines.

Il y a encore quelques autres congregatiōs pour la doctrine Chrestienne, instituees principalement pour catechiser les petits enfans, ce qui cōmence maintenant d'auoir grād cours en nostre Frāce, entre lesquelles il y en a de filles nommees Vrsulines, tant à Lyon qu'en Auignon,

gnon, & autres lieux qui instruisent la jeunesse, lesquelles toutesfois ne font point de vœux, mais l'année dernière, à sçavoir l'an 1612. au mois de Novembre, le iour S. Martin, d'autres filles aussi nommées Ursulines, qui ont vne maison aux faux-bourgs saint Jacques de la ville de Paris, prindrent vn nouuel habit, sous la reigle de saint Augustin, & firent les trois vœux solennels selon les bulles qu'elles en auoient obtenues du saint Pere Paul V. elles ne sont encor que douze.

Ordre condamné par l'Eglise.

A Pres auoir traité des ordres approuuez de l'Eglise, il ne sera peut-estre pas hors de propos de dire vn mot aussi de ceux qui sont condamnez entre autres des Blancs qui eurent vne telle origine.

Au temps de Boniface IX. il vint d'Allemagne vn certain Prestre lequel descendant des Alpes avec quelques-vns qui le suiuoient, il s'arresta à Luques où il amassa incontinent plus de trois mille personnes à la deuotion & se vestit tout de blanc, portant vne aube de lin avec vn capuchon en sa teste comme ceux que portent les Religieux, comme faisoient aussi ceux qui le suiuoient tant hommes que femmes. Il portoit vne image du Crucifix en sa main, & se lamentoit des miseres humaines, des calamitez de son tēps, & des pechez des hommes, si bien qu'avec le grand maintien qu'il auoit à l'alleure modeste le parler bien composé, & autres belles apparences qu'il monstroie, il estoit tenu & honoré comme vn homme saint.

Adonc toute la compagnie qui estoit grande le suiuoit deux à deux en maniere de procession, les plus apparens deuant: pour le commun peuple & les ieunes ils alloient les derniers, & allans ainsi de ville en ville, ils crioient souuent tous ensemble misericorde, paix, & autres inuocations: mesmement ceste contemplation de la tres-sainte mere de Dieu composée par saint Gregoire à sçavoir. *Stabat mater dolorosa*, & où la nuit les prenoit, ils se couchoient à mesme terre, & viuoient de ce que les bonnes gens leurs apportoit: ce qui incitoit tellement le peuple à deuotion, que plusieurs personages même de grande estoife & gens d'Eglise, se mettoient à les suiure, & se vestir de blanc comme eux: c'est pourquoy ils ont esté appelez les Blancs.

Or ayant ceste compagnie couru beaucoup de pays, finalement il fut resolu par leur chef qu'il les meneroit droit à Rome, comme ils s'y acheminoient, le Pape Boniface IX. estant à Viterbe, distante de Rome d'environ quarante milles, en fut aduertty, si fit mettre la main sur leur chef & le fit mener à Rome, où estant bien examiné, il fut condamné à mort, & executé comme superstitieux: par ainsi la guide estant ostée à ceste compagnie, elle se rompit, & s'en retournerent chacun en leur maison, ce qui aduint l'an 1400. Le Crucifix que cet homme portoit pour banniere est à Luques, & se font, à ce qu'on dit, plusieurs miracles par iceluy: ainsi que fait foy le grand nombre d'images qui sont pendues en l'Eglise où il est, qu'on appelle l'Eglise du Crucifix, & mesme lors qu'il fut apporté par ceux de Luques à leur retour apres la mort de ce chef, il monstra de grands miracles par le chemin, comme on peut voir par les escritures authentiques faictes par mains de Notaires publics, qui sont gardees au thresor de la confrairie des Blancs.

De maniere que voyans ceux de Luques la continuation des choses miraculeuses que Dieu faisoit par ceste sainte Image ils y bastirent ceste belle Eglise qui en porte le nom, où ils la mirent tres-honorablement sur l'Autel principal.

Ce lieu est administré par vne confrairie en confraternité, laquelle a retenu iusques au iourd'huy le nom des Blancs, on y fait le seruice diuin fort deuotement: il y a encor à Florence en l'Eglise saint Pierre du Moron vn autre Crucifix, qui est aussi fort reueré pour les grands miracles qu'il faict, & dit-on que c'est celuy que portoient les femmes de la susdite compagnie en procession lors qu'elles suiuoient cet homme d'Eglise.

Il y a aussi en ceste Eglise vne confrairie des Blancs. Ceste congregation commença environ l'an 1396. & fut esteinte l'an du Iubilé 1400. En ceste ville de Luques il y a vne Eglise de saint Martin, que le Pape Alexandre I. fit bastir lors qu'il estoit Euesque d'icelle: & quand il fut paruenue au Papat, il octroya priuilege aux Chanoines qui y sont, de pouoir porter mitres de soye blanche en de certaines solemnitez: ce qu'ils ont tousiours faict depuis, iusques au temps de Paul III. lequel non seulement leur confirma ce priuilege, mais y adiouta de porter l'habit Episcopal entierement, & quand ils vou-

Après ceux-cy on peut mettre ceux de la coquinerie, lesquels ayants mieux endurer toutes autres incommoditez, que de travailler avec cette lascheté de cœur, neantmoins ils voulurent sulciter vne congregation sous especes de religion: ainsi se vestant d'une tunique de grosse toille, teste nue & pieds nuds, alloient comme vagabonds çà & là, s'arrestant aux portes des Eglises, ou au coin des rues pour demander l'aumône.

On dit qu'un taineant de Cremone, appelé Jacques, en fut l'auteur: ils mangeoient de toute sorte de viande, & tant qu'ils vouloient, dormoient tant & à telle heure que bon leur sembloit, alloient où il leur plaisoit, & manioient argent à leur fantaisie, & qui estoit le pire, ils n'auoient personne à qui ils rendissent obéissance, ains viuoient à discretion sans estre suiets à l'Euesque, Prieur, ny General, ny autre seigneur temporel.

Il y a eu aussi la congregation des Freres de l'Opinion, laquelle print son commencement l'an 1278. d'un nommé Herman, & fut assez fauorisee de plusieurs Princes, mais finalement quand leurs meschancetez furent descouuertes, on les supprima, & fut leur congregation excommuniée par le Pape Boniface VIII.

L'an 1300. commença la congregation des Doulcins, qui fut mise sus par un certain personnage natif de Nouarre, ville du Duché de Milan nommé Doulcin, lequel en moins d'un an mit ensemble, tant d'hommes que de femmes, plus de six mille personnes qui suiuoient presque mesme ordre, ou pour mieux dire de mesme desordre que ceux dont nous venons de parler. Ceste congregation fut excommuniée par le Pape Clement V.

Quant à la congregation des pauvres de Lyon, ils furent chassés par le Pape Jean XXII. Ils se disoient du tiers ordre de saint François, & tenoient vne certaine opinion fantastique contre la foy Catholique: parquoy le susdit Pape ne se contenta pas de les chasser, mais ordonna qu'ils fussent tous bruslez l'an 1320. l'Auteur de ceste secte fut un frere Pierre de l'ordre des freres Mineurs.

Ordre du bien-heureux Jean de Dieu ou des freres de l'Hospital de la Charité.

Cette congregation a esté receüe en l'Eglise (suivant l'institution premiere d'icelle par le bien-heureux Jean de Dieu Religieux & disciple de saint Augustin Euesque d'Hypone, dont il a choisi la reigle pour faire les constitutions de la sienne pour la gloire & la louange de Dieu, pour le soulagement & solide prouidence, direction & gouvernement de choses sainctement instituees, faictes & ordonnees par les Chapitres generaux dudit Ordre afin qu'elles demeurent & persistent fermes & assurees.

Premierement les freres de cet Ordre par solennelle, expresse ou tacite profession renoucent vertuellement & par effect à tous les biens, raisons & actions qui leur appartiennent, ou qui leur appartiendront à l'aduenir en quelque maniere que ce soit, & mesme touchant l'usufruit, ne se reseruant rien d'icelles en aucune façon, si bien que pour l'aduenir ils ne puissent appeler, non pas mesme par paroles aucunes choses propres ou appartenantes à eux: ils sont obligez de resigner toutes choses de quelque sorte & qualité qu'elles soient, meubles ou immeubles, & en quelque maniere qu'elles ayent esté acquises, disant que mangerons, que boirons, reseruant le lendemain à la prouidence de Dieu.

2. Nul ne travaille pour soy, l'aumosne que l'on leur donne pour leurs Messes est pour le commun & rien pour soy, comme aussi tout autre travail, artifice ou ouillage.

3. Les Superieurs des lieux seront obligez d'observer & par tout la communauté.

4. Deffences à tous leurs freres de reueler aux seculiers ou aux Nouices les ordonnances & secrets de la Religion & de l'ordre, toutes les fois qu'ils en seront conuaincus ils seront punis de la peine la plus grande, comme destructeurs de la Religion.

5. Ils font vœu d'Hospitalité & n'acceptent point d'Hospitaux sans la licence de leur Pere General & de leurs Conseillers: ils n'en accepteront aux villages s'ils n'ont à tout le moins des entrées pour entretenir six pauvres.

6. Ils feront des questes par les Prouinces & par les villes, & les Prouinciaux limiteront aux freres les bornes du pays auquel ils feront la queste, & ne permettront point que l'un empesche les questes de l'autre.

7. Si quelqu'un d'entre leurs freres ose introduire parmy eux un nouveau genre de vie qui repugne au vœu de l'Hospitalité dont ils font profession, sera priué de l'habit & enuoyé aux galeres pour trois ans.

8. De trois en trois ans le Chapitre changera les familles des Hospitaux, & ce changement sera faict par le General, & par les Prouinciaux qui feront en sorte de satisfaire à tout.

9. Les Prieurs pourront receuoir en leurs Hospitaux quelques personnes pour tertiaires, leur donnans un habit, un chapeau & un manteau de couleur de l'habit de Religion, les ayans auparauant recogneus pour gens de bien & qu'ils n'ayent passé 35. ans de leur age.

10. Qui offencent legerement doiuent estre punis, en confessant leur faute publique, mangeant

geant à terre baiser les pieds des freres, viure durant vn iour au pain & à l'eau: les reprimēdes publiques, dire des Pseaumes & des Chappelliers.

Pour vne faute grande les peines sont, la prison, les fers & les menottes: suspension & priuation d'offices; priuation de voix actiue à temps & passiue: bannissement de la Prouince.

Quant aux Superieurs, Chefs, Prieurs & Officiers dudit Ordre ils ont leur rang & pouuoir en cette sorte.

Le premier & le plus authorisé est le General lequel s'eslit au Chapitre General de mesme que les autres Officiers, & sa charge dure six ans, au bout desquels le Chapitre se tient & en eslit on vn autre

2. Apres l'election du General, le Chapitre assemblé avec le vieil & nouueau General, le vieil donne la premiere voix pour l'election des Cōseillers & des Prouinciaux de l'ordre, selon que les Prouinces en auront besoing: l'office des Cōseillers sera pour six ans, & au premier Chapitre General le premier Cōseiller sera esleu en l'office de Procureur General, & le second en la charge de celui de Prieur de Rome: l'office des Prouinciaux durera 3. ans.

Par apres s'eslit vn Prieur au Chapitre General par vne voix secrette & la plus forte l'emporte.

4. Il y a des Sousprieurs, des Secretaires, des Enfermiers, des Sacristains, des Procureurs des Conuents, du grand Enfermier, de l'office des garderobes, des Hospitaux.

DE L'HOSPITALITE.

L'Enfermier receura au Conuent avec toute charité & amour les malades qui s'y presenteront, & auant qu'entrer au liēt, il leur fera lauer les pieds, & sçaura que pour la guari-son du corps on doit procurer au parauant celle de l'ame, & pour cette cause il exhortera avec toute douceur les malades à se confesser auant qu'aller au liēt si la maladie le permet, & si elle le presse il sera confessé & communiqué promptement de l'aduis du Confesseur: on luy fera vestir vne chemise blanche avec vn bonnet à la teste, des linceüls, vn cheuet & des seruiettes blanches, & si besoyn est l'enfermier leur chauffera le liēt.

Le malade estant au liēt le frere gardien des biens s'en ira escrire dans vn liure le nom & surnom, pays, aage, exercice, tous les habits & tout ce que le malade aura apporté, afin que s'il retourne en santé, le tout luy soit restitué, & apres il escrira à la marge du liure du departement ou de la mort du malade.

Le Medecin & le Chirurgien visiteront deux fois par iour les pauures malades avec cet ordre: lors de l'arriuee du Medecin on fera signe de la cloche afin qu'elle s'entende par tout le Conuent, & que les enfermiers se trouuent à la visite avec l'apothicaire & le Chirurgien, chacun desquels aura son liure auquel il escrira tout ce que le Medecin ordonnera tant au manger qu'au boire, & aux medicaments, & le grand Enfermier aura vn soing particulier, afin que chacun s'acquitte deuement de sa charge.

On gardera iour & nuit les malades pour leur fournir ce qu'ils ont besoing, ils seront restaurez de trois heures en trois heures avec bouillons, œufs frais, confitures, breuuages & autres choses, selon l'ordonnance du Medecin.

Apres que le malade aura reçu l'extreme onction & l'exhortation du Prestre, il sera tousiours assisté d'un frere iudicieux, qui l'exhortera à bien mourir, & y tiendra vn Crucifix, des cierges allumez, de l'eau beniste, & autres choses semblables.

Le malade estant mort est transporté de l'Enfermerie enuveloppé dans vn linceüil, & avec vn Crucifix au deuant & des cierges allumez, les freres iront en la Chappelle designee chanter le *Miserere mei Deus*, & estant dit on le laisse là iusques à l'heure de l'enterrement, & à lors on sonnera la cloche, afin que tous les freres qui sont en l'Hospital se trouuent presents à la celebration de l'office avec le Prestre, & le matin suiuant on dira vne Messe pour son ame, & tous les Vendredys on dira tant aux Enfermeries qu'aux Eglises des Hospitaux les Messes des morts pour les ames de ceux qui sont trespassez ausdits Hospitaux.

Nombre desdits Hospitaux de la Charité.

1. **L'**Hospital de saint Iean Calibya à Rome.
2. L'hospital de saint Deodate de Beneuent.
3. L'hospital de sainte Marie de la paix de Naples.
4. L'hospital de saint Iean Baptiste de Naples.
5. L'hospital de saint Pierre de Rome.
6. L'hospital de saint Suaire de Turin.
7. L'hospital de saint Pierre ez Liens de Palerme.
8. L'hospital de saint Nicolas de Perug.
9. L'hospital de sainte Croix de Coroneto.
10. L'hospital de saint Iean Baptiste de Verrery.
11. L'hospital de sainte Marie de l'humilité de Florence.

12. L'hospital de saint Anthoine de Liurme.
13. L'hospital de sainte Marie de la sante Lancian.
14. L'hospital de saint Vitto de l'Aigle.
15. L'hospital de la sainte Trinité de Plombin.
16. L'hospital de sainte Marie Aracæli de Milan.
17. L'hospital de sainte Marie de Cesence.
18. L'hospital de nostre Dame de Lincorauata de Cremona.
19. L'hospital de saint Benoist de Bolongne.
20. L'hospital de sainte Marie de la paix de Mont-basile.
21. L'hospital de sainte Marie de l'arc de Trois.
22. L'hospital de sainte Catherine de Foggea.
23. L'hospital de la sainte Annonciade de Tarente.
24. L'hospital de la sainte Trinité de Barletta.
25. L'hospital de l'Annonciade de sainte Agathe.
26. L'hospital de la sainte Annonciade de Muliterno.
27. L'hospital de saint Charles de Lotito.
28. L'hospital de nostre Dame de la pitié de Corigliano.
29. L'hospital de sainte Marie de la sante de Confeza.
30. L'hospital de la sainte Annonciade de Rassauro.
31. L'hospital de saint Jean Baptiste d'Octavian.
32. L'hospital de saint Basile de Bouin.
33. L'hospital de sainte Marie d'Itrira de Moran.
34. L'hospital de la sainte Annonciade de Salerne.
35. L'hospital de sainte Elizabeth de Messene.
36. L'hospital de sainte Marie de la pitié de Syracuse.
37. L'hospital de sainte Marie de la pitié de Laurenti.
38. L'hospital du saint Esprit de Caltagerone.
39. L'hospital de saint André de Traena.
40. L'hospital de sainte Trine de Termini.
41. L'hospital de la tres-sainte Annonciade de Palizzi.
42. L'hospital de saint Anthoine de Caltanizzeta.
43. L'hospital de saint Marc de Bouin.
44. L'hospital de saint Jean Baptiste lez Paris , faux-Bourgs saint Germain des prez, premierement fondé par la Roynne Mere du Roy Louys XIII. & du depuis augmenté par Monsieur le Duc de Neuers en memoire de seüe Madame la Duchesse de Neuers son Espouse.

Ordre des Religieux de la vision en Ethiopie.

69. **M**Ais auparavant que de mettre fin à ce petit sommaire, il sera bien à propos pour contenter la curiosité du Lecteur, de dire vn mot des Religions qui sont en Erhiopie. Le plus grand & principal Monastere qu'ils ayent en ce pays-là, est celuy de Bisan, c'est à dire de la vision, lequel est proche de la ville d'Ercocco, qui est gouuernement du Barnagas subiect du Prete-Ian. Il y a en ce Monastere plus de trois mille Religieux, estant cestuy-cy chef de six autres, qui sont scituez aux enuiron, dont le plus esloigné en est distant de trente-milles. En chacun d'iceux il y a vn Dauite, c'est à dire gardiẽ, lequel est subiet, & rend obeyssance à l'Abbé de la vision: ce Monastere est assis sur la pointe d'vn rocher fort haut d'où on voit vne profondeur espouuantable, de quelque costé qu'on puisse ietter la veüe en bas Il y a là dedans vne grande cuisine toute garnie d'ustenciles, aupres de laquelle il y a vn grand refectionnair ou ils prennent tous leur refection, & mangent trois à trois dans vn plat de bois, qui est bien large & gueres profond.

Les viandes dont ils vsent sont fort grossieres, & leur pain mesmement qui est fait de millet & d'orge, & d'vne autre espece de petite graine noire qu'ils appellent Tuse.

Ce pain est fait tout rond de la grosseur d'vne pomme d'Adam, & en distribuent à chascun des Religieux trois pour sa portion, & aux Nouices chacun vn & demy seulement: on leur donne avec cela quelque peu de choux sans sel & sans huile, de laquelle viande ainsi mal assaisonnée, ils enuoyent par honneur aux plus anciens & venerables de la maison, lesquels sont dispensez de venir au refectionnair: ils nourrissent grand nombre d'enfans au dessus de huit ans, la pluspart desquels sont manchots, estropiez ou auégles. Mais, quant aux Religieux ils ne mangent iamais de chair, ny ne boient iamais de

vin,

vin, sinon hors du Conuent, quand ils sont seuls: ils ont vne coustume que si tost qu'ils ont donne l'habit aux Nouices ils les enuoyent hors du Monastere gagner leur vie, & travailler pendant qu'ils sont ieunes, pour autant qu'ils ne se pourroient pas entretenir au Monastere, s'ils ne s'aidoient de leur industrie, encor qu'il y ayt vn grand reuenu: mais quand ils sont deuenus vieux, alors ils se tiennent tout à fait au Monastere, où ils passent le reste de leurs iours: ils se donnent bien garde que femmes, ne mules, ne vaches, ne poules, ne autre beste quelcō que de sexe feminin, n'approche du Conuent d'vn grand traict d'arquebuze: en chacun Monastere de cet ordre ils nourrissent vn coq, auquel ils attachent deux sonnettes aux pieds, & leur sert pour leur signifier l'heure de Matines & de Vespres. Ceux qui demeurent aux chāps ne s'addonnent à autre chose sinon à cultiuer les terres pour auoir du millet, & à entretenir des ruches d'abeilles: & quand la nuit approche ils se retirent incontinent à leurs maisons, de peur des bestes sauvages. Le reuenu de ce Monastere de la vision est fort grand, car en premier lieu la montagnē où il est assis contient bien enuiron trente mille du pays, où il y vient grande quantité de millet, orges, seigles & rufes, dequoy on leur paye les dismes, & mesmes les paltis où se nourrit le bestail leur rendent tribut. Au bas des montagnes il y a plusieurs bonnes fermes, desquelles la plus part appartient à ce Monastere, & de-là iusques à vne iournee ou deux on trouue infinis autres lieux de leurs possessions qu'ils appellent Gultus, c'est à dire les franchises de la Vision: ils ont outre cent petits villages qui leur payent tous les trois ans chacun vn cheual, qui seroient trente & trois cheuaux par an, mais l'Alicasin, c'est à dire le maistre d'hostel ou procureur du monastere au lieu de cheuaux prend des vaches, à raison de cinquante pour chacun cheual, estant la coustume telle, de maniere que de tous ces lieux-là qui sont distans du Monastere iusques à 5. iournees, il reçoit bien par an mil six cens cinquante vaches, outre lesquelles ils sont encores chargez de plusieurs redevances de grain, qu'ils payent à ce Monastere, les dependances duquel s'estendent plus de quinze iournees dans les Royaumes de Tigremalun: ces terres s'appellent Adetyeste, & payent par an quarante cheuaux apreciez à vaches comme dessus, & vne infinité d'autres droits. Il y a encores plusieurs autres lieux qui sont au Roy, lesquels payent quantité de cheuaux, & tiennent cela d'ancienne coustume: en fin on tient qu'ils peuuent aller plus de trēte iournees sur le leur: quelques vns d'entreux sont fort deuots, les autres vicieux: ils ont beaucoup de superstitions qu'ils tiennent des luifs: ils gardent fort estroictement le Sabat, faisant cuire leur choux, & leur pain dès la veille, de peur de rien faire de leurs mains ledit iour de Sabat, non pas allumer du feu, de maniere qu'ils sont les plus desreglez de toute l'Ethiopie: Leurs habits sont faits de peaux de cheures accoustrez comme chamois, qui leur pēdent iusques à terre, & sont teintes de couleur iaune, puis ils ont là-dessus vne chappe comme celle des Iacobins, qui est faicte de mesmes peaux: quant à l'accoustrement de leur teste, non seulement eux, mais aussi tous les Religieux de l'Ethiopie portent cheueux, sinon les Prestres qui sont tonsus.

Le reste des Religieux d'Ethiopie sont presque tous d'vn ordre, à sçauoir de celui de saint Anthoine, combien qu'ils ayent quelque diuersité en leurs ieusnes & abstinences: car il y en a qui mangent chair & boient du vin, & d'autres qui n'en veulent pas seulement voir, ny laisser entrer en leurs Conuents.

Leurs habillemens sont tous de couleur iaune, les vns estans faits de gros cotton, les autres de peaux de cheures accoustrees comme chamois. Les femmes de religion sont habillees de mesme, excepté qu'elles ne portent point de manteau par dessus leur froc, ny de cheueux comme les hommes, ains vont avec le froc seulement, & la teste toute rase, à l'entour de laquelle elles portent vn bandeau de cuir bien serré, sinon quand elles sont vieilles qu'elles y mettent par dessus certaines coiffes & voiles: elles ne demeurent point renfermees dās les Monasteres, mais dans les fermes & villages qui en dependent.

Et pource comme nous auons dit que toutes leurs Religions sont de mesme ordre, elles sont sujettes au plus prochain Monastere où elles reçoient l'habit: elles n'entrent point à l'Eglise, non plus que les autres femmes. Aucunes d'icelles sont de bonne & sainte vie, les autres qui ne sont pas si reformees ont des enfans.

Tous les Religieux & Prestres de ce pays-là portent en leur main vne Croix de bois noir, & quant aux Prestres ils vont tous iours teste raze, & portent longue barbe, mais les hommes laïcs nourrissent leurs cheueux, & font razer le dessous de leur menton & leurs moustaches: la plus grand' part des Moines vont nuds pieds, & n'y a guieres d'Eglises de Prestres où il n'y ait aussi des Moines, & s'en trouue aucunes où il y a iusques à deux cents Debeteras, c'est à dire Chanoines, & autant de Moines qui sont entretenus bien honorablement.

En l'Eglise de Caxumo qui fut la premiere edifiee par la Royne Candace, apres qu'elle eut esté baptisee par l'Eunuque, qui auoit premierement receu le baptisme de saint Philipe.

plusieurs Moines, Religieux & autres Prestres se vont mettre à ces iours là.

D'autres non seulement ne mangent point de pain, mais se retirent au profondes valles des foreits les plus espailles où autre homme du monde ne va, & là font penitence tout le Carême avec de l'eau: Le ieusne commun que font la plus grande partie des Religieux pendant le Carême est de manger seulement de deux iours en deux iours, & tousiours le soir quand il est nuit, mais le Dimanche, ny le Samedi, ils ne ieusnent point, & pour ceste raison, ils font cinquante iours le Carême: & pour autant qu'il ne se dit là qu'une Messe par iour, ils la celebrent de nuit où tous communient, puis vont souper, alleguans à cela la Cene de nostre Seigneur, lequel consacra son vray Corps, disent-ils, vn iour de ieusnes comme il estoit quasi nuit: aux autres iours qu'il n'est point ieusne, ils disent la Messe dès le matin, & quant à ceux qui mangent de la chair, ils n'ont point de discretion du Vendredy, ny du Samedi, ains en mangent indifferemment: outre le Carême ils ont encore diuers ieusnes: premierement le Lundy d'apres la Trinité, ils commencent à ieusner tous les iours de là en avant fors le Samedi & le Dimanche, iusques au iour de la Natiuité de nostre Seigneur, depuis lequel iour iusques à la Purification de nostre Dame, qu'ils appellent la feste de saint Sauere, ils n'ont point de ieusne. Les trois premiers iours d'apres la Purification, ils ieusnent fort estroitement, ne mangent point en tous ces trois iours là plus d'une fois, & disent que c'est la penitence de Ninive. Or ces trois iours, & l'Aduent, & le Carême, tous indifferemment Prestres, seculiers, hommes, femmes, enfans, grands & petits ieusnent inuiolablement.

Après auoir parlé des Religieux qui marchent sous l'estendart du Crucifix, il ne sera peut estre par hors de propos de dire vn mot de ceux qui se sont maintenant enrollez pour la meilleure partie, sous ceste triomphante enseigne, & qui estoient cy-deuant attachez aux superstitions de l'idolatrie, à sçauoir de ceux de la grande Isle du Japon ou de Zipangu, ainsi que le recite le bien-heureux S. François Xavier Iesuite en vne lettre qu'il en escrit aux Peres de sa Societé de la ville de Conimbre, l'an 1549. veu qu'ils auoient beaucoup de conformitez avec nos Religieux: Car il dit qu'outre leurs *Bonzes* ordinaires qui sont chez eux, comme les Prestres, ils en ont encore de trois sortes, qui sont comme nos Moines qu'ils appellent, *Lequixil*, & des femmes qui sont comme nos Religieuses, qu'ils nomment *Hamacata*, tous lesquels ont des Monasteres tant dedans que dehors les villes: Ceux qui se tiennent es citez ne se marient iamais, vivent d'aumosnes, ont la teste & la barbe rase, portent de longues robes à larges manches, l'hyuer ils ont la teste couuerte, & tout le reste de l'an ils l'ont descouuerte, mangent ensemble, & ieusnent plusieurs fois l'annee, ne mangent point d'animal quel qu'il soit pour faire plus grande penitence, laquelle est commune à tous les autres Moines du Japon, se leuans à minuit pour prier, faisans leur oraison en chantant par l'espace de demie-heure, puis s'en reuont coucher iusqu'à l'aube du iour, qu'ils se leuent encores à la priere, & en font autant à Soleil leuant, à midy, & sur le soir, & lors ils font quelque bruit, lequel estant entendu du peuple, soudain tous se mettent à genoux, & ioignās les mains les leuent au Ciel, & prient tous.

Ce sont ces *Lequixil*, qui preschent, & exhortent le peuple & sont fort suivis. Ils pleurent en preschant, & induisent l'assistance à plorer, tant ils ont de persuasion en leurs discours.

Il y a encore vne autre sorte de ces *Lequixil* & *Hamacata*, qui sont vestus de gris, & ne se marient point: les Monasteres des hommes sont proches de ceux des femmes, ce qui donne assez à discourir: ils font grand nombre d'oraisons, & ieusnent souuent: ceux-cy sont fort rustiques.

La troisieme sorte de ces Religieux, fait aussi de grandes penitences, vivent tous en commun, & s'habillent de noir. Ils adorent tous plusieurs Idoles, cōme *Xaca* (qu'ils disent estre né huit mille ans auant que sa mere l'eust conceu) *Amida* & *Quanon*: Ils adorent encore le Soleil & la Lune qu'ils appellent *Denix*: ce peuple est si deuot à ses Superieurs, que le Pere Michel Vilette Iesuite dit en son epistre qu'il en escrit, qu'en vne montagne proche de la Royale ville de Meac, il y eut iadis sept mille Monasteres dediez aux Idoles, & entre autres vn tres-riche où les Roys & tout le reste du peuple vont faire leurs vœux & leurs necessitez, & y offrent de tres-grands & riches presens, le diable apparoissant en vision à ceux qui vont offrir leurs oblations en ce lieu, leur faisant entendre qu'il est appaisé par leur deuotion, & qu'il les deliurera de tout peril & de toute fascherie, & qu'à l'aduenir leurs affaires leur succederont bien ou mal, comme soigneusement ou negligemment ils luy rendront du seruice.

C'est succinctement ce qui se peut dire des ordres & congregations qui sont en la Chrestienté, excepté les ordres & compagnies militaires, desquelles a esté parlé cy-dessus.

Fin des Estats & Empires du monde.



T A B L E

GENERALE DES CHOSES PLUS

MEMORABLES CONTENUES EN LA

Description des Estats, Empires, Royaumes,
& Principautez du Monde.

Orne & travail des grands Cosmograpbes & Geographes, en quoy consiste. 2.

Mappemonde des Estats & Republiques du monde desseigné par eux. ibid.

Desordre facile à se glisser en la notice des pays & Royaumes. ibid.

Diuersité grande des Royaumes & Prouinces regies de puissances souveraines, inégales & différentes. Ordre qu'y ont establi les Geographes. ibid.

Cognoissance des choses qui nous sont plus voisines es Estats voisins, utile pour cognoistre celles qui nous sont plus esloignées, & presque inconnues. 2

De la grandeur des Princes & Puissance des Republiques, se cognoist le pouuoir que chaque Estat a de se maintenir contre ou avec les autres. 2

La vraye Geographie ou description de la terre, & des pays, commence par l'Angleterre. 2

*Des Estats du Roy de la Grand' Bretagne.
Angleterre.*

Angleterre premier des Estats d'Europe, qui donne entree aux Empires, Royaumes, Republiques & souverainetez d'icelle partie du monde. 2

Description de l'Isle nommée de la grand' Bretagne, diuisee en 3. Royaumes, Angleterre, Escosse & Irlande. 2. Angleterre plus puissant des trois Couronnes de la grand' Bretagne. ibid. a tousiours esté estimée pour la renommée de ses Roys, Princes & de ses habitans. ibid.

Noms diuers donnez par les anciens à l'Isle de la grande Bretagne. 3

Albion nom iadis donné à l'Isle la grand' Bretagne, à cause de ses rochers blancs qu'on y apperçoit en ses riuages. 3

Nom de Bretagne donné à l'Isle d'Albion du mot *Brit* signifiant coloré en Anglois, d'autant que les peuples de ce pays souloient se peindre le corps. 3. elle fut depuis appelée Enghelland. 3. terre des Anglois, pour la demeure des Anglois, Saxons qui s'y habituerent. 3

L'Isle de la grande Bretagne est presque semblable à la Sicile, ayant trois caps ou promontoires qui regardent l'Océan en trois endroits, sçauoir Bellere au Ponent, ou d'Antouëst, vulgairement appelé Cap de Cornuaille: Canie vers l'Orient. Orcas ou Dunbehead, du costé du Nord. 3

Son assiette vers l'Occident distante de 15. degrez de l'équateur du costé d'Europe, ses autres limites.

ibid. sa longue estendue, & comment les Anglois la mesurent. ibid. tour de toute l'Isle combien contient. ibid.

Qualité du pays d'Angleterre: son air grossier: ses brouillards, pluyes & vents frequents: température de leurs saisons. 3. Medecines moins vltées en Angleterre qu'ailleurs: maladies rares, nuicts claires: peste qui s'y engendre de 4. en 4. ans, qui peuple fort les cimetières du pays. ibid. Grande fertilité d'aucuns lieux d'Angleterre, en toute sorte d'arbres, notamment des sapins: les Oliuiers ny Orangers ne s'y peuuent nourrir à cause du pays froid: vignes rares en Angleterre. Bleds s'y nourrissent mal. Plusieurs Collines sans arbres ny eau: laine des moutons d'Angleterre plus longue & meilleure qu'aucune autre. ibid. Troupeaux d'Angleterre ne sont abbrevuez que de l'eau de rosee, & non des fontaines, & en sont empelchez par les Bergers, & la raison de cela. Laines, richesse plus grande des Anglois: animaux de toute sorte en Angleterre: fors des asnes, des mulets, & des loups qui n'y peuuent viure. ibid. Nulle beste veneneute en ceste Isle, bestail va par tout en liberté sans garde, demeurant de nuict aux prairies. Biere excellente en Angleterre au lieu de vin. Fleuues tres-beaux. Tamise, l'Ombre, deux principales riuieres de l'Isle qui ne croissent iamais quelque pluye qu'il face. 4

Cheuaux d'Angleterre appelez Guildins qui sont hongres, leur naturel d'aller. ibid. Conils en quantité, oyseaux de toute sorte nourris par les Anglois. ibid. Chappons de Kent fort grands, plus que ceux du Mans en France. Oysons y sont fort delicats. Autres especes d'Oyseaux de challe au pays en grande quantité. ibid. Cygnes par tous les lacs d'Angleterre. Corneilles en multitude infinie, qui crient tous les matins aux riuieres. Vers y naissent en grande abondance. Corneilles dommagesables aux bleds. ibid.

Or, argent, plomb, estaing & cuiure produits en Angleterre. ibid.

Cesar voyagea en Angleterre pour y trouuer des perles. ibid. Il en fit un corselet qu'il offrit à la statue de Venus. ibid.

Fontaines de sel en Angleterre, comme aussi d'autres dont les eaux sont chaudes. ibid.

Pierre nommée Gagat qui se trouue en Angleterre, & ses vertus. ibid. Ses vtilitez mise en poudre. ibid.

Incommoditez d'Angleterre, & ce dont elle manque, & qu'elle emprunte des Estrangers. ibid.

Mœurs des anciens Anglois. 5. Monnoye d'airain ou anneaux & lames de fer dont vsoient iadis les Anglois pour leur monnoye. ibid.

Ne mangeoient de lieure, de poule ou d'oye. *ibid.*

Peuples de Kent, sont Anglois plus civilisez que les autres. *s. vivoient de lai& & de chair, & non de pain. ibid.*

Leurs habits n'estoient que peaux, & se peignoi& de pastel. *ibid.*

Femmes anciennes d'Angleterre alloient nu& en quelques solemnitez, & estoient peintes de pastel. *ibid. elles estoient communes. ibid.*

Cheveux longs des vieux Anglois. *ibid.*

Les Anabaptistes ont renouvel& en leurs ceremonies, la forme de la Republique de Platon, comme aussi les vieux Anglois. *s*

Quels estoient ceux iadis en Angleterre qui avoient entr'eux leurs femmes communes. *s*

Vsage des chariots entre les anciens Anglois aux combats. *s. comme ils combattoient. ibid.*

Anglois appelez Barbares par Strabon. *s*

Forests d'Angleterre entour&es de foss&es, estoient iadis les villes des vieux Anglois. *ibid.*

Anglois, dit Tacite, avoient des femmes pour leurs Chefs d'arm&es, ne labouroient point la terre, ne vivoient que de chasse & de fruits, dit Diode Nicee. *s. vivoient d'escorces & racines d'arbres aux forets: figures qu'ils imprimoient sur le corps de leurs enfans: fort addonnez à la Magie. Ne mangeoient rien voyageans sur mer. Leur breuvage ordinaire. ibid.*

M&eurs modernes des Anglois. *s*

Anglois à present bien policez & civilisez. *ibid.*
Gentilshommes Anglois pleins de gentillesse & de courtoisie, Anglois de basse qualite plus barbares que les autres. *ibid.*

Esprits Anglois, esueillez, prompts & subtils, capables de tous arts & sciences, leurs corps fort souples. *6*

Anglois de qualite ont la fa&on belle, & la douceur mes&ee avec la grauit&. *ibid.* Leurs actions ne sont point forcees. *ibid.* Se plaisent à festiner les Estrangers. *ibid.* permission octroy&e en Angleterre aux Estrangers, d'aller dîner chez le Maire de Londres. *ibid.*

Anglois sont furieux en guerre; mais ne prennent aucune cognoissance des dangers, & ne sont vaillans. *ibid.*

Illustres personnages aux lettres en Angleterre. *ibid.*

Anglois s'habillent maintenant à la François&. *ibid.*

Leur humeur altiere qui ne cede en rien à celle de l'Espagnol. *ibid.*

Nation Angloise nee au larcin. *ibid.*

Volleurs en grand nombre en Angleterre, retenus par l'assemblee des villages. *ibid.*

La *Hermudad*. Assemblee d'Espagne quelle. *6*

Escumeurs de mer en grand nombre en Angleterre. *ibid.*

Anglois sont grands yvrongnes, se servent du Tabac pour mieux reboire. *ibid.* Femmes Angloises port&es à mesme dissolution que leurs maris. *ibid.*

Angleterre, Escosse & Irlande sont à present suiettes à vn seul Prince. *7*

Richesse des Anglois procede de la vente des laines, Estrangers se fournissent de laines & de draps en Angleterre pour plus d'un million d'or chaque ann&. *ibid.*

Estain d'Angleterre tres-bon & de grand traffic,

ibid. particulièrement celuy de Cornuaille: ce que les Anglois en tirent de profit tous les ans: avec le traffic du haranc ptis au pays d'Yorc. *ibid.*

Bieres d'Angleterre fort estimees de ceux du pays Bas, comme aussi leurs cuirs & charbon. *ibid.*

Londres ville Metropolitaine d'Angleterre, & séjour de ses Roys, combien c&tte ville & faulxbourgs comprend de familles. *7.* est s&ie sur la Tamise, où abordent les vaisseaux de mer. *ibid.*

Compagnies de Stapoliers marchands Anglois, riches de plus de deux cens mille escus d'or en argent comptant, ils ont permission de tirer des laines. *ibid.*

Traffic d'Angleterre avant les troubles de Flandres, se montoit par an à 12. millions d'or, selon Guichardin. *ibid.*

Revenus des Roys d'Angleterre avant qu'ils fussent absolus, limitez. *ibid.*

Parlemens d'Angleterre ont relas&hé de leur premiere puissance, & toute l'autorite est maintenant entre les mains du Conseil P&iv& du Roy. *ibid.*

Revenu de la Couronne d'Angleterre à quelle somme montoit avant que le Roy Henry VI. se separast de l'Eglise: tirez de la tutelle des pupilles iusques à l'an 12. de leur a&ge. *ibid.*

Le Roy d'Angleterre m&istre des mariages, nul ne se peut marier s'il n'a compos& avec luy. *8*

Biens Ecclesiastiques vn&s aux laiz en Angleterre. *ibid.*

Revenu en Angleterre appell& la liuree des revenus, quel il est. *ibid.*

Revenu appell& Reluffe, consistant en la recognoissance des fiefs. *ibid.*

Domaine de la Couronne d'Angleterre, appell& la vieille rente. *ibid.*

Revenu du Duc de l'Enclastre. *ibid.*

Revenu de la Gabelle, appellee la Coustume. *ibid.*

Estrangers en Angleterre chargez de subsides quatre fois autant que les Anglois. *ibid.*

Revenus des mines de fer, de plomb & d'estain. *ibid.*

Revenu des Eueschez & Abbayes d'Angleterre qui vacquent. Les Roys d'Angleterre ont la nomination des Eueschez & Abbayes. *ibid.*

Revenu ordinaire du Roy d'Angleterre quel, outre les subsides extraordinaires. *ibid.*

Le Roy d'Angleterre tire le cinquiesme des Corsaires & Escumeurs de mer. *9*

Maisons Royales en grand nombre en Angleterre. *ibid.*

Despence de la feu&e Royne Elizabeth en sa cour, à quelle somme se montoit. *ibid.*

Anglois grands despenciers. *ibid.*

Tribut exig& en Angleterre & Irlande des Catholiques Romains. *ibid.* sans qu'il leur soit permis de faire aucun exercice. *ibid.*

Des forces d'Angleterre. *10*

L'Angleterre est mieux assise qu'aucun autre Royaume pour la forteresse: à les deux propriet&es qu'Aristote recherche en l'assiette d'une ville. *ibid.* Les ennemis n'y peuvent entrer qu'avec grande difficult&: à les yssu&es fort ais&es pour toutes sortes d'entreprises. *ibid.*

Mer d'Irlande pleine d'escueils & de dangers, & n'y peut on aller avec de grands vaisseaux. *ibid.*

L'isle d'Angleterre n'est autre chose qu'une grande forteresse. *ibid.*

Ports

Ports & hautes d'Angleterre au nombre de neuf. *ibid.*

Angleterre non jamais prise, ny par guerre, ny par forces estrangeres: elle est de difficile accez. *ib.*

Armée Navale d'Espagne de l'an 1588. pour conquerir l'Angleterre: cette armée estoit appelée l'Invincible, sa composition, d'hommes, d'armes, munitions & nombre de vaisseaux *ibid.* est destruite & ruinée par l'armée Angloise & par les mauvais rencontres de la mer d'Irlande. *11*

Gallions d'armée en Angleterre souloient estre au nombre de cent, dont en reste encores 70. *ibid.*

Deux mille vaisseaux de marchands traquans aux ports d'Angleterre. *ibid.*

Le Roy d'Angleterre peut mettre sur mer 400. vaisseaux de guerre. *ibid.*

Edouard 3. & du depuis Henry 3. passerent a l'entreprise de Calais, & au siege de Boulogne avec mille vaisseaux. *ibid.*

Anglois fort experimentez sur la mer. *ibid.*

Courent la mer Oceane en Hyuer & en Esté. *ib.*

Canons en grande abondance en Angleterre. *ibi.*

Ils traquent par tous les pays d'Orient, & d'Occident. *ibid.*

Ille Espagnolle arraquée des Anglois l'an 1586. *ibid.* moiettoient les Isles Azores, le Cap verd & le Brasil. avant l'alliance d'Espagne & d'Angleterre. *12*

Anglois mariniers ne s'addoient qu'à escumer & voler plusieurs marchands Chrestiens. *ibi.*

Armée que peut mettre sur pied le Roy d'Angleterre. *ibid.*

Royaume d'Angleterre divisé en 31. comtez. *ibi.*

Ordre de leur des Soldats & de composer vne armée en Angleterre. *ibid.*

Infanterie Angloise de quatre sortes, archers portans arcs & fleches, halebardiers portans vne arme d'ast semblable à l'hallebarde, harquebusiers, picquiers. *ibi.*

Anglois depourueus de bonne cavallerie, & ne se soucient nourrir de bons chevaux. *ibid.*

Cavalliers de deux sortes en Angleterre & comment ils vont armez. Cavallerie Angloise, ne s'est guere fait remarquer en aucun combat. *ibid.*

Effort du Roy Henry 8. d'Angleterre lors qu'il fit l'entreprise de Boulogne, decrit au long *ibid.* & 13.

Du gouvernement d'Angleterre 14. femmes succedent en Angleterre à tance de masses. *ibid.*

Royaume d'Angleterre divisé en 4. sortes de personnes nobles, bourgeois, hommes liges & artisans. *ibid.*

Ceux qui sont contez entre les nobles sont le Roy, les Princes, & les plus grands du Royaume. *ibid.*

Baron nul en Angleterre s'il n'a mille marcs d'or de son reuenu. *ibid.*

Chevalier nul ne naist en Angleterre non pas mesme le Prince de Galles. Ils sont faits avant ou apres le combat *ibi.* sont créez de la main du Roy, autres du general d'armée, forme de la reception d'un Chevalier Anglois. *ibid.*

Des Chevaliers du Bain Anglois faits au sacre du Roy. *ibid.*

Chevaliers de portenseignes faits en l'armée. *ibi.*

Femmes des Chevaliers Anglois appellees Dames. *ibid.*

Chevaliers de la iartiere en Angleterre. *ibid.* par

qui institue.

ibid.

Des Escuyers Anglois appelez Squires & ce qu'ils portent en leurs armes. *ibid.*

Nom de Monsieur donné seulement aux Gentilshommes en Angleterre. *ibid.*

Bourgeois sont les magistrats des villes en Angleterre. *ibid.*

Hommes liges ou legaux en Angleterre quels. *ib.*

Officiers Royaux d'Angleterre sont à la vie. *15*

Estats des principaux officiers d'Angleterre. *ibi.*

Villes principales d'Angleterre sont gouvernees par les officiers du Roy. *ibid.*

Titres donnez par le Roy d'Angleterre aux grâs Seigneurs. *ibid.*

Vn Duc mourant son fils ne porte le tiltre de Duc & la raison dece. *ibid.*

Fils des Comtes Anglois ne sont appelez que Milords. *ibid.*

En Angleterre la souveraineté est entre les mains des Estats. *ibid.*

Le Roy d'Angleterre est bien ayse de conuocquer tous les ans l'assemblée du Parlement du Royaume. *ibid.*

Loix d'Angleterre ont deux choses. *16*

Personnes publiques en Angleterre sont les Notaires, les Advocats & juriconsultes *ibid.* offices & debvoirs des vns & des autres. *ibi.*

Les cours d'Angleterre sont les lieux des jugemens où l'on fait les loix & les Sentences *ib.* quel. les sont ces cours & lieux de jugemens. *ibid.*

Cour du Chancelier d'Angleterre. *ibid.*

Sieges Royaux d'Angleterre. *ibid.*

Cour des Pupils en Angleterre. *ibid.*

Chambre toilée en Angleterre. *ibid.*

Cour des Requestes en Angleterre. *ibid.*

La Duché del Enclastre en Angleterre. *ibi.*

Officiers des Estats quels *ibid.* office de l'Orateur quel. *ibid.*

Estats d'Angleterre comment assemblez, leur forme, & comme le Roy s'y comporte. *ibid.*

Seance du Roy d'Angleterre avec Majesté en l'assemblée des Estats de son Royaume *ibid.* loix des deputez a l'assemblée. *17* *ibi.*

Le Roy d'Angleterre absout de tout crime de sa propre autorité 17. & ne parle on a luy qu'à genoux, *ib.* nul n'ose le pourmener en son antichambre quoy qu'il n'y soit pas *ib.* & ny ose on denquer sans estre descouvert quoy qu'il soit absent. *ib.*

Jugement de trois sortes en Angleterre. *ibid.*

Estats du duel en Angleterre. *ibid.*

Assemblées iuridiques d'Angleterre. *ibid.*

Supplices d'Angleterre, c'est pendre, forme de l'exécution des Criminels condamnés en Angleterre, traistres comment punis en Angleterre. *ibid.*

Marquis ou Barons Anglois estans du Parlement accusez de crime de leze Majesté sont jugez par leurs semblables. *ibid.*

Femme Angloise qui aura tué son mary, est bruslée toute vive. *ibid.*

Juges de circuits & juges par les Prouinces d'Angleterre, & de quelle autorité ils sont choisis tous les ans par le Roy. *ibid.*

Pouvoir de la Cour estoillée en Angleterre, & pourquoy ainsi appelée 18. les Presidens & Juges d'icelle & par qui instituée *ibid.* elle est pour arrester les insolences des plus puissans. *ibid.*

Cour pour les orphelins & Pupils où se juge tout ce qui leur concerne. *ibid.*

Cont de la Duché de l'Enclastre pour les fonds
de la Duché. *ibid.*
 Cour d'Eglise, nommée Cour de Chrestienré, les
Archeuesques & Euesques y president *ibid.* ont
jurisdiction particuliere, la nature des causes qu'ils
jugent. *ibid.*
 Parens assistent leur parent executé à mort *ibid.*
ils luy tirent les pieds pour l'estrangler afin qu'il
ne languisse. *ibid.*
 Religion premiere des Anglois receüe par eux de
Ioseph d'Arimathie, & puis du Pape Eleuthere.
ibid.
 Le Roy Luce d'Angleterre baptisé par Saint
Fugace & saint Damian. *ibid.*
 Angleterre occupée des Saxons. *ibi.*
 S. Gregoire mande S. Augustin en Angleterre
pour renouveler la foy. *ibi.*
 Foy Catholique est demeurée longuement en
Angleterre. *ibid.*
 Ina Roy d'Angleterre rendit le Royaume tribu-
taire d'un denier pour feu au saint Siege de Ro-
me. *ibid.*
 Henry 7. Roy d'Angleterre maria Artus son fils
aîné, à Catherine fille de Ferdinand d'Arragon, &
d'Isabelle de Castille. *ibid.*
 Ce mariage ne fut consommé pour la mort d'Ar-
tus: Henry 8. surnommé Artus espouse Catherine
de Castille avec dispense. *ibid.*
 Catherine d'Espagne femme d'Henry 8. Roy
d'Angleterre quittee par luy pour espouser Anne
de Bolen. *ibid.*
 Henry 8. aymeroit desperduement Anne de Bolen
ibi. les Theologiens des vniuersitez estrangeres es-
criuent pour luy gaignez par argent, & les autres
escriuent contre, *ibid.* le Roy enuoye au Pape Cle-
ment 7. pour faire adouuer ce diuorce, & le Pape le
refuse. Il espouse secrettement Anne de Bolen: flat-
teurs à la Cour du Roy Henry 8. apres son diuorce,
se moquans des Prestres, du Pape & des Sacre-
mens. *ibid.*
 Les Huguenots incitent le Roy Henry 8. à se
faire iurer l'obeyssance qu'on promettoit au Pape
en Angleterre. *ibid.*
 Cranmer Archeuesque de Cantorbery ne reco-
gnoisant plus le Pape prononce la Sentence du di-
uorce du Roy Henry 8. d'avec sa femme Catheri-
ne. *ibid.*
 Le Pape Clement 7. declare le mariage d'Henry
8. avec Anne de Bolen, illegitime. *ibid.*
 Ordonnance du Roy Henry 8. en vne assemblée
de ses Estats de son Royaume, que nul sur peine d'es-
tre déclaré Criminel de leze Majesté n'eust à reco-
gnostre l'autorité du Pape en Angleterre, ou Ir-
lande, & qu'on le tint luy-mesme pour chef de l'E-
glise Anglicane. *20*
 Henry 8. obtint la confiscation de tous les Mona-
steres de l'un & l'autre sexe, & finirent lesdits Mo-
nasteres en Angleterre enuiron l'an 1540. *ibid.*
 Edoüard 6. Roy d'Angleterre apres la mort de
son Pere Henry 8. prit le tiltre de Chef de l'Eglise
Anglicane. *ibid.*
 Religion Catholique toute esteinte en Angle-
terre sous le Roy Edoüard 6. *ibid.*
 Eglises Catholiques en nombre de dix mille rui-
nées en Angleterre sous Henry 8. *ibid.*
 Edoüard Heymer heretique Zuinglien, oncle
du Roy Henry 8. introduisit aux chaires les Mini-
stres Lutheriens en Angleterre, & ordonna que

dés lors on celebreroit l'office diuin en langue vul-
gaire. *ibid.*
 Marie fille de Henry 8. & de Catherine maintint
toute seule la Messe & le S. Sacrement en la Chap-
pelle. *ibid.*
 Mort d'Edoüard 6. Roy d'Angleterre. *ibi.*
 Marie receüe Roynne d'Angleterre apres la mort
de son frere Edoüard 6. *ibid.* fit annuler le tiltre
de Chef de l'Eglise Anglicane, remit les causes spi-
rituelles au iugement de l'Eglise: Cranmer fut
condamné & chassé d'Angleterre avec 30. mil he-
retiques de diuerles nations & sectes, & annulla
toutes les loix faictes par Edoüard contre l'Eglise
Catholique, & pour aduancer la Religion se ma-
ria avec Philippe, Prince d'Espagne. *ibid.*
 Elizabeth fille d'Anne de Bolen, apres le trespas
de la Roynne Marie, fut Roynne d'Angleterre.
ibid.
 Ce qu'elle fit pour conseruer la succession contre
le Pape & les Catholiques. Elle chercha le moyen
de maintenir son autorité par l'heresie: imposa si-
lence aux Predicateurs Catholiques, & ouurit les
ports & les portes de l'Isle aux heretiques *ibi.* aux
Estats qu'elle fit assembler elle voulut estre reco-
gnüe souveraine, tant au spirituel qu'au temporel
en tous les Estats: peine qu'elle voulut estre infi-
gée à ceux qui refuseroient de la recognoistre pour
telle: s'approprias les Annates & les Decimes: abo-
lit la Messe en son pays, & tout exercice de Reli-
gion Catholique, ordonnant peines à ceux qui oy-
roient la Messe, ou administreroient le saint Sa-
crement. *ibid.*
 Messes cessées & le diuin office Catholique par
tout le Royaume d'Angleterre l'an 1559. sous le Re-
gne d'Elizabeth. *ibid.*
 Edict de ladite Roynne Elizabeth contre ses sub-
iets Anglois qui frequenteroient les Colleges &
Seminaires establis par Gregoire 13. pour les An-
glois Catholiques qui auoient quitté l'Angleterre
à cause de la persecution. *ibid.*
 Seminaires Anglois commencerent aussi tost que
la furie du Caluinisme s'alluma contre les Catholi-
ques d'Angleterre. *ibid.*
 Sectes diuerses des heretiques regnantes en An-
glettre, tous ennemis du Pape & des Catholiques.
ibid.
 Caluino-Papistes pourquoy ainsi appelez. *ibid.*
 Sont plus cruels que les Turcs enuers les Catho-
liques. *ibi.*
 Caluinistes d'Angleterre, appelez Puritains,
qui ne veulent auoir rien de commun avec les Ca-
tholiques. *ibid.*
 Anabaptistes tolerez en Angleterre, comme en
Allemagne. *ibid.*
 Liure de constitutions Ecclesiastiques faict par
Iacques 6. Serenissime Roy de la grande Bretaigne
ibid.
 Principaux poincts qui en ont esté remarquez. *ibi.*
 Discipline Ecclesiastique du Liure des constitutions
Ecclesiastiques. *22. & 23*
 Caluinistes en Angleterre prohibez de faire exer-
cice de leur Religion. *24*
 Le Roy d'Angleterre assigne les gens de la
Cour sur l'exaction faicte sur les Catholiques. *ibid.*
 Regnes des Roys d'Angleterre. *24*
 L'histoire des Roys d'Angleterre est toute plei-
ne de confusion iusques à Egebert qui regna l'an
801.

Catalogue des Roys d'Angleterre depuis Egbert premier iusques à Jacques 6. à present Roy serennissime de la grande Bretagne. 24

Alliance d'Angleterre avec les plus grands Princes de la Chrestienté, comme avec les Roys de France, d'Espagne, d'Allemagne, Dannemarch, Suede, Hongrie & autres souverainetez. 25. 26.

Archeueschez d'Angleterre. 27

Nombre des Archeuesques & Euesques d'Angleterre. ibid.

Estat du Royaume d'Escoffe 28.

Escoffe est la partie septentrionale de la grande Bretagne 28. fut iadis appelée Albanie. ibi.

Diuision de l'Escoffe d'avec l'Angleterre par les riuieres de Zuede & Soluay, les bornes des trois autres costez sont la mer. ibid.

La longueur & largeur ibid. il est diuisé en plusieurs contrees. ibid.

De la Prouince de *Laudem*, iadis nommée *Pictland*, c'est à dire pays de *Pictes*: il est fort montueux & sans arbres, le peuple est fort civil & courtois. ibid.

Edimbourg sejour des Roys d'Escoffe est scituée en cette Prouince & plusieurs autres villes. ibid.

Le pays de *Merk*, l. borne d'Angleterre & de l'Escoffe. ibid.

Pays de *Teisidale*, c'est à dire vallee. ibid.

Pays d' *Eschedale*

Pays d' *Busfedale* } Ibidem.

Pays d' *Niddisdale* }

Vallée d' *Anandale*.

Pays de *Gallunay*, abondant en pastis.

Pays de *Caryste*. ibid.

Pays de *Coyl*. ibid.

Pays de *Sterling*, *Menthers*, *Clusoidale*, *Leunt*, *Ermanale*, *Strathern*, *Storie*, *Raffen*, & *Argile*, abondant en pastis. ibid.

Caledoniens anciens habitans d'Argile. ibid.

Cannre, marescageux. ibid.

Strathnahern. ibid.

Fiste où est la ville de saint André. ibid.

Angusie.

Marie.

Marnie pays maritimes, puis *Auchqueban*, *Reffemuray*, *Nesseland*, & *Turbathe*, *Beaurossen*, *Sutherland*, & *Cathernes*. ibid.

Lors aspre & pleine de montagnes moins fertile que l'Angleterre 29. abonde en poisson. ibid.

Huitres de harans, de corail & de coquilles dans la mer d'Escoffe. ibid.

Lacs, marais, riuieres & fontaines en grande quantité en Escoffe, où est force poisson ibid. ils descendent du mont *Grampié*. Ibid. riuieres qui en sourdent. ibid.

Mer d'Escoffe quelle ibid. autres riuieres d'Escoffe. ibid.

Montagnes en Escoffe produisant marbres & albâtre. ibid.

Forests d'Escoffes pleines de bestes fauves & noires. ibid.

La Forest de *Caledoine*, où sont des bœufs blâcs farouches, & qui ne peuvent estre domptez, & ont leur crin comme celui des Lyons. ibi.

Aire de charbons abondant en bitum terrestre

qui brulle quelquefois.

ibid.

Mines d'or, d'argent, de plomb & de cuiure en Escoffe. ibid.

Mine d'or trouuée en *Craufort* d'où se tire l'or sans peine. ibid.

Lac appelé *Mirtun* au Pays de *Gollonay* se gele vne partie en hyuer, l'autre ne se peut geler pour froid qu'il face. ibid.

Bœufs de *Carite* dont la chair est tendre, leur graille coule comme huile. ibid.

Lac de *Loumend*, qui fait 30. Isles dont la plus grande est pleine de bourgs habitez. ibi.

Trois choses memorables se disent de ce lac. ibi.

Bleds rares en Escoffes. ibid.

Fontaine merueilleuse à deux mille d'Edimbourg. ibid.

Mœurs anciennes des Escoffois. ibid.

Ils furent iadis *Pictes* qui veut dire peincts. ibid.

Se repaïssoient de chair humaine selon S. Hierosime, se prenoient aux mammelles des femmes qu'ils arrachioient ibid. Boece dit le contraire qu'ils estoient fort sobres ibid. alloient pieds nuds. 30

Tombeaux des nobles illustrez d'autant d'obelisques qu'ils auoient tué d'ennemis. ibid.

Ceux qui alloient à la guerre sans fusil ou n'ayâs l'espée au costé ou en la main, estoient fouettez par ignominie. ibid.

Si quelqu'un s'en alloit sans congé, il estoit permis de le tuer. ibid.

Femmes en Escoffe s'enroolloient pour aller à la guerre pourueu qu'elles ne fussent enceintes. ibid.

Ceux qui estoient trop addonnez à boire & manger estoient noyez. ibid.

Ils vsoient de lettres hyeroglyphiques comme les Egyptiens.

Mœurs modernes des Escoffois de ce temps. ibid.

Escoffois de leur naturel enuieux & superbes, & mesprisent tous les autres ibid. font parade de leur noblesse. Les plus pauvres disent qu'ils sont sortis du sang des Grands du Royaume, & de la race Royale. ibid.

Escoffois diuisez en civils & sauvages. ibid.

Gens de la terre haute sôt les Escoffois Civils. ibi.

Gens de la basse terre sont les Escoffois sauvages demeurans vers le Nord. ibid.

Sont sortis des Irlandois. ibi.

Escoffois ont beaucoup d'esprit & d'industrie, mais fort vindicatifs & cruels, ils sont hardis & courageux en guerre, & souffrent toute incommodité plus que les Anglois: ils sont subtils & rusez, enclins à factions & seditions, ils sont tenus pour extrêmement fideles: les Roys de France s'en seruent pour la garde de leur corps. ibid.

Secours que les Roys d'Escoffe ont enuoyé aux Roys de France, & des Priuileges dont iouysent les Escoffois en France. ibi.

Alliance entre la France & l'Escoffe signifiée par la double bordure des fleurs de lys qui est à l'entour du Lyon en l'escu des armes du Roy d'Escoffe. 31

Alliance de France avec l'Escoffe fut contractée dès le temps de Charlemagne & Achayus l'an 791. & continuée comme il se void. ibid.

Seruices & secours rendus à la France par les Escoffois. ibid.

Ont attiré l'orage des ennemis de France sur eux pour avoir secouru la France. *ibid.*
 Mariage entre France & Escosse. *ibid.*
 Escossois honorez d'honorables charges en France par les Roys de France agreans leurs services. 32.
 Compagnies de la nation Escossoise prez la personne du Roy de France pour la premiere garde. *ibid.*
 Privilèges des Escossois en la maison du Roy de France. 33.
 Comte de Montgomery a esté le dernier Capitaine de la compagnie des Escossois en France, de la nation Escossoise. *ibid.*
 Articles accordez entre l'Empereur Charlemagne Roy de France & Achayus Roy d'Escosse l'an 791.
 Renouvellez par Louys le ieune aussi Roy de France, & Guillaume d'Escosse l'an 1166. *ibid.*
 Robbe du sacre du Roy de France appartient aux gardes Escossoises. *ibid.*
 Droicts de naturalisation & d'aubeins en France donné aux gardes Escossoises par Henry premier. *ibid.*
 Sont exempts de routes sortes d'impositions mises sur les marchandises. *ibid.*
 Confederation avec les Escossois renouvellee par le Roy Charles 3. & Robert 2. Roy d'Angleterre. 34. confirmée par lesdits Charles & Robert 3. & entre Charles 7. & Robert Duc d'Albanie Gouverneur d'Escosse. Autre confederation nouvelle entre Charles 7. & Jacques 1. Roy d'Escosse, & depuis entre Louys 12. & ledit Jacques. *ibid.*
 Autre confederation renouvellee & amplifiée par le Roy François 1. & par le Duc d'Albanie gouverneur d'Escosse. *ibid.*
 Trafic de laine des Escossois, vente de charbon, carisee, reuesches, harans. *ibid.*
 Revenu petit du Royaume d'Escosse. *ibid.*
 Escosse pays fort plein de precipices, montagnes & forests *ibid.* les fortterelles. *ibid.*
 Edembourg & la situation ville capitale. *ibid.*
 Sa Citadelle Imperiale. *ibi.*
 Ordres d'Escosse. 36.
 Le Roy d'Escosse est Seigneur direct de toutes les terres, & a autorité royale sur le temporel & spirituel. *ibid.*
 Fils aîné d'Escosse appellé Duc de Rothes & Seneschal d'Escosse. *ibid.*
 Thanes, en Escosse officiers du Roy. *ibid.*
 Titre de Duc quand introduit en Escosse & par qui. *ibid.*
 Cheualiers dorez au premier rang des nobles Escossois. *ibid.*
 Enfans puisnez des Seigneurs ne succedent à leur Pere, ains le seul aîné *ibi.*
 Estats d'Escosse ont vne autorité fort absoluë. *ibi.*
 Dequoy composée *ibid.* le Roy approuue ou deduoc ce qui y est resolu. *ibi.*
 College de iustice en Escosse & par qui institué. *ib.*
 Comtes Subalternes en chaque Comté d'Escosse. *ibid.*
 Religion Chrestienne quand receuë en Escosse 36.
 Changee en heresie à cause du voisinage d'Angleterre. *ibid.*

Hamelton parent de Jacques 5. Roy d'Escosse, bruslé pour estre soupçonné heretique. *ibid.*
 Comte d'Arangouuerneur d'Escosse. *ibid.*
 Marie Stuart Royne d'Escosse mariée à François Dauphin de France. *ibi.*
 Sa prison en Angleterre, & son exemption. 37.
 Observation des ordonnances Ecclesiastiques par le Roy Jacques en Escosse. 38.
 L'Escosse donnée en proye à l'heresie apres la mort de Marie Stuart. 37.
 Archeuesques d'Escosse, de saint André, Primat, & celui de Glasco, huit Eueschez, puis trois. 38.
 Clergé d'Escosse vit à la façon d'Angleterre. *ibid.*
 Des Roys d'Escosse 38. & suiv.

Est de l'Irlande.

Irlande iadis nommée Hybernien & d'autres noms 40. sa situation *ibid.* iadis appelée Escosse selon Jean Maior Escossois Docteur de Paris. *ibi.*
 Hybernois ou Irlandois appelez iadis Escossois. 41.
 Langage d'Escosse est meslé de l'ancien Anglois & Hybernois *ibid.* ses limites & la forme. *ibid.*
 Sa diuision en cinq parties *ibid.* son air est doux & temperé, n'a rien de venimeux, est trop humide, cause de plusieurs maladies, le pays est montueux & marécageux & plein de forests, venteux, ses ports de mer, sa fertilité grande, bled court & menu y croist, produit de bons cheuaux, cerfs gras, force rats, force poisson, grand nombre de sangliers & lieures, faulcons, espreuiers, aigles, cygnes, mouches à miel, perle en la mer d'Irlande. 41. & 42.
 Martiniers qui estans morts se gardent, & empeschent la tigne aux coffres. 42.
 Irlandois anciés fort sauvages, mangeoient des chairs humaines, mangeoient les corps de leurs Peres & meres, despourueuz de pieté & de vertus dit Mela. *ibi.*
 Irlandois victorieux se frottoient le front du sang des ennemis & en humoient, le droit & l'injustice leur estoient indifferens. *ibid.*
 Coustume ancienne des femmes Irlandoises ayans produit des masses, comme elles les nourrissoient. *ibid.*
 Gloire des Irlandois consistoit aux armes. 42.
 Irlandois modernes, fort agiles & de grand courage: ne craignent les perils, endurent le travail & le froid & la faim, sont enclins à l'amour: courtois aux estrangers, constans en amitié, irreconciliables en hayne: legers de creance, ambitieux, extremes en leurs passions, donnent noms profanes à leurs enfans les baptisans. *ibi.*
 Souffrent malaisement les outrages, nom du Pere ne se donne à son fils sinon apres sa mort. *ibid.*
 Des meurs des femmes & des filles Irlandoises, ce qu'elles font quand elles se marient & accouchent: ont honte d'allaiter leur enfans, ce qu'elles leures font estans malades, brasselets de cheueux qu'elles donnent à leurs amants: aiment la musique & l'oyseté: ieune des filles Catholiques Irlandoises, leurs chemises faites de branches & escorces de peuplier, Religieux Irlandois comment viuent. *ibid.*

Larcin n'est tenu pour infame en Irlande, estiment honte de vivre du travail de leurs mains: estiment lacheté dormir de nuit: volent les temples & lieux sacrez. *ibid.*

Ils ne se marient que dans les villes, par paroles de futur seulement: femmes font estat de leurs cheueux. *ibid.*

Irlandois sauvages s'agenouillent voyans la nouvelle Lune, & ce qu'ils luy disent. *ibid.* prient Dieu pour les loups afin qu'ils ne les offensent. *ibid.*

Est ment forcier celle qui demande du feu le 1. jour de May. *ibid.*

Autres coustumes, mais plustost niaiseries des Irlandois se voyent 43. & 44

Leur nourriture ordinaire. 44

La richesse d'Irlande consiste en l'abbord des marchands qui y arriuent de tous costez pour le trafic avec les habitans. *ibid.* & en leurs vaches. *ibid.*

La ville de Galucy pleine de riches habitans qui font trafic de tous costez. *ibid.* Vwaterford luy est semblable. *ibid.*

Garnisons d'Angleterre en Irlande qui est cause que le Roy n'en tire que de bien petites commoditez. *ibid.*

Tribut qui se paye par les Catholiques d'Irlande sans permission d'exercer leur Religion. *ibid.*

Forces d'Irlande, & leur milice composee d'hommes de cheval & de pied. 44. chevaux dressés à leur volonté. *ibid.*

Leurs armes sont dards pesans qu'ils dardent contre leurs ennemis, les prenant par le milieu. *ibid.*

Gens de pied Irlandois nommez Galoglasses, portent des haches plus trenchantes que rasoirs au bout de leurs longs bois. *ibid.*

Autres soldats Irlandois appelez Karni vsent de dards & de coutelas, & n'estiment auoir tué vn ennemy s'ils ne luy emportent la teste. *ibid.*

Soldats coureurs appelez en Irlande Daltins, marchent desarmez, & seruent les Cavaliers. *ibid.*

Pharo, Pharo, cry de la Cavalerie & Infanterie Irlandoise, quand ils viennent aux mains. *ibid.* ils vsent de cornemuses au lieu de trompettes. *ibid.*

Nombre grand des Irlandois, & seroient invincibles n'estoit leur diuision. *ibid.* cause d'auoir donné en leur Isle entree aux Roys d'Angleterre. *ibid.*

Dix forteresses garnies de douze mille Anglois tant de pied que de cheval, que le Roy d'Angleterre y tient. *ibid.* ce qui fut commencé par la Roynne Elizabeth, contre les dernieres entreprises du Pape Gregoire. *ibid.*

Almach ville Archiepiscopale d'Irlande tres-forte. *ibid.*

Tridar plus grande forteresse du pays. *ibid.*

Dublin, siege des Roys d'Irlande, assez bonne forteresse, où l'on s'embarque pour aller en Angleterre. *ibid.*

Vvduergues forteresse d'Irlande du costé de Tramontane. *ibid.*

Sept forteresses Irlandoises avec leurs ports du costé d'Angleterre. 45

Canal d'Irlande fort dangereux. *ibid.*

Le Roy d'Angleterre ne craint pas l'inuasion d'Irlande par les Princes Estrangers, à cause du grand nombre de ses forts, & de ses garnisons. *ibid.*

Gouuernement de l'Isle & Royaume d'Irlande. *ibid.*

Nombre de petits Roys iadis en Irlande. *ibid.* est maintenant sous la puissance des Anglois depuis l'an 1175. Roderic Roy de Connacie en Irlande en fut cause. *ibid.* Roys d'Angleterre s'appelloient du commencement seigneurs d'Irlande, iusques à Henry huitiesme, qui en fut nommé Roy par les Estats d'Irlande. *ibid.*

Viceroy Anglois en Irlande, appelez conseruateurs d'Irlande, peuuent faire paix & guerre. *ibid.* leur reception deuant le Chancelier du Royaume. *ibid.*

Conseil d'Irlande, & ses officiers honoraires. *ibid.*

Irlande a les mesmes ordres que l'Angleterre. *ibid.* est diuisee en deux parties, en Irlandois sauvages, & en Anglois Irlandois, qui parlent naturellement bon Anglois. *ibid.*

Seigneurs ou plustost Tyrans des Irlandois sauvages, qui n'obeyssent à l'Anglois que par force. *ibid.* leurs iuges appelez *Brehans*. *ibid.*

Estats d'Irlande ont plus de puissance que tout le reste, & s'assemblent à la volonté du Viceroy. *ibid.*

Quatre assemblees iuridiques par an en Irlande comme en Angleterre, & cinq cours. *ibid.*

Iusticiers des assises en Irlande, quels sont. 46

Gouuerneurs aux Prouinces pour rendre Iustice. *ibid.*

Irlande a mesmes loix municipales que l'Angleterre, & les loix des Parlemens y estoient en vslage iusques à Henry septiesme. *ibid.*

Grand Mareschal d'Irlande, est le Magistrat militaire. *ibid.*

Barons de Morley Anglois, ont esté long temps grands Mareschaux d'Irlande. *ibid.*

Banquiers ne sont soufferts en Angleterre. *ibid.*

De la Religion d'Irlande. 46. receut la foy l'an trois cens trente-cinq, du regne de Fincomar Roy d'Ecosse. *ibid.*

Comment cela arriua. *ibid.*

Religion Catholique a duré en Irlande iusques au regne de Henry septiesme Roy d'Angleterre, qui y sema l'heresie, y fut aduancee par Elizabeth, en mit dehors le Comte du Tiroen Catholique, qui se retira à Rome. *ibid.*

Amende outre le tribut annuel, payee par les Catholiques d'Irlande trouuez faisant dire la Messe, & les Prestres mis en prison perpetuelle. *ibid.*

Edicts publiez en Irlande contre les Catholiques & Ecclesiastiques. *ibid.*

Edict publié par le Viceroy d'Irlande, le trentiesme Ianuier mil six cens vingt quatre, bannissant les Archeuesques, Euesques, Iesuites, & autres Ecclesiastiques hors le Royaume. *ibid.* & suiuaus.

Quatre Archeueschez en Irlande, & 24. suffragans, ils y sont sans authorité, & y vivent avec mille peines. 48

Estas du Royaume de France. 49.

Nom de Gaule & sa source. 50. diuerses opinions sur ce nom. *ibid.*

Gaulois entendus iadis sous le nom de Celtes, selon Mernla, pour la Noblesse des Celtes k 113

Senonois, qui estoient le sang plus noble des Gaulles, qui surmonterent l'Italie, & prirent Rome sous leur Chef Brennus. *ibid.*
 Celtes rendoient la Gaule redoutable aux estrangers. *ibid.*
 Nom de Celte attribué à toute la Gaule. *ibid.*
 Preuve de cela chez Strabon. *ibid.* Fut aboly du temps de Cesar, & fut repris celui de Gaule. *ibid.*
 Nom de Gaules aboly par l'introduction des Gaulles des peuples Allemands nommez Francs, sortis des pays Septentrionaux d'Allemagne, selon Ptolomee. *ibid.* Qui se rendirent maîtres des Gaules. *ibid.*
 Gaule non de grande estenduë de pays. *ibid.*
 Division de la Gaule selon les anciens, Cesar & Ptolomee. *ibid.*
 Limites du Royaume de France. 50
 Sa largeur, sa longueur, son circuit. *ibid.*
 Division de la France selon les Parlemens. *ibid.*
 Parlemens de France au nombre de huit. 51
 Parlement de Paris contient 6. Archeueschez & 24. Eueschez. Prouinces où sont lesdits Archeueschez & Eueschez. *ibid.*
 Parlement de Thoulouse contient trois Archeueschez, & 28. Eueschez. Prouinces où sont lesdits Archeueschez & Eueschez. *ibid.*
 Parlement de Rouën a sous luy vn Archeuesché & six Eueschez. *ibid.*
 Parlement de Bourdeaux a sous luy vn Archeuesché & vnze Eueschez. 52. Ses principales Prouinces où elles sont scituées. *ibid.*
 Parlement de Rennes a sous luy vn Archeuesché & 9. Eueschez. *ibid.*
 Parlement de Dijon a sous luy deux Eueschez. *ibid.*
 Parlement de Grenoble a sous luy 2. Archeueschez & cinq Eueschez. *ibid.*
 Parlement d'Aix a deux Archeueschez & vnze Eueschez. *ibid.*
 Parlement de Bearn a sous luy deux Eueschez. *ibid.*
 Parlement de Mets a trois Eueschez. 53.
 Description generale des Prouinces de France. 53. 54. 55. & luy.
 Villes de Picardie. 53. Les Seigneuries qui en dependent. *ibid.* ses riuieres. *ibid.*
 De la Preuosté & Vicomté de Paris diuisee en 4. parties. Paris quel. *ibid.*
 De la Ville de Paris, capitale de France, & sejour ordinaire des Roys. *ibid.*
 Incendie des deux Ponts à Paris 1621. 54.
 Description de Paris. 54. & 55
 De l'Isle de France, & ce qu'elle comprend. 55
 De saint Denis en France. *ibid.*
 Pays de Valois. *ibid.*
 Pays de Gastinois. *ibid.*
 Pays de Beaussé. *ibid.*
 De la ville d'Orleans. *ibid.*
 Pays de Sologne. *ibid.*
 Pays de Touraine. *ibid.*
 Pays d'Anjou. *ibid.*
 Pays du Mayne. *ibid.*
 Pays du Perche. *ibid.*
 Prouince de Champagne, & les pays qu'elle contient. 56. quand vnice à la Couronne. *ibid.*
 La Brie & ses villes. *ibid.*
 Pays de Lyonnois. 57. de la ville de Lyon. *ibid.*

De la Duché de Berry, & de la ville de Bourges. *ibid.*
 Prouinces d'Aquitaine, qui recognoissent la Iurisdiction du Parlement de Paris. *ibid.*
 Bourbonnois. *ibid.* ce pays a eu autrefois des Ducs. *ibid.* De la ville de Moulins chef du Bourbonnois. 58. de ses autres villes. *ibid.*
 Pays de Forests, & la ville Montbrison qui en est le chef. *ibid.*
 Prouince du Poictou comprend 12. cens Parroisses sous trois Eueschez. Ses bornes. Estoit iadis le Royaume des Gots chastez par Clouis, Princes qui en ont iouy. Quand requirte à l'obeyssance des Roys de France. *ibid.*
 De la ville de Poitiers, & des autres villes du Poictou. 59
 Du pays d'Angoulmois, ses bornes: de la ville d'Angoulesme, les autres villes. *ibid.* Ce pays quand erigé en Duché. *ibid.*
 Pays d'Aulnis, & du territoire de la Rochelle. *ibid.*
 Du pays d'Auvergne, ses limites: sa diuision en haute & basse. De la ville de Clermont la principale, de S. Flour, & autres. *ibid.*
 Prouinces qui sont du Parlement de Thoulouse. *ibid.*
 De la Prouince du Quercy, ses bornes: Cahors sa ville capitale. *ibid.* puis Montauban & autres *ibid.*
 Pays de Rouergue, sa ville principale est Rhodéz, ses autres villes. *ibid.*
 De la Prouince du Languedoc: ses bornes. *ibid.* contient 22. Dioceses. *ibid.*
 De la ville de Thoulouse capitale du Languedoc. *ibid.* autres villes du Languedoc. *ibid.*
 De la ville de Nismes, où on void des anciens amphitheatres. *ibid.*
 Du Pont du Gard, où il y a trois ponts l'un sur l'autre. 60
 De la Prouince de Gascogne, & ce qu'elle comprend. *ibid.* ses bornes, les Prouinces & villes. *ibid.*
 Des pays du Parlement de Rouën, contenant toute la Normandie. *ibid.*
 Prouince de Normandie, & ses bornes. *ibid.*
 De la ville de Rouën, siege du Parlement de Normandie, & autres villes de la Prouince. *ibid.*
 Des Duchez d'Alençon, d'Aumale & de Longueuille en Normandie. *ibid.* des Comtez qui y sont. *ibid.*
 Du Royaume d'Yuerot, & comment venu aux heritiers de Gaultier seigneur d'Yuerot, histoire notable. *ibid.* comprend 18. villages. *ibid.* il est au pays de Constantin. 61
 Pays qui sont compris en la Prouince de Normandie. *ibid.*
 Du Parlement de Bourdeaux, & ses Prouinces. *ibid.* ses limites
 Du haut & bas Limosin, ville de Limoges, & autres. *ibid.*
 Du pays de Perigord, ses bornes, de la ville de Perigueux sa principale, & autres. *ibid.*
 Des pays du Bordelois, Basadois, les Landes. *ibid.*
 De la ville de Bordeaux ancienne & belle. *ibid.* autres villes du Bordelois. *ibid.*
 Senechaussée de Bordeaux, & ses pays. *ibid.*
 Pays de Medoc & Ablonneux, ses places. *ibid.*

Pays de Bouch est subiet aux Comtes de Candale.		De l'Isle de Marmoutier.	ibid.
ibid.		De l'Isle de Ré viz a viz la Rochelle, ses lieux.	ibid.
De la ville & pays de Fronzac.	ibid.	Isle de Rets porte le tiltre de Duché.	ibid.
Basadois & ses villes.	ibid.	Des Isles d'Oleron.	ibid.
Pays de Lapord ou Lourde ayant 2. Dioceses,		Des Caps ou promontoires de France.	ibid.
Bayonne & Aqs.	ibid.	Du Cap de saint Matthieu vers Occident.	ibid.
De la ville de Bayonne clef de France.	ibid.	autres Caps.	ibid.
Du pays de Xaintonge, ses bornes: de la ville de		Forêts de France en diuerses Prouinces.	ibid.
Xaintes sa principale, & autres.	ibid.	Forest d'Orleans la plus grande.	ibid.
Du Parlement de Rennes, & de la Prouince de		Riuieres principales de France.	ibid.
Bretagne: ses bornes, sa longueur, & sa largeur:		Seine, Loire, Rhosne, Saone, l'Isere, Duran-	
on y parle deux langues, diuisee en haute & basse.	ibid.	ce, Garonne.	64
De la haute Bretagne: de sa ville Metropolitai-		Qualité des pays & prouinces de France.	64
ne, sçauoir Nantes: de la ville du Parlement de		Territoire de Paris, plaisant & fertile.	ibid.
Rennes, & autres villes.	ibid.	Ruisseau de Gentilly, ou ruiere des Gobelins.	
De la basse Bretagne, & de Vannes sa principale		ibid.	
ville, & autres villes.	62	Plastre de Montmartre.	ibid.
Bretagne, de Comté erigee en Duché, quand vnie		Territoire de Chartres fort abundant.	ibid.
à la France.	ibid.	Beauce fertile en bleds, pays sans eaux & sans ar-	
Du Parlement de Dijon qui comprend la Duché		bres.	ibid.
de Bourgongne. Bourgongne d'où appelée.	ibid.	Sologne pays sablonneux.	ibid.
ses limites. Dijon sa principale ville, belle & ma-		Territoire de Blois ahonde en toute chose.	ibid.
gnifique.	ibid.	Territoire d'Orleans, fertile en bons vignobles.	
Autun ville Episcopale, tres-ancienne, a de bel-		65	
les marques d'antiquité. ibid. estoit capitale des		Pays de Gastinois sablonneux, & de peu d'apport.	ibid.
Heduois, anciens peuples des Gaules dont parle		ibid. poisson y est en abondance, forces noix.	ibid.
Cesar: autres villes de Bourgongne.	ibid.	L'Auxerrois bons vignobles.	ibid.
Pays de Bresse, & Bourg sa ville principale.	ibid.	Prouince de Champagne, fertile en seigles &	
Duché de Bourgongne depuis quand demeure		foins.	ibid.
entre les mains des Roys de France.	ibid.	Brie tres-abondante, petit pays.	ibid.
De la Comté de Mâcon.	ibid.	Conserue de roses de Prouins fort exquisite.	ibid.
Du Parlement de Grenoble, qui comprend la		Prouince de Picardie, ses fleuves, est vn des gre-	
Prouince du Dauphiné, ses bornes.	ibid.	niers de Paris, le vin y manque.	ibid.
Ambrun ville Archiepiscopale, capitale du haut		Niurnois & ses fleuves, plein de belles prairies	
Dauphiné. Vienne Archiepiscopale Metropolitai-		& de bois & pasturages: a des mines d'argent & de	
ne du bas Dauphiné. La ville de Grenoble qui est		fer, & charbon de pierre.	ibid.
la capitale de toute la Prouince, est le siege de son		Berry grandement abundant en bois, terres &	
Parlement: autres villes du Dauphiné.	ibid.	vignes, fruits, cuirs & laines: les riuieres.	ibid.
Pays de Thiersues, Baronnie de Gapençois & de		Le Maine a force pasturages.	ibid.
Briançonnais en Dauphiné. Valentinois, Grasiuo-		Pays d'Anjou, bons vignobles, forests & bois, &	
den, Viennois. Comment ceste Prouince a esté ac-		prairies. 66. ses riuieres au nombre de 40. ardoise	
quise l'an 1340.	ibid.	qui en vient.	ibid.
Le Parlement d'Aix comprend la Prouence, ses		Prouince de Normandie, belles campagnes pres	
bornes: de la ville d'Aix, siege du Parlement, Ar-		de Rouen, celle de Rhommois.	ibid.
cheuesché & principale de Prouence.	ibid.	Territoire de Caen, où croissent des vins rares en	
autres villes de la Prouince.	ibid.	Normandie.	ibid.
Terre de Camarque pres d'Arles, abondante en		Vins d'Argences en Normandie, tres bons.	ibid.
bleds & pastis.	63	Normandie ne manque de rien. ibid. il y a forces	
Plaine de S. Chauar & autres, pleines d'oran-		bleds, chairs & laitages, & fruits en abondance.	
gers & citronniers, grenadiers, oliuiers & figuiers,		ibid. Citre & Peré de Normandie au deffaut du	
& de beaux vignobles. ibid. autres villes de Pro-		vin.	ibid.
uence.	ibid.	Terres en Picardie couuertes de sables.	ibid.
La sainte Baume, entre Aix & Marseille, re-		De la Prouince de Bretagne, abonde en bleds, en	
traicte de la Magdelaine.	ibid.	prez & pasturages, en forests & landes, mines de	
Comme la Comté de Prouence a esté vnée à la		fer, plomb, & quelques vnes d'argent, il y croist	
Couronne de France.	ibid.	peu de vin, mais ils y viennent de Poictou, Anjou	
Du Parlement de Bearn, de ses deux villes Epis-		& Bordeaux.	ibid.
copales, l'Escar & Oleron.	ibid.	Prouince de Poictou, pays bon & gras, riche en	
Du Parlement de Mets, des villes qu'il comprend.		bleds, vins, bois, laines, lins, & fruits.	ibid.
ibid.		Xaintonge riche en bleds & vins, & en fait grand	
Mets mis sous l'obeyssance des Roys de France.		trafic en France & Espagne.	ibid.
ibid. a esté iadis chef du Royaume d'Austrasie.	ibid.	Angoulmois ne luy cede rien en abondance de	
Du pays Meffin, & de ses lieux.	ibid.	toute sorte de biens, ses beaux iardinages, ses	
Des Isles qui appartiennent à la France, en la		chanures en abondance.	ibid.
mer Oceane Occidentale.	ibid.	Perigord est pays montueux & peu fertile, sinon	
De l'Isle de nostre Dame de Bouyn.	ibid.	en chataignes, dont le peuple tire profit.	ibid.
De l'Isle Dieu.	ibid.	Limousin est peu fertile en fourment, mais forces	

seigles, orges & panicles, forces chataignes, & des saues, quantité de vin au territoire de Limoges, mais verd, les viures y sont à prix honeste. 67

Auvergne haute abonde en pastis & seigles, & point de vin: la basse Auvergne abonde en bleds, vins & bois, prez, fontaines, lustran, mines d'argent. ibid.

Fontaine merueilleuse prez Clermont en Auvergne. ibid. forces baina d'eaux chaudes en Auvergne. ibid.

Bourbonnois & Forests, peu de froments, le pays estant sablonneux, d'assez bons vins y croissent, & du seigle en quantité. ibid. il y a forces bois. ibid.

Pays Mellin fertile & abondant en bleds, vins, chair, poisson, foin, sel & mines. ibid.

Bourgogne aupres de Dijon, produit peu de biens: Beaune assez bon pays pour la fertilité & bons vins. Territoire d'Autun fort maigre. Châlons, Mâcon & Tournon assez fertile en bons vins. ibid.

La Prouince du Dauphiné fertile en bleds, en les montagnes, mais presque tous seigles: forces pastis. ibid. peu de vins en ce pays. ibid.

Le Lyonnais est pays maigre, le long de la Saône le pays est bon, il y a quantité de vignes & prairies. ibid.

Prouence fort fertile en bleds, & forces oliues, oranges, citrons, & autres bons fruits. 68

La Prouince de Languedoc, terroir d'aupres Thoulouse le meilleur de France, tant en bleds que vins. ibid.

La Comté de Lauraguais abonde de tout ce qui se peut desirer au viure. 68

Le pays d'Albigeois afforty de toutes choses. ibid.

Pays de Viuzeretz produit vins excellens, & bleds à suffisance, legumes, chanures & fruits. ibid.

Montpellier & Nîmes bon terroir. ibid. y a quantité de vins, oliues.

Velay & Geuaudan, produisent seigles & legumes en abondance, leurs fourrages. ibid.

Pays de Rouergue aspre, & montaignat, peu fertile. 69

Pays de Quercy abonde en bleds, & en bons vins, quantité de bestail, charbon naturel, riuieres poissonneuses. ibid.

Fois a ses montaignes pleines de bons pastis, forces mineraux, mine de fer la meilleure de France, resine, tourmentine, poix, encens, lieges, lactage, marbres, iaspes, ardoises, lauasses, tuffes & grez: grands lacs, grands precipices, vallons fertiles pres Pamiers, belles fontaines, bons cheuaux. ibid.

Pays de Cominges de mesme qualité abonde en bleds, vins, fruits, huiles de noix, miel. ibid.

Pays d'Armagnac tres-fertile en aucuns lieux, force chataignes vers les landes. ibid.

Pays de Bigorre fertile en abondance dans les vallons en vignobles & froment, le haut pays est sec. ibid.

Pays de Bourdeaux est celebre en vins excellens, le vin de Graue y croist, autres vins excellens: pain de Potensac estimé. ibid.

Pays de Buch, fertile en pins resineux seruans de chandelle aux pauvres gens du pays. ibid.

Landes de Bourdeaux sablonneuses, & pleines de bruyeres, l'eau y est rare. ibid.

Chalosse aux bons vins blancs. ibid.

Terroir de Daix, fontaine d'eau salee, d'où se tire du sel alumineux, bains & mines de fer & de bitume. ibid.

Pays de Bayonne maigre, fertile en fruits pour faire du cidre. ibid.

Pays de Bearn, vins de Iurançon tres-bons, bains excellens de Caudes aiguës & de Cauderets, simples des meilleurs, quantité de mines, abondant en miel, bons pastis, cheures en quantité, rochers & bruyeres en abondance en ce pays. ibid.

Mœurs des anciens habitans de France. 70.

Longs cheueux des vieux Gaulois. ibid.

Rois de France ne se faisoient iamais tondre anciennement. ibid. se lauoient la teste avec chaux pour rendre leurs cheueux blonds. ibid.

Nobles se rasoient le poil des ioues. ibid.

Gaulois haïssoient ceux qui estoient gras. ibid. peines qu'ils prenoient aux lettres. ibid.

Eloquence des vieux Gaulois louable. ibid. estoient mesdisans & glorieux. ibid.

Dire notable des Gaulois, de Vercingetorix. ibid.

Religion des anciens Gaulois selon Cesar. ibid.

Mercuré iadis adoré des Gaulois, & autres Dieux. ibid.

Statuë de Mercure faicte par Xenodore en vne villed'Auvergne. ibid.

Diane d'Ephese auoit iadis vn Temple à Marseille. ibid.

Comment les vieux Gaulois adoroient leurs Dieux. ibid.

Hommes immolez anciennement parmy les Gaulois. ibid.

Gaulois passoient les nuits aux sepulchres des vaillans hommes. ibid. ils ne faisoient sacrifice sans appeller vn Druyde. 71

Bardes, anciens Poëtes des Gaulois. ibid.

Eubages parmy les Gaulois recheschans les plus hauts secrets de la nature. ibid.

Druydes appelez Magiciens par Plin. ibid.

Instruisoient la ieunesse, fort honorez parmy les Gaulois, tous debats se rapportoient à eux, iugeoient des crimes, & ordonnoient des peines, si quelqu'un mesprisoit leur ordonnance, ils luy defendoient de se trouuer aux sacrifices, & estoient tenus pour impies, & ne leur rendoit on iustice. ibid.

Druydes auoient vn chef qui auoit souueraine autorité sur eux, leurs assemblees annuelles au pays Chartrain, où ceux qui auoient procez alloient pour ouyr leur sentence: lieu où les dites assemblees se tenoient, est appellé Dieux par Cesar, n'alloient iamais à la guerre, non subiects aux impositions, vers enseignez par les Druydes à la ieunesse sans les elctre: tenoient les ames immortelles disans qu'elles passoient d'un corps en autre: disputoient des mœurs, & enseignoient la Philosophie naturelle: femmes des Druydes faisoient mesme profession qu'eux, à guy l'an neuf venu des Druydes, enuoyant du guy par leurs disciples à tous au commencement de l'année leur desirant heureuse. ibid.

Druydes estoient Philosophes Gaulois, desquels Pytagore a esté disciple, d'où sont venus ces Druydes, opinion commune: Druyde vaut autant à dire que Chelniers, & pourquoy ainsi appelez, leur premiere langue estoit la Grecque, ont appris aux

Grecs la langue Gauloise, à cause de quoy Grece est appelée *Gallagracia* : allusion du mot de Druides à celuy de cheine fort grande selon Plin. Druides vient du mot Hebreu *Drušin* ou *Drušin*, qui signifie speculateur, & recherchant les hauts secrets comme ils faisoient : leur autorité premiere & souveraine en Gaule sur le peuple : retenoient les Gaulois vaillans mesprisans la courte durée du corps. *ibid.*

Les Druides adoroient les faux Dieux des Payés Germains & Gaulois, n'adornoient que les Dieux qu'ils voyoient, dit Celsus. 72

Brennus ayant pris Rome, ne fit estat de Mars Capitolin. *ibid.*

Anciens Gaulois adoroient Iupiter par un haut cheine, dit Tyrius Maximus. *ibid.*

Celsus n'a jamais dit qu'on ait trouué des Temples des Idoles entre les Celtes Gaulois. *ibid.*

Druides Celtes adoroient le Cheine & y appendoient leurs despoüilles de guerre. Druides profanes alloient armez aux assemblées. Les femmes des Druides deliberoient de la paix & de la guerre. *ibid.*

Coustume des Anciens François & Druides Gaulois, de demander des nouvelles aux passans. *ibid.*

Gaulois anciens punissoient plustost la mort d'un estranger, que celle d'un du pays. *ibid.*

Chose remarquable incontinent publiee parmy eux. *ibid.*

Anciens Gaulois apprirent ceux de Marseille de clore leur ville & habitations de murailles. *ibidem.*

Estoient les plus prompts de la terre à s'exposer aux dangers, ne pouvoient jamais demeurer en repos. Ils ne se pouvoient commander : estoient grands amateurs de liberté. *ibid.*

Gaulois redoutables en Italie. Roys d'Asie & tous les autres estimoient les Gaulois pour leur courage. *ibid.*

Aristote dit qu'ils ne craignoient point le tremblement de terre. *ibid.*

Reponce que quelques Gaulois firent un iour à Alexandre, leur demandant ce qu'ils craignoient le plus. *ibid.* Tenoient toute fuite ignominieuse. *ibid.*

Forme des vieux Gaulois voulant faire la guerre. 73.

Armoient les enfans de 14. ans. Hommes de tous ages alloient à la guerre : auoient grand soin des viures de leurs armées. *ibid.*

Armes des vieux Gaulois, quelles. *ibid.* Legion de Celsus composée de Gaulois, appelée aloüette & pourquoy. *ibid.*

Leur forme de combattre, Cavalerie par eux plus estimée que l'Infanterie. *ibid.*

Cris espouventables qu'ils faisoient en guerre. *ibid.*

Ne combattoient par ruse ny embusches, mais en hommes francs & à guerre ouverte. *ibid.*

Ordonnances de leurs armées & soldats. *ibid.*

Ils immoloient les prisonniers de guerre à leurs Dieux, nyans obtenu victoire. *ibid.* & attachoient leurs tentes aux portes de leurs villes. *ibid.*

Deux sortes d'hommes en reputation entre les vieux Gaulois, les Druides & les Cheualiers. *ibid.*

Communauté des biens de leurs mariages. *ibid.*

Maris auoient puissance de mort sur leurs femmes & enfans. *ibid.*

Maisons des vieux Gaulois la pluspart aux forêts. *ibid.*

Habits des vieux Gaulois. 74.

Leur vaisselle estoit de terre sursemée de fleurs : mangeoient estendus contre terre sans s'asseoir, sur des peaux de loup & de chien : autres disent assis sur des liëts, & se faisoient servir par jeunes enfans. *ibid.*

Vignes nulles entre les anciens Gaulois, leurs vins venoient d'Italie & de Marseille. *ibid.* estoient fort coustumiers de nager & chasser : leurs funeraillies magnifiques. *ibid.* iettoient dans le feu tout ce que le defunct auoit plus aymé : personnes mesmes qui se iettoient au feu, lettres iettées sur le bucher : prestoient argent à condition de le rendre aux Enfers. *ibid.*

Mœurs des François Modernes.

Parisiens de naturel doux, aisez à esmonuoir, desireux d'argent, & entreprennent tout pour en auoir : estoient iadis niais, & pour ce appelez badauts par la France : aujourd'huy ils sont desmaisez & capables d'affiner les autres, ils sont desfiens à cause du nombre des affronteurs. *ibid.*

Les femmes de Paris veulent paroître, & bien vestues, mieux que leur condition ne porte : leurs maris s'efforcent de leur complaire : louables en ce que les plus belles & delicates, visitent les hospitalaux. *ibid.*

Parisiens curieux de nouveutez : ayment les passe-temps : ils soupçonnent ordinairement les estrangers, & se gardent d'eux. *ibid.* ne sortent de nuit de leurs logis quelque bruit qu'on face. 75. Payfans d'autour de Paris fort fiers : espuisent les passans tant qu'ils peuvent. *ibid.*

Mœurs & coustumes des peuples du pays Chartrain. *ibid.*

Naturel des Beauverons. *ibid.*

Des Citoyens de Blois & de Blaisois. *ibid.*

Des habitans Vendosmois. *ibid.*

Des peuples de Sens & du pays d'autour. *ibid.*

De ceux du pays de l'Auxerrois. *ibid.*

Des Champenois & Briois, des Picards, Tourangeaux, Manceaux. *ibid.*

Des Angevins & Poiteuins. 76.

Des Normands, Bretons, Angoumoisins, Perigordins. *ibid.*

Gentilshommes de Perigord sont de vrais miroirs de vertu. *ibid.*

Des Limosins, les Gentilshommes de ce pays sont ordinairement en querelle les uns avec les autres. 77.

Des Auvergnats, la Noblesse y est fort courtoise, Des Bourbonnois doux & gracieux. *ibid.*

De ceux du pays Bessin. Des Bourguignons, de ceux de Beaune, de ceux de Saumur. Ceux de Châlons. Du peuple Lionnois doux & gracieux. Du peuple de Forest. Des Daulphinois. Des Montagnards du Daulphiné. *ibid.* Des Prouençaux. 78.

Des peuples du Languedoc, des Tholosains nez aux lettres. *ibid.*

Ceux d'aupres Carcassonne, Beziers, Montpellier & Nismes : des habitans du Viuatetz, du Velay, du Geuaudan. 79.

Des habitans de Foix & du pays de Foix : du pays de Cominges, d'Armagnac, Bigorre. *ibid.*

Du naturel des Gascons. *ibid.*
 Du peuple de France en general. 80.
 De la noblesse de France tres-vaillante. *ibid.*
 Leurs visites frequentes entr'eux: se plaisent aux lettres des Gentils-hommes qui sont à la Cour. 81.
 Occupations ordinaires des Courtisans de France. *ibid.*
 Le Roy de France est familier, gracieux & affable. *ibid.*

Des forces de France. 87.

Royaume de France entre deux mers, assuré de toutes parts. 87
 La France jamais vaincue, sinon par les Anglois à cause de la diuision des François. *ibid.*
 Causes qui rendent aujourdhuy la France plus forte que jamais. *ibid.*
 France a deux sortes de gens de guerre, de mer, & par terre. *ibid.* nerf de la milice Françoisse consiste en gens de pied, mais sur tout en la Caualerie. *ibid.*
 Gendarmerie d'obligation est appelée arrierebâ. *ibid.*
 Les compagnies d'ordonnance du Roy de France. 88.
 Gens de pied se peuuent tirer en grand nombre de Gasconne, Viualetz, & des montagnes de Dauphiné, pour les meilleurs soldats. *ibid.*
 Les Roys de France ne se seruoient gueres anciennement d'infanterie, & pourquoy? *ibid.*
 Hommes de pied en petit nombre entretenus en France. *ibid.*
 Les compagnies de gens de pied de la garde du Roy de France. *ibid.*
 Regiments entretenus aux garnisons. 89
 Viures en quantité en France. *ibid.*
 La France quand Charles le Quint passa par icelle, auoit sur pied cent cinquante mille soldats. *ibid.*
 Sous Charles nombre de vingt mille cheuaux, & 30. mille pietons d'estrangers tous soldats pour luy, & le Roy auoit quinze mil cheuaux, & 100. mille hommes de pied tous François. *ibid.*
 Les Roys de France entretenoient anciennement 3500. lances, & 4500. Archers. *ibid.* il falloit treize cens mil escus tous les ans pour les payer. *ibid.*
 Ils furent reduits à leur perfection par le Roy Charles huitiesme, & leur establit paye & places frontieres du Royaume pour les loger. *ibid.*
 Artillerie de France faicte toute d'une sorte. *ibid.*
 Mesure des canons de France & de leurs fusts. *ibid.*
 François ont rauagé presque toute l'Italie. 90.
 Charlemagne avec les François subiugue la Saxe & la Baviere, & combattit en Espagne contre les Sarrazins, destruisit le Royaume des Lombards. *ibid.*
 L'entreprise de Hierusalem, rien de plus signalé faict par les François. *ibid.*
 Charles d'Anjou conquist la Sicile & le Royaume de Naples. *ibid.*
 Barbarie & Egypte ont esprouué les armes des François. *ibid.*
 La Grece & l'Asie obeyrent iadis aux armes des François. *ibid.*

Charles VIII. occupa l'Italie en peu de temps. *ibid.*
 Vingt millions d'ames en France par le denombrement, faict au temps de Charles neuuiesme. *ibid.*
 Places fortes en grand nombre en France. *ibid.* la cause des fortresses de France.
 Estat de France a esté autresfois Democratique, & maintenant est Monarchique. 95.
 Le Roy de France a toute puissance de faire guerre & paix, & faire alliance avec les Princes ses voisins. *ibid.*
 Fils aîné du Roy de France doit porter le nom de Dauphin. *ibid.*
 Aileu successeur de l'Empire s'appelle Roy des Romains. *ibid.*
 Autorité des Reynes de France ont ressort & grands iours en leurs terres, tant de leurs domaines que de leurs doüaires. *ibid.*
 La mere du Roy regnant, si elle n'est Roïne de France est precedée par la Roïne regnante. *ibid.*
 Dons des Roys aux Roynes, leurs espouses, ce que valent. *ibid.*
 Officiers domestiques des Roynes & meres de Roys ont pareils priuileges que ceux des Roys. *ibid.*
 Roïne veufue appelée communement Roïne blanche. *ibid.*
 Sacre & couronnement des Rois de France, avec quelles ceremonies se font, coustumes anciennes obseruées aux couronnemens des Roys de France. *ibid.*
 Sainte Ampoule de S. Remy de Rheims enuoyee du Ciel pour le Sacre du Roy Clouis, & depuis pour les Roys de France ses successeurs. *ibid.*
 Serment faict par les Roys de France en leur Sacre. *ibid.*
 Regence en France ordonnée pendant la minorité des Roys. 96.
 Fils de la maison de France, partageoient iadis par esgales portions, sans aucun droit d'aînesse. *ibid.*
 Troisieme lignée des Roys de France a reietté les bastards de la Couronne non seulement, mais aussi de l'adueu & surnom de France. *ibid.*
 Filles de France n'heritent qu'en meubles & acquets, selon la loy Salique, & sont exclues de la Couronne par coustume & loy particuliere de la maison de France, & sur quoy fondée. *ibid.*
 Des Duchez & Comtez, Pairies simples & particulieres réunies à la Couronne de France. 97.
 Bourgogne venue à Clouis par la femme Clotilde fille de Gundebaut Roy de Bourgogne, sa réunion. *ibid.*
 Diuision de la Bourgogne en Duché & Comté. Duché au Roy de France, le Comté à l'Empereur. *ibid.*
 Normandie erigee en Duché & Pairie par Charles le simple, le pays a esté possédé par des Ducs particuliers, iusques à Philippe Auguste, possédée des Anglois, sa réunion. *ibid.*
 Guyenne Duché erigee par Charles le chauue, occupée long-temps par l'Anglois, sa réunion à la Couronne. *ibid.*
 Bretagne Duché & Pairie, erigee par Philippe le Bel, & réunie à la Couronne par François premier. *ibid.*

Orleans Duché & Pairie, pour en appanager le premier fils de France, apres l'aîné & le Dauphin. *ibid.*

Alençon Duché & Pairie possedee par Seigneurs particuliers iusques à Helie, sœur & heritiere de Robert d'Alençon. *ibid.*

Anjou Duché & Pairie erigee par Philippes le Bel, pour son frere Charles de France Comte de Valois, &c. *ibid.*

Auvergne Duché & Pairie, possedee par des Comtes particuliers. *ibid.*

Nemours Duché & Pairie, erigée par le Roy Charles 6. pour Charles second Roy de Navarre. *ibid.*

Angoulesme Duché & Pairie a changé de maistres, des Comtes particuliers en ont iouy, puis vint à Philippes le Bel. *ibid.*

Chastelleraut Duché & Pairie, erigée par François premier, en faueur de François de Bourbon. *ibid.*

Comtez & Pairies réunies à la Couronne. 99.

Poitou Comté & Pairie, confisqué sur l'Anglois par Philippe Auguste. *ibid.*

La Marche Comté & Pairie. *ibid.*

Eureux Comté & Pairie. *ibid.*

Artois Comté & Pairie. *ibid.*

Mascon Comté & Pairie. *ibid.*

Foix Comté & Pairie. *ibid.*

Beaumont le Roger, Comté & Pairie. *ibid.*

Des Duchez simples réunies à la Couronne de France. ibid.

De la Duché de Berry. *ibid.*

De la Duché de Touraine. *ibid.*

De la Duché de Soissons. *ibid.*

De la Duché de Chartres. *ibid.*

De la Duché d'Estampes. *ibid.*

De la Duché de Vallois. *ibid.*

De la Duché de Beaumont le Vicomte. *ibid.*

De la Duché de Montargis. *ibid.*

Des Duchez simples & particuliers. ibid.

De la Duché de Longueville. *ibid.*

Duché de Tonneville. *ibid.*

Duché de Chevreuse. *ibid.*

Duché d'Albret. *ibid.*

Duché de Roussans. *ibid.*

Duché de Beaupreau. *ibid.*

Duché de Boissy. *ibid.*

Duché de Chasteau Thierry, Chastillon sur Marne, & Espernay. *ibid.*

Duché d'Eureux. *ibid.*

Duché de Brienne. *ibid.*

Duché de Croüy. *ibid.*

Duché de Bar le Duc. *ibid.*

Des Douze anciens Pairs de France. ibid.

Fable de tirer l'origine des Pairs de France de Charlemagne. *ibid.*

Remarque qui semble favoriser cet établissement. *ibid.*

Royaume de France iadis diuisé en sept grandes & principales Prouinces, & en plusieurs moindres quelles sont. *ibid.*

Seigneurs commandans ces sept grandes Prouin-

ces en disoient Princes. *ibid.*

Comtes de Champagne ont succédé au lieu & degré que le Comte Hebert tenoit entre les Princes de son temps. *ibid.*

Princes Primats en France, quels. *ibid.*

Sçavoir ceux qui tenoient les grâds fiefs Royaux. *ibid.*

Pairs de France selon aucuns venus des grands Princes appelez Primats de France. *ibid.*

Pairs tirez des Patrices de Constantinople, selon l'opinion des sieurs Pasquier & Loyfel. *ibid.*

Ducs d'Orleans, d'Anjou, de Chartres, ny de Tours, non iamais mis au rang des Pairs, coniecture de Vignier. *ibid.*

Ces opinions improuuees par Monsieur Pythou. *ibid.*

Origine des Pairs de France, tirée de l'usage commun des fiefs, & sont appelez, *Pares Curia aut domus regia.*

Barons tenans fiefs Royaux, comme Duchez, Comtez mouuans du Roy, à cause de la couronne, se peuvent dire Pairs du Royaume. *ibid.*

Duc de Bourgogne, pourquoy premier Pair, raison de Vignier. *ibid.*

Duché de Bourgogne réuni à la Couronne par reuerfion, par la mort du Duc Charles. *ibid.*

Duché de Normandie, retourné par reuerfion à la couronne, & confisqué sur les rebelles Anglois. *ibid.*

Autres Pairies anciennes comment réunies à la couronne. *ibid.*

Des Pairs Ecclesiastiques de France.

De l'Election des Duchez & Pairies qui subsistent aujourdhuy en France.

Terre erigee en Chastellenie, ce qu'elle doit auoir d'ancienneté. *ibid.*

Baronnie de quoy composee. *ibid.*

Comté ce qu'elle doit auoir. *ibid.*

Marquisat ce qu'il doit auoir. *ibid.*

Edict du Roy Henry III. concernant ce qu'il faut qu'un Duc aye de rente annuelle pour estre Duc & Pair de France. *ibid.*

Des Officiers de la Couronne & Maison de France.

De la charge de grand Maistre de France, & son autorité sur tous les officiers de la Maison du Roy. *ibid.*

Estat du grand Chambellan de France, est comme chef de la chambre du Roy. *ibid.*

Du premier Gentilhomme de la chambre du Roy & sa charge. *ibid.*

Du grand Escuyer de France, qui a charge sur toutes les Escuries du Roy, & a commandement sur les Gentilshommes commis sur l'Escurie, sur les Escuyers, pages, chevaucheurs, & piqueurs qui y sont: porte l'espée Royale semée de fleurs de lys en toutes les ceremonies solennelles. *ibid.*

Du controolleur general des postes de France. *ibid.*

Du grand Veneur de France, sa charge & puissance. *ibid.*

Du grand Fauconnier sa charge & pouuoir. *ibid.*

Des Maîtres d'Hostel de la maison du Roy leur charge.	ibid.	Parlement sedentaire à Paris donné par Philippe le Bel.	ibid.
Quelle estoit leur charge anciennement.	ibid.	Palais donné pour la sceanse du Parlement de Paris.	ibid.
Du grand Panetier de France & sa charge.	ibid.	Parlement de Paris transféré à Poitiers, pendant que l'Anglois tenoit Paris.	121.
Du grand Elchanon & sa charge.	ibid.	Etablissement de la chambre des Enquestes.	ibid.
Du grand Preuost de l'Hostel, & de l'estenduë de son pouuoir.	ibid.	Chambre des Requestes du Palais.	ibid. diuisee en deux chambres, grande & petite. 121. puis encores deux autres iulques à quatre.
Des gardes du Roy, rât de la personne & du corps de la Majesté, que de son Louure & Chasteau, diuisees en 3. compagnies.	ibid.	Chambre de la Tournelle erigee par le Roy François I.	ibid.
Regiment des gardes Françoises du Roy sous son Maître de Camp.	ibid.	Pourquoy appellée chambre de la Tournelle.	ibid.
Office du Chancelier de France, chef de la iustice.	118	Chambre des Vacations establie par le Roy François I.	ibid.
Offices du Garde des Sceaux.	ibid.	Le Parlement semestre par Edict d'Henry II. fait à Compiègne.	ibid. reuocqué par autre Edict l'an 1557.
Secretaires de la Maison & couronne de France.	ibid.	Parlement de combien de testes composé.	ibid.
Des quatre Secretaires d'Estat.	ibid.	Chambre de l'Edict establie par le Roy Henry 3.	122.
Secrétaire du cabinet du Roy & sa charge.	ibid.	Authorité grande du Parlement.	ibid.
Conseil priué de la maison du Roy.	ibid.	Matières des combats se vuidoient iadis au Parlement.	ibid.
Grand Conseil du Roy.	ibid.	Opinion & estime du Parlement de Paris, & Cour des Pairs entre les estrangers, dont les Princes se venoient soumettre à son iugement.	ibid.
Princes du sang & autres grands personnages qui assistent au Priué Conseil du Roy: on y traite des affaires tant de paix que de guerre.	ibid.	beaux exemples de cela.	ibid.
Gens du grand Conseil du Roy où assistent, le Chancelier, huit Maîtres des Requestes de l'Hostel du Roy, 17. Conseillers, 2. Secretaires, vn Aduocat, & Procureur du Roy.	ibid.	Personnes du Parlement iadis choisies de nos Roys, par merite & capacité.	123.
Maîtres des Requestes du Roy, sont les assesseurs du Chancelier.	ibid.	De la chambre des comptes establie à Paris, pour le fait des comptes des finances.	ibid. officiers, Maîtres des comptes & autres iuges d'icelle.
De l'Estat du Connestable de France, son commandement sur toute la gendarmerie du Royaume, rât de pied que de cheual: est general des armées qui se leuent en France.	ibid.	ibid.	
Ce qui est de sa qualité & puissance.	ibid. officiers Royaux qui dependent de luy.	Archeuesque ou Euesque iadis I. President de la chambre des comptes.	ibid.
Des Mareschaux de France qui ne peuuent estre demis de leurs charges.	ibid. ce qu'il leur appartient & leur iurisdiction.	Grand Bouteillier de France estoit anciennement l'un des Presidents de la chambre des comptes.	ibid.
De l'Admiral de France qui est chef general de la mer.	ibid.	Ils sont iuges souverains iugeans en dernier ressort.	ibid.
Son pouuoir & les choses dont il doit auoir connoissance.	ibid.	Son autorité. Nombre des officiers de la chambre des comptes.	ibid.
Des Lieutenans Generaux des armées de France, qui tiennent la place du Roy, & ont pareille autorité que le Roy.	ibid.	Correcteurs, Auditeurs, & Greffiers de la chambre des comptes: Procureur du Roy en icelle. Huissier de ladite chambre.	ibid.
Des gouverneurs des Prouinces, le pouuoir qu'ils auoient iadis, & de celuy qu'ils ont maintenant.	ibid.	Messagers de la chambre des comptes au nombre de 18. s'appellent Huissiers, & sont aujour d'huy 24.	124.
Des ordres des Cheualiers de l'Estoille, de S. Michel, & de celuy du S. Esprit.	ibid.	Chambre du tresor au Palais, pourquoy ainsi appellée.	ibid.
Parlement de France est l'un des plus anciens établissements du Royaume, portoit iadis le nom d'Estats ou d'assemblée de notables, qui se conuoquoient de 3. ans en 3. ans, en tel lieu qu'il plaisoit au Roy.	120.	De la Cour des Aydes, & de son institution, pour le fait des deniers des Aydes, subides & imposts.	ibid.
Tenir le Parlemēt en France anciennement estoit comme en Angleterre, assembler les Estats du Royaume.	ibid.	Nombre de ses officiers.	ibid.
Premieres assemblees du Parlement se renoient iadis quelquesfois en pleine campagne, en la premiere lignée de nos Roys: prouues de cela en l'Histoire.	ibid.	De la Cour des Monnoyes, & de ses officiers.	ibid.
Affaires de iustice & d'Estat, se traitoient indifferemment es assemblees du Parlement, & sur tout; les matieres beneficiales Ecclesiastiques & de police.	ibid.	Des Baillages despendans du ressort du Parlemēt de Paris: ville de Laon premier bailliage dudit Parlement.	ibid.
Assemblees de champ appelez iadis Parlements ambulatoires.	ibid.	Du siege Presidial du Chastelet de Paris, composé de vingt-quatre Conseillers, à ce siege ressortissent le siege de la Preuosté & Vicomté de Paris, la conservation des Priuileges Royaux de l'Vniuersité de Paris, & autres ressorts qui en dependent.	ibid.

Les

Les Officiers du Chastelet de Paris, sont trois Lieutenans, civil, criminel, & particulier, le conservateur des Privileges : les gens du Roy, Procureur, & Aduocat, les juges, Auditeurs, les greffiers, tant civil que criminel : les Commissaires de la ville, & pour le service dudit Chastelet : il y a bon nombre de sergens tant à cheval qu'à verge : le Chastelet a charge du fait de la police des marchandes de bouche. *ibid.*

Chambre nouvelle & chambre du domaine. *ibid.*

Chambre des Requestes de l'Hostel du Roy. *ibid.*

Chambre des Maîtres des eaux & forests. *ibid.*

La jurisdiction des Esleus.

Le siege de l'Admirauté à la table de Marbre. *ibid.*

La grande Paneterie de France. *ibid.*

Le bailliage du Palais. *ibid.*

Des sous-bailliages du Chastelet de Paris. *ibid.*

Sieges de iustice principaux sous le Parlement de Paris. *ibid.*

Et le nombre des Officiers qui y sont. *ibid.* & 126.

Bailliages & sieges de Normandie sous le Parlement de Rouen, les officiers dudit Parlement & leur nombre. 127

La Cour des Aydes de Rouen, & le nombre de ses officiers. *ibid.*

Presidiaux de Normandie sous le Parlement de Rouen. *ibid.*

Parlement de Thoulouse avec les Bailliages & Seneschauſſees qui en dependent. *ibid.*

Sieges du Seneschal de Quercy. *ibid.*

Presidial de Montpellier, Cour des Aydes & chambre des Comptes. *ibid.* 4. sieges qui en dependent. *ibid.*

Sieges de iustice du Parlement de Bourdeaux. *ibid.*

Sieges de iustice du Parlement de Bourgongne. *ibid.*

Sieges de iustice du Parlement de Bretagne. 128

Sieges de iustice du Parlement de Dauphiné, scât à Grenoble. *ibid.*

Siege de iustice du Parlement de Prouence. *ibid.*

Religion de France. ibid.

S. Luc, selon que dit S. Epiphane, a presché la foy Chrestienne en France. *ibid.*

Disciples de nostre Seigneur & des Apostres ont planté la foy en France. *ibid.*

Temps de la conuersion à la foy Chrestienne du Royaume de France. *ibid.*

Dioceses contenus au Royaume de France. *ibid.*

Nombre des Dioceses, Archeueschez & Eueschez avec le nombre de leurs clochers & Parroisses. *ibi.* & 129.

Religion diuisee en France : la Religion Catholique Apostolique & Romaine : & la Religion Pretendue reformée de Calvin : Calvinistes supportez en France, sous les benefices des Edicts. 130.

Catalogue des Roys de France. 130. & 131

De pays souverain de Bearn. 132.

Description du pays de Bearn, & ses villes principales. *ibid.*

Etat de la Monarchie d'Espagne.

Le Roy d'Espagne grand terrien & ce qu'il possede par le monde. 139. ce qu'il possede en Italie, Estat de Milan, des Isles de Minorque & Maiorque, d'Euse, de Sicile & Sardaigne. *ibid.* ce qu'il possede en Afrique, sçauoir le meilleur port appelé du pays, Marzalcabi, ou grand port & autres places. *ibid.*

Isles de Canaries au nombre de 12. sous la domination d'Espagne : ce qu'il y tient encore à cause de la couronne de Portugal, Serpe & Tanger en Afrique, qui sont les clefs du destroiët de la mer Mediterranee, & de l'Ocean Athlantique. *ibid.* il a eu encore à cause du Portugal les Isles Azores, celle de Tercere & S. Michel, sainte Marie, Isle du Pic, & S. George. *ibid.*

Il tient aussi le S. port & l'Isle de Madere : les 7. Isles du Cap verd, l'Isle de S. Thomas : il possede toute la coste d'Afrique, depuis Aguerre iusques à celui de Guadarfu. *ibid.*

Ce que tient le Roy d'Espagne en Asie, il tient Ormus, Diu, Goa, & Malaca, 140. quelques fortresses aux Royaumes de Cananor & de Cochin.

Il tient aussi la coste depuis Daman iusques à la ville de Melipour : l'Isle de Manar & le port de Colombar en l'Isle de Zeilan : les 40. Isles Philippines. *ibid.*

Nouveau appartenant au Roy d'Espagne : est diuise en Isles & terres fermes. Isles de la mer du Nord sont infinies en nombre : Isles de Lucayes en nombre de 400. cës, Borichen fort grâde, Iraique, la Cube, l'Espagnole. *ibid.*

Le Roy encore possede en terre ferme tout ce qui costoye la Floride, la nouvelle Espagne & le Iucatan, & toute la Presqu'Isle Meridionale, iusques au cap de Californie : voire iusques à Quiuere. *ibid.*

Il possede la partie du Peru, qui est entre la riuier de la Plata & Maragnon : & commence à Panama, & cecy s'appelle Bretil : il tient encore le Peru & le Royaume de Mexique. *ibid.*

Bornes du Royaume d'Espagne. *ibid.*

Fontarabie en la Prouince de Guipuscao. *ibid.*

Monts Pyrenées ne sont estendus de droit fil autour de l'Espagne. *ibi.*

De l'estendue de l'Espagne, est de 275. lieues. *ibid.*

Et tout son circuit six cents & yingrs lieues Espagnoles, dont chacune fait quatre milles d'Italie. *ibid.*

Romains ont iadis diuise l'Espagne en Citerieure & Vlterieure : puis diuisee en trois Prouinces, Betique, Taraconoise & Lusitanie, par les mesmes Romains, qui y etablirent 14. iurisdiccions. *ibid.*

Espagne auioz d'huy diuisee en 3. Gouuernemens ou Royaumes, sçauoir Aragon, Castille, & Portugal. *ibid.*

Royaume d'Aragon, & les pays qu'il comprend. 141.

Royaume de Castille, & les pays qu'il comprend. *ibid.*

Le Portugal, & ce qu'il comprend. *ibid.*

Perpignan au Comté de Rossillon, engagée par Jean d'Arragon pour beaucoup de milliers d'escus aux François *ibid.* & puis rendue au Roy d'Espagne par le Roy Charles 8. *ibid.*

Comté de Rossillon s'estend entre les mōts Pyrénées, dont l'un va à Saltes, l'autre à Colibre. *ibid.*

Barcelone ville capitale de Catalogne. *ibid.* places de Catalogne. *ibid.*

Là est le lieu de Mont-serrat, mont de deuotion incroyable, où les milliers de Pelerins arriuent pour prier la Vierge tous les iours, & y a 12. hermitages, où les hermites prient nuit & iour pour les Confreres & Pelerins de nostre Dame de Mont-serrat. *ibid.*

Du Royaume d'Arragon, ses bornes, places, & villes d'iceluy. *ibid.*

De la ville de Sarragosse capitale d'Arragon. *ibid.*

Du Royaume de Valence, ses bornes & limites, ses villes principales: ses fleuves, de son port nommé Alicant. *ibid.*

Du Royaume de Murcia, ses limites, est pauvrement peuplé, Murcie ville capitale: port de Cartagena le meilleur d'Espagne sur la mer Méditerranée. Dire d'André d'Orta touchant les 3. ports assurez d'Espagne. *ibi.*

Du Royaume de Grenade, fort habité du temps des Mores: est fertile en toute sorte de biens, ce pays à present est de peu de rapport, l'agriculture y est fort peu exercée. *142.*

De la ville de Grenade, semblable à vne Grenade ouuerte, diuisée en quatre parties différentes. Marchands & Gentilshommes du Royaume habitent en la ville de Grenade: Eglise de Grenade d'admirable architecture. *ibid.*

Du lieu nommé Alcazar petite ville ayant dix portes. *ibid.*

Alhambra Palais des Roys Mores, beau lieu pour la multitude de ses fontaines: son assiette merueilleuse, circuit de la ville de Grenade, ses murailles & tours en grand nombre. *ibid.*

Gadix ville de Grenade: autres villes de ce même Royaume; lieux maritimes d'iceluy, grand nombre de villages pres la ville de Malaga: ce Royaume fut conquis par Ferdinand Roy d'Arragon & de Castille l'an 490. *ibid.*

De l'Andalousie comment s'estend. *ibid.*

Du destroiët de Gilbratar. *ibid.* sa largeur, son flux & reflux de mer; appellé destroiët d'Hercules par les Grecs, & pourquoy: ce destroiët appellé Gadi-tan par les Latins, nom de Gilbratar luy est donné par les Mores, & pourquoy? *ibid.*

De l'Isle de Caliz appellée Gades des Latins, ville en icelle fort renommée du temps des Romains. *ibid.*

Neceddoit à aucune ville de l'Empire, ny en grandeur, ny en magnificence, ny en nombre d'habitans, y estoient quelquesfois cinq cents Cheualiers Romains, ruinée par les Maures: Seuille luy faict dommage pour le trafic de la mer. *ibid.*

Du port nommé, Porto-Real. *ibid.*

Porte de sainte Marie. *ibid.*

Port de saint Lucar où les nauires s'arrestent. *ibid.*

De la ville de Seuille, son grand circuit, sa quantité grande d'Eglises & Monasteres, de ses belles

rues & grandes places: 20. mille villages ou hameaux autour Seuille quand le grand Ferdinand la prit. 200. places fermées pres Seuille à present. *ibi.*

Riuere de Gualdaquiper fait port a Seuille: les eaux propres à la teinture des draps, & à rendre belles les personnes. Triane fort agreable nêbre de Seuille: les bleds y sont meulz en Avril ainsi qu'en Egypte: Seuille propre à demeurer en temps d'Este, & Burgos en Hyuer. *143*

Autres villes d'Andalousie, de la ville de Cordoue, de grand circuit, mais pleine de iardins: force chasteaux, & places pres d'icelle. *ibid.*

Jaën ville remarquable qui a merité que les Roys d'Espagne s'en disent Seigneurs. *ibid.* places de son Diocèse. *ibid.*

Marcechene lieu sur les côfins de Grenade & Andalousie. *ibid.*

Almaden tout aupres où a esté institué l'ordre de l'Alcantara. *ibid.*

De l'Estremadure, Royaume, ses villes principales Badajos, & de Meride. Guadiane riuere de ce pais coule 15. lieues sous terre: Merelin lieu renommé pour la naissance de Ferdinand Cortez qui conquesta le Mexico: en ce pays est la nostre Dame de Guadalupe, lieu fort fréquenté. *ibid.*

Des 2. Royaumes de Castille nouvelle & vieille: nouvelle pays plain: sa ville capitale est Tolède, & de la vieille Burgos.

La ville de Tolède est grande, haute & basse, son circuit est entouré de montagnes, a 13. quartiers, & 17. places, entourné du fleuve Tage de 4. costez.

La ville de Madrid, sejour Royal des Roys d'Espagne, du costé du Nord de Tolède. *ibid.*

Guadiane cité royale: Couque & Ocagne renommées pour les gands qui s'y font. *ibid.*

Cheualiers Espagnols de Guadiane & d'Alcantara. *ibid.*

Burgos capitale de la vieille Castille, ville ancienne, son Eglise Cathedrale taicté avec grand artifice: iours courts en Burgos, & pourquoy? Crucifix fait par Nicodeme gardé en cette Eglise: conuent de Religieuses, dictes Vulgues dans Burgos. *ibid.* cette ville debat de primauté avec celle de Tolède: comme le Roy Ferdinand les contenta tous deux. *ibid.*

Salamanque ville celebre pour son Vniuersité. *ibi.* Medina del Campo ville fort riche. *ibid.*

Zamore & Valladolid ville des plus belles & agreables d'Espagne: pleine de palais magnifiques, grand nombre d'Orfebures qui y sont. *ibid.* elle s'est accreue pour le sejour que les Roys d'Espagne y ont fait. *144*

Des villes d'Auila, Segouie, Signende, & autres villes au Leuant de Salamanque. *ibid.*

De la ville de Sorie appellée des anciens Numance, qui a fait beaucoup de mal aux Romains. *ibid.*

Ville de Leon capitale du Royaume de ce nom: là demurerent les Roys d'Espagne apres la conqueste de l'Espagne par les Mores. *ibid.*

Mores contraincts de retourner en Afrique par les Roys & Gentilshommes d'Espagne. *ibid.*

Du Royaume de Galice, pays renommé pour le corps de S. Iacques le grand protecteur d'Espagne. *ibid.* étant en la ville de Compostelle. *ibid.*

Cheualiers de S. Iacques en Espagne instituez par Alphonse 9. *ibid.*

Couronne port de Galice tres-bon: autres lieux

de Galice. *ibid.*

Asturie & son estendue, sa ville principale Oviedo, où se sauverent les Gots. *ibid.*

La Biscaye, ses bornes, ses places, S. Andié, avec un bon port. Laredo ayant un autre bon port, a aussi un port fort capable: Bilbao ville capitale de la Biscaye. *ibid.*

De Guipuscoa, ses bornes, separe la France d'avec l'Espagne: ses places, Devia, Oria, saint Sebastien: sa ville capitale, Fontarabie, le Passage, & Tolosette. *ibid.*

Le Royaume de Navarre, son assiette. Pampelune sa ville capitale: autres places, comme Seale, Turrelle, Lagrogne, & Calatort: appartient de droit au Roy de France, d'où proceda le mal & la perte de ce Royaume de Navarre. *ibid.*

Espagne n'est cultivée en beaucoup de lieux. 145. est fort pierreuse. *ibid.* est abondante en tout ce qui est necessaire à l'homme en plusieurs lieux: n'est pas tant molestée des vents que la France, & l'air n'est infecté de brouillards: l'or, l'argent: & le bon fer en abondance en Espagne plus qu'en autre lieu: sable d'or aux fleuves, & sur tous au fleuve du Tage. *ibid.*

Fragmens du pur or, trouvez iadis en Espagne, de la quantité de demie liure. *ibid.*

Fontaines chaudes & froides en Espagne, qui ont vertu admirable pour diuerses maladies. *ibid.*

Betail en abondance en Espagne: bestes privées & sauvages en grande quantité. *ibid.*

Chevaux d'Espagne fort estimez, sont douces de grande vitesse. *ibid.* n'a guiere de bestes nuisibles: les Espagnols ont abondance de poisson: l'air y est bon: oliues, oranges, citrons en abondance en Espagne: la chair est de fort bon goust. *ibid.* Tons s'engraissent du gland qui tombe des chesnes dans la mer, vers Gibraltar. *ibid.*

Poisson long de 40. brasses, & large de 15. pieds, jetté en la coste de Penice en Portugal, dit le Pere Grenade. *ibid.*

Veau marin en la place de Valence, long de cent pieds, Babines de Biscaye dont on tire 100. bottes d'huile. *ibid.*

Terre d'Espagne abonde de poix, escarlatte, de ioue, lin, chanvre, vis argent, saumon, de pierre, tourmentine, & d'alun. *ibid.*

Airain des Monts Marins d'Espagne, dont Plin fait estat. *ibid.*

Catalogne toute sterile, & plus fertile en fruits qu'en grains, plus d'arbres sauvages que de bonnes plantes. *ibid.* près de Vich pays aspre & desert: près de Tortose terroir fertile. *ibid.*

En Aragon on marche des iournees entieres sans trouver un habitant, les vallees portent fruits & grain. Caladiud bon air, pays de bñ rapport, beaux iardins & lieux peulez. 146

Valence, son air temperé plus que l'Espagne, son terroir plein de iardins, riz, sucres, grains, fruits y sont en abondance. *ibid.* ses rivières: mines d'argent à Curial: d'or à Loder, de fer à Finistrat & à labée, d'albâtre à Piacent, d'alun, de chaux & de plâtre en diuers lieux. *ibid.*

Murcia par qui deliurée des Mores: quand il reçut la foy Catholique: fidelle à ses Roys, fort peulee: son circuit: sa situation. *ibid.*

Cité de l'Orcin luy appartient. *ibid.*

Cartagene bonne ville & bon port. *ibid.*

Magistrats & officiers de iustice en la ville de

Murcia, sa belle police sur la marchandise. *ibid.*

Ce que l'on fait à Murcia pour traicter un larron, belle ceremonie. *ibid.*

Officiers de iustice, de Lorca & Cartagene. *ibid.*

Chancellerie Royale à Grenade, où vont par appel ceux de Murcia. *ibid.*

Gouverneur de Murcia obligé d'aller à Cartagene avec les gens de l'armée la coste des Mores. *ibid.*

Pays entre Murcia & Cartagene, desert & despeuple, coste d'Orca fort peulee: places dependantes du gouvernement de Murcia. *ibid.*

Fruits en abondance du territoire de Murcia, citrons gros come grosses citrouilles qui y croissent. *ibid.*

Grenade terroir plus fertile d'Espagne. *ibid.*

Mores disoient que le Paradis estoit au dessus de Grenade. *ibid.* son chateau admirable pour les Tours. *ibid.* belles citernes à Grenade. *ibid.* fort peulee, a deux mille fontaines d'eau. 147

Bains d'Alhama fort bons aux fains & aux malades. *ibid.*

Andalusie surpassé toute l'Espagne en fruits & grains: appellé le grenier, la cave & l'Ecurie d'Espagne: pays fort abondant en grües. *ibid.*

Cordoue terroir de gräd rapport, y a force beaux iardins. *ibid.*

Mine de vis argent pres d'Almadén, & sa qualité. *ibid.*

Genets d'Espagne les plus beaux, nez aux courtois de Marchene. *ibid.*

Etiennadue pays excessivement chaud en Eire. *ibid.*

Bons pasturages en son territoire. *ibid.*

Nouvelle Castille abondante en grains, *ibid.* la vieille Castille en bestail.

Madrid seise en bon air, a la commodité des bois propres pour la challe. *ibid.*

Valladolid terroir fertile en grains, chairs, vins, & fruits. *ibid.*

Galice pays aspre, bons vins près d'Orens. *ibid.*

Asturie de mesme qualité que Galice. *ibid.*

Biscaye a fort peu de vins: pommiers plantez en icelle au lieu de vignes: poisson en grande quantité en la mer: pain excellent pres Bilbao: riviere de Tholosette abonde en saumons & en truites. *ibid.*

Mœurs des anciens Espagnols. *ibid.*

Firmique dit que la nation d'Espagne est pleine d'arrogance: Vopisque dit qu'elle est pleine de ruses, sans repos, desirée de nouveautez. *ibid.*

Espagnols estoient iadis de robes courtes & noires. *ibid.*

Lavent leurs corps & leurs dents avec vrine: femmes s'exercent à l'agriculture: seruoient leurs maris couchez au lit, elles estant accouchées: faisoient leur breuvage de miel: sont abstinentes & sobres: leur forme de combat en guerre pratiquée par eux anciennement: leurs armes diuerses: meres racontent à leurs fils allans en guerre les beaux faits de leurs peres: habits qu'ils portoient en guerre: colonies aux sepulchres des morts, autant qu'ils avoient tuez d'ennemis: passoient les rivières à la nage: cruels aux ennemis: courtois aux estrangers, plusieurs d'eux ne vouloient surmuer leurs Roys: aymoient leur liberté: meres tueient

leurs enfans en la guerre Cantabrique, leur courage loüé par Iustin : Cesar auoit des Espagnols pour les gardes, s'empoisonnoient leur arriuant chose contre leur gré : faisoient manger les morts aux Vautours. *ibid.*

Mœurs des Espagnols de ce temps. 149.

Sont chauds & secs de nature : sont de couleur brune : couleur blanche & rouge vîrée des femmes Espagnoles : les Espagnols ont les membres durs : sont superstitieux, leurs ceremonies, flatteries, & de leurs tiltres superbes, nez à dissimuler, leur grauité avec feuerité affectée : femmes ne boient vin : les Damoiselles ne sortent point de leur logis, qu'avec grâde bande de valets & chambrières : sont sobres chez eux, & gourmands ailleurs : peu courtois aux estrangers : meurtres & larcins rares en Espagne par le grand soin des Magistrats. *ibid.* nul ne demeure impuny ayant failly contre les loix : leurs discours en guerre contre leurs ennemis. *ibid.*

Faim, fatigue, travail, veilles, & necessitez, se supportent par les Espagnols estans campez, ont plus d'art que de furie quand ils viennent à combattre : suivent leurs ennemis aisement à cause de la legereté de leurs armes. Liures Espagnols en quantité en France : ils ayment le repos, & se fondent tousiours sur les apparences, vantent ce qui leur touche : recognoissent tost leur aduantage : courent leur foiblesse par grand artifice : se battent mieux à pied qu'à cheval : ont des chevaux bons par excellence, s'aydent mieux de l'arquebuse que d'autres armes, leur grande reuerence à l'Eglise & choses sacrées, deuenient amoureux en leur vieil aage. Habitans rudes & sauvages pres de Vich en Catalogne : habitans fort ciuilez à Saragosse en Aragon : habitans de Valence peu estiment des autres pour estre comblez de delices, s'adonnent peu aux armes, les autres Espagnols les appellent Penites, à cause de leur delicatelle. Femmes de Valence, qui font l'amour, preferent la volupté à l'honnesteté, en toute maniere : Habitans d'Andaluzie fort policez & ciuilez, d'un esprit bon & gentil : Biscayens sont excellents & bons soldats pour la mer. *ibid.*

Des Richesses d'Espagne. 150.

Indes suppleent au peu de commerce qui se fait en Espagne. *ibid.*

En quoy consistent ses richesses. *ibid.*

Pesche des Tons de grande importance en Espagne, le Duc de Medine Sidoine en tire octante mille ducats tous les ans, & celuy d'Arcos 20. mil. *ibid.*

Vases de Craye & fines soyes de Murcia. *ibid.*

Trafic grand des bonnes laines de Cartagene. *ibid.*

Vers à soye morts à Murcia, ont esté repeuplez plus que iamais par ceux de Grenade. *ibid.*

Soyes & laines en grande quantité au Royaume de Grenade. *ibid.*

Port de Seuille de grand profit à l'Espagne, quatre mille pieces de vin entrent tous les iours dans Seuille. *ibid.*

Les richesses des Indes & du Nouveau Monde se deschargent à Seuille : cette ville vaut au Roy d'Espagne autant qu'un bon Royaume. *ibid.*

Vif argent trouué près d'Almaden au Diocèse de Cordoie, apporte de grandes sommes aux Espagnols. *ibid.*

Argent en grande quantité prouenant de la vente des Genets de Marchene. *ibid.* les Genets sont fort beaux & bien formez. *ibid.* leur hardiesse admirable aux combats. *ibid.*

Vins d'Orens plus grande richesse du Royaume de Galice, & de la peïsche qui s'y fait. *ibid.*

Laines de Biscaye se portent aux pays Septentrionaux. *ibid.*

Espees de Bilbao & de Tholosette fort estimées. *ibid.*

Soyes, sels, & Tons, sont la richesse plus grande de Portugal. *ibid.*

Lisbonne abord de toute sorte de marchandise & le lieu où se fait tout le trafic des Indes Orientales, & d'autres pays. *ibid.* là les flottes & armes de mer se fournissent. *ibid.*

Trafic qui se fait aux ports d'Espagne, & principalement à Lisbonne : denombrement particulier des pays, d'où y arriuent toutes sortes de marchandises. *ibid.*

Maluoisies de l'Isle de Candie. *ibid.*

Cuir, pierres precieuses, tapisseries & autres choses de Barbarie. *ibid.*

Draps d'Angleterre. *ibid.*

Toiles fines & menuës, merceries des pays bas. *ibid.*

Armes de Biscaye. *ibid.*

Cuir fort grands, & en quantité des Indes Occidentales. *ibid.*

Casse, sucre, & argent de l'Isle Espagnole. *ibid.*

Sucres, ambre gris, & cotons du Bresil. *ibid.*

Six cens mesures de sucre tous les ans viennent de Madere, à quatre ducats chaque mesure, *ibid.* sapin de dragon qui en vient aussi. *ibid.*

Deux mille arobes de sucre, & deux cens esclaves Negres arriuent tous les ans de l'Isle de saint Thomas. *ibid.* cotons qu'on y a introduits dans la premiere année arriua à Lisbonne 60. mille liures. *ibid.*

Riz, noix, singes sans queue, & perroquets bleus, viennent des Paranes. *ibid.*

Sucre, riz, & esclaves noirs de l'Isle du Prince. *ibid.*

Sucres, coton, cuirs, peaux de cheure, riz, cire, huiles, & esclaves noirs de l'Isle du cap verd. *ibid.*

Pastels en quantité, froments, orges, alun de roche, des Isles Azores. *ibid.*

Or des mines de la Guinée pour 200. mille escus tous les ans. *ibid.*

Deux cents mille quintaux de poiure, viennent tous les ans des Indes Orientales. *ibid.* à trois ducats le quintal, & à Lisbonne en la maison des Indes, quarante ducats chaque quintal. *ibid.*

Pour 200. mille escus de Gingembre, canelle, mastice, girofle, & noix muscade, vient des Indes Orientales à Lisbonne. *ibid.*

Item de bons eudelles pour cent mille ducats, propres à teindre draps, au lieu de paltels, viennent encore de là. *ibid.*

De là encore viennent tous les ans, borax, canfre, sandal, alcès, ebene pour 40. mil ducats. *ibid.*

Viennent encore de là ambre & mule, pour 20. mille ducats. *ibid.*

Perles, & pierres precieuses, rubis & diamants, viennent aussi de ces Indes Orientales à Lisbonne. *ibid.*

Soyes blanches, belles porcelaines viennent de la Chine, Malaca, & autres lieux des Indes à Lisbonne. *ibid.*

Menuës perles, & autres ouvrages delicats de la Chine, vendus à Lisbonne, chacun cent escus de Portugal. *ibid.*

Littieres, tables, chaires, & bancs de bois noir luyant comme ebene, apportez de la Chine à Lisbonne. 152.

Tapis d'or & de soye, & fines laines amenees de Perse à Lisbonne. *ibid.*

Trois Viceroyaux Indes Orientales, pour le Roy d'Espagne. *ibid.*

Marchandises de Lisbonne enuoyées aux Indes, *ibid.* au Bresil: en Angleterre, pays bas, en Italie. *ibid.*

Revenu du Roy d'Espagne, *ibid.* ce qu'il tire des Estats d'Italie, Sicile, du Portugal, des terres neuves, des Isles de Maiorque & Minorque d'Espagne. *ibid.*

Dons gratuits des peuples ordinaires & extraordinaires, de Naples, Sicile, Sardaigne, Duché de Milan, Castille, & Estats du nouveau monde, qui sont en leur temps, chacun de beaux presens au Roy d'Espagne. *ibid.*

Reuenus du Roy d'Espagne en quoy se consomment. *ibid.*

Roy d'Espagne debiteur sur la place de Genes, d'un grand nombre de millions d'or. 153.

Guerres des Pays bas ont espuisé les bourses d'Espagne. *ibid.*

Des forces du Roy d'Espagne. ibid.

Comment la Monarchie d'Espagne ne peut estre de longue durée, & comment. *ibid.*

Opinions contraires là dessus. *ibid.*

Rebellions des peuples des pays qui luy obeyssent ne sont à craindre pour estre bridees des Espagnols. *ibid.*

Grandeur de la Monarchie d'Espagne. *ibid.*

La grande puilliance cõtre ses ennemis de dehors. *ibid.* les membres d'icelle se peuvent voir avec des forces de mer. *ibid.*

Aduantages du Roy d'Espagne sur le Turc. 154.

Grandes armées naualles d'Espagne, menees en Alger, & à Tunis, & en Grece sous André d'Orta. *ibid.*

De l'abord de toutes sortes de vaisseaux à Seuille. *ibid.*

Valeur des Biscains sur la mer. *ibid.*

Armee d'Espagne naualle pour faire guerre à la Roynie d'Angleterre l'an 1588. *ibid.*

Description de l'appareil de guerre qu'il fit. *ibid.*

Nombre d'hommes qu'il auoit en cette guerre. 155

Ce que contribua l'Andalusie pour cette guerre. *ibid.*

Contribution de Seuille & de l'Estremadure. *ibi.*

Contribution de Galice & Asturie. *ibid.*

Contribution d'Algarbe. *ibid.*

Contribution de l'Isle de Maiorque. *ibid.*

Contribution de Portugal. *ibid.*

Contribution de Genes & Valence. *ibid.*

Contribution de Naples. *ibid.*

Contribution de Carthage. *ibid.*

Contribution de Malaque, Maxonelle, & Ceres. *ibid.*

Infanterie d'Espagne est la meilleure que le Roy d'Espagne puisse auoir, *ibid.* avec icelle furent chassés les Maures, assallirent l'Afrique, & y prirent plusieurs places. *ibid.*

VVavons meilleurs soldats du Roy d'Espagne, hors d'Espagne. *ibid.*

De l'infanterie Italienne des terres du Roy d'Espagne. *ibid.*

Caualerie Espagnolle, la meilleure consiste en la valeur de leurs cheuaux. *ibid.*

Nombre grãd de Caualerie entretenuë par le Roy d'Espagne en ses Estats. 156

Nombre des Princes, Ducs, Marquis, Comtes, & des Barons qui sont au Royaume de Naples. *ibid.*

De la place de Salces appartenant à l'Espagnol, du costé du Languedoc, pour opposer à Lucate place forte du Roy de France. *ibid.*

Perpignan bonne ville en la Comté de Rossillon, & a vn chasteau imprenable. *ibi.*

Barcelone ville grandement fortifiée. *ibid.*

Port de Carthage fortifié par le Roy Philippes II. luy estant tres-important à cause du Turc. *ibid.*

Fortereffes en nôbre au Royaume de Grenade. *ibid.*

Citadelle de Pampelune, place la plus forte d'Europe. *ibi.*

Fontarabie capable de grande defence. *ibid.*

Lisbone est l'une des meilleures villes de tous ces pays, il y a vn magasin d'armes en 3. salles, pour armer 15000. hommes de pied & caualiers. Il y a là dedans 20. pieces d'artillerie, dont vne porte 100. liures de charge, elle fut ostée aux Mores, par les Portugais à Diu aux Indes. *ibid.*

Tour enuironnee d'eau avec 40. pieces de canon au deuant du Monastere de Bellam, baillie au port de Lisbonne. *ibid.*

Puissance des Portugais fort diminuee. *ibid.*

Espagnols ont suiuy vne raison d'Etat des Romains, pour la multiplication de leurs familles. 157.

Peuple d'Espagne fort diminué. *ibid.*

Se seruent de Milanois, Neapolitains, Siciliens, & Sardes. *ibid.*

Espagnols & Portugais faute d'hommes ont laissé de belles entreprises. *ibid.*

Princes & Estats qui confinent avec le Roy d'Espagne. *ibid.*

La France ne peut craindre l'Espagne de quelque costé qu'on voudroit entreprendre sur nous. *ibid.*

Flandres & Brabant, bridez par les Estats d'Hollande. *ibid.*

Monsieur de l'Escliguières auourd'huy Connestable de Frãce, capable pour empêcher les armées de Milan, d'entrer en France, quoy que le Due de Sa- uoy leur donnast passage. *ibid.*

Republique de Venise est plus sur la deffensive que sur l'offensive. Les Espagnols se sont quelquefois employez pour elle aux guerres de Bajazet, Soliman, & Zelin II. *ibid.*
 Republiques ou Princes d'Italie, amis ou obligez à l'Espagne. 158.

Du Gouvernement d'Espagne.

Rois d'Espagne sont honorez de leurs subjects. *ibid.*
 Ont toute puissance en Espagne, & disposent de tout à leur volonté, non toutesfois sans conseil. *ibid.*
 Le Royaume tombe en quenouille, & les filles du Roy succedent à la Couronne : & ainsi à cause de cela la maison d'Autriche commande l'Espagne. *ibid.*
 Le Roy a la nomination de toutes les Archeveschez, Evêchez, Prieurez, & commandes des ordres de Cheualerie. *ibid.* est maistre absolu de la paix & de la guerre : cree tous les Presidents, Conseillers, Viceroy, Lieutenans, Gouverneurs, & Capitaines. *ibid.*
 Ne peut conferer les benefices qu'aux naturels d'Espagne. *ibid.*
 Dire de l'Empereur Maximilian. *ibid.*
 Conseils divers en Espagne, avec lesquels le Roy gouverne ses Estats. *ibid.*
 Du nombre de ces Conseils. *ibid.* ce que le Roy leur confere. *ibid.*
 Villes d'Espagne gouvernees par vn Gentilhomme qui en est natif, avec vn conseil que le Roy luy donne. *ibid.*
 Du Conseil du Roy d'Espagne, ce qui y est deliberé, Officiers d'iceluy Conseil : les sieges de Castille y viennent par appel : se tient le Samedy. 159.
 Chanceliers à Valladolid & à Grenade. *ibid.*
 Membres & Officiers des Chancelleries d'Espagne. *ibid.*
 Du Conseil de Castille, des officiers d'iceluy & de leurs gages. *ibid.*
 Du Conseil d'Arragon, de ses officiers, & de leurs gages. 160.
 Du Conseil d'Italie, de ses officiers, & leurs gages. *ibid.*
 Du Conseil des Indes, de ses officiers & de leurs gages. *ibid.*
 Des Viceroy d'Espagnes, & les audiences qu'ils ont es Indes. 161.
 Les Chancelleries des Indes, tant Orientales que Occidentales, pour l'Espagne.
 Du Conseil d'Hazienda, ses officiers & leurs gages. *ibid.*
 Des conseils des ordres, leurs officiers & leurs gages. *ibid.*
 Du conseil de l'Inquisition, ses officiers, & de leurs gages. 162.
 Du conseil de l'Inquisition de Toledé. *ibid.* officiers d'icelles villes où se tient l'Inquisition en Espagne. *ibid.*
 Cours souveraines & Chancelleries d'Espagne. *ibid.*
 Maistres des comptes, en la grande chambre des comptes en Espagne, leurs officiers & leurs gages. *ibid.*
 Du conseil de guerre, officiers d'iceluy & leurs

gages. 391
 Du conseil de Camora, ses officiers, & leurs gages. *ibid.*
 Du conseil des descharges, ses officiers. *ibid.*
 Du Conseil des Bois & ses officiers. *ibid.*
 Du conseil de Portugal & ses officiers. *ibid.*
 Des Viceroy & autres Gouverneurs que le Roy d'Espagne pouruoit. *ibid.*
 Des Ambassades que le Roy d'Espagne enuoye de part & d'autre. 164.
 Des souverainetez que le Roy d'Espagne pouruoit. *ibid.*
 Taxe des gages des officiers de la maison du Roy d'Espagne. *ibid.*
 Des offices de la maison du Roy d'Espagne. 165.
 Des Gardes du corps du Roy en son Palais. *ibid.*
 Gardes Bourguignons, & leurs gages. *ibid.*
 Gardes Allemandes, leurs officiers & leurs gages. *ibid.*
 Gardes Espagnolles, leurs officiers & leurs gages. *ibid.*
 Gardes à cheual, & leurs gages par iour. *ibid.*
 Gentilshommes de la chambre & leurs gages. *ibid.*
 Fourriers de l'Ecurie du Roy, & des chemins, & leurs gages. 166
 Trois cents Gentilshommes ordinaires de la maison du Roy d'Espagne. *ibid.*
 Des chasseurs du Roy qui sont tous Gentilshommes & Cheualiers, au nombre de 50. 20. desquels gardér en la châtre de la Royné & des Infantes. *ibid.*
 Leurs officiers & leurs gages. *ibid.*
 De la Chapelle Royale du Roy d'Espagne. *ibid.*
 Des estats & qualitez de ceux qui y seruent au grand Chappellain & de leurs gages. *ibid.*
 De la musique du Roy d'Espagne, gages des maistres de musique, & de la Chappelle, de leurs enfans de Chœur, & 45. chanteres de la chapelle, du Musicien qui tient la basse, au maistre qui monstre le latin aux enfans de chœur, à l'organiste & autres personnes de musique, & de leurs gages. *ibid.*
 Des Chapelains du Roy qui ne seruent pas. 167.
 De l'Ecurie du Roy, & des officiers d'icelle, & de leurs gages. *ibid.*
 De la Mulerie, officiers, & leurs gages. 168.
 De la chasse à l'oyseau, des officiers & de leurs gages. *ibid.*
 Des chasseurs en l'eau. *ibid.*
 De la chasse de volaille, & ses officiers, & leurs gages. *ibid.*
 Des chasseurs d'oyseau à cheual. *ibid.*
 Des Garçons qui ont la charge des leuriers, leurs gages. *ibid.*
 Et ceux des nourrisiers desdits leuriers. *ibid.*
 De la iurisdiction de Seuille, & de ses officiers. *ibid.*
 De celle de Navarre. *ibid.*
 De celle de Galice. *ibid.*
 De celle d'Arragon. *ibid.*
 De celle de Valence. *ibid.*
 De celle de Catalogne. *ibid.*
 De l'inquisiteur general d'Espagne, & des Contelers de l'inquisition. *ibid.*
 Des quatre iuges de la cour du Roy. *ibid.*
 Des Alguazils ou sergens de la cour au nombre de 30. *ibid.*
 Recompense que le Roy d'Espagne fait aux vieux soldats, & qui sont estropiez, voire à leurs enfans, s'ils meurent à son service. 169.

Des Seigneurs de marque & de tiltre en Espagne. *ibid.*
 Des Seigneurs de Velasco, tiltre, maison, & revenus. *ibid.*
 De ceux de Mendoza, leurs tiltre, maison, & rentes. *ibid.*
 Des Enriques & du tiltre que se donnent ces Seigneurs. *ibid.*
 de là est sorty le Comte de Fuentes. 170
 De ceux de la Cerda, maison Royale, & du tiltre que se donnent les Seigneurs de cette lignee, ensemble de leurs armes, rentes & de leur maison. *ib.*
 Des Mapriques, leur tiltre, leur maison & rentes. *ibid.*
 De ceux de Cordoue, leur tiltre, maison & revenus. *ibid.*
 de là est descendu Dom Gonfalles de Cordoua Capitaine Espagnol des Pays-Bas.
 De ceux de Tolède, leur tiltre, maison & rentes. *ibid.*
 De ceux de Cuniga, leurs armes, tiltre, maison & rentes. 171
 Des Borias, leurs armes, tiltre, maison & rente. *ibid.*
 Des Guzmanes, leurs armes, tiltre, maison & rente. *ibid.*
 De la maison des Cardonas, ses armes, tiltre, honneur & rente. *ibid.*
 Des Figueroas, leurs armes, tiltre, maison & rente. *ibid.*
 De ceux de la Cucua, leurs armes, tiltre, maison & rente. *ibid.*
 Des Pachecos, leurs armes, tiltre, maison & rentes. 172
 Des Girons, leurs armes, tiltre, maison & rentes. *ibid.*
 Des Ponces de Leon, leurs armes, tiltres, maison & rentes. *ibid.*
 De la royale maison d'Aragon, leurs armes, tiltre, maison & rentes. *ibid.*
 Des Sylvas, leurs armes, tiltres, maison & rentes. *ibid.*
 Des Oforios, leurs armes, tiltres, maison & rentes. *ibid.*
 Des Royas, leurs armes, tiltres, maison & rentes. 173
 De ceux de Castro, leurs armes, tiltre, maison & rentes. *ibid.*
 Des Riberas, leurs armes, tiltre, maison & rentes. *ibid.*
 Des Pimenteles, leurs armes, tiltres, maison & rentes. *ibid.*
 De ceux de Haro, leurs armes, tiltres, maison & rentes. *ibid.*
 De ceux d'Auila, leurs armes, tiltres, maison & rentes. *ibid.*
 De ceux de Cortes, leurs armes, tiltre, maison & rente. *ibid.*
 Des Peraltas, leurs armes, tiltre, maison & rentes. 174
 De ceux d'Aguilar, leurs armes, tiltre, maison & rentes. *ibid.*
 Des Faiardos, leurs armes, tiltres, maison & rentes. *ib.*
 Des Viamontes, leurs armes, tiltre, maisons & rentes. *ibid.*
 Des Puertos Carreros, leurs armes, tiltres, maison & rentes. *ibid.*

De ceux de Bacan, leurs armes, tiltre, maison & rentes. *ibi.*
 Des Herreras, leurs armes, tiltre, maison & rente. *ib.*
 Des Cardenas, leurs armes, tiltre, maison & rentes. 175.
 Des Acunas, leurs armes, tiltre, maison & rentes. *ibid.*
 De Capatas, leurs armes, tiltres, maison & rentes. *ibid.*
 Des Sarmientos, leurs armes, tiltre, maison & rentes. *ibid.*
 De ceux de Guevara, leurs armes, tiltre, maison & rentes. *ibid.*
 Des Ayalas, leurs armes, tiltre, maison & rentes. *ibid.*
 Des Quignones, armes, tiltre, maison & rentes. 176.
 Des Azevedos, leurs armes, tiltre, maison & rentes. *ibid.*
 Des Lunas, armes, tiltres, maison & rentes. *ibid.*
 Des Mexias, leurs armes, tiltre, maison & rentes. *ibid.*
 Des Vloas, leurs armes, tiltre, maison & rentes. *ibid.*
 Des Arellanos, leurs armes, tiltre, maison & rentes. *ibid.*
 Des Bonavides, armes, tiltre, maison & rentes. *ib.*
 Des Auellanedas, leurs armes, tiltres, maison & rentes. *ibid.*
 Des Carillos, leurs armes, tiltre, maison & rentes. *ibid.*
 Des Saanedras, leurs armes, tiltre, maison & rentes. 177
 Armoiries de la lignee de Castille. *ibid.*
 Armes de ceux de Grenade. *ibid.*
 Armes des Aualos. *ibid.*
 Armes des Manuels. *ibid.*
 Armes de ceux de Touar : *ibid.* le Duc de Feria en est yflu.
 Armes de ceux de Sandoual. *ibid.*
 Armes des Meneses. *ibi.*
 Armes des Chacones. *ibid.*
 Armes de ceux de Biucero. *ibid.* 178
 Armes de Padillas. *ibid.*
 Armes de Leynas. *ibid.*
 Armes de Los Nignos. *ibid.*
 Armes de ceux de Solis. *ibid.*
 Armes de ceux de Vera. *ibid.*
 Armes des Vanegas. *ibid.*
 Armes des Fonseca. *ibid.*
 Armes des Valdes. *ibid.*
 Armes des Maldonados. *ibid.*
 Armes de Quiquadas. *ibid.*
 Armes de Vargas. *ibid.*
 Armes de Sandos. *ibi.*
 Armes des Vegas. *ibid.*
 Armes de ceux de Soto Maior. 179
 Armes des Caranaiales. *ibid.*
 Armes de ceux de la Vega. *ibid.*
 Armes de ceux de Vermudor. *ibid.*
 Armes des Auendagnos. *ibid.*
 Armoiries des Porras. *ibid.*
 Armes de Iuestrosas. *ibid.*
 Armes des Chaves. *ibid.*
 Armes de Quesadas. *ibid.*
 Armes de Grassos. *ibid.*
 Armes de Cuandos. *ibid.*
 Armes des Tello. 180

Des Vicomtes generaux, admiraux & Prieurez & les commanderies qui sont en Espagne.	ibid.
Reuenus de tous les Archeuesques & Euesques d'Espagne.	ibid.
Des Eueschez suffragantes de l'Archeuesché de Tolède & leurs reuenus.	ibid.
Des Eueschez suffragantes de l'Archeuesché de Seuille & leurs reuenus.	ibid.
Des Eueschez suffragantes à l'Archeuesché de S. Jacques & leurs reuenus.	181
Des Eueschez suffragantes à Grenade.	ibid.
Des Eueschez suffragantes de Valence.	ibi.
Des Eueschez qui sont exemptes en Espagne.	ibi.
Denombrement des Prelats d'Espagne & de leur reuenu.	ibid.
Ceux du Royaume d'Aragon.	ibid.
Abbayes de ce Royaume.	ibid.
Prelats de l'Isle de Sardaigne.	ibi.
Prelats du Royaume de Valence.	182
Des Prieurez d'iceluy.	ibid.
Des Commanderies de saint Jacques & leurs rentes.	ibid.
Des Commanderies de saint Jacques de Castille.	ibid.
Commanderies de la Prouince de Leon.	ibid.
Les gouuernement & dependances de l'ordre de saint Jacques.	182
Commanderies de l'ordre de Calatraue.	ib.
Prieurez & Sacristies dudit ordre de Calatraue.	ibid.
Commanderies de l'ordre d'Alcantara.	ibi.
Les iurisdiccions dudit ordre d'Alcantara.	184
Prieurez & Sacristies dudit ordre.	ibid.
Des Cheualier de Portugal.	ibid.
De la Religion & choses concernantes l'Eglise d'Espagne.	185
De l'Archeuesché de Tarragone, de son reuenu: & des Eueschez qui sont sous iceluy.	ibid.
Archeuesque de Tolède Primat d'Espagne.	ibid.
l'Archeuesché de S. Jacques de Còpostelle a combien de reuenus.	ibid.

Est. du Royaume de Naples. 218.

Royaume de Naples ainsi nommé du nom de sa ville Capitale ibid. son estendue, ses limites & ses bornes.	ibid.
Alphonse 1. Roy d'Arragon de Naples & de Sicile diuisa le Royaume de Naples en six Prouinces.	ibid.
Royaume diuisé en deux parties esgales par Louys 12. Roy de France & Ferdinand Roy d'Espagne.	219
Royaume de Naples contient deux mille & sept cens lieux peuplez, dont il y a vingts qui sont Archeueschez, cent & vingt-sept Eueschez, & mille quatre cens places où il y a enuiron deux millions d'ame.	ibid.
Terre de labour ou Campagne heureuse dont la ville capitale est Capouë.	ibid.
La Pouille pleine, ses bornes.	ibid.
Le pays d'Abruzze, iadis des Samnites, ses bornes diuisé en l'Abruzze de deçà, & en l'Abruzze de delà la riuere de Pescara.	ibid.
L'un contient 150. Chasteaux ou places fermées & cinq Citez, Beneuent, Sulmone & autres, l'autre contient 184. Chasteaux ou places closes & 4. villes.	ibid.

La ville de Beneuent fut donné à l'Eglise par Héry 4. Roy de Naples pour eschange d'un certain tribut.	ibid.
Aquila autre ville de l'Abruzze d'au delà le Pescara.	ibid.
Comté de Molisi compris dans l'Abruzze qui a 104. lieux clos & 4. Citez.	ibid.
Isles de Dimede en la mer Adriatique vis à vis de la Pouille.	ibid.
Isles en la mer de Toscane appartenantes à ce Royaume de Naples sçauoir Palmarole, Pontic & autres.	ibid.
Isles au golphe de Pouzzoli & de Naples en nombre de 18.	ibid.
Isle de Capry, où Auguste alloit souuent.	ibid.
Port de Naples sert plus de pompe que de seureté aux vaisseaux.	ibid.

Qualité du pays de Naples. 222.

Comté de Rhegge & plusieurs lieux de Calabre produisent force sucre.	ibid.
Terre du labour a du vin & du bled en abondance.	ibid.
Montagne d'Astrune avec vne grotte, où est vn bain à suer.	ibid.
Terroir d'Otrante plein de bons pasturages abonde en vins & froment, orge, auoyne, oliues, melons	ibid.
Ladrerie regne au pays d'Otrante pource que les habitans mangent trop de chair de porc.	ibid.
Tarantule animal dont on chasse le venin avec le son & le chant des instrumens.	ibid.
Peuple du Royaume de Naples fort addonné au traffic ibid. exactions fort grandes sur le peuple en ce pays.	ibid.
Gens rudes & sauages aupres de Monsault.	ibid.
Peuple de Calabre moins cruel & releué que les autres.	ibid.
Richesses du Royaume de Naples.	ibid.
Neapolitains se diroient heureux s'ils n'estoient chargez des officiers, ont abondance de toutes choses & la commodité de les debiter.	ibid.
Basse Calabre enuoye du corail aux autres Prouinces, & de la Manne fort estimée.	ibid.
Castre renommée pour ses huiles qu'on porte de tous costez.	ibid.
Le Roy d'Espagne tire de ce Royaume deux millions & cinq cens mille ducats tous les ans.	ibid.
Trente & vn grains qu'on paye pour le logement des gens de guerre & l'entretien des Gentils-hommes du Viceroy.	ibid.
Des forces du Royaume de Naples.	ibid.
Neapolitains suiets aux reuoltes	ibid.
a esté possédé par les Normands, François, Allemands, Catalans & Espagnols.	ibid.
Discours qui montre comme le Royaume de Naples parueni au Roy d'Espagne, tous les empeschemens qui pouuoient confondre ce pays ont esté leuez avec resolution de le maintenir.	225.

Etat de la Duché de Milan. 240.

Le tour & circuit de la duché de Milan.	240
Milan chef de la duché, d'où elle tire son nom, ville fort peuplée, forte & puissante.	ibid.
Nombre de ses habitans.	ibid.
Ses grands Fauxbourgs enuironnez d'eau.	ibid.

La ville aussi entourée d'eau par des canaux qui apportent toutes sortes de grandes commoditez à Milan. *ibid.*

Les viures y sont à bon prix. *ibid.*

Excellence magnifique des bastimens d'icelle. *ibi.*

Grand nombre de marchands & familles tres riches. *ibid.*

Quatre Papes sortis de Milan. *ibid.*

Chateau, Dome & l'Hospital sont les trois merueilles de Milan, pour estre pieces magnifiques. *ibid.*

Dans le Duché de Milan est la ville de Cremone excellente en l'orgueil de ses edifices, a vne belle citadelle gardée par les naturels Espagnols. *ibid.*

De la ville de Lode fort riche. *ibid.*

Paue surpasse toutes ces villes en grandeur: ce fut l'ancien sejour des Roys Lombards, est celebre pour la bonne vniuersité. *ibid.*

La ville de Nouarre scise sur vne colline a quantité de nobles familles. *ibid.*

Discours de la ville de Milan, comme elle a esté occupée par diuers Roys & Princes. *ibid.*

Territoire de Paue fertile & tres abondant en fruiçts & herbages, est appelé le iardin de Milan, force gibier & volailles & poisson. *ibid.*

Terroir de Come rien de plus agreable. *ibid.*

Milan est fort peuple d'artisans tort industrieux qui travaillent si dextrement que leur ouurage est estimé par tout. *ibid.*

Harquebuses de Milan fort requises, & toutes les armes qui en sortent. *ibid.*

Gardes d'espées tres belles & seures, passements de Milan & broderie en grande recherche parmy les estrangers. *ibid.*

Milan prouisionne de ses fruiçts les Suisses & les Grisons: & est pourueu de tout ce qu'il peut desirer. *ibid.*

Reuenue que tire le Roy d'Espagne de l'Estat de Milan par chaque année, avec les dons gratuits & les choies extraordinaires. *ibid.*

Pour les forces du pays le Roy d'Espagne y entretient ordinairement 3000. hommes de pied Espagnols, mille chevaux legers & 600. hommes d'armes pour la garde de ce pays. *ibid.*

Le peuple Milannois n'ayme guiere l'Espagnol & leurs actions leur desplaisent. *ibid.*

Du Chateau de Mila qui se fortifie tous les iours, à raisõ dequoy le gouverneur tire de grandes sommes du Roy d'Espagne, cette place est de grande resistance. *ibid.*

Tour de Cremone est vne place des plus fortes de l'Europe. *ibid.*

Paue assez bonne & de deffense *ibid.* de mesme aussi que Nouarre: il y a encore en cet estat.

Discours de l'Italie, des Estats, Principautez & republiques d'icelle.

De l'Estat de l'Eglise.

DE la grandeur & estendue des Estats du Pape. *332.*

Ferrare, Canachie & Romagnole adionstées aux Estats du Pape. *ibid.*

Il comprend le Ferrarois, le Bolonois, la Romagne, la Marqued'Ancone, l'Ombrie, la Sabine, le Perusin & vne partie de Toscane, le Patrimoi-

ne, Rome & le Latium ou la campagne de Rome. *ibid.*

De la Duché de Spolette. *ibid.*

De l'Exarquat de Rauenne. *ibid.*

De la Marqued'Ancone. *ibid.*

De la campagne de Rome de mesme que le pays qui est du costé de Florence est appelé Patrimoine. *ibid.*

La Romagne & où s'estend. *ibid.*

Autres villes que comprend l'estat du Pape *ibid.*

Il comprend encore la Comté de Venisse ou d'Avignon & de Beneuent au Royzume de Naples. *ibid.*

Papes sont souuerains du Royaume de Naples & de Sicile, du Duché d'Vrbain, de Parme & de Messeran. *ibid.*

Description particuliere de la ville de Rome. *331. 333. & suiuaus.*

Estat de l'Eglise en particulier. *338*

Description du Latium ou campagne de Rome, du Patrimoine de saint Pierre laillé à l'Eglise Romaine par la Comtesse Mathilde. *ibid.*

De Peruse ville fameuse. *ibid.*

D'Oruiere ville renommée pour son assiette, puits, & son Dome. *ibid.*

Belsene avec son lac.

Montefiasco

Baguares, } *Ibidem.*

Castro

Nepe

Viterbe fameuse pour la longue demeure que les Papes y ont fait. *ibid.*

La Sabine, & ses principales places. *ibid.*

Ombrie au Duché de Spolette, & ses villes. *ibidem.*

La Marque d'Ancone a plusieurs bonnes places, entr'autres Fabrian fort renommée, elle a onze tant Archeueschez qu'Eueschez & autant de belles villes. *ibid.*

De la ville d'Ancone port de mer bien garny de nauires & vaisseaux. *ibid.*

De la Romagne: ses villes principales. *ibid.*

De la ville de Rauenne où quelques Empereurs ont fait leur sejour: & puis les Exarques des Empereurs de Constantinople.

L'Exarcat quand commença. *ibid.*

De l'Estat de Ferrare qui est grand & fort commode, veu qu'en y cõprenant Modene, qui en a esté demembre, sa longueur est grãde: ses villes plus celebres. *339*

De la ville de Ferrare, son circuit, ses belles rues, ses beaux Palais, son grand nombre d'Eglises & Monasteres: vniuersité pour les estudes en tous arts. *ibid.*

Du Comté de Venisse appartenant au Pape, quatre belles citez, qui en dependent, Avignon, Carpentras, Cavaillon & Veson, outre il y a 80. places murées. *ibid.*

Avignon fut acheué par Clement 7. Comté de Venisse fut confisqué pour l'heresie du Côte Raymond de Tholouse. *ibid.*

Qualitez des pays & Prouinces suiuettes à l'Estat du Pape. *ibid.*

Qualité de l'Ombrie. *ibid.*

Qualité du territoire de Ferrare. *ibid.*

Champs fertiles de Rietzy & de Ferny. *ibid.*

Campagnes de Viterbe & de Rome fort fertiles.

ibid.

Bolognois abonde en toute chose.

ibid.

La Romagne distinguée de collines & vallées.

ibid.

Terroir de Rimini, de Fano, & d'Ascoli, de Ferme, de Peruse & de Cornet sont delicats au possible.

ibid.

Fleuves principaux d'Italie le Po & le Tybre.

ibid.

Campagne de Rome a des races de chevaux qui ne cedent à ceux du Royaume de Naples.

ibid.

La marque d'Ancone a des plaines & des vallées riches d'huiles, grains & vins.

ibid.

La Comté de Venisse est fort agreable & rapporte beaucoup.

ibid.

Mœurs anciennes des vieux Romains.

342

Six conditions requises à la perfection d'un Etat.

340.

Mœurs & naturel des Romains de ce temps.

345

Les richesses d'Italie & singulierement en l'Etat de l'Eglise.

346

Etat general des revenus & despences du Pape

247. 248. & suivans.

Revenus incertains du saint Siege.

350

Ce que la sainteté donne à ses Nonces.

ibid.

La garde du Pape.

351

Des forces de l'Etat de l'Eglise.

ibid.

Du gouvernement ancien des Romains.

356

Du gouvernement moderne.

360

Religion des premiers Romains.

366

Chronologie & briefue description de la succession, vie & mort des Papes depuis saint Pierre jusques à Urbain 8. à present seant, ensemble leurs ordonnances, conciles & schismes 369. & sui.

Constitution du Pape Gregoire quinziésme pour l'election des Papes.

398

Cardinaux qui ont iuré, promis & signé avec le Pape Gregoire X V. ladite constitution.

401

Controverse pour l'election du Pape à l'election du Pape Gregoire X V. entre les Cardinaux 402. & suivans.

Des Estats du grand Duc de Toscane. 414.

Etat des trois republicues de Toscane, sçavoir de Florence, de Pise & de Siene ont esté vnies & reduits en vn Etat sous l'obeyssance d'un seul Prince par les Ducs de Florence.

414

Les guerres frequentes & les changemens de domination qui se sont veus en cet Etat de Florence.

ibid.

Le Duc de Florence a quinze bonnes villes en ses Estats, c'est à dire huit dans l'estat de Florence, & en l'estat de Siene sept.

ibid.

De la ville de Florence, son circuit, nombre de ses habitans, sa situation, Arne riviére qui l'arrose, jointe par 4. beaux ponts, son beau pavé des rues & les belles places, aussi est elle appelée Florençe la belle.

ibid.

Palais du grand Duc de Toscane est des plus superbes & beaux bastimens de l'Europe, tient la place de plus de 50. logis qui y estoient: sa sale magnifique pour représenter les comedies: beauté de ses iardins, fontaines, statues & autres raretez.

ibid.

Le grand Duc outre ce Palais en a encore vn autre appelé Pratolin avec plusieurs chambres & sales, & forces fontaines, qui jettent l'eau, comme

à celui de Tiouly.

ibid.

De la ville de Volaterra, son assiette sur la cime d'un mont, & ses fortes murailles, a 5. belles portes & à chacune vne belle fontaine, on y voit forces vieux Sepulcres avec epitaphes en lettres Etrusques, de tres anciennes statues de marbres & autres pieces rares.

ibid.

De la ville de Pise, est maritime & tres ancienne, son assiette entre deux fleuves: elle est fort grande, ses murailles sont de marbre & fort hautes, y a vn Têple qui a ses portes d'airain, & aupres vne Tour bastie par artifice exquis: fons de Baptême de ce Temple sont des plus rares, mais son cimetiere encoire plus.

ibid.

De la ville de Pistoye sise au pied du mont Apennin, ruinee par les discordes & comment.

ibid.

Autres villes & places de l'Etat de Florence.

416

De la ville de Siene, tres ancienne, iadis Colonie des Romains: cette ville est belle & fortifiée, mais fort peu peuplée, son circuit, nombre de ses ames, ses villes & places qui en dependent au nombre de 31.

ibid.

Qualité des pays de Toscane, l'abondance des biens qui y croissent, fertilité en bleds & bons vins principalement des vins appelez vins de Trebian.

Pise & son pays est si abondant en biens qu'il peut nourrir toute la Toscane.

ibid.

Volaterra abonde plus en mines d'albastres, d'azur & vitriol & autres mineraux, que de fruits.

ibid.

Pays de Mugelle traversé par la Siene fort agreable & porte force fruits.

ibid.

Valdarne abonde en bleds, & Chianty en vins.

ibid.

Des mœurs & formes de viure des Toscans.

ibid.

Leur excellence paroist aux Florentins, subtils & de grande espargne, & ingenieux.

ibid.

Ceux de Praty, sont cruels en guerre.

ibid.

Ceux de Pistoye sanguinaires.

ibid.

Ceux d'Arezzo sont de bonnes especes.

ibid.

Ceux de Pise sont inconstans en leurs conseils.

ibid.

Des richesses de Toscane & de l'estat de Florence, & ce en quoy elle abonde.

418

Forces du pays de Toscane, quantité grande de bonnes forteresses en Siene.

ibid.

Gens de guerre & garnisons que le grand Duc entretient es forteresses & places de ses Estats.

ibi.

Isle d'Elbe obtenüe de l'Empereur Charles 5. par le Duc Cosme ibid. elle a deux bons Chasteaux. Du port de Liourne tres assuré.

ibid.

Arsenal du grand Duc à Pise 420. vn autre en l'Isle d'Elbe.

ibid.

Forces d'hommes de guerre & de commandement d'où se tient par le grand Duc.

ibid.

Institution de l'ordre des Cheualiers de saint Estienne en la Toscane.

ibid.

Artillerie en nombre de 150. pieces de campagne au Chateau de Florence.

ibid.

Autre quantité de canons es autres forteresses de ses estats, & principalement en l'Isle d'Elbe.

ibi.

Le Duc de Florence tasche de s'entretenir aux bonnes graces du Pape, & la raison de cela.

ibid.

Pretention du grand Duc sur l'Isle de Corseque, à cause de son Etat de Pise.

ibid.

Les Luquois enfermez au milieu des Estats du grand Duc.

ibid.

Du gouvernement des Estats de Toscane, de l'ad-

ministration de la Justice, de la distribution des Magistrats, du gouvernement des affaires d'Estat. 420.

Origine de la maison de Florence & des grands Ducs de Toscane. 421. & suiv.

De l'Estat du Duc d'Urbain.

Où s'estend cet Estat, ses villes & grand nombre de Chasteaux. 430

Ses principales citez. ibid.

Dimensions de cet estat. ibid.

De la ville d'Urbain des plus anciennes d'Italie, belle & bien bastie. ibid.

De la ville de Pisé, a de belles maisons, & la ville de Fossombrone, fort peuplée. ibid.

Qualité & productions de biens & fruits du pays de ce Duché. ibid.

De ses richesses, en quoy consistent. ibid.

Le reuenu annuel du Prince Duc d'Urbain. 431

Des forces de ce Duché, nourrit force bons hommes tres capables des armes, & de bonnes defences. ibid.

La ville d'Urbain est assez forte, mais Pisé l'est davantage, & a vn bon Chasteau. Il y a encore plusieurs autres bonnes places en cet estat.

Genealogie des Ducs d'Urbain. 431. & 432.

De l'Estat du Duc de Mantoue.

L'Estat de Mantoue tient le second lieu en Italie apres celuy de Toscane. 433

Tient tout ce qui estoit iadis de la iurisdiction de Mantoue. ibid.

Il tient aussi le Marquisat de Monterrat qui est plus grand que l'Estat de Mantoue. ibid.

La ville de Mantoue qui est en Lombardie de là le Po, est plus ancienne que Rome. ibid.

Elle fut iadis chef des 12. colonies des Hetruriens: elle fut subiuguée par les Gaulois entrans en Italie. ibid.

La ville de Mantoue est belle & grande, & habitée de forces personnes de qualité. ibid.

Marmierol Palais Royal & fort magnifique basti à grands frais. ibid.

Le Marquisat de Monterrat est l'un des sept Marquisats establis par l'Empereur Otton 1. ibid. il a esté possédé par la maison des Paleologues, iusques à l'an 1534. & comme il est parvenu au Duc de Mantoue. 434

Les villes de ce Marquisat. ibid.

Qualité du pays d'autour de Mantoue, & ce qu'il rapporte à ses Maistres. ibid.

Qualité & rapport du Marquisat de Monterrat. ibid.

Des mœurs & naturel des habitans de l'Estat de Mantoue & du Marquisat de Monterrat. ibid.

Des richesses & reuenus que possède le Duc de Mantoue de ces deux Estats. ibid.

Des forces de ce Duché. ibid.

Ville de Mantoue tres forte, & n'y peut on entrer que par des Ponts. ibid.

Casal a de fortes murailles basties par les anciens Marquis de Monterrat, a aussi vn tres fort Chasteau, & vn fort basti par le Duc de Mantoue l'an 1590. tenu pour imprenable, nommé Citadelle: autre bonne forteresse de saint Sauueur: Pantoure vne des bonnes places qui se voyent, & plu-

sieurs autres encores. ibid.

Cavalerie de Mantoue la meilleure d'Italie. ibid.

Gouvernement du pays de Mantoue & de celuy de Monterrat. 435

Genealogie des Ducs de Mantoue. ibid.

Estat du Duc de Modene & Duché de Ferrare 436.

Les Papes pretendent la Duché de Ferrare, & leur raison. 438

Qualité du pays d'autour de Modene, son abondance en bleds & autres choses necessaires à la vie. ibid.

Mœurs & naturel du peuple de Modene. 440

Richesses & reuenus de ce pays, & son gouvernement. ibid.

Estat de la republique de Luques.

Luques bonne ville assise en Toscane, pourquoy ainsi nommée. 441

Son circuit: son assiette en vne plaine ceinte de bonnes murailles, ornée de belles maisons. ibid.

L'Eglise principale de Luques, est sainte Croix, où est vne croix d'or engagée par les Pisans aux Luquois, ce qu'elle vaut. ibid.

Cette ville a eu iadis diuers Maistres. ibid.

Fut la premiere ville de Toscane qui receut la foy Chrestienne. ibid.

La qualité du pays. ibid.

Le terroir est petit: mais de grand rapport. ibid.

Mœurs & naturel des Luquois. 442

Les richesses qui reuiennent des traffics aux habitans de ce pays, & leurs correspondances par tous les Estats de la Chrestienté. ibid.

Forces du pays de Luque. ibid.

Ville de Luques forte d'assiette, a de bonnes murailles, bien pourueüe de munitions & de canons, nombre de ses habitans. ibid.

Du gouvernement de cette republique. ibid.

Le Conseil en est tout le fondement, & de luy dependent les Magistrats: il est composé de trois sortes de personnes & est de 160. Citoyens. ibid.

La ville de Luques est diuisée en trois parties appelée tierciars. ibid.

Gonfalonnier esleu par le Conseil pour estre chef de la republique. Election des Tierciars & dudit Gonfalonnier. 443

Seigneurie de Luques a cent Soldats estrangers pour la garde de son Palais. 444

Estat de la republique de Genes.

Description de la Ligurie, & ses bornes: pourquoy ce pays nommé Ligurie de là le Po. 445

Villes & places d'importance de la Ligurie. ibid.

Des villes de Vintimille, Arbengue, Cure, Final, Marquisat, Nole & Sauone. ibid.

De la ville de Genes capitale de Ligurie, la description, les Ducs qu'elle a euz. 446

La ville de Sauone en Ligurie fort ancienne, soit circuit, & ses bastimens magnifiques: 3. Papes sont sortis de cette ville. ibid.

Des places & lieux de Ligurie obeysants à Genes. ibid. & 447

Herfane, place forte frontiere de Toscane. ibid.

De l'Isle de Corse, ses bornes, ses dimensions, son circuit, par qui iadis occupée, est aux Geneuois, est diuisée en quatre parties. ibid.

Plin & Martian Capelle disent que iadis elle avoit 33. villes, à présent ny a presque qu'une seule ville appelée la Bastie près de la mer fort petite, Chateau de Bouface qui y est : port de Syracuse. *ibid.*

Qualité, fertilité & productions du pays de Ligurie. *ibid.*

Du lieu agreable de Neruy : le plaisir des Genevois. 448

Corseque Isle pleine de Forests, abonde en miel, cire & raisins : produit de bons fruits & des vins. 448.

Mines de fer en la Comté de Nibie. *ibid.*

Des mœurs anciennes des peuples de Ligurie & de leur forme de vivre. *ibid.*

Des mœurs & naturel des Liguriens & Gennois de ce temps fort ingénieux & ménagers, & pour ce ils sont fort riches. *ibid.*

Quant aux forces de ce pays, il y a entr'eux force bons hommes de guerre & de bons Capitaines; où on remarque les maisons des Doris & des Spinola dans Gennes : les Genevois sont vaillans sur mer, & entendent fort bien le commerce. 449

Quant aux Corfes sont peu civilisez, sont fort cruels : sont bons Soldats & courageux : sont vindicatifs : sont peu fidelles en traitez. *ibid.*

Pour les richesses les Genevois font argent de leurs citrons, limons, oranges, huiles, qu'ils font porter par toute l'Italie avec grand profit, les vins de Corse leur apportent de grands profits. *ibid.*

Ils tirent de grandes richesses d'Espagne. *ibi.*

Sommes d'argent que le Roy d'Espagne doit aux Genevois. *ibid.*

La republique n'est pas riche, il ny a de riches que les particuliers. *ibid.*

N'a point de tresor public comme Venise. 450

La Seigneurie de Gennes n'est guiere garnie de bonnes ny fortes places. *ibid.*

Bastie de Corse est forte place. *ibid.*

La ville de Gennes a bien de bonnes murailles & forces canons, mais non pour faire longue resistance : *ibid.* garnisons de Corse dans Gennes, & des Genevois qui tiennent les meilleures places de cette Isle. *ibid.*

Gennois sont puissans sur mer. *ibid.*

Du nombre de ses galleres. *ibid.*

Du gouvernement de Gennes & de tout son estat & de l'autorité du Duc de Gennes. *ibid.*

De l'élection de ce Duc & la forme d'icelle. 451

Justice de Gennes rigoureuse aux Corfes. 453

De la Religion de Gennes : le pays est tout Catholique, y a dans Gennes un Archevesché, ses Eveschez qu'elle a sous elle, Eveschez de l'Isle de Corse sont en partie sous l'Archevesché de Gennes, en partie sous celui de Pise. *ibid.*

Estat de la republique de Ragouze.

Ragouze s'appelloit autrefois Epidaur : cette ville est icise en Esclauonie. 455

Esclauonie est l'ancienne Dalmatie, ses principales villes. *ibid.*

Ragouze ville d'Esclauonie est tributaire au Turc, sa situation & ses Isles. *ibid.*

La qualité de ce pays de Ragouze, abonde en fruits, huiles, vins, poissons & arbres chargez d'huîtres. *ibid.*

De l'Isle de la Granose sur la mer, pleine de jar-

dins, orangers, citronniers & grenadiers. *ibid.*

De l'Isle de l'Angoste abondante en oliues, & raisins. 456

Mœurs anciennes des anciens peuples de Ragouze, de naturel fort barbare, & tiennent de l'humeur des Scythes. *ibid.*

Des mœurs modernes des Ragousois, leurs coutumes & usances en leurs mariages & alliances & autres choses. *ibid.*

Des richesses des Ragousois, sont petites & ne suffisent pour entretenir leur Estat : toutes leurs richesses viennent du trafic. 457

Tribut de 14. mille selsquins que Ragouze paye au Turc. *ibid.*

Les Ragousois n'ont pas grandes forces pour ce qu'ils manquent de commoditez : Ragouze est assez fortifiée, mais est commandée d'une montaigne. *ibid.*

Ont fort peu de gens de guerre : leur garde de cent Hongrois. *ibid.*

Du Chateau de saint Laurent hors la ville qui est assez bon, & une bonne forteresse vers la porte du Levant. *ibid.*

Du gouvernement de la republique de Ragouze conforme à celui de Venise. *ibid.*

Ragouze n'a pas toujours esté republique : elle a eu des Princes Grecs & Albanois : des divers Cōseils & Magistrats qui sont en cette republique. 458.

Des Pregads de Ragouze tous Gentils-hommes *ibid.* leurs charges, sont 60. *ibid.*

Du recteur de la ville, & du pays & du Conseil qu'on luy donne. *ibid.*

Des officiers de la ville. *ibid.* & 459

College de trente à Ragouze & ses officiers, les choses qu'il cognoist. *ibid.*

De l'Arcenal de Ragouze. 459

Revenus des Ragousois en quoy consistent : Ragouze est toute Catholique : y a un Evesque qui y demeure : y a trois Procureurs de Cathedrale qui ont la garde des reliques de l'Eglise. 460

Estat de la republique de Venise.

Description generale des villes, places, forteresses, Chasteaux & Estats de l'obeyssance de Venise. 461

Description magnifique de la grandeur & excellence de tout ce qu'il y a de beau & superbe en la ville de Venise. *ibid.*

De ses Palais admirablement beaux. *ibid.*

Du magnifique Temple de saint Marc de Venise. 465

Creation des Magistrats de Venise. 464

De la multitude des ponts qui sont en cette ville de Venise 467. circuit de cette cité. *ibid.*

Du port de mer de Venise & de ses deux forteresses bien munies. *ibid.*

De la Tour admirable de saint Marc de Venise dont on void les Alpes d'Italie & les caps d'Istrie. *ibid.*

Description de la grand' place de saint Marc de Venise. 468

Du tresor public & de la belle Biblioteque de Venise. 469

Isle proche Venise où se vendent les glaces de cristal de Venise, est en forme de cité fort peuplée beaux & excellens jardins en cette Isle. Outre ses Temples

Temples magnifiques est le Monastere de l'ordre de saint Dominique richement basti & illustré de bejs peintures. *ibid.*

De l'Isle de saint George prez Venise où est vn superbe Monastere, dont le Temple est tout de marbre bien basti *ibid.* description des raretez de ce beau Monastere. *ibid.*

Qualité & rapport de la marque Trevisine, ses grains, fruiets & vins, ses riuieres, la vallée de Valcamonique pleine de mines de fer: Verone a vn air fort sain, son terroir est peu fertile, forces huiles, vins excellens, fruiets de toute sorte & des laines en viennent. 470

Bergame pays rude & aspre, sterile aux montagnes, mais fertile au possible aux autres endroits. *ibid.*

Cremeville abondante en bleds, vins & fruiets & poisson en abondance. *ibid.*

Friul porte de bons vins & en abondance, peu fertile en froment. *ibid.*

Istrie est montueuse, abonde en vins, huiles, fromens. *ibid.*

Mœurs anciennes des Venitiens 471. mœurs de la marque Trevisane & des habitans du Friul. *ibid.*

Mœurs modernes des Venitiens, des Trevisains, des Bressans, de Bergame & Vincence. *ibid.*

Richesse de Venise, tire de ses Estats tous les ans deux millions d'or, en la forme deserte *ibid.* d'où les Venitiens tirent argent de leur estat. *ibid.*

Des forces de Venise, de ses forteresses & villes fortes, Chasteaux forts, des gens de guerre que la Seigneurie entretient en cet Estat 473. de ceux de qui elle se sert en temps de guerre.

Del'Arsenal de Venise, description particuliere d'iceluy, des nauires, canons, armes & ouuriers, & tout ce qui en depend. 474

Du gouvernement de la republique de Venise, de ses Senateurs, Conseils, Magistrats & diuers officiers. 476

Religion des Venitiens toute Catholique, ceux de Corfou Isle de Venise suiuent la Religion des Grecs. 478

Des villes & forteresses qui sont dans le continent d'Italie appartenant à la Seigneurie de Venise.

Description de la ville de Bresse.

Description de la ville de Verone. 479

Des villes de Bergame, Vincence & Creme.

Du Friul & de ses villes. 480

De l'ancienne ville & Territoire d'Aquilée. 481

De la marque de Treuise & de ses villes. 482

De la ville de Trente.

De la ville de Treuise. 483

Etat de toutes les Isles de la mer Mediterranee, Adriatique & Ionique appartenantes à la Seigneurie de Venise 485.

De l'Isle de Candie. *ibid.*

De l'Isle de Corcyre, ou Corfou. 487

De l'Isle de Cephalonie.

De l'Isle du Zante. 488

Du Golphe de Venise, & de l'erreur qu'on fait sur la cognoissance de ce Golphe. *ibid.*

Des Ceremonies obseruées en l'election des Ducs de Venise. *ibid.*

Des Ducs & Princes de la republique de Venise. 489.

Des Estats du Duc de Sauoye.

Leurs limites & bornes. 498

Tous lesdits Estats sont diuisez en deux, en Sauoye & Piedmont. *ibid.*

Bornes de la Duché de Sauoye. *ibid.*

Comté de Maurienne & le Marquisat de Suse font partie de la Sauoye. *ibid.*

De la ville S. Jean de Morienne. *ibid.*

De la Tarantaise enfermée entre les montagnes des Alpes *ibid.* la ville du Montier sa principale *ibid.*

Seigneurie de Fossigny où est la ville de Ripaille lieu renommé, & pourquoy. 499

De la Duché de Cables & des Baronnie de Raud & de Gaz. *ibid.*

Description de la ville de Chambery capitale de Sauoye *ibid.* de ses autres villes: Piedmont & son estenduë & ses bornes. *ibid.*

De Turin ville capitale de Piedmont. *ibid.*

Du parc que le Duc de Sauoye a fait faire à Thurin. *ibid.*

Des autres villes du Piedmont, Iuree, Oite, Mondeuy, Fossan, & autres. *ibid.*

De la ville de Vercei tres ancienne & capitale des peuples Lybiques. *ibid.*

De la ville de Iuree qu'on nomme Lampotreggio, & les anciens Eporedia, capitale des peuples Saassiens, aujourd huy Cavaiois.

La ville d'Oite, bastie par Auguste, est à la bouche des Alpes Grecques & Penines qu'on nomme à present le grand & petit mont de S. Bernard. *ibid.*

La ville de Mondeuy assise sur vne colline, elle est plus peuplée qu'aucune autre de Piedmont. *ibid.*

La ville de Fossan assise aussi sur vne colline, il y a en icelle vn fort beau Chasteau.

La ville de Saluzze assise prez des Alpes & est capitale du Marquisat de Salusse: cette ville est grande & a vn grand Chasteau. *ibid.*

Marquisat de Salusse a cette ville de son nom, puis Dronere & Carmagnole, comme aussi Rauei, Doghan où passe le trafic de Piedmont, Versole, Mintes, Pagny & autres. *ibid.*

Ce Marquisat a esté vny au Piedmont & le Duc de Sauoye a donné en eschange au Roy de France le pays de Bresse. *ibid.*

Piedmont outre les citez & villes Episcopales a 260. places fermées, entre lesquelles il y en a plusieurs qui sont bonnes, comme Biele, Quiers, Cune, Suse, & autres. 500

La ville de Biele a vn grand tour & de beaux bastimens, entre lesquels on compte par excellence les Couuens de S. Hierosme, de S. Dominique & de S. Sebastian. *ibid.*

Ville de Pinerol a vn bon Chasteau. *ibid.*

Quiers ville honorée par Barberousse du tiltre de grande ville, elle est beile pour ses beaux Couuets, ses belles Eglises & belles maisons. *ibid.*

La ville de Cuny assise entre les fleuues de la Stoure & le Gasse. *ibid.*

Suse estoit autrefois vne grosse ville & de grande importance. *ibid.*

Auillane est bonne ville, riche & marchande, & a vn Chasteau assis au hault d'vn montagne avec vne source d'eau vive. *ibid.*

Riuole se vante de la naissance du Duc de Sauoye & à present y fait baltir magnifiquement. *ibid.*

Moncalier assez grande ville. *ibid.*
 Carignan renommé pour son Chasteau. Il y a
 forces familles qui y ont fondé un Monastere de
 Religieuses. *ibid.*
 Queyrac agreable pour ses ruës qui sont droictes
 & larges. *ibid.*
 Cene est fort d'assiette. *ibid.*
 Racons estimé pour son Palais & ses reservoirs.
ibid.
 Et Busque pour le tiltre des 7. Marquisats descen-
 dans d'Aleran. *ibid.*
 Sauillan renommé pour sa beauté & pour le beau
 Monastere de saint Benoist. *ibid.*
 Cheuë est capitale d'un beau Marquisat qui com-
 prend 26. places. *ibid.*
 La Comté de Nizze, sa longueur & largeur : elle
 est diuisée en 4. Vicairies, les villes capitales d'icel-
 le: plus de 30. places fermées, & autres qui ne le
 sont. *ibid.*
 La plus renommée de ces places est Villefran-
 che. 501
 Pour la commodité de son port. *ibid.*
 Mais pour parler de Nizze, c'est une ville belle,
 & bien peuplée, elle a ses maisons de cinqu. 6. eta-
 ges, ses ruës fort droictes. *ibid.*
 De la Comté de Tende iointe à celle de Nizze, de
 la Comté d'Ast, qui a un nombre infiny de Cha-
 steaux. *ibid.*
 Qualité & abondante fertilité de Sauoye. *ibid.*
 Piedmont est arrosé du Po & de 18. autres rui-
 res dont 8. sont au territoire de Cune. *ibid.*
 Pays d'autour d'Ast arrosé de ruières, ombragé
 de bois, releué d'agreables collines, a de belles
 campagnes abondantes en fruits. *ibid.*
 A Verceil on mange le pain plus blanc & les plus
 gras chappons de Piedmont *ibid.* autres places &
 territoires riches en bien & abondance de fruits.
 502.
 Des mœurs & naturel du peuple Sauoyard, leur
 coutume & forme de viure *ibid.* des Piedmontois
 & du peuple de Nyse. 503
 Richesses de Sauoye peu de chose, mais grandes
 celles du Piedmont, & du Comté de Nizze. 504
 Reuenu du Duc de Sauoye est de plus d'un mil-
 lion d'or par an. *ibid.*
 Des forces de Sauoye, de ses forteresses 504
 Forteresses du Piedmont. *ibid.*
 A Thurin il y a une Citadelle Pétagone ou à cinq
 Angles ou bastions belle & grande, le Duc y a gar-
 nison de 300. Soldats. *ibid.*
 Ses autres garnisons à Canas, Cune & Ville-
 neufue, à Suse & Cahors. *ibid.*
 Des pretentiōs du Duc de Sauoye sur Geneue. 506
 Sur le Royaume de Cypre & de Hierusalem 508
 sur quatre moyens. *ibid.*
 Catalogue de la vie & suite des Côtes & Ducs
 de Sauoye depuis l'an 1000. iusques en l'an 1625.
 extrait de la Cronique de Sauoye. 510
Etat de la republique des Suisses ou des cantons des
Lignes des Suisses 523.
 De l'union des Suisses par ensemble 524. la Suisse
 est une Prouince d'Allemagne, ses bornes. *ibid.*
 Pays des Grisons & ses limites a beaucoup de iu-
 risdiction entrelassée parmy les Suisses. *ibid.*
 Qualité du pays des Suisses, la sterilité & fertili-
 té d'iceluy. *ibid.* & 529
 Mœurs anciennes & modernes des Suisses, & de
 leur naturel & coustumes. *ibid.*

Leurs richesses, forces & gouuernemēt. 531. & su.
 Cōment les Suisses se sont auili cantonnez, & ont
 formé une republique si puillante. 532
 De la Ligue des trois cantons. 533
 Ligue des 4. cantons, de Lucerne, Vry, Suits &
 Ondreuald. 534
 Allemblée faicte à saint Gal entre les quatres
 cantons qui a vigueur de ley & de ligue. 535
 Ligue de Zug avec les cinq cantons. 538
 Ligue de Glaris. *ibid.*
 Ligue de Berne avec les trois cantons. *ibid.*
 Ligue hereditaire faicte entre l'Empereur Maxi-
 milian & Charles Archiduc d'Autriche & les
 Suisses. 539
 Vnion des trois Ligues des Grisons avec les can-
 tons. 541
 Ligue de S. Gal. 542
 Forme de cette Ligue. *ibid.*
 Derniere paix faicte avec ceux de Zurich le iour
 de saint Octauian l'an 1581. *ibid.*
 Paix de Berne l'an 1537. *ibid.*
 Religion des Suisses diuisez en Catholiques,
 Zuingliens, Caluinistes & meslez. 544
 Memoire concernant les troubles & remue-
 mens des Grisons. 545.
 Des differens entre l'Eueque de Coire & les
 Grisons, d'où est ariné le trouble pour la Reli-
 gion. 546
 Remonstrance de Monsieur le Marquis de Cœu-
 rre Ambassadeur extraordinaire de la Majesté tres
 Chrestienne en Suisse faicte aux cantons Suisses.
 558.

De l'Etat du Duc de Lorraine.

Austrasie ancien nom de Lorraine. 562
 Origine du nom de Lorraine. *ibid.*
 Ses bornes & limites. *ibid.*
 Villes principales de Lorraine, & particuliere-
 ment de la ville capitale de Nancy, seiour ordinaire
 du Prince. 563
 De ses Comtez & Seigneuries. *ibid.*
 Les droicts que les Ducs de Lorraine pretendent
 auoir au Royaume de Hierusalem. 564
 Fertilité & abondance des vins de Lorraine,
 bains, salines, diuers metaux, pierres d'azur, pois-
 sons & carpes de trois pieds de long, Cassidoines
 d'admirable grandeur, miroirs & ourages de ver-
 re. *ibid.*
 Mœurs, naturel & humeur des Lorrains tenās du
 François & de l'Allemand. *ibid.*
 Richesses des habitans consistantes au trafic des
 pierres d'azur, des perles, des miroirs & verres de
 Cassidoines, des toiles, des mines d'argent & de
 salines. 565
 Reuenu du Duc de Lorraine, en quoy consiste,
 & à combien se monte tous les ans. *ibid.*
 Forces & forteresses de Lorraine, ses voisins &
 alliez. *ibid.*
 Denombrement & Catalogue des Ducs qui ont
 commandé en Lorraine. 566
 Principale Origine de la maison de Guise. 567.
 Princes & Princesses de la maison de Guise. *ibi.*
 Princes & Princesses de la maison de Mayenne.
 568.
 Princes & Princesses de la maison d'Aumale. *ibi.*
 Princes & Princesses de la maison d'Elbeuf. 569
 Princes & Princesses de la maison de Mercœur.
ibid.



*Est de dix-sept Provinces des Pays-Bas tenues par le
Roi d'Espagne & les Hollandois.*

Origine du nom de basse Allemagne 571. & de
celuy de Flandre. Sa situation, limites, son cir-
cuit & grandeur. *ibid.*

Rivieres les plus celebres des Pays-Bas, leurs
sources & cours. *ibid.*

Division du pays en 17. Provinces, & combien il
y a de ville & villages en chaque Prouince. 573

Comment elles ont esté vnies sous vn mesme Sei-
gneur & reduictes sous la domination d'Espagne.
574.

Qualité, fertilité & profits des terres des Pays-
Bas. 575

Mœurs anciennes & modernes des habitans des
Pays-Bas. 576

Des richesses & traffics ordinaires de mer des
Pays-Bas. 577

Des forces de l'Archiduc de Flandres *ibid.* des
villes fortes & forteresses qu'il commande en ses
pays. 578

Forme du gouvernement, Police, Justice, Con-
seils, Magistrats & officiers des pays de l'Archiduc. *ibid.*

De la Religion des pays de l'Archiduc. 580
Des Archeueschez & Eueschez deidits Pays-Bas
de son obeissance. 581

Des Seigneurs & Comtes de Flandre. 582

Description du pays d'Artois & de ses plus bel-
les villes. 578

Des villes du Brabant, Anvers, Malines, Lou-
vain, Bosseduc & autres. 577

Du fort de Doinkerque & du pays de Flandre,
Bruges, Gand, l'Isle, Grauelines, Ostende & au-
tres. *ibid.*



*Des Estats generaux des Provinces vnies des Pays-
Bas, & ce qu'ils possèdent.*

Description des pays & terres qu'occupent les
Estats des Provinces vnies des Pays-Bas. 588

Situation de l'Isle de Zelande & contées voisines,
leurs confins, estenduë, les villes & isles, description
de la Hollande, & ses principales villes, entr'au-
tres d'Amsterdam. 589

Du Duché de Gueldre & de ses villes. *ibid.*

Des pays d'Ouerissel. 590

Du pays d'Vtrecht. *ibid.*

De la Frise Orientale & Occidentale. *ibid.*

De la ville de Groningue. *ibid.*

Qualité de l'air des Isles de Zelande, Hollande
&c. leurs bons pasturages. *ibid.*

Des mœurs, naturel & humeur des peuples de
ces Isles: pays d'Vtrecht, Frise & autres Prouin-
ces. 591

Richesses grandes des Estats des Pays-Bas pro-
cedantes du trafic de mer. 592

Des villes, forteresses & places de defences que
tiennent aujourdhuy les Hollandois. 593

Quel est le gouvernement & Police de cette re-
publique tant sur mer que sur terre. *ibid.*

La forme de conuocquer leurs Estats & assem-
blées. *ibid.* & 594

Du grand Conseil & chambre de Compte &
monnoye d'icelle Prouince. 595

Des Estats de la Comté de Zelande, & de quelles
villes sont composez. 596

De la Principauté & Estat d'Vtrecht, ses mem-
bres. *ibid.*

De l'Estat & Seigneurie de Frise partie en trois
quartiers, de la forme & lieu où se tient leur assem-
blée. *ibid.*

De l'Estat d'Ouerissel composé de trois iurisdic-
tions. 597

De l'Estat & Police de la ville de Groningue.
598.

De la Religion des Prouinces vnies quand & com-
ment le Caluinisme & autres sectes se sont glissées
en ce pays. *ibid.*

Articles de la trefue accordée entre l'Archiduc
Albert & les Estats generaux des Prouinces vnies
581.

Genealogie des Comtes de Hollande, Zelande
Seigneurs de Frise.

Des guerres des Pays-Bas entre les Archiducs
les Hollandois depuis les trefues finies. 59

Siege & prise de Iuliers par l'Espagnol.

Degast du Comte Henry de Nailau fait en
bapt. 59

Siege de Berghe sur Zoon par le Marquis de
nola. 59

Arrivée du Comte de Mansfeld & du Prince
Brunswic sur la frontiere de France 605. son es-
dans le pays de l'Archiduc & les combats qu'il
auec les Espagnols 609. se joint au Prince d'Orange
à Breda.

Leuée du siege de Berghe sous Zoon par le Mar-
quis Spinola.

Bloquement & siege de la ville de Breda par le
Marquis de Spinola.

Entreprise des Hollandois sur la Citadelle d'
uers, mais en vain.

Secours d'Angleterre conduit par Mansfeld
Estats d'Hollande.

Description de la ville de Breda & du siege en
Marquis Spinola. 614. &

Des Estats de l'Empire d'Allemagne.

Grandeur & estenduë de l'Empire des Romains
son declin & affoiblissement par les guerres
les & autres causes.

Division de l'Empire d'Orient en Occide-
quel en fut le partage au siecle de Charlemagne
ibid.

Qualité d'Allemagne, sous quel climat située,
air tascheux, son rude hyuer, abonde en toute sor-
te de bleds & legumes, mines d'or, d'argent, cui-
ure, fer & plomb, fontaines & mines de sel, vi-
gnes, safran, sapin &c. 615

Remarque particuliere des choses que chaque
Prouince d'Allemagne produit. 616

Allemands pourquoy anciennement appelez
Germaines. 617

Election de leurs Roys comme se faisoit, & celle
des chefs & generaux d'armées. 618

Femmes Allemandes martiales & courageuses : leurs sacrifices d'hommes à Mercure & leurs autres folies. 629
 Remarque particuliere des mœurs de quelques peuples de Germanie. 630
 Des Saxons diuisez en 4. Estats addonnez à l'idolatrie & à l'adoration des arbres, fontaines & forests. 630.
 Façons de viure & loix de Suabe. 631
 De ceux de Bauere. ibid.
 Allemands de present diuisez en quatre Estats, & quels sont leurs mœurs en general. 632.
 Particularitez de chaque Prouince en leurs loix & maniere de viure. 633
 Richesses d'Allemagne en mines d'argent & autres metaux, fontaines & puits d'eau salée & autres ouurages. 637
 Des tonnes de Franc-fort. ibid.
 Reuenus des villes & Princes seculiers. ibid.
 Reuenue de l'Empereur. 638
 Les forces les Empereurs Charles V. & Maximilian 2. ont tiré d'Allemagne lors qu'ils ont entrepris le Turc. ibid.
 Nombre des Soldats que l'Empire peut leuer.
 La Cavalerie & Infanterie Allemande. ibid.
 Les forces maritimes d'Allemagne. ibid.
 Les deux choses qui manquent à l'Empire. ibid.
 Le d & par qui l'Empire hereditaire a esté fait. 640
 Les membres de l'Empire, dont les 7. Electeurs premier. ibid.
 Le second membre des grands & des Nobles. ibid.
 Le troisieme membre de l'Empire composé de villes franches. 643
 Les Conseils des cercles & à quoy instituez. 644
 La constitution de la Chambre imperiale de Spire. ibid.
 Les charges & dignitez de l'Empire reduictes au nombre de quatre chacune. ibid.
 Les choses sont les seances aux Diettes, & de l'ordre réglé aux processions publiques. 645.
 Les trois Conseils qui se trouvent aux Diettes, & de quelles personnes sont composez. 646
 La Religion diuerse des Allemands ibid. &
 Du commencement & progres de l'heresie de Luther de Zuingle & autre, & de l'estat auquel maintenant, & quelle Religion tiennent les peuples. 647. & 649
 Le Catalogue des Empereurs d'Occident.
 L'Action de l'Empereur Ferdinand second à la Cour Imperiale. 672
 La seance des Electeurs, Seigneurs & Ambassadeurs au Conseil tenu au Rommer ou maison de Franc-fort. ibid.
 Du Serment que le Magistrat & les Soldats de Franc-fort prestent aux Electeurs du saint Empire. 673
 Le serment fait au deuant du chœur de l'Eglise de Saint-Emmerich de Francfort, pour le Roy des Rommes nouvellement esleu & les 7. Electeurs.

675.
 Proclamation & publication de l'Election. 676
 Diuision des Cercles d'Allemagne. ibid.
 Premier Cercle de Franconie, Prouinces y comprises. 677
 Second Cercle de Suabe & ses pays. ibid.
 Troisieme Cercle de Bauere & ses pays. ibid.
 Quatrieme Cercle d'Austriche & ses pays. 678.
 Cinquieme Cercle d'Westphalie, ses pays & villes. ibid.
 Sixieme Cercle des quatre Electeurs du Rhin. ibid.
 Septieme Cercle de l'ancienne Saxe & ses pays & villes. 680
 Huitieme Cercle de la basse Saxe & ses pays. ibid.
 Neuuieme Cercle du Marquisat de Brandebourg & ses pays. ibid.
 Le dixieme Cercle de la Franche Comté de Bourgogne & ses villes. 681.

Etat du Royaume d'Hongrie.

Des contrées & Prouinces contenues au Royaume d'Hongrie, & d'où elle a pris son nom. ibid.
 Des bornes & climats de ce Royaume. 683
 Diuision du pays d'Hongrie en deux parties, d'où vient le nom de Bude, capitale du Royaume, & la forte assiette. ibid.
 Description des autres villes d'Hongrie. ibid.
 Des fromens d'Hongrie, se changeans en autre meilleure espeece la troisieme année. Des vins sulphureux de forte odeur, & enyurans soudainement. ibid.
 Description des riuieres, lacs, fontaines. ibid.
 Du sel Mineral de Matomarus, & eaux miraculeuses conuertissans les bois en pierres : autres eaux bouillantes, transformans leur element en pierre. ibid.
 Des mines d'airain de Meusole, & de l'abyssme du Comté de Zolie, & sa mortelle odeur. ibid.
 Hongrie habitée en diuers temps par diuerses nations barbares. ibid.
 De la disposition des neuf Cercles qui environnoient iadis tout le pays, & du mot de guet qui se donnoit d'un cercle à autre. 685
 Hongrois iadis farouches, seditieux, vindicatifs, auourd'huy civilisez & addonnez à l'exercice des armes. ibid.
 Coustume des Hongrois de porter moustaches longues, & barbe raze. ibid.
 Leur richesse en bestail & abondance de vins, & les petites forces du Royaume. ibid.
 Des deux Magistrats Principaux de la Hongrie. 686.
 Du duel & combat d'armes ordonné es causes difficiles à iuger. ibid.
 Des successions dont les seuls masles sont capables. ibid.
 Diuersité des sectes de Religion qui regnent en Hongrie, & de la grande conformité du Calvinisme avec le Mahometisme. 687.
 Le nombre des Archeueschez & Eueschez de cet Estat. ibid.
 Liste des Roys d'Hongrie, leur regne & mort. ib. & suivans.

Relation des differens suruenus l'an 1605. en ce Royaume, pour le fait de la Religion, & pour les charges & dignitez aux armes. 689

Articles de la paix pour la Hongrie, faite avec Botscay en Septembre 1606.

Conference de Debrita entre les Ambassadeurs & deputez de l'Empereur, & de l'Archiduc Matthias, & de ce qui y fut conclud. 690

Ceremonies observees en Hongrie en la receptio, sacre & couronnement du Roy Matthias. 693. & 694.

Etat du Roy de Pologne.

D'où vient le nom de Pologne, l'estenduë de ce Royaume & ses Prouinces. 696

Diuision de la Pologne en haute & basse, & les villes principales. ibid.

Description de Cracouie, ville capitale de la basse Pologne, ses Duchez & places voisines. 697

De la Liouonie, sa capitale & autres principales villes. ibid.

De la Lituanie, ses bornes, sa ville capitale, ses Duchez & Palatinats. ibid.

De la Samogitie, sa longueur & confins. ibid.

De la Massouie, etymologie & origine du nom de cette Prouince, sa capitale & autres principales villes. ibid.

De la Volhinie, son assiette & Prouinces. 698.

De la Podolie, ses limites, & capitale ville. ibid.

De la Russie, etymologie de son nom, ses bornes, pays & ville capitale. ibid.

De la Poldasie, quand & par qui vnie à la Pologne, les villes principales. ibid.

De la Pomeranie, etymologie de son nom, ses villes. ibid.

De la Prusse, ses bornes, & longueur, ses principales riuieres, quand reduite en principauté seculiere, diuisee iadis en douze Duchez, maintenant en deux pays, sa capitale ville, Mariembourg. ibid.

Polonois originaires, & descendus des Slaves: leurs ceremonies à l'imposition des noms de leurs enfans, quels Dieux ils adoroient en general. 701.

Maniere de viure des Polonois de ce temps, la forme de leurs caracteres à escrire, & de l'usage de la langue Latine, commun aux villes & villages. 702.

Leurs richesses en grains & bleds, & autres choses propres au trafic. 704.

Des reuenus du Roy de Pologne, à quoy se montent toutes les annees. 705.

Des biens de la noblesse de Pologne. ibid.

Des forces Polonoises en quoy consistent. 706

Nombre grand de leur Cavaletie, & la conduite de leur artillerie & autres munitions de guerre. ibid.

Des places fortes de ce Royaume, de leurs navires, galeres & autres forces maritimes. ibid.

Leurs confins tant ennemis qu'amis, & leurs puissans allies. 708

Leur forme de gouvernement & Police moderne plus semblable à vne republique qu'à vn Royaume.

Des Nonces terrestres, leur autorité. 709

Assemblées & deliberations publiques de cet Etat. 707

De l'autorité de leur Roy & de la Noblesse. 708.

De la discorde des ordres des Senateurs & Cheualiers, des familles nobles & des Prouinces. 710

Des deux membres qui composent tout l'Estat de Pologne. ibid.

Quel est le nombre de ses Archeueschez & Eueschez, des Palatins, Marschaux & autres dignitez de ce Royaume. 714.

De l'heresie Lutherienne & autres sectes introduites en Prusse & en tout l'estat de Pologne par des marchands & par l'apostasie d'Albert de Brandebourg, & quelles sont les Prouinces qui ont retenu la foy de l'Eglise Romaine. 712

Genealogie des Ducs & Roys de Pologne. 714

Etat du Roy de Dannemarch.

Royaume de Dannemarch, quels pays & Isles il comprend, ses bornes & parties principales, dont la premiere est appellée Iutie ou Iutlande, ancienne habitation des Cimbres, sa limite & largeur. 719

Des 4. grands Eueschez compris en la Iutie, & quels gouuernemens & places sont comprises en chaque Eueché. ibid.

Du rocher Skarringklint d'enorme grandeur, & du redouble Angle de Iutie. ibid.

Description des Duchez de Schles Vvich & d'Holface. ibid.

De la Scanie, Prouince iadis diuisee en deux Duchez, ses gouuernemens & places de l'admirable horloge de Londe. 720

De l'Isle Selande, sa longueur, largeur & ses places. ibid.

De l'Isle Fionie ou Fuyne diuisee en 24. gouuernemens, villes & Chasteaux & Isles. 721

De la Noruege & ses bornes, ses Chasteaux, gouuernemens & villes. ibid.

De l'assiette de l'Islande diuisee en 4. parties, ses Eueschez & Monasteres. ibid.

De la bonté de l'air & fertilité des Prouinces de Dannemarch. 722

Fontaine dont la fumée transforme en pierre ce qu'elle touche. 723

Les poissons veneneux & d'excessiue longueur. ibid.

Des montaignes d'Islande couuertes de neiges, & vomissantes flammes & feux par le pied. ibid.

De l'Origine des Cimbres, & descente de cette nation en Italie. ibid.

De la bonne disposition & complexion de corps & d'esprit des peuples de Dannemarch, leur naturel & maniere de viure. 714.

Leur richesses au trafic de bestail, grains, poissons, cheuaux, draps de Vvarman, souffre, beurre salé. ibid.

Des richesses du Roy de Dannemarch. Quel nombre de vaisseaux il peut armer. 725

Combien il y a de gouuernemens, appelez Hairs en Dannemarc. ibid.

De la forme & ceremonie observee au sacre & couronnement des Roys de Dannemarc. 726

Des cinq ordres qui sont en tout le Dannemarc, & des principales dignitez & offices de ce Royaume. ibid.

Du gouuernement & police particuliere de chaque Prouince. 727

Heresie de Luther quand & par qui introduite en ce Royaume. 728.

Liste des Roys qui ont regné en Dannemarck. 729.

Estat du Roy de Suede.

Estenduë du Royaume de Suede, ses principales Prouinces & ses bornes. 732

Description de la Gothie, ses limites & meilleures places. 733.

De la Finlande & ses villes. ibid.

De la Roddie ou Bothnie. ibid.

De la Laponie, son estendue & limites. ibid.

Autre diuision de la Suede en vnze Prouinces, contenans vnze Duchez, & douze Comtez. ibid.

Autre partition de ce Royaume en 7. Eueschez, & combien chaque Euesché cōtient de Parroisses. ibid.

Fertilité de la Suede. 734.

Particuliere description des choses dont chaque Prouince abonde. ibid.

Naturel valeureux des anciens habitants de Suede, leurs coustumes, loix, & diuerses sortes de sacrifices. ibid.

Constitution robuste de corps & de bonté d'esprit des modernes Suedois, les diuerses sortes de pain & viandes dont ils vient, la façon de leurs vestemens, habitations & edifices. ibid. & 735. & 736.

Leurs richesses en quoy consistent. ibid.

Des reuenus ordinaires & extraordinaires du Roy.

De la gendarmerie Suedoise, & quelles compagnies d'infanterie & de cavalerie sont entretenues en chaque Prouince.

Des forces navales de cet Estat, & quel nombre de vaisseaux peut armer le Roy en temps de guerre.

Denombrement des principales forteresses de ce Royaume, ses allies & confins aduersaires. ibid.

Des Vicomtes, lamens, lansmens, & autres iuges & officiers commis à l'administration des iustices de chaque Prouince.

Des loix establies contre les vsures.

Des officiers commis sur les finances du Roy.

Sectes de Luther & de Calvin, comment & quand introduictes en Suede.

Denombrement & catalogue des Roys de Suede qui y ont regné iusques à present.



TABLE SOMMAIRE DES choses memorables contenues en la seconde partie de ce liure, des Estats & Empires du monde.

Estats du Turc en Europe, Asie, & Afrique.

De ses Estats en Europe.

Sommaire description de l'estenduë des Estats de l'Empire du grand Seigneur, & des pays qu'il occupe à present en Europe, Asie, & Afrique. 1.

Particuliere description des Estats & Royaumes tenus par le Turc en Europe. 4.

Topographie singuliere de la Thrace ou Romanie, Prouince de Constantinople. ibi.

Singularitez memorables de cette ville de Constantinople. 4. & 5. & suiv.

Description generale du Serrail ou de la Cour du grand Seigneur. 14.

De la personne du grand Seigneur. 18.

Du couronnement des Empereurs Turcs. ibid.

Des titres & qualitez qu'ils prennent, & de leurs vestemens & exercices ordinaires. 18.

De la table du grand Seigneur & de ses viandes. 19.

De la grandeur & gravité, son serment & alliance, & de la reception qu'il fait aux Princes Estrangers, des ceuures manuelles du grand Seigneur, & de ses amours. 19. 20. 21.

De ses femmes, de leur vie, logement, & conduite de ses parens, du mariage de ses filles, de ses enfans masles, & de leur education, & des ceremonies de leur Circocision. 22.

Des presents faicts au grand Seigneur & de ceux qu'il fait. 23.

Des thesors du Serrail, & du reuenu du grand Seigneur. ibi.

De la magnificence en ses entrees & sorties, de son Serrail & de Constantinople. 24.

Du Diuan ou conseil public dans le Serrail, pour l'exécution des affaires generales. ibid.

Des enfans du Tribut, & des Eunuques blancs & autres. 25.

Des officiers du grand seigneur serans au Serrail, & des viures ordinaires de la prouision du Serrail. ibid.

Du train & de la cour de l'Empereur des Turcs. ibid.

De la grandeur des Bassas Turcs. 26.

Des empoisonnemens frequents entre les grâs de Turquie, de leurs sales desbauches. ibid.

Des amours des Dames de la Cour du Turc, & de leurs ardentes affections entr'elles. ibid.

Les 4. principaux Bassas de la porte, & des fauoritz du grand seigneur. 26.

Des armes & du sceau du grand seigneur. ibi.

De la mort, duel, funeraillles, & sepultures des

15. *ibid.*
 ns des Thraciens, farouches, & ru-
 s coutumes, celle des Thrauses, &
 27.
 Thraciens de ce temps, & de la forme
 29
 ou Prouince d'Attique, de la Mace-
 doine, de l'Epire, le Peloponese & autres pays.
 32. 33. 34.
 Villes de la Macedoine anciennes.
 De l'Epire partie d'Albanie.
 De l'Achaie. 35
 Du pays des Locrois & Opuntiens, de la Phocide
 où est Delphes, de la Beotie, de l'Attique, de la con-
 tree de Megare. *ibid.*
 Du Peloponese ou Moree, du nom moderne de
 l'Arcadie, du pays de Corinthe, du pays d'Argie,
 pays Laconique, de Lacedemone, de Messine, de
 l'Elide, de l'Achaie propre de Sycione d'Arcadie.
ibid. & 36.
 Qualitez des pays, Prouinces & peuples d'icelles.
 37.
 Macedoine pays temperé plus que nul autre en
 l'Europe. *ibid.*
 Albanie, fertile, agreable, espece d'or incogneue,
 arriuee en icelle du temps d'Aristote. *ibid.*
 Thessaliemeilleure contrée de Macedoine, fort
 agreable & celebre pour l'estime de ses cheuaux.
ibid.
 Du mont Olympe celebre en bois & lauriers : du
 mont Athos, tant renommé des Poëtes, toujours
 couvert de neiges : il est abundant en arbres frui-
 tiers, vignes, oliuiers, & en sel mineral de la vallée
 de Tempé. *ibid.*
 Sterilité du pays d'Epire & Attique. 38.
 Fertilité du Peloponese, & aspreté du pays d'Ar-
 cadie, où se faisoit vn vin rendant les femmes fer-
 condes, & les hommes erragez, & où naist l'If, ar-
 bre veneneux en son fruit & en son ombrage, &
 fait mourir ceux qui en vsent. *ibid.*
 Du naturel des anciens peuples de la Grece, &
 premierement des Macedoniens, guerriers addon-
 nez aux sciences & aux festins : vices des Thessa-
 liens, ceux de la vallée de Tempé, Religieux aymés
 les sacrifices & festins. *ibid.*
 De l'oracle de Dodone & de son bois : antiquité
 des Dorien & Pelagiens, vaillance des Eoliens, ru-
 sticité de Phoeniciens. *ibid.*
 Subtilité d'esprit des Atheniens & peuples d'At-
 tique, leurs deitez, festes, mysteres & sacrifices.
 41.
 Du genereux courage des Lacedemoniens, cere-
 monies.

Demarques, Creontes, Syrofilaces & autres Magis-
 trats & dignitez : de la Republique d'Athenes. *ibid.*
 47. & 48.

De l'ancienne police de Sparte, & comment
 gouvernee par les loix de Lycurge, de leurs maria-
 ges, naissance de leurs enfans, nourris aux lar-
 cins & autres mœurs & police des Spartiens.
 57.

De la religion des Grecs modernes. 64.

Des Isles de l'Archipelague, qui appartiennent au
 Turc, & ce qu'il possède en Euboea, leur situa-
 tion, circuit, & villes principales, leur fertilité, &
 singularitez, mœurs & coutumes anciennes &
 modernes. 65

De l'Isle de Cypre, sa diuision, sa situation, lon-
 gueur & bornes, naturel des habitans, mœurs,
 police, & Religion, de ses Roys en partie, de la mai-
 son de Lusignan. 71. & 87

De l'Isle de Rhodes, sa situation & circuit, & du
 celebre Colosse d'airain iadis esleué en la ville de
 Rhodes, ayant vingt coudées de hauteur. 76.

Des Isles du Propontide, appellees des modernes
 Marmora. 77

Description des pays de Bosnie, la Bulgarie, Ser-
 uie, Russie, & ce que le Turc possède en Hongrie;
 quelles sont les villes principales, mœurs & façons
 de faire des peuples de ces pays. 79

Des Royaumes d'Alger, de Tunis, & de Tremi-
 sen, situees en Afrique. 105. & sui.

De l'Egypte, du regne de ses soldans, & com-
 ment elle a esté reduite sous la tyrannie du Turc.
 113.

Du pays des Troglodites son voisin. 118.

Description des terres que le Turc possède en A-
 sie. 80

Du Royaume de Hierusalem & de ses Roys.
 87.

Des Patriarches Latins de Hierusalem. 91

Discours des Turcs en general, de leurs mœurs.
 134. & sui.

Forces & gouuernemens. 100. & sui.

De la doctrine, loix, & Religion de Mahomet.
 143.

Liste & catalogue des Empereurs de Constanti-
 nople, tant Chrestiens que Turcs, depuis que l'Em-
 pire d'Occident, fut séparé de celui d'Orient,
 donné à Charlemagne. 144. & sui.

Du grand trouble arriué en Turquie, apres la
 mort du Sultan Osman, & des cruelles guerres que
 fait au grand seigneur le Sophi de Perse, par la re-
 uolte de ses propres Basas.

Etat de l'Egypte depuis le vray Empire Romain.
 111.

bles, qui ont longtemps duré sous la Supériorité
de la Perse. 174
Relation de l'abandon de la fertilité d'une par-
tie des Provinces de Perse : description de l'autre par-
tie. 175 & 176
Abondance en ce pays de Bitum & Naphte, Aro-
mat, corcor, dattes, froment, figues, olives, &
autres fruits. 176
Coutumes & usage de vivre des anciens Persans,
de la descente des Rois aux mages, & des mi-
sères qu'ils laissent sur leurs peuples. 178
De la célébration de leurs noces, pluralité de
femmes permise, exercice de la musique & forme
de leur air & de leurs habits. 180
Cérémonies de leurs obseques, de leurs funérailles,
& des devoirs qu'ils observent. 179
De l'ancienneté salut des Perses, & manière de
combattre. 180
Du naturel effrayé des Médes, leurs alliances
avec l'Assyrie de long. 180
Vieillesse des anciens Assyriens, & leur cou-
situde de porter arroyés & l'usage en main. 180
Loy & coutumes Assyriens, d'envoyer en vertu
les belles filles, pour de puis en marier les leurs.
181
Autre coutume d'expulser les malades, pour rece-
voir conseil & remède de ceux qui avoient été vic-
times de semblable maladie. 181
De l'orgueil des Perses, de ce qu'ils ont avec eux, & de
leurs sépultures & funérailles par les & celles d'E-
gypte. 181
Commodité charnelle des Rois Assyriens, a-
vec les étrangers, en l'honneur de la Déesse Venus.
181
Des Mages Assyriens appelés Chaldæens, en pa-
rallèle honneur par les Géméophiles & Perses
d'Egypte : quelle fut leur doctrine touchant la di-
vinité & moralité des châtiments célestes. 181
Coutume des Chaldæens d'aller en guerre, &
combattre montés sur des ânes, & de se se marier

qu'ils n'ont fait de de quelques
années tant en bataille.

Ses généraux de la Margiane, par
pays, hommes, & leurs corps man-
quants.

Quelques & savoir connus des
mages, adonnés aux sciences, au tra-
vail, & aux mécaniques, courts fan-
tasques & fantaisies en habits, &
manière de langage Arabe. 181

Leurs richesses considérables en draps d'or & de soye,
& parallèlement au trafic des perles & pierres
 précieuses. 181

Quelles sont les forces du Royaume de Perse, infan-
terie & cavalerie des Perses, & quel nombre de ca-
valerie il peut mettre sur champs. 181

Quels sont les royaumes & provinces du Prince
Persan. 181

Des puissants États voisins, avec lesquels il con-
fère. 181

Gouvernement du Royaume de Perse, diffé-
rent de celui des Turcs. 181

Des 4. sectes principales de la Religion Mahomé-
taine, & quelle des 4. est la secte des Perses de ce
siècle. 181

Des Juifs & Chrétiens Melchites, Nestoriens, Ar-
méniens, habitant en Perse. 181 & 182

Abrégé de la Chronique des Rois de Perse, selon
l'Historigraphe Méliand. 182

Des Rois des Rois de Perse, selon que les Au-
teurs Grecs & Latins en ont écrit. 182

Chronique des Rois de Perse, selon la sainte Bi-
ble, Platon & autres auteurs. 182

Autre Chronique abrégée selon les autres au-
teurs Grecs & Latins. 182

Des Rois de Perse Mahométans. 182

La ligne des Sophes, 182

Mouquans de Perse. 182

Ligne des Artabanides. 182

Ligne d'Alim-Cassim ou Affendy. 182

FIN DE LA TABLE.





Legatoria
B. SALVAREZZA
Via Vercellina, 20
Tel. 060.822 - ROMA

Digitized by Google

